

Doctissimi Clarissimique
GERARDI JOANNIS VOSSII

Et ad Eum

Virorum Eruditione celeberrimorum
EPISTOLÆ:

Quas inter Centum ferme numerantur

Illustriss. Guil. Laud,	}	Jo. Meursii,
Archiep. Cantuar.		Er. Puteani,
Ja. Usserii, Armachani,		Jo. Fr. Gronovii,
Edw. Pocockii,		Pet. Cunæi,
Tho. Farnabii,		Gasp. Scioppii:

Multa Præclara

Theologica, Critica, Historica, Philosophica,
COMPLEXÆ.

*Opus omnibus Philologiæ & Ecclesiasticæ Antiquitatis
Studiofis utilissimum.*

Ex Autographis MSS. Collegit & ordine secundum singula tempora digessit

PAULUS COLOMESIUS

Ecclesiæ Anglicanæ Presbyter.

ITERATA EDITIO,
Rerum INDICE uberrimo aucta.

LONDINI:

Prostant apud SAM. SMITH & BENJ. WALFORD, Societatis
Regiæ Typographos, ad Insignia Principis in Cæmeterio D. Pauli.
MDCXCIII.

GERARDO GANNIS VORST
 EPISTOLÆ
 VITAE FRUCTIBUS DELIBERATIONUM



PROFESSOR SAM. SMITH & BEND. WATFORD, SOCIETAS
 REGIAE TYPOGRAPHIAE, AN. 1794. IN COMMERIO D. PAULI
 MDCCXIV

Serenissimo & Potentissimo PRINCIPi,

GUILIELMO

D. G.

Magnæ Britanniae, Franciæ, & Hiberniæ

REGI;

Fidei Defensori;

PRINCIPi Arausionensium, &c.

Serenissime Domine,



ERARDUS-JOHANNES VOSSIUS,
*insigne Belgicæ Tuae Ornamentum, dum vi-
veret; Vir, siquis alius, Magni Nominis
in Rep. Literariâ; in hoc Epistolari Vo-
lumine jam Rediurus, ad genua Tua sa-
cratissima provolvitur, supplex & gratulabundus. Te
Principem suum agnoscit, Batavus; Te Regem suum sa-
lutat, Anglus; utrâque civitate donatus, utriusque gentis
nexu obstrictus: ibi in Professoratum ab Illustrissimis
Ordinibus adlectus; heic in Canonatum Ecclesiæ Cantua-
riensis, beneficio CAROLI Primi, Avi Tui, τὸ μαχεῖται,
adscitus.*

Multæ mihi, eæque gravissimæ rationes (omisso jure gentilitio, cujus modò memini) hancce gloriosam Nuncupationem suadebant, imò persuadebant.

Primum, quòd cùm Tu Rei Britannicæ & Religionis Stator atque publicæ Libertatis Vindex, per summam Dei providentiam, extiteris; Tibi in fastigio rerum posito, ex merito, Egregium omne debeat, Tuo imprimis Nomini consecrandum, quò aternare possit.

Deinde, quòd Auctor hic noster tantà animi devotione totam Arausionensium perillustrem Familiam coluerit, quantà cernere est in ipsâ Operis fronte, Epistolâ primâ ad Patrem Tuum GUILLIELMUM f. m. ab ipso perscriptâ: unde liquidò paret, Ipsum, si viveret, haud aliter velle decernere; aut, si moriens prævidisset has chartas aliquando juris publici futuras, in extremis tabulis non alteri quàm Tuo Nomini eas destinare voluisse.

Alia sunt fortasse non minora; quòd se Vir bonus pacis & concordie studiosum, in illo religionum dissidio, quo tum patria divexabatur, ubique proficeretur; quòd Majestati Tux, cujus is est sensus, minimè displiciturum confido: Et quòd jus & potestatem civilis Imperii in re Ecclesiasticâ probè tueretur; quòd passim videre est in hisce familiaribus scriptis, quòd ad Hugonem Grotium popularem suum, quòd ad Episcopos aliquot nostrates, quibuscum agitabas commercia literarum.

Restat hoc unum, ut vota faciam pro salute Majestatis Vestræ, & quæ eadem est, prosperitate Britanniarum.

Faxit

*Faxit Deus O. M. ut Vobis omnia cadant, cedantque
ex voto: Tibi, Invictissime & Clementissime Princeps,
qui sic vincere amas, ut devincias; & malis leges ac-
cipere quàm dare; & quod Auctor ait, ut prosis magis
quàm præsides; & Heroïnæ M A R I Æ, Augustæ
Conforti Tuæ, quæ ob præstantiam Formæ & suavita-
tem Morum Regina, si natales id ei non dedissent juris,
& esse & dici merebatur: Atque Vobis stabile Reg-
num, constantem Victoriâ, perenne in terris Nomen
largiatur; & ut, post diutissimam & feliciter deactam
vitam præsentem, sempiternâ unâ in cœlis fœlicitate per-
fruamini.*

Quod ita fore vovet, spondet, & animitus precatur

Sacratissimæ M A J E S T A T I S Vestræ

Humillimus Cultor,

&

Fidelissimus Servus & Subditus,

A D I E L M I L L S,

A 3

Editor.

John D. Swainline III

2

Trichostema brevifolium

ADRIAN MILLS

Editor:

3 A

PRÆFATIO.

A Marci, fateor, ab ineunte ferè ætate virorum doctorum Epistolas : cum propter multarum rerum non faciliè alibi occurrentium notitiam, tum ob genuinas clarorum virorum effigies, quas in Epistolis, tanquam in speculo, cernere est. Crevit amor iste cum annis ; & quas antea solùm amabam, eæ nunc in deliciis mihi esse cœpere. Quid hic eloquar quanto cum fructu Marci Tullii & Plinii Junioris Epistolas sæpius legam ? Quot egregia, quæ incassum alibi queras, me docuerint Angeli Bassi, à patria Politiani, & Roterodamensium Phœnicis Epistola ? reclamante licet Paulo Manutio, viro quidem politissimo, sed in cujus Epistolis, præter verba, nihil habeas. His addantur merito suo Josephi Scaligeri & Isaaci Casauboni Epistola ; è quibus historiam literariam plenissimè didicimus ; ut ex Hugonis Grotii, quæ nuperrimè prodire, Philologica, Politica ac Theologica multa. Agmen claudat vir seculorum memoria longè dignissimus Gerardus Joannes Vossius ; cujus Epistolas eximiam probitatem ac ingentem eruditionem redolentes oculis tuis, Lector benigne, nunc subijcimus. Frustrà sum, si in iis deprædicandis tempora tua morari vellem. Præterquam enim quòd Vossii nomen nullibi gentium est ignotum, & vino vendibili, ut aiunt, suspensa hedera opus non est ; vereor ne mihi non immeritò succenseas, si Horti hujus ingressu diutius te prohibeam. Bonis igitur avibus ingredi, & areas singulas diligenter perlustra, indeque flores decerpe, tum ad hanc, tum ad futuram vitam utiles. Dabam raptim ex Ædibus Lambethanis 8. die Martii, anni 1689. cum in summo mœrore essem ob immaturum obitum viri ingenio juxtà ac eruditione præstantissimi Isaaci Vossii, Gerardi filii. Etsi enim septuagenario major is decesserit, mihi tamen, ut Plinii Junioris verba usurpem, acerbæ semper & immatura videtur mors eorum qui immortale aliquid parant. Benè vale ac æternitatem cogita.

Tuus in Christo Jesu,

PAULUS COLOMESIUS.

V I T A

Viri Incomparabilis,

GERARDI JOANNIS VOSSII

Eloquentiæ & Chronologiæ

In incluta Academia Lugduno-Batava Professoris Celeberrimi,

*Cum ex Athenis Batavis Jo. Meursii, tum scriptis
aliis, breviter collecta.*

GERARDI nomen à parentibus accepit in memoriam proavi sui, Gerardi Vossii, Ruremondani, Viri in urbe patria, ante hos annos centum & ampliùs, genere, virtute, fortunisque spectatissimi: qui ex uxore, Gertrude Verhagens, Bartholomæi filia, reliquit filium Antonium Vossium. Huic uxor fuit Juditha Calenia, soror unica Viri Clarissimi, Christophori Calenii, Ruremondani in Crucigerorum Monasterio antistitis (quo in munere jam septuagenarius obiit anno cl^o Id^o VIII.) filia vero Johannis Calenii, in publicis muniis quinquaginta pene annos cum honore versati, & Catharinæ Budeliæ, Reineri Budelii, experientissimi Medici filia: amitæ autem Amplissimi Viri, Reinerii Budelii, Jurisconsulti, cujus de re monetaria uberes atque utiles commentarii Coloniae prodierunt. Ex Calenia hac Antonio Vossio liberi fuere, Johannes, Gerardi hujus pater, Arentius, & Isabella, quæ ex marito Dionysio Bylmacero, filiam unicam, Juditham, reliquit, nuptam Amplissimo Viro, Petro Bosmanno, superioris Ducatus Geldrici ordini equestri, ac Ruremondanæ item Civitati à secretis. Natus est Joannes anno cl^o Id^o XLIX. Vix quinquennis erat, cum famigeratum illud incendium anni cl^o Id^o LIV. quod vix Ruremondæ parti decimæ pepercit, etiam parentem ejus, & avi utriusque ædes, absumeret. Multum illud & rei & spei parentum incommodavit. Sic tamen etiam fortunis ferentibus, urbe quotidie è favillis pulcrius exsurgente, filium Latinis Græcisque literis, ac Philosophiæ studio, in Schola patria excolendum curavere. Postea etsi tumultu belli Belgici, paullum amor studiorum refrixisset, mox tamen ardor prior rediit: etiam Italicam, Gallicam, & linguas alias superaddidit: occasioneque captæ ab Auriaco Principe Ruremondæ, Concionumque ibi habitarum nova luce accensus, in Academiam profectus est Heidelbergensem, summosque auditit Theologos, ante omnes Hieronymum Zanchium & Zachariam Ursinum, ibidem frequentabat disertas Calparis Oleviani conciones, feliciterque ipse exprimebat. Cumque magistris tantis præclaras animi dotes auxisset, nec levè jam sibi parasset nomen, anno cl^o Id^o LXXIII. adlectus est in eorum numerum, qui Ecclesiam Dei in dioecesi pascere Heidelbergensi. Quo ipso anno, bona cum venia Electoris Palatini, Friderici Pii, Wasseburgum, Juliaci urbem, ubi libertas Religioni Reformatæ erat, profectus fuit, ac genere, pietate, prudentiaque præstantissimi Viri, Matthæi à Biele, Ruremondani, qui Albani Ducis, ac Lindani Episcopi metu, eò se receperat, filiam Cornéliam, lectissimam Virginem, uxorem duxit: cujus ille ut mores castifimos

firmos multis annis perspexerat, ita propinquos omnes norat, Quæstoria, Senatoria, ac Consulari dignitate Ruremondæ, inque vicinis oppidis, insignes. Reversus ad Ecclesiam suam, quadrienni proximò quaternis augetur liberis. Eorum natu omnium minimus noster fuit Gerardus, qui in lucem editus, in eunte vere anni cō Is LXXVII. semestri circiter post obitum Friderici Pii. Eopse anno, Ludovico Electore Palatino, in locum Pastorum priorum surrogante alios, qui Lutheri de S. Cœna sententiam amplecterentur, parens cum uxore & filiolo Gerardo vix senum mensium, è Palatinatu in Bataviam commigravit, novæque Academiæ, & magnorum ibi Virorum desiderio, doctissimus ipse, pellectus, Lugduni potissimum domicillum elegit, atque à Rectore Petro Tiara V. Maii anni cō Is LXXVIII. inter Academiæ membra adscriptus est hoc nomine: *Joannes Alopecius Ruremondanus*. Nam ex more eorum temporum, & Græcicæ linguæ amore, Græca magis appellatione gaudebat: quam & filius Gerardus ad annum usque ætatis XII. retinuit, auctoreque tum præceptore suo Rekenario mutavit; qui appellatione vulgo haud intellecta honestatem familiæ obscurari distabat. Lugduno dum parens degit, ad Lejendensem Ecclesiam, quæ in Rhinlandico est Leidenesium territorio, vocatur. Unde mox, attamen ægrè admodum, Gerardo adhuc tum vix bimulo, avelitur. Sed in istis Belgicæ moribus, ingens eorum in Flandria penuria erat, qui non prudentia atque eruditione minus quam Zelo pollerent. Itaque optimi quique auctores fuere, ut à nobilitate Flandrica, quæ perhonorificam miserat legationem, persuaderi pateretur, ut Ecclesiæ curam susceperet Furnæ, oppido, ut fertilitate soli, & martyrum sanguine, ita natalibus Clarissimi Pauli Leopardi, inclyto. Anno cō Is LXXXIII. cum illud & alia Flandriæ oppida, in potestatem rediissent Hispaniarum Regis, Gerardus, jam sexennis in Bataviam reducitur. Parens Dordrecht, primaria Batavorum urbe, Ecclesiæ præfectus fuit. Hic anno proximo Gerardus dulcissimam Matrem amittit. Pater anno cō Is LXXXV. alteris nupriis uxorem ducit Annam Wittiam, Francisci filiam, sororem Amplissimorum Virorum, Cornelii & Jacobi Wittiorum, quorum ille Consulari, hic quæstoria apud Dortrechthanos, uterque Senatoria dignitate inter delegatos Hollandiæ ac Westfrisiæ Ordinum conspicuus fuit. Tertio ab eo conjugio mense etiam patre vix octennis oritur. Utroque parente destitutus, studia nihilominus literarum excolebat condiscipulo inter alios usus Erycio Puteano, Historiarum, post Justum Lipsium, in Lovanienfi Academia Professore, viro scriptis non intermorituris toto orbe clarissimo. Inferiores classes permensus, à Cornelio quidem Rekenario potissimum instituebatur in elegantia Latini sermonis, Philologia universa, Oratoria item ac Poësi; at Oratores & Poëtas Græcos enarrabat Franciscus Nansius, Franconatum prius in Flandria Decurio perpetuus, tum Græcæ ea in Schola linguæ Professor. Ac nunc Græcum carmen pangendo, nunc Græcè declamando, item in omni pene philosophia exercebat Adrianus Marcellus. Anno cō Is XCV. mense Septembri, Lugdunum Batavorum mittitur: inque literis Græcis porro audit Bonaventuram Vulcanium, in Mathesi Rudolphum Snellium, in Philosophia Peripatetica, cum Petrum Bertium, tum Petrum Molinæum; à quo &, cum universam Philosophiæ ἀνεργασίαν publicè defendisset, ex auctoritate Rectoris Magnifici, ac Senatus Academici, liberalium artium Magister ac Philosophiæ Doctor creatus fuit, quod anno contigit cō Is XCVIII. XIII. Martii. Exinde in Hebræis audivit incomparabilem Virum, Franciscum Junium, in Theologia, tum eundem Junium, tum Lucam Trelcatium Seniore, & Franciscum Gomarum, Viros præcellentis doctrinæ. Nec minus lectionibus privatis, ac disputando exercebatur à Johanne Kuchlino, Theologici illustrium Ordinum Collegii Præside; sub quo de summo bono, iterum

Vita G. J. Vossii.

iterum de agnitione miseræ, hinc de Symbolo, rursus de Trinitate, denique de prædestinatione eas theses defendit, quæ cum Vossii nomine in lucem prodierunt. Interim & occasione Bibliothecæ à patre sibi relictæ, ac ab antiquis etiam Theologis instructissima, Patrum lectioni, & Historiæ Ecclesiasticæ, sedulo vacabat: quod studium deinceps, quantum muneris ratio permetteret, cum cæteris studiis semper conjunxit. Anno clō Io XCIX. præcipiti autumno, ac deinceps aliquot mensibus, Clarissimo Viro, Ælio Everardo Vorstio, (qui Petro Molinæo in Physices professione ante annum successerat) inter Medicinæ Professores cooptato, publicè cum laude summa in Academia explicuit Aristotelis lib. V. *Φυσικῆς ἀκρόασις*, item ejusdem librum de memoria & reminiscencia. Actumque à nobilissimis Academiæ Curatoribus fuit, de eo in Professorum Philosophiæ numerum legendo. Sed dum in eo sunt roti, fato suo fungitur Dortrechtii Vir doctissimus, Isaacus Corputius, Ecclesiastes, ac cui in Præceptorum Collegio proximus ab Rectore locus esset. Paucis post mensibus etiam obiit Rector ipse Hadrianus Marcellus. Eaque occasione summa gubernatio Scholæ commissâ est Gerardo Vossio: desinente tum & professionem suam Joanne Polyandro, doctissimo Theologo, qui Logices & Ethices in illustri eo Gymnasio fuerat Professor. Anno clō Io XII. Februar. uxorem duxit Castissimam Virginem, Elisabetham Corputiam, V. Cl. Henrici à Corput, primarii apud Dortrechtanos Ecclesiastæ, ex conjuge Adriana à Brecht filiam, neptem Jo. Corputii, Actuarii ac Consulis Bredani, ex uxore Antonina Montenia; cujus parentes fuerant, Henricus Montenius Senator, & Quæstor generalis Baronatus Bredani, & Joanna Roveria, Guilielmi Roverii, Senatoris Bredani, filia. Ex uxore hac suscepit liberos ternos. Anno clō Io VII. VI. Februar. uxorem amisit. Eopse anno in lucem dedit Oratoriarum Institutionum libros VI. quos triennio post auctiores & emendatiores emisit. Eo opere primam sibi nominis claritatem peperit, dum magno applausu exciperetur, etiam ab ipsis eruditionis principibus, Josepho Scaligero, & Isâaco Casaubono: quorum ille cum avide sane perlegisset, profitebatur (verba ejus retinemus) se infinita ex eo didicisse: nec à veteribus quidem esse, qui palmam præripiat summo Viro: Casauboni vero apud V. Cl. Hugonem Grotium aliosque multos, judicium tale fuit, nihil Rhetoricis ejus esse elegantius, nitidiusque, nihil *καλεκτότερον*, elucere ubique judicium & *πολυδραγνώσιαι*. Simillima etiam aliorum judicia erant, quæ Vossio ad ea, cæteraque studia, porro excolenda, non mediocriter animum addebant. Anno vero clō Io CVII. XVIII. Augusti, alteris nuptiis uxorem duxit Virginem honestissimam, Elisabetham Juniam, prognatam nobili & viro & Theologo, Francisco Junio, & Elisabetha Corputia, Joannis Corputi, Consulis Bredani, filia. Anno clō Io XIV. & proximo, ad professionem S. Theologiæ in illustri Schola Steinfurtensi vocatus est, à generosis Comitibus Benthemensibus. Sed cum eodem tempore à nobilibus Academiæ Lugdunensis Curatoribus perhonorifice vocaretur ad regimen Collegii Theologici, quod illustres Hollandiæ ac Westfrisiæ ordines Lugduni statuerant: hanc vocationem, urgentibus amicis, prætulit; etsi magis quam dicere posset, terreretur oneris difficultate, præsertim in maximo illo Ecclesiæ Schismate, juventutem etiam contraria in studia scindente, non exiguo sane pietatis ac modestiæ dispendio. Quamdiu ramen id munus gessit (id per quadriennium & amplius fuit) fortiter ea in tempestate clavum tenuit. Postea, ut lassus, sic levatus, regundæ adolescentiæ molestia (quæ annos duraverat viginti, optimamque ætatis partem sibi vindicarat) in Academia Lugdunensi Eloquentiæ, ac simul Chronologiæ Professor factus est ordinarius, stipendioque publico extra ordinem invitatus, quæ ad veteris Ecclesiæ controversias atque historiam pertinerent, fideliter

deliter consignavit. Sub idem ferè tempus, à Serenissimo M. Britanniae Rege Carolo primo, Canonicatu Cantuariensi donatus est; qui honos in Anglia à renato Evangelio in extraneos rarissimè confertur. Anno clō lōc XXXIII. ad illustre Amstelodamensium Gymnasium migravit, Historiarum professioni deputatus. Is itaque fuit Vossius, qui omnibus omni studio etiam prodesse voluit, atque ita quidem, ut non valetudini curandæ (ita de seipso loquitur in præfatione præmissa lib. III. de Theologia Gentili) vel rei struendæ, studiose daret operam, sed cum prioris haud levi periculo, & certo alterius dispendio, impensius semper publicis studeret commodis: plane ad exemplum prisca Catonis, qui multo surgebat mane, atque imò ipsa etiam nocte, quo vacaret studiis, ac meditaretur quid Reip. foret utile, posthabita etiam rei familiaris ratione: Quinimo cum sciret illud:

Ὁυ γὰρ πρηνύχον εὐδῆν βελήφορον ἀνδρα.

insomnes traducebat noctes & vir, & senex, qua ætate sibi jam parcere potuisset; omne id temporis perdi ratus, quod publico bono non impendisset. Quid quod ne inter ipsas quidem epulas sibi temperaret, quo minus vel lectitaret libros, vel cogitationibus inhæreret. Omne pene, quod hic in terris egit tempus, ita egit Vir summus, ut uniuscujusque momenti fere rationem reddere vellet, nec posset minus. Loquuntur id, & loquentur tot ejus labores, quos nunquam suo pretio æstimare queat justa posteritas. In iis dubius sis, quid potissimum mirari conveniat; omnigenamne magis ac solidam eruditionem; an vero piam magis, ac modestam. Pulchra fuit illa Ægyptiorum consuetudo, qua non licebat aliquod præclarum inventum sacrarum ædium columnis inscribere, nisi prius ab aliis ejus artis maxime gnaris id probaretur. Legat hos, ac sanè judicet eruditus orbis, non vidit, aut videbit unquam, quod magis Æternitatis Ædi inscribi mereatur. Ut autem erat ille βιβλιοθήκη ἡμισυχοῦ, ἢ πεντακτὴν μυροῦ, atque omnium artium, & doctrinarum Promulcondus: ita liberis non minus, quam libris ornavit seculum, Francisco nimirum, Gerardo, Matthæo, Dionysio, & Isaac; ut dubium effecerit, scriberetne accuratius, an gigneret felicius, quemadmodum alicubi loquitur illustis Grotius. Atque ii quidem patri simillimi ea etiam edidere scripta, quæ non nisi cum pereunte mundo perire possint. Cum vero numero novem essent filii, filiarque, omnesque pariter linguarum peritia, ac quovis studiorum genere inter se certarent, meritò ipsius ædes, quod de Pythagoricis dicebatur, Apollinis, novemque Musarum, vocasset habitaculum. At enim horret animus (scribente Francisco Junio, in Præfatione operis Vossiani de quatuor Artibus Popularibus) dum liberos cogito. Vix viderat illos ad justam vitæ, & gloriæ, maturitatem excrevisse Parens, cum ecce turbato mortalitatis ordine, contra commune Parentum votum, videt alterum alterius quasi premere vestigia, dum ad vocantis Dei nutum se sistunt penè omnes. Quis neget omnem humanitatis sensum exuisse Tiberium, qui felicem vocabat Priamum quod superstes omnium suorum extitisset? Quis sortis suæ, suorumque memor Camillum laudet, qui amisso filio dolori succubuit; adeoquidem, ut non nisi inter ipsos mulierum cætus muliebrem in modum casum filii dolens inveniretur? Summus Vossius, quanquam eos amisisset filios, qui paternis passibus contenderent, quousque gloria eniti potest, quales etiam pro suo in literas amore non filios non lugere non posset, quovis tamen dolore se ostendit potentior, cui succumbere tristissimis cladibus ducebat tristius. Enimvero non Periclem, non Xenophontem, non Anaxagoram Clazomenium, constantis in adversis animi exempla, jactet antiquitas, quos nempe erigere poterat pulchra filiorum in bello pro patria Virtus; Vossius lectissimæ, atque

eruditæ,

Vita G. J. Vossii.

eruditæ filia Corneliae prope inclytam Leidam aquis hyberno frigore concretis fidem frangentibus miserrimè submersæ iturus exequias, cum corpus humandum ostendi sibi peteret, atque ægre ab amicis, quod crudum vulnus sic refricari crederent, id obtineret, ubi vidisset, dictavit ipse adstantibus solatia, monuitque divinæ acquiescendum esse voluntati, ac nihil fieri ἀλλοθεν ἢ τῆς τοῦ λόγου τῶν ἡμετέρων, καὶ ἡμῶν ἕτοιμα φάσκει. Ita vixit hic literati orbis Imperator, & septuagesimum tertium egit annum, cum fatis cederet vir immortalitate dignissimus. Recessit à nobis anno recuperatæ per Christum Salutis clō Isc XLIX. pia placidaque morte; quanquam non recesserit totus. Reliquit enim liberos suos, Eximium nempe Virum, Isaacum Vossium, insigne sui ævi decus, ac ex Clarissimo Matthæo nepotem sibi cognominem, Gerardum, in quibus eum aliquando agnoscemus, cernemus, tenebimus, ut immutem paullo Ambrosii illa in funere Theodosii. Addam ingeniosissimi Poëtæ Batavi, Justi Vondelii Epigramma:

In EFFIGIEM Celeberrimi Viri

GERARDI JOHANNIS VOSSII.

*Sex denos nihil est numeret si VOSSIUS annos,
Candidior niveis frons erit illa comis;
Hæc habitat cuncti sub fronte scientia seclī,
Condita quæque libris condita habet cerebro.
Quid chartis hominem cingis, Sandrarde, librisque
Charta, liber, quicquam si capit, ille capit.*

EPI T A P H I U M.

*Hoc tumulo plorat pietas & candida Virtus,
Et luctu Padas Saxeæ dirigit.
Invida mors ridet, ridet quoque VOSSIUS illam,
Dum calamo mortem vincit & ingenio.*

SCRIPTA.

- O** Ratio Panegyrica de felice expeditione exercitus Fœderatæ Belgicæ,
ductu Principis Mauriti, 1597. 4°
Institutiones Oratoriæ, Lugd. Bat. 1643. 4°
Partitiones Oratoriæ, Lugd. Bat. 1622. 8°
Aristarchus, sive de re Grammatica, Amst. 1662. 4°
Castigationes in Vet. Tragicos Latinos, Lugd. Bat. 1620. 8°
Grammatica Latina, Amst. 1631. 8°
Grammatica Græca Clenardi aucta, Lugd. Bat. 1642. 8°
De Logices & Rhetorices natura, Hagæ, 1658. 4°
De quatuor Artibus Popularibus, Amst. 1650. 4°
De Scientiis Mathematicis, Amst. 1660. 4°
Ars Historica, Lugd. Bat. 1653. 4°
De Historicis Græcis, Lugd. Bat. 1651. 4°
De Historicis Latinis, Lugd. Bat. 1651. 4°
De Artis Poëticæ natura, Amst. 1647. 4°
Institutiones Poëticæ, cum aliis Opusculis. Amst. 1647. 4°
De Poëtis Græcis & Latinis, Amst. 1654. 4°
Etymologicum Latine Linguae, Amst. 1660. Fol.
De Vitiis Sermonis. Amst. 1645. 4°
Oratio in Obitum Thomæ Erpenii. Lugd. Bat. 1624. 4°
Vita Fabiani à Dhona, Lugd. Bat. 1628. 4°
De Philosophia & Philosophorum Sectis, Hagæ, 1658. 4°
De Idololatria, Amst. 1668. Fol.
Isagoge Chronologiæ S. Hagæ, 1659. 4°
Apologia pro Grotio contra Ravenspergerum, Lugd. Bat. 1618. 4°
Responsio ad Consilium Michaëlis Lonigi, Lugd. Bat. 1623. 4°
Historia Pelagiana, Amst. 1655. 4°
Theses Historico-Theologicæ, Hagæ, 1658. 4°
Theses de Baptismo, Amst. 1648. 4°
De Tribus Symbolis, Amst. 1642. 4°
Harmonia Evangelica, Amst. 1656. 4°
De Christi Genealogia, Amst. 1643. 4°
De Cognitione sui ac de Studiorum ratione, Amst. 1655. 12°
Commentarius in Plinii Epistolam de Christianis. 12°
De Jure Magistratus in rebus Ecclesiasticis, Amst. 1669. 4°
Epistolæ, Lond. 1690. Fol.
-

INDEX

INDEX EPISTOLARUM

Ad VIROS Claros

A Ger. Joanne Vossio missarum.

A.

A Brabamo vander Merio	III,
Abrahamo vander Mylio	112. 306.
Academia Cantabrigiensis	119.
— Oxoniensi	382.
Adriano Blyemburgio	103. 120.
Adriano Hoffero	101.
Amstelodamensis Reip. Consulibus	3. 75.
Andreae Colvio	387. 397.
Andreae de Naglowitz	339.
Andreae Riveto	198. 349. 373. 396. 410.
	412. 417. 420.
Antonio Emilio	162. 278. 441.
Antonio Matthæo	448.
Arnoldo Com. à Bentheim	200.
Arnoldo Buchelio	198.
Arnoldo Ticmanno	290.
— Arcerio	377.
Auberto Miræo	333.
Axelio Oxensternio	268.

B.

Baltazari Willio	299. 237.
Belgica Federatæ patribus	19.
Bernardo Damke	199.
Briano Duppa, Principi Walliæ à studiis	261.
Eid. Episc. Cestrensi	381.
— Borrio	417.
— Brounerio	205.

C.

Cantuariensis Ecclesiæ Decano & Canonici	381.
Carolo Principi Walliæ	13.
Chatio & Christophero à Dhona	31.
Christianæ Sueciæ Reginæ	8.
Chr. Slupeski	293.
Christoph. Wren	109.

Claudio Salmasio	116. 143. 162. 214. 219.
	228. 229. 234. 246. 250. 252. 254. 257.
	266. 295. 315. 316. 326. 342. 343. 346.
	347. 357. 412. 413. 422. 423. 426. 432.
	439. 442. 445. 449.
Clementi Timplero	43.
Conrado Vorstio	102. 213.
Constantino Huygenio	110. 216. 284.
Constantino L'Empereur	321.
Cornelio vander Mylio	330.
Cornelio Tollio	454.
— Comemburgio Conf. Rotred.	231.

D.

Danieli Heinso	195. 389. 441.
Danieli Paræo	80. 135. 279. 307.
Davidi Guilielmo	101.
Davidi Wedderburno	304.
Diderico Vlamingio Dom. ab Ostborn	283.
Diodoro Tuldeno	170.
Dudleio Carletono	90. 91. 92. 96. 97. 102.
	143. 161.

E.

Edwardo Baroni Herbert de Cherbury	435.
	446.
Edwardo Misselden	166.
Edwardo Pockockio	159. 383.
Electori Palatino	436.
Episc. Novæ Casæ	434.
Erico Oxenstierna M. Axelii Fil.	26. 457.
Erycio Puteano	79. 169. 170. 181. 184.
	185. 188. 206. 221. 231. 333.
Eust. Swartio	193.

F.

Fortunato Plempio	187.
Francisco Gomaro	104. 134. 317. 356. 362.
Francisco Junio FF.	127. 135. 148. 178.
	252. 266. 296. 320. 388. 430.
Friderico	

I N D E X.

Friderico Spanhemio 419. 455.
Fulconi Grevillo Baroni de Brook 89. 93.
 108.

G.

Gabrieli Benedicto Oxenstiern 351.
Gabrieli Gustavo Oxenstiern 350.
Georgio Abbot, Archiep. Cantuar. 155.
Georgio Calixto 211. 400. 433. 452.
Georgio Charleton, Cicestrensi Episc. 108. 116.
Georgio Ratallero Doubletio 28. 319. 334.
 347. 348. 352. 365. 366. 390. 397. 398.
 416. 417. 420. 424. 427. 435.
Georgio Slupeski Baroni 304.
Georgio Villiers, Buckinghamiae Duci 10.
Guilhelmo Arausionensium Principis Filio 1.
Guil. Boswello, Equiti, Regis Britannici
apud Belgas Legato 90. 91. 98. 110.
 133. 197. 292. 330. 370.
Guil. Dell 260. 273.
Guil. Grotio 358.
Guil. Fuxon Episc. Londinensi & Angliae
Thesaurario supremo 261. 286.
Guilielmo Laud, Bathoniensi & Wellensi
Episc. 115. 117.
Eid. Episc. Londin. & Archiep. Cantuar.
 120. 129. 132. 136. 153. 157. 163. 168.
 172. 182. 189. 201. 208. 212. 219. 223.
 249. 259. 271. 273. 288. 289. 290. 298.
 331. 361. 373. 383.
Guilielmo Nieuportio 243.
G. Blinierswicio 429.

H.

Henrico Ernstio 291.
Hieronymo Belo, Aulae Pembroch. apud Cantab.
Præfeto 111. 131. 238.
Hollandiae West-Frisiæ; Ordinibus 23.
Hugoni Grotio, Regis Suecici apud Gallos
Oratori 35. 37. 39. 40. 42. 44. 45. 48.
 70. 81. 84. 95. 97. 113. 114. 121. 122.
 140. 173. 175. 176. 207. 208. 217. 218.
 222. 224. 226. 232. 233. 239. 240. 241.
 245. 264. 269. 270. 276. 281. 297. 299.
 301. 303. 309. 318. 320. 327. 328. 334.
 336. 341. 344. 355. 359. 367. 378. 379.
 401. 404. 406. 408. 409. 410. 421. 424.
 428. 432. 433. 436.

J.

Jacobo Catsio, Equiti 18.
Jacobo Corputio 391.
Jacobo Crucio 184.
Jacobo Golio 393. 434. 440. 441.
Jacobo Gerbofredo 453.
Jacobo Lydio 443.

Jacobo Roverio 100. 146. 217.
Jacobo Usserio, Archiep. Armachano 186.
 375. 385.
Jacobo Wittens 74. 228. 233. 258. 308. 378.
Jano Grutero 88. 89. 103.
Joachimo Bergesio 300. 317.
Jo. Adolpho Fabro 86.
Jo. Ant. Corvino 255.
Jo. Ant. vander Linden 359. 375. 452.
Joan. Berckio, Equiti 21. 84.
Joan. Beverovicio 164. 242. 285. 294. 341.
 364. 371. 391.
Jo. Bodechero Banningio 241.
Jo. Brunæo 275. 442. 444.
Jo. Cabeliarvio 316.
Jo. Christenio 277.
Jo. Cloppenburgio 395.
Jo. Cocceio 376. 430.
Jo. Cordesio 101.
Jo. Elichmanno 294. 298.
Jo. Forbesio D. à Corle 459.
Jo. Fred. Gronovio 302. 325. 399. 407.
 419. 425. 431.
Jo. Hulsmanno 221. 340.
Jo. Is. Pontano 135. 275. 315. 338.
Jo. Meursio 94. 99. 118. 144. 150. 156.
 178. 180. 211. 220. 224. 236. 246. 248.
 257. 267. 288. 301. 308. 322. 324. 331.
 340.
Jo. Meursio, J. F. 348. 376. 392.
Jo. Rave 399. 427.
Jo. Rodolpho Weststein 363.
Jo. Rouse, Bibliothecario Bodleiano 109. 165.
 177. 238. 262. 374. 384.
Jo. Sadlero 438. 450.
Jo. Seldeno 109. 434. 437. 454.
Jo. Skytte 203. 204. 205. 210. 220. 255.
 256. 301. 305. 335. 365. 400.
Jo. Slupeski Baroni 78.
Jo. Thomæ Bangio 394.
Jo. Vossio, ipsius Fil. 138. 147. 154. 159.
 165. 192. 244.
Joanni Williams, Episc. Lincolnensi 107.
Josepho Laurentio 428.
Isaaco Bargravio 338. 369.
Isaaco Basirio 204.
Isaaco Grutero 456.
Iusto Cæciliano Puteano, Erycii Fil. 271.
Iusto Lyræo 250.
Iusto Reisenbergio 203.

L.

Lancelotto Androsio, Episc. Wintoniensi 43.
 74. 85.
Levino Warnero 345. 351.
Ludovico Duci Gelriæ ac Juliae, Comiti
Egmondæ & Zutphaniæ 453. 454.

Ludovico

I N D E X.

Ludovico Crocio 85. 87. 285. 291. 237.
354. 356. 372. 408. 415. 447. 456.
Ludovico de Dieu 393.
Lugduno-Batavæ Academicæ Curatoribus 24.

M.

Marco Zuerio Boxhornio 251.
Martino Pilio 212.
Matth. Berneggero 163.
Matth. Martinio 149.
Matthæo Wren, pòst Episc. Eliensi 109.
142.

Merico Casaubono 155. 158. 194. 195.
196. 214. 225. 235. 247. 274. 282. 295.
303. 314. 336. 339. 374. 380. 389. 398.
418. 451.

Martin, Præf. Col. Reg. Cantabr.

239.

P.

Patricio Junio, Bibliothecario Regio 385.
Paulo Seriere 130.
Petro Cunæo 167. 213.
Petro Staeckmans 263.
Philippo Paræo 200.

R.

Richardo Sterne, Episc. Dunelmensi 106.
Richardo Stewarto 126. 384.

S.

Samueli Marefio 451.
Samueli Sorberio 457.
Samueli Wardo 108. 125.
Simoni Bellimontio 208. 210. 292. 312.
Stephano Goffe 237. 279.
Stephano Joanni Stephano 318. 322.
323. 377. 392. 446.

T.

Thomæ Farnabio 193. 353. 386.

V.

Vincentio Fabricio 329.

W.

Wimando Rutgerfio 171. 352. 380. 444. 448.

INDEX

Ger. Jo. Vossium missarum.

207.
Henricus

I N D E X.

<i>Henricus à Dieft</i>	112. 260.	<i>Joan. Schildius J. F.</i>	250.
<i>Henricus Ernftius</i>	76. 118. 127. 131. 235. 286.	<i>Joan. Smith</i>	267.
<i>Herbert Dom. de Cberbury</i>	272. 275.	<i>Joes Chriftenius</i>	202. 204. 215.
<i>Herman. Conringius</i>	260. 274.	<i>Joſephus Laurentius</i>	244. 261. 265.
<i>Herman. Ravensperg</i>	18.	<i>Isaacus Buſirius</i>	81. 131.
<i>Hieron. Beale</i>	58.		
J.		L.	
<i>Jac. Crucius</i>	84. 93.	<i>Laurentius Coccus</i>	179.
<i>Jac. Florianus</i>	2.	<i>Laurentius Skytte</i>	178.
<i>Jac. Golius</i>	37. 49. 229.	<i>L. Caſembroot</i>	149.
<i>Jac. Gothofredus</i>	239. 290.	<i>Ludovicus van Berchen</i>	17.
<i>Jac. Henningius</i>	115.	<i>Ludovicus Crocius</i>	146. 174. 193.
<i>Jac. Lydius</i>	86. 155. 277. 282. 288.		208. 209. 214. 215. 219. 230. 241. 245.
<i>Jac. Uſſerius Armachanus</i>	188. 300. 301.		249. 253. 264. 280. 283. 285.
<i>J. Becius</i>	10.	<i>Ludovicus de Dieu</i>	228.
<i>J. van Hont</i>	298.		
<i>J. Fancus</i>	34.	M.	
<i>J. Skytte ſen.</i>	88. 142.	<i>M. Joan. Michaelis</i>	221.
<i>jun.</i>	120. 244. 294.	<i>Marc. Zuerius Boxhornius</i>	87. 137.
<i>J. Utenbogaert</i>	13.	<i>Martinus Lydius</i>	1.
<i>Janus Gebhardus</i>	41. 45. 46. 48. 53.	<i>Martinus Opitius</i>	76.
<i>Janus Ruigerſius</i>	3. 4. 5.	<i>Martinus Ruarus</i>	32. 105.
<i>Janus Vhitiſius</i>	263.	<i>Matth. Wren</i>	56. 66. 69.
<i>Jerem. Hoelzlin</i>	77. 109. 161.	<i>Maurerius</i>	28.
<i>Joachimſus Matt.</i>	245.	<i>Meric. Caſaubonus</i>	129. 137. 147.
<i>Joannes Beverovicus</i>	47. 83. 90. 107.		
	111. 219. 228. 254.	N.	
<i>Joannes Bollandus</i>	186. 263.	<i>Nathanael Conopius</i>	145.
<i>Joannes Cabeliarvius</i>	64.	O.	
<i>Joannes Cocceius</i>	214. 216.	<i>Oligerius G. Roſencrantz</i>	128.
<i>Joannes Elichmannus</i>	162.	P.	
<i>Joannes Forbeſius à Corſe</i>	268.	<i>Pet. Bertius</i>	52.
<i>Joan. Fred. Gronovius</i>	111. 134. 155.	<i>Pet. Cunæus</i>	118. 148.
	156. 159. 164. 173. 175. 177. 182. 187.	<i>P. Prataeus</i>	110.
	232. 255. 256. 261. 268.	<i>P. Turner</i>	119. 302.
<i>Joan. Freinſhemius</i>	172. 193.	<i>Phil. Paræus</i>	187.
<i>Joan. Henricus Boeclerus</i>	242. 271.	<i>P. Winſemius</i>	250.
<i>Joan. Johnſtonus</i>	139.		
<i>Jo. If. Pontanus</i>	53. 185.	S.	
<i>Joan. Kirchmannus</i>	49.	<i>Samſon Johnſon</i>	197.
<i>Joan. Loccenius</i>	132. 178.	<i>Samuel Johnſon</i>	57.
<i>Joan. Lydius</i>	12. 13. 61. 149.	<i>Samuel Mareſius</i>	283.
<i>Joan. Meurſius</i>	40. 41. 42. 59. 65. 69. 72.	<i>Samuel Petrus</i>	240.
	74. 79. 81. 85. 95. 100. 101. 102. 108.	<i>Samuel Wardus</i>	43.
	113. 116. 127. 133. 136. 145. 151. 152.	<i>Simon Episcopius</i>	24.
	154. 158. 160. 161. 169. 170. 171. 186.	<i>Stephanus Goffe,</i>	à 120. ad 125.
<i>Joan. Meurſius Fil.</i>	189. 193. 194. 196. 209.	<i>Stephanus Joan. Stephanus</i>	94. 104. 114.
<i>Joan. Polyander</i>	27. 257.		115. 165. 167. 176. 183. 188. 213. 281.
<i>Joan. Pricæus</i>	254.	T.	
<i>Joan. Pyrædus</i>	211.	<i>Thomas Farnabius</i>	71. 85. 213. 303.
<i>Joan. Ravius</i>	231. 235. 249.	<i>Tho. Jo. Bangius</i>	266. 287.
<i>Joan. Rodolph. Wetſtein</i>	184. 278.	U.	
<i>Joan. Rouſius</i>	240.	<i>Ubbo Emmius</i>	5.
<i>Joan. Sawadski</i>	126.	<i>Vincentius Fabricius</i>	104. 114. 151. 166.
			174. 178. 181. 186. 289.
		Z.	
		<i>Zacutus Luſitanus</i>	161. 167. 168.

G. J. VOSSII

EPISTOLÆ.

I.

*Magno Principi Guilielmo, Celsissimi
Frederici Henrici, maximi, invictis-
simique, Arausionensium Principis Fi-
lio; Augustissimi Britanniarum Mo-
narchæ, Caroli, Fidei Defensoris, &
Henricæ Mariæ, Christianissimi Re-
gis Galliarum Henrici Magni, Fi-
liæ, Genero felicissimo,*

*Minutum hoc maximi, ac devotissimi Animi Mo-
numentum, offert, dicatque*

G. J. Vossius.

Celsissime Princeps,

LÆT A, ac diu multumque exop-
tata affulsit dies, quâ Civitas hæc
Amstelodamensis conspicit sere-
num, placidumque vultum Au-
gustæ socrus, Henricæ Mariæ, Gal-
liarum Regis Henrici Magni Filiæ, Magnæ
Britanniæ Regi Carolo nuptæ. Eoque lætior
hæc dies, quod unâ videamus auream tantæ
Reginæ prolem; serenissimam Principem Ma-
riam formâ eximiam, animi dotibus pulchri-
orem, patris, & avitarum laudum hære-
dem, pluresque in suo stemmate Reges nu-
merantem, quàm altera hodiè Regalis fami-
lia possit. Ut hanc sacris Penatibus intrö-
ducenti Cellitudini tuæ; verè illud conveni-
at Poetæ Veronensis: *Vidit quis Venerem
auspicatorem?* Comitantes etiam cernimus
Divûm Liberos; serenissimi heu quondam
Bohemorum Regis Frederici, ex maximi
Magnæ Britanniæ Regis Jacobi I. Filia Eli-
zabetha Celsiss. filios: Cordatissimum, &
fortissimum Rupertum Palatinum, famâ ad
sidera notum; & summæ expectationis fra-
trem Mauritium, grandi hoc nomine gau-
dentem, à sponse in sacro Baptismate, in-
victissimo Arausionensi Principe Mauritio, A-
vunculo suo magno, quem virtute, ac felici-
tate Belgica, ut confidimus, aliquando datu-
rus est Orbi. Adest etiam ingentis animi,

ac nominis Arondelius, Comitum Illustrissi-
morum nulli profapiæ, antiquitate ac splen-
dore secundus, ab Rege Augusto Augustæ
Reginæ additus comes. Quid singulos Bri-
tanna ex gente memorem majorum imagi-
nibus illustres, nec ingentium Avorum in-
dignos? Atque his foederatæ Belgicæ nomine
adjunxit se. Ipse Celsissimus Arausionensium
Princeps, Fredericus Henricus, Patriæ Pa-
rens; qui gestorum magnitudine cò res Bel-
garum perduxit, ut de fide apud posteros
laboratura sit fama: multisque ita videatur,
fortasse non tam amplius illud optandum
esse, ut tellus hæc pergat fortiter tueri Li-
bertatem, quod sub tanti Principis ductu,
haud difficile erit genti ab omni ævo fortissi-
mæ, atque inter arma natæ: quàm ut vento
tot jam annos adeò secundo, ex sapienti Poe-
tæ præcepto, paulisper sua contrahat vela,
nec prosperis nimis exultet. Sequeris & ipse
Principe hoc prognate, Celsissime Princeps
Guilielme Arausionensis: qui nihil æquè spe-
ras, aut spiras, quam laudes ingentium
Heroum æmulas; Parentis, Patruï, Avi;
& ut paucis absolvam, tot majorum, ultra
etiam tempora illa, quibus ante annos tre-
centos, è domo vestra in altissimo Cæsareæ
dignitatis gradu, vel fastigio potius, emi-
nuit Adolphus Nasovius. Desceret stylus,
si Belgas, Germanos, gentiumque aliarum
Comites, Barones, Nobiles, recensere vel-
lem; quos in hoc Augustæ Reginæ, & sere-
nissimæ filiz comitatu, florentissima hæc ci-
vitas nunc cernit, ac miratur. O diem
terque, quaterque beatam! quam nulla ex
hominum memoria oblivio delebit, nec un-
quam excellentium ingeniorum monumenta
conticescent. De quo fidentius pronuncia-
mus, non obscuram capiendo conjecturam
ex iis sincerissimi gaudii signis, quæ nunc in
omnium oculos incurrunt. Videmus enim,
quanto studio Nobilissimi, & Prudentissimi
hujus urbis Consules, & amplissimus, gra-
vissimusque Senatus, unum hoc agant, ne-
quid præteritum videatur quod ad ingentis
lætitiæ, & devotissimi animi testationem per-
tineret.

tineret. Exemplum etiam suorum Procerum universa sequitur Civitas, vestigia eorum legens, ut in sacros Augustæ Regina, & serenissimæ prolis, fidereos vultus, suos paulisper figere liceat obtutus: ac simul, Celsissime Princeps, in illos etiam verè maximi Parentis, ac tuos. Unde omnis ætas, ac sexus, vicos cunctos, moeniana etiam, ac podia complet: atque adeo ædes singulæ, imprimis curia, templa, ipsi urbis muri, in hac inusitata omnium lætitia, gestire mihi præ gaudio videntur. Quæ cum ego ita fore, facillè animo perciperem meo, ac tacitus revolverem; sic continuo cogitare mecum coepi: Ergone in hac publica lætitia non amplius agam, quam unus è multis, qui augustæ domui Britannæ plus debeo mei ordinis cunctis? Observabatur etiam Diogenes. Cum enim Philippus, Amyntæ filius, Alexandri nomine & re Magni Parens, expeditionem adversus Corinthios moliretur; alii in urbe arma sibi parare, alii muros reficere, nonnulli lapides congerere, vel aliud agere ad præsens negotium utile: Diogenes (altæ mentis Philosophus, sic ut Alexander, nisi fuisset Alexander, Diogenes esset vellet) versare intèrea dolium suum, nè vivos inter obambulare mortuus diceretur. Quod animo ille quocunque egerit, mihi quidem mente candidâ, devotâque, hætenus exemplum imitari visum fuit, ut ne totâ urbe, undique edente lætitiæ signa, non quidem dolium circumvolverem, attamen nec otiosus viderer; quin potius agerem utile aliquid, quo in hoc adventu Augustæ Regina, & serenissimæ filia, animæ dimidio Tuæ, gratum, devotumque animum, erga Regiam Magnæ Britannæ Majestatem, totamque domum Augustam, testarer: saltem quantum vix præmeditato, sed, penè dixerim, in arena consilium capienti, deque paupere penu aliquid deprompturo, in ea temporis angustia liceret. Nam per Deum immortalem, cui justiores, quàm mihi, hodiernâ se die causæ obtulerunt, testandi officii sui erga domum Regalem, pariterque Celsitudinem tuam, postquam ab Augusto Rege gener es adlectus? scio, quantum debeam invictissimo Principi, Parenti Celsitudinis tuæ, Vindici patriæ libertatis: sine qua vita quid est, nisi cadaver? sed hoc beneficium magnum adedò licet, ut nullius ingenio, vel facundiâ, satis possit prædicari; si tamen fas sit dicere, commune est mihi cum omni foederata Belgica: etsi, nisi fallor, nos qui literas, & sapientiæ studia colimus, plurimum rectius aliis nostra intelligimus bona. Sed ego nunc in animo habeo illud in me grande meritum, quod unus è foederata Bel-

gica accepi ab Augusto Rege Carolo, Religiosissimo Principe; quem ut Trajano scimus meliorem, ita ex veteri formula, Augusto Cæsare optamus feliciorum. Divinus ille Rex (justius enim dixero, quàm quem proximè laudavi Augustum, semper Deum dicebat Maro,) Rex, inquam, ille, cui dulcius est prodesse, quàm præesse, unum me, quanquam digniores esse alios non distitear, in Metropolitanæ Cantuariensis Ecclesiæ, Præbendarios allegit. Neque unquam dies illa animo excidet meo, quâ cum gratias quas deberem, pro nobili hoc canonicatus beneficio, Augustæ agerem Majestati; Ille me hoc placidissimi oris responso dignabatur: pariter se gratias divinæ agere Majestati, à qua hoc haberet, quod me de literarum studiis benè merente, meliusque mereri parato, ipse etiam benè mereretur de me, & familia mea. Quæ quàm altè in hoc pectus descenderint; quantoperè etiam mihi stimulos subdiderint ad porro calcandum Virtutis, & Industriæ callem; rectius, quàm maligno hoc seculo fieri amat, Posteritas judicabit; si non quod satis sit, ex iis quæ ab illo tempore publici juris feci, ac vel Celsitudinis tuæ adfini, serenissimo Walliæ Principi; vel Doctrinâ, & Fide eminentissimo Ecclesiæ Anglicanæ Clero dedicavi: saltem ex aliis quæ deinceps moliar, dummodò vitam mihi, ac valetudinem concesserit divina bonitas. Sed grande aliquid deproperare nunc tam subitò non dabatur. Gnarus igitur ejus, quod vulgo dici solet, tuscule quoque sacra fieri Diis: non dubitari hoc quaecumque de schedis nostris offerre. Selegi verò aliquid sacri argumenti; quia hoc maximè convenire putarem, quem Augustus Socer hoc potissimum sine sacro Cantuariensium ordini inseruisset, ut qui Musas antea dulces ducerem, non tam vulgares illas colerem, quàm sacras. Hujusmodi verò est labor noster, de tribus symbolis, Apostolico, Athanasiano, & Constantinopolitano: in quorum prioribus ostendo, quantoperè multos fugerit ratio, de primis eorum Authoribus; in tertio autem illos præcipuè refello, qui Constantinopolitanos Patres, de spiritus sancti processione à filio, signasse aliquid arbitrantur. Simul hoc de symbolis opere constare volui, non me in publico hoc gaudio conspici penitus Asymbolum; sed istiusmodi contulisse symbolam, quæ simul symbolum foret animi devotissimi erga Augustam Majestatem, Serenissimam Filiam, ac Generum Regium. Scio, quàm mole sit exiguum, quod pro symbola pariter, ac simbolo esse cupio: Sed argumento exiguum non debet haberi, si ab sincera symbolorum illorum fide, dependet Rerum publicarum

publicarum tranquillitas, & æterna populorum salus : quæ duo cordatis Principibus cariora esse suis oculis oportet. Quod si deprimat fortasse laborem hunc scriptoris humilitas, attollet eundem Tua Celsitudo; unde non leve referet decus, ac splendorem; si minus genium & immortalitatem.

CELSISSIME PRINCEPS,

Senile ac modestum votum accipe, quod facio pro universa domo, tum Augusti Magnæ Britanniae Regis, Caroli; tum Celsissimi Arausionensis Principis Frederici Henrici: Illius, foci Celsitudinis tuæ; hujus, Parentis; Utriusque verè Optimi Maximi. Diutissime salvi, atque incolumes, orbis universi, ac præcipuè Reip. Christianæ bono, rebus intereste humanis. Et quia vita hæc, quantumcumque diuturna, fragilis tamen dicenda est, & caduca; in memoria, atque ore bonorum omnium vivite; donec ista etiam vita cum orbe terrarum finem suum sortiatur. Denique solutâ hac mundi compage, corpore, animoque æternum vivite, cœlestibus choris permixti.

Amstelodami.
c10 Idc lxii.
xii. Kal. Jun.

Celsitudini tuæ Devotissimus,

G. J. Vossius.

II.

Nobilissimis, Amplissimis, Prudentissimis Dominis, Amstelod. Reip. Consulibus.

Alberto Conrado Burgio, Curatori Societatis Indiae Occidentalis, Illustrissimorum fœderatæ Belgiae Ordinum ad Potentissimum Russiæ Imperatorem, item ad serenissimum Daniæ Regem, Ex-legato, in Collegio etiam Illustrium Hollandiæ, & West-Frisiæ Ordinum antehac Delegato, Illustris Amstelodamensium Gymnasii Curatori.

Cornelio Graef, Domino in Polsbroek, Societatis Indiae Orientalis Curatori.

Joanni Cornelio Geelvink antehac in Collegio, tum Illustrium Hollandiæ, & West-Frisiæ Ordinum, tum Præfectorum rei Maritimæ Delegato.

Gerbrando Pancratio Curatori Societatis Indiae Orientalis;

G. J. Vossius, S. P. D.

Nobilissimi, Amplissimi, Spectatissimi viri,

Inter tot bona, quæ doctrinæ temporum debemus, facile principem meretur locum, quod absque hac cœca sit rerum vete-

rum memoria: non quasi non & alterum ejus lumen sit; (quam tibi honorem terrarum, locorumque peritia deposcit:) sed quia citra commemorationem temporum, præcipua rerum gestarum monumenta, quali tristibus tenebris, spissâque jaceant caligine sepulta. Utcumque enim ex memorabilibus, atque exemplis, de amplo Veterum penu depromptis, non levem, tam pietatis, quam prudentiæ fructum capere sit, etiam ejus, quando quidque contigerit, ignaris: In totius tamen Orbis historia, vel magni, vel diuturni Imperii, totiusve Ecclesiæ rebus, si ordo gestorum fœdè conturbetur, næ illa quidem, quæ videre nobis videmur, magis cernimus, quam eximiam, & ab omni arte laudatam corporis humani fabricam conspiceremus, solum oculorum aciem defigentes in monstrosam hominis figuram; ubi pectus, capitis; venter pectoris; brachia pedum occuparent locum. E contrario autem, ubi sese extulerit aureum temporum jubar: pulsas tenebris plusquam Cimmeriis clara omnia luce vestiuntur, inque formoso corpore omne membrorum decus apparet. Atque hoc est serenum, ac splendidum illud lumen, quod in historia exigimus; non modò, quò prudentiam magis habeamus ducem, tum in vita privata, tum gerenda Republica; sed etiam ad duo alia longè maxima, quæ Christianam Religionem propius tangunt; nimirum, ad certius cognoscendam Scripturæ veritatem; & ad mentem ejus melius perspiciendam; præcipuè in rebus hoc seculo controversis. Quorum utrumque ubi otium fuerit magis otiosum, fusiùs diducam. Suffecerit nunc rerum carpere fastigia; ne existimemur, novum magis ordiri laborem, quam Epistola simplici, quæ Liber fieri nō debet, pauca præfari, tum de minutis duobus opusculis, quæ nunc publici juris facimus; tum præcipuè de nostro, & antehac, & in posterum, instituto; cujus Vobis potissimum, Nobiles & Spectatissimi Viri, rationem me reddere æquum existimavi; quando me hanc ipsam temporum scientiam in Illustri Urbis vestræ Gymnasio docere voluistis; proque vestro, erga literas amore, atque erga literatos munificentia, bellè adeò, comiterque jam annum habetis duodecimum; nec de me præclare mereri desinitis. Ut igitur à priori fructu, quem Doctrinæ temporum tribuebam, initium faciam; pace illud omnium, qui tempora non attendunt, vel morantur, exquirere paucis lubet; unde potius codices eos, qui Canonem Scripturæ constituunt, à Prophetis esse, & Apostolis profectos, colligatur, quam quoddam sicuti apud Nationes lampada alii aliis dabant, decurrentes

in Vulcanalibus, Prometheis, Panathenæis : Ita longèque certius, Ecclesia, fidelis Scripturarum custos, has ipsas, quasi de manu in manus, tradiderit nobis? Nec eo offendi aliquis debet, quod de Scripturis, ut traditionibus, loquar: cum hæc in iis, quæ Apostoli tradidere, familiam ducant. Illud potiùs dolendum, quod homines Profani etiam quæ scripto tradita sunt, in dubium vocent: Nempe quia, ut aiunt, quæ libris iis traduntur, res sint longè à temporibus nostris remotæ: cujusmodi traditionibus non minus sæpe falli homines soleant, quam nummis adulterinis. Sed qui hunc in modum ratiocinantur, ignorare mihi videntur, veluti Argentariis est Lapis Lydius, quo metalla explorent ita cunctis temporum intelligentibus esse, quo internoscant traditiones veras à falsis, sive scriptis, sive non scriptis. In quorum utrisque, ita comparatum est, sicuti in catenâ videmus. Minuti enim artificii est, sic annulorum alios aliis subdere, ut juncturâ referant catenam, licet eorum nexus sit nullus. Hic si luscitiosi sumus, vel contenti è longinquo intueri; facile quis oculos frustrabitur nostros. Sin etiam annulos tangere grave non ducamus; mox fraudem loquentur manus. Simile quid in traditionibus usu venit. Si quis enim in temporum scientiâ nihil, vel parùm videat; facile persuaseris, ea, quæ, ut Græci loquuntur, heri & nudius tertius, tradi cœperunt, esse genuina Antiquitatis monumenta; nihilque nisi veritati consentaneum, complecti. Sed in temporum ratione, & eorum scriptoribus subactus, priusquam de rebus, vel Authoribus eorum, statuatur aliquid, omnem Ecclesiæ ætatem, tacitus animo pervolvit; donec vel concatenatio temporum traditionem comprobet veram, vel quispiam in ea defectus arguat falsam. Video quidem, non cujusvis esse hanc viam insistere. Sed hoc loco non tam de quovis è populo loquitur; quàm illis alicujus in studiis nominis, aut progressus; quorum si qui ab hac scientia fuerint imparati, sibi vitio vertant; vel quando se quilibet gessit absolvere, per me licet, ut culpam omnem transcribant Magistrorum inscitiam, vel inertiam. Interea illis, quibus volupe fuit, ut sanè debet, sæculis singulis considerare providentiam Dei in Ecclesiâ tuendâ, servandâque; planè omnis hic futura est via; modò paulum in eam cogitationem, quam diximus animum intendant. Equidem non diffitebor, quamquam id sine mœrore facere non possum, incidisse me in nonnullos, quibus de veritate Scripturarum non liqueret. Sed fuere illi partim indocti penitus, partim aliorum potiùs studiorum gnari, quàm vetustatis.

Vel si quis non penitus hospes in iis, quæ ad seriem temporum pertinerent, nihilominus in tam sancto negotio vix aliud, quàm ollas, & cucurbitas lippiret; ad manum facile erat remedium, quo saniores ad mentem reduceretur. Quantilli enim hoc operis est, apud temporum gnaros, per priora ire secula; donec perveniatur ad Christi Vaticaniam, præcipueque miracula? Quorum si magnitudinem consideremus, omnem exsuperant vim naturæ. Imperium enim exercuit Christus in aquas, ventos, arbores, pisces, morbos, mortem ipsam; ut qui mortuos suscitaret. Nimirum tota illi servit rerum Natura; Eumque Deum, & Dominum suum agnovit. Jam quàm miracula illa multa? quàm varia? Nimirum non hæc, illic, patrata; non subinde, sed serie continuâ, præsertim in omnis generis morbis, vel tactu, vel solo etiam verbo, sanandis. Quid præterea iis certius? ut ostendit, quod non in angulis contingere; sed tam multa, tam populosa adiit loca, & undique magno ad eum studio accurreretur. Lustrata ei omnis Judæa, Samaria, Galilæa utraque, & terra cis Jordanem. Vel Hierosolymorum magnitudinem cogitemus, & isthic agentium multitudinem; præsertim Paschali festo: quo ex Flavio Josepho scimus, non minus istic erat, quàm vicies sexies centena virorum millia. De miraculis verò quæ habemus (infinite autem partibus plura fuere quàm scimus) tunc temporis illa prodiderunt Evangelistæ, cum adhuc superessent multa adeo millia, apud quos miracula patrasset; ut quæ fecisset, præcedente, comitante, sequente plurimorum millium turbâ; quæ & stupore illorum Regem eum voluit creare. Quare neque veritatem miraculorum in dubium vocare ausi fuere hostes Christi. Quid aliud enim dixere Judæi, quàm Jesum ea facere ope Spiritus impuri? Quasi non eò tenderent illa, ut destrueretur Diaboli regnum. Neque Gentiles aliud ei objectare, quàm Magicas Artes, quas in Ægypto didicisset. Quasi non inde admodum Infans cum parentibus sit reversus. Ut mittam, quod Magus nullus possit adferri, qui vel millefima ex parte, ea fecerit, quæ Christus, sine carminum vi, sine herbarum succis, sine ulla observatione sacrorum, libaminum, temporum; ut Celso Epicureo ab Origene olim responsum fuit. Sed de isto, ut miracula Christi & magnitudine fuerint stupenda, planèque Naturæ vim excedentia; ut eadem essent numero innumera; ut fide etiam longè certissima; sigillatim alibi, & accuratè agemus. Atque idem de Apostolorum etiam miraculis, imò & illis, quæ proximis contingere temporibus, dictum velim.

Nunc

Nunc institutum prosequamur. A primis hinc Christianorum temporibus per antiquiora secula ad Orbis ascendere primordia, longè fuerit pulcherrimum. Sed enim plerique omnes laboris fumus fugientes. Ut sic quoque non leve quiddam me consecutorum arbitrer, si saltem unum hoc impetrâro, ut ne illi, quibuscum nunc mihi apud vos, Magni ac Sanctissimi Proceres, negotium est, antè inire temporum rationes definant, quàm illas de Christi Miraculis subduxerint probè. Ubi enim ex hisce clarè iis eluxerit divina Servatoris virtus: eadem hinc constabit, non solum de veritate Instrumenti Novi, sed etiam Veteris: quandoquidem, uti Moyses, & Prophetæ testantur de Christo; sic etiam Christus ad eos nos remittit, velut testes omni exceptione majores. Utinam verò, sicuti nos ex Instrumento Novo, de Veteri sumus certi; sic Judæi ex Veteri perspicerent veritatem Novi? Mutuò enim allucent facem; atque ita allucent, ut Novum Soli, Vetus lunæ, quæ à Sole lumen accipit, conferri mereatur. Sed enim Judæis quoque horribilis ea mentis cæcitas, iusto Dei iudicio, obvenit ex temporum ignorantia. Nam cum hi parum admodum videant in gestis excidium prioris Templi consecutis; sine quibus LXX. Danielis hebdomades, aliaque tam præclara de Christo vaticinia, intelligi minime possunt: tum verò longè minus conspiciunt in temporibus Christi, & Apostolorum, quæque excidium templi secundi exceperunt. Ubi non aliud elogium promerentur, quàm isthoc quo (ut apud Platonem est) Græcos dignabatur Ægyptius sacerdos, semper eos esse pueros. Atque hæc quoties cogito, non possum non ambabus, quod dicitur, ulnis amplexare grande illud beneficium Dei, in populo suo conservantis historiam temporum, non illorum modò, quæ Christum antecedunt; sed Christi ipsius nascentis, in terris commorantis, adeo digna Deo præcipientis, de numine purâ mente colendo, nec in honore, vel opibus, sed Deo, & promissis divinis, fiduciam reponendo; coram tot testium oculatorum millibus, tot, tantaque miracula patrantis; tam dura, atque aspera, mortem ipsam cum infamia, spontè etiam subeuntis; tertio die, uti pollicitus erat, resurgentis; inde quadragesimo post die, in conspectu Apostolorum, quingentorum etiam fratrum, ascendentis in coelos; exinde Spiritum S. Hierosolymis mittentis Apostolis: qui homines licet simplices, nullaque honorum vel commodorum spe, potiùs cum magna dirorum suppliciorum, à quibus Natura usque adèò abhorret, expectatione, Religionem Christianam longè adeo latèque per

totum terrarum Orbem, breviculo temporis spatio, non sine singulari Dei Providentia, & ingentibus miraculis, propagarunt. Quid si jam ulterius persequi velim consecuta quindecim secula, quibus Dominus noster, postquam coelos repetiit, ad dextram Patris confidens, Verbo ac Spiritu Ecclesiam suam adversus omne hostium genus defendit ac conservat? Sed enim suffecerit ista carptim, ac vellicatim attigisse: quando ea meditati obscurum esse nequeat, temporum notitiâ nos de Scripturæ veritate fieri peritiores. Proximum igitur est, ut in alterum (de quo præterea me dicturum receperam) considerationem paucis intendam: quomodo nimirum hæc ipsa temporum doctrina præstet, ut Scripturarum mentem faciliùs, certiusque, litigioso hoc seculo, capiamus. Omnes profectò experientiâ sua docti, non contumeliosè, sed verissimè dici, Ipsas auro magis aureas Scripturas, quæ omnia ad credendum, sperandum, faciendum necessaria, perspicuè factis continent, malè nihilominus posse intelligi. Et quis dissideatur, non id modò habere in aliis locum; sed in sese etiam, ac unoquoque nostri; quando omnes sumus homines, ac errori idcirco obnoxii? In hac verò imbecillitate humana, non temerè illud à Tertulliano, Latinorum Ecclesiæ Scriptorum, quos habemus, vetustissimo, dictum iuit, Antiquissimum quodque verissimum. Ecquid igitur ingeniis modestis (nam illa Omnisciorum pro desperatis habemus) ad veram Scripturæ intelligentiam, atque adeo etiam ad Ecclesiarum pacem, fructuosius esse possit, quàm si antè omnia quidem, animo veritatis percupido, Deum in Scripturis loquentem audiamus, præsertim eâ linguâ, quâ divinitus sunt exaratæ: mox verò, quia nullus sibi uni, vel paucis secum, Spiritum Dei ad Scripturas capiendas vindicare debet, audiat quoque Spiritum in Ecclesiâ loquentem; eoque homines consulat pios juxta ac eruditos; ac novellis doctoribus superaddat antiquos, ut hoc pacto cognoscat, quid in Scripturarum interpretatione constanter amplexa sit Ecclesia vetus; quando, & ubi fuerit recessum à iudicio vetustatis; quid primò, quid deinde, quid postremò placuerit; atque ubi primis, ubi mediis, ubi ultimis temporibus, vel alii alios tulerint, vel Anathema dixerint dissentientibus? Si aliter nos componamus, quomodo non in hac mentium caligine, ceoque amore sui, crebrò, quod dicitur, à janua aberremus, dum suo quisque, vel etiam æqualium aliquot iudicio, Ecclesiæ doctrinam, ac gubernationem metitur; prisca verò & meliora illa tempora, eò despicit, quia ignorat? Quamobrem nihil æquè miserum statuo,

statuo, quam quod iste Antiquitatis contemptus, sive segnitie juventutis, sive alia de causa, quam dicere nihil attinet, tanta quotidie capiat incrementa. Et tamen ea est temporum malignitas, ut vix liceat ulcus hoc Chironium tangere. Et si liceat, brevitati instituti nostri nunc non sinat. Dolor interea expressit, ut quæ dixi, illustri comprobarem exemplo; idque eorum potissimum, apud quos vitium hoc præcipue dominatur. Quales censéo qui Samosatēni, vel Photini dogma orbi recoquunt Christiano. Nam si cuncta Christiani nominis tempora tacite animo percurramus; nullam comperimus Ecclesiam, ab Apostolis, vel iis, quos hi miserant, constitutam, quæ aliquem ejus sententiæ agnoverit Doctorem. Equidem non diffiteor, quod obtundunt, extremis Apostolorum temporibus, fuisse Ebionitas. Sed ullamne ex iis, quas dixi, Ecclesiis dare poterunt, quæ vel decimo successione gradu, multoque etiam postea, in defuncti Episcopi, Presbyteri, Diaconi, imo vel Hypodioti, Lectoris, Cantoris, vel Exorcistæ locum, prudens sciens Ebionitam advocarit? foris hi coetus suos inibant; extra Ecclesiam erant, quam oppugnabant. Ex hoc genere est censendus Theodotus Byzantius Coriarius ille; qui postquam nihil pensi habuit novum dogma inducere de Christo merò homine, ob defectionem hanc, à Victore, Urbis Romæ Episcopo, qui anno ducentesimo, & antea, claruit, Christianam meruit communione privari. Ejusdem farinae erant duo ejus Discipuli, Asclepiodotus, & Theodotus Trapezita: à quibus Natolius, auro corruptus, cum antea Confessorum choro accenseretur, Ecclesiam relicta, factus est Theodotianorum Episcopus. Hic postquam divinitus graves in somnis poenas dedisset, vix tandem à Zephyrino, qui Victori successerat, in Ecclesiam est receptus. Quid nunc de Artemone dicam, atque omnibus ab eo profectis? Quid item de Samosatēni Paulo, Antiochenæ Ecclesiæ Præfule? qui nisi ab omnibus audisset Catholicus, nunquam per varios honoris gradus adscendisset, donec in ea Ecclesia teneret primas, ubi primò auditum fuisset Christianorum nomen; quæ etiam Ecclesiarum Orientis prima censeretur. Eo in honore Ordine illum præcesserant, Euodius, Ignatius, Hero, Cornelius, Hero alter, Theophilus, Maximinus, Serapio, Asclepiades, Philetus, Zebennus, Babylas, Fabius, Demetrianus; ut Paulus iste fuerit Præfulum Antiochenorum quintus-decimus. Sed operæ est cognoscere, quid virum tantum impulerit, ut deferret fidei normam, quam observassent tot sui decessores, viri sanctissimi, plerique etiam scriptis, & martyrio incliti.

Vivebat iis temporibus Zenobia, Odenati vidual, Palmyrenorum Regina; quæ in Oriente longè latèque rerum potiebatur; multumque metuebatur à Persis, Arabibus, Saracenis, Armeniis, Ægyptiis, diu etiam à Romanis. Cumque doctissima foret ipsa, doctos etiam magno in pretio habebat; ante omnes Longinum, ea eruditione virum, ut viva Bibliotheca, & obambulans Musæum diceretur. Atque ille quidem Religione erat Gentilis; Ipsa autem Judæa; unde & doctissimos secum Judæos habebat. Horum commercio tantum profecit Longinus, ut præclaro admodum Elogio Mosē ornaret, aureolo, qui hodieque superest, Libello de *sublimi dictione*. Sed ut ea cum Judæis familiaritas, Longino profuit non mediocriter; ita è contrario perdidit Samosatēnum. Nam cum eâ tempestate Antiochia, Syriæque universa, in Zenobiæ forent potestate; sapius consistendum erat Paulo, cum Judæorum doctissimis, & disertissimis. Ac magnopere quidem adlaborabat ille, ut & hi, & Regina ante omnes, (quæ eum magni faciebat, & à qua ipse majoris fieri cuperet) deinceps agnoscerent, Jesum esse promissum illum Messiam. Sed offendeantur illi Doctrinâ Ecclesiæ, de uno Deo, Patre, Filio, & Spiritu Sancto. Quod etiam pertinebat, receptissima gratias agendi forma; *Deo Patri, & Filio, Domino nostro Jesu Christo, cum Sancto Spiritu gloria, & Imperium, in Secula Seculorum. Amen.* Siquidem Samosatēni temporibus, utebantur hac norma, eaque à majoribus accepta; ut testis est locuples eorum temporum scriptor, Dionysius Alexandrinus; cujus de eo verba legere est, apud B. Basilium in præclaro de Spiritu Sancto opere ad Amphilochoium Iconiensem Episcopum. Paulus ergo faciliorem hoc pacto sibi victoriam ratus, neglectâ priorum doctrinâ, in Artemonis castra concessit; Judæisque illud largitus fuit, unam esse *ὁμοῦς* Divinæ Naturæ, nec Jesum prius fuisse, quàm de Spiritu Sancto è Virgine Maria nasceretur. Non tulit tam fœdam *συνοδική* Synodus Antiochena; quæ propterea Paulo Dominum suffecit; approbante hoc ipsam Episcopo Alexandrino. Nempe nihil tale hæcenus, vel Antiocheni audierant, jam inde ab Euodii temporibus; vel Alexandrini, ex quo iis præfuisset Marcus Evangelista: quorum uterque Ecclesiis illis, præcipuis totius Orientis, primus ab Apostolis Episcopus datus erat. Patriarchæ Constantinopolitani sententiam nemo hîc à me requirat, quando necdum nova erat Roma. At Veteris Romæ, & cum eo totius Occidentis, idem fuisse judicium de Paulo, partim eò scimus, quia Scriptores antiqui, ac fide digni,

digni, ita de hoc prodiderunt; partim quia etiam, dum Gentiles forent Imperatores, nec universalia haberi Concilia possent; ne non Apostolica de duabus in Christo Naturis per omnis orbis Ecclesias decurreret, cum aliter cavebatur, tum præcipue commercio literarum, quas dixere Pacificas, Canonicas, Ecclesiasticas, Communicatorias, vel etiam Formatas. His enim vel maxime, quod multi non satis attendunt, continebatur illa in Christiana fide contestatio hospitalitatis, ut eam vocat Tertullianus. Nulla quippe Ecclesiarum ab Apostolis edocta, primumve ab iis nacta Doctorem, ignara erat doctrinæ, quæ ab Apostolicis in ea sonuisset temporibus; ubi quicquid memoriæ hominum, etiam longævorum, deesset, Ecclesiasticis supplebatur Archivis. Quocirca nec Samosateno, vel ejus affectis, nec omnino cuiquam, qui ab Catholica se Ecclesia separasset, Epistolas dedisset Canonicas. Cujus rei complures laudare testes possum. Sed fuerint omnium instar Optatus Milevitanus, & Hipponensis Augustinus; quorum Ille, cum Lib. II. urbis Episcopos memorasset ad Siricium usque sui temporis Episcopum Romanum, subjungit deinde; *Cum quo nobis totius orbis commercio formatarum, in una communione Societate concordat.* Alterius est Epist. CLXIII. ad Eleusium & alios; *Hic primo asserere conatus est, ubique terrarum esse communionem suam. Querebam, utrum Epistolas, quas formatas dicimus, possent, quod vellent, dare, & affirmabam, quod manifestum erat omnibus, hoc modo facillime illam terminari posse questionem.* Ac præcedenti etiam Epistolâ idem dixerat; *Unde factum est, ut etiam ad nonnullos Donatistarum primarios scriberemus, non communicatorias literas, quas jam olim, propter suam perversitatem, ab unitate Catholica, quæ toto Orbe diffusa est, non accipiunt, sed privatas tantum.* Nec horum demum temporibus ea formatarum cepit consuetudo. Nam ut de Laodicensi Concilio taceam, deque ipso Niceno (quorum illud literarii talis commercii meminit Canone CXLV, hoc XVIII.) etiam Eusebius Pamphili in septimo Historiæ conservavit nobis hujus generis Epistolam; & quidem à Synodo Antiochenâ ad Dionysium Romanum, & Maximum Alexandrinum, in ipsius Samosateni causam exaratam. Quin ab excessu Apostoli Joannis annis quadraginta, vel etiam minus, obtinuisse eas in Ecclesia, vel ex vita Xysti apud Anastasium conspiciamus. Vereor, ne promissam brevitatem, modumque Epistolæ, excedere videar, si alterius sermonem producā de duobus illis ingentibus bonis, quæ è temporum doctrina promanare dicebam. Ea parum ipse attendebam, cum animum ad hoc studium

appellerem, in prima penè adolescentia. Quid mirum? quando non tam judicio ad illud deferretur, quam occasione Bibliothecæ, bellè adeo instructæ, etiam ab antiquis Ecclesiæ scriptoribus, quam reliquerat mihi doctissimus, idemque vetustatis amantissimus Parens meus. Sed quanto cum ætate altius me postea in hoc studium penetravi; tanto magis ejus necessitatem peripexi. Præcipue verò ex laboribus istis, vidi fructum me percepisse maximum, postquam Theologico Illustrium Hollandiæ, & West-Frisiæ ordinum Collegio Præfectus, cum Scripturis cuncta Ecclesiæ tempora jungerem: atque ita nullâ spe, nisi celesti, laborem mihi ipse duplicarem. Idem amor, ac studium mansit, cum deinde in Leideni Academia, præter literas Græcæ, omnem omnium temporum Historiam, Sacram, Ecclesiasticam, Civilem, enarrarem. Ac quamvis ut alia omnia, ita animum quoque auferre ætas soleat: nec dum tamen mihi, in illustri Gymnasio vestro idem studium proficenti, ardorem istum ætas extinguit frigidior; quin potius gliscit. Nempe majoris mihi fuit conscientia, quam res fluxæ: eoque penè hoc uno metior cuncta, ut in die illa, quæ animo semper observatur, otii pariter, ac negotii mei, facilius Deo rationem reddam. Quomodo animatus, quicquid mihi temporis à publico munere, auctoritate vestra impolito, restat, id omne, quatenus per indigenarum, ac præcipue exterorum interpellationes licet, in eo infuso, ut literarum etiam monumentis non malè promerear de studiis, præcipue juventutis. Quocirca ut in aliis me artibus, ac scientiis factum; ita in doctrina quoque temporum, multa jam literis mandavi. Sed hætenus penè omnia in Bibliothecæ forulis delitescunt. Interim tempora labuntur, atque ætas affecta aurem vellit, ac cogitare jubet de farcinulis colligendis. Eo igitur animo sum, ut illis dem lucis usuram, in quibus perficiendis, & emendandis, minus operæ desideratur. Solum dubitavi, utrum satius foret, initium ducere, ab orbis, an Christi incunabulis. Verum enimverò licet temporum doctrina, præstantium virorum industriâ, nunquam majora ceperit incrementa, quam seculo proximo; multum tamen vereor, ne non unius ætatis negotium sit, priusquam hæc scientia ad id fastigii adsurgat, ad quod aliæ quædam jamdiu pertigerunt. Nec propterea tam animo, quam otio, mihi opus sit in exasciandis nostris. Utcumque enim viribus diffidam meis; bona tamen spes est, in hoc etiam studio, ubi toties noctem omnes offendimus, quod plures plura dicent, & conferent, eò citius posse tenebras discuti. Quocirca ab
illis

illis Veteris Instrumenti paulisper recedam cum animo revertendi. Nunc verò exorsus à Novo, diatribam geminam; unam de sospitatoris nostri genere; alteram de annis ejus nati, baptizati, mortui, publici juris facio. Ultramque, magni magnæ urbis Antistites, columnina Patriæ omni laude majora, amplissimo nomini vestro, L. M. Q. offero, dicoque. Nec ignoro, quanto majora meritis debeantur vestris. Sed cum non possum hoc tempore, quasi vellem; volui, quali poteram testimonio, cultum atque officium nostrum testari. Et fidentiore me faciebat, notissima omnibus æquitas judicii vestri; ut iniqui ipse judicii reus fuerim peragendus, si metuissem, ne libellis nostris plus demeret favoris, quod exigui forent; quam adderet argumenti non præstantia modò, sed etiam difficultas. Et stultè adeo si sapuissem, sapientià tuà errori nostro, vel in proximo de libellis nostris sermone, longè humanitatis, & affectus plenissimo, mederi potuisses, magnifice, ac amplissime Consul, Alberte Conrade Burgi, tot jam honoribus perfunctè, non in urbe modò partià, cum quavis urbe certante; sed in totius etiam Hollandiæ, ac West-Frisiæ Senatu; Legationibus quoque ad Russiæ Imperatorem, & Serenissimum Daniæ Regem, magna prudentiæ laude feliciter obitis, longè lateque celebratissime: tum autem (quod multis partibus minus sit licet, me tamen, & literarum studia, propiùs spectat) Athenæi nostri jam ab eo tempore Curator, quo sic Deo, & prudentissimæ urbis hujus Proceribus placuit, ut Ego, & ab omni laude cumulatissimus Collega meus, Gasparus Barlæus, prima illius fundamenta, jaceremus. Ut verò porro etiam structura ejus pulchrior, pulchriorque exurgat, & voce & calamo pariter adnitimur. Ac si vita suppetat, uberior deinceps animi hujusce testes dabo, non modò publici boni amore, sed etiam vestri: quibus si placebunt nostra, magis placitura sunt aliis, & Authori; quantòque vobis per hæc carior reddar, tantò ipsi etiam mihi carior fiam. Deus Opt. Max. porrò quà terrà, quà mari, urbem hanc secundet; jam nunc licet felicitate, & rerum copià, nulli secundam. Atque idem familias vestras cunctis animi ac fortunæ bonis locupletet. Vos ipsos, ex bonorum civium, tot etiam eruditorum votis, Urbi, Ecclesiæ, Gymnasio nostro, imò potiùs vestro, sospites ac propitios, diutissimè conservet.

Amstelodami
 cld. lxx. xliii.
 v. Kal. Nov.

III.

Serenissimæ & Sapientissimæ Christianæ

NON dubito, Serenissima Regina, quin plerique, qui prolixum tuum erga me favorem, & beneficentiam norunt, valdè mirentur, nullum me hæcenus grati animi signum ostendisse, cum tamen innumeri, quos nunquam obstrinxeris, in remotissimis etiam terrarum oris, virtutes tuas uno ore laudent, celebrent, & in cœlum certatim evehant. Si vel ihstita quædam ignavia, vel aliud animi vitium, tam diuturni esset causa silentii; tantum abest, ut delicti peterem veniam; ut ultrò potiùs à te poenam criminis efflagitarem. Sed me quàm longissimè ab hac culpa abesse, nemo potest ignorare, cui & mores mei, & ingenii mensura fuerit cognita. Si nunquam præsens essem contemptus ea, quæ totus de te terrarum Orbis prædicat, miracula; fidentius aliquanto exigente necessitate, sermonem de te instituerem. Nunc verò cum videam ea ipsa, quæ de te jactantur, longè esse infra gloriam tuam, cum omnem prorsus famam virtute exceßeris; eò sum redactus, vel malignus habear, si destitutus ea dicendi facultate, quæ tantæ convenit Majestati, non illa saltem proferam, quæ possim. Quod itaque te alloquar, non hoc facio fretus viribus, aut ingenio meo, neque enim me mea fugit imbecillitas, sed saltem, ut, si quod tacendo crimen incurrerim, illud omne loquendo diluam, & repellam. Nec tamen ideo silentium rumpo, ut laudes tuas aggrediar; faciunt hoc ii, qui vel sunt, vel sibi videntur facundi, & disertis, à me enim uti virtus illa, ita etiam altera ista procul abest vanitas: hoc saltem peto, & obsecro, ut benigna & serena fronte munus, quod offero, suscipias, nec indignè feras, quod possit tam longam moram, aliena pro meis audeam exhibere. Quamvis ut rectiùs loquar, tuum est, Domina, non alienum, id quod tibi consacro opus: Tibi quippe vivens destinarat Pater meus, tibi etiam moriens ultimis reliquit ceris. Sive tamen tuum sit, sive non, accipiendo id facies tuum, eritque, ut opinor, non minus gratum, quàm si meum esset, imò etiam gratius, quoniam & melius. Argumentum.

mentum operis quod attinet, ne hoc spero, adspernabere; continet enim ætatem, & scripta eorum, quos tu libenter à mortalitate una cum suis monumentis, si per fata liceret, adfereres. Vereor autem, Domina, ne plus doloris, quàm voluptatis hic tibi adferat liber; fieri enim non potest, ut non quam gravissimè commovearis, si in tot Veteris Græciæ lumina, tot præclaros, & inæstimabiles Thesauros, avaros illos tuos & insatiabiles conjeceris oculos. Nudam quippe Scriptorum famam, solos laborum titulos, & quædam quasi humanæ sapientiæ naufragia hic conspicias. Nihil hic Theopompi, nihil Timæi, nihil denique Ephori, præter nomen: periere omnes, & quod maximè dolendum, periere sine posteritate. Neque hoc idè à me dicitur, quod iniquè de Historicorum hujus seculi sentiam ingeniis, ut non illa etiam ea qua debeam æstimatione prosequar; sunt illi quod voluerint, dummodò sciant, multum se abesse à sublimitate Veterum, & quantum ipsi plebem superant intellectu, tantumdem se ab illis superari. Quamvis autem ejus rei causam reddere, non sit difficile, quid tamen opus eam multis explicare, cum eventus ipse manifestè id docuerit? Quis responderit stulto, quærenti, quare desipiat, nisi qui & ipse, pro stulto velit haberi? falsum verò est, quod quidam opinantur, ex quo desierint esse Heroes, desuisse etiam eos, qui facta eorum memoriæ, & posteritati traderent. Cui non Veterum Heroum comparandus gloriosissimus tuus Parens? Quis non illum Regum, Principumque omnium diceret Maximum, nisi Majorem se genuisset filiam? Nullus tamen quod sciam, facinora ejus toto Orbe, & omnibus sæculis memoranda, vel potuit, vel ausus est, literis, & æternitati consecrare. Hinc adparet hodiernis Scriptoris, non deesse argumentum, verum ipsos deesse argumento. Qua quidem in re uti, & in cæteris fermè, planè adversantur priscis, & vetustis Historiæ conditoribus; Illi quippe arte, & industria Heroas ex hominibus faciebant, isti verò culpa ingenij & facundiæ, Heroas, imo ipsos Deos, in homines, & quidem vilissimos, permutant, & transformant. Sed quid ego hic aliorum crimina commemoro, cum pulcherrimam laudum præ manibus habeam materiam? Invitus, Regina, aliena persequeretur vitia, si tuis prædicandis par essem virtutibus: sed eas percensere longè fuerit difficilius, quàm aliorum carpere errores. Labi quidem & errare, res est, ut factu, ita quoque dictu facilis. Tua verò virtus cum nihil habeat humanum, sed sit prorsus Divina & Immortalis, quis eam aggredi, & exprimere possit nisi cui cœlestis

quoque contigerit facundia? Nonne ego eundem incurrerem errorem, quem paulo ante in aliis reprehendebam, si heroicas, & incomparabiles animi tui dotès, tenuitate styli & eloquij deprimere, & tanquam de cœlo in terram deducere conarer? Permitte, Serenissima Regina, si in me ingrati videatur animi indicium, de virtutibus tuis tacuisse, ne ingratus habear. Malim tu hoc videre, quàm prodere malignitatem, cujus ego manifestè reus peragar, si te modicè, & frigide (neque enim aliter possum) prædicavero. Licet nihil aliud in te magnùm, & memorabile occurreret, quàm quod fortunæ, & natalibus debes, esset id tamen majus laude, & præconio nostro: tantum quippe abest, ut sublimia illa, sceptræ & coronas, sermone possum assequi; ut sæpè ne verba quidem succurrant, quibus amicis, & familiaribus meis satisfaciam. Sed verò cum fortuna, licet illa omnia dederit, minora tamen præstiterit tibi, quàm sint ea, quæ ipsa adquisiveris: quum propria te virtus, etiam supra diadema evexerit; vanus essem, & ineptus, si periculum virium facerem, & verbis attenuare mallet, quàm sacro silentio venerari ea quæ in te certatim concurrunt miracula. Huc accedit, Domina, quod laudare nemo te possit, sine gravissimo aliorum Regum, Principumque vituperio. Nam sanè etiam si aliquid prædicatione dignum in his sese offerat, id tua obumbrat gloria, vixque eorum supremæ virtutes eò adsurgunt, ubi tuæ incipiunt. Honorificum est illis trium quatuorve linguarum peritiam sibi compataste. At verò quota hæc est pars tuæ laudis, cum linguas pleraque (barbaras tamen excipio) exactissimè intelligas, multas etiam sermone exprimas, idque tam eleganter, ut ne ipsas etiam Musas elegantius, disertiusque posse existimem. Et tamen, ut multas edidiceris linguas, plures tamen sunt, quæ te celebrant. Jam verò quàm in aliis regibus gloriosum habetur, si erga literas, & literarum cultores, benigno, & benevolo fuerint animo? Tu verò, incomparabilis Domina, non solum literarum amore teneris, verum etiam tantos in iis progressus fecisti, ut ne doctissimis quidem concedas; Tuæ certè ætatis omnes longè post te reliquisti. Quodnam est enim doctrinæ scientiæque genus, cujus non etiam penitissimos perlustraveris recessus? Poetas quidem & Oratores, qua Græcos, qua Latinos, partim legisse, partim memoriæ mandasse, ludus tibi jocusque fuit. Historiarum eam tibi comparasti cognitionem, qua nec majorem illi, qui totam ætatem huic studio consecraverunt. Illud verò mirandum proflus, & inauditum, quodque non in Juvenem, nedum

in Virginem cadere existimassemus, nisi tu sola exemplo nobis fuisses, evasisse te tam citò ad illa sacra, & abdita Philosophiæ penetralia, ad quæ alii assiduo labore, continuis vigiliis, vix tandem in extrema canitie pervenire potuerunt. Nescimus adhuc, Domina, propriâ ne industriâ, an verò singulari Dei beneficio, tantam sis adepta sapientiam. Quamvis enim rapido, concitatoque ingenio, annos & ætatem tuam præcurras: Quamvis etiam ea sis diligentia, ut nullum tibi tempus frustra effluat; & licet te quieti tradas, cum demùm major noctium pars præterierit, nunquam te tamen aurora dormientem deprehenderit; vix tamen patitur imbecillitas humana, ut tantum scientiarum, rerumque usum tam subito, & inter tot regni negotia acquirere, & comparare tibi potueris: Cælo necesse est tam cœleste ad te pervenerit donum; neque enim ex sola Platonis, Plotini, similiumve institutione tanta repente prodiiisset. Sed quid attinet quærere, coelitusne infusum, an verò labore partum sit, id quod in te passim colimus, & admiramur, dum cœleste, & immortale id esse fateamur? Cesset itaque curiosa nimium, & inutilis illa inquisitio, cesset etiam omnis laus; cum laudare non possimus, id quod quale sit, & unde habeas, ignoremus; sed tamen cum Divinum id esse agnoscamus, permitte ut te adoremus. Si enim unquam honor, cultusque divinus sine crimine, & errore cuiquam conferri debuerit, debuit tibi, incomparabilis, & adoratione dignissima Regina. Merces hæc est exigua, si virtutes tuas, ingentiaque quæ in me contulisti beneficia respicias: Tanta quippe illa sunt, ut etiam si mihi millies vita, quam dego, recurreret; millies me mors opprimeret, prius quam tuorum erga me meritorum partem, vel minimam deponerem. Sed tamen neque tu majus aliquid expetis, neque ego aliquid majus possum reddere, quàm animum purum, devotum, & intemeratum, quo te æternum colam, venerer, & adorem.

Humillimus Servus,

J. V.

IV.

Illustrissimo & Celsissimo Heroi, Georgio Villiers, Duci, Marchioni, & Comiti Buckinghamiæ, Comiti Coventriæ, Vice-Comiti Villiers, Baroni Waddoniæ, summo Thalassiararchæ Angliæ, & Hiberniæ, & Principatus Walliæ, Gubernatori omnium Arcium, & Castellorum Maritimorum, & Classium Regiarum, Magistro equitum Regis, Domino Wardeni, Custodi sigilli Regii, & Thalassiararchæ quinque Portuum & membrorum ejus, Dynastiæ arcis Doverensis, Justitiario in Eyre, omniumque Regis Sylvarum & Saltuum cis fluvium Trentensem, Dynastiæ Regiæ Arcis Windesoriensis, Primario Cubiculario Regis, Præsidi Synodario Ordinum & Regnorum Angliæ, Scotiæ & Hiberniæ, Equiti Nobilissimi Regii Ordinis Garterii, Cantabrigiæ Academia Cancellario, &c.

Illustrissime & Celsissime Dux,

TEnuis ille ego conditionis, & Academicis spatiis, atque umbris affuetus, affari nunc ausus sum Celsitudinem tuam; virum videlicet, Principem, quem alma Parens natura, non solum generosâ adeo domo, prodire in lucem jufferit; sed nascentem etiam oculis ita blandis intuita sit; ut cunctas illi corporis, atque animi dotes largiretur. Quem deinde sapientia pariter, ac virtus, quasi ex se natum, à teneris unguiculis educarint. Quem firmâ jam vigentem ætate, Augustæ memoriæ Rex Jacobus, sagacissimus ingeniorum, & meritorum æstimator, in arcana suæ Majestatis consilia adsciverit: Quem idem serenissimus Rex (quod ob fluxam quorundam principum fidem, & aularum illud incertum, non minoris duci debet) ut prudentissimum, observantissimum, fidelissimum, expertus est semper: Ita, quamdiu rebus ipse præfuit mortalium, amore complexus est incredibili: Imo quem filio, eique unico, quod omnes exsuperat titulos, ancipitis plenum iter sollicitudinis facturo in Hispanias, non tam comitem dederit, quàm ducem: Quem multò etiam habuit cariorem, postquam luculentæ adeo fidei, & prudentis felicitatis conspexit indicia; partim in eo, ut varia eluderentur consilia, aliò spectantia, quàm sperabatur; partim ut salvum ac sospes Patri, Patriæque sisteretur carissimum utriusque,

que, & naturæ juxta ac factorum lege, tot regnorum imperio destinatum pignus. Quæ quanti singula sint, & summus Rex, & Rege eo dignissima proles, satis intellexit; & abundè testatum fecit sanctissimus Procerum conventus, cum propter eam, totius regni nomine, celsitudini tuæ prosperè reduci, verbis honorificentissimis, gratias egit immortales. Nec limitibus eorum temporum continetur inclytum nominis tanti decus. Nam Rege Jacobo in meliora alterius vitæ regna translato, ille tot, & terrarum, & virtutum Patris hæres, Optimus, Maximus Rex Carolus, non domestico solum exemplo, sed suo etiam incitatus judicio (quod in lubrico hoc rerum humanarum palmarum censetur) simili celsitudinem tuam affectu prosequitur, atque ita prosequitur, ut dies amorem eum non imminuat, sed augeat. Adde istis, quod non solum generosæ illius vestræ, ac laudatæ undique Britannicæ gentes; verum multæ etiam præclari nominis exteræ Nationes, præconiis toties in cælum tollant nomen tuum; quoties iis in mentem venit virtutis Heroicæ, è tam arduis relucens negotiis, quæ tot jam annos sustines; atque inter ea è legationibus ad Potentissimos Reges, & foederatam etiam hanc Belgicam susceptis. Accedit denique, quod favor cœlestis, ac Regia Majestas tot unum, & tantis ornarint honoribus, ut qui non simul cogitet, ut in uno etiam multorum merita, ac dotes concurrant, is nec iudicium duorum Regum, nec Dei ipsius, in cujus manu sunt Regum corda, satis intelligere, atque æstimare posse videatur. Meditantem me ista, majora propè omnia, quam ut mei similes, non dico enarrare illa, sed vel concipere animo satis valeant, qualiscumque coepit oblitio mei; quæ tantum apud me potuit, ut nunc hanc sumptuosi fiduciam compellandi Celsitudinem tuam. Facile enim mihi excidi, dum totus extra me summam in admirationem rapior virtutum tuarum. Et cui non earum splendor mentis aciem præstringat, cum tantus is sit, ut, solarium instar radiorum, haut alios fortiatu fines, quam eos ipsos, quos terrarum Orbis agnoscit? Attamen accessit èd alterum quoque: Nam quantum ab alloquio Celsitudinis tuæ arcebat excellens dignitas; tantum revocabat eximia, & quasi privati hominis, in fortunâ eâ publicâ, humanitas; præsertim erga eos omnes, qui feliciter literas nostras colunt. Quis enim obtusi adeo pectoris est, ut ignoret, summum Celsitudinis tuæ ardorem erga doctrinarum studia, ac Musarum Sacerdotes? Usque adeo multa magnæque hujus cœlestis animi argumenta præbuit. Sed ea melius posteris referet Britannia, quæ

uti grande adeo depositum terris exhibuit, ita èd feliciter gaudet. At solum extero mihi attingere liceat, non leve hujus amoris documentum, quod hîc vidimus, cum Legationem obires apud Belgas. Periculum erat, nè, Reip. literariæ damno, miserè dispergerentur Linguarum Orientalium codices; quos summus vir, & amicissimus Collega meus Thomas Erpenius *ô margelm*, ex Oriente, Africa, terris aliis, tot annis, maximis periculis, & impensis congefisset. Vix illud cognoras, cum ecce, Celsitudinis tuæ jussu, ac liberalitate summâ, nobilis Bibliotheca, publico, ac imprimis Cantabrigienfis Academiæ bono, quasi ab orco redimitur. Quamquam verò magnum hoc fuerit; quantum tamen est, præ aliis tam multis, quæ commemorare nunc longum foret? Et miremur quotquot, si ita fas sit loqui, Apollinis, & Pallados delubra frequentant, etiam novum hoc Britannicæ fidus respicere, velut tutelare studiorum numen? Quis igitur satis prædicaverit singularem prudentiam Almæ Cantabrigienfium Academiæ? quæ exuberanti huic erga scientias affectui, cæterisque virtutibus, cultum tributura, quem maximum posset, cumulatifimos illos honores, Cancellarii, ut nunc loquimur, adauxit dignitate: Quâ profectò nihil pulchrius, aut majus uspiam, Orbis habet eruditus. Et quod pretium addit, præclarum hoc amplissimi, ac clarissimi ordinis iudicium, quemadmodum à præstantissimis viris accepimus, Regi ipsi Carolo eximiam attulit voluptatem. Tanti Regis exemplo, quem non modò rerum Britannicarum custodem; sed etiam doctrinarum omnium vindicem, ac statorem dicere possumus, mihi quoque ex ima Literatorum cavê, fas, ni fallor, erit, non gaudere modò, sed etiam gratulari, tum Celsitudini tuæ, ob luculenti hujus honoris accessionem; tum celebratissimæ Cantabrigienfium Academiæ, cui exoptatus adeo, obtigerit Tutor, ac Patronus. Atque eo impensius, & illi gratulor, & mihi gaudeo, quia nescio quod astrum usque adeo me Academiæ illi temperat; ut licet terrâ marique disjungar, nec ultra vulgarem scientiæ modum quicquam mihi ausim arrogare; tamen tantillus ego, ante annos pauculos, non inidoneus visus sim, qui eodem arcefferer, ut adderer Doctoribus juventutis, fideribus sanè fulgentissimis, non modò in Britannia sua, sed universo Orbe relucenibus. Sed enim mihi in hisce Batavis Athenis compedes tum injectæ fuerint partim Procerum nostrorum consilio, quod penè imperiû loco ducebam; partim meorum valetudine adversa; partim conjunctissimi cujusque precibus. Attamen non eo minùs debere me

profiteor, & inclyte illi Academiae vestrae, & ante omnes, Illustrissimo Baroni à Broock, viro, seu praeclara ejus erga Britanniam omnem merita, seu erga studia, ac literatos, amorem consideremus, immortalitate longè dignissimo; cujus munificentia summâ ea mihi laudis, ac gloriae seges offerebatur. Verum beneficium Mecenatis hujus (quod cum maximum sit, tralatitè profectò dici non debet) alibi à nobis melius celebrabitur. Ad Celsitudinem tuam redeo; Dux inclyte, cujus nunc patrociniò, læta Cantabrigiensis Academia altius caput effert, & quamvis maxima, majora tamen de se promittit, atque, ut reor, jam in monumentis praeclaris, quæ feliciter parere nunquam desinit, etiam ea meditatur, quibus excelsum nomen tuum, & memoria tot benefactorum, ad seros nepotes propagetur. O pulcherrimas in amore hoc vices! Honorem Academia detulit, & deferendo accepit. Auctior, ornatioque est tanti Herois praesidio: sed vicissim ea praesidium, ac decus suum exornabit, dum studiis in Orbe constabit honos suus. Tanta Celsitudinis tuae conjunctio, & Cantabrigiensis Academiae, cum animo obversaretur meo: Equidem existimavi, eadem me operâ consequi utrumque hoc posse; ut aliquo ingenii & industriae monumento ostenderem, tum quanti faciam heroicis virtutes Celsitudinis tuae; tum quanto affectu prosequar, illam à tot seculis florentissimam, quam dixi, Academiam vestram, ac meritis fortasse nulli terrarum secundam. Cæterum ita animato nulum ex iis, quæ sub manibus haberem, nobilius occurrebat argumentum, quam hoc de Historicis Latinis. Mitto enim quod historia omnis, & otiosos oblectat, & negotiosos instruit, tum ad vitam privatam, benè beatèque degendam; tum ad eandem in imperio domi, bellique prudenter componendam. Illud solum dicam, quod, seu ea pars operis nostri spectetur, quâ tracto, de Historicis Gentilibus; proderit is labor interiorum amantibus literarum; seu pars consideretur, quâ de Historicis ago Ecclesiasticis, non ingrata aut inutilis erit commentatio nostra, Theologiae; & Antiquitatis Ecclesiasticae studiosis. Nempe utrumque laborem conjunxi, ut utrisque prodessem, qui in utroque illo studii genere, majorem ætatis meae partem posuisssem. Etsi autem juventuti imprimis desudavi; non tamen opus hoc, quod nomini Celsitudinis tuae sacra retur, planè indignum putavi; partim quidem, quia, qui Academiae nobilissimæ tutelam geris, etiam optimè vis studiis omnium; partim verò, imò imprimis quia, qui ipse heroicis virtutibus, ad æterni nominis decus, magnis passibus jam tot an-

nos contendis, non potes non amare scriptores eos, qui benè malèque gesta posteris tradunt, & ea prodendo etiam alios ad immortalitatem nominis parandam accendunt. Aliquid etiam ad commendationem operæ facit, quod, quatenus potui, complectar, quotquot intra XVII. secula & ultra, rem historicam scribendo juverunt: in quibus licet aliquot, vel minuti ipsi, vel minutæ rei narratores intercurrent (idque propterea quia nihil contemnendum putavi, à cujus notitiâ, vel temporum series pendèret, vel lucis aliquid historiae accederet) majori tamen ex parte, vel viri eximii, vel mediocres saltem se offerunt: Inque illis Senatores multi, atque etiam Consules Romani: Viri item Principes, atque adeo Reges, & Imperatores: ad hæc nobilissimæ cujusque Ecclesiæ, etiam Britanniae vestrae, antistites, viri sæpè sanctimoniâ præcellentes, judicioque omnium jam diu cœlo adscripta nomina: nonnulli etiam eo commendabiles, quod ut poterant, de rebus praeclaris scripsissent. Atque hi omnes, quatenus in relictis à se monumentis hodieque vivunt, pariter sese dant in Celsitudinis tuae clientelam. Eoque libentiùs faciunt, quia in iis comparent multi, quorum vel nomina hætenus aliis prodita non sint, vel opera intercidisse falsò sit persuasum. Quales non paucos in Bibliothecis publicis, aut privatis amicorum, vel etiam propria latitantes, partim vidimus, & legimus; partim præstantium virorum judicio cognovimus; quorum singulis symbolam suam, uti mos est meus, candidè ubique refero acceptam. Ab hisce Christianis, externis, magnis, mediocribus, minutis, editis, ineditis, plusquam mille & sexcentis scriptoribus, sperat labor noster, à seculo hoc, & posteris, pretium se illud accepturum, quod alioqui ab ingenio Authoris consequi se posse desperat. Atque eâ fiduciâ hanc tenuem, ut videtur, operam, sed satis profectò operosam, & cui deinceps etiam, si Deus mihi otium concesserit, limando, augendo, curam sedulò impendere decrèrim, ausus sum offerre, ac dicare maximo, & illustrissimo nomini tuo. Quod si eam non ingratam, tum Celsitudini tuae, tum clarissimis Cantabrigiensis Academiae luminibus, fuisse intellexero; erit sanè quod gaudeam; simul ad majora mihi animus magnoperè addetur.

Inclyte Dux,

Deus Opt. max. faxit, ut tardè cœlos petas, quò tot Regnorum Regi, regisque tanti regnis, simul florentissimæ Academiae Cantabrigiensis, ac universis literis, & literatis,

teratis, diutissime profis. Id quidem vel-
le, & orare Deum, quamdiu potero, non
delistam.

Ludg. Bat. pridie
Kal. Jun. Anno
cdo Ioc xxvii.

Illustrissima Celsitudini Tue

Humillimè devotus,

G. J. Vossius.

V.

*Carolo, Dei gratia magnæ Britanniae
Principi, Duci Cornubiæ, & Rosiæ,
Comiti Cestriæ & Cariciæ; Filio Pri-
mogenito invictissimi Monarchæ, Ca-
roli, Magnæ Britanniae, Franciæ &
Hiberniæ, Regis, Fidei Defenso-
ris, &c.*

DIES nulla, celsissime Princeps, obli-
vione delebit memoriam eorum, quæ
litteras, maximèque sacras colentibus conferre
non cessat, Augustissimus Rex Carolus, tuus,
idemque Patriæ Parens, & iis qui studia tra-
ctant, quasi numen tutelare. Cùm enim
amplissima possideat Regna, ac præstantium
ingeniorum aded feracia, ut exteris minimè
indigeat; novi tamen Triptolemi instar, be-
neficentiæ semina, non in sua modò Britan-
nia, sed aliis etiam terris, longè latèque spar-
git. De se Gallia, & nationum cæteræ, præ-
dicabunt. Mihi tacere sit nefas, de scæderata
hac Belgica; ubi me licet insperantem, uber-
rimo beneficiæ naturæ suæ fructu sic ornavit,
atque auxit, ut quoties me proprio pede me-
rior, divinam hanc benignitatem vix cogita-
tione, nedum verbis assequi possim. Eo ma-
gis jam diu laboro, ut de sanctiore studio-
rum penu quæpiam depromam, quibus me-
morem, gratumque, saltem ut possim, ani-
mum erga dominum, Regemque meum tes-
ter. Sed cum ea in tam occupato vitæ ge-
nere necdum ad editionem publicam matu-
ruerint; & nihil ita deproperari debeat,
ut operâ tumultuariâ publico minùs profim;
sensum hinc in cogitationem deveni, aliquid
interea præstandi, quod tibi, serenissimæ Ma-
jestatis Primogenito, non incongruens vide-
retur. Ætas enim tua, illustrissime Princeps,
jam literaturæ est idonea. Opus autem hoc
est de literis, syllabis, vocibus, & earum
nexu; quorum etiam omnium causas, prout
otium & tempus ferent, hinc poteris haurire.
Haut equidem disiteor, multa à nobis differi,
quæ in regnorum ingentium spem crescenti

delibare suffecerit. Attamen, vel longè me
ratio fugit, vel tantulæ ætatis tanto Principe
non indignum erit, si cara Britannicæ Nobili-
tatis pignora, atque alii etiam, quibus nostra
ista, vel iis similia, plenius sint cognoscenda,
non aliunde ea, quàm à principali tuo fasti-
gio, velut lumen à pharo accipiant. Imo quis
dubitat, quin laudi maximæ sit futurum, si
quantùm stemmate Regio, tantùm universis
etiam literis præcellas; juxta illud Mæonii
Vatis, magno quoque Pompeio commenda-
tum olim à Possidonio:

Αὐτὸν αἰεὶ δύνῃ, καὶ ἀνέστησεν ἑμυδάσαι ἄλλων.

Siquidem aureum hoc dictum, in doctrina-
rum quoque studiis locum sibi vindicat;
maximèque apud Magnæ Britanniae Princi-
pem: à quo, si à Regiæ Prosapie quoquam,
non Regnum hoc modò, sed verò Orbis
Christianus, solidam potius, quàm umbrati-
lem, & tralatitiam doctrinam expectat.
Quod quas faces, quos stimulos, subdere
animo oportet? Nec obscura est ratio, cur
tam pulchram omnes opinionem concepe-
rint; quando si universa terrarum regna
conferamus, nullum comperiemus, quod
Principes tot genuerit doctrinâ non minùs,
quàm sceptro insighes. Quin in eo videmus,
raro prorsus exemplo, in Societatem hujus
gloriæ etiam venire Reginas. Non jam ab
ovo, quod dicitur, rem arcessam; ut olim
Antimachus Clarius, sive alius potius, qui
rem Trojanam scripturus, ab Jove est auspi-
catus, in olorem converso, Ledaque ovo,
Helenam unde natam fabulantur. Et tamen
nostra se quoque offert nobis Helena, sed
Christiana, eaque Augusta; Flavii Constantii
Cæsaris conjux, unica Coilli, apud Britannos
Regis, Filia, Regni que hæres, & artibus iis,
quæ liberales dicuntur, assatim exulta, nec
Latinis solum literis, sed Græcis etiam versi-
bus pangendis excellens: eaque omnia, si
Pontico Virunio fides, à Parente ipso edocta,
quò, eo vitâ functo, digniùs succederet.
Nec in laudes excurram Edithæ, Comitissæ
Cantiani Filiæ, Edvardi Confessoris, Regis
optimi, & pro temporibus iis, eruditissimi,
Conjugis dignissimæ; quam incredibilis fu-
isse doctrinæ, Gervasius Dorobernensis au-
thor est. Prætereo quoque Mathildim cog-
nomento Bonam, Milcolumbi Scotiæ Regis
filiam, triumque in ea Regum, Edgari,
Alexandri, & Davidis sororem, Henrico I.
Anglorum Regi nuptam; quæ & ipsa non
eruditionis minùs, quàm pietatis laudem me-
ruit. Omittam quoque cæteras, quas alter-
utrum vetusto ævo Regnum dedit; meque
intra Henrici VIII. prolem continebo. *Quam*
quam

quam nec immorari hîc animus Mariæ, literis Latinis ac Græcis, optimisque scientiis imbutæ, magnamque id partem de consilio Ludovici Vivis, viri ut variæ doctrinæ, ita sapientiæ prope incomparabilis. Nimirum, pro instituto nostro, una suffecerit Elizabetha, literarum, linguarumque scientiâ ad miraculum instructissima. Necdum ea annum implebat septimum decimum, cùm tersè loqueretur, non Gallico solum, vel Italo sermone, sed etiam Romano; Græcè quoque lætaret, primum novi fœderis codicem, hinc alios atque alios, imprimis Sophoclem; imò Iſocratis illam ad Nicoclem, & alteram, quæ Nicocles inscribitur, Latinè redderet. Et quod majorem habet admirationem, non resedit ardor ille studiorum, ubi regium tenuit sceptrum; sed tum quibque, nisi per regni negotia staret, versare illa præstantissimos Latii, ac Græciæ Scriptores, inde linguam expolire, animum salubribus pascere præceptis, & exemplis. Imò hucusque ejus progressum esse industriam accepimus, ut de consolatione Philosophiæ Boëtium, de arte Horatium, de Jugurtha Sallustium, de curiositate Plutarchum, & alios qui me fugiant, Anglicè verteret, suâque manu transcriberet. Quid quod tum etiam ingenii sui aliqua condidit monumenta; in quibus non infimum locum merebantur tot orationes, non minus illæ Romani sermonis puritate, quàm sententiarum pondere, commendabiles. Earum habuit alias ad exterarum gentium Legatos, alias ad Angliæ suæ Academicos; quorum studia quantoperè foverit, grandi illud argumento erit, quòd curârit quotannis sibi commentariolis perscribi, qui potissimum, & qua parte excellerent, ut ita virtuti cujusque melius pretium rependeret. Atque hæc eo potissimum animo, illustrissime Princeps, à me dicuntur ne sublimem erectamque mentem, cujus femina jam exerere sese cupiunt, sic unquam demittas, ut alter sexus, etsi & ipse laudatissimus, doctrinæ nomine prævertat. Sed de sobole hac optimi maximique Regis Caroli, Jacobi sapientissimi nepote, longè alia omnes auguramur, certoque nobis promittimus. Quin igitur, quod tam generosâ indole dignius, Heroum potius, quàm Heroinarum exempla ob oculos ponimus? Ante omnes Constantini Magni, qui Britanniam tuam, quamvis antea, & rebus gestis nobilem, & eo nobiliorem, quòd prima Provinciarum fidem recepisset Christianam, partim nascendo in illa, nobilissimam fecit, partim eò quod imperator, hîc salutatus, & illam, & quicquid terrarum Christum recepit, immortalis sibi beneficio obstrinxit. Felicitas enim illa Arviragi esto, quòd eo potissimum

Rege, in Britannia primò sonuerit Evangelii tuba, occidente sive Apostolorum aliquo, sive Josepho Arimathæo. Laus quoque ea fuerit Lucii, quòd primus Regum, quos quidem legerim, palàm professus sit fidem Christianam, & illa Britannia parte, quam tenuit, publicè jusserit doceri. At quanto major hæc gloria Constantini; qui non in Britannia solum Religionem instauravit, Diocletiani persecutione atrocissima propemodum extinctam; sed primus etiam imperatorum per orbem Romanum templa aperuerit Christianis. Vestratem verò hunc, ac Romanorum juxtâ, Principem, literarum studiis fuisse deditum, nec legere contentum, animum etiam appulisse ad scribendum; præter nobiles Britannia Scriptores, testes habemus locupletes, Eutropium sophistam, & Aurelium Victorem. Addit illud Cæsariensis Eusebius, quando per otium liceret, Orationes meditatam, quandoque etiam habuisse, confluyente innumerâ multitudine, ut Philosophantem audiret Imperatorem. Nec inficias ivero, studiorum decus & gratiam non mediocriter jacuisse, ex quo, fractis Romanorum rebus, Vortigernus Rex à Saxonibus majore Regni parte exutus fuit; & Christi ac literarum cultoribus non alio ferè, quàm in loca ob montes ac paludes prope inaccessa, maximèque in Walliam, tutus patuit receptus. Quam tristis Britannia tum facies fuerit, non meliori alius fide dicet Gilda sapiente; ut qui ipse fuerit Britannus, & annis non amplius quatuor & quadraginta ab Saxonum in eas terras adventu, frui ceperit hujus lucis usurâ. Sed rediisse videntur tempora aliquanto lætiora paulo ante annum à nato servatore sexcentisimum, cum Gregorii Magni discipulus Augustinus, primus Dorobernensium, sive ut nunc dicimus, Cantuariensium Archiepiscopus (à quo Reverendissimum D. Guilielmum, grande Ecclesiæ totius præsidium ac columnen, tertium jam supra septuagesimum numeramus) publicam Religionis nostræ professionem, quibus in locis à Saxonibus pago deditis propè fuerat deleta, restituit, sed ita restituit, ut omnia juxta Romanæ Ecclesiæ faciem conformaret. Hic enim ille est, qui, cùm pauci adeò ut pietate, sic doctrinâ conspicui forent, eo minore negotio Angliæ Ecclesias, Orientis antea sive Græcis Ecclesiis magis convenientes, ad Romani Pontificis obedientiam, Romanæque Ecclesiæ constitutiones, primum quantum potuit, adstrinxit. Ac paucis post annis in aliis Britannia partibus idem Paulini, & Felicis studium fuit; Illius apud Northumbros, hujus in Norfolcia. Nec longo inde temporis intervallo, idem præstitum Wilfrido apud Saxones

ones Australes. Ita plurimis per Angliam locis Religione, & literis unâ redditis, difficile dictu est, quantus subito doctrinarum ardor habuerit Reges. In his Sigebertum, Orientalium Anglorum ab Uffa quintum; qui ditione suâ scholas instituit passim. Utrum verò incluta illa, nec satis unquam laudata Cantabrigiensium Academia, ac ob privata etiam merita, multò mihi carior, Sigeberto huic sit obstrictior, an Lucio Regi, vel alii priorum, aut è posterioribus Alfredo, vel primo secundove Eduardo; nec nostri ingenii est decidere; nec, opinor, tale illud, ut vehementem animi concertationem mereatur. Eo igitur superlesso, ad Inam potius venio. Occiduorum Saxonum Regem, Kennethi Regis filium, qui anno sexcentesimo octogesimo nono Cedwallæ successit, atque ut bello, ita etiam doctrinâ, multum sibi gloriæ peperit. Quid jam de Celwolfo dicam, Northumbriæ Rege? quem ab literarum pericia valdè laudat Malmesburiensis, præeunte etiam venerabili Bedâ, qui, Anglorum Historiâ à se conditâ, tanti potissimum Regis iudicio standum putavit. Quid item de Offa, magno Merciorum Rege? à quo Bedâ non degener Discipulus, Albius Flaccus, Legatus ad Carolum magnum missus, posteaque ejus, ut vocabant, deliciosus Magister, author tanto Regi fuit, Parisiensium in Galliis, Ticinensis in Italia Academiæ condendæ. Nec indictus mihi abibit Etelwulfus, fortissimi Regis Egberti Filius, Wentanus prius Episcopus, postea Occiduorum Saxonum Rex, Caroli Calvi æqualis; qui doctrinæ suæ decus, magnam partem acceptum retulit Helmetano, Wintoniensi Episcopo, & Suithuno Monacho eruditissimo. Quibus præterea laudibus, prosequar Etelwulfi hujus Filium Alfredum Regem? Qui, quamvis Parentum incuria, ab anno demum duodecimo, literis Latinis seriò incubuit; quâ de infelicitate suâ grandiori ætate sæpius querebatur: Incredibili tamen amore doctrinæ postea semper exarsit, eruditos multum æstimavit, & ad dignitates evehit. Ipse etiam, ut de Veteris Novique fœderis Libris taceam, Bedæ Historiam Anglicanam, Boëthium de Philosophia, Orofii Orchestrâm, Gregorîi Magni Pastoralia aliaque haut pauca, Saxonice reddidit: quod Guil. Malmesburiensis, & Ranulphus non sinunt nos ignorare. Illud verò prope fidem exsuperat, quòd tantus Rex, ut ei per familiaris Asser Menevensis refert, *Filiis eorum, qui in Regali familia nutriebantur, non minus propriis diligens, omnibus bonis moribus instituere, & literis imbueri, solus noctu diuque non desinebat.* Ac credo, admiratione talium, Martinus Papa, Anglorum scholam, quæ Romæ erat, ab

omni tributo immunem esse jussit. Et quantum gloriæ idem Rex peperit, extremis vitæ temporibus, præclarè adeo merendo, de Oxoniensium studiis! Quorum florentissima Academia nunc caput cælo infert: Eoque majori à me cum voluptate memoratur, quia excidere animo meo nunquam poterit, quantum mihi honoris, cum ante quinquennium pedem in ea primum posuissim, habitum iverit immerenti. Utinam modò summis, & hujus, & illius Academiæ in Anglia viris, uti apud animum memorem stat beneficii gratia, ita possim officiis respondere. Et unâ cum iis, triga ut Charitum fiat, venerando, sanctissimoque Cantuariensium Ordini; cui quod indignus licet, dignatione tamen Augustissimi Regis Caroli additus, sub Reverendissimo, & Illustrissimo Antistite D. Guilielmo, loci hoc teneam, non plurimas solum molestias, quibus nunquam piorum caret vita, deterget; sed etiam ad melius meliusque, de Ecclesiâ, ac Rep. literaria merendum, plusquam dicere possim animi addit. Sed longius jam ab eo ab Alfredo Magno; qui anno Christi nongentesimo excessit. Post eum Edvardus Senior, qui feliciter toties adversus Danos rem gessit, Alfredo patre erat, ut Monasteriensis ait, *potentiâ pariter, & dignitate gloriosior, sed literarum cultu inferior.* Quâ partè longè præstitit frater hujus Ethelwardus; quippe qui, ut Asserius Author est, *divino consilio, & admirabili Regis providentiâ, cum penè totius regionis Nobilibus Pueris, & multis Ignobilibus, diligenti Magistrorum cure traditus, utriusque linguæ Libros, Latine & Saxonice, assidue legerit, ac scriptiori quoque vacavit.* Sanè literis ita fuit imbutus, ut iis temporibus inter Literatorum Principes censeretur. Eruditione hinc avo Alfredo, Patruoque Ethelwardo, similior erat Æthelstanus Rex, Eduardi Filius; is qui Danis, è Northumbriâ ejectis, primus totius Angliæ imperium tenuit. Post illum studiis clarius, illustriusque nomen suum reddidit Edgarus, ex Eadmundo Rege, qui Æthelstano fratri in regno successerat prognatus; & ne hac solum parte laudetur, *flos & decus Regum, gloria & decus Anglorum, cujus largitas, & munificentia totam Europam impleverat;* ut de eo scribit Westmonasteriensis. Metuo ne longior æquo videar, si quodcumque Regum, in Anglica, ac Saxonica domo ab eruditione commendatur, intra angustos unius Epistolæ cancellos complecti velim. Ac magis etiam, si in Northmannicâ stirpe idem tentavero. Non prætereundus tamen Guilielmi Conquestoris Filius, Guilielmi Rasi frater, Henricus Primus; quem Thomas Rodburnus, sic Cantabrigiæ ait studiis operam navasse, ut propterea

Henricus

Henricus Belloclericus diceretur. Et quod è genere Nortmannico Reges in Academiarum alterutrâ postea ceperunt ingenii, doctrinæque cultum? Ut Oxoniensem nunc solum tangam, de Edvardo secundo indicant Archiva; de tertio, Rytmica Joannis Anglici: de Henrico V. Gymnasii Cadomentis in Nortmannia Conditor, Rossus Warwicensis Libro de Regibus; de Edvardo V. Oxonienses ipsi literis gratulatoriis ad Edvardum Quartum. Richardus etiam Tertius, etsi illaudatus Princeps, ubi tamen nefariis artibus regnum erat consecutus, eadem in Academia, raro prorsus exemplo, Philosophos audit discipientes; quod ex Academia ejus Epistola ad illum cognoscitur. Propiora afferam. Ac primum de Henrico VII. Tritavo tuo; dubium meliusne de Britannia merito, dissidia tollendo, quæ in Lancastria, & Eboracensi, Regii sanguinis familiis, tot Regum temporibus durassent; an nuptui collocando Filiam Margaritam Jacobo, Quarto ejus nominis Scotiæ Regi, Proavo Jacobi Sexti, qui jure hæreditario Angliæ, Regnum primum cum Scotico conjunxit, ac utrumque augustissimo parenti tuo Carolo feliciter transmissit. Porro Henricum hunc Polydorus Urbinas contentus est dicere, fuisse *ingenio magno sagacique, & à literis non alieno*. Sed enim magnum ejus erga literas amorem multa arguunt. Illud inter alia, quod qui Gallicè scirent, potius tamen Latine ei scriberent. In quibus etiam Hadrianus Castellanus Cardinalis, Herefordensis prius, Wellensis postea Episcopus. Et quis exiguæ esse doctrinæ existimet, quod à fide devium differendo ipse Cantuariæ ad fidem converterit Christianam? Quantum præterea ad gloriam illius facit, quod ejus in Anglia, uti in Scotia Jacobi IV. Atavi tui temporibus, literæ Romanæ elegantius excoli cœperint. Græcæ etiam, ut Constantinopoli antea in Italiam, ita inde tum traductæ sint in Britanniam universam. Atque in hisce humanitatis studiis, eo Rege diffundendis, maxime eluxit opera, cum Nobilis Itali, Cornelii Vitellii, qui primus Oxonii bonas literas docuit; tum indigenarum; Thomæ Linacri, quem filii Arturi studiis Rex præfecerat; & trium Guilielmorum, Grocinni, Eilii, & Latemerii; ac præterea Joannis Coleti, B. Pauli, ut nunc dicimus, Decani. Sed ad altius doctrinæ fastigium est assurrectum, regnante ejus Filio Henrico VIII. excelsi planè animi Principe; qui quanto studiorum amore fuerit inflammatus, indicio erit, quod ternas ædes regias Bibliothecis totidem mirè luculentis, instruxerit. Ab eodem illud amore est profectum, quod & ipse, & una Regina Catharina, pene eo

solum consilio Oxonium sunt profecti, ut Ludovicum Vivem in collegio Corporis Christi audirent differentem. Quin idem in Academia Cantabrigiensi, pro singulari affectu, erga viros ejus doctissimos, locumque illum ubi literis navasse operam perhibetur, Collegium studiosorum, totius prope dixerim Europæ amplissimum, sacræ & individuae Trinitati dicatum, munificentissime extruxit, & latifundiis, ac proventibus uberrimis ditavit. Quantoperè etiam elegantiorum hominum monumentis perpetuò celebrandum, quod publico sanxerit Edicto, ut barbariei, cujus reliquæ aliquæ honorem utriusque Academiae, alioqui florentissimæ, non leviter offuscabant, summo studio obviam iretur ab omnibus; ac quia sermonis illa rusticitas, & stribiligo in Philosophorum Scholis, potissimum regnaret, eò Aristoteles & Plato, publicè non aliâ quam græcâ prælegerentur linguâ. Quam digna hæc Rege illo, qui omnes ætatis suæ Principes, doctrinâ faciliè anteiret; quo etiam non alius hac parte magis admirationi esset; præsertim quando privatim, sermone etiam Latino, de rebus gravissimis dissertaret; vel publicè quoque de sacris controversias nunc constitueret, nunc tolleret. Tanto jucundior nunc quoque eorum est conspectus, quæ ad B. Augustini codicem de Civitate Dei, manu sua annotavit. Uti & horum, quæ eadem Regiâ manu exarata supersunt, de reformanda Angliæ Ecclesia cujus proximam à Deo potestatem, non alteri in terris attribui est passus. Idem antequam scriberet, Christiani hominis institutionem, deque bello in Scotos, item de Concilio Mantuano, & Vicentino, aliaque compluria, jam assertionem illam ediderat de Sacramentis: quâ non solum inter illustres obtinuit scriptores nomen; sed illud etiam, ut non quidem ignotum antea, desitum tamen, regius reponeret titulis pulcherrimum hunc, justiusque exinde possidendum, Fidei Defensoris. Ac de Filio ejus Edvardo VI. planè obstupesco, cogitans mecum, cum ante annum ætatis sextum decimum, exactè locutum Gallicè, commodè etiam Italicè, Hispanicè, atque adeo Græcè: Romano autem sermone, sæpius bene longas habuisse Orationes tam purè & eleganter, etiam promptè aded, ut utroque hoc illos quoque, qui temporibus iis inter doctissimos referrentur, non provocaret modò, sed vinceret. Quod si non verborum tantum delectus, sed in omni sermone, rerum pondus attendere-ret; non suæ dico ætatulæ, sed tantula in ætate, humani penè ingenii fastigium excessisse videbatur. Præsertim animo suo reputantibus, cum ea linguarum cognitione conjunctam in artibus liberalibus, & Divinarum humanarumque

manarumque rerum scientiis subtilitatem. Quam cum Hieronymus Cardanus, homo Italus, totius naturæ intelligentissimus, atque idem *πολιτικός*, è pluribus liquido perspexisset, pro naturæ eum miraculo habuit semper, eoque Elogio non privatim modò, sed publicis etiam scriptis decoravit. Qui talis tantusque esset, verè Angliæ, vel Orbis potiùs delictum, ereptus est terris anno imperii sexto, ætatis decimo septimo; atque ut meliorem sui partem coelo reddidit, ita præter corpusculum, terris debitum, & tristissimam sui memoriam, commentarios reliquit gravissima quæque negotia, quæ imperante se obvenerant, continentes, ac manu sua, non ad publicandum quidem, sed proprium in usum, in tantula ætate prudentissimè signatos. Post tam multa de Anglia, nec Scotiam tacitus pertranfibo. Hujus Regibus amor ille studiorum fuisse dicitur multo etiam ante tempora Donaldi, Regis, ut creditur, non indocti; sed gemino magis nomine inclyti; ut qui Scotticorum Regum primus, Christianam Religionem sit professus; & tantæ fuerit fortitudinis, ut ejus imprimis metu Severus, maximus sine dubio, imperator, muro per transversam Britanniam, ducto utrinque ad Oceanum, quicquid Romanarum erat partium muniret. Hæc ducentis fuere post Christum annis. At longè ante Reutha Regum septimus, historiam suæ gentis consignasse, & de re medica opus reliquisse dicitur. Annis enim circiter centum & quinquaginta vixit, ante Christi Natalem; ac pari temporis intervallo post Fregulium, primum Regni Scottici conditorem, Alexandri Magni, ut fertur, æqualem. Josina quoque Regum Novus, cui Reutha Patruus fuerat, eo nomine prædicatur, quod naturæ arcana sedulò sit scrutatus, atque adedò, Regis Salomonis exemplo, de viribus scripserit herbarum. Sed incertiora isthæc, nec testibus exceptione majoribus esse subnixa, non absurdè aliquis dixerit. Liquidiora verò omnia post Fregulium secundum; qui Honorii, & Arcadii Cæsarum temporibus, ut rei Romanæ Camillus, ita Imperii Scottici conditor alter fuit. Maximè quæ post annum septingentesimum, quando ardor studiorum egregiè effulsit in Eugenio septimo. Hujus illud inter cætera institutum, ut in Monasteriis res à Regibus gestæ literis proderentur. Mox idem animus in Morcaco & Etfino; posteaque in hujus Filio Achaio; à quo, ut traditum, eruditissimi homines magno numero, submissi Carolo Magno, quò Germaniæ, Galliæque Academiis, aut Monasteriis, præessent. Quod si propiora, eaque de Stuartis tuis magis aves cognoscere, quid, pro temporibus illis, cultius Jacobo, ejus

nominis primo? qui ante annos ducentos Regnum tenuit. Literarum enim, ac Eloquentiæ studiis, variâ quoque Linguarum peritiâ pollebat; nec vulgaribus solum, sed Latinâ etiam linguâ versus composuit. Ut nihil mirandum sit, si eâ Rex doctrinâ, Scholas instituerit publicas, Doctores earum foverit liberaliter, aliunde etiam præmiis elegerit in Scotiam. Proditum quoque, disputationibus plerumque interfuisse, ac quandoque per Regni negotia liceret, tempus traduxisse sermonibus literatis. Omni autem studio hoc agebat, ut Nobilium, non florido, sed, si sic loqui liceat, vulgo, nescio quo pestilenti fidere afflato, opinionem illam eximeret, quasi literarum doctrina animos frangeret generosos, solumque Ecclesiæ, vel Scholarum Doctoribus, non item terrarum Dominis, conveniret. Sed proporo ad sapientissimum avum tuum Jacobum; in quo tot res propriæ, & singulares. Unus enim Regum Europæorum, continuâ bis mille annorum serie, centum & octo Reges numerabat. Primus etiam Britannicorum Principum Angliæ, Scotiæque Regna tenuit; & ita tenuit, ut quæ tot dissiderent seculis, concordibus postea animis conspirarent. Sed non tam de genere, vel imperio, nunc sermo est nobis, quàm doctrinâ; cujus partium alii singulas, unus ille hauserat universas. Peritiâ dico linguarum, profam versamque facundiam, naturæ, prudentiæque Disciplinas, Historiam Ecclesiæ, & Civilem, cæterasque literas divinas, & humanas. Quare sic statuere non verear, tam variâ maximarum rerum scientiâ superâsse, quicquid Regum à mille annis, mille vero? imò, absit dicto invidia, quodcumque à Regis Salomonis temporibus fuit. Ubi nihil auribus dari, nulli melius sciunt, quàm interioris admissionis Procures, atque Antistites; abundèque ipse Orbi id universo testatum fecit, divinis suis ingenii, doctrinæque tot monumentis. Tanti Regis imaginem vivam vides, & audis, in Parente tuo, serenissimo Rege Carolo; qui à teneris, ductu excellentissimorum virorum, sed sapientissimi Patris consilio formatus, posteaque tot annos sermone ejus firmatus, & exemplo, dubium nunc relinquit, utrum Regii fastigii amplitudine, an celsissimâ mente, variâque doctrinâ sit eminentior. Sed non insitam ejus laudibus, quamque præcipuam fore Epistolæ hujus partem aliquis putasset, una penè decrit; neque tam id ne soli videar lucem scenerare, quando divinæ ejus virtutes, satis orbi cognitæ sunt: quam quia alibi, spero, commodior de iis dabitur dicendi locus: & nunc de his solum, qui beatum in cælis ævum degunt, loqui animus est, quo adulatio omnis

abesse magis videatur. Omnis verò hæc eò spectat Oratio, celsissime Princeps, ut animum tuum, majoribus maximèque Regni negotiis necdum occupatum, literarum studiis excolas; eumque falcites Parentis, Avi, & tot Britanniarum Regum exemplis, qui præclarè præverunt ad illa, ut Poeta ait;

Edita doctrinæ sapientum templa serena.

Hæc nunquam non animo obversentur, quò faciliùs virtutes eorum æques, vel etiam, si fieri possit (hoc Augustissimus ipse Parens tuus vovet) exsuperes. Scio, ad ista nunquam defore hortatores, qui plus me valeant autoritate & doctrinâ. Attamen non propterea vel nunc, vel ubi etiam ætas adoleverit magis, ingratum fore confido, si inter alios, quem sic Regia obstrinxit bonitas, quia corpore, aut vivâ voce minùs possim, pennâ saltem, ad studia nunc incitem, votumque exhibeam meum, hoc devotissimi animi symbolo; atque eadem ostendero, ut illustrissimum nomen tuum, non tacitè solum intra cordis adytum colam ac venerer; sed ipsum hoc coram orbe erudito, comprobare gestiam commentationibus nostris. Quas velut tabulam quampiam, in regalis gloriæ templo, eâ mente suspendo, ut dummodo mihi vita, ac valetudo suppetat, eadem ad majora me obligem. Accipe igitur, Illustrissime Princeps, hos labores meos; qui fortasè argumenti causâ minores aliquibus videbuntur; si tamen irradiantur quibusdam splendoris tui stricturis, nihil quidem de maximo tuo nomine deterent; nec enim sol eo minor est, quia loca lustret humilia, ac res exiguas; ipsi verò de lumine tuo lumen accipiunt; eoque latius se diffundent, vivent diutius, frequentius legentur. Nec enim facile futurum, ut non existimentur bona, quæ in spem tot Regnorum nato offerantur. Vale felicissime, celsissime Princeps, & juxta vota, ac spes omnium, virtute, & doctrinâ, quæ in aliis annos consequi solent, ætatem etiam præverte.

Kal. Mart.
A. cło Ioc
xxxv.

Celsissimi Principatus tui

Submississima Devotionis Servus,

G. J. Vossius.

VI.

Nobilissimo, Amplissimo, & Clarissimo Viro, Jacobo Cathio, Equiti, Præpotentium Hollandiæ, ac West-Frisiæ Ordinum Syndico Supremo, Magni Sigilli Custodi,

G. J. Vossius S. P. D.

Offero munusculum vile, si vires considerem donantis; majus si illud animo ejus metiar, ac promptissima voluntate; penè maximum dixerò, si attendam erga hujusmodi illius adfectum, cui mitto. Quid enim summo Poetæ, vel gratius, vel convenientius, dare poteram, quàm de re poetica? Non quasi nuncpandam Artem ipsam; quod alio in opere, tribus à me libris factum est; attamen eò, quia scripsi de arte. Propositum enim mihi fuit, agere de Poeticæ nomine, definitione, fine, inventione, & distributione. Quæ Præcognita solent nuncupari; ac licet vix aliud, quàm gustum exhibeant disciplinæ; nec nisi confusam artis notitiam præstent, doctrinæ tamen ordine præeunt; quia viam muniunt ad scientiam ipsam. Fortasè satis erat, hanc solam attulisse causam instituti mei. Sed enim præterea compulsus sum, justissimâ admiratione nominis tui. Si ingenium cogitem, Venus & Charites illud omnium elegantiarum flore imbuerunt. Si doctrinam, quas non artes, ac scientias, capacissimâ illâ mente complexus es? quò sic laudibus pariter abundares, tum excellis illis hominis πολυκῷ, quo in ordine tot jam annos præclarum nomen sustines: tum clarissimi Poetæ, cujus est animus diffundere per omne disciplinarum genus. Jam si virtutem considerem, undique ea è mentis sacrario, ubi habitat, elucet. Si dignitatem, quàm illustris est locus, in quem te prudentiæ, & eloquentiæ genius extulerunt; & ita extulerunt, ut non abducerent tamen à studiis nostris? Si humanitatem, posse hanc etiam eximiam esse, & tamen cum ingenio, doctrina, virtute, ac dignitate, concurrere, exemplo tuo comprobasti. Denique si benefacta hominis πολιτικῷ æstimemus; quàm tibi quotidie bene consulendo, in Amplissimo Illustrum, & West-Frisiæ Ordinum confessu, universam obstringis Rempublicam nostram. Sin merita eximii Poetæ cogitemus; cui non ordini prodes poetando de civili, ac morali vita? Quod est non unius ditionis, sed tot terrarum (rem arduam) mores emendare. Jam mitto, quòd privatim etiam omnibus, imprimis literatis, benefacere non cessas. In quibus

bus etiam nomen profiteor meum. Itaque (quod præficipi dixerim,) immortale jam nomen obtines; quò magis fruaris, postquam vixeris. Scio, quæ modestia est tua, hæc laudes potius dices tribuendas esse amori meo, quàm virtutibus tuis. Sed quæso patere, ut quæ bonorum jam omnium sermone celebrantur, eadem meo quoque suffragio confirmem. Et si molestus is sermo noster fuit, cogita mea quoque interfuisse, ut omnes cognoscerent, non degenerasse me ab antiquis; quibus tantoperè placuit *πρωτοπείων πηλαγὸς περὶ μόνον ἢ λόγῳ*, Persona præfulgida sermonis, vel Libri initio constituta, ut Dionysii Halicarnassensis in præceptis de Oratione pænegyrîcâ, verbis utar. Ac visum quoque idem fuit Aristidi Sophistæ; qui aiebat, *τὸς μὲν πρὸς τοῖς θεοῖς, πρὸς ἡμῖν ἡμεῖς τὸς δὲ ἀνδράς τὸς ἐλλογίμους τῷ ᾧ βέλτιον ἀνατίσκει μῦθον*. Templâ consecrare diis; viros vero eximios decet librorum dedicatione honorare. Nimirum judicabant, splendore pulcherrimi nominis alieni hoc se consequi, ut pulchrior labor suus videretur; haut secus ac ager videbitur melior, si sole splendente Favonium spectemus. Similiter igitur & ipse volui; ut, quia laus non sufficeret ex illis, quæ scripsi; accederet altera ex eo, cui inscripsi. Quo pacto erit, ut quantum hæc nostra deprimuntur Authoris sui ingenio; tantum adsurgant splendidi tui nominis famâ.

Deus Opt. Max. te, Nobilissime ac Clarissime vir, Reipublicæ, familiæ, ac amicis, diutissime saluum ac sospitem conservet.

Amstelodami
cIo Ioc xlvii.
Prid. Kal.
Sextiles.

VII.

Augustis Belgicæ fœderatæ Patribus,
Gerardus Joannes Vossius dicat, consecratque.

Illustrissimi, ac Præpotentes Domini,

ANNI sunt quadraginta, & amplius, ex quo primum ea, quæ in penitioribus literis, ac universo disciplinarum Orbe, sacris etiam studiis observassem, publici juris facere cœpi; eaque veterum monitu, & exemplo, plurimum inscripsi prælustri loco constitutis. Nec tamen ad vos, terrarum Rectores, unquam assurrexit animus. Sæpe interrim, fiduciam inter & verecundiam constitutus, dubitavi, utrum publico non simulatæ devotionis alloquio, an silentio porro etiam,

venerari vellem Orbe toto clarissimum nomen vestrum. Perfecta quidem erat rara in tanta dignitate humanitas. Videbam fulgere non superbire, fasces vestros. Ut facile appareret, semper esse illud vobis in animo situm, non vos Reip. sed Remp. vobis incumbere: cuius onus, ut Cælum Atlas, sic vos benignâ fati Providentiâ, rectis & salubribus consiliis, sustinetis. Sed ea licet conspicerem, nihilominus me, frontis tam imbecillis homulum, assidue terrebat excelsâ magnitudo vestra. Terrebant præterea, non aliis terendæ humeris, occupationes; quibus turbida componitis, ardua exsuperatis, & utcumque res sese dederit, pari omnia ingenio, atque animo suffertis. Hactenus ita fluctuanti lætæ affulsere dies, quibus terræ tam vestræ, quàm hactenus hostiles, ingenti spe complementur pacis æternæ, post diuturnum ad eò bellum, ineundæ, inter potentissimum Hispaniarum Regem, & Belgicam hanc fœderatam. Equidem, cum fatear lubens, multis partibus me inferiorem esse aliis multis; boni tamen civis officio, alteri cessero invitus. Quamobrem sermonibus publicis, etiam eorum, qui Remp. administrarent, excitatus, ante omnia Deum rogavi, ut secundare utrimque pacis consilia vellet: Et quia tot prudentissimi homines non vanam mihi spem concepisse animo viderentur, gratias eidem agere cœpi, quòd nato mihi anno, à funesti ad eò belli primordiis quarto, ac multa interim in me ipso, pluraque in Parentibus, vi hostili perpeffo, quodammodo dederit, jam septuagenario, prævidere finem ante-malorum. Præcipue verò gratulatus sum vobis, totius fœderatæ Belgicæ proceribus, quòd cum Potentissimo Europæi orbis Rege tot annis eâ prudentiâ, ac fortitudine bellum gesseritis, donec tandem eò deduceretis, ut ab Hoste ipso offerentur conditiones pacis, omnibus triumphis vestris longè, ut arbitror, potioris. Facile horum cogitatio expressit mihi, ut, positâ verecundiâ, consilium caperem, ea, quæ nunc dixi, publicè etiam testandi apud vos, præpotentes fœderatæ Belgicæ Antistites. Cum tamen sine donario nollem ad vestra venire templa; commodè accidit, ut hoc tempore ad umbilicum properarent tres nostri Institutionum Poeticarum libri. Ut non diu mihi quærendum videretur, cuiusmodi munusculo literario alloqui, ac venerari vellem prælustre nomen vestrum. Fortasse dicent aliqui majus quid convenisse tantis Heroibus. Equidem non repugno. Sed molâ litat, qui nequit hecatomba. Neque tam exiguus est Poeticæ honos, quàm multis videtur. Qui non cogitant Deum ipsum, bonam partem Sacræ Scripturæ, libris esse Poeticis complexum?

plexum : unde, eas partiens Christus, de se scriptum ait in Mose, Prophetis & Psalmis. Imò hymnus in ore Servatoris nostri fuit. Etiam Ezechiel Poeta Judæus, tragœdiam Græcè reliquit, de educatione Israelitarum ex Ægypto. Ex Plinio, qui Apostolico ævo, ac deinceps vixit, cognoscimus, sui ævi Christianos, hymnis Christum celebrasse. Ad hæc quantum Veteris Ecclesiæ Doctores, Poematis suis, & sibi decus pararunt, & Ecclesiæ fructum pepererunt ? Illi verò qui Gentilium poesin contemnunt, ipsam habere Philosophiam dispretui videntur. Veterum enim Poetarum alii, vitæ præcepta dederunt ; ut Solon, Tyrtaeus ; & similes : alii naturæ arcana referebant ; ut Empedocles, Melissus, Parmenides, cæterique. Atque, ut ad antiquiora veniam tempora, ita ab antiquis accepimus, illa quoque, quæ Orphei, ac Musæi, dicebantur, vel ad mores pertinuisse universa, vel ad rerum naturam ; quò etiam referebant, quæ de Deorum amoribus, conubiis, præliis, & similibus, traderentur. nec rarò sub unius fabulæ involucro, utramque Philosophiam occultabant. Quomodò, quod terrigenæ dicuntur Deos aggressi cælo expellere, non solum de ventis intelligebant, qui è terra originem ducunt : sed etiam de hominibus impiis, templa Deorum populantibus : sicut interpretatur Apollonius apud Philostratum. Hanc carminum laudem, Maximus Tyrius pulcherrimè expressit Oratione ; quâ docet, Poeticen esse Philosophiâ vetustiorē ; re verò eandem, soloque nomine diversam. Quæ non aliter capere oportet, quàm quod antiquissimis temporibus, iidem fuerint Philosophi, & Poetæ ; sed Philosophiam fæctis velarint fabulis ; quas carmine sunt complexi. Nec aliud voluit Plutarchus, libro de Musica, & eo, qui inscribitur, Quomodo à junioribus audiendi sunt Poetæ ; ubi ostendit Poesin, initium fuisse Philosophiæ. Nec enim, nisi priùs Philosophi fuissent, vel fabulis occultare, vel carmine posteris prodere, sapientiæ ac prudentiæ doctrinam. Iccirco etiam traditum fuit à Poetis, fuisse sylvas cantu attractas, atque extructas civitates. Nimirum quia à sapientibus, iisque eloquentibus, & Musicis præterea, sic versibus suavisissimis, ac delenificis, permulsi fuere homines agrestes ; ut relictis rupibus, ac sylvis, in unum concesserint locum ; domos conjunxerint ; leges ac jura receperint ; humaniusque amplexerint vitæ genus. Quare de Homero etiam sic statuimus, nomen ejus non magis Poetæ esse, quam Philosophi : neque fallere, vel falli, Veterum illos, * qui memorant, Homerum fuisse Magistrum Platonis ; licet

* Maxim.
Tyr.

quatuor circiter seculis postea consecuti. A Veteribus sic accepimus, ex Oceano profluere Mæotidem (sed de Mæotide sunt decepti, verius iidem de cæteris) ex Mæotide originem capere Pontum, ex eo Hellespontum ; hinc fluere mare Ægeum ; ex hoc porrò vastum illud Pelagus, quod hinc Europam, Asiæque partem ; indè Africam ingenti separat intervallo. Haut aliter cogitandum de Homero ; ex quo Platonis, (Homeri, dubito, an Socratis similioris) tum verba fluunt omnia, dictioque tota, prope adeo recedens à carmine, tum quoque omnigena illa rerum doctrina. Nimirum, five cogitemus siderum motus, aliasque observationes cœlestes ; five naturæ totius scientiam, five gubernationem rei familiaris, vel Reip. five rei bellicæ disciplinam ; ac quicquid in rebus humanis expetere, vel fugere oportet ; omnium illorum in eo non minus semina comperiet Philosophus ; quàm artis suæ exempla inveniet, tum Poeta, tum Orator. Nec sanè Alexandro, tam sublimis spei Adolescentulo, alium æque ac Homerum, proposuit Aristoteles. Videbat, non solum ex eo posse hauriri gubernationem sui, vel domus, sed etiam civitatis, ac regni, & scientiæ militaris, & eloquentiæ. Nec moveor eo, quòd ipse Plato Poetas, ex sua exturbet Republica. Quis enim ignorat, offensum fuisse commentis istis, de pugnis Deorum, vel concubitu ; de vinculis Junoni à Jove injectis ; Saturno à Jove castrato, uti prius ille fecerat Cælo ; & trecentis hujusmodi ? Naturæ quidem vim istis adumbrarunt Poetæ ; multumque ea res admirationis attulit, intelligentibus. Sed quid hoc ad vulgus ? quod propriè omnia capiebat. Unde fiebat, ut vel nullum esse numen crederet ; vel ejus exemplo, improba multa sibi licere arbitraretur. Itaque Dionysius Halicarnassæus Romulum laudat, quòd Græcorum Fabulas hujusmodi minimè admiserit. Cujus judicii sui tam Dionysius, quàm Romulus, multos habet approbatores. Inter cæteros fuit Hieronymus Philosophus ; ut de eo apud Laertium legas. Is aiebat, Pythagoram apud inferos vidisse animam Hesiodi, alligatam columnæ æneæ, multumque stridentem ; illam verò Homeri de arbore dependentem, ac diris circumdatam serpentibus ; propterea quod tam fœda uterque de divinâ prodidisset naturâ. Quæ cùm minimè fugerent sapientiam Platonis ; ipse quidem, studiosè legendo Poetas, sapientibus eos, ut legerent, suo præibat exemplo : sed ab iis arcebat imperitum vulgus ; quod, cùm solum exteriorē lamberet corticem fabularum, ad interiorē fructum neutiquam penetrabat. Operabatur igitur Plato, ut Poetæ symbolis, non adeo

adeo periculi plenis, rerum naturam adumbrassent. Postquam verò res aliter cecidisset; fecit quod potuit, & debuit; solos ut sapientes ad eorum lectionem admitteret. Vellem ista magis perpendisset, magnus omnino vir, Cæsar Scaliger; qui, cum ipse fateatur Homerum de Diis suis loqui, tanquam Suibus, (quo quid noxium magis simplicioribus?) Platonem tamen culpatur, quod Homerum removeat à civibus suis; cum cogitar eduberit, & quos arceat, & quomodo Homerum dimittat; videlicet non indignè, sed coronâ redimitum, unguentis delibutum, & omnino ut virum magnum; sed sublimiorem quàm ut captui Plebis suæ conveniret. Periculum igitur ille extimescebat, ne vulgus stupidum non distingueret inter Rosas & Spinâs, inter aurum & lutum. Sed nihil hoc periculum ad sapientes, longèque minus ad nostra tempora. Postquam enim Evangelium Domini toto terrarum Orbe illuxit; fabellæ istæ fidem omnem paulatim perdiderunt; ut luto sæ non contaminent, spinosæ non pungant; & proclive sit omnibus aurum tollere, luto relicto; ac evitatis spinis, carpere rosas. Non ulterius uni insistam Homero; universè de Poetis videamus. De his sic

* Epinomis ait Cæsar Scaliger *: Poetæ finem esse, docere cum delectatione;

Poesin verò esse politiæ partem; quæ sub Legislatore, quamquam alia facie, atque colore continetur. Nam quæ jussa sunt in legibus, quæ sunt apud concionatorem, moderatoremque populi suasiones; hæc, Poetices operâ certâ, atque separatâ, comparabuntur quibusdam amœnitatibus ad institutionem Civitatis. Neque hoc in dubium vocârit, qui cogitet, ab affectibus proficisci actiones; ac propterea Poetam, civitatis doctorem, jucundè docere affectus, tum bonos; quò cives, per affectus bonos, bonas agitent vitæ actiones; tum malos, quò malorum affectuum odio, evitent actiones malas. Ut verissimum sit, hoc differre civem, doctoremque: quod hic referat actiones propter affectus; ille componat affectus suos propter actiones. Quorum utrumque beatam facit vitam; & privatam, & civitatis, sive Reipublicæ.

Sed quid ego tam latum ingredior mare? ubi porro si provehar,

Autem diem clauso componat vesper Olympo,

Quàm cæteras etiam Poeticæ laudes complectar. Vela igitur contraham, & quia ab æternæ pacis spe, sermo cœpit noster, in voto simili definam.

DEUS OPT. MAX.
VOS, AUGUSTI FOEDERATÆ
BELGICÆ PATRES,

Diutissime salvos, ac fospites conservet; perque vos aureum seculum Belgis reducat. Europâ totâ pacis tranquillitas, cœlo demissa, furores compescat Martiales. Imprimis pietas caput ubique exerat. Ardeant cuncti tanto veritatis amore, ut magis eam ament, quam seipsos. Et ne in tot votis, oblivio me capiat ordinis mei, flagret in animis sincerus amor literarum, tum humanarum, tum divinarum, præmiaque sint studiorum laboribus: quæ multis in terris, vel odio, vel contemptui esse cœperant, non minori damno, quàm dedecore publico.

*Amstelodami. An. cIo
Idc XLVII. Prid. Id.
Sextiles.*

VIII.

Illustrissimo, & Amplissimo, Johanni Berckio, Equiti Torquato, Supremi in Hollandia Consilii Senatori, Potentissimorum fœderatæ Belgicæ Ordinum ad serenissimam Venetorum Remp. Legato.

CUM multum intersit humani generis, ne pereat illa, quæ viri eruditione, & sapientiâ præstantes monumentis prodiderunt; tum in historia hoc imprimis locum habet. Nam, ut universæ interciderent literæ, doctrinaque omnis ipsis ex hominum mentibus deleteretur: non propterea posteritas fraudaretur pulcherrimâ eorum cognitione, quæ ad rationis disciplinam, vel rerum naturam, vel morum scientiam pertinerent. Quippe superesset nihilominus miranda mundi compages, & mortalium societas, & utriusque contemplator animus hominis; qui, ex rebus sese in vita offerentibus, sensim deveniret ad notitiam artium, & scientiarum, quas Magistri Veteres tradiderunt. Longè verò aliter cum historia est comparatum. Nam si omnis ea semel oblitteraretur; non magis humanâ instaurari posset industriâ, quàm studio cuiusquam redire nunc ipsa scit hominis vita. Quare suus licet honos constare semper Socraticis debet chartis; præcipue tamen vota ejusmodi fieri convenit, ut, qui res gestas literis signarunt, æternum vivant,

geant, floreatque. Iccirco arbitrabar, non malè à me iri publico consultum, si hoc tempore ad illustrandam historiam animum appellerem. Et hætenus quidem, in eo præcipuè opera consumpta est mea; ut non modò tractarem de Historicis, Græcis pariter ac Latinis: sed præterea res gestas, digererem omnis ævi. At quia nondum ea ad umbilicum perduxì; libellum hunc de natura historiarum, & ejus scribendæ præceptis, in antecessum dare visum fuit. Quamvis enim, ut verissimè Plinius ait, *Historia quoquomodo scripta delectat*: tamen quia non tam voluptate omnia metiri decet, quàm publicis commodis; neque exiguo emolumento contenti esse possumus, ubi frui datur ingenti: profecto nec diffiteri illud licebit, plurimum referre, utrum negligenter tractentur res gestæ, an eadem cum fide optima, tum prudenter ornatèque memorèntur. Nec temerè à me factum putò, quòd minutum hoc emittere sum ausus, sub præstantissimi nominis tui auspiciis. Cui enim hæc à me offerri æquius erat, quam illi, qui & studia hæc, & me ipsum amaret, & aberrantem in viam reducere non minùs vellet, quàm posset? Nam quamvis ætatem universam, quod minimè te fugit, in honestarum artium studiis exegi; non tamen sum ita Suffenus, ut ignorem, hæc ipsa, quæ commentabar de via, ac ratione scribendæ historiæ, multò ab iis melius intelligi, qui juxta mecum evolverunt Scriptorum Veteres, & aliquanto id majori, quam ego, judicio egere; partim ob eximias animi dotes, quibus ab iis longissimè vincor; partim quia rerum civilium (quod in legendâ, condendâque historiâ præcipuè conducit) longè sunt peritiores; utpote in Rep. semper versati, & ita versati, ut ipsi etiam res egregias in ea gesserint. At cui laudes justius deferamus, quàm eximio nomini tuo? Postquam enim, vernanti ætate, quemadmodum antiquâ ac nobili domo tuâ, & præcellenti ingenio, dignum erat, multijugâ eruditione, præcipuè autem æqui justique scientiâ, & doctrinâ civili, pectus imbuisses: fieri haut aliter poterat, quin Princeps, ac cordatissima Bataviæ civitas, cui vitalem hanc auram debes, excellentias animi tui dotes, statim perspiceret, ac vix adolescentiâ egressum, idoneum censeret, cujus oraculum consultum irèt, in obscuris involutisque Reip. ac Civium rebus. Nec hujus eam pœnituisse judicii unquam, luculentè illud docet, quod annis triginta, & quod excurrit, usque adeò feliciter usa sit consiliis tuis. Neque urbe in patria duntaxat sese exercuit splendor iste virtutis tuæ; sed in amplissimis quoque Illustrum Ordinum concessibus; quoties nempe inclytæ civitatis

nómine, in augusto hoc loco de pace, bello, induciis, fœderibus, aliisque negotiis maximis, decerni oporteret. Ingenii verò, prudentiæ, ac fidei tuæ hunc fructum retulisti, quod oculos omnium coniectos in te vidimus: neque quicquam tam arduum creditum est, quod non rectè tibi committi posse videretur. Itaque & in supremi consilii Senatores es adlectus, & fœderatæ Belgicæ Ordinibus, patriæ patribus, præcipuè es delectus, qui de rebus gravissimis legationes tot obires. Nam semel iterumque sublimis hic honos obtigit, ad magnum magnæ Britannicæ Regem, Jacobum I. cui tantoperè placuisti, ut te virtutis ergo, dignitate equestri decoraret. Iterum amplissima legatione functus es ad potentissimum Daniæ, & Norwegiæ Regem, Christianum IV. Atque (ut de magnifica opera tua, præpotentium Belgicæ Ordinum auspiciis suscepta, ad illustrissimos Cliviæ Duces, nihil nunc dicam) quid splendidius hac ipsa legatione, ad serenissimam Venetorum Rempublicam? Invictissimam illam, & beatissimam, & si formam spectes imperii benè constituti, nihilo inferiorem veterum ulla. Cujus grande, ac mansurum decus, celebrare hoc loco non invitus; sed periculum extimesco, ne, ut nubes solis radios interceptis, ita ego, ob infantiam meam, subducam facilius, quàm addam lucem. Itaque laudibus ejus non insisto; nec magis tuis, Illustrissime Legate, quas melius posteris Annales Belgici loquentur. Mihi satis sit, devotissimo pectore, gratulari eximium hunc honorem virtuti tuæ. Cujus animi mei, quem tibi penitus obstrinxisti beneficiis tuis, libellum hunc obsidem mitto. Multum verò gaudeo, quod ille in ea potissimum deventurus est loca, ubi literas, & literatos pretio suo æstimare sciant viri nobilissimi, & præstantissimi; quos inter honoris causâ nomino, illustrissimum, & amplissimum Dominicum Molinum, virum majorum meritis inclytum, sed magis virtute suâ; de qua quicquid dixeris, minus erit. Tu verò, maxime, & illustrissime Domine Legate, placida & serena illa fronte, qua me ipsum soles, suscipe nunc hoc qualecumque ingenii mei monumentum; parum illud dignum quidem, limato, politoque judicio tuo; sed quod eo pretiosius apud omnes censébitur, quia clarissimi nominis tui sacrario fuerit appensum.

Lugduni Batavo.
vi. Kal. Mart.
An. clc lxxiii.

Præfatus nominis tui cultor,

G. J. Vossius.

IX.

*Illustrissimis Hollandiæ, West-Frisiæque
Ordinibus, Dominis Potentissimis, G. J.
Vossius Dedicat, Consecratque.*

Tanta est laus, ac gloria vestra, Maximi, ac Sapientissimi Proceres, ut nulla penè Orbis regio sit, quò non pervaserit fama eorum, quæ, præsentiore dubium Virtute, an secundiore Fortunâ, tot jam annos pro libertate gessistis. Sed nihil tamen videtur illis majus esse, atque excellentius, quæ recenti imprimis memoriæ omnium inhaerent. Quid enim novum est magis, atque inauditum, quàm Classe vos Mexicanâ potitos esse, & prope incredibili gazâ Hispaniarum Regis? Quod ut nunquam antea vobis, ita vicinorum adhuc Principum contigit nulli. Regi verò, atque hostibus, eò luctuosius visum, quò indignius putarent, jam de suo vos adversus se armari. Quis etiam satis prædicit, quòd, sine prope ullo sanguine vestro, Vefaliâ cepistis, illam viribus suis inclytam, & hostili sic præsidio firmatam; illam annorum aliquot manubiis, ac prædâ divitem; illam belli delectam contra vos sedem? Eoque clarius hac parte divinus erga vos favor eluxit, quòd hostis illo tempore, in foederatorum visceribus grassaretur, & cùm magna daret damna, multo tamen majora anheleret. Ita ut cepisse hanc urbem, non modò sit, stitisse hostilis victoriæ cursum; sed sua etiam recepiße, hostes finibus ejecisse, complurique oppida, quæ ab eo tempore in vestra, & sociorum sunt clientelâ, addidisse foederatorum terris. Denique quàm amplum illud, atque Augustum, quàm Arausionensium Principi, quàm vobis, quàm foederatis gloriosum, quòd in vestram, sociorumque potestatem, redegitis Sylvam Ducis, urbem antea semper infestam, ac sic naturâ loci, & veterano milite munitum, ut opinio esset prope omnium, viribus eam humanis expugnari non posse. At vos hanc quintum intra mensem vicistis, & quidem hostium duce obsessis cum ingenti exercitu suppetias incassum ferente. Atque horum singula, cùm per se magna sint, eo tamen majorem admirationem cient, quòd quæcumque adhuc diximus, intra annum vertentem peregistis. Neque se nominis tanti decus, cancellis gloriæ militaris; uti in nationibus quibuldâ videmus, quæ belli laudibus contentæ, literas studiaque despiciatui habent. Vos enim non armis modo, sed doctrinâ etiam excellere, pulcherrimum semper dux-

istis. Imo ægrè admodum fuerit vobis, si mystica illa Gentium Pallas, terrarum ulli posthabuisse Bataviam vestram videretur. Ut nihil mirandum sit, si sic animati multos adeò à libertate partâ numeretis, qui cùm summos in Rep. gesserint honores, non eo minùs ingenii, doctrinæque monumentis clarissimi fuerint. Sed de illis celebris eruditionis viris, qui, ut dixi, præfuerint Reip. vel præsent, aliàs fortasse commodior sese offeret agendi locus. De Academiâ vero, quæ propius me tangit, unum illud, & si non citra invidiam dixero, in mediis eam bellorum tempestatibus, ac procellis, ita caput extulisse, ut, si annos numeremus, qui non multo plures sunt quinquagenis, Virorum excellentium, & magnitudine, & numero, quasvis provocare Orbis Academiâ possit. Hæc cùm animum subeunt meum, Illustrissimi Proceres, verè vos felices prædico, quorum meritis voluerit Deus tantopere Academiâ hanc, & Universam debere Rempublicam: Neque cives modo, sed externos etiam, qui auxilia vestra exposcunt; adhæc quicquid uspiam elegantiorum est hominum, & amantium studia literarum. Quo nomine, ut vobis ex animo gratulor, ita mihi gaudeo, cui sub imperio vestro in terrâ, ut belli artibus, ita doctrinâ omni florentissimâ, à puero scientiis imbui, & securè hactenus vitam degere, contigerit; Imo qui jam ab annis xv. mistum me videam fulgentissimis Academiæ hujus luminibus, atque id favore vestro; cùm probe mihi conscius sim, splendorem me ex ea accepisse potiùs, quàm eo attulisse. Ut igitur pro affectu illo, erga me tam benevolo, quem aliis etiam beneficiis declarastis, gratum animum testor, offero nunc, quo nihil habeo majus, memet ipsum, ac mecum animi nostri foetum, quem genui adolescens; atque ubi triennio lucem viderat, corpore, & viribus auctiorem produxi, in conspectum omnium; nunc vero post viginti Annorum intervallum, talem vobis sisto, ut dubium relinquat, magisne idem, an alius videatur. Quamquam vero, sobolem hanc nostram laudare, non est meum; eo minus, quia, quo plus ausus fuero promittere, hoc plus necesse habeam præstare: Nisi tamen industriæ saltem mihi conscius essem, minimè ausus fuissèm eam dicare; partim vobis, quos Deus, vice sua in Batavia fungi jussit; partim iis, quos nomine vestro præesse Academiæ vultis. Nec parum me ad hoc animavit, quod propositum mihi fuisset, ut Institutiones hæ, Partitionibus nostris, auctoritate vestra, in Scholas omnes Bataviæ inductis, Commentarii loco forent. Simul speravi, me, hoc labore suscepto, meliùs satisfactis-

tisfacturum muneri, quod mihi abhinc septennio à Nobilissimis Academiæ Curatoribus injunctum fuit. Placuit iis tum, ut non modo temporum omnium gesta tractarem; sed illa etiam exponerem, quæ ad benè dicendi artem pertinerent. Quomodo futurum videbant, ut, quia historia est fons prudentiæ universæ, Rhetorice autem viam ad Eloquentiam munit: juvenus operâ quoque nostrâ, perduceretur ad connubium illud Palladis, & Mercurii, quod Antiquitas Hermathenam vocabat. Morem igitur iis gessi, quibus æquum erat; propensaque adeo iis obtemperandi voluntas, vobis ingrata esse non poterit; præsertim cum summo studio conjuncta, benè de publico merendi, ac potissimum de Bataviæ Scholis, & Academiâ vestrâ. Quamobrem planè ita fore confido, ut quemadmodum ante sexennium Historiam meam de Historicis Græcis, si non pretio fui, at vobis placendi studio, æstimâstis: ita aliquo nunc loco finatis apud vos esse, Commentarios nostros de Rhetorica facultate. Ex quibus nihil, fateor, honoris, Vobis accesserit; sed vestra præcessere beneficia, quæ gratuita erant; nostrum sequitur officium, quod debetur; & quo magis debetur, eo minus poterit displicere.

Deus Opt. Max. vestrum erga studia amorem foveat, & conservet; Imprimis vero prudentiam, & fortitudinem largiatur, quo & domi quietè, & salubriter diu regatis, Bataviæque & fœderatorum proferatis Imperium, non in terris modo vicinis, sed etiam longè diffitis, imo ut facitis, etiam extra Europam. Nisi, post grave hoc, & diuturnum bellum, longa nos pax manet. Cujus spem toto sinu admifero lubens. Sed publica vincat utilitas; quæ curæ erit, & Patri Supremo, & Vobis, Patriæ Patres.

*Lugduni Bat. Anno
cło 16cxxx. IV. Kal.
April.*

X.

Nobilissimis, & Amplissimis Dominis Curatoribus Academiæ Lugduno-Batavæ, Francisco ab Aerssen Equiti, Domino Sommelsdicensi, & Platenfi, Status Consiliario.

Nicolao Cromhoutio, Domino in Urihoven, Curie Hollandiæ & Zelandiæ Præsidi.

Ægidio de Glarges, Domino in Elefmes, Reipublicæ Harlemensis Syndico.

Et Amplissimis, ac Prudentissimis Viris, Gerardo Leonartio, Hugoni Coedicio;

Danieli ab Alphen Illust. Ord. Quæstori in Urbe Leidenfi, & agro Rhinlandico.

Gerardo Lanschot M. D. Consiliario in Collegio Rebus Maritimis Præsecto; Reip. Lugdunensis Consulibus, Curatorum Collegis. Item,

Joanni Wevelinchovio, J. C. Reipubl. ejusdem Syndico, & Curatoribus à Secretis, Gerardus Joannes Vossius, Dedicat Consecratque.

Nobilissimi, Amplissimi Viri.

Cum à mundi incunabulis, hanc naturæ legem fixerit Opifex ejus sapientissimus, ut qui homo fuerit, idem animal sit; quod verò animal est, carere affectu non possit; hominem Ipsum exuere non postulat, qui cum Zenone, & porticu, excindi affectus jubet. Sed cum cæteris quidem animantibus, communes sunt affectus nobis; ratione autem, & sermone, sæcernimur, quorum illa imperium obtinet, cum benè vivimus; hic cum benè dicimus: Illa dominatur affectui proprio; hic etiam alieno. Utroque horum nihil melius esse, ac præstantius constat. At non æquè convenit, quâ viâ ad benè dicendi vim facilius ac certius ducat. Plurimi enim contendunt, ad parandam Eloquentiam, sufficere ingenium non infœlix, modò dicendi usu roboretur. Quorum judicio operam luserimus, signandis istis de arte Oratoriâ. Sed damnari ab iis non possumus, nisi prius ejusdem culpæ ream peragant totam penè Antiquitatem; præ cæteris Aristotelem, & Tullium; acris ingenii, exacti judicii, summæque autoritatis viros; qui de facultate hac, pulcherrima ingenii monumenta posteris reliquerunt. Nec verisimile est, infirmis quoque artibus sua esse præcepta; sublimi
vero

vero Eloquentiæ proprias esse observationes nullas. Si qua etiam facultas, solius naturæ beneficio nixa, nullo artis auxilio vigeret: Poësis sibi illud suo quasi jure depolceret. Atqui, ut taceam de Vetustis; quantis ingenii, doctrinæque viribus, quàm copiosè etiam, Parentum nostrorum ævo, de re Poëtica, egit Cæsar Scaliger, vir veteribus par, major fortasse novis? Quare si non de nihilo dici solet, Poetas nasci, fieri Oratores: multo sanè justius hic labor apud Rhetorem insumitur. Solum cauto opus est, ut ne pueriles tantum præceptiunculæ coacerventur; sed ea afferantur imprimis, quæ placere etiam nec stupidis, nec indoctis possint. Utrum hoc, quod ab aliis nunc requiro, præstiterim ipse in institutionibus nostris; penes vos, Nobilissimi, & amplissimi viri, judicium erit.

* Novum pariter & vetus. Opus ipsum est *καινοπαίδευ**, ac in sex Libros, jam olim à me distributum; quorum tres agunt de

Inventione, & Dispositione; ac totidem de Elocutione, & Pronunciatione tractant. Priores illos L. M. Q. consecravi Illustribus Hollandiæ, & West-Frisiæ Ordinibus; hos posteriores Votivum animi mei Specimen, jure vobis inscribo, qui eorundem nomine Lugdunensi Academiæ præstis. Nimirum studeo eos imitari, qui ædes exstruunt magnificas. Solent hi columnis Tuscanici, Dorici, Ionici, aut Corinthii Operis exornare earum fores, ut continuò aliquid occurrat, quod oculos in se convertat; non eorum duntaxat modo, qui domum subire parant; sed illorum quoque, qui transeunt. Similiter volui ego, in frontispicio utroque tanta comparere nomina, ut decus illa adferant, commentariis nostris; etiam apud eos, qui, obiter adspicere contenti, fortasse legent nunquam. Et sanè si Eloquentia viris

* Lib. 4. de finib. Rhetorice, pars sit scientiæ civilis, ut ab antiquis accepimus; ad quos potius itum oportuit,

quàm eos, qui tot jam annos præstis Reipublicæ, atque iis honoribus fungamini, ubi potissimum regnare Eloquentia solet? siquidem partim in magnis Bataviæ civitatibus, vel senatui estis à consiliis, consiliorumque Interpretes; vel summum etiam tenetis consularis dignitatis gradum; partim in supremis Bataviæ Universæ Collegiis conspici estis, vel præsidendo Inclytæ Curiæ, vel confidendo inter splendidissimos, Ordinis Equestris Viros, ac Senatus Consiliarios: ut taceam (si tacere liceat, quod imprimis huc facere videtur) de obitis toties legationibus, ad Respublicas, Principes, Reges; tot etiam

annis, ad Henricum, Galliarum Regem, nomine, & re magnum. Ita ut, cum multum debeatis prudentiæ; grande tamen aliquid sibi flexanima illa vindicet Regina. Atque hanc quidem laudem vestrarum nunc solam excerpili; quia eam cum celeberrimo, non minus prædicem artem nostram, quàm vos ipsos. Et Homerus quoque Deos, ac Heroas suos, extollere solet à parte aliquâ; quomodo Junonem ab ulnis, Auroram à digitis, Thetidem à pedibus, Achillem ab eorum celeritate commendat. Nec solum tamen Operis me argumentum compulit, ut hæc vobis dicarem; sed eodem me hortabatur vitæ meæ conditio, ac munus quod obirem. Quemadmodum enim Eloquentia, nec non tutela artis Oratoriæ, maximè convenit iis, qui civibus præstunt: Ita qui sustinet, aliquas in Academia partes, optimè Curatoribus ejus, non publicæ modò, sed privatæ etiam, industriæ suæ rationem reddit. Id nunc tacitus quodammodo præsto, loquente pro me Operâ hâc meâ: ac verbis etiam idem hoc loco facerem lubens, nisi satis vobis constare arbitrarer, quomodo triginta hos annos decurrerim, publicè docendo, scribendo, privatim plurimos juvando, idque in muneribus variis, & difficillimis, & quæ singula totum penè hominem requirerent. Quamquam verò satis videam, paulatim sic atteri vires, ac fortasse fraudi etiam fuerim meis; cum non magis operosum sit pariter forbere, & flare, quàm totum se Musis dare, & privata sectari commoda: me tamen vitæ sic actæ per tot annos, nondum poenitet. Quippe præterquam quòd animo sic magis satisfeci meo; cui nihil unquam jucundius fuit, quàm in studiis proficere, & ore, calamo, operâ prodesse quamplurimis: Deo etiam, qui per Reip. & Academiæ Præfectos tam variam mihi provinciam mandarat, conscientiam meam melius probavi. Præterea tot bonorum mihi conciliavi amorem, etiam illorum, quos Deus in Illustri loco collocasset; ante omnes ipsius, quem debita venerationis causâ nomino, Magni Magnæ Britannici Regis KAROLI; à quo insperato mihi, homini extero, collatum tam grande beneficium, per quod Reverendo Cantuariensium Canonicorum Collegio, sum insertus, quiescere me neutiquam finit; sed assidue stimulat, ad porro etiam de doctrinarum studiis benè merendum; ne unquam gratiâ hâc Serenissimi Regis, & Inclytæ Britannorum Gentis, videar indignus. Vester etiam affectus tam benevolus erga me, Nobilissimi, & Amplissimi viri, faces ad hoc ipsum animo meo mirificè subdit; eoque dulcius mihi fuerit, placere vobis hac parte, quo dulcius

est vobis, bene mereri de Academia Universa. Quod ut nunc ferè hominum sunt mores, verè est seculum corrigere. Neque deerunt, qui animum hunc vestrum, seris pandant Nepotibus: quæ post conscientiam optima est benefactorum merces. Laudi dabitur Ordini nostro, scripsisse quæ legerentur. Sed magis erit laudi Vobis, egisse, quæ scriberentur. Quantoque majora erga literas, & Academiam, merita erunt vestra; tanto etiam magis in secula vestrum ibit nomen: suumque ei decus constabit, quamdiu uspiam studiis honos erit. Votum superest, Nobilissimi, & Amplissimi Viri, ut vos Deus Reip. pariter atque Academia incolumes, diutissimè præstet, ac melius meliusque de utrâque merendi, & animum vobis suppetet, & vires.

Lugd. Batav. Anno cl^o lxxxv.
Prid. Kal. April.

XI.

Illustri & Generosissimo Juveni, Erico Oxenstierna, Magni Axelii filio, L. B. in Kimitho, Domino in Fiholm, & Tideun, &c.

EO jam potentia provecta est, Regni Suedici magnitudo, Illustris Baro Oxenstierni, ut ad pristinam illam Gothorum maiestatem, pleno, rapidoque gradu ferri iterum videatur. Nec aliter esse potest, quin Excellentissimus, & Illustrissimus Tuus Pater, Axelius Oxenstiernius, Regni Senator, ac Cancellarius toto Orbe Inclytus, Deo gratias agat immortales, quoties cogitat labores, & consilia sua, & domi, & per Germaniam, & terris aliis, ita prosperè cessisse, ut nihil non bene verterit Suedis: Regnumque licet antea metuendum, nunc eò pervenerit fastigii, ut horrorem pepererit inimicis, pluribus invidiam, toti verò mundo stuporem & admirationem. Gloriosum certè nasci in tali populo; sed quantò gloriosius, nasci ex illo, cujus divina in Regnum merita, honores merentur, (absit invidia dicto) iis proximos, quos vetustissimi illi Getæ Zamolxi, Legislatori suo, decreverunt; felix es itaque, quod alterum Gothorum Zamolxin habeas Parentem. Sed si ob hoc solum fortunatum Te censerem, quam ego propriis tuis laudibus essem injurius? Neque enim sublimitas generis tui, quam Majorum potiùs laudem censet, tantum tibi conferre possit, quantum ipse virtute tuâ adquisis. A te igitur incipiat, qui animi tui dotes enumerare velit; ac sic etiam habebit, quod perficere vix possit. Mihi animus non est, tale quid adgredi: Et

etiam si ea mens foret, neque locus, neque tempus, neque ille cui hæc scribo, istud patitur. Sufficit illa dicere, quæ ipsemet, dum hic viveres, coram perspexi; quæque omnes norunt. Perspexi ipse insignem tuam comitatem, ac humanitatem: qua etiam minimis te æquasti; quæque me admonet, ut gratias quomodocumque rependam. Alterum verò nulli non cognitum, est illud, quod cum pauci admodum sint, qui de generis sublimitate Tecum certare, aut possint, aut velint: difficilius tamen sit invenire, qui valeat Tecum contendere amore, quo literas, & literatos prosequeris. Atque hæc duo tanti ego censeo, ut quamvis de cæteris virtutibus Tuis maximis, paulisper vellem cogitationem deponere: vel sola tamen potuerint me impellere ad illustri nomini tuo inscribendum literarias hæc commentationes nostras. Sunt illæ de duplici Sermone: Uno Veterum Romanorum; altero postea consecuto, earum Gentium, quæ quicquid pene in Occidente possederant Romani, in suam rede gere potestatem; cumque Imperio magna ex parte linguam ipsam transfuderunt. Nemo autem ignorat in iis, quas dicebam, Nationibus, facillè primas ferre Gothos vestros. Eoque jucundius futurum, ubi in parte operis nostri conspicies tot vestigia Vocabulorum, quibus usi Gothi, & finitimæ Gentes, non tam linguâ, quàm sola dialecto, diversæ. Accedit quod non parùm hinc lucis accesserit legibus, quas Gothi variis in terris tulerunt. Ut ante annos amplius centum supra milles in Hispaniis, ac Galliis (cujus pars Sidonio Apollinari Gothia vocatur) Euricus Rex, ut ex Isidoro cognoscimus. Item centum annis post Leuvigildus; posteaque alii, atque alii. In ipsa quoque Italia Theodericus, Wisigothorum Rex: à quo Leges Theodericianæ, ad instar codicis Theodosiani, sic vocati à Theodosio Juniore, qui non multo præcesserat. Ejus Theoderici est Edictum Capitulum CLIV. quod ipse se dedisse ait, *devictis tam Barbaris, quàm Romanis*. Nempe, Dominus Romæ factus, loqui voluit pro more Romanorum; qui ut Græci antea præter se cunctos vocarant Barbaros; ita ipsi, præter se, & Græcos, omnes Barbaros dixere. Nec in Barbari nomine convitium fuerit, si, ut propriè sonat, Extraneum intelligamus; quomodo tam Romanus fuerit Barbarus, si in lingua peccet Gothica, quàm Gothus in Romana. Totum enim hoc est ex genere eorum quæ relata, Græcis τὰ ἑθνικὰ, nominantur. Itaque videmus ab Arabibus, in Asia quidem Barbaros nominari Græcos, Syros, Persas, & Ægyptios; in Africa contrà sic dici Hispanicè, vel Latine loquentes. Porro

Porro partim ex illa loquendi consuetudine Romana; partim quoque (sic sanè Veterum more, toto etiam opere loqui liceat) barbarâ illâ, conflata est hæc commentatio nostra; quâ operam dedimus, ut tum eorum inserviremus commodis, ac quibus nihil in sermone gratum est, nisi auribus cognitum Romanis; tum illorum etiam qui intelligere cupiunt Scriptores, linguâ usos confusaneâ, ac miscella ex Veteri Romana, & illa imprimis nationum, quæ subegerunt Romanos. Dixerit aliquis, si non in alio desudâro, in re tenui hanc operam, ac tenuis quoque gloriæ fore; quia circa verba solum, non res ipsas, versetur. Sed qui sic sapiunt, parum intelligunt, quantopere ad Romanam facundiam, ac prudentiam universam; verborum conferat scientia, ac delectus. Nec enim absque delectu, quem eloquentiæ originem esse Cæsar censebat, vel olim elegantiam consequi Romanam fuit; vel nunc, in sermone Romano, ipsam effugere barbariem conceditur. Unde hæc sic dominatur, temporibus nostris in monumentis virorum non è vulgo; inque publicis personat pulpitis, etiam eorum, qui se profitentur Doctrinarum duces. Non dubium igitur, quin majus quiddam sit multorum opinione, cum ea pedem comminus conferre; etsi nimium sibi promittat, qui propterea speret, profligare se eam penitus posse. Sufficit, si illis saltem utilis navetur opera, quibus de luto meliore præcordia finxerit Prometheus; quales nunquam literis dèrunt. Alia interim est ratio ineunda seculo nostro; quàm olim Cæsaris Julii, & Augusti temporibus. Tum (quicquid alii contrà arbitrentur) melius loquebatur vulgus rude, & indoctum, quàm nunc, (nisi duos tres excipere è numero non magno lubet) fortasse ipsi literarum Principes solent. Cui felicitati Veterum, accedebat diligens exercitatio apud Magistrum. Ad variæ etiam eruditionis laudem addiscebant elegantiores priscum ac desitum sermonem, non ad usum, sed ad intelligentiam Scriptorum, qui uno altero seculo præcessissent. Nam puerorum instar sapere judicabant, nisi qui priorum etiam temporum memorias complecterentur. Utcunque verò ex noticia obsoletorum, aliquis etiam ad nos fructus redundet; videlicet ad cognoscendam vocabulorum proprietatem, quæ ab iis originem ducunt: minutum tamen est hoc præ illis temporibus, quibus rancidi illius sermonis scriptores extarent. Nunc postquam nihil nisi laceras eorum reliquias, velut è magno naufragio, habemus; pro illo desita dicendi, alius est subeundus labor, in cognoscendo sermonis, qualis multis sæculis fuit, postquam à tot gentibus exteris, dis-

cerptum est Imperium Romanum. Nec tamen ab iis hoc exigo, qui nondum è barbariei cœno pedem posuere; sed iis sedulò lectis, qui dictionem formant. Scio, delicatulos multos hanc doctrinarum partem, pejus odisse, quàm ululam fullones solent; sed defraudent illi animum, ut lubet, suavissimo tot rerum utilissimarum pastu. Cordatiores satis vident, quantum studiis decedat universis, si ob solam dictionem dispretui sit, quicquid penè scriptorum tempora nobis non inviderunt; jam inde ab Antoninis, vel Severi, filiorumque imperio, usque ad Atavos, vel Tritavos nostros. Itaque sic statuo, etsi multò augustius sit sapere, quàm dicere: esse tamen dignum sapiente, intelligere omnes, etiam Barbaros; ac interim convenienter loqui auribus Romanis. Nec ita malè agitur cum studiis, ut non multi hac in re, nobiscum sapiant. His igitur consultum ivimus gemino isthoc labore nostro. Quem, tibi, illustris Baro, comitem do reliqui itineris, ac opto, cupioque, esse pignus, ac monumentum devotissimi affectus. Eò gratum, acceptumque fore confido. Quid enim non mihi spondeam ab illo, cujus acre acri ingenio, judicium junctum mirabamur, priusquam Bataviâ discederes? Quid igitur nunc non promittamus nobis, post aditas, & lustratas Gallias, Italiam, terrasque alias; post cognitâ tot nationum leges, ac mores; post Principum, summorumque virorum, amicitias; imò cum divum propagine, de orbis negotiis sermones? Nec minus probatum iri confido exactissimo illi iudicio fratris tui, D. Baronis Johannis Oxenstierni, Regni Suedici Senatoris, ac Legati ad conventum Monasteriensent; ubi nunc permistus est, tot magnorum Regum, ac rerum publicarum caduceatoribus magnis, de hoc uno consultantibus, ut Orbis Christianus, armis positus, tranquillitate fruatur longâ, omnibus victoriis potiore: vel si tantus est bellandi amor, arma convertat in communem nominis Christiani hostem. Et cur non persuadeam mihi, per inclytum hoc fratrum par, nec sine laude nominandum, posse etiam laborem nostrum, impensius probari Parenti vestro illustrissimo, incomparabili viro: qui nunquam desiit, aut desinet animo meo obversari, ex quo præsentem in hac urbe vidimus, loquentem audivimus, omni ab eo comitate excepti sumus. Relucebat in vultu blanda severitas, & facilis majestas. In sermone certabant verborum dignitas, & animus nihil humile cogitans. Ubique ingenium, & eloquium, gratiæ, ac eloquentia se exserebant. Imprimis in stuporem omnes trahebat cogitatio rerum maximarum, quas

ab excessu invicti Regis Gustavi, per universam Germaniam gessisset. Sed ista melius dicent variarum gentium annales, quibus sic præterita narrabuntur, ut iterum, imò semper videantur geri; terminari nunquam. Mihi verò, cui non ea est facundia, ut rerum magnitudine vinci nesciat, propositum est, ne culpâ ingenii tantas deterere laudes pergam, eas potius cum silentio venerari; ac definire hunc sermonem, simul ac non ficto officio, sed voto, ab imo pectore proficiscente, tibi, illustris Baro, totique familiæ Oxenstierniæ, omnia fuero felicia comprecatus. Magno quidem parenti, ut vegetâ & diuturnâ fruatur senectâ, diuque consiliis suis adjuvet Serenissimam Reginam, Phœben illam septentrionis, illam invictam, & nunquam vincendam Amazona. Illustrissimo, & excellentissimo Fratri, ut in tam illustri, & Orbi tam diu exoptato coetu, ejus quoque ope, tandem aliquando, Jani claudatur Templum, & Musarum illud aperiatur. Tibi vero, illustris Domine, ut id itineris, quod restat in Patriam (quæ quasi eminens conspicua, jam brachia protendit, gnara quantum tibi de virtute tua possit promittere) pari absolvas fortuna; quamque de te universo Orbi spem fecisti, feliciter impleas.

Amstelodami. Illustris & generosissimi nominis tui
clo lxx. xlv.
Kalend. Sextil.

Cultor Devotissimus,

G. J. Vossius.

XII.

Viro Nobili Clarissimoque, Georgio Rattallero Doubletio, in suprema Hollandiæ, & Zelandiæ Curia, Senatori Amplissimo, Gerardus Joannes Vossius, S. P. D.

Nobilissime Amplissimeque vir,

Offero tibi librum; ambigo ipse, novumne dicere debeam, an antiquum, an utrumque eorum. Atque huc magis inclinat animus; unde novantiquum nobis liceat nuncupare. Longè maximâ ex parte antiquum esse, facile ipse cognosces; ut qui jam ante annos XXX. cum primò hæc consignâssem, non legeris ea solùm; sed juventutem quoque sacris initiatam studiis, sub præsidio meo publicè, ut Scholarum est mos, audieris eadem defensitantem. Nec rationes tamen deficiunt, cur, ut tibi gratior sit

opera hæc nostra, ausim eam ab aliqua etiam novitate commendare. Antea enim disputationes singulæ prodierunt seorsim, justisque temporis intervallis. Nunc universas, quæ ad Baptismum quidem pertinerent, uno quasi fasce complexus fui. Nec necesse putavi, ea ubique verba appendere. Spontè enim illud prædico, siquid rectius, vel clarius, posse dici putarem, minimè verum me esse, illud vel immutare, vel addere. Jam verò quod caput est rei, aliquas hîc dissertationes comperies, antea ineditas: scriptas quidem quadriennio, quo ab illustribus Hollandiæ, & West-Frisiæ Ordinibus commissum mihi regimen fuit, Theologici, quod Leidæ habent, Collegii: sed postquam in Academia ibidem cœpi profiteri Sacræ, Ecclesiasticæ, externæque historiæ tempora (ut de eloquentiæ studiis, curisque aliis, nihil nunc dicam) propter multiplicis oneris, ac muneris, quod susceperam, difficultatem, propè habitas pro derelictis; ac nunc demum anno ætatis secundo & septuagesimo, quo magis magisque lethi memor, mea convalesco, publici juris factas. Variæ autem & graves me causæ compulerunt, cur ista, potissimum sub præclari nominis tui auspiciis, in lucem prodire vellem. Primum quidem, quod beneficia à tot jam annis mihi præstita, ac meis, jam diu, me commonefecerint, ut si paria referre non possem, qualecumque saltem grati pignus animi reponerem. Doluit enim sæpè, fateor, quòd cum pro aliorum in me benefactis gratiam, quo potui pacto, studuerim rependere: tibi uni, etsi neminem sciam, cui videar mihi devinctior, nullo hætenus argumento, testatus fuerim animum, atque affectum meum: tanquam per te solùm, mihi esse ingrato liceret. Accessit, quod minimè animus mihi foret, hæc cuiquam offerre, nisi in hujusmodi versato. Rarum in aliis quidem, si uno in studii genere eminent. Tua verò laus est, quòd, qui te jus audiant dicentem, omni ætate putent operam dedisse jurisprudentiæ. Quique aures, atque animos, adhibent differente de divinis, nihil aliud nisi sacra tractasse arbitrentur. Atque idem in politioribus literis existimant, ac Philosophiâ universâ. Et sanè, de omni hoc fieri vix aliter potuit, qui Parente tanto, Philippo Doubletio, nascereris. Vir sanè is, luculentâ erat natus familiâ, cui decus etiam addebat, stemma maternum è Batavâ stirpe Dammiâ; in qua, ante annos penè ducentos quinquaginta, tres Dammios fratres, cum Dammio cognato, raro exemplo, Sigismundus Imperator, rogante Guiljelmo, Comite Hollandiæ, equestri ornârat dignitate. Sed genus & proavos, alienas censet laudes: ac

per

per te effet, nec tangere hujusmodi liceret, quamvis jam ante annos quasi quinquaginta mihi cognitissima. Sed mos hætenus geratur. Illud igitur potius dicam, virtutibus suis fuisse longè nobiliorem. Quas cum propagari in liberis, ac nepotibus vellet; nihil æquè studuit, quàm ut tibi sic nato, à primâ etiam pueritiâ, præficeret optimos pietatis pariter, ac doctrinarum magistros. Gnarus videlicet, quantum cæteris antistarent vera animi bona; cujus rei ex se ipso capere poterat documentum: ut qui, postquam Parentem suum, quem honestissimo sciret semper loco, in avitâ Mechliniensium urbe habitum esse; perque fluctus illos decumanos decumis suis ab Albano Duce excitatos, cum multis summis viris in Hollandiam vidisset ejectum: eam mox his terris virtutibus suis conciverit admirationem sui, ut oculis omnium in se coniectis, comitatus Hollandici rationibus, atque insuper foederatæ totius Belgicæ præficeretur ærario. Nec leviter ejus fidem, ac merita declarat, quòd in posteriori illa dignitate, defuncto suffectus sit filius natu maximus, Joannes Doubletius, Sanct-Annæ-Landiæ Dominus, vir summæ virtutis, atque existimationis: mox filius alter Philippus, vir benefactis florens; qui cum tanto omnium applausu nunc munus hoc sustinet. Sed de eximiis horum laudibus dabitur fortassè aliàs melior dicendi locus. Ne propterea tamen in patre, vel fratribus, sistam, facit *Margæti* mater tua, cordatissima matrona, cui multum sapienti supra sexum suum, cum antea semper, tum præcipuè post mariti excessum, nihil æquè curæ fuit, quàm ut simillimus evaderes Parentis sui, Georgii Ratalleri; quod nomen non sine numine, in sacri baptismatis fonte, imposuerunt Parentes, multum tam auspicato vocabulo favente Avia Loïa, Georgii Ratalleri viduâ; quicumque quoties sermo mihi fuit, non aliter judicavi, quàm conspiceret me, atque audire, reliquias aurei seculi. Nempe hoc ipso nomine excitare te à puero studuerunt, ad ejus viri vestigia premenda. In quo nec prudentia illos destituit, nec felicitas. Nam ut more Homérico, à posteriori initium capiam, vivam in te magni avi imaginem nunc omnes intuentur: Ut qui in dignitate illa senatoriâ, verè sis, quod gentilitium Ratalleri cognomen sonat, *consilio omnibus*. Quàm latus, ac lætus, mihi se offerret campus de laudibus tuis differere volenti? sed jam dudum metuo, ne ut aliis qui te norunt, jejune dicar, atque aride de te locutus; ita uni tibi videar fuisse nimius. Quare alteri capiti insistant, quod in hac etiam, ut Græci vocant, *δραματι*, quam magnus Plato sapientis propri-

am ducebat, prudentiam non minus aperit, quàm affectum. Nam is avus tuus Ratallerus fuit, ut sapientiâ & fide, nulli esset secundus. Hoc jam omnes fore augurabantur, simul ac à Galliz, & Italiæ Academiis, redux Patriæ se iterum stitisset. Sed magis postea in multiplici adeò dignitate, se exeruit virtus ejus incredibilis, ac propè divina. Primum cum in supremum Arteliæ Concilium est adlectus. Exinde ubi à Cæsare Carolo V. in magno Belgicæ Consistorio, quod est Mechliniæ, senator est creatus, & libellorum supplicum Magister. Postea etiam cum in ditione Provinciæ Ultrajectinæ, supremi senatus præses fuit. Quando item Belgarum suorum nomine, tanta cum gloria legationem obiit, ad serenissimum Daniæ Regem. Magna hæc, imò ingentia esse, inficias iverit nemo. Longè tamen hisce majus existimari debet, quod difficillimis temporibus istis, animum semper æquissimum, consiliaque moderatissima, attulerit rebus turbatis. Quod sub Margaritæ, Ducis Parmensis, gubernatione inter alias præcipuè Valencenarum urbs; sub Matthia Archiduce, tum Groningana, tum Campensis civitas, suo & totius Belgicæ bono, ubertim fuere expertæ. Sed facile mei Ordinis hominibus persuasero, quantacunque hæc sint, magnam tamen iis acceptionem exinde fieri, tum quod in tanta dignitate, singularis esset comitas, ut Gratia cum, quasi digitis suis, finxisse viderentur: tum quòd ob variam, & elegantem eruditionem, à summis etiam viris, inter seculi sui decora reponeretur. Quo loco iis fuisse, mirabitur nemo; qui viderit pulcherrima ingenii, doctrinæque ejus monumenta. In quibus (ut taceam de metrica, quam adservas, Psalmorum paraphrasi) non postremus debetur locus Sophoclis, quotquot extant, tragœdiis, Latino ab eo carmine tam fide bonâ redditus; quàm postea malâ ex prima tragœdiarum trium editione, suam in versionem multa adeo transulit Johannes Lalemantius Heduuus; vir cæteroqui pereruditus; ut ostendunt quædam Hippocratis opuscula, donata ab eo latinâ togâ, & doctis illustrata commentariis. Neque ignoro, quid in Sophocle Latino requisierit vetus amicus noster, liberi satis oris, ac calami. Nobis verò arduum illud semper visum fuit, quod Nobilis Adolescens, Latinè Græcæque doctissimus, purè adeo expresserat genuinam grandis Poetæ mentem. Et scimus, vix hominis esse in omnibus omne punctum ferre: quando etiam in dimidiato illo Menandro, quem viritum terit, teretque usus publicus, vim comicam desiderârît, (at quantus vir!) Julius Cæsar. Nempe nulli Deus omnia dat magna; quale etiam est adsequi Sophoclis cothur-

cothurnum : quo si sublimiorem novisset Poetarum Princeps, non hunc potissimum nominasset ; cum laudare vellet tragœdias, sive Varii sui, sive Afinii Pollionis. Præterea mirum, non venire istis in mentem, translationem illam suo verius esse Authori extortam, quam sponte emissam in lucem. Itaque ipse maluisset per intervalla superaddere *πρὸς ἄλλο*, quod unum (quo jure id faciant in interprete, ipsi viderint) *οὐ μὴν πῶς* requirere se aiunt. Quasi non hanc etiam laudem adimpleverit in Elegiacis, Epigrammatis, atque aliis, quantum quidem sineret argumentum, curareque istiusmodi permitterent, Magni Regis & Reipublicæ negotia, quæ vellem homines umbratici (citra convicium hoc dico) magis attenderent. Utinam verò adhuc superessent commentarii ejus cedro dignissimi ; quibus partim jam maturâ ætate, partim etiam fenex, complexus fuit rerum se, quâ senatore, quâ senatus Præside, judicatarum observationes exactissimas. Nunc (triste) eâ parte nihil, nisi plorare nepotibus reliquerunt obscenæ illæ Harpyiæ, quæ in thesaurum hunc involârunt : credo ut grandia inde, atque arcana, venditantes pro suis, majori essent admirationi cæteris. Verùm his ulterius insistere si parem, metuum prorsus, ne, contrâ quàm præcipi solet à dicendi Magistris, fiat *μὴδ' ἄνδρ' ἐπὶ πᾶσι*. Redeo igitur eò, unde abieram ; ac quia initio omnis in eo fui, ut exponerem, cur inscripserim hunc laborem nomini tuo : deque causâ principe satis mihi videor dixisse, pauca addam de altera hac ; quod si putârim aliis me testari melius posse amorem tibi debitum. Ac cœptus quidem ille erga admodum adolescentulum, cum omnes caperentur indole, præclara quæque promittente ; multum verò idem firmatus fuit suavissimo annorum prope XII. convictu, partim in principe Batavorum urbe, partim in Academia eorundem. Postquam verò lustratis Academiis Britannicis, Gallicis, Italicis, restitutus es tuis, cum Ulysse Homericò, mores edoctus, & urbes ; tanta idem incrementa cepit, ut ad fastigium pervenisse amorem hunc putarem. Crevisse tamen video, dum pro beneficiâ illâ naturâ obstringere me, meosque non cessas. Pro quo nihil occurrit, quod reponam præter affectum tibi, tuisque devotissimum, & hujus apud posteros, testandi ergo (ut mei ordinis homines solent) chartaceum munusculum ; quod tamen gratissimum fore confido, vel argumenti causâ. Quid enim magis nos meditari assidue decet, quàm sacramentum illum, unde, inter alia, duo illa magna ad nos redeunt bona ? Primum quod eo inserimur Ecclesiæ, ac reddimur membra Christi ; cujus spiritu vivimus,

quotquot eum induimus. Deinde quod in hac vita, perpetuis tentationibus obnoxia, suavissimum inde solatium percipimus adversus omnes mali spiritus insultus. Quorum utrumque accuratius, in opere ipso exponimus. Faxit Deus Opt. Max. Nobilissime, & Amplissime vir, ut labor hic noster aliquid adferat fructus veræ pietatis, & Antiquitatis Ecclesiasticæ, studiosis. Atque ab eodem numine precor, ut conservet tibi amorem nostris, ac diutinam largiatur valetudinem, & vitam ; non modò Reip. causâ ; sed etiam propter suavissimos liberos ; imprimis filiorum trigam, tenerâ hac ætate nihil, nisi optatissimum, in studiis, & moribus, spirantem ; Philippum, Joannem, Florentium : quorum si me precibus ad Deum commendem non minùs, quàm tanti Parentis, nihil abs re fecero. Scio, quàm illa innocens ætas grata sit Deo ; cui ex ore etiam parvulorum nascitur robur, & gloria, ut divinus Psaltes ait. Illis ego pro suo erga me adfectu, vicissim opto, ut parentum insistant vestigiis, avi etiam utriusque, & majorum deinceps longâ serie.

Amstelodami, Anno æræ Dionysianæ cō Idc XLVIII. III. Idus Martias. Quo die (ut unum hoc de nostro, Scholastici hominis, quasi jubilæo, addam, quando scis, quàm ægrè apud te sermonem definam) annus expletur quinquagesimus ; ex quo post primum ætatis septennium balbutiei, & Grammaticæ datum, alterosque annos septenos Latinis, & Græcis literis impensos, ac totidem in Philosophorum præcipuè spatiis transactos ; ex Senatus Academici autoritate apud Leidenfes (& fortassè hoc eo est commendabilius quòd honos ille, quantum memoriâ omnes tenerent, à Lycei primordiis ante me illic contigerat nemini) summam studii Philosophici lauream mihi conferebat Theologus, ac Philosophus clarissimus, quo præceptore jure gloriator, Petrus Molinæus. Hoc jam quia de me est, existimabis fortassè, meliùs potuisse præteriri. Nec repugno, sed facilem mihi scio apud te veniam fore ; quia quâ prudentiâ es, nostri mores senum ; quibus adolescentiæ, primorumque studiorum dulcis esse solet, ac jucunda recordatio.

XIII.

Illustribus, ac Generosissimis D. D. Chathio, & Christophoro, Achatii filijs Burggravijs & Baronibus à Dhona.

Illustres & generosissimi Domini,

SI res universas non iudicio infanientis vulgi, sed suo ponderemus momento, ut sapientes decet; primas pietati dabimus, prudentiæ alteras, tertias eruditioni: cui & ipsi locus in hac triga debetur, quia ad priores duas munit viam, ac fomenta ipsam, & alimentum præbet. Ac quanto hoc disciplinæ singulæ felicius præstant; tanto propius absumt à laudibus pietatis, & prudentiæ; quibus principem locum nemo unquam denegavit. Unde illud effici puto, in doctrinarum Orbe, nihil esse commendabilius Virorum Præstantium Vitis. Ab hoc enim fonte haurimus, quorum Exemplo, earumdem virtutum æmuli fiamus, atque imitatores. Propterea nullus satis eorum laudavit industriam, qui præclare gesta posteris prodiderunt. Atque in eo quidem non temerè aliquem mihi adversaturum existimem. Sed alterum est, in quo iudicium multorum minime congruat cum iudicio nostro. Vident plerique, si memoriæ omnium temporum consulantur, nihil esse difficilius, quàm ut ita literarum monumentis consecremus res superstitum; ut non aliquid benevolentiae, vel odio, spei, vel metui demus. Hujus igitur periculi fugâ declinantes in contrarium, de iis scribendum contendunt, quos avorum potius, aut Proavorum, quàm nostra, vel Parentum ætas conspexerit. Quales non satis expendere videntur, quàm sit operosum in rebus toto seculo remotis vera falsis internoscere. Ac ne illud quidem cogitant, quàm multorum suspecta sit fides, quia miris aliquem laudibus extollant, post unius alteriusque ætatis silentium, extinctis jam omnibus, quorum testimonium adversus illos pondus habuisset. Ut ab hoc etiam periculo immunes simus, expedit, ut mediam insistamus viam, atque eorum potius gesta, publici juris faciamus, qui non amplius rebus intersint humanis, ac ætate tamen, tum Parentum floruerint, tum nostrâ. Id nunc fecimus in Illustri, ac generosissimo Patruo vestro, Fabiano Burggravio à Dhona, Domino in Karwinden. Cujus eximiae laudes, adhuc in omnium memoria versantur: cum septennium solum effluxerit ab ejus excessu. Virum hunc cum dico, non tam hominis nomen, quàm Virtutum plurimarum, mihi videor dicere.

Genere enim erat Nobilissimus; sed genus Nobilior animus exornabat: Quem ille à puero imbuerat doctrinâ, non tantum seriâ illâ, quæ prudentiam adfert; sed etiam amœniori, quæ ex Musarum, & Charitum commercio nascitur. Atque idem cum Doctrina, Eloquentiam feliciter sociarat, planè ad veterum mentem, qui cum statuerent, Palladem, & Mercurium coalescere oportere, Hermathenam nobis effinxerunt. Nec satis fore putavit, si omnia sciret, imò nec si graviter & copiosè, de omnibus diceret; nisi idem optima faceret: Ut cum multum acceptum ferret eruditioni, & facundiæ; plus tamen cultui divino, & probitati deberet. Quibus etiam infervire voluit, quicquid studii posuerat in cognitione Naturæ: quod multum sane erat. Dicere autem solet, agnoscere se ex Operibus Dei, omnipotentiam ejus; ex horum ordine sapientiam; ex usu eorumdem, bonitatem & misericordiam ejus. Ita ille omnia referebat ad pietatem; quæ undique relucebat è dictis, factis. Cujus rei testes dare possumus, tot genere, dignitateque, tot eruditione Clarissimos viros, qui sermones ejus avidis hausere animis. Imò præclaræ hujus mentis imaginem quandam adhuc videre est, in Epistolis ejus ad summos viros exaratis: Imprimis iis, quas ad vos, Illustres D. D. Barones, & generosissimos fratres vestros, utpote sanguine proximos, imò affectu liberos, frequentes admodum dabat, interdum Germanicè, sæpius Latinè, Gallicè, Italicè, idque etiam cum septuagenario jam major foret. Hæ superstites literæ, ut Sermones nunc mittam, abundè documento fuerint, eum non, multorum instar, hæere solitum in causis, uti vocant, secundis: at nec contemnere eas; sed eousque ascendere, donec requiescat, in potenti Dei dexterâ, ac promissis ejus. Unde etiam, cum retulisset, scitum illud Imperatoris Caroli V. ad filium Philippum, Brabantiam esse consilium suum, Hannoniam nobilitatem suam, Hollandiam robur suum: altius hoc Batavico robore assurgens, At inquit, fortitudo nostra Deus est. Per fidem enim sancti vicerunt regna: ut divinus ad Hebræos scriptor ait. Atque eo ille animo, in omni vita erat. Ubique etiam se exserit patientia ejus in adversis. Amat enim affigi à Domino, seque solatur illo Apostoli; ad bonum simul adjutare omnia diligentibus Deum. Nec eum de statu mentis dejicit, piorum infelicitas in hac vitâ: sed cogitat assiduè, iudicium Domini incipere à domo sua; Eum castigare quos amat, partim ut peccata corrigat, partim etiam ut eos patientia imbuat, & filio suo reddat conformes. Negat quoque in hac vita imaginandum nobis aureum seculum;

cum

cum Davidi in summa etiam felicitate obversentur Valles mortis. Si diutius cessent auxilia divina, ita colligit secum, vel peccatis nostris quasi compedes injici divinae bonitati; vel propterea opem differri paulisper, ut postea tanto majori cum gloria liberemur. Ubi res in extrema quasi tegula consistunt, pejus quam inter sacrum, & saxum, ut dici solet; non hastas propterea abjicit; sed sic se, sic alios affatur (quid enim prohibet, quo minus hic etiam aureola ejus verba adscribam?) *Rationes Tecum, mi homulle, in eas, quoties Deus te languentem recrearit, errantem reduxerit, periclitantem defenderit; quoties benignus hic hospes instruxerit tibi mensam, unxerit caput oleo, implevit calicem vino. Nemo hoc Pastore & hospite benignior, nemo liberalior. Dominus Te pascit; non egebis. Eris Ovis Dei benedicta; Conviva Dei acceptus. Vives in morte; lucebis in tenebris. Egressus ex hoc mundo, ingredieris in domum caelestem, & cum Jesu gaudebis aeternum.* Hujusmodi animum omnia illius spirant. Nimirum quaelibet metiebatur consolatione illa propria filiorum Dei. Unde nec poterat adduci, ut miseris accenseret, vel Jobum ulceribus scamentem, vel Lazarum de petigine squalidum, vel Paulum in carcerem conjectum. Contentebat autem tales, in calamitatibus suis virefcere palmae instar nivibus pressae. Quod si civiles etiam virtutes, attingi placet; in his quoque, ex Socratis consilio, operam semper dabat, ut is foret, quem haberi se vellet; quo uno non alia est melior, & expeditior ad solidam gloriam via. Ac talis ille, omnium bonorum judicio censebatur. Imò quanto nosceretur penitius, tanto majora in eo virtutum praemia conspiciebantur. Quemadmodum enim in coelo stellae sunt, quas non videas, nisi adhibeas inventum nuper Telescopum: Ita & in eo fuere laudabilia multa, quae nescirent, nisi qui curiosius observarent. Inque tot virtutibus imprimis relucebat modestia singularis; quae fiebat ut cum summis ipse animi dotibus polleret; maximè tamen eas in aliis veneraretur. Tantus tamen vir effugere non poterat, quo minus cum ventis suis circumflarent malevoli. Quorum omni tempore tanta esse copia solet, ut eorum numerum, nec inire possit Archytas Tarentinus,

Quem, maris & terra, numeroque carentis arena Mensorem.

perhibet Vates Venusinus. Sed utcumque saevirent invidiae turbines, non ideo tam heroici animi vir animum despondebat. Sciebat, nullum esse Euripum adeo instabilem, neque Aegaei maris fluctus tam turbidos esse,

sub Arcturi occasu, quam plebis esse voluntates solent. Videbat, uti non semper sunt Alcedonia, nec terrarum uspiam, veris amoenitas semper obtinet: Ita & vicēs esse rerum humanarum, ac maxima quaeque esse obnoxia calumniae procellis. Videbat, si fortiter clavum occupet, sussepturam undis navem: sin propterea à gubernaculis recedat, periculum naufragii fore. Quare hominibus improbis medium ostendebat unguem: Imò lucri hoc ex iis faciebat, quod tanto navigaret circumspēctius, quasi inter Scyllam & Charybdim. Ita ille invidiam vincebat, virtute alumnum suum facile vindicante. Et profecto qui vivere velit, ubi non sit irrequietum, & nequissimum obrectatorum genus, non ei in Orbe hoc quaerendae sint terrae, sed magnis itineribus eundem sit ad Lunam ubi terram novam jam olim somniabat Xenophanes; qui & suos sectatores invenit. Neque cum laudes hasce in unum congero, morem sequor multorum, qui veluti Zeuxis, Venerem picturum Crotoniatem, pulchritudinem multarum Virginum, in unam transfulerat imaginem: Ita ornaturi aliquem laudibus, quae in singulis commendatione digna invenerant, haec uni tribuunt universa. Nihil enim hoc adulantium artificio opus in Fabiano fuit. In quo si quis diffideat à nobis, diffundat animum per singula, ac in eo consideret nobiscum, tum summam generis vetustatem, tum liberalis educationis elegantiam, tum peritiam in Nobilissimis Disciplinis, atque Artibus, tum fecunditatem Ingenii incredibilem, tum masculam, & vividam virtutem, qua cum priscae etiam aetatis viris contenderet, tum nova decora magnitudine gestorum in penates, ac familiam illata: & tot alia quibus non insistam, ne videar actum agere, repetendo ea, quae toto sparsa sunt Panegyrico, quem nunc edimus: eoque cum Comico dicar, in Prologis scribundis operam abuti. Sed quid sunt res mortalium sine literarum monumentis? Nam absque historia foret, tantae virtutes, ac cuncta ejus benefacta, futura olim essent, quasi nunquam fuissent. Sola enim historia, siue hanc Orator, seu Poeta, seu alius expresserit, omnes nobis aetates, ac secula conservat. Per unam hanc supersunt haecenus, quotquot fuisse quondam cognoscimus. Non jam Ninus, vel Cyrus, non Hamilcar, vel Hannibal forent, nisi historia eos servasset. Nusquam essent Miltiades, & Themistocles; nusquam Agefilaus vel Epaminondas; nusquam Alexander, aut Pyrrhus; nisi historia eos consecrasset. Non viverent in hominum memoria, duo belli fulmina Scipiones; non Pompeius, ac Caesar; nisi perpetui hoc nominis

minis decus, ab historiâ essent consecuti. Per-
riissent etiam Carolus Magnus, & Frederi-
cus Barbarossa, alique Immortalitate dignis-
simi viri, nisi, sicut olim Jupiter, si Romanis
fides, fugientes novæ urbis cives; Ita histo-
ria nobis fugitivi temporis memoriam stitit-
set. Ut solus sanè Historicus dici mereat-
ur, stator Temporis, Perennitatis sacerdos.
Neque ignoro, plurimos eandem laudis
perpetuitatem sperare è statuis, columnis,
sepulchris, aliisque id genus monumentis.
Sed eventus comprobavit, omnia ejusmodi,
esse invidiæ ac fortunæ casibus obnoxia, ac
sæpè brevi admodum temporis spatio, dissi-
pari, aut consumi. Quid mirum autem, si
quæ manuum sunt opera, naturam sequan-
tur corporis, quod mortale nobis datum est?
Historia verò est animi opus, qui morte ca-
ret; cujus instar & ipsa Historia, nec Libi-
tinam, nec Orcum extimescit. Hæc igitur
una generosissimo Patruo vestro præstiterit,
ut quemadmodum corpus ejus Morungæ è
Saxo habet monumentum; Ita etiam ani-
mus, ac tot benefacta ejus, ubique terrarum
monumentum obtineant literarium: ac qui
perpetua apud Deum gloria fruatur in coelis,
idem perpetua hominum fama fruatur in
terris. Sed hæc quæ velut largo è penu, in
historiæ laudem depromimus, non alteri
convenire putandum, quàm illi, quæ verè
historiæ nomen possidet; hoc est quæ prin-
cipem ejus legem servat, ne quid falsi dicere
audeat, ne quid veri non audeat. Quorum
neutrum in signandis Inclyti Patruï vestri
gestis, neglexi sciens. Nihil enim, vel eorum
dissimulo, quæ objectarent Malevoli. Cum-
que laudantium vulgus, benevolentiae studio,
utrum ficta, an facta referat, sæpè nihil pensi
habeat: sedulo hic operam dedi, ne ulterius
verborum flumine ab ripa solverem, aut li-
berius, ac rapidius deferrem, quàm veritas
pateretur. Interim Editorem me Panegyrici
hujus profiteri malui, quàm Authorem. Nam
præivit, ut potuit, alter, qui historiæ penè
totius seriem, atque maxima ex parte argu-
mentum hujus commentarii complexus erat.
Hujus ego vestigiis cum plurimum insistam;
cuncta uni nomini meo, sine nominis ac can-
doris defectu, tribuere non potui: Ne qui-
dem si tueri me utcumque parem illo Auso-
nii ad Symmachum suum, *Quodam pacto so-
cietatem laudis affectare, qui aliena benedicta
primus enunciat.* Sed ut alterius opera operam
mihi parte ex una levavit; ita parte ex alte-
ra, multo amplius laboris reliquit. Nam &
spissi se offerebant errores non pauci: pluri-
ma erant omissa, quæ magnoperè ad rem
pertinerent: multa non Davum requirebant,
sed Oedipum: Linam exigebant universa,

iis exceptis, quæ non tam linam poscerent,
quàm spongiam. Alia igitur rescui; alia
supplevi; disjecta ordinavi; denique Mone-
tam (nequid gravius dicam) parum Latia-
lem incude magis Romanâ refinxî: Eò ju-
stius, quia cum multa adeo à nobis forent,
nisi cætera simili dictione exponerentur, Ora-
tio futura erat hybrida, sui que ipsius dissi-
millima, non sine Lectoris fastidio. Quæ
non à me dicuntur, alium fugillandi causâ,
qui, ut dixi, quod potuit, fecit: sed quia
ignosci mihi volo in nonnullis, quæ pressius
& melius à me dici potuissent. Longè enim
molestius, per alia itur vestigia, quam cum
libero gressu proceditur. Quod si cui ista non
satisfacient, cogitet hæc in antecessum dari,
ac fortasse quod desidero ipse, aliquando so-
lutorum in probò & aspero; vel si mihi oti-
um defuerit, non defore tamen alios, atque
eos ætate, doctrinaque florentes, otio etiam
abundantes; qui ex hisce nostris, monumen-
tum aliquod condant, dignum, quod tan-
quam Phidiæ Pallas in arce reponatur. Nobis
nunc satis visum fuit, si Panegyricum vel
(ut amicis, ad alliciendos magis historiæ a-
matore, inscribi placuit) Commentarium
hunc ederemus, qui præcipua quæque suppe-
ditaret. Nam omnia dicere qui aulam? cum
certus sim, in Argumento adeo fecundo
superesse non pauca, quæ partim ejus, cui
bona ex parte debeo ligna, lapides, cæmen-
tum; partim etiam nostram effugerint indu-
striam. Sed, nisi opinio me fallit, ferè ista
minoris erunt momenti præ iis, quæ diximus.
Qui autem strictim aliquando, exponerem
meliorem, gravioraque (præsertim in iis, ubi
aliena non premo vestigia) leviora his anxie
nimis sectari non debui. Si qua tamen mi-
nora etiam nunc intercurrent: cogitare opor-
tet quod Damis respondit, cum reprehende-
retur, quia de Apollonio Tyaneo minutias
quasdam retulisset. Aiebat, de mensis Deo-
rum Analecta etiam colligi oportere, ne Am-
brosiæ ejus pereat quicquam. Atque idem
Xenophontis judicium fuit, qui dicebat, Viro-
rum virtute præstantium, non seria modo,
sed etiam joca, literis mandari oportere. Et
sanè, si Lucerna Epicteti tanti fiebat, ut esset,
qui mille eam drachmis emeret: si fuit, qui
Protei Stoici baculum emeret talento; quanto
magis dicta, factaque omnia Virorum Ex-
cellentium in pretio habere convenit. Prop-
terea rectè etiam, atque ordine, facturum
putem, qui temporis aliquid tribuere volet,
colligendis Illustris Patruï vestri dictis. Multa
enim præclarè ex ore ejus proficiscebantur
quotidie. Quod si quis ex ampla segete, spicas
exigit paucillas, hujus generis erant. Non
minoris impietatis est Deum fingere, quàm
negare.

negare. Cor hominis poenitens, frangit cor Dei irascens. Cum viri principes timere Deum nolunt, timere homines coguntur. Regnantibus Tyrannis, multiplicantur Adulatores. Optime ulciscitur calumniantes, qui innocentiam Deo commendat. Ubi magna regnant vitia, ibi propinqua est poena. Divinam nescit naturam, qui eam diu parcere putat scelestis. Non punitur cum malis qui se sociat bonis. Et fuere id genus plurima, aliqua fortasse etiam luculenta his magis, ac edecumata; eoque commendatiora, quod non quaereret ea Heros, sed pro rebus sponte se offerrent. Quod si non levis ejus dictis honos debeatur; quanto minus permittendum foret, ut interirent preces, ac suspiria, quæ Illustris Vir, manu ipse sua consignaverat. Spirant enim magnum Dei amorem, ac pectus verè devotum numini cœlesti: Imò vix arbitror, ex iis, quibus Religio mediciter cordi est, ullum esse ingenium adeo segne, ac frigidum, quin iis legendis possit, non calefieri modò, sed etiam inflammari. Atqui si ulla, hæc sane tempora, in fatali Orbis Christiani motu, tantoque & animorum æstu, & armorum postulant, vel flagitant veritas, ut dum quotidie Dei, atque hominum amor frigescit, inque pejus abeunt seculi mores, expediant omnes omnia, quæ pietati, ac virtuti debent. Quamobrem, etsi Illustris Patruus vester, preces eas suspiriaque, sive affatus, proprium duntaxat in usum, atque id Teutonica lingua concepisset, publici tamen boni interesse existimavi, si ea in aliorum quoque usum Latine exhiberem. Idque liberius paulò versa, interdum fere ad Paraphraseos modum. Nam ut linguae cæteræ, ita Teutonica suum habet genium: eoque si anxie nimis de verbis laborassem singulis, non de perspicuitate modò, sed de vi etiam, atque efficacia, plurimum decessisset. Verborum lenociniis hic studendum minime putavi. Bene enim preces istæ olent, quæ pectoris magis sanctimoniam, quàm Rhetorum pyxides redolent pigmentarias. Simul quoque videbam, à præstantia, tum argumenti, tum etiam authoris, pretium illud ac pondus accedere Orationi quod ab Interprete non haberet. Itaque mihi certum potius, quàm arbitrarium est, gratissimum fore utrumque hunc Laborem meum Illustri nomini vestro. Quod ut aliunde nescirem, tamen non aliud credere permetteret ferventissimus ille amor vester, erga Patrum optime meritum; atque ut de hoc etiam taceam, facile illud mihi persuaderet singularis vestra probitas, ingenium excellens, acriter judicium, prudentia eximia, humanitas incomparabilis, ac tot aliæ in vulgus etiam

notissimæ, ac vetusto adeò, & Illustri genere vestro longæ dignissimæ virtutes: de quibus filere apud vos malo, partim quia ipse ad earum splendorem connivere cogor, quem admodum adulterini Aquilæ pulli ad radios solis; partim etiam, quia jucundius vobis est laudabilia facere, quàm laudari; in os verò laudari molestum est. Cæterum quando utilitas utriusque hujus Argumenti animum meum subit; minime despero, non vobis modò, ac generosissimis fratribus, & Universæ Dhonæorum familiæ; sed etiam aliis, saltem optimo cuique, probari posse operam nostram. Nam cum, ut initio dixi, nihil majus, atque augustius, habeamus, pietate, atque prudentia; est hic, quod ad utramque conducatur. Sive enim Panegyricum spectemus; tum ad civilem, tum ad militarem vitam conferet notitia eorum, quæ variis in terris, ab Illustri Patruo vestro prudenter, & fortiter gesta sunt. Sive oculos conijciamus in preces, ac suspiria; quid ad alendam pietatem magis prodest, quàm si alieno in precibus ardore ipsi etiam accendamus ad invocandum Deum? Quod nemo, puto, inficias iverit, qui sanctum hoc studium, suo nòrit pretio æstimare. Nam etsi Deus non longè à nobis abest, ut in quo simus, vivamus, & moveamur, tamen ob pravam indolem, longè ab eo absumus; eoque opus est preces scilicet, quibus ascendamus in cœlum, & supplices imploremus gratiam Dei, sine qua tantumdem possumus, quàm qui nunquam fuerunt. Hujusmodi igitur adminicula qui respuunt; sanè ut parvi æstiment pietatem, aut de viribus propriis multa præsumunt, ignari ejus, quod Illustri Patruo vestro in ore esse solet, ritè precari esse artem artium, & scientiam scientiarum: cui affine est, quod idem crebro dictitat, fiduciam defensionis divinæ reddere nos de exitu securos; at non segnes ad precandum.

Cur autem, Generosissimi D. D. Barones, vestro potissimum Nomini Opuscula hæc offeram; neque ignorare vos potestis, neque aliis fore arbitror obscurum. Neminem enim caligare hic finit eximius nominis vestri splendor; qui partim ex inclytis natalibus vestris relucet, partim ex summis laudibus, quas ingenium vobis peperit, atque industria. Cujusmodi mixtura occurrit in perpauca. Quemadmodum enim rara res est, lux absque umbra, ignis absque fumo: Ita perpauca etiam invenire est, qui non sui generis claritati, vel morum vitiis, vel inficitia, tenebras offundant. At vos pariter hæc tria illustrant, Nobilitas vetusta, Virtus memorabilis, & insignis Eruditio: ut de dignitatibus, velut adscititiis Ornamentis, nihil

nunc

nunc dicam. Duobus igitur libellis, quorum alter ab optimo, prudentissimo, fortissimo Herco, Fabiano à Dhona, alter autem de eo scriptus foret, totidem Patronos dare volui, eosque non indecores, sed tergemina, qua dixi antea, luce illustres. Præterea putavi, recedendum mihi esse, ab more vulgi sua dicantis iis, qui, ea, quæ scribantur, non intelligant: & si intelligant, nihilo magis illa, ad se pertinere arbitrentur, quam alium quemvis: ut non tam patrociniū operi exposci, quam illud quæri, quod dicere nolo, res ipsa non loquatur, sed clamet. Volui igitur hæc iis offerre, quos constaret melius ista novisse, quam scriptorem ipsum; quos etiam, unā cum generosissimis fratribus, magis hæc tangerent, quam quicquid est hominum ubique: quos denique patrociniū scirem desu- gere, nec velle, nec posse. Quæ omnia me video consecutum; quis is, quem descripsi- mus, & cujus preces damus, naturā Patruus vobis fuit, affectu Pater: ac vos ut bonorum & opulentia, ira gloria estis hæ- res; atque omnibus quidem, sed potissimum vobis exemplo fuit: nec minus exemplo erit, præclaris, atque ad maxima natis liberis ve- stris, atque adeo nepotibus quoque & omni- bus, qui sæculis futuris, longo ab iis ordine (ita voveo) felicissime nascentur.

Illustres & Generosissimi DD. Burggravii & Barones à Dhona, stirpe quidem maximi, sed animo majores, vivite & valete: ac vel in ima cera inter candidos inclyti nominis ve- stri cultores, referte etiam nomen meum.

Lugduni Batavorum Anno clō lxxviii. Pridie nonas Junias: quo ipso die, ante sep- tennium excessit inclytus Heros, Patruus ve- ster, cui nunc parento; & ante annos am- pliūs octingentos defuncta est Luitgarda, conjux Caroli verè magni, imperatoris eo magis à præclara stirpe vestra celebrandi, quia ab illo, & filio Ludovico Pio, ad pristina ge- neris decora, Dhonani nominis, ac Burggra- viatus dignitas, jam ante tot sæcula accessit.

Æternitati Illustris ac generosissima fa- milie Dhonanae, devotissimus,

G. J. Vossius.

XIV.

Hugoni Grotio, Gerardus Vossius
S. P. D.

ITa me amari à te cupio, vir Amplissime, quàm verè illud nunc ad te scribo, nihil mihi videri scripto tuo, non dico elegantius

tersiusque (quomodo tua laudare sit vitupe- rare) sed doctius, nervosius, temporibus no- stris accomodatius. Planèque persuasum ha- beo, juxta mecum sentire, quotquot animum habent affectibus minimè mancipatum. Sed heu! quotus quisque est, quem non epi- demicus provinciæ nostræ morbus, tan- quam pestilenti aliquo fidere afflari? præfer- tim ex eo ordine, qui sub Prophetici Spiritus prætextu soli sibi omne controversiarum ju- diciū deposcit. Equidem non sine gravi dolore coactus sum, audire maligna adeo judicia hosce homines ferentes. Non te in atramento, sed felle calamum tinxisse aiunt. Tantoperè à te contemni Sibrandum, ut non Doctoris usquam elogio ornes, nisi cum um- braticum Doctorem appellas: Nec Theologi cum nomine digneris, nisi cum negas cum eo, & similibus Theologis sapientiam mori- turam. At Sibrandum virum esse optimè de Ecclesia & meritum, & merentem; atque ut fortè alicubi exorbitavit, non tamen malitia peccasse, sed puræ Religionis Zelo; tum au- tem minimè dubitandum, quin totum hoc egerit magnatum (aliquorum saltem) seu instinctu, seu permissu. Nec enim benè adeo Frisios Hollandis unquam voluisse; & nunc recentes accessisse rixarum causas ab exactio- nibus, aut vectigalibus, nescio quibus, pla- nèque metuendum, ne scriptio hæc animos eorum magis exacerbet. Negant quoque magis te potuisse causam agere Remonstran- tium, uno hoc excepto, quod non apertè Zelotarum opinionem erroneam dicas. Sed longè omnium indignissimum se putare, quòd Ecclesiastas dicas exposulare, quod non in- ter sint conventibus publicis; *Ἀρχιεπισκόπου* eos multis in locis obliquas per artes in se tra- here, & ubi invaluerunt vindicare etiam sibi audere: *Διμαρτυρίαν* sæpè ad negotia civilia extendere; Flandriam turbulentis suis con- cionibus perdidisse: tempore Licestrii hoc egisse, ut Ordines redderent contemptissimos: Ordines necesse habuisse, eos publicitus mo- nere, ut perdenda Hollandia abstererent: pe- riculosissimo tempore ordinum detrectasse im- perium, ivisseque oblatum externis. Neque quicquam te horum aliquo *σοφῶν παρρησίᾳ* edul- care, tantum dicere, bonos te minimè horum criminum insimulare, ac mox *ἑνὶ νόμῳ* hu- juscemodi succinere, talia in Ecclesiastico or- dine esse ingenia, ut plus iis, quàm necesse sit, haud tuto committas. Subjicere te qui- dem mox, dolori tibi esse, quod causa hæc aliter se tractari passā non sit. Verum hæc occinenda iis, qui necdum ære lavantur; vi- ris enim quotquot non omnino naris sunt ob- es, luce ipsa clarius esse, longè aliter causam à te tractari potuisse. Multa enim à te mitti potuisse,

potuisse, & si asperiori esse necesse erat, nil tamen opus fuisse te omnia à πνευματικῶς ἀγαθῶς, καὶ ἐπιθυμῶν agere; scriptum tuum esse, πνευματικῶς οὐκ ἀπορριπτῶς, ἀλλὰ καὶ ἀπὸ τοῦ οὐνοῦ. Si Religionis hostis esses infensissimus, non tamen potuisse te tutò in Batavia indignius excipere eum Ordinem, quem velle te dicis, ut à populo quàm sanctissimus habeatur. Non aliud se persuadere sibi posse, quin cùm apud Frisios esses, ante biennium aut præterpropter, quoties item apud urbis nostræ Magistratum, & quosdam Zelotas Ecclesiasticas, de Religionis es negotio locutus, quasi mansuetissimi esses pectoris neutrarumque partium, totum hoc animo feceris simulato; aut saltem mirandum esse, quod tantum tam cito sis mutatus ab illo, qui fuisti prior. Nominis tui autoritate, Jesuitas publicè privatumque, sese tuituros, ad exprobrandum ordini huic animum malitiosum, rebellem, & quibus non viriis infectum. Primum te esse, saltem eruditorum qui hujusmodi posteritati dicas scriptis tuis, quæ æternatura nec ipsi dissentientur. Nec suffecisse, ut hæc lingua Latina legerentur ab eruditis; debuisset Ecclesiasticas fabulam fieri cædonibus ac tonsoribus, dum ea vulgarem in linguam transferri curas; si quid à paucis aliquando fuerit peccatum, non posse cæteros præstare hanc culpam. Deinde non minus peccatum esse tum temporis à Rerump. Rectoribus, utut strenuè hic Ecclesiasticæ mussare cogantur. Denique cùm anni tot ex eo tempore sint elapsi, maligne admodum vulnus hoc toties refricari. Ex his facillè intelligere potes, quantoperè exacerbatus sit, erga te quorundam animus. Sanè nec desunt, qui bello sibi schemate videntur librum tuum nuncupare, *impiam pietatem*. Interea melle dulcior iis circa cor gliscit iracundia, quando animo tempus illud concipiunt, quo, ut inquit, Sibrando, & forte aliis, (etiam Pontificiis, ni eos spes fallit) poenas dabis. Quanti autem Sibrandum suum faciant, quo item te loco in Theologica palæstra habeant, hinc æstimare potes; quod quemdam audierim, aptantem tibi illud Poetæ;

Infelix puer, atque impar congressus Achilli.

Nempe difficillimè sibi persuaderi patiuntur, tantam Theologiæ notitiam cadere in quemquam, qui Minister non sit, ut de controversiis nostri sæculi iudicium ferre, ausit adversus Theologos suos; quod à te factum credunt. Tum autem, quia in Patrum lectione plane sunt peregrini, ne hac in parte te videantur indoctiores, etiam tibi loca quæ citas, aliundè suggesta apud indoctos calumniantur, nempe ab Utenbogartio, ut sus-

picantur. Hæc ego uti cum dolore aliquo, ita nec absque risu scribo. Et te quoque risum vix tenere planè habeo persuasum. Sanè ex sermonibus tam insulsis facile judicare est, quam haud iudicii sint ullius, vel eruditionis, utut unus alterque multijuga sibi placeat lectione. Tales profecto hostes minus tibi metuendi, quàm Sibrando Vorstius; quem tantoperè contemnit. Si tamen etiam scripto maledicere tibi non dubitabunt, (quo de vix levem susurrum hæctenus audivi) tuum erit animum firmare iis, quæ ipse scripsisti, Regium enim esse iis cùm benè feceris audire malè; neque quemquam debere ad rem tam utilem, atque tam odiosam accedere, nisi qui ad ferendas calumnias benè se munierit, ut honesti consilii conscientia possit dicere;

Omnia præcepi, atque animo mecum ante revolvi.

Et de his hæctenus.

Pag. 36, vers. ult. in Augustini verbis, *Cælestiani aut Pelagiani*. Etiam apud interpretem tuum est, *Cælestiniæ*. Ac video etiam ab aliis interdum ita nuncupari. Sed planè duabus literis inductis, scribendum *Cælestiani*. Quippe, uti scis, nomen id à Cælestio Pelagii Discipulo, non à Cælestino qui Cælestianis adversatus. Id cum fugeret Vallam, scripsit Cælestinum Papam Romanum fuisse Pelagianis. Nempe Cælestium & Cælestinum confudit: quo nomine merito vapulat ab Annalium Scriptore.

Pag. 50. In verbis Ammiani Marcellini, vel universa ejus verba adduci debent, vel vox *gravius* planè tollenda. Sic enim ille extremo Libro XXI. *Eratque super his adimere facilis quæ donabat, Christianam Religionem absolutam, & simplicem anili superstitione confundens, in qua scrutanda perplexius, quàm componenda gravius, excitavit dissidia plurima, &c.* Sententiam esse vides; non tam graviter componebat dissidia, quàm perplexe Religionem ruspabatur. Omnino igitur *ta gravius* pertinet ad *componere* non ad *excitare*.

Aliud quod moneam non habeo, ac fateor ne hæc quidem scriptio ullò modo digna esse. Sed cum opus non possem, operam saltem meam tibi probare volui. Superfunt tamen pauca, de quibus si præsens essem, iudicium tuum exquirerem, uti cum pag. 52. ais, Augustanam Confessionem esse mutatam. Nescio enim an id magnoperè ad rem faciat, cum privato quidem consilio Melanchthonis mutata sit, at publica; ni fallor, auctoritate nunquam. Hoc saltem scio, Melanchthonem à Luthero hoc nomine objurgatum, quod fecisset id omnibus inconsultis. Scio & Germaniæ Principes, qui Confessionem sequuntur

tur Augustinam, non aliam agnoscere quam eam, quæ Carolo quinto exhibita anno clō lxxx. scio denique Lutheranos hoc pacto se purgare, cum à Pontificiis accusantur immutata toties confessionis. Quod pag. 36. ais, Chrysostomum ubi necesse est, gratiæ necessitatem non obscure inculcare. Memini me dum hic esses, tribus verbis de Chrysostomi sententia colloqui. Velim autem, si integrum, adeas *ad iudicium*, Hom. XII. ad Hebr. Nihil clarius quam tolli ab eo gratiam prævenientem. Et quid mirum? Cum idem in prioribus scriptis fecerit Augustinus, quem errorem retractat, Lib. I. Retract. cap. 23. Quare cogitandum satisne solidum sit argumentum quod urges pag. 34. ubi ais, aut Remonstrantes Pelagianos vel Semi-pelagianos minimè esse, aut & Chrysostomum talem habendum, ne simus *oportet*. Nam dispar fortasse ratio temporis ejus, quod ante Pelagium fuit, quo, ut Augustinus alicubi scribit, securius omnino de gratia loquebantur. Interim Remonstrantes minimè ejus erroris reos esse agnosco: tantum ambigo, annon jure Semi-pelagianus sit dicendus, qui gratiam neget prævenientem; quamquam Chrysostomus, Augustinus, multique alii ante Pelagium, eam minimè agnoverint. Quod si est, non parùm de vi argumenti tui decesserit: utut res in se vera sit. Possitque argumentum hoc si sapit, urgere adversus te Sibrandus.

Pag. 118. Ratio sequitur, quia alii aliorum calumnias ferre debemus. Videndum annon aliovorsum torqueas Sibrandi verba. Nec enim id, puto, voluit Sibrandus, velle se Anglorum ferre infirmitatem; verum potius ut Archiepiscopus nostrarum, siquæ sunt, Ecclesiarum ferat infirmitates.

Pag. 42. Inquis, in crepusculo elucescentis veritatis. Similiter loqui scio Jul. Scaligerum in Historiam Theophrasti. Sed discere aveo, an & crepusculum liquido pro diluculo ponatur. Aliud judicare videtur Plin. Lib. XVIII. cap. 25. ac imprimis Censorinus de die natali, cap. ult.

Verum somnolentum me (nam media jam nox est) ad meras nugas delabi sentio. Quare ne molestus tibi ultra sim, manum de tabula tollo. Ignosces, quod nihil attulerim, quale expetiisti. Nec enim id mearum virium est. Et toties integro hoc triduo de die partim à discipulis, partim ab aliis sum interpellatus, ut ipsas historias, quod optassem, diligentius examinare non licuerit; ac ne has quidem literas, nisi sera nocte, potuerim exarare. Sub vesperam responsum tuum accepi, de quo nihil addo, quia demum crastino mane de eo sum cum Corputio acturus. Vale,

vir Amplissime, Belgicæ Phoenix, cui (cum cætera largè sis consecutus) unum hoc tantummodo à Domino exopto, ut valetudinem largiatur in hisce laboribus firmam, animum adversus injurias fortem.

Dordrecht clō lxxiii. Post. Calend. Novembris. Velim, vir Amplissime, apud neminem de literis, aut judicio meo facias mentionem. Minus enim, si suspectus esse coeperim, prodero bonæ causæ. Quanquam profecto te hoc monere, nihil necesse fuisse intelligo, qui per te isthæc longè melius vides iterum vale.

XV.

Gerardus Vossius Hugoni Grotio S. P.

Accepi Lucanum tuum, Amplissime Groti, verè inquam tuum, quem feliciter adeo restitueris integritati. Quo nomine maximas tibi gratias debet orbis eruditus: Hispania tamen imprimis, cujus nobilem adeo civem foedis tabescentem vulneribus sanasti: sed puto ut, superba est natio, nec Batavorum laudibus satis æqua, aut nulla hoc beneficium agnosceret, aut invita. Nobis satis est, quod Lucanus ipse quantum Batavo debeat, neminem sivit ignorare. Quod si eum ob ingenuam adeo confessionem patria sua minoris facere volet, à Batavis poterit donari civitate, civis futurus nobis acceptissimus. Me quidem, (quem Batavia jam diu meritis suum fecit) mire semper delectavit, maximè sententiarum acumine. Deinceps verò tanto etiam futurus gratior, quanto posthac minus erit, quod in eo legendo remoretur ingenii nostri tenuitatem. Quantumvis verò merito suo placuerit vates tuus, tamen dissimulare non debeo, maximam eidem gratiam conciliasse donantis affectum: de quo tantoperè gratulor mihi, ut eum ponam in parte non exigua felicitatis meæ. Ut verò etiam quomodocumque gratum reapse animum tester, quod unum possum, mitto ad te *arripe* Oratorias nostras: Impar quidem donum sapientum judicio atque etiam meo, sed minime futurum impar, si putare libeat rationes, cum fecunda gente Mene-ni. At extra omne periculum fuero, si titulum legisse contentus, mox librum in angulum aliquem abbas. Quamquam profecto gravissimæ occupationes tuæ facile metum hunc omnem mihi eximere possint. Et tamen quasi etiam tibi otii quicquam super sit à rebus tuis, qua publicis, qua privatis, mittere ad te, judicii que tui facere non dubitavi minutam

minutam quandam commentatiunculam nostram, quam ante menses paucos, occasione certâ, subito calore, ac soloci stylo effudi. Ea describenda prope triduo à redditis mihi literis tuis Amanuensis occupatus fuit: quæ ratio fuit, cur non statim rescripserim, ne forte id incuriâ factum putes. Non est autem quod chartas hæc remittas; quia servari poterunt in adventum meum. Quamquam enim propter affinium *noydem* adventum, & amicorum aliquot expectationem, his fortasse duabus, aut tribus hebdomadibus extra urbem pedem ponere non licebit, omnino tamen ad vos excurrere animus simulac potero; ut verò possim, planè adnitar. Quid enim exoptatius mihi contingat, quam ut cum eo colloqui liceat, quem unum præ omnibus mortalibus æstimo, cujus singularis prudentia; atque apud illos autoritas, qui plurimam in Rep. possunt, eam in me spem excitaverunt; ut brevi & pacatiorem Remp. & Ecclesiam, nec horum licentia, nec illorum tyrannide æquè periclitantem, nos habituros putem? Adjeci quoque exemplar earum literarum, in quas ex Anglia ad Ecclesiastem quemdam transmissas nuper iudicium feci. Tuum erit vel totum hoc de literis istis, vel illud saltem dissimulare, ex urbe nostra exemplar earum ad te transmissum esse; neque id tam mea causa peto, quam illius qui id exemplar mecum communicavit. Nec enim alioqui ei ad quem perscriptæ literæ (cujus nomen coram retuli) difficile fuerit odorari, unde earum ad te *ἀπογὰς* manarit. In urbe nostra magis magisque residet animorum fervor; quo nomine non mediocriter gaudeo. Non tamen Zelotæ sic sese comprimere possunt, quin interdum excendant quædam etiam publicitus. Neimpe difficulter, ut Poeta ait, ignem celaveris,

Lumine qui semper proditur ipse suo.

Ita in concione hesternâ audire erat Valerium Poplicolam, intonantem graviter adversus eos, qui perstringunt Ecclesias (ita enim is loquebatur) quasi ereptum ire velint Magistratibus jus suum. Duplicem, inquit, potestatem facimus; unam autoritatis, ministerii alteram, si modo ea quoque potestas dicenda est. Huic addebat; solis Magistratibus datam à Deo autoritatis potestatem; ministris non aliam convenire quam illam ministerii. Provocabat idem Stentorea voce ad omnes Doctores nostros, ex quorum monumentis aliud negabat evinci posse, quam penes ministros esse illam ministerii potestatem. Qui sic loquitur, ut fucum faciat imperitioribus, quid tamen aliud quam paratus est ab-

stinere vocabulo autoritativæ, ut loquuntur, potestatis, dummodo rem ipsam à Magistratibus obtinere possit? Nam certum mihi non arbitrarium est, haud aliud eum sentire, quam Christum sibi autoritatis potestatem, in Ecclesiasticis reservasse, ministris vero executionem totam delegasse: qui idcirco in talibus ex Magistratus voluntate minimè pendeat. Scilicet qui sic animatus est, gravem habuit causam, reos calumniarum agendi omnes eos, qui censent in vocatione ministrorum *immo* actionum Synodaliū, atque aliis Ecclesiæ rebus, quæ ea publicæ est, penes Magistratum supremum supremam esse potestatem. Similis moneta erat, quod idem eapse concione invehebatur, in illos, qui, ut aiebat, non omne Dei verbum Ecclesiæ Dei putent proponi oportere. Quomodo, inquit, fundamenta Religionis sufficere aiunt, cum nemo in terrenis tam stultè sapiat, ut fundamentum jecisse contentus, non insuper necessarium planè arbitretur ut domum superædificet? Quasi vero qui fundamentum salutaris doctrinæ firmiter jecerit, non ipse sit Templum Spiritus sancti superædificatum super fundamento Prophetarum & Apostolorum. Nec tamen id ab illustribus ordinibus agi puto, ut, quemadmodum ille videri volebat, sola doceantur principia Religionis nostræ, etsi sola faciant Christianum: verum illud potius, ut cum conclusionum (quarum habitus Theologum facit) aliæ aliis clarius certiusque ex principiis consequantur, multæ etiam multorum iudicio inde eliciantur, quas alii, nec pietate, nec eruditione his inferiores, consequi inde inficiuntur, imo vero noxias censeant homini Christiano; non omnes conclusiones alba signentur linea, sed earum fiat delectus, apud plebem præsertim; quæ minimè ea decidere vel etiam capere idonea est, de quibus mille & amplius annis summus in Christiana Ecclesia dissensus fuit. Sed si hos audimus, qui de conclusionibus ad usque seculum nostrum damnatis, aut Græcis saltem Ecclesiis plane ignotis, in Latina demum post quadragesimum annum controversis *immo* licere arbitretur, nec eas tanquam certas, & cognitu necessarias apud plebem urgendas censeat, is (quod non semel audire me commemini) ex Christiana Religione Pyrrhoniam cudere velit *ἀνιστάμενος*: quod hæcenus ego persuadere mihi non possum: nec tu, scio, tibi, vir amplissime, quem cum conjuge salvere jubeo. Neque enim ultra morari te visum. 14 April. 1614.

Tui observantissimus,

Gerardus Vossius.

XVI.

Hugoni Grotio, Gerardus Vossius S. P. D.

Edictum Illustrium D. D. Ordinum, Amplissime Magnificeque D. Groti, mirè hic vapulat à Zelotis, à plerisque etiam scurriliter impetitur. Qui mollissime loquuntur, mirari se aiunt, pro Edicto Illustrium Ordinum publicari, in quod non consenserint Civitates. Nec fatentur tale *res ista* esse, quale exposcebant Dordrechtani: quandoquidem, præter horum sententiam, haud clarè exprimitur, de cæteris doctrinæ capitibus standum esse receptæ Ecclesiarum sententiæ: juxta decretum hac de re ante annum unum alterumve ab Ordinibus factum. Sugillant etiam, quod, Edictum si sit, non transmittatur ad Civitatum Proceres: sed his ipsis à Bibliopolis sit emendum. Æque admiratio eos subit, quod nulla in eo poenæ fiat mentio, manentis eos, qui fuerint transgressi. Unde boni viri colligunt, tuto se id transilire posse. Denique homines illi, quibus mire scilicet Ordinum honos curæ est, mirari se aiunt, Ordines adeo decoquere honorem suum, edicendis illis, quæ non servatum iri prævideant omnes. Talia non solum blaterant recentes de Schola pueri, Ministri tridui, sed etiam quidam de Veteranis. Quos inter immodestiam suam desiderari minimè patitur Lydius, qui etiam cæteros Ordinis sui concitat, ut adversus hoc Edictum, ad Magistratum suum scribere velint, Amstelodamensium scilicet Exemplo, qui, uti scis, scripsere adversus priorem Edicti formam. Quia vero de oppugnatione Edicti jam inter fratres consultatur, quidam ejus ordinis, sed cæteris modestior, magnoperè à me exposcit, ut scriptum illud Amstelodamensium diem unum habere liceat, quo videat ecquid in Edicto hoc relictum sit, quod reprehensionem mereatur. Gratum itaque feceris, si prima occasione ad me mittas. Si voles, intra triduum remittam. Hactenus quidem is, quem dico, nihil in Edicto culpat: sed ex Amstelodamensi istoc scripto discere avet, quid in eo alii culpent, idque illo potissimum sine, ut si nihil videat reprehensione magnoperè dignum, Collegas ab instituto melius possit dehortari. Sunt qui testimonia Edicto addita, à Vossio congesta dicant. Nescio quis homulus Gouda eum huc nuntium apportavit. Ego hanc opinionem iis haud vello: neque enim video, quorsum id facere debeam, quando tu, vir Amplissime, non honorem hinc tibi, sed Pa-

triæ solum tuæ emolumentum quaris. Superiori hebdomade usus sum valetudine haud satis prospera: quæ ratio est, cur ex quodam redii, parum promoverim in scribendo. Sed nunc Dei gratia melius valeo, totusque sum in detexenda tela mea, vel potius nostra, quando non solum te suatore impulsoreque aggressus sum, sed etiam te Aristarchum emendandi curam suscipiente perfici debet. Sanè & superiores literæ, & nuperus sermo tuus, multorum me monuit, quæ nunquam venissent in mentem. Quamquam autem utcumque didicerim indoctorum judicia aspernari, tamen (fatendum est) nonnihil me in scribendo moratur morosa cogitatio de quorundam, quibuscum mihi post scripti editionem negotium erit, summa in strenuè mentiendi cahmaniandoque audacia. Quæ sane res me subinde incertum facit, annon satius sit opusculum hoc primum edi nomine meo haud expresso, atque adeo lingua Belgica, ne stylo prodar. Sane nihil videtur obstare, nisi Patrum testimonia, quæ in alienam transfusa linguam, vinorum instar, plurimum de gratia amittunt. Alioqui hoc pacto possum melius cognoscere hominum judicia, nempe qui similis sim futurus Apellis, post tabellam latitantis. Tum autem, si fortassis imparem me videro hominum improbitati, potero latina editione supersedere, aut alteri hunc laborem resignare, qui tutiori loco vivat. Nam quod tu, Amplissime Domine, credas è modestis adeo tractatibus, ac solius veritatis & concordie causa scriptis, periculi nihil, saltem post Ordinum hoc Edictum, metui amplius posse: Equidem verum te opinari magno optem; sed nemo id dicat, qui mores nostrorum experiundo didicit. Nudius quartus locutus sum cum fido, & modesto sacri ordinis viro. Nisi inquebat is, omnia nostrorum hominum approbaris, nihil te tantopere purgabit, ut non unus & alter Collegarum meorum sic nomen tuum per urbem differant, ut omnium sis futurus fabula. Diceris nunc quidem modestius voluisse agere: sed Eleusin sacra sua non simul pandere; latere in pectore tuo longe alia, quæ tempori sis prompturus. O Mentis viperinas? sed de his melius coram, feriis proximis, si Deus volet. Johannem Arnoldi strenuè adeo progredi, plurimum gaudeo. Si uti te facturum scribis, responsum ejus, antequam edatur, legendum transmissis, candide judicium perscribam: quod tamen eum scire nihil attinet. Non possum quin de Steinfurtenensi vocatione aliquid scribam. Ante biduum venere huc duo Ecclesiastæ Batavi, Borrii Lugdunensis frater, & alter cujus nomen excidit. Hi pro Zelo suo
erga

erga domum Dei, muneris sui esse existimarent, ut de certo nuntio Ecclesiastas nostros facerent certiores. Retulere iis, ut ante dies paucos inciderint in Mercatorem quemdam, qui studiosè inquireret, ecquem Gerardum Vossium nossent, & quomodo audiret? Eum à D. Vorstio commendatum esse Comiti Benthemenfi, sed matrem Illustris Comitis non passuram, ut quisquam ad Professionem Theologiæ Steinfurtum vocatur, nisi qui undique sit Orthodoxus, hoc est, Contra-Remonstrantium partibus addictus. Addebant dixisse Mercatorem, sibi id à Comitibus Matre in mandatis datum esse, ut Dordrechtum quoque iret, atque ibi ex Ecclesiasticis, atque aliis de doctrina vitæque mea conquireret. Ubi nostri illi audire isthæc, varia illorum animos subiit cogitatio: nescire enim se dixerunt, quid sibi de me sentiendum sit: nihil quidem se audiisse ex me unquam, quod ~~interdixisset~~ ullius argumentum esse posset: sed tamen mirari à Vorstio me commendatum; nec enim sibi verisimile fieri, commendatum eum quemquam, nisi suæ farinæ hominem: eoque sibi gravissimam causam esse deponendi tam bonam opinionem, quam de me hactenus habuerunt. Aut enim magnam mihi cum Vorstio familiaritatem clanculum intercedere, ac Socinianum virus in pectore occultè gestare: aut vasserrimum Vorstium hoc agere, ut me apud bonos, ac urbem imprimis nostram, decoloret. Ego in utroque eos falli longissimè scio. Nam neque Vorstium vidi unquam, neque vel ipse ad eum scripsi, vel literas ab eo unquam accepi. Neque etiam opinionem ejus sequor, quatenus quidem, aut Omnipræsentiam, aut Omniscientiam Dei convellere putatur. Sed neque Vorstius, uti audio, aliquam nominis nostri deprecationem proposuit sibi: Verùm cum ex Remonstrantium causæ aperte additis neminem commendare liceret per junioris Comitis Matrem, proximum putavit, ut eum commendaret, quem concordiæ ac pacis, inter eos studiosum audiret, qui se à Contra-Remonstrantium causa neutiquam separassent. Hebdomade proxima affore dicitur is Mercator. Si hinc calumniandi causam ceperint Zelotæ, feram ut Christianum decet. Non potero tamen sic contemnere, ut non aliquid doloris sit allaturum, quod monstrosarum insimulæ opinionum. Sed fortasse hæc res melius abibit, quam spero: præsertim quando semper paratus sum, ingenua confessione testari, me alienissimum esse ab iis opinionibus de Deo, quarum Vorstius (verène an secus haud disputo) à plurimis insimulatur. Cujus tu rei testis mihi esse potes; quando aperte sæpius apud te id factum Vor-

stii improbavi, quod is sic in libris de Deo aliquando disputet, ut videri possit monstrosas, & in Ecclesia Dei inauditas opiniones voluisse hominum animis inferere. Sanè si aliud ei propositum fuit, imprudentissime egit, sequendo de tanti momenti rebus tale disputandi genus. Et tamen ut imprudentia potius quàm malitia peccarit, magnopere opto. Recte omninò facturus est, si tandem sic sententiam suam de istis capitibus publicè perscribat, ut nullus sinistrae de eo suspicioni posthac, saltem apud bonos, relinquatur locus. Mitto ad te Hamelmanni libellum de jure Principis in rebus Ecclesiasticis. Uteris eo quamdiu lubet. Arnobium tuum, & locos Augustini cum Synodo Diospolitana nondum remitto, quia necdum Lugduno Exemplaria recepi: sed tamen curabo, ut primo tempore restituere possim. Chartas meas si post octiduum per Tabellarium, aut fidum Nautam miseris, haut sero miseris. Tantum enim temporis minimum requiro ad perficiendum ea quæ primam constituent Libelli nostri partem: qua nempe de peccato originali, ac necessitate gratiæ, cum prævenientis, tum subsequenti, item gratiæ sufficientia, & arbitrii libertate tractandum erit. In Anglicano illo scripto describendo strenuè progreditur Amanuensis: sed tamen ob ductus incommodos, & plurima vitia Orthographica nondum dimidium Libri absolvit. Vale, Magnifice Amplissimeque Domine Groti.

Tuus omni Officio,

11. Aug. 1614.

Gerardus Vossius.

XVII.

Gerardus Vossius, Hugoni Grotio S.P.

Magnifice Domine, postquam Sibrandianum responsum in lucem prodit, tam vane multa pro eo adversus Illustris Ordines, ac dignitatem tuam, à Malevolis jactabantur, ut non potuerit quidquam bonæ causæ, five qua publicum, five qua privatum te tangit, vel conducibilius vel opportunius accidere hoc tempore, quam Edictum Ordinum, & bona Sibrandi fides. Itaque me quidem tantopere delectarunt, ut quamquam quo tempore fasciculus mihi reddebatur, ob morosas quasdam Scholæ nugas animo esset minus defæcato, tamen literis tuis, cæterisque lectis, sic fuerim recreatus, ut totum exinde diem tam lætum hilaremque duxerim,

rim, quam si Hilaria fuissent. Quantum verò ea res gaudii mihi attulit, tantum inde doloris Malevoli ceperunt. Cum autem alia eos in Edicto malè habuerunt, tum quod apertè in illo dicatur, operam tuam Illustribus Ordinibus gratam fuisse, ac Sibrandum mala tecum fide egisse. Quod quidem non minus eos urit, quam quod venditioni Libri Sibrandiani interdicatur. Eoque magis hæc res eos coquit, quod disertim addatur, hoc pleno in conventu constitutum esse. Nempe vident & dolent, minus sic deinceps fidei calumniis suis habitum iri. His vero omnibus aliud nihil opponere possunt, quam quod nec defuere ex Civitatibus, quæ Sibrandianam magis causam probarint: quasi unquam ferè sic agatur in rebus, vel publicis, vel privatis, ut idem sentiant omnes. Ecclesiastes quidam nostras retulit mihi atque aliis, ut filius suus Amstelodami viderit Edictum hoc Portæ (urbis ac Templi) affixum ab Illustrium Ordinum Viatore. Hoc quidam non factum credere malunt. Sed qui tantum scilicet sæculus credere sustinent, mirari ac ringi, quod hoc perpeti voluerint ejus civitatis Proceres, in cujus constantia proram ac puppim causæ suæ constitutam sæpius sunt confessi. Bona fides tua effecit, ut nonnullis tandem scrupulus sit injectus, quibus antea persuaderi non poterat, Sibrandum mala fide agere. Imo aliqui aperte eum jam culpæ non verentur. Sane hæsterna die, cum rogasset quidam ejus ordinis, quid mihi de bona fide videretur? atque ego respondissem, metuere me, ne multum Sibrando sudandum sit, priusquam omnibus iis respondeat: confessus est quod antea nunquam, multa eo in scripto esse, quibus à Sibrando responderi non possit: ac se quoque antequam Libellus hic prodiret, quædam istiusmodi observasse: sed Libello hoc tuo (cujus tamen non te, sed Bertium, ac Joannem Arnoldi Authores suspicantur) & plura, & tam clarè probari, ut negare sit neminis, nisi qui frontem perdidit. Addebat, se quid multo eruditius ab tanti nominis viro expectasse: Plurimos esse in Batavia, etiam recentes de Schola, qui Sibrando melius illam causam potuerunt tractare. Postea in alios incidi, qui similiter judicarent. Paucissimos reperi, qui non fateantur, graviter, & Sibrandum peccasse & omnes eos, qui absque ordinum insectatione de religionis controversiis agere non possunt. Utinam verò simul emisisses Scriptum tuum, de summi Magistratus jure circa Ecclesiastica: fortasse enim si Edicti tempore prodisset, hinc tacitè aliquid autoritatis ei accessisset. Sed quia id factum non est, proximum puto, ut quam celerimè subsequatur. Quid enim at-

tinet Crabronibus illis toties per intervalla bilem moveri? Recens nunc ira est. Si statim Liber edatur, poterunt simul bilem omnem despumare. Quod amicè me adeo Rotterodamum invitas, gratias habeo maximas. Velim quidem, sed detinet me lectio tertii Georgicon Virgilii, cum aliis rei rusticæ Scriptoribus; ex quibus bonum delectum cogar discere. Cras verò à prandio progressus mei periculum faciam. Quam tibi aliisque, vir Amplissime, grave est Rempub. gubernare; tam mihi in annum integrum ab Homericorum Heroum cibo, quinquaginta capitibus, vel stomachis potius prospicere. Imo multo quidem hoc difficilius mihi, quia semel jam iterumque persenti, post omnes veteres consultos, ubi ad forum boarium deventum, tantundem me sapere quam prius. Itaque post oleum & operam consumptam, aliena tandem opera uti cogor. Nec eo magis domo abesse licet, quando alieni nihil hac in re audent absque præsentia ac nutu meo. Adde quod juvenus Scholæ nostræ (cujus bona pars, pro sapientia sua, non minus desiderant boum nostratium conspectus, ac mactationem, quam olim in Circo populus Romanus gaudebat Lucarum boum spectaculo ac pugna) nunquam magis custode eget, quam hoc tempore; quo & difficillimè domi continetur, & periculosissime excurrit. Quod verò, ni fallor, significas, fortasse, Dordrechtum te venturum, Utinam, Utinam fiat: Imo utinam ut amplitudo, ac dignitas tua ferat, ut pro diverforio publico subire possis pauperis hoc tugurii nostri, sed non congestum cespitem culmen. Nobis quidem ea res non voluptati minus esset quam honori. Amplius adderem, sed metuo, ne inani spe mihi blandiens alienam ex verbis tuis sententiam exprefferim. Utrum sit, brevi spero, vel ex Epistola tua, vel quod malo, ex adventu tuo longè exoptatissimo recognoscā. Etiam adventum tuum expetit Lydius: ut qui & multis retro mensibus, significavit, magno se loquendi tecum desiderio teneri, & hæsterno vespere dixerit, optare se ut paucis agere tecum liceat de Libello eo, cujus gratia ab Afello illo, (sic enim loquitur) Corvino Princeps, inter eos reponitur, qui τὸ ἀπορῆλας βλασφημῶν. Persuadere mihi conabatur, scrip-
tū se Libellum eum in Laudem Magistratum, ejusque probandi, verba nescio quæ ex opusculo citabat. Ego cum nec tam fatuus essem ut crederem, nec irritare vellem eum quem ad coenam invitāram, consolatus sum illo, quod scriptum hoc Corvini perennaturum non putem; tūc maximè quod pauci sciant, Lydium dialogi illius esse Authorem, pauciores item, per βασιλικῶν Lydium de-

signari. Gaudebat eo sermone, sed tamen addebat, pati se non posse, ut tu de eo tam atrocem habeas opinionem: eoque prima occasione, vel Roterodami, si eo proficisci contingat, vel Dordrecht, si tu prior huc veneris de Libello eo purgare se apud te velle. Vale, Amplissime Domine, uxoriq; lectissimæ tuæ à me salutem dicito.

A. T. *Observantissimus*

27. Octob. 1614.

G. J. Vossius.

XVIII.

Hugoni Grotio, Gerardus Vossius S. P.

Hesterno die, Magnifice, & Amplissime Domine, literas accepi Steinfurto, quas jussu generosi Comitum, suo & Collegarum nomine, ad me scripserat Timplerus. His offertur mihi professio S. Theologiæ in illustri Schola Steinfurtensi. Significavi statim rem totam Prætori Musio, & Syndico Berkio, quorum utrumque optimè mihi velle non dubitandis indicis jam multos annos comperio. Dixi iis, nihil mihi in eo, quo fungor, munere displicere, quam quod videam optimum ætatis meæ florem abire, nec multum me in studiis promovere. Sæpius me comperisse, si quando die Dominico à meridie, discipulis in Templum abeuntibus, studiis domi vacem, plus me paucissimis istis horis proficere, quàm alias integris aliquot diebus. Præterea non nihil dolere, quod nonnulli Ecclesiæ præter meritum meum, nomen meum apud plebem obstrigillent, haud alio argumento, quam quod subinde, conscientia dictante, modestè eos muneris commoneam, qui quocumque convitiis genere illustres Ordines impetunt. Tum autem quod aliquando dicam, non controversiarum naturam, sed hominum, culpam esse, quod hoc Ecclesiæ dissidium componi non possit. Si etiam aliquam multos Melancthonem, & totidem Calvinos haberemus, omninò me confidere, a deo eos amice hoc negotium transacturos, ut nihil inde Ecclesia capiat detrimenti. Neutiquam me à contra-Remonstrantibus se-gregem factum: sed neque in omnia eorum dicta jurare velle. Tantum ex animo dolere sortem Ecclesiæ, quæ ita factionibus scindatur. Multa quoque alia in hanc sententiam attruli; quæ quoque in re calculum mihi ad-jecerunt. Tantum visus sum iis minus constan-ti animo, quod obrectatorum sinistros ser-

mones devorare haud satis possem. Sæpius enim talia ab æmulatione aliqua, aut animi impotentia proficisci. At ea quoque non minus in Academicis ipsis habitura locum. Quod verò dicerem vix quicquam temporis à me studiis dari, id aliquamdiu adhuc concoquen-dum putabant. Nec enim dubitare sese quin haud perpetuo sim isthoc Sisyphi saxum vo-luturus. Et tamen inquebant, habendam mihi vel maximè rationem Liberorum meo-rum, quibus in functione hac, si ulla alia, honestè satis prospicere possem. Nec tamen hoc sic à me accipi debere, quasi me perpetuo hoc in munere consensescere velint. Quin verò sese ipsos mei memores esse velle, si quid fortean possint in vocatione aliqua Lugdunen-si. Et hoc eo se magis dicere, quia jam aliquid ea de re inaudissent. Possè etiam huic rei Steinfurtensem istam vocationem in-servire. Interea Authores erant, nec accipe-rem conditionem, nec recusarem; sed poti-ùs scriberem, velle me de re tota cum ami-cis consilium capere. Parui consilio. Ac lite-rarum etiam mearum ad Timplerum exem-plum mitto. Hæc scire te volui, Amplissime Domine, ne si fortè Hagæ, quò uterque pro-ficiscetur, ejus rei mentio incidat, tu omni-um sis ignarus. Interea non est quod de me tantoperè sollicitus sis. Non possum quidem non maximas tibi pro affectu erga me tanto gratias agere: sed quædam interdum sunt, quæ moram aliquam exigunt. Sane intelligo aliquibus nihil magis in me displicere, quam quod etiam Amplitudinis tuæ nitar commen-datione. Aliquis etiam nescio quid objicit de Literis quibusdam, quas ad te scripseram. Sane metuo, ne D. Bertius (quem ego alio-qui ut Præceptorem optimè meritum, & vi-rum summæ eruditionis plurimum & veneror & æstimo) non nihil rebus meis incommodet. Scio illum literas meas, quas ad A. T. de aliquot Erasmi locis scripsi, & habere, & aliis commonstrare. Inter alios est Rutgersius noster, cui bonam earum partem legit. Au-dio etiam ambire professionem historiæ Ec-clesiasticæ; & quia non nihil à me prius hæc in re metuebat, uti prius à Vossio (nam & cum is Lugdunum vocaretur Theologiæ pro-fessionem ambiisse dicitur) *et me proinde* dictat, semper sibi aliquid remeliginis injici, vel ab aliquo Vossio, vel ab aliquo Vossio. Sed ab illo ad A. T. redeo, vel potius ad me ipsum. Equidem multa mihi ad arduam hi-storiæ Ecclesiasticæ professionem deesse video. Accepturi quidem essemus vocationem, si vo-caremur, sed non tam quod non malimus nos pauxillum adhuc in hoc pulvere hære-re, quàm quia metus esse possit, ne cum maximè molestissimo hoc onere liberari velim, minimè possem.

possim. Nam & interdum, vir amplissime, in animum venit, te quoque mortalem natum. Alioqui, uti dixi, temporis mihi aliquid concedi malim, quo muneri me isti præparare possim. Quod si ubi me propemodum parem isti muneri putabo, non subsequatur aliqua vocatio, ἡ ὁρμή τῆς ἀποκαλείδης, sic quoque scribendo saltem prodesse Ecclesiæ Dei poterimus. Sunt alia multa, de quibus colloqui tecum a-veo, eo magis, quia me literis tuis, quas ante horam accepi, amicè ad te invitas: sed id nunc fieri non potest, quia metuo ne, absente me, discipuli in glaciem currant, aut fortean pedem, aut brachium frangant. Tutius id poterò, ubi glacies erit soluta. Quamquam si & antè se occasio offeret, minimè eam negligam. Hæc raptissimè, ob festinationem Tabellarii. Deus ter Opt. Max, diu te Reip. Ecclesiæ, familiæ ac nobis servet incolumem.

3. Non. Martii, 1615.

Misit D. Vorstius ad me per amicum varias literas, ad se de vocatione Steinfurtensi scriptas, uti exemplar literarum, quas Ill. Comites de me vocando ad Curatores Academiæ Leidensis scribunt. Ego statim singula describi curavi. Si tanti putabis, percurres, & vel in adventum meum adservabis, vel ubi voles transmittes ad me. *Εἰρησ.

XIX.

Clementi Timplero.

EGO verò, clarissime, doctissimeque Dom. Timplere, non possum, non & plurimum mihi gaudere, & tum illustribus, & generosissimis Comitibus Bentheimensibus, Dominis meis clementissimis, tum ornatissimo ordini vestro professorio, ingentes agere gratias, pro tam honestâ de me existimatione, & luculentis adeo, erga me affectus notis. Mihi quoque partim, ne adversus adeo munificos, ac benevolos ingratus essem, partim publici boni causâ, unâ cum Tabellario hoc ad vos, excurrere animus erat; ac vobiscum super omnibus sermonem ferere: sed incommodissima anni tempestas, à profectione deterruit; nec muneris conditio, quod nunc obeo, diutinam mei absentiam ferat; & quod familiam ducit, ea nunc rerum mearum conditio est, ut nisi desultoriæ mihi levitatis notam, merito impingi velim; cum uno alteroque amplissimo viro, mei, & publici commodi amantissimo, super re tanti ponderis, serio mihi deliberandum intelligam. Id quidem, quin neque illustres Comites, neque clarissimus Professorum ordo, vitio sit versurus, nullus dubito. Interea quia in eo

loco, illustris Scholæ vestræ res sunt, ut moram vix patiantur ullam, recipio me aut intra brevissimum tempus, excursurum ad vos, aut literis de animo meo facturum te certiorerem. Nihil enim mihi gravius sit, quam ut benè de me, & publico, mereri volentibus, sim injurius, & simul cessatione meâ, illustri Scholæ vestræ sim intertrimento. Vale, Doctissime, & merito mihi charissime Domine; & si grave non est, tum illustres, ac generosissimos comites, Dominos meos clementissimos, tum clarissimos, ac præstantissimos Collegas tuos, plurima, meo nomine, salute imperti.

III. Non. Mart.
Ann. cl. lxxv.
Stylo Gregoriano.

Dignitatis tue observantissimus,

Ger. Vossius.

XX.

Reverendo in Christo Patri, D. Lancelotto Androsio, Episcopo Wintoniensi, Regi Britannicæ & Sacris & Secretis Consiliis.

Reverende in Christo Pater,

QUOD coram me posse, pro magnò optâsem, id absens nunc agam: ac quia aliter non licet, per literas saltem fiduciam sumam compellendi tui. Jam aliquot menses sunt, quod facere id animus fuit. Sed gravis & diutinus uxoris morbus & hoc, & alia multa, quæ vel ad studia, vel ad humanitatis officia pertinerent, disturbavit. Nunc quia sextus est dies, quod paulatim convalescit, & ego quoque sensim meus esse incipio: nolo diutius illud omittere, quod tamdiu distulisse jam pudet. Ex quo Franciscus Junius, affinis meus, in Angliam venit, sæpius ab eo literas accepi, nullas vero, quin iis magnificè prædicet felicitatem hanc suam, quod tibi innotuerit, tot eximiis dotibus prædito, & ejusce dignitatis viro, à quo etiam tantopere ametur, & cui se suæque ita curæ esse videat, ut non aliter affectum hunc, quàm verè paternum possit nuncupare.

Equidem non facile dixerim, quantâ res hæc voluptate animum meum perfuderit. Et quid me unum dicò? imò quantopere exhilararit omnem Junii sive mansueti familiam. Quæ satis etiam intelligit, plus se eo nomine debere tibi, quàm exsolvere possit. Etsi verò hoc per se magnum, imò maximum erat; tamen alterum etiam accessit, ut genuinâ omnino lætitiâ afficerer. Nam eadem adfinis

literæ, tum etiam, quas nobilis & mei amantissimus juvenis Georgius Dubletius ad me dedit, testificantur mihi, non solum tibi notum esse nomen meum, sed etiam amantissimum te mei & cupidissimum esse. Quem ego affectum multo auro potiorum ducō: sed in hoc statu non aliter remunerari possum, quam solo amore, & propensissimā in me colendo voluntate. Hanc quidem, si non dignitati amplissimæ, saltem summæ bonitatis probaturum me confido. Interim mihi quidem gaudeo, potissimum verò gratulor affini meo: quem deinceps etiam commendatissimum tibi fore spero. Neque enim favore tuo plane indignum putabis, cujus ea est eruditio, & quod caput est, illa vitæ integritas, propter quam imprimis charissimus hic omnibus esse solet: si solos excepero, qui virtuti & doctrinæ, addo & Ecclesiæ paci bellum indixerunt. Sed neque iniquum videtur, ut ex segete ea beneficiorum, quæ in uberi Ecclesiæ solo maximus ei parens obsevit, horum optimus filius aliquid frugis metat: atque id potissimum per te, cui consuetudo benefacere in naturam vertit: cuique etiam excellentem pietatem, doctrinam, prudentiam, humanitatem eruditissima scripta undique spirant, ac fama etiam celebrat, & doctissimorum hominum sermones. Eò verò impensius hoc desidero, quia & affinem hunc meum juxta ac meipsum amo, & eam de virtute ejus spem concepi, ut si quid mihi humanitus contingat, hunc præcipuè fore putem, in quem dum vita ei supersit, cura liberorum meorum recumbat. Hæc sunt, quæ nunc ad te scribenda existimavi. De rebus verò meis nihil addo, partim quia nihil magnopere est quod scribam, partim quia siquid fuerit, id alteris malo literis reservare.

Reverende in Christo Pater, Deum ex animo oro, ut illum erga nos affectum: te verò ad fidei & pacis Christianæ bonum, diu Ecclesiæ suæ incolumem servet.

viii. Kal. Nov.
cdo lxx.

Reverendi & illustris nominis
tui cultor,

G. Vossius.

XXI.

Hugoni Grotio, Gerardus Vossius S. P.

Magnifice amplissimeque Domine Groti, posteaquam D. Van der Myle, & DD. Consul Syndicusque Leidensis domum re confecta abierant, mirè cum coram tibi gratias

agere, tum de variis tecum colloqui gestiebam: sed adhuc ob summam tempestatem frustra fui. Biduum quidem, imo triduum prope jam ex eo tempore exspiravit: sed venti validius etiam spirant, quam ante: Nec ego duntaxat, qui meticulosior videri possim, quam virum decet, sed, ut audio, plerique etiam nautæ, audax & *periculosus* hominum genus, oram hinc solvere verentur. Ita abiit mihi initium feriarum nostrarum: quo tempore commodissime domo abesse poteram. Vereor autem ne adhuc plusculis hic diebus detinear, partim quia hac hebdomade pro affinis infante in baptismo spondendum erit; partim quia Rutgerius noster impense cupit, ut interim solemniori convivio, quo die Jovis proximo serenissimi Suecorum Regis Legatum accipere cogitat: post Paschalem verò diem animus sit uxorem Bredam ad sororem deducere: ubi fortasse diem unum aut alterum hærendum erit. Omnino tamen decretum, antequam feriæ nostræ desinant, hoc est intra quatuordecim hosce dies excurrere ad A. T. nisi interea te in Zelandia potius, quam vel Roterodami, vel Hagæ etiam fore cognoro. Una tunc mecum feram commentationem tuam de Christi satisfactione, cujus descriptio spissè procedit, ob nimis festinatos literarum ductus: sed tamen intra hos sex septemve dies scriptionem ejus absoluturum sese sperat Amanuensis. Mitto interea Thomsoni librum præstantissimum; unà cum Augustiniana confessione, Synodi Palæstinæ gestis, & Arnobio: quibus cum diu adeo, fortasse incommodo aliquo amplitudinis tuæ, usus sum, sanè cum maximo fructu meo. Carere quod nunc iis possim, facit, quod tandem ipse eos Antverpia nactus sim. De Thomsono non tantum suadeo, sed etiam rogo, quam primum edatur. Nihil ea diatriba hoc in genere, vel doctius extat, vel elegantius. Me quidem valde in vera sententia confirmavit. Nihil tamen hoc judicium nostrum Bertiadem Heroem, nisi secus putabis, scire attinet: quippe qui, ut etiam amici mihi narrant, hoc cum magno eloquentiæ Romanæ parente habeat commune, quod silere difficulter ea possit, in quibus tacito opus erat. Quamquam vero liber iste Thomsoni multis partibus sit emendatius descriptus, quam exemplar ipsum, tamen supersunt in eo non pauca, in Græcis imprimis quæ corrigi debeant. Ut emendanda putaram, de quibusdam ante trimestre in chartula annotaram; sed hanc licet quæsitam, nunc invenire non possum. Nec multum puto refert, quia nullo negotio corriget isthæc inter legendum Bertius noster. Infante (filio an filia?) amplitudinem tuam auctam gaudeo: eoque nomine tibi gratulor; ac Puerperæ

pure foelicia omnia opto. Valc, & præsidium
& dulce decus meum.

14. Aprilis
ea vespere.
1615.

T. A. Obstrictissimus,

G. J. Vossius.

Hugoni Grotio, Gerardus Vossius

S. P. D.

SCriperam tibi ante aliquot dies, Magnifice & Amplissime Domine, male me metuere Ecclesie Bredanae à Musenholio, qui cum reprobationis absolutæ, gratiæque irrefutibilis & indeficibilis dogma tanquam filiolam suam amet, atque amplectetur; tamen nec ejus quam tueri vult, opinionis satis est intelligens, nec partis adversæ sententiam (quam ubicumque & quandocumque occasionem levem videt, lineamentis distortissimis foedissimisque coloribus depingit) cognoscere vel minimum laborat. Jam ab aliquot retro annis novimus hominem per affinitatem qualemcumque. Semper uti aliis ita mihi quoque visus est nullus, vel judicii, vel industriæ: mirè ad hæc iracundus & pertinax: cæteroque imis pariter ac summis, quamdiu nullæ irarum aut simultatis causæ intercedunt, comis ac affabilis; etiam Latine non paulo mellius sciens, quam sui plerique ordinis solent. Is ergo cum antea semper nescio quas non monstrosas Opiniones, quas vel ipse, per febrim credò, formidasset, vel à malegeniatis quibusdam pessima fide confictas avide arripisset, spargere per vulgus solebat: tamen ex quo Amstelodamensium, & famosi Zelotarum Ducis, perperis pravisque consiliis dare se totum coepit, multo seipso favior factus est; sic ut non aliud nunc speret aut speret, quam factiones, & triste Ecclesie vixdum florecentis, dissidium. Ad quod facinus tantum utitur, vel abutitur potius, plerisque hominibus Adolescentulis. Eorum unus est Amstelodamensium Alumnus, ac nisi me multum fallit conjectura *τὸ πλεονεχὲς* & complerem emissarius, nomine Spiliardus, qui subinde Lugduno Bredam, inque ejus urbis pagos venit; ac paucas ante hebdomadas domum meam venit, multum Musenholianum pacis studium extollens, ac Boxhornium & Affinem, quasi non recto talo in obortis controversiis publicitus proponendis incederent, censoria graviter virgula notans, etiam obnoxie rogans, Adfinem primis literis muneris sui commonefacere: neque enim per Musenholium statutum, quo minus ea in Ecclesia

farta tecta concordia conservetur. Quæ cum apud me audeat hominem penè sibi ignotum, & Diamantio affinitate junctum, quid non apud alios spargere ausit, cogitatu haud difficile est. Alter congerronum est Radæus, Ecclesiæ Veteraquinatis Lydii Collegæ filius, discipulus ante pauculos annos meus, sed qui immaturus adhuc disciplinæ se nostræ subduxerit, Dordrechtque Franekeram, indeque Leidam ablegatus, Sibrandiana prius institutione, hinc Polyandri auditione, mox audiendis Homiliis parentis (qui vir nec prima Latini sermonis elementa scit, sed *αὐθιμὸς* non multos pares reperit) tantum & sibi & Parenti maximo intra biennium & trimestre profecisse visus, ut idoneus crederetur, qui Pastor fieret Ecclesie Ooster-Goudensis: quod & ambitu paterno facile est consecutus, segnescente indies cleri disciplina, & mutuum mulis scaberitibus, ridentibus & ringentibus interim veteribus condiscipulis, qui cum se ei suppare fuisse scirent cum à nobis discederet, nondum tamen eo jam Pastore ferulæ manus in schola nostra subduxerunt. Sed neque segnem Musenholio navavit operam Pollio, qui jam sic sese iis civitatibus commendabilem facere studebat, ad quas se *τὸ μαλλον ὄχι* Polyandri opera brevi vocando non falso sperabat. Atque hi illi ipsi sunt, qui in Bredana classe ultima, atque aliàs in convivii & circulis absolutam Catecheseos subscriptionem importunius cæteris urgebant. Quam ob causam literas ad adfinem dedi, quibus subscriptionem istiusmodi, à qua jam ante abhorrebat, penitus dissuadebam. Ostendebam Synodis aliquot confessionis exigi subscriptionem, nulla verò Catecheseos, ac synodica fortassis, minimè verò classicalis esse auctoritatis, novum in Ecclesia morem inducere; tantoque hoc ferendum minus, quod nusquam in Hollandia ipsa; non in ipsa Classe Dordrechtana, cujus tot annos pars fuisset, consuetudo illa obtineret. Sed & Synodo Gorchomiensi, & edicto illustrium ordinum potestatem omnibus factam Pastoribus, tam Confessionem quam Catechesin examinandi, ad scripturarum trutinam; quo si quid alterutrius Authores humanitus passi viderentur, ejus indicium & judicium fieret in synodo consecutura: dubitandum autem minimè esse, quin aliqua contineantur catechesi, de quibus dissensus sit inter præstantes Ecclesie reformatæ doctores, ut de descensu ad inferos, de justitia activa, & similibus: proindeque non debere quemquam ad absolutam ejus scripti subscriptionem compelli, priusquam Synodicum judicium factum esset. Quamquam verò affinis subscriptionem nunquam *ἀναί* detrectarit, sed dixerit semper, nolle

nolle tanquam Scripturis Canonis subscribere, sed ut præstanti Theologiæ compendio, in quo si quid fortasse Scripturis ac rationi rectæ consentaneum magis dici potuerit, saltem necessaria omnia Religionis Christianæ capita salutariter explicarentur; tamen nec hoc modo aliud profecit, quàm ut diceretur, nisi *ἄλλως* subscribere paratus esset, redditurum sese novitatis suspectum. Nempe cassa hac terribilis percelli, & à proposito dimoveri posse arbitrabantur. Postea per urbem dispersum, proclinare, uti Boxhornium jam diu, ita jam nunc Diamantium quoque in Remonstrantium partes; ut qui Catechesin subscribere formidaret, quam tamen ipse ad populum interpretaretur. Suspicionem auxere, quod duo vel tres Musenholii familiares, qui libellos nuperos *ἑστῶτες* legissent (cæteri enim nihil insolens in Affinis concionibus animadvertent) dicerent Affinem aliter quædam Scripturæ loca enarrare, quàm à Calvino factum esset, quem super iis consultuissent; tum autem, quod cum à gratiæ divinæ contemptu neglectuque populum dehortaretur, hoc aliquanto fervidius fecisset, nec addidisset, ut Electi hautquaquam vel resistere Spiritui Sancto, vel eum excutere possent: quorum utrumque sacro verbo doceremur. Sed & de concione dixerat Adfinis, gentes non omni veri Dei cognitione fuisse destitutas, sed eam in mendacio detinuisse; planèque videri, nisi id ab iis factum esset, divinam bonitatem, ac misericordiam majori eas gratia fuisse dignaturum: nunc culpa sua perisse, quia citra gratiosum fidei donum nemo Deo placere ad justificationem, ac salutem dandam posset. Ob quem sermonem Adfinem in Consistorio reum agere non dubitavit Musenholius; sed peragere non potuit. Nempe dixisse dicebat, posse gentes salvari sine fide in Christum: contrarium autem seniores, quos vocant, se audisse profitebantur. Ad hæc contigit, ut Lansbergius, Hillerus, alii, Amstelodamensibus aperto schismati studentibus, formulam concordiæ, aut quocumque nomine appellare lubet, ad vicinas Ecclesias miserint, easque inter Bredanam: in qua cum Boxhornius, & adfinis nihil nisi pacem Ecclesiæ spectari viderent, nec abludere ab nupero Ill. Ordinum edicto judicarent, non gravatè manu sua adfensum sunt testati. Non factum mallem, haut quidem quia mali hic videam quicquam; sed quia per quos isthæc procurantur minus tacituros putarem. Sanè vix subscripserat uterque, primo, ni fallor, alibi, mox Bredæ res ad Musenholium indeque in vulgus dimanavit. Jamque dièterio hoc notatur adfinis, quod qui gravatus sit subscribere Catechismo, hic Illustrium Ordinum Edicto (sic formulam

nuncupant) subscriptione sua dignetur: quasi dicant, divinis humana possidere. Dixi ante, qui de Ecclesiastarum, aut Candidatorum etiam grege Musenholio maximè student; sed & in urbe habet is duos, tres, qui operam ei suam commodent; hinc tanti typhi, ut cum literaturæ omnis penitus sint rudes, melius cunctis Ecclesiasticis, sese controversiarum obortarum gnaros esse jactitent. Hos inter quis familiam ducat, me non monente scies, si scias esse unum ex iis ægrorum consolatorem, quo hominum genere jam ab aliquot retro annis, nihil reperi nasutus, nihil ad turbandas Ecclesias, vel aptius, vel proclivius; Imprimis si factionis suæ ducem aliquem Ecclesiastarum nanciscatur. Ita, ut alios mittam, memini Dordrecht, Ecclesiasticas nullum magis metuere, & concionum, & vitæ apud vulgus censorem, quam ejus ordinis hominem: qui & cum Lydius de reprobationis dogmate mollius sentiret, & cuidam separatistæ Roterodamensi non in cunctis assentire posset, eum passim traducere coepit apud suos, quasi in Remonstrantium castra descivisset. Sed Lydius, cum tam atrocem, ut ipse interpretabatur, calumniam dissipare vellet, proximis hominibus graviter in Remonstrantes detonuit, multumque ea arte hominis labefecit fidem. Verùm ad Bredanum illum minimè factum *πυρρῶς* redeamus, qui similiter apud suos, ut Remonstrantem passim traducit adfinem. Quemadmodum verò olim nihil Christiani ipso nomine erat invisius, abundeque illud criminis, imo crimina omnia completi credebatur: Itidem Musenholius, *πυρρῶς* iste, & pauculi ejus farinae alii, sic Remonstrantis nomen apud non paucos exosum reddiderunt, ut qui Remonstrantem dixerit, hæresum omnium sentinam, & aliquem qui per schisma ad Patriæ prodicionem munit viam dixisse videatur. Sanè Musenholius his diebus in mensa Amintini nostri, apertè ac sine circuitione dixit, Remonstrantium hoc propositum esse, ut paulatim Papatum invehant. Hoc qui apud eos facit qui sunt nobis affinitate conjunctissimi, nec ob prudentiam facillè admodum calumniis istiusmodi fidem habent, quid non effutiat apud imperitum vulgus? sanè jam tantum per se suosque effecit, ut dicantur ducenti, aut circiter hac una de causa à sacra synaxi abstinere velle. Hæc malè adeò adfinem habent, ut jam menses aliquot, sed per intervalla, cum morbo graviter conflitetur, quem non aliunde quàm animi ægritudine contraxisse putamus: planeque metuimus, ne si (quod Deus avertat) res in apertum schisma prorumpat, affinis sit ferendo. Sanè moror multis *πυρρῶς* accessere solet, ut non temerè

temerè sit, quod ex etymo hoc mcerorem à dolore distinguant Grammaticorum filii. Per adfinem non stabit uti neque per Boxhornium quominus Ecclesiæ ejus conservetur concordia; tantum neuter adigatur ad Manichaica illa publicitus vel docenda, vel audienda. Miseret profecto Ecclesiæ, quæ vixdam papatus jugum excussit; ac jam nunc per concionatorem istum (Tulliana, non vulgari tantum consuetudine nunc vocem eam usurpo) suspicionibus ac calumniis à fidis Pastoribus avocatur, absterreturque. Mihi quidem omnimodo laborandum videtur, ut concordia retineatur. Qua autem ratione id confieri possit, tu, Amplissime vir, pro æquilina illa ingenii tui perspicacitate longè citrà dubium melius me vides. Dicam tamen quod in mentem venit. Non dubium mihi quin Hagæ, noris optimè Amplissimum D. Martinium, Senatorem Curie Brabanticæ, & Bredani Senatus aliquando partem, eoque qui indolem atque animos Magistratus Bredani optimè nosse possit. Quid? si is quempiam Procerum, cui maxime fidat, literis moneat, ne patiantur civitatem suam schismate distrahi miserè, sed Ecclesiasticis suis præcipiant, ut concordie studeant, nec in controversiis obortis prudentissimum Illustrum Ordinum Edictum transgrediantur, seu Manichaica seu Pelagiana docendo. Imprimis verò, quid? Si Magistratus illum ægrotum consolatorem, & unum alterum illius *ut dicitur* monere ad se arcescat, graviterque commonefaciat, ne ultra crepidam sapere velint, multo minus piis & doctis Pastoribus Ecclesiæ suæ hæreseos notam incurrere, ac vulgus à sacra synaxi absterreere velint. Equidem magni referre puto, ne ea civitas schismate turbetur, quæ & Ecclesiam habet novellam, & à Principe gubernatur Pontificio, & magna sui parte principis sequitur religionem, & quod caput, quæ hostili adeo solo est propinqua. Non dubito, quin si quid istiusmodi vel Illustris Ordines, vel Ill. Princeps Mauritius resciscat, principiis tanti mali sint obstituri. Cum ante menses duos tres adesset nobis adfinis, author ei fui, ut quod facile poterat, Hagam excurreret ad reverendum & summum virum D. Uytenbogartium, eique statim omnem Ecclesiæ suæ exponeret. Nec à consilio eo multum abhorrebat adfinis; tantum metuebat, ne si cum eo communicasse consilia sua immotesceret, plus Ecclesiæ suæ res ea damni daret, ut nunc quidem sunt tempora. Cogitabat etiam qui Musesii mos est, facile si vel levem suspicionem concepisset, hoc sibi exprobraturum: nolle autem hoc committere, quod negare non posset. Hæc ego cum scirem, putavi non

malè me facturum, si vel ipse ad clarissimum Uytenbogartium scriberem, vel, quod postea prætuli, tuæ rem omnem prudentiæ committerem, qui, si consultum putabis, cum eo rem communicabis, feci autem omne hoc nullo istius rei gnaro: Affine vero tam ignaro quam qui ignarissimus. Pene hoc significare exciderat, (quamquam exigui videatur momenti) ante hebdomades duas Mufenholium fuisse in urbe nostra non tam, puto, ob nuptias Pollionis quibus interfuit, multa cum Festo (ejus latus dextrum claudēbat) mussans diutissime; quam ut cum, quem dixi, viro nova turbanda civitatis consilia caperet. Sanè ratiocinari possim, uti de Clodio in Miloniana Tullius, nili magnum aliquod fuisset, cujus causa urbe exiret, non tum potissimum se ad iter fuisse accincturum; sciebat enim utrumque Collegam suum valere malè. Sed absente eo famula (quicum consilia sua homo prudens communicare videtur) dixit, non posse in urbe durare, in qua videre cogatur tam multa præter animi sui sententiam. Intellego ex quodam, qui Festo utitur familiariter, eundem cum domum reversus esset Ecclesiæ Ter Heiden (cui ante inserviverat Pollio) commendasse illum, qui sub cruce Roterdami (sic loquebatur) concionatus hæcenus fuit. Nempe existimatur ille suæ constantis *ad se* aliquod dedisse experimentum in urbe vestra, eoque dignus putatur qui jam perpetuus certi loci Pastor fiat. Ego ab istiusmodi hominibus, in Bredana dicecesi nihil boni spero, qui prius fratribus separationis, seu Separatistis, ut in Anglia vocantur, seu Donatistis novellis, ut veteri eos vocabulo insigniamus, sese factionis præbuerunt duces. Quamobrem hoc quoque ad adfinem primo tempore, perscribere animus est, quo cum Collega Boxhornio videat, ne sua pusillanimitate Ecclesiæ aliquid adferat detrimenti. Vale, Magnifice, Amplissimeque Domine; Et si occasio dabitur, ne quæso gravare salutem meo nomine dicere Clarissimo Uytenbogartio; cujus ego salutandi causa superioribus feriis Hagam excurreram; sed cum Principe prandere dicebatur; mihi autem, ob necessaria quædam negotia, diutius Hagæ hæreere non licebat: ita factum ut ex quo tempore una tecum ei aderam, præstantissimum virum non viderim. Iterum Vale.

Amplitudini Tuæ Observantissimus,

3. Decemb.
1615.

Gerardus Vossius.

XXIII.

Gerardus Vossius, Hugoni Grotio S. P.

Quoties cum animo meo reputo, prima reformationis tempora, eaque cum proximis, & illa item cum nostris compono; toties, Magnifice, Amplissimeque Domine, se maximum mihi offert argumentum infirmitatis humanæ: neque dubito, quin idem tibi usu veniat sæpissimè. Quid enim magis Luthero, aliisque piis Doctoribus, primitus obijci solet, quàm Papæ, & Ecclesiarum multarum dissentientium auctoritas? sed Doctores nostri ab Ecclesiis ad Scripturæ iudicium, à Papa ad Magistratus iudicium provocabant. Bona causa multis locis triumphavit. Sed cùm Lutherus homo quoque esset, à quo idcirco humani nihil alienum putari debet, factum, ut cum bono semine zizania alicubi seminaret. Videre hoc alii, fortassè nec pietate, nec eruditione inferiores; qui idcirco sedulo sibi adlaborandum iudicaverunt, ut à bono semine zizania distinguerentur. Hic qui in sententiam Lutheri iurassent, quasi quæ de Scripturarum unico, ac perfectissimo Canone dicta essent, adversus Pontificios solum valerent; ecce iidem, vel geminis planè armis, aggredi eos ausi sunt, qui zizania in Ecclesiis suis recens orta eruncare vellent. Nam ut Pontificii Pontificem, ita hi Lutheri Sectatores, Lutherum; ut illi Ecclesiam Romanam, ita hi Ecclesias Saxonicas, & alias; ut illi mediæ ferè, aut infimæ Antiquitatis consilia aliquot, ita hi, tanquam quod Conciliorum sibi multorum instar esset, Confessionem Augustanam urgere adversus dissentientes coeperunt. Habuit hoc alios pessimè, imprimis eos qui in re Sacramentaria ab iis dissentientes, hac parte Zuinglium, & Calvinum sequi se profiterentur. Aurem igitur istis vellere, memoriamque priorum temporum refricare, quibus armis istiusmodi pugnandum fuisset, causa fuissent longè inferiores. Sed surdo caneatur fabula. Nam qui quasi rerum dominarentur, hi, ut Pontificii olim, ita jam ipsi quoque in omnes à se dissentientes de umbone, tanquam de plastro omnis generis convitia jactare coeperunt: communitati etiam omni in posterum renuntiaverunt. Atque in his tuebantur se Lutheri ipsius (quanti alioquin viri!) exemplo: qui ut multa istius farinae omittam, (commemorare enim tædet) paulò ante excessum suum, ad Jacobum Probst, Pastorem Bremensem, virum, quod nec qui Lutherum tantopere sectantur, diffiteri poterant, eximie pietatis, scribere hunc in modum non dubitavit: *Be-*

tus vir, qui non abiit in consilio Sacramentariorum, & in via Zuingliorum non stetit, & in Cathedra Tigurinorum non sedet. Quod cùm illis aureolum, & bracteatum quoddam dictum videretur, omnes qui non habent animum affectibus impeditum, vident esse, non dico bullatas nugas, aut ineptam, ac puerilem allusionem: sed impiam & horribilem Psalmi perversionem. Nec intra convitia, aut Anathemata res stetit: ad carceres, ad exilia deventum: uti vel sola indicium faciet Peuceriana carcerum historia, quam optimus, & doctissimus Pezelius scripsit. Tantum non quidem religio, sed perperus affectus potuit suadere malorum. Tandem divina misericordia, in Britannia, in Germania, in Gallis, in Belgica, efflorescere etiam Ecclesiæ coeperunt, quæ Papæ sic jugum excuterent, ut à Luthero simul in *ovulas* dogmate dissentirent. Ac aliquantisper quidem hæ memores pristinæ conflictationis, & cum Papistis & cum Lutheranis, nihil urere, quàm Prophetica, & Apostolica scripta, summumque in Ecclesiasticis iudicium Magistratibus spontè detulerunt. Sed postquam plerique earum Doctores rem omnem in vado esse viderunt, inque Veterum multorum locum, jam successerant Oratores novi, Adolescentuli, quam in Papistis prius, ac mox Lutheranis tantopere damnarant, hanc ipsi, cùm alibi, tum imprimis in Belgica hac, calcare viam coeperunt. Si quod enim dogmatum suorum in dubium vocaretur, non jam ad scripturas solas, imò nec ad primævam Antiquitatem, provocari se patiebantur: sed ut Lutherani illi Lutherum, ita hi Calvinum, aut Bezam: ut illi Augustanam Confessionem, ita hi Confessionem Belgicam, vel Catechesin Palatinam: ut illi Saxonicarum, ita hi Reformatarum, in Provinciis hisce jactabant consensum. Et quod dolendum imprimis erat, non minùs quàm priores, omnes, à se sententiis discrepantes, tanquam hæreticos differebant, & quos possent sedibus, suis deturbabant. Quæ quoties cogito, propè animum meum subit, & ne & illi qui nunc, ob aliquem in Prædestinationis dogmate dissensum, tanquam *adversus* traducuntur, si superiores aliquando fiant, (liberè cur non apud te loquar!) similiter excepturi sint eos, qui dissentire ab ipsis audebunt. Quippe & illi homines sunt, non minùs quàm priores: Et semper sic, ut alios mittam, cum ipso eruditum vulgo ita comparatum fuit, ut contemptis iis qui moderata suggerent consilia, iis qui extrema sequerentur, se potius applicarent. Sed huic spero malo providebunt temporis viri aliquot præstantes, qui inter ipsos plurimum possunt: ac imprimis Magistratus

stratus summus, quem hæc antecedentium exempla possunt reddere cautiorem. Quod autem nunc illi, qui receptiorem sententiam tuentur impensè negant, vel transversum se unguem deflectere ab illa dissertandi ratione, quam sequebantur, qui primi Ecclesias Belgicas, vel domi, vel in exilio, docuerunt, hoc istiusmodi est, ut meritò dubites, utrum magis imprudentiæ, an impudentiæ tribui debeat. Hoc cur dicam, cum alia multa, etiam in vulgus notissima, testatissimum faciunt, tum imprimis historia isthæc quam nomine Nobilissimi Johannis à Lasco, Belgicæ Ecclesiæ in Anglia Episcopi; item Martini Micronii, eruditissimi, & fidelissimi Pastoris, & omnium Belgarum, aliorumque peregrinorum Londino profugorum, scripsit, divulgavitque, nobilis & insignis vir Johannes Utenhovius, Ecclesiæ Belgicæ senior. Quanto profectò aliter, quàm hodie hic fit, disputant illi cum Lutheranis Coldingæ, Wilsmaris, Hamburgi, atque alibi. Non visum hic universam istorum temporum historiam percurrere; sed contentus ero, ex multis aliqua delibasse, ex quibus de cæteris non obscura fiat conjectatio. Coldingenses quidam Pastores erant, nomine Paulus Noviomagus, & Henricus Sylvæducentis. Cum his nostri pium aliquod colloquium poscebant. Negabant contra illi, eo quicquam opus esse, cum nec Rex, nec ipsi minimum de Regni Danici doctrina dubitarent. Nempe similiter ac (lubet enim isthæc cum nostris temporibus conferre) dicentes audivimus quosdam, posse Pyrrhonios istos, ut vocabant, inter sese Catechesim examinare ad scripturarum statum: sibi hoc factu nihil opus esse, qui nec de particula ejus minima dubitarent. Sed quid hic à Lasco, Micronius, Utenhovius? Nempe tales præjudicio peccare arbitrabantur, planèque statuebant, non tantum cum Zizania spontè, aut fortuito oculis sese offerunt, de evellendis iis consilium capi oportere, sed sollicitè etiam inquirendum, nihil ne Zizaniorum uspiam reperiamus, cum inimicus homo ea soleat spargere, dormientibus iis quibus cura agri Dominici incumbit. Sed pergamus. Dicebant Lutherani, negari à nostris, clara Scripturæ verba, Hoc est Corpus meum. Nempe simili ratione, ac Ecclesiastæ illi, qui cum de Electionis & Reprobationis absolutæ dogmate disputant, clara esse aiunt verba Apostoli, Rom. IX. ac Reprobationem aliquam conditionatam inducentibus priusquàm quod volunt persuadeant, totum illud caput è sacris literis furcillandum esse. Sed quid in simili controversia à Lasco, & alii, quos diximus? Ipsum Noviomagum superiori concione docuisse, & quidem rectè: veritatem

cujusque doctrinæ, probandam non esse, unius alicujus loci in Scripturis testimonio, sed unanimi totius Scripturæ consensu. Obiciebant deinde nostris, quod omnia carnis judicio metirentur. Quis nescit hodie oggeri illis, qui absolutam reprobationem negant? sed audiamus à Lasco, & alios. Multa sunt alia in religione nostra capita, magis multo rationis nostræ judicio repugnantia, quæ tamen nos omnia per Dei gratiam indubitata fide amplectimur, abnegato omni rationis nostræ judicio, eo quod illa certis divini verbi testimoniis niti, atque insistere videamus; idem & hic multò libentissime facturi, si idem videamus. Obiciebant item, quod per Danicæ Regnum, jam alia de coena sententia obtineret: nempe ut nunc quidam in Prædestinationis dogmate Ecclesiarum (quam vere non disputo) auctoritate se tuentur. Responderunt nostri Lutheranis istis; Doctrinæ sane veritatem petendam nobis esse, non sanè è Regnorum, sed ex verbi divini certa ac solida auctoritate. Criminabantur item nostros, quod dissentirent à Lutherò, ac Saxonis Ecclesiis; quod Augustana Confessione damnarentur. Nempe haut aliter, ac nunc quidam semper crepant Calvinum, Ecclesias Belgicas, Confessionem, aut Catechesim: quæ fortassè tamen non usque adeò illis patrocinantur. Sed quid hic iidem illi laudatissimi viri? Dominus, inquebant, Lutherum, ac Saxonis Ecclesias, denique & Augustanam Confessionem non esse Catholicam Ecclesiam: nos Lutherum pro insigni Dei organo habere, sed illi nihilominus, Spiritum Sanctum juxta mensuram datum fuisse: hunc honorem solis nos Prophetis & Apostolicis scriptis deferre, ut nihil contineant quod non certa fide sit amplectendum: ceterum in scriptis Lutheri, (de Calvino idem dicere possumus) luculenta extare testimonia, illum sibi non perpetuo, neque per omnia constare. Quare & Lutheri scripta, & ipsam adeo Confessionem Augustanam, ad Scripturæ regulam, & legitimam Ecclesiarum judicium revocanda esse: neque ex Lutheri dogmatibus, aut etiam ex Augustanæ Confessionis auctoritate, ita præjudicandum esse, ut scindantur Ecclesie, utve sanctorum communio in Catholica Dei Ecclesia (contra fidei nostræ confessionem) videtur. Verba profectò aurea. Porro quia Paulus Noviomagus hæresios accusarat nostros publicè in concione; respondere ad illud in hunc modum: Contra doctrinam Evangelii factum dicimus; quandoquidem nemo de alterius condemnatione, pronunciare aut potest, aut debet in Ecclesia, quem non constat publicè à fundamento Apostolicæ Confessionis, Petri ore proditæ, excidisse. Et aliquanto post addunt: Nos hujus controversiæ nomine, neminem unquam averfati sumus, sed in fraterna charitate tulimus; & ferendos esse putavimus omnes, qui modo nos vicissim ferre volent, donec Dominus controversiam hanc, per gratiam

tiam suam componat, eo quod omnes fundamentum Confessionis Apostolicæ pariter retineamus. Quod ipsum in Prædestinationis controversiam multo etiam iustius dici possit. Alia quoque huius generis in isthoc Coldingensi colloquio legi possunt. Sed nihil nostros ulla iuvat defensio sui: Verum extrema in afflictione; mediæ hyemis tempestatibus, sexaginta circiter familiæ (quos inter decrepiti, pueri, matronæ gravidæ) summo cum vitæ periculo regno eiectione sunt. Sed operæ etiam fuerit delibare dissertationem, quam Hamburgi, Micronius habuit cum Joachimo Westphalo, eo adversus quem, & Calvini exstant quædam. Is tanquam Achilleum argumentum objiciebat Micronio: *De veritate doctrinæ nostræ Sacramentariæ nihil est ambigendum, cum ea in omnibus Saxonici & Orientalibus Ecclesiis, ut à sanctissimis viris, & Præceptoribus suis eam acceperunt, unanimi consensu tradatur. Falsa igitur, & repudianda est, contraria Zuinglii sententia, quæ in prædictis Ecclesiis est damnata.* Præclare respondet Micronius: *De controversa aliqua doctrina, non ex unanimi Ecclesiarum multarum consensu, sed tantum ex concentu Prophetice & Apostolicæ statui debet. Alioqui triumpharet Papa.* Tum Westfalus; *Ecclesiæ nostræ Saxonice sunt Ecclesiæ Dei.* Hic Micronius: *Ecclesiæ Dei ex loco estimari non debet. Utque Londinum non facit Ecclesiæ Dei, ita nec Hamburgum, aut Lubeck.* Nulla præterea est Ecclesiæ, præter Propheticam, & Apostolicam, quæ non in quibusdam hallucinari quandoque possit, quod ipsum quoque Lutherus docuit. Addimus Et Calvinus. Sed quid Westfalus hic? *Quod Lutherus scribit, Ecclesiæ errare posse, de Papistica, non de Christi sensu Ecclesiæ.* Respondet Micronius: *Imò de vera Christi Ecclesiæ loquitur Lutherus, qui ex humana quadam imbecillitate, in quibusdam nonnunquam impingit. Ex parte enim Prophetamus. Et fit aliquando, ut eximius aliquis doctor alicubi turpiter hallucinetur, quem mox deinde alii, præpostero quodam Zelo incitati, temerè, & pertinaciter imitantur. Hinc etiam sæpè errores in Ecclesiæ oboriuntur. Verissimè, Verissimè. Quare optimè ibidem sic colligit Micronius: Proinde approbanda venit doctrina Ecclesiæ omnis, non Ecclesiarum aliquot consensu, sed verbi divini auctoritate.* Objiciebat Westfalo Micronius; quod in libello suo, cui titulum fecisset, *de recta fide*, doctrinam suam sacramentariam Ecclesiæ iudicio subiecisset, eoque examen ejus subterfugere non deberet. Respondet Westfalus: *Ego doctrinam meam Sacramentariam, non Londinensi, sed Ecclesiæ Dei Hamburgensi judicandam proposui.* Similiter hodie multi in Prædestinationis dogmate, nullis se Ecclesiis subicere volunt, nisi quas idem secum sentire habeant persuasum. Ait idem Westfalus: *Si dubia*

adhuc esset nostra doctrina, graviter peccasset senatus noster, & serenissimus Daniæ Rex, qui adversus vos decreta tulerunt. Optimè respondet Micronius: *similibus argumentis facillè omnes viceris Papa.* Ait Westfalus: *Contra vestram doctrinam Comitibus Augustanis pronuntiatur est.* Micronium hic audiamus: *Non video vos justam habere causam tantoperè gloriandi, de Augustanis Comitibus, cum ea in eum finem instituta non sint, ut ibi audita prius utraque parte certi aliquid de re Sacramentaria statueretur: Sed fuit tantum nuda fidei confessio, quæ nullo modo Concilii legitime congregati auctoritatem obtinere potest.* Quod ipsum de Belgica confessione dicere possumus. Quemadmodum, & quod continuo subdit: *Siquidem Concilia omnia adhuc subjacent Scripturarum Auctoritati, quanto magis Confessio Augustana?* Alibi quoque recensetur in eadem historia colloquium, à Micronio habitum Wismariæ cum Doct. Smetendio. Hic, cum Micronius dixisset, *Magistratus possit colloqui testis esse, ac iudex:* respondet Doctor ille, *Magistratus? quid ille de religione intelligit? Petamus Rostochium, & ad Doctores, aut superintendentem proficiscamur, qui de colloquio judicare poterunt.* Nempe non alios iudices admittit, nisi à quibus certam sibi victoriam videt. Quid Micronius autem ad hæc? *Sic cine, inquit, Magistratum contemnis, Doctor? Quo iudice precor Papam principio vicit Lutherus, ab omnibus tunc Doctoribus Scholasticis passim damnatus?* Sed exscribillandi modus tandem esto. Abundè sanè ea, quæ adduximus, ostendunt quod superius dicebam, illos qui primi Ecclesias Belgicas collegerunt, repurgaruntque, semper à Doctorum quorundam sensu, Ecclesiarumque quarundam consensu, ad scripturarum iudicium, & Magistratus iudicium provocasse contra eos, quibus cum illis Doctoribus nostris negotium fuit; haud secus ac hodie quidam occipiunt è nostris. Nam ovum ovo similis non est, quàm illa quæ vidimus Lutheranorum Argumenta, & ista nostrorum, qui absolutam tuentur prædestinationem, nec Magistratus iudicium in Ecclesiæ rebus admittunt. Nec tamen par omnium hoc immodestia: sed quo imperitior quisque, hic minus rationi locum præbet. *Αὐτὸς δὲ ἀπειρήτων νόος ἀνθρώπων Δύσμαχος, καὶ δὲ δόλου καὶ ἀπρεκρίτου πλάνης,* ut optimè olim Oppianus. Atque ut ingeniosissimus Poeta alicubi ait,

Non plus his cordis, sed minus oris adest.

Plus modestiæ (quemadmodum & eruditione plerosque ordinis sui vincit) retinuit Antonius Walæus, cujus scriptum de jure Magistratus in Ecclesiasticis dicere possum, *ἀνέγνω καὶ ἔγνω, τὸ καὶ ἔγνω ἀπλῶς* addere non possum, ne merite

rito audiam illud quod desertori Juliano respondet Basilus, ἀνέγνως ἀλλ' ἐν ἑγώ, εἰ δὲ ἑγώ, ἐν αὐτῷ ἑγώ. Ita multa in eo scripto reperi, quæ meliorem mentem, majoremque modestiam spirent. Sanè si quis ea ex opere excerpta in unum congerat, simulque oculis subiciat, vix amplius aliquid requisiturus videatur. Sed tamen duobus nominibus peccat gravissimè. Nam adversarii sui mentem, quam non capit, carpit; eumque se oppugnare credi vult, cum suum oppugnat somnium. Ad hæc quæ scribit minimè videntur ἀνάλυτον καὶ ἀμείνων. Nam cum summum in Ecclesiasticis imperium, neget esse penes αὐτοκρατορά, ea tamen passim dicit, ex quibus colligere hoc potuisset, si mens non læva fuisset. Omnis erroris fons, & caput, quod confusè, indistinctèque singula consideret, & tractet, cum hic vel maxime habeat locum, illud Stagirita, Οὐκ ἐκνύσσειν τὸ διαφεύγειν. Id quo pareat, prius quidem, universè ac generatim ostendam, Magistratui summo etiam in Ecclesiasticis jus competere summum: deinde verò aliquam multa, imò præcipua ferè, Wallæani operis ad trutinam scripturæ, & rectæ rationis expendam. Nec ignoro, quam tu hæc melius me intelligas, sed non ingratus me facturum spero, si meum quoque hac de re iudicium perscribam.

Ac penes Principem quidem, seu Magistratum summum esse imperium supremum rerum Ecclesiasticarum, quatenus quidem penes mortalium quemquam potestas earum esse potest, solidè comprobatur, partim Dei ipsius mandato, annexaque promissione, & comminatione: partim exemplis piorum Principum, quæ nobis in S. Scriptura proponuntur, & commendantur: partim rationibus, quibus, Magistratus circa religionem, tum indirectum, tum directum, habere imperium ostenditur: partim exemplis Christianorum Principum, quæ Scriptoribus Ecclesiasticis continentur: partim autoritate Veterum, recentiorumque Patrum, qui potestatem hanc tribuunt Magistratui summo: partim iudicio, ac confessione Scriptorum externorum, qui & ipsi, velut rationis quodam ductu, imperium circa impiam Religionem suam, tribuant Principi suo: ac Principum ipsorum, qui in impia Religione sua jus illud usurparunt. Hæc omnia quidem cum cura tractare velle, scio res fuerit ingentis commentarii. Verùm nos ex immensa sylva tantummodò paululam struem congeremus. Ut igitur ordiamur, jubet Christus, *Matt. VI. 33.* ut primùm quæramus Regnum Dei, ac fore spondet, ut cætera omnia adjiciantur nobis. Quod mandatum, cum privatum quemque tangat, tum eos imprimis, quibus non

sui tantum, sed publici etiam cura incumbit: quibus regnum Dei in Remp. inducendum, promovendum, curandum, conservandum. Itaque & *Psal. XI. 10, 11, 12.* Sic eos per Davidem compellat: *Nunc ergo, Reges, animadvertite, eruditionem percipite, ô judices terre. Colite Jehovah cum reverentia, & exultate cum tremore. Osculamini filium, ut non irascatur, & pereatis in via, cum exarserit vel minimè ira ejus. Beati omnes, qui recipiunt ad eum.* Ubi Reges compellat Deus, non velut aliquos ex societate humana, sed tanquam Reges; quos non sibi tantum colere pietatem velit, sed curare, ut eandem subditi exerceant, quemadmodum optimè ea verba declarat Augustinus, ut infra videbimus. Huc quoque pertineat, si recta interpretatio, locus ille *Psal. XXIV. 7. Attollite portas, Principes, vestras, & elevamini porte infernales, & introibit Rex glorie. Psal. LXXV. 4.* ait David, *solutas columnas terre aptabo.* Ubi Spiritus S. (ut quidam satis aptè eum locum exposuit) columnas terræ vocat, statum secularem, & Ecclesiasticum, sive imperium in rebus civilibus, & Ecclesiasticis: quæ duo imperii statumina, & firmamenta, per diuturnas Saulis clades attrita, ac penè contracta, instaurare se velle ait David. Huc pertinent quoque illustria Magistratus elogia, ut quod *Es. XLIX. 23.* dicuntur *nutritii Ecclesie*; quodque *Psal. LXXXII. audiunt, Dii estis, & filii altissimi.* Nam ideo Deus hoc eos titulo dignatur, quia munus gerant divinum, præcipuaque imperii pars versetur circa ea, quæ ad Dei gloriam, & animarum salutem pertineant. Quod si exempla petuntur, suppetunt ea, in Davide, Salomone, Asa, Josophata, Ezechia, Josia, Jehu, aliis. Non inhærebo iis commemorandis, partim quia omnia inculcantur libris, partim quia selectissima illa testimonia sufficiunt, quæ ad edictum Illustrum Ordinum adscripta sunt, ex *2 Chron. VIII. 2. XVII. 6, 7. XXIV. 4. XXIX. 4. XXX. 1. XXXIV. 3. XXXV. 2.* Nec poenarum exempla, quibus Deus punivit, ejus mandati neglectum, quicquam arbitror requirat, qui vel solum cogitet: propter Salomonis idololatriam regnum ejus fuisse divisum, multosque Samaritæ Reges, ob religionis neglectum, periisse, ipsasque tandem decem tribus hac propter funditis propè fuisse deletas.

Scripturarum autoritati succedat pondus rationis. Nam si vel temporalia solum curare Reges seriò velint, ne sic quidem religionis cultum negligere debeant, cum cultus divini contemptus, ac negligentia, fons sit infelicitatis, ac multorum malorum: uti contra sincerus Dei cultus in temporalibus quoque magnam adfert felicitatem. Qua de re vide

integrum Deuteronomii, cap. XXVIII. quo nihil illustrius. Similiaque legas 2 Chron. XVII. 3, 4, 5, &c. XXVI. 5, 6, 7, 8. XXVII. 3, 4, 5, 6, 7. XXVIII. 6, 7, 8, 9, 10. XXIX. 6, 7, 8. XXXI. 21. XXXII. 27, 28, 29, 30, &c. Itaque Constantinus Magnus (uti Nicephorus scribit Lib. VII. cap. 46. *Publicitas omnes cohortatus est, ut imprimis divinum numen pie colerent: ita enim fore, ut omnia eis abunde prorsus suppetant; omniaque cepta cum spe optima feliciter cedant: sin à pietate tali, & veri Dei religione aberrarent, nihil eos & pace, & bello, quam res adversas expectare debere confirmans.* Etiam Theodosius moriens (uti idem Nicephorus scribit, Lib. XIII. Eccl. Hist. cap. 1.) nihil aliud filii mandavit, quam ut veram pietatem fervarent illibatam, coque eos argumento quoque inflammabat, quod per hanc habituri essent pacem, bellum sopituri, & victoriam à Deo consecuturi. Cui geminum illud Cyrilli penè initio libri, de recta fide ad Theodosium: *Impii Reges plurimè miseri, ac mali malè perierunt: contra verò pietatis cultores sine labore vincebant inimicos, & adversarii praevalabant.* Fusè deinde è Scripturis idem probat. Addamus & illud Leonis Magni ad Martianum Imp. Epist. XLII. *Magnam materiam gratulationis accepi, quia studiosissimos vos Ecclesiasticae pacis agnovi: cui sancto desiderio, digna equitate confertur, ut quem statum cupitis esse religionis, eundem habeatis & regni. Nam inter Principes Christianos, Spiritu Dei confirmant concordiam, gemina per totum mundum fiducia roboratur: quia perfectus charitatis, & fidei, utrorumque armorum potentiam insuperabilem facit, ut propitiato, per unam confessionem Deo, simul & haeretica falsitas, & barbara destruitur hostilitas, gloriosissime Imperator.* Pertinet huc quoque illud Tullii de Aruspicio responso, pag. 248. *Nec numero Hispanos, nec robore Gallos, nec calliditate Pænos, nec artibus Græcos, nec denique hoc ipso ejus gentis, ac terræ domestico nativoque sensu; Italos ipsos ac Latinos; sed pietate ac religione, atque hac sapientia, quod Deorum immortalium Numine, omnia regi, gubernarique perspeximus, omnes gentes, nationesque superavimus.*

Jam verò non tantum indirectè, & propter temporalem felicitatem, curam religionis Rex debet: sed etiam directè, & propter se, ut qua pars principalis ac quasi anima sit imperii. Quippe ut Ammianus, Lib. XXIX. ait, *Nihil aliud est imperium, ut sapientes definiunt, nisi cura salutis alienae.* Atque ut idem ait Lib. XXX. *finis justì imperii, ut sapientes docent, militas obedientium estimatur, & salutis.* Atqui, qui illud Satyrici novit, *optandum est, ut sit mens sana in corpore sano;* is sciat salutem, non solum esse corporis, sed etiam

animæ: ac quanto anima præstantior corpore, tanto hujus salutem potius censendam corporis fanitate. Si igitur sapientes, ut Ammianus ait, salutem alienam, finem esse statuunt Imperii; potissimum animæ salutem curare debet Princeps: præcipua autem, imo verò animæ salus est, æterna animæ salus: quam iccirco optimè finem Principis facit Thomas Aquinas, sive alius, libro de regimine Principis, cum alibi, ut infra videbimus, tum cap. ult. ubi ait, *divino cultui Rex toto conatu incumbere debet, tanquam debito fini, non solum quia homo est, verum etiam quia Dominus, & Rex est.*

Idem quoque eo evincitur, quod Magistratus Homero dicuntur *ποιῶντες λαόν.* Cui consentit Xenophon, cum Lib. VIII. de Institut. Cyri, *Similia esse, ait, opera boni Pastoris, & Regis; nam & Pastorem præstare, ut pecora habeant feliciter, & iis uti, si pecudum ulla felicitas esse possit: & Regem itidem urbes, hominesque facere beatos, atque iisdem uti.*

Τὸν τε γὰρ νομῖα ἡγήσας, ἔφη, ἐυδαίμονα τὰ πᾶσι ποιῶντα, ἡγεῖς αὐτοῖς (ἢ δὲ οὐκ ἔστι τὸν ἐυδαίμονα) τὸν τε βασιλέα ὡς αὐτὸς ἐυδαίμονα πᾶσι, καὶ ἀνθρώπους ποιῶντα, ἡγεῖς αὐτοῖς. Pag. 124.
Edition.
H. St. a.
1571.

Quantum igitur, *ἐυδαίμονας* pecudum (sic loqui licet) curat Pastor: tantum Rex procurabit hominum *ἐυδαίμονας*: atqui hæc non corpus solum respicit, sed animam quoque, atque id imprimis: ut etiam in Nicomachiis Aristoteles sentit. Sed fortius etiam idem probat, quod Princeps & dicitur, & est Patriæ Parens: ut Augustinus ait, Lib. XIX. de Civitate Dei, cap. 14. *Imperant qui consulunt, sicut vir uxori, Parentes filiis, Domini servis.* Quod igitur jus competit Patrifamilias in domo sua, idem aut majus etiam (nam paternum jus à principali determinari potest) convenit Principi in Rep. Atqui patris boni officium est curam gerere, non corporis solum, aut bonorum terrenorum; sed etiam & cum primis quidem eorum quæ animam tangunt: hæc verò inter, quin Religio familiam ducat, quis sanus dubitat?

Quid si exemplis etiam Christianorum Principum movemur; inde quoque clarissimum evadet, Principis munus esse publicitatis Religionem instituere, institutam conservare, & defendere. Constantinus Magnus in literis ad Ecclesias apud Eusebium, Lib. III. cap. 16. *Τὸν οὖν καὶ πᾶσι τὸν ἐκείνη ἔχειν καὶ οὐκ ὁρῶντες, ὅπως ὁ Θεὸς τοῖς μακαριωτάτοις τῷ Καθολικῷ Ἐκκλησιαστικῷ πνεύματι πᾶσι μίαν, καὶ εἰλικρινῆς ἀγάπην, ὁμοψύχων τε μετὰ τῷ πνεύματι τοῦ Θεοῦ ἐνότητι τῇ.* Idem Constantinus legem tulit, ut basilicæ Catholicorum, quas Donatistæ occupassent, Catholicis redderent, nec quas ipsi fabricassent, retinere

tinere permitterentur : cuius rei meminit Augustinus Epist. CLXVIII. ad Januarium, & contra Parmenianum, Lib. I. cap. ult. & contra Petil. Lib. II. cap. 92. Etiam edictum contra Arrium tulit, in quo hæc inter alia : *Si quid compositum ab Arrio reperiatur, ut igni id tradatur volumus. Illud etiam mandatum, ut si quis librum ab Arrio compositum occulasse deprehensus sit, & cum non statim in medium adductum igne combusserit, morte mulctetur.* Vide Socrat. Lib. I. cap. 6. Sozom. Lib. I. cap. 20. & Nicephor. Lib. IX. cap. 25. Etiam apud Eusebium de vita Constant. Lib. III. cap. 62, & 63. Lex ejusdem existat adversus hæreses omnes. In cuius fine, hæc legere est : *Nostræ enim prospere, ac beate vite ratione, qua Dei beneficio fruimur, est admodum consentaneum, ut qui atatem bona spe sustentatam degant, ab omni vago, & cæco errore, ad rectam viam, à tenebris ad lucem, ab inscitia ad veritatem, à morte denique ad salutem traducantur. Ac quo proviso hæc in curandis erroribus robur, & firmitatem sibi necessariam, assequatur ; mandavimus, ut supra dictum est, ut omnia superstitionis vestræ loca, in quibus convenire soletis, omnia dico hæreticorum templa, (si modo templa appellare convenit) sine recusatione, aut controversia diruantur, & diruta, absque mora Catholice tradantur Ecclesiæ, reliqua loca publico Reip. usui addicantur, ne ulla vobis in posterum conventus celebrandi relinquatur facultas. Sic igitur hoc ratum statutumque, ut post hunc diem in nullo loco, vel publico, vel privato, nefarii vestri conventus in unum coire audeant.* Hujus legis occasione, hæreticos, ac schismaticos, paulatim ad Ecclesiam rediisse, præter Eusebium, eoipse & sequ. capite, authores sunt, Sozom. Lib. II. cap. 30. & Nicephor. Lib. VIII. cap. 52. Etiam filius hujus Constantius, priusquam Arrianus fieret, Epistola ad Tyri Episcopum, hæc inter alia scripsit : *Certi sitis, me omni ope adnifurum, ut ea quæ sunt legis Dei, quam maximè inoffensa, illabefactaque, servantur, profligatis scilicet, & contritis semel inimicis legis, qui sub specie sancti nominis, multiplices & diversas blasphemias efferunt.* Vide Athanas. Apol. II. Idem adversus Donatistas, Macarium præfectum suum misit : qua de re Optatus, Lib. III. adversus Parmenianum. Constantio successit Julianus desertor : huic Jovinianus, de quo sic Gregorius Nazianzenus, Orat. XXI.

* Pag. 394. quæ est in laudem Athanasii, Edit. Morell. * *de ira dei istius laus & commendatio* *hujus Basiliius agnoscit, &c. Qui Jovinianus, ut pulcherrimum imperii sui fundamentum jaceret, rectamque legum sanctionem, unde conveniebat, auspicaretur, cum omnes alios Episcopos, tum cum ante omnes, qui omnibus virtute præstabat, ac ci-*

tra dubitationem ullam pietatis causa oppugnatus fuerat, ab exilio revocat. Quin etiam fidei nostræ veritatem, à multis laceratam, & perturbatam, atque in sexcentas opiniones, partesque distractam, sibi tradi postulavit ; ut maximè quidem universus Orbis, si fieri posset, in fidei negotio consentiret, spiritusque auxilio in unum coiret : sin minus, ipse certè optimæ parti sese adjungeret, simulque & ei robur afferret, & ab ea vicissim acciperet, excelsè simul, & magnificè de rebus maximis cogitans. Valentinianum etiam contra Donatistas legem tulisse scribit Augustinus, Epist. CLXVI. Gratiani, Valentiniani Junioris, & Theodosii senioris lex est, apud Theodoretum Ecclesiast. Histor. Lib. V. cap. 2 : & Sozom. Lib. VII. cap. 4. *Cunctos populos, quos clementiæ nostræ regis imperium, in tali volumus religione manere, quam divinum Petrum Apostolum tradidisse Romanis, religio hucusque ab ipso insinuata declarat, quamque Pontificem Damasum sequi claret, &c.* Item ista, *Episcopis tradi omnes Ecclesias mox jubemus, quos constabit communione Necessarii Episcopi Constantinopolitanæ Ecclesiæ esse sociatos, &c.* Aliam quoque vide Cod. de summa Trinit. Lib. II. De Donatistis etiam quædam à Gratiano, & Theodosio constituta esse docet Augustinus, Epist. CLXVI. Idem Gratianus Edictum emisit, quo universi hæretici, non Ecclesiis tantum, aut urbibus excedere juberentur ; sed etiam extra terras omnes propellerentur : qua de re vide Sulpitium Severum Hist. Sacræ, Lib. II. numero 69. Idem Theodosius Magnus Demophilum Arrianorum Episcopum, Ecclesiis Constantinopolitanæ urbis jussit excedere : eaque ratione factum, ut reliquas etiam Ecclesias recuperarent Catholici, quas sexaginta jam annis Arriani occuparant. Vide Sozom. Lib. VII. cap. 5. & Nicephor. Lib. X. cap. 8. Idem Sozom. cap. 12. Lib. VII. Et Nicephor. cap. 10. Lib. XV. testantur ab Theodosio Magno legem latam, ut sectarii, neque conventus agerent, neque doctrinam fidei profiterentur, neque Episcopos, aut alios ordinarerent. Quæ lex existat in Cod. Theodosii uti & aliæ multæ ad Religionem pertinentes : unde Hieronymus Epist. ad Paulinum, panegyrici pro Theodosio mentionem faciens his verbis : *Et militatem legum futuris seculis consecrasti.* Illustre etiam est, quod Socrates de eo narrat, Lib. V. Histor. Ecclesiast. cap. 19. *Determinata, inquit, die cujusque religionis Episcopi, ad aulam vocati conveniunt. Aderant igitur Nestorius, & Agelius Homusianæ fidei Antistites ; Arriana verò Demophilus ; Eunomiana ipse Eunomius ; Maædoniana Eusebius Cyzicenus. Ubi convenissent, excepit eos Imperator, & accepto cujusque dogmatis scripto, seorsum Deum impensè orat, ut se ad eligendam veritatem adjuvet.* Deinde

inde lecti cujusque dogmatis scripto; reliqua omnia, tanquam separationem sanctæ Triadis inducentia, reprehendit, ac carpit, solum verò, quod Homusianam fidem continebat, laudat, & complectitur. Hic verò videmus, ut etiam solus Imperator, Religionis controversiam decidit. Finem de Theodosio faciam, ubi adjecero hæc verba Ambrosii, de ejus obitu: *Theodosium Imperatorem dilexi: Virum, qui cum jam corpore solveretur, magis de statu Ecclesiarum, quam de suis periculis angebatur.*

Ejus verò Zelum hac parte imitati quoque filii ejus Arcadius, & Honorius, quorum hic etiam inter duos Episcopos judicans, falso Episcopo deposito, verum restituit, ut ait Turrecremata, Lib. IV. summæ, Part. I. cap. 9. Ac quemadmodum Theodosium Arcadius, & Honorius, ita Arcadium quoque, suus sequutus filius Theodosius junior, hunc item Marcianus: quorum de Religione leges, & plures sunt, quam ut huc congeri possint, & obviæ magis, quam ut nunc referri debeant. Non possum tamen præterire hæc Theodosii, & Valentini verba, ad Hormisdam Papam: *decere arbitramur, nostrum imperium, subditos nostros de Religione commonefacere, &c.* Et illa imprimis: *Inquisitio veræ Religionis, præcipua est sollicitudo Majestatis Imperialis.* Item hæc eorundem, Epist. XVII. earum quæ vel Cyrilli, vel inter Cyrillianas leguntur: *A pietate quæ in Deum est, Reip. nostræ constitutio pendet, &c.* Sed nihil illustrius verbis eorundem, quæ ad Illust. Ordinum Edicta citantur, ex Lib. II. Novellarum Theodosii, tit. 2. De Marciano verò tantum dicam, Evagrium, Eccl. Hist. Lib. II. cap. 1. & Niceph. XV. cap. 1. testari, imprimis hoc cum studuisse, ut sublatis hæresibus vera Religio, & rectus Dei cultus doceretur. Ejus quoque successor Leo, constitutiones priorum Cæsarum, pro Orthodoxa Religione confirmavit: ut scribunt Episcopi Egyptii, Epist. Lib. I. ad Leonem Imper. Eadem mens Justinii senioris: cujus legum pro Religione meminit, Niceph. Lib. XVII. cap. 2. Justinianus quoque Epiphanius Archiepiscopo scribens: *Nos, inquit, maximam habemus sollicitudinem, circa vera Dei dogmata, & circa sacerdotum bonestatem.* Et constitutione Novella XLII. de Episcopis, & Clericis, restituta ab Antonio Augustino: *Sed nos omni providentia curam Ecclesiarum gerimus, per quas, & imperium nostrum sustineri, & publicas res per clementiam Dei, ac gratiam muniri credimus.* Extat etiam, ut cætera mittam, Justiniani Edictum, de summa Trinitate, & fide Catholica: quo, ut in argumento ejus meritò scribit Ant. Contius; vix quisquam Patrum, aut Episcoporum, plenior, ac luculentior fidei ex-

positionem emisit. Procopius verò minime audiri debet, cum Imperatorem summum eo nomine fugillat, quod intra palatii secreta, de mysteriis fidei, cum sacerdotibus, quam de re bellica cum senatoribus colloqui mallet. Mitto Justinii junioris, Constantini Pogonatæ, aliorumque constitutiones, de quibus ex Novellis, Nicephoro, & cæteris constat. Nempe Socrates, Lib. V. scribit in proem. *Ἀφ' ὧν οἱ βασιλεῖς χειρταρίζον ἡρέαστο, τὰ τ' ἐκκλησιαστικὰ καὶ τὰ πολιτικά, καὶ αἱ μέγισται συνέδοι, τῶν αὐτῶν χρόνῳ, γινώσκει τε καὶ γινώσκουσι.* Similiterque postea animati fuerunt, Theodoricus Italiæ Rex, qui secundum Symmachum judicans schisma sustulit: ut agnoscat Turrecremata loco ante citato. Item Carolus, Ludovicus, Lotharius, uti Ecclesiasticæ leges ostendunt, ab Aufegiso collectæ. Nec putandum vel eos quos diximus hætenus, vel Principes Christianos (quos omnes recensere sit longum) hoc sibi juris vindicasse Episcopis invitit. Imò verò illud suscepisse volentibus Episcopis, ostendunt ea SS. Patrum loca, quibus Cæsares, ad illud capeffendum adhortantur, & gnauiter eo fungentes, summis laudibus extollunt. Hujusmodi jam adduximus aliquam multa: Addam verò & alia, quo res fiat manifestior. Justinus sanè Martyr, Apologia ad Antonium Imperatorem, * cum paratum se * Pag. 37. dixisset denuò, de Christiana Edit. Com. Religione cum Imperatore colloqui, addidit hujusmodi, *καὶ ὡς οὐκ ἔστιν ἀλλοτρίον τῷ βασιλεὺς εἶναι τὴν πίστιν.* Clarius etiam Gregorius Nazianzenus. † Cum consum- † Pag. 309. masset Jesus hos Sermones, &c. Edit. Morell. *Ταῦτα καὶ λαϊκοὶ νομίζουσιν. Ταῦτα καὶ πρεσβυτέρους ἐντέλλομαι, ταῦτα καὶ τοῖς ἀρχιερεῖς παρασκευάζω, βοηθῆσατε τῷ λόγῳ πάντες, ὅσοις τὸ δυνάμει ἐκδοῦν ἐστιν ὁ πῶτον ὁ ἑμὲς λόγος, ὁ δυνάμει πολεμῶν ὡς ἐστὶν ἀγία πειλὶς, ὅσον τὸ πνεῦμα.* Augustinus contra literas Petiliani, cap. 92. *Habent ergo Reges, excepta generis humani societate, eo ipso quo Reges sunt, unde sic Domino serviant, quomodo non possunt, qui Reges non sunt.* Et Lib. II. contra Cresconium Grammaticum, cap. 51. *Reges cum in errore sunt, pro ipso leges contra veritatem ferunt; cum in veritate sunt, similiter contra errorem, pro ipsa veritate decernunt: Ita & legibus malis probantur boni, & legibus bonis emendantur mali.* Rex Nabuchodonosor peruersus legem sevam dedit, ut simulacrum adoraretur: Idem correctus, veram, ne Deus verus blasphemaretur. In hoc enim Reges, sicut eis divinitus præcipitur, Deo serviunt, in quantum Reges sunt, si in suo regno bona jubeant, mala prohibeant, non solum quæ pertinent ad humanam societatem, verum etiam quæ ad divinam Religionem. Quibus gemina habet de correctione Donatistarum,

tistarum, ad Bonifacium, cap. 6. Idem eopse, hoc est, de Donatistarum correctione libro, cap. XIII. Nondum autem agebatur, quod paulo post in eodem Psalmo dicitur; Et nunc Reges intelligite, erudimini, qui iudicatis terram. Servite Domino in timore, & exultate ei cum tremore. Quomodo ergo Reges Domino serviunt in timore, nisi ea quæ contra iussa Domini sunt, religiosa severitate prohibendo, atque plecendo? Aliter enim servit quia homo est, aliter etiam quia & Rex est. Quia homo est, ei servit vivendo fideliter; quia vero etiam Rex est, servit leges iusta præcipientes, & contraria prohibentes, convenienti vigore sanciendo. Sicut servivit Ezechias, lucos & templa Idolorum, & illa excelsa, quæ contra Dei præcepta fuerant constructa, destruendo: sicut servivit Josias, talia & ipse faciendo: sicut servivit Rex Ninivitarum, universam civitatem, ad placandum Dominum compellendo: sicut servivit Darius, idolum frangendum in potestatem Danieli dando, & inimicos ejus Leonibus ingerendo: sicut servivit Nabuchodonosor, de quo jam diximus, omnes in regno suo positos, à blasphemando Deo, lege terribili prohibendo. In hoc ergo serviunt Domino Reges, in quantum sunt Reges, quoniam ea faciunt ad serviendum illi, quæ non possunt facere nisi Reges. Cum itaque nondum Reges Domino servirent temporibus Apostolorum, sed adhuc meditantur inania adversum eum, & adversum Christum ejus, uti Prophetarum prædicta omnia completerentur, non utique tunc possent impietates legibus prohiberi, sed potius exerceri; hic enim ordo temporumolvebatur, ut & Judæi occiderent prædicatores Christi, putantes se officium Deo facere, sicut prædixerat Christus, & gentes fremerent adversus Christianos, ut omnis patientia Martyrum vinceret. Postea vero cum cepit impleri, quod scriptum est, & adorabunt eum omnes Reges terræ, omnes gentes servant illi: quis mente sobrius regibus dicat, Nolite curare in regno vestro, à quo treatur, vel oppugnetur Ecclesia Domini vestri, non ad vos pertineat in regno vestro, quis velit esse religiosus, sive sacrilegus? Quibus dici non potest, non ad vos pertineat in regno vestro, quis velit pudicus esse, quis impudicus?

Hæc Augustinus, apud quem, & alia ejus generis non pauca legas. Leo Magnus ad Theodosium Augustum, Epist. XI. Pro integritate fidei, Christianissimum Principem convenit esse sollicitum. Vide & Epist. XXV. ad eundem. Idem Epist. LXXV. ad Leonem Augustum: Cum enim Clementiam tuam Dominus tanta sacramenti sui illuminatione diraverit, debes incunctanter advertere, regiam potestatem tibi non solum ad mundi regimen, sed maxime ad Ecclesie præsidium esse collatam, &c. Gregorius Magnus quoque Mauritium Augustum laudat; quod conservandæ sacerdotali charitati, & custodiæ fidei, rectitudine studii spiritalis, præcipua sollici-

tudine invigilet. Vide Lib. IV. Epist. LXXVI. & CLXIII. quarum utraque ad Mauritium scripta. Isidorus Hispalensis, Lib. III. Sentent. cap. 51. * Cognoscant Principes seculi, Deo debere se rationem reddere, propter Ecclesiam, quam à Christo tuendam suscipiunt. Nam sive augeatur pax, & disciplina Ecclesie, per fideles Principes, sive solvatur, ille ab eis rationem exigit, qui eorum potestati suam Ecclesiam credidit. Bernardus, Serm. XLVI. super cantica. † Quomodo namque stabunt Ordines Clericorum, & administrationes eorum, si non Principum tanquam tignorum beneficio & munificentia sustententur, & potentia protegentur? Arnulphus Episcopus Lexovientis, Sermone in Synodo habito. † Justitia regis Majestatis, per discretionem scientie dirigit, & informat. Informat ad virtutem, dirigit ad salutem. Et quid multis opus? cum Christiani Episcopi etiam ad Gentilem Cæsarem provocarent. Nam, uti Eusebius scribit, Lib. VII. 24. & Niceph. Lib. VI. 17. & seqq. Cum Paulus Samosatensis, à Synodo Antiochena damnatus, Episcopi ædes relinquere successori nollet, non dubitarunt Christiani Episcopi provocare ad Imperatorem Aurelianum, qui decrevit, ut illis Ecclesie domus tribueretur, quibus eam urbis & cæteri Italiae Episcopi adjudicassent.

Nec recentiores Ecclesie Reformatæ Doctores, hac parte à Veteribus dissentiunt. Ostendunt hoc ea loca Musculi, Martyris, Buceri, Joëlli, Witacheri, Bilsioni, & Episcopi Cistertiensis. Item Confessiones Belgicæ, Helvicæ, Basileensis, quæ citantur ad Illust. Ordinum Edicta. Addam locum M. Buceri, ex defensione Christianæ Reformationis Hermannii Archiepiscopi Coloniensis. * Ad unumquemque Magistratum præcipue pertinet, ante omnia providere, diligentissimeque, & efficacissime constituere, ut populo Christi, quoad curam animarum, rectè consulatur. Eadem mens est H. Zanchii Miscell. T. 2. † Primum, inquit, Magistratus munus, ordinare tam illa, quæ ad Religionem, & cultum Dei attinent, quam quæ ad publicam pacem, honestatem & justitiam. Sexcenta hujusmodi sunt, in Germanorum, & Helvetiorum locis communibus, uti Polani, & aliorum cap. de Magistratu. Nec tresloquens aliquot, sed libros integros describere oportet, si adferre vellem, quæ hac de re, Burtillus, Tookerus, alique Angli Theologi scribunt adversus Jesuitas. Unius tantum ex multis pauca ponam.

† Col. 704.
Edit. Antwerp.

¶ Fol. 75.
Edit. Paris. Anno 1585.

* Pag. 432.

† Pag. 277.
Edit. Neoscad. Anno 1608.

L. Cice-

L. Ciscestriensis ad M. Torti librum responsione, pag. 364. In Israele autem, nondum os reperi tam durum, quod negare etiam auderet, præcipuas in Religione partes, penes Regem extitisse: vel uno hoc argumento, quod per sacre historie seriem totam, mutato novi Regis animo, mutata semper est facies Religionis. Eaque in Religione mutatio Regi semper adscribitur, quasi factum ejus. Nec Pontifices unquam, vel præstare poterant, ut fieret mutatio in melius, vel ne fieret in pejus, impedire. Penes eos autem, si Religionis tum summa fuisset, aliquis aliquando Pontifex, etiam Rege secus affecto, præstitisset hoc tamen, ut cultum Dei ilibatum, pars aliqua populi saltem, retineret. Et pag. sequ. Regi id semper, Ecclesia nunquam, vitio datum legimus, quod Excelsa steterint. Regi ergo, siue declaret hoc, siue non declaret, etiam ante Ecclesia declarationem, id ex officio munus incumbit, deque eo neglecto, Deo rationem redditurus est. Et pag. 373. Conveniunt illa Regi, dare Judices in causis Ecclesie; dare Judicium Præsidentes; abusus in Religione, & corruptelas tollere; Arcam reportare, & præire reportandæ; Tempia dedicare, & ad eam rem cætus indicere; libro legis recitato, præcipere Pontifici de repurgando Dei cultu; fœdus renovare de Religione reformanda; Templum ingredi, & æncum serpentem confringere; Missiones sacerdotum facere; Pontificem ipsum ejicere, atque exanthorare, ne sit Pontifex: Hæc si Regi omnia sic conveniant, convenit & regimen Ecclesiasticum. Et pag. 380. Religionis cura, res Regia est, non modo Pontificia, & in Regis prima, quamque ille non solum, foris ab externa vi, sed & domi ab incuria hominum asserere teneatur. Vos quidem ipsi, si vis instet ulla, rem Regiam clamatis: Ille vero si collapsa sit disciplina, non minus Regiam. Quod si etiam ~~etiam~~ ^{etiam} audire lubet, hi quoque Religionis curam, potissimam faciunt Imperii curam. Ita Plato II. de Rep. ait, Præcipue eum, qui publico præsidet, Religionis curam suscipere debere: & eandem IV. de Rep. propugnaculum vocat Magistratus: & Lib. VII. de LL. nominat vinculum legum, & honestæ disciplinæ. Cicer. II. de Deorum voce excepta, planè consentaneum est illud Venusini Poetæ, Lib. III. Od. 6. *Dii multa neglecti dederunt, Hesperie mala lucifera.* Quod si quis exempla desiderat, quibus Principes gentiles præcipuam Religionis curam habuisse demonstratur, adeat Greg. Tholozanum, Lib. XII. de Rep. cap. 4. Danæum, Lib. I. Polit. & alios.

Atque hæc satis ostendunt, Principem præ aliis, tam personis, quam rebus, de Reli-

gione & Ecclesia, qua publica utraque est, sollicitum esse debere.

Estque ejus doctrinæ cognitio necessaria planè his temporibus, partim ob Magistratus ipsos, ne se putent *ἀλλοτρίωνται*, si Ecclesiastica curent; quin verò gravissimam sibi neglecti muneris rationem Deo reddendam sciant, si non curent: partim ob Ecclesiastas, ne hujus rei ignorantia, se Magistratus imperio, in Ecclesiasticis eximentes, transiliant mandatum Christi, jubentis ut Cæsari demus, quæ sunt Cæsaris, *Matth. XXII. 21.* Et Apostoli Petri, monentis, ut subiecti simus cuivis humanæ Ordinationi, propter Dominum, 1 *Epist. II. 13.* Item illud Pauli dictum, docentis omnem animam potestatibus supereminentibus esse subiectam, *Rom. XIII. 1.* quem locum interpretans Chrysostomus, disertim scribit: *Potestatibus ex debito obedire jubet; ostendens, quod ista imperentur omnibus, & sacerdotibus, & Monachis, non solum secularibus, id quod statim in ipso exordio declarat; cùm dicit Omnis anima potestatibus supereminentibus subiecta sit, etiam si Apostolus sit, si Evangelista, si Propheta, siue quisquis tandem fueris. Neque enim pietatem subvertit ista subiectio. Quæ verba etiam bonam partem excipit Theophylactus. Idem ibidem: Deus ita exigit, ut creatus à se Princeps vires suas habeat. Neque extenuatio ex eo est, quod Principi honorem suum reddis, sed magis ex eo, quod cum negligendo contemnis. Eodemque respiciens Bernardus, *Epist. XLII.* quæ ad Archiepiscopum Senonensem; *Omnis, inquit, anima potestatibus sublimioribus subiecta sit: Si omnis, & vestra: quis vos excepit ab universitate? Reddite Cæsari, quæ sunt Cæsaris. Scio ad secularia tantummodò referre hoc Pontificis: sed planè iis refelluntur, quæ antea de jure Magistratus in Ecclesiasticis diximus: Dolendum verò, hodie isthoc Papale *νενομήσιν*, etiam ab aliquibus studiosè arripi, quos alioqui amore sinceræ Religionis, ac pietatis erga Deum seriò duci judicamus. Sed sic ferè omnes sumus; ut quasi veritas Lesbia quædam regula esset, plurimùm seramus sententiam, prout quisque putamus rebus nostris maxime expedire. Itaque qui alias judicium in Ecclesiasticis utraque manu Magistratui deferimus, & ipsam severitatem principalem erga adversarios nostros, Zelum solemus appellare; hi si nobis delinquentibus, non omnia Magistratus ex animi nostri agat sententia, judicium retractamus: & quod non minus quàm antea Zelus dici debuerat, nec conscientia bona, ac citra magnum Ecclesie dispendium poterat omitti; hoc, quia nunc sic nobis affectis videtur, partim *ἀλλοτρίωνται*, partim etiam sævitiam appellemus. Quam bene**

benè aptari nobis possit, quod Gregor. Nazianzenus scribit Orat. XVII. quæ

* Pag. 270.
Edit. Morell.

ad cives Nazianzenos : * Nos fratres, dum officium ipsi deferentes, Magistratus potestatem iniquo animo ferimus, perinde utique facimus, ac si quis certaminis Præsidem, ut improbum accuset, cum ipse in palestra leges peccet ; aut medicum, ut indoctum, & audacem, quod sectionibus & canteris utatur, cum ipse gravi morbo laboret, asperioribusque remediis indigeat. Sed Græcè-quin potius ipsum audimus : *Ἡμεῖς τοῦτο π πάροθεν, ἀδελφοί, μὴ τὴ ἐαυτῶν κατεργασίῃς, ἀλλὰ τοῖς τῶν ἐξουσίαν διυπεραίνοντες, ὁσπερ αὖ ἐν τῇ αὐτῇ ἀγωνοδότης τις μοχθηρὸν, αὐτὸς ἐκπαλαῶν, ἢ τὴ λατρεῖν ἀμαθῆ καὶ δεσπὸν τῶν ποταμῶν, καὶ τὴ καύσασαι καρχηδόνων, αὐτὸς πονηρῶς διακείμενος καὶ τὴ ἀνθεστῆσαν δούλῳ φαρμάκων.* Tandem verò sapere discamus, & ut (hortatione

Nazianzeni ex eadem Oratione
† Pag. 269. hanc partem claudam) : † Submittamus nos, tum Deo, tum aliis aliis ; tum

illis qui imperium in terra gerunt : Deo quidem omnibus de causis ; aliis autem aliis, propter charitatis fœdus ; Principibus denique, propter ordinem, publicæque disciplinæ rationem : idque tanto etiam magis, quanto facilius illis, ac benignioribus vivimus.

Atque hæc generatim de jure summi Magistratus in Ecclesiasticis præmittere visum fuit. Porro nec abhorreat animus à speciali ejusdem juris consideratione : nempe quâ illud, circa Synodos, vel Pastorum vocationem vel legum lationem, vel jurisdictionem occupatur : sed cum accuratè adeo hoc omne persequaris gemino scripto tuo, ut nihil (nisi forte quis mole ac numero insaniens, exemplorum, testimoniorumque strues ampliores requirat) desiderare ultra possit : atque ad hæc quæ superius diximus, pro instituto quidem nostro, sufficere nunc temporis possint : speciali illa consideratione vel omissa, vel in aliud tempus rejecta, accedam deinceps ad ipsum scriptum Walæi, ac si qua ejus mereri nobis videbuntur, & recensèbo, & censèbo paucis. In ipso operis ingressu multus est in probando, reipsa distingui Magistratûs munus à munere Ecclesiastico : idque ut ostendat (quemadmodum passim indicat) Ministros verbi, non esse sui Magistratus, sed Dei Legatos, & ἀμείων à Deo vocari, non ut Magistratum obeant vicem, sed ut tam Magistratus, quàm cæteros, imò Magistratus præ cæteris Dei verbo pascant. Atqui hæc vera falsâ ne dicam incertus hæreo, an potius utrumque horum. Quam in sententiam magis animus inclinât, quia pro discrimine potestatis, ac judicii diversimodè hæc se habent. Potestas enim eorum qui publica sunt vocatione instructi, vel Civilis est, vel Ecclesiastica. Civilis procurat

humanum bonum, uti *ἐνδημιονίαν πολιτικὴν*. Atque hoc respectu societas hominum, non Ecclesia, sed Respub. vocatur. Potestas verò Ecclesiastica procurat spirituale bonum, uti beatitudinem cœlestem. Atque eo respectu hæc ipsa societas non jam Reip. sed Ecclesiæ nomen obtinet. Potestas verò Ecclesiastica est duplex : una interior, altera exterior. Interior versatur in his quatuor, verbi prædicatione, Sacramentorum administratione, Ordinatione Pastorum per impositionem manuum, & usu clavium. Exterior potestas in externa gubernatione consistit, qua Religio publicè sancitur, omniaque procurantur quæ ad bonum Religionis, quâ publica est, pertinent. Prior illa potestas propria est Ecclesiastarum : posterior primò & per se competit Magistratui. Quod optimè intellexit Constantinus Magnus. Is enim in sermonibus super mensam, cui accumbabant plurimi Episcopi, & in his Eusebius Pamphili, dixisse fertur, *ὑμεῖς μὲν τῷ εἶσω τῷ Ἐκκλησίᾳ, ἐγὼ δὲ τῷ ἐκτὸς ἀπὸ τοῦ καθεσθῆναι ἐπίσκοπον αὐτὸν εἶμι.* Ubi τὰ εἶσω five res interiores ab Constantino vocantur, verbi divini annunciatio, Baptismi & Eucharistiæ exhibitio, impositio manuum, five Ministrorum Ordinatio, & usus clavium ; uti antea dicebam. Τὰ ἔξω vero five res exteriores, vocat Constantinus, (ut optime ejus verba interpretatur vir Cæsarei juris intelligentissimus Melchior Goldastus) defensionem Ecclesiæ, custodiam Disciplinæ Ecclesiasticæ, rectè atque Ordine gerendæ, Conciliorum, seu Synodorum indictionem, Legum Ecclesiasticarum sanctionem, emendationem cultus divini, abrogationem superstitionum, & idololatriæ, observationem Cereemoniarum Ecclesiasticarum, notationem vitæ & honestatis Clericorum, punitionem impiè & flagitiosè viventium, Ministrorum bonorum procurationem, & malorum depositionem : & si qua id genus alia. Hanc Constantiniani dicti interpretationem confirmat illud, quod ipse dixerit *ὅσα πᾶσι κοινὸν ὀφίσκοπον ἐκ τοῦ καθεσθῆναι*. Quo clare indicat, se Episcopis etiam in Ecclesiasticis præesse, nempe non interioris (directè quidem) sed exterioris jurisdictionis ratione. Cujus etiam ratione (non tantum ratione Civilium Legum) se ministrum Dei esse dicebat, seque habere potestatem Episcopos improbos coercendi, ut est apud Theodoretum etiam, Lib. I. cap. 19. Quomodo etiam capiendum calcatur illud, *Rex est Persona mixta cum sacerdote*. Neque aliud volunt illi, qui dicunt Magistratum, etsi primò cura ei competat rerum Ecclesiasticarum, non semper tamen per se exercere, sed ferè hanc aliis committere. Quod de sola exteriori jurisdictione intelligunt. Ut omninò immeritò hos fugillet Walæus.

Hoc ut ita esse pateat, adferam aliquot recentiorum loca, superius à nobis omissa; quibus interiorem jurisdictionem Christo, ejus Ministerium ac functionem Pastoribus, exteriori verò in Ecclesiasticis jurisdictionem, & principalem Ministerii curam, supremo Magistratui committunt. Hier. Zanchius, Tom. 2. Miscellan. Illud, quo regnum hoc Christi instauratur, conservatur, propagatur, est sacrum, seu, ut vocant, Ecclesiasticum Ministerium, cujus Ministerii quidem totius, non functio, sed cura penes Principes esse debet, ut in exemplis piorum Regum Juda, imò ante hos in ipso Mose, videre est. Is ut Princeps & Dux totius populi, curam imprimis, ex mandato Dei, suscepit Religionis, & totius sacri ministerii: ipsam verò ministerii sacri functionem à politica separavit, & unam sibi retinuit, alteram Aaroni Pontifici, ejus liberis Levitis, injunxit. Muscul. locor. comm. de Magistratu: Quid igitur Ministris Ecclesiarum, Episcopis, ac Presbyteris relinquatur, inquirunt, si Magistratui comparat, ut curam gerat Ecclesiarum, Ministrorum, Doctrinæ, Sacramentorum, rituum, ac ceremoniarum, consistorii, scholarum, ac bonorum Ecclesiasticorum? Respondeo, relinquuntur illis ministeria, ad quæ obeunda eliguntur, atque constituuntur. Neque docet Magistratus, neque administrat Sacramenta, sed faciunt hæc Ministri. In schola non docet Magistratus, sed docet Ludi-Magister. In Consistorio non judicat Magistratus, sed qui ad id officii ab illo sunt constituti. Et tamen superior bonorum omnium auctoritas, & potestas ad Patremfamilias, labores verò & ministeria ad Oeconomum & familiam pertinent. Hac distinctione satis multum relinquatur Ecclesiarum Ministris. Utinam officia sua fideliter, militer, & prudenter obeant.

L. Cisterciensis responsione ad Matthæum Tortum, pag. 370. In gubernando primatum ponimus, non docendo, & Regem non doctorem summum, sed gubernatorem dicimus; ut jam dirimi possit lis, in docendi munere, quod proprie pertinet ad primatum suum; in gubernandi Rex, quod ille sibi solum vendicat ut Rex: nec illam alterum pontificatum docendi invadat unquam. Idem

copse libro (quem locum & Walæus citat.) * Docendi munus, vel dubia legis explicandi, Rex non assumit, vel conciones habendi, vel rei sacræ præcundi, vel Sacramenti administrandi, non vel Personas sacrandi, vel res, non vel clavium jus, vel censura; quæ ad sacerdotale munus spectant, seu potestatem ordinis consequuntur. At in iis quæ exterioris sunt politię, ut præcipiat, suo sibi jure vendicat, nosque adeo illi libenter merito deferimus. Religionis enim curam rem regiam esse, non modo pontificiam, & in regis primam, quamque ille non solum foris, ab externa vi, sed & domi ab incuria hominum asserere teneatur. Nam cum lege ipsa Dei, custos sit, ac vindex, non secundæ modo ta-

bile, sed & prima, prima quoque curam ad se pertinere putat, & primam primæ. Clarè etiam Guilielmus Theolog. Prof. & Decanus Leichtfeldensis, duello contra Becanum Jesuitam pro primatu Regis. † Tota controversia & lis nostra, versatur de ea † Pag. 59. potestate, quæ fori exterioris est. Quod idem sic explicat. || Rex non est su- || Pag. 23. pra Sacramenta, & verbum; nec super Ecclesiæ spiritualia charismata, & tamen est supremus Ecclesiæ gubernator; quia primaria Regis cura, agenda est pro rebus, ac causis Ecclesiasticis, primatusque Regis in eo munere perfungendo potissimum consistit. Et pag. 15, 16. Regia sublimitas constituenda est super omnes Personas, licet sint Apostoli, sint Prophetæ, sint Doctores, Evangelistæ, sint denique Pastores, non quidem supra Res, utpotè verbum Dei, sacramenta, fidem, penitentiam, quæ sunt spiritualia: per hæc enim spirituale regimen animarum Christi est proprium, etsi exerceatur per sacerdotale ministerium. Itaque Ministrorum functio, & dispensatio, quæ concedita est illis, Regum ac Principum minori antecedit perfectione & solatio: non tamen potestatis eminentia, quæ omnia bona, & salutaria jubet pro Christo & Ecclesiæ, & prohibet contraria.

Atque ex his testimoniis constare arbitror, quid judicii ferri debeat de iis, quæ de discrimine Civilis, & Ecclesiasticæ potestatis, disputat Walæus usque ad pag. 12. Imò ex iisdem facile etiam diluuntur, quæ deinceps usque ad pag. 18. differit, ut ostendat judicium de rebus Ecclesiasticis competere Ecclesiasticis. Nam confundit judicium quod simplex sententiæ dictio est, & illud quod cum imperio est conjunctum. Optimè idem Guilielmus Tooker adversus Becanum Jesuitam, pag. 50, & 51. Est quiddam quasi perpetuo Regis Coronæ adnexum, quod directivam cum aliis, coactivam solus habeat potestatem. Atque addit, hoc esse quod dicit; eum primatum Christianum Christiani Principis in Ecclesiæ Christi sub Christo habere. Quare quod objicit Walæus, sacerdotum fuisse judicare de lepra tam interna, quam externa, de priori illo judicio, quod directivum seu suasivum optimè vocatur, verissimum est: sed hoc non prohibet, quominus solis Magistratibus, primò & per se competat judicium imperativum, seu coactivum; quatinus eorum est sacerdotes, si vel munus suum non intelligant, vel negligant, officii commonefacere, in locum immorigerorum, vel non idoneorum alios surrogare, leges pro Religione ferre. Quæ omnia cum non cæco impetu ad nutum alienum, sed post disquisitionem certam fieri debeant, omnino prævium judicium requirunt.

Respon-

Respondent aliqui, iudicium quidem Magistratibus competere, cum quævis actio consequatur iudicium intellectus: nec quod iudicium privatis conceditur, magistratibus eripi possit: verum Magistratus hoc iudicium, rectè sentientium Pastorum iudicio conforme esse debere. Sed non cogitant hi, illud ipsum esse, de quo iudicare oportet Magistratum, qui illi sint rectè sentientes Pastores. Nec enim ideo ἱερεῖς sunt, quia tales se esse profitentur, cum idem faciant ἱεροδδοῖς. Nec ideo tales habendi, quia numero vincunt: cum sæpe hæreticorum numerus sit major: ut olim cum ingemisceret mundus, seque Arrianum factum esse miraretur, ut Hieronymus scripsit. Initio item Reformationis, & omni eo tempore, quo Waldenses se, totis nempe trecentis annis & quinquaginta, ante Lutherum Synagogæ Pontificiæ opposuerunt. Nihil igitur manifestius, quam Magistratum ponderare, non numerare sententias debere. Unde colligere est, quoties Pastorum suorum potius quam aliorum, aut plurium, quam pauciorum iudicium sequitur Magistratus, non ideo sequi, quia Pastores illud dicunt, sed quia persuadent, quod dicunt.

Pag. 22. Quadrifariam probare occipit duo distincta collegia ordinari, *Denter*. XVII. unum Ecclesiasticum, alterum Civile. Verum ut duo distincta collegia fuisse concedamus, (sanè utramque in partem, non adspernanda video argumenta) non tamen ritè evincat, quod vult. Nec enim hoc impediret, quominus & prius iudices, & post hos Reges, utrique præfuerunt collegio, nec res duntaxat Civiles, sed etiam Ecclesiasticas gubernarint, cultum divinum fovendo, collapsum instaurando. Quam piorum fuisse Principum curam, argumentum illud validissimum est, quod pro Iudicium Regum, vel pietate, vel impietate, semper Religio, aut floruit, aut jacuit, ut & ante dictum est.

Inter alia verò ait, nisi fateamur, fatendum esse, quod apud Evangelistam dicuntur, non minus sacerdotes, quam populi seniores, convenisse ad iudicandum Christum; consecuturum etiam sacerdotes, ac Levitas habuisse jus necis. Verum duplici ratione id absurdum non est. Uno nomine; quia, *erant quædam* (verbis utar Burchilli è cap. 28. pag. 294.) *privilegia sacerdotum Veteris Testamenti, quorum erat & in rebus civilibus de jure respondere: etiam Deum consulebant in dubiis, tam civilibus, quam Ecclesiasticis.* Altero verò nomine, quia dici potest, non habuisse jus necis, qua sacerdotes (nec enim omnes jus hoc habuere) sed qua pars erant summi synedrui, cujus solius erat, *iudicare, tribum,*

sceptrum, Pseudo-prophetam, & sacerdotem magnum: ut ex Talmudistis refert Petrus Galatinus. Josephus etiam adversus Appionem, Lib. 2. disertim scribit, sacerdotes inspectores omnium, iudices controversiarum, erratores damnatorum fuisse à Mose constitutos.

Pag. 25. Argumentum inde pro sententia sua dicit, quod Ecclesiasticis solis jus clavium committatur. Sed distinctione hic opus, ad quam nobis præit Marilius Patavinus, secundæ partis, cap. 6. uno tamen hoc habens, quod satisfactionem Ecclesiasticam, errorem sui seculi secutus, convertit in satisfactionem pro poenis purgatorii. Ipsum audiamus. *In peccatore, inquit, verè penitente aliqua solus Deus operatur etiam absque sacerdotis aliquo proveniente Ministerio, mentis videlicet illuminationem, culpæ seu maculæ peccati purgationem, & æternæ damnationis remissionem. Alia verò sunt quæ Deus, in eodem peccatore non secundum se solum operatur, sed per ministerium sacerdotis: sicut ostendere in Ecclesiæ facie, quis solutus, vel ligatus, à peccatis habeatur in hoc seculo, ligandus aut solvendus in alio, id est cujus peccata Deus retinuerit, aut dimiserit. Amplius, est & aliud quod Deus operatur circa peccatorem per ministerium sacerdotis, &c.* Alterum, hoc est satisfactio, seu quorundam pietatis operum à sacerdote impositorum præstatio, quibus se poenitentia peccatorum verè duci declararent. Tertium ut ibidem Marilius ait, est, quod à Sacramentorum communione per sacerdotem excludantur contumaces, & resipiscentes admittuntur. De tribus quæ à Deo auctore præstantur, nulla est controversia: sed tantum de illis tribus posterioribus. Quod ad primum, quæ sacerdos non quidem peccata remittit, aut retinet, sed ut optimè Marilius dicit, remissa aut retenta esse ostendit, five annunciat. De hoc litem non movemus, Nam jam antea hoc respectu facti sumus: administrationem clavium esse jurisdictionis interioris, non exterioris, quam solam Pastoribus tribuimus. Quid mirum? cum prædicatio Evangelii his solis conveniat: administratio verò clavium, respectu hujus primæ partis, nihil aliud sit, quam singularis Evangelicæ prædicationis applicatio, quæ alii intromittuntur in Ecclesiam, alii ex ea ejiciuntur: intromittuntur poenitentes & fideles: ejiciuntur impoenitentes, & Apostatæ. Unde & idem Marilius Patavinus, secundæ partis, cap. 6. hanc clavium auctoritatem vocat, judiciariam potestatem: eamque esse ex Hieronymo, & Augustino definit, *discernendi scientiam, & potentiam qua (sacerdos) dignos recipere, & indignos excludere debet à regno.* Nempe ex pronuntiato, generali scripturis contento, quod in syllogismo majus est pronuntiatum, & ex cujusque Personæ

qualitate, qua vel fidelis, vel infidelis est, (hæc res minus constituit pronunciatum) concludit, qua quisque conditione sit apud Deum, num Regni particeps an exfors; live num damnatione peccato solutus, an restrictus. Unde ministerii usus, sive jus hoc singularis applicationis, non modò clavibus, quibus claudimus & aperimus, sed etiam vinculo comparatur, quod vel stringitur, vel solvitur. Ad priorem translationem pertinet, quod Christus ait, *Tibi dabo claves Regni celorum*. Ad alteram referendum quod dicit; *Quodcumque ligaveritis super terram, erit ligatum in celis*. Utrumque igitur singulari Evangelicæ prædicationis applicatione fit, ut tum aperiamus, vel claudamus: tum ligemus, vel solvamus: sed aperiimus & claudimus ratione personarum: ligamus, & solvimus ratione rerum, hoc est peccatorum. Quomodo optimè, iudicio meo, Christi verba explicat Junius, in analysi ad hunc locum: ubi sic scribit: *Ministerio servorum Dei, tum persone in Ecclesiam intromittuntur, aut ejiciuntur: tum rei ligantur, solvunturque, id est peccata tenentur, aut condonantur*. Secundum erat satisfactio, qua poenitentiae quædam signa, in delictis gravioribus perscribebantur: de cujusmodi satisfactione agit Cyprianus, Ep. XII. & LIV. & alibi. Hæc signa suadere sacerdos potest, *velos* verò loquendo imperare non potest: cum penes eum solum, qui imperium habet, sit vis coactiva. Tertium erat abstentio à coena, sive non exhibitio signi Sacramentalis: qua minister non de aliena actione judicat, sed de sua; peccet enim contra charitatem, si ei præbeat signa, ad quem scit non pertinere. Eoque nec ullum hic imperium, sed tantummodò Ministerium est. Atque hinc liquet, quatenus clavium usus solis conveniat Pastoribus; & tamen horum quoque ratione, ad Magistratus indirectè pertinet, hoc est non quoad usum ipsum, sed quoad curam circa eum quæ publicus est. Nam veræ Religionis cura cum primis pertinet ad curam, & potestatem Magistratus, ut Musculus ait.

* Loc. com. pag. 1369. *antea dixerat, || Cura Religionis publica, ad Magistratum non simpliciter, & utique, sed cum primis pertinet.*

Quo loco non hæc Musculi mens est, magis Magistratum Religionem, quàm res civiles curare debere; sed verò curam Religionis, qua publica, ad Magistratum magis, quàm Ministros pertinere. Unde idem

* Pag. 1371. ait, * penes Magistratum esse, *superiorem Religionis potestatem, & curam*. Atque ex his quoque liquet, nihil efficere Walæum, seu vulgarem, seu illam Biffono, & alijs aliquot eruditjs viris proba-

tam sequamur interpretationem loci istius, *Matt. XVIII.* de qua Walæus agit, pag. 25. usque ad pag. 29.

Illud verò invidiosè, & prope dixeram malignè quod pag. 28. ait, eos qui disciplinæ Ecclesiasticæ exercitium, Magistratui primò dicunt convenire, novum eudete Christianissimum, novam planè Ecclesiæ faciem inducere: qualis nec apud ipsos obtineat hæreticos. Nam Disciplina Ecclesiastica, & qualis in primitiva obtinuit Ecclesia, & qualis nunc nonnullis locis est, partim divinæ est institutionis, partim humanæ. Divinæ est, quod Pastor impœnitenti, & incredulo regnum celorum claudit, hoc est, quod tanquam Legatus Christi, regnum celorum ei clausum esse denuntiat. Item quod palam hæretico, aut facinoroso, non exhibet signa Sacramentalia. At humanæ institutionis est, quod qui peccarit, licet poenitentia facti ducatur, præfinito tempore seorsim à cæteris inter poenitentes jubeatur consistere: atque alia id genus omnia habentia poenam politicam. Posteriora hæc non conveniunt Ecclesiasticis, quæ tales, sed ubi Magistratus est Christianus, jus omne circa ea habent à Magistratibus, quibus solis convenit jurisdictio propriè dicta. At priora competunt quidem Ecclesiasticis, ut tales sunt: sed hoc non impedit, quo minus Magistratus sit procurare, ne Pastores in munere suo sint negligentes, vel etiam seu odio, seu alio affectu, consolatione debita, vel Sacramentalis signi exhibitione fraudent, quos non oportebat. Nam (ut verbis utar Gregorii Magni in *Johan. cap. XX. Homil. XXVI.*) *Sæpe agitur ut indignus Episcopus, vel damnet immeritos, vel alios ipse ligatus solvat. Sæpe in solvendis ac ligandis subditis sue voluntatis motus, non autem causarum merita sequitur. Unde fit ut ipsa hæc ligandi, ac solvendi potestate, se prioret, qui hanc pro suis voluntatibus, & non pro subditorum moribus exerceat.*

Peccat igitur Walæus cum disciplinam Ecclesiasticam posteriori tantum modo considerat; cum jus ejus Magistratui priorum ratione imprimis tribuatur: nempe quia hæc propriè imperii sunt, solus autem Magistratus vim habet cogendi. Interim illud benè est, quamquam satis non est, quod paulo post, pag. nempe 30. agnoscit ipse, satis parere è verbo Dei, Magistratus esse officium curam gerere, ut rectè exerceatur, universum ministerium Ecclesiasticum, ac proinde etiam Disciplina Ecclesiastica. Quamquam fallitur, cum existimat, sic Magistratus esse curare, ne quid hic peccent Presbyteri, quomodo Presbyterorum videre est, ne quid delinquant Magistratus. Nam Magistratus cura est principalis, quia imperii est, directè quidem circa priora

priora illa, quæ humani sunt instituti: indrecti verò circa posteriora, quatenus procurat, ut fiant, quæ instituti sunt divini. Quod ait, non consequi ex iis quæ confessus erat, si jure suo abutantur Presbyteri, posse ad Magistratum *veluti* loquendo appellari: in eo illi minime adstipulamur. Nam omnino Magistratus cura superior est, ut benè Musculum dicentem videmus. Quid verò appellare aliud est, quàm ab inferiori iudice, ad superiorem provocare, seu voce illud fieret, seu libello? ut est L. XIV. de Appellationibus. Quomodo & in Veteri glossario legere est: *Appellatio est proclamatio ab inferiori, ad superius tribunal, vel gravaminis relevatio, per clamationem ex minori ad majorem iudicem factam, prætextu iniqui gravaminis, vel injustæ sententiæ.* Et quid infirmius isthac argumentatione cum sic colligit: Ad Magistratum summum non appellari nisi in iis, quæ per se subire possit Magistratus: non posse autem Magistratum prædicare Evangelium, aut Sacramenta administrare; eoque in his ad eum appellari minime posse. Nam & multa sunt ministeria civilia, quæ per se obire Magistratus summus minime debeat; in quibus tamen ad eum licet appellare: cujusmodi sunt ea, quæ sui utilitate offuscarent, vel etiam ludibrio prostituerent summi imperii Majestatem. Verum esto sanè, ut appellationis vox apta satis non sit; saltem concedat, si Presbyteri disciplinam injustè exerçant, posse unumquemque de injuria conqueri apud Magistratum: ac quamquam hujus non sit facilè querimoniis istis habere fidem, tamen nec facile debere illis aurem obstruere; imò nec magis perpeti debere injustum clavium usum in Consistorio, quàm hereticam institutionem in Templo. Quæ diffiteri non potest: ut qui ipse, p. 30. scribat, si tempora incidant, quibus Disciplina corrigi debeat, Magistratus esse facti rationem exigere à Presbyterio, excommunicationem innocentium sui autoritate imperii impedire: quomodo Athanasio à Synodo condemnato, Constantinus (ut Socrates testatur, Lib. II.) alios instituit conventus, quorum opera, uti & virorum aliquot doctorum, res denuò cognosceretur: quomodo item Magistratus pii, nostro seculo Ecclesias Reformatas, adversus excommunicationem Pontificis, & Concilii Tridentini defenderunt; hodieque per Dei gratiam tuentur. Atque hoc etiam (pag. 33.) Th. Bezan cognovisse ait, ubi hæc ejus citat verba adversus Erasmus: *Cum etiam à rectè constituto consistorio, possit reis delatis injuria fieri, in angustioribus territoriis, citra ullam Ordinis Ecclesiastici violationem, Christianus Magistratus, ut sabulæ sariisq; & Ecclesiasticæ cunctis custis & vin-*

dex, prospicere potest conquerentibus. Mox etiam (pag. eaple & seq. 34.) ait, Magistratum tantumdem juris, in Synodos, ac Concilia quæcumque obtinere, cum usu non raro venerit, ut his quoque decernerentur, quæ verbo Dei repugnarent. Eoque id si fiat, talibus constitutionibus obviam ire, & posse, & debere. Quæ omnia præclare ab eo dicuntur, ac istiusmodi sunt, ut principalem Ecclesiæ curam, penès Magistratum summum esse evincant. Præsertim cum (vers. 10, & 11. pag. hujus 34.) dicat se semper loqui de iis quæ ad *bonam* Religionis pertinent, quæque verbo Dei discretim præcipiuntur. Nam si circa hæc Magistratui tribuit imperium indirectum, quod jubeat, quæ Deus jubet, eo quod Deus jubet: non dubitandum videtur, quin directum etiam imperium, Magistratui concessurus sit in iis, quæ ad ædificationem quidem Ecclesiæ pertinent, sed speciatim verbo Dei non præcipiuntur. Et sanè propter hæc, & alia istiusmodi factum credo, ut vir quidam præstans, (quemadmodum præsentè D. Heinio mihi retulit Colonius) judicium hoc tulerit de scripto Walæi; tam multa eum adversariis largiri, ut propè non videat, quid in controversia relinquatur. Ac etiam clarissimus P. Bertius præsentè Collega meo dixit mihi, se ex iis quæ hæcenus, eo in scripto legisset, judicare aliud non posse, quàm cum Utenbogartio, in re ipsa consentire. Quod pag. eaple ait Musculum, & aliquot alios ejus populares, ab unanimi Christiani orbis sententia paucillam deflexisse, idque odio Anabaptisticæ Disciplina factum videri: mihi quidem verisimile non fit, sed potius censo, impugnata ab iis eam disciplinæ rationem, quæ Genevæ obtinet, quam & alii alibi inductum ire voluerunt. Ac sic ut sentiam, magis faciunt verba, cap. 18. Confessionis Helveticæ, quæ ipse citat, pag. 35. sunt verò istiusmodi: *Quamque omnino oporteat in Ecclesia esse disciplinam, & apud veteres quondam usitata fuerit excommunicatio, fuerintque judicia Ecclesiastica in populo Dei, in quibus per viros prudentes, & pios exercebatur hæc disciplina, Ministrorum quoque fuerit, ad ædificationem, disciplinam hanc moderari, pro conditione temporum, status publici, ac necessitate, ubi semper tenenda est regula, omnia fieri debere ad ædificationem, decenter, honestè, sine tyrannide, & seditione.* Et sanè nihil Musculus dicit, quod non aliis quoque Reformatæ Ecclesiæ doctoribus videatur; ut omnino non *inordinatè*, qualem Walæus videri vult, (nempe hanc mercedem reportant qui diligentius veritati indagandæ incumbunt) sed *inordinatè* dici debeat. Quod verò pag. 42. ait, malignè Utenbogartium adversariis suis impingere studium collateralis imperii; utinam verum

perio præest, etiam universam Religionis curam, qua publica est, summo Magistratui subiectam esse necesse est. Eoque respectu fatendum, Ecclesiastas secundum interiora illa, nempe prædicationem Evangelii, administrationem Sacramentorum, impositionem manuum, & jus clavium à Magistratu summo dependere. Quod cum dico, non tantum Ecclesiastas Magistratui subijcio, quatenus in horum arbitrio est, quæ Religio publicè debeat obtinere; sed etiam quatenus eorundem est procurare, quæ ad Religionis puræ primitus institutæ conservationem, aut collapsæ instaurationem pertinent. Atque hinc planissimum fit, non in eo tantum discrimen esse, inter Magistratus & Ecclesiastas; quòd illorum munus in imperio, horum in solo directione, ac ministerio situm sit: sed etiam quod Ecclesiastæ, in Ecclesiasticis immediatè non Deo, sed Magistratibus subsint, nempe qua Religio publica est: directè quidem ratione exteriorum, in quibus propriè dictum imperium habent: indirectè verò in cæteris, in quibus improprium habent imperium, ut quod solum consistat in procurando ea, quæ Deus imperavit. Illustremus hæc exemplo, de Cœna Dominica: in qua tum essentialia spectantur, tum quæ extrinsecus accedunt. In prioribus jus Ecclesia non habet, aliquid omittendi, vel mutandi: eoque nec Magistratus, qui supremus est Ecclesiæ gubernator, potestatem habet hic aliam, quàm procurandi, ut à Presbyteris observetur Dominicum institutum. Si igitur Presbyteri vel solum calicem populo præbere velint, quod nusquam fieri arbitror, vel solum panem, uti in Pontificia Ecclesia obtinet consuetudo: est pii Magistratus (quidquid contra disputent Presbyteri, quamcumque etiam in rebus Ecclesiasticis, & scientiam, & potestatem sibi arrogent, Magistratibus derogent) istiusmodi dimidiati Sacramenti abusum omnimodis impedire. Sed de externis & accessoriis, habet Ecclesia, eoque & qui Ecclesiam moderatur Magistratus, potestatem instituendi quæ vel ad locum, vel tempus, vel numerum, vel modum pertinent. Ratione loci, ut in quibus ea templis debeat celebrari. Ratione temporis, uti, quod licet Christus Cœnam Dominicam vesperi celebravit, tamen cum jubeat Scriptura omnia facere *εως ἡμετέρας* fatius sit administrari eam, quo tempore homines etiamnum jejuni esse solent: ut quod ad Religionem, piamque devotionem longè sit accommodatius. Ratione numeri, ut quoties in anno ea debeat celebrari: nùm Dominicis diebus, an etiam aliis, (in quo vetus Ecclesia variavit) & si Dominicis tantum, num singulis, an quibusdam, & quibusnam. Ra-

tione denique modi; ut cujusmodi adhibendæ sint preces, gratiarum actiones, hymni, ceremoniæ: quæ quia in potestate sunt Ecclesiæ, nostro quoque sæculo, in ipsis quoque Ecclesiis Reformatis, non parum varietatis cernere est. In hujusmodi igitur omnibus, Ecclesiæ jus concedunt definiendi, ac canones constituendi: Magistratui directum, ac propriè dictum imperium conceditur. Atque hac essentialium, atque accidentalium directi, & indirecti imperii distinctione, in fumos abit, quod Utenbogartio ejus pag. vers. antepr. objicit Wallæus, tantam veritatis vim esse, ut ei subinde veritas excidat invito; ut qui interdum agnoscat Pastores, *ἀμύτους*, muneris sui mandatum habere à Deo; & tamen aliàs contendat, eos ab & sub Magistratibus consequi exercendi muneris sui potestatem.

Pag. 45. Agnoscit non posse Magistratum summum renuntiare summo in civilibus imperio, nisi simul desinat esse Magistratus. Optimè. Sed idem in Ecclesiasticis locum habet. Imo in his tantò magis, quantò temporalibus præstant æterna. Nec enim civilis tantummodo beatitudo, sed etiam cœlestis, ac hæc quidem imprimis, finis est regis potestatis: ut antea ostendimus, ac rectè agnoscit Isidorus Pelusiotæ, L. III. Ep. 249. quæ ad Isidorum Diaconum: *Ἐξ ἱεροσύνης ἡ βασιλεία τὰ ἀνάγκηματα συνήσκηκε· εἰ γὰρ καὶ πολλὰ ἀλλήλων διαφέρουσιν, (ἡ μὲν γὰρ ὡς ψυχὴ εἴλω, ἡ δὲ ὡς σῶμα) ἀλλ' εἰς τὸ ὁρᾶσι τέλος, τὴν οὖν ἀπὸ τῆς ἀσκήσεως.* Cui consona scribit Thomas Aquinas, Lib. I. cap. 14. & cap. 3. Lib. III. de Regimine Principum. Quanquam is Liber, etsi in Romana quoque editione legatur, Thomæ tamen falso tribuatur, ut in quo Rodolpho Adolphus, Adolpho Albertus successisse dicatur, quorum hoc contigit, annis post Thomæ obitum 25. sed istoc utut est, optimè eo quo dixi libro legete est: *Finis ad quem principaliter Rex intendere debet, in seipso, & in subditis, est æterna beatitudo, quæ in visione Dei consistit: & quia ista visio est perfectissimum bonum, maxime movere debet Regem, & quemcumque Dominum, ut hunc finem subditi consequantur.* Quod si beatitudo supernaturalis, sit principalis Regis ac Regni finis, sanè cum regnum non sit ob Regem, sed Rex propter regnum, (quomodo non oves ob pastorem, sed pastor est propter oves) liquet Regis esse omnes subditos suos regere, tam in Ecclesiasticis, quàm Civilibus; nec posse hoc imperium summum in Ecclesiasticis in alterum transferre, quin alienet principalem imperii sui partem, ac proinde Magistratus summus esse desinat, ut qui se abdicet eo, quod, non dico imperii summi quarto modo proprium sit, sed quod de essentia est imperii, & quidem

dem ut dicebamus, principalis imperii summa pars.

Quod hoc loco, & alibi Walæus ait, posse Magistratum in civilibus exequi ea munera, quæ alteri mandat: sed non posse per se obire prædicationem Evangelii, & Sacramentorum administrationem: eoque nequitiam Magistratui id juris competere in Ecclesiasticis, quod obtinet in civilibus. Hoc quanquam imperitum aliquem movere possit, revera tamen nihil officit iis, quæ hæcenus diximus. Nam jam antea confessi sumus, Ministros jus docendi, aliaque ei necessario connexa agenda, non minus *aiulow* adeo obtinere, quam Magistratus summum imperium immediatè habet à Deo. Sed non de essentialibus ministerii, verum de imperio disceptatio est, hoc est, quæritur, an non Ecclesiasticæ directio Magistratus imperio subint in rebus exterioribus, sive in actionibus ordinem, ac *полития* Ecclesiæ spectantibus: indirectè verò in interioribus, quatenus ejus est procurare, ut à Pastoribus fiant, quæ Deus jussit: atque ad hoc habet vim coactivam. Nec quidquam ad rem facit, quod Magistratus per se non potest exequi munus Presbyterorum: quia nec Magistratus multa munia, ob vilitatem sui obire per se possit; nec tamen id impedit, quominus supremum circa ea habeat imperium. Hinc Burtrillus, cap. 21. pro Tortura Torti: *Supremi*, inquit, *in quovis genere gubernatoris non est, exequi singularum officia, sed curare, ut suum quisque officium exequatur. Utque in supremo gubernatore, in rebus conjugalibus non requiritur, ut potestatem habeat conjugalem: ita nec in supremo gubernatore, in rebus sacerdotalibus requiritur, ut habeat potestatem sacerdotalem.*

Pag. 46. ait, Si Magistratus jure suo abutens, seu falsis Pastoribus, seu aliter Ecclesiam Dei perditum ire velit, Ecclesiam hoc juris habere, ut vel invito Magistratu, novos ac sanos sibi eligat Pastores. Sed confundit Ecclesiam quæ talis, & quæ publica. Nam jus hoc quidem Ecclesiæ concedimus; ut si Imperator hæreticus lupum Christiano ovili præficere velit, sibi cavere à lupo, deque vero animarum Pastore prospicere possit. Sed Minister iste, Ecclesiæ quidem Minister erit, publicæ verò Ecclesiæ Minister non erit. Ut efficeret, quod vellet, probare debuit, Ministros Ecclesiæ, quæ publica est, non à Magistratu solo jus consequi publicè docendi, aliaque exercitia Religionis publicè obeundi.

Quod sine ejusdem pag. ait, sic novum inveni papatum, imo tot Papas novos itatui, quot sint supremi Magistratus; id à Jesuitis quoque obijci scimus Theologis Anglis; à quibus id semper negatum fuit. Audiamus

Guilielmum Tookerum, S. Theologiæ Professorem, & Decanum Ecclesiæ Lichfeldensis, in duello suo cum Becano Jesuita, pag. 13. Cum, inquit, *Regem Ecclesiæ præponimus, primatumve & regimen in Ecclesia supponimus; nec Pontificatum veterem, nec Papatum novum invehimus in Ecclesiam.* Quod plenius declarant verba serenissimi Jacobi Magnæ Britannię Regis à Tookero, pag. 5. adducta. Regibus, inquit, *Christianis Ecclesiam intra fines suos, non minus quam reliquum populum esse gubernandum, ut qui custodes sint utriusque tabule; non quidem novos articulos fidei condendo, (id enim Papæ munus est) sed efficiendo, ut Dei verbo publicè obtemperetur, Religionem repurgando, juxta divinam voluntatem, in sacris patefactam, & temporalem gladium in beneficium spiritualis potestatis distringendo, abolendo corruptelas, Ecclesiasticam auctoritatem sanciendo, quæstiones frivolas, & schismaticum licentiam, vel componendo, vel coercendo, tollendoque, quod Constantinus faciitavit; denique decorum quoddam tuendo, & leges, ac jura præscribendo de adiaphoris rebus omnibus, ordinis gratia: ad quem solum scopum collimat hoc juramentum primatus.* Hæcenus Rex, qui & paulò ante dixerat: *Reges Veteris Testamenti cuncta moderatos esse, quæ ad Ecclesiasticum regimen quoquo modo pertinerent.* Atque uti nec plus, nec minus, quam serenissimo Regi, debetur supremo nostro Magistratui: ita neque minus, vel amplius ei tribuimus, nec ipse plus sibi vindicat.

Nec enim sibi infallibile tribuit judicium in rebus Religionis, quod facit Papa: nec potestatem condendi capita fidei, quæ conscientias obligent: sed tantum jus faciendi, quæ Religio publicè debeat obtinere, procurandique ea quæ ad *исповѣданіе*, & ædificationem Ecclesiæ judicat pertinere. Non se facit spirituale caput Ecclesiæ, quod scit solius esse Christi; non ipse obire vult Ministerium Ecclesiasticum, quia scit se ad hoc non vocatum à Deo: verum quia scit officium summi Magistratus, præcipuè versari circa Religionem, & cultum divinum, (ut qui imprimis debeat procurare, ut subditi consequantur beatitudinem æternam) eo conscientiam suam, sic arbitrio eorum, quos falli scit posse & solere, alligare non vult, ut ad nutum alienum omnia in Ecclesiæ rebus exequatur. Scit sibi à Deo commissum esse, officium dirigendi regimen suum, in finem verum, qui est beatitudo cœlestis: scit hoc principale officium suum esse: hoc igitur se munere abdicare non vult, nec aliis resignare, salva conscientia, potest, qui ad istud vocati non sunt, plurimum etiam ut ad illud vocentur, idonei non sunt. Non novum Papatum invehunt, qui hoc Magistratui tribuunt, sed qui

interim dicimus. Unum est, quæ hujusmodi Conciliis sunt decreta, Canonem *novis* loquendo, non legum vim habere, quia penes solum Magistratum sit vis *νόμος* *ἡ δὲ ἀρχὴ*. Alterum est, Christianum Magistratum permittère, ut citra inauditum, vel consensum suum Synodi celebrentur: quæ autem sine hujusmodi Magistratus consensu Concilia fiant, hæc illegitima esse sustinuerunt Protestantès, de nullitate Concilii Tridentini: sed & cum Magistratus in Concilium consensit, ejusdem est Synodos dirigere per se, vel legatos suos: nec debet decretis Synodiceis vim legis addere, nisi de quorum veritate sit persuasus in animo suo. Quæ quidem quam utiliter moneantur, multis ex historia Ecclesiastica exemplis ostendi possit, nisi unius Athanasii temporibus hæc liquidò comprobarentur. Demceps rursum paginis aliquot probat, Ecclesiastas non esse servos, aut legatos Angelorum, nedum hominum, sed ipsius Dei. Rectius operæ & oleo pepercisset, nec enim ejus institutum juvant quicquam. Sanè ipsi quoque agnoscimus, hæc verissima esse, tum ratione mandati, quod à Deo, non creaturis habent; tum legationis, quam Christi, non Magistratum nomine sustinent. Sed hinc minime consequitur, Magistratum summum, qui vicem Dei obit in terris, non imperare iis debere, ut tum mandatum Dei fideliter exequantur, tum legationem, nomine Christi, bona fide agant; ad hæc negligentes, & immorigeros poenis posse afficere: posse item eos legibus adstringere de rebus, ad politiam Ecclesiæ pertinentibus, quarum *μενδόν* non definiuntur in verbo. Quæ omnia ostendunt Ecclesiastas, etiam in Ecclesiæ rebus, subesse imperio Magistratus, partim directo, partim indirecto, ut aliquoties jam declaravimus.

Quod pag. 57. agit, Constantinum Magnum non voluisse sapere supra Concilium Nicænum: sed & post alios sententiam dixisse, & Patrum Nicænorum sententiæ subscripsisse: id eam minime vim habet, ut iccirco Magistratus sequi semper debeant judicium Synodicum. Nec enim Synodi sententiam approbavit Constantinus, quia Synodus eam diceret; sed quia rationum pondere, sententiæ suæ veritatem ei persuassisset. Alioqui enim quot Synodi pro errore sententiam tulerunt? Etiam his calculum suum addere debeat Magistratus? Quis sanus hoc dixerit? Quamquam igitur non facile, Pastorum suorum judicium improbare debeat Magistratus: nec tamen eis tettere, ac leviter assensire debet, eoque omnino opus ut, post *ἡλὸν ἀνδρόν*, consequatur *ἐκκλῆσιον* Magistratus.

Quod pag. 58. & alibi, Constantium pro Arriano habet, (quo argumento & alii ne-

gant rectè Constantii facto Magistratus in convocandis Synodis auctoritatem comprobari) id ut aliquid est, non tamen tanti, quam plerique putant, ponderis putari debet. Nec enim cum Orthodoxis Patribus desuere, qui existimarent, non tam Arrianum fuisse Constantium, quam cum videret se Arrianos, sine Reip. exitio, delere non posse, consilia iniisse de pace cum iis ineunda. Sanè Gregorius Nazianzenus, post obitum luculentè eum, non semel tanquam optimum, ac Christianum Principem laudavit, nec malicia, sed simplicitate, & unionis Ecclesiasticæ studio, Ecclesiæ statum aliquantò perturbatiorem fecisse arbitratur. Inter alia verò sic scribit, in-
vectiva prima adversus Judianum, pag. 64. Edit. Morell. *Ὁ γὰρ ὁ ἐν τῇ παλαιότητι ἡγεῖς, ὁ μετὰ τὴν ἐκείνην, ἐν ἡμέτερον ποτὶ τὴν ἡμετέραν ἐκκλῆσιν, ἀλλ' ὅτι πάλιν ἐν τῇ, ὁ συνεστὴς, παλαιότητος ὁ καὶ διακονήσας, καὶ ὁ διακονῶν τοῖς χριστιανοῖς.* Quem locum & Nicephorus citat, Lib. IX. Hist. Eccl. cap. 50. pag. 463. At minime loci mentem perspexit Morellius, cum ad oram interpretationis suæ adnotat, causam à Nazianzeno reddi, cur Deus Orthodoxos nonnihil afflixerit. Nam nihil clarius locum inspicienti, quam de Constantio sermonem esse, quem partim simplicitate quadam, partim concordie studio, exorbitasse censet: non item quod Arrianum dogma, magis quam Orthodoxum approbaret. Itaque idem nec dubitat Constantium vocare, *ἐκκλῆσιον* *κατακλῆτον* ὁ *ἐκκλῆσιον*, pag. 19. Edit. Savil. five pag. 63. Edit. Morel.

In iis quæ pag. 65. & deinceps de excommunicatione disserit, confundit abstentionem à Coena, sive non dationem signi Sacramentalis, cum inflictione poenæ positivæ. Posterius hoc est humani instituti, eoque ad directum Magistratus imperium pertinet. Prius verò non negamus canone præcipi divino: eoque non nili indirectè subjacere Magistratus imperio. Quamobrem si quispiam, vel Imperator ipse esto, impoenitens, signum petat Sacramentale, non Imperatorem hic Episcopus audiet, sed Deum, qui supra est Imperatorem. Nec enim is ab Episcopis, symbola foederis divini, cuiquam porrigi vult, quem ex confessione, & vita, consistet ad foedus minime pertinere. Scit præterea Episcopus, adversus charitatem esse vel maxime, ut symbola hæc iis exhibeamus, qui eorum participatione judicium sibi Domini arcessunt, condemnationemque sibi edunt, ac bibunt. Sed de poena positiva similiter judicari non debet. Ut si Imperator vel alius etiam, peccati poenitens certum tempus, extra reliquorum fidelium cœtum, in Ecclesia consistere jubeatur, qua de re nullum præceptum exstat in Scripturis:

statem. Audiamus quod Becano, cum similiter occurrisset Episcopo Eliensi, respondeatur à Burhillo, cap. 27. pro Tortura Torti, pag. 278. Prophetam ut Mosem probes fuisse, recitas locum longiusculum ex Num. XII. 6. Quasi verò nobis horum aliquid, aut negaretur, aut nesciretur. Summum quoque sacerdotem fuisse probas. Sed hic oblitus es turpiter, in exemplo Mosi ad primatum regium, non tam queri utrum summus sacerdos fuerit, quam utrum post consecratum Aaronem fuerit. Scimus enim Mosi in Ecclesiasticis, post consecratum Aaronem, obeditum ut supremo gubernatori: nec ut Legislatori, aut Prophete, credo, dixeris. Restat ergo ut obeditum dicas Mosi, in hoc negotiorum genere, vel tanquam Principi seculari, vel tanquam summo sacerdoti. Nec tamen post consecratum Aaronem, facile persuaseris Mosem permansisse summum sacerdotem; ne duos summos, quasi Antipapas faciens, bicipitem facias Ecclesiam sub Mose.

Ad Josuæ exemplum respondet Walæus, Mosem, Num. XXVII. 18. voluisse Josua omnia faceret ad verbum Eleazari; quem iccirco, si quid agendum, consulere deberet. Quo etiam argumento pugnat Becanus, adversus Episcopum Eliensem. Sed cum ibidem addatur, Eleazarum debuisse consulere Deum, liquet Josuam à Deo accepisse responsum per sacerdotem, gestantem Urim & Thummim. Quare hoc quoque indicat, certitudinem directivi iudicii in Eleazaro: imperium non item. Egregie vero hoc loco, adversus Becanum scripsit Robertus Burhillus, cap. 27. pag. 280. & 281. ubi hæc inter alia, quæ Walæanum responsum planè infringunt: *Si (ut videris velle) ex eo quod dicitur, Num. XXVII. 18. ad verbum ejus (id est, ut exponis, Eleazari) egredietur, & ingredietur Josua: id modo effici cupis, non quidem, ut in gubernatione civili, sed tantum ut in Ecclesiasticarum rerum gubernatione, subsit Josua Eleazaro: reclamabunt verba contextus: quæ non modo de Ecclesiasticis negotiis loquuntur; sed etiam de omnibus, de quibus Deus consulendus per sacerdotem fuerat. Nec tamen ita de his omnibus, ut in iis omnibus Josuam imperio Eleazari subijciant; sed oraculo divino: cujus tum certus interpret Eleazarius, & post eum diu successores ejus fuerant. Si Papa (idem de Pastoribus Ecclesiarum dici potest) itidem certus interpret esset voluntatis divinæ, fateremur, ad verbum Papæ, Principibus & egrediendum, & ingrediendum. Nec tamen ideo diceremus, Principibus omnia facienda ex consilio Papæ: nec enim de omnibus Deum consulebant per sacerdotem: nec etiam per os sacerdotis divinum responsum acciperent, sacerdotis imperio paruisse dicuntur. Ut nec fecialis, sed Regis imperio pareat, qui feciali, Regis mandatum deferenti, pareat. Nec tamen damus, quod*

tuo more, sine probatione sumis, illud ad verbum ejus, exponendum potius; ad verbum Eleazari, quam ad verbum Domini. Certè enim in Hebræo hoc antecedens propius, & interpretes etiam vestri stant ab hac interpretatione, &c. Et post aliqua: Aut non omnino jubetur ad verbum sacerdotis egredi, & ingredi, sed ad verbum Dei: quod probabilius videtur: aut saltem non absolute, sed ad verbum ejus pendens à consultatione Domini, id est, quatenus internuntius est voluntatis divinæ.

Deinceps respondet quoque ad exempla Davidis, Salomonis, Josaphati, Ezechiae, Josiæ: quibus non Utenbogartius tantum, sed etiam Rex serenissimus Jacobus, & Theologi Angli, supremam in Ecclesiasticis curam Regi competere, variis scriptis adversus Pontificios ostenderunt. Itaque qui sciat, ut Theologi illi, exempla ea, à Pontificiorum responsis vindicarint: is simul norit, quid ad exceptiones illas Wallæanas debeat responderi. Quare non visum huic argumento ultra insistere: sed remittere malo ad Guilielmum Tookerum, qui in duello suo cum Becano Jesuita, non tantum regium in Ecclesiasticis regimen, ac primatum exemplis his fuisse probat, sed etiam ad ea omnia, quæ oggesserat Jesuita, solidè respondet. Vide eum à pag. 113. usque ad pag. 175. Ac eò lubentius hanc partem prætereo, quia idem video à Burhillo factum, libro pro Tortura Torti, ut qui & ipse cap. 28. pag. 292. nos remittere malis ad responsionem Doctissimi Decani Leichfeldensis, qui non alius est, ac Guilielmus Tookerus. Adde quod etiam si Walæus evinceret, singula exempla per se non satis validè probare, quod Utenbogartius volebat; tamen alia attulerat, quæ nec argumentorum subtilitate eludat, nec robore elidat. De cæteris cogitandum illud Poetæ veteris,

Es quæ non prosunt singula, multa juvant.

Quod verò ad illam testimoniorum sylvam, quam Utenbogartii testimoniis obducit, mihi quidem magnam partem videntur ea sententiam nostram confirmare. Itaque quamquam jam scribendo lassus, strigare malim, quam protelo ducere: tamen adferre visum aliquot istorum testimoniorum, ut pareat quam is non cum adversa sententia, sed quemadmodum Romani tyrones, Vegetio teste, solent, adversus palum plurimum pugnet.

Pag. 115. agnoscit Helveticam confessionem, Magistratui imprimis Religionis curam demandare. Respondit, hanc mentem Confessionis esse, non quidem Magistratui modo excellentiori, hanc curam demandari, quam Pastoribus, sed potiorum Magistratui Ecclesiasticorum,

asticorum, quàm civilium, curam habendam esse. Sed quem meliorem Confessionis Helveticæ interpretem habere possumus, quàm Wolfgangum Musculum, qui superiorem Magistratus subordinatam Pastorum in Ecclesiasticis curam facit? ut antea vidimus. Nec alia Bullingeri, aliorumque Helveticorum sententia est.

Pag. 115, & 117. Agnoscit Regem, ab Anglicana Ecclesia habitum, pro capite Ecclesiæ. Verùm his verbis supremam Ecclesiæ gubernationem ei tribuisse. At neque nos Magistratum spirituale Ecclesiæ caput facimus: sed hoc ipsum quod Anglicana voluit Ecclesia, quodque à L. Ciscestriensi tribui Regi docet ipse, pag. 118. Item ex Burhillo, pag. 121. uti hæc verba inter alia citat. *Regem postquam ab Ecclesiasticis consiliis, aut (si hæc non satisfecerint) ab auctoribus ob fidem, & harum rerum peritiam idoneis, quorum os consulere tenetur, satis edoctus fuerit, præcipuum esse Dei servum, & exequenda voluntatis divine supremum gubernatorem.* Et ex eodem aliquanto post, cum plurima enumerasset: *Hæc fere omnia, certe maxima, in primatu Regio quod ad spiritualia agnoscimus.* Item pag. 122, 123, & 124. quibus locis, exteriorem Ecclesiæ curam Regi tribuit, licet verbo limitatam: item ait, & Pastores, & Regem habere spiritualium curam, sed hujus curam, etsi spiritualium sit, non esse spirituales. Optimè item pag. 125. Burhillum inducit declarantem, verba Augustini in quæstionibus, Veteris & Novi Testamenti. *Rex habet imaginem Dei, regnantis in coelis: Episcopus Christi, sed ministrantis in terris.* Nempe quia sacerdos, legatione fungens nomine Christi, precibus, & hortatibus agit, non imperio regit; ut Paulus ostendit, 2 Cor. V. 20. Dicendum & aliquid de testimoniis Veterum quæ à Walæo adducuntur.

Pag. 154. vers. antepen. Cypriani locum citat, ad probandum plebem ab Episcopis consuli solere, antequam aliquem ordinarent. Sed ipse locus hic indicat, non fuisse id perpetuum, cum dicat hac in causa se facere id noluisse.

Pag. 157, & 158. insignia duo loca, adducit e concilio Nicæno, & Constantinopolitano, quibus decernitur ne ulli constituantur Episcopi, nisi de voluntate Episcoporum Provinciae. At nihilominus Nectarium, à Theodosio Juniore electum, constat ex Sozomeno, Lib. VII. cap. 8. pluraque istiusmodi adducis, Magnifice Domine, in pietate tua, à pag. 19. usque ad 97. Quæ exempla ostendunt, hoc tantum voluisse Patres præscribere, quid maximè expediret, non item quod liceret. Sanè cum Canones Ecclesiastici, non

nisi à summo Magistratu vim legis accipiant, obstringere eum nisi volentem minimè possunt. Et si canon iste observandus fuisset, in Ecclesiarum nostrarum reformatione, quales nunc Episcopos, & Presbyteros haberemus? Quin igitur extra ordinem aliter possit Magistratus, minimè dubium videtur.

Pag. 165, & 166. Illustria duo Magni Leonis loca adfert, Calvino quoque probata, quibus ostendit, in Pastorum electione, nec honoratorum, ac imprimis Magistratus iudicium negligendum esse. Sed distinctè de quatuor his sententiam suam promere debuit: 1. Quid summo Magistratui conveniat, ut membro Ecclesiæ: in quo nihil à fidei cerdone differat. 2. Quid ei tribui possit, ut membro honorato; quod ei commune esse possit cum viro antiquæ nobilitatis, aut claræ eruditionis, aut eximie virtutis, aliove nomine præter ceteros conspicuo, non tamen Remp. capeffenti. 3. Quid præterea ei competat, ut membro habenti imperium, hoc est ut Magistratui ejus loci ubi Pastor eligendus: Sed tamen istiusmodi Magistratui, qui superiorem agnoscat. 4. Denique quid illi debeatur, ut Magistratui summum imperium habenti. Ad hæc distinguere debuit, quid illi competat ordinariè, quid item extra ordinem. Nam plus ei schismatis tempore tantum pacis & concordie custodi tribui debere, agnoscit ipse, pag. 171. sub finem.

Non satis autem intelligo, quid sibi velit, cum pag. 183. ait, etiam magno loco habenda esse iudicia, non Pastorum seu Politicorum, seu aliorum, qui donum habeant Prophetiæ; eo quod Pastorum iudicio, plurimum ab his roboris accedat. Nam vidcri possit hoc velle, tantum sententiam eos rogari debere, cum non obscuris indiciis constet in Pastorum sententiam ituros. Verùm quid si Prophetæ illi Pastorum sententiam probare non possint? jam futurum ut potius deterant aliquid de autoritate iudicii pastoralis. Ait Prophetas Prophetis subjectos esse debere. Sed quæritur, an Prophetæ quisque Prophetas suæ ditionis præferre debeat alienæ Provinciæ Pastoribus ac Prophetis? Item an nostri seculi Prophetæ, præferendi sint Prophetis Ecclesiæ antiquæ? Hæc quidem consideratio ad electionem Pastorum, de qua nunc sermo, non pertinet primò & per se; sed tamen valdè cum ea est conjuncta. Nec solum in Ministrorum vocatione, sed etiam controversiarum dijudicatione, ad Paulinum illum locum provocari solet. Meritò igitur quærimus, an negari debeat eum Prophetarum iudicio se subicere, qui cum Prophetis consentit Ecclesiarum non ignobiliorum nostrarum: imò quicum faciunt Prophetæ omnes Ecclesiæ antiquæ?

tiquæ? Atque ut ad externos, aut veteres non abeat, quæritur, an Prophetarum iudicio se non subiciat, qui facere secum videt, minorem quidem numerum, ex iis qui vel nullius, vel exiguæ sint eruditionis: sed maiorem ex eruditorum flore, eorumque qui animum habent in Scripturis subactum; idque non iudicio solum suo, sed etiam adversariorum ipsorum, qui iccirco calcatum illud in eos vibrent, quo doctrina quisque instructior, hoc esse impuriorem, perversioremque in dogmatis fidei? Sed perpetuus est hic, & scriptoris huius & aliorum innumerorum error, ut suæ tantum sententiæ homines æstiment, ceteros loco habeant nullo, aut parvo. Atque inde est, quod si quis dissentiat in re ulla, à maiore Pastorum parte ejus, in quo ipse vivat: licet hunc, loci & suæ provinciæ doctiores, & exterorum plures, & veterum omnes sibi habeat consentientes, nihilominus ab Ecclesia dicant dissentire, in quo Donatistarum eos similes esse, quis non videt? Sed redeo ad Veterum testimonia, à quibus me occasione ejus quod de subjiendo se Prophetis, dixerat, paulum video deflexisse. Citat pro se Concilium Nicænum II. pag. 177. sanè qui ab Constantii exemplo argumento peti nolunt, non debent provocare ad Pseudo-Nicænam, quæ idolorum cultum stabilivit. Pag. 190. commemorat obiter Synodos quinque, Nicænam adversus Arrium, Constantinopolitanam adversus Macedonium, Ephesinam adversus Nestorium, Carthaginensem adversus Pelagium, Chalcedonensem adversus Eutychem. Sed præterquam quod Ephesinæ postponit Carthaginensem, cum hæc antiquior sit, causæ nihil video, quid inter quatuor illas Oecumenicas, quas tanquam quatuor Evangelia venerari se dicebat Gregorius Magnus, & ex eo Isidorus, mediam interferat Carthaginensem, quam adversus Pelagium celebratam rectè dicit. Num quia apud imperitos Antiquitatis Ecclesiasticæ, si qui Remonstrantes nunc dicuntur, malè audiunt tanquam inter mortuam Pelagii, aut Semi-pelagianorum sententiam in Ecclesiis Reformatis ab Orco revocantes, eo credemus tacite insinuare voluisse, eosdem ferè, qui nunc supremam Magistratus Autoritatem, in Ecclesiasticis agnoscunt, ac quibuscum sibi nunc negotium est, olim jam SS. Patrum Conciliis fuisse condemnatos? Sed ego divinus, aut veterator non sum; ariolentur illi qui *quæstiones* didicerunt.

Atque hic tandem paulam faciamus, ego scribendi, tu legendi. Occurrebant quidem & alia multa; eaque duum generum: alia momenti nullius, uti illud; (ex plusculis exemplis unicum adferam) quod pag. 103.

uti Oecolampadium, ita Bucerum inter Helvetios numerat; cum hic fuerit Sclæstadiensis; Sclæstadium verò quis nescit, civitatem fuisse Alsatiæ, unde & nomen ei quasi Elstede, ut docuit ipse Sclæstadiensis Beatus Rhenanus? Verum hujuscemodi si consēctor, nec causam juvero multum, nec rationem habeam occupationum utriusque nostri. Alia etiam erant quædam momenti majoris, sed præterquam, quod ex iis, quæ dixi, eorum parere invalentiam arbitrabar; sciebam ea omnia & eruditè, & nervosè te refutasse, aureo hac de controversia libello tuo, quem lucem, quam primum adspicere, & Ecclesiæ, & Reip. interest. Non deerunt fortasse qui ausint Anticatoriem aliquem scribere; nam quid intentatum relinquit humana ambitio? sed spondeo me velle defensionem ejus quovis tempore suscipere, & ore, & calamo: modo tu, vir Amplissime, me idoneum huic rei, nec Collegio hoc, aut Ecclesiæ damnosum judicabis. Vale.

x. Febr.
clb Ioc xvi.

XXIV.

Gerardus Vossius, Hugoni Grotio S. P.

Summe virorum atque item amicorum; Quod amoenissimo Sylvæ tuæ vireto animum oculosque meos pascere suaviter volueris, quantas possum gratias ago. Equidem multum in ea me delectavi. Cujusmodi si primum calorem atque impetum secutus facis (quod Sylvæ nomen ostendit) quid fuisset, si lenta Maronis cura placuisset? Neque enim quid nunc desiderari possit, video. Statum sanè longè post te relinqueret mihi videris. Itaque toties me legere juvit, ut bonam jam partem memoria teneam. Et ne uni mihi id contingere putes: scias illustrem Legatum Maurerium, cum ei ante paucos dies in prandio adesset, complures carminis tui versus memoriter recitasse. Cui etiam optimè interpretabatur illam Olivarii & Hospitalii *mel-pegorum*; ubi frustra fuerat Scriverii nostri acumen. Quamquam profectò non adeo mirandum, si amplissimo Legato, gentis suæ nobiles adeo Senatores magis obversarentur. Non possum verò dissimulare apud te, ut cum primum inscriptionem longi adeo carminis conspicerem, coeperim subvereri, ne acerba adeo, ac diuturna mala fecissent, ut in veteri regno tuo minus posses, quam olim. Sanè ægrè animo meo fuisset, si qui primas tulisti quondam carminis maiestate, nunc secundis con-

tentus

tentus esse deberes. Sed ut paucos tantum versus delibavi, facile inanem hunc timorem deposui. Cum verò omnia impensè me delectarint, tum multum ex eo voluptatis cepi, quod tanta voluptate classicos quosdam Scriptores, & disciplinas omnes describas. Et tamen plus etiam me afficit, nobilis illa digressio qua celebras ornamentum sui sexus, ac verè Heroïnæ, conjugem tuam. Quam ego carminis tui partem siccis oculis legere non potui. Nempe etiam affectus absque dubio difertior te fecit. Quam præclarum etiam iudicium tuum, cum in religionis negotio flectere oculos jubes ad antiquos, nec graviter minus, quàm iustè, queris de moribus seculi nostri. Metuo nihilominus ne furdus canas. Et si aliquas esse aurei generis reliquias in Britannia, quibus antiquitas sapiat, ex pluribus intelligo. Ac de Gallia etiam spem aliquam facit, quod scribis fummos illos viros, quorum elogia extremo tuo carmine, mellitissimis verbis es complexus, optimè de laboribus meis sentire. Sanè hæc res non mediocriter mihi fiduciam, atque animum adderet ad audendum aliquid in aliis etiam Religionis controversiis. Sed alia sufflamant. Unum eorum dico. Nosse te arbitror, ut cum de Religione Christiana præclarum illud opus numeris Belgicis meditatus esses: plerorumque hoc iudicium fuerit, etsi nihil inesset, quod reprehensionem mereretur, tamen quânto præclariora essent, quæ scripsisses, tantò magis premi illa debere. Idque ne aliorum de te iudicia incommo- daret, si & rectè de Religione sentire, atque in ea supra mystarum vulgus sapere videreris. Simile mihi aliquid usu venit. Neque enim satis videtur multis, si mea à facultate Theologica approbentur priùs, quàm edantur: sed malunt in totum me scripture ejusmodi abstinere, idque ne plus auctoritatis accedat Operi historie meæ, quod æterna oblivione sepultum vellent. Itaque nunc nihil possum, nisi in studiis literarum, vel eloquentiæ, vel historie externæ aut Philosophiæ. Qui campus satis quidem est amplus, sed quanto propius ad senectutem accedo, tantò impensius flagro amore eorum, quæ Christianæ Ecclesiæ pacem, atque concordiam possint asserre. Sed dum facere haud licet, quod velim: facio quod licet. Quare duos nunc libellos emitto, ad oratoriam facultatem pertinentes. Altero eorum artis hujus *intimulus* sum complexus. Nec est quod vereare, ne ea res vitam eripere posset commentariis istis Oratoriarum institutionum, quas ante annos quindecim in lucem emisi, & quadriennio post auctiores re- endi jussi. Nam non adeo durus Pater esse volui, ut à novella prole paterer interimi,

quam priùs genuissem: præsertim quæ multorum iudicio, & publico emolumentis, & mihi gloriæ ac nominis aliquid attulissent. Quare ne contingeret quod dixi, potiùs in novo hoc opere viam istam institui, ut eorum, quæ ad artem necessariò pertinerent, nihil omitterem: sed aliis ferè uter verbis; exemplis item novis, magisque illustribus. Ad hæc curavi ut multa utiliter adderem passim; priori opere mihi indicta: ea verò omitterem quæ *votari* artis non spectarent, & opere altero fusè à me essent tractata. Puto me consilium hoc meum facillè tibi probaturum. Scripsi verò hoc opus potissimum in usum Scholarum, postulato eorum qui his præfessent. Commentarii mei de lingua latina adhuc domi latent. In causa est illud, quod antehac etiam scripsi. Nempe quod Germania necdum pacata, Bibliopolæ ac Typographi etiam frigeant. Sed tamen meliorem jam spem concipere incipiunt. Rumor enim est, Magnæ Britanniæ Regem pro Exrege Bohemico intercessurum: quo effici posse putant, ut hic (dummodo renunciaret juri in regnum Bohemicum) Palatinatui suo restitueretur. Dum hoc agitur, ego prela Typographica libellis aliis fatigare non cessabo. Synodus Roterodamensis jam desit. Etsi verò Synodo Gaudana ante annum fuerat statutum, ut ne ad Eucharistiæ Sacramentum admitterer, nisi sententiam retractarem; tamen nunc molliùs agendum mecum putarunt. Nam decretum ut admittar ad eam, dummodò spondeam, nihil me adversus Synodum Dordrechtanam velle moliri palam, vel occultè. Ita nihil me editurum, quod non priùs approbarit facultas Theologica. Hæc si præstem, toleratum me iri, sed extra functionem Theologicam, & Ecclesiasticam. Tamen intelligo esse nonnullos, quibus nimis hæc mollis agendi ratio mecum videatur. Nam existimant, si non compellar ad subscribendum Synodo, saltem esse retractanda quædam, quæ in historia mea, ac thesibus quibusdam scripserim. Ego video hoc agi, ut opera mea inutilis in posterum Ecclesiæ reddatur. Tamen si errorem videro ullum, non pudebit retractare. Sed jam biennium est, cum errorum infimulor, neque ostenditur ubi exorbitarim. Novi quemdam qui obnixè hoc agit, ut vel unum locum in opere historie incommode videar adduxisse. Scit facilitatem meam. Quare arte hac circumveniendum me putat, ut agnoscam saltem quædam minus appositè citari. Hoc ego ubi fuero confessus, jam spargetur fama, me errorem in historia mea esse confessum, nec esse, quod alius eo opere moveatur, quod author ipse non ubique putet litare veritati, quæ pri-

ma historiae lex & quasi anima est. Video mihi circumspicere esse agendum, atque inter spinas, quod dicitur, calceatum me esse debere. Interea seu malos vincat constans bonitas, seu Deus misericors aliter rebus nostris providebit: servabimus animum bonum ad spes bonas. Quamquam profecto videre vix possum, quid si me potius, quam publicum spectem meliora attineat sperare. Non jam ad alienum cogor somnum dormire, nec ad alios passus eundum est. Scis ut inter ea, quae beatiorem faciunt hanc vitam esse, olim scripseris, nulli solvere temporis tributum. Hoc nunc otio fruor. Utinam saltem molesti esse definant, per quos hactenus quieto esse non licuit. Sed fortasse, & hoc propediem erit. Nam facultas Theologica satis benignè mecum agere videtur; uti & amplissimi Curatores. Si quid in causa mea agitur statim perscribam. Valdè desidero, ut tuorum quamplurima lucem videant. Uti commentarii in tres Evangelistas: vel si eos paulum premere adhuc voles, saltem Stobæus, aut *ῥυθμικὴ*, & rhythmicum pro Religione Christiana, opus. De quo quia mentio incidit, præterire illud non possum, versum antepenultimum, vel illi proximum, minus probari amicis quibusdam tuis. Ais sicubi minus satisfacias, ob ætatem excusari debere, & paratum esse dicere veriora. Protritum hoc illis videtur, & illis etiam usitatum, quibus imperant *ὁ πρίντος Κασιλῆς*. At minime convenire viro cœlestis ingenii, & eximiae adeo eruditionis. Dixi ego primam hanc Christiani laudem esse, humilitatem: & summi Magistri hanc esse voluntatem, ut pueri similes simus. Sed satisfacere eo non potui. Tu cogitabis. Quod ad illa quæ de religionis controversiis, & iudicio antiquitatis scripseras; quam dissidentes sint amicorum sententiæ, arbitror jam satis te sive ex parente, sive aliunde, cognovisse. Sanè perutile est, constare vulgo quod iudicium fuerit veterum. Sed num putas, eo me inscripto, posse commendari, quo fortasse vel urbanatim, vel rusticatim, tangam, sive Agamemnona, sive Achillem, sive Chalcantis proficiam? Quare persistat animus, vel recoqui paulum oportere hoc opus, vel editionem melius differri, saltem in hebdomades paucas. Fortasse interim (ita video aliquos sperare) evenerit aliquid boni. Sin minus, exigua sanè mora est, quæ postulatur, nec quæ publico, ut puto, incommodare possit. Sæpius posthac ad te scribere statutum: fortasse autem non semper tabellarius erit satis fidus. Propterea, ubi opus putabo, aliena manu utar, ac ne nomen quidem consueto more addam. Tu vero, summe vir, vel ex argumento facile

quis scripserit cognosces, vel ex *ἰσοδυναμίᾳ*, ut si pro Gerardo Joanne Vossio scribam Vulturium Gratianum Bassarium. Nam illa Desiderii Alopecii metuo ne aperta sint nimis. Quandoque etiam initiales V. G. B. satis scriptorem testabuntur. De te si quid dicendum erit, vocabo Cellsum: id enim prænomen tuum sonat. Gadolii cognomen nimis evidens videtur. Quare & hic suffecerint una alteraque initii Litera. Hæc non eo agam, quasi de aliis, quam innocentibus Musis loqui sit animus (nam scis ut alia captum meum superent) verum quia non desunt, qui omni sub lapide metuant serpentem. In mentem venit non inutile fore, si libri Augustini adversum secundam Juliani responsionem, cum castigationibus tuis prodeant. Multa enim felici conjecturâ emendasti. Posses & notas addere seculo nostro profuturas. Quod si quid etiam dicendum adversus dissentientes putabis, occasio de plerisque spontè se offeret. Tantum ita instituenda ratio, ut undique relucent mitis sapientia, non Leli ut ille ait, sed Grotii, quam in te virtutem mirari soleo. Nec puto ea quæ perpeffus es, hanc tibi virtutem excussisse. Scis cognomentum tuum, quod semper tibi obversari debet: & simul occurrat, quod à sapienti Seneca in libris de ira scriptum fuit. Non est magnus animus quem incurvat injuria. Scis Athenodorum id Augusto consilii dedisse, nequid iratus committeret, priusquam Alphabeti literas cum animo suo percurrisset. Soleo quid simile facere, atque aliis suadere: Nempe ut si res exigat, ut adversus alterum calamus stringendus sit; id quidem fiat dum fervet animus: nam affectus disertiorē facit: sed quia periculum est, ne aliquid caninæ facundiae admisceat (homines sumus omnes) eo placet ut ad limam opus revocemus, ubi animus resederit, atque alienis malis occupatus. Multa absque dubio vel tollemus, vel mitigabimus. Ita futurum, ut si etiam post annos multos in nos ipsos descendamus, minus nos urat scriptio vetus, quasi non satis simus functi officio hominis Christiani. Adde quod si undique in scriptis relucent patientia, facilius in veris inveniemus fidem. Sed ista longè melius me nosti. Maximi Thuani historiam posthumam vidi. Editam gaudeo, nisi qua parte, atque id immeritissimè, focerum Junium desultoriæ fuisse scientiæ dicit. Mirum hoc mihi de eo visum, qui etiam mediocris eruditionis homines, & pacis longè minus amantes, in opere suo tantoperè extollat. Quid Amplissimum virum ita egit transversum, ut ista Gallus de Gallo, vir tantus de tanto, posteris traderet? Scio ego multa fugisse

gisse focerum. Video in scriptis, præsertim criticis, quæ indicta mallem. Sed tamen hac parte non modò Palmerium, sed alios etiam non infimi nominis post se relinquit. Non assurgit fateor, ad gloriam Scaligeri, Lipsii, & aliorum, qui in hoc studio primas sibi vendicarunt: Verùm tamen multa præclare observavit; quod cum Scaliger in suis ad Manilium notis dissimulat, candorem in eo requiro. Verùm isthoc studium mitto. Quem Theologum Romana, quem Reformatæ Ecclesiæ dabunt, in quo vasta adeò tum Linguarum, tum Philosophiæ, Historiæ externæ, Philologiæque cognitio fuerit? Quam ille sedulò Scholasticos, Thomam cum primis; quanta industria antiquos Theologos legebat? Cujus ego rei non tantum ex scriptis indicium capio, sed etiam illis, quæ ad Theologos veteres manu sua adscripsit. Sed neque hic substitit error maximi Thuani. Addit, in Batavia studuisse rebus novis, ac propterea ab illustribus Ordinibus esse hinc ejectum: tum Noribergam abiisse, atque ibi esse defunctum. Quid horum verum est? Sanè aliqui Authores fuere, ut pagellas aliquot adversus Thuani historiæ edere, quibus gloriam focii vindicarem. Posse eum argui testimonio Academia, ac Illustrium Ordinum, imo & Noribergensium, atque adeo totius Orbis reformati. Verum nihil agendum putavi te inconsulto. Ad hæc videbar mihi hoc pacto tantummodò fluctus in simpulo excitaturus. Præterea cogitabam hominem focii Thuanum fuisse, & facile potuisse contingere, ut duos Gallos, quorum uterque Lugduni sit professus, confunderet. Scis enim ut Donellus Leicestrianis partibus impensè faverit, ac propterea è Batavia ab Ordinibus exire sit iussus, Saravia quoque iisdem temporibus, fuga in Angliam sibi consulente. Scis quoque Donellum concessisse Noribergam, atque ibi docuisse jus Civile. Et potuit iustior causa esse, cur Thuanus minùs bene vellet Donello, quam Junio. Nam Cujacium, Amplissimus ille, à *margelrus* Thuanus faciebat maximi. Et, ni valde fallor, Præceptor fuerat. At Donellus nec causam sæpè habuit, nec modum invenit exagitandi Cujacium, quem, ut audio, ita in prælectionibus suis solet *μεγαλειον* *homo nescio Cujas*. Quid igitur evidentius, quam Donellum animo Thuani obversatum, dum ista scriberet? Calami interim lapsus non esse, indicat, quod ista annotavit, ad illud tempus, quo Junius è vivis excessit. Vellem scire an eadem in *αιτιολογια* habeantur. Nam fuere qui suspicarentur, à Genevensibus factum esse fu-

cum Lectori, vel Italis potius, quorum in manibus liber fuit, priusquam ederetur. Mihi id minus verisimile fit, ob ea quæ dixi. Interim cogitabis, quæ ratione & Thuani & Junii nomini optimè consuli possit. Quid si filius ejus, vel alius, ad calcem libri moneat *μνημονικον* planè *διαρτημα* esse, quod de Junio scriptum fuit, quem nihil minus quàm defultoriæ fuisse scientiæ constet, quique in gratia apud Ordines semper fuerit, Lugdunique Batavorum magno bonorum omnium dolore, decesserit, ubi etiam versibus ei à Scaligero, te, Heinio, & aliis summis viris sit parentatum? Cogitabis, & quid factu opus putes, perscribes. Sed loquaci adeò Epistola ulterius molestus esse definam. Neque enim me fugit, recenti adeo uxoris adventu, & rebus vestris nondum compositis, alia majoraque esse, de quibus sit cogitandum. Rogarem te, ut me, quamvis nunc tanto disjungamur intervallo, non minùs propterea ames. Sed scio te amicis animo possidere, qui, ut Seneca ait, nunquam abest, ac quemcunque vult quotidie videt. Vale, vir, idemque Amice incomparabilis. Salutem plurimam dices maximo Tilenò; sed & Clarissimo Rigaltio: cui ante annos multos miseram Onofandrum locis pluribus à Scaligero feliciter emendatum. Accepisse mihi ipse rescripsit. Sed tamen tot jam anni sunt, cum nihil intelligo de editione nova, quam tum moliri dixerat Rutgerius. Et quia Rutgerii incidit mentio, scito eum loco Dyckii Legatum fore Regis Suecici ad Illustres Ordines. Ita enim retulit ipse Regis commissarius, quem satis hanc rem nosse arbitror. Imo & Dyckium ipsum hoc perscripsisse audio. Et jam in via Rutgerius esse dicitur. Affinis ejus D. Heinio carmine Venetias celebravit: quapropter, (ut ipse amicis compluribus retulit) brevi legatur in Ordinem Equitum B. Marci. Verùm finis tandem esto. Uxor, Diamantique plurimùm te salutant. Etiam Scriverius, itemque Jacchæus, qui & plurimam mihi salutem tuo nomine dixit. Cæteris, quos adscripseras, ausus non fuit idem significare, ne suspicionem iis injiceret, quasi de rebus aliis quàm Musarum, tecum sibi commercium esset. Timori huic ignosces.

Lugd. Bat.
MDCXXI.

Tuus dum vivam,

G. J. Vossius.

XXV.

Jacobo Corn. F. Witten J. C.
Dordrechtum.

Vir Amplissime, & affinitate conjunctissime,

TAndem uti receperam, libellum mitto beneficii Matthæo collati: scio jamdiu factum id oportuit, sed nosti negligentiam meam in iis, quæ res domesticas spectant. Ut de me verè dici possit, quod proverbio fertur; *Fluvius quæ procul sunt irrigat*; Libellum ubi Quæstor viderit, remittes.

Mirum alterum exemplum (scis enim in rebus hujusmodi, geminum esse solere) non reperiri in chartis tuis. Sed fortè id est in chartis foceri, vel Beverii Consularis. De beneficio gratum erit, si non alibi verba fiant, quàm apud eos, quos gnaros esse rei opus. Ita enim cum offerretur, convenerat: Et causas rei, coram melius exponam. Quanquam tu eas per te satis vides.

Accepi heri Venetiis Aphorismos undetriginta, quibus Cardinales colligunt, Saxonicum etiam, & Brandenburgicum, Electorem dignitate sua, à Pontifice spoliari debere. Nec enim fas esse, ut sacrum Romani Imperii corpus, dehonestetur Electoribus hæreticis. De Palatino solo ante sermo erat. Id ubi successit, etiam utroque cornu, irruitur in Electores alios, Pontificiæ Religioni minus faventes. Ita cum fortuna Clero Romano gliscit impudentia. Operæ visum, ut Aphorismi isti, hebdomade hac in urbe nostra excudantur. Ubi prodierint, exemplum mittam: eo lubentius, quia si otium erit, præfatiunculam, aut censuram, paucis adnectam.

Vale, Ampliss. vir, & affinitate arcta mihi juncte, sed multo conjunctior, eo quod, præter morem mortalium, ames mecum bonam mentem. Uxor, & Te, & Conjugem, fororesq; ejus, cognatas suas, plurimum salutat. Etiam sororem tuam Hogevertiam uterq; salutamus.

Lugd. Bat. Post.
Kal. Sept. clō
1602 xxi.

Additissimus Tibi,

G. J. Vossius.

XXVI.

Reverendo in Christo Patri, D. Lanceotto Androsio, Episcopo Wintoniensi, Regi magnæ Britanniæ à Sacris, & Secretis Consiliis.

Reverende in Christo Pater,

Annus propemodum est quod pollicitus sum, velle me proximis ad te literis perscribere, quis rerum mearum status foret. Multa adeò tum erant, cur putarem, intra breve spatium effici illa posse, quorum sponte mihi fecerant spem nobiles atq; amplissimi Academiæ nostræ curatores. Sed propensissimæ illorum voluntati erga me, vel potius Academiam suam, mora hæctenus injecta est, per quosdam publici boni minùs amantes, vel, quod credere malo, non satis ejus intelligentes: quibus utinam meliorem Deus mentem largiatur. Neq; hoc iis tam mei opto causâ, qui patientiâ Christianâ (itâ enim, quàm Spartanâ, dicere malo) & quicquid ista injuria, & istâ etiam majores, per gratiam divinam concoquere utcunq; didici: quàm propter illos ipsos, qui quia nunc verè, quod volunt, possunt, eo cœlum sibi digito attingere videntur: quos ed ego infeliciores puto, quia dum leviculis quibusdam suam beatitudinem metiuntur, se verè infelices esse non intelligant: imprimis autem id iis opto, propter Ecclesiam Christi, quam istorum imperitiâ atq; imprudentiâ itâ lacerari, magis etiam animo meo dolet, quàm dicere possum. Hæc ed ad te scribo, non quia conqueri de illis visum sit, quod facere minime soleo: sed ut videas in me culpam non esse, quòd, contra quam me facturum receperam, scribere usq; adeò diu distulerim. Pudebat enim ineptire, ac inanes ad virum adeò gravem ac ferium, in ea dignitate constitutum, literas dare. Interim verò, dum ego sileo, sæpiusculè mihi literæ ab optimo & dulcissimo affine meo, Francisco Junio, quibus summas virtutes tuas prædicare non cessat: ac sibi maximopere gratulatur de egregio, ac verè patrio erga se amore, ac prolixâ humanitate tuâ. Imò eas inter literas unæ quoq; erant, quibus illud continebatur, non modò te ab affectu pristino nihil recessisse: sed verò novi etiam nominis auctario cumulare voluisse. Quippe qui minime se gravatus sis, de meliori notâ commendare illustri ac nunquam sine laude nominando inclytæ Angliæ vestræ Mareschallo. Quid ego hic primum; quid postremum eloquar? Profectò naturæ tuæ adeò beneficiæ ad-

admiratione: tum autem gaudio, quod per te affini meo ita bene sit, majori quasi cœstro me sentio concitari. Quare si huic loco conveniret, quod oratoribus conceditur, neque inulitatum planè est Theologis antiquis: equidem animo huic morem gererem lubens, ut magnam illam animam foci mei Junii (cujus mihi memoria magis etiam ob pietatem excellentem, & eximium pacis studium, quàm ob variam & exquisitam eruditionem sancta semper erit) verbis meis quasi coelo deductam sisterem tibi velut præsentem, orationeq; forsitan non indignâ se, & meritis tuis, gratias agentem tibi, quod tantopere amore & curâ tuâ digneris carissimum illud pignus suum, cui unico ex liberis suum impoluit nomen, & à cujus ingenio ac moribus, eò ardentius, ut puto, optima semper expectavit. Et quidem quod facias isthæc eo potissimum tempore, quo liberi & affines sui, ab iis, quibus dum nobiscum versaretur, ipse contulit beneficia, negliguntur, usq; adeò etiam penè spernuntur, neq; id alio ullo merito, quàm quia & ipsi patris foci; exemplo ad eruditionem qualemcumq; contendant, & paci Ecclesiæ etiam cum dispendio suo, optimè consultum velint. Sed non adeò ineptus sum, ut non videam hujusmodi orationem à simplici illo & familiari epistolarum stylo penitus abhorrere. Quare ne dum undiq; erumpente lætitiâ, quod multis evenire solet, planè ridiculus siem, illud potius agam, quod non solum sponte facere gestio, sed etiam universi his in locis Junii *fratris* liberi, generi, nepotes, requirunt, quod etiam tot Juniani nominis amantes velle scio, quod deniq; & facile possum, & sine scelere prætermittere non possum: omnium, inquam, nostri nomine epistolâ hac testabor, quantum gaudeamus de hoc judicio, & affectu tuo, quantum gratulemur Francisco Junio nostro, quantum nos tibi obstrictos fateamur universi, ob eximiam hanc benevolentiam, tantaq; merita tua. Sanè gratiam quidem ut mereris, referemus nunquam, sed habebimus, quamdiu vitam nobis Deus concedet. Hoc affectu nostro, Optime maxime præsul, cuncti rogamus ut contentus esse velis. Nec enim re aliâ ulla consequi possumus merita tua, quàm agnitione debiti istius, cui solvendo impares sumus. Sed quod nos humilis loci homulli non possumus, id largè rependet sublimis ille ac beneficus Deus.

Ad hujus me thronum devolve, hunc supplicibus votis rogo, ut propter Christum & Ecclesiam suam, cujus commodis hætenus metiris tempora tua, spiritus sui robore te porro confirmet, favoreq; hoc terras dignetur, ut

*Serius in cælum venias, diuq;
Lætus intersis populo Britanno.*

Vale, Reverende in Christo pater, & affinem ac me amare persevera.

Lugd. Bat.
clxxxii.
Idib. Sept.

Illustri nomini tuo Obstrictissimus,

G. J. Vossius.

XXVII.

Proceribus Amstelodamenfibus.

Amplissimi & præstantissimi viri,

JAm octiduum & paulo amplius est, quod me Lugduni domi meæ frustra quærebatis: sed Hagæ tamen reperistis. Judicium tum faciebatis pulcherrimæ cogitationis vestræ, de constituenda apud vos illustri schola, ne habeatis necesse rudes & improvidos adolescentulos tam cito ablegare in Academiam; quod quanto sæpe cum periculo fiat, tristibus etiam documentis cognovistis. Et sane quamquam hoc ipsi non addebatis, tamen facile illud per me video, curâ id etiam vobis esse, ut urbs vestra; undique propè beata, literarum etiam gloria magis caput attollat: Quod autem, in tanto negotio meam quoque operam conducibilem fore existimastis: equidem gaudeo. Nec aliena mihi mens ad morem eâ parte gerendum vobis, atque adeò magno etiam animo capeßendum, quod exposcitis. Sic enim semper fui, ut in eo quod semel susceperim, non finem claudicare diligentiam meam. Sed tamen non levia etiam sunt, quæ scrupulum injiciunt. Primum illud cogito, vivere me in Academia toto terrarum orbe inclyta. Ac frûor in ea emolumentis, quantis mei ordinis quisquam. Nempe à bis millibus ea propè absunt, si etiam immunitates accenseam. Quæ cum cogito, nescio an satis ex re sit vestra, si ad me potissimum eatur. Nec enim ab hoc loco avelli possum, nisi laboris sit non multò amplius, emolumentum non paulo majus. In quo mihi non videor peccare, cum aliòquin periculum sit, ne fabula multorum fiam, malignis adeò temporibus, si Academiam Schola illustri commutem levibus de causis. Sane non hic modo male audiam sed vicinis etiam locis, ad quos vel viva voce docendo, vel industriæ monumentis nomen pervenit meum. Itaque sic existimo, nihil me posse in re tam gravis momenti statuere, nisi prius constiterit, quibus conditionibus sim avocandus, sive laborem, quem susceperem, sive præ-

præmium respiciam. Terret etiam (ingenue ut dicam) offensa amplissimorum Academiae literatorum. Nam poscebatis, ut iis ignaris, transigi omne hoc negotium inter nos possit. At hoc si fiat, Æolum extimesco, & Septentrionis filios: sed enim vos, velut humani Joves, si prius compellari non possint, saltem sedare queatis tempestatem istam, quam nunc formido. Quid multis opus? In tam arduo negotio, nec abnuere tantæ urbis proceribus pulcherrimum postulatum fas putavi: Et tamen graves etiam causas video, cur arbitrer, penitius aliquantò mihi explorandum esse de tota hac re animum & sententiam vestram. Deus & vobis, Amplissimi proceres, & mihi mentem illam inspiret, quæ & glorioso ejus nomini inserviet, & inclytæ urbi vestræ, atque adeo Bataviæ universæ, tum etiam mihi ac familiæ meæ sit maximè salutaris.

Lugd. Bat.
Kal. Jan.

Nomini vestro & inclytæ vestræ
Resp. addidissimus,

G. J. Vossius.

XXVIII.

N. N.

S. P.

JAm ex amplissimo affine tuo Reigersbergio intellexeris, vir maxime, ut Amstelodamenses causis compulsi gravissimis constituere in urbe sua cogitent Gymnasium illustre: atque ut eam ad rem utilem existiment operam tum meam tum Collegæ & amici veteris Casparis Barlæi. Sed Leidenenses plane habent persuasum, detrahère eam rem multum posse nomini & existimationi Academiae suæ: eoque omnem movent lapidem, ut hoc negotium disturbent. Primum negant, juris hoc esse ulli civitatum, præterquam suæ, cui pro tolerata fortiter obsidione, præmii loco sit attributum, ut Academiam habeat, ad quam Hollandiæ & Zelandiæ ablegetur juvenus. Amstelodamenses autem arbitrantur, aliud esse Academiam statuere, quam ob rem opus sit privilegiis & immunitatibus à suprema potestate concessis: aliud autem Gymnasium erigere, in quo juvenus, & alii Musarum amantes, absque ejusmodi privilegiis, liberali imbuantur doctrinâ: quale jus penes singulas esse civitates. Existimem quoque, eam rem plurimum commodare posse Leidenensibus, quia si annum unum alterum diutius apud se detineatur juvenus, &

eruditione auctior ventura sit ad Academiam, quod ex honore loci futurum: eo judicio firmior quod efficiar, ut deinceps hic minus sit turbatum. Urgent iterum Lugdunenses, si habere Amstelodamenses velint Professores aliquos, saltem non alibi iis docendum fore, quam in scholis classicis: uti apud Dordrechtanos fecere Professores Nansius, Polyander, Marcellus. Amstelodamenses aiunt non esse laborandum Leidenensibus, utrum in Auditorio aliquo Scholæ classicæ doceant Professores, an loco aliquantulum distito, qui magis deceat non modo doctores ipsos, sed etiam adulescentes jam rûde à ludi moderatore donatos, ac pariter tot præstantissimos clives, qui studia colant, ac de rerum natura; vel imperiis, aliisque rebus præclarissimis, publicè alios differentes audire exoptent. Denique objectant, ut hæc essent, non tamen debuisse Amstelodamenses ex Academia hac vocare: sed potiorè iis habendam fuisse rationem scholæ quæ totius sit Hollandiæ & Zelandiæ, quam quæ unius sit urbis futura: Præsertim cum ipsi nobile sint membrum in procerum conventu à quo Curatores Academiae statuuntur, ut quos hi statuerint Academiae Professores, iidem ab Amstelodamensibus ipsis præfecti fuisse Academiae sint dicendi. Neque negant Amstelodamenses hæc alicujus esse ponderis: ac propterea delegati eorum in Ordinum conventu ante menses duos cum à Leidenensibus super hoc compellati essent, eò inclinabant, ut si rogarentur, ne quemquam vocare ex Academia sua vellent, morem ea in re gerent, dummodo mihi satisfaceret, quo invito facta conventa non possent reddere irrita. Leidenenses vero passi sunt optimam occasionem effluere, quamquam dies dicta esset conventu, & ea de causa semel iterumque Lugduno Hagam excurrissem. Nimirum honestius urbi suæ putant Leidenenses, si non tam rogent Amstelodamenses ut à proposito desistant, quin si in proximo ordinum conventu, qui mense Martio futurus, interdicatur Amstelodamensibus, ne illustrem scholam erigere, aut saltem ne quemquam ex Academia ad Scholam urbis suæ vocare professorem possint. Amstelodamenses negant se quidquam facere velle, quod privilegiis Leidenensium adversetur. Sed si iis repugnet consilium de Gymnasio in quo doceant professores publici, solum opus esse, ut privilegium hoc sibi monstretur, eo viso, velle se ab instituto desistere. Ad me autem quod attinet, eò se potissimum de me aiunt cogitasse, quia non solum opera mea in publicè docendo Historiam pergratum toti urbi argumentum, utilis sit futura, sed etiam in dirigendis scholis duabus

abus classicis (quarum non melior facies sit, quam in cæteris Bataviæ urbibus) juvare consilio Amplissimos Consules possem: quippe qui non sine fructu annis totis xv. Dordrechtanæ Scholæ ante hos xv. annos præfuissem. Negant præterea cum in Academia professores locantur, stipulationem intercedere, qua obstricti professores non alio ire possint, si res eorum sic ferant. Si jus est Leidensibus abrogandi munus professoribus, cujus rei exempla nuper vidimus (ut de focero Junio taceam, cui professio linguæ Hebrææ erepta invito) sane etiam professoribus jus esse abdicandi se munere quando vellent. Ac hujus rei exempla multa suppetere: ut in Danao, se conferente in illustrem scholam Gandavensem; Gomaro Middleburgum eunte: Meursio proficiscente Soram; & compluribus aliis: si professione fungens non possit à se vocari, tantum requiri, ut professor muneri renunciaret: nec dubitari posse quin eum tum vocari sibi liceat. Hæc sunt de quibus Leidenses in proximo Ordinum conventu, controversiam Amstelodamensibus moturi videntur. Quod si sic etiam se nihil efficere posse animadvertant, puto, contenti erunt à proceribus nostris xx. aut circiter, millia expetere, ut deinceps liberalius habeant professores alicujus nominis, atque alios etiam consequantur, qui vel docendo publice, vel scribendo illustrare hanc Academiam possint. Hujus rei indicium non unus mihi eorum fecit, qui Leidensibus familiarius utuntur. Nec obscure innuunt discessum meum causaturum, ut luculentiori conditione Salmasius iterum advocetur: ut paulum illud damni quod in me faciet Academia, magnitudine ejus viri abunde compensetur. Equidem si venerit gratulabor, eò magis, quia ei docendum publicè non erit; eoque desæcatori animo totus erit in scribendo. Mihi tam felici esse non licuit, cui bis de die docendum fuit, ut ignosci mihi debeat, si scriptorum præstantia ab aliis vincat. Laus hæc publica est: nec omnia omnes possumus. Ac de isto hæcenus. Ad aliud nunc venio, in quo consilio atque operâ mihi opus tuâ. Ante dies tres quatuor redditæ literæ filio meo Dionysio, à generosissimo barone Christophoro Stupesquio, quibus significat, fortasse iturum se Constantinopolim & ad alios orientis tractus: ac quia meminerit, quanto ardore filius soleat expetere, ut terras eas lustraret, & quæ deessent in Arabicis, ab Arabice loquentibus posset addiscere, voluisse se nunc occasionem offerre, quia sine parentum molestia voto suo posset satisfacere. Comitem enim itineris hujus assumpturum. Non abhorret filius, quin nihil æque desiderat, quam

ut hoc fiat. Sed quiddam scrupulum mihi injicit atque uxori. Nam quia illustrissimus hic Baro in Religione sequitur opiniones Ecclesiæ Romanæ; ac filius meus ob ætatulam (necdum annorum xx. est) judicio non adeo est firmato, ut inescari promissis nequeat, aut argumentis decipi speciosis: parum tutum arbitror, eum committere itineri tam longinquo cum iis, qui rem Deo se gratam facturos putarent, si ad gremium Ecclesiæ Romanæ filium abducerent. Suspicio mihi injecta ab aliquo à rege Christiano legatum ire aliquem Constantinopolim, inque hujus comitatu Baronem Stupesquium fore. At rex non mittet alium, ut puto, quam suæ in religione sententiæ. Eum Presbyter comitabitur, & alii *ἑπὶ τοῦ*. Quare tanto plus periculi filio sit, in tanto eorum numero, qui diversum sentiant à nobis, ut mittam, quod fortasse in iis futuri homines malis moribus, quos affricare meo possent. Ille quidem se satis firmo ad ea pectore arbitrat. Sed ego multis edoctus exemplis tuta etiam timere didici. Nec propterea consultationem omnem de hac re abjeci. Fortasse enim illustris hic Baro minus Romanæ Ecclesiæ placitis adhæret, quam cum viveret nobiscum. Fortasse etiam comitabitur Ephorus Paschalis medicus Gallus, qui tantum non juravit in verba Zelotarum nostrorum. Fortasse & unâ iturus frater generosorum tertius, qui, ut intelligo, in religione plane noster est. Et si legatus mittendus, fortasse erit aliquis, qui in religionis controversiis non male sentiat de Ecclesiis nostris. Quales è politicis Gallia habet multos, qui distinguere æra possint lupinis. Hæc si essent, facilem me postulatis filii præberem. Est enim is Baro Christophorus Stupesquius, ut, si unum illud de Religione excepero, nihil in eo possit desiderari. Pius est ac numinis metuens, gravis est, modestus, & cordatus. Ingenio excellit, & pro ingenio rara ei eruditio, & mei filique est amantissimus. Quare si pulchra fuerit occasio filio visendi orientem, nullis, vel exiguis impensis meis: nec causa sit satis gravis, cur in Religione ei ab *ἐκείνῳ* metuere debeam, sane fore puto, ut morem ei geramus; verum haut animus annuere, antequam de eo quod dixi, penitius aliquid cognoro. Quare rem feceris longe mihi gratissimam & amicitia nostrâ dignam, si ea quæ vel jam scias de itinere hoc, vel ex illustribus Baronibus aut aliis possis cognoscere, ad me iis ignaris perscriberis. Ego quidem & filius generoso Baroni rescriptimus, sed de metu eo, qui Religionem spectet, ne *ἴσως* quidem. Id enim magis abalienare, quam conciliare posse videbatur. Si inconsultum plane erit, ut

filius

filius se in viam det, aliæ à nobis causæ, & veræ poterant adferri, cur id minus fiat. Accepi his diebus literas ab ornatissimo Omfio nostro, quibus significat, impense se desiderare responsum ad literas, quibus significat, quas ad te misit, postquam mihi sententiam tuam de Equestri S. Michaelis dignitate perscripseras, nihil illi acceptius fuit humanitate ea, qua morem nobis gesseris. Atque optat, ut de cætero etiam certior à te fiat. Salutant te, uxorem, liberos, omnes mei, atque una filius tuus, qui in studiis probare se pergit.

Lug. Bat.

Tuus omni officio,

G. J. Vossius.

XXIX.

Baroni Jo. Stupeski,

S. P.

JAm quasi annus est illustrissime & amicissime Stupeski, quod generosissimi fratris tui, Nicolai Stupeski, alloquio suavissimo iterum frui dabatur, nec quidquam ad perfectionem gaudii mei requirebatur, nisi quod qui antea nobili illo fratrum pari beabar, tunc dimidium ejus non viderem, nec si nunciaretur, subinde baronem Stupeskium velle me compellatum, è famulatio aut liberis querere, — possem. Illud vero etiam dolorem non mediocrem adferebat, quod intelligerem te, cum jam unà in viam dedisses, valetudine adversà coactum patriam repetere. Nam, ut amor sollicitus est, tristiora etiam metuebam. Mirabatur tum frater, me nullas à te literas accepisse, quas à te scriptas probe constaret. Aegrè erat, eas intercidisse. Ita enim suspicabar cum Paschali medico jam in Gallias profectus esset. Nec multo post alteræ mihi à te literæ, atque illæ à te Lutetia Parisiorum perscripta. Sanè utrisque literis nihil mihi carius esse potuisset: partim quia caperem mirâ sermonis elegantiam, partim quia reluceret ubique summa humanitas atque amor mei. Sed Parisinæ tamen illæ non paulo acceptiores, quia hæ metu me illo liberabant, quem valetudo incusserat. Quippe ex his cognovi, te redditum tibi, & jam emensis itineris spatiis, cum florentissimo fratrum pari, feliciter Lutetiæ agere. Hoc mihi eo jucundius fuit, quia ibidem haberetis virum illum, quo ego nihil undique consummatius novi, ac quo quanto familiarius uti licebit, tanto vos beatiores putabo. Nihil,

puto, opus addere illud, me Hugonem Grotium dicere, quod intelligerent etiam nominis Grotiani hostes. Illud potius dicam, quamquam valde gaudeo vos adeo esse felices, tamen, cum Batavicè bona confero cum vestris, & aliorum extra has terras, non vobis quidem quos sic amo, & colo, sed tamen aliis quibusdam hanc felicitatem, pœne dixerim, me invideo. Scio enim quantum damni in eo faciam, quod tot annos hoc viro careo. Neque aliud æquè opto, quam illam mentem proceribus nostris, ut eum restituant patriæ & suis. Ex epistola quam ante quadriduum ad Dionysium meum scripsisti, video te cogitare Constantinopolim & orientis tractus: nec abnuere, imo potius exposcere filium tanti itineris socium & comitem. Equidem cum illustre genus vestrum & cæteras laudes tuas cogito, non possum non summas tibi gratias agere, quòd tantus tanto honore atque affectu pariter me meosque prosequaris. Nec tamen tam subito ego & uxor statuere quicquam potuimus, partim quia itineris totius rationem ac quas vocant *conditions* aliquanto saltem penitus nosse antea oporteret: partim quia animus meus nunc alio negotio plane distinetur. Quod cujusmodi sit, non defugiam exponere. Amstelodamenses decreverunt illustrem erigere Scholam in urbe sua. Atque hoc ut faciant, duo imprimis impellunt. Primum movet liberorum cura, quos, tot tristibus edocti exemplis, tam cito in Academias licentia corruptas ablegare metuunt. Nec enim idem moribus obinet Belgarum, quod gentis vestræ: Sed apud nos ætas ea, quæ in vitia omnia maximè ebullit, maximè sine custode relinquitur. Sufficere existimant, si aliquis mores inspiciat, cum ætatis beneficio, vitia ignorant. Præterea impellit civium amor, quibus studia sunt cordi. Magnus enim eorum est numerus in hac urbe, qui & nostram & Academias alias his proximis viginti, vel triginta annis lustrarint: neque nunc minus, quoties licet, audire aliquem cupiant de rerum natura, vel rebus gestis, aliisque rebus gravibus publice differentem: Advenarum etiam non pauci ibidem degunt, quibus idem est ardor. Nempe præter illos, qui solas sectantur Musas, cum Apolline suo, habet ea urbs viros Mercuriales, quibus doctrina pariter curæ sit ac opes, Mercurii sui exemplo, non mercium modo, sed eloquentiæ etiam præsidis. Desiderium est igitur civitatis, ut quemadmodum longe supra alias urbes caput extulit divitiis, ita etiam literarum laudibus magis & magis fiat inclityta. Tanti ut voti compos existat, existimavit, eos sibi advocandos Professores, qui tum scriptis jam inclaruissent, ut nomen nascenti Scholæ dare

dare possint : tum etiam Venere aliquā ac facundia polleant in docendo, ut facilius allicere & detinere auditores valeant. Qui ea in urbe me aliquando audire, quales etiam è proceribus sunt, persuasere cætero senatui (quam verè ipsi viderint) non esse me ab his laudibus destitutum. Itaque missi ad me è Senatu, qui postularent, ut huic Reip. operam meam addicere vellem in iis publicè docendis, quæ apud Leidenfes narro. Item præterea ad Casparem Barlæum : qui cum aliis scriptis, tum præcipue poematis magnū sibi nomen non in patria modo, sed vicinis etiam regnis parasset. Quam disertè autem tetrica logices præcepta idem ante annos duodecim solitus sit in hac ipsa Acadèmia tractare, testes plurimi supersunt, qui florentissimo auditorio docentem audierunt. Quare hunc Philosophiæ Professore designarunt ? Luculentam domum habebit, ac præterea annos florenos, nostrates mille & quingentos. Mihi præter domum, quæ octingentis conducitur, annumerabuntur quotannis bis mille & quingenti. Spes etiam aliorum facta, quæ commemorare singula nihil attinet. Et jam affectum suum erga liberos testari cœperunt, Franciscum meum referendo in numerum advocatorum urbis suæ, qui Hagæ degunt. Huic Amstelodamensium instituto non satis æquos se præbent Leidenfes : quibus illud unice in votis, ut disturbare consilia eorum possint. Sed procerum sapientiores negant eos quicquam effecturos ; Quæ de re certiora proximis ad te scribam literis. Simul etiam plenius significabo, quid nobis videatur de postulato filii, rogantis, ut comitari te in orientem possit. Quamquam profecto vix nos extricare possimus, nisi, ut dixi, re omni, de qua consulendum, melius perspecta. Sperat igitur filius se alteris literis tuis melius de omnibus posse edoceri. Quicquid autem futurum, æternum tibi debebo, quod luculentè adeo testari volueris, erga me & meos, quanti nos facias. Deus hanc tibi mentem perpetuo conservet, mihi autem & meis vires largiatur ad ea præstanda officia quæ animum gratum in nostri ordinis hominibus deceant. Generosissimis fratribus tuis, atque etiam doctissimo viro Paschali, plurimam meo nomine salutem dicito.

Lugd. Bat.

Generosi nominis tui, ac totius illustriſſis domus tuæ cultor,

G. J. Vossius.

XXX.

Erycio Puteano, S. P.

JAm diu est, summe & vir & amice, quod Oratoriæ meæ & auctiores, & limatiores venire gestiunt in manus tuas. Sed occasio eas mittendi nunc demum obtulit per tabellarium, qui monitu tuo me compellavit, nec literas solum, sed commentarium etiam nostrum se procuraturum recepit. Quamquam fortasse jam à me acceperis. Nam ante quadrimestrè vel præterpropter, cuidam professione medico, qui se per Brabantiam in Galliam iturum diceret, illud pro jure quodam meo in mandatis dedit, ut ne sine meis ad te literis abire vellet, atque ut à typographo geminum posceret Oratorium mearum exemplum, quarum unum retineret, alterum tibi daret. Is dum ego ab urbe absum, discessit, nec nisi unum exemplar rationibus meis apud Typographum addi jussit. Itaque hæreo, utrum, quia nihil ad te scripisssem, sui tantummodo rationem habendam putarit : an contra humanitatis suæ esse existimarit, ut alterius potius rationem haberet, quam sui : Præsertim cum eo pacto commodior esset occasio compellandi tui, cujus conspectum & alloquium ambiret. In re incertà id facere malui, quod fecisse me vides. Si medicus ille fecerit, quod optarem : Pro filiorum aliquo hic index fuerit. Reperies in eo semel iterumque mentiunculam tui : sed non pro meritis tuis in rem literariam. Quorum major ratio habebitur in commentariis nostris de lingua latina, ac imprimis Originum libris, quos circa proximum Christi natalem prelo subjicere Elsevirius decrevit. Si fallit, non moror. Nam mihi ipsi horret animus, cum cogito quantum laboris exantlandum erit. Si quid enim difficile est, id profecto est eruere è tenebris causas vocum omnium : ubi ille togatorum omnium doctissimus effugere non potuit, quin crebro nugaretur. Scio ab eo tempore multa in apertum producta esse, quæ tum in obscuro latebant. Sed nec pauca sunt, quæ reliquerit, quæ pulchrum sit revocare ad natales suos, sive illi in antiqua Latii lingua, aut Æolum Dialecto : sive in Linguis Orientis, imprimis Syra, unde Cadmus genus duxit : cui etiam literas ipsas debet Græcia. Adde quod non leve judicium requiritur, si, ut animus est, in tanto Philologorum dissensu rationes plurimum addere velim, cur illud potius sequamur, quam istud. Neque hoc eo dico, quali multa mihi de me promittam : sed ut videas, non de nihilo esse, quod re jam etiam ante multos annos per-

penſa,

penſa, nihilominus adhuc horret animus ad illud laboris, quod ſuperest. Quia ſpiſſe ejus operis editio procedet ob voluminis magnitudinem, decretum tibi, ſi per Typographum licebit, per partes illud tranſmittere. Nempe minus tædio fuerit, ſi ſic legatur, præſertim ab homine occupatiſſimo: modo noſtra tanti putabis. Sed ſaltuatiſſimè hoc ut facias, facile ſpero, impetrabo. Magnas vero tibi gratias ago, quod toties me beas perennibus illis, ingenii, doctrinæ, induſtriæ tuæ monumentis. Quam me, ut mittam alia, tua delectavit Flavia Domitilla. O ſi multa eo in genere, ut poſſis, ita velis! Quid de hiſtoria Inſubrica dicam! magiſve doctrinæ, an ſermonis elegantiam & facundiam mirer? Nec poteras opera alia magis tibi, & hoc ſeculum, & poſteros obſtringere. Nam in rebus Græcis ac Romanis multum jam ſumma ingenia deſudarunt. Jacent penè diſpreta tempora quæ Imperium Romanum proximè exceperunt. In his Hypſæo cæcior ſit, qui ignoret irruptiones Barbarorum in orbem Romanum: Ab illis origo tot florentiſſimis regnis ac principatibus in Europa noſtra. Ubi vero incidi in loca ea, quibus tam amicè commendas nos, operamque in hiſtoricis noſtram, quiddam melle dulcius mihi circa cor gliſcere perſenſi. Quid enim jucundius quam laudari me ſit, uſque adeo laudata laudatiſſimi viri opera, & qui me à pueritia norit? ſane hoc boni feciſti, quod ſtimulos etiam addidiſti ad porro bene merendum de literis noſtris. Volupe etiam fuit luſtrare ſtirpem Puteanam: quam ego perhoneſtam eſſe, nec antè annos neſcivi XL, cum unà Dordrechtii viveremus. Sed non paulo id nunc accuratius perſpexi, cuiſque liberis eo nomine gratulor, quod tam benè nati ſint. Quamquam proſecto ſatis haberent, quo ſe jactarent, ſi prima honoris fundamenta jeciſſes. Utrum Calenii mei Puteani ſtirpi fuerint innexa, non ſat ſcio. Neque enim qui tanto Venlovia abſum intervallo, occaſionem habui in omnia inquirendi. Sed ſi ita eſt, jucundum mihi erit ſcire, ac familiaræ etiam meæ id gloriæ ducam. Nec indecores Puteanis ſumus, cum multi hodieque ex cognatis meis non his modo in terris egregio loco ſunt; ſed Ruramondæ etiam & vicinis locis, partim conſulares, partim aliis dignitatibus functi vel etiam fungentes, ſuperſint. Hæc ego iii. Nov. raptim exarabam, die dominico, quod eo ipſo antè meridiem tabellarius abitum pararet. Sic quoque ſacro die ſacra tractavimus, cum ſacra res ſit amicitia inter bonos & Dei metuentes: qualem te comperi à prima ætate, optime, doctiſſime, amiciſſime Puteane. Cujus idcirco amor ac cultus erit, dum terras colam.

Tuus,

G. J. Voſſius.

XXXI.

G. J. Voſſius Danieli Paræo S. P.

T Ardè admodum mihi redditæ literæ tuæ, nempe tertio menſe, ex quo ſcripſeras: interim & alius menſis effluxit, non tam reſcribendi negligentia, quàm quoddam aliquem exſpectarem, per quem meæ ad te tutò mitterentur. Super quo etiam ornatiffimum juvenem Billetium compellendum exiſtimavi, ſimulac eum pedem in urbe noſtra poſuiſſe intellexi. Sed nunc demum occaſio indicatur, quam arripiendam putavi. Nec interea à me ceſſatum in iis, quæ ad te pertinerent. Nam tuâ potiſſimum cauſa Hagam excurri, ut colloquerer cum Domino Camerario, Illuſtri Suecorum regis ad Ordines noſtros legato, viro amantiſſimo ut mei, ita tui, & totius domus avitæ veſtræ. Satis video, quam ille propendeat, ut ſatiſfaciam poſtulato tuo. Sed necdum potuit, quod vult. Nec minus ipſe laboro; inque curæ hujus partem adſumo præſtantiſſimos collegas, qui te amant & æliimant, cum ob proprias virtutes, tum etiam propter clariſſimum parentem, & maximum virum, avum tuum. Sed difficilius aliquid te dignum poſſunt, quia de pluribus popularibus laborandum iis hætenus fuit. Et in non paucis quidem effecimus, quod voluimus. Quid deinceps poſſimus, non ſat ſcio. Sed illud ſcio affectum te & operam non deſideraturum meam. Venio nunc ad illud, quod Lucretium mihi tuum dicandum putaris, poetam eum, quem plurimi facio, non ſolum ob lectiſſimam dictionem, ſed etiam quia multa adeo in illo ad naturam rerum intelligendam. Adoleſcens in unius Ariſtotelis verba jurabam, ætate provectior ſæpe excedere cœpi è Lyceo, meque contuli vel in Academiam, vel in porticum, vel etiam hortos Gargetti ſenis. Nempe εὐλαμπὴς factus ſum. Nullius addictus jurare in verba Magiſtri: De Philoſophia dico. Nam in ſacris unicus Magiſter Chriſtus, qui & antea per Prophetas, & poſtea per Apoſtolos viros *διδασκάλους*, locutus nobis. Cæterum non video, amiciſſime Paræe, quas tibi pro tanto adfectu, ſummoque hoc honore gratias rependam. Sed in elogio noſtri, ingenue dico, large nimis peccas, meque non tam honoras, quam oneras. Ego honoris illud quod mihi tribuis, ſemper aliis reſigno, uti debeo. Verum credo, dediſti illud non tam mihi, quam dulciſſimæ ſed miſeræ nunc patriæ noſtræ: cujus gloria tanto fuerit major, quantò illuſtriores fuerint, quos produxit. Sed de iſto & aliis, brevi ad te pluribus ſcribam. Sunt enim

enim apud nos, ut intelligo ex popularibus, Hanovienſes qui intra hebdomadam unam alteram redituri ad vos. Per eos mittam Oratoriarum exemplar, quæ hoc anno prodire, non donum proſpecto aut pretium, quo me tibi ſatisfacere poſſe exiſtimem, ſed affectus ſponſorem tabellam, quo me ad majora potius obſtringam. Filii mei, quos ſenos habeo, Muſarum aſſiduos cultores plurimam tibi ſalutem adſcribi juſſerunt: Quod ſane facio lubens. Præterea verò meo nomine plurima ſalute impertias rogo præſtantiffimum parentem tuum, quem ego virum ob præclarum ingenium, & doctrinæ elegantiam, tot monumentis teſtatam multos jam annos amo & æſtimo, majoriſque deinceps faciam ſemper, poſtquam Parææ domus primo de me optimè voluit mereri.

Lug. Bat. Kal. Januarii, Quibus, more veteri, atque ex intimo animo, exopto, ut annus ſic Parææ familiæ & lætus inchoet, & lætior procedat, & exeat lætiſſimus, τὰ χεῖρα

Tibi tuiſque merito tuo addiſſimus,

G. J. Voſſius.

XXXII.

Gerardus Johannes Voſſius, Hugoni Grotio, S. P. D.

IN rebus meis, Vir Ampliſſime, nihil actum; eo quod Curatores ſtato die non advenierint; ſed menſem diſtulerint adventum ſuum, quod nunquam antehac fieri memin. De Wicelio uti & Stobæi eclogis, jam frater ad te ſcripſerit. Quare actum agere nolo. Nonnunquam dubitavi, annon uſui tibi eſſe poſſent Comitorum Græcorum ſententiæ, quibus tam multa bona ad oram alleviſſes. Hoc ſi eſt, ſcis tantum ſignificato opus eſſe. Gaudeo ſex tuos de vera Religione libros in lucem prodiſſe. Sunt illæ unicæ delitiæ multorum, & eos inter conjugis meæ, cui eo impenſius placent, quod domi ſuæ habet interpretem eorum, quæ circumlocutione quadam dicuntur à te, vel etiam ubi alludis ad hiftoriam minus in vulgus notam. Dubitavi interdum, an non in gratiam imperitorum utile foret, declarationem talium ad oram verbo annotari, vel ad calcem adjungi: quod jam alios ſcis in hymnis ſuis præſtitiffe. Nec tamen minutum adeo laborem ſubiri à te velim, ſed fratre, vel alio. Vellem cum his de Religione libris Latino-Belgica vel potiùs Belgico-Lati-

na tua ἀντίγραφος exiſſet. Parentes multi occaſionem haberent, egregia multa & diſcendi, & docendi ſuos. Loquor de hominibus bonarum literarum non ignarīs, qui Latinis magis delectantur. Nam cæteris editione Belgica, toties jam repetita, ſatis jam conſultum puto. Tum autem ob oculos verſantur ſtudioſi adoleſcentes; quorum multi (dicere horret animus) vix elementa Religionis Chriſtianæ ſciunt. Imo quid illo vix opus mihi? Etiam abſque illo nihil dixerō παρελκόμενον. Paucos adeo ex iis invenio, qui & Chriſti beneficium, & ſuum officium intelligant. Hæc Hogerbetio ſubito ad vos abitum parante, ſcribenda mihi exiſtimavi. De cæteris brevi per ſtudioſum quempiam, qui Lutetiam cogitat, faciam te certior. Salutem uxori lætiſſimam à me & mea. Item ſummis viris, Tilenò, Salmaſio, aliis.

Kal. Jun. c15
16xxii.

Tuus omni officio,

G. J. Voſſius.

XXXIII.

Gerardus Voſſius, Hugoni Grotio, S. P.

AMpliſſime, Clariſſime vir, jam diu expecto, ut de rebus meis aliquid ſtatueretur, quo, cum aliud non habeam, ſaltem hinc capere ſcribendi argumentum poſſim; ſed adhuc fruſtra fui. Nam etſi jam diu Curatoribus is animus fuiſſe videtur, ut vel Eloquentiæ, vel Hiſtoriæ univerſalis docendæ provinciam mihi decernerent: tamen ab aliquibus, partim apertè inimicis, partim φίλοις ἀφίλοις, ſemper aliquid obſectum, quod hoc eorum propoſitum impediret. Attamen tam multa in hoc tempore concurrunt, ut aliud vix perſuadere mihi poſſim, quam proximo eorum conventu habitum iri rationem mei, vel potiùs Academiæ hujus: in qua humanitatis ſtudia magis magiſque ſordere incipiunt juventuti: ut niſi plurium induſtria gliſcenti malo obviam eatur, omnino futurum prævideam, ut brevi barbaries omnia occupet. Nec cauſa obſcura eſt, cum nulla elegantioris literaturæ, humaniorumque ſtudioſorum præmia ſint; imo hæc ipſa invidiæ obnoxia ſint, apud eos, qui perſuaſum omnibus cupiunt, Neminem eſſe Theologum, vel Juriconſultum poſſe, niſi qui unum hoc per omnem egerit vitam: nec ætatis partem triverit in iis, per quæ gradus fieri debebant ad ſublimiora. Hæc ego ad te non ſcriberem, niſi nunc magis quam antehac unquam, veriſſimum eſſe comperirem illud, quod in Petro-

M

niano

niano Satyrico legere est, id quo nihil est majus, pueris indui adhuc nascentibus. Quamquam vèro petilens istoc fidus prope omnium animos inflavit: tamen non desperem posse nonnullis, quibus de luto meliore Phœbus finxit præcordia, noxiam adeo opinionem ex animo evelli, dummodo ne homines partim imperiti, partim invidi, tantum bonum impedire pergant. Interim de me utcunque erit, gaudebo, quod mihi sit mens sana in corpore sano: si insipientibus non visum uti opera nostra, dum possunt, illi, non ego infelicior fuero. Quin fortasse eo beator ero. Quod tu quidem, magne Vates, facile arbitror mihi concesseris: quippe qui alicubi cecineris, inter ea esse *Vitam quæ faciunt beatiorē, Nulli pendere temporis tributum.* Sanè quamdiu ab hoc tributo immunis sum, sedulo id operam do, ut ne minùs sim negotiosus quàm soleo. Et nunc sub prelo est commentatio mea, de Historiæ natura, & scribendæ Historiæ præceptis. Quam arbitror intra hebdomadas duas lucem adspicere posse. Nisi fortasse moræ aliquid injecerint, libelli alii non absimilis planè argumenti, quos cum priori emittere propemodum stat sententia. Sed profectò quantò malle hac ætate insumere operam meam studiis istis, quæ ad pietatem Christianam, Scripturarum illustrationem, vel Ecclesiæ historiam pertinent. Non malè, nec infelicitè puto, ornare hanc Spartam coperamus. Sed temporum infelicitas, torrentis instar nos abripuit, ac levibus hisce literariis curis adfixit. Interim blandiorem auram exspectabo, qua provecti ad graviores curas, appellere iterum studiorum nostrorum navem, possimus. Tu verò, Amplissimè vir, nunc, ut arbitror, omnia potes quæ vis. Nisi fortean excipere ea debeam, quæ ad nominis tui defensionem pertineant. Nam ex plerisque, sed minus amantibus tui, intelligo, Ordinum nostrorum Legatis, priusquam Lutetia, ante annum, vel circiter discederent, illud fuisse promissum, nihil istic editum iri, quod Procerum nostrorum quiscumque cum injuria sua conjunctum esse arbitretur. Sed longè alius animus eorum, qui in honore antea fuerunt, & illorum qui illis favent: quibus nihil adeò in voto esse videtur, quàm ut aliquid videant tui, quo mundus intelligat, quàm benè & patriæ voluerint semper & adhuc velint. Utris potiùs gratificari debeas; vel quid rebus tuis, aut publico magis expediat, scio à me minimè requiris, quem scis non multum sapere ultra ea, quæ ad molles Musarum Labores, ac Socraticos libellos pertinent. Adderem etiam facros, si per eos liceret, qui, uti dixi, nihil illis sapere quemquam putant, qui non illo-

tis manibus, eos sit aggressus. Sanè video esse, qui summum Virum Tilenum Theologum esse negent; quem tantoperè Palatinarum Theologorum elogiis celebratum, ante annos aliquot vidimus. Nempte nunc minimè de plebe homines persuasum id aliis volunt, sedulo eum humanitatis studiis vacasse: atque inde esse quod sua tot bracteatis dictis, & vermiculatis emblematis ornet: cæterum quicquid istis operæ infusit, id decidisse arduo Theologiæ studio: quippe quod totum hominem requirat. Equidem nec ego quemquam velim meliorem ætatem istis unis tere, quæ tantum gradus esse ad Theologiam debent; sed quum putidum est, non posse de Religionis controversiis judicare, nisi qui linguarum trium genium ignoret, nisi qui historiam externam, & locorum situs nesciat, nisi qui differendi artem solum degustarit, tanquam canis Nilum; at animæ doctrinam, moralem scientiam, ea quæ de universalibus principiis, & affectionibus à Philosopho disputantur, ne attigerit quidem. Et quod omnium foedissimum est, non posse idoneum esse Scripturarum interpretem, nisi qui junioribus Magistris contentus, superfederit discere ex Antiquis, quid & alii senserint, & cur ita maluerint sentire. Quæ etsi profiteri minimè audent homines imperiti & malevoli: tamen quid aliud agunt, qui authores sunt juventuti, ut studia istæ, quæ dixi, negligant; quippe inutilia, & sæpè etiam noxia: qui item undique produnt, nullos à se viliori loco haberi, quàm qui studiis istis adjuti ad graviora se contulerint? Sed istos missos faciamus. Ad te, maxime vir, revertor: cujus, ex quo in Galliis fuisti, nihil videre contigit, præter ea, quæ de Pelagianismo disseruisti. De quibus te judicium meum jam ex aliis cognovisse scio. Sed ut illa non uno nomine magna cum voluptate legi: ita impensè desidero, ut simulac ab iis, quæ publicas curas spectant, otii aliquid nactus fueris, seriò cogites de emittendo Stobæo tuo. Exple, exple tandem augurium illud doctissimi, & de literis optimè meriti, Andræ Schotti, quod est in scholio addito Photii Bibliothecæ tmemate seu cap. 167. *Presagit, inquit, animus, (quid enim vetat ominari?) fore ut ope Photianæ Bibliothecæ, quæ latent, eruantur non pauca: & quemadmodum, nunc exiverunt Hadrianus, Gelasius, Theophylactus, Simocatta, ac quædam etiam Diodori Siculi, sic quoque spes est, Stobæi Eclogas omnes capite truncas, alibi vitiosas, turbatas, mutilas, primo maxime & secundo libro, Philosophi alicujus opera, atque Philologi in integrum restitutum iri, ut apto illo colligenti ordine servato, majore cum Reip. commodo appareant.* Et tibi, quod omnium primum æcono-

*œconomiam Librorum, ac singulorum cujusque capitulum seriem, & Argumentum Photius accuratè designet: dein Augustanæ Bibliothecæ (cujus multa jam exstant in rem literariam beneficia) codex calamo exaratus: ut & nostra neque pauca, neque contemnenda fragmenta quæ ex Anton. Augustini V. C. gerimus, adferunt adjumenta. Nunc quoniam in medio palma est, huc Græcæ ac politæ Philosophiæ studiosos invito. Hunc ego locum adscripsi, quia contineret, unde peti possent, quæ novam Stobæi editionem ornam. Gratulor vero Stobæo quod à longè illustriori manu medelam, ac decus suum accipiet, quam Schottus prælagire, vel sperare unquam ausus fuisset. Non dubito, quin seire aëas, quid sit de Seneca Tragico, quem ante annum atque amplius notis se suis illustrare velle receperat Scriverius noster. Ille verò lento adeo pede, & verè testudineum in modum procedit, ut multum videatur timere, ne, si alius esse occipiat, quàm solet, cognomen Lentuli amittat, per quod à te patriciis Romanorum familiis sibi insertus videtur. Hæc res facit, cur neque quæ ipse in fragmenta Tragicorum meditabar, lucem adspexerint: neque item illorum quicquam, quæ transmiseras ad utrumque nostri. Non ignoras, me à multis retro annis Originum libros moliri. Iccirco impensè aveo nosse, num brevi sint proditura, quæ de eodem Argumento scripsit clarissimus Salmasius, ut cognosco ex notis ejus ad Historiæ Augustæ scriptores. Multum metuo, ne si vir tantus suos edat labores, ego meos æternum premere cogar. Et tamen nihil magis desidero, quàm sit nobile ejus viri opus quam primum adspiciat lucem. Potero meas copias in arctum cogere eaque solum adferre, quæ Salmasius vel dicere neglexerit, vel contempserit. Ita non planè mihi peribit labor meus, qui multis mihi vigiliis stetit. Et interim hoc lucrabor, quod si Salmasianæ priùs prodierint, ego iis visis meliora, certioraque edocebor in multis ubi nunc hæreo; Nec enim vulgare quicquam ab eo expecto, cujus ego *εὐνοΐαν* in corrigendis Scriptoribus Antiquis fatis mirari non possum, nec prædicare unquam definam. Quod verò ad Romanorum Antiquitatum intelligentiam, quem cum eo componere possimus planè non video. Alias ejus viri laudes prætereo, tibi magis cognitæ. Mihi quidem, quoties aliquid mei lucem videbit, prope decretum, quoties ad illud mitto, etiam exemplum addere ad summum illum virum; non quia tanti mea esse putem; sed quia committere non possum, quin ostendam quanti à me fiat. Et quod caput est, opto ei innotescere. Quod ea occasione per te commodè fiet. Nam tu, vir*

Amplissime, qui me meaque amare soles, commendatione nugarum mearum pretium illis addes, quod à se sperare non audent. Utinam verò pròdesse tibi in aliquo possem vicissim? sed jam diu est, quod affectu meo contentus esse soles. Quare verbum non addam, nisi quiddam de affine mea, & eo qui illius ambiit nuptias. Equidem optassem; & ille ut tristibus his temporibus, de conjugio minimè cogitasset, & nostra, ut magis à secundis nuptiis abhorruisset, hoc saltem tempore. Virum quidem novi ab annis triginta & amplius, etiam his annis circiter quindecim familiares fuimus, quantum loci intervallum quo plurimum distinguebamur, item temporum ratio sinebat. Indole optima semper mihi visus fuit, moribus etiam honestis, & politiori literatura, quod rarum est in ejus professionis homine, eleganter est excultus sed cogito semper mecum, quantis, munus, quod sustinet, sit periculis involutum: tum autem si terras cogitent, alio sub sole jacentes, metuo ne ea nostræ sit corporis imbecillitas, ut longiori itineri minimè par sit futura: adhuc longè aberit à sanguine, & affinitate junctis. Propter ista & quædam alia, author conjugii esse non potui: nec tamen in dissuadendo libertate ea ausus fui uti, quæ fortasse requirebatur. Videbam enim alios hic esse qui impensius suaderent. Tum autem minimè tam obsecram naris, ut ex colloquiis & aliis non animadverterem, quanti faceret conjugii bona. Adhuc metuebam, ne si hic alteram duxisset, non inferioris fortis, nostram verò peteret nemo nisi inferioris conditionis quàm iste est, illa fieret *ἁπλοῦς πνευµατικὴ*, quod pulchram illam, ut tuin videretur, conditionem dissuere passa esset. Dixi igitur interdum, mihi sic videri, seu abnueret, seu annueret, fore ut postea poeniteret. Sed cur poenitudinis duceretur si annuisset, vix aliam adferre causam poteram, quæ alicujus momenti ei videretur, nisi quod aut longissimè abundum foret à suis, aut si maritus iis in locis, in quibus esset, remaneret, illa in perpetuo versatura sit metu, ne is experiri eandem cogatur fortunam, quam aliquot eorum, qui ejus sunt conditionis, nunc discere coguntur. Illa ad hæc; meliora se tempora sperare: & si quid adversi Dominus intromittat, confidere eundem etiam spiritu suo roboraturum. Habes, Amplissime vir, quæ nunc occurrébant. Deo immortali primum gratias ago, quod tibi & familiæ toti benè adeo sit: deinde eum supplicibus votis oro, ut hoc bonum diuturnum esse velit, quo diu Reipublicæ, & Ecclesiæ utilis esse possis. Uxor multum te salutat. Etiam utriusque nostri nomine salutem dicito rari

exempli foeminae, conjugii tuae, quam ego post tot adversa ex marito suo solidum capere gaudium non minus laetor, quam propria si res ageretur; si bene memet novi. Nec praeterire possum Clarissimum, & *Σολοζοτῆσαν* Tilenum. Penè est ut addam magna quaedam nomina, quorum extrema tua Sylva meministi. Sed metuo ne meum hic delitescentis nomen fortasse nec fando unquam acceperint.

Lugd. Bat.
cl. 15 Ioc xxii.
Idib. April.

Ὁ σὸς ὅς ἐστις τῆς ἀρετῆς,

Tuus ex toto corde,

Ing. ὁ Ἀλφεινός,

G. J. Vossius.

XXXIV.

Hugoni Grotio, Gerardus Vossius S. P.

VIR Clarissime, Amplissimeque, vellem diem unum alterumque scribendi officium differre licuisset. Potuisssem fortasse certius aliquid ad te perscribere de rebus meis. Est enim hodie octavus Augusti, quo, uti nosti, convenire Academiæ hujus Curatores solent. Sed nefas putavi, ut sine literis meis Lutetiam iret Vir Illustrissimus Anth. Maurerius. Interim planè arbitror fore, ut intra triduum de professione, si non ipse multum gaudeam mihi, saltem plurimum gratulentur mihi amici: qui causas non planè leves adferunt, cur malint, me in publico munere versari, quam privatim mihi canere, & Musis. Tamen fuit qui insusurraret, vereri se, ne aliquid incommodet rebus meis, quod inter literas interceptas quædam ad me scriptæ forent. Id mihi parùm credibile videbatur, quia de nullis rebus Epistolæ nostræ loqui solent, nisi privatis, aut innocentibus Musis. Quicquid erit brevi resciscam. Simul illud cognoscam, quid ad me libri miseris. Fuit qui putaret esse aliquid Clarissimi Salmasii. Alius intellexisse se dicebat, esse librum à Cl. Rigaltio missum. Quod si est, credo fuerit Onofander meus. Id si est, perierit fortasse mihi. Nam etsi librum amo, tot locis manu Scaligeri correctum: tamen non tanti duco, ut temporibus his, quibus suspicionum plena sunt omnia, reposcere eum digner à Procerum nostrorum conventu. Dissimulabo potius rem omnem. Hæc nunc paucis: sed intra octiduum alteras à me literas expecta: præsertim si quid actum erit in rebus meis.

Salutem Conjugi, Tileni, Salmasio, Rigaltio. V. V. C. C.

viii. August.
cl. 15 Ioc xxii.

Tuus totus,

G. J. Vossius.

XXXV.

Johanni Berkio, *Belgiæ fœderatæ*
Ordinum Legato, ad Serenissimam
Remp. Venetam.

Illustrissime Domine,

CUM eximias animi tui dotes, maximam semper fecerim, & ejusce rei argumentum aliquod extare publicè cuperem; neque me fugeret, quantoperè me obstrictum teneres: Ita judicavi pusillum hoc, de arte Rhetorica, quia aliud ad manum non erat, præclaro nomini tuo, inscribendum esse; non quidem ut paria tecum facerem, quod fieri omninò non potest; imò ne quidem ut vincula, quibus sum tibi devinctissimus, paulum saltem videar laxasse: sed potius ut morem animo gererem meo, quem & tibi obligatissimum esse, & in nexu adhuc manere, ingenuè agnosco. Unicè igitur rogo, ut nihil aliud hic spectes, quam mentem devotam, lubensque à cultore id tuo accipias, quod nunc est tuum. Hæc fiduciâ tantillum munusculum viro tanto mittere non metui. Et quomodo aliter mihi persuadeam de eo, cujus, & humanitatem erga omnes, & summam erga me benevolentiam, semper sum expertus. Utinam modo mihi, de nonnullis aliis, in Batavia similia possem polliceri. Quod non temerè opto: Quemadmodum enim vitis, non sine ulmo adfurgit; ita ut optimè nosti, nec eruditio, nec virtus, se facile attollit sine summorum virorum præsidio, aut tutela. Interea gaudeo non mediocriter, de favore Amplissimorum Academiæ Curatorum erga me. Sanè quàm non omnino immemores sint mei, vel hinc vide, quod nunc quartum mensem, eloquentiæ studium, & omnis ævi historiam, vel verius *ἡγεμονίαν*, publicè profiteor. Ipse etiam, ne consilii hujus poenitere eos possit, sedulò Spartam meam orno. Itaque & frequentia auditorum à nemine vincor. Quamvis non ignoro hoc potius tribuendum esse gratissimo argumento, quod tracto, quàm doctrinæ meæ. Utinam enim non quantum minuto isto, quod dixi, fortasse exupero alios, tantum à cæteris, & ingenio vincerer, & eruditione. Sed ut Poeta ait,

Non

— *Non omnia possumus omnes.*

Noli autem putare, quia nunc publicè docendo, tempus infumo, eò me sollicitum non esse, de iis scripto consignandis, quæ labore multo observavi. Nam quanto aliter sum animatus, argumento erunt libri mei, tum quibus de Historicis tracto, tum quibus tempora omnia digero. Volui, ut tibi, otii mei ratio constaret. Ac propterea duos priores operis, de Historicis Græcis, (qui soli excusi) ad te mitto; ut inde de cæteris conjectes. Eosdem misi ad Illustrissimum Dominicum Molinum, quem mea alicujus facere intelligo. At Libellum dicatum tibi, tum eidem seorsim cum literis transmissi; tum Clarissimo Balthazari Bonifacio; aliorum nemini; quando cum his solis literarum mihi commercium intercedit. Tertius accessisset Paulus Servita, quem virum ob virtutem, plurimum semper æstimavi. Sed non multo postquam amicissimè salutem mihi adscribi jusserat, per Illustrissimum Dominicum Molinum; Coelestis Pater, ex misero hoc orbe eum in meliores sedes transtulit. Aliud nunc nihil habeo, quod scribam; nisi dum tanto tu intervallo à Patria, sed Patriæ causâ, abes; assiduè vota me facere pro salute tua, & uxoris, veræ heroinæ, ac totius familiæ tuæ, multumque me desiderare diem illum, quo in Bataviam reversis, foelicem gratulari adventum licebit. Plurima salute uxorem tuam, cognatam suam, impertit conjux. Sed etiam meo nomine salutes rogo: Uti & amicissimum Colvium; quicum utinam, priusquam in oras istas abiret, loqui paucis licuisset. Fuisset hoc ex re utriusque nostri. Vale, Illustrissime Domine Legate, & nos amare perge.

Lugd. Bat.
v. Kal. Apr.
c161xxxii.

Illustris nominis tui Cultor,

G. J. Vossius.

XXXVI.

Ludovico Crocio.

GAudeo, Clarissime Croci, usque adeo tibi probari Amstelodamensium institutum. Et profecto, si rem suo momento, non invidorum judicio, ponderemus, nihil conducibilis fuerit, hinc præsertim temporibus, quibus literarum contemptus apud nos etiam indies gliscit. Ad eum sistendum non leve pondus afferet, si civitates illæ, quæ inter Europæas caput extulere, ostendere coeperint,

se vere esse Mercuriales, non dimidium colere Mercurium, illum nempe mercium dominum, non item eloquentiæ prælidem, quæ sine sapientiæ studiis est nulla. Sanè Amstelodamo ad perfectum laudum cumulum nihil mihi unquam deesse visum fuit præter unam literarum gloriam, ut ea quoque augeri possit, uti ei, ut non neminis alius, de quo jam quædam mussant nonnulli, sic & Willii nostri opera esse possit. At faveo ei utroque, quod dicitur, pollice. Sed utrum iis in studiis, quæ ille profiteretur, cujusquam opera uti velit, præterquam eorum, quos jam vocarint, tum demum scire potero, cum eo pedem tulerò. Quod *si* *non*, futurum est post mensem. Sed sive id succedet nobis, sive secus erit, non patiar ulla in re affectum meum desiderari. Plane enim virum amo, non jam amplius ob commendationem tuam, sed ob egregias animi dotes, quas ex sermonibus ejus sæpius perspexi, sed imprimis ex disputatione in sacris publicè suscepta, cujus ille præmium, magno totius Academici senatus consensu, retulit, quam doctoralem lauream nuncupamus. Gratulor eo nomine & illi, & clarissimo ejus parenti, & urbi vestræ, quæ eum dedit, planeque sic auguror, hæc jam semina esse latissimæ segetis, quam Ecclesia dei universa quandoque ex eo metet, imprimis vestris, vel, quod non minus opto, nostris terris. Vale, vir summe & amare nos perge.

Post. Kal.
April.

Tuus,

G. J. Vossius.

XXXVII.

Reverendo in Christo Patri D. Lancelotto Androsio, Episcopo Wintoniensi, Regi Magnæ Britanniæ à Sacris, & Secretis Conciliis.

Reverende in Christo Pater,

NON possum non magnopere dolere propter immaturum obitum Cluverii nostri. Nam & amicum amissi, quicum multos annos conjunctissimè vixeram: & cogito, quantum damnum morte ejus fecerat Respublica literaria. Accedit quod reliquit liberos parvulos, utroque parente orbatos, & in re angusta aded, ut quo pacto honestè possint educari, equidem non videam. Paululum tamen me recreat, ac reficit, quod puerorum avia superest, bona forma, gente Bri-

tatina,

tanna, atque, ut intelligo, honesto admodum genere orta. Ea nunc in patriam redire parat, eo animo ut periculum faciat, num recipere bona valeat, in quæ alios iniquè involasse conqueritur. Utinam per te, vel per amicorum tuorum aliquem, uni alteri eorum, quorum est de talibus judicium ferre, ferè commendetur, ut, si causa æqua est, facilius, quod cupit, obtineat. Sanè nihil melius, Deoque gratius, quàm viduas & pupillos tutari, ac juvare. Et omnium, quotquot liberalia studia non tralatitiè tractamus, hoc votum est, ut ne carissima summi viri pignora, penitus abjecta desertaque relinquantur. Tuam verò hac in re benevolentiam ac favorem propemodum spondemus nobis, quia præter raram eruditionem ac eximiam prudentiam, hoc etiam divinâ bonitate habes, quòd ad alteri benefaciendum paratiorem noverimus neminem. Cujus ego animi tui domesticum habeo exemplum in affine meo Junio. Nam benefacta erga eum tua, cum per se magna sint, tum eò gratiora sunt nobis, quòd ferè id temporis benefaciebas ignoto, quo noti, sed virtutis inimici injuriis afficiebant. Ac ne nunc quidem erga eum minuitur paternus affectus: Sed tantò amas ardentius, quantum illi cum ætate virtutis & eruditionis amor crescit. Sed his nunc non insistam. Duntaxat orabo, ut affectum hunc porro conserves. Ad res meas, quod attinet, profiteor in Academia hac, tum Eloquentiam, tum Historiam, tum potius Chronologiam Universalem. Munus est luculentum ac videor etiam hanc Spartam non segniter ornare. Sanè & Academiæ Curatoribus, & Collegis, & juventuti satis probatur opera mea. Interim hoc studium multum abest à sacrorum studiorum dignitate. Profectò si verum dicere licet, post Pessimuntium aëllum Diaria summa. Sed Spartanâ hoc patientiâ concoquendum. Quod eò facio libentius, quia si minus ex me commodi redundet ad Ecclesiam Dei, quàm vellem: nulla tamen hic culpa est mea; sed temporum quibus veneranda antiquitas vix ullos sui invenit amatores: atque adeò solida eruditio non modo despiciatui, sed etiam odio est. Sed fortasse erit aliquando, cum hæc corrigantur. Hac spe nos solabimur. Quæ si nos destituat, bonâ tamen conscientia subnixi, meliora expectabimus post hanc vitam. Deus, Reverende in Christo pater, diu te Eccl. Anglicanæ, & bonis omnibus fervet incolumem.

Lugd. Batav. v. Id.
Jun. A. clō Iocxxii.

XXXVIII.

Gerardus Joannes Vossius, Joanni Adolpho Fabro, S. P. D.

PErgratæ quidem fuerunt mihi literæ tuæ, sed ita assidue distringor, ut penè, quo me vortam, nesciam, & tamen diutius tibi debere responsum incivile videatur. Præsertim cum te ob doctrinam & summam humanitatem diligam ut debeo. Atque auct non mediocriter hunc affectum, quod Spartam illam, quam nactus es, sedulo ornare studes: ut ex literis tuis facile perspexi. Perge hoc pede, mi Faber, & ominis hoc inesse crede nomini tuo, quòd affabre debeas fabricare ac formare animos juventutis. Sane melius mereri non possis de Rep. Neque ignoro, per plurimos de Ordine Scholasticos sentire & loqui. Non nemo etiam ideo lubentius facit, ut mihi ægre sit, quem scit in illud incumbere, ut melius sit studiis adolescentiæ. Sed contemnere nobis liceat contemptores muneris honestissimi: qui ne illud quidem essent, quod sunt, nisi bene iis esset ab illis, quos carpunt, cantharidum instar rosas arrodentium, è quibus nascantur. Quæris, quod Logicæ compendium maximè probem. Rarum laudas, quem non contemno, imo Adolescentulus valde capiebar. Non æque aliquanto adultior. Nam quantum mihi ætas crevit, tantum & amor Aristotelis, & Græcorum interpretum. Quare nunc quoque difficulter ab iis me avelli sino. Sed non hi ad captum pueritiæ: cui accommodatiores, Hunnæus & Crellius, quos puer didici: item Molinæus, Præceptor meus & Burgerfidi Collega, nec tamen alieno hac in re judicio præscribam. Meum promò, quia petis. Quod eo lubentius facio, quia quandoque indignor, cum jacere sic video, qui Veteres sequuntur. Itaque jam videas ab hominibus non indoctis recentiores advocari ad partes, si quid dicant, quod millies dixerint veteres. Ut si Erasmus cites in Apophthegmate, quod apud Plutarchum, Laertium, atque alios legatur. Hoc qui faciunt (quò magno sunt numero) ostendunt profecto, quam hospites sint in antiquitate. Sed improbare ineptias istas possum, corrigere non possum. Nec omittere tamen potui, quia non injucundum est tecum colloqui, qui mihi visus es amare bonam mentem, quod pauci admodum faciunt. Video etiam te laborare de ratione brevissimo tempore docendi elementa Linguae Græcæ. Sane multi hic peccant: qui non distinguunt inter ea, quæ præceptis cognosci, quæque usu

addisci

addisci oportet. Si aliquando excurreris, de eo primus nobis sermo esto. Nec graver nunc pluribus eam rem exponere per literas, nisi aliis distincr. Quamquam quid ego ista ad te, quem scire illa scio? & in vicinis etiam locis (fortasse & in urbe tua) homines habes eruditissimos, qui nec ista, ut arbitror, neglexerint. Dicas, te meum quoque iudicium cognoscere avere, fortasse ita est. Sed ego cenfeo, te magis ista exquirere, ut argumento aliquo scribendo aperias affectum erga me tuum. Quem ego sanè amo & amabo semper, mi Faber. Nec propterea, si omnino etiam de eo iudicium requiras nostrum, gravabor illud perscribere, & tamen, si verum dicere amemus, fateri oportet, facilius illud pauxillo sermone explicari posse, quam longâ etiam Epistolâ. Pro munusculo gratias ago: sed cave deinceps idem agas, nisi remunerari me voles luculentius quàm præisti.

Lugd. Batav.
Post. Kal. Sept.

XXXIX.

Ludovico Crocio S. P.

Magnum mihi dolorem attulit obitus summi, & viri & amici Matthiæ Martinii, Collegæ tui. Nec tamen tam meam doleo conditionem, quam Ecclesiæ, quæ magnam in hoc viro iacturam fecit. Sane quotidie mihi decrescere eorum numerus videtur, qui aliquid in studiis vident supra vulgus. Atque hoc eo pejus me habet, quod tam paucos esse video, qui bono Ecclesiæ potius, quam affectui suo ducantur. At in eo, quem amissimus, ambo hæc erant, omnigenâ eruditione nulli in Germania cedebat, & sciebat, quantum omnes paci & concordie Ecclesiæ debeamus. Scio quosdam aliter de hoc viro loqui, sed quales profecto? nempe, ut puto, qui foris sint lyncei, domi fortasse talpæ. Qui Cantharidum instar in rosis latitant, atque hoc agunt, ut, quodd nec literatos, nec Christianos decet, venenum aculeo suo affundant: sed & tales ferre animus. Nam si non laborent ipsi, cuiusmodi dicant cur laborem ego, quid dicant? Quare surdis ea auribus transmittito. Apud bonos tamen & cordatos viros famam ejus & honorem tueor, uti convenit. In quo ipso aliquâ opus prudentiâ propter quosdam majoris zeli, quam scientiæ. Scripsi hæc non sine dolore. Quamquam enim jam aliquamdiu est, quodd à te tanti amici obitum intellexi, quoties tamen de turbatis

adeo Ecclesiæ rebus cogito, dolor omnino recrudescit. Sperabat summus ille vir Funnianæ se familiæ quodammodo jungi posse, eam ducendo, quam affinis meus viduam reliquit. Neque per me unquam stetit, quominus voti hujus compos fieret. Sed ætas ingravescens scrupulum injiciebat. Et præterea minuta quædam, quæ nihil attinet referre, cum ea per te videas. Et fortasse non idem erga virum affectus omnium fuit, qui meus. Nunc tamen non successisse negotium gaudeo: partim propter liberos Martinii, quibus secundæ hæc parentis nuptiæ damnosæ fuissent: partim etiam propter fratrem, & nos ipsos, qui non tantum gaudii ex ea conjunctione cepissemus, quantum doloris ad nos, ex brevitate connubii rediisset. Desidero scire, ecquis defunctum laudarit, & an ea oratio jam viderit lucem? Nemo quidem ad hanc rem magis fuerit idoneus, quam tu, Præstantissime Croci, qui animum & virtutes viri plane perspexeras. Quare, si quid operæ in hoc à te insumptum, publicum videat. Pulchrum sit Martinio laudari à tam laudato viro. Nec periculum facile est persuasum virum fuisse majorem quibusdam, qui primas nunc ferre creduntur, opinione non sua modo, sed etiam aliena. Qua de re plura dicerem, nisi hoc alienam quodammodo reprehensionem habere videretur.

Vale, doctissime & amicissime Croci, tanto quo semper amior futuro, quanto sanctiorem apud te Martinii nostri memoriam semper fore intellexerim. Salutem meo dic nomine optimo & eruditissimo Cochio, cujus operam in edendo Sanhedrin & Maccoth valde probo, & surgenti ejus gloriæ ex animo faveo atque applaudo.

Lugduni Bat.
Kal. Octobr.

Tuus,

G. J. Vossius.

XL.

Ludovico Crocio, S. P.

Valdè me delectavit, quodd literæ tuæ sic amorem spirent erga & maxime amicum Martinium. Nimirum talis esse bonorum amor solet. Non ille cum vita amici exstinguitur, sed etiam ubi eum frigida mors sustulit, vivit tamen flamma, quam ejus virtus in pectore nostro accendit. Willius tuus imo nunc etiam meus, non solum mihi commendatione tua & paterno decore, sed & suis virtutibus carissimus est. Subinde me invisit,

ac mirifice colloquii ejus, & suavissimis moribus capior. Hyeme hac subsistere hic decrevit. Si qua in re utilis ei esse poterit opera mea, nusquam deero. Cochium Hebræas apud vos literas enarraturum intelligo. Eo nomine gaudeo, ac tum ipsi, tum illustri Scholæ vestræ gratulor; res Ecclesiæ nostræ necdum in liquido sunt. Metuoque ne Auster aliquis turbidiores reddat, quam nunc sunt. O utinam medium tenere cursum semper liceat inter Symplegadas, hinc effranis licentiæ, inde jugi humani. Sed tum nimia curiositas, tum odium ac metus nesciunt modum. Nec ista corrigere est opus humanæ. Hoc ut cum poeta loquar *δὴ ἐν γένει καί τινι*. Cui te post breve adeo alloquium commendo. Neque enim nunc multis te destinandum putavi: cum Vander-Bekius tibi futurus sit vivæ Epistolæ loco. Ex eo igitur tum Reip. tum Ecclesiæ statum abunde, ni fallor, cognosces.

Lugd. Batav.
Kal. Decemb.

Tuus sine fūco ac fallaciis,

G. J. Vossius.

XLI.

*Clarissimo & undecumque Doctissimo viro,
Jano Grutero, J. C. & Historico
Electoral.*

CUM Historiarum notitiâ, vir Cl. comparatum est, quemadmodum tum cum Sole, Luna, & Astris, quibus Lucis nihil encomiis accedit, aut convitiis decedit: tum cum Marco illo Catone, cujus gloriæ, ut ex Livio scribit Hieronymus; neque M. Tullius laudando profuit, neque C. Cæsar vituperando obfuit. Quare operæ haud existimo, de præstantiâ ejus, ac necessitate laudum corollam plectere. Illud mihi potius faciendum videtur, ut consilii mei rationem aperiâ; sed paucis. Nam quisquis te novit (& quis non novit in Europa?) Is scit quantum historiâ alios antistes. Et hæc nostra commentatio de historiâ, quæ ad scribendam historiam viam sternit. Hui, inquiet, Quis paucas istas pagellas ad virum non nisi lacte gallinaceo, certè magnis quibusque dignum? Quo colore factum hoc purgem? Num minutum quippiam me affectasse dicam, quia id quod de Poematis dicebat Aristoteles, de quibusque libris verum est, nempe quæ insanæ sunt magnitudinis, non magis esse pulchra, quam supra modum magnum Animal. *Ὅν γὰρ ἄνθρωπος ἢ θηρίον πλεονάζει, ἀλλ' οὐ γὰρ τοῖς μεγέθεσι τὸ ἐν*

καὶ τὸ ὅλον ἐκ τῆς ἀνωρίας. Neque enim simul inspectio eorum fieri potest, sed subterlabitur ex intuituum contemplatione, illud unum & totum. Atqui ut idem mihi inquit, nec quicquam admodum exiguum fuerit venustum: *ὅσους αἰῶνες ἢ διὰ τὴν ἐξουσίαν τῆς ἀνακρίσεως χεῖρε γινώσκῃ.* Confunditur statim inspectio, quæ brevissimo fit temporis momento. Sed & in rebus modus servari potest, aureaque mediocritas. An potius, quoniam multa hodie ingentia scribi volumina videmus in quibus, ut facetus Comicus ait,

Gerre Germane, atque ædepol lire lire,

Idcirco dicam mihi placuisse semper, placiturumque æternum Lucretianum illud,

*Parvus & est Cygni melior canor ille Gruum quam
Clangor in æthereis, dispersus nubibus Austri?*

At non quia *Καλλιμαχὸς ὁ Γεωμετρικὸς τὸ μέγα εἰς ἑλὶον ἴσον ἐλεγεῖν τῷ πρὸς μαγὰ καὶ τῷ*, ut scribit Eclogarius Athenæi: Ideo liber quilibet pusillus magnum bonum, sed sæpè pusillum, imò magnum interdum malum: ut interim omittam, illum ipsum Cyrenensem Callimachum, tandem malevolorum calumniis adductum, ingens Hecates poema edidisse. Unum occurrit quo spero culpam hanc, si qua est, eluam. Humanitatem summam esse statuo, in peritissimo totius humanitatis; eamque in me opinionem alit, tum relucens in tot monumentis tuis summa humanitas, tum eorum de humanitate tua iudicium, qui noverunt familiarius. Itaque et si,

Non tam adversus equos nostra sol jungat ab urbe.

Ut ignorem acre tuum ingenium, & excellentem eruditionem: tamen si id peccare est, audendo peccare satius fuit, contra magnitudinem, quam non audendo contra humanitatem. Aliis satisfactum spero, tibi scio: sin minùs, una superest via, ut Libellus sit tibi Ajax Augusti, tuamque in spongiam incumbat. Atque hoc eo leniori animo feram, quòd haud magnum ei laborem impensum agnoscam. Certè si vel minimum laudis indulseris, ut Afranius in Thaide, *majorem laudem, quam laborem invenio*. Verùm metuo, ne nimis hanc laboris, & operæ parvitatem, parvitas, levitasque operis augeat, dum minute quid, ac subfrigide, at nihil observate, curiosèque scripisse judicabor. Quod si est, nihil superest aliud, quam ut Soricis instar, suo libellus pereat indicio: Et quia ad te emendandum mitto, unâ emendetur liturâ, quomodo Plutarchus scribit

* Lib. 2. de Alexandri fortuna.
 * scribit Philoxenum, cum sibi Liber ad emendandum esset traditus, εὐδὺς ἀπὸ τῆς ἀρχῆς ὅλον μέχρι τῆς καταστάσεως περὶ τῆς. Vale, Vir Cl.
 Et si mereor, imo immerentem quoque amore complectere.

XLII.

Clarissimo viro, Jano Grutero.

Vir Clarissime, Coniunctissimeque Affinis,

Dolorem meum quem cepi, ex tristissimo Palatinatus casu, non mediocriter auxit, quod Te quoque, cuius merita, erga Orbem Universum, nemo unquam satis prædicaverit, incendium hoc adflarit. Volupe interea fuit, quod ex literis tuis intelligo, rectè Te valere, animoque esse constanti in his malis. Multum etiam me recreat, quod, uti complures mihi retulerunt, Frankeram es vocatus; ut Academiam hanc luce tua illustres: Atque adeo etiam, ab serenissimo Daniæ Rege, honestissimo stipendio invitari diceris, ad ornandam Academiam Hafniensem. Quantum mallem, nobis adesses? Utinam hæc res iis curæ foret, qui consilio valent apud eos, quorum in manu ea res est. Sed mihi non est animus, querimoniam de his temporibus instituere, quibus propè omnes omnia metiuntur commodo suo, nec alios, quàm foelices colunt. Quin Spartana potius patientia hæc concoquamus. Interim impensè scire desidero, utram vocationem, si vera intellexi, cogites amplecti. Mallem si non nobiscum, saltem proximus nobis fores. Sed tamen magis consultum volo commodo tuo, quàm desiderio meo. Eloquentiam hic ego, simulque Chronologiam profiteor. Honestum fateor munus, sed sacra malim hac ætate, præsertim quando, ni me nimis amo, haud impares sumus, sanè ut ita semper literas, & Philosophiam tractavimus, ut is potissimum nobis scopus foret: Interim solatiolo est, quod sic quoque profusus publico. Florentissimo quidem Auditorio fruimur, si hic quisquam alius nunc, vel antehac etiam. Lis Computiana, ante Paschales ferias decidetur, nisi fallunt penes quos ejus dijudicandæ est potestas. Occasionem nactus, per Commelinum Francofurtum euntem, mittere ad te volui Libellos duos; Unum quo historiæ naturam, ac præcepta complexus fui; Alterum de Historicis Græcis; Tertius qui est de Historicis Latinis brevi, & ipse, lucem videbit. Spero eos haud tibi ingratos fore, non eo tantum

nomine, quia à me proficiuntur, quem à te amari scio: Sed etiam quoniam fieri aliter non potest, quin qui tamdiu ea cum gloria illustri loco, historiam sis professus, atque inter tot Scriptores, etiam Historicos, usque adeo multos foelicissima curiositate restitueris, & illustraris; eorum & ipse approbes conatum, qui quomodocunque, de Historia, & Historicis, benè student mereri. Salutem plurimam Uxor Tibi dicit: Item Amplissimus Rutgerius, & Collegæ mei, Heinsius, Meursiusque; adhæc Scriverius, & quos alios salutari iusseras.

vi. Eid. Mart.
 cl. loc xxiv.

Tuus omni officio,

G. J. Vossius.

XLIII.

D. Fulconi Grevillo, Equiti aurato;
 Baroni de Brook, Serenissimo Regi
 Magnæ Britanniae & Secretioribus
 Consiliis; S. P.

Incredibili voluptate perfusus fui, cum intelligerem te, generose Domine, in quo cum illustri Natalitium splendore, & summa dignitate non excellens modò virtus, sed eximia etiam eruditio, suaviter conspirant; & me natum scire, & præterea amare, & tanti quoq; facere, ut dignum existimes, cui inter florentissima Cantabrigienfis Academiae lumina, te auspice, tribuatur locus. Equidem non tam habeo, quàm Poëta appellat, carnem fibram, ut non sentiam, quantæ, & gloriæ, & utilitati, ea res mihi, & liberis meis, esse possit. Tum autem quid jucundius fuerit Ecclesiasticæ Antiquitatis amantissimo, quàm in ea vivere Ecclesia, quæ, seu doctrinam salutarem, seu exteriorem Ecclesiæ faciem attendas, Apostolico ævo, & proximis seculis, simillima videatur? Quamobrem non possum non beatum me putare, quòd Deus animo tuo honestam adeò de me opinionem inspirarit. Suis interea pauca quædam, de quibus aliquanto certior fieri desidero. Ut super lectionum de hebdomade numero, & imprimis de habitaculo, quod, ut arbitror, uxorem liberosq; habenti non nisi extra Collegium esse possit. Atq; hæc, licet in vocationem tam præclaram magnopere propenderem, scribenda nihilominus putavi. Simul ut quomodocunq; gratum animum testari inciperem, literis meis comites addere volui libellos hæcenus à me editos: quos vel eo nomine haut ingratos fore confido, quòd à

summo excellentissimarum tuarum virtutum admiratore proficiantur. Quod si Deus valetudinem & otium conceaserit, consequentur & plura & meliora, quorum partem jam habeo confectam. Deus te, Illustris Domine, diu Magnæ Britannæ Regno, summo literarum & literatorum bono conservet.

Lugdun. Bat.
clō Idxxiv.
Idib. Sept.

Illustri Nomini tuo
devotissimus,

G. J. Vossius.

XLIV.

Amplissime Doctissimæq; Domine Boswelle,

Intellexi ex nobilissimo Dom. Carletono, quàm præclare de me sentias, strenuèq; operam des, ut in florentissima Cantabrigiensium Academia perhonestum teneam locum, seu Historiam profitens, seu scientiam Civilem. Equidem fore hoc pacto video, non tantum ut illustriori loco constitutus, majori nominis luce circumvestiar: sed etiam, ut amicitia & colloquiis fruens summorum Academiæ ejus virorum, maxima & pietatis & doctrinæ capere possim incrementa: tum autem, ut ad plures industriæ meæ, & qualiscunq; eruditionis fructus redundet: ut interea de rei familiaris incremento nihil dicam. Metuo sanè, ne pro tali ac tanto beneficio pares unquam gratias referre possim. Sed velle tamen non desistam. Interea hoc promittere habeo, nunquam fore, ut te consilii istius possit poenitere. Is enim mihi animus semper fuit, ut pro viribus & publicè & privatim quâ voce, quâ scribendo, consultum irem publico bono. Quamvis autem planè eò propendeo, ut ad honestam adeò conditionem si vocer, sequar: tamen quædam ante operæ fuerit scire. Super quibus scripsi ad Generosum Dominum Baronem de Brook. Literarum earum exemplum Epistolæ huic addendum putavi. Vale Amplissime & Præstantissime Boswelle, atq; amare nos perge.

Lugd. Bat. Idib.
Septembr. clō
Idc xxiv.

Tibi merito tuo Ob-
strictissimus,

G. J. Vossius.

XLV.

Nobilissimo & Amplissimo Dom. Dudleio Carletono, à Secretis Concilii Regii Magnæ Britannia.

Nobilissime Domine Carletone,

EN tibi literas, quas exaravi tum ad Generosum Dominum Baronem de Brooke, tum ad Amplissimum Dom. Boswellum. Etiam exemplum utriusq; epistolæ vides. Si cubi peccatum putes, jucundum erit à te moneri, ut corrigatur, priusquam literæ meæ tantis viris exhibeantur. Similiter exemplum Epistolæ ad Dom. Baronem de Brook literis ad Dom. Boswellum inclûsi. Mitto & quicquid hætenus edidi, ut Dom. Baroni de Brook offeratur, minutum quidem donum, sed magni affectus. Plinii Epistolas cum Catanæi commentario tandem nactus fui. At librum Vorstii de Deo, quem nunquam editum mallet, nusquam amplius in Bibliopoliis proflare scias. Arminii quæ quidem reperire potui, uti petieras, mitto. Sed fore intelligo, ut cuncta ejus viri uno volumine intra paucos menses in Germania recudantur. Quod si expectare malueris usq; dum id fiat, solum opus erit ut nunc missa remittas.

Vale Nobilissime Domine, & quo cœpisti favore, porro me prosequere.

Lugd. Bat. Id. Sept.
clō Idc xxiv.

Tuus Tuo merito,

G. J. Vossius.

XLVI.

Dudleio Carleton. Londinum.

Nobilissime & Ampliss. Dom.

Reditæ mihi sunt literæ doctissimi Boswelli, quibus ab illustri Barone de Brook, ad Professorem in Cantabrigiensi Academia honorificentius vocor, quàm homo tantilli ingenii atq; eruditionis merear. Redditæ item tuæ, quibus non amanter minus, quàm prudenter mones, ut ne cum uxore ac liberis me in viam dem, priusquam peracta quædam sint, de quibus ob incerta Rerum Humanarum, constare antea satius sit, quàm stabilem cum meis sedem in florentissimâ Britannia vestra figam. Equidem, quantas possum, pro singulari hoc affectu, gratias ago, uti debeo. Sed scrupulus tamen

tamen non exiguis injectus est mihi quem dissimulare non possum apud tam amantem mei. Auctor enim es ut quàm primùm veniam; sed solus, & ignaris iis quibus Academia cura incumbit. Neq; non video, id tibi propositum esse, ut si minus omnia ex voto reperiam, citrà honoris dispendium, sineq; Academiae nostræ Curatorum offensa, facilis mihi reditus pateat ad meos. Sed Nobilissime Domine, quid si per utrumque munus quod sustinui, & illud quod nunc oboeo, ita politioribus propè omnibus innotuerim apud nos, ut pedem vix extra urbem, nedum extra Bataviam ponere liceat, quin profectio mea dimanatura sit ad plures? Atque ut de nocte iter conficiendo, vel alium dolum nectendo, fallere omnes ad dies paucos possim: quia tamen per unum alterumque ex Anglia reducem jam rumor hic est diffusus de vocatione ad vos meâ: de itinere in Angliam etiam suscepto, suspiciô oborietur multis, simulac hebdomadas totas desiderabor ab Academia hujus juventute, Senatu, foroque ipso. Quater enim de hebdomade docendum mihi: nec pars modo Senatus sum Academici; sed unus ex quatuor viris, qui rectori Academiae adfident in tribunali nostro. Illud etiam reticere nequeo, literas ab ornatiss. Boswello scriptas, quarum mihi exemplum miseris Hagâ, non parùm variari in stipendii modo ab Epistola, quam ipse ab eo accepi. Hoc unde contingat, non satis conjecturâ assequi possum; nisi fortè quispiam tuis è terris sponte se minoris offert, neque desint qui nunc deprecient, ut fieri solet. Quid enim ego umbraticus sciam, quid in Anglia, quis rerum agat, sive per se, sive per suos? Quamobrem per amorem erga me tuum, etiam atque etiam rogo, ut hac in re me quamprimùm pro singulari tua prudentia, consilio juves. Vale decus meum, & eum, qui beneficia tua animo inscribit, patetissimo, nec eorum esse ignarum posteritatem finet, amore tuo porrò dignare. Salutem quoque plurimam, si occasio dabitur, meis verbis dicito Reverendissimo Wintoniensi Episcopo, Viro incomparabili, cujus erga me affectui, utinam gratias referre dignas valerem. Iterum Vale.

Lugduni Bat.
clô Idc xxv.
iv. Id. Feb.

Nobilitatum Virtutumque tuarum Cultor atque Observator,

G. J. Vossius.

XLVII.

Nobilissimo & Amplissimo Dom. Dudleio
Carletono, à Secretis Consiliis Regi
Magne Britanniae.

Nobilissime Domine,

DE vocatione in Angliam mea rem omnem quia longiorem moram non pateretur, communicavi cum uno altero ex Nob. & Amp. D. D. Curatoribus Academiae nostræ. Æquum autem imò planè necessarium arbitrabantur, ut quicquid hujus est etiam à me in Collegio eorum exponatur. Ego ne hac parte postulato eorum refrager; partim adducor amore & gratâ recordatione beneficiorum quæ præstiterunt: partim quia si dicendum, quod res est, plane pusillum est, quod exigunt. Nam post dies decem, h. e. ad octavum Maii, eorum hic conventus erit. Postquam Hagâ rediit uxor in vehementem incidit febrem: quæ res effecit, ut dies aliquot scribendi ad te officium distulerim. Interim, ex medici etiam sententia, carere morbus periculo videtur. Sed Poetæ illud nosti, quando ait, amorem rem solliciti plenam timoris esse. Quod si per lectiones publicas, ac imprimis valetudinem conjugis liceat, etiam ante Nobilium Curatorum adventum operam dabo, ut de nonnullis tecum loquar. Nec enim tam ignarus sum rerum humanarum, ut non, quemadmodum video undique amorem erga me tuum; ita etiam perspiciam, quantum juvare me consilio possis, non per te modo, sed etiam per illusterrimum patrem tuum, æternum Britanniae suæ ornamentum. Deus utrique vestri, & hic, & in cœlis præmia rependat, amoremque istum erga me conservet.

Lugd. Bat. clô
Idc xxv. xxviii
April.

Nobilissimo nomini tuo obstrictissimus,

G. J. Vossius.

XLVIII.

Gulielmo Boswello.

Amplissime Doctissimeq; Domine Boswelle,

QUis rerum mearum ignarus, aliud sibi persuadere possit, quam diutinam hanc in respondendo cessationem inde duntaxat, aut potissimum saltem, promanare, ut Vocatione Anglicanâ aliquid mihi apud Batavos

tavos lucelli acquiram? Scimus id plerisque moris esse. Nec notam hanc effugit summus Jurisconsultus, Andreas Alciatus, cum Biturigibus Patavium vocaretur. Et ille quidem callide hoc egerat ipse, ut vocaretur. Mihi, ut scis, ne per somnium tale quid cogitanti sponte apud vos professio oblata est. Ille item, immane quantum aucto stipendio, apud Biturigas remansit. Ego, uti hoc nunquam egi, ita nec quicquam accessionis (quam quidem scio mihi minimè invideres) consequar remanendo, nisi simul accessio fiat fortè novi laboris. Quæris quid igitur in causa sit, cur tardius literis tuis respondeam, tam amanter, tam benevolè scriptis? Dicam apertè & sine circuitione. Scrupulus aliquis animo meo injectus erat, quod putarem posteriores literas minus cum illis, quæ ad nobilissimum D. Carletonum missæ erant, convenire. Nec is, nisi adventu Domini Carletoni, & imprimis alteris à te literis ad eum exemptus fuit. Alia etiam causa accessit, ita enim officii ac muneris mei ratio ferebat, ut de vocatione mea, quicquid erat, referrem in conventu nobilissimorum Academiae hujus Curatorum. Is conventus, præter ipsorum & meam imprimis spem, diutius dilatus est quàm putabamus. Tertiam etiam causam accipe. Inciderat uxor carissima in morbum gravem, quo fiebat, ut nec in hanc, nec in illam partem, de vocatione ea certi quicquam statuere auderem. Sed ubi ea convaleuit, vel convaleuisse saltem visa fuit, seriò de re tota & mecum, & cum amicis, & cum Academiae Curatoribus cogitare coepi. Adhortari alii, dehortari alii, ut fieri solet. Sed non tam stupidus eram, ut non viderem, quæ suaderent, ut quamprimum vocationem meam amplecterer. Nam & in florentissima Academia inter summos tot viros victurus eram, & iis in terris, ubi Ecclesiæ ea facies foret, qua non alia hodie in terris veterem illam magis referret. Sperabam etiam eò me gratiorem fore, quod antiquitatis Ecclesiasticæ studio à puero me dedissem: ejus autem studii apud vos plurimi essent non intelligentes minus quam amantes; cum quibus per-jucundum fuisset, colloqui ac conversari. Sed dum hæc oculis quasi observantur, ita Deo volente, dulcissima conjux, singularis sanè exempli foemina, iterum in morbum incidit; ac in longè vehementiorem, quàm ante. Nec enim aliud nunc (quantum futura prospicere scit infirmitas humana) conjecturâ assequi possumus, quàm eam vel hoc morbo terris ereptum iri: vel saltem, diuturnum morbum fore; diuturniorem etiam languorem, qui morbum consequi solet. Proinde judicavi, non diutius spem mei fa-

cere me oportere generoso Domino Baroni de Broock: sed quamprimum cum de statu rerum mearum faciendum esse certior: Te verò, doctissime & amicissime Domine Boswelle, quàm amo, quàm æstimo, propter plurimas maximasque virtutes, ac potissimum propter eam quàm tantopere excellis, humanitatem, cujus abundè erga me indicia dedisti. Sed laudibus tuis non insistam: ne non tam judicium videar promere, quàm pro ingenti beneficio verbis gratias velle referre. Atqui gratias referre opis non est nostræ: qui nihil nisi devotum tibi animum offerre possumus. Atque eo scio, quæ humanitas est tua, contentus nunc eris. Plura jam scribere domesticus dolor impedit. Sed aliàs id compensabitur. Cum enim obscurum non sit quantopere me complectaris: literis posthac meis subinde te, si grave id tibi non erit, compellabo. Amorem etiam erga te meum ubi potero, & publicè, & privatim testari non desistam. Vale.

Lugd. Bat.
clō lxxv.
Kal. Junius.

Tuus totius,

G. J. Vossius.

XLIX.

Dudlæo Carletono.

Nobilissime D. Carlone,

DUM ego hesterno die tecum colloquor, aliud hic agitur. Quid illud? inquires. Dicam. Superiori die Sabbathi, cum literis tuis ad me venit juvenis nobilis, mihi ignotus, sed, ut ipse postea retulit, ex aula principis serenissimi, qui in urbe hac vivit. Exposuit quorsum accepisset. Literas à te accepisse aiebat. Rogavit amicè quid de negotio Anglicano decrevissem? Exposui mille Angliæ bona, quæ iter suaderent. Sed adjeci quædam quæ scrupulum injicerent. Nempe ea ipsa, quæ apud te retuli. Et quia nihil ad illa magnopere reponebatur: iterum rogatus seriò dixi, dum hi forent scrupuli vix hinc avulsum iri. Ille, etsi Angliam suaderet, tamen petiit, ut si iter illud minus capefferem, saltem veterem in Angliam affectum retinerem. Hagæ à te reversus, intelligo non solum constare jam pluribus in urbe, quæ huic nobili dixissem: sed aperte promi, me apud eum penitus detrectasse provinciam. Et illud jam in Angliam esse perscriptum. Quod si est, sanè pugnabunt nonnihil literæ tuæ cum iis, quæ Lugduno missæ. Non tum eum

eum scrupulum eximi posse putabas. Atque ego ostendi, non me alienum esse, si & uxori & liberis uti dicebam consuli posset. Quare arbitror satius fore ut nihil in Angliam perscribatur priusquam tecum loquar. Fiet autem id aut cras aut summum perendie. Nam & alia sunt quæ satius sit à te sciri, utpote mei amantissimo. Salve à me. Postridie quàm à te abii, horis circiter xx. postquam tecum egi, idque ob festinationem manu filii cui hæc dictabam. Nam moræ locum nullum relinquendum putabam, ne differendo negotium corrumpere. Cras igitur, aut ad summum perendie Hagæ adero.

L.

*Ad Illustrem & Generosum Dominum,
Baronem de Brook, Fulconem Gren-
villum.*

EGO verò, Illustris ac Generose Domine, amorem erga me tuum magis magisque cognosco: ut qui stipendio honesto non contentus, de libera habitatione etiam addendum putaris. Sed quanto excelsa illa mens tua mihi perspectior est: tanto magis vereor, ne affectui huic, ac amoris mihi habito, satis videar respondere. Equidem (dissimulare non debeo quod officii mei erat) communicavi rem omnem cum Nobilissimis & Ampliss. Academiæ hujus Curatoribus. Petiere illi ut in conventu suo proximo, proponere rem vellem. Videbatur mora duntaxat fore hebdomadam duarum. Factæ sunt plures. Interim uxor in gravem incidit morbum: Conveniunt Curatores, & urbis Consules, qui illis à consilio sunt. Auctores esse omnes, ut hanc ne Academiam relinquam, prolixèque affectum suum testari. Potuit ea res scrupulum injicere mihi, homini minime, ut arbitror, malo. Sed nec deerant amantes mei, qui maximopere adhortarentur, ut terras hæc florentissimo Angliæ regno commutarem: atque hujusce rei causas afferebant sanè graves. Et jam uxor convaluisse videbatur. Verùm enimvero, ut nihil certi est in rebus humanis, ecce sæva tempestas. Incidit uxor in recidivam. Ad morbum accedebant symptomata gravia, ac vehementia. Quo res evasura sit, necdum scio. Periculum quidem summum omnes videmus. Atque ut Dei beneficio optimè res cadat: tamen (quantum humanus animus ex præsentibus conjectare potest) morbus hic diuturnus planè erit. Mihi interim qui mi-

feram video uxorem, illam animæ dimidium meæ; cuique in hoc statu vix horam ab ea abesse licet, dum nihil præter cruciatus specto, nec præter gemitus tristiæque suspiria audio quicquam, cor prope finditur, ac sapientia, si qua in me unquam fuit, penè tota (pudet dicere) expectoratur. Sanè studiis operam dare nec vacat, quia absentem uxor requirit, nec lubet quod absens etiam macerer. Quid enim mirum, si plurimum ei metuo, quam plurimum amo? Præsertim cum amorem augeat amittendi metus. Do quidem operam, & sedulò do, ut animum ad omnes casus, & divinis & humanis præceptis, obfirmem. Sed tamen diffiteri non possum, me tantâ curâ doloreque circumseptum esse, ut subinde ad id, quod timeo, penè invitus revolvor. Quare haud aliud statuere possum, quàm ita Deo Opt. Max. visum esse, ut in his terris, quod vitæ reliquum est, absumam. Id autem quantum futurum sit, præsertim annis hæc pestilentibus, novit idem ille qui solus scit omnia, vitæque qui nostræ modum præhinnit. Interim non possum non immortales tibi gratias habere, quod illustre adeò beneficium, tam humaniter, tam liberaliter in me conferre fueris paratus. Sanè quanti me facias, istâ amoris ac benevolentiae significatione satis indicasti. Mihi quidem merita hæc tua nunquam animo excident. Nec tam arduum, aut magnum, dici quicquam poterit; quod non debere me tibi prohtear. Utinam aliquando sit, ut ostendere erga te possim cultus & observantiæ erga te meæ propensissimam voluntatem. Nunc pro illa, & honestandi mei, & augendi fortunas meas tam munifica voluntate, non aliud quàm maximas gratias ago. Nec enim pro tantis meritis, reddere vicem possum: redderem autem, si possem. Si quid tamen otii mei fructibus expectari possit, obnixè hoc agam, non quidem ut illustrando nomini tuo inserviat (nec enim ego soli lucem addere possum) sed tamen ne posteris pro tanto beneficio videar fuisse ingratus. Te verò, Illustris Domine, unum illud præterea majorem in modum rogo, ut ne harum literarum ergò, quicquam apud te nomini meo decedere patiaris: sed potius excusationem meam æqui bonique consulas: atque ita statuas, Providentiâ Divinâ, quæ cuncta dispensat, vocationi huic meæ injectum esse impedimentum. Plura in eam sententiam scriberem, nisi viderer diffidere præstantissimo judicio tuo, ac jam dudum mens avocaretur domestici mali cogitatione.

Deus

Deus te Illust. Dom. diu inclyto Britanniae regno incolumem servet, amorem etiam tuum mihi semper conservet. Vale.

Lugd. Bat.
Kal. Junius.
clō 16cxxx.

Illustris tui nominis cultor,

G. J. Vossius.

LI.

Gerardus Vossius Jo. Meursio *Viro*
Clariss. S. P.

DUplex nomine gaudeo, maxime vir atque amice eximie, primum quod ut florentissimum Daniae Regnum majori luce vesties atque eruditionem Nobilissimae Juventutis augebis, ita futurum video, ut ipse etiam majora & honoris, & emolumentorum, capias incrementa. Deinde autem illud plurimum me recreat ac reficit, quod, si bene animum tuum novi, quanto magis in pretio eris, tanto magis amare studia literarum, deque hoc seculo & posteritate in simul, praelare perges mereri. Unum illud doleo quod à te tanto, & viro, & amico, tam longe separer intervallo. Sed nunquam tam mei fuero studiosus atque amans, ut non gloriae, ac commodis tuis, ut tuis vero? imo Reip. Literariae longissime possideam utilitatem, licet multo maximam quam ex suavissima conversatione tuâ capiebam. Quod ad rerum mearum statum attinet, magna quidem mei expectatio apud serenissimum Angliae Regem, & Regni proceres, concitata erat; ut his diebus ex nobilibus Britannis intellexi: sed non multo post abitum tuum, uxor in gravissimum iterum incidit morbum: qui tres pene menses duravit; Ac ne nunc quidem corpore est satis firmo. Ea res efficit, ut mihi divinitus compedes injectas arbitrarer: plane enim vitae ejus metuebam: nec ut viduus eò me conferrem ex re fuisset mea aut meorum. Praesertim cum rei familiaris parum sim intelligens quemadmodum nosti. Nec propterea hilo per abitum tuum auctior sum nisi quod Ampliss. Acad. hujus curatores, à me petierunt ut, ne penitus jaceret studium Linguae Graecae, diebus Mercurii ac Sabbati extra ordinem illud horam unam profiteri vellem: uti à me serio fit; sed stipendio plane incerto. Propterea auctores nonnulli fuerunt, ut ne ea conditione provinciam susceperem; sed nosti, quam soleam *πῶν οὐκ ἀποδέχεται*, ac tanto minus id Curatoribus dene-gandum putavi quod benevolentia mei du-

ctos, utcumque causam non satis perspicerem hoc consilii cepisse eos arbitrarer. In opere meo de Historicis Latinis jam ad Justiniani tempora perveni. Video fore, ut non multo ante natalem Domini absolvatur. Usque adeo lentae sunt operae. Superiore hebdomade in senatu Academico Rector magnificus, Polyander, Sualenburgius & ego homullus, missi fuimus Hagam ad Illustrissimum Principem Henricum quo ei gratularemur novam dignitatem, atque Academiae nostrae statum eidem commendarem. Respondit humanissime, etsi valde infirmus, usque adeo ut eo die neminem praeter nos admiserit. Pridie misere fuere confectus cum morbo colico, quem esu mororum, melonum, fungorumque contraxisse ferebatur: At talium tragematum *πῶν ἀνδρῶν ἡν*, potius sanè quam per ea male sit optimo Principi, cui vel de meis Deus annos superaddat. Sane improborum aliquod gaudium tum erat, sed bene est quod nunc valetudini restitutus videtur. Golius Arabice docet. Sed poposcit à curatoribus ut tibi potestas daretur cum Westio designato Consuli Aleppensi in Syriam suis sumptibus proficiscendi, atque impetravit. Post trimestre aut circiter se itineri accinget. Quares quis Deus hanc illi mentem inspirarit. Nempe non alio compellitur quam quod multa adeo in Arabica Lingua supersint, quae nec illi nec cuiquam in Orbe Christiano cognita sint. Quaecumque Arabica Lexica suppetunt, mutila videntur. Quid dico, videntur? Imo si de iis quidem loquamur quae scripta sunt ab hominibus Christianis, desunt verba pene infinita. Ita qui interpretari quid vellet, saepe ad fallaces conjecturas recurrere cogatur. Ea autem quae Lingua sua Arabes condiderunt, multo quidem sunt perfectiora; sed quia gentis suae hominibus scribere, ita breviter succincteque cuncta interpretantur ut à Christianis hominibus non intelligantur. Praesertim ubi ritus Arabum attinguntur nostris ignoti, aut ubi ad Poetarum Arabum loca alluditur quos iidem saepe ne per transennam quidem videre. Sperat itaque Golius noster si annum unum Damasci & vicinis locis, cum doctissimis Arabum atque aliarum Asiae gentium colloqui familiarius detur, posse se plus uno proficere die quam viciis, si suo omnia labore hic ruspetur. Certe Juvenis est praeclarus magnumque aliquando virum dabit, si Deus ei valetudinem & vitam, quod ex animo voveo, cum Bataviae, tum praecipue studiorum causa. Multa enim ex Arabum monumentis erui possunt, quae à nostris sciuntur, juxta ac ab ignarissimis. Schrevelius quo haecenus Haga medico usa fuit, honore eo à Curatoribus auctus est ut inter Professores Medicos fami-liam

liam duceret. Et jam Orationem habuit inauguralē. Sed de principe loco sponte maluit cedere affini suo Heurnio qui tot annos, jam Medicinam in Academia hac fuerit professus. Hac tamen conditione loci gratiam fecit, ut ne Affinis primarii medici titulum sibi arrogaret. Spero eam rem aliquid ponderis habituram ad concordiam. Sanè modestiam prudentiamque Screvelii hac parte omnes commendant. Multorum sententia erat ut Screvelio etiam botanica functio mandaretur. Et maluisset ipse atque etiam amici ejus, cum ob alia, tum horti Academici amœnitatem. Sed Vossius noster in ea opinione erat, fore eam rem sibi ignominia, si cedere illa domo nunc ipsa mater familiaque cogerentur, ubi hæcenus *o margelms* Vossius egisset. Utcumque hoc est, amicus ille noster Vossius Curatoribus persuasit adjuvante imprimis Cunæo. Itaque & Ordinarius is Medicinæ nunc Professor est, & idem Doctor botanicus: quæ felicitas nescio an cuiquam ea ætate in Acad. hac contigerit. Screvelio cum in totum Parenti Vossii succedere non posset, loco Botanicae professionis trecenti vel amplius floreni annui decreti sunt. Amplissimus Rutgerfius menses multos lecto affixus fuit: deque valetudine ejus prope conclamatum esse Screvelius Medicus judicabat. Sed hesternæ die cognovi ex Heinsio, Valentium medicum Delphensem, pro certo habere, laborare eum scheloturbe: ac se eum intra octiduum vel præterpropter valetudini restituere posse. Quod Deus faxit. Sin, quod Deus avertat, naturæ concesserit, sedulo apud ferentiss. Regem opera dabitur ut in locum ejus Heinsius possit succedere. Et multi fore arbitrantur, ut compos ejus voti fiat. Nec tamen in Bataviæ proceribus desunt, qui suorum alicui decus hoc conferri præoptent, atque etiam in hoc sint elaboraturi. Vides mi amice, hominum certamina. Nos vero interim dulcia Musarum studia colamus, atque amore potius inter nos, imo & cum aliis benè merendo de bonis literis certemus. Hesterno die à Screvelio Gymnasiarcha, vocatus fui ad nuptiale convivium (mercatori cuidam Harlemensi filiarum ejus una nupsit) Ei intererant præter alios, Cunæus & Barlaeus, qui impense postularunt ut suo te nomine salutarem. Uxor quoque mea plurima te salute impertit. Utriusque etiam nostri nomine multam salutem dicito lectissimæ atque optimæ uxori tuæ.

Lugd. Bat.
clō loc xxv.
Kal. Octob.

Ο σὺς Ἀλλοτίνος.

LII.

Hugoni Grotio, Gerardus Vossius
S. P. D.

LEgi responsum tuum, Amplissime Domine, in quo non dico permulta, sed omnia planè ita subtiliter, nervoseque à te dicuntur, ut quamquam sciam quàm plerique omnes docere quam discere simus paratiores, tamen bona me spes habeat, posse his Clarissimum Molinæum ab anticipata opinione dimoveri. Sed cum omnia mirè fuerint ad palatum meum, tum imprimis ea me delectarunt, quæ de salutis certitudine scripsisti. Omnino enim in hoc dogmate plus mihi lucis adduxisti, quàm vel alius antea quisquam, vel tute antea ipse; quamquam semel iterumque tecum de eo sim locutus, & communicaris mecum quæ de conciliatione dissidentium sententiarum scripseras nuper. Nec tamen abeunt ab iis, quæ interea temporis jam animo conceperam. Sed gavissus sum ea calculo tuo comprobari: & quod magni duco, distinctius ea proposuisti, quàm ego ea mente eram complexus. Itaque usus mihi eorundem fuit hodierno die, quo dicendum aliquid fuit de verbis istis Christi, Cap. XXIV. *Matth. & τῶν μαθητῶν ἐις οὐρανόν, καὶ τὸ ἐκκλησίαν*. Nam huc usque me in eo Evangelista series ipsa perduxerat. Nec arbitror nos, plus quam à te factum, largiri cuiquam posse, nisi simul à clara scripturarum luce, inque ea ambulantis piæ antiquitatis vestigiis, visum sit deflectere. Quod verò prohibes, ne Nobil. Langeracensis literas tuas ostendat viro doctissimo, equidem istiusmodi puto, ut nec tu imprudenter illud scribas, & Langeracensem tamen prudenter facturum putem, si nullus hac parte tibi morem gerat. Nam & Reip. & Ecclesiæ plurimum interest, ut magni nominis Theologi, piæ antiquitatis sententiam cognoscant, super prædestinatione & dogmatibus annexis: tum verò imprimis, ut jus summi Magistratus in rebus Ecclesiasticis rectius addiscant. Quod si tamen Legatus sibi illum thesaurum servet; post illa scribi oportebit, rem omnem te ipsius permittere potestati. Nec puto hoc consilium quemquam ut candidum minus interpretari posse, nisi forte qui niger sit ipse. Qualis fortè etiam in scripto tuo minus verisimile dicet; quod ais pag. 2. vers. 9. non aliud te spectasse, quàm ut Molinæi consilio, & ipse & alii adjuvari possent ad pacem promovendam. Obducatur enim quod, pag. 17. (cujus initium ad conclusionem) ais non scripsisse te in eum finem, quod Molinæum inspecturum putaras, sed ut sententiam tuam apud

apud Nobil. Legatum deponeres. Quæ tamen licet *avaritia*, non tamen *avaritia* esse patet, cum, ut ego arbitror, volueris, non scriptum Molinæo ostendi, sed dissimulato scripto, Molinæo exponi debere, quæ scripto esses complexus, quæque Legatus ad consilium ejus de procuranda pace eliciendum, significanda ei arbitraretur. Porro cum ejusdem pag. 17. vers. 2. nominas conciliationem, cui subscripturi sint Angli, Belgæ, Helvetii, Germani, dubitavi certone consilio an festinatione omittantur Galli, præsertim cum in Gallias scribas. Quemadmodum nec sat scio, an quod pag. 6. vers. 7. à fine, ais, simplex donum esse non potest, quod pluribus conceditur, priori gratia abutentibus, quam utentibus, an *adversus* intelligi possit; cum certum sit, si princeps tam iis qui hastam abjecerint, quam qui benè rem gesserint, armillas donet, minimè horum ratione simplex donum dici posse. Hæc sic ego non muginabar, sed muginabar. Nam aliquid in chartam conjiciendum erat, non quale Tu scriperas, cujusmodi nihil erat, (scio Te sic ingenue scribenti fidem habiturum) sed tamen quod chartæ spatium implere posset. Bis me legisse dicere possum, etiam tertiaturum, nisi metuisssem, ne in remittendo festinato opus, esset. Superest, vir Amplissime, & supra mortales omnes mei amantissime, ut maximas Tibi gratias agam, quod priusquam responsum hoc tuum mitteres ad Langeracensem, ejus mihi legendi feceris potestatem. Nec enim majori cum voluptate, addo etiam cum fructu, meum in re alia tempus collocare potuisssem. Plaqueque rogo simili adfectu, & honore in posterum me prosequi velis. Est & quiddam aliud, de quo ad Te scribere aveau, quod Bredanam Ecclesiam spectet. Sed nunc serum est, eoque isthac occasione potius utar, cum frater ad te Hagam iturus, quod futurum die Jovis, uti intelligo. Salutabis, Magnifice Domine, Nomine meo lectissimam Seminam conjugem tuam, quam Clemangis editor ante unam aut alteram hebdomadem præconio isthac feriò apud me decoravit, quod suaviter se risisset versiculis rythmicis, quia rei familiaris aliquo dispendio curasset, ut sic compellare suos posset (sic loqui liceat) confratres, Ecce hic stant, Augustinus, Hieronymus, ceterique Patres. Vale deus meum.

Prid. Kal. Decemb.
c1c lxx.

A. T. Observantissimus,

G. J. Vossius.

LIII.

Dudleio Carletono.

Nobilissime Domine,

OPere meo tandem excuso, haut superest aliud, quam ut cogitetur, qua ratione optime Illustrissimo Domino Duci possit offerri. Primum videndum, quot exemplaria ad Illustrissimum illum heroem debeant transmitti, & quo potissimum ornatu id fieri conveniat. Scio melioris notæ chartam assumi oportere: nec minus posse præstari, quam ut membrana & margines inaurantur, vincula item sint byssina. Sed, ni fallor, codices destinati principibus viris vestri solent holoserico rubri, viridis, vel alterius coloris. Vel præter illum etiam alter, qui alteri ab Cellitudine sua possit donari. Hoc si placet, jubebo mihi codices adornari eos ad modum illum, quo libri sunt plerisque Veneribus, aut Junonibus Batavis: præsertim isti quos in sacras aedes secum deferunt. Vides minutam curam, & quæ infra Vossium sit, ac longè magis infra te ejusce nobilitatis virtutisque virum. Sed postquam hæcenus infumta opera, reliquo etiam videndum ut commodè defungamur. Porro etiam dispendiendum, à quo vel quibus felicitatis tantum sperare Vossius tuus ausit, ut non graventur filiolam hanc suam Illustrissimo Duci sistere, ac benignè commendare, quò gratior esse possit. Quot item codices, & quo ad eos Schemate exornatæ debeant procurari. Accesseram hesternâ die aulam junioris principis Boëmici, idque eo animo, ut super illis clloquerer cum nobilissimo eo, quod ego non minoris facio, doctissimo D. Donglio. Sed ex Doctore Altingio cognovi Hagam isse, nec reversum ante diem Lunæ. Fortasse igitur, Nobilissime Carletone, occasio se offerret tibi de hac re colloquendi cum præstantissimo illo viro. Is pro amore erga me suo, ubi redierit, facile mihi exponet, quid utrique vestri in re mea optimum factu videatur. Si tamen satius existimetis, ut Hagam ipse excurram, non defugiam id laboris diebus feriat, qualis nobis ille Mercurii ac Saturni. Vides quantum in amore vestro fiduciæ reponam, qui nugis istis rebus maximis obstrictos viros obtundam. Sed quia felici adeo fidere natum me video, ut me non indignum amore vestro existimetis, nihil non ausus sum exquirere è vobis, quod meâ scire interesset.

Tuus,

Lugd. Bat. c1c
lxx. xxvi. xiii.
Junii, Raptim,

G. J. Vossius.
LIV.

LIV.

Hugoni Grotio, Gerardus Vossius
S. P.

Magnifice Amplissimeque Domine; hodierno mane nunciavit mihi ornatissimus Collega meus, advenisse in Urbem Uytenbogartium, ac quod antea factum nunquam velle me invisere: collaturum autem de jure summi Magistratus in Ecclesiasticis. Statim in mentem venit, non id colloquii aut dissertatiunculæ ergo fieri, cum ignorare non possit, quam mihi curta sit suppellex: sed potius quia postulare statuisset, quæ hac de re nuper ad A. T. scripsissem. Nec ea me suspicio fefellit. Nam vix de velle me, & statu Collegii nostri exquiritur, cum sermonem iniecit istiusmodi, ecquid sub manibus haberem, quod brevi lucem adspicere posset. Et cum negarem me ob difficultatem muneris in hisce quasi primordiis aliquod edecumatum, & seculo dignum elucubrare posse: porro institit, nihilne de principali jure in Ecclesiasticis essem commentatus. Sciebam quo tenderet, & mentiri non erat meum. Respondi igitur, ante trimestre aut amplius, sententiam me meam, ad aliquem chartæ illevisse, sed statuisse, simul ac paulum otii nactus ero, quatuor, aut quinque disputationibus eam rem in Collegio accuratius pertractare. Non improbavit consilium: sed tamen optare se interim dixit, ut sibi inspiciendi eorum quæ scripsissem, qualiacumque ea essent, facerem potestatem. Addebat, jam à tribus retro mensibus, vel amplius scisse se me aliquid tentasse. Dicebam mirari me unde hoc haberet, cum præter eum ad quem scripsissem, nemini mortalium rem communicarim, uno excepta Collega, qui fidem dedisset se cum nemine hac de re verba facturum. Respondit se ex A. T. rem cognosse. Idem dicebat D. Episcopus, qui aderat: Non tam naris obesse eram, ut non odorarer, cur hoc mihi persuasum vellent, sed tamen dissimulabam. Optarim interim magis Collegam hac parte litasse Sigalioni. Imo meipsum. Quando iniquè ab altero silentium exigit, qui ipse illud præstare non potuit. Addebat, D. Uytenbogartius, si bona mea venia fieret, velle se ab A. T. scriptum istoc exposcere. Dixi non displicere, ut prius videam, quid scripserim: putare enim alia etiam familiaria eis literis esse admitta. Velle itaque quamprimum ad te scribere. Rogavit igitur, ut hoc quamprimum facere vellem: Rem me

sibi gratissimam facturum. Nunc oratum te velim, ut si otium horulæ detur, oculo volanti percurras, & ad oram Epistolæ lineam transversam ducas, ubi quid à me prætereundum arbitreris. Si tamen id per occupationes non potes, ipse agam, priusquam alteri chartas istas exscribendas dederò, quo Uytenbogartio mittam. Illud quoque candidè scribere illi statui, siquid hic boni sit, tuæ hoc A. tribui debere, cujus hac de re sententiam, non ita pridem antea legissem. Quod si illud ipsum Exemplar, quod A. T. habet, mitti posset, opus foret simul addere, ne cui illud alteri innotesceret, quando ad te familiariter scriptum esset more Romanò, non seculi nostri, quo Inferiores non sic ad tui Ordinis ac dignitatis viros scribere solent. Vale, Magnifice Amplissimeque Domine, & Uxorem saluta *τὴν δὲ σου γυναῖκα*.

xxiii. Jun. c15
Ioc xvi.

T. A. Devotissimus.

G. J. Vossius.

LV.

Dudleio Carletono, Hagam Comitiss.

Nobilissime D. Carletone,

Dixeram me postridie missurum literas, quas ad D. Boswellum scripsissem. Simul in me receperam negotium comparandi tibi prælectiones Theologicas astuti illius, sed mali Theologi, quas ab amico tuo expecti dixeras. Quæ cum dicerem, non satis cogitabam proximè diem Dominicum consequi: quo minus convenisset disquirendi molestiam faceffere Bibliopolis. Quare postridie demum eam rem curavi. Sed cum plurima Socini Bibliopolæ nostri habeant, eo tamen opere, quia id maxime omnium expetitur, penitus destituuntur. Itaque cogitandum mihi erit de via alia, quâ satisfieri amico tuo possit. Mitto interim literas quas dixi, sed apertas, ut prius legas, quàm mittas. Si placuerit, mittes obsignatas, sin aliquid mutandum putes, prius mone, idque liberrime, vel etiam Hagam evoca. Plus enim tribuo prudentiæ tuæ, quàm meæ, partim quia in propriis ferè cæcutimus: partim quia tibi, utpote Anglo, Anglicana omnia perspectiora sunt quàm mihi: partim quia in luce prudentissimorum hominum semper versatus, eaque in dignitate constitutus, experientiam majorem rerum omnium sis consecutus, quam mei ordinis quisquam; memorem te etiam esse velim sermonis ejus, quem obiter

obiter de operis mei dedicatione (quod est de Historicis Latinis) unâ habebamus. Sed quid ego, ut memor sis, rogo, qui prior etiam de me compellaris? Equidem, ut aperte dicam, magnam in te ejus rei, & aliarum, quæ me tangunt, fiduciam colloco. Ac simul in præstantissimo Boswello. Mihi unum hoc erit laborandum; imò & liberis meis, ut grati erga vos simus. Vale.

vii Sept. c10
Ioc xxvi.

Tua dignitatis cultor summus.

G. J. Vossius.

LVI.

Gulielmo Boswello, Westmonast.

Clarissime Doctissimeque Boswelle,

Valde mihi gratulor de constantia amoris erga me tui: ac tantò id facio impensius, quanto minus in me, quo id merear, reperio. Equidem magna cum voluptate rumino subinde hanc felicitatem meam: & tacitus mecum cogito, ecquando visurus sim diem illum, quo coram gratias agere possim, tum Illustrissimo Baroni Brookio: tum etiam tibi, aliisque amantibus mei. At enim dixeris, ut id quamprimum fiat, in manu esse mea: hoc enim ex literis me tuis non obscure perspicere potuisse. Non diffiteor: attamen non levia obstant, quo minus hac parte morem animo geram vestro, imò & meo. Quod ut verissimè à me dici videas, non abs re erit, si altiusculè rem ordiar. Jam plusquam septennium est, quod in procerum & Ecclesiastarum dissensu, me quoque, qui ab omni dissidio animum gesseram alienissimum, incendium calamitosi temporis afflavit, ac penè ambussit. Mirabar & mirabantur juxta mecum alii. Interim patienter non perferebam, quia non mihi conscius essem modò, quantopere Rēip. & Ecclesiæ paci studuissem: sed idem mecum agnoscerent, quoscunque non nimis abriperet affectus. Paulatim defæviebat tempestas, meaue indies innocentia testatior fiebat. Itaque numinis benignitate, Curatorum Academiæ auctoritate, aliorumque virorum præstantium operâ factum est, ut qui stipendii quidem parte bona fruerer, à docendo tamen abstinere: is Eloquentiæ & Historiarum insimul in Academiæ hac doctor publicus & ordinarius constituerer. Quæ res & emolumentum nonnihil secum ferebat. Anno, aut circiter post, commissâ est mihi provincia configuandi ea, quæ ad veteris Ecclesiæ tempora pertinerent. Paucis post

mensibus felicitas ea obtigit mihi, ut in Cantabrigiensem Academiam vocarer. Sed detinuit partim gravissimus uxoris morbus, partim voluntas Curatorum, qui prolixè optima spondebant. Exinde abeunte in Daniâ clarissimo Collega meo, Joanne Meursio, demandata etiam mihi est professio linguæ Græcæ. His auctior pristinam mihi seu fortunam, seu dignitatem, videor recuperasse. Nec ignoro, quantacunque hæc sint, tamen Anglicanam vocationem plus habere splendoris: idque partim ob antiquitatem & claritatem Academiæ in nobilissimo Angliæ regno constitutæ: partim quia magnum est versari in luce doctissimorum hominum, quorum ea est Angliæ copia, ut nulla ei tellus hac parte possit comparari: partim quoque, quia profectò non levis est gloria, primum alicujus cathedræ, ac potissimum talis, professorem fuisse designatum. Equidem magna esse hæc singula confiteor. Attamen ut omnia suo momento ponderemus, illud quoque in rationem venire debet, quod hic mihi non malè sit: imo stipendio hic majori fruam (præsertim si commoda quædam accenseam) quàm apud vos mihi offerantur. Fateor carior apud nos annona. Sed nimium quantum excedit, quod hic percipio, ut istoc facile compensetur, quod minori apud vos pretio omnia veneant. At illud fateor magnum, quod frequentes in Angliâ sint ex donatione Regis, Episcoporum aliorumque præbendæ, canonicatus, dignitates Ecclesiasticæ, quæ mihi, licet extero, ac postmodò etiam liberis paterent. Verum cum meimet considero, non leviter mihi displiceo: planèque metuo, ne ego homullus tantorum virorum expectationi satisfaciam: atque ita, nullâ mei amantium culpâ, sed solo defectu mei, vel etiam amicorum illorum obitu luculentæ illæ spes evanescant. Eoque postmodò, cum cane Æsopico, jure à nostratibus ridear. Nec desunt, qui hæc uxoris auribus sæpe insusurent, siue id sincerè faciant, siue ut per eam facilius me detineant. Cogitare etiam me jubent, mortalem me esse, & fieri posse, ut non multo postquam in Angliam pedem posuerim, mortem oppetam; illa autem solam se, cum octonis liberis, plerisque etiamnum parvulis, repèriat domi in solo eo, cujus necdum linguam didicerit. Hæc, si non sufficiant, cogitare etiam uxorem jubent, an quæ adhuc lienis & jecoris malis obnoxia est, par futura sit molestiis itineris: an expedire sibi valetudinariæ putet mutationem aeris: & alia, quædam profectò minuta, & non aliunde profecta, quàm quod bonitatem, & soli, & incolarum Angliæ vel ignorent, vel retinendi mei causa dissimulent. Interim tamen

tamen nonnulla ex his, & imprimis quæ superius commemoravi, tanti sunt, ut animum distrahant, diversosque in me ciant affectus, nunc eundi, nunc remanendi: nec multò aliter affecta uxor, nequid dissimulem. Sed si vel sexennium animus in dubio foret, annos, ut scis, totidem hic hæreretur. Proinde, ita planè statuo. Illustrissimo D. Baroni Brookio de altero omnino cogitandum esse, atque id, nisi aliter ei videatur, quamprimum. Serà illud ætate si fiat, non fraudabitur quidem vel benefactorum mercede in cœlis: vel gratâ memoriâ posteritatis; verum nihil prohibet, quominus superstes etiamnum diutissimè fruatur gloriâ honorèque Cathedræ à se in illustri adeò Academia erectæ; quæ, ut cum poeta dicam,

Canescat seclis innumerabilibus.

Sed quid ego hæc ad te, cum melius, quid ex re sua sit, ipse pervideat Illustrissimus Baro? Quare loquacitati ignosces. Interim, quantas possum, gratias ago Illustrissimo D. Baroni; cujus ego beneficio ita me obstrictum censeo, ut si ille ingratus dici debeat, qui cum omnia alterius causa velit, dignas tamen gratias referre non possit, omnino moriturus sum ingratus sum. Tibi quoque doctissime & amicissime D. Boswelle, ago gratias pro hoc erga me affectu. Equidem me magnopere video devinctum nomini tuo: quod ego ob præclara merita tua, & linguâ, & calamo prædicare non desinam. Sanè jam amoris mei publica indicia prodissent, nisi ab excudendis aliquot ingenii mei monumentis sextum jam mensem operæ Typographicæ cessarent. Cujus rei causa est, quòd nonnullis Academiæ nostræ professoribus publicâ auctoritate illustrium D. D. Ordinum demandatum sit, ut partim conscribant, partim corrigant libros eos, qui deinceps per omnes Hollandiæ Scholas pueritiæ prælegentur. Ea in re non minimam ego molestiam cogor devorare. Sed bene est, quòd diuturnus admodum hic labor posthac esse non possit. Nam eousque jam perductus, ut intra tres hebdomadas perfici possit. Quibus exactis, redire postliminio licebit ad jucundiorum mihi, & doctis gratiorem operam de Historicis Latinis: cujus voluminis (sane operosi admodum, & in quo plurima sint aliis indicata, partim ad Philologos, partim ad Ecclesiasticos Scriptores pertinentia) jam multò maxima pars excusa est, ac quod residuum est, intra bimestre spatium ad umbilicum poterit perducere. Hoc opus alia atque alia, partim literas sacras, partim externas spectantia consequentur, modò mihi Deus vitam, & valetudinem concesserit. Nec

enim cessare animus est. Nihil quippe meum puto; præter tempus divinitus concessum, & quæ cudo ingenii monumenta. Itaque in hoc potissimum adlaboro, ut ne supremo judici rationem temporis reddere cogar. Atque insimul docendo juventutem, & aliqua literis mandando, quæ profutura nostris hominibus & posteris videantur, opes mihi congrebo, non illas (et si eas non penitus aspernor) quæ me defuncto alium atque alium dominum consequentur; sed quæ, ut Plinius aiebat, ubi semel nostræ esse cœperint, nunquam desinant esse nostræ. Interea, quæ lucem propediem videbunt, erunt quoque Theses meæ Theologicæ, quarum ad te exemplar transmitti petis. Nec enim ulla hic amplius exemplaria prostant, quia pauca admodum excusa fuere, & quamprimum per juventutem dispersa. Itaque jam apud nos multorum manibus describuntur, imò & apud exteros. Hæc res facit, ut necesse sit de nova editione cogitare. Præsertim cum hæc non Typographi solum, sed & multi præstantes Theologi requirant. Mitto postremum exemplar quod habeo: Sed quo carere tamen possim, partim quia filius aliud habet: partim quia sex septemve alii sunt in urbe nostra, à quibus petere possim, ubi de recedendo cogitabitur. Video nimis excrescere Epistolam. Quare manum tandem de tabula tollo. Salve præstantissime Boswelle, & nomen nostrum porro ama, atque auge etiam in Angliâ tua, imprimis illustrissimum apud Baronem Brookium, cui ut salutem plurimam meo nomine dicas, etiam atque etiam rogo. Adderem & alios quosdam clarissimi nominis viros, nisi vererer, ne molestus tibi essem.

Lugd. Bar. cl^o
Ioc xxvi. Nonis
Sept.

Tue dignitati devinctissimus,

G. J. Vossius.

LVII.

Joanni Meursio.

Clariss. Vir atq; amicissime,

ET si aliter fieri non possit, quin permolestum sit, quod carere te cogar, tamen facilius absentiam tui ferrem, nisi mortes quorundam, quos valde amavi, non mediocriter augerent desiderium tui. De consanguineis & affinibus, quos hoc sescuianno amisi, nihil nunc dicam. Ecce superiori hebdomade ereptus Academiæ nostræ, egregium ejus lumen, Willebrordus Snellius, Vir

utriusque nostri amantissimus, dum fata Deusque linebant. Parentavit ei ex ordine nostro Gil. Jachæus. Ab Golio jam ante hebdomades complures Literæ in Bataviam perlatae, ex quibus saluum in Syriam advenisse cognoscimus. Intra octo menses, aut circiter, redibit ad Profess. Arabicam & penè est ut suspicer modo sospes in patriam pertingat, etiam Hebraicæ L. professorem fore. Nam hanc ei professionem à D. Curatoribus destinatam esse ex eo conjecto, quod hætenus nullus est constitutus. Nec verisimile est, Golium post tam longinquum itineris molestias linguarum Orientalium causa susceptas, pusillo unius Professionis Arabicæ stipendio contentum fore. Dedellus inter Ordinarios Jur. Profess. nunc agit. Corrector Dorelaer affectat professionem Poeseos in hac Academia: quid futurum sit, melius sciemus proximo conventu D. Curatorum Academiae. Qui nunc sunt exlegatus Arsenius, Præses Curiae Cromhoutius & Syndicus Pavius. Vossius uxorem duxit filiam D. vander Meulen magnificis ædibus è regione aulae hic habitantibus. Semel iterumque Literas accepi à Jano Gratero, quibus petit, ut plurimam tibi salutem dicam suo nomine. Video ei necdum constare de decessu tuo. Gener ejus Brettæ dejectus est de munere, quod Romanæ Eccl. nomen dare nollit. Itaque pene animus ei Groeningam se conferre ubi amicos habet & aer non displicet. Fervet præsum notis Heinianis in Nonnum. Theologi Acad. nostræ edidit opus adversus confessionem Remonst. uti & Walæus (qui etiamnum Rector est magnificus) volumen quoddam emisit adversus Joannem Arnoldi Corvinum. Rivetus Genevæ Criticum suum sacrum recudi curavit. Aliquanto is auctor est editione prima. Burgerfdicius edidit institutiones Logicas quæ non displicent. Prodiit apud nos Theo, & Aphthonius. Utriusque translationem Heinsius recensuit & interpolavit. Utinam hic fuisses qui nobis Græcum textum meliorem dare potuisses ex opt. codice, de quo aliquando te mihi quædam referre memini. Sed nihil impedit quo minus, tum editionem nobis aliam procures. Quod impense velim. Nec minus desidero alia ingenii & eximia tuæ eruditionis monumenta quæ hic habebas, partim confecta, partim affecta. Omnino & literarum & literatorum interest ut tam præclaræ observationes tuæ, quas frustra ab alio quopiam expectemus, quamprimum videant lucem. Scio tamen te nequam otiosi, sed serio elaborare in Historia Danicâ, eoquæ impensius opto ut Academiae vestrae brevi ab Typographo prospici possit, ne cum tum extra omnem sis culpam de-

posuisse videaris Reip. Literariæ & posteritatis amorem. Hoc ne Deus sinat, quod tantopere inimici tui optent. Opus meum de Historicis Lat. ad menses aliquot intermittere sum coactus, propterea quod auctoritate Ill. D. Ordinum commissum mihi fuit, ut novam adornarem Grammaticam Lat. & Græcam, sed ita ut in illa Lithocenis, & in hac Clewardi imprimis præceptis atque exemplis insisteretur. Videbam esse ingloriorum laborem & difficilem satem. Detrectare tamen nolui amore scholarum. Gaudeo intra quatrimum me operam eam ad finem perducere posse. Quod ubi erit, quæ in Historicis Latinis supersunt pertexam. Nosse te arbitror ante mensem pronunciatam à iudicibus delegatis sententiam esse, in præfectos rei maritimæ peculatus reos. Ex quibus Berkus fiscalis damnatus est floren. nostratum 74800. Idem perpetuo mancipatus carceri. Ac jam in arcem Lovesteiniam deportatus. Vander Mast Delphenis triennio carceris incola futurus multatus flor. 26667. Nicolaus Zelandus triennium exulabit. Solvet flor. 24182. Seguaert Dordracenus totidem annis exul erit. Multatus flor. 19842. Vander Heul Brielanus perpetuo carceri destinatus. Solvet flor. 13669. Duyhussem multatus flor. 1476. Nobilis D. à Cronenburg ut intellexit se multatum octo mill. fl. in morbum incidit ac paucis post diebus expiravit. D. à Ralphost ejusdem criminis reus, jure contendit. Cæteros mitto. Ultra nunc nihil occurrit. Plurimam salutem dicito lectissimæ Conjugi nomine meo. Uxor etiam mea utrique vestrum salutem ascribi jussit. Vale.

Non. Novemb.
clo loc xxvi.

Tuus totus,

G. J. Vossius.

LVIII.

Nob. viro Jacobo Roverio cognato.

Cognate Præstantissime,

Superiori hebdomade Amstelodami fui. Unde reduci tradita ab uxore literæ tuæ oppido quam grata. Mitto igitur, ut petis, *avryyeyya* epistolarum, quas Socer ad Musenholium nostrum dedit ut, quod res est dicam, præter unas vix ullæ tanti videntur, ut prælo committantur. Non quia non omnia ejus viri amem, uti debeo: sed quia nihil est in iis, quod scire alios interfit; jussi nihilominus, ut filius sex septem ex iis describeret, quia meminissent

minissent vocationis ejus in Gallias, item in Frisiam, & quorundam aliorum quæ nonnihil ad vitæ historiam facerent. Has apud me videbis, cum voles. Quod ad illud in epistola Sapphus:

Molle meum levibus cor est violabile telis.

(Quomodo & Aldina habet, & hac antiquior Veneta Bernardini Novariensis) quidam metricæ artis scriptores reponunt *levibusque*. Idque propterea, quia Ovidius ubique corripit; ut Lib. V. Trist. Eleg. VIII. Lib. I. de Ponto Eleg. IV. ad Rufinum. Et Lib. V. Met. Fab. VI. uti & Martialis. Lib. X. Epigr. XV. de Apro, item Aufonius Epigr. XLVIII. Neque qui aliter usurpet, quisquam occurrit. Vale Musarum amice atque etiam noster, meoque nomine tuos omnes saluta. Uxor etiam te *divitiarum* *est*.

Tuus,

G. J. Vossius.

LIX.

Davidi Guilielmo S. P.

VIX dicere possum, quam ægre mihi sit, quoddam ille ego, qui claudi instar futoris domi fere confideo, meque in bibliothecam abdo, tum potissimum ab urbe abfuerim, cum tu, vir præstantissime, ac una amicissimus Goliath ad me salutandum domum meam venissetis. Jamdiu enim est, quod te aveo videre & amicitiam tecum contesserare. Addo etiam, aliqua eorum ex te discere, quæ tu variis in terris à summis viris hausisti, vel longâ & diuturnâ peregrinatione ipse observasti. At nunc, quod mearum erat partium, peragis, & ubi te frustra hic fuisse vides, prior etiam literis compellas, atque ejusmodi literis, quæ comites haberent, Themistoclis epistolas, magni sanè viri, & qui ingenium semper habuerit in numerato, ut de eo prodidit antiquitas. Sane gratum mihi hoc donum tuum, uti & alterius opusculi, in quo suffragia Romanorum Procerum, quæ tulere cum in Sanctorum numerum Andreas Corsinus referretur. Quid ego tibi pro istis rependam? sane animum, atque affectum. Tuus enim sum, eroque, non illa vulgari ac sublesta, sed antiqua Romana, vel si malis Germana aut Batava fide. Gratias etiam ago quod ignorare me non siveris, quam benigne de monumentis nostris sentiant, Querengus, Alexander, Mæcardus, alii summi viri Romæ, atque alibi. Nec tamen ea res efficere un-

quam potuit, ut tantâ me laude dignum putem; melius me novi: sed ea animum addunt, ut porro etiam non pessime de nostris hominibus ac fortasse etiam posteris mereri velim, & credo eo fine hoc ad me perscriptisti, ut talium judicia judiciis malignorum opponam, meque soler, qui exulcerato hoc tempore oneri propemodum succumbam. Nihil vero mihi illis magis ridiculum videtur, qui ob laudes alienas longe sibi majores videntur quàm sunt, illi umbris similes sunt, hæc nunc majores, nunc minores, sed corpuscula nostra manent eadem. Cum Illustrissimo legato Britannico Thoma Roe nulla mihi hætenus notitia est. Absque illo esset, non paterer te absque literis meis in Daniam ire, sed si in Bataviam venerit, mei muneris erit, summum virum accedere, omnemque affectum testari coram, uti hætenus in aliis à me factum, qui huc missi ab Illustrissimo rege Carolo, præclare adeo de me merito, nec me solum, sed etiam meis: superest non aliud, quam ut te, longe adeo iterum euntem à nobis, votis meis prosequar. Quod sane facio & faciam; ac plane fore confido, ut propediem te salvum venisse in Daniam, intelligamus, imo ut, feliciter cunctis expeditis, brevi iterum te tuis in Belgica nostra sistas. Vale, vir præstantissime, meque amare perge, usque adeo redamantem tui.

Lugd. Bat.

Tuus,

G. J. Vossius.

LX.

Adriano Hofferio S. P.

UTunque me, Amplissime Hoffere, calamus apud te excuset, quod non scripserim; animus memet accuset, quod multa adeo in me recipiam, ut ne illis quidem amicorum, quos jure maximi facio, præstare ea possim, quæ debeo, vides ut non petam excusationem, unde ordiri plerique solent; verum dicam, quod res est: Nempe amicitiam colam sine pompa, eoque raro admodum, nisi necessario, in hisce occupationibus scribo. Aliam fuge causam suspicari silentii mei. Quod tamen non tam fuisset diuturnum, si fratris tui filius ab eo tempore, quo primum vidi, vel verbo unquam me compellasset. Bimestri etiam moratum me fuit iter in Britanniam. A quo ut redii, ita undique obruebar negotiis, ut nihil minus, quam meus forem. Paulatim nunc meus esse incipio, & meus dum ero, tuus quoque fuero,

fuero, amplissime vir; qui magnopere me obstrinxisti Amandi Chronico, & versibus de urbis vestræ situ & obsidione. Amo Amandum: amo versus historiæ causa: sed magis tu amandus mihi.

*Munere nam plus est, & carmine gratius ipso
Officium docti, iudiciumque viri:*

Ut paulum immutem versiculos Hispani vatis. Nec temere id dico, quid enim jucundius mihi esse possit, quam amari à te, viro ejusce & eruditionis & dignitatis? Quid turpius mihi quam non contendere tecum amore. Qui & invisere me prior, literisque compellere, eo munere etiam, ac versibus superioris ævi mihi antea invisis, ditare volueris Bibliothecam nostram! Quare multum tibi debeo. Semper gavisus fui plurimum amicitia nostri Ilaaci Pontani: amavi etiam illius griphum septenarium, tum auctoris, tum argumenti causâ. Sed non parum hunc in me affectum auget, quod eum tibi potissimum dicavit, cujus ego sic nomini faveo, quàm qui maximè. Equidem gratulor urbi vestræ de tali consule & senatore. Cujus si similes multos haberemus, melius his terris cum studiis ageretur. Nunc metuo, ne paulatim redeamus ad barbariem, ob eorum imperitiam, qui Rempublicam capeffunt. Sed hæc Deo curæ erunt: Cui te, mi Hoffere, commendo. Simul rogo, veniam mihi des per te salutandi egregiam animam Amplissimi Moermonti, uxoris meæ cognati, atque eo nomine cari, sed multo carioris, quod nobiscum Musarum sit cultor & Gratiarum. Quod si occasio se offerat, salutem etiam dices ornatissimo Belonio, & aliis eidem mecum familiæ implexis.

Lugd. Bat.

Tuus,

G. J. Vossius.

LXI.

Gerardus Vossius Conrado Vorstio
S. P. D.

Clarissime & eximie vir, literæ tuæ multum me recrearunt, propter summum erga me affectum quem spirant. Nec potui non multum gaudere, quo eo dignatus sis honore, ut ad me quoque partem Antipiscatoris tui mittendam putaris. Necdum tamen totum per occupationes legere licuit: sed quæ legi (legi autem plurima) non minori cum

voluptate legi, quàm fructu. Adeo multa utiliter à te observata. Quæ quamquam ita sint, spero tamen te *vestris* illis, licet haur *vestris* à te tractentur, defungi propediem posse, extremamque tandem manum admovere velle notationibus in N. T. quas ab non uno prædicari tantoperè audio. De Camerario non est quod festines. Simul ac carere eo ultra non licebit, monebo ipse. Quod si quid aliud etiam in Bibliotheca mea usui esse tibi possit, tantum significata. Ego hoc sic interpretabor, quasi beneficium à te accipiam. Molanum & Cunerdingium, Adolescentes longè optimos (quorum utinam omnes similes essent) multum amo, partim merito suo, partim propter commendationem tuam. Pelagianam & Semi-pelagianam Historiam orsus sum; certisque eam disputationibus complectar. Primam destinavi Molano, quæ jam absoluta: sed antequam prælo tradetur, consilium tecum capere volui, utrum diutius apud nos sibi vivere expediat, ubi multorum adeo displiceant mores, & perpaucos habeat sui amantes. Ego in Molano nihil nisi animi firmitudinem requiro. Vase, vir maxime, & te donaque tua æstimantem porro amare perge.

xxvii. Febr.
clō Ioc xvii.

T. R. additissimus,

G. J. Vossius.

LXII.

Dudl. Carleton. Haga.

Nobilissime Domine,

Mitto exemplar præfationis meæ, etsi ob occupationes extremam ea necdum manum acceperit. Sed quid superest, facile horulâ præstabitur, dummodò prius de re totâ iudicium tuum cognôro. Scis, quàm parum mihi tribuam in iis, quæ ad viros principes pertinent: quippe qui contentus esse soleam Spartâ meâ, rebus nempe istis, quæ non transcendunt captum hominum in umbra Academica degentium vitam suam. Quare te oro, ut de singulis moneas fidenter. Addam, demam, mutabo, prout tibi videbitur, atque aded omnibus, quos mei amantes, & talium intelligentes iudicabis. Coram si fuissèm, rogassèm ubi loci inter tot dignitates reponi debeat titulus Cancellarii Academici, cui postremus à me tributus. Item, utrum initio pro *heroe* rectius dicturus sim *principi*. Fortasse enim consuetudo fert, ut solus eo elogio

elogio insigniatur primogenitus regis. Sed de his, & aliis quæ facili per te videbis, negotium tibi serio committo. De me verò certò tibi persuade, gratum me semper fore, quibus aliquam mei meorumque curam esse intellexero.

Nobilitatis tue,

Lugd. Batav.
clō Ioc xxvii.
Pr. Cal. Maii
raptim.

totiusque domus Carletoniæ

Observantissimus cultor,

G. J. Vossius.

LXIII.

*Amplissimo Viro Adriano Blyemburgio.
Dordrechtum.*

Amplissime Blyemburgi,

Propemodum pudet, tardè adeo quod binis tuis respondeam. Nec tamen tam ipse in culpâ sum, quàm omne hoc tribuendum necessitati; quam, ut ait ille, nè dii quidem vincere potuerunt. Planè enim meus esse defui, extremis hifce mensibus iv. eoque quicquid literarum, sive ex finitimis civitatibus acceperam, sive etiam, ex Britannia, Gallia, Italia, Germania, terris aliis, id unum in locum recondere sum coactus, responsurus singulis, simulac pusillum otii nactus essem. Malui nempe paulum abuti amicorum patientiâ, quàm ut in Opere, quo prælum ferret, temporis angustia exclusus sæpius ineptirem. Sanè metuo ne nunc quoque, quando feci quod potui, sæpiusculè quàm vellem, humanitus aliquid passus sim. Quid igitur futurum erat, si de pauxillo isto, quod à publici muneris curâ superfuit, subsecare plusculum voluissim? Nec enim Vossius tuus, est divino adeo ingenio præditus, ut laudabile opus, publico labore condere possit: sed de se quoque verum esse scit, quod Aristides Orator olim aiebat, esse se ex scribentium numero, non vomentium. Quod imprimis dictum velim de Historia nostra, quam nunc de Latinis Historicis, penè ad umbilicum perduximus. Nempe quod in Latinis Poetis Crinitus, & eo non paulo doctior Lilius Gyraldus fecit: Id ego in Historicis præstare sum conatus. Poteram, more quorundam, argumentum sumere, sexcentis ante me tractatum: atque inde in triclinia nostra convasando supellectilem alienam, mirificas opes ostentare. Mihi alia mens fuit, eoque argumentum mihi delegi, in quo eruditio pariter

atque industria haberet locum. Utrum affectus sim, quod volui, alii iudicabunt. Saltem pro viribus pusillis oppidulo nostro moenia fecimus. Hæc ad te nunc scripli, non quia quicquam in iis sit, quod scire tua intersit, quam longè graviores curæ distinent; verum ut videres, me simul ac meus esse cœpi, mei quoque Blyemburgii esse, iterum cœpisse; cuius & æternum ero, quantus quantus sum, dummodò sim meus. Salutem plurimam, ubi occasio erit, dices meo nomine Amplissimis Viris, Affinibus tuis, Consuli Beverio, ac Quæstori Rufio, item Wittio urbis vestræ Quæstori, & aliis nostri amantibus, quorum catalogum non texam. Nam pauperis est numerare sua, ut aiunt. Vale.

Lugd. Batav.
clō Ioc xxvii.
iii. Nonas
Maias.

Tuus sine fuco, ac fallaciis,

G. J. Vossius

LXIV.

Maximo Viro, Jano Grutero. Brettam.

Maxime, & Coniunctissime Grutere,

Incredibili me voluptate perfudit, Clarissimus vir Altingius, cùm certiore me fecit, de vocatione tui, ad Academiam Groninganam. Equidem spero fore, ut bellam adeo occasionem, benè merendi de studiis amplectaris; præsertim cùm tam multa sint, quæ id suadeant. Nam habet ea provincia Proceres literarum, & literatorum mirè amantes: ut certè tibi persuadere possis, carum te, atque in pretio istic fore: Et vilior ibi annona, quàm aliis plerisque fœderatæ Belgicæ locis. Scis etiam quanti intersit habere Collegas, non eruditissimos tantùm, verùm etiam humanissimos; Imprimis, *ἀνδρῶν καὶ παιδῶν ἀγαθῶν*, quibus, quando boni, nihil est melius, acceptiusque; quando mali, ac crabronum similes, nihil est deterius, ac magis invisum. At Collegis uteris, ut eruditione ac doctrinâ, ita virtute ornatissimis: ex sacro verò ordine, habebis duos eximios viros, quorum unus, affinitate tibi iunctus, ac elegantiorum literarum non gnarus modò, sed etiam in hac ætate cultor sedulus: Alter item vetus amicus, quicum tot annos in Heidelbergensi Academia vixisti. Uterque ea præditus humanitate, ut proprio quodam naturæ munere, ad eam virtutem facti videantur. Quare non tibi negotium erit, cum hominibus, qui præsentibus laudent: absentes, ut tuus Plautus loquitur, frigidam subdole suffundant: quales ego nimis multos novi, quosdam

quosdam etiam non sine dolore experior. Accedit ad ista, quod juvenus ibi, ut audio, satis sit modesta, benèque composita. Nec duram suscipies provinciam. Leges Florum, Justinum, Livium, Tacitum, alios, quos volēs, scriptores, studiosè adeo, contentèque tibi lectitatos, sæpiusque, ut arbitror, prælectos. Interim occasio tibi erit limandi cætera, rursus nova, quæ Reip. literariæ bono, tuique cum nominis honore, partim in Academia illa, partim etiam in nostrâ, si ita tibi videatur, lucem mox videre possint. Equidem si quid huc transmiseris, non defugiam laborem corrigendi, in quibus Typothetæ aberrarint. Quare ne te hominem Belgam Belgis diutius invide. Nec ætatem objecta, quæ necdum effœta, sed ad molles Musarum labores satis est vegeta. Cogita Imperatorem itantem mori oportere. Sanè longè quidem mallem, ut una nobiscum Lugduni, in studiis esset vivendi potestas. Sed nunc quidem non licet mihi esse tam beato. Gaudeo interim, quod iisdem Fœderatis Provinciis agemus, nec longo adeo diffiti intervallo, ut non aliquando excurrere liceat, ac literarum commercia crebra esse possint. Sanè non mihi modò id jucundissimum futurum, sed etiam uxori meæ, quæ sæpè tui meminit, & Cognatarum Smetiarum, etsi nonnisi puella admodum vos omnes viderit; ac plerosque ejus jam familiæ, transfulerit Deus, in meliores sedes. Edidi hoc anno libros tres de Historicis Latinis, eorum historiam perduxì usque ad Carolum V. Exemplar non mitto, ne librariam supellectilem tuam magis onerem. Sed videbis simulac pedem in Belgica nostra posueris. Felicem diem, quando te, liberosque, ac generum, amplecti licebit! Deum Opt. Max. oro, ut veniendi vobis mentem inspiret; atque etiam in itinere Angelum suum det vobis comitem, qui vos salvos in Belgicis sistat hospitibus. Vale, vir eximie, literarum columen, amor omnium eruditorum; ac cum tuis lætus, quam primum veni; lætior iterum hæc terras vide; Lætissimus iisdem quàm diutissimè vive.

*Lugduni Bat.
c. l. l. c. xxvii.
iii. Non. Maii.
Tegra more
meo.*

*Tuus sine fœco ac fallacia, more
majorum; nec tuus modo, sed
& tuorum omnium, totus,
totus.*

G. J. Vossius.

LXV.

*Clarissimo viro, Francisco Gomaro.
Groningam.*

Clarissime vir, ac Conjunctissime Affinis,

Verissima sunt omnia, quæ ante menses quatuor de Thuano mihi scripseras; Planèque tibi assentior, non abire ita oportere. Atque adeo si cessare ii vellent, qui sanguine, vel affinitate *παρμαστειν* Junio devinctiores sunt; non tamen tam duro stomacho esse deberent quibus Ecclesiarum nostrarum honos cordi est, ut hominem tam benè de iis meritum, postquam illum cœlo dignatus est Deus, ab eo viro, qui ob summam authoritatem, apud posteros fidem fortassè inveniret, apertissimis, & iniquissimis calumniis onerari paterentur. De me quidem ita habe, neutiquam me quieturum. Sed cur hæcenus nihil in hoc negotio egerim, causa est non una. Nam usque adeo obrutus fui mole curarum, ut ne respirandi quidem otium concederetur. Ad professionem historicam accesserat altera Linguae Græcæ. Præterea munere Assessoris sæpius occupabar, quàm gratum esset; morte Patruï novi mihi cura accesserat. Authoritate publica corriperebam utriusque linguae præcepta, ac alia quædam conscriberebam, quæ deinceps in universis Bataviæ Scholis prælegerentur. Ante omnia me noctes, diesque, fatigabat opus de Historicis Latinis, cujus quia jam bona pars excusa erat, non sine damno Typographi, differri diutius poterat. Quàm autem operosa ea mihi opera fuerit, tum inde cognoscas, quod in ea agam de scriptoribus amplius, quàm mille & sexcentis: Tum exinde quod plusquam tertiàm ejus partem, fervente prælo, exarare sim coactus. Itaque sæpè primâ, alterâque hora nocturnâ, non æstiva modo, sed etiam hybernâ, occupabar miser, probis, ut vocant, emaculandis. Nec propterea ullam unquam lectionem publicam neglexi. Imo nec intermisi Collegium Orationum, aut Historicum in quo Nobilissimis juvenibus XXX. vel circiter, magna ex parte Sarmatis, Cimbris, aut Germanis, vel viam ad Eloquentiam pandebam, vel Antiquitates Romanas enarrabam, & ita enarrabam, ut historiæ non solùm è φιλολογίας penu allucerem facem, sed etiam aptarem singula ad civilis prudentiæ præcepta, quod potissimum à me exegerant; quippe non tam Scholis destinati, quàm Principum Aulis, vel gubernationi Rerum-publicarum. Nec eo segnibus aliis subinde, qui vel docentem aliquamdiu audissent in Academia, aut recentes huc advenissent,

sent, frequentare domum meam, sive ut exquirent aliquid, quod minus percepisse viderentur, sive ut consilium meum de tota studiorum suorum ratione cognoscerent. Ac plerisque eò minus officii id potui denegare, quia à præstantissimis viris, etsi sæpe mihi ignotis, per literas magnopere commendarentur. Tam multis districtus, non solum distuli respondere Thuano; sed etiam coactus sum, quicquid literarum acciperem sive à Belgia nostra, sive ex Anglia, Gallia, Italia, Germania, Dania, terrisque aliis, id omne unum in locum recondere, responsurus singulis, aliquanto quidem post intervallo; sed tamen simulac liceret, hoc est, ubi parte oneris levatus essem, nempe Collegiis domesticis desinentibus, & Operibus meis, quæ excuderentur, ad finem perductis. Antehac sanè pugilicè, atque athleticè valueram; verum hoc anno, qui ætatis fuit quinquagesimus, minus firmus esse corpori ac retro euntis valetudinis indicia manifesta persensì; imprimis in brachio sinistro: sive id ab immodico labore, sive à natura fatigante, post annos septies septenos exactos. Profectò si longè diutius exantlare tot & tantos labores coactus forem, haud diu vitalis esse potuissem. Sed de isto. Venio nunc ad alteram causam dilati in tuendo socero officii. Sciebam edi in hac urbe Epistolas Scaligeri, quas antequam vidissem, putabam nihil hac in re fieri oportere. Quid, inquis, ea res ad Junianam causam? Imò plurimum, scis quale fuerit illud maximi Scaligeri ingenium. Non ferebat dissentientem. Itaque semper eo nomine offensior Junio fuit, quod in quibusdam ad sacram *ῥενοδοξία* pertinentibus, ac credo in aliis etiam nonnullis à se discreparet. Offensam eam unus & alter Discipulorum alebant, malignè interpretantes apud Scaligerum, quæ vel publicè docuisset Junius, vel privatim dixisset. Scaliger ut iræ impotens erat, accusare Junium literis suis, apud doctissimos Gallorum, eosque inter Casaubonum, Thuano usque adeo familiarem, atque adeo ut arbitror, Thuanum ipsum. Itaque non committendum putavi, ut, quia alterum accusationis caput erat de Junii desultorio ingenio, multa conante, nec assequente quod moliretur, hisce verbis responderem, priusquam vidissem, quid Scaliger ad Casaubonum scripsisset. Prodiit nunc Epistolarum opus. Præfatio est ab Heinsio, sed sub Elzevirianorum nomine. Magnifice extollit Scaligeros. Ait naturam quotidie homines parere, non miracula. Sed quid tota posset, voluisse in utroque Scaligero experiri, inque iis duobus bis omnes vires suas esse periclitatam. Quibus ego laudibus non invideo:

Etsi non arbitrer Erasmus fuisse iis minor, præsertim quando cogito tempora, in quæ hujus pueritia incidit; tum etiam quàm præclare de Novo Testamento, à tot SS. Patribus meritis sit. Nec enim persuadere mihi possum, minoris momenti, aut fructus, esse Operam istam, quàm quæ subtilius sæpe, quàm verius adversus Cardanum Julius disputat; aut quæ de re poetica, vel causis LL. idem nos docet: præsertim cum ne filius quidem in iis, quæ de Poetis judicarat, Parentis judicium sequendum putarit: Et opus de causis LL. quærat sæpe quod non est, Alchymistarum instar, ut ipse ejus author agnovit, quemadmodum ex Bordonæ fabulæ confutatione accepimus. Quodque ad Josephum attinet, ut nec invidia negare possit, ad temporum cognitionem, plurimum eum contulisse in libris de emendatione temporum, & animadversionibus Eusebianis; ita Religio quoque sit fateri, plus inde utilitatis ad Ecclesiam redundasse, quàm accuratà illa operâ, quàm Erasmus antiquis Ecclesiæ Doctoribus vertendis, corrigendis, censendis, impendit. Longèque illud minus fatebor, plus profuisse Scaligerum, ingeniosis quidem, & doctis in Varronem conjectaneis; verum sæpe nimis audaci conjectura nixis, usque adeo ut, Petrus Victorius (quemadmodum ipse Scaliger conqueritur) cum id opus vidisset, nunquam conqueri destiterit, quasi is in perniciem literarum esset natus, ac quia ingenio abuteretur, nimia sui fiducia, corrupturus verius esset Scriptores veteres, quàm correcturus. Equidem longè mitius de Scaligero censeo: Sed tamen tantam licentiam probare non possum, non magis, quàm candorem, cum dissimulat quæ in Antiquis Varronis Codd. invenisset. Et cui persuaserit, se in Festo corrigendo, non usum esse schedis Læti, dum ita supplet quæ defunt, prout in iis sæpe schedis legebatur? Non hæc candidi animi fuere. De notis ad Priapeia, ad Ausonium, ad amorum Triumviros dicere nolo. De Manilio illud dicere contentus erò, compluria Junium ita in eo scriptore correxisse, prout Scaliger in editione postrema emendavit. Scio, ait Scaliger, se ita reperisse in codice Gemblacensi. Sed quid si is obiisset, ante repertum eum codicem? Eòne peccasset, qui ex Palatino codice, genuinam lectionem Rēipublicæ literariæ indicaret? Vaticinari Junius potuit, fore, ut Scaliger eadem postea, & ineliora, in Gemblacensi Cod. reperiret? Verum hæc ad Junium potius pertinere videantur, quàm Erasmus, de quo institutus erat sermo. Ut igitur ad eum redeam, mihi utroque illo Hæroe, Erasmus non minor videtur, præsertim si seculum infelix attendam, quo Eras-

mus, inter indoctos Monachos, in tanta tot librorum bonorum penuria, qui necdum, vel corruptissime prodierant, ad illud eruditionis fastigium potuit aspirare. Verum ut hoc quoque concedamus, solum Italum Cæsar. Scaligerum, & Gallum Josephum filium, palmam præripuisse iis qui & ante, & post fuerunt: Non tamen quisquam laudaverit eam malignitatem animi, qua in Epistolis suis utitur. Rectè interim, ac laudabiliter quod omnibus in locis, loco Juniani nominis, Asteriscum posuere, uti & cum Manilius Junii, vel Tertullianus, vel Epistolæ ejus ad Atticum taxarentur. Mallem tamen totas periodos omisitissent. Nunc sic quoque intelligunt non pauci, quid dicatur, idque ex iis, quæ vel præcedunt, vel consequuntur. Ac imprimis illi sagaces satis erunt, qui Junii, & Scaligeri temporibus vivere. Nam quomodo hi non intelligant, de quo sermo sit, ubi vident, loqui de eo, qui in Academia doceat Lugdunensi, qui Epistolam aliquam ex Arabico transferendo, jam Arabicæ se Lingux peritiam, sibi vindicasse posse arbitratur, atque alia id genus? Quam autem malignè egerit Scaliger, vel hinc vide, quod non semel dicat, usque adeo imperitum esse Junium, ut non dico Hebraicè (quamquam & illud scribat) sed ne Latinè quidem sciverit. Cujusmodi cum literis istis video contineri, dubitare non possum, quin iis Thuanus compulsus, sinistrum adeo judicium de Junio tulerit. Imo planè persuasum habeo, haud leviora esse, quæ de eo ad Thuanum perscripserit. Quamobrem si calamum adversus Thuanum stringam, periculum video, ne filius Thuani, Juvenis eruditus, & ut genere, atque opibus pollens, ita multis in Galliis carus, & maximis honoribus destinatus, quæ de imperitia Junii modestè Parens scripserit, ea apertè, & sine circuitione prodita, ostendat à magno Scaligero, Reip. literariæ dictatore, cui doctior orbis lubens eruditionis fasces submittit. Hinc mihi nova cura, etiam tuendi eum adversus Scaligeri calumnias, incumbet. Quem ego virum laudavi semper, ac porro laudare decrevi: Non quia ejus impotentiam animi, aut maledicentiam ignorem; aut quasi nesciam, quàm multis in locis aliquid humanitus patiatur: sed quia ejus tantæ virtutes, præclaraque adeo merita sunt, erga Historiam, ac bonas literas, ut propterea, quæ peccavit, censeam ei condonari, & æterna oblivione sepeliri oportere. Nec tamen impediunt ista, quominus accuratè refellantur, quæ de fuga Junii, ex supplicii metu comminiscitur. Imo nec impedit quicquam quominus, saltem modestè, aliquid dicatur adversus illud de ingenio de-

sultorio. Nec enim desultorio is ingenio, qui à prima penè ætate Theologiæ se dedit, inque eo studio consenuit. Linguarum sciò studio, & Philosophiæ incubuit: sed propter Theologiam imprimis, ut in Criticis aliquis voluit videri: Hæc ille subcivis horis, quas alæ aut computationi, aliqui impendunt. Sed sæpius deceptus est. At nihil opus metiri Junium ex Criticis, nihilo sanè magis, quàm Scaligerum ex Cyclometricis, puerilium errorum plenissimis. Nec tamen infelix est conjector, quàm livor ait. Aliquid accusatio ea ex vero, at nec minus est, quod ex mendacio, invidia, atque odio trahit. Quare nec detrecto provinciam, isti parti quoque occurrendi: Nedom diffugiam laborem diluendi sædum errorem, quo seditionis aut complicationis, adversus summos Magistratus reum agit, ac turpis fugæ insinuat. Quæ tantò turpiora, quantò probitas eruditioni antistat. Tantummodò mihi ita agendum video, ut quàm minimà eorum offensâ, qui Thuano, & Scaligero impentius favent, fortissime Junii causam agam. Utrum autem seorsim, an in præfatione operis alicujus id acturus sim, adhuc delibero. Atque ubi, ex amicorum consilio, aliquid statuerò, faciam te quamprimum certiorum. Nec displicet, ut in Academiæ Lugdunensis Professoribus, quorum vitæ ante biennium hic cum cæлата eorum imagine recusæ fuerunt, idem error paucis refellatur. Hæc nunc in mentem venerunt. Poteram fortasse paucioribus hæc proposuisse. Sed non possum in scribendis anxius esse de brevitate, nihilo sanè magis, quam de dictione. Quare si loquacior visus sim, pro amicitia nostra, faciliè eam rem condonabis. Plurimam salutem lectissimæ uxori, ac tuis, tum autem sorori nostræ Juniæ, ac præstantissimo D. Makowski.

Lugd. Batav.
clō Ioc xxvii.
v. Id. Maii.

Tuus sine fisco,
G. J. Vossius.

LXVI.

Reverendo in Christo Patri, Richardo
Episcopo Dunelmensi.

Reverendissime in Christo Pater,

Offero tanti & meriti & nominis præsulī aliquid de paupere penu nostro, exiguum, sed magni tamen affectus, & devotissimi animi monumentum, commentarios nostros de Historicis Latinis: quos spero non ingratos

gratos fore, partim propter autorem, qui nihil æquè exoptat, quàm ut placere possit iis, quos Deus ad tantum decus in Ecclesiâ suâ evexit: partim etiam propter argumentum literarum amantibus perutile, iis imprimis, qui eo loco habent antiquitatem Ecclesiasticam quo meretur. Sanè dicere illud possum, studiosè me operam dedisse, ut facilius & legi, & refelli possint, quæ de controversiis variis ab celeberrimo Annalium Ecclesiasticorum conditore adversus nostros scripta sint. Plurimum enim refert nosse, quæ genuina, quæ supposititia sint, quâ ætate scriptor quisque vixerit, utrum Pontificias an Cæsareas secutus sit partes, & id genus compluria: quorum usus magis apparebit, ubi, quæ nunc de scriptoribus prodidi, accomodata verò rebus ipsis, quas memoratus annalium autor, ex iis vel probare vel refellere se posse arbitratur. Deum rogo, ut ad institutum hoc nobile, & vitam, & valetudinem, imò & otium largiatur. Simul numen ejus oro, ut incolumem Reverentiam tuam diu Ecclesiæ suæ præstet & conservet.

Lugd. Batav.
clō lōc xxvii.
vii. Id. Sext.

Reverendissimi nominis tui

Cultor ad obsequia paratissimus,

G. J. Vossius.

LXVII.

*Reverendo in Christo Patri Joanni,
Episcopo Lincolnienfi:*

Reverende in Christo Pater,

ETSI non ignoro, quæ modestia, quantaque animi submissio deceat, primum hoc alloquium, quo affari ausus sum eum, quem Deus illustri adeò loco in Ecclesia sua collocavit: arbitror me tamen illud dicere de me posse, à prima me adolescentia summo amore captum fuisse Historiæ omnis, ac præcipuæ Ecclesiasticæ Antiquitatis. Quid verò labore atque industriâ promoverim, judicium penes alios esto. Saltem, spero, nemo bonus improbabit propensissimam hanc voluntatem benè merendi de studiis literarum. Atque ego animo pergo quotidie colligere vindemiolas meas, quas & publici juris facio. Cæterum, cum in omni historia duo spectare conveniat, quis dicat, & quid dicat; scorsim de utroque melius me acturum existimavi. Atque istud in causâ est, cur hoc tempore de Historiarum scriptoribus egerim.

Ac ante triennium quidem commentarios meos emisi de Historicis Græcis. Hos nunc consequuntur alii de Historicis Latinis. Priores dicavi Illustribus Bataviæ nostræ Ordinibus, patriæ patribus. Alteros hosce sacravi florentissimæ genti vestræ, potissimum Illustrissimo Duci Buckinghamiæ, imo si non tam inscriptionem, quàm argumentum præfationis nostræ ponderemus, toti insimul Academici Cantabrigiensi. Nempe animo terras omnes lustranti non efferebat se natio illustrior vestrâ, seu arma spectarem, seu literas etiam, tum sacras, tum istas de quibus hoc opere tractamus. Adhæc beneficium illud, quo me per Illustrissimum Baronem à Broock, affectit laudatissima gens vestra, jamdiu aliquod mihi testimonium grati animi imperare visum fuit. Quanquam autem non adeò Sufenus sim, ut existimem proficisci à me quicquam posse quod satisfacere possit exactissimo Reverendissimi nominis tui judicio (cujus ad limam si revocare omnia velimus, fore prospicio, ut pauciora hic reperiatis quæ placeant, quam quæ displiceant) tamen nihil causæ videbam, cur idem minus haberem tam multis prædicantibus summam humanitatem tuam, ac facilitatem in cognoscendis & ignoscendis erroribus eorum, qui de publico bene mereri studuerunt. Bonæ hujus spei plenus, tantæ & dignitatis & doctrinæ præfati offero nunc monumentum hoc laboris nostri, minutum quidem si autorem consideres: sed non aspernandum tamen, seu respicias paratissimum ad cultum omnem, & obsequium tui voluntatem nostram: seu etiam spectes, quòd hæc opera munient viam nobis ad majora: putà ad refellenda ea, quæ ex scriptoribus à nobis opere hoc memoratis ab Ecclesiasticorum Annalium conditore, atque aliis adversus Religionem nostram depromuntur. Deus Optimus Maximus longam tibi, Reverendissime Præful, felicemque vitam largiatur, quòd diu Ecclesiæ suæ præstis & profis.

Lugd. Batav.
clō lōc xxvii.
vii. Id. Sext.

*Reverendissimi nominis tui cultor
ad obsequia omnia paratissimus,*

G. J. Vossius.

LXVIII.

*Reverendissimo in Christo Patri Georgio,
Chichestrensi Episcopo.*

Reverendissime in Christo Pater,

Sæpe recorder honoris mihi habiti tempore Synodi Dordrechtanæ, ac postea, priusquam pedem è terris nostris poneretis. Nam & Dordrecht mensa me tuâ, & quod longe majoris duco, sanctis juxta ac eruditis colloquiis tuis, & eorum quos tecum in Bataviam Ecclesia miserat Anglicana, dignari voluisti: Nec Lugduni minus persenti eximiam humanitatem tuam, & collegarum, quos dixi, virorum non præcellentis, minùs pietatis, quàm doctrinæ. Beneficium hoc vestrum pluribus extollerem, nisi satius ducerem, ut ista silentij nunc sipario recondam, virtutesque vestras apud alios potius quàm apud te, prædicem. Hinc amorem erga te meum, immane quantum auxit beneficentia illustrissimi legati, viri immortalitate dignissimi, & cognati ejus regii Consilii Magnæ Britanniæ à Secretis: qui & præclare de me meriti, & porro mereri non cessant. Quamobrem cum nobilissimæ genti vestræ Carletonæ multò sim obstrictissimus, nefas putavi, si non operis novi de Historicis Latinis exemplar ad te mitterem, præsertim cum illud consecrarim nunquam satis laudatæ Britannicæ nationi. Quæso, Reverendissime Præful, minutum donum non aspernare. Proficiscitur enim ab animo devotissimo, & ad obsequia tua paratissimo. Et deinceps mihi viam sternet, ad ea diluenda, quæ ex superiorum seculorum scriptoribus adversus Religionem nostram à Baronio, atque aliis, adferuntur. Utinam mihi Deus & vitam & otium concedat ad eam rem, uti exopto, fusius planiusque comprobendam. Nunc quod olim Augustus Cæsar aiebat, contentus eris hoc Catone. Reverendissime domine, consule hæc igitur æqui bonique. Deus te saluum ac sospitem servet Ecclesiæ suæ bono.

*Lugd. Batav. Reverendissimi nominis tui cultor, imò
clō loc xxvii. illustrissimæ domus Carletonæ
vii. Id. Sextil. cliens æternum debitorus,*

G. J. Vossius.

LXIX.

*Illustrissimo D. Fulconi, Baroni à Broock,
Serenissimæ Regiæ Majestati à Consi-
liis interioribus, Mecænati suo Optimo.*

Illustrissime D. Broocki,

Postquam me beneficio summo planè fecisti tuum, rectè me atque ordine facturum putavi, si tam otii quàm negotii mei, etsi nihil tale poscenti, redderem rationem. Eoque animo mitto nunc novum ingenii, ac industriæ nostræ foetum. Idque eò lubentius, quia sacratu is florentissimæ genti vestræ, cui propter meritum tuum debebatur. Nec eò minùs adhuc maneo in nexu tuo, unde me exolvere nunquam potero. Sed, spero, tandem saltem mihi vita suppetet, donec gratum etiam posteris testari liceat affectum: de quo serio nunquam cogitare desistam. Multum gaudeo, quòd heroicà liberalitate ac munificentia tuâ nobile adeò munus obtigerit præstantissimo nostro Dorellario J. C. Deumque oro, ut optime hoc, cum ei, tum Academiæ Cantabrigiensi vertat. Et profectò ex viri ejus præclara doctrina ac virtutibus, quibus ex animo faveo, ita fore auguror. Vale Illustrissime Domine, nec noster modo, sed planè literarum ac literatorum Mecænas.

*Lugd. Batav.
clō loc xxvii.
vii. Id. Sextil.*

Illustrissimo nomini tuo æternam obligatissimus,

G. J. Vossius.

LXX.

*Clarissimo & eximio Viro D. Samueli
Wardo S. T. Doctori & Professori in
alma Academia Cantabrigiensi.*

Clarissime Domine Warde,

NOLI propter diutinum silentium putare, oblitum me suavissimi, ac doctissimi Colloquii tui, tum Dordrecht cum habiti, tum etiam Lugduni. Atque utinam occasio mihi antehac fuisset testandi gratum animum pro benevolentia tua, atque adeò omnium eorum, quos ad Synodum Dordrechtanam Magna Britannia miserat. Equidem meminero,

*Dum memor ipse mei, dum spiritus vos regit artus.
Itaque & nunc mitto ad te amoris nostri
pignus minutum, commentarios nostros de
Historicis*

Historicis Latinis. Atque eò id facio lubentius, quia fore spero, ut non iis modò operâ hac profuerimus, qui *τὰ ἱστορικὰ* tractant assiduò, sed etiam, quibus curâ est cognoscere Ecclesiæ Historiam. Nam probè scis, quanti referat nosse, qui res scripserint Ecclesiasticas, & quando, & quâ fide, atque alia quæ ad auctores ejusmodi pertineant. Itaque planè fore confido, ut si minùs tibi videar affectus, quod conabar, saltem probes voluntatem commodandi ejusmodi studiis juventutis.

Vale præstantissime Vir, & ne amicitia nos tuâ indignos censè, qui te propter egregias dotes maximi facimus.

Lugd. Bat. clò
Ibc xxvii. vii
Id. Sext.

Tuus ex animo,

G. J. Vossius.

LXXI.

*Generoso & eximie eruditionis Viro D.
Joanni Seldeno, J. C. Londinum.
S. P.*

Quod olim fecit Cornelius Nepos, vir tantopere à Catullo laudatus, ut scriberet de Historicis Latinis: idem nunc ego tentavi, viribus quidem ingenii ac doctrinæ Nepote longè inferior. Sed tamen alio nomine magis profuturus, quia licet præclarus ille Nepotis labor superesset, non tamen ultra sua tempora, hoc est, Augusti ævum, pertingere potuerit: ego verò historiam perduxerim usque ad tempora Caroli quinti. Quod ut facerem, evicit, non quidem laudum immensa cupido, ut ait ille, sed potius boni publici amor, qui me nunquam patitur cessare. Nec magnopere laboro de eo, quod commentationis nostræ lapides videbuntur minus politì, quod sponte agnosco: sed satis fore putavi, si etiam rudes ului esse possent, quare non ista modò qualiacunque in lucem dare, sed etiam ad te mittere ausus sum, Vir eximie. Cujus ego simulac aureum opus de diis Syris vidi, legere non contentus, etiam iteravi, atque tertiavi, semperque ex eo me inter tuos debitores sum professus. Atque hoc ipsum in causa est, cur nunc aliquod affectus mei testimonium mittam: quod eò, spero, gratus erit, quia id dicatum eximie nationi vestræ, cui me æternum fateor obstrictum. Ulterius quomè, vel hanc etiam operam meam tibi commendem, nihil, præter argumentum ipsum, occurret: quia tu quoque, scio, cultorem no-

minis tui minimè contemnes. Vale, Clarissime Seldene; nosque redamare ne grave duxeris.

Lugd. Batav. clò
Ibc xxvii vii. Id.
Sextiles.

Tuus totus sine fūco,

G. J. Vossius.

LXXII.

*Reverendis, Clarissimis, & multijugæ
eruditionis Viris, D. D. Matthæo &
Christophoro Wrennis, Serenissimæ
Regiæ Majestati Magnæ Britannix à
Sacris.*

Reverendi, & Clarissimi Viri, Nobile fratrum par,

Quotidie pene novum capio experimentum veteris dicti, quo amorem gigni aiunt similitudine studiorum. Quantopere quidem capiamini amore Ecclesiasticæ antiquitatis, ex Nobilissimo Dubletio nostro abundè intellexi. Qui & me, ut studiorum eorundem cultorem, propterea amari à vobis, non semel prædicavit. Ego verò vos, summi viri, non jam uno sed gemino nomine redamo, ut eorundem studiorum sectatores, atque ut amantes mei. Rogo, ut ne in affectu eo, etsi id minimè merear, persistere gravemini. Mitto ad vos genuinum exemplar operis novi de Historicis Latinis: quod si non ingratum fore intellexero, beneficio etiam me affectum planè arbitrabor. Addidi & exemplaria altera duo; quorum si unum Doctori Hieronymo Belo, alterum conjunctissimo affini meo Francisco Junio, transmittere non gravemini, magis etiam me obstrinxeritis vobis. Valetè Reverendi & summi Viri.

Lugd. Bat.
clò Ibc xxvii.

Utriusq; Vestri cultor atq;
amicus,

G. J. Vossius.

LXXIII.

*Clarissimo atque eximie eruditionis Viro,
D. Jodoco Rous Bibliothecæ Bodlei-
anæ præfeto. Oxonii.*

Vir Clarissime,

Nec summa doctrina tua, nec munus præclarum quod sustines, patiuntur te ignorari nostratum illis, qui Musas colunt severiores.

veriores. Atque ea me res impulit, ut munusculo literario animum testarer erga te meum. Mitto enim commentarios nostros de Historicis Latinis: quo in opere non mediocris mihi exhaustus est labor, nec minus fortasse superest. Multa enim limam tuam, tuique similium requirunt: nec operâ tuâ, aliorumque magnorum virorum, exigua ei accessio fieri possit à Bibliothecis gentis vestræ, Bodleianâ imprimis, cui præses. Utinam ita res meæ tulissent, ut tot præclaros Scriptores, quos ineditos hæctenus servat Britannia magna, coram ipse manu versare, & curiosis oculis lustrare potuissem. Equidem cœlum mihi digito attingere visus fuisset. Sed quia non potui, quod optabam, optare non desinam, quod fieri possit. Hoc est, ut è summis viris vestratibus intelligam, ubi opera mea claudicarit, quod quin sæpius contingerit, quàm vellem, nullus dubito. Verum spero ex te, Vir eximie, atque aliis præstantissimis Viris cognoscere licebit, vel indicta mihi, vel perperam dicta. Ipse editione alterâ non finam posteritatem nescire per quos profecerim. Id enim candore nostro præcipuè dignum arbitror: quippe qui non tam scriptis nostris velificemur honori nostro, ut ambitiosi solent, quàm omnia publico metiamur commodo. Imo, ut arbitror, sic sponte nos gloria, longèque eâ solidior consequetur. Quid enim pulchrius nobis, quàm si posteritas videat, quantis viris innotuerimus & quàm studiose eorum amicitiam ambierimus, nec id sine alio, quam amore virtutis doctrinæque. Vale, præstantissime Roufi, nec grave dixeris iis me accensere, qui te ob eximias animi dotes maximi faciunt.

Plurimâ te salute impertit Dubletius noster.

Lugduni Bat.
c15 Id. xxvii.
vii. Id. Sextil.

Tuus totus sine fūco,

G. J. Vossius.

LXXIV.

Constantino Huygenio.

Nobilissime, Amplissimeque Vir,

EX Athenæo nostro, vel si mavis, Musarum castris, mitto opus nostrum, non Mulivum quidem, ac tessellatum, sed Apollinare tamen; vel si hoc quoque nimium est, saltem exaratum, de illo genere, Apollinari virorum; quod panxerit res gestas,

magnaque ex parte Martialium virorum. Quod addo, ne importunè illud transmittere videar, ad Mavortia Castra vestra. Quamquam altero etiam nomine, tueri factum meum possim. Etsi enim apud paludatum Imperatorem nostrum, & tot sagatos Heroas, nihil nisi Mavortium audiat: tamen simulac tuus paulum esse coeperis, scio, te illas de Marte cogitationes, Musarum studiis, quasi fortem Falerum, Castaliis aquis temperare. Cujus ego rei conjecturam, non obscurè cēpi, ex iis quæ mihi retulit, deliciæ nostræ Barlæus. Quamobrem nec rogare jam sustineo, ut me ames, cum id sedulo facias, longè etiam, supra meritum meum. Potius illud oro, ut optimi consulas munusculum meum, minutum quidem, sed magni tamen affectus symbolon. Non meretur, quod verissimè, Veronenfis Poeta, de Nepotis sui chartis scribebat, doctis, Jupiter! & laboriosis. Nec enim ita insanio, ut apud tui similes, de doctrina jactare me, vel commendare nostra, velim; scio quam mihi curta sit supellex. Attamen propemodum censeo, competere commendationi nostræ, posterius illud Laboriosæ Elogium. Quod ne Afinis quidem invidetur, fin nobis, ne illud quidem relinquatur, iussero ego malignos adeo æstimatores, ætatem agere in simili senticeto, quo sentire tandem discant.

Vale, Nobilissime, doctissimeque vir; nisi jam nunc fortissime potius dicere debui; sed scio te, amantiolumi tui verba non exigere ad libellam.

Lugduni Bat.
c15 Id. xxvii.
Post. Eid.
Sextil.

Tuus sine fūco,

G. J. Vossius

LXXV.

Generoso Doctissimoque D. Gulielmo Boswello, amico optime de se merito.

Præstantissime D. Boswelle,

SÆpe observatur animo meo Illustrissimus Baro à Broock, Vir genere quidem & dignitate summus: sed in quo tamen virtus longè exsuperet fortunam, ut reverà in eo minimum sit, quod vulgo putatur maximum. Hujus erga me affectum, & iudicium de me præclarum, tute longe melius me nosti. Quare scio, nequiquam miraberis, si dixerò, seriò me sæpius cogitare quo pacto Viro huic dignissimo sanè, qui nunquam ignoretur, publicum grati animi testimonium offerre

offerre possim. Sed quia hactenus in tantâ occupationum mole præstare non potui, eos imitari proposui, qui creditoribus syngrophâ, quod debeant, obliquant. Nam & quid beneficii acceperim, ingenuè, ut decuit, agnosco: & quid ulterius cogitem, non obscurè indico. Utrumque hoc tribus, ut ita dicam, verbis, testatur præfatio operis ad Illustrissimum Buckinghamiæ Ducem. Commentarii ejusce exemplar quadruplex transmittito: unum Reverendissimo in Christo Patri Joanni Episcopo Lincolnienfi, alteram Illustrissimo Baroni à Broock, tibi verò tertium, quartum clarissimo Seldeno. Fore autem spero, ut quod paulo ante me Illustrissimo Baroni recepisse aiebam, id primâ occasione exsolvam, non tam summi ejus viri causâ, cujus honori nihil à me scriptione ullâ accedere potest, quàm ut animo meo quomodocunque satisfaciam. Hæc familiariter ad te scribenda existimavi, doctissime Boswelle, Tu nos porro ama, & illustrissimi Baronis amorem erga nos deinceps etiam, quantum in te est, fove. Nihil mihi gratius facere possis. Vale.

cl. Id. xxvii. xxv.
Jul. Kal. Sextil.

LXXVI.

Clarissimo & summæ eruditionis viro, D. Hieronymo Belo, S. T. Doctori, & aulæ Pembrochianæ Præfecto. Cantabrig.

Clarissime Domine Bele,

Omnes quidem eos maximo prosequor amore, qui literarum studiis excellunt; nullos tamen æquè æstimare soleo, quàm qui Ecclesiasticæ etiam antiquitatis sunt callentes: quales in tristi hoc religionis dissidio impensius paci concordiaque Ecclesiæ consulere & possunt, & solent. Quo sanè quid utilius hoc tempore præsertim in tanto eorum numero, qui antiquitatis contemptu nova dogmata vel fingunt vel foveant. Tibi verò, ut ex Nobilissimo & utriusque nostri amantissimo Georgio Dubletio intellexi, antiquitas studio semper ac cordi fuit, ac me quoque, quia ejus capiar incredibili amore, majoris propterea facere soles. Utrumque hoc tui etiam in me amorem longe maximum accendit: quem nunc cum aliter non possem, leviculo industria nostræ monumento testandum putavi. Tu, vir Clarissime, quicquid hoc

est opellæ boni consule, nec tam munus spectâ, quam animum donantis. Vale.

Lugd. Bar. cl. Id. xxvii. vii
Id. Sextil.

*Tuus sine furo ac fallaciis,
more majorum,*

G. J. Vossius.

LXXVII.

Abrahamo Vander Merio, Senatori. Hagam.

Amplissime vir, Cognate Ornatissime,

Quæ synodo antè triennium promiseram, ea jam ante menses xx. atque ultra sum executus, sed opus in quo id egi, (dico autem commentarios meos de Historicis Latinis) usque adeo spissè processit, ut demùm, post mensem, in lucem prodire possit. Quid mirum, cum in eo agam, de Historicis amplius, quàm mille sexcentis? Proderit is labor meus, non solum Literarum bonarum, aut prudentiæ civilis studiosis; sed omnibus etiam, qui cum Theologia conjungunt Antiquitatem Ecclesiasticam. Locus de quo dixeram, est operis hujus pag. 213. Ubi multa brevissimè sum complexus. Nam clarè rejicio sententiam Cassiani, qui Semi-Pelagianorum Princeps habitus. Clarè subscribo Augustino, Prosperoque, qui & Pelagianis, & Semi-Pelagianis fortissimè restiterunt. Et ne videar eorum sententiam aliter capere, quam oportet, clarè addo, me ita eos intelligere, ut dicant, prædestinationem esse, fidem & perseverantiam priorem, h. e. ut Prædestinatio sit causa, fides & perseverantia sint prædestinationis fructus. Et quia mihi sæpè objectum de Historia à me edita super controversiis, quæ Ecclesiæ cum Pelagio, & Semi-Pelagianis fuerunt; eo non dubitavi addere, haud assequi sententiam meam, si qui putent illa quæ opere eo attuli, de quatuor primorum seculorum sententia, adversari Augustini sententiæ, ante memoratæ: quippe plus eum dicere quàm priores, non contrarium. Denique promitto ibidem, me per occasionem aliquando fusiùs de istis tractaturum. Priusquam hunc locum prælo subjecerem, monstravi eum singulis facultatis Theologicæ Professoribus: Quibus abundè satisfeci. Unus Walæus putabat, ubi scripseram, *Tanquam impie vel falsæ, rectius scripturum, Vel etiam falsæ.* Itaque eo Authore, etiam adjeci, scio me satisfecisse omnibus bonis. Nam & Ecclesiasticis compluribus domi meæ verba illa prælegi. Siquis tamen ita animatus sit, ut

nunc

nunc quoque nodum in scirpo quærat, non tam ille mihi crucem figet, quam animi sui ulcus prodet. Cæterum perhæsto in sententia, non satis ex honore meo fore, si cogar, priusquam opus meum in omnium manus venerit, ostendere pagellas, quibus præsto, quod receperam. Is enim sum, cui fides dicenti debeat haberi. Et ex facultate Theologica potuere rem omnem cognoscere, si quibus adhuc scrupulus ullus foret. Verum tamen si omnino ita necesse erit, non impedio quominus iis pagellæ illæ monstrentur, quibus videbitur. Locutus sum de re tota, cum D. Henrico Fabricio, viro præstantissimo, & integerrimo, quem Classis Leidenfis ad Synodum mittit. Is nec ipse existimabat, temerè eas esse promendas. Sed permisi, ut si omnino opus sit, eas à te pagellas petat. Committo negotium omne, prudentiæ utriusque vestri. Plura vellem, sed ne sacram concionem negligam, malo abrumper. Scripti celerimè. Nec relegendi otium erat. Tu pro benignitate animi tui, si quid hic culpæ fuerit, facile condonabis. Salutem optimæ Conjugi tuæ, & ubi Dordrechtum vineris, affini præstantissimo Jac. Wittio quæstori, simulque uxori ejus.

iv. Jul.
1627.

Tuus totus,

G. J. Vossius.

LXXVIII.

Abrahâmo Vander Merio, *Senatori.*
Hagam.

Vir Amplissime, cognate Optime, & Amicissime,

DE Hadriano Imp. legimus, quoties à Poetis versus afferentur, eos versiculis suis remunerari solitum. Ac placuit exemplum, Pio II. qui antea vocatus Æneas Sylvius Piccolominæus. Ejus illud circumfertur.

*Discite pro numeris, numeros sperare Poetæ.
Mutare est animus carmina, non emere.*

Quamquam Vossius tuus, nec est Cæsar, nec Papa, tamen (vide quos spiritus gerat) decretum ei, utriusque vestigiis insistere. Itaque pro versibus, versiculos mittit, ut sit hostimentum par pari. Dices non tam versus te expectasse, quam judicium meum, de dubiis, ut Grammaticorum filiis ea visum nuncupare. Age igitur, si ita placitum, sit hoc opellæ nostræ poeticæ Mantissa, vel Corollarium. Ego interim Cathedram Gramma-

ticam ascendo, & te Auditore, vel Lectore uno, contentus (etiam Antimacho unus auditor Plato suffecit, qui erat ei instar omnium) de dubiis istis, non dubiam feram sententiam. Faciamque id (si ita cum Lovaniensibus Magistris loqui fas sit) magistraliter. Quidni enim mihi id per te liceat, qui longè etiam majora mihi permittis? Quare in rem ipsam venio. Tu Amplissime Senator, togam compone, & Grammaticum hominem audi contendentem, non in vestro illo, sed foro suo. Primum igitur aio, fuscillis quædam ex dubiis istis proculdubio expelli debere. Nec ignoro, quo tibicine vulgus fulciat opinionem suam. Sed tibicen iste est ficulnus, ut non possit non labare, quicquid imponas. Nam de *Natrix* fefellit Grammatico, Lucani locus. In *Aleyon* decepit Servius. In *fiens* pro fructu imposuit Martialis locus malè intellectus. Muliebri enim genere usurpant Celsus, Plinius, rei rusticæ scriptores, & quicquid Classicorum est uspiam Authorum. *Camelus* Græcis quidem foemininum est, Latinis nunquam. De *Pharus* etiam sitne dubium, planè dubium est, atque incertum. Tutius saltem in muliebri genere usurpes. *Pulvis* vix inter dubia reponi meretur. Sed hoc tamen non acriter ducere velim feram cum quoquam. Hui, inquires, si tam multa ex versibus hæc expellantur in Morboniam, in arctas admodum copias cogentur dubia. Mane vir præstantissime, nos in eorum locum quos fugavimus, novos succenturiabimus. Erunt autem isti *Varix*, *Sandix*, *Onyx*, *Sardonix*, *Canalis*, *Volucris*, *Ales*, *Palumbes*, *Arrabo*, *Bubo*. Vides quàm multi, ut periculum non sit, ne armis expellantur inde, quo à me deducti. Multoque minus laborabunt, si jure vestro contendatur. Quamquam profecto ita aperta est hæc causa, judicio meo, ut minimè metuendum sit, ne priores isti, quos expulimus ex interdicto, unde vi, restitui postulent. Causa ista perorata, ut ego quidem censeo, venio ad iudicium quod poscis. De Steuchio Eugubino equidem ita judico, malè eum mereri de Religione Christiana, quando mysteria ejus cognita fuisse docet, Antiquis Gentium Philosophis, imprimis Platoni: atque hoc ut persuasum eat, planè aliovorsum torquet verba ejus, quàm Philosophus ille senserat. Nec magis probo, quod ea stabilire conatur, ex Trismegisto, ac Sibyllinis Oraculis: ubi multò apertius arcana Religionis proponuntur, quàm in Prophetarum Vaticiniis. Atqui quis nescit ea tempora, quæ *ἐνανδραπέων* sospitatoris nostri præcedunt, ab Apostolo ipso nominari, *χρῆνός ἀγνοίας*; aut quem fugit *ἐνανδραπέων*, eidem dici *μυστήριον Σατανᾶς καὶ τῶν ἀγγέλων*.

ἡ δὲ αἰσῶν ἐν τοῖς θεοῖς; Quibus gemina & alia in scripturis leguntur. Nec ignoro, quæ ab Hieronymo Floravantio, Lib. III. de beatissima Trinitate, cap. 1. adferantur, ut doceat Trinitatis mysterium, aliquo modo gentibus fuisse cognitum. Sed ille eadem ac Eugubinus chorda oberrat. Hoc est vel genuinis Gentilium scriptis, falsam affingit sententiam, vel scripta *κατολισμῶν* ac supposititia habet pro genuinis. Mihi neutrum placet. Nec enim veritas coelestis, quæ est à Christo, & Spiritu ejus, indiget mendacio, quod Patrem habet Diabolum. At Platonicos non id voluisse, quod Eugubinus putavit, nemo negabit, qui in Platone cum judicio fuerit versatus. Trismegistum autem, & Sibyllina, ut vocant Oracula, esse supposititia, & res clamat, & dictio ipsa arguit. Quod ego pluribus demonstrarem hoc loco, nisi inter alios, luculentè id fecisset Casaubonus, exercitatione prima ad apparatus Annalium Baronii. Nec nescivit hoc Magnus Civis tuus, qui brevissimè nuper pro veritate Religionis Christianæ commentariolum edidit, sanè hoc seculo potissimum, quo omnia ad *ἀδύρκα* vergunt, perutilem eoque utiliorem, quod quantum hæcenus potui videre, scopulos effugerit, in quos priores impegere: Nam segregavit ille argumenta ista, quibus mysteria nostra Religionis, non sine aperto mendacio probarentur. Præterea Religio est ei, quod debemus Spiritui Sancto, & Prophetis ac Apostolis, id acceptum ferre lumini Naturæ, & cæcarum gentium lacunis. Quod parùm religiosè fecit Steuchus, & cum eo alii nonnulli. Ad duo tantum capita Epistolæ tuæ respondi: Et vides jam in tantum literas hæc excrevisse. Quid futurum est, si de cæteris, etiam quid sentiam, attexam? Sed de iis, vel coram, vel literis alteris videro. Tu, Amplissime vir, loquacitatem meam boni consule. Salutem conjugii tuæ. Desidero scire, an planè jam valetudini suæ restituta sit forcrus tua *ἡ ἀγυῖα σου*. Quare quando otium est rescribendi, velim verbum de hoc at-texas. Multam etiam salutem Senatus vestri Præfidi, ac Curatori Academiæ nostro Cromhoutio.

Lugd. Batav.
clō Idc xxvii.
xiii. Kal. De-
cembris.

Tuus sine fūco,

G. J. Vossius.

LXXIX.

Gerardus Vossius Hugoni Grotio S. P.

TAndem, maxime, & amicissime vir, prodit in lucem historia mea, de Historicis Latinis; cujus exemplar nunc mitto: quod licet nihil elucubrari subtili tuo judicio dignum, tamen, quia meum est, placitum confido. Si ausus fuisssem ulterius onerare conjugem tuam, addidisssem codicem alterum ad Salmasium. Sed fiet id per Lamerium, qui Gallias cogitat. Simul aliquid ad eum literularum addam. Dicere vix possum, quantoperè sim sermone, & literis multorum fatigatus, ut tuerer honorem foceri adversus Thuanum. Et diatribam super eo seorsim postularunt. Mihi etiam impensè honori Juniano studuerim semper, res tamen ea tanti visæ non est. Quare satis fore putavi, si id fieret præfatione altera operis nostri, quæ est ad Lectorem. Ita autem respondeo, ut salvo foceri honore, modestius potuerit nemo: idem scio judicabis ipse ubi videris. Movere me non solum magna Thuanani merita, sed etiam quod filium ejus viderem tantopere à te amari: quem scirem nihil immeritò magni facere, præter me unum. Sanè hic erga nobilissimum juvenem, amor tuus tanti apud me fuit, ut vel acerbius aliquid tam multorum assiduo impulsu cogitantem, facile posset sufflaminare. Acrius paulo insurrexi adversus Scaligerum, quia edoctus essem ab eo fonte esse, quod pleraque de Junio Thuanus hauisset: Ut idem faciebant multa. Memor eram, qualia superstes evomuerit adversus Junium, cum totus in fermento jaceret. Et meminisse ipse potes. Adhuc in nostris, & aliorum manibus versantur codices Juniani, Scaligeri manu op-pleti bellis illis elogiis, simia, asinus, cojone, & aliis id genus convitiis, *καυωλόγημα*, non Scaligero dignis: Et hocce anno Heinsius noster in lucem edidit Epistolas Scaligeri, in quibus non urbanatim, sed rusticatim Junium tanquam Cumanum asinum tangit, homo cætera magnus, sed nimis malignus, nec ita animatus, ut se etiam hominem esse cogitaret. Vellem Heinsius periodos eas, in quibus de Junio Scaliger loqueretur, imò totas Epistolas omisisset. Nunc Asteriscum ponere fuit contentus: interim relinquit, ubi dicatur edidisse notas in Cypriani Magistrum, contulisse Manilium cum MSS. codicibus Palatinis, aliaque id genus: quasi multum intersit, utrum dicam Sophronisci filium, an Socratem; Trojani belli Scriptorem, an Homerum. Equidem vellem hanc mihi necessitatem respondendi

Q

spondendi non imposuisset Heinſius. Et tamen ita reſpondeo, ut qui neſciat hocce anno editas apud nos eſſe Scaligeri Epiſtolas, neſcire etiam poſſit per eum, cujus me nomen dico parcere velle, intelligi Scaligerum. Nempe tum demum nomino, cum ejus de Junio epicedium reſero: Iccirco tandem ſubjungo *aliqui de Epiſtolis preſtantes viro, ſive diſti ſive adhuc innominati vobis*. Nempe innominati, ubi calumniæ reum ago. At nominati honorificè, ubi ejus de Junio elogium commemoro. Summa autem deſenſionis noſtræ eò reſcit, dicere potuiſſe Junium de Criticis ſuis, & aliis ſimilis monere, illud Arellii Fuſci, ne quis me ex his cenſeat. Dicavi opus meum Illuſtriſſimo Buckinghami Duci; nempe ut Cancellario Academiæ Cantabrigiæ, ad quam honorificè vocatus eſſem; ſimul ut teſtaret affectum meum erga gentem eam, in qua tot mei amantes haberem. Diſplicebit fortasſe nonnullis apud vos laudatio ducis: ſed ſcripta hæc à nobis, priuſquam fama increbuiſſet belli Anglicani adverſus Gallos. Nec ad ſimiles mei, innocuos Muſarum Cultores, judicium pertinet, utrius regni cauſa hoc in bello potior ſit. Equidem opto, ut genti utrique bene vortat, eſſi id fieri quo pacto poſſet, minimè videam. Excufus jam liber tuus de Religionis Chriſtianæ Veritate. Quem cum lego in cœleſti cenaculo cum Diſ mihi epulari videor. Ut quam correctiſſimè ederetur curavi, ut potui & debui. Sed cum ſemel Ultrajectum, iterum mihi Hagam excurrendum eſſet, nec perſuadere poſſem Typothetis, ut abſente me, alia prælo ſubjicerent, filiis curam committere ſum coactus. Ita factum ut tribus quatuorve pagellis, quædam compareant negligentibus edita, ea imprimis, unde errorem ſpiſſum ad calcem annotavi. Fragmenta illa, quæ in rutis cæſis tragicorum comparent, ſperavi propediem poſſe recudi. Sed nihil hætenus æquè obſtitit, quam quod talia à paucis legantur: quippe, ſi *quædam* pauca exceperis, ejuſmodi ſunt omnia, ut nihil inde commodi referant alii, quam penitioris literaturæ amantes, quos Grammaticos vocamus. Sed tamen quia jam finem ſuum Hiſtoria noſtra habet, hæc etiam curam ſuſcipere animus eſt; nec urgere Lamerium deſinam qui moras ſemper neſcit, neque id alia de cauſa, quam quia non facile Seneca cum fragmentis inveniat emptorem, ob molem tot Criticorum, qui nihil annotarint, quod ſit ad vulgi guſtum. Quod ad duos tres, ut cum Varrone dicam, phreneticos Septentrionis filios, quibus moris magnas ciere tempeſtates, ſi quis non per omnia eorum ſequatur opinionem velut *uxoriam* mihi quidem nunc aliquan-

to pacis amplius, atque opto, ut æternum eos Æolus compeſcat. Vir Clar. Janus Gruterus in Academiam Groningæ, & Omlandæ vocatus eſt, ut ibi ſuccedat Ubboni Emmio. Venturum ſpero, non tantum quis is vir eſt, qui, ut de Mario M. Ciceronis, *ſcavola veſter dicebat, Canefcet ſeculis innumera bilibus*: verum etiam quia affinitate eſt uxori meæ junctiſſimus, & mei amantiſſimus. Filius meus Franciſcus præclarum opus tuum de jure Belli propè ad unguem callet. Et quid ei, quem juris ſtudio deſtinavi, melius commendaviſſem? Memini enim me apud Tullium legere in primo de Legg. ex intima Philoſophia diſciplinam juris hauriri oportere. Id quidem comprobaviſſe mihi primus videris. Scire deſidero, quid poſt hunc laborem, & gnomarum opus geminum, verum ſapientiæ Theſaurum, publici juris facere cogites. Vale, & à me, uxore, & familia omni ſalve plurimum.

Lugd. Batav.
clō 19c xxvii.
x. Kal. Sepr.

Tuus æternum,

G. J. Voſſius.

LXXX.

Gerardus Voſſius Hugoni Grotio S. P.

Magnifice, Clariffimeq; domine; Abbotius in Apocalypſi nec in officinarum pergulis, nec in amicorum Bibliothecis compareret. Si ſcripſit, Angliè ſcripſerit credo, de quo certiora dicere poſſet affinis Junius. Habeo Abbotium de Antichriſto: quem an volueris non ſat ſcio: ſed tamen mittere volui. De reformatione Colonienſis Archiepiſcopi ſapius à me Bertius eſt compellatus: ſed habere negat, ac vel ad Hogerbetium vel Utenbogartium remittit. Quorum illum, ſimul ac Haga redierit, compellabo. Reſponſum Junii ad quæſtionem, num arma ad Religionis deſenſionem à ſubditis ſuſcipi poſſit, inter ea fuit, quæ ex ore ex tempore diſtantis domi ſunt excepta. Habui ea prope univerſa, ſed una cum pulviſculo omnia in Friſiam abſtulit affinis Calimirus, hoc ſine, ut aiebat, ut cum ſuis conferret, & ſi non inconſultum Juniani nominis amantiſſimus videretur, ederet in lucem. Sed antequam tu, Ampliſſime vir, ejus reſponſi apud me mentionem feciſſes, cognoveram ex Codæo, hoc reſponſum in ſchedis ſuis habere. Ergo quamprimùm conveni: cui ut poſtulatam tuam expoſui, lubentiſſimè ſe communicaturum reſpondit. Sed poſt horas duas

duas rediens, invenire posse negat, & cum inter chartas deesse aliquas cognoscat, metuere ne jam diu sit, quod alteri dederit legendas, atque in iis etiam sit hoc responsum. Corvinus non arbitratur exstare apud suorum quemquam. Ita vides, ut non defuerit animus morem gerendi tibi, sed nihil effecerim, quo nomine doleo. Quod in Anglicanis tardè aded procedatur, partim Bertius in causa fuit, qui hesternâ demum die, triplicis Ordinum decreti translationem ad me tulit, partim Amanuensis, industrius quidem Adolefcens, sed qui ab excipiendis, & cum schedis commilitonum conferendis Episcopi Lectionibus, quas auro, contra caras non putat, ægrè avelatur. Jam tamen unum exemplar habemus. Et his feriis natalitiis, totum se his describendis dabit, nihil orsurus priusquam telam istam pertexerit. Corvini librum, quia occasio erat, mitto. Scio tamen carere eo potuisse, usque dum Anglicana sint scripta. Id intra triduum aut quatrimum fore spero. Simul tum mittam Historiæ nostræ Pelagianæ Librum quintum, qui est de prædestinatione. Nam penè jam descriptus est. Sextus erit de reprobatione: cujus appendicula est de causa Godescalci. Eam licet necdum relectam, ad te mitto. Spero non ingratum fore, quando hæcenus rectè tractata est à nemine. Si non displicet tibi Liber primus operis, qui est *εἰσαγωγικός*, statim à Kal. Januariis poterit prælo committi. Scis lentas esse operas. Ego quia jam opus omne absolvi, minus temporis in excubando requiram, quam illi in excudendo. Vale, Amplissime Domine. Uxori salutem maximam.

xxii. Decemb.
cdo loc xvii.

Tuus totus,

G. J. Vossius.

LXXXI.

Reverendissimo in Christo Patri Gulielmo Bathonenſi & Wellenſi Episcopo.

Reverendissime in Christo Pater,

SI in equis, generosioribus quidem illis, at mutistamen animantibus, ita usu venit, ut in certaminibus applausu, & quasi gratulatione adstantium ad velocius currendum incitentur: quid fieri hominibus putemus, iis præsertim, qui in studio virtutis industriæque pro viribus bene mereri contendunt de literis studiisque. Ecquid de me illud dicere habeo, geminis Reverendissimæ dignitatis tuæ literis amorem favoremque summum

spirantibus, posterioribus etiam indicium facientibus de præclaro Illustrissimi Ducis affectu erga me, licet immerentem, stimulos mihi subditos esse acerrimos, ad porro gnæviter insistendam, quam calco hæcenus, honestissimi laboris viam. Hoc cum per se magnum esset: non tamen hic felicitas mea stetit: Sed cum summi beneficii loco habendum ab alio, ac meipso etiam, foret, si Illustrissimus Dux supplicanti solum benignas præberet aures: nunc quod tanto majus est, sponte etiam per Reverendissimam dignitatem tuam, exquirere non est dedignatus, quo pacto Celsitudinem suam hoc tempore bene mereri de me posse arbitraret. Quo nomine nunc digitis mihi cælum videor attingere. Ut qui nihil post virtutem ipsam majus unquam putârim, quàm placere posse Principibus viris, & summis Ecclesiarum antistitibus: quos virtus ipsa constituisset, quasi agonothetas suos, videtur. Quare, ut dixi, hoc nomine plurimum gaudeo, aut verius triumpho. Non tamen factum à me quicquam puto, quo affectum ejusmodi sim promeritus, cum heroicæ Illustrissimi Ducis virtutes, quicquid ab umbraticorum hominum studiis proficisci potest, albis, quod dicitur, quadrigis, vel amplius etiam, excedant. Quin potius metuendum mihi fuit, ne id, quale quale est, negligendo, iratam prope virtutem habiturus mihi viderem. Quamobrem etsi haut aded cornea mihi fibra est, ut non sentiam, quantum heroicus Illustrissimi Ducis animus possit: neque fortunæ mei, aut meorum hujuscemodi sunt, ut optatissimam hæc occasionem sine summa imprudentiæ nota negligere debeam: tamen ita existimo, nec esse modestiæ meæ eligere quasi præmii genus, ubi nullum mihi deberi putem, sed nudo tanti ducis affectu abundè sim remuneratus: nec siquid excelsa mens ulterius velit, usque aded cæcutio, ut non videam, ipsum Illustrissimum Ducem pro benigna Celsitudinis suæ prudentia, & benevolis Reverentiæ tuæ consiliis quid in rem meam & meorum sit, longè melius perspicere & posse & velle, quàm mei ordinis ulli etiam in rebus suis cernere valeant. Nihil igitur mihi superesse video, quàm ut quàm maximè me commendem Reverentiæ tuæ, Deumque votis supplicibus orem, ut perpetuum esse velit hunc erga me affectum Illustrissimi Ducis: cujus honori & obsequio, simulque etiam tuo, Reverendissime Pater, quicquid vitæ largietur Deus, deinceps decurret. Idem supremum illud numen rogo, quantum possum, ut & Illustrissimum Ducem, & Reverendissimam dignitatem tuam, non modò Britannicæ suæ, sed etiam devotissimo huic cultori

Q²

diu

diu confervet incolumes: ac mihi quoque eas
confervet vires, ut ne tam præclarè pro me-
ritis unquam videar ingratus.

Lugd. Bat. c. 10 Dec.
xxviii. x Kal. Feb.
postidie nempe,
quam reddita
mihi essent ac-
ceptissimæ illæ
Reverentiæ tuæ
litæ.

Reverendissimi Nominis tui

cultor devotissimus,

G. J. Vossius.

LXXXII.

Reverendissimo in Christo Patri, Georgio Cicestriensi, Episcopo.

Reverendissime in Christo Pater,

Inter felicissimos viros meæ diæ, quales la-
pillo signare atbò antiquitas consuevit,
non postremum tribuere iis locum soleo,
quibus Reverentiam tuam, & præstantes
gentis vestræ Theologos, unâ tecum ad Syn-
nodum legatos, videre & affari mihi datum
fuit; Dordrechtî primum, mox iterum Lug-
duni. Exinde mihi sæpe in animo, sæpe in
ore, eruditissimi illi sermones, quibus me,
mensâ dignati, beare voluistis; nec doctissi-
mi illi modò, sed non minori etiam huma-
nitate conditi: quippe quam tunc expertus
erga me sim planè singularem. Horum me-
moria mihi literas Reverentiæ tuæ, longè
acceptissimas per sese, multò etiam gratiores
reddidit jucundioresque. Equidem avidè
cas hausi, nec legissè eas suffecit, iterum ite-
rùmque relegi. Et animadverto, tanti viri
affectu erga me, magis etiam me inflammari
ad bene merendum de studiis literarum.
Nempe, quod vulgò aiunt, laudatam crescere
virtutem, id in me quoque locum habere
sentio; atque hoc etiam nomine plurimum
tibi debeo, & deinceps etiam debebunt studia
nostra. Nam quem non apprimè delectet,
si, & amari se, & alicujus fieri intelligat ab
viro in summa dignitate constituto, & maxi-
mis animi dotibus dignitatem istiusmodi
multùm exsuperanti? Quæ quanto magis
cogito, tanto magis mihi operam dandam
judico, ut affectum hunc mihi semper con-
servem, atque adeo etiam, si fieri possit, au-
geam: quod scio non aliter me consequi
posse, quàm si memet vincere coner, in hoc
vitæ instituto. Hunc animum non potui,
quin tribus nunc verbis prescriberem. Nu-
dius tertius demùm Reverentiæ tuæ literas

accepi. Interea Hagæ, partim ab occupationibus, partim ab amicis detentus sum. Nunc autem Lugdunum subito vocor. Nec ventus minus in Angliam vocat nobilissimum Dudleium Carletonum, quem sine meis literis ad Reverentiam tuam venire nefas putavi. De Baronio, & Pelagii patria, nunc nihil addo: quia volo, ut simulac Lugdunum rediero, inde alterum mihi furgat literarum argumentum. Deus Opt. Max. Reverendissimam dignitatem tuam diutissime Ecclesiæ suæ salvam ac sospitem fervet: nec Ecclesiæ modò, sed etiam mihi, qui, quantum possum, elaborabo, ut ne nunquam affectu & obsequio cuiquam eorum videar cefisse, qui inter devotos cultores Reverendissimi tui nominis, nomen profiteantur suum.

Hagæ Comitib.
M D CXXVIII.
vii Kal. Febr.

Reverendissimi nominis tui
cultor obstrictissimus,

G. I. Vossius.

LXXIII.

Clarissime Salmasi,

JAM quadriennium est, quod me donasti
Commentario tuo in Tertullianum de
Pallio, nobili & victuro, ut omnia tua,
opere: pro quo gratias habeo, quantas pos-
sum. Nunc vero longo adeo post intervallo
ausus sum mittere ἀντίκτιστον, historiam no-
stram de Historicis Latinis; opus tanto, ut
ego censeo, minus bonitate, si cum tuo com-
paretur, quanto mole exsuperat. Sed si pa-
ginarum numero vincimus, jam non omni
ex parte superamur. Vide, & ride, Vir
summe, quod mea sic, & serib, commen-
dem. Sed utcuq; hanc insistam viam
apud te, & paucos alios, qui ad summa evo-
lâstis; plus tamen animi ac spiritus scito
mihi esse apud homines mediocres, ac præ-
cipue rudem juventutem: cui de longe me-
liori nota mea videor posse commendare.
Nam profecto est aliquid ei digitorum inten-
disse ad fontes, unde hauritur noticia omnis
ævi. Quocirca nondum poenitet instituti:
præsertim quando video quotidie in hoc ar-
gumento etiam eos Saturnias lippire lemas,
qui sibi, & pene sui ordinis cunctis quantivis
pretii videntur. Qualis, inter sexcentos, est
nuperus Editor Opusculi, quod Auctorem
habet Gennadium Scholarium, Patriarcham
Constantinopolitanum, atque inscribitur, ὁ
ἐκ τῶν ἐκ τοῦ Πάτριου ἀποσπασθῆναι. Academiae istae Juliae
Theo-

Theologus, agnoscit Scriptorem eum vixisse temporibus Joannis Palæologi, idque anno **CLXXXXXXX**. variasque ad Turcam Legationes obisse: atque inde esse, quod dissertationem hanc de Trinitate cum Amurathe Turca habitam, in Literas retulerit. Sed idem (en cor hominis!) vitam ejus nobis describit è Gennadio Massiliensi, qui Libro de Scriptoribus Ecclesiasticis agit de quodam Gennadio Constantinopolitano, qui Leonis Imperatoris temporibus claruerit. Quid fortius in erudito Theologo hac *divisenda*; Gennadius Massiliensis, ut nos opere hoc statuimus, & omnes mediocriter docti sciunt, circa annum vixerit quingentesimum? Quomodo igitur Gennadius, de quo ille tractat, idem sit ac is, quem Theologus ille intra ducentos hosce annos claruisse ipse agnoscit. Non erant tales digni, quorum ratio haberetur, nisi tam multi horum similes invenirentur, qui alios omnes ad palatum ac genium suum sapere jubent. Quod equidem malo meo non semel sum expertus. Sed fortasse, qui alios culpo, culpâ ipse non vaco, seu ea quæ de ætate Historicorum prodidi, seu alia ad eos pertinentia consideremus. Sane hominem esse me, non diffiteor; & quia ex aliena infirmitate de mea facio conjecturam, Opus hoc meum ad te, Vir summe, & alios aliquot eximii nominis viros mitto. Nimirum fore spero, ut ita multa, quæ me fugere, edocear; à te inter primos, qui tot bona me docuisti, cum aliis scriptis tuis aureis, tum maxime Commentario in Historiæ Augustæ scriptores non semel mihi in Historia nostra laudato, nec unquam satis laudando, quippe omni laude majori: ac in quo verè locum habuerit, quod de Ludis olim secularibus dictum, eo quidem in genere simile nec vidisse, nec visurum quempiam. Ex iis verò quæ ad Tertullianum adnotasti, video difficile esse dispicere, utrum in gentium Scriptoribus plus possis, an Sacris: Quare utinam in hoc Ecclesiæ ductore, quo pede coepisti, pergas. Ad quem emaculandum atque illustrandum mihi natus videris. Quod de nemine homine præter te dixero. Unus enim præstare illud potes, quod verius conati adhuc alii, quam affecti. Iterum igitur opto & rogo, ut huc potissimum ingenium intendas. Habent quidem gentium Scriptores, atque universa Musarum studia, *divisenda* quiddam. Neque insignem esse eorum utilitatem negare possum. Sed tamen quis bonus non malit, ut tale ingenium, & illa Eruditione, in Ecclesiasticis potius Scriptoribus, iisque antiquissimis, & corrigendis & illustrandis operam infumat suam? Non quasi adhorter, ut *divisenda* Musas deferat, sed ut

deinceps illas remissus, hæc meliores notitas impensius colas, uti facere jam serio aggressus es. Tibi inde Lux major, amicis summa lætitia, omnibus fructus uberrimus. Vive, & vale literarum pereuntium Vindex præstantissime, cui si mea utcumque probare potero, felicem me putabo. Nihil enim malo, quam diligi à Salmasio, hoc est interiorum Literarum nostri seculi Principe. Cujus si præsentia frui liceret, multum me adjutum iri posse confido. Habent quidem & aliæ terræ viros eruditos atque eximios; sed de interioribus nostris literis loquor. Quare lucente sole cur quærerem stellas. Iterum vale.

Lugduni Bat.
cl b c xxviii.

Tuus sine fado,

G. J. Vossius.

LXXXIV.

Gulielmo Episcopo Bathoniensi &
Wellensi.

Reverendissime in Christo Pater, Domine æternam
mihi omni Officio colende.

Simulac literas Reverendissimi nominis tui legi, totus ob infortunium tuum expalui atque exhorui. Nec casus ille minus animum meum perculit, quam si meus foret. Debebam dicere, & verè poteram, magis affectis. Sed semper existimavi operam dandam esse, non modò ne quid aurius demus, sed etiam nequid dare videamur. Et tamen, quis dubitat, quin qui boni viri & prudentis, qualium protecta non est larga nimis seges, jure nomen possidere velit, is alienam salutem præponere suæ debeat, quando in alterius salute salutis publica magis laborat. Quid ergò me facere æquum erat, qui & te colerem ut communem Ecclesiæ parentem, & me inter eos meritò reponerem, quos singulari amore, ut pater filium, prosequaris? Quare assidue Deo vota facere non cesso, ut pristinas Reverentiæ tuæ vires reddat: tamen difficile dixerim quantam in hoc ipso dolore ceperim voluptatem ex tam manifestis certissimis erga me amoris signis. O felicia scripta mea, quæ sic beent autorem! Nam quid bonum aut magnum æquè censere in hac vita possim, ac si à bonis & magnis viris & laudari & amari contingat? Laudari jucundum est, sed jucundius amari. Quæ scripseram, etsi nihil ejusmodi mererentur, tamen utrumque mihi contulerunt. Nescipe vis studiis honorem esse, quod verè est seculum corrigere. Nunc illa me urget citra,

ne videar ingratus. Etsi autem quod rependam non habeo, imo nec verba reperiam, quibus me satis gratum ostendam: tamen si placere potuit prior labor noster, non despero me & alia non minora offerre posse Famæ ac Æternitati nominis tui propriis virtutibus in omnia secula ituri. Atque ut ex parte videas, quid rerum agam, mitto Syllogen veterum disputationum mearum, mutilam quidem illam & imperfectam (nam major pars adhuc inedita est) sed decretum & quæ vides auctiora, & addere ea, quæ adhuc in Schedis nostris latitant. Nempe volumine uno complectar, quæ ad Sacramentarium negotium pertinent. Alio quæ spectant statum animæ post mortem. Et ita porro in aliis. De Baronio quid moliar seorsim alteris exponam, idque ut non tantum consilii mei rationem explicem; sed etiam, quid Reverendissimo nomini tuo videatur, intelligere possim. Nunc hoc solum dicam, non tam visum esse minutias confectari, quam illa, ubi cardo rei potissimum vertitur. Uti illa imprimis, in quibus longius à primitiva Ecclesia recessit Romana. Etiam evolare gestiunt commentarii mei de Lingua Latina; cujus pars posterior origines ejusce linguæ ex Græcia & Oriente repetit, multaq; ex veteribus Scriptoribus, aut corrigit aut illustrat. Sed de his, & aliis quibusdam, pluribus alias agam. Interim me meaque Reverendissimo nomini tuo in cultum & obsequium perenne offero & transcribo. Deumq; Optimum Max. supplex precibus oro, tum ut Dominum meum Illustriss. Ducem Buckinghamiæ spiritu suo roboret, consiliaque ejus prosperet, Britannię totius bono, tum ut Reverendissimo tuo nomini cœlesti suâ gratiâ magis magisque adsit, corporique non pristinas modò vires instauret, sed diuturnam quoque valetudinem largiatur, ad Anglicanæ atque aded Universæ Ecclesiæ emolumentum.

Lugd. Bat. clō
Ioc xxviii. viii.
Kal. Maias.

Reverendissimi nominis tui cultor
obstrictissimus, & qui nunquam
tuns esse desinet,

G. J. Vossius.

LXXXV.

Joanni Meursio.

Vir Clarissime & Amicissime,

Non exiguum mihi dolorem attulit,
quod tanto temporis intervallo, nihil

à te acceperim Literarum. Nam solatium hoc amicitia habet, quod eorum legere literas possumus, quos videre non possumus. Tantoque magis dolebam quod, metuerem ne silentium hoc proficisceretur ab mœrore aliquo quem privatim etiam vobis afflictæ res Daniæ attulissent. Nunc & valere vos intelligo & meliora in posterum de regno vestro augurari. Equidem prædicabo ac ambitiose, quam mihi gratum fuerit ea cognoscere præsertim ex teipso. Facile enim hoc cogitare potes: ut cui non ignotus sit amor erga te meus. Neque de eo quicquam detrahare debet quod rarius & ipse scribam. Vere enim dicere possim hæcenus me non satis scisse quo pacto Literas optime possim procurare. Atque aliter ut foret non eo minus arserit amoris nostri ignis. Silere enim diutissime possum. Sed non amare Meursium non possum, nisi simul & virtutis amorem & doctrinæ deponam. Ante amorem non exuam sed tuus semper ero, tuus plane, præstantissime & charissime Meursi. Tanto impensius frui etiam cupio præsentem, cujus quod spem facis, beas profecto. Sed tamen beator mihi videbor ubi coram complectar. Nunc ut amantes meticulosi esse solent, male formido ne ita ætate proxima infestet vias Cæsareus miles ut spes nostra decollet, nec nisi anno post atque utinam vel tum, conspicerem vos liceat. Ubi veneris post Snellium (cujus & conjux decessit) desiderabis quoque communem amicum Jacehausum, qui Paralyti obiit die eo Martis, qui Paschales ferias proxime antecessit. Defunctum laudavit Vorstius. Hujus in scribendo ad te incuriam serio increpui. Et culpam fatetur: sed emendaturum recepit. Mitto ad te opus nostrum de Historicis Latinis. Sed (si ita placet) conditione ea, ut rescire possim, quid probes, quid improbes. Nec enim nosse id minus laboro, quam si editum id nondum foret. Quippe recudi poterit ut in Partitionibus Oratoriis factum ante paucos menses. Barlaeus carmine sibi multum gloriæ parat. Prodiere ejus poemata mense superiori. Cum prima hæc editio sit tamen non video quem præferat præsertim in carmine epico. At quorundam etiam benignius est judicium. Quid futurum si sæpius sæpiusque limatæ prodierint. Uxor mea ternis mensibus gravissime ægrotavit. Nunc pene convalescere videtur. Salutat vos plurimum. Plura volebam, sed Haga jam tantum redux hæc pauca potui quod festinato opus esset si cum cæterorum Literis, meas quoque hoc tempore deferri ad te vellem. Quæ & causa est, cur opus nostrum præter morem meum miserim incompletum.

Vir

Vir amicissime, vive, vale cum familla tota, ut valere ipse melius possim, & quod caput est, ut diutissime Reip. Literariæ possis.

Lugd. Bat. clb
Id. xxviii. Id.
Matis.

Tuus totus,

G. J. Vossius.

LXXXVI.

Clarissimis & Celeberrimis D. D. Vicecancellario, & Univerſo Senatui Academiae Cantabrigienſis.

Eximie D. Vicecancellarie, & Senatus univerſe almae Academiae Cantabrigienſis,

Vetus est verbum, facile esse Athenis Atheniensem laudare. Mihi verò Cantabrigienſem Academiam laudibus extollere apud Cantabrigienſes perdifficile videtur; quia tanta earum copia est, ut non arduum minus sit initium quam exitum invenire: partim etiam quia neq; ingenium illud, nec ea mihi sit eruditio, ut alia possim adferre, quàm quæ à vestratibus ipse scriptoribus acceperim: qualia si Britannicis Athenis vestris reponere nunc velim, meritò audire cogar, sus Minervam, vel Nocturnam Athenas. Quare veterem vestram gloriam, recentiaq; etiam merita erga Britanniam, & terras alias, non tam orationis penicillo depingam hoc loco, quàm animo ea mecum tacitus colam. Quod à prima etiam adolescentia haestenus facio sedulo. Nihil enim auribus dedero, si candide profitear, ex quo versare corpi veteris Ecclesiæ Doctores, didicisse me imprimis venerari statum Ecclesiæ Anglicanæ, ut quem ad primævum illum proximè accedere viderem. Quique eam insisterem studiorum viam, non potui non etiam capi lectione Theologorum, quotquot ab alma Cantabrigienſis vel Oxoniensis Academiae uberibus pependissent, suisque postea monumentis, eas illustrassent. Facile enim apparebat, non aliunde majorem me capere posse ingenii cultum, quàm iis, quorum aureis è scriptis undique reluceret, quâ industriâ, ac judicio quanto versassent sanctos patres. Atque hæc quidem in adolescentia, ac deinceps etiam incredibilem in me excitaverunt amorem Academiae utriusque. Nec tamen sperare ausus fuisssem fore unquam, ut ulterius obstringeretur Britannicæ vestræ quàm propter ea, quibus obligassetis vobis universum orbem Christianum. Sed longè benignius agere mecum voluit supremi numinis favor. Nec enim mihi cornea ita fibra est, ut non sentiam,

tiam, quantum honoris inde accesserit mihi: quod non indignus visus sim, qui auspiciis ac liberalitate Illustrissimi Baronis Broock in Academia vestra inter præclara ingeniorum lumina operam & ipse meam docendo publicè impenderem. Deum immortalem! qui paulo ante profitebar tantopere studia mea debere multis Britannicæ magistris, scriptoribus florentissimis, quantum emolumenti capere potuissem, si provectiori ætate hac sermones coram cedere liquisset cum tot summis Britannicæ, ac vestræ imprimis Academiae viris. Quod si gloria etiam in censum venit, sanè cum multi homines clarissimi locis obscuris conciliarint egregii nominis decus: ego contra qui mihi videbar tantum unus *ἄνθρωπος*, longè celeberrimæ Academiae vestræ alis in sublime evectus claritatem ipse nominis accepissem. Neque eam felicitatem minus attendi antehac. Sed multa quæ repetere nunc nihil attinet fecere, ut præclari adeo muneris gratiam pene facerem ingratis. Nec eò minus me benevolentia atque amor Britannicæ vestræ cenſeo obstrictum. Imò nihilo secius quod præterea debeo tantum esse arbitror, ut si satisfacere maximè velim nunquam tamen possim. Quapropter & hoc de Historicis Latinis opus meum, imò jam vestrum, velut *ἱκετήριον* creditoribus offero: unde sciat posteritas, saltem gratæ mentis conatum mihi neutiquam defuisse. Argumentum quidem, quod tracto, nulli scio ingratum erit, nisi iis forte, qui literas nunquam didicere: quales sufficere etiam putant, si eas aspernentur. At Britannicæ gentis longè aliud semper iudicium fuit: quæ præ terris aliis, cum literis sacris inter alia, omnis ævi, Ecclesiæque imprimis historiam invidenda felicitate conjunxit. Atque eò lubentius hoc quicquid est laboris suscepi, quia nobis muniet viam ad refellenda ea quæ ex scriptoribus opere nostro memoratis, cum ab aliis Religionis nostræ adversariis, tum imprimis à celeberrimo Annalium Ecclesiasticorum conditore adferuntur; quemadmodum planius fiet, ubi, (ut decrevimus) scriptorem eum candide ad veritatis obrusam expendemus. Quam ad rem utinam Deus & vitam nobis & otium concedat. Quare non tam illud verendum est mihi, ne materies, de qua ago, vilior obscuriorque videatur: quam ne nobili adeò argumento fuerim impar, sive iccirco quia ingenii mihi vel doctrinæ non esset satis: sive quia occupationum esset plusquam satis. Quorum utrumque de me fatebor haut invitus. Verum quemadmodum in liberis, quos vel natura, vel adoptio fecerit nostros, non dotes modo amamus, quas possident in præsentia: sed

sed etiam quas egregia indoles in posterum promittit; similiter foetus hic, qui naturâ quidem est meus, adoptione autem semper erit gentis vestræ, non solum, spero, gratus erit, ob bona aliqua, quæ novellus etiam continere videbitur, sed propterea quoque, quia, modò Deus mihi diuturniorem vitam concesserit, ab annis & labore nostro paulatim sumet incrementa.

Eximie Vicecancellarie, ac universe Senatus almae ac florentissime Cantabrigiæ Academiæ,

Diu feliciter vivite, & æqui bonique consulti, quicquid hoc est, opellæ nostræ.

*Lugd. Bat. An.
c. 10 Id. xxviii.
vii. Id. Sextil.*

Universe Academiæ Cantabrigiensi hæcenus obstrictissimus, & in nexu adhuc permanens,

G. J. Vossius.

LXXXVII.

*Amplissimo Viro Adriano Blyemburgio,
Gerardus Vossius, S. P.*

SCis mihi bis de die differendum esse in Lyco; Et cum illic taceo domi loquor, calamo, & manu. Nam quotidie urgeor, ut Vindemicolas meas colligere pergam. Itaque paulisper apud te filui; sed ea spe, ut pluribus alias confabularer tecum. Nunc ne longâ quidem Epistolâ, opus esse video, si, ut spero, hebdomade ptoximâ, excurrere ad vos licebit, nuptiarum ergo. Quod si fiet, occasionem inveniam uberius tecum colloquendi; scrupulum tamen injicit, quod hæsterna die catarrho cœpi laborare, qui in sinistram pedem incidit, sed seu citius, seu serius veniendi ad vos potestas fuerit; in antecessum hæc tribus ad te verbis scribenda existimavi. Non quia non omnia coram melius possim; sed quoniam turpe putarem prodire in conspectum tuum, latæ admodum culpæ reum, ut qui binas à te literas acceperim, neutris responderim. Imo nec pro munere gratias egerim. Ac longè quidem gratissimum est, quod veteris contubernii, & institutionis memorem te scribas, sed, Præclare Vir, utrumque etiam, te tacente, apud me, satis sciebam: Usque adeo multa, & dicere, & facere, apud amicos soles, quæ Vossii tui amorem testentur singularem. Nunc quasi hæc satis non essent, bellum mittis calicem, indicem profusissime voluntatis tuæ.

Ego vero, satis sciò minimè istac testificatione fuisse opus. Nam quod de versiculis nostris dicas; Authori eorum crede: Ipse eos tanti esse negat. Sed amor tuus iis pretium addit: Et postquam id fecerit, pretioso eos dono remuneratur. Tanto magis Tibi obstringor; amoremque hunc tuum scribendo quasi scintillis quibusdam fovendum mihi putavi. Ubi enim amoris tui ignem quotidie se clarius exerere video; nefas sit non acrius etiam amare: Amorque hic noster, in cordis nostri foco vivet, dum vivam ipse, Si cineribus fortassis tegi poterit, dum animus aliis distentus, à scribendo paulisper abstinet; extingui tamen non poterit. Imo hoc quoque nobis curæ erit, ut ne eum cineres tegant; sed flammâ suâ semper se prodant. Quod optimè, ni fallor, crebro literarum commercio consequar. Vale, Amplissime Vir, & plurimum salve cum lectissimâ Coniuge, & à me, & à mea, tua Cognata.

*Lugd. Bat. c. 10 Id. xxviii.
xii. Kal. Jul.*

LXXXVIII.

Gulielmo, Episcopo Londinensi.

Reverendissime in Christo Pater, ac Domine,

Quod proverbio dici solet *ἀγαθὸν ἀγασθῆναι*, id mihi fuere literæ tuæ. Primum illud incredibile mihi gaudium attulit, quod valetudini etiam nondum prout optarem, haut paulò tamen melius sit, & deinceps optima liceat sperare. Deinde etiam maximâ me lætitiâ perfudere tot bona, quæ de me & meis intelligo. Sane cum Poeta dicere solebam, Dulces esse ante omnia Musas. Non tamen antea erant mel merum: sed absinthio temperatum, præsertim ob temporum infelicitatem. Sed postquam placere cœpi inclyto Britannicæ regno: etiam absinthii amaror edulcari cœpit. Qui nunc penitus recessit, ex quo respicere me dignati sunt Serenissimus Rex vester, & Illustrissimus Buckinghamiæ Dux. At cui tantum debeo? O Pater, ô Domine,

*Tu mihi quodcumq; hoc sortis, tu sceptrâ ducemq;
Concilias*

Eoque mihi dulcius est tantopere debere Reverendissimæ dignitati tuæ, quod cum subductâ ratione nihil videam cur me vel tralaticitiè amares: tamen affectu me prosequare paterno, vir is, quem ipse rex serenissimus nunc præfulem esse Londinensem voluit, quo,

fi. aulæ regiae deinceps propior fores, prudentissimis consiliis tuis in maximis ac difficillimis negotiis facilis & felix uteretur. Quid me beatius, quam qui tanto præfui potuerim placere? Itaque memor Pliniani illius, vitam esse vigiliam, longè etiam alacrius studiis nunc invigilabo, non tam inanis gloriæ, quam boni publici amore. Inque hoc gloriæ dispectu nihilominus fore prævideo, ut quantæ nunc voluptati est vivere, dum possum studiis prodesse, tantæ aliquando gloriæ sit, prodesse etiam postquam vixero. Nihil præterea æquè mihi cordi futurum, quàm ut erga eos, qui tam præclare de me merentur, pro modulo meo gratum possum animum exhibere. Ante cæteros autem tum Reverendissimo nomini tuo, tum etiam Illustrissimo Vicecomiti Dorcestriensi, cuius ego erga me affectum, & persensi hic curam, & abundè iterum, imò liquidius ex literis tuis ad nobilissimum & mei amantissimum Dudleium Carletonum intellexi. Nunc igitur nihil superest aliud, quàm partim ut noctes diesque gratus esse laborem: partim etiam, ut filium bonis meis monitis onustum dimittam, quo unà cum felici Magnæ Britanniæ vestræ aere hauriat succum illum bonæ mentis, quo altus & enutritus, pertingat aliquando ad illa

Edita doctrinæ sapientum templa serena.

Honestè satis annum totum in Collegio, eum sumptibus propriis alere grave non ducam: quippe qui liberum causâ omnia & velim & debeam. Quin, si opus omnino erit, ulterius etiam facere paratus sum. Quamquam, quanto celerius, imminui saltem cœperint impensæ, tanto magis consultum ibitur familiæ meæ sat numerosæ. Ergo ut orsus eram dicere, mittam filium, idque, si Deus volet, intra hebdomadas tres. Ac simul tum de aliis, ac inter cæteros de Thesibus Oxonii reculis perscribam. Quod præproperus nautarum discessus, vocante vento, nunc minimè permittit.

Reverendissime Pater, ac Domine, Deus te magis magisque salutaribus Spiritus sui donis augeat, ac locupletet: diutissimeque te & Ecclesiæ suæ, & etiam mihi meisque incolamem conservet.

*Lugd. Batav.
clō 16c xxviii.
iv. Kal. Sept.*

Reverendissimæ dignitati, ac dominationi tuæ, eternam devotissimus, totique Britannicæ Magnæ Regno,

G. J. Vossius.

LXXXIX.

Gerardus Vossius Hugoni Grotio
S. P.

AMplissime Vir, redeo tandem ad scribendi officium, nimis enim turpe fuerit, si tam bellam scribendi occasionem negligam penitus, Lamerio ad vos eunte. Et tamen, quod difficulter persuadebo, cum minimè scribo, maximè amo. Nempe occupationes quidem, quo minùs scribam, morantur: at interim animus te cogitat, & incrementum amoris est ex dolore, quod officium facere non possim. Quod etsi verè dicam, nihilominus aut valde fallor, aut hoc argumentum non erit tibi tanti, ut, quo sic amor meus sumat incrementum, propterea rariùs etiam, quàm facio, mihi scribendum putes. Quare hoc excusationis genere non utar: sed potiùs, quod te malle scio, paulùm tecum confabulabor. Maximè mihi voluptati est, quod uti partim ex literis ad me, partim ex fratre tuo intelligo, non cesses de studiis benè mereri: sed aut vetera tua des meliora, aut omnino proferas nova. Lætor autem tum publici causâ, cui per te melius est; tum tui, quia volo, ut indies cultus nominis tui gliscat; tum etiam mei, quia non cochleæ libentiùs rore cœlesti, quàm ego succo scriptorum tuorum pascor. Multum etiam gaudeo, quod benignè adeo sentias de laboribus meis. Quod dum facis, vere dico, hoc inter alia boni facis, quod non mediocriter erigis me, quem unus & alter depresum lubentes eant. Atque eo magis erigis, quod aliorum etiam iudicium recenseres. Non quasi opus sit, ut ex consensu alieno, auctoritatis quicquam sententiæ accedat tuæ; verùm quia mihi persuadeo, eo minùs aliquid gratiæ datum esse, quia idem propè sentiant & alii apud vos. Quamquam nec multum habeo quod conquerar, de literatis apud nos hominibus, si unum alterumque excepero, quos etiam elogio non aspernando ornavi. Nempe ex spiculis eorum, ac unius imprimis, neutrius nostrum amantis, satis video, mihi subinde colluctandum fore cum hominibus fide sublesta, & falsis falsimoniis, nec Batavis patria, nec moribus. Benè interim, quod minus possint, quam quibuscum superiori hebdomade negotium mihi tandem esse desiit. De quo, ut gaudeo, (scis enim quàm difficulter sacro ordini satisfiat) ita non nihil animum mordet, quod non possim me, meaque probare illi, quem antea dicebam. Scio enim non mereri me livorem. Quare multum

R

tum metuo, ne hæc sugillatio nostri nominis proficiscatur, non tam ab aliena invidia, quam culpa mea, sua vitia nescientis, atque interea per imprudentiam offendentis alios, exigua sermonis libertate, dum non satis didici parasitari iis, qui nihil nisi immodicas laudes sui audire sustinent. Sed quid mihi cum talibus? Probent improbent bene faciendi voluntatem, liveant vel plorent, nihil curæ Hippoclididi. Nam utcumque verear, ne qua hic culpa sit mea, tamen cum attentius mecum, malignitatem eorum cogito, non possum non contemnere censores istos, penè ut cum Cornico dicam, censione bubula dignos. Ego illis relictis, me severioribus Mulis delectabo domi: atque ita vitæ innocentia & silentio me ulciscar probè. Atque eo id faciam impensius, quod non desint amantes mei in terra Britannia, quique seriò cogitent de ratione ac modo, quo in his etiam terris, mihi & meis melius esse possit. Jam super eo literas accepi, à Reverendissimo Domino, ante quidem Bathoniensi, & Wellensi, nunc verò Londinensi Episcopo. Simulatque res effectum suum penitus sortita erit, faciam te de re tota certior, ut una gaudeamus. Scio enim quàm tibi curæ sim. Prodiit ante menses paucos, nova Partitionum mearum editio; quæ jam publica autoritate, in Britannia scholis præleguntur. Authores erant amici, ut, quo mihi consulerem, & familiæ meæ, Illustribus Ordinibus eas dicarem, qui quodammodo id opus fecissent suum, dum in terris suis prælegi pueritiæ mandant. Sed quia jam olim dicassent Maurerio, non placuit prætextu alicujus emendationis, aut augmenti repetere id, quod donassem semel. Ethî fortasse jam omnis veteris facti gratia periisse apud eum videatur. Nam saltem liberi, & qui studiis eorum præest, cui ego tam bene feci, salutariuncula aliqua debuerant dignari, siue dum egere in Italia, unde à tot honoratissimis viris crebrò adeò literas accipio: siue postquam reduces in patriam facti: Etiam nunc recudi incipiunt Oratoriæ Institutiones, longè & correctiores, & auctiores iis, quæ ante tot annos Dordrecht prodierant. Spero fore, ut similiter aliquando limatiores, melioresque lucem videant commentarii nostri de Historicis cum Græcis, tum Latinis. Quam ad rem non mediocriter mihi prodesset, si Catalogus exstaret, Bibliothecæ Medicæ, vel alterius apud vos. Sed magis tamen adjutum eas, si monere non defugas, quæ operibus nostris addi, demi, vel etiam immutari in iis oporteat: cujusmodi quin longè plurima sint, dubitare mihi nefas, cum jam non pauca id genus ipse observarim. Vale, vive, incomparabilis vir, atque amice;

cumque uxore præstantissima, & liberis, salvè à me, uxore, & liberis meis.

Lugd. Batav:
elo 1^o Dec xxviii.
v. Kal. Sept.

Tunis totus

G. J. Vossius.

Salutem Rigaltio, Tileno; Salmasio enim scripsi. Jussi ut Lamerius filio istic tuo Partitionum exemplar compactum tradat. Posces, si negligat. *Epistola.*

XC.

Gerardus Vossius Hugoni Grotio,
S. P. D.

Magnifice Amplissimeque Domine: Quamquam, ut apud Varronem est, bonus est honos qui sustinet Remp. tamen te novo hoc, seu onere honoratum, seu honore oneratum, multis profecto nominibus est quod gaudeam. Nam verum si dicere licet, quamquam tu externos honores non magni aestimas; tamen nefas fuerit, in hac præstantium virorum inopia, inclytum virtutis tuæ splendorem in patrio solo intra unius, honestissimum licet, syndici titulum constringi. Et lætissima uxor tua, animæ dimidium tuæ, habet tota quod mente petivit, domicilium nacta in medio consanguineorum, & familiarium, quod illi melius, quàm omnis Bataviæ & Zelandiæ capparum lienem deducet. Nec minus consilio auxilioque hic poteris prodesse tuis, quos inter me etiam repono, cum maxima mihi abs te ornamenta proficiscantur, nec patiaris ullum mihi in te commodum claudere. Denique quod palmarium credi debet, talem senatorem hæc Reip. tempora postulant. Te quidem destina ei destinato, frustra omnes fore auguror, qui eam labefactare consiliis suis conantur: atque ne vanus anquam comperiar, Deum Opt. Max. votis supplicibus oro. Libello Lucii (penè Lucidi dixeram, prope adeò ut nominibus, in doctrina conveniunt) horas sex septem impendi. Quid dicam? Doleo populari meo (uterque enim Palatini sumus) non plus inesse satis. Non de publico tantum, sed ipso etiam benè mereatur, qui tam insulsum sale candido defricare volet, ne putifcat totus. Verissimè Lingerhemius ad te quos ille reos agit Semi-pelagianismi justius arguere ipsum posse sesquialinismi. Sed tamen cogitato opus, num si pedem

si pedem cum eo struere lubeat, cominus semper congregiendum, ejusque vestigiis insistendum semper putes: quod si fiat, necesse habemus respondere ad quinque illa Haganæ collationis capita, & ea quibus adversum te pugnat S. Scripturæ loca. An verò satis putes, si quæ Pelagii, Semi-pelagianorum, Catholicorum communiter, Augustini singulartiter, & Prædestinationorum fuerit sententia distinctè proponam, & non uno tibicine solidè ex vetustate fulciam: simul sicubi opus, argumentis alienis occurram. Quidquid præscripseris, parebitur. Nam seu hanc seu alteram insistere viam lubeat, faciem mihi victoriam hinc spondeam: nec meum est ferre, Palatinatum produxisse, qui nomen cum tum tum Illustrissimorum ordinum decolorare cogitet, nec produxisse, cui illud curæ sit vindicare. Quocirca simulac præfuero disputationi de creatione, quam his diebus scripsi (exemplar thesium ad te mitto) bonis avibus ordiar recoquere historiam de Semi-pelagianismo, & vicinis contrariisque erroribus. Futurum hoc intra triduum spero. Hoc magis autem cogitandum erit, ut aliquid novi adferam post Corvinum, quando ille meliorem laborum nostrorum partem nobis non invitis in Antibogermanno suo exscripsit. Nam præter ea quæ Dordrecht illi per te miseram, Lugduni hic utendum dedi, quidquid testimoniorum ex antiquitate de singulis Hagenibus controversiis, non sine labore longo congesseram. Quod cum sciret ipse, ante semestre & amplius in familiari sermone subvereri se dixit, ne dum magnam laboris nostri partem in suas cameras conveyit, non tantum honoris qualemcumque fructum interceperit nobis, qui tanti non est mihi, sed etiam reliquum quod fecit, depreciaverit planè, cum eadem à me reponi minime sit ex honore utriusque nostri. Ego securum esse jussi, quandoquidem restarent alia multa, quibus locum eorum quæ exscripsisset, supplere abundè possem. Quod verissimum est, sola temporis angustia premor, quo minus ea curâ hæc tractare possim, quâ optem. Augustini adversus Julianum Libros hætenus ineditos jam mensis circiter est quod vidi, sed otium legendi non fuit. Aliquam multa tamen folia delibavi, nec dubito, quin genuinus sit fœtus. Statim igitur codicem tuum remittere debuisses. Ego verò cum tam multas præclaras emendationes ad oram Codicis tui adscriptas viderem, gaudio prope exsilui, nec committendum putavi, ut me fraudarem ejus libri usu, priusquam omnia ad Codicem meum adscripsissem. Quod bona me cum venia tua facere spero. Ne tamen diutius quàm par est, te libro tuo de-

fraudem, promitto non plus quàm bidui hanc moram fore. In illis ad Augustinum notis Menardi, solam culpam breviter. Tamen spero nunc aliquam quoque utilitatem nobis adferre posse. At quæ de Pelagio, & Semi-pelagianis narrat, jam ante observata nobis. Nec quantum meminisse possum, aliud quàm Baronianam Epitomen continent. Quod cum nec ipse dissimulet, candorem sanè laudamus. Meursius cum secundo ad me scriberes, Hagæ fuit, ac reversus demum die Mercurii circa vespere. Die Jovis mittere Balsamonem neglexit, fecit id te Veneris. Quem quin eo ipso die, quo tertio scripsisti ad me, hoc est, die Sabbathi acceperis, nullus dubito. Mirari satis non possum quod nihil ab Utenbogartio responsi accipio. Nam nisi memoria fallor, jam sextus est dies quod ad eum scripsi. Rogaram autem ut quamprimum Epistolarem dissertationunculam meam remitteret: si tanti putaret, curaturum me, ut intra paucos dies reciperet. In mentem venit fortasse rectà ad te mittere malle. Nisi forte aut domo jam abest, aut aliquem describendi cura interim fatigat. Herpenius super quæstionibus à te consultus, indiculum earum Amstelodamum præmisit, ad præceptorem suum Judæorum quotquot hodie vivunt eruditissimum. Ac se diem unum alterum hic substiturum dixit, simulque de iis cogitaturum: inde cum sua etiam causa Amstelodamum ire cogatur, rectà eo profecturum, ut cum Magistro suo de iis conferre possit. Velim apographa illa duo, in quibus tam fœdum hiatum esse significas, simulac poteris remittas. Curabo ut quàm ocyssimè, quicquid omissum est suppleatur. Simul ut alia quæ voles vel adjiciantur, vel corrigantur. Episcopo ante dies paucos adfui. Dixit se, magna cum voluptate diatribam tuam *de f. Antiochianis* legisse: & judicare, nihil ingeniosius, eruditius, solidius, ea in controversia à quoquam scriptum esse. Cum idem mihi videri dixissem, sed tamen hominem neminem esse, qui non aliquid interdum humanitus patiat, eoque impensè rogare me, ut sicubi desideraret quicquam, liberè apud te sententiam suam exponere vellet: ille in priori judicio persistit, nec habere dixit quod requirat; nisi fortè, inquietabat, quod passionem Christi consideres ut poenam propriè dictam: Nam dispiciendum esse, an non satius multo sit, cum scripturis vocare Sacrificium, idque imperatum à Patre, & voluntarie à Christo susceptum. Nempe ut dicatur, Deum, quo fœditatem peccati & sui erga nos amoris magnitudinem commostrarat, decentius omnium judicasse, neutriquam peccata remittere, nisi interveniente

carissimi filii sui sacrificio, quod tantæ *evangelii* fuerit apud Deum, ut ejus causa omnibus in filium credentibus peccata remittere velit. Memini etiam ante trimestre & amplius, Samuelen Næranum, Ecclesiastem Amersfurtensem, hanc ipsam sententiam apud me defendisse, tanquam quæ magis fugiamus incommoda, quæ Socinus objectat, & quæ tamen minimè infringat *ἀπολογισμὸς* veritatem, vel dignitatem. Petii ab Episcopo, ut de hoc ipso, & si qua alia essent, per literas sententiam suam communicare tecum vellet. Respondit, minimè gravaturum se hoc facere, cum omnia tua causa velit & debeat; sed non usque adeo magnam sibi familiaritatem, vel notitiam tecum intercedere; eoque malle ut ipse judicium suum perscriberem: præterea, si quid talium literis committat, minimè satis videri ut sententiam suam quasi de tabella pronunciet, verum enimverò rationibus solidis eam firmandam fore: quod quominus facere nunc possit, ob stare occupationes, quibus distineretur. De solitudine tua pro affine Junio, & illi gratulor, & mihi gaudeo, & tibi gratias maximas utriusque nostri nomine ago. Sanè consilium impensè placet. Quare & cum ipso, & cum Diamantio quamprimum rem omnem communicare decretum: Mox, quid cum mihi tum ipsis videatur, te faciam certiorum. De Walachriano scripto est, quod seire tua interfit. Vix octiduum erat, quod apographum nacti eramus, jam suboluerat Zelandis. Scire te arbitror, Utenboghartium describi curasse, exemplar hoc suum ad Episcopium misisse, hinc & Corvinum & Barlæum, illum ut brevibus ad oram notis castigaret, hunc ut oratione fusa refelleret: sed & per aliorum manus volitavit: nihil igitur mirum, si ad plures, atque ipsos etiam Contra-Remonstrantes res emanarit, præsertim Barlæo, & ex hoc Oeconomo nostro, rei totius gnaris: de quibus hoc amicissimum ipsis judicium est, nihil vel sub silentii fide committi illis debere, nisi quod utile existimemus omnibus innotescere, vel saltem non damnosum. Cæterum vix Walachriani literas ex Hollandia acceperant, quibus de apographo, quod hic jam habemus, facti erant certiores: statim ad se Amanuensensem unus cæterorum nomine vocavit. Miser Amanuensensis, inter sacrum & saxum hærens, & magis de fortuna sua (quam à Zelandis Ecclesiastis, Burzio imprimis, pendere videbat) quam de gloria Dei sollicitus, negavit se cum illo exemplar quopiam communicasse; atque hoc eo fidentius faciebat, quod persuadere sibi non posset, adfinem meum secum exemplar suum in Hollandiam por-

tasse, & hoc ut fecisset, Remonstrantibus fuisse communicatum. Perstabat Burzio apud eum ut verum diceret: Sed ille item in mendacio perstabat: Unum tantummodo hoc fateri voluit, adfuisse sibi adfinem exemplaria describenti, & legendo partem bonam percurrisse. Quod simulac audit Burzio, ille impense adventum adfinis ex Hollandia desiderare: vix cognorat rediisse, quærit an cuiquam in Batavia de classis Walachrie consilio aperuisset quicquam. Benè secum affinis agi putavit, quod non aliud rogaretur: confessus est, & putare dixit, nihil in eo peccatum esse. Burzio verò dicere, graviter peccasse, multumque in Remonstrantes debacchari, & culpæ adfinem, quod tam bonum classis consilium sua lingua disturbasset. Porro arbitratur adfinis, quantum ex Burzii sermone colligere potuit, dubitare nunc Ecclesiastas Walachrianos, utrum ex re sit, judicia exterorum à se exquiri, posteaquam ad Remonstrantium hoc aures pervenit: facile enim alios ad se metientes, cogitare possunt, minimè eos hic cessaturos. Omnino utile sit certò constare, quid consilii cœperint Walachriani. Nam Barleana Oratio, & Corvini breves castigaciones jam confectæ sunt, vel adfectæ. Et si ad externos mitti debeant, jam prelo tradi tempus sit. Locutus hac de re sum cum Episcopo: ille recepit se acturum de eo cum Utenboghartio. Hactenus in scribendo perveneram, cum ecce adest Episcopus; narrat ut Hagam post horas aliquot sit iturus: venisse ad me ut diatribam tuam restitueret. Iterum in priorem sermonem incidimus: paulòque nunc fusiùs de satisfactione differtabat. Hoc unum inter nos & Socinum in controversia relinqui putabat, num Christus patiendò solum apud homines aliquid egerit, an item apud Deum: posterius negare Socinum, sed mirè & miserè scripturas torquere, atque id solidè à te demonstrari. Verum porro quæri, quid illud sit quod apud Deum egerit. Vulgarem esse opinionem, poenas, quæ nobis debebantur, pertulisse. Undè & eo sit deventum, ut desperasse, & tartareos sensisse cruciatus putaretur: quæ sententia ut impia, rectè refellitur à Loensi Anglo in sua Sabbathi effigiatione. Verùm ut non eousque cum vulgo procedamus, si tamen Christum pro nobis poenas subiisse dicamus, ne hoc ipsum quidem satis convenire cum eo, quod peccata nobis remitterentur. Nec enim gratuitam esse remissionem, si alius solvat. Dicere quidem te, hoc ipsum gratiæ esse ingentis, quod peccata nostra imposuerit filio: sed tamen non satis hoc esse, vel saltem non videri satis, ut sit vera & propriè dicta remissio.

Quare

Quare nec videri satisfactionem esse istiusmodi, qualem vulgo opinentur: sed quemdammodum in Vet. Test. sacrificio oblato peccata remittebantur nemine poenas subeunte: sic in Nov. Test. remitti peccata interveniente Sacrificio Christi; quæ melior victima ita accepta fuerit Deo, ut propter eam peccatis cunctis ignoscat. Quocirca in eo propriè Socini errorem consistere, quod negarit Sacrificium Christi esse propriè propitiatorium; quod multis Scripturæ locis adversus eum rectè à te demonstratur: Sequè aliis qui in Socini sententiam proniores videbantur, subinde idem dixisse & demonstrasse. Dicebat præterea, duo tria esse, in quibus nesciret, an tuam sententiam sis probaturus Theologorum vulgo. Unum est pag. iv. ubi de materia satisfactionis tractans, eam esse dicis, tum cruciatus mortem antecedentes, tum præcipuè mortem ipsam. Adscribere quidem ad oram, non solum corporales à te cruciatus intelligi, sed vel imprimis illas animæ perpeffiones, quas voce *λυσις*, & similibus significet scriptura. Verùm nihil dicere te, quod cognoscamus alios te animæ dolores intelligere, quàm è corporis cruciatibus provenientes. Alterum est pag. 16. ubi qualitates primitus creati ac deinde resuscitati corporis inter se ab Apostolo conferri vis; quorum illud habuerit cum naturali moriendi possibilitate, conjunctam ex divino beneficio vivendi quoque possibilitatem; hoc verò vitam ita in se habiturum sit, ut *nulla ei adfuit moriendi possibilitas*. Eandem dicebat Socini esse sententiam, ut qui corpora nos etiam *καὶ τὰ σώματα* spiritualia habituros putaret. Cæterum juniores omnes, atque suo judicio veteres item ad unum omnes moriendi possibilitatem concedere, solum actualem mortem negare. Tertium est pag. 51. ubi ais, posteris Davidis peccata esse remissa, non tantum ob promissiones Davidi factas, verùm etiam quia Davidis actiones Deo placuerant. Hoc quoque insolens visum iri putabat. Nihil tamen horum non probari sibi dicebat: imprimis tertium isthoc. Nempe quæcumque istic dicis, ut ostendas solere etiam sæpe actionem gratam admitti velut in poenæ compensationem, hoc ipsum pro ea sententia facere dicebat, qua Christus placasse Patrem creditur, non poenarum pro nobis persolutione, sed oblatione victimæ summæ *εὐδοκίας*. Denique monstrabat manifestum animi minus presentis *οὐδυνα*, pag. 54. ubi ais, dicere Socinum, nusquam scriptum esse Deum nobis, sed semper nos Deo conciliatos esse. Mox subjicis verum non esse, quod dicat nusquam esse scriptum nos Deo esse reconciliatos. Affers deinde locum, *Eph. XI. 16.* ubi Apostolus

ait, hominem *ἀποκαταστήσει* Sicut. Atqui receperas, te probaturum Deum nobis reconciliatum: nunc te adversus Socinum probare ais, nos Deo reconciliatos (neque aliud evincunt verba Apostoli) quasi non hoc ipsum sit, quod agnoscit Socinus. Alia quorum monebat, non erant. Tamen abitum parans, verbo indicabat, putare etiam alia à se adferri potuisse, nisi tantopere negotiis fuisset districtus, ut Lectioni lectissimi libri tui, non eam potuerit curam impendere, quam oportebat. Hoc vix eo fine ab illo dictum arbitrer, ut ad te perscriberem. Tamen nihil te celandum putavi. Atque eo fidentius id addidi, quia scire te scio, nihil vel à te, vel mortalium quoquam tam benè scribi posse, ut non alicubi sit, quod melius dici possit. Sic nempe cum humana infirmitate comparatum est. Sed hoc ab editione detertere non debet. Si enim nihil scribi debet, quod non undique perfectionis contigerit metam, nihil profectò scribi debet. Et peccarunt omnes Catholici Doctores, quorum tot aurea monumenta ad nos pervenerunt. Nosque Hæreticis in hac vita noxios errores spargentibus, sic studia scilicet nostra componemus, quasi post hanc vitam cum iis disputare cogitemus. Quocirca te, Amplissime vir, rogo, ut neutiquam iccirco tua premere diutius velis; sed brevi nobis aut Corvino diatribam hanc tuam remittas, quò lucem quamprimum adspicere possit. In Junio negotio voto nostro Delegati D. D. Ordinum annuerunt. Maximas tibi meo, & ad finis nomine gratias ago pro commendatione apud Nobil. Barneveldium. Vale vir omnibus omnium elogiis major, præsidium decusque nostrum. ix Jan. clo Ioc xvii. quem annum vicissim tibi, conjugii, liberis, totique Grotianæ familiæ faustum & felicem ex animo opto.

Emendationes tuas
jam exscripsi. Itaque
Augustinum tuum
una mitto, & pro
usu gratias ago.

Tuus totius,

G. J. Vossius.

XCI.

Samueli Wardo.

Clarissime Vir, propemodum pudore suffundor, quòd tardè adeò respondeam. Sed tamen respondeo. Turpe enim putabam, si filio Joanne studiorum causâ ad vos eunte, bellam adeò scribendi occasionem prætermitterem, præsertim luculento adeò à te dono remuneratus. Cujus ego jam bonam

carissimi filii sui sacrificio, quod tantæ *donatus* fuerit apud Deum, ut ejus causa omnibus in filium credentibus peccata remittere velit. Memini etiam ante trimestre & amplius, Samuellem Næranum, Ecclesiastem Amersfortensem, hanc ipsam sententiam apud me defendisse, tanquam quæ magis fugiamus incommoda, quæ Socinus objectat, & quæ tamen minimè infringat *ἀπολυτῶσαι* veritatem, vel dignitatem. Petii ab Episcopo, ut de hoc ipso, & si qua alia essent, per literas sententiam suam communicare tecum vellet. Respondit, minimè gravatum se hoc facere, cum omnia tua causa velit & debeat; sed non usque adeo magnam sibi familiaritatem, vel notitiam tecum intercedere; eoque malle ut ipse iudicium suum perscriberem: præterea, si quid talium literis committat, minimè satis videri ut sententiam suam quasi de tabella pronunciet, verum enimverò rationibus solidis eam firmandam fore: quod quominus facere nunc possit, obitare occupationes, quibus distineretur. De solitudine tua pro affine Junio, & illi gratulor, & mihi gaudeo, & tibi gratias maximas utriusque nostri nomine ago. Sanè consilium impensè placet. Quare & cum ipso, & cum Diamantio quamprimum rem omnem communicare decretum: Mox, quid cum mihi tum ipsis videatur, te faciam certiore. De Walachriano scripto est, quod seire tua interfit. Vix octiduum erat, quod apographum nacti eramus, jam suboluerat Zelandis. Scire te arbitror, Utenboghartium describi curasse, exemplar hoc suum ad Episcopium misisse, hinc & Corvinum & Barlæum, illum ut brevibus ad oram notis castigaret, hunc ut oratione fusa refelleret: sed & per aliorum manus volitavit: nihil igitur mirum, si ad plures, atque ipsos etiam Contra-Remonstrantes res emanarit, præsertim Barlæo, & ex hoc Oeconomo nostro, rei totius gnaris: de quibus hoc amicissimorum ipsis iudicium est, nihil vel sub silentii fide committi illis debere, nisi quod utile existimemus omnibus innotescere, vel saltem non damnosum. Cæterum vix Walachriani literas ex Hollandia acceperant, quibus de apographo, quod hic jam haberemus, facti erant certiores: statim ad se Amanuensem unus cæterorum nomine vocavit, Miser Amanuensis, inter sacrum & saxum hærens, & magis de fortuna sua (quam à Zelandis Ecclesiastis, Burzio imprimis, pendere videbat) quàm de gloria Dei sollicitus, negavit se cum illo exemplar quoppiam communicasse; atque hoc eo fidentius faciebat, quod persuadere sibi non posset, adfinem meum secum exemplar suum in Hollandiam por-

tasse, & hoc ut fecisset, Remonstrantibus fuisse communicatum. Perstabat Burzio apud eum ut verum diceret: Sed ille item in mendacio perstabat: Unum tantummodo hoc fateri voluit, adfuisse sibi adfinem exemplaria describenti, & legendo partem bonam percurrisse. Quod simulac audiit Burzio, ille impense adventum adfinis ex Hollandia desiderare: vix cognorat rediisse, quærit an cuiquam in Batavia de classis Walachrie consilio aperuisset quicquam. Benè secum affinis agi putavit, quod non aliud rogaretur: confessus est, & putare dixit, nihil in eo peccatum esse. Burzio verò dicere, graviter peccasse, multumque in Remonstrantes debacchari, & culpæ adfinem, quod tam bonum classis consilium sua lingua disturbasset. Porro arbitratur adfinis, quantum ex Burzii sermone colligere potuit, dubitare nunc Ecclesiastas Walachrianos, utrum ex re sit, iudicia exterorum à se exquiri, posteaquam ad Remonstrantium hoc aures pervenit: facile enim alios ad se metientes, cogitare possunt, minimè eos hic cessaturos. Omnino utile sit certò constare, quid consilii coeperint Walachriani. Nam Barleana Oratio, & Corvini breves castigationes jam confectæ sunt, vel adfectæ. Et si ad externos mitti debeant, jam prelo tradi tempus sit. Locutus hac de re sum cum Episcopo: ille recepit se acturum de eo cum Utenboghartio. Hactenus in scribendo perveneram, cum ecce adest Episcopus; narrat ut Hagam post horas aliquot sit iturus: venisse ad me ut diatribam tuam restitueret. Iterum in priorem sermonem incidimus: paulòque nunc fusiùs de satisfactione differtabat. Hoc unum inter nos & Socinam in controversia relinqui putabat, num Christus patiendò solum apud homines aliquid egerit, an item apud Deum: posterius negare Socinum, sed mirè & misè scripturas torquere, atque id solidè à te demonstrari. Verum porro quæri, quid illud sit quod apud Deum egerit. Vulgarem esse opinionem, poenas, quæ nobis debebantur, pertulisse. Undè & eo sit eventum, ut desperasse, & tartareos sensisse cruciatus putaretur: quæ sententia ut impia, rectè refellitur à Loensi Anglo in sua Sabbathi effigiatione. Verùm ut non eousque cum vulgo procedamus, si tamen Christum pro nobis poenas subiisse dicamus, ne hoc ipsum quidem satis convenire cum eo, quòd peccata nobis remitterentur. Nec enim gratuitam esse remissionem, si alius solvat. Dicere quidem te, hoc ipsum gratiæ esse ingentis, quod peccata nostra imposuerit filio: sed tamen non satis hoc esse, vel saltem non videri satis, ut sit vera & propriè dicta remissio.

Quare

Quare nec videri satisfactionem esse istiusmodi, qualem vulgo opinentur: sed quemdam modum in Vet. Test. sacrificio oblato peccata remittebantur nemine poenas subeunte: sic in Nov. Test. remitti peccata interveniente Sacrificio Christi; quæ melior victima ita accepta fuerit Deo, ut propter eam peccatis cunctis ignoscat. Quocirca in eo propriè Socini errorem consistere, quod negarit Sacrificium Christi esse propriè propitiatorium; quod multis Scripturæ locis adversus eum rectè à te demonstretur: Seque aliis qui in Socini sententiam proniores videbantur, subinde idem dixisse & demonstrasse. Dicebat præterea, duo tria esse, in quibus nesciret, an tuam sententiam sis probaturus Theologorum vulgo. Unum est pag. iv. ubi de materia satisfactionis tractans, eam esse dicis, tum cruciatus mortem antecedentes, tum præcipuè mortem ipsam. Adscribere quidem ad oram, non solum corporales à te cruciatus intelligi, sed vel imprimis illas animæ perpeffiones, quas voce *λυτῶν*, & similibus significet scriptura. Verùm nihil dicere te, quo cognoscamus alios te animæ dolores intelligere, quàm è corporis cruciatibus provenientes. Alterum est pag. 16. ubi qualitates primitus creati ac deinde resuscitati corporis inter se ab Apostolo conferri vis; quorum illud habuerit cum naturali moriendi possibilitate, conjunctam ex divino beneficio vivendi quoque possibilitatem; hoc verò vitam ita in se habiturum sit, ut *nulla ei adsit moriendi possibilitas*. Eamdem dicebat Socini esse sententiam, ut qui corpora nos etiam *per se* spiritualia habituros putaret. Cæterum juniores omnes, atque suo iudicio veteres item ad unum omnes moriendi possibilitatem concedere, solum æqualem mortem negare. Tertium est pag. 51. ubi ais, posteris Davidis peccata esse remissa, non tantum ob promissiones Davidi factas, verùm etiam quia Davidis actiones Deo placuerant. Hoc quoque insolens visum iri putabat. Nihil tamen horum non probari sibi dicebat: imprimis tertium isthoc. Nempe quæcumque istic dicis, ut ostendas solere etiam sæpe actionem gratam admitti velut in pœnæ compensationem, hoc ipsum pro ea sententia facere dicebat, quæ Christus placasse Patrem creditur, non pœnarum pro nobis persolutione, sed oblatione victimæ summæ *divinæ*. Denique monstrabat manifestum animi minus præsentis *opinionem*, pag. 54. ubi ais, dicere Socinum, nusquam scriptum esse Deum nobis, sed semper nos Deo conciliatos esse. Mox subijcis verum non esse, quod dicat nusquam esse scriptum nos Deo esse reconciliatos. Afferis deinde locum, *Eph. XI. 16.* ubi Apostolus

ait, hominem *inimicum* & *hostem* *divinæ* *gratiæ* *reconciliatum* *esse* *Deo*. Atqui receperas, te probaturum Deum nobis reconciliatum: nunc te adversus Socinum probare ais, nos Deo reconciliatos (neque aliud evincunt verba Apostoli) quasi non hoc ipsum sit, quod agnoscit Socinus. Alia quorum mone-ret, non erant. Tamen abutimur parans, verbo indicabat, putare etiam alia à se adferri potuisse, nisi tantopere negotiis fuisset districtus, ut Læctioni lectissimi libri tui, non eam potuerit curam impendere, quam oportebat. Hoc vix eo fine ab illo dictum arbitrer, ut ad te perscriberem. Tamen nihil te celandum putavi. Atque eo fidentiùs id addidi, quia scire te scio, nihil vel à te, vel mortalium quoquam tam benè scribi posse, ut non alicubi sit, quod melius dici possit. Sic nempe cum humana infirmitate comparatum est. Sed hoc ab editione detertere non debet. Si enim nihil scribi debet, quod non undique perfectionis contigerit metam, nihil profecto scribi debet. Et peccarunt omnes Catholici Doctores, quorum tot aurea monumenta ad nos pervenerunt. Nosque Hæreticis in hac vita noxios errores spargentibus, sic studia scilicet nostra componemus, quasi post hanc vitam cum iis disputare cogitemus. Quocirca te, Amplissime vir, rogo, ut neutiquam iccirco tua premere diutius velis; sed brevi nobis aut Corvino diatribam hanc tuam remittas, quò lucem quamprimum adspicere possit. In Juniano negotio voto nostro Delegati D. D. Ordinum annuerunt. Maximas tibi meo, & adinjs nomine gratias ago pro commendatione apud Nobil. Barneveltium. Vale vir omnibus omnium elogijs major, præsidium decusque nostrum. ix Jan. cl. lxxvii. quem annum vicissim tibi, conjugii, liberis, totique Grotianæ familiæ faustum & felicem ex animo opto.

Emendationes tuas
jam exscripsi. Itaq;
Augustinum tuum
una mitto, & pro
usu gratias ago.

Tuus totus,

G. J. Vossius.

XCI.

Samueli Wardo.

Clarissime Vir, propemodum pudore suffundor, quò tardè adeò respondeam. Sed tamen respondeo. Turpe enim putabam, si filio Joanne studiorum causâ ad vos eunte, bellam adeò scribendi occasionem prætermitterem, præsertim luculento adeò à te dono remuneratus. Cujus ego jam bonam

nam partem legi, non fructu minori, quàm voluptate. Quamobrem munere hoc multum me tibi obstrinxisti: nec tu modo, sed etiam Reverendissimus Episcopus Sarisburiensis, tam præclari operis auctor; quem etsi antea facerem maximi, non parum tamen nunc ad admirationem viri accessit. Quod verò & mea ac frivola tam grata tibi sint, plurimum gaudeo. Eaque res stimulos mihi subdit, ut quod in cæteris meis scriptis facio, nec facere cessabo, dum vivam idem agam in commentariis meis de Historicis Græcis, Latinis: hoc est seriò ut cogitem, de iis, quæ indicta mihi, addendis, & si qua perperam dicta, corrigendis, & quæ bene dicta, firmandis magis. Domitius Piso dicebat, Thesauros esse scribendos, non Libros. Libros dedi, non Thesaurum, sed siquid in me ingenii, & eruditionis, quæ scio quàm sint exigua, sed tamen quantulacunque sint, operam dabo jugi curâ, & meditatione, ut aliquando libri isti, non dico magnis viris, attamen mei similibus, hominibus non omnino indoctis, thesaurus penè aliquis, in tali quidem argumento, esse videantur. In hoc omnino desinerem: nisi unum istoc superesset, ut filium meum tibi commendem. Longè aberit à parentibus. Sed spero, quemadmodum mei Reverentissimus semper fuit, ita etiam operam daturum, ne mihi dolori sit absenti. Ad pietatem, modestiam, industriam, quod coram facere soleo, literis eum adhortari non desinam. Atque ut, cum occasio erit, idem facias apud præsentem, etiam atque etiam rogo. Ego tibi vicissim omnia amici hominis officia promitto spondeoque.

Lugd. Bat. clæ
Idc xxviii. ix.
Kal. Octob.

Tuus ex animo,

G. J. Vossius.

XCII.

Richardo Stuarto S. Theol. Doctori,
Capellano Regio S. P.

NOli quærere, Præstantissime Stuarthe, quàm mihi jucundæ fuerint literæ Reverendissimi Domini mei, Episcopi Londinensis: ex quibus luce clarius perspexi, quantopere ei curæ sim, ut per quem tantum mihi honoris obtigerit ab Serenissimo Rege, & Illustrissimo Buckinghamiæ Duce, ut, simulac locus vacarit, Cantuariensis futurus Canonicus sim, *οὐδ' οὐδ'* quo nomine ita gaudeo, ut prope mihi digito cælum videar contin-

gere. Tanto me beneficio obstrictum tenet, tum Reverendissimus Dominus meus, tum Illustrissimus Vicecomes Dorcestrensis, quorum uterque & magno Regi, & inclyto Duci fuit quali *παιδὶ τοῦ Ζαῖ*. Atque idem Reverendissimus Dominus, ut filium quamprimum ad vos mittam, auctor est: seque ei patris locò fore pollicetur. Ex quo ipso tuam etiam benevolentiam non obscure intelligo. Video equidem te esse, qualem hinc abiens promisisti. De me quoque ita habe, fore me eum, quem recepi, nec unquam futurum, ut fallam opinionem tuam. Et sanè, si maxime vellem, hæc ætate vix alius esse erga præstantes & bene meritos possim, quàm debeo. Quippe cui jam in naturam verterit consuetudo colendi & observandi tales, tanquam reliquias quasdam aurei generis. Cum verò tanta inter nos animorum conjunctio sit, vix necesse habeam tibi commendare filium meum. Quippe mei officii esse scio non cessare, nisi re perfectâ. Atque etiam ubi jam honestus in Collegio Cantabrigienfi locus erit tributus, non semel fortasse consilio tuo egebit, sed de isto tum viderimus. Nunc, quod instat, agamus. Quæso igitur meâ causâ etiam atque etiam filium commenda Reverendissimo Mecænati, Domino Londinensi Episcopo. Non melius me devincire tibi atque obstringere possis, quàm in tam charo pignore. *Περὶ τούτου* non addo, quia non intelligo. Sed singula curæ ac fidei tuæ committo. In quâ ob excellentem humanitatem tuam tantum fiduciæ pono, ut videar tibi injurius fore, si nimis eum anxie ac sollicitè commendem. Et tamen, quod sponte etiam te facturum scio, id peto, quam maxime possum, ut amare eum velis, Joannem potissimum mihi, natu omnium maximum. Minoribus ob lubricum ætatis magis metui, præsertim tam longè remotis ab oculis parentum. Hic jam usu, ni fallor, modum norit vitæ suæ. Aliquid etiam est, quod hic vegetâ magis ac firmâ est valetudine, quàm Franciscus, qui proximum ab eo locum tenet. Octennium jam est, quòd in Academia versatur. Sed initio (ut familiariter tecum loquar) cùm imprimis venuſtati sermonis operam dari oporteret, industria ejus claudicabat. In quo ut aliqua ejus culpa erat, ita & aliqua temporum fuit, quibus apud nos factione omnia arderent: fortasse & aliqua erat culpa nostra, quia importunitate quorundam, ac zelo præpostero vexatus, penè etiam adflictus, non eam potui præstare liberum curam, quam vellem. Sed illi cum ætate postea etiam judicium & studiorum amor gliscebatur: sic tamen ut præcipuè rerum momenta sectaretur, itaque & sub Clarissimo Snellio,

Snellio, *in pueris* in Mathesi se non negligeret exercebat. Magnopere etiam rapiebatur amore Scientiæ Naturalis. Cui etiam Botanicen, & præcipuè Anatomicen adjecit. Ulterius etiam iis vacaturus, nisi potius Juris utriusque studium quam Medicinam sibi proposuisset. Et jam in Jure Baccalaureus est creatus. Ac bona spes erat, posse intra menses non ita multos Licentiatum consequi honorem merito suo. Sed ubi cognovit de occasione familiæ meæ in Angliā oblata, aliquem eò filiorum mittendi, qui in Collegio Cantabrigienſi uberius capere possit ingenii sui cultum; serio de eo mecum egit, & quanto per S. Theologiæ amore teneretur, exposuit. Adjecit etiam, ne & postea claudicaret eruditio sua, velle paulum studiorum cursum retro legere, supplendo ea, quæ in Philosophia sibi deesse animadverteret, privatim etiam se bonas literas culturum, & quicquid viam sterneret ad arces solidæ eruditionis. Ingenio valet, nec minus judicio. Solum industriæ opus erit, atque ut studia ex prudentum judicio componat. Quales etiam attendere solent, quo unumquemque ingenii geniique ardor trahat. Multi enim præclaros nobis viros dedissent, nisi ea potissimum studia sectati essent, ad quæ minus idonei forent. Tanti est nihil facere invitâ Minervâ. De sumtibus quos honestè faciet filius, præstabo quicquid in me erit. Quin malo paulò majores facere impensas, ut inter eruditiores honestioresque cibum capere, & versari possit, quàm ut minori sumtu inter minores proficiat minus. Fore si ero, ut in eo, & ætatis, & longi temporis, quo in Academia egit, & honoris quem adeptus, ratio etiam aliqua habeatur. Quicquid filio dabitur, id in me beneficium collatum putabo. Interim quanto celerius sumtum ratio minui cœperit, tanto magis mihi gratulabor. Quid mirum? qui in re sum non nisi mediocri, fortasse etiam infra mediocritatem, præsertim si quis attendat, ut conjugem habeam plurimum valetudinariam, & quàm numerosam in studiis prolem alam domi. Animus interim est prolixus, & dummodo liberi non abutantur patris lenitate, pro forte meâ liberaliter omnia præbebo. De ratione studiorum meorum nihil nunc addam. Volo enim inde mihi novum nascatur literarum argumentum, ubi filium in Angliam salvum venisse cognovero. Nam crebrò deinceps literas meas videbis. Juvabit tecum colloqui, à quo me ita amari video. Nempe ex te colligo, ut quisque est amore dignissimus, ita ad alios amandos esse maximè propensum. Eò magis operam dabo, ut præclaram quam de me opinionem concepisti, semper conservem.

Adhæc curabo, ut nos amicitia fuisse junctissimos, non æquales modò, sed etiam posteri intelligant. Vale Clarissime & Doctissime Stewarte, filiumque (facies scio) salutaribus monitis instruas, ne si vel apud Reverendissimum Episcopum, vel in Cantabrigienſi Collegio, vel alibi, in ipso Angliæ ingressu præ imperitiâ peccet; fiat, quod proverbio dici solet, Cantherius in porta: eaq; res non illius modò honori derogat, sed etiam depretiet parentem. Πάλλιν ἑπίστασο.

Lugd. Bat. An.
clō Ioc xxviii.
ix Kal. Octob.

Tuus tuo merito,

G. J. Vossius.

XCIII.

Francisco Junio, F. F. Londini.
S. P.

CUM Cantabrigiam ante annos paucos vocarer, si Taurosthenis columbam habuissem, omnino consuluissem, quid facto opus foret. Nunc ob loci intervallum, & quia certò satis procurare literas non possem, coactus sum absque te omnia agere mei unius arbitrio. Venissem facilius, si & uxori valetudo melior fuisset, & Anglicæ linguæ intelligens forem, & ad mores exterios mihi visus essem habilis magis ac paratus. Scis enim in omni vita placuisse hactenus mores Batavos, planèque simplices, utpote homini Scholastico, & Musei umbræ assueto convenientiores. Sed quia venire ipse non potui, filium nunc Cantabrigiam mitto, ut in Collegio aliquo, ex D. Episcopi Londinensis sententia, studiis operam navet, virtutèque suâ & ejusce Reverendissimi Domini, aliorumque amicorum favore, fortunam aliquam sibi paret: vel si canina aliqua scæva has interciplat, saltem postquam, quantum profecerit, non poenitebit, tum pietate, tum doctrinâ, ad suos redeat instructor. Atque eò fidentiùs mitto, quia tu, carissime Adfinis, in Angliâ vivas, cujus sapientissimo consilio, vel præfenti auxilio, si ita res ferat, juvari adolescens possit. Scio enim te, tam omnia nostri causâ velle, quàm parati nos sumus ad præstandum tibi debita officia arctissimæ conjunctionis nostræ. Quare etsi Reverendissimus Episcopus se patrem ei fore promiserit: etsi Doctor Stewartus, Ecclesiastes Regius, vir mei amantissimus, (quo hic familiariter usus sum, dum menses aliquot cum legato Carletono in Batavia egit) magno me amore complectatur: etsi etiam aliquid fidu-

ciz pono in Doctore Beale, Pembrochianæ Aulæ in Academia Cantabrigiensi, præfecto, qui & ipse nos nostraque alicujus facere solet: tamen desipiam, si affectum cujusquam cum tuo comparandum putem, qui arctissimo sanguinis vinculo liberis meis, per matrem sororem tuam, junctus sis. Eum igitur tibi de optima nota commendo; sic age cum eo, quasi naturâ pater fores. Eum de manu tibi in manum trado. Et coram & per literas illum mone, objurga, juva. Nihil mihi gratius facere possis, præsertim hac ingravescente ætate, quâ interdum de colligendis farcinulis, & migratione in patriam, aurem mihi mors vellit. Annum unum parentum erit sumtibus alendus. Exinde vel non multo post, socium Collegii fieri posse, sperat Reverendissimus Episcopus. Equidem grave non ducam, hoc quicquid est sumtuum facere, dummodò filius nihil inutiliter profundat, sed memor sit esse me *παύσαντα*, nec optimam parentibus hæreditatem relictam, quin nec me, nec uxorem, anxie unquam de congerendis opibus laborasse: imò mutationem Reipublicæ ante octennium aliquot millibus mihi stetisse, & quid singula persequar, quæ tibi ignota non sunt? Et in hac tamen fortuna mea malo aliquanto majores facere impensas, ut inter doctiores & honoratiores vivat filius, quàm ut cibum capiens inter rudes adolescentes erudiat minus. Audio mensam in Collegio non stare amplius quàm ducentis. Et tamen, si aliter est, vel trecentos perfolvam. Et ingenii & judicii filio abunde est. Vellem in utraque lingua progressus fecisset majores. Magis id foret ex re ejus, & familiæ honore. Et eapropter non parùm hæsi, num eum mitti oporteret. Verùm miro Angliæ amore rapiebatur. Et metus erat, ne mater suorum, quàm privigni studiosior videretur, si juniorum aliquis prælatus primogenito foret. Accessit, quod hic usu aliquo rerum pollet, atque ad unguem factus videtur in rebus, quæ conversationem spectant civilem. Et defectum in *φιλοσοφία* compensat peritia rerum aliarum, præsertim earum, quæ partes aliquas Mathematicos spectant, etiam *τὴν γεωμετρίαν* item scientiam naturalem, botanicen, anatomicen, in qua parte sanè progressus fecit egregios. Et propter ista, ad Medicinæ studium idoneus maximè videbatur. Sed nescio, quæ causans, vel Theologiæ vel Juris utriusque studium præoptabat. Et jam in jure utroque Baccalaurei gradum est consecutus. Ac professorum judicium erat, intra semestre, vel circiter, modò parem industriam adhiberet, Licentiatum honorem consequi posse. Et factum esset, nisi oblata hæc occasio foret visen-

di Angliam, linguam ejus moresque ad discendi, tentandi ecqua & sibi istic spes foret emergendi: sin spe excideret, saltem cum majori & prudentia & doctrina post aliquod tempus redeundi ad suos. Videtur annum ultra Philosophiæ velle impendere, intra quem se Magisterii gradum consequi posse sperat. Nec obstat ratio annorum quos numerant Angli. Ut qui octennium egerit in Academia nostra, & puto in exteris non omnia ad vivum refecari. Post illa ad S. Theologiam appellat animum: sed sic, ut non negligat Juris notitiam, quantulamcunque sibi paravit, sed potius eam adaugeat, quantum licet. Seu ad sacras literas, seu ad Juris studium potissimum collimet (de quo post menses aliquot statuere melius poterit) annum sacris operam dedisse non inutile erit. Quin turpe sit Christianum, & tot annos in studiis versatum, in hoc certamine animorum quod per orbem obtinet Christianum, non mediocriter intelligere Religionis controversias, sed in omnibus omnino ab alieno pendere judicio, ut nervis alienis mobile lignum. A filio ad alia venio. Raræ admodum mihi à te literæ, atque utinam saltem raritatem earum longitudine compensares. Scis, quod olim Symmachus aiebat, odisse se parsimoniam bonorum verborum; & scribendi brevitate, fastidio, quàm officio, propiorem esse. Non tamen id in te locum habet: qui quàm mei & meorum amans sis, abunde semper comprobasti. Quare illam literarum & raritatem & brevitate occupationibus tribuere malo: saltem cuius rei potius quàm fastidio, vel affectus friguscule. Opus nostrum de Historicis Græcis an videaris haut sat scio. Reperies in eo & amicam tui mentionem, lib. 2. cap. 21. ubi sermo nobis de Gelazio Cyziceno quem à focero translatus tuâ habeo munificentia. At commentarios de Historicis Latinis, quos ante annum misi, quin acceperis non dubito. In ejus operis præfatione ad lectorem focerum defendo, quem ita depinxerat Thuanus, quasi defultorius ac vagus fuisset magis quovis Scythâ. Atque hoc acerbum adeo judicium tulerat ille ob critica quædam: ad quæ focer lassus gravioribus studiis demittere se solet, instar caballi in clivo, cui sudor extricandus. Potuit itaque Junius dicere, quod olim Arellius Fuscus, nemo me ex his censeat. Simul occurrendum fuit ibidem calumniis quibusdam Josephi Scaligeri, quas Epistolis nuper hic cum Heinsii præfatione editis inspersit. Asterisci quidem aliquot locis apparent indices rei alicujus præteritæ. Sed ex antecedentibus & sequentibus non est obscurum, quid dicatur: iis præsertim, quibus non

non incognita prorsus est Historia eorum, quæ postremis aliquot annis inter Junium & Scaligerum intercefferunt. Aut qui Paulinas aliquot Epistolas ex Arabico à Junio translata, ac Tertullianum, Manilium & alia quædam ab eo edita, non ignorant. Eò verò impudentior prorumpit, ut Junium ne Latine quidem scisse calumnietur. Valde me recreavit, quod spem facis adventus tui in has terras, idque intra annum vel paulò amplius. Opto enim tempus videre, quo te fruar. Sæpe mihi conspectum tuum antè oculos pono. Sed non dubito, quin jam multum facies mutata sit ab ea, quæ erat cum abires in Angliam. Tanto impensius videre aveo: quanquam non tam ut dextras jungere, columque amplecti, quam ut sermonem liceat de variis rebus sociare, multaque ex te discere mihi penitus incognita. Habes Epistolam bene longam. Aliquanto parcius esse potuissim: & per te id licuisset: scio enim te verba mea non exigere ad libellam: Sed committere nolui, ut cum ego juxta, ac uxor mea, brevitatem tuam culpæ soleamus; tu meum mihi exemplum objectares. Plurimum te salutat conjux, quæ malè ex casu aliquo valuit ante dies pauculos sed nunc cum Hygieia prope in gratiam rediit. Liberi etiam plurimum jubent te salvere. Vale afinis conjunctissime, & longè charissime.

Lugd. Batav.
clō lxxviii.
x. Kal. Octob.

Tuus totus,

G. J. Vossius.

XCIV.

Guil. Londinensi Episcopo.

O Multis nominibus felicem nuntium, quem mihi Reverendissime in Christo Pater, ac Domine, literæ tuæ apportarunt! Iterum me, imò ter & quater beatum, quem amore tuo & curâ seriò digneris, vir, imò heros illâ pietate, illis ingenii dotibus, illâ doctrinâ, illâ dignitate refulgens, & ut verbo dicam, verè Dei Opt. Max. æmulus. Nam ut magnitudinem præter cætera ostendit, quòd illustrem ejus legatum agis in Anglia vestra, ita non nisi eximie est bonitatis, quod tanto tibi beneficio obstringas hominem tantillum, quodque magis mirandum, longo adeò diffitum intervallo. Equidem primum quantas possum, Deo gratias habeo, uti & Illustrissimo Comiti Dorcestrensi, quorum operâ Deus & Serenissimi Regis, & Il-

lustrissimi Ducis animos tantoperè mihi conciliavit. Tanti Mecænatis fiduciâ innixus, non dubitavi in Angliam mittere carissimum pignus, Joannem meum, filiorum natu maximum. Quem, ut potissimum eligere, non unâ ratione adductus fui. Primum illud movit, quòd hic ob ætatem magis videretur nòsse vitæ suæ modum. Accessit, quòd valetudine uteretur aliquantò firmiori, quàm unus & alter eorum, qui proximi forent. Præterea illud spectavi, quod profiteretur se capi admodum S. Theologiæ studio: nec alibi ejus cultum æquè capere optare, quàm in florentissima Britannia vestra. Denique grave videbatur, si juniorum aliquis primogenito præferretur; imò is amor & cultus erga eum est juniorum, ut si id fieret, injurios se fore ei arbitrentur. Jam circiter octennium est, quòd publicas audire lectiones coepit. Ac cum ætate magis & magis Historiæ & Philosophiæ incubuit; imprimis Mathesi, & scientiæ naturali, sub qua nunc etiam herbariam notitiam comprehendendo, uti & anatomicen, in qua progressus fecit minime aspernandos. Ab istis animum appulit ad juris scientiam in qua jam Baccalaurei gradum consecutus, imò paucis mensibus posse Licentiatum gratum adipisci, plerumque professorum judicium erat. Sed ubi intellexit de occasione hac continuandi in Anglia studia sua, planèque pertexendi, præoptavit paulò cursum retrò legere, ac quod sibi in Philosophia & aliis deesse animadvertet, id novâ curâ supplere: exinde autem velis remisque contendere ad studium S. Theologiæ, sic tamen, ut quod jam in Juris scientia hausit, non ventis tradat, sed horis subficivis adaugeat, modò ingenium, occasio, & res ferant. Saltem Canonicum jus haud multum à Theologia avocabit, quia quicquid illud boni habet, è Scripturarum fonte & S. S. Patrum rivis petitum est. Sed de isto viderimus suo tempore. Imò, non tam ego, quàm Collegii præfecti. Tuque etiam consilii res hæc futura, Reverendissime Præsul, ac Domine; cui ut commendatissimus sit filius meus, usque adeò exopto, ut effari id non possim, nec mihi Linguae si essent complures. Et tantam tamen rem neutiquam rogo timidè quasi assem porrigerem elephantò; sed magna cum spe consequendi, quod voveo & opto. Tanta mihi est fiducia eximie, ac propè divinæ humanitatis tuæ. Itaque etsi non ignorem magnitudinem tuam, meque etiam pede meo didicerim metiri, tamen nixus meritis tuis, & literis postremis, ausus sum filio polliceri paternum affectum tuum, sed conditione eâ, quâ Augustus suos commendabat, si merebitur. De sumptibus

S

quos

quos primo potissimum anno fieri opus erit, curæ mihi res futura. Quin si fatius id videatur, vel in antecessu solvam. Sin id necesse non est, collybo curabitur ne in cuiusquam ære sim. Ad Theses meas Theologicas quod attinet, vellem earum editione abstinuissent Oxonienses. Sed gravius tamen id mihi futurum, si negligenter fecerint. Sin bonâ fide, & cum cura exemplar editum expresserint, feram, quando infectum nunc fieri id non possit, & ut spero amore id fecerint, cum publici boni, tum mei. Nec eò minus adlaborabo, ut nova prodeat editio, in qua suppleam, quæ nunc desunt. Fore arbitror, ut primum lucem videant controversiæ de baptismo, unâ cum Historia rituum, quibus veteres in sacramento uti solent. Pars ea à me jam prope ad umbilicum perducta. Et nisi, ut simiarum catuli, ita me fallunt ingenii industriæque meæ foetus, non infelicitè hæcenus sub manu negotium hoc successit. Ad huiusmodi magis magisque elaboranda, non mediocres mihi stimulos subdit, quod tu quoque, Reverendissime Domine, tantum de gravissimis remiseris negotiis, ut placido illo vultu tuo adspiceres imperfectum disputationum istarum opus. Adspiceres vero? imò legeres quoque, & quid legeres dico? quinetiam laudares. Quod cum cogito, tacitè mihi gaudium circa cor gliscit, majoresque animos sumo, deinceps etiam ea scribendi, quæ tantum Præsulem probaturum confidam. Simul etiam mihi cogitatio obversatur illud agendi, ut omnes videant mihi ad referendas gratias voluntatem non defuisse, sed facultatem. Scio, cum omnia egero, minimè vel dimidiam meritorum tuorum partem expungam. Sed tamen hoc effecero, ut quantopere tantum Præsulem colere debeam, omnes intelligant. Non est mei similibus debita reponere præmia. Quod si leviter coner, humeri mox fatiscunt. Attamen benè merentes laudare licuit, semperque licebit. Nam & à mortalibus laudes reddentur Deo immortalis. Hanc devotam mentem, si scripta mea ætatem ferent, omnis laudabit posteritas. Sin (sed omen verbis absit) quod effugere coner animi ingrati, ingratum tam præclare de me meisque merito nequam esse possit.

Reverendissime in Christo Pater ac Domine, mei pariterque filii mei, Mecænas Optime, supplex oro omnipotentem Deum, & benignum Patrem, ut quemadmodum hæcenus fecit, ita porro etiam te spiritu suo gubernet, & qui tanto gaudio nostro valetudinis jam melioris initia largitus est, idem pristinam penitus restituat, & diutissime conservet,

ad gloriam sui nominis, & bonum tum Ecclesiæ tum etiam nostrum.

Lugd. Batav.
clo. loc. xxviii.
x. Kal. Octob.

Reverendissimo nomini ac dignitati tue pro voluntate tam præclaris erga me meritis restata æternum devinctissimus,

G. J. Vossius.

CXV.

*Nobilissimo Viro, Paulo Seriere.
Metas Mediomatricum.*

Nobilissime & Coniunctissime Serieri,

SI vales, cum tota familia, plurimum gaudeo: Ego, uxor, & octoni Liberi, Dei gratia, valemus. Diuturnum jam utrinque silentium fuit. Interim amor noster, non periit, sed latuit. Unum doleo, quod silentium nostrum exceßerit modum Pythagoricæ *ἡσυχίας*; sed ut post longum hyemis rigorem, gratior est Zephyrus, & verna tempestas: Ita spero, post cessationem hanc, acceptiores erunt literæ nostræ. Quomodo enim aliter censeam, cum arctissimo, & indissolubili vinculo, junctus sis uxori meæ: Et ego amicitiam, quæ cum tam propinquo colitur, sanctam existimem? Pudet quidem diuturnæ adeo cessationis in scribendo: sed non tota hæc nostra, verum magna ex parte temporum, culpa fuit, quibus hic viximus. Et si quid peccatum hæcenus, id crebrioribus deinceps literis compensabitur; non à me modo, sed etiam à Liberis meis, quos superstitione propemodum amare soles: Nec illi minus jucundam tui memoriam servarunt. Non dubito, quin tibi quoque volupe sit futurum, arare nobiscum literarum officio, illum amicitiae campum. Ita crescet amor noster, qui æternus esse debet. Nihil autem æque nosse ex te aveo, quam an vivas, & valeas, an supersit sanctissima Mater tua, Matertera nostra, an benè sit uxori sanctissimæ, quot liberis te auxerit, & cuius sint ætatis, ac sexus, & quibus vocentur nominibus; utrum adhuc apud Metenses agas, & quâ apud eos, vel alios, dignitate sis, & si quæ alia te, vel tuos spectent. Quæ si ex te cognoro, etsi te semper amavi plurimum, non exiguus tamen tanto affectui cumulus accesserit. Jam sextus est annus, quod Historiam Universalem, hoc est, tam sacram, quam externam, profiteor in Academia nostra. Huic muneri ante triennium, & alterum accessit. Nam

Meursio

Meusio nostro successi, in professione Linguae Græcæ. Nec sine gloria, utramque professionem sustineo. Sanè frequentissimo doceo auditorio, eoque nomine à Curatoribus Academiæ amor, & honestè habeor. Qui nec abire in Angliam siverunt, cùm in Academiam Cantabrigiensem vocarer perhonorificè, ut in ea Politicæ, & Historias profiterer. Nec solum viva voce docendo, sed pariter scribendo, nomen procudere, benèque de publico mereri non cesso. Sanè ex quo à nobis abiisti, multa publici juris feci. Ex quibus commentarii nostri, de Historicis Latinis, ita grati fuere Britannis, ut serenissimus Rex, jam manu sua mihi promiserit Canonicatum Cantuariensem, simulatque ulus vacarit. Quæ munificentia tanti Regis eo gratior est, quod hic, & ubivis terrarum, ejus emolumentis, quæ sanè magna, frui licebit. Filiorum meorum jam quatuor, in studiis egregios fecere progressus. Quorum natus maximus, intra paucos dies in Angliam abit, ut Cantabrigiæ, ubi plurimos habeo amantes mei, uberiores capiat ingenii cultum. Uxor, atque Liberi jubent mecum salvere, tum optimam Matrem tuam (nam supersitem adhuc esse speramus) tum lectissimam Conjugem, & familiam universam. Vale, Cognate præstantissime, & nos ama, ut soles.

Lugd. Batav.
clō Idc xxviii.
x. Kal. Octob.

Tuus totus,

G. J. Vossius.

XCVI.

Hieronymo Beale.

Clarissime Doctissimeque Beale, cunte Cantabrigiam Joanne filio, nefas putavi, si eò absque meis ad te literis veniret. Sanè longè aliud jussit tuus erga me amor, quem ego non minori affectu remunero. Quanquam autem & antea te plurimi feci, ut debeo; tamen literis ad me tuis non parvus benevolentis huic cumulus accessit. Satis enim ex iis perspicio, etsi mihi adhuc videar inter cygnos anser strepere, multò tamen præclariùs te de me sentire. Qui error, uti vulgus non prenso, gnarus *non debet id quod* ita seriò gaudeo, vel potiùs triumpho amicitia hominum doctorum. Eorum imprimis, qui in studiis sacris, novellis doctoribus sociarunt antiquos. Quos inter constans fama, te, vir doctissime, reponit, & ita reponit, ut inter paucos illos referat, qui hac in re familiam

ducunt. Ego quoque hanc Spartam pro viribus ornare studeo. Sed tamen amicorum postulato, cogor interdum ad ea relabi, quæ humanitatis vel eloquentiæ studia spectant. Itaque prælo jam subjeci Commentarios Institutionum Oratoriarum, sed longè auctiores melioresque quàm lucem videre ante annos viginti duos, atque iterum sexennio post. Similiter Commentarios meos de Historicis Græcis Latinisque, subsicivis horis, augeo, emendo, orno. Hoc animo veteres & novos lego, ut non modò ditare possim labores meos, sed etiam, meliora edoctus, propria cædam vineta. Imò ut Apelles judicia omnium, post tabellam latitans observabat; ita ego ubique sedulo operam do, ut intelligam, quæ ab doctissimis hominibus in scriptis meis requirantur. Nec tamen solum limandis & corrigendis veteribus operam infumo, sed etiam nova parturio: atque inter alia Commentarios de L. L. grande de erudita literatura opus. Nempe amicissime Beale, cessare non possum. Placet egregius Atheniensium mos, ubi, ut Valerii verbis utar, inertia è latebris suis languore marcens, in forum perinde atque delectum protrahebatur, fiebatq; ut facinorosa, ita erubescendæ rei culpa. Fore spero, ut in studiis suis filius apud vos paternam æmuletur industriam. Quod si fecerit, & sibi optimè consuluerit, & gaudio mihi futurus est. Proficiendi non alibi terrarum melior ei occasio esse possit, quàm in tanta luce clarissimorum hominum. Quanquam autem, quo in Collegio potissimum victurus sit filius, necdum sciam; sed de eo demùm statuet Reverendissimus Episcopus Londinensis, *o mihi*, qui parentis ei loco se fore, quæ humanitate est, recepit: tamen cum omnino id Cantabrigiæ futurum sit, non possum non plurimum te rogare, ut pro amore tam propenso erga me, studio etiam tuo complectare filium meum. Quæ ratione plurimum me tibi obstringes, & devincies. Scio quidem, vel tacente me, commendatum tibi fore, sed tamen orare id te literis meis malui, qui putarem iis aliquam commendationis accessionem fieri posse. Quare iterum iterumque id rogo. Vicissim etiam omnia à me expecta officia, quæ ab homine amicissimo possint proficisci. Vale, & mutuo amare perge hominem studiosissimum tui, quique te non modò mirabiliter amet, sed etiam colat & observet.

Lugd. Batav.
clō Idc xxviii.
x. Kal. Octob.

Tuus,

G. J. Vossius.

KCVII.

Gulielmo Laud *Episcopo Londinensi.*

Reverende in Christo Pater ac Domine,

Illud Tartaro profectum facinus etiam ad laures Lycei nostri pervolarat: sed aliquam multis diebus postquam priores literas exarasset. Nec primum fidem inveniebat, nisi apud paucos. In causa erat, tum quod nuncii ejus mirum in modum variarent, tum quia toto ante trimestri publicæ pacis hostes similia istis longè latèque sparsissent. Nunc enim Illustrissimus Dux mensæ assidens, nunc curui insidens, simili scelere sublatus ferebatur; quæ quia vana esse docuerat eventus, eo sperabant boni tum quoque famam mentiri, etsi, ut ingenue dicam, formidarem subinde, ne hæc ab hominibus malis spargerentur, ut inde aliquis conciperet cogitationem verè ea patrandi, quæ falsò tum diffunderentur. Sed quocunque animo hæc facta sint, nimis verum fuisse hunc rumorem docuit nos dies: maxime postquam jam filius in Zelandiam abierat, ubi hebdomadas aliquot ventos & commodam navigationem expectare coactus fuit. Quantum inde doloris perceperim, nullis literis testatum facere possim. Non jam sufficebam expediendis negotiis meis vel publicis vel privatis. Indignabar ereptum orbi illustrissimum ducem, annis florentem, magni adeo ac præstantis animi, à quo expectarentur præclara omnia, dignaque tabulis æternitatis. Cogitabam quantum in eo amisisset Britannia, quantum illustris ejus familia, quantum tot boni: quantum & ego, quod tantò sæpius in mentem veniebat, quantò apertiora erga me erant merita ejus. Spem etiam muneris fecerant literæ tuæ: atque ex aliis etiam cognoram, quàm munificus esset, planè præter mores & tempora hæc. Sed quemadmodum ventis cessantibus mare detumescit: ita voluit Deus gaudii mei redundantiam hoc infortunio residere. Interim sic quoque Illustrissimi ducis merita erga me majora sunt, quàm sperare unquam ausus fuisset. Nam quid mihi beneficio eo, quo coopter in Canonicorum illud nobile Collegium, vel honestius vel clarius, vel ad bene merendum de Ecclesia & Republica literaria accommodatius esse possit? Quare & nunc Illustrissimo Duci *meo* gratias habeo, quas possum, & habebo dum vixero: semper etiam operam dabo, ut ne illustrissimi ejus nominis amantes, ac præcipuè liberos, & sanguine, affinitate, vel amicitia junctos, vel talis de me

judicii, vel collatæ dignitatis, possit poenitere. Animum autem hunc meum eo ostendere modo conabor, quo possum; imò quo illustres animæ imprimis affici solent: nempe illo, qui ad æternam laudem & gloriam confert; quæ optima maximaque omnium in hac vita semper judicavi.

De afflictæ valetudine tua mihi peracribum fuit cognoscere. Nam, si quis alius, is sum, cui & res tuæ secundæ incredibilem adferant voluptatem, & adversa omnia maximum dolorem pariant. Et, si vir bonus esse velim, quî aliter affectus esse possem erga eum qui me illustris aded amoris significatione sis prosecutus, ac porro in clientelam tuam filium, carissimum meum pignus, recipias, ita ut uterque non alio, quàm parentis loco, colere te debeamus ac venerari. Atque in hanc mentem plura dicerem, nisi vel proximis literis eam in tanta dignitate tantisque meritis vidissem esse humanitatem tuam, eamque modestiam, ut laudanda facere, quàm laudari in os malis. De Collegio quod scrupulum injicere posse videatur, gradus honoris filio collatus, sanè doleo. Sed non dubito, quin pro sapientia tua facile sis perspecturus, quid nunc factò potissimum opus videatur. Cum voluptate autem in literis filii legi de eo potissimum loqui te velle, cum Clarissimo Wrenno, viro non summâ modò doctrinâ sed singulari etiam humanitate prædito, ac præterea, quod non uno indicio cognovi, amantissimo mei; Thesium mearum syllogen accepi, proque munere quo me mihi donas, gratias habeo summas. Nam mirum in modum desiderio tenebar, jam dudum videndi novam hanc editionem differtationum nostrarum. Gaudeo typis satis venustis, & quod caput est, non inemendatè, quantum adhuc cognoscere potui, produisse. Sed disputationes illas, quæ postremum locum obtinent, nempe illas de virtutibus gentilium, deque peccato originali, & gratiæ necessitate, satis fuerat omitti, cum in Historiæ Pelagianæ opere legantur, eò quidem emendatius paulò. In controversia de Baptismo Johannis mallet licuisset paulò apertius sententiam exponere vetustatis. Sed ita tum videbatur, & ne sic quidem efugî satis eorum offensas, quibus non satis antiquitas sapit. Sanè quod candidè exposuerim veterum judicium de Prædestinationis controversia, & aliis, quæ Pelagius & Massilienses movere, id quidem, (ut apud te dicam quod res est, & mussare cogor apud multos) majori mihi pretio sterit, quàm sex nostratium florenorum millibus. Sed quod in terris decessit, id Deus rependit in cælis. Ex his, quæ de Josephi Vicecomitis opera tam

amanter

amanter mones, clare fatis perspicio, quanto pere me diligas, & quàm curæ tibi sit nomen meum. Verum planè confido me neutiquam post eum operam lufurum. Ita multa bona observavi ei indicta. Et ubi concurrimus, brevius rem complectar, quia ejus operam excutere de manibus non est animus. Pleaque etiam digeram melius, & auctoribus aliis firmabo. Sed de me nimis multa. Interim, qui hæc promitto, necessitatem mihi impono hoc agendi, ut nec expectationem fallam. Neque de eo tam sollicitus sum quàm doleo, quòd labores mei spissius procedant, quàm vellem. Nimirum nunc publica avocant munia vel privata mea, vel etiam amicorum: nunc affatus abstrahunt juvenum, qui ex variis adeò terris in Lyceum nostrum contulere; nunc valetudo uxoris moratur vel etiam mea, sane nudiustertius lumbagine infestatus sum, quod malum neque nunc planè cessat, multum tamen remissit. Omnino, ut medici, & amici suadent, paulum deinceps corporis exercitiò dare cogar, si diu & publico, & meis, utilis esse velim. Spero hac etiam partè me Deo meo curæ fore. A valetudine mea ad tuam venio. Reverendissime in Christo Pater ac Domine, Deum oro, ut ad summam tuam prudentiam, doctrinam, dignitatem summa etiam à corporis vigore & robore pristino, felicitas accedat: atque id imprimis, ut diutissime Ecclesiis Britannicis præsis & prosis; deinde etiam mei filique mei causâ, quorum utrumque ut in clientelam tuam recepisti, ita porro amore atque curâ paternâ ut foveas majorem in modum rogo.

Lugd. Bat. Pr. Nat.
Dom. an. cto lcc.
xxviii. St. N.

Reverendissimi nominis &
dominationis tue devotissimus
clerus,

G. J. Vossius.

XCVIII.

Gulielmo Boswello

S. P.

Quamquam, generose vir, atque idem amice amicissime, à corpore langueo, ab animo vetizo, ut illa Augusti voce utar: tamen ea erga me sunt merita tua, is erga te amor meus, ut propemodum mihi placulare aliquid videatur, si tuorum quemquam sine meis ad te literis dimittam: Sed, ô quanto optatius fuisset, si, uti spem feceras, Lugdunum revivisses, atque ita mihi desideratiffi-

simo tui colloquio frui paulisper licuisset! Sed privatos, fateor, affectus regni vestri negotiis posthaberi æquum est; imo plusquam æquissimum. Libellos quos ante sæculum Gratius, homo Pontificius, Ecclesiæ bono concessit, ad te mitto; spero munusculum non fore ingratum, quia fructu omnia potius quam pretio metiri didicisti. Multum tibi debeo, quod me donaris Clave Apocalyptica ejus viri, qui etsi nomen dissimulet, tamen abunde prodit ingenium, doctrinam, industriam. Jam decennium est, quod in Collegio Theologico Illustrium Ordinum hunc librum Auditoribus enarravi. Compluribus in locis ubi hærebam, nebulas mihi vir ille discussit. Atque utinam mihi tam lymphoto & defecato esse animo licuisset, ut non seorsim Capita, vel Capitum interdum partes considerare licuisset; sed quod in hoc argumento palmarium est, à capite ad calcem, interpellante nemine, perspiculare omnia potuissim. Interim ex iis quæ tantopere probantur, planè persuasum habeo, idem de iis judicium fieri oportere, de quibus nondum satis liqueret. Sed ista expendam accuratius ubi meus esse magis cœpero. Simul etiam unius alterius egregii apud nos viri judicium exquiram & perscribam. Hæc nunc paucis perscripsi. Sed, ô vir præstantissime, quanto uberiores à me Literas accipies (atque ego mihi item à te promitto) ubi salvum ac sospitem advenisse in Britanniam vestram cognôro! Quorsum hoc à me dicatur, scio te intelligere. Nihil enim mihi magis volupe erit, quam commercium si literarium tecum intercesserit. Scio, quanto pere mihi ea res esse subsidio in studiis meis possit. Et, quod probe cognovi cum proxime adesses, fiet id te non invito: quid invito dico? imo prope æque, ac à me fit, expetenti. Eo nunc facilius Epistolam abrumparam. Quanquam nec plura si velim, possim, dum assidue ab aliis interpellor, & quomodocumque quàm nihil scribere malo. Quæso, mi Boswelle, commenda me Illustrissimo Domino Legato, Comiti Carlensi, cujus ego affectum erga me jam bis perspexi, quod homullum hunc tanto sit honore dignatus. Nunquam mihi excidet beneficium hoc ejus Herois. Cui nunc aliud optare non possum, quam ut rebus ex sententia confectis, lætus ac sospes se Regi Serenissimo & Britanniarum sitat. Quod idem tibi, generose Domine, exopto. Si valetudo & alia concesserint, literas exarabo etiam ad aliquos in Britannia amantes mei. Sed si id minus nunc erit, fiet intra dies paucos. Rogo ut me commendare digneris, ac simul filium, Reverendissimo Domino Episcopo Londinensi,

nenſi, Viro, cui plus uterque debeamus, quam dicere poſſim. Quod & ipſe antea expertus ſum, & ex literis filii mei ſatis didici. Quid de CLL. & ſummis Theologis Wrenno, Belo, aliis dicam? Ego verò non auſim à te poſcere, ut hoc oneris ſalutandi eos ſuſcipias; alioqui de eximio Viro Seldeno non tacerem, & uno item alteroq; alio. Sed de iſto videro proximis Literis. Raptiſſime.

Lugd. Bat. clb
Ioc xxix. ix. Jan.

Tuus ex animo,

G. J. Voſſius.

XCIX.

Clariffimo viro, Franciſco Gomaro.
Groningam.

Vir Clariffime, & Coniunctiſſime,

Qui has tibi literas reddit, cùm primum in Academiam venit noſtram, de meliore mihi nota commendatus eſt, à Theologis Bremeniſibus; Eoque uti nomine, mihi gratus ſemper fuerit, ita non leve amori pondus acceſſit, ubi non eruditionem modò, ſed quod longè majoris ducò, pietatem etiam, & ſingularem modeſtiam perſpexi. Parentem habuit egregium virum, D. Streſonem (ut nunc, quàm Epiſcopum dicere malunt) in Eccleſia principatus Anhaltini. Quo in munere, is ſucceſſorem habuit Clariffimum virum, Angelocratorem, eum, quem in Synodo Dordrechtana, non minus ab eruditione, quàm de facie noſſe potuiſti. Ut ad juvenem hunc redeam, Is partim caritate annonæ, quæ hic eſt, compulſus, partim famâ præſtantium Academiæ veſtræ virorum illeſtus, iter ad vos inſtituit: ſed vix æquè aliud in votis habet, quàm ut publicæ ſtudioſorum menſæ particeps eſſe poſſit. Quod ut conſequi liceat, commendari à me tibi voluit, & Collegis tuis. Rogo igitur, ut huius voti ſui particeps per vos fiat, vel ſi locus nondum vacet, ſaltem conſilio juvetis, ut ne diu admodum ſpe fluctuet in certâ. Erit id mihi longè gratiſſimum; nec mihi modò, ſed etiam ſummis viris, Scholæ Bremeniſis Theologis, qui eum mihi, ut dixi, commendarunt. Neque dubito, quin juvenis ipſe ſemper grato animo ſit conſervaturus memoriam beneficii veſtri. Pro doctiſſimo opere de Sabbatho (quod tamen non ad omnium guſtum fuit, ut nunc tempora ſunt) gratias quas multò ante debui, nunc demum ago. Planè mihi ſuccenſeo, quod ab tam

amico viro, tam præclaro munere ornatus; (nihil auribus do, non pauca me bona docti) tardè adeo reſcribam quicquam. Nempe jam penè in naturam abiit conſuetudo tardè reſcribendi. Primum tantummodo in craſtinum, aut perendinum diem rejicio, aut diem eum, quo Academico more feriamur. Hoc non facilè aliquis improbaret in eo, cui bis de die publicè docendum. Sed dies unus, alter, ſit hebdomas, hebdomas menſis, menſis trimeſtre: Niſi puderet dicerem ſemeſtre, annus ultra; Imo quod quorundam literis nunquam reſpondeam: Non profeſſò contemptu cuiuſquam, nedum præſtantium virorum: ſed quia non par ſim omnibus, quæ ſuſcepi in humeros meos. Ad quæ nunc acceſſit moleſtiſſimum Aſſeſſoris Academici munus, & nova lima Oratoriarum Inſtitutionum, quibus jam prælum fervet. Hæc eo pluribus ſcripſi, ut facilius ignoſcas, quod nihil reſcripſerim hætenus, de negotio illo ἐρωτησῶ. Quamquam & alia ſunt, quæ tardiores fecerunt. Primum iſtud, quod illa quam me ſcis dicere, ſignificaffet ſtatutum ſibi eſſe abnuere conditionem. Deinde hoc, quod ipſe hærerem. Πολλὴ ἰδίᾳ, πρὸς τοὺς ἑαυτοῦ ἀνδρῶν πολλὴν φέρων ἀνέχεται ὁ δὲ τοῦ νικηφόρου. Si non magis ex compacto Teutones noſtri, nec prudentioribus conſiliis, rem curabunt publicam, tantum poterunt tela eorum adverſum, & cum Poetis dicam, Jovis alitem, quantum Chaonias, vel ſi mavis, Teutonicas dicunt, Aquilâ veniente columbas. Sed Omen abſit. Neque planè de Teutonum rebus deſperare poſſum; præſertim ob nonnulla, quæ viri talium intelligentiores communicarunt mecum. Quod ſi optima ſperare deinceps detur, de Germaniæ ſtatu: Et quæ poſcitur, noluit viduis noctibus floridam perire ætatem, equidem non indecorum hunc ἀπολογιστὰ duxerim noſtræ familiæ. Sed porro tùm cogitandum erit, nequid liberis inde diſpendii oriatur: Hanc curabit nobiſcum ille, qui nunc, ut ſcis, Britanniam petiit, ac menſe proximo aſſuturus denuo putatur. Salutabis meo nomine plurimum conjugem, & liberos; Imo Collegas tuos, imprimis D. Altingium, & D. Ghebartum. Uxor etiam ſalvere te juſſit, & tuos.

Kal. April. clb.
Ioc xxix.

Tuus totus,

G. J. Voſſius.

C.

Danieli Paræo S. P.

IS amor est noster, Præstantissime Paræe, ut peccaturus mihi videar nisi quamprimum te facerem certiore eorum, quæ pertinent ad statum rerum mearum. Amstelodamenses nostri decrevere scholam erigere illustrem: ac me Historiarum ad professionem & Politices vocarunt, nempe (verbo ut dicam) ut quod oneris hic sustineo, idem suscipere in Rep. sua velim. Quæ eos consilia impulerint, longum esset adscribere. Sed tamen facile cogitare possis, non nisi suavissimis de causis tantos sumptus facere velle. Quippe ut de uno me dicam, si domum accenseam, stipendium futurum centenis aliquot supra ter mille florenos nostrates. Et amici præterea pollicendo commodorum mihi meisque spem egregiam fecere. Illi quibus oculi dolent, quando literis & literatis bene est, hunc animum Amstelodamensium in calumniam rapiunt. Mihi vero certissimum est, solo studiorum, & publici boni amore hæc eos suscepisse, neque ego eorum postulato acquiescerem, nisi viderem, sic melius posse me Reipub. literariæ inservire. Quanto enim fuero animo defæcatori, tanto pulchrius mereri licebit de studiis, docendo pariter, scribendoque, fortasse & sic magis prodesse potero amicis meis: quos inter te etiam, mihi Paræe, merito tuo expono. Utinam urbis ejus exemplum imitentur Haerlemenses. Id fore quondam in ea republica opinio est. Quin jam serio de eo actum fuit. Quin & Delphenses tale quid promittere videntur. Quæ si accidunt, facilius deinceps ratio haberi poterit virorum præstantium. Nunc enim id fieri nequit, quia functiones vacant nullæ. Sed de istis propediem scribam pluribus, aut saltem post mensem. Tum enim Amstelodamum ibo: Atque eò ut venero, non desinam dispicere, eequem fructum capere possis ex amicitia nostra. Nec eo minus idem hic, & Hagæ facient amantes Paræani nominis & nostri, scire tamen vellem quò maxime animus feratur, & in quo vel me vel amicos alios, posse aliquid existumes. Si possumus, volupe erit; sin minus, affectum tamen testabimur. Oratoriarum mearum exemplum recipies à vestratibus Bibliopolis. His enim uti & Denarium Meursii nostri, se daturum eas recepit typographi nostratis filius, qui nunc est Francofurti. Vale egregie vir,

ac deinceps etiam nos semper mutuo amemus.

Lugd. Bat.

Tuus totus,

Prid. Kal. Aprilis.

G. J. Vossius.

CI.

Jo. If. Pontano S. P.

Vir clarissime, Jamdiu est quod de multis tecum colloqui aveo. Prope semestris est, cum spem feceras Hagâ Lugdunum repetendi & invisendi me. Exemplar Oratoriarum decreveram offerre præsentis. Sed occupationes credo impedierunt, quo minus secundo me accederes. Quod gratularis mihi de professione apud Amstelodamenses pergratum est. Intelligo ex amicis, te crebro huc excurrere. Tanto mihi jucundius erit hic vivere, quia sæpius unà esse licebit, deque communibus literarum studiis confabulari tecum, quem multum quidem amo, sed nec minus æstimo, sanè non alterutro cuiquam lubens cessero. Quare simulac pedem in urbe hac posueris, vel primum nos vides, vel si res tuæ illud non sinunt, saltem in primis. Ælnothum, quem petieras, mitto. Destinatum diu Oratoriarum exemplar dono tandem. Uti & denarium Pythagoricum Meursii nostri, qui eum mihi dicavit. Habet hoc commune amicus noster, cum viris principibus & Rebusp. quod pecuniam cudad, sane periculi nihil est ne ei quisquam ob denarium cūsum litem intendat. Quin potius ei gratias agit Resp. literaria. Plura vellem, nisi vereretur ei molestus esse, qui hæc perfert & scribentem expectat: Salutem clarissimis Collegis Bronchorstio & Zevecotio.

Tuus,

G. J. Vossius.

CII.

*Doctissimo Viro, Francisco Junio.
In Aulam Arundelianam.*

PLurimum me Tibi obstrinxisti, Optime, & Conjunctissime Afinis, quod tantum laboris susceperis filii mei causâ; ut eum deduceres ad cognatam Bulliam. Neque id tam gratum mihi est eo nomine, quod hoc

hoc Duce, & Comite, tutius potuerit conficere isthoc iter; quàm quod tali diebus aliquot monitare fruens, magna potuerit incrementa capere, & pietatis, & prudentiæ, & doctrinæ. Utinam hujusmodi illi felicitas sæpius obtingat. Verum quia rivi, id non ferre institutum vitæ tuæ, cum vix magis tuus sis, quàm ego meus: saltem illud precibus consequi à te licebit, ut crebrò eum literis tuis, sui officii commoneas, scis enim quàm proclivis sit adolescentia ad otium, & vitia. Sanè vero illud dico, eo me animo esse tranquilliori, quod illic talem affinem, vel potius fratrem, hoc est, ut Grammatici dicere solent, ferè alterum me habeam, qui propemodum sic amet liberos meos, quàm si ex se nati sint. Præsentia Clarissimi Petri multum me delectavit. Juvit pendere ab ore narrantis, tam multa pulchra, & præclara de peregrinatione suâ. Egregiè meritus est de Rep. Literariâ, quod multò magis patebit, cum ea quæ observavit, in publicum emisit. Gratulor tibi quod, cum tanto ejus Mecenate, Illustrissimo dico Comite Arundelio, vivere tibi contingat; cujus auspiciis, & sumptibus, hoc iter susceptum est. Sed quod Petrus aiebat, sperare se, te quoque iturum in Græciam, id tale fuit, ut Lapides mihi loqui videretur. Eò magis, quia retuli mihi, ut sæpius in carcerem, tanquam explorator fuerit conjectus; semel etiam naufragium fecerit. Cum hanc peregrinationem suadere tibi D. Petrus coeperit, velim ex diserto fiat infantissimus. Græcos ne tibi lustrandi veniat tam dira cupido: præsertim postquam maximè memorabilia iis è terris abstulit Petrus. Tun' spicilegii ergo, hac ætate tantum capeffas laboris? tot te periculis exponas? Malim te ire ad Gallos, Italos, at Belgas ante omnes, ubi Nos vises, qui tanto tenemur desiderio Tui. Et facies id spero propediem, fortasse tamen antea extare voles aliquod monumentum ingenii, & diligentiae tuæ. Nam partim ex literis tuis, partim filii, intelligo te moliri aliqua, de statuaria arte, ac picturis veterum. Sanè aliqui hoc Argumentum tractarunt. Ut præter Gauricum, Cæsar Bulengerus, qui ante biennium emisit in Galliis libros duos, de picturâ, & plastice statuaria. Nec dubito quin videris Joannis Molani Lovaniensis Theologi libros de historia S. S. Imaginum, & picturarum. Verum & hi & alii, quibus argumentum hoc expositum fuit, non exiguum tibi reliquere spicilegium. Tantò impensius desidero ea videre, quibus non modò te Illustrissimo Comiti, Literarum, & Literatorum Patrono, Opt. Max. commendare possis, sed etiam Reip. toti literariæ, &

sæculis futuris. Sanè, mi Affinis, præter tempus, & benefacta, nihil est nostrum. Opes post obitum nostrum, alium atque alium Dominum nanciscuntur; sed ingenii, & industriæ monumenta, non mutant dominum. Quare perge in præclaro Instituto, & brevi nos bea foetu aliquo, qui parente suo dignus sit. De liberis meis nihil addo, præter hoc unum, eos se mihi magis magisque probare: quod tibi quoque jucundissimum esse cognitu scio. Hæc raptim, atque festinantius quàm vellem; eò quod Joannes Brunæus, cum Coniuge, ad me divertisset, nec illum diutius sine alloquio mei relinquendum putarem. Jussit ut te plurimum suo nomine salutarem. Sororis tuæ Johannæ res meliori loco, his proximis mensibus esse coeperunt: quo nomine, valdè Ego & Uxor gaudemus. Non paulo nunc sereniori animo est, quàm esse solet. Juvit tua liberalitas, sed imprimis quod quingentos, vel amplius, ex negotiatione Americana percepit; spero eam, & universam Parentis tui familiam, Deo curæ fore.

Lugd. Batav. clo
15c xxix. Prid.
Kal. Quint.

Tuus totus,

G. J. Vossius.

CIII.

*Reverendo Dom. Guilielmo Episcopo
Londinensi.*

Reverendissime in Christo Pater ac Domine,

Multiplici me gaudio perfuderunt literæ, decimo Maii exaratae, ac mense eo paulò amplius post, redditæ mihi unâ cum epistola filii mei, quæ & ipsa altero me gaudio implevit. Primum enim non mediocriter lætabar, quod viveret filius Cantabrigiæ in collegio. Eò impensius lætabar, quòd locus ei datus esset inter eos, qui ætate, doctrinâ, honore, aliis antestarent: quæ res & posset, & deberet, ardorem addere studiis ejus, & occasionem præbere ex tam pulchro sodalizio majora quotidie capiendi incrementa, pietatis, prudentiæ, doctrinæque. Maxima verò lætitiâ afficiebar, quòd haberet præsidem Collegii doctissimum Theologum Matthæum Wrennum, à quo amari me, & alicujus fieri scirem, ut ex voto meo non alteri filius meus meliùs certiusque potuerit committi. Ad tanta hæc nunc illud accessit, quod filius perferibit, se à serenissimo & beneficentissimo Rege Carolo (cui Deus prospera omnia, ac de annis etiam meis, inquit super-

superfuerint, largiatur) eo honore esse affectum, ut deinceps sit accensendus fociis Collegii Jesu. Quod beneficium quantum, imprimis erga hominem exterum, nili intelligam, tum verè fuero lapis. At omne hoc post Deum ac Regem, vel tui unius, vel imprimis saltem, Reverendissime Præsul ac Domine, affectui tuo ac curæ debeo singulari. Magna, vel potius ingentia erga me & meos priora erant merita tua: utcumque in iis, quæ Magnæ Britanniæ deberemus, multum aded sibi vindicaret illustrissimus & magnificus Buckinghamiæ Dux, æternùm mihi animo, sermone, ac scriptis celebrandus. Sed, sic quoque, ut dixi, magnopere eram obstrictus nomini tuo, qui, ut mittam cætera, tanti mihi herois gratiam conciliafles. Nunc priora beneficia accumulare hoc novo voluisti. Hoc verè est patrem se præbere, & filio, & mihi. Quare cùm benefacere non cesses, nec nobis cessandum est in gratiis agendis, & omnibus grati animi officiis spondendis, qualia quidem à meæ conditionis homine proficisci possint. Hæc me aliàs etiam scribere commemini. Sed facile mihi veniam dabis, ut, quemadmodum idem facere pergis, ita idem ego scribam, verbis fortasse aliis, sed in eandem sententiam: in quo recordor similiter se S. Sulpitio olim M. Tullium excusasse. Unum illud in literis tuis dolori erat, quod, cruris vitio, ne nunc quidem planè sis tuus: multùm tamèn gaudeo, res ita procedere, ut sperare liceat, si non penitus recuperes vires antiquas, at illas saltem adepturum, quæ ab iis proximè absint. Optimè observasti, quod ego non dolo quidem, sed studio tamen, non oblivione aliquà egeram, ut de nostris in Baronium animadversionibus, deque veteris Ecclesiæ strenuè tacerem in literis meis. Nempe non ignorabam, quæ tua & aliorum virorum præstantium expectatio foret. Ego autem, ut apertè, quod res est, nunc dicam, auctoritate Illustrium Bataviæ ac Westfrisiæ procerum compulsus, partitiones meas oratorias iterum divulgavi: quæ nunc in Scholis omnibus Hollandicis docentur. Sed quia in his brevior aliquantò fuisset, operæ multis videbatur, ut etiam commentarios oratorios, grande opus, quod ante annos xxiii. atque iterum triennio post divulgaram, tanto post intervallo ad incudem revocarem: atque ità & rem præstarem Illustribus Ordinibus nostris longè gratissimam; & magis etiam, quàm fecissem antehac, scholarum mihi præfectos obstringerem: ac bene insimul mererer de multis qui aliis etiam in terris studium hoc Oratorum colunt: ac si hoc quoque in censum venire meretur, eadem nonnihil honori consu-

lerem, cùm non mediocriter mea interesset, ut non tam multa quam optima, victuraque posteris relinquam. Quòd si primogenitorum cura nos plurimùm tangat, aiebant, æquum mihi videri, ut nunc præbità mihi à proceribus nostris occasione optimà, denuo in manus sumerem primum illum nostrum ingenii *Ægypsiæ* foetum, atque operam darem, ut quæ tantoperè Scaliger, Casaubonus, atque alii summi viri tum comprobarunt, eadem nunc emendatiùs, & auctiùs, & feliciùs videant lucem. Atque hoc quidem futurum est, summum, ni fallor, intra trimestre, aut circiter. Vix enim tertia pars superest excudenda. Equidem mihi telam istam olim, ita postulante tunc muneris ratione, orsus fuisset, atque etiam ut tum vires ingenii ferebant, pertexuisset (idem autem de L. Latinæ commentariis dictum velim) nunquam profectò ità nunc desiperem, ut levioribus potius illis, quàm sacrorum meditationi, & antiquitati Ecclesiasticæ tempus impenderem. Et tamen sic quoque operam do, partim ut nec illa me nunc detineant totum: partim ut iis, quàm citissimè liceat, defungi, quo totus majoribus & melioribus vacem. Accepi his diebus ab iis, quibus res Britannicæ non ignotæ viderentur, adhuc metus esse aliquid, ne improvido quorundam zelo, etiam in inclyto regno vestro, schisma fortasse oriatur, ob diffensum aliquem doctissimorum hominum, in controversia de prædestinatione, & dogmatis annexis: proptereaque aiebant etiam pietatem ac prudentiam tuam sese Parlamenti postremi tempore occupasse, ut pestilenti aded malo salubribus & moderatis consiliis obviam iri posset: sed omninò pertinacius fuisse malum, quàm ut discuti tum potuerit: ed fortasse minus, quia inter illos, qui Religionem, ut fieri solet, prætexerent, forent non pauci, qui alienæ inhiarent dignitati, ac rebus studerent novis. Non ego tam curiosus esse soleo, ut anxie inquiram in negotia publica regni vestri: sed tamen, nequid dissimulem, non leviter me ea res conturbavit. Opto enim res Britannicæ esse florentissimas, non tantùm, quia & ipse quodammodo nunc in Britannorum numerum transcriptus mihi videar favore vestro; sed vel maximè, quia salus Ecclesiæ Reformatæ post Deum, à Britannicæ regno, & hisce terris dependeat. Itaque assiduè Deum oro, ut benedicere dignetur Serenissimo Regi, ac felicem largiatur successum tuo, & aliorum tui similibus, sancto proposito; quod utroque, ut dici solet, pollice hic probatur ab omnibus pacis & concordie studiosis. Sanè, si non aliud quam humanas vires spectemus, arduam suscipiunt provinciam, qui in Religionis

diffidio sequestri esse student. Imò plurimum, quod quodammodo edoctus sum malo etiam meo, præda esse victoris solent. Sed tamen, ut spero, nondum sic iratus est Deus peccatis nostris, ut etiam apud vos passurus sit in neryum erumpere triste adeò diffidii malum. Cui omnes, si ipsis de se credimus, consultum volunt: sed utut pacem utrimque crepent, tamen remedia adferunt admodum disparia. Multi enim non aliam viam sciunt, quam ut iis, qui dissentiunt, malè mulctatis atque oppressis, Regnum obtineant soli. Alii contra in omnibus, qui fundamentum Religionis retinent, longè præferunt moderationem & animorum & scientiarum: quam non desperant posse obtineri, dummodo venerandæ antiquitati, & magnis etiam viris, quos Deus serius nasci voluit, honos debitus constet. Utcunque enim inter veteres & juniores, in aliquibus fortasse dissensus aliquis appareat, tamen facillè negotium componatur, dummodo abfuerint, hinc quidem temerè innovandi libido, inde autem amor domini in conscientias alienas. Sed hoc non agnoscunt qui coelestem veritatem postponunt ambitioni suæ: ac charitatem Christianam posthabent odio & malevolentiae propriae. Verùm dum hi, quarumcunque tandem partium fuerint, disputare acutè malunt, quam Christianè vivere, non quidem capitur Saguntus, sed quiddam vincitur longè majus & excellentius Sagunto. Quippe fraterna dilectio, sine qua esse Christiani non possumus, animis & doctorum, & populi expellitur; contrà, vires capit Regnum Antichristi. Tantò magis oro Deum, ut te, Reverendissime Domine, optimeque Mecenas, deinceps etiam spiritu veritatis & constantiae firmet, ac longam tibi vitam & valetudinem prosperam in hoc proposito largiatur, atque aliis quoque eam gratiam tribuat, quò præclaris monitis ac consiliis tuis aures præbeant vacivas, neque sua quærant, sed quæ sunt Christi.

Lugduni Bat.
clō Ioc xxix.
xx. Junii.

Reverendissimæ dominationis tue
cultor devotissimus,

G. J. Vossius.

CIV.

Joanni Filio.

Dilecte Fili,

Multum gaudeo te, hominem exterum, & qui cum à nobis abires nihil ultra vulgarem eruditionem tibi possem vindicare, tanto honore tam citò à serenissimo Carolo Rege esse affectum, ut te cooptarit in numerum sociorum pulcherrimi Collegii, quod à suavissimo nomine Sospitatoris nostri Jesu nomen suum accepit. Quantum propterea magno Regi, quantum Reverendissimo Domino Episcopo Londinensi, quantum Aca- demiae Cantabrigiensis summis viris debeam, tute melius vides, quam ego, satis in dicendo infans, verbis possum explicare. Nunc, si unquam ante, magnâ opus erit curâ, atque industriâ, ut ne summi Regis & beneficentissimæ gentis gratiâ hæc te indignum geras. Equidem non delinam cogitare, quomodo optimè animum testari gratum possum. Sed nihil æquè dolet, quam quòd undique ita distingor, ut non tam citò possum omnia quam velim. Ad pecunias quod attinet, iussi, ut mercator ille qui proximè centenos tibi florenos annumeravit, idem nunc ducentos daret. Vix tanto opus esse tibi putabam. Sed malui modum excedere, quam me intra eum continere. Tuum est curare, ut parè expendas. De avunculo quod scribis, frustra es. Facilius Herculi extorqueamus clavam, quam illi teruncium. Necdum ab eo accipi, quod mihi debet ratione domus, cui insigne Dodrechtii ruber pannus est. At scis multos jam annos esse, ex quo debetur mihi ea summa. Videtur tantum hoc agere, ut mihi incommodet, & domui Junianæ. Deus illi ignoscat; sed & nobis, si forte in culpa ipsi sumus, etsi id nobis minimè videatur. Nempe ut scis, non solemus videre mantice quid in tergo est. Balthazar Lydius jam ante semestre fato suo functus est. Vix dici possit, quantum optima ejus conjux Anna Mylia, quantum liberi ejus in hoc viro amiserint. Scis enim sortem eorum esse angustam satis. Ferè quicquid habent consistit in Bibliotheca sola, luculenta illa quidem, sed quæ alendæ illi familiæ, ut vel maximo pretio distrahatur, nullo modo suffecerit. Abrahamus Beverius noster ante trimestre uxorem duxit, Velartiam, filiam natu maximam viduæ Panthusiæ, non ejus quæ ex adverso ædium nostrarum, sed quæ è regione ædium Knotterianarum degit. Nuptiali convivio ego, mater, Franciscus, & Cornelia interfuimus.

fuimus. Franciscus nuptias eas versibus non inelegantibus partim Latinis, partim Belgicis celebravit. Misissim exemplar, sed ipse careo. Imò ne sibi quidem frater exemplar ullum reservavit, quæ in talibus simplicitas est adolescentis. In oratoriis meis institutionibus jam quintus excudi liber cœpit. Vix absolvi poterint ante mensem quartum. Forma est folii in quaterna complicati. Fasciculus ille literarum, quem Borrius ad Dubletium curandum suscepit, nondum comparet: quo nomine doleo. Theodorus Grafwincklius uxorem ducit maximam natu, sororem convictoris quondam nostri Loëi, puellam & benè natam, & educatam, & egregiè cordatam. Barones nostri ante bimestre ière in Brabantiam: inde per Gallias patriam repetent. Itaque onere nunc convictorum liberati tandem sumus. Abeuntes postularent, ut suo nomine te juberemus plurimum salvere. Dionysius in collo laboravit ingenti tubere. Jam mensis est, quòd Chirurgi operâ curatur. Nec puto sanitati pristinæ ante mensem restitui posse. Primum valde metuebamus illi, penè etiam vitæ. Nunc non modo extra periculum est, sed studiis etiam vacat, propemodum ut solet, etiam cum optime valet. Nec-dum surrogatus quisquam in locum Jacchæi. Expetunt eum M. Reinerius, Pauwii liberorum præfectus, Sinapius subregens, & M. Bodecherius. Reinerio favet Curator Arsenius: Sinapio Curator Cromhautius, Bodecherio consul Brochovius. Academia Rectorum magnificum habet Burgerfdicium. Cognata Berkia, legati vidua, nunc Hagæ degit. Sipesteinia hac demum hebdomade nupsit Bommio. Aiunt prolem jam diu ex marito habuisse, eamque vivere. Sed quid ad nos verène hæc sparsa sint, an per calumniam? Posterius tamen credere malo, eoque nonnihil dubitabam an etiam hoc scripturus essem, præsertim cum nostra nihil, ut dixi, interfuit. Vicinas ædes, quæ Hardewinii sunt, inhabitat nunc Schrevelius medicus: quod nec mihi injucundum, nec conjugii, sæpe, ut scis, infirmæ ac valedudinariæ. Et nosti quàm is suavis sit ac lepidus, pene dixeram congerro. Arnoldus Beaumontius hesternò die publicè pro Licentiatu gradu magna cum laude disputavit. Publicè etiam opposuit Franciscus noster: adeò alacriter & pulchrè, ut cæteros opposcentes, professorum consensu facile vicerit. Nec dubitat jam quisquam, quin dignissimus sit gradu vel Licentiatu vel Doctoratus. Sed ille differre mavult, quia non tam citam ambit gloriam, quæ umbratilis esse consuevit, quàm solidam. Golius ex Syria rediit, ante mensem. Quo nomine valde gaudeo,

ob filium Dionysium, cui ille arcana omnia linguæ Arabicæ se referare velle promisit. Et faciet scio, quæ viri est humanitas. Nec operosum hoc illi erit, vel inglorium: postquam filius jam in ea lingua, uti & aliis orientalis tantum promovit. Ubi planè sine cortice poterit natæ, aliquos libellos ex Arabico vertet: ut sibi & toti familiæ nostræ inde gloriæ aliquid pariat. In tralatione historiæ Reidani pervenit jam ad librum XIV. sperat quod superest intra bimestre posse absolvi. Sed ubi id erit de limando opere cogitabit. Assiduus est in Cæsare, deliciis suis, cujus dictionem ut assequi possit, impensè elaborat. Magna promittit de se, dummodo vitalis sit, &, ut nunc, ita deinceps semper Dei sit reverens, qualem fore spero, imo confido. Matthæus industriâ magis se mihi probat, quàm solet. Ardor omnigenæ eum historiæ adhuc tenet. Sed Philosophiam jungere cœpit. Nunc etiam, me auctore, valde se in lectione clarissimorum Scriptorum, & imitatione eorum exercet. Diu suasi, tandem Dei benignitate persuasi. Tu quoque ut agas idem, adhortari non desinam. Scio te jam gravioribus studiis detineri: sed tamen necesse est omnino, ut quotidie aliquid stylo tribuas, qui dicendi est magister. Et consequeris, quod volo, si industrius etiam hac in re esse voles. Jubeo igitur ut paternum imiteris exemplum, qui temporis unius avarus, cæterorum liberalis esse solet. Sed de priori placet: de altero memor eris fortunæ nostræ: hoc est, etiamsi liberaliter suppetant pecuniæ, tu tamen parcè iis utere. Quod ego lubentius scribo, quia (si fides habenda Belgæ cuidam, qui cum altero Belga locutus in Britannia fuit) omninò hac in parte peccas. Nam ita loquebatur, quasi supra sortem nostram faceres impensas. Aiebat te alicubi ità flore Liberi patris exceptum ut propè redditus fueris madula. Ego ei hoc minus fidei habebam, quia à quo hæc profecta sunt, etiam hic cum foret, dicitur nomini meo detrahare solere. Vides nec te effugere posse calumniarum spicula. Ita voco. Nam quæ retulere, credere non sustinet paternus animus. Utinam ne decipiar; si quid tamen peccatum, corrige, & cautior esse discere, quantum me, te, & totam nostram domum ames. Qualem te haberi voles, talis semper esto. Ita futurum aliquando ut ne sistat se fortuna in honore quo nunc es ornatus, sed altiora pertingas, ut mihi animus prælagit, dummodò is fueris, qui debes. Muscheronio literas debeo: sed nec mater ejus scire se aiebat, an adhuc ageret Carabrigiæ. Scribes de eo aliquid, ut sciam, quo literas mitti oporteat. Scripsi ad Re-

verendissimum Dominum Episcopum, quo gratias ei haberem pro affectu erga te & me. Eas literas mercatoris, qui tibi annuerat pecunias, Reverendissimo Episcopo vel traderet ipse, vel per suorum aliquem offerri curabit. Quid enim opus fuit eas ad te Cantabrigiam mitti, ut inde denuò Londinum referrentur: Matertera Brunæa quingentos plus minus florenos accepit ex negotiatione Indica. Hæc pecunia opportuno ei admodum tempore obtigit: ut facile intelligis. Matertera Junia, Casimiri vidua, vicit causam. Itaque bis mille quingentos florenos ei debitor solvet. Imo jam mille quingentos accepit. Quo nomine quantopere omnes gaudemus, non opus est exponam. Si scissem nomen ejus Theologi, qui præest Collegio Jesu, commendassent te ei per literas. Proximis igitur literis fac me de eo certiores, ut ne hac parte claudicat opera nostra. Gratias egi D. Procancellario pro honore amorisque erga te, literas ei trades, quas tuis addidi. Statueram primò & aliis scribere. Sed non occurrebat aliud quicquam quod scriberem, præterquam ut gratias haberem pro eo, quod tantopere te amore prosequuntur. Quamquam profectò hoc satis idoneum sit argumentum, & quod per se sufficiat. Verùm occupatior eram, ut tam multis scribere non possem, & hærebam si unum eligerem, quem esse cum conveniret, cum omnes, ni fallor, pariter te diligant. Quando ad me scribes, significa quid maximè facto sit opus. Adde & prænomena, & dignitatem, ne peccem inscriptione. Isaaci & Gerarduli studiis præest filius Joannis Viterarii, discipulus cæci illius Pontani, auditoris mei. Pulchre erudit parvulos meos. Itaque ei victum omnem largior, sed eà conditione, ut comedat cum famulatio, ut Petrus, baronum famulus, solet. Mater valetudine est satis infirmâ, sed tamen curat eam diligenter. Ne nunc quidem omnia mihi ex voto, sed malignitate alienâ & temporum. Verùm fractis etiam rebus infracto esse animo oporteat: nedum nunc, cum omnia mediocriter sese habeant, & quod magno mihi solatio est, liberi omnes virtutis insistant viam. Video me quartam jam paginam implèsse. Quare longior esse nolo. Scripsi raptim omnia, & prout in buccam, nullâ ordinis ratione habitâ: quæ negligentia fortasse non dedecet Epistolam familiarum. Sed ego, ut scis, vix aliter possum scribere, etsi velim, ob tam varias occupationes. Salutem dices V.V. CL. D. Procancellario Wrenno, item regi Collegii in quo vivis, & D. Doct. Belo, Doct. Collino, Doct. Porter, Doct. Charterton, Mag. Critoni. Quos summos viros vide ut

observantissimè semper colas & venereris. Vale.

Lugd. Batav.
clō lxx xxix.
xxx. Jun.

Tuus Pater,

G. J. Vossius.

CV.

Hugoni Grotio Gerardus Vossius,
S. P. D.

Cum valdè optarem aliquem mihi dari, per quem tutò literæ ad te mitti possint: ecce à Sarmatis suis ad nos redit nobilissimus Stupeskius; unâ cum Ephoro suo Paschali, Doctore medico, Natione Gallo, domo, & placitis Genevensi, homine docto, & perhonesto. Aiebat uterque se propediem, saltem post hebdomadas paucas, Lutetiam ituros. Sed propè jam bimestre est, quod culpa eorum, qui ab utrisque partibus com meatus literas procurant, discedere iis demum licet. Alioqui non paulo celerius ex me ipso cognovisses ista, quæ de itinere meo Britannico, ex fratris, vel aliorum literis, jamdudum te arbitror percepisse. Nihil tamen prohibet, puto, quo minus nunc quoque pauca de eo perscribam. Nempe à Rege Serenissimo, Archiepiscopo, Comitibus, Baronibus, Episcopis, utriusque Academiæ summis viris, aliis etiam vel dignitate, vel doctrinâ claris, eo sum honore, favoreque exceptus, qui non tam Vossio, quàm longè majori conveniret: nec recessi, nisi auctus dignitate Canonicatus Cantuariensis, idque ea conditione, ut emolumentis ejus frui liceat etiam in partibus transmarinis. Quæ res, nescio, utrum plus mihi hic peperit honoris, an invidiæ apud nonnullos, eos imprimis, quibus moderatio animi nostri est ingrata. Sed ut Diræus ille Vates ait, *χρηστον δὲ καὶ μὴ ἐπὶ πότῳ*. Hujus meæ fortunæ recordatio cogitationem mihi injicit ejus, quod hic inter Academiæ Curatores deliberatur de Salmasio huc vocando. Inter illos, qui maximè negotium urgent, est Dominus Someldicensis. Ex ordine verò nostro, Rivetus. Occultiorque, at non minor, opera est nostra. Impensè enim viro faveo, ob multijugam, ac reconditam eruditionem. Nec parum erga eum amor addit amor erga eum tuus, quem literæ omnes tuæ spirant. Quæ res fortasse, cur non apertè ei studeam. Nempe, ne ei magis incommodum, quàm prosum. Scis enim negotium hoc transigi non posse, nisi tum iis volentibus, qui extrema

trema omnia, quam qui moderatiora consilia sequuntur. At prioribus illis pleraque mea sunt suspecta: nisi fortè ipse nimis *sim* suspicax, qui hæc de iis scribam. Adde quod nec omnes, in Salmasiano illo negotio consentiunt, qui nosse virtutes viri debebant. Liceat paulùm tecum joci per literas, quod præsens facere mallet. Ait Plutarchus, pictorem fuisse, qui cum Gallos depinxisset, iussit, ut puer tabulæ adlideret, qui veros abigeret Gallos, ne, quam ineptus esset pictor, deprehenderetur. Similiter hic sunt, qui manibus, pedibusque disturbare eorum consilia nitantur, qui eruditissimum illum Gallum huc advocandum censent. Metuunt, ne tabulæ suæ fiant minoris, si omnes ex hoc Gallo videant, quantum ipsis ad Romanarum, Gallicarum, Ecclesiasticarum Antiquitatum peritiam defuit. Alterum etiam est, quod ob stare Salmasio videatur. Nec enim ad docendum arcesceretur (quam conditionem amplecti si volet, neminem inveniet, qui ob stare volet, ut ego quidem censeo) sed ut eo & loco esset, & stipendio frueretur, quæ olim *in* *manibus* Scaliger. Facile autem cogitare potes, in ea profitentium turba unicam esse minimum, qui sibi honoris hoc deferendum potius arbitretur. Utinam autem non de Salmasio modo huc vocando; sed de te etiam revocando cogitaretur. O quam uberem ex te messem meteret patria tua? Quantos & ipse perciperem benevolentiae tuæ fructus? sed non omnium dierum soles occiderunt. Interea me oblectabo dulci recordatione veterum meritorum tuorum. Nam quod aliquando de fructibus amicitiae nostræ literis tuis scribebas in eo meas mihi eripuisti partes, qui nunquam tuorum debeo meritorum oblivisci. Tanto justius filio tuo faveo. Quamquam non tui modò causa, sed etiam quia ingenii elegantia, ac bonitate indolis, sic meretur. Dolet de illo corporis vitio, quod cum Agefilao, Tyrtæo, aliis habet commune. Sed gaudeo, quod corrupto hoc seculo, quo omnium penè animi claudicant, filio hæcenus mens est recta & erecta. Petierat uxor, ut diebus dominicis semper pranderet nobiscum. Sed non facit. Subinde tamen adest, & lussat cum nostris. Nec occasionem eam negligo videndi, quantum in studiis, & moribus profecerit. Vellem tui filii causa, ut paulò felicidus cum Bataviæ Scholis ageretur. Sed raro alii, quàm fungi, præfici inferioribus classibus solent. Imo multis è fungino genere hoc ipsum vitæ genus fordet: malunt aliquid ogganire popelli auribus de ambone, & imperare imperantibus. Et profectò, quanto tales magis sapiunt, quàm qui in pædido illo grege

puerorum à me ad vesperum cramben repetunt tribus conducti nummis? Melius societas Jesuitica ac prudentius facit; in cujus Scholis, pueris classem mutantibus, mutant & ipsi Doctores, atque ad classes superiores evecti, & successorem nacti, præficiuntur sacris. Hæc si Proceres nostri imitarentur, & doctiores haberemus Ecclesiarum Præfectos, & pueritiæ Reip. seminario, melius consulere-tur. De Lugdunensi tamén Schola minus, quàm de plerisque aliis conqueri possumus, ob probitatem ac virtutem præfecti, qui sic satis hypodidascalorum suorum rationem habet. Libros tuos de Religionis Christianæ veritate, altera hac editione tot mendis obfictos prodiisse, sanè doleo; simulac cognoram, Lamerium novam editionem cogitare, obtuleram spontè ei operam meam, ad corrigenda Typothetæ *opè* *quædam*. Sed negavit ea sibi nunc opus esse, quia non manuscriptum quicquam excuderet, quod molestius procedere solet; sed jam semel excusum. Cùm ne sic quidem satisfaceret, iterum institi, usque dum significaret, se in isto usurum opéra Clarissimi Barlæi. Tum demum mihi acquiescendum putavi, sed postmodo cognovi, contentum fuisse perfunctoria Opella mercenarii *cujusdam*, scis autem *quaro* *parum*, hoc hominum genus sollicitum esse soleat, utrum emendatè, an inemendatè libri prodeant. De Tragediâ Euripideâ, & tralatione tua, omnia spero meliora. Corrigendi ipse laborem suscepi. Quamquam semel, iterumque, postremam revidendi curam, commiserim nostro Coracino; qui tum fortè hic erat. Ille si non peccarit, benè erit, sed postquam Coracinus abire coactus (historiam jamdiu inaudieris; puto) terroris aliquid injectum uxori. Ita dormitavit tragedia aliquot mensibus. Jam dies est quartus, quod domum repetiere chartas tuas; idque eo animo, ut reliqua perficiant, filius meus Franciscus ante bimestre, publicè disputavit de gravibus in jure controversiis; nec parum laudis retulit; Laurea etiam doctorali, cum bonorum favore, ornatus est; superioris anni gesta jam penè absolvit Heinsius, sperat se intra menses duos, vel tres, prælo subjicere posse. Utinam quoque tibi mens fuisset, obsidionem Sylvæducentem describendi. Mitto ad te oratoriarum nostrarum editionem novam. Quam cum dimitterem, sic munusculum meum tacitus affabar, cum vate Hispano;

*Tu qui longa potes dispendia ferre viarum,
I liber, absents pignus amicitiae.*

Si modò nobis pignore ullo opus, sed utcumque est, affabitur ille, cùm voles; quod ipse utinam possem. Nihil enim æquè in votis, quàm

quàm ut ne æternum te fruatur externi.
Iterùm occurrit illud Biblici poetæ:

*Sed reddare tuis iterum visere Sabinis
(Batavis ego dixero)
Teque tuas numeres inter amicitias.*

At desino tandem effundere, quicquid in
buccam venit. Salve, Amicorum doctissime,
Doctorem amicissime; imo Doctorem do-
ctissime, Amicorum Amicissime, diuque cum
Uxore præstantissima & liberis, Vale. Uxor
salutem vobis omnibus officiosissime dicit.

*Lugd. Batav.
clō 13c xxx.
Postrid. Non.
April.*

CVI.

Matthæo Wrenno *Procancellario Aca-*
demie Cantabrigienfis, nunc Magi-
stro Collegii S. Petri, & Decano Win-
tonienfi.

Reverende ac Clarissime Domine Wrenne.

Multum equidem lætabar, cùm saluum
advenisse filium in Britanniam cog-
noscerem. Gliscebatur lætitiæ, cum viderem
Reverendissimum Dominum Episcopum Lon-
dinensem, meum juxta ac filii Mecenatem,
tanto cum affectu curam ejus rei ac sollicitu-
dinem suscepisse, ut filius in Collegio aliquo
Cantabrigiæ vivere impensis suis ad tempus
posset. Sed maximè lætitiâ delibutus fui,
cùm eo esset res perducta, ut in eo viveret
Collegio, cui tu, vir idem, atque amice
summe, tanta cum laude præesses, & quod
ipsum etiam jure magni admodum ducebam,
ubi mensâ & conversatione iis jungeretur,
qui ut profectu, ita honore etiam primas
ferrent. Quid istis majus eo quidem tempore
vovete potuisssem. At nunc tamen aliud
luculentum adeò accessit, cùm idem à sere-
nissimo Rege curâ ac intercessione Reveren-
dissimi Domini Episcopi, & commendatione
vestrâ, tanto auctus est honore, ut in nume-
rum Sociorum Jesu Collegii referretur. Fe-
licem me, qui tales habeam in Britannia ami-
cos, felicem etiam filium, qui & ipse uberes
adeò fructus percipiat ex vestro erga me amo-
re. Quamquam autem nunc Collegium
mutabit, fore tamen spero, atque adeò con-
fido, ut qui hætenus pulchrè adeò de filio
ac meipso meritis es, eundem erga nos ani-
mum conserves. Opto etiam ut Collegii Jesu

præfectum talem erga se filius experiatur,
qualem te expertus est semper. Utinam modò
filius non indecorum se præstet, nec indig-
num meritis vestris. Votis ille meis satisfac-
ciet, si idem est absens, quem præsentem se
hic gessit. Mæ interea partes erunt, ut qui
tantum mihi amoris ac favoris exhibetis, as-
siduè illud cum animo cogitem, quomodò po-
tissimum gratum testari affectum erga eos
possim, à quibus tanto affectus sum beneficio,
ac qui neque nunc bene de me cessant mere-
ri. Quos inter te, vir clarissime, optimo jure,
censeo, imo in iis repono, qui familiam du-
cunt. Cæterum nunc liceat etiam bonas
hasce precari te preces, ut deinceps quoque
filium si ita usu veniat, consilio aut ope tuâ
juves; ac si forte (quod ne Deus sinit) vel
suoapte instinctu, vel suafu alieno, alius alibi
fieret, me quam primum facias certiore,
quo principiis obstemus. Nihil quidem metuo
istiusmodi. Sed tamen jamdiu didici, hu-
mana omnia incerta; eoque etiam tutissima
metuere soleo, tantò sanè magis, quantò
quisque mihi conjunctior & acceptior est.
Hæc tanti mihi visa, ut vel sola (ita paternus
est animus) ad te, vir maxime, scriberen-
tur. Sed deinceps de aliis etiam, quoties ali-
quid non indignum scriptione se offerret, li-
teras à me expecta. Sed simplices, & quales
hæ sunt, ut sine animi fūco, ita absque ver-
borum calamistris. Nempe omnia prout in
buccam venerint. Ita inter amicos puto fieri
oportere. Nec vel occupationes sinunt, ut
lenocinia ulla, more quorundam confectæ;
neque ego illis capior, scio neque tu, vir exi-
mie. Salutem à me plurimam dices clarissi-
mis ac doctissimis viris, Doct. Belo, Doct.
Collino, Doct. Wardo, Doct. Porter, Doct.
Charterton, Mag. Critoni, aliisque omnibus
amantibus nostris; quorum ego utinam af-
fectui erga me & filium meum possim officio
ullo respondere.

*Lugd. Batav.
clō 13c xxix.
Kal. Jul.*

*Virtutum tuarum admirator,
ac dignitatis eximie cultor
Devotissimus,*

G. J. Vossius.

CVII.

Ger. Jo. Vossius Claudio Salmasio
S. P.

Quod tarde adeo responderim Literis tuis, maxime Salmasi, prius quidem in causa fuit iter à me in Britanniam susceptum inde dignitate Canonicatus Cantuariensis à Serenissimo Rege collata, auctior redi domum. Postea autem cum viderem Oratorias nostras vergere ad finem, paulisper volui expectare usque dum eas una cum Literis meis per hominem fidum mittere possem. Qui nunc obtigit, Illustris Baro Stupeskus Polonus una cum Ephoro suo Paschali, domo Genevensi professione Medico. Utinam vero placere tibi possit hic foetus meus. Sed placebit spero, si non merito suo at saltem ob pulcherrimum conatum. Nam & veterum imprimis vestigiis institimus, & multa tamen accuratius excussimus, quodque facile videbis, plane alia nobis ratio inita; quam qua vulgo tetrica artem præcepta tractari solent. De tuis in Plinium ac Solinum commentariis, qui vere *ἀγαθὴν ἀγασθὴς*, gratiam sane promissi facio. Quid enim amicitia nostra recens adeo inita tam cito tibi sit fraudi. Sed siquid postmodo emisericis exigui sumptus, cujusmodi fuit ante *ἀνδρὸς* missi, quale item quod nunc vides; sane si omnino liberalis esse voles gratum mihi erit donum & suo nomine & auctoris: quem ego cum Grotio nostro conjungere soleo, quoties duos nominare volo omnigenæ doctrinæ Principes, sane orbis nostri doctissimos. Quod elogium non perscriberem ad te, (metuerem enim ne quid videam auribus dare) sed idem non semel his diebus testatur sum apud Academiæ nostræ Curatores. Ex quibus Someladicensis Dominus seriò hoc agit, ut Scaligeri locum tueri apud nos possis. O me beatum, si hoc contingat! Rivetus etiam, optimus sane ac doctissimus Theologus, negotium hoc urget, quàm qui maximè. Faveo ego utroque, quod dicitur, pollice, & eos incito, qui plus me autoritate valent. Nihil tamen certi promittere habeo: partim, quia multi apud nos ad clavum Reipub. sedent, studiorum minime intelligentes: partim etiam aliis de causis de quibus fortasse aliquid scribam Post. Non. Maii. Eum enim in diem indicus Curatorum Academiæ Conventus. Vale, summe idem vir atque amice, ac deinceps crebras à me literas expecta.

Lugd. Batav.
cl. bc xxx.

CVIII.

Dudlæo Carleton.

Illustrissime Domine,

Indignus sim tantis in me meritis tuis, si à longo tempore intermissa scriptione, etiam hanc occasionem dimitterem, redeunte in Britanniam filio meo. Fateor, diu scriptum à me oportuisse, sed sublimem adeo virum interpellare sæpius verebar; ut cui tanta negotia, & regias incumbere curas nossem. Nihilominus, cum prolixam cogito humanitatem tuam, qua me humilem adeo hominem persecutus es, vicissim magnæ videbatur inhumanitatis, non facere te certiorum de rebus meis, qui satis ostenderas, quam bene mihi, & omni familiæ meæ velles. Ea itaque res, ut scriberem, induxit; nec materia deesse videbatur. Nam præterquam quod mei muneris duxi transnittere Oratorias meas (quas rogo animo potius donantis æstimes quàm pretio sui) etiam ex meipso cognoscere te volui, quòd fortasse jam ex aliis intellexeris; nempe ut mensibus abhinc propemodum quinque sedem meam Amstelodamum transfulerim, vocatus ab urbis ejus Proceribus. Nuper quippe ii Consilium cepere de erigendo in urbe ea Illustri Gymnasio, ne Civitas omnium totius Belgicæ florentissima & opibus virisque valida, sola Studiorum cultura aliis plerisque cederet. Itaque eo me vocarunt ad eandem Professionem sustinendam, quam obii Lugduni. Causæ, quæ me impulere, ad suscipiendam conditionem, variæ fuere; ut enim stipendium mittam, quod fere alterâ parte majus est, liberorum hic longè magis rationem habendam, satis luculentis indiciis perspexi. Nonnullis credo mirum videbitur me ex florentissima Academia commigrare in Illustrè Gymnasium, de quo vix dicere illud possumus, adhuc messem ejus in herba esse. Necdum enim herbescit, imò ne quidem sementis facta. Veruntamen non mei unius hoc consilio egi; sed multum cum aliis summæ & prudentiæ & auctoritatis viris deliberavi, qui hujus mihi rei auctores fuerunt. Nempe omnes prope judicant, eam esse hujus urbis potentiam, illud nomen per orbem omnem: ut si aliunde splendorem petam, quàm à propriis ingenii ac industriæ monumentis, eum non minus à clarissima hac maximaque Urbe, quàm vicina Academia, consequi possum. Quantoque illustrius deinceps futurum urbis hujus Athenæum, tanto ubique gloriosius mihi erit, prima ejus jecisse fundamenta. Multum me etiam pellexit

lexit Magistratum hujus urbis cum summa prudentia, tum etiam excellens doctrina; ita ut verissimum hic Platonis dictum comperiar, qui tum foelices fore Respub. aiebat; quando, aut qui Philosophi essent, regerent, aut qui regerent, Philosopharentur. Nec ignoro esse, qui nomini Procerum plurimum detrahant, quasi iniquiores sint Ordini Ecclesiastico. Verum video, abunde huic eos favere, dummodo se ille contineat intra effata, ac pomœria sua. Nec ea ad Gymnasium nostrum controversia pertinet. Neque me deinceps ei immiscere animus, sed pacem semper & concordiam sectabor. Liticula adhuc aliqua est Lugdunensibus cum Amstelodamensibus de Jure erigendi hic Illustris Gymnasii. Sed intra dies paucos ea Controversia ab utraque Curia decidetur. Nec tantillum dubito, quin sententiam latura sunt pro Amstelodamensibus. Ita saltem censent, quicunque rerum Batavarum sunt gnari, atque animum habent affectibus minimè manipatum. Sed de isto fortassis nimis multa. Quod superest, Illustrissime Domine, optimeque Mecenas, Deum oro, ut Nestoreos annos felix & fortunatus vivas, cum Illustrissima Heroïna uxore tua. Ex qua quam simillimam vestri prolem, vobis exopto, Regni Britanniae bono, simul gaudio vestro. Atque hoc Deum rogo. Te autem unum illud, ut quem hactenus tanto es favore complexus, eum porro habere velis in Clientium numero. Hoc equidem affectu erga me tuo subnixus semper ero.

Illustrissimo nomini tuo totique Domini Carletonae devinctus simul & devotus Cultor,

G. J. Vossius.

CIX.

Johanni Meursio S. P.

OB diuturnum adeo silentium difficilis mihi causæ dictio apud eos foret, qui me nævo potius aliquo norint, quàm integrum, uti tu facis, vir clarissime. Cui, ut puto, facile persuadebo, tamdiu me nihil scripsisse, non quia minus amem te absentem, quam soleo præsentem: sed partim ob occupationes *gyrnasii*, & invaletudinem meorum, ex quibus maximus natu filius, Collegii Jesu Socius apud Cantabrigienses, plus minus mense oculis captus fuit: partim etiam quia teipsum expectaremus, uti spem tui feceras

nobis ante sesquiannum, vel præterpropter. Primis quidem mensibus, ex quo eas literas acceperam, irritum fore hoc promissum facile prævidebam. Sed foedere inito inter Cæsarem, & Serenissimum Regem vestrum, omnia visâ liquidiora. Itaque proximo quidem autumno avide te expectavi. Nunc nihil sperare ausim ante ver medium, vel etiam adultum. O beatum illum diem quo te amplectar! Quam de multis tum loqui licebit *seu vobis seu*, quæ non tuto satis literis committantur. Sed dum te caremus, nefas sit non arripere occasionem scribendi bellam, eunte ad vos optimo doctissimo amicissimo Stephano Stephano. Jucundum quidem mihi est te salutare; sed multo jucundius erit id agere per amicum hoc caput, ex quo ea etiam cognosces, quæ non scribo. Jam mensis est, ex quo me Lugdunum iterum habet. Bimestre impensum itineri Britannico. Sane non facile dixerim quantum mihi honoris habitum sit à viris, genere, dignitate, doctrina, insignibus: ipso etiam Serenissimo Rege, nulli nostri temporis regum secundo: cui coram gratias egi pro collata mihi dignitate Canonatus Cantuariensis, & ita collata, ut frui ejus emolumentis etiam in transmarinis partibus possim. Equidem nescio, nec valde scire laboro, utrum oculi propterea doleant amicorum meorum fucatifimo, de cujus fucosissima amicitia scio etiam te non semel apud me graviter conquestum. Nempe tales sic omnia componunt, quasi sibi non esset bene, nisi aliis sit male, præsertim illis, qui studia tractant non adeo diversa. Ut facile comprobent illud vetus quo solent *ἐμοὶ ἑαυτοῦ ἀντὶ τοῦ κακοῦ* vocitare. Sed meliora tamen de illis speremus, ne videamur amorem omnem exuisse, cum aliud sane ob egregias quasdam virtutes mereantur. Præsertim cum, tales sæpe cum obesse volunt, magis profint. Ut non de nihilo dixerit Gregorius Theologus, multa esse in quibus *ἡ ἀδελφικὴ φιλία* est *πρόσων*, *ἡ ἀρετὴ καὶ ἡ ἀνδρεία ἀδελφικὰ*. Curator Academiæ Arsenius, Someldicensis Dominus, in eo strenue adlaborat, ut in Academia hac clarissimus Salmasius eo esse loco possit, quo Scaliger olim fuit. Est qui manibus pedibusque obnixè agat omnia, ut huic incommodet proposito. Parum id fore ex honore suo arbitratur. De quo ego non disputo; qui multum honoris huic loco ex viri ejus præsentia Academiæ nostræ accedere posse existimo. Utinam tantum etiam Amplissimus Grotius, tuque, clarissime Meursi, eodem vel non dissimili apud nos loco essetis. Sane ubicunque nunc vel Cimmeriæ esse tenebræ videntur, vobis lucentibus facile hæ pellerentur, nec præter vestri ingenii ac doctrinæ faciem

cem nocturna ulla lumina quæreremus, imo Titania ingenii vestri lampade, alius in hoc, alius alio in studii genere, diem ipsam reduceretis. Sed multum metuo, ne unquam nobis tam beatis esse liceat. Interea pro te mihi erunt scripta tua, quæ omnes amant præter *ἁπλῶς ποινῆς* animique livore tinctos. Sane apud Britannos, qui quidem Græcarum Antiquitatum studio tenentur, tuos labores mirè prædicant. Inter eos doctissimus Crito, Græcæ Linguae apud Cantabrigienses Professor; ex cujus ore lubentissime audiui, quæ & illo & te digna erant, ac eo solum nomine à me reticentur, quia moris mihi magis est ista apud alios, etiam in æmulum præsentia, referre, quàm quempiam in os laudare. Ut videas quantopere scripta tua peregrinentur, superioribus annis etiam Athenæ tuæ Athenis ipsis fuerint. Eò secum detulerat illas Pitteus, Anglus longe doctissimus, quem Illustrissimus Arundeliæ Comes, vir natus iuvandis literis, in orientem miserat, ut inde antiquos lapides, aliaque monumenta in Britanniam referret. Vix dici possit quam multa præclara inde reportarit. Quæ paulatim juris faciet publici. Atque idem inter alia etiam Athenas, ubi diutissime vixit, describere parat: credo ad formam eam, quâ Byzantius Gyllius descripsit. Vir est ut humanissimus, ita mihi amicissimus, ac tuo etiam dignissimus amore. Nam quod dicebam antea *ἁπλῶς ἀντιπρὸς* esse solere, id in neutro nostrum locum habere debet: qui cum studiis semper conjunximus animi candorem. Puto fore ut propediem hic edantur literæ Casauboni ad Scaligerum, Heinsum, Rutgersium, alios. In iis non tam multa quam vellem, sed nec rara tamen fit mentio tui. *Ἀντιπρὸς* enim vidi; nec dubito quin futurum sit, ut omnia fide bona edantur: quippe præerit editioni doctissimus ac tui etiam amantissimus Rivetus. Itaque nec displiceat, si eas huc mittas, quas magnus ille vir ad te olim scripsit: Fuerit, puto, id ex honore tuo, cui impense faveo. Quod si quid in iis sit quod divulgari non debeat, poterit à te deleri. In Scaligeri Epistolis, quæ, ut scis, ante triennium hic excusæ, quædam relicta sunt, quæ rescari longè satius fuisset. In iis quiddam etiam est acerbè ac nequiter de te dictum, sed pro nomine tuo Asteriscus positus, ut te signari pauci intelligant, præter eos qui Scaligero fuere familiares. Socerum quoque meum Junium non uno loco sugillat. Eaque res mihi præfationem magna ex parte expresse, quam historiæ meæ de Historicis Latinis præmisi. Seldeni opus de Diis Syris hac æstate, vel paulo ante, longè auctiùs hic recusum, & Heinio nostro dicatum est. Au-

ctor ipse, cum esset inter patronos Minoris domus Britannica, atque se vehementius gereret adversus Regem Serenissimum (seditione multa locutus dicitur, de quo ego iudicium ferre non possim, quia & patronos suos habet) in turri custodiæ traditus est. De vita tamen periclitari negant illi, qui norunt clementiam Regis, atque amorem erga literas & literatos. Imo jam dies sunt pauci, ex quo aliquis mihi significavit, cunctos qui se Regi tantopere opposuissent, ab Rege esse è custodia liberè dimissos. Sed de isto certiora propediem intelligam. Si vera narrent, quamprimum Seldeno literis meis gratulabor. Nam inter nos non ita magnum, culpa mea, sed aliquod tamen commercium est literarum. In Alardo, quem mihi penultimis literis commendaras, feci quod potui: nec inutilis illi fuit opera hæc mea. Quicquid feci, feci adolescentis causâ, feci & tuâ; feci etiam ob parentem ejus, qui & mihi per literas gratias egit. Video virum esse bene eruditum. Si quid in eo amplius possim, vel quocunque alio, faciam id lubentissimo animo, uti amicitiam nostram decet. Sum quidem satis negligens in scribendo, præsertim ubi nihil est quod urgeat. Sed nunquam patior operam meam desiderari iis in rebus, unde boni aliquid ad alterum redundet. Bertium ante tres menses obiisse, jam, ut puto, intellexeris. Golius ante 4 menses rediit è Syria, vir sanè ut doctissimus, ita longe optimus, & candidissimus, ut verum Batavum decet. Is geminam obit professionem: inque Matheli Snellianas, in Arabicis Herpenianas partes suscipit, non sine gloria. Grotius Grollæ obsidionem descripsit, quæ jam excusâ. Heinsius Ordinum est Historiographus. Hoc nomine ei tributum stipendium annuum flor. 700. Occupatur in scribendis iis, quæ hoc anno feliciter Batavis successere: imo putat intra mensem unum alterum se Historiam hanc prelo subicere posse. Non abhorrebat ab iis pangendis Grotius: Sed videtur eum sufflaminasse, quo duo vel tres hanc sibi provinciam elegissent, qui certius omnia nosse possent, ut qui Obsidioni Sylvæducentis interfuerant. Ex his esse creditur Huygenius, Principi nostro à Secretis. Barlæus victoriam hanc carmine victuro celebravit. Etiam nomine Illustrissimæ Ameliæ ingeniosam & elegantem Elegiam fecit ad Maritum suum Principem nostrum, ad modum earum, quas sub heroidum nominibus Ovidius ac Sabinus condiderunt. Eam Epistolam non ineleganter Belgicis versibus in gratiam Dominæ Præntipis Scriverius expressit. Institutiones meæ Oratoriæ intra bimestre erunt recusæ, multo limatiores, & al-

terâ parte auctiores illis, quæ secundo prodire anno clō Ioc ix. Vale, vir maxime & amicissime, & plurimum meo nomine saluta optimam uxorem, Clarissimum Laurenbergium & Collegarum alios. Uxor etiam plurimam tibi atque uxori salutem adscribi iussit: & filia filia. Nempe æquum est etiam liberos paternæ esse amicitia participes ac hæredes.

Lugd. Batav.
clō Ioc xxx.
Id. Januar.

Totus tuus,

G. J. Vossius.

CX.

Clarissimo Viro, Jacobo Roverio, S. P.
Dordrechtum.

NON studiis modò, ut putares mi Roveri, sed occupationum etiam undis (nisi hoc grave nimis est verbum) ita immergor, ut vix animus unquam emergat. Ad negotia seria accedunt Interpellationes amicorum, vel coram, vel per Epistolam. Scio nihil utilius, nihil etiam esse sanctius amicitia; sed si ea in nimis multis diffunditur, fit illud, ut quia scribendo non licet benè mereri de publico, tempus omni auro potius, non quidem ratione omnium, sed tamen ratione plurium, pereat studiis ac posteritati. Illud dicere malo, quàm bono famæ. Nam quid illa esse nisi inane nomen? Et habet aliquid, quod magis noceat, quàm profit. Quid illud? inquires. Nempe eo ferè omnes animo sumus, ut non libenter aliquid deperdi sinamus, quod nominis ad honorem pertineat. At qui ita fuerit animatus; ille famæ jam magis, quàm sibi, quàm bono etiam publico, vivere incipit. Mihi verò longè semper alia mens fuit. Subinde tamen metuo, ne non satis me nòrim, & dum non dico famæ fervio, quod omnino non facio, sed tamen paulò fortasè majoris eam æstimo, quam debebam, minus etiam placeam amicis illis, qui omnia publico metiuntur. Quos inter, conjunctissime & amicissime Roveri, lubens meritò te repono. Amo enim te ut affinem, Liberorumque meorum Consanguineum, amo ut quodammodo discipulum, cumque amantem mei, eoque, prout quidem res utriusque nostri tulere, satis familiarem. Sed majus est, quod amo, ut præclaræ adeo indolis, præclaræque eruditionis virum, & si voles, pulchrè de Rep. literaria meriturum. Itaque dolet, quod ex Britannia redux diculâ citiùs, quàm statueram, abieram Dor-

drechto. Decrèram enim aliquot hōras dare amico non uni, atque in his, quos fraternus tibi sanguis, aut proxima adfinitas conjunxit. Quod si potuissim, fuissim felicior, quàm putàram. Nam in te quoque, quem ob peritiorem literaturam, urbis tuæ posthabeo nemini, simul incidissem. Non te Dordrecht, sed Hagæ unà cum Parente, vivere arbitrabar. Eoque simul ac Hagam excurri, rectà eam in domum, ubi me apud te divertisse meministi, contendi. Quid responsi acceperim, nihil attinet dicere. Dolui interim ob errorem hunc meum, & ita dolui, ut cum per alterum excusare hoc apud te possem, ipse ad te literas dare maluerim, tardius fortasè quàm expectasses, sed ex more meo, qui usque adeo tardus in scribendo esse soleam, ut interdum nec tertio respondeam mense, interdum nunquam: quippe qui rarò, nisi necessariò scribam. Quod vitio nemo vertet, qui vitam, & occupationes meas nòrit. Absque his esset, non alter lubentius, vel frequentius ad me literas admitteret, quàm ego remitterem. De multis etiam scriberem, quæ ne nunc quidem scribo. Sed de quibus non scribo, loquar tecum cum voles. Quando autem illud erit, Optime, & Optatissime Roveri; Audies tum inter alia, de toto meo itinere Britannico. Filium meum Franciscum non sine gloria publice, pro doctoratus, ut vocant, Laureâ disputasse v. Non. Febr. credo, jam ex aliis intellexeris. Oratoriarum mearum vix ante mensem videbunt lucem. Parte alterâ erunt auctiores, longèque emendatioris: ut novum opus haberi, vel saltem videri possint.

Vale, Doctiss. Cognate, ut nunc loquimur, vel potius Adhins; sed tamen non minus care, quàm si sanguine tam esses conjunctus, quàm es non modò uxori, ac liberis meis; sed etiam qui paulo propius attingunt. Plurimam per te salutem dico, Amplissimo Parenti, ac conjugi optimæ; item fratribus egregiis, ac Affinium Pari Blyemburgio, Berckioque; quorum illi, tergemino antea honore inclyto, accessionem equestris dignitatis, gratulatus sum coram, ac nunc quoque feliciter ipsi, familiarique toti vertere cupio, speroque.

Lugd. Batav.
clō Ioc xxx.
vi. Id. Febr.

Tuus,

G. J. Vossius.

CXI.

Joanni Vossio.

JAM quarto ad te scribo ex quo veni domum. Interim unæ Literæ mihi à te ; non Literæ , nec enim Literarum nomine censerî dignæ, quibus non aliud ais, quam te Hungari Literas ad me mittere, ut domestici mei eas melius procurent, quam à tabellariorum vulgo fieri solet. Nisi hoc alicujus putas, quod adjeceris, te non multò antè ad me de pluribus scripisse, atque in his etiam consilium te poscere, utrum Theologiæ an Juris studium debeas amplecti. Ego verò eas Literas non accepi, ut quæ ambiguum reddunt animum tuum, scire non possim. Quanto satius erat, te mecum de eo egisse, cum in Britannia forem, atque ipse cum Reverendissimo Episcopo, & aliis summis viris consultare de re tota possem? Nunc illud dixero, Theologicum studium palmam præripere omnibus, & esse ei suos quoque, imo maximos, in Anglia honores. Quod de aliis terris non possis dicere. Quanquam ut nulli honores ei magis quam apud nos forent, tanta est excellentia ejus studii, ut omnes pios in amorem & admirationem illud sui raptare debeat. Quare teipsum in consilium adhibe, vide quo animus maximè feratur, consulta cum summis viris, & utriusque nostri amantibus. Ante omnia Deum ora, ut te prudentiæ spiritu regat. Mihi seu hoc, seu alterum studium amplecti volueris, satisfacies abundè, dummodo duo ista præstes. Prius est, ut pius sis, atque ita te geras, ut videam te regi Spiritu Domini. Alterum ut nihil vulgare in studiis præstes, neque indecorum te familiæ nostræ offendas, sed gloriæ esse & immortalitatis candidatum. Quàm ad rem industria opus. Magnam in Librorum singulis spem reposui; Unus tu mihi, natu omnium maximus, scrupuli aliquid injicere soles: non quia non tibi ingenii abunde sit, sed quia diligentiam desiderarem. Sed cum postremò alter alteri vale diximus, ita me plenum magnæ spei dimisisti, ut non possem non pulchra quædam de te augurari. Credimus nos Parentes facile liberis nostris. Sed tamen tibi, ea jam ætate, puto me tutò credere posse. Si decipis, te potius quàm me deceiveris. Adolescens, ut Poeta ait, *Cereus in vitium flecti*. Tu potius cereus esto in eo, ut facile animo imprimas monita mea; Ab his dimovere si quisquam te volet, ferreus vel adamanti similis sis. Apage igitur istos qui ad inertiam te vocant, filiamque ejus luxuriam, quæ te in Barathrum aliquod

præcipitem daret, unde cum lachrymis eximi postea optares, sed frustra. O quam mihi gratus eris, si (ut Nazianzenus ad Vitalianum scribit) *ἀναγκασίως σταυρὸν ἢ πολλῶν, ἢ ὀνείρων ἔχεις τὸν ἀγῶνα*. Fac, fac, mi fili, sic eris senectutis meæ solamen, domus nostræ fulcrum. Quid tibi cum illis negotiis, non tam pedibus valgis, quam mente distortis? Similem te sui volunt. Renuntia eorum amicitia. Quid boni ex iis discis? Nihil sanè. Omnis eorum eruditio, quod manum habeant eruditam. Sciunt ut cum Poeta dicam,

Quo gestu Lepores, aut quo Gallina secetur.

Venustum in illis nihil. Quippe qui nullam sermonis Venerem nisi de Venere agnoscunt. Tuum est amare non illam vulgarem Venerem, sed alteram, *Ὀυερίας*, quæ cœlestes inspirat amores. O quanto jucundior amor ille! Me quidem ita sacra studia afficiunt, ut omnia præ iis pudeant. Nempe tantum studium Theologiæ præstat cæteris studiis, quantum hæc voluptatibus istis adolescentiæ. Sed si Naturæ, Historiæ, Juris te magis delectat, non repugno quo minus totum te iis des. Hæc quoque ut usum necessarium, ita incredibilem habent voluptatem. Itaque Plinius ea studiorum voluptate tenebatur, ut & somno & cibo detraheret, quemadmodum ipse in præfatione naturalis Historiæ testis est nobis. Scis etiam ut Archimedes & cibi & potus oblivisceretur studiorum amore. Sed quid ego te ad Externa voco? Cur non sufficiat domesticum exemplum? Egone tantum laboris & in istis exhaustissem, nisi ille mihi labor fuisset jucundior, quàm ista quæ alii consecrari solent? Et voluptas illa manet. Juvat nunc recordari quoque ætatis retroactæ. Quod tu de te non dixeris. Sed ut deinceps dicere possis, de eo quidem, quod divina bonitas vitæ amplius largietur, id quidem in manu est tua, mi Fili. Quare hoc age; nec patere domum, quàm ego virtute mea paullum exeri, tam cito vitio tuo collabi. In stylo omnino velim te exerceas. Neutiquam enim mihi satisfacis hac parte. Nosse desidero, quantum in Græcam tuopte Marte valeas. Item ecquos instituas Adolescentes. Optimus proficiendi modus docere alios, quæ didicimus. Et tum demum aliquid scimus, cum docere id alios possumus. Aves, credo, scire ecquid apud nos rerum sit novarum. Sed nihil sane est quod magnoperè scribi mereatur. De induciis deliberatur, in Ordinum Conventu; verum plures eam adversantur, præsertim qui in mari vivunt, vel ut scitè Græci eos vocant *ναυται* (nautas me vides dicere) vel qui ex eo vivunt, ut

Negotiatores multi Magnarii, imo & quos liberos Piratas nuncupamus. Ultrajectini cogitant de Academia erigenda. Si Amstelodamenses in proposito perstunt, vocabunt in urbem suam Barlaam, ut ibi Philosophiam & Historiam profiteatur. Colvius uxorem ducit filiam Abrahami vander Mylen. Wicfordus qui pro gradu Doctoratus in Academia nostra ante paucos annos disputavit, in Galliis dicitur conjectus in carcerem ob æs alienum, quod ~~etiam~~ ille conflagavit, nec Patensolvere curat, nec etiam debet ne foveat ejus luxuriam, & ceteros perdat liberos. Mater tua ægrotavit iterum aliquot hebdomades. Curæ eam valdè macerant. Scis quales dicere velim. Audio te ante menses duos vel paullo minus, Londini adfuisse Strusio. Ego utrum Strusius ille albus an ater sit nescio. Sed tamen ajunt eum conviviis magis gaudere quam nostram debeat sortem. Quare malim tibi commercium esse cum hominibus literatis, & ad rem attentis. Pupam unam filiolarum Domini Wrenni jamdiu acceperis. Alteram non potuimus tam citò nobis comparare. Amstelodamo enim apportari necesse fit. Sed si & alteram voles, perscribe, atque adde cujus magnitudinis eam esse cupias. Quanquam hoc quoque scito opus, quomodo transmitti quam tutissimè possit. Prodiit Londini Libellus cum hac Inscriptione, Alter Ecebolius, M. Antonius de Dominis Archiepiscopus Spalatenfis, Excudebat Billius, An. 1624. Ibidem prodiit Concio ad Clerum, habita Cantabrigiæ per Sam. Wardum, Excudebat Milo Flesher 1627. si commoda se offerat eos Libellos mittendi occasio, transmittes. Sin minus, ne laboro. Habui utrumque Libellum commodatum à Nouwio. Sed cum in Gallias iret, per fratrem utrumque repetiit. Retinere maluissim. Et dixerat, posse me utrumque reservare. Sed sententiam videtur postea mutasse; Nolim tamen de iis te valdè esse sollicitum. Possim enim utroque carere. Video chartam monere, ut desinam scribere qui non desinam te amare, dum tu virtutem amabis, quod ut æternum sit, Deum oro. Salutem dices iis quos toties jam literis signavi, ut repetere nihil attineat.

Lugd. Barab.
c15 Ioc xxx.
Post. Id.
Mart.

Tuus Pater,

G. J. Vossius.

Qui has ad te Literas defert, mihi quidem hæcenus ignotus fuit, sed cum eum cognoscerem, esse filium Castellani, Gallicæ Ecclesiæ quondam Ministri, Senioris autem Treleccarii, Præceptoris mei, ex filia Nepotem,

nolui eum dimittere sine Literis meis; præsertim cum & honestus & non ineruditus videretur.

CXII.

Francisco Junio, Fr. Fil. Londinum.
S. P.

Ranis illis Seriphiis, mi Affinis, taciturnior mihi videris. Citius illis vocem, quam tibi verbum aliquod expressero. Quippe jam bimestre est, quod à nobis abiisti, ac ne illud quidem significas an salvus in Britanniam adveneris. Profecto, nisi mihi satis perspectum foret, quam tardus sis in scribendo, planè aliquid suspicarer, quod dicere nolo. Interea ut mihi, optimæ sorori, & liberis etiam meis, omnem exitas scrupulum, silentium rumpe, & nos quamprimum Literis compella. Si non ob aliud, saltem, ut ne ultra ignorem, quod me maxime tangit. Quare ~~non tui rogatus~~ ~~et~~ ~~non tui rogatus~~. Nam quid magnopere juvet, si nos inutuo amemus, & ne literis quidem alter alterius fruamur. Nempe sic Tantalo, jure comparemur, cui & jam decrat, quod habebat. Franciscus meus pro gradu, ut loquimur, Doctorali, publicè disputavit, ac strenuè rem gessit. Smontius ab Amstelodamensibus, urbe exactus est. Itaque apud nos domum conduxit. Oratoriæ meæ domum, post hebdomades duas, aut tres, erunt absolutæ. Filius Dionysius orsus est, ex Arabico, transferre gentis ejus proverbia. Nonnihil tamen ab hac opera revocabit versio historiæ Reidani. Heinsius prope die m editurus est historiam omnium, quæ superiori anno contigerunt. Vehementibus studiis agitur, in conventu Illustrium Ordinum, an de induciis sit cum Hispano agendum. Major pars hæcenus abhorrebat ab eo consilio videtur. Desidero scire, quando sperare liceat quæ affecta habeas, de Pictura, Sculpturaque. Martinus Bremensis videtur deposuisse cogitationes, de Affine Junia. Nosse aveo, verene hic sparsum sit, Seldenum carcere liberatum. Adde quoque, quando visuri sumus Clarissimi Pittei Athenas, aliaque. Quæso urge virum. Metuo enim ne ei calcare opus sit. Sorori Brunæ ægrè est, quod ei migrandum erit ex ædibus in quibus hæcenus commodè vixit. Ipse Dominus ædium in iis habitare statuit. Literas à te Roterodamo ad se perscriptas, toto mense post accepit. Quod malè eam habuit. Colvius noster uxorem ducit, filiam Abrahami Mylii, puellam egregiam, nec malè dotatam. Amstelodamenses cogi-

cogitant, de uno alteroque Professore, aliunde advocando, ne Parentes necesse habeant, tam cito ablegare liberos ad Academiam, ubi major pars corrumpitur, licentiâ, & malo exemplo. Jam de Barleao super hac re actum, nondum tamen transactum. Nec dubito tamen, quin si negotium procedat, cæteris sit præferendus. Dicuntur Ultrajectini cogitare de Academiâ apud se erigenda. Quæ res incommodare Leidensibus possit. Scis enim locum esse ad eam rem satis idoneum. Nec ob stare Hollandi possint, cum æquæ Provinciam constituant, ac illi, si quid ultra hic rei novæ sit, cognoscere possis ex eo, qui hæc literas deservit. Est is senioris Trelocatii, ex filia Neptæ, Castellani, Gallici ante annos aliquot Ecclesiasticæ filius. Hactenus mihi ignotus fuit. Sed cum studiorum causâ, se in Britanniam velle ire diceret, & perhonestus juvenis videretur, sine meis cum literis dimittere non potui. Speraveram fore, ut prior scriberes. Poteram sanè te compellere illo Homero, *ἀλλὰ γὰρ ὁ πόσις καὶ ἄνθρωπος*. Sed mihi majus est literarum tuarum desiderium quàm tibi mearum. Scis enim quàm aveam nosse omnia, quæ ad filium pertinent. Quare prævertete te scribendo malui. Nec deinceps detrecto similem Provinciam; dummodo tantum spondeas, tæ propemodum, paria mecum facere velle. Ultra non exigam, nisi minus me sis occupatus; nisi valde me ratio fugit. Pergratum erit si plurimam meo nomine salutem dixeris Nobilissimæ Equitæ D. Guiljelmo Houardo, cui à studiis es magnæ Illustris Arundeliæ domus spei. Omnia ei à me servitia offerre, ne gravè sit. Pitteum etiam salutabis, in quo candor & eruditio certare mihi videntur. Vale, Coniunctissime Affinis.

Lugd. Bat.
cl. loc. xxx.
Post. Id.
Marr.

Tuus Affinis,

G. J. Vossius.

CXIII.

Matthiæ Martinio. S. P. Bremam.

Longo tempore filii ad literas tuas; sed jamdiu quoque causam ejus rei intellexeris, scio, ex Herdenio nostro. Nam id non obscure perspexi ex Epistolâ tua ad Jonstonum. Quare non tam me in Britannia fuisse dicam, quàm illud dicam, ita me illis fuisse, ut qui prius eo negotii causa sim profectus, videar mihi aliquando, vel solo ex amore, eam posse repetere. Humanissime

enim sum exceptus à Rege Serenissimo; Archi-Episcopo, Comitibus, Baronibus, Episcopis, & quid singulos enumerem, summa & dignitatis, & authoritatis viros? Nec parum mihi honoris exhibuit, utraque Academia: uti & Cantuaria, ubi Canonicorum ejus loci ordini sum insertus, regia dignatione: Et quidem conditione ea, ut in partibus etiam transmarinis emolumentis fruatur. Scis illud Bilbilici Poetæ:

*Dicitur & nostras cantare Britannia versus.
Quid prodest? nescit sacculus ista mens.*

Video me feliciorum hoc Poetæ; ut qui labores sui apud Britannos, non modo, ut illi, nomen aliquod, sed etiam rem parent. Quamquam ut sacculus ista nesciret meus: nihilominus (verè dico) affectus hujus gentis animum adderet ad majora; quippe qui publico potius bono, quàm privato, metiri omnia soleam. Reperi in Britannia etiam magnâ cum voluptate meâ, complures nominis tui amatores; Et cum sermo de te incidisset, interdum ab alio, interdum à me injectus fuit, dignum virtute tuâ, doctrinaque illa singulari, præconium à nobis accessit. Qui fieri aliter poterat? Ægyptios fuisse incantatores, facile credo Homero. Nec enim omnia mentiantur Poetæ. Te scio non Ægyptium esse, sed Germanum. Sed tamen quasi Ægyptius esses, nescio quo veneficio, usque adeo imbuisi animam meum, ut eum planè illexeris, tibi que devinxeris. Et eo magis favi amoribus tuis; utcumque in hoc rerum incerto, non possem sic me, *ἀπαρτῶς*, huic negotio miscere, ut vellem: præsertim qui scirem, quid animi aliquibus foret, qui propius viverent, & plus possent. Quamquam de eo quidem, non est quod multis loquar, postquam tu, sive quia præsens Germaniæ status non satis ardeat, sive alia de causa, satius putas, ut missa hæc facias, salve amore nostro, qui erit dum erimus. De Arnoldo Vorstio, non sine dolore, intellexi, quod ita æs, tibi sablini passus sis. Misere me Matris quæ commendari à probitate multum solet. Metuo ne liberorum mores omnem ei prudentiam expectarent. Quid dicam? Animam debet. Nec amplius ei credam, quàm donare quantum velim. Uno peccare solet, Indulgentia erga liberos. Sed metuo ne Vira Vibiam sequatur. Scis quid non tentare soleant qui constituti sunt pejus, quàm inter sacrum & saxum. Non levè est, quod & debet soceri mei filia nata maximæ. Ego illud nomen vix textivilitio emptitern. Crebro domum ejus tua causa filius meus accessit. Accessi & ego. Sed notiores omnes è familia mea sunt, quàm ut admittantur. Quare sit illud Poetæ;

Non-

Non sum, possum, non libet esse domi. Sed de isto plenius alteris literis, si opus putabis. Conjux mea aliquandiu male valuit, hac tamen hebdomade, meliuscule ei esse coepit, ut aliquid bonæ spei concipiam. Filiorum natu secundus, cui ab avo Francisci nomen, publice Theses defendit, pro Doctorali Laurea, in utroque Jure, & quod voluit, non tam favore, quàm merito obtinuit. Negotium Brugmanni iterum urgebo, hebdomade proxima, quā Hagam ibo. Audio Philippum Cæsarem, ad Pontificias defecisse. Parum fit verisimile, non mihi modo, sed aliis quoque. Quippe qui arctè adeo dicatur novellitati adhæsisse; ut Papismi suspectos haberet, siquis transversum digitum ab ea abiret. Aiunt, ne te quidem, aut Collegam, qui ipsi synodo interfuissetis, fatis ei probare potuisse causam vestram. Scire aveo, an vera spargantur. Elegantissimus Synesius alicubi ait, se imitari velle Medicos, qui aquam calidam præbent ægris, ut cum aqua, educant unā, quæ intus latent. Similiter & ego, de Philippo vestrate ad vos scribo, ut reddas mihi ea cum scœnore. Apud nos nonnulli è sacro Ordine nihilo melius rem gerunt. Hagam solam vide: ubi uterque Gallicæ Ecclesiæ Pastor dejectus de munere, ob vitam impuram. Prior tamen, nondum liquido fatis adulterii est convictus. Nec enim, ἡ ἀντιπαρ' ἑσθ' deprehensus, uti alter, in lectulo, cum scortillo, etsi uxorem formosulam ipse haberet. Male diu hic audierat. Tandem misellus; sed tacere de istis malo, quæ non sine dolore animi cogito. Putabat se omnia boni Pastoris munia implere, si principibus Zelotis posset accenser. Itaque tantæ erat pietatis, ut quanquam ego per amicos, eum Hageni Ecclesiæ commendassem; tamen nunquam ab eo tempore, domum sit ingressus meam. Nempe putabat, me esse ex eorum numero, qui in hoc tristi schismate, de remediis cogitandum putant. Nec male cogitabat; qui scire hoc poterat, quippe qui jam ante duennium, frequens fuerit conviva meus, cum similem se simularet, usque dum eliciisset commendationem meam. Nec longè ab Haga alius Ecclesiastes, sacrilegii miserè convictus. Solet ille suffurari pecunias Eleemosynæ nomine, in templo collectas. Hæc quanto sint scandalo nobis, facile vides. Cristas erigunt Pontificii, eo tantum non de nobis triumphant. Gravis est hæc tentatio infirmis. Interim nos disputare malumus, quam vivere in Christi præcepto. Facile, qui abundè sensa mea nosti, perspicis, quam hæc coquant, & macerent animum meum. Neque enim vivicomburium deprecari, si scirem me posse, eo redimere concordiam

Ecclesiarum nostrarum, majoremque primævæ Ecclesiæ amorem; præ qua etiam hominibus, nec malis, nec ineruditis, nimis nunc novellitas sapit. Multi apud nos ad Pontificios abeunt. Audio idem, & aliquantò magis, in Galliis fieri; & metuunt plurimi, ne longe tristiora, intra paucos annos, intelligamus. Quid quod nec pauciores quotidie ad ἀδύτητα vergunt. O tristes disfidii fructus! Et tamen massare cogor, quasi aliud, quam bonum Ecclesiæ spectem, cum vel pusillum moderationis requiro. Ego vero metuo ne Deo cogar rationem reddere, quod non satis fortiter egerim causam optimam; non dico harum vel illarum partium, sed Ecclesiæ Christianæ, quæ in symbolo etiam Catholica nominatur. Quod nomen ego quantivis pretii puto, utcumque aliqui illud planè habeant suspectum, non alia sanè de causâ, quam quia, aliqui iniquissime solis sibi illud arrogant. Sed quid de tam multis moror, Amicissime Martini? Nempe rarè scribo, sed cum scribo, tarditatem literarum longitudine compenso. Et quod mirum ἡ δόξα μάλιστ' ἡ ἐξέλιξις, ἡ τοῦ μάλιστ' πικροτέλει. Quod de se Socrates apud Platonem, ac Synesius quoque, ad Pylæmenem scribit. Quo tamen gloriari apud te non possum, qui hac parte, ut aliis multis, sæpius me vincis. Sed ea est virtus tua, ut lubens cedas. Eæ quoque occupationes meæ, ut ægre hanc tarditatem ferre non debeas. Absque hoc esset, quid Literas meas mittere cessarem, cum tuis nihil mihi gratius esse possit, & te similiter affectum esse putem imo sciam? Doctissimi Cochii, de Sanhedrim, & Maccoth, laborem ante dies sex septem, accepi. Nec munere eo mihi gratius quicquam. Si apud vos agit, plurimum meo nomine salutes, rogo, & significes, me per literas gratias acturum. Id nunc non feci, quia prius rogandum ex amico, utrum Franeckeræ, an Bremæ agat. Salve, optime Doctissimeque Martini.

Lugd. Bat.
clō Ioc xxx.
Post. Id. Mart.

Tuus

G. J. Vossius.

CXIV.

Joanni Meurfio.

EQuidem summe & Vir & Amice, tam diu me siluisse ac scribis, non putabam; ac plane metuo, ne Literæ aliquæ interciderint. Gaudeo interim constantem adeo esse amorem tuum ut cessatio hæc nihil de eo detri-

detriverit : imo simulac Literas meas acceperas, ne conquerendum quidem de diuturno hoc silentio putaris. Nempe ut Symmachus ait, Amicitia cito sanatur officio. Sed quæ divina hæc bonitas tua, ut hunc cessatorem, seu triconem aut bovinatorem (impone nominis quicquid vis) literario munere, eoque auro magis aureo, maestes, cum Nauisistrata dixerò, Vir viro quid præstat ! Alterum urit si aliquid credamur ; tu nomen nostrum prædicare non cessas, & seculo huic & posteris. Quas tibi ego, quas Liberi mei pro beneficio hoc grates rependent ? Sane omnes plurimum nos debere tibi fatemur : ac si, quid mihi opinione amicorum celerius contigerit, quod animum testari, ut vellem, non sinat ; id compensabit pietas Liberorum. Ex quibus jam quartus Dionysius meus totus est in Reidani Historia Latine vertenda, & quibusdam Arabum monumentis itidem Latiali Linguâ transferendis. Natu secundus, Franciscus, in humanitatis ac sapientiæ studiis perseverat : et si ex quo supremam in Jure lauream apud nos adeptus, Hagæ simul vacet, si non tricis, ac tetricis saltem advocatorum contentionibus audiendis. Nempe scis vix aliam esse ad honores hic viam, nisi forte aliquem favor amicorum magis, vel opum gratia, collat, quam rerum peritia, aut virtus. Tertius eorum Matthæus, satis se mihi in omnigena historia probat. Natu omnium maximus Joannes, Collegii Jesu socius est, apud Cantabrigienses. Qui, quod visum receperit, & mihi gaudeo, & illi gratulor, & Deo quantas possum gratias ago. In filiis duobus natu minimis, Isaaco & Gerardo, sumptibus non parco. Itaque domi iis præfeci Adolescentem : sed quem quia non admodum eruditus est, ex præscripto meo omnia agere velim ; ne mihi deoscedenda discant. Quippe malim ego nihil eos à Magistro haurire, quam male imbui : quandoquidem sic gemino mihi esset labore opus, in eluendo vitio & instillando vero rectoque. Ut non possim reprehendere Timotheum Mulicum, duplicem qui mercedem exigebat, alio siqui Magistro uli forent. Quid multis opus ? Hactenus non infeliciter mihi in liberis negotium successit. Quo nomine Deo gratias debeo si quisquam. Utinam misericors ille Pater beneficium hoc suum mihi diuturnum esse patiatur. Quod equidem eo magis exopto, quia video quam hæc rara fit res in multitudine liberorum. Vel summum Virum & tui amantissimum Rivetum vide. Nôras duos ejus filios natu maximos, cum apud nos viverent. Eorum alter, Vir optimus, Ecclesiastico munere apud Gallos fungens, vita sua functus est. Urit hic dolor Parentem, ut co-

gitare potes. At magis macerat, quod alteri qui Duci Tremulio à secretis erat, Domini sui exemplo ad Pontificios defecit. De meis in hoc vitæ humanæ incerto meliora non possum mihi spondere ; sed tamen sperare optima licet. In quo si non eludar, habebis semper summos homines tui cultores, ut amicitiam nostram decet, cujus liberos hæredes esse convenit. Quod eo dico, ut videas non meum modo, sed meorum etiam me affectum spondere. Mitto ad te Oratorias institutiones meas tertium editas, usque adeo castigatas & auctas, ut mihi ipsi licet parenti hujus foetus subinde novum potius opus dedisse quam prius illud videar reddidisse. In quo committere non potui quin solemne meum obtinerem ut debeo : nempe ut testatum facerem posteris quid de tuis sentirem. Primo uti libro ubi de Atheniensium foris loquor. Et tamen omnia sunt infra merita tua. Verum quod hic desideret quisquam, alibi compensabitur. Proxime quid editurus sim nequeo dicere. Sed puto illud aut commentarios fore Linguæ Latinæ, aut opuscula quædam è miscellaneis nostris. Nam de iis quæ ad Ecclesiæ historiam veterem pertinent, spissius ni fallor negotium procedet. De libris quos ex Rutgeriana petieras Bibliotheca, semel iterumque compellavi hæredem. Prius ille nec annuere, nec omnino negare, sed poscere, ut postridie vel ubi occasio daretur iterum de eo loqueremur. At cum denuo compellarem ; dicere ut cum Benaventura hac de re locutus esset, qui negaret id sine certo auctionis dispendio fieri posse. Fore enim ut multi ob rariores libros huc confluant, qui si ea jam divendita cognovint quamprimum ; semel iterumque elusos, eò ituros, unde venerant. Potuisse hoc fieri si Catalogus necdum editus foret ; nec seferum nimis esset. Et cum oggererem, vix auctionem esse ullam, in qua non pauculi saltem libri prius sint divenditi, quam publica illa venditio instituatur, respondere ille, complures etiam alios esse, qui similiter sibi quædam poposcerint, ut aut nulli, aut pluribus, magno cum dispendio suo gratificari cogeretur. Et sane ipse (quod plane illud verisimile facit) ex Anglia literas accepi, quibus simile quid poscunt. Quod tamen nostro significandum minimè putavi ; ne quem satis aversum viderem, redderem difficiliorem. Multa interim oggessi de amicitia veteri, occasione mittendi, quâ nulla deinceps melior se esset oblatura, & similibus. Sed tandem intelligo ex eo, sic libros (quod facile credo) disiectos esse, ut intra paucos dies reperiri non possint, quos postulares. At is per quem mitti hos oporteret, intra biduum parabitur.

abitum. Cum nec plane deesset, quo his occurrerem, dixit quiddam, ut Collegam veterem deceret: puta, non alium, quàm te, hos libros habiturum. Si quis alius in auctione pretium promitteret, se aucturum, & me idem facere oportere. Quod si eo pacto pretium nimis excreceret, velle se illud in tui gratiam postmodo remittere; ac si liber sex solum florenorum sit, & XV. aut XX. sit venditus, te tamen non amplius quàm denos soluturum. Petii, ut sententiam suam de eo perscriberet. Facturum se promisit; sed nunc occupationem esse. Denarium Pythagoricum tuum Lamerius est editurus: sed quia prelum multis distinetur, negat id ante sex hebdomadas fieri posse. Curabitur, ut emendatè prodeat. Forma erit folii in quaterna complicati. Significabis per quem exemplaria, & quàm multa transmitti voles. Minimùm tibi XXIV. cedent. Sed quæ hic amicis donari voles, ea tuo nomine donabuntur. Imo & exteris, si ita visum: uti Puteano, atque aliis. Scottum adderem: nisi ille ad superos jam concessisset, ut te scire arbitror. Puto non displiceat de Critone & Pitteo in Anglia, Grotio & Salmasio in Gallia. Tu quos præterea voles, significabis. Operam dabo, ut supra numerum, quem dixi, aliqua accedant exemplaria, ut liberalioribus esse liceat. Quod mea etiam interesse, facile intelligis. Scire aves, qua occasione contigerit, ut Serenissimo Magnæ Britanniae Regi innotescerem, atque ab eo luculenta adeo Cantuariensis Canonicius dignitate ornerer. Nempe jam ante annos decem in florentissimo hoc Regno aliquot magni viri æstimare coeperunt scripta mea: præsertim historiam nostram de Controversiis Pelagianis. Scis autem, si uspiam terrarum, in Britannia sane esse longè plurimos Ecclesiasticæ Antiquitatis amantes. Itaque & Oxonienses, me ignaro, recudere disputationes eas, quas in Collegio habui. Jam octennium est, cum Houterus, ad Carolum Hornes, Baronem Suecum, scriberet, se ex uno Regionum Secretariorum audisse, ita in Aula ferri, si ab illustribus Ordinibus ob factionem illorum temporum, quæ multos perdebant, porro negligeret, fore ut mei Serenissimus Rex haberet rationem. Nec multo adeo post, actum mecum de professione Historiæ & prudentiæ Civilis in Academia Cantabrigiensi. Postmodo etiam majoribus promissis tentatus fuit animus meus. Sed uxoris valetudo, & alia quædam hic detinebant. Amici Angli dicere, sic quoque mei rationem habitum iri, & si affectum præstare non possunt præsentem quem vellent, præstituros absenti. Ego hæc habere pro affectus magni in-

diciis. Sed cum me pede meo metirer, fore non putabam, ut præter laudem & honestum de nobis iudicium perciperem quicquam. Sed hæc ipsa tanti mihi visa, ut cogitarem de opere aliquando dicando Academiæ Cantabrigiensi, ad quam vocatus essem. Amici auctores esse, potius inscriberem Illustrissimo Duci Buckinghamiæ, Academiæ hujus Cancellario. Ita enim me, Illustrissimo Duci, magno Mæcenati litterarum, & simul Academiæ cui ille præfesset, rem facturum gratissimam. Placuit consilium. Exemplar ut ad Ducem, ita ad Serenissimum Regem Carolum transmissi. Quemadmodum & tertium dedi Serenissimo Bohemiæ Regi. Etiam misi ad Archiepiscopum Cantuariensem, & quosdam alios ex Ecclesiastico ordine. Ita auctores erant amici; nec videbam, quorsum hæc tenderent. Aliquanto post inopinato nuntium accipio de Canonatu ab Serenissimo Rege Carolo mihi inter Cantuarienses collato. Multum debeo Britanniae, & plus quam exsolvere possum. Ante omnes Serenissimo Regi; hinc Illustrissimo Duci; item Episcopo tum Bathoniensi & Wellensi, nunc Londinensi. Etiam Legato tum Carletono, nunc Secretario Regis, & Vicecomiti Dorcestrensi. Sed omnes commemorare non attinet. Meum erit publicis etiam scriptis erga eos gratum animum testari. Si hebdomadibus paucis Illustrissimus Dux superfuisset, etiam de suo mirè liberalis fuisset. Jam per amicum suum, virum magnum, id mihi scribi jusserat. Audio decrevisse tria florenorum nostratum millia. Jam de eo collocutus erat cum suis. Sed immani scelere nefarii parricidæ fortuna hac excidi. Et sane sic quoque æternum obstrictus ero Duci, & Magnatum tot aliis in præclarâ hac gente. Venio ad alia. Heinsius Ordinum Generalium Historicus est. Putat se intra mensem unum & alterum posse divulgare Acta superioris anni, in quibus præcipue erit obfidio ac victoria Sylvæ-ducentis. In Epistolis Scaligeri ab eo editis P. 670. locus, qui te spectet, est Epistola *vers. 2.* CCCLV. ad Car. Labbæum. Ubi nomen tuum disertè in *αὐτοῦ ἐργον* exprimitur. Exteri, quis signetur, nescient, quia nunc pro nomine tuo positus asteriscus. Sed de Civibus tuis nescio an idem promittere liceat. Quippe nuper quidam qui *αὐτοῦ ἐργον* non viderat, referre mihi hunc locum, nec dubitare se, quin tu potissimum signareris. Causam, unde conjecturam hanc caperet, addebat. Sane dolet, quod quidam tam stultas opiniones, aut viro maximo inseverint, aut saltem aluerint. Nihil tamen hæc malignitas nocere tibi poterit, qui jam diu supra

supra invidiam es. Multa adhuc alia, quæ scribam, occurrunt. Sed inter scribendum decies sum avocatus; & jam tertio fororis tuæ filius Latius literas urget: quia tempus instat, quo nautæ Amstelodamum solvant. Scribam de cæteris brevi: etiam de quibusdam, quæ Statum publicum pertinent.

Uxorem tuam mea salutat, filia filiam ἀνταρπίδα, filii vos omnes. Rivetus etiam, Barlæus, Vorstius, alii, plurimam salutem adscribi jusserunt.

Raptim cō Ioc xxx. Post.
Kal. Maias. Salutaris & V.
clar. Laurenbergium & alios
Collegas. Πάλιν ἔρ-
ρωσθ.

Tuus æternum,

G. J. Vossius.

CXV.

*Reverende in Christo Pater, Domine
Illustrissime.*

Quamquam non mediocrem ceperam dolorem ex obitu illustrissimi Comitis Pembrochii, cujus summam erga me humanitatem persenseram coram, magnumque ad promovenda studia ardorem facile perspereram, ex tot MSS. thesauro, quo Bodleianam Oxonii tui Bibliothecam liberalissime adauxit verèque immortalis beneficio obstrinxit; in hoc dolore tamen meo, non mediocriter illud me recreavit ac refecit, quod cum & nobilissimæ Academiæ Cancellarius idoneus & tanto heroi dignus successor quæreretur, ad te potissimum itum sit: quo his temporibus exulceratis non alter ei muneris aptior videretur: qui etiam pro boni publici amore summo humeros gravissimo huic oneri supponere (ut sperabitur) velles. Deum oro, ut hæc honoris accessio & tibi & imprimis Oxoniensibus tuis perutilis sit ac salutaris. Eodem pene tempore gratissimum hunc nuntium intellexi, ex amicis, serenissimum Dominum nostrum Regem Carolum prole, eaque mascula auctum esse, quam Deus hæredem tot Regnorum & Patri & Britannicæ vestræ conservet, seroque succedere velit sceptris paternis. Optabamus hic item felicem partum illustrissimæ Principis Arausionensis, sed illa postquam diu cum tertiana conflictata est, abortum fecit, ac mirè adhuc languet. Auctores sunt medici, ut ad discutiendas morbi reliquias se ad balnea conferat Aquisgranensia & aquas Spadanæ. Et jam ab illustrissimis Principibus itineri destinatus erat proximus dies Martis. De Comitatu & totâ itineris ratione decreta

omnia. Pro Ecclesiæ in via futurus erat collega meus conjunctissimus Andreas Rivetus Gallus Theologiæ Professor. Cum ecce triduo superiori iterum infirmior est reddita: ita ut plerique metuere incipiant, ne ea res omne hoc negotium diutius differre cogat. Nescio quàm verè, non absurdè tamen eos sentire arbitror, qui dictitant coqui ac macerari eo Dominæ Principis animum, quod videat tantum illorum dissenfum penes quos est Reip. potestas Ecclesiæque administratio. Unde illud quoque consequitur quod videt mariti sui, quem sic amat, aures oppleri variorum querimoniis, ut nihil gravius dicam. Ille nihilominus aures utrique parti præbere, concordia utrobique studere, omnia potius bono publico metiri, quàm lubitu paucorum. Hagæ adhuc est Dux Neoburgicus. Is hæreditaria Cliviæ & vicini soli oppida reposcit, quæ in nostra sunt potestate. Nostri se paratos reddere profitentur, simulac de hæreditate herciscunda inter cum & Electorem Brandeburgicum convenerit. Quamquam profectò utcumque nulla inter eos lis amplius foret, prius necesse esset restitui graves impensas quas iis in locis Ordines nostri fecere. Itaque, ut puto, spissè illa redditio procedet: præsertim quamdiu nobis à Cæsare metuimus. Matthiam Martinium Bremensem Theologum nosti, ut arbitror, vel ex tot Scriptis, vel ex eo quod Synodo interfuerit Dordrechtanæ. Is ante sesqui mensem decessit non levi dolore meo. Erat Vir enim undecumque doctissimus: in Germania quidem majorem virum non nôram: & in hoc Ecclesiæ dissidio multum de facienda concordia cogitabat: omnino plus æquitatis in eo reperi, quàm multis aliis, cujus rei testes habeo Literas non unas, quas ad me scripserat. Et quæ viri erat ingenuitas, ad hoc studium profitebatur sibi plurimum profuisse nostram de Pelagio & Massilientibus Historiam. Institutiones oratorias meas jam acceperis spero, sed sine Literis ullis. Tam subito enim portitor abitare parabat, ut vix sermonem cum eo mutandi tempus daretur. Spero operam quam illi studio impendimus, non displicituram ullis qui Literarum & Eloquentiæ sint amantes. Quod verò in mea ad Lectorem præfatione dico, idem hic dico; gaudere me quod opera illa sim perfunctus; ac reverti liceat ad Historiam Ecclesiæ veteris diutius quàm par erat intermissam. Nec enim ultra video quid morari possit: nisi quod Linguae Latine Commentarios quidam pene cum convitiis exposcunt. De quo nihil hoc bimestri proximo statuere possim: sed potero Typographis reversis à nundinis Francofurtensibus. Interea nos antiquit-

tiquitates Ecclesiæ detinebunt, ad quas jam diu anhelavi; non quasi à Literis unquam alienus sim futurus, sed adhibere eas volo non ut opus, sed ut operis accessorium. Non diutius te, illustrissime Domine, morabor, si unum hoc addidero, me hæc hebdomade fuisse in Aula illustrissimorum Bohemiæ Principum: atque ibi locutum mecum ex Anglia reducem illustrissimum Britannicæ Legatum, qui prolixè mihi exposuit summum erga me amorem tuum. De quo quidem persuasissimus & antea fui: sed tamen perjucundum fuit ea quoque cognoscere ex ore tanti Herois, & quidem qui ista diceret tuo nomine: ut cum tam nobile par cogitarem, & quis ego homullus forem, tacitus mecum admirarer bonitatem Dei, qui mihi conciliaffet hos amatores mei.

Quamobrem Deum Opt. Max. rogo ut te Illustrissime & Reverendissime Domine diutissimè Ecclesiæ Britannicæ, & simul etiam mihi amorem hunc tuum conservet.

Lugd. Bat. clō Ioc
xxx. Non. Sextil.
St. vet.

Reverendissimi & Illustris-
simi nominis tui devotissi-
mus & obstrictissimus
Cultor,

G. J. Vossius.

CXVI.

Joanni Vossio.

Charissime Fili,

TAndem accepi aliquid à te Literarum. Hæc minutis illis exceptis, quibus Ungari Literas incluseras, primæ earum sunt, quas acceperim ex quo Britanniam corpore magis quam animo reliqui. Utrum plures scripseris, tu melius scies. Sed omnino diligentior te in hoc Epistolari officio esse velim. Fuit interim Epistola tua eò gratior, quòd eam comitarentur Literæ præstantissimi Halli, quem ego virum si non amarem & æstimarem, ob egregias animi dotes, at saltem diligerem ob affectum egregium erga utrumque nostri. Respondissem ei jam nunc. Sed quædam impedire. Fiet id post dies paucos: simul tum ad te copiosius, ut spero, de nonnullis perscribam. Insimul aliquod exemplar transmittam Oratoriarum nostrarum, quæ tandem (beneficio Dei) ad finem perductæ. Nunc vix alia scribendi ad te causa est, quàm ut scias, quid ex primo trimestri proventus annui ex Præbenda Cantuariensi, qui quidem hoc anno exspiravit, fieri velim.

Nempe octonæ Libræ Sterlingicæ cum dimidia tibi annumerabuntur: undecim verò cum dimidia dabuntur Joanni Nabradi Ungaro, qui Sacris Literis Oxonii operam navat. Populares ejus mihi annumerarunt hic Imperiales, sive Joachimicos Daleros quinquaginta. Id Britannicæ monetæ tantum esse, ac dixi, cognovi ex præfecto negotiationis Anglicanæ qui Delphis in aulâ agit. Atque idem mihi Dubletius & alii affirmarunt. Nam ut aliis, sine damno meo gratificari sum paratissimus, ita iniquum est, ut beneficentia mea sit fraudi mihi. Scripsi de re tota ad Clarissimum Casaubonum. Literas eas inclusi iis quas nunc mitto. Tu postquam eas legeris obsignabis, & amicissimo viro mittes, nec ubi pecuniolæ hoc acceperis, propterea te in Libris emendis insumere universam velim, aut partem meliorem. Satis sit si istis sacri studii initiis Anglicana evolvas Biblia, assidueque rumines tum Linguae causa, tum imprimis ob argumentum divinum. Quamquam non impedio si unum, alterum, tertium scriptorem addas eadem Lingua. Sed per nimiam copiam diffundere te non debet. Scis illud Senecæ, Qui ubique est, nusquam est. Habes ornatissimum & amicissimum Hallum, habes alios, quorum ex consilio studia hæc possis componere. Nec penitus iccirco ventis tradi velim, quæ in Medicina vel Juris studio hauseris. Multis & miris casibus obnoxia est vita humana. Forte ab alterutro eorum quandoque tibi vel honos surget, vel erit unde tueri vitam cogaris. Scis optime quomodo ego postquam foeda illa tempestas nostram concussit Belgicam, nunc sacra nunc externa studia sim professus. Male mihi fuisset nisi fuisset, quod ait ille, in utrumque paratus. Interim sacra potissimum cordi sunt. Studiis cæteris nihil si sacra exceperis, dulcius est: sacris verò nihil etiam augustius. Non sunt beati qui super aurum & gemmas calcant: sed sunt beati qui mente piâ ac devotâ Verbum Dei legunt ac relegunt, unde & religiosos vocari arbitrantur nonnulli. Nihil illo melius habet orbis, quippe auro magis aureum est, gemmis magis gemmeum. Sed frustra in eo evolvendo eris, nisi Spiritus Domini te dirigat. Hunc exerce à Deo & impetrabis. Nos etiam assidue pro te vota faciemus. Vale, Charissime fili, & quos hæcenus salutare Literis meis iussi, iis iterum meo nomine plurimam salutem dicito.

Lugd. Bat. clō
Ioc xxx. Prid.
Non. Maias.

Tuus natura & af-
fectu Pater,

G. J. Vossius.

CXVII.

CXVII.

Merico Casaubono S. P.

Maximæ mihi voluptati fuit, præstantissime Casaubone, quod proximis mihi diebus retulit hic amicus Anglus, Mercenatem nostrum, Illustrissimum & Reverendissimum Dominum Episcopum Londinensem factum esse Oxoniensis Academiæ Cancellarium. Outinam vera audierim! Decretum ea-propter Hagam excurrere cras vel perendie, ut certiora cognoscam. Quod si vera nunciant, mihi quidem gaudebo, & summo viro gratulabor, cui hæc honoris accessio facta sit; sed magis gratulabor publico & Oxoniensibus; quibus hæc turbidâ tempestate, quæ Reformatas Ecclesias usq; adeo concutit, tam cordatus atque idoneus obtigerit gubernator. Oratoriæ tandem sunt absolutæ. Misissim nunc & Venerabili domino Decano, & tibi exemplar: sed occasio dederat: quæ simulac se obtulerit, non patiar eam effluere. Jam ejus mihi spem fecit quidam, qui vel ipse in Britanniam proficisci parat; vel saltem mercimonia sua in Angliam transmittit. Academiæ nostræ Curatores cogitant de advocando huc Clarissimo Salmasio; idque ut eo hic loco sit quo magnus olim Scaliger fuit. Faveo viro utroque quod dicitur pollice: etsi non ignorem, aliud optare amicam nostrum qui eum sibi honorem potius deberi arbitratur. Ecquid effecturus sit apud nostros difficile sit dicere. Sed post unam alteram hebdomadem (ni fallor) exploratius aliquid perscribam. De Pharnabuka, Brasiliæ metropoli à Batavis capta, jam sine dubio rem omnem intellexeris. Quare operæ in ea narranda parcam. Deus faxit, ut victoria hæc illis in terris plures alias secum trahat. Certè magna ejus rei fiducia tenet nostros. Nec alius est modus, quo magis Hispano incommodare possimus. Sanè, maximus ille Paulus Servita apud Venetos ita semper dictitabat, Non esse meliorem viam ac rationem infringendi vires Hispanorum, quàm si Batavi Americam infestent. Parum illud hosti nocere, si in Belgica pauca ei eripiamus oppida. Palmarium fore, si eum ejiciamus terris istis unde illi opes, nervus belli. Vellem idem animus fortissimæ Britannorum genti foret. Jure enim non Rebuspublicis modò, sed etiam Regnis omnibus suspecta esse debet nimia Austriacæ domus potentia. Necdum perscripsi quid fieri velim pecuniâ, quæ Regiâ benignitate mihi è Cantuariensi Præbenda cedit, primo hujus anni trimestri. Velim

autem inde filio Joanni annumerari Libras Sterlingicas octo & dimidiam: undecim vero & dimidiam Nabradio Ungaro, Theologiæ apud Oxonienses studio: Uterque ea de re ad te perscribet. Residuas Libras quinque asservari à te velim, usque dum alteras literas misero. Rogo præterea, certior me facias, quo tempore exspiravit primum trimestre, ut deinceps in apochis eum addam. Quod si non bene concepero formulam apochæ, per literas mone. Video quàm tibi molestus esse cogar. Utinam gratum testari aliquando animum possim. Operam quidem dabo. Vale vir atque amice summe, meoque nomine plurimum salutem venerabilem Dominum Decanum, & Universum Collegium nostrum. Reverendus Dominus Rivetus plurimam salutem tibi adscribi petiit; uti & Clarissimus Heinsius, cui me scripturum ad te dixeram. Idem se notas suas in Horatium ad te missurum recepit.

*Lugd. Bat. clo Idc xxx.
Fridie Nonas Maias,
Nocte intempestâ.*

CXVIII.

Georgio Archiepiscopo Cantuariensi.

Reverendissime Pater, Domine Illustrissime,

Crebro ejus temporis in mentem venit quo coram licuit ut Poeta ait

—audire & reddere voces:

quo etiam tanto à te adiciebar honore, quem non alteri post serenissimum Regem debere malim. His non mediocriter animatus, magis & magis operam do, ut bene mereri possim de Ecclesia Dei & Republ. Literariâ. Ac partim quidem omnis sum in scribendis novis, partim in iis, quæ jam ante in lucem emisi, augendis & limandis. Ex quibus sunt Commentarii nostri Rhetorici, opus jam ante annos amplius xxiv. publici à me juris factum. Batavis jam tum illud dicâram, ut non debuerim nunc aliis quamvis nihilo secius de me meritis consecrare. Exemplar ejus operis transmittito, atque ut à cultore tui devotissimo serenâ fronte suscipias, etiam & etiam rogo. Is qui de manu, (ni fallor) in manum tradet, est nobilissimus adolescens, Adamus Jerislaus à Berg, Moravus, Joannis Christophori de Berg filius. Quo loco pater ante novennium hoc fuerit apud suos, vel unum illud indicio erit, quod serenissimus Bohemiæ Rex eum potissimum ex nobilitate, præesse voluerit

voluerit cunctis Moraviæ terris, quas quidem hereditarias accepisset. Earum enim penes nobilissimum hunc virum gubernatio fuit, cum titulo supremi præfecti. Sed majus est quod sinceræ Religionis assertor, ac meliorum partium defensor acris fuit. Tantis vir nunc patriæ extorris, bonisque patriis & avitis exutus, opem eorum implorat, qui bonis & bonæ causæ, semper optimè voluerunt. Sexennium apud nos cum Uxore & Liberis ita vixit, ut bonis semper charissimus foret. Nihil quoque uxore ejus (ut intelligo) vel melius vel cordatius; neque item Liberis suavius quicquam. Ex quibus notus mihi natus maximus adolescens erectæ mentis, & qui omnino præclari aliquid promittat. Annos habet prope sexdecim, & pro tempore quo studiis operam dedit bene profecit. Utinam ejus in Britannia haberi ratio possit, imo & fratrum atque adeo & parentum. Quos ego vehementius commendarem, partim quia sic eorum virtus meretur, partim quia sic postularunt aliqui ex Collegis. Sed cum intelligam & à Serenissimo Bohemæ Rege, & aliis qui auctoritate plurimum possunt, id sedulo factum esse, non operam arbitror meam vel cujusque mei ordinis magnopere eam ad rem requiri. Committere tamen non potui quin hinc proficiscentes, saltem votis meis prosequerem, ac quomodocumque etiam apud te affectum testarer meum. Deus te, Reverendissime Domine atque Illustrissime, diu Ecclesiæ suæ totique Britannæ sospitem conservet.

Lugd. Bat.
a15 Dec xxx.
Id. Sextil.

*Illustrissimi ac Reverendissimi nominis
tui cultor devotissimus & obstric-
tissimus,*

G. J. VOSSII.

CXIX.

Johanni Meursio S. P.

NON soli vivunt Gomarus & Meursius, qui Danæi aliorumque exemplo, Lugdunensem Scholam alia commutarint. Nam is ille ego Vossius tuus accessi, qui Amstelodamum commigraui, atque ibi hæc nunc scribo. Miraris scio. Nec sane id ego unquam fore antehac credidissem. Nimirum multa homini inopinato obtingere videmus. Occasionem, scio, & causam consilii ejus aves cognoscere. Jamdiu est, quod Amstelodamenses vident, quanto cum periculo se liberosque suos exponant, dum carissima pigno-

ra, priusquam vitæ modum sciant, mittunt Lugdunum, ubi licentia indies gliscit. Sane paucis abhinc annis plures commissæ cædes, quam multo plurimis antehac. Ulceri huic Chironio non aliter medicinam se facere posse, judicarunt, quam si Professores aliquot alerent publicè. Atque ego, & Barlæus, idonei visi sumus, à quibus professionis primordia ducerentur. Idem labor ac honos mihi in illustri hac Schola futurus, ac Lugduni: Sed stipendium prope altera parte majus. Præterquam enim, quod luculentam domum assignarunt, annuos numerabunt bis mille florenos, & quingentos. Ad hæc me meosque spe non unâ implerunt. Nec fallent, scio, qui jam affectum exerere cœperunt erga filium meum Franciscum, urbis suæ Advocatum. Sed Leidenenses magnopere huic instituto refragantur. Contendunt hoc adversari urbis suæ Privilegiis. Quin & illustrium Ordinum consensu comminati fuerunt, si Amstelodamenses persistant in proposito, nolle se quicquam in posterum ad bellum conferre. Tandem inter Proceres harum urbium convenit, ut Curia utraque Hagensis, rebus expensis, intra mensem statuatur de mente verborum, quibus Leidense Privilegium concipitur. Interea Amstelodami à publicis Lectionibus abstinerebunt. Nihil periculi est, ne adversus eos sententia feratur, qui hæcenus vocati. De Juris-prudentia verò & Medicina, ac imprimis Theologia, operosior fuerit difficultas. Sed negant Amstelodamenses de eo disputari debere, priusquam aliquos ad eas profitendas vocarint: Prodiit tandem Denarius tuus Pythagoricus. Ac decem ejus Exemplaria mitto, idque ex xxv. quot ægerime exsculpere potuit ab Euclione illo, qui edidit. Ex residuis duo mihi reservavi. Unum Venetias misi ad Molinum: alterum Lovanium ad Puteanum. Præterea exemplar, uti jufferas, dedi Mylio, Riveto, Cunnæo, Vorstio, Heinsio, Barlæo, Scriverio, Buchelio, & præterea tribus aut quatuor aliis in dignitate constitutis. Sed tamen plura si exposces, non finam ea à te requiri. Mitto & Epistolas quatuor Canonicas Syriacè ab Elzevirio excusas venustissimis typis, una cum interpretatione & Notis doctissimi Pocockii Angli, qui hocce anno in Syriam profectus. Cur noluerim te hoc opusculo carere, nihil æque in causa est, quam quod mihi fuerit dicatum. Pro Historia tua Danica gratias ago summas: uti & pro Ælnotho Monacho. Scis, quam mihi illa omnia sint accepta, quæ ad Historiam novissimæ etiam antiquitatis pertinent. Quanto magis jucunda sint, si tuo prodeunt beneficio & cura? Attamen magis Historia me Danica oblectavit; tanto nempe magis, quanto

quanto illa plus tibi debet. Dictio mirè placet; candida est & terfa, penitusque Romana. Adhæc perspicua planè, quod ego in magna laude pono. Vellem ab hac parte tam felix esset Heinſius in ſua Sylva Ducis. Opus eſt quidem elaboratum, & in quo multa ſint ingenii lumina, ac doctrinæ: ſed dum Tacitum ſe æmulari putat, ac *ῥολυτις* nomen affectat, dictio ejus ſæpe nativum illud perdit, inque obſcuritatem tantam incidit, ut crebro nec à ſagaciſſimis & prudentiſſimis viris intelligatur. Quibus tamen Tacitus & veterum alii, ſatis ſint plani & aperti. Hæc non mei unius ſententia eſt, ſed pene omnium, qui non palpum ei obtrudunt. Quod familiariter ad te ſcribere non dubitavi, pro neceſſitudine amicitiaſe noſtræ. Idque eo lubentius, ut ſcias, occasione hac à multis prædicari, quæ de Auriaco Principe, atque induciſ ſcripſiſti. Et ſcio magis eſſe prædicaturos, ubi Danicam tuam Hiſtoriam legerint, quæ pauciſſimis adhuc viſa eſt. In Heinſiano illo Commentario, quem dixi, quædam etiam Generales Ordines & alios in dignitate conſtitutos, offenderunt. Itaque abſque Beaumontio fuiſſet, vix etiam cum quædam juſſet recudi, privilegium ab Ordinibus fuiſſet conſecutus. Omnino multum & ſudandum fuit, & tamen ne ſic quidem ſatiſfecit: jure ne an injuria non diſputo. Tu vero hanc partem literarum cum legeris, litura una obduces: vel totam Epiſtolam conſcindes. Nihil enim attinet alios poſthæc ſcire, quæ ſcriptitamus liberè inter nos. Nondum dicere poſſim, quando futurum ſit, ut Rutgerſii *ῥε μακαελτς* Bibliotheca auctione diſtrahatur. Promiſerat Heinſius id fore ante Paſchales ferias. Sed illæ jam elapſæ, nec certi ex eo quicquam potui adhuc cognoscere. Interim ſpoſpondit, non alteri ceſſuros libros, quos petiſti, ne quidem ſi juſto majus pretium offeratur. Suaneburgio nemo hætenus in profeſſione ſurrogatus. Ambiant id munus Hupertius advocatus, Bronchortius, Vorſſius junior, Vinnius & Cavellarius. Jurifconſultus veſtras, quem mihi per literas commendâras, longe mihi tua cauſa, & ob eximiam probitatem gratiſſimus tuit. Utinam verò etiam affectum oſtendere liceret erga filium incomparabilis Herois Oliveri Roſencrantzii: Sed de ejus adventu nihil hætenus intellexi. Nec eas videre literas contigit, quas per eum miſiſſe te ſcribis. Suſpicor in aliam prius Academiam conferre ſe voluiſſe, priuſquam ad Batavos proficiſceretur. Ubi venerit, non ſinam te quicquam in me deſiderare. Omnino propter magnitudinem Herois omnia officia ejus filio præſtabo. Simul etiam propter commendationem tuam. Al-

terutrum horum ſufficeret; nunc ea concurrunt, quorum ſingula per ſe ſatis ponderis haberent. Solonem tuum videre aveo. Quæſo quomodocunque potius tua ede, quam ut diutius ea cum blattis & tineis rixentur. Nihil æque mihi dolet, quam quod non te ſolum carere cogar, ſed tamdiu etiam careamus tot aureis monumentis tuis. Cognoscere deſidero, annon brevi, vel anno ſaltem hoc, decrêris inviſere tuos in Batavia. Jam biennium eſt quod ſic receperas. Sed hætenus ſpe vana lætaſti. Ubi Amſterdamum acceſſeris, apud quem divertere cum tuis debeas, fruſtra ſcribam. Ea enim eſt amicitia noſtra, ut liquido illa tibi ſatis præſcribat. Salutat tuam uxorem uxor mea, filiam filia, imo omnes nos vos omnes. Etiam clariſſimis Collegis tuis, præcipuè Laurenbergio & Stephanio, plurimam meo nomine ſalutem dicito.

Amſteldami
clô lœc xxx.
iv. Id. Maias.

Tuus ex aſſe,

G. J. Voſſius.

CXX.

Guilielmo *Epifcopo* Londinenſi, Gerardus Voſſius S. P.

TArdius quàm ſperaram literas meas viſdes, Reverendiſſime Pater, Domineque dignitate illuſtris, ſed pietate, doctrina & meritis longè major. Nonis Decembribus, ut fortasſe ex Nobiliſſimo Carletono intellexeris ſalvus ac ſoſpes Lugdunum veni: octiduo nempe ex quo è Britannia exceſſi. Divina gratia eodem hic omnia reperi loco, quo fuere cùm abirem. Vix dicere poſſum quantus ſalutantium numerus me primis exceperit diebus: ſermo propè omnis de Sere-niſſimo Rege Carolo, vel iis qui ſacræ ejus Majeſtati à conſiliis forent. Judicia diſparia, prout quiſque regii, vel popularis ſtatus, veteris, vel recentis Eccleſiæ amantior foret. Equidem neutiſquam mihi eorum tribuo intelligentiam, quæ ad regni negotia pertineant. Probè ſcio quantopere hæc captum excedant meum, quem Deus in ſtatione longè inferiore collocarit. Sed tamen pietas non ſivit, ut non quorundam immodetiæ modeſtè, atque amice occurrerem. Eos intelligo qui digito cælum ſibi attingere videntur, ſi quomodocunque nocere eorum nomini, atque exiſtimationi poſſint, quibus ſtantibus & integris, præſens regni atque Eccleſiæ ſtatus convelli neutiſquam

neutiquam possit. Quanquam verò apud eos parùm profecerim, quibus nihil nisi popolare, ac novellum sapit; cordatiores tamen scrupulum sibi eximi gaudebant, quem quidam tribunitii spiritus suis calumniis injecerant. Interea totum hoc quod à me factum, pietatis causa factum, quippe qui tantùm Britannis, ac summis ejus viris (ut de Serenissimo Rege taceam) etiam deberem, si nihil deberem. Nunc quantum est quod debeo, verba non reperio *ἰσχύοντα*, quibus satis hoc imprimam, &c. De induciis cum Hispano ineundis, vehementibus studiis in conventu Ordinum certatur. Ad bellum inclinant non pauci, qui metuunt, ne si induciæ fiant, domesticis magis diffidiis laboremus: alii tamen vel maximè, iis occurrere posse arbitrantur. Amstelodamenses ante hebdomadas paucas sua urbe exegere Ecclesiastem quandam: qui licet sæpius à Magistratu moneretur, à tribunitiis ad Populum concionibus, desistere noluisse perhibetur. Est hic ille qui ante plus minus duodecim annos edidit Heautontimorumenon. In quo ex scriptoribus Latinis Græcisque (est enim vir multijugæ lectionis, sed exigui judicii) convitia usque adeò congestit, ut ex plastro maledicere videatur. Sanè hoc piguisset adscribere, nisi optimus quisque ringeretur, in Reformatæ Religionis hominibus inventum esse, qui Gretzeros Scioppios, & similes vinceret maledicendo. Sed illum mitto, cui ea parte saniores opto mentem, &c. Deus faxit ut longa ætate, Iliacos æquare senes, aut vincere possis. Ita ex animo voveo, meque iterùm tibi devoveo, Reverendissime Pater, Domine Illustis.

Reverendissimi, & Illustrissimi
Nominis tui cultor, ac
Idibus Jan. An. cliens fidus addictusque,
cio ioc xxx.

G. J. Vossius.

CXXI.

Merico Casaubono.

Quanquam, mi Casaubone, coram abundè perspexi summum erga me amorem tuum, jucundissimum nihilominus fuit videre eundem tantopere spirantem in literis tuis. Solùm dolui ob dolorem quem conceperas ex diutina in scribendo cessatione mea. Nec possum me ab omni omnino culpa immunem dicere. Sed quædam tamen non leviter eam imminuunt. Illud maxime, quod affinis

Junius, quem sine literis meis dimittere nefas putassem, occasione quâdam subitâ præter opinionem & suam & nostram recessit. Vix abierat ille, cum valetudo uxoris pejor pejorque esse cœpit. Erat tum quidam apud nos, qui se propediem in Angliam iturum diceret. Sed totum mensem & ultra me elusit. Sed hæc fuere; quodque peccatum Lethæo poculo mergere debebis. Mihi perstat animus quantæcunque deinceps fuerint occupationes, non illis tantum in me imperii permittere, ut non crebras ad te literas dem. Id non modo exposcunt præclaræ illæ animi dotes tuæ, sed etiam conjunctio studiorum, ac quod collegæ & fratres sumus dignatione Dei & Regis atque opera communis Mecænatis. Quod ipsum etiam (ni fallor) aliquanto nos arctius conjunxit. Serenissimum Regem prole auctum gaudeo, & mascula quidem, quæ vere *ἡρώα δόξαν*, ut Euripides dicebat de liberis Regiis. Non legiones, non classes æque firma imperii munimenta, ut Tacitus monet. Quare spero fore ut siqui forte nova anhelarent, nunc ad officium redeant. Literæ incomparabilis viri Parentis tui necdum prælo subjectæ. Videtur Typographus tricar. Meursius è Sorana Danorum Academia misit aliquot Epistolas ad se exaratas, quas addi petit. Jam mensis est quod Oratoriæ meæ recusæ sint. Eadem quædam Exemplaria ante tres hebdomadas misi in Angliam ad asinum Junium, qui in ædibus illustis Comitibus Arondellii agit. Horum unum Reverendo Domino Decano, alterum ut tibi detur, mandavi postremis Literis. Vellem non ejusmodi munusculo, sed aliâ ratione, affectum erga collegas meos testari potuissem. Sed id, ut fiat, operam dabo. Tempus solum requiro. Scis enim non esse me, non ausim dicere *ἐν τῷ ἀνελεῖν*, attamen neque *ἐν τῷ ἐμῶν*. Heinſius totus est in scribenda Historia eorum, quæ superiori anno Batavi terræ marique gesserunt: præsertim iis quæ ad obsidionem Sylvæ-Ducis pertinent. Obiit ex professoribus Juris Swaneburgius, vir suarum rerum intelligentissimus, sed qui scribendo nullum sibi nomen parârit. Eò magis penes Cl. Cunæum deinceps Juridicæ facultatis honos stabit. Scire aveo quo loco sint res Seldeni, num eodem an meliori. Jam prope trimestre est, quod per literas petii ut Nabrado Ungaro annumerarentur libræ sterlingicæ undecim cum dimidia. Quas si necdum accepit, quæso ne diutius ea res differatur. Scrupulum illud injicit quod, ut ex popularibus ejus intelligo, domicilium petilentiae causâ mutavit. Quare fieri possit ut aberrarint Literæ, quæ ejus negotii causâ missæ ad illum fuerant. Postulâram etiam
ut

ut filio Joanni de meo dentur libræ Sterlingicæ octo cum dimidia : quamquam nec repugnem, si inde fiant libræ decem. Puto enim ob Pestilentiam grassantem pluribus egere. Quia verò tardè adeo literæ procurantur, pleræque etiam intercidunt, rectè me facturum putavi, si tribus ad te verbis perscriberem quid in rebus ejus fieri velim. Cum in Angliā essem ex pluribus cognovi, sufficere si ei quotannis annumerentur de meo libræ Sterlingicæ quindecim vel summum viginti. Quare placet ut trimestri quolibet de meo detrahantur libræ Sterlingicæ quatuor vel summum quinque, nisi *deus* n. obvenierit, quod in hoc morbo epidemico paulo aliam inire rationem cogat. Quod ad residuas libras xx. eas trimestri quoque accipiet Ackertius mercator Belga qui Londini agit. Temporis angustia non sinebat, ut ad eum nunc literas darem, sed fiet illud post paucos dies. Eas postquam ad te miserit, queso effice ut pecuniæ illi numerentur. Ego cum damno non ita magno ab eo recipiam qui hic negotia ejus procurat. Quod si meliorem viam scias, fac me certiore. Vale, amicissime Casaubone, & à me, uxore, & meis salve, una cum lectissima Uxore; ac plurimum etiam saluta Reverendum Dom. Decanum ac venerabile fratrum nostrorum Collegium.

Lugd. Batav.
clō lōc xxx.
xx. Julii. Silo
novo.
Tdygca, nocte
intempesta.

Tuus tuo merito,

G. J. Vossius.

CXXII.

Doctissime & Amicissime Pococki.

Mitto ad te viginti exemplaria utilissimi laboris tui, quem iv. Apostolicis Epistolis impendisti. Spissius aliquanto processit editio quam vellem. Sed leve illud, dum emendatè satis prodeunt, uti spero. Saltem operam id dedit filius Dionysius quem coram vidisti : & imprimis de Dieu qui postremam relegendi curam in se suscepit. Non jam repetam quantopere me affectu atque honore hoc obstrinxeris. Feci alias, & tu id me scribere non pateris, quæ tua est humanitas. Quare priora non repetam. Non desinam tamen cogitare, quâ ratione affectum erga te testari optime possim. Mitto Oratoriarum ad te Institutionum mearum exemplar geminum. Quarum unum tibi reserves, alterum ornatissimo & amicissimo M. Rouse dabis.

Et tertium quartumque amicis aliis addidisse nisi hominem amicum ad vos euntem, ulterius gravare molestum fuisset. Accedit quod ne illud quidem scirem, an Oxonii uterque sitis, an minus; audio enim totâ pene Angliâ vehementer grassare pestilentiam, eoque quibus id integrum est, penè omnes se in agros recipere longius distitos. Non dubium quin ea potissimum causa sit, cur vix quisquam mihi ex Angliâ hoc trimestri proximo responderit. Pluribus rescribam, simulac cognoro non frustra me scribere. Simul tum ad D. Rouse, quem merito maximi facio, & faciâ semper, de nonnullis exarabo. Salutabis plurimum amplissimum D. Cancellarium, atque omnes summos viros, à quibus tam humaniter supra merita mea me exceptum apud vos esse tute nosti, ut Catalogum hic texere non habeam necesse. Raptim,

Lugd. Batav.
clō lōc xxx.
vi. Id. Sext.

Tuus ex animo,

G. J. Vossius.

CXXIII.

Joanni Vossio.

Charissime Fili,

Quas per ornatissimum Maderazi Ungarum literas miseras, accepi xix Julii; horenos xxi quos ab eo mutuo sumpteras restitui. Valere te gaudeo, præsertim hoc tempore, quo ut ex aliis etiam intelligo Pestilentia usque adeo apud vos grassatur. Tuum erit sedulo habere rationem valetudinis tuæ, ac quibusdam etiam amuletis uti, quemadmodum hic facere solemus cum morbus idem dominatur. Hagæ plurimæ illo domus sunt infectæ; nec pauci jam decessere ex eo, sed ferè ex fæce vulgi. Quod si contagio hæc latius ibi serpsit, revocabo huc Franciscum nostrum. Quanquam neque hac in urbe plane ab ea immunes simus. Sed hactenus malum illud intra paucillas ædes consistit. Ubique sumus in manu Domini: qui dabit quod erit salutare. Interea lætor Collegium vestrum longius abesse ab Urbe; adeoque illud spaciosum esse ac loco situm salubri. Non mediocriter me excruciat, quod te videam tam parum tuâ sorte esse contentum, planeque etiam metuere ne omnem vitam hic consumere cogaris. Mihi longè alia spes, atque adeo fiducia, dummodo omnes nervos contendas, uti recepisti. De studiorum genere tui rem omnem arbitrii feci. Non quasi desultorium vitæ

vita genus amem, sed propter Poetae illud,

Tu nihil invita dices faciesve Minerva.

Hæc sola res fecit, ut Medicinæ te paterer valedicere: etsi rationes essent parum validæ quibus ut ei renuntiares, compelli te aiebas: idque eo tempore cum intra menses paucos summam te lauream consequi posse existimarem. Sæpe damnavi hanc facilitatem meam: Sed quid facerem, cum quanto ego magis adhortarer, tanto tu magis abhorreret? Postquam permisi ut vel ad Jurisprudentiam, vel ad Theologiam animum appelleres; tamen nunc quoque mihi videris animo fluctuare, cum tamen brevi temporis spatio, & hoc & illud absolvi possit; dum ne tu laborem ullum metuas, sine quo nihil præclari unquam consequeris. Non deerunt tibi in Britannia fautores, dummodo ne indignum favore te præstes. Et si cessaret Britannia, haberent tui rationem amici in Batavia, qui te aliquod ad munus revocarent, in quo te patriæ & tuis ornamento fore putarent. Nunc quid faciamus, num idoneus sis ut in Academia, vel Schola quapiam illustri profitearis vel Linguam, vel Mathesin, vel Philosophiam, vel facultatem Juridicam, aut Medicam aut Sacram? Prope omnium gustum habes: sed in uno animum desigi opus fuit: quod quia factum non est, fieri deinceps oportet, ut videamus ecquid hic pro te possimus. Fortasse malis tui rationem haberi extra Academiam. At in quo, ut urbis sis Medicus, an ut ejus Advocatus? ad neutrum satis es paratus. Longeque minus (ni fallor) ad Sacrum Ministerium. Quæ cum ita sint, excitare peccus tuum debes, ut ne indignus sis cujus vel in Britannia, vel apud nos ratio habeatur. Facilius mihi erit sacra mea omnia, ut loquuntur, commovere, ad te per amicos juvandum, quam tibi præstare aliquid egregio favore dignum. Tantum animum intende. Dimidium facti, qui cepit, habet. Sapere aude, ut bene monet Horatius. Aude, aude, mi Fili, contemnere voluptatem, amareque laborem, quem tu si amabis, non diu querulis Literis erit opus; præsertim me vivo, cujus causa multi aliquid velint. Non dubito quin jam à Clarissimo Casaubono acceperis eam pecuniam de qua scripseram. Neque tu modò, sed etiam Nabradius Ungarus. Quanquam is jam non amplius Oxonii, sed (ut puto) Londini vivit. Crebras ille Literas ad populares suos huc misit, quibus conqueritur quòd jam tertius sit mensis, quo à me pecunias expectat, sed frustra; quia meas necdum Literas viderit. Itaque iterum ad præstantissimum Casaubonum scripsi. Nec enim

satis est ut tibi anumeret eam summam, quam jussi, sed Nabradius etiam satisfieri æquum est. Quippe hic populares ejus mihi CXXV. florenos annumerarunt, qui Anglicana pecunia valeant Libras Sterlingicas undecim cum dimidia, modo quamprimum persolvantur. Sin necdum accepit, iniquum haud erit, si hic Ungaris refundam unum alterumque florenum, propter damnum quod Nabradius ex mora hac accepit. Atque ita quidem facere perstat animus. Addam rationem quâ existimem tibi in posterum consuli posse. Nempe jubebo ut Clarissimus Casaubonus, vel is qui in Anglia ab eo accipiet, proventum nostrum singulis trimestribus, quando voles, modo justum tempus exspirarit, tibi annumeret Libras IV. Sterlingicas. Quod si te parcum & industrium ostendas, non dubitabo pro quaternis assignare quinas, ita ut quotannis sis habiturus tum Libras Sterlingicas viginti. Quod sit supra ducentos florenos nostrates. At tu centenos poposceras. Ego sponte centenos & quinquaginta addixeram. Nunc etiam ut tibi animos addam, pretium augeo sed conditione quâ dixi. Quam sum tibi lenis pater in te angusta! Ultra si poscas, frugi non sis, nec ea liberalitate dignus. Florenos illos XXI. quos hic refudi non detraham tibi; sed iis tu emes mihi & aliis, eos Libros de quibus scripsi nuper. Sed facies illud quum maximè opportunum erit. Nolim enim te propterea Londinum excurrere, ne inutiles sumptus facias, & tempore adeò contagioso, periculo te exponas. Tu crebro ad nos Literas da: præsertim si quis erit qui ex vobis ad nos veniat. Causam non adscribo: quæ non solum est quod sumptibus parcity, sed & quia tutius scribitur. Sed si talis non occurrat, tu quomodocumque scribe; siquidem deesse materies tibi nequit: si non aliunde, saltem argumentum fuerit idoneum ex studiis. Desidero enim scire quomodo jam studia componas tua, & an eos tibi fructus capere videaris, quorum minime poeniteat. Ex cognatis (ut aliquid de aliis rebus hisce Literis appingam) nupsit superiori hebdomade Antonina Corputia. Viviano nomen est novo marito. Vir est ut non ineruditus, ita & nobilis & honestus & prædices. Eoque hæc felicior sororibus licet natu minima, videatur. Conviviali festo etiam interfuit frater tuus Franciscus: si non ob arctam sanguinis conjunctionem, at quia illi sponsæque eadem mater, non quæ illos pepererat, sed ut cum Plauto dicam, quæ mammam dabat. Surandyburgii defuncti locum in Cathedra ambiunt Vinnius rector Scholæ Hagienfis, Cabelavius Epistolarum editor,

editor, quas tamen an videris nescio, Bronchorstius Hubertius, is qui novam Psalterium Paraphrasin vel Metaphrasin potius producit, & Vorstius junior. O utinam eos fecisses progressus, ut inter eos nomen numeretur tuum, aut pro te liceret ambire. Non deerat animus fratri Francisco ad eum prestandum. Sed dissuasi; neque hoc alia de causa quam quia ob ætatem immaturus videretur. Absque ea esset, calcar addidissim. Nec fortasse deessent fautores. Utinam paria de te liceat dicere. Sed spero brevi id licebit. Volo enim vos in studio virtutis pariter decurrere, five eodem illud five diversi generis studio fiat. Vos certate inter vos; ego applaudam victori. Similiter committere Marthæum cum Dionysio velim: & Gerardum cum Isaaco: — *καλὸν εἶναι τὸν βροτῶνα* ut est apud vatem Ascræum. Commissa est non longè à Vesalia pugna, inter nostros & hostis militem. Utrunque cedere non pauci, sed penes nostros victoria fuit. Qui & captivum & triplici vulnere faucium adduxere Vesaliæ Joannem Nassorium copiarum præfectum. Rumor hic est ex Mercatorum Literis ortus, Mexicanam Urbem undis esse absumptam. Urbs ea in paludibus sita: ut multa aggerum cura opus fuerit adversus aquarum periculum; In quo dum qui pro Rege erat negligentior est, pecuniæque eo sine erogatas in proprium transferre commodum non veretur, atrox hoc infortunium Hispano evenit, si vera est fama: de qua certiora propediem sciemus. Obiit ante sesqui-mensem Dordrecht Anna Mylia Balthazaris Lydii vidua: obiit & Bremæ ante duas vel tres hebdomadas amicus meus summus, Matthias Martinus, is qui uxorem depoposcerat uxoris mæe fratrem: sed voti compos factus non est, dissuadente Fr. Gomaro qui eum dicebat *ἀρτυριάζειν*, imo in eorum castra planè abiisse. Verène an secus non disputo. Cum quotidie tot mortes intelligamus, semper cogitare nos oportet de novissimis: ut quando hora extrema supervenerit, fatalem illum ictum forti accipiamus animo, memores vitam nobis non mancupo, sed usu datam esse, *χρησέαι, ὡς κτήν*, ut dicunt Græci. Quare non diutius velle vivere debemus, quam visum erit Deo & Christo. In hoc fiducia firmâ recumbamus, mi fili. Dabit ille nobis quod expedit nobis. Salutem tibi dicunt mater, fratres, sorores.

Lugduni Bat.
c. lxx.
xxi. Julii.

Tuus natura & affectu
Pater,

G. J. Vossius.

CXXIV.

Doctori Carletono.

Nobilissime, & amicissime Vir,

Non facile dixerim, quantæ mihi fuerit voluptati nuper quod tot laudibus egregium, etiam Græcis viderem Literis capi. Sermo tuus inter alia injectus de numerum notis. Paucis rem dixi. Remisi de cæteris ad Institutiones Græcas in quibus pag. XLVIII. liquido totum hoc exposui. Mihi earum exemplar per Filium: tardius aliquanto, quam vellem. Nimirum operam dedi, ut melioris chartæ aliquot mitterem. Sed nec Typographus ipse ulla habebat. Mihi igitur non quale optabam, jure debebam: sed cujusmodi poteram. Sed nescio quid factum, utrum, quod domi non esses, an quia aliud impedierit, filius te non convenerit. Dederam enim in mandatis ut ea tibi exponeret coram, quæ animum meum tibi obstrictissimum testarentur. Facilius autem illi ignosco, non modo quia filius sit (scis, quam leves parentum esse animi foleant) sed etiam quia adeo adolescens, erat enim Dionysius meus, quartus ætate ex meis, sed qui eruditione fortasse prioribus non cedat. Nunc cum Golio nostro hifce feriis autumnalibus vivit, non longe ab Haga, ut ab hominum consortio remotissimus strenuè magis perficiat, quod in Arabicis ei Literis deest. Simul operam non malam Magistro suo præstabit, in concinnando Lexico Arabico, quod à tanto viro Christianus Orbis exspectat. Nec enim sine uno altero, qui à manu sint summo viro, facile fiat, ut voti nostri compotes fiamus. Oratoriarum mearum exemplar debeo illustrissimo Mecænati meo, patruo tuo Vicecomiti. Sed nescio an tanti sint Mercuriales hi labores, ut in transmarinas partes mitti mereantur. Tamen simulac Hagam venero, colloquar de eo, tuoque ex consilio omnia faciam. Superiori Hebdomade in aulâ Principum Bohemiæ locutus sum cum Illustrissimo Serenissimi Britanniarum Regis legato. Cujus ego virtutes heroicas semper sum admiratus: sed mirificam humanitatem satis extollere non possum. Locutus est mecum de liberis suis, sed ego consilio hac parte juvare non poteram; quia profectum eorum penitus ignoro. Quare vel cum ipsis, vel eo qui studiis horum præest, velim sermonem serere, ne quid consilii dem, cujus postea possit poenitere. Si huc mittantur, operam dabo, ut meum sentiant affectum. Nam cum omnia debeam nobilissimæ genti vestræ, tum maxime illustribus

tribus familiis, & tam mei amantibus me obstrictum sentio. Intellexi ex illustrissimo heroe affectum erga me reverendissimi Londinensis Episcopi, cui nunc scribo. Tu quæso heroi Literas ne has tradere graveris. Nam se missurum illas in Angliam recepit ad proximum Lunæ diem. Debeo & Literas illustrissimo tuo patruo. Sed has inter paucos dies mittam; nisi occasio se obtulerit excurrendi Hagam, ut feram ipse. Vale, nobilissime Carletone, & in amore nostri persevera: quod scio facies & faceres non rogatus.

Lugd. Bat. c1o
Idc xxx. xviii.
Aug. raptim.

*Tibi & illustri familie
tuæ obstrictissimus,*

G. J. Vossius.

CXXV.

Ger. Jo. Vossius Claudio Salmasio
S. P.

JAm ante trimestre à me rescriptum oportuit. Nec officio defuissim si satis vidissem quomodo aut quid potissimum scribere deberem. Ancipitem me reddebat, quod diversa adeo studia viderem in illo Scaligeranæ *δυσκολίας* negotio. Cujus illum exitum expectabam, quem virtus tua meretur. Dolebam interea livorem tantum posse. Sed de eo nihil scribere ausus eram: Imo sic semper fui ut potius vitia ferrem aliena, ac graves etiam injurias concoquerem, quam illis divulgandis operam darem. Simul cernebam, quantum tua scire ea interesset, aliunde etiam te posse cognoscere. Interim gaudeo, saltem confique rem esse perductam, ut omnes intelligent, solum obstitisse livorem, quo minus fierent ea quæ nominis tui amantiores optabamus. Nec tamen penitus spe excidimus: postquam oblatis mille quingenti annui, tantum ut præsentia tua & scribendo Academiam hanc ornas. Sane stipendio isto majus habet decentium nemo. Et puto paulatim incrementa capere posse. Imo vero de eo non dubito. Et honesta in re es ut de minuto non necesse habeas laborare. Quare si alia non morentur, hoc quidem non tanti putabis, ut propterea te carere cogamur. O utinam nos sic bees, ut Literarium istud oraculum consulere hic nobis coram liceat! Quod tanto magis opto, quanto me penitus penetro in Plinianas exercitationes tuas. O Thesaurum interioris doctrinæ! Jam tertia est hebdomas, quod à Drovartio ex-

emplar accepi. Pro quo gratias ago, si non quas debeo, at quantas possum. Quotquot Literas amamus valde desideramus tertium quoque volumen quod promittis. Nemo tamen sic festinare te velit, ut valetudini incommodos; quartana illa quæ tamdiu detinuit te satis indicat, nec ferreum tibi corpus esse. Sed tamen quantum valetudo ferat matures, rogamus. Et quid dissimulem? cum magnopere me illius voluminis desiderium teneat, tamen in majori apud me expectatione est commentarius tuus in Concilium Iliberitanum. In quod legi Libros tres Ferdinandi de Mendoza Madriti editos. Sed quam multa & verius & plenius dici possint facile video. At non item video à quo id melius quam à te fieri possit. Fortasse autem tutius talia apud nos edantur. Eoque impensius opto ut si sine tuo tuorumque incommodo possis ad nos venire, non detrectes. Habebis hic non paucos nominis tui & Admiratores & Cultores, in quibus nomen profiteor meum. Quis sit animus in hac re tuus brevi spero sciemus, vel ex te ipso, vel si longius Lutetia absis, ex Literis iis quas Clarissimus Justellus ea de re nobilissimum Somelſdici Dominum aut Rivetum Theologum dabit. Si veneris, mihi quidem gaudebo, Academiæ vero gratulabor: fin iis conditionibus, quæ nunc Colæ ad unum vel alterum offeruntur venire recusabis, non desinam tamen gratulari & mihi te amico, & Literis te patrono, & tibi cui hoc Deus concesserit, ut præclare adeo de studiis mereri & possis, & velis.

Lugd. Bat. c1o
Idc xxx. IV.
Kal. Sept.

CXXVI.

Antonio Æmilio, Gerardus Jo. Vossius
S. P. D.

CLarissime & αἰνῶλε Æmili, haud facile dixero, quoties & quam amica mentio fiat tui, me uxoreque confabulantibus. Quid mirum, cum utrique nostri usque adeo jucunda sit tui memoria? Eo mirandum minus, si non sine parvissima (ita mihi scio cum Varonne apud te hominem φιλολογώτατον, loqui licere) penè dixerim querimonia, miretur subinde, tantoperè te à frigido Saturni sydere afflari potuisse, ut nullos amplius igniculos cernat veteris affectus. Absque eo esset, inquit, illone paucarum horarum intervallo dissidens à nobis, nunquam faceret potesta-

potestatem videndi sui? Vides non à me solum te diligere, sed etiam uxore: vel potius (quando hoc jam vetus) quam constanti amore te prosequamur uterque, etiam postquam aliquis metus esse coepit, ne minor esset ardor tuus, quam olim. Sed si quis fortassis hujusmodi metus se insinuet, fucillis longissime fugandus, facile enim sic in animum inducimus omne hoc, quod nobis ægre est, non aliunde provenire, quam ex immensa qua premeris negotiorum mole. De me quidem id dicere possim, qui nihil nunc minus sum, quam meus. Et qui vix sum meus, volo tamen esse tuus, tuorumque. Et hac fiducia etiam meos commendare tibi sustineo. Ac hoc quidem tempore, ex uxoris meæ fratre natum, Franciscum Junium, Franc. Nep. Is postquam biennio in Academiâ Groeningana Jurisprudentiæ operam dedit, etiam Ultrajectinos sibi adeundos putavit, ut majora caperet studiorum incrementa. Propterea eum per literas commendavi, nobili urbis vestræ Jurisconsulto, paternum decus vel æquanti, vel Vincenti. Quod utrique nostri pro nomine erit. Volui tamen ut tibi quoque innotesceret. Nec enim mihi fatis est, si Jurisconsultum audiat: sed volo ut literarum ac imprimis historiæ studium adjungat: scio enim, imo scit Belgica nostra, quisquis sacrum ejus accedere volet, tuas imprimis fores pulsare oportere. Multi enim Thyrsigeri, pauci Bacchi. Uxor plurimam tibi salutem adscribi petiit.

Amstelodami, clō
Idc xxx. vi. Id.
Septembris.

CXXVII.

Gerardus Joannes Vossius, Matthiæ
Berneggero, S. P.

Rescripisssem jam diu, Præstantissime Berneggero; sed jam à longo tempore, in neminem incidi, qui ad vos se iturum diceret. Quanquam vero nihil mihi jucundius esse soleat, quam per literas colloqui cum hominibus eruditissimis; fateor tamen mirè me segnem esse, si metuam, ne frustra scribam; quod crebro nunc fit, milite vias passim obfidente. Absque eo esset, nè laborem quidem defugisssem, commentarium quem in Justinum, aliquot abhinc annis scripsi, cum cura relegendi, eaque excerptendi, quæ imprimis placitura arbitrarer, sed ut dixi defuit, per quem tutò ea mitterem. Et præterea mirè distringebam, edendis commen-

tariis nostris Oratoriis: quæ tandem ad finem perducta esse lætor. Nunc verò labor, puto iste, supervacuum fuisset, quia credo, jam lucem viderit Editio, quam adornasti. Impensè faveo studio, quod in hunc scriptorem insumpisti: Benè de historiâ externa mereris, & Latinis. Nec faciliè aliis, ad eam rem magis fuisset idoneus, quam qui ut tot Disciplinas, ita Historiam omnem animo est complexus. Nec opera nostra (de qua limanda cogitationem abjecimus) perierit nobis; sed utilis erit ad ea, quæ de Temporum ratione aliquando, si Deus volet, juris publici faciemus. Volupe fuit cognoscere, Procures vestros, non infra se putasse, curam Grammaticam; quæ nunc apud doctissimos ita sordet, ut minor iis videar, quia studium hoc non neglexi. At quanto aliter sapuerint apud Romanos, etiam viri Principes, non ignoras. Quod verò scribis, in repastinanda Gymnasii vestri Grammatica, adjumento fuisse nostram; id mihi longè gratissimum fuit. Nam in talibus scis, non honorem spectavi, sed publicum commodum. Valdè me beasti, Grammatica Græco-Barbara Metrophonis Critobuli. Multum lucis adferet ad intelligendum linguam vulgarem. Planè lucem videre debet. Quod fiet hyeme proxima, sic enim recepit Elzevirius; qui nisi operam suam addixisset, vel ad alium issem, vel nunc remisisssem. Idem ubi ad nos redierit, excudet commentarios nostros de lingua Latina. Mallem hac ætate, ea in lucem dare, quæ ad Ecclesiæ antiquitates pertinent. Quod studium me à prima tenuit adolescentia, sed etsi non pauca in eo elaboravi, tamen vix quicquam prodiit post Historiam de Pelagio, & Massiliensibus. Nempe alia me tenere: non illa mala quidem:

*Sed fugit interea breve, & irreparabile tempus,
Omnia dum capti circumvehamur amore.*

Vale longe doctissime Vir, & quod facimus, id porro etiam faciamus, ut nos mutuo amemus.

Lugd. Batav. clō
Idc xxx. Post.
Kal. Sept.

CXXVIII.

Guilielmo Archiepiscopo Cantuar.

Reverendissime in Christo Pater, Dom. Illustriss.

In diuturno Conjugis meæ morbo, jam tertium enim is mensem excessit, ne mediocri solatium affudit Literarum tuarum

quas merito magno mihi semper honori duco, conspectus: magis etiam ubi ex iis vidi, ut quo antehac affectu eo prosequi me pergas, quanto minus merentem, tanto magis illustrissimo nomini tuo obnoxium ac devotum. De globo utroque procuratum sedulo: probe enim scio non alios uspiam esse qui melius vel sydera nobis, vel terras mariaque expresse- rint. Auro tamen & scitamentis aliis, com- memini ornatiores missos ad aliquos viros principes qui istis caperentur: Sed tales nunc parati erant nulli; nec Britannia destituitur viris rerum hujuscemodi intelligentibus, qui istoc suppleant: atque ut alios transmitti ma- lis, non deerunt quos jam missis demerearis. Mitto Maimonidæ Librum jam diu excusum. Sed hæcenus hæsi vellemne comitem ei dare, excercitationem de Rabbiorum temporibus, ita præfatio dilata: interim strenue pro occu- pationibus quæ sic distinent, progressus sum opere in eo quo omnis Gentilis Idololatriæ causas eruo ex historia veteri vel rerum natura, hæcenus tentatum nemini. Nam quanto aliam insititerit viam Lilius Giraldu Italus, vir eruditus, nemo possit ignorare, nisi qui non legerit. Atque hæc quidem non exter- nis modo scriptoribus, sed etiam Theologis antiquis allucet facem; subinde etiam Scri- pturis Sacris. Quod magis fiet omnibus iis quæ deinde consequentur, modo Deus mihi valetudinem & vitam, uti spero.

Filius meus Joannes in India Orientali fa- tis concessit. Præclare rem gerebat, paulo tamen sumptuosius quàm vellem. Manebant cum magni honores & unde intra annos tres quatuor in re unctissima redire domum possit. Sed aliter visum supremo Deo. Interim so- latur tum affectus procerum nostrorum, qui summa ei destinarent: tum imprimis quod pie admodum esse defunctum intelligam.

Deum Opt. Max. oro, ut salvus & sospes annos permultos sis Ecclesiæ Anglicæ, vel potius Catholicæ, cujus Episcopos omnes su- prema post Deum & Christum manet cura.

*Amstelod. clō
Ioc cxxxvii.
Prid. Kal. Oct.
St. Vet.*

*Illustrissimi & Reverendissimi
tui nominis Clientis devotis-
simus,*

G. J. Vossius.

CXXIX.

Joanni Beverovicio, S. P.

UT ex Anglia reduci volupe erat Dor- drechti videre te sospitem ac valentem, ita ingratum illud fuit, quod tam cito avel- lerer. Amo enim te, mi Beverovici, atque id non modo ob egregiam doctrinam & vir- tutem tuam singularem, & mellitissimæ in- dolis suavitatem; sed etiam quia me amas, neque id modo, ut bene de studiis multo- rum merentem, sed etiam ut olim meritum de tuis. Id enim nec tuæ ad me literæ diffi- mularunt, & apertè, quoties res tulit, pro- mere apud alios soles. Nempe sic animati esse solent, quibus cor magnus ille Promethæus de meliori finxit luto. Nec ultro optare doctores debent, quam affectum. Quo amplius neque parentes à liberis, neque Deus ipse exigit à nobis. Sed ô tempora! quam multos, imprimis dum fatales istæ controversiæ Bataviam turbarunt, reperi, qui insignem ex eo laudem sperarent, quod pro beneficio maleficium rependerent nobis! Quanto magis à talium moribus abfuisi, tanto impensius te amari à me æquum est, & sane, absque paucis foret tui similibus (quos inter merito suo Amplissimum Blienburgium refero) poeniteret propemodum operæ totis annis quindecim urbis vestræ Gymnasio im- pensæ. Quotidie enim video sentioque, quan- tum ea res incommodarit studiis nostris. Sed eo me solor, quod ut in cæteris, ita in his etiam, cuique statutum sit, quâ viâ sit eun- dum, & quousque pertingat. Quare ulterius alii famæ quadrigis decurrant, non si eo vincamur, propterea apud Deum perierit opera nostra. Isti famæ aucupes exprobrent nobis vilem, atque ut vocare ipsi solent, asina- riam operam. At ego non propterea definam putare, insipientis esse suo potius, quam pub- lico omnia bono metiri, & paullum aliquid honoris majoris facere in terris, quam ut Deo obedias luculentè omnia compensaturo in coelis. Sed istos mitto: atque ad te redeo, cujus me versiculi valde delectarunt. Et ani- mus erat iis ornare frontispicia oratoriarum nostrarum, quæ ante paucos menses iterum in lucem prodire. Sed non poteram id fa- cere, nisi apponerem quoque quos scripserat affinis Næranus & Bonifacius Italus, & Col- lega Heinsius, atque alii complures. Malui igitur præterire universos, quam delectu quempiam offendere. Interim scias nihil mihi gratius fuisse vel literis vel versibus tuis.

*Lugd. Batav.
clō Ioc xxx.
Non. Octob.*

Tuus,

G. J. Vossius.
CXXX.

CXXX.

Ger. Jo. Vossius, Johanni Rouse, S.P.D.

Vir Clarissime & Amicissime,

Venit ad vos Jonitonus, juvenis probus & doctus, Natione Scotus, qui in variis Scotiæ, Germaniæ, Belgicæ Academiis Scholisque illustribus vixit. Hunc ante annum mihi commendavit Matthias Martinus, Theologus Bremensis Germanicæque Theologorum maximus ut ego cenſeo φιλόλογος; nec tamen in studiis ſacris ullo ſuæ gentis inferior. Ob hujſce Viri commendationem, quia arcta mihi amicitia fuit, Juvenem, dum hic fuit, amavi, præſertim ubi ita ſe gerere vidi, ut nihil in ejus vita culpandum videretur. Nec obſcurus erga eum affectus meus fuit. Quâ fiducia non dubitavit à me poſcere, ut eum uni vel alteri florentiſſimæ Academiæ veſtræ commenderem. Id verò facio lubens. Rogo igitur ut ſi qua in re utilis ei opera tua eſſe poſſit, vel etiam ornatiffimi & amiciffimi Pococki noſtri, hanc ei ne denegeris. Nullus dubito quin gratus ſemper ſit futurus. Oratorium mearum, quæ ante ſemefre hic ſunt recuſa exemplaria pauca in Angliam miſi ad Nob. Virum Franciſcum Junium affinem meum, qui in ædibus degit illuſtriſſimi Comitæ Arundelii: Plura mittere animus erat, ſed juvenis ille, qui ea ſecum in Angliam deferrebat, pluribus onerari non debuit, niſi humanitate ejus abuti vellem. Petii autem ab affine, ut ex iis, quæ miſi, exemplar unum ad te, alterum ad amicum communem Pocockum transmiſſeretur. Id quin fecerit non ambigo; niſi forte Literas meas non acceperat, quod non puto. Necdum tamen iis reſpondit. Poſtea etiam nobiliſſimus Vir Joannes Chriſtophorus à Berg, hæreditariorum bonorum Sereniſſimi Bohemiæ Regis in Moravia antea præfectus, nunc autem metu Cæſaris exulans, à me accepit XX. exemplaria operæ ejus, quam Dom. Pocockus Catholicis è Syriaco transferendis impendit. Ea exemplaria jam Pocockus acceperit ſpero. Satis eleganter Liber eſt excuſus, nec emendatè minus, ut arbitror. Sed de eo judicium veſtrum hic exſpectamus. Dubletius noſter tui memor vivit, impenſeque te ſalutari juſſit. Plurimam etiam ſalutem meo nomine dices Ampliſſimo Dom. Procancellario, quem nunc Doctorem eſſe Juxonem intelligo Collegii Jo. Baptiſtæ præfectum. Quod ſi eſt, gaudeo. Item ſaluta eum qui cum adeſſem vobis, Procancellarius erat, Doct. dico Fruen, præfectum Collegii Magdal. Quid de Duppa,

Prideaux, Fellio, Claytono, aliſque dicam, ſummis ſane Viris? Quid de doctiſſimis & humaniſſimis Harriſſono, Pococko, Chillingwortho? Quæſo, ubi occaſio erit, affectum iis meum teſtare. Vale.

Lugd. Batav. clō Ibc xxx:
vii. Kal. Nov. St. Novo.

CXXXI.

Joanni Vossio:

Chariſſime Fili,

JAM prope menſis eſt, quod nullas à te literas viderim: ut plane ignorem, utrum ternas meas acceperis, quibus ternis tuis anxie ſatis de valetudine ac penuria perſcriptis reſpondebam. Volui igitur exemplar literarum quas iterum ad amiciffimum Caſaubonum miſi ad te transmiſſere, ut facilius perſpicias, quid tibi in rebus tuis factò ſit opus. Sed dubitare vix poſſum, quin vel à D. Caſaubono, vel mercatore illo Londinenſi, qui Hondii noſtri res procurat, voto tuo ſit ſatiſfactum. Volui hujus tamen operæ etiam te reddere certior, quia ſatius duxi, quicquam in me ſupervacuum quodammodo videri, quàm jure à te quicquam requiri. Occupatiſſimus quidem ſemper ſum, ut noſti, & indies creſcit curarum ſepes, quæ meum me eſſe non finit. Sed vincit omnia affectus erga te meus, ac porro etiam vincet, dum tu eris qui debes, ac quem te eſſe planè confido. Permiſi ſuperioribus literis, ut ſi cum bona ſuperiorum venia poſſis, & ita valetudini ac ſtudiis expedire tui amantibus videatur, & nihil periculi à mari vel hoſte timeant prudentiores, quamprimum ad nos excurras. Fortaſſe tamen expediatur, ut aliquantum hoc iter differas, uſque dum eruditione ſis auctior. Sic iis, quos hic tui amantes habes, facilius ſatiſfacies: & hominibus malignis obſtrectandi occaſionem adimes. Noſti hominum mores. Simul ſumptibus parceretur: nec periculum erit ab hoſte. Sed tamen tui rem arbitrii facio. Tantum prudenter diſpice, quid facere ſit opus, & cum iis qui magis hæc intelligant, conſilium cape. Salutant te Mater, Fratres, Sorores. Tu quoque ſalute plurimâ imperties egregios Academiæ veſtræ viros, quos quidem lues à vobis non fugarit. In his eſſe ſignificas optimum & doctiſſimum Ma. Hallum, cui te curæ hoc triſti eſſe tempore ſignificas. Sanè, vir tot laudibus ornatiffimus, vel hoc nomine dignus eſt amari à nobis omnibus. Peterem etiam ut ſaluta-

res

res Magistrum Dod; suavem sane animam. Sed cum jam quoque aliò concessisse ex literis tuis intelligo.

Lugd. Batav.
clō Ioe xxx.
iii. Kal. Nov.
St. N.

Tuis Parens,

G. J. Vossius.

CXXXII.

Edwardo Missfeldeno Anglo. S. P.

Vellem, vir amplissime, priusquam in Angliam redires paucis tecum de studiis filii colloqui licuisset. Pleraque enim melius tribus verbis coram quam longo sermone per Epistolam expressero. Nec propterea deero petitioni tuæ, cum omnia tui causa velim, cujus prudentia, virtus, candor (ut cæteras nunc dotes prætermittam) à tot annis mihi non incognitæ fuerunt. Dum filius mihi adfuit tuus, alternis fere diebus exercui, nunc prosâ condendo aliquid, nunc carmen pangendo. Præterea potissima eorum exigere soleo, quæ me publice docentem audiisset, ac si qua minus fideliter percepta, ea aliquanto fusiùs diducere, aut apertius enarrare. Nec inutilis ei fuit manu ductio nostra in istis, quæ pertinerent ad terrarum situm, ac imprimis Imperii Romani: sine cujus notitia nihil aut parum in Historia videmus. Ac sibi ipsi nisi adolescens defuisset pauculis hebdomadis quibus sive Harlemi, sive in urbe nostra fuit (putabam ego aut Hagam isse aut morbo decumbere) plenius satisfecisset expectationi tuæ. Et tamen ne nunc quidem est quod poeniteat profectus: præsertim ab eo tempore quo sermonem inter nos sevimus; ego & is, quem ad me miseris. Tenuia quidem isthæc initia sunt eorum quæ animo conceperam, inque tuæ spem gratiæ & filii amore acturus eram, modo diutius substitisset apud nos. Sed scis istoc vetus: Dimidium, qui coepit, habet. Imo secundum Ascæum vatem, Dimidium plus toto. Tanti interest ut ne in studiis quoque malè incipiamus. Quia igitur non malè apud nos coepit, velim in patriam redux pede eodem pergat: ac cum Cicerone Livium jungat. In Historico hoc primum attendat quæ ad elegantiam sermonis pertinent. Codicem habeat in quo annotet verba, & formulas, ex Livio à se excerptas, ac subjiciat singulis quomodo ea hoc tempore transferre possit in usum suum. Altera cura esto Historiæ. Quemcumque Livianum leget Librum, ejus sibi compendium concinnet, minimum duplo

auctius epitome veteri, quæ cuique Libro præmitti solet. Tertium esto, ut ea confideret quæ mores majorum virorum vel prudentiam tangunt civilem. Præceptaque & exempla singula ad locum referat communem. Hoc sine codicem habeat in quo chartæ distinguantur titulis virtutum moralium & capitum prudentiæ tum togatæ, tum militaris. In ordine istorum titulorum, utrum Aristotelem an alium sequatur, non multum arbitrator referre. Velim etiam quia passim & in hoc scriptore & in aliis occurrunt quæ tangant mores usq; Romanos, ad manum ei semper sint collectanea Rosini, quibus complectitur gentis ejus antiquitates, de urbis situ, diis, sacerdotiis, Comitibus, Magistratibus, legibus, & alias. Nunc si quis in istis plane fuerit hospes, is exiguo fructu veteres leget. Ac hac quidem ætate Rosinus ad ista suffecerit. Postea satius fuerit ipsos legere ex quibus sua Rosinus collegit, & alios quos Rosinus videre non potuit. Postremum hæc cura esto ut luculentæ orationes illæ, quæ apud Livium extant, Dialecticorum more resolvantur ut compareat, in quo cardo rei consistat, quibus argumentis causa nitatur, quomodo occurratur adversario, quæ adferantur ad conciliandos auditores, quæ ad affectus commovendos. Nec enim facile dixerim quantum ea res conferat ad eloquentiam: præsertim si quis ad exemplum istorum argumentum eligat nostris aptum temporibus, in quo quantum licet insistant antiquis. Hæc tam multa considerare operosi videtur operis, præsertim pro ea ætate quæ nunc est filius tuus. Sed non aliam præscribo viam quam ipse insisterim bono meo: ac longe optimam esse in variis sim compertus, qui recta via grassari vellent, ad solidam potius doctrinarum arcem, quam umbratilis gloriæ. Et hæc quidem sufficere arbitror pro ratione privatim Livium legendi, quam publicè hætenus enarrantem audivit. Sed nolim in Romana consistere Historia. Sacram & Patriam præmisisse oportuit. Subjungere etiam opus Græcæ Orientalem & omnium gentium quæ irrupere in Romanum Imperium. Quo pacto autem ex istis universalis Historiæ notitia optimè comparetur, chartâ alterâ expono. Spero operam hanc meam boni consulens. Idem facturus eram in studio Philosophiæ, nisi satius putassem, ut filius plusculum Linguae utriusque Historiarum & profanæ ac poeticæ eloquentiæ studiis insisteret. Et sub manibus habeo, imo jam olim habui, & aliquamdiu intermissum simulac potero ad incudem opus revocabo, quod partim erit de Philosophorum sectis, partim de Artium ac Scientiarum omnium utilitate ac nexu. Eo fusè dissero, quomodo sit Philosophandum. Summa

ma eo redit auspicandum esse à secta peripatetica, postea diffundi oportere per sectarum alias imprimis Platoniam, & Zenoniam, sive Stoicam; denique sistendum esse non in Pyrrhonia, quæ etiam ambiget in certissimis, sed Polemonis Alexandrini, quæ Electrix sive Græce malis ἐλεγκτική dicitur, nec in ullius Magistri verba jurat, sed singulas singulorum suo æstimat momento. Verum hoc iudicium non nisi post Sectarum omnium notitiam in iis oritur qui veritatem prope majoris faciunt quam seiplos. Ea virtus necdum cadere potest in ætatem filii tui. Quare suffecerit hoc tempore ut Philosophia sit Peripatetica contentus. Non fatigabo te meque ulterius. Deum rogo, ut filio tuo adolescenti optimi ingenii bonam mentem conservet. Omnino enim si volet præclarum quid, indoles ejus promittit: velle autem spero vel potius confido. Vale, vir amplissime, & nos tui amantes porro eo loco habe qua hæcenus facis.

Amstelodami cło Ioc xxxviii.
iii. Kal. Decemb. St. Gregor.

CXXXIII.

Petro Cunæo.

Vir atque amice summe,

GRaviter in amicitiam nostram peccarem, si in eo, quod serio adeo petis, morem minus gererem. Equidem jamdudum id fecissem, nisi, ut primo adventu domesticis negotiis, ita nunc aliis obruerer. Otium hic est, quamdiu nondum docere publice aggressus sum, cæterum id minus segnè. Nam ut de eo nihil dicam, quod totus sum in schedis meis digerendis, quæ res plus molestiæ habet, quam primò putarem; etiam exteri, qui vel à vicinis civitatibus, vel terris etiam longinquis, huc veniunt, item indigenæ ut initiis fieri solet, non paululum mihi temporis eripiunt: pene non minus, quam Lugduni unquam factum. Nec tamen dicere possum, mihi non esse otium ad literas exarandas: Sed, sic animatus sum, ut mirifice soleam procrastinare hoc officii genus: quod ubi diebus, atque adeo Hebdomadis totis factum, tandem etiam (pudet dicere) in oblivionem venit. Idem ne mihi in hac recula vitio amplius verti possit; cum literas tuas sub noctem accepissem, confestim ad Bazirium has, quas vides, exaravi. Mirabitur, scio, ille: nec enim puto, meas, post tantum silentii intervallum literas expectat. Interim

ex his me non oblitum fui facile videbit, atque idem deinceps comperiet, quoad à virtute non descisset. Gaudeo me hic quoque reperisse, qui præclarè de eo sentiant. Est sane egregio ingenio, & si, ad magna animum adjecerit, non videtur impar futurus, verum quid ego hæc ad te? qui melius me ejus indolem introspexeris. Gratias tibi ago, quod filium meum in his, quibus Lugdunenses offendit, defendis. Teneri ex officio id facere, vellem omnes scirent. Nam cum id negotium proceres hujus urbis suis commiserint advocatis, atque eos inter & filius teneat locum: honestè satis se oneri subducere non possit. Et tamen non illæ ejus sunt partes, quæ forent, si hæc res non me, & Lugdunenses spectaret. Omnino enim primas etiam in iis, quæ filio, ut natu minimo competeret, alius tenet. Non quia meus impar, sed quia paternum agitur negotium. Quod si sic quoque non satisfacit Lugdunensibus, videbo, an expediat, plane hac eum controversia abstinere. Quod gratissima tibi fuerit commendatio Roscrantzii, plurimum gaudeo. Apud Hubertum non degere eam ob causam cognovi, quod in longum tempus se obstringere noluerit: quippe qui propositum habeat, ubi hic doceri publicè ceperit, quandoque hebdomadam unam alteram apud nos studiis suis dare. Tibi interea, vir amicissime, quod laborem tantum sumere volueris, gratias ago summas: invenies me promptum semper, sicubi vicissim operam meam tibi utilem existimabis. De uxore mea, penè exciderat. Quod aiunt eam aerem hunc minus posse perferre, vanissimum est. Valet illa non deterius quam antehac. Quin spem concepi, prospera hic magis valetudine usuram. Vale, vir amicissime, & cum tua, à me meaque salve.

Amstelodami.

Tuus omni officio,

G. J. Vossius.

CXXXIV.

Petro Cunæo.

VIR clarissime, qui has tibi literas tradit, is est filius generosi viri, Oligerii Roscrantzii, regii in Dania Senatoris, Herois, ut genere ac dignitate sublimis, ita undecunque doctissimi, & eruditorum omnium mirè amantis. Tanti viri prolem, eamque quantum per ætatem licet, paterna prementem vestigia, de meliori nota mihi commendavit utrique

utriusque nostri amicissimus Joannes Meursius. Equidem si Lugduni perstitissem, nihil mihi jucundius fuisset, quam bene de adolescentis hujus studiis mereri. Idque non modo, quia sic Meursius petisset, sed ipsius etiam adolescentis causa, ac imprimis parentis ergo, viri, vel herois potius incomparabilis. Nunc quod præstare ibi loci, nequeo, id ab iis præstari exopto, quos Collegas & amicos conjunctissimos tot annis habui: à te potissimum, quia prodesse ei potissimum potes. Atque utinam etiam in domum tuam recipias unà cum Ephoro ejus Mullenio, juvene ut perhonesto, ita egregie docto. Sane valde demereberis parentem, qui nunquam immemor hujus affectus erit. Scio enim quantopere sibi gratulatus sit Meursius, quod ante annos aliquot convictorem habuerit filium natu majorem. Quod si res domestica id hoc tempore minime sinunt, proxima apud parentem gratia erit, si consilio juves. Mihi nunc præter Hupertium advocatum, ubi degant, nemo occurrit. Si apud civem, vivendum sit, Bibliopolam Ephorus prætulit. Sed præter Jacobum Marci, apud quem aliquandiu vixere Barones Stupeskii, Bibliopolarum qui convictores habent novi neminem. Ejus vero uxorem aiunt attentiores esse ad rem, quam oporteat. Nec video cur tanti sit apud Bibliopolam potius agere, quam alium civem honestum. Nec dubito, quin, cum tibi notiores sint cives, quam mihi, facile suggerere alium possis magis idoneum. Quod ad res meas, initia hic non displicent. Nam perhumaniter habeor. Sed non arbitror fore, ut publice doceamus primis quatuor aut quinque hebdomadis. Vel saltem non antequam sententiam tulerit utraque Curia Hagensis. Cujus judicium avide expectamus. Nec dubitant procures hic, quin accepturi sint ex voto responsum. Tantum in causa fiducia habent. Scripseram ad Syndicum Wevelinchovium me simulac cognoro conventuros DD. Curatores, Leidam velle excurrere. Rescripsit ille, necdum certam diem præstitutam: Sed ubi de ea intellexerit, facturum me certiores. Quare propediem fortassis te videbo. Salutem plurimam dices uxori, & Collegis amicissimis.

Amstelodami.

Tuus totus,

G. J. Vossius.

CXXXV.

Guilielmo Archiepiscopo Cantuariensi.

Illustrissime Domine ac Reverendissime Pater,

JAM tertius est dies, quod de gravi con-
venior negotio, cujus te quamprimum
certiorem faciendum putavi. Hoc, quod
dixi, istiusmodi est. Atque utinam præsens
potius consilium capere tecum possim. Jam
ab aliquot annis ex vicinis Bataviæ urbibus,
ad Academiam nostram & ætate minores &
doctrina inferiores, quam antehac solent,
initti Adolescentulos videmus. Mores quo-
que eorum quotidie fiunt deteriores. Itaque
non Baccho modò ac Veneri perpetuo litat
pleraque omnis Adolescentia, sed crebriores
etiam cædes proximo hic sexennio commis-
sæ, quam antea totis triginta annis atque
amplius. Hæc res male habet parentes urbi-
umque procures; imprimis Amstelodamen-
sis Civitatis, quæ hæc unà parte infelicem se
dolet, quod liberos; cum necdum modum
vitæ sciunt, Studiorum causa in Academiam
hanc, ubi dissolutè à magna parte vivitur,
mittere cogatur. Atque illud eo magis ad
animum revocat, quia hoc ipso anno pri-
marii Civis sui inque dignitate constituti fi-
lius, Civem necavit Lugdunensem. Magis
etiam sua interesse hoc Amstelodamum pu-
tat, quia tam multi ad nos ex urbe sua, studi-
orum causa, confluunt, quam ex septem Bata-
viæ civitatibus, aut plerisque etiam provinciis
totis. Jure igitur optimo occurrendum huic
malo arbitrat. Convenere ergo urbis ejus
procures universi, omniumque consensu sta-
tutum est, non melius sibi se & liberis consu-
lere posse, quam si in urbe sua erigat illustre
Gymnasium, ubi professores duo aut tres do-
ceant Historiam, Philosophiam, aut alia qui-
bus juvenus imbui debet. Atque hoc de-
cretum eo majori favore atque applausu à Ci-
vibus exceptum est, quia in tam populosa
urbe, seu indigenas spectemus, seu advenas,
ex cunctis ferè Christiani orbis regionibus;
magna eorum ceopia est, qui vel ægregiè ipsi
eruditionis sint, vel saltem doctrinæ pera-
mantes. Horum igitur omnium votum fuit,
ut & ipsi audire quotidie aliquem possint, qui
vel antiquitates gentium, aut naturæ arcana
pandat. Itum hoc animo ad me, ac rogatum
ut hac in re addicere operam florentissimæ
Reipub. vellem. Itum quoque ad Casparum
Barlæum Philosophum ac Poetam insignem.
Stipendium mihi obtulere altera parte majus,
quàm apud nos Professores habent. Nec ab-
horret animus: Nam & pulchrè mereri hic
de

de publico mihi licebit; & gloriosum erit primum me jecisse fundamenta Illustris Gymnasii, quod fortasse aliquando cum inclytis Academicis fama nominis contendet. Uxor etiam valde proclivis est, quia si quid mihi humanitus contingat, malit ea in urbe esse, ubi viduis bene-meritorum optime consuli à proceribus solet. Liberi etiam adhortantur, quia longe facilius illic assurgendi sibi occasio erit, in tanta dignitatum ac munerum multitudine. Eo magis quia jam Proceres ipsi & mihi & meis spem pollicitando fecere, futurum ut occasiones non dimittant, quibus familiaris meae consuli possit. Consanguinei & amici suadent ne hanc conditionem abnuam; variasque etiam rationes adjungunt, quas longum esset exponere. Oravi Deum animum mihi ut illum inspiret, ut eligam quod Reipublicae atque Ecclesiae imprimis utile erit, ac mihi meisque salutare. Fortasse aliqui partium studio nimis laborantes, & quibus insitum à natura est alienam felicitatem invidis intueri oculis, mihi id vitio vertent. Sed consolor me in eo quòd sapientis atque probi sit potius sequi Conscientiam ducem, & bonorum consilia, quam vanas quorundam voces. Talium imprimis, qui eapropter quod Magistratus jus suum tueri satagat, adversus unius aut alterius tribunitias Conciones feditiosaeque Consilia clamitant, eum partium studio in praesentibus Religionis Controversiis teneri, & ex suo ingenio proborum dimetiuntur animos, in longe melioribus ea reprehendentes vitia quibus ipsi laborant. Equidem si eò venero, ostendam me non alteri Ecclesiae adhærescere, quam hætenus feci, omniaque in tristi hac discordia ad pacem & concordiam dirigam, eam prudentiâ quâ Dominus mihi servo suo conferre dignabitur, ut ita tandem quantum in me est, nostram Rempubl. (navi quæ fluctibus ac ventis agitur similis) tranquillum in portum appellari sese valeat.

Hæc raptim nunc exaravi. Post paucos dies certiora perscribam. Nunc plura non licet; quia hodie mittendæ sunt hæ Literæ Hagam, ad illustrissimum meique amantissimum Dom. Vaine, Serenissimi Regis Magnæ Britanniae Legatum; qui crastino mane iter suscepturus in Britanniam, cum sine meis redire Literis nefas fuisset.

Illustrissime Domine, Pater in Christo Reverendissime, Deus Opt. Max. diu te incolumem Ecclesiae ac Britanniae, imo & mihi meisque conservet.

Lugd. Bat. c10
Ioc xxxi. xii. Jan.
Stylo novo.

*Illustrissimi & Reverendissimi
Nominis tui Cultor obstrictis-
simus & devotissimus,*

G. J. Vossius.

CXXXVI.

Erycio Puteano. S. P.

Fatum quodammodo meum videtur, perpetuis occupationibus ab officio literarum impediri. Sæpius scribere cupidum gravissima retinuerunt negotia, quæ si unquam, nuhe certe in me obruunt. Petis ut de statu meo faciam te certiores, ego quoque non petenti purgandi causâ significassem, ut non voluntatem æque officii præstandi, quam potestatem deesse mihi intelligeres: res ita habet. Annus fere integer elapsus est, quod partim corrupti adolescentium mores, partim aliarum causarum Amstelodamenses magistratus perpulere, ut consilia de erigendo illustri Gymnasio inirent. Id & sibi jucundum & liberis utile fore prævidebant: quippe qui nullo obtentu ad Academiam festinare Lugdunenseri possent, atque in parentum conspectu ac metu essent, quoad huiusmodi ætate, & studiorum propemodum spatio decurso ad graviora se transferrent, ac supremum honoris gradum peterent. Ad hoc illud accedit, quòd in civitate ea qua incolamus, magnitudine, non alteri, ut puto, tota Belgicâ cedit, ingens Doctorum & Semidoctorum copia est, qui vel quotidie vel quoties res sinunt aliquem de egregio argumento disputantem audire exoptent. Diu itaque re deliberatâ inter proceres utilem omnes censuere. Inde disipientibus quos potissimum ad docendum vocarent, primas honoris ejus mihi tribuendas putarunt. Et ne transire ad se dubitarem, stipendii magnitudinem aliaque proposuerunt, multò quam hic fruor, ampliora. Illud bis mille & quingentorum in annos singulos florenorum est, additæ & ædes publico sumptu conductæ florentis nongentis. Liberorum se rationem habituros adjecere. Seni enim præter filias liberi, quorum unus & alter civilis nunc honoris capaces videntur. Vides ipse quanta hæc sint. Illud imprimis quod postremo dixi, ego nunc huc nunc illuc inclino. Eo modo cum propinquis, modo cum amicis rem communico. Plerique conditionem ut accipiam suadent. Ita mihi dies itineribus & consultando, pene dixerim, pereunt; dum Haga ultro citroque commeo. Exitum brevi res habitura est. Simulatque constituero, nequitiam postrema tanto amico significatio. Opusculum tuum de Begginarum instituto accepi. Quæ vidi, perplacent; sed, ne quid dissimulem, perlegendi otium occupationes, quas retuli, non concessere. Cæterum & non lecta Puteano digna facile præfatio, quod

Z

ex

ex fonte, præter limpidas aquas, quis expectet quicquam? Audes tamen monere, ut censere tua scripta velim. Summo modestiæ argumento, ut cui eruditio censuræ jus deferat, sua ipse aliorum subijcere iudicio velit. Nimirum est hæc Puteano digna modestia, in quo certare virtutes omnes videntur; quæ ut aliorum in se amorem attrahunt, ita ab animis xl, & amplius ita meum illexerunt animum, ut nunquam nisi fato indissolubile amicitiae vinculum solvi possit. Cætera proximis literis persequar. Nam nunc, quod volo, non possum. Cum *ἀνδρῶν* non habeam mitto translationem iv. Apostolicarum Epistolarum à Syriaco, ea scio argumenti causa grata erit, & quia meo nomini dicata est ab eruditissimo interprete. Vale, summe vir idem atque amice.

*Lugd. Batav. clō Ioc xxxi.
xiii. Kal. Feb.*

Salutem Præstantissimo Tuldeno, cui prima occasione rescribam, nunc euim non possum ob intempestam noctem & animum curis lassatum.

CXXXVII.

Diodoro Tuldeno S. P.

Aliquandiu est, Clarissime Tuldenè, quod tuum de sui cognitione commentarium, & dono quidem tuo, accepi. Ac licet, si unquam variis interim distringerer curis, quandoque etiam ab urbe abessem (causam fortasse jam aliunde cognovis) impetrare tamen à me non potui, quin per intervalla nunc hanc, nunc illam partem, in manus sumerem; quod majori dubito voluptate fecerim, quam fructu: unum doleo, occupationibus me iis implicitum fuisse, ut insignem adeo librum non qua curâ oporteret, evolverem. Sed sic quoque præstantiam facile cepi, qua allectus ad eum sæpius recurram. Duo potissimum sunt, quæ commendare scriptionem valeant, argumentum & tractandi modus. Hoc si spectemus, omnes implēsti numeros. Argumentum, cuius sit pretii facile prudentes intelligant, imprimis corruptis hisce temporibus. Quam sapiens ille Chilon, aut quicumque is si resurgeret, Dicti sui utilitatem, vel potius necessitatem conspiceret: quibus te, Doctissime Tuldenè, laudibus dignaretur, qui sic sistere seculi vitia nitaris, nunquam non laudando proposito? Videret & in Belgis (utut Barbarà ei nominassent) nasci viros, qui Græcorum & imitarentur, & æquarent sapientiam. Quamquam parum

hic sit æquasse, qui, Christiana Religione perfusus, quicquid hic gentilis est sapientiæ, longius opere hoc exsuperes, quam luna sidera minora. Equidem, qui sæpius calamitosa hæc tempora deploro, tanto majores tibi gratias ago, quanto magis, senescente hac ætate, eorum mihi vitia videor intelligere. Atque utinam dignas referre gratias possim; sed qui vix libri pretium capio, qua ratione, iusta æstimatione metiri possim? Attamen simulatque meus esse coepero, ac Musas sereniori animo invisere licebit, (quod propediem fore arbitror) primam curam otio meo seposui, tuum accuratius lustrandi atque evolendi opus. Ex quo sane mihi, ac aliis cunctis discere semper licebit. Nunc aliud non possum quam pro munere gratias agere, quod data opportunitate, compensare nequam differam. Plurimam salutem dices summo & viro & amico Erycio Puteano. Imo & aliis, quos mei amantes judicabis. Vale, Præstantissime Tuldenè, & diligere nos perge.

*Lugd. Batav.
clō Ioc xxxi
iii Non. Mart.
nocte intem-
pesta, ut plu-
rimum meus
est mos scri-
bendi literas.*

Tuus,

G. J. Vossius.

CXXXVIII.

G. J. Vossius, Erycio Puteano, v. cl.
S. P. D.

Magnam capio voluptatem, quoties cogito, uti ab iisdem magistris literas docebamur adolescentuli; ita utrumque postea idem eloquentiæ studium adamasse, atque etiam iis adjutum; me quidem præcepta ejus pro viribus in literas referendo, te vero, quod non paulo majoris spiritus, bene dicendo: quo illud es consecutus, ut quos veterum potissimum tibi imitandos proposuisti, eos non provocare modo, sed suis etiam cedere in castris videaris. Quamquam vero ea parte longissime vincas: tamen illud me solatur, quod studium non plane dissimile, eosdem fere nobis amicos plurimis in terris peperit: uti variis eorum exemplis comperi qui in Germania, Italia, Gallia, Britannia, Sarmatia, aut vicinis imperiis degunt. Putidum fortasse fuerit, diu ejusmodi sermoni immorari: cum me ipsum etiam spectet: sed Sueonum regno tacere non finit præsens occasio. Nam ut cæteros fileam, qui

qui quotidie vel huc veniunt, vel me literis suis compellant. Hisce proximis diebus non semel de tuis laudibus sermo apud me fuit generoso adolescenti Jacobo Skyttee, quem video non solum legisse omnia pene, quæ divulgasti, sed tanta eorum admiratione teneri, ut unus ei Puteanus sit instar omnium, qui triverint hunc eloquentiæ callem. Ac magnopere ille gaudebat cum ex me cognosceret, quæ inter nos animorum conjunctio foret, meque maximopere rogavit, ut simul ac ad te scriberem, suas literas adderem meis. Omnino enim se velle tibi innotescere aiebat. Hunc honestum ejus ardorem scio tibi non ingratum fore: partim quia optime semper volueris studiis adolescentiæ: partim quia publici interest, ut illustri loco nati, quando literarum ac eloquentiæ amore flagrant, in præclaro hoc proposito magis magisque animentur. Est vero adolescens is minimus natu filiorum perillustri ac generosi viri, Joannis Skyte senioris, L. Baronis in Duderoff, Domini in Groufoo, & Stronszorum, Equitis aurati. Qui quantus sit in regno Suecorum ex eo cognosces, quod idem sit ex summis regni senatoribus: idem universæ Livoniæ, Careliæ & Ingridiæ gubernator: idem Academiæ Upsalienis Cancellarius. Idem Finlandiæ septentrionalis judex provincialis, nec facile dixerim, quanta indies incrementa apud Suecos ac populos vicinos literæ ac eloquentiæ capiant hujus Viri operâ: Ut vere Mecænatis nomen mereatur. Quin ejus maximè instinctu serenissimus Rex Gustavus Dorpathi in Livonia illustre Gymnasium erexit in quo Baro Skyttius orationem inauguralem ipse habuit anno superiori iii. Id. Octob. Imo suis etiam sumptibus in Academia Upsalieni professorem Eloquentiæ extra ordinem alit. Ut jam ea Academia non regis modo professoribus, sed Skyttiano etiam se jactet. Nec minora sunt, quæ molitur: imprimis vero totus est in eo, ut regem non fortissimum modo sed etiam eruditissimum inflammet ad Academiæ, Collegia, ac Scholas excitandas in cunctis ditionis suæ terris; Etiam (quis credat?) in Lapponia illa, dubium fabulis an historiis magis decantata. Gaudeamus, mi Puteane, quod etiam sub frigido illo axe Musarum ardent amore, nec Musarum modo, sed etiam nostri utriusque. Multi enim, ut dixi initio, nostri istic amatores, tui etiam admiratores. Quare, ut puto, nec grave tibi erit, tribus verbis respondere illustri Baroni Skyttio. Quod non ipsi modo, sed & mihi atque adeo illustrissimo parenti ejus longe erit gratissimum. Literas Amstelodamum procurabis, ibi enim alterum jam men-

sem vivo. Necdum tamen Historias ac Politicæ profiteri sum publice aggressus. Interim stipendium nobis liberaliter fluit: ac fruimur otio beato, sed minime segni. Nam non minus interm scribendo prodero, quam si ingens corona à dicentis ore penderet. Plurimam salutem dices V. Cl. Tuldeno, Castellano, & si qui præterea ament studia nostra.

Amstelodami.

CXXXIX.

Winando Rutgersio *Sa. Theol. Doct.*
S. P. D.

Multis occupatus, Vir Clarissime & Amicissime, nolui tamen deesse postulatibus tuis. Amstelodamum ante quinque menses commigraui. Ubi loco habeor perhonesto. Stipendium, cæteraque emolumenta, quæ ex publico percipio, exsuperant tria florenorum millia. Spes adhuc aliorum, pro liberis. Quem mihi commendas, vir mihi videtur apprimè probus. Nec opificium ei apud Batavos vel Westphalos obtinere debet. Nam itidem sarcinator Batavus ille erat, qui apud Westphalos ab acu ad sceptrum pervenit. Nosti Monasteriensium fabulam? Sed extra jocum. Optime ei volo, idque imprimis tui causa. Necdum tamen video, quomodo ei valde utilis esse possit opera mea. Nam pedellatus, quem vocant, & ut sic dicam, subpræfectura bibliothecæ, & similia quæ illustrem hanc scholam spectent, iis potius concedi solent, qui vel literati sint vel saltem non *ἀμαθες*. At hic humanitatis studia non degustavit. Cæterum alia sunt, ad quæ magis sit idoneus. Tantum vacare aliquid ejusmodi velim; et si jam alii sint, qui similia à me petierint, & quidem quibus negare nihil possum: Nec hoc prohibet quominus pari cum iis loco sit hic tuus. Plura velim, quam possum. Sed faciam quicquid potero. Sic amicissime vir merentur virtus & amicitia tua, postulat autem mutuus amor, qui jam ab annis est triginta vel circiter, ut non recurram ad vetera: nempe affectum qui inter parentes utriusque nostri fuit; de quo multa prædicare mihi parens tuus solet. Intelligo te circa Paschales ferias excursurum. Advenies gratissimus. Credo optimam etiam adduces uxorem, quam non conspexi ab eo tempore, quo cum vitrica utebatur Dordrechtii hospitio meo. Sane tempus sit, ut videat has terras, quas puto, ab longo adeo intervallo non adspexit. Uxor eam salvere jubet. Multa etiam salute impertrias

Collegas doctissimos & omnes mei amantes.
Vale optime & ornatissime Rutgerfi.

Amstelodami.

Tuus totus,
G. J. Vossius.

CXL:

Guilielmo Episcopo Londinensi.

Reverendissime in Christo Pater, Domine Illustris.

MIrari te longum adeo silentium meum non solum arbitror, verum & certe scio. Quippe qui eorum, quæ in causa sunt, cur scribendi hoc officium diutius distulerim, minimè, ut puto, gnarus esse possis. Itaque rem omnem in pauca conferam. Postquam Lugdunenses viderunt, eo me propendere ut Amstelodamum commigrarem, id unum petierunt, ut saltem rem in integro relinquerem, usque dum locuti essent cum Amstelodamensium illis, qui Hagam ad illustrium ordinum conventum missi ab urbe sua forent. Interea diem illi ex die ducere, & nescio quas ob causas moras necere. Jam mensis unus & alter exspirarat, cum frustra responsum expecto. Tandem cum Academia Curatores Lugdunum venissent, idem à me postulant quod ante. Molestum mihi erat sic animi pendere. Sed quid facerem, nisi Lugdunenses mihi aperte inimicos vellem? Aliquanto post in Hageni Ordinum conventu magnis studiis certatum inter Amstelodamenses & Lugdunenses Delegatos, utrum Amstelodamensibus liceret illustre erigere Gymnasium cum in propinquo sit Academia, cujus id solius jus videatur, ut in ea publicè doceant professores. Non oblitere Amstelodamenses, quo minus omnis tum controversia ab ipsis proceribus decideretur. Quod si contigisset, sine dubio pronuntiatum pro Amstelodamensibus foret. Parvi enim momenti sunt, quæ Lugdunenses pro se adferunt. Nec facile Civitates adversus seipsas sententiam tulissent. Quippe si Amstelodamensibus id non licet; nec alteri vel Hollandiæ, vel Zeelandiæ Civitati licebit, cum utriusque Provinciæ sit Academia Leidensis. Id verò nunquam dixerint vel hujus vel illius Provinciæ Civitates. Præsertim cum non una alteraque sit ex majoribus, quæ idem ac Amstelodamenses affectet. Solum eas impedit, quod sumptus essent faciendi maximi, quibus vix pares nunc videantur. Attamen meliora sperant tempora. In quorum præjudicium nihil nunc fieri velint. Adde quod Dordrecht in Batavia professi publice sint

Polyander, Nanfius, Marcellus: Middelburgi verò in Zeelandia, Gomarus, Mordifonius, alli; nec unquam se Lugdunenses opposuere: ut satis liqueat, quod nunc animati aliter sint, id totum esse ab invidia profectum erga Urbem tantæ potentiae: Nisi credere malumus ex eo id esse, quia metuant ne vehementius Lugdunensibus Amstelodamenses incommodent, partim ob loci propinquitatem, partim ob opes immensas, ut si velint, facile in Urbem suam possint summos quosque viros ex Academia Lugdunensi magnis promissis allicere. Utcumque illud est, in eo quem dixi ordinum conventu postulatam ab Amstelodamensibus & Lugdunensibus, ut utrique judicium hujus controversiæ committerent curiæ tum Hollandiæ tum supremæ. Itaque & Amstelodamenses, ne quicquam præter leges tentare viderentur, Senatorum judicio rem permittere. Quæ cum ad te perscribere vellem, intelligo paucis hebdomadis vel potius diebus negotium consummandum. Quare officium scribendi paulisper differebam. Verum tres, aut quatuor effluebant hebdomades, priusquam parati essent Lugdunenses. Paratis illis novæ iterum spes quæstionis unâ atque alterâ hebdomadâ definiendæ. Sed adhuc sub iudice lis est. Quamobrem cum iteratò me spe frustratum viderem, ulterius differendam scriptionem non putabam. Aiunt quidem fore ut intra dies paucos decidatur. Sed hoc alteris tum literis malim significare, quam diutius nunc silere, ne penitus immemor videar officii mei. Priusquam Amstelodamenses Haga domum redirent, convenit inter eos & Lugdunenses, ut Amstelodamum commigrarem, sed conditione hac, ne publicè docere aggredieremur, dum lis ea penderet. Etiam Academiae curatores, cum Hagam excurrissem, idem à me postulârunt. Quare hic otio nunc fruor, sed negotioso. Nam præterquam quod nonnihil mihi molestum est tam diu à publico docendi munere abstinere, etiam sollicitus sum de Legibus atque aliis, quæ ad constitutionem novi Gymnasii pertinent. De his enim ut nunc cogitarem petiere Urbis hujus proceres. De controversiæ verò exitu minimè sum sollicitus. Nam nulli penè is dubius est. Nec multum causæ suæ confidunt Lugdunenses. Sed aiunt plerique eo se litem movere Amstelodamensibus, ne si forte Gymnasii illius gloria quandoque vel incommodet Lugdunensi, vel etiam luminibus obstruat, à posteris accusentur, quod initio non obstitierint, cum ista ab Amstelodamensibus tentarentur. Quidquid verò de Academia est Lugdunensi, in eo prope omnes conveniunt prudenter agere Amstelodamenses,

ses, ac rectè consulere, non modò Civibus suis, & Juventuti, sed etiam oppidis vicinis; cum periculo non careat si adolescentes, priusquam vitæ modum sciant, mittantur eam in Academiam, ubi non in Collegiis vivant, sed in ædibus apud cerdones in quos imperium exerceant ipsi; unde sit, ut noctu bene poti per plateas grassentur, non sine periculo & suo & alieno. Inventus quicquam exaro, quod nomini Academicæ ejus obesse possit, quam non amare modò debeo sed etiam venerari. Attamen & id verissimum est, etiam ab eo tempore quo postremo ad te scripsi, complures gravissimè vulneratos, ac nunc etiam Zelandum bono genere prognatum ex vulnere decumbere; de cujus vita planè conclamatum videatur. Reus verò, ut fieri istic solet, fugà sibi consuluit. Quod suggerebas ne proceres patriæ offenderem, id quamquam antea fixum mihi erat, tamen monitu tuo incitatus, serio magis attendi. Sed neminem reperi qui ægè ferret, vel factum improbaret meum. Imo plerique ex Lugdunensibus aperte ita dicunt, tam me prudenter facere, qui meliorem Amstelodamensium conditionem sim amplexus (nam & idem se facturos meo si loco fuissent) quàm Amstelodamenses peccent subducendo eum Academicæ qui bonam juventuti operam navet: nec enim concoquere id se posse Amstelodamenses ex Academia ejus Provinciæ, cujus ipsi sint pars illustris, vocare quemquam in urbem suam, cùm magis rationem habere debuerint Provinciæ quàm suæ Civitatis. Et sane speciosè admodum ista dicuntur. Sed obtundunt Amstelodamenses jus esse professoribus quovis commigrandi, quo velint: ad hæc se prius rem omnem communicasse cum Lugdunensibus; nec obscure his significasse, si neutiquam parati me essent dimittere, posse de eo conveniri, dummodo mihi satisheret, cui se obstrictos faterentur. Quod si tum à Lugdunensibus, & aliquot etiam mensibus post fuerit cessatum, non esse profectò quod nunc Amstelodamenses accusent, sed se ipsos qui in me retinendo fuerint negligentiores. Alia etiam non levis momenti pro se adducunt. Sed video me jam alteram paginam explevisse. Quare ne longior sim, abrumpam, si unum illud adjecero, plus omnino mihi hic otii fore, ad ea limanda ac perficienda, quæ sum exorsus. Imprimis autem quod toties tibi, Illustrissime Domine, postulatum, me ad Ecclesiasticam Historiam accingam, quantum per munus publicum licebit. Magnus est animi mei ardor ad præstandum aliquid quo Spartam illam ornem. Ac quamquam malè me habet, quod sex septem homines (quorum magna ante

annos duodecim in Ecclesia erat auctoritas) propterea quod inter extremas sententias cum antiquitate aliquid medium probarem, sic affixerint rem familiarem, ut longe opulentior Lugdunum venerim, quam nunc recedo: tamen magis ægè est animo meo, quod relictis propemodum studiis sacris coactus sim docere bis de die in studiis humanitatis. Nam manè quidem Xenophontem, Aristophanem, aut alium ejus generis enarrare soleo: post prandium autem Florum, Justinum, aut similem. Nisi quod postremo biennio dum expono Sulpicii Severi Historiam Sacram, occasio fuit expendendi universam Historiam veteris Testamenti. Mallet eadem occasio fuisset in rebus Christianorum, propter provinciam illam quam suscepi. In qua lento admodum pede sum progressus. Absque eo fuisset his annis duodecim, si bene me novi, minimùm in Historia Ecclesiastica sex ejusmodi volumina ac est Historia Pelagiana, nec minoris bonitatis edidissem. Sed hoc fere illi non poterant, qui quod honoris mihi accederet, sibi decedere arbitrabantur. Ego vero etsi optimi cuiusque aliquo etiam magnatum favore subnixus, temporibus tamen cedendum putavi. Nec aliter poteram, si conjugii ac liberis consultum vellem. Nunc auctoritas eorum de quibus conquerebar, multum refrixit. Planeque omnia suo magis momento pensantur. Maxime è cordatissimo hujus urbis Senatu. Verum oblitus non tam mei, quam negotiorum tuorum iterum materiem ingredior de qua priusquam omnia dixero, diem clauso componat vesper Olympo.

Deus Opt. Max. te, Illustrissime Domine optimeque Mecenas, Serenissimo Regi Carolo, Regno Britannicæ magnæ, Ecclesiæ universæ ac amicis & cultoribus tuis, familiæ in his meæ, quæ assidue pro te vota facit, diuturnam ac incolumem vitam largiatur.

*Amstel. cl. l. c. xxxi.
Prid. Id. Quineties.
St. Vet.*

*Devotissimus & obstric-
tissimus Reverendis-
simo & Illustrissimo
nomini tuo,*

G. J. Vossius.

CXLI.

Gerardus Vossius Hugoni Grotio
S. P.

Am ex amplissimo affine tuo Reigersbergio intellexis, vir maxime, ut Amstelodamenses

lodamenses causis compulsi gravissimis, constituere in urbe sua cogitent Gymnasium illustre: atque ut eam ad rem utilem existiment, operam tum meam, tum Collegæ, & amici veteris Gasparis Barlæi. Sed Leidenenses planè habent persuasum, detrudere eam rem multum posse nomini, & existimationi Academiæ suæ: eoque omnem movent lapidem, ut hoc negotium disturbent. Primum negant juris hoc esse ulli civitatum, præterquam suæ: cui pro tolerata fortiter obsidione, præmii loco sit attributum, ut Academiæ habeat, ad quam Hollandiæ, & Zelandiæ ablegetur juvenus. Amstelodamenses autem arbitrantur, aliud esse Academiam statuere, quam ad rem opus sit privilegiis, & immunitatibus à suprema potestate concessis: aliud autem Gymnasium erigere; in quo juvenus, & alii Musarum amantes, absque ejusmodi privilegiis, liberali imbuantur doctrina: quale jus penès singulas esse civitates. Existimant quoque, eam rem plurimum commodare posse Leidenensibus; quia si annum unum alterum diutius apud se detineatur juvenus, & eruditione auctior ventura sit ad Academiam, quod ex honore loci futurum, & judicio firmior, quod efficiet, ut deinceps hic minus sit turbarum. Urgent iterum Leidenenses, si habere Amstelodamenses velint professores aliquos, saltem non alibi iis docendum fore, quam in Scholis classicis: uti apud Dordrechtanos fecere professores, Nansius, Polyander, Marcellus. Amstelodamenses aiunt, non esse laborandum Leidenensibus, utrum in auditorio aliquo Scholæ Classicæ, doceant professores: an loco aliquantulum diftito, qui magis deceat non magis Doctores ipsos, sed etiam adolescentes, jam rude à ludi moderatore donatos, ac pariter tot præstantissimos cives, qui studia colant, ac de rerum natura, vel imperiis, aliisque rebus præclarissimis, publicè alios differentes audire exoptent. Denique objectant, ut hæc essent, non tamen debuisse Amstelodamenses ullum ex Academia hac vocare: sed potior rem iis habendam fuisse rationem Scholæ, quæ totius sit Hollandiæ, ac Zelandiæ, quam quæ unius sit urbis futura: præsertim cum ipsi nobile sint membrum in Procerum conventu, à quo curatores Academiæ statuuntur, ut quos hi statuerint Academiæ professores, iidem ab Amstelodamensibus ipsis præfecti fuisse Academiæ sint dicendi. Neque negant Amstelodamenses, hæc alicujus esse ponderis; ac propterea delegati eorum, in Ordinum conventu ante menses duos, cum à Leidenensibus super hoc compellati essent, eò inclinabant, ut si rogarentur, ne quemquam vocare ex Academia sua vellent,

morem ea in re gererent, dummodò mihi satisfaceret, quo invito pacta conventa non possent reddere irrita. Leidenenses verò passi sunt optimam occasionem effluere, quamquam dies dicta esset conventus, & ea de causa semel iterumque Lugduno Hagam excurrissent. Nimirum honestius urbi suæ putant Leidenenses, si non tam rogent Amstelodamenses, ut à proposito desistant, quam si in proximo Ordinum conventu, qui mense Martio futurus, interdicatur Amstelodamensibus, ne Illustrem Scholam erigere, aut saltem ne quemquam ex Academia, ad Scholam Urbis suæ vocare Professore possint. Amstelodamenses autem negant, se quicquid facere velle, quod privilegiis Leidentium adverteretur, sed si iis repugnet consilium de gymnasio, in quo doceant professores publici, solum opus esse, ut privilegium hoc sibi monstretur: eo viso, velle se ab instituto desistere. Ad me autem quod attinet, eo se potissimum aiunt de me cogitasse, quia non solum opera mea in publicè docendo Historiam, pergratum toti urbi argumentum, utilis sit futura; sed etiam in dirigendis Scholis duabus classicis (quarum non melior facies sit, quam in cæteris Bataviæ urbibus) juvare consilio Amplissimos Consules possem: quippe qui non sine fructu annis totis xv. Dordrechtanæ Scholæ, ante hos annos xv. præfuissem. Negant præterea, cum in Academiam professores vocantur, stipulationem intercedere, qua obstricti professores, non alio ire possint, si res eorum sic ferant. Si jus est Leidenensibus, abrogandi munus professoribus, cujus rei exempla nuper vidimus (ut de Socero Junio taceam, cui professio linguæ Hebrææ erepra invito:) sanè etiam professoribus jus esse abdicandi se munere quando vellent. Ac hujus rei exempla multa suppetere: ut in Danæo se conferente in illustrem Scholam Gandavensem: Gomaro, Middelburgum eunte; Meursio proficiscente Soram, & compluribus aliis. Si professione fungens non possit à se vocari, tantum requiri, ut professor muneri renunciet: nec dubitari posse, quin saltem eum tum vocari sibi liceat. Hæc sunt, de quibus Leidenenses in proximo Ordinum conventu, controversiam Amstelodamensibus moturi videntur. Quod si sic etiam se nihil efficere posse animadvertant, puto, contenti erunt, à Proceribus nostris xx. aut circiter, millia expetere, ut deinceps liberalius habeant professores alicujus nominis, atque alios etiam consequantur, qui vel docendo publicè, vel scribendo illustrare hanc Academiam possint. Hujus rei indicium non unus mihi eorum fecit, qui Leidenensibus familiarius utuntur. Nec obscurè innunt,

nuunt, discessum meum causaturum, ut luculentiori conditione Salmalius iterum advocetur: ut paulum illud damni, quod in me faciet Academia, magnitudine ejus viri abundè compensetur. Equidem si venerit, gratulabor, eo magis, quia ei docendum publice non erit, eoque defæcatori animo totus erit in scribendo. Mihi tam felici esse non licuit, cui his de die docendum fuit, ut ignosci mihi debeat, si scriptorum præstantia ab aliis vincat. Laus hæc publica est; nec omnia omnes possumus. Ac de isto hætenus. Ad aliud nunc venio, in quo consilio atque opera mihi opus tua. Ante dies tres quatuor, reddite literæ filio meo Dionysio à Generosissimo Barone Christophoro Stupesio, quibus significat fortasse iturum se Constantinopolin, & ad alios orientis tractus: ac quia meminere, quanto ardore filius soleat expetere, ut terras eas lustraret, ut quæ decissent in Arabicis, ab Arabicè loquentibus posset addiscere, voluisse se nunc occasionem offerre, qua sine Parentum molestia, voto suo posset satisfacere: Comitum enim hujus itineris assumpturum. Non abhorret filius, qui nihil æquè desiderat, quàm ut hoc fiat. Sed quiddam scrupulum mihi injicit atque uxori. Nam quia illustrissimus hic Baro, in Religione sequitur Opiniones Ecclesiæ Romanæ, ut filius meus ad ætatem (necdum annorum xx. est) judicio non adeo est firmato, ut inescari promissis nequeat, aut argumentis decipi speciosis; parum tutum arbitror, eum committere itineri tam longinquo cum iis, qui rem Deo se gratam facturos putarent, si ad gremium Ecclesiæ Romanæ filium abducerent. Suspicio mihi injecta ab aliquo, à Rege Christiano legatum iri aliquem Constantinopolin; inque hujus comitatu Baronem Stupesium fore. At Rex non mittet alium, ut puto, quàm suæ in Religione sententiæ. Eum Presbyter comitabitur, & alii *quidam*. Quare tantò plus periculi filio sit, in tanto eorum numero, qui diversum sentiant à nobis. Ut mittam, quod fortasse in iis futuri homines malis moribus, quos affricare meo possent. Ille quidem se satis firmo ad ea pectore arbitratur: sed ego multis edoctus exemplis, tuta etiam timere didici. Nec propterea consultationem omnem de hac re abjeci. Fortasse enim illustris hic Baro, minus etiam Romanæ Ecclesiæ placitis adhæret, quàm cum viveret nobiscum. Fortasse etiam comitabitur Ephorus, Paschalis Medicus, Gallus, qui tantum non juravit in verba Zelotarum nostrorum. Fortasse & unà iturus, fratrum generosorum tertius, qui ut intelligo, in Religione planè noster est. Et si Legatus mittendus, fortasse erit aliquis,

qui in Religionis controversiis, non male sentiat de Ecclesiis nostris. Quales è politis Gallia habet multos, qui distinguere æra possint lupinis: Hæc si essent, facilem me postulatis filii præberem. Est enim is Baro, Christophorus Stupesius, ut si unum illud de Religione excepero, nihil in eo possit desiderari. Pius est, ac Numinis metuens: Gravis est, modestus, & cordatus. Ingenio excellit, & pro ingenio rara ei eruditio. Et mei, filique est amantissimus. Quare si pulchra fuerit occasio filio visendi orientem, nullis, vel exiguis impensis meis: nec causa sit satis gravis, cur in Religione ei ab *irregulis* metuere debeat: sanè fore puto, ut morem ei geramus. Verùm haut animus annuere, antequam de eo, quod dixi, penitus aliquid cognoro. Quare rem feceris longè mihi gratissimam, & amicitia nostra dignam, si ea, quæ vel jam scias de itinere hoc, vel ex Illustribus Baronibus, aut aliis possis cognoscere, ad me, iis ignaris, perscripseris. Ego quidem & filius generoso Baroni rescripsimus. Sed de metu eo qui Religionem spectet ne *quid* quidem. Id enim magis abalienare, quàm conciliare posse videbatur. Si inconsultum planè erit, ut filius se unà in viam det, aliæ à nobis causæ, & veræ poterunt adferri, cur id minus fiat.

Accepi his diebus, literas ab ornatissimo Consilio nostro, quibus significat, impensè se desiderare responsum ad literas eas quas ad te misit, postquam mihi sententiam tuam, de equestri S. Michaelis dignitate perscripseras. Nihil isti acceptius fuit humanitate ea, qua morem nobis gesseris. Atque optat, ut de cætero etiam certior à te fiat.

Salutant te, Uxorem, Liberos, omnes mei, atque unà filius tuus, qui in studiis probare se pergit.

Lugd. Bar.
clō loc xxxi.
Prid. Id. Feb.

Tuus omni officio,

G. J. Vossius.

CXLII.

Gerardus Johannes Vossius, Hugoni Grotio, S. P.

Magnis animis superiori hebdomade actum est, de negotio meo Hagæ in Illustrum Ordinum conventu, inter Leideneses & Amstelodamenses. Minantur Leideneses nihil se deinceps tribuere velle ad bellum adversus Hispanum, si Amstelodamenses violent privilegium sibi à Philippo Rege concessum, ut pro obsidione bis fortiter tolerata, erigere

gere possint Academiam. Aperta enim esse Privilegii verba, quibus cavetur, ne ulla Hollandiæ aut Zelandiæ urbs talem Scholam erigat. Amstelodamenses jubent attendere ad ea quæ antecedant vocem hanc *talem*, nempe privilegiatam, sive quæ honores graduum conferat, immunis sit à tot oneribus, suam habeat jurisdictionem. Quæ sint forma Academiæ: non illud, quod publicè doceatur, cum hoc multa habeant Gymnasia, quæ vocant Trivialia; omnia verò illa, quæ vocantur Illustria: ut Schola Bremensis, Sigensis, Steinfurtensis, Dantiscana aliæque. Imo idem Dordrechtanos juris sibi vindicasse, atque Middelburgenses: nec Leidenses se unquam opposuisse. Primum hoc agebatur in Ordinum conventu, ut Civitatum Deputati sententiam ferrent de mente privilegii Leidensibus à Philippo, hoc est Principe Guilielmo sub nomine Philippi concessio. Sed ubi videre plerasque civitates eò propendere, ut pro Amstelodamensibus sententiam ferrent (quæque enim graviter ferret, jus sibi eripi deinceps in urbe sua alendi Professorem publicum) maluere eam controversiam ad Curiam utramque devolvi. Utrum passuri id sint Amstelodamenses, necdum scio. Sed si sint, non dubito, quin Amstelodamenses sint futuri superiores. Usque adeo apertum mihi videtur, singulas civitates id juris habere. Hæc ego subito in chartam conjiciebam: quod nollem Nobilissimum illum Polonum, qui has literas perfert, & multa de laudibus tuis diceret, sine meis ad te literis venire. Propediem cætera perscribam. Hæc enim ego, quod dicitur, stans pede in uno, sane raptim adeo, ut metuum ne legere ea possis. Sed nimis festinationi ignoscas. Proxima hebdomade, hoc est postrid. Kal. Maias Amstelodamum migro. Quod Deus benè vertat. Ibi iudicium expectabo Curiae, si ad eam causa deferatur. Sin minus, cum Amstelodamensibus quid faciendum sit consultabo. Ita enim petiere, cum per hanc urbem Haga se domum conferrent. Vale Amplissime vir & amicissime.

Lugd. Batav.
clō loc xxxi.
xxix. April.

Tuus æternum,

G. J. Vossius.

CXLIII.

Gerardus Vossius Hugoni Grotio S. P.

ANTE omnia, Incomparabilis vir, Deo immortalis gratias ago, quod diutinas horum temporum calamitates, temperarit dulcissimo beneficio liberationis tuæ. Quod eo majoris ducō, quia ne aliud quidem sperare audebam, quam ut intercessione Principis exteri cum certis conditionibus dimittereris. Sed subinde labascebat animus, cum minimè viderem, quibus conditionibus & conscientiæ tuæ, & Procerum simul voluntati posses satisfacere. Nunc Deus voluit, ut planè tuus esses, neque ulli præterquam uni sibi, beneficium tantum deberes. Quanto magis propterea Divinæ sis bonitati obstrictus, satis intelligis. Sed quia vita hæc terrestris, nihil aliud esse videtur, quam perpetua tentatio quædam, facillè vides, quanta nunc opera danda tibi sit, ne qui à Deo corporis custodia liberatus, à communi generis humani hoste, in carcerem longè foediorem, animi nempe, ullis ullorum blanditiis pelliciaris. Quod eò ad te scribo, quia inimici tui spem eam conceperunt, propediem huc nuncium allatum iri, quod Bertii exemplo abjuraris quæcunque à Reformatis Ecclesiis docentur, eosque omnes pronunciaris hæreticos, qui non per omnia cum Romana Ecclesia sentiunt. Equidem nihil tale de te metuo. Novi enim pietatem, animique constantiam. Sed tamen quid homuli sumus, si Salomon ipse foedè adeò sit prolapsus? Quare Deum oro, ut nec spe, nec metu, à recta te via, & conscientia integra, abstrahi patiatur. Tu verò, vir Maxime, me vicissim in precibus tuis apud Deum habe commendatum, ne vel pellacia horum, vel illorum blanditiis, agere id unquam velim, quod salva conscientia facere minimè possum. Sed de me quidem propediem fortasse plura. Nam expecto, quid vel Synodus decretura sit, quæ Roterodami nunc haberi incipit; vel quid Nobiles Academiæ Curatores viii. Augusti facturi sint in rebus meis. Ad te redeo. Legi cum optimo Parente tuo, scriptum de quæstione ea, an Melancthoniana sententia rectè Pelagiana esse dicatur. Scis quid hac de re sentiam. Sed aliud nunc in quæstione est. Nempe an expediat ea, quæ scripsisti, quamprimum in lucem exire. Video de hoc ne inter tuos quidem satis convenire. Et utrumque argumenta adferuntur. Quibus id probatur, aiunt Dei, & veritatis causam agi, hanc ab omnibus causæ satis intelligentibus defendi viribus omnibus debere: à te verò imprimis,

imprimis, partim quia perpauca, quid vetus Ecclesia senserit, æque sciunt: partim quia tutius istic ubi nunc es, potes: partim quia hoc sine liberasse te Deus videatur, ut veritatis sis Patronus fortis. Accedere aiunt, quod multorum millium de te spem eludere non debeas. Item quod aliter mundo testatam facere innocentiam tuam vix possis. Sed quibus secus videtur, hi satis fore putant, si ea defendas quæ egisti ipse dum Reip. habenas moderareris. Ea quæ à Synodo decreta sunt, malunt oppugnari ab illis, qui populum docent, ut quos ea res propius tangat: sicubi opera eorum claudicet, posse à te juvari. Sed ut ipse rectis quasi cornibus in Synodum incurras parùm tutum putant, eo quod in Britannia, Belgica, Germania, ipsaque Gallia tot habeat defensores; quorum impetum metuunt ne solus possis sustinere. Scis quam durum suscipiat provinciam, cui cum Theologis negotium est. Adhæc negant res tuas ita firmo loco esse, ut non vel obitu Regis, vel alio infortunio inde ejici possis: nec debere te in totum tibi aditum præcludere in loca illa, ubi Calvinii dogma regnat. Præterea aiunt magnis passibus, eò nunc omnia tendere, ut brevi planè moderatis hominibus futurum sit opus, à quibus triste Patriæ dissidium sopiatur. Utilem verò tunc nobis operam tuam fore, si non tam Remonstrantium causam susceperis defendendam, quam unius tui; quod necessarium esse minimè diffidentur. Accedit, quod aliter si agas, minus etiam, quam nunc sunt, in gratia erunt, qui vel sanguine vel affinitate tibi juncti sunt. Utrum majoris hæc argumenta sint, an priora, satis per te vides. Quamquam verò consultore non eges, tamen non possum, quin addam, minimè mihi improbari, ut paululum saltē hoc negotium differatur. Præsertim quando conjux tua, itemque affines planè habent persuasum, tibi, liberis, sibi, plurimùm posse hanc rem incommutare, nec usque adeo necessariam esse. Hæc sunt quæ Delphis scribebam. Nunc rectè Lugdunum peto, unde de aliis alteras ad te literas dabo. Neque enim plura nunc possum, ob festinationem. Deus tibi, vir Clarissime, amicorum maxime, eum animum inspiret, qui faciendæ Ecclesiæ concordiæ plurimum adferat emolumenti. Summo Theologo Tileno salutem si dixeris, gratum feceris. Nec enim obstare arbitror, quod de facie minus nôrim, cū animi virtute hominem æstimemus: quam qui norit, is verè mihi nosse virum videtur. Vale.

xxii. Jul.
cl. lcc xxxi.

Tuus æternum,

G. J. Vossius.

CXLIV.

Johanni Rouse, *Bibliothecario, S. P.*

Quas literas vides non Lugduni Batavorum scripsi, sed in Amstelodamensi urbe, emporio per orbem totum inclyto, & Belgicæ foederatæ, ut sic dixerim, Venetiis. Ea civitas viris & opibus potens hoc uno nomine visa sibi infelicio, quòd præter vulgarium Scholarum præfectos non haberet publicos juventutis doctores. Eoque erigere statuit, Gymnasium, ut vocant, illustre; cujus fundamenta, ut jacere vellem, petierunt, nec à me modo id obtinere, sed etiam Casparo Barlæo, Poeta & Philosopho egregio. Ille Philosophiæ Professor futurus, ego Historiarum ac Politices. Labor idem mihi qui Lugduni: stipendium pene altera parte majus. Nec tamen tam illud ut migrarem persuasit, quàm quòd non paulò melius liberis hic meis possum consulere, & plus otii sum habiturus ad ea conficienda, quæ animo confeci. Verè enim id dicere possum, mei me aliquam, majorem liberorum, maximam autem posteritatis rationem ea in re habuisse. Accepi à Reverendo viro Ludovico de Dieu Marianum Scotum calamo exaratum. Non dubito quin sit exemplar illud de quò mecum Oxonii verba faciebas. Nam aiebat de Dieu id sibi transmissum à Reverendissimo & Illustr. Archiepiscopo Hiberniæ: ac quanquam Literæ nullæ essent additæ, tamen quia Historici esset argumenti, mihi transmissum colligebat. Simulatque vero in manus sumsi, vidi nomen meum frontispicio ascriptum, quod omnem utrique scrupulum solvebat. Itaque primâ occasione ad Reverendissimum Dom. Archiepiscopum scribam. Quod eo hoc tempore non facio, quia ob transmigrationem, & curas alias, non potui hoc volumen Mariani sic versare, uti vellem, atque uti eum oporteat, qui apud heroem illum nolit crudum promere judicium. Nam ingenuè ut dicam, quod res est, tantum carptim complura legi: quod facile mihi omnes ignoscent qui norint vitam meam, præsertim hoc tempore. Qui has tibi literas tradunt, sunt tres Fratres Adamus, Guilielmus, & Carolus, Filii Nobilissimi Viri Leonardi Neyenburgii, qui dum viveret, primum Imperatori Rodolpho, postea Matthiæ qui in Imperio successit, à consiliis fuit. Ephorus eorum est Joannes Addon natione Bohemus: cujus & gentis sunt Juvenes illi quorum studiis præest. Rogarunt obnixè me, ut ne in Britanniam ituros sine commendatitiis meis dimittere se vellem. Lubens iis morem gessi: quippe qui probita-

A a

tem

tem illorum ac modestiam haberem perspectam. Quo nomine non mihi solum sed collegis etiam meis fuisse accepti. Quare si fortasse in solo extero, consilio egeant tuo, ejus participes illos facias. Doctissimum & amicissimum Pocockum in Syriam esse profectum, ut majora ibi Orientalium Linguarum incrementa caperet, intellexi ex Britanno, qui Oxonio veniret; & Hamburgum ad Britannum legatum proficisceretur. Negabat se quicquam Literarum apportare, quod subito decedere sit coactus. Attamen securum me reddebat de exemplaribus Pococko transmissis. Unde & colligo accepisse vos duo Oratoriarum Institutionum exemplaria quae adjunxeram. Diu ea res me valde sollicitum habuit; propterea quod nihil de illis intelligerem. Heri me convenit Mulinus Danus, Ephorus Nobilissimi Juvenis Roscrantzii. Is mihi Arontii exemplar inauratum ex dono typographi obtulit, ex quo etiam cognovi eum de nova thesium mearum editione cogitare. Itaque de isto etiam proximis vel ad ipsum vel ad te Literis scribam.

Vale, Vir Clarissime & Amicissime, meoque nomine plurimum saluta summos viros, Acc. Fruen, Gu. Juxon, Br. Duppam, D. Prideaux, Sam. Fell, Thomam Claytonum; Sed & optimum & doctissimum Harrisonum & omnes quos nostri scis amantes.

Amstelodami
c1o Ioc xxxi.
iii. Id. Maias.
St. Vet.

Tuus totus,

G. J. Vossius.

CXLV.

Joanni Meurfio S. P.

Quod moras tantas vir atque amice summe necitat Blauwius noster, id non tibi tam molestum est quam mihi. Eo magis quia idem facit in Maimonide mei Dionysii *μα-ναεiru*. Simulac literas tuas à vestrate mercatore accepi, recta me contuli domum ejus. Sed aberat ab urbe. Rediturus postridie dicebatur. Distuli igitur scribendi ad te officium, ut perscriberem certiora. Nunc ultra deferre non licet, quia jamjam abiturus is à quo Literae mihi tuae redditae sunt. Et necdum Blauwius reversus. Compellavi interea fratrem ejus natu minorem ante menses sex septem ex Italia reversum. Exposui illi quae sententia tua foret. Ille petere ne quid agerem ante reditum fratris. Hoc causae cur

non remittam scripta tua. Simul ille quid diceret certo te visurum specimen editionis, antequam ad vos redierit Danus hic Mercator. Facilem se & citam scire ad te id procurandam. Negabam me credere nisi quod viderem tot annis elusus. Omnia meliora spondebat, & hac ipsa hebdomade orsurum, vel saltem simulac fratrem compellare dabitur. Quid facerem? Urgebo opus filii & tua: & tua magis quam illud filii locutus sum, & ante annum circiter & hesternum iterum die Noomsium Arlandervenae dominum de Cretenesium editione ejus honori dicanda, & opus ipsum lustrandum dedi. Qui valde eo capiebatur. Sed aegre ferebat triconem Blauwium sic nos omnes frustrari. Nec ultra ego quicquam commonere, vel innuere potius (etsi nec id opus fore apud honestam animam arbitrer) quamdiu necdum videret lucem. Pestilentia quae superiori anno ex una Leidensi urbe sexdecim hominum millia abstulit, videtur nobis nunc comminari. Sed speramus meliora. Obeunt de hebdomade nunc trecenti nunc quadringenti. Nihil id tam magna in urbe praeter Leidensi ubi quaque hebdomade cum lues illa maxime grassaretur, etiam mille quingenti & ultra moriebantur. Grotii mari Libero responsum à Seldeno J. C. Anglo, cujus de Syris diis & marmora Arondeliana & alia extant. Illustres Ordines nostri in mandatis dedere Grafwinkelio J. C. meo ante annos viginti discipulo & convictori ut opus hoc refellat. Mirto ad te primam partem Annalium Batavicornum filii Matthaei. Scio quam rerum nostrarum sis intelligens, & tanto facilius probaturum se tibi confido. Clarissimis viris Laurenbergio, Stephano Joanida, aliis salutem plurimam, imprimis letissimam conjugii & optatissimis liberis. Cui & conjux mea ac filius filiaque salutem adscribi petiere.

Amstelodami.
c1o Ioc xxxi.
iii, Non. Jul.

Tuus aeternum,

G. J. Vossius.

CXLVI.

Francisco Junio, F. F.

Literas tuas, Conjunctissime Affinis, ante unam, atque alteram hebdomadam accepi: atque ex iis de tuo in Gallias discessu, certior factus sum; simul etiam de causa hujus itineris. Equidem verebar jamdudum aliquid ejusmodi, cum cogitarem, non alio loco

loco habitum Pettæum, cujus labores noscam. Nihilominus cum mente revolverem, tot à Comite promissa, vix poteram à me impetrare, ut suspicioni ulterius indulgerem. Interea gaudeo, tibi que gratulor, quod omnia viri boni, & fidi Doctoris, munia expleveris. Si erunt, qui te hic mercede iusta fraudabunt, at non deerit is, qui venturo sæculo, cum fœnore omnia rependat. Quod quæris, an probem abitum; mihi certè videris rectè, atque ordine fecisse. Si enim eo compensare operam tuam, Illustris Comes distulit, quòd in Liberorum aliis ea indigeret: fortassis, ubi viderit, nolle te amplius animi pendere, gratus esse maturabit pro beneficiis tuis: Quam ad rem plus absentia valet. Præsentia enim plurimum vilescunt. Ac magis, quid habuerimus, videmus, ubi & nobis carendum. Sin is semper ei animus fuit, vanis tantummodò promissis lactare, longè etiam magis consilium tuum probem. Nam quid æquè miserum, quàm inani spe animum sustinere, ac tempus terere? Ut omnino præstet, maturè rebus suis consulere: Scis Poetæ illud;

— *Nocuit differre paratis.*

Utinam autem occasionem hic viderem utilem tibi operam navandi: fortassè id aliquando erit. Sed nunc tamen nihil occurrit. Fortè tui ratio hic haberi posset, si Professorum numerum augere Proceres Amstelodamenses vellent. Putarem te maximè idoneum, qui Mathesin publicè tractares. Sed nec Amstelodamensium mihi animus est cognitus, nec tuus. Ac ne ipsi quidem docere aggressi sumus. In causa est, lis, quam Lugdunenses Amstelodamensibus intentant. Nec ea tamen in rebus meis sollicitum te habere debet. Ita enim prudentes omnes censent, non posse aliter fieri, quin pro Amstelodamensibus Curia utraque pronunciet. Interea occupor in digerendis iis, quæ superioribus annis scripsi; præsertim quæ ad literas, & Historiam externam pertinent. Volo enim semel iis defungi, ut reliquam ætatem sacris literis, Historiæque Ecclesiasticæ liceat impendere. Ad te redeo, mi affinis, valdè optem, ut in Galliis, commoda affulgeat occasio, qua tui, studiorumque tuorum rationem honestè, ac commodè habere possis. Gaudeo quod ea nunc sis in urbe, ubi degit summus vir, & amicus Hugo Grotius. Is enim consilio juvare possit. Sed si deinceps illustris aliqua domus in simili, ac ante negotio, opera tua uti velit; nihil monito opus, cautius tibi agendum esse, cum id abundè malo tuo sis edoctus. Nimirum paciscendum est cum iis, qui longè sortem nostram excedunt;

quia si non adstringantur; simulatque opera est præstita, amor flaccescit, spes verbis facie in vanum abeunt: durumque cum iis certamen est inferioribus. Interdum suspicio oboritur, te fortassè, quia tam malè tibi nunc cecidit, aulas odisse, sublimiaque illa vitare. Non tamen ab uno omnes discere licet. In quo non minus peccaretur, quàm si alba omnes linea signaremus. Tu pro judicio, quo plurimum vales, facile discrimen facies. Ego quod hæc perscribo, non alia de causa facio, quàm ut postulato tuo morem geram. Si nulla est occasio in Galliis, qua consulere tibi possis, malim te duos, tres menses, apud nos degere, ut interea aliquid discipiat boni. Nec metuere debes, ne interea oneri nobis sis. Nam affectum meum nosti. Et ut mittam alia, possis consilio meos juvare: præsertim in Matheli. Nec mihi quicquam eruditis, ac piis colloquiis tuis suavius esse possit. Et tamen nolim te propterea, ullam prætermittere occasionem, qua proles tibi. Nam sic simul erit, quo afflictam Germanæ domum juves. Ea nunc bimæstri cum tribus liberis mecum fuit. Quartana laboravit, quæ ante triduum remisit. Etiam soror Maria, cum Filiola Cazimiri fratris Dantisco venit, ac nobiscum vivit. Fecimus viduam affinis certiorum de adventu filiolæ, quæ jam decennis. Ac quia prævidebat uxor, eam continuo ad nos advolaturam, coacti sumus adjicere, ut differre hoc iter velit, usque dum soror Joanna Middelburgum repetierit. Nam quia jam viginti numero sumus, nullum cubiculum vacat. Id spero fore, ut optimè interpretetur. Aliter si saperet, atroci me, & meam, injuria afficeret, qui omnia Junianæ domus, honore ac commodis metiamur, quod satis est insolens, sæculi nostri moribus, ubi nemo aliud spectat quam se, & liberos suos. Næranus Dantisco remansit, ut expediat negotia quædam, quæ conjugis bona spectant. Nam homo simplex (veniam dabit, quod sic loquar) homini obærato quinque florenorum millia credidit: Neque nunc videt, quomodo ultra mille florenos recipere possit. Dubitat Maria utrum velit nobiscum degere, an Delphis. Conjux posterius malit. Nam quia valetudinaria est, non posset mea, ejus habere rationem, quam vellet. Et tertia esset famula opus, quæ res in tam numerosa familia, plus incommodi adferret. Quare satius sit, si seorsim cum marito, & famula degat, & subinde nos diebus plusculis inviset. Id neutrius fiet incommodo, & magis erit alendi amore fororio. Vides quàm familiariter, ac liberè omnia perscribam, haud aliter ac si præsens adesses. Hæc postquam scripissim, intellexi quiddam ex sorore Maria, quæ id se accepisse

cepisse aiebat, ex Barthio cognato prioris Mariti sui. Id istiusmodi est. Illustrem Comitem Arundelium, postquam literas tuas accepisset, confestim rescripsisse, nihil æquè sibi gratum fore, quàm ut ad se redeas, ac deinceps, cum discipulo veteri, Italiam lustres, velleque se Tibi supra victum, ac vestes, annumerare quotannis centum libras sterlingas. Id si est gaudeo. Verum filius meus Joannes putat, vanum esse id planè. Et causam addebat, quia discipulus tuus spon- sus sit, si vera est fama: ut de Italico itinere nihil esse possit. Barthius tamen petende- bat nihil esse certius: atque ita se ex duobus Anglis fide dignis accepisse. Tu quid rei sit, quæso nos quamprimum fac certiores. Ut vel tecum gaudeamus, vel porro quod facto opus sit cogitemus. Vale, Optime, & Charissime Affinis.

Amstelodami
clō Ioc xxxi.
viii. Kal. Sex-
til.

Tuus totus,

G. J. Vossius.

CXLVII.

Johanni Meursio S. P.

Certior factus in Daniam ire præstantissi- mum virum Davidem Guilielmum, nefas putavi negligere talem adeo ad te scri- bendi occasionem. Et tamen nihil magno- pere erat quod literis committerem. Attamen ubi semel calamum in charta posuero, facile amor aliquid dictabit. Quare illud primo, jam diem esse tertium quod apud nos Erastius agit. Semel iterumque adfuit mihi etiam in coena. Quo minus semper mecum fuerit, nescio utrum modestia ejus in causa sit, an quod nobiles quidam Dani id non permi- serint. Sed quod hæcenus feci ut ostende- rem quanti apud me esset commendatio tua, id deinceps etiam faciam: eo lubentius, quia vir est longe optimus & candidissimus, & qui te sui instar colat atque observet, sæpe etiam non alio quam patris nomine compellat. Mag- næ mihi voluptati fuit cuncta ex eo cognosce- re quæ ad te pertinerent. Gaudeo etiam ex eo me intellexisse, quidquid illud erat de Bib- liopola vestro, nam cum paulo aliter hic res narrabat, melius ora malevolis obstruam. Te *paragelæ* Coddæi libri superiori hebdomade sunt divenditi. Hæc auctio erat fatum libro- rum Rutgerii, sed Heinii consilium muta- vit. Formidat ne sui vilius vendant, si tam cito auctio una alteram excipiat. Et sanè non temerè ita existimat: utrum intra hebdo- madas paucas, an demum post ferias longas

auctio ea futura sit, nihil ipse certi habet; sed dixit ipse ante triduum velle se mecum de re tota consultare; atque id decreturum quod maxime mihi probabitur. Unde colligo eum propendere ut ne diu admodum ea res dif- feratur. Quando erit ut te, uxorem, liberos hic videamus? Male sit militibus illis qui sic vias infestant, ut bonis sit male, neque nos te frui possimus. Sed quæso simul ac occasio sese obtulerit, eam ne negligas, rectaque te do- mum nostram confer cum tuis. Nam cur alibi potius divertas quam cum homine qui tuas virtutes scit æstimare, & fratris te instar amat? In Batavia gliscit dissensus in- ter proceres. Disputatur de induciis. Plær- que Civitates eo inclinant. A quibus dif- sentiunt Harlemenses & Leidenenses. Etiam plærque Civitates aiunt in ordine cogi de- bere Amstelodamenses; quippe qui Smantium Ecclesiastem ex urbe exire jusserint, & è suis unum alterum velint interesse synedrio. Uti apud Leidenenses & Delphenenses sit. Item qui non minus Remonstrantibus jus concionandi facere coeperint quam Luterani, Memnonistis, Judæis. Sane male esset Magistratui nisi mi- litum se præsidio adversus factiosos Cives tue- retur. Vorstium ut aliquid tandem scriberet commonui, qui sponte eo inclinabat, sed pudebat diuturni silentii. Paruit tamen. Est Vir utriusque nostri amantissimus. Quod addo, ne propter silentium hoc amo- rem ejus putes imminutum. Denarius tuus post duas hebdomadas prælo subjicietur. Uxor uxorem tuam, liberi omnes mei, filia potissimum filiam salutat.

Lugd. Batav.
clō Ioc xxx.
vi. Id. Jun.

CXLVIII.

Joanni Meursio S. P.

Eunt in Daniam Fœderatæ Belgicæ legati, in quibus è Frisia præstantis. Scæfferus, è Batavia vero nostra Amplissimi Viri Beverius & Oetgens: hic Consul Amstelodamensis, ille consularis Reip. Dordrechtanæ, filius Claris- simi illius Beverii, qui ante bimestre septua- genario, ut puto, major decessit. Nefas fuisset eos sine meis ad vos literas venire: præ- fertim cum etiam petieris, ut tibi quampri- mum rescribere vellem, ecquid de docendis apud nos Græcis Literis sit constitutum. Equi- dem vocatus huc sum ea conditione, ut illos subirem labores, subibam quos Leidæ. Eoque Græcas Literas cum Historia universa conjungi oport-

oportebit. Quo in consilio nonnihil aliqui nutant: qui me totum partim in rebus Hebræorum, partim Romana Græcæque Historia esse mallent. Ecquid tamen in eo sint mutaturi, non possum dicere, propterea quod de tota hac re procures nostri sileant. Videntur nolle hæc ad animum revocare priusquam lis Hagensis sit decisa. Nullus dubito quin curia utraque sententiam sit lata pro Amstelodamensibus. Saltem hoc scio, plebsque quibuscum locutus sum cum, Amstelodamensibus sentire. Sententiam fereatur post duas tres hebdomades, ut ex iisdem senatoribus cognovi. Interea ut dixi neque nos docemus publice, neque Amstelodamenses quicquam de pluribus advocandis statuere, ne Lugdunensibus, eo intellecto magis ira gliscat circa præcordia. Nam si iis diu invidia fuit urbis hujus potentia, & ad invidiam odium accessit, postquam Amstelodamenses connivendum putant in Remonstrantium concionibus, maximeque ubi seditiones Cives urbe eiecerunt, qui honorifice à Lugdunensibus excepti: quid futurum iis deinceps animi putas quando nostri illustre erigunt gymnasium, & Doctores Lugduno arcessunt? Præsertim si audierint eos de pluribus advocandis serio cogitare. Valde autem habent Lugdunenses professores quod sibi de discessu meo gratulentur. Nam Curatores Consulesque ne alii tam facile alio pelliciantur, singulis Professoribus auxere stipendium, aliis quidem ducentis, aliis vero trecentis Florenis. Itaque, Theologi item Cunæus & Schrevelius jam habent mille septingentos, unde de cæteris possis conjectare. De Editione Epistolarum Casauboni adhuc deliberatur. Petunt Elzevirii ut cura Heinssii vel Riveti Epistolæ excubantur commoda manu, iis deletis quæ præteriri satius sit. Sed nec Heinssius nec Rivetus laborem eum suscipere volunt, vel etiam sumptus in eam rem facere ullos. Quare fortassis tarde hæc editio procedet, si modo unquam successura. Videntur Elzevirii ex Scaligeranis non multum fecisse lucri. Id nunc minus promptos facit ad edendas Casaubonianas. Hugonis Grotii libri de Jure Belli, opus nunquam satis laudatum, hac in urbe excusi multo auctiores. Arbitror fore ut ubi Mercatores rediere à nundinis Francofurtensibus excudantur à Guilhelmo Cæsio commentarii mei de L. L. Leidenfes Professionem Linguae Græcæ obtulere Antonio Emilio qui Rector fuit Gymnasii Ultrajectini, sponteque se munere eo laboris tædio abdicavit. Sed: Antonius Professionem abnuit. Mavult deinceps vivere extra munia publica. Vir est doctus, dives, & qui splendorem illum Academicum non mul-

tum moretur. Arbitror Professionem eam deinceps offerendam Mag. Jeremiæ Hoevellus, quondam correctori Ambergenfis Gymnasii Electoralis Collegæ Beckmani: nunc Brillanæ est Scholæ Rector. Vir est moribus simplex, sed trium Linguarum & Philosophiæ admodum gnarus. Salmasius putatur Leidæ affuturus proximo Octobri aut initio Novembris. Stipendium erit bis mille florenorum. Etiam per Literas ei spes facta liberæ habitationis. De qua tamen nihil statutum postremo Conventu curatorum, quod ægre viderentur assensuri consules. Nempe ubi coram aderit, facile se id quoque affecturum censet Somersdicius. Valde totum hoc ægre fert Heinssius, ut facile potes cogitare. Unum est quod facere possit, ut abnueret vocationem. Nam solum Thyssii & Walæi filii qui studiorum causa in Galliam abeunt, Literas curatorum deferent. Scis autem solere aliquem magni nominis mitti. Tuningius Scaligeri causa in Gallias missus: Herpenius ob Rivetum. Ego minutus homo cum vocandus essem Lugdunum, missi ad me ex Curatoribus Nobilissimus Vandermilus, ex Leidenfibus, Consul Isenhautius cum Syndico Zeistio. Est vero Salmasius ingentis spiritus. Quare nisi Rivetus, Justellus, & amicorum alii moncant, ut hoc diminutum contemnat, plane futurum ut Provinciam quam quodammodo recepit detrectet. Brevi rem omnem sciemus. Salutem mei omnes tuæ tuisque, ex animo quantum possint adscribi, petiere. Etiam doctissimis Collegis, imprimis Laurenbergio & Stephanio salutem dices.

Amstelod. iii. Kal.
Sept. 1631.

Tibi fraterno amore
junctissimus,

G. J. Vossius.

CXLIX.

Erycio Puteano Ger. Jo. Vossius
S. P. D.

Quot Epistolas à te, tot amicitiae veteris nova accipio pignora, vir atque amice eximie. Tu & sæpe, & raro absque munere, ego & rarius, & cum munere non nisi quandoque, & post longa temporis spatia ad te scribo. Certe natum te non literis modo, sed & amicis demerendis jam dudum experior. Vellem & ipse non tot aliis distringerer, quo referre paria liceret. Sed facile novi humanitatem tuam, quæ nihil ultra requirit, quam animus & occupationes privatæ ac publicæ sinunt. Quam nisi excusationem haberem, jam dudum puduisset, quod, ut aliis,

aliis, sic benevoli etiam affectus indicis me hactenus viceris. Non vacat jam cuncta exsequi: novissimum duntaxat munus tuum dicam: Circulum hunc, quo quid elegantius, venustiusque, quid ingeniosius? Superasti priorum industriam: imo pene dixerim ingenii humani modum: ut qui hoc pacto non de mortalibus solum bene merearis, sed de illo *παισιμονοτιῶσι* sole: cui hactenus nullam requiem speranti metam laborum posuisti. Certe nequeo, amicorum, qui quidem supersint, vetustissime, quin gratule tibi super novo hoc invento: quod mihi non ob autorem minus, quam ob rem ipsam placuit. Etiam, quas possum gratias, habeo: non quasi hic primus accepti beneficii dies sit: sed quia novum prioribus cumulum addidisti. Itaque jam nunc, quem olim quoque dicaveram, animum & operam offero. Tu sicubi tenues vires nostras utiles tibi fore judicabis, prompte utere. Scis mutasse jam dominum urbes, quibus & ego & tu originem debemus. Proinde si forte vel hic, vel alibi præstari pro te quicquam posse existimas, sive id apud Proceres nostros, sive apud illustrissimum etiam Principem Arausionensem erit, tantum indica. Efficiam ne voluntatem meam aut studium requiras. Jam menses sunt duo, quod præter morem, bene longas ad te literas scripseram. Eas dederam perferendas necessario ac propinquo meo Joanni Corputio, cujus parens ante in Senatum Dordrechtanum allectus, nunc Rotterodami est rei maritimæ præfectus. Sed is cum prius per Brabantiam iter in Gallias cogitaret, post ubi de Arausionensis Principis in Geldriam expeditione intellexit, consilium mutavit, ac quas dederam literas, sexta mihi, ex quo scripseram, hebdomade remisit. In iis præter ea quæ ad adolescentis commendationem pertinerent, alia nonnulla, etiam illud erat, ut opus nostrum Grammaticarum Institutionum, quod ante annos xxx. & amplius, scribere orli eramus, tandem prælo subjici cœpisset. Jamque in secundo libro occupamur. Filius meus Dionysius cui nihil ab longo tempore jucundius & exoptatius contigit, literis tuis & iis, quas eodem tempore ab doctissimo Tuldeno accepit, Latine reddit Annales Belgicos Reidani. Quæ translatio cum à magnatum multis expetere-tur, jam ante menses tres excudi cœpit. Atque ex libris duodeviginti octo jam absoluti, atque arbitror intra menses sex septem ejus te operis exemplar visurum. Eidem decretum est, Cæsarem, sibi per familiarem scriptorem, plurimisque à se locis castigatum, & notis illustratum, edere in lucem. Eam ad rem usus est uno alteroque meo, & editioni-

bus vetustis; ut de variantibus Fulvii, & aliorum lectionibus nihil dicam. Sed enim impense desiderat plurium Manuscriptorum copiam. Et jam aliquorum ei spes facta. Non dubito quin apud vos, qua publicis, qua privatis Bibliothecis inveniantur. Quocirca si unum alterum calamo exaratum exemplar Cæsaris nancisci ac transmittere ad nos possis, sanctè spondeo, optima fide redditum iri. Sin mittere hac non sinatur, proximum est, ut per adolescentem quempiam conferri cures. Modo tanti codices illi videantur, sumptus ut æquum, refundam. Horum alterum si consequi filius possit, obstringes non illum modo, sed me quoque, qui quidquid liberis meis sit, mihi præstitum existimo. Vale summe vir.

Amstelodami Prid.

Non. Septemb.

CL.

Reverendissime in Christo Pater & Domine Illustrissime,

Redit tandem ad Cantabrigienses suos Filius meus. Diutius quidem pro opinione apud nos hæsit. Sed scis quam ægrè Liberi à Parentibus divellantur, præsertim ubi aliquamdiu extra eorum fuerint conspectum. Infirmior etiam valetudo filii suavit, ne citò nimis dimitterem. At nunc postquam sibi penitus restitutus videtur, nolim eum diutius abesse ab Academia Cantabrigiensi: ubi præclaram adeo occasionem habet maximos faciendi progressus apud tot præstantes viros, quos demum æstimare didici, cum præsens doctos eorum sermones audirem: eoque nec uspiam certe lubentius versari filium meum velim. Et tamen parum abfuit, quin ei hic unius & alterius hebdomadis moram necerem: sed metuebam ne peccarem in Collegii Leges. Alioqui paulum retinuissem, idque sine eo duntaxat ut per eum significarem sententiam utriusque Hagenis curiæ, super lite inter Lugdunenses & Amstelodamenses. Siquidem utrumque jam à partibus producta omnia quæ potuerunt, nec superest aliud, quàm ut à Senatu judicium feratur: quod intra dies XII. vel præterpropter, fore, ex compluribus Senatoribus cognovi, cum ante dies paucos Hagam procerum nostrorum postulato excurrenssem. Cæterum vel omnia me humana fallunt, vel pro Amstelodamensibus pronuntiabitur. Hactenus quidem vix in unum alterumque, atque eos partibus obnoxios incidere

dere datum, qui non rem satis liquidam putarent. Oblare consules Lugdunenses, nihil miror; partim quia damni inde aliquid civibus, si tardius eò concedant Adolescentes: partim quia si alibi etiam publice doceatur, majora professoribus suis stipendia perfolvere cogantur, ne alio se pellici pariantur. Quod quam verum sit, experimentum vidimus ante sequimensem; quia professoribus singulis ducentis, aut trecentis florenis nostratibus auxere stipendium. Sane tantam tamque subitam liberalitatem erga singulos non pensavit Academia, dum stetit. Hoc jam boni se mihi, vel Amstelodamensibus potius, debere ipsi prædicant professores. Nempe quia decessus meus & Amstelodamensium liberalitas ejus rei causa sint *καὶ συνέχουσιν*. Et sperant iidem, præcipue qui magis excellunt, his non paulo majora. Quæ res ut gratissima hominibus doctissimis, ita malè habet eos, qui Lugduni minus liberaliter habere publicos doctores mallent. Interea hic à publicis (ut vocant) lectionibus abstinetur. Sed otio fruor negotioso, dum de ordine ac statutis Athenæi nostri laboro, quam possum maxime. Nec tamen in variis illis curis quibus distineor, non aliquid quotidie penè refeco, quod Ecclesiasticis detur. Hæc enim summa votorum mihi uti & studiorum potissima. Eoque operam do ut cætera seponam, quæ priori potius, quam ætati huic videntur convenire. Et tamen quotidie urgeor, ut saltem ea promam in studiis aliis, quæ jam habeo parata. Quod vix video ut effugere possim. Affinem meum Franciscum Junium in Gallias profectum Literis ipsius certior factus fui. Postea etiam Epistola amplissimi Hugonis Grotii edoctus sum in Britanniam rediisse. Sed quo animo reversus sit, non addit. Neque de eo quicquam ad me affinis. Undecolligo eum à scribendo abstinuisse, quia nihil adhuc certi quod scriberet, haberet. Rogo te, Reverendissime, & Illustrissime Domine, ut commendatum eum habere velis. Non est indignus tanto Patre filius. Probitas, eruditio, & quæcumque bonos commendare viros solent, in eo non vulgaria sunt sed eximia. Fides etiam, quâ in Illustrissimi Comitris Arundelii domum fuit, insignis eluxit: & exerciti labores graves per novennium integrum. Addit tribus verbis Hugo Grotius, sese amore Junii de eo ad te scribere ausum esse. Id mihi gratum accidit. Scio quanti sit ab eo commendari, qui Belgicæ miraculum sit. Rogo quòd mei causa, & Junii nostri gratia velle scio, id tanto facias lubentius ob magnum patrem, magnum etiam hunc familiæ Junianæ amicum. Mihi licet cætera ignotus Junius foret, tamen si serio

commendatum à Grotio scirem, tanti id esset, quam si omnem ejus vitam introspexissem, ac per omnia probassem. Tantum ego illi tribuo viro quem à prima novi adolescentia, quem suspexere etiam hic omnes ante triste illud terræ nostræ dissidium; quem denique soli non æstimant, qui virtutis pariter ac doctrinæ sunt hostes. Mihi quoque videor scire quo apud te loco sit, Reverendissime Pater, eoque liberius ea promere ausus sum. Filium etiam quid, optime Mecænas, commendem tibi? Affectus hæcenus ita eluxit, ut non ultra rogem, quam eum ut conserves. Ipsum verò hortari non definam, ut magis magisque tanto tui favore dignum se præstet. De victoria nostri Principis nihil, puto, addere opus: quia absque dubio omnia etiam apud vos jam pervulgata. Multi hostium & in his nobiles quamplures cæsi sunt, multi submersi: ac plus quam quater mille capti. Non adeo imprudens hostile consilium fuit: Sed nebula subito coorta valde classi incommodavit. Ea enim factum ut à laterna Admiralii aberraretur, navesque singulæ telis nostrorum paterentur, unde locorum non satis gnari dedere se quam confici à nostris maluerunt. Si verum dicere licet, non exiguum est, quod & principis prudentiæ, & virtuti militum nostrorum debetur; tamen absque illa nebula, quam Deus immisit, difficilis nobis nec incruenta victoria fuisset.

Deum Opt. Max. oro

*Reverendissime Pater, Domine
Illustrissime, Mecænas optime,*

Ut deinceps quoque terris nostris faveat adversus hostem potentissimum, magnam vero Britanniam in longa pace conservet, tibi multos in annos valetudinem prosperam largiatur, bono publico omniumque devotorum nominis tui cultorum, quos inter æternum.

*Amstelod. clæ Ioc
xxxi. Prid. Kal.
Octob. Stil. Nov.*

Obstrictissimus cliens tuus,

G. J. Vossius.

CLII.

CLII.

Erycio Puteano v. Cl. Gerardus Jo.
Vossius S. P. D.

Literas tuas avidè expectatas avidius legi. Es, & semper eris Puteanus: hoc est, totus candidus, maximusque & amicorum, & eorum, quæ faciunt, æstimator; ita ut multum ambigam, ecquis vel minima in re gratificari tibi possis, cui non magnopere propterea te devinctum putes. Talis mihi visus es semper, & quo longior tecum mihi consuetudo est, eo magis crescere humanitas tua videtur. Nec dubito, quin licet istiufmodi sis quadam naturæ bonitate, tamen non parum etiam sibi vindicent studia, quibus te addixisti. Ea tu verè scribis nulli esse noxia: at ego etiam toti ea orbi utilissima esse prædico. Næ barbarum ego illum censeam, cui tantus studiorum antistes non sit cordi: nedum ut lædere, aut iniquior saltem esse audeat quisquam. Quare quod significas pro confecto jam esse puta. Est vir, inter cæteros mei amantissimus Simo Beaumontius, sive Bellimontium malis, qui in Collegio Patrum foederatæ Belgicæ jam annis aliquot magno cum honore fuit. Doctissimus ipse doctissimum quemque in pretio habet, & vicissim in pretio habetur. Is hæctenus in castris nostris, vel Leodici fuit. Nunc ab illustrissimo Principe Arausio-nensi Hagam missus, ut cum Patrum cæteris de pacis conditionibus, si conveniri forte possit, consulat. Sed intra diem unum alterum iterum Trajectum cogitat & castra. Huic vero te posse ignotum esse arbitraris? Præsertim Dordrechtano: ubi tot non amatores modo, sed admiratores tui habes. Ubi etiam progenies tua nobili & Patriciæ familiæ implicita. Ubi ipse cum optimo parente tot annos vixisti. Hic saltem tanto viro neciri non potes, qui nominis tui fama Belgicam & vestram & nostram (utinam communem dicere liceat) jampridem implet. Sed faxo ego, ut qui te ob egregias animi dotes & merita erga Remp. literariam, hæctenus plurimi facit, etiam ut amicum complectatur. Nec eo minus, quoties occasio se offeret, apud procerum alios conabor, quicquid potero: imprimis urbis nostræ, cujus ob summam potentiam non levis est auctoritas. Certe etsi nulla tecum amicitia fuisset (cujus diuturnitatem quoties cogito, gliscit in pectore occultum aliquod gaudium) tamen eximie eruditioni tuæ, & hoc, & majora multa, deberem. Tu vero, si quid etiam, quod ab tanto ingenio profectum est, laudaverim, id læ-

taris? Debeo & volo. Itaque si nostrum tanti tibi testimonium sit, ut ingeniosissimo operi tuo præmittere, publicèque legi velis, nequeo, quod tibi placuerit, non probare. Nam verissime dixi: neque eò quisquam impudentiæ unquam procedet, ut adulationis hic aliquod vestigium esse dicat. Quod filii mei causa laborem susceperis perlustrandi Bibliothecas quæ apud vos sunt, & me obstringis, & illum. Ego certe lætor, etiam vinculis tuis illigatam esse sobolem meam: sic perennatura est amicitia nostra. Gratias me agere, & plurimam salutem adscribere petiit.

*Amstelodami, Prid. Id.
Octobr.*

CLIII.

Gerardus Joan. Vossius Jacobo Crucio
S. P. D.

Etsi quas mihi tribuis laudes, agnoscere nec debeam, nec velim, irrepsit tamen animo, nescio quæ voluptas, quod ab erudito doctum, à probo bonum, haberi me videam; quorum illud ut assequer, ætatem meam studiis omnem impendi, spe non tam tumidæ famæ, quàm de publico benè merendi: hoc ex æquo omnibus expetendum, ut pii, & sint ipsi, & aliis videantur. Itaque non diffiteor jampridem, Debitorem me tibi, qui immerentem me, saltem de te tale meritum nihil, cumulare laudibus, & tanta prosequi humanitate volueris. Atque eo magis dolet, tardè adeo me tibi respondere. Et utinam solus hic aliquid in me desiderares? simili modo vapulo propè ab omnibus amicis meis. Sed ita est, mi Crucii, neque ego in me tantum juris habeo; ut quæ velim, possim; neque illæ vires humanæ, ut animus eodem tempore, omnibus sufficiat. Me tum propinqui, tum exteri distinent quotidie, satis alioqui occupatum, tum publico munere, quod cæteris antehabui semper; tum iis quæ vulgare paro, aut jam emitto. Sic nunc quoque calefacimus prælum commentariis nostris de arte Grammatica, in quibus *πρὸς ἑσπερίαν* veterum, & nobiliorum nostræ ætatis Grammaticorum labores, ad examen revoco; plurimaque optimorum Scriptorum loca, vel mendosa corrigo, vel obscura illustro. Hoc opus mox consequentur Originum libri; tum ii quos de re Poetica fecimus. Scio non defore, qui omne hoc argumentum humile, & inferius ætate mea arbitrentur. Et ego idem sentio. Sed
volui

nolui labores tantos, quos maximam partem, ante annos propè xxx. exhausti, æternum teneis gratificari. Nolebam etiam multorum fallere expectationem, qui jam pridem promissa mea impleri postulabant. At his defunctis, majore animo, si vitam summum numen concefferit, aggrediar, quæ jam pridem de Historia Ecclesiæ, & quæ huc pertinent mecum agitavi. Igitur tot tantisque semper penè obrutum, dixerim, occupationibus, mireretur quispiam in rescribendo amicis esse aliquanto negligentior? Inguenè & verè dico, si subinde literas ad amicos dare cupiam, plurimum adeo præcipitari scriptionem opus est, ut aliud penè agentis, eas excidisse, quisque judicaturus sit. Nec id me malè habet, quia satis profectum ad laudem arbitror, si quæ molior, utilia, quæ dico, non barbara habeantur. Quo modo animatur aliter scribere non possum, quam occupatum decet. Sed novi candorem, & prudentiam tuam. Non desistas à me literas, aut quod huic sæculo potius videtur, affecto acumine ornatas desideres. Habe igitur simplices hæc, quas solus tui amor dictavit. Habe simul animum meum, quem si non alia re, at certe eruditione tua, ne humanitatem dicam, abundè tibi conciliasti. Vale.

Amstelodami Post. Kal.
Octob. An. cl^o lxxxi.

CLIV.

Erycio Puteano, *Historiographo Regio,*
S. P. Lovanium.

IPSE credideram, vir Clarissime, primis, quas ad te daturus eram literis, scripturum me quando initium facturi essemus publicè docendi. Sed ut multa Opinione citius cadunt, alia in multum spatium trahuntur ita, quoque Scholæ nostræ quæstio, diu agitata, necdum conquievit. Propinqui tamen jam summæ spei sumus. Quippe Proceres nostri, aliquot abhinc diebus, Hagam sunt profecti, ut Curiæ utriusque sententiam audiant; Et tantum non decisa lis est. Triduo, aut quadriduo, nisi plurimum me, & plerosque alios, opinio fallit, ipse scire, & quod sciam, significare tibi potero. Quid de tota censeam controversia, nihil repetere opus. Nam ante scripsisse memini; nec mutata in ullo aut spes, aut sententia est nostra, ut stabilis plurimum illis opinio, qui pro causa nituntur bona. Cæterum quod tantas mihi gratias agendas putes, pro mu-

nusculo agnosco, & præter meritum fieri, & simul humanitatem tuam. Sed jamdudum ita assuevisti me, ut cum Puteanum nomen video, ipsam me humanitatem adspicere cogitem. Profecto Musas humaniores sine causâ appellari, fere hodie dicere liceat, si earum cultores hodie lubeat æstimare. Tu unus, si alius quisquam, iis nomen asseris suum. Eoque injuriam tibi faciamus, nisi, quomodo me vocas, immerentem, te potius Musarum vindicem appellemus. Et tamen gaudeo, non minus promptam mihi esse ad hoc voluntatem, utcumque successus dispar sit. Ex eodem humanitatis fonte proficiscitur, quod laborare te scribis, ut Grammatica nostra in quibusdam Scholis apud vos recipiatur. Existimo tamen, frustra te fore, ob partes eas quibus nunc domus Dei distrahitur. Etsi nihil in Libellis iis sit, quod ea quibus nunc dissident, tangant. De Inscriptione ea quam proponis. GUSTAPHUS ADOLPHUS D. G. GOTHORUM, VANDALORUM REX, MAG. P. FINLAND. DUX ET HONICARELS NEC NON INGRI; temerè arbitror confusa postrema verba; nam Gustavi inter titulos est, *Magnus Princeps Finlandiæ, Dux Estoniæ, Careliæ & Ingridiæ*. Hoc inter cætera ostendunt, variæ Rutgerii, quas huic Regi dicavit. Et ex iis qui regnum hoc describere, satis est res aperta. Quare aut peccatum in numismate, aut perperam lectum. Suspicio omissa postrema litera, sic scriptum esse, DUX ESTONI. CARELI. NEC NON INGRI. Saltem sic inscribi debuit, aut aliquid aliud est, quod me fugit. Barlæum nomine tuo salutavi, cui id longe gratissimum fuit. Ac prima occasione, ad te scripturum promisit. Nunc resalutari iussit. Vale summe, & vir, & amice.

Amstelodami.
cl^o lxxxi.
Non. Decemb.

Totus totus,

G. J. Vossius.

CLV.

Summo viro & amico Erycio Puteano
Ger. Jo. Vossius S. P.

Maxime & Amicissime Puteane,

EAdem hora, qua literas tuas accepi, operam dedi, ut Plempium nostrum convenirem, ex quo intelligo (quod alioqui apud cæteros premit) Brabantiae vestra aliquos, civili alios dignitate, alios doctrinâ insignes, atque in his etiam præstantissimum Fromondum, sedulo operam dare, ut profes-

B b

sione

sione Medica apud vos Lovanienses fungatur. Horum ille literas quotidie exspectat. Atque illud in causa est, cur negaret, cum de Bononiensi Lyceo animum ejus tentarem, responsum precipitare adeo se posse. Sed tamen non obscura indicia perspexi, facile intelligere, quam honorifica sit futura Bononiensis illa Professio, ac quantum etiam emolumenti adferre possit. Profecto minime abhorret. Verum, antequam de ea aliquid audiisset, animum suum de Lovanio quodammodo aperuit amicis. Et negari non potest, propiorem sic Batavis suis fore. Quod longe etiam jucundius, si inter vestrae & foederatae hujus Belgicae Proceres pacis negotium procedat: uti optamus & confidimus. Equidem gaudeo, sic Italos, sic Belgas de Plempio cogitare, vir est ut optimus & humanissimus, ita ingenii elegantis, Philosophus acutus, medicaeque artis callentissimus. Si me, si urbem hanc spectarem, mallem non aliud pedem referret. Verum enimvero sic doctrinae atque virtuti Plempii faveo, ut quam optime ei esse velim. Quod de Circulo tuo augendo cogitas, sane gaudeo. Nam etsi nihil in eo quisquam desiderat, non tamen ignoro, ab eo ingenio, eaque doctrina, deinceps etiam posse expectari, quae doctissimos doceant. Et placet, si Amplissimo Simoni Bellimontio exemplar transmittas. Non desinam praestantissimum & optimum virum amore tui magis & magis accendere. Ac tacente etiam te apud procerum alios id facere non cessabo. Id enim vere amici munus esse satis intelligo. Plura nunc scribere non possum, quia tabellarius Lovaniensis, qui hodie demum me convenit, cras summo mane abitum parat solito celerius, quia, ut incessus fidem faciebat, arthritide coeperat laborare, & ne glisceret hic malum extimefcebat. Sed intra paucos dies, ut spero, de Plempiano negotio certiora perscribam. Occasio erit per tabellarium Antwerpensem. Tu, amicissime, operam dabis, ne ambiguae hae literae meae fraudi esse Plempio possint, fortasse satius sit nihil hac de re ad Amplissimum Chrysgonum Flaccium scribere Bruxellas, usque dum literas à me aut Plempio acceperis, aut istic, quid de Lovaniensi cathedra Medica statutum sit, cognovis. Quamquam quid ego de isto ad te? Qui, per te melius quid facto opus sit intelligis. Et quod nunc in mentem venit, credo nec praestantissimus Flaccius ignarus est, quid Lovanii in Plempii causa agatur.

*Amstelodami, Prid.
Non. Decembr.*

CLVI.

Jacobo Usserio, *Archiepiscopo, Armachano, Hiberniae Primati.*

Reverendissime in Christo Pater, Dom. Illustrissime, Omnino me in ruborem dedit eximia illa humanitas tua, quâ historiam Godschalci, & Praedestinatae controversiae, tanta à te cura elaboratam non modò transmittere, sed mihi etiam dicare volueris. Quid enim ejus non pietatis ac eruditionis modò, sed etiam dignitatis virum, hoc honore Vossium dignari? Equidem maxime Praeful, æternum tibi hoc nomine obstrictus ero, ac una mecum tot Adoloscenscentes, studiorum amantissimi Liberi mei. Omnibus nobis atque adeo cunctis, qui vel ex Juniana familia, vel eidem imnexi sumus, eadem est mens, pro hoc beneficio gratum (ut poterimus) animum & ore & scriptis testari. Nimirum singuli prope existimant sibi hoc habitum honoris, quod mihi praestitisti. Plurimum te semper, praestantissime Domine ac illustrissime, aestimavi jam ab eo tempore quo publici juris fecisti aureum illum commentarium tuum de Christianarum Ecclesiarum successione ac statu, ab Apostolicis temporibus ad nostra usque tempora perductum. Ex quo multa me bona didicisse profiteor. Atque id praedicare apud omnes soleo, eos praesertim, qui cum Sacris Literis omnem conjungere Ecclesiae historiam amarent. Nec reperi quemquam, qui non ubi commendatione nostra avidè totum opus perlegisset, debere se mihi ob judicium hoc fateretur. Sedenim nunquam putassem me aliquando à foetus hujus parente, honore tanto maculatum iri. Etsi autem in Godschalci historia non per omnia eandem institutus viam (& quis facile duos dabit quibus in cunctis conveniat) plurimum tamen gaudeo in eo quod rei, ni fallor, caput est, probe nos consentire. Uterque enim B. Augustini sententiam amplectimur. Sed in quaestione relinquatur an illam quoque Godschalcus, & siqui Godschalcum sequantur, satis assequantur? Metuo ego ne eam Godschalcus excelsit. Nec enim doctissimo sui seculi Rabano & tot Moguntinae Synodi patribus in Augustini Lectione versatissimis, facile fidem detrahère ausim: qui ea dixisse aiunt quae nunquam dixisset Augustinus. Nec Remigius defendere omnia Godschalci audent: sed contentus est dicere, siqua stultè & absurde effreni sua Lingua effuderit homo instabilis ac inconstans, non propterea etiam damnari oportere, in quibus illi cum B. Augustino satis con-

conveniret, quemadmodum optime observasti operis tui capite 6. Nec, ut ingenuè dicam, confessiones ejus dimovere me adhuc de sententia istac potuerunt. Siquidem ex *αἰτιολογίας* intelligo in Bibliothecis Gallicis extare cætera de Godschalco quæ sententiam meam mirifice confirment. Ea ubi accepero (bonam illorum spem mihi amicus fecit) faciam te, uti debeo, de re tota certior. Atque ut nihil haberemus, præter illa quæ jam lucem viderunt: nonne potuit Godschalcus, & confessionibus suis ea sola complecti, quæ Augustino arctius hærentibus probarentur, & alia aliàs superaddere, quæ Augustini itidem amantibus displicerent. Quod eo mihi credibilis Godschalco evenisse; quia video in eadem controversia nostra ætate viris etiam eruditiss quædam excidisse, ac deinde disputando ulterius quoque protractos, dum consentanea placitis dicere allaborant. Atque in his non verear reponere optimam illam & candidam Joannis Piscatoris Theologi Herbornensis animam, cujus auctoritatem memini aliquando in disputatione publica objectari clarissimo socero meo Francisco Junio: illum autem suaviter respondere nolle se omnia Piscatoris dicta præstare. Novi & his in terris quamplures etiam *οἱ θεοὶ λόγῳ κήρυκαί*, qui non solum in regeneratione, sed in omnibus actibus piorum irrefutabilem esse Dei gratiam contendunt, eoque non posse quemquam plus boni facere quam facit. Soleo illis oggerere, pœnitentiæ sic vim infringi. Nam si quicquid boni à nobis negligitur, id defectu gratiæ negligitur, eoque aliquid nos facere nolimus, quia Deus illud operari à nobis noluit: sane quoties cubitum ituri, acta diurna cum animo nostro revolvimus, vix serio dolebimus ob officium neglectum. Sint Preces, sint Eleemosynæ, sit Admonitio aliorum, sit Exemplum quo præire debuimus. Ubi cumque cessatum, cogitabimus non fuisse placitum Deo vires nobis conferre ad agendum bonum. At quanto vividior erit pœnitudo, si constet cessationem officii non esse ex gratiæ sed voluntatis defectu; sæpe pios aliter per gratiam Dei posse: sed non semper ex potestate gratiosè collata agere. Quanto hæc consentanea magis non scripturis modo sed etiam B. Augustino & antiquitati universæ! Ac poteram id genus etiam alia adferre, nisi rosas malletm consecrari quàm spinas, ac prope id consuetudine mihi in naturam vertisset proprias potius papulas observare quam alienas. Quare ne illa quidem attulissem, quæ cum reprehensione aliquorum conjuncta esse video, nisi necessarium putassem, ex nostris temporibus colligere de antiquis. Si enim ætate nostrâ

sic prædestinationis controversia tractatur à nonnullis, ut non ea modo dicant, quæ dixit Augustinus; sed superaddant quæ non dixit, imo iis contraria quæ dixit, sane nec difficile creditum, fuisse olim nonnullos qui similiter exorbitarent, & in his fuisse monachum non omni ex parte laudatum, ut qui contra præscriptum monasterio suo exierit, nulloque vocante nomen prædicatoris assumpserit; qui etiam prædestinationis dogma proponendo hoc egerit, ut (quod Remigius non diffitetur) velut novus atque admirandus prædicator existimaretur: qui præterea vulgari errore implicitus ad veritatem dogmatis sui adstruendam se sponte examini aquæ, picis, & olei offerret. Quibus consideratis, statuere malo, dixisse quidem Godschalcum quæ dixerat Augustinus, sed plus dixisse quàm dixerat Augustinus, eoque & rectè illum damnatum à Rabano & Synodo Moguntina propter illa quæ non dixerat Augustinus, vel alia is mente dixerat, ac rectè quædam Godschalci capita defensa esse ab Remigio quæ etiam dixerat Augustinus, & eâ mente dixerat quâ capiebat Remigius. Valde autem placet quod idem Remigius ait, partim de illis qui Augustini sententiam amplecterentur, partim illis qui scripturas sic interpretarentur, ut priores patres & ipse ante Pelagianam controversiam Augustinus solebat. Utrorumque sententia honoranda, quia & illa ex Divina Auctoritate vera esse monstratur, & ista quædam piâ ratione non abhorre à veritate fideliter creditur. Fiduciam sumpsi, Amplissime Præsul, pluribus hac de re tecum differendi; quia id mihi per te licere existimarem, partim quia in Britannia cum essem, sic prædicari à pluribus audivi eximiam non modo doctrinam, sed etiam humanitatem tuam: partim quia excellenti adeo beneficio à te nullo meo merito affectus persuadere mihi aliud non poteram, quàm amari me à te plurimum; & majoris etiam fieri quum viderer non mihi modo, sed, ut arbitror, aliis quoque qui penitus me novissent. Quod si occasio dabitur, denuo in lucem edendi historiam meam de Pelagii & Massiliensium controversiis; non dissimulabo quantum tibi debeam tum privato nomine, qui sic nomen ornâris meum, tum communi, quia Ecclesiasticæ Historiæ amantibus tantopere alluxeris ad illam de Godschalco quæstionem majori cura perpendendum. Sin illud de historia nostra spissius procedet, aliter dispiciam si non ut merito me tuo exsolvam, saltem ne vivam ingratus. Venio ad alia. Jam biennium est quod Oxonii cum essem, doctissimo ornatissimoque Joanni Roussio, Bodleianæ Bibliothecæ præfecto,

fecto, referrem cogitare me de nova editione Mariani Scoti: cujus Librum tertium cum M. Scripto Gemblacensi, & altero collatum haberem, nec pauca me in meis de temporibus commentariis annotasse, quæ scriptori illi facem allucent. Tum ille prædicare nobilem operam quam, illustrissime Præsul, auctori huic impendisses. Subjiciebam ego, Lubentem me, codicem meum in Hiberniam transmissurum. Ille, si rectè memini, ogerere, velle se hac de re ad te scribere, ac fortasse ejus te sententiæ fore, ut non gravate ipse communicaturus sis mecum labores tuos. Jam annus propè abierat, cum Lugduni domum meam venit Clarissimus Vir Ludovicus de Dieu; ac præfatus quædam de illustri dono, quo à te affectus esset, subjungeret, ut sibi quoque missus esset Marianus Scotus: Cæterum, cum is non faciat ad studia sua, planè se existimare, eum mihi transmissum esse, utcunque nihil de eo perscriptum esset. Mox ego firmare illius suspicionem sermonibus inter me & amicissimum Roussium habitis. Ergo ille mihi in manus dare Marianum: cujus ut primorem paginam conspexi, monstro adscriptum ei nomen meum. Subrisit ille, quod antea istoc non animadvertisset. Multis eo tempore occupationibus distringebam. Et semel iterumque domo proficiscendum erat. Post hebdomades aliquot, ubi meus esse cœpi, Marianum (quem cursim antea inspexeram) accuratius cum edito conferre cœpi. Vidi præmitti Mariano quædam ad temporum rationem pertinentia: quæ cujus sint neque nunc scio. Sequebatur deinde primus Mariani Liber, ubi, ut conspexi, octo prima capita, quæ in editis desiderantur, valde sum exhilaratus. At duplicatum gaudium postquam animadverti hic verè esse Librum secundum: eum autem, qui vulgo habetur secundus, tertium esse. Multum etiam lætatus sum conspectis paginis aliquot Libri tertii, ad quarum oram variantes lectiones magna curâ annotasses. Dolebam cætera desiderari. Sed cum in quaternionem incidissem, ubi tempora continerentur ex Mariano ab an. 10000 usque ad 101000. animadverti ex inscriptione ea quæ desiderarentur ex Wigornienſi exscribi debere. Quemadmodum & quæ Libro primo defunt post annum Jacobi 1411. ex eadem peti debent: si rectè capio quod post eum annum adscribitur. Scriptum quidem reliqua Libri tertii eodem modo haberi in Chronicis Florentii Wigornienſis. Verum arbitrator tertii errore calami pro *primo* scriptum esse. Nam charta in qua id notatum, proximè Librum secundum Mariani præcedit. Nunc Reverendissime Domine, certior

fieri exopto de Mariano tuo (verè enim tuo qui tibi potissimum vitam sit debiturus) quid fieri à me velis. Etsi nihil de eo mihi à quodam perscriptum, nec ornatissimus de Dieu, à quo accepi vel tantillum ejus nosset; ex sermone tamen ab Roussio nostro Oxonii habito ita plane colligo id te voluisse, ut beneficio tuo integer nunc demum Marianus prodiret: quem antea & capite habuimus & membris aliquot truncatum. Eoque nisi aliud tibi placitum cognôro, editurus hic sum scriptorem illum: quod jam ante fecissem, sed præesse volui editioni. Id Lugduni non potui, quia pauculis mensibus post codicem acceptum, commorandum mihi istic erat. Deinceps melior Amstelodami occasio erat: quo commigraui ingentibus præmiis invitatus. Nempe potentissima hæc Respublica illustre erexit Gymnasium, in quo publice frequentissimo non adolescentum modo, sed doctorum virorum, primariorum civium auditorio omnis ævi historiam, ac civilem doctrinam profiteor. Sed etsi non obscure mihi videor mentem tuam perspexisse: velim tamen me sive à teipso, reverendissime Domine, sive ab aliquo tuorum, paulo penitius de ea edoceri. Interea ego quæ afferre ipse, ad ornandam hanc editionem potero, procurabo. Valde quidem distineor, & tantum non obruor negotiis. Sed (ut spero) quod dies non sinunt, noctes dabunt. Divinum numen tibi undecumque, maxime Domine, diu prosperet ætatem, bono tuo & cultorum nominis tui, præcipue Ecclesiæ totius, Britannicæque ac Hibernicæ tuæ.

Amstelodami, clō
Id. xxxii. iii. Id.
Januar.

Reverendissimi & Illustrissimi
nominis tui Cultor, ac Clie
ens devotissimus.

CLVII.

Erycio Puteano, V. Cl. Gerardus Joannes Vossius, S. P. D.

IN mediis occupationibus gratissimæ literæ mihi tuæ advenerunt. Quibus licet respondere vix res sinebant, nefas tamen putavi nuncium sine meis ad te literis remeare. Quam tu legem propè mihi imposuisti assiduis officiis, atque exemplo. Pulcherrimum animi tui scetum, ut vidi, exosculatus sum affectu quo debeo, & is meretur. Et tamen necdum ea cura, quæ velim, lustravi. Erit id simulac cura, quæ nunc premit, paulum abscesserit: hoc est intra biduum. Nihilominus sic quoque spondere aulam, omnia parente

rente suo esse dignissima. Sed isti non insistam, nequid videar auribus dare. Exemplaribus fieri, quod petieras, jam coepit. Etiam Plempio dedi: qui lectulo jam quartum, vel quintum, ni fallor, diem æger attinetur. Hoc immoderata ei studia attulere, dum in Avicenna suo ex Arabica transferendo est perditus & pernox. Monui sedulo studia non esse inventa ad crucem. Et sic prodesse debere, ut diu prosit. Nec culpam diffitetur. Sed negat ab animo suo impetrare posse, ut corrigat. Is studiorum est ardor. Qui si modum excefferit, profecto dulcis est infania. Vix ædes eram ingressus, cum prius ipse, mox seorsim parens ejus verbo inquit, quid sit de Medica apud Lovanienfes vestros professione. Et ecquid de eo certi sit statutum. Negavi hoc: & tamen nolui ejus ignarum esse, alterum esse, qui commendetur Serenissimo Archiduci, à quo etiam animo sit neutiquam alieno. Ex eo cognoscere possis quo propendat. Quid mirum? Minus abesset à suis. Et jure aliquid putat, esse ubi degat, ea cum gloria candida Puteani anima, & doctor suus Fromondus, ut de aliis taceam. Panegyricum & carmen filii Dionysii dubitavi an mittere ad te deberem. Postea etiam geminum offerre exemplar ausus sum. Quorum alterum dabis illi, quem inoffensum ea legere posse existimabis, omnino enim liberius aliquibus in locis est locutus. Sed, qua prudentia es, facile id dabis Patriæ amori. Scis Batavis suis scribere. Et ego sic scribentibus in partibus adversis ignoscere semper soleo. Mitto quod quiddam & calamo emendasset, si domi fuisset. Audio generum cum filia esse Dordrecht. Si Amstelodamum venerint quæso hospitem me ne dedignentur. Beneficium mihi præstari à familia tua credam. Et volupe erit videre & audire tuam progeniem; generum etiam amplecti. Vale vetus & magne amice. Salutat te filius Dionysius, qui ipse scripisset, nisi, ut dixi, foris fuisset, dissentus: sed antequam exiret, hoc à me adscribi postularat.

*Amstelodami, Prid. Kal.
Febr. An. nocte intem-
pesta, ut fere soleo.*

CLVIII.

Guilielmo *Episcopo Londinensi*
Ger. Jo. Vossius *S. P.*

Reverende in Christo Pater, Dom. Illustrissime,

TAndem decisa est lis duarum civitatum, atque ab utraque Hollandiæ curia pro Amstelodamensibus est pronunciatum. Quare

Deo propitio vi. Id. Jan. inauguralem habui orationem: ubi & postridie Caspar Barlaeus. Magnoq; doceo auditorum confluxu non adolescentum modo sed virorum gravium doctorumque, in quibus & complures qui ad clavum Reip. sedent. Ut quamvis frequens mihi auditorium esse soleat Lugduni, Amstelodamense tamen hoc & numero aliquanto & præstantiâ longissimè vincat. Atque id (ut ingenue dicam) magis animum meum juvat, quàm quod hætenus hic paucis doceam horis, & stipendium prope alterâ parte excedat. Amicissimi Casauboni Optatum accepi qui & gratus mihi fuit, quia Ecclesiæ rem adeo salutarem concordiam commendat; & eo gratior, quia à magni Parentis egregio ut filio, ita vindice longè exit castigatior: & hoc nomine gratissimus, quod non alterius potius quàm tuo sit dicatus nomine, qui in ea dignitate quâ olim Optatus Ecclesiæ præsis & schismatico hoc ævo Optati instar sic ad labores, ut qui necessariis fidei capitibus conveniunt, Ecclesiæ etiam concordiam factam tectam conservent. Cæterum hoc Casauboni exemplum aurem mihi velle, officii que me admonet mei: qui non minus eo, ac fortasse etiam multo amplius obstrictus sim patrocinio ac favori tuo. Equidem facio quod possum sedulo; sed mihi magis quam cuiquam dolet, quòd tot occupationibus dissentus non iis passibus progrediar quibus vellem. Sed tamen promoveo. Atque unam hanc moram bonitate compensem. Nec despero. Reverendissimus Episcopus Armachanus dicavit nomini nostro Laborem suum de controversia quæ ante annos prope octingentos de prædestinatione cum Godschalco fuit. Sane pro honore tuo habito mihi plurimum summo viro debeo, operamque dabo, quoad vivam, ut gratum me præstem. Nec tamen per omnia nobis convenit in hoc argumento. Primus sane Reverendissimus Usserius talem Godschalci defensionem suscepit qualem non ausus olim fuit Remigijs ipse, vel Ecclesia Lugdunensis. Esto, ut Hincmarus non tenuerit modum in eo premendo: non idcirco non Godschalcus modum excefferit in Dogmate suo, quem ipse ante litem cum Hincmaro damnarat doctissimus sui seculi Rabanus Maurus, & una cum eo universa Synodus Moguntina, in qua tot viri simplicis antiquitatis gnari & Augustiniani sententiæ non amantes minus, quàm intelligentes? Quanto igitur satius sit existimare monachum unum exorbitasse quàm tot viros eximios: Et quàm grave tot Historicis veteribus fidem derogare! Augustini sententiam amplector & ipse: sed non ut eam capiebant monachi Andrumetani, & sæculis tot postea Godschalcus:

cus : verum ut eam interpretabatur Prosper, atque is cuius de vocatione gentium Liber sub Prosperi extat nomine : hoc est, sic Augustinum capere soleo, ut non pugnet secum, ac simul cum antiquioribus quos adversus Pelagium ipse advocare in partes solet. Amplissimus vir, Hugo Grotius, suasu multorum præstantium virorum, eorum etiam, qui in dignitate sunt constituti, in Patriam rediit : sed illis ignaris, qui ante annos duodecim, perpetuo illum carceri addixerant ; item istis qui factiosis illis temporibus, dejectis cæteris, ad honores summos pervenerunt. Omnes isti paucis exceptis suâ interesse existimant, ne tantus vir (nec enim magnitudinem ejus ipsi ignorant) in luce hominum versetur apud suos. Quare adversus eum in illustrium Ordinum conventu magno ab iis studio, ac contentione certatum est. Nec Grotio luculentum defuit patrociniū vel Ordinis equestris vel trium magnarum Civitatum, Rotterodamensis ubi Syndicus fuit, Delphensis ubi natus, & Amstelodamensis, quæ non prudentia minus quam opibus & potentia valet. Attamen tanto impensius obniti Lugdunenses, quorum primarius Consularis unus è iudicibus fuit ; item Harlemensis, ubi non multum dissimilis causa. Civitatum aliarum quædam se medias gerunt ; plures se aggregant Lugdunensibus, sed ex minoribus, quæ ex placito Ecclesiastarum pendere imprimis existimantur. Proinde, quem res ea habitura sit exitum, hunc facile dixerō. Faventem quidem habet florem Bataviæ ; sed ita sæpe apud nos usu venit, ut Zelotæ, quales apud vos rigidiores Puritani, minis & clamoribus modestiam melioris partis expugnent. Quod si sic pertendant, metuo ne maximus vir, molestiarum pertæsus, sponte etiam ingrata patria excedat. Atque eo magis hoc formido, quia probe habeo perspectum quantoperè eum & Reges, ac complures desiderant Principes, qui magnis honorum & commodorum promissis suas in terras pelli-cere conantur ; sed si extra patriam ei vivendum sit, cunctis eum terris, pene dixerim, invideam, præterquam magnæ Britannię : ubi prævideo, quantopere & Serenissimo Regi Carolo, Domino nostro, & regno universo utilis esse possit. Academia Lugdunensis, cum videret se quotidie pejus pejorque audire ob crebras pugnas ac cædes, tandem exemplo memorabili, effrænem hanc Licentiam compescendam putavit. Nam quod in ea contigit nunquam, capitis supplicium de eo qui alterum interemisset, sumptum est. Fuit is ex famulatio principis Razevillii, ejus cujus parens ob potentiam Regi prope ipsi Sigismundo formidabilis esse solet, atque à Re-

formatis Ecclesiis maximi fit, ob summum studium erga Ecclesias nostras. Tanti principis filius Lugdunum se studiorum causa ante annum circiter contulit ; nec levem adventu suo Academiæ honorem attulit. Servum habuit, qui uno altero comitante ex eadem familia vesperi exiens, incidit in hominem nequam, qui prius, ut aiunt, & litem intentavit, & pugna adortus fuit. Hunc vulneribus aliquot confodit servus is : sed cum & vulnus ipse accepisset, non potuit sat cito sibi fuga consulere. Captus itaque vitæque multatus, etsi multum pro eo intercederat princeps Razevilius. Hoc supplicium graviter admodum Razevilius tulit. Itaque sive proprio instinctu, sive facellani & nobilium, quos habet, solenni die, quo Rector Magnificus novus toti denunciatur Academiæ, surgens de latere Principum Bohemicorum (nam inter eos & Academiæ Curatores medius confidebat) non impetrata ex more venia, suggestum ascendit, atque ad Professorum Collegium orationem habuit, ac vehementer cum eis exposulavit, quod (ut verba ejus retineam) post triginta nocentium impunitatem, sanguine innocentis servi, togas suas conspurcassent : unde fieret, ut ipse qui honorem præsentia sua Academiæ attulisset, nihil inde præter ignominiam reportaret, proptereaque sibi animum quamprimum Academiam hanc relinquere. Quibus dictis non priorem locum repetiit, sed cœtum continuò excessit. Hoc ejus factum indigne valde tulere Curatores ac Professores Academici, & Leidenfes Proceres. Postulatum igitur ut Senatui se sisteret. Respondit, se Principem esse : eoque, si quid dicere haberent, se accederent. Peti-tum ut scripto traderet quæ dixisset. Negavit se de scripto recitasse ; eoque frustra illud exposci. Vix honos Academiæ permittit, ut nihil hac in re agatur. Et tamen, ut censeo, concoquet hoc factum ob illustrem ejus dignitatem, quicum illi negotium est. Et videtur non tam peccatum à Principe, qui adulescens est annorum duodeviginti, vel circiter ; quam ab iis, quos in comitatu habet, ac quorum curæ est commissus. Græve etiam ducent, offendere parentem ejus, Lithuanie ac Imperii etiam principem, maximæ in universa Polonia auctoritatis virum, si quis alius iis terris, præclare de Ecclesia merentem. Superest, ut gratias agam pro affectu erga filium, quem Literæ tuæ, Reverendissime Domine, testantur. Porro eum quoque nomini tuo commendo ; quod & ipse, ut facerem, postulavit : ego verò rescribo, me non alia ratione meos commendare solere, quam qua olim suos Cæsar Augustus, *Si merebitur*. Volo enim magis magisque se suscitet, ut tueri & ipse familiæ decus possit.

Deus

Deus Opt. Max. diutissime te incolumem præstet, bono Ecclesiæ universæ, ac totius Regni Britannicæ; ac tuorum quoque Reverendissime Domine, Clientum.

Amstelodami
elo loc xxxii.
Id. Februariis.

Reverendissimi & Illustrissimi
nominis tui Cultor ac Client
devotissimus,

G. J. Vossius.

CLIX.

Gerardus Vossius Joanni Filio, S. P. D.

TAndem, mi Fili, decisa est lis, quæ de schola illustri à Lugdunensibus huic urbi mota fuit. Exitus est qualem optabamus. Itaque jam duabus hebdomadibus publice docuimus. Ac succedunt initia ex animi sententia. Magnus enim est auditorum numerus, non de Juventute tantummodo, sed etiam ex viris primariis, & hominibus eruditissimis. De negotio quod abiens mihi commendaras, abundè sollicitus fui. Sed metuo ne spissè procedat, quod uterque optaremus. Nam si qua functio se offerat non indigna te, tantus continuo est numerus ambientium ut eorum quidem qui multis & magnis fautoribus sint subnixi; ut non ego solum facile desperem, sed alii etiam, qui causam agerent nostram. Nec propterea curam hujus rei agere desinam, veruntamen facile video non posse te melius tui rationem habere, quam si nihil fiduciæ in fautoribus, plurimum post Deum in virtute doctrinaque reponas. Quare non dubito quin sedulo vel Sacris literis, vel arti Medicæ incumbas. Utrumque studium in Britannia aliquem te efficere possit: in Batavia nostra (ut nunc sunt tempora) solum posterius. Reverendissimus Dom. Episcopus nuper ad me scripsit literas humanitatis plenas: ex quibus facile perspicio, simulatque idoneus sacræ functioni eris, fore ut tui habeat rationem. Attamen si Medicina magis arridet, non impedio quo minus hoc vitæ genus amplectaris. Ac seu apud Britannos seu apud Batavos tuos exercere illud velis, non deerit tibi favor & noster & amicorum. Solum curandum ne incertus semper fluctues: tum etiam opus (ut apud Tullium in oratione quadam fuit) Labore & Constantia. Quod scis postea Plantini Symbolum fuisse. Vellem te frequentiore esse in literis scribendis. Te denas misisse ais. Quid dicam? vix tertia est hebdomas, quod secundæ allatæ, nec ex eo tem-

pore alias accepi. Scripsi ad Casaubonum, ut quemadmodum ante annum fecit, ita etiam deinceps tibi trimestri quoque annumeret de meo libras Sterlingicas quinque. Si acceperis eas ex trimestri, quod Decembri Mense expiravit, bene est. Sin necdum acceperis, scio quamprimum id facturum, nisi forte jam Masio dederit summam integram, quæ mihi debebatur. Quod si est, proximo Martio dabit tibi duplum, hoc est Libras Sterlingicas decem. Ita enim fieri iussi. Frater Dionysius vocatus est in Academiam Dorpatensem, quæ in Livonia, & ad professionem publicam. Sane magnus est Rex cui se adiceret. Verumtamen filii ætas facit ut malim adhuc retinere. Et amici etiam auctores sunt, ut prius apud nos juris & politices studia absolvat, quam in exteris terris figat domicilium. Pergratum mihi interea, quod nomen ejus magis & magis inclarescit. Hugo Grotius in Bataviam venit amicorum suasu: ea res multos habet pessime, & turbas etiam in conventu Ordinum dedit. Præsertim Lugdunenses, & Harlemenses infestos habet. Quem res ea exitum sit habitura dicere necdum possim. Sed nondum despero. Præsertim cum Delphenes, Roterodamenses & Amstelodamenses valde ei faveant, omnemque moveant lapidem, ne tantus vir alibi potius, quam in Batavia sua vivat. Velim ad me perscribas, quid rerum agat Affinis Junius, & ubi vivat. Nihil enim hactenus de eo intellexi, præterquam quod unis literis tuis continebatur, ac tu ex Petteio te accepisse scribebas. Jam hebdomas est quod Aurelium Londinensem Ecclesiastem obiiisse cognovi, de quo tu nihil perscriperas. Dolet quod Britannia tot alios Viros egregios amiserit. Id enim Literæ tuæ testantur. Gratum facies si deinceps quoque significes, qui iis successerint. Valde laboro pro Vandenbrukio ut præsit vendendis rebus præfecturæ maritimæ: unde ad eum quotannis luculentum salarium rediret. Sed obstant nobis alii; in his Realius præfectus, iis à secretis, qui pro filio suo id munus petit. Nec desunt alii qui ambient. Atque etiam traducunt nostrum illum quasi poculis sit addictior, nec suæ rei satis gesserit curam. Dolet quod non magis habuerit rationem nominis sui. Cum his diebus quempiam ex præfectis rei maritimæ ejus causa compellarem, benignè quidem respondit: sed addebat deinceps qui munus hoc sustinere velit, eum cavere oportere pro xx. aut triginta Florenorum millibus: ne iterum publicum defraudetur. At ego neminem amicorum scio, qui Vandenbrukii causa tanto se periculo velit exponere. Fortasse facilius negotium succederet, si quosdam

in

in quorum manu ea res, muneribus ac promissis faceremus nostros. Sed ego artes istas non didici. Interim ex his facile colliges difficilem esse provinciam, quam suscepi, & ut nonnulli aiunt, non satis mihi honorificam. O utinam deinceps in huiusmodi negotiis non amplius utatur operâ meâ! Non possum facile aliquid amicis negare. Interea audire illa cogor, de eo quem commendo, quæ magnum mihi dolorem adferant. Et si verum dicere licet, ex parte in causa est focrus, quæ vitia ejus patefacere aliis solet, atque etiam exaggerare ultra modum; sic pleræque foeminae sunt: nec interea cogitat se sibi & suis abesse. Archiepiscopo Armachano gratias pro honore mihi habito maximas egi. Scio in causa Godschalci nonnihil dissentire: sed facit id perhumanè. Quod cur tanto viro non æquè liceat ac mihi licet in sententia persistere, postquam ejus opus legi? Sanè vir est summus & lectionis admodum variæ; mihi quæ planè decretum scripto aliquo testari, quanti eum faciam. In eo tamen falli arbitror, quòd existimat Godschalcum per omnia eadem ac B. Augustinum sentiisse. Omnino enim exorbitavit ea Augustinianæ appingens sententiæ, quæ beatus ille antistes nunquam dixisset. Aliter si esset, non eum damnasset Rabanus Maurus omnium ætatis suæ doctissimus, & una cum Rabano Synodus Moguntina, in qua tot viri Augustiniani dogmatis non intelligentes modo sed etiam retinentes. Nec Remigius aut Lugdunenses ausi unquam fuere Godschalci per omnia patrocinium suscipere. Ut multo minus id nunc fieri conveniat, post annos prope octingentos. Ut mittam quod pro me stat tot historicorum cohors: quos non ausim omnes falsi arguere. Non tanti mihi monachus unus, præsertim qui sine consensu præfecti cœnobio excessisset, ad prædicandum istic quo nemo miserat. Serenissimus Bohemiæ Rex in Palatinatum est profectus. Pleraque oppida jam occupavit Sueciæ Rex potentissimus. Superfunt Heidelbergia, Frankendalia, & quædam alia quæ veteris domini amore, ut spes est omnium, facile se dedit, nisi validissima sint præsidia Cæsarea vel Hispanica. Reverendissimo Londinensi Episcopo (ut magnopere te probes) valde & tuâ & meâ causâ exopto. Optime nobis vult. Sed opera tibi danda, ut omnes in dignum contulisse beneficium existiment. Vellem aliquid mihi temporis esset ea perficiendi, quæ jam diu molior. Affectum meum erga tam bene meritum monumento aliquo testarer. Et tibi ea res utilis foret. Sed scis, quàm premar, & tantum non opprimar curis variis, quæ me urgeant. In quibus non

minimum illa locum tenet, ut præclare omnes boni de te judicent. Hoc erit, si cum industria junxeris quam *σπουδὴν* Græci vocant, quia ut Aristotelis ait *σπουδὴ φέρει πρὸς τὴν ἀρίστην*. De affine Junio desidero scire ubi & quâ conditione vivat. Post eas literas, quas Lutetia ante annum prope scripserat, nullas ab eo accepi. Professor Bodecherus agere hoc videtur, ut & gener meus & simul collega fiat. Sed soror tua hæc animo ab eo est satis alieno. Habet alioqui, ut scis, inter procures hujus Urbis non paucos sanguine sibi junctos. Lugduni Batavorum ante duas tres hebdomadas capitale sumptum est supplicium de quodam ex famulitio principis Razevilii, qui vespertinis exiens horis, inque hominem nequam incidens, & ab eo male habitus, eum interemit. Vulnere ipse tardus effugere non potuit. Hoc primum est supplicium capitale, quod Academia vidit. Razevilii graviter adeo id tulit, ut oratione publicâ sit conquestus de injuria quam servo suo fecisset Academia. Nec exprobrare dubitavit quòd post xxx. nocentium impunitatem innocentis sui servi sanguine togas conspurcassent. Tam liberæ voces in cœtu procerum, professorum, studiosorum non impunè alteri abirent. Sed ut puto hic connivebitur. Est enim adolefcens quidem qui ista dixit: Sed Lithuanie Princeps, & filius magni illius Razevilii qui Regi ipso Sigismundo prope formidabilis esse solet, qui etiam amore eo dignior, quia præclare adeo in Polonia de Reformatis Ecclesiis meretur. Barlæo nostro non bene est; & nescio quorum hoc evasurum sit malum. Valde opto ne tam bono frauder collega. Res ea male cederet & mihi & imprimis novo Gymnasio. Oratio inauguralis quam idibus Januarii habui, typis est divulgata. Eam primâ occasione mittam. Id nunc facerem; sed tanti non erat ut propterea sumptibus & te & amicos onerarem. Quare meliorem captabo occasionem. Dionysii Reidanus propediem (ut arbitror) excudetur. Matthæus in Comicum historia magis magisque se probat. Isaacus in Græcis pulchre progreditur: & jam Evangelistas cum Actis scitè interpretatur. Præceptore utitur Brenio, erudito javene, quem in collegio (ni fallor) nosti. Nec male Gerardus procedet aliquanto. Lufibus, ut illa ætas solet, additior est, sed ingenio id quo plurimum valet, compensat. Vale, mi fili, ac sæpe me de studiis tuis & cæteris fac certiore.

Amstelodami
c1o Ioc xxxii.
Kal. Feb.

Tui Amantissimus Pater
tantoque amantior fu-
turus quanto pulchriora
de te intellexero.

G. J. Vossius.
Lite-

Literas hæc non uno die exaravi : quod occupationibus & interpellatione non una avocarer. Sed antequam eas absolvissem pene eodem tempore, binæ aut ternæ mihi Literæ tuæ redditæ, prope ejusdem argumenti : nempe quæreris quod nullas à nobis literas acceperis. In causa autem fuit, partim quod tuas expectaremus, partim quia initia professionis difficiliora essent, nec cæteris aliquid temporis relinquerent. Nunc postquam de pecunia ad Casaubonum scripsi, animo scio eris magis defæcato. Literas eas tuis inclusi, quia non alium putem eas melius procuraturum. Literæ sunt grandiusculæ, quia inclusi iis, quaternionem Oratoriarum, quem desiderabat. Clarissimis professoribus & amicis cæteris, in his optimo & amicissimo Hallo, plurimam salutem dices.

CLX.

Eust. Swartio S. P.

Sæpe doluit, mi Swarti, quod tot annorum intervallo nihil de te cognoscerem. Solum hoc retulit cognatus uxoris meæ Roverius, visum te sibi Hagæ. Et aliquanto post Bostadius retulit, in Batavia te degere, nec id se unquam fugisse. Tanto jucundius nunc est ex teipso intelligere vivere te, & valere, & memorem esse nostri. Voluptatem etiam attulit, quod præfecturam Scholæ Sylvæduensis sis consecutus. Utinam non ea esset Civium pervicacia : quæ etsi ipsis damnosior est, quam tibi, nihilominus molleste tibi accidit. Sed etsi lautior dignior est fortuna, honestior tamen hæc Provincia, quam ut deferere eam debeas, priusquam unctior conditio obtigerit. Equidem ut antea semper, ita nunc etiam optime tibi volo : imo nunc magis, quia ex Literis tuis didici generum te esse cordatissimi Civis & optimi Viri Vanderlachi, affinem Cornelii & Nicolai Vanderlachi, quorum hunc veterem erga me affectum retinere satis ex eo colligo, quod rarius quidem quam vellem, subinde tamen Lugduni me invisere, & suavissimis sermonibus pascere soleat. Tanto magis exoptem, ut utilis tibi esse posset opera nostra in eo munere, quod desideras in Lyceō nostro. Veruntamen necdum video, quo pacto persuaderi possit proceribus nostris, ut cogitent de advocando Politices professore, qui ut Historiam, sic civilis etiam Doctrinæ, me Professore designarint : meque unum huic oneri sufficere existiment. Paulo facilius impetremus de humanioribus Literis. Sed tamen

vir est clari nominis qui eodem adspirat. Equidem utrumque vestri mihi Collegam optem. Sed certum est prius cogitatum in se Mathematico. Quid mirum ? in Mercuriali Civitate : cujus commercia sine numerandi scientia non constant, nec navigationes in omnes orbis plagas ac terras etiam ignotas sine scientia fiderali. Si quid tamen cognoro, quod tua tuorumque scire interfit ; vel te, vel Vanderlanios faciam certiores : Seduloque exquiram, quæ ad hoc negotium pertinent ; ne veterem in me amorem refrixisse credas. Longe tamen facilius effici posset, quod speras ; si perrexisses in illustrandis Scriptoribus antiquis, uti cœperas. Nunc tot annis siluerunt Musæ tuæ. Sed bene est, quod pristinus redit vigor, curamque suscipis castigandi & illustrandi Curtii. Multa enim post Raderi labores restant. Arbitror Janum Gebhardum popularem nostrum, idem animi habere. Sed pulchrum est in nobili hoc circo plures decurrere. De Plauto edendo, quantum ex silentio tuo colligere possum, jam cogitationem deposuisti. Quod si est, non incommode, ut arbitror, domuitionem cogitet vetus editio nostra, quæ cum variorum prodiit olim Commentariis. Sæpius mihi molestum fuit ea carere : Uti & Dutia, cui adscriptæ Scaligeri castigationes. Nam Camerariana, ad cujus oram exscripsisti illas Scaligeri, non parum abit à Dutia, ut sæpe hæserim incertus. Nec si remiseris, potius remittendi minus potestas erit. Sunt enim *τὰ πρὸς τὴν αὐτὴν*. Quare, quæ mancipio nostra sunt, ex usu tua esse volo. Id enim meretur egregia eruditio tua ; atque item præclarus erga me affectus tuus. Vale, præstantissime Suarti, ac deinceps etiam amore certemus.

Amstelodami. die ioc xxxii. Kal. Martiis, quibus scis olim munuscula mitti solere. Mitto idcirco orationem inauguralem hic à me habitam nuper. Quæ etsi tanti non est, tamen amare eam poteris propter Autorem. Vale.

*Tuus sine fūco,
G. J. Voilius.*

CLXI.

Thomæ Farnabio S. P.

ET gratæ & jucundæ mihi fuerunt literæ tuæ, optime & doctissime Farnabi. Eo molestius mihi est quod tarde adeo respondeam. Nempe jam diu scribere cupientem temporis angustia, & negotiorum moles excludere : quæ ita me distinent, ut pæne con-

jurasse videantur ad eripiendum tempus, quo amicos salutare, aut eorum satisfacere postulatis possim. Tibi certe jamdudum responsum oportuit. Quare licet nunc quoque occupatissimus, malui cætera meo in te officio posthabere. Etenim injurium me fore videbam in tuam erga me humanitatem, nisi aliquando, post multam cunctationem, non pertinax silentium, sed pene necessarium abrumperem. Imprimis vero novissimæ tuæ Literæ stimulos addiderunt; itaque dum recens tui memoria, & simul occasio opportuna erat, vel hanc, vel illam, elabi nolui. Et quia postrema maxime animo hærent, succurrit primum Martialis, quem edere cogitas. Ego Scriptorem illum, non semel à me lectum, amavi semper, ob venustatem ingenii; quod tamen odi quoties in spurcitiem degenerat. Sed illa tanquam non dicta prætermitto; sunt alia divina certe Epigrammata. Itaque optabam ipse nonnulla olim observata communicare: sed volentem retinent imperiosæ occupationes. Accedit, quod omnes meos vetustos Codices, & eos quibus multa manu sua annotarat Scaliger, jam ab annis quindecim retinet amicissimus Scriverius. Cujus penè unius nunc Editionem habeo, egregiam illam (nec hoc invidia puto negarit) sed quam tamen meliorem possit reddere, si etiam ei obtingat. Sane lib. II. Epigram. frustra sollicitat hunc versum, *Si totus tibi triduo legatur*; mavult, *Si totus triduo tibi legatur*: Atqui prior in triduum est porrecta: uti & in biduum; unde Terent. Eunuch. *Rus ibo, ibi hoc me macerabo biduum*. Qui senarius est, Lib. III. Epigr. LXVI. displicet, *Abscidit vultus ensis uterque sacros*. Atqui Lucani est in primo, *Illa comam lævo morienti abscidit ephebo*. Nempe est ex *abs* & *cædo*, ut *abscondo* ex *abs* & *condo*. Hæc ad artem pedariam pertinent; Illud ad *avalozier*, quod ad Epigram. XCIV. Lib. VII. ait, Onychem imo solum isto loco muliebri genere usurpari; Malim dixisset, non alibi accipi eo genere pro lapide alabastrite, vel ampulla inde facta: nam pro gemma fœmininum plane est. Itaque Plinius, Lib. XXXVII. cap. 6. octie continuo jungit fœminino. Sed quid minuta adeo pergam sectari: præsertim tam occupatus? Illud tamen omittere non possum, esse hic Typographum, qui jam diu aveat excudere Martialem tuum. Typos habet venustissimos, quod, vel me tacente, judicare possis, ex Juvenali ac Persio tuo, & Horatio Bondii, quos ad te mittit, ut ipse dispicias, utrum committere ei labores tuos velis, an ipse Editioni in patrio solo præesse malis. Sane non facile, his quidem terris, reperias; qui venustius, & fortasse e-

tiam accuratius tua edat. Ego etiam Scripta tua malim eleganter excudi. Nam & hic dicere liceat, gratiora esse quæ non bonitate modo, sed etiam venustate sui commendantur. Et omnino mihi placet, quod utilissimam operam & antiquis Scriptoribus & Juventuti impendis: quum iniquum est prolixis illos Commentariis onerari. Melius tu qui supervacua omittis, ut eo magis assidua Juventus sit in fontibus ipsis hauriendis. Sed video me immemorem temporis; & nolo Londinensem illum Mercatorem, qui tuas mihi literas tradidit, & hac ipsa hora abutum parat, sine meo ad te responso venire. Itaque te, clarissime & amicissime Farnabi, optime valere opto, & nostri amorem referbare.

Amstelodami.
Clc lxc xxxii.

Nomini tuo addictissimus,

G. J. Vossius.

CLXII.

Merico Casaubono.

Vir Clarissime,

Cujus causa sæpius scribere distuli, quodque semper primarum mihi literarum argumentum fore existimaveram, id tandem accidisse & ego lætor, & tu ubi cognoveris gavisurum nullus dubito. Est autem de Schola illustri quo eventu nescire non potes si priores meas Literas legisti: nam quod credidi ipse, & mecum plures alii, ex voto omnia ceciderunt. Judicium confessus, quorum arbitrio permissa res erat, nihil præter leges aut æquum Amstelodamenses exorcos, & falso litteram à Lugdunensibus motam. Ita hæc composita; nescio tamen an id dicere liceat, nam audio Lugdunenses nondum quiescere, sed si possint (multi enim posse negant) provocare ad Urbes Hollandiæ velle. Sed faciant quodcunque videatur; nos jam solennia Illustris Gymnasii peregrimus, & quotidie docemus, Auditorio non infrequentiori, quam Lugduni solebamus, vel, si numerus paulò minor, quicquid hic jacturæ, Auditorum præstantia compensat, quos inter multi sunt grandævi, & venerabiles Viri. Sed hæc quidem hætenus; Optatum Milevitanum, à te illustratum pro diisse lætor. Et multum videre desidero. Necdum enim mihi allatus est, neque Junium aut compellavi ipse, aut ubi sit intellexi. Credo aliis distineri. Sed quamvis nondum perlegere labores tuos licuerit,

licuerit, jam tamen præfagit mihi animus, dignissimos fore tanti parentis tanto filio. Certè, utvis multum occupatus, nequeo quin teneat desiderio Animadversionum tuarum. Fateor eas esse occupationes meas, ut quamvis nihil ultra accedat, minime tamen otiosus sim futurus. Verum nunquam tantum mea negotia poterunt, ut seponam, aut differam saltem percurrere tanti amici scripta. Ne dicam eruditi adeo viri, quod verè dicere possum, ex quo præsens tuam existimare doctrinam didici. Ut mittam etiam eruditionem, minus an facere quidquam possim, cum nostra quoque Lectione tua dignatus sis. Ingratus sum, mi Casaubone, nisi te amem, æstimem, colam; inhumanus, nisi saltem par pari referrem. Itaque ego quidem ut dixi aveo tuum Optatum habere: & ne tuum quoque desiderium morer, mitto Quaternionem quem desiderari in Oratoriis nostris scripsisti. Jam redeo ad curas quibus sæpius te oneravi; vel potius ut priorem tibi sollicitudinem eximam. Etenim de stipendio quicquid debebatur mihi accepi, excepto semestri postremo cuius dies Decembri mense expiravit. Illud expecto, & nescio quid Masium moretur; quando uti ex literis tuis cognovi, jamdudum pecunias habuerit. De Peystero quod scribis, nondum perpendere potui; quamobrem semel placita retineo. Cæterum monitum te rursus velim, amicissime Casaubone, ut filio meo Johanni, singulis trimestribus Libras quinque mittas. Credo quoque reservasse te ei summam illam de postremo trimestri, quod Decembri finitum. Si id factum non est, necessum erit de hoc trimestri, quod Martio mense expirabit, demi altera parte plus, libras videlicet X. Dolet sæpe adeo molestum esse tibi; Cæterum multum in humanitate tua reponere me facile ipse animadvertisti. Vale.

CLXIII.

Danieli Heinio S. P. Leidam.

PRO Herode tuo, & poematis annexis, quæ ab Collega Barlæo accepi, gratias habeo summas. Valdè me eorum lectio delectavit, ut omnium tuorum solet, præsertim in hoc scribendi genere, ubi certas cum Antiquis. *Antiquis* quod mittam habeo nullum. Sed vices nunc meas supplebit præstantissimus Mericus Casaubonus: qui Optatum Milevitanum, notis suis auctiorem edidit, & exemplar quod mitto, tibi dari iussit. Non dubito, quin gratissimum tibi futurum

sit, tum editoris causâ, cujus cum maximo parente, tanta tibi amicitia fuit; tum ipsius Optati, qui utinam exulceratis hisce temporibus, magis in deliciis foret? Salve summe vir, & à Veteri Collega, cum optima conjugè plurimum salve.

viii. Kal. Mart.
c1510c xxxil.

Tuus,

G. J. Vossius

CLXIV.

S. P.

Quanto magis desidero tecum, amicissime Casaubone, confabulari, quantoque negligentius plerasque meas literas ad te video perferri, tanto avidius animus est omnes arripere scribendi occasiones. Eam nunc attulit Mercator Londinensis per quem Farnabii mihi literæ traditæ erant. Vellem tamen discessus ejus non tam subitus fuisset. Pluribus colloqui licuisset: Feriæ enim nunc sunt, quibus spatium datur cum amicis colloquendi. Nam cum docendum est publice, otii adeo parum relinquitur, ut sæpe vix domestica curare liceat. Aded, ut plerumque literarum scriptionem in ferias differam: quarum bonam semper partem amicis do, maxime consanguineis vel affinibus, qui invisere tum imprimis solent. Literas tuas & simul pecunias accepi: Libras videlicet vestrates quinque & triginta. Postrema quam scripsi Epistola, quia cognoram commodius te per Peysterum procurare pecunias posse, rem totam tuo arbitrio permisi, & addidi eo consilio Chirographum. Cæterum monitum te volo, prænomen Peysteri, quod tunc non occurrebat, perperam me scripsisse, & pro Jona (nam id nomen illi esse nunc cognovi) Franciscum appellasse. Quod hic adjicere visum, ne putares alium me quam illum quem aiebas, Peysterum designasse. Itaque deinceps à Peystero, nisi Masium præferas, pecunias expectabo. Si de Peystero commodius erit, quæso ut Masio satisfacias, de impensis quas fecisse mei causa sese ait: & detrahe id de summa quæ proxime mihi cesserit. Nec tamen scio quos sumptus Masius signet: crederem aliquos fecisse in itinere Cantuariam faciendo. Utcunque est, nolim me ei debitorem. Optati tui exemplaria nonnulla Bibliopolæ Lugdunensi tradidi, qui postea indicabit quo pretio vendere ea possit. Negabam minoris venundari oportere, quam nostrati Floreno Caroleo: quod paulo minus,

est quam solidis duobus sive Schellingis Anglicanis. Quod si consequi hoc liceat, viginti Caroleos nostrates, pro viginti Exemplaribus, sive triginta octo Schellingios Anglicanos, demes de pecunia mea. Sed metuebat Bibliopola ne tam care posset vendere, quia paucorum ad palatum sint Antiqui: præsertim qui argumentum tractent, quale Optatus tuus. Mi Casaubone, valde fordescent hic Veteres. Quod si quid antiquorum legere velint, id vix aliud sit, quam de Prædestinatione, ut quædam Augustini, Prosperi, Fulgentii: Theologiæ Doctorem novi, qui nullum veterum in Bibliothecâ haberet: nec diffitebatur, sed dubitare tamen aiebat, an non unum cuiusdam opusculum haberet, seu Bernardi, seu Anselmi. Quod si periculum videro, ne optimus scriptor annos totos, in Bibliopolarum serualis jaceat dispretus, aliter hoc negotium perficiam: Nempe cum Bibliopolarum variis de permutatione aliqua transigam. Faciliores hac in re esse solent. Nec ea res obesse mihi admodum possit, quoniam subinde ego, vel liberi, emere scriptores aliquos necesse habeamus. Quare nihil impedio, quo minus de proximo hujus anni quadrante, vel eo ipso qui mense hoc Martio expiravit, resces illos XXXVIII. solidos, sive Schellingios vestrates. Deceveram aliquid addere, de studiis & laboribus nostris, sed id proximarum esto literarum argumentum. Multam salutem à me & mea, optimæ uxori, dices, item Rev. Dom. Decano, & toti Collegarum & Fratrum præstantissimorum Collegio.

*Amstelodami clb Idc xxii.
Prid. Kal. April. St. Vet.*

CLXV.

Merico Casaubono S. P.

EN tandem tibi Exercitationes meas Grammaticas, præstantissime Casaubone. Addidi & alterum exemplar quod dandum Reverendo D. Decano. Plura misissem, nisi scirem argumentum hoc non facere ad multorum palatum. Sed munificus magis ero, ubi edidero quæ sequentur argumenti gravioris ac sanctioris. Literis proximè missis nihil mihi gratius fuit. Satisfactum mihi jam à te usq; ad Septembrem anni superioris, qui fuit quartus & trigessimus supra clb Idc. Expecto igitur semestrem Præbendæ meæ, quod expiravit in Martio hujus anni quinti & trigesimi. Jam intellexeris confido, Hu-

gonem Grotium Legatum agere Regni Suecici Eutetiæ Pariorum. Sophompaneas ejus (tragœdia est de Josepho Hraelis filio) hæc excuditur. Eam eo jultius mittam propediem, quia nomini meo inscripsit. Scio placituram. In mentem venit hoc ipso die, quo ista scribimus (is est vi. Id. April.) ab Henrico octavo, ejectis monachis in Ecclesiâ Cantuariensi constitutum esse Decanum cum xii Præbendariis ante annos xciv. Contigit semel iterumque, & sæpius fortasse, ut non nemo, me & aliis præsentibus ea referret, quæ ostenderent ordinem hunc Canoniorum seu Præbendariorum eo in Angliâ loco esse, quo pauci his terris existiment. Sed ego, etsi super eo aliqua me audire memini coram, tamen non habebam, quæ de aliis certo responderem objectantibus quibusdam, non satis me decora, & dignitatem ordinis nostri scire. Si grave non erit, velim per otium tribus verbis significes, quo loco in regno Anglico Collegium sit nostrum. Video Monachos olim & Cantuariensem statuisse Archiepiscopum, dummodo Regi placeret. Sed scire malim, quæ penes eos fuerit, ex quo Præbendarii substituti. Uti eque locum obtineant in Parlamento. Quibus Secularium (ut vocant) pares censeantur. Et si qua id genus. Neque id fastu scire aveam. Alienum id à moribus meis, præsertim qui longè aded diffusus vivam. Sed ne imperitior videar illis, qui diu quidem in Angliâ vixere, sed neutiquam eo assurrexerint, quo nos regia evexit dignitas, ut nostri ideo hic mirentur eos exactius me scire, quæ ordinem nostrum spectant. Vale Reverende & Amicissime D. Casaubone, meoque nomine plurimum Reverendum D. Decanum & universum D. D. fratrum Collegium saluta. Nec minus lætissimam uxorem tuam, quam & mea salute plurimâ impertit & Filius Mathæus, quem coram vidisti. Is nunc totus est in Annalibus Hollandicis, quorum libri quinque primi excuduntur. Ut spero & istos intra menses duos videbis.

Tuus omni officio,

G. J. Vossius.

CLXVI.

CLXVI.

Guil. Boswello, Oratori Regis Britanniaë.

Nobilissime & Amplissime Domine,

Reditæ mihi sunt literæ tuæ, & illæ quas scripseras paulò antequam Bateria excederes, & alteræ ex Anglia transmissæ. Utrisque lectis non potui satis exosculari perpetuum erga me amorem tuum, & humanitatem tam prolixam. Tantoque mihi impensius curandum video, ut affectui tuo possem respondere. De Hortensio nostro ita est, ut scribis. Sed de altero ei surrogando necdum cura suscipitur urbis nostræ proceribus. Ejus rei causam accipe. Quo tempore Hortensium & *Marcellum* cura tenebat proficiscendi in Italiam, sæpe ab urbe aberat, nunc Hagam excurrens, nunc Leydam vel Delphos. Hæc res fecit, ut non ille solum longè alia ac juventutis bonum curaret, sed auditoribus quoque ejus amor Mathesios refrigesceret: vel siquibus ardor ille duraret, in alia Lycea deflueret. Ubi deposuit noster animum illius itineris destinati, redire quidem voluit ad labores & auditiones publicas: Sed sæpe *dux* erat nullus, interdum unus & alter, ut locum haberet illud Persianum è Græco expressum, *vel duo, vel nemo*. Et duorum interdum (miserum) alter erat minister Lycei, quem Pedellum dicimus. Hoc vidit & indoluit: idque eo magis, quia spem majoris stipendii habere non possit, nisi opera ejus necessaria publico magis videretur. Natura propensior erat ad tabem, quâ parentes obierunt. Accessere varia, quæ animum ejus forte suâ multo celliorem discruciant: in his illud quod dixi. Eo absumpto consultius Urbis nostræ magistratui videtur, paulum deponere curam Professoris Mathematici, primoque circumspicere de uno altero idoneo vel ad Professionem Historiæ Romanæ, vel similis studii, cujus amore juvenus vel omnis potius flagret ætas. Nec dissiteor priusquam tuas accepissem literas, id me consilii proceribus dedisse. Spectavi tum me ipsum, tum præcipue bonum publicum. Nam nisi vel Romana Historia vel ejusmodi quid eo tempore doceatur, quo ego in sacra vel Ecclesiastica sum Historia publicè enarranda, periculum sit, ne ille quoque defectus imminuat eorum numerum; qui huc se tanquam ad studiorum mercatum receperunt. Scis enim his terris non usque adeo multos esse Ecclesiasticæ antiquitatis amantes. Homines fuisse ajunt, qui ab Apostolorum temporibus ad nostrum usque seculum scripturam enarrâ-

runt: eoque non dispiciendum quæ dogmata obtinuerint, primis etiam seculis, vel quale fuerit regimen Ecclesiæ, sed quid Deus dicat in verbo suo, hoc est, quomodo ipsi novè putent scripturas intelligi oportere. Hic novellitatis ardor, is antiquitatis contemptus, nisi pestilentis instar Sideris multorum animos afflasset, beatius in rebus ageretur humanis; & si Britannica certamina satis capio, non tantas Scotia turbas daret. Scio innumera animarum millia esse extra omnem culpam. Sed quid faciamus istis *Amazones*, qui soli sibi sapere videntur, proque talibus se venditant simplicioribus: illos vero qui antiquitati suam deferunt honorem, tanquam umbras putant circumvolitare. Imo, ut intelligo, calumniis suis pudore nullo, in odium gravissimum adducere apud suos non cessant tum Regem suum, cordata animi bonitate suorumque amore, nullo Regum inferiorem, tum omnes eos quibus Deus præcipuum Ecclesiæ suæ regimen commisit. Sed quia jam in hunc sermonem incidi, literas Cantuaria accepi, quibus certior redditus sum; quia serenissimo Regi ad motus Scoticos compescendos milite fuerit opus, cuique Canonorum Cantuariensium de Præbenda annua portionem decidendam: mē qui percipere soleam quotannis libras centum sterlingicas, non posse percipere ultra octoginta. Equidem non is sum qui non omnia Regis causa velim, quin quicquid habeo non modò Regiâ liberalitate, vel à parentibus relictum vel labore partum proprio, atque adeo vitam ipsam pro Regia dignitate impendere sim paratus. Sed tamen ambigo, cum ignorem quantum conferant fratrum meorum alii, num ego qui solum centum percipio, privandus sim libris vicenis. Arithmetica enim in hoc negotio proportionem agendum non sit: sed Geometrica, ut nosti. Utinam igitur grave non sit de isto consulere vel Illustrissimum & Reverendissimum Dom. Archiepiscopum, vel Reverendissimum Dom. Episcopum Londinensem. Non hoc peterem, nisi jam novem prope menses forent, quibus nihil percepi. Ab clarissimo quidem fratre Casaubono literis certior factus sum, mercatori meo se pro trimestri annumerare voluisse viginti libras, sed cum nisi viginti quinque (ut antea) daret, accipere quod offerebatur noluisse. Verum ego ad Mercatorem scribi curavi, ut potius trimestri quoque viginti acciperet, quàm nihil. Respondit ille (nisi ab eo qui Amstelodami habitat eludor) nec viginti illos se posse accipere. Nemo, ni fallor, æque idoneus fuerit ad consilio juvandum quam Rev. Dom. Londinensis, de cujus affectu etiam omnia mihi merito polliceor. Nam ipse abundè mihi

mihî cum coram comprobavit, nec alter eo intelligentior, qui ipse in Collegio Canoniorum Cantuariensium fuerit. Hæc scripti raptissime in ædibus nob. & amplissimi Dubletii, qui officiosissimam tibi salutem adscribi iussit. Scripsissem ad magnos illos Ecclesiæ memoratos Antistites, quorum laudes nulla ætas conticescet. Sed, ut vides, vix nunc potui hæc ista. Festinationi ignosces & simulac occasio sit, vel potius cum voles, omnia officia cum salute devotissima offeres Reverendis & Illustribus Dom Archiepiscopo & D. Episcopo Londinensi. Vale.

Tuus totus,

G. J. Vossius.

CLXVII.

Arnoldo Buchelio S. P.

AMicitia quæ jam ab aliquot annis, tecum mihi fuit, Amplissime Bucheli, omnino postulare videbatur, ut contendente Amersfurtum, filio meo, simul & adiuturo civitatem vestram visendi studio, te, & ipse per literas, & filii verbis salutarem. Quippe qui existimem boni viri esse, etiam sollicitum agere de amicorum rebus, & valetudine. Itaque non facile dixerim, quam gratum mihi acciderit, quod his diebus ex ornatissimo K. Marteno intellexi, valere te, bellèque pro ætate portare. Eo autem id mihi jucundius erat, qui non modò, donum amicum decet, optimè tibi optare, sed etiam quod publico, te plurimum benefacere posse cogitarem. Et jampridem cupidè expecto, ut patriam, ut nos omnes, tot annorum laboribus tuis bees. Sanè id si ob attenuatas corporis vires, tam citò non possis, quam vellemus, aut alia etiam de causa, adhuc premere labores tuos malis; saltem curaturum te spero, ut per propinquos, ac necessarios tuos, aut quibus aliis dare id negotii volueris, lucem quondam adspiciant. Nam dolendum profectò sit, si quæ viri, suis in studiis præstantissimi, multo studio conquiescere, publica luce careant. Accedit quod raro scripta, nisi ab Authore ipso, emendatè edantur. Ideoque, & ego his temporibus, quæ ante annos xxx. & ultra commentatus sum, protrahere in lucem molior. Hic quem vides, filius meus Matthæus Vossius, scribere ante annum aggressus est, Comitum Hollandiæ Historiam; cujus majorem jam partem absolvit, & ut arbitror post menses paucos

edat. Quare si qua tibi sint, quibus juvare eum, in egregio hoc instituto, sine incommodo tuo possis, is non dissimulabit publicè, cujus beneficio profecerit, aut fuerit adjutus. Quod eo dico, quia video hodie, adeo invaluisse morbum illum, ut homines addiscere quidem velint, sed à quibus hauserint, non agnoscant. Sed à talibus longè diversus mihi, etiam filio meo animus. Itaque si habeas, vel Manuscripta, vel olim edita, ac propè jam sepulta, quibus putes lucem addi Patriæ Historiæ posse, honor tuus erit, publici autoritas. Et paucis diebus recepturum te, quicumque commodaveris, fide quam optima spondeo. Vale.

*Amstelodami
clō Idc xxxii.
xi. Kal. Jun.*

Tuus,

G. J. Vossius.

CLXVIII.

Andræ Riveto.

Lugdunum Bat.

Reverende vir, Doctissime Collega.

Eunte ad vos ornatissimo juvene Rigaltio, non potui occasionem hanc prætermittere, mittendi ad te Optati Milevitani, quem à se castigatum, notisque auctum, ex Anglia transmissit Mericus Casaubonus, ut tibi traderem. Frustrà vero, aut scriptorem ipsum, aut Casaubonum nomen commendaverim; cum utrumque in veneratione tibi esse sciam. Dignus quoque tanto Parente Mericus. Quare ut lubenti animo donum accipias, pro me, & eruditio, & Parentis magnitudo, & ipse Opratus postulat, cujus Episcopi utinam omnes hodie similes forent. Si enim tam hi amantes essent pacis, ac concordie, non ita Ecclesia Dei scinderetur, magno hostium gaudio, & imbecillum scandalo. Verùm non tam querimoniâ nunc opus, quam remedio; ad quod tibi, & paucis tui similibus, salutaria, ut spero, consilia, inspirabit Deus, magis magisque. Salutem plurimam honorandæ Matronæ conjugii tuæ, & Collegis universis, ubi vacabit, aut opportunitas erit, meo ut nomine dicas rogo.

*viii Kal. April.
clō Idc xxxii.*

Tuus totus,

G. J. Vossius.

CLXIX.

CLXIX.

bernardo Damke S. P.

Quod hæcenus, Ornatissime Damke, literis tuis non responderim, propter occupationes meas fuit; quibus quotidie fic premor, ut si otioso, vel pauxillum esse liceat, vix me Vossium esse credam. Verumtamen quia commoda adeo occasio est, per honestæ admodum domus adolescentem, literas ad te mittendi, non patiar hanc mihi diffluere. Major erga te amor meus. Sed sic tamen, ut paucis defungar. Quæris de loco Basilii Imp. ubi ait in suis *παρανεπκοίς*, summos juxta, ac infimos, *ἢ πλεον τετιγχεως γῆς μὲν δάνατον κληρονομήσειν*. Puto non meliorem fabulam adducere posse, quam à magno Marone, qui similiter ait, de Coeli Mantuani sepulchro, tres patere non amplius ulnas. Scio ut crucem fixisse se Grammaticis, magnus ille vates dixerit. Sed enim sufficere debet, quod Cornificius, & Asconius, ex ipso audierint Marone, per coeli spatium, significari Coeli illius, quem dixi, sepulchrum. Quem enim meliorem interpretem quæramus ipso Poeta? Nec in dubium vocare licet sententiam hanc, quia non ipsi hoc Cornificius, & Asconius scribant. Sufficere debet, quod hæc subnixa sint, non solum honorato tibicine, sed etiam Junio, Phialgrio. Mens igitur Basilii ista erit, utcumque Imperatores, non solum magna habitent palatia, sed etiam, vel totius orbis Domini fiant, non tamen domum eam, quam obitu incolunt, plusquam tricubitalem fore. Parva certe hæc domus, ut meritò dixerit Horatius,

Et domus exilis Plutonia.

Valdè enim falluntur, qui vel *exilii*, pro *exilis* legunt, contra omnium codicum fidem; vel qui existimant, significari amplum illud animarum receptaculum, quod Poetæ Erebum dicunt: nempe ut domus illa dicatur exilis, non quia ipsa exilis, sed quia ut nugantur, animæ, vel umbræ sint exiles. Quanto illud verisimilius, quod jam ab aliquot annis persuasi multis, Plutonium domum, esse sepulchrum. Nam Pluto, terra, quia è terra effoditur *πλῆτοι*, five quicquid metallorum, juxta illud Poetæ,

Effodiuntur opes, irritamenta malorum.

Et Græcis idcirco *Ἄδης* ab Hebræo *אֵדֶן* h. e. Terra: non uti Græculi putarunt, ab *α* & *ιδέν*. Nec ineleganter idem Basilii ait,

ὥσπερ ἱατρὲς περὶ σωματίων φιλοπερίε, ὥτω καὶ φιλοσοφὸς ψυχὰς ἱατρῶν. Scio quod objectas *ἱατρὸς*, proprie *ἱατρῶν*, φιλοσοφὸς φιλοσοφῶν. Sed placuit Basilio *μέλαρος* illa, quam veteres vocant *ἀκόλυσον*, sive reciprocā. Qualis est, quod altum pro profundo dicimus, profundum pro alto, Gubernatorem pro Auriga, Aurigam pro Gubernatore, æquor pro campo, campum pro æquore, flores pro stellis, & stellas pro floribus, aliaque id genus. Venio ad Agapetum. *Παύσιμος* non magis morari debet, quam *παισιόσκοπος*, quod apud Nazianzenum. Hoc à *σκοπεῖν*, illud ab *θεῖν*, quæ *ἰσοδυναμοῦντα*. Ut derivata *Ἐρεσις*, & *ἐπισκοποι*, *παισιόσμος*, & *πολλεία*, venustè de Romano imperio: Interim vulgaria Lexica, præsertim ex posterioris ævi scriptoribus, compolitis id genus verbis dictabit, qui vollet. Eidem Agapeto, *Οἱ δὲ δόματα περιεμύθηται* sunt excubitores. Nam comparationem facit Agapetus inter utramque fortunam, summam illam Imperatorum, & alteram vigilum, sive corporis custodum. Superest quod quæris de *ἐρυθρίᾳ πιδίλοις*, qualibus Imperatores utebantur, etiam Occidentis. Nam uli calceis Mulleis, & foli quidem jam à tempore Aureliani. Mullei autem Calcei, qui Dioni *ἐρυθρόχρους*. Sed quia Agapetus, ad Justinianum Imperatorem scribit, de Constantinopolitanis solum videamus. Nihil enim certius, quam eos rubris usos calceis. Hinc Paulus Diaconus, Lib. XVI. *Ut agnosceretur ex rubris calceis*. Georgius Phronza Protovestiarius, Lib. I. cap. 17. *Suffragante Nobilitate Manuelem Imperatorem creat, cocco tincta calceamenta concedit, successorque ab omnibus agnoscitur*. Hinc Gregorius, Lib. III. ait Alexium *ἐρυθρίᾳ ὑπόδημα χρῆται*. Et Nicetas in Joanne Comneno, Lib. III. *τὸ πόδις εἰς ἐτοιμασίαν τετραγώνιον φοινικῶδες ἀμφέννυσσι πιδίλον*. Etiam Joannes Curopalates narrat Isaacium Comnenum fuisse Patriarchatu dejectum, quia gestasset *κοκκοῦν πιδίλον*, quippe quæ solius essent Imperatoris. Possum & alios adducere; in his Procopium, & Zonaram. Sed quia video te esse totum in Basilio Imp. illum potius advocabo. Ille in *παρανεπκοίς* ad Leonem filium, cap. 63. *Τὸν ποδῶν σε τὸ ἐρυθρὸν πημῆσαι ὑπόδημα*. Hæc ut ad te scriberem, affectus compulit. Impensè enim faveo omnibus, qui bonam mentem amant, & ea jam ætate quæ tu es, benè de Rep. literaria mereri cogitant. Nihil tamen his meis magnoperè fuisset opus, postquam ad vos, uti spero, jam salvus, ac sospes pervenit, ille æculi nostri Phoenix: quod cum dico, nihil puto addere opus, Hugonem me Grotium dicere, virum magnæ in patriam fidei, & quicquid est usquam mortaliū, multijuga doctrina supergressum. Et tamen

tamen temporum hoc diffidio, habet Batavia, qui alibi, quam apud se vivere Heroem malint. Scilicet caligant eorum oculi, ad lumen hoc, cujus radiis perstringuntur. Non committes, quin eum meo nomine salutes. Quod eò addo, quia volo te perducere in notitiam tanti viri: Oraculum hic habebis majus illo Delphico. Non tam facile, tu difficultatis quicquam reperiēs, quam ille exsolvet. Fœlix Hamburgum, cui nunc sol ille illuxit, fœlicius si fœlicitatem intelligat! Saltem capere debent, qui literarum studiis capiuntur. Sed ego nimirum, dum nonnihil me effundo in laudes ejus viri, arrogantiae crimen subeo, quasi existimem, satis cuiquam virium esse, ad tollendum illum, qui supra omnem laudem est. Parenti optimo, & doctissimo Mag. Joachimo Damke, item Clarissimo Frederico Tiliobrogæ salutem plurimam dices.

Amstelodami
clō Ioc xxxii.
vii. Id. Maias.

G. J. Vossius.

CLXX.

Arnoldo Comiti à Benthem.
Steinfurtum.

Illustris & Generosissime D. Comes,

ET sublime fastigium domus vestræ, & humilitas mea, prohibent me morem non gerere postulato ulli, quod in vestræ spem gratiæ possim: Nedum tam æquum, tam facile liceat detrectare. Etenim magnum semper fructum studiorum meorum esse existimavi, favorem virorum Principum consequi, imprimis talium, quos non cæcus amor, sed iudicium, & intellectus scientiarum, ad æstimandos Musarum cultores duceret. Itaq; vel sola hac de me opinione, necessitas mihi imponeretur, quicquid præstare in tanti Herois gratiâ possim, promptè suscipiendi. Accedit meritum quoque, cujus sæpè mihi memoria obversatur, quod ante annos duodeviginti, ab illustri, & generosissimâ domo vestrâ, ut Theologiam profiterer publicè, ad Steinfurtensè Gymnasium sum vocatus. Tanto magis elaborandum mihi intelligo, ut ne promptius commendasse ipse quemquam alumnorum tuorum videaris, quam ego ab Illustri adeo nomine, commendatos mihi suscepisse. Incitat etiam doctissimi Parentis, sed infœlicis, memoria, cujus causa adolescenti, quamdiu sibi ipsi curæ erit, non deero. Quamobrem sic existima, vel sponte me, &

hoc, & amplius velle. Solum rogo, sic persuasum habeas, non in minuto hoc solum; sed ubicumque tenues vires meæ navare utilem, Illustri homini tuo, ac generosissimæ familiæ universæ, operam poterunt, fore me semper

Amstelodami
clō Ioc xxxii.
Idib. Junii.

Devotissimum Illustri nomini vestro, & ad quodvis obsequium paratissimum,

G. J. Vossium.

CLXXI.

Philippo Paræo P. S.

JAM menses sunt duo, Cl. Paræe, cùm nostratium Typographorum uni dicerem, velle me, ubi nundinarum tempus instabit, quædam per eum ad te transmittere. Quod ego imprimis propter Ennium Columnæ dicebam, de quo amicum compellaram. Hodie jam eum, ante unam alteram hebdomadem discessisse intelligo, me penitus ignaro. Atque eo minus me convenisse, quia ad mercatum Francofurtensem, plenum sit periculis iter, ut nec sarcinas, nec res ulla, eò hinc advenire ausint. Etiam vereri, ne quid librorum ex Germania, aut saltem nonnisi maxima cum difficultate referre possint. Atque addebat Typographus, Amstelodamensis Janfonius Blau, absque eo fuisset, seipsum eo iterum fuisse, ut melius distraherentur libri, quos magno numero hac hyeme excudit. Quod si scribere ad te velim, id ipsa hac hora fieri oportere, quia ante vesperum nuntius esset abiturus; nec deinceps durantibus nundinis, scribendi occasionem fore. Ne igitur oblitus videar amicissimi viri, pauca hæc raptim malui exarare, quam penitus tacere. Ac primum de Columna meliorem esse occasionem expectandam. De Nonio certior fieri cupio; quando eum filius prælo subjicere cogitet. Velim enim priusquam ad notarum editionem sit devenum, quædam transmittere, quæ lucis aliquid, vel etiam medelæ, locis plusculis adferant. Et fortasse amicorum unum alterum, ad idem excitabo. Quod quæris de vocis Tropici significatione in sacramentis, cur eam non annotarim, in Oratoriis meis, causam accipe. Cum primum eas ederem, obtuli edendas Raphelengio. Sed is, quod ante nesciebam, Romanæ Ecclesiæ placita sequebatur. Eoque cùm dissertationem super hac contineri Oratoriis nostris intelligeret, gravatus fuit, opus hoc excudere,

excudere, quia negabat fore, ut in Brabantia, atque inter Pontificios, divendi liber posset. Resecui igitur, quæ ejusmodi forent, inque Commentationes transtuli Theologicas, in quibus fusè de hoc argumento tracto. Tuam vero de hac re opinionem probo, quam satis clarè, in Rhetoricis proponis, solidèque adstruis. Quamvis & Pontificii in hac locutione Tropum adnoscant, sed non signi, verùm materiæ. Cum enim nos dicamus Panem, vocari Corpus, quia signum est Corporis; illum Panem vocari aiunt, quod sit Corpus, quia ex Pane est conversum. Plura velim: sed ecce jam interpellor. Quare abrumpo, ne morer Tabellarium. Plurimam salutem eruditissimo à me filio dices. Vale egregie, ac Reverende Patre.

Amstelodami.
clo Idc xxxii.
Post. Non.
April.

Tuus totus, & tuorum,

G. J. Vossius.

CLXXII.

Gerardus Vossius Jo. Cordesio S. P.

Peccaturus eram, Clarissime vir, in humanitatem tuam, si diutius retinerem Schedas tuas. Sanè nisi subitè sapius occupationes ingruissent; non tam diu frustratus fuisset expectationem tuam, qui nostram prævenisti, in suppeditandis promptè adeo, quæ pro mea opinione, in Goteschalci causâ, faciebant. Equidem simulac negotia mea paulum expediero, decretum mihi (modo bona id tua venia fiat) in lucem dare, quæ in iis Epistolis, ad Hæretici illius historiam pertinent. Nec parum enim lucis adferent iis, quæ ante annos quatuordecim, de hac re scripsi, in septimo operis mei, de controversiis à Pelagio, & Massiliensibus motis. Tuum autem publicè beneficium profitebor, non quod ita, merito me tuo parem rependere gratiam existumem, sed ne videar ingratus. Vellem tibi, aliqua in re, utilis esse posset opera nostra: quod si posse existimes, ostendam, ne promptius te petisse, quam ego præstare videar.

Amstelodami.
clo Idc xxxii.
Kal. Sextilib.

CLXXIII.

Guilielmo, Episcopo Londinensi.

Reverendissime in Christo Pater, Dom. Illustriss.

Nolui hanc qualemcumque occasionem ad te scribendi omittere, quia & iniquum erat, quemquam certæ fidei sine meis Londinum literis venire, & raro eorum, quos norim, proficiscitur quisquam. Et tamen nihil magnopere quod scribam occurrit: nisi valere me, ac familiam universam: ac res Hebræorum florentissimo publice auditorio docere: quod non modo frequentem adolescentem ad magna nati, sed plurimi etiam viri Amplissimi, ac ut ætate & dignitate, ita virtute doctrinaque insignes. Ea res ut animos addit, juxta Poetæ illud, Excitat auditor studium: ita aliquid etiam incommodi secum trahit. Quanto enim plus in rebus Hebræorum, & temporibus iis, quæ Christum antecedunt, elaboro; tanto spissius ea procedunt, quæ ad Christianas Antiquitates pertinent. Si Deus mihi valetudinem & vitam diuturnam concesserit, spero me in utrisque operæ pretium facturum. Et jam distineor utrisque: Sed non ut prælo adhuc subjecerim, quod longe minoribus fervet. Puta Commentarii Linguae Latinæ: pars eorum est vel Historia rei Grammaticæ, vel excellentium Grammaticorum Censura: pars vero, origines complexa, fontes totius Linguae referat & recludit. Et comites erunt libri de Re Poetica. In quibus aliquid ausus sum post magnum Cæsarem Scaligerum. Sed utcumque in his, & aliis, non plane mihi, longeque minus mei amantibus displiceam: dicere tamen non possum, quàm mihi hoc doleat, quod inimici mei superioribus annis me ista magis tractare compulerint, quam unde longe amplius fructus ad Ecclesiam redundaret. Ut illa sunt quæ de Hebræorum & Christianorum rebus meditor quotidie. Nunc orationem inauguralem, ante aliquot menses à me habitam mitto: Non quasi dignam lectione tua existimem, sed quia nihil tam magnum, tam minutum à Vossio proficisci debet, quin tu Illustrissime Domine ejus particeps sis. Et hoc tantum vadimonio me obstringo, majora me tibi in posterum oblaturum. Vale.

Amsteloda. clo
Idc xxxii. Prid.
Id. Majas.

Reverendissimi & Illustrissimi
Nominis tui cultor devotissimus,

G. J. Vossius.

D d

CLXXIV.

CLXXIV.

S. P.

Quid hoc, summe vir, summe idem amice? Serione ambigere te, ecquid ejus nominis ac doctrinæ Scriptorum tuorum mittere mihi ausis? O quam mihi mens alia! nihil mei tam minutum, quod non ausim communicare. Quam vere id dicam, vel hinc vide. En tibi *ἀντίθεσις*, sed quale Diomedes Glauco: puta horæ unius dissertationunculam pro dissertationibus tot dierum: commune argumentum pro sacro: paucas pagellas pro pulchro volumine; ut alia ejus generis mittam. Sed tamen ne depudiisse me dicas, conditione ea mitto, ut ignoscas quod tanto inferiora tuis ausus sim mittere. Atque ut facilius hoc impetrem, non vereor addere, majora me destinare propediem divulganda: quæ nominarem nisi hærerem ambiguus unde potissimum velim auspicari. Quod si excurrere ad vos dabitur, de eo jucundum fuerit tecum consultare, disputationes tuas, quos miseris avidè legi, etli occupatior quam vellem. Argumentum pro temporibus nostris pene vetus. Sed video te sedulo observare illud antiquorum, *τὰ μὲν κοινὰ ἄνθρωποις, τὰ δὲ ἄρρητα τοῖς θεοῖς*. Nam & cautius multa ponis & solidius firmas. Ut de genio taceam, quo hæc tractas. Præsertim ubi res cum pontificiis, qua in Palæstra hodie dominaris. Testis tuus Catholicus orthodoxus, quem quoties in manus sumo, toties, quod discam, reperio. Hæc ut possis, multum quidem post Deum naturæ dotibus debes: sed enim non minor illa felicitas, quod, præter temporis nostri morem, sic veteres legeris Ecclesiæ doctores: quibus, quantopere ipse ab adolescentia capiar, coram aliquando me dicere commemini. Accedit, quod sic evolvas doctores eos, quibus se Romana tantopere jactat Ecclesia. Et hos, & priores illos multi è nostris ad partes advocant frequentes, qui, si verum dicere licet, satis in iis legendis sunt infrequentes. Nimirum neque adeo fungos putant se cæteros, ut non animadvertant, eosne, quorum labores adducunt, ipsi legerint, an ab aliis lectos memorent. Atqui ut eundem si arcum tendant Hercules & Iolaus, vel, si lubet puer hujus, utcunque neutrum cernas, eos ex telo misso discernas: ita cum eadem à duobus scribuntur, non operosum est dignoscere, ecquid ab scriptore dicatur, an exscriptore. Quanto autem magis in iis, quæ habemus, placuisti præ aliis multis, tanto avidius cætera, de quibus dicis, expectabo, ac præsertim illa in Genesin: unde auspicandum mihi, qui vestigiis Sul-

pitii Severi velim insistere, nempe novum munus à rebus ordior vetustissimis. Scis enim ut cum Civili doctrina mihi omne ævum sit emanandum. Quæ provincia cum latissimè pateat, maxime insistam rebus Hebræis, Græcis, ac Romanis. Nec dubito quin in eo facile tibi probaturus sum consilium meum, nam sola Hebræorum Historia incipit à mundi incunabulis: sola Prophetas auctores habet: sola, præter novi fœderis historiam, pietatem veræ Religionis docet. Sola etiam quater mille annos, vel, si ab Abrahamo ordiri visum, bis mille annos complectitur. Tantum enim est ad captam à Tito Hierosolymam: Hebræis, uti aiebam, proxime, quemadmodum apud vos soleo, subdam res Græcas & Romanas. Nec enim extra res Hebræas, ulla est Historiarum, quæ meliora, vel uberiora, prudentiæ, justitiæ, fortitudinis, aliarumque virtutum exempla præbeat, quàm Græca & Romana. Græcæque tanto fructuosior, quanto imperium Græciæ similis est nostro. Romanæ autem hæc gloria est, quod ea gens una circumtulit per totum pene orbem, & dominata sit annis amplius mille & ducentis, ac tot nostri temporis imperia enata sint è Romano. Ut vides, totius orbis historiam enarraturo in tribus hisce imperiis maximè pes erit figendus. Neque hæc opera nostra vobis Lugdunensibus incommodabit, sed commodabit magis. Nam deinceps ut ætate majores, ita majori etiam doctrina ac prudentia Academiam tum vestram tum exterarum accedent. Et quid melius his terris, quam cum neutiquam invidiæ sint Musarum fores, si non unis deinceps mœnibus sapientiæ studia concludantur, sed alibi etiam vigeant florentque. Me quidem consilii mei necdum pœnitet, præsertim qui, hactenus saltem, tam frequenti præstantium virorum doceam auditorio. Archiepiscopi Usserii labores vidi ac legi, & jam per literas ei gratias egi, quod tantæ dignitatis vir eruditos suos labores nomini dicavit nostro. Nam quod de Godschalco nonnihil dissentit, id minime me movet. Sunt illi summo viro causæ suæ, sunt item mihi meæ. Sufficit, quod uterque amplectamur Augustini sententiam. Nec tanti est, utrum eam sit affectus Godschalcus. Mihi sic secutus videtur, ut aliquantum excefferit. Atque hoc vidit Rabanus Maurus, magnus sane vir, vidit quoque Synodus Moguntina, quæ Godschalcum damnavit. At fuere in ea complures Augustinianæ sententiæ & intelligentes & retinentes. Nec unquam per omnia eum tueri ausus Remigius, vel qui Lugdunensis Ecclesiæ nomine scripserunt. Tantum conqueruntur, quod, ut exorbitarit Godschalcus, non

eo debuerit damnari sententia aliorum, qui se intra effata pomœriaque veritatis continent cum Hipponensi illo antistite. Quid multis? puto quæ de Godscalcio inedita in bibliothecis quibusdam asservantur, fidem faciant, me verissima dixisse: ea ubi accepero, faciam te certiore. Magnopere de eo gaudeo, quod de Salmasio scribis. Scis optime quanti eum virum semper fecerim. Sane non alius est in Belgica, qui toties scriptis suis eum celebravit, jam ab annis aliquot, præsertim opere de Historicis tum Græcis tum Latinis: optarim tantum doctrinæ communi illi amico nostro, qui foedè adeo eum depreffit. Mihi simulac pedem his in terris posuerit, animus est uti illo amico ac familiari. Quod communi, ut spero, bono fiet, saltem meo & publico. De Aurelii excessu nihil hæcenus inaudieram. Valde de eo doleo, ob veterem studiorum conjunctionem, de transmissio ejus Jobo maximas gratias ago. Exemplar alterum ad Senatorem Casimbrotium mittam. Nec enim in Batavia quemquam illo ac me habuit conjunctionem. Ac jam ab annis prope XL. triga quasi amicorum fuimus. Si viduæ vel ipse, vel conjux tua rescripserit, gratias ei meo ages nomine, atque adeo & Casimbrotii. Id enim eum scio velle. Qui, nisi celerius, quam optasset, Jobum Lugduno remisissimus, suis cum sumptibus hic edere decrêrat. Facile cogitare potes quàm id gratum accidisset Aurelio nostro. Sed id ego demum cognovi, postquam jam in itinere erat Molinæus per quem exemplar remisimus. Sane ut cætera mittam, typi, si hic editus foret, non paulo essent venustiores. Vale vir præstantissime, tuarumque virtutum cultorem perpetuum in posterum quoque ama. Uxori salutem.

Amstelodami. Tuus sine fūco more majorum,

G. J. Vossius.

CLXXV.

Vir Illustrissime,

Nihil mihi gratum æque accidere potuit, quam quod cognovi tanti me ab illustrissimo Skytio fieri, ut ex parte mei quoque causa filium suum in Bataviam dimitteret. Certe non injuria de tanti viri opinione triumphari mihi posse videor, cujus æstimatio eo apud me major, quod non cæco amore studia, aut eorum cultores prosequatur, sed ipse non levem quoque hic gloriam vindicare

sibi possit. Equidem inhumanitatis merito damner, si obsequi viro summo recusem. Nihilominus duram necessitatis legem esse ipse nosti: obstant hinc ædium angustia, inde conjugis gravis semper valetudo, & numerosa familia: ea tamen omnia pensare & studia generosi juvenis, ubicunque potero, juvare decretum, movet me non parentis solum, non tua tantum (quam semper feci maximi) commendatio, sed & desiderium operam utilem navandi illi, qui quondam Sueciæ regno, qua opera, qua consiliis prodesse poterit. Faveo genti illi, & si quisquam, certe ego addictus fui, cui nihil magis in votis, quam ut magni Gustavi grandia molimina secundare supremum numen velit: ipse humilibus Deum precibus, pro eo rogare nunquam desinam. Tibi interea vir illustris, omnem animi cultum & ubi servire tuis commodis potero, obsequium, & nunc, & in perpetuum offerre non supersebo. Vale.

Amstelodami.

*Illustris nominis tui devotus
cultor,*

G. J. Vossius.

CLXXVI.

Justo Reifenbergio. S. P.

AMO te, mi Reifenbergi, ob communem patriam: magis tamen ob niveum pectus, & egregiam eruditionem ac facundiam, quæ abunde elucet ex orationibus nuper editis, quarum ad me specimen transmisseras. Respondere tum neglexi, partim adversâ meorum valetudine detentus, partim occupationibus multis. Postea etiam iter meum in Angliam accessit. Redux jam orationes omnes editas comperi. Ac priori specimine allectus etiam cæteras legi. Profecto non est quod judicium virorum præstantium reformides, nugatorculos vero contemnes. Scis illos qui divulgant aliquid, non intelligentes solum habere censores, sed etiam fungos, instar eorum qui ædificant in totius populi conspectu. Nostri interea nihil prodiit, præter Oratorias longe auctiores & limatiores. Nempe subsecivis temporibus, lubens in omnibus meis hoc facere soleo, ut quæ prius fugerant corrigam, quæ deerant suppleam. Qui has literas tradit, est Guilhelmus Simonius J. C. ac Regii apud Suecos judicii in Livonia, Carelia, & Ingria adfessor, vir optimus ac doctissimus, ac filius ejus Simonii

qui Eloquentiæ professor magna cum laude fuit, prius in Rostochiensis, posteaque in Upsalensis Academia. Hoc nomine etiam tibi gratiorem fore arbitror, qui ipse Eloquentiæ studio egregium jam nomen parasti. Amstelodamum me commigrasse, fortasse jam aliunde intellexeris. Consilii hujus causas perscriberem: sed vix illa subito in chartam licuit conjicere. Nam Simonius noster uti hodie Lugduno venit, ita confestim Frisiam cogitat, ut præstantes Franckeranæ ac Groningensis Academiae animas videat coram. Et in his te, mi Reisenbergi, spero alias fusiustecum per literas colloquar, interim me amare perge, peramantem tui: sive salve ab eo qui perseverabit esse amicus, imo & cultor nominis tui.

Amstelodami.

CLXXVII.

Præillustri ac generosissimo, D. Joanni Skytte, Ger. Jo. Vossius S. P. D.

Illustrissime Domine,

Si gratulor mihi ipsi, quod tanta studiorum meorum apud te æstimatio sit, merito certè faciam. Ut enim mittam honorem summum, qui ea re mihi tenuis conditionis homini à tam illustri viro contingit: Quanti me facere existimas vel solam opinionem ejus qui de eruditione omni accuratè adeò judicium ferre possit? Nec satis visum fuit si tuis ostenderes literis, quam benignè de me censes, hoc est, ut ego interpretor, plane supra meritum meum: documentum etiam addere voluisti, quo non certius aliud optare unquam potuissim: quippe qui filium mihi commendes tuum. Equidem qui parentum in liberos affectum ex meo facile metiri valeo, planè nefas duxerim dubitare, quin & tibi supra omnes gazas carissima tua pignora sunt. Præsertim qui non ad propagandam solum familiam ea genueris: sed in spem etiam publicas Sueciæ res administrandi. Unde duplex meritò tibi cura, ut & tanto parente, & dignitatibus summis digna sint. Mittis autem filium ea ætate, quæ maxime idonea est, ut sapiendi dicendique scientiis imbuatur. Atque ego quidem jam brevi hac consuetudine satis perspexi, animum ejus nihil minus esse quam degenerem, sed potius ad honestissima quæque mirificè accensum: ita ut nihil mediocre deinceps ab eo expectare debeamus. De affectu vero erga illum meo atque opera, vir illustrissime, quid ad-

dam? Sueciæ regnum florentissimum, cui votis meis semper favi, hortatur me, ut, quam optime possim, mereri de illo velim, qui quondam perutilem patriæ sit operam navaturus. Movet tua, vir illustrissime, commendatio, cui non obsequi nefas duxerim. Admonet denique ad maxima quæque erectus generosus adolescentis animus: quales ut magni semper feci, ita in illustri adeo loco natis admirari etiam soleo. Itaque nihil plane est, quod de studio hic meo dubitare possis. Ego ubicunque illum discendi invenerim cupidum, instruendi labore non fatigabor. Ut saltem hac ratione, quando alia necdum datum est, servire Sueciæ, & tuis, vir illustrissime, commodis possim, cui obstrictum me & nunc, & deinceps semper, pro humanitate hac fatebor.

Amstelodami.

CLXXVIII.

Isaaco Basirio.

Ornatissime Basiri,

Si oblivione tui longo adeo tempore scribere me distulisse existimas, injuriam facis constantiæ meæ; si negligentia, occupationes meas ignoras. Quæ certè majores sunt quam verbis exprimere ullis possim, & sæpe quo me vertam nescio, à mane ad vespertinum modo amici, modo exteri interpellant, modo eorum literis obruor, ut cui respondere, quem differam, vix ipse certus sim. Et sic mihi sæpe non dies, non hebdomadae, sed integri quoque menses abeunt, ita ut destinata perficere, licet invitatus, prohibear. Jamdudum quippe rescribere tibi decreveram: affectus siquidem in te meus nunquam minor est, atque antehac fuit. Quemadmodum enim non facile amore prosequi soleo, nisi quos dignos existimo, ita quoque ubi semel amare quemquam coepi, non desultorius meus affectus est. Te ut dignum amore complexus fui non perfunctorio, ob ingenii tui felicitatem, neque minorem ingenio eruditionem: Unde nihil vulgare expectabam. Publicè quoque ea opinione dignissimum te satis ostendisti, quæ disputationibus, quæ aliis in Academia nostra exercitiis; eoque ego, cum rarè egregia ingenia ad virtutem animum adpellere videamus, te quod supra vulgum sapieres, semper feci maximi. Qua in sententia si perseveraveris, ut summis viris te commendabis, ita magnis quoque passibus amorem meum auctum ibis. Nec dubi-

dubitare possum, quin & talis persistas, qualem te ante cognovi: vix enim mihi persuadere possum, eum qui in adolescentia sua ad magna summis viribus contendit, nunc firmato quoque cum ætate iudicio, degenerem fore. Si itaque vera auguror, est quod gratulari & tibi possum & mihi: tibi quod collatis à natura dotibus, bene utaris; mihi quod non temere te æstimavi. Perge modo & nullis parce laboribus. Sic tandem sæculi nostri lumen evades. Sine illis consequi ægrè datur, & ubi affectus fueris, gloriosum est. Audi ingentem illum Demosthenem. Καλὸν μὲρ, inquit, καὶ διὰ, πῶς ἔγωγε ἐν τοῖς ἀνθρώποις ἀνυμνῶμαι, πολλὸν δὲ κέρδιον διὰ τὸ ἐπιμύλειαν τῷ αὐτῷ μὲν δὲ οὐδὲν ἀμείνων γένεσθαι. Tu si velis, potes: at velle & posse, satis ante ostendisti: itaque adhortari diutius nolo, ne de studio tuo diffidere videar. Quod minime facere me patitur ardor summus ad honestissima quæque quem ante in te perspexi. Quin & non vana me sperasse, ex compluribus intelligo, qui egregiam mihi virtutem tuam prædicant. Me nunc Amstelodami vivere, aliunde credo cognoveris. Nimirum urbis ejus procures luculento me stipendio vocarunt, ad Historiam ac Politicam publice profitendam, in illustri Gymnasio. Cujus mihi pulchrum erit fundamenta jacere, uti & Collegarum aliis, quos partim jam vocarunt, partim vocare decreverunt. Plus quoque hic otii spero ad consignanda ea, quibus & de hoc & venturis seculis bene mereri possim. Nec minus interea amicis in tam potenti urbe utilis fuero. Quod si qua in re prodesse etiam tibi, mi Basiri, possum, nusquam operam desiderabis meam. Tu tantum quid exoptes, significa. Imo ut nihil istiusmodi occurrat, literis tamen compellare ne intermitte, quas mihi gratissimas semper futuras spondeo. Vale.

Amstelodami, vii.
Kal. Quintil.

Tibi addictissimus,

G. J. Vossius.

CLXXIX.

Ornatissime Brouneri,

NE diutius eludam expectationem tuam, etsi occupatissimus, mitto tandem, quem petieras, Indicem omnium eorum, quæ continentur Politicis Justii Lipsii. Summi sane viri, cujus de civili prudentia libros initiis istius studii tui Civilis maxime accommodatos existimavi, idque non solum ob breviter atque ordinem, sed etiam ob tot

laudabilia dicta, ex quibus, sedula instar apis, suum hoc mellificium confecit. Tuum nunc erit sæpius eos lectitare, quò tot aurez sententiæ penitus animo inhæreant. Illustriores etiam γράμματα & exempla præclara, quæ legendo deinceps observabis, vel ad oram, vel charta inserta, è regione suo quoque loco annotabis. Ità deinceps sua sponte oculis se offeret tuis, quicquid variè adeo dispersum repereris. Simul dum quæque memorabilia chartæ inscribes, etiam animo inscribes. De cæteris coram colloquemur à feriis nostris. Vale, & sapiendi dicendique studia sociare perge. Ita tuis eris voluptati, & uberes aliquando ex te fructus capiet Respublica.

Tuus,

G. J. Vossius.

CLXXX.

Jo. Skyttio, Seniori.

Illustris Domine,

ÆGrè me à filio tuo divelli nullus mirabitur, cui ita atque mihi ejus mores atque indoles introspectæ sint. Quippe dignissimum eum illustri adèd parente, dignissimum tua commendatione comperi. Est in eo erectus ad honestissima quæque animus: est doctrina, iudiciumque supra ætatem; uti & cætera omnia longe supra hominum vulgus. Accedit, quam in eo summam animadverti, doctorum virorum æstimatio. Equidem felicem, illustris domine, qui non modo ad tantum virtutum, tantum dignitatis fastigium perveneris; verum & liberos expectationis non minoris generis. Felicem, dum te, illustrissime Domine, fruitur, Sueciam; felicem expectatione liberorum tuorum. Ego quidem haud secus quàm aquileges ex vapore ascendente aquas latere conjectant, ita ex generosi filii tui indole maxima quæque præfagio. Et qui alius esse possit? Illo parente natus, & inspectorem ejusmodi habens, qualis est D. Simonius, in quo si magna est eruditio, majus atque acre iudicium relucet; si iudicium exactum est, probitas morum, vitæque integritas multò maxima est. Verissimè dico, plus in recessu habere eum, quàm in fronte promittit: & paucis ut absolvam, est, quicum lucere in tenebris, ut vulgò dicunt, possis. Quò magis tuam, illustris domine, prudentiam admiror, qui cautè ac circumspectè adèd hac in

re procefferis. Nihil enim æquè in lubrico quam adolescentia est. Et quæ semel haufit, firmiter retinet. Quamobrem nulli prudentius agunt, quam qui viris indubitata ut probitatis, ita prudentiæ ac eruditionis liberos suos commendant. Te, illustrissime vir, cuncta hæc in Simonio habere, etiam si negare vellem, tamen tacitè mecum crederem. Itaque dignus ille filio tuo, dignusque illo filius tuus. Qui si tales porro duces habeat, erit quondam quò se jactare Suecorum universum regnum possit. Ego pro viribus meis, pro exiguo adeo tempore quo apud nos moratus est, quod potui feci, majora si occasio tulisset præstiturus. Quæ si unquam detur, ostendam me paratum ubique navare operam illustri familiæ Skyttianæ, illi nimirum dico, quæ Sueciæ regno ceu felix ali-quod astrum, illuxit. Te interea, illustris domine, ut diu supremum numen servare sospitem velit, unice rogo. Quo non regni tantum publica commoda, sed etiam studia, (quamvis & illa non levem regnis utilitatem adferant) quæ passim jam aliis in gentibus vilesunt, in Sueciæ Regno, tuo beneficio as-furgere, uti coeperunt, possint. Et Te, uti Suecorum gentes ob impensam Regno ope-ram mirabuntur ac colent, ita perpetuis & nunquam intermorituris monumentis uni-versa literaria Respublica posteritati commen-datum eat. Ita sane voveo atque auguror. Vale.

Amstelodami.

*Illustrissimi nominis tui cultor
devotus,*

G. J. Vossius.

CLXXXI.

Erycio Puteano, S. P.

Vellem, Amplissime Puteane, quoties aut res meæ ferunt, scribendi ad te occasio daretur, aut quoties occasio datur, res meæ ferrent. Sed sæpe contingit, ut, me occupato, nuntii veniant, sæpe ut otiosus nuntios desiderem. Hinc fit, ut rarius, quam pro voluntate mea, ad te scribam. Nam quoties ad animum occurrit antiqua illa, & ætate nostri utriusque coalita amicitia, dicere nequeo, quam te alloqui desiderem, cujus amorem erga me semper sum exosculatus, ac cujus eruditionem & dotes alias quo magis considero, impensius miror. Hinc sæpe fit, ut etiam materia atque argumento destitutus, tamen confabulari tecum & jucundam veteris

nostræ consuetudinis memoriam recolere cupiam. Ita igitur prompto, commodum scribendi occasio offertur, eunte ad vos necessario ac propinquo meo Joanne Computio, filio affinis mei, Amplissimi viri Jacobi Computii, ante in Procerum Dordrechtanorum ac nuper in præfectorum rei maritimæ Collegium Roterodami adlecti, olim sub Orydrio ac Rekenario condiscipuli utriusque nostri. Putarunt cordatissimus is parens & ornatissimus ejus filius (qui per Brabantiam in Gallias tendit, eaque occasione Lovanium vestrum & excellentes ejus viros conspiciere exoptat, aliaque quæ urbs habet imprimis memorabilia) non aliunde posse melius de omnibus cognosci, quam ex te, neque te consilio solum, sed si opus sit, etiam commendatione posse adjuvare: itaque licet, propemodum nihil scriptione dignum haberem, nedum satis grave interpellandis occupationibus tuis committere tamen nolui, quin & tu memorem me amicitiae nostræ, & illi, quibus optime velle debeo, facilem me amicis viderent. Sed, quod pene omiseram, ut nostram quoque rem gnarus sis, opus nostrum Grammaticarum exercitationum, quod ante annos xxx. & amplius scribere orsi eramus, tandem prælo subijci coepit. Filius meus Dionysius, cui nihil ab longo tempore jucundius & exoptatius contigit literis tuis, & iis, quas eodem tempore ab doctissimo Tuldeno accepit, Latine reddidit annales Belgicas Reidani. Quæ tractatio cum à magnatum multis admodum expeteretur, hac ipsa hebdomade excudi coepit Lugduni. Atque eidem decretum, Cæsarem, scriptorem sibi perfamiliarem, plurimis locis à se castigatum, ac notis illustratum, edere in lucem. Eam ad rem usus est uno alteroque Manuscripto, & editionibus vetustis, ut de variantibus Fulvii & aliorum lectionibus nihil dicam. Sed enim impense desiderat plurium Manuscriptorum copiam, & jam aliquorum ei spes facta. Non dubito, quin apud vos qua publicis, qua privatis Bibliothecis inveniuntur. Quocirca si unum alterum calamo exaratum exemplar Cæsaris nanciſci, ac transmittere ad nos possis, sanctè spondeo, optimâ fide redditum iri. Sin mittere huc non sinatur, proximum est, ut per Adolescentem quempiam conferri cures: modo tanti codices illi videantur Sumptus. uti æquum, refundam. Horum alterum si consequi filius possit, obstringes non illum modo, sed me quoque, qui quicquid liberis meis fit, mihi præstitum existimo. Vale Amplissime vir.

Amstelodami.

*Tuus,
G. J. Vossius,
LCXXXII.*

CLXXXII.

Hugoni Grotio S. P. Hamburgum.

Hæce qui literas tradit, est Joannes Ludovicus Wolzogen, liber Baro in Nieuhausen, Aultriacus, qui septennio exulavit, priori quinquennio in Polonia, cætero biennio Amersforti. Vir & virtute doctrinaque egregius, eoque nomine bonis omnibus carus. Mathesi se totum pene dederat; sed nusquam solatium præterquam in sacris literis invenit. Cum familia in Germaniam nunc revertitur. Nec ei quicquam volupe adeo, quam si Hamburgum transiens, occasionem habeat compellendi tui, quem facile intelligit doctrinarum Principatum tenere, & documentum esse virtutis constantis licet infelicitis, nunc tamen ut speramus, malaciam post tantas tempestates promittentis. Spem eam præbent Suecorum Regis virtus, & felicitas, & magnus erga te affectus, ut si Principi extero addicere operam debeas tuam, sanè non alteri illam melius in Germania præstare possis. Sed fiet hoc non sine multorum dolore, qui & tibi, & patriæ optimè volunt,his, & nonnullis qui si non optimè, saltem nec malè velint, cre..... mihi dissertatio, de postremo hoc discessu tuo: quem apertè improbare non verentur. Plerique etiam, quod cum is sit Reipublicæ nostræ status, credideris hic posse te sedem figere, absque illorum probatione qui ad clavum sederent. Negare soleo eos intelligere, quo animo veneris aut abieris. Jam annos effluxisse tam multos, optimam ætatis partem, quò Patria careas: Effluxisse simul, tot bonas occasiones quibus optimè potueris consulere, & tibi, & familiæ tuæ. Iniquum poscerent, ut ulterius differri eas velint. Nam quousque tandem? An in effectam senectutem, idque in hoc vitæ incerto? Venisse igitur te, ut Patria, si vellet, opera tua uteretur, potius quam exteri Principes. Hanc illa ...ac deinceps damnum quod inde sentiat, non tibi, sed sibi imputetur qui hac etiam parte fungi volueris officio optimi civis. Tantum opus est salutari *ἀμνηστία*. Si non ferat præsens status, ut publico fanciatur decreto, saltem ferre, ut conniveatur in iis, quæ cum dispendio Reipublicæ, & libertatis constituta. Vel si nec illud quidem ferat, alibi quam hic te malle vivere. Nec vi...verti oportere, si ita credideris, cùm id longè à Patria agenti perscripserint, qui hic agerent. Si quid igitur temerè speratum, culpam esse eorum, qui aliter statum hujus Reipublicæ tibi depinxerunt. Sed ut ista, & multa illiusmodi, quæ longum sit adscribere, bellè dicantur à me, tum etiam vere:

tamen & mea, & aliorum me prudentiorum in eo perstat opinio, antequam operam extero Principi promittas, cognoscendum, an non bona cum venia vivere apud nos possis. Nihil volunt posci, quod sapiat ...nem culpæ quæ cares; Imo ne quidem tentari aliquid, antequam satis sit perspectum fore, ut impetretur quod petitur. Eoque ante cæteros, nos certissimos esse debere, de propensissima voluntate *τὸ ποιεῖν λαῶν*. Quæro mihi veniam dà, mea anima, si exposcam, ne ullis injuriis te abripi sinas, ab eo quod tibi, Patriæque & utile, & honorificum imprimis fuerit; interea utrumque hoc facere non desinam, & causam tuebor quod virtuti debeo tuæ, & amoris nostro: Et Deum simul precabor, ut salubria tibi consilia inspiret, pristinamque animi lenitatem, quam propriam hæcenus, tot injuriis pressus, possediti, deinceps etiam conservas. Ex ædibus Georgii Doubletii, tui valdè ut debet æstimantis, qui & salutem adscribi iussit. Salutem uxori ac filio.

xxv. Augusti,
clbcccxxxii.

Tuis,

Dum spiritus hos reget artus.

CLXXXIII.

Hugoni Grotio S. P. Hamburgum.

ME nec filere æquum puto, nec longas dare literas opus, eunte ad te Heroïna dimidio tui; quæ curatius cognoscenda cuncta expediet, quam per literas ego facturum essem. De rebus tuis nihil æquè scripto opus, quam summos, & viros, & amicos eandem retinere sententiam: nimirum rectè facturum te, si Proceres scripto compelles, sedem ut tibi in Batavia dent. Sed facillè assentiant; id antequam fiat, videndum, an Princeps fidem dare velit, effectum se daturum, quantum in se sit, ne repulsum feramus. Alioqui illè si impromptior, o quanto satius fiderit, ut opera utatur tua magnus Suecorum Rex, vel alius Principum Europæ: dummodo ne unus ille quem dicere non sustineo. De quo quid fieret, valde metuo, ne unus ille dies magnorum esset malorum causa. Non possum plura scribere, quia ad hoc usque tempus me Isaacius Pontanus distinuit, vir tui amantissimus; & jam ex famula mea intelligo, tuum abitum parare, quam & salutare, & has literas tradere coram volo.

Amstelodami.
clbcccxxxii.

LXXXIV.

CLXXXIV.

Hugoni Grotio S. P. Hamburgum.

Jucundissimum fuit de prospera valetudine tua cognoscere, ex optima, & cordatissima tua uxore: quæ salva, ac sospes huc venit; & hinc Hagam abiit nudiustertius, pridie nempe non. Octobr. Die uno altero ante eodem ierant, Vlamingius, Bickerus, & hujus urbis Procerum alii, audituri Legatos hostilis Belgiæ de Pacis conditionibus. Accepi his diebus literas Merici Casauboni tibi inscriptas, quas mitto. Lamerius jam dudum à me habet tuum pro veritate Christiana codicem, in quo plucula, & correxeras, & addideras, & jam majusculis excudere literis coepit. Commentariorum meorum de arte Grammatica, primus jam liber est excusus, & penè secundus. In Reidano vero, quem Latinè reddidit filius Dionysius, nono nunc libro fervet prælum. Hæc paucula nunc scribenda putavi, eunte ad vos optimo, & ornatissimo viro, Matthio Ecclesiaste inter Remonstrantes; qui Hamburgum proficiscitur, ducturus ibi uxorem, cum maximis opibus.

Amstelodami,
cId Idc xxxii.
Post. Non.
Octobr.

Tuus totus,

G. J. Vossius.

CLXXXV.

Simoni Bellimontio.

ETSI non nescirem, Amplissime Bellimonti, quantæ occupationes te, cum alias semper, tum hoc imprimis tempore, distineant: Non eas tamen veritus sum, interpellare. Novit me hic, quem vides, Manasses Ben-Israel, vir doctus, & probus, utinam Christianus. Sed quamvis Judæorum nobis plerumque infestius genus est; hic tamen non paulò nobis benevolentior; Imo ut multum commodare Christianis potest, sic etiam cupit: Itaque hoc nomine nonnulla etiam invidiâ laborat apud suos. At tanto mihi gratior, qui eo utor penè familiariter; magis etiam filius Dionysius, non sine emolumento literarum Hebræarum, quamvis jam ab sexennio, ut nostis, studiosus fuit. Porro cum Vir is intellexisset, mihi quoque aliquem in amicitia tua locum; rogare non dubitavit, ut significare tibi vellem, quid de se

mihi videretur. Id solum scire te volui; nec ultra distinebo. Salutem uxori, & familiæ plurimam.

Amstelodami.
cId Idc xxxii.
Post. Id.
Novembr.

Tuus totus,

G. J. Vossius.

CLXXXVI.

Guilielmo Episcopo Londinensi.

Reverendissime in Christo Pater, Domine Illustissime,

QUAS ad me dederas literas, duobus post mensibus accepi, & jam prope tantundem temporis effluxit, ex quo mihi reddita fuerunt. Nimirum quia petieras; ut plenius aliquanto sententiam meam de Godschalciana Controversiâ exponerem: expectandum putavi, usque dum quædam hæcenus inedita ad hoc negotium pertinentia ex Galliæ Bibliothecis accepissem, & cum curâ legissem. Utrumque nunc feci sedulo: sed sic quoque perstat animus in iis, quæ ea de re ante annos xiv. complexus sum Historia de Pelagio & aliis, qui litem de gratia & libero arbitrio moverunt. Qui verò hac parte à nobis dissentiant, quod pace summorum virorum dixerim, non satis mihi attendere videntur, quinduplicem, olim de Gratia ac Prædestinatione sententiam fuisse. Media in his communis illa Patrum priorum, ipsiusque etiam Augustini, priusquam cum Pelagio certamen susciperet. Hæc ut res docet, & Augustinus passim contendit, non comitantis modo in subsequenti, sed prævenientis etiam Gratia necessitatem ferebatur. Circum hanc sententiam quatuor sunt diversæ: duæ extremæ, & totidem inter extremam mediamque interjectæ. Extrema una Pelagii fuit, qui sic arbitrium hominis extollebat, ut necessitatem Gratia negaret. Altera erat Prædestinationariorum, qui sic Gratiam prædicarent, ut non esset libero arbitrio, eoque nec monitis aut poenis locus. Inter extremam Pelagii, & mediam Catholicorum veterum interjecta fuit opinio Genuensium, & Gallorum quorundam, præcipuè Massiliensium: qui putabant non posse nos sine gratia salutis negotium perficere; posse tamen illud absque gratia incipere. A Pelagio igitur hæcenus abstant, quod gratiam esse necessariam agnoscerent; at in eo conveniebant, quod non necesse sit nos à gratia præveniri: unde hi reliquæ Pelagii, vel etiam Semipelagiani sunt vocati. Inter extremam Prædestinationariorum &

& mediam veterum Catholicorum erat illa B. Augustini, qui cum Patrum prioribus agnoscebat gratiæ prævenientis necessitatem: sed ut eam fortius tueretur, illud super addebat, fluere hanc ab absoluto salvandi decreto. Hac de Augustini lacinia quadruplex fuisse olim iudicium invenio. Nam ut de Pelagianis & Semipelagianis nihil dicam, etiam Catholicorum nonnulli, qui in cæteris assentirent Augustino, hoc caput, ut novum, falsum, periculosum respuebant; ut liquet ex Epistolis Prosperi & Hilarii ad Augustinum. Alii damnare non audebant, sed tamen putabant vel plane incertum, ac potius reticendum, quia multi adeo eo offendeantur: vel saltem non planè certum, de quo idcirco modeste inter eruditos posset disquiri. De priori liquet, ex iisdem Epistolis. Ad posterius fortasse referre illud liceat, quod Coelestinus Papa scribit extremo capite eorum quæ ad Galliæ Episcopos de Dei Gratia misit: *Profundiores difficilioreque partes incurrentium questionum, quas latinus pertractavit, qui Hæretici resistunt, SICUT NON AUDEMUS CONTEMNERE, ITA NON NECESSE HABEMUS ADSTRUERE.* Quia ad confitendam gratiam Dei SATIS SUFFICERE CREDIMUS, quicquid secundum prædictas regulas Apostolicæ sedis nos scripta docuerunt. Tertium genus, caput illud Augustini strenuè asserbat: sed ita asserbat, ut arbitrii libertas, Monitorumque & Correctionis utilitas non everteretur; nec cum priorum Patrum doctrina pugnaret. In his B. Prosperum Principem reponimus, præclaraque etiam opera Scriptoris de Vocatione Gentium. Denique aliqui solum attendere, quæ B. Augustinus de Gratia à Scripturis attulisset, & quomodo ea esset interpretatus, ac durissima quæque optuma putare, nec laborare quicquam, quid ex iisdem Scripturis pro libertate Arbitrii doceret, aut quid de Gratia priores statuissent: unde aliud consequi non poterat, quam ut sic Augustinum intelligerent, ut secum & cum Antiquis pugnaret, nec gratia libertatem arbitrii perficeret, sed tolleretur, nec correctionum ulla esset utilitas, sed inane nomen. Ex hisce, qui ut Scripturas, ita Augustinum perperam interpretarentur, proque errore suo eorum abuterentur verbis, Godschalcum Monachum fuisse, Rabani Mauri, totiusque Moguntinæ Synodi, iudicium fuit. Cui nos ante annos plures, in Historia nostra de gratiæ & liberi arbitrii controversia subscripsimus: multoque nunc minus sententiam nostram mutare possumus, postquam nacti sumus ea, quæ hac de re ipse scripsit Rabanus. Sic igitur statuimus, Godschalcum hunc non per calumniam dici Prædestinatio-

num, uti illi qui Augustini sententiam amplecterentur, eoque nomine à Pelagianis & Semipelagianis vocabantur: sed jure meritoque sic appellari: ut qui verbis Scripturæ & B. Augustini male intellectis, male etiam senserit, & docuerit de Gratia & Prædestinatione. Diffidet tamen hac parte à nobis vir summæ Pietatis, Doctrinæ ac Dignitatis; qui nullos censet fuisse Prædestinatos. Quotquot enim sic vocati, per calumniam ita nominatos, ab iis qui Augustini sententiam rejicerent: Mihi vero graves causæ, cur dissentiam. Quas, quia fufius paulo hanc rem tractare malim, dissertatiuncula complectar, quam proximis literis transmittam. Idem maximus Vir improbat quod scripserim, jam Augustini ævo fuisse, qui verbis ejus malè intellectis in ipsum adeo inciderint errorem. Sed neque hic video, cur resiliere debeam ab opinione ea. Quæ me moveant consignavi, eaque ad te nunc mitto, ut tui, Reverendissime Pater, iudicii faciam. Cui quod displiceat, id me placere possit Auctori suo. Vellem alteram, de qua dixi, dissertatiunculam, & majoris illam, quam hæc, momenti, comitem ei nunc addere potuissim. Sed quandoquidem ea nunc est anni pars, qua munere publico maxime distringor, & in disquisitione illa quædam occurrerunt, ubi necesse sit plures e mediis ævi scriptoribus ad partes advocari, quo solidius singula firmentur: facile veniam dabis, si id hoc tempore non fecerim. Exercitationes nostræ Grammaticæ, opus novantiquum, jam ab aliquot mensibus excudi cœpit. Et strenuè proceditur, me admodum lubente, qui majora scire exposci. Et quantum possum, animum ad Ecclesiæ veteris Historiam, ab istis non dico difficilibus nugis, attamen levioribus, ac vere pedissequis revoco. Filius meus Dionysius, alter eorum, quos in Anglicano itinere Comites adsumseram, ante hebdomadas aliquot transferre ex Hebræo cœpit Rabbi Moseh Maimonidis dissertationem de Idololatriæ exordiis, & progressu. Auctor ille est, de quo Hebræi vulgatum illud dicere solent, à Mose usque ad Mosen non fuisse similem Mose. Argumentum fecundum, & in quo Notas plures addendo, varia ostendi eruditio possit. Laborem suum hunc, si gratum erit, Illustrissimo inscribere nomini tuo filius decrevit. Ut eum non tanquam signum grati erga te, Reverendissime Pater, animi habeas; sed oblidem & vadem eorum, quæ ego tibi debeo, & si Deus vitam concesserit, perfecturum me spero. Existimat intra quartum aut circiter mensem se consummatum, & duobus aut circiter mensibus editum iri. Citius posset, nisi jam præsum ferveret excudendo translationem

ejus Annalium Belgicorum Reidani, quos pure, & ad veterum formam Latine reddidit. Jamque ex Libris XVIII. priores duodecim exculi. Hac etiam Hebdomade prælo subiciet geminum Panegyricum dicatum Arau-
fionentium Principi, post luculentas aded Victorias Hagham Comitibus reverso. Unus Prosâ scriptus, alter Carmine. Nec ego hæc omnia, in lucem ea ætate (vix annum egressus vigesimum) edere eum permetterem, nisi istiusmodi fore considerem, ut etiam literarum principibus probarentur. Hæc ego aliquanto apertius non gloriæ aut jactationis studio, vel nimio meorum amore; sed quia scirem, ea jucundum esse tibi cognoscere, Illustrissime Pater, qui tanto & me amore complecteris, & meos. Sed ego, Illustrissime Domine, videar mihi oblitus mihi, cui scribam, & quam occupato. Quamobrem finio, more meo, cum voto ut diu te Opt. Max. Magno Carolo, diu Britanniarum Regno, diu Ecclesiæ suæ, diu denique mihi incolumem fervet, qui si privati apud te in censum veniam, debitorum tibi omnium maximum me esse, & fateri debeo, & lætor.

Amstelodami.
c10 loc xxxii.
vi. Kal. Dec.

*Reverendissimo & Illustrissimo
nomini tuo obstrictissimus,*

G. J. Vossius.

CLXXXVII.

Simoni Bellimontio. *V. Cl. Ger. Jo.
Vossius S. P. D.*

AUT ego nimium amicis abundo, Amplissime Vir, aut alii iisdem egent. Sane eò me jam pervenisse video, ut Commendator jure appellari possim: Tu fortasse Importuni addes vocabulum. Certe si sic vocare voles, injuriam mihi fieri ne ipse quidem dixerim; quippe gnarus, quæ occupationes distingere te etiam ante soleant, quanto nunc magis, postquam arduum pacis negotium, distingere cepit Belgicæ Proceres, in quibus tam illustri es loco. Sed audeo nihilominus curis, quibus ista nunc libras, inferere me; qua fiducia scis, & sæpius dixi; nimirum amoris tui. Nunc iterum commendo, quodammodo quidem rogatu alieno, sed magis sponte mea. Non dicerem id, nisi dignum tua gratia putarem, pro quo loquor, Erycium Puteanum, Virum Doctissimum, disertum etiam, & elegantis Ingenii; ut ipse non ignoras: probum & candidum, ego imprimis scio, qui novi eum ab annis xlv. Una enim

in patria urbe tua, ab Orydrio, & Rhekenario, liberalibus disciplinis, in pueritia excultus sumus. Mireris fortasse illum tibi commendari; sed faciunt hoc tempora Reipublicæ, & spes pacis incerta. Quare unum illud, uterque petimus ut amare velis. Putat enim ipse, ut ex Literis ejus intelligo, sua non parum interesse, ut postquam Venloa, Urbs Patria ejus, nobis accessit, aliquos in his partibus amantes sui habeat; quos inter te imprimis esse cupiat. Utrum vero agris suis à milite metuat, an aliud sit, dicere non possum. Sed scribet propediem ipse ad te; & fortasse jam fecit. Itaque non longius curas tuas interpello. Plurimum saluta lectissimam Uxorem, & Liberos optimos.

Amstelodami Prid. Id. Decembris c10 loc xxxii.

CLXXXVIII.

Illustr. Joanni Skyttio Baroni, &c.

Nisi singularis humanitas tua, Generose Domine, nostras quoque terras personaret, & favor erga studiorum cultores mihi cognitus foret, nequaquam ea essem fiducia, ut ultima prope hora, qua filius abijt, & ego à multis interpellor, quasi in mediis negotiis, literis aliquid committere auderem ad virum sublimis adeo fastigii. Nunc quia famam de te scio non mentiri, & ex generosis quoque liberis tuis viva tui imagine, certum indicium capio: Non dubitavi per literas hæc officia ac venerationem tibi meam deferre. Non quasi tua id magnopere interfit; sed quia obstrictum me tibi sentiebam in liberis tuis. Vix equidem dixerim, quantum cum voluptate conspexerim remeantem, post sexennii peregrinationem generosum filium tuum: in quo prudentia, eruditio, & quæ alia tantæ dignitatis juvenem ornare queant, undique elucunt. Certe gratulor Tibi, Illustris Domine, de sobole tam eximia, & te digna. Et eo magis gratulor, quia in sublimi positos multæ illecebræ à virtute sæpe avocant: quo impensius miratus sum egregium & excelsum adeo animum filii tui per vestigia paterna incedentis. Certè si qua in re opera nostra illi utilis esse potuisset, non alius me promptius eam collocasset. Nunc quia occasio illud non permittit, saltem in altero filiorum tuorum ostendam, quam devoto erga te sim animo. Juvit ejus studia quantum possit, qui diversa, vicina tamen urbe habitet. Ac deinceps animus idem futurus: partim quia hoc pacto bene mereri me de publico intelligo, cui aliquando is præfuturus; partim

partim etiam in tuæ spem gratiæ, cui placere posse pulcherrimum, & non levem studiorum meorum fructum puto. Vale.

Amstelodami a. d. x.
Januarii anni hujus
c1o 16c xxxiii. quem
illustri familiæ tuæ
felicem & prospere
rum exopto.

*Illustris & generosi nomi-
nis tui cultor,*

G. J. Vossius.

CLXXXIX.

Joanni Meursio S. P.

Vellem, Vir summe & amice, ante horam unam atque alteram scivissem, generosum Rosercantium quamprimum in Daniam abire. Uberiores à me literas haberes. Non committendum tamen ut abeat sine literis meis. Dicam quæ potissimum in mentem veniunt tuæque scire maxime interest. Scripseram superioribus literis, Guilhelmum Janfonium Blauwium cogitare de edendis Danicis, tum tuis, tum Pontani. Idem ad te perscripserat vicinus ejus Joannes Janfonius: sed ita perscripserat ut aliquid caliginis adspiceret. Nec enim animus illi uno volumine complecti opera vestra: quod nec Pontano gratum foret, necdum tibi, sed utraque seorsim edere parat, forma tamen eadem, typis iisdem; ita ab eo qui volet, simul compingi possint; seorsim item ab eo, cui mens alia. Quare ne quidem in unius inscriptione mentio alterius fiet. Sane puto te scire venustiores esse Blauwii typos atque eundem emendatius aliquanto sua excudere: Nec aliud me movit, cur hoc scire te vellem. Tamen & alter Vir bonus, & rerum suarum non indiligens. Quare de hoc fruaris judicio tuo. Solum ne facile nimis fidem habe quæ alter de altero perscribat. Cogitat idem Blauwius, ut tui est amantissimus, & filium habet Jurisconsultum qui prælo præest, omnia tua eleganter & emendate uno volumine complecti. Idem si tibi videatur possis perscribere quo ordine velis ea concinnari. Opus etiam sit significari quæ addi in singulis libris vel etiam mutari voles. Si voles, ipse utinam in partem veniam curæ, quo magis honori & desiderio satistiat tuo. Aureum laborem tuum de Atticæ regibus Jo. Janfonii tradidi, non prius tamen quam recepisset se quamprimum prælo velle committere. Hæret adhuc, utrum hanc Harderwici id agere velit: si hic, meâ; si Harderwici, Pontani interdum opera uti decrevit.

Mitto ad te exemplar Orationis nostræ de laudibus Historiæ, quam non fore ingratam spero tum argumenti causâ tum auctoris. Excudit nunc Blauwius exercitationes meas Grammaticas; Jamque in tertio libro occupatur. Utinam opera ista ad umbilicum perducta foret. Scio enim majora à me expectari. Cætera literis proximis intelliges. Id propediem erit. Nunc ob festinationem generosi Juvenis cogor manum tollere de tabula. Uxori salutem plurimam dices & liberis optimis non à me modo sed conjuge quoque & grandioribus liberis, filiæ imprimis filia mea.

Raptim Amstelodami
vi. Id. Jan. Anni hujus
c1o 16c xxxiii. Qui
ut familiæ tuæ pariter
ac nostræ felix sit,
Deum supplex rogo.

Tuus totus,

G. J. Vossius.

CXC.

Georgio Calixto Theologo S. P.
Helmstadium.

SI amici mihi essent deligendi, Præstantissime Calixte, profecto eos, vel maxime inter eruditos quærerem. Et inter eruditos non alii se mihi commendant, quam quos pietas: Et inter pios, vel maxime mihi probantur, quorum integra in sacris judicia esse video. Unde nihil præter morem meum faciam, si te, vir Clarissime, in amicorum potissimis habeam. Imo nisi habeam, degenerem à natura mea. Etenim sive pietatem cupio, sive doctrinam, sive judicium acre, non aliis opus mihi est documentis, quam præclaris monumentis tuis; quæ cum voluptate, cum fructu, cum admiratione legi: Et gratulatus mihi sum quam maxime, reperisse me in Germania virum, qui non multorum, in damnandis dissentientibus impetum sequeretur: sed verè nosset, quid sit Catholica illa Ecclesia, quam in symbolo profiteamur. Multum hoc schismatico sæculo, profecisse mihi videtur, qui illud didicerit. Sed de isto pluribus alias, si sic videbitur, per literas colloquemur. Ad illud nunc revertar, quod orsus eram dicere, ex quo tempore, novisse te ex scriptis tuis coepi, simul ingentem mihi amorem tui ortum. Ita ut nihil mihi gratius accidere potuerit salutationibus tuis, quibus per ornatissimum Overbequium, sæpius me, cum Lugduni agerem, es dignatus. Adeoque mirarer ipse, non citius me literas ad te dedisse, nisi amicorum quoque in-

timos mihi, super talibus sæpe queri scirem. Distentus occupationibus, crebro tantum meminisse amicorum possum; & cùm maximè scribere velim, prohibent non modò solitæ curæ, sed & subita, quæ mihi non rarò ingruunt, tanta turba, ut assiduis quorundam curis comparari possint. Huc usque egeram, & amans, & æstimator, & memor tui, cum non uno literario à te munere provocatus, & monitus à præstantissimo Wickevortio (quo non alius amicitia inter nos dignior usurpari conciliator poterat) abrupti non tam pertinax silentium, quam occupationes, quas inhumanus sum, nili vel ad tempus, tuo in me posthabeam amor. Crede, eruditissime Calixte, si aliorum colui amicitias, tanto magis me tuam expetivisse, quanto aliis dignior tu, & mihi honorem magis ac fructuosum erat, familiaritatem exercere, cum viro, veteris Ecclesiæ amantissimo, & ut veritatis, ita pacis sic studioso. Debeo ego tibi, cùm ob munera, quæ auro omni præpono, tum imprimis ob affectus indicium, quod à te coepit. Debent tibi, quotquot verè Christiani sunt, & esse volunt, hoc est, tota Ecclesia. Perge tantum benè de illa mereri, & commoto huic sæculo tranquillitatem reddere, quo nihil salutarius nobis, nihil Deo gratius præstari potest. Habebis certe optimum quemque laboribus tuis faventissimum. Ego quidem nunquam desinam te amare, cui me obstrictum esse fateor, & lætor. Nam si verè olim dictum est, firmissimam esse inter Pares amicitiam, nostra perpetua erit; quando & mihi nihil aliud unquam in votis fuit, quàm pro tenuibus, quas habebam, viribus, occurrere Christiani Orbis diffidiis. Vale, & Deum expecta laborum tuorum remuneratorem.

Amstelodami x. Kal. Febr.
An. c1510c xxxiii.

CXCI.

Gulielmo *Episcopo* Londinensi.

Reverende in Christo Pater, Domine Illustrissime,

MAgis magisq; comperio, quam vere non semel, & imprimis coram promiseris, paterno te affectu fore in me & meos. Quod enim evidentius affectus, vel *scilicet* potius, habere poteram argumentum, quam postremas literas tuas? Quas non gratias tibi debeo, pro tam eximia cura, pro monitis tam fidis! Sed enim de amoribus illis non possum

non referre, quod comperisse mihi videor. Cum ante triennium in Britannia ipse essem, hæc ipsa de filio vulgabantur. Cum verò in rem totam inquirerem, atque adeo ipsum serio monuisssem, negavit id per somnium sibi unquam venisse. Atque addebat extremæ fore dementiae si is, qui virgines in Batavia, & loco egregio, & opibus non spernendis, habere in matrimonio potuisset, nunc se projiceret infra sortem suam, infra honorem familiaris. Non abnuebat, sermones identidem cum ea habuisse; sed nunquam animum ducendi. Atque adeo omnibus penè Epistolis suis, quas ab aliquot mensibus ad me & meos scripsit, rogat, ut cogitare velimus de civili aliquo munere, præsertim apud Ruremondanos; quorum urbem, natalem ac sedem parentum, ac majorum meorum, Araulionensis Princeps in foederatarum Belgarum potestatem redegit. Quæ prorsus aliena à cogitationibus ejusmodi videntur. Nam si honores ullos in Belgica cogitat, quos profecto non ita facile est apisci, ducenda ei potius uxor sit ejusdem soli, ut matrimonii vinculo novos sibi amicos & favorem paret. Nec tamen ex istis certi quicquam mihi audeo polliceri. Novi quam varius & mutabilis esse animus Adolescentiæ soleat. Et facile cogitare possum, nihil temere tam ejus, tam mei amantes, tibi, Illustrissime Domine, scripturos fuisse. Quare ab affine meo Junio, qui nunc cum Illustrissimo Principe Arundelio, in Britanniam reditum parat, petii ut simulac pedem Londini posuerit, consultare tecum velit, atque illud exsequi, quod optimum vobis videbitur. Nec solum, si nuptias ejusmodi cogitet, revocari eum quamprimum expediat; sed etiam si vita sit dissoluta, vel æs alienum contrahat; ac utroque alterove horum, periculum sibi arceat. Itaque illud etiam affinem meum Junium rogavi, ut Cantabrigiam ipse eat, deque omni re cognoscat. Atque utinam eò cum venerit, intelligat, jam omnia melius aliquanto se habere. Omnino enim exopto, ut si absque sui, vel Collegii, in quo vivit, honoris dispendio, atque etiam familiaris nostræ, vivere annum minimum unum istic possit, id potius faciat; ac si non est Theologiæ amor, quem optarem, saltem in Medicinæ studio, in quo jam ante triennium egregie profecerat, seriò desudet, quo brevi, sive in Britannia, ubi suus est Medicis honos, sive apud nos, ubi non eo quidem loco, nec tamen dispretri sunt, suo succo discat vivere. Nam præter eum duæ mihi filia (& altera jam nubilis) quidni etiam filii, qui omnes studiis vacent. Quanti hic mihi sumtus sint faciendi, facile vides. Interea gratias ago Deo immortalis, quod omnes quos

quos hic habeo, & mihi & probis omnibus se probent, maximamque etiam spem sui concitarint. Tanto turpius fuerit natu maximo, si vincatur ab iis quibus præire oportebat. Macerat hæc me cura magis quam dicere possum. Sed culpam ejus præstare non possum. Si periculum in mora est, quamprimum potius veniat ad nos, quam aliquid vel ipse faciat poenitendum, vel ei contingat inhonorum. Ei vero? imo vero mihi, & omnibus meis. Deus illi meliorem mentem: mihi vero & conjugii animum fortem. Interea tibi, Illustrissime Domine, & exoptatissime Mœcenas, gratias Immortales pro cura & optimo consilio habeo, ac de cætero etiam hoc negotium commendo. Quem hic mitto Panegyricum, & Carmen, nuper filius meus Dionysius composuit, & quia omnia mea, vel meorum grata tibi esse jampridem didici, volui & hujus qualiscunque laboris te participem facere. Deus te, Reverendissime Pater, diu Ecclesiæ Catholicæ & nobis incolumem servet.

*Amstelodami,
iv. Kal. Febr.
Ann. 1633.*

*Illustrissimi & Reverendissimi
nominis tui cultor devotissi-
mus & obstrictissimus,*

G. J. Vossius.

CXCII.

Petro Cunæo, V. Cl. Ger. Jo. Vossius
S. P.

Quanto rarius ad te scribo, maxime idem vir atque amice, tanto ad te sæpius scribere desidero. Sed video sic ferè usu venire, ut nisi quid necessarium ingruat; occupationes ante officium putem: Quas apud te commemorare opus non arbitror, qui vitam meam nosti. Neque ego, si vel maxime otium mihi fuerit, adeo ignarus sum rerum tuarum, ut literis scribendis multum vacare te posse arbitrer. Alioqui merebatur id amor noster, ut talibus etiam officiis certaremus. Sed quemadmodum ego, facile te excusatum habeo; ita nec ambigo, quin nullius me admodum culpæ accuset: quem præter publicum munus, nunc quoque distinet Editio Grammatici Operis, ante annos scripti xxx. sed cui inter edendum, lima pluribus in locis, quid mirum? accedat. At ne descriptionis causam diutius differam, sermones his diebus mihi fuerunt, cum Amplissimo Bickero, Consulari viro. Quare-

bat, an spem haberem efficiendi, ut cognatus suus, (Helmondio nomen est) in tuis viveret ædibus. Ego quia putarem id te non facturum, negavi. Jam quærit, an apud Vinnium, quem ab eruditione egregia semel iterumque hoc sine ei commendavi, habitare juvenis possit? Quin cum fructu studiorum suorum id facere possit, nullus dubito. Sed scito præterea opus, an locus in ædibus suppetat. Quare rogo, ut certiore me ejus facere velis. Obstringes, non me solum, sed & Consularem Bickerum, qui plurimum te salutat. Multam etiam salutem meo nomine dicet, præter eos quorum antehac in literis meminisse soleo, Clarissimo Salmasio, quem in Academia vestra lætor vivere. Non dubito, quin præclaris monumentis, per se alioqui Clarissimæ Academiæ, majorem etiam claritatem sit allaturus. Etiam Ornatissimum Vinnium, si eum compellandum putabis, meo nomine salutabis; de lectissima Coniuge, & Collegis taceo, quia, ut dixi, non alios nominare nunc animus, quam quos scirem urbi vestræ accessisse. Nec tamen præterire fas, præter uxorem, salutare vos omnes Dionysium meum, qui Panegyricum & carmen suum ad te mittit. Scio non ingratum tibi munusculum fore, quia sic familiam nostram amas.

*Amstelodami,
clo Idc xxxiii.
ix. Kal. Febr.*

CXCIII.

Conrado Vorstio.

Clarissime & Amicissime Vorsti,

Davidem de Haro, juvenem egregium, Discipulum tuum, à me tibi commendari, fortassis miraberis; cum studia illius, non tibi minus, quam mihi, postrema magis etiam nota sint. Sed rogabat hoc pro vetere notitia, ac cum liberis etiam amicitia, commendare ut se vellem, dum Medicinæ supremum cogitat gradum. Honestæ erant postulata, ac placuit mihi ingenium, ac mores. Religionem ejus, quatenus à Christiana abit, si amare nequeo, modestiam tamen ejus probo, eoque abnuendum id non putabam. Et non dubito, studia quoque ejus mereri hunc honorem; aut si quidquam in iis requiritur, eo ingenio est atque industria, ut brevi tempore supplere

hoc

hoc, & efficere possit ne gradum hunc honoris indigno collatum dicturus sit quifquam. Itaque rogatum te velim, ut favore tuo, si opus habeat, juvare cum non graveris. Compositum à filio Panegyricum mitto, quem pro amore erga me, meosque gratissimum fore confido. Plurimum is te salutari jubet. Uxori etiam tuæ, plurimam salutem adscribi petiit. Quam & dices a fini optimo Backerio, & Conjugi. Et si molestum non est, tum maximo, & amicissimo, Cunæo, tum ingenti, licet novo Academix ornameto, Salmasio. Quod præteream candidas animas Tyfii, Constantini, Golii, ut collegarum alios taceam, id fieri, quia nolim te onerare, tute facile vides. Tamen si maximus Academix vestræ honos Dom. Tyfio obtigerit, optima quæque ei, meo nomine precaberis. Volo enim ut omnes sciat, memorem me esse vestri, optimæque velle cunctis, iis imprimis, quorum exploratus mihi amor, atque affectus. Vale doctissime, & amicissime vir, & amicitiam avitam, paternam nostram, ad liberos etiam propagemus.

Amstelodami
clō Ioc xxxiii.
ix. Febr.

Tuus,

G. J. Vossius.

CXCIV.

Claudio Salmasio.

Vir maxime,

Literas tuas jam ante hebdomadam certè accepisse me, jam tibi arbitror Lamerius indicaverit. Quod tum non rescripsi, occupationibus meis imputabis. Alioqui animus illuc inclinabat. Nam nihil æquè volupe mihi, quàm desiderium, quod videndi habeo tui, scripture crebra sublevare, donec per anni tempus, & munus meum, excurrere Lugdunum licebit. Certè parum his proximis diebus ab itinere absui, sed tempestates & inclemens cælum vetuere. Unde quod unum supererat, per literas te invisere malui: quia iniquum ut tu recte putas, est amicitiam nostram locorum propinquitate deteri, cum illa tanto arctius constringere eam debeat. Quæris quid agam? edere ante menses complures corpi opus Grammaticum quod annis abhinc xxx. & amplius magna ex parte scripsi. Possis dicere censuram eorum quæ veteres, ac plerique etiam juniorum de artis præceptis tradidere. Tædiosum negotium:

sed operam do, ut quantum possum ejus fastidium levem: Si non aliis saltem scholis proderimus. Et necesse fuit, ut aliquis hoc laboris devoraret. Tentavi ego, dum alii majora. Libri septem erunt, quorum tertius jam ad finem vergit. His absolutis ut puto, Origines LL. consequentur. Opus utrumque fortasse leve multis videbitur. Non levis tamen labor, quo mihi constitit; illud interea diffiteri non possum, vix esse hæc pro ætate mea. Quare animus jamdudum gravioribus incumbere ardet. Cæterum nolui mihi complurium annorum labores perire. Si Deus illos absolvere dederit, spero me ad utiliora, nempe Antiquitates Ecclesiæ transiturem. Quod te facere etiam velle scio. Quas mihi literas commendasti, ne dubita recte Hughonem nostrum accepturum. Atque utinam ipse de manu in manum tradere ei illas potuissim. Interim tanto & viro & amico amoto, nihil æquè lætor, quam te successisse. Velim Batavi omnes agnoscant felicitatem suam: Lugdunenses imprimis. In quibus non dubito quin familiariter utaris V. Cl. Petro Cunæo, viro non modo longe doctissimo & disertissimo, ac Batavici status intelligentissimo, sed præterea gravi & candido. Habui illum ego, cum istuc viverem, inter amicorum primos. Te quoque, ut idem facias, hortor. Dignissimus est ille amicitia tua. Vale, maxime Salmasi, ac nunc Bataviæ etiam nostræ ingens decus: quod spondeo magis & magis ipsa deinceps agnoscat, malevolis omnibus invitis.

Amstelodami,
clō Ioc xxxiii.
vi. Id. Febr.

Tuus,

G. J. Vossius.

CXCV.

Merico Casaubono S. P.

JAM ab occupationibus meis tandem ad te redeo, mi Casaubone. Quam vellem id prius factum! Sed qui vitam meam sciat, misereatur potius mei quam succenseat; Usque adeo occupationibus & molestiis premor. Et quasi non abundè id esset, novum prioribus laborem sponte accudi. Nimirum exercitationes meas Grammaticas, quarum jam tertius liber ad finem properat. Opus futurum ejusdem molis ac, quas proxime dedi, Oratorix institutiones. Scio alia à me expectare, cum alios, tum excellentes Britannicæ viros. Sed semel mihi defungendum commentationibus istis, quas majorem partem ante annos

nos xxx. elaboravis, atque ante annos xii. cum factiosi quidam sibi solis sacrorum tractationem vindicarent, iterum in manus sumi, & aliquot mensium spatio, partim limavi, partim observationibus novis adauxi. Sanè ad faciem eam artem Grammaticam scripsit hæc ænus nemo. Planeque Aristarchum agò in Grammaticos veteres, & novorum illos, qui nomen aliquod merentur. Multa scriptorum veterum loca illustro, multa emendo. Equidem mallem ipse nunquam aggressus essem hoc laboris. Poteram interim longe majora & acceptiora conscribere. Sed cum hæc orsus sum, Gymnasii Dordrechtani præfectus eram: eoque nihil alienum à munere meo faciebam, talia consignando. Postquam vero regimen cepi Collegii Theologici ab illustribus Ordinibus constituti apud Lugdunenses, non sivere antiquitatis Ecclesiasticæ hostes, qui plurimum poterant, ut aliis quam secularibus (ut vocant) studiis me darem. Illis igitur regnum tenentibus, non passus sum perire labores meos, quos nunc publici juris facio, ut totus deinde in majoribus esse, & Britannia atque alibi gratioribus possum. Sed quid ego hæc tam multis? Spero ubi videris operam, non usquequaque improbabis. Et qui possis tam amans mei? Verum scire hæc te volui, ut apud iudices iniquiores operam & studium defendas nostrum. Solum hæreo, quid facto opus sit, de vasto penè Originum opere: quid de rei Poeticæ libris. Nam utrumque opus jam ad umbilicum perduxi. Et tamen inter excudendum, ut scis, aliquid novæ exquiritur curæ: Quod autem iis accedit, id sacris meditationibus aufertur. Quid ergo? Missane hæc faciam? Etiamne quæ de omnibus veterum disciplinis exaravi, & tantum non ad finem perduxim? Si fas esset homini Christiano, propemodum male illis optarem qui hæc potius tractandi necessitatem mihi imposuerunt, quam porro exolvendi magnos veteris Ecclesiæ doctores: quod studium sic cum altero, à prima pene Adolescentia conjunxi, ut longe illud præferrem. Itaque alterum quoque nunc sic tracto, ut melius majusque non intermittam. Utinam tantum foret tantum otii, ut ne sæpe adeo ab eo avellerer invitus. Mane publica distineor auditione, vel ut nunc loqui amant nostri, prælectione. A prandio consulor à multis, quibus non possum operam denegare. Etiam Saluatorum peregre advenientium nimium quantum est. Quid omnia referam? Videor mihi labori satis assuetus. Et tamen fateor, interdum sub sarcina ingemisco, ut iniquæ mentis asellus. Tu vero, amicissime Vir, ne propterea, quæso, minus me ama. Sed si quando tardius officium vel scribendi, vel

aliud exsolvo, ita tibi persuade, non esse me meum; magisque id mihi ægre esse, quam amantibus mei. Et ista hæcenus: Pecuniam, quæ ex Cantuariensi Canonicatu, regio mihi beneficio cedit, accepi usque ad proximum Septembrem. Ut primum trimestre, quod debetur, sit mensis Decembris. Multum tibi debeo, optime virorum, qui fide ea atque industria procures res meas. Verum quid tandem pro beneficio rependam, ne videar, vel potius sim ingratus? Sanè cogitatio hæc me sollicitum habet, magisque anxium haberer, nisi perspectus esset erga me amor tuus. Nec tamen delinam cogitare de testatione aliqua animi non ingrati.

Venio ad hortense negotium, de quo seorsim literulas ad te scriptas hisce inclusi, & eas quando expedire putabis, Reverendis Fratribus ostendas. Nunc hic plenius paulo apertiusque animum meum aperire mihi visum fuit. Equidem, mi Calaubone, tamet si, ut ingenue loquar, offendere neminem velim, nihilominus non pono offensas alienas, præsertim injustas, ante jus non meum modo, sed & collegarum & fratrum meorum. Nam quod merito metuitur, si ego eripi mihi meum patiar, fortasse etiam illi, qui mihi successerit, carendum erit. Saltem id contentionem non mediocrem possit excitare. Quare prævertendum omnino huic rei videtur. Sed quia mihi tam longe remoto statuere difficilius est, malo rem omnem arbitrio tuo committere. Quicquid feceris, id ne dubita me probaturum esse. Neque id de horto solum, sed etiam de pecunia annua, ut hæc, quemadmodum cæteris, uno Molinæo excepto, pro ratione proventus, vel accrescat vel decreascet mihi.

Dicere non possum, quantopere amplissimo Hughoni Grotio placuerint literæ tuæ & quanti te faciat. Is nunc Hamburgi agit; non dubito, quin illi tristissimus fuerit nuncius, de excessu fortissimi Suecorum Regis. Nam ab eo amabatur & æstimabatur. Imo Rex jam in mandatis non uni dederat, qui cum eo colloquerentur, ut operam & consilium suum sibi addiceret. Pretium offerebat, quale Legatis dari solet, uti ex fidis hominibus accepi. Etiam Holsatiæ Dux & alii Principes viri hæc agunt, ut ad se veniat. Simulac certi aliquid statuisset intellexero, perscribam ad te. Binas vel ternas ab eo literas accepi. Responsum adhuc debeo. Quæ causa, credo, intra sequimensem nihil ad me scripserit. Sed facile mihi veniam spondeo, quia vitam meam novit. Nusquam eum vivere malim, quam apud nos; ut coram potius quam per literas colloqui liceret. Et facile hoc ei concederetur, si modo vivendi his

his terris potestatem libello posceret. Verum metuit, ne id sic interpretentur aliqui, quali culpam ullam agnoscat, cum contra se præmio potius dignum ob ea existimet quæ egit solo patriæ libertatis amore ductus. Legati hostilis Belgicæ Hagham reversi, colloquuntur cum proceribus nostris de conditionibus pacis. Plerique metuunt, ne convenire possint. Usque adeo grandia sunt quæ utrinque postulantur. Sed, credo, iniquum petitur, ut æquum impetretur. Plerique Sacri Ordinis bellum præoptant. Nec obscura est ratio: Nam belli tempore plus tribunitiis concionibus valent; quia multa Proceres tolerant, ne quid turbarum domi oriatur. Sed longe aliam ipsi causam prætendunt. Negant enim honestam esse pacem cum Idololâtris, quos Deus excindi in verbo jubet. Negant tutam, quia Artes Pontificæ & Austriacæ Domus plurimum se occultent specioso pacis titulo. Quod sane aliquid est. Sed neque talia Proceres nesciunt, qui providebunt semper ne quid detrimenti capiat Respublica. Filius meus Dionysius, quem vidisti mecum, Panegyricum & Poematium scripsit honori Principis Arausionensis. Id fortasse jam acciperis. Nam exemplar affini Junio mihi Hagham, qui simulac in Angliam rediisset, curaturum recepit. Jam liber decimus quartus Reidani Belgici Historiographi, ab eodem Latine redditus, sub prælo est. Spero infra menses tres universum opus posse absolvi. Et puto, nec Historici prudentia, nec Interpretis dictio displicebit. Plurimam salutem tum lætissimo uxori, tum Reverendo D. Decano, tum charissimis fratribus & Collegis meo nomine dicito.

Amstelodami
xiv. Kal. Mart.
Stylo Gregor.
Raptim.

Tuus non uno nomine,

G. J. Vossius.

Agnosco quicquid dignatione & beneficentia Regia ex Præbenda Cantuariensi mihi ab ejus exordio debebatur usque ad mensem Septembrem anni Millefimi sexcentefimi trigefimi secundi, esse persolutum, à Reverendo & doctissimo Merico Casaubono: ita primum trimestre quod annumerandum sit, incidat in anni ejusdem mensem Decembrem. Scripsi & subscripsi Amstelodami manu propria, mense Februario anni proximi qui est cl. lxx trigesimus tertius.

G. J. Vossius.

CXCVI.

Constantino Huygenio S. P.

Quod, Nobilissime, Amplissimeque Huygeni, tu quoque sic obitum carissimi pignoris, meumque hunc dolorem doles: amicè facis, & liquido ostendis, neutiquam me in eo falli, quod te semper amantissimum mei, familiæque meæ judicavi. Nimirum pro affectu hoc tuo, non potes, non peracribum hunc mihi casum judicare. Sanè periculum fortasse esset, ne animus de gradu totus deiceretur, nisi partim tui, & aliorum præstantium virorum alloquio Epistolari, paulatim spiritum, & vires reciperem: partim sponte mihi etiam, ob oculos sæpius ponerem, incertum vitæ humanæ, & alia, quibus ægras mentes, in casibus hujuscemodi, solari ipse antea soleo. In his familiam ducit voluntas Dei, quæ Christianis nobis, omnem penè paginam facere debet. Nam ut quanto nebula, ac caligo magis attollitur, tanto aer proximus fit purior, clariorque: sic comperio mentem etiam nostram eo reddi serenior, quo amplius elevatur ad Dei Providentiam, quæ nihil non providè immittit, aut permittit. Illustrissimo, & Inviçtissimo Arausionensi Principi, æternum pro ea liberalitate, debitor sum futurus. Sed si cogitem, per quem mihi conciliatus sit maximus Heros, ingratus sum, nisi hoc ita illi tribuam, ut non & tibi beneficii partem transcribam. Nec nunc præter hujusmodi verba habeo, quod rependam. Enitar tamen sedulo, ne vel beneficentia Arausionensium Principem; vel te, Nobilissime, & Amicissime Huygeni, commendationis tuæ possit poenitere. Hunc animum nostrum, qui prima occasione se exeret, magnum censebis, si cum æstimes, non pro viribus ejus, quæ exiguæ, sed pro humanitate tua, quæ summa est.

Amplissimum, Optimumque Affinem tuum, David D' Willem, salvere si jusseris, gratissimum erit.

Amstelodami
cl. lxx xxxiii.
Prid. Non.
Mart.

Tuus merito tuo,

G. J. Vossius.

CXCVII.

CXC VII.

Hugoni Grotio S. P.

NON facile dixerim, quantum mihi solatio fuerint geminæ literæ tuæ. Nam licet pro acerbo hoc casu, videor mihi satis fortis; tamen mentiar, nisi agnoscam subinde etiam non magna occasione malum recurrere animo. Quid mirum? quando quem amisi, is erat, in quo post Deum, ingravescente hac ætate mea, plurimum fiduciæ mihi, meisque reposueram; ut non potuerint non acceptissimæ esse literæ, cum Salmasii, & Cunæi, tum imprimis tuæ, quibus erigere animum mœrentis voluistis. Nescio autem, num ab luctu sit, an foeda anni tempestate, an immodico labore, ac vigiliis, quod tribus mensibus malè habuerim. Sex prioribus hebdomadis, pedem domo non extuli, sex proximis unum illud potui, ut publici muneris causâ, ingrederer Lyceum, quod vix lapidis jactum ab ædibus nostris abest; sed videor mihi quotidie virium capere incrementa, & appropinquat blandior adolescentis veris aura, quæ meliora, melioraque sperare jubet: atque hæc eo etiam lubentius commemoro, ut causam videas cur plurimis literis tuis non responderim. Quarum postremis partim mihi Tragediam misisti tuam, partim significas, ut locum quendam corrigi velis. Simulac eas accepi, quia ipse exire non poteram, per filium arcessivi Blauwium: Qui velle se excudere dixit, sed negabat id ullo modo ante proximas nundinas Francofurtenses fieri posse. Addebat, nec se, nec alium habere literas qualibus Auriacus excusatus, sed visurum quæ proximè accederent. Juro, nisi festinato opus putares, Francofurto tales procuraturum, quales petis. Video ejus prælum fervere plurimis, pluraque sub manibus habere; quare vix puto, ante duas hebdomades orsurum editionem: nempe ubi ea absolutâ, quæ Francofurtum mittere cogitat. Sed ulterius si moram nectat, non patiar. Nec sanè is est qui calcaribus egeat, præsertim in tuis; unde certum lucrum: nisi vicinus Janssonius, ut solet, minoribus excudat typis, quo minori pretio divendat. Credo tandem acceperis filii *fr. marger. Reidanum*; uti & de Terminis Vitæ variorum responsa ad Beverovicium. Epistolam ejus nunc tantum mitto, quia decretum erat includere literis meis Illustri Schitio tradendis, ubi ad vos iturus. Sed ille jam menssem, & ultra, præter expectationem suam hic cogitur hære. Video Beverovicium hoc agere, ut judicium quoque tuum perscribas, ipse au-

tem tomo secundo inferat. Id quidem an placeat satis nescio, sed scio illud Rivetum antehac Theologiæ apud Leydenses Professore, ubi legit judicium Episcopi, dixisse se adversus illud scripturum. Et jam in eo totus esse dicitur. Salmasius, qui & ipse sententiam rogatus erat, & sic satis prolixum opus composuit, negat se passurum ut divulgetur; nempe maligno adeo sæculo metuit, ne & ipse vapulet. Et si & alteram causam habet. Scorsim legi sua malit, quam ut in turba compareant. Credo, si Grotii vel Salmasii essent, quorum judicia promuntur, non invitus se quoque Principibus permiscum agnoscat Achivis. Nunc minuti quidem Heroes, & ut sic dicam Dii Patellarii, si modo Dei intercurrunt. Putavi tua interesse, ut hoc scires, & si ea sis prudentia, ut istorum etiam nescius, non sis scripturus quorum possit pœnitere. Filius tuus jam ante hebdomades duas Amstelodamo discessit. Causam nescio, sed maluissimè mensem unum alterum remansisset, vel propter Blawium qui cum in Mathesi instituere jam coeperat. Sed nihil fecisse arbitror, nisi ex parentis voluntate, quibus absque dubio sua ratio constat. Uxori lectissimæ, & filio Cornelio salutem dicito. Sed & Lindembrochio, si occasio erit.

Amstelodami,
clō lxxiii.
x. Kal. April.

Tuus totus,

G. J. Vossius.

CXC VIII.

Jacobus Roverio S. P.

TU verò, Cognate Roveri, ut libertatem tuam rectè accipiam, rogare etiam sustines? quasi aut hæc studia non ab humanitate acceperint nomen; aut illius sit excusare semet, qui utilem amicis operam navare studet. Mihi potius id reliquisses, qui ob dilatum (ex more scilicet meo) responsum; purgare me debeam, vel occupationes, vel aliud memorando, quò tibi satisfiat. Nec propterea in eo operam infusam, quam perdere nolo. Abundè enim nostri me publicè docere, privatim scribere, & quasi neutrum esset, vacare domesticis, amicis; ad hæc tot indigenis, & exteris, qui quotidie ex Germania, Gallia, Britannia, terris aliis, cum veniunt, compellere nefas putant. Quid reliquum literis? Ipse hoc tempore impeditissimus scribo. Quid mirum? Nox est, quæ plerumque curarum esse levamentum creditur. Vix est mihi qui tam multa in noctem rejicere

reijcere cogar; præsertim quæ hoc Epistolare hoc officium spectant. Ququam sic quoque, illa mihi nunc levamentum; quia haut noctem esse sentio, quod te quomodocumque colloqui habeam pro curarum cessatione. Quæras fortasse, si ita animatus sim, cur tam tardè à nocte subsidium petierim? Plusculæ enim abiire, ex quo non respondi. Nimirum illud est commodi, in absentium amicitii, quod vacare iis tantum opus sit, ubi opportunum est; præsentibus sæpè, cum minimè est integrum. Et tamen paucos ex amicis etiam absentibus habeo, quibus non partem aliquam temporis mei, utcumque illud pusillum sit, gratificari velim. Tibi verò, præstantissime Cognate, non volo modò, sed etiam debeo; Ut qui non passus sis studia tua, sine fructu meo procedere: Quod propter Epistolam tuam bonæ frugis plenam dico. Equidem ingratus sim, nisi hanc agnoscam humanitatem: Quæ si paulò maturius se exeruisset, etiam publicè fuisset utilis. Nunc quæ observasti, pleraque artem metricam spectant. De hac operis nostri Grammatici liber secundus tractat; qui jam dudum absolutus, ad quintum enim devotum, de Pronomine agit, Tamen si omiforum copia ita crescat, ut Appendicem concinnare operæ videatur; erit quod publicè me tibi debere profitear. Utcumque enim non pauca mihi jam dicta ex iis quæ mones, tamen & reperi quod addere maluisssem. Nunc de verbis tuis quid dicam? Planè venusti sunt, sic ut Romani hominis videantur, & argumento, quod tractas, nihil convenientius. Sponsum haut dubiè, etsi haut dubiè, sua jam felicitate contentum, nova voluptate Musa afficiet, tam suavis, & tam cari capitis. Equidem velim meo nomine, & illi, & sponsæ illius, optimæ virgini, omnia fausta apprecheris: Sed & Amplissimo Parenti tuo, & fratrum alteri Joanni, atque adeo toti domui vestræ. Præterire verò nefas sit Amicissimum Beverium, Inclytæ urbis vestræ Prætorem. Quibus omnibus, & uxor ac liberi salutem adscribi petierunt.

Amstelodami
xiv. Kal. Maias.
cdo Ioc xxxii.

Amantissimus & studiosissimus tui,

G. J. Vossius.

CXCIX.

Hugoni Grotio.

Vir Amplissime, amicorum Optime Maxime,

Eunte ad vos Matthiisio, haud aliud scribere habui, quam quod his diebus haut lætus accepi, optimum, & disertissimum virum Erycium Puteanum, in periculum, aut certè molestias aliquas incidisse. Scripsit stateram Belli, & Pacis, quo nonnullis de partium suarum impotentia prolatis, complures offendit. Nosti fastum Hispanorum, & Principum aures, quorum nec hæ, neque illi veritatem accipere sustinent. Itaque nisi nossem multos ei in aula Bruxellensi, quò vocatus est, amicos esse: nili quoque ingenium, & eruditionem illius æstimari scirem, finistri aliquid vererer. Nunc optima non omnino despero. Utinam non aliud audire cogantur, quam quod olim in simili ferè negotio, à Phalaride aiunt fuisse dictum Simonidi? *Μέλοισι σὺν Μουσῶν εὐκλέεις πόνοι.* Rerum hic novarum nihil. De Pace adhuc ambiguar opinionones. Haud dubiè, priusquam conveniat, de nostris, aut hostium armis aliquid audiemus. Opus nostram Grammaticum quotidie procedit. Jam libro quinto prælum fervet. Reidanus filii mei Dionysii intra hebdomadem unam & alteram finem accipiet. Simulac editus erit, tibi mittet, qui jure tuo non illum modò, sed quicquid etiam à me, aut meis proficiatur exigere potes. De filio tuo subinde Rectorem Oitdorpium conveni, cujus literas accipies cum meis. Absque eo esset, fusiùs scriberem. Ingenium semper laudat. Visus tamen paulo plus diligentie requirere. Quod celare non debui, quatenus tuis, non minus quam meis benè volo. Quia una alteraque hebdomade domi eum meæ non videram, ipse accessi domum illius, & commonui, ut frequentius me, meosque inviseret. Simul aurem vellebam de Oratione quadam è Tacito, quam promiserat se carmine redditurum. Non desinam eum mone-re, & hortari, omniaque illa facere, quæ te velle scio. Vale Amplissime vir.

Amstelodami,
cdo Ioc xxxiii.
v. Kal. Sextil.

Tuus tuo merito,

G. J. Vossius.

CC:

Guilielmo Archiepiscopo Cantuariensi.

Reverendissime in Christo Pater, Domine Illustrissime,

Nescio felicem me an infortunatum appellare debeam. Quippe hinc ingens ille favor, & affectus tuus, me tantopere evehit, & singulari gaudio implet, quod tum magni, tum eruditi Præfulis cum mihi amorem obtigisse videam: inde rursus angor, quod in tanto affectu tuo quem par est animum testari nequeam. Semper occupationibus obrutus nunquam meus sum. Et si forte aliquod respirandi spatium, simul & otium spero colloquendi cum iis, quorum aut favore obstrictus sum, aut amicitia, subito plerumque nova moles ingruet, ut jam dediscam sperare vacuum à laboribus tempus, qui semper negotia nova habeam dum adhuc veteribus quam maxime distineor. Equidem non ignoro ad labores hominem natum, & quietem hic solidam habere nequire. Sed enim cum cogito ingratum me videre posse in optimè de me meritis, quorum inter primos te, Illustrissime Domine, pono, parum abest, quin importunis adeo occupationibus indignor. Pudet dicere quod menses elapsi sint ex quo tibi, Reverendissime Pater, debeo literas & grâtiâs pro eo quod benevole adeo cætera etiam ad Marianum pertinentia transmiseris. Ita ut si moram compensare gratiarum magnitudine æquum sit, nulla verba inveniam, quibus satisfacere possim. Animum solum tot & tam variis impeditum nihilominus semper veneratione tui plenum retineo: & quia ille bonus est, facile veniam spero apud te, Illustrissime Præful, qui humanitatem tuam prolixè adeo in me effudisti. Nunc tandem quas diu volui literas celerare libuit ob occasionem, quâ non aliam habere meliorem potui dum apud nos est Præstantissimus Boswellus: cujus si eruditionem æstimem, non minus miror ingentem, quâ te prosequitur venerationem. Volupe fuit mihi sermones conferre cum eo, quem pro summis virtutibus tuis tantum esse cultorem tui viderem: cumque eo pro cujus pietate, doctrina, industria, magna in Hibernia incrementa additum iri spero melioribus studiis. Cæterum ad Marianum ut veniam, eum in lucem mittere per diversa hætenus nequivi. Nam & cura operum quæ sub prælo habeo obstabat, & Typographus tam multa & varia receperat ut culpæ non possem, si moræ aliquid postularet. Non committam tamen, quin primâ, quam Deus

dederit, occasione, præstem, quod & tibi & mihi in votis est. Tantum breve spatium rogo, quo in ordine redigam mea, & expedire animum liceat ab iis quibus nunc distinetur. Te interea, Illustrissime Domine, supremo numini, me & illi & tibi commendo: atque oro ita habeas persuasum, neminem te inter Belgas habere, qui Illustris ac Reverendum nomen tuum devotius veneretur.

Amstelodami
clō Ioc xxxiii.
vi. Kal. Sextil.

Reverendissimi & Illustrissimi
nominis tui Cultor,

G. J. Vossius.

CCI.

Claudio Salmasio S. P.

Committere, maxime Vir, nolui ut communis amici nostri Hugonis literæ ad te sine meis irent; si non ob aliam causam, certè ut hoc saltem modo tres amici simul ut possumus essemus; quorum illum iniquitas temporum, te valetudo, & cœli inclementia, & credo domesticæ etiam curæ, me publicum docendi munus congrédi nondum patitur. Sed spero vigorem tibi jam pristinum rediisse, & ut homines satis æqui non sint, aëra saltem esse. Hujus duritiem adfuetudine, illorum invidiam animi magnitudine facile superabis, præsertim si cogites Sophocleum illud,

Πεὶς ἢ ἔργον ὁ φθόνος ἔργον. Optasses fortasse alio documento tuas virtutes intelligere: sed certiori non poteris. Scio quæ mihi evenerint, quamvis infra invidiam me esse debere putem. Et sic hoc inter arctiora amicitia vincula, quod quamvis bene meriti præmia parum digna pariter retulerimus. Sanè abundè solatii mihi est quando tot bonorum, & his & aliis in terris, & posteritatis simul iudicia cogito. Quæ tibi, optime maxime Salmasi, excellentiora longe & jam obtigere, & deinceps erunt. Reputemus etiam mercedem hic ereptam à supremo & beneficentissimo mortalium rectore cum scœnore rependi. Salutem plurimam Uxori tuæ meo, & meæ nomine dices, quam, licet ignotam, æstimo ob egregium parentem & majorem conjugem. Summis etiam viris Cunæo, Scriberioque cum occasio dabitur, salutem impertias rogo.

Amstelodami
clō Ioc xxxiii.
Kal. Maii.

Tuus sine fūco & more majorum,

G. J. Vossius.

F f 2

CCII.

CCII.

Joanni Skytte.

VIR Illustrissime, quamvis inexpectato generosi filii tui discessu præventus, malui tamen tumultuarias prope ad te literas dare, quam nullas. Adstringebant me huc nupera promissa, & ipsius filii tui rogatio. Cui ego quomodo hoc negare possim, cui majora longe sponte etiam obtuli? Accedit quod non alias à me gratiores fore literas scio, quam ejus manibus perlatas, quem non possis non carissimum habere, sive naturam spectes, cum nullum reperiatur arctius vinculum, quod parentes liberis adstringit; sive indolem generosi filii tui, quæ virtutis via ad excelsa grassatur. Videor jam omnino videre mihi illum in summis regni vestri honoribus, quibus si tales multi fungantur, qualem hunc futurum confido, dubium non est, quin gloria gentis vestræ auctura etiam sit gloriæ gradum, quem virtutis suæ merito, & magni Gustavi affectu obtinet. Etenim & ingenio filius hic tuus est acris, & ætatem cum considero, pro ea sane judicio excellenti, & pro iisdem annis studiis non leviter tinctus, præsertim quæ fortunam ejus decent. Ac nequid auribus tuis dare videar, ipse egregium hujus rei argumentum videbis, vel Panegyricum ejus. Multa adeo bonæ erectæque mentis indicia apertissima in eo se exerunt passim. Ob subitum discessum non potui legere, quæ cura vellem. Sed carptim id facere cogebar. Verum ex ungue, quod dicitur, leonem. Ut monumentum etiam sit futurum, quod posteris placere possit. Satis etiam laudare non possum generosum filium tuum Joannem. Tantus in eo est ardor studiorum: Nec præter eum retinuit illum apud nos quicquam. Existimabat enim inanes fore labores, quos apud nos hæcenus studiis impendit, si ea in medio cursu defereret. Alioqui postquam eum à te, Illustrissime Domine, arcessitum intellexi, serio hortatus sum, ut paternæ voluntati obsequeretur. Meum non fuit inquirere, cur scripisses; sed ille arbitrabatur, nihil tibi gratius esse posse, quam ut hac ætate, qua sementis studiorum fieri debet, non destituat parentum de se & illustri familia spem. Itaque cum optime illi perspectum animum tuum putarem, nolui nimium urgere, ut iret, ne vel ignarus tuæ voluntati contraria consulerem, vel illo, quem sic amo, carere viderer velle. Imo vero cupio in omnibus illi prodesse; eoque nulli parcere labori animus est. Priusquam finio, debeo quoque gratias tibi agere, Illustrissime Domine,

filii mei Dionysii nomine, quod eum ad te cum liberis venire tuis iterum volueris. Nunc id opera ejus, quibus prælum fervebat, non patiebantur, sine offensa multorum, & ingenti damno Typographi. Interea tanto acrius generosi filii tui studia juvare conatur, ut se gratum ostendat pro eximia hac humanitate tua.

Deus Opt. Max. rogo, ut diutissime te saluum præstet regno Suecico, familiæ tuæ & cultoribus, quos inter ego, & mei omnes nomen præ aliis profitemur nostrum.

Amstelodami
Kal. Jun.
Styl. Greg.

Eternum illustri tuo nomini devotissimus,

G. J. Vossius.

CCIII.

Joanni Meurfio.

Vir summe & nulli amicorum secunde,

Quod non semel scripsi, & ut metuo, sapius conquerar deinceps, non finit hoc vitæ genus, quod nunc dego, ut amicitias colam, quemadmodum oportebat. Unde est, quod raro quisquam literas à me accipit, nisi jam multis ante mensibus expectatas. Sed cum hoc male me habeat, in plurimis, tum nihil magis indignor, quam non licere mihi colloqui cum duobus tribus quos supra ceteros æstimo mortales. Satis nosti in his te esse uti & *et* *et* Grotium nostrum. Fateor sane jure te tuo, uti illos suo crebriores à me literas exigere. Sed quid agam, qui quo longius ætas provehitur, eo minus mei sum juris, contra veterum Romanorum mores qui ab Augusti ævo, missionem dabant vicena stipendia meritis: eos vero, qui senadena fecissent, sacramento solvebant, ac sub vexillo retinebant donec agros & præmia tribuissent. At ego jam bis senadena stipendia feci, nec labor minuitur, sed gravatur. Et si negare non possim jus mihi esse recusandi. Sed si quid componatur, negare non sustineo, ut mihi ipsi culpam tribuere magna ex parte cogar. Nimirum sic cogito, Musarum castra non facere militiæ finem, nec certos habere stipendiorum annos, sed vel maxime hic habere locum, quod dici solet, Imperatorem stantem mori oportere. Quantum ad opera tua attinet, ea brevi aggredietur Blauwius. Sed optat, ut si qua in adhuc editis addideris aut mutâris (& fieri vix aliter potest) quamprimum ea chartæ committas, & ad nos transmittas. Adscribam deinde operibus

bus tuis, quæ hic habeo, ut auctiora & si fieri possit, meliora etiam prodeant. Jo. Janfoni-
 us ante menses jam aliquot excudere cœpit,
 quæ miseris. Et puto jam prope absolvisse.
 Scorsim etiam excudet Blauwius, quæ postre-
 mo accepta. Nihil tuorum in via utcumque
 silentio prætereir in Literis meis. Nempe
 tam occupatus scribere soleo, ut non possim
 non aliquorum oblivisse, eoque Literæ meæ
 magis animum meum quam seipsas probare
 tibi debeant. Dionysius meus brevi tibi Hi-
 storiam Reidani Latine à se redditam trans-
 mittet. Opus egregium est. Versionem com-
 mendare ipse nolo: illud tamen dicere audeo
 plurimi laboris fuisse. Mittit nunc Panegy-
 ricum & Carmen ad principem ante V. men-
 ses editum. Nunc etiam Commentarios parat
 in Rabbi Maimonidis libellum de Idololatria
 quem transtulit ex Hebræo. Mittit filia mea
 tuæ, quæ postulorum comparare potuit. De
 corallinis operam dedit nec successit. Nunc
 quoque dum hæc scribo in eo occupatur. Nos
 adhuc de pace disceptamus & eventus, in am-
 biguo est. Princeps Rhenoberkam obsedit.
 Nec Hostes segnes sunt qui jam xx millium
 exercitu Mosam transiere. Vale optime ma-
 xime vir & amice, plurimumque saluta Uxo-
 rem, Filiam, Filiumque. Sed & Laurenber-
 gium ac Stephanium nostros. Quorum alteri
 orationem nostram, alteri filii Panegyricum
 dabis. Hoc enim fieri geminum exemplar
 misimus.

Amstelodami, cl. Ioc xxxiii.
 Post. Kal. Jul. Styl. Gre-
 goriano.

Tuus totus,

G. J. Vossius.

CCIV.

Ger. Jo. Vossius *V. Cl. Erycio Puteano*
S. P. D.

ETSI valde faveo novo honori præstan-
 tissimi viri & amici Plempii, tamen ve-
 re dico, cum dolore ab eo avellor. Plane ma-
 luissem ut patrium hoc Lyceum ingenii doctri-
 næque suæ laudibus decorasset. Præsens ejus
 properus abitus hæc mihi literas, vel potius
 tumultuarias literulas extorsit; uberiores dari
 nunc oportebat, quia raro iis procurandis tam
 boni offerantur amici: sed nunc facere quod
 possum, cogor, non quod volo. Intellexi his
 diebus editam à te stateram pacis & belli, mul-
 tis quidem ingenii & doctrinæ indiciis relu-
 centem, sed *φιλανθρωπικόν*, quam tempora hæc
 ferunt. Quare & Bruxellas vocatus dicebare:
 non possum dicere quam id male me habue-

rit, sed tamen solatur eximia eruditio, &
 pius animus, & magni quos habes amici.
 Nec enim illi patientur tristius te propterea
 haberi. Tu quæso, si consultum putas, fac me
 quamprimum de rebus tuis certior. Scis
 illud poetæ,

Res est solliciti plena timoris amor.

Summi numinis custodiæ te meque commen-
 do. Scribebam præcipiti si unquam calamo.

Amstelodami, vi. Cal. Sextil.
 Anno cl. Ioc xxciij.

CCIV.

Joannis Hulfmanno *S. P.*

CUM nihil, Clarissime Hulfmanne, luben-
 tius legam, quam Præstantium viro-
 rum Literas, tamen adeo tardus sæpius sum
 in rescribendo, ut videri possim metuere, ne
 si diligentior hac parte sim, nimis multas ab
 iis accipiam. Quod non aliunde est, quam à
 negotiorum mole. Atque hæc in causa etiam
 fuere, cur prioribus tuis literis, tanto scriptis
 affectu, non responderim. Accessit fiducia fa-
 cilitatis tuæ: sed nunc alteris etiam præven-
 to, ulterius in scribendo esse remisso non licet,
 ne injurius videar in amicitiam nostram nu-
 per initam. Quomodo enim, præterquam
 Epistolari hac via, colere eam liceat, quando-
 quidem tanto disjungimur intervallo? Ita-
 que non facile committam, ut hac in re in-
 dustriam nostram desideres. Multum enim,
 mi Hulfmanne, amo te, ac æstimo; ac crebro
 in mentem venit, jucundæ illius diei, quo
 unà de rebus divinis colloqui dabatur: sæ-
 pèque mihi optem tales recurrere; facile enim
 tum perspexi egregias animi dotes. Atque
 opinionem de te meam postea auxere duæ
 & viginti dissertationes tuæ eruditissimæ, quas
 muneri reliqueras. Deum oro, ut in hac sta-
 tione diurnare contingat, quo deinceps simi-
 libus monumentis Ecclesiam bees. Nihil ve-
 rò æque me in sermonibus tuis delectavit,
 quam quod studium pacis ac concordie jun-
 xisses amoris veritatis strenuè tuendæ adver-
 sus omnes, *ἡρώδης καὶ πατριῶς τὰ πάλιν ἡρώδης*
δογματισμοῦ καὶ διέξεως. Nam quod de Ebi-
 onitis veteribus Eusebius scripsit, id nobis ac-
 comodare liceat, Novis illis, quos seunebio-
 nitas possis dicere. Rerum novarum, post
 Rhenoberkam captam nihil hic habemus.
 Etsi vero aliquot ab annis omnia fluxerint ex
 voto, nihil tamen æque exopto, quam ut bel-
 lum hoc pax excipiat. Cujus spem vel toto
 sinu admitto.

Non

*Non semper imbres nubibus hispidos
Manant in agros.*

ut monte Flaccus. Quare & nobis, his locis, & Germaniæ etiam vestræ, imo & nostræ, quandoquidem in ea vitalem primo auram hausi, sperare liceat serenitatem post nubila & turbida. Quò in voto desino, idque eo lubentius, ne longior sim præter morem, qui verborum parvus esse soleo: solum rogo, ita tibi persuadeas, sicubi usui hic tibi ulla in re esse possim, vel aliis etiam, quos commendare nobis voles, operam me daturum, ut intelligas quanti te faciam.

*Amstelodami, vii. Kal. Te æternum amaturus,
Septembr. An. 1633.*

G. J. Vossius.

CCVI.

Hugoni Grotio S. P. Hamburgum.

Eorum quos vides, unus est nobilissimus juvenis Guldensternius Danus, cui Patrens superstes, Eques auratus, vir ut antiqui stemmatis, ita magnæ in Regno authoritatis. Alter est ornatissimus, doctissimusque Ernstius Helmstadiensis, qui in Academia Sorana juris Professor Meursiique nostri Collega fuit. Hi lustrata Gallia, Italia, ac Sicilia, nunc domum redeunt, magnæque felicitatis censent, quod Hamburgi sibi compellendi tui occasio erit. Perjucundum mihi fuit cognoscere judicium tuum de optima ratione instituendæ pueritiæ, neque mihi alius unquam animus fuit: sed proximis duodecim annis, & quod excurrit, vix ulla in Bataviæ civitate, potiri ea Doctoris, ac coetus quem describis felicitate licuit; ut omnino aut privatim domi alendus fuerit pædagogus, aut puer in scholas publicas ablegandus. Cum enim tota Reip. facies immutaretur, illud etiam cautum facit, nequis extra scholas publicas pueritiam institueret. Quo pacto fiebat, ut nec Ecclesiastico, nec Scholastico munere dejectis studia sua prodesse, ad se suosque sustentandos: nec Parentibus qui Remonstrantibus addictiores forent, potestas esset liberos suos aliis committendi Præceptoribus, quam qui Synodalibus se decretis adstrinxissent: sed Decretum hoc paulatim in urbe hac, biennio proximo, aut triennio, coepit negligi. Ita ut nunc, tres quatuorve sint, qui seorsim honestiorum Civium liberos instituant, aliqui etiam in convictum recipiant: ringente admodum Gymnasiarcharum altero, nomine Stado, ejusquem de no-

mine nosti, filio, qui Patri in scholastica hac Palæstra successit. Is postquam Proceres me utriusque scholæ suæ curam gerere voluerunt, sæpe apud me conqueritur, quod Ordinum, Urbisque Decretum sic negligatur, eamque causam esse ait, quod tam paucos habeat discipulos, paucioresque convictores. Nec minus fatigat Scholarcharum alios, ut quicquid est scholarum hujusmodi disturbetur; sed surdis canit, quia plerisque ex ipsis Proceribus, altera magis via placet. Et sanè audio, eos gratulari sibi, de liberorum in privatis scholis profectu: sed quot numero distinctos, quam multos item in convictum habeant, nondum possim dicere, pleniusque de eo exquiram die crastino. Nunc fieri id non potuit; nec nisi hesternæ die literas de hoc tuas accepi. Intelligo ex filio tuo, uxorem tuam intra octiduum vel circiter hic fore, eamque Hamburgum cogitare. Id si est, de isto, & aliis, optima scribendi occasio erit. Habitat Lugduni Batavorum, Vir egregius & Cordatus, Matthias Overbekius, literatus ipse, ac litterarum amans; nec paucorum adolescentum, qui sacra studia excoluere Nutricius ac Mecænas. Hic nihil æque exoptat, ac studet, quam ut ex amplissima hæreditate, quam cum Cohæredibus adiit, decidatur portio, quæ sufficiat sex septem alendis, Philosophiæ, ac Theologiæ studiosis. Ac partim eo movetur, quod utile sit futurum Ecclesiæ Dei, his maxime temporibus, quibus omnes, prope in partes eunt; paucique adeo rectam insistant viam: partim illo etiam, quod certo sciat, nec ignorare Cohæredes possint, eam fuisse defuncti sententiam; cui grave est refragari, utcumque civili jure constringi fortasse non possint. Videor mihi ex Overbekio non obscure intelligere, Cohæredum esse unum (cognatum arbitror) quibus hæc non satis placeant, eoque à me mirum in modum petiit, ut ad te transmitterem, quem ipse hac de re consignarat, quo plenius mentem suam intelligas; simul rogavit, ut hoc negotium commendarem tibi, quem consilio & auctoritate aiebat plurimum apud Cohæredes posse. Hæc ea sunt, de quibus nunc ad te scribere volui. Vale, vir incomparabilis, & valetudinem tuam, pro qua innumeri vota faciunt, cura diligenter: salutatur te familia universa; simul filium tuum, de quo non dubito, quin magnis passibus, in studiis pergat; præsertim ex quo tecum assidue est, & te *Ερπιδιπύκτω* omnium habet.

*Amstelodami, clocxxxiii.
post. Kal. Octobr.*

Tuus tuo merito,

G. J. Vossius.

Gulielmo

CCVII.

Gulielmo *Archiepiscopo* Cantuariensi.

Reverendissime in Christo Pater, Dom. Illustriss.

Tristem nuncium huc allatum de morte Reverendissimi Domini Archiepiscopi Cantuariensis, lenivit mox fama, quæ adferebat, plurimorum eo vota, ac, ut addebant, Regis sapientissimi eo consilia tendere, ut tu in summo hoc pulcherrimoque Ecclesiasticæ dignitatis gradu locareris. Quæ mihi eo magis volupe fuit audire, quia & quo statu Ecclesia Christiana nunc sit, & quantum tibi pietatis ac prudentiæ ad eam dirigendam, quodammodo videor intelligere. Unde spem maximam concipiebam, fore, ut Dominus Deus, cujus in manu corda hominum sunt, magis magisque huc animos flecteret. Eo dum flagro desiderio, ecce Hagha mihi ab amico Literæ, quibus perscriptum, jam eam te in sedem ascendisse. Ac paucis post diebus idem dispersit fama, qua non aliam lætiores longo tempore ad aures nostras advolasse possum dicere. Nec tamen tam bene in Batavia hac, nec puto in Britannia agitur, ut malevoli desint, vel etiam male creduli, quibus quia primæva fordet Antiquitas, exosaque est Ecclesiæ Disciplina, eo alteri hoc honoris collatum præoptent, nec linguæ id virulentia dissimulent. Sed istis moribus jam à multis annis in Ecclesia Dei vivitur: beneque agitur cum bonis si tales maledicere solum possint, malefacere non possint. Nec interim non magnus numerus eorum, qui rectius sapiant, ac mecum divinam venerantur Majestatem, cujus providentia huc fastigii perductus es, & supplices eandem rogent, ut diu te gravissimis hisce temporibus regere Ecclesiam permittat. Quæ quanto diutius prudentia tua dirigetur, tanto haud dubie felicius erit. Quantum ad filium meum Johannem attinet, cum ex tuo potissimum, Reverendissime Pater, consilio, & quorundam hic amicorum, revocavi: & agit nunc in ædibus meis. Quid factum mihi opus sit, & an remittere cum in Britanniam consultum sit, adhuc hæreo: Fortassis tempus me in hanc aut illam partem trahet. Filiorum alter Dionysius historiam patriam è Belgico sermone Latine transtulit, & vulgavit; quam hic mitto. Auctor Vir fuit doctus, gravis, prudens, & quod in Historico primum, Reipub. ejus quam describit, apprimè intelligens. Sed quorundam judicio, quia Gulielmo Nassovio, Frisiæ Governatori, à Consiliis esset, Nassovix domui in hoc opere addictior, quam Historico conveniret.

Ab hoc fonte & capite esse arbitrantur, quod Vir aliqui laudatissimus & Belgicorum Historicorum facile Princeps, sic Arausionensium Principibus, & maxime Comiti Wilhelmo Nassovio bene gestorum gloriam adscribat, ut justum decus vix tribuat Fœderatæ Belgicæ Patribus: de quibus liberiora subinde judicia occurrunt. Ut mirandum non sit, si minus quandoque pepercerit, vel Serenissimæ Reginæ Elizabethæ, vel Gallorum Regi, vel Cæsari, vel exteris Principibus, aut Rebus publicis. Addidi huic operi alterum quod ex Lingua Hispanica proxime vertit de conciliandis Sacræ Scripturæ Locis, quæ in Pentateucho pugnare inter se videntur. Etenim utile visum est Christianis omnibus, quæ ad Quæstiones divini operis commentati essent Rabinorum doctissimi: quorum ferè omnes opinioniones hic liber completitur. Uterque hic labor incausa fuit, quo minus Maimonidis dissertationem de Idololatria consummaret. Nunc tamen ad eam rediit, totusque incumbit, ac vix sexta pars operis superest, ut intra quintum hebdomadam vel circiter Typographo tradi possit. Nec segnius ego desudo in Ecclesiæ Historia. Sed quotidie deploro, quod non in Villam aliquam me possum ad menses aliquot abdere. Nunc quibus horis non publico munere distringor, iis dicere non possum, quam multi interpellent, partim Belgæ, partim Exteri, plerique aut genere illustres, aut doctrina clari, quorum ego affectum non possum non exosculari: sed dum me illis do, dormiunt opera tot quæ habeo affecta. Quamobrem, adventante hyeme, gaudeo, quia tum magis meus esse incipio. Sed peccare me video, Illustrissime Domine, qui in his difficillimi muneris initiis, tam longis Literis tempus majoribus & melioribus eripiam curis tuis.

Deum optimum maximum iterum oro, ut quemadmodum te Gratia ac Providentia sua in summi Præsulis sedē collocavit: ita etiam prudentia ac fortitudine roboret, & cunctis Spiritus sui donis cumulet: ut improborum consilia & conatus irrita reddat, ad Serenissimi Domini Regis, & florentissimi Regni Britannici, totiusque Ecclesiæ Catholicæ bonum.

Amstelodami, clō Idc xxxiii.

post. Kal. Octobr.

CCVIII.

CCVIII.

Hugoni Grotio. Hamburgum.

Amplissime Vir,

QUI has defert, nomine Johannes Fredericus Sliffer, Halasaxo, Lugduni aliquamdiu studiis operam dedit: unde per urbem nostram Helmftadium cogitans, aiebat, desiderio se maximo teneri videndi ac salutandi tui: quod quo honestius posset (utrum motu proprio, an consilio alieno non sat scio) obnixè rogabat, aliquid sibi literarum ad te dare vellem. Primum tergiversabar non tam quia hæcenus non vidissem juvenem, quam quia occupatissimus essem hoc tempore, & uxorem tuam quotidie hic expectamus, per quam quicquid scribendum esset, optimè curaretur: sed enim ille instare, & visus perhonestus, literarumque, ac literatorum amans. Quare tantillum nolui denegare. Prorsus vero erat, ut una mitterem Reidanum à filio Latine redditum. Quippe jam mensis est quod lucem vidit, sed nolui ignotum onerare. Fortasse jam aliunde intellexeris de obitu Archiepiscopi Cantuariensis. Ei susceptus, ut audio, Episcopus Londinensis, vir ut mei tuique amantissimus, ita veritatis, & pacis admodum studiosus, & eapropter non æque carus illis, quibus novellitas, & dissidia placent. Deus diuturnam ei vitam diut. Aliquid hic cognovi de colloquio tuo cum serenissimo Daniæ Rege. Aliunde etiam percepi, ut Rex Poloniæ de te cogitet. Mihi hæc per jucunda, qui optimè, ut debeo, tibi tuisque volui semper, nec velle desinam: scio tamen quid magis exoptarim; sed si Tardipede illo Deo, Dii Batavi tardiores esse pergunt, equidem infelicitatis nostræ causa illis magis tribuenda erit, quam tibi, cui miserum est semper pendere. Quod cum dolore scribo. Vale, Vir, & amice incomparabilis.

Amstelodami, clodcccxxiii.
x. Kal. Octobris.

Tuis tuo merito,

G. J. Vossius.

Postquam has literas exararam, pluribus cum Sliffero sum collocutus, & intelligo esse eundem, qui ante annum locutus mecum de recta studiorum ratione. Sæpius etiam me docentem audivit, imò & sermonem tecum habuit Hamburgi. Calixto Germaniæ, ut ego quidem censo, Theologo Principi, est familiaris. Hæc quia me fugerant, cum superiora scriberem, adtexere volui, quia ad commendationem ornatissimi, & doctissimi juvenis facere videbantur. Iterum vale.

CCIX.

Cl. Joanni Meursio S. P.

QUam tardus sit Joannes Janfonius in excudendis tuis Regibus Atticis, argumento est, quod nunc demum ad Indicem devenit. Ipse ad Nundinas Francofurtenses abiit. Petebam ab uxore & Typotheta primario, ut, quantum excusum esset, occasione hac ad te mittere liceret. Sed absente & nescio Janfonio, negabant se hoc audere. Nempe durantibus his inimiciis inter ipsum & Blauwium, sub quolibet lapide metuunt serpentem. Fortè quia Blauwio, non minus quam ipso, utor familiariter, metuere, ne Blauwio ea traderem; is verò quam celerime recuderet, quo utraque editio simul prodiret, non levi hujus Janfonii damno. Hoc ne vererentur, jussi, ut chartas ipsi ad te mitterent obsignatas; sed furdis canebam. Quæ ad primum operum tuorum totum pertinerent, rectè accepi, inque ineditis juvit oculos & animum pascere tot bonis, quæ videre erat in lætis & latis illis tuæ Græciæ campis. Ringantur duo tres malevoli: justum virtuti doctrinæque tuæ semper pretium erit: invidi autem quid nisi pastoritia fistula excipiuntur à cunctis, qui studia hæc sciunt suo pretio ælimare. Ad editionem quod attinet, super eo ipse ad te Blauwius scribit. Metuo ne tibi longior mora videatur, quod demum post trimestrem editionem auspicabitur. Sed, mihi crede, ita prælum ejus variis fervet, ut ante vix possit. Et præterea propemodum omni charta destituitur; nec ille modo, sed etiam Typographorum alii: idque quia Mercatores chartæ quod Bataviæ destinatum putabatur, id omne in Moscoviam, & loca alia, avexere. Itaque jam tertium mensem in Exercitationibus meis Grammaticis cessare operæ cogantur, me plane illibente. Nam exonerari tandem minutis illis exoptem, quo totum me dem istis, unde & plus mihi honoris, & quod caput, publicæ gloriæ. Mitto tibi Reidanum à filio Dionysio translatus: de quo judicium tuum non anxius exquiro, gnarus ab amicis plurimum, qualiacunque etiam laudari. Hic tamen, ne quid dissimulem, satis magnis studiis labores ejus excepti sunt. Adeo & Conciliationes locorum ἐναρμόνιον in Pentateucho scriptas ab docto Judæo, hac in urbe inter suos Ecclesiastâ; à filio verò meo in Christianorum gratiam, ex Hispania translata, sed stylo qui argumento isti magis convenire videbatur, ne flosculos hic ullos expectes. Si minus ex hoc opere quicquam haurire

haurire sit, quod studia tua juvare possit, poteris donare Academiæ nostræ Theologo, vel alii amicorum, omnino invenient Theologi quod discant. Pauci enim Rabbinos legunt, vel intelligunt; At noster ille Manasses Ben-Israel (id enim Conciliatori nomen est) omnem prope ætatem in hujusmodi scriptoribus trivit. Maimonides, quem ex Hebræo filius idem vertit, & notis illustravit, properat ad finem. Rerum novarum publice vix quicquam habemus. Princeps quid agat, ambigitur; exercitum habet numerosissimum. Sed & hostium majores, quam antea, vires sunt, ut non aliud tempus, plus ei gloriæ addere possit, siquid præclari geratur. Quod si privata etiam notorum nosse cupis, Lugduni Festus suam Johannam Cuchlinam, suam Rutgersiam Daniel Heinſius, Johannes etiam Latus suam Balduiniam amisere. Festi Hommii uxor graves & diuturnos dolores, & cancro excruciatum corpus habuit. Testamentum una fecerant ambo ejusmodi, ut qui diutius viveret, meliori aliquanto loco esset, quam defuncti hæredes. Sed hæc ubi certam se mortem manere brevi videt, callide, marito ignaro, aliud fecit Testamentum. Itaque dimidia bonorum omnium parte quamprimum cedendum Hommio. Non Bibliotheca, non aliud quicquam, quin justo sit pretio æstimatum. Sed Hommii non tam male ferre videtur, quam alii qui illi optime volunt. Cuchlina ex Bertii liberis non alios hæreditatem adire voluit quam duos illos, qui in patriam huc remearunt. Id Bertium pessimè habet, equidem doleo propter minimum natu, omni à culpa immunem, quem Bertius in memoriam socii mei Franciscum vocarat, spondente pro eo in Baptismo uxore meâ. Heinſii uxor hydropica erat ex malo lienis, quod & alios morbos pariebat; nec multum à delirio aberat. Multum ei morbum adauxit infortunium fratris, Mercatoris Amstelodamensis, qui foro cessit. Ille verò conqueri solet de forore, quod propemodum ex asse esset hæres Jani Rutgersii. Quasi, si qua hic culpa est, ea non omnis in Jano potius Rutgersio, quam Heinſia reſederit. Salmasius Lugduni vivit, sed impetigine ita fœde laborat, ut hæcenus invifere nos ausus non sit. Quanta simultas Heinſii erga eum nemo Lugduni ignorat. Et quod pejus est, traxit ille non paucos in partes, qui solo Heinſii amore, pessime de Salmasio loquantur. Fœdum hoc malum obſectationis, quo eruditi tantopere laborant. Prorsus satius erat nescire literas, quàm eas fœdare sic invidiæ & loliginis succo. Hugo Grotius Hamburgi adhuc degit; sed vitio stomachi mala vale-

tudine agit, ut hesternâ die ex filio natu secundo, qui studiorum causa in Urbe nostra agit, intelleximus. Equidem Deum non intermittam precari, pro incolumitate ejus viri, qui, si totum æstimemus, parem non habet, superiorem saltem neminem. In Britannia fato nuper functus est Abbotus, Archiepiscopus Cantuariensis. Successit ei Guilelmus, Londinensis Episcopus, vir pietate, prudentia, eruditione nemini secundus, mei quoque amantissimus; idem pacis publicæ summe studiosus, denique laudibus dignus majoribus, quam ego aut alius quisquam tribuere ei possit. Cætera cognosces ex nobilissimo Gulternio, & optimo doctissimoque Ernstio, qui lustrata Belgia, Germania, Gallia, Italia, Sicilia, hodie ad suos remeant. Petebant ut ad te literarum aliquid scriberem. Sed satius putavi ut Epistolam hanc Crugio tuo darem, ne fasciculo librario simul egregium illud par onerarem. Dico salutem plurimam uxori tuæ, à mea, quam utinam meliori valitudine aliquando videam. Liberi etiam mei tuos impense salutant. Sed Collegas etiam optimos, maxime Laurenbergium & Stephanium VV. CLL. impertias salute. Vale.

Amstelodami,
Pr. Non.
Octobris
c1o 16c xxxiii.

Tuus æternum,

G. J. Vossius.

CCX.

Merico Casaubono S. P.

Simulac intellexi, Clarissime Casaubone, Reverendissimum Patrem, ac utriusque nostri Mecænatem, Guilielmum Londinensem hæcenus Episcopum, ad Archiepiscopalem esse dignitatem evectum, equidem præ voluptate mihi abripi extra me videbar, non tantum quod Præfulem utrique nostrum adeo faventem, summum in Ecclesia Britannica tenere dignitatis & auctoritatis locum cognoscerem; sed vel maxime ipsius Ecclesiæ causa; cujus statum indies in melius iturum non dubito, postquam nacta est Antistitem ejus pietatis, tam raræ prudentiæ, & eximie adeo doctrinæ. Non debeo apud te laudare eum, cujus mirandas dotes melius me novisti: tantum felicem prædicare libet Britanniam universam, maximeque Ecclesiam Cantuariensem, fortunatos nos, qui Præfulem hujusmodi nacti simus. Det modo ei numen vitam longævam, & quotidie spiritu suo impleat

G g

pleat ad bonum Ecclesiæ suæ, & totius Regni Britannici; cujus prosperis ita faveo, ut patriæ alteri oportet. Hic rerum novarum non aliud est, quam quod noster & hostium exercitus iisdem in campis confederunt. Vires utrimque pares esse feruntur; nisi quod equitatu nos superemus, ex quo auxilia Suecorum (quinque millia equitum sunt) accessere. Plerique ad manus eventum iri antea arbitrabantur. Sed nunc plerorumque opinio hostem non facile se prælio commissurum, solumque hoc acturum, ut se castris suis tueatur. Magnus Hugo Hamburgi adhuc agit, & à Daniæ Rege vocatus est magni stipendii spe. An oblata sit accepturus, nondum mihi constat. Die hesternæ hinc uxor ejus ad illum profecta est, credo, ut simul de re tota consulant. Eo anxia magis deliberatio, quia & Illustrissimus Oxensternius, Suecici Regni Cancellarius amicis eum literis invitat. Quod ex conjugē ipsa accepi. Et scio in Poloniæ regno quoque de eo cogitari. Et jamdiu alicui se regno addixissent, nisi Batavorum Procerum aliqui in causa essent, cur moras neccerent. Mallent illi in patria eum vivere. Sed ita scissa studiis Republicæ efficere non possunt, quod volunt. Meus quidem animus eo magis inclinatur, non diu recusaturum occasiones oblatas, quando tam averfam à se patriam experitur. Mitto tibi Historiam Belgarum, quam nuper transtulit Dionysius filius meus. Rogamus uterque gratum habeas hunc ejus laborem. Sententiam fide optima expressit; & existimatur scripsisse ea dictione, quæ historiæ conveniat. Cæsarem imprimis ac Tacitum imitatur; quos prope in sanguinem & succum vertit. Sed quid ego in judicio tibi præeo, qui tuum potius judicium expecto? Solum igitur de Auctore ipso addam, fuisse virum Consularem, aliisque dignitatibus perfunctum, etiam Delegatum in Generalium Ordinum confessum, & à Consiliis Guilielmo Comiti Nassovio, Frisiæ Gubernatori: ut non alter melius penetrare potuerit arcana hujus Reipublicæ. Magna scripsit libertate, non solum quæ externos Principes spectarent, sed etiam quæ ad Fœderatæ Belgicæ Patrēs pertinerent. Eoque noluit sua prodire, nisi duodecim annis ab obitu suo exactis. Nempe metuebat offensas Potentium quas prævidebat. Alterum quod Reverendo Decano Exemplar daretur, non habebat filius: sed nè *ἀδελφῷ* sit, mittit ei librum Manassis Ben-Israelis, quo conciliat ex Rabbiniis *εὐαγγελιστῶν* Pentateuchi loca, ex Hispanico à se translatus. Nec operam ea versione filius perdidit, cum nihil prope operosius sit, quam ostendere convenientiam locorum Scripturæ quæ pugnare videantur.

Non inutile profecto laborem iis navarit, qui scribere posthæc in Libros Mosæicos volent. Non omnia in illo volumine probamus. Judæi est opus, in hac urbe *ἐκκλησιάζοντες* inter suos. Sed tamen videbimus, ut qui posthæc commentari in Mosæica volent, ex Rabbiniis sibi non lectis hinc depromturi sint, quibus gratiam ac venerem suis concilient, & multijugæ lectionis honorem ab imperitis consequantur: Nimirum sic hodie vivitur. Alii vere eruditi, alii videntur. Pecunias meas quod attinet, rogo, amicissime Casaubone, per Peysterum mihi dimidii quantum anni est mittas. Tantum enim debitum jam à superiori mense, qui September fuit: Tamen tam te amo, nolim incommodo tuo facias. Etiam negotium horti mei, & quicquid me spectat, tibi quantum possum, commendando. Spero & favorem Reverendissimi & Illustrissimi Domini Archiepiscopi prodesse mihi posse in re longè æquissimā. Salve cum conjugē lectissima à me meaque & liberis.

Amstelodami
clō loc xxxiii.
Id. Octobr.
St. N.

Nomini tuo devotissimus,

G. J. Vossius.

CCXI.

Hugoni Grotio S. P. Hamburgum.

Quam affligerit me casus hic tristissimus, amisso filio carissimo Dionysio, me etiam tacente, facile per te æstimabis; ut qui & illum non male, & me cognitum habueris: eoque perspicias, quantum in eo præsidii fuerit, ingravescenti, & continuis laboribus ac vigiliis paulatim defetiscenti ætati meæ. Nec possum non cogitare, quantum amiserint natu minores liberi mei, quorum ille studia, ac mores, paterno potius, quam fraterno affectu moderabatur. De uxore quid dicam? cujus unus ille molestiam, & ægritudinem idoneus erat detergere. Quid multis opus? omnes ejus obitum vehementer dolemus; non quidem ipsius causa, qui ut vitam duxit, pietatis, ac devotionis plenam, ita sanctè in Domino obdormivit: sed nostri ipsorum gratiā: qui in recenti adeo dolore, fortasse paulo effemus infœlices minus, si infœlicitatem nostram minus intelligeremus. Et tamen cum cogito, quanto nunc meliori conditione sit filius, Deumque esse, qui & dederit, & abstulerit; eum optime perspexisse quid filio, quid mihi cæterisque

que expediret: Illam quoque esse virtutem aliorum liberorum, ut pœnitere eorum non possit; quin de plerisque, vel potius omnibus, optima maxima liceat sperare: planè, inquam, quoties hæc cogito, ingratus quidem erga Deum fuero prorsus, nisi sic quoque mihi videar admodum fœlix, dummodo grata mente sciam divina agnoscere beneficia, erga me & meos. Dabit spero Deus, ut magis & magis hæc animo obversentur. Et credo à tristibus istis cogitationibus avertent occupationes; quæ utinam non nimis forent; Nunc unde subsidium in tali negotio foret, inde verius obruor. Non de studiis queror, quæ moderari ipse possum: sed de tam multis, qui quotidie nunc consilium, nunc operam requirunt meam. Nam vix è Lyceo nostro pedem extuli, cum interpellandi initium video, non finem, nisi quum ad cœnam vocor. Quare interdum cogito mecum de Veteribus Romanis, qui in Tusculanum, aut Pompeianum aliquod se abdebant. Ego id non possum, qui quotidie publico munere distineor. Sed ut possum, quando non ut volo; vel potius deinceps debeo, quod possum. Sic enim Deo visum. In Grammaticis exercitationibus jam tribus mensibus cessatum, quia charta Typographo deesset. Verum videtur jam redire velle ad ea quæ supersunt absolvenda. Multo diutius si differat, non ante nundinas proximas lucem videant. Est mihi hæc mora eò molestior; quia ætati huic alia conveniunt. Scies me jam Juris Canonici Doctorem factum. Publicè enim cum ex Eusebio, & veterum aliis enarrassem Historiam Ecclesiæ, usque ad Concilium Nicænum, coepi de Conciliis ipsis tractare, & jam enarravi Canones Concilii Nicæni, Ancyran, Neocæsariensis: sed & Illiberitani, quod in codice Græco, à Justiniano confirmato desideratur. Vident nostri homines, non paulo aliam fuisse faciem Ecclesiæ Veteris quam nostræ. Vident & Pontificii, nec suas Ecclesias ex amissis antiquis temporibus respondere: Imo multa esse maximi momenti, ubi à veteribus sit recessum. Insolens & argumentum nostris terris, eoque in magna hac urbe, numerosior conventus auditur hominum honestissimorum. Candidius & modestius hæc tractare non poteram. Atque hanc laudem mihi omnes concedunt, etiam qui quædam mallent præteriri; quò facilius aliis eant persuasum, Antiquos Patres, in maximis, mediis, minimis, à partibus suis stare. Ego verò, ne Crabrones irritum, quod verissimum est, subicere soleo, assignatum Historici munus esse: Historiæ autem animam esse veritatem, eoque non videndum, quid horum,

vel illorum opinioni, ac consuetudini sit congruentius; sed sine partium studio exponendum, quid antiquis temporibus plauserit: Num vero ubique, an alicubi, an nusquam, ubi recessum, profectum quoque sit, id non esse hujus loci expendere: sed tamen rem utilem facturos, qui vetera tempora cum novis, novaque antiquis componere volent, & causas utrorumque expendere: ut ubi nos melius, gratulemur nobis; ubi veteres rectius, non nimirum deinceps nobis; Videor autem mihi hoc modo, apud non paucos, non illud modo consequi, ut minus iisordeat antiquitas; sed etiam veritatem fidei, & pacis, ac charitatis studium, promovere non parum. Adfuit mihi ante paucos dies, utriusque nostri amantissimus civis tuus Verhœvius urbis nostræ Medicus; retulit autem, ut Ludovico Houwen Mercatori Amstelodamensi, cum Johanne Gualtheri Mercatore Hamburgensi, controversia sit, ex societate quadam oborta. Hic Ludovicus Houwen nihil æquè desiderat, quam ut propter rerum humanarum incertum, tandem ratio utrinque putetur: nisi enim id utroque superstitite fiat, difficilior illud postea fore, magnaue fortasse secum tracturum incommoda. Hamburgensis quem dixi, est Affinis D. Assueri Matthiæ, qui uxorem apud vos duxit: Et constat omnibus Hamburgensem eum, magno te loco, ut debet, habere. Quare cum sanctissimum sit, inter Christianos paci studere, & Ludovicus Houwenus, & ejus nomine Medicus Verhœvius, obnixè me rogant, ut hoc negotium commendare tibi vellem. Putant enim, si paucis eum monueris, fœliciter hoc negotium confici posse.

Cum hucusque pervenissem, Medicus Verhœvius intervenit. Quare desinam, ubi unum hoc adjecero, me sedulò inquisisse, de Pædagogio quale desiderabas. Sed nescio, an satis omnia hic voto possint respondere. Scio qui decem, aut duodecim fœliciter instituat, sed in uno convictu habet neminem. Quare necesse esset, ut apud Patrum, vel alium Adolescentuli viverent. Alius est qui in victu octones, aut plures habet; qui & ipse ab institutione commendatur. Palatius est aliquanto addictior Zelotis; quæ res effecit, ut paulo hærerem; prima occasione Patrum conveniam. Nunc demùm intellectum mihi ubi degat.

Vale Amplissime vir, & mei in sanctissimis precibus memor esto coram Domino; ac Conjugi dic salutem.

Amstelodami.
xii. Novembr.
cdo lxxiii.

Tuus totus,

G. J. Vossius.

CCXII.

Ger. Jo. Vossius, Cl. Salmasio *V. Cl.*
S. P.

Quas ante aliquot hebdomadas literas mihi, eas jam puto accepisti. Alebar tum spe adventus tui, non tanta quidem ac fuerat, cum primum de te agebatur: sed non omnis tamen decollârat. Interea ex curatoribus Academiae nostrae accepi, quomodo conditionem hanc abnueres, atque honestas etiam cur ita faceres, causas adferres. Itaque ut video nunc spe mea penitus excidi, neque ego modo sed quotquot te hic tantopere præstolabamur. Neque consilium tuum hoc improbare ausim; præsertim cum ex literis tuis facile perspexerim, nunquam fugisse te quid animi alteri foret, qui omnem moveret lapidem, ut ne iis animis res ageretur, quibus oportebat. Intelligo nunc prælum fervere tertio exercitationum tuarum opere, quod si est gaudeo. Quid de me mirum? qui tot bona me docueris, seu linguam utramque spectem, seu scientiam naturalem, situm locorum & prope disciplinas universas. Vere hoc quoque Exercitationum ad Solinum opus est thesaurus, non liber. Nec inferiora scio erunt, quæ consequentur. Quin tanto fortasse potiora, quanto præstat Solino Plinius, cui ni fallor nunc uni defudas. Ringantur omnes malevoli atque invidi. In eo studiorum genere nihil simile ætas nostra vidit: utinam conspiciat posteritas simile. Sed hoc voti est. Nunc quidem unus es qui ista possis. Spero brevi fore, ut non solum de Rep. literaria bene merearis: sed etiam de Ecclesiastica antiquitate, & Catholica illa Ecclesia quam Symbolo nos credere profiteamur: sed plures jactant quàm noverunt. Et jam quidem præclara hoc de argumento exorsus es. Ea ad pertexenda Deus confido valetudinem suggeret & vires. Et si te occupatissimum scirem & ipse etiam satis multis distringerer; committere tamen non potui, quin affectum hunc meum literis iterum apud te testarer. Vale maxime & amicissime Salmasi.

Lugduni Batav.
clō Ioc xxxiii.
Id. Novembr.

CCXIII.

Amplissimo viro Jacobo Wittens Quaestori Dordrechtano S. P.

Feriis nostris autumnalibus, Amplissime, & Coniunctissime Witti, excurreram Hagam-Comitis, unâ cum filia natu majore: At eo id animo à me factum fuit, ut inde eam abducerem Dordrechtum, quo visendis amicis, tuæ ante cæteras familiæ, biduum, vel triduum daremus. Sed enim vix pedem posueram Hagæ, cum intelligo de gravissimo lætissimæ uxoris tuæ morbo: quæ res, & mihi & filiæ maximum attulit dolorem. Quare importunissimum tempus ad vos proficiscendi ratus, consilium de itinere hoc mutavi. Amstelodamum redux, & quidem non una, postea hebdomade, cognovi ex affine tuo Viviano, viro sanè ex reliquiis aurei generis, necdum quidem optimè esse conjugii, sed indies tamen convalescere; quod mihi non mediocri voluptati, nec mihi solum, sed universæ familiæ meæ fuit. Nam ut liberi nostri, non sanguine juncti essent; cui me familiæ benè velle æquius esset, quàm cui hinc parens, inde focer, ante annos propemodum quinquaginta fuerint innexi? Sed solidum ac diuturnum hoc esse gaudium, non sivit tristissima calamitas, quæ me domumque meam adflixit. Puto enim jamdudum ad aures tuas pervenerit, ut amiserim suavissimum Dionysium meum; quo superflite, omnia adversa facilius ferebam. Deum immortalem! quantum ille de se, imo, prope dixerim, quid non spondebat? Quis ejus ætatis Classicos Scriptores, Latinos, & Græcos, diligentius evolverat? quàm feliciter, etiam ubi magni viri sæpe hærent, enucleabat? quanto cum genio imitabatur? Quis plurium linguarum notitiam complexus? Non ego illas vulgares dicam, in his Gallicam, Italicam, Hispanicam; solum nominabo eruditas illas, ut Hebræam, tum antiquiorem illam, tum Rabbinicam; Item Syram, Chaldæam, Arabicam; Armenicam etiam, ac Æthiopicam dare sese cœperat: Vix anni spatium requirebatur, quin multa, magnæque habuisset Resp. literaria, studio, operaque ejus perfecta: Nec illa Linguarum modo variarum, & multijugarum, eruditionem testantia, sed acre etiam ingenium, limatissimum judicium, & quod ante omnia puto, eximiam pietatem. Nunc immatura mors spes omnes abscidit. Nisi quod dispiciam, quid facto optimum de Maimonidæ opusculo, ex Hebræo Latine ab eo reddito, & no-

tis

tis illustrato : Item de Julio Cæsare quem post Scaligerum ipsum, feliciter innumeris pænè locis, castigavit, & notis eruditis fecit planiorem. De cæteris consilium sequar Plinii, qui non perfecta haberi jubet pro non inchoatis. Sed feralibus illis missis, (in quibus Christianum pectus, voluntatem divinam, pro lege habere debet) ad aliud venio, de quo jam diu ad te scribere in animo habui. Credo, meministi, me cùm hic esses, tecum loqui de eo, quomodo Brunæus, ex conjugis sorore natus, ex canonicalibus bonis, urbis vestræ beneficio frui posset, quod Francisco meo focer tuus, piæ memoriæ procurarat sponte. Sed serò me tum locutum cognovi, quia jam alteri facta esset promissio. Putavi nunc mihi temporis te conveniendum in re simili. Matthæus meus post Kalendas, proximus triennio toto fructurus sit hoc beneficio; quemadmodum literæ super eo datæ testantur. At ego paratus sum, beneficio illi renuntiare, ab eo tempore, quo dixi, dummodò proximis Kalendis Januariis succedere contingat Francisco Junio, ex uxoris fratre, Joanne Cazimiro, nato: atque is deinceps fruatur usque ad annum ætatis vigesimum quintum; qua lege conferri id beneficium solet. Sic prope quadringenti floreni mihi decedant, quibus honestè fruatur, partim quia liberis id beneficii collatum, ex bonis Canonicalibus, quorum honesta semper fruitio fuit, dummodò dignis conferatur; partim quia datum non malè merito de urbis juventute per tot annos: partim etiam quia accepi, in solatium plusquam decuplo majoris summæ mihi immerenti, turbidis illis tempestatibus adeptæ. Sed enim cogito tecum non tam me indignum esse hujus pecuniæ, quam domum affinis defuncti. Vidua enim cum liberis relictis parva in re est, ut nosse te arbitror. Est genere ipsa nata perhonesto. Filius Franciscus, de quo nunc ago, ut cognomine, sic & nomine avum refert: Et avi instituturum vestigiis, magna spes est. Nec debet videri alienus planè ab urbe vestra: cujus Parens studia in urbe vestra hausit, avunculus magnus Henricus Corputius, tot annos benè de Ecclesia vestra meritis. Sed quod caput est, avus illius, maximis meritis, omnes toto orbe terrarum Ecclesias reformatas sibi vehementer obstrinxit. Vir undecumque doctissimus, nec ullò Theologorum quot sunt, vel fuere, inferior. Hæc ego pluribus sum persecutus, ut mihi curæ esse videas. Puer ipse optimi est ingenii, educatio optima. Nihil requiritur nisi ut studiis subsidium sit. Decretum mihi habere pueri rationem, ne avo, vel nobis, sit indecorus. Verùm si quid

nunc serius loquar, & licet triennio toto anticipem, tamen jam alicui ex magnatum cognatis facta sit promissio. Ecce igitur conditionem aliam. Si hoc ita est, & intra annum unum alterumve expirabit alicujus annus vigesimus quintus, qui hoc beneficio fructus sit hætenus: Non repugno, quominus alius, quisquis ille, proximis Kalendis Januariis, sibi Matthæo succedat, dummodo Franciscus Junius, Joannis Filius, Francisci Nepos, post annum vel biennium, frui eo beneficio contingat, & jam ei certa promissio fiat. Pluribus, mi cognate amplissime, non morabor te, quem occupatissimum scio. Et certè si occupationes meas scias, mireris me, præter morem, tam prolixè scribere potuisse. Sed quia non mihi me natum scirem, sed aliis etiam, imprimis cognatis meis, vel liberorum meorum conscientia non sivit, ut hac in re essem negligentior. Salutem plurimam dices optimæ uxori, & liberis, item præstantissimis viris, Consuli Beaumontio, & Syndico Catfio. Item M. Berkio, Colvio, Bewerio, Becmanno, cæterisque amantibus nostri. Sed cùm occasio erit, ne me operâ tuâ, in salutationibus ullis, abuti velle censeas. Vale.

*Amstelodami,
clō Idc xxxiii.
x. Decembris,*

Tuus, ut & tuorum,

G. J. Voffius.

CCXIV.

Claudio Salmasio.

NON facile dixerim quanto in luctu fu-
erim; imo quo in dolore nunc quo-
que sim. Semper enim recurſat memoria tam
cari pignoris. Dies scio insipientibus quo-
que paulatim minuit mœrorem; nec in nostri
ordinis hominibus ratio minus valere debet;
quin potius prævertere in nobis tempus illud
continet. Sed enim carendo eo filio, cujus
virtutes rarissimas tecum optime intelligis,
quotidie magis & magis intelligo, non quan-
tum publicum modo, sed quantum ipse etiam
amiserim. Omnino immaturus ejus deces-
sus, meas quoque, non meorum solum ra-
tiones in studiis conturbavit. Minores vero
nata, & Doctorem suum, & vitæ omnis du-
cem amiserunt. In ea calamitate nulla in re
æque nunc solatium invenio, atque illis quæ
Deus & Pietas suadent. Jubet Apostolus ne
eorum instar lugeamus qui spem Resurrectio-
nis non habent. Alter ait, beatos esse qui
in Domino obdormierunt. Præterea doce-
mur

mur bonis omnia, in bonum cedere. Pater ille cœlestis optime norat quid filio, quid mihi, quid meis expediret. Quare si subinde me recolligo, & cogito mecum quàm turpe sit futurum, si qui istiusmodi præceptis præire aliis ad constantiam soleo, nunc dolori ipse, eique inutili succumbam. Magnasque Deo gratias ago quod me spiritu suo firmet, & profecto quam ingratus fuerim erga Deum, si solum cogitem quid abstulerit, non item quantum reliquerit immerenti in liberorum cæteris. Multum vero tibi debeo, amicissime Salmasi, quod ipse non bona valetudine, dignatus tamen sis me allocutione per literas, quæ & propter argumentum, & quia à te venirent, non parum doloris absterferunt. Solatio etiam fuisse literæ quas Triumviri illi eo in casu perscribere; Clarissimi dico viri, Cunæus, Burgerdicius & Constantinus: quos licet antea amicissimos, propterea tamen magis deinceps amari debeo. Nam alloquium eorum tam opportunum pro grandi habeo argumento amoris erga me. Et si occasio dabitur, non refugies verbo hoc iis significare. Rescripsissem id ipse singulis: sed uti hætenus respondere tibi neglexi, itidem illis, nempe ne literas tristes hujus argumenti multas scribendo, dolorem mihi refricem sapius, quem sepultum magis expedit valetudini & studiis meis. In tuis verò illis tam amicis scriptis, mi Salmasi, unum illud valdè dolorem attulit quod, de invaletudine uxoris exarasti: tum autem quod medicorum judicium esset, ab hydrope tibi metuendum. Cohorui cum legerem, & mei aliorumque tui amantissimorum, & magis uxoris lectissimæ & dulcissimorum liberorum tuorum, & maxime boni publici causa; de quo non alius melius hoc tempore meretur. Sed tamen in mentem venit, eo hæc medicos dixisse, ut valetudinem tuam tam caram bonis, sedulo magis curares: Omniaque cœlo huic nostro aliquanto inclementiori, convenienter agas: ac imprimis ne ad animum revoces, duorum fortassis aut trium sinistra judicia, ac laudationes malignas, sed potius grato in Deum animo, sæpe illud cogites, quod in loco cœleste numen te constituerit, quasi in Theatro omnium Doctrinarum, in quo quicquid candorem cum præclara eruditione conjunxit, tibi ac præterea uni alteri (in his scis me dicere, tuum & meum Grotium) pariter adsurgit. Et cum tam benigna bonorum omnium judicia experiaris, ut qui non eo te loco habet, si non doctrinæ, probitati saltem bellum indixisse videatur: tamen non dubito, quin præclariora etiam futura sint posterorum judicia, præsertim si dederit Deus, ut ea quæ ad Ecclesiasticas An-

tiquitates pertinentia jam affecta habes, vel consecuta in lucem ac manus hominum evenire contingat. Utinam mihi Deus tam longam vitam concesserit, ut laboribus illis tuis frui detur. Verè enim dixero, nullum esse studium, quod me à plurimis annis magis ceperit; nec malevolis atque cenfeo, quod superiorum temporum tempestate non levem bonorum meorum jacturam facere sim coactus, quam illud quod ab his studiis sim abstractus, quibus eo magis animo meo morem gessissem, & magis consuluissem publico. Aphrodisium de Fato, quem petieras ex Bibliotheca mea, mitto. Nec citius remitti postulo, quam tibi videbitur. Vel tota enim hyeme eo, & additis Scriptoribus carere possum, propterea quod etiam compareant in Bibliotheca hujus urbis publica, cui filius meus Matthæus est Præfectus; hunc enim honorem ei procures nostri habuere, ut *maxime* fratri surrogarent. Quare si quid vel in ea, vel in nostra usui esse possit, scias non magis te promptum esse posse in petendo, quam nos faciles in mittendo. Vel quinquagenos si ex mea eodem poscas tempore, gaudebo, quod aliquo pacto liceat ostendere, quanti te faciam; & quam omnia tui causa velim. Uxor tuam salute plurima impertit, quam doluit de adversa ejus valetudine, tam gavisa est de secunda; Quam utrique vestri, & familiæ universæ diuturnam optamus.

Amstelodami iii. Non. Decembr. clc xxxiii.

Postquam, Maxime Salmasi, superiores literas scripseram, intelligo ex meis ob intensius gelu nautas non audere se itineri committere, metu ne non sine maximo periculo congelantur in via. Nempe dies hesternus, quo tuas accepi, postremus fuit, quo hinc solverent. Superest ut terrestri itinere liber mittatur. Sed id non satis tuto fieri solet, præsertim quia ut committam librum aurigæ, tamen is non ulterius contendit quam Harlemum, ubi alio opus qui Leydam deferat. Sed operam dabo ut fidum hominem nanciscar, ex iis quibus abeundum Lugdunum. Sane dolet, quod non statim tuæ satisfaciam voluntati, sed nunquam importunius, toto penè anno, posci liber potuerat, quam hoc tempore. Credo si præcisses, bi-duo vel triduo ante scripsisses. Nimirum, mi Salmasi, discendum adhuc cœlum Batavum, & quomodo hic vivatur. *Tæxsa.*

Tuus totus,

G. J. Vossius.

CCXV.

CCXV.

Erycio Puteano S. P.

Magnus me luctus tenet, mi Puteane, amisso Dionysio meo, quem ego filium amare solum poteram, ob excellens ingenium, & raram hoc seculo, ea præsertim ætate, modestiam & probitatem. Nunc tam varia accefferat eruditio, nec illa in Latinis modo Græcisque literis, quæ solæ totam hominis ætatem occupare possint, sed etiam Hebræis, Syris, Chaldæis, Arabicis. Ut de Æthiopum Lingua, & aliarum Orientis gentium taceam, quia objectari possit, istarum non multo plus quam gustum habuisse. Ut quoque præteream Gallicam, Italicam, Hispanicam, quibus loquebatur. Sed istas in vulgaribus haberi scio dici posse. Et jam Cæsaris editionem novam moliebatur. Jam Maimonidem de Idololatria ex Hebræo fonte in Latinam Linguam à se derivatum, & commentario redditum illustriorem, communicare Reip. literariæ gestiebat. Jam quoque animo conceperat ex Rabbini omnibus, quorum volumina avide devorabat, ingens volumen, quod præcipue complecteretur quæ ad Judæorum conversionem pertinerent. Nunc, si Maimonidem & Cæsarem excepero, quæ non multum desiderant (ita prope absunt à perfectione) omnia jacent plane imperfecta, ut etiam pro non inchoatis debeant haberi. Quid in Reidani Annalibus transferendis præstiterit, nondum potes vidisse, & hibernâ hac tempestate majusculum volumen commode satis transpitti non potuit. Sed enim curabo meliori occasione, nequid dignum amicitia nostra in me requiras. Volo enim te omnium esse participem, quæ à me, aut meis proficiantur. Sed præter eam, quam dixi causam, altera etiam cur nunc non mitterem, accessit ratio, quæ à temporibus his erat. Utcunque enim nihil nisi innocentes curem Musas, tamen non ignoras, quibus temporibus vivatur, sane suspicionum, atque utinam suspicionum modo, ac non etiam malevolentia, & pestilentia plenis. Contemnamus hos uterque, mi Puteane, utcunque id durum videatur, præsertim ab iis si perferendum, qui ex literis nostris humanitatem hausisse debebant. Ego vero te ob amorem pacis amo impensius. Scio te ista & amore magni regis vestri, & simul universæ Belgicæ scripsisse. Valeant sanguinarii illi, quibus nihil dulce præter bellum & opes quas inde ingentes expectant. Equidem non tam rerum sum nostrarum ignarus, ut non videam innumeris opes bello accrescere. Sed

ego pro pecuniæ ac diaboli mancipiis habeo, qui bellum præoptent, si inter partes honestis trantigi conditionibus possit. Nec aliud mihi persuadere possum, quam Belgicæ vestræ proceres belli, ac tot calamitatum pertæfos candidè nobiscum negotium hoc tractare. Deum Opt. Max. uterque, optime & amicissime Puteane, oremus, ut illis quibus negotium hoc incumbit, magis magisque animum illum inspiret, eorumque consilia ad exitum, utrisque partibus felicem, perducatur. Barlæo nostro literas tuas præbui legendas, cui jucundissimum fuit videre, quanti se facias. Voluit ut suo nomine plurimum salutarem.

Amstelodami. Anno dñi M^o cccc^o xxxiv. iii. Non. Jan. Novusque hic annus, ut tibi, conjugi, liberis, felicissimus sit, voveo atque exopto, ut debeo.

Tuus totus,

G. J. Vossius.

CCXVI.

Conemburgio *Consuli* Roterodamensi
S. P. Roterodamum.

Quod, Amplissime Conemburgi, ab idoneo Scholæ præfecto, jam prospectum sit florentissimæ urbi vestræ; sane gaudeo, pro amore erga Remp. literariam meo, & affectu etiam erga eam civitatem, quæ non tam meum dixerim, quam communem Orbis doctorem dedit. Nunc verò intelligo, quam laboretis de aliquo, qui proximum à primo, in Gymnasio vestro teneat locum. Est autem apud nos, Justus Rienard, quem si sollicitetis, facile assensurum video. Est juvenis, à pietate & moribus laudatissimus. Latine idem Græceque doctissimus. Poesi etiam Græcanica egregius: ut omnino sapiat supra conditionem eorum, qui munus hujusmodi solent sustinere. Equidem si quid in talibus possum videre, (& experientiâ videor aliquid mihi consecutus) non utilitati modò, sed ornamento etiam, sit futurus urbi vestræ. Tanto magis de istoc mihi certiore te faciendum putavi, quod magnæ urbis nostræ proceribus visum fuerit, Operâ uti meâ, in exposcendo Junio vestro. Successisse negotium gaudeo. Sed non eo deterius urbi vestræ volo. Imò nihil æque exopto, quam ut sæpè se mihi occasio offerat, quâ affectum erga urbem vestram meum possum comprobare. Vale, vir amplissime, & benè de urbis

bis vestræ gymnasio, atque adeo civitate universâ, mereri perge.

Amstelodami
c1o 10c xxxiv.
14 Nov.

Amplitudini tuæ ad-
dictissimus,

G. J. Vossius.

CCXVII.

Hugoni Grotio S. P.

DUÆ propemodum, Vir Amplissime, hebdomades sunt, cum ad te literas exaravi. Etsi autem sciam, ut non Philosophi solum, sed prope omnes scholastici ambulant: tamen jam eas spero à Cassio acceperis. Paucis post eas scriptas diebus, Blauwius J.C. me convenit, seque omnia dixit comparare malle: ex animi tui sententia: eoque animo jam scripsisse Francofurtum, ut illius notæ mittant typos ac expetiisti; sed dubitare continuo cœpi, utrum tanti tam leve characterum discrimen putares, ut Blauwium propterea paulo minoribus edere jam paratum, disferre negotium velles. Interea respondi me super ea exquirere velle sententiam tuam. Et sic quoque scribendo, ac rescribendo, una altera hebdomas abiit. Quod molestiæ devorandum tibi erit, vel potius illi, cui accelerandæ editionis spem fecisti. Nescio, an ut debui jam ante trimestre de Zorgiis adolescentulis ad te scripserim, an hoc ut metuo, morbo meo, in oblivionem venerit. Summa eorum, quæ vel scripsi, vel scripsisse oportuit, ista erat. Patruum eorum, qui hic habitat, paratum esse, in domum suam eos recipere, pariterque animatam esse Conjugem, quæ attendere possit omnia munditiem spectantia; sese aiebat Patruus curaturum cætera, studiis exceptis, quæ haurient à Præceptore, non longè ita ab ædibus Zorgianis habitante. Huic toto prope die aderunt, cum decem, vel circiter adolescentulis aliis: quibus instituendis fidelem operam navat. Mihi id consilii non improbat. Hac hebdomade jam longius aliquanto ab ædibus meis procedere cœpi, cum ante pedem non ulterius domo efferrem, quam in propinquum Lyceum nostrum. Nempe augment indies vires. Putabam ego ea mente, Petrum tuum Amstelodamo migrasse, ut intra mensem Hamburgum se reciperet. Videor enim tale aliquid audisse; sed cognatus tuus Hartigfeldius retulit mihi, ante diem unum alterum literas se accepisse à fratre tuo: ex quibus cognoscat, malle, ut Amstelodamum

redeat, ac uti cœpit, porro utatur seniori Blauwio in Mathesi Doctore. Hoc si est, fatuus fuerat remansisse. Nam Blauwio scio id commodius esse hyeme, quam æstate ob turbam, quæ de die domum ejus frequentat. Si redeat filius, nuspiam melius puto vivat, quam in ædibus Corvini. Is Kalendis Maii huc migrabit, ac domicilium habebit, ut Lyceo nostro, sic ædibus meis vicinum; scio Corvinum omnia tua causa velle. Quare facile spero, hac in re ad paucos menses gratificabitur, dum idem tibi videatur. Nam ut ad Ostdorpium Rectorem redeat filius, vix fieri potest: quia id nimium ei incommodat. Causas exposuit, quibus mihi fidem faceret. Nec obtrudi ei potest invito. Caput querimoniarum erat, quod colloquiis ejus cum famulatio, operæ domesticæ impedirentur: familiaritate item cum Classicæ scholæ pueris disciplina sibi difficilior redderetur. Non ibo per omnia excusatum filium; sed tamen, quid mirum? si filius adolescentulus more ejus ætatis, colloquia, & lusus, cum domesticis quærat? præsertim cum vivat apud hospitem, optimum illum virum, & tui amantem, sed gravem, & exigui sermonis, ac fere valetudinarium. Lætiora ei omnia apud Corvinum erunt, & in propinquo domus nostra, tam benevola, quam si arcto ei sanguine juncta foret. Plura, hoc est domo mea, offerrem, nisi arctè, ob liberorum multitudinem, habitarem, & filio etiam tuo alterum magis expedire arbitrarer: sed si de Corvino non cadet ex animi sententia, tamen opera dabitur à nobis, ut aliter ei consulatur.

Amstelodami
c1o 10c xxxiv.
Nonis Aprilibus.

Tuus totus,

G. J. Vossius.

Qui hæc literas tradit, est Illustris Johannes Skitte, L. Baro in Duderof, &c. maximus natu trium fratrum, quorum minimus ante mensem, & quod excurrit, Hamburgo, ad nos profectus studiorum causâ. Juvenis est eximie probitatis, literarumque cultor, literatorumque omnium amantissimus, tui imprimis nominis, & cultor, & admirator. Eique sic poscenti literas has sic deferendas, dedi, quas alioqui traditurus essem Tabellario. Nempe arbitrabatur, meliorem sibi occasionem fore compellendi tui, si literis meis tibi commendaretur. Quod facio libens; nimirum nihil aliud ei in votis, quam ut conspiceret te detur; simul, semel, iterumque, dum Hamburgi pauculis diebus subsistit, compellere te possit: quod tam minutum negare nulli

nulli soles: nedum huic grave sit hoc præstare, & generose nato, inque summas spes educato, & mihi longè carissimo. Uxori ab uxore salutem dicito, & omnibus tuis. Iterum vale.

CCXVIII.

Jacobo Wittio, *Quæstori Dordraceno,*
S. P.

Non pauci, dilecte Cognate, per se, vel amicos, suos transmittere labores, meumque judicium exposcere solent. Nec facile dixero, quantopere sæpius hæream. Nam si laudem, intelligentioribus videar ineptus; si vituperem, amicis eorum, & ipsis magis videar malevolus. Nunc in nulla Charybdi laborandum. Verè enim, & ex animo dico, simulac aureolos versus tuos accepi, ferreolum me Zelotæ cujusdam scriptum deposuisse: hisque quicquid molestiæ fenseram prius, penitus fuisse detersum. Sed dic, O bone, quod alterius etiam versus, tuis esse comites volueris, Batavane simplicitate factum? An callidè potius, ut purpuræ tuæ splendor magis conspicuus foret? Sanè non soleo ego cuiquam detrachere, neque nunc faciam quia utrumque vestri æstimo; sed tamen injurius tibi sim, nisi dicam in perpauca me videre illam ingenii elegantiam, illum etiam Romani sermonis candorem, qui tuis in versibus relucet. O utinam sæpe nobis tales dares, & quod dicere liceat, digniori te argumento. Nam & illud non parum conferre ad hoc solet, ut nos in istis animi foetibus vivamus; & poematis quidem, non solis tamen, te inclarescere velim: fecundius quippe ingenium, quàm ut inde solum tibi laudem pares. Emaculandus, illustrandus, unus alter tibi veterum scriptorum. Abundè tibi gloriæ à prioribus relictum. Mox etiam alia, & alius generis sequantur; de quibus coram melius colloquemur. Equidem non possum non Beverwicum meum amare, quod utrumque hoc studeat, ut benè de publico mereatur, & se quoque tollat humo. Tune, mi Wittio, te vinci fines? Profecto si tam caro capiti irasci possem, facerem illud, & facerem vehementius. Quo nomine? inquires: eo sanè quod illo ingenio, & doctrina, illo ætatis flore, illo otio, illis fortunæ bonis, præter duo tria poemata nihil elaboraris: Et quantum vel ex te ipso, vel aliis intellexerim, nedum aliquid sub manibus serio habeas, quo nomen tuum à rubigine vindices; quo familiæ nobili, & ante in Galliis, & jam seculis in

hac Belgica, novum decus addas; quo denique non exiguo sis ornamento urbi patriæ: de cujus honore ac gloria, bene multis annis, istic habitus, & tot liberorum ibi parens factus, plus multis indigenis; et si id minime sciant, soleo cogitare. Vellem illam urbem, copia excellentium virorum cum quavis Bataviæ, vel Belgicæ certare. Si assurgere nondum potest ad Roterodami, vel Delphorum gloriam, (quantas animas duæ illæ urbes dederint, non capiunt miselli, qui carpunt) at saltem opera danda ut habeat qui proxime absint. Cætera curæ erunt Orbis Rectori. Hic tibi, conjunctissime Wittio, illam mentem inspirent, ad quam nunc te adhortor. Idem te, & universam familiam tuam diutissime sospites conservet. Salutabis in ea omnes; ac præterea & Colvium, & Beverwicum, & quoscumque fucato hoc sæculo, vere scias amantes nostri.

Amstelodami,
clō Idc xxxiv.
post Kal. Apr.

Tuus sine fūco,

G. J. Voſſius.

CCXIX.

Hugoni Grotio S. P.

Redit, Illustrissime Domine, ad te generosus filius Johannes: cui, quod potui, hætenus præstiti; partim juvenis causâ, cujus id virtus, & amor doctrinarum merebatur; partim tuæ in spem gratiæ, quem boni omnes, ac prudentes, suo jure maximi faciunt; non modo ob sublimem locum, in quo es constitutus, sed etiam ob singularem doctrinam, & humanitatem summam: quæ virtus cum in omnibus, in Heroibus prope est divina. Atque ista etiam prædicant, qui his degunt terris; quia statim in oculos incurrunt; qui verò propius adsunt, laudant virtutes alias oculiores, non minus Heroem decentes; de quibus nihil à me expectas, qui non de te mihi ad te scribendum, sed de literis tuis, quas mei causâ, in Bataviam misisti. Sanè illustris filius Johannes honestam admodum memoriam sui apud Batavos relinquit. Præclare de eo censent urbis hujus procures: nec dubitant, quin patriæ sit futurus præsidium, atque ornamentum. De studiis quid attinet me scribere, quandoquidem viva ipse Epistola erit? Solum igitur illud dicam, exoptare me, ut ad suos reversus, unum alterum scriptorem nobilem, & eum potissimum quo genius maximè traxerit, assidue verset, & quotidie nonnihil scribendo, magis, & magis, eum exprimere conetur. Cœperat aliquid foeliciter tentare,

H h

de

de gestis maximi Regis Gustavi. Videre est in illis bonæ dictionis lineamenta, maximè ex Cæsare, & Tacito. Nec interea diffiteor, nondum stylum satis firmasse; eoque opus ut legendo, & imitando pergat; illo pede, quo cœpit gressum, dies formabit, haud aliter ac in pueritia videmus: nam & eloquentiæ studium habet pueritiam, habet juventutem, ac vigorem suum. Pro victu utriusque filii mihi planè satisfactum. De luculento etiam honorario pro institutione gratias ago maximas. Accepi autem in universum imperiales octingentos, & quinquaginta. Minori contentus partem recusavi: sed urgente filio recepi; & sanè care vivitur apud nos, ob maximos census, quia nobis cum potenti hoste negotium est; sed consultius videtur, ut filius generosus Jacobus, potius aliis in ædibus, quam apud me degat. Melius extra domum meam cognoscet, quid ubique rerum geratur. Nihil me occupatius, ut vix sciam quid foris geratur; studiorum verò ejus nihilominus mihi cura erit, quin & potius major. Inque partem curæ, assumam filium meum Matthæum, cum aliorum, tum maximè omnis historiæ intelligentem admodum; & jam orsi eramus uterque, quæ deesse filio potissimum videbantur; & simul quibus imprimis caperetur: cum ecce narrat, sibi in animo esse Gallias, præcipuèque Italiam visere: velle autem ante hyemem proximam reverti, ad ulterius capiendum ingenii cultum. Primitus mirabar plurimum; sed ratione consilii hujus non aspernandas adferebat; satius enim esse, ut æstate peregrinetur: hyeme apud nos degat. Præterea nunc habiturum Ducem, & Comitem Skyttium, virum & doctrina egregium, & quod huc potissimum spectat, in probitate & prudentia pariter insignem. Quo alioqui sit frustrandus, quia cum illustris frater suus Benedictus impensè desideret. Insuper malle recentem à studiis reverti in Patriam, quam ubi quædam, peregrinationis diuturnitate in oblivionem venerint. Denique aiebat, animadvertere se, me editione operis Philosophici, quo in veteres, & recentes Grammaticæ artis scriptores, Aristarchum ago, multaque antiquorum illustris, vel emendo, esse aliquanto occupationem, quam ut æque sibi vacare possim, quam futurum esset hyeme, opere interim absoluto; similia de filio afferebat qui distineretur Annalibus Batavis concinnandis: Eaque opera intra paucos menses absolvi posse cognorat. Mirabar filii ætate in ea prudentiam; sed filium tuum esse cogitare mox cœpi; occurrebat Poetæ illud, Est in juvenis, est in equis, patrum virtus; sanè animi est excelsi, magnæque spondet. Nempe totus est in eo,

ut nobile genus, nobiliori animo illustret, in quo multum abit à Nobilium, si sic loqui liceat, vulgo, quod quia vera non intelligit bona, umbris capitur. Tuum verò hunc, imo omnes tuos, vix opus ad virtutes, ac studia adhortari, ne fiat illud vetus, Equis ad campum. Deum Opt. Max. rogo, ut hanc in liberis foelicitatem tibi perpetuam esse velit, teque, Illustrissime Domine, diutissimè incolumem servet, non tibi modo, & tuis, sed potissimum Suevico Regno; cujus etfi nomen inclytum semper fuit, tamen sub Gustavo nulli Regum inferiore, maxima honoris sui, per universum orbem, incrementa cepisse, nos exteri judicamus; & puto gens Suevica agnoscit non invita.

Amstelædami,
iii Id. April.
∞ Loc xxxiv.

*Illustrissimi nominis tui
cultor, ad officia omnia
paratissimus, tibi,
& generosis liberis,*

G. J. Vossius.

CCXX.

Cl. Salmasio, Ger. Jo. Vossius S. P.

Magnæ mihi voluptati fuit conspectus optimi adolescentis Merceri tui. Juvit enim videre eum qui & affinitate tibi esset junctissimus, tantoque & parente & avo prognatus. Solum vellem ut apud me divertisset & aliquot hic hæsisset diebus. Si quando ipse occupatio fuisset, colloqui cum filio potuisset, eoque Duce & Comite urbem hanc & quicquid in ea memorabile lustrare; sed negabat id ullo pacto nunc fieri posse. Quæso si necdum valetudo tua & anni tempus ferant ut nos cum uxore, liberis, affine invisas, veniat is affinis tuus. Cura ejus habebitur tanta ut sollicitum te esse nihil sit opus. De botanicis scire aveo an propediem visura sint lucem: Memini te coram de iis loqui cum essem Lugduni. Ab eo tempore nihil intellexi, nisi quod Epistola quadam Lugduno percripta Hardervicum spes quoque eorum fiat. Vellem autem Literæ illæ paulo aliter meminissent ejus operis, in quo ut in cæteris fecisti tam multa, doctissimos etiam docebis, præclareque de medicorum filiis, ut alios taceam, mereberis vetera nomina explicando: quod non potest, nisi qui naturam & vires Plantarum exacte calleat. Equis maligne laudet, nihil ad te quia infra te, præsertim cum perversissimile sit fieri istæc non tam quadam animi

animi malitia quam in gratiam alicujus qui
ferre illud non possit, ut in istis & tot aliis sa-
pere etiam judiceris ubi is plane videat nihil
Intellexi te aliquid, imo librum justum edo-
lasse de vitæ termino, quem lucem videre ex-
optem, modò nihil in eo adversus receptam
sententiam his terris *καὶ τοιοῦτος* nec eam
arriperent. Damno hoc magno meo didici,
atque istoc absque dubio apertè etiam fatis
vides. Pluribus nunc colloqui tecum velim.
Sed affinis ait tibi abundum, ut morari non
liceat eum. Et mihi nunc eundem ad Gym-
nasia urbis, quia est solennis examini dies, un-
de mihi in curatorum numerum adlecto ab-
esse non licet. Vale, Salmasi, decus nunc Ba-
taviæ quoque hujus & seculi deliciae. *Τέλει*

cIo Ioc xxxiv.
v. Idus Aprilis.

CCXXI.

Merico Casaubono S. P.

Cogor me ipsum ridere, mi Casaubone, quod ad aliquem scripturus, fere tanquam à solenni formula ordiar literas meas ab excusatione diuturni silentii. Sed tamen nunc scio facile veniam à te & aliis impetrabo cessationis meæ, postquam ad veteres traditatis causas longè gravior ex mœnore accessit, ob amissum optimum & suavissimum Dionysium meum, de quo sæpe ad te scribere cogitavi; sed cum calamum in manus cepissem, dolor recrudescibat, quem cogitationibus aliis amoliri satius erat. Mollitiem hanc animi accusabis, meque ad Philosophorum veterum præcepta deduces, & imprimis ea quæ nobis solatia sacra suggerit fortuna. Istis verè munio pectus sedulo, qui fortasse succumberem, nisi attenderem ad illa quæ nec gentium Philosophi ignorarunt; ac præcipue nisi oculos attollerem ad divinam Providentiam, quæ suaviter sic omnia dispensat, ut ea quoque quæ molestissima sunt carni, salutaria sint spiritui. Hæc mihi propono, his me solor, quoties occurrit qualem & quantum amiserim; Quot enim ille vulgares Linguas erat complexus, in his Hispanicam & Italicam, ut de Gallica taceam? quot etiam Linguas eruditæ non modò Latinam Græcæque, sed Hebræam, Syriacam, Chaldaicam, Arabicam, ut de cæteris nihil dicam? Quos etiam Poetas, Oratores, Historicos, Philosophos non legerat? & ita legerat, ut non magis memoriam mirarer in retinendo, quam iudicium in ea ad usum transferendo. Sed nihil

à quæ exosculabar, quam indolis bonitatem
 studiumque pietatis, & contemptum velup-
 tatum, & aliorum quibus Ætas ista capi ac
 decipi solet. Nec virtutes hæ occultæ esse po-
 terant. Itaque jam à proceribus nonnullis
 Regni Suecici agebatur ut in Sueciam profes-
 tus, ibi sex septem mensibus linguam Gen-
 tis addiceret, atque ad Archiva admissus ex
 sermone etiam præstantissimorum hominum,
 antiquas ac recentes res Suevorum cognosce-
 ret; inde ad nos reversus Regni ejus Histo-
 riographus, mercede non exigua cuncta lite-
 rarum monumentis traderet. Quod si porro et-
 iam operam suam regno vellet addicere, longè
 majorum ei in regno bonorum promissa tie-
 bant. Itaque proceribus iis flebilis occidit :
 nulli tamen magis quàm mihi, quia si quid
 affectum habeam, imo quicquid aliquoufque
 à me scribendo perductum, id si quid huma-
 nitus contigisset, optime unus pertexere po-
 tuisset : Sed quid hæc tam multis ? gratias
 Deo ago, quòd talem mihi filium dederat :
 nomen quoque ejus sit benedictum, qui cum
 fortasse, ne à mundo corrumperetur illa in
 ætate ad se recepit. Gratia quoque ei, quòd
 tot alios mihi liberos reliquerit, qui omnes
 (nisi quod in Johanne meo, majorem studio-
 rum amorem exoptarem) industria viræque
 exemplo planè mihi satisfaciunt. Quid Do-
 mino pro tot beneficiis rependam ? Ita cum
 scriberem, ecce mihi tabellarius qui tradat
 geminum exemplar M. Antonini Impera-
 toris de vita sua Anglicè à te de Græco fonte
 redditi, notisque illustrati. Atque utinam
 linguæ, quâ scripsisti, intelligentior essem ;
 interea Græca cum Britannicis, ut poteram,
 conferenti, maximè libro primo, & iis de
 quibus differis in notis, vîlum sic fuit non
 pauca te melius Xylandro percepisse, viro
 aliqui doctissimo, beneque de studiis meri-
 to. Vellem Johannes meus in duobus tribus
 locis explicare, hærenti mihi, (linguæ quippe
 Anglicæ multis partibus intelligentior) sen-
 tentiam tuam potuisset. Præsertim verbis
 de Sexto ; ubi in laudibus ejus ponit, τὸ ἀνε-
 ἀρτηλον τὸ διαμετρικόν, nisi δινωμετρικόν rescribendum.
 Tales enim instar simplices, nec attendunt ad
 multa amicorum minus laudabilia : quod ad
 conservandam amicitiam plurimum facit.
 Sed nihil pronuncio, quia infcitia linguæ
 nihil certo mihi de mente tua ausim promit-
 tere, utcunque eam adsequi viderer. Sed
 ubi redierit filius juvabit plenius cognoscere.
 Aliquantò ante ubi Antoninus ait, ἢ σὺ ἐπεργ-
 λικὸν ἀνδρα. ὁπαδὲν κενυῖς, nonne præstaret, ἐπερ-
 γηπὸν ; præsertim quando ἀσκητὴν ἀντεcef-
 sit ? Ac post aliquam, ubi Severi nomen retines,
 nonne rescribendum hoc pacto, αἰετὶς τὸ ἀδελ-
 φὸς μὲ Οὐνήν τὸ φιλοσέβειον, καὶ φιλαδελφεύς, καὶ φιλοσέβ-
 Η h 2 χαλόν,

καὶ τὸ δὲ αὐτῷ γινῆναι Θεοσέαν, Ελκίδαν, &c.

Sed de istis tu melius judicabis, qui scriptorem eum totum nunc, quod dicitur, in sanguinem & succum verteris. Præclare meritus es de Britannis, quibus ex tanto Principe haurire præcepta sapientiæ licebit. Quam viam si, exemplo tuo, plures insisterent, multi Patriæ solum Linguae gnari, frugibus potius quam quiscunque, pascerentur. Sed amicissime mi Casaubone, non possum te celare imbecillitatem meam quantumcunque mihi (fortasse & aliis) fortis videar. Cum ego hunc præclarum laborem tuum in manus sumerem, mox sese obtulit pagina à titulo proxima, qua laborem tuum inscriberes divino Viro, magno illi Mecænati nostro. Vide pugnantisimos nostros affectus. Gaudio ingenti erat, quod & illud illustre nomen decorares, & nomen illud non minus decoraret opus tuum. Et tamen dolor ingens me invaluit, ob amissum filium Dionysium, quicum ego omnia communicaram de officiis, quæ Heroi illi familia mea deberet; qui etiam prope nihil non ejus auspiciis edere decreverat. O spes hominum incertas! Nunc ego, nunc mei, tanto post te unum intervallo relictus, ut gemino jam monumento hoc egeris, ne ingratus videaris. Et sæpe metuo, ne qui merita Illustrissimi & Reverendissimi Domini sciant, & quomodo in Batavia hinc vivam, nesciant, vel fœcundiæ me reum agant, vel ejus viri, quo infestis terra nihil pejus sustinet aut creat. Utinam opus meum Grammaticum (quod tanto mihi labore stetit, quo etiam præclare me puto meritum de Republica literariâ) liberis potius post meum obitum reliquissimè divulgandum, quam ut nunc videar tam lentum nomen, atque ut veteres dixere, vere trico & bovinator. Sed facta nequeunt reddi infecta. Non deinceps curæ huic aliud prævorti sinam. Desinam, nec sine dolore, unum si addidero, quod scire debes, jam ante menses aliquos, me accepisse à Peistero pecuniam, quæ provenit mense Septembri anni superioris. Itaque mense Martio hujus anni, totius semestris proventus mihi debitus, quem te paratum mihi refundere, simulac literas meas videris, jam ex Peistero intellexi. Multam salutem dicito Reverendo Dom. Decano, & universo fratrum Collegio, quod colo, & colam semper, uti debeo. Optimam verò uxorem tuam non meo solum sed conjugis etiam nomine plurimâ salute impertias rogo. Vale.

Amstelodami.
clō Iōc xxxiv.
Kal. Maii St.
Vet.

Tuus, uti debeo,

G. J. Vossius.

CCXXII.

Joanni Meursio S. P.

CAREO, Amicissime Meursi, tantopere dilecto filio meo Dionysio; eoque careo (cur reticeam?) magno cum mœrore; sed quem leniat dies, & imprimis divinæ voluntatis cogitatio. Post excessum ejus lentior fui in scribendo. Quod non miraberis, si scias quantum amiserim. Equidem sæpe cogito mecum, quis ille ea ætate; quantillus ego hac grandæva. Sed superanda omnis fortuna ferendo est. Atque hæc non aliqua animi mollietie, sed maximo jure à me scribi, facile videbis, ubi in lucem ejus Maimonides & Cæsar prodierit. Reidanus jam excusus fuit eo vivente, quem mittam ubi occasionem suggesseris, vel ipse reperero. Scio, judicabis sic interpretem egisse, ut, si viveret auctor, non alium votis debuerit expetere. Tua de Regno Attico credo jam acceperis. In qua editione siquid peccatum, nulli minus quam mihi vitio veritas; quandoquidem Janfonio (ita intelligo) visum, ut Harder-vici potius excuderetur, utcunque aliud inscriptio præ se ferat. Aderam his diebus Arlanderveniæ Domino Guilielmo Noomsio, viro & literarum, & literatorum amantissimo, tui præ aliis prope omnibus. Cui cum exposuissim, quàm præclare hoc ipso anno meriturus esses, editione multorum de Republica literaria: in his etiam Bibliotheca Attica, & quæ de aliis scriptoribus consignasses; pro familiaritate, quæ ei mecum est, dicere cœpit, paulo aliter convenisse, & periisse sibi sic laborem, quem in hoc argumentum insumpsit. Attamen, ut ingenuè agam, inter eos qui tam mihi amici, satius existimo à te id fieri quam alio quoquam. Non diffiteor post abitum tuum multum ei argumento esse infusatum his locis. Sed enim quis orbe toto intelligentior talium Meursio meo? Et tamen non plane frustrandus voto suo Noomsius noster. Puto, recte te facturum, si ex opere eo partem aliquam ipsi dedices. Satis animadverto sic satisfactum ei iri. Vel si discerpi id opus non placet, dicetur opus aliud non plane dissimilis argumenti. Et ausim dicere, si bene virum novî (nosse autem debeo) non ingratum eum fore. Nec enim sordidus est. Blauwius necdum opera tua excudere est exorsus: Duas suspicor causas. Una, quod opere nostro Grammatico distineatur; quod & duos tres menses morari eum poterit. Altera, quod ei lis sit cum vicino Johanne Janfonio, quam prius componi velit. Siquidem vix aliquid ullius momenti excudit

excudit Blauwius, quin recudat Janſonius; vix quicquam Janſonius, quin par pari Blauwius det hoſtimentum. Semel iterum uterque (ſed fruſtra) opéra uſi meâ ad controuerſiam hanc dirimendam; nec tamen ſopiri poſſe diſſido, ac brevi quidem ſpatio, damno ſuo uterque diſcet ſapere; ſed ſi bene rem capio, aliquanto iniquior Janſonii cauſa. Quod ſi animus iſte pertinax, vel, ſi malis, pervicax, utrumque gravaturus diutius, non deſinam propterea Blauwium urgere ut quamprimum ſatisfaciat promiſſo ſuo, & expectationi tuæ. Nec enim neſcio, quo affectu homines eruditi non illos ſolum corporis, ſed vel maximè animi ſœtus, ament. Scripſi hæc ſubito cum Lugduno huc veniſſet noſter Mullerius, ſequæ ad Dom. Roſæcrantzium poſt horam literas diceret miſſurum. Nolui enim tam bellam ſcribendi occaſionem omittere. Intelligo ante dies paucos Elzevirium proſectum in Daniam. Quod ſi ſciſſem, fortaſſe occaſio fuiſſet per eum mittendi Reidani; ſed hominem non vidi, nec domi meæ fuit. Uxorem tuam uxor meâ, & liberos tuos liberi mei ſalutant.

*Amſtelodami,
clō Ioc xxxiv.
Pr. Kal. Maias.*

*Tuus, ſi alius
quiſquam,*

G. J. Voſſius.

CCXXXIII.

Stephano Goſſe S. P.

ERgone, doctiſſime Stephane Goſſe, non ſatis nuper munificentiam tuam exeruiſſi, donando me nobiliſſimi Viri opere de Veritate, & longè deſideratiſſima Clementis ad Corinthios Epistoſa: denuoque Bibliothecam amici immerentis augere voluiſti præſtantiſſimi Seldeni ad Hebræorum leges commentario? Quas pro multiplici dicam tibi munere grates? Nunc enim quo paria faciam nihil occurrit; ſed ſpero, occaſionem datum iri magis teſtandi affectus. Popularis ille tuus (ſcis quem dicere velim) recuſat ſe ſubjicere Statutis Eccleſiæ Belgicæ. Rogatur ab amantiſſimis, ut morem gerere velit. Quod & Eccleſiæ & ipſius cauſa facere ſe aiunt; ſed ille immotus perſtat veluti Marpeſia cautes. Ac miniſtris etiam Belgicis ſtat animus, non admittere in ordinem Eccleſiaſtarum, niſi ſententiam mutet. Aliàs ſi fiat perſcribam: nec officio in eo, vel aliis, unquam deero; non amore vel odio cuiuſquam: ſed quia bono Eccleſiæ omnia metior, quam doleo lic

ſcindi, hinc ab iis, quibus tanti eſt Papalis auctoritas, inde ab iſtis, quibus præ novellitate tota ſordet Antiquitas. Abbaris Nihuliani diſſertationes mittere non poſſum, quia jam diu repetiit, & quod unicum ipſe hoc habet exemplar, extra urbem gravatè miſſurus ſit. Sed Eirenici geminum tibi accepi exemplar ut alterius amicum participem facias, quem voles. Nemo hæcenus ſe offert ad pugnam: quod illi glorioſum, noſtris ſatis indignum. Malunt diſſertare de umbone, ubi adverſarius dicat, non quæ ipſe, ſed quæ ipſi volunt, & bene, male, respondeant, nemo contradicat. Hoc animo meo dolet, & ſcio grave eſſe nonnullis, quos quo minus in arenam deſcendant, & publici muneris, & privatarum occupationum grave onus impedit. Unus tamen Ordinis tui ſe paratum decertare retulit mihi. Et fortaſſe alii ſunt etiam, quos ego ignorem. Sed optime, amiſſiſſime Goſſe, num indignam hanc te provinciam putes? non imparẽ te jamdudum perſpexi. Animis opus; vel ſi ſic videatur, offer te eminẽ cominus populari tuo, qui in Patria non admodum diſſimilem inſiſtit viam. Scio te non indigere conſilio, vel auxilio meo; ſed tamen quia, ut aiunt, plures oculi plus vident, noli putare uſpiam claudicare tibi poſſe operam meam. Volo omnia tua cauſa & magis publica: & mihi quoque jucundum erit; tam amicũ uſque ad eò nobilem curam ſuſcipere, tamque dignam cogitationis ſuæ. Quid enim hac cauſa æquius: quomodo non juſte ab iis recedatur, qui te ferro & flamma perſequantur, & ideo perſequantur quia ab ipſis diſſentias amore ſimplicis veri in ſcripturis reſplendentis, confirmatus etiam conſenſu ſanctorum Patrum, ſimiliter ac tu primis ſeculis Scripturas interpretantur; denique, quia credere non poſſis quæ credi non poſſunt, ut quæ contradictionem involvunt: Cujus rei manifeſtum exemplum, cùm proximè unà eſſemus in uſuſorias dogmate, expendebamus. Sunt alia etiam multa quæ adverſus Romanæ Eccleſiæ errores ac tyrannidem poſſunt in medium adferri; ſed vel hoc unum quod dixi quantivis mihi pretii videtur! Quamobrem, mi Goſſe, cogita, quæſo, an non putridam illam clavam Nihulio qui ſibi Hercules *ἀνδρείον* videtur, vel ſi malis alteri illi in Angliã ſimilia ſpiranti, debeas de manibus extorquere. Favebo & applaudam victori quem te reſpondere auſim, & bonitate cauſæ nixus & ingenio doctrinaque tuâ. Vale, optime doctiſſimeque Goſſe.

*Amſtelodami,
clō Ioc xxxiv.
poſt Kal. Mai.*

Tuus,

G. J. Voſſius.
CCXXXIV.

CCXXIV.

Hieronymo Beale S.P.

Dignum scribendi argumentum eximie Beale obtulit mihi Illustrissimus Comes de Leshno: qui visere Britanniam nostram ardet, & compellare in ea doctrinâ atque aliis animi dotibus excellentes viros. Non dubito quin vel eo nomine gratissimus sit futurus, utcumque non accederet familiæ splendor, tot imaginibus illustribus hodieque inter alias præfulgens inclyto heroe, hujusce Comitæ parente, Regni Polonici Palatino, viro doctrinâ, eminenti prudentiâ celebratissimo, pietate nullo inferiori: cujus merita cum universum celebret Regnum, tum præcipue illi qui Ecclesiarum nostrarum potius sententiam, quam Pontificiam sequuntur. Est enim his magno & præsidio & ornamento planèque illud Polonis suis, quod Lithuanis maximus est Razevilus. Adde quod idem ille heros serenissimo Regi nostro Carolo sit non de nomine solum, sed literis quoque cognitus, & ob raras animi dotes, summamque apud suos auctoritatem carissimus. Ut tanti herois soboles, quæ in gloriam magni Parentis feliciter adeo profuerit, non possit non gratissima esse, & tibi & aliis Academiæ vestræ luminibus, quibus conspectis clarius se quoque visurum arbitrat. Sanè non inglorium futurum . . . inclytæ Academiæ viris si alloquio suo (quod non poterit non domino Comiti esse utilissimum) eum dignentur, ac sic demereantur, ut deinceps apud Sarmatas quoque talem suæ virtutis ac doctrinæ præconem nanciscantur. Qui ei à studiis est Joannes Jonstonus, juvenis est admodum doctus & probus, & ante diem Lugduni supremo in Medicinâ titulo ornatus. Quo nomine & ille vobis, præcipueque Medicinam profitentibus, gravior esse poterit.

Amstelodami,
post. Id. Maias,
An. cl. lccxxxiv.

Tue dignitati ad-
dictissimus,

G. J. Vossius.

XCCXXV.

Johanni Roufio, *Bibliothecæ Bodleianæ Præfecto, S. P.*

Jamdiu est, præstantissime Roufi, quod mille inter nos literæ commeant, non sine dolore meo, credo & tuo. Sed si silentium

hoc meum quod solis occupationibus adscribere debes, rupit illustrissimus Comes de Leshno, qui cum desiderio arderet visendi Regnum Britannicum, & inclytas ejus Academiæ, ac conveniendi excellentes ejus Viros; aliquid etiam à me literarum ad amicos poposcit, quod eo pacto facilius se voti compotem fore arbitraretur. Mihi tam perspecta gentis Britannicæ humanitas, ut sciam, nec humili loco natos aspernari solere; nedum vile iis sit genus, ut sic dicam, deorum. Quamobrem nihil sanè Literis meis fuit opus; & si opus fuisset, etiam tacente illustrissimo Juvene, sponte debueram hoc officii offerre. Quid enim non meretur tantus studiorum ardor, is amor doctorum, in eo qui tantam in Polonia spem succrescit? Parens ejus toto Poloniæ regno in pretio est maximo, præclareque meretur de eo, præsertim de iis qui nostrarum Ecclesiarum sententiam potius, quam Pontificiam sequuntur. Vereque illud in Polonia sua est, nostris hominibus, quod in Lithuania magnus ille Razevilus. Nota etiam caraque parentis virtus magno magnæ Britannicæ nostræ Regi Carolo; quod & Literis testatum fecit non unis. Quare cum sic Rex serenissimus æstimet parentem Polonici Regni Palatinum, non poterit non acceptissimus esse præclaris Oxoniensis Academiæ Viris tanti Herois tam charum pignus. Comitatur eum, qui ipsi à studiis, vir doctissimus Johannes Jonstonus, Scotus, qui recens Lugduni in numerum Doctorum Medicinæ magno cum honore est receptus. Eoque cariorum fore arbitror doctissimo & experientissimo Thomæ Clayton, Magistro Collegii Pembrochiani, & Regio Medicinæ Professori, cujus humanitatem satis ipse coram perspexi. Avidè desidero nosse, num jam è Syriâ salvus ac sospes redierit ornatissimus & amicissimus Edwardus Pococke; quem ego juvenem æternum summo prosequor affectu; partim quia sic virtus ejus ac eruditio meretur, partim ob summum honorem, quem laboris utilissimi dicatione mihi habuit. Clarissimis Viris, Juxono, Duppæ, Fell, Prideaux, aliis, nostri amantissimis, salutem dicto plurimam. Non addo ambiciosos titulos, quia virtutem eorum supra eos esse censeo. Etiam Harrifonum & Chillingwortium salute impertias, & quos præterea nostri memores nosti.

Amstelodami,
prid. Id. Maii,
an. cl. lccxxxiv.

Tuo nomini ad-
dictissimus,

G. J. Vossius.

CCXXIV.

CCXXVI.

*Doct. Martin, Præfecto Collegii Regina-
lis, S. P. Cantabrigiam.*

Dicere non possum, Doctissime Martine, quanto fuerim gaudio affectus, cum primum intelligerem Reverendissimum & Illustrissimum Dom. Episcopum Londinensem ad Archiepiscopalem esse dignitatem evectum. Equidem maximum ex eo amorem Dei colligebam erga Ecclesiam suam regnumque Britanniae universum: Quantas enim dotes in eum divina contulerit bonitas! quas qui non vident, si tales inveniantur, cæci sunt: Si non suo pretio æstimare norint, valde invidiæ, ac loliginis succo laborent, necesse est. Quanquam quid ego hæc apud te, qui tot annis longe me rectius herois ejus virtutes perspicere potuisti? Ac memini adhuc Sermonum, quos de iis una Londini habuimus. Quemadmodum & tanti Mecænatis erga te affectum non obscure cognovi. Atque ut istorum, ita & sæpe eorum in mentem venit, quæ de Religionis controversiis, ac ratione eas sopiendi, non injucunde vel inutiliter differebamus. Tanto molestius est, quod tam longo tempore nullum inter nos literarum sit commercium. Hoc silentium mihi abrumpendum putavi, pulcherrimam mihi scribendi occasionem præbentibus Illustrissimo Comite de Leshno, &, qui ei à studiis, erudito viro Joanne Jonstono Doctore Medico. Noluere enim sine literis meis visere Academiam Cantabrigiensem: atque ego minutum hoc scribendi officium non debui Illustrissimo Comiti negare. Nam præterquam quod turpissimum esset leviculum adeò detrectare, poscente id tam sublimis prosapiæ juvene, tamque erudito, tam doctorum omnium amanti & æstimanti; etiam alia ratio debendi illud accessit: quia cognati ejus Illustrissimi Barones Stupeskii diu mecum Lugduni vixere, juvenes excellentis spei: etiam postea fratres eorum, mei unius causa, Amstelodamum venerunt; ac totis sex mensibus sunt commorati. Mitto alia. Unum reticere non debeo. Illustrissimi Domini Comitis parentem esse maximæ autoritatis virum per universam Poloniam, regni ejus Palatinum: quem cum æstimant omnes, tum imprimis illi qui in religionis negotio nostras potius Ecclesias quam Pontificias sequuntur. Quippe quod magnus ille Razevillius est apud Lituanos, id Palatinus ille de Leshno inclytus heros est Polonis suis. Hæc ego pluribus sum profecutus;

quia nollem eum à te, vel aliis Academiæ Cantabrigienfis summis viris ignorari. Unde futurum videbam, ut nec ipse satis cognosceret, si uspiam terrarum, sane in Britannis simul conspirare eximiam doctrinam summamque humanitatem. Nunc pulcrum erit si eâ natum prosapiâ, in eam spem educatum, in terris etiam longè diffitis, vestri præconem habeatis. Hæc intempestâ nocte scribebam. Plurima salute impertias excellentes Academiæ vestræ viros; præsertim quos amantiores nostri existimabis.

*Amstelodami Postridie
Id. Maii, clō Idc xxxiv.
T. M. S.*

Tuus ex animo,

G. J. Vossius.

CCXXVII.

Hugoni Grotio S. P. Hamburgum.

SIC primò promiserat Blauwius, summum abhinc duabus Hebdomadis accepturum se Francofurto, Typos novos, & elegantes, quibus ex animi sententia excudantur sacra tua poemata. Sed nunc significat, haberi eos demum posse intra quatuor Hebdomadas; propterea quod quæcumque ad nundinas mississet, tardius eò pervenerint: In causa esse, quod Dux Nieuburgicus, novum, ac grande vectigal imposuerit mercibus, quæ Dufeldorpio Coloniam, inde Francofurtum devehî soleant. Eapropter Hebdomades aliquas fuisse famulo suo Coloniam subsistendum, priusquam libri, aliaque eo deferrentur. Certò autem addixit, intra quintam Hebdomadem se auspicaturum editionem. Id ego significandum putavi, eunte ad vos docto, ac prudenti viro, Ephoro liberorum Illustris familiæ Scytteanæ. Alia etiam adderem, si die uno præscissem de ejus discessu. Sed hac hora ei abeundum intelligo. Quare definam, ubi adjecero, mediocriter nos omnes hic valere, eademque sperare de te, uxore, filioque; quos omnes mei salvere jubent.

*Amstelodami
Postridie Idus
Maias. Anno
clō Idc xxxiv.*

G. J. Vossius.

CCXXVIII.

CCXXVIII.

Hugoni Grotio, *V. Cl.* G. J. Vossius
S. P. D.

Vir Clarissime,

Mitto ad te Guilhelmi Schikarti literas, & si non fallor, ejus פורים, sive de Judæorum Bacchanalibus opusculum. Quam inde capio conjecturam, quia ad me miserit, quicum non ea illi amicitia, vel illud literarum commercium, hæcenus fuit. Simul literas accipies Hortensii, civis tui, quem puto aliquando non inglorium patriæ urbi fore. Est & illi familiaritas, sed literaria, cum Schikarto: uti & cum Gassendo, & aliis in Mathesi claris viris. Ipse nunc disciplinas Mathematicas, in urbe hac, sed extra ordinem proficitur. Attamen is est confluxus audientium; is quoque genius docentis, ut non dubitem, quin propediem eum Collegam simus habituri. Ptolemæum sic sequitur, ut Tychonianam, & Copernicanam sententiam simul proponat, & explicet. Nec obscurum nobis in Copernicanam magis inclinare: utcumque ea Romæ sit damnata à Cardinalibus, Anno cIdo Ioc xvi. atque iterum anno superiori: Imo Galilæus Galilæi Florentinus, quia hanc sententiam, & viva voce, & scribendo defenderet, in carcerem sit conjectus, nec inde emittendus, priusquam poenitentia satis egerit. Quam rem à Nuntio Apostolico Bruxellis Lovanium perscriptam esse mihi constat, ex Fromondo: qui his diebus Antaristarchum suum hoc de argumento ad me misit. Hæsterna die iterum legi Sophompaneam tuam; sed non sine multis lachrymis. Nec enim mihi cornea fibra est. Movebar argumento ipso, de certissimis scripturarum fontibus hausto, & à te tam graphicè nobis expresso. Movebar quoque recordatione Authoris, magni sanè totius orbis eruditi, præcipui item, si non unici, Belgicæ ornamentum: cui ubivis potius, quam in Patria, maximis à se beneficiis affecta esse licet. Vellem magno civi tuo voluntas, vel potius otium esset, de eo cogitandi serio. Sed recessus animorum unus scit, quem Καρδιστογνώστην, in scripturis vocari propterea videmus. Amstelodamensium affectus non deferbuit. Sed quicquid sine illo tibi struitur, corrui. Et metuo, ne rigoris illud, in tuendo civitatum, suæ imprimis, jure, magis possit abalienare eum, qui plurimum potest. Omnino enim pecuniis ad bellum opus est. Nec sufficit hæc civitas una, vel etiam Batavia universa. Tandem tempus putatur, ut foederatæ quædam Provinciæ in commune solvant quod debent. In

hoc si Batavi perfistant, spissè procedet Cæsarense negotium. Intelligo & eos, qui Provinciarum omnium nomine magnum illud Collegium constituunt, cogitasse, de Guilhelmo Comite in Germaniam mittendo, majori etiam stipendio promisso. Sed Batavi in illo dicuntur conspirare, quod pecunias nolint eam ad rem contribuere: quia se nesciis, non potuerit, vel debuerit, istius momenti constitui quicquam. Cætera cognosces ex Fabricio, Juvene elegante, & erudito, atque ex poematis tibi jam noto, qui Hamburgum, ob morbum matris est arcessitus. Eunte illo, paulo liberius de rebus Batavis scripsi: quæ me sæpè habent sollicitum, sed spero aderit & Θεός quasi ἀπὸ μαγανίης. Cui te, conjugem, filium commendo.

Amstelodami cIdo Ioc xxxiv.

v. Kal. Junias.

Amplissime summeque vir, superioribus ad te literis raptim, sicut nunc meus est mos, exaratis, aliud quiddam in mentem venit. Jam annus, & credo, ultra est, quod in urbe hac degit Bartholdus Nihuyusius, vir doctus, & subtilis, Lutheranus quondam, & Calixto Theologo perfamiliaris, postea Pontificius, atque ad Abbatis dignitatem evectus; sed ea, bello hoc Suevico exutus, & nunc extorris. Is in Germania, priusquam huc concederet, multum, diuque cum Lutheranis solitus differtare, super Religionis controversiis: sed non ad morem vulgarem. Poscit ἀποδείξω, invictumque aliquid, quodque animum possit, aut debeat reddere, ἀνελκυσσόν, & ἀνελκυσσόν. Negat opus de singulis disputare. Eligere suos Lutheranos, vel etiam Calvinianos, & quosvis alios, posse, ubi maxime existiment suæ Ecclesiæ causam triumphare. Si unum viderit argumentum, velle redire ad eos, unde malum pedem extulerit. Sin disputando intelligant, nihil solidi crepare, quicquid hæcenus obtenditur, æquum videri, ut redeamus ad Romanæ Ecclesiæ finem. Edidit novo anno, ut vocat ipse, Ἐπιστολὴν; quo Lutheranos in hanc formam provocat. Crebrò & me invisit. Et quamvis de aliis quoque rebus colloquamur, tamen jam iterum, tertioque, eò nos sermo provexit. Illo igitur poscente causam justam, cur parens meus à Romana abierit Ecclesia, respondi multa, de veteris, præsentis Romanæ Ecclesiæ discrimine. Sed tandem in eo pedem figebamus; Romanæ Ecclesiæ Doctoribus, ita scripturas interpretantibus, ut manifesta iis vis fiat, planèque abeant à primorum seculorum Doctoribus, imo interdum (ut in transubstantiationis dogmate) sensus interpretationi reclamet,

met, manifesta que sit contradictio : Nec solum sic interpretantibus, sed etiam, nisi simpliciter interpreteris, ferro te, & flamma perdere paratis : jure ab ejusmodi Doctoribus receditur, ac seorsim cultus Dei, celebratur, partim conscientię studio, partim vitę conservandę, quam Patrię, Ecclesię, familię, & amicis conducibilem existimamus. Si valetudo, si otium tibi, si res etiam tuę sic ferant, ut hujusmodi tractes, quod arbitror : quęso paucis saltem perscribere, quid tibi de hac re videatur, & quam potissimum viam, cum istiusmodi hominibus insistendam putes. Vale.

CCXXIX.

Hugoni Grotio.

Maxime & Amicissime virorum,

NON excusabo apud te diurnam silentium, quamvis te prope solitarium sciam vivere, eoque gratiores amicorum literas credam. Etenim satis occupationes meas nosti ; & quod scriberem, nihil magnoperę erat. Nunc scriptionem differre diutius nec volui, nec potui : Quippe mihi videbatur, Salmasii ad te literas à me, sed sine meis literis venire. Vir ille nihil æquę, quam tuam absentiam dolet. Nec multum miror, cum vivat Lugduni. Scis quid velim dicere. Ante dies non ita multos, adfuit mihi quispiam ex amicis Aristarchi, qui in tantum, moribus, & doctrinę Salmasianę detractum ibat, ut non multum supra semidoctos ponere videretur. Cui cum non mediocriter adversarer, ille quodammodo mihi postea accedere, sed dicere, hæc nemo Lugduni promovere auderet. Nemo credo ex Parafrastris Aristarchi parvulis : Nam aliā mens paulo cordatioribus, qui & Salmasio, & Aristarcho, suas tribuere laudes sciunt. Ceterum præterquam quod nonnulli Salmasio non satis sint æqui, etiam aer est molestior, ut ambigat, an ætatem illic vivere possit. Hoc spero : nolim enim Batavia, postquam sole suo caret, citò adeo fraudari sydere, quod nuper accessit. Utinam hoc effici possit, ut brevi fruamur utroque. Hoc in voto optimo cuique. Procerum quidem hujus urbis animus est in te qui fuit, & debet : sed opinio est, nihil effici posse, priusquam aliquid certi de pace, vel induciis, aut bello constiterit. Gallus sedulò operam dat, ne Belgica coalescat ; multaque ad bellum promittit. Sed verendum, ne si auscultemus, facillè aliquid impediatur postea, cur pollicitis stare non possit.

Operis mei Grammatici jam dimidia pars excusa est. In quarto enim Libro occupantur Operę. Intra sex septem menses puto cetera consummanda. Mitto tibi Panegyricum, & Poematium, filii Dionysii. Gratum utrumque fore scio ego, & sperat filius : quamvis se probare tibi rudem Musam vix arbitretur. Vale, & cum filio salve. Etiam Teliobrogę salutem dices, si occasio erit.

Amstelodami.

CCXXX.

Joanni Bodechero Banningio. S. P.

SImulac, Præstantissime Bodechere, paulum licuit respirare, tuis me poematis delectavi. Non leve exiliump, quod tibi proposueris omne carminis genus. Multos enim qui in genere uno laudem merebantur, in alio sua vena destituit. Quod de te non dixerō ; Et si maximè capiar Elegiis, & Hendecasyllabis : Idque ob *σφηνειαν*, quam ego principem Orationis virtutem cenfeo : Ita ut si elegantiam sociare ei nequeam, malim *ἀμαρτρεον* dicere, modò *σφίστεον*. Adolescenti mihi mens alia ; sed ætas animum jamdiu mutavit. Quod verò meum etiam judicium exquisieris, de affectu sanè gratias ago. Sed alio potius itum oportuit, si velles aliquid, quod scribere opere videretur. Et tamen ut fidem facerem, lecta mihi tua, volui quædam annotare, quæ tui facerem judicii.

In paneg. pag. 3. Tygresque,] Tygresque Græcè *Τύγρης*. Celtiberum] Penultima Catullo, Martiali ; porrecta. Et Græcè *Ἰκίπης*. Belgiadum,] video, qui non refugiant. *Ἀναλογία* tamen aliud postulet. A Belgium deduxeris ; sed longè aliud Belgium, ac Belgica, et si doctissimi etiam confundant. Cur non Belgarumque ?

Pag. 9. Illa dies ad d. f. quod atrox.] Video versum quod exigere. Et fortasse habes, qui prævit. Alioqui malim, *que atrox* : ut Seneca ; *Venient annis secula seris, Quibus oceanus vincula verum laxet.*

P. 10. Carbasa Celtiberum] de quantitate penultimę jam dictum. Panopęa] Panopęa, Græcè *πανοπεία*, non *πανοπεία*. Alta voce.] Nihil vulgatus trivio. Sed veteres puto semper, *clara*, vel simile.

Sylv. III. p. 1. Scævior, non memini in comparativo legere. Simile tamen sit *sinisterior*, quod apud Nasonem. Et convenit significatio, quia *σκαίος*, sive scævus idem ac sinister. P. 2. Medęa] Medea Græcè, *μειδεία*, per ei non ai. P. 3. Iaspide] Non memini me *τετραλάς* legere.

Sylv. VI. — *Redux Professor, & omnem*] Prima in Professor, necesse, ut eundem habeat modulum quem *profiteor*. At prima est semper correpta. Eleg. IV. *Questibus*] *Questibus* quia non à *quero* hîc, sed à *queror*. Eleg. V. *Nec Polydectes ego*] Postrema in *Polydectes*, quia Græce πολυδέκτις, ut πανδέκτις. Eleg. XIV. *Hesper aquas*] ab ἑσπερος, vel est vesper, vel Hesperus, non Hesper. Eleg. XVIII. *Junctas Azone*] Dicunt Latini *Azoni*, vel cum *Azone*. Serm. IV. *Id licet ipse negarim, in limine scribens.*] Festinatione in scribendo, vox præterita, quia pes deest. Carm. IV. *Hos pauculos versus habe obsides mei.* Nulla hic Triemimeris, quam Horatius, nec in epodon libro, nec alibi neglexit. Saltem nolim vox aliqua, totum pedem tertium constituat in Jambico senario. Poteras *Paucos habeto hos obsides versus mei.* Eam legem veterum, saltem elegantiorum, nec video in illo, *Ille belluo celebris, ut hic nepotulus*, Cæsura fit hoc pacto, *Celebris belluo ille, ut hic nepotulus*. Vix etiam Triemimeris in isto, *Pæana vocem addit suam Ripperfius*. Carm. V. ad Tulpinum. *Largus percrebui vocibus undique*] prima in *creber* longa, ideo & in increbescō. Nec aliter Virgilius, vel alius quicumque veterum. Carm. VI. *Divum voluptas, & conviva diceris*] Placetne pari, quarta quippe fede, spondæus? Car. VII. *Præcoci sapientia*] scio in Glyconio à Catullo, prima sede poni Trochæum: sed ubi id deinceps observet? Id Horatius non facit: nec ipse facit. At secunda in *præcoci* est brevis. Nam est à *præcoquo*, *præcoquis*, & contractè *præcox*: In gignendi casu *præcoquis*, secundâ correptâ. Ita omnes antiqui juxta naturam ejus unde descendit. Hendecasyllabo 1. Epicurus dicitur Pater ipse veri, κατὰ τὴν, dixerit, quem me scis dicere. Sed quid de illo viro rigidiores? Pater veri, qui Providentiam negat divinam? Mittam alia. Hendecaf. II. *Dum nullo peregre pudore tacta.* Peregre non venit ab adjectivo, ut *doctus*: Eoque si Grammaticorum canonibus standum, corripet ultimam. Hend. IV. *Estne hoc postridie redire Lemvi.* Secundo in *postridie* est longa. Phalæcio, Phalæcium oppono, eumque Martialis, Lib. II. Epig. VI. *Si totus tibi triduo legatur.* Objicies amicum nostrum ibi annotare, leviculâ traiectione legendum servasse, si totus tibi triduo legatur. At refellitur hoc senario, Terentii Eunuchō. *Rus ibo, ibi hoc me macerabo biduum.* Idem in Andria: *Venit Chremes postridie ad me clamitans.* Et par ratio in aliis è die compositis. Catullus; *Sube ad te veniam meridiatum.* Solum quotidie excipitur. Hend. IV. *Nec profecto facis.*] Non improbo, quia non occurrat Poeta, qui ultimam in *profecto* corripiat, vel producat. Tamen ratio posterius suadet,

quia *profecto* est, *profecto*, *Wooz:waer*. Ergo quali ablativus. Sed non tanti hoc. *Irarum ratio modo liberat,*] Deest aliquid. Hend. VI. *Nummulisque apisci*] Puto à Typographis operis esse, quod prima in *apisci* notatur circumflexo; sanè est brevis; ut indicat compositum *adipisci*. Item *indipisci* ex *indu* & *apisci*. Hugeno, & *Chelys emulo campo*, si *Chelys* hic gignendi casus, *chelyos* dici oportuit. Hendecaf. VII. *Venusta pixis,*] *pyxis* Græce πύξις.

Hæc ego duntaxat amore tui, & scio te non aliter accepturum, qui & me nosti, & occupationes meas. Siquid in iis fuerit, quod monuisse non erit ingratum tibi, sanè non dico operæ, sed opellæ pretium fuit, hæc exarare. Sin minus volupe erit, me studium saltem probasse. Erant alia de quibus quæfissim, si unâ fuissim. Sed id quia fieri non potuit, sic mihi persuadeo, tibi rationem omnium constare: vel ecquid melius dici possit, per te satis visurum, ubi animum intenderis, non in universa poemata, sed singulatim in hoc vel illud; ut fit cum Typographus tantum poscit Autographi, quantum philogra excudenda capiet. Mihi quidem sic usu venit, ut nunquam mihi videar perspicacior, quam cum eo animo mea lego, quasi deinceps, nihil amplius juris in ea firm habiturus, ubi facta erunt publici iudicii. Atque utinam mos Veterum hodieque obtineret, ut amici fideles convocarentur, coram quibus nostra recitarem. Nunc optima illa consuetudo negligitur, quia is fastus recitatoris, ut non sustineat moneri: ea vanitas, & jactatio monitoris, ut neminem, quorum monuerit amicum, sinat ignorare. Plurimam salutem optimis parentibus dicito.

Amstelodami
clō Isc xxxiv.
Postrid. Kal.
Jun.

Tuus,

G. J. Vossius.

CCXXXI.

Joanni Beverovicio, Senatori, & Medico Dordrechtano, S. P.

QUAM vellem, suavissime Beverovici, alter alterum sæpè videremus! Videremus? imo audiremus, ut ait ille, Multum oculi, sed plus aures, debere fatentur. Attamen si non licet tam foelicibus esse, saltem liceret Literarum commercio frequentiori, audire, & reddere voces. Bellè, inquires, qui, toties provocatus scribendo, Deo illo, quem Tardipedem vocant, in rescribendo tardior videaris. Quem colorem me hic quæsiturum

rum putas? aliquid adferendum ex Rhetorum meorum ἀνέκδοτῶν. Didici ex illis, & porro alios docui, incidere, & controversiam, εἰ μὴ αὖ ἢ μὴ οὐκ. Crede mihi siquid in me culpæ, sanè perexiguum est. Et nunc lentior me fecit, quod literas Hamburgo expectarem, ab eo, cui miseram tuas, & unà librum de Vitæ Termino. Tardius scio accepisse, quia, cui commiseram, non habuit tam citò occasionem mittendi commodam, quam uterque optamus. Reidanum filii mei τὸ μαγεῖν, quem superstes promiserat, comitem dederam. Tanto magis cupiebam, ut tuto omnia perferrentur. Nullas tamen ab incomparabili viro literas recepi. Et credo in causa esse, quod non amplius sit Hamburgi, ut edoctus sum literis, inde ab Illustri Barone Skittio ad me perscriptis. Aliunde etiam accepi, Francofurti esse. Nec de eo dubito. Tantum spero, opto, voveoque, ut quia ingrata cum patria respuit, alibi sic habeatur, ut doctrina ejus, & virtus merentur. Mihi quidem, nihil hic magis, quam alteri feritur, aut metitur, sed sic sum ab teneris unguiculis educatus, ut alius esse non possum, nisi Bataviam amare desinam, & simul quicquid eruditum, & honestum. Valdè desidero scire, an jam Salmasii dissertatio de fatali Fine, lucem viderit. Video te hoc agere, ut me quoque producas in arenam. Nec reformido Retiarios, aut Myrmillones, quibus candor inest. Sed quid, si pro candidis, inciderem in nigros? Equidem semel nullo meo merito, habitus pessimè, nunc propè sub omni lapide metuo serpentem. Quare stat sententia, extra teli jactum speculari, ut abiturum hoc sit uni alteri, qui suum judicium perscribere; & simul animus avidè expetit Salmasiana: qui fortassè sic, quicquid præclari exhauriet, ut nihil mei desiderare quicquam velit. Saluta plurimum amantes nostri; in his Colvium, & Roverium; quos monere debes, ut aliquod ingenii, doctrinæque suæ monumentum posteris procudant. Possunt. Et magnam in tribus vobis fiduciam habeo: quos Patriæ Civitati ornameto esse maximo exoptem. Adderem τὸ μακαρίτω filium, non levi literariæ Reip. damno denatum. Sed aliter visum magno Imperatori, qui è sua statione eum evocavit, cum prodesse publico inciperet. Tamen Maimonidem ejus, ac Cæsarem, lucem visuros spero, & quidem intra hunc annum. Nunc nihil moratur, nisi quod Edirione Commentariorum de arte Grammatica ipse distinear.

Amstelodami
clxxxiv.
Jun.

Tuus.

CCXXXII.

Guilielmo Nieuportio Consuli Ultrajectino. S. P.

CUM ante paucos dies, Amplissime Vir, tuque & duo præstantissimi viri, qui tecum venerant, me compellaretis, atque inter alia, de idoneo Philosophiæ Professore sermo esset nobis; nihil occurrebat præterea, quæ tum afferebam. Sed post abitum vestrum, altero die venit ad me vir insignis Franciscus Diuban Augustodunensis: Quem simul ac conspexi, ac quædam de urbis vestræ consilio exposui; animum quoque ejus tentare cœpi, quo cognoscerem, num ad hujusmodi vitæ genus magnopere propenderet. Ac facilè cognovi, minimè ab eo alienum; quin potius eo maximè proclivem. Quamobrem, cum iterum convenissetis, non leviter vobis eruditissimum virum commendavi. Ab eo tempore rursus mihi cum eo loquendi occasio fuit. Non destiti igitur monere, & hortari, ut partim publici boni, partem rei familiaris gratia, hoc de animo suo, ipse etiam vos volet facere certiores. Putavi autem pro meo, erga urbem vestram, & Rempublicam Literariam, amore rectè ordineque me facturum, si per Epistolam etiam, eorum quæ coram dixeram, memoriam reffricarem: sed imprimis quædam apponerem, quæ vel tum in mentem non venerant, vel postea demum cognovissem. Est ornatissimus vir, de quo nunc sermo nobis; annorum circiter xxxviii. studuit Mussipunti, Parisiis, & aliis in locis. Annis prope xx. docuit. Ac publicè quidem in Academia Mussipuntina, variisque Collegiis; uti Flexiæ, Rothomagi, Molinis; quibus in locis professus nunc literas humaniores, vel Eloquentiam, vel Philosophiam, nunc Theologiam, & causus Conscientiæ, quos Rothomagi, in aula Archiepiscopali, præsentè etiam Archiepiscopo exposuit. Sed maximè opera ejus publica, Philosophiæ est impensa, idque circiter decennio. Nec pauci ex ejus Auditoribus, ac Discipulis, nunc in Galliis, ipsis in Academiis, vel Collegiis, publici Doctoris munus, cum laude sustinent. Vidi disputationes ab eo, publicè Molinis susceptas, & Reginæ Matri dicatas. Sanè vel illæ fidem fecerint, quantum in Philosophia valeat; ut mittam quæ in Logicis, Physicis, Ethicis, ac Metaphysicis elaboravit, atque ubi extrema manus accesserit, in lucem edere cogitat; & si sua vobis opera probaturus, inclytæ potissimum urbi vestræ dicabit. Religionem reformatam primum Lutetiæ Parisiorum est professus. Cum

in Hollandiam veniret, ab Illustrissimo Duce Lanspergenſi, & Heroïna ejus conjuge, ſo-
rore Illustriſſimi Principis Arauſionenſis com-
mendatus admodum per literas, huic prin-
cipi noſtro fuit; uti & ſeneriſſimo Bohemiæ
Regi, & Reginæ. Atque hi quidem operam
ejus Lugduni Batavorum ſunt experti, in in-
ſtituendis Liberis ſuis. Etiam Rex promiſe-
rat, ſi in Electorales Terras ſuas à Deo redu-
ceretur, velle ſe publicâ ejus operâ uti, in
Academia ſua Heidelbergenſi. Uxorem ex
aulâ Bohemiæ puellis, patriâ Namurcen-
ſem, Reginæque præ cæteris acceptam, duxit.
Sed metuo, ne dum fuſè adeo omnia pro-
ſequor, propemodum videar velle, hiſtorio-
lam contexere. Quare aliis ejus generis miſ-
ſis, illud nunc ſolum dicam, Doctiſſimum
hunc virum paratum eſſe, ſuam vobis ope-
ram addicere. Nec certum ſtipendium ex-
poſcit. Poſſitis, menſibus aliquot, vel anno
etiam periculum facere, & vitæ, morumque,
& doctrinæ, inque docendo dexteritatis.
Non recuſat, quo minus miſſum faciatis,
ſi parum ſatisfaciat expectationi veſtræ. Ve-
rùm arbitror, iis & doctrinæ, & facundiæ
dotibus pollere, ut nihil ultra requiratis.
Sanè locutus cum iis ſum, quorum liberos
inſtituit Lugduni. Hi magnoperè ſibi de
opera ejus gratulabantur. Cumque Philo-
ſophia admodum latè pateat, ut vix unus
explere omnia poſſit; quid ſi hora una al-
tera de Hebdomade ea ſuppleat, quibus Phi-
loſophus alter non ſufficiat: Reliquum Heb-
domadis impendat ſtudio Eloquentiæ; nec
ſolum publicè eam doceat, ſed privatim quo-
que in declamando exerceat, tum ſtylum, &
rationem formando, quod & Lugduni à
præſtantiſſimo Cunæo, & Amſtelodami à me
ſit, non exiguo juventutis bono, etiam Lin-
guam Gallicam docendo, & ejus, & uxoris
operâ, conducere poſſit civium veſtrorum Li-
beris. Nec ſi vobis videatur, diffugiet con-
cionandi Gallicè munus, ut ex ipſo accepi.
Hæc raptim, idque nocte intempeſta exaravi,
partim quidem, ut Doctiſſimo Duban pro-
deſſem, ſi poſſem: partim vero ac imprimis,
amore publici boni, inque veſtram ſpero gra-
tiam. Vale Ampliſſime Nieuporti, & cum omni
familia, ornaſiſſimo filio imprimis, ſalve.

Amſtelodami
cloſe xxxiv.

Addiſſimus tuo nomini, & Vi-
trajedine toti Reipublicæ,

G. J. Voſſius.

Iis quæ à Clariſſimo D. Voſſio Collega
meo, in commendationem Doctiſſimi viri
ſcripta ſunt, libens ſubſcribo, amplitudini
tuæ addiſſimus,

Cæſar Barleus.

CCXXXIII.

Gerardus Voſſius, Joanni Filio S. P.

CUM à te divellerer, ut in triſtibus Poeta
loquitur,

Vix illud potui dicere triſte Vale.

Decrêram ea dicere, quæ ſi quid, te abſente,
humanitus paterer, maximè vellem inhærere
animo tuo. Sed eo me ſolor, quod illa ætate
ſis, quæ ſatis per ſe intelligit, quid factò ſit
opus. Potius igitur vota nunc facienda, ut
Deus Spiritu te ſuo ſic regat, ut nihil agas,
aut velis, quod non conſcientia, & honeſtas
jubeat. Beatus Auguſtinus dicebat, bonâ ſibi
conſcientiâ opus eſſe, propter Deum; bonâ
famâ, propter homines. Ita planè conſido,
& hujus, & illius, te rationem habere velle.
Nam mille mortibus triſtior eſt vita, ſi diſpli-
ceamus Deo, & probis. Non Jupiter, ſed
Deus, *Amſelbrau*, vel ſi Latine malis, aver-
runcus, hoc unquam ſiverit, ut vel levis ſuſ-
picio de alterutro neglecto animo meo obo-
riatur; dum vaſtum hoc iter, Deo Duce,
Angelo ejus comite, capeſſis. Maluiſſem
antea te, paterno & avito exemplo, ſtudiis
vitam tueri. Sed video aliter placere Deo,
qui noſtra dirigit, aliamque tibi voluntatem
partim permiſit, partim immiſit. Feram e-
tiam quod adverſatur animo magno. Tu
tantò magis. Tandem ubi ubi ſimus, à
cælo abſumus. Non operoſum negotium
hoc ſeculo, ire ad Garamantas & Indos, &
revocare gradus. Verùm ſuperas evadere
ad arces, Hoc opus, hic labor eſt. Senſiſti
his terris impedimenta bonæ mentis. Nec
deerunt quoquo pedem feres. Quare ſem-
per eſto, quod dicitur, inter ſpinas calceatus.
O ſi diem illum videam, quo quaſi geminis
alis, per ora virum voles, hinc inſigni pie-
tate, inde pulcherrimi nominis famâ nixus!
Sed ſi breve duntaxat ætatis mihi ſpatium
ſupereſt; etiam poſtquam ad meliores ſedes
penetrârò, eam tibi ſollicitatem à Deo precor.
Sed præcibus meis, tuas quoque te addere
oportet, eaſque ardentes, quò facilius à Deo
exaudiamur. Hoc age, mi fili, Quicquid of-
fenſæ adverſus numen, hoc reſtinguent la-
crymæ, à poenitentia proſectæ. Adulari non
eſt Patris, præſertim ſenis, idque in eo ne-
gotio, ubi agitur, tum de ſalute æternâ, tum
de nominis honeſtate. Addere etiam poſſis,
de valetudine, & vita tui amantiſſimi Paren-
tis. Nam ſi ſiniſter nuntius perculerit porro
aures meas, quid niſi moerore brevi conta-
becam? Sed meliora Deus dabit, & tu quo-
que ſcio, cogitabis tecum Poetæ illud:

Utque

Uique ego majores, sic me coluere minores.

Et isthoc,

Ab alio expectes, alteri quod feceris.

Eoque majori tibi curæ erit, omnem sic vitam tuam componere, ut senile hoc cor, tot curis propè consumptum, recrees, & relicias. Hoc post Deum in manu tua est; nec divina bonitas claudicabit. Tu cum bono Deo manum move. Inter alia, illud non minimum referes, quod bonis artibus rem parabis. Tanto magis obstringes tibi, si quos reduci, ut spero, Deus liberos dabit. Miserum enim gignere ad spem famis, & esuritionis. Sed quàm in multis mihi obstiterit res arcta? Quam multa enim meorum bene voluisssem, si potuisssem? Attamen fortasse, non si malè nunc, & olim sic erit. Non definam enim familiam curare, memor Paulinæ ad Timotheum sententiæ, *Si quis suorum, & maxime domesticorum curam non habeat, fidem abnegasse, & infideli esse deteriorem.* Idem tibi obversari debet. Fortassè enim deinceps, non se offeret tam commoda rei faciendæ ratio. Sed de opibus quod dixi, ita capias velim; ut imprimis commendem pietatem, & bonum nomen: sine quibus nullæ mihi opes placent. Miserum est serere Liberos ad egestatem; sed multis partibus miserius est, gignere tales, quos sui pudeat Parentis: & porro seminaturi sunt, qui non æquis auribus, avi nomen audiant. Hoc ego cavi sedulo, hoc item cavit uterque avus; cavere & Proavi; eoque indignius fuerit, te degenerare. Quare confido, oculis ita omnium in te coniectis, nunquam committes, ut non honori sis, & tibi, & tuis, tum qui sunt, tum post futuris. Pluribus si monere, & hortari velim, metuo ne videar diffidere. Quamobrem finem faciam scribendi: sed non Deum rogandi, ut te salvum, ac sospitem, & ad Indos ducat, & nobis reducat. Hoc orant quoque mecum, mater, fratres, sorores; nec desistent orare, usquedum, vel te nobis iterum sitieris, vel meliores in sedes erimus relati. Vale, dilecte fili, atque iterum vale, & tertio vale.

*Amstelodami
clbc xxxiv.*

CCXXXIV.

Hugoni Grotio S. P. Francofurtum.

David Lommelius, qui has literas defert, ante biennium mihi, cùm Hardervico se huc conferret, ab Isaaco Pontano de meliore nota commendatus fuit: ac comperi, favore neutiquam indignum. Parentem habuit honestum virum, cujus opera serenissimus Sueciæ Rex, sæpius in rebus suis, apud Ham-burgenses, locisque in aliis usus fuit. Erat is Latinè, Græcèque eruditus, versumque nunc Belgicum, nunc Latinum scitè pangebatur. Πολύγλωττος adeo, ut duodecim fuisset complexus Linguas dicatur. Uxorem habuisse audio, germanam illius sororem, priorque conjugis nostri Prætoris Grotenhusii. Adolescens ipse commendatione Pauli Pellii, à secretis erit Cornelio Pauwio, multumque literas amat, & literatos, te ante omnes, ælimat ut debet. Eo minus, sic poscenti literas denegare ad te potui; simul quia semper ingenium comperi. Blauwius, quod nunquam alias, tardum nomen factus, in excudendo Sophompaneo tuo. Diu novos, & elegantes Typos, Francofurto expectavit. Sperabat autem posse excudere, tribus Hebdomadibus, quæ proximè antecederent tempus profectiois ad nundinas Francofurtenses, sed ubi id tempus advenit, errorem suum animadvertit. De Sophompanea solo cogitavit: exciderat autem de recudendis simul piis poematis, quæ non paulo plus spaciū requirunt; itaque dolet ob hanc culpam, ac quia inanem nunc fore conatum videt, si al-laboret, ut in nundinis compareant, satius judicat differre Hebdomadam unam alteram: simul ne aliis incommodetur, quibus prelum fervet. Equidem non patiar deinde moras necti, nec sanè ille acturus, potius singulari cura, quod nunc deliquit, corrigere conabitur. Quas vero tibi gratias, & quantas debeo, amplissime vir, quod divinum opus meo nomini hujus homulli dicatu meas? Equidem quibus verbis, gaudium meum, vel quanto-perè me obstrinxeris eloquar, non invenio. Sanè si duo tria mihi omni contigerint vita, quæ ad honorem meum putarim, plurimum conferre in iis reponi debet honos, quem habitum mihi iussi. Quare gratias quidem ago, & quantum possum ago, non quas debeo. Solumque spondeo fore me, qui fui semper, vel si fieri possit, operam daturum, ut meipsum vincam. Filius tuus sedulo audit Blauwium in Mathesi; ac in Jure etiam à Corvino institui coepit. Quotidie incrementa capit, non virtutis modo, sed doctrinæ

næ etiam ac modestiæ. Id non alia de causa, quam quia sic res habet, scribo. Quotidie est domi meæ, nec ullius utitur commercio, à quo corrumpi possit. Commentarii mei Grammatici, ut spero, ante nundinas absolventur. Sumpserunt Indices, & pauca alia. Gaudebo me onere molestissimo defunctum. Dum hæc scribo, advenit Baro Jacobus Skytius, juvenis optimus, & sititor doctrinæ, imprimis ejus, quæ nobilitati esse usui maximo solet. Orationem molitur, de laudibus sui Regis; ait se de eo ad te scripsisse, rogasseque pauculis versibus, vel ornamentis causa ornare editionem velis. Simul postulavit plurimum te salutarem, & verbulo hoc attingerem quod dixi; scio molestum esse, sic ad placitum alienum, à gravioribus avelli. Sed tamen juvenis non est indignus, qui elogio tuo ad majora exciteretur. Et Parentem demereberis, quem non injuria, magnus Rex magni fecit, dum in terris egit. Et multum est quod in Suecico regno, magnus est studiorum Patronus. O quam gaudeo, magne vir, & amice, quod post iniquitatem, non illam Patriæ quidem, sed quorundam tamen, qui nimium in Patria possunt, virtutes tuas æstimare sciat frenua hæc Suecorum Gens: ante omnes magnus Cancellarius, vir immortalitate dignissimus, cui longam, ac felicem vitam exopto, non solum Suecici regni, & Germaniæ libertatis ergo, sed etiam tui causâ; cui quod nunc bene est gaudeo, & ut melius meliusque sit exopto; ringentibus quantum lubet invidis, ac virtutis tuæ inimicis. Uxori, liberisque multam salutem meo, conjugis, & liberorum nomine dicito.

Amstelodami
xii. Kal. Sept.
St. N.

Tibi devotissimus,

G. J. Vossius.

CCXXXV.

Cl. V. Claudio Salmasio G. J. Vossius
S. P.

Nonne tibi, maxime Salmasi, à moribus meis alienum videtur, quod tuis ejus viri tam amicis literis tanto tempore non responderim? adversa quædam, quæ privatim domum meam spectarent, obstiterint: & partim inde, partim aliunde animus tristior, valetudo infirmior, non mihi solum, sed uxori etiam meæ. Et trahebant ista secum non parum curarum, quæ nos esse nostros non sinebant. Quamobrem etsi de meliori valetu-

dine vestra nos omnes, magis quam dici possit, gauderemus; tamen latius fore putavi, si non ante rogarem te, ut excurrere ad nos velletis, quam & corpore essem firmior & curarum aliquid animus exonerasset. Nimirum domi primum lætiora mihi omnia optabam, ut vultu animoque hilarior essem optima dierum quæ vos exciperemus. Nunc quia melius undique mihi, venio ad veteres preces, obnixequæ te tuamque rogo, ut dum valetudo utrinque, dum etiam anni tempestas finit, amplectamini occasionem inviscendi hominem amicissimum & urbem hanc florentissimam. Albo diem lapillo notabo, quæ primum vos hic conspexero. Et quid impedit quo minus cum tuis, filio meo duce, qui nunc Lugduni est, quamprimum voto nostro satisfacias? Sin id res vestræ nunc non sinant, ac ne proximâ quidem Hebdomade, saltem ne juvet differre ultra tres Hebdomades. Sane aliqua etiam gratia magnæ est hujus urbis nundinis, quibus initium erit xii. abhinc diebus ac durare Hebdomadem vel ultra solent. Ut tu minus istis delecteris, fortasse uxor caperetur. De opere rei vestiariæ multum gaudeo. Sed de eo & cunctis quæ studia spectant, colloquemur potius otiosi, cum urbem & nos bearis adventu tuo, quam avidè expectabimus. Mea te tuamque plurimum salutat.

Amstelodami iii. Non.
Sept. clxxxiv.

CCXXXVI.

Joanni Meursio S. P.

Mitto ad te, chare Meursi, Reidanum ^{fratrem} ~~fratrem~~ filii mei, quem placitum confido & filii & argumenti, & dictionis etiam causa. De quo judicium tuum quoque ubi acceperis expectabo. Jamdiu missum oportuit; quippe inter primos esse te conveniebat cui mitteretur: neque id solum ob amicitiam nostram, sed etiam quia tanta cum laude ipse in Historia Patriæ sis versatus. Nunc Danica non minori tractas gloria. Mallem ego Batava, etsi valde faveam Danicæ genti, vel ob tot eximios proceres, quos scriptis tuis decorare jamdiu orsus es. Sed enim nulla hic culpa tua, verum Patrii soli, exteris magis quam suos æstimantes. Aliter si effet, non alibi potius quam his terris ageret bonis omnibus laudatissimus nec ullis tacendus feculus Hugo Grotius. Qui quanti te faciat scio

scio ex sermonibus, quos de te habuimus hac in urbe ante sesquiannum circiter. Quam autem ejus erga me amor perseveret, luculentum brevi argumentum videbis. Suum enim Sophompaneam nomini dicavit meo. De Josepho se aperiente fratribus in Ægypto Tragœdia est. Qua nihil omni hoc seculo eo in genere divinius scriptum puto. Editionem ejus proximo mense ordietur Blauwius: Et tuorum simul operum quæ dilata quidem hæcenus: sed testis ego esse possim, quodd nihil hic segnitie vel discordia sit peccatum, sed solum ob nimium vicinum, qui omne commodum incommodo non Blauwii solum sed etiam publico intercipere conatur, recudendis confestim quæ maxime placent. Noomius Arlandervenix Dorwinus sæpius cum laude meminit tui. Et vellem ostendere ei si licuisset partem illam literarum quæ ipsum tangit. Sed utrum nunc in prædiis suis an Harlæmi vel Haghæ agat, satis dicere non possum. Intra Hebdomades duas reversurum ex famulitio intelligo. Certus sum gratissima ei fore, quæ scripsisti. Aristarchus meus sive de re Grammatica Libri VII. necdum prodierunt. Intra mensem tamen vel circiter absolventur. Salmasius prope convaluit. Itaque non dubito quin Arnobium suum & alia brevi sit daturus nobis. Non est ea apud Lugdunenses gratia, qua meretur. Imprimis ei obstat Menapisci invidia, qui non desinit erga eum esse qui esse solet erga non Batavos solum sed prope omnes eruditos. Vale singularis amice & uxorem ac liberos saluta meo, conjugis, ac liberorum nomine. Nec Stephanium vel Laurenbergium præteritis velim. Valdeque aveo scire an non tandem nobis Stephanus Saxonem Grammaticum sit daturus. Quæso de hoc quoque aliquid proximis literis scribe. Et si cessat ille, calcaria subde. Dignissimus est scriptor cui tam bonum ingenium operam impendat suam.

Amstelodami.
Non. Sept.
clō lōc xxxiv.

Tuus æternum,

G. J. Vossius.

CCXXXVII.

Merico Casaubono S. P.

QUÆ ad Antonini loca à me producta respondes, præstantissime Casaubone, ea planè fuere ad gustum meum; nec ab alio quoquam verisimiliora iis adferri posse arbi-

tror. Quodd verò alteram jam editionem Typographus cogitet, satis arguit, quam grata fuerit Britannis opera tua, quæ vertendo, quæ illustrando. Ac quanto sunt majora, quæ nunc sub manibus habes (hoc enim non obscurè significant literæ tuæ) tantò, ut auguror voveoque, majus te ex iis decus manet. Et tamen non dubito tibi aurem quoque vellere de ἀνενδότης illis parentis tui Ἰσίδρου, quorum Cantuariæ cum essem Indicem apud te vidi. Tuum & tam candidi erit, non invidere lucem jam perfectis, & tam eruditi, extremam affectis manum admove-re. Scio idem optare etiam Salmasium nostrum, quicum de te, deque parente tuo honorificus sermo fuit. Triduo cum conjugē domi meæ hisce Amstelodamensibus fuit nundinis. Multusque nobis de interioribus literis sermo, quos meminisse juvat, si scire aves, quid nunc sub manibus habeat, primum Arnobius commentario luculento illustrior lucem conspiciet. Mox sequentur de vitæ termino Liber, & grande opus de re Vestitaria. Nosse te arbitror, ut Grotius operam suam regno addiderit Suecico. Vellem tempore feliciori. Nunc, ut literæ consentiunt è Germania perlata, res retro eunt, Germaniæ quidem Suevorumque malo; non item Galliarum tuarum. Cujus Rex cum Cancellario suo, seriò advigilat, ut iidem fines regni sint ac quondam, cum Rhenus terminaret. Atque eo spectat, quod Sueoni suppetias mittat, sed conditione ea, ut urbes nunc has, nunc illas, quas in ditionem redegit, oppignoret Gallo. Cancellarius Oxensternius, ut Cæsareum Hispanique exercitum Francofurto audivit imminere, Moguntiam se recepit. Utrum & Grotius Moguntiam sit Cancellarium secutus, à quo maximi sit, an in Galliam ad Regem missus sit, non possum certo dicere. Sed non dubito quin inter paucos dies futurus sim certior. Opus nostrum Grammaticum post mensem, spero, videbis. Gaudebo me molestissimo labore defunctum. Oratori Regio Boswello misi Antoninum tuum. Cum acciperem exemplar geminum, nullæ additæ literæ erant. Cumque exemplar mittere vellem (id fuit post acceptas literas) jam is Britanniam profectus dicebatur. Filius meus diutius hic hæsit, cum alias ob causas, tum illam, ut de maternis bonis cognosceret. Intra paucissimos dies liquida fient omnia. APOCHAM triennii, ut petieras, mitto. Reverendissimo Domino Archiepiscopo, Mecænati nostro optimo maximo, res meas curæ fore confido. Sed & tibi commendatissimas esse scio: Quare nihil de iis addo. Nos omnes plurimum te uxoremque salutamus. Reverendum etiam

D. De-

D. Decanum totumque fratrum collegium
plurima salute impertias velim.

Amstelodami Pr. Kal.
Octobris anno 1634.

Tuus tuo merito,

G. J. Vossius.

CCXXXVIII.

Joanni Meurfio S. P.

SI, amice optime maxime, amicitia nostra ab Epistolis dependeret, jam pridem eam extinctam credere deberem. Sed & firmior tu es, quam ut mercenariorum in hominum manu esse velis arbitria amoris nostri, & ego scio multos intervenire casus quo minus aut scribatur aut scripta cum fide perferantur. Annus jam integer est quod literas ad te dedi bene longas euntibus in Daniam legatis nostris. Sed illas, quia in oris Regni Danici substituerant legati, per nuncium ad te missas ex famulo cognovi. Nunc vero periisse eas satis animadverto: quod eo indignius fero, quia una miseram ingentem fasciculum literarum ab aliis exaratarum, quem ab affine tuo Hebrando Ecclesiaste acceperam. Ex eo tempore epistolam ego ab te unam alteram, Conjux ab uxore tua accepit. Et scio mirari vos quid prohibuerit tuis satisfacere postulatis. Cæterum nē hæreas, scito, cum primum ad cōmenda ea, quæ petieras, conjux mea exisset, non repertam esse mensam ejus magnitudinis ac uxor tua scripserat. Itaque distulit curam hanc ad dies aliquot. Nam relatum mihi erat Hebdomadem unam alteram substitutum hac in urbe cum qui literas tuas attulerat. Sed postea cum advenisset tempus morem tibi gerendi, cognovimus jam abscessisse hominem cui tradenda erant suppellectilia tua: Ita uterque spe excidimus, ego obsequii, tu suppellectilium. Eam ob rem quia Muldenius generosi Adolescentis Rozekrantii ephorus ajebat se literas meas ad te optime procuraturum, & otii aliquid dabant à publicis occupationibus nundinæ Amstelodamenses, non putavi diutius scriptionem in illud tempus rejiciendum. Collegam adhuc præter Barlæum habeo nullum. Causæ me latent: sive consules properare nolint: sive eo id fit quia bello omnium intentæ mentes & fuerunt hæcenus & adhuc sunt. Etenim à multis annis non alium videmus celebriorem victoriarum nostris. Subactæ sunt Venlona, Ruremonda, Strala, Trajectum ad Mosam: quin & omnis ducatus Limburgensis. In potestate Mosam habuerimus, si Mamurco potia-

mur. Etiam ad Antwerpiam castella complura & validissima expugnâvimus, in his magnum illud Antwerpiae momentum aggerem Rouwenstenianum. Nec jam arma quiescunt. Princeps ipse ad Trajectum manet curandis munitionibus. Interea aliis locis sunt copiae ubi cum rei gerendæ opportunitas detur intentæ. Sed publicum gaudium longius produxit me: ad nostra redeo. Ab aliquot mensibus fervere cœpit prelum libris nostris de Arte Grammatica. Est ea pars prior commentariorum de LL. Altera consequitur quæ origines comprehendit. Habeo & paratos libros tres de arte Poetica: qui absoluto majori opere, si Deus vitam dederit, edentur. Tu quibus jam occuperis scire aveo: idque eo magis quia novi indefessum illud ingenium tuum quod otio nunquam nisi doctis omnibus fructuoso indulget. Solonis duo exemplaria accepi. Sed alterum ἀνέφαλον. Nam à capite quidem primo incipit: sed folium illud desideratur ubi inscriptio & præfatio. Credo in mensa tua vel apud Bibliopolam relictum. Gratum feceris si occasionem nactus scribendi tuis literis incluseris, quo plus pro eruditissimo & utilissimo opere debeam. Integrum exemplar Barlæo tradere malui, qui gratias impense agit. Nuper is valido afflictus fuit morbo & periculoso: sed placuit Numini reddere ei valetudinem. Itaque jam mensem unum alterum publica iterum munia functus est. Tuorum vero ægritudo an animum penetraverit meum dicere si velim, frustra faciam. Nam & amoris nostri meum: & novi ego soli in extera gente habitanti (etsi amicos tibi optimum quemque sciam esse) omnes casus graviore accidere. Ideo optavissimè & ipse tibi tuisque solatio esse & auxilio. Agnosceres non dubito quamvis multis hodie fides vacillet, Vossio plus constantiæ & amoris adversum te esse. Cæterum quod præterire nolim, sæpius appellatus sum à Guilhelmo Janfonio Cæsio sive Blauwio Typographo & Bibliopola urbis hujus principe, ut exquirerem ex te utrum ea, quæ ad Historiam Danicam pertinentia edidisti, postea vel emendâris vel saltem auxeris. Vel ecqua habeas ejus argumenti inedita. Quippe ei decretum omnia tua & aliena quæ ejus sint argumenti in lucem dare. Quod faciendum sibi non putavit nisi prius mentem tuam perspexisset. Adhæc ut respondeas etiam & etiam rogat. Corrigendi curam deponco mihi, quamvis adeo curiosus suorum operum Blauwius sit ut nulli cedat. Filius meus Dionysius animadversiones in Cæsarem & qui adjunguntur ei auctores molitur. Manuscriptos complures nactus est. Itaque rogavit me ut exquirerem ex te ecquid in iis scriptori-

bus

bus tibi observatum vel emendatum esset. Si habes aliqua, nihil sibi præter curam edendi petit; gloria omnis tua publici utilitas erit. Sed cesso. Video enim excrescere epistolam & simul quoque studium scribendi. Quod ne adeo gliscat ut abrumperè nequeam, te, vir clarissime & amicissime, & tuos omnes supremo humani generis Rectori commendo. Uxor quoque mea tuam, liberi mei tuos salutant. Plurimam etiam salutem Viris Cll. Laurenbergio & Stephano. Cujus postulato hoc ipse die satisfecissem, si præcissem crastino die Domino Mullenio literas esse tradendas, modo quamprimum curatas & quam optime velim. Nec enim erat qui tam cito vitam quam exposcit Stephanus, exscribere posset. Verum intra paucos dies id præstabitur. Decretum iterum tum Mullenii opera uti, qui literas vitamque eam suis & ad illustrissimum & generosum Heroa Rozekrantzium includet.

Amstelodami,
clō Ioc xxxii.
vii. Kal. Octob.

Tuus antiqua fide,

G. J. Vossius.

CCXXXIX.

Guilielmo Archiepiscopo Cantuariensi.

Reverendissime Pater, Domine Illustrissime,

GAudeo me tandem ad finem perduxisse labores meos Grammaticos, quibus censuram exerceo in omnes hujus Artis Scriptores, causas eruo Sermonis Romani, optimosque ejus auctores vel corrigo vel illustro. Utinam pro labore maximo, quo mihi steterunt, fructus etiam ex iis redeat ad Rempubl. literariam. Jam anni sunt triginta & amplius, quod in hosce Commentarios congesti, quicquid penè ad hanc artem pertinet ex infinitis scriptoribus observassem. Ea ne ulterius luci inviderem, flagitarunt à me homines eruditissimi, tum hisce, tum terris etiam longe distitis. Quemadmodum & valde urgent de rei Poeticæ libris; in quibus, præteritis rei metricæ minutiis, Aristotele imprimis duce in penetralia ejus Artis duco juventutem plane *ἀντιστοιχιστὴς*, sane alia facie, quam factum hæctenus à quoquam. Nec minus, qui videre exposcunt vastum Originum opus, prælo & ipsum diu paratum. Sed gravioribus distentus, & his, & aliis id genus sepositis, de solis Artis Grammaticæ libris septem, persuaderi mihi passus sum: non quali ignorarem, quantopere jaceat hoc studium temporibus nostris; verum tanto magis necesse putabam, exsurgere ali-

quem qui hoc labore seriò fungeretur, partim ne tenera ætas diutius tot laboribus imbuatur, partim ut homines doctissimi, sed aliis studiis occupati, interea in hisce minutiis sapius hærentes, haberent hic, qui labore suo eorum levasset laborem; quo fine quatuor luculentos indices adjeci. Nempe quibus perlegendi non est otium, fortasse consulendi subinde voluntas non deerit. Cum autem conatus sim prodesse toti Reipub. literariæ, tum imprimis cogitavi in Editione hac de Magnæ Britanniæ Gymnasiis: quibus si utilis fuerit opera hæc nostra, cœlum mihi digito attingere videbor. Sæpius etiam in mentem venit illustrissimi Principis Walliæ, uti & illustrissimi Principis Eboracensis. Nam et si non ignoro, cœlestes illas animas haud esse diu detinendas in Grammaticorum spinetis; fortasse tamen, ubi paullum ætatis accesserit, non ingratum erit hæc quoque inspicere, ac aliquantum rolarum decerpere, præsertim si præturgida sua nomina, aut alterutrum, in librorum frontispicio conspexerint. Atque hoc est, Reverendissime Pater, de quo nunc consultum per Epistolam venio. Sane labores hujusmodi non absurde, nisi fallor, à tam excelsis nominibus humilitati suæ aliquid præsidii petunt. Scio Commentarios hosce magis convenire Artis Doctoribus, multumque jam in literarum studio provectis. Attamen fatendum, totum opus esse de literis, syllabis & vuculis earumque structura; à quibus ætatu- læ illustrissimorum Principum aspiciendum erit. Quod possim igitur hoc tempore iis accommodatius offerre? Spero etiam tenui hoc munusculo utcumque comprobaturum me humillimum obsequium, quod debeo Domino meo serenissimo Regi CAROLO: Cujus quoties ego ingens beneficium, quod conciliante te, illustrissime Domine, accepi, mecum cogito, cogito autem quotidie, toties Deum rogo quæsoque, ut mihi largiatur, servo esse non ingrato, nec indecori magnæ Britanniæ regno. Vires quidem mihi exiguæ, vel potius nullæ; sed in alio si quoquam prolississimus, in me omnis obsequii affectus. Atque ex eo aliquid capio voluptatis, quando his terris occasio se offert, retundendi malevolorum calumnias, quibus Anglicanam Ecclesiam, maximeque ejus Antistites traducunt. Facio autem id ea modestia, qua possum; neque id tam contradicendi studio, quam amore veri rectique, & quia ægre fero tam facile iis aures præberi ab imperitis. Procerumque..... studium hoc meum, quia iidem sunt homines, à quibus dicta factaque sua vident in deteriore partem rapi. Quasi non liceat adhærescere Do-

K k

Strinz

strinae & Ordini veteris Ecclesiae, cum occulte foveas in pectore Papam, cum Hispano. Nempe istiusmodi sunt maledicta, quibus novarum rerum cupidi se ulciscuntur, postquam turbare omnia volunt, nec possunt. Maimonidem filii mei *fratris proxima* demum hebdomade prælo subjiciet. Typographus antea negat se potuisse, quod typis destitueretur Hebræis. Deinceps opera dabitur, ut tamdiu promissus non minus emendate quam eleganter exeat. Eamque ad rem mihi operam sedulo pollicetur Typographus; qui illustrissimo nomini tuo plurimum se debere fatetur, pro opera & affectu, eo in negotio quod ante aliquot menses per literas commendaram. Petiit à me ut tibi, Reverendissime Pater, gratias suo nomine agerem, quod quo minus ipse faceret, pudore impediretur. De Johanne meo quid scribam? non possum in eo excitare illum studiorum amorem, quem requiro; & jam alia mecum agitare animo incipio, sed ante festinamentum nihil certi perscribere potero. Ita non tam meus quam filii fluctuat animus. Cætera de rebus meis cognosces ex doctissimo & optimo Goffio, quem ego vere amo, quia bonam mentem amat, teque, illustrissime Domine, supra omnes reveretur ac colit.

Deus Opt. Max. te, Reverendissime Pater, Domineque illustrissime, diutissimè Ecclesiae totique Regno Anglicano sospitem conservet.

Amstelodami,
clō Idc xxxiv.
vii. Kal. Nov.
St. Vet.

Reverendissimi & Illustrissimi
nominis tui Cliens,

G. J. Vossius.

CCXL.

Cl. Salmasio Ger. Jo. Vossius S. P.

IN gratulantium ingenti numero qui te haud dubie totos jam dies, maxime Salmasi, circumfistit, nec ego quo in te amore sum, temperare potui à scriptione. Felicem judico Bataviam, quæ te fruitur; sapientes quorum beneficio fruitur. Etsi vero nunc ab Lugdunensi absim Academia, nihilominus sic quoque gaudium magnum capio, quatenus & in propinquo agitantem invisere & frequentius literis compellare erit. Adeoque nec præcipitis autumnus frigus, etsi paulo languidiorem, nunc prohibuisset excurrere, ni publici, quod sustineo, muneris vinculum retinuisset. Sed dabit spero Deus & vitam

mihi & occasionem compellendi ejus, quem absentem etiam tantopere veneratus sum semper. Nunc Lugdunensi in Academia tot nominibus beata, literæ etiam, variaque omnis eruditio, atque adeo ut Romana & Græca, sic Ecclesiastica etiam antiquitas, non paulo sublimius quam adhuc caput efferent. Ac si Scaligero, Lipsio, aliis illa magnis viris se jactat, non minore deinceps incola poterit superbire. Utinam quæ tam justa æstimatione metiri eruditionem tuam novit Batavia, alia aliquanto in magnum Hugonem fuisset. Doleo quotiescunque cogito eripi publico nostro virum eximiis adeo virtutibus quas posteritas melius æstimabit; doleo quoties avulsum à me amicum & te quoque eodem tam tui amante cariturum reputo. Sed variæ rerum vices sunt, & ego uti ardentissimis votis semper optavi iterum jungi Hugoni nostro, etiam impendio diem illum videre desideravi, qui te sospitem Bataviæ fisteret, magnasque summo Deo gratias ago, cui incolumitatem tuam debemus. Vale, vir idem atque amice maxime, & si quando magnam in qua vivo urbem visere (sic mereatur) animus erit; quæso cum Coniuge & tuis, ne alibi potius quam domi divertas meæ. Id vero honori mihi ducam maxime, pleneque dignum erit amicitia nostrâ.

Amstelodami v. Id. Novemb.
Nocte intempestâ.

CCXLI.

Cl. Salmasio Ger. Vossius S. P.

NON facile dixerim, quam mecum gaudeat uxor, quod tua te prole iterum bearit, salva ipsa ac sospes: eoque nomine, & ego & conjux Deo gratias agimus, nobis gaudemus, utrique vestrum ex animo gratulamur. Vix indicium feceram meæ, cum illa rogaret (& quid curiosulæ prius exquirere?) marem an femellam enixa esset tua? Ego hic ignorantiam meam profiteor. Nec enim adscripseras: sed aiebam, quia de eo filerent literæ tuæ, putare me esse femellam. Conjectorum artem non didici, à parentibus vel magistris. Facilem igitur veniam mihi fore spero, si fallor. Sed amice, aliud etiam habe. Ut significavi meæ, quod dixi, illud etiam addere ea; O si præcissem cum Domina Salmasia hic esset, tanto post tempore demum parituram, quam urissem ut plusculos dies manere nobiscum voluisset; nec sic abiret, cum vix venisset. Sed eo se sola-

solabatur, quod aliquando una esse poterimus, cum partus propinquus non metuitur. Deus tantum nobis valetudinem: Quæ neque nunc bona coniugi, vix etiam mihi. Et præterea etiam me detinet hic munus publicum. Absque eo fuisset alteruter nostri expositurus erat coram, quod per literas nunc facio. Nempe precibus te oro, & obsecro, ut si res adhuc integra est, alterutri honos ille exhibeatur, ut pro infante spondeat in Baptismo. Utrumque atque adeo familiam vestri studiosissimam totam obligabis. Ut aliquid ego humanitus patiar, liberi studebunt implere sponsonem paternam. Scripsissem de isto literas ad quempiam de veteribus Collegis, si scivissem annon alii jam priores tulissent, sive absentia, sive celsatione mea. Attamen verbulo si rem aperias vel Clarissimo Polyandro, sive præstantissimo Cunæo, sive optimo tuique studiosissimo Constantino, vel alicui ex eorum uxoribus, sane nemo eorum, scio, ubi de voluntate mea referas, detrectabit meo loco polliceri: Quod memini me promississe, non semel alieno nomine. Nihil enim apud nos usitatius: Sed tui tamen arbitrii esto, quem substituere velis, dummodo se meo sistat nomine. Perge sic, optime maxime Salmasi, bene de nobis mereri. Nam quod literis mihi gratias agis, quasi multum humanitate mea obstrinxerim, meas mihi præripis partes; ut qui probe sciam multum me eapropter vobis debere; quippe qui beneficium acceperim non dederim. Utinam tempus videam, ut denuo sic beer. Quod ubi erit, magis cognosces, quanti ab hac urbe tias: Multis ægre admodum fuit, quod prius discessisses, quam de adventu cognoscerent. Grotius adhuc Moguntia est cum uxore & filiabus. Nempe iter Gallicanum paulisper dilatatum. Scio illud magni esse momenti, negotia, in quibus Proceres Suevici opera ejus uti decrêrunt. Sed literis omnia committi non possunt. De submersione Lymphatici somnium est. Ut videas non Sabinos solos, quod volunt somniare, sed gentem etiam tam vicinam. Equidem literas vidi Moguntia ab Grotio & uxore ad filium, qui hic studiorum causa vivit, Kal. scriptas Novembr. Neque tum constabat eis de die, qua in Galliam iretur. Ac fortasse aliud non minoris ponderis negotium prævertet aliquantum. Ex Anglia necdum recepi responsum. O quam molestum est animo meo, quod nihil illorum habeam de quibus scribis. Sed tamen crastino die inquiram, an aliunde possim nancisci. Verum metuo ne frustra sim. Nihilominus duos tres accedam, in quibus aliquid spei habeo. Quod si non confestim

rescribam, scias me operam lussisse. Vale, maxime vir & amice, atque cum lætissima uxore, à me & mea plurimum salve.

Amstelodami cl^o Id^o xxxiv. ix. Kal. Decembr. xii. Nocturna. Sic die toto fui à variis impeditus, ut rescribere prius non potuerim.

CCLXII.

Marco Zuerio Boxhornio S. P.

Gratias tibi ago, ornatissime Zueri, pro munere: & magis quia scriptorem illum non uno semper nomine amavi. Quare placet, quod non tibi solum familiarem eum reddideris, sed notis etiam orandum putaris. Sed quid sibi vult quod in Claudio scribas Baustum Syllam? vidi an in erratis ejus nos moneres. Nunc contra in indice priorum nominum in litera B. Baustum reponis nobis. Pene suspicor, ab alio eum esse indicem concinnatum. Nam scio te scire, etiam Filio Syllæ Dictatoris Prænomen fuisse Fausto, uti Filia Faustæ. Fidem inter alios fecerint. Asconius argumento Orat. pro M. Scauro, & Plutarchus in vita Syllæ. Puto & non à te, sed librario esse, quod ais, ut Diogenes scripsit βίος φιλοσόφων, ita Plutarchum reliquisse βίος περὶ ἀλλήλων, nec enim sunt βίοι περὶ ἀλλήλων verum περὶ ἀλλήλοι, h. e. vitæ comparatæ. Sed de istiusmodi minutis fortasse aliquando coram colloquemur. Placet quod fragmenta Tranquilli appofueris. Utinam cætera dedisses, quæ quidem extant, id enim omnino & Suetonii intererat, & tua. Nunc in iis meministi librorum de Grammaticis & Rhetoribus, qui extant: non meministi libri de Poetis qui non extat. At B. Hieronymus loco eo quem adducis, non minus hunc respexit, quam priores. Et mox opponis ipse verba Scaligeri ex vita Lucani. Quæ tum inedita quidem, sed postea prodijt beneficio Scriverii nostri. Quare ea non debuit omitti. Uti nec vita Persii vel Juvenalis, utcumque huic aliquid aliunde affutum. At illud maxime mirandum, quod omittis luculentam Terentii vitam: quam certum est non Donati esse sed Suetonii. Horatii vitæ, quæ corruptissimè edita, vellem castigationes Rutgerii addidisses ex editione Parisina. Non ingratum est, quod præmiseris Tranquillo, quæ de vita & scriptis ejus habemus in Historicorum historia nostra. Sed non inseruisti quæ in appendice interponenda monui, cum ea non sit aspernanda accessio.

Voluiffem & librarii errorem sublatum, ubi Tranquillum fi Suidæ codicibus standum, feriffi de Cæfaribus, Libros VIII. fed ad minima iterum relabor. Laudo quod etiam cogites de aliis Hiftoriæ Auguftæ fcriptoribus: etfi difficile fit poft Homerum Iliada fcribere. Verum *χαλεπὰ τὰ ἔργα*. Nec tu ut cenfeo tam meffem uberem quam fpicilegium promittis. Atque id colligo ex parte ea quam miferas. Legi in iis quæ fatis ardirent, fed cogitare de fingulis non licuit, quia alia quædam magis urgerent, & Lamerius fignificaret proxima Hebdomade editionem inchoatam, tum autem noram quantorum virorum confilio uti Lugduni poffis. Quod Salmafii te amicitie inlinuare velis, bonum factum. Quid enim non ab fummo illo viro difcere poteris, fi eo amico utaris, facile hoc videre potuiffi vel ex iis, quæ fcripfit in eos Hiftoricos, quos nunc habes fub manibus. Quem enim exiftimas eo in genere tam multa bona doctiffimum quemque docere poffe? Quare eo viro laudando non facile peccabis, potius metuendum, ne cum omnia, quæ cenfes dixeris, infra veras ejus laudes fubfiftas. Plurimam falutem dicito tuis, imprimis optimo doctiffimoque feni avo tuo.

Amftelodami,

Tuus,

Kal. Decemb.

G. J. Voffius.

CCXLIII.

*Clariffimo Salmafio Gerardus Voffius
S. P.*

NON dubito quin Columna Trajani plurimum commodare poffit operi, quod de Re Veftiaria bono publico fub manibus habes. Prope apud omnes Bibliopolas, & eos, qui tabulas chartasque divendunt inquiri juffi: fed omnem operam lufi. Blauwius fuam offerebat ad eam Româ petendam. Id tardum videatur negotium, hyeme imprimis. Tandem in mentem venit Joachimi Wickefortii, ejus apud quem nummos Velferianos hic uterque vidimus. Ex ejus igitur Bibliotheca nunc mitto. Atque utinam de Antonina idem facere potuiffem. Aiebat Wickefortius, necdum eam æri incifam, attamen manu cujufdam Presbyteri in Charta expreffam Romæ exiftare, proque ea fe obtuliffe Florenos ducentos: fed non potuiffe eo pretio nancifci. Arauficæ urbis Arcus Marianus nec ipfe in lucem prodiit. Pluribus fum locutus, qui Arauficæ viderint, mireque

commendent. Ac Pontanus nofter qui his diebus mihi affuit, ut optimam habuerim occafionem tuas de manu in manum tradendi, aiebat fe ante biennium locutum de eo cum Hugenio Araufionenfium Principi à fecretis, eum dixiffe curaturum fe ut ne diutius tam nobili monumento careant homines literati: fed nihil poftea intellexiffe: nec id ab eo vel alio præftitum in animum poffe inducere. In electis Rubenii eft Icon unius alteriusque ftatuæ togatæ ac tunicatæ. Volui idcirco mittere. Cancellario Frifio in hunc fere modum infcribi literæ folent;

Nobiliffimo, Ampliffimo ac Magnifico Viro Domino Chriftiano Frys Toparchæ in Cragerup, Sereniffimi Danorum Regi Cancellario ac Regni Senatori.

Quod ubi prole iterum augebere, me vel uxorem fidei fponforem fore promittis, id fane pergratum utrique, eoque ardentius pro falute veftra vota faciemus.

Amftelodami iv. Id. Decembr. clc lxxiv.

CCXLIV.

Ger. Jo. Voffius, Francisco Junio, F. F.
S. P. D.

SPero jam acceperis fasciculum, quem de rebus Joannis mei, ad te ante duas Hebdomadas, mifit Filius Matthæus. Sed incuriâ famulæ factum, ut tum reperiri non potuerint literæ Filii Joannis tibi infcriptæ, quas nunc mitto. Neceffe fit negotium ejus Cantabrigiæ expediri ante Kalendas Martias. Nam tum expiravit tempus emanendi è Collegio conceffum. Rogo agas, in hoc ejus negotio, quantum honeftas finit. Quod vitæ genus deinceps initurus fit filius, fortasfè jam perfcipferit. Sin reticuit, quod credere malo, proximis ex literis meis cognofces. Petierat Joannes, ut ex utenfilibus, pluscula darentur ifti, de qua jam ante feftuicquid annum, ad me fcripferas. Si modo eadem eft: quod mihi negat. Verùm toties deceptus, nescio quid credere debeam. Quæ autem ei tribui velit, charta quadam complexus fuit: fed non poffum nunc invenire. Sunt lectus, menfa, & fimilia; libros, chartas, picturam meam, & id genus, voluit huc transmitti. Sed nihil adhuc certi poffum fcribere. Opera dabitur, ut reperiatur ipfius filii manus. Quam malè fibi iftis amoribus

ribus consuluit filius? Hæc mihi devoranda; qui post quinquaginta annorum in studiis labores; aliquam mihi in liberis requiem sperabam. Nunc non minus diu, nocturne laborandum, quam adolescenti olim fuit. Quàm illas veteres delicias, Dionysium meum desidero, qui ingenio divino, probitate eximia, assiduus in omni propè doctrinarum genere studiis, moribus ad hæc suavissimis, quicquid molestiæ obtingebat, unus facile detergebat. Nunc & eo careo, & ex altero nihil nisi molestias percipio. Sic Deus castigat suos: Cui interea gratias ago, ob tot alia beneficia; & interea quod non Franciscus modò, & Matthæus, se valdè mihi probant: Verùm Isaacus etiam cum Gerardo sic vitam & studia componunt, ut propè spem conceperim, quod damni, & familia mea, & Resp. literaria, in Dionysio fecit; per eos aliquando posse refarciri. Matthæus intra Hebdomadam, unam, alteram, Typographo excudendam dabit Historiam Comitum Hollandiæ, non dubito, quin placitura sit. Tandem ab Amplissimo D. Boswello, regia negotia apud nos curante, certi aliquid de inscriptione, sive principalibus titulis accepi. Quare nunc nihil superest, quàm ut præfatio excudatur. Maturabo, quantum possum. Scire te arbitror, ut jam tertium annum Lugduni vivat, vir summus Claudius Salmasius; qui eo invitatus pretio, quo olim Joseph Scaliger. Atque id non mediocrem ei invidiam peperit, apud unum, alterum Professorem, imprimis Gandensem. Mihi verò qui gaudeo, tantum virum his terris agere, non mediocris cum eo amicitia intercedit; nec per literas modo, sed sic etiam, ut subinde, alter alterius præsentia fruamur. Sanè triduo roto ante menses duos, cum uxore, apud me divortit. Qua occasione à me petiit, ut meo suoque nomine, à te peterem exemplar statuiæ palliatæ, ex monumentis Arundellianis. Habet sub manibus grande opus, de Re Vestiarum; ubi ad amussim exprimendæ formæ Togæ, Pallii, Sagi, Paludamenti, & similium. Pollicitus est quod pictori tribueris, id quam primum se velle refundere. Conatus est aliquid, in argumento hoc, Baysius, sed tantum conatus. Adeo nihil est præ illis, quæ Salmasius præstabit. Eò minus patieris hic curam tuam desiderari. Scis cujus magnitudinis esse soleant imagunculæ quæ in libris exprimuntur: Quamquam quacunque tibi mittere visum erit, ipse facilè imitabitur, sive sculptor potius pro libr. qua Salmasiana excudentur.

Egregium opus tuum de Pictura excudi non potest ante Kalendas Maias. Præcipue in causa est, quod Blauwius Typographus,

uxorem duxerit Goudensem; quæ non ante à parentibus poterit divelli, ut tribus hisce mensibus proximis τοῦ νεογάμου, ultro citroque sit commeatum, hinc Goudam, inde Amstelodamum. Quod non exiguo fiet τυπογραφείας incommodo. Ipse autem editioni præesse malit, & quod tam multa alioqui peccare soleant Typothetæ, & alii.

De cæteris scribam, cùm Exercitationes meas transmittam. Id fore arbitror post tres Hebdomadas; nam & aliquid temporis absumetur, in exemplaribus compingendis; præsertim bellulo aliquo, quod Celsissimo Principi Carolo offeratur.

Dum in his scribendis sum, ecce mihi literæ ab Illustrissimo Suecici regni Legato, Hugone Grotio, tui, nostrique amantissimo. In iis hæc de te leguntur. "Quærenti mihi alique[m], vir præstantissime, qui me in Epistolis scribendis, aut describendis adjuvet, & quicum, de literis, præsertim illis sanctioribus, sermones conferre possim, cujusque opera simul usui esse possit, in paranda editione eorum, quæ ad Evangelia notavimus, ante omnes mihi in mentem venit, Francisci nostri Junii. Sed primum abs te scire cupiam, quæ commoda apud Comitem Arundelium habeat, ne ei offeram, quo conditio ejus deterior fiat; deinde an putes eum, & velle, & sine quo non est ut velit, honestè posse mutare Britannicam Gallica fede.

Ego ad ista quod respondeam, non habeo, priusquam te consulero. Is quicum vires, est magnus planè vir, doctrinarum facilè Princeps. Si idem nunc tibi ardor esset, arcana studiorum penetrandi, quæ Adolescenti fuit, aliquanto alia ratio foret. Nunc venationes, & alia Aulæ studia, fortasse invitum etiam paulatim diversis moribus imbueret. Adde quod rei Suecicæ fortuna, in Germania quidem admodum fluctuat; tuæque conditio à Grotiana, illa à Suecica dependeret. Eo excusso, fortasse operosum esset, Arundelianæ similem invenire. Spero etiam tam luculentum tibi esse nunc annum stipendium, ut Domino Legato difficile fuerit cum Illustris adeo Comitum familia certare liberalitate. Verùm quid ego tam operosè de eo ad te, qui in rebus suis (in quibus ego prorsus cæcutio, quia de iis tam parci esse sermonis soleas) decuplo, & amplius videre possis quid facto sit opus, me etiam tacente? Attamen rogo, quamprimum mihi perscribas, quid rescribere debeam. Iniquum enim sit, si mora nostra impediamus, quominus, tempori sibi consulat vir, & amicus summus. Edidit is his Hebdomadis Sophompaneam, quod Josepho Israelis Filio, nomen

nomen in Ægypto. Tragœdia est, magna arte scripta; quæ eo tibi gratior erit, quia nomini illam inscripsit meo. Prope diem eam ad te, & amicos transmittam. Memini ante exemplarium, de re Grammatica, quæ ad te mihi. Præter ista mihi Reverendis. & Illustris. D. Archiepiscopi Secretario, duo holoserico vestita: Unum spero ab ipso, Dom. Archiepiscopo tradetur, de manu in manum, Illustrissimo Walliæ Principi: Alterum ipsi Dom. Archiepiscopo cedit, nisi aliter ipsi videatur: addidi enim & aliud solum inauratum, & hoc Chartæ Regiæ, quod cui videbitur Procerum tradere possit. Secretarius verò habet exemplar unum, inauratum, tradendum Reverendissimo D. Episcopo Londinensi. Simile item offerendum Bibliothecæ Bodleianæ, apud Oxonienses. Tria non inaurata addidi; unum Epithoro Illustrissimi Principis; alterum Bibliothecario apud Oxonienses, Rouse; tertium ipsi Secretario. Plura non mihi, sed si mitti satius videatur, significo. Nolo illiberalius agendo, gratiam deperdere. Sanè si sacri fuisset argumenti, non hic munificentia mea stetisset. Sed scio, materiem ejus operis, non facere ad omnium palatum, præsertim in Magna Britannia, cui Theologica magis, & fortasse sola ardeat. Literas ad præpositum Collegii Jesu, relinquere apertas, visum fuit, quo ubi legeris, sub sigillo ceræ aliquid subdas, atque inde, si sic videatur, tradas. Sin existimes, iis de filio contineri, quæ satius sit ignorare, retineri à te poterunt. Omnino enim, qui istic es, facilius me dispicies, quid facto sit opus. Tandem tempus abrumpendæ Epistolæ, ne loquacitate obtundam. Vale, Charissime Adfinis, & ab uxore & liberis salve.

Amstelodami
clō Idc xxxv.
Non. Jan.
Stylo Veteri.

Tuus omni officio,

G. J. Vossius.

CCLXV.

Claudio Salmasio.

DAusqueii doctrinam atque industriam jam ab annis novi pluribus vel ex commentario in Silium. Orthographica demum vidi mensibus abhinc duobus: nempe excuso jam opere Grammatico, appendicibus exceptis, ubi semel iterumque ejus memini, & ad eum remitto Lectorem. Video operæ fore, ut labores ejus conferam cum nostris Originum libris. Nam & ipse in ori-

ginibus de Orthographia tracto: & quantum paruit, secundum Dausqueii Tomum obiter lustranti, crebrò concurrimus. Et qui aliter potuimus, cum uterque nostrum astruamus sententiam, ex lapidibus Vett. Grammaticis & Manuscriptis? Carmen quod honori urbis hujus fecisti; non mihi solum, sed aliis quoque mirum in modum placet. Gaudeo in iis quoque esse Barlæum nostrum: Genium plane probabat. Equidem non dubito quin nisi Camœnarum delubro conspicereris parvus & infrequens, quàm propitiâ habes Minervam. Tam divæ ille futuræ sint faventes; eorumque qui temporibus nostris Poetarum habentur Principes, alios se æquaturus, alios superaturus. Scis quantum usus polleat. Bene interim sit insomnia ista, quæ causa est tot bonorum versuum, ac si valetudini non incommodet, sæpe redeat. Præstabit tibi, quod *μυσεπιδόμοις* illis, in bicipiti somniasse Parnasso. Quantumcumque autem versiculi tui placuerint, si tamen mihi credis, filebis de iis apud Leideneses tuos. Novi ego & meo & alieno experimento, ut levicula de causa plumbeas iras gerant. Non sine gravi plurium offensa abiret, sic laudasse Amstelodamum. Scis quod olim à Platone scriptum *Πᾶσα πόλις πάση πόλει φύσει πολέμιος*, ἄλλως τε καὶ ὁμοῖον χρεὼν ἔχει, sed imprimis graviter ferrent distichon postremum. Ac nostri quoque proceres uti gaudent de affectu & augurio tuo, ita invitis illis fiat si Leideneses ut nihil non ante triennium movere in ordinum conventu cum de Gymnasio Illustri hic constituendo ageretur, ita occasione inde arrepta, quod Batavis de Athenis scribis pressum eos ire dicerent nobilem Academiam. Quod nostris & molestius forent, quoniam optimè Academicæ volunt. Quid mirum, quando non ea Leidenesium propria, sed totius Bataviæ communis est. Nisi novissem candorem tuum, non ista sine circuitione ulla scriberem. Nempe amorem tui gliscere his terris etiam apud Leideneses volo, non vero malevolentissimo omnium apud vos materiem dari, quasi aversiori sis animo ab urbe. Sic enim (novi cum intus & cute) interpretaretur. Et habet niger ille duos tres eodem in ludo edoctos per quos nihil non audet. Sed de isto satis vel potius plusquam satis. Apud te tamen facilis mihi hujus loquacitatis venia fuerit. Hugonem Grotium jam Lutetiæ esse confido: Tres enim jam hebdomades sunt & amplius, quod uxor Moguntiâ huc perscripsit postero se die cum tota familia comitaturam maritum, nec iter hoc ulterius posse differri. Quod jam bene vertisse spero. Exercitationes nostræ Grammaticales non absolventur, nisi post duas hebdomades. In causa est quod è Britan-

Britanniâ exspectare debuerim, quibus titulis ornandus esset Serenissimi Regis primogenitus. Ei enim opus nostrum inscribemus.

Lectionissimæ uxori à me meaque salutem.

Amstelodami clō Ioc xxxv.

Pr. Nonas Febr.

CCXLVI.

N. N.

Illustris Domine,

Multum tibi debeo, quod ea cum humanitate, idque geminis literis, non gravatus sis me facere certiorum de victoriis serenissimi maximique regis vestri; ita arbitrator sic esse perpauco, qui non eapropter & sibi gaudeant & magno vestro regno gratulentur: maximas etiam gratias ago, quod nolueris me celare de oratore, quem foederatæ Belgicæ ordines Constantinopoli habent. Conquestus sum super eo apud aliquos qui in Rep. nostra plurimum possunt. Sed facile cognovi nihil iis de isto negotio constare. Aliqui existimare malle hanc de eo suspicionem conceptam. Alii dicere si quid ejusmodi exisset, fortasse privata nonnullorum auctoritate compulsus, & nihil tale unquam in procerum conventu decretum. Illud quidem pro certo habere, summates urbis nostræ viros & Regno & Regi vestro maxime favere, ac quantum in se nunquam perpessuros, ut quisquam concitet Musulmannos adversus Regem Christianum, & ita Christianus, ut is tristi hoc Religionis Christianæ dissidio imperium in conscientias uni sciat Deo convenire. Quare siquid ejusmodi factum ab oratore nostro, necesse est aliquid monstri alere, qui ad hoc eum virum non communicato cum aliis consilio impulerint. Nova hic, quæ nostrum spectant Remp. pene nulla, aut parvi illa momenti. Nisi quod ab Americana Societate nostra Paraibam in Brasilia expugnatam naves postremo inde appulsæ referant. Is locus situ non longe Olinda civitate, quam nomine regionis perperam Pernambucam vocant, tribus constat castellis, non magno diffitis intervallo. Eo magis mirandum, quod exiguo adeo temporis spatio in nostrorum venit potestatem. Nec inutilem in eo capiendō operam præstitit nobilis vestras Artissimi. Quem me aliquando sic compellare memini. Eo autem major hæc victoria habetur, quod molæ aliæque purificando saccharo idonea nostris integra sint relicta. Acce-

dit, quod qui ante in talibus operam Hispanis locabant, eam nobis addixerint. Unde tantum animi Americanæ nostræ societati accessit, ut ante diem unum alterum liberum in eos tractus commercium mercatoribus concesserint, modo decimas rerum inde allatarum penderent. Fervere hic jam incipit armorum apparatus ad proximam ætatem. Vix enim dubitandum, quin grave imminet bellum ab Cardinale Hispano, qui illustrem victoriam ad Norlingam adeptus, non minores hic successus imaginatur, cæterum diversitatem belli nonnihil impediendi allaturam confidimus. Germanis Mars apertus placet semper, raro Batavis qui multo maximam spem in propugnaculis sitam habent. Nec ratio belli, quod jam sexaginta per annos adversus potentem adeo hostem geritur, conferre semper manus permittit. Victi enim Batavi difficulter cum victoribus instaurant certamen. Nec æquum uni discrimini salutem patriæ maxima ex parte committi. Pro documento nobis sit ad quantam spem erecti nuper Germanorum principes subita clade una quasi è summo fastigio deciderint. Et hætenus quidem fenserunt & adhuc sentiunt, quam futile sit, nisi necessitate summa urgente, unico prælio de summa rerum decernere. Imprimis Udenhemum à Cæsarianis interceptum, quem in locum Galli, tanquam munitissimum, aurum, argentum, annonam, cæteraque bello necessaria comportarant. Quicquid anni labore & impensis acquisitum unicâ pene horâ rapuit. Hinc plerique ominari improsperos Gallorum successus. Filius is nobis, qui antea fuit, sic est commendatissimus. Nec patitur ille in vita aut studiis quicquid desiderari. Qua de re plura proximis literis scribas. Vale.

Amstelodami,
Prid. Kal. Mart.
An. clō Ioc xxxv.

Illustri tuo nomini addicissimus,

G. J. Vossius.

CCXLVII.

Jo. Arn. Corvino.

Hactenus, præstantissime Corvine, non respondi literis tuis, partim quia cognatum tuum Zeistium exspectarem, in quo me fessellit opinio mea; partim quod plane hærerem ipse, ita ut semel iterumque, manum calamo admoverim, sed mox eundem deposuerim, quia ab animo impetrare non possum, ut ullum animo scrupulum injicerem, quo

quo minus ad nos quamprimum venires. Nihil enim æque desiderabam. Et tamen metuebam, ne aliquid eorum deficiat in iis, quæ scribis, si domicilium hic fixeris. Simul videbam, de isto melius te ex avunculo tuo Perfinio posse edoceri. Quem super eo, si Hagam issem, consuluissem ipse. Illud interrim scio, tutò admodum te hic victurum. Ea enim est Magistratus prudentia ac vigilantia, ut malevoli nihil erga tui similes possint. Quam vellem, ne tantopere abjecisses voluntatem procudendi typis optima quæque. Quam bene pariter de studiis & familia tua mereris: Si vir ea doctrina ac judicio curæ illi incumberes, ut antiquorum tot monumenta aurea, quæ pene interciderunt, per te quasi ab Orco revocarentur: vel quæ passim corruptæ leguntur, tuâ operâ integrius, castigatius, ornatius prodirent. Sed eo ab consilio semper mihi visa abhorreere conjux tua, postquam Lugduno abeundum sibi aliò statuerat. Vi. Id. Januarii inauguralem habui orationem in Illustri Gymnasio nostro. Postridie item Barlæus. Ac uterque frequenti admodum auditorio diximus non adolescentulorum modo, sed etiam virorum eruditorum graviumque. Literas tuas *πρὸς Μελάνω* inscriptas, simulac mihi ab amico traditæ sunt, procuravi sedulo. Nunc mitto responsum ejus, ex quo facile perspicias, quanti te faciat. Itaque admodum tibi illud gratum fore scio. Uno excepto, quod addit ob odium quorundam Vatinianum, nondum adeo liquidas esse res suas, quam vellent, qui viri ejus virtutes norunt, nec doctrinæ pariter & concordie publicæ bellum indicunt. Veruntamen magna me spes tenet, propediem omnia fore loco meliori. In quo si nos opinio faller, non diem in patria morabitur. Nam opus? præsertim cum certo familiæ suæ dispendio. Si quid tuto ad eum curatum velis, ad me mitte. Ac si quid aliud etiam exposcas, solum impera, omnia siquidem tui causâ volo ac debeo. Uxori optimæ à me & mea salutem dices plurimam.

Amstelodami.

Tuus,

G. J. Vossius.

CCXLVIII.

Generosæ Domine Baro,

Valde animo meo ægre fuit, quod nec pridie quam discederetis, Illustrissimum Dominum Legatum, vel te, quem sic amo, sic æstimo, domi reperissem. Foris cœnare quispiam è famulatio dicebat, neque postero mane minus operam luserim, quia sic maximi herois, parentis vestri, vel regni potius negotia tulere, ut jam currum adscendissetis priusquam, etsi non multis passibus ab ædibus vestris, eo venissem, & extremum vale dixissem, optima quæque & tam bonæ legationi, & itineri vestro comprecando. Sed quod facere tum non licuit, id vero nunc per literas facio, verbis quidem parcius, sed affectu non minus uberi ac devoto. Illud quoque non parum mihi dolet quod non satis perceperim mentem tuam de chartis hic relictis. Siquidem sic opinabar, non eas te legi à me vel te, sed alias, quas ipse scripseras. Has autem, quæ non amplius, ut arbitrator, quam dimidiam negotii partem complectebantur, tecum ipse domi retuleras. Alteras illas dic repertas primis aliquot diebus hic relictas ignoravi. Sed tamen fortuna bona in eas incidi, sponteque cras aut pendie eram remissurus. Opera dari cœpta, ut tumultuarie saltem à me legerentur, & aliqua castigatæ magis dictionis indiga notarentur. Sed multa adeo se obtulère, ubi prorsus hærerem, quod res Suecicas, mentemque scriptoris haud satis perspicerem, ut statuerim non posse eam rem hac nocte confieri. Nam post septimam demum vespertinam redditæ mihi ab eo cui dederas literæ tuæ: atque idem ait se cras sexta matutina Hagam repetere; utinam horis sex septem una nobis duobus esse licuisset. Plus promoverem, quam vel triduo nunc toto valeam. Nam quis mortalium rei minus intelligens, sæpius turpiter me darem. Si tamen tanti putaveris, Patrueli tuo possis Suevicum transmittere exemplar, ut is Germanicè exprimat mihi. Equidem non patiar ulla in re operam meam desiderari. Utere, fruire, me, meis, in hoc, in cæteris. Non alius vel hic, vel alibi reperiar, quam

Amstelodami,
clo Idc xxxv.
xxi. Mart. xii.
Nocturna.

Vestra Illustrissima Familia
æternum devotus,

G. J. Vossius.

Gratum

Gratum fuerit si illustrissimo parenti (quem equidem deinceps, non ob prudentiam, vel doctrinam maximam devotius quam ob eximiam humanitatem colam) obsequium in eum sedulo in cunctis offeras. Te illustrissime Baro, & tecum pariter fratrem D. Jacobum, nobile adeo par juvenum, uxor, ac liberi plurimum jubent salvere, proque vobis mecum non desinent assidua facere vota ad Deum. Raptim.

CCXLIX.

Claudio Salmasio, *V. Cl.* Ger. Jo. Vossius *S. P.*

Papyri iconas remitto, qui Stapelio ionge gratissimæ fuerunt, multumque debere se fatetur. Nec minus mihi jucundus fuit conspectus literarum, quibus olim focer meus ad sacram professionem Leidam vocatus Heidelbergæ. Eoque gratius donum, quod nondum videram. Primaque occasione id perscribam ipse; sed dum quod mei scis non esse insolens, officium hoc scribendi differo, quæso hujus affectus mei ne penitus Puteanos fratres siveris expectes. Quod justius eo facies, quia eos amavi & colui semper ob præclara erga literas merita. Uxor mea jam menssem secundum ægrotat, non sic tamen ut perpetuo sit lectulo affixa. Et jam convalescere videtur; spero vere adulto, omnia meliora. Interea partim hæc invaletudo ejus in causa, quod longiusculo tempore non scripserim; partim etiam quod eadem mallem una cum literis meis mittere de Re Grammatica libros. Quod ne nunc quidem facio: sed fiet intra octiduum. Jam Bibliopegis exemplaria aliquot tradidi compingenda. Ex quibus prævertere necessum est, ea quæ in Britanniam mittentur. Id faciam die crastini, vel perendini. Simulque exposculabo cum affine Junio de non missis statuarum iconibus. Equidem planè nescio quid in causa sit. Nec enim suspicari possum, illustrissimum Comitem nolle exterorum quenquam aliquid è suis monumentis primum publici juris facere. An forte fasciculus literarius, quo & literæ hujus argumenti continebantur, minus in affinis manus pervenerit? Id eo minus velim, quia addita erant quædam de rebus non parvi momenti, eaque publica autoritate firmata. Sed quicquid erit, utrum acceperit exemplaria primogenito Serenissimi Regis Caroli, & aliis tradenda. Scio, jam cognoveris, amplissimum Grotium Lutetiæ agere, ac ut Legato Regni Suecici honoris ei officia esse præstita, ut post-

quam in conventu Regis ac procerum exposuisset quæ in mandatis habebat, privatim cum Rege sermones de toto negotio Suecico ac Germanico habuisse. Equidem ob hæc & alia non minus gaudeo, quam dolere illum scio, qui in castris non humanitatis quidem sed inhumanitatis & malevolentiae facile principem locum tuetur. Utinam tantum non eo loco res Suecicæ viderentur, ut Gallorum etiam Regi satis sit difficile futurum, instaurare eas, si vel maxime velit. Sed isthoc *δεσπότης ἐν γυναικί καί ταις*. Nil desperandum: dum in Galliis est Grotius, filiarum juniorem amisit. Credo frigore hyberno, & molestiis itineris morbum contraxerit. Intelligo parentem, etsi valde amaret hunc casum ferre, nec illum doloris indicium domesticis in vultu ejus relucere. Non eadem constantia filio ejus Petro apud nos agenti. Quid mirum, adolescens est; & ab nemine fratrum vel sororum sic se dilectum atque ab illa arbitratur. Quare sic primis aliquot diebus lachrymis indulsit, ut vix cibum caperet. Sane & ipse vocatione & alloquio conatus, sed non semel, dolorem hunc abstergere. Nunc meliuscule omnia, nisi quod ubi mentio ejus, dolor recrudescit. Sed alio potius sermonem derivamus. Vale, optime maxime Salmasi, & cum uxore lectissima ab omnibus nobis salve.

Amstelodami, cIdccxxxv.

Pr. Kal. April.

CCL.

Joanni Meursio, *V. Cl.* Gerardus Vossius *S. P. D.*

Quamquam de tot ingenii, doctrinæ, industriæ tuæ monumentis, plurimum mihi que gaudeam tibi que gratuler: cogor tamen fateri, hanc eo lætitiā imminui, quod sic Blauwius in edendis iis eluserit expectationem utriusque nostri. Quod quidem facilius ferrem, si mei & aliquot tui amantium, ac non totius interfuisset reip. literariæ, tam avide omnia tua expectantis, prodire tandem quibus orbem doceas universum: si item non coqueret animum meum damnum, quod privatim familiæ tuæ dedit, dum te fraudat tot annis, tum honore apud bonos doctosque, tum etiam emolumento illo quod percepisses ab illis, quorum gratum erga te animum persensisses quod chartis perennaturis nomen eorum posteris propagares. Equidem non facile dixerim, quoties & quantopere super istoc exposculaverim; ipsumque rationem inire Blauwium

wium jufferim quam grave tibi damni dedisset. Nec verissima ille me dicere negare vel voluit vel valuit. Non facile tamen dixerim, quam gavifus sit Historiam tuam Danicam ubi vidit. Nunc, inquit, ostendam, non mihi voluntatem defuisse sed facultatem in iis promulgandis, quâ elaborasses: Nempe quia hic non deficerent eum typi quibus ex animi tui sententia opus hoc prodiret. Itaque continuo typothetæ præcipuo negotium dedit ut ordiretur eam, nec nisi absoluta desisteret. Sic præter ipsum retulit typotheta quicum ignaro eo sum de tota hac re locutus. At cur in prioribus cessatum? Bis coepit; sed primis typis tam minutis quasi pulverem vellet ob oculos legentium spargere. Et progressus fuisset nisi obstitissem. Postea urgente me majoribus exorsus. Placuit coeptum; sed desistere coactus quia tot Græcis intercurrentibus typis destitueretur. Hisce nundinis instantibus famulus ibit Francofurtum qui secum afferet quantum deest. Interea nullo opere prælum ejus fervebit quam Hiltoria tua Danica. Mense Maio, hoc est, typis Græcanicis acceptis, etiam alter typotheta in aliis occupabitur. Mihi amice optime maxime, nihil hic vel feritur vel metitur, nisi quatenus amicorum commune esse negotium solet; sed tamen tam diu tam turpiter elusus, puto verum dicere. Excudetur ab eo opus meum de Idololatriæ origine & progressu; non permittam ut in istoc pergat nisi pari pede progrediatur in tuis. Amplius vis? si non valebit utrumque præstare, jussero ut mea ad tempus cessent. Omnia tui causa volo eo magis quia pudet me non antea subodoratum quid ageretur, nimiaque simplicitate pene dixerim fuisse hunc triconem dum de mense in mensem sino hoc negotium tuum protrudi, nec omnia tua ut scripseras remitto. Sed crede mihi hic si fuisses nec ipse aliter egisses. Tam verisimilia semper attulit ut cuivis bono fucum facere potuerit. Cæteroquin non is sum qui tam facile eludar; sed quid opus tam multis? ipse ait Literis suis sese sic purgare ut satisfactum confidam. Salmasius ante hebdomadas pauculas è Galliis est reversus, ubi biennium vel circiter fuit, cum ob alias causas tam propter pestilentiam Lugduni grassantem. Nihil hætenus terris Batavis in lucem dedit; sed non arbitror ulterius cessaturum. Heinsii notæ in N. T. excudi tandem coeperunt, quæ quales sint futuræ postea uterque & alii judicabimus. Nunc non idem omnium judicium est. Filii mei *σὺ μακάριος* Maimonides excusus, excepta præfatione, alioqui nunc misissem. Salutant te uxorem & liberos uxor & omnes mei. Multa etiam salute imperties V. Cl. Laurenbergium, Ernstium ac Stephanium. Ernstio proxime re-

scribam. Nunc quia tertia est nocturna, cubitum me confero. Nempe sic de die ab innumeris pene avocor, ut nihil fere nisi de nocte possim.

Amstelodami T. 1752.
vii. Idus Aprilis.

CCLI.

Jacobo Wittio *Quæstori* Dordraceno
S. P.

CHartam mitto beneficii ab urbis vestræ Proceribus collati, Francisco Fr. F. Junio, spero hoc viduæ dabit Quæstor, ut tanto nunc promptior sit in exsolvendo, quanto ego tardior fui in negotio urgendo. Negabis fortasse tam me lentum esse debuisse, cum non possim ignorare, quam id viduæ sit molestum. Sed sic sum, nulla tamen culpa mea; quando quotidie minus, minusque meus esse incipio; si hoc ita processit, quid amicorum negotiis, imo quid tandem studiis meis fiet? Et tamen manet ardor, quod ante biennium cogitaram, excurrendi ad vos cum aliquo meorum; idque si Deus vitam, & valetudinem, feriis Autumnalibus. Juvabit videre veteres amicos, eos imprimis, quos veteris sui Doctoris necdum poenitet: In quibus jure repono, ut de Te taceam, Colvium, Beverovicium, J. Roverium. Grammaticum nostrum opus grande, & arduum jam excusum; & habet Bibliopega aliquot Exemplaria, quæ compingat. Propediem ad Te transmittam. Difficiles nugas, dicent malevoli. Quid mea? quando jam diu talium voces didici contemnere. Et certe si necdum sciam, quando futurum tandem, ut norim? Quippe jam annum ago undeseagesimum. Deo gratias ago, quod ætas sic satis vegeta, utinam de conjuge idem possim dicere. Sed illa in dies defetiscit; ut multum metuam, ne vita illa sit vitalis. Jam excudi coeperunt Annales Hollandiæ, & Zelandiæ, quos filius Matthæus conscripsit: scio non displiciturum opus, ubi videris. Sanè priores non parvo post se relinquet intervallo. Domesticum quidem hoc testimonium meum; sed tanto religiosius hæc scribo, qui vanus nolim deprehendi, vel domi cæcus. Excusa propemodum Tragœdia Groti, Sophompaneas, sive Josephus, qui altero illo nomine Ægyptiis vocatur. Placebit argumentum, nec minus Romana vere dictio: credo & eo nomine, quia meo nomini inscripsit. Et illam, unâ cum nostris transmittam. Authorem, non ut dictitant aliqui, ab illustrissimo

strissimo Oxensternio solum, sed à Regina, & Regni Succici Proceribus, legatum ad Gallos missum, credo jamdiu intellexeris. Uti & illud, quod Regi fuerit longè acceptissimum; qui gaudet non modo reversum in Gallias, sed honore auctiorem redire. Spero vir ille, quo affectu erga patriam est, non Suecicis modo, sed Belgicis etiam rebus, multum in Galliis commodabit. Quod non scriberem, nisi melius nossem, quam multi, qui solis sibi iudicium vindicant, cum nulli magis ignorent. Confido illum Deo curæ fore, utcumque res Suecorum, in Germania quidem, in extrema stare tegula videantur; sed jam ad argumentum venio, quod non ita cursim possit referri. Quare abrupto, teque multum, & uxorem optimam, & familiam totam iubeo salvere: idemq; facit conjux, cum liberis. Vale, amplissime & integerrime Cognate.

Amstelodami,
clō Ioc xxxv.
10 Non. April.

Tuus omni officio,

G. J. Vossius.

CCLII.

Guilhelmo Archiepiscopo Cantuariensi.

Reverendissime in Christo Pater, Domine Illustrissime,

TAndem finem suam implent exercitationes nostræ Grammaticæ: quarum geminum mitto exemplar, unum celsissimo Walliæ Principi, alterum tibi Mecænati meo optimo maximoque; qui nunc iterum bonas mihi precandus es preces: Nempe ut tantus Princeps, non aliunde potius quam ab illustri manu tua accipiat commentationes nostras: atque ab ore sacro tuo etiam cognoscat submississimam devotionem pectoris mei. Atque hæc quidem eâ conditione oro rogoque, si sic res ac tempora ferant. Quid enim fieri possit, vel debeat, infinitis partibus melius me perspicies. De exemplarium cæteris quid faciendum censeam, ex ornatissimo Dello cognosces. Nihil tamen acturus nisi ex consilio tuo.

Opere hoc copiosissimo, sed juventuti & φιλολόγῳ, quam sacra tractantibus utiliori, ad finem perducto, aliquandiu seponenda video, quæ bonas literas, vel humanas scientias spectant. Et si permulta jam prælo parata sint ut, præter Originum libros, vastum en opus! etiam tres de re poeticâ libri diu expetiti, quia hæcenus eam disciplinam, ratione illâ, tractarit nemo. Item liber περὶ ἐγκυκλοπαιδείας, sive de scientiarum artiumque omnium naturâ, nexu, & usu. Item Græcorum Olympiades. Ad hæc

rerum Romanarum Annales. Pluraque id genus, quibus non insistam. Nempe totum me accingo ad ea, quæ Thefis Lugduni editis, Ellofoti recusis, ante annos multos complexus sum: castigatius auctiusque mulro, idque librorum forma, divulganda; videlicet ut duo sint Libri de Baptismo, & ejus ritibus; totidem de Eucharistiâ libri, uti & de statu Animæ post mortem; Alius de creatione & fine mundi; Alius de lege, & bonis & malis operibus. Et porro ita in aliis non editis modo sed & hæcenus *arrendetis*. In cunctis iis nihil æque mihi propitium est, quam studere paci ac concordie Ecclesiæ; simul ut sacræ scientiæ candidatis notitiam atque amorem veteris Ecclesiæ instillem.

Vix ea lucem viderint quin, *ὅν δεῖ*, secuturum est opus nostrum de mundi Antiquitatibus, usque ad vocationem Abrahæ, & inde de rebus Hebræorum usque ad Christi natalem, vel Hierosolyma à Tito deleta. In his ad duo ista imprimis collimo. Primum ut sacram Chronologiam accuratius tractem, quàm à Scaligero magno alioqui viro, & aliis aliquot, factum. Deinde ut difficilia multa veteris Instrumenti loca, præsertim *ἐκδοσίον* enarrem: ac sententiam nostram, tum rationibus solidis, vel saltem verisimilibus, tum item auctoritate sanctorum Patrum, & Rabinorum aliorumque confirmem.

Tertia nobis cura erit de Christianorum rebus; quod opus bipartitum. Prius exponetur Historia Ecclesiæ, ut candidè ita succinctè: rationes etiam verbo uno altero inspergentur, quibus diversa sentientibus responderi queat. Posterius ea omnia seligentur, super quibus nunc controversia est. Hic modestè cum Baronio & aliis, manus conferimus. Sic utrisque consulimus, & illis quibus sufficit scire rem gestam: & istis, quibus opus est adversariis occurrere. Hanc curarum partem optarem, vel primam lucem conspiciere, nisi multa adeo adhuc cruda intercurrent; partim quia toties, imo quando non, ab indigenis & exteris inturbor, partim quoniam in his consignandis in illo Ecclesiæ Catholicæ schismate, ac tantis partium studiis veritatis studium neutiquam sufficit, sed prudentia etiam opus est singulari. Eoque ubi paulum priora processerint, nihil æque exoptem, quam ut cum uno altero Magnæ Britanniæ, antiquitatis intelligenti & prudentia conspicuo, per literas subinde de talibus conferendi felicitas obtingat.

Nondum in scribendo huc usque perveneram, cum mihi à Dom. Goffio literæ tuæ exoptatissimæ. Quid primum hic, quid postremum eloquar? Tène illo dignitatis loco Dei gratia constitutum, tantis ac tam densis ne-

gotiis obrutum, hoc me honore dignari indignum, ut ea cura, eo affectu respondeas singulis literis meis? O affectum eximium! quem nisi videam nihil me fuerit arrogantius stultiusque; nisi profitear, nihil me terra proferat ingratus.

De posthumis filii mei Dionysii, similiter actu, censeo, nihil nempe ejus divulgari oportere, nisi perfectum. Quippe imperfecta, ut rectè olim Plinius, censenda pro non inchoatis. Dissertationem tamen Maimonidis ab eo versam, judico propè adeo abesse ab ultimâ manu quam edendo solet adhibere, ut haberi id opus possit pro absoluto. Et jam editum foret, nisi Blauwius J. C. uxore ducta in vicina ageret urbe, ac demum circa Kal. Jun. domuitionem cogitaret. Parenti optimo, parum erudito extra Mathesin, non ausus fuit absens committere curam operis.

Filius Joannes operam suam addixit præfectis Indicæ negotiationis. Fiscus iis fuerit advocatus. Spero idoneum magis fore seculi rebus quam eum expertus sum in humanitatis studiis vel sacris. Nihiligitur superest, quàm ut honestè alteri loco cedat in Collegio. Interim multum me Regiæ beneficentiæ tuæque sollicitudini debere profiteor; quòd hætenus ei bene in Anglia fuerit, saltem bene esse potuerit, nisi per ipsum stetit. Quicquid superest, spero exequetur conjunctissimus affinis meus Franciscus Junius; ad quem fusè scripsi. Si qua in re opus ei fuerit consilio vel auctoritate tua, confido illam non defore. Reverendissime, Illustrissime Dom. Deum rogo, ut diutissime te saluum ac sospitem esse velit, quo Ecclesia Anglicana, illa omnium hodie Ecclesiarum Helice & Cynosura, deinceps etiam recto cursu ac secunda navigatione feratur.

*Amstelodami,
clō Ioc xxxv.
Post. Non.
April. St. Vet.*

*Illustrissima tuæ Reverentiæ
humillimus ac devotissimus
Clienſ,*

G. J. Vossius.

CCLIII.

*D. Dell, Reverendissimo Archiepiscopo
Cantuariensi à Sacris, S. P.*

Fiducia, optime Delli, quam mihi amicissimus Goffius fecit, non dubito aliquid à te exigere, in quo mihi utilis esse possit opera tua. Est hæc futura in exercitationibus Grammaticis quas mitto. Duorum exemplarium, quæ amictu holoserico eminent,

unum celsissimo Walliæ Principi destinatum, alterum Reverendissimo & Illustrissimo D. Archiepiscopo, communi Mecænati ac Patrono nostro. Si ludere nonnihil in re seria licet, cui viridi vestitum convenientius erit, quam virescenti D. Principis ætati? cui cæruleo contextum magis competat, quàm D. Archiepiscopo, cœlestia curanti? Addidi his duo in membranis compacta, & marginibus paginarum inauratis, unum Reverendissimo Domino Episcopo Londinensi, alterum Bodleianæ Oxoniensium Bibliothecæ. Quorum ille Reverendissimo Mecænati meo D. Archiepiscopo in priori dignitate successit; hæc verò, ut præclarum Oxoniensis Academiae ornamentum, ad curam ejusdem tantquam Cancellarii pertinet. At, inquires, tertium primis duobus chartæ par reperio. Ita est, sed hoc superpondium est. Nempe metui, ne ex proceribus cuiquam exemplar satius esset offerri, quem equidem ignorarem, tam longè à Britannis degens. De illo igitur plane agendum fuerit, ex consilio Reverendissimi Dom. Archiepiscopi. Sunt & tria chartæ secundo tertioque non disparis, sed solo hoc inferiora, quod oræ paginarum non renitent auro. Horum unum esto ejus qui studiis præest celsissimi Walliæ Principis. Intelligo esse D. Brian Duppa, antea Decanum Ædis Christi apud Oxonienses; cujus viri doctrinam pariter ac humanitatem, cum ante quinquennium & amplius Oxonii essem, abundè sum expertus. Tanto minus dubitavi ad eum scribere, & hunc novum ei honorem onerosum, sive onus malis, longè honestissimum, gratulari. Nempe & hic locum non minus habere censeo, quam in regunda Republica, quod olim à doctissimo Varrone dictum fuit, Honus est Honos qui sustinet Rempublicam. Alterum exemplar Rousii esto Bibliothecæ ejus præfecti, quam ante dixi. De tertio facile vides non posse te præteriri, quem antea incognitum ausus sum onere hoc onerare, veriùs quàm honestare. Sed simul putavi aliquod mittendum Symbolum amicitiae, deinceps contrahendæ. Sæpius enim mihi per literas compellendus posthac eris, occasione earum rerum, de quibus aveam cognoscere sententiam Reverendissimi Domini Archiepiscopi. Non est minutis interturbandus, qui tot tantaque negotia sustineat. Quare sic ad heroa scribam, ut quædam tibi committam qui in districtissimo commoda noris fandi tempora. Mittere etiam animus exemplar Academiae Cantabrigiensi, & Decano Cantuariensi, ac amicissimo Casaubono. Sed existimavi non tibi hoc curæ committendum, cùm exequi liceret per ornatissimum affinem meum Franciscum Junium, qui in

ædibus

ædibus agit Illustrissimi Comitis Arondelii. Multis amicorum non mitto, quia argumentum non est ejusmodi, ut faciat ad genium omnium. Sed ubi quæ sacram Historiam, vel Ecclesiæ dogmata ipectant, edidero, non ero parcipromus, verum munificus & liberalis. Si tamen nunc quoque peccatum, monito opus. Mittam quamprimum iis, quibus oportebat. Vale.

Amstelodami cl^o Id^o cxxxv.

7. Idus April. Stil. Vet.

G. J. Vossius.

Hicce literis scriptis, in mentem venit, ut amicus putavit, perperam à me Reverendissimum & Illustrissimum D. Guilhelmu in præfatione ad celsissimum Walliæ Principem, statui ab primo Archiepiscopo Augustino tertium super septuagesimum. Nam inquebat, est Archiepiscopus LXXV. Occurrebam hoc pacto, sequi me Landavensem Episcopum Godwinum, cui si *o margéius* Reverendissimus D. Georgius Abbotus est LXXIII. sane Reverendissimus D. Guilhelmus erit LXXIV. ab Augustino autem omnium primo LXXIII. Nam si ab eo numerem, primus non veniet in numero. Ut in Ovidiano illo

Alter ab undecimo jam tum me ceperat annus.

Ubi non duodecimus sed tertius decimus annus signatur.

Novum eidem visum quod & Augustissimi Regis & celsissimi Principis nomen scriberem per K. Sed Latinis C. & K. non literæ sunt diversæ, sed ejusdem literæ ductus diversi. Nec judicio tam Karolus posui, quam consuetudine; quia meminisse, sic me in membranis optimis & vetustissimis exaratam hanc vocem invenisse. Atque ita quoque Petrus Pithæus, vir optimè de antiquitate meritis, in Francicis Annalibus crebro admodum Karolus, vel Karolus expressit. Et si nec Carolus refugit. Nempe scribendi modus hic est arbitrarius, nec in eo versantur vectigalia Populi, vel salus Regni, ut dici solet. Sed quid minutis insisto? Utinam ne graviora sint, in quibus aliquid me fugerit. Nempe homo sum, nec humani quicquam à me alienum puto.

Iterum vale, optime D. Delli.

CCLIV.

Episcopo Londinensi.

Reverendissime in Christo Pater, Domine Illustrissime,

Gratias Deo ago, quod cum decrevisset grande illud Ecclesiæ columen D. Guilhelmum in Archiepiscopali sede constituere, te potissimum voluerit in Londinensis Ecclesiæ Cathedra tanto succedere heroi. Hinc enim omnes pietatis juxta & antiquitatis amantes ita fore augurantur, ut arctissimâ vestri duorum conjunctione, magis & magis sordeat novellitas, splendeat vetustas. Quem affectum meum cum optimo quoque communem perscribendi nunc occasionem arripui avidè, quod exercitationes meas Grammaticas ad celsissimum Magnæ Britannæ Principem mitterem. Putavi enim recte, & ex officio me facturum, si eadem eminentissimo nomini tuo exemplar offerrem, quod ut boni consulas rogo. Equidem ignorare non possum, quanto gratius munus foret, si in sacro argumento industriam posuisssem. Sed alterum illud ætatulæ celsissimi Principis magis conveniebat. Nec in graviori re deinceps opera nostra claudicabit, modo Deus mihi concesserit valetudinem & vires. Quem ipsum rogo ut te, Reverendissime & Illustrissime Domine, diutissime saluum ac sospitem conservet.

Amstelodami,
cl^o Id^o cxxxv.
12. Kal. Maias
St. Vet.

Reverendissimi & Illustrissimi
nominis tui cultor devotus,

G. J. Vossius.

CCLV.

Rev. & Doctiss. D. Brian Duppa, Illustrissimo Magnæ Britannæ Principi & Studiis.

Reverende Doctissimeque Vir,

Sæpe animum meum subit recordatio, qua me humanitate exceperis Oxonium venientem, ubi tum Decanum te esse Ædis Christi commemini. Nunc vero intelligo; admotum te studiis illius, à quo post augustissimum Regem, (cui de nostri utriusque temporibus siqua supersunt, annos Deus largiatur) spes Magnæ Britannæ potissimum dependet. Bene æternum sit optimis & sapientissimis viris, per quos Deus hanc mentem

tem insinuavit serenissimo Regi, ut ex sum-
morum virorum abundantia tantopere Britan-
niâ unum te omnibus præferret, cui cara
adeo pignora committeret. Cœlesti etiam nu-
mini supplicamus, tui quoque, sed magis
Regni causâ, imo tot Regnorum, ut magis
magisque te spiritu sapientiæ firmet. Quid
enim homulli absque divinâ gratiâ possu-
mus? Faxit illa ut te tanti Principis Epho-
ro, ætas gaudeat præsens, & omnis posteritas,
pro tam nobili opera, præconia debita
rependat. Quamvis verò non ea vis animo,
nec illa foelicitas, ut in huiusmodi sortem nas-
cerer, nunquam definam erga inclytam seren-
issimi Regis stirpem, animum testari devo-
tissimum. Cujus primum argumentum sun-
to Exercitationes Grammaticæ, quas si Illu-
strissimo Walliæ Principi dicarentur, illustri-
ores fore existimavi, & simul hoc me conse-
qui posse, ut opere tantulæ ætati non prorsus
inconveniente, obstringerem me ad graviora
sanctioraque. Exemplar confido illustrissi-
mus Princeps, jam ante has tibi redditas, ab
Reverendissimo D. Archiepiscopo Cantuari-
ensi acceperit. Sed nefas erat, si non tam
bellam occasionem amplecterer, aliquo inge-
nii nostri monumento, ut possem compro-
bandi erga te animum & officium meum.
Nempe isto potissimum, ut eumpse fœ-
tum ad te quoque transmitterem: non quasi
commentatione hac usque adeo mihi placeam,
sed quia leve, quam multi censeant, putent
artem Grammaticam, artium & scientiarum
omnium janitricem, eo usque perducere, ut
non multum adeo nunc, à fastigio, ac per-
fectione sua abesse videatur. Cessatum hâc
parte à viris magnis. Subii ipse onus fortasse
aliquo honoris nostri, publici dispendio non
item. Idem spero judicabis, ubi operosam
adeo operam nostram introspexeris. Vale, vir
summe, & amicissime, animoque tuo ita per-
suade dum vivam, tui me nominis cultor-
em fore.

Amstelodami,
c1o lœc xxxv.
14. Kal. Maii.

Tuus omni officio,

G. J. Vossius.

CCLVI.

Joanni Rouse, *Bibliothecario Bodleiano*
S. P.

GAudeo, præstantissime Rouse, tam bel-
lam mihi occasionem oblatam abrum-
pendi diuturnum hoc silentium, quod non
ab ullâ tui oblivione est (melius de me meri-

tus es) sed ab occupatissimo vitæ genere,
quod meum me esse neutiquam sinit. Quam
vero occasionem dixi, ei mihi præbita est ab
nostris de re Grammatica libris, celsissimo
Magnæ Britanniæ Principi inscriptis, quorum
exemplar melioris chartæ & inauratum mit-
to, ut instructissimæ Bodleianæ Bibliothecæ
illatum, aliquid inde honoris accipiat, & ad
auctorem suum id transfundat. Alterum
etiam codicem comitem esse iussi; sed hoc
animo, ut ubi hoc officio perfunctus erit, in
privata tua Bibliotheca aliquid reperiat loci.
Affectum hunc erga te consules boni. Non
diffiteor argumentum operis nostri vile ha-
beri à multis. Sed aliis cessantibus, susci-
piendum id nihilominus existimavi. Turpe
enim cum tanta seges sit eorum, qui quotidie
bene mereri student de disciplinarum aliis,
non inveniri, qui idem contentur Gramma-
tica in arte, cum priusquam ad majora my-
steria admittamur, minoribus illis initiari
opus sit. Ab hac doctissimorum virorum
circa eam disciplinam incuriâ provenit, ut
nuspiam fere crebrius peccetur quàm à do-
ctoribus ejus, dum vulgatis insistent senti-
tiis, nec quâ eundum, sed quâ itur, gressum
dirigunt. Porro (quod multis minus fiat
verisimile) satis operosa nobis hæc opera
fuit, dum (ut cum Terentiano Mauro dicam)
recondita quæque

*Dumos inter & aspera
Scruposis sequimur viis,
Fronte exile negotium
Et dignum pueris putes.
Aggressus labor arduus.*

Sed de opera nostra nihil addam, maloque
te remittere ad præfationem, quam præmisi
ad Lectorem. In priori Epistolâ, quæ est ad
serenissimum Magnæ Britanniæ principem,
mentionem facio Oxoniensium inclytæ Aca-
demiæ, & eximie humanitatis, quâ me sum-
mi ejus viri exceperunt. Nempe occupatio-
nes tam densæ, quibus penè obrutus sum,
necdum si vere, ut aliter affectum erga bene
meritos testarer, quam debiti mei professione.
Sed spero aliquando melius erit: quod opto,
ne videar ingratus. Desidero scire, vivatne
& valeat ornatissimus Edwardus Pococke, &
utrum è Syria, ut confido, sit reversus, ubi
item degat. Volupe erit cum eo deinceps
colere amicitiam, ante quinquennium in-
choatam. Salutabis plurimum meo nomine,
excellentissimos viros Academiæ vestræ, imo
& nostræ, quando & me in Academicorum
vestrorum numerum adsciscere non dubitâ-
stis, xii. Nov. Ann. c1o lœc xxix. ut bene
noster Pocockius, in opere nobis dicato an-
notavit. Sed, ut puto, non occasio jam sa-
lutandi

lutandi Doct. Juxon, quem ad Episcopalem dignitatem evectum audio, uti & Doct. Brian Duppam studiis admotum celsissimi Walliæ Principis. Verum arbitror agere adhuc Oxonii, D. Acceptum Fruen, item D. Prideaux, ac D. Samuel. Fell: Sed & D. Claytonum, & ornatissimos viros, Harrisonum ac Chillingworth, atq; alios. Quare eos, quæso, ut dixi, salute plurima imperti; imo si grave non erit, perscribere ut valeant, & an eadem quæ, cum istic forem, munia apud vos obtineant. Mihi per jucundum erit aliquid de illis ex te cognoscere. Vale, doctissime & amicissime Roule.

Raptim scribebam
Amstelodami
c10 lxxv. xii Kal.
Maïas St. Vet.

Tuo nomini merito tuo
addictissimus,

G. J. Vossius.

CCLVII.

Petro Staeckmans, in Coll. Gener. Ord
Deputato, S. P. Hagam Comitiss.

A Liquid molestiæ mihi attulit, vir amplissime, quod tam avidè expectanti redditum tuum, occupationes inviderint hanc felicitatem: nam absque his fuisset, scio, quæ humanitas tua, cùm urbem hanc transires, non expertem me sivisses jucundissimi alloquii tui; siquidem, non ignoras, ut cibo corpus, ita animum sermonibus ali, illis imprimis, qui promuntur, non ab uno è multis, sed illo quem sua virtus, ac doctrina, in sublimi loco collocarunt. Benè interim quod publicis mihi occupationibus tuis ereptum, compensâs literis longè humanissimis: in quibus videre, visus sum imaginem tui. Eò magis volupe foret satisfacere illi, quod postulas; sed enim quos filius Matthæus, Bataviæ, Zelandiæque Annales condidit, nunc penes Typographum sunt: qui jam editionem aspiciat, inque iis promittit se passibus tantum progressurum, ut intra menses duos, vel circiter, lucem videant, libri quinque priores, quibus ducentorum quidem annorum tempora, non fusè quidem, nec confuse tamen perstringit: accuratè verò persequitur proximos trecentos, qui in anno desinunt trecentesimo post millesimum. Priusquam verò partem alteram publici juris faciat, decretum ei edere, quæ observata illi, de Batavorum libertate: Quæ sanè ante Burgundorum, & Austrianorum, in has terras imperium, maxima semper fuit. Quod nec semper dissimulant scriptores, satis Austriacis addicti. Longum esset omnes recensere; sed multorum instar, fuerit Pontus Heuterus Delphius, qui in secundo Burgundicorum non veritus

sit scribere, Brabantii, Namurcenses, ac Hannones Principibus suis in Pag. 36. gratiam Comitiss obtemperarunt. Leodienses, Hollandi, ac Zelandi, minime; quantumvis Comes Albertus, omni ratione, Comiti Ludovico gratum facere studeret. Precario enim ferme Reguli hujus temporis Liberis populis imperabant. Si dicendum quod res est, vir amplissime, longè alia facies hujus Reipublicæ fuit, sub Comitibus Hollandis, atque etiam Hannoniis, & Batavis: alia sub Burgundis, & Austriacis, qui cum vellent, quod quâ jure, quâ injuriâ, possent, libertatem pene omnem pessum iverunt, partim dolo, partim vi. Nihil liquidius erit, ubi filii liber, super hoc argumento, prodierit in lucem. Quod si ea, non dico, extremam manum acceperint, sed non multa adeo, solum memoriæ ergo rudius, concepta intercurrerent, qualia qualia forent, jam nunc transmitterentur. Atque id coram etiam me dicere commemini. Porro opere eo, non solum Belgicæ, sub Burgundis statum expendit, sed ab ipsis incunabulis ejus libertatem est probaturus. Vis, vir amplissime, ut Pictorum more, lineis quibusdam, picturaque *μνηστέριον*, ac ut veteres dixere, subleffâ fastigia carpam operis universi? Erit id quadripartitum. Primum quidem Bataviam, à Romanorum; deinde à Saxonum, Francorum, & Wiltorum servitute vindicabit. Tertius liber in eo totus versabitur, ut societatem inter Frisios Batavosque initam probet, & quo pacto illi tandem communibus votis Principem elegerint. Postremus Ordinum Comitumque collatam potestatem habet; ubi imprimis ostenduntur Principum artes, in obtinendâ Belgarum libertate maximèque Burgundicæ domus & Austriacæ: & in illâ quidem Philippum Bonum occulte, Carolum Audacem palam, in hac simulando Carolum V. Philippum vi, Republicæ libertatem evertere conatus. Istitis comprobandis prope ei prora, & puppis, Leges, Privilegia, Statuta Ordinum Comitumque. Partim tamen etiam ad partes advocantur Meieri annales Flandricæ, Haræi Brabantica, Flandrica Marckantii, Burgundica Heuteri, ejusdemque Austriacæ, Annales Hollandici, Belgicâ olim linguâ conscripti, Trajectina Hedæ, & Frisica Ubbonis Emmii historia, atque alii nonnulli; sed super istis fultus differemus, ubi vel tibi Amstelodami pauxillum hærendi, vel mihi Hagam excurrendi occasio erit. Vale, vir amplissime, diuque fœderatæ hujus Belgicæ bono, sospes age, & incolumis.

Amstelodami.
c10 lxx xxxv.
iv Id. Maïas.

Amplissimo nomini tuo
addictissimus,

G. J. Vossius.

CCLVIII.

CCLVIII.

Hugoni Grotio, *Regni Sueciæ Legato*.
Parisiis.

Illustrissime vir, .

DE honore legationis, quo longè eo dignissimum Sueciæ te regnum extulit, ex animo gaudeo, eumque, & tibi tuisque & Sueciæ universæ, atque adeo Christiano Orbi, fortunare cupio. Atque idem votum omnium, qui virtutem amant. Equidem semper rebus Suecicis optimè volui: nunc tamen impensius id facio; quia video eam intelligere & æstimare posse virtutes, laudesque tuas. Optimè diu sit Illustrissimo Heroi Oxensternio, cujus prudentia tam Sueciæ, quam tibi, consultum nunc, & porro consuletur, si in maximis expensis, quas tanti honoris exigat fastigium, malignius solvatur: ut aliqui amantes tui verentur (amor res est meticulosa) si hinc Cæsar, inde Polonus oppugnent, nec Christianissimo Regi res satis erit cordi; sed hæc curabit ille, qui Regum corda habet in manu: & ea est ingenii tui sagacitas, ut tempori scias omnibus providere. Ac prope modum metuo, ne ista legens, fortasse rideas, tam anxiam sollicitudinem eorum qui hic sumus: præsertim cum à Vossio profiscantur, qui ab animo suo potuit impetrare, ut tam fero tantum tibi honorem gratularetur. Ut in me etiam conveniat, quod Ciceroni olim aiebat Augustus, Postremum accedere amicorum; sed illi ambigua voce ludere visum, quia similiter Tullius, cum laudandum diceret Octavianum, tollendumque. Meus verò animus tam perspectus tibi, ut cessationem istam nunquam sis crediturus ab imminutione amoris provenire. Et verò cum multa variaque meum hoc officium sint morata, nihil æquè tamen ac illud, quod de Sophompanea, ac cæteris poematis sacris, certi aliquid respondendum putarem, ac de hebdomade in hebdomadem, à Blauwio rejicerer. Nihil æquè mihi grave in talium genere fuit, quàm quod sic eluderet, ut neutiquam satisfacere postulatis tuis possem. Bene interim, quod tandem se exsolvit, nec inelegantibus Typis excudit, & ut emendate excuderetur, mecum providit: si quid tamen oculos fugerit, vel melius nunc occurrerit tibi, quàm prius, velim perscribas, ut saltem editione ea, quæ minoribus Typis sequetur, corrigatur. Non dubium enim quin vicinus Janfoni, uti in opere tuo de Jure Belli fecit, ita hæc etiam poemata minori forma divulgare cogitet. Huic malo non aliter occurrere Blauwius posset, quàm Typis itidem exiguis, sed

elegantioribus recudendo. Valdè hic animi hominum suspensi de Classe quam serenissimus Britannia Rex parat. Plerique metunt, ne quia multimodis offendimus, in nos cudatur faba. Cæterum, quod aiunt, Regem, vel Proceres ad Papismum vergere (ita his quoque terris prædicant vulgo) id ab animis profiscitur exulceratis, nec quicquam probantibus, nisi quod Gallicis Ecclesiis conforme. Hoc habent optimi & doctissimi quique Britannia, quod magni faciant Ecclesiam veterem, nec in dogmate solum libenter sapiant cum primis seculis, sed etiam ritus, qui tum obtinere, lubentes sequantur. Hac propter Cathari, qui id Papismum vocant, non desinunt traducere sic sentientes, & simpliciores, quorum maximus numerus, magno Zelo abalienare ab Regum Optimo, & Episcoporum illis, quibus Orbis Christianus genuinæ antiquitatis reverentiores non habet. Quam noxium, ac periculosum id Regno sit, si quis non intelligit, ex Zelotis plerisque in Batavia capere possit experimentum. Quare Rex studet, ut qui fide conveniunt, ritibus etiam similes sint; sed audio Puritanos Anglos dicere non debere Indigenis minorem esse in istis libertatem, quam exteris; Regem, intellecto hoc, egisse, ut Gallis etiam, ac Belgis nati, sed in Britannia, ac Angliæ à pueris edocti, Anglicis se Ecclesiis jungerent, ut ita facilius Ecclesiæ istæ coalescerent. Hos propterea vehementer conquestos; regique indicium factum, ut Britannia excedere cogitent. Dixisse ad illud Regem; puerorum eos similes esse plorantium priusquam vapulent. Nec videri Regem illos diutius ursum, dummodo tandem pausa fiat odiosè adeo traducendi Proceres optimos, & in contemptum adducendi præsentem Ecclesiæ Anglicanæ formam. Horrescit animus referre, quibus maledictis, & mendaciis, Zelotæ (me etiam præsentem, ne quid iis affingi putes) Antistites optimos, mihi que notissimos profuderint. Quanto hic tutius, tanto id quoque hic vehementius, & frequentius fit. Quales cum in Angliam veniunt, indigenarum etiam animos magis turbant: ut ista Zelotarum utriusque gentis commercia concordiam Ecclesiæ Anglicanæ reddant difficiliorem. Quam falsum autem sit, quod Reverendissimum D. Archiepiscopum Cantuariensem aiunt cogitare de Papatu reducendo, si non aliunde mihi satis constaret, vel inde conjecturam planissimam caperem, quod me tum per alios, tum literis etiam suis, hortari non desinit, ut breviter Baronianos Annales refellam, Regique operam hanc nostram dicem. Vix etiam semestre est, quod Sacellanus Regius, coram Rege, & Archiepiscopo, in concione dixit,

dixerit, eo anno, ac mense, ac propemodum die, centesimum annum expirare, ex quo Henricus VIII. Papatum omnem ex Anglia penitus ejecerit: ac votum idem Sacellanus addebat, ut ne unquam, vel sub Rege Carolo, vel prole ejus reduceretur. Quod apertis favoris indicibus Rex, & Archiepiscopus mox approbarint, universa Ecclesia acclamante, *Amen*. De Assine Junio multum gaudeo, quod tanti eum facias, ut operam ejus potissimum exoptes: scio quantum hoc ei incrementum in sacris, & civilibus studiis afferre possit. Sed qua conditione apud Illustrissimum Arundelium vivat, dicere non habeo, uti nec illud, an ad certum annorum spatium, se familiæ illi obstrinxerit. Existimo me citius super eo aliquid rescripturum, quam existimes. Est apud nos juvenis annorum XXVIII. nomine Justus Ruewaert, filius optimi doctissimique Theophili Ruewaert, Ecclesiastæ Remonstrantium, & ante schisma, & nunc quoque apud Britannos. Is Gallias cogitat, spe illa, quod nobilis alicujus liberis præfici honesta conditione possit. Latine non modo, sed Græcè etiam doctissimus est, ac ea lingua versus etiam edidit complures. Intelligo & moliri editionem Epigrammatum Græcorum, quæ fecit. Valdè ob hanc peritiam, æstimari à Cunnæo, & Heinsio solet; ut de aliis taceam. Non dubitarem eum tibi commendare, si mores mihi perspectiores forent. Disparis de eo Remonstrantium ipsorum opiniones sunt. Corvinus, & moderatiorum alii amant; ac à judicio, & probitate laudant. Alii culpant, tanquam non satis siccum. Excusant amantes, eo quod nihil mirum in juvene sit, si lassus diurno labore (nam apud Wytirium, egregium mercatorem, & liberis ejus à studiis fuit, & præfuit codici accepti, & expensi) circa vesperum horula interdum cum amico frontem exporrigat: quod cum domi suæ facere non possit, in diversorio fieri necessum esse. Raros Lugduni, etiam melioris notæ, aliter vivere. Quodammodo amasse etiam ex Catonis magis, quam B. Pauli præscripto aiebat ei inimicissimus secta Contraremonstrans. Sed constanter id pernegant amiciores: vel saltem rident nugas, quod in ingenio optimo, ita minutatim omnia ad vivum resercentur. Quorsum ista, inquires, ad me tam multis? nempe ne quem sic commendem, ut non vera, falsaque scias. Tum autem ut videas, an privatim etiam utilis esse possit. Credo, homo est, & adolescens, sed excitato ingenio, & qui si volet, (ut velle puto) altius assurgere possit, quam vulgares animæ solent. Si forte ad te literæ per ipsum dandæ, non apertè omnia scribere li-

ceat, quia experientia comperi, literas ab adolescentibus in suo negotio referari solere, priusquam tradant. Et hæc cum scribam, tamen amo juvenem ob dotes egregias. Tantum nescio, in ambiguis illis, vel discrepantibus amicorum pariter ac inimicorum judiciis, quid credere debeam. Mei interim officii erat, nihil te celare. Jam nunc enim de eo compellari incipio, ut commendem tibi, non quo utaris ipse opera ejus, (nihil enim illis de eo cogitationis) sed ut, si possis, commendes alteri. quandoquidem hic exigua spes emergendi. Nec paternæ facultates illæ, ut succo suo vivere possit. Sophompanæ xx. Exemplaria fratri tuo tradidit Blauwius, decem melioris, totidem vulgaris chartæ. Cætera ad te utriusque chartæ mittit; sed plura missis, si voles, à Bibliopola accipies. Nam si benè Blauwium novi, non is est, qui ad exemplaria paucula attendat. Ipse ex duodecim exemplaribus, quæ mihi pro opera debet, in Angliam aliqua mittam: uti Junio, Casaubono, aliis; ante omnes Reverendissimo & Illustrissimo D. Archiepiscopo. Quod tantus egregium animi foetum nomini meo dicaris, & antea multum solatii attulit filium lugenti, & nunc magnitudinem beneficii hujus cogitanti, summam adfert voluptatem. Quare quod antea etiam feci, iterum, iterumque meo, & meorum nomine nunc facio; gratiasque agimus, quas possumus, quia debere plurimum omnes proitemur. Mitto melioris chartæ exemplaria duo librorum de arte Grammatica: unum tibi, vel filio potius; alterum ei cui voles, hoc est alicui non planè tetricum hoc, & quodammodo puerile studium aspernanti, seu is Rigaltius, seu Puteanus, seu alius erit. Si tertium, affectus testandi, cuiquam dandum putes, quamprimum mittam: vel à Bibliopola Parisiensi, cui exemplaria Blauwius mittit, per famulorum aliquem petendum. Facile inter me & Blauwium conveniet. Miserat fratrum Puteanorum alter ad Salmasium literas Lugdunensium, quibus socer meus Junius Heidelbergæ, in Lugdunensium Academiæ vocabatur; miserat autem ut mihi darentur. Pro quo affectu summi viri, & per Salmasium gratias egi, & nunc quoque id facio, & occasionem opto grati animi comprobandi. Claudam eo literas hæc, quod filius Petrus, probitate vitæ, mihi, Corvino, & aliis satisfaciât, nec industriam, quandoquidem mediocris ea, magnopere desideremus. Ut sic pergat, vel potius se vincat, fortasse etiam hortatus nostri, sed paterni præcipuè efficient. In me, quod curam ejus respiciat, non patiar aliquid requiri. Ego, uxor, liberi, te, Conjugem, & tuos plurimum

mum salutamus, Deumque rogamus, ut te, Illustrissime Domine, Sueciæ, & orbis Christiani bono, diutissime incolumem conservet.

*Amstelodami
clō Idc xxxv.
Idibus Maiis.*

Illustrissimi nominis tui cultor,

G. J. Vossius.

CCLIX.

Francisco Junio, Ger. Jo. Vossius S. P.

TAndem, mi Affinis, silentium rumpo, atque ad officium redeo. Occasionem scribendi præbet Illustrissimus Comes de Leshno, juvenis eruditus, & Doctorum æstimator. Qui cum aliquid literarum à me posceret, ad amicos meos in Anglia, scribendum putavi Cantabrigiam ad Doct. Beale Præfectum Collegii Joannis; & Doctorem Martiæ, Collegii Reginalis præsidem: Oxonium autem ad Doctorem Fruen, Collegii Magdalenensis caput, & Joannem Rouse, Bibliothecæ Bodleianæ Præfectum. Nempe sic Illustrissimus Comes arbitrabatur, facilius se innotescere posse summis his, & per eos, aliis egregiis Angliæ viris, si mea quoque commendatio accessisset. Quare si qua in re, ei opera quoque tua utilis esse possit, defugere non debes. Juvenis est in magnam spem natus. Parentem habet Illustrissimum, Polonii regni Palatinum, magnum Columnen Ecclesiarum reformatarum iis terris: sanè non minoris à nostris fit in Polonia, quam magnus ille Razevilus in Lithuania. Horum enim erga Ecclesiam merita præ omnibus prædicantur. Etiam idem ille Heros Serenissimo Regi nostro Carolo per literas est notus, ac vicissim literis quoque Rex suum erga eum affectum, abundè testatum fecit. Hæc eo lubentius perscripsi qui Barones Stupeskii de Conari, quos scis sesquiannum mecum vixisse Lugduni, ex eadem familia sunt; ut decus tantæ domus non possit non mihi perspectissimum esse. Qui ei à studiis est, Joannes Jonstonus, juvenis est pereruditus, ac admodum probus, & his diebus in Doctorum Medicinæ numerum cooptatus à Lugdunensibus nostris. De filii mei Dionysii discessu ad superos, nihil possum scribere. Tantus me dolor premit, quoties cogito; amisi plusquam dicere possum. Deum immortalem! quanto ille intervallo Patrem post se relicturus erat! quippe qui jam nunc in non uno longè superat. Accedebat tanta probitas, ut ego hac ætate, non ausim mihi

eam tribuere. Sed sic visum Deo, qui unus novit, quid illi, quid mihi, quid familiæ toti, maxime expedierit. Hoc me solor, optime Adfinis, teque salvere jubeo. Quod & facit conjux, & tota domus nostra.

*Amstelodami raptim,
Post. Id. Maias
clō clō xxxv.*

CCLX.

Claudio Salmasio S. P.

TAndem, maxime vir, ad te mitto, quæ, paucis exceptis, olim observavi in antiquis ac recentibus artis Grammaticæ scriptoribus. Gaudeo me equidem defunctum molestissimo labore in argumento adeo tetrico & in speciem puerili. In quali me omnem deinceps quoque ætatem consumere optent malevoli. Me vero solatur quod qualis qualis materies sit, non inamœne vel incuriose eam tractarim, modo formam operis cum priorum opera lubeat conferre. Et nisi pertæsum fuisset diuturnioris moræ in hujusmodi, ut creditur, minutiis, longe pulchriora essent interspersa. Sed Catone hoc nunc contenta sit adolescentia, & quod est scholarum, quarum præfectis consulere volumus. Grotii eximii Sophompaneam credo, vel jam acceperis, vel paucissimis diebus accipies à fratre ejus Guilhelmo Grotio Hagenfi Jurisconsulto. Sin is cessarit, non committam ipse ut diutius frauderis. Maximè mihi voluptati fuit, quod intelligerem bonis omnibus laudatissimum virum non ab Illustrissimo Oxensternio modo sed à Regno Suecico missum ad Regem Christianissimum, ac ab eo & Regni proceribus honorifice adeo exceptum. Deus tantummodo faxit ut perpetuum gaudium gaudeamus. Quod erit, si Galliæ satis cordi erit Germaniæ status, & Deus consilia Regis fortunarij. Ab Affine Junio tandem literas accepi Kalendis Aprilis exaratas. Vellem transmisisset, quæ petieramus. Verba ejus ex Epistolâ excscribi jussi, ut quid rei sit, certius intelligas. Sed fortasse interea, vel Patricius Junius vel Seldenus promissis steterint. Si quid cognoro ex literis proximis, statim perscribam. Scire aveo quando speres commentarios tuos rei vestiariæ posse Typographo tradi, item quid de Arnobio statueris. Blauwius noster post menses duos auspiciabitur editionem operum omnium Meursii quorum magna pars hæcenus *avindit*. cætera meliora erunt vel auctiora. Salve plurimum à me

à me, uxor ab uxore, imo uterque salvere à nobis omnibus, & una vobiscum D. Elichmannus.

Amstelodami,
c1o 10c xxxv.
viii. Kal. Jun.

Tuus omni officio,

G. J. Vossius.

CCLXI.

Joanni Meursio S. P.

CRetensia tua, optime maximeque Meursi, accepi, mihi quidem per jucundum fuit videre, opus longe eruditissimum amicissimi viri multoque etiam gratius credo futurum Arlandervenix Domino. Nunc ab urbe abest: sed simulac redierit faciam quod mei muneris est. Jam video, quid me scribere porro velis. Nempe quid promoverint in editione tuarum Amstelodamenses nostri. Referre piget pudetque. Dic ingenue inquires. Quid dicam, amicissime vir? Nondum auspicati. Etli mansuetum & lenem animum tuum jam à multis annis perspexi, tamen scio commoveris. Et profecto mihi idem usu veniret. Causam quæris. Dicam ego non unam. Primum est illa, quod Johannes Blauwius J. C. in quem unum hætenus onus omne recubuit, uxorem Goudæ duxit honestam, opulentam. Eapropter plusculis mensibus omnia frigide satis hic acta. Nunc demum is pedem hic figere statuit. Cur dices non quamprimum saltem inchoant? Alius diceret solatioli causa id fieri. Sed eludere aliquem à moribus meis nimium quantum abhorret. Quare sic habe. Parens Guilielmus est senex, qui derivare statuit Typographii laborem in liberos justæ ætatis. Qualis Jurisconsultus ille quem dixi, & alter, qui exterarum terras hætenus lustrat, & jam ex Italia redux in Britanniam venit, unde ad nos rediturus, non quidem intra duos, tres dies, ne te fallam, sed menses circiter duos. Credo horum partiaria omnis deinceps, ut impensa, ita cura erit. Cernis, ut ista prævideri non potuerint, cum primum ad te scriberetur. Eo facilius condonabis. Ac summum hoc sit ex infortuniis tuis. Ex animo meo tuum æstimo: itaque scire voles intra quod temporis spatium absolvi cuncta possint. Nondum potui certi aliquid resciscere, quia ne Blauwii satis magnitudo & multitudo operum tuorum perspecta. Sed hoc pro certo mihi asseveratum ab iis, velle eos, binis uti typothetis, binis prælis, ut omnia opinione celerius peragantur, & quod ne-

glectum mora diuturna, id eo pacto compensetur. Mihi quidem qui eos viros bonos novi, plane persuaserunt. Sed occasione primâ ex me plenius certiusque de singulis cognosces. Urgebo haut aliter ac si mea res ageretur. Ac ne censeas quas causas commemoravi uni tibi obfuisse, scias easdem obstetisse cur Filii mei Dionysii Maimonides non viderit lucem. Nam non ante eum aggrediemur quam ubi Frater Jurisconsulti redierit. Multum autem assidua duorum typothetarum opera promoveri, & tu satis scis, & nos hic experimur in Historia Comitum Hollandiæ quam Filius meus Matthæus non sine genio, & quod majus, summa fide conscripsit. Mittam simulac opus erat absolutum. Nunc habe meos de re Grammatica libros de quibus me aliquando, cum Collegæ essemus colloqui memini. Tandem lucem vident nescio quo honore meo, scio adolescentiæ & scholarum bono. Addo & Sophompaneam maximi & tui amantissimi Hugonis Grotii. Quod eo facio lubentius, quia mihi operam hanc suam consecravit. Certus sum multum voluptatis tibi attulisse, quod homo Batavus suis ante neglectus, nullo merito suo, nunc Deo propitio ad illud fastigii decus sit evectus, ut legatus sit Regni Suecici ad Christianissimum Regem, à quo etiam honorifice admodum est exceptus. Filiam juniorem magni ingenii Puellam amisit simulac Lutetiam venit. Morbum ex hiberno itinere contraxerat. Audio nec alteram satis commodè valere. Quis Reip. nostræ status deinceps sit futurus difficile est dicere. Fœdus initum cum Gallo, quod Deus utinam fortunet. Multorum enim metus, ne minus sit salutare futurum his terris. Causas quid dicam? Non omnia literis committi possunt. Sane non dubium quin eo offenderimus Britannum. Quamquam de eo & aliæ offensæ sint causæ. Strenue rem gestimus in Flandriâ, unde magna cum clade à Philippino propugnaculo rejectus Hispanus. Galli quoque ab eodem juxta Hujam insignem victoriam reportarunt. Omnino Cardinali ut vocant Instanti infelicitè initia hæc procedunt. Sed an ut gaudendum nobis quod prælo superior sit Gallus, ita oprandum sit eundem bello vincere difficile dictu esset. Plane verendum ne tam potentis vicini aliquando pœniteat. Nam quid æque nobis adversum Hispanum commodavit quam ejus longinquitas? Sed hæc curæ erunt numini supremo. Burgerfdicius post longum morbum Lugduni exceilit. Uti & aliquanto ante Socer ejus Verbonius. Etiam Heinsius uxorem amisit, de quo, absque dubio, jam aliunde intellexeris, & fortasse ex meipso, nec enim satis memini: Nam annus & amplius multo est quod excess-

fit. Salmasius necdum Leidæ aliquid in lucem divulgavit : sed meliori utitur valetudine quam antehac. Barlæi uxor graviter ægrotat, nec extra periculum est. Mea infirma ut solet, sic tamen ut par videatur rei familiari. Honartius Senator & Consul urbis nostræ Bickerus, legati in Poloniam missi, cum Frisio Senatore, qui Franekeræ quondam juris professor fuit. Nempe hoc fine ut dispiciant num inter Suecum est Polonum pacis negotium transigi possit. Adrianus Pauwius advocatus Hollandiæ & legatus fœderatæ Belgicæ in Galliam hæret istic hætenus sed invitatus, quia ut scribit, negotium totum, cujus causa missus erat, confecit. Multum sollicitat per literas ut redire liceat. Sed nihil hætenus efficere tot literis vel precibus potuit. Causam melius illustrissimus Princeps quam procerum multi intelligat. Simon Beaumontius qui ante in generalium Ordinum confesso locum suum tuebatur, nunc Syndicus est urbis Roterdamenfis. Tamdiu cessarunt Roterdamenses novum Syndicum in Hug. Grotii locum creare, quamdiu is operam suam extero Principi nondum addixisset. In causa est quod conditione istac Grotius Syndici munus hoc susceperat, ut ne illi possent repudiare cum vellent. Itaque existimat stipendium sibi vetus deberi usque dum legatus à Sueciæ Regno constitutus. Et multorum ea opinio (si dicendum quod res est) plane hoc debent, præsertim cum nihil egisse, nisi ex senatus præscripto fateantur. Sed tempus abrumpendi tandem hanc scriptionem. Uxor uxorem, Filia Filiam, imo omnis familia mea omnem tuam salutat. Salutem etiam Cll. Viris Stephano & Laurenbergio dices.

Amstelodami,
c1o lxx xxxv.
vii. Kal. Jun.
St. Nov.

CCLXII.

Axelio Oxensternio *Cancellario Regni*
Suecici S. P. Hamburgum.

AB discessu tuo, Illustrissime Dom. Cancellarie, plurimus inter urbis hujus Proceres sermo fuit, de maximis virtutibus tuis; quibus præcipuè attribuunt omnes, quicquid post Serenissimi Regis excessum, pro libertate Germaniæ, foeliciter gestum fuit. Ac licet priusquam pedem in fœdera hac Belgica posuisses, jam omnia laudibus tuis

foelicissimè personarunt; tantum tamen abest, ut quod multis usu venit, præsentia quicquam de iis detriverit, ut decus ejus multis partibus auxeris. Quod non scriberem, nisi Amplissimos Consules, aliosque hujus, & aliarum urbium Proceres, uno id ore, dicentes, ipse audiissem. Quodque præsens facile animadvertisti, id postmodo, uberius vidi, quam gratam rem feceris, & ipsis, & cunctis bonæ mentis amantibus, eximium illud beneficium conferendo, in summum virum Hugonem Grotium: in quo nescio plus ne amem eximiam pietatem, atque ut erectam, ita suavissimam indolem; an verò magis mirer divinum ingenium, & incomparabilem doctrinam. Non equidem diffiteor, superesse aliquos, qui aliud malint, sed ferè, qui vel vehementer læserint, vel metuant, ne tantus suis obstruat luminibus. Hæc coram etiam me attingere commemini. Nunc ea, argumentum literarum esse volui, cuncte ad te, Illustrissime Domine, generoso Barone, Jo. Skytte juniore, juvene ob egregias animi dotes, mihi percaro, & quem, tanto majoris scio facies, quod excellentiæ tuæ, ut alterius parentis, observantissimus sit cultor. Pluraque de eo dicerem, nisi id putidius fortasse videretur, ipso literas deferente. Ecquid etiam addam de opere nostro Grammatico, quo censuram exerceo in veteres ac recentes ejus artis scriptores? Misi hoc in Texeliam, & credo, jam acceperis. Non stultè adeo sapio, ut existimem, cum, ut cœlum Atlas dicitur sustinere, sic res Suecicas, & Germanicas, si non unus, at longè tamen præ cæteris sustineas; illis sepositis debere tantum Heroa pauxillum temporis puerili studio impendere. Longè aliò spectavi. Nempe ut opus hoc à manu tanti literarum Patroni, tantique literatorum Mecænatis, facilius, & foelicius deveniat ad eos, qui pueritiæ, & adolescentiæ studiis in Suecia præfunt. Spero, cum aliquando omnia magis erunt liquida, ac serena, quæ ad regni salutem pertinent, hanc quoque, nec ipsis regibus indignam curam suscipi à te posse, ut ne diutius tot supervacanea, tot falsa, vel incerta, prima illa, & optima ætas discere cogatur. Equidem hoc nomine, sæpè non doctoribus minus succenseo, quàm discen- tium miseret me. Paulò ista familiarius scripsi, quam fortasse meæ sortis homini, ad tantum Heroa conveniret. Sed divina, quam præsens comperi, in tanto fastigio humanitas aliquanto me audaciorem fecit. De publicis nihil addo, quæ spero ex aliis, & in his à Blomartio nostro cognosces.

Deum Opt. Max. oro, ut prudentiæ ac fortitudinis spiritu, porro excellens nomen
tuum

taura, ornet, Sueciæ, Germaniæque, ac nostræ etiam Belgicæ, bono publico.

*Amstelodami cło Ioc xxxv.
Prid. Id. Jun. Festinantius
aliquantò quam vellem, sed
properatus Domini Baro-
nis abitus ita cogebat.*

*Illustrissimi, & Ex-
cellentissimi nominis
tui cultor æternum
devotissimus,*

G. J. Vossius.

CCLXIII.

Hugoni Grotio S. P. Lutetiam Paris.

QUO tempore, illustrissime Domine, literæ meæ Affini Junio reddebantur, jam itineri cum Dom. Comite accinctus, vix pauca ad me unum potuit exarare. Profite- tur multum se tibi debere pro tanto affectu, nec si ante annos aliquos, ea conditio esset oblata, alteram fuisse prælaturam. Nunc ita se Arundelianæ domui obstrictum, ut bona cum gratia nequeat discedere. Præ- rea jam isti se vitæ generi adfuevisse: fore etiam ut interrumpatur utile propositum, de picturis Veterum, sepulturisque explican- dis: quod in gratiam serenissimi Regis, & Illustrissimi Comitissæ sui jamdiu suscepit. Jam tres ad me libros transmisit, eruditos sanè, plurimæque lectionis; quos Blauvius noster edere cogitat. Sequentur postea alii, non tam de arte, quam de artificibus ipsis. Credo pictorum, sculptorumque illustrum, ab omni ævo indicem velle texere: sed eum ad modum, quo actum mihi de Historicis Græ- cis, ac Latinis, Giraldo, de Poetis. In hoc opere adhuc distinetur. Vellem filius tibi, aut gener, vel cognatione junctus ali- quis, tam pulchra in opera posset commo- dare: Quomodo Hagæ Ill. Camerarius ge- nerum à secretis habet. Sed ejus, qualem deposcis, non paulò latius se cura diffunde- ret, quia non Regni solum Suecici negotia, vel etiam privata, respicit; sed etiam quo- modo studiis, sacris pariter humanisque, quam optimè merearis de orbe Christiano atque erudito. Sed dum idoneus tibi ad ista quæritur, fortassis non aspernanda sit opera Ricwaertii, de quo superioribus literis scri- bebam. Sagaci ingenio est, ac Latinis, Græ- cisque literis instructus. Ætas etiam quæ ju- dicium adferat: namque duodetrigesimum excessit. Considerem si sub tuis agat oculis, remissurum de vitæ genere laxiori paulo, quam ædibus tuis conveniret. Sed super eo cum nemine hic loqui volui. Solum à Cor- vino, & aliis deposcitur, ut ne eum in Gal-

lias ire patiar, sine commendatitiis ad te meis. In quo me amico homini difficilem non præ- stabo. Utcumque enim fortasse aliquid sit, quod in hoc juvene culpari mereatur, si ta- men is esse deinceps volet, quem speramus; magnum sibi, & pulchrum nomen parare possit. Nescio an superioribus ad te literis scripserim, de Amplissimo Guilhelmo Noom- sio Arlanderveniæ Domino, persistere eum in proposito, de acquirenda in Galliis eque- stri dignitate. Jam ante annos aliquos, pri- usquam in patriam redires, egi de eo tecum per literas. Nunc poscit, ut negotium hoc, iterum commendem. Malle tibi, quam al- teri se debere. De pretio memini jam annis superioribus, dedisse alteri in mandatis, ne quid moram adferret. Forte erit, quod paulo averfior te, vel uxorem reddiderit. Scio, quid dicatur. Sed mihi Historia omnis notior, quam alteri: quippe qui utrimque utilem sanando malo operam navarim. Sed parum tutum est omnia literis committere. Solum dixero, multis partibus minus in hoc culpæ esse, quam aliquis rei gestæ totius ne- scius existimaret. Sed de isto satis. Tu, scio, & illi, & familiæ tui amantissimæ, hanc ope- ram non denegabis. De filii tui Petri Grotii animo, super profectioe in Indias, jam diu mihi constitit, ex liberis meis, & iis apud quos habitat. Ante sesquiannum quidem non abhorrebat; eoque diligentius studiis operam dabat, quæ ad illud vitæ genus con- ducunt. Nutare autem visus, ex quo hic sparsa quædam, de meliori forte, quæ fami- liam maneret. Ubi autem certus nuntius de summa retulit dignitate tua, planè cogi- tationem istam abjicere visus est. Nec leviter eum firmavit, quod cum in urbe hac Illu- strissimus Dominus Cancellarius pedem po- fuisset, benigno admodum sermone sit ex- ceptus; in tantum ut quo magis ad studia, virtutemque accenderet, sponte filio promi- ferit, velle se cogitationem quoque suscipere ejus promovendi. Volui & ipse filii tui ani- mum tentare, atque adeo, si non prorsus ef- set alienus, magis ad iter accendere. Sed frustra me fore statim perspexi, & jam du- dum sese aiebat, ad parentem perscripisse. Imo si candide me velis scribere, quod cen- seo, (velle te scio) prope omnium qui hic sumus, judicium est, si nimium à Matre, vel maternis amicis urgeatur, sic interpretatu- rum, quasi ob corporis vitium minoris cen- seatur, longèque relegetur ad Garamantas, vel Indos. Novi ego commodo filii maxime studeri. Sed non hæc ætas statim capit: nec desunt, qui ubi intelligunt parentum pro- positum, longe aliter apud eum interpreten- tur; præsertim ex adolescentibus. Scis mo-
ribus

ribus Batavis satis esse insolens, ut quis eo mittatur, nisi qui minus se vita probet. In tuo negant quicquam requiri, quod præstare ipse possit. Invisit hac Hebdomade me Realius, is qui præfuit nostris in India. Cumque de filio tuo mentio incidisset, dubitare se multum aiebat, annon eadem quæ hic, magis etiam obstare filio in Indiis possent, quàm itinerum mari terraque difficultatem spectemus, quàm auctoritatem apud inconditos illos homines, vix homines. Spero jam ante mensẽ, & amplius, acceperis Sophompaneam; uti & opus nostrum Grammaticum. Intelligo hic ex Amstelodamentibus nostris esse, qui ignari idem esse propositum filio tuo Petro, toti sunt in Sophompanea, Belgicis Rhythmis reddendo. Ita mihi retulit Moitardus Reip. huic à secretis. Realio, quem his diebus adfuisse dixi, valde commendavi negotium Galilæi de Galilæis. Nec facile dixerim, quantoperẽ optet, ut non alibi pedem figat. Aiebat se manibus pedibusque operam daturum: Et idem ut agerem volebat. Tamen de successu nihil audebat spondere. Hortensius mirè exoptat hoc ipsum, atque unà senior Blauwius, ut alios taceam. Facilius esset negotium, nisi tam multi ex iis, qui clavum tenent, pecunias majoris facerent, quam doctrinam, & urbis gloriam. Quod ipsum mihi etiam visus sum cognoscere, ex consulis Flamini relatu. Nam & eum conveni: nec deero deinceps aliis compellendis, qui aliquid, & possint, & velint. Leonis Allatii de Pfellis, & eorum scriptis diatribam vidi, & legi, & doctrinam viri æstimo, ac jam locutus sum cum Blauwio seniore, de ejus scriptis hic divulgandis. Nec abnuitt: sed exspectat reditum filii Jurisconsulti, qui jam duos propè menses Goudæ est, cum uxore. Absque ejus amoribus fuisset, non Sophompaneas tuus, tam spissum fuisset negotium, ut eo tardius scriberem, quia alieno me nomine puderet. Nihil in Blauwiis ita displicet, quam quod tam multa recipiant in se, & adeo tarde promissa exsolvant. Corvino cujus mensa fruitur filius, si vel tribus verbis responderis, vel saltem literis meis salutem adscripseris, ut ostendere valeam, de affectu veteri, nihil decessisse ex eo, quod filium tuum juris scientia imbuere studuerit, rem facies, & illi, & conjugii ejus pergratum. Facile omnes suspitioni indulgemus. Mihi quidem nec feritur, nec metitur. Sed scis quid velim. Et facile vides, sic vel hoc, vel illud agendum, ut sponte istud à te profectum esse videatur. Alia quoque veniunt in mentem, sed tertiam cum paginam implem, cætera literis alteris refero. Deus Opt. Max. te, Illustrissime Domine, cum familia

tota, diu Christiani orbis bono, & Reip. literariæ conservet.

*Amstelodami,
cl. loc xxxv.
Kal. Quintil.*

*Illustrissimi nominis tui
Cultor,*

G. J. Vossius.

CCLXIV.

Illustrissimo viro Hugoni Grotio, Gerardus Vossius S. P.

ANTE dies paucos accessit me Optimus, & Doctissimus vir Theophilus Ricwaert, partim, ut de more inviseret, partim etiam rogatum ut aliquid ad te literularum, in gratiam filii sui Justii, qui has ad te defert, exarare vellem. Facio vero id, ac lubens, præsertim quando idem à me possunt Barlæus, Corvinus, Hasius, quem jam ante annos viginti, ex Eglißemiano certamine cognitum tibi arbitror. Est Justus hic juvenis, ingenio valens, ac eruditus, quemque tres isti, quos proximè dixi, etiam à vita & moribus mihi commendant, & adversus obrectatores, quibus nunquam humana caret vita, magno affectu tueantur. Laudat quoque hac parte filius meus Matthæus, cui non ita magna, aliqua tamen cum eo familiaritas fuit: uti & filio tuo Petro, occasione ea quod uterque juris scientia à Corvino imbueretur. Sanè dignissimum arbitror, cujus ratio habeatur, siue ejus opera utilis tibi esse potuerit, siue alium istic noris, cujus liberis erudiendis præfici possit. Volupe fuit ex Lomelio, Pavoni à secretis, nudius tertius cognoscere de valetudine tua tuorumque; præsertim post vulnus nuper familiæ intlictum tuæ, quod primo animum valde perculit, ut omnium tui amantium, ita maximè Petri tui, sic ut aliquot diebus, nunc cibo abstineret, nunc vix tangeret: mentionem verò carissimæ Mariæ etiam postea non nisi lacrymans audiret. Omnino amore magno hi duo se mutuo complectebantur. Advocando, & alloquio, deterimus mœrorem, ut potuimus, memores quæ nobis præstitisses literis non unis, nec solis, sed Sophompanea comitatis, in maximo luctu nostro. Sed dicere etiam non possum, quantum solatii attulerint filio tuo, quas literas scripseras ad parentem, fortes profecto: partem enim earum & se exscriptam, mihi quoque filius ostendit. Hactenus filius tuus usus Corvini convictu; sed conqueritur hospes ejus, se angustius

angustius habitare, alia etiam præterdit, præsertim de valetudine majoris filię. Si ibi minus benè possit, ut aliis in ædibus benè filio sit, à Patruo curabitur, ac lubens in societatem hujus curæ veniam. Bina operis nostri Grammatici exemplaria, jam diu spero acceperis, uti & à Blauwio Sophompaneam, & geminas exinde à nobis literas, quibus inter alia de Junio nostro, Galilæo de Galilæis, & Leone Allatio, respondi: de duobus his plenius aliquid, brevi ut spero scripturus. De publicis rebus nihil addo, quia non dubito, quin aliunde, melius certiusque ea intelligas. Salutant te plurimum uxor, ac liberi, ac mecum etiam Heroïnam conjugem, ac familiam universam.

Amstelodami xvi. Kal. Sextiles,
Anni cō Idc xxxv.

CCLXV.

Justo Cæciliano Puteano Erycii F. S. P.
Lovanium.

Magnæ voluptati mihi filioque est, semperque erit, recordatio tui, Amplissime Doctissimeque Puteane; uxori item, filięque meæ, non minus jucunda est memoria suavissimæ & cordatissimæ fororis tuæ, in quam, si ita fas loqui, Dii singuli videntur contulisse quod pulcherrimum haberent. Utinam verò, sic res vestræ tulissent, ut utriusque præsentia diutius frui licuisset. Gaudio interea quod Parentes, & omnes vestros reperitis salvos. Scis quam me, & meos, cura hæc coxerit, quandocunque pericula cogitarem, quæ nunc læti evaluisti. Medicæ Historia valdè capior, tum doni causâ, tum argumenti & scriptoris. Dignus sanè fœtus Parente tuo, suoque, nec Medicæ solum Heroibus gratus, sed orbi universo. Nec venio *ad hæc*; qui *amissum* mitto, impar magis authore; quam dissimile argumento. Historiam pro historia, sed Vossianam pro Puteana. Spero tamen non displicituram, vel propter Batavos Veteres, quorum virtutem hi nostri æmulentur velim. Et faciunt profectò, utcumque hujus anni gesta placere non possint. Sanè Tenensium cladem dolemus. Crûdelitatem in urbe exercitam, non Brabant magis detestantur, quam Batavi. Utinam Præfectus urbis tempori impotentes Gallorum mores cogitasset. Nec tamen istud satis, vel Gallos excusat, vel si qui è Belgis Fœderatis, fœdum exemplum sint secuti. Scio quàm Deus talia soleat vindicare.

Unde statuere potes, quid de edito Epigrammate Parentis tui censeam. Imperatori tamen nostro, qui furorem militum sistere non potuit, optimè & volo, & velle semper debeo, tum ipsius causâ, tum quia in eadem navi navigo. Alterius Epigrammatis, quis Author sit, non adscriperas. Sed quisquis ille, & venustate sua, & novitate rei, quam refert, me delectavit. Salutem plurimam summo Parenti tuo dicito, meo nomine. Etiam te, fororemque salute impertiunt omnes mei.

Amstelodami,
cō Idc xxxv.
ix. Kal. Aug.

Tuæ universæ familiæ amici summus,

G. J. Vossius.

CCLXVI.

Guilielmo Archiepiscopo Cantuariensi.

Reverendissime in Christo Pater, Dom. Illustris.

Quanto plura majoraque esse negotia tua omnes agnoscimus, tanto majori me gaudio implevit conspectus literarum tuarum, quibus humanissime, ac pro occupationum mole, qua premeris & tantum non opprimeris, ubertim etiam, ac singulis quidem Epistolis meis respondes: unis exceptis, quas famulitii incuriâ intercidisse prædicant mihi illi ipsi quibus dederam; Sunt ii Barones Scytii, liberi Illustrissimi Legati Suecici, quorum unus ante sexennium, duo superioribus mensibus à serenissimo Magnæ Britannię Rege equestri dignitate ornati sunt. Sed si perditâ Epistola nostra, bene est quod nihil continuerit, nisi quæ ab omnibus legi possent. Ex ornatissimi Delli, qui dignitati tuæ illustrissimæ à Secretis, literis intelligo, opus nostrum Grammaticum tam felix fuisse, ut de manu tanta in tanti Principis manum traderetur: quod sine dubio grati animi testificationem nostram gratiorem reddidit in tot Regnorum spem crescendi. Præterea ex Epistola Clarissimi Richardi Sterne certior factus sum, ut inter gravissima Ecclesiæ, Regni que negotia, res Cantabrigienses homulli, filii dico mei, curæ tibi ferio fuerit, & quantum hoc mihi commodarit. Quid aliud faciam, quam ut quas possum gratias agam ingenuèque agnoscam in me immerentem tot indies pene beneficia cura tua paternâ conferri, ut post Deum immortalem plus debeam nemini. Tanto justius sic cuncta mea studia compono, ut imprimis sic de merito probentur: Ac hoc tempore quidem bonam

bonam sibi partem ejus vir dīcat Chronologia sacra, in qua dicere vix possum quanto-
pere à summis etiam viris sit aberratum. Operæ ejus non multum adeo refiat : quam
deinde alia consequentur. Filius Joannes
Indias petiit, advocati fīscalis dignitate or-
natus. Spero se hoc munere dignum, dig-
num etiam familiā geret. Non alia facili-
or ratio est rem faciendi honestè : sed sub terris
vix alia quoque corporibus umbræ adfueris
periculi plenior. Domino confidam, cujus
est terra & plenitudo ejus. Si scisset filius
uti affectu illustrissimī nominis tui, & tot
Magnæ Britanniæ bonis ; longè melius con-
sulisset sibi, & minus damni familiæ dedis-
set. Sed si frugi porro erit, facile vetera ista
condonabuntur. Huc usque literas perduxer-
am, nec ultra scribendo avocare fas puta-
bam, cum ad me veniunt homines honestis-
simi ; unus etiam, ut opibus florentissimus,
sic literis ornatissimus. Hi mecum sermo-
nem serere hujuscemodi : Nostemne Scipio-
nem Gentilem Norimbergensis Reip. apud
Altorfinos ante aliquot annos professorem
Juris : nostemne item fratrem ejus Alberi-
cum Gentilem, qui Oxonii Professor fuit,
filium etiam in Collegio Joannis ibidem ha-
buit. Annui, meque sedulo scripta utriusque
legisse dixi, nec sine fructu. Illi tum subi-
cere, esse quiddam, quod me postularent pro
Scipionis filio ; nempe scire me quæ facies
esset Palatinatus patriæ meæ. Hic Scipionis
viduam ingentia à Cæsariis damna perpeffam,
itaque quæ filiam præterea haberet, non esse
idoneam filio in studiis porro educando. Op-
tare se ut in Angliæ Collegio aliquo apud
Cantabrigienses, vel Oxonienses, ubi pa-
trui fuisset Professor, vivere daretur. Ado-
lescentem esse boni ingenii, indolis optimæ,
& eos in studiis progressus fecisse, ut Scholas
Clāssicas, quas triviales vocant, emensus, jam
aptus publicis Academiæ auditionibus videat-
ur. Obnixè igitur rogarunt, ut hoc votum
suum ad te, Illustrissime Domine, perscribere,
& negotium verbis tribus commendare ve-
lim. Dixi non audere me toties literis in ea
rerum mole distento obstrepere. Sed cum
miriticè urgerent, modestiæ meæ non fuit
diutius adversari in re tam honesta. Pul-
chrum ac prope divinum est benefacere affli-
ctis, præsertim qui opem postulant. Et fa-
cile commoveor erga eorum liberos, qui be-
ne meriti de studiis : Quales Scipio & Al-
bericus Gentiles. Quam multa enim par-
tim ad bonas literas, partim ad Jus Civile
ac Canonicum pertinentia bono publico divul-
gārint, satis testatur facit Bibliotheca Bod-
leiana, in cujus Catalogo eorum libri non
indiligenter recensentur. Scio in his Ger-

maniæ rebus magnam esse ejusmodi petito-
rum copiam. Sed fortasse huic adolescenti
proderit habuisse patrum professorem apud
Oxonienfes tuos. Præsertim quandecumque
is videatur non tanti fecisse Zelotas hujus
temporis, quam amasse cum veteribus bo-
nam mentem. Hec enim mihi ex plerisque
ejus scriptis videor non obscure intelligere.
Illustrissimus Reginæ ac Regni Suecici Lega-
tus ad Galliarum Regem Hugo Grotius, pau-
lo antequam dignitate ea auctus, tragœdiam
scripsit de Josepho Fratres agnoscente. Spe-
ramus cum Josephi sui instar pro magnis ma-
lis, quibus affectus à suis, in dignitate hac
prælusuri multa beneficia iis collaturum. Tra-
gœdia ea inscribitur Sophompaneas, nomine
Ægyptio, quod Pharaon dederat, ad Græcam
consuetudinem inflexo. Alicui pro eo apud
Mosem est juxta Masoretica puncta Saph-
nath-Pahaneach, apud Josephum Psontom-
phanecus, corruptius apud Rufinum Psontom-
phanicos. Exemplar mitto, propterea
quia nomini inscripserit nostro. Addidi &
alterum, domesticorum cui voles, ornatius
missurus, si ad manum fuisset aliquod. Ex-
peditio à nostris una cum Gallo suscepta non
admodum feliciter procedit. Spe devorave-
ramus Brabantiam & Flandriam. Nunc non
male nobiscum agi putabimus, si munitissi-
mum illud propugnaculum Scemgkianum,
quod negligentia unius, quem dicere nolo,
tam fœde amissum, recipere valeamus. Uti-
nam ne Deus vindex graviter nos puniat,
propter barbaram & prope his terris inaudi-
tam crudelitatem, quam in capta Tinentium
urbe exercere Galli, admittis etiam (ut ai-
unt) aliquibus è Belgis, qui tamen paulo
minus exuisse hominem visi sunt. Super eo
varii in Brabantia circumvolitant libelli, qui
non leviter iis terris depreciant nomina Du-
cum nostrorum. Ne vero huc etiam defe-
rantur, publica cavetur auctoritate. O quan-
do erit illa dies, ut nos aurea pax reviviat.
Deum. Opt. Max. oro, ut hanc ipsam Magnæ
Britanniæ perpetuam esse velit : teque, Reve-
rendissime in Christo Pater, in tantis Ecclesiæ
ac regni negotiis, animi ac corporis viribus
magis & magis augeat.

clō Ioc xxxv.
iv. Kal. Aug.
St. V.

Reverendissimi & Illustrissimi no-
minis tui devotissimus Cultor,

G. J. Vossius.

CCLXVII.

Guilielmo Dell, *Domino Archiepiscopo Cantuariensi, à Secretis S. P.*

AUſus eram, optime & amiciffime Delli, opere meo Grammatico ſive Ariſtarcho malis (vix aliud convenientius nomen dare potuiſſem) non paulum tibi imponere oneris: ſed excrevit illud multo amplius quam putarem, nullâ quidem culpâ meâ, ſed infortunio, dum aliqui (nec culpâre auſim, quia forte ſic muneris ratio tulit) involant in commentationes noſtras prope dixerim harpyarum inſtar. Sed bene ſit tibi, mi Delli, qui eas tam benigno affectu ac labore ab unguibus eorum viſcoſis reglutinaſti, ſi modò viſcoſi dici debent, quando plerique ſaltem ſponte erant facturi officium, modo ſciſſem quibus & à quo exemplaria iſtæc mitterentur.

Quas miſeras ad præſantiſſimum Goſſium literas, eæ curaram, ut Hagam, inde in caſtra mitterentur. Sed poſt aliquod tempus eas recepi. In Angliam profeſtum prædicant. Simulac redierit reddentur.

Mitto ad te exemplar Tragœdiæ quam nuper edidit illuſtriſſimus Regni Suecici ad Galliarum Regem Legatus Hugo Grotius. Hæc per ſe grata ſcio erit (nihil enim illa eo in genere elegantius) ſed illo gratiorem fore conſido, quod nomini meo inſcripſerit. Argumentum eſt de Joſepho fratres ſuos agnoſcente. Sophompaneam inſcripſit, quod nomen Joſepho à Pharaone impoſitum.

Scripti ad illuſtriſſimum Dominum Archiepiſcopum. Nihil eſt in literis quod moram non patiat. Trades igitur cum commodum tempus exiſtimabis. Præcipuum fere argumentum eſt, rogari me hic à quibuſdam, ut quia decrêrint Reverendiſſimum & Illuſtriſſimum Dominum noſtrum orare, ut Scipio Gentilis adoleſcens annorum circiter viginti, recipi poſſit in Collegium aliquod Oxoniënſe aut Cantabrigienſe, hoc poſtulat ſuum literis meis ad Patronum noſtrum Opt. Max. velim complecti. Sperant aliquantum id ſibi profore. Non lubens pro aliis ſollicito, qui propriis ſic, per ſe ſatis ſuperque occupatum, diſtineo. Tamen miſericordia erga ignotum proſus vicit. Eſt iſ adoleſcens filius clariſſimi Scipionis Gentilis juris dum viveret Profeſſoris apud Altorſinos in Germania. Deſuncto patre ſtudit Ambergæ, civitatis ſuperioris Palatinatus. Quo amiſſo, vidua mater non eſt alendo in ſtudiis filio. Maxima enim à Cæſare damna accepit. Sperant amici poſſe admitti in Collegio ali-

quo Oxoniënſi: nam patruus adoleſcentis, Albericus Gentilis juris iſtic rofeſſor fuit. Quamquam ſeu Cantabrigiæ ſeu Oxonii recipiatur, parum refert, dum in ſtudiis progredi, ac patris patruique exemplum poſſit æmulari. Aiunt enim ingenio valere & vitæ eſſe probæ. Mihi eſt ignoriffimus; ſed fide hæc eorum ſcribo, qui noſſe poſſunt & debent. Fortaſſe locus nuſpiam vacat, aut indigenæ alicui addiſtus exteris non patet. Sum rei omnis ignarus. Tamen quia memini exteros etiam admiſſos, paſſus ſum mihi perſuaderi, ut illuſtriſſimum Dominum & Patronum compellarem. Tu rem ita diriges, ut ne moleſtus ei ſim: qui ſatis, ut dixi, meis occupo, tantâ tanti herois gratiâ proſus indignus, quâ abuti profeſto non debeo; præſertim ubi mihi nec ſeritur, nec metitur. Totum quod feci, feci non mei cauſâ, ſed Dei, qui nobis viduas ac pupillos commendat. Et ſcis homines eruditos facilius miſericordia tangi erga prolem eorum qui ſtudiis excelluerunt. Vale, optime Delli, & nos amare perge.

Amſtelodami,
iii. Kal. Aug.
Syl. Ver.
cſo Ioc xxxv.

Addiſſimus tibi,

G. J. Voſſius.

CCLXVIII.

Guilielmo *Archiepiſcopo Cantuarienſi.*

Reverendiſſime in Chriſto Pater, Dom. Illuſtriſſ.

CUM doleam multa adeo eſſe, quæ ſtudia remorentur, tum non leviter moleſtiam hanc auget, quod Typographi ſic moras neſtant, in edendis tum Dionyſianis, tum etiam meis, præſertim quæ ſacram Chronologiam tangant. Gaudeo interea ſaltem excuſiſſe alterius filii Matthæi (quem & ipſe participem menſæ tuæ facere dignatus fuiſti) quinque libros Antiquitatum Hollandicarum ab anno circiter nongentefimo, quando Comitatus dignitas in Repub. hac eminere inter optimates cœpit, uſque ad annum milleſimum trecentefimum; ubi primo hoc volumine deſinere viſum, quia exinde iſ honos, deficienti maſcula ſtirpe, penes Comites non Batavos, ſed domo Hannonios fuit. Uti poſtea penes Bavaros, hinc Burgundos, ac denique Auſtriacos. Univerſa hæc perſequi filio animus eſt. modò vitam Deus, & valetudinem conceſſerit. Exemplar nunc mitto, partim quia tibi omnia mea, ac meorum grata eſſe ſcio, partim quod quæ tradit, magnam partem,

tem, minime saltem Latino sermone tradita sint. Proceribus quidem nostris mire opus gratum fuit, usque adeo ut ad strenue peragendum, largo honorario sint prosecuti, non sine spe, cum nova pars prodierit, Historiographi sui titulo cum stipendio publico ornandi. Etiam alterum addidi exemplar Chartæ itidem Augustæ, cujusmodi quatuor sunt tantummodo excusa, duo hominibus Batavis ubi scripta dicataque, duo autem quæ nunc in Britanniam transmittito. Alterum hoc cui debeatur, multis partibus melius me, Illustrissime Domine, perspicies. Tui igitur iudicii hoc totum esto. Spero operam non displicituram, non modo quia & iudicium & fides & dictio se probent; sed etiam quia maiorem partem nunc demum Latino prodeant sermone, plurima etiam nec indigenis sint observata. Siquid forte intercurret, ut fortassis in operis ipsius initio, quod non conveniat Regum Imperio, cogitandum hæc scripta esse in Optimatum Republica, non regno, quæ regendi forma, si ἀπλῶς loquamur, longè sine dubio optima; sed ut Alcibiades & Augustus dixeret, boni est civis præsentem Imperii statum mutatum nolle. Deus Opt. Maximus, te, Reverendissime Pater, & Illustrissime Domine, diu fospitem conservet.

Amstelodami
clō 16c xxxv.
Id. Oct. St. No.

Reverendissime & Illustrissime Dominationis tue Clientis
longe devinctissimus,

G. J. Vossius.

CCLXIX.

Merico Casaubono S. P.

Clarissime & amicissime Casaubone,

REcepi à Peistero quantum mihi è Cantuariensi Præbenda anni huius clō 16c trigessimis quintimense Martio debebatur. Expectabo igitur ab eodem, ubi tibi integrum erit (id brevi fore spero) quod sexto post mense Septembri puta expiravit. Mitto nunc non quidem de meo quicquam, sed de cari capitis filii mei Matthæi (quem cum τῷ μακροτέρῳ vidisti Dionysio) labore. Sunt quinque libri Antiquitatum Batavarum: nempe annorum cccc Historia, quæ anno clō ccc terminatur: quando Comitatus honos mascula stirpe desita, à domo Batavis ad Hannoniam transiit. De fide optima scriptoris tibi sponforem me do.

Confido autem sese etiam & iudicio, & dictione probaturum tibi, nec minus Reverendo Domino Decano; cui alterum mitto exemplar. Siquid vel initio erit, vel alibi, quod non satis conveniat genio Imperii Britannici, observandum: hæc scripta esse imprimis Batavis, quos Optimatum imperio usos, etiam sub Comitibus satis constat. De rebus publicis quid scribam? Amico Gallo libere significo societatem hanc Gallicanam pessime nobis successisse. Sed plerique qui eam initio avide adeo amplexi, nunc vetera Britannicæ gentis merita, magis ad animum revocant. Prope diem puto Legatos mittendos: quod & Britannicæ & fœderatæ Belgicæ bono fore confido. Uxor & omnes mei, te una cum lectissima conjuge plurimum salutant. Multa etiam salute imperties Reverendum Dominum Decanum, cum universo venerabilium fratrum Collegio.

Amstelodami,
clō 16c xxxv.
Id. Octobr.

Tuus tuo merito,

G. J. Vossius.

En literarum exemplar ante mensem, vel propè sesquimensem scriptam & traditam, ut amicissimo mihi, ita optimo & doctissimo Stephano Goffio, castrensi apud nos Anglorum Ecclesiaste. Is tum ituro in Angliam illustrissimo Electore Palatino comes erat futurus. Ac fortasse jamdiu in Anglia sunt. Hæsterna tamen die ex quopiam intelli xi adhuc in Zelandia hære ob ventum adversum, vel saltem non ante hebdomadam abiisse. Existimavi igitur, tutius fore, si juberem literas priores rescribi, ne reus immerito agar pertinacis adeo silentii. De legatis quod scriperam, necdum processit; sed hoc nunc agi utrinque videtur, ut induciæ fiant. Spissum sane negotium, cui tamen opinione celerius accelerando haud mediocre momentum attulerit non illaudatus urbis Episcopus Urbanus. Quem ex viris minime vanis & talium gnaris accepi serio hoc moliri, ut Orbi Christiano pax reddatur, Marte qui ubique hic sevit relegato ad Mehamedanos, cujus res nostris discordiis gliscunt. Pestilentia vehementer grassatur totâ propè Belgica fœderata; Lugduni Batavorum imprimis; ubi quandoque una hebdomade rapiuntur mille ac quingenti. Nostris Amstelodamensibus optime fuit diu. Nunc Lues hic quoque incrementum capit. Hactenus tamen toti familiæ nostræ optime est. Sed quid porro futurum sit, quis dixerit? Tanto ardentioribus votis opus ad Deum; cujus me meosque ac pariter totam familiam

familiam tuam, sed & universum venerabilium Fratrum Collegium commendo.

Amstelodami
c10 Ioc xxxv.
12 Kal. Dec.

Tuus tuo merito,

G. J. Vossius.

CCLXX.

Joanni Isaacio Pontano S. P.
Hardervicum.

DE Catulliani loci emendatione, Optime & Doctissime Pontane, ampliandum cenfeo. Legis apud Poetam hoc pacto:

Ego inuber, Ego Adolefcens, Ego Ephebus,
Ego Puer.

Sane metrum non refragatur, quod Galliambicum est. Prima enim sede fuerit Anapæstus, hinc Tribrachus, quod interdum fit, hinc Iambus, tum Dactyli duo, inde Anapæstus. Quæres, quid ergo assensum moretur? Nimirum illud, quod non censcam *inuberem* poni, pro ablactato, sed notare macilentum; ut quod veniat, ab *uber* adjectivo. Quare *uber* & *macer* pugnantia sunt. *Inuber* igitur idem ac *macer*; sed *inuberis* vox insolens. More suo ideo Gellius interpretationem subiecit; cum *Ostreæ*, inquit, *Inuberes macraque essent*. Est hoc ab *uber* adjectivo. Ab *uber* autem substantivo, pro mamma non videtur *inuber* dici, sed solum *sububer*, pro *ἐμπυδίσω*, quod apud Isidorum, & fortasse etiam *exuber*, ut hoc Scaligero demus, qui ita putavit, nec authorem laudare possit suæ opinionis. Ad hæc si *abuber* substantivo veniret, *inuber* non significaret ablactatum, sed *sububerem*, & quasi *uberibus* incumbentem. Quomodo *inuber* & *exuber* contraria forent, Illud significaret, *καταμάζιον*, hoc *σπογδαλίσιον*. Denique ut *inuber* aliquis, post *σπογδαλίσιον*, diceretur, fortasse ne sic quidem, Catulliano illi loco satis conveniret. Neque enim Atyr erat recenter ablactatus; sed Puer, Ephebus, Adolefcens, dici poterat. Imo cum in illis, *Adolefcens, Ephebus, Puer*, quo ordine ponit Catullus, decrescat Oratio, elegantiae Catullianæ fuisset, extremum locum tribuere voci, quæ recens ablactatum signasset. Non ausim igitur, *mulier* damnare, quod est in antiquis Codd. etiam editione, quæ Regii Lepidi anno prodiit c10cccc lxxxii. sed *Mulier* *δουλοῦ* efferendum, ne claudicat metrum. Sententia fuerit, Mene nunc *Mulierem*, & *Eviratum* esse, qui ante *Adolefcens, Ephebus, & Puer* fui? Nec hoc scribo, quati ve-

hementer tuæ sententiæ refrager. Velim enim omnes conjecturas tuas esse certas, quod nulli tamen mortalium evenit. Eo facilius veniam dabis paulum dissentienti. Quamquam ne ista quidem scripsi, quasi multum abeam, sed ut videas ad statuminandam opinionem, eam firmiori tibicine opus esse. Locus de quo scripseras est, in primo de Art. pag. xvii. uti alter libro de Constructione, pag. ccxlv. Uterque infra virtutes tuas, quod alibi foelicius præstabitur. Salutem multam imperties Consuli Amplissimo Brinkio, Collegæ item Theologo Distio, de Zevecotio adderem, nisi pauci adeo dies essent, quod nobis adfuisset.

Amstelodami,
c10 Ioc xxxv.
7 Kal. Nov.

Tuus æternum,

G. J. Vossius.

CCLXXI.

Joanni Brunæo, V. Cl. Quæstorî Middleburgensi, S. P.

Quam vellem, amplissime Vir, atque idem non animorum minus similitudine quam affinitate conjunctissime, ut si non tam diu, quam optabamus, paulo saltem diutius, frui licuisset, tui quidem mihi, uxori autem meæ, conjugis tuæ, imo & liberis meis, præsentia utriusque vestri. Omnes enim pariter vos colimus & æstimamus: & si verum scire cupis, permolestum est, quod tam longo spatio divellimur, nec sæpius una esse liceat: mihi imprimis, qui ex sermone tuo ut mirificam voluptatem, ita fructum etiam capere soleo: hac veteris nostri amoris fiducia nunc ad te scribo. Scio probe te memorem esse sermonis habitî inter nos, cum hic fores, de Annalibus Hollandiæ & Zelandiæ à nlio Matthæo exaratis, dicatisque illustrissimis Hollandiæ, Zelandiæ, Westfrisiæque Ordinibus. Quam grata hæc fuerit opera Proceribus Hollandiæ, quid dicam? putidius id fuerit perscribere; sed ut cætera taceam, vel inde conjecturam, vir sagacissime, poteris capere, quod sint honorario profecuti (apud te non dissimulabo) florenorum cccl, ex quibus quadringenti quidem illi pro opera assignati, quinquaginta vero pro exemplaribus. Majus illud, quod, ut ex non uno nobilissimi confessus accepi, nihil æque hoc tempore obstiterit, quo minus terræ suæ Historiographum constituerent, quam quod metus foret, ne alius, qui res nostri ævi describendas suscepit, hanc

qualemcunque societatem ad infringendum honoris sui decus facere arbitraretur. Nihil vero hoc obstitit Zelandiæ vestræ, quæ, ut arbitror, nullum hoc tempore istoc honore prosequitur. Et spes à multis hic facta filio mihi quæ, quod nunc non fecere Proceres, facturos occasione alia, præsertim ubi alia pars operis prodierit in lucem. Plura hic addere de filii laboribus non est meum, nec tu ipse, quæ modestia es, id probes. Sed te ipsum, & intelligentissimum quemque operis judicem capio. Mitto nunc exemplaria novem: tot enim in illustri illo confesso proceres esse intelligo, sed superaddidi tria. Unum seorsim antea dandum nobilissimo Knutio, quem interest nostra in tantis negotiis, quæ sustinet, prius vel fugitivo oculo lustrasse hunc laborem, quo facilius statuatur, quid facto sit opus. Scio præstantissimum virum per se satis favitorem fore operæ publico bono insudatæ. Sed nec inutilis propterea erit commendatio tua, præsertim quando, nisi valde fallor, aliqua etiam ejus est conjunctio cum uxore tua. Parum absuit quin ad ipsum scriberem. Sed nolui tibi diffidere. Eo minus quia & negotium commendavi (nihil horum ignorare debes) amplissimo senatori Cromen; cum in urbem hanc nostram his diebus ad nuptiale festum se contulisset. Is ineunte Novembri in urbe vestra futurus ad aliquam juris controversiam decidendam cum jurisconsultis & arbitris. Præterea & hic & Hagæ locutus sum, cum urbis vestræ secretario amplissimo Vanderburgio Illustris Berkii *fr. p. angelus* genero. Et is bonam addixit in hac re operam. Huic alterum ex tribus residuis exemplar dandum. Tertium cedat illustrium ordinum Zelandiæ à secretis: sive seorsim, sive cum novena illa proceribus exhibendum. Quid expediat facile perspicies: si scissem quando conventuri fuissent illustrissimi Ordines vestri, filio auctor fuisset ut ipse excurreret. Nunc plane de eo incerti sumus. Accedit, quod non finit ejus pudor ut Curio & Buccinator sit laudis suæ; melius ista per amicos peraguntur; mitto quod lue per fœderatam hanc Belgicam grassante non secure satis in turba aliquis se navi committat. Quamobrem omne tibi commendo negotium, & illis simul quos ante memoravi; spero autem pro gratia pulchre navata gratias me vobis acturum prope diem.

Amstelodami
c13 Ioc xxxv.
4. Kal. Nov.

Amplitudini tuæ
addicissimus,

G. J. Vossius.

CCLXXII.

Hugoni Grotio.

Lutetiam Parif.

Illustrissime Domine,

Quod de negotio summi viri Galilæi Galileii tardè adeo rescribam, diutina fecit ab urbe absentia syndici nostri Guil. Borelii; qui rem omnem apud Dominos Ordines fideliter procuraturum se recepit. Nec sanè ad eam rem, alter magis idoneus eligi poterat. Sed non puto eum affore ante Christi Natalem. Magnus est affectus Procerum urbis nostræ erga Galilæum, eorum saltem, quibus scientia in pretio est. Ante omnes, prædicare debeo Nob. Realium; qui nihil æque exoptaret, quam ut Galilæus, prætextu offerendi Ordinibus nostris, suas de re maxima cogitationes, has ipse in terras veniret. Poterat, inquit, opera hinc dari, ut fingere hic domicilium vellet. Sed votum hoc viri, de suo etiam largiri ad detinendum parati, metuo ne provecta in istac Galilæi ætate, planè frustra sit. Joannes Narsius, quia videretur, ne ulla sui deinceps à proceribus Suecis ratio habeatur; operam suam præfectis negotiationis Indiæ addixit. Ac intra triduum, si ventus faverit, navem ascendet. Octoginta menses, Florenos assignarunt. Obtinebit in itinere locum quem vulgus supremi Mercatoris vocant. Hinc inter præfectos justitiæ facturus. Medicam simul artem exercebit; & majoris honoris spes facta. Nec tamen hujusmodi filium tuum Petrum, magnopere commovent ad simile iter suscipiendum. Domi, vel apud externos etiam Principes, dignitatem quampiam præferret. Sed quia non ignorat, quam miserum sit, ab incerta spe pendere: Ita decrevit studia sua componere; ut vel solis illis tueri decus suum possit. Juris prudentia imprimis placet, sed sic ut, ex consilio tuo, ea fociare velit, quæ ad mercaturæ intelligentiam pertinent. Literas ad Illustres juvenes Stypeskium, & Skyrtium sedulo procuravi. Leonis Allatii labores, etiam vetera illa *divendia*, quæ habet, excudere qui paratus sit, non unum hic habemus. In iis & Blauwius est. Sed dum totus est in Atlante suo adornando, non facile dixerò, quam tardè promissa exsolvat. De Tacito quod cogitas gaudeo. Metuo alioqui, ne alius quispiam in tuam involet purpuram, suisque inferciat pannis, dissimulato nomine tuo. Scis jam dudum esse, quod quæ meditatus es, non sint in tuâ potestate. Mihi quidem quicquid eorum vidi, ac legi, impensè, ut omnia tua, placuit. Berneggerum, & doctrinæ, & virtutis nomine, merito

rito æstimo, & amo. Nec officio deero si quis locus patuerit in ulla Illustrium Scholarum, his & vicinis terris. Vale Illustrissime Domine, & cum Heroïna conjugē, & familia, à me & meis salve. Salutem etiam plurimam mei amantibus dicito: Imprimis Rever. & Amplif. Bignonio, & Cordesio, à quibus quod amer, tui, ut alia, beneficii est.

Amstelodami clò Dec xxxv.
Non. Decembris.

S. P.

Dum literas, quibus hæc inclusi, plusculum detinco, quia deesset commoda mittendi occasio, ecce nobis Hagha hoc rescriptum DD. Ordinum. Partem primam Annalium Hollandicorum, quos Matthæus misit, spero, jam acceperis: Nisi fortè futurum, ut unà cum hac Epistola recipias. Spero operam non fore ingratam. Quæso commune, sicubi erratum putabis. Editione altera corrigi poterit. Filius tuus indies se magis, & magis insignem reddit, non studiorum modo profectu, sed modestia etiam, judicioque, quo pro ætate illa, plurimum valet. Itaque honori, etiam tibi, atque familiæ fore confido.

Idibus Decembris.
clò Dec xxxv.

*Illustrissimi nominis tui
Cultor,*

G. J. Vossius.

Geminæ literæ D. Deodato inscriptæ, ab Collega meo Hortensio sunt: Rogat is te plurimum, per famulorum quempiam deferri jubeas. Vale.

CCLXXIII.

Joanni Christenio.

Præclare, & Consultiff. Christeni,

Plurimum semper à prima etiam adolescentia amavi Urbem vestram, vel eo nomine, quod pueritiæ suæ studia ei barbaro illo seculo debuerit magnus Desiderius, vir nec sua ætate quoquam minor, nec nostra fortasse nec intermedia, saltem si totum consideremus Erasmus; non studium hoc vel illud, quando non ita feliciter agitur cum ingenio cujusquam, ut ei se doctrina totam indulserit, sed felicitas est (ut minimum dicam) vel in decuplam ejus partem recipi. Multum vero gaudeo, quod proceres vestri

cedere nolint proavorum gloriæ, sed nunc quoque omnibus nervis contendant, ut augeant decus literarum, quibus magnus ille studiorum in urbe vestra alumnus orbi illuxit, divinarum nempe, ac præterea, non dico profanarum, ut quidam *μέγα πρέσβυς* loqui amant, sed humanarum, quia humanæ interserviunt vitæ; ut fileam de sacris literis ad quarum intelligentiam ex iis plus redundat commodi, quam capiunt illi, qui eas nonnisi tanquam canis è Nilo degustarint. Quæ eo à me sine scribuntur, ut videas, quanti faciam propensissimam voluntatem tuam, claris doctoribus, etiam extra studia sacra, augendi gloriam, illustris jamdiu, sed quæ illustrior heri possit, Academicæ Scholæ vestræ. Ac scio eandem esse mentem Collegarum præstantissimorum, præ cæteris optimi & viri & Theolog. D. Dyffii. Cæterum de Gronovio sic habe: Non alium nunc occurrere mihi, cujus & doctrinam, & industriam magis commendare sum paratus, si certo Parisiis adhuc agere constaret. Metuo enim ne visendæ Italiæ & tot veterum in ea monumentorum amore flagrans, jamdudum eò concefferit. Si recte atque ordine me facturum putes, per literas Lutetiam missas exquiram, utrum Parisiis etiamnum degat, vel ut discesserit, quando iste exspectetur ab amicis, quos ille, ob singularem in literis doctrinam habet complures. Memini mihi valde à summis viris per literas commendari Matthiam Barneggerum, Professore Argentoracensem ingentis & doctrinæ & nominis. Nempe rebus Germaniæ usque adeo turbatis, tertium annum nihil perceperat stipendii, eoque maluisset veteres sedes mutare Academia vel Schola aliqua Illustr. Belgicæ Fœderatæ. Sed is superiore Februario satis concessit, multis relictis ingenii & eruditionis monumentis, in his ut Historica solum dicam, Justino à se recensito. Generum habet, vel habuit potius (quando ipse ad superos ut dixi concessit) Joannem Freinsheimium, satis clarum notis suis in Florum, ac Tacitum, & amplis in Curtium commentariis inscriptis Nobilissimo Equiti Joachimo Wickefortio urbe hæc degenti, tibi que ut arbitror cognito. Idemque parat Suetonium, Sallustium, Ammianum, Thucydidem, Pachymerium, Livium, & alios. Sed enim non sat scio, utrum is tam paratus sit Germania sua excedere, ac focer fuit. Et arbitror Augustanæ Confessioni addictum, ut istis locis solent. Quod ut existimo, sufflaminaret procerum vestrorum animum erga virum summum. Hannoviæ adhuc agit Joannes Philippus Paræus, magni Theologi Davidis Paræi Filius, viri multis scriptis celebris. Hic facile pertrahi possit in has terras,

ras, quia misero Germaniæ statu res ejus ad lincitas sunt redactæ. Posset claritas ejus nominis ac paterni simul aliquod decus addere Gymnasio. Notus est mihi, tum aliter tum etiam per literas. Notior item Jacobo Laurentio urbis nostræ optimo & doctissimo Ecclesiastæ: quem super eo compellasse, nisi valetudo obstitisset, quæ nec scivit, ut statim literis tuis responderem. Sane si afflictam Germaniam cogitemus, non dubitandum quin plurimos habeat viros insignes probitate ac doctrina, quorum opera Reip. literariæ bono in Gymnasiis suis hæc uti provinciæ possent. Nec dubito quin complures suggeri possint, ab iis, qui terras eas lustrant, & urbe in vestra ac vicinis vivunt. Quamquam nec Belgica hæc fœderata pulchris caret ingeniis & huic aptis provinciæ. Solum dolet, quod cruda sic studia propellantur in ambonem, & forum. Quæ res nobis barbariem pristinam minantur. Verum nolo in tristi omine definere. Malim optima sperare, vel eo nomine, quod videam amplissimos urbis vestræ proceres tum literarum esse & literatorum studiosos.

Raptissime *Amstelodami* scribebam.
cl̄o Id̄c xi. Kal. Jan. St. Vet.

Rev. Dom. Dyte, viro summo & aliis Collegis præstantissimis salutem plurimam, ubi otium erit, meo nomine, quæso dicito. Volo enim sciant utcumque tardus sim in scribendo, probe tamen eorum me esse memorem.

Epp̄ro.

G. J. Vossius.

CCLXXIV.

Gerardus Vossius V. Cl. Antonio Æmilio S. P. D.

Nihil lubentius facio, quam ut amicis prosum, præsertim, si eadem publico commodum. Tale hoc negotium est, de quo nunc agam tecum. Est inter uxoris meæ propinquos, optimus, & doctissimus juvenis, Gorsius, qui annos multos, non literis modo, & Philosophiæ, sed sacris etiam studiis, operam Lugduni dedit. Jam ante quinquennium, cum ibidem historias profterer, aliquo inter studiosos loco fuisse memini. Atque interea longe maxima cepit incrementa, ut ex pluribus intelligo. Sed nescio quo infortunio fiat, ut ejus non habeatur illa ratio ab Ecclesiasticis, quæ debebat. Id ipsum, id nos,

& alios amicos male habet; est enim benè natus. Matrem an aliquando apud nos videris, nescio; tuit ea Davidis Ruteri, Amplissimi nunc senatus Brabantici, Hagæ senatoris soror germana. Avunculi suæ Werstenius, & Martinus, ibidem senatores. Avia erat Montenea. Noſti familiam perveterem. Quid consanguineos omnes recenscam, pleſosque Nobiles, vel saltem Patricios: suspiſcantur aliqui, obſtare juveni, quod moderatius paulo se gerat, quam Zelotis placeat; ſcio ego tibi Zelotarum mores non probari; hominum natorum, ad perdendas, non Ecclesiæ modo, sed totas etiam Reſpublicas. Quod igitur minus gratum reddit talibus, id eum commendabit, non tibi modo, sed Ticmanno, quem ego virum amavi ſemper, non modo doctrinæ nomine, ſed etiam moderationis; quæ ſi unquam, his temporibus requiritur; ſed aliud etiam obſeſſe ei ſuſpicantur, puta quod ſuis ſtuderit impenſis. Aiunt tantam eſſe eorum copiam, qui ſtudiis ſuis abſolutis, ut aliorum, quibus paulo auctior ſors, haberi ratio non poſſit, aliquid dicerent, ſi tales annum unum, aut alterum expectare cogerentur. Nunc ſemper negliguntur. Hoc pede ſi pergatur, quotuſque tandem, qui aliqua in re ſit, liberos ſuos ſtudiis ſacris deſtinari? ſed quid his inſiſſito? Ad rem ipſam potius venio. Intelligo Eccleſiam Liſſæ (is pagus eſt inter Harlemum & Leidam) carere verbi Miniſtro. Gorſius autem, quem dixi, non veretur operam ſuam offerre, ad ſacrum hoc munus; ſcio aliquos quoque eſſe, qui Eccleſiæ illi præfici exoptent; ſed ubi ſinguli ſint auditi, cogitari poterit, quis digniſſimus ſit. Et non ſolum hic Synedrii, vel Clafſicalis voluntas ſpectanda, ſed etiam ejus qui juſ Patronatus habet auctoritas. Eum eſſe ſcio Nobiliſſimum virum, Duickemburgium urbis veſtræ Prætorem, quicum, ut arbitror, aliqua tibi notiſſa intercedit. Huic Gorſium commendari exoptem. Et ſi operæ putas, aſſumes quoque Ticmannum noſtrum. Neutrum commendationis poenitebit. Perſpecta enim mihi juvenis, & modeſtia, & doctrina. Dubitabam an ipſe, ad Dom. à Duickemburg, ſcribere vellem. Animum audendi præbebant ſummæ viri virtutes, quas ab omnibus commendari video; ſed tandem putavi melius, id vos coram facturos, apud Nobiliſſimum hunc virum. Pluribus non morabor te tam occupatum, ipſe adeo uſque occupatus, ut vix hæc ſubito potuerim conjicere in chartam.

Amſtelodami,
cl̄o Id̄c xxxvi.
Jan.

CCLXXV.

CCLXXV.

Stephano Goffio, *Ecclesiastæ Castrensi*
Colonelli *Verii*, S. P.

Credo jamdudum tibi, optime & doctissime Goffi, mirum videtur quod tardè adeo ac tertiis demum literis provocatus respondere. Tantæne inquires occupationes tuæ? sanè majores illæ, quam facile me cuiquam persuadere posse existimem. Sed tamen alia concurrerunt. Tardè enim cognovi, super quibus certior fieri desiderabas; nec erat cui tuto literas committerem. Nam filius, ad quem illas Hagam mitti petieras, is Amstelodami erat. Damportus sæpius hic concionatus est, & gratus est non paucis, maximeque iis qui maxime faciem Ecclesiæ Britannicæ damnant. Sed necdum de eo advocando actum cum Ministris Ecclesiæ Belgicæ; multoque minus cum proceribus urbis. Videntur pastores non alieni ab eo; dummodo subicere se velit classicis decretis. Id utrum facturum sit, dicere non habeo. Sed quorundam opinio est facturum, ne Hokeri instar, spe excidat. Apud proceres nihil æque ei commodare possit, quam quod multi illis persuasum eunt, hoc agere Episcopos Angliæ, ut imperium in Ecclesiis Belgicas exerceant; vanissimum hoc commentum animis eorum evellendum, inque eo adlaboro, ut debeo. Utcunque autem fautoribus non destituerit Damportus, nihil tamen efficiet, nisi ostenderit hic literas, quibus ab sua Ecclesiâ sit honestè dimissus; tum item nisi comprobarit liquidò, sibi in Angliâ solum quæstionem fuisse, de ceremoniis vel hierarchiâ; non item aliquid intercessisse, quod regem, aut regnum, spectaret. Hæc nunc sola perscribere potui. Plura ubi cognoro, faciam te quamprimum certiozem. Jucundissimum mihi fuit ex te cognoscere, de literis Clementis in Britannia editis. Nondum eas conspexi. Alioqui judicium meum perscriberem de locis inde à te excerptis. Nec propterea eas transmitti opus. Nam tuto satis id facere vix possis durante hoc gelu. Sed si quando huc excurreris, vel fidum hominem habebis, cui committas, non ingratum erit conspiciere. Nihil vero in istoc festinato opus. Vale, vir præstantissime & amicitissime. Postr. Kal. Jan. Anni clc lxxvi. quem tibi ac familiæ meæ, Britannicæ Magnæ, ac fœderatæ huic Belgicæ salutarem exopto.

Tibi addictissimus,

G. J. Vossius.

CCLXXVI.

Danieli Paræo S. P.

Vellem, vir clarissime, Reverendus & ornatissimus vir, Jacobus Hintzerus, prius quam alias adiret Bataviæ urbes, pedem posuisset in Amstelodamensi, nosque compellasset: vel enim valde fallor, vel juvare eum consilio, in accedendis quibusdam Ecclesiis, vel etiam magistratibus, potuissim: nunc quia postremo in urbem hanc venit, vix quicquam potui præterquam apud Ultrajectinos. Et tamen id minutum fuit; interea præstiti quicquid potui. Nec quicquam lubentius feci. Usque adeo gratus mihi acceptusque erat, partim ob virtutem & doctrinam, partim quia à tuo filio commendaretur, jucundumque esset ex eo cognoscere, quæ ad te & Paræanam domum pertinerent. Amstelodami jam vivo commodeque habeor à proceribus civitatis. Itaque Deo gratias ago, qui eam mihi mentem inspiravit, ut non abnuerem conditionem, cum huc vocarer; scio Gymnasium hoc novum fore: sed ante annos etiam quinquaginta novum fuit Lugdunense, cujus nunc tantum decus per orbem universum. Fortasse & non exigua quandoque erit gloria Gymnasii Amstelodamensis. Ita fore confido atque auguror. Mihi vero pulchrum tunc erit, jecisse ejus Gymnasii fundamenta. At interea, dices, deteret ea res aliquid de nomine qui inclytam Academiam Gymnasio demum constituendo commutavit. Quid dicam; vir amicissime? non ignoro, quantillius sim. Sed tamen cum plurimum tota hac de re judicium hujusmodi est: nunquam me à nomine & gloria ejus Academicæ pependisse. Si doli-um Diogenis incola suo celebratum, posse & me oppidulo aliquid decoris dare. Atque extra illud de Academia, quanto urbs hæc alteri præstat! Quid ea opulentius! quid potentius! Quæ una ad bellum cum hoste potentissimo plus confert, quam---; sed reprimam me, ne tot magnis Bataviæ civitatibus, tot Belgicæ fœderatæ provinciis, quicquam detrachere velle videar. De procerum vero & prudentia singulari & summa eruditione, penitus tacere non possum; siquidem illa res inter cætera me compulit, ut sedes hic ponerem. Sane complures novi, hic non minoris doctrinæ quam qui Collegæ mihi in Lugdunensi Academia fuerunt. Certò eam talium copiam, frustra in aliis & urbibus & provinciis quæras. Nec ignoro, vapulare eos à nonnullis, quasi non satis sint *de doctrina* amantes. Sed hoc non aliunde est, quàm quia permittant conciones eorum, qui in Prædestinationis dogmate dissentiant à doctrina publice recepta.

Tum

Tum autem quia aliquos urbe jusserint exire, qui seditiose multa agebant; non accusabo quemquam, tamen sanguinaria quorundam consilia non ignoro. Horret animus meminisse sermonum, quos ipse, ex ore quorundam audiui; non loquor de iis, qui ab urbe jussi abesse, anno uno altero. Alios tango, quos dicere nolo. Ita enim semper animatus fui, ut de talibus non facile loquerer, nedum scriberem; sed apud te, familiarius paulo mihi agendum putavi. Sic tamen ut nulli periculum creem: postquam ab iis urbi esse periculum amplius non potest. De patria quia perscribi petis, paucis expediam. Parens mihi fuit Joannes Alopecius, sive Vossius, Ruremundanus. Is temporibus Friderici Pii in Heidelbergensi Academia, Zanchium, Ursinum, & alios audivit; atque anno 1573. in agro Heidelbergensi ecclesiastes factus. Post excessum ejus electoris anno 1627. quaternis auctus liberis, sed ex quibus solus superesset, in Bataviam venit cum ecclesiasticis cæteris qui Lutheri de cœna domini sententiæ subscribere noluissent. Itaque jam anni sunt quasi LIV. quod Palatinatum non viderim. Multis familiariter usus sum, quibuscum amicitia in Palatinatu parenti intercesserat; sed post tantum annorum intervallum prope omnes defuncti: Joannes Mylius Neostadiensis Ecclesiastes, puer cum ibi sæpe in paternis ædibus vidit: ut mihi his etiam diebus retulit: Nam in extrema Batavia prope Gorcomium ac Sylvam-Ducis pastorem agit. Apud hujus matrem vel novercam potius Barbaram Myliam ab octavo ætatis anno vixi, usque ad XVIII. quæ multa mihi referre solet de laudibus parentis quem octennis amisi. Norat ea parentem optime, quia arcta fuerat amicitia parenti meo cum marito ejus Jacobo Mylio, viro perdocto, & fido Dei servo in eodem Dicecesi. Horum memini quia soror Joannis Mylii, Jacobi filia nupta fuit Balthasari Lydio, quicum tibi, ni fallor, amicitia, aut saltem commercium literarum fuit. Et anno uno me natu grandior erat, superiori verò anno decessit paucis post maritum hebdomadis. Omipino pauci eorum supersumus, qui in Palatinatu temporibus Friderici pii, aut initii Ludovici nati sumus. Me vero semper illud habuit pessime, quod ab anno ætatis XXIII. priusquam dulcem patriam revisissem, scholastica fuerim functione distentus, primum in Academia paucis mensibus, mox in Gymnasio Dordrechtano annis XV. & ultra, inde Lugduni iterum, partim in Collegio Theologico, cui quadriennio præfui, partim in Academia ipsa, in qua docui circiter novennium; sed ad alia jam delabor, de quibus non rogaras, nempe mihi jucundum tecum est

per literas confabulari. Itaque calente calamo scribo, quicquid in mentem venit; neque enim gloriolæ aliquid ex epistolis quero, qui eas sæpe ne relegere quidem soleo; nedum id otium sit cum cura aliqua eas exarandi. Abunde est, si raptim adeo scribentis manum assequi possis. Pro Christianæ institutionis elementis gratias ago, mihi opera valde probatur; nunc quod mitterem *Arndtwey* erat nullum, sed fore propediem spero; nec enim inutiliter tempus abire patiar, quo necdum publice docemus: verum omne illud impendam digerendis schedis meis. Puto, mox à nundinis Francofurtensibus edendos commentarios meos de L. L. grande opus & in quo non parum operæ posuerim, & tamen nec parum restat, quod nonnihil terret, cum cæteras cogito occupationes meas: sanus subinde infelici mihi videor natus fidere, quod nunquam liceat esse otioso, ac dulcibus Musarum studiis frui ex sententia. Aiunt hoc solatio esse posse, quod ipsa illa sidera ut luceant hominibus perpetuo moveantur. Mentibus nostris, quas cœlitus habemus, aliquid esse cum cœlestibus illis corporibus commune: verum ut mihi quidem videtur, non tam fidelibus, quam candelis nos comparari oportet: sidera lucent ac eadem permanent: nos lucemus aliis atque interim consumimur. Sed uterque clarissime & amicissime Paræ, hoc cogitemus ut consumantur corpuscula, manere animum, manere honorem in terris, longeque augustius præmium in cœlis. Quare me quidem laboris adhuc non pœnitet: scio nec te, qui bene de studiis ac pietate mereri non defines. Vale.

Amstelodami.

Tuus totus,
G. J. Vossius.

CCLXXVII.

Abrahamo Vander-Mylio S. P.

SCis, conjunctissime Vander-Myli, ab annis tot, ut aliquanto amplius sit, quam tertiæ ætatis meæ pars, te amari à me plurimum, & æstimari. Nec eo minus formido, ne propterea quod tot literis tuis, tam humanis, tam eruditis, non responderim. Nisi jam à doctissimo Genero tuo Colvio, & aliis (ut reliquos mittam) in urbe vestra degentibus, cognoris, quam pene mihi ex consuetudine in naturam verterit, etiam amicissimis, etiam doctrina, vel dignitate clarissimis, raro respondere, nempe vix aliter, nisi gravis, ac penè fontica causa urgeat. Nec uspiam magis hoc vitium meum dominatur, quam iis ubi mea res agitur, vel liberorum.

In quo

In quo immane quanto differo à Mercuriali urbis hujus Populo. Nulli autem tam grave. quam optimæ uxori meæ: quæ si verum dicit, prorsus valetudinem perditum eo. Quid agam? Vix ab auditorio publico revenio, cum ex urbe nostra, ex aliis Bataviæ urbibus, ex foederatis terris, ex Britannia, Gallia, Germania, tractibus alijs compellor, idque ad nonam Vespertinam. Quare vix temporis aliquid superest vel studiis propriis, vel literis ad amicos, nisi illud inter & secundam nocturnam. Tum duntaxat interpellatorem habeo neminem, interpellatricem subinde unicam, conjugem dico, sæpius tamen interpellaturam, nisi ut ipsa ait, surdo caneret. Metuo interea ne immutandum mihi sit istiusmodi vivendi genus, modo vitalem mihi diu hanc vitam velim. Cogito seriò, & cogitabo porro, partim ut amantibus mei (quos inter illustrem scis te locum obtinere) satisfaciam magis, partim etiam, ut paulum temporis obtingat limandis illis, quæ annis pene XL. non inutiliter mihi videor observasse. Tu vero micognate, beatus mihi videris, non quidem undique (quis enim omni ex parte felix?) attamen multis nominibus, inter cætera eo, quod plus otii suppetat præclare, & cogitandis, & signandis rebus, animum omni alimonia dulcius pasturis. Atque hoc imprimis dictum velim, propter auro contra non caros labores tuos, de Ecclesiæ concordia, quæ satis diu in propria sæviit viscera: ut tandem tempus sit definire, si publici cura tangat ulla. Quod vero nec in hac sæculi iniquitate, tam pulchram deposueris cogitationem, mihi quidem gaudeo, tibi vero, & magis Ecclesiæ gaudeo; quam vel hoc argumento, colligo amari à Deo, etsi istis odiis, ac rixis multum degenerarit. Deus tibi hanc bonam mentem esse perpetuam velit: Et simul pro pietate hac tua, non potest hanc vitam modo, sed etiam dum his terris, teque tuosque remuneretur. Quod tempus utinam liceat videre? ut tandem pacis amantes suos etiam maneat honos. Satis autem mirari non possum, ea ætate, ac in tam gravi negotio Ecclesiæ districtissimo, etiam otium esse cogitandi ea, quæ ad Arcana pertineant Naturæ. Atque ego quidem nihil magnopere adversus ea habeo, præterquam quæ coram asserre memini: sed denuò doctissimum Collegam Hortensium collegi: Atque ut paucis, quid sibi videretur, perscriberet rogavi. Paruit quidem, sed quàm tardè hinc æstimes licet, quod nondum quartus est dies, ex quo responsum accepi. Atque hanc quoque causam esse scito, cur tardius acceperis meas. Nolebam enim scribere, quin per me, vel alium, ex parte saltem, æquissimo tuo postu-

lato satisfacerem. Accessit valetudo incommodior ex catharro: quæ nec publicam ascendere Cathedram hodiè fivit. Eoque justius veniam dabis, filum hoc scriptionis abrupti: Etili alia erant, de quibus, quia aliter non licet, saltem per literas colloqui liceret. Vale, clarissime Cognate, & cum Uxore lectissima, à me, mea, & liberis salve.

Amstelodami,
clō 16c xxxv.
pr. Kal. Febr.

Tuus totus,

G. J. Vossius.

CCLXXVIII.

Hugoni Grotio S. P.

Quod tam honorificis literis, filium Matthæum compellare, hoc est, (quod tibi propositum fuisse non dubito) ad reliqua studiorum accendere volueris; ut aliis nominibus, ita illo etiam, uterque plurimum debere nos fatemur. De *ἀνθολογία*, tardius respondeo. In causa est quod filius Petrus Grotius jamdiu, ut mihi ante menses duos retulit, hoc munere sit perfunctus; sed addebat, suis se ad te literis addidisse, videri sibi conducibilius, ut in Galliis hoc opus edatur; quia in talibus, Triconem, & Bovinatorem, ut cum Lucilio sic dicam, Blauwio hoc majorem ex Typographis norit neminem. Qui sic ante conjugium erat, nunc *Νεόγαμος* se, (ex quo solus omne onus cum fratrum uno sustinet) justius censet lentè, ut ipse appellat, festinare. Et verè festinat, ubi semel sit exorsus; sed ad ordiendum, nihil lentius videre memini. Itaque omnes ferè eludit, non animo quidem malo, sed quia nihil recuset unde spes lucri affulgeat, & aliqua etiam honoris: postea verò ubi singuli admonent promissi, imparem se tam multis intelligit. Atque ille quidem, cum primum de *Ἀνθολογία* convenirem, confestim annuit, & transmitti eam postulabat: sed ego hic objectare, quod jam biennium haberet filii Maimonidem, nec satisfaceret. Quod non minoris temporis spatii detineret opus Affinis mei Francisci Junii, de Pictura Veterum. Quod aliquanto diutius, tam multa Meursii hætenus inedita, quæ poscenti benignè transmississet, magno cum viri dolore conservaret: Id eo virum hunc magis urere, quod Nobilissimis Danicæ, & aliorum locorum viris hisce dicaſſet. Nec eos hoc fugeret, qui assidue pollicita exigant: tarditate hac levioſem apud eos fore gratiam. Blauwius humeros attollere; addere deinceps, se alium fore, hætenus fratrem à Galliis

Galliis expectasse. Et jam quidem tres Julianos de pictura libros orsus. Maimonidem filii ⁷ *magistris*, post octiduum certò auspabitur. Opera Meursii intra sex hebdomades ut sperat. Nostros de poetica libros vertente hoc anno. Sed grande Originum opus, non nisi post annum exactum posse. De tuis verò valde se invito fore, ad alterum si eatur. Ne tamen statim responderem, poscebat. Velle aiebat, cum fratre dispicere de certo editionis tempore. Eam esse magnitudinem, ac dignitatem tuam, ut etiam apud cessatorem hunc, eximius esse debeas. Multa igitur aliorum dilaturum, partim in tuæ spem gratiæ, partim ne sibi minus, quam publico incommodet: sed nimis hæc verbosè apud tam occupatum. Ad Tacitum venio, quem & ipsum cum tuis castigationibus, ac notis edere paratissimum se ait: sed pro multitudine harum, vel paucitate statuere debere de forma operis; utrum ea angusta esse debeat, an ejusmodi, quæ circumferri possit, vel media aliqua. Adfuit mihi his diebus, frater germanus, Optimi, & Clarissimi Skickardi: literas ejus prælegit, de misero, & suo, & Germaniæ statu. Utinam Ultrajectini de eo cogitent? Horum Illustris Schola in Academiam convertetur: cujus inauguratio erit triduo à Paschate. Non desinam commendare. Sed raro eorum ratio habetur, qui tam longè absunt, nec nisi aliena commendatione innotescunt. De Berneggero idem & feci, & faciam porro. In Centuriones Nauticos, qui tribus circiter mensibus, Hagæ in carcere fuerint detenti; quia tam bellam occasionem perdendi Classem Dynkerkanam neglexissent, hesternum die, qui decimus quintus erat Martii, à delegatis judicibus lata est sententia. Wander-Apt qui Thalassiarum erat, ut fertur, carceri annorum viginti quinque est addictus. Habet tamen non paucos, qui famam ejus tueantur. Codde totidem annos exulaturus. Crachtius, & Sterkius, sexennio erunt extorres. Quod ex publico iis debebatur fisco adjudicatum. Quaskius, & alii absoluti. Filius Petrus Grotius, vita, & industria se nobis, & aliis probat. Quas literas his meis adjunxi hesternum vespero accepi. Quo in genere non soleo procrastinare, quod esse possint de re maximi momenti. Salutem plurimam lectissimæ uxori, & liberis, à me, & meis. *T. J. Voss.*

*Amstelodami,
cl. l. c. xxxvi.
xvii. Mart.*

Cultor nominis tui,

G. J. Vossius.

CCLXXIX.

Merico Casaubono.

Reverende Clarissimeque Casaubone,

Literæ tuæ mihi redditæ incunte Februario, pauloque post à Peisteri procuratore pecunias recepi, quæ ex beneficio Regionis Septembri superioris anni mihi cessarent. Has multo tu ante annumeraras, ut ex literis tuis video. Sed nisi spisse admodum ab hominibus illis peccetur, non soleo cum iis verba commutare. Nunc amice rogandus es, ut quantum in te est, pro veteri affectu erga me, procures, ut prima occasione percipiam pecunias semestris ejus, quod exspiravit mense Martio anni hujus post millesimum sexcentissimum trigessimum sexti; id mihi erit gratissimum. Quod acceptus tibi fuerit labor meus Grammaticus, gaudeo equidem. Uti & quod probes Annales Batavos Filii mei Matthæi. Et sane itidem cordatis & eruditis omnibus impense hic placent. De studiis nostris scribam literis proximis: nam nunc nihil eorum sub prælo; sed excuduntur hic de veterum pictura libri tres affinis mei Francisci Junii, ejus qui in ædibus agit Illustrissimi Comitum Arundelii. Rerum novarum jam hic aut nihil, aut parvi ea momenti, eo excepto quod Scenckianum propugnaculum, inter Rheni & Vahalis fluentia situm, priori æstate insidiis ab hostibus interceptum, undique à nostro sit cinctum milite. Quippe Illustrissimus Princeps Auriacus, ut fama perceperat, nova hostem opera Cliviano in agro qui ultra Vahalem ex adverso jacet, moliri, illico Wilhelmo Nassovio, exercitus, ut vulgo vocant, Marefchalco, in mandatis dedit, ut quotquot militum occulto contrahere posset, quamprimum ad ea hostium conamina impedienda illuc perduceret. Quod gnauiter adeo ab eo factum, ut inopinantibus superveniret, & prius plures eorum fugam quam arma cogitarent. Qui locorum munitis, quæ Infans, ut appellant, Hispaniæ, ad retinendum Scenckianum propugnaculum fieri curarat, fidebant, post aliquot oppugnationes cessare, non exigua ante clade accepta. Solum Ferdinandi propugnaculum, in honorem Cardinalis Ferdinandi sic vocitatum, cæteris opera & natura loci validius hostes retinere, quia ad Tormentorum jactus, qui crebrò ab obsessis fierent, nostri paterent. Hoc tamen simul inclusum nunc cum ipso propugnaculo nostrorum operibus, ita ut brevi urgente rerum penuria potituri illo loco videamur, quo Hollandi, Geldri, ac Ultrajectini

trajectioni carere nequeunt. Quippe com-
mode adeo inde incurfus in hæc ditiones
patet, ut nili mature fatis, cum interciperetur,
alia fuissent opposita propugnacula, magnam
fuerint universi cladem accepturi. Subvenire
nunc suis cogitant hostes. Sed tota adeo militum
furore vastata est Clivia, ut pabulum equi,
victum homines desiderant, quos jam in Gueldra
Civitate equinis non abstinere carnibus nunciatur.
Hocque adeo ex eo evenit, quod Illustrissimi
Ordines quaecunque annonæ genus ex hostico in
hotticum prohiberi vetuerint. Imo & interdictum
ipsis agricolis, ne cibaria nisi unum in diem
coemant, nec amplius quam sustentandæ propriæ
familiæ sit opus. Reperiuntur tamen hic, qui auri
fame insatiabiles, adversum ea nitantur, & occulto
quicquid possunt avehant. Sed illorum jam sex
septemve suspensis, cæteris haud dubie illorum casus
metum incutiet. Ita nunc hic ad cuncta adversa
fortunæ edocti, animadvertere incipiunt. Etiam rei
maritimæ cura ex parte resumpta, & navium
præfectorum aliqui, qui oblata occasione priori
ætate Dunkerkanos non invaserant, aut carceri ad
viginti quinque annos addicti, aut exilio ad certum
tempus pro delicti gravitate multati. Omne verò æs
quod ipsis debebatur ærario inlatum. Quamvis
autem ita hic cuncta armorum strepitu resonant,
non tamen apud multos promovendorum
litteratorum amor cessat. Dordrechtani exemplo
Amstelodamensium, Illustris Gymnasium instituere,
non quidem cum magnificis stipendiis, sed prout
potuit urbs honoratior quam ditior. Idem & factum
ab Ultrajectinis, sed illi consensu ejus loci
Ordinum sexto & vicesimo Martii die ad
Academiæ dignitatem locum suum evexere: facta
Professoribus Doctorum creandorum potestate.
Attamen in eo maximum à cæteris Academiis
differt, quod non suo Rectori, sed ipsis urbis
consulibus studiosi obedire cogantur; imo & illis
immunitates negentur, quas plerumque aliis in
locis habent. De his fatis. Salutem plurimam
optimæ uxori à me & meis omnibus. Item à me
Reverendo D. Decano & optimorum doctissimorumque
Fratrum cæteris.

Amstelodami,
An. c. d. lxxvi.
Kal. Apr. Sc. No.

Tuus tuo merito,

G. J. Vossius.

CCLXXX.

Diderico Vlamingio, Dom. ab Osthorn,
S. P. Hagam Com.

Molestè me habuit, Nob. Amplissimeq;
vir, quod filiorum, natu majoris,
profectus in studiis malignè adeo responderit
votis nostris. Sine circuitione, & ambagibus,
apud virum tam cordatum loquar. Non minus
ille, anno primo, promovisse debuerat, quam
quarto, nunc exacto, contigisse video, doleoque.
Sed factum nequit reddi infectum. Avolavit
irreparabile tempus, optima optimæ ad studia
isthæc ætatis pars. De cætero igitur, quod instat,
agamus, ne iridem dispareat, quod puero
temporis divinæ superest bonitate. A voto ordi-
diar. Utinam suppeteret bonus docendi pueri-
tiam artifex, qui sex septem pares ætate, ac
profectu, honestè etiam eductos, imbueret
Latinæ Linguae atque liberalium artium
primordiis. Huic, citra dubium, etiam ag-
gregandi erant bini liberi tui. Nam in illa
quadragenorum, aut plurium, una in Classe
turba, & eorum quidem tam ingenio, profectu,
moribus, etiam differentium, vix credi potest,
quam minutum sit illud, quod propter sic
divisam Magistrum curam, ad puerorum
singulos redit quotidie. Nec propterea contem-
dero, unum uni committi oportere, quod nonnulli
tentant, sed sæpe infelicitè. Nam præterquam
quod res ea magnorum est sumptuum, abest
æmulatio, quæ studia omnis ætatis, multum
alut, & fovet. Et Linguae præterea melius
addiscuntur allocutione multorum. Medi-
am igitur viam insisti velim. Sed si paucorum
adeo bonum sub bono Doctore consortium
nequeat obtineri, (quippe in quo negotio
plurium parentum constantis sententiæ
conspiratio requiratur) eundem nobis erit,
quo ivere Parens, Avus, Proavus, & ita
porro Majores nostri; hoc est ad Scholas
Classicas quales habemus, si non quales
optamus. Quamquam urbem vestram, non
est quod suarum poeniteat, si cum scholarum
aliis conferantur. Sanè locum etiam hic
habet illud Augusti, Contenti sumus hoc
Catone: vel si sic malis, duobus his
Catonibus. Quare si in alterutram
mitti tuos placet, equidem, quod me
quidem iudice, non leve adeo putandum,
Vossius hic, liberique ejus, in partem
aliquam curæ istius venire sunt paratissimi,
in vestræ spem gratiæ, quos adeo erga me
benevolos, hætenus persensui. Sed ut video,
metus est multorum, ne si liberi sui propè
adeo

adeo absint à Parentibus suis, partim corumpantur indulgentia Matrum, partim etiam consortio consanguineo, aliorumque æqualium familiari usu: qui multos avocat, in urbe hac usque adeo (quæ scilicet civitatum infœlicitas esse solet) luxui dedita. De Heroïna conjugæ tuæ, aliud me sperare suadent prudentes ejus sermones. De iis qui puero noti, ac usu conjuncti, nihil, quia mihi ignoti, dicere habeo. Sed si aliò mittere perstat animus, non displicent Harlemum, ac Hardervicum. Illud quia propinquum, & eadem habet artis Grammaticæ præcepta, & ludi moderator, ab eruditione, & industria commendatur: Hoc vero, quia Gymnasium ejus urbis, jam à multis annis, optimè audit, ac hesternæ etiam die intellexi, ex Isacio Pontano, viro utriusque nostri amantissimo, qui per hanc urbem Ultrajectum, ad generum tendebat, non incumbere istis præceptores partæ olim gloriæ, sed id potius agere, ut augeant hujus nominis decus. Unum morari hoc consilium possit, quod mutare ex parte Grammaticen cogeretur; sed enim non usque adeo variant, Batavica, & Hardervicensia præcepta. Utraque enim Grammatica ex Lithocomo profluxit, etsi emendatores non eandem ubique insistant viam. Præterea parum adeo est, quod in Grammaticis didicit filius, ut non multum necesse habeat dediscere. Sanè examini intererant Cognati tui, Arlandervenæ Dominus, & Bronchorstius. Non præteritorum, & supinorum, doctrinam norat: quin nec satis callebat primam Grammatices pagellam. Utrum autem parum expediat, eum vivere, cum Diesthio Theologo, an Acronio Ludimagistro, difficile dixerim. Utrumque commendabat noster Pontanus; de Diesthio addebat, solere eum habere, in convictu, qui illustrem scholam frequentarent. In his negotium ei non optimè successisse. Præferre igitur ætate ac profectu minores, qui facilius illi morem gerant. Fufius ista scripsi, ut eo facilius certi aliquid statuere possis. Nec enim leve est negotium carissimorum pignorum, ubi de paranda agitur virtute, & doctrina. Moram diuturnam in deliberando non finit ætas puero procedens. Non minutum est, sic, culpa Magistri, nequequam periisse tibi aurum, & impensas; sed longè majus periisse sic puero, auro magis aureum tempus. Tanto magis curandum, ut damni, quod factum, industria refarciatur; scribebam ista occupatissimus, ad occupatissimum: sed loquaciorem fecit amor tui, tuorumque.

Amstelodami,
clō Ioc xxxvi,
12 Aprilis.

Addiſſimus tibi
tuo merito,
G. J. Vossius.

CCLXXXI.

Constantino Huygenio.

CUM nulli eorum, Nobilissime Huygeni, tuas qui virtutes singulares suo sciant pretio æstimare, cedere hac parte sum paratus: plurimum tamen (cur diffitear?) vereor, ne interdum sic de me cogites: O hominem rusticum, qui nec geminis literis meis tam amicis, ab tam longo tempore scriptis, responderit hætenus? Hic si inter homines elegantiores vivere sciret, non ne minutum quid ab studiis, vel occupationibus, subsecaret, quo non avaris ejus temporis, leviter saltem satisfaceret? Equidem si alius sic mecum ageret, vir præstantissime, facile in has cogitationes venirem. Eo justius suspiciones tuas formido: quas minimè extimescerem, si satis me tibi notum arbitrarer. Noffes enim viæ hoc meæ genus, quod me invitum licet, in hos quasi scopulos crebro illidit, adeo ut mihi prope solemne sit peccare adversus omnes, in epistolari hoc officio. Tam multi mihi hætenus veniam dedere, ut facilem etiam mihi, apud hominem tam intelligentem, veniam fore sperem. Neque alia nunc excusatione utar. Quod labores nostros sic prædicas, rem magis te dignam, quam meritis nostris facis. Habent commentationes meæ, quod se jactent laudibus tuis. Non quidem eas scripserim rudis ab eruditione; sed vix sperare ausus eram, ejus doctrinæ, ac loci hominem, se dimissurum in hæc Grammatices sententia. Et propterea diligentior fueram, in annotandis rerum fastigiis, quo doctiores ista saltem lustrarint, oculo fugitivo. Cogitabam mecum illud Bilbilici vatis;

*Lemmata qui quaris, cur sint adscripta, docebo.
Ut si malueris, Lemmata sola legas.*

Sed ut video, opinione melius mihi apud te labor hic processit. Atque idem de quibusdam aliis summis viris dissimulare non possum. Utinam de omnibus etiam amantibus nostri, dicere idem liceat. Nempe argumentum his displicet. Nec dissentent, magnum illum Hipponensem Præsulem olim Grammaticen scripsisse: sciunt & togatorum doctissimum, & ipsum Julium Cæsarem, virum bellica laude tam illustrem, de Analogia libros reliquisse; & quidquid de Augusto, Claudio, cæterisque afferro, sibi quoque probè perspectum aiunt. At negant me ingravescente hac ætate, eaque de me hominum expectatione, ad minutias hæc, etsi non incuriosè tractatas, descendere debuisse. Rem magis me dignam, fore magis etiam utilem Ecclesiæ

Ecclesiæ, si animo nulli affectui mancipato, eruere adlaborem antiquitates Ecclesiasticas, multis adhuc tenebris involutas. Et sane hoc studium fuit à prima adolescentia. Nec quidquam præter temporum iniquitatem paulum inde abstraxit. Multa quoque in hoc genere, vel confecta jam habeo, vel affecta. Eo majori voluptate redeo nunc ad studia meliora, quæ magis placitura confido, & tibi, & aliis itidem bonis. Gravioribus istis lassus fortasse iterum revertar ad eruditionis semen- tim, ad nuces. Non tamen ex cique reddar avis fera, ut domum redire obliviscar. Nisi fortasse, ante me longus corripit somnus. Quippe jam annum pulso sexagesimum, ut vitæ non ita multum superesse videatur; sed hæc curæ erunt Imperatori summo, qui ubi è statione hac nostra avocabit, læti ad meliores sedes avolabimus. Pertæsi etiam ineptiarum, quibus sese, & alios discruciant, erudituli nostri nihilo sæpè amantiores bonæ mentis, quam infrunitum vulgus, cui facilius ignoscas. Pereant studia universa, si nos duntaxat gloriæ præstant animalia, nec ad solidam pietatem, ac prudentiam ducunt. Scio te juxta mecum sapere, Vir Nobilissime, eo- que lubentius hanc querimoniam apud te deposui, non quasi mihi hic quidquam feratur, aut metatur, sed quia me miserescat Ordinis nostri. Sed de isto satis, ne in Epistola hac videar velle rhetoricari. Vale, Nobilissime Huygeni, una cum Heroïna Coniuge, ac familia universa.

Amstelodami,
cl. loc xxxvi.
Id. April.

Additissimus nomi-
ni tuo,

G. J. Vossius.

CCLXXXII.

Ger. Jo. Vossius Joanni Beverovicio,
V. Cl. S. P. D.

INvitus à Colvio (meo an tuo dicam?) divellor, si in candore hoc meo, locum inveniret livor, non possem tamen Dordrechtanis boni quicquam invidere. Attamen si possem, puto, & injurato credes, è sacro Ordine neminem me præoptaturum, Amstelæ urbi præ Colvio hoc: Jure dixerim, Quicum vivere amem; prope etiam porro *παρὰ δαίμονα*, quicum obeam lubens. De honesta illa, & erudita Beverovicii anima, idem cen- seo. Atque hoc par cum sic diligem, merito lætor de amore, quo mutuo vos, & me pariter complectimini, eumque affectum, peren-

nare vobis volo. Pro novo veteris hujus amoris indicio, capio etiam, quod domo transmiseris operis de vitæ termino editio- nem iteratam cum accessione luculenta, quæ me valdè oblectavit. Debebit tibi posteritas quod tot bona ingenia excitâris ad disqui- rendum de hac re. Num placet, qui pomum Eridis, à te jactum prædicant, siquidem est hæc controversia, ex iis, in quibus liceat dis- sentire; dummodo nec Deo adimatur futu- rorum contingentium præscientia: nec homini, arbitrii sui libertas: quorum prius qui facit, Dei, qui alterum, hominis destruit naturam. Quomodo tamen hæc duo, & in isto, quod sub manibus habes, & in cæteris negotiis conspirent, non cuivis promptum est dicere. Quare istoc sanè ventilent homines acuti. Nos interea laboribus eorum suaviter fruemur, eoque avidius iis pascemus ani- mum, quia tuo, hoc est amicitii hominis, epulo excipimur. Scias vero, nulla à te fer- cula apponi, quæ magis sint ad gustum me- um, quam ubi video minimum recedi à sancto vetustatis choro, *αὐθεντικός ἐν ἰδοσυνήτοις* jubeo sibi habere res suas. Mihi quibus anti- quitas desipit, parum ipsi sapere videntur. Responsum debeo consanguineo meo Some- rio, Collegæ tuo optimo & doctissimo; sed dabo operam propediem, ut me exolvem. Salutabis meo nomine, plurimum, ante om- nes vero, lectissimam uxorem tuam.

Amstelodami,
cl. loc xxxvi.
7. Kal. Maias.

CCLXXXIII.

Ludovico Crocio S. P. Bremam.

DIC bona fide, doctissime, & quod ma- joris ego facio, mi optime Croci, utrum miraris magis, quod tuis, & præstantissimi Willii literis compluribus, vir ego haud ma- lus, & vestri utriusque amicus non è mul- tis, non unius anni spatio neglexerim respon- dere: an quod nunc post cessationem vestram spontè, nullo etiam oblato scribendi argu- mento, Epistolam hanc mittam? Quid im- pulerit quæres; nempe non aliud, quam, quod cogitarem, non (venia sit verbo) ma- tula solum, ut in veteri dicto est, sed incuriæ etiam modum esse oportere. Nec enim ami- citiæ fiduciâ, semper licet esse negligenti. Vides, ut negligentiam ipse hoc appellem, sed hoc cum facio, nulli injurius sum præ- terquam mihi. Utcumque enim alius, in- curiam

curiam hoc duxerit, robè tamen mihi conficius sum, nullius minus me fuisse (eorum dico, qui aliquid apud me possunt) quàm mei ipsius, idque jam à biennio, aut triennio. A mane ad vespèram salutor, compellor, distineor, ab nonnullis, commodo, & meo, & publico, à pluribus dispendio, & meo, & Reipublicæ Literariæ, cui non possum præstare, quod volo, & à multis annis pollicitus sum; sed utcumque videar incuriosus in amicorum rebus, quia non facile rescribam, nihil tamen me industrium magis, in iis exequendis quæ postulor. Spero neuter vestri conqueretur usquam, claudicasse affectum meum, in illis promovendis, quos commendassetis. Non tamen scilicet unquam successit, quàm in Heilerlichio. Eum confestim deduxi in ædes amplissimi Michaelis Pauwii, quem virum noris scio, partim ex Parente Consule, magni nominis, temporibus Synodi Dordrechtanæ, partim ex fratre Legato nunc, ab illustrissimis, federatæ Belgicæ Ordinibus, ad Christianissimum Regem. Multum profecto vestri amborum literis commendatitiis debet. Nam absque illis esset, non in eam dixi domum venisset; unde auspicio præfectus curæ, & institutioni filii, quem unicuique habet illustrissimus Arausionensis Princeps. Spero maiores eum honores manere paulatim, quam ipse existimet; dummodo is porro erit, qui fuit, & fortuna semper sua rectè uti sciat. Nunc eo, quo Heilerlichius ante, munere fungitur Gronovius, non sacris quidem, sed literarum tamen studiis, Heilerlichio superior: nam bono iudicio, ut de industria taceam, in optimis quibusque Latii, ac Græciæ scriptoribus est versatus. Quod propediem fortasse testabuntur Criticarum Observationum Libri, quorum partem vidi pariter ac probavi. Magna omnino, & pulchra nobis, ab hoc ingenio speramus; sed ecce jam Bibliopola vester adest, cui has literas tradi oportet. Quare abrumpam; salutem dicēs plurimam Doctori Willio, quem talem hic comperi, ut non possim non amare; sed & eruditissimo Cochio, cujus monumenta sic salivam mihi movent, ut in iis illum reponam, qui magnum ab eruditis, ac imprimis à posteris, pretium sint relaturi, nec æquè aliquod desiderem, quam ut pergat sic de studiis mereri. Et quid impedit quo minus salutem etiam adscribam Clarissimo Bergio? Viro raris virtutibus; sed mihi illum, quàm maximè commendat, quod intelligo, antiquitatis eum esse admodum amantem, nec tristibus hisce temporibus, affectu, sed pretio sui omnia æstimare. Te quoque sic animatum scio; planèque confido, nunquam te in hoc Ecclesiæ Schismate,

pacis, & concordie studium velle deponere. Vale.

Amstelodami,
vi. Id. Jun.

Tuus & Collegarum tuorum ex animo amicus,
G. J. Vossius.

CCLXXXIV.

Ad honoratissimum & reverendissimum in Christo Patrem Guilielmum Episc. Londin. & Magnum Angliæ Thesaurarium.

Reverendissime in Christo Pater, honoratissime Domine,

Quod Thesauris te suis præfectum voluerit Serenissimus Dominus optimus Regum Carolus, id ingenti me gaudio persudit. Solum dolet tarde adeo id pervenisse ad aures meas. Absque doctissimo & amicissimo Goffio esset, nunc etiam nescirem. Sed aiunt post longiusculum etiam intervallum gratulandi officium non solere esse ingratum. Quod ante igitur fecisse mallet, id nunc demum serius, quidem nec tamen serio minus facio, tantamque honoris acceptionem fortunare volo non tibi modo tuisque, sed cum Ecclesiæ tum Regno Angliæ universo. Atque ita fore auguror, siue spectem tum tuam pietatem, tum prudentiam, industriam, fidem, quibus in tractandis pecuniis Regiis opus est: live etiam cogitem cujus rei ex quo primo in Britannia pedem posui, ignarus esse non potui, quanta tibi conjunctione animorum sit cum heroe illo Reverendissimo & Illustrissimo Domino Guilielmo Archiepiscopo Cantuariensi. Hæc spem faciunt optimam, si minus ferrea hac ætate prorsus aureum redire Ecclesiæ seculum possit, habituros nos tamen tale, quod ab aureo propius absit. Quocirca non desinam una cum meis assidue preces funditare ad Deum boni omnis fontem, ut tum serenissimo & augustissimo Regi meo Carolo, tum toti familiæ Regiæ, tum utrique etiam vestri, tam nobili pari, ac porro aliis Ecclesiæ ac Regni antistitibus ad res Britannicas feliciter moderandas longam & prosperam vitam conservet.

Amstelodami,
clo hoc xxxvi.
v. Kal. Sextil.
St. Ver.

Reverendissimi & Honoratissimi
nominis tui cultor devotus,

G. J. Vossius.

CCLXXXV.

CCLXXXV.

Fortunato Plemptio.

Lovanium.

Nescio, Clarissime Plempti, utrum magis meis debeam occupationibus succedere, an potius moribus meis, hominis, (nec diffiteor) tardissimi in officio Epistolari. Absque utroque horum esset, egone nihil hactenus respondissem Plemptio? Viro tam suavis indolis, tam raræ doctrinæ, ejus etiam in Rep. literaria dignitatis? Quod si magnam aliis in humanitate tua, mihi & perspectissima, fiduciam haberem, post tantam cessationem, deinceps quoque à scribendo abstinere, tantum, quia putarem, serum esse officium hoc, teque aliorum esse similem, qui contemptum hoc sui interpretantes, plumbeas idcirco iras gererent. Sed mihi negotium cum Batavo, qui nunquam exuet simplices ac candidos suæ gentis mores. Ac talem se semper, mihi, & amicis, quos hic magno numero habes, exoptem. Videor mihi bellè satis negotium meum egisse, sic me excusando. Sed solusne Plemptius candidus, in Vossio candor desideretur? Ne Deus sirit. Quare, ne, non dico alius in me, sed ipse candorem desiderem meum, cogor aliud apud te apertè promere, cur alteris literis tuis non responderim. Verbo dicam, puduit. Cur verò inquires? Meministi argumenti? Erat id de furore nostrorum in Thenensi oppido. Vix de eo scribere nunc sustinet animus. Ubi horribilis ille nuntius aures meas perculit primò, nihil fortunatum nobis speravi, usque dum supplicibus votis, & seria delicti poenitudine, Deum nobis propitium reddidissemus. Nec sanè vel me, vel alios similiter animatos, opinio fefellit. Scis ipse, quæ sint consecuta, & melius longè nobis. Nec tibi, vel ullis, in Brabantia, magis ægre est, tam crudeliter (Scapham dixero Scapham) actum esse Tinnis, quam Vossio, & amicorum aliis. Nobis, nobis, ea res maximè detrimenti fuit. Nec tam Batavorum tuorum hic culpa, quam Gallorum. Scio ut plerumque, quando res fecius cadit, alter alteri impingere soleat culpam. Attamen exploratum mihi, prope omnem hic Gallis culpam tribui debere. Et tu, credo, nunc in eadem es sententia. Non quasi diffiteri velim fortasse, & gentis tuæ sex septem, vel plures, etiam, si sic velis, Gallis fuisse immixtos. Etiam Bataviam scio habere, qui facile alieno, etsi pessimo, rapiantur exemplo. Ad Principem quod attinet, si pietas non absterruisset, saltem gloriæ studium, principibus omnibus innatum, non sivilisse, sic licentiam Gallicam

graffari, modò in furore illo, ullus fuisset, vel rationi, vel authoritati, relictus locus, locumque non potius habuisset Poetæ illud;

Fertur equis antriga, neque audit curvus habenas.

Necdum placere arbitror, ut filum abrum-pam, sed velle, ut aliquid addam de opere Cl. Fromondi, quo me, quo amicorum alios, summus vir donavit. Nisi mihi tecum homine tam candido, & cui tamen candore nolim cedere, sermo foret, silentii tam longi, quam tamen nunc dicam, reticerem causam. Ipse non abhorreo ab Origani opinione; quam satis probabilem, etiam judicavi; priusquam aliquid Origani vidissem. Non tamen, ut alteram, Ptolemaicam dico, opinionem respuam. Scis quam difficulter à me impetrem, ut aliquid improbem, quod majorum comprobavit autoritas. In sacris sanè nunquam ab iis recedam, quæ consensu Ecclesiæ Veteris comprobantur. Hic aliquanto alia ratio: Accedit quod tot Antiquis, ante Aristotelem, longè alia mens fuit. Et tamen Ptolemæi opinionem haudquaquam damno: solum existimo esse hoc, inter Naturæ occulta, ac posse inter homines eruditos, de negotio illo disquiri. Vis, & aliam silentii mei causam? Is qui adversus doctissimum Fromondum sentiat, Hortensius est, Collega mihi in urbe tua patria conjunctissimus. Scis quæ hac de re scripserit: quædam scio affectu juvenili, sed magis magisque judicium crescit; ut si res integra foret, eadem fortasse, aliter tamen fuerit dicturus. Interea multum pro dono debeo Fromondo: Legi lubenter, & legisse juvit, & perstat animus, quem sæpius apud te aperui; virum esse qui inter sæculi nostri Principes doctrinarum debeat reponi: planèque animo meo ægre est, quod desinat vos beare, tam multis, quorum spem, in prioribus Reip. literariæ fecit. Hæc ego recens à funere veniens, charitæ subito mandabam, metu, ne si ultra differrem scribendi munus, tandem obrepere, etiam amicissimo homini, posset opinio, quasi non idem absens forem, qui coram eram. Tu verò contra sic habe, clarissime, & amicissime Plempti, me præclaras animi tui dotes, non amare solum & æstimare; sed etiam venerari, ac porro veneraturum semper, dum memor ipse mei, dum spiritus hos reget artus. Salutem, si occasio erit, clarissimo Puteano dices; de filio cujus nosse aveo, an jam è Sarmatia fuerit reversus: Nam nihil à sex septem mensibus de eo cognovi; ita ut interdum meream, ne quid ei in itinere humanitus evenierit. Si molestum non erit, vel ad me, vel ad Stapelium, tribus de eo verbis, perscribes. Eximio etiam

tiam sæculi hujus ornamento Tuldeno, salutem meo nemine impertias; sed & summo viro Fromondo.

Amstelodami,
c1o Idc xxxvi.
iii. Eid. Sext.

Tuus totus,

G. J. Vossius.

CCLXXXVI.

Joanni Meursio S. P.

Nunc demum forte territus Literis tuis, excudere omnia tua Blauwius cœpit. Mavult enim cuncta, quam solum hætenus inedita. Et sic expedit literarum studiis, ut uno & altero volumine, vel tertio etiam, contineantur, quæ Vir illo ingenio, doctrina, industria bono elaborasti publico. Nihil inquires fraudis latet? Nam quid si cessit, ubi meus ille qui has literas defert, decesserit? Non hoc scriberem nisi tam scæva cogitatio mihi quoque in mentem venisset. Certo tamen habeam jam orfos tua. Uti & filii Maimonidem toto itidem triennio post ambitus & promissa neglectum. Grotiana itidem promissa necdum cœpit: & non minus *ne* Grotium morum istiusmodi quam te pœnitet. Quibus sim moribus, nisi satis haberes perspectum, hinc videres, quod magis amicorum res urgeam quam meas. Nam cum tam multa habeam parata, quid mei suscepit? sed ubi hinc in Grotianis, inde, quæ prævertent tuis & filii paulum promoverit, de meis loquar, vel alteri Janfonio, vel Henrico Laurentio, negotium committam. Noli putare te si coram adestes plus in hoc negotio, quam me posse, qui te fratris loco diligo, & si haud nimium, plus tamen aliis apud Blauwium valeo. Sed non obscure video cur primitus plus receperit, quam possit. Videor mihi videre post damnum ex æmulo vicino, post sumptus ex nupero filii conjugio, post tot annis coacervatas tot codicum editiones quarum pleræque non satis vendibiles, paulo ad rem factum attentioem, & ut sic dixerim sub omni lapide scorpionum, hoc est damnum, metuere. Magna pars Librorum ejus his duabus hebdomadis publica auctione est distracta. Multi libri minoris venditi quam ipse excuderat: & non hoc meticulosum hominem reddere possit? De tuis tamen Viri Orbe universo celeberrimi meliorem majoremque spem semper habere jussi. Nec magnopere hic mihi Suada opus qui id satis per se videt. Solum terret malus vicinus; sed jam persuasi nihil in tanti moliminis opere ausurum. Fore ut revereatur utrumque nostrum.

Spero itaque paucissimas intra hebdomadas te aliqua visurum tui. Nec magis decipi possum toties deceptus quam si nunc decipiar. Salmasius necdum è Galliis reversus. Grandes ei honores offeruntur in Galliis; sed videt non semper præstari, quidquid promittitur: nec tanti sunt æmuli ut eo non redeat ad nos. Scripsit adversus Grotium Seldenus de mari libero. Rescribit illustrium Ordinum mandato Grafwinckelius J. C. Hagenfis, quondum meus Leidæ convictor, natus, si forte sic magis noris, ex Basia sorore Basii rationalis cameræ præfecti. Comes Mauritius ad Indos Orientales abiturus gubernator futurus eorum locorum. Vides quam illustres heroes nunc eum locum sint obtenturi quam antea: nolo addere cætera. Scis me dicere, non quidem terræ filios, attamen nihil qui forent ad tantam profapiam. Deus faxit ut bono sit Reip. nostræ. Pauwius Hollandiæ Syndicus & in Gallias ante biennium circiter legatus quotidie expectatur; sed in Syndici munere ei suffectus Catzius Dordrechtanus Syndicus. Ipse fungetur munere, quod in rationali camera obtinuit prius. Fortasse Syndicus hujus urbis Borelius Venetiæ iturus legatus revocato Domino de Lier; saltem honos is ei oblat; sed an uxor assensura sit, non satis constat. Nec enim aliquid invita hac velit. Deus Opt. Max. diutissime te tuis, nobis, imprimis publico conservet. Optimæ tuæ Uxori Conjux mea salutem, filiæ filia, omnes nos omnibus vobis. Etiam CLL. VV. Laurembergjo & Stephanio & cæteris porro Collegis plurimam dicito salutem. Raptim, ut soleo.

Amstelodami,
c1o Idc xxxvi.
Postr. Idus
Sext. St. Nov.

Tuus æternum,

G. J. Vossius.

CCLXXXVII.

Guilielmo Archiepiscopo Cantuariensi.

Reverendissime in Christo Pater, Domine Illustrissime,

Usum opera mea, an abusum Calandrinum dicam, propè hæreo incertus. Saltem facile mihi persuadere sinam, egisse illum magis negotium suum, quam serenissimi Regis. Negat ille quidem suum abs Regio posse divelli, de quo quid sit nescio: sed vellem, cum operam meam postularet, candide magis aperuisset, quorsum istæ tenderent. Sed ipsi porro viderint; nec enim mihi scriitur, qui Calandrinis nec teruncium acceptum unquam

unquam tui. Sed illos potius ob summam facilitatem in commendando, habeo debendi reos. Interea dolet, quod in rebus nihil ad me pertinentibus molestiam tibi, illustrissime Domine, pepererim: quod fateor, verè est in Ecclesiæ imò & Regni negotia peccare.

Tandem Typographus aggressus est filii Maimonidem de Idololatria. Deinceps omnia spero liquidiora. Ne solitarius prodat, addam ei comitem de eodem argumento Dissertationem nostram. Qua ex opera nostra spero lucis non parum capere posse veteres cum τὸ ἔξωθεν, tum imprimis Ecclesiæ Scriptores. Dum cætera majoris operæ molior, si sic illustrissimo nomini etiam tuo videatur, publici juris faciam, duos de Baptismo Libros: de quibus memini me ante aliquot annos scribere. Prior majori ex parte antea editus, alter de Ritibus nunc demum proditurus. Absolvi & tripartitum opus de Symbolo Apostolico, Athanasiano & Constantinopolitano. In quo præter alia, de eorum Auctoribus, & additione Constantinopolitano facta. Operosior labor de temporibus Hebræorum usque ad capta à Tito Hierosolyma. Hic ut de cæteris, ita & de LXX. Danielis Hebdomadis differo. Quem & ipsum spero intra annum hunc lucem videre posse. Nisi prævertat labor alius, & sæculo hoc utilis de Controversiis inter Latinam Græcamque Ecclesiam. Atque in his propè omaibus crebra mihi sed modesta cum Baronio Dissertatio; ut grandioris operis sint quædam quasi *συντομία* ac segmenta.

Cætera me spectantia, ubi otii tantum erit, cognosces ex optimo doctissimoque Goffio: cujus ego candorem ac pietatem magis magisque amo & æstimo. Nec facile satis prædicavero in eo, ut antiquitatis, ita rerum omnium præclaram cognoscendi ardorem. Quæ ejus modestia est, sperabat hac etiam parte ex conversatione nobiscum aliquid suis studiis incrementum. Eoque etli perhonestè adeò à nobilibus & summatibus viris hic haberetur, ægrè tamen divellebatur; sed qui suus non esset, alienis posthabere propria debuit commoda.

Propitium numen Reverendissime & Illustrissime Domine, longævam tibi & prosperam vitam largiatur.

Amstelodami,
clō 16c xxxvi.
Kal. Sextil.
St. Vet.

Reverendissimi Illustrissimique
nominis tui. Client
devotissimus,

*Ignoscendum, Amice Lector,
exscriptoris incuriæ. qua fit ut
sequens Epistola (sc. in tem-
pore prior) loco cedit supersori.*

CCLXXXVIII.

Guilielmo Archiepiscopo Cantuariensi.

Reverendissime in Christo Pater, Dom. Illustriss.

ADfuit mihi hesternâ die vir honestus, nec dignitati tuæ ignotus, Philippus Calandrinus; quem tum patruelis suus comitabatur, tum aliter vir ut virtute, ita literis cultissimus, mihiq; perfamiliaris. Eorum uterque Calandrininaum mihi negotium esse commendatissimum exoptabat. Referebat vero Calandrinus, ut valdè cupiat suas literas in manus Augustissimi Regis Caroli pervenire: eoq; id desiderare impensius, quia ignarus sit, utrum priores, quas magnatibus aliquibus misit, reddita sint. Ex eodem intelligo, hoc in mandatis habere, ut monilia Regia quæ terris hisce sunt, majestati Augustæ restituantur. Sed incassum se ait laborare, frustra que etiam operam de hinc insumpturum, dum sic sunt Burlamachii res, nec eas hic pecunias recipit, de quibus ad Augustissimum Regem scribit. Necesse igitur est, ut ea summa de illa Burlamachiana detrahatur, posteaque cedat in solutionem vel imminutionem pecuniæ quæ Burlamachio numeranda sit à serenissimo Rege. Agitur res non Calandrini modò, quem auxilio dignissimum omnes arbitrantur; sed etiam ornatissimi adfinis ejus, viri à multis annis mihi cogniti, quem ob virtutem ab omnibus prædicari & æstimari semper intellexi. Imo agitur negotium Regiæ ipsius Majestatis, cujus monilia se restituere posse Calandrinus desperat, nisi precibus suis apud serenissimum Regem relictus sit locus. Intelligo Calandrinum, non ignaro te, Reverendissime & Illustrissime Domine, in Bataviam ad expediendum, Regium negotium profectum esse. Ac video eo plus præsidii collocare in bonitate & prudentia tua heroica, ne pariter mala gratia sit apud optimum omnium Regum; simulque in sui ac familiæ in gravem incidat probrosamque ruinam. Equidem fateor me his argumentis compulsus esse, ut has ad te, illustrissime Domine, literas darem, measque etiam preces sociarem, quo facilius Calandrinus, voti sui apud serenissimum Regem compos fiat. Res est Deo acceptissima, erigere afflictos, tuæque id eximie dignitati consuetudine diu jam in naturam vertit: quod tot beneficiis maximis ipse obstrictissimus facilius certiusque possum prædicare. Neque in hoc negotio Calandrino solum auxiliares præbebis manus, vel etiam affini ejus: sed multos quoque sanguine ipso, vel affinitate iis junctos (in quibus & aliqui studiis & scriptis clarissimi) æternum inclito Regi Regnoque ac illustrissimo nomini

P p

nomini tuo obstringes. Omnes pariter oramus, ut Deus Opt. Max. serenissimam Majestatem Regiam, ac pariter te, Reverendissime atque Illustrissime Domine, Magnæ Britanniae Regnis ac Ecclesiae suae permultos in annos conservet, salvos & incolumes.

Amstelodami,
cło Ioc xxxvi.
viii Kal. Jun.
St. Vet.

Illustrissimi & Reverendissimi nominis tui devotissimus pariter ac devotissimus Cultor,

G. J. Vossius.

Iustum quia hasce literas argumentum complecti putarem, nihil nunc quidem, quod proximis fiet, de rebus meis particulatim perscribo; præterquam Reverendissimæ dignitatis tuæ literas probe mihi redditas, & infinitum debere quod ea cura, in ea dignitate, in illis occupationibus, mihi tantillo rescribere non fueris gravatus.

CCLXXXIX.

Guilhelmo *Archiepiscopo* Cantuariensi.

Reverendissime in Christo Pater, Dom. Illustriss. **M**IHI gaudeo, Britanniae gratulor, Deo gratias ago, de immissa animo tuo cogitatione sanctissima revocandi juris ejus, quo Reverendissimi Cantuariensis Præsules jam ab antiquis temporibus in lustrandis Regni Anglici Academiis uti frui solent. Sane non corpora solum nostra fluxa ac fragilia sunt, sed humana etiam instituta, licet optima, facile per incuriam in pejus vergunt. Eoque ad retinendum grande illud disciplinae bonum nihil exoptatius à Deo & Rege potuit evenire, quam ut priscum jus tanto præsuli restitueretur, per eum potissimum labantibus moribus obviam eatur, cui ut sacrorum sic morum bonorum præcipue cura incumbit, quique sic sanctimoniam ab illis exigere sciat, ut eadem præcedat cæteros. Sunt quidem florentissimæ Academiae ambæ: sed cura tua deinceps se vincent, ac pulchriores pulchrioresque semper exurgent. Quod bonum suum sapientissimi quique per se sine dubio vident, ac magis & magis intelligent, nec solum nostra ætas, sed posteritas etiam, ut sui temporis emendatori gratias propterea semper agat. Primus qui me jucundissimo hoc negotio lætissimus ipse perfudit, optimus & doctissimus Gostius noster fuit. Is aliquamdiu studiorum ergo hac in urbe egit, ac me usus perfamiliariter; quia, quæ viri modestia est, arbitraretur, studia etiam sua ex nobis aliquid posse capere incrementi. Gaudeo me incidisse in amicum tam amantem bonæ mentis, & de quo non possim non optima quæq; mihi augurari.

Amstelodami cło Ioc xxxv.
Pr. Non. Sext. St. Vet.

CCXC.

Ger. Jo. Vossius, Arnoldo Ticmanno
suo S. P.

QUI has literas defert, optime & Doctissime Ticmanne, is est D. Jacobus Hintzerus exul Palatinus; sed dum patriæ res florebant, in Heidelbergensi diocetesi Ecclesiastes: eum mihi, postulato patris, commendavit, vir eruditus & scriptis magis magisque inclarescens Daniel Paræus. Quem si non ob eruditionem & probitatem inligentem multum amarem, amarem tamen ob summum erga me affectum. Nam suum mihi Lucretium, quem egregiis notis ornatum ivit, consecravit. Filius est Philippi Paræi, cujus tot scripta in humanitatis studiis habemus. Ejus Terentium ac Plautum, ut cætera taceam, visos tibi arbitror. Hic eundem magnopere commendavit nonnullis in urbe nostra. Avus est magnus ille Germaniæ Theologus David Paræus, de quo satius tacere quam pauca dicere. Hæc de Paræis, ut scias, à qua familia compluribus in urbe hac Hintzerus noster commendari meruerit. Equidem comperi ipse, virum esse ut integrum & probum, ita egregie doctum; accedit quod honeste natus, honestis etiam familiis per uxorem innexus. Uti illa Antoniorum, quæ tot egregii nominis Jurisconsultos habet. Illum Franckeræ juris doctorem ac professorem, tota Germania inclytum (is Patruus est uxoris Hintzerianæ) ejus filium Collegam D. Gomari: item alium Professorem Cassellensem. Adhæc Doct. Reisenbergium, qui & ipse juris Professor Franckeræ. Etiam Sohnius, magni nominis, ut scis Theologus, hanc familiam attingit. Sed quid exuli profapia prodest? Quid eruditio? Quid virtus? Quamdiu cessant omnes ejus curam habere. Quod scio non sit malevolentia: sed ob exulum copiam. Tamen hic melioris notæ. Qui saltem sine aliquo liberalitatis indicio, ab Ecclesia dimitti non debet. Præit Amstelodamentis, diuor fortasse illa quam vestra: sed neque veltra, ut puto, exhausta. Non soleo ego sic alios commendare. Sed viri amor, & Paræanæ domus postulatum, hoc ut facerem, fecerunt. Scito, siquid feceritis benigne, optime id iri locatum. Diu est, quod te non vidi. Videre autem desidero. Amo enim virtutem & integritatem tuam, quam à puero perpexi. Amo etiam eruditionem non vulgarem. Tanto Deum impensius rogo, ut tibi tuæque familiæ bene faxit. Salutem dices Collegis, iis imprimis, quibus

quibus me notum carumque scies. Sed & Emilio nostro, viro longe majoris doctrinæ, quam vulgo putant.

Amstelodami, iii. Kal.
Sept. raptim.

CCXCI.

Ludovico Crocio *Theologo* S. P.
Bremam

SIC hætenus in animum induxi meum, Clarissime Croci, etsi Epistolari officio fortasse ab aliis vincerer his terris; non tamen à quoquam superari amore tui. Nam si quis alius videbar, eo te pretio æstimare, quo dignum erat summis virtutibus tuis. At postquam, quos proximè de Theologia labores, juris fecisti publici, versare per otium coepi; etsi maximi semper fecerim, cogor tamen non paulo te sublimiori loco collocare. Itaque me ipsum culpo, qui dum animus meus tam multis distrahitur, amicum non coluerim uti debui. Nisi fortasse nunc te ipsum hic superâris. Quod si est, non video quomodo culpari meritò possim. Utcumque est, gratulor Ecclesiæ Dei, ac Germaniæ imprimis vestræ, quod te habeat, Deumque oro, ut diu te sospitem conservet. Atque id quidem eo justius facio, quia magno dolore conspicio, tam in arctas copias cogi, qui benè de Ecclesia, non possint minus quam velint. Cum gemitu sæpè mecum considerans statum Ecclesiarum nostrarum, dico, *fuius Troes*. Tu & pauci similes tui, quos ut aurei sæculi reliquias colo, sistere debetis exitium, quod minatur nobis, sol dioris doctrinæ odium, aut contemptus. De me quidem ita habe, posse me concoquere malignitatem sæculi, eorum imprimis, qui esse malunt imperiti, quam videri: paulo minus istorum, qui non eruditioni modo, sed virtuti etiam bellum indixerunt. Etsi verò perjucundum mihi fuit, per se legere, doctum, & laboriosum opus tuum; tamen aliquid voluptatis inde etiam accessit, quod Vossius tuus inter summos viros, quos celebras,

Se quoque Principibus permistum agnovit Achivis.

Excuditor nunc Dionysii mei *τὸ μαγείρεν*, Maimonides, de Idololatria, Latine redditus, & notis illustratus. Comitem dabo dissertationem nostram luculentam de eodem argumento; maximè de gentium cultu. Mittam *ἀντίθετον*, ubi prodierint: uti & Cl.

Cochio. Quem virum intelligo Franekeram, à vobis advocari. Credo non dimitteretis, si fortunæ essent Reip. vestræ, quæ olim. Aureo esset inescandus hamo; quod fortasse tempora hæc non sinunt. Virum amo, ac eadem mens erat filii, quod Maimonides ejus luculentis indiciis ostendet. Sum ejus munificentiz obstrictus. Sed operam dabo, ut me exolvam. Collocutus sum cum Bibliopolis nostris, de summi, & amicissimi Martini, heu quondam nostri, Originum libris. Arridet argumentum. Sed prela aliis distinentur, & status Germaniæ, ubi id genus librorum distrahi solet, tardiores nunc facit. Magnam pacis spem faciunt aliqui. Majori commodo hærendum excudatur, si ea affulerit. Sed tamen ulterius etiam tentabo, quid possim. Nihil enim laboris recusem, propter liberos ejus viri, quem mortuum etiam amare nunquam desinam. Vale. Plurimam salutem V. V. Cl. dicito, Bergio, Willisio, Cochio, Cabeliawio.

Amstelodami, cl. Id. xxxvi.
xi. Kal. Octobris.

CCXCII.

Henrico Ernstio S. P.
Soram Danorum.

VIR eruditissime, & quod non paulo majoris facio, integerrime, credisne me ignorare, mirari te, planèque evenisse, præter opinionem, quod compluribus Epistolis tuis hætenus non responderim? Sed sine dubio, id in optimam partem interpretaberis; si scias, me hoc in vitæ genere non posse, quæ vellem, & propterea in Epistolari officio mirè esse tardum. Egone absque illo esset, non scripsissem, ad Illustrissimum Herodam Roscrantium? Ne Deus sinit, ut ejusmodi moribus essem. Sed undecunque ad me querelæ; quas innocentissimus cogor concoquere, idque Spartana patientia. Nam crede mihi, durum mihi, quod nec aliis, nec mihi ipsi satisfaciam. Tanto tamen majoris te facio, quod nullæ in literis tuis querelæ. Tuæ profecto fuissent justiores, quam aliorum quorundam qui occupationes meas melius nosse debebant. Nisi istæ obstitissent, multa ingenii, & industriæ nostræ monumenta, saltem pro modulo nostro, exarata intra hoc triennium, amici, & literatus orbis vidisset. Schedæ P. Syri tui, sedulo adeo cum Manuscriptis collati à te, pudicè hætenus adservatæ nobis. Utinam quod abitum paranti aiebam,

aiebam, triduum hic persistere licuisset. Confectum habuisses negotium. Tardiorum postea fecit carissimi Dionysii excessus, qui negotium receperat, & ejus iter in Hispaniam, cui dicandum opus videbatur, & moles occupationum, quâ ipse urgebar. Tandem negotii hoc dedi filio Gerardo; qui & binos, ex Bibliotheca mea, codices Manuscriptos, & aliunde alios nactus, aliquot etiam editiones veteres, tibi invisas, strenuè in eo scriptore operam impendit. Planè confido fore, ut intra hanc instantem hyemem, lucem videat, tuâ, & filii gloriâ. Salve eruditissime, & candidissime amice, ac amare nos perge.

Amstelodami,
cId Idc xxxvi.
Prid. Non.
Octobris.

Tuum,

G. J. Vossius.

CCXCIII.

Guilielmo Boswello.

Nobilissime Boswelle,

SCripfit affinis meus Franciscus Junius de Pictura veterum Libros tres sanè eruditos & laboriosos. Eos probantibus illis quorum auctoritas merito apud eum plurimum valet, sacrare cogitat serenissimo Regi ac Domino nostro Carolo. Opere jam excuso sola superest præfatio: quam, priusquam prelo committatur, communicari tecum voluit, ne in sermone ad tantum Monarcham forte verbo offenderit ignarus. Tuo stare & cadere judicio est paratissimus. Scit enim te ut aliarum rerum multarum, ita earum, quæ ad Regum aures pertineant, longe utroque nostri intelligentiorem. Manum ipsam Junii misi, eoque ubi legeris remitti opus erit. Quod si molestum erit perscribere, quid potissimum mutandum existimes, saltem filio meo Francisco, qui Hagæ est advocatus, indicium eorum facere ne refugas. Is facile ad me perscribet. Nuper in proprio, nunc in simili affinis negotio molestiam faceffo. Tanta mihi fiducia est humanitatis & amoris erga me tui. Maimonides de Idololatria jam bonam partem excusus cum translatione & notis filii mei Dionysii ὁ μαθητής. Eo absoluto compluria nostra consequentur: sed gravioris argumenti quam illud illustrissimo Walliæ Principi sacratum. Necdum tamen laboris ejus poenitet. Sed ætas hæc & vitæ etiam genus quod profiteor, nunc postulat majora.

Vale, Nobilissime & Amicissime Boswelle, & cum uxore, quam jamdiu redu-

cem ex Anglia spero, item cum prole sua. viissima. Salve.

Amstelodami cId Idc xxxvi.
iv. Id. Octobris.

• CCXCIV.

Simoni Beaumontio *V. Cl.* Gerardus
Jo. Vossius *S. P. D.*

QUod five viduas pertæsus noctes, five potius curas domesticas, & alia incommoda, quæ solitaria secum vita trahit, ad alteras, vir amplissime, nuptias animum adpuleris, id & jucundum mihi cognitu fuit, & planè ejusmodi, ut tibi, tuis, & quod caput est, Patriæ, foelix, faustumque fore confidam. Hinc rei familiaris sollicitudine levatus, inde & vinulis alloquiis, & melleis amplexibus recreatus, novis viribus exsurgens ad patriam, de qua tot annos præclare adeo mereris, melius meliusque merendum. Sed & amicos tuos..... quod te velle scio, non uno edoctus experimento, quod ex fructu amicitiae tuæ percepi. Hac fiducia, partim sponte mea, partim poscente ita Francisco Filio J. C. non dubitavi has literas exarare, quibus animum tentare tuum, ut cognoscerem ecquo urbi vestræ, magni Alumnæ Erasmi, nec minoris Grotii consiliis nuper nixæ, nunc prudentia nihil minus, quam degeneris Batavi suffultæ, utilis Hagæ esse possit opera forensis filii mei, cujus me antea scis nomen dicere. Equidem velim: quod si est, spero, imo persuasissimum habeo, opera id nos tua posse consequi. Nec enim existimo, ita intra centum Advocatorum numerum, liberum opusculum constringi, ut eum excedere nefas putet. Neque is sum, qui tantoperè commendare illum vellem, nisi perspectam haberem fidem ejus, atque industriam. Quippe scio, non fore, ut te poeniteat unquam operæ impensæ. Et in grata segete beneficium obferetur, si me, si meos benè novi. De meis studiis si quid petis; nunc de Idololatriæ origine, & progressu libros edo. Quos comites do filio, à meo Dionysio ὁ μαθητής, de fonte Hebræo, Latinè reddito, ac notis illustrato. Ubi uterque prodierit, ex primis videbis.

Amstelodami cId Idc xxxvi.
v. Idus Novembris.

CCXCV.

Illustrissimo Chris. Stupesky.

Postquam, Illustrissime Domine, cœleste numen eripuit terris, quem mihi dulcissimum dederat Dionysium, sæpius quidem propositum fuit, literis apud te testari dolorem, quem conceperam: sed mox idem dolor retrahebat, quem sic mihi reficaturus magis videbar. Nec potui facile à me impetrare, ut tibi quoque molestiam afferrem, ut coram affatim pensentibus, posteaque perspeximus ex luculentis literis tuis, quibus eum decreti in orientem itineris comitem expetebas. Præterea neque his terris tam commoda scribendi Romam occasio fuit. Adeo ut ne illud quidem sciam an postremas nostras acceperis, quas dederam ad Amplissimum Senatorem Venetum Dominicum Molinum. Nunc patriæ te redditum magnopere gaudeo: atque ut post longi temporis peregrinationem ei consilio atque opera plurimum prosis, Deum, patrem luminum quæso rogoque. Judæorum de quibus scribis, miseret me prorsus: Quanto mallem sedulo ut operam darent Christiani iis convertendis. Hoc fine jam Thalmudicis & Rabbinicis totum se dare cœperat *o magister* Dionysius meus. Nunc plerisque omnibus terris mira eorum est paucitas, qui sua tueri adversus hanc gentem sciunt: pauciores etiam qui idonei videantur iis expugnandis: merito accusamus Judæos pertinaciam, sed nec ipsi sumus exsortes, quando apud nostros propemodum jacent Orientis literæ, sæpeque optimam causam lusoriis magis armis tutamur quam decretoriis: quasi hoc aliud sit quam proderet veritatem. Non hoc scriberem nisi sæpius observassem, quam levi amictu Judæi exeant tela nostra: atque id hac in urbe Amstelodamensi magis etiam cognovi quam ante. Quamobrem valde opto, ut quia multum metuo, ne & in florentissima alioqui gente Polonica, non multum absimilis ratio sit, ea pro autoritate qua magis & magis valebis apud tuos, in hoc prorsus incumbas, ut homines Christiani armis sint instructiores adversus Judaicam perviciam. Spiritus Dei & Scripturæ sunt pro nobis. Hæc volvendæ diu, noctuque ille exorandus. Apage malæ causæ tela, ignes, ferrum. Solus Dominus conscientis præest. Nihil hic imperatorem posse, rectè olim Cæsar Maximilianus. Hæc eo lubentius scribo, quia hoc à vitio immunis est laudatissima natio vestra. Spero & ab illo, quod nec falsis criminibus circumvenire velit, opum gratia quas sæpe possident, subinde nec artibus bonis partas. O quam

multa exempla nobis omnis suggerit historia calamitatum Judaicarum, quas perpeffi nunc zelo sacerdotum, sed qui non esset secundum scientiam, nunc protervia vulgi, vel incitantibus vel conniventibus, quos minime oportebat; nunc avaritia principum & aulicorum, ubi res eorum prodigalitate sunt absumptæ: unde habeant, non quæritur: sed habere oportet. Ne videar querimoniam vel accusationem instituere falso, compluria transnisi ex magni nominis scriptoribus exscripta. Abunde illa arguunt quid fere impulerit sive Christianos sive qui Christianæ saltem religioni nomen dedissent, ut ita in Judæorum bona involeatur. Mea nihil interest quid in Polonia vel alibi rerum geratur. Sed horrescit animus quoties cogito quam parum solliciti omnes sumus de salute proximi; quem malis artibus nostris magis avertimus à nobis, & simul ab æterna salute sua, saltem quantum in nobis. O pulchra & nobilis anima mei Stupeski, quam te aversum à talibus exopto! imo prorsus confido. Nota enim mihi tum prudentia, tum pietas etiam tua quibus, dum hæc ageres terris, poteram dicere, familiam ducebas: contentus ero illo, quod æqualium inferior esses nemine. Itaque nihil mihi mediocre de te spondeo, dum valetudinis neutiquam ferreæ majorem habeas rationem, quam cum apud nos eras. Alii Baccho & Venere eam perdebant, tu nimio studiorum amore & ardore: sic ut medicorum & intelligentium judicio, plane esses sufflaminandus. Nunc ætas, ut non dubito judicium per se acre, magis firmavit: Quare de isto verbum non addam. Potius illud dicam, non solum sic quia natura hoc fert mea, sed etiam in tuæ spem gratiæ, nullum defore officii genus à me optimo & illustrissimo fratri tuo Florianio Stupesky, quamdiu his terris agit. Atque utinam amplius possim. Hæc scripsi bella adeo occasione oblata per illustrissimum Regis Poloni legatum, qui filium suum studiorum ergo in urbe hac est relicurus. Vides ut perseveret inclytæ vestræ gentis judicium de Vossio tuo. Nec dubito quin multum de nobis judicium auxerit tua & inclytæ familiæ tuæ æstimatio. Tanto æternum devinctior ero. Uxor mea & liberi mei sex (quippe & natu maximum satum abtulerit) dum artus regit spiritus, tui semper memores erunt. Impense etiam salutant. Prope-rante calamo in tantis occupationibus scribebam,

Amstelodami, Anno
Sospitatoris nostri
c1o Ioc xxxvii.
xiii. Kal. Jan.

Illustrissimi nominis tui
Cultor,

G. J. Vossius.

CCXCVI.

CCXLVI.

Joanni Beverovicio S. P.

UT gratæ mihi literæ fuerunt tuæ, amplissime & amicissime Beverovici, ita haut sane libens cognovi, quod de nonnullis scribis, pleniusque ex aliis intellexi. Adeone illos transversos agi, ut ingens illud Bataviæ decus, atque ævi nostri miraculum, vivere patria in terra noluit? Hunc scilicet fructum maximus ille vir, non jam dico eruditionis, quæ sola etiam potuit detertere, sed virtutis & meritorum in patriam reportabit? Indignor profecto, mi Beverovici, multumque indignor, quoties degenerum illorum Batavorum in mentem venit: facilius externis ignoscam, qui virum ignorare possint. Sed externos habet æquissimos, quia non est illis ignorabilis doctrina ejus ac virtus. Peregrinis minus ignosco, quibus tam bene est in Batavia: sed eò se fore minoris existimant, si suus honos tanto constet viro, quicum comparari minime possunt. Attamen his quoque ignoscamus, quia suo, non Bataviæ velificantur honori. At Batavos etiam sic affici, ut sua bona ignorent? Certe ut amantes sunt meticulosi, subinde videre mihi videor turbines pene eosdem, qui innocentem Africanum natali solo expulerunt: sed illud apud gentes erat. Christianosne homines eo abripi? Hæcine illa proximi charitas est, quam ab ipsis prope incunabulis docemur? Tantum parentum nostrorum ævo libertatis simul ac purioris religionis amor his in terris cœpit. Citone adeo res nostras in pejus labi? Te, optime Beverovici, te laudo, qui pro viribus corruptos mores sistere, ac ruentis seculi vitis occurrere conaris; fortiter tantum perge. Incita cupidos, accende languentes, dehortare adversos: noli, quantum est in te, permittere, ut principem urbium Bataviæ suâ se exuisse gloriâ feri quoque Annales testentur, habeatque posteritas, cur ingratos adeo cives damnet. Crede mihi, ut non Africani exilium nostra tempora latet; ita ibit quoque in ævum, quomodo se Batavi adversus magnum hunc virum gesserint. Vides pravos homines nihil non movere, ut partes suas tueantur. Quanto æquius illum diligenter incumbere, qui bonam causam fovet. Dignissima profecto est, ubi omnes nervos intendas. Arrecta est in expectationem omnis Batavia, quid Batavia? arrecta est Gallia, Germania, Britannia; arrectæ sunt nationes aliæ, magnâ animi cura opperientes satissime animi ac fidei sit amicis pro tanto viro. Et si

labascere illos videant, expetent sibi quisque tantum decus. Ne patere, ut aliis invidemus eum, quem habere ipsi possumus. Præceps occasio est: hoc tempus est, quo tu, quo similes tui probare virtutem suam possint. Cogitandum vobis, quotquot ad clavum Reip. in urbe ea sedetis, quotquot etiam alias Bataviæ urbes gubernant, spectare omnem Europam, quam fortiter pro justitia nitamini adversus eos, qui tantâ perviciaciâ heroem illum oppressum ire conantur. Mihi sanè, si quid in hac re virium esset, ostenderem non modo, quanti amicum (nam patriæ utilitas privatis est amicis antehabenda) sed quanti justum & æquum fratrem. Tu Beverovici, pro viribus tuis, per te in urbe vestra, per alios quoque, urbibus aliis, depellere conare adversantium turbines, demereberis non me tantum, vel etiam maximum illum. & utriusque nostri amantissimum virum: sed quoque quidquid ubique est eorum, qui doctrinam virtutemque ament. Salutem tuo nomine seu dixi, seu scripsi, summo illi viro, cui ea longè gratissime fuit, ac vicissim salutari te ex animo jussit.

Amstelodami.

Tuur,

G. J. Vossius.

CCXCVII.

Joanni Elichmanno, Ger. Jo. Vossius
S. P.

SI tam meus essem, quam vellem, optime, & præstantissime Elichmanne, non fivissem profecto, ut tu quoque accessio illis amicorum fierès, qui experimento suo didicere, quam tardus, nulla licet culpa mea, sim in respondendo literis amicorum; longè licet gratissimis semper, sæpe etiam caris adeo, ut auro contra caras non putarim. Hoc si persuaserim (& non vano homini fidem habere te confido) diuturnum hoc silentium meum in optimam capies partem. Magnum mihi dolorem attulit, obitus Stapelii nostri, tum quia me fideli amico privatum, tum Theophrasti causa; cujus editio ut video, non ea erit, quæ illo superstite fuisset; sed ne infelicitè tamen exeat, curæ imprimis erit Clarissimo Corvino. A me hac parte, non ita multum præsidii erit, qui si cum Stapelio *no magis*, & tecum vestrisque similibus comparer, tantummodo, ut in veteri est proverbio, inter Apia verfer. Nempe non omnia

omnia possumus omnes. Te verò etiam & etiam rogo, ut ea ex Arabico, & aliunde perficias, quæ orandæ editioni novæ facere possint. Ad libros quod attinet, quos commodato à te habuit ὁ μαχαρίτης, præstabo, ne quid tui distrahatur auctione publica, quæ futura circa ferias Paschales. Ut nunc reposcam, nescio an consultum putes. Intra hoc semestrem, quantum jam extulere, qui pestilentia decesserit. Postremus intra hanc hebdomodem excessit. Vides ut nihil Podalirius, aut Machaon, nihil Hippocrates aut Galenus, adversus τὸ Δέσιν valeant. Si quid Salsmanum habuerit Stapelius, quod restitui oporteat, quæso tempori mone. Mihi res cordi erit, ne damno sit humanitas viri summa. Quem ego Leydæ redditum, sic gaudeo, ut non facile dixerim: sed scire aveo, quibus propediem, ingenii, doctrinæque foetibus, Illustreram urbem, imo totam Bataviam potius, reddere cogitet illustriorem, indignantibus iis, qui virtutis viri, & doctrinæ se hostes, utcumque aliud videri volunt, abunde comprobant quotidie. Te quoque velim, tandem juris ea publici facere, quæ scio diu, ex Arabico, & aliis Orientis Linguis observasse, eruditissimis etiam hæcenus ignota: salutem plurimam dic viro, vel Heroi incomparabili Salsmasio, ac familiæ ejus universæ. Utinam tempus videam, quo iterum Amstelodamum præsentia sua decoret: sed de isto, ipse occasione prima, ad eum scribam. Nunc propter frigus non aulam poscere, ut excurrat, cum conjuge: sed verna instat tempestas.

Amstelodami, clō Idc xxxvii.
xviii. Martii.

CCXCVIII.

Merico Casaubono, Ger. Jo. Vossius.
S. P. D.

SI tu, uxor, liberi valetis, gaudeo; ego & tota familia mea valemus. Jam menses sunt quatuor quod recepi pecunias, quarum debitor in Septembrem superioris anni inciderat. Martio igitur anni hujus clō Idc xxx. septimi deberi coeperunt proventus sex mensium. Has spero jam à reverendo & amplissimo Quæstore acceperis. Feceris igitur rem gratissimam, si per Peisterum pro humanitate pristina ad nos procures. Rerum novarum quas operæ sit perferbere nihil hic habemus. Multorum urit animos ingens damnum, quod ab Dunkerkanis singulis prope hebdomadibus accipitur. Non difficile adeo sit huic malo indies

gliscenti obviam iri, nec tamen occurritur. Facilius ferretur, si merum esset infortunium: nunc latissima subest culpa: quæ penes quos resideat non est hujus loci disputare. Animi omnium hic valde sunt suspensi, expectatione Classis quam serenissimus Rex Carolus parat. Votumque prope omnium, ut ea Rex utatur ad reducendos in paternam dirionem Principes Palatinos serenissima Bohemæ Regina prognatos. Atque eo magis id optatur, quia ut novo etiam bello involvantur Austriaci magnopere Fœderatæ Belgicæ expediret. Solum metuitur ne cessetur, quia pace magis & magis florescant res Britannicæ. Claudius Salsmasius, post biennii & ulterius in Galliis, moram, rediit Leydam equestri dignitate & consiliarii titulo à Christianissimo Rege decoratus. Maimonides Dionytii mei ὁ μαχαρίτης excusus est, solâ præfatione exceptâ. Etiam liber primus operis mei de origine & progressu Idololatriæ jam est absolutus: proximaque hebdomada alterum auspicabitur Typographus. Intellexi jam prælum fervere Epistolis à Clarissimo Parente tuo exaratis. Excuditur hic Historia Danica Meursii. Cujus & opera cætera voluminibus certis distincta ejusdem Typographi industriâ prodibunt. Plurimum uxorem lectissimam salutat uxor mea, imo potius omnes mei tibi & tuis salutem adscribi jusserunt. Meo verò nomine præterea multa salute imperties Reverendum D. Decanum totumque nostrum fratrum Collegium.

Amstelodami, xii. Kal.
Maii, S. N. Anni hujus clō Idc xxxvii.

CCXCIX.

Claudio Salsmasio S. P.

CUI has ad te literas dedi, is est Henricus Ernstius, vir optimus & candidissimus, Canonicus Widburgensis, juris antehac in Sorana Academia professor, ac ibidem clarissimi Johannis Meursii Collega. Is nunc in Gallias abit, Ephorus illustris & generosi Comitæ Woldemari filii Regis Daniæ ex nobilissima matre, ac quasi uxore Regis, quippe consentientibus regni proceribus adscita, præviis etiam Sacerdotis solemnibus, non tamen in regni spem liberos datura, sed honoris Comitatus, vel similis. Nimum impar obstabat genus, quo minus legitimæ prorsus uxoris loco haberetur; etsi hoc contubernium proxime ad justum connubium accederet.

ret. Hoc igitur Ernstio cum filio regio ad vos eunte non potui committere, quin literarum aliquid exararem, si non ob aliud, saltem ut reditum è Galliis gratularer, meumque testarer gaudium, quod cum lectissima conjuge ac liberis salvus ac sospes sis reversus. Id jamdiu à me factum oportuit; sed hebdomas aut amplius abierat, antequam de adventu cognoscerem; posteaque quia aliud magnopere quod scriberem nihil erat, malo meo more de die in diem differre cœpi, donec hæc se occasio offerret. In edendo opere meo de origine & progressu Idololatriæ pervenit Typographus jam ad librum secundum. Filius Gerardus notas & castigationes scripsit in Publii Syri sententias. Eas cum variantibus Ernstii ante memorati Lectionibus in lucem dabit propediem. Antequam tamen excudantur, ad te mittet, quia ut intelligere ex te memini, cum MSS. sedulo contuleris, variaque observaris. Ea jam ante biennium liberaliter offerebas; sed puto satius, ut prius videas, quid sine Theſeo filius potuerit. Aveo scire quid potissimum nunc habeas sub manibus; sed hoc scribes cum ab aliis curis eris lassus. Nulli ego scribendi laborem imposuero, qui tantus sum ipse in scribendo cessator. Salutem à me & meis conjugio dicito.

Amstelodami, cIdo Ibc xxxvii.
xiii. Kal. Maias.

Per occupationes prope exciderat addere, quod solum poterat justum esse scribendi ad te argumentum, lætari me plurimum, quod à Christianissimo Rege decoratus sis pro meritis tuis Equestri dignitate, & Consiliarii titulo. Ringantur invidi magis etiam solito, dum tibi tantus honos totique familiæ tuæ perpetuus bene vertat; quod Deum oro rogoque. Vale.

CCC.

Ger. Jo. Vossius, Francisco Junio, *Fr.*
F. S. P. D.

TAndem prodiisse in lucem vides, quæ de veterum pictura elaborasti; tardè profectò, sed pro more Blawiano, sat citò, si sat benè. Urgentibus nobis prælatus es, & meis, & Meursianis, & tot aliis. Non facile dixerim, quàm multis ejus Typographi prælum ferveat, Cosmographicis, vel Mathematicis imprimis. Adde quod nobis hoc datum, ut liber ille, etsi his quidem terris, paucorum

videretur hominum, tamen nullo tuo, vel periculo, vel sumptu excuderetur. Quocirca nihil pretii annumerabis, nisi pro exemplaribus, quæ deinceps voles transmitti. Hoc non dari solet alteri, nisi jam magnum tibi nomen in studiis compararit, & argumentum ad omnium sit palatum. At tuum tantum ad elegantiores pertinet; cæteri ferè spectant illa *αἰεὶ τὰ ἀλφισα*, nisi quod aliquis cuivis historiæ sit locus. Omnes enim narratiunculis capiuntur. Utinam autem singulorum capitum argumenta concinnasses, ut inde Index conficeret? Author sim ut deinceps, id fiat in iis, quæ sub manibus habes. Imo quid si chartæ, duo, tres, adjiciantur residuis, quæ hic sunt exemplaribus? In iis, & argumenta sint, & Index. Erit opera tua hoc pacto, & commendabilior, & utilior, simul addentur iis errata, quæ in posteriori parte observaris: sola prioris excudere non erat ex re. Nec fieri potuit, quia demùm ea accepi, exemplaribus quæ mihi compactis. Cum erudito juvene, (eo nempe cujus opera usus sum, in operis nostri Grammatici Indicibus conficiendis) multis egi, ut eandem operam præstare vellet in tuis; sed nihil effeci, etsi pretium liberaliter offerrem pro labore. Negabat se veteris picturæ intelligentem: nec qui argumentum operis non caperet, sufficere periochis, vel syllabis scribendis. Tum autem Theologicis, se magis capi, nec Grammatica, quia saltem caperet, fastidisse. De pictura autem, nec capere se, nec capi. Quæ scribo ut videas, hoc in te opus devolvi. Nam nec filii in se recipere audebant, cùm tua causa maximè vellet cujus gratia omnia debent; sed humeris diffidebant; ac satius visum, si absque iis opus prodiret, quàm aliena inscitia opus corrumpere. Præfationem, priusquam ederetur, ostendi oratori Boswello. Longiorem ille aiebat, quàm ut unquam Rex esset lecturus. Itaque se authorem esse, ut inde duæ fierent, ad serenissimum Regem una, ad lectorem altera; sed argumentum erat istiusmodi, ut commodo id præstari non posset. Tentatum enim à me. Remittere autem longioris res moræ fuisset. Facile menses duo abiissent. Quamobrem edita propemodum est, uti miseris. Deinceps cautiore in hac re esse licebit. Non dubito, quin brevi, cæteros de pictura labores tuos cogites divulgare. Præstabitur à me, & meis, (hic si edi visum) quidquid possimus. Nulla hæctenus editi operis tui exemplaria sunt distracta; nec dividendur priusquam te exemplar serenissimo Regi tradidisse cognôro. Tui verò officii erit simulac acceperis exemplaria, me commonefacere, ne nimiam morâ, damno simus Typographo. Miseret me Prudentiæ; sed

sed magis dolet, propter eum, qui ducendo illam, sic se, suosque afflixit. Adhuc sudandum hic in exsolvendo ære alieno quod contraxit. Unum solatur, quod qui ex Indiis veniunt, aiunt benè rem gerere, & spem esse summam maximi honoris, quem si consequatur, rem facere possit honestè, & ex voto suo, nostroeque. Prudentia scio, exoptat, eum quamprimum reverti. Sed stultè profectò, nec nomini suo convenienter. Quid aliud enim expectaremus, quàm ut liberos gignerent, in spem esuritionis? ut nihil gravius dicam. Scis quippe quanta mala, penuriam sæpe consequantur. Itaque valde me perculit, quod nec *ἀπαις* seipsam possit alere. Egestas sæpè malesuada sexui isti, imo & firmitiori esse solet. Prudentia interim in hac prudentia adjutanda opus. Iniquè enim uni omnia infumam, quali obesse fratribus debeat, quod recta ad virtutem via grassentur. Tum quid de filiabus dicam? Nunquamne illarum mihi curam suscipere licebit? Semperne comedar sic, ut nequeam frugaliter aliquid comparcere, quod eas pro dote si detur, magis reddat commendabiles? Quid si brevi Deus evocet me ex hac vita? Quid matri fieret viduæ, si magnopere oneri meo sit Britannia, & quod præstaret relinqui meæ, hoc profundatur alio? Quamobrem multum esse non debet, quod eroges, si quid omnino erogandum, urgente necessitate, judicabis. Sed de isto scribam diligentius, simulac literas à marito accepero, ex quibus intelligam, rem augere, ac solum mutuo dari, quod annumerandum, sed tuo quasi nomine putabit. Interea exiguo sit contenta, deque cætero, corpusculum animo, animum hac spe sustentet, brevi fore melius, ubi fortuna (si loqui sic licet) maritum planè inauraverit. Plurimum à me, & sorore tua, optima mea coniuge, Francisco item meo, non exigui nominis inter Hagenfes Advocato, cæterisq; liberis meis salve.

Amstelodami, cId Idcxxxvii.
xiii. Kal. Mai. S. N.

CCCI.

Illustri viro, Hugoni Grotio, Ger. Jo. Vossius S. P. D.

QUI hæc ad te literas defert, is Henricus Ernstius est, multum mihi amicus, ob eruditionem, & amorem illum quo doctos omnes prosequitur, longèque acceptior, ob eximiam animi integritatem, summumque

candorem. Fuit is in Academia Sorana, ubi jus est professus, Meurhii nostri Collega. Sed serenissimus Danicæ Rex, maxima probitate viri intellecta, voluit eum esse Ephorum filii sui, Illustris Comitæ Woldemari. Est is natus ex matre admodum nobili, quamque Rex prope uxoris habuerit loco. Nam, & consentientibus eam Regni proceribus adscivit, & sacerdotali interventu, conditioneque illa, ut nascituri, Comitum essent titulo insignes; cum ex legitima uxore prognati, in spem Regni educuntur, & mox ducum titulo gaudeant. Sed de istis, si voles, plenius omnia cognosces, ex Ephoro, qui gratissimum fore aiebat, si per ipsum potissimum aliquid ad te mitterem literarum. Hanc ego scribendi occasionem eo avidius sum amplexus, quia jamdiu officium neglexi, & Arlandervenicæ Dominus Guilhelmus Noomsius, interpellare non cessat, de alteris ad te literis exarandis, quibus nomine ejus rogem, ut ne gravatè onus illud procurandæ ei equestris dignitatis decus, suscipere in te digneris. Multos ego id menses facere neglexi, tantum quia putarem, non admodum te capi negotiis hujuscemodi, & probè meminissim jam antea te authorem fuisse, ut potius hoc exposceret à foederatæ Belgicæ Legato, necessario, ac propinquo suo. Aiebat noster, nec sibi ista excidisse: sed non libenter ei in ulla re obnoxium fore: eo ad te itasse, & quia superioribus literis scripssisses, si opera illius propinqui sui uteretur, & tua quoque commendatione opus videretur, non illi à te amici hominis officium defore: eo affectum se tum sibi ulterius etiam polliceri, in tantum, ut citra illius operam, quam nolit, haud gravatè id honori ejus sis præstiturus. Addebat quoque rem te facturum, non ipsi modo longè acceptissimam; sed etiam amicis cæteris, præcipuè avunculis duobus, Domino ab Osthoorn, & Consulari Geeloinckio, nunc urbis Quæstori. Et verum dicere scio; cum singulari eum amore complectantur. Nec sanè ulli gravis vivit, comis, & humanus omnibus, etiam Gravæ familiæ peramicus; sic ut mutæ etiam sint vocationes. Eo facilius confido, si absque incommodo tuo possis, hanc suscipies cogitationem; sin aliis item denegaris, vel aliud sit quod impediatur, tribus id verbis perscribes; si non ob aliud, saltem ne hoc scribendi officium, vel amicissimo homini, vel familiæ ejus videar negligentius egisse. Cætera ex alteris literis cognosces, quas Hagam nisi, ut per Tabellarium citius perferantur. Nam de Ernstio metui, ne in via moram trahat. Iis inter alia, hoc quoque Noomsianum negotium complector; ut celerius habeam, aliquid de mente tua polliceri,

Qq

ceri, vel si id fieri commode non possit, aliam inlittat viam, ad quam scio non defore ei consilium tuum. Illustri Conjugi tuæ & familiæ universæ, ego, uxor liberi, plurimam dicimus salutem.

Amstelodami c1o Idc xxxvii.
Prid. Kal. Maias, St. N.

CCCII.

Joanni Elichmanno.

Clarissime, & Amicissime Elichmanne,

PAULUM hæli, utrum hoc tempore, filium ad te mittere expediret. Et, me dubio, magis animi anceps uxor erat. Credo aliquid inaudieris, de infesto unius, & alterius animo, erga me, meosque. Mihi propterea animus non est, deferere virtutem. Ero qui fui, utcumque illi sint, qui fuere semper. Bene merendo de publico, simul etiam de ipsis, modo occasio sit, nos ulciscemur. Nec alia animus vindicta uti. Majora exuperavi. Nec ut spero nimia istæ semper lenitas abalienabit à me viros bonos; quales non paucos habet Academia vestra. Atque ut ego aliter fuisset animatus, Isaacus meus sic ardet Arabicæ Linguae amore, ut difficile esset diutius detinere. Hunc igitur quasi de manu, in manum trado. Poterit is uno alteroque mense, opera tua uti, & præstantissimi Golii, cujus ego, ut doctrinam, sic virtutem, tot jam annos sum expertus. Omnia mihi de illo polliceor. Atque ut ille fortassis, diebus Canicularibus domo, tu, qui abesse æque ab urbe nequis, filio multorum instar eris. Pluribus nihil nunc opus, quia pro literis uberioribus, ipse filius erit viva Epistola. Magno Salmasio, quem nemo unquam satis existimaverit, plurimam salutem dices. Optimo item, doctissimoque Golio nostro. Hoc tempore non onerabo pluribus, quia filio id negotii dedi.

Amstelodami,
c1o Idc xxxvii.
xvi. Kal. Quin-
ctiles:

Tuus totus,

Ger. Jo. Vossius.

Quibus Athenis olim *pericla*, in memoriam, quod cives tum sedes suas mutassent. Nempe ut vides, eopse die, quo & meus domicilium mutat. Sed ut spero, ad breve tempus, ne oneri simus, quanquam parati pariter omnia agere, in tuæ spem gratiæ.

CCCIII.

Guilielmo *Archiepiscopo* Cantuariensi.

Reverende in Christo Pater, Domine illustrissime,

EXegi jam annum tertium supra sexagesimum, quem climactera antiquitas dixit, ac facile negavit abire sine animi & corporis offensione. Mihi quidem cœpit à febris permolesta; mox consequebantur morbus Colicus & Nephritis; à quibus hætenus semper fueram immunis. Aliquantisper hisce malis liberatus, amitto filiam unicam, & naturæ dotibus egregiam, & linguarum artiumque studiis excultam. Nec multo post Deus ad se vocat Filium meum Gerardum, quem ego tanquam oculos, vel si quid his carius, amabam. Ingenium doctrinaque elucet ex castigationibus in Velleium jam editis. Ac propediem ejus Emendationes in Valerium Flaccum & Censorinum videbunt lucem. Extremo quem dixi anno morbus me invasit articularis, & quem magis metuo, magnus corporis languor. Nec is in totum remisit; videor tamen paulatim mihi vires recuperare. In opere de Religione Gentili & Physice Christiana pauca solum folia supersunt. In priori argumento Deos omnes, qui vel homines fuerint, vel pars aliqua hujus compagis naturalis. In posteriori, excussi omnia de Cœlo, Elementis, Meteoris, Homine, Quadrupedibus, Avibus, Piscibus, Serpentibus, Insectis. Visum hic sistere; jam enim libri sunt quatuor satis grandes, qui duos Tomos constituent. Nec tamen jam ante menses duos juris publici fieri poterint, quia indices erunt concinnandi, & Typographus meus aliis distinctur. Opera interim à me dabitur, ut quam citissime possim, tam diu promissa debitaque exsolvam. Multa antea de me retuli quæ non mediocriter me retardarunt, tum in Opere dicto ad umbilicum producendo, tum sæpius ut officium meum erat, Reverendissimam Dignitatem tuam literis meis compellando. Sed ad mala alia accessit perpetua anxietas sollicitudo de rebus Scoticis. Novi ego mores & animos eorum, & ut quicquid possint, aulint, quibus in Sententiis & Ritibus Ecclesiæ novella omnia magis quam antiqua placent. Tum autem justus mihi metus est, ne in Anglia etiam, quos simile Sydus afflavit, nunc rebus suis desint hac occasione, nec vel his, vel istis, flabella in oris decurrant exteris: Alii quidem solius sectæ amore, alii vero, quia interesse sua existimant distrahi & infringi vires Regni tam potentis florentisque. Eo impensius Deum Opt. Maximum oro quotidie,

tidie, ut Serenissimum Regem Carolum Regum, qui hodie vivunt, optimum, prudentiæ & fortitudinis spiritu firmet, omniaque Achitopheli contilia dissipet. Te quoque Illustrissime Domine, & quod majus duco, Ecclesiæ Catholicæ Antistes Reverendissime, precibus meis supremo numini commendo; quo porro vitam diutissime sospitem ducas, præclareque de Ecclesia Dei, ut paratissimus es, in posterum etiam annis plurimis mereare.

Amstelodami,
cl^o Id^o cxxxvii.
Id. Maias.

Reverendissime & Illustrissime
me dignitatis tue Cultor
devotissimus,

G. J. Vossius.

Amplissimus Misselden, qui ante annum vel ultra, Regii negotii ergo huc missus fuit, de Reverendissimo nomine tuo hic semper est locutus, & omni ubique sermone melioribus se addictum partibus ostendit. Id autem volupe mihi admodum fuit, & perscribere antè volui, sed impediunt morbi & tot adversa. Iterum vale, magnum Ecclesiæ columnen, Præfulgentissime.

CCCIV.

Baltazari Willio, *S. Theol. & Philos.*
Doctori S. P. Bremam.

Quamquam quod scriberem nihil erat, non ingratum tamen fore putavi; si vel hoc ipsum potius scriberem, quam in silentio persisterem. Non semel à te literas accepi; sed exultavi, bellè me satisfacturum amicis, qui vitam, & occupationes meas nossent, si eorum gratia facerem, quidquid possem. Itaque quem commendatum isti, juvi qua parte potui, plura etiam facturus, in tuæ, Collegarumque spem gratiæ. De literis verò non diffitear, si scribendæ illæ solum sint, affectus testandi ergo, non item, quod grave aliquod negotium urgeat, tardior em ea parte quam ego sim, me nosse neminem. Atque hoc facile concedunt, qui sciunt, quam à mane ad vesperum distringar. Nec aliud in causa est, cur tam multa, quæ in lucem exire amici expetant (quippe quæ confecta jam sint, vel affecta) nihilominus cum blattis, & tineis rixari sinam. Spero interim summum, intra menses quatuor, opus meum, de cultu Gentium Idololatricæ prodire posse. Eo multa etiam complectar, quæ scripturis faciunt illustrandis. Vale optime, doctissimeque Willii, ac sic tibi persuade, nunquam

fore, ut candidum illud Willii mei pectus, pectore excidat meo. Salutem plurimam, meo nomine, dicito clarissimis & præstantissimis Theologis, Crocio, Bergioque: quos amare, & æstimare, nemo satis possit, nisi qui nesciat, quanti reformatarum hodie Ecclesiarum interfit, ut controversiæ, quibus scindimur, mansueto potius Christi spiritu dirimantur, quam illo, qui nunc sic in plurimis dominatur. Etiam salute imperties doctissimum Parentem tuum, si vitali, ut spero, aura fruatur. Transit hanc urbem, ante mensem, vel amplius, Doctor Cabelavius, ac compellatum me voluit: sed domi non eram. Nunc utrum in Batavia sit, an ad vos reversus fuerit, juxta cum ignarissimis scio. Iterum vale.

Amstelodami,
cl^o Id^o cxxxvii.
xiv. Kal. Quintil.

Tuus,

G. J. Vossius.

CCCV.

Hugoni Grotio. Lutetiam Paris.

Illustrissime Domine,

QUI has ad te desert, est Joannes Mulenius, natione Danus, vir si alius, integræ, & inculpata vitæ, eoque proceribus suæ gentis gravior, & acceptior; in his Illustrissimo Rosékransio, cujus non degenerem filium, cura sua dum Lugduni ageret, quod ante biennium, vel ultra fuit, doctrina longè reddidit auctiorem. Notus mihi, atque adeo amicus, pene est à septennio, ut eo fidentius de illo judicium feram. Nunc aliorum adolescentum studiis præest, sed itidem è primaria nobilitate Danica. Is impensè ardebat desiderio videndi, & compellendi tui; atque ad eam rem, putabat utiles sibi fore literas ad te meas. Morem gessi libens; quia gaudebam mihi sic satis in scribendo, sed nulla mea culpa, negligenti quodammodo necessitatem imponi aliquid exarandi. Et interea quid scripturus sim vix scio. Nam publica tibi in ea dignitate constituto, aliunde melius, certiusque innotescunt. Quale inter alia, utres nostræ maritimæ propemodum pessum cant: non sine magna indignatione multorum, non eorum modo, qui hunc fructum putant mutata ante annos quasi duodeviginti Reipublicæ; sed aliorum etiam, qui quotidiana propè damna sua deplorant, & in facili remedio dolent negligi illud, ac mirabiliter, in cessat

tionis ejus causas inquirunt. Nova officina Typographica Blauwii, quam sumptibus maximis adornat jamdiu, videtur intra sexquimenſem, vel circiter ad finem poſſe perducī. Etiam Græcos characteres, quorum penuria hætenus laboravit, indies Francofurto expectat. Emiſſe conſtat. Atque ait, quod hætenus in Meurſianis ceſſarit, uni iſti Græcanicorum Typorum deſectui debere adſcribi. Quod non excuderit hitoriam ejus Danicam, jam ante annum tranſmiſſam, eo excuſat, quod bello hoc Germanico Suecico, non habuerit chartas, ex animi ſui ſententia. Interim ringit Meurſius, ſic ſe quinquennio habitum ludibrio. Ubi Francofurtenſes typi advenerint, ſpecimen tranſmittam, ac de excudendis tuis porro exquiram. Nunc ſi quid certi in re ſpondeam incerta, metuo ne toties deceptus, falſus fallam te, & alios qui tantoperè tua flagitant. Heinſius in ſacris exercitationibus, jam ad Lucam devenit. Ac quo operi huic melius vacet, impetravit ab Ampliſſimis Curatoribus, ut aliquandiu non doceat publicè. Nobis non licet eſſe tam beatis; quibus quina de hebdomade Acroaſes incumbunt. Utrum vero elaboratiora daturus ſit, non niſi poſt meſes ſex ſeptem judicium fieri poterit. Nam ſevera adeo lege interdixit, ne excuſorum cuiquam videndi fiat poteſtas, ut hætenus, non niſi Philyrum, adjutante amico, viderim. Sed alius eſt, & πρῶτος, qui plura conſpexit. Is negat, tanti eſſe quam jactitat. Utcunque eſt, hoc unum ſcio, eum in hoc ſacro ſtudio planè ἐμπροσθεν, nec ſatis ab aliis quibuſdam ſtudiis inſtructum, neſtquam daturum, quæ tuis poſſint comparari. Quamobrem nihil æque deſidero, quam ut divini, in divino hoc argumento labores tui, aliquando, vel apud nos, vel ubicunque videant lucem. Opus noſtrum de Idololatria Gentium, vix intra meſes quatuor poterit abſolvi. Ita dies totos diſtrahor. Et ſimul aliqua hic culpa eſt noſtra, dum manum neſcimus de tabula tollere. Heroinæ conjugi tuæ ſalutem à nobis omnibus: Etiam liberis, inque iis, ornatiffimo juveni Petro tuo, modo is jam ad vos redierit.

Amſtelodami,
cId Idc xxxvii.
vi. Idus Quin-
tiles.

Tuus totus,

G. J. Voſſius.

CCCVI.

Joachimo Borgeſio, Ger. Jo. Voſſius
S. P.

ET SI variè ut ſoleo diſtringerer, Deſiſſime Borgeſi, minimè tamen committendum putavi, ut Junia mea, ſine meis ad vos, literis rediret. Præſertim cum tuis tanto ante tempore ſcriptis, necdum reſponderim. Et tu interea de ſoceri mei nepote, uxore, & liberis meis, arcè adeo ſanguine conjuncto, benè mereri non ceſſes; majoraque etiam deinceps expectemus, poſtquam primam ille in claſſem adſciſus, ab tui unius ore pendeſcit. Puer agilis eſt, & ætæni ingenii. Sed ætatem noſtri ceream prorsus in vitium ſceti. Tanto ſtudioſius adlaborandum nobis, ne corruptis adeo temporibus alius fiat quam vellemus. Quod quidem non modo illi, matri, familiæ toti, etiam πρὸς μακαρίους, patri, avoque: ſed univerſæ Eccleſiæ Dei, contumelioſum foret, in qua magnus avus, longè latèque, adeo virtutis, doctrinæque ſuæ radios ſparſit. In partibus adverſis, hoc Ithacus velit, & magni mercentur Atridæ. Quod cum juxta mecum pervideas, nihil neceſſe puto, pluribus tibi cum commendare. Malim ego, ſi meus magis forem, nec ſi momentis penè ſingulis avocarer, paulum adtexere de ſtudiis noſtris, quæ pertinent vel ad ſacram, vel externam hitoriam. Nam & te omnigena ſic hitoria capit à multis retro annis, ut qui propius norint, digniſſimum cenſeant, qui in Academicis ſpatiis, de lumine tuo lumen accendas juvenuti. Eoque cogitandum tibi, quomodo optimè aliquo ingenii doctrinæque monumento, conceptam de te opinionem foveas, atque augeas. In Baronianis ſpiſſè mihi negotium procedit. Sed jam excuſa dimidia pars operis noſtri, de Gentilis Idololatriæ origine & progreſſu. Quo in opere multa etiam ſacris illuſtrandis intercurrent: Franciſci Junii, Fra. F. Diſcipuli tui Patruī, opusculum de pictura bene eruditum, ad te mitto. Gratum fore conſido. Vale.

Amſtelodami,
cId Idc xxxvii.
Non. Jun.

CCCVII.

CCCVII.

Illustrissimo Jo. Skytte.

Illustrissime Domine, post excessum optimi & eruditissimi Dionysii mei, qui totum se tum Deo, & studiis, tum inclytæ familiæ vestræ, atque adeo universæ Sueciæ regno devoverat, nihil æque mihi triste accidit, ac nuncius de obitu generosissimi Filii tui Joannis Skyttii, à cujus præclaris virtutibus cum maxima quæque expectaremus, diuturna etiam optaremus. In flore cum ætatis eripuit terris summus imperator, qui cuique stationis suæ tempus adsignavit. In hoc tamen dolore non mediocri solatio mihi fuit, quod pulchram animam (nec melius poterat) patriæ & causæ quam Deus probaret, impendit. Eoque nomine ab nostris etiam hominibus, ubi occasio se obtulerit (sit autem hoc sæpius) maxima cum laude memorari solet. Quod si Filium Matthæum, uti nunc totus est in temporibus Bataviæ antiquis, etiam, uti propositum habet, recentia describere tempora Deus permittet, nequam ejus historia eximias nobilissimi juvenis laudes conticescet. Quod enim majus historiæ decus, quam quod si promeritum cuique decus rependat? Ac vel me auctore idem his & aliis locis, facient alii, quibus pariter animus est res hujus temporis ad posteris propagare. Res nostræ mari non optime procedunt, culpa planè nostra: qui vero in vitio sint, varii varie dissertant. Mihi non animus est movere hanc odii plenissimam Camarinam. Illustrissimus Arausionensium Princeps sic militem Breda cinxit, ut solvenda impar videatur hostilis exercitus. Galli in eo esse dicuntur, ut obsidione cingant Grevelingam in Flandria, quod si feliciter successerit, multum terris hisce commodabit. Ad privata quod attinet, uxor carissima, lectulo adfixa plane de valetudine etiam medici judicio periclitatur. Absque quo esset, juvaret pluribus colloqui. Pauca tamen ista non potui non scribere, redeunte ad vos nobilissimo juvene Joan. Skytte. Quem ego sic amo ut paucos. Itaque avellor invitus. Sic sane apud nos se gessit ut exemplo esse possit. Nihil ejus moribus amabilius, nec finistri quicquam de eo ad me meorumve aures pervenit. Plane etiam confido fore, ut sese probet abunde & variarum linguarum & historiæ omnigenæ & aliorum notitia, quæ sic natum ornet juvenique. Salve Illustrissime Domine, cum Heroïna conjuge, & ad maxima natis liberis optimis ac dulcissimis, quorum mihi amor durabit,

dum memor ipse mei, dum spiritus hos regit artus.

*Amstelodami, cIo Ioc xxxvii.
Prid. Kal. Sextil.*

CCCVIII.

Hugoni Grotio S. P.

Redit ad vos, Illustrissime Domine, Filius Petrus Grotius juvenis, magnis animi dotibus, & quod ego in illo ingenio, illaque pro ætate doctrina palmarium censeo, moribus modestis, optimèque compositis. Quos quia paterno haustos exemplo, altos vero, à noverca tua injusta, necdum tamen viris bonis penitus exhausta, in Galliam secum adferet; nihil æque tecum optabo, quam ut ne illos eâ terrâ, bonis malisque foecunda, adolescentiæ, fatis per se lubricæ, insidiatrice, uti in discipulorum non paucis comperi, immutari, ac corrumpi contingat. A quo tamen nihil verendum, quamdiu filius malorum fugere consortium, & animum rebus agendis, vel studiis occupare perget. Hactenus quidem in urbe nostra, & aliis, optimè apud optimum quemque audit. Ipso hoc eunte ad vos, de rebus meis pauciora scribam. Futurus ille pro viva Epistola; unde etiam ut plenius, ita jucundius omnia cognosces. Salmasii uxor auxit maritum prole femella. Excuditur ejus liber de re funebri. De Noomsio curæ fore spero, eo magis, quia gratus, acceptusque non suis modò, sed illis etiam, quibus minimè existimes. Οἷός τις γὰρ τῶν ὁμιλητῶν καὶ ἐνέδωκεν τὴν παρθέτον καὶ μεθυσμένην. ut mittam cætera. Sin invitus illiusmodi rebus impliceris, vel majoribus intentus, in tantillis debere ulli Gallorum nobis: proximum est, ut consilio juves. Malit ille per te fieri, nec causam ejus rei video. De Legato nostro quod ante biennium monueras; afferbat causas cur ei debere nollet. Hæc ego urgente Arlanderveniz Domino gnaris avunculis iterum perscripsi. Sed si id nonnisi incommodo aliquo tuo confieri possit, ubi ego resciero, ita rem tractabo, ut nulla offensæ occasio sit. Mensibus proximis, libelli aliquot famosi sparsi fuerunt, imo palam divenditi; Alii adversus Consularem Oetgens Dominum à Waveren, ob affectatum Dominium Æmelandiz: alii autem contra Collegam meum Barlaam, quod Manassis Judæi opusculo de creatione carmen præposuisset, quo pietatem etiam agnosceret in homine Judæo, Deoque etiam servire fateretur. Nec libellis tra-

duxisse

duxisse horribiliter suffecit. Editus nunc adversus eum, à Vedelio Theologiæ apud Daventrienses Professore, liber cum hac inscriptione, de Deo Synagogæ: summa ut intelligo eo redit, Deum negari ab illis, qui Christum nesciunt, imo blasphemant. Uxori à mea, liberis item à me is salutem.

Amstelodami,
clb lbc xxxvii.
2. Jul.

Tuus ut suus,
G. J. Vossius.

CCCIX.

Joanni Meursio.

Mensis & ultra quod Mercator Danus tuas mihi literas attulit longe, ut semper, gratissimas. Receperat ille se ante abitum suum ad me reverfurum, ne sine responso abiret. Sed neglexit non sine aliquo dolore meo. Decebam affectu testari, horulam cum eo comburendo, luculentiori id prandio facturus tui causa, nisi obstetisset valetudo uxoris quæ jam sextam hebdomadam vix cubiculo egreditur. Sed Daventriensi hoc an Zwollano juvene ad vos abeunte meque sponte compellante, nefas erat tam commodam negligere scribendi occasionem. Unde autem potius ordiar quam à monumentis tuis? de quibus quid factum sit scio aves nosse. Equidem Blauwium domi meæ intra tres menses non nisi hac hebdomade vidi. Aiebat se pudore solo deterritum, quo minus me inviseret. Et credo quod me visente illum domi esse negaretur, non aliunde esse quam ab eadem causa. Non posses acrius cum eo expostulare quam decies à me factum. Recensebam illi seriem scriptorum ἀνεκδοτων, unde colligere jussi cum multa à te adeo jam habeat viris magnis dicata, & ista si edidisset longe plura fuerit habiturus, an non vel bis mille Carolæorum damno te mulctarit. Attonitus ad hæc consistit ut iniquæ mentis asellus, nec habet quod opponat. Fatetur rem ingenue. Solum ait large primitus se promississe, sed postea multa intercessisse quæ hoc quod receperat redderent ἀδυσιατον. Se uxorem duxisse. Patrem cujus folius quodammodo res agebatur transegit interim cum liberis. Diu expectatum fratrem tandem ex Italiâ reducem factum. Hac demum hebdomade Typographiam cum operis omnibus in alteram urbis partem translata, pluresque operas, & quod caput est, toto de quibus laboratum est triennio, typos operibus tuis accomodatos Francosurto esse advectos. Nihil in his mentitur.

Sed largiter peccatum, quod tam facile promiserit, quæ præstare non posset. Dolet quod non aliqua saltem in Dania tam longo temporis spatio anticiparis. Sed quis adeo spiritum hoc fore negotium existimasset? Tuo edictus malo indicium feci illustrissimo Grotio. Sed idem cum sua ab eo excudi, quam alio malit, negat tamen transmissurum aliquid nisi prius fide data de certo temporis spatio intra quod singula lucem sint visura, convenierit. Itaque nihil Grotianum habet, sed translatis jam omnibus in domum longe majorem, & operis magis affluentem, decretum ad eum quamprimum scribere de tempore quo absolvere omnia ejus possit. Est in his ἀνθολογία ex Pall. codd. auctior Latinis verbis reddita, & notis & castigationibus commendatior. Opus nostrum de Idololatria gentium tardius processit quam vellem. Deinceps omnia meliora non spero: sed confido. Nec tamen ante quartum mensem lucem videbit, nempe sub manibus præter opinionem mirum in modum crescit. Mitto ad te, quia meum nihil possum, opus affinis mei Junii de Pictura veterum. Brevi Scylacem videbis Filii Isaaci, ut & alteri Filii mei Gerardi Velleium Paterculum. Forte & Matthæi mei partem alteram annalium Batavico-rum. Dum Arausionensium princeps Bredam obsidet, Vinloniam & Ruremondam amimus. Nec existimatur ante menses duos potiri nos Breda posse. Scis quam urbs sit natura & arte munita. Atque utinam ne interea tertio oppido excidamus. Neque enim Cardinalem Hispanum cessare existimandum. Vale optime max. amice, & cum uxore ac liberis à me & meis omnibus salve. Collegis item doctissimis salutem impertias.

Amstelodami,
clb lbc xxxvii.
x. Septemb.

Tuus æternum,
G. J. Vossius.

CCCX.

Joanni Friderico Gronovio S. P.

SCire desidero, Doctissime Gronovi, an, quos Nonis Quinctilibus, Sall. cod. Manuscriptos, cum editione Coleri transmiseram, acceperis. Tum autem an δ πάυ Salmasius jam sese in viam dederit, vel quando tantoperè expectatum affore speretur. Equidem etsi valde lentus in scribendo sim, five naturæ vitio, five obrutus nimis multis, quibus ferendo non sim; tamen nisi hæc mea opinio semper fuisset affore propediem, non distulissim

stuliffem tamdiu scribere. Quod verò ad te scribam, credo non mediocriter miraris. Sed in causa est juvenis quispiam, Condiscipulus Bremæ tuus, Berchemius, ex Anglia redux. Non dubito quin te, ac ornatissimum Heilderfichium Hagæ compellarit. Is quo parentem, ut ait, sumptibus levet, desiderat; ut ab aliquo in ædes receptus, studiis liberorum prælit. Scis quam gravatè id fieri soleat, nisi de moribus juvenis benè constiterit, imò & de parentibus, ut si quid peccetur, sit compellandi eos jus, vel saltem ex parentum virtute, qualecumque de juvene fiat judicium. At ille sine utriusque vestri literis, ad me venit. Rogo igitur vel uterque, vel alteruter, altero subscribente, certior me faciatis, de parente, & juvene ipso: ut melius dispiciam, an commendatione etiam mea dignus sit. Dubito num parens sit Ludimagister, an Pastor, an utroque munere fungatur. Vestrum judicium, quorum mihi ut doctrina, ita virtus est perspectissima, multum ponderis addet præsentī negotio. Sed festinato paulum opus erit, ne aliena alius commendatione prævertat. Quid variis tuis fit? Quid iis quæ tam feliciter ad Sylvas Papinianas meditatus es? Mihi quidem hæc cessatio est permolesta: vel eo nomine, quia nomini incommodat tuo. Plurimum salutis summi virum Rivetum, & insignem Grafwinkellii animam, cum amico communi Heilderfichio.

Amstelodami,
iv. Kal. Sept.

Tuus,

G. J. Vossius.

CCCXI.

Merico Casaubono.

Reverende & Clarissime Casaubone,

ACcepi quinquaginta libras sterlingas, quæ debitæ extremo Martio Anni hujus Millefimi sexcentefimi trigefimi septimi, itaque nunc desidero id quod exspiravit Septembri septimo, eo magis quia ut ex tuis literis intelligo, nulla in te mora erit, simulac meas receperis. Cæterum amici talium intelligentes, auctores mihi sunt, ut ne viam insistam, quam soleo Leydæ, sed potius utar Angli opera, quod in Emporio hoc inclyto facile est. Eum simulac Præbendæ id quod debetur annumerari posse cognovit, hic mihi, imò vel ante, dummodo de voluntate D. Quæstoris constiterit, numerare velle. Atque ita

jam actum. Quamobrem rogo ut ubi literas meas acceperis, Mercatori satisfiat. Sic nihil opus erit deinceps, quam ut per Mercatorem ad te vel Rev. D. Quæstorem, vel utrumque literas dem, quibus vos, tum de vita mea, tum de priori pecunia accepta, faciam certiores. Cui numeranda sit pecunia, liquebit ex subscriptione libelli Anglici: ea subscriptio paulo ambitiosior præter morem meum, ut magis fidem facerem, dum muneris mentionem facio, quod quod sustineo nihil mercatoris fraudis latere. Filius meus Johannes tato excessit apud Indos, ubi magnas dignitates, & unde præclarè rem facere posset, non modo sibi ipse promittebat, sed etiam Magnates nostri illi addicebant. Sed tam beato esse non licuit, si in talibus etiam beatitas ponenda homini Christiano. Magnæ erant filii laudes, excepto quod sumptuosius viveret, ac fortunam ejus deceret. Itaque hoc non parum mihi dolori fuit. Solatur interea, quod piè ut intelligo excesserit. Ex opere nostro de Idololatria excusæ jam ut loquuntur quaterniones septuaginta. Spero propediem typis mandatam iri alteram Annalium Batavicornum partem, quam scripsit Filius Matthæus. Isaacus meus dabit Scylacem & alios Geographos Græcos ferò à se castigatos. Velleium autem innumeris locis emendatum filiorum minimus mihi cognominis. Nihil verò tam cito prodierit, quin transmittam. De Breda ab Arausionensium principe capta, scio jamdudum esse quod intellexeris. Non parum inde securitatis Batavis, & Zelandis accessit. Salutem uxori lectissimæ, tum autem Reverendissimis Dominis Decano, quætori & universis fratribus meis, à quibus me amari maxime cupio, operamque dabo, ut ne affectus mei ignara sit posteritas.

Amstelodami,
Id Idc xxxvii.
xxi. Octob.

CCCXII.

Hugoni Grotio. Lutetiam Paris.

Illustrissime Domine,

QUas nono Julii scripseras, eas demum ix. Octobris accepi à Wander-Burgio. Tantæ moræ causa est, quod eas literas, cum erudito Philolai opere cistæ suæ incluserat: Nauta autem Rhotomagensis, cui hanc commiserat, tam sero appulerit. Hesterno die Hortensio legendum Philolaum dedi: qui valde

valde eo capitur. Ac Blauwius excudere est paratissimus. Idem excudere avet *Arbologia* tuam, sed conditione hac, si placeant Typi, quibus usus in tuo de Jure Belli : majores enim non habet. Maimonides filii *Ἰσὺς μακρότερος*, post mensem ut spero editus erit. Excudentur & nostra, de origine ac progressu Idololatriæ. Ringitur Meursius, quod post triennii moram, necdum sua orlus sit Blauwius. Prorsus ei injurius est : si non alio nomine, saltem inedita tot retinet, eumque frustratur pretio, quod à magnatibus in Dania ex dedicatione rediret. Salmasius necdum reversus ; sed ex Riveto intelligo propediem affore. Aliud metueram ; sed gaudeo, quod nolit illis gratificari, qui in Galliis remansurum sperant. In filio tuo, nihil, vel nos, vel alius, hic desiderat quicquam. Lues quæ superiori anno, plus minus duodeviginti millibus Leidæ absumpsit, vehementer satis Harlemi hoc anno grassata ; minus urbe nostra ; sic tamen, ut antemensem unum alterum de hebdomade tolleret supra sexcentos : nunc longè remisit, siquidem intra idem spatium, intra trecentos amittimus. Heinsius, ut specimen ostenderet observationum suarum in Novi Instrumenti libros, philyram excudi curavit : sed nondum contigit videre ; nec super eo laboro. Subinde fallor : sed vix arbitror illud hic fore. Jam sexennium est, quod paratum sese diceret ad editionem ; si est qui fuit, non intra alterum sexennium id erit. Præclarum est ingenium, sed à majoribus studiis, ad tantam rem non satis paratum ; sed ipse viderit. Nihil mihi hic feritur, aut metitur. Minus malignus esset ; amore esset dignissimus utriusque nostri. De iis, quæ ad Rempub. hanc pertinent, quid scribam ? Aliunde illa melius, potissimum ex Affine Reigersbergio cognosces. Illustrissimæ Dominae conjugii tuæ, salutem à me, & meis, uti & optimis liberis.

Amstelodami,
Prid. Kal.
Novemb.

Illustri nomini tuo
addictissimus,

G. J. Vossius.

CCCXVI.

Georgio Slupeschio Baroni.

Illustris Domine,

MAgnam mihi voluptatem attulerunt literæ tuæ, quas cum legerem, visus sum mihi coram loquentem audire. Et pondus etiam attulit quod de manu in manum traderentur ab lectissimo juvene fratre tuo Floriano : qui quod cum cæteris virtutibus conjungere cupit scientiam militarem, rem facit & se & genere suo condignam. Quod autem cum apud externos morari vellet, castra prætulit Arausionensem Principis, facile non Batavis modo, sed cordatis omnibus suum est judicium probaturus. Utinam vero ulla in re, quam petis, utilis esse illi possit opera nostra ; id egregia virtus ejus promeretur, imo etiam debetur eximie humanitati atque amoris tum tuo erga me, tum duorum majorum natu fratrum : sic enim me devinxistis, ut omnia velim illustris vestrae domus causa. Quod nobilissimus & excellentissimus Dominus de Naglorice, illustrissimus serenissimi Regis Polonici ad Britannos, Belgas, Danos legatus, præstantis spei juvenem filium suum, una cum Ephoro optimo & doctissimo, apud nos potissimum studiorum causa relinquere velit, id vero mihi accidit per jucunde : ac quemadmodum gaudeo perennare præclarum nobilitatis Polonicae judicium de me, sic opera quoque in posterum à me dabitur, ut nec heroem illum nec alium vestrae gentis quemquam conceptæ de nobis opinionis possit pœnitere. Vale, Illustrissime Domine, tuique sic ac familiaræ vestrae amantem, porro amare perge.

Amstelodami,
clō Idc xxxvii.
13 Kal. Dec.

Illustrissimi nominis
tui cultor,

G. J. Vossius.

CCCXVII.

Davidi Wederburno, *Scholæ Aberdonensis Moderatori.*

PErgratæ mihi fuere quas miseras literæ, testes locupletes egregii erga me affectus tui, eoque gratiores quod non solum mitterentur ab homine eruditissimo, beneque promerenti de studiis juventutis, sed etiam ea
ex

ex urbe, quæ terris pariterque Reipub. literariæ dedit *ἡ μακροεὐδω* Jacchæum, Philosophum ac Medicum insignem, conjunctissimum, dum fata sinerent, Collegam meum, & Compatrem acceptissimum. Bibliopolæ, quem commendasti, utinam in ulla re utilis esse potuissim; sed ille nullo in negotio nobis ului est. Monui, ut si reuerit has in oras, liberius operam exposcat nostram, quam ego bono nulli negare soleo; nedum repulsam ferret qui ab homine commendaretur doctissimo & nostri etiam amanti. De originibus nostris sic res habet. Jam anni sunt XXII. quod ad umbilicum perduxeram, vel saltem id fecisse videbar. Ac tempore Synodi Dordrechtanæ, hoc est ante annos XX. monstraram labores hosce præstantissimo viro & amico Martinio. Anno uno altero post cum Typographis jam transegeram, ut in lucem ederentur; cum ecce literas Brema ab eodem Martinio accipio, prelum jam fervere Etymologico ejus edendo: itaque nomine Typographi rogare hoc impensè ut Editionem operis nostri differre consueque vellem, donec bonam partem distractum suum opus foret. Dedi hoc amici postulato lubens. Proximis verò annis ita aliis semper distentus fui, ut vacare editioni non potuerim. Nunc excuduntur libri nostri de Diis Gentium sive Origine & Progressu Idololatriæ: ac spero intra trimestre posse absolvi. Hinc aliqua sequentur quæ sacri sunt argumenti; dummodo mihi Deus valetudinem largiatur; quam tibi optimam exopto, ut publico diu utilis esse possis.

Amstelodami,
clō Iac xxxvii.
4. Kal. Dec.
Styl. Nov.

Tui studiosissimus,

G. J. Vossius.

CCCXV.

Joanni Skyttio, *Gubernatori* Livoniæ,
S. P.

TAmetsi & tuas, illustrissime Domine, interpellare curas minime oporteat, nec meæ occupationes patiantur supervacuum scriptionem, generoso tamen filio tuo Joanne scribente, occasionem hanc negligere non potui, sed operæ pretium putavi non salutare modo, verum & gratulari tibi de cunctis filiis tuis, plane ad decus paternum adfurgentibus. Etenim cum plurium ipse liberorum parens conscius mihi sim, quo amore & universos &

singulos complectar: non possum mihi aliud persuadere, quam longe tibi jucundissimum accidere, quicquid de progenie tua boni teque & se dignum cognoris; scio enim te ita credere, me quod scribo non cæco adfectu, ac longe minus ut aliquid auribus tuis dem, quorum utrumque procul à senectâ mea esse decet; sed judicio & experiendo edoctum ita scribere. Ac ut prius dicam de primogenito tuo, is jam sex mensibus, & quod excurrit, mecum prandet, & cœnat, imo ante dies paucos plane in ædes meas receptus, ut totis diebus sit nobiscum. Nimirum id, Illustrissime Domine, dandum judicavi tum sublimi dignitati tuæ, tum indoli egregiæ filii tui, & tamen longe plurimis jam primariis viris, & fœderatæ nostræ Belgicæ rectoribus, idem negavi; sed videbatur mihi filius ille tuus longè dignissimus, quem præ aliis omnibus amore complecterer. Quippe si pietatem & modestiam dicam, reliquos non sui tantum ordinis, cui indulgere plusculum solemus, sed plurimos humilioris etiam fortis antecessit. Imprimis vero incredibilem ejus ardorem in studiis amo & miror. Occurrit animo, rarum esse ut qui post Minervæ castra, secutus sit illa Martia, iterum se totum det Musis, cum duo hæc adversari maxime videantur. Ille tamen tantam ex iis voluptatem capit, ut nisi scirem, nunquam illum castra ulla vidisse crederem: imo prioris temporis recordatio etiam faces illi ac calcaria ad studia subdere videatur, tantò lubentius, etsi ob numerosam prolem, angustius habitem, in ædes recepi meas. Ubi occasionem deinceps longe meliorem habiturus, quoties vel quandocunque libuerit me, aut filiorum quem voluerit, consulendi in studiis suis; vix patiuntur occupationes ut tempora à Deo quieti destinata, reficiendo corpori impendam: nihilominus supra colloquia, quæ ultra prandium & cœnam sæpe extendimus, horam quotidie, sæpe & ultra impendo, ut quibuscunque modis possim, desiderio tuo atque illius satisfaciam. Cætera, quæ per occupationes ipse nequeo, egregie filius meus Dionysius supplet, qui tanto incensus est amore promovendi studia filii tui, ut magis non possit. Adeo ut non dubitem, quin si ardor ille filium tuum diu teneat, uti planè confido, ubi is ad te redierit, & tu in illo habiturus sis ornamentum illustriss. familiæ tuæ, & Sueciæ ingens præsidium. Atque ista de primogenito. Nefas verò mihi aliud sit dicere de filio tuo Benedicto, cujus ardens ingenium & maximarum rerum capacem animum, ut par est, ætumo. Quare uti ille nusquam sibi deest, ita neque nos sinimus vel adfectum vel industriam nostram

R r

fram

fram claudicare, de quo plura adderem, nisi intempesta jam nox esset, & crastini, quos cogito, labores, me capiendæ quietis moneant. Spero propediem me iterum de eo scripturum; scio enim non posse me tibi facere rem gratiorem, quam si de omnibus faciam certicrem, quæ ad tam cara pignora pertineant.

Deum oro, ut te, illustrissime heros, diutissime & Succæ Regno, & generosæ familiæ, addo, & nobis, quibus omni cultu te tuosque prosequi animus est, incolumem præstet.

Amstelodami.

G. J. Vossius.

CCCXVI.

Abrahamo Vander-Merio, *Senatori Curie Hollandiæ.*

TAndem aliquid respondeo, vir amplissime atque conjunctissime, tardene adeo? inquires. Quid dicam? sic sum: præsertim ubi publica magis urgent, uti contigit his muneris primordiis. Et sciebam mihi negotium esse cum facili creditore, ut prope periculum fuerit, ne mensibus aliquot pergerem tricare. Verum id minime passus es, ut ex filii sermone nuper, ac proximè etiam ex literis intelligo. Nempe credo observabatur tibi illud sceneratoris Alphii, vel optima nomina non appellando fieri mala. Quia igitur ulterius morasnectere non finis, paucis ad ea quæ quæris respondebo. Ac primum de illo, ubi Cœlius causam adferat delectationis illius, quam nolo dicere. Est locus ille non in Epistolis Calcagnini, sed alterius Cœlij patria Rhodigini Lib. XV. var. Lect. C. X. Alterum fuit, An Porphyrius ad Christianam fuerat conversus religionem? Ita visum tum aliis plurimis, tum Annalium Ecclesiasticorum conditori, Cæsari dico Baronio, cui illud imposuit, quod hodieque extat panegyricus hominis Christiani, qui nomen præfert Porphyrii. Hujus auctor creditur esse Tyrius ille, qui Phœnicia sua lingua primo Malchus, postea Græcanica Porphyrius nominatus; sed enim auctor longe alius est, puta Publius Optatianus Porphyrius. Ut cætera mittam argumenta, non pertigit Malchus ad tempora Constantini Augusti: cui panegyricus ille perscriptus. Nec Malchus Latine scribebat; nec in isto carmine genius Tyrii illius spirat, impii, sed magni omnino viri. Quæstiunculas annectis convivales cur *αὐτῶν* facietis hominibus figura ea, quæ

grammaticis vocatur *ὀφ' ἐν*, dicatur ne lis? Causam reddit Horatius, quo iudice,

*Natis in usum lætitiæ scyphis
Pugnare Thracum est.*

Cur vinum generosum vocetur Theologicum? credo miraris, quia nihilo deterius palatum sit Jurisconsultis, Medicis, Philosophis, quam Theologis, & fortasse etiam putabis hoc ad injuriam aliquam eorum pertinere, qui sacris præsent. Equidem nolim quemquam ejus ordinis irritare, ne forte excitem crabronem. Quare tantum dicam, eo jure dici vinum Theologicum, quo Horatius Pontificum dicit cœnas & dapes Saliarum, quod item Cicero epulas Saliarum, Apuleius Saliarum cœnas. Ut nihil dicam de adjuicialibus Augurum cœnis, de quibus Varro, Seneca, Plinius, Macrobius. I nunc & dic Pontifices, Salios, Augures, palato multum valuisse; hac sapientiæ parte caruisse Prætores, Consules, Proconsules; cave tamen existimes, hæc pertinere quicquam ad *τὸ θεῖον λόγον κήρυκας*, qui nostris in terris degant. Apud nos omnes licet, ut scis. Ad Germanos ito, vel potius accomoda hæc illis, qui in pontificiis militant castris, de quibus securius sæpe mentiri licet, quam de nonnullis nostrorum verum dicere. Pergis rogare, cur melioris notæ vinum, non solum dicatur Cos. sed & Costa. Nimirum in Cos. quidem ad vinum Coum, de quo Plinius in quarto decimo, verum singulæ magis literæ spectantur, quæ Colorem, Odorem, & Saporem signant, objecta trium sensuum, Visus, Odoratus, Gustus: ita hæc ipsa priori syllaba in Costa denotantur; sed altera hic syllaba accessit, ne solum tribus sensibus in hauriendo flore liberi patris opus esse videatur, sed vero universis, hoc est præter tres istos tactum etiam & auditum, quorum initiales literæ T. A. syllabam efficiunt, nam & calor præsertim æstate, demit vino gratiam, & nimius frigus hyme, calor autem & frigus tactus sunt objecta. Nec auditum excludere licet, quandoquidem vina generosa hoc habent, quod ob spiritus copiam tum in vase sic æstuent, ut audiri possit, tum etiam calici infusa, ac mox auribus admota. Cujus rei non semel periculum apud Dordrechtanos meos in cellis feci vinariis, sic jubentibus iis qui sua mihi vina commendatum irent. Aut valde fallor, aut una alteraque superest quæstio: verum minor Schedulingum cui ea inscripta frustra nunc à me quæritur. Ni fallor erant ex de Periplo orbis, & scriptoribus, quorum lectio negotioso homini, sed *φιλομαθεῖ*, maxime conveniret; ubi se schedula ea obtulerit, respondebo de priori. De altero agam fortasse in opere

opere meo de orbe disciplinarum & universis disciplinis. Salutabis plurimum optimam conjugem & heroinam focum, item affines Verium & Vivianum cum uxoribus. Etiam ubi occasio erit, Amplissimum Præsidentem Crom Mea etiam vos omnes salutari iussit.

Amstelodami.

Tuus totus,

G. J. Vossius.

CCCXVII.

Da. Paræo S. P.

JAM quartus est mensis, doctissime & amicissime Paræe, quod Amstelodamum veni. Ubi dum sum, redditus est mihi Lucretius Carus tuus, verè carus omnibus merito suo, nunc carior merito tuo mihi ante alios, quem, eo dicando, feceris tibi debitorem. Quare ut antea etiam scripsi, solum dispicio, quomodo me utcunque possim exsolvere, de quo cum nunc cogitarem aliquid scribere, occasione nundinarum Francofurtensium, commodior priori oblata est occasio adventu optimi & doctissimi Jacobi Hintzeri: Qui longe mihi gratissimus fuit, partim quidem ob egregias animi dotes, partim vero ob pulcherrimam operam, quam Ecclesiæ Dei & Reip. literariæ navat describendis apparandis iis, quæ magnus avus tuus in Schedis reliquit. Quantulum enim est, quod heros ille tot bona chartis commisit, si ea jaceant propemodum dispersa, vel saltem nunquam videant lucem? Ex eodem cognovi, præfore te studiis liberorum illustrissimi comitis Isemburgensis. Quod non improbo. Et si enim is est afflictissima Germaniæ status, ut nec principes viri tantum possint erga bene merentes, quantum vel ipsi vel nos optaremus: ac fortasse etiam lucrosius transigi possit cum opulento ac liberali mercatore: nihilominus tanto illud magis ex honore tuo erit ac publico bono, quanto liberi excelsius nati, & ubi adoleverint, amplius etiam terris profunt. Interea non desinent amici hic tui (in quibus præcunctis nomen profiteor meum) meminisse tui, quoties vel professio in Academia, vel illustri Gymnasio, vel regimen Scholæ, in celebri quapiam urbe vacarit. Non quasi omnia possimus in tanta Candidatorum & prestantium copia: sed quia aliquid poterit affectus erga te noster, multoque amplius virtus & rara doctrina, tam tuam imprimis parentis tui, maximeque in-

clyti illius avi. Necdum enim ita male agitur cum Batavia, ut magna ejus merita exciderint animis hominum, utcunque atro carbone multi procures nostros apud externos depingant, quasi nescio quid monstri in religione alant: Quod hætenus videre non possum. Utcunque illud non inficior, plerisque in urbibus ita esse animatos, ut solis iis, qui Dordrechtanæ Synodi decretis subscribunt, publica loca & stipendia tribuunt. Iis qui in prædestinationis dogmate Melancthonii vel Lutheranis accedunt, permittant, ut Ecclesiarum suarum sumptibus, privatis in locis doceant: dummodo constet alienos esse ab iis dogmatis, quæ repugnant harmoniæ Ecclesiarum, quale imprimis est Photini ac Samofateni, quod Socinus de novo paxillo suspendit. Medulla tua Historiæ universalis valde me delectat. Quam non paucis è juventute de meliori nota commendavi. Quid enim turpius quam si ea particula Historiæ veteris contenta sit? Diffundendus est animus per omne ævum, quod pauci hodie faciunt. Tanto majorem fructum ac gloriam ex opera hac reportabis. De historia tua Ecclesiæ La-Merium conveni ipse, ac postea idem filius fecit. Sed nihil promittere voluit, qui nesciret de magnitudine libri. Solet ille magis capi iis, quæ minoris sunt molis. Addebat jam prelum fervere multis & variis. Respondi nec festinato opus esse, sufficere, si post menses sex septem editionem ordiatur. Quod si is difficilem se præbeat, non deerunt, ut spero, alii, qui lubenter id facient. Dissimulare tamen non possum, nusquam difficilius esse typographum reperire, quam apud nos, nisi quis suis sumptibus librum edat. Fit hoc ob rerum omnium summam caritatem, quam causat grave & diuturnum bellum, quod nobis est cum hoste potentissimo. Sola excipio *seigneurie*, & nugalia quibus nihil vendibilius, ut ipsi non dissimulant typographi. De Nonio Marcello quod scribis, pergratum mihi est. Perge tantum, & quemadmodum Lucretium tibi devinxisti, ita de hoc etiam scriptore optime mereri. Non quia tantopere æstimem ejus eruditionem, sed quia tam multa ex veteribus adducit, quæ frustra apud alios quæramus. Dispiciam etiam an non juvare te hac parte possim: sive iis, quæ *avéndo-ra* habeo ab aliis observata, sive etiam nostris. Omnino enim faveo instituto tuo: quia satis jam perspexi, quantum in posterum à te expectare debeamus. Columna olim sum usus amici beneficio, cum in tragicarum fragmenta notas ederem meas: sed ipse non habeo, & amicus ille à quo habui, nescio, an usque adeo paratus sit in exteris oras mittere, sed tamen, si ille tantillum mea

causa recusaverit, aliunde poscam ab iis, qui faciliores sint. Saltem non cessabo, usque dum misero. Crastino die Lugdunum tendo, aut summum perendie, ubi hanc curam curabo. Magnopere etiam lætor, quod Palatinorum principum ac Bavarorum vitas edere decrevis. Valde faveo huic proposito, partim quia Palatinatus mihi natale solum; partim quia illa portio est historiæ universæ, quam urgere semper soleo. Sed de isto & aliis tecum pluribus loquar proximis literis. Interim, amicissime Paræ, egregia, & parentis & avi proles, mutuo nos amemus inter nos.

Amstelodami.

*Tuus sine dolo, moreque
majorum,*

G. J. Vossius.

CCCXVIII.

Jacobo Wittio S. P.

UT dies non sine nocte, ita nec amicorum scriptiones sine silentio. Cavendum modo ne nox longa fiat, qua ad Lethenitur. Quod ne nobis contingat, post anni hujus silentium has ad te literas mitto. Superiores tradideram Polyandro, qui se ad urbis vestræ Ecclesiasten dixerat scripturum. Verum nec ille ab Ecclesiaste, nec ego à te responsum accepi. Unde prope est ut mala fide curatas suspicer. Fortasse jam aliunde intellexeris, ut Amstelodamum à proceribus ejus urbis vocatus sim, quo in illustri Gymnasio, quod magno Bataviæ bono erigunt, Historiarum sim ac Politices professor. Stipendium annuum erit bis mille sexcentorum Florenorum. Accedit pulchra habitatio, quam hic vix octingentis aut etiam nongentis conducere: magnæ etiam factæ spes liberis meis; quorum mihi potissimum ratio habenda fuit. Jam enim plerique idonei esse incipiunt, qui munia publica capeffant. Joannes Cantabrigiæ Socius est Collegii Jesu. Franciscus est advocatus Curiae Hollandiæ, strenueque pro ætate sæpius jam causas egit. Matthæus paucis mensibus cogitat edere historiam comitum Hollandiæ. Dionysius quid possit, propediem ostendet, partim in Latinis & Græcis, partim in Hebræis, Arabicis & aliis Orientis Linguis. Nec malignam de sese præbent spem Isaacus, & Gerardus, omnium ille minimus, qui jam annum explet undecimum, & Latinis, Græcisque literis, historia etiam sacra, Romana, Græca, non

tinctus quidem, sed tamen pro ætate non leviter est adpersus. Filiarum natu major Cornelia jam nubilis, quippe quæ annum exegit duodevigesimalum. Nec pro sexu minus se probat quam fratres. Soror ejus Joanna jam novennis est, & ipsa ingenii satis amœni. Utinam sic res tuæ ferrent, ut mecum omni cognatorum tuorum familia, ac imprimis uxorem meam & sororem ejus Mariam, quarum utraque te sæpe habet in ore, semper in corde, invisere cum præstantissima tua uxore ac liberis possis. An nunquam illa dies adveniet? mihi vero juvenescere viderer, si tam beatus forem, qui saltem vel ad paucas vos hebdomadas hic conspicerem. De nobilissima matertera, heroina matre tua, tacere cogor, quia ætatem ejus id scio minime ferre. Sed tamen volupe est, quod vivat & valeat. Quod ut diuturnum esse possit, Deum rogo. Cui te, vir amplissime ac nobilissime, & dilectissime cognate, etiam & etiam commendo. Salutem dices meo nomine & omnium nostri, conjugii lectissimæ, liberis, & dominæ matri. Sed & clarissimo Ferrio, cujus ego vindicias pro Scholastico Orthodoxo, cum fructu & voluptate legi. Tuum erit, quando occasio dabitur, præstantissimum virum monere atque adhortari, ut porro bene mereri de Ecclesia Dei pergat. Vale.

*Amstelodami
Anno*

*Tui amantissimus, non minus
virtutum tuarum causa,
quam ob arctissimam con-
junctionem ac necessitudinem
nostram,*

G. J. Vossius.

Imperiales xxviii. quos miseras affinis mei Cazimiri Junii viduæ, accepi; deque eo per affinem meam, Mariam Juniam, certioram ipsam feci. Aveo nosse ecqua dignitate in patria tua fungaris. Amicus retulit te vel urbis esse senatorem vel Principis Lotharingici Consiliarium. Quæso ne patere me hoc diutius ignorare. Iterum vale & ama nos: scis votum amantium, Amari volunt qui amant.

CCCXIX.

Joanni Meursio.

UTinam, clarissime & amicissime vir, de me & meis perscribere possem jucundiora. v. Kal. Februarii ipsa Gerardi mei natali amisi suavissimam majorem natu filiam Corneliam, virginem ea pietate, moribus

bus illis, ac rei domesticæ intelligentia & cura, illa, ut de Latina taceam, Gallicæ, Hispanicæ, Italicæ Linguae peritia, illa notitia tum omnis generis Mufices, tum & calamo, & penicillo pingendi; ut tot bonis boni numinis gratia concurrentibus, omnibus fuerit admirationi qui nossent, fatendumque sit non eam profecto minus sui sexus laudibus excelsuisse, quam suis filiorum quos habui vel habeo quemquam. Quodque dolorem auget, ea mihi momento erepta, dum per glaciem rheda cum fratre Matthæo & sorore Joanna Illustrissimique Polonici Legati Filio fidei meæ commendato, nec non Ephoro ejus traha Leidam fertur. Non quidem quicquam imprudenter existimo hic factum à meis (si quidem ea crassities glaciei erat ut centenæ eodem tempore trahæ veherentur sine periculi formidine) sed non impudens minus quam imprudens traharius, dum invitis sessoribus prævertere vult antecedentes, ad latus ubi piscati antea fuerant, tenuique glacie aqua erat obducta, deflectens, omnes præcipitavit in aquas: unde prima quidem extracta Cornelia (heu nuper mea!) sed jam terrore & casu plane exanimata: Cæteri vivi educti virtute potissimum, post Dei gratiam, Matthæi mei qui ter in aquas insiliit non sine magno sui periculo, ut succurreret alieno. Prope ista Leidam contingere, qua occasione filia est avito inlata sepulchro. A tristibus veniam ad lætiora, ea nempe quæ te & tuos spectent labores. Tandem persuasum Typographo est, ut serio staret diuturnis promissis. Nec dubita quin intra mensem unum vel alterum Danica tua sit absoluturus & exorsurus ea quæ ad *πολυμάθειαν* pertinent. Opus nostrum de Idololatria Lentulum experitur non Celestem quales Metelli. Sed & minus urgeo ut tuis incumbat magis. Nec urgeo illa filiorum de quibus scripseram; facturus tamen simulac sex septem folia excuderit in Philologicis tuis. Si tum esse trico volet, cum vicino Janfonio transigam. Malim à Blauwio non uno nomine. Sed quomodocunque malim quam me eludi. Maimonides Dionysii mei jam ante annum & ultra absolutus, sed adhuc deest præfatio. Salmasius de usuris scripsit. Quod opus se transmittere tibi hesternæ die Elzevirius aiebat. Heiniana in Nov. Testament. opera credo jam in medio Paulinarum occupatur Epistolarum. Fortasse subsequenter Salmasiana Notæ; quod fieri, plurima in Heiniana animadvertet. Imo & in hoc de usuris videre possis, adversum Aristotelis Politicorum paraphrastem (nec ignorare virum potes) accurate differentem. Hottomanni Afconium ex Filii mei Isaaci Bibliotheca ad te mitto. Is, imo & Conjux

& omnes mei plurimum salvere te & uxorem optimam & liberos jubent. Estque is affectus eorum mihi longe jucundissimus. Nam profecto quid pulchrius quam quod junior ille air Isocrates, *τὸ παῖδάς ὥσπερ τὸ ὄσας ἔτα καὶ τὴν φιλίαν τὴν πατρικὴν κληρονομεῖν*. Vale magna Meursii anima & æternum mihi meisque anima.

Amstelodami,
c15 Ioc xxxviii.
Τέχνη.

Tuus tuorumque totius,

G. J. Vossius.

CCCXX.

Hugoni Grotio S. P.

JAM tertia est hebdomas, Illustrissime Domine, quod postremas tuas accepi. Iis saltem post longiusculam in scribendo cessationem, quam primum oportuit responsum dedisse; sed more suo moratus me est Blauwius J. C. eum semel, iterum, tertio, conveni domi suæ de Editione *ἀνδολογίας*, idque tui quidem gratia, sed magis, & mei, & communium studiorum. Distulit rem semper his verbis, conveniendum sibi prius esse Parentem, quia nihil nisi ex ejus sententia, statuere auderet. Velle me postea domi meæ, de omnibus facere certiorum. Ubi video me eludi, denuo accedo, casuque illius in ædibus, Parentem, & alterum etiam filium deprehendo. Prius senex dubia uti oratione; sed cum dicerem aperte agendum esse; absque eo nihil certi posse tibi respondere: in hanc sententiam absque circuitione aliqua est locutus. Nec suæ esse consuetudinis, nec sententiæ, scriptoribus addicere exemplaria compacta; imo ne incompacta quidem ad centenorum numerum: planè id sibi fore damnosum: præsertim in hoc opere; quod aliunde esset edoctus, hominum fore elegantiorum; non eorum solum, qui *πρὸς τὰ ἀλφίστα* attenderent. Longè magis se rem facere ex scriptis, quæ puerorum, aut vulgi, & semidoctorum manibus tererentur, quam quæ amarent, ac mirarentur pauci, de meliore luto à Prometheo efficti. Præterea terreri se malo vicino: qui simul ac à se aliquid viderit editum, recudat confestim. Aureum esse volumen, quod de Jure Belli scriptum à te fuit. Vicino tamen recedente, coactum se suam editionem, longè minori pretio divendere, quam impensæ finerent. Ita damnum fecisse Opere eo, emolumenti nihil. Nec referre, si nulla hic culpa fuerit tua, dum suo factum sit damno. Velle te *ἀνδολογίαν* tuam eleganter prodire

æ; vicinum mox expressurum Typis minoribus, charta viliori: Id fore satis majori emptorum parti, dum Opus hoc quomodocumque habeant. Tandem ita obliquare longos logos: paratum se esse excudere hoc opus, dummodo intra plus minus LX Exemplaria incompacta consistatur: neque id facturum se esse spe tantilli lucri, quippe damnum se magis præsentire; sed spe ista, ut excudere postea possit historiam tuam, & in Novum Testamentum notas. Hæc ego apud Atticum Asiatico sermone diffudi, ut melius certiusque mentem hominis aperirem. Omnino is ingravescente hac ætate, præsertim post Uxorem amissam (id ante tres menses factum) attentior ad rem evaluit. Præterea, vir aliqui optimus, μελαγχολικώτερος est, ac imaginatur, sibi non multum vitæ superesse; fortasse & terrent impensæ, post tantos sumptus, quos fecit in Atlante: Nec enim minores esse possunt, quam L. aut LX. millium Carolinorum. Et tamen non abhorret ab editione *ἐν πολλοῖς*: sed valde inhiat gemino operi jam memorato: scit historias ab omnibus expeti, ac legi: Et in tanto per Orbem, qui Theologi sint, aut videri velint, numero, non detore uspiam emptores sacro argumento, quod tam Illustri se authore tueatur. Opus nostrum de Idololatriæ origine, ac progressu, spisse procedit; partim ob occupationes, quibus vix par sum, partim etiam, quia sub manibus crescit. Itaque jam excusi quaterniones, ut vocant, LXXX. Nec video, ut ante tertium abhinc mensem exire in lucem possit.

Credo jam intellexeris de Excessu Noomfii Arlanderveniæ Domini. Amabam virum, quia tam amicum se gessisset erga me, & meos; & ea pietate esset erga Deum, quam in paucis istius fortunæ hominibus deprehendas. Unum semper ejus animum cruciabat, quod stultè ante connubium egisset. Et per est verisimile hoc fatum ei accelerasse: adeo illud ad animum revocabat; etsi nihil ab eo peccatum deliberato; sed si probè ab eo sum edoctus, ebrius insidias evitare non valuerit, quas sobrius non semel effugisset. Credo & eam fuisse causam, cur equestri dignitate ornatum se cuperet; ut quia videret, uno altero obstante, in Magistratu legendo, sui rationem haberi nullam; titulis aliis, non inferior æqualibus videretur. Non tamen S. Michaelis ordinem expetebat (negabat se pro tempore eo, tantos spiritus gerere) sed suffecisset honos, quomodocumque nobilitatis nomen referret.

Convenit me his diebus, Thyfius antea Hardervicenus, sed ab annis jam XVII. Leidensis Theologus. Is decrevit edere in lucem ea quæ pertinent ad scriptores Ecclesiæ, qui primo vixerint seculo. Quales eti-

am Ignatius, & Polycarpus, etsi ætatem ulterius continuarint: scis Latine extare Polycarpi Epistolam ad Philipenses: Eam Græcè dicitur habere Sirmondus. Habet & Salmasius beneficio Sirmondi; à quo exscriptam nactus quoque Thyfius; sed ait, si ex Latinis judicium sit faciendum, partem desiderari in illis quæ Salmasius, & ipse habent Græcè. Metuere igitur, ne fucus sit Salmasio factus à Sirmondo, partem Epistolæ Græcè sibi reservante; ne honos iste, editæ Epistolæ ejus, sit penes quemquam à Romanæ Ecclesiæ sententia alienum. Quæ desiderantur, quantum recorder, incipiunt ab illis verbis. *In his ergo state, & Domini exemplar sequimini*, &c. Petiit igitur Thyfius, hoc ad te scriberem, plurimumque te rogarem, ut Operam des, quo Græcum Sirmondi Exemplar, ipse videas, & per Amanuensem, quæ desiderantur exscribi cures; vel si Sirmondus non passurus sit codicem suum extra limen deferri, saltem per alium, tantum efficias ut etiam extrema à quocumque, sed fido tamen homine, de codice ejus exscripta habeamus. Multum metuo, ne sua Thyfium de Sirmondo fallat suspicio; sed ut verum esset, parum est verisimile, quod facere noluit, in gratiam eruditi Galli, id Belgæ ergo facturum. Et si in hoc aut simili negotio, frustra antehac fuisti, ut mihi relatum, merito verearis, secundo te repulsam laturum. Volui nihilominus hoc veteri dare Collegæ, nec tibi ignoto, ut perscriberem quod à me petisset.

Meursii opera, hebdomade proxima, incipiet excudere is, qui optimum virum jam quinquennium elusit. De Philolao, quem ut petieras, tradidi Hortensio, & Blauwio, quid futurum tandem sit, juxta scio cum ignarissimo. Blauwio editionem commendavi sedulo. Postea negotium omne commisi Hortensio; qui ad se Philolaum, non me missum aiebat: ostendi igitur partem literarum tuarum, qua mihi mitteres, sed eo fine, ut judicio Hortensii, & Blauwii, vel ederetur, vel remitteretur. Mox causatus me tribus mensibus detinuisse; Id pernegavi, qui pridè domum post vespertinam octavam acceperam. At inquebat literis subscriptum, ante trimestre esse exaratas. Narravi ergo, ut juvenis is cui Philolaum ad me dederas deferendum, eum cum literis ad Hortensium, arcæ suæ inclusisset. Hanc ut ipse mihi juvenis exposuit, trimestri fuisse Rothomagi detentam. In istoc & similibus, *δερούμε* Hortensii molestior mihi foret, præsertim merita mea cogitanti; nisi virtutibus hanc compensari putarem, & ad istiusmodi penè obduruissimam jam ab adolescentia. Impensè ab eo actum, ut publicis impensis, id autoritate Ordinum Generalium,

neralium, ad Galilæum de Galilæis mitteretur. Perhonorificum hoc foret, & ex colloquio cum viro reconditæ doctrinæ, multa addiscere daretur. Ac forte in Gallia, vel Italia, luculentior obtingeret dignitas, quam apud nos habet; sed-enim metuo, ne tam facile id nunc sit consecuturus; postquam urbicus senator Realius, Indicus antea Præfectus, vitæ huic est ereptus, qui valdè hoc negotium urgebat, ut nosse te arbitror. Quamquam vero non leviter incommodare possit illustris urbis hujus Gymnasio, si compluribus mensibus, nullæ habeantur auditiones Mathematicæ: nihilominus decretum, si auxilio nostro ei opus erit, adjuvare eum apud urbis hujus Proceres: Idque ea fiducia, quod publico nomine, & stipendio missus, futurus sit devinctior ad se sitendum postea Batavis; & quodcumque fructus ex perfectione perceperit, suis potius impertiendum quam alienis.

Hæc cum scripisssem intervenit Constantinus l'Empereur, Hebræarum apud Leidenfes literarum Professor, vir tui amans, & æstimans, supra sui ordinis complures. Is se misisse ad te aiebat, quod proximè de Hebræis Legibus opus edidit; sed cùm adderet, vix esse tres quatuorve hebdomadas, quod misisset; negavi mirum esse, si responsum haberet nullum, quandoquidem magna sæpè incuria esse eorum soleat, quibus libros damus deferendos. Non pessime actum iri, si vel tertio post mense acceperis, vel quarto. Id tibi in meis, mihi semel iterumque in tuis, (ut illo quem miseras Philolao) contigisse. Recepi tamen sic poscente hujus me rei mentionem facturum iis quas jam literas exararem. Idem Constantinus revidere postremo solet paginas excusas exercitationum sacrarum Heinſii in Novum Testamentum. Credo partim, ob Hebræa quæ intercurreunt; partim ne quid aspergatur, quod rerum sacrarum, præsertim de quibus controversantur in scholis, minus probet intelligentem. Is retulit mihi jam deventum esse à Typographo ad notas in Epistolam ad Romanos. Transiit hanc per urbem Illustrissimus Regis Polonici Legatus, vir doctus, & perhumanus, tuoque affini in Galliis, juventutis tempore, perfamiliaris. Jam credo ex eo cognoris, ut legatio hæc successerit in Britannia. Nam ad affinem tuum scripturum se aiebat. Apud nos filium, cum Ephoro relinquere maluit, quam apud Leidenſes, ob tot foeda quæ proximo mense illic peracta erga mulieres, imo & adolescentes. Referre ea pudet. Heu quantum locus ille immutatus ab eo qui in utriusque nostri erat adolescentia.

Jam aliquot menses præterire, quod in

lucem prodit affinis mei Francisci Junii Opus, de Pictura Veterum: quod alia de Pictoribus Antiquis subsequenter. Is mihi commisit, ut Exemplar ad te transmitterem; sed non video, ut commode hinc fieri possit, hyberna tempestate: filio igitur exemplar dedi, quod fratri tuo optimo Guilielmo daret. Is occasionem aliquam melius intelliget.

Amstelium Vondelii, quam illustri tuo nomini inscripsit, jam ut puto videris. Diu quominus ageretur, obstitere aliqui Presbyterii, ut arbitror nomine. Tandem id Consuli Gravio commissum ut perlegere cum cura vellet. Dixit se nihil invenire, quod jure offenderet. Nam quod dicerent, *παίς* totum drama, uti & Authorem, id sibi parvi ponderis videri; eo quod personæ debuerunt introduci, non ad tempora reformationis, sed temporibus suis accommodatæ. Nudius tertius primo actum id drama, idque majore tanto cum applausu, quanto diutius elusa fuerat populi expectatio. Cum in eo essem, ut literæ obſignarentur, domum meam venit Blauvius J. C. Quærit utrum jam ad te scripisssem. Dixi literas necdum missas. Petit in hunc modum scribere vellem, Ita jam occupata esse prela sua omnia, ut intra tempus longiusculum nihil novi tentare ausit. Nam hac ipsa hebdomade, bina, ternave prela occupaturum solis operibus Meursianis. Quæſivi utrum prudenter satis rejiceret editionem tui operis, cum & *Ἀνθολογία*, per se opus sit gratissimum, & tanti interpretis translatione, & nobis longe futurum sit commendabilius. Causatus tum ille, & malum vicinum, & quod non posset ex animi tui sententia excudi, nisi gravioribus impensis, & alia ante memorata, ut reponere nihil attineat. Nimirum hæc verè *αἰτία*, quod renunciatum venerat, solum *πρόβλημα*.

Deus Opt. Max. diutissime te & Heroinam conjugem, & filiorum utrumque, cum filia optima (quos omnes ego, & omnes mei impensè salutare jusserunt) salvos, & sospites conservet. Scribebam festo Epiphaniæ anni hujus c1616c xxxviii. quem prosperum ac foelicem, ut inchoantis anni tempore fieri amat, comprecarer, nisi superiori voto, & hoc, & alia, mihi complexus viderer.

Tuus æternum Cultor,

G. J. Vossius.

CCCXXI.

Simoni Beaumontio Syndico Rotero-
damensi S. P.

VIR amplissime, atque eximie, tertio jam & plurculo intervallo, manum admoveo calamo ad rescribendum; & quod de die non erat, nocturni temporis beneficio (O beatas noctes non studentium minus quam amantium!) impedit nullus. Seu *juridicina*, seu *causidicina*, tuo voles in versu, favitores habes non malæ ætatis scriptores, atque eos quos maximè voles, vel Jurisconsultos, vel verborum juris retinentissimos. De Tertulliano qui virum norit, nemo inficias ierit. Is opere Scholastico, de Pallio, quod exaravit ubi Presbyter erat factus Carthagenensis, occasione ea quod velut, ἀρετῆς χειρῶν, pro toga, Pallium assumpsisset, hunc in modum scribit capite tertio: Cato *juridicina sue in tempore humerum exertus, haud minus palliato habitu Græcis favit. Juridicinam dicit pro tempore eo, quo jus diceret Prætor. Prætores enim cinctu Gabino, hoc est nudo humero dextro, (hoc enim est quod Tertullianus ait humerum exertus,) jus civibus dicebant. Hoc cognoscere est ex veteri interprete Persii in illud, satyra quinta.*

Bullaque succinctis laribus donata pendit.

Atque item Isidoro Originum, Lib. XIX. cap. 24. Ut autem à *juridicus, juridicina*, ita à *Causidicus* formarunt jurisconsulti vestri, *causidicina*. Qua voce usus Ammi-

Pag. 452. Edit. anus Marcellinus, Lib. XXX.

Ad ultimum id habet causidicina cum cæteris metiendum & grave, quod hoc penè ingentum est penè litigantibus cunctis, ut cum iurgia, mille casibus cadant, accidentia secus in potestate esse existiment Patronorum, &c. Dixit aliquis hunc & hominem fuisse Græcum, & Militem, uti ipse de se refert, extremo Historiæ suæ. Dabo igitur Aurelium Symmachum, Oratorem eumque Consularem. Is tribus in locis hoc usus est vocabulo. Ut Lib. V. Epist. XV. quæ ad Theodorum Sancto Lampadio, germano tuo, & ad spem processus, & ad bonam viam morum, Causidicinam credidi profuturam. Item, Epist. LXXIII. quæ ad Licinium: Modestiori causidicina dare numen afficit. Alibi idem, Qui Magisterio tuo Causidicinæ insinuo candidatos. Sed quid his insisto? Præclarum quidem Symmachi nomen, quem in florido dicendi genere, nullo Veterum minorem ait Macrobius, Saturnalium Lib. V. cap. 1. Malis tamen scio Imperatores, qui

stante Roma, & eadem qua Symmachus vixerint ætate, sunt hi Theodosius, & Valentinianus.

Codicis Theodosiani Lib. VIII. Tit. 4.

A. A. Si qui verò cohortales, vel subiecti cohorti, ullam ante hanc legem gessit militiam, aut ceptam dudum etiam nunc gerit, aut causidicinam in foro amplissima præfectura, atque Illyrici, vel urbano proficitur iudicio, in eodem latum pridem constitutionum sanctio observetur. Vides illustrem locum eo ex opere, quod mecum scio miseris, vir amplissime, non magis esse, in manibus eorum, qui se Themidi vestræ iaciunt. Et sanè quid ἀναλογίαν utroque, quæ diximus, vocabuli. Nam ut à *Causidicus, Causidicina*, à *juridicus, juridicina*; sic à *carnifice carnificina*, à *vestifice, vestificina*, apud Tertullianum de Pallio, ab *Indice Indicina*, Apuleio VIII. Milesiarum. & aliis alia id genus. Vale, vir maxime, & porro nos amare, ac de Republica Batava benè mereri perge.

Amstelodami
Cl. loc xxxviii.
Kal. Febr.

Tuus æternum,
G. J. Vossius.

CCCXXII.

Martino Pilio S. P.

IT A est, ut scribis, Ornatissime Pili. Planè ego, & præstantissimus Patruus tuus, iisdem in pueritia præceptoribus, Oxydrio, & Rekenario, viris doctissimis, uti sumus. Sed quod in vita ejus, de viro Cl. Francisco Nansio, lego, longè aliter est. Quippe is demum post excessum Oxydrii, Latinas Græcæque literas docere Dordrecht coepit: At superstitie Oxydrio, jam Leidam se contulerat Pilius, ut vel ex Rekenarii Epistolis à te editis cognoscere licet. Imo quo tempore docere Nansius coepit, (id anno fuit Cl. lxxci) jam juris studio se Pilius addixerat. Primum ego Nansium, postremumque audiui; sed nunquam ego, & Patruus classe fuimus conjuncti. Quid mirum? quando ille ut ætate, (septennio enim natu grandior erat) ita etiam eruditione longè superior foret. Itaque postquam ille Gymnasium Dordrechtanum reliquit, præter dulcem sui memoriam, etiam exemplum reliquit, quod imitaremur. Sanè laudibus ejus ego, & æquales mei non leviter ad studiorum amorem accendebamur. Præsertim cum Academicarum feriarum tempore, excurreret Dordrechtum, & veterem suum Præceptorem Rekenarium, in Gymnasio docentem, honoris, & amoris ergò, audire

dire dignaretur. Ac licet vix egressi essemus pueritia, tamen quotquot necdum subduxeramus manum ferulæ, facillè videbamus, nihil gratius Rekenario esse ista discipuli comitate. Nunquam sane eruditius, ac disertius docebat, quam honorario hoc auctus audire. Postea etiam multa magni erga Rekenarium affectus indicia dedit; præsertim ubi præterito Rekenario, quasi Græcè non satis gnaro, Rectori Oxydrio Hadrianum Marcellum suffectum vidit. Quam graviter id tulerit, argumento erit, quod cum audiisset à Marcello, ejusque discipulis, aliquot sic spargi, Rekenarium Græca vix delibasse; Gymnasium sit ingressus, ac nobis audientibus, in hanc sententiam, Marcellum sit affatus. Intellego optimum, & doctissimum Præceptorem meum à te, tuis traduci, ut Græcis literis minus excultum. Accessi igitur, ut ex discipulo æstimare discas magistrum. Homerum cedo, vel Isocratem, vel quemque Græcum scriptorem voles. Experiamur, quid uterque extempore interpretando possit. De peritia utriusque penes Franciscum Nansium, & alios judicium esto. Carmine & politiori literatura præstabat Rekenarius: Sed longo eum intervallo superabat Marcellus, ut Arrium, & Philosophiæ scientia, quam Lovanii hauserat, ita & peritia sermonis Græci. Nec exiguum eo honorem reportarat aliquot ante annis, Antverpiæ, quo tempore & privatam sibi scholam aperuerat Bonaventura Vulcanius. Sanè ita vulgo ferebatur, plures Græcè eruditos è Gymnasio suo emittere Marcellum, quam Vulcanium. Equidem multum metuo, ne id magis incuriæ Vulcanii fuerittribuendum. Nam quantus in Græcis fuerit is vir, optimè præter Academiam Lugdunensem, in qua biennio quasi docentem audiui, testantur ejus tot monumenta per universam diffusam Europam. Sed enim ista tum nos fugiebant admodum Adolescentes. Nec aliud æque mirabamur, quam sic à Patruo tuo, vix annos nato duo & viginti, provocari ad certamen, senem, qui annos xxx. & quod excurrit in literis Græcis insumpisset. Sed hanc Pilio fiduciam gignebat, quod priusquam iret Leidam, ab Oxydrio Græcè doctissimo, præclare ea lingua esset imbutus, & cum Leidæ degeret assidue, manu tam Græcos verfasset, quam Romanos. Unum tamen in se Leidæ culpabat, quod Rami, potius quam Aristotelis præceptis, à Præceptoribus esset imbutus; Primus enim Philosophiam peripateticam, in Gymnasium Dordrechtanum introduxit Marcellus. Nec dubium, quin ad amorem Aristotelis, multum eum accenderit tum Justus Lipsius, qui in Epistola quadam scrip-

serat, non fore magnum, cui magnus esset Ramus: tum etiam Petrus Molinæus, vir omnino Peripateticus, quo utebatur perfamiliariter. Sic igitur claudicaret hac parte doctrina, & ipse frequentare Peripateticos coepit: Ac initium fecit ab initiis Crellii, qui eo tempore palmam in hac arte præripuisse cæteris videbatur. Meminit ipse ejusce rei, in literis suis, ad Nob. & Cl. Joannem Polyandrum seniore: quicum & magna illi notitia erat. Cumque per varia animum diffunderet, nunquam tamen deponebat amorem Poeseos. In quo quantum præstiterit, conjecturam capere licet ex iis quæ jam editione nova ab Orco vindicasti. Sic ille Latinis Græcisque literis, & cum liberalibus artibus, tum prosa, vorsaue facundia instructus, animum ad juris scientiam appulit; cujus exemplum si imitarentur adolescentes, non tot in publicum cruda propellerent studia, meliusque & sibi & publico consultum irent. Sed hæc emendare non est nostrarum virium. Tuam pietatem erga Patruum non possum satis laudare. Quid enim iniquius fuisset, quam ut laudatissimus undecumque Patruus tuus, à quo nihil non magni Patria expectabat, paucos intra annos intercideret totus? Id permittendum nulli bono, & studiorum amanti erat. Minimè omnium tibi, fratris filio: quem, ut video, Typographus tuus in ipsa inscriptione nepotem vocat; quasi Nepos non sic se habeat, ratione avi, uti filius ratione Parentis. Sed perminutum hoc, & à quo minimè pendeant, vel salus Patriæ, vel honos Patruui. Et fecit ille non sine exemplo doctissimorum nostræ ætatis hominum; non tamen eorum, ut arbitror, qui Romanis temporibus purè loquebantur. Nam locus unus alter quem objectant è digestis, vel malè lectus, vel malè intellectus. Quod in jure sic subactus, facillè videbis; ubi tam ad pusilla etiam te dimittere voles. Illustri Dom. Exlegato Beverio, affini tuo, magno Patriæ columini, ubi occasio feret, plurimam meo nomine salutem dicito.

Amstelodami
cl^o loc xxxviii.
xv. Kal. Febr.

Tuus omni studio,

G. J. Vossius.

CCCXXIII.

Merico Casaubono, Isaaci F. Ger. Jo.
Vossius S. P. D.

Reverende Clarissimeque Vir,

SI Gregorianam temporum seu emendationem, seu depravationem sequimur, decurrit hodie annus vetus: cras inibit novus, quem fortunare cupio tibi ac familiæ toti & venerando fratrum Collegio. Nos hic post mortem Dionysii, Joannis, Cornelii; postque morbos graves Matthæi, Isaaci, Gerardi, & corpore interdum languemus, & animo subinde, ut Augusti utar voce, betizamus. Accedunt molestiæ aliæ pene quotidie. Sed in universis voluntati divinæ acquiescimus. Interea spissius procedunt Musarum Labores. Adde quod Typographus noster ipse moras plurimum necitat, ac sæpius habet quod existimet prævertere oportere, uti nunc Barlæanam descriptionem pompæ quam hic conspiciere fuit, ingrediente urbem Regina Matre Medicæ: ea intra mensem aut circiter cum picturis elegantissimis prodibit. Hoc magis sepositis paulisper nostris in iis festinatur, ne diuturniori mora gratiam deperdant, si quæ cum Italorum pompis collata tantum fuere mediocria, hæc nimis magno molimine tarde admodum videant lucem. Rerum hic novarum nihil habemus, nili de capto Brisaco nomine Galliarum Regis. Eo difficilius succedet pacis negotium in Germania. Neque enim adduci se finet Rex Christianissimus, ut reddat locum tanti momenti. Absque eo autem Cæsar omnes condiciones pacis respuet. Interea hoc inde boni proveniet foederatæ Belgicæ, quod Cæsar non poterit æstate proximâ exercitum adversum nos mittere, uti decrevisse fama undique percubuerat. Abunde enim nunc milite suo opus ei erit tuendis regionibus iis, in quas è Brisaco fieri possit irruptio. In urbe hac intra menses duos tres non minus XL. è viris Mercurialibus foro cesserunt. At qui etiam aiunt plures esse quinquagenis. Et complures in iis qui debeant ultra trecenta florenorum nostratum millia. Hæc res perdet plurimos qui illis crediderant, nec leve hinc damnum toti mercaturæ, quod & magnopere incommodavit publico: præsertim si verum est quod aiunt, moribus antiquis verisque rem stetisse Romanam: pecuniis adversus tam potentem hostem stare cadereque Batavam. Interea hoc solatii nobis, quod hinc æstimare discimus animi bona præ illis fragilibus ac fluxilibus. De præbenda Cantuariensi quæ bono meo

expiravit hoc mense Decembri, curæ tibi fore confido, ut ea pecunia annumeretur Mercatori Amstelodamensi Custenio, sive quem ille in Anglia huic rei præfecerit. Uxor uxorem optimam, imo nos omnes salutamus vos omnes.

Amstelodami cl^o Id^o xxxviii.
Pr. Kal. Februarias.

CCCXXIV.

V. Cl. Merico Casaubono Ger. Jo.
Vossius S. P. D.

IN summo mœrore meo pauxillum hoc literarum scribo, præstantissime & amicissime Casaubone, siquidem Dominus Deus quam mihi dederat abstulit filiam natu maiorem optimam Virginem, & multis nominibus laudatissimam, quam rem ex aliis qui norint malim te intelligere. Quodque dolorcm mihi auget, erepta mihi tristi infortunio. Dum enim his ut terris, credo & Britannicis, obtinet hyeme, per glaciem rheda, sive traha malis, una cum fratre, sorore, cognato & duobus aliis fertur; nec impudens pariter & imprudens auscultare vult meorum & aliorum monitis, universi rupta glacie in aquas præcipitati. Tenella illa mea, partim casu, partim metu exterrita, mox obrigit: ceteri, sed non absque maximo periculo, evasere. Sed plerique eorum salutem post Deum debent filio Matthæo, qui non semel in aquas insiliit sponte, ut salvaret cæteros. Sic Deus, mi Casaubone, me exercet in hac vita, qui & hætenus dat illud, &, ut confido, porro dabit, ut in sanctissima ejus voluntate conquiescam. Jam ut scis viginti quinque debentur mihi libræ Sterlingicæ ex Canonicatus Præbenda, quam vocant. Nempe expirarunt Decembri mense anni superioris cl^o Id^o xxxvii. Tantumdem hic mihi hodierno die annumeravit honestissimus & ornatissimus Kustenius ea fiducia, ut quamprimum refundatur ei Cantuariæ sibi, vel illi, qui nomine illius ostenderit schedulam à me subscriptam, spero nullam fore moram vel in te, vel fratrum charissimorum quoquam. Plurimum salutem à me & meis dicito lectissimæ uxori, sed & Reverendo D. Decano & toti Collegio venerabilium fratrum.

Amstelodami cl^o Id^o xxxviii.
xviii. Febr.

CCCXXV.

Joanni Isaacio Pontano.

Hardervicum.

JAM credo intellexeris, Præstantissime Pontane, de excessu Cornelie filie meæ natu majoris. Ea cum fratre Matthæo, sorore minore, cognato item Junii Nepote, sed & Illustrissimi Poloniæ Legati Filio, & Ephoro ejus, Leidam per glaciem ferebatur rheda, ut nostrates ea tempestate solent. Et erat Meis ea in urbe negotii quiddam. Sed Rhedarius, nisi Traharium malis dicere, minimè obsequens assiduis eorum quos veneret monitis, dum prævertere alios conatur, non impudens minus, quam imprudens, universos in glaciei fracturam, ubi piscaretur antea, sed tum leviter glacie erat obducta, conjecit. Unica illa Cornelia confestim obriguit. Cæteri sed non sine magno periculo, virtute Matthæi evaserunt: cui in hoc tristi infortunio, favore divino robur erat triplex, & pectus adamantinum. Ita ut tertio etiam ad alios liberandos, se in aquas præcipitem dedit. Ferreus sim, vel siquid ferro durius, nisi hic casus me admodum maceret, & coquat. Tamen me non mediocriter solor divina Providentia, sine qua nec capillus nobis excidat, ut Sospitator prædicat. Hic interim mœror me paulo fecit tardior ad rescibendum. Præterea quod cum tuæ huc literæ ferrentur, Lugduni essem, quo me receperam exequiarum ergo. Nam avita Junii sepulchro est illata. Simul illud ut deferrem fecit, quod Papiam ipse non haberem. Nam quod ad opus Grammaticum nostrum, ubi subinde memini, amici sum usus codice: qui dicit tibi ejus usum esse necessarium in Isidori glossis, quas cum commentario edere decrevit. Dolet quod non possim Stephanio gratificari, cujus ego, & virtutem amavi semper, & æstimavi doctrinam. Aveo scire ut valeas. Nam literæ tuæ ad me, injecerunt sollicitudinem non levem: Sed spero jam planè convalescis. Id Deus faxit, non tui modo, & tuorum causa; sed vel maximè propter Remp. Literariam, quæ & Geldricam tuam historiam, & alia à te avide expectat. Omnes mei te salutant, foeliciusque hunc annum decurrere tuæ familiæ cupiunt, quam meæ cœpit.

Amstelodami,
cl̄o l̄oc xxxviii.
xvii. Febr.

Tuus,

G. J. Vossius.

CCCXXVI.

Claudio Salmasio Ger. Vossius. S. P.

NON absq; periculo, salvus interim ac sospes, cum filio filiaq; nunc unica Amstelodamum perveni, & eapropter gratias Deo nostro ago, quas possum. Conradum Pauli Brunswicensem (male Heresbachium putâram) mitto quidem, sed vix video ut juvare aliquid possit. Hottomannum de Usuris nec habeo, nec hic ex amicis queo nancisci. Scio tamen Lugduni in Galliis excusum anno cl̄o l̄oc xix. cum aliis aliquot ejus viri opusculis. Mirum præteritum esse in Oceano Juris, cujus tomo septimo (septem & viginti voluminibus constat) habentur septem de Usura Scriptores. Hoc volumen transmissem, nili scissem certo esse etiam in Bibliotheca Leidensi. Sed ex Bibliotheca nostra habeo nunc domi meæ, ac transmittam si verbo indices. In indice tot voluminum video & aliis tomis multa de hoc argumento interspersa esse. Sed quandoquidem Leidæ hæc habetis, quæ si ulli, tibi sane patere debent, nihil de eo addendum putavi. Sin à nobis malis, universa in arca concludam ac mittam. De honore habendo nobis in baptismatis sponsione uxor gratias agit, ut convenit, rogatq; obnixè, ut utaris vicaria ejus opera, cujus maxime velis. Sic enim apud Batavos, & credo aliis etiam terris usus est, si loci intervallum vel valetudo vel aliud obstiterit quo minus, quis coram adeste perq; se obire sponsionis munus possit. O si suavissima mea Cornelia, quam sic ob virtutes dileximus ego & uxor, imo innumeri nobiscum, hoc potuisset pro nobis. Sed facta est voluntas Domini, cujus nomen sit benedictum. Conjugi tuæ lectissimæ sed & affini tuæ optimæ salutem adscribi jussit uxor mea; simul obstrictissimus tibi Isaacus meus & qui plura tamen debere exoptat, quo mancupio totus sit tuus, saltem non minus quam parentis, plurimum te & conjugem salutat.

Amstelodami, cl̄o l̄oc xxxviii.

Non. Feb.

8 f 2

CCCXXVI.

CCCXXVII.

Claudio Salmasio, V. Cl. G. J. Vossius,
S. P. D.

IN mœrore quem conceperam ex obitu optimæ & suavissimæ Cornelie meæ, dolorem illum Leida abeunti non mediocriter auxit, quod partim ex Elichmanno, partim etiam ex Epistolio tuo, intelligerem de nephritide, adversaque valetudine, quâ impeditus, non uti ante, ita à funere etiam invisisses. Atque eo pejus me hoc habet, quod ex eo nihil intellexerim. Scis autem quam amor sit suspiciosus. Simul nonnihil molestiæ animo attulit meo desiderium cognoscendi, quid proximo Curatorum conventu factum esset de rebus tuis, & an manserint promissis. Sed si valetudo est prospera, minus laboro de cæteris: quanquam si ullus mortalium, is sim, qui magnum inde dolorem caperem, si tantum posset improbitas, ut te illud sæculi decus, ac Batavica etiam Academiæ præsidium, à terris avelleret nostris. Quod ne Deus finat, ut unquam videam. Credo, jam filiam tuam Mariam sacro fiteris baptismati. Sed sive id jam factum, sive futurum propediem, ex more Batavo, arbitror & Gallico, munusculum mitto, quo adultior tua meminerit optimæ conjugis meæ: cujus utinam valetudo sisisset, ut ipsa de sacro fonte levaret; sed quia nec ipsa potest ad vos venire, nec de Cornelia dulcissima, Deo sic visum fuit, vicaria opera opus vel fuit vel erit, dum ipsa susceprix, & sacræ initiationis arbitra censeatur. Tantum Junia mea Merceram tuam rogat, ne vili metallo, splendido luto, munusculum minutum, sed solo æstimet affectu. De Hottomanno nihil mirum, si Haga nihil receperis; nam quo ad te scripseram die, eo ad nos filius Haga venit. Ac necdum ad Hagenses reversus, & ut arbitror jam serum est ex advocatorum elegantioribus exquirere de hoc opere. Quare nisi aliter videatur, operæ parceretur; sin aliter placitum, fac ut ex Isaac meo intelligam. Nihil enim mihi vel meis jucundius esse possit, quàm ulla in re tibi, hoc est reipublicæ Literariæ, utilis esse possit opera nostra. Salutem plurimam tibi, Conjugi, affini tuæ, Uxor, imo omnes nos dicimus.

Amstelodami, cId Idc xxxviii.
Non. Kal. Martias.

CCCXXVIII.

Joanni Cabeliavio. J. C. S. P.
Ultrajectum.

Dicere non possum, mi Cabeliavi, quam grata mihi fuerit utraque Epistola tua: posterior imprimis; qua mihi carum adeo pignus, lugenti, omni solatiourum genere mederi voluisti. Hunc animum tuum nisi habeam pergratum, prorsus fuero ingratus. Quamobrem, etsi semper te dilexerim, non leve tamen est, quod amor accessit nostro. Nec propterea opinari te velim, molliter adeo me ferre tristissimum hunc casum, cujus gratia, tantum assumendum tibi laboris putasti. Scis ætatem senilem, & ut teneris ab unguiculis, studiis sim innutritus, sacris imprimis: quæ tractare soleo, non, ut alios solum reddam meliores, sed ut prior sim Ipse, quales esse alios velim. Sed de isto pluribus colloquemur, ubi Amstelodamum veneris. Nam spem eam mihi fecit alloquio suo optimus Affinis tuus. Advenies exoptatissimus: Neque id modo, ob eruditionem insignem; sed etiam ob pietatem, & candorem, quibus omnem doctrinam, in summis etiam viris possideo, sæculo enim vivimus fucato, & maligno: adeo ut qui raram doctrinam cum excellenti probitate, animique candorem conjunxerunt, sint vix totidem, quot Thebarum Portæ, vel divitis ostia Nili. Sed mihi ut videtur, ad carceres prope decursum hoc vitæ spatium. Tibi, ut arbitror, longa restat via; in qua conficiunda multum metuo ne graviora etiam subeunda sint, quam illa, de quibus scribis prioribus literis. Non omnia, hominibus eruditissimis præsertim, Dei mentuentibus, evenire solent ex animi sententia. Nimirum melius novit Deus, quid cuique expediat. Literas tui amici remitto, ut volueras. De tuis fiet ut scripseras. Barlæus tui amantissimus plurimum te salvere jubet.

Amstelodami,
cId Idc xxxviii.
Postr. Non. Mart.

Tuus omni studio,

G. J. Vossius.

CCCXXIX.

Francisco Gomaro, V. Cl. *Præceptor*
Veteri, affinitate conjunctissimo, Ger.
 Jo. Vossius S. P. D.

Quod M. Tullius ait de Phidiæ signo, simul id adspectum, & probatum; id intelligentissimi cujusque judicium est, de opera tua, in Hebrææ poësis notitia quasi ab Orco revocanda. Nam & eruditissimus hic labor tuus novitate argumenti facile in oculos incurrit omnium, & quanto gratiora esse debent, quæ sacras attingunt literas, tanto magis vel prima facie se commendat, & tamen majorem allaturus fructum, quo magis inspicitur. Sanè apud nos video extolli hanc commendationem, non ab iis modò, qui nomen nobiscum Christo dederunt; sed iis quoque qui, se aiunt, Mosaicis contentos sacris; laudarentque iidem impensius, si cum Hebræis literas conjunxissent Græcas. Magas igitur gratias habeo pro Opere, quod & nostra ætas, & postera æstimabit semper. Altero etiam nomine, & ego & conjux hoc tempore, post tot merita vetera tibi obstringimur, quod ea ætate illis occupationibus non gravatus fueris, nos in hoc tristissimo dilectæ filiæ obitu, solatii plenissimis literis alloqui. Valdè illæ gratæ nobis, acceptæque, imprimis mœstissimæ conjugii, quam non mediocriter refecerunt. Spero Deum porro daturum, ut ea quæ scribis, ad animum revocet magis & magis. Nec illa segnitè id hæcenus fecit, sed recurat vel minima occasione dolor. Nec leviter excruciat, quod erepta filia nunc ætate hac gravescente, & valitudine adeo infirma, sibi conflictandum videt cum ancillari vecordia, segnitie, ac moribus improbis. Nam antea longè maxima pars oneris in filiam recumbebat, quæ ad regundam familiam nata videbatur; non sine parentum, & fratrum admiratione. Ita circumspectè, nec moribus gravibus minus quàm placidis moderabatur, ea quæ ad rem familiarem pertinerent. Nisi hoc non minus foret, quod dixi, majus etiam de pietate, & sacrorum intelligentia, adderem de peritia sermonis Gallici, Italici, Hispanici. Nec Latine nesciebat. Adderem de Musice universa, arteque tum calamo, tum penicillo, & coloribus pingendi. Sed dolorem talia meum quoque, qui virum, quodque caput est, Philosophum me Christianum commemini, refricant magis, quàm mitigant. Ergo his missis, ad studia nostra venio. Excuditur opus nostrum, de origine & progressu Idololatriæ Gentilis, & humanæ mentis ascensu ad Deum: quo ipso cum Nationum Theologia triplicem refero conflictum; historiæ præcæ unum, scientiæ naturalis alterum, ac tertium Scripturæ Sacræ. Sed opus tam varium, ac difficile, in spissis adeo occupationibus non potest non spisse procedere. Salutem plurimam dicito, non uxori modò, generoque; sed clarissimo etiam Altingio; item Nobilissimo Magduello. De affine Junia, & Matertera ejus Manieria nihil addo, quia hoc negotium uxoris soleo literis committere.

Amstelodami
 cl^o l^oc xxxviii.
 vi. Id. Mart.

CCCXXX.

Joachimo Borgesio *Gymnasiarchæ*
 Groningano S. P.
 Groningam.

Peramice à te factum, Doctissime Borgesi, quod mœstum me, propter excessum optimæ carissimæque filiæ, consolandum per literas putaris. Omnino enim valdè me hic casus affecit; sic tamen, ut solidi plurimum solatii percipiam; quod jam à teneris sum edoctus, nihil nobis secundi vel adversi contingere, citra Dei voluntatem. Unus ille melius, quid filiæ, quid Parentibus expedierit, novit, quam Orbis universus. Deī sunt cuncta, dat ille, & adimit, cum visum. Nec sanè illis temporibus vivimus, ut homini prudenti ac pio valdè adblandiri hic mundus possit. De me quidem illud dixero ingenuè, longè injucundissimam mihi hanc vitam fore, absque duobus illis foret, quod voluptatem magnam capio, partim quidem in senectute hac addiscendo, porro quæ me reddere possint meliorem, partim vero, voce, scriptis, factis, benè merendi de omnibus, pro modulo gratiæ, quam mihi adensus est Dominus. Pergratum quoque fuit *Ἀντίδωρον* tuum; quod cave, ut facis, posthac depreties. Omnino contra censeo, te mihi pro scrutis & frivolis reposuisse; non contentus sum dicere aurea, malo dicere auro magis aurea. Nam quis homulus ego, pro duobus maximis Regibus, Davide, & Salomone? quid scripta nostra, imo humana omnia, præ *δυναστεύειν*; Præ istis aurum non est aurum, sed lutum, etsi quid illis vilius. Valdè etiam mihi probatur

†

opera

opera tua, in pietate sic à teneris instillanda unguiculis. Hoc enim præfatione operis abundè testatum facis. Nimirum quanto corruptiora sunt secula, tanto magis glifcenti malo obviam eundum est, præsertim Scholarum Præfectis. Equidem cùm te sic animatum esse videam, non possum non & mihi gaudere, & Juniolo nostro gratulari, quod talem nactus sit Doctorem. Quare quod aliqui facerem, & vehementer facerem, ut puerum de meliori nota commendarem tibi, id nunc necessarium non arbitror. Nam cùm affecta etiam hac ætate omnia metiaris juventutis bono; eo imprimis quod ad viam perducit æternam, quo pacto persuadere mihi possum, cessaturam unam operam tuam in eo adolescentulo, quem cùm ingenii causa ames, tum propter avi summi viri merita erga Ecclesiam Dei. Cujus etiam tralationem in iis, quæ nunc à te edita, præ cæteris omnibus, versandam pueritiæ manibus putaveris. Vale, vir præstans & amice.

Amstelodami
cl. Id. xxxviii.
vi. Id. Mart.

Tuus,

G. J. Vossius.

CCCXXXI.

Stephanio V. Cl. Gerardus Joannes
Vossius S. P.

SÆpè animo meo, Clarissime Stephani, jucundissima subit recordatio ejus temporis, quo studiorum gratia vixisti Lugduni, proque ea ætate non inglorius, præsertim editis in Saxonem Grammaticum castigatioribus, non acutis minus quam eruditis, ac mihi meique amantibus, eò gratis magis acceptisque, quod ut Heinisano, sic nostro etiam nomini dicandas putaris. Nec absens defuisti, literis testari, singularem erga me affectum tuum. Non dubito autem, quin sæpius sis miratus, fortasè & dolueris, quod Epistolari hoc officio non paria fecerim. Sed enim, amicissime Stephani, si nosces quam à mane distinear ad vesperum, sic ut non nisi interpesta nocte vacare à studiis possem, credo, qui amor est tuus, peteres ipse, ne subirem qualemcumque respondendi laborem. Nec tamen hoc à me scribi puta, ut te quoque in scribendo faciam negligentior. Nihil mihi, mi Stephani, tuis literis gratius fuit, vel erit. Tantum te in optimam capere partem velim, cessationem nostram. Neque enim provenit ex eo quod imminutus sit amor no-

ster, sed quia magis & magis desinam esse meus. Absque hoc foret, crebris, non te modo, sed præstantissimum etiam Collegam tuum Laurembergium literis compellassem. Interea fore spero, ut & tibi & tot aliis amantibus mei, magis satisfaciam; jamque seriò dispicere cœpi, quomodo me exolvam hisce vinculis, quæ injici totos dies video. Interea amemus nos inter nos: Eo impensius quo ætas mea hæc magis aggravescit, luctu etiam accedente domestico, de quo ex summo viro, (olim meo, nunc tuo, atque utinam nunc quoque meo Collega possem dicere) Joanne Meursio, poteris cognoscere. Neque enim quæ ad eum scripsi, iterare dolor finit. De Saxone tuo, curæ mihi antehac etiam fuit. Sed nihil certi datum responsi. Desperabat Elzevirius excudi apud nos posse: Nondum ego. Propediem certiora, vel ex Elzevirio, vel meipso cognosces. Clarissimum Laurenbergium plurimùm meo nomine saluta.

Amstelodami cl. Id. xxxviii.

Kal. Aprilis, St. N.

CCCXXXII.

Hugoni Grotio S. P.

Lutet. Paris.

DOlet, Illustris Domine, quod tardè adeo ex conjunctissimo Collega meo Barlæo resciverim de itinere Cl. viri Joachimi Wichwortii; si præcisssem, non passus eum forem sine meis Lutetiam literis proficisci. Nunc abierat priusquam cognoscerem eum de habitu certi aliquid statuisse. Itaque nec valedicendi potestas fuit. Molestè etiam tuli, quod Epistola mea, tot ante menses exarata ad te, diu adeo delituerit apud præstantissimum fratrem tuum Guilhelmu. Vel me non satis intellexerat Filius meus Franciscus, vel Francisci mentem non satis sit affectus frater tuus. Nam volueram, ut literas per Tabellarium mitteret. Affinis de pictura opus, per amicum mittam, ubi occasio obtulisset. Gratissimæ mihi fuerunt literæ tuæ, quibus moestum erigere studes. Nec tamen mihi videor, molliter ferre tam durum casum: nec id censent amici: mirantur magis, quando cogitant, cujus ipsi animi forent in simili negotio. Nempe mecum assidue revolve, ut curæ semper fuerim Deo meo, qui unus melius me, & omnibus mortalibus novit, quid mihi, quid meis expediat. Nec infelices censeo, qui in flore ætatis discedunt. Non

†

corrum-

corrumpentur à seculo hoc, quo ab annis xx. ita improbitas, & ἀδελφία, coepit incrementa, ut animus vehementer exhorrescat; quando mecum reputo, quæ tempora videantur imminere, si sic porro procedetur. Eadem aliquid solatii afferunt conjugii optimæ, nec tamen in hoc dolore suo satis cordatæ. Me quidem sæpe ejus gemitus & lacrymæ somnum capere non sinunt. Nam & mihi refricant causas doloris. Recurro igitur ad vetera solatia millies ei dicta, & quod plus sæpe valet arte, ad alias cogitationes abducere ægram ejus mentem annitor. In opere nostro excusa sunt, ut vulgo numeramus Alphabeta quatuor. Quintum quantum conjecto superest. Miraberis, scio, me non posse manum tollere de tabula. Sed primo satis visum ex prisca historia, adducere quæ ad Religionis gentilis primordia, & progressum pertinerent. Postea non sum visus mihi sat utilem operam publico navaturus, nisi mentem humanam adducere quoque ad verum numinis cultum. Itaque juvat per omnia me naturæ opera diffundere; inque iis considerare, Dei bonitatem, potentiam, ac sapientiam. Valdè enim ab iis dissentio, qui inanem naturæ speculationem arbitrantur. Collegæ Hortensii iter ægrè procedit. Delegati Provinciarum in generalium Ordinum confessu assignarunt in itineris impensas, bis mille Caroleos: quos petere iusserunt, ab rei maritimæ Præfectis, vel simili Collegio, quod Amstelodami sit. Displicet id huic urbi. Si idem fecissent Ordines Hollandiæ, negotium jam confectum haberemus. Metuitur nunc ne, si in minuto hoc fœderatarum Provinciarum Delegatis gratificetur, res sit exempli non optimi, ac assuescant imperare quantum valent: immensam autem pecuniam valent semper, si urbem hanc opibus ut aiunt affluentem, habere coeperint in talibus obsequentem. Scripsi nuper cur noluerim me immiscere editioni Critolai, totumque hoc commiserim Hortensianæ industriæ. Ita factum, ut nihil ejus hæcenus sit editum. Sed paucis abhinc diebus, Salmasius ad Isaacum meum scripsit, ut cognosceret, quid de hoc opere fieret. Occasione ea compellatus Blauwius, qui retulit jam figuras, quas vocant, incisas: ac propediem opus ipsum velle excudere. Nihil homine illo tardius, in exsolvendis promissis. Commonebo Hortensium ut magis urgeat. Sed vix illi quoque sat curæ fore arbitror, quam diu incertus itineris, sic animo fluctuat. Hoc si videro post longam cessationem, curam ipse hanc lubens suscipiam. Isaaci mei Scylax Caryandensis, Geographus vetus serio ab eo castigatus, excudi abhinc mense coepit. Etiam Mæotidis

periplum ἀνέκδοτον addet. Coniux & liberi uxorem præstantissimam, ac filios, filiamque plurimum salutant.

Amstelodami
c. 10 Id. xxxviii.
Postrid. Kal.
Maias. St. N.

Illustri tui nominis cultor,

G. J. Vossius.

CCCXXXIII.

Viro Amplissimo Georgio Ratallero
Doubletio, G. J. Vossius S. P. D.

Intelligo apud vos, vacare Prorektoris ut vocant locum. Cogitare proinde mecum coepi, de Scholis Bataviæ; quarum plerisque, succrescere video, non ausim satis dicere fungorum segetem, (nam quæ hæc Latinitas?) attamen copiam talium, qui priusquam didicerint, docere alios præsumant. Hujus mali fons caputque est præpostera quædam misericordia Procerum erga imperitos, fame fortasse, nisi sui ratio habeatur, perituros; quos dum curant, immisericordes fiunt erga innocentem illam ætatem, quæ eo magis erat curanda, quia curare se nescit. Exultavi igitur, cum tot annos instituendæ impendendæ adolescentiæ, nihil me facturum à moribus meis alienum, si & publici boni ergo, & in eorum spem gratiæ, qui scholæ apud vos bonum curant, commendarem tibi Joannem Varanum, Samuelis Filium, spe illa, ut tua opera, commendetur iis quibus Scholæ cura incumbit. Juvenis hic; (nam cur dissimulem) in illo quidem capite, quod sic hodie est controversum, Melanchtonianæ est addictior sententiæ; sed quod comperi, alienus planè ab illis, qui monstri aliquid amentes, Φατνιδῶσι, sive mavis Σαυινιδῶσι. Quales à me nequiquam sperent, ut pueritiæ apud nos, censeam præfici oportere. Hac fiducia, literas istas exaravi, nec alioqui in gratiam meorum acturus. Tu quoque si eum Scholæ curatoribus commendare non graveris, facies, & rem mihi gratissimam, & pulchrè mereberis, de Parentibus, pariter ac Pueris, & eadem Curatoribus, qui digna tibi postea gratias agent. Est enim pius, sobrius, modestus. Quam raræ sunt laudes istæ temporibus nostris! Jam præterea quod in isto munere spectatur, Latine est scientissimus, Græcè gnarus, carmen etiam pangit foeliciter. Dexter est in instituendo, & industrius. Novi juvenem familiariter, norunt & liberi, ut fidentius ista scribam.

De

De rebus meis nihil habeo addere, nisi jam majorem partem esse absolutam operis mei, de Idololatriæ origine, & progressu. Optimæ conjugii tuæ à me, & meis, salutem plurimam dicito.

Amstelodami,
clō Ioc xxxviii.
v. Idus Maias.

CCCXXXIV.

Hugoni Grotio.

Lutet. Par.

Illustrissime Domine,

Eunte ad te Petro Peltio, & aliquid à me literarum poscente, etsi hoc tempore valdè distrahar; tamen ornatissimo id juveni, & amplissimo ejus tui amantissimo Parenti, dandum putavi, ut aliis hoc officium præverteret. Valdè jucundus mihi filii tui Petri J. C. adventus fuit, qui & aliquot nobiscum dies Amstelodami egit. Post eas literas quas veniens exhibuit, alteras tuas benè longas, ac tanto gratiores accepi. Sed nunc respondere, nec his, nec aliis licet. Fiet hoc autem Epistola proxima. Solum mitto quæ Hispanicè Manasses exaravit. Sed cenfeo non satisfacere ista quæsitis tuis. Agam ipse cum eo accuratius. Philolaus me urgente excudi coepit. Hactenus opera mea ab Hortensio, in promovendo itineris instituto, postulata non est. Aliunde quicquid eo pertineret, resciscendum fuit. Nunc quia meam sibi operam, apud proceres utilem fore arbitrabatur, non deero amicissimo Collegæ. Sed utinam id antea fecisset! Non debuit hoc negotium, eo pede quo coeptum transigi. Monstravi illi in literis tuis quæ ad laudem ejus, & hujus instituti commendationem pertinerent. Petiit, ut ea sibi à Filio meo exscripta traderem. Tum item ut Consulem Conradum Verburch, & Consularem Bicherium accederem, tuamque de tota hac re sententiam prælegerem. Feci id lubens, & video non leve apud eos pondus habere judicium tuum, uti sanè debet. Facturi sunt omnia quæ salva Hollandiæ Ordinum auctoritate possunt. Verum & de hoc, & de aliis, literis proximis. Jam enim adest Peltius, & tempus abitus instat. Illustri Domine conjugii, & familiæ toti salutem à me meisque.

xiv. Jul.
St. N. Anno
clō Ioc xxxviii.

Tui nominis Cultor,

G. J. Vossius.

CCCXXXV.

Francisco Junio, Fr. F. Ger. Jo. Vossius
S. P. D.

QUI has ad te literas defert, conjunctissime affinis, is est ornatissimus juvenis Joannes Roue, Professoris Eloquentiæ, in inclyta Rostochiensium Academia frater. Octennium jam in Witebergenfi, Lipsienfi, Rostochienfi Academia vixit: Ac linguis, præcipuè Orientalibus, sedulam dedit operam, sub egregii nominis viris Buchnero, Smidio, Trostio eo qui & Syriaci Testamenti, & Lexici editione, non leve sibi nomen paravit. Exinde anno integro, lustrata illi Suecia, Daniaque. Sed egregius animus nequit his se spatiis continere, sed nosse avere quicquid in orbe est præclari. Itaque in Bataviam venit, ac Leidæ sub Golio Professore, in Arabicis se exercuit: Inque ædibus vixit Elichmanni, Medici experientissimi, & quod magis huc facit, Arabicæ, Persicæ, Ægyptiacæ, & aliarum Linguarum periti. Nunc Magnam cogitat Britanniam, magnis (ita cenfeo) foetam viris. Commendatitias eo, ut intelligo, obtinuit à præstantissimo Boswello, Gentis Britannicæ ad Belgicæ federatæ Proceres Oratore. Sed quem dixi Elichmannus hospes ejus, petiit ut meas quoque adderem. Quod eo lubentius feci, quia & Cornelius Grotius, Magni Hugonis Filius, cum filio meo Matthæo per literas commendarat. Postea etiam in prandiolo, quo cum collega Hortensio, & Hasio Medico exceperam; sic tribus nobis se probavit, ut amare nostri dignum, imo bonorum omnium putaremus. Non animus quidem tam occupato faceffere quicquam negotii; sed facies quod possis, quod mihi gratissimum erit, meque ad similia in tuæ spem gratiæ præstanda paratissimum scito. Ab Nobili D. Boswello spes ei facta est, posse cum Britanno natalium splendore inclyto, proficisci ad illustrissimum serenissimi Regis Caroli Oratorem, qui Constantinopoli agit. Quare quoque in istoc, si quid valeas, non patieris, scio, operam tuam desiderari. De excessu filii mei Joannis in India Orientali jam diu existimo aliunde cognorisi. Scripti de eo ad Reverendissimum, & Illustrissimum Dom. Archiepiscopum, nequid ignoraret, cujus maximè scire interesset. Sic sunt spes humanæ. Post tantas impensas, benè tandem fore sperabam. Et ille meus magnam sui exspectationem suscitavit. Jamque Proceres hic nostri, cogitationem susceperant, de ornando eo dignitate luculenta,

lenta, quæ eum potuisset, ut sic dicam, totum inaurare: sed Deo aliter visum. Ex Bibliotheca ejus desidero, nimum quantum librorum, quos donarum. Et in his aliqui, quos ut recuperare his terris possim, minime videam. Intelligo de nova Vitruvii editione te cogitare; sane placet animus: Et in nostris, sive ^ἢ *μακαρίης* filii malis, vetus erat editio Florentina, quam usui Tibi futuram arbitrarer. Habeo alioqui & alteram. ibidem excusam, non multo post curante Jocundo Veronense: si usui esse possit, transmittam. Clarissimus Salmasius, Vir nunquam satis laudatus, magnas Tibi gratias agit, pro Opere tuo de pictura: & *Ἀντίδωρον* mittit, quæ de usuris scripsit. Unum est volumen sed ejusdem Argumenti; jam alterum sub prelo est. De excessu Cornelie mee suavissimæ, & eruditissimæ virginis scio, jam cognoris, ex sorore Brunæa. Eo magis tristitia illa refricare, mihi animus non est. Quæso, mi affinis, ne tam segnis sis in scribendo. Tueberis te exemplo meo: sed si vitam meam tam molestam, & occupatam noffes, facile excusaveris. Uxor nunc Amersforti est, apud Neranam sororem: Idque Authore Medico, qui arbitrabatur usque adeo valetudinariam recreari posse, tum aere ejus loci meliore, tum colloquio sororis, & amicorum, quos alios in his Thinium Affinem habet. Excuditur opus nostrum gemini Argumenti, de Theologia Gentium, & Physiologia Christiana: jamque perventum ad philyram centesimam, sive id clarius, ad Alphabetum quintum. Excuditur & Scylax Caryandenus filii mei Isaaci, qui & de Ptolemæi Geographi-
corum nova editione consilium suscepit. Vide ecquibus Codd. ex Anglia MSS. juvare possis. Multa enim in eo corruptissimè nunc leguntur. Quæso meo nomine salutes, quos mei in Britannia scis amantes. Catalogum nunc texere non est animus. Vale, optime Affinis, & à nobis omnibus salve; etiam Cognato tuo Brunæo, qui post suum ex Anglia reditum, nobiscum Amstelodami vivit.

cl. Idc xxxviii. iii.

Kal. Jul. St. N.

CCCXXXVI.

Constantino L'Empereur, G. J. Vossius
S. P. D.

Nobilis, & Magnifice vir,

A Ccepi hodie literas à viro Cl. Ludovico Crocio, Theologo Bremenfi, quibus mihi commendat Georgium Gentium, Dhama-Saxonem, eum qui has ad te literas defert: Ac porro à me petit, ut ne eum dimittam Leidam, sine literis meis *ουσάλικαίς*, vel ad te, vel Golium nostrum, vel Ludovicum de Dieu; viros famâ nominis egregios, sed eorum judicio, qui penitus mecum norint, longè hac majores. Ac vos potissimum nominat, quia juvenis hic hætenus Orientis linguis sedulam dedit operam: atque ut uberiorem ex iis capiat ingenii fructum, ad vos potissimum, tot Orbis Academiis insuper habitis, capeffit gradum. Horam vel amplius, cum eo sum collocutus. Video esse eruditum, & quod scis, majoris me facere, modestum. Augustanæ confessioni est addictus: quod & Crocius scribit, & ipse agnoscit. Laudavi ejus propositum, quod ex fonte Hebræo, Scripturarum peteret intelligentiam; Et simul addere veller, quæ ex translationibus, & Paraphrasibus, Orientis possent hauriri. Subjeci interim sicut soleo, ut Historia Ecclesiastica, & sanctorum Patrum commentariis legendis, partem aliquam temporis dare vellet: multaque in eam rem attuli, quæ incitare ad hoc possent. Devenimus occasione hac, eum in sermonem, ut aliquid dicendum esset, qui juniorum, de antiquis Ecclesiæ temporibus, sui quoque memoriam, apud posteros reliquissent. Apud eum quem scirem, Augustanæ esse confessionis, & præterea in diocesi natum esse Magdeburgensi, mentionem injeci de Centuriatoribus Magdeburgensibus: quos ut multa fugisse, non est dubitandum, ita quin plurima præclare viderint, nemo sanus ambigit. At eruditus juvenis in hoc doctrinarum genere, statim inscitiam suam prodidit. Nec nomen istius operis nosse aiebat, nec vidisse unquam. Deduxi igitur in Museum meum, & opus commonstravi universum. Cogitavi ego mecum, quod olim dicebat Tullius, O tempora, Omores? Sic jacere antiquitatis studium, pariter apud nos, & eos quos dixi? Irascebar non optimo juveni, & qui hac parte, penè extra omnem foret culpam: sed Doctoribus Theologis, quos audiisset tam diu. Nempe scripturarum interpretationem, ex junioribus solum petere jubent: Veteres autem Ec-
clesiæ

clēsiae Doctores, uti Megarenſes olim *ἐπὶ τεῖτοι
ἐπὶ τέταρτοι*. Tanto magis te amo, Nobiliſſi-
me, & amiciffime vir, qui eximia Lingua-
rum Orientalium peritia minime contentus,
jam ab annis pluribus in eo operam inſumas
tuam, ut veteres Eccleſiae Doctores, ſocios
novis, & novos item antiquis. Quod ſi ab
omnibus fieret, melius cum Eccleſia Dei age-
retur. Optimae Conjugi, ac Clariſſimis vi-
ris, Golio ac de Dieu (quibus per otium hunc
juvenem commendabis) plurimam meo no-
mine ſalutem dicito: ſed & Collegis aliis, ac
amicis; verum ut dixi, ubi ſpontē ſe occaſio
feret. Non is ſum qui ex magno pariter vi-
ro, ac amico, & munus nunc ſuſtinenti, ſub
quo tam corruptis temporibus, propemodum
Alcides ſuccumbat, ſalutigerulum facere
ſultē adlaborem. Tamen committere non
poſſum, quin extra ordinem, unum memo-
rem: ſcilicet avunculum tuum, eumque con-
junctiorem; mihi quoque alio nomine,
quod Belgam, in foederatis hiſce terris, An-
tiquitatis Eccleſiaſticae, (qua ſic me capi ſcis,
jam ab adoleſcentia) nec amantiorem, nec
intelligentiorem ſciam aliquem. Ni grave
eſt, aliud quoque eſt, quod ſummo illi viro
ſignifices: accepiſſe me reſponſum, ab Illu-
triſſimo Suecorum Legato, Hugone Grotio;
in cujus literis, hæc iſdem verbis legere eſt,
*Polycarpi Epiſtola Græcæ, non puto plus habere
Sirmondum, quam habeat Salmaſius. Ultima
ſunt, Ἀλλὰ τὸ ἔσχαττον ἡμῶν ἀποδιδόναι, καὶ δι' ἡμῶν ἔσο-
...* Ex Græcia quin id damnum ſarciri poſſit,
ſiquis allaboret, vix dubito. Danda opera eſt ut
queratur & Hermas græcus, qua de re Anglos
quoſdam monui. Vale vir, amiceque eximie.

Anno cdo Idc xxxviii.
Poſtr. Kal. Julias.

Tuus æternum,
G. J. Voſſius.

CCCXXXVII.

Stephano Stephanio viro Cl. & ami-
ciſſimo, Ger. Jo. Voſſius S. P. D.

DE Saxone Grammatico jam uni alteri
Typographorum ſum locutus, ſed ni-
hil certi reſponderunt. Negant ſe quicquam
ſtatuerè poſſe, priuſquam conſtiterit quantum
id ſit, quod præſtiteris in nobiliſſimo gen-
tis veſtræ ſcriptore. Dixi ego, quicquid
molitus ſis, ſine dubio non deterius fore
egregiis notis, quas elucubrasti jam ante
annos pluſculos. Aiunt ad iſtoc, non diſ-
fugere ſe iudicium meum de tuis: ſed tamen
neceſſum eſſe, ut videant, quæ futura ſit

moles operis, ut ſtatuerè queant, quæ impen-
ſarum futura ſit ratio, & quantum chartæ
unius generis ſit comparandum. Non potui
iis hac parte ſatiſfacere, quia neſcirem Mer-
catorem, cui ſuperiori Autumno theſaurum
illum commiſeras. De Papia Pontanus
ſcripſit ad Jo. Lydium. Sed nihil ab eo re-
ſponſi accepiſimus. Florilegium Fabianum
meretur, ut excudatur, & manibus teratur
elegantioris adoleſcentiæ. Sed vidi non eſſe
ad palatum craſſi Typographi, quicum ſer-
monem de eo habui. Videbo, an alius ſit
futurus paratior. Omnino præla noſtratia
ſic bonis malis fervent, ut difficulter aliquid
novi recipiant: atque hæc etiam cauſa eſt,
cur & in meis & illis filiorum, de quibus
ſcribis, Tricones ſint maximi: quod in ſuis
quoque expertus eſt, ille tuo mæus, & meo
tuus clariſſimus, atque maximus Meurſius.
Ut de Illuſtriſſimo Grotio, atque aliis tace-
am. Vale præſtantiffime, atque Amiciffime
Stephani, noſque amare perge. Adderem,
ut ſalutem Clariſſimo Collegæ tuo Laurem-
bergio diceret; ſed intelligo Hamburgi eſſe,
relictæque illic uxore, propediem in Batavi-
am venturum.

*Amſtelodami, cdo Idc xxxviii.
Prid. Id. Junias.*

CCCXXXVIII.

Joanni Meurſio V. Cl. Ger. Jo. Voſſius
S. P. D.

Poſt ſuperiores literas de optimæ ac erudi-
tiſſimæ filiæ meæ exceſſu diu alia nos
tenuit ſollicitudo. Filius Matthæus (is cujus
de primis Hollandiæ Comitibus comenta-
rios habes) duos tres menſes nunc am-
biguas nunc adverſa valetudine uſus eſt:
credo ex nimia animi conſternatione & aquæ
injuria, quando pene impos mentis, ubi ſic
omnes periclitantes in glacie vidit, ea rupta
in aquas ſæpius inſiliit: nunc hunc nunc illum
liberandi gratia, quod feliciter ei ſucceſſit in
omnibus, præterquam ſorore Cornelia: addo
& ſeiſpo; quando tandem in mortuum hæc
erupere gravem, adeo ut Medici quini (binos
advocaram, ſed tres amore familiæ, & ut
aiebant officii ergo ſponte acceſſerant) de
vita ejus vel plane, vel pæne deſperarent.
Nunc ille magis magisque per Dei gratiam
convaleſcit. Sed Uxoris morbus illum filii
excepit. Quid mirum ſi muliebris animus
non ſufficiat omnibus ferendis? etiam prope
conſtantiam meam tot adverſa expugnave-
rat.

præsertim accedentibus aliis, in his nonnullis, quæ tu scio tantum pro pulicum moribus habes; illorum uti nequitia qui sibi omniscii (omnisciioli potius) videntur, & tanquam ab alvo te meque sic ingentes Grotii & Salmasii animos despiciere ac depreciare non cessant. Hac hora venio à Blauwio qui certo addixit tres intra Hebdomades Historica tua & Danica & Belgica ad finem perductum iri. Bina quidem præla tuis quotidie fervent, ut mihi significat filius. Isaacus cujus Scylax & nostra item de Idololatria Gentili & Philosophia Christiana eo tardius procedunt, qui unus alter ex operis Typographicis alio se recepere, & nolim ego qui in tuis distinentur inde avocari, præsertim qui semper dixerim paratum me esse ad menses aliquot differre: dummodo non in aliis sed tuis alacrius progredieretur. Cur demum postquam à te Literas acceperit missurus sit quæ petis, ex ejus Epistolâ cognosces. Aliquid subest pigritiæ. Utcunque enim nescias, quas miserit chartas, poterat omnium mittere nunc exemplar, & ubi tuas acceperit chartas supplere in iis quæ recepisti. Sed prætexebat gravem in tantis occupationibus fore laborem ex fascibus singulis folium sive Phylaram unam eximendi. Non laudo, sed cum domus ejus vitam attendo utcunque excusaro. Heinsius vetus Collega nostra in excudendis ad N. T. notis jam pervenit ad Epistolam philippenfis scriptam. Vale optime & summe vir, & cum Uxore, filio & filia à me, Conjuge & Liberis universis salve plurimum.

Amstelodami, clb Idc xxxviii.

Prid. Id. Junias.

CCCXXXIX.

Stephano Stephanio, V. Cl. Ger. Jo. Vossius S. P. D.

NOlui ulterius differre scribendi munus, præsertim redditum parante Severino vestro. Nam nunc quoque si negligam, metuo ne etiam differam in illud tempus, quo absolutum erit opus nostrum, de Gentium Theologia, & Christianorum Physiologia. Atqui ut ex voto meo acceleret Typographus, non ante tres menses ad finem poterit perducere. Ita grande futurum, non quia mole delecter, sed quia illud poscat diffusum adeo argumentum. Cæterum ubi edidero, non patiar te aliunde id habere quam à nobis. Scio ut antehac etiam id facerem, postulasse amicitiam nostram, sed multa sæpe quæ volumus, non possumus. Nec tu ut minutatim causas

addam exposcis, sanè proximi operis ne exemplar quidem dedi ullum, vel Consulibus urbis hujus, quibus sum obnoxius; vel ulli ex affinibus meis conjunctissimis. Tam multa sibi Britannia magna vindicabat. Deinceps tamen ære meo emam potius, quam te expertem sinam. Excerpta tua ex Fabio, optimo dicendi Magistro, mirificè placent, & bono juventutis videbunt lucem, sed pusilli temporis mora poscitur à Typographis, quia præla sic fervent aliis, in quibus, ut aiunt, festinato opus sit: si diu eludere volent, non sinam, sed quamprimum remittam. De Saxone Grammatico edendo, nondum hic cuiquam potui persuadere. De præstantia scriptoris, non vocant in dubium, quæ dixi: sed aiunt opus fore perpauco hominum, se autem omnia splendido illo luto metiri. Debat is scriptor non alibi edi, quam in ipsa Dania, idque luculentis, & elegantibus Typis, charta etiam optima. Hoc ex honore esset Daniæ. Ac si Typographi non sufficiunt, impenis Regiis, vel Nobilitatis, aut Academiarum sumptibus fieri id conveniret. Quæso siquid horum jam fuerit decretum, vel simile aliud, fac me quamprimum certiore. Jam à multis annis sic amo Saxonem, ut nihil æque exoptem, quam eum esse in plurium manibus: nec alium scio, qui medicam illi manum admoveere foelicius possit, quam te Popularem ejus doctissimum, & jam à tam longo tempore, non minore judicio, quam industria in hoc versatum. Fuit his diebus horam unam nobiscum, præstantissimus Collega tuus, Doctor Christianus Matthias: video esse virum, ut integrum, ita egregiè doctum: spem fecerat redeundi ad me. Decreram autem conviviolo excipere, sed ex Fischero quicum ad me advenerat, cognovi temporis fuisse angustia exclusum. Non committes quin plurimum salutes meo nomine: Uti & dignum omnium Doctorum amore, Laurembergium. Memini me coram Cluverio jam ante annos plus minus xx. conspiciere Græco-Latinam ejus Græciæ descriptionem; nunc verò nequitia illius, cui in has terras dederat deferendam, solum tabulas superesse. O factum malè! Rectè interea egerit, si laborem denuo suscipiat, non dico, utraque lingua. (Quid enim opus?) sed Latina solum ea complectendi, quæ ad tabularum illustrationem pertineant. A meorum quopiam, si clarissimus Laurembergius hanc Provinciam detrectarit, postulatum fuit, sed quis illo melius hanc spartam ornaverit? Nec enim dubium quin tam longo temporis intervallo plurima observarit, non aliis modò, sed sibi etiam antea incognita. Vale, vir & amice egregie, nosque ama porro.

Amstelodami, clb Idc xxxviii.
iii Kal. Oct. St. Gregoriano.

T t 2

CCCXL.

CCCXL.

Joanni Meurfio, Ger. Jo. Vossius
S. P. D.

Filius Matthæus à gravissimo morbo ut-
cunque convaluit. Isaacus adhuc decum-
bit, sed indies vires recuperat. Ego, conjux &
reliqua familia recte valemus. Danica & Belgi-
ca tua historia tandem ad finem perducta :
quo nomine gaudeo. Deinceps ut cætera ma-
turentur, urgere Blauwios non desistam. Tu-
um quoque erit idem crebris facere literis.
Sic quoque spisse satis procedet negotium ;
id abunde es edoctus damno tuo, & ego atque
alii id experimur quotidie. Absque hoc esset,
jam diu habuisses quæ scripsimus de veteri
Theologia Gentilium & Physiologia Christia-
na : sive de origine & progressu Idololatriæ,
& ex mirandis naturæ eorumque causis huma-
næ mentis adscensu ad Deum. Ut grande esse
opus videas, quintum ejus (ut vulgo opera
metimur) alphabetum jam excusum est. Su-
perest sextum quod fore censeo supremum ;
sed quando id absoluturus sit Typographus
dicere non possum. Jam tres sunt hebdoma-
des quod cessat in nostris, atque idem porro
faciet minimum mense toto. Hoc enim ipse
prædicat ; consenseram ut Scylacem filii & id
opus quod sub manibus me habere dixi, pau-
lum seponeret, dummodo in tuis eo esset dili-
gentior. Nunc mihi etiam præponit homi-
nem Gallum, cujus Philolao sive opere de mo-
tu terræ prælum jam fervet. Nec dici potest
quantum nos omnes moretur Atlas ejus,
opus multorum grandium voluminum. Pro-
diit jam Salmasii pars prior de usuris, ac pro-
pediem etiam alteram habebimus. Heinsius in
Novum Testamentum jam ad Apocalypsin
pervenit. Opinio est multum eum adjutari
iis quæ Scaliger observat, cujus chartas scis
in foliis Bibliothecarii esse potestate. Adhæc
intelligo eum à vidua Erpeniana habere om-
nia quæ ad maritum undique transmiserant
viri doctissimi, quando is Novi Testamenti
editionem moliebatur cum notis à flore docto-
rum undique subministratis. Confido candore
eo fore nostrum illum, ut ne alienum tollat in
armum, sed suo singula transcribat auctori.
Quamquam quid hoc nostra, dum quæ edan-
tur talia sint ut multa etiam doceat eruditos !
Abrumpam si addidero, triduo proximo affu-
isse mihi senatorem Scapium convictorem
quondam tuum, & sollicitè inquisivisse ecquid
de te, & omni familia tua, certi haberem :
tandem ubi intellexisset de literario nostro

commercio, vehementer illud me rogasse ut suo
nomine plurimum te salutarem, ac pariter
conjugem. Nec minus conjux mea & liberi
universi salutant te ac tuos.

Amstelodami c15 Idc xxxviii.
iii Kal. Octob. St. Greg.

Regina Medicæa conjux dum fata finerent
Henrici IV. perhonorifice excepta est ab urbis
hujus Proceribus: puto pompatici illius ingres-
sus tabulas æri incisas cum Barleianis, & ali-
orum versibus lucem propediem usuras. Id si
est, curabo ut exemplar habeas. Leidæ obiit
Meerinnus advocatus melioris notæ ; item
consul Lahscotus atque alii. Omnino his
locis terrisque vicinis acutæ febres dominan-
tur quæ multos tollunt. Deus & nos & tuos
diu conservet. Iterum vale.

CCCXLI.

Georgio Calixto *Theologo* S. P.
Helmstadium.

NON dubito, quin magnopere mireris
pertinax adeo silentium meum, sed
quid faciam ? nulli scio, probare hoc possum,
præterquam quibus perspectum sit hoc vitæ
genus, quod nunc Amstelodami sustineo.
Mane doceo quotidie; nisi quod privatim Sa-
turni diebus præsim Collegio juvenum, qui se
apud me exercent. Pomeridianis horis usque
ad cœnam interpellor à civibus, & exteris,
non è vulgo. Si quid literularum mihi exten-
dendum sit, id ferè fit post noctem intempe-
stam, quo ipse tempore, & limandis vaco iis,
quæ tradenda sunt Typographo. Et hoc ip-
sum adeo spisse procedit, ut septennio, quo
hic fui, nihil eorum, quæ affecta habeo, vel
confecta, edere licuerit in lucem ; præter de
Arte Grammatica libros, opus jam ante an-
nōs amplius triginta conscriptum. Hoc mo-
numentum qualequale, nunc per ornatissi-
mum Mag. Kinderlingium Philosophiæ, ut
intelligo, Professore in Academia Julia
destinatum, transmittere erat animus ; sed
jam omnem suppellectilem suam miserat Ham-
burgum. Quare per Wickfortium nostrum, id
commodius fiet : & factum esset jam diu, ni-
si in Galliis hætenus fuisset ; sed intra pau-
cos dies reducem expectamus. Excuditur
nunc opus nostrum, de Gentilium Philosophia,
& Physiologia Christiana. Spisse procedit,
quia sic occupationibus avocor. Confido ta-
men intra tres quatuor menses posse absolvi.
Vix lucem viderit, quin mittam. Tandem
enim

enim quomodocumque abrumpendum hoc silentium, quod nulli ægrius, quam mihi: spero mihi priorum veniam apud te futuram, ac deinceps idem fore jus Sanatibus, quod fortibus. De publicis quid scribam? imo & privatis plerisque? Omnia melius ex D. Kinderlingio intelliges, teste oculato, & auro. Et dum ista tumultuarie in chartam conjicio; semel ad funus, iterum à Nobili Sueco, mox ad aliud. Sic vivitur; sed spero propediem, me multis exsolvendum occupationibus: saltem hodie, nihil ultra licet. Salutem plurimam adscribi jussit Collega optimus D. Barlæus, qui & ipse, dum hæc scribo, compellendus fuit. Meo quoque nomine salutabis plurimum, Clarissimum, verèque tecum aurei sæculi germen D. Hornæum. De doctissimis viris, D. Conringio, & aliis adderem, nisi hoc, Dominum Kinderlingium onerare satius foret.

Amstelodami,
clō Ioc xxxviii.
prid. Kal. Oct.

Tuus omni officio,

G. J. Vossius.

CCCXLII.

Joanni Fr. Gronovio, Ger. Jo. Vossius
S. P. D.

NON recordor tale quid ex ore meo profectum quale scribis, sed scio ex aliis, partim Leydæ adhuc degentibus, partim in oras jam profectis exteris, audisse me, juvenem illum qui à convivio tecum sermones istos habuit, & bonæ indolis videri, & pro ingenio illo præclaræ expectationis: solum metui, ne corrumpatur à non nemine, quo utitur familiariter. Ut te quoque sic judicare dixerim, non sit verisimile; nec verum arbitror. Quia vero de clarissimo Golio scribis, non possum reticere, de quo præter me, & ipsum, scire puto neminem; cum insidiæ illæ structæ essent filio meo Francisco, à Leydensium seu uno, seu pluribus. Non vacat jam in hoc accuratius descendere: de Vatiniano unius odio erga me, qui à multis jam annis me perditum cepit, non graviter minus, quam verè sum conquestus. Neque ignorabam ab eo plurimum amari illum inimicum meum (meum vero? imo tot aliorum, non paulo majorum me) verum virum esse prudentem sciebam, neque minus mei amantem arbitrabar. Atque eadem nunc quoque in opinione sum. Itaque sic convenit, ut si Amstelodamum veniret, non alibi quam apud me diverteret. Ac spopondi ego, etsi affinitate conjunctos in urbe ha-

berem, tamen non commissurum; quia ubi me honore istoc dignaretur, exemplum imitarer; & sanè is est quem ex Professorum primis, invisere semper soleam. Quamobrem ut vel hoc fidis ejus commissem auribus, non tamen persuasero mihi, hujus indicium illis facturum, qui nullam negligunt occasionem nocendi mihi, & meis. Quod ego gravatè ipsum quoque ferre censeo. Si conducibile existimes, de eo ad ipsum scribam Golium; vel ipse nomine meo saluta; & literis com-monstratis exquire, quid rei sit. Comperies hominem, non eruditissimum modo; sed Batavo; vel si malis Germanico candore. Tanto magis opinio hæret adolescentem, unde istud habes, hæc protulisse, ut expiscaretur ea, quæ nesciret: vel alterum illum tam ei familiarem, imposuisse illi quo abalienaret à te, viro non malarum partium, etsi propter aliquas, quas in iis videas, virtutes, ferre scias malos. Tam familiariter quam ista non memini me de illis scribere; sed fortasse inde est, quod paulo commotior, simulac tuas accepi, ista in chartam conjeci. Quoties cogito, quam improbe mecum egerint, qui solis tibi masculam Eloquentiam, & reconditam omnem doctrinam vindicant, proletaria solum mihi, & me intelligentioribus concessa: non possum non deplorare studiorum infelicitatem, ac cerdones etiam, præ multis nostri ordinis, beatissimos putare, dum bonam mentem colant. Tu vero, mi Gronovi, ita tibi persuadeas velim, amari te à nobis plurimum, & amatum iri semper, idque ob eas virtutes, quas benignitati debes divinæ. Si qua in isto de quo scribis negotio opera mea utilis tibi esse possit, perscribe: Nusquam deero. Si molesti esse volent, potius quam ut noceant, omnem in me transfer culpam, quantenus possis. Nam obdurui ad ista. Tui dispar ratio: quem nolim cum ingeniis conflictari ejusmodi, dum pro virtutibus, doctrinaque; nondum promeritos adeptus es honores; ad quos in hac temporum malignitate, fortasse malorum etiam faventia opus est. Lugdani ubi iterum excurreris, id credo deinceps sæpius futurum, dum excuduntur tua, plurimam salutem dices τῷ πάλῳ Salmatio, alteri cum Illustrissimo Grotio Europæ oculo. Ut ilia Codris omnibus rumpantur, nulla te maledicentia, ab amore divini illius hominis avertat. Matthæus, Isaacus, Gerardus meus; te plurimum salutant:

Amstelodami, clō Ioc xxxviii.
post. Kal. Octobris.

CCCXLIII.

CCCXLIII.

Claudio Salmafio, Ger. Jo. Vossius,
S. P. D.

ISaacus meus prope ab omni febre est immunis, interea infirmus, hodieque primum ex cubiculo in coenaculum descendit, quod ei bene vertat. Studia aliquot de die horis tractare jam coepit, & pro imbecillitate corporis aliquanto ardentius, sic ut sufflaminandus sit nobis, suadente etiam medico. Dolet admodum quod destituar Mureto ad Ethica Nicomachia. Operam dedi ut alicunde nanciscerer. Et hæc causa est cur diem unum respondere neglexerim; sed hæc quoque spes me fefellit. Philolaus de quo aliquando ad me scripseras, intra tres circiter hebdomades fuerit excusus. Id volumen, quia iisdem typis edatur ac mea, cessant in nostris: sed tanto aiunt alacrius se postea perrecturos. Nec enim minus se optare quam me ut tandem perducatur ad umbilicum. Gaudeo inveniri qui operam dent ut inter eos, qui sic in literarum studiis eminent, animorum sit consensus. Solum exopto ut qui tractare hoc negotium volent, & prudentia valeant & probi sint ac benevoli. Quæ tria ut optime nosti in eo qui suadere aliquid valet, requirebat Stagirita noster optimus, idem sapiendi dicendique magister. Imprudentiæ fuerit si quis suscipere hanc provinciam cupiat, nec mores partium satis habeat perspectos. Jam confecisse se negotium lætabitur, cum magno molimine magnas egerit nugas, meliori etiam parti plus periculi crearit. Quanto enim occultius, tanto nocebitur certius. Quæ minime dicerem, nisi ter edoctus malo meo. Jam nisi quis probus sit & benevolus, metus est ne deterioris sed amioris commodis magis velificari gaudeat. Novennium circiter est cum collegarum duo operam mihi suam offerrent, ut eum mihi conciliarent amicum quem me scis dicere. Egi iis propterea gratias, atque adjeci, nihil mihi fore jucundius, ac si hoc perfecerint multum me iis debiturum; atque ut viderent quanti eos facerem, aiebam me omne hoc negotium illorum fidei committere, præstiturum me quæcunque illis visum: postulare solum si post tot injurias acceptas animo fuerim tam humili ac demisso, ne hoc negotium aggredi velint, nisi in isto saltem gratificare velint, ut ipsi existiment solum dicis gratia acturum aliquid, non autem bonâ fide; eoque brevi fore quod dicitur anum ad armillam; illam insistant viam, ut simulatio istæ nihil det incommodi aut mihi aut meis. Receperunt se de eo cogitatuos, nec aliquid

motuos, nisi æque ratione habita utriusque nostri. Neque postmodo te unquam de eo compellarunt, sive id eo factum, quia eludendum minimè putarent candorem meum, sive etiam displicuerit hæc dissidentia mea. Cur enim non suspicari liceat in me etiam (nam hominem me scio) desiderasse? Nece hoc animo scribo ut minus audias, qui animis vos esse velint minime alienis; sed duntaxat, ut, quod æque noris me silente, sis inter spinas calceatus. Rem magnam præstabunt qui negotium hoc component cum eo, quem ego & tot alii mecum (sed falso fortassis) credebamus amare neminem nisi qui parasitari sciat, & secundas agere, imo contemptis cæteris, ut studiorum omnium aut prope omnium principem veneretur. Quem etiam judicavimus nec supparem ferre necdum parem: quanto minus longe superiorem? Et tamen Christianum est hoc negotium, ut alii alios amemus. Quare existimo non debere te animo esse alieno ab iis qui de conciliandis vobis cogitant, dummodo ut dixi & mores alterius habeant perspectos, & si non magis æque tamen sint amantes tui. Quos inter ex iis quidem quos noverim facile principem tribuerim locum clarissimo Riveto: nam & ex sermone semper & nuper etiam ex ejus ad me Literis abunde perspexi illius erga te amorem constantissimum. Grave etiam pondus erit nobilissimi Somersdicii atque aliorum, quos nihil attinet dicere cum longe me illos melius noris. Tantum non fidei nimis habendum eis qui vel alterius imprimis vel suum pariter negotium agunt. Non tui solum amor sed etiam veneratio me compulsi, ut præter consuetudinem meam in scribendo tam longus forem: sed confido id fore tibi minime molestum. Aveo nosse quando tua ad Simplicium visuri sumus. Nec tamen nimis sollicitè id quæro. Scio quo magis tua producis, hoc plura à te discere orbem Literatum. De usura Scholasticorum quos vocant plurimos habeo: sed eadem prope chorda aberrant. Aliquanto cautiore qui sæculo hoc vivere, quorum aliqui nobis; nec video tamen ut multum inde accedere tuis possit. Si quid tamen voles, tuis æque ac meis serviet commodis. Uxorem tuam uxor, imo ei tuamque vestri omnes nos & pariter affini tuæ salutem dicimus.

*Amstelodami, cl^o Id^o xxxviii.
iv Non, Octobr.*

CCCXLIV.

Hugoni Grotio S. P.

Lutetiam Paris.

Minus minusque mihi, Illustrissime Domine, satisfacit Blauwius noster. Persuasi de Philolao: sed (planè præter opinionem meam) nostra de Idololatria intermitrit. Jam mensē in iis cessatum. Et ait altero etiam mensē opus, antequam Philolaurum perduxerit ad finem. Iisdem typis excuditur, quibus mea solent. Negat autem, illam sibi esse Typorum ejusmodi copiam, ut eodem tempore utrumque Opus excudi possit. Ecce aliud quod displiceat. Jam prope sexennium est, quod postulato ipsius Meursius transnisiit omnia, edita, inedita, sola excepta Historia Danica; quam postremo excudi volebat. Ille contra, ab hac orsus est, quia cæteris ejus viri vendibiliorem fore arbitrabatur. Ususque propterea Typis majoribus, quam in meis. Et illa jam finem nacta: Existimat igitur Meursius, strenue nunc cum progredi in istis, quæ pertinent ad emendationem veterum Scriptorum, vel Antiquitatum Romanarum, Græcarumque intelligentiam. Rogavi vehementer Blauwium, ne ultra sextum annum eludere amicum meum vellet. Ille dicere, nihil minus sibi propositum: sed non ex re sua fore, si iisdem edat formis cætera, quibus Historiam Danicam: Nec me vel Meursium passurum, ut illis edantur, quibus me invito, prope enim oculos fugiunt, filii mei in Scylacem notas divulgabit. Non superesse alias ac medias illas, quibus utitur in meis: sed ut has usurpet fieri non posse, nisi & Philolao, & pariter nostris finem fortitis. Proinde— & quid opus illo Proinde? Satis vides, quid hinc colligat. Atqui in meis etiamnum restant pluscula. Minimum tribus opus mensibus antequam absolvantur. Et quis spondebit nobis, spatio hoc temporis exacto, non aliud, qui ejus mos est, excogitatum, quo Meursium eludat? Nihil dixeris Meursiana faciunt ad ea de quibus scripseram. Imo plurimum. Ut vos non iidem sitis, idem ille, quantum video, erga vos erit. Esto autem ut Meursiana ordiatur. Libris de Poetica, & Originum, & tam multis, quæ Philosophiam, & Ecclesiæ Antiquitates, vel Scripturarum Interpretationem tangerent, quorum compluria jam affecta, vel etiam consecrata, porro cum blattis tineaſque rixandum erit, si Meursiana patiar prævertere. Meursius autem ulterius moræ est impatiens. Si dicendum quod cenſeo, nec meorum aliquid, nec Meursii aggredie-

tur; Οὐ φέρεις ἰπποκλείδην. Quæremus utrumque alium, si hic nos fastidit Alexis. Vellem erga tua saltem, alius foret, quando tantum supererminent, quantum lenta solent inter viburna cupressi. Sed quid faciamus? Homo ille privati, quam publici boni amantior, pecuniæ etiam quam honoris appetentior nihil æque ac lucrum curat. Hoc autem ait, non aliunde æquè ad se redire, quam ex Tabulis suis Geographicis. Addere poterat & Missilibus, ac similibus quæ excudit, sed sic ut Colonienſis Typographi nomen præferant. Quando igitur laterem lavaremus, cum hoc homine agendo de tuis, meisve excudendis, visum mihi fuit compellare vicinum Blauwii Janſonium; quod & factum ab ornatissimo filio tuo. Ac huic quidem responſum dedit, velle se transmittere specimen Typorum, Latinorum, Græcorumque, ut prius cognoscat utrum placeant tibi. Mihi vero instanti ut id fieret quam primum, dixit, non posse, hac hyeme prælo committi. Nam præla sua edendo Atlante, & aliis vastis voluminibus sic distineri, ut res sua familiaris non ferat ultiores impensas. Planeque persuasum habeo eum verum dicere. Magis miror tantum suscepisse quantum video; præsertim Blauwio manibus pedibusque hoc agente, ut hominem, in re non ita magna planè ad incitas redigar. Nullus tuis edendis magis idoneus esset Elzeviriiſ Leidenſibus: non quasi sint viri, aut cives meliores, sed quia charta, & typorum bonitate vincunt. Et puto non recusarent, nisi alii in ea urbe dehortarentur; imprimis ille, qui se amicum tuum ait, nuperque ad te scripſisse. Et scripſisse etiam ex filio tuo intelligo. Quàm vero amicus, melius ex illustri Barone Jacobo Skytte cognosceres, si is modo sermones de te, præſente altero, quem in cœlum extollebat, habitos secum referret. Nobis quidem hic, recenti memoria, indignationis plenissimus exposuit. Nequitiam tum hominis ridebamus. Nec interea mores mutasse, clare ex multis deprehendimus. Hæc ego non referrem, nisi constaret de stomacho tuo, qui patientia plusquam Spartana, concoceris multis partibus majora. Et ſcis invidiam illi, ac malignitatem, jam diu in naturam vertisse: nec alium erga alios esse, quos doctrinam cum virtute putet conjunxiſſe. Hoc ego, ut de aliis taceam, abunde meo malo didici: didicit Meursius, discere nunc cogitur maximus Salmaſius: sed nemo dixerit, quam ille ejus mendacia, ac calumnias contemnat. Quod ego non æque potui, cum eum conjuraſſe erga me viderem, cum inimicorum illis, qui toti in eo erant, ut me meosque omnibus everterent fortunis. Redeo ad edendi tua curam: de

de qua certiora perſcribam, ubi vel fratri, vel nilio fuerim locutus. De Suecicis quid opus ſcribere quem nihil illorum fugiat? Adderem alioqui Cancellarium Oxenſternium in Germaniam cogitare, ut diſpiciatur de pacis negotio. Eo & iturus Comes Danus, natus ex eadem, imo iisdem, cujus filium, ante annum, vel amplius viditti, cum Ephoro Ernſtio. Sed is qui huc mittetur, major eſt natu illo quem vidimus. Sic mihi Nobilis Suecus retulit, ex literis, quas ab avunculo regni Suecici ſenatore acceperat. Putabam Collegam meum Hortentium dilaturum iter in terras externas, propter luculentam rationem quam ſcripſiſſas, & ille ex Deodato cognorat. Sed longe alia ei mens. Nec miror. Bina illi Caroleorum noſtratum millia, ad hoc iter ſunt aſſignata ab Ordinibus Generalibus. Præterea fruitur ſtipendio nongentorum quos percipit ab urbe hac. Vides quantum proſueris. Non vidit loca externa. Nunc impenſis publicis præluſtri titulo iter ſuſcipiet, quæ res, & nunc honori illi futura, & poſtmodo memorabitur ad ingentem ejus gloriam. Deus illi gratam tribuat mentem, & tributurum conſido. Ait ſe primò in Britanniam iturum: unde in Gallias, tum Venetias, inde prout res dederit. Sed cum longiſſimo tempore nihil mecum communicaffet, uti neque cum Blauwio; nempe quia credo ſumus occupatioribus aliis, quam ferendo ſimus; tandem mihi ſignificavit, de Anglia dicis gratia ſe ſpargere, quo iter hoc ſit occultius. Sed recta iturum in Gallias, non Luteriam tamen, ne de eo Italia cognoscat, ex illis quibus fortaffe innotuerit, ſi Lutetiæ videant. Nolle enim ſe periculum magno ſeni creare. Ne Venetiis quidem agere ſe quicquam velle per literas, niſi ex conſilio illorum, qui rei ſunt planè intelligentes. Si per eum literas dare vellem, nihil committendum itiuſmodi, tibi feſtinato opus foret. Fortaffe enim ne locuturum quidem tecum. Poſtremum hoc plane foret, præter opinionem Conſulis Ampliſſimi Conradi Verburchii. Nam eum ſcio ab affine tuo optimo Reigersbergio literas petiſſe commendatitias, quo gratior acceptiorque filius ſuus, juvenis plus minus annorum xx. eſſe poſſit. Is ſi ad vos venerit, ſcio acceptiſſimus fuerit. Parens enim vir eſt, non uno nomine laudatiſſimus, & qui plurimum in hac urbe poſſit. Præſertim Conſule Gravio, ante octiduum deſuncto: Bichero in præfectos negotiationis Indiæ Orientalis relato. Ulamingio Ooſthornio, Hagæ inter Delegatos hujus urbis degente, & ut arbitror, hoc acturo, ut vivere poſſit vitam privatam. Video enim, & eum horum temporum eſſe pertæſum. Si ab Manaffe nihil ac-

ceperis literarum, mirari noli. Nam menſis, & prope etiam alter eſt, quod morbo decubuit. Uti & contigit Iſaaco meo. Eo nihil actum in ejus Scylace Caryandenſi, & illo qui ante annos circiter ſeptingentos, ex Scymno, Chio, & aliis deſcripſit Mæotidis periplum. Sed ſatis te detinui. Modum neſcio ſcribendi, dum nunc ſileo proſus, nunc multiloquus tua moror tempora. Heroinæ conjugii ſalutem plurimam dico, & filiæ optimæ. Nam filios intelligo, jam in Germania Martiales factos. Clariſſimis viris, Bignonio, Cordefio, Rigaltio, & omnibus non aſpernantibus me, ſed ſi optima occaſio ſic ferat, ſalutem etiam impertias rogo.

Amſtelodami
cloſe xxxviii.
xiv. Octobris.

Tuus æternum,
G. J. Voſſius.

CCCXLV.

Hugoni Grotio.

Illuſtriſſime Domine,

Multum doleo, de exceſſu optimæ ſocrus tuæ, quicum memini, me non ſemel domi tuæ prædere, & ſermones ſerere non injucundos, pro temporibus illis, quibus omnia mutationem Reip. in pejus minabantur. Interea optimè ſcis, magis agendas eſſe gratias Deo, quod ei vitam conceſſerit tam diuturnam, ut & tempora meliora, & tot bellos conſpiceret Nepotes, Neptesque, quam dolendum, quod non ulterius ei reliquerit vitæ uſuram. Leydenſibus item ereptus Petrus Cunæus, magnum ejus Academiæ columen. In Zelandiam ierat, unde æger rediit domum, Collega Barlæus: jam tertium menſem laborat quartana, metuitur ei à μαρσού. Ut convaleſcat, non videtur idem fore qui quondam. Afflixit valetudinem opere properando, quod nunc excuditur, & hoc de ingreſſu Reginæ Matris in urbem noſtram, & honore pompæ ei exhibito. Typis prodibit Auguſtis, plurimis exornatum picturis. Atque hoc, quod dixi, non diſſimulat apud amicos; ſed multum metuo ne morbum hunc inde contraxerit, quod nimis ad animum revocaret, quæ adverſus eum ſcripta ſunt à Doct. Vedelio, & Magiſtro Schokio. Hic Ultrajecto jam in Daventrienſem Scholam conceſſit, ac opera poſtrema, quod vernacula ſcripſit lingua, minatur librum juſtum, quo comprobeſcat, te quoque in caſtris militare Socini. Nam illa de ſatiſfactione Chriſti, tantum temporum illorum gratia, quo facilius

has falleres, scripsisse: ubi illa via non processit, te, larvâ depolitâ, ostendisse, quis foret, in libris de veritate religionis Christianæ. Ubi minimè sacræ Triadæ mysterium tradas, dicas Moſem populo tantum temporalia promittere; Christi præcepta nova esse, ac perfectiora Moſaicis; Christum dici filium Dei, quia natus è virgine, conceptus è spiritu sancto. Arbitror non defore his terris, qui respondeat, sed multum intererit, à quo id fiat. Etiam hoc proſe advocat, quod Crello non responderis; quasi non theologorum hic æque cauſa agatur, ac tua; quasi item jam ſemel acerbi Ravenspergeri maledictis (quem à Si-brando ad hæc incitatum, mihi, ex Affine, utrique eorum amicissimo, probè conſtat) foedè adeo exceptus, ſapienter hoc illis relin-quas, qui nihil niſi quod ipſi faciunt, rectè factum putant. Sed de ipſo ſatis: quem Voëtii eſſe hyperaſpiſtem ſatis ſcire te puto, atque ab eo ſua legi prius quam excudantur, fate-tur apertè: Eo Heinſius noſter utitur amico: ut mirandum non ſit, ſi diſertim ſcribat, non te minus eruditum eſſe Heinſium; ſed nomi-nis eſſe hunc magis honeſti. Deus meliorem largiatur mentem, & Adoleſcenti, & Tri-umviris, qui ejus opera tam turpiter abu-tuntur. Hortenſius hac hyeme hic ſubiſſet. Interim parabat ſe ad hoc, ut paratior ſit ad colloquendum cum Galilæo de Galilæis co-ræ, vel per internuntios, aut literas, & lo-co aliquo tuto, aut propinquo. Blauvius ſenior vita exceſſit: Filiorum, quibus cura eſt Typographia, alter ægrotat. Quid de Meur-ſianis tandem decreverint, planè ignoro. Danicam ejus impreſſere hitoriam; at non videntur facile aggreſſuri ea, quæ ad vet. Scriptorum emendationem, vel Romanas, aut Græcas Antiquitates pertinent. Jan-ſonius de quo ſcripſeram, Vir eſt honeſti no-minis: ſed partium quas Contra-remonſtran-tium vocant, uſque adeo ſtudioſus, ut à pau-cis eo vincatur. De Affinis meæ junioris in Zelandia agentis, filio, ſi quid ſcripſero, Azoti is nomine, literis meis ſignificabitur. Videtur hinc in Britanniam, inde in Gallias recta Lutetiam iturus. Nolim te amore fa-miliæ Junianæ decipi à quoquam. Alioqui hæc non ſcriberem; Et ut puto deinceps quoque aliquid exarandum erit. Salutant te, Conjugem lectiſſimam, & liberos, plurimum omnes mei.

Amſtelodami,
cl^o l^oc xxxviii.
xv Dec. ſt. N.

Tuus æternum,
G. J. Voſſius.

CCCXLVI.

Vincentio Fabricio ſuo, Ger. Jo. Voſſius
S. P. D.

Multum & ego, & familia mea tibi de-bemus, pro honore, quem habitum iſiſti nobis, verbis tuis elegantiffimis; fe-ciſti, ut non modò viveremus in laboribus noſtris, ſed etiam tuis: qui quod Juriconſultus Scævola fruſtra ſperabat, de Mario Ci-ceronis, Caneſcent ſæclis innumerabilibus. Quamquam nec Marius ejus intercidit totus, quia aliqua parte vivit in illis, quæ perenna-runt: facies autem prudenter, ſi deinceps etiam Poeticam hanc Spartam ornaveris: ſed ſic ut magis te vindicent ſibi ſapientiæ ſtu-dia. Maximi quidem facio, quâ merito eru-ditis places, *Μὴν γὰρ ἐνέμεται*: ſed præ toto Par-naſſo, cum Suadæ ſacello, placent edita doctrinæ ſapientum templa ſerena. In qui-bus & te, illo Themidos præcipue, adſiduum eſſe intelligo lubens: Imo ab iis qui ad nos veniunt, reſertur propediem fore, ut adle-garis in myſtarum numerum: ſummæ mihi voluptati erit, quando iſtoc te honore auctum inaudiero. Quamquam enim quod Vallæ olim in ore fuiſſe ſerunt, Plures ſint Docto-res, quam docti: Nec tamen exiguus adeo eſt numerus eorum, in quibus titulus non fallat. Et facilius ſic ad honores muniveris viam. Quod cùm hiſce terris veriſſimum eſſe comperiamus, tum credo multo magis habere locum in Germania tua, ſive malis noſtra. Utinam tandem furere Mars definat; qui nunc præclaris tot ingeniis incommodat. Tu interim durabis amiciffime Fabrici, & ex monito vatis tui, rebus ſervabis te ſecundis. Atque ut ſpiſſius procederet de Patria tua, nunquam Bataviæ, aut fœderatæ Belgicæ, de-erunt, qui ingenium dignis cupiant orna-tum honoribus. Equidem ad hoc, operam omnem offero. Nam cæm omnia ante volu-erim cauſa tua: nunc etiam velle omnia de-beo, poſtquam me obſtrinxisti beneficio tuo. Vale, Optime, & Amiciffime Fabrici.

Amſtelodami, cl^o l^oc xxxix.
Prid. Non. Januarias.

CCCXLVII.

Nobilissime Boswelle,

Perjucundum mihi fuit cognoscere, Reverendum Dom. Doct. Higgeum antehac facellatum Reginæ Bohemiæ, nunc regio favore pro egregiis virtutibus suis, factum esse Decanum Litchfeldensis Ecclesiæ. Præclaræ viri ejus dotes jam duo ante lustra non fuere mihi ignotæ. Nunc verò magis magisque amo, postquam perspicio quantum iis accesserit incrementi. Planeque ita mihi persuadeo hunc quem scribis honorem non tam fastidium ei, quam ulterioris fore dignitatis gradum. Tantum Deus longam ei vitam concedat, quo diutissime præclarè de publico mereatur. Simsonii tui, quem aliquando mihi commendaras, candidum pectus, ei perhonesti mores magnopere mihi placent; omnino optima de eo auguror, ac cum tui tum ejus causa velim omnia. Tu modo dispice in quo porro & utilis esse possit opera nostra. Commentatio nostra de Gentili Theologia & Physiologia Christiana spissè procedit, partim Typographi segnitie, partim ob occupationes meas: quæ profectò tantæ ut hæc item literulas non licuerit exarare, nisi post noctem intempestam. Spero autem fore brevi ut te hic videamus: quo de nonnullis consilium tecum capere liceat. Sin ea felicitas non obtingat, vel primis ipse feriis excurram. Vale Nobilissime & Amicissime vir.

Amstelodami.
clō Ioc xxxix.

CCCXLVIII.

V. N. Cornelio Vander-milio:

Hagam Comitum.

Nobilissime, & Maxime vir,

JAM diu quidem est, quod Blauwius Meursii Danica absolvit: sed distrahi non sivit, quia de re herciscenda, inter senioris Blauwii & υανελιτς, hæredes, necdum convenisset. Quod si priusquam divenderentur, illis amicorum, de quibus scripserat Meursius, exemplaria traderentur, metuit ne fortasse Typographus alius nancisceretur exemplar, ac dum Blauwii in vendendo cessant, id opus celerrimè recuderet. Id perscribi ad te Blauwii voluere, quo moram hanc in optimam caperes partem. Sanè nec ipse codicem mihi destinatum urfi, ne si aliunde Typogra-

phus quis, nactus exemplar recudisset, in eam vel fraude, vel incuria, peccatum videretur. Deinceps nihil periculi futurum. Nam paucos intra dies, opus hoc publicè prostabit. Intellego ex literis à Meursio ad te exaratis, velle, ut exemplar Cunæo ante destinatum, eo jam defuncto, Bonifacio in Italiam transmittatur. Quare & istud à Blauwii poposci, qui mortuo Cunæo sperabant, hinc unius sibi exemplaris lucrum. Me id æquum negante, haud multum adversati. Multum verò doleo, quod septimum jam annum, Meursius noster eludatur à Blauwii. Nam quicquid hæcenus edidit, vel paratum habebat, se excusuros receperant grandi forma, duobus, vel pluribus voluminibus: Itaque ad eos transmisit multa ante *ἀνέκδοτα*, item quæ antea excusis addi, vel in iis mutari vellet. Nunc post molestam, & damnosam longi adeo temporis moram, quid facere in animo habeant, planè sumus incerti. Fervet nunc prælum, opere nostro, de Theologia Gentili, & Physiologia Christiana. In quo tum originem & progressum Idololatriæ explico, tum admiranda Naturæ, & eorum causas. Cumque gentiles, admiratione naturæ, eò sint abducti, ut solem, & alias naturæ partes colerent pro Diis; mihi contra propositum est, hominem à causis secundis, deducere ad causarum omnium causam. Operam dedi, ut ne adeo diffusum Argumentum, confusè tractarem; Multa etiam adferimus aliis indicta, omnia vero planè, alia facie, quam priores. Confido intra menses quatuor, posse ad umbilicum perducì. Mitto ad te Scylacem, & Velleium filiorum meorum; Addidi utrius Exemplar alterum, ut cum historia Meursiana, ad Clarissimum Baltazarem Bonifacium, eadem opera transmittatur. Addidi & literarum aliquid, ut me adhuc vivere, & de studiis non pessimè mereri intelligat: simul etiam, in tam longo silentio, non minus amare, quam cum in scribendo essem frequentior. Vale vir Nobilissime, benèque de patria, ac literarum studiis, ac studiosis promerere, meque tui nominis cultorem ama, vel immerentem.

Amstelodami,
clō Ioc xxxix.
Τάχα.

Tuus omni officio, idque merito tuo,

G. J. Vossius.

CCCXLIX.

Guilielmo Archiepiscopo Cantuariensi.

Reverendissime in Christo Pater, Domine illustrissime,

NON leviter percellunt animum meum, quæ de Armis à Scotorum gente adversus Regem suum susceptis, non ex tua modo Epistola, sed sermone etiam intelligo prope omnium, qui vel ex Britannia huc veniunt, vel literas inde accipiunt à suis. Hoc etiam me pungit, atque urit, quod homines improbi, quorum larga semper feges fuit, eritque, causam tanti mali arcessere amant, non unde oportuit, ab iis quibus in Ecclesia nihil nisi novellum placet; ut Æolis aliis, tantæ tempestatis flabris, quibus utile bellum: Sed sacro Angliæ ordine, quali hoc agat, ut gradibus quibusdam gens purioris tenax Evangelii (sic enim loquuntur) iterum ruat in idolopatriam papalem. Et quo excellentiori loco quemque Deus constituit in Ecclesia sua, hoc magis tanti eum criminis agunt reum. Quamobrem fatis prædicari nequit sapientissimum serenissimi Regis Caroli consilium, dum auctor est, ut quæ adversus Jesuitam Fisherum scripsisti, ea denuo edantur, sed sic ut in Frontispicio testentur nomen Auctoris. Quantum mihi inde boni promittam, haud facile dixerò. Nuper sane cum avidè multi legerint calumnias adversus te Anglico scriptas sermone, Belgiceque translatas; mirum in modum illæ frigere cœperunt, simulac ejusce gentis lingua prodiit quoque oratio tua, qua malignis hominibus, humanius quam merebantur, respondisti. Majorem etiam utilitatem ac fructum mihi spondeo, simulac edideris ea, quæ promittis; præsertim ubi Latine quoque viderint lucem, imo ut confido, etiam Gallicè & Belgice: nec etiam Scotia solum Tribunitios alit Spiritus, sed exteris etiam terris haut defunt Rebellionis flabella. Hisce nunc paucis oblitescere volui occupationibus summis, quibus non premeris, sed obrueris. Nec plura nunc addam, quia metuo, ne, si ulterius sermonem producam, sine meis ad te literis veniat vir & civis optimus Griffinus Higgus. Tam malis enim temporibus malo sic virum doctissimum ac reverendissimum nominis tui & amatorem & æstimatorem laudare, quam ab aliis animi dotibus, et si istæ egregie in eo luceant. De opere quo prælum fervet hætenus, scribam paucos post dies; nunc ob causam quam dixi, manum de tabula cogor tollere. In precibus nostris nunquam desinam meminisse tui, gnarus quantum Ecclesiæ Catholicæ

præstes boni. Utinam sua satis bona intelligat.

Amstelodami, clō Idc xxxix.
xii Kal. Aprilis.

CCCL.

Joanni Meursio S. P.

MAle me, præclare Meursi, habet, quod Blauwii fratres post patris excessum sic moras nectant in excudendis tuis; licet jam sextus sit annus, imo ut reor ultra, ex quo & parens ipse & filiorum natu maximus editionem eorum sponte promiserant. Nunc prætexunt parentis excessum cur differant. Quippe negant magni aliquid se posse ordiri, nisi de exciscundo conveniret prius inter liberos qui seni numero, ex quibus duo duntaxat ætate aliis superiores rem Typographicam suis curaturi impensis, ac vel commodis vel damnis. Atqui ut audio, longe maxima hæreditatis pars consistit in iis, quæ hoc artis & mercaturæ genus spectant. Uti sunt immensa pene librorum copia tot linguarum, tam varii typi ænei, tabulæ pene innumeræ ex eodem ære, partim terrarum ac marium, partim illustrium virorum, herbarum, & aliorum id genus descriptionem vel figuram continentes. Equidem metuo ne tam facile conveniat inter hæredes, dum hi æstimabunt ista minoris, magno alii: nec vel inter arbitros tam facile componuntur talia. Si quidem Mercuralibus leve discrimen inter animam & nummos. Hac propter metuo ne spisse hoc negotium conventionis procedat; ac si expectandum sit donec inter eos fuerit transactum, diu tibi mihiq; fieri fucus possit. Quamquam non ignorem eos dicere propediem eam rem compositum iri: nec dubium ipsimet quin longe melius res suas intelligant. Credamus igitur illis. Verum aliud ecce: negant tua se posse ordiri priusquam absolverint commentationes meas de Idololatria, sive de Theologia Gentili, & Phytologia Christiana. Cur vero, inquires: videlicet quia non sufficiant sibi characteres ad tua excudenda in quibus tot Græca intercurrent, nisi vel paratus sis, ut prodeant minutis illis oculos pene suffugientibus, talibus fere, si non iisdem, ac filii mei Isaaci notæ in Scylacem prodierunt: vel ego sinam ut labores mei de argumento ante memorato in annum unum alterum differantur, quod ego si perpeti velim, non similiter se animatos fore, ob certissima damna quæ eos maneant, præcipue opere jam pene ad finem perducto. Quid agamus, vir optime & amicissime? Ego qui te fratris in-

star dilexi semper, vim illis hac parte facere non possum, vix etiam istoc si possum velim, quia jam undique vix sine populo ab ignavis occupationum mearum magnopere accuser, quod extremam imponere manum tabulae nesciam. Attamen nisi aliter visum tibi fuerit, simulac mea lucem aspicient, non patiar quantum in me erit ulla tuis praevertere sed nostris; nam & hoc noscere tua interest, non poterit coronis imponi, si forte ante Solstitium, saltem non ante Kal. Junii. Hæc cura prope anxia perscribere ad te volui, quia non ignoro quam mecum foetus proprios ames, & ætatem etiam tuam vergere cogites subinde: simul etiam metuerim, ne Blauwius forte, quem ut ad te scriberet rogavi, Mercuriali more facum quodammodo faceret literis suis. Tu utriusque lecta epistola melius statues quod ex re sit tua. Equidem post cessationem adeo diuturnam nunc quoque expectandum censeo, donec mea perduxerit ad umbilicum, tum etiam si idem esse velit qui fuit semper, cum alio alia credo inunda erit via. Quamquam, quod de mulieribus conjicio, ait, id de hoc hominum genere (etiam illam melioris notæ quale illud, quicum negotium nobis) merito dicere liceat, in eodem omnes videri ludo doctos, si non ad malitiam, saltem ad lucrum, cum alieno etiam dispendio. Nunc ad aliud venio. Historici operis tui nullum hæcenus exemplar accepi, nedum Mylius, vel amicorum alii quibus ea à me mitti voluisti. In causa est quod quamdiu necdum inter hæredes Blauwicos est conventum, minime conducibile existiment exemplaria his terris illa in hominum manus venire, ne suspicio oboriatur, intercepti commodi ex libris divenditis. Quam vellem ne facilem adeo te præbuisses literis ad Blauwium proximis! Simulac cognovi te, iis etiam annueratis exemplaribus quæ inter amicos his distribui cuperes, necdum accepisse XX. hominem pro jure meo increpui ac negavi pauciora debere quam XXXVI. Proinde ad te XVIII. mitti oportere. Ille num hoc habere *χρησιμότερον* temet literis tuis acquiescere, si sena mittantur exemplaria. Pertendi ego, nescire me, quid ad ipsum scripseris, sed probe ex iis, quæ ad me exarasses, perspectam habere sententiam tuam. Quocirca si non possum impetrare æquam, saltem mediam insisteret viam, nec pauciora mittat duodenis. Et ita discessi, ut facturus videretur. Quod ad Academiam attinet Leidensem, in ea non sine magno rei literaria dispendio decessit vetus collega noster Petrus Cunæus: ac paulo post ejus obitum uxore etiam consecutum. Oratione ei parentavit Vossius: versibus autem complures. Opinio multorum est, ejus in locum successurum esse Jacobum Gothofridum J. C. Dionysii filium,

Syndicum Genevensis; saltem literis Curatorum Leidenensium ei professio est oblata. Sed hesternæ die ex filio Isaaco Leidâ redeunte cognovi eos quibus is notior desperare propemodum. Sunt qui sermonem injiciant de amplissimo Simone Beaumontio, Middleburgensis prius Reip. nunc Roterodamenti Syndico, qui intermedio tempore inter Proceres ut vocant generales fœderatæ Belgicæ fuit; aiunt non abhorreere ab hoc professorio ac tranquillo vitæ genere. Sed enim vix fore arbitrator, ut in eo vocando convenient Curatores & Consules; scis quas ille partes secutus sit, scissa ante annos viginti Reip. nostra. Jam mihi cum uno Professorum Leidenensium sermo fuit qui id fore negabat. Vides manere magnam partem malignitatem temporum, quæ te meque & tot bonos vexavit immerentes. Aristarchus sive potius exercitationes Sacræ in N. T. quibus scis Heinsium diu noctuque incumbere, vix intra menses duos vel tres juris erit publici. Utinam quoque divulgaret, quæ ejusdem argumenti elaboravit Josephus Scaliger: scis enim summum virum multum in eo desudasse; sed edere sua ausum non fuisse, quia in multis non à Beza modo, sed aliis etiam à nostris diffideret. Salmasius post excusum prius de usura volumen, nunc in alterum incumbit, in Simplicium quoque animadversiones edit. Vossius parat scribere adversus ea, quæ Salmasius scripsit in exercitationibus Plinianis ad Solinum, ubi in eo totus est ubi doceat Saccharum veterum esse à nostro diversum. Hanc Salmasii opinionem erroneam exprobravit ei Vossius in convivio multis præsentibus, ac postea quoque apud amicos eandem improbat: poposcit igitur Salmasius ut publice refelleret. Id se is facturum promisit. Cæterum recepit Vossius, se amice cum eo acturum, non ut multi nunc solent è Theologis, aut Criticis; Argumentum enim de Saccharo nihil nisi dulce exigere, sanè amarorem omnem & animi & sermonis averfari. Primus quod sciam hanc controversiam movit Joannes Menardus Ferrariensis in Epistolis medicinalibus, eumque in Paradoxis Medicis est secutus nescio an gentilis, saltem cognominis mihi Leonardus Vossius, seu ut ipse scribebat Fuchius. Verum Salmasius novis opinionem eum argumentis stabilire est aggressus. Mitto ad te literas Gronovianas cum fasciculo in quo observatum ejus libri. Juvenis est integræ vitæ, & ingenii acumine, doctrinaque pollens, dignus planè amore tuo, & omnium bonorum. Misit antehac ad te Epistolas Casauboni, in quibus & illa comparebunt ad te exaratas, quas hoc fine, ut ederentur, miseras mihi. Inter quatuordecim dies iturus Gronovius in Gallias. Quare si quid ei scribere voles, (velle puto,

puto, quia id præclaræ dotes (ejus merentur) ad me literas mittas; quia cum sum procuraturus tuas, simul etiam quibus tibi responderit, forem missurus. Scylacem Caryandenum Isaaci filii mei tandem vides. Quod mitto exemplar unicum est, nullum in ædibus superest, alioqui alterum ad D. Stephanium addidissim, sed Blauwius non perpetitur ulla ex ædibus suis exire priusquam conventum sit inter hæredes. Et vix illud quod mitto potuit impetrare. Collegæ tuo, amplissimo Doctore Christiano Matthiæ salutem dices plurimam. Dolet quod non uti decreram una cum doctissimo Fithero convivio excipere licuerit. Etiam salute imperties Dom. Laurenbergium. De Dom. Stephanio addiderim, nisi ad eum transmitterem hoc tempore exemplum literarum quas per Mercatorem sue cum nuper mittere statueram paucis post diebus, aut per alium, Germanum natione hominem doctum & ut putabam fidum. Sed metuo ne acceperit; & fortasse ne tu quidem eas quas tum scripseram. Uxor tuæ conjugii, filio, filiæ salutem adscribi iussit.

Amstelodami
clb loc xxxix.
xii. Kal. Apr. St.V.

Tuus totus,
G. J. Vossius.

CCCLI.

Auberto Miræo, Ger. Jo. Vossius
S. P. D.

Multum tibi debeo, reverende atque eximie vir, pro luculento Chronici Belgici dono: quo longe plurima & me doces & doctissimum quemque. Quod ipsum de monumentis aliis tuæ dixero industriæ; utinam vero, mox à literis tuis acceptis, quaecunque mittere *ἀντὶ δὲ ἐγὼ* licuisset, videlicet commentationes nostras de Historicis Latinis: in eo cum totus essem, ecce nuncius Leida adfertur, ad meliorem te vitam advocatum. Dolui vehementer studiorum vicem, de quibus hætenus præclare adeo meritis es, ac mereri porro non cessas, sed tamen suspectior paulo is nuncius erat, utcumque commercium sibi literarium tecum intercedere dictitaret; videbar mihi & in aliis vanitatem hominis comperisse, vel ut mollius dicam, nimiam credulitatem. Proinde Typographo nostro Blauwio in mandatis dedi, ut id exquireret ex Typographis Antwerpiensibus, quibuscum sibi negotium foret. Res erat facilis: sed nimis se in eo negligenter gessit. Demum ex clarissimo Plempio (id pauculos ante menses fuit)

cognosco lætiora omnia. Petii igitur ne Lovanium hinc abiret sine literis ad te meis & volumine nostro Historico. In hoc morem se gessurum promisit. At abunde mihi perspectus viri candor, etiam amor, quo complectitur utrumque nostrum. Tamen sive ab amicis, quos hic plurimos habet, sive aliis occupationibus detentus, facere neglexit. Gavissus igitur sum cum Lambertus Vossius vir ornatissimus diceret, & tecum sibi notitiam esse, nec pauca de virtutibus tuis prædicaret. Avide igitur hanc occasionem apprehendi meis te compellendi literis; sed exemplar quod mittere animus fuerat, cum vellem maxime non potui; unicum filii Matthæi habebamus, in quo nihil esset exaratum, id in morbo nuper quo ante menses paucos diutissime decubuit ei surreptum videtur. Mitimus igitur ad Typographos hujus civitatis, sed nullum in ullius officina comparet, nec Leidensis ipse editor ullum præterea obtinet; tamen opera dabitur ut ab aliquo amicorum quodpiam nanciscar; nolim enim ingratus censeretur. Hoc duntaxat scire te velim, urgeri me undique ad editionem novam in qua non levis erit accessio. Nunc sub manibus habeo grande opus de Theologia Gentium & Physiologia Christiana. Plura nunc nequeo, quia abitum urget eruditissimus Vossius.

Amstelodami clb loc xxxix.
iv Kal. Aprilis.

CCCLII.

Erycio Puteano, Ger. Jo. Vossius
S. P.

Jucundum mihi, maxime Puteane, fuit & nuper ex clarissimo Plempio, & nunc ex doctissimo Lamberto Vossio cognoscere de prospera valetudine non tuæ modo sed familiæ universæ. Quod vero diceris cogitare de epistolarum tuarum ineditis hætenus divulgandis, id eo mihi gratius est, quod nemo paulo humanior ignoret te in venusto hoc floridoque dicendi genere, plane regnum tenere. Interea omnes tui nominis amantes vehementer hoc cupimus, ut excuso hoc opere, quod multum ad ornandam eloquentiam facturum nemo dubitat, denuo recurras ad ea, quæ si non confecta, saltem affecta habeas in Mathesi, Doctrina civili, Historia vel externa vel sacra: in quorum singulis valere te plurimum abunde comprobasti ingenii doctrinæque monumentis, quæ jam in omnium prope bibliothecis visuntur: nimirum nil

hil vel tibi honestius, vel publico utilius esse poterit, quam si hac varietate labores tuos diffundas. Atque ita pietatis, prudentiæ, eloquentiæ, & nos & posteritatem, pabulo pascas. Hanc in scribendi libertatem meam, ut in bonam capias partem, non est animus rogare. Novimus alter alterum à pueris, ut in facilitate tua, & amicitia nostra, abunde habeam fiduciæ. Intellego quoque cum filium tuum, tum filiam itidem, par liberorum suavissimum, connubium contraxisse se dignum, planeque ex animi tui sententia, quo nomine haut secus gaudeo, ac si sanguine juncti mihi forent. Quæso hoc, iis meo nomine significa, omnia me eorum nomine velle, ac Deum rogare ut Matrimonium utrimque bene iis vertat, teque ac domum tuam nepotibus ac neptibus augeant avitæ virtutis æmulis. Mitit ad te filius Isaacus Scylacem suum, quem gratum fore confido, & ob Antiquitatem Scriptoris, & ob bonam ei operam impensam ab amici filio, qui paterno exemplo te sciat æstimare.

*Amstelodami, cId Idc xxxix.
iv. Kal. Aprilis.*

CCCLIII.

Hugoni Grotio, *Regni Suecici ad Regem
Christianissimum Legato.*
Lutetiam Parisiorum.

Illustrissime Domine,

Vincentio Fabricio per Angliam in Gallias tendente, una cum Adolescente Patrio Hamburgensi, cujus studiis præest; facile perspexi, vix duos intra menses, meas tibi reddi posse literas. Nolui tamen illum sine illis dimittere, præsertim cum ipse urgeret, ut saltem minutum aliquid exararem, & istiusmodi, ubi in mora nihil foret periculi. Eo autem lubentius morem gessi, quia amavi juvenem, obanimum candorem & egregiam doctrinam, quam ex Poematis ejus, & fortasse etiam Literis jam videris. Simul illud etiam, quum me omni officiorum genere sibi demerendum putarit. Equidem & ipse etiam, siqua possim, ei bene faxim lubens; sed nunc non alio gratificari poteram, quam paucula ad te scribendo. Cæterum intra paucos dies de aliis fufius tecum loquar, & quæ magis ad nos pertineant. Nunc illud cum dolore referam, utriusque nostri amantissimum Joannem Meursium (quemadmodum ejus Collega Sorâ Danorum ad me

scripsit) graviter adeo morbo decumbere, ut jam Medici desperare incipiant: scis calculo semper fuisse vexatum. Nunc vero etiam urinam emittit planè purulentum, ulceris in renibus, vel visceribus indicem. Ita paulatim imminuitur numerus eorum qui literas colunt. Quando me quoque Imperator meus arcessere hinc velit, scis me scire juxta cum ignarissimis, sed tamen minimè terret annus quem jam ingressus sum Climactericus. Puto nec Christiano homine indignum esse illud Bilbilici vatis, summum nec metuas diem, nec optes. Ego vero etiam optarem, nisi cura meorum tangerer, & voluptatis non parum caperem ex eo, quod mihi videar de pluribus bene mereri. Hoc quodammodo divinum videtur, ita divini planè beneficii esse agnosco.

Omnis mea domus, te, Heroinam lectissimam Uxorem tuam, & liberos plurima salute impertit.

*Amstelodami, cId Idc xxxix. xviii. Kal. Mai.
quo die desita Legis fervantes Judæos,
Amstelodami video celebrare primum
Azymorum.*

Tuus eternum.

CCCLIV.

Georgio Ratallero Dubletio.
Hagam Comititis

Nobilissime Amplissimeque Vir.

LAcrymas non tenui, cum ex ornatissimo Heemskerchio nostro de tristissimo casu tuo cognoscerem. Nec interim mihi tam quicquam solatio fuit, quam animi tui constantia. Sic enim omnem hætenus vitam composuisti, ut quotquot te novimus, possidere credamus benè præparatum pectus ad adversa quæque subeunda. Gravis Ausus te perculit: sed non ut bonæ mentis naufragium facias. Gemina Anchora jam à puero fundaris, Princeps illa Christianæ Religionis, cujus tessera est patientia. Hac intravit Christus ipse ad gloriam, ad cujus exemplum vocati sumus, nec patimur sine voluntate Dei; qui solus novit quid expediat nobis; hæc & tot alia ex chartis Apostolicis, animo occurrant tuo; quæ solidum solatium præstabunt. Nullus Medicus tam benè ægræ menti medebitur, quam coelestis ille, verbo & spiritu suo. Vulnus facit, sed & Medicinam. Quare si dolor urferit vehementius, juvet alloqui Deum,

Deum, nec alteram illam aspernari anchoram, & longo à priori vincitur intervallo. Præcepta inquam, & exempla, quæ omnis nobis suppeditat Historia, & Socratica Philosophia. Sæpe à Seneca, & Epicteto, ejusque Interpretibus, cordatior sum regressus. Turpe putabam, si *ὁ ἐξωδον*, vincerent hominem à pueritia Christo sacratum. Quicquid erit, dum dolor recens, avocandus ab ea parte, qua dolet, hoc ratio nunc efficiat: Cætera præstabit dies, quæ multum etiam potest in insipientibus. Quod ad exequias me vocas, affectum tuum video, de quo nunquam dubitavi; sed à feria quarta hebdomadis Paschalis, cum morbo confliktor hætenus. Primum me vehemens tertiana afflixit: sed vix octiduum duravit; mox colici excepere dolores, iique peracerbi; nec multo post exeruit se Nephritis, quæ dies, noctesque me cruciavit. Nunc dolor multum remisit. Virium tantum, ut etsi pedes extra ædes ponere non sustineam, tamen in Museum quasi perreptem: quique antea vel duodenis in studiis horis par eram, nunc binæ sufficere incipiunt: Interea multum metuo, ne Nephritis me, per omnem vitam comitetur, grave malum, & unà cum Arthritide doctis perfamiliale, in senio præsertim. Sic beavit me hic annus Climactericus: id jocosius in re seria dictum judicabis; sed-enim vere adversa nos beant, quia ad vitam præparant beatam. Non ultra teneo te. Nam eum has accipies, occupatus exequiis, ne his quidem legendis fortasse vacabit; sed leges cum poteris. Claudam isto Epistolam, *ὡς φίλος ἄλλος*, cum carissimo Christi discipulo uterque recumbamus, in sinu Domini. De Velleio cras literas à Gerardo meo habebis; nunc isti siquid ac tuas acceperam, volui respondere. Uxor, & omnes mei, te, socrum, & Affines, mecum salutant plurimum.

clō Ioc xxxix.
xxiii. Maii.

Tuus æternum,

G. J. Vossius.

CCCLV.

Joanni Skyttio.

Illustris Domine,

AD aures meas pervenit, sic relatum tibi esse, filium tuum in studiis quorum gratia huc miseris, plane esse socordem ac negligentem, & quod ad vitam, inutiliter pecunias absumere: ac præterea ne Erasum quidem, quem illi Ephorum dederas, ab hoc

crimine esse alienum. Hic nuncius horrendum in modum utrumque horum perculit. Filius tanto cum mœrore mihi ea retulit, ut prope à morbo ei formidarem. Nec tamen me ipsum leviter ea res affecit. Sane filius in vicinia nostra habitat, ædes vix lapidis unius jactu à meis distat, omnes perhonestè de eo sentiunt & loquuntur: ebrium nec ego nec domus meæ quisquam conspeximus. Nec vel jurato facile crediderim, fuisse unquam in lupanari, vel cum scortis gnarum leves etiam sermones agitaſſe. Quare illustris domine, mirificas istas suspiciones de animo tuo depone. Siquid istorum foret, Vossius tuus non ignoraret. Ad Erasum vero quod attinet, tantum abest, ut ulla in re violet pietatem, ut potius superstitione aliqua in alteram partem peccare videri possit. Interea dicere non possum, an non paullo faciant majores sumptus quam voles. Multum interest, quo pacto quis filium velit vivere. Non idem hic parentes ejusdem etiam opulentiae ac dignitatis sentiunt. Hic tuum est legem præscribere juxta quam sese componant. De nullo vero æque conqueritur filius tuus, quam quod multo carius omnia, quam alii emere cogatur. Nempe qui pannos ei divendunt aut vestes parant (& par aliorum ratio) non pretium exigunt, quale ab aliis parata solventibus pecunia, sed ut usuram forti annumerent: quippe qui spe solum solutionis vivant. Et nuper non defuit, qui credere nihil vellet ultra, nisi pro eo sponderet filius. Hæc alteri dictabam in summis calculi doloribus, qui hocce anno climacterico meo (sexagesimum enim tertium sum ingressus) excruciare me cœperunt. Plura adderem, si dolor fineret. Sed si Deus permiserit, ut iterum esse incipiam, qui antea fui, fusiùs de omnibus scribam. Nunc sic habe, & vitam filii esse perhonestam, & non aspernandos in studiis, dum hic est, præcipue in universa Historia, progressus fecisse. Mihi nec seritur nec metitur. Sed officii mei putavi ut tam foedæ calumniæ occurrerem. Eadem existimavi me rem facturum gratissimam, si opinionem, quæ sine dubio vehementer te pungeret, animo tuo evellerem. Deus opt. Maximus te & omnem familiam tuam diutissime prosperam ac sospitem conservet.

Aliena manu hætenus: hæc mea subscripsi.

Anno Christi,
clō Ioc xxxix.
xi. Kal. Jun.

*Illustrissimi nominis tuæ
devotissimus cultor,*

G. J. Vossius.

CCCLV.

CCCLVI.

Hugoni Grotio S. P.
Lutetiam Paris.

Verna hac tempestate, Illustrissime Domine, ingressum me scias *κλιμακτηε* seniorum, tertium & sexagesimum, quem aiunt advenire cum periculo interitus vitæ, vel morbi gravioris: Non ut puto, præcisè, ob numeri vim, sed propter qualitates inditas naturæ. De me quidem illud dicere habeo, ex septimis quibusque, nullum non mihi morbum apportasse, præterquam sextum, hoc est ætatis meæ, secundum & quadragesimum. Credo animi ægritudinem sufficere tum ad me affligendum, divina bonitas putavit. Erat enim is annus, seculi hujus vigesimus; quo quot adversa pertulerim à malis, quam tristitia conspexerim in tot bonis, imo summis, & viris, & amicis, apud nullum minus exponi opus quàm te, qui vel solus utramque feceris paginam. Sin corporis potius morbos attendero, non alius mihi annus infestior fuit Climacterico quarto, sive ætatis duodetrigesimo. Nam si quicquid morborum, vita pertuli universa, in unum conflatur, vix puto æquarit, unum illius anni, tam gravem, ac diuturnum morbum; quem mox exceperit mors conjugis, itidem octavum & vigesimum annum agentis. Septimus Climactericus mihi attulit Arthridem, quæ & postmodo, me semel iterumque magna vi est adorta. Nunc ab quadriennio circiter, immunis fuit, credo, diætæ beneficio, & ratapotiocum, quibus hebdomade quaque uti soleo. Hoc verò senili Climactere, post quem num alterum sum visurus, solus vitæ, ac mortis arbiter novit, primum tertia me invasit, quem XXXV. annis proximis nulla febris corripuerat, præter unam, quam uxor arbitrari solet profectam ab scurrili vexatione inimicissimi mihi, tibi que amici, quem cum affine convivio exceperam. Nempe annus erat seculi primus & vigesimus, quo nihil obloqui fas erat, sed Spartana concoquere sapientiâ, necessum fuit, utcumque, vel cibi, & potus reliquiis conspurcassent. Sed post longos logos, redeo ad eum, unde cœperam *κλιμακτηε*. vix tertia desierat, dolor me occupavit colicus, quem non nisi adolescens semel eram expertus. Hinc secutum est grave nephritidos malum, à quo mihi metueram nunquam, quia nullum mali signum hætenus in faccato illo corporis humore animadvertetam. Nunc vero me duabus & ultra hebdomadibus perpetuo propemodum lectulo ad-

fixit. Sunt tamen dies prope jam duodecim, quod ab eo videar mihi liber, cumque Mulis in gratiam redierim, ac vires etiam paulatim recipiam. Hoc tam amanti mei significandum putavi, ut si forte, ex fratre de morbo intelligens, dolore sis affectus, literis meis hunc animo detergeam tuo. Simul illud addo, magnum Salmasium, quem diu salvum, ac sospitem esse, non paulo majoris interest Reip. literariæ, post morbum gravissimum, nunc convalescere magis ac magis. In opere de Theologia Gentili, & Christiana Physiologia, tribus jam mensibus cessatum à Typographo. Premitur quidem, dum distinetur, editione Latina Barleæanæ commentationis, de ingressu Medicæ Reginæ in urbem nostram; mox tralatione Gallica, & Belgica; ac mense proximo, etiam morbo meo. De tuis cum Janfonio locutus sum. Nunc ait, nunc negat. Nihil illo lubricum magis. Anguillam aiunt ficulno constringi folio. Hinc quo pacto teneam, vix video; sed de isto, jam frater, & filius, de te scripserint. Nec enim unquam huc veniunt, quin illud, ut Janfonium ipsi compellent, commoneam, filium imprimis. Jo. Meursius periculosè decumbit: scis, ut arbitrator, calculo laborasse ab adolescentia. Nunc vehementius vexatur, quam antehac unquam: nec ulcere, ut creditur, vesicæ profluere illi solet nisi purulentus humor; sic ad me Collega ejus Stephanus, (à quo novam & longè castigatorem Saxonis Grammatici editionem quotidie expectamus) ante mensem, & ultra perscripsit, nec devita ejus parum metuit. Vale cum omni familia diutissimè.

Amstelodami,
clō Ioc xxxix.
prid. Non. Jun.

Tuus eternum,

G. J. Vossius.

CCCLVII.

Merico Casaubono S. P.

Plurimum tibi debeo, Reverende & Clarissime Casaubone, quod tantum mei causâ sumseris laboris, ut ista de motibus Britannicis perscriberes mihi. Licet enim non prorsus eorum ignarus forem, haud mediocriter animum juvit, ista ex te plenius planiusque cognoscere. Proderit quoque ad hoc mihi, ut majori de his fiducia sermonem cum nonnullis seram, qui unum hoc à Regiis putant, ut Romana reducat superstitio ac tyrannis. Sic solent beare eos, quibus religio est abire à veteris Ecclesiæ consensu. Papæ mancipia sunt, qui non juniorum somnia præjudicio

præjudicio antiquitatis vitia arbitrentur. Soli sapiunt Cathari: sunt cæteri umbræ circumvolitantes, vel si quid istis levius vaniûsque. Equidem in hisce turbis assidue facio vota pro ferenissimo Rege meo & reverendissimo Dom. Archiepiscopo. Nihil boni ab iis spero, qui nihil pensi habent, quod dicant vel faciant, dummodo id faciat pro novellitate. Quod ad imminutionem præbendæ annuæ, scire aveo utrum in Collegio fratrum proportionè agatur Arithmetica, ut loquuntur, an Geometrica. Nec enim æquum videtur, ut qui tanto minus, quam præsentis fructus capio, is tantundem faciam damni. Cæteroquin si omnino sic fiat sententia, ut etiam absentes damnum tangunt, non hoc agere velim, ut præster indemnus. Tam mihi Regia causa est curæ, ut longe majora velim propterea & velle æternum debeam. Ad neminem summæ super eo scribere in Angliam potui. Valde adversatur animo molestiam iis facere literis meis, quos scio Regni & Ecclesiæ negotia humeris suis sustinere; sed tamen videbo an vim facere mihi possim. Cæteroquin tam facilis esse soleo, ut omnia potius perferam, quàm ulli sim molestus. Interim recte fecerit is, qui nomine Amstelodamensis mercatoris pecunias meas accipit hoc tempore, quia semestre expiravit, si superiori trimestri nihil accepit, contentus sit quadraginta libris Sterlingicis loco quinquagenarum. Mitto ad te Velleium filii mei. Gratum fore confido & nostri causâ, & quia post summos viros non paucis vulneribus medicinam fecit. Hæc raptim scribebam: mediocriter nunc valeo. Nam jam altera est hebdomas quod rursus in publicum prodeo & in Lyceo iterum doceo. Toto antea mense cum morbo sum confictus, & sat gravi; ne nunc quidem pristinæ vires redierunt.

Plurimum saluta lectissimam uxorem, reverendum Dominum Decanum & Collegium fratrum universum.

Amstelodami,
clō lōc xxxix.
prid. Kal. Quintæ.
Styl. Greg.

Tuus æternum,

G. J. Vossius.

CCCLVIII.

Ludovico Crocio S. P.

Bremam.

QUO tempore, eximie Croci, tuas priores accepi, & paulo post alteras, cum reutatione dogmatum Socini, gravi morbo decumbebam. A quo ne nunc quidem con-

valui prorsus: in tantum tamen, ut licet corpore non satis firmo, publicè tamen jam iterum doceam. In morbo autem recreavit me non mediocriter, quod non deponeres memoriam, & amorem nostri, ac munere etiam testari voluisses, quanti me faceres. Eo ardentius, paulum remittente morbo, legi tua. Pretium operæ fecisti occurrendo illis, in quibus infautus ille Fautus, à veteris Ecclesiæ consensu abeundum sibi putavit. Eadem os occlusisti malevolis, qui, si quis vel digitum latum ab iis recesserit, optimum hoc vindictæ genus putant, si sparserint eos Σοκνίσεις. Hoc in te quoque successurum sibi putabant. Sed in ruborem dedit nuperus ille tam bellus foetus tuus. Verùm non sine horrore dico, ubi mendacii, & calumniæ rei agebantur, non aliud invenere κρησφύγετον, quam quod dicis causâ, non ex animi tui sententia, istæ scripsisses. Sed illi ipsi, qui alioqui à te abirent, hoc putidius putabant. Optimus, & modestissimus quisque, utroque, ut aiunt, pollice, extollit, quod in tristi hoc Ecclesiæ Schismate, animo sis moderato, nec defugias, quo minus illud testaris, non obscurè, præclaris ingenii, doctrinæque monumentis. Si qui molestiam facebant, tuum est id insuper habere, cui conscientia, publicum bonum, Dei honor, pro amplissimo sint theatro. Vale vir, & amice summe, ac quanto major veteris est Ecclesiæ contemptus, quantoque plures, his quidem terris, (nec enim par ubique dementia) sua omnia iudicio metiuntur, tanto magis veteris Ecclesiæ honori, recentis vero concordie studeamus; imo sic animati, tantò impensius amemus nos inter nos. Plurimam, clarissimis & optimis Collegis, salutem meo nomine dicito.

Amstelodami,
clō lōc xxxix.
post. Kal.
Quintæ.

Tuus omni officio,

G. J. Vossius.

CCCLIX.

Baltazari Willio, S. Theol. Doct. & Profess. S. P.

AMBIGO, clarissime & amicissime Willi, utrum magis gaudeam, quando tuas accipio literas, hominis tam amici; an impensius doleam, quando mecum cogito, sic me distringi, ut cum paria maxime facere velim, non tamen possim. Solatur illud, quod sciam, non posse te irasci tam amanti tui, jam ab illo tempore, quò primum te con-

X x

spexi

spexi Lugduni, imo erectam etiam animi tui indolem, perspicere mihi visus sum. Valetudo quotidie fit firmatior, quæ menssem totum me, vel lectulo affixit, vel cubiculo conclusit. Etiam Salmasius, & *mihi*, qui graviter decubuit, magis, & magis sibi restituitur. Magnum in eo damnum metuebam Reipub. literariæ; ac idem mecum formidabant omnes, quos non tangit nigræ loliginis succus. Pro egregio munere, non uno, quo me ornasti, gratias ago, & meo nomine, & publico, de quo bene mereri non cessas. Clarissimo Parenti, & Collegis omnibus salutem dices plurimam.

Amstelodami,
clō lōc xxxix.
postr. Kal.
Quinct.

Tuus,

G. J. Vossius.

CCCLX.

Joanni Isacio Pontano.

Clarissime & Amicissime Pontane,

AB annis xxxv. non ita graviter ægrota-
vi, ac omni eo tempore, quod inter
Paschæ, & Pentecostes ferias intercessit. Ter-
tiana primum me affixit, mox colici dolores,
hinc Nephritis; à quo malo, per omnem vi-
tam fueram immunis. Quid porro futurum
sit novit Deus. Illud scio, agere me Clima-
cticum, quem senibus periculosum aiunt,
non quasi ulla vis sit numerorum, sed quia
Deus naturam sic fecit, ut ad numerum, fi-
guram, ac pondus, cuncta exequatur. At-
que hoc inter alia, etiam dies critici arguunt.
Nec tamen hæc eo in medicuntur, quasi an-
num hunc formidem. Etsi enim septimo quo-
que anno mihi fuerit pejus; tamen fortasse
jam periculo sum defunctus; atque ut aliter
esset, quod præcipit Martialis, summum
nec metuo diem, nec opto. Vix tamen vale-
tudini eram restitutus, cum Matthæus denuò
incidit in morbum, meo quoque gravio-
rem; ac ne nunc convaluit prorsus. Absque his fu-
isset, alteruter noster, non literis modo re-
spondisset tuis, sed etiam egisset gratias, pro
insigni munificentia. Danica enim tua jam
diu accepimus, & melioris quidem chartæ
codicem, ut Typographo mandāras. Opus
hoc plurimū tibi famæ adstruet. Jam an-
tea quidem, eam tot ingenii, doctrinæque
monumentis, sat magnam pararas; quibus
vel solis, (penè singulis dixeram, nec judi-
cium id poenitendum foret) immortalita-
tem nominis tui jam diu promeritus es.
Verumtamen quia maligno vivimus sæculo,

gaudeo tui, & literarum causā, novum nunc
tibicinem, eumque benè validum accessisse.
Danicam Meursii historiam necdum vide-
ris, ea intra dies paucos distrahetur publicè.
Hactenus soli amici, quibus donavit, exem-
plar habent, iique perpauci. Mitto nunc ad
te Velleium Gerardi mei; sed & Scylacem
Isaaci: hunc incompactum, quod aliud hoc
tempore exemplar non habemus. Spero
non displicituros utriusque labores. Multa
enim pulchrè iis correctæ, observataque.
Nostrium opus quod jam diu promisi, vix
quartum intra mensem perducetur ad finem:
Nam accrescit sub manibus. Et Typogra-
phus subinde, omissis nostris, alia excudit:
ut ante menses duos tres, Barlæi Medicæ,
cūm Latinā tum Gallicā, & Belgicā Linguā.

Vale Vir & Amice optime, & nos amare
perge, qui etli tardiores in literariis respon-
sis videamur: nulli tamen cedimus amore
tui, cujus pro diuturna valetudine, & vita,
nec ego, nec liberi, vota facere cessamus.

Amstelodami, clō lōc xxxix. x Kal. Sextiles.
Amplissimo Brinkio, & Cll. viris, Die-
stio, & Zevecotio salutem dices, si otium,
& occasio erit.

Tuus æternum,

G. J. Vossius.

CCCLXI.

*Reverendo & eximio Domino Isaaco
Bargravio, S. Theol. Doctori, & Ve-
nerabilis Canonorum Cantuariensi-
um Collegii Decano observando.*

Reverende & eximie D. Decane,

CUM gratissimæ mihi fuerint Literæ tuæ,
his ipsis tamen jucundior obtigit con-
spectus charissimi filii tui; quem puellum
me videre belle *remotus* probe recordor.
Jam tum ex vultu ingenuo, & scitulis mori-
bus, in futurum pulchri aliquid de eo mihi
promittebam; & volupe est, quod non va-
nus augur fuerim. Nunc non paulo majus
est, quo placeat: animo, dico, recto &
erecto. Tanto magis mihi operam esse dan-
dam intelligo, ut ne consilii ejus, quod huc
potissimum eum miserat, te unquam possit
poenitere. Equidem si qua potero studia
ejus juvare (posse autem confido) non de-
ero tuæ petitioni, atque officio meo. Quoties
vero vel publicis vel rebus privatis avocabor,
certatim nunc filiorum hic, nunc alius, hoc
ipsum implebunt. Promissa hæc non ulterius
procadam

procudam verbis, benefacere magis, quam largè promittere adsuetus. Sæpius posthac à me literas exspecta, præsertim quoties erit, quod scire tua interesse arbitrabor. Scio enim, quàm tenerè liberos suos ament parentes: nec aliud æque desiderent, quàm dulce illud virtutis doctrinæque contubernium. Cum lætissimam uxorem & filiam (quam puellulam vidi: nunc, ut puto, maturam viro, & plenis nubilem annis) tum venerabile carissimorum & doctissimorum Fratrum Collegium, plurimum meo nomine saluta.

Amstelodami,
clō Idc xxxix.
Post. Kal. Sex-
tiles. Stil. Greg.

Tuus tuorumque æternum,

G. J. Vossius.

CCCLXII.

Andræ de Naglowitze.

JAM plures sunt menses, Illustris, & Nobilissime Domine, quod commendatum nomini tuo ibam, negotium quoddam, ornatissimi, & præstantissimi, Johannis Wiikenfortii, verè Mercurialis pulli, quando ad instar Mercurii, foeliciter adeo, cum exoticarum mercium cura, sociat jucundos Musarum labores. Inque his nec vinci se patitur frater ejus Joachimus Wiikenfortius, vir Principibus multis gratissimus. Is ob prudentiam, & merita præclara, ante duos tres menses, è Galliis huc rediit; sed equestri dignitate auctus, à Rege Christianissimo. Multum vero, & ego, & præcipuè Johannes Wiikenfortius, imo tota domus Wiikenfortia obstringitur nomini tuo Excellentissimo, pro singulari affectu, quod rem tibi commendatam, curæ tibi esse passus sis. Nam abundè perspeximus, nihil vel à te neglectum, vel Illustrissimo, nec unquam satis laudato, Principe Razevilio. Quantum vero favoris in animis peperit vestris, æquitas causæ; tantum ea odii excitavit, in animo, tum debitoris Johannis Witmakeri, qui propter æs alienum in custodia detinetur; tum fratris ejus, negotium hoc ipsum, ut fieri solet, ad animum revocantis. Uterque enim nihil nisi vindictam sperat, & spirat; atrociam etiam comminatur: Ut mirum non sit, si haut parùm, & Domini rebus, & vitæ metuat suæ, negotiorum Wiikenfortianorum administrator. Itaque Dominus ejus Johannes VViikenfortius, plurimum à me expetiit, ut alteras Excellentissimo nomini tuo literas scriberem, quibus rogarem, ut mei, & VVi-

kenfortiorum ergo, laborem suscipias scribendi ad Illustrissimum Principem Razeviliū, & Tribunal Vilnense: quo minister VViikenfortii, in solo nunc agens peregrino, tuto securæque res domini exequi possit; nec necesse habeat assiduo esse in formidine, ab improbo illo pari fratrum, quod dura, diraque comminatur. Multum etiam ad istud conferet, si simulac res ferat, decideri possit. Quam ad rem commendatio tua plurimum adfert momenti, sanè quantò celerius controversia finietur, tanto citius se noster subducere possit periculo; quod alioqui in tam vasta, & populosa urbe effugere, perdifficile est. De nobilissimo filio tuo sic habe: virtuti, & modestiæ litare, & ab optimo quoque amari, ac magni fieri: studiis etiam non segniter incumbit, ut non planè confidam satisfacturum expectationi Patris, Patriæque.

Amstelodami
clō Idc xxxix.
xii. Kal. Aug.

Illustris nominis tui cultor,

G. J. Vossius.

CCCLXIII.

Merico Casaubono.

Reverende & Clarissime D. Casaubone,

PER eum ipsum, cui tradideras priorum Literarum exemplum, civem se Cantuariensem ac ædibus tibi vicinis habitare ajebat, jamdudum tuis respondi. Credo ventis contigerit adversis, ut tardius acceperis, vel fortasse, quia domo abfueris. Knysterius Amstelodamensis mercator, qui hic mihi pecuniam annumerare solet, partem mihi pecuniæ ejus persolvit, quæ expirarat mense Junio adulto: sed negat se reliquum velle persolvere, antequam ex Anglia cognoverit si non quinquagenas saltem quadragenas Libras Sterlingicas esse numeratas illi, cui hæcenus à te numerari solent. Quæso itaque si is forte domum tuam venerit, & quadragenis acquiescat pro quinquagenis, ne quid in solvendo moræ trahatur. Scio non te in causa fuisse, cur minus acceperit, sed ipsum qui nihil mallet recipere quam non quantum solet. Sed enim non dubito, quin animum hunc mutarit, ex quo Knysterium de re tota literis prius tuis edoctus feci certiorum. Gaudeo impense de pace reddita Britannia. Deumque oro, nequid turbarum in posterum amplius det Novellitas. Sed scire aveo an non ab tempore pacis cessaturum sit damnum, quod in Præbenda fecimus, ac vetus sit numeranda summa. Sic requirere

rere ratio videtur, nec video quin objici possit, præter regiam voluntatem, si forte aliter ei videatur. Reverendi D. Decani filius mihi gratus est acceptusque, qua de re abundè ad parentem perscripsi. Nec ulla in re operæ meæ parceretur, vel liberorum meorum. Diligenter etiam curabo, ut intelligat magnum apud me pondus habuisse commendationem D. Hanscombii, neque id sui modo, & D. Decani causa faciam, sed etiam reverendi D. Episcopi Eliensis, cui probare me meaque omnia & volo & debeo. Vale, dilectissime Frater, meoque nomine Uxorem optimam, & universum venerabilem Fratrum Collegium saluta.

*Amstelodami, clō Ioc xxxix.
Post. Kal. Aug. Stylo Novo.*

Tuus tuo merito,

G. J. Vossius.

CCCLXIV.

Joanni Hulsemanno *S. Theologiæ Doctori, Professori Witebergæ, S. P.*

VIR clarissime, quod scribam hoc tempore, vel non scribam, non sat video, usque adeo extremâ fere horâ qua ab urbe abeundum, plena propemodum domus eorum qui compellare velint. Nec tamen tam egregia ejus anima, quem mihi commendabas, fuit dimittenda sine meis ad te literis. Quamobrem ne nihil scribam, hoc scribam quod primo occurrit, nempe gratissimas mihi tuas fuisse literas, & semper jucundam ejus temporis fore memoriam, quo una in hac urbe differebamus de illis quæ ad veritatem dogmatum & pacem Ecclesiæ pertinerent. Mitto ad te amicitiae nostræ indicia quædam, liberorum labores, Scylacem Isaaci mei, Velleium cognominis filii: videbis multa in utroque scriptore feliciter correctâ. Metuo, ne tibi gravioribus studiis detento, minus integrum sit ad hæc leviora se dimittere, sed poteris istorum facere Collegarum alicui indicium, dummodo nasum habeat criticum, de quo ipse optime judicabis. Si quæras, quid agam, sub prelo est opus nostrum de Theologia gentili & Physiologia Christiana: Sive de idololatriæ gentilis origine & progressu, & naturæ mirandis, eorumque caulis, & ex iis humanæ mentis adscensu ad Deum: spero autem, intra trimestre vel circiter, ad umbilicum posse perducî. Plura nunc addere non licet, sed brevi, ut confido, hanc breviter longioribus literis compensabo. Tu interim vir, & ami-

ce optime, perge & de publico bene, quod hætenus facis, mereri, & amare etiam me, qui te facio maximi.

*Amstelodami,
clō Ioc xxxix.
vi Kal. Septemb.
Stylo Gregoriano. Td. xxi.*

Tuus omni studio,

G. J. Vossius.

CCCLXV.

Cl. V. Joh. Meursio. *S. P.*

Quod meliore utaris valetudine, jucundum fuit cognoscere mihi & meis omnibus. Ego quoque mediocriter nunc valeo ac pariter Uxor & Liberi, uno excepto Matthæo. Tandem responsum à fratribus Blauwiis erat qui sexennium vel ultra, non dico vana te meque spe lætaverant, sed tot etiam fecerant promissa, te etiam de iis non cogitante, sponte ad tua cuncta excudenda se obtulerant. Malum factum, nec quo sese excusent inveniunt præterquam quod mors paternæ consilia sua disturbârit; significavi multum me metuere ne publice de injuria hac conqueraris. Non aliud responsum, quam id quidem in te esse, sed se sibi probe conscios esse innocentiae suæ. Tentavi animum Jansonii, sed is ait nullos typos sibi otiosos intra annum fore; adeo multis se edendis distineri. Elzevirius existimat se intra menses non ita multos hac in Urbe propriam adornare velle Typographiam. Sed non arbitror illi eas opes ut tam grande opus ausit suis suscipere impensis. Fortasse tamen Patruales Leidenfes parati fuerint in hoc adjuvare. Laminam æream, cui vultus tui incisio, item alia, præcipue scripta tua, remissem nisi Blauwius uterque ab urbe abesset, ut recipere nihil licuerit. Prodiere tandem exercitationes Heinsianæ in novum Testamentum. Fore puto ut adversus eas scribat ac singula pene refellat Salmasius, nisi intercessione amicorum Heinsii sufflaminetur. Existimabat Heinsius se sic cum hoc doctissimo Burgundo agere posse, uti tecum, mecum & tot aliis solet. Sed est Salmasius omnis injuriæ gravioris impatientissimus. Hæc raptim; quia jam jam currus adscendendus erat Hagam ituro, quod bene vertat. Vale cum omni familia & ab omnibus meis salve.

*Amstelodami,
clō Ioc xxxix.
xxv Sept.*

Tuus æternum,

G. J. Vossius.

CCCLXVI.

CCCLXVI.

V. Cl. Joanni Beverovicio *sno*, Ger. Jo.
Vossius *S. P. D.*

Valde me sollicitum habuit morbus tuus, de quo ex variis inaudiveram. Nunc de restituta valetudine, gratissimum attulit nuncium præstantissimus Colvius noster, atque ita magnò me gaudio implevit. Nec solum lætari me puta, quia amico melius sit, & tali quidem, qui de publico benè mereri & possit, & velit: Meipsum gaudeo liberatum auxilia de te cura. Valde enim coquebat animum meum. Nec enim ignorare potes, quanti à teneris quoque annis fecerim ingenium tuum; quo cum eximiis quibusque certares, vulgares vero animas, albis præverteres quadrigis. Hujus me judicii poenituit nunquam, ac poenitere, ne possit, sedulo caves, dispergendo per orbem tam præclara ingenii, doctrinæque monumenta. In his Ideam Medicinæ veteris; in qua tamen ob tam vastum argumentum, tum demum omne punctum tuleris, si iterum manum admovearis, non quidem ut cuncta quæ posses ex antiquis dicas (id enim laboris prope esset infiniti) attamen propemodum alterum tantum adtexas. Ad hoc quidem, si mei res arbitrii foret, non minorem tibi annorum numerum concederem, quam est Musarum. Nisi satius putes, ut annis Charitum numerum æques: post novennium autem, tertio prodeat idea tua, non minus consummata illo futura tempore, quam Plato esse voluit Ideas suas, vel saltem quando non finit humana imbecillitas, quam proximè abfutura, si cum aliorum industria comparetur. Vides quid de te, cui adhuc virent genua, sperare auisim. Mihi de me spem ejusmodi concipere, nefas: quando frigida senectus deinceps artus debilitabit; sanè anno hoc Climacterico, quem senum multi formidare solent, pejus valui, quam annis proximis tribus & triginta. Nam præter Tertianam, Colicus me invasit dolor, etiam quod antehac nunquam, Renum calculus vexavit hebdomade, & ultra; ubi dolor aliquantum remitteret, quæ antea avidè legeram de calculo, accuratè à te scripta, iterum in manus sumpsi: foetumque mentis tuæ consului, quia parentem ipsum coram minus possem. Jam vero tres sunt menses, quod malum id non recurrat: credo in Morboniam, unde malum attulerat pedem, rediit, me salvo ac sospite relicto; quod utinam Deus diuturnum esse sinat? Intelligo ex Colvio nostro prodiisse jam in lucem, quæ elaborasti de sceminis eruditis, quare propediem pro hoc labore, gra-

tias tibi sum acturus; nisi vel tu ab ingenio recesseris, non mittendo, vel ego ad ingenium rediero, tardius rescribendo quam velles. Quicquid erit, non te eo minus amabimus. Tuum verò tam erit mihi ignoscere, quam amici sui ignoscebant, magno Medicæ facultatis vestræ ornamento Hieronymo Cardano: qui cur negligentior fuerit à salutationibus ac Epistolari commercio, si minus nunc locus occurrat, reperies in octavo de rerum varietate, Cap. XLIII. Hujus viri exemplo excusabis me apud alios quoque amantes mei, sed hoc in me vitium, ut vocant, culpantes: quasi ego in tot occupationibus, amicorum esse in non necessariis possim, qui ne in necessariis quidem sum meus. Præterea dices iis, hoc sive vitium, sive aliter vocandum, cum primum ab solis esset occupationibus, nunc longa consuetudine, prope in naturam vertisse. Habes Epistolam verbosam, & à solo tui expressam amore. Claudam eam solemnī Tullii formulā, Valetudinem tuam cura diligenter. Et cogita hoc mecum petere, tam multos, qui adversa valetudine, ad te recurrunt; etiam illos qui te non vident, sed mecum tamen, ex utilissimis laboribus tuis, præcepta hauriunt valetudinis, vel tuendæ, vel recuperandæ. Præter morem de salutandis amicis, non adscribo. Id laboris nunc melius imponam communi amico Colvio, qui has tibi literas daturus.

Amstelodami
Id hoc xxxix.
post. Idus Sept.

CCCLVII.

Hugoni Grotio. Lutet. Par.

Illustris & amplissime Domine,

CUM propter urbis nundinas, Lyceo nostro hebdomadis unius feriæ forent, committere non potui, quin tam bonam occasionem amplecterer, excurrendi Hagam, partim ut inviserem amplissimum & amicissimum Georgium Ratallorum Dubletium; excessu optimæ & sanctissimæ uxoris suæ Schoterbolsiæ mœstum; partim etiam, ut coram salutarem heroinam conjugem tuam; quam lætus salvam ac sospitem comperi; lætiorque audiui læta omnia referentem de te ac tuis. Dum hic sum, reddidit mihi à te literæ ad Isaacum meum. Ex iis video, te non accepisse fasciculum illum, quem per Bibliopolam Parisiensem miseramus. In eo inter cætera, erant literæ meæ de valetudine adversa, qua usus sum Climacterico hoc anno. Video, & alias quasdam non traditas tibi,

uti

uti neque illas Manassis Ben-Israel; sed de his jamdudum sum id arbitratus, ob quædam, quæ ex filiis cognoram. Exemplar igitur Amstelodamo mecum attuli, ut hinc mitterem. Unarum, quas ipse scripseram, exemplar retinui, manu filii exscriptum. Mittam ubi rediero domum, modo tanti id sit. Tandem prodire Exercitationes Heinſianæ in N. T. Credo eas jam acceperis, priusquam hæ tibi literæ reddantur. Obiter pluscula lustravi; ac quanto penitius inspicio, tanto vehementius ardeo desiderio eorum quæ ante tot annos elaborasti in eisdem sacri Instrumenti libros. Utinam vero & clarissimo Salmasio pertexere detur ejusdem argumenti labores quos promisit. In iis refellere illi animus est innumera ab Heinſio dicta: imò omnia quæ de suo deprompsit penu. Facile credo, hanc contentionem, non parum detracturum nomini Heinſiano; sed partim eo me solor, quod nemo ignoret, ipsum sibi hoc malum intrivisse; dum perpetuus est in traducendis omnibus, quibus præclarum est in Repub. literaria nomen: partim ac imprimis isto, quod contentionis hujus bonum sperare liceat eventum; sine dubio enim, multa etiam doctissimos quosque docebit Salmasius: & fortasse etiam Heinſius hinc discet, modestius de se sentire, cæterisque suis laudibus hanc addet, ut ne tam credulus sit palpatoribus, qui eum Phœnicis, Dictatoris, Atlantis studiorum Elogiis onerant verius, quam honorant. Sanè & Heinſius, & qui eum solum, hodie doctum aiunt (quid faciamus tam fatuis?) toti jam in fermento jacent, solum lecta præfatione Salmasii, quam præmisit libro de modo usurarum. Quamquam ego Salmasio author fuero deinceps, non tam acerbè hominem literis clarum tractandi, modo ipse etiam remittere velit de illo maledicendi studio. Indignum mihi planè videtur, sic inter se committi homines doctissimos; sed iniquum etiam majores, melioresque eo, quem me sæpius nihil attinet nominare, sic vilipendi, quasi in Doctorum grege, nonnisi extremum locum cum scabiosis Grammaticis mereantur. Sed de isto nimis multa. Audio *in Dordrecht* tuam Lutetiæ excusum iri. Gaudeo, ob Typos meliores; etsi meam, meorumve Operam Amstelodami in mendis Typographicis emendandis, probare tibi maluissim. Verum quid de illo speremus, qui postquam sexennium, vel circiter (tamdiu est, ut exactè tempus dicere non possim) retinuit tot edita, & inedita Meursii, nunc negat se posse illa excudere, & paratum dicit, remittere universa? Estque hæc eo gravior injuria, quod non Meursius illum ambierit, sed Meursio, de alio cogitante, & hoc ad eam rem paratiss-

fimo, ille postularit ut commendatione mea, alteri præferretur. Scripsi ex ædibus amplissimi Dubletii, qui ut te colit, & æstimat, ita amicissimam adscribi salutem petiit.

cl^o Id^o xxxix.
vii Kal. Octobr.

Tuus tuo merito,

G. J. Vossius.

CCCLXVIII.

Cl. Salmasio.

Nobilissime & undecunque doctime Salmasi,

QUI has ad te literas desert, patria est Suecus, nomine Joannes Granius, ephorus illustri juvenis Bieltii, qui arcta affinitate inclytæ Oxenſterniorum familiæ est innixus. Uterque apud nos studiorum causa sesquiannum vel circiter vixit. Nunc Leidam se conferunt. Ac Granius quidem (nam Bieltio non is studiorum ardor quem optaremus) ut literarum & literatorum est amantissimus, ita nihil prius ducit, quàm ut te videat, & compellet præcipuum literariæ fidus Reip. Poscenti igitur aliquid ad te literarum, denegare id nec volui nec honeste potui. Quippe me amavit & coluit semper, quam qui maxime; & Bieltius is cujus studiis præest à primariæ nobilitatis Sueciæ viro, dignitate Comite mihi fuit commendatus. Quamobrem non ingratum fore confido, si dum hac hieme commoratur Leidæ, bis ter ei potestas fiat compellendi tui, deque studiis consulendi. Mirè cum devincies, & pariter ipsos Bieltios & Oxenſternios qui eum multum amant, ob mores optimos & singularem illustris juvenis sibi commissi curam. Tua de modo usurarum, quando aliquid mihi à meis otii est, a vide lego, nec fatiari queo. Ut in cæteris, ita hic quoque à te congestus doctrinarum pene omnis generis penus. Cæterum vix risum tenui, cum me præſente vir quidam bonus doctusque diceret, se librum hunc emere, non propter tam multa quæ doctissimos quosque in opere ipso doceres primus, sed ob præfationem adversus sycophantam, cujus virus retundi non ex tuo modo honore erat; sed prorsus è re publica. Magis vero magisque in fumos abijt illud de Linguâ Hellenisticâ commentum, quo sic placebat sibi & suis. Memini enim mihi amicum ejus dicere, neminem hæcenus vel veterum vel juniorum fuisse, qui linguam novi instrumenti intellexerit. Idque ob Hellenisticæ Linguæ imperitiam, cujus *debetus* ille solus sit gnarus, eoque unice idoneus ad abstrusa omnia referenda. Cum non ipse solum, sed etiam amici ejus tam stultè sapiant, hanc larvam

larvam ei detrahi interest Orbis Literatū. Decrēm aliquid addere de S. Antonii vita. Sed id jam à se factum retulit mihi filius meus Isaacus. Nec propterea quicquam fieri velim incommodo tuo. Cogitabis, sed cum aliquid otii fuerit à tuis, quæ prævertere æquum est. Uxor uxorem, filia affinem tuam, filii te plurima salute impertiunt.

Amstelodami,
cId Ioc xxxix.
Non. Octobr.

Tuus tuo merito,

G. J. Vossius.

CCCLXIX.

Nobilissime Salmasi,

AB eo tempore quo domi me tuæ tam humanè comiterque & hospirio & mensæ sermonisque tui epulis excepiisti, nulla quidem dies intervenit, quum adversa uxoris valetudo satis per se molesta, eo dolorem augeret, quod tua lectissimæque conjugis & affinis tuæ præsentia hic uti speraveramus frui minime nobis liceret. Atque idem molestissime accidit Arlanderveniæ Domino, qui quanto pere delectatus fuerit elegantissimis versiculis tuis, haud facile dixerim. Itaque decreverat, huc ubi venissetis, humanitatis officiis testari affectum suum. Dixerat de convivio, ad quod advocasset homines urbis lectissimos. Sed alterum quia innuebat potius quam exprimebat, utrum id vasa fuerit Porcellana (ut vocant) melioris notæ conjugii donare tuæ; an aliud quippiam, non habeo dicere. Hominem tam amicum & qui me parentis instar coleret, ante sex hebdomadas fatum abstulit nobis consanguineorum dolore magno etiam meo meorumque. Quod filio Isaaco Scylacis editionem meditantem tam benigne communicaris, quæ ad hoc institutum & aliorum etiam Geographorum pertineant, multum profecto omnes pariter tibi debemus, operamque ut possumus dabimus ut ne ingratos nos dicat posteritas. Quæso, maxime vir, in hoc amore persiste. Spisse procedunt operæ in iis quæ scripsimus de Idololatriæ origine & progressu. Metuo ne multi hic ea expectent quæ Romanam propius Ecclesiam tangant. At nos fere contenti sumus differere de Diis Gentium. Interim in iis quæ syderum, elementorum & mixtorum corporum cultum spectent, non omnino perfunctorie pando, quæ juvare possint naturalis scientiæ amantes. Nempe non satis visum ex naturæ mirandis falsam refellere religionem, nisi in iisdem etiam mentem humanam adducerem ad veri numinis cultum. Certior fieri desidero, an multum promoverit Typographus in illis de usura; eoque in mandatis Isaaco meo dedi, ut ex te de isto &

aliis exquireret. Hoc libertatis illi lubens scio concedes, qui forēs tuas non hominis, sed humanitatis esse hætenus expertus. Hæc enim tuam conjugem & affinem tuam plurimam salutamus.

Amstelodami, cId Ioc xxxix.
Id. Octobris.

G. J. Vossius

CCGLXX.

Viro incomparabili Claudio Salmasio
Equiti, G. J. Vossius S. P. D.

LEidam se ire velle dixit mihi nobilissimus Eques Petrus Hoofdius, quem me hic tecum prandiolo aliquando excipere conmemini. Est is præfectus trium oppidorum & Goylandiæ. In Belgicis poematibus, quæ plurima edidit, plane regnat. Vita ac gectus Henrici IV. ab eo scriptis nihil tali in argumento vel elegantius vel prudentius dari possit. Scio quanti faciat viros virtute doctrinaque excellentes, præcipue duos Europæ ocellos clarissimos, eum ad quem nunc scribo & una popularem atque amicum suum, Illustrem Grotium. Quare fore prævideo, ut pedem Leidæ non efferat priusquam te salutarit. Noli igitur committere, quin per eum aliquid ad te literarum darem: si non ob aliud, saltem ut ex eo, ut viva Epistola, cognoscere postea liceat de prospera valetudine tua tuorumque, pro qua vota facit quicquid hominum est eruditiorum. De studiis propriis nihil scribere habeo, nisi opus nostrum quod prælo subjeci tardius procedere ob occupationes sæpe minutas, semper densas. Exercitationes sacras *εὐλαβίας*, quia necdum in Bibliothecam retuli, mensem adhuc occupant. Ita fit, ut quandoque se quasi sponte in manus ingerant. Sed vix dicere possim, quam non sint ad gustum meum, dum vel aliena lego vel minuta, vel falsa. Et tamen hoc stomacho essem, ut omnia possem concoquere, nisi tot experimentis compertissima malignitas male adeo me haberet. Sed fortasse Deo visum opera tua uti, ut modestius de se sentire, melius de aliis discat loqui. Quod si fiat, scio te quoque paratissimum fore sic errores ejus corrigere, ut honoris & amoris ergo, quantum licet, homini parcatur. Vale vir nobilissime maximeque, & meo meorumque nomine lectissimæ conjugis & optimæ affini salutem plurimam dicito.

Amstelodami, cId Ioc xxxix.
Kal. Novembris, Styl.
Greg.

CCCLXXI.

CCCLXXI.

Hugoni Grotio. *Lutetiam Paris.*

Illustris Domine,

QUI hæc literas defert, est Johannes Christianus Volhart, Jenensis, filius Christiani Volhart syndici Jenensis; Nepos Joannis Volhart, Electori Saxonico, redditum, & sacrorum scriniorum secretarii. Mater ei Anna Schræteriana, Frederici Schræteri Comitis Palatini Cæsarei, Philosophiæ, Medicinæ, & utriusque juris Doctoris, & apud Jenenses Professoris publici: Neptis vero Joannis Schræteri, Comitis Palatini, Cæsarei Archiatri, olim Maximiliani II. Imperatoris posteaque ex Austria, ab Joanne Frederico I. Electore Saxonico vocati Jenam: qui & ab Ferdinando I. Imp. sibi, & posteris, nobilitatis insignia est consecutus, scholæque Jenensi Academiæ nomen, ac privilegia est adeptus. Soror germana hujus Annæ Schræteræ matertera juvenis, de quo sermo, nupta est Petro Kirstenio, à quo & Arabicam esse Grammaticam editam, scire te arbitror. Ipse Joannes Christianus Volhart, scholæ classicæ spatia emensus, præcipuè scientiæ naturali, & Medicinæ operam dedit; Idque in Academia Lipsiensi, Jenensi, VVittebergenfi, & Leydensi. Cum Galeno autem junxit Chymicæ studium, uti videre est è Thesibus triplicis disputationis in Academia Jenensi, ab eo habitis. Hic à Principibus VVimariensibus literas acceperat, ad ducem Bernardum, P. M. cui commendabatur hoc sine, ut eo Medico uteretur exercitus. Jamque in viam se dederat, cum intelligit de tristissimo decessu ducis. Nob. & Amplissimus urbis hujus syndicus Guil. Borelius, eum in legatione sua, ad Remp. Bremensem, & Ser. Daniæ Regem, adsumpsit, partim ut Medicum, partim ut Secretarium, cujus præcipuè opera, in Germanicis Latine reddendis uteretur. Circiter annus est quod novi: semperque se vita, & moribus probavit: Et hac parte etiam apud me laudarunt, qui in Germaniæ eum Academiis, ac Leydensi etiam novere. Nunc is de quo tam multa dixi, Gallias cogitat, quia rebus in dulcissima Patria turbatis, novercam ibi fortunam extimescit, ignarus interea, quid futurum sit alibi terrarum: sed scis, quod senes etiam esse debent, hoc ætatis beneficio, semper esse juvenes, hoc est *ωδυσσεύς*. Et istic igitur fortunam tentaturus, literas accepit ab syndico Borelio, ad Illust. Legatum fœderatæ Belgicæ, Dom. de Licr. Et alteras à me,

ad te, Excellentissime Domine. Quæso, si consilio, vel auxilio juvare possis, ne desis. Scio in Germaniæ hoc statu, non omnia te magis in peregrino solo posse, utcumque tam illustri scis loco constitutus, quam minutum me hominem in tua, ac quasi mea etiam Patria inter tot notos; sed confido, facies quod possis.

Amstelodami, cId Idc xxxix.
Kal. Decemb. St. Gregor.

CCCLXXII.

Hugoni Grotio. *Lutetiam Paris.*

Illustrissime Domine,

HOdie ex filio tuo, qui Amstelodami nunc est, lætus intellexi, decretum tibi esse tam multa, magnaque, quæ parata habes excudenda, Typographis dare: eaque occasione non pauca de Blauwiiis sumus collocuti: inque his, ut tam fœdè, tot annos, Meursium eluserint: tandemque, nempe post septennii circiter moram, urgenti mihi promissa responderit, se de operibus ejus edendis mutasse sententiam, & paratos esse, omnia mihi remittere quæ huc, ut ederentur, misisset. Scripsi id Meursio, qui non multo post, hac vita creptus. Quo tempore, & Harder-vici excessit Isacius Pontanus. Utrumque fuisse Danici Regis historicum, puto te non ignorare. Ad Typographum ut redeam: Uterque Blauwius paratissimus est, recudere commentarios tuos, de jure pacis, & belli, sed censet filius, quod æquissimum, si tardi sibi velint. luculentam illam operis accessionem, aliorum etiam editionem suscipere oportere. Non abibit hinc filius, quin quo animo sint cognorit. Quare de eo nunc amplius non addam, gnarus fideliter omnia, filium ad te perscripturum. In nostris de Theologia gentili, & Physiologia Christiana, perventum ad serpentium naturam, cultumque: quibus *συνεχόμενα* illa de Insectis subdam; ut sic absolvam, quæ ad animalium naturam pertinent. Ante eam partem, præmissi tamen de cultu Angelorum, & Animarum: tam de natura cultuque corporum Cœlestium, Elementorum, & *ἡ ἀστέρα*, quatenus ex mirandis eorum, ad Deum ascendimus. Ea puto, intra menses tres, summum habebis. Tum paulum strigabo, & interquiescam: sed mente ea, ut deinde alia divulgem, quæ nonnisi lineam aliquam exposcant. Placet enim consilium quod dedisti, fortasse tamen præverter, tertius memorati operis

tomus;

tomus; in quo agendum mihi de stirpibus & fossilibus: ut ita totam rerum naturam absolvam; quatenus quidem sufficit instituto meo. Item de affectionibus rerum corporearum, in Deorum numerum relatis. Nam absque hac parte, mutila fuerit historia de Gentium Diis. Ac denique de symbolica Gentium Theologia; sive de simulachris, ac ritibus sacris, eorumque causis. Atque in hac demum parte, agendum mihi vides, de questione, quam super præcepto secundo moves. Manasses quidem arbitratur ꝑ illud nec copulativum esse, nec disjunctivum, sed paragogicum: ut sententia sit, Non facies tibi sculptile ullum, cuiuscumque illud habeat similitudinem. Hoc colligit ex eo, quia Deut. v. 7. Illud ꝑ omittitur. Scriptum enim לא תִּשְׁכַּח לְךָ פֶסֶל בְּחַמְסִינִי, quod Arias etiam Montanus, κατὰ λέξιν reddit, Non facies tibi dolaturam omnis effigiei. Ac similiter cepit Onkelos in Paraphrasi Chaldaea, cuius sic verba Fagius expressit. Non facies tibi imaginem, cuiuscumque similitudinis, eorum que sunt in calis, &c. Chaldaice est, לא תִּשְׁכַּח לְךָ צִלְמוֹת דְּבָרִין, quod conveniens Hebræo reddas, *sculptile omnis similitudinis*. Sanè Chaldaeis, צִלְמוֹת non *imago* modò, sed & *statua*, ut in Lexico suo Chaldaico reddidit Buxtorfius. Utcumque id est, videmus & Chaldaeorum Paraphrasem illud ꝑ neglexisse. Censeo itaque si nudis insistamus verbis, non interdicti eo præcepto picturam, sed sculptilia duntaxat: nec intercedo quominus Judæi, sive Israelitæ potius, in vexillis suis signa habuerint animantium, ut Rabbinii annotarunt, ad Num. 11. 2. ubi de Israeliticis vexillis ac signis. Sed utcumque non exprimantur picturæ, præcepto secundum Hebræos secundo; satis aliunde liquet, & Dei picturam prohiberi, & cunctas cultûs gratiâ effictas. De his, se scripturum ad te receperat Manasses. Verum ut anticiparem paucis illis istis, effecit quod ne, more meo, de die in diem, differret, metuerem. Planè enim alia quam studia animo agitat, Lusitanis nihil, ob paupertatem synagogæ, Doctori suo persolventibus. Nempe si Judæis fides, (ut videntur mihi verum dicere) sese in urbem receptis, nostri illis esse familiares, negotiatio etiam sæpe communis, ut facile fuerit nostris, omnes eorum artes bonas, malas, cognoscere. Sed nostri vel ad clavum sedent, vel eos habent favitores & amicos. Quare non operosum fuit liquid periculi, vel apud nos, vel in Hispaniis etiam oboriretur, illis in luto relictis, vel profunda potius palude, emergere opera eorum, qui & his, & terris aliis plus possent. Manasses igitur Brasiliam cogitat, ut istic, fortasse quidem Docto-

rem agat; sed præcipue tamen Mercaturam exerceat. Non parum studia amat, & gloriam sitit: sed res familiaris suadet, quod dixi. Nec enim est magna in re. Et jam ab Arausienfi Principe commendatitias accepit ad negotiationis Americanæ Præfectos.

Amstelodami, cId Ioc xl. Kal. Jan. sed St. V.
Planèque ineuntem hunc annum, & tuæ Illustri familiæ, & nostræ, tibi tuisque æternum addictissimæ, prosperum, ac foelicem exopto.

Devotissimus dignitati tuæ,

G. J. Vossius.

CCCLXXIV.

Lævino Warnero.

Multum te amo, doctissime Warnere, quod de nequissimo illo Sacidia me feceris certiore. Nunc porro opera mihi opus est tua. Nempe in hoc, ut ne cesses donec ab hospita illa liber nobis remittatur; vel quod proximum eum adservandum det, vel Cl. D. Heidano, quicum hac de re sum locutus, vel Nob. & magnifico Dom. Rectori Polyandro, quem scio pro veteri inter nos amicitia, lubenter mei causa facturum quidquid poterit. Si quid juris prætereundum valeat in hoc pignore, hoc quoque integrum ei postea futurum. Tantum ne diutius ab ea adservetur, quæ amittere vel abalienare etiam possit. Non tam sollicitum ea me res haberet si dominus ipse forem. Nam ut nosti, est Bibliothecæ Amstelodamensis, unde à filio Isaaco datus est commodato huic nequam Judæo, ut loca quædam ex Arabico transferret, quorum usus esse possit in opere de vita & dogmatis Mahumedis. De hoc enim argumento filius, quem dixi, commentarium habet sub manibus, quem prope diem spero lucem visurum. Ipse hujus rei gratia filius Leidam erat iturus, sed id non linit gravissimus filii Gerardi morbus, metuo enim ne diem unum alterum possit supervivere. Nec medicis magnam spei superstit. Tanto te scio rem curaturum promptius ac fidelius. Convenies primum D. Heidanum, virum magnæ ut doctrinæ sic pietatis. Is recepit se consilio te adiuturum, atque si opus sit conventurum supra hoc negotio & D. Rect. magnificum & Amplif. D. Præto-rem: qui non modo in postulato tam honesto & æquo, sed etiam amore mei, libens in hoc

negotio gratificabitur nobis. Plura nunc scribere non libet, nec licet, ita tam ægritudine filii quam aliis distinear. Propediem, ut spero, gratias tibi agam, pro negotio feliciter confecto. Salutem plurimam dicito illustri D. Baroni Kyntzy.

Tuus,

Amstelodami, An.
1640. Mart.

G. J. Vossius.

Literarum interest, ut ditu te fruatur sospite ac salvo. Hoc tanto facilius consequentur, quanto tu constantius malevolorum artes ac furorem perrexeris contemnere. Mea ac liberi salutem plurimam lectissimæ conjugii & optimæ affini tuæ adscribi petierunt.

Amstelodami,
cl^o lxxxi.
3. Kal. Mart.

CCCLXXV.

Claudio Salmasio, Ger. Jo. Vossius
S. P. D.

Vehementer, ut debui, dolui, postquam cognovi ex filio meo Isaaco de excessu nobilissimi & maximi parentis tui Senatoris, quæ malis temporibus laus est optima, integerimi, suaque commoda præcipue publico demensi. Hoc enim constans de eo bonorum esse iudicium, sapius ex iis intellexi, quos non paulo me melius scire convenit res Gallicanas. Præclara adeo famâ decessisse tanto plus luctui tuo adferre solatii oportet, quanto minus in nostra est manu quomodo nascamur vel etiam educemur; sed neque tum cogitandum quantum & quam bonum parentem amiseris, quàm quod hoc eum ætatis præmiseris. Cum enim moderata esse conveniat vota nostra, puto non multo ulterius te ausurum à Deo nunc poscere liberis tuis parentum suorum vitam, quam ætatis ejus quæ parentem tuum Deus ad se advocavit. Hæc ut cætera melius me perspicis, ut nihil attineat ea nunc ob oculos ponere quæ sacri nos docent Doctores, vel etiam optimus quem paras, Epicteti interpretes Simplicius. Cujus quando incidit mentio non possum omittere, quin addam illud, multum me gaudere ac tibi æque & publico gratulari, quod jam ad finem perduxeris tuos de re sceneraria commentarios; planeque id confidere fore intra menses non ita multos, ut tibi quicquid bonorum doctorumque est hominum gratias etiam agat, pro Epicteto Simplicioque tam bene ingenii doctrinæque tuæ face illustrato. Plane enim ita habere magnam jam esse ejus operis expectationem. Interea maturandum verius quàm festinandum, non operis dico causa, sed tui: qui quomodo tam multis & operosis nunc sufficere possis in ea corporis imbecillitate, satis mirari minime possim: etsi ipse pro vitæ meæ genere (ni fallor) laboriosus satis. Quare sic publicum te attendere velimus omnes ut etiam respicias te & uxorem optimam & liberos parvulos: quorum non minus quàm Reip.

CCCLXXVI.

Claudio Salmasio.

Vir illustri doctrinæque incomparabilis,

Facio non invitus, ut Deorum liberos, hoc est, juvenes præclaro genere natos, vel consilio vel auxilio juvem, præsertim si operam requirant meam. Noli igitur Nobilissimo Reii literas ad te negare, quo commodiori occasione fruatur & adspectu & alloquio tuo: Juvenis est vita & moribus probatissimus, eruditionis & eruditorum amantissimus, & ante biennium vel circiter (ex quo tempore studiorum ergo in urbe hac Amstelodamensi fuit) multum mihi commendatus ab illustrissimo suo parente serenissimi Poloniæ Regis tum Legato, partim ad federatæ Belgicæ ordines, partim ad Magnæ Britannicæ ac Daniæ Reges. Huic velut Achates aliquis à parente additus est Erasmus vere *egregius*; quippe vitæ inculpatissimus dignus parente egregio apud suos Theologo filius, qui & non aspernandam apud Britannos in Philosophia ac Theologia doctrinam est consecutus. Confido te facilem fore in iis admittendis. Illi vero sic humanitate utentur tua, ut non abutantur, gnari satis non esse in publica peccandum commoda. Alterum quoque est de quo aliquid scribendum putavi: Adfuit mihi ante paucos dies Pastor Ecclesiæ ejus quæ in urbe hac Augustanam sequitur confessionem. Narrauit is mihi aliquando tecum collocutum Joannem Casparum Scherrenberk, qui illustrissimo Comiti à Warthen est à secretis, huic Scherrenberkio te pollicitum libros quosdam te transmissurum Dresdam ad nobilissimum Dom. à Frisen Electoris Saxonici consiliarium. Hoc si factum in mandatis habebat, ut pretium vel mihi, vel tibi, vel Bibliopolæ annumeraret. Interea jam habere se aiebat tua de usuris, Epistolas Casauboni, Petavii Rationarium temporum, Velleium filii, & orationem nostram de Historia. Quo magis me penetra in exercitationes nostri

frī, לְרִנָּה, sive Graio malis nomine Theocriti à Ganda (hoc enim titulo Poematia quædam Belgicè edidit) tanto magis in mentem venit vetus illud,

Καλὸς Θεοκρίτος ἔ μόνος ἀνδρώπων ὄρεται.

Id quo publico bono deluceat magis, longam tibi à Deo vitam & valetudinem exopto, reque etiam ut hanc sedulo cures plurimum rogo.

Amstelodami Anno cōlōc xxxix, vel si ab ipso natali Christi potius quam Kalendis Januariis annos putamus cōlōc xl: qui ut felix tibi decurrat, & felicior sæpe redeat, iterum iterumque comprecor. Uxori & tuis salutem nostris verbis dicito.

Tuus,

G. J. Vossius:

CCCLXXVII.

Georgio Ratallero Dubletio.

Nobilissime & Amplissime Dubleti,

REm veteri & arctissima nostra amicitia dignissimam fecisti, quod in luctu ob excessum unicæ & ornatissimæ filiæ meæ solandum me putaris literis tuis: quæ non leve sane apud me pondus habuerunt, sed sic divinæ visum voluntati, ut luctui illi satis magno alterum adderet dolorem non uno nomine graviolem. Quinto enim die à funere Joannæ meæ in eundem varorum morbum (morbillis vulgo nuncupant, etsi morbus sit sæpe pestilentia ipsa molestior, nec periculosus minus) incidit, deliciæ meæ tuæque, Gerardus; eumque die abstulit xvii. nempe quintæ matutinæ puncto, die xxviii Martii. O spes hominum inanes! nec enim facile dixero quantum mihi pollicitus sim ab illo ingenio cum iudicio pro ætate in literis tam exacto. Quæ cum pulcherrima putarem, magis tamen capiebar indolis bonitate, ita veritatis, sive veracitatis, ita pacis ac concordie erat studiosus, omnia domi forisque in meliorem partem interpretando, ac prout vixit, sic vivere desiit: quod magnum & conjugii solatium adfert. Multa benigne de multis prædicamus iudicio charitatis: hic non opus ex charitatis regula iudicium fieri, quia aliter de excessu iudicium ferre non licet. Omni enim tempore quo decubuit, mire patienter morbum tam gravem tulit, assidue Deum ardentissimis precibus com-

precando, nostras preces exigendo, vel ut sacri eloquii verba prælegerentur: is, qui nec parentes, nec fratres, vel sorores, nec ut arbitror quenquam, verbo aut vultu perstrinxit, deplorabat, quod non ardenti ea pietate coluisset numen, quo oportuit, sed fiduciam veniæ se repositam habere aiebat in misericordia Dei patris celestis, & merito ac intercessione sospitatoris Jesu Christi: talis ille ad extremum usque halitum. Sic ut vir perdoctus, cum nocte quadam vigilaret, fassus sibi sit lachrymas excussas, dum videt, tanto ea in ætatula meliorem se, magisque *χειριστιζοίσα*. Verbo ut dicam, exemplo cunctis, omnium iudicio fuit, nec meliorem ego mihi, uxori, liberis adhuc superstitis exopto. Idemque de se prædicat matertera quondam Diamantia, nunc Nærana. Quæ fufius ad te unum perscripti, ut qui præ cæteris dolebis mecum, idem mecum gaudeas, quod cum non amiserimus sed meliores in sedes præmiserimus. Editionem Valerii Flacci, & Censorini commendavit fratri Isaaco. Utrumque enim opus absolutum. De Nobilissimi Mylii negotio meminero, hætenus nihil licuit: imo nec typographo Cornelio Blawio, qui eodem morbo amisit conjugem *νέγραμον*. Vix enim tribus ei fuerat mensibus nupta. Exequiæ filii futuræ die Saturni hora prima pomeridiana. Id non addo, ut eas cohonestes (scio in tam parvis liberis, & paterna illa sollicitudine exigi non debere nec fieri posse) sed ut omnium sis gnarus. Significabis hoc ipsum Amplissimo Senatori, & cognato, ut nunc loquimur, veteri amico Davidi Ruterio, ex quo consanguineorum filii facile intelligent cæteri.

Raptissime, *Amstelodami*,
cōlōc xl. xxviii. Martii

Tuus Totus,

G. J. Vossius:

CCCLXXVIII.

Claudio Salmasio, G. J. Vossius
S. P. D.

REcte sentis, nobilissime Salmasi, gravissimum esse hunc casum qui me afflixit gemina prole amissa: in quarum una Mater, in altera ego, imo ambo in utraque multum adeo fiducia reponebamus. Sed sic humana sunt omnia in quibus solatio nobis divina esse voluntas debet. Huic soli acquiesco quia solus novit Deus, quid Parentibus expedierit, quid Liberis. Et magni est divini erga nos amoris argumentum, quod constanti adeo in

Y y a

Deum

Deum & Christum fide abierunt. Gerardus verò tam in gravissimo morbo cordatus & patiens, tam assiduus ad Deum precibus intentus adeoque ardentibus ut omnibus tam admirationi quàm exemplo foret. Non meliorem mihi vel meorum cuiquam excessum exopto. Et tute aliquid etiam illud esse fateberis, quod pulchella reliquerit ingenii doctrinæque specimen, ut non abiecit hinc, nisi pro ætacula bene de publico meritis. Quare omnino sic etiam illum amisisse quam nunquam habuisse quem Deus mihi non debuit, malo. Dolet verò ex animo quod intelligam male tibi à pedibus esse; Metuo subinde ne hæc tibi proveniant à studiis immoderatis, cujus ego intemperantiæ sæpius accusor ab amantibus nostris. Non possum verò mihi persuadere esse hoc imbecillitatis, inde quod nimis ad animum revoces calumnias hominum malorum, quarum specimen, etiam ex versiculis huc transmisisti, perspexi. Ringebam quidem, sed neque ridebam stultitiam minus. Et video mecum sentire optimum ac doctissimum quemque. Collocutus autem sum cum multis, tum hujus incolis civitatis, tum vicinarum etiam, & qui ab oris venirent exteris. Magis magisque sordent, quod sic tecum agant, Acheronta etiam si possunt (pii scilicet homines) moturi adversus te. Sed non mereatur ut diutius iis immorer. Cætera ex filio cognosces Isaac. Uxori optimæ & affini tuæ ac liberis à me salutem conjux adscribi voluit.

Amstelodami, cId Ioc xL.
ix Kal. Aprilis.

CCCLXXIX.

Joanni Meursio Juniori S. P.

Valde me, mi Meursi, afflixit excessus clarissimi & summi viri, parentis tui: non me solum, sed omnes meos: Uxor mea vicem dolebat matris tuæ; filii, tuam; filia, illam sororis tuæ: interea ut nobis, sic & vobis solatio esse debet, quod terrenam hanc vitam meliori commutavit; quod æternum vivet nominis sui fama: quod etiam in liberis vivet, te imprimis, quem paternæ virtutis ac doctrinæ æmulum fore pollicemur nobis. Eam in nobis fiduciam gignit cum ingenium, & sub tanto doctore, parente tuo, educatio, tum specimen illud doctrinæ, quod, ut paternæ adderetur Cretæ, transmisisti. De eo edendo curæ mihi erit. Sed hæcenus non licuit cum Blauwio colloqui, quia uxorem

quam vix tribus habuit mensibus, amisit, & adhuc totus luctui se dat, me quoque hisce tribus hebdomadibus, intra quas literæ mihi tuæ redditæ sunt, domi detinuit, tum obitus unice ac dilectissimæ meæ Johannæ, tum gravissimus morbus filii Gerardi: de quo parum spei posse vel diem supervivere: hat voluntas Domini, quem interea oro, ut nobis conservet tam carum pignus, modo & nobis divino gloriosum, & nobis filioque salutare sit. Eripuere mihi filiam morbilli, ut nunc vocant, morbus Epidemicus ac mire malignus: quo & filius decumbit. Huic tamen longe majus à febris, continua & ardentissima, quam morbillis ipsis periculum est. Non potui committere, egregie & amicissime juvenis (nostri illud Isocratis *πρέπει τὸς παῖδας, ὅσπερ ἡ φύσις, ὅντων καὶ τῶν φίλων τὴν παῖς κληρονομεῖν*) quin in summo licet dolore, & animi anxietate hæc pauca ad te exararem, præsertim rogante id Severino vestrate mercatore. Cui & monumenta tradidissem paterna, de quibus scripsisti; sed aiebat se terra iter facturum, eoque nihil hoc tempore ad vos præter litteras posse perferre. Captabo ipse occasionem aliam nisi Blauwius mutato consilio, editioni se accingat. De omnibus colloquar tecum literis proximis, si Deus & valetudo permiserit. Ego & omnes mei matrem tuam, & liberos optimos peramanter salutamus, omniaque offerimus officia, quibus utilis his terris opera nostra esse possit. Plurimam etiam salutem dicito clarissimis viris Stephanio & Laurembergio.

Amstelodami,
cId Ioc xL.
viii Kal. April.
St. Gregor.

Tuis tuorumque,

G. J. Vossius.

CCCLXXX.

Georgio Ratallero Dubletio.

Nobilissime & Amplissime Dubleti,

JAM ab aliquot retro annis graves & crebræ fuere Domini visitationes, ut *ἐκπαύσεις* cum Scriptura & Ecclesia loqui solemus. Itaque quoties cogitatio eo defertur, metuo ne hic cesset manus Domini: ac si aliquantum temporis sine gravi incommodo labatur, in lucro illud pono, & gratias ago bonitati supernæ. Quod si plane ita divina ferat voluntas, ut alia me maneant adversa, ita fore prorsus confido, ut qui vulnerat, etiam saucio spirituale suum balsamum affundat. Nihil pium ex nobis, sed in Christo omnia possumus. Nescio ecquid audieris de nova disputandi

divia, qua sola confisi Pontificii in quovis dogmate provocant nostros. Huic se opposuerat Calixtus, Theologus Confessionis Augustanæ, & quidem, si quid iudicare de his valeo, facile omnium, qui eam in Religione Christiana sententiam profitentur, doctissimus & cordatissimus. Huic respondit vetus ejus condiscipulus, Ducus Wimariensis, qui nuper vita excessit, præceptor, sed post desertos Lutheranos Abbas Pontificius: Abbatia autem sua à Sueco milite ejectus, ac inde in Bata-viam profugus, ubi nunc tertium quartumve annum agit, vir doctus, & perhumanus, nec infacetus. Hunc aliquando ad me perduxere Overbequius P. M. & Joachimus Willefortius: ac sine hoc illo, ut de uno altero capite eorum, quæ inter Pontificios & nostros controversia forent, dissertarem. Postea idem sponte etiam sua ad me venit non semel: sæpiusque de nova illa differendi arte, ut vocant, collocti sumus. Quia vero quam insitit disputandi viam, non aliunde melius quam ex apologia ejus contra Andabatam Helmeftetenfem, hoc est Georgium Calixtum, cognoscere est: eo geminum ad te exemplar ex quaternis quæ dono accepi, transmittendum putavi. Unum tuo inserviat usui, cujus ego in talibus etiam judicium magni merito facio: alterum clarissimo Riveto vel ipse dabis, vel per famulum mittes. Causam consilii mei, ubi otium erit, facile ex te cognosces; nempe propterea illum potissimum elegi, quia ex Theologis Fœderatæ hujus Belgicæ *vertrouwen*, & controversiarum quæ nobis sunt cum Ecclesia Romana intelligentiorem scirem neminem; amicus quidem meus per-vetus putat Nieuhusium toto opere *opposita* nequere, cui non per omnia adfensero; sed puto etiam istis conditionibus palæstræ quas præscribit, causam nostram superiorem fore. Et illius rei semel iterumque experimentum dissertando illum in modum cepi. Sed de istis pluribus aliquando coram: ubi & valetudo meorum, & feriæ publicæ excurrendi ad vos facient potestatem. Omnes mei te plurimum salutant.

Amstelodami, cl^o Id^o xl. pridie Idus Aprilis. Quo die si fuisset Hagæ, non commissem quin illustris legati Suecici Joachimi Camerarii recta petissem domum, eique & familiæ in multa sæcula omnia effem felicia comprecatus: Nempe quia hic est dies ille, quo lucem primum Banbergæ ante annos cxl. vidit avus ejus Joachimus Camerarius, quo viro, ut cæteras ejus laudes taceam, nullus in Germania melius est meritis de literis Latinis pariter & Græcis. Ubi sponte se occasio obtulerit,

salutem plurimam & Dom. Legato, & filio, generoquo dicitur.

CCCLXXXI.

Andræ Riveto, *summo & Theologo, & Amico*, G. J. Vossius S. P. D.

GRAVE omnino est geminum illud vulnus quod accepi: præsertim istud de filio, ea in ætacula istac eruditione, ea insuper vita ac moribus, ut in illo minus desideraram quam meipso. Sed sic quoque plurimum debeo numini, quod egregiam hanc prolem mihi donarat, vel potius commodarat. Non leve est quod monumentis suis vivet in hominum memoria: Majus, quod nomen ejus inscriptum sit vitæ melioris. Quare omnino malo, hunc datum mihi filium, quam si Deus dedisset nunquam: planèque pro eo quoque beneficio debitorem me agnoscam ac profitebor semper. Non facile autem dixero, quam mihi gratum fuerit, quod me literis tuis solandum putaris; nec Deus qui hunc tibi animum inspiravit, Epistolam tuam in me infugeram esse sinet. Idem dixero de literis quas nudius tertius ad me misit *o nro* Salma-sius. Cujus quando nunc mentio incidit, dissimulare non possum quam male me habeat, quod Leidensium nonnulli loliginis succo pleni, infandi adversus eum finem faciant nullum. Non satis erat ubique eum traduce-re, nisi & nescio quem, sancto Martyri, qui Tertullianum suum doctorem vocare solet, cognominem, verum moribus, ut ex scripto apparet, valde discrepantem, instigare ad scribendum pro manibus, ut ipse loquitur, Cuna-anis? Profecto, si quoties quis à defuncto modeste dissentit, pro manibus ejus liber debeat prodire; contra quem non eruditorum immanes pro manibus libri scriptitentur? Te, meque etiam hæc maneat fortuna, nec enim possumus negare, quandoque à priorum nonnullis nos abire. Et quæ aliter possumus, cum illi ipsi sæpius abierint ab iis, qui fuerant, nec consenserint semper cum illis, qui essent; ad hæc quid fieret Aristarcho, à quo sæpe adeo acerbè, & præter meritum ullum vapulat Nonnus? Non metuit ne quis scribat pro manibus Nonni? Cujus sancta anima, postquam mille & ultra annis in Domino obdormivit, nec ulli gravis fuit, multorum vero mentes sacro pavit alloquio, quasi inquietata, & quantam in ipso fuit Aristarcho, velut cœlo devocata fuit ad causam Leidæ dicendam pro opera honori Christi, & Evangelii illius impensa. Num ullum talis rei exemplum habemus

habemus à longe plurimis retro sæculis? Crede mihi, optime & prudentissime Rivete, non eo hæc sine à me scribi, quod libido me teneat obtrigillandi quemquam, nedum illum, cui male licet merito, ob doctrinam & quia collega fuerit, honorem suum debeo: sed solum hæc à me dicuntur, quod ferre non possim tantum eruditionis & candoris divorcium, propter quod etiam doctissimi multi ludibrium indoctis debent. Nempe sic cum iis agitur, ut domi sint talpæ, Argi foris, imo oculatior Argo, quippe qui videant etiam quod non est. Nulli ad me his diebus versiculi virulenti in Salmasium, nempe ex eorum quos dixi officina, ut quidem ad me perscriptum, & postea sermone eorum didici qui Leida venirent. Et addunt, non hic statueram rem, sed de vi cogitari. Verum ego cassas hæc terriculas puto. Sapient magis; nec hoc boni firint. Orandus interim Deus nobis, ut meliorem hominibus mentem inspiret, ad gloriam sui nominis, & honorem ac utilitatem Reip. Literariæ, cui ab moribus istis magis magisque est contemptus, nulla literarum, magna quorundam literatorum culpa. Hanc querimoniam tutis auribus vel literis committere volui apud te, cujus ut rara doctrina, ita eximia pietas ac prudentia, & erga amicos fides, nota est omnibus iis qui penitus inspexere. Vale, vir maxime, & amare nos tui nominis cultores perge; nec optimæ solum conjugii, sed si quando otium erit, etiam clarissimo affini tuo Molinæo meo nomine salutem dic plurimam, vel huic potius scribe. Jucunda enim mihi semper fuit, eritque tam eruditi doctoris mei memoria: addo & collegæ ex quo ambo in Cantuariensium canonicorum ordinem sumus adsciti.

*Amstelodami, clb Idc xxxix.
iii. Id. April.*

CCCLXXXI:

*Illustriss. atque Excellentiss. Domino,
Dom. Gabrieli Gustavo Oxenstiern.
L. B. in Kinutho, Domino in Torefio,
& Stureforfa, &c. Regni Sueciæ Sena-
tori, & Proregi, &c.*

Illustrissime & Excellentissime Domine,

Redit ad vos generosus Dom. Bielkius, juvenis bonorum amore dignus, mihi quidem non modo ob genus præclarum, majorumque virtutes, sed etiam propter indolem optimam longe semper charissimus, non modò dum Amstelodami fuit, sed postquam etiam

abiit Leidam: redit autem doctrina auctior; qua parte tamen non ausim dicere, plane expleturum vota & desideria vestra. Sed nihil impedit, quominus etiam in patria majora addat incrementa, partim legendo scribendoque, partim commercio hominis eruditi ac fidi: verum ea est vestra prudentia, ut de isto melius coram judicio facturi sitis, quam ego vel alius his verbis. Et habebitis optimum & doctissimum Granium, qui his diebus magna cum laude supremam in utroque jure lauream est consecutus. Ex eo omnium, quæ ad studia generosi Bielkii pertinent, optime cognoscetis. Est is vir magna pietate, ac moribus optimis, idemque ea est doctrina ac facundia, ut his etiam nominibus semper mihi fuerit acceptissimus. Sane in paucos incidi gentis Sueciæ, qui paria faciant, nedum superarent. In curando vero juvene, cum præfectus à vobis fuit, summa ejus semper eluxit fides ac industria. Non facile dixerim quoties de generoso juvene mecum sit collocutus, inque studiorum ratione, qua eum informandum putavit, non possum non utroque quod dicitur pollice, institutum ejus comprobare. Tanto dignior, cujus à te, præclare heros, & à procerum aliis, ratio habeatur; five existimabitis operam ejus in Academia, five in Reip. negotiis patriæ utiliore fore. Interest hoc non modo ipsius doctoris Granii, sed etiam nobilitatis Sueciæ: si enim huic viro ea virtute ac doctrina post operam generoso Bielkio summa fide navatam, publice honor expendatur: præterquam quod cum admodum vobis obstringetis, futurum etiam, ut eo ad similem industriam ac fidem accendantur alii, quos nobilibus adolescentibus in terras externas mittendis præficere cogitabitis. Ut nihil jam de eo dicam, quod illo munus istoc quod imponetis, egregie sustinente (neque enim de eo dubitandum) futurum eadem ut magna ex parte ad vos redeat honor, & illi de quibus bene merebitur, illustribus proceribus, qui tam recte sibi prospexerint, gratias agant immortales. De me sic habe, illustrissime & excellentissime Domine, devotissimo me animo esse erga florentissimam gentem Suevicam; ac jam ab viginti annis, partim Leidæ, partim Amstelodami ut potui comprobasse: ac si quos mihi commendandos putabis, nunquam me commissurum, ut ullum meum officium desideretur.

Deus Opt. Max. diutissime tam illustre caput, & patriæ, ac familiæ, ac amicis sospes ac incolume conservet.

*Amstelodami,
clb Idc xl. Id.
Aprilis.*

*Illustrissimi nominis tui
cultor devotissimus,*

G. J. Vossius.
CCCLXXXII.

CCCLXXXIII.

Illustriss. atq; Excellentiss. Domino, Dom. Gabrieli Benedicto Oxenstiern, L. B. in Morby, Domino in Lindholmen & Rosersberg, &c. Regni Sueciæ Senatori & Thesaurario, &c.

Illustrissime & excellentissime Domine,

NON possum dicere quam grata mihi fuerint literæ ab tanto heroe ad me missæ, quæ commendaſti mihi generosiſſimum juvenem Bielkium. Itaque cum antea eum diligereſ, poſtea etiam impenſius ejus ſtudii commodis, nec ulla in re, qua opera mea uti vellet, officium noſtrum claudicavit. Nec inutiles ei fuimus; credo tamen proſectus majores deſiderabis. Sed enim ſi nobiles adoleſcentes omnes in ſtudiis nervos intendant, merito & nobis gaudemus, & illis gratulamur; ſin fortaiſſis majorem requiramus induſtriam, lætamur tamen dummodo nobis non plane perierint impenſæ; & tam corruptis ſæculi moribus, ita ſe geſſerint, nihil ut ſit quod vitæ probitati & honeſto nomini multum adverſetur. Sane indole hic juvenis eſt perbona, planeque ita fore conſido, ut deinceps in patria ſi ſtudia continuet, & docti ſiſtæque hominis conſiliis ea dirigat; id ſuppleat, quod non injuria nunc deeſſe videatur. Sed de iſto non præibo conſilio, quando optime ea ſine monitore perſpicias. Et melius ea exponet doctiſſimus Gravius, qui vir ſedulam ſemper generoſi juvenis ſuæ fidei commiſſi, curam geſſit, ſive ſtudia ejus, ſive vitam moreſque attendamus; nec dubitandum, illuſtriſſime Domine, quin excellentiſſimo nomini tuo, & procerum aliorum ſit charior acceptiorque futurus, quod nuſquam paſſus ſit fidem & induſtriam ſuam deſiderari; ſane & in hac urbe iis qui novere, & Lugdunenſi in Academia, ubi ſupremos in utroque jure eſt adeptus titulos, ab optimo & doctiſſimo quoque & amatur, & æſtimatur: atque ita eorum judicium eſt, non deſore tam pio candidoque, tam docto & prudenti viro, qui vel ab honore Academico, vel civili munere, conſultum, & illi velint & patriæ ſimul, quæ multum ex eo capere poterit utilitatis: Mihi quidem id ſi contingat, jucundiſſimum erit, nec mihi duntaxat, ſed aliis etiam qui ſtudiis, & Sueciæ toti bene velint. Porro ſiqua in re illuſtriſſimo nomini tuo inſervire poſſit opera noſtra, ea ſemper erit paratiſſima; nec committam, ſi quos nobilitatis Sueciæ adoleſcentes commendandos mihi putaris, quin omni eos

conſilio, & auxilio juvem, dummodo ſibi ipſis non deſint. Nihil enim jucundius mihi, quam de ſtudiis eorum bene mereri, qui aliquando columina futuri vel ſtudiorum, vel regni, vel reip.

Deus Optimus Maximus perdiu te, & illuſtriſſimam familiam tuam ſalvam, ſoſpitemque conſervet, bono regni Suecici, ac ſimul cultorum tuorum.

Amſtelodami
cl. Ioc xl. Id.
April.

Excellentiæ tuæ devotiſſimus,

G. J. Voſſius.

CCCLXXXIV.

Gerardus Voſſius, Leovino Warnero
S. P. D.

NON diſtuliffem reſpondere literis tuis, niſi ita fore exiſtimaffem, ut filius meus Iſaacus Leidam hac ipſa hebdomade proficiſceretur. Nunc video id non fore, niſi ſequenti, & fortaiſſe extrema. Quare ſignificandum tibi putavimus, ſi vidua illa non minori pretio reſtituere librum Bibliothecæ Amſtelodamenſi velit, & in mora periculum eſſe videatur; nos ſatius putare, ut ei id pretium annumeretur quamprimum. Sin nihil prorfus hac pauxilla mora peccabitur, poſſe rem in filii adventum differri. Videtur enim plane iniquum, ut ea quod publicum eſt detineat, nec reglutinari illud ab unguibus ſuis patiat; niſi quatuor imperialibus annumeratis. Sane unus alter ſuffeciſſet ſolatioli cauſa, quia & ipſa ab homine nequiſſimo ſit eluſa. Poſſis colloqui cum clariffimo & amiciſſimo Heidano. Quicquid utrique veſtri videbitur, id utroque pollice ipſe laudavero. Pecuniam ſimulac librum videro, refundam; vel ſi malis, præmittam. Gratias interim ago vobis pro opera noſtri ergo hoc in negotio inſumpta. Altero etiam nomine gratias habeo, quod mihi miſeris virulentos vericulos illos in virum nunquam ſatis laudatum Claudium Salmaſium. Video inde, & ex aliis multis, Lugduni habitare cum inter tam infeſtos, quam ſi in mediis viveret Jeſuitis. Utinam tandem ſit inſaniendi finis. Sed metuo ne id non ante ſit, quam, qui tantopere nunc adverſantur, æſtimare ſatis ſciant divinas ejus viri virtutes, quas, ut videt, ſic ſuſpicit orbis univerſus. Sed pro animis adeo exulceratis ſpiſſe admodum id procedet. Interim orandus Deus, ut iis ſaniorem largiatur mentem: nec ceſſandum viris bonis aquam potius, quam oleum

oleum huic flammæ affundere. Vale, doctissimi & amicissime Warnere, plurimumque meo nomine saluta illustrem Dom. Bar. Kynitzy.

Amstelodami c15 Ioc xl.
Idib. April.

CCCLXXXIV.

Winando Rutgerio *S. Theologiæ Doctori.*

Vir Clarissime & Amicissime,

JAM pene sesquiannus est quod multis conflictor adversis, nam & febris interim laboratum & arthritide, & colico dolore & calculo, ex quibus duo posteriores morbi antea mihi fuerunt ignoti. Sed & conjux ac liberi prope omnes ægrotarunt, duo ex illis erepti nobis, vel mundo potius. Filia unica & suavissimus Gerardus, cujus extant foelicissima in Velleium Paterculum castigationes, ac brevi ut spero consequentur ejus Valerius Flaccus, Censorinus & alii; quæ & illi honori & Reip. Literariæ utilitati fore confido. Hæc omnia (ut taceam quædam quæ dicere nolo) non mediocriter animum meum afficiunt. Corpus interim animo, animum spe meliorum temporum sustentamus. Quod si spes ea frustrabitur, saltem non falemur de promissis beatoris vitæ, ubi lachrymæ omnes detergebuntur. Nec tibi omnia ex voto fluere, indicant literæ tuæ, ac præterea ex optimo ac doctissimo Alberto van Filligen intelligo. Crede & hanc fortunam tuam mihi esse dolori maximo, omniaque tua causa velle ac cupere: neque unquam ulla occasio abit, quin te commendem & dotes tuas. Parum absuit quin voti fuisssem compos factus Ultrajecti, ubi desiderabatur qui succederet in locum Mag. Reineri Philosophiæ professoris acutissimi. Pro te stabat professor alter Philosophiæ M. Segwertius, qui de meliore nota te commendarat, atque ea pro nomine & fama tua (hanc zelotes quispiam arrödebat) attulit apud proceres, quæ ex me audierat; puto confectum haberemus negotium nisi Regina Bohemica, dum hæc agimus, Palatinum quendam commendasset præceptorem antea liberorum suorum. Is igitur à primatibus prælatus, quanquam vero majus erga te erat studium meum, tamen gaudeo non penitus esse aberratum, juvenis enim est eruditus, & perhonestus. Nec fuit tamen tale quid denegandum Regiæ, exuliquidem, sed tamen Britannici Regis sorori, & cujus liberi forent Pronepo-

tes Guilhelmi Arausionensis præclare adeo promeriti de his terris. Hoc facilius repulsam feret, præsertim cum nemo te eo aspirasse possit suspicari; imo quod res est, te ignarum fuisse omnium omnes sciant. Aliquid etiam per amicum tentabam Hardervici, uti & alibi. Sed nihil hætenus potui, id est, ab multitudine competitorum: subinde etiam ab zelotis, quibus suspectum est, qui, quid loca incolit, ubi clarissimus Vorstius quondam docuit. Utinam affinis tuus mecum sociaret operam suam, plus efficeremus; sane varios variis commendat locis: in his etiam Cabelavium Amstelodamenfibus nostris. Urget ut præferatur filio meo Francisco Jurisconsulto, putabam me effugisse Vatinianum ejus odium erga immerentem. Sed, ut experior, spes me refellit. Mihi non est animus par pari dare hoiimentum. Feram ut soleo; imo patientius tanto, quanto ex corporis imbecillitate æpius subit cogitatio, brevi Deo rationem fore reddendam vitæ annectæ. Vale, vir & amice summe, & cum uxore à me & uxore salve.

Amstelodami,
c15 Ioc xl.
Non Quinct.

Tuus æternum,
G. J. Vossius.

CCCLXXXIV.

Georgio Ratallero Dubletio.

Nobilissime Amplissimeque Dubleti,

AB eo tempore, quo te Hagæ invisit charissimus meus Isaacus, prius quidem morbus diutinus me afflixit, mox cum aliis fuit conflictandum adversis, sane duris, sed quas patientia faceret leviores. Nempe ad omnia, ut videtur, obdurandum est mihi, donec hæc vita durabit. Aspera tam multa eripere etiam mihi animum respondendi amicorum literis, tuis quoque tam amicis, cum saltem gratulari oportuisset honorem eximium. Sed tanta erat amicitiae fiducia, ut facilem mihi apud te negligentiam hujus veniam fore putarem, præsertim filio meas quodammodo partes apud te fungente. Inertiozem etiam reddebat, quod aiunt, gratulationes etiam seras esse gratissimas; contra quam in consolationibus usu venit, ubi dolor, qui calum jam duxerat, refricatur. Cæterum non modo opto, ut nova hæc ac summa dignitas tuæ familiæ ac toti patriæ sit salutaris; sed ita etiam fore confido, nec aliud bonorum hic judicium est. Negant omnes à multo retro annis ejusmodi dignitate digniorem ele-

etum. Solum mirantur aliqui, tam malis temporibus, ac virtuti adversis non diutius te præteritum. Auctumnales feriæ nostræ hac hebdomade coeperunt: nec abhorret ab eo animus, ad vos excurram. Sed uxorem domi solam relinquere non sustineo: nam ut una se in viam det, id vero nihil est. Ea est corporis infirmitas; verum Junia affinis, Casimiri vidua, nunc est Amersforti. Ea prope diem cum sorore Nærana ad nos venit; id ubi erit, abesse domo licebit: quia sic habebit uxor, quibuscum se oblectet. In opere nostro de Theologia Gentili, ac Physica Christiana binis jam mensibus operæ typographicæ cessant; sed vehementer ac suo jure urgent Indicem ac Dedicationem. Hæc etiam causa erit, cur excurram; neque enim morari ultra typographos licet. Ita queruntur de damno quo eos mactō. Dignum laboris præmium hoc tempore, ab Anglia sperare non ausim. Ita pecuniis opus ad bellum id quod paratur. Ex præbenda accisæ mihi quinque libræ Sterlingicæ trimestribus singulis. Idem factum Canonicis cæteris, quare jam biennium circiter est, quod tertio quoque mense solum viginti percipio, qui viginti quinque solebam. Sed ecce ne viginti quidem accipere hoc trimestri potui. Atebat quæstor, quicquid parata hic foret pecunia Regi fuisse dandum: eoque expectandum mihi, dum aliæ ex agris redierint. Injurato etiam mei causa me optare credes, ut bellum componatur. Sed cum cogito animos eorum, quibuscum negotium Regi est; tum autem flabella in Anglia ipsa, item Gallia, atque utinam non his terris, vix boni quicquam sperare possum. Sed nimis me diffundo, de his & aliis prope diem plura.

Amstelodami,
clōbc xl. xi
Kal. 6.

Tuus totus,

G. J. Vossius.

CCCLXXXVI.

Thomæ Farnabio.

Præclare Farnabi, Vir pariter atque Amice summe,

Quod post egregia tot ingenii, doctrinæ industriæque tuæ monumenta, in otio isto non dubitaris negotium suscipere, novæ Grammatices concinnandæ: id quam animis vulgaribus vulgare & ipsum judicabitur, tam mihi videtur animi esse erecti, nec imperitum opinione, sed suo quidque pretio æsti-

mantis. Ac scio mecum probe consentire eos omnes qui necessitatem hujus studii intelligunt, & quanto olim in honore fuerit etiam apud principes viros. Quæ apud te referri non merentur, qui, quid hac de arte statuas, facto ipso comprobasti. Quod vero pulchram hanc operam tuam inscribere volueris nomini nostro, fecisti pro affectu tuo, quem jam ante perspexi, cum aliunde, tum ex eruditis in varios Poetas Scholiis: opera erudita, in qua cum candide laudare soleas, si qui probe alicujus loci mentem præ aliis affectuti videantur; ipse etiam Achivis istis me permixtum agnovi. Gratias itaque & pro istoc habeo, & præcipue pro gratissimo munere, quod nunc mittis. Et fortasse vix alteri mittere poteras, cui labor ille foret acceptior. Operam verò dabo, ut quanti tefaciam, intelligas. Quod verò poscis, ut sicubi discesseris à me, in bonam partem, accipiam id factum nolim. Quid enim gravatè id feram, qui toties abeo ab aliis, & quotidie addiscendo abire à me ipso soleo? Non soleo morari quid scripserim; sed quid rectum putem, ac præfiscine hoc dixerim, gratiorum mihi esse veritatem, quam ipsemet sum mihi. Quare sicubi me fugerit aliquid, quod postmodo mutatum velim, non sum medicus tam misericors, ut urere & secare verear illos animi mei foetus. Atque hoc conspicias, si Deus siverit, ut aliquando illi de Arte Grammatica Commentarii recudantur. Multa enim interim observavi, quæ ad oram allevi Codicis nostri; multa fors observabo, si Deus hanc mihi diutinam esse vitam volet. Crede mihi, Cl Farnabi, nihil arte hac nostra operosius, difficileque in plurimis certi aliquid consignare, nisi quis omnes veteres evolve-rit cum cura, atque adeo optimos quosque Codices MSS. adierit, vel eos saltem, qui bona fide variantes Codicum lectiones annotarint. Et sic quoque in ambiguo quædam relinquuntur ob tot loca corrupta à librariis imperitis, qui, quæ non intelligerent, mutare solent, magno rei literariæ dispendio. Sed septennium primum lusibus, & Grammaticis datam, alterum septennium utrique linguæ, & Elementis Rhetorices, Poetices & Logices impendi; posteaque gravioribus studiis totos insumpsi annos quinquaginta, perque varia admodum studia, pro exiguo ingenii nostri modo me diffudi. Tanto temporis spatio, tantam reperi difficultatem in hocce nostro studio Grammatico, ut citius aliquis in Theologia, Jurisprudentia & Medicina, (non apud Anglos quidem, ubi tardè honores isti conferuntur, sed aliis etiam in terris, quas nominare nihil attinet) Pileolum consequi possit Doctorem, uti vocant, quam

ut consummatus ille evadat Grammaticus. Tantoque gratiores & acceptiores esse omnibus bonis labores eorum debent, qui ut aliorum ea parte labores imminuant, sedulo operam dent. In iis te quoque esse, doctissime vir, gaudeo. Rideant, an ringantur, non *ἀγέμευτος* modò; sed etiam, qui studium hoc leviter degustarunt, nihil pensi uterque ducamus; præsertim quando nihil est, quod invidemus istis Suffenis, qui, quia minora studia nesciunt, eò in maioribus majores sibi videntur; cum in his etiam tanto sint minores, quanto magis humanitatis studia neglexerint. Vale, clarissime Farnabi, ac deinceps etiam amemus nos inter nos:

Amstelodami, cId Ibc xl.
 prid. Kal. Sext. St. N.

G. J. Vossius.

CCCLXXXVII.

Ludovico Crocio *Theologo* Bremensi.

Eximie & vir & amice,

Nihil hæcenus, ut arbitror, ad te perscripsi de gemino vulnere domestico, quorum utrumque superiori mense Martio accipi. Prius Dominus ex hac vita evocavit filiam, quam haberem, unicam, jam ea ætate, qua viro maturæ judicantur, etsi nos, quodammodo septentrionis filii, non adeo calide hoc connubiale negotium terris frigidis urgeamus. Hæc res mihi permolestè accidit: solatus me interea sum voluntate Dei: eo magis quia pie adeo, uti vixerat, obdormisset. Dolorem quidem augebat quod tam reverita esset parentes, etiam complexa esset variarum linguarum, & artium scientiam, ob quam non exigua erat laudem adepta apud eos, quibus innotuerat. Sed enim consolabar iterum me illo, quod pietatis tam cito haberet mercedem: & quod ad terras attinet, si bona mundi, sane nec mala ejus nosset, nec jam obnoxia sit periculo ne male nubat, vel filios nanciscatur male morigeros, ut tot alia mitam. Vix tres erant hebdomades, quod ita mecum collector: cum ecce nobis etiam adimitur filius natus minimus, mihi cognominis qui cum castigationibus edidit Velleium: ut propediem Valerius Flaccus & Censorinus, sedulo castigati consequentur: postmodo fortasse Servius, & emendationum in varios scriptores libri. Hæc ille jam præstiterat, cum necdum annum expleffet primum & vigesimum. Nempe agebat climactericum tertium si septenariis numeremus. Uti & vix paucis cum mensibus excefferat Dionysius me-

us, Reidani annalium interpres, adolescens tot vulgarium linguarum, ac præter Latinam Græcamque tot Orientis linguarum intelligens. Ejus spero versionem Maimonidæi operis de Idololatria intra duos tres menses transmittam. De castigationibus in Julium Cæsarem nihil certi spondeo. Ad Gerardum & *marcelum* redeo, cujus obitus non minus quam Dionysii ante septennium magnum mihi attulit dolorem. Nam præter mores suavissimos amabam judicium & doctrinam, qua aliis etiam ætatem vincere putabatur. Quid facerem, nisi ut me solaret eo, quod eum jure suo repetiisset Dominus; nec tam amissus esset quam præmissus, nec tam ereptus nobis, qui fortasse eum brevi sequeremur, quam mundi hujus miseriis. Nihil quoque periculi nunc, ne corrumpatur à mundo, postquam illi valedixit, & uti vixerat pie etiam in Domino obdormivit. Sane omni morbo, non fratribus modo, sed aliis etiam & quidem ætate provectis, exemplo fuit. Poteram videri jam malis defunctus, cum ipse in morbum incido qui me lectulo aliquamdiu affixit, diutius vero detinuit domi: ita ut vix tertia sit hebdomas quod pedibus me porto meis. In adversis hæc Deus spiritu suo nos firmavit, & ut confido nos roborabit porro. Ne tibi quidem vel collegis doctissimis, ut ex literis tuis, & variorum sermone intelligo omnia ex voto procedunt. Qui lites fovere in Ecclesia malint, probare in vobis nequeunt pacis istud studium, quod focer sic in Eirenico, imo Theologorum quisque optimus, semper commendavit. At longe alia mala mihi est mens, qui vota etiam pro longiori talium vita facere soleo. Magnam partem hoc malum provenit ex antiquitatis contemptu, quam pro nobis stare certissimus sum. Sed isti *ἰδογνώμονες* nihil probant, quod non didicere à magistris suis, viris sæpe doctissimis, sed non minus errori obnoxiiis, quam veteres Ecclesiæ doctores, Apostolicis temporibus propiores, ac nostris (hoc enim video prope in confesso esse omnibus) pietate etiam superiores. Cumque vos acerbè adeo reprehendunt, utinam cogitarent quantopere à nobis alienent eos, qui Augustanam sequuntur confessionem. Merito enim illi objectant omnia omnium *ἐλπίδια*, & tam amica alloquia, iis præcipue terris, ubi admissi nondum sumus, nihil esse, nisi dolosa aucupum cantus ad volucres decipiendas. Nam inquirunt, si in pauculis cum iis facientes ferre non possunt, sed fœde adeo eos traducunt: quid boni expectent de iis qui distare se protitentur totis parafangis? Paulo ista liberius præter morem scripsi indignitate rei motus. Vobis interea satis esto, quod probetis vos pro batissimo cuique: quod posteritas omnis hoc

hoc studium vestrum pollice utroque commendabit : quod Deus, ut confido, magis magisque huic studio benedicet : & si minus in terris luculentam, in cœlis vobis mercedem rependet. Salutem plurimam clarissimis collegis D. Bergio, & DD. Willis dicito.

Amstelodami,
clo Ibc xl.
xx Junii.

Tuus æternam,
G. J. Vossius.

Libellum mitto de reprobatione absoluta, nescio cujus auctoris, sed nuper hic editum. Anglus putatur auctor.

CCCLXXXVIII.

Hugoni Grotio S. P.
Lutetiam Paris.

Illustriss. Dom. vir undecunque maxime,

Literas hæc exarabam, in Gallias ituris, Bartholo, Thoma, Casparo Bartholinis, liberis Caspari Bartholini, Philosophiæ, ac Medicinæ, dum viveret, in Academia Hafniensi Professoris, viri acutis & pereruditis ingenii, doctrinæque monumentis, per orbem celeberrimi. Præterea comitem se iis in viam dedit, Theodorus Fuirenus, eorum quos dixi Consobrinus, natus ex Doctore Medico, amplissimi Consulis nostri, Andreæ Bicheri, Consobrino Bartholinorum. Materteram uxorem habet Olaus Wormius Medicinæ in Academia ante memorata Professor, cujus extant Fasti Danici, doctum & utile opus. Item liber de Runica, sive antiquissima Danorum literaturâ, vulgò dictâ Gothicâ. Hæc de iis qui literas perferunt, juvenibus eruditis, ac ut cenfeo, non indignis, quos ad salutationem & alloquium tui admittas. Nunc de meis loquar. Post amissam dulcissimam Joannam meam, Puellam jam nubilem, & variis artibus, ac animi dotibus instructam, filiam unicam: Post ereptum item Gerardum carissimum, in quo semper certare putavi judicium cum ingenio, pietatem cum industria (Velleium ejus vidisti, & Valerius Flaccus, ac Censorinus, fortasse item alia consequentur) in alia quoque adversa incidi, quæ non mediocriter animum premerent; ne tamen opprimerent, operam dedi quam potui. Vix tamen dubito, quin crebrior eorum cogitatio, & uxoris mœror, aliquid etiam contulerint ad morbum, qui me lecto aliquandiu affixit, duos etiam menses detinuit domi. Ita factum ut cessarent operæ, in excudendis meis, qui-

bus prælum antea fervebat; ut item quasi intermitterem prorsus Epistolare officium. Quamquam de te, altera etiam cessationis causa erat. Nam interea temporis, semel iterumque adfuit nobilissimus genere, animoque, filius tuus Petrus, qui sæpius est cum Blauwiis collocutus, ac quorum opus foret, omnium te facturum certiore recepit: ut hac parte opera mea non valde opus foret. Nunc valetudini melius est, etsi non ut solet. Absoluti duo tomi, Theologiæ, & Physices Christianæ, jamque Indices concinnantur. Binos intra menses, te visurum opus id confido. A nostris jam, ad majora, melioraque, me confero. Legendis iis, quæ in Novum Testamentum fuisse commentatus, nequeo satiari. Aurea planè sunt quæ me, imo me longe doctiores doces. Propertianum illud leviter liceat immutare:

*Cedite Romani scriptores, cedite Graii,
Nescio quid majus Sol opere hoc videat.*

Jamque aggressi essent Blauwii excudere, nisi responsum expectassent, num typi, ac chartæ forma placeat transmissa. Vix hæc lucem viderint, quin prælo subjecturi commentarios de Jure Belli, & Pacis; item *ἀνθολογία* tuam, & quæ alia voles. Diatriba de Antichristo paucis placet, qui quidem segreges sint ab Ecclesia Romana: usque adeo radices in animis omnium egit opinio illa de Urbis Episcopi, adversus Deum, & Christum, elatione, sæpe ut volunt, & clarissime scripturis prædicta. Sanè respiciens spatium omne ætatis antea, jam à prima penè pueritia, recordor sententia ea personuisse pulpita, nec preces publicas sæpius fuisse conceptas sine detestatione Antichristi Romani, & raris turbæ. Quorundam opinio est, ut vera diceres, non expedire, ut populus in eam opinionem veniat. Nempe non abeunt à notissimo utrique nostri, Bal. Lydio, *ἡ μάχη*, qui increpitus à me, quod inter multa verissima, quædam etiam falso impugisset Doctoribus Ecclesiæ Romanæ; ubi defendit ea quæ dixerat, *ἡ ἀπολογία* non reperit aliud, tandem eo se contulit, nullo cumque penicillo satis fœde Romanam Ecclesiam posse coram populo depingi. Mihi verò præstabat opinio, veritatem non egere mendacio, & manifeste fallis, fidem etiam detrahi veris. Quod Ultrajectini Voetii de Diatriba super cœna judicium sit, cognoscere satis poteris ex Epistola juvenis ad me, qui coram audiit docentem. Exemplum transmissi hac commodâ occasione: etsi fortasse res ipsa vix tanti, ut legere sustineas, videbitur. Mihi, & hæc quam proxime dixi dissertatio, & illa quam paulo antea commemoravi, &

aliæ mole exiguæ, pondere maximæ, plurimum placuerunt. Nec satis mirari possum, etsi divinum ingenium tuum non ignorem, quomodo in Illustrissimo illo onere, & ea salutantium multitudine, sufficias tam multis, iisque plurimum indictis, tum perspiciendis, tum nos, & alios docendis. Nec minus stupent alii: credo & mali, etsi dissimulent. Maximi Salmasii opus de fœnore Trapezitico, credo jam legeris. Non erit ad palatum, five Cloppenburgianum, five Voetii. Huic opus ipsum, illi præfatio respondet; sed neque ringi desinet sacer Exercitator; adversus quem, adeo multa asperguntur, sanè pererudita. Hæc sola nunc occurrebant.

Vale Illustrissime Domine, amicorum tuis meritis prime, & à me, & Coniuge, & omnibus meis salve.

Amstelodami,
clō Ibc xl.
xv. Junii.

Tui Illustrissimi nominis
cultor,

G. J. Vossius.

CCCLXXXIX.

Ludovico Crocio Ger. Jo. Vossius
S. P. D.

Summe vir pariter & amice,

PAuci sunt dies ex quo scripsi: tamen amor non finit ut hanc etiam commodam negligam occasionem. Obversatur semper animo vitæ brevitatis, & cum tot adversis confictatio: quæ non tacite innuunt, sed plena voce dicunt, Jesu, & sponsæ ejus amantes, dum vita divinitus conceditur, debere alios esse & solatio & ad durandum hortamento: quod non coram modo sermone, sed absentes etiam literis consequimur. Magnam quidem molestiam ex eo capio, quod qui reformatam Religionem profiteamur, tam simus deformes, nec vel veritatis satis studiosi, vel concordie amantes satis: verum alienam culpam nemo præstiterit, satis est, nos si nostram. Quare hoc solum agamus, ut omnia agamus non amore hominum, sed Dei & Christi: quem amorem depreciant, qui negitant eum secundum gradum aliquem reprobis esse cum electis communem. Credo jam videris veteris collegæ mei Heinsii ad novum Testamentum notas: fortasse & illa quæ à maximo Salmasio cum alibi tum opere de fœnore Trapezitico refelluntur. Atque (ut omnium fere expectatio est) idem suas ipse in N. T. novas edet. Verum ob parentis excessum, in Gallias ipsi proficiscendum.

Hæc res editionem annum facile, vel amplius morabitur, grande omnino opus futurum. In quo ut intelligo, comprobabit inter cætera, nihil Heinsio dictum boni quod aliis fuerit indictum; quicquid de suo attulerit esse falsum, sæpe etiam ridiculum. Scio te mirari, cum hæc legis; mirarer & ipse, nisi & max Salmasium nosses; sed tute ex opere memorato tanquam ex ungue leonem existimabis, mihi enim in toto hoc negotio nec feritur nec metitur. Optem ego ut concordibus animis eruditi omnes honori studeant divino, non suo, unde illa in loquendo scribendoque acerbitas multis. Sed-enim annis permultis mire Salmasius divexatus ab illo, quem, ubi improbo, reticere malo: præsertim cum sic quoque satis intelligar. Quæso per otium librum, quem dixi, adire grave ne duxeris: uti & præfationem operis Salmasii de modis Usurarum. Hic abrumpam, quia & is, qui literas feret, & vir quidam doctissimus, advenere. Salutem dices collegis doctissimis & clarissimis.

clō Ibc xl. iii.

Kal. Julias.

CCCXC.

Maximo Viro, Francisco Gomaro.

Groningam.

Vir undecumque maxime,

REDIT ad vos fratria cum filio; qua occasione volui ad Te pauca perscribere, de quibus hic inter nos locuti sumus. Video illam de filio, mirè esse sollicitam; & meritò profecto, si quomodo nunc in Academicis soleat vivere juvenus, cogitemus. Nec puto authoritatis satis esse in nostra hac ad compescendum adolescentem, si fortè, quod ne Deus finit, ab aliis seductus ad partem se applicuerit deteriolem. Plus mihi fiducia fuerit in te, & Nobilissimo Magduello, & Genero tuo. Ingenium adolescenti felix obtigit, & bona Indoles. Interim ut ætas ea, à labore proclivis est ad otium, subinde monitoris eget *ἐπιμνήσκου*. Qualis si obtigerit, nihil fore puto, quod magnoperè requiratur. Quod ad rerum mearum statum: spiritu suo solatur nos Deus, qui geminum rursus vulnus inflixit, unicam auferendo filiam, longè suavissimam, bonisque adeo artibus exultant; filium item ejusce ingenii, ac doctrinæ, quæ ex illius Velleio Paterculo satis relucet, ac luculentius se exerent, in Censorino, & Valerio Flacco, quos innumeris locis castigavit, &

& fratri Isaaco edendos reliquit. Te quoque afflixit Deus, auferendo Conjugem, quæ tibi ætate adeo provecta maximè auxilio esse poterat. Sic ubique fit voluntas Domini; qui solus novit, quid liberis suis conducat. Gaudio interea, quod in eadem urbe, tecum vivat Gener optimus, cum similibus morum filia tua: sed quia horum jam mentio incidit, non possum reticere, quod mihi & aliis etiam, his in locis, quandoque in mentem venit. Arbitrabantur illi mecum, non malè te familiæ, ac publico consulturum, si adhuc superstes cogitares, de Genero tuo Curatoribus Academiæ sic commendando, ut in Professorum adfiscatur numerum. Scis numerosam illi prolem esse, & quotannis gliscere; nec defæcato satis animo tractari sacra solent, ubi anxia rei familiaris cura ab iis avocatur. Honoris etiam accessione generosa mens accendi consuevit ad majorem doctrinam, ac nominis claritatem. Si aliter illi consulere non possis, quid si in eum transferas professionem Hebraicæ linguæ, vel saltem ejus partem? Ut si præcepta artis Grammaticæ, curiosè ac perspicuè tradat; Tu usum eorum, quod excellentius in sacris scriptoribus ostendas. Hoc vel tale quid, curæ esse velim, dum vita manet; quia ingrato vivitur sæculo, ut vix putem, si humanitus aliquid tibi contigerit, cura id Curatoribus fore, propter merita tua, licet majora quàm dicere possimus. Exemplum ex foceri familia capio. Non obolo ex publico auctior sum, propter foceri virtutes, & benefacta. Nec est, quod vel ob accessionem meorum laborum, quos totis jam 40. annis, bono publico summa cum fide subeo, melius secum iri actum existiment liberi mei. Verè nimis ille Veronensis, omnia sunt ingrata, nihil fecisse, benignè est. Primis ventis secundis in Gallias discedet Claudius Salmasius, ad familiam herciscundam; siquidem Parens ejus obiit, senator Divionensis. Eâ conditione ab Amplissimis Curatoribus dimittitur, ut redditum se promittat. Plurimum Academiæ Lugdunensem exornat, & ab eruditissimis quibusque, oraculi instar, consultitur. Equidem varia magis ac reconditâ ornatum doctrinâ novi neminem. Vellem autem non tam diu rei funebris argumento fuisset dissentum. Mallem dedisset commentarios in Arnobium, Conciliumque Illiberitanum, & quæ de primatu Urbis Episcopi scripsit. Quamquam opus hoc, dum is in Gallia erit, à Lamerio excudetur. Cætera nonnisi à reditu lucem videbunt. Uti & quæ commentatus est in Novum Testamentum. Magna horum pars refellet, quæ in S. Exercitationibus prodidit Heinhus: In his illa quæ

adversus Bezam differuit toto opere, propter quæ, & in Galliis esse audio, qui patrocini-um Bezæ suscipere volent, ferre nequeunt, quod religiosè adeo sibi caveat, nequid dicat adversus R. Ecclesiæ decreta; interim nihil pensi habeat, tanto conatu oppugnare Bezam; quem cum sæpè saltem verum pervidisse negare non possit, tamen ne in istis quidem, unquam nominare dignetur. Sed falli arbitror, qui, quod non nominet, aiunt à contemptu profectum. Potius fuit inde, quod sua etiam in R. Ecclesia legi velit. Nam memini eum & me commovere, ut relictis controversiis sacris, ea sola tractarem, quæ ubique legerentur. Quantula, inquiebat, pars est orbis, ubi Reformata obtinet religio? Literas etiam conspexi, Roma ab Holstenio, Vaticanæ Bibliothecæ Præfecto, exaratas, quibus monebatur, magis etiâ, quàm in Nonni Aristarcho fecisset, cavere sibi debere, nequid in Exercitationibus offendant, si Romæ sua legi vellet. Verùm quid alienus ad me animus pertinet, qui solum præstare meam soleo culpam? Vale vir summe, Affinis conjunctissime, deque me, innumerisque aliis benè merite. Uxor, & omnes mei, plurimum te salutant; uti & Nobilissim. Magduellum.

Amstelodami,
cl. Ibc xl.
xv. August.

Tuus totus,
G. J. Vossius.

CCCXCI.

Claudio Salmasio, Ger. Joh. Vossius
S. P. D.

Bibliothecam misisti nobis, vir nobilissime, vere ἀγαθὸν ἀγαθὸν ἀγαθόν, pro qua munificentia tanta gratias ago, quantas possum. Plurimum verò gaudeo, non modò, quod tam multa me doceas, ut & cæteros; sed etiam, quod tam illustribus ingenii doctrinæque monumentis plane triumphas de iis, qui hæcenus in eo sunt, ut omne nominis decus ereptum eant. Ac quantum video, non desinent spissis mendaciis traducere. Unde etiam est commentum illud de causâ itineris tui Amstelodamensis. O quanto mercentur Atrides isti, ut verum dicerent! Quanquam nec illud si foret, desinerent foliibus immensis de te mendacia spirare. Imo ne quidem si persuadere possent ut eo ires, quo Meurium fugarant. Multum me recreat, quod non revoces ista ad animum. Alioqui & ipse molestius nequitias istas ferres. De Theolo-

ego qui calumniæ tibi litein intendit, semper tale quid metui ex quo sua edi petiit. Novi ego mores talium, idque magno cum malo meo. Spero, imo confido, valido te esse stomacho, ut & hoc sis concocturus. Hoc si erit, virtutibus tuis facile superabis, quod boni omnes vovent: qualium longe major est numerus quam existimares. Id quotidie video, ut ex decrescente indies fama inimici tui (qui non definit concitare adversum te vel Acheronta ipsum, hoc est, quicquid διαβολική amat) non obscure colligere possimus brevi deserviturum id malum. Placet, quod pagella una altera Copriano occurreris. Fortasse tamen non inutile, quo jam te sponte propendere coram intellexi, si ubi Lutetiam Parisiorum veneris, ostenderis quam paucæ sint lectionis qui hoc quod docuisti universo Jurisconsultorum choro repugnare arbitramur. Tamen finem aliquem respondendi malevolis esse velim, quia id fiat cum dispendio literarum, si nimis sit diuturnum. Scis me ex parte scire, quam multa hæcenus indicta observaris, quæ adhuc domi premas; non quia inideas ea publico, ejus amore scripsisti: sed quoniam qui nomini tuo invident, calumniis suis avocando, tantum valeant, ut editionem eorum morentur. Vel ob hoc ipsum si odisse nobis Christianis quempiam licet, odio sunt dignissimi, qui tantopere incommoquant doctrinam studiis. Eruditissimum Crocii opus Blauwius se editurum recepit, simulac excusa erint Illustris Grotii in Novum Testamentum notæ. Hæ lucem videre possint intra tres menses, si cœpto pede pergant. Nam cum demum cœperint quando Hagæ una eramus, jam quadraginta folia sive, ut vocant, biniones excuderunt. Sed enim quid præter gentis tuæ humanitatem & eximiam indolem tuam impulit te, ut mihi gratias ageres, quod domo exceperim, quasi non meæ potius partes sint, gratias agere quod hoc mihi honoris habitum sit. Equidem magna anni parte vel sanguine aut affinitate junctum, vel quempiam aut in dignitate constitutum, aut eruditione clarum hospitem habeo: sed dicere hoc possum, nullo sic me hospite lætatum omni mea vita, quam magni Belgæ in Galliis, magni Galli in hac Belgica, quos ego dies Cressa, ut ille loquitur, nota soleo notare, & æternum meminisse juvabit, non me duntaxat, sed omnes meos. De famula tua, quasi molestiæ aliquid crearet nobis, quæso opinionem deponere. Nihil insolens vidimus. Pro itinere Gallicæ non desinet domus nostra facere vora, usque dum cognoverit vos salvos & sospites venisse in Gallias. Nec minoribus vobis prosequemur, potius credo majoribus, ubi in-

tellectum erit, vos reditum parare. O felicem & exoptatum diem, quando iterum alii alios complectemur! Uxor & mei mecum Conjugem tuam plurimum salutant.

Amstelodami, cId Idc xl.

v. Kal. Septembris.

CCCXCII.

Guilhelmo Grotio, J. C.

Hagæ Comitis.

Clarissime vir,

Planè dolet; quod cum tam opiparo à te convivio sim exceptus, nequidem licuerit, te frui familiarem in modum. Prope dixerim occupationibus istis tuis, quæ te inviderunt nobis, pessimè sit, nili multum tibi attulerint lucri. Nam hoc si est, caruisse horis aliquot malo, quam damno ut fuerim amore tui. Annumeravit mihi tamulus tuus, mei ut aiebat, cognominis, florenos centum quinquaginta sex, stuferos quinos. Receperam ante à Matre tua, florenos duodeviginta, stuferos quindecim, in universum tunc ex usura, floreni centum septuaginta quinque. Quantum sit reditus, centum florenorum in annos quindécim, quinis quotannis usuræ loco datis. Sed quod Parens tuus, me ignaro, in obligatione de semis, & quadrante, indignum erat amicitia veteri nostra. Quare recidendum, & Uxor, & Ego putavimus. Et nisi promptior tua fuisset liberalitas, amplius imminuissém. Sed occurrebat, fuisse centenos istos ablatos ex majori longè summa Ordinibus locata, qui quantum annumerent non ignoras. Commodè igitur hoc interpretaberis, quod vel obolum, usuræ loco receperim, præsertim, cum dimidium duntaxat fuerit meum, ut retuli coram. Mitto *ἀνδρόγαλον* Illustris fratris tui, & rectè facere conseo, quod malit excudi Pariliis. Nec enim Typorum venustate Blauwius noster unquam æquipararet. Notas N. T. præter Corfellium relegit Bremius, qui priori accuratior, & in iis, quæ literaturam tangunt, eruditior: solum hoc me habet male, quod operas dividunt, usque adeo festinante Blauwio, ut citissimè hac editione defungatur. Absque illo fuisset, putarne permissurum me fuisse, ut alius operæ hoc præstaret? Sed puto eos hebdomadis singulis, excudere solia, sive Biniones decem, vel amplius. Quid hic in occupata adeo vita, possim Ego, v. l. Isaacus meus? Præsertim quando hic suis, illisque fratris Gerardi, qui sua ei moribundus com-

commisit, sic premitur, penè dixerim opprimetur. In meis, quibus prælum adhuc ferret, vix binis par foliis sum, quaque hebdomade. Loquar tamen die crastino cum Blauwio, nec opera mea, vel meorum, ubi utilis esse possit, uspiam claudicabit; non modo, quia debitor sum virtutibus, & meritis fratris tanti, sed etiam quia literis meis promissi damnas. Uxori optimæ, & Matri venerandæ, Ego, uxorque, plurimam salutem dicimus, atque ita habet, nihil familia mea esse paratius, ad commodandum tibi, tuisque.

Amstelodami,
c1o Idc xl. iv.
Kal. Septembr.

Tuus totus,

G. J. Vossius.

CCCXCIII.

Joanni Ant. Vander Linden.

Vir Clarissime,

Sperabam pluribus nos ante abitum tuum colloqui posse, inter alia de Hefychio, ut penitus mentem tibi exponerem meam: Id melius quam literis potuissim. Sed cur compellere denuo non licuerit, sat gravis est causa, quam promissis. Quem enim magis paratus tangit uxorius, quam maritum? Jam spero prole sis auctus: aliter si est, (si sic las loqui cum illis gentium scriptoribus) facilem Illyriam comprecor conjugi, siue malis Junonem Lucinam.

Ad Hefychium ut redeam. Sperabam eum filii mei beneficio visurum lucem candidiorum. Nec tamen dissimulare possum, paulo id tardius fore, quia nunc totus est in Geographicis Ptolomæi conferendis & corrigendis. Imo & de Melæ Avieni Ruti, aliorumque editione cogitat. Hæc aliquid temporis auferent: ut fortasse Schotani V. Cl. editio lucem videre possit, priusquam hic satis sit paratus. Non abhorret igitur animus mittere exemplar quod petis: sed si jam editio sit in procinctu: præsertim si jam contextus partem deproperaverit typographus, sic quoque tempori mittatur, ut in notis quas subjunget operi, videat ecquid melius alteri observatum. Clarissimo Rigaltio mihi Onofandrum manu magni Scaligeri emendatum, idque ante annos viginti. Editionem alteram adornare dixerat mihi clarissimus Rutgerius, sed hæcenus nihil conspeximus. Nequid simile nunc contingat, cautio esse debet, præsertim cum non ignores scriptorem esse, qui eruditus sæpius sit consulendus. Nemo quid

rei sit te melius norit. Quare solum cognosce, quousque perducta sit egregii viri opera. Pro nuntio exsequar: si enim prævertere filium possit (& posse censeo) nolim peccare in commoda publica: solum metuo, ne spissæ res procedat. Jam anni triginta & amplius sunt quod clarissimus Heinlius promissit. Et multa ostendit mihi quæ observarat, verum aut valde fallor, aut editurus nunquam. De Clarissimo Schotano longe meliora spero, paucioribus, ut arbitror, dilento. Quare si intellexeris ex eo, jam jam edendum nobilissimum Grammaticum. nolim in me illi quicquam commodi claudicare: sin spissum erit negotium, quid impedit, quominus tum mittatur, quando res magis calebit? Interim domus meæ usui inferviet. Illustri Salmatio epistolam tuam mittam, necdum enim abiisse reor: secus si est, Lutetiam mittetur per primum tabellarium. Scripti nocte intempesta, toto enim die ex quo tuas accepi, respondendi otium fuit nullum. Schotani saluta meo nomine, ac dicas velle me omnia ejus causa. Si otium etiam sit & occasio commoda, Collegas salute impertias: in his summos viros Mokoski, Vedelium, Pinackerum. Winsemium, Cochium. Plures non ausim nominare, ne onerem te, velut saluigerulum quendam, qui melius tempora locare potest. Et tamen si mei res judicii fuerit, dixero non leve esse si amicis pareat, nos memores eorum esse. Quid magis decet eruditorum chorum? *Td. 752.*

Anno c1o Idc xl.
Pr. Kal. Septemb.

Tuus,

G. J. Vossius.

CCCXCIV.

Hugoni Grotio *Regni Suecici Legato, ad Christianissimum Regem.*

Lutetiam Par.

Illustrissime Domine atque Excellentissime,

Simulac tuos in 4 Evangelistas commentarios accepi, avidè eos legere cœpi; sed in hac occupatissima vita, nunc carptim, nunc sic, ut sæpius à lautissimis, ad quas invitares, epulis avocarer. Hoc unum ex præcipuis est malis meis: quod uno die decies, imo vices interpellor, atque ita bonæ mihi horæ effluant, penè cum veteribus dixerim, mala ætate. Tandem me accedit Blauwius, paratissimum se dicens ad eos excudendos. Placuit oratio. Volui igitur ei dare tertiam, quar-

quantamve partem eorum, quæ ad Matthæum annotati: idque eo fine ut me pascere reliquis, quæ reservaram domi; simul ut viderem quid foret, quod offendere aliquem, tam malignis temporibus posse arbitrarer. Sed negavit id posse fieri; quia tria simul prela hoc operæ esset occupaturus. Quare nec alterum totum me posse retinere. Proxima erat cura, ut quam emendatissime ederentur. Dixit se domi habere Aialam, cui negotium id esset satis curæ futurum, nec sese defore huic rei: tum autem, ultimam quam artifices illi probam vocare solent, perfectum iri à D. Corfelles. Negavit ille, tanto se labori parem: Eoque adscitus socius D. Bremius. Vides quam multi distineantur curâ hac, ut omnia sint correctissima. Et quæ vidi subinde, ea bonam spem faciunt, saltem pro Editione prima, ubi quam difficile sit, non aliquando ut aliquis dormitet, sæpissime in editione meorum sum expertus. Etsi quid humanitus erroris obrepserit, non poterimus propterea Corfello succensere, qui ex correctione nullum percipit lucrum; sed totum hoc lubens præstat, partim amore boni publici, partim veneratione excellentissimi nominis tui. De quo mihi optimè constat. Eo autem non leviter impellebatur Corfelles, quod negaret Typographus opus hoc, in quo tot Græca, & Hebræa intercurrerent, velle excudere, nisi tuo quis nomine, spontè se offerret, qui corrigendæ probæ ultimæ curam susciperet. Interea idem Corfelles, ut hodie ipse mihi retulit, metuit non parùm ne satis suam operam, licet indefessam, probet: sed inquit, si qui irrepperint errores, id tribui oportere nimis Typographi festinationi, tot simul prælis, uno opere distentis, sic ut sæpè uno die, senas etiam accipiat probas. Tum autem fieri quandoque, ut quæ ab eo, in margine sint correctæ, non emendentur à Typotheta. Quin ipse ei fortè non fuerit domi; (quod quandoque fieri est necesse) non expectari, donec redierit, sed Aialæ, qui ad manum, opera uti. Quid multis? Negat Corfelles, vel luculento se pretio deinceps adductum iri, ut tantum probarum, quinarum nempe, vel senarum, deinceps, uno suscipiat die corrigendum. Sufficere singulas occupato homini; præsertim quando canis, quod dicitur, festinans, parere cæcos solet catulos. Hic ecquid ab eo *ὑπερβολικώτερον* dicitur, dicere non est meum. Vir interim mihi bonus videtur, etsi non *πολιτικός*, saltem tanti, ac meritò virtutum possides, nominis amator, & cultor. Ne illud quidem dissimulandum putavi, aliquando, ut aiebat, culpam videri esse à festinatione, vel ejus quo uteris librarii, vel etiam tot, tantisque negotiis distenti autho-

ris. Exemplum unum alterumque, quod animo potissimum occurreret, afferebat. In Matth. l. 25. *ἔως ἔ.* Negationem banc de tempore ante partum nihil affirmare; sed de tempore posteriore: multis exemplis, ab aliis est demonstratum; quibus addam locum, qui infra est: ubi rescribendum, de tempore post partum, & de tempore priori. Ac ni fallor, sic se reposuisse aiebat. Alibi, inquit, ubi sermo de Josepho Arimathensi, manu propria, addideras, *Imitatore Sammelis*: hic ille non dubitabat, quin voluisses, *Simeonis*, nempe justii illius, qui expectabat liberationem Israelis. Rectène, an secus, sic correxerit, melius scirem, si codex tuus fuisset ad manum. Hæc negabat se dicere, quasi plus sapere vellet, qui mortalium nemini plus, quam excellentissimo nomini tuo tribueret. Sed ut viderem, si fortè festinatione erret corrector, ignosci oportere, cum neque authores, dum festinant, attendere ad omnia valeant. Præterea narrabat se literis commonitum, ut si quis scrupulus incidisset, me compellaret. Id inquit planè *ἀδύνατον*, quando tam longè habitans à me, non possit ire redireque intra horæ spatium: tum autem non permissurum id Typographum qui moram hanc non ferret. Postulavi igitur à Typographo, ut saltem transmitteret mihi quæ jam edidisset; ut per otium videam, ecquid offendam, quod in edendis, vel erratis debeat commoneri. Nihil tamen fiet, quin prius tuum judicium de istis cognoro. Fortasse jam videris, quæ adversus diatribam de Antichristo, scripsit Mareschius. Quorum instinctu id fecerit, facile potes cogitare. Præfatio planè est virulenta. Est is Mareschius Pastor Sylvæduensis, & ibidem Theologiam proficitur. Ut magis opus redderetur exosum, præfationem sic erat exorsus: 'Nuper prodixisse opusculum de Antichristo, eo edente, qui & Crellii, & Volkellii Socinianum librum edidisset. Sed Jansonius, quia jam Blauwiis est reconciliatus, noluit sic excudere, ne prior eos læsisset, vel periculum creasse videretur. Itaque hæc Mareschius, si sua à Jansonio vellet excudi, adimere est coactus. Super duobus præcipuè erit cogitandum. Unum est, quomodo filius peccati atque perditionis Caligula esse possit; cum Epistola ad Thessalonicenses utraque scripta sit, postquam Apostolus fuisset Thessalonicæ, ut ipse Apostolus indicat. Thessalonicam autem venerit demum anno Claudii XIII. ut ex Actis cognoscere est, cap. XVII. & tota temporis serie, quæ in iisdem Actis antecessit. Alterum est de nomine *ΟΤΑΠΙΟΣ* ubi C non potest aliud notare quam ducenta. Nam *ἑξήμιον* & valet quidem VI. sed in literis non habet locum, eoque in *ΟΤΑΠΙΟΣ*, nequit C haberi pro *ς*. Succur-

rent

rēt fortasse, quibus occurrere utrique valeas; sed ut aliter esset, in argumento tam obscuro, pulchrum fuerit conjecturas suas doctis expendendas dedisse: si quid aliis præterea viderit quod magis probetur, laus ea sit publica. Tantum absit calumnia, malum diabolicum: adsit amor Christianus; qui nunc toto prope Orbe Christiano exultat, ac nusquam difficilior inventu, quam apud eos, qui inimiciter adeo veteri Ecclesiæ adversantur, nec quidquam, nisi novellum probant. Intellego statuisse Blauwios, diatribas illas seorsim editas, subungere Notis in IV. Evangelistas. Verum quid si dispiciatur prius, quæ inimici contra sint allaturi. Fertis eorum seges his terris, sub duobus, vel tribus qui pariter plantant, & irrigant. Si non ante Natalem Domini, ad eas se accingere diatribas Typographus possit, fortasse sat temporis habeas dispiciendi, quid mutatum, vel additum velis; sin illo festinante, excludaristemporis angustia, possint post sex septem menses adjungere, primo solum foliolo mutato, quod additionem diatribarum testetur postmodo. Quod ad nostra attinet, jam menses sunt quini, vel plures, quod Typographus in iis cessat. Primò fuit, quod concinnandi essent indices. Id satis molestum fuit negotium homini sic distracto. Ubi ego paratus fui, (id jam ante sex hebdomadas fuit) maluerè progredi in tuis. Nec displicuit, quia interea paulum mihi licuit respirare, (ut cætera mittam) salutantium turba sat impedito. Tamen aiunt Blauwii, se meis etiam hac ipsa hebdomade vacaturos, ac breviori quam existimem spatio, omnia perducturos ad finem. Nam interesse sua, ut tandem opus hoc prodeat: cujus mora diuturna multum damni fecerint. Jam menses sunt aliquot, quod Toparchæ cujusdam uxor, femina cordata, opulenta, *amis*, mecum locuta, de Equestri honore acquirendo in Galliis marito suo. Occasio inde erat, quod non aliena esset in domo Dom. Arlandervanii. Quod ipsum tamen addo, illâ ut metuo invitâ. Planè enim urisit, ut præterito prorsus, cujus id nomine exposceretur, duntaxat exquirerem, utrum, Illustris & excellentissime Domine, operâ tuâ, hoc honoris maritus possit adipisci. Id ego rogare per literas neglexi, quia alia magis animum meum occupant, quam curæ istiusmodi. Postquam tamen aurem item mihi vellit, puduit oblivionis, & negligentiae; nec ultra dilatum hoc negotium duxi.

Multum interea metuo, ne frustra sit; propterea quod invitatus scio, in ea dignitate constitutus, super talibus, nihilque ad Reip. utilitatem pertinentibus, negotiis aliquid facessas, quibus debere nihil malis. Verum si ut

puto, non fuerit ex honore tuo, homini huic, Religione Pontificio, cæterum optimo, tui, tuorumque, nostri etiam amantissimo, eam quam ambit operam præstare; proximum erit ut perscribas viam aliquam, quâ id consieri optimè possit. Id ipsi dixi; sed videbam, malle illud honoris debere excellentiæ tuæ, quam alteri; aiebat non profecto quod minori se id pretio, ab illis quos compellares consequi posse opinaretur, sed quia honoratius id marito sit, sibi fore arbitrabatur.

Illustrissimæ D. Heroinæ Conjugi, quam ex Zelandia jam salvam, ac sospitem appulisse confido, salutem plurimam meo, & meæ nomine dicito.

Amstelodami, clō Ixc xl.

v Kal. Octobr. Styl.

Gregor.

Accepi à fratre jurisconsultissimo, de Religione Christiana opus aureum, cum accessione Notarum, quæ plurimum illud illustrant, multaue etiam doctissimos docent. Etiam in perhonorificam nostri mentionem incidi: quo nomine, excellentiæ tuæ debeo plurimum, & maximas ago gratias, quod non desinas in loco tam sublimi, prosequi me affectu veteri, vel etiam majori. Vale Decus sæculi, & sic raptim scribenti, omnia prout in buccam veniunt, vel mentem potius ignosce, prout hætenus soles.

CCCXCV.

D. Guilielmo *Archiepiscopo* Cantuariensi.

Reverendissime in Christo Pater, Domine illustrissime,

ACcepi ab affine Junio geminum munus tuum, auro contra non carum, quippe utrumque aureum totum, & illud, inquam, Constitutionum ac Canonum Concilii Cantuariensis ac Eboracensis, & alterum collationis inter te, tum Episcopum S. Davidis, & Jesuitam Fisherum. Utrumque me iudice, satis fuerit, saltem esse debet, calumniis retundendis, quæ adversus Ecclesiam Anglicanam, ejusque Antistites, Te imprimis, Reverendissime Domine, sparguntur à malevolis, in unum hoc præcipuè intentis, ut in odium adductis primitivæ Ecclesiæ & Dogmatum

tum & Constitutionum tenacioribus, sufficiantur ocyus, qui juniorum omnia placitis metiantur. Mihi quidem utrumque opus inter *κειμήλια* semper erit, & tantillo tempore quo habui, non leviter usui fuit, malignioribus frænandis, modestioribus firmandis. Sane longè alii rumores differebantur, quam his libris edocemur. Vellem, redeunte ad vos affine, per eum mittere licuisset operosissimos labores meos de Deorum Rerumque Natura. Verum is aiebat, se promissis obstringi, quo minus diutius hic liceret commorari. Indices jam omnium librorum sunt concinnati; in quo non leve mihi tædium subeundum fuit. Solum opus excudi eos, quod mirè avert Typographus longioris moræ & ipse pertæsus. De cæteris meis rebus quid dicam? Pro me melius omnia referet Junius, qui vivæ erit Epistolæ loco. Interea nos non desinemus vota fundere pro serenissimo Domino Rege, incolunitate tua, & Anglici Scotique Regni concordia; quod tanto faciemus impensius, quanto magis Regni utriusque motus dolemus: De quibus aliqua attingis literis tuis longe humanissimis, & ante triduum acceptis (pro quibus quas possum, & debeo, gratias ago) sed minime leviora sunt, quæ post scriptas tuas accidisse ex nunciis haud vanis intelligo. Sed nondum imminutum est brachium Domini: qui licet peccatis nostris merito sit iratus, tandem tamen spero miserebitur, ac lachrymas nostras in gaudium convertet. Tempus ei præfigere non possumus: solus enim novit, quando quid expediat nobis. Attamen non diu abfore illud, magis ex divina bonitate, quam animis tantopere exulceratis sperare ausim. Ac propterea iterum iterumque Deum Opt. Max. rogo, ut errantibus, ne quid gravius dicam, mentem inspiraret largiorem. Te verò, Illustrissime Domine, Ecclesiæ Anglicanæ bono diutissime sospitem conservet.

*Amstelodami, post.
Non. Octob. St. Greg.
Anno cło Ioc xl,*

Reverendissimi & Illustrissimi tui nominis cultor æternum devotus,

G. J. Vossius.

CCCXCVI.

*Clarissimo Viro, Francisco Gomaro,
Ger. Jo. Vossius S. P. D.*

JAM anni sunt triginta, quod Leidâ excur-
rebas Dordrechtum ad rem herciscundam, inter hæredes Junianos. Eo tempore memini tibi, præsentem me, sermonem fuisse cum Reverendiss. D. Compatri meo Jo. Becio de permissionis natura: Tu mecum & satis diligenter de Prædestinationis objecto. Fluctuabat eo tempore nonnihil animus meus, in hoc difficili argumento. Persistebam in ea sententia, quàm à Præceptoribus, præcipuè socero Junio, teque acceperam; in qua etiam multum firmabat non indiligens B. Augustini, & Prosperi, aliorumque autoritas; sed imprimis aliquot sacræ scripturæ loca, impensius mihi favere visâ sunt sententiæ illi quâ prædestinatio creditur, fide, & perseverantia prior; non prævia ejus conditio. Sic cum affectus forem, non satis tamen videbam, quomodò eluctarer à quibusdam, si vulgatiorem de prædestinationis objecto sententiam sequeretur. Commodè sic, Deo volente, evenit ut quemadmodum dixi, Dordrechtum venires, ac plusculos illic hæreses dies. Ibi demum mentem tuam, quàm aliqui referre potius tentârent, quam exposuerant, assequi cœpi; nec postea deserui. Ita mihi visum solidè occurri istis, quæ objectari viderem, scrupulumque animo iniecerant meo. Gaudebam etiam, quod viderem utcumque B. Augustinus, Prosper, & qui campse sententiam profiterentur, non iisdem vocabulis uterentur, idem tamen voluisse, nisi pugnare eos secum velimus: quod cur statuamus, causâ nihil videbam. Quin planè æquum censebam, ut quales nobis lectores exoptamus, tales nos præstemus, tum Junioribus tum Antiquis. Interea subinde mihi, cum hominibus eruditis sermo de hoc argumento fuit; sed paucos reperi, qui satis caperent mentem tuam, D. Walæo, & præterea uno altero exceptis. Ac profectò metuo, ne plerique ex iis, qui proximè sic adversati, nondum percipiant satis, quid voles: magisque ex suis hypothefibus judicium, quam tuis ferant. Parum alioqui credibile est, illos adeò durè, asperèque acturos adversus te, cujus sententia non uno nomine mitior est, & gravioribus subnixâ argumentis; utcumque vulgò longè aliter feratur. Eo laudabilior fuerit opera, si per otium fusius aliquanto Theses tuas diducas, vel Thesium singulis aliqua subdas, quæ lucem afferant. Omnino enim altera sententia non receptior modo,

modo, sed simplicior, iis saltem qui, ut ait ille, numero Philosophari, vel φιλοσοφῆν potius amant. Nam homini accuratori, si penitus rem omnem introspicere volet, non obscurum fiet, longè solidius, sic objectum statuendo, tecum occurri istis, quæ adversus illam sententiam afferebantur à doctissimo Arminio. Quamquam verò sic existimo, non levi te affectum injuria, imo eo graviore, quo ætas ingravescit magis: tamen multa censeo fratribus condonanda, propter communem servatorem Christum: qui quid nos docuerit de remittendo, neminem fugit; tu autem propter sponfam ejus, Ecclesiam, quam abundè laceram, scindi ulterius miserum sit. Malim arma converti in Romanam Ecclesiam, & illos qui sanctæ Trinitatis dogma, & Christi satisfactionem, tanto studio impugnant. Quæ omnia infinitis partibus, melius me intelligis. Et tamen perstat animus, ut aliquanto, melius non dixerò, sed aliquanto tamen, talium captui quibuscum est negotium, accommodatius, hoc tractes argumentum. Non ignore ætatem, & occupatissimum vitæ genus; sed subactum, cum in aliis, tum præcipuè infelicitate temporum, in hoc argumento, judicium, magnopere imminuet illum laborem. Nec si Deus ad meliorem evocarit vitam, quod ut serum sit exopto, alterum repertum iri existimem, qui tuam te melius sententiam exponat. In quo quantacumque sit modestia tua, facillè te mihi adfensurum puto. Non defuturus Typographus, vel his locis: & omnino expedit, sciant omnes sententiam tuam non repugnare Confessione Belgicæ: (quin & ego quidem semper istam hæcenus cepi) illam potius illustrare, dogmaque acutioribus alioquin horridiusculum mitigare, ac mollire, mirandum in modum; utcumque nonnullis, vel obtusioris pectoris, vel præjudicio laborantibus, prima facie aliter videatur. Nempe non attendunt à Confessione Electionem attendi, per modum executionis, à te, ordine naturæ, per intentionis modum. Dissimulare interim non possum, quid his diebus amicus, vir doctus, dixerit de hoc negotio, non improbari, quod eam sequaris sententiam; sed quod adversantes damnes: quasi diceret, succenseri, non ob falsitatem doctrinæ, sed ob acrimoniam censuræ. Equidem scio id in Romana Ecclesia observari ut in his discrimen faciant: quomodo damnarentur in ea, qui Thomistarum damnarent opinionem, de B. Virgine in peccato originali concepta. Quomodo scis item Bulla Pontificia damnatum Michaelē Baium; non quia ejus sententia id mereretur, sed quia improbari nolent aliorum opinionem. * In Baii dogmatis erat, Pelagii esse errorem, posse peccatum

vitari solis viribus Naturæ; & quædam alia hujus generis. Hoc aliorum quoque, è Pontificiis quorundam judicium est: qui tamen damnatos se cum Baio negant. Nempe quia non aliorum opinionem condemnent. Sic illam Pii V. & Gregorii XV. bullam intelligere jubent Toletus, Suarez, alii. Sed quid ista adversus te, qui non hæreseos accuses dissentientes, uti Baius, qui dissentientes aiebat, cum Pelagio hæretico sentire? Quomodo modestius poteras dissentire, quàm isto modo quo scribis? Sed sic dum me diffundo, nonnihil otio abutor meo, magis tuo: Quare hic sisto. Pro summo affectu erga Juniam asfinem, & prolem, ego & conjux gratias agimus, quas debemus, vel saltem quantas possumus. Pro genero tuo pauca scripseram; sed ex iis quæ scribis, facillè video, nihil esse hoc tempore movendum; ne dum pro tuis adlaboras, prolis alienis, & male volentibus; magisque oblis rebus tuis. Sanè quod tu metuis, id ego paucis hisce mensibus expertus sum, in negotio tam simili, ut vix ovum ovo similis esse possit. Longo tempore, magnoque molimine quædam movebam, idque ut videbatur applaudentibus, quorum ea res in manu erat. Sed in *Δίσει* effeci quod volui: planè autem Vulpiones illi oviculum hanc (licet aliud sonet cognomen meum) ἐν *ἰσοδίσσει* elusère. Vides ut nesciam vulpinari. Nam istorum mores, si præcissimè, operæ pepercissimè. Nunc frustra mihi multæ bonæ horæ abierunt. Verùm quid mea? Nondum mihi omnium, ut puto, dierum folles occiderunt. Dominus providebit. Cui te, tuosque, ac me etiam, meosque commendo.

Amstelodami c1670.

x. Kalend. Novemb.

CCCXCVII.

Jo. Rod. Wetstenio, Græcæ Linguae
Professori, S. P.

NON diffiteor, doctissime Wetsteni, me tertiarum demum Epistolarum tuarum, vel ut te video existimare, quarum respondere: sed enim hæc querimonia tibi communis est cum plurimis, quando intra hunc trisquiannum nec decimarum eorum parti respondi, qui ad me scripsere. Itaque reposui ingentem Epistolarum vim, quibus adhuc deberem responsum. Ex primis es, cujus literas in manus cepi, ut tandem officio satisfacerem. Nempe inter illud temporis spatium non multum licuit sol-

licito esse de hoc literarum commercio. Scire enim te velim, hoc anno meo climacterico raro me bonâ fuisse valetudine, bis etiam periculose ægrotasse: semel initio ejus, item ejus exitu. Præter alia me afflixere nephritis & morbus colicus: quos morbos non perferam antea: & suaves medici jubent me optima in posterum sperare. Compluria enim exempla se nosse aiunt eorum, qui eos post climactericum, si antea nunquam, nec deinceps sint experti. Bono igitur animo sumus, mi Wetsteni, nec malo futuro, male si erit, quia nihil mali bonis. Nec illud seu malum, seu bonum dici debeat (sed bonum potius, quia bono nostro cœlestis pater immittit) in morbo meo sitit. Et uxor vehementer ægravavit: vixdum convaluerat, in morbum incidit filia unica, literis & bonis artibus instructa. Quam Deus eripuit nobis, grande solatium nostrum, sed præcipue uxoris. Vix hebdomas erat, cum meus Gerardus, delictum illud meum, morbo arripitur. Exanthemata erant, quibus ut ante foror, ita & ipse excessit. Utrum ejus Velleium videris, nescio: reliquit & castigationes in Valerium Flaccum, ac Censorinum, quas propediem lucem puto visuras. Gravis etiam morbus Matthæum semel iterumque invasit. Is est, qui Annalium Batavicum edidisset libros V. & intra hebdomadem alteros quinos prælo committet. Quid cætera memorem, mi Wetsteni, & mire ris temerariam non negligentiam duxero, sed cessationem. Vix dicere possim quam parum processerit ob ista opus meum, quo prælum antea fervebat. Est hoc de origine Idololatriæ ac progressu, & naturâ mirandis, eorumque causis & progressu inde ad causam principem, naturæ auctorem. Brevis si malis, est de Theologia Gentili, & Physiologia Christiana; sed ecce brevissime, de natura Deorum & rerum. Valde incusor ab Typographo, quod magno ejus dispendio, tarde adeo prodeat hoc opus; magis incusaret, nisi fortunam domus meæ nosset. Spero interea, intra menses tres, quatuor, duo volumina, quorum utrumque binis constet libris, lucem esse visura; sed de rebus meis abunde. Venio nunc ad illud de quo magis nosse aves. Equidem nihil magis exoptem, quam ut Centurias Magdeburgenses edere possim, cum brevibus nostris notis. Præclarum est opus; sed est, ubi aliquid ab Centuriatoribus illis datum affectæ & anticipatæ opinioni: homines enim erant. Est ubi humanitus error obrepserit, præcipue istis, quæ dies postea docuit, at à scriptoribus antiquis, qui tum temporis nondum viderant lucem: vel ubi doctissimi homines in scriptoribus jam ante editis locum esse corruptum observarint. Plane spissum

hoc Ecclesiasticæ Historiæ negotium est, multis vel tenebricosum, vel spinis oblitum; sæpe in rebus meis afflictis scribere volui, me provinciam hanc suscepturum, quam deposcerer; sed semper resiliui, cum viderem eam rerum mearum faciem, ut nihil promittere auderem. Juvenes esse *evangelistas*, magni illius Stagyritæ est assatum. Sed senecioni mihi idem hætenus fuit animus. Verum tot incurrentibus adversis, nihil audeo polliceri. Quamobrem nihil æque exopto, quam ut alius minus negotiis distentus, viribus etiam animi corporisque florentior, hoc suscipiat negotium. Is esto, qui hoc saxum diu jam volvit, vir clarus Ludovicus Lucius: quem ex scriptis jam ante vicenos novi annos. Nulla vero libentius legi quam quæ adversus Socinianos editavit, manibus enim pedibusque obviam eundum Sectæ, usque adeo & Christi naturæ meritoque & veteris Ecclesiæ dogmatis adversanti. Ad Theses meas Theologicas quod attinet, excusæ vel potius recusæ sunt Oxoniæ; sed jamdiu est, quod & illa sunt distracta exemplaria. Quare efflagitant plurimi, ut novam procurem editionem, dissertationibus variis adjunctis, quæ necdum lucem viderunt, atque jam à me scriptæ & viris eruditissimis visæ ante annos viginti. Quid Vossius tuus de se spondeat, dum nihil illi otii est ab amicorum negotiis, præterquam nocte intempesta, qua & ipse has literas subito exaravi, ne amicissimo viro injurius viderer? Præter præstantiss. D. Lucium nomine etiam meo saluta pulchram Buxtorfii animam, magni parentis prolem præclaram.

Amstelodami,
clō Ioc xl. iv
Kal. Novemb.
Styl. Greg.

Tuus omni officio,

G. J. Vossius.

CCCXCVIII.

Joanni Beverovicio *suo* G. J. Vossius
S. P. D.

Vir Clarissime,

SCio jamdiu esse quod promiserim gratias me acturum tibi pro munere de eruditis sceminis: quod magnopere me delectavit. Atque isthoc quidem quod dixi, pollicebar, priusquam eo nomine obstringerer. Nempe ut credere aliquis possit, quo celerius animum meum pascere epulis inemptis. Quicquid de isto sit, ab eo tempore, quo dono isthoc opus misisti, filius strenue: non tam oblivione ulla, quam quia arbitrarer cessare aliquantif.

tisper posse hoc literarium officium nostrum in tot adversis ; præcipue morbo meo gemino , & conjugis , & liberorum , & ex hisce etiam mortibus suavissimi Gerardi , & pro sexu non inferioris Joannæ , unicæ filiæ meæ . Hanc taciturnitatem nostram minus te mirabitur nemo , qui scias quam alioquin etiam negligens in epistolis esse soleam . Hoc offendit non paucos : non te Clarissime & Amicissime vir , ut satis inde video , quod nihilominus mittere volueris Dordrechtum tuum , plerorumque liberorum , quos partim habeo , partim habui , natale solum , ut parentem meum mittam , quem ea in sacris doctorem habuit , & matre mea defuncta , alteris nuptiis non indecori familiæ innexuit , ut me quoque taceam , qui pueritiæ meæ studia illi debeo , & fortasse plura , quam acceperam , refundere sum conatus . Quorum ut video , ne tu quidem posteritatis pateris esse ignaram . Nempe sic stat sententia , quantum colligere possum , nullæ ut ad me , vel in publicum potius , chartæ prodeant tuæ , quæ non perhoneste meminerint veteris præceptoris : qui tamen quando tua legit , & se discipulum lubens agnoscit tuum . Atque illum affectum cognovi , ex illis etiam quæ decertata inter te , summe vir , & πάλιν Salmasium . Huic te respondere scribis , sane magis sic elucebit veritas , sed alternatio sit non altercatio , de quo plura scriberem , nisi probe mihi notum esset , quanti virum facias ; quantopere etiam improbes Coprianæum & similibus scribendi morem . Vale vir præstantissime & amice , atque intra unum alterum mensem , opus nostrum de Gentili Theologia , & Christiana Physiologia expecta . Jamdiu prodiisset nisi & me valetudo mea meorumque impediisset , & typographus magnopere moraretur , qui sepositis nostris totus est in edendis quæ illustri Grotius in quatuor Evangelistas pererudite elaboravit . Spero ea ante Kal. Januarias lucem visura . Eximio Colvio , & quos alios nostri scis amantes salutem plurimam dicito .

Amstelodami cId Idc xl.
post. Id. Novembris.

CCCXCIX.

Georgio Ratallero Dubletio *Senatori*
supremæ curiæ.

Nobilissime, Amplissimeque vir,

Vicinum habeo indolis optimæ, honesti nominis, & ingenii industriæque minime expertem, quique adolescentior denis pluribusve annis, varia loca, præcipue Germaniam & Sueciam lustravit. Nomen illi Danieli Giot: patria Amstelodamum, unde & parentes tam ejus, quam conjugis, & hi & illi bene semper audierunt. Is subinde domum venit nostram, inque morbis liberorum meorum præ aliis plurimis fidem, amoremque, & noctu excubando, & aliis officiis comprobavit. Hac fiducia non dubitavit à me exposcere, ut quandoquidem vacaret prætura, sive Baillivatus Bevervicensis pagi, vellem se commendare tibi, quicum mihi amicitiam esse veterem ignorare non potuit, qui liberis tam familiariter uteretur. Ego vero maluisssem quidpiam petere, ubi suffragio proprio aliquid sine incommodo tuo posses, quam ubi quis commendandus esset alteri: quod sæpe non possumus, (in me ipso expertus loquar) sine opera molestiore, ingratioreque. Verum cum virum honestum esse cogitarem, & parem muneri quod desiderat, non potui non despicere, ecquo juvare possim. Frontisne mollitiem dicam, quod negare amicis familiaribus nihil sustineam, an impudentiam, frontemque perfrichim, quod illum ad te mittam, ut auxilio vel si minus possis, consilio jues? Id mihi gratum erit, ne putet, mihi affectum duntaxat in labris natum, sed nihil interim incommodare tam occupato, & honorato velim. Videbis ipse melius, quid non sine dispendio possis. Scribo hac de re etiam, sed paucioribus, ad equitem D. Grafvinkelium: qui sine dubio non parum valet, & ut confido, prorsus etiam volet, apud Nobiliss. præstantissimumque D. Basium avunculum suum D. de Harincaspel. De his satis: præsertim quando tempora, quibus vivitur, cogitamus; nam multum metuo, ne irritum sit hoc totum negotium, ob copiam (uti reor) competitorum; quorum aliqui vel gratia, vel pecuniis possint amplius. Etsi nec Giotto animus deest, vel facultas, pro binis spondendi florenorum nostratium millibus. Sic ipse retulit mihi, cum aliquis objectaret, quid nunc obtineat. De rebus meis nihil habeo, nisi spisse procedere commentarios nostros. Dixeris nihil superesse, præter præfationem,

ap-

appendicem minutum & luculentos indices. Quæ an ipsa vix duodecim conficiant quaterniones, quantum conjecto, fateor: & addo, potuisse ista excudi, intra menses duos, sed enim præla jam defudant Grotii annotatis in N. Testamentum. Atque adeo in his edendis maturant, vel festinant potius, ut existimem, quaque hebdomade, non minus quam sex folia, (in significatione qua nostri *bellen* ex pellium voce nuncupant) excudere, plurium typothetarum opera, opere in uno occupata. Sed non mediocris hic metus meus, ut hic quoque locum sit habiturum vetus illud, quod de canis festinantis cæcis catulis dici solet. Urgeo subinde mea, sed respondent, cum sæpe eos sim moratus paratissimos, æquum videri, ut nunc moræ aliquantum ipse perferam. Et facilius sum hac parte ob causam quandam, quam me tacente etiam optime intelligis: nec alia ratio est, cur hæcenus non responderim postremis literis tuis. Cæteroquin scias nihil me præfaturum operi, nisi consulto Nob. Amplissimoque regni Anglici Oratore Boswello, cui quæso quando otium erit, pl. & amicissimam meo nomine salutem dicito. Vale.

Amstelodami cId Idc xl.
Nonas Decembris.

Tuus tuo merito,

G. J. Vossius.

CCCC.

Nobilissime Amplissimeque Dubleti,

Postridie Kal. Januar. an. hujus cId Idc xli. unde auspiciatius ordiar quam à voto? Id vero facio lubens meritoque; Deumque oro, ut tibi tuisque omnia succedant, non dico ex animi sententia (nec enim scimus quid expediat nobis) sed prout maxime Deus sensit conducibile esse animarum salutem. Hoc patris cœlestis iudicio fretus, facilius multa ut debeo perfero adversa: ac magis magisque in eam adducor sententiam, ut credam sospitorem nostrum in precatione ea quam edocuit Apostolos, non iussisse ut terrestribus panis peteretur, sed cœlestis: non quasi nefas putem expetere illum, præsertim ubi defecit: sed quia existimem Christo apud Matthæum fuisse propositum animos nostros à terrestribus, de quibus usque adeo solliciti sunt, ad cœlestia attollere. Atque cursum animare debet quod promittit salvator, non si cessamus terrena exposcere, eo nos iis carituros: sed cum nobis curæ sunt cœlestia, & ista votis assiduè flagitemus, Deum sponte

nobis largiri velle, quæ ad vitam terrenam necessaria erunt. Præter ista quæ dixi, & plenius precationi dominicæ apud Evangelistam subjunguntur, & complurium sanctorum patrum auctoritatem, qui similiter sentire, & vocem ipsam *Θύμης*, quæ non alium panem signare potest, quam *Θύμης* *βίης*, valde etiam in hac sententia firmat series ipsa precationis. Quid enim convenientius quam ut duo rogemus ista, ut bona consequamur, & simus immunes à malo? Bonum spirituale, tum finem attingit, tum viam, five ut loquuntur in scholis, media ad finem. Finis est gloria Dei, eoque poscimus ante omnia, sanctificationem nominis divini. Via complectitur hæc tria; primum, oblationem spiritus sancti, unde petimus, ut veniat ad nos regnum spiritus, & verbi divini: deinde operationem ejusdem spiritus, per quam voluntatem facimus Dei, non nostram; denique conservationem spiritus ejusdem, ac per eum perseverantiam nostri in fide & sanctimonia, quæ per panem futuræ vitæ indicantur. Obiiciant huic sententiæ adversarii, si per panem intelligamus alimoniam spiritualem, *συντήρησιν* secundam petitionem & quartam. Sed hoc non dicerent, si cogitarent discrimen Baptismi & Eucharistiæ, ac Christum utrumque instituisse Sacramentum. Mirro alia quæ eos refellant. Ad immunitatem à malo venio, quæ respicit malum præteritum & futurum. Ad prius pertinet, ut remittantur delicta, quæ jam commisimus. At posterius, ut ne Diabolo permittatur tentatio & victoria de nobis. Ubi una erimus, paucillum super isto si vacabit dissertabimus. Equidem cum primo calamum in manus sumerem, non putabam me isthoc argumentum, & tam fusè, ut nunc, tractaturum. Sed facilis ad amicum tantum (uno trium, quibus pro rebus humanis valde mihi placeo) & occasio se scribendi offert, & argumentum. Nec negare tamen velim, fortasse me nihil fuisse scripturum, nisi Guiottus noster rogasset, ut aliquid ad aliquem exararem, quod ex re sua foret. Satis egi, eoque minus poenitet, quia sic spe video bona, quod luculentum tui & aliorum affectus indicium præbet. Bis locutus sum, & una mecum collega meus Barlæus, cum Domino de Heemsted; is omnia prolixè pollicitus: sed volebat ut Guiottus serio secum perpenderet, num hæc conditio satis sibi conveniret, quandoquidem, si non Beverovicensem, sed alteram consequeretur, à Miropio hæcenus administratam, periculum foret, ne quandoque ad Dunkerkanos auferretur. Noster metuebat, ne hæc eo diceretur, ut absterretur, & Olikannio, vel alii faventior foret. Interim ut

ut dixi, & mihi & Collegæ large promisit; & quia Collegæ memini, scias & tertium additum hodie Cabeliavium, nepotem ejus Cabeliavii de quo in Historia Borrii an. c15 15 lxxxvii. orationem inauguralem hodierno habuit die: scripsi post duodecimam nocturnam. Et scio longiores non exposcis, five quia satis occupatus, five quoniam quod omnes jubent, parcere me etiam valetudini meæ voles.

Amstelodami, c15 15c xli. diem quid addam?
nolo videri obliuiscus ejus quod initio Epistolæ scripsi. Quanquam si hæc culpa est dicenda, nec sic satis vitarim: nam & annum à me expressum nunc in mentem venit.

Tuus tuo merito,

G. J. Vossius.

Filii Matthæi alter Batavicum Annalium tomus jam traditus est typographo; uti primus de domo Egmondana, ita hic futurus de Hannonica, & tertius de Bavarica, quartus de Burgundica. Mitto de reliquis.

CCCCI.

Hugoni Grotio.

Illustrissime Domine, vir Incomparabilis,

Propè interdum est, ut adaptem mihi Catullianum istoc:

Fulsere quondam candidi tibi soles.

Videlicet dum mens in sano corpore sana fuit. Nunc ferè aliter est, dum vires, minus minusque solitis sufficiunt laboribus. Interea Deo gratias ago maximas, quod annis totis sexaginta, si paucos excepero morbos, qui in climactericum incidere, non corpore minus, quam animo valuerim, si deinceps pejus fuit, eò sic voluisse Deum arbitror, ut sarcinulis collectis, totum me componam, non ad exilium quidem, ut Gentiles dixere, sed patriam, quo caput Ecclesiæ suæ ascendit. Bona tamen spes familiam meam habet, melius fore, ubi blanda Zephyri aura reduxerit nobis egelidos veris tepores: qui foras sinent exire, & ambulatiuncula discutere hunc penè dixero veterum. Id enim jam binis ternis mensibus, parum licuit, ob aera, penè affiduè nebulis foedum, sane magis, quam à multis retro annis memini; non in septentrionali hac Hollandia modo, sed Australi etiam, ac vicinis Provinciis. Itaque alii, alio morbo

cubant. Tussientium vero è catarrhis crebris, ac molestis plena prope omnia. Hæc quaecumque solatiolum adferunt in morbo meo; magistamen quod non prorsus cogar libros abjicere; & non desint amici, qui alloquio reficiunt pio, & erudito. In horum numero, nunc est, optime & egregie de Ecclesia promerens, Joannes Duræus. Jam quasi hebdomas est, quod è Germania huc venit, à suis in Britanniam revocatus. Quid promoverit, ex literis ejus intelliges, quas ad te ut mitterem jussit. Plurimum autem metuo, ne in irritum cadant, quæcumque hætenus inter Lutheranos egit. Jam decennio, antequam ille hanc provinciam suscipere, nihil æque objectabant Lutherani, quam pacificatores omnes agere hanc causam malo dolo, ut nempe postquam pro fratribus agniti sint, simplicibus Lutheranis os sublinant, errores suos affricent, & numero auctiores facti *synodus* Lutheranos sedibus expellant. Atque hujus rei firmamenta adferebant partim ex veteribus exemplis, partim ex eo quod Synodus Dordrechtana, in damnanda Remonstrantium sententia, simul condemnarint Lutheranam; partim etiam, quod Doctores in exilium eiecerit, auditorum coetus sub gravi poena interdixerit. Ergo inquebant, ite ac prius componite controversias inter vos, & Remonstrantes, qui etsi in sacramentario negotio diffideant, æque ac vos, in dogmate tamen de prædestinatione propius absunt à nobis, plerique etiam plane consentiunt. Quamquam vero adventu D. Duræi, non omnino suam opinionem mutarant Lutherani: plerique tamen aliquanto meliorem de eo sententiam conceperunt, eo quod missus foret à Clero Anglicano. Nam agnoscebant, Ecclesiam, qualis sub Eduardo, Elizabetha, Jacobo, & hætenus sub Carolo fuit, seu doctrinam, seu ritus considerarent, propius secum convenire. Præterea videbant, vel rarè, vel nunquam, ab iis qui regimen, Liturgiam, & disciplinam Angliæ comprobarent, suas Ecclesias convitiis & maledictis fuisse impetitas: quod, aiebant, à maxima parte aliarum Ecclesiarum fieri solere. Sed quid animi nunc, ad ineundum cum Ecclesiis Gallicis, & Belgicis, fore putabimus, ubi cognorint, hoc agi in Britannia, ut accusatis, damnatis, ejectis omnibus, quos non longè à se abire, & omnino modestiæ, & pacis amantiores credebant, triumphant soli, quos ipsi Calvinianos, in Anglia autem Puritanos nuncupant? Equidem horreo, quando cogito quæ Londino à plurimis, sed ferè Puritanis perscribantur; præcipuè de Reverendissimo Archiepiscopo, eum in custodiam abductum, perduellionis reum. Liber etiam his terris (urbe certe dicere non possum) Latine editur hujus argu-
menti,

menti; præcípites nimis fuisse Scotos, in abjurando Episcopatu; nec Anglos sine Hierarchia hac posse regi; sed recidenda stipendia, longe maximam partem; sufficere singulis ternas quaternas, summum quinas libras sterlingas: meliores verò sufficiens in locum multorum; in his Wrenni, Montacutii, potissimum Archiepiscopi Cantuariensis, quippe intus, & in cute (utcumque adhuc aliud simulet) Papistæ. Hoc etiam abundè comprobari, ex Opere Anglicè, adversus Jesuitam; dum Menevensis [S. Davidis] esset Episcopus, perscripto & postulato Regio, superiori anno, plusculis additis recuso. Obiectatur quod de Ecclesiis Reformatis h. e. Puritanis, sinistros habuerit sermones; imò (quam hoc verè dicatur nescio) Calvinum vocarit Nebulonem. Et hæc propter, gravis instituitur querimonia, quod istoc ausit contra magnum illum Heroa, terræ filius, cujus Natales satis noti sint in Britannia. Quasi non ad majores etiam dignitates evecti sint alii, qui non tam honeste nati, ac ille Noster; sed neque de Papismo quod aiunt, in animum possum inducere; cum & coram, & literis non unis, me fuerit adhortatus, ut Baronio responderem. Longè aliter etiam de eo prædicant, apud me qui maximè illi familiares. Metuo igitur, ne Papismum, ut vulgò fieri amat, vocent id omne, quod Puritani respuant, utcumque vel semper, vel primis saltem seculis obtinuerit in Ecclesia Christiana. Et sanè absolvere illum ab hoc crimine possunt, quæ in Synodo Cantuariensi & Eboracensi, sub utriusque Archiepiscopi præsidio, adversus Papistas, uti & Socinianos, sunt decreta anno superiori. Visa tibi arbitror, Mihi quidem exemplar, ab ipso D. Archiepiscopo transmissum fuit. Et iis quibus innotuit ejus erga me affectus, villioris me pretii idcirco putant. Non soleo tamen, de ejus erga me amore quidquam jactare. Novi enim nostrorum invidiam, ac mores; sed ex Anglia venientes hoc diffuderunt. Et in his amplissimus Dordrechtanorum Consul, in Angliam nuper Legatus, Guilhelmus Beverius, nisi is Cornelius potius, retulit non uni, quomodo, cum de variis Regni rebus, cum reverendissimo Archiepiscopo esset collocutus, & jam utriusque currus diversam insisteret viam; miserit famulum, qui paulum sisteret currum Beverianum: tum alterum alteri occurrisse: cæterum Beverium grande quiddam expectasse; Archiepiscopum verò non aliud postulasse, quam ut amicissimo suo Ger. Jo. Vossio plurimam diceret salutem. Hoc qui audire, *πομπῶς* factum negant. De salute quidem ex ore Consulis, ac Legati accepi, sed de cætero reticuit. Leve tamen delictum, & cui facillè ignoscant,

qui sciunt, quàm paucos in Batavia sit invenire, qui cum mediocri Doctrina, animum ad componendâs Ecclesiæ lites adferant. Neque hæc dico, quod ad rem tantam videar idoneus: sed quia ad excusationem ejus multum valeat, quod me talem putarit. Tu quoque Illustrissime Domine, multum sermone variorum vapulas, quasi istis in Anglia Papisantibus faveas. Imò Papaturientium istic gratia, de Antichristo eam fovere sententiam diceris, quam diatriba tua complexus es: scio te istac calumnia non terreri. Tamen metuo, ne & alii deinceps adversus te exsurgant, & virulentum calumum stringant. Jam credo videris, & alterius Galli, sed in Gallia agentis, nec de nomine tibi ignoti Antidiatribam. Aiunt, & Voetium quædam moliri; sed *πολεμικῶς* missis, aliquid etiam dicamus de tuo in Evangelistas IV. Commentario. Is videtur intra tres hebdomadas posse absolvi. Ternis proximis excudent diatribas tuas, & Indicem, una cum erroribus commissis, quos interea temporis à te missum iri sperant. Opus nostrum de Idololatriæ origine, & rerum naturâ spissè procedit, non solum culpa Typographi, qui totus in tuis desudat, sed etiam ob invaletudinem meam, quæ non permittit, ut sim qui in meis esse soleo. Et sanè si per Typographum liceret, mallet, ad mensum unum alterum, differre editionem operis nostri, in cujus Indicibus quatuor operosis, pro totidem libris, nunc occupantur Operæ Typographicæ. Utinam verò non morbus me etiam impediret, quo minus sæpius Typographum excurrerem, & ut tua procedant, attenderem. Nunc toto mense, imò & altero, vix pedem extra domum pono. Et rarò satis consulor ab correctoribus. Jam aliquandiu est, quod quaternionem ad me misere, in quo pag. 768. ubi vidi in *αὐτογράφῳ*, vel potius inde exscripto *היה* pro *היה*: Item *μὴ* pro *μὴ*. In postrema etiam pagina, in eodem exemplari fuit Thedotio pro Theodotio, *καὶ* pro *καὶ*, *Νομα αἶσα*, pro *αἶσα*. Hæc similiter Typotheta posuerat, nec noster ille correxerat. Vellem Brenius solus par fuisset labori, qui talium intelligentior est emendatore altero. Equidem sustuli illa quæ dixi; quia adhuc integrum erat corrigere, sed vereor, ne ejus generis multa relinquuntur: satis præfidii, dum ponunt, in eo quod transmissum exemplar. Quasi in iis, qui absente Authore excuduntur, non opus sit, ut Typographi pretio nulli parcant, in parando sibi homine, ad emendandum idoneo; non ea modo, quæ Typothetæ peccant, sed etiam authoris Amanuensis. Quod me meaque placere maximo Salmasio scribis, gaudeo. Nempe utriusque vestri, & aliquot aliorum, qui cum doctrina

virtutem & candorem, rem raram, conjungere, solari me soleo, adversus obrectationes Phoeniculi, cum suo Hyperaspiste, & aliorum, qui toti ab eo pendent & in ejus gratiam, à quo laudari in scriptis exoptant, non cessant cedere te, Salmasium, & hunc homulum, qui ita scribit. Uxori heroinæ, quam salvam rediisse in Gallias lætor; & liberis tuis, meo, uxoris, & filiorum nomine salutem dicito.

Amstelodami,
1641. post.
Id. Jan.

Tuo illustrissimo
mini devotissimus,

G. J. Vossius.

CCCCII.

Reverendo & eximio viro, D. Isaaco Barggravio, S. Theologiæ Doctori, Venerabil. Canon. Cantuariensium Decano.

Reverende Dom. Decane,

Jamdiu est, quod nullas ad te officii atque amoris testes literas misi. Nimirum cessare volui, donec mitterem volumina bina de Gentium sacris à Deo abducentibus, & naturæ mysteriis adducentibus in admirationem & cultum veri numinis. Nec tamen diu adeo distulissimè literarium hoc officium, nisi varii rumores de Anglicanæ Ecclesiæ statu quodammodo reddidissent in nonnullis animi incertum. Sed spero, Deus desinet peccatis omnium irasci, ac veritatis, ac ordinis publici amantibus faventia sua adspirabit. Ac pro isto quidem assidue ad Deum preces fundo. Opus nostrum gratum tibi fore confido; uti & symmytis universis. Fusè satis de illo scripsisse mihi videor epistola illa, quæ non uni tibi, sed toti Canonicorum inscripta Collegio. Quare ista non iterabo, sed te solum rogabo, ut exemplar hoc, quod particulatim tibi mitto, boni consulas: nec tam in eo donum attendas, quàm affectum donantis. Atque idem de Dionysii mei Maimonide dixerò. Scivi id te facturum, me non poscente; sed metuebam, ne si de eo siluissim, non eximiæ humanitatis tuæ fiducia neglexisse viderer, sed arrogantia aliqua, quasi hoc mihi deberi putarem. Tu verò Reverende D. Decane, vel paucos intra menses alia itidem expecta. Nam vobis omnibus præclare muneris vestri fatigentibus, minimè committendum mihi existimo, ut præter ea quæ publicè docendo in Illustri hoc Gymnasio Belgis præsto, aliisque huc commigrantibus, tanquam ad mercatum

bonarum artium, non etiam scribendo procudam ejusmodi, quæ florentissimis Angliæ vestræ, imo jam meæ quoque ingeniis, placere posse confidam. Nimirum in eo sum totus, ut bene merear de Ecclesia & Rep. literaria, non his modo terris, sed etiam exteris, Anglia cumprimis, quæ tot jam me nominibus obstrictissimum tenet. Eadem mihi hoc consequi videor, ut orbis videat, ordinis nostri homines publicis invigilare commodis; quippe ubi in hoc tantopere etiam desudent illi ipsi, qui impediuntur variè, quominus sint præsentis.

Vale, Reverende atque eximie Domine Decane, cumque optima conjuge & liberis à me salve: præsertim salutem à me dici velim præclaræ spei filio, quem hic cum summâ voluptate vidimus coram. Utinam modò sic res ejus tulissent, ut ego illo, ille me diutius frui potuisset.

Amstelodami,
Id. Dec. xli.

Tui reverendi nominis
cultor,

G. J. Vossius.

Paucula infra scripta ad Epist. 424. spectare
Lector facile deprehendat, huc Exscriptoris
incuriâ transposita.

Deuò te compello, magne & Reverendissime Domine; quæso ignosce. Addidi exemplari ad te misso alterum tuo simillimum, ei, si sic res ferat, dandum cui imprimis debui. Pro tua prudentia, quid factò sit opus, melius me perspicies. Item duo alia vulgari ratione compacta; unum pro eo, quem oblitus fuero; nec enim dubito, quin aliquis mihi præteritus sit, dum sic propero, cujusmodi solocismi faciem mihi veniam fore confido, apud eximiæ adèò humanitatis virum. Alterum autem mitto pro ornatissimo viro, qui Reverendissimæ dignitati tuæ est à secretis. Nempe non minus potui vel debui, quando ab eo exoptem mihi hanc operam dari, ut curâ illius, per famulitium aliquem singulis mittantur ea exemplaria, quæ tanto numero mittuntur. Iterum reverendissime & illustrissime Domine, salve à Vossio, nomini tuo æternum obstricto.

Libellus memorialis pro ornatissimo
D. Secretario.

Mitto exemplaria octodecim. Compacta quidem duodecim: quatuor Reverendissimo D. Episcopo Londinensi: duo duabus Academicis. Septimum D. Usserio Archiepiscopo Armachano. Octavum D. Episcopo Ciceritensi. Tria adhuc Cantuariam destinata; unum universo Canonicorum Collegio, al-

B b b

terum

terum particulatim D. Decano, & tertium Casaubono. Superest duodecimum affini meo, Francisco Junio, agenti in ædibus Arundelianis. Sex insuper sunt incompacta; unum Doctori Steward: tria Londini agentibus, D. Patricio Junio, D. Seldeno J.C. D. Th. Farnabio. Duo Oxonium mittenda, D. Rouse bibliothecario & D. Ed. Pococke, ex Syria reverso. Confido autem affinem meum D. Junium, paulò antè memoratum, modò in Urbe agat, simulatque cognòrit advecta esse exemplaria, lubentem se additurum socium in exemplaribus procurandis, si ita opus videatur.

*Inservire vicissim in omnibus
paratissimus*

G. J. Vossius.

CCCCIII.

Guilielmo Boswello Equiti, & Serenissimi Regis Caroli ad Fœderatæ Belgicæ Ordines Prolegato.

Vir Illustris, atque eximie,

HOC etiam nomine nunc debeo tibi quod certior me facere volueris quo loco res forent Reverendissimi Dom. Archiepiscopi optimi Mecænatis mei. Non minus obstringor ista etiam parte ipsi Dom. Archiepiscopo Cantuariensi, qui, & suis & totius Regni ac Ecclesiæ Britannicæ rebus ita perturbatis, nostri tamen cogitationem non deposuit, deque statu suo me voluit edoceri, idque per te virum eo loco constitutum, & amicū communem. Atque ego quam primum Literis tuis respondi, nisi in mentem venisset, satius fore si unam alteram hebdomadem hoc officium differrem, quo interea cognosceremus, quem exitum istorum sperare tandem liceret. Sed jam dies illi evolarunt, & æquè incertus sum ac dudum. Qui Literas subinde è Britannia hâc accipiunt, aiunt propediem fore, ut rejectis vetustatis quiescentibus, Ecclesia Anglicana ad instar Scoticæ componatur, nec vel nomen Episcopale fando audiat, solaque obtineat Apostolica, & *isopiæ*, & doctrina, quam ab anno usque cl. b. LXVIII. sed præcipue hoc Archiepiscopo oppressam conqueruntur. Hos si audimus, non de Archiepiscopali modo dignitate, sed Archiepiscopo etiam actum sit. Deus meliora. Tu Vir illustris quod fidei habendum sit melius perspicis. Ego interim

assidue vota fundo pro serenissimo Rege Carolo Regique familia, ac Regno & Ecclesiâ, particulatim etiam pro Reverendissimo Cantuariensi Archiepiscopo. Quem quod Papistam aiunt, id ejusmodi est ut nihil à verò alienius dici posse arbitror. Scio studiosissimum semper fuisse veteris Ecclesiæ, & Anglicanæ illius, quæ Eduardicis obtinuit temporibus. Sed hoc si fuerit Papista esse, mirum à Regina Maria tam multos, quia sic saperent, ut hæreticos fuisse vivicomburio & aliter sublato. Nec excidere possunt sermones quos coram non semel habuit mecum. Iis semper adhortabatur, ut annalibus Baronii responderem, quod & non unis ad me Literis fecit. Tamen fore puto paucis diebus, ut Liber in lucem exeat latinè, quo hoc propositum sit auctori monstrare Reverendissimum Dominum, quem dixi intus & incute Papistam esse, atque hoc ipsum evincere conabitur locis quamplurimis operis ejus, quod cum Menevenis etiam Episcopus foret, adversus Jesuitam quendam perscripserit, & anno superiore postulato regio recudi Londini iussit. Intelligo & ex viris bonis doctisque qui Librum videre, hoc exprobari vehementer Reverendissimo Præsuli, quod Calvinum vocarit nebulonem. Id factum non credam, nisi oculis locum conspexero. Ea igitur occasione invehitur in D. Præsulem quod tantum Heroa sic nuncupet is, cujus, ut ait, natales adhuc in Angliâ omnibus sint cognitissimi. Ex hujusmodi non difficile est conjecturam capere de cæteris. Utrum vero in Batavia is Liber mandetur typis an alibi, Angliâ puta, vel terra quapiam Belgicæ fœderatæ, ne illis quidem constitit unde hæc hausi. Quod ad commentarios nostros de Gentili Theologia & Physiologia Christiana, solum superest, ut excudatur index Libri quarti, ac operis præfatio, dicatioque. Index intra duas erit hebdomadas absolutus. Urgebit deinde typographus cætera: cujus interest ut opus quam citissime prodeat. Ego quas potero moras nectam, diu tamen hominem querulum & lucri cupidissimum eludere non licebit. Vellem excurrere Haggam ut una de negotio hoc tecum consulerem, uti & Nob. & Ampliff. Dubletio. Sed non finit valetudo, quæ jam me tribus hebdomadis detinuit domi. Objectat Uxor quod ex quo scæva illa de Reverendissimo D. Præsule variorum Literis huc perscripta, pejus coeperim valere. Mihi tamen satis bellè videor, & proprias ferre & amicorum fortunas: sæpeque cogito fidelibus etiam adversa omnia in bonum cedere, & ut Chrysostomus pulchre Homilia quadam comprobavit, neminem lædi nisi à seipso. Sed fortasse memet non

non satis novi. Et diffiteri non possum cum primum hunc nuncium acciperem, vehementer me dolore fuisse affectum: partim quidem propter Reverendissimum Præfulem, & alios quosdam magni nominis, quorum ego & virtutem ac doctrinam & veteris Ecclesiæ amorem semper feci maximi: partim verò ac imprimis, quod Regno diu florentissimo à magna metuerim immutatione: quæ raro felix esse consuevit: nec nunc felix esse possit, si ut exoptare multos video, futura est imminutione Majestatis Regiæ, & non levi despectu Ecclesiasticæ vetustatis: quam si mei res foret arbitrii corruente indies Papatu toto orbe velim magis & magis triumphare. Sed spero metus nostros fore vanos, quales sæpe hominum Scholasticorum esse solent. Vale, Illustrissime & Excellentissime Vir, & cum Uxore lectissima salve ab

Amstelodami v Kal. Feb.
clō Ioc xli.

æternum tibi devo-
tissimo,

G. J. Vossio.

CCCCIV.

Joanni Beverovicio Senatori & Medico
Dordrechtano S. P.

AN quia & ipse Palæmonis arte non pauca consignavi, Amplissime Beverovici, eo similiter sapere me putas ac nobilem illum Grammaticum Vicentinum: qui tam stulte sapiebat, ut putaret nomen suum propterea à Marone positum esse in Bucolicis, quod prælagiisset, ipsum quandoque fore judicem poematum ac poetarum.

*Non ea vis animo, nec tanta superbia nobis,
Nec tam aversus equos Batavis sol jungit ab oris.*

Nunquam ego vel de poetis, vel de aliis summis viris, quale hoc par quod me scis dicere, judicium mihi vindicabo. Et profecto qua parte ego, & Vicentinus ille, si artem quodammodo communem exceperis, convenimus: Ille natas secum, & morituras aiebat literas. Ego vix ausim inter litteratos nomen profiteri meum. Literatorem dici sinent, qui non aliud objectant, quam quod illustris vestræ urbis procures juvenem me Gymnasio suo præferent. Præterea Vicentinus iste Varronem vocabat porcum: mihi cum illo omnium togatorum doctissimo bene convenit, nec minus cum nostri seculi Varro-
ne, & miru Salmasio, quem toto orbe ob-

stupescit quicquid pene est doctorum; nec minus omnis admirabitur posteritas. Dixeris, ista *ἐδὲν ἄρδς ἐπ' ὅ*. Expoui judicium meum de Metonymico isthoc loquendi genere, equidem non defugerem hunc laborem, nisi certus essem, solum dicis, vel honoris gratia, hoc iudicii mihi à duobus summis, & mei amantissimis præferri. Quid enim sit statuendum videtis per vos ipsi, & hoc videre vos vident omnes: vel ex literis super eo à te scriptis quilibet, non solum Vulpius tuus, viderit sententias ambas à veritatis & pacis studioso tam facile posse conciliari, quam vulpes pyrum comest. De adversa cognati Roverii valetudine multum doleo, semper enim ingenium illud amavi, eaque expectavi ab eo, quæ & Reip. literariæ plurimum prodesse, & decus tum ipsi, tum familiæ, & urbi patriæ adferrent. Sed nescio quomodo fiat, ut præclara ingenia sæpe fugitantia sint laboris: præsertim si fuerint in re lauta. Confido tamen compluria jam chartis commisisse, quæ si quid humanitatis illi obtinget, à fratre vel te aliove in lucem promi mercantur. Cum postremo eum Dordrechtii inviserem, aiebat multa se observasse in opere nostro de arte Grammatica: quæ communicare mecum vellet. Sed tam longo tempore nullas ab eo literas accepi. Si possis ex eo elicere, quæ ista sint, vel persuadere, ut ipse transcribat, rem feceris gratissimam. Nec editione proxima obliviscar grato animo ejus meminisse, unde accepi. Scio abunde, utcumque innumeros pene errores aliorum castigarim, & ab opere eo edito, alia non pauca venerint in mentem: tamen sic quoque grande me spicilegium aliis relinquere. De Cassiano sic habe, amare me eum scriptorem; sed nescire utrum sit codex bonus, & pervertus, ut operæ videatur cum à me meisve conferri: deinde multum interfit, num fuerint libri tres de incarnatione; an vero xii. de institutis renunciantium; vel xxiv. de collationibus Patrum. Primo quod opus loco dixi, omnino volupe sit conferre cum Ms°. multis adeo locis medicam manum desiderat. At posteriores commentationes Romæ ex antiquissimis codd. innumeris locis repurgatæ à viro nunquam satis laudato Petro Ciacconio, ea editione hætenus utor: raroque omnino est ubi offendam: neque nunc tantum otii est, ut cum Ms° conferre valeam; si tamen codicem veterem venalem viderem, ære eum meo compararem, idque hoc animo ut per otium nunc hunc nunc illum locum consulerem. Ex his quid fieri velim, tu te facilius judicabis, qui, ut arbitror, scriptorem elegantissimum videris. Sed ecce vix ista scripseram, cum intervenit Isaacus meus,

elegantiarum, & variæ eruditionis mire curiosus. Is, ut audiit me literas ad te parare, de Cassiano sponte quærit, & Scriptoris ejus sibi inspiciendi, & conferendi potestatem exposcit. Quare isthoc etiam adscribendum putavi. Uxori optimæ plurimam dic salutem: simul (ne pluribus te onerem) pari optimo & charissimo Amplissimo Cos. Wittio, & φιλοσοφώτατῳ And. Colvio nostro.

Amstelodami, iv Kal.
Febr. An. 1641.

Tuus omni officio,

Ger. Jo. Vossius.

CCCCV.

Ludovico Crocio, *Theol. Doctori*,
Ger. Jo. Vossius S. P. D.

JAM menses sunt aliqui, quod Londino nos Amstelodami invilit affinis meus Franciscus Junius, Francisci filius: is inter cætera retulit, jam diu esse, quod urbis vestræ Medico Doct. Timplero pecuniæ aliquantum mutuo dedit: Nec ea sibi refundatur. Ea propter literarum aliquid ad eum scripsit, quo aurem vellat fatis hac parte oblivioso. Receperam ego me literas ejus inclusurum istis quas ad te daturus essem propediem. Ita enim fore putabam, quia raro non aliqui adolescentum, qui studiis se dederunt, hinc ad vos commeant, quorum alicui literarum hoc perferendum tradere in animo erat: sed præter opinionem contigit, ut jam longo tempore me compellarit nemo. Et credo, propter hibernam tempestatem perpauci in viam se dederunt. Accessit prius quidem morbus meus, qui me hebdomadas sex afflixit: mox pessima uxoris valetudo, quæ adhuc eam vexat, ita jacuerunt literæ prope dispretæ: ut non injuria dici possit, vix aliquid in isthoc literario genere curari negligentius, quam quod conjunctissimis commiseris. Cæterum sat peccatum adversus charissimum affinem: qui alteras jam ad me literas dedit, quibus miratur se nihil à Doct. Timplero accipere responsi. Rogo igitur, per quempiam tuorum has tuis insertas deferri ad eum cures. Dices cur non potius hoc tabellario mandasti? Sine circuitione causam exponam. Plerisque hoc in more positum, quando per literas commonentur æris alieni, ut dissimulent, quasi acceperint nullas: ac subinde etiam scrupulus injiciatur creditori, quasi tabellarius haud probe functus sit suo munere. Nec propterea existima me aliquid odiosi imponere tibi, qui nihil ultra exigo,

quam ut literas sciam traditas esse. De causâ scriptionis pro tua prudentia facile dissimulabis, neque enim tam longi temporis cessatio (complurium sane annorum) sat fuerit ex ejus honore, neque fortassis literæ hæ ex meo, qui neutiquam habeo in mandatis, ut cum quopiam hoc negotium communicem. Ante hebdomadas plus minus quatuor transiit hac optimus doctissimusque Joannes Duræus, qui præclare admodum de te sentit, & loquitur: non item de ingrato illo zelota quæ tibi ac veteribus collegis tuis tantum invidiæ, atque odii consistere his terris per literas conatus. Equidem permultum vereor, ne Duræo à suis domum revocato multorum refrigescat ardor in hoc *εὐνοιοῦσι* negotio: non quasi ab uno hoc pendeat negotium: sed quia qui misérant eum, non tantundem poterunt deinceps, si negotium processerit in Angliā ex sententia Parlamenti inferioris: in quo prope omnes ad faciem Genevensis Ecclesiæ reformari ecclesiam malle dicuntur, quam ad formam Edvardi vi. vel Elizabethæ tempore receptam. Non desino Deum orare, ut Spiritu S. & serenissimum Regem & procures regni gubernet, ne zelo improvido Ecclesia Catholica aliquid capiat detrimenti. Scis suum honorem Calvino, & Bezæ, magnis sane viris, deberi: sed & suum debere esse pretium antiquitati, & istis Ecclesiæ Doctores, qui ad antiquitatis normam, ubi à scripturis non abiret, instaurarunt Ecclesiam Anglicanam. In quibus non modo tot magni Angliæ viri fuere, sed etiam Pet. Martyr, & Martinus Bucerus, quem quanti Socer meus Junius facere soleat haud facile dixerim. Sine dubio jamdudum intellexeris de excessu summi viri, & mihi peramici Doct. Fr. Gomari: in quo maximæ virtutes: quas tamen aliquantum deprecabat zelo, & animi impotentia. Aggressus erat te quoque, summe item vir, & amice, publice refellere, sed sic ut nemini parceret. Contentus erat dicere (si vera mihi ejus discipuli referunt) novum Lutheranorum hyperaspistem. Multa propter Christum, & sponsam ejus concoquere debemus: non Spartana, sed Christiana patientia. Obiit xi. Januariae terræ mandatus xviii. ejusce mensis. Spero te progredi in iis, quæ & veritatis, & concordiae causâ præclare es exorsus. Minor eris multis hominibus cordatis qui te in cœlum tollunt, si suffaminare te valeant nonnulli omnia novellitate metientes. Mihi jam ad umbilicum perducti libri vi. de Theologia gentium, & Phytologia Christiana. Equatuor indicibus, jam postremus est sub prælo. Simulac excusum erit opus, è primis eris, quem participem faciam. E paucis enim

enim es, quorum pietatem doctrinamque, cum iudicio hoc tempore æstimem. Plurimam salutem clarissimo Bergio, Willioque nuncia.

Amstelodami. c. 10 Ioc xli.
Non. Martii.

G. J. Vossius.

CCCCVI.

Andræ Riveto *Theologo.*

SI ego homo umbraticus, & qui angusto Scholastici titulo contentus semper fui, relatus unquam fuisset in numeros hominum elegantiorum, metuerem, ne tuo etiam viri ac pariter amici summi iudicio, inde expungerer jamdudum, quod toties peccem in leges eas vivendi, quas prudentiores, & ad unguem facti, exacte adeo observant. Nam ut mittam vetera (grandis enim est talium meorum Solœcismorum seges) quam rusticum plane quod nunc dicam. Miseras mihi auriculam vatem veteris in Philosophia doctoris mei, nunc etiam in Canonicorum Cantuariensium Collegio, Collegæ honoratissimi. Magni Molinæ nomen adderem, si hoc inter nos esset opus, qui taciti etiam veneramur nomen, quod orbis prædicat universus. Num vero vel auctori præclari operis, vel tibi, qui miseris literalis egi gratias ut oportuit. Non Amyclæ magis tacitæ Vossio tuo: Defensitare hæc non possim: est tamen quo me purgem. Animus erat ad pauculas hebdomadas differre officium scribendi, ac unâ tum tibi pariter, tum affini tuo, transmittere qualecumque *avridæge* nostrum de gentili Theologia & Physiologia Christiana. Jam ad umbilicum perpemodum mihi perductum hoc opus videbatur, cum in morbum prius ego, postmodo uxor incidimus. Hebdomadas ea res multas morata est Typographum. Redii postea ad labores. Opereque ut videri poterat perfectio, cogitare de luculentis indicibus coepi. Hæc res non exiguo mihi in tantis occupationibus labore stetit. Aliud accessit; Multa coepi desiderari in iis, quæ jam excusa. Itaque & auctarium suum singulis subjeci libris. Nunc tandem & ista typis commissa. Cum ecce à filio Isaaco intelligo (& is indicium ejus rei tibi se debere prohibebatur) prodisse in Galliis opus novum de Gentium Theologia. Non putavi mea in lucem protrudenda, donec isthoc vidissem. Negavit se habere Elzevirius is qui hac in urbe degit: sed ejus causa scripsit Leidam ad

cognominem Typographum. Hesterno demum vespere, is Elzevirius, quem hic degere aiebam, domum meam venit, ac narrat, ut navis cum è Galliis appulsa sit, quæ Bolduci Otia Christiana, in quibus multum ad nostri operis argumentum pertinentia, inter alios libros apportaret, atque hac hebdomade me habiturum. Moras igitur nec tam, ut videam, ecquid sit, quod necesse habeam, vel nova appendicula, aut præfatione, vel aliter commonere. Simulac vero perfecero, è primis eris, quibus sum officii ergo missurus. Atque idem habes de eximio affine tuo: cui non minus quam lectissimæ conjugis tuæ, meo nomine salutem dices, quando otium erit vel occasio scribendi. Gratularer præterea familiæ vestræ, si quod dictum mihi, filium esse sponsum, constaret; sed ubi certiora cognôro, hoc inter alia novarum mihi literarum argumentum esto.

Amstelodami c. 10 Ioc xli.
ix. Kal. April.

Tuus omni studio,

Ger. Jo. Vossius.

CCCCVII.

Guilielmo Archiepiscopo Cantuariensi.

Reverendissime in Christo Pater, Domine Illustrissime,

Satis scribere nequeo, quam diu noctuque sætuet animus meus decumanis magnæ Britannię fluctibus, pariterque affectus mihi optimus quisque videtur; tanto magis quanto quisque genuinæ Reformationis à fermento Pontificio, ut intelligentior, ita amantior est. Et sane si tanti fluctus etiam Marpesiam caute commovere posse videantur: quomodo hic *avridæge* fuerit, quem tum beneficium à Serenissimo Rege in Cantuariensi Ecclesia mihi collatum, arcè adeo Cantuariensi Archiepiscopo colligavit: tum etiam tot tantaque beneficia tua tantopere obstrinxerunt eidem. Nec solamen hic facile invenio, præterquam in voluntate Patris Cœlestis, absque cujus voluntate, nec capillus defluit nobis. Multa ille facit, multa permittit humano sæpe ingenio impervia, sed æquis semper causis subnixa: dura quidem Carni infirmæ; sed contestante Apostolo, salutaria semper diligentibus Deum. Cujusmodi prudentiæ Christianæ præcepta nihil opus memorare illi, cui ad humanos casus semper robur & æs triplex circa pectus fuit. Hac Spiritus sui gratia nec deinceps Dominus te, ut confido, destituet. Nos interea quotidie preces

preces ardentissimas coram Deo fundimus, ut porro te spiritu suo regat ac moderetur; & si sic voluntas ejus, quæ sola est sancta, ferat, in annos plurimos Ecclesiæ suæ servet incolumem, Serenissimi Regis, ac universi Regni bono.

Hagæ Comitæ,
c15 Idc xli.
Aprilis St. Greg.

Reverendissime tuæ & Illu-
strissimæ Dignitatis filius
devotissimus;

G. J. Vossius.

ne graveris communicare. Beneficium conferes illi qui ex Laurentum Lege, alienum nihil attollat in armum; sed candide suo quæque auctori transcribat. Vale, vir summe pariter atque amice, ac cum Uxorem lectissimam tum reverendum D. Decanum & universum venerabile fratrum Collegium plurimum saluta.

Amstelodami, c15 Idc xli.
vi. Non. Apr. St. Vet.

Tuus tuo merito,

G. J. Vossius.

CCCCVIII.

Merico Casaubonio.

Reverende & Clarissime Casaubone,

Postulato id dedi filii mei Isaaci, ut Britanniam mox & Galliam visere liceret, lustrareque nobiliores Academias, & Bibliothecas, coram etiam compellere viros per orbem illustres, quo & doctior & prudentior patriæ se postea sistat. Sed quod dici solet, pecuniam esse belli nervum, id non minus in studiis & itineribus eapropter institutis locum habet. Quapropter rogo, ut dum in Britannia agit, (id non ita diuturnum erit, quando in hac senecta nihil æque desiderem quam ut cito reducem liceat complecti) cura atque opera tua recipiat, quantum mihi ex trimeltri spatio mense Decembri anni superioris, puta supra millesimum ac sexcentissimum quadagesimi cedere convenit. Sin jam Mercatori Londinensi Hoofdio id annumeraris; illas viginti quinque libras Sterlingicas percipere queat, quæ liberalitate regia meo commodo expirarunt mense Martio. Sive filio sive Hoofdio pretium hoc annumeres, perinde erit. Opus nostrum, de quo sæpius scripsi, vix ante menses binos videre poteris. Nam mense opus erit, priusquam Typographus absolverit. Inde aliquid temporis sibi vindicabit, quod nonnisi compacta mittere amicis exemplaria soleam. De motibus Britannicis quid scribam, vel non scribam planè non video. Ita hic omnia augurantur alii læta, alii tristia. Deum assidue oro ut moderetur sic corda procerum, ut omnia fiant regni & Ecclesiæ bono. De rebus meis quid scribam? Si filius Cantuariam veniet, is (ita fore confido) pro viva erit Epistola. Inter alia decretum ei in lucem dare Ptolemæi γεωγραφικα. Cum variis jam editionibus contulit. Si quid ad eum scriptorem observaris, vel aliquid eo perti-
nens ex paterna habeas Bibliotheca; rogo

CCCCIX.

Johanni Rouse V. Cl. Ger. Jo. Vossius.

Præstantissime & Amicissime Rouse,

HAS qui literas desert, is Isaacus est meus, filiorum natu minimus; qui ante biennium Periplum Scylacis Caryandensis cum translatione sua ac Castigationibus τῶν ἀδελφῶν Salmasio dicavit; posteaque emisit breves in Trogum sive Justinum Notas; prætereaque parata habet alia haut pauca; in his Ptolemæi γεωγραφικα cum variis collata Codicibus, Notisque à se illustrata. Quæ redux ad nos, si ita tulerit divina bonitas, publici juris faciet. Nunc ei me non invito, sententia sedet videre Britanniam Galliamque, occasione quidem Nuptiarum inter augusti Regis prolem & Principis nostri Araulonis filium (nam quem non capiat tam excellorum Principum conspectus pompæque sublimi adeo forti conveniens?) Sed si bene filii animum perspexi, non paullo magis ut doctrinâ pectus augeat, tot florentia utroque in regno lumina cernat, & quia vocalia sunt, affatibus etiam pascatur; adhæc Bibliothecas lustret, oculis quantumlibet curiosis; inque Britannia illam imprimis toto orbe inclytam, cui hætenus foeliciter præes. Nunc igitur te clarissime ac charissime pariter, etiam atque etiam pro amore nostro rogo, ut adulescentem in hoc instituto suo, consilio & auxilio juves; planeque hoc agas, ut quantum potes sine tuo vel publico incommodo, debere se tibi profiteator. Si bene animum filii novi, sementem seres in agello, qui non facile eludat spem coloni. Nec enim patietur posteros esse ignaros eorum, quorum opera quæ molitur exeant perfectiora. Libros quatuor de Gentium Theologia, & Christiana Physiologia, intra duos summum menses videbis. Cætere quæ ad me meosque pertineant, nihil nunc epistolæ committere

tere est opus, quando filius vivæ erit Epistolæ loco. Vale, vir præclare, & plurimam meo nomine salutem dicito magnis Viris, D.D. Accepto Fruen, Prideauxio, Samueli Fell, Thomæ Claytono, quorum affectum confido non defore filio, præsertim te proxeneta.

Amstelodami, clb lxxli.
iv. Non. April. St. Vet.

CCCCX.

Jacobo *Archiepiscopo* Armachano.

Reverendissime in Christo Pater, Domine Illustriſſime,

Multum equidem debeo, quod non cesses augere & Bibliothecam nostram libris, & nos doctrina. Ut mittam quæ miseras prius, quam gratum acceptumque aureolum, sive aureum potius munus tuum de Britannicarum Ecclesiarum Antiquitatibus. In quibus ambigo, magisne mirari conveniat singularem Industriam, an summam Eruditionem, & Judicium exactum; quod etiam tum elucet, cum satius judicas judicio supersedere. Eo autem avidius hæc tua legi, quod ipsa argumenti præstantia, ac fructus mirificus, avocaret animum à cogitatione tot adverſorum, quæ ab annis plurculis me circumglomerarunt; in his mortes quinque liberorum virtute doctrinaque præstantium. Atque hunc dolorem proximè auxerant motus Britannicæ vestræ, imo & nostræ; de quibus multa multorum literis, vera, falsa, ad nos deferuntur. His spero benignum Numen finem daturum propediem Serenissimo Regi, & universo Regno salutarem. Quam ad rem persuasissimus sum (atque hoc quoque constans de te est judicium) ea te consilia suggerere, quæ si sequantur, quorum maxime interest, non pacatam minus, aut florentem simus Ecclesiam habituri, quam superiorum Regum temporibus fuit. Hoc futurum, si ita caveamus Superſtitionem & sordes Pontificias, ut debitus interea honos constet primis Ecclesiæ seculis, nec medicina, quod dicitur, modum excedat. Hoc scio curæ fore, tot Ecclesiæ patriæ amantissimis, & qui (quod bonis omnibus applaudentibus tanto cum fructu facis) peritiam antiquorum temporum cum illa proximi seculi feliciter sociarunt. Jam ad umbilicum penè perductum est opus nostrum de Gentili Theologia & Phytica Christiana. Atque hoc in causa fuit, cur diutius rescribere neglexerim: Volebam enim, ut literæ meæ hoc *avriduegy*

comitarentur. Sed-enim, eunte in Angliam filio meo Isâaco, adolescente ob studia & mores mihi pergrato, committendum non putavi, ut proficisceretur sine literis ad eum, qui me obstringere beneficiis suis non cessat: ut vel in proxime editis Antiquitatibus tuis, cum alibi, tum ubi de Mariano Scoto. De quo quod aurem vellas, & jure tuo facis, & mihi longè gratissimum fuit. Sed neque tot domesticæ charissimorum funera, morbi aliorum, etiam uxoris, ac meus præsertim ante annum, quem tum ego *κλυσαντικον* habui, meum me esse siverunt. Imo neque Typographum meum, dum opere superius memorato ferveret prelum, aliud esse ei subiecturum, mihi poteram persuadere. Verum hoc potius proximarum mihi Literarum inter alia argumentum esto. Interea te, Reverendissime Præsul, Deus Opt. Max. saluum ac sospitem Ecclesiæ suæ conservet.

Amstelodami,
clb lxxli.
iv. Non. Apr.
St. Vet.

Reverendissimi ac illustriſſimi
Nominis tui Cultor devotissimus,

G. J. Vossius.

CCCCXI.

Joanni Antonio *Vander Linden.*

Clarissime Vander Linden,

Noli existimare, quia tam longo tempore non responderim, eo minorem esse erga te affectum meum. Sed sic statue, nec valetudinem meam, nec meorum, nec adversa alia, isthoc siviſſe, ut meus & amicorum forem. De Hefychio sic habe: tantum me expectasse, per quem tuto mitterem. Nunc juvene hoc qui à Clariss. Cocceio mihi literas reddidit, se sponte ad isthoc onus offerente, nolui ultra differre: præsertim ex quo filius Isâacus, cujus gratia diutius reservatus, in Angliam abiit, inde Gallias petiturus. Haud facile dixerim, quam utilem literariæ Reip. apud Anglos operam navet, tam multis Græcis scriptoribus, tum ineditis describendis, tum jam editis cum vetustis exemplaribus conferendis. Et ut bene cum novi, nihilo magis claudicabit hac parte ejus in Galliis industria. Interea nihil impedit, quo minus clarissimus Schotanus adnotet, quæcunque sibi ex veteris amici mei Sopingii codice utui esse possint. Ubi redierit meus perscribam. Quanquam malim, si is fortassean, ut juvenes solent, tardius reditum paret, temporiſſus Hefychium recipiam. Subinde

inde consulendi ejus occasio mihi etiam incidere solet. Semper enim hunc scriptorem literaturæ Græcicæ non librum, sed thesaurum putavi. Nihil attinet, ut arbitror, pluribus te hoc tempore distingere: feriæ instant caniculares; quibus ut spero coram te amplexari, & sermones una jucundissimos ferere licebit. Vale Clarissime, & Amicissime Vander Lindi.

clo Ibc xli.
iii. Kal. Quint.

Tuus totus,

G. J. Vossius.

CCCCXII.

Clarissimo Cocceio.

AMavi te & æstimavi jam ab eo tempore, quo Brema ad me misisti primum, ut arbitror ingenii tui foetum. Quem quanti fecerit & *margems* Dionysius meus (utque post tot annos in ea ætula, annorum nempe ter septenorum, Orientis linguis impensis) sæpius ex ipso lectis tuis audiui, & non sivit posteritatem plane ignaram esse judicii sui in notis ad Maimonidem de Idololatria. Id opus jam ante quinquennium prodiit in lucem, sed non manus hominum, quia dum ego aliud opus molior de Theologia Gentili, & Physiologia Christiana, jacuit apud typographum, expectans duntaxat, ut nostra, ob argumenti similitudinem qualem qualem, prodeant simul. Interim me mortes meorum, & aliorum morbi valde affligerunt, nec sivere satis officio fungi in eo, ut amicorum literis responderem. Tam bella tamen scribendi occasione, nolui esse negligentior: etli nondum legissem, quæ de Antichristo adversus illustrem virum observasti. Nempe paulo postquam & literas, & munus hoc acceperam, intervenit amicus, vir eruditus, qui ubi in menta conspexit dissertationem tuam, ad dies tres quatuor petiit tibi legendi fieri copiam. Nolui negare id homini amico: præfertim quia forem id temporis negotiis variis distentus. Sed cras ut censeo, restituet: neque enim eludet eum, qui sese dicit, legendi tua desiderio teneri. Sed cave putes, auctorem quicum tecum negotium est, non sentire quod scribit. Quantum novi, videt multa superstitiose geri in Papatu, & tyrannicè. Sed & aliqua in Ecclesiis aliis solet improbare, & omnia metiri imprimis doctoribus antiquis. Intelligo jam respondisse iis, qui priores refutare aggressi. Sed ne x^o quidem eorum vidi vel editum, vel ineditum. Ita distrahor, ut non possim vacare iis quibus velim. Interea gratias tibi ago pro munere, atque ita habe, multum

te diligi à me, & magnopere optare, ut quale id donum, quod olim legi, multa labores. Ecclesiam & Rempub. literariam tibi planissime obstringes. Summis viris & Theologis Makoskio, & populari Vedelio, plurimam, ubi otium erit, salutem dicito: Et simul à Vossio tuo qui nihil æque quàm pacem & concordiam reformatæ exoptat Ecclesiæ, permultum salve.

iii. Kal. Quintiles
clo Ibc xli.

Tuus totus,

G. J. Vossius.

CCCCXIII.

Joanni Meursio Joannis Fil.

Eruditissime & Amicissime Meursi,

Nudius tertius tuas accepi literas & simul dissertationes civiles miscellaneas, longe gratissimas. Quid enim jucundius esse possit, quam magni Parentis tui non degeneris filii videre monumenta, parentis inquam tui, quem ego semper sic dilexi, ut fratrem non potuerim magis. Exemplar, quod jam decreram heri, transmittam cras Nobilissimo Mylio, & aliis, quos præclari patris tui amantissimos putavi. Animus erat nunc longas ad te literas dare, sed jam hora ea instat, quæ abeundum mercatori Severinio, quem sine meis ad te literis abire nefas putavi. Jam horas quatuor & ultra distinxit vir doctus superintendens Lippicus: quo factum ut spe exciderim omnia perscribendi, quæ vellem. Sunt ea plura, sed id alteris heri literis. De Jacobo Marci solum tangam. Putavi ego jam diutissime impressa esse, quæ illi & ego, & filius Isaacus, sic commendaveramus. Quid faciam, si tanta est hominum incuria, nequid gravius, & verius dicam. Si liceret, vellem nunc scribere Clarissimo Dom. Eraſtio, quem intellexi jam rediisse in Academiam Soranam. Nam sero desideravi ad quædam responsum. Salutare nunc satis eos erit: uti & egregios viros D. Laurenbergium, sæpius Doct. Eraſtium, sæpiissime Magistrum Stephanium. Unum addam, quem, ni memoria fallit, vidi nunquam: Is est magnus, Joannes Raw logices & eloquentiæ Professor, cujus fratrem, nunc Constantinopoli agentem, me aliquoties convenire memini. Narrabat ille mihi de Cornelio Nepote ab illo edito, sed etli inquisierim, videre illum nondum licuit, verum Bibliopola Amstelodamum spem ejus videndi fecit: idque paucas intra hebdomadas. Vale amicissime juvenis, cujus

jus causa ego omnia velim, & optimæ matri, de qua ego & uxor crebro loquimur, & quam his terris vivere optaremus, plurimam dicito salutem: simul elegantissimæ virgini forori tuæ.

Amstelodami,
clō Ioc xli.
xiv. Junii. St.
No. τὰ γὰρ.

Tuus æternum, & supra
quam credere possis.

G. J. Vossius.

CCCCXIV.

Cl. Arcerio.

Eximie & Clarissime vir,

DIC bona fide, nonne satis diu videor tibi elusisse spem tuam? Sed ut olim Varro Satyram inscripserat, Est modus matulæ; sic ego dixerim cessationis, quam tu, ut confido, consules boni. Tandem igitur Hefychium mitto, postquam Britanniam petiit Isaacus meus; cui nihil æque in voto, quam ut ingenio industriæque tuæ plurimum eruditissimus debeat Grammaticus. Multi hæcenus Scriptorem eum promissere; sed te eum fore confido, qui spem expleas Reip. literariæ. Pluribus loquar tecum occasione alia, nam is, per quem Hefychium mitto, jam adest, & si ante vesperum abire volet, uti decretum, ultra morari non audet. Salve amicissime Arceri, & nos tui gratia omnia velle exissima.

Amstelodami,
clō Ioc xli. iii.
Kal. Jul.

Tuus omni officio,

G. J. Vossius.

CCCCXV.

V. Cl. Stephano Stephani, Professori
Historiarum.

Clarissime & Amicissime Stephani,

Multa me in literis tuis delectarunt, præcipue quod scribis, jam totum te esse in Saxone tuo, eumque propediem visurum lucem. Bene de te opera hac mereberis; melius de patria Saxonis, tuaque; optimè de

omni Repub. literaria, ac posteris universis. Semper mirificus me amor tenuit tam nobilis Scriptoris; nec mirari satis potui, eum dictionis cultum barbaris temporibus conspici in gente adeo ad Arctum remota, quem frustra desideraremus iis in locis, ubi vernaculus fuisset sermo Romanus. Nec debuit Scriptor ille debere alteri salutem, quam civi suo, inque tuis, ante omnes, Stephanio, cum multis aliis nominibus, tum imprimis *Ἰωάννου* promerenti ob civem servatum. Quid enim aliud censeam, qui jam ante Annos XIV. ex castigationibus tuis, Heinio mihi que (qui & illo tempore amor erga nos fuit tuus) inscriptis, imo ut tu scribere non dubitabas, dicatis, satis perspicere mihi visus fui, nihil à te profecturum, nisi ingenio tuo doctrinaque dignum, ac magna industria elaboratum. Applausum totius eruditæ cavæ jam nunc ausim tibi polliceri. Atque utinam jam reversus è Galliis foret *ὁ πένυ* Salmasius; quem intra mensem vel circiter affore spero: simulac redierit, tradam ei quæ illi misisti. Interim metuere incipio ne ea jam habuerit à filio Isaaco. Scis non alienum fuisse à moribus *τῶ μαγκεῖν*, nostri amici, ut libros grandi pretio divenderet, postquam prius exscripsisset, quod in rem suam foret. Si ausus fuisset referare, non dico literas tuas, quod nefas duxerim, sed fasciculum istum in quo liber iste, contulissim cum variantibus lectionibus codicis ejus, quem à filio meo Isaaco habuit; cujus & propterea non sine præconio meminit. Utunque est, commendabit te satis incomparabili viro hic erga ipsum affectus tuus; & si quid deesse videbitur, id supplebit nostra oratio, qui te in oculis ferimus. Henrici Canisii Lectiones varias nancisci nondum potui: nec ipse habeo; sed quando opus, utor codice, qui est in Bibliotheca Amstelodamensi. Intra sex hebdomades Leidæ distrahentur libri Clariss. Fran. Gomar; in cujus Bibliotheca quin sit futurus, nullus dubito. Si aliter nequeo, opera dabitur, ut inde tibi mittatur. Vellem nunc plura, sed ecce jam advenit Bibliopecta vester. Quare abrumpam. Verum inquires, nihil respondes de opere tuo, quo Idololatriæ originem atque progressum, atque adeo, ut Theologiam Gentilem, ita & Philologiam Christianam persequeris. Ita est, sed dicare statueram in Anglia summati viro. Nunc res illic turbata me consilii ejus anxium reddunt. Hoc unum obstat, quo minus habeas. Jam absoluti Libri IV. sola præfatio desideratur. Interim sic habe, ex primis te fore, cui hoc affectus mei testimonium sum missurus. Plurimam salutem dicito præclaris viris collegis tuis; quorum

C c c

rum

rum uni nunc scripsissem, nisi temporis angustia excluderet.

Amstelodami, cl^o Ioc xli.
x. August. *tuus*
Nec enim aliter nunc
potui.

Tuus totus,

G. J. Vossius.

CCCCXVI.

Hugoni Grotio.

Parifios.

CUM gaudio intellexi ex literis filii Isaaci, ut salvus Parifios venerit, excellentiam tuam compellarit, & quod fore sciebam, acceptissimus fuerit; Clariss. Salamafium, alterum orbis literati decus, cum dolore suo non repererit, eò quod in Burgundiam abiisset. Nec dubito, quin ab eo tempore excellentiam T. compellarit sapius: nisi forte quod factum nolim, veneratione ejus fastigii veritus sit, ne in publicum peccaret. Quamobrem licet non ignorem, alloquio neminis, reddi posse doctiorem, prudentiorem, meliorem; ab uxore tamen commonendum putavi, ut ne sine causa, & modo interpellaret: atque interea, ne paucis istis mensibus, quibus in Galliis futurus, disfluere sibi patiatur occasionem tam bellam, nec postea reddituram. Tuæ vero excellentiæ, curæ eum fore, usque adeo sum persuasus, ut neque id rogandum magnopere putem. Imo si peccandum est, in hanc filium partem peccare malim, quod sapius compellet, quam subrusticus pudor sineret. Et tamen non ignoro, heroicæ mentis tuæ negotia, partim Regni Suecici, imo aliorum etiam ingeniorum bono; partim Ecclesiæ Catholicæ, quam soli adspernantur vitiligatores omniscoli, Ecclesiæ veteris contemptores, qui magis magisque cornua ubique tollunt, ob scilicet in Britannia successum, ubi meliores eorum, quos dicere nolo, meliorum se mortem expectare creduntur, sequiores vero etiam, manibus pedibusque procurare. Mihi vero de talibus, vix scribere etiam tutum.

Quid moretur editionem operis nostri, ut sic dixerim, Theologico-physici, & per te, perque ea quæ proximè dixi facile vides. Tamen, ut ultra cessem, non finit res Typographi, cui prorsus injurius sum, nulla licet culpa meâ. Jam sex menses sunt, quod opus id non inspexi, nempe quia etiam Indices jam excusi, solaque desideretur dedicatio. De eò, cui destinaram, fieri ut video nequit: utrum Clero Anglicano inscribatur, delibe-

rabo, ubi Hagam excurrero. Id intra tres erit hebdomadas: quando offerenda erit illust. Ordin. filii pars altera Annalium Batavicum: ea erit de Comitibus, ex domo Hannonia. Quæres fortasse, cum tam diu non admorim manum operi de Theologia Gentili, quid interim moliar: nec enim cessare me existimabis. Equidem in tot adversis, utcumque forti sim animo, non longam adeo mihi vitam polliceor. Quare eorum instar, qui abitum parant, convalescere mea incipio. Hoc est, relego & edita, & plura inedita; qualium majorem longè copiam reperio, quam putabam: si vita, & valetudo siverint, plura videbis nostra, intra biennium, vel circiter, quam putares; sed si prope jam ad carceres decursum hoc vitæ curriculum, manebit eorum cura liberos, præcipuè Isaacum meum, penè dixerim delicias meas: quem iterum iterumque excellentiæ T. commendando. Heroinæ conjugii salutem dicito, imo familiæ omni, à familia mea longe inferiori, sed excellentiæ T. devotissima.

Amstelodami,
cl^o Ioc xli. post.
Kal. Sept. St. N.

Illustris excellent. T.
obsequio, servitio-
que paratissimus,

G. J. Vossius.

CCCCXVII.

Amplissimo Viro, Jacobo Wittio.

Amplissime D. Consul, Cognate eximie,

HOC semper conatus sum in liberis meis, ut tempora sua publico bono, Bataviæ imprimis, metirentur. Eoque sine Dionysius meus *o uangelins*, Annales Belgicos Reidani, prudentissimi scriptoris, Latinâ donavit togâ. Eumque deinceps erat continuaturus, nisi aliter visum fuisset Numini supremo. Matthæus meus ad vetera Batavorum tempora describenda se contulit. Et ante annos pauculos, quinque libros primos edidit, quibus complexus trecentorum annorum historiam; nempe omne id tempus, quo Hollandi Comitibus domo Hollandis paruerunt. Exinde totidem libros condidit, de Comitibus domo Hannoniis. Eam partem proxima hebdomade decrevit offerre Illustrissimis Hollandiæ & Westfrisiæ Ordinibus; suscepit verò hunc laborem spe illa, quam Ordines ipsi, cum superiorem partem afferret, fecerunt. Nempe ut eum Historiographi sui titulo, cum stipendio decorarent. Sanè Confessus nomine significatum non modò

modò gratum fuisse laborem; sed peti, ut historiam Gentis suæ eodem modo retexeret. Sed ut nunc tempora sunt, illa jam animo effluxerint, aliqui fortè nec studia curant, nec honorem majorum, aut Gentis hujus à tot seculis florentissimæ. Quare planè opus est, ut in illustrissimo confesso, quidam, qui omnia suo pretio sciant æstimare, hanc operam commendent. In quo spero, facillè primos fore, qui in corona Hollandicarum urbium, jure suo primas tenent: præsertim cum id etiam futurum sit ex honore urbis, ubi meus ille, ac simul vester, natus, educatusque. Planè fore confido ut iis accenseatur, qui literarum studiis vestram etiam urbem exornarint; quod à paucis factum proximo seculo, superioribus fortasse à nullo. Tanto impensius operam dandam intelligo, ut ne honos suis desit benè de urbe, totaque Hollandia merentibus, & si Deus siverit porro merituris, saltem nunc sic animatis, quorum voluntatem promptissimam non destituet; Inclytæ urbis vestræ favor, quem erga me & meos summum semper sum expertus. Amicus meus, quem hic habeo, vir sanè cordatissimus aiebat; nunc iis vivi temporibus, quibus procures hujusmodi munera conferre non aliis soleant, quam gratuiti honoris ergo; non qui ornare historiam Patriam velint. Et exempla promebat eorum, qui stipendio fruuntur; sed nihil minus quam historiam Bataviæ, vel veterem, vel novam cogitent. Respondi egome nulli nostrorum Procerum facilitatem invidere; sed ita confidere, si tam benignos se præbeant erga eos, quibus decretum nihil exequi eorum quæ suscipere; non claudicaturam eorum munificentiam erga illam domum, quæ triplici jam monumento comprobavit, quantopere honori Bataviæ studeat apud Gentes exteras omnes. Sanè literas habeo à primario Magnæ Britanniae viro, qui ad me scribit, viros lectosque sibi filii Annales; talisque si opera impensa esset rebus Britannicis, fore ut grande sui laboris pretium referret. Plura adderem, nisi mallet alios, quam me, præcones esse monumentorum filii mei. Vellem autem de his scripsissem ad te prius. Metuo enim, ne has literas demùm accipias, postquam in Hagam abierint Proceres. Quod si est, necesse sit, tribus verbis per literas negotium filii iis commendari; quod alioqui melius fieret coram, dùm adhuc in urbe sunt vestra. Sanè Consul Bickerus recepit, se velle crastino mane (is dies Sabbathi erit) de eo negotio agere, cum Collegis suis, quo majori animo, rem illi urgeant Hagæ; sed quid faciendum sit, quâ prudentia es, longè me perspicies melius. Uxori lectissimæ torique familiæ, à

me, uxore, & Matthæo meo, plurimam salutem dico.

*Amstelodami, cId Isc xli.
xii Kal. Octob. quo Romulum die natum fuisse,
credidit antiquitas.*

*Dignitatis tuæ
studiosissimus
affinis cultor-
que summus,*

G. J. Vossius.

CCCCXIX.

Hugoni Grotio, *Lutetiam Paris.*

Illustrissime Domine,

Generosus Baro, Benedictus Skytte, relictæ domi conjuge, in Gallias redit; Parentibus, uxore, amicis, Medicis etiam authoribus, qui sic arbitrantur valetudinem adversam, quam in corpore naturâ infirmo auxit bonorum liberum amissio, corrigi posse peregrinatiuncula, & mutatione aëris. Gallias terris prætulit aliis, partim quia Medicos habeat excellentiores, partim ob aëra temperatiorem, partim etiam excellentiæ tuæ causa, quam tam sibi faventem, & propitiā exoptat, quam pensavit prius: Eoque sine aliquid etiam literarum à me petiit, quo excellentiæ tuæ commendarem. Id vero facio lubens, eoque lubentius, quod & ob ingenium, doctrinamque, & genus, ac gentem, per se sciam commendatissimum. Nimirum nihil hic opus circumspicere, ex præcepto Theognidis, atque etiam Horatiano, ne mox incutiant aliena mihi commissa pudorem. Gratias excellentiæ tuæ ago immortales, pro opere immortalis, & incomparabili annotationum in quadrigam Evangelistarum: quod ex quo accepi, jam dies est quartus, avidè, sed pro occupationibus, queis premor, cœpi devorare. Ac video esse reconditæ eruditionis thesaurum. Utsinam his epulis liceret animum magis pascere? Præterquam quod evocaretur sic mens à cogitatione tot adversorum, (quæ interim mediocriter ferò, & fortasse magno animo) etiam legendis tuis, meliora possem reddere, tam multa nostra in sacris, in quibus nunc limandis aliquantum occupor. Nihil in opere, de Idololatria & naturæ mirandis superest præter præfationem, secundi voluminis, hesternaque die excudi cœpit. Inscripti Clero Anglicano; quod consilium meum gaudeo, nec excellentiæ tuæ improbari. Minus uret animum Reverendissimi Archiepiscopi, si opus, (sibi destinatum quod sciat) videat saltem Clero dicari, quam si ad illustres irem Ordines

nes nostros, vel Regnum Sueciæ, ut plerique erant authores. Illa adversus Reverendissimum, de quibus scribis ἀνέγνω, ἔγνω, κατέγνω. Valde me malè habet, quod videam tam sævum animum eorum qui Doctores sunt Religionis reformatæ. Gaudeo interea quod ipse in Galliis agas. Noli enim putare, minus excellentiæ tuæ esse infestos. Quod facile intelligo ex iis quos hic habemus. Jam mihi cum nonnullis dissertandum fuit. Illi colligunt ex postrema tua diatriba, adversus Borboritam, & Prænotionem, excellentiam tuam in gratiam Cardinalis Richelieu, hoc agere, ut redeant omnes ad errores Pontificios. Contra contendit, velle & excellentiam tuam, ut Romana Ecclesia reformetur; sed putare à Reformatoribus quibusdam, in his Calvino, modum esse excessum. Quæmodum verò non sequitur, nec Italus est, nec Hispanus, ergo nec Belga, aut Gallus; itidem neque consequi non, placet illi reformatio Lutheri, minus etiam Calvini: ergo nec placet illi reformatio ulla Romanæ Ecclesiæ; non quam Cassander, aut ante etiam Erasmus exoptabant; quamque magnam partem secuti, qui sub Edwardi VI. reformarunt Ecclesiam Anglicanam; sive hunc in modum malis, non placet reformari, ut volunt aliqui ἰδογῶνες, & ἀνδραγατοί, veteris Ecclesiæ contemptores; Ergo nec eo modo, quem probant veteris Ecclesiæ gnari & amantes. Confido me mentem tuam, in illa diatriba, melius perspexisse, quam excellentiæ tuæ inimicos juratissimos. Qui nisi in Galliis viveres! Sed nihil cætera dicere attinet: Chartæ tamen eorum, dente Theonino, vel Leonino, aut Ursino, etsi quid efferatum magis, rodere & lacerare nomen non desinent. Nihil tam benè, tam verè dixeris, quin deorfuri sint aliam in mentem, alii malignitate, alii imperitia, at ἀλογισία. Jam prævideo, quid sis dicturus mihi, nempe ut in Pietate ordinum facis.

Omnia percepi, atque animo mecum ante peregi.

Atque ita confido, Deumque oro, ut tanta aggressum, amore Ecclesiæ, misere scissæ, spiritu sacro firmet magis ac magis. Intellico jam Hagæ esse apud fratrem libellum illum, de quo superioribus ad me literis scripseras. Gaudeo quia inde melius excellentiæ tuæ mentem perspicere erit. Eo libentius post hebdomadam unam alteram me Hagam conferam, ut legendi istic potestas fiat. Etiam absque illo fortasse item, cum filii causâ, tum meâ, ut colloquar cum Oratore Anglico Boswello, quo melius volumina nostra, Britannicæ Clero dicata, eo transmittantur: si tamen valetudo, vel tempestas, iter

impedient, per literas exequar; simul scribam ad fratrem Jurisconsultissimum, quem annotata illa ad consultationem Cassandri, ad diem unum aut alterum communicaturum, mecum non invitum, prorsus habeo persuasum. Nihil erit periculi, ne in manus veniat aliorum culpâ meâ. Vale, Illustrissime Domine, meum etiam Isaacum habe commendatum, quantum publica privataque sinunt. Dominae conjugii, & familiæ toti, ab omnibus nobis, salutem plurimam dicite.

Amstelodami, Cl. Id. xli. xxviii Octobris, h. e. ipso natali Erasmi. Cujus herois memoria, pagina hac excunte, pene ordier novam. Nam cum quando cogito, & tempora nostra confitero, Ecclesiæ misere fecit; sed dissentus exiguis, dissentissimum maximis, non detinebo, seu solutiloquentiâ meâ, ut Caser dixere, seu aliter vitium hoc meum vocandum putabis.

Illustrissime excellentiæ tuæ devotissimus,

G. J. Vossius.

CCCCXXX.

Winando Rutgersio, S. Theologiæ Doctori & Professore.

Clarissime & longe amicissime vir,

DUM mihi adstat ornatissimus Alb. à Velgen, non omnia solum ore promenda, aliquid etiam literis committendum putavi. Valeo, ut solent, quibus animus ad multa adversa obdurescit; tot malis pressio nova acciduntur quotidie; sed Deus, ut calamitate non una lauciat, sic oleo spiritus sui medetur. Postquam Ultrajectinæ te Academiæ commendaram, & mihi ejus scholæ professor spem fecerat, sed unus alter Zelota obstitit, & Procures etiam judicarunt, recipiendum esse Ephorum liberorum Regiæ Bohemicæ, præsertim ea magnopere commendante. Commede ceclidisse putavi, quod vir nobil. Wynenbergius, Curator Harderwicki Gymnasii me consulere de professore novo in Philosophia. Et eo majorem spem concipiebam, quod diceret non primum commendari te à me, sed Lugduni idem fecisse affinem tuum. Gavissus sum ea propter magis etiam cum adderet, idem Winenbergius, Doctorem Cloppenburgum, quantum ex sermone colligi posset, non visum esse alienum. Dixisse

Dixisse enim, te advocato, futurum, ut si morbo vel aliter detineretur, ipse aliquando in sacris doceas juventutem; sed spes etiam illa decollavit, alio jam arcessito. Intellego ex D. Velgio te abitum huc parare; mallem ad munus vocatus venires: sed fortasse tamen ubi coram videre, felicius sub manu succedet negotium. In me quidem nihil desiderabis, quod à fratre possis exigere. Etiam viribus hujus pastor Laurentius, amicus meus, te ob virtutes tuas, & mei etiam causa diligit, & paratum se ait facere in tuo negotio, quicquid possit. Vale mi amice Rutgeri, & animo esto forti, eundemque mihi à Domino exopta. Uxor uxori salutem adscribi petiit; nam ista subito in chartam conjectanti intervenit.

Anno clō lxxii.
post. Kal. Novemb.

Tuus æternum,

G. J. Vossius.

CCCCXXI.

*Reverende Domine Decane cæterique
Metropolitane Cantuariensium Ec-
clesiæ Canonici, Domini, ac fratres
plurimum honorandi.*

JAM anni sunt duodecim, quod serenissi-
mi Regis bonitate cooptatus sum in ho-
noratissimum collegium vestrum, ac coram
etiam cum temis liberis omni à vobis comi-
tate atque humanitate exceptus fui. Ex quo
tempore semper animus mihi arsit cupidine,
quomodocunque testandi posteris gratum
erga vos affectum. Visus sum mihi nunc ali-
quam reperisse occasionem literario hoc
munere, tum universè dicando Clero Angli-
cano, in quo etiam continetur egregium no-
men vestrum; tum particulatim in secundo
volumine vos nominatim exprimendo, tan-
quam eos, quibus arctius jungerer. Gemi-
num nobis institutum est; partim enim enar-
ro originem & causas Idololatriæ: quas
ostendo non quidem fuisse nullas, sed stul-
tas, vel saltem erroneas; partim verò pando
naturæ arcana, de quâ multi quidem ante
nos tractarunt: sed nos, ut puto, sicut alio
fine, & crebro alia atque alia scripsimus.
Quamquam verò materies sit diffusa variaque,
quantum tamen licuit operam dedi, ut ne
esset *à pui dō* & confusanea; quod pro cer-
tissimo habere soleo *à pui dō* argumento.
Sed de proposito nostro frustra hoc loco ad-
feram plura, cum fusè satis de eo dicam in

utriusque voluminis proloquio. Solum igitur rogo, ut affectum hunc hominis devotissimi vobis boni consulatis, atque ita persuadeatis vobis, nulla terrarum intercapedine posse fieri, ut non eo vos affectu colam, quo prosequar præsentem.

Deus opt. max. universum Anglicanæ Ecclesiæ Clerum, inque eo particulatim vos, Domini mei, ac fratres in Christo venerandi, diutissimè feliciter conservet.

Amstelodami,
clō lxxii.
9 Kal. Dec. St. V.

*Reverendi ac clarissimi
nominis vestri cultor,*

G. J. Vossius.

CCCCXXII.

*Reverendissimo in Christo Patri, Domino
Illustrissimo, Briano Duppa, Episcopo
Cestrensi, Ephoro Principis Walliæ.*

*Reverendissime in Christo Pater, Domine hono-
ratissime,*

S I parum responderem summorum de me
virosum expectationi, qui assidue à me
aliqua exagitant studiorum monumenta;
plura etiam quam ut tam multis ingenio, do-
ctrinâ, industriâ, par esse valeam, excusatione
nulla æquè apud æquos judices possim excu-
sari, quàm quod animus, publici ejusque gra-
vissimi muneris, seu onere, seu honore sit di-
stractissimus; & si quid otii supersit, id prope-
modum omne auferat, vel rei familiaris in
tot adversis cura, vel officiosa nimis amico-
rum interpellatio. Equidem si res lautior fo-
ret domi, fortasse me urbi subducerem, at-
que aliquò in villam abderem, non tanquam
Timon *μωλύβρωτος*, sed ut perficiendo ea quæ
habeo, affecta, amicis, posteris, Deo ipsi me-
lius temporis mei reddere rationem. Et ta-
men experior quodammodo, sic etiam ani-
mum nonnihil valere, quo intendero, posse-
que etiam in negotiorum mole otio ea sub-
civivo, si diurno minus, nocturno saltem non
ineleganter dispungi. Eaque noctium fiducia
aggressus sum opus arduum de Idololatriæ
origine ac progressu, & mentis humanæ, ex
natura adscensu ad Deum. Id vero contexui
ex scriptura S, literatura, historia, veteri no-
yæque, & naturæ admirandis. Dicavi anti-
stibus Ecclesiæ Anglicanæ, in quibus etiam
illustre nomen tuum; præsertim ad Ecclesiæ
Cestrensis honorem accedente maximi Prin-
cipis cura, quem tot regnorum manet fasti-
gium. Fore tibi laborem hunc non ingra-
tum,

tum, facile colligo ex affectu, quo me semper es prosecutus. Luculentaque ejus indicia ante annos XII. Oxonii perfunsi, cum me nullo non prolixissima humanitatis genere dignareris. Eo minus rogandus es, ut quod sponte etiam facies, boni consulas munusculum tum meum, quod dixi, tum filii Maimonidem, utrique Angliæ Academiæ inscriptionem, ut hoc etiam nomine tibi mitti debuisset videatur. Sanè sic vellet, si viveret, Dionysius meus, itineris mei Anglici comes, ac tuam etiam erga se humanitatem expertus coram. Deum optimum maximum rogo, ut Augustum Regem Carolum, serenissimum Walliæ Principem totamque domum Regiam multos in annos feliciter conservet; teque pariter, omnesque Regni Proceres, & Ecclesiæ Anglicanæ Antistites, pro quibus eò ardentius preces fundo, quo magis scissa multorum studia video, doleoque; non quasi Cantuariensibus insertus Regia benignitate hic aliquid attendam mei, sed solius Regis Regniue, & in hoc Ecclesiæ amore; pro cuius concordia vel mortem appetam lubens.

Amstelodami
cło Ioc xli.
xii Kal. Dec.
Styl. Vet.

Reverendissimi & illustrissimi
mi nominis tui cultor
devotissimus,

G. J. Vossius.

CCCCXXIII.

Magnifice atque eximie Domine Procellarie, excellentissimi inclytæ Oxoniensis Academiæ Professores, Doctores, ac Magistri, Domini plurimum honorandi.

EN vobis foetum tenellum, quem *δ μαργεῖν* filius meus Dionysius, paulo antequam fato concederet, enixus apud nos fuit; prope dixerim, ut Pallada Jupiter apud priscos nationum Theologos. Sed paganicus ille Jupiter cum Minerva sua adhuc in gentibus vivit, meus non Jupiter, sed Gnatus, jam ab hinc octennio vixit. Nam quadriennio, ex quo videratis coram vivere desiit in terris, qui nunc meliore vitâ fruitur in Coelis. Utinam verò hic non tam animæ istiusmodi videatur, ut neque illum parentis sui, neque parentem, si viveret, foetus illius posset supputare. Hæc quidem de vestro me iudicio spes habuit, cum filio Isaaco auctor forem, ut eum (quod ipsi utinam scriptori potius facere licuisset) undecunque doctissimis flo-

rentissimæ utriusque Academiæ Anglicanæ viris offerret dicaretque. Fecique hoc eo lubentius, quia scirem, si quid hoc in opere excidisset filio (& qui aliter esse possit in ætate adeo juvenili?) non ignoscendi minus, quam cognoscendi, vobis animum fore. Cogitabam simul, uti Halicarnassensis ille Dionysius ait, Apollinem in Panegyricis esse ὡς πρὸς ἀρετὴν περὶ τὴν τὴν λαοῦ ἀρετὴν κείμενον τὸν λόγον: ita mei quoque Dionysii Commentarium, quo Maimonidem studii illustrare, sic illustratum in jubare nominis vestri, ut non scriptionis magis, quam inscriptionis causa, conspicuus notusque fiat omnibus. Nec alter filius, editor relictorum, dubitasset istoc publice testari, nisi se, studiorum gratia, regna petente extera, à me id commodius fieri posse, haut temere existimasset. Maimonidæ, & translationi ac Commentario Dionysii addidi de penu proprio libros quatuor, æternum mihi venerando Anglicanæ Ecclesiæ Clero inscriptos. Iis ago de conflictu Theologiæ Gentilis, & Physicæ Christianæ. Ac Idololatriæ quidem originem expono ex Literatura, Historia, mundi fabrica & sacris literis. Atque ex iisdem enarro Naturæ admiranda; quibus stulti abripiuntur in cultum Naturæ, sapientes autem deducuntur in admirationem & cultum Conditoris. Si priora nostra de Historicis Latinis, aliaque, ut annos ante duodecim coram vidi lubens, locum adepta in inclytæ Bibliotheca vestra, etiam quæ nunc mitto, hoc, spero, honoris ab eximia vestra humanitate consequentur. Pro istoc affectu, etiam aliis in rebus erga me testatissimo, in laudes vestras perlubens excurrerem, præsertim quando raram atque omnigenam Doctrinam mirabundus mecum cogo. Verum & maxima perstringendo prodidero infantiam meam, & vestram, in os laudando, modestiam offendero. Et fortasse alius istis reservatur locus. Quare hic sistam. Solum Deum Opt. Max. rogo, ut augustum & serenissimum Regem Carolum, & illustres Regni Proceres, ac vos etiam, non de Anglia modo, sed universo orbe præclare adeo merentes, diutissime salvos ac sospites feliciter conservet.

Amstelodami,
cło Ioc xli.
x Kal. Dec.
St. Vet.

Ingentis vestri nominis admirator cultorque,

G. J. Vossius.

CCCCXXIV.

CCCCXXIV.

Reverendissime in Christo Pater, Domine Illustrissime,

QUO magis aggravescit ætas, & fortasse adversis multis prope defatiscit: eò magis gliscit affectus ille gratum testandi animum erga tam bene de me promeritum Angliæ regnum. Ac cum magnum Magnæ Britannæ Regem cogitarem, facile eo impulsus sum, ut non alteri Grammaticos dicarem Commentarios, quàm proli ejus Augustæ. Sic enim opinabar studia prima, primæ ætati imprimis convenire, atque etiam deberi. Atque antea etiam sic ratiocinabar mecum, quia ad historiarum professionem vocatus forem in Academiam Cantabrigiensem: facturum me non absurdè, si eidem Academiæ, & præcipue ejus Cancellario Illustrissimo Duci Buckinghamiæ, Latinorum Historicorum Historiam consecrarem. Hisce sic defunctus in eo totus eram, ut gratam mentem testarer erga Clerum Anglicanum: præcipueque cui, aut quibus potissimum deberem. Scripserat filius Dionysius, (quem Oxonii vidisti mecum, & cum liberorum meorum aliis tam humaniter, comiterque exceperis) is, inquam, in Maimonidem de Idololatria Latine à se redditum Commentarium scripserat. Occasione illà amicis rogantibus, eò animum adjeci, & uno quasi falce complecterer, quæ de Gentili Idololatria observassem. Spissè mihi negotium processit, multis adeo occupato; quæ ratio est, cur nunc demum Maimonides prodeat, et si jam ab annis quatuor, imo ultra excusus. Actum produsse mallet: sed junctim exire malebat Typographus. Nunc nostri quoque operis quatuor libris absolutis, ulterius differre nec volui, nec debui: licet si Deus vitam & valetudinem conceperit, duos præterea libros addere decrèrim: ut ita integram planè habeamus, tum Theologiam Gentilem, tum Physicam Christianam. Ac de Maimonide quidem auctor filio Isaaco fui, ut fratris *re mangelre* labores offerret, dicaretque florentissimæ utrique Regni Academiæ Anglicani. In quarum altera quantum fuerit nominis tui decus, quantum etiam Reverendissimi D. Duppa, & quomodo ea doctrina ac virtus, gradum vobis fecerit, ad grandius in Ecclesia fastigium, quantum etiam honoris mihi tribueritis immerenti, apud alios potius, quàm apud Vos, memorandi fuerit locus. Quod verò ad libros quatuor à me exaratos, non per omnia quidem sed quodammodo tamen imitari volui exemplum B. Cypriani absente Episcopo Romano ad

Clerum scribentis. Utinam verò, si id de singulis expectare nimium est, saltem optimus, & doctissimus quisque è Clero hunc affectum nostrum consulat boni. Quod facient, scio, quicumque paulo penitiùs me, & hunc Angliæ amorem norint. Nec quia hæc nunc qualiacunque amoris mei monumenta mitto, eo me gentis humanissimæ præstantissimæque meritis ex animo exsolvi meo. Scio enim longè majora deberi, & (ut taceam heroas alios) ante omnes Augusto Regi, erga quem, non aliter quàm subditos ejus compellendo, hætenus officium probavi meum; ut facile videam, & assidue cogitem, quanto majus sit quod deinceps à me desideretur. Sed spero Deum daturum in hac etiam senectute, ut probi omnes videant, neque hæc parte me opinionem eorum elulisse. Velle quidem & conari non desinam.

Diutissime feliciter vale, eximie Antistes, & quod hætenus facis, porro etiam me faventiæ tuæ Zephyro afflare non graveris.

*Amstelodami
clo Idc xli.
ix Kal Dec.
Syl. Vet.*

*Reverendissimi & Illustrissimi nominis tui
cultor devotus,*

G. J. Vossius.

CCCCXXV.

Eduardo Pococke, Socio Collegii Corporis Christi.

Clarissime ac Amicissime Vir,

IN tot adversis non mediocriter mihi voluprati fuit, quod te salvum ac sospitem Constantinopoli rediisse Oxoniam intelligam: Deoque gratias pro hoc beneficio ago, cum privato nomine de amico tanto lætus, tum etiam publico, quia facile video, quantum deinceps Respublica Literaria, ac pariter Dei Ecclesia, utilitatis ex te capere possit. Si enim jam ante tria lustra tam bene potueris de studiis mereri: quid non posthac sperabimus, ex quo & ætas, & tot annorum industria, Doctrinam pariter ac judicium firmarunt? Gratulor ergo tibi, mi Pococke, gratulor Oxonio, totique Angliæ, imò literato Orbi hunc reditum tuum. De quo simulac cognovi, continuo pene hunc calamum corripui, ut affectum meum, quem coram non poteram, lteris testarer. Nolui verò planè inanem esse Epistolam meam; cui idcirco adjunxi Maimonidem de Idololatria, à filio meo Dionysio (quem coram mecum vidisti Oxoniæ) Latine redditum, notisque illustratum; item

item libros quatuor à me exaratos, de falsâ nationum Religione, humanæque mentis ex natura adscensu ad Deum: planeque confido, & τὸ μαγεῖν filii, & mei causa, grata fore hæc munuscula, præsertim cum nec Argumentum possit displicere. Vale amice πολὺ ἡμεῖς, ac deinceps etiam amemus nos inter nos.

Amstelodami,
c1o Ioc xli.
ix Kal. Dec.

Tuus tuo merito,

G. J. Vossius.

CCCCXXVI.

Ricardo Steward, *Theologiæ Doctori.*

Reverende & Clarissime Vir,

NON patiar interire, vel etiam flaccesce-
re amicitiam, quæ mihi tecum jam ante annos tot in Batavia fuit, magnam partem ferruminante eam Nobilissimo Viro Georg. Rarac. Dubletio, nunc Supremæ Curiæ Hollandiæ Zelandiæque Senatore laudatissimo. Ut durare videas affectum hunc nostrum, mitto aliquod amoris *μνημόσυλον*, partim de filii *μαγεῖν* penu. Ac de nostro quidem vides Paralela Theologiæ Gentilis, ac Physices Christianæ, si modo is titulus explet materiam operis; quo non minus cum Religione Gentium confero historiam veterem, quam Scientiam naturalem. At de penu filii est Maimonidis de Idololatria liber, Latine ab eo redditus, & uberi illustratus Commentario. Utinam hoc filio diutius frui licuisset! neque id mei magis, quam publici boni gratia exopto. Sed ferenda quæcunque immittit Deus. Solus quippe scit, quid mihi, quid expedierit filio. Nihil vero gratius mihi contingere potuerit, quam si intellexero utriusque nostri operam, tibi, tuique similibus, quales habemus paucos, neutiquam improbari. Hoc si consequar, non erit quod de malevolorum iudicio laborem. Vale, insignis Vir, pariter ac amice; ac porro nos ama ut soles.

Amstelodami,
c1o Ioc xli.
vi Kal. Dec.

Tui nominis admirator,

G. J. Vossius.

CCCCXXVII.

Johanni Rousio.

Bibliothecario } Collegii } Socio.
Bodleiano } Orientalis }

Vir Clarissime,

SCIO Stagiritam nostrum dicere, silentio diuturno amicitias dirimi; & longo tempore nullum inter nos literarium fuisse commercium. Nec propterea tamen existimo vel tantillo amorem nostrum esse imminutum, ut qui non vili lucro amicitiam metiamur, sed bono publico. In quolibet cessare in scribendo licet, ubi publicum finit, imo cum damno ejus, nimium erga amicos foremus officiosi. Sed nunc, viderer mihi verè amicitiam violare, nisi rumperem silentium, teque Literulis meis compellarem. Quippe & ego, & filius ὁ μαγεῖν, quædam juris fecimus publici, quæ operam desiderant tuam, ut permaturè inferantur Bibliothecæ, non Apollinis Vaticani, tantopere veteribus celebratæ, sed multis partibus præstantioris Oxoniensis vestræ. Ac à filio quidem est Maimonides de Idololatria Latine redditus, & uberius Notis illustratus. Quod opus frater ejus utrique Anglicanæ Ecclesiæ dicavit. Et gratum erit, tum Argumenti causa, tum quia semper in ore habere Scriptor ejus Dionysius solet clarissimos Oxoniensis Academiæ Viros; à quibus paterni Itineris comes adeo humaniter, admodum adolescens, fuerat exceptus. Ad didi de nostro quatuor Libros de Idololatriæ origine & progressu, & ex Naturæ operibus adscensu humanæ mentis ad Deum. Non puto, vel te, Clarissime Vir, vel ex Academiæ vestræ heroibus aliquem mihi esse orandum, ut ne gravetur opus nostrum inferre celebratissimæ toto orbe Bibliothecæ Vestræ. Hoc fecistis, cum necdum Academiæ vestræ membrum forem; & nunc non idem expectem Academiæ insitus, præsertim in opere quod æternum mihi venerando totius Angliæ Clero consecrarim? Quare de hoc tam amico postulato, verbum non addam; tantummodo peto, ut plurimum meo nomine salutes summos & florentissimos Academiæ Oxoniensis Viros, præsertim eos qui ante Annos 12. me & ternos filios tam proluxa humanitate exceperant. Nomina adderem, nisi ut ejus temporis Procancelarium, & in Æde Christi Decanum, atque alios item aliquos ad sublimiorem gradum evectos esse cognovi jamdiu, ita de aliis idem confiderem, licet nihil habeam certi. Verum promitto

mitto mihi de eximia humanitate vestra, fore, ut vel tute, Vir Clarissime, vel præstantissimus Pocokus, vel alius nostri amans, certio rem me faciat de tot Luminibus Academicæ: de quorum conditione jucundum erit cognoscere, præterquam eorum, quos (ut fluxæ ac fragiles sunt res humanæ) magnum Numen ademerit terris; quanquam & de illis, si iusto omnia pretio æstimemus, gaudendum potius sit, postquam eos Deus ex calamitosa hac vita in sedes transtulerit beatas. Atque ut præter has, nihil magnopere mihi; ita easdem tibi sed feras exopto, quo diutissime prodis Reipublicæ Literariæ, tum Sacræ, tum Externæ.

Amstelodami,
clō Ioc xli. vi.
Kal. Decemb.
St. Vet.

Tuus totus,

G. J. Vossius.

CCCCXXVIII.

Patricio Junio, *Bibliothecario Regio.*

DUM, Vir eximie, prelum fervet Editione Maimonidæ de Idololatria, una cum filii mei T^o *μαργετ* Dionysii Tralatione, ac Notis; solo adducti titulo amici aliquot rogarunt, ut eadem, quæ de Gentilium Idololatria jam olim mihi observata scirent, subcivis percurrerem temporibus, & (quia metuerent, ne alioqui laboris huius fructus periret Reipublicæ literariæ) simulac possem juris facerem publici. Quæ mea facilitas est, parui illis; ac alacriter quidem sum aggressus, sed ut fieri solet, sub manu opus crevit, & cum opere molestia, ob molem occupationum, quæ me quotidie pene avocarent. Verum sic quoque non modo quid filius, sed quid ego etiam præstiterim, si quis alius, optimè iudicabis. Solum metuo, ne, non tantum tibi abs re tua otii sit, ut legere valeas, vel etiam saltuatim percurrere. Ut hoc verear, facit operis magnitudo tanta, parens ut ipse ab relegendo quæ scripsit, possit deterreri. Notum illud, *Andini vatis* — *Laudato ingentia rura, Exiguu colito*: Non minus dicere possumus: Ingens laudato volumen, Exiguu legito. Sed, quicquid de nostro hoc labore futurum, boni scio consules affectum; præsertim quando utrumque opus Angliæ Clero, & Academiis dicatum. Atque ut aliter foret, rara Eruditio tua cum maximâ humanitate non sineret, ut non grata tibi foret hæc voluntas nostra bene merendi de studiis literarum. Ex literis filii Isaaci intelligo, quantopere faveris studiis adolescentis

αλεξυζοτος, pro quo gratias ago, quas possum; pluraque nunc adderem, nisi ad varios adeo scribendis literis, abrumpere epistolam citius cogerer, quam vellem.

Amstelodami,
clō Ioc xli.
v Kal. Decem.
Vet. Styl.

Tui nominis clarissimi
cultor,

Ger. Jo. Vossius.

CCCCXXIX.

Reverendissimo & Illustrissimo Jacobo Usserio, *Archiepiscopo Armachano, totius Hiberniæ Primate.*

Reverendissime Antistes, Dom. Illustriss.

CUM primò solum animus foret, scribere de gentium Diis ac Sacris, eorumque origine ac caulis; postea ulterius sum pro vectus; rerumque naturam exponere studio fuit, sine non alio quàm ut naturæ mystis ejus mystas facerem, qui condidit naturam. Hujus laboris nostri, quem officii ergo, summis Cleri Anglicani viris consecravi, exemplar nunc mitto, qualecunque *ἀντίδωρον* operis tui auro contra non cari, quo antiquitates Ecclesiarum Britannicarum complecteris. Adjunxi Maimonidæ simul librum de Idololatria, cum tralatione & commentario filii mei Dionysii juvenis, si fas eum à parente etiam prædicari, ingentis dum viveret & pietatis & doctrinæ. Eamque operam ille Angliæ dicare decrêrat; extincto autem, duabus Angliæ Academiis inscripsit frater ejus Isaacus; is quem ante menses paucos non vidisti duntaxat, sed etiam usque adeo humaniter excepisti, ut de tanto affectu suis in literis non gaudium modo testetur, sed penè etiam triumphet. Nunc hic in Galliis agit, ac totus est in eo, ut exscribat, quæ in bibliothecis reperit *ἀνέκδοτα*. Planè confido, reducem in patriam, amantibus sui, & his, & aliis in terris, neque inglorium, neque inutilem fore: neque commissurum, ut nesciant posterius, quantum debeat summatibus Britannæ, aut Galliæ viris. Atque hoc votum meus Deus secundet. Te simul, Reverendissime & Illustrissime Domine, diu ac feliciter conservet, ut fluctuantibus Ecclesiæ rebus pro anchora esse possis. Hoc Deum assidue precabor. Plura de aliis vellem, sed charissimæ conjugis morbus, & adversa alia non sinunt: ut mittam, quòd occasione huius operis scribendum sit varias in terras. Scis enim, quàm latè pateat Respublica Literaria; atque ut

D d d

ami-

amicitiam eorum, qui ad hanc pertinent, nulla dissolvant regionum spatia.

*Reverendissimi & Illustrissimi
nominis tui cultor atque
admirator,*

G. J. Vossius.

CCCCXXX.

Merico Casaubono.

Charissime Vir, Reverende Frater in Christo,

TAndem prodeunt bina familiae nostrae opera: unum Maimonides, cum Translatione, & Notis Dionysii mei, cujus & Annales Belgicos è Reidano Latine redditos accepisti; alterum autem à nobis exaratum, De Religione Paganica, & triplici cum ea conflictu; Historiae veteris, de qua 1° libro; Scientiae naturalis, de qua 2° & deinceps; Scripturae sacrae, de qua Opere universo. Dionysii mei laborem sacravi binis Angliae Academicis; ubi ob tot S. Theologiae Doctores, atque Linguarum Orientalium Professores, vel earundem bene intelligentes; plurimi erunt, qui non modo de monumento hoc mei, (eo, quem cum fratribus duobus non vidisti modò, sed etiam benignè adeo excepisti) benevolè judicare poterunt, atque etiam volent. Hoc & laudabilis opera filii spondet mihi, & laudatissimorum virorum affectus erga me, & meos. At labores proprios dicavi, laudis nullius indigenti Angliae Clero; cujus Canoniorum Cantuariensium Collegium pars est honorata. Nec propterea in generali nomine listendum mihi putavi; sed minimùm altero in Volumine, quod majus priori, exprimere nominatim volui eos, quibus conjunctus arctius forem. Atque utinam affectus hic gratus sit fratribus meis Reverendis; quam studiosus est vestri animus illius, à quo opus hoc proficiscitur. Tria mitto exemplaria, unum inauratum, ut inferatur Bibliothecae Cantuariensi, si merebitur. Duo alia Venerando D. Decano, ac tibi, Collega optime, & amicissime. Plura addidissim, si in grandibus Operibus tam munifici essent Typographi quàm deberent. Sed hoc insusurrare liceat in aurem, mi Casaubone, gratum fore, si, ubi videris, desiderari pro singulis utriusque operis, vel saltem mei, exemplar aliquod, mihi id quamprimum significes. Et si carissimè veneant exemplaria, proprio tamen aere potius mercabor, quam ut ulla in re patiar officium claudicare. Vides quàm fa-

miliariter tecum agam, quod optime confules. Uxorem, Reverendum D. Decanum, & fratres dilectos plurimùm saluta.

*Amstelodami,
c10 Idc xli.
vi Kal. Dec.
St. Vet.*

Tuus aeternum,

G. J. Vossius.

CCCCXXXI.

Thomae Farnabio.

Præclare & amice Farnabi,

Scribimus indocti, doctique volumina passim.

SAnè tam multa hodie ab imperitis edi videmus, ut si sic res procedat, & lectores suos, ut cœpere, porro inveniant, plane sit metuendum, ne Nepotibus nostris vescendum sit glandibus, uti Atavorum temporibus fiebat. Sed bene est quod non desint Triptolemi novi qui fruges oberant, inque his facile tum locum sustines, dum juventutem glandibus vesci vetas, eamque deducis ad frugiferos agros optimorum Latii scriptorum, ac ingenii doctrinaeque tuae vomere, h. e. non perspicuo minus, quàm erudito stylo, facis, ut bene culti niteant magis & magis. Sed bellè de antiquis scriptoribus merendi non una est via. Nos eodem tendimus quo tu; sed aliter & indicio sunt quæ hactenus scripsimus, & ea quoque ostendunt quæ nunc mitto. In iis duo hæc præstare conor, ut pandam priscam gentium religionem, sine qua intelligi nequeunt scriptores veteres, atque ut exponam quid Plato, Aristoteles, Zeno, & Philosophorum alii, imo & Poetæ cæterique scriptores de rerum natura senserint, atque scriptis consignarint. Planè confido, hæc etiam per quæ illis scriptoribus à te illustratis lucem porro aliquam affundere studuimus, non displicitura præstanti ingenio tuo, qui pro candore, & veterum auctorum amore, nihil æquè exoptes quàm ut multi tecum in societatem veniant illius gloriæ, quæ paratur illustrandis auctoribus vetustis. Eoque gratiora omnia fore persuasum habeo, quia sacra à me sint non exteræ genti sed vestrae, imo quodammodo etiam nostræ; postquam & ipse serenissimi Regis beneficio Anglicano Clero sum insertus, ab utraque etiam Academia, ut membrum, adscitus. Addidi de filii Dionysii penu Maimonidem cum ejus translatione ac notis, eumque non minùs placitum spero, quàm nostra: & affectum hunc augebit, quòd is quoque Angliæ inscribatur. Quæ deinceps sim aggressurus, animi adhuc pendeo;

pendeo; usque adeo multa sunt quæ limare, perficereque ardet animus, modo Deus vitam concesserit, & valetudinem prosperam: quam tibi non minus quam mihi exopto. Vale.

Amstelodami, clb Idc xli.
iii. Kal. Decembris.

Tuus,

G. J. Vossius.

CCCCXXXII.

Andreas Colvio suo, Gerardus Joannes Vossius S. P.

EN Tibi, Vir atque amice eximie, pro Cassiano tuo M^{so}. ac ob devotionem pectoris, stylique verustatem, ut quicumque editi codices conferantur, haud indigno, qualecumque *Assidue* nostrum; de cujus argumento dicerem aliqua, nisi jam abhinc biennio, partem hic bonam vidisses, pleraque etiam excurrisses. Miraberis, scio, spissè adeo opus hoc successisse. Nolim ego omnem culpam rejicere in Typographum. Magis Ipsi in causa fuimus, vel potius Amici, & exteri salutatores, quorum indies crescit seges; sic ut nequeam (quod poteram ante annos plures) negotiorum molem subcisiui temporis otio eleganter dispungere. Africanum id fecisse proditum à Velleio, scriptore fidei non subletæ, præterquam in sui ævi rebus. Verum nobis non licet esse tam beatiss. Omnino enim ut metuo, valedicendum studiis, mittendique Libri, tot annorum spatio congesti, ac mihi stantes plusquam annis millenis. Vel hoc si nimis durum, publico etiam, ac Posteris noxium, subducere me aliquò cogar; putà in villam aliquam; neque defunt, ex illis facilè agentibus, atque etiam amantibus nostri. qui cum mei miserescentes, tum amore ducti Reip. Lilerariæ, villam ad tempus, vel aliud offerant, ut istic ex animi sententia, vacare possim limandis, & perficiendis tam multis, quæ nunc vix inspiciendi est otium, & me mortuo, fortassè æternum cum blattis, & tineis rixabuntur. Nec alienus ab hoc consilio forem; verum uxoris valetudo non finit, ut sic menses totos ab ea divellar: nec permittent Proceres nostri: mihi autem non est tam lauta res familiaris domi, carere ut velim, aut possim, liberali adeo professionis publicæ mercede. Vides quàm animi hæream incertus. Tu cordatissime Colvi, viam dispice, quàm me expediam. Talem mihi indicari velim, quàm neque frauder amicorum

eruditorum (quos inter locum facilè tuum tueris) suavissimis alloquiis; neque Exteriorum variis è terris adventantium Vitorum, vel rara doctrinà, vel prælustri genere, ac dignitate præstantium, sermonibus acceptissimis, sive de studiis nostris, sive de vita & scriptis eorum sint, quos exteris in locis amo, & æstimo, sive etiam de publico rerum statu; cujus noticia quantopere requiratur in Historiarum & Civilis scientiæ Doctore nequitiam potes ignorare. Multum autem vereor, ne utcumque omnes in te partes verses, aut hisce universis fateare carendum, aut quando ista prope omne tempus sibi vindicent, quod à munere publico superest; agnoscere cogaris, ne istis me defraudem, & plurimorum offensam incurram; deinceps mihi nihil legendum, scribendumque dixeris. Si ita mecum agitur, quo pacto par fueris spissis hisce duobus voluminibus, quæ mittis? Mane, istuc ibam; Nam totas noctes in utramque aurem dormio: sed quod à decima est Nocturna, ad sequentem secundam, impendo penticulandis illis, quæ tot annis in adversaria retuli. Ac Propterea opus hoc, de Paganica Theologia, & Christiana Philosophia, poteram inscribere. Noctes Amstelodamenses. Sanè tanta est comitas, & modestia Indigenarum, & Exteriorum, ut quia tum ipsi somnum capiant, mihi studia nequitiam inturbent. Atque hoc imprimis verum est hiberno tempore, quo domi se continent studiosius, figoris causâ, in quo ego ista tecum garrio, ut vel hinc videas amoris mei erga te ignem, quem neque noctis hibernæ frigus vincere potuerit. Sed Varro olim. Est modus matulæ: nobis etiam sit modus Epistolæ. De cæteris confabulandi tecum lubido erit, ubi Tibi otium erit amicos hac urbe invisendi; quod nimis raro facis. Simul tùm ferram reciprocabimus, super multis, de quibus dissero in eo, quod mitto, opere, misello magis, quàm confusaneo; quippe mirè admodum vario, at non *ἀμερόδω* quod vitium habere soleo, pro certissimo *ἀπειροσῆς* argumento. Ac scio te quoque hominem non *διολογῶτατον* modò, sed etiam *φιλοσφρότατον*. in isto juxta me sentire. Vale, vir & amice Egregie, ac meo nomine, Præter uxorem Lectissimam, saluta Consulem Wittium, cum cognata nostra Coniuge; Item Doctorem Bevervicium. Quid pluribus oneremus? Si possim, velim uni & alteri novi operis exemplar mittere, videbo quid possim.

Amstelod. clb Idc xli.
vi. Id. Decembris.

CCCCXXXIII.

Francisco Junio Fr. F.

Londinum.

Nob. & Clarissime Affinis Juni,

TAndem vides commentarios nostros, de Theologia gentili, & Phytica Christiana; quos gratos fore confido, non Tibi modo, sed etiam Clero Anglicano, cui eos dicavi. Mitto etiam Dionysii mei Maimonidem, à fratre Isaac inscriptum duabus Angliæ Academiis. Isaacus adhuc in Galliis est, sed iter in Italiam adfectat; de quo non possum adfentire. Terrent non sumptus modò, sed etiam pericula. Spero, nihil acturum, me inconsulto; et si videam Illustrum Grotium, iter non dissuadere. De obitu suavissimæ Cognatæ Joannæ Brunæ, jam ex sororis literis, vel filii ejus, sine dubio intellexeris. Næranus noster gravi morbo decumbit; multumque vitæ metuitur. Franciscus meus multo me, imo omnes nos, morore adficit. Matthæus alteram Historiæ Batavæ partem emisit, & Historiographi Batavi Titulum ab Illustribus Ordinibus Hollandiæ est adeptus. Non levis is honos. Sed de magnitudine salarii, necdum quod scimus statutum. Sunt in Proceribus qui dicant satius videri, ut quoties pars operis nova exhibetur, filio perhonestum detur honorarium cum salario, quàm ut certum sit annuum: quia tam multi pecuniâ fruuntur otiosi: Exemplum capere ex Heintio jubent, qui post scriptam Sylvæ-ducis captæ historiam, nunquam admovit manum historicæ scriptioni; sed in utramque aurem stertit securus, gratisque stipendio fruitur. Alii contra contendunt, ejus culpam non debere aliis obesse: quorum industria gemino jam pareat opere. Accepi his diebus minutam schedulam à te missam mihi: in ea (præter illud de stipendio Cantabrigiensi, à Casaubono accepto, & Hoofdio Londini annumerato) illud etiam erat, fascem Librariam missam à te Amstelodamum esse: In iis libris quosdam pro Amplissimo Doubletio emptos: Chartas item quasdam tradendas Hoofdii Londini agentis fratri, prope Remonstrantium Templum habitanti. Is apud me fuit cum altero fratre, hic itidem habitante. Verum nobis nihil hætenus traditum; eoque opus erit perscribi per quem Nautam missi sint libri, cæteraque. Alioquin enim metuo, ne cuncta perierint

filio, Doubletio, Hoofdio. Doubletius sæpe ex me inquit, ecquid de libris certi habeamus. Quæso fac nos de Nautæ nomine certiores, deque cæteris etiam, quæ nos attinet scire. Hæc non infima saltem, si non princeps causa fuit, cur ad te scriberem. Desidero etiam scire, quomodo valeat Illustrissimus Comes Oxfordiæ, cujus, ni fallor, studiis es præfectus, & ecquid si ei sit de vestra in has terras profectio. Spem enim qualem qualem conceperam ex schedula tua antedicta: Epittulam enim non videor mihi posse nominare. Agunt hætenus mecum bini liberi fratris tui, Casimiri Junii & Margareti. Franciscus tibi cognominis ingenio sic satis valet, & industria se mediocriter probat, foreque confido, ut ea quotidie capiat incrementum. Planè hæc ago, ut dignus sit & Avo, & Patruo; quæ rum non prænomine minus, quàm cognomine gaudet. Prodiere Illustris Grotii annotata in Novum Testamentum. Iis addidit tres Libellos cum Appendice, qua defendit, quod scripsit, Antichristi nomine, non intelligi in Scripturis Episcopum Romanum, sed Cæsarem illum, gentilem dico, Ecclesiæque Persecutorem. Hoc multos habet pessimè; qui judicant fore, ut omnes magis abhorreant à Romana Ecclesia, si Episcopum ejus esse ipsum Antichristum habeant persuasissimum. Sed qui statuunt cogitari debere de concordia orbis Christiani, existimant, hanc opinionem esse noxiam; foreque ut non cogitetur de remedio, quia nemo cum eo ullum sibi negotium esse velit, aut ab eo boni quicquam sperare, qui sit Anti-Christus, & in hoc solo operam omnem ponat, ut ad inferos præcipitet. At meliori Ecclesiam fore loco, si non desperemus de bonitate Dei, ac confidamus posse Deum, qui non Regum modò, sed Paparum etiam corda habet in manu sua, paulatim aperire oculos & mollire corda eorum, qui & superstitione, & Tyrannide, tantoperè à primis sæculis recesserunt. Atque ut Romæ non succederet pius conatus, multum profici posse, si in Galliis succedat, ubi ingens Illorum est numerus, qui sic Romanam sequuntur Ecclesiam, ut in præcipuis, quæ nos oppugnamus, faveant sententiæ nostræ; sed solum plus moderationis requirant à nobis, majorem etiam venerationem erga Ecclesiam veterem, quam non Parens quidem tuus, non alii multi, in Anglia præcipuè; sed multi tamen ἰδοῦναι ποιεῖς καὶ ἀνδραγαθῶν, pretio suo nesciunt æstimare. Dum hi sic disceptant, Ego, Egregie Adfinis, vota suscipiam pro Ecclesia reformatâ, ut eam Deus spiritu veritatis, & pacis, regat magis & magis. Et te quoque eidem numini commendo.

Vale

Vale diutissime, & quæso subinde nos literis
tuis compella.

Amstelodami,
clō Ioc xli. Kal.
Decembris, St.
Vet.

Tuus, dum suus,

Ger. Jo. Vossius.

CCCCXXXIV.

Danieli Heinio.

Nobilissime & summe vir,

Dolet rara adeo nobis esse literarum
commerciorum, collegis veteritis, & par-
vo adeo distans locorum intervallo. Equi-
dem silentii pertæsus, committere non potui,
quin novo hoc anno ineunte, fausta omnia
per Epistolam commendarem tibi, filio & filiae,
ac simul amplissimo genero tuo. Altera etiam
ratio scribere me iussit, satis enim diu est
quod non nisi per illum gratias tibi egi pro
munere acceptissimo eorum, quæ ad N. In-
strumenti libros adnotasti. Luculentum est in-
genii doctrinæque tuæ monumentum; atque
utinam Deus longam tibi ætatem tribuat, ut
porro in istiusmodi argumento defudet in-
dustria tua. Nec deterreere debet, quod aliis
simile studium sit. Sic enim comparatum
est cum scripturis, ut nullius ingenio vel la-
bore, exhaustiri possit veritas, tam profundo
earum puteo contenta. Semper supererit
quod discamus: ut vel sæculum viæ nostræ
adderetur. Quemadmodum adversus omni-
scios istos sæpius in vitæ extremo dicere
solet fover meus Junius. Unum opto, ut qui-
cunque in sacra hac palæstra se exercere, & pa-
riter alios volent, sic in ea versentur, ut tum
veritati, quatenus humana finit infirmitas;
tum etiam modestiæ lient, ac candori. Sed
plerique hoc pati non possumus, qui, siquid
alteri accesserit, decedere nobis arbitramur.
Cum quo vitio, corrupto hoc sæculo, facile
etiam eruditissimis obrepenti, magnis viri-
bus decertandum censeo: ne nostrapte culpa
male adeo audiat eruditio, ut quotidie cum
dolore conspiciamus. Sed tristibus istis missis,
redeo ad gratissimos labores tuos: in quibus
dissimulare non possum, inter alia mihi fu-
isse illud jucundissimum, quod antiquum ob-
tineas in tuendo Erasmo, viro optime de li-
terarum studiis merito, nec minus de toto
sanctorum patrum choro. Quem profecto
mini sæculi nostri dabunt, in quo duo hæc
æque concurrant, imo si quem vel intra mille
annos proximos ab harumce laudum cinio
justius prædicari posse existiment, nomen
ejus edant. Quare etsi hominem fuisse sci-

am, nec jurare semper in ejus sententiam
velim, (quem honorem nulli hominum de-
ferendum censeo) tamen probare eos non
possum, qui tam irreverenter illum habent:
parum cogitantes, quibus temporibus vixerit,
quantumque omnis ei debeat posteritas. Ve-
nio nunc ad tertiam hujusce scriptionis cau-
sam. *Avridocy* mittere volui, non quidem
dignum præstantissimo ingenio tuo: sed no-
stri tamen ingenii modulo non peritus, ut
puto, indignum. Est id commentationem in
nostrarum de Theologia gentium & philoso-
phia Christiana, in quibus, si non videar ti-
bi & eruditissimis Collegis, operam & oleum
perdidisse, erit sane, quod hunc sortum no-
strum deinceps amem vehementius. Sin se-
cus; sed nolo male mihi ominari, potius in
voto, unde orsus sum, desinam, nempe ut
tibi tuisque omnia hoc anno felicia exoptem:
Imo & Collegis veteribus, quibus si occasi-
one commoda salutem meo nomine dixeris,
longe id erit gratissimum. Filio nob. salu-
tem adscribi sine dubio iussisset Isaacus me-
us, nisi cum Gallæ haberent. Vere proximo
reducem speramus.

Amstelodami
clō Ioc xlii.
Post. K. l.
Jan. St. N.

Nob. & maximi nominis
tui amantissimus,

G. J. Vossius.

CCCCXXXV.

V. C. Merico Caufaubono, G. J. Vossius
S. P. D.

Quantum rationes inire valeo ejus tempo-
ris, quo navis Anglicana hinc solve-
bat, inter merces suas etiam deferens exem-
plaria complura operis nostri de Paganica
Theologia & è naturæ mirandis manucti-
one hominis ad Deum; Jam una & altera
hebdomas paullove amplius esse possit, quod
tuque & Fratres venerandi acceperitis La-
bores nostros. Sed celerius aliquanto an tardi-
us hi vobis redditi sint, parvi duco, præ istis ut
ne viris doctrinæ ejus judicii displiceant
illa, quæ in tot occupationibus summo nihil-
ominus mihi labore stetit nequeo diffiteri.
Nec illud solum voveoque optoque ut fratri-
bus meis placere possint, verum etiam ut
Clero Angliæ universo. Nunc quia & senio
& tot me adversis atteri indies video, magis
magisque cogito de sarcinulis colligendis;
eoque totus in eo sum, ut tam multis quæ
habeo affecta, præsertim illis minoris molis,
extremam admoveam manum. Et jam ali-
quid

quid prælo tradere occepi, de quo proximis literis. Filius meus Isaacus, quem in Anglia vidisti, jam è Galliis Italiam cogitat, ut varias lustrat Bibliothecas & exscribendo *avensolæ*, ubi facultas dabitur, possit melius postea mereri de Republica Literaria. Quo deliderio sanè honesto ardet more juvenum qui (ut scis) quicquid volunt, vehementer volunt. Ego & filii & publici boni amore in hoc voluntati ejus non desum, sed plus prope ago quam fors nostra sinat. Impense autem rogo, ut hæc parte juves quantum possis. Scis è præbenda Cantuariensi serenissimi Regis beneficio mihi duo jam trimestria deberi: unum quod superiori Septembri, alterum quod in Decembri sequenti exspirarit. Simul inde fiat quinquaginta Librarum Sterlingicarum summa. Eam refundi velim Joanni Thuiller mercatori Londinensi, illic res agenti præstantissimi beneque de me merentis Joannis Wickefortii mercatoris Amstelodamensis: à quo filio procuratur, quicquid itineri est opus. Eo minus æquum fuerit ut eum vel hic, vel in Anglia diuturniori morâ illudam. Nolim pluribus hoc negotium tibi commendare, cujus proximam humanitatem semper sum expertus. Lectissimæ Conjugi ac Liberis, item Reverendo D. Decano & universo optimorum Clarissimorumque Fratrum Collegio plurimam à me dicito salutem.

Amstelodami, cl^o Id^o xlii. Idus Januariæ stylo Anglicano. Quo ipso die ante Annos xcvi. Heidelbergæ, natali meo solo, abolito Papatu, reformata fuit Ecclesia. Sed peccatis nostris factum, ut nec integro sæculo licuerit hoc beneficio frui.

Tuus tuo merito,

G. J. Vossius.

CCCCXXXVI.

Georgio Ratallero Dubletio, *Senatori.*

Nob. Amplissimeque vir,

CUM proxime ad te literas darem, videbar mihi de exemplaribus cæteris stare promisso intra octiduum posse. Sed spatium illud pene menstruum invasit, dum Bibliopegarum unus pergit esse, qui solet, hoc est, tricobovinator, & siquid ex Lucilio amplius dicere possumus: alter vero, quem prioris vitium correcturum putabam,

morte Parentis sui, & aliis causis fonticis, nequivit, quod volebat, aut velle saltem visus fuit. Tandem tamen, ut vides, me exsolvo, & tarditatem meam facilius excusabit, quod interea non licuit foras prodire, sed tardipes tardipedi Deo affecerim assiduus, ob malum subinde recursum; quod tamen satis leniter me subinde tractavit: à publico munere avocavit, non à Libris, & dulcibus Musarum sacris. Itaque interim limavi libellum de tribus Symbolis, & alterum de Dominico Anno, Mense, Die, Nativitatis, Baptismatis, Mortis. Metuo ne illi, qui orbi me quam urbi consulere malunt, hunc morbum, dummodo tam placidis me luminibus semper intueatur, subinde optent revenire. Minus auditoribus decesserit, quam lectoribus accesserit. Ut redeam ad exemplaria, quæ mitto: est in iis unum grandis forma, quod tibi mitto: sed ea, si placet, conditione, ut quod prius habuisti, alteri cedat amicorum. Cum Hagam ad te irem, in mandatis dederam Bibliopegæ, ut à Typographo etiam peteret illa chartæ melioris. Non alia tradidit, quam Hagæ vidisti. Credidi igitur non itetisse promissis. Sed redux intelligo, tria quatuorque in charta Augusta impressisse. Curavi ex iis duo compingi, quorum alterum putavi non ad alium quam ad te ire oportere. Nam de Anglia vel domina juniore Principe, serum est, & ut vides, nec inauratæ paginæ: quæ lenocinia attendi solent. Possis tuum curare à famulo deferri ad Nobiliss. Archiepiscopium, qui habitat non longe, si recte recorder, à Secretario ordinum Bellimontio, apud quemdam nomine Patrem, vel ex adverso. Is Pater, ambigo, sitne Oenopola an diffusor. Quicquid est, vir tam clari nominis non fuerit obscuri domicilii. Et jamdiu illi debeo exemplar, quia melius est de me meritis, quam fortasse existimares. At mittam quod teneam multiplici promisso. Vellem ejus valetudini melius esset, sed metuo ne qui tam multa fortiter consilio & manu his terris gessit, non sat fortiter ferat injurias, quas accepit. Mitto præterea exemplar Doctori Johnsono, item alia duobus Senatoribus, Reigersbergio, Dedelioque; ac denique unum Advocato G. Grotio, qui, qua in re bonam pro me operam navavit, non ignoras. Matthæus mæus in Frisia est, unde propediem reducem exspecto. Isaacus Lugduni fuit in Galliis: ac puto, nunc vel Florentiæ esse, vel Romæ fortasse. Ait se auctores ejus itineris habere illustres Grotii & Salmatii animas. Sed Grotianam imprimis. Nam alter, quem in Burgundia invisit (ut ipse ad me scribit) diutius apud se detinere, quam ut hiberna

hiberna tempestate tam molestum iter infisteret.

Amstelodami,
cl^o Ibc xlii. ix.
Kal. Febr.

Tuus tuo merito,

G. J. Vossius.

CCCCXXXVII.

Jacobo Corputio *Senatori, & Scabino*
Reip. Dordrechtanæ.

Dordrechtum.

Amplissime Corputi, Affinis Coniunctissime,

Binas à te literas accepi, in ea brevitate prolixum spirantes affectum, præcipuè in promovendo Matthæi mei negotio; quod primo etiam tibi curæ esse velim, & fore confido. Is nunc in Frisia est, nec eo, cur abierit, es ignarus. Intra triduum exspecto reducem. Isaacus meus Lugduno Galliarum, in Italiam profectus: Ac puto nunc esse Florentiæ, & inde iturum Romam. Non parvo mihi stant Liberi; sed id grave non est dum illis curæ sit erudita pietas; quod hæcenus de Isaaco possum dicere. A summis Britannæ magnæ viris, præclare adeo est exceptus, ut si scribam, prope metuam, ne fidem inveniam. Idem de Galliis dixero, ubi etiam Senatoria dignitate conspicui, sed quorum consanguinei isti Junianæ, non indecoræ familiæ essent innexi, inviscere eum in diversorio, non gravabantur. Magni verò etiam nominis viri, opiparo convivio dignabantur. Dixeris ista, vel Parentis, vel Avi gratia esse facta. Equidem credo, & hæc aliquid valuisse. Sed tamen plus censeo potuisse, quæ tibi post Scylacem editu n, post Justinum, & Geographorum aliis observata, quæ secum circumfert; in aliis etiam studiis cognitissima esse, familiari sermone comprobatur, viris non ex ima cavea. Eò lubentius habenas laxavi, ut ex magnis tot terrarum hominibus, non doctrinam minus, quam nomen augeter; spero & pietatem, quæ cæteroquin rarò auctior fit per tot maria, & terras currendo. Potius gentes vitia sua affricant, quàm virtutes. Et sæpè id cogito. Solum spero profore nobis preces, quas ad Deum pro eo fundimus. Tum etiam quod ejus infatigabilis discendi cupido, animum avocabit ab insanis voluptatibus, quibus capi juvenus solet. Cum postremò, una Hagæ essemus, promisi me missurum labores meos, de paganica Theologia, & Philosophia Christiana. Tandem me promissis exsolvo, ac citius fecissem, nisi valetudo deti-

nuisset, & Bibliopegæ inertia. Geminum, ut vides, Argumentum sum complexus, quorum alterutrum satis foret arduum; utramque ego provinciam suscepi: sed an operam sim probaturus, vel edocto, è grege Pastorum, vel invido, è numero Professorum, non est curæ Hippoclidì inquirere. Miserum est pendere à malignorum judicio. Paratus sum stare, & cadere eruditorum judicio his terris, magis exterorum, maxime posteritatis. Et interea hæc cuncta parvi puto, dum Deo rationem valeam reddere, & talenti, & temporis concessi. Puto autem id mihi faciendum propediem. Nec enim tam laboriosa, in tot adversis vita, longam finit sperare ætatem. Quam neque ulterius exoptem, quam opera nostra utilis esse possit Ecclesiæ, ac Reip. Literariæ. Uxori salutem dicito, præterea filio cum nuru, genero cum filia. Adderem de juniori filio, nisi eum, ut puto, extera adhuc haberet tellus. Longam habes Epistolam, ab homine occupatissimo. Causam, si quæras, nox erat, qua ego, omnibus iis qui de die interpellant dormientibus, Tibi mi Coniunctissime Affinis, vigilabam.

Amstelodami,
cl^o Ibc xlii. ix.
Kalend. Febr.

Tui tuorumque Aman-
tissimus,

G. J. Vossius.

CCCCXXXVIII.

Joanni Beverovicio *Senatori & Medico*
Dordrechtano S. P.

GAudeo, vir Amplissime, Clarissimeque, non me duntaxat curæ tibi esse, sed etiam meos. Mitto igitur geminam Apòcham, manu Francisci mei scriptam; sed in qua spatium reliquerit, ubi nomen quæstoris scribi possit: Uti & tempus, quo salarium hoc expiravit. Neque enim desubito poterat reperire formulam, quam sequi solet: Misissem eadem opera labores nostros, de Paganica Theologia, & Philosophia Christiana: quo in opere, ter quater minimum, tui facta nobis mentio. Quid minus poteramus, te nullam negligente occasionem, testandi amoris erga me tui? Sed nolui tantæ molis opere, onerare Tabellarium. Convenientius id fiet per Nautam, proxima hebdomade. Salmastius est primo vere rediturus in Bataviam. Sic suis ad me scribit literis. Respondit jam Libello, de Lingua Hellenistica, qui absente eo prodiit iis terris; nequid tamen perlo

submitit.

submit ; nec dicere possum, utrū Lugduni, an Lutetiæ Parisiorum malit edere. Non arbitror visum illi esse responsum tuum. Saltem non meminit. Mallem in editione Epistolarum mearum, pro Copriani nomine, asteriscum posuisses, vel Cyprianum scripisses. Nolim ego crabrones fuscitare, cum domi sat reperiam negotii ; & malo meo abunde sum edoctus, si tales digito attigeris, omnem penè sylvam accendi. Et tamen si quid moliat feremus. *Lenit albescens animo Capillus.* Non æque laceffentes procaciter ferre potuissim, quo tempore, me doctore utebaris. Quamquam tum etiam injuriarum non eram impatiens prorsus. Sed nunc illa, quæ sæculi homines pro magnis ducunt, penè despiciatui habeo ; etiam illa, quæ pertinent ad nominis decus. Sat decorum nomen, si illud scriptum fuerit in coelis. Nec eo segnior sum futurus, in benè merendo de Rep. Literaria. Abundè ad hoc calcaria, ac stimulos subdet ; quod cum non multum superesse mihi vitæ possit, propediem ratio erit Deo reddenda talenti, quod porro etiam operam dabo, ne arguar defodisse. Optimæ Conjugi salutem dicito : uti & Colvio, præcipuo tecum in urbe Patria studiorum Ornamento.

*Amstelodami, clō Ioc xlii.
viii. Kal. Febr.*

Tuus,

G. J. Vossius.

CCCCXXXIX.

Gerardus Joannes Vossius *Nob. & Præstantissimo juveni, Joanni Meurfio, Joannis F. S. P.*

JAM duo sunt menses, mi Meurfi, quod morbo æger fuerim, ac hesternæ demum die sacram cœpi concionem audire ; Uxor verò plurimis mensibus domo non extulit pedem, imo vix cubiculo : Et nunc quoque, ita male se habet, ut prorsus metuam, ne vita hæc diu illi vitalis esse possit. Quid faciam in tot adversis ? Nisi ut omnem in Deo meo fiduciam reponam, qui solus novit, quid expediat nobis. Interea hæc non finunt, ut possim pro amico capite, quæ velim. Nullum enim filiorum habeo domi, cuius operâ aliquid efficiam per amicos : sed majus ecce impedimentum ; ut cætera mitam, filius Isaacus, prope integrum annum, partim in Anglia, partim in Gallia fuit, & jam Florentiam, Romam, aliaque Italiæ loca cogitat. Nempe ardor illi, & compellandi

summos orbis viros, & visendi Bibliothecas exteras ; penè ubique totus est in exscribendis, vel ære suo comparandis MSS. hætenus ineditis ; præcipuè Græcis. Collybum proximè accepimus, prius ducentorum, iterum quingentorum florenorum. Hoc plus est, quam ex stipendio trimestris spatii percipiam. Itaque mirè sudandum mihi erit, ut hoc exsolvam. Nam scœnori non lubens accipiam. Et aliud aliter pecuniam urget : quod cognosces, huc si veneris. Quare nunquam importunius potuisti, compellare de eo, quod scribis. Animus prolixus, pro affectu eo, quod magnum Parentem sum profecutus, sed ne ipsi quidem si viveret, morem gerere possem, et si maximè vellem. Eo æquius est ; hoc te in meliorem partem interpretari. Non plus quam est, sed minus potius, me dixisse satis videbis, huc ubi veneris. Gratiæ ago, pro Catalogo Librorum, quos Patrens eximius, nec unquam sine laude nominandus, bono Literariæ Reipublicæ, vel juris publici fecit, vel edendos reliquit. Præclare de publicis mereberis, si inedita minimè patiaris nimis diu cum blattis, & tineis rixari, si consilium istoc juvare valeam, faxo id lubentius, quam tu operam exposcas nostram : sanè omnium Eruditorum interest, quam maximè, ut ne in tanti momenti negotio opera cesset tua. Vale Nob. & care juvenis, & non à me duntaxat, sed etiam uxore, licet ægra admodum, salve.

*Amstelodami,
clō Ioc xlii.
iv. Id. Febr.*

*Tuus ex animo æternum
amicus.*

G. J. Vossius.

CCCCXL.

Viro Cl. Stephano Stephanio, Ger. Jo. Vossius S. P. D.

TAndem à tui amantissimo Vossio, magni, ac veteris amoris, minutum novumque symbolum accipe : Libros quatuor de Theologia Paganica, & Philosophia Christiana, placituros confido. Cur, inquires ? Quia confido affectui tuo, quo & me aliquem esse putas. Et si eloquendum, quod sentio, etiam confido exactissimo judicio tuo. Probe enim mihi conscius sum, permulta me attulisse, ad hoc opus, vel alia, vel aliter dicendo. De hoc nolim me submittere judicio hominum exiguæ lectionis ; quales distinguere nesciunt, inter dicta, in dictaque nostra, & aliena. Ipsi interim sibi placent, licet nihi

hil adferant, nisi millies dictum, qua sperant latere posse, quæ exscripserint. Malim igitur tui similibus placere; quia jam ab eo tempore, quo Lugduni unà viximus, abunde memini, quam φιλομαθής, & πολυμαθής, fores. Eoque avide delidero nosse, quid de Saxone tuo fiat. Hic scriptor, & genti tuæ multum gloriæ, & tibi æternum parabit decus. Tantum ne moras ulterius nece, ne & Patriæ, & propriæ gloriæ, malè consulas. Ad me quod attinet, decrevi majora, quæ partim edidi, partim confecta, vel affecta habeo, diffundere libellis septenis, vel pluribus fortasse; eo alacrior, ad ea grandioris molis rediturus: modò Deus mihi tribuerit vitam, & valetudinem secundam. Ex pluribus intelligo Clarissimum Ravium, apud vos profiteri eloquentiæ studia. Quo nomine gaudeo: nec committes, quin permultam, meo nomine, illi salutem dicas. A fratre ejus Constantinopoli reduce Londinum, literas accipi; unde intellexi quantoperè deinceps de literarum studiis possit promereri. Ingentem enim MSS. thesaurum secum attulit. De Clarissimo etiam Laurembergio scire aveo, quid molitur. Nec enim tam nobile ingenium cessare existimem. Illum etiam plurimà impertire salute, ne grave duxeris. Vale summe vir, & porro amemus nos inter nos.

Amstelodami, cId Ibc xlii.
vi. Kal. Martias. Τάχιστα.

CCCCXLI.

Ludovico de Dieu *Theologo.*

Vir reverende clarissimeque,

EN tibi literas à Ravio, Constantinopoli Londinum reduce, has incluserat literis ad me datis, uti & alteras ad Golium, quas seorsum mitto: nolui vero dimittere hanc tam commodam occasionem ad te scribendi; & eadem mittendi Maimonidem Dionysii mei τὸ μαχαίτη. Accipias tanquam exiguas naufragi cabulas. Si longiorem deus vitam ei concessisset, multa haberemus ex Talmudicis ab eo scriptis illustrata, nec pauciora pro religione Christiana adversus Judæos. Ad me quod attinet, post opus quadripartitum de Theologia Paganica, & Physiologia Christiana, ante menses plures luci mandatum, magis magisque cogito semper ætatem adfectam, vires infirmas, atque ut nihil æque mihi deficiat, quam otium: quo permulti adeo uberi affluunt. Quare totus

sum non tam in novis inchoandis, quam perficiendis & emendandis iis, quæ antehac subsecivis scripti temporibus. Neque tam operam hanc suscepi juvenum more, ut scilicet clarius nomen explendescat, quam ut me probem Deo: cui propediem fortasse ratio erit reddenda temporis mei. Te quoque nequiquam otiosos transigere dies, & muneris ratio clamat, & tot aurea scripta, & constans fama. Eo impensius Deum rogo, ut diutissime te Ecclesiæ ac Reip. literariæ salvum ac fospitem conservet.

Amstelodami, cId Ibc xlii.
idibus Martiis.

Egregii tui nominis
cultor summus,

G. J. Vossius.

CCCCXLII.

Jacobo Golio *Matheseos & Arabicæ
linguæ Professore.*

ORnatissimus Ravius Londinum Constantinopoli est reversus. Literis vero ex Anglia ad me exaratis, alteras addidit tibi inscriptas, quas nunc mitto per eruditum juvenem Bloemium, nisi Romano vocabulo Florum malis dicere. Tam commoda occasione recte atque ordine facturum me putavi, si τὸ μαχαίτη filii mei Dionysii Maimonidem ad te mitterem. Gratum fore spero, imo scio, pro amore, quo vivum, non modo ut Præceptor discipulum, sed pene, ut Parens filium complecti solebas. Cum postremo una essemus, spem faciebas brevi excurrendi Amstelod. sed non licuit nobis esse tam felicibus, ut te frueremur. Quæso quantum potes, tandem fac promissa compareant. Clarissimo & amicissimo Vossio plurimam salutem dicito, imo & veterum Collegarum aliis, ubi sic occasio tulerit; uxori tamen lectissimæ ante omnes.

Amstelod. cId Ibc lxii.
Prid. Id. Mart.

Tuus totus,

G. J. Vossius.

CCCCXLIII.

Quadiennium & ultra est, quod in ædibus meis vidisti Maimonidem filii mei τὸ μαχαίτη Dionysii, & simul locum quemdam, ubi honoris ergo, præceptoris sui clarissimi meminisset. Quod non alio à me

E e e

ad

additur sine, quam ut facilius memoriam refricem. Tam longo inde tempore latuit opusculum apud Typographum: qui ex re sua magis fore putabat, si non ante publici juris faceret, quam perducta foret ad umbilicum, quæ ipsi de argumento similis tituli, sed dissimilis multis partibus, sub manibus haberemus. Spero non ingratum erit munusculum, siue mei causa, collegæ veteris, & qui nulli cedere velim amore tui, quem sic semper amasti. Spero si ex Italia salvus ac fospes edierit filius meus Isaacus, etiam Cæsarem ejus visurum lucem. Interea quæso hoc sis opusculo contentus. Salutabis omnes amantes nostri: Sed quando se sponte offerret occasio. Lectissimæ uxori, à me & conjugæ salutem ante omnes. Id enim mea adscribi plane jussit. Nocte intempesta.

Amstelod. clō Idc xlii.
Prid. Id. Mart.

Tuus æternum,

G. J. Vossius.

CCCCXLIV.

Thomæ Bangio, *Professori Hebraicæ
linguæ Hafnensi S. P.*

Quod literis tuis, vir præstantissime, tam amice me compellas, humanitati tuæ magis adscribo, quam virtuti meæ, aut in Remp. literariam meritis. Quamquam famam alicujus doctrinæ non abjicio: sed sufficit, si ut in eruditis duces non sumus, ita fortasse non agmen claudamus. Dolet, quod juvare non possum illo de Cicerone relegato & revocato. Adolescentem tamen vidisse me recorder. Non parum gaudeo munere tuo de Ægyptiorum Hieroglyphicis, multa & ejus argumenti parata habeo; quæ partem operis constituent de cultu symbolico: hoc est, tertii voluminis de Theologia Paganica; cujus fortasse jam quatuor primos libros videris. Superfunt nunc illa de plantis, ac lapidibus, idem de affectionibus in deos relatis: ac dentque de statuis ac simulachris aliisque religiosi cultus symbolis. Nunc tamen aliis prælum desudat, quia juvit labores istos diffundere nonnullis ad religionem nostram pertinentibus. Cujusmodi sunt de tribus symbolis, Apostolico, Athanasiano, Constantinopolitano: adhæc de annis, quibus Christus natus, baptizatus, mortuus, & alia plusscula id genus. Nempe ætatis memor sarcinulas colligo; ut solent aliò migraturi. Dunsius mihi acceptissimus est, non solum ob commendationem tuam

longe gratissimam, sed ob suave ingenium & mirum proficiendi ardorem. Quare non patiar cum in me ullum officii genus desiderare. Tam patet illi omnis bibliotheca mea, quam si arcto me sanguine contingeret. Plane persuasum habeo virtute doctrinæque aliquando patriæ & suis præsidio & ornamento fore. Si quos huic similes, commendatione tua non indignos putabis, faciam profecto, ut intelligas, quantum tui causa, & Danicæ juventutis, præstare sim paratus. Vale vir eximie, & magno animo bene de studiis mereri perge.

Amstelod. clō Idc xlii.
xvi. Kal. Aprilis.

Tuus,

G. J. Vossius.

CCCCXLV.

Joanni Thomæ Bangio *S. Ling. Prof.*
in Academia regia Hafniensi S. P.

VIX hora abierat, quod per famulam Dunfio nostro literas miseram ad te perferendas: cum ecce me compellat ornatissimus Erasmus Hammerus, ac quod me tum temporis fugiebat, eum se esse ait, qui literas Dunfio datas in Daniam sit delaturus. Subjeci me, id si scissem, aliquam etiam ejus facturum mentionem in Epistola, quam ad te exarassem. Adhæc ille, gratissimum sibi fore, si nunc quoque aliquid adjungerem. Non tamen putavi reposcendas literas, cum opere æque facili liceret alteras contexere. Neque enim soleo operose scribere ad amicos, sed prout quidque in buccam venit, ita illino chartis. Quæ sæpe vix aliud præstant, quam ut jubeant amicis gaudere, vel, si Græcum mavis, χαίρειν, à quo usu vetustissimo primitus το χαρην nomen datum fuit. Quod ad Hammerum attinet, intra hebdomadem triennium exspiravit, quod mihi eum commendares, ac pariter Ludovicum Johannis Episcopi Othoniensis filium. Sed non videntur sic res tulisse Hammeri, ut multum in urbe Amstelodamensi foret: ut qui Musarum sibi sedem Leidam esse maluerit, & Gallias etiam lustrandas putarit: Aliter animatus noster Dunsius erat, qui jam plussculis mensibus hic degit & in vicinia quidem, cui propterea nostræ semper patent fores: omnino enim juvenem diligo, ac fore spondeo, ut cum reducem licebit amplecti, nihil non sapienter ab eo factum intelligas. Nihil vel illi vel mihi jucundius, quam ut ubi domum fuerit

fuerit revocatus, afferat secum notitiam rerum variarum minime protritarum, sed quæ fugiant, ut modestissimè dicam, etiam eruditorum vulgus. Nec alius erga Hammerum animus fuisset. Amo itidem ingenium ejus & probitatem. Sed alia mens iis, quibus, credo, mos ei gerendus fuit. Interea quid refert, unde doctrinam haurias, dummodo pectus ea irrigaris? Quod quin ab Hammero pulchre actum sit, nullus dubito. Neque alio hæc sine à me scribuntur, quam ut videas, me quidem omnia juvenis causa voluisse. Simul etiam longior sum, quia non injucundum est, tecum per literas confabulari. Quod porro etiam facere paratus sum seu Argumentum scribendi erit, seu fecus. Amantibus enim vel de nihilo nascitur Historia.

Amstelodami,
cIo Ibc xlii.
xiv. Kal. Apr.

Tuo nomini addictissimus,

G. J. Vossius.

CCCCXLVI.

*Illustrissimo Jo. Skytte Seniori, L. B.
in Duderoff & Gronfio, Senat. Reg.
Suec. Cancellario Academiæ Upsaliensis, &c.*

Jucundum mihi fuit, illustrissime Domine, videre filium tuum Benedictum, quem ob eximias animi dotes plurimi semper feci. Majorem tamen ex ejus conspectu cepissem voluptatem, nisi narrasset de valetudine adversa: Cujus ergo terras alias peteret, Gallicas imprimis, coeli solique latioris & medicis experientibus felices. Dabam operam, ut mederer salutaribus ac fortibus monitis. Fortasse fallor. Nec enim morbi causam, vel naturam mihi aperuit. Attamen vereri occœpi, ne quid sit, quod generosiorum ejus animum coqueret. Novi enim ab aliquot annis, pleraque altius ad animum revocare, quam ex magni Catonis præscripto oporteret. Vellem etiam magis imbibisset sortem rerum humanarum, nulli undique & usquequaque arridentem. Quod ne quidem expediret nobis, discipulis Christi, cum Magistro ituris per Augusta ad Augusta. Atque & hæc & alia, memini me miscere sermoni, qui nec illi erat ingratus. Locutus cum eo filius meus Isaacus in Galliis eumque sui itineris comitem optabat. Sed meus Italiam cogitabat ad visendas Bibliothecas toto orbe inclytas. Multa ex iis ex-

scribit hætenus inedita, quæ redux, Deo juvante, juris faciet publici. Ptolemæum quoque dabit multis partibus ab ingenio & antiquis codicibus emendatiorem. Geographica Scylacis Cariandensis cum notis suis jam ante biennium in lucem emisit. Proximè vero divulgavit opus posthumum fratris sui defuncti Dionysii. Est id Mosis Maimonidis Rabbiorum doctissimi: cuius de Idololatria dissertationem Latine reddidit & uberi Commentario illustravit. Isaacus vero, cum pluscula in hoc opusculum præfari vellet, recte se facturum putavit, si aliquid misceret de illustrissimæ domus vestræ affectu erga fratrem nunquam satis laudatum. Vellem Isaac meo paulo plenius constitisset de primogeniti, heu quondam, tui fortissimi juvenis excessu. Accuratius quædam dixisset. Sed ea fortasse ex illustrissimi Jacobi Skyttii literis aliquando dabit cognoscere. Mihi meisque perseverat voluntas, quacunque ratione licebit, testandi posteris, quanti faciamus excellentissimam domum vestram, tum aliter, tum de studiis præclare meritam & porro mereri percupidam. Egregiæ animæ illustrissimi filii tui Jacobi Skytte, suavissima mihi sæpe memoria occurrit, nec mihi duntaxat sed & conjugii & liberis. Quæso ne grave duxeris salute eum impertiri nomine omnium nostri. Proxima occasione ad eum scribere decrevi, libentius etiam facturus, si ipse me præverterit. Nunc ad te, illustrissime domine, scribendi occasionem nolui negligere, eunte ad vos nobili Sueco Jo. Kreutfio, qui Galliis Italiæque lustratis, anteaque annis totis apud nos literarum studiis impensis, reditum in patriam parat.

Amstelodami,
cIo Ibc xlii. iv.
Kal. April.
St. Novo.

Illustrissimo nomini tuo, totique inclytæ familiæ devotissimus,

G. J. Vossius.

CCCCXLVII.

*Joanni Cloppenburgio Theologo, Ger.
Jo. Vossius S. P. D.*

NON mediocrem mihi dolorem attulit, clarissime Cloppenburgi, nuncius de excessu communis amici, doctissimi Collegæ tui Zevecotii. Quem virum, ut ante annos viginti circiter, primulum vidi, amare genium ingeniumque illud continuo cœpi. Ne-

scio quæ Suada, ut de Pericle olim dictum, in labris ejus sedebat, sic ut facile cæteros literatos imprimis pelliceret in amorem sui; nec mediocriter capiebar ejus versibus facili vena profluentibus. Quanta vero cum laude historias fuerit professus, nulli melius dicent, quam qui docentem audierunt: neque id nos ignorare ea, absentes licet, permittunt, quæ ad Tranquilli Julium observavit, & Observata Politica inscripsit. Recte sentis interiorem mihi cum eo amicitiam fuisse, neque unquam in Amstelodami hac urbe ponebat pedem, quin domum peteret recta & de studiis confabularemur, aliquando etiam querelas suas de nonnullis in sinum deponeret nostrum. Quod si serenior mens foret (nunc ea nubila ob valetudinem aliquandiu adversam) pangerem aliquid in gratiam amici; sed cum non magis id corporis imbecillitas, quam occupationes finerent, cum clarissimo Collega meo Barlæo, Philosopho pariter, Poetaque eximio, super isto egi; qui cum decima nocturna de eo à me compellatus foret, postero mane versus eos misit, quos nunc vides. Nempe unus ille optimæ viduæ & eleganti adolescenti pro nobis erit duobus: præsertim quando nec valetudo sivit, ut facerem, quod vellem, & noster ille, ut nosti, in Poesi plane dominatur. Eoque nihil attineret pannum nostrum cum illius purpura componi. Atque ista de me scio facile ornatissimæ viduæ satisfaciunt: dummodo tu sis facundus mentis nostræ interpres. Sanè quacunque in re vel illi vel filio possit utilis esse opera mea, nupiam sentiet eam claudicare. Pro dissertatione de baptismo pro mortuis, gratias ago. *παυδαλιν* est quæstio, multumque deinceps etiam, ut metuo, agitanda. Nostram nunquam habui ut *Κυρίαν Νέαν*. Sed in alienis etiam est, quod desiderem. Tuam expendere animus est; neque enim judicium præcipitare soleo. Quod si deinceps etiam alia ejus generis de penu tuo promere voles, & ut nunc fecisti, ad dapes tuas invitaris, facile me scholico illi convivio addicam, imo, pene dicam, accessero invocatus. Amplissimo Brinkio & (ne singulos nominare sit opus) universis illustribus Gymnasii vestri vel Curatoribus, vel Professoribus, si occasio se offeret, salutem meo nomine dicito, imo & clarissimi Collegæ. Utcunque enim non aderat ista scribenti, tamen id velle non dubito.

Amstelodami, clō Ioc xlii.
iv. Kal. Aprilis.

CCCCXLVIII.

Andræ Riveto S. P. D.

NON decreveram, clarissime Rivete, quem mitto de tribus symbolis, libellum, seorsum in lucem dare; sed serenissima Regina Britannica cum prole Regia, & celsissimo Principe Araufionensi Friderico, cum filio Principe Gulielmo, in urbem hanc advenientibus, putavi & me debere tam lata die officium testari non modo erga celsissimos Principes, sed etiam erga Regiam Magnæ Britannæ Majestatem. Quorum utrumque me consequi posse existimavi, si opusculum hoc regio genero dicarem. Utinam vero tibi etiam probetur hic labor noster. Quod si erit, magis quam nunc probabitur auctori; sin aliquid improbabis, quæso facias certior, neque in istac solum opella sed etiam cæteris, si ea lucem viderint siue deinceps. In tam densis occupationibus & illa *παυδαλιν*, nihil mirandum sit, si quid excidat. Eo soleo studiose exquirere summorum virorum judicia, ut, vel addita editis pagella aliqua, moneam lectorem, vel in editione secunda corrigam. Decrevi edere quæ scripsi de historia Dominicæ Passionis & Resurrectionis. In quibus præcipue opera defudat nostra in conciliandis scripturis, & ex literario penu conciliandis nonnullis. Utinam propius, ut Leidæ quondam, habitarem; sed votis istoc non fiet. Quare sic quoque operam dabo, ut pro modulo nec de sacris, nec externis literis male dicar meritis: scribam, quæ scio; quæ nescio, si hic minus potero, in schola discam cœlesti. Pro nupero ingenii tui, doctrinæque dono, gratias ago summas. Et si porro, ut confido, imperties nobis labores tuos, propediem iterum grates agam. Deum rogo, ut nos omnes regat spiritu veritatis ac pacis, quo, quatenus humana finit infirmitas, unum sapiamus omnes.

Amstelodami,
clō Ioc xlii.
post. Pentecostes.

Tuis æternum,

G. J. Vossius.

CCCCXLIX.

CCCCXLIX.

Andreas Colvio S. P.

PRæclare Colvi, qui hæc tradet literas, nobilis est Polonus, reformatæ Ecclesiæ filius, plusculis ab annis mihi notus, nec non ob virtutis studiorumque amorem pergratus. Is menses aliquot in urbe vestra sedem figere decrevit; velim igitur, ut auxilio & consilio juves, partim cogitando de domicilio, ubi honeste habeatur, partim etiam (quando molestum non est homini tam occupato & privatis & Ecclesiæ negotiis) pauxillum confabulando. Atque utrumque horum etiam peto ab egregia Beversvici anima. Pene scripsissem super ea re etiam ad communem hunc amicum; sed quid attinet isthæc iterare, quæ ex literis hisce ipse etiam possit cognoscere? Satis es expertus nulli in literis scribendis Romanum Lentuli magis nomen convenire quam mihi. Quid mirum? absque noctibus esset nihil à me expectare deinceps possit Resp. Literaria. Nunc, quod amici de die eripiunt, de somni tempore decido. Quare propediem, ut puto, aliquid nostri conspicias: in his libellum de tribus Symbolis, Apostolico, Athanasiano, & Constantinopolitano, quod Nicenum etiam nuncupari solet, quia Nicenum comprehendit. Sed tibi, tam amico capiti, irasci si possem (cujus ne causam quidem præbuisi in pueritia, etsi ea ætas valde cerea ac lubrica) nunc sane vehementer succenserem quod non sequaris exemplum nostrum in bene etiam de posteris merendo. Quod neutiquam scriberem nisi quantum valeas scirem. Occupationes quod prætexas, aliquid, & nihil est; vires si eas tibi neget, alium quæras cui persuadeas. Cave igitur, ne cogar suspicari, placere tibi, ut cum gentili loquar Poeta, antiquæ sacra Vacunæ & Vacunales focos. Plurima salute impertias Consularem Wittium & affinem ejus Vivienum, ac pariter lectissimas conjuges; ut taceam tuam, & Bevervicium meum. Abunde salutigerulum feci, quare desino.

Amstelodami, clb Idc xlii. eo die quo æstatem incipere non uno loco proditum Plinio.

CCCCCL.

Georgio Ratallero Dubletio, Ger. Jo. Vossius.

Quamtu video, nobilissime Dubleti, de Junio, ut Hagam is veniat, spissum est negotium. Fuit his diebus mecum, sed negat se ab Oxoniensi Comite posse avelli: nec Hagæ alterutri quicquam esse negotii. Huc tamen cum Comite venturum, simulac de Reginæ Britannicæ ad nos profectioe facti erint certiores. Interea Hoofdus prope impatienter urget ut sibi tradantur, quæ una cum libris fuerant transmissa. Et hoc sine tradidit mihi apocham; ut constet, suo huc ea mitti periculo. Nihilominus hoc agendum, ut *κειμήλια* illa qualiacunque fido tradantur homini: ut ipsi in simili negotio nobis fieri vellemus: de quo frustra ad te, in quo dubium, utrum probitas, an prudentia præcellat. Accepi literularum aliquid à filio ad te quod mitto. Ac paulo post etiam alteram accepi Epistolam, unde liqueat quinto Aprilis etiamnum fuisse Florentiæ; paucis vero diebus Romam iturum. Totos pene dies in Bibliothecis delitescit, & describendis scriptoribus Græcis hætenus ineditis occupatur: optat se centimanum Gyan, ut eo beatus redeat domum cum *ἀνεκδοτῶν* thesauro. Nunc enim solum se non sufficere tam multis excubendis, nec unum invenire Florentiæ Græcè gnarum, vel saltem cujus opera in hoc negotio justo pretio uti valeat. Quare subinde se tristibus oculis intueri multa & præclara reposita, quibus videndis profecto nulla deinceps affulgebit occasio. Retuli filii mentem matri. Illa nihilominus malit filium redire bimanum quam centimanum: qualem se negat peperisse, & tali conspecto ait, vel oculos clausuram, vel latebras quæsituram, ut solent, qui necdum ære lavantur. De studiis nostris si quæris, totus in eo sum, ut veteres relegam Chartas, atque inde seligam, quæ posse lucem ferre arbitror. Est vero tanta eorum turba, quæ jam cum blattis & tineis rixantur, ut edendis (limam enim desiderant) vix decem anni suffecerint. Longe enim eorum numerum exsuperant, quæ hætenus in manus hominum venire passus fui. In hisce igitur ad incudem revocandis, tantum sudo, quantum sinunt, qui assidue interpellant. Amplissimis viris, Reigersbergio, Dedelioque salutem plurimam.

*Amstelodami, clb Idc xlii.
iii. Kal. Maias.*

CCCCLI.

CCCCLI.

Georgio Ratallero Dubletio, *Senatori*
Cur. sup.

Nobilissime, amplissimeque vir,

Indolui vehementer, postquam ex eo, qui tuas mihi literas adferebat, intellexi de excessu optimæ adfinis tuæ: nec enim antea id cognoveram, neque tam id literæ tuæ significabant, quam huiusmodi quid innuebant; fortassis, quod aliunde malles me percipere id, de quo non scribere modo sed cogitare etiam foret permolestum. Ac sortem quidem defunctæ nemo sapiens lugebit. Quid enim certius, quam vitam hanc plus aloes habere quam mellis? Ego si multos ante annos defunctus forem, quot adversa non vidissem! Sed doleo vicem optimi & præstantissimi affinis tui: qui nescio an facile alteram ejusmodi vitæ comparem sit reperturus. Interea temporis eam quoque provinciam minus difficilem reddet; quod ni fallor, unica solum proles relicta & in re tanta. In hocce verò luctu, ut confido, eum se præstat, quem semper cognovimus: pectoris nempe bene præparati quamvis ferre fortunam. Quam ad rem vehementius etiam incitare eum debet Gentilis & affinis sui exemplum. Cujus tanto justior fuit dolor, quanto molestior multiplicis adeo ac tenellæ proles educatio; sed nulla esse tanta tristitia debet, ut animum, non dico, commoveat, sed de statu dejiciat. Frustra hæcenus studiis & sacris & externis operam dedimus, si hoc non magnam partem ex iis haulimus, quomodo medela debeat fieri animis ægrotis; imo illud etiam qua ratione consequamur, ne animus multum diuve moveatur adversis, id erit, si mens ad omnem sit eventum præmunita. Nam tela, quæ prævisa, ea vel amictu evitamus, vel levius saltem feriunt, ut dici solet: Atque ista scribenti venit in mentem, si tute, qui tam fortia verba exaras, cognosceres nunc filium dulcissimum quem ante biduum Florentia (ubi tantum temporis, partim musis conferendis, partim *ἀνεκδοτοῖς* exscribendis, impendisse nosti) saluum ac fospitem venisse Romam: literis ipsius edoctus gaudebas, Si inquam eumpe nunc tristi fato excessisse audires: nonne ea res omnem illam, quam sic prædicas, sapientiam facile expectoraret? Ego mox omne tam triste abominare, eo facilius, quia omnia, ejusmodi quidem, flocci facio. Huic cogitationi pauxillum insitens, non alio animo, quam ut me ipsum excuterem (valde enim difficile est illud γνῶσις σαυτοῦ)

ut pugnantes videas affectus, risi & ingemui. Denique in eam mentem sum adductus, fore me non imparem fortunæ, per gratiam divini spiritus, qui non tentat supra vires. Quorsum, inquires, ista tendunt? Nempe, ut ostendam, omnia nos nobiscum antea revolvere debere, quæ valeant obtingere in hac vita; si nihil eorum, quæ metuimus, usu venit, lucro reputabimus; majores etiam Deo gratias agemus: sin secus, animo erimus præparato: sed noctuam Athenas, qui ista scribam. Mitto tibi exemplar opusculi de tribus Symbolis: quod gratum erit, ut omnia nostra. Addidi alterum, Amplissimo Reigersbergio, tertiumque affini tuo Dubletio, quem plurimum meo salutes nomine, rogo, uti & senatorem collegam, quem dixi. Mitto & alia exemplaria: sed de illis curæ futurum cognato Brunæo: in his unum cedit Doctori Johnsono, aliud equiti Zulichemio, tertium D. Riveto: quartum equiti Wickesfortio: quintum consulari Conradino Burgio; sextum ipsi cognato. Vix scripseram ista, cum in mentem venit, de nob. Boswello, Dedelio, Catfio. Quare & ista tibi destinavi; sed conditione ea, ut si voles, non per tuum id famulum fiat, ut recipiant, sed per Brunæum nostrum. Tantum monendus erit, vel potius significabo, ut ipse domum veniat tuam.

Amstelodami,
c1o Ibc xlii.
Non. Quint:

Tuus tuo merito,
G. J. Vossius.

Cum ex literis affinis meæ Brunææ cognoscerem filium ejus ægrotare, consilium mutavi, omniaque ad te exemplaria misi. Si meliuscule valuerit, tuam poterit domum arcessi, per famulum, ut levet tuum illum labore discurrendi per urbem ad exemplaria tradenda. Omnia tuæ prudentiæ committo, qui facies, prout maxime tibi erit commodum. Prænomen Domini Dinglei, imo vix nomen sciebam. Id exemplar procurabit Doct. Johnsonus, ad quem de eo scribo.

CCCCLII.

Merico Casaubono.

Reverende clarissimeque Casaubone,

JA M facile cum animo tuo æstimare potes, cur has ad te literas scribam, nempe quia ex beneficio Regio mihi annumerandæ sint libræ

libræ sterlingicæ quinquaginta. Nisi forte quadraginta duntaxat; nec enim, qui tam longe absum, scire possim, ecquid nunc etiam decidi oporteat de summa. Filius meus Isaacus post vias & lustratas Gallias vel potius bibliothecas cum viris doctis, in Italiam quoque abiit. Florentiæ tribus circiter mensibus substitit, ubi imprimis eum detinuit bibliotheca Medicæ. Unde multa *diversa* se descriptisse filius pene dixerim gloriatur. Inde Romam abiit, præsertim propter Vaticanam. Neapolin etiam accessit, ubi illam lustravit, quæ Jani Parrhasii olim fuit. Romam inde rediit, ubi etiamnum erat ante hebdomades ternas, ut ex ejus literis cognosco, sed primo die, quo ætius aliquantum remiserit, ait se Venetias iturum. Hæc sine majusculis impensis fieri non possunt. Quocirca rogo, ut cura tua citra longiusculam moram (modò ullo pacto sic res vestræ ferant ut confido) mercatori Hoofdio annumerentur pecuniæ ante memoratæ. Id ego in hoc rerum mearum statu beneficii loco sum habiturus. Quin nostra de Theologia gentili & Physiologia Christiana jamdudum acceperis, minime ambigo. Quod vero ab tam longo tempore nihil acceperim responsi, id ego nulla fieri negligentia arbitror, sed ob rerum Britannicarum statum præsentem, qui animos vestros in rebus, quæ infinitis partibus sunt majores, defixos & suspensos tenet. Quod unum valeo, id volo, nempe assiduo ut preces fundam ad Deum pro sereniss. Regis Regiæque familiæ ac universi regni incolumitate. Augusta Regina ab Amstelodamentibus nostris magnificè excepta. Qua occasione & ipse gratulari volui libello de tribus symbolis, quem idcirco dicavi juniori Arausionensium Principi, non tam ut principis inclyti filio, quam ut genero Regio. Mittam prima occasione. Multa & alia habeo editione prope parata; sed ita à mane usque ad vespertinam interpellor, ut non decuplam ejus valeam, quod possem, si in prædium aliquod me abdere ad menses paucos liceret. Facimus tamen, quod valemus, cujus rei indicia & alia aliquot conspicias brevi, modo Deus vitam & valetudinem concesserit utrique nostris. Id Deum oro, si salutare nobis. Plurimam dicito salutem lectissimæ conjugii & Reverendo Domino Doctori Decano, & universo reverendorum fratrum collegio. Quia ab his xii. annis, quo una eramus, è collegio venerando, & fatum aliquos abstulit, & publica utilitas ad majora transtulit, scire aveo, quibuscum nunc fratribus hoc decus quodammodo habeam commune, & an adhuc vita fruatur optimus Dr. *Angan* : cujus

subinde inter alios mihi memoria occurrat.

Amstelod. clō Ibc xlii. iii Kal. Sext. Quo die olim Londini religionis ergo combustus Rombertus Barens, Anglus, Sac. Theologiæ Doctor, cujus extat liber de Pontificum vitis. Anni nunc sunt cii.

Tuus æternum,

G. J. Vossius.

CCCCLIH.

Joanni Friderico Gronovio *Hist. & Eloquentiæ Professori.*

Quas clarissimo Freinshemio literas inscripseras, confestim curavit, & nunc responsum ejus mitto. Video virum esse optimum doctissimumque, semel iterumque una fuimus, excepto quod non unà essem, cætera læti. Literas ab Isaaco meo jam binas accepi Roma, spero intra trimestre denuo affore nobis. Grotius Riveto fusius, sed una alteraque pagina Laurentio respondit. Nunc uterque responsum parat: porro Riveti illud jam excuditur ab Elzevirii. Polyænum mitto & unà Grosippum, unde colligo cogitare te adhuc de re nummaria. Utcunque ex literis tuis intelligam, quantopere distinearis, confido tamen fore brevi, ut aliquod ejus argumenti in lucem des. Si quid ultra ex mea bibliotheca tuis possit infervere commodis, exposce. Paratior ero ad mittendum, quam tu ad petendum. De Salmasii reditu nihil certi potui cognoscere. Puto etiamnum Divione esse. Plurimam salutem doctissimis collegis dicito.

Amstelod. clō Ibc xlii. xvii. Jun.

Tuus totus,

G. J. Vossius.

CCCCCLIV.

Joanni Rave, *Eloquentiæ Profefs. S. P.*

Præclare Rave, si quis alius in adolescentia jurare in singulas Stagiritæ nostri sententias soleat, eum me fuisse commemorari. Neque hoc animi mihi tantummodo fuit septennio illo, quo sub magistris acutissimis ope-

operam darem differendi disciplinæ, & universæ sapientiæ ac prudentiæ studiis, donec tandem supremâ in illis laureâ non indignus judicaretur; sed biennio etiam post, cum Aristotelis *Ἀρεταματις* in Leideni Lycéo publica auctoritate enarrarem. Quum plusculis etiam annis postea hoc animi permanisset, sed paulatim veritatis luce adactus confiteri cœpi, aliqua divini viri repertis addi, aliqua etiam melius dici posse, idque non modo in philosophia ipsa (quod in scientia naturali etiam Hypseâ cæciori clarum esse arbitror) sed in ipsa quoque *ὑποκειμένη καὶ διαλεκτική*; quibus duabus omnem differendi disciplinam veteres complectebantur. Placet igitur, quod à Plinio ad Cænium scriptum video. 'Sum ex iis, qui mirer antiquos, non tamen, ut quidam, temporum nostrorum ingenia despicio. Tuum sane amo, & exosculor: cum ob ea, quæ aliis in studiis elaboras, tum ob reperta ista in rationis disciplina: quæ non possunt non amari ab rationis amantibus. Quod si forte ea res invidiam creat, forti hoc animo devorandum. Sin iste dissensus etiam offendit bonos, & qui aliquid possunt, istum errorem quadam arte ut corrigas elaborandum. Nempe ne publice è cathedra aliud doceas, sed sententiæ tuæ arbitrum facias orbem literatum scriptis eruditis; ita non erit, quod, qui adversantur, dicant, minus à te in cathedra impleri munia, ad quæ sis vocatus, imo erroribus imbui auditores: & paulatim tamen ex monumentis ingenii doctrinæque tuæ veritas elucebit, quibus dum undique applauditur, futurum confido, ut quos nunc maximè habeas adversos, pedibus in tuam concedant sententiam. Valde autem placet, quod hæc studia sic tractes, ut ostendas sectari te veritatem, quæ carior esse nobis debet, quam ipsi nobis sumus: & interea etiam litare te Modestis, quæ cum ubique sectanda, tum imprimis locum habere debet iis in rebus, quæ elegantioribus ingeniis vere sint animi pabulum, non tamen istiusmodi, ut inde vel animarum salus, vel vestigalia populi dependeant. Pluribus nunc colloquerer tecum, nisi præstantissimus frater tuus, quem ob præclaram eruditionem, præsertim orientalium linguarum scientiam multum amo, pro viva sit Epistola futurus. Ex eo igitur, quicquid ad res nostras pertinebit, ubertim cognosces.

Amstelod. cId Idc xlii.
Pr. Kal. Quint. St.
Gregoriano.

Tuus totus,

G. J. Vossius.

CCCCLV.

Georgio Calixto.

Helmstadium.

Clarissime ac summe vir,

CUM omnis doctrina, vel divina sit vel humana, hæc ad Deum ducat, illa perducatur: recte me atque ordine facturum hoc tempore putavi, si opus conderem, quo ex utroque facerem cinnum, sive ut Græci dicunt, *κυκλῶνα*: sed sic, ut præcipuè versarer circa humanam, quæ gestorum historiam & notitiam naturæ comprehendit; unde ad doctrinam divinam, illam pietatis nempe, sive Christianæ fidei, & vitæ præcepta, ascenditur. Hujusce laboris nostri, satis operosi, pro mole quidem occupationum, quibus distineor, exemplar mitto lubens meritoque. Nec ingratum fore confido. Addidi opusculum de tribus symbolis, & Maimonidem *ἡ μάχη* filii mei Dionysii. Item pænegyricum Matthæi mei illustrium Ordinum historiographi & Amstelodamensis bibliothecæ Præfecti. Pene addideram volumen ingens de Arte Grammatica; sed metuebam, velle hoc viderer, ut ejus lectione repuerasceres: vel etiam hoc agerem, ut avocarem ab labore indefesso, quo & voce & scribendo divinis vacas, veritatis pariter ac concordie assertor. Sed Grammatici illius laboris loco, alia gravioris argumenti expectata, modo Deus vitam ac valetudinem concesserit. Horneio præclaro philosopho ac Theologo plurimam à me salutem dicit.

Amstelod. cId Idc xlii.
xv. Kalen. Quintiles.

Tui nominis estimatissimus,

G. J. Vossius.

CCCCLVI.

Illustri V. Joanni Skytte, Baroni, &c.

Illustrissime Domine,

JAM spero literas acceperis, quas iv. Kal. April. dederam Nob. juveni Jo. Kreutzio. Ut denuo scribam, bella facit occasio, eunte ad vos V. clarissimo Jo. Freinshemio, quem Historiarum & eloquentiæ in Upsalieni Academia Professore constitutum, & ante ex aliis intellexi, & nunc ex ipso audeo, gaudeoque. Atque hoc omne, præclare literarum ac literatorum Mæcnas, Tui unius est beneficium, qui & de præstantissimo Freinshemio,

Freinshemio, atque ejus familia, & de Academia patria atque adeo omni Rep. literaria pulcherrime mereri voluisti. Hæc & fidentius scribo, quia mihi & ex sermone & tot ingenii doctrinæque monumentis & aliorum etiam summorum virorum judiciis, vir hic notissimus est; dignissimus sane, quicum vel in tenebris mices, & ea ingenii elegantia, ut non facile posthabeam cuiquam; inque scriptoribus antiquis ingenio tam subactò, ut his & vicinis terris hætenus se omnibus probaret ea in palæstra versatis. Sane multa sunt, qui prima facie quantivis pretii videntur, sed si introspectas, comperimus secundum veterem adagionem, pro thesauro carbonem. In nostro hoc contra est, qui longe plus habet in recessu quam in fronte promittat. Neque unius hoc mei judicium est. His paucis diebus locutus sum cum multis, qui uno ore omnes, ut indefessum laudant tuum studium in bene merendo de literis, ita & prudentiam extollunt in hoc viro è literatis seligendo, qui familiæ Skyttianæ, sanè illustrissimæ, si fieri potest, lucis aliquid addere porro apud posteros, & ornatissimus ipse ornamento esse, licet longè ornatissimæ, diu noctuque conabitur; & si Deus longam illi vitam ac valetudinem, quod velit, etiam poterit. Nihil attinet plura de Clariss. viro addere, qui eâ est modestiâ, ut si ista à me scribi sciret, verecundius tanto Heroi literas offerret nostras. Metueret scilicet ne ex compacto, hoc fieri suspicari posses: verum ne ille quidem scripturum me scivit, nisi cum jam nauta abitum pararet. Quæso ubi occasio erit, salutem dicito generoso filio Baroni Jacobo Skytte, volo enim ut sciat, me memorem esse sui, neque me solum, sed omnem familiam meam: à qua itidem salutem adscriberem, nisi hoc ipso mane Ultrajectum se cum aliis amicorum contulissent.

Amstelodami,
cl. Ioc. xlii. iiii.
Non. Quint.

Illustrissimæ familiæ tuæ
æternum devotus,

G. J. Vossius.

CCCCLVII.

II. Hugoni Grotio, Legato Suecico ad
Regem Christianissimum.
Lutetiam Paris.

POST perlongi temporis moram, Illustrissime Domine, ad officium iterum redeo. Binas Excellentie Tuæ literas accepi; quarum priores exarata, octavo die Aprilis:

iis Saberium commendabas: ac placet, tum ingenium elegans, tum varia eruditio. Allocutus est Eruditorum complures; in his etiam Cl. Rivetum. Is commendavit Illustri Comiti Rhenensi, ac tantum videtur effecisse, ut præfaturus sit ejus Liberis, ac præter victum habiturus sit centum Imperiales. Gaudet Domina Comes, se opera Domini Riveti, nactum juvenem modestum, doctum, & quidem reformatæ Religionis. Nam inquit, metuebam, ne cum maritus sit confessionis Augustinæ, quempiam præficeret Lutheranum. Sed demùm Augusto mense est tuturum, ut in Ædes Dominae Comitissæ, marito in castris agente, recipi possit. Nunc ea cura mordet Saberium, ne interea Lutetiam Parisiorum scribat Rivetus, & qui Ecclesiastarum, illi degunt rescribant, de quopiam incautius sibi dicto factore. Utcumque erit, nec ego, nec alii hujus urbis, patiemur eum quicquam in nobis deliderare. Alteræ Excellentie Tuæ literæ scriptæ fuerunt x. Maii; ex quibus intelligo tandem Excellentie Tuæ traditum esse opus nostrum, de Theologia Paganica, & Scientia Naturæ. Id ego jam compactum dederam, ante menses per multos illi, qui Lutetiæ distribuit libros à Blauwiis editos. Hic enim erat tum temporis. Simul mandabam, ut postquam in Gallias rediisset, adderet pro amico, cui dare velles, ex incompactis exemplar quodpiam, vel etiam geminum. Item filio Ilaaco, tum adhuc agenti Lutetiæ, minimum duo Exemplaria, & si plura exposceret etiam tertium, quartumve. Sed non multo post, Epistolam à filio accepi, unde intelligerem dolere illi, quod ante abitum non potuerit eos codices nancisci; quo gratum animum erga benè meritos testaretur. Quid iis Exemplaribus factum sit, exquiram ex Blauwio. Sic enim non Blauwiis nunc scribendum mihi, fratrum eo, qui junior erat, paucos ante menses defuncto. Magis ea res obesset Reip. literariæ, nisi fratrem propemodum ex asse hæredem tecisset. Absque eo foret, qui superest, impar esset sumptibus faciendis tantis. Quippe ut mittam cætera, Typographiæ ergo, alit quotidie supra homines xl. Utrum præter compactum exemplar, etiam acceperis unum, plurave incompacta, non potui ex literis Excellentie Tuæ cognoscere. Si neglectum Bibliopolæ, petat famulitii aliquis; facile ei in memoriam revocabitur, quod me præsentem, stylo æneo, in charta deletili scribebat. Probè etiam Blauwius, & famulus ejus meminere, quibuscum de eo sum locutus, ubi literas Excellentie Tuæ accepi; & nullam ejus rei in iis vidi mentionem. Ea quæ scripti proximè

F f f

Excellentie

Excellentiæ Tuæ, probari valde gaudeo: Quod verò etiam laudibus extollas, planè triumpho. Quamquam nullius Suada possit esse tanta, ut quas mihi laudes tribuis, eas mihi arrogem. Ac tam lævam mentem à numine deprecor. Interea excessus iste amoris, in prædicandis meis, solatur me non parùm, cum alii sic depretiant, ut nec iustas laudes concedant. In quibus ille, qui Flando inanes glorias, satis docet, cujus sit gentis. Misi illi per amicum nostra, cum filii Maimonide. Rogatus, an nihil vellet rescribere? negavit, sui moris esse rescribere, nisi prius legisset. Bellè hæcenus. Post mensem literas accipio. Ait sibi gratos esse hos labores, uti alios nostros: Cæterum iudicium non apponere, quia non soleat iudicium ferre, nisi opere integro perlecto. Perlegerit credo ad Kalendas Græcas, ac iudicium tum expectabo; quod perscribat, an minus (dicam cum Comico) cicum non interdum. Quæ ad N. T. adnotasti, quanto studiosius verso, tantò magis exosculor, ac stupeo prorsus. Nihil hæcenus tale, vel tantum prodiit. Sanè inimici de iis tacere, quam vituperare illa malunt. Sed tria sunt, quibus sic eos offenderis, ut nec fullo ululam odisse pejus possit. Primum est, quod Papam negaris, illum Anti-Christum. Ac Tuæ quidem Excellentiæ propositum illud video, ut facilius coalescat Ecclesia misere adeo scissa. Illis verò hoc studium, ut quantum pote abhorreant omnes ab Ecclesia Romana, arctèque sibi adhæreant. Itaque multi existimant, expedire ut credatur Anti-Christus; nec opinionem eam evellendam animis, utcumque falsa foret. Optimè Barucephalum nosti, Dordrechtanum illum concionatorem. Nam vere id erat, si Tullii more, concionatoris utendum vocabulo. Is amice à me monitus, nè in concionibus tribueret Pontificiis, quæ nulli eorum non vehementer improbarent. Ille quærere, num ego patrocinium suscipere vellem Papistarum? Respondi alia esse satis multa, quæ verè possent culpari; nec veritatem egere falsis: Nec posse eum unicum Pontificiorum producere, qui sic sensissent; me sexcentos allaturum, qui contrarium docerent. Ad incitas redactus, torvo vultu dicere, neminem posse satis fœde Romanæ Ecclesiæ doctrinam coram populo depingere, ut magis eam abominetur. Non multum abludit oratio eorum, quibuscum sum locutus Amstelodami. Cui, inquiunt, bono, ulterius non haberi pro Anti-Christo, quam ut plures quotidie deficient à nobis ad Romanam Ecclesiam? Quasi non abundè eorum sit, qui hoc faciunt, rerum suarum satagentibus apud nos

Pontificiis Doctoribus; nostris plerisque omnem penè fiduciam reponentibus, partim in acerbioribus Magistratus adversus Pontificios edictis, partim in eo quod se frigide, etiam causam suam agentibus, obloqui liceat nemini. Alterum quo aſciam in crura impegeris, ipsimet esse aiunt, quod omnes errores Papistarum, vel defendas, vel excuses. Magnam partem hæc eorum opinio inde originem trahit, quod Papisticum credant, coque erroneum, quicquid non conveniat Doctoribus suis. Dicere soleo, *ἀναθεστέον ἡδὲ ἀνακατέσθαι*, tria distingui tempora oportere, *Conformationis*, quæ in primis sæculis, quod ad multa etiam in consecutis: *Deformationis*, quæ jam ante etiam Successorem Gregorii M. Bonifacium (intermedius enim Sabinianus solum quinque mensibus sedit) in nonnullis esse cœperat; sed seu Tyrannidem, seu superstitionem attendamus, à temporibus Hildebrandinis, magna imprimis incrementa cœpit: *Reformationis*, cum & optimo, & doctissimo quoque tam Tyrannidis, quam Superstitionis pertracto undique, emendatio Ecclesiæ exposceretur, variique exulceratæ Ecclesiæ medicinam adferre conarentur. Sed plerique non sat iusto pretio antiqua tempora æstimantes: unde *αὐτὰρ αἰεὶ* quadam, non ea modo rejecere, quæ à deformatis erant temporibus, sed etiam cum Apostolicis traditionibus nihil non (ut sic dicam, quando Conformationis voce uti cœpi) conforme traderetur. Jure igitur Excellentia Tua negat, alba omnia linea signari oportere, quæ Reformationis Authores immutaverunt; cum non ea modo plerique sustulerint, quæ à deformatis erat temporibus, sed etiam, ut sic dicam, conformibus: hoc est Apostolico temporis convenientibus. Tertium cujus ergo sic bilis turgeat est isthoc, quod seditiosos dicas, qui Genevensem imprimis Ecclesiam sequuntur; & Calvinum, non dubites, ut crudelem incescere. De priori aiunt, te præcipuè tangere, tum Anglos, sive potius Britannos reformatos, tum Belgas fœderatos, & in his Amstelodamenses. Quod ad Britannos, plerorumque iudicium est, rectè fieri, quicquid hæcenus ab eis factum. Nam Regem esse desinere, qui Supremo Regi non paret; non parere autem, qui vel Papista sit, vel papizet; papizasse vero hæcenus Ecclesiam Anglicanam, mox ab excessu Henrici VIII. cum Edvardus Ecclesiam reformaret, licet iudicio eorum, qui flos Theologorum credebatur; nec suorum omnia iudicio meliori vellet, sed externam etiam opem exposceret, in hac Buceri ac Martyris; è quibus jam tum Bucerus non satisfacit Calvino: Et qui Calvino adhærerent, Bucericissimum

cerisimum vocabant, si qui Calvino non consentient; ac qui Bucerio faverent, novum credebantur Papiſmum, quali dicerent Calvino-papiſmum, vel Lutheri-papiſmum introducere. Bucerus non poterat ferre vehementiam Calvini, quem optimè norat ex quo Argentorati una vixerant & in lius neſe didicit, ex quo Geneviam revocatus. Accuſare igitur ejus (quo jure melius me ſcias) maledicentiam maximam, & quod diſſentientes non ferret, ſed durè adeo, aſperèque perſequeretur, ſic ut etiam fraticidum, uti lego, nuncuparet. Calvinus ſic à magno viro increpitus reſponderet; hæc eſſe genii potius fui, quam judicii; & (ut Calvinus ipſius verba, ad Bucerum retineam) ſic ſcribere, *Ut verum fatear, nulla mihi cum maximis, & plurimis vitiis meis, difficilius eſt luſtra, quam cum iſta impatientia; ne ne certe nihil proficio, ſed nondum id ſum conſecutus, ut beluam planè domuerim.* Hæc ſanè ſatis modèſtè, ſi id poſtea conſecutus. Illud verò conſequere non potuit, quod idem Bucerus, qui cum vel norat, vel noſſe putabat, non veritus eſſet ſcribere; *Judicas prout amas, vel odiſti; amas autem, vel odiſti prout lubet.* Quod cum legiſſet, literas ſcripſit, quarum hoc initium. *Cum literæ tuæ mihi ſub cænâ allatæ eſſent, tanto gaudio perſuſus fui, ut non meminerim tribus totis menſibus, lætior mihi horam aſſuſiſſe. At cum eas ſuper cænâ, utcumque percurriſſem, lectione ipſa, ſic fui flagellatus, ut proxima nocte irrequietus ſemper æſtuarem, nec toto poſt tri-duo fuerim apud meipſum, &c.* Traducebant Calvini amici Bucerum, quali novum Papiſmum erigeret; nempe uti de tua dicunt Excellentia, interpolatum te Papiſmum exhibere. Bucerum negat, à ſe hoc nomine accuſari Calvinus. Sed optare tamen, ut ne cauſam præbeat calumniæ, dum ſic mediam Excellentia Tuæ inſtar inſiſtit viam. Quod cum ex cunctis ejus pateat ſcriptis, tum præcipuè, à forma reformationis, præſcripta Hermanno Archiepiſcopo Colonienſi; & illis quæ Anglicanæ Reformationis ergò ſcriptis. Cum vero Bucerus propius ad Romanam Eccleſiam accederet, quam Lutherus; Calvinus longius ab ea abiret, quam idem Lutherus; extra Lutheraniſmum, duæ ortæ Appellationes, Bucerismi, & Calvinismi: & tatebatur Calvinus, Bucerisimum eſſe magis tolerabilem, quam Calvinisimum, ſi non ad obruſſam Scripturæ rem exigi oporteret. Nunc Bucerum pacinimum dare, ſe omnia metiri veritate. Sed Calvini verba audiamus. *Fruſtra mihi excuſas, novo Papiſmo erigendo (quod nempe Excellentiam Tuam aiunt facitare) te non ſtudere; ſed vellem aliis omnibus, ſic exploratam*

eſſe puritatem tuam, ut ne ſuſpicionis locum relin- queres. Fruſtra etiam id te dare operam nequid Calvinismi admisceatur. Si à ſcripturâ ſemel de- ſectendum ſit, non ignoro, quoniam ſit tolerabilior Bucerismus, quam Calvinismus, &c. Bucerismo Excellentiam Tuam magis favere, quam Calvinismo, res clamat; Atque hanc, ſi Scripturis non repugnet, magis tolerabilem eſſe Calvinismo, agnoſcebat ipſe Calvinus. Solum igitur quæſtio oritur, An Bucerismus ei magis obverſetur Calvinismo? Facile eſſet cuſvis, hanc decidere Controverſiam, niſi Scripturæ etiam poſſint malè intelligi à Calvino, & cum ſequentibus. Puto igitur operæ eſſe videre, quomodo eas intellexerint Vereris Eccleſiæ Doctores. Quod ſi fiat, ſine dubio, vicerit Bucerus. Exiſtimo autem rem tacturam non inutilem, qui ex Bucerii ſcriptis colligere velit, quæ ad Controverſia Dogmata, & Concordiam Eccleſiæ pertineant. Sed conſulendæ ſunt Editiones illæ, quas nobis Germania produxit; non quæ ex Sententia Calvini caſtratæ, prodierunt Genevæ. Exempli gratia. Commentario in Salmo II. ſic habet Argentoratensis Editio Anni clb lxxix. Non poſſum non ſanum judicium optare quibuſdam, qui hoc noſtro ſeculo plurimos admodum turbant hoc paradoxo; ſola nos fide ſervari. Cum viderent tamen hoc eo rapi, ac ſi juſtitiam ſola animi exiſtimatione, finirent, & bona opera ſecluderent. Quæ jam illa Charitas, quæ huic malo, uno verbulo mederi dedignetur? Fide formata juſtificamur, aut per fidem bonorum Operum, voluntatem, ac ita juſtitiā conſequimur. Aut fides, fundamentum, & index eſt juſtæ vitæ, ut Auguſtinus dixit. Neque veris enim quiſquam eſt offendendus, &c. Ubi pro hiſce, ſic habet Editio R. Stephani quæ Anno prodiit clb lcliv. nempe triennio à morte Bucerii, decennio ante mortem Calvini: Nemo gravari debet, cum videt offendi homines, quod ſancti dicunt, Nos ſola fide ſalvari; adjicere vivā, formatā, per dilectionem efficaci, aut quid huiusmodi. Nam qui offenduntur hoc dicto, putant eos, qui illud uſurpant, juſtitiam in inanibus animi cogitationibus collocare, bonorum operum ſtudio tanquam fruſtraneo repudiato. Ut igitur ne veris quiſque offendendus eſt, &c. Cum vero omnia ſere Bucerii, ſint moderatiſſima; tum imprimis, præſatio in Commentarios ſuper quatuor Evangelistas, in Editione Argentoratensi Anni clb lxxx. quæ & ipſa præterita, in Editione Rob. Stephani Anni clb lliii. Nempe probari illa iis non poſſunt quibus Romana illa Eccleſia, non eſt Apottolica, ſed Apottatica: Nec ſedes Chriſti, ſed Anti-Chriſti; nec vivum ſed mortuum eſt Corpus. Doctiſſimus Jocer Junius, cum nollet ab iis diſcedere,

qui censent, Romanam Ecclesiam esse Meretricem Babylonicam, & tamen statueret, in ea salvari innumera millia; aiebat esse vivum Corpus, sed ulceribus oblitum. Meretricem esse, sed adhuc sponfam Christi, vel Conjugem, quia Christus necdum illi miserit libellum repudii. Sed non eo satisfacit Genevensibus, qui illam dicerent Idololatricam, ac proinde neminem in ea salvari. Narravit mihi Doctor Antonius Thyfius aliquando cum Genevam venisset, & foci mei nomine, multam salutem diceret D. Bezæ, illum continuo subiecisse; *Et quomodo valet charissimus frater Junius? Vir est egregie de Ecclesiis nostris meritis; quanquam in uno capite dissentiat à nobis.* Id caput erat de Ecclesia, quam Junius negabat, tam arctis limitibus concludi, ac multi volunt; sed jam metuere incipio, ne prolixitate tanta, molestus sim occupatissimo. Ad alia igitur venio. Clarissimus Rivetus ref. onsum parat, atque id ait sibi non fore difficile. Omnibus tui, sui que scripti comparisonem instituentibus fore liquidum, causam ab excellentia tua desertam. Rogare se Deum, ut dotes ingenii melius colloces, quam factum proximè. Ita ille. Cur causam desertam à tua dicat excellentia, causam non video aliam, quam quod non agas de universis, quæ fuerant objecta; quasi non dicas initio, hoc tempore non alia te velle defendere, quam quæ tuam excellentiam tangant. Respondere etiam Epistolæ tuæ parat Laurentius. Indignè fert se sic remitti ad veteres, cum Theologiæ studium sibi proprium sit, & istos, ut ait, legerit; ipseque ætate non nisi triennio, ut inquit, præcedas. Inde colligi posse quanto spatio prius huic se studio dederit, & tot laboris sui monumenta habere testes, quæ jam abhinc annis circiter xxx. diversis divulgavit temporibus. Culpat à cunctis, quod Apostatam probare velit, ex sententia partis adversæ: aiunt enim eos potius ἀποστατός esse accusandos, qui non steterunt tecum, à partibus Illustriss. D. D. Ordinum Hollandiæ. Nec tantum fiduciæ habet; ut ausit dicere, potiorum fuisse causam eorum, qui Remp. immutarint. Negat se controversiæ isti velle immiscere. Ac alii contra, jam immiscuissè sese, & animum suum aperuissè, qui ex partis adversæ iudicio, iudicium ipse de ἀποστασία ferat aliena. Non solet sic loqui; nec proximis turbis male de Rep. meritis fuit. Itaque Collegis tam erat exosus, quasi Proceribus parasitaretur. Nunc placere iis studet; mirantur aliqui Procerum istam μέγα μὲν φωνήν. Ait ipse non potuisse concoquere quod Amstelodamenses Ecclesiastæ dicerentur seditiosi, in illo Maresii scripto. Nam in his & se nomen suum profiteri. Responsum,

sermonem tuæ excellentiæ fuisse de iis, qui tum anno fuere huius sæculi, xix. tum item decennio post. Nihil hic magnopere ad præsentem pertinere, quia Triglandius Leidam concesserit; Smoutius sit exactus, Cloppenburgius profugerit, aliqui fato sint functi. Modestiores nunc esse adscitos, sive ea laus sit Presbyterii, sive Procerum prudentiæ. Vix habet hic quod opponat, quam illud, Quid tum? Plurimam salutem D. Conjugi, & familiæ tuæ.

Amstelodami,
c1o Ioc xlii.
xvii Junii.

Excellentiæ tuæ devotissimus,

G. J. Vossius.

CCCCLVIII.

Hugoni Grotio, Legato Regni Suecici,
S. P. Parisios.

PAUCIS diebus quum Amstelodamo me Hagam conferrem, dono ab Læurentia de accepi libellum adversus Excellentiam tuam exaratum. Ubi titulum legi, aversam paginam inspexi. Video tuis aptari ineptè Horatianum illud, de montium partu enitentium, non aliquid montibus dignum, sed murem, eumque ridiculum: unde & subijcere voluit, alterum hoc ejusce vatis: *Speciatum admissi risum teneatis amici?* sed legendum admissi jussu erat excudi. Verum ut videtur, monitus, jussit vocem primam deleri, quia metro repugnaret: voluit autem pro ea, reponi, *spectandam*, vel potius *lustrandam*, genere muliebri, quia, ut inquiebat, ad Grotianam Epistolam respiciatur. Quasi non sic deficiat præverbium *ad*; ut integrè sit, *ad lustrandam Epistolam*. Provehor ad libellum ipsum. In aditu ipso, video lituram; sed sic ut tralucerent hæc verba, *ex familia Oxensterniana*; delere hæc voluit, quia Axelius Oxensternius, qui Leidæ studiorum gratia agit, nollet in verba sua, tanquam oracula, illini chartis, & volitare per hominum manus & ora. Nec si pœnitendum hoc Nobilis juvenis iudicium sit, eo tam culpandus ille, quam qui uno ore talia ipsius auribus infillant assiduè. Omnino enim hoc agi video, ut Proceribus Sueciæ displiceas, inque Legati munere sufficiatur alius Excellentie tuæ. Ulterius legere cœpi. Incido in verba illa, *citius aquam è pumice elixerim*. Pene dixissem *ὅς μοι λείγηνν*. Posui paulum libellum? Mox, ut sit, recipio; simul alter intervenit, qui

jam legerat, ostendit verba illa, *Nach groter Pot.* Ait proverbium esse potantium largius, & more Græcanico, grandius poculum exposcentium. Etiam in bibendo, ut narrabat idem, proverbium esse incipit, *Nach groter Pot, seidt Jacob Laurens.* Alius retinebat lectum sibi, in eodem libello, *Grotius komt al te laet in School.* Ego, inquebat, potius dixerō, *Laurens is al te broeg gelopen upt de School.* Melius enim discere debuisse Grammatices Latinæ præcepta, priusquam ad sacra animum appelleret, manibus illotis. Longum sit adscribere, quid singuli rideant, aut carpant. Atque ego nec ista scripsi sine dolore. Amavi enim virum, nec prorsus exui amorem, quia primum hoc est viri *doelst*: & fortasse ad saniores mentem redibit. Antea enim semper ostendit displicere sibi facta collegarum, atque eo nomine, minus iis gratus fuit, at gratior Proceribus; sic ut propterea, nec invidia fratrum suorum careret, multa etiam ab iis indignè pateretur. Miranti autem tam subito mutatum, respondit, sua interesse, & liberorum, ne ipse pro seditioso haberetur. Interfuisse etiam Presbyterii, ne ad unum omnes seditionis arguerentur, ac propterea se ejus defensionem suscepisse. Dixi ego, non agi de Pastorum singulis, qui nunc Presbyterium constituant. Eos qui criminis tanti arguerentur, maximam partem vel fato concessisse, vel alibi locorum agere. Uti Triglandium Leidæ esse professorem, Smoutium, qui urbe exactus, esse Rotterodami, Cloppenburgium, qui sponte metupœnæ profugit, in Harderviceni Gymnasio jamdiu Theologiam docere: in locum defunctorum, eorumque quos dixi, suffectos alios, consentiente Magistratu; ad quos illud de Seditione nihil pertineat; imò ne ad Hanekopium quidem, qui cum Proceribus magis quam fratribus seditiosis faveret; eorum artibus, de munere sit dejectus. Addidi facta quædam, quæ non posset diffiteri: etiam quæ ex ore unius post fugam percepissem. Item oggeffi querimonias de fratribus, à quibus tam multa, ob concordie studium diu esset perpeffus. Ad hæc non aliud respondere, nominandos ab Excellentia tua fuisse, qui Ecclesiastarum seditionis forent rei: nec talium se patrociniū velle suscipere: nunc cum *doelst* loquaris, de Amstelodamensibus Ecclesiasticis, periculum esse, ne omnes eidem crimini involvantur. Quasi non & ipse, dum *doelst* omnes tuetur, tam fontes quantum in se, quam in fontes absolvat. Magnam interim gratiam init, ab omnibus crimini isti obnoxiiis; ac literas quotidie accipit ab ejus farinae hominibus, etiam ut intelligo, ex ipsa Anglia;

quibus impensè gaudet, ut propterea valde metuum, ne quem, non alium ante quam bonum virum novi, vel saltem, quam talem, ut seditiosis se non satis probaret; is deinceps totus in zelotarum partes concedat. Hoc eo justius metuo, quia in Pontificiorum quidam lectione sedulus fuit, sed ea est *doelst*, ut non satis sciat distinguere, quæ Romana Ecclesia ex primis sæculis retinuerit, quæque in iis mutarit: Item quæ sentiant universi, & de quibus secus judicent prudentiores. Negabam quæ subinde Pontificiis objectat, ea statui ab tota Ecclesia Romana, imò à multis negari aiebam. Ille contra, quæ in Romana Ecclesia scribantur pro dogmatis ejus Ecclesiæ habenda, quia nihil in ea nisi approbatum scribere liceret. Ego ad ista ex eodem principio colligere sententiam aliorum, qui dissentiant, pro approbata habendam, quia horum æquè libri, cum venia superiorum, prodeant in lucem. Quæ duo cum sint *doelst*, fatendum esse, super nonnullis non conveniri, quia nihil sit autoritate ejus Ecclesiæ decisum. Non dubium vero est, quin si respondeas viro, alia atque alia objecturus sit Pontificiorum loca, potissimum illorum, qui à cordato nemine defendi posse videantur: atque isthoc fine id acturus, ut dijudicent omnes, quibuscum conciliationem quæras. Hic si provocas ad eos, qui moderatius sapiant, apud cordatos multum, apud eum nihil feceris, quia dicit istos sic loqui, ut tegant execranda dogmata: alios quos ipse adducat, candidè sententiam Ecclesiæ suæ aperire. Et multum metuo, ne qui Laconismo gaudes, hæc fuisse adeo deducta, non absque tædio legas. Mei nihilominus officii putavi, plenius tibi virum describere, quò certius statuas, an cum eo pedem figere velis. Valde id exoptat, quia nunc se contemni putat: quod impotenter fert, quia xxx. annis fuerit Pastor; & xx. ediderit volumina; sed quæ, ut aiunt, qui Typographica è re & literaria mercatura se sustinent, à paucis emantur, aut nullis: ut non mirandum sit, si antea virum non noris, fortasse nec alii in Galliis; si rescribendo gratificari homini voles, necesse fuerit historiam noris anni xxviii. vel proximi hujusce sæculi. Mirantur aliqui è Proceribus, negari à Laurentio, quæ tum ab Ecclesiasticis acta. Nec puto, iis invitis, lucem visura, quæ ad seditionis pertinent authores. Contigere ea biennio, priusquam Amstelodamum commigrarem, ut non possim exactè rem dicere. Duplo plura; quam nunc facio, scribere erat animus; sed dum hæc scribo, septies minimum sum interpellatus. Et jam nunc Doct. Johnsonus, Bohemiæ Regiæ Ecclesiastes, accedit: cui cum dicerem instare tempus,

tempus, qua literæ essent tradendæ Tabellario Gallicano, & addidissim eas ad te mittendas, rogavit, ut Excellentiam tuam plurimum suo nomine salutarem. Volebat, ut adderem, quomodo in Parlamento accusatus sit ἐπεροδοξίας, non ipse modo, sed & Regina, quod talem foveret: sed negotium hoc prudentia quorundam esse discussum. Propediem spero me cætera scripturum.

Amstelodami, c15 Ioc xlii. xxi Julii, Hagæ Comitum; è domo amplissimi Ratalleri Dubletii, qui & ipse petiit, ut plurimum excellentiam tuam salute imperitrem.

Nimia festinatione factum, ut superioribus literis, in historia peccarem, confundendo duos libellos Laurentiadæ, quos eundem intra mensem divulgavit, eadem forma, ac magnitudine. Quorum prior adversus Excellentiam tuam, perscriptus, quem jam acceperis aliunde, scio. Alter adversus foeminam, lingua Belgica, in qua illud, *negotium dñs, noch gwoeter Por.* Quæ ea foemina sit, ipse in præfatione exponit. Vocat Helenam Jacobi, Plateam addit in qua Amstelodami habitet, ait lardum habere venale, post mariti excessum, nupuisse suo famulo Pontificio, & ab eo persuasum, ad Papatum defecisse. Accusat vehementer impudentiæ, quod venerabili Senatui Ecclesiastico fuerit ausa quæstiones proponere, & solutionem subitam exigere.

CCCCCLIX.

Hugoni Grotio. *Lutet. Paris.*

Magnopere gaudeo, Illustrissime Domine, quod, quæ ad V. T. observasti, ea à Typographo perducta sint non modò ad Pentateuchi finem, quemadmodum scribebas: sed ut ex aliis Hagæ, postea intellexi, ad Regum libros; qua appellatione credo, etiam Samuelis libros complectebantur. Sed valde mihi molestum est, quod videam excellentiam tuam, variis impeti libellis, quod metuo, ne avocet in magno illo opere. Quanquam non desunt qui existiment fore, ut non rescribas, ne quidem Cl. Riveto. Huic studiosè id actum arbitrantur, ut nos committeret: ut qui toties advocet ad partes, quæ ante hos annos xxv. in Collegio scribebam. Quasi non aliter scribendum sit, quando cum adversario comminus congredimur; aliter quando de concordia consilium initur. Non ignoravit hoc Georgius Wicelius, qui præfatione Viæ Re-

giæ ad Imperatorem Ferdinandum ait, Polemica scripta nostra tanti non facimus, quin hæc velimus, aliquanto pacatiora esse; verum tempus militiæ tunc ita postulavit, ut sentirent ii, cum quibus commissus eram, & mihi vires esse, & mea tela nocere. Puto *ἐπιμύσειν* quintum Jacobi Laurentii jam videris, in quo tuæ ad se Epistolæ quodammodo *παρωδία & σαζύρτες*, eadem ut arbitror ex officina, & geminum carmen Salebrii Santræ: prius utrumque Hugonii esse, fatis convenit, & sponte narrarunt, qui nosse possunt. Ac tacentibus amicis, styli salebræ proderent: Idem est, qui in gratiam Heinssii, postquam audierat, Salmasium velle eum refellere, Epigramma suum sic obsignabat:

*Te duce, qui rugiet, variâ & sine dentibus irâ,
Nesciat hæc ungues in Daniele Leo.*

Salmasius vero iis lectis, scribebat Riveto, ab Leone illo saluum fore Daniele; sed perituum Heinssium. Is Heinssius, nunc totus in eo esse dicitur, ut novam det editionem suarum in N. T. annotationum: sic mihi retulere maximè familiares. Credo corriget, de quibus sibi à Salmasio metuit: Hic utrum propediem in Bataviam sit remigraturus, non satis scio; sed satis scio, curatoribus tam longam absentiam minus probari, tantoque fore gratiorem, quanto celerius advolarit. Mareschius, ut intelligo, immane volumen cudit adversus ea quæ in Romana Ecclesia, nostris improbatæ; aliquibus rescissis, laudem mereri, vel saltem tolerari posse docuisti. Metuo ne parum cum excellentia tua agatur humaniter, hoc est, non tanquam cum doctrinarum Principe, imo vel homine doctissimo, nedum velut cum imagine Regis, qui Dei imaginem sustinet in terris. Magnos animos duo dant, & illi, & aliis similiter animatis, antiquitatis contemptus, & Calvinii admiratio; sed de priori nolunt fateri, ut ex eo capere potes, quod sic indignetur Laurentius, ob consilium salubre sibi datum ab Excellentia tua. Ait sibi hoc jam adolescenti, infillatum à Doctoribus, ut amaret veteres: quasi uterque ignoremus, quæ mens fuerit ejus Magistris. Eorum alterum, cum antiquitas objectaretur, dixisse scimus, Et nos patres foremus, si iis vixissemus temporibus. Id verè dixit, hinc sciri potest, quod tunc multa sint habita pro hæreticis, quæ nostra sustinent; ut quæ in Ætio, Vigilantio, aliisque improbatæ. Non quasi idcirco hæreticos censeam; sed quia existimabat ille, solius esse ætatis; ut aliquis pro veteris Ecclesiæ Doctore habeatur: nec simul *ἐπιμύσειν* attendatur. Credo autem non inutile foret,

foret, si penitus cognita foret vita Calvini. Magnæ fuere illi vitæ, & ingenii dotes; sed & ille suos manes patiebatur: quod fateri nolunt ejus unius tanti admiratores. Abominantur Bolsseciana; sed in illis etiam sunt tabulis publicis subnixa. Et apud varios homines integerrimos, pariter ac doctissimos, suppetant non pauca, quæ ejus doceant animi impotentiam, & quantoperè oderit semper dissentire, à se signis audere. Hæc satius foret tegi; sed video plurimos, non tam virtutes Ducis sui sequi, quam vitia; idque magno Ecclesiæ damno: cui convenientior foret spiritus mansuetus, & majorum reverens. Quare cogitandum, an non expediret, candidam extare dissertationem de eo, quod de Calvino judicium fuerit suæ ætatis, & quantillum ab eo, & discipulis, antiquitati fuerit tributum. Quod Riveto necdum respondeas, sed illa ad N. T. perducere malis ad umbilicum, sanè gaudeo. Nihil magnopere, ut puto, festinato opus; Et fortasse præstiterit etiam conspiciere Marefchiana, priusquam respondeas. Poteris credo, multos parietes unâ fideliâ dealbare. Quicquid est, nolim sufflaminari tam utilem laborem, quem sustines, in illustrando V. T. Nondum illa vidi, sed facile possum æstimare, vel ex illis ad N. T. ubi duo præ cæteris admiror, quod nemo antehac, tam multa *ἐναγγορεύει*, conciliarit: quod nullus ex humanitatis studiis plura attulerit ad sacras literas illustrandas, minusque partium studiis abreptus. Hic jam certamen gliscit de jure Magistratus in Ecclesiasticis. Defendit illud Vedelius antea Genevæ & Daventriæ Professor Theologiæ, nunc autem adversus eum scribere Triglandus Leidæ Professor, & Revius, qui in Collegio regundo Festo Hommio successit. Is Festus, cum jam ante menses complures, se munere eo abdicasset, ante duas hebdomades, vel tres, ex hac vitâ excessit. Oratione ei Polyander parentavit. In Synodis, & concionibus, graviter agitur quæstio, de jure patronatus. Facilius puto, efficerent Ecclesiæ, quod volunt, nisi celsissimus Princeps Araulionensis, & illustrissimus Brederodius, viderent, & suam hic causam agi. Negotium Angliæ magnopere me habet sollicitum; non sanè propterea, quia inde quotannis præbendæ fructum capiam; quam quia veterem amo Ecclesiam, & vicem doleam optimi Regis: pro quo assidue vota facio. Apud cordatiores res hæc suspectiores reddit Puritanos. Negant enim se videre, quid Regale Regi velint relinquere. Et nonnulli his locis metuere incipiunt, ne si istic effecerint, quod volent, hic novi fiant motus, quia animos addet fœlix successus in Regno Britannico, & si res la-

boret, inde etiam auxilium expectent. Mihi vero, vivo Araulionensi, non ita multum periculi videtur his terris: quia & illius interest, & militem in manu habet. Vale, Illustrissime Domine, & cum uxore lectissima, & liberis salve; semperque dignum animum Excellentia tua, hoc malo sæculo conserva.

Amstelodami,
cIo Ibc xlii.
x Kal. Sept.

Illustrissimæ excellentiæ
tui cultor,

G. J. Vossius.

CCCCCLX.

Joanni Frederico Gronovio, *Professori*
Daventriensi.

Clarissime & amicissime Gronovi,

Proximis feriis autumnalibus partem bonam Hagæ fui, filius partem ibidem, partem in Zelandia; nunc vero in Frisiam abiit. Me vero subinde preffit valetudo mala. Præsertim hac nocte, urgentibus doloribus nephriticis, à quibus ante climactericum immunis semper fui: ac nunc tertio ab istoc anno, denuo incurfant. Dum ego filiusque domo absumus, literæ è Galliis domum meam perlatae, quas nomini inscriptas tuo judicavi ex eo, quod inclusæ essent meis, ubi id petitur, ut ad te mittantur. Cæteroquin ex inscriptione vix aliquis ob characterem insolentem id dignovisset: cujus rei periculum hic ipse feci, cum duobus, tribus ostenderem, qui Gallicis literis non assuevissent. Vix hæc æger ad te perscribo, attamen tam longam cessationem ex absentia nostra cogitans, putavi non ulteriori moræ indulgendum. Puto esse literas à senatore Saravio: secus si est, per otium ex te cognoscam. Rescribere si voles, mittam, quo jusseris: vel includam meis ad illustrem Grotium: qui tuto rem per famulitii quempiam procurabit. Theologo Dietio, Jurisconsulto Christenio, Ifendornio Philosopho, plurimam salutem dicito.

Amstelodami,
cIo Ibc xlii.
Non. Sept.

Tuus æternum,

G. J. Vossius.

CCCCCLXI.

CCCC LXI.

Ludovico Crocio, *Theologo Bremensi*
S. P.

ANte mensem plus minus mihi ad te, eximie Croci, opus nostrum de Theologia gentili & Physiologia Christiana: utrum acceperis, non quæram. Nam his diebus adfuit mihi quispiam qui salutem mihi ab eo diceret, cui Bremam misissem volumen antea memoratum. Nomen quærenti, negabat se scire: & solum se hoc iussum dicere aiebat, quod dixisset. Sane apertior erat circumlocutio ista, quam cum Trojani belli scriptorem dicimus pro Homero. Nam multi præterea id bellum descripserunt. Ego autem labores nostros uni tibi in Germaniam miseram. Quare recepisse te gaudeo: ac placere confido, non quali præclare de nostris solem sentire: sed quia nec livor negarit, nulla hic esse aliis indicta, eoque scripta mihi, non exscripta. Miscui vero & sacra profanis & profana sacris, ut utrique scholæ prodessem. Vides, cur tantopere confidam, probaturum te operam in hoc opere locatam. Ac eo impentius, scio, probabis, quia probitatis semina, dum rerum naturam tracto, inspersimus passim. Restat pars ea, quæ est de fossilibus & plantis; sed hanc nondum exalciavi, & jam alia quædam in manus sumpti, ut ita laborem illum insititiis aliis distindam. Argumento fuerit opusculum hoc de tribus symbolis, quod mitto. Atque hoc itidem si probabis, approbatus & ipse vudicabo. Jamque prælum fervet simili libello de tempore nativitatis ac passionis dominicæ. Sane utraque quæstio, ut nosti, perplexi est negotii. Fortasse consequentur tum liber de vitiis sermonis, tum Harmonia evangelica de passione ac resurrectione Christi, ubi duo hæc potissimum ago, ut ordinem gestorum exponam & ἐναρμόζω conciliem. Non parum hic veterum juniorumque debeo industriæ, sed etiam spicas quasdam legendas nobis reliquerunt. Et in tanto eorum dissenso, non minoris est iudicii, quam laboris certi aliquid consignare. Illustris Grotius arduam suscepit provinciam conciliandi Ecclesias Reformatas cum Romana; non quod se vivo multum hinc boni proventurum speret, sed quod pulcherrimum etiam putet ferere arbores, quæ alteri seculo profint. Nec ignorat superstitionem & tyrannidem papalem. Sed scit innumeros esse passim ex Catholicis Romanis, præsertim in Galliis, quibus ea improbentur. Quales existimat faci-

le adduci posse ad concordiam, sed requirit idem in nostris etiam plus moderationis. Quanquam multa. Romanæ Ecclesiæ vulnera ostenderint, quædam etiam feliciter sanarint, esse tamen, ubi ipsi novum faciunt vulnus, eoque locum habeat illud Poetæ, *Excessit medicina modum*. Rectene an secus assequar ejus sententiam, optime perspicies ex ejus animadversionibus in animadversiones Riveti. Quorum idcirco exemplar mittere volui, fortasse quia deinceps controversia cum Grotio futura multo longius abeunte, missos facient Bremenses. Utunque egerint, scio vos fore semper divinæ gratiæ patronos, nec eam causam deserturos, à qua stant scriptura & ecclesia vetus. Imo ut Romanam & Augustanam ecclesiam mittam, fere optimus ac doctissimus quisque eorum, qui in reformatis Ecclesiis aliquo in pretio habuerint antiquitatem, nec planè forent ἰδογνώμονες καὶ ἀνδραγατοί, vel alterius sententiæ suam plane mancipassent. Salutem plurimam dicito clarissimis viris, Collegis optimis doctissimisque, Bergio, Willioque. De Neufuillio adderem, nisi id officii in se recepisset filius, qui hæc traditurus.

Amstelod. c. Id. xlii.
iii. Non. Quinct.

Tuus futurus dum
suus,

G. J. Vossius.

Pag. 933. Operis nostri de Idololatria pro virtutibus tuis sat jejune te laudo. Alias v. id corrigetur. Scio humanitatem tuam, quem talibus offendere non possum.

CCCC LXII.

Hugoni Grotio, *Legato Suecico*.

Lutetiam.

Illustrissime Domine,

QUI hæc, ad Excellentissimam Tuam defert literas, Beuningius est, patria Amstelodamensis, juvenis elegantis ingenii, moribus optimis, variæ eruditionis non minus, quam juris sui curiosus: ut meritò hæc urbs, de eo habeat sibi magnum aliquid polliceri. Patrem habet superstitem, urbis senatorem. Mater est soror Consularis Alberti Conradi Beurgii qui nunc Hagæ agit, in ordinum delegatorum Collegio. Avus is Beuningius fuit, qui ante annos sex septem, Consulatu gesto, magnâ cum laude excellit. Is juvenis, cum Excellentie Tuæ cuperet commendari literis meis; parui lubens, eoque lubentius, quia scirem non ingrata esse

Excel-

Excellentiæ tuæ alloquia eorum, qui virtutis via ad decus grassantur, atque iis nati sunt, qui Remp. hic sustinent, & Illustræ nomen tuum amant & colunt. Bellum Puritanicum hic multos habet sollicitos. Ecclesiastas quo affectus trahat, non obscure ex precibus publicis cognoscere est: horum aliqui non dubitant, Deum exposcere, ut bene cœptum Reformationis opus feliciter procedat, Regisque ut emolliatur animus. Quæ etsi commodam mentem capiunt, tamen satis est apertum, haud aliud exoptare, quam ut Rex inani titulo sit contentus, ac novellitas doctrinæ de Antiquitate triumphet. Sed unum est in quo non satis conveniat illis, qui se Episcopis opponunt. Multi omnem regendæ Ecclesiæ potestatem penes presbyterale collegium esse volunt: Alii vero aiunt, hoc jugum gravius Episcopali. Quare contendunt, singulis id committendum Ecclesiasticis, ut secundum Dei verbum, populum doceant, & gubernent. Atque sic ab Episcopalis & Presbyteralibus (sicut vocant) distincti, Independentés nuncupantur. Pimius, cujus magna adeo in Parlamento est autoritas, prioris esse sententiæ dicitur, sed multi hac parte, ei adversantur, qui cætera convenire videntur. Estque plurimorum id iudicium, utcumque infracta omni Regis potestate, & abolito Episcopatu, geminum agerent triumphum: Eos inter sese mox commissum iri; quia multi non à Presbyterii potestate minus, quam Episcoporum abhorreant. Ulterius procederem in scribendo, nisi cogitarem tarde admodum fore, quod has literas recipies. Novi enim quomodo proficiantur juvenes, qui exteras petunt Regionés. Vale, Illustrissime Domine, ac diutissime orbis bono superlis. Domine conjugii plurimam dic salutem, necnon Liberis.

*Amstelod. Id. Id. xlii.
Post. Non. Sept.*

*Excellentiæ Tuæ cultor
devotissimus.*

G. r. Jo. Vossius.

CCCCCLXIII.

Hugoni Grotio, Legato Suecico.
Parifios.

Illustrissime Domine,

QUI hæc literas affert, est Johannes Duns, natione Danus, juvenis eruditus, ingenio & iudicio bonus, pietate & industria nulli secundus. Sesiuiannum me

docentem hic audivit, ac privatim sæpius collocutus; eoque notior mihi & meis, quia in vicinia habitavit. Augustanam complecti Confessionem, vix necesse habeo dicere, cum Danum dixerim. Literas ad Excellentiam Tuam, non alio fine petiit, quam ut videndi & alloquendi, vel potius audiendi hoc orbis Oraculum honestior faciliorque daretur occasio. Itidem, ante mensem unum alterum, Clarissimi Collegæ Barthei filius, patri cognominis, postulabat à me aliquid literarum; sed eâpse hora, quâ abeundum illi, ac mox etiam mihi publicè docendum foret. Spem feceram Epistolæ Brillam mittendæ, prius quam navim Gallicanam conscenderet. Sed partim me promissi oblitio cepit, partim alia impediunt: In his cogitationes de Matthæi mei connubio. Ejus gratia ante tres hebdomadas, Leowardiam abii. Ac post dies sex septem denuo *ad deo* proficiscar, ut præsentia mea Nuptias condecorem. Pater sponsæ est Jurisconsultus, & Leowardienſis Reip. Consiliarius, & Scabinus. Mater filia Verrutii Syndici, dum viveret, Groningensis, ac soror ejus, quæ nupserat Schombergio, Reip. Groninganz nomine, in Collegio Ord. Generalium Delegato. Vedelius Theologiæ apud Franckeranos Professor, dum in Frisia sum, satis concessit. Moribundum cruciabat, quod terris eriperetur, priusquam potuisset Revio & Triglandio respondere. Horum uterque acerbe satis scripsit adversus scriptum ejus de Constantini Episcopatu; quo Magistratus jura circa res Ecclesiæ defendit. Collegæ defuncti mihi Franckeræ aiebant, fortasse responsum sic etiam edendum; sed deletis, quæ, ut par pari redderet hostimentum, virulentius chartis illevisset adversus Revium. Est is Revius, ut me alias scripsisse arbitror, Regens Collegii Theologici, quo in numere Festo Hommio successit. Vedelii mors Collegæ Bartheo flebilis non erit; à nemine enim horribilius fuit tractatus, quam ab isto. Prodit etiam nunc liber Mareſii Sylvæ-ducentis Professoris adversus Voetium; qui prius Thesibus Ultrajectina Academia disputatis, accusarat Sylvæ-ducentis Procures Idololatricæ, quod ex Reformatis, plerique adscribi voluissent in ſodalitatem B. Mariæ. Quod tamen factum erat, ut vis ejus Collegii, quæ magna, infringereſt nostrorum consortio. Noluerunt nostri apertè esse perjuri. Illudere maluerunt. Artificium nostrorum nescio an sis probaturus. Ubi Mareſchiana videris, fortasse satius fuisset ista non in apertum proferri. Nunc ne Procures Sylvæ-ducentis in quibus, & Ill. Brederodius, Idololatricæ sint suspecti, omnibus ſipariis dedu-

ctis, penè nudam Venerem cum suo Marte, solis instar ostendit. Sed de isto malim, ubi Marefchiana legeris, iudicium tuum cognoscere.

Amstelodami,
c1o Idc xlii. xxiv.
Octob. *nixu.*

Excellentiæ Tuæ ob-
strictissimus,

G. J. Vossius.

CCCCXLIV.

Illustri Hugoni Grotio,
Lutetiam Parif.

Illustrissime Domine,

DE filio Isaaco plurimum gaudeo, quod sospes Lutetiam redierit, & sic Excellentiae Tuæ placeat, ut sponte etiam in aedes recipere sis dignatus, satius etiam censeo, ut si molestiam ea res non adferet, aliquantisper commoretur. Eum domi videbit, atque audiet, cuius dicta singula pro oraculis habere debet, foris etiam notitiam summorum virorum consequetur: Bibliothecis variis fruetur. Utrobique verò erit, unde non modò doctior fiat, sed etiam prudentior. Amo innocentes Musas: sed neque me fugit, quantum decus etiam ei, qui nunquam capeffet Remp. accedat, eo, quod rerum civilium non sit penitus imperitus. Multum etiam letor, quod eusque produxeris annotata tua in vetus Instrumentum. In novo, censeo non inutilem fore Excellentiae tuæ (fortè jam videris) variantium lectionum Libellum, qui, in adversariis, Ludovici de la Cerda Hispani, caput constituit xci. De Blondelli opere, ita est ut scribis. Petierat doctor Rivetus, ut Blauwio commendarem. Primùm refugii, eo nomine, quod putarem Episcopis adversari. Dixit secus esse, mediam insilire viam nec Armachano Archi-episcopo displicere. Pauca solum paginas inspexi. Mea hæc sententia est, jam Apostolicis temporibus, Episcopos Presbyteris præfuisse; facile largiur non fuisse eos, dam Apostoli adhuc continebantur Palæstinâ vel cum primùm extra eam Ecclesiæ colligerentur. Sed ubi excrevere illæ, & Apostolorum numerus est imminutus, secus censeo. Atque ut verum esset, quod δ παλιν Salmasius arbitrabatur, demum cœpisse circa annum centesimum, Religio foret recedere ab ea gubernandi forma, quam totius orbis Ecclesiæ comprobassent. Nigrinus non est mihi notus, sed vidi literas, quas qui scripserat, aiebat, se ex ore ejus audivisse, me superiorem Quadragesimam ex

more Romanæ Ecclesiæ observasse. Quis ei hoc persuaserit, nescio. Quanquam id verum, privatim publicèque multa me dixisse de Quadragesimæ antiquitate & usu; vehementer etiam improbasse, quod nostri homines ne quidem Passionis Dominicæ die soleant jejunare; solidè me posse evincere, semper aliud obtinuisse in Ecclesia veteri; nec tamen laudaturum, qui hoc uno nomine turbet Ecclesias nostras; posse enim quemque jejunare domi suæ, cum id non sit interdictum. De Ignatio filii, grata sunt quæ scribis; deque valetudine tuenda, quod communes, gratias Excellentiae Tuæ ago. Dominæ Conjugi, ac liberis, salutem plurimam à me, meorumque dicito.

Amstelodami, c1o Idc xliii.
vii. Id. Septembris.

CCCCXLV.

Andræ Riveto S. P.

NEgotio filii in Frisia ex animi sententia confecto, domum redux, cum variæ mihi ab uxore literæ redderentur, nullas avidius ac majori cum voluptate legi, quam tuas, magne pariter & vir & amice. Primaque hæc mihi cura fuit ut clarissimi Blondelli chartas ad Blauwium ipse adferrem, & fidei ejus atque industriæ, quantum possem, commendarem. Feci vero id lubens, non tantum tuâ causâ, cui scio quantum debeam, vel etiam Blondelli, quem antea de solo nomine mihi cognitum, nunc merito suo inter summos seculi hujus viros repono, mihi que hæc occasione bella innotuisse, non gaudeo solum, sed penè triumpho; sed imprimis, quia opere tam erudito, multa etiam doctissimos docebit. Eorumque in numero, non quidem doctissimorum (curtam novi supellectilem nostram) sed illorum tamen, qui eruditiores redeant à lectione hujus operis, lubens etiam profiteor nomen meum. Perjucundum mihi est laudari à laudatissimo fenatore Saravio: ac tanti viri affectus vehementius ad bene merendum de studiis accendit. Sed ego jam ab anno illi multum debeo, propter benevolentiam summam, qua Isaacum meum complexus in Galliis fuit. Ipse enim hoc ad me filius semel iterumque perscripsit. Dices fortasse, hoc si tam longo tempore resciverim, mirari te, quod hactenus ei nullas per literas gratias egerim. Ego vero, eximie Rivete, non quidem mi-

ror

ror (quippe jam à multis annis nulla in re frequentiores committo solœcismos, quam in Epistolico hoc commercio) sed multum tamen doleo, quod parte hac non satis me iis probem, quibus maxime & vellem & deberem. Omne vero hoc malum inde potissimum proficiscitur, quod à mane ad vesp̄eram, nunc hic, nunc iste, vel operam desideret nostram, vel saltem alloquium exposcat. Sum vero ea frontis mollitiæ, ut nihil sustineam negare. Ubi igitur sic dies mihi prope mortuus est, animum subit ea cogitatio: Ergone mihi viliora erunt studia, etiam sacra, quam ars sua erat Apelli, qui, ut à Plinio accepimus, nunquam tam occupatam diem agebat, ut non lineam duceret? Continuo me in Bibliothecam proripio, ac omnium, quæ ad Epistolare negotium pertinent, securus, schedas arripio, eas ordino, & sicubi lima opus videatur, operæ non parco. Atque sic ubi non totum mihi diem periisse cognosco, suavius me ad mensam vel lectum confero. Nec eo hæc animo à me dicuntur, quasi diu scriptionem ad Amplissimum Saravium differre sit animus. Speravi hæcenus filium nobis affore ante hycem, ut pariter ei gratias ageremus. Sed hesternæ die literas à Florentia accepi, quem jam Venetiis esse, imo inde ad nos iter capeffere arbitrabar, ut nunc vix sperem ante ver aduultum, videre me cum posse. Eâ quia spe excidi (& ob Florentinæ Bibliothecæ tot *ἀνέκδοτα*, multum metuo ne diutius moritur ac dixi) statui occasione eâ ad Amplissimum Senatorem scribere, quam probabis scio. Jam sub prælo est unus alterque libellus noiter, quibus excusis commodam accipiam occasionem, & eos mittendi & testandi singularem pro tanti viri merito affectum nostrum. Clariss. Spanhemium domi meæ visum mihi, scito. Nec æque doluit, quam quod vix semihorâ alloquio ejus frui liceret: Cujuscunque is consilio Leidam vocatus, bene, imo optime meritis est de Academia. Non committam, quin me quoque his terris sui sciat amantissimum; quam ex dono jam diu Genève transmissio æstimare addidici. Et aliquid amoris serenus addidit vultus, ubi coram adspexit. Eum coram me ducebat candida Hortoni anima. Quo in viro rara Societate, cum eruditione Pietas, & Prudentia conspirant. Spem fecit, verno se tempore velle in hanc urbem redire. Utinam tum tecum etiam frui liceat *τῷ πνεύματι* Salmasio. Quem ante hycem nobis affore non possum in animum inducere. Difficulter credo, quæ maxime cupio. Utinam saltem videamus cum Zephyris & hirundine primâ. Exequias ire tristis soleo. Sed fu-

neri Hellenistico lætus iusta solvam. Non dubito, quin eo ex opere multa bona hausturi simus docti pariter indoctique. Alii qui sentiant, *τέτοις καὶ δὴ κερύμεν ἐσθίον*. De novo labore Illustrissimi Grotii primum ex te didici. Exemplar non accepi. Sed intelligo jam in urbem hanc adlatum ad alium. Imo & ubi volo, habiturum me exemplar. Tuum quoque responsum aiunt jam penè perductum esse ad umbilicum. Planeque mihi spondeo, fore ejusmodi, ut tam modestiam laudent cordati, quam doctrinam eruditi. Omnino Reip. Christianæ interest, excuti ab hominibus doctissimis, quid nos Ecclesiæ Romanæ, quid nobis illam concedere oporteat. Sed eam si provinciam suscipiat antiquitatis nescius, ne legere quidem curem. Eo impensius gaudeo, ab utroque vestri potius, quam ab minutis istis patellariis diis hæc controversias tractari. Nescio an videris Ulmenis illius maledicentissimum ac omnis violentiæ plenissimum scriptum, quod hic adversus Grotium prodiit. Homo is doctentem me audivit, ut aiunt, qui norunt. Atque aliquis qui à pluribus novit annis, mira mihi narrat de vita hominis antea facta. Liberalissimus est in donando quæ scripsit, sed hæcenus me ne compellavit quidem, *καὶ ἐφ' ὧν τῆς ἱστορίας*. Vellem non abusus esset parte literarum tuarum, quam opusculo præmisit, quasi patrocinis tot mendaciis, quæ nihil ad Ecclesiæ negotium. Tales magis causæ obfunt quam juvant. Et video hominem fanaticum nec assis hic fieri, nec ab aliis, qui similes amant labris lactucas. Ego ne istud probarem dicendi genus, qui (quod hic promere liceat) ne in amicissimo quidem, & multis partibus ut doctiore, si modestiore, probare potui quod tam multa inspersisset, quæ nihil ad causam pertinerent? Quale illud *πρὸς ἀπεστασίαν*, non quidem Ecclesiasticæ sed civilis. Vide quæ non audeam in sinum tuum effundere, nunquam id facturus (non adeo læva mens nobis) nisi putarem, hanc à veteri & sincera amicitia concedi, seu licentiam seu libertatem. Pro decretali Vigili Papæ Epistola, ac dissertatione Petri de Marca, quantas possum, gratias habeo. Futurus mihi inter itineris Frisici comes libellus. De afflictâ clarissimi Præceptoris mei, conjunctissimi vero affinis tui valetudine valde doleo. Solatur vero, quod ad tantam ætatem illum Ecclesiæ suæ concefferit divina bonitas. Nulla ætas ejus laudes conticefceret, & Deus in illa die mercedem rependet. Pro voto erga filium sponsum, ac gratulatione etiam de Historiographi munere gratias ago tanto majores, quanto præ aliis multis non dico affectus tu-

us apud Batavos proceres eluxit, sed etiam fidelis se opera exeruit. Nempe non finis, ut ulla in re claudicet benevolentia tua erga me meosque. Brunæus noster tradidit mihi Blondelliana illa, quæ per eum mittebas. Et jam Blauwius accepit, qui etiam reliqua avidè expectat. Misit ad me Clariss. Marefchius quæ scripserat pro ordine Mariano Sylvæ-Ducensium. Nec quicquam video quo offendam, dum cogito, quo in statu res fuerint. Multum promotum sic quoque. Sed alter est scrupulus, an non illud sit pontificiis, quia longe alia iis mens fuit, cum primum transigerent nobiscum. Quamquam quid illud ad me, vel etiam Marefchium? Lectis istis fore spero, ut Clarissimus Voetius acquiescat. Planeque sic mihi persuadeo, Viro Doctissimo illud esse ab aliquo Sylvæ-Ducensium ferventiore. Quod non difficile fuit apud eum, qui ipse, quicquid vult, ita vehementer vult, ut non eat, sed currat. Uxori lectissimæ uxor mea salutem voluit adscribi. Sed & nomine nostro salutem, quando sponte se occasio offeret, Nob. Amplissimo que Hugenio, Dubletio, Gulelmio, Wickefortio, Doctissimo etiam Heilersichio, quem eo impensius amo, quod in amore nostro annunciando, sæculo hoc maligno, bonum se virum præstare non desinat.

Amstelodami,
cl̄o Ioc xlii. iii.
Non. Novemb.

Æternum tuus,

G. J. Vossius.

CCCCCLXVI.

Andræ Riveto, *Theologo.*

Reverendè Clarissimeque Vir,

Remitto tandem Salmasianam diatribam de Herode infanticida. Ex qua quantum profecerim, non pœnitet. Atque hunc fructum non solum debeo *τῷ πάλῳ* Salmasio, sed etiam beneficio tuo; absque quo foret, necdum conspiciere licuisset. Bene interim est, quod in libris, quos Isaacus meus è Galliis expectat, propediem comparebit. Optime id Collegæ veteri Heinio cessit, quod extra Leidam vix quisquam de hoc Salmasiano responso inaudierit. Alioquin id studiosi adolescentes efflagitarent à Bibliopolis quotidie. At isti lucripetæ quamprimum subjicerent prælo; quod de se sponte his diebus quispiam fatebatur mihi. Nempe ut volent libri per hominum manus, vix ardentius est fuscitabulum, quam si premi constet. Ubi Leida,

atque Haga redierit ad nos Isaacus, nihil æque volupe erit ex eo resciscere, quam ut valeant veteres amici, & quid agant, quibus scribendo etiam cura est exterorum & posteritatis. Præ cæteris volo, ut exquirat de magno fene, conjunctissimo affine tuo Molinæo; quem, post excessum clariss. Gomari, solum nunc omnium præceptorum meorum habeo superstitem. Omnia illi prospera atque fausta opto; ac pariter tibi, cui multum debeo, non solum ut Collegæ antehac quod non leve duco, sed ut mei meorumque studiosissimo, iis etiam temporibus, quibus si mihi de me credere licet, premerent innocentem. Plurimam salutem meo & uxoris nomine dicito lectissimæ conjugī tuæ.

Amstelodami, cl̄o Ioc xliv. x. Kal. Decemb.
nempe pridie ejus diei, quo hæc Amstelodamensium civitas se foederatis junxit partibus. Nempe crastino, quo nostræ tibi literulæ reddentur, ab eo tempore completus erit annus septimus supra sexagesimum. Deus faxit ut civitas grato semper animo hoc beneficium æstimet.

Tuus omni officio,

G. J. Vossius.

CCCCCLXVII.

Nobilissime Salmasi,

Verba B. Ambrosii sunt Epist. XV. ad Irenæum, five lib. IV. Epist. III. ubi exponit, cur lex prohibeat ne vir muliebri stola, vel mulier virili schemate utatur. Ait vero eam legem esse naturæ subnixam. Cum enim natura nos vel mares creet, vel foeminas, ac plurimum in mutis etiam animantibus notæ sint, quibus exterius quisque sexus internoscatur, naturæ eum adversari, quisquis habitu alium mentiatur sexum, quàm dederit natura. Mendacium esse turpe in verbo, turpius in veste. Foedum esse in foemina, si mentiatur sexum meliorem; foedius in viro, si mentiatur sequiorem. Malum esse, si quis in plateis conspiciatur capillis more muliebri demissis. Pejus esse, si Clericus sic se sistat in templis; ut quando Sacerdos sacra facit bene barbatus, contra qui sacræ mensæ inservit, adstat foemineo more capillatus, aut etiam cirratus, ut pueri Romani. Ergo, inquit, pariant, ergo parturiant, qui crispant comam, sicut foeminæ. Verum habeant excusationem, qui patrias usque sequuntur, sed tamen baros:

baros: ut Persæ, ut Gothi, ut Armenii: Major quidem est Natura, quam Patria. Si non negat gentes barbaras habere excusationem, plane ad mulierum morem intonsas; quid de iis censuisse putandum quæ minus tonsæ. Nec enim puto quisquam dixerit naturam dare capillitium, ut continuo refecetur, nec eam permittere, ut hoc tempora & aures muniamus, atque adeo, ut quantum vitæ conditio & mos patrius finit, etiam decore inempto ornemus caput. Raptim scribebam, cum jam ad Gynasium me hora vocaret. Vale.

Tuus æternum,

G. J. Vossius.

CCCCLXVIII.

Claudio Salmasio S. P.

Multum doleo, Nobilissime Salmasi, quoties cogito, frigescente adeo Charitate, sine qua fides est exanimis, moveri controversiam de Pilis; non quasi non hac parte etiam peccetur à multis; sed quia qui in contrarium abeunt, ipsi etiam modum excedant, dum præfinire modum student, ne aures capillis obtegantur, nedum aliqua colli pars. Profectò non pauca sunt, de quibus infinitis partibus magis erat laborandum. Sed quia in simpulo, si vera aures ad meas perlata, fluctus iis concitare visum est; non potui non gaudere, quod in eo nunc totus sis, ut malo isti, Ecclesiæ bono, medearis. Profectò non placent intonsi, quorum capilli formidant ferrum: uti usù veniebat Monachis Mesopotamiæ, Nasæorum more κόμης γυναικείας περιβαλλομένοις; ut de iis locuples nobis testis est Epiphanius hæresi lxxx. quæ est Messalianorum; Ubi & ipse eos improbat. Sed non hoc in quæstione est, utrum intonsi esse debeamus: sed quam altè, vel demissè refecare oporteat capillos. Paulina urgent verba. Verum reverendo Bezæ adsentio, qui censet eos κομᾶν, qui forficem refugiunt, mulierum instar: eos verò κείρεσθαι, quibus capilli præciduntur: utcumque non solum tecta sit cutis, sed longius etiam diffundantur, dummodo ne excedatur τὸ πρέπον, quod variat pro temporibus & locis vitæque conditione. Græcorum erat Proverbium, Δὲλθ' ὦν κόμην ἔχεις; Romani vero veteres radebant & capillos, & barbam, quod vel ex veteribus nummis conspicuum est. Servi contra alebant capillos, sed radebantur, cum pileo donarentur. Quam multæ item gentes coma-

tæ, ut pars Galliæ tuæ quæ inde nomen sortita. Item intonsi Sicambri. Et quid cæteras memorare attinet tam multas? ut omnino sicut Ambrosius ait in alenda coma, *excusationem habeant qui patrios usus sequuntur*. Nec sane qui usque ad oricillam capillos demitter, vel ulterius aliquanto, capillos alere dicendi semper. Ἀλλῶς enim si loquamur, alimus capillos, dum forceps recessit, non mensibus modo vel hebdomadibus, aut diebus, sed etiam momentis. Uti enim crevisse, non crescere arbores videmus, ita & in capillorum furculis usu venit. Eos alimus dum ipsi nutrimur. Naturalis interim inclinatio docet, turpe esse viro si mulierum instar in lumbos demittat capillos, vel etiam nates: mulieri item fore turpe, si procedat capillis usque adeo detonsis, ut non multo ultra aures protendantur, instar adolescentum vel aliorum etiam, qui se ad vulgatiorem aulæ morem componunt. Equidem ita censeo difficile esse aliquid de tonsuræ modo gentibus cunctis præfinire. Plane enim is variat non modo pro locis ac temporibus, sed etiam pro diversa adeo vitæ conditione. Aliud enim ætati convenit prætextatæ, aliud mediæ, aliud senili. Nec quod decet Regem vel aulicum, id etiam clericum. Nec quod militem, id mercatorem, opificem, rusticum. Tondere est ex iis ὑπερέχοντα τὸ μάλλον καὶ τὸ ὀλίγον, ut non qualitates modo, sed etiam actiones & passionis, sicut proditum ab Aristotele in Categoriis.

Perplacet vero, quod non de hoc solo decreris scribere argumento, utcumque multis docturus orbem literatum: sed etiam addere statueris de tonsura clericorum, ac Virginum Deo dicatarum. Video disquiri de origine hac tonsuræ. Athanasius Lib. de Virginitate, Deo sacratæ Virginis exigit τὰς τρίχας κεφαλῆς περικεκεµέναις. Sed animadverto focerum Junium ambigere num sit is liber genuinus. Et inter alia mihi scrupulum immisit, quod paulo ante legas, si virgo observet eo Libro præcepta, fore ut nomen illius scribatur in Libro vitæ & inveniat in τῷ τρίτῳ τῷ γράμματι τὴν ἀγγελίαν. Quæ suspicionem injiciunt, nescio quam certam, juniorem fuisse cum scriptorem Areopagita, qui pene seculo post Athanasium vixit, quantum variis colligere indiciiis possum. Sed utcumque istoc sit, non dubitandum saltem, quin tonsura ea in usu fuerit anno quadringentesimo. Nec tamen hoc inde adstruxero cum multis, quod Hieronymus Epistola ad Augustinum quæ est xxvi. sic scribat. *Fratres duos Dominum Alipium & dominum meum Enodium, ut nomine meo salutes, precor coronam tuam*. Vel quod Augustinus ipse Proculianum Episcopum Ep. cxlviii.

cxlvii. alloquitur hoc pacto : *Honorant nos vestri, honorant vos nostri. Per coronam nostram nos adjuvant vestri; per coronam vestram vos adjuvant nostri.* Possumus enim his in locis per coronam non tam intelligere tonsuram capitis vel rasuram verticis, quam *μετωρυμῶς* regale sacerdotium. Aliqui etiam signari putant gaudium & gloriam: ut Philipp. iv. & Apocalyp. iii. His igitur argumentis non pugnabo, sed nonnullis saltem in locis obtinuisse horum temporibus, evincere posse videor ex istis B. Hieronymi in gravi illa obijurgatione ad Sabinianum Diaconum. *Moris est in Ægypti, & Syria monasteriis, ut tam Virgo, quam vidua que se Deo devoverint, & seculo renuntiantes, omnes delicias seculi conculcaverint, crinem Monasteriorum Matribus offerant desecandum, non intecto postea contra voluntatem Apostoli incessuræ capite, sed ligato pariter ac velato. Nec hoc quisquam præter tondentes novit, & tonsas; nisi quod quia ab omnibus fit, pene scitur ab omnibus.*

Interea duo hic in considerationem veniunt. Prius est quod non dicit hoc ubique obtinere, sed in Ægypto & Syria: ut hinc liqueat morem fuisse particularem. Deinde item quod non ad Apostolorum provocat institutum, sed morem vocat. Quemadmodum & causas subdit non mysticas profecto ut juniores solent, sed naturales plane. Sic enim subiungit. *Hoc autem duplicem ob causam de consuetudine versum est in naturam: vel quia lavacrum non adeunt, vel quia oleum nec capite nec ore norunt, ne à parvis animalibus quæ inter cutem, & crinem, gigni solent, & concretis sordibus opprimantur.* Plerique etiam adstruere tonsuram illam conantur ex Concilio Carthaginensi iv. Can. xlv. quo interdicti aiunt *ne Clericus alat comam aut barbam.* Quomodo etiam citat Gregorius, nominis ejus nonus. Sed post barbam in Gemblacensi Codice est *tondeat*, in Gandensi S. Bavonis *radat*. Utrumque de barba est, de coma convenit. Adhæc pro se adferunt B. Augustini Librum de Monachorum opere Cap. lxxx. & duobus seqq. Ac sane Calvinus etiam Institut. Lib. iv. Cap. xix. §. xxvii. scribit ex hoc Augustini opere constare, unde originem habuerit clericorum tonsura. Nempe quia illo seculo non alii capillum alerent quam delicatuli, & elegantiarum ejusmodi studiosi, quæ virum minus decerent; eo visum mali fore exempli, si clericis illud permetteretur; eoque satius judicatum, si vel tonderentur vel raderentur, nequid effœminati præ se ferrent. Sed de rasura nihil ibi Augustinus, neque ea tum temporis exigebatur. Quid verò requirat indicant hac verba: *Quo pertinet queso tam aperte contra Apostoli verba comari? An ita va-*

candum est, ut nec tonsores operentur? Et mox, vereor in hoc vitio plura dicere, propter quosdam crinitos fratres, quorum præter hoc multa & pene omnia veneramur. Adfert deinde hoc eorum argumentum *luculose ridiculum*, ut vocat Augustinus: *Virum inquit, prohibuit Apostolus habere Comam. Qui autem seipsos castraverunt propter Regnum Cælorum, jam non sunt viri. Quasi hoc vellent, proinde iis licitum mulierum instar comam nutrire.* Hæc ostendere videntur, fratrum eos, quos Augustinus designat, non modo ad oricillam usque, vel paulo ulterius demississe capillos, sed credidisse se posse mulierum vel pene mulierum instar alere capillos. Quæ quid ad tonsuram, qualis in clericis, vel monachis, urgetur? Quare in Africa, ut puto, necdum ea obtinuerit tempore Augustini. Multi tamen vetustam adeo arbitrantur, ut originem ab ipsis arcestant Apostolis. Quod & Isidorus facit Lib. ii. de officiis clericorum Cap. IV. Atque idem censet ad exemplum fieri Nazæorum: quasi non, qui Monachi esse incipiunt, tondeantur; tonderentur vero qui Nazaræi esse desinerent. Nonnulli etiam qui itidem Apostolos putant tonsuræ auctores, hujusmodi se narratiuncula tuentur: Petrum cum ad Evangelium prædicandum missus foret, ab inimicis ita fuisse attonsum; sed ei benedixisse Christum: atque ita quod opprobri ergo factum erat, verum esse in honorem. Sic Germanus Episcopus Constantinopolitanus & Ceolfredus apud Bedam Historiæ Anglicæ Lib. v. Cap. xxii. Item tot seculis junior Jacobus de Voragine in Legenda Aurea, ubi de Cathedra Petri. Quibus tanta tonsuræ placeat antiquitas, allegant Dionysium Areopagitam Cap. iv. Ecclesiasticæ Hierarchiæ, ubi monachum ait, quando initiandus à sacerdote, *συνεστῆς τῷ πρῶτῳ σφραγισθῆναι*. Id Perionius vertit, *signo crucis consignatum tonderi.* Sed puto, Dionysium hoc velle, tonsuram fieri non *συνεστῆς* sive in orbem, sed *συνεστῆς*, sive ad modum crucis: ut apud Orientales obtineret. Et sanè hujus tonsuræ *συνεστῆς* etiam in Euchoiogiis Græcorum fit mentio. Interea non ex istis ea colligitur tonsuræ antiquitas, quam multi arbitrantur: modò verum sit, quod multis argumentis alibi ostendimus, atque ante nos aliis comprobatum, Dionysium eum summum extremis B. Hieronymi temporibus vixisse. Præterea citant, ut etiam Espenæus nuncupat, *vetus Marcelli decretum.* Qui ab anno ccciv. sedit usque ad ann. cccix. quinquennio nempe ante Silvestrum I. Decretum id habemus apud Gratianum, Decreti part. 11. causa xx. quæst. 1. *Illud autem statuendum esse censuimus, ut si in minori ætate filii monasterio oblati fuerint, vel sa-*
cram

eram tonsuram, vel velamina susceperint: dignum quidem duximus, ut xv. anno à prælatis moniti verbis inquirantur, utrùm in ipso habitu permanere cupiant, an non: si verò permanere professi fuerint, ulterius pœnitendi locum minimè amplecti possint. Si verò ad secularem habitum reverti voluerint, redeundi licentia nullo modo denegetur: quia satis inutile est, ut coacta servitia Domino præstentur. Sed hoc decretum Gratianus quidem tribuit Marcello Papæ: ac in Glossa ibidem Martino Papæ assignatur. Et ejus temporibus magis convenire, in margi e adscriptum Conciliorum editionis Bini- anæ. Is verò Martinus post Marcellum an- nis claruit amplius trecentis. Nempe anno 16 cxlix. & proximo quinquennio.

Rasura autem multò est recentior, quàm tonsura. Pro antiquitate ejus Anicetum Pa- pam adducunt, qui sedit Anno Dom. clxvii. usque ad ann. clxx. Is jubet capillum radi ad modum sphæræ, quasi dicat, *σφαερειδής*, non Græcorum more, *συσφιδής*. Verùm Episto- lam eam suspectam esse, nec Bellarminus dis- sistetur. Imò jam olim eam Cusanus apocry- pham pronuntiavit, posteaque Antonius Au- gustinus, Lorinus, alii magno numero, quic- quid contrà contendat Turrianus. Et sanè non tantam esse rasuræ antiquitatem multi- fariam comprobatur: inter alia eo, quòd Clemens Alexandrinus lib. iii. Pædagogi tonderi jubet, non novaculà, quod illiberale ait, sed forfice. Atque ille de cunctis loquitur Christianis. Ac sacerdotes tangit Catho- licos, quod Donatistarum morem eos raden- tium improbat Optatus Milevitanus contra Parmenianum. Hieronymus quoque in Eze- chielem cap. xlv. ait, sacerdotes non debere comam alere, nec tamen radi. Sed ipsum audiamus: *Juxta quod dicimus, nec calvitium novaculà esse faciendum: nec ita ad pressum ton- dendum caput, ut rasorum similes esse videamur, sed in tantum capillos demittendos, ut aperta sit cutis.* Et triplici hac motus auctoritate Bel- larminus lib. ii. de Monachis agnoscit, ra- suram primitus non obtinuisse. Et sanè non occurrit nunc quisquam, qui quingentesi- mum ante annum meminerit rasuræ. At- que in iis, qui de Monachis agentes solius tonsuræ faciant mentionem, etiam est Joan- nes Climacus in Paradisi scala, Gradu iv. Vixit ille, non an. quidem cccxl, ut Tri- themius putavit: sed an. 16 lx. quemadmo- dum nec Bellarminus dissistet in scriptoribus Ecclesiasticis.

Sed cum ego hæc tam multis, obliviscor mei, imò tui. Nam quid ego, nisi *γλαυκός* *εὐς* *Ἀδύνας*, ac præterea, quod cujus labores mirer, eos morer? Uxori lectissimæ salutem. Spero me posse vos invisere, ubi filium re-

ducem è Galliis videro. Sed gratissimum fuerit, si prius te, & conjugem, & quos è liberis ac familia adducere præterea integrum erit, apud nos conspexero. Etiam uxor, quæ aliquanto melius valet, (vides, cur hoc addam) impensè id flagitat.

*Amstelodami, Incomparabilis doctrinæ virtu-
cl6 16c xlv. tumque tuarum cultor,
vii. Id. Jun.*

G. J. Vossius.

CCCCCLXIX.

Ludovico Crocio, *Doct. & Prof.
Theolog.*

Clarissime & amicissime,

Vellem, uti petieram, ornatissimus Dose- nius me accessisset pridie quam esset abi- turus; sed nunc demum in urbem venit post semihorulam rediturus, ut mox navem ad- scendat. Interea, etsi nunc mecum sint hos- pitum nonnulli, in his nobilissimus Magduel- lus, militaris judicii præses in Frisia, nefas putavi non subito aliquot literularum exara- re. Gaudeo te tam multis infestis, animo esse bono infractoque: ac Deum oro, ut semper idem esse velis; stat à partibus tuis scriptura: stat omnis vetus Ecclesia: stat etiam ex reformatis optimus quisque & do- ctissimus. Amo consulem Dosemium, quod te amet, & faveat, foveatque causam opti- mam. Memini te literis superioribus de illu- stri Grotio judicium meum exposcere; de quo pluribus alias loquar. Nunc solum dixe- ro, injurios illi esse qui Pontificium esse fa- ctum spargunt. Arbitratur in reformatione à nostris facta, multa recte esse emendata, multa non; item, ut hic etiam locum habeat poetæ illud, *Excessit medicina modum.* Putat ea, quæ non sunt propria Ecclesiæ Romanæ, sed universæ, (qualia sane quæ continentur Canonibus Ecclesiæ universæ, codice à Ju- stiniano etiam Imperatore comprobato) non posse pro Pontificiæ Ecclesiæ propriis haberi, nedum ut ab Antichristo profecta censeantur. Sedulo attendit, quæ semper in Ecclesia obtinuerint, quæ postea, alia aliis citius tar- diusque fuerint statuta. Ac plane censet, ut in Romana Ecclesia multa à multis supersti- tiose fiant, nec tyrannidem plurimorum Pa- parum probare bonus quisquam possit; ita quoque seu doctrinam, seu regimen Ecclesiæ, ac ritus spectemus, multa in nostris posse ju- re improbari, magis interim in iis qui Cal- vinum sequuntur, quam qui Augustinam Confessionem. Facilius enim censet inter

Lutheranos, conventurum (præsertim tales, qualis Calixtus, præclarus fane vir) interque Pontificios, præcipue Gallos & alios, non plane Erasmmum, Cassandrum, Casaubonum, Anton. de Dominis, & similes exosos: quam inter eos, qui in Calvinii verba jurarunt, & qui Romanæ Ecclesiæ placita rigidius duriusque quam necesse sit, interpretantur, aut qui ex particularibus Romanæ Ecclesiæ doctoribus putant de universa Ecclesia Romana statui oportere; nec fane quod negat Episcopum urbis esse Antichristum, ab alia æque causa est, quam quod videt, nullam esse spem reconciliationis, vel ejus etiam tentandæ, si hoc altè adeo animis sit inscriptum agi de conciliatione cum Antichristo, Diaboli Vicario. In cunctis vero, quæ ad hoc argumentum pertinentia exaravit, non hoc petit, ut alba omnia signemus linea: sed studium laudemus, & expendamus cuncta ad Scripturas ex primæva antiquitatis mente intellectas. Idem summus vir jam pene absolvit quæ duobus ingentibus Tomis ad difficilia Veteris Testamenti loca annotavit. Ac mox consequentur commentarii in Acta, & cætera N. Testamenti. Filium desidero videre. Nondum enim me convenit. Nulla in re operam meam desiderabit. Pro ingenii tui monumentis, quæ subinde mittis, gratias ago quantum possum.

CCCCCLXX.

Georgio Ratallero Dubletio.

Nobilissime & amplissime vir,

Semel iterumque locutus hic sum cum amplissimo Alberto Conradi Burgio, qui secundum factus Consul, ac collegas habet Pancrarium, Geelvinckium, & Gravium defuncti consulis Gravii filium dignissimum. Is Burghius retulit mihi à nemine se hætenus compellatum de negotii filii Matthæi: sed causa jam à superioris anni consulibus approbata, velle agere, quantum possit, nec videre, cur adversari aliæ civitates valeant, cum nihil eorum hic fiat incommodo. Ait se crastino die abiturum Hagam, qui erit decimus Februarii. Id volui tibi constare: etsi sic quoque spissum vereor negotium, cum raro adeo sit domi, si is Hagæ est, qui hic fuit. Itaque jam ab aliquot annis sæpius cum frustra fuisset, non soleo accedere nisi constite-

rit, quâ horâ vacare possit, ut compellem. Id video Hagæ fieri non posse in tanta adeuntium copia, ut nulli horam certam valeat addicere: eo magis dolet, quod tam molestum negotium susceperis. Atque utinam potius sponte obviam fiat, qui nulquam minus, quam domi esse soleat. Hesterno die literas accepi à filio Venetiis, quem salvum ac hospitem gaudeo. Scribit non diu se itlic hæsurum, sed intra mensem rediturum in Gallias. In sumptibus, quos facio, solatur quod sit frugi & φιλομαθής, inque omnibus bibliothecarum pluteis ac forulis ruspandis plane φιλόπονος. Non quidem tanquam Jasonem aliquem cum vellere auro, attamen cum multis ἀνεδέτοις, auro contra non caris reducere me visurum confido; nisi quid mihi interea humanitus obtigerit, vel etiam carissimo isti capiti; sed ut sumptibus nonnullis mihi hoc iter Isaacii mei stat; ita majoribus connubium Matthæi, non satis sese fortunis meis metientis. Itaque decretum repetere ab illustribus Hollandiæ & West-Friiæ Ordinibus sortem bis mille & septingentorum florenorum: quorum reditus expiret xvii. Aprilis. Puto necesse esse, ut sex hebdomadibus id Myropio significetur in ante diem quem dixi. Necdum tamen certi quicquam statui: & fortasse præstiterit repoicere pecuniam à Dordrechtano Quæstore, quandoquidem itlic annos xxx. ante & ultra est collocata. Quando otium erit, tribus verbis indica, siquid in hac re scitu mihi sit opus, quod nostri similes fugere soleat. Nudius tertius mihi redditæ literæ ab Illust. Grotio ex quibus intelligo intra tres menses posse absolvi, quæ annotavit ad libros veteris Instrumenti, eos etiam, quos Hebraus Canon non agnoscit. Hinc fore, ait, ut prælum defunderet istis, quæ ad Acta Apostolica, Epistolas & Apocalypsin est commentatus. Equidem exopto ut videre liceat. Sane illis in IV. Evangelistas multa me bona docuit: ac sicubi recedam, occasionem tamen accuratius meditando præbet. Imprimis desidero Apocalypseos interpretationem, quando nostri, si Hieronymum Zanchium & paucos alios excepero, cuncta ad urbis Episcopum solent referre, præter antiquorum mentem à quibus invitatus abire soleo. Et tamen non disiteor in Prophetiis posse esse, quæ antiquioribus invisæ, nos ipsa docuerit dies, optima etiam stultorum, ut aiunt, magistra. Deus te diu familiæ, Reip. & amicis conservet. Amplissimo Reigersbergio salutem dicito; item affini Nobili Dubletio, item reverendo Doctori Johnsono & si Hagæ fuerit Doct. Goffio. Huic debeo exemplar de Idololatria, quod diu misissem, nisi in mora fuisset bibliopegæ. Ante diem unum accepi compactum; sed

nescio

nescio ubi degat Goffius, & gravare famulum tuum nolui.

Amstelodami, cl^o Id^o xliii.
ix. Feb.

Tuus totus,

G. J. Vossius.

CCCCCLXXI.

Geo. Ratallero Dubletio.

Nobilis & Amplissime Senator,

Quos ad me quadringentos misisti flores, eos hesternâ die accepi. Ac ex pecunia apud Quæstorem Dordrechtanum collocata Aprili proximo refundo. Pro cura & affectu quas debeo gratias ago. Matthæus meus, ut arbitror, intra hebdomadas duas vel præterpropter affuturus est nobis. Quod opto, ut videam, numquid in Arnalibus Batavicis promoverit; omnino ex illorum est genere, quibus subinde auris sit vellenda. Ergo ubi redierit pro ἐργασίας ero. Ante triduum redditæ mihi ab Isaaco literæ, quibus significat, se post duos tres dies Venetiis Mediolanum cogitare, atque inde Genevam. De Mediolano, urbe hostili, non multum adlubescit. Sed solatur, quod in hujusmodi moderari linguam sciat. Et credo, si bene novi, potius quam in periculum incideret, ea diceret, faceret, quæ ego ab animo meo non impetrarem. Amplissimo Reigerfbergio salutem; uti & gemino nomine conjunctissimo affini tuo Dubletio, nec minus patrueli. Et cur non suavissimis liberis addam, præsertim natu maximo Philippo. Ubi occasio fuerit excurrendi, erit, spero, quod de profectu ejus mihi gaudeam, tibi gratuler.

Amstelodami,
cl^o Id^o xliii.
Non. Martiis.

Tuus omni officio,

G. J. Vossius.

CCCCCLXXII.

..... Borrio J. C.

Hesternâ die, Cognate optime, literas mihi, Amplissimo Dubletio inscriptas, ecce nunc alteras, quibus Senatori Reigerfbergio commendo negotium tuum. Ubi diem adscripseris, aliquid sigillo, quod impressimus, ceræ subdes. Valde exopto, ut voti tui compos fias. Quod si pluribus scri-

bendo existimabis me aliquid posse, tuum est isthoc mihi significare, qui paratior sum ad gratificandum tibi in quocunque negotio, quam tu sis futurus in poscenda opera nostra. Redditæ mihi heri literæ etiam ab fucero tuo Amplissimo, cui, ut arbitror, nihil attinet hoc tempore respondere. Nam eadem reponerem, quæ tibi scribo. Plurimam autem meo nomine salutem dicito; uti & socii & conjugii & utrique adfui, nisi alterum illorum Gallæ adhuc tenent. Meus Isaacus post lustratam Britanniam, Galliam, Italiam, nunc de domitione videtur cogitare. Postremæ quas ab eo accepi literæ Venetiis scriptæ erant; sed addebat intra triduum se Mediolanum cogitare Genevam. Si Deus fiverit, redibit ad nos ingenti Manuscriptorum Codicum necdum editorum supellectile instructus. Assidue pro ejus reditu vota ad Deum fundo: negotium etiam omne divino numini committo, quod solum novit quid expediat utrique nostri. Eo autem sollicitior sum, quod toties jam in liberorum flore novercam experior fortunam, si sic fas loqui Christiano. Vale, carissime Cognate.

Amstelodami,
cl^o Id^o xliii.
Post. Id. Mart.

Tuus omni officio,

G. J. Vossius.

CCCCCLXXIII.

Cl. V. Andr. Riveto *Theologo.*

Reverende ac Clarissime vir,

Multum tibi, nec paullo amplius debeo Amplissimo Gothofredo de munere isto Philostorgiano. Vere misisti ἀγαθὸν ἀγαθὸς, five enim Philostorgium attendem, multa docet, quæ absque eo esset, nesciremus: five ὁ πᾶν Gothofredum, licet magni semper eum fecerim, valde tamen hac opera auxit apud me exultationem suam. Adeo multa sunt quæ non me modo & mei similes, sed longe etiam doceat doctiores. Sed quoties mecum cogito tot florentissima Gallæ tuæ ingenia, nescio, magisne doleam fortem fœderatæ hujus Belgicæ, an gratuler Gallæ, quæ tot tantivis pretii laboribus beare tempora nostra, & postera simul sæcula non cessat. Belgica vero hæc num ultra duos tres laudare possit (si modo tantus eorum numerus) qui lucem adferre veteris ecclesiæ temporibus vel velint, si possint, vel possint, si velint? Atque in horum, quos nunc culpo numerum referre etiam liceat nomen meum, quamvis pro tuo erga me

H h h

amo-

amore benigne adeo de me loquaris, & scribas, etiam in nupero ingenii doctrinaeque tuae monumento, pro quo munere magnas ago gratias, atque utinam possim aliquid rependere. Sed ita distineor, ut semper metuum, ne promere aliquid si velim, illud crudum adeo sit, ut non faciat ad palatum eorum, qui dapibus adfuevere exquisitis. Et tamen durat ardor ille nobis ferventissimus Ecclesiasticae Antiquitatis. Quantillum vero hoc, si ut Aspendius tibicen, mihi duntaxat canam & Mulis! Id me facere negabis. Equidem facio in illis quidem, quae ad veteris Ecclesiae tempora pertinent. Quamquam in aliis etiam quantillum est, quod promoveo. Nunc sub praelo est Elzeviriano liber de vitiis sermonis, falso suspectis, & variis glossematibus: ubi proposui mihi, tum aperire in quam multis à puro sermone abeant hodie multi non ineruditi, tum tueri quae temere à multis culpari solent, tum lucem adferre semibarbaris superiorum seculorum scriptoribus, quorum sermo, cum allium & cepas oleat, saepius tamen grandes habet sensus, ut non videam operam ludere, si praestem, ut melius intelligantur. Interea quid ista magnopere ad ea, quae amici ab hac aetate mea exposcunt, ut aliqua saltem ex parte iis satisfacerem. Blauwio dedi excudendum libellum de anno Christi natali & emortuali. Qui licet necdum divulgatus sit, tamen jam ante menses sex septem ad finem perductus à Typothetis. Adjungere volui minutam diatribam de genere Christi. Tantummodo quinque est, ut vocant, quaternionum. Et nihil mei à Blauwio, his exceptis excusum intra quinque hos menses. Quae idcirco attuli, ut videas, nihil mea obstare doctissimo operi Blondelliano. Quid igitur, inquires, moratur? Vir Blauwius est minime malus: sed ut Mercuriales omnes solent, erepto fratre, in quem magna pars oneris recumbebat, serio dispicere solet quid sit in rem suam. Habuit autem & aliunde, quae excuderet, & quae absolvi posse existimaret, ante proximas nundinas Francofurtenses: quod de Blondellianis non ausus erat sibi promittere. Maluit igitur illa praevertere. Accessit, quod characteres Blondelliani tam minuti forent, ut brevibus & nebulosis hymis diebus Typotheta mira cum molestia legeret, quod fere ad candelam fuit. Propterea voluit expectare dies & longiores & fereniores. Sic vero in animum inducas tum, atque idem clarissimo Blondello persuasum velim, nunquam ab meis ullam ornatissimo ejus labori remoram fore, sed neque passurum, ut opere illo alterius, quo nunc praelum fervet, ad umbilicum perducto, post-

habeat (si quid valeam) Blondelliana cuiusquam scriptis. De magno Salmasio quod scribis, mox à Paschalibus feriis dominationem ad nos parare velle, valde me gaudio affecit. Pene dixerim, saeculum mihi videri, quod eo caremus. Funus Hellenisticum ejus, & Ossilegium legi. Placet causa Salmasiana, & in Ossilegio etiam modestia. De funere improbarem acre illud & acerbum, nisi nossem, quam crudeliter ille, quem impetit, tractare soleat omnes bene de studiis mereri cupidos, quasi honoris illud, quod aliis accedit, illi decederet. Mihi contra semper visum fuit, à nullo omnem eruditionem possideri, sed bene nobiscum agi si cum Hercule obtineamus partem decumanam. Imo hoc ipsum arbitror obtigisse nemini, ut multum is mihi demum scire videatur, qui scit, quantum nesciat. Hoc utinam omnes non chartis (uti ego nunc facio, & ille, quem me scis dicere, assolet) sed animo inscribamus penitissimo. Gratum fuit intelligere, quis ille sit, quicum disputat in Ossilegio maximus Salmasius. Nam multa crudite objicit: ut hinc affinis tui Bocharti egregiam doctrinam non obscure intelligam. Sane si istis armis non possit defendi causa linguae Hellenisticae, actum de ea & conclamatum. Bene etiam sit affini, qui Salmasiano illi scripto occasionem dedit. Abrumpam, qui & alteram me video paginam impleisse. Nisi hoc addere operae est, gemino me nomine gratias iterum tibi agere, tum pro Dissertatione tua de pace Ecclesiae, eo magis quia fuere complura unde proficerem, tum pro opera in tramittendo Philostorgio Amplissimi Gothofredi, quem non patiar deinceps expertem esse ullius, quod juris publici faciamus. Uxori lectissimae salutem.

Amstelod. cIo Ibc xliii.

Prid. Kal. April.

CCCCCLXXIV.

Merico Casaubono, Isaaci *Filio*.

Reverende ac clarissime vir, conjunctissime Collega,

Hodie adfuit mihi Hoofdius, urbis hujus incola, ac significavit ut à fratre literas accepit Londino, è quibus intelligat, accepisse eum trimestre isthoc salarium, quod à mense Septembri debebatur mihi ex regia beneficentia, seque id hac ipsa hebdomade resun-

refundere mihi paratum aiebat. Sed & lulentam spem faciebat alterius trimestris, quod extremo Decembri expiravit. Ego hac occasione scribendum mihi putavi, ac gratias tibi, & universo Reverendorum fratrum collegio agendas, quod mei, longe distiti, usque adeo turbatis Angliæ rebus memores esse pergatis. Et si nuper, pro modo ingenioli, doctrinæque nostræ, testari volui affectum erga fratres reverendos, animum istum non deponam, dum vivam. Ægre mihi est, quod tam pauca de dilectis adeo capitibus intelligam: Sed scio, peccata omnium nostri meruisse, ut tanti fiant motus in ecclesia pariter ac regno, qui non sinunt ut literaria sint commercia, sicut solent. Et tamen, ut confido, dabit Deus his quoque finem. Huc adliduo preces meæ adspirant & tot bonorum. Ætas mea, egregie vir & amice, ingravescit. Sarcinulas igitur colligo, ut potiora eorum, quæ quadraginta & amplius annorum spatio exaravi, juris fiant publici: atque id non in sacris modo, et si his imprimis, sed etiam politioribus literis & Philosophia. Quæ nunc sub manibus habeam literis proximis cognosces. Tam multa enim sunt quæ molior, ut quid primum, quid medio loco, quod postremo exsequar, equidem ne ipse quidem satis perspiciam. Uxori optimæ, Reverendo Decano, venerandorum fratrum singulis, salutem plurimam dicas, rogo.

Amstelod. cId Ibc xliii.
Kal. Maii, St. vet.

Tuus æternum & fratrum reverendorum,

G. J. Vossius.

CCCCCLXXV.

Joanni Friderico Gronovio.

Clarissime Gronovi,

PErgratum est, quod usui tibi esse possit bibliotheca mea: eo magis quia ipse uti nequeam, prout vellem, ob nimiam salutarium multitudinem. Absque noctibus foret, cum nunc male mecum agatur, pessime. Nam quid mei similibus, vel nostri potius infelicius est, quam assidue avelli à libris, quod mihi interdum decies de die contingit? Mitto autem ex iis quos poposceras Grammaticos methodicos, à Putschio editos. Habeo & Priscianum Manuscriptum, bonæ notæ, Aldinum & hoc antiquioris editionis. Quos misissem, si id velle scirem. Scis & mihi Nonium esse Manuscriptum longe optimum. Siquid locorum

voles inquiri, non gravate id fiet: mitto præterea Schotti observationes huminas. Item Leonartum Porcium Vicentinum de festertio, talentis, aliisque: Item Aquilæ & Mameramni libellos Aquilæ adjunctos, adhæc Henniffschium Mathematicum de Aïfæ & ejus partibus; Chiffetium de numismate antiquo, & Puteanum de ratione pecuniæ Romanæ; volui & videres Græpium de fido & talento, licet ambigerem annon id conspexisses, tum autem num usui esse posset. Paschafii Grosippi live Scioppii Mercurium, Prisciani, Fannii, Bedæ, & Meriani opuscula addidi, quod ad eos & Vineti notas quædam Scaliger adscripsisset. Habeo & mei consanguinei Budelii de re nummaria libros duos, cum xxv. aliis libris, quos suis adjecit, sed magis ad juris scientiam quam philologiam pertinent. Mittam tamen si ita voles. Quas tanto ante literas Clarissimo Ifendornio dederas, eas accepi ante biduum, cum pridie mihi redditæ forent à Reigersbergio, quas dedisses ornatissimo Gerardino. Isaacus meus Lutetiam est reversus & cum illustrissimo Grotio vivit. Utrum ante hyemem sit reversurus, an ea exacta, dicere nequeo. Valde triumphat de tam multis à se descriptis, quæ adhuc *divulgetur*. Salmasio ab illustribus ordinibus navis jam mittitur bellica, quæ cum referat Academiæ. Multum gaudeo de elegantissimi ingenii viro Vincentio Fabricio, omnino honore de quo scribis, dignissimus est. Nec hic apex fuerit sed gradus. Matthæus meus te *avtuo d'Zrai*, ejus conjux, quantum rationes putamus, binis tuam mentibus antevertet. Utrique facilem partum opto, & ut sæpius lata prole maritos faciant parentes. Clarissimis collegis, Duistio, Ifendornio, & (quem præmisisse oportuit si tanti res foret) Christenio salutem. cId Ibc xliii. xxvi. Octob. mira festinatione, ob eos qui scribenti interveniunt.

CCCCCLXXVI.

Friderico Spanhemio, *Theologo.*

Eximie & Clarissime vir,

QUod coram promiseram nuper, nunc præsto. Utinam modo opusculum, quod mitto, sapiat palato tuo. Cujus ego judicium multorum instar æstimo, cæterum illi de genere & annis Christi, addidi, alterum aliquanto ante divulgatum, de tribus symbolis. Nempe ut opusculum tam minutum,

H h h 2

tum, si augeteretur, paulo fieret commendabilius. Magnam ex eo voluptatem capio, quod omnia sic Leidæ tuis personant laudibus. Sic enim intelligo ex multis, qui inde huc veniunt. Sordescere cœperant veteris Ecclesiæ tempora, quæ bellè adeo socias cum nostris. Te tibicine, non metuum, ne juvenis deinceps dispretui habeat doctores antiquos. Nec ignoro, quantum debeamus magnis viris, quos paterna & avita ætas tulit. Ac male de nobis, pejus de Ecclesia meremur, si sic eos amplexemur, ut propterea priores, præsertim primævos illos faciamus depontanos senes, ut cætera mittam damna, hoc pacto ne ingrati quidem animi crimen effugiamus. Illud quoque præclare de Academia sperare jubet, quod salvus ac sospes redierit à *pau* Salmasius. Vir undecunque magnus, ac ut in cætera historia ita Ecclesiastica, si quis alius penitus subactus. Quid non à tam nobili pare, una in urbe degenti, liceat sperare? Quocirca non desinam Deum rogare, ut uterque vestri, multos in annos, letus intersit populo Batavo.

Vale, Præstantissime Spanhemi, atque ita tibi persuade, nunquam fore, ut officium meum claudicet, ubi opera nostra utilis esse possit tibi, vel tuis.

Amstelodami, c1o 10c xliii.
Post. Non. Decembris.

CCCCCLXXVII.

Andræ Riveto *Theologo.*

Reverende, ac Clarissime vir,

Minutum mitto opusculum de genere & annis Christi, in quo plus mihi insumptum laboris, quam pro mole videatur. Sed utrum operæ respondeat fructus, tui esto judicii, quod merito maximi semper feci. Plura, & ut confido meliora hoc à me anno habuisses, nisi valetudo nunc mea, nunc conjugis obstitisset. Ingentem Salmasium ad nos salvum ac sospitem rediisse, impensè lætor, magis etiam gavifurus, si alternis dederit nobis nunc de Scholice literarum dape, nunc de veteris Ecclesiæ rebus: Quo pertinerent, quæ ad Concilium Illiberitanum commentatus fuit. Sed nimis diu cum blattis & tineis, ut metuo rixantur. Spero hoc duce, & simul clarissimo Spanhemio, velut ab orco posse revocari ecclesiasticæ antiquitatis studium, quod post tuum à Leidenis abitum, ac Thylii obitum, jacuit velut sepultum dispretumque. Utinam & Petitus hæc in

oras, cujus mihi quidam spem fecerat, fuisset advocatus. Sic cum iis quadrigam fecisses, quamvis paullum separatus loci intervallo. Majori ego disjunctus, lubens currum vestrum essem consecutus, uti olim triumphantium solent. Vale, vir & amice eximie, ac meo & conjugis nomine, plurimum saluta conjugem tuam; cujus frater clarissimus quo pacto valeat scire desiderem. Ergo, quando otium & occasio melior erit, aliquid scribendi ad me (non urgeo negotium, qui ipse usque adeo negligens esse soleo in literario commercio) quæso de isthoc tribus verbis adspere quippiam.

Amstelodami,
c1o 10c xliii.
Post. Non. Decembris.

Reverendo ac clarissimo nomini tuo addictissimus,

G. J. Vossius.

CCCCCLXXVIII.

Georgio Ratallero Dubletio *Senatori*
Curie supremæ.

Nobilis Amplissimeque vir,

Tandem vides libellum de annis Christi: cui & diatribam præmisi de genere Christi, dicavi eum laborem urbis nostræ Consulibus. Id enim jamdiu expectabatur ab iis. Majoris aliquid molis maluissimè, sed non sivit vel mea vel uxoris valetudo, quæ diu nos afflixit & adhuc detinet conjugem; operi de Vitiis Sermonis accudere animus Glossarium latino-barbarum. Quod erit tripartitum, de vocibus penitus barbaris, de barbarorum iis quæ ortum Latio debent, de latinis quidem, sed non more latinorum usurpatis. Exemplum primi generis est, burdo, pro mulo, bannus pro proscriptione. Alterius albedo pro albor, labilis pro infirmo. Tertiæ, capella, pro sacello, hospes pro caupone. In singulis harumce partium prius videbo de nominibus, tum verbis, hinc particulis. Ut classes sint futuræ novenæ. Tripartito glossario subdam de iis quæ falso eruditæ etiam hominibus barbara censentur. Ac glossario quidem id propositum mihi, ut intelligantur posteriorum seculorum scriptores. Nam si res universæ Ecclesiæ, omniumque imperiorum scire volumus, intelligi opus non illos modo, qui purè castæque locuti, sed etiam labantis Latinitatis, atque adeo collapsæ auctores. Malles credo, hæc ab alio fieri, sed neque ego hoc ætatis id laboris susciperem, nisi jam olim egregiam istorum sylvam mihi parassim. Edendo igitur illa, quæ

quæ ad barbarissimum seu solœcissimum pertinerent, longius sum digressus, ne periret labor iste vel mihi, vel publico. Interea opera etiam dabitur, ut priusquam ita videant lucem, (id vix ante semiannum erit, ita sub manibus labor crescit) quædam in publicum prodierint, quæ ad Philosophiam vel Ecclesiæ historiam pertineant. Filius Matthæus, in eo est totus, ut tertium Annalium tomum tradat typographo, quod proxima fore hebdomade existimat. Isaacus, postquam periculose adeo Mediolani ægrotarat, sospes rediit Parisios; ubi in ædibus Illustrissimi Grotii agit. Puto, sic expedire, ut maiorem sibi & juris, & rerum civilium scientiam pareret: quod vix alibi tam feliciter posset, quam ea in urbe & domo. Superest rogem, ut singula opuscula iis per famulum procures, quibus à me mitti in frontispicio adscripsi. Potueram, & credo, debueram parcere hac in re occupationibus tuis. Sed si per tabellarium singulis misissem seorsim, scribendum fuerat singulis. Laboris istius fugienti ignosces. Vale, Nobilissime Senator, præsidium & delictum nostrum.

Amst. cId Idc xliii.

Post. Non. Dec.

CCCCCLXXIX.

Ger. Joh. Vossius, Hugoni Grotio
S. P.

Illustrissime Domine Legate;

GAudeo Isaacum meum Mediolano saluum ac sospitem Lutetiam reversum. Quamquam paulum malè me habet, quod simulac vestra urbe posuerat pedem, de reditu quidem tribus me verbis fecit certior, ac per Tabellarium proximum prolixius se scripturum promisit; at ne per secundum quidem nuncium Literarum aliquid misit: ut subvereri cogar, ne Mediolano festinanti, hoc iter tam longum confecerit, quàm à querquero illo morbo, vix dum depulso, corporis linearet infirmitas. Quod si, ut spero, valetudo nunc secunda ei, nolim iterum eum moretur. ndia, quo minus fruendo coram Excellentia tua, eum itineris sui fructum superaddat, cujus consequendi occasionem frustra desideret postea. Intellego etiam Lutetiæ esse filium Amplissimi Consulis Conradi Burgii. Cui quàm benè velis, abundè cognovi ex Excellentia tuæ ad me literis, jam ab eo tempore, cum eum commendarem, per Gallias, ut credebatur, unà cum Hortensio itu-

rum ad τὸν μαγιστῶν Galileum de Galileis. Quamquam verò nullus dubito quin idem sit, qui olim fuit; tamen longè fuerit jucundissimum ex tuâ Excellentia intelligere, quid censeas de ejus vita, studiis, atque industria. Crebro enim itare in aulam vestram, eoque frequentius quod ibidem habeat Amitinum suum Beuningium, narravit mihi hodièque Nobilis Filius tuus, Petrus Grotius: qui Patruo Guilhelmo, atque adeo penè ejus familia omni, Haga abeunte; nihil causæ vidit, cur non & ipse feriis fruatur, iisque Amitinos Reigersbergios in urbe visitet nostra. Avide omnes bonam mentem amantes expectant, quæ ad veteris Instrumenti Libros annotasti. Cognosco jam Excellentiam tuam in tertio volumine desudare. Utinam mihi Deus longam adeo vitam concedat, ut qui illa in novum Fœdus plus oculis meis amo, etiam me pascam cæteris, citra dubium nihil nisi nectar spirantibus. Malevoli ringantur, certent porro non dictis, sed maledictis; quali cuminum sererent, aut ocymum. Sol non invidet vespere. Et tamen vellem non tantas moras necti ab eo qui responsurus sit, illis sic habenas irarum in Ex. T. effundentibus, optimæque etiam dicta in deteriore rapientibus partem; qui nihil æquè audiunt inviti, quàm quod medicina dicitur modum excessisse. Valetudo mihi ab aliquot hebdomadis, ut non pessima, ita parum prospera, credo ab eo, quod ob diurna impedimenta non sat parcam noctibus. Interim animus nihil novi auspicari. Quorsum enim? qui tam multa sum aggressus, ut me subinde stultitiæ condemnem. Sic enim egi, quali longissimam mihi ætatem sponderem. Sero nunc sapio. Nempe, ut olim aiebat ille, sapere incipimus plerique omnes, cum desinimus vivere. Nec tamen magnoperè id malè me habet semper. Utcunque enim illa, quæ perficere non licebit, haberi debent pro non inchoatis; tamen præter honestam voluptatem, quam ex ea studiorum varietate cepti, hoc feci boni, quod in iis, quæ jam juris publici facta, vel effecta habeo, multa ob studiorum nexum, illustrius, saltem magis ex animi nostri sententia tractavimus, quàm si in studiis, scriptisque, arctiores mihi limites præfinitsem.

Deus Opt. Max. Excellentiam Tuam, Conjugem Heroinam, ac familiam universam, diutissime salvam ac sospitem conservet.

Amst. cId Idc xliiii.

v Id. Sextiles.

*Illustrissima Excellentie
Tuae Cultor devotissimus,
G. J. Vossius.*

Con-

Consulem Flamingium Dom. ab Osthorn nudius tertius amisimus, magno cum bonorum dolore. Sustulere illum ingentes calculi dolores: propter quos sæpè mortem exoptavit, corde alioqui vegeto, ac firmo. Multum amisi in viro tam amanti domus nostræ: sed non paulò amplius est, quod in eo perdidit Resp. De faventia erga Excellentiam Tuam, scis ipse, & nunquam apud me occasionem, vel minimam, neglexit testandi erga Excellentiam Tuam propensissimum affectum.

CCCCCLXXX.

*Viro Illustri Claudio Salmasio,
G. Jo. Vossius S. P. D.*

TAndem igitur læta advenit dies, quæ de te, magnæ. Vir pariterque amice, prospera fors Batavis reddidit, ac nobis. Quod bene prospereque vertat equidem verè dixerò, menses prope singulos, mihi annum vivos, dum amici te caremus, imo Batavia sole suo destituitur. Ex singulis qui è Galliis venirent, vel quibus scripisses, si occasio daretur, quærere de te soleo, & adventus tui spe. Malis negantibus, te de reditu cogitare; illi contra propinquam spem facere. Absque eo esset, non tam diu siluissent literæ meæ. Multum verò gaudeo, quod interea dum abes Leidensium Doctorum numero, accesserit Clariss. Spanhemius; vir, quantum ex omnibus intelligo, dignus, quicum in tenebris mices. Quiddam grande est candor hoc seculo, nigrorum hominum tam feraci. Et ad ejus laudes accedit, quod vetera Ecclesiæ tempora æstimat, quia novit; contra quam alii tam multi, quibus est moris contemnere, quod non didicerunt. Quid verò deinceps primò à te expectabimus? Est qui Colophonem de usuris malit. Alius Arnobium. Ego Concilium Illiberitanum. Amici quidam de Episcopis & Presbyteris. Illustrissimus Princeps Araulionensis de re militari veterum. Sanè hunc prævertere æquum est. Sed qui igneam ingenii tui aciem, acre judicium, omnigenam doctrinam novit, & quam multa jamdiu habeas parata ad prælum, is non dubitabit sperare gemino etiam prælo posse operam tuam desudare. Et tamen nihil ejusmodi ausim exposcere, vel etiam suadere. Quippe valetudini metuo, quam non esse ferream nuperus ostendit morbus in Galliis. Quare subinde animo illud obversetur, quod sapientissimo Augusto crebro in ore esse solet,

Lentè Festinandum. Atque hoc cum tibi valetudinis causa curandum existimem, mihi longe alia de causa occini possit: puta, ne non iis, quibus tu animi dotibus instructus, festinare nimis si velim, fiat illud, quod proverbio dicitur de Cane festinante. Sane dum in Galliis distineris, quædam feci juris publici, an festinantius quam oportuit, tui esto judicii. Ea sunt quatuor de Theologia Gentili, & Physiologia Christiana. Ad hæc de tribus Symbolis, & genere atque annis Christi. Ea mitto, unà cum filii Dionysii Maimonide. Primum istorum, de Paganica dico Religione, & Naturæ scientia simulac edideram, Clarissimo olim Collegæ Heinio *avridwes* (nam exercitationes illius in N. T. ab eo acceperam) L. M. Q. per adolescentem qui verbis ejus significavit, necdum se rescribere, quia non soleat judicium ferre, de iis quæ necdum legerit. Plane hoc Socraticum. Quam stulte enim de necdum visis judicia vulgo ferri solent? Sed ut ne parum humanè mecum egisse censeas, mense toto post literis mihi gratias egit: ac ut constantiam videas, addidit, velle suum etiam judicium, ubi legerit, perscribere. Necdum legisse arbitror, nec fieri postulo, quia nec tanti mea facio, ut bonas horas nostris consumat, vel obiter etiam lustret, quo vel ex ungue Leonem, quod dicitur, vel ex ungula æstimet Asinum. Hoc igitur futurum ad Kalendas Græcas. Maximas ago gratias, quod Isaacum meum tanto affectu in Galliis exceperis. Nunc Lutetiæ agere, scio te scire: Nam tribus verbis rem proxime tetigit literis ad me suis. Omnino autem in talibus cum scribendis paulo fusiolem optarem. Credo existimavit, ubi huc venisses, omnia posse melius coram cognoscere. Hyeme hac Lutetiæ eum agere permisi, quia in ædibus Illustris Legati optima ei occasio erit augendi scientiam & Jurisprudentiæ, & Civilem. Uxor mea male admodum valet, quod scis ei esse insolens. Res ea non paulum moratur studia mea, quæ satis alioqui lente procedunt, in tanta interpellantium turba. Plurimum & tibi & lectissimæ Conjugi tuæ salutem adscribi jussit. Uti & filius Matthæus, quem illustres Hollandiæ & West-Frisiæ Ordines Historicum suum creârunt, eodem pretio quo fruitur Heinio; ut hac parte illos videas Collegas. Uxorem duxit Frisiam bono genere natam, benè educatam; quæ res mihi in plurimis adversis solatio est.

*Amstelodami, cId Idc xliii.
post. Id. Decemb.*

CCCCCLXXXI.

CCCCLXXXI.

Nobilissime Salmasi,

VAlde me beasti literis tuis, præsertim quæ benigne adeo sentis de laboribus meis. Utcumque enim me inferiorem laudibus tuis putem: est tamen pergratum à te laudari; non quia non putem aliquid à te dari amori, sed quia sic facilius me solor, tantum aliis odio nostri indulgentibus, ut laudes etiam iustas negent. Perjucundum mihi est legere Commentarium tuum de lingua Hellenistica; pro quo, quantas possum, gratias ago. Spero hac opera Colophonem imposueris dissertationibus tuis de hoc argumento. Quamquam Groningæ esse intelligam Scokium (Spokium nuncupant alii quod Belgis Spectrum notat) qui iis, quæ de Funere Hellenistico, & Offilegio scripsisti, repositurus est librum adversus Vespillonem. Vel inde maledicentiam hominis vides, si fortasse antea te fugerit. Sanè vulgo omnes ex iis, quæ hæcenus divulgavit, ita arbitrantur, in calumniando non minus esse impudentem illo ipso, cujus causam suscepit. Sed vide sæculi stultitiam. Sic fertur, cogitari Franckeræ de substituendo Professore Theologo in locum *ἡ μακροῦ* Vedelii. De compluribus jam esse sermonem, ac in his etiam nomen esse Scokii. Spero, quamquam graves peccatis nostris poenas commeremur, nondum tamen ita exosas Deo esse Academias foederatæ Belgicæ, ut tam nobilis Sparta huic committatur. Nosse desidero, multumne affuturus sit à sententia tua, qui existimet, dum superessent Apostoli, & ab his missi, quos & ipsos Apostolorum nomine dignabantur, penes eos fuisse quandam *ἑσπερίαν*. iis verò defunctis Ecclesiam vidisse, requiri, ad Schismata cavenda, ut penes Presbyterium esset quidem gubernatio Ecclesiæ: sed in hoc ipso emineret is, penes quem foret Presbyterorum *ἐπισκοπή*, quique propterea singulari notione, Episcopus sit nominatus. Hoc eo scribo, quia nulli cordato placet illa *ἰσσημία*, quæ in nostris obtinet Ecclesiis. Quæ super eo sententia fuerit foci mei Junii; quæ item necessarii ac propinqui mei Francisci Gomari, probè adhuc memini. Neuter Anglicanam Ecclesiæ gubernationem per Episcopos improbabat. Scio etiam, illam à Festo Homio apud Anglos Theologos in Dordrechtana Synodo longè prælatam formæ regundi quæ his obtinet locis: ubi quantæ sæpe in classibus contentiones sint, quanta item *ἀταξία*, malim ex aliis intelligas, modo curæ sit nosse, quod vix arbitror. Hoc malum magnam partem tolli posse existimo, si Pres-

byterium habeat suum *ἑσπερίαν*, cujus auctoritate multi pervicaces, præsertim homines adolescentes, typho plurimum inflati, melius compeferentur, quam in ista sit *ἰσσημία*. Nec quia super eo iudicium tuum exposcebam, coabstractare animus est ab iis, quæ publico parass, ut orbis literati desiderio satisfacias. Dabitur, spero, super eo colloquendi locus, simulac occasio erit tibi ac uxori optimæ, excurrendi ad nos: de quo nihil superioribus scripsi literis, quia & te arthriticum intelligebam, & uxor item veteri morbo laborabat. Nunc illi meliuscule est; nec ei minus jucundus erit vester adventus, quam mihi exoptatus. Cum proximæ tuæ literæ redderentur mihi, rogabat Coniux, an jam ad te scripsissem. Annui: Tum illa; Scin?, me iussu tuo, adservare duos fasciculos D. Salmasio inscriptos? Unde, inquam, illi nobis? Nescire se aiebat, nisi quod de altero ex Suecia putaret. Et jam annum esse & ultra fortasse quod accepissemus: nec tibi mitti potuisse, quod singulis te mensibus expectaremus. Ita mihi memoriam refricavit. Mitto igitur, quod ante octiduum missum oportuit; & simul literas, quas filius Haacus Lutetiæ Parisiorum transmittit ad nos ut tibi redderentur.

Amstelodami, secundum Stylum Julianum post. Kal. Jan. anni hujus *ἸϞϞϞϞ* Id. xlv. quem tibi ego, coniux conjugii, liberi liberis, imo omnes omnibus vobis felicem ac prosperum exoptamus.

Nobiliss. & amplitudinis
tuæ cultor,

G. J. Vossius.

CCCCLXXXII.

Nobilissime Salmasi,

PEne altera elapsa est hebdomas, ex quo non satisfacio expectationi tuæ. In causa, præter cætera fuit, quod demum die hesternæ comparare mihi potui Arcudium. Nihil occurebat, quod magnopere juvare possit præter illa p. 612. Mittendum ramen putavi, quia negligenter satis lustrassem. Addidi Hospinianum de Monachis, qui fuit de tonsura rasuraque. Item Altenstangii Lexicon propter scholasticos quosdam, quos advocat voce Tonsura. Etiam Galenum Westcapellum, qui aliquid habet tum in Commentario de Sacerdotio Christiano, cap. 6. fol. 72. & seq. tum in Originibus Monasticis cap. 12. p.

137, & 138. a. Præterea Collectanea Espenæi propter Concilia. Eorum loca index suggeret in tonsura. Video & quædam habere Cornelium à Lapide in 1 ad Corinth. cap. 11. præcipue ad ver. 6. Sed mittere neglexi, quia nihil haberet Bellarmino & aliis indictum. At ut constaret melius, quo pacto à nostris jam occursum sit Bellarmino, nisi quæ adversus eum Junius & Sultivius Anglus scripsere, cum tarde adeo de Arcudio negotium procederet, raptim quædam de argumento istoc epistola sum complexus: vel hoc fine, ut videres, quam multa in hoc argumento me fugerent. Tanto jucundius erit proficere ex tuis, quibus orbem instruis universum. Iterum vale.

Tuus æternum,

G. J. Vossius.

Cum viderem cistellam plurium esse librorum capacem, ac scirem Bellarminum te habere, ejus loco volui mittere Gregorium de Valentia hominem doctum, & quem acuminis ergo Bellarmino Hieronymus Zanchius soleat præferre. Videbis & ab eo veterem cramben reponi.

CCCCLXXXIII.

III. V. Hugoni Grotio.

Illustrissime Domine Legate,

Magna cum voluptate legi, quæ reposuisti obtrectatori. Eamque dissertationem tuam recudere parat Blauwius. Cæterum metuo ne alicubi, vel Amanuensis tui, vel Typographi incuria, pro *Octogesimo*, irrepperit *Octavo*. Locus est, ubi agis, de usu Bombardæ apud Venetos; unde acceperint Turcæ. Paginam exprimerem, nisi Exemplar meum Blauwius haberet. Historia sic habet.

Anno 1354. Bertholdus Monachus reperit Bombardas, sic Hieronymus Ziglerus in Illustrium virorum Historia.

Anno 1357. Lovanienses Bombardis adversus Flandros usi, eosque duodecim habuere, ac *Donderbussen* appellarunt. Sic Petrus Divæus in rebus Brabanticis.

Anno 1360. Lubecenses præparasse eas è Chronico Slavico, probat in Geldricis suis, Isaacus Pontanus. Idem Chronicon à Lindembrogio subjunctum Adamo Brementli.

Anno 1374. Hollandi iis usi in oppugnatione Gildemburgi, temporibus nempe

Dom. Jacobæ. Verba Chronici (quod hætenus ineditum filius Matthæus habet) sic sonat.

Anno 1378, vel 1380. Veneti primum usi, contra Genuenses, in conflictu ad fossas Clodias. Unde & Itali tum primum inventas credidere.

Sanè Guido Pancirola, de Novis repertis, Lib. ii. Tit. x. sic scribit: *Tormenta illa bellica, quæ Bombardæ dicuntur, inventa fuere à Germano quodam, circa Annum Christi, 1378. Exque prima usurpata fuerunt à Venetis, cum Genuensibus ad fossas Clodias confligentibus, quos hi suo conabantur subicere dominio.*

Sub Urbano Octavo, Anno 1380. repertam ait Platina.

Nempe quia Veneti, Anno 1378 & 1379. vel juxta alios 1380. usi sunt, eam tum demum repertam, uterque Italus prodidit. Interim illud extra Controverliam manet, Venetos si non Anno 1378. saltem 1380. jam usos esse. At ante Annum 1354. repertam nemo putarit, nedum tum Veneti acceperint à Germanis. Quare existimo, ubi nunc est, pro *millesimo trecentesimo Octavo* in Autographo fuisse, *millesimo trecentesimo Octogesimo*, ac sic reponi debere, cum dissertatio recudatur.

Utrum reponendus sit latius, tantum abest ut sciam, ut non arbitrer adhuc dissertationem tuam vidisse. Est hic juvenis eruditus, Discipulus Petavii, antea Minorita, qui Libellum edet de eodem Argumento; sed hic contendet Americanos esse à Phœnicibus. Nempe ut quemadmodum Carthago eorum colonia & Gades, bonaque pars Hispaniæ possessa, ita & hi Americam tempestate, vel aliter, fuerint delati. Pro se afferet, quæ de Atlantide Plato, & alia ex Aristotelis auditionibus mirandis, Diodoro Siculo, Plutarcho. Sed suam sententiam dicet; alios non nominabit, nec refellet.

CCCCLXXXIV.

Georgio Ratallero Dubletio, *Curie Supremæ Senatori.*

Nob. Amplissimeque Dubleti,

Intellego Nicolao Matthæi van Hulten item adversus Arentium (sivi Aquilium vel Arnoldum) Matthæi F. Boosch. nec aliud jam superesse, quam quod revisionem vocant; te vero in iis fore, quibus incumbet rem judicatam recognoscere. Postulat igitur ab amico, ut vellem hoc negotium tibi commendare, quò (quod in omni

te

te facere negotio constans est fama) in hac etiam controversia facere ne graveris: hoc est, ut ne molestum ducas totam causam introspicere. Litis naturam nec scio, nec laboro nosse. Sed quia postulatum hoc mihi non iniquum videretur, nolui vim facere naturæ meæ, quicquam ulli denegando. Præsertim quandoque in iis, qui hoc à me exposcerent, communis foret amicus Jurisconsultissimus Guilielmus Grotius, cujus causa omnia volo. Et fortasse ab hoc illud consilii datum vander Hultio; de quo ut inquirerem tanti non putavi. Amicæ ab viro amico, clarissimo Riveto, literas accepi, quibus perhoneste iudicium fert de transmissio opusculo. Multaque adjungit de affine suo Petro Molinæo, nempe eo, quod scire averem, quid de ejus foret valetudine. Tandem ista subjungit:— Gratulor tibi reditum Isaaci tui Lutetiam Parisiorum, quem Saravius amplissimus ad me scribit venisse optimis onustum spoliis ex illustriss. Bibliothecis, quæ postea in usum literatorum sit liberaliter sparsurus. Deum precor ut eum tibi restituat gratia sua cumulatam, & ab omni superstitionis contagio, quod in Italia, & locis similibus grassatur, plane liberum.— Huic Riveti voto plane applaudo. Interim illud de locis similibus leviter me uffit. Suspicio quippe eo cogitationem retulisse, quod nunc in ædibus agat Illustris Legati Suevici: scio enim probe, quam animo semper ab eo fuerit averso, simulac pedem posuit in his terris. Simulac igitur rescribendi fuerit occasio, vel potius tempus, tribus verbis hunc scrupulum eximere adnitar. Et ipse coram plenus faciet filius. Nam summum intra tres menses se nobis affore confidit. Hoc ego & uxor vovemus, & tu scio nobiscum, amice optime maxime: quem Deus ut diutissime saluum & sospitem conservet precari semper soleo, ac quasi novo hoc Anno, ex consuetudine veteri impentius mihi faciendum existimavi. Scribebam Post. Non. Jan. Sed si Grotius noster paulo lentius ambulabit, ipsis Kal. Jan. Stylo Gregor. possis recipere literas. Sed non tanti istoc ut ineunte Anno hoc votum intelligas.

Tuus totus,

G. J. Vossius.

CCCCLXXXV.

V. Clarif. Joanni Frederico Gronovio,
Ger. Jo. Vossius S. P. D.

Quam gaudeo de munere tuo, molem si libelli spectes, minuto; sin fructum, ingenti. Ita multa bona de Settertio, obiter etiam de aliis doces vel doctissimos; in his etiam heroas illos Budæum, Hortomannum, Scaligerum, & tot alios in Reip. literaria principem obtinentes locum. Gratulor ingenio tuo; gratulor urbi vestræ, imo orbi, quando ut voce urbem, sic orbem calamo doces. Deus diutissime te conservet, præsertim sæculo hoc ad barbariem non sensim eunte, sed gradum adeo præcipiti grassante. Quæ eo fidentius scribo, quia nihil periculi est, ne sermo cujusquam inflare posset, quando non minus modestiam mirari soleo quam ingenio acri acre additum iudicium, & utrique raram eruditionem, & multijugam. Utinam à publico munere amplius tibi otii sit, quo propediem frui liceat aliis etiam quæ primus docebis. Hoc vere pulchrum est, postquam multi adeo exscriptores potius quam scriptores esse cœperunt. Mitto ad te literas filii quas Lutetia Parisiorum exaravit. Simul etiam aliquid nostri, opusculum bipartitum de Genere & de Annis Christi; imo & tria addidi exemplaria, quæ, quibus tradi velim, inscriptio testabitur. Miror interdum tot bona prodire à Gymnasio vestro, cum minora quædam Academiæ præsent. Næc dubito, quin amplissimum urbis vestre senatum hoc magis magisque accendat ad bene merendum de vobis; qui urbis (jam ab eo tempore illustris doctrinarum studiis, quo sinu suo fovit immortale sæculi tui decus Erasmus) nomen honoremque per orbem longe lateque diffunditis ingenii ac doctrinæ monumentis. Plurimam dices salutem, tum lectissimæ conjugii, tum Collegarum iis, quibus cum mihi datum coram colloqui, & quorum scriptis frui licuit. Theologo Dietio, Jurisconsulto Christenio, Philosopho Ifendorio, cui significabis accepisse me jam à Doctore Fontano etiam utilissimos ejus in naturali Scientia labores.

Scribebam Amstelodami, Post. Kal. Janu. Stylo, quo uti vos arbitror, Juliano, Anno partæ salutis, clxxiv. quem tibi & conjugii; imo & Clarissimis Collegis faustum & felicem precor.

CCCCCLXXXVI.

Claudio Salmasio.

Illustris Domine,

UTI in negotio de La-Barra feci apud Proceres nostros, quod potui, ac porro etiam adlaborabo; ita & in Doctoris Bottelii de Grandi-Villa rebus velim apud Typographos quantum possim. Inter alios locutus sum cum Amstelodamensi nostro Elzevirio, qui frigide omnia: sed postea cum convenit Isaacus meus, visus ei non penitus abhorrere. Compellavi postmodo Blauwium, qui promisit, vel nullius se opera uti velle, vel huius de quo scriperas. Sed nunc quicquam occurrere negabat, in quo transferendo aliquid Latine, Italice, Gallice sibi esse usui possit. Nam fratre defuncto, omne sibi onus incumbere Typographiæ, nec audere nimium suscipere, qui parte potius vacare malit in hac per Germaniam, & Angliam bellicâ tempestate, quæ Typographos perdat. Benignius responsum est, quod mihi narravit, conjuge suâ præsentē, Doctor Bottelius. Sed metuo ne (modo verba bene intellexerint) verba utrique dederit. Saltem aliter ille apud me; etiam ubi tuas illi literas ostenderam, licet omnia tua causa velit. Certiora ubi ex eo cognoro, quamprimum te faciam certiorē. Croii liber necdum, delatus est in urbem nostram; sed cum avide de eo inquirerem, monstrarunt mihi Gomarī Scripta, & ante omnia præfationem eam, qua promittitur de Livore & Calumniis quibus sic incomparabilis Heinſius creverit. Displicent Artes plusquam Pelasgæ; & puto, nec præstantissimo Croio erunt acceptæ: quem pariter impeti non est dubitandum. Ad quem præterea hæc pertineant, quid attinet dicere? Quam vellem, ut sincera semper fide in gratiam rediretur? Verum quantillo eruditi multi distant iis quos nolo dicere! Plurimum te, uxorem, liberos, salutamus ego, uxor, Matthæus, & Isaacus meutius ante omnes.

Amstelodami,
clō Idc xlv. xii.
Kal. Febr.

Tuis æternum,

G. J. Vossius.

CCCCCLXXXVII.

Claudio Salmasio, Ger. Jo. Vossius.

REtulit mihi multa de singulari humanitate tua Nobilissimus Blitterswicius, Scabinus Bruxellensis, Erycii Puteani amores; petiit verò ut ad te mitterem versiculos quosdam partim Latinos, partim Gallicos. Hæc sola nunc scribendi occasio fuit, quod alioqui occupationes vix fivere, defuncto hesternā die Jacobo Laurentio Ecclesiastæ, & qui gemino Libello illustrem Grotium impetivit, ac fortasse memineras te cum eo prandisse aliquando domi meæ. Hunc Collegam habui in cura Scholarum; quæ præcipua est in examine ante Pascha, atque iterum senis post mensibus. Filius Isaacus *son Isaac* intra mensem unum alterum affuturus nobis. Literas tuas accepisse video, iisque magnopere gavifum. Hesternā die in manus meas, nescio qua occasione, incidebant Merulæ in Ennium Commentarii, ac quidem locus iste ubi ait, plura se adferre fragmenta, quàm ab Hieronymo Columna factum. Ea se habere ex Calpurnii Pisonis libro de Continentiā veterum Poetarum, viſo sibi Parisiis in Cœnobio S. Victoris. Non semel, multis abhinc annis, sed frustra semper, alios de hoc opere rogavi. Nosse igitur etiamnum aveo, utrum adhuc ibi lateat, an fortè jamdudum lucem viderit. Gratum erit id ex te cognoscere: Sed imprimis quo pacto nunc valeas, & domus universa. Nec tamen rescribi velim, nisi cum non alia distinebunt. Uxor mea paulo nunc melius habet.

Amst. clō Idc xlv.

xi. Kal. Aprilis.

CCCCCLXXXVIII.

Claudio Salmasio, Ger. Joh. Vossius,
S. P.

QUI hæc defert literas filius est Ludovici Crocii S. Theologiæ Doctoris, ac Professoris primarii in illustri Bremensium Gymnasio, eademque in urbe Ecclesiastæ disertissimi. Cum hoc ejus parente jam ab eo tempore, quo Dordrechtī Synodus fuit, amicitia mihi haud vulgaris intercessit. Id enim & viri eruditio & integritas mereri viſa est. Quanquam non ignorarem esse complures, non optime affectos, quod in Synodo Dordrechtana,

drechtana, mollius aliqua interpretaretur: uti & in Calvino. Sed de isto non est nunc agendi locus. Huius filius, quem ob probitatem, eruditionem, & quia *quidam* amo, jam ante menses plures à me petiit, ut si quid ad te scribere vellem, ad se mitterem, quo literas de manu in manum tradendo occasionem haberet videndi & affandi tui. Ego promissi mei oblitus id facere neglexi. Merito igitur suis literis aurem vellit. Nec erat, quod scriberem. Quid tu? Suffecerit hoc tempore & morem gessisse adolescenti, & simul gratificaturum parenti. Quem scio ingentis nominis tui, non amatorem modo, sed admiratorem etiam cultoremque.

Amst. clb Idc xlv.
viii Kal. Aprilis.

CCCCXXXIX.

Georgio Ratallero Dubletio, Ger. Joh.
Vossius. S. P. D.

EQuidem, Nobilissime Dubleti, multa video, quæ me trahere Hagam & possint & debeant. Atque in his facile principatum tenent tecum, hinc conjunctissimus affinis Junius, inde illustris Boswellus, quem ego ob ingentes virtutes, ac summum nostri amorem, non solum amo & æstimo, sed etiam colo ac veneror. Ac præter vos tres viros, ardet animus videre & affari atque audire Amplissimum Reigersbergium, Rivetum, ac Johnsonum, Doctores Theologos, pluresque alios, quos referre mora sit. Sed hoc nostrum excurrendi desiderium sufflamant plura, juréne, an injuria te arbitrum eligo. Spisse valetudo uxoris procedit, confido autem, quantum ver hoc novum adolescet, tantum incrementi ejus valetudinem capere posse. Sic antehac fere illi usû venit. Præterea Matthæi mei quinque Annalium libri sunt exculi: uti & ipsa ad Ordines præpotentes præfatio; nihil ut præter indicem restet, qui hac proximæ hebdomade poterit absolvi. Adde nunc triduum, vel circiter compingendis libris. Vides, ut medio inter Pascha & Pentecosten intervallo comitem me itineris dare possim filio. Impense enim hoc desiderat, eo quod minori verecundia opus operamque ejus commendare valeam apud senos, septenosve procerum; & notiores mihi, & literarum amantiores. Nec tamen filio addixi, vel potui ob rerum incerta, præsertim uxoris valetudinem. Interim animus ab eo itinere minime est alienus. Et siquid impedit, proxi-

mæ erunt feriæ Pentecostes, quibus plurimum dierum feriæ futurae. Saltem non committam, quin si Deus, & familiæ valetudo siverit, videas me ante dies caniculares exactos. Solent amantes dicere, jam annum videri, quod alter alterum non viderit. Hæc illi, ubi subinde vix unus sit mensis alterve. At scis non longe à biennio esse, quod non licuit mihi frui vestro conspectu & alloquio. Spero intra menses duos nobis affore Isaacum meum. Si non ante Hagam ivero, tanto me facilius postea in viam dabo, filiorum alterutro comite adsumto, altero apud matrem relicto, ne, siquid periculi, quod Deus avertat, absente me, oboriatur, nullus sit mas domi, qui opituletur sexui imbecilli corpore pariter atque animo.

Amstelodami clb Idc xlv. Post. Paschæ:
Salutem adscribi jussit Conjux. Mco etiam nomine rogo salutem impertias amantibus nostri: nec minus filiis, imprimis suavissimo Philippo: qui quantum profecerit in studiis, spero me brevi coram posse cognoscere.

CCCCXC.

Joanni Ravio, *Arabicas literas docenti*
Ultrajecti.

Clarissime Ravi,

JAM una & altera hebdomada est, quod expecto aliquem ex notis Ultrajectum iturum, per quem literas à Gallia tibi inscriptas procurarem. Interim & aliæ ad me literæ delatæ. Porro hac ipsa hora etiam à Tabelario fasciculus mihi traditus. Pro quo tres florenos cum dimidio uxor necesse habuit persolvere. Ne igitur diutius frustrarer expectationem tuam, recte atque ordine me facturum putavi, si universa mitterem ad quempiam Clarissimorum urbis vestræ Professorem. Elegi vero amicorum in urbe vetustissimorum, quem hoc oneris, ut de habitatione tua inquirat, tua meaque causa, non invitum suscepturum existimavi. Is est summus vir Antonius Æmilias. Tuum erit præfinire quo pacto deinceps non cogar aliis esse molestus. Cum Ultrajecti habitaret conjunctissimus adfinis meus Junius, hujus opera utebar. Nunc dispar ratio, nec ausim sæpe alios, & opera & sumtu onerare. Scire aveo quid rerum geras, & quomodo tibi primordia ista Orientalium linguarum in Ultrajectina Academia docendarum hætenus processerint.

rint. Equidem instituto tuo impense faveo. Deumque rogo, ut fortunare porro velit, cum tua, tum imprimis Reip. literariæ & Ecclesiæ causa.

Amstelod. an. 1644.
ix Kal. Maias.

CCCCXCI.

Hugoni Grotio.

Illustrissime Domine Legate ;

DIE hesternæ hodieque Costerus, Medicus urbis nostræ, Excellentiæ Tuæ, à multis retro annis, poesi Belgica notissimus, atque idem eminentissimæ dignitatis Tuæ Cultor, convenit me, filiumque, uti & ab Uxore ejus factum, de causa quadam, quæ Lutetiæ agenda. Petrus ab Oorschot, in negotiatione Angolismi se exercuit triennio apud Christophorum Gangelt. Ubi vero id tempus expirarat, quo se obstrinxerat, à Mercatore eo lis illi mota, verè quæsitis, quantum intelligo, argumentis, Mercurialium more. Petit igitur obnixè Costerus, cum Coniuge, quia se is Petrus Oorschot, magisque ejus frater, cognatione, vel affinitate, propinquam attingit, ut si advocatus ejus, vel ipse Oorschotius, Excellentiam Tuam accesserit, consilio juvare velis. Quod officium eo gratius Deo fore arbitratur, quia & Adolefcens ille, annis minor est, quam ut suis esse possit, & matrem habet viduam perhonestam. Dum sermo mecum seritur, animadvertere visus sum, partibus advertis favere Heufdium, Mercatorem Parisiensem, qui vel frater, vel patruelis foret Heufdii, quem duxisse uxorem scirem filiam Consularis Wittii, nunc ad Succos Legati, ex amitina Coniugis meæ natam. Aliud accessit, quod in Excellentia Tuæ ædibus degeret Heufdus, ex eadem familia: qui absque dubio faventior esset partibus Christophori Gangeltii. Costerus, & Uxor, sic putabant, non ita grande id esse vinculum, quod attineret Heufdios. Nam solum aliquid esse affectus ex eo posse, quod Christophorus Gangelt, quicum Petro Oorschotio negotium est, fratrem habeat Mercatori Heufdio famulantem. Quare neque me propter eum Heufdium, qui in Tuæ est Excellentia familia, neque propter Heufdium, qui nostram cognatam, Corputiam, live Wittiam, Legati Berchii privignam, duxerit uxorem, commendare, eominus oportere. Parui igitur, atque id lubens feci, quia bene volui semper

Costero, ut optimo civi, & nunc etiam obstringor, quia (post excessum Verhoevii, Excellentia Tuæ civis) uxoris meæ, ut plurimum valetudinarie, curam ei committere non dubitavi. Illustrissimæ Dominae Coniugi, & Nobilissimæ filia, à me, Uxore, Filioque, salutem plurimam adscribo. De Nobiliss. filio Petro, nihil addo, quia vixdum hora est, quod mecum est, ac seipsum ad Parentem velle ait scribere.

Amstelodami,
cl^o l^oc xlv. iii.
Non. Quint.

*Illustrissimæ Excellentia
Tuæ cultor æternum,*

G. J. Vossius.

Ad filium scribere erat animus; sed ecce qui interpellent. Fiet id die Lunæ proximo. Unum addo. Scire aveo, ecqua intercedat notitia cum Illustrissimo Polonici Regis Legato; Vir est doctus; & quamquam inter Suesones, & Polonos, animus quodammodo hostilis esse solet, tamen antequam à Polonia pedem poneret, dixit, se velle amicitiam cum Excellentia Tua inire, nec id fore Rege invito. Ita ex eo coram accepi. Nam prandi cum eo, apud Bartelottum Mercatorem, meque domi invisit meæ. *Εἰς πόρον.

CCCCXCII.

Josepho Laurentio, *V. Clarissimo*, G. J. Vossius *S. P. D.*

NOli putare, vel locorum, vel temporis intervallo posse non dico infringi, sed etiam imminui amorem erga te meum. Quamdiu mihi in memoria erit magnus ille Molinus, quam diu ante oculos egregia ingenii doctrinaeque tuæ monumenta, & ut cuncta dicam, quamdiu artus hos spiritus regat; firma erit amicitia nostra, quæ ex tam bono principio; Molino inquam, conflata est: nec offendere debet, quod tardius respondere amicis soleam. Id jam à lustris multis familiare mihi est malum: usque adeo, ut consuetudo pene verterit in naturam. Hoc excusationis genere cogor toties uti apud amantes mei, ut pudeat propemodum canticum eandem canere tam crebro. Interim multum temporis auferunt salutationes tam multorum, occupationes publicæ, & privatae; valetudo aliquando mihi, longeque sapius, ac semper pene coniugi adversa. Jam aliud etiam adjicere istis amici, qui me norunt, solent, aiunt illi, utcumque verissima sint quæ adduxerim, tamen nec postremas in causis tenere,

tenere, quod qui multa variaque sub manibus habeo, difficulter ab iis avellar, quæ publicam posse lucem ferre, vel ego, vel amici non diffidunt. Absque his esset, egone non subinde literis meis compellarem egregiam ac pereruditam Balthassaris Bonifacii animam? Nunc (pudet dicere) nec illud scio an super sit. Postquam enim ad plures abiit Nobilissimus Cornelius Vander-Mile, qui sedulus erat in arvo illo Epistolari excolendo, non tam comoda mihi amplius occasio est exquirendi de viris Italiæ præclaris. Sed hac parte, ut confido, ero beator, ubi advenerit è Galliis filius meus Isaacus, quem intra tres hebdomades, summum mensem, expecto. Agit hoc tempore in ædibus Illustrissimi Sueconum Legati Hugonis Grotii, viri de quo quicquid laudum congesseris minus erit. Multum tibi debeo quod tam amice filium exceperis, ac si rediisset, magis eundem obstringere tibi fueris paratus. Sæpius mihi per literas nunc doctrinam præstantium in Italia virorum, nunc etiam erga se, meque, affectum prædicavit. In his etiam egregia erat laus tui; sed concitius ille omnia quam vellem. Tanto impensius reducem opto, quo pendere ab ore liceat fulius omnia deducens. Simul per illum melius exequar ea, de quibus scribis. Aggressus sum loqui de tuis cum uno altero Typographo. Nec abnuere prorsus vili. Sed aiebant se paulo frigidiores in excudendis libris, quia non æque distraherentur ac solent, idque ob grave bellum in Germania, Britanniaque, quibus nunc illud inter Danum ac Suevum accessit. Præcipue vero quærimonia erat de Germania, cujus bona pars male vastata de fame potius cogitet quam fama, aut libris. Verum de hisce, ac cæteris accuratius omnia literis proximis, ubi filius aderit. Sanctes Pagninus, juvenis optimus, mihi commendatissimus est, tum ob virtutes suas, tum quia nihil non tui causa volo, tum imprimis ob ingentem illum Pagninum, qui meritis, ac fama nominis orbem implevit universum. Equidem cum plurimum quoque illi debeant studia mea, non patiar erga nepotem gratum in me animum desiderari. Vale Clarissime & Amicissime Laurenti.

*Amstelodami, cō Ioc xlv.
iii. Non. Quintiles.*

CCCCXCIII.

G. Blittersvicio *Sup. Senatus Geldrici
Senatori.*

Bruxellas.

Vir Nobilissime,

PErgratæ mihi literæ tuæ fuerunt, quæ laudæ scripseras: Eo gratiores, quod ex eis intelligerem, te cooptatum in collegium atque ordinem senatus Geldrici. Gaudeo vero tum tuo nomine, cui optima quæque opto voveoque; tum etiam patriæ causa, quæ deinceps multum etiam virtuti ac prudentiæ tuæ debebit. Cur enim non Geldriam pro patria habeam, quando parenti, avo, proavo ac aliis porro è majoribus meis, Ruremundæ contigit nasci atque educari? Quodque ad locum ubi primum hauri vitalem auram, quoque ob belli Belgici tempestates se receperunt Parentes, is vix senis me habuit primis viræ mentibus. Exinde enim, relicto à parentibus Palatinatu, paucis annis terram Flandriam, at plus quam sexaginta Hollandiam incolui. Ubi cum tam longo tempore mihi fuerit optime, cur non hanc alteram, vel tertiam liceat patriam nuncupare. Noli enim me tam angusti animi putare, ut quem patriæ amorem debeo, constringi patiar intra oppidum, vel unius ditionem: ac tantum abest, ut ejus poeniteat opinionis, ut parum absit, quin mundum mihi patriam dixerim, non tam ea mente qua Philosophus olim se mundanum respondit, quam longe alia, qua omnes ejusdem patriæ censetur, qui cives sumus unius Rep. literariæ, quotquot cum virtute, toto terrarum orbe, sociamus studia literarum. Sic Nobilissime Blittersvici, etsi tua se profapia jactet Bruxella, tamen tu meus civis es, uti ego tuus, quia una est Sparta, literaria scilicet, nobilis sane civitas, quam uterque incolimus, ac tot nobiscum alii, non illa in Peloponnesi regione sita, sed latissime in mundo diffusa: quam videor mihi, si commodum interpretem nanciscar, Spartam Spartarum posse dicere. Hoc pacto ego non Palatinatum aut Geldriam, aut Bataviam modo patriam vocâro, sed etiam patriæ partem dixerò Brabantiam tuam, doctissimorum hominum adeo feracem, ut non sit quod aliis invideatis. Et tamen fatendum, paulo arctius Brabantis adstringi mihi Geldros meos: in quibus principem facile locum tuetur grande, & immortale literati orbis decus tuus meusque Erycius Puteanus. Vidén' quam te amem, amice nobilissime, quod in mediis occupationibus otiose adeo tecum confabuler? Nec tamen minis longo sermone

sermone jam senatorem & (quod tempus majores curas exigit) recentissime ad hoc dignitatis evectum; patriæ meæ bono, morari nunc animus mihi. Tamen hoc non prætereundum mihi, utcumque literæ priores Le da transmissæ admodum fuerint gratæ acceptæque; quibus acceptis gratulari quamprimum me oportuisset: (& fecissem nisi oblitisset valetudo meorum) nihilominus valde etiam me in alteris illis exosculatum fuisse tantum amorem mei, quem undique spirant. Nobilissime & Amicissime Blittersvici, porro semper alter alterum amemus, & quantum utriusque sinent tempora epistolari officio hunc arcemus amoris campum. Sic habere, vix aliud mihi literis tam elegantis, ac cordati viri jucundius esse posse. Salutem adscriberem multis, nisi maximam longe partem extra Bruxellas viverent. Hoc igitur tempore contentus ero addere, me uxoremque illi seu Veneri seu Junoni tuæ (cujus ego bellissimæ bellulam adeo imaginem hic conspexi, & multo etiam belliolem animum auguror) plurimam precari salutem, ac Deum rogare, ut sæpe vos simili vestri prole faciat parentes.

Amstelodami,
clō Ibc xlv. xi.
Kal. Quintæ.

Nobilissimi nominis
tui cultor,
G. J. Vossius.

CCCCXCIV.

Joanni Cocceio *Viro Clarissimo*, Ger.
Jo. Vossius *S. P. D.*

Reverende ac Clarissime Cocceie,

Maximâ voluptate affectus fui, quando intelligerem te in illustri Frisiorum Academia constitutum Theologiæ Professore. At quamquam tuo etiam nomine maximopere gauderem, eo quod te digna tibi Sparta obligisset; magis tamen publico nomine lætabar: partim videlicet quia in te concurrere viderem in aliarum etiam scientiarum doctrinam, insignem Orientalium Linguarum peritiam, in qua parte non paucos novissem valde imparatos: partim etiam quod te alienissimum semper judicassem à malo, etiam sacri ordinis viris nimis familiari, immodestia dico, quam pejus odisse oportebat quam fullo ululam. Utinam hac in re sequerentur potius exemplum magni foci mei Junii: à quo Christianam illam lenitatem animi summopere scio omni vita fuisse commendatam, etiam postremis sermonibus, quos habuit cum præstantissimo præceptore

tuo Martinio. Equidem operam dedi semper, ut ab illa maledicendi aliis prurigne, quæ vere pestis est Ecclesiarum, immunis forem, & si non satis caverim, semper perire ea scripta malim, quibus deliquerim. quam in mei opprobrium ac posterorum damnum vivere. Magnas vero atque adeo ingentes tibi gratias ago pro illustri munere, quo ornatum ire voluisti, & me & bibliothecam meam; factum præclare, quod potissimum volueris operam ponere in operoso ac difficili Jobi volumine. In quo multa adeo etiam doctissimis hætenus negotium solent facessere. Ne dubites, quin orbis literatus semper tibi sit gratias acturus, quod toties tenebras dispellas Phœbeâ illa lampade ingenii & eruditionis tuæ. Deus, mi Cocceie, longam tibi vitam & valetudinem prosperam largiatur, ut diutissime similes gignas foetus, qui te meliores ad sedes translato, non desinant pro te apud posteros loqui. Vellem aliquod ad manum fuisset *avindæon*, quo possem affectum testari; sed cum id non possem hoc tempore, ne is qui tuos mihi attulit commentarios auro contra non caros, vacuus prorsus ad te rediret, nisi libellum, an libellulum dicam, de genere & annis Christi. Et tamen dubitabam, an non jam ante cuiquam dederim tibi deferendum; facile enim istiusmodi minutiarum obliviscor; sed id si factum, bene est, quod virtus doctrinaque tot tibi conciliarint amicos, quorum facile aliquis à tam bona manu accipere dignabitur. Majus vero aliquid deinceps expecta. Plurimam à me salutem dicito Collegis, summis viris, Collegis tuis ornatissimis, Maccovio, Cloppenburgio, Pynakero, Lindio, Winsenio, Schottano, ac tanto impensius, quantoque nostri amantiolem putabis.

Amstelodami, clō Ibc xlv.
pr. Non. Maias.

CCCCXCV.

Ger. Jo. Vossius, Francisco Junio *suo*
S. P. D.

Nobilissime & Ornatissime Cognate Juni,

Hebdomadibus duabus Hagæ fui, eoque tardius rescripsi, domum enim reverfus, reperi multa quæ prævertere æquum erat. Disputationes tuæ mihi admodum gratæ sunt. Pro iis gratias ago: quod & mecum facit reverendus, & tui amantissimus Hottonus. Nec displicet si nunc de suprema juris laurea cogites, dummodo titulo eo qui juventutem

ventutem inflare sæpius solet, minime de pri-
stina modestia tua, præcipuo ætatis tuæ or-
namento, quicquam decerpatur. Doctor eris
non doctior. Gradus vocatur non apex.
Valla dicere solebat majorem longè esse nu-
merum doctorum à recto *Doctor*, quam
doctus; nec scio an non titulus sit magis onus
quam honos. Ut hic quoque habeat locum,
quod de capeffentibus Remp. à Varrone di-
ctum fuit, Onus est honos, qui sustinet Remp.
Nec hæc dico ut deterream, sed ut cogites, cum
honore eo quid oneris suscipias. Quod impos-
sibilem etiam accendere ad hoc studium debet.
Scis enim, assumpto Jurisconsulti titulo, profi-
teri te cuius de quavis re consulenti paratum
respondere. Quoties igitur hoc elogio saluta-
beris, toties in mentem veniet, quid orbi de
te promittas. Quare gradus iste, ut vocant,
non ut ulvenire solet, remissiorem te in stu-
diis faciet vel inanibus gloriolis inflabit: sed
faces stimulosque novos subdet, ut sis, qui
videri voles. Ita mihi bene sit, suavissime
Cognate & filii instar dilecte, quam ego studi-
is tuis per omnia bene volo. Alioqui enim ista
non scripsissem; sed magnus avus, focer, &
præceptor meus, item conjunctissimus affinis,
& condiscipulus, parens tuus, & uxor mea
suavissima & cordatissima, amita tua; non
finunt quin assidue de te, sororeque, nec mi-
nus matre optima cogitem. Hoc nunc iterum
nihil æque mihi gratum fore, quam si post-
quam laurea juridica fueris decoratus, con-
jungas cum juris utriusque studio & φιλοσοφίαν
& φιλοσοφίαν: nempe tum linguam & historiam
universam studium; tam quæ dabunt Academia,
Lyceum & Porticus, addo, & ubi iudicium erit
firmatius, Potamoniam sectam, quæ familiam
ducit, ubi priores prius fueris edoctus. Mallem
hæc spatia antea emensus fores. Sed nunc non
dispiciendum quid quandoque præstiterit; sed
quid nunc ex re sit tua. Plurimam salutem
dico nobilissimo Magduello; addo & egre-
giæ filiæ, cujus suavissimæ mores nunc etiam
recordatione me delectant. Item reverendo
clarissimoque Theologo Maresio. Si salutige-
rulum ex te facere velim, addam & duos
Collegas Theologos & pulcras animas Tobie
Andree, & Altingii, quem doleo hinc ab-
isse priusquam reverterer: Et pulcre adeo de
te & propterea etiam de universa magni Junii
familia merenti doctori Steinbergio. Sed præ-
cæteris saluta matrem & sororem dilectissimas
mihi, ut nosti; nec tantum nomine meo id
fiat, sed etiam uxoris & Isaaci mei. Et ubi oc-
casio erit, possit & mater Dominam Schom-
bergiam salute plurima impertiri.

Amstelodami,
xxiv. Maii.

CCCCXCVI.

V. Cl. Jo. Fred. Gronovio.

Davent.

Clarissime & Amicissime Gronovi,
Gratum mihi fuit cognoscere eam tibi
desponsam quæ placuit tibi & placere
erit dignissima. Ut amoribus favissem tuis, si
de iis mihi constitisset; ita nunc connubium
fortunare cupio: atque id ut obtingat Deum
ex animo rogo. Cum tuas accepissem literas,
Collegæ domum accessi; sed Hagæ apud No-
biliss. Wickesfortium. erat & duas circiter heb-
domadas permanfit. Vix redierat, quin ani-
mum de versiculis tentarem. Belle adeo rem
egi, ut continuo addiceret. Sed cum vellem
sponsæ nomen ex literis tuis significare non
potui, quia eam reliqueram in mensa cubicu-
li, unde nescio ubi à se repositam, invenire
posse famula negabat. Sed hoc leve, quando
argumentum Clariss. Collegæ exposui. In-
terea, nempe ante triduum domum meam
venit Elzevirius Bibliopola, ac tuarum ad se
literarum argumentum enarrat. Quod ad
priorem earum partem, nunquam ego illas
Hamburgo ad te literas accepi. Omnino di-
ligentius in rem inquirendum. Circa idem
tempus Brema ad me fasciculum misit Clariss.
Crocus. Non recepi; sed delatus ad me
fascis librarius qui Cabeliavio inscriptus. Ego
jussi in navem referri. Inde Cabeliavio dela-
tus; sed utrum fasciculus ad me qui missus
erat, ei sit traditus, dicere non possum. Per
Bidellum inquisivi; respondit intricatum ei
quid, & se Bremam literas missurum ut reci-
piam. Hoc de Bremensi fasciculo, qui nihil
ad te pertinet. De Hamburgensi tuo metuo
ne quis itidem fraudem fraus sit. Omnino
cogitandum, quomodo resciscere valeamus
nequitiam hominis hæc agentis, qui unusne
sit, an habeat sociennum, nequeo dicere: nec
nimis suspicioni puto indulgendum; sæpius
me fefellit. Hodierno die denuo mihi sermo
fuit cum Clariss. Barlæo. Distinebatur, su-
perioribus diebus, Epithalamio in Schoute-
rum illum, qui Leidæ uxorem antea habuit
Overbeekiam. Nunc occupari se aiebat ver-
sibus destinatis Principi Bohemæ Elizabethæ,
cui dicandum Opus miscellum Catzii ac Bar-
læi. Emblemata esse arbitror Catziana, sed
Barlæi ac Westerburgii Ecclesiastæ Dordrech-
tani versibus Latinis facta illustriora. Et ta-
men video, certo aliquid præstaturum, si tri-
bus versibus imo verbis, id tibi gratum fore
significaris. Quid si scribas hoc pacto? verbo
te antea fecisse indicium animi tui literis apud
me, & cognosse summum virum non passu-
rum ut ulla in re claudicare affectus suus vi-
deatur. Proinde te voluisse in antecessum
gratias

gratias agere, pleniusque facturum, ubi acceperis optimi affectus indubitatum argumentum. Plenissime tibi deinceps valeat. Nam (ut liberius tecum loquar) vix in occupationibus istis & tam lucrosis, facturum puto, nisi literulis digneris. At si hoc grave non erit, facturum non dubito, imo spondeo. Plurimam salutem dicito clarissimis Collegis, ac memento, si serum non est, quamprimum significare de nomine sponsæ, & quo titulo tua signetur professio. Puto Historiarum & Eloquentiæ; sed tamen peccare hac in re Collega nolit: Eo malim certius constare.

CCCCXCVII.

Claudio Salmasio.

Nobilissime Vir,

Magnopere mihi dolet, de amissa suavissima filia, de quo nihil antea inaudieram. Et auxit dolorem, quod de alterius filia morbo eadem cognoscerem. Uxorem verò eo magis hæc res affecit, quod reficavit ei memoriam trium liberorum, quos eodem morbo amisit. Nec in his dolor stitit; mox, ut fieri solet, cogitatio subiit Cornelie suæ, quam tristis fatum sustulisset. Deum immortalem! Quid homulli sumus, nisi bulla, vel *σφαῖς ὄρεα*? Te constanter hæc ferre, plane persuasum habeo. Sed & conjugem supra sexum cordatam: quæ probè novit, quod Poeta vetus ait, nemini per æquor inoffensum labi currum ad candidum calcem. Imo quod Christiani scimus, ne quidem expediret nobis fluere omnia ex voto. Commentarius tuus de Cæsarie virorum, & mulierum Coma, tam multa omnes docet, ut nunquam ejus poenitere possit auctorem; etiam solidè adeo, quod proposuerat, evincit, ut responsurum arbitrer neminem. Collocutus sum cum pluribus, in nullum hæctenus incidi, quin utroque, quod dicitur, pollice laudaret. Atque ego de isthoc citius scripsissem, nisi sperassem, coram melius id facturum, filio è Galliis reduce. Nunc ille, ut ex literis tuis intelligo, etiamnum Lutetia est. Ego verò putabam, jam ante duas tres hebdomadas se dedisse in viam. In quo, si fallor, quid dicam, quam videre me quam difficulter possit à Galliis avelli. Ejus causâ, quem mihi commendas, omnia faciam, quæ potero, uti debeo. Ego & uxor salvere te jubemus, totique familiæ fausta omnia comprecamur.

Amstelodami,
cl^o Id^o xliv.
x. Kal. Sept.

Æternum tuus,

G. J. Vossius.

CCCCXCVIII.

III. Hugoni Grotio, Legato.

Lut. Paris.

Illustrissime Domine,

QUI hæc literas reddet, Lævinus Warnerus, patria Westphalus, juvenis est tum pius & probus, singulari in studiis industria, idemque in Orientalibus linguis apprime versatus: quod constans omnium de eo judicium est. Nec obscurum est ex iis, quæ in lucem emisit. In his proximè fuit, centuria Proverbiorum & Sententiarum Perficarum. Sexennio cum laude præfuit studiis Illustrissimi Dominorum Comitum de Chinitz, & Tettau. Omni eo tempore, gratus, acceptusque fuit, & maximo Salmasio, & Golio, Constantinoque L'Empereur; mihi etiam quoties Leidâ Amstelodamum excurreret. Nunc incredibili ardet amore adeundi Constantinopolin, partim ut penitus cognoscat arcana quæque literaturæ Orientalis: partim ut augeat prudentiam, videndo & urbes, & hominum mores. Nec difficile ei fuit, à me elicere aliquid literarum ad Excellentiam tuam; cum putaret, faciliorem sic fore sibi compellendi viam. Jam duæ sunt hebdomades, quod literas à filio Isaac accipi, unde intellegebam, post dies paucos velle se in viam dare. Id si fecit, jam ante aliquot dies, Lutetia discefferit. Eo impensius eum expectamus, quod superiori hebdomade Navis Zelandica, dum Gallias petit, tempestate periit; inque submersis, tres fuerunt adolescentes hujus urbis, probe mihi cogniti, qui studiorum causâ, in Gallias tendebant. Immane quantum Excellentiae Tuae debeo, pro beneficiis multis, in quibus nescio ecquid majoris facere me oporteat, quam erga filium Isaacum, affectum, ac benevolentiam singularem. Quantum eo nomine debeamus, nequeo effari; nec tamen de illo multa impræsentiarum scribam: malo aliarum mihi id literarum sit argumentum, postquam datum erit filium amplecti, & omnem ex eo itineris rationem coram cognoro. Multi hic sumus, qui ingenti flagremus desiderio pascendi oculos, & animum iis, quæ, ad vetus Instrumentum adnotaris. Gaudeo rem eò perductam, ut nunc de solis Indicibus laboretur. Sic enim ex præstantissimo, Excellentiae Tuae fratre, intellexi. Sed nequeo satis concoquere, quod de *Ἀνδολογία*, atque aliis huc transmissis spissè adeo negotium procedat. Interim aliquid est, quod jam cœperit Blauwius, novam editionem Operis

Operis de jure Felli. & Pacis, significavit mihi ipse, ante octiduum, & ultra. Uxor plurimam salutem Excellentie Tuae adscribi iussit, sed & Heroine Conjugi, ac Liberis nobilissimis, uterque fausta omnia comprecamur.

*Amstelodami, cIo Ioc xlv.
Nonis Septembribus.*

*Excellentie Tuae
cultor æternum.*

G. J. Vossius.

CCCCXCIX.

Hugoni Grotio.

Lut. Paris.

Illustrissime, & Excellentissime Domine,

DE reditu Isaaci mei magnopere gaudeo: hodie dies est quartus decimus, quod primum amplecti datum fuit. Ex sermonibus, quos interea commutavimus, plurimum cepi voluptatis; nec vel quantum profecerit, poenitet, vel impense; facile etiam video, quantum Excellentie vestrae debeam, pro honore, quem filio, ac familiae, meo habuisti. Nec beneficium tantum, cujus & ipse est sermonibus ejus fructum percipio, unquam excidet animo cujusquam nostri. Spero me paucos intra dies, à Jurisconsultissimo Excellentie vestrae fratre, accepturum quæ ad veteris Testamenti codicem annotasti. Nunc magnas ago gratias pro eo, quod tam præclaro munere augere volueris Bibliothecam nostram. Sed ubi licuerit, Ambrosia ejus pascere animum, diu noctuque, multis partibus amplius debebo; nec delinam profiteri. Nunc pauculi dies, quibus careo, totus mihi annus videntur. Scio aliter fore animatos, qui terris hisce succo turgent lologinis. Sed oblatrent quantum volenti; ubi multi numero, mentes & operam conjunxerint, non decuma eruditionis pars exprimitur. Deus, Excellentissime Domine, vitam & valetudinem diu conservet, terrarum, atque Ecclesiae bono. Illustri Dominae Conjugi, multam, Ego, Uxor, filii, salutem dicimus, pariterque, Nobilissimæ filiae.

*Amstelodami,
cIo Ioc xlv.
ix Kal. Novembribus.*

*Illustrissimæ Excellentie Tuae
obstrictissimus.*

D.

Georgio Calixto, S. T. P.

QUÆ miseras, eximie Calixte, de beatitudine æterna, Transubstantiatione, Monarchia Ecclesiae visibili, & dominicæ nativitatibus festo, ea accepi universa, & quamquam plurimum tam egregiis capiar donis, impensius tamen lætatus sum, quod divina bonitas tibi vitam, valetudinem, vires animi conservet ad tam bene de nostris posterisque temporibus promerendum. Ac idem mecum sentiunt his locis quotquot non aliam in Religione Christiana sectam sequuntur, quam sit ab utroque nostri. Illis vero qui in cuncta Romanæ Ecclesiae placita jurarunt, eo facilius ignoscere debemus, quod hoc concordiae studium omnibus satis probetur, qui à Romana Ecclesia recesserunt, sicuti ex Buschei, & ejus farinæ aliorum deliriis conspicere est. Sed his bipartito commentario solide adeo occursum video, ut nihil ultra requiratur. Nescio sitne & responsum Erbermanni vindiciis hœce anno Moguntiae editis. Ubi inter alia miror sectione tertia contendere te Papale tribunal tibi vindicare, tanquam judicium tuum haberi velis tanquam publicum omnium Ecclesiarum idque ἀναγκαστικόν. Ac qui sic argumentari solent solos se putant canones Logicos observare in fidei negotio, cæteros circumvolitare tanquam umbras. Vidi & eopse anno editam contra te annotationem de communione Græcorum sub una specie, ut inscriptio promittit. Ubi legi non reperi quidquam quo destruantur à te adserta de communione publica quæ sit in Ecclesiis Græcanicis & Orientalibus. Sed longa mihi esset series rerum complectenda, si cæteris id genus insisterem; nec valetudo hoc tempore sinit, quæ ab aliquo retro tempore infirmior esse coepit. Credo commonet, ut magis magisque cogitem de commigrando. Tu vero, excellentissime vir, perge cum divino auxilio strenue decurrere hoc curriculum ad quod es vocatus. Pro multis testium millibus conscientiam habes. Et applaudet omnis eorum chorus, quibus dolori est inconfutibilem Christi tunicam ita misere discindi. Equidem id ingenue dixero, quod apud alios prædicare non desino, nullius scriptis è Germania aut vicinis terris æque me capi, quam ejus ad quem nunc scribo. Conjunctissimo Collegæ tuo doctori Horneio summo viro salutem plurimam dicas rogo. Nam & ille nobis è reliquiis aurei generis.

*Amstelodami,
cIo Ioc xlv.
4 Kal. Novemb.
Styl. Greg.
K k k*

Tuus æternum,

G. J. Vossius.
DI.

DI.

Jacobus Golio.

Clarissime vir, atque amicissime,

Fuit his diebus mecum Samuel Costerus, vir ut ingenio ac prudentia, ita medica pariter ac melica arte pollens. Is narrabat se ad te scripsisse litteras quibus Senatoris Stetinenfis filium de meliori tibi nota commenderet. Equidem non ambigo, quin multum apud te ponderis illius habebant literæ, præsertim quando ex priori connubio filia ejus sanguine tibi jungitur. Nihilominus ita habuit persuasum, aliquid apud te posse amorem nostri: eoque à me poposcit, ut ad te argumenti ejusdem litteras darem. Id vero lubenter in ejus spem gratie facturum me recæpi. Solum excidit nomen juvenis. Neque schedulam, in qua annotaram, potui reperire. Quid refert? Quando tibi de eo possit constare ex literis Costerianis. Solum igitur rogatu est opus, ut quantum res tuæ finant, observes quid juvenis agat, ne fortasse malorum consortio corrumpatur. Consilio etiam in studiis, si opus videatur, juves. Id mihi quoque pergratum erit amicissimi Costeri gratia, cujus opera subinde utor in adversa meorum valetudine. De rebus meis nunc nihil addo, quia melius omnia cognosces ex filio Isaaco: quem mihi Deus ex Anglia, Galliis, & Italia prosperum ac salvum stitit, post triennii & sex mensium peregrinationem non inutilem minus quam jucundam. Conjugi à me & mea salutem dices plurimam.

Mense Novembri,
cIo Ioc xlv.

Tuus æternum,

G. J. Vossius.

DII.

Johanni Seldeno, J. C.

EN tibi, vir doctrina famaue maxime, *Σεβαστάριον* nostrum contextum ex memoria gestorum, natura rerum, & monumentis sacrarum Literarum. Quo in opere hoc unice studuimus ut nationes, & qui proxime ab iis abirent, ab impia sua pietate abduceremus, eademque deduceremus ad veri numinis notitiam, amorem ac venerationem; ut deinde eos fax verbi divini, quod nequit natura vel historia externa, feliciter ad cultum perduceret Christianum.

Atque hoc quale quale munus eò gratius fore confido, quòd magnam partem eodem pertineat præclarus tuus de Diis Syris labor; qui, ut tot alia, canescet sæclis innumerabilibus: quemadmodum de Marci Ciceronis Mario scripsit Scævola Jurisconsultus. Adjunxi etiam Maimonidæ opus de Idololatria cum filii mei Dionysii *τὸ μανχεῖον* tralatione ac notis. Ac neque operam istam fore ingratam, planè habeo persuasum, vel eo nomine, quòd cum studiis aliis, præcipuè duobus Philologiæ & Juris prudentiæ conjunxeris tot Orientis Linguas, ut hæc etiam parte sit difficile parem alterum reperire. Vale, vir summe, & tui admiratorem ac cultorem porrò ama.

Amstelodami,
cIo Ioc xlv.
Kal. Dec. St. Ver.

Præclaro tuo nomini æternum
addicissimus,

G. J. Vossius.

DIII.

Episcopo Novæ Casæ.

Leidam.

Reverendissime, & eximie vir,

Rescripsissem de iis, quæ tetigisti literis tuis, nisi valetudo obstitisset & alia quædam. Spero id à me fieri posse propediem. Quamquam quid ego de istis ad te, & quidem degentem ea in urbe? Hoc nonne fuerit ligna in sylvam? & tamen ulla in re possim gratificari, quæ omnia tua causa velim? Ut cunque vero distinerer mirifice, nolui tamen eum juvenem qui tuas mihi longe acceptissimas litteras reddidit sine meis reverti. Amo enim non modo propter commendationem tuam, sed etiam propter parentem nobilissimo genere prognatum, & à Rege Bohemico olim præfectum bonis Regiis in Moravia, quicum mihi ab annis compluribus aliquis amicitiae usus intercessit. Ingemisco sæpius, quoties cogito tam multos & genere & dignitate, aliquos etiam eruditione conspicuos, nunc variis adeo terris exules agere. Sed multis melius est infeliciores videri, quam ut cuncta hic fluant ex animi sententia. Salmasio te uti familiariter gaudeo. Nam quid eo viro mentis capacioris? Simulac ad eum scripsero, decrevi affectum tuum literis testari.

Jam cogor abrumpere. Vanderbergio nostro abitum necessario parante.

Amstelodami, cIo Ioc xlv.
Kal. Decemb. *τὸ γῆμα*.

Tuus æternum,

G. J. Vossius.

DIV.

G. Ratallero Dubletio.

Nobilissime Amplissimeque Dubleti,

Hesterno die, qui Veneris erat, puta A. D. v. Kal. Jan. planè domi meæ, in Christo obdormivit filius Franciscus, postquam apud nos tribus fuisset mensibus. Eo in lectulo cubantem, ac jam tum prope desperata valetudinis adportari, primis tenebris jusseramus; quo non corpus modo bene curaretur, sed monendo, hortando, melius instillarentur à nobis, quæ versare animo oportet, brevi deserturos has terras. Nec consilii vel operæ poenitet. Adeo negligebatur domi suæ, imo crudeliter habebatur, etsi summitteremus quotidie quibus opus esse ægro putaremus. Non convitiis parcebatur à Xantippe illa, nisi Aleto potius dicenda; quæ & advocabat sorores, non tanquam *συνεργιστὶς*, sed ab orco furias binas. Itaque & verberibus sævitum in decumbentem. Quod ne sæpius contingeret, addidimus ei custodem, qui diu noctuque cum illo ageret. Interim hic ne mutire quidem verbum audebat. Sed hæc fuere. Filio nunc melius est, postquam ereptus est his malis. Ac cogito mecum, fortasse Deo visum fuisse stultitiam ejus in terris punire, quo hic disceret cogitare de cœlestibus, dum locus est poenitiæ: ac ut facilius hanc mentem conciperet, voluisse per eam sic adfligere cujus insano amore, tanti mœroris causa fuisset parentibus adeo bene meritis. Mordet me nunc cura de filiola *τῇ μαργαρίτῃ*, ne male in tali domo educetur. Sed de isto coram aliquando. Sepelietur noster die Mercurii proximo. Tandiu differre exequias cogimur, quia Dominicum diem excipiunt duo alii feriati ob Dominicum Natalem. Totis enim diebus hic conciones habentur in Templis. Si adhuc viverem Leidæ, scio quid postulaturus à te sim, ac pariter senatore Ruteri, viro quidem carissimo, propterea quod uxorem, & liberos sanguine contingat, magis autem, quod annis prope modum quinquaginta amicitia intercesserit sine querela. Sed longum locorum intervallum, & sæviens frigus, non sinunt, quod vellem poscere, ab alterutro vestri. In te verò tertia accedit causa, quod cum uxorem non habeas, tuto abesse domo non possis, nec soleas. Interea non displiceat, si Amplissimum Ruterum omnis rei facias certorem. Spero grave non erit, si per famulum ei legendi has literas feceris potestatem.

Ita enim hoc tempore obruor variis, ut alteras etiam Literas scribendi otii suppetat nihil.

Scribebam *Amstel.*
viii. Kal. Jan.
c15 Idc xlv.

Tuus toto animo,
Ger. Jo. Vossius.

DV.

Nobiliss. Baroni Herbert.

Londinum.

Aliquot nunc effluxere menses, Nobilissime & Generosissime Baro, quod librum tuum acceperim de Religione Gentilium, errorumque apud eos causis; idque unà cum literis serenissimi Electoris & tuis. Et pro libro, & pro literis non possum non gratias agere quam maximas. Delectatus sum plurimum & Argumento, & Scriptionis genere. Vix itaque dixerim, quam avidè, quantoque cum fructu illum devorarim. Non jam animus est, ut scribam tibi, quid de hoc opere sentiam. Scio quam difficulter audire laudes tuas possis. Audiant has illi, quibuscum sæpe de hoc Scripto colloquor, cum tempus & occasio patitur, quæ nunquam non sese offert. Dum itaque sæpius lego, & relego, illos tuos Commentarios, animadverti verum esse istud, nullam in bonis rebus esse satietatem. Inde factum est ut serius tibi respondeam, gratiasque agam maximas, quod participem me feceris lucubrationum tuarum. Nec quod sit, ubi diversum à me videatur tibi, id pretium apud me imminuit. Quàm augeat verius. Præterquam enim, quod nolim opiniones meas haberi, velut *κρυπταὶ δόξαι*: pulcherrima mihi præbetur occasio, pensiculandi ea quæ scripsi; ac vel corrigendi, vel firmandi magis. Ut mittam quod multa adhuc indicta reservavi postremo Volumini, quo agendum mihi primum de Plantis, & Fossilibus; hinc de Affectionibus in Deorum numerum relatis; postea de cultu Naturæ universalis; ac denique de cultu Symbolico mixto. Ac diu illa universa in lucem prodissent, nisi novis curis semper avocarer. Superest, ut sicuti meo nomine gratias ago pro tam præclara opera: illas agere etiam possit Orbis universus. Id maxime desidero, tantòque id citius futurum, quantò citius lucem aspiciet. Quod si in eo excudendo, utilis esse opera mea possit, vel hic, vel alibi, nisi in Anglia excudi satius existimabis, libentissime

simè illam offero. Vale, Illustrissime & Generosissime Baro.

Amstelodami,
cl^o Id^o xlv.
iii. Kal. Jan.

Tuus aeternum,
G. J. Vossius.

DVI.

Illustriss. & Sereniss. Electori Palatino.
Londinum.

Serenissime Princeps,

Quamvis opus non fuisset, ut Serenitas vestra commendaret librum Nobilissimi ac Generosi Baronis H. de Cherbury, cum bonæ merces seipsas soleant commendare; tantum tamen voluptatis percepi ex literis Serenitatis Vestræ, ut majorem nunquam. Itaque non possum non gratias agere immortales Serenitati Vestræ; tum quod me literis suis honoravit, tum quod me dignum censuerit, cui aliquid commendaret. Liber memorati Domini Baronis, & doctissimus est, & ea qua potui attentione illum pervolvi. Sed ad sustinendum iudicium Vestræ Serenitatis, de opere illo corrigendo, modo ab ullo corrigi possit; necesse esset, ut meipsum superarem. In eo etiam video incredibilem Serenitatis vestræ humanitatem, quod tantum mihi attribuat, meque hominem minutum usque adeo obliget. Faciam ego semper quod debeo, & quod possum; plura etiam facturus si liceret. Sed neque Serenitas vestra plura à me expetit, neque plura ego possum.

Deus, Serenissime Princeps, Serenitatem Vestram tueatur & provechat ad ea quæ desiderat.

Serenitati Vestræ

Amstelodami,
cl^o Id^o xlv.
iii. Kal. Jan.

Devotissimus,
G. J. Vossius.

DVII.

Cl. V. Hugoni Grotio.

Illustrissime & Excellentissime Domine,

Accepi jam ante mensem quæ ad Veteris Testamenti Libros, Excellentia Vestra annotavit; Sacrarum Observationum, non Librum, sed Thesaurum. Adeo ubique

multa se offerunt, partim paucis observata, partim hætenus inedita. Juvit etiam cognoscere, quid in tanto scribentium dissensu, iudicio illo accurato maximè comprobassent. Magnopere præterea delectavit, quod ostendis, multa adeo in Veteri Interprete, quæ carpi à Novis solent, commodam capere Expositionem, planèque consentaneam contextui Hebræo, etiam ut nunc legunt Masorethæ. Nempe scribere voluisti, non tantum concinna atque erudita brevitate; sed etiam non industria, quam plurimi, sed studio partium minori; quando alterum hoc corrumpere hoc sæpius Religionis negotium solet. Quamobrem immensum quid æternumque Excellentia Vestra debebunt, qui seriò amant legere & intelligere Scripturas. Ac privato etiam nomine, non solum pro munere magnifico, sed quod majus puto, pro opera tam utili teneor atque obstringor, Eò impensius Deum rogo, ut Illustrissimæ Excellentia Vestræ, longam ætatem, ac optimam valetudinem largiatur; quo & illud, quod in Novi Instrumenti Libris enarrandis superest, perficias; atque adeo veteres refumas labores; non quasi desiderem, sed quia confidam Spiritum Domini plura deinceps consimilia bono publico edoctrum. Scribo hoc eò fidentius, quia planè cenfeo, Excellentiam Tuam, hac parte, non abire, à communi quondam Præceptore, socero meo Junio. Is aiebat, si vel annos centenos superesset, neutiquam se ingenio ullo vel industriâ, exhaustire posse, quæ profundo insunt Scripturarum puteo; sæpe mihi paucis ante obitum mensibus retulit, si absolvere daretur, quæ ad Bellarminum annotasset, nolle cogitationes alio adjicere, quam ad veteres suas Commentationes limandas. Sæpius istius mihi in mentem venit; nec tamen peccare desino, in procudendis novis, ac sæpe minutis, quale illud quod pauculos intra menses conspicias: Est id de Sermonis Vitiis, & Glossæmatis Latinobarbaris: opus fortasse non inutile juventuti, ad Sermonis Latini castimoniam: Aliis item ad intelligendos seculorum posteriorum Scriptores, quantivis illos pretii, sæpe interim semibarbaros. Hæcne ætati meæ conveniunt, qua eum inchoavi annum qui intra hunc ipsum, cl^o Id^o xlv. ætatis erit septuagesimus? Fons caputque hujus mali est, quod si qualia præferrem, & fortasse parata habeo, publici juris facerem, calumnias malorum non injuria extimescerem; quando satis sum edoctus quantum velint & valeant. Accedit quod tam multa in tam variis studiorum generibus sim aggressus, ut quoties cogito de singulis, vix videam, quid primò

primò, quid deinde, in manus sumere imprimis conveniat. Interim existimo; è primis fore, Librum singularem de natura, & constitutione Poeticæ; duos autem de temporibus Poetarum, Græcorum & Latinorum, tum eorum qui deperiire, quam qui Libitinam effugere potuerunt; Tres verò Libros, de artis totius Poeticæ præceptis. Credo comitem addam Harmoniam Evangelicam, de Passione & Resurrectione Domini, opus jam ante annos viginti quinque laboratum. Sed postquam avidè devoravi, quæ ad Evangelistas observavit Excellentia Tua, non pauca conspexi tum quibus firmare mea possem; tum quoque propter quæ pedibus mallet in Excellentia Tuæ ire sententiam, eoque propria vineta cedere lubens. Nec siverint id mores mei, ut hoc dissimulem, ubi lucem adspiciet.

Amstelodami, Pridie Kalen. Jan. Stylo Juliano, clò lxxv. quem fortunare opto, Excellentia Vestræ, Heroinæ Conjugi, & Nobilissimis Liberis. Quod mecum vovet Conjux & Liberi, & ante omnes, obstrictissimus Excellentia Vestræ, Isaacus meus.

DVIII.

Joanni Seldeno J. C.
Londinum.

Clarissime, virorumque Eximie Seldene, Jucundius mihi fuit, quam facile dixero, ex affine Junio, & ornatissimo Hoofdio, cognoscere de singulari erga me meosque affectu tuo, ac opera quoque eo in negotio, quod mea interesset plurimum. At longe illud jucundissimum, partim ex conjunctissimo Collega Pello, partim ex optimo Hoofdio resciscere, de felici totius negotii successu. Quare nimidum quantum obstrictus sum præclaris Regni Britannici Proceribus, & eximio nomini tuo, & præstantissimo D. Sadler, atque aliis qui luculento adeo argumento, amorem nostri, ac in me studiorum comprobarunt. Multum etiam hoc nomine debere profitentur, & Matthæus meus, Illustrum Hollandiæ & Zelandiæ Ordinum Historiographus, & filius alter (ut de tertio Jurisconsulto taceam) Isaacus meus, qui non semel perhumaniter adeo à te exceptus Londini; & ante duos, tres menses, Gallia, Italiaque, triennii quasi spatio, lustratis magnos præclarosque Scriptores hactenus ineditos, pene dixerim Thesaurum apportavit;

alios post alios juris publici facturus, bono literarum, nec sine testatione, quorum beneficio tantum potuerim in studiis & meis & liberorum. Ac eadem multo justius mens mea, quando fructus quidem hujus beneficii, magnam partem ad liberos redundat. Attamen me imprimis spectat, qui magno cum rei familiaris damno, cuncta publicis metior commodis. Itaque (si familiarius mihi paullo loqui tecum permissum) poteram ego, si quantum pecuniarum Bibliothecæ impendi apud Illustres Hollandiæ & Westfrisiæ Ordines collocassem, tantum inde percipere, & amplius etiam, quam ad me redit ex Britannia magnæ, magno illo, nec satis æstimando beneficio. Nempe hoc facit, ut minori molestia sumptus in studiis sufferam, animoque magis defæcato limare pergam tam multa quæ habeo affecta. Quippe longè eorum excedunt numerum, quæ hactenus emisi. Ac intra hunc annum, ut spero, complura eorum conspicias, in non uno studiorum genere. Jam enim sub prælo sunt nonnulla. Nimirum nunquam cesso, quia semper cogito, quantillum absum à septuagenario. Semper igitur illud in mentem venit, prope diem mihi rationem esse reddendam temporis, quod divina hactenus bonitas concessit. Tibi vero, Magne Seldene, ingentes ago gratias pro præstita opera tam pulchra, tum etiam hoc tempore opportuno; & (ut de liberis nihil repetam) facit item mecum optima Conjux, summi viri Francisci Junii proles. Et cur non illud addere liceat; Etiam qui antea celebrarent toto orbe Celebratissimam Doctrinam tuam, non minus efferunt in cælum singularem Beneficentiam ac Humanitatem, atque in me (saltem sic judicant amantes mei, quales longè plurimi) non solum collata, vel præstita hæc putare, sed omni Eruditorum Ordini his terris. Tantum mihi meisque adlaborandum magis, ut ne præsentī seculo, vel postero ingrati unquam fuisse videamur. Neque is solum animus futurus est noster erga te; sed cunctos qui tam bene de familia mea mereri voluerunt. Quæso hanc meam, meorumque mentem, ubi otium erit, significare. Ac ipse etiam, prima occasione, uni alteri significare decrevi.

Amstelodami, Post. Kal. Jan. An. clò lxxv. quem tibi tuisque, & toti Regno Britannia Magnæ fortunare ex animo cupio optoque.

Æternum tibi tuo merito obstrictissimus,

G. J. Vossius.
DIX.

DIX.

Nob. & Charissime Adfinis,

Reliquit terras filius Franciscus, atque, ut spero, iis miscetur, qui in illo die misericordiam magis quam iudicium pro meritis expectant. Satis placidè expiravit, ac tribus mensibus, quibus domi nostra fuit, crebro vidimus, quam multum poeniteret, ac tum ipse veniam Deum rogavit, tum petiit, ut nos pro se ignoscentiam, numen assiduo postularem. Sepulturæ destinatus est dies Mercurii proximus. Suffecerit igitur, si te Martis die in viam des, ut avunculus sororis filium natu maximum, tibi cognominem & magno avo, sed virtutibus immane quantum inferiorem, extremo hoc honore cohonestes. De Cognato Brunæo nihil addo, quia hæc scripturus, intellexi ex filio Matthæo esse in urbe hac Amstelodamensi: scripsi etiam ad Amplissimum Senatorem Dubletium, sed scio stulte, & inique ab eo postulatam iri, ut hoc anni tempore, se itineri accingat, qui domi non habeat Conjugem, tot suavium Liberorum interea curam gesturam. Neque poscere ausim à Senatore Ruterio, qui & ipse vix quadriennio abest ab decimo Climacterico. Nunc plura ut addam, non sinunt occupationes, sed si valetudo hoc ferat, ut excurras, erunt alia multa, de quibus differendi erit otium. Affini Brunæ, & filiæ plurimam salutem dicito, etiam (modo vobiscum sit). Illustrissimo Comiti Oxfordio, pro cuius assurgente Gloria, licet iniquissimis temporibus, non desinam vovere, quæ virtus ejus meretur.

Amstelodami,
cl. Id. xlv.

Tuus quantum possim,

G. J. Vossius.

DX.

Nobilis Conjunctæque Affinis,

TRistem tibi nuncium apporto. Ereptus nobis est, heri vespere, filius Matthæus, postquam quadriduo circiter lectulo fuisset adfixus, & postquam biduo ante imminentis morbi nobis indicia aperuisset. Hodie est xxi. Martii; funus deducetur xxiv. hoc est proximo die Sabbathi. Itaque ego, Uxor, Nurus, & filius Isaacus, plurimum rogamus, ut quem honorem exequiis Francisci mei proximè habuisti, eo nunc cohonestare funus Matthæi nostri, ne grave ducas: neque id te solum rogo, sed etiam Cognatum

Brunæum, modo valetudo utriusque, ac res sic ferant. Perspectissima mihi est summa humanitas tua, ut hoc pluribus postulare nequitiam opus habeam. Feci etiam de isto certiorum Amplissimum Dubletium; non tamen poscendum putavi, ut denuò se huc conferret. Ne quidem id petii à charissimo Cognato Ruterio, abundè semel hoc agendo adfectum suum comprobavit. Tamen priusquam te in viam des, significabis ei de hoc dolore nostro. Scriberem ipse, sed dolor non finit, & præterea occupationes funebres. Has & similes derivare antea in Matthæum soleo. Nunc etiam hic senectæ scipio ereptus mihi. Ita ut vides longa ætas multa secum advehit mala. Sorori Brunæ salutem nostri omnium nomine dicito.

DXI.

Joanni Sadlero S. P.

NON facilè dixerim, præstantissime Sadlere, quantum voluptatis ceperim ex tuis ad me literis. Neque eo id nomine duntaxat, quod me rei longè desideratissimæ facerent certiorum: sed etiam quod ab eo proficiscerentur, qui luculenta adeo operâ, suum erga me familiamque meam amorem, ac fidem comprobasset. Quanquam verò jam alteram Hebdomodam lectulo sim affixus, nempe ob senilem morbum, pedibus non valentibus officium facere, imo nec manu sinistrâ; quia tamen paulatim remitteret morbus, à quo biennio fueram immunis, dextra etiam commodè se haberet: committere non potui, quin literulis hisce, iterum, iterumque gratias agerem, & à me ac meis, pro viribus omnia grati animi officia pollicerer. Decretum erat ad minutam mentis benevolæ testationem, Exemplum eorum mittere quæ hæcenus edidissim in lucem. Sed multorum nullum apud Typographos Exemplar amplius comparet, omnibus jam diu distractis. Sed in eo aliqui sunt ut reculantur. Quod ubi effectum, non differam quæ mei sunt officii. Nunc præmitto quos potui nancisci. Sunt autem isti Libri vii. de Arte Grammatica, quibus censuram exerceo in Veteres Recentes Grammaticos.

Libri vi. Oratoriarum Institutionum.

Libri iv. De Gentilium Theologia, & Physiologia Christiana, duobus Volum.

Liber de Genealogia Christi, deque Annis ejusdem, Nati, Baptizati, Mortui. Item dissertationes tres de tribus Fidei Symbolis, uno Volum.

Quæso

Quæso boni hæc consule, nec tam quid mittam, quam quo mittam animo cogita. Qui sanè erga te talis, qualis pro tuis meritis esse debet, & futurus semper. Mitto ejusdem generis quinque volumina ad amplissimum & præclarum Oliverium Sanct. Joannium. Quos gratiores fore confido, si à te acceperit, eademque operâ à me salutaris, & omnia grati animi officia promittas. Hæc ipse scripsissem ei; sed is est corporis languor, ut iterum in lectum cogar recipere. Deus qui coepit reddere valetudinem meliorem, brevi ut spero pristinam restituet.

Amstelodami, clò Ibc xlv.
iii. Non. Maias, Stylò
Gregoriano.

Eternum tuus,
G. J. Vossius.

DXII.

Cl. Salmasio.

Nobilissime, maximeque Salmasi,

Jucundum fuit nudius tertius, ac quartus, bona te valetudine conspiceret; ac multum gaudii accesserit, ubi ex te cognoro, lectissimam Conjugem, animæ dimidium tuæ, salvam, ac sospitem pedem in Galliis posuisse. Mitto quæ scripsi de Vitiis sermonis, & glossæmatis Latino-barbaris. Id munusculum boni consules. Addidi Minurium Baldwini, cujus præfationem, à Typographo desiderari intelligo.

Amstelodami,
Non. Septemb.
clò Ibc xlv.

Tuus eternum,
G. J. Vossius.

DXIII.

Cl. Salmasio.

Eximie vir & amice,

SI multis exprimere velim quàm mihi jucundum fuerit, de valetudine tua cognoscere, & quid in studiis bono publico moliaris; faciam quiddam, non satis dignum veteri firmataque amicitia nostrâ, quæ non finit, ut in hujusmodi negotio dubitet alter, de alterius constantissimo affectu. Istoc igitur mittam, ac potius de rebus meis te faciam certiore. Ac primum quomodo mihi cum Arthritide fuerit conflictandum, non illa quidem, quæ me prorsus arceret à Musarum sacris, sed ejusmodi tamen, ut domi conti-

neret, quandoquidem turpe putarem, si instar Tardipedis Dei, claudicarem foris. Ut autem videas haud nimium in me valuisse Divam malignam, quam nos Podagram vocamus, mitto ad te opus literarium de Vitiis sermonis, & glossæmatis Latino-barbaris, cujus partem non exiguam, morbi tempore, partim scripsimus, partim ex veteribus schedis digessimus. Exiguo id loco ducent qui literas aspernantur: non tu, vel alius, qui utilitatem cum difficultate conjunctam æstimabitis suo pretio. Equidem hic quoque cum Terentiano Mauro fas sit dicere:

*Fronte exile negotium,
Et dignum pueris putes:
Aggressis labor arduus,
Nec tractabile pondus est.*

Quod magis judicabis, si alterum quoque volumen consequetur; sed hoc antequam lucem videat, edere animus est grande opus, de omnium disciplinarum naturâ & constitutione, earumque scriptoribus, tum antiquis, tum (modò magnoperè mereantur) etiam novis. De re poetica etiam, & Poetis Latinis & Græcis, quinque libros habeo paratos. Ad hæc, tres Harmoniæ Evangelicæ, de Christi Passione, Morte, Sepulturâ, Resurrectione, & Ascensione in Coelum. Item opuscula varia, quæ videbis, ubi pedem posueris in ædibus nostris. Hæc adfero, ut faciliuste, ubi occasio dabitur, in viam des. Et si de me aliud promittere nihil habeo, nisi facilem mensam, lectulum mollem, frontem porrectam, & quod non in infima parte putandum, colloquia, ac sermones quales amamus uterque, quoties bonus nos Deus conjunxit. Atque utinam, aliquod tum possis Typographo, ingenii, doctrinæque monumentum committere; sive de dicatione perstet animus, quem scribis, sive aliquid melius in mentem venerit: scio enim nihil à te proficisci, nisi ingenio perfectum, atque elaboratum industria, planèque istiusmodi, quod non placitum sit, seculo non modo nostro, sed etiam posteris. Quo in omine desino, teque pariter, ac lectissimam uxorem (illam mihi notam virginem, notam matrem, ac ut censo etiam aviam) plurimum salvere jubeo.

Amst. clò Ibc xlv:
post. Non. Sept.
Styl. Greg.

Tuus totus,
G. J. Vossius.

DXIV.

DXIV.

Jacobo Golio *Matheſeos & Arabicæ*
Lingvæ Profeſſori. *Leidam.*

Eximie & amiciffime Goli,

Vellem, cum proximè forem Leidæ, magis in animo habuiſſem, vetus illud verbum, quod Cæſari Auguſto, non in animo modo, ſed ore etiam atque epistoſis, frequens eſſe ſolet. Nam, ſi ut eo præcipitur, lenitius ſeſtinaiſſem, non excidiſſet tecum loqui de negotio quodam, cujus curam, in me ſuſceperam Hagæ, vel Ryſwici potius, ubi non me modò, ſed nobile etiam fratrum Dubletiorum par, & Boulenum Piterſhoexi dominum (ut matronas præteream) convivio opiparo, exceperat ampliſſimus Leewius, Brilanæ urbis Prætor. Nonne affectus tam prolixus, in animum debuerat revocare, quod ſemel, iterumque, eidem Leewio promiſeram? Sed gratiſſimus conſpectus tuus, optimæque uxoris, & præſtantium convivarum, quibus me ſocium addidiſti, ita me abriperunt, ut ex memori priorum immemor fierem. Præſertim dum ſemper obverſatur brevitatis temporis, intra quod, neceſſe haberem, adire, & ſalutare complures veterum Collegarum, & incomparabilem Salmaſium, & maximum Spanhemium, non minus elegantis ingenii virum; quàm doctriinâ, ſacundiâque excellentem. At ſaltem imponere huic oportuiſſet, quod apud te fuerat neglectum; ſed dum cogito, jamjam currum eſſe adſcendendum, ſi temporis Amſtelodami eſſe velim, nec hic magis, quàm apud te incurrit, quod ex te, Spanhemioque, quaſiturum me receperam. Nempe utrum alteruter veſtri non gravetur, convictorem habere, ampliſſimi ejus, quem dixi, Leewii filium. Adoleſcens eſt, ſuaviſſimæ indolis, ac probè educatus; ſed facile videt parens præſantiſſimus, qui ipſe in Academia Leidenſi vixit diu, quanti periculi ſit, eo ablegare filium uſque adeo adoleſcentem, ac penè puerum, niſi degat ſub oculis alicujus, quem ætas illa revereatur, ut debet. Rogo igitur, ut tribus verbis ſignifices, num tibi integrum ſit, optimum hunc adoleſcentulum recipere in convictum. De pretio, facile conveniet. Novit enim parens, nullam melius impendi pecunias, quàm ut liberi augeantur virtute ac doctriinâ. Quod ſi res tuæ non ſic ferant, ut fieri id poſſit, proximum eſt, ut & mei, & imprimis ampliſſimi Leewii cauſâ, exquiras, ex præſantiſſimo Spanhemio, num apud eum pluribus vacet locus, ac paratus ſit, adoleſcentem eum

admittere in numerum convictorum. Quod ſi ne ille quidem recipere poſſit, hoc tempore, diſpice quaſo, ubi habitaturum hoc tempore tutiſſimè putes. Parens nihil æque habet in votis, quàm ut vivat apud alterutrum eorum, quos dicebam. Quo celerius ſuper hoc reſponſum accepero, eo gratiores erunt literæ tuæ. Longas non expecſto, novi occupationes tuas. Solum ſcribe; Recipere mihi, vel D. Spanhemio integrum eſt. Aut, Cenſeo rectè, huic, vel illi commiſſum iri. Ita poſtulato meo ſatisfacies, & ego minus injurius fuero in tua, ac publica commoda. Salutem dices ſuaviſſimæ conjugi tuæ, & ſummo viro Spanhemio.

Amſt. cId Idc xlv.

Nonis Septemb.

DXV.

Ampliſſime & Conſultiſſime Mieropi,

Sæpè mihi in mentem venit, eximiæ bonitatis, ac humanitatis tuæ, jam ab eo tempore, quo Dordrechtum me tenebat, & annua tibi cura veniret Auſtralem, publico nomine, Hollandiam petendi. At eo jucundior eſſe ſolet illius temporis recordatio, quod poſtea quoque, te mihi, & meis expertus ſim ſemper uſque adeo benevolum, & amicum. Tanto fidentius ante has duas hebdomadas, cum ampliſſimo & integerrimo (ut cæteras laudes taceam) ſenatore Ratalero Dubletio acceſſi domum tuam; ac quia nunc, ob adverſam conjugis valetudinem, excurrere non datur, per literas compello, iterumque filii mei Matthæi, quantum poſſum, negotium commendo; idque non tui ſolum cauſâ, ſed etiam, ut per te, & illuſtriſſimum Legatum Pauwium, ad quem itidem ſcripli, commendatius eſſe apud præſantiſſimorum Collegarum alios poſſit. Vides mihi rem curæ eſſe: nec miraris ſcio, tot ipſe liberorum parens. Et cum ſemper nobis cordi ſint cariſſima pignora, in hoc vitæ incerto, tum præcipuè, ubi non vitæ multum ſuperest. Nam quid aliud mihi perſuadeam, poſtquam tam parum abſum à ſeptuageſimo, quem decimum vocant climactericum, ac ſapientiſſimus Solon vitæ terminum judicabat, indigante quidem Mimnermo, ſed non abhorrente divino Pſalte, niſi quod annos denos vivacioribus ſuperaddit. Rogo Deum, ut tu quoque vivacibus iſtis annumereris, & deinceps quoque belle, ut cum Poeta dicam, pedibus te portes tuis. Id facies bono familiæ,

liæ, & Reip. & amicorum. Ita voveo, (ac pariter mihi ipsi comprecor) æternum tibi.

c1o Ibc xlv.
v. Kal. Octob.

*Ob insignem illum af-
fectum, & amorem
obligatissimus,*

G. J. Vossius.

DXVI.

*Clarissimo & Amicissimo Golio.
Leidam.*

ALtero, ex quo à vobis discefferam, die, literas ad te dedi, pro argumento sanè longiusculas. Iis te certiore faciebam, quomodo Ampliff. Leuwius Brilanzæ urbis Præfectus, multum me rogarit, ut exquirem ex te & Clariff. Doct. Spanhemio, utrum filius suus habitare in ædibus alterutrius possit, quo in Academia Leidensi florentissima, ac domestico exemplo, uberiores capere possit ingenii ac doctrinæ cultum; super eo nihil hæcenus respondi accepi. Metui ne id proveniret ab occupationibus nimis, quibus distringeris. Quare rectè me facturum putavi, si memoriam refricarem. Quæso hoc age, ne expectationem Leuwii nostri diutius eludam. Lectissimæ conjugii salutem dicas.

*Amstelod. c1o Ibc xlv.
Kal. Octob.*

Tuus,

G. J. Vossius.

DXVII.

*Incomparabili Viro, Collegæ veteri,
Danieli Heinsio, Ger. Jo. Vossius,
S. P. D.*

Proximè edidi volumen de vitiis sermonis, & glossæmatis Latino-barbaris. Nimirum, mihi duo proposui, prius est ut pro viribus aliquid conferrem, ad barbariem profligandam; alterum ut lucis aliquid adferrem mixobarbaris illis, quæ legere est, apud superiorum seculorum scriptores. Eunte igitur ad vos Longermanno, juvene optimo, & arcto sanguine juncto communi amico nostro Gronovio, occasionem negligere nolui, mittendi exemplaris, non quia tanti putarem, ut inspiceres, sed quod existimarem, id officii mei esse, nec tibi nostra in-

grata esse posse, Collegæ veteris, & tui amantissimi, jam ab annis propè quinquagenis. Amorem etiam tuum vicissim perspexi vel proximè, cum una apud Golium coenarem. Quem ego virum maximi facio, ut debeo; si meo nomine salutaveris, rem facies longè gratissimam.

*Amstelod. c1o Ibc xlv.
iv. Idus Octob.*

DXVIII.

Clarissimo viro, D. Ant. Æmilio.

Clarissime, & amicissime Æmili,

QUI has tibi literas tradet, vir est probus, natione Græcus, nomine Nathaneal Conopius, Presbyter, & Patriarchæ Cyrilli antehac Protosyncellus: Græcè pereruditus, nec Latine ignarus, sexennio Oxonii vixit; postmodò, ob res in Anglia afflictissimas, terris nostris commendatus. Aliquot diebus apud nos fuit. Urbis nostræ Magistratus eum centum donavit Karoleis; Ecclesia Belgica sexagenis. Minus Gallica dedit; quippe ipsa in re satis tenui; ut non sic indigentibus succurrere valeat, quàm optaret. Nunc ad vos contendit, ut Urbis, Ecclesiæque liberalitate auctior redire ad suos possit. Reformatarum Ecclesiarum sententiæ favet, ac spes nostrorum hominum est, posse eum Ecclesias Græcas arctius conjungere cum nostris. Sed SS. Patres cœmendos (sine quibus parum in hoc sancto negotio præstiterit) non exiguis opus sit impensis. Quas cum sustinere per se non possit, opem flagitat alienam, nec iniquam. Cum verò posceret à me commendatitias, præ cæteris occurristi, quem hoc onere bearem: Nempe ut ejus causam Procerum uni alteri commendes, atque adeo etiam eorum qui Ecclesiæ præfunt. Ad præstantissimum Niuportium, Urbi vestræ à secretis, scripsit, ejus causa, conjunctissimus Collega meus Barlæus. Eo negotium hoc apud Proceres vestros facilius processurum confido. Spero in Ecclesiastico ordine, non gravatè ad hoc conferre operam suam velle, virum magnis virtutibus Arnoldum Ticmannum; quem rogo, ut à me salutes, cum ob hanc ipsam causam, tum ut videat me non esse immemorem sui. Dolet quod non melior mihi occasio sit videndi, & complectendi utrumque vestri: & eo magis dolet, quod ab annis circiter quadraginta, cum adhuc messis vestræ lateret in herba, abunde prospexerim, quantum boni,

ab tam præclaris animi dotibus expectare Ecclesia & Resp. Literaria posset. Sed vos mihi non minus videmini, Ultrajectinæ adfixi glebæ, quàm ego Amstelodamensi. Interea mihi facilius venia dari debet, ob grandiore aliquanto ætatem. Nam paucillas intra hebdomades, ingrediar Climactericum meum decimum, ultra quem, nullum sibi computandum Solon putabat. De me quid facturum sit, sum unicè securus, ut qui divinæ hoc Providentiæ committam; & ut Poeta Bilbilibus jubet; *summum nec minus diem, nec optes*. Vale, maxime vir, pariter & amice.

c10 Ioc xlv.
ix. Kal. Novembris.

Tuus omni officio,

G. J. Vossius.

DXIX.

V. Cl. Joanni Brunæo.

Middleburg.

Amplissime vir, Cognate carissime,

Luculentam mihi spem fecerat filius Matthæus, superiori te Majo, ac conjugem pariter affore nobis. Sed licet vix aliud æquè in votis esset, video tamen non sic res tuas tulisse. Multa erant, de quibus alloqui decreram: quorum alia ad fratris tui filium pertinerent, alia etiam ad communia studia nostrâ; quiddam etiam quod me quoque tangit, quia tangit filium. Jam hoc cum dico, satis intelligis, maximoperè me optare, ut Zelandiæ Illustrissimi Proceres desiderium nostrum expleant de eo, quod nunquam spissè adeo processurum putabamus: Nempe ut Historiographo suo annum assignent stipendium; exemplo Hollandiæ, quæ ubi prævissit, non se huic rei defore pollicebantur: nec ignoro quis moram injecerit justissimæ petitioni nostræ; sed postquam ille vita excessit, spero facilius hoc fore negotium; præsertim ubi semel sacra sua commovere voluerit Brunæus, vir, & amicus summus: quem utinam tam literis ad istoc possem accendere, quàm me posse confidam, si vel ad horas paucas colloqui daretur. Nullius equidem commodis obisto; sed non iniquum arbitror, ut ejus potius ratio habeatur, qui mentem non in varias divisit curas, sed tot jam annos in eo totus est, posteris ut prodat gesta inclytarum Gentium, Hollandiæ, Zelandiæ, Westfrisiæ. *Paulum sepulta distat inertie celata virtus*. Quid majores à suis nepotibus magis requirunt, quam ut

ne virtus sua ignoretur? Quid dignius se nepotes egerint, quam ut præclare de eo mereantur, qui desiderium illud majorum expleat? Vellem inclytis ac laudatissimis Proceribus vestris, ob oculos ponere possem, quam nulli labori, imo nec impensæ parcat filius, ut veritatem in profundo Democriti puteo latitantem producere in apricum possit: Nempe totum se huic uni curæ mancipavit. Quid in alio quoque simile? Scio te ista non diffiteri. Solum opto, ut quibus commisit Deus rei patriæ curam, hoc negotium, non infra cogitationes suas putent. Ac non confido defore nobilissimum Cnutium, qui affectum mihi suum in hac re coram declaravit. Multum illi, & cunctis, quibus hoc negotium cordi erit, debebimus, si gratias agere illis liceat, pro eo quod nunc expetimus. Ego, Conjux, filii te, & tuam, & tuos plurima salute impertimus.

Amstelod. c10 Ioc xlv.
xv. Kal. Decembris.

Tuus æternum,

G. J. Vossius.

DDX.

Nobilissime, & Eximie Salmasi,

Immortales ago gratias pro immortalis divinæ mentis opéra, De primatu Papæ: quod multum animum meum pascit, pascetque, ac Deum oro, ut reliqua pariter det tibi pertexere, simulque ut Patroni infallibilitatis ac omnipotentia Papalis videant, quam incertis ac putidis subnixæ sit tyrannis ejus, qui sic se extulit supra conservos suos. Inquisivi sedulo, quid animi foret Proceribus, de advocando Professore Medico; sed negabant hæcenus de eo sermones fuisse inter se; sed solum de Professore Botanico; quod suorum civium plurimum interesse putarent, ut peritiores haberent Pharmacopæos. Et scio sic esse; Etsi non ignorem, malle, qui non Botanicus modò gnarus sit, verum & profiteri artem Medicam velit. Optem me super hac re colloqui posse cum Exlegato Scapio, Lugdunensis Academiæ Curatore ac Gymnasii nostri; sed is nomine Urbis nostræ adhuc agit Hagæ Comitum, ac vix putatur affuturus ante Natalem Domini. Non desinam urgere hoc negotium, ubi fuerit reversus: Hæc parva malui raptim exarare, quam diutius relinquere animum suspensum præstantissimi Kyperi, cujus egregia Volumina duo, de scientiâ naturali abundè ostendunt, quid ab eo sit expectandum Lyceo nostro, si Proceres nostri ad eum huc advocandum adjiciant

rant animum, sed nisi cum pluribus fuero collocutus, nihil certi possum rescribere. Isaacus meus plurimam iussit salutem adscribi.

Amstelodami,
clō lōc xlv.
xii Kal. Decemb.

Æternum tuus, tuique
Admirator & Cultor,

G. J. Vossius.

DXXI.

Reverendo variæque Eruditionis Theologo Jacobo Lydio, Ger. Jo. Vossius
S. P. D.

Ternas à te literas accepi: unas cum dono Reverendissimi Armachani, quod per mihi gratum fuit, tum propter eruditatem ad Ignatii vulgarem Editionem notas, tum propter genuini Ignatii veterem translationem. Ipsum Græcum Codicem non vidit vir summus Usserius; sed ea foelicitas reservata fuit Isaaco meo, qui Florentiæ è bibliotheca Medicea descripsit, ac primus orbi Christiano dedit, opposita è regione versione antiqua ex editione Usseriana. Non possum, Amicissime Lydi, satis exprimere, quantopere me Reverendissimus Usserius, ac imprimis filium meum, dono suo bearit: quanquam & tu quoque, in aliquam huius beneficii veneris societatem: qui cum nobis ex Britannia apportasti, & simulac pedem in urbe patria posuisti, eum continuo misisti mihi; probe gnarus, in huiusmodi etiam negotio, locum habere, quod vulgo dici solet, bis eum dare, qui det citò. Sed ut eo nomine laudari tu mereris, ita ego metuo, ne potius castigandus tibi videar; qui nec de hoc dono rescripserim quippiam, nec ad alteras literas repofuerim quidquam. Poteram pro me adferre, tum adversam valetudinem meam, ac præcipue uxoris mire adflictam: tum mortes filiorum Francisci J.C. tum Matthæi Historiographi; sed enim aliud præterea est, quod me negligentior fecit, in postulato Reverendi & præstantissimi Roberti Bayllii. Scripseras in edendis nostris festinato opus esse: At Typographorum duorum, quibus hic utor, prælum in tantum distinebatur variis, & ingentibus voluminibus, ut uterque negaret, intra aliquot menses, quicquam mei posse excudi. Sed exinde nuspiam non velle omnia agere in mea spem gratiæ. Non peccassem, si quamprimum te huius responsi fecissem certior, sed nunquam in respon-

dendo sum tardior, quam quàm scribere non licet id quod ego & alter mallems. Ita factum, ut in totum scribendi officio supersederem; sed ante menses sex septem Blauwius exorsus est libros, quos exaravi, de omnium Artium, & Scientiarum natura, usu, ac nexu. Elzevirius autem excudere coepit librum unum de natura & constitutione Poeticæ, & tres de Arte Poetica: quibus jungentur duo, unus de Græcorum, alter de Latinorum Poetarum temporibus. Sed quoniam hæc grandibus aliorum voluminibus intermiscant, nostra vix philyrum unam singulis hebdomadibus procedunt. Interea pollicentur, post duos summum menses, se in nostris assiduos fore. Quod si tum quoque eadem maneat mens, Reverendo, Clarissimoque Bayllio, non committam, quantum in me fuerit, quin ejus expectationi satisfaciam. Sin id serum tunc erit, ut metuo; non deerunt alia atque alia, quæ publici juris faciam: In his quinque reliqui Libri de Paganica Theologia, qui non affecti modo, sed etiam confecti; uti & tres de Harmonia Evangelica, in Argumento Dominicæ Passionis, Resurrectionis, & Ascensionis in Cœlos. Adderem alia, sed non petiisti tam Catalogum propediem *ον δεσφ* edendorum, quam ut responderem de Editione eorum, quæ de Baptismo, & imprimis de Anabaptismo scripsi, & isti Argumento vicinis. Tamen fortasse, nec ista ignorare malueris. Id enim postulat amor domus nostræ hæreditarius, jam ab annis octoginta circiter coeptus inter Avum tuum præclaræ doctrinæ virum, ac Parentem meum; postea vero continuatum, inter me, & avi tui viduam, optimamque Matrem tuam; quæ te scio non ignorare, ac stimulum esse debent, ad amorem etiam præstandum filio meo, quasi *μονογενει*, qui nullum in se benevoli affectus officium sinet claudicare. Vellem te aliquando hic videremus. Etsi quid minuti negotii fuerit, hoc etiam impellat, quod visurus apud nos es ingentem turbam MSS. etiam hætenus ineditorum. Hoc philtro te alliciendum putavi. Neque enim ignoro, quam sis *φιλόβιβλος* & *φιλόμυθος*. Uxor & filius te plurimum salutant, salutem etiam nostro dicito nomine, optimæ sorori, ac egregiis fratribus: per otium quoque Illustri viro Wittio Exlegato, ac cæteris quos nominis nostri amantes imprimis scias.

Amstelodami,
clō lōc xlvi.

DXXII.

Joanni Brunæo, J. C. V. C. Gerardus
Jo. Vossius, S. P.

GAudeo, Amplissime vir, charissime cognate, quod tam te videam memorem mei, & meorum. Prout auctor fuisti, libellum mitto Illustribus D. D. Zelandiæ Ordinibus offerendum. In quo tantum abest, ut mihi videar peccare, ut potius existimem me non publici minus habere rationem, quam familiæ meæ. Nam si hac parte Proceres aliis nolint terris cedere, quæ res majorum à pluribus sæculis, posteris tradiderunt; nunc recte de publico mereor, si offeram cum, qui spartam eam non minus ornare velit quam possit: Imo non minus possit, quam illustres ipsi Proceres velint. Tot jam annos non dico, sed lustra, Historiæ Belgicæ, Fœderatæ maximè, cura ac cogitatio distinuit domum nostram, ut nemo in ea non potuerit aliquid videre supra vulgus. Nunc hic unus superest, qui ut de ejus ingenio, doctrinaque, nihil nunc dicam (puridius hoc forsitan videretur) at saltem non leve videri debet, quod tot annos non minima fuerit pars sermonum, quos de Antiquis Fœderatæ, imo universæ Belgicæ rebus, pœne assidue internos, in domo, ut arbitror, non prorsus illiterata, commutavimus. Accedit quod istiusmodi ad hoc negotium Bibliotheca sit instructus, ut nesciam ecquis alius præferri debeat. Nec de excusis id solum libris dixero (quanquam, & hoc non leve putandum) sed maximè MSS. quos nescio numquis plures de Historia Belgica ineditos habeat, vel etiam compluribus annis comparare sibi possit. Quid dicam de filii *is margeris* observationibus multis, quas in schedis asservamus. Non ego præter morem meum ista scriberem tam prolixè, nisi putarem, id nunc à me exigere, si non publici minus quam domestici boni amans sim. Tu modo curam hanc suscipe, ut Illustrissimis Proceribus Zelandiæ vestræ, pro affectu erga me & meos, & cum his etiam tibi agere gratias possim. De nobilissimo Cnutio omnia mihi spondeo, & Procerum aliis, quos in causa filii Matthæi me Hagæ meminisse convenire. Ita mihi sereno vultu affectum suum testari visi sunt. Nec culpa fuit nostra, siqua velut canina scæva obturbarit, qui studium hoc non aliter quam canis Nilum degustarat. Cui tamen in cæteris laudibus nihil detractum velim. Non hoc vel moribus, vel ætati conveniat meæ. Quid ego pluri-

bus te nunc distineam, Amplissime Cognate? Ea es prudentia, ut per te videas, quid nunc factu sit opus: ea autem benevolentia atque amore, ut omnia nostri causa velis. Quod si quid præterea à me fieri posse putes, tribus verbis perscribas: sed imprimis tempus illud expectabo, ingenti cum desiderio, quo te Conjugem, & quos Liberorum unà adducere visum erit, coram amplecti licebit. Plurimam omnibus vobis adscribi salutem uxor jussit; sed & Cognato Brunæo, si adhuc hospes fuerit patruui sui.

Amstelodami,
clō lbc xlvj.

DXXIII.

Winando Rutgerfio, S. Th. Doctori.

Clarissime atque Amicissime Domine Doctor,

VAlere te & tuos gaudeo. Valeo & ipse mediocriter, melius valiturus, nisi male valeret conjux. Existimet aliquis me ad tam diuturnum malum paulatim obdurescere. Et foret fortasse, nisi pariter, & animi, & corporis dolore discrucietur; ut ferreus sim futurus, nisi dolore ejus doleam. Interim quantum possim, dolorem tempero, tum sapientiæ præceptis, tum etiam studiorum amœnitate; quæ non finit ut quidquam remittam de laboribus antiquis: imo nugis animum remittere, etiam innoxis, prope mihi idem videtur, ac animum amittere. Admodum mihi est ægre, quod non potuerit vel mea, vel filii opera tibi esse utilis, in conquirendis libris de quibus scribis. Studiosè lustratæ sunt tabernæ librariæ, consultiq; quos oportuit; sed incassum sudavimus. Negant eos amplius apud Bibliopolas, vel Typographos reperiri. Desidero scire an habeas Petrum Tyræum Societatis Jesu Theologum, & Professore Herbipolensem; cujus duo extant libri; unus de apparitionibus omnis generis Spirituum Dei, Angelorum, Dæmonum, & animarum humanarum; cum appendicibus, de Spirituum imaginibus, ac cultu, ac Purgatorii veritate. Alter verò liber qui est quadripartitus, tractat de Dei in V. T. Apparitionibus & Locutionibus; tam externis, quam internis. Coloniz à Cholino est excusus Anno clō lbc folio in quaternam plicato: paginis constat quasi quingentis. Si eo destituaris, & videre desideres non patiar, ut quicquam hac parte requiras. Si quando excurre, cujus toties jam spem fecisti, sedulo uterque lustrabimus,

Iustrabimus, ecquid vel mea, vel filii Bibliotheca habeat, quod doctissimis laboribus tuis utile esse possit. Salutant te & Conjugem Uxor & Filius.

Amstelodami,
c1o Ioc xlv.

Tuus ut scis sine fuco more majorum,

G. J. Vossius.

DXXIV.

Claudio Salmasio, Ger. Jo. Vossius
S. P. D.

Vir Nobilissime,

TArde rescribo, nec aliter potui ob gravissimum amplissimi Schapii morbum. De eo prope fuit conclamatum: hæc tamen convaleuit, ut pedem posuerit in curia, cum maximè ejus præsentia opus foret, quia de novo creando Magistratu, agendum esset. Nec tamen ea firmitas corporis, ut novo Academiæ Magnifico Rectore designato, Leidam se conferre fuerit ausus. Facile in recidivam incidisset, cui infirmatis adeo viribus, non æque par fuisset ac ante. Nudius-quartus demum compellendi potestas facta. Deque præstantissimo Kypero, gratus ei sermo noster fuit. Jam antea de hoc locutus sum, cum Consularium duobus, vel tribus; sed negabant sibi constare de eo, quod putabam. Refricavi eis memoriam eorum, quæ semel iterumque acta essent, de advocando Medico & Botanico. Nec abnuere illi utiliter de eo posse cogitari; sed putabant quiddam esse, quod hoc tempore prævertere oporteat. Et hoc quale foret retulerunt. Quamquam satis id per me intelligerem. Pertinet autem ad Jurisconsulti professionem. Ac similia dicere Amplissimus Schapius, sed prolixè quædam addebat, de affectu suo erga Ornatissimum Kyperum. Satis vidi, non per eum staturum, quo minus, vel Leidæ, vel apud nos ejus ratio habeatur. Putavi mei muneris esse, ut tam bene affecti amorem, magis etiam accenderem. Itaque multa retuli, de Eruditione, quam ex Commemorationibus illius perspexissem: Etiam in Chymia, quam ego scientiam, sed sic, ut Antiquis etiam suis constet honos, magni semper feci. Sed-enim Consul Schapius ea respondit, unde cognoscerem se non esse hujus ignarum. Ac benignè adeo dimisit, ut facile viderem, si per alios non steterit, plurimum in eo reponi fiducia posse. Equidem certi nihil habeo promittere, eo minus,

quia hoc habent ferè urbis nostræ Proceres ut diversa eorum sint studia, ac putent præterea nihil maturandum, an festinandum dicam? Propè quasi ex Lentulorum essent familia; quales etiam Aufriacos magis quam Héroas Gallos esse ferunt. De me interim ita habe, me nulli defore occasioni, quin eam arripiam, ut si possim, perficiam quod velles. Atque id quidem Clarissimi Kyperi causa, quem jure æstimo, tum in tuæ spem gratiæ, cujus ergo, nihil non velle debeo. De rebus meis poteram fortasse aliqua addere, quamquam minuta, ut omnia sunt mea; sed cultore tui nominis, ac penè dixerim numinis, Isaaco filio, Leidam eunte, malui ex ipso omnia à te cognosci.

Amstelodami, c1o Ioc xlv.
v. Id. Feb.

DXXV.

Amplissime ac Conjunctissime Adfinis,

Putavi ob arctissimam Conjunctionem nostram, hoc mihi agendum, ut ex me potius, quam aliunde cognosceres de obitu filii mei Matthæi, quem xx. Martii morbus (maximam partem veteris erat) abstulit mihi, intra quatrimum, quo lecto adfixus fuit. Biduo jam ante, tale quid mihi præsagebat animus, cum in mensa mea referret, ut, dum assiduus est in gestis Domine Jacobæ describendis, frigore sæpius horridiusculo corripereetur. Sic res sunt humanæ. Mihi est animus cum bono Deo, qui tot adversa pertuli, hoc quoque forti animo perferre. Et ut melius possim, amicorum me precibus commendo. Scio non defore, qui ambiant apud Illustres D. D. Ordines Historiographi Officium. Equidem non possum dicere me alterum huic muneri scire magis idoneum fratre ejus Isaaco; de quo plura dicerem nisi filius foret. Et posset ille una munus Geographi Ordinum implere, quod olim sustinuit Philippus Cluverius. Solum terret quod multum mihi laboris fuerit exhauriendum, priusquam id obtingeret Matthæo nostro, ut Historiographum facerent Proceres nostri. Sed fit etiam, quod cum molestia fit. Decretum per otium de hoc agere cum Ill. & Ampliff. Wittio Cognato, quem scio ita esse animatum, ut nuspiam passurus sit operam suam claudicare. Et fortasse è re fuerit, si rei istius non fuerit ignarus. Nam facile obtingeret, ut aliquis cogitationes, & molimina mea, quæ cum uno duntaxat Dubletio communicavi, ob-

turbare

turbare conetur. Hæc ergo nunc raptim adeo, ut vix sciam quid scribam. Sic undique interpellor; & tamen non dimittendus erat inanis nuncius, qui hac hora ad vos contendit. Salutem uxori ac liberis, nec minus Amplissimo Cognato Witio.

clo Idc xlv.
xxiv. Martii.

Tuus totus,

G. J. Vossius.

DXXVI.

Clarissimo & Præcellentis Doctrinæ viro, Dn. M. Stephano Joannis Stephano, Serenissimi Regis Daniæ Historiographo, inque Equistri ac Regia Academia Soræna, Professore Ordinario. Soram Danorum.

Ger. Jo. Vossius S. P. D.

TAndem læta affulsit dies, qua non dubitandum, æternùmne Cimbricæ gentis decus, Saxo Grammaticus vester, Stephanii mei popularis sui beneficio, sanus, bonæque corporis habitudine, pererudito etiam Commentario auctus, illustriorque, ac verbo, ut dicam, omnino ejusmodi, qualem hæcenus desideravimus, in lucem, manusque hominum elegantiorum venit. Expri- mere non possum, quam bene mihi de te ipso, de gente vestra, deque universa Republica literaria meritis videaris. Deus plurimos tibi annos largiatur, ut melius meliusque mereri posses. Quamquam tantum effectum tibi, ut si vel brevi (id ne benignum numen sinit) humanitus aliquid tristius subeundum foret, sic quoque æternum, ut in te Saxo, sic tu in Saxone tuo sis victurus; nullaque dies sit deletura beneficium utriusque vestri. Si ante annum habuisssem hos labores tuos, crebrius nomen tuum legeretur in opere nostro de Vitiis Sermonis: in quo videbis aliquando etiam ad partes advocari Suenonem tuum. Scio, quod mitto *à Visdægy* impar esse tuo. Sed ut quomodocumque æquarem, volui addere libellos duos de symbolis, unum alterum, de genere atque annis Christi. Nihil opus rogare, ut boni confulas. Novi enim quanti me meaque omnia soleas æstimare. Nec impedio, quo minus deinceps etiam huic indulgeas errori tuo. Illud vero impensissime rogo, ut pergas eruere, inque apertum proferre alios etiam rerum Danicarum Scriptores,

imo & quæ nostro sæculo, quæ feliciter, quæ fecus contingere, ingenii, doctrinæque tuæ penicillo posteris prodas. Nolim tamen in hoc rogando te longo uti sermone, quia non dubito quin quotidie illud à te postulent, atque expectent, viri & Illustrissimi generis, & maximæ in Dania vestra auctoritatis; quorum præcipue valere apud te voluntas debet. In studiis gravi hac ætate, præsto quantum possum: pluraque possem, si memet corona illa adhuc cingeret octonum Liberrorum, qua me beatum Leidæ novisti. Nunc ad meliores sedes, Deus transtulit universos, excepto Isaaco Vossio J. C. quem confido brevi multa publico daturum. Is filiorum erat natu minimus, uno dempto Gerardo, cujus Velleium, & alia quædam videris fortasse. Nolo tristibus illis diutius immorari. Plurima salute impertias egregios viros, & mihi caros Collegas tuos, D. Laurembergium, & D. Erastium. Addo & optimum, & cordatissimum, D. Meursium, cum filio, filiaque.

Amstelodami, xi. Jun. clo Idc xlv.

DXXVII.

Nob. Baroni Herbert.

Illustrissime D. Baro,

SEro rescribo ob mortes meorum; unius natu maximi filiorum Francisci, in Curia Hollandiæ & Zelandiæ Advocati; Alterius natu proximi, Matthæi, Illustrium earumdem Provinciarum Historiographi, & Amstelodamensis Reip. Bibliothecarii: cujus fortasse Annalium libros xv. videris. Itaque nunc Liberorum mihi nihil, præter Isaacum, qui paucos ante menses, Ignatium genuinum edendo, benè bonis de Ecclesiæ meritis videtur. Quippe antea nonnisi Latine exstabat, idque Reverendissimi Armachani Antistitis beneficio. De præclaro opere tuo, sæpius cum Typographo sum collocutus; tardius autem responsum accepi: in causa erat, quod nunc in edendis libris sint difficiliores, propter motus Britannicos, & Germanicos. Istis enim terris immane quantum hinc librorum distrahi solet. Nunc aliter est ob causam quam referebam. Quæsi tamen quantum exigerent, tuis si sumptibus prodiret. Blauwius qui mea excudere, nec semper tamen solet, paratum se post sex menses prælo committere, idque impensis suis, dummodo ipse centena exemplaria emas, & pro quoque sesquiflorenum Hollandicum, sive

xxx.

xxx. stuferos nostrates, persolvas. Sed editurus aiebat forma ac Typis quibus opus meum, de Theologia Paganica, & Philosophia Christiana, lucem videt. Ambigebat quid diceret, si Typis tam grandibus excudetur, ac tua illa præclara de Veritate, ac errorum causis. Usque adeo nunc prælum ejus distinetur multis, ac ante id, quod dixi, tempus, ordiri Editionem non possit. Interea temporis, & à te responsum expectabo, & ipse semel, iterum, ac tertio, fortasse perscribam, quid censeam de iis, ubi aliud tibi videtur. Nunc solum significo, ita me animatum esse, ut non arbitrer aliquem mortalium minus moveri ob dissensum alienum. Perplacet, quod mihi, & aliis sæpius referebat focer, summus vir Franciscus Junius: Sic ego, sic ille; eruditi viri dispiciant, quid melius ego, quid rectius perspexerit alius. Imprimis hoc propter Drusium dicebat, subinde aliquid affectui indulgentem, virum interim Hebræis literis pereruditum, & aliquid observantem, alteri invisum. Nempe aliquid singuli videmus; nemo omnia: sed quidquid singuli valemus, in publicum proferamus, ut penes posteros judicium sit, quibus eo facilior erit delectus, quò candidius quisque exposuerimus, quid nobis videatur. Sæpe veritas è Democriti puteo difficulter educitur; ut multorum manibus, atque opera opus sit. Interea quia sic poscis, non defugiam laborem perscribendi minutatim de nonnullis, ubi dissentire videamur. Et quia longioris ea res operæ sit, si non unis, pluribus id literis faciam. Noli enim uspiam, ab tam illustri viro, ejus ingenii ac doctrinæ, quicquam à me desiderari. Sic planius erit, ubi mihi persister animus, ubi aliquid à te commodius dictum putem, ubi statuat facilè per se conciliari, quæ pugnare videantur. Et tibi quoque hoc opere inedito, & mihi parte commentationum alterâ, corrigendi aliquid occasio dabitur. Si hic excudi velis, & id neutiquam possit fieri, ante menses sex: falvis ac sospitibus nobis, abundè temporis erit, de variis differendi per literas, quia coram non licet. Utinam vero brevi aliquid cognoscerem de Alcyoniis Britannicis. Neque id tam dico mei causâ, quam amore Regni antehac florentissimi. Nec tamen peccem, ut arbitror, si minus diffitear, agi etiam ex minuto rem meam. Nam jam menses sunt quindecim, quo nihil ad me redit ex præbenda, ut vocant, Cantuariensi. Nihil gratius facere possis, quam si sic res ferant tuæ, ut commendatione tuâ, non ita spissè procedant res nostræ. Præsertim, cum rebus, licet turbatis, grande non sit ex-

solvere quod debeat, singulis enim annis, non ultra centum libras sterlingicas percipio. Nolui tamen molestiam ullam facessere, ne videar in nugis nostris, tanti Herois operâ uspiam abuti: Et tamen hominibus nostris non videor indignus, cujus ratio aliqua habeatur, qui nihil nisi assiduè pro Britannicæ bono preces fundam, & supra, quam ætas sinat, desudem, pro Rep. literaria, inque studiis omnia non tam metiar profecto commodo meo, quam Ecclesiæ Christi. Absque eo foret, multis partibus unctiores forent res nostræ. Deus Opt. Max. diutissime Te saluum ac sospitem, Illustrissime Domine, conservet.

Amstelodami,
clb Idc xlvj.
Post. Id. Jun.

Illustrissime dignitatis tue
Cultor æternum,

G. J. Vossius.

DXXVIII.

Reverende idemque Amicissime Croci,

Quamquam in scribendo aliquanto sim negligentior; non tamen si quis è nobis hinc ad vos eat, eum sine meis ad te literis dimittere soleo. Quare & consuetudinem hanc nunc retineo, redeunte ad vos Neumanno, Juvene, & probo, & pererudito, & utroque nomine hominibus doctis acceptissimo; ante omnes *nos* Salmasio: qui & aliquando eum per literas mihi commendavit. Quamobrem confido ei nusquam defore, tuum, & aliorum præstantium hominum favorem, si qua in re eum fortassis desiderabit. Audio, gaudeoque omnia apud vos jam quietâ esse & tranquillâ, postquam abiit Doct. Combachius. Equidem hæc Alcydonia, non diuturna modo, sed perpetua vobis esse velim. Sed quoties malos, pravosque hominum mores cogito, non possum mihi aliud persuadere, quam nonnullos homines, qui nisi nocerent, morerentur, ubi qualiscumque Dux obtigerit, redituros ad ingenium, velut anus ad armillum. Multum tamen bonæ spei habeo, in Procerum vestrorum prudentia; qui non sinent hujusmodi, cum urbis, atque Ecclesiæ malo, turbare, & cum ratione insanire. Edidi aliquot ante menses totum priorem de vitiis sermonis: quo operam dedi, tum ut castigatior sit sermo, puriorque, tum etiam ut semi-barbari illi, qui post irruptiones Gothicas, atque alias, Romanum Imperium tenere, melius ab hominibus non ineruditis, intelligi possint. Etsi vero sciam non ferre tua tempora, ut istis legendis vaces; volui tamen

tamen ut videres, quia indignum amicitia nostra putarem, aliquid mei prodire in lucem, cujus non facerem te participem. Cætera, quæ ad me, & alios nostri ordinis, his in locis pertinent, & præterire nunc animus est, quia melius, certiusque, ex Neumanno cognosces, qui viva erit Epistola. Et sanè gaudeo eum potissimum ad vos ire, cui & nostri Gymnasii, & Leidenis Lycei status est cognitissimus. Etsi enim mihi longe est jucundissimum, per literas colloqui tecum; tamen vel inertia quadam, vel ob assiduas occupationes, quodammodo, lætor, si in scribendo liceat esse breviori. Salutabis plurimum Clarif. Dn. Wittium, quem amo, & æstimo, nec ejus memoriam deponam. Deum rogo, ut utrumque Vestri, diutissimè conservet, cum familiæ, tum imprimis Ecclesiæ bono.

Amstelodami,
clb Ibc xlv.
Prid. Id. Jun.

Nominis tui cultor,

G. J. Vossius.

DXXIX.

Antonio Matthæo, J. C. Gerardus
Vossius, S. P.

SÆpè mihi, summe vir, jucunda obversatur memoria ejus temporis, quo clarissimus focer tuus, atque ego, morum similitudine conjunctissimi, amicitiam colebamus, usque ad ejus extremum vitæ diem. Nec illius me temporis oblivio cepit, quo & tu atque ego, alter alterum coram amplexi sumus: cujus ego, tum doctrinam ac virtutes, amare & æstimare didici. Nec scio utrum magis, talem tibi focerum, an illi talem generum gratularer. Eo impensius gaudeo, tam bellam mihi oblatam esse occasionem, testandi affectum hunc, ab tot annis minimè esse imminutum. Et quæ possit? Cum tua & eruditio insignis, & virtus eximia, quæ sola mihi amorem mereri, in nostri ordinis hominibus semper visa sunt, quantum dies accrevit, tantum doctorum judicio, testatiora sunt cunctis. Quocirca cum unico uxoris meæ fratris filio, optimè consultum vellem, non aliud potui in animum inducere, quam ut eum tibi de meliore nota commendarem. Quem eo gratiorem fore confido, quod & bonarum sit literarum amantissimus, & probitate ac modestia egregius, & juris studio biennio jam in Academia vacarit, quæ quondam tantopere, magno Parente tuo poterat gloriari. Sed existimavi, quod non possit Parens, *ὁ μακαρίτης*,

id posse apud Ultrajectinos tanto Patre natum, non minorem filium. Quocirca author, nec solus tamen fui, ut ad vos potissimum se conferret, & quæ juris studio hæcenus deessent, ea suppleret de pectore tuo Papinianeo. Nec dubito, quin longe sit futurus gratissimus, non solum, quia sic erecta ejus indoles mereatur, sed quia natus sit magno sanè viro, & præclare de Ecclesiis nostris merito. Est enim Francisci Junii, nobilis viri, sed nobilioris Theologi, ex filio natu maximo Nepos, quem nunquam familiæ indecorem fore confidimus. Solum rogo, idemque facit mecum Conjux, facit Juniana omnis familia, sic illum complectaris, ut studia ejus quamplurimum tibi debeant. Vale, vir maxime, & qui amor inter focerum, & me fuit; is deinceps esto inter te, meque, atque etiam duret inter liberos nostros. Quid enim pulchrius? quàm, ut junior ille Isocrates olim ad Demonium scribebat, *ἄσπερ τὸ ὄψιμα, ἔτι καὶ τὴν φίλῃ τὴν πατρικὴν ἀνεστημένῃ.*

Amstelodami,
clb Ibc xlv.
Prid. Non. Jul.

Tuus æternum omni officio,

G. J. Vossius.

DXXX.

V. Cl. Guinando Rutgerfio, Ger. Jo.
Vossius S. P. D.

QUod tu, uxor, generque, cum filia benè valetis, equidem gaudeo; ego mediocriter valeo, quod de uxore non possum dicere; atque ad ejus adversam valetudinem accedunt, quæ non muliebrem modò, sed & virilem constantiam possent expugnare; imprimis mortes duorum filiorum, qui ætate exsuperabant cæteros: li sunt Franciscus Jurisconsultus, & Matthæus, Ordinum Historiographus, quorum uterque intra semestre proximum excessit. Cum octonis liberis Amstelodamum veneram, unica nunc proles superest: utrùm vero hanc etiam terræ sim daturus, an potius velit Deus, ut unus filiorum superfit, qui ubi fatalis illa hora advenerit, oculos mihi claudat, id cum Horatio dixerim, *scire nefas*: quandoquidem, ut ait idem: *Prudens futuri temporis exitum caliginosa nocte premit Deus*. Noli autem propter tot adversa putare, sic me iis premi, ut officio desim. Propè enim nihil remitto à veteri labore, licet septuagenarius: Quia tantò sum temporis avidior, quanto citius mihi ejus rationem reddendam video. Sed mihi multas bonas horas auferunt tum amici, tum qui vicinis, vel re-

motis

motis etiam è terris salutatum veniunt. Si tam stultè sciperem, quam Plautinus ille miles, nec meo me pede metiri didicissem, poteram fortasse suaviludiis quibusdam fidem habere, qui mihi similia his conquerenti, ridiculè respondebant, Nimia est miseria, Doctum esse hominem nimis. Sed mittamus affanias. Ego propter crebros adeo visitantium accessus, non possum sic limare mea, ut eruditæ cavere usquequaque satisfaciam. Ac propterea, sæpè recessum aliquem opto, qualis ille in quo nunc degis; absque eo esset, quod Miles sæpè incommodat: ut mihi narrant, qui tuas mihi literas reddiderunt. Mitto nunc ad te iv. Tomos operis nostri de Theologia Gentili, & Physiologia Christiana. Quatuor supersunt, qui quando lucem sunt visuri dicere nequeo. Ita multa sunt, quæ forsitan prævertent. Miraberis fortasse, cur non miserim prius, sed cum Cleo dicasssem Anglicano, tam multa eò exemplaria mittere necesse fuit, ut non potuerim amicorum multis donare, quibus antehac soleo. Quid Amicos dico? Negavi etiam Liberis, quia nullum superesset, præter unicum, in quo novas curas annotarem. Sed postquam intellexi, tanti tibi esse nostra, ut pretio tuo emi velis, emere ipse malui, quam ut tu nummum impenderes. Præsertim cum non indignum sit homine Theologo & Philosopho argumentum, ut planè confidam, non displiciturum. Sanè à summis viris ac studiorum principibus benigna satis iudicia accepi. Operis nostri de Natura, & Nexu disciplinarum, vix octo, ut vocant quaterniones sunt excusi. Jam menses sunt aliquot quod operæ cessant: non culpâ nostrâ, sed quia scripturienti hoc sæculo variis adeo præla distineantur bonis malis. Leloyherium de Spectris non vidi; ac metuo ne idem sit ac Lu. Lavaterus, de Spectris; qui Genevæ excusus, an. clb Idlxxx. apud Eustathium Vignon. Forfan incideris in alicujus Jesuitæ, vel similis farinæ librum. Mos enim illis corrumpere nomina eorum, qui inter hæreticos, quodammodo familiam ducunt. In his autem Lavaterus ille, Theologus Tigurinus, Henrici Bullingeri gener; cujus scio varia videris monumenta: Et fortasse illud de Spectris. Sed hunc ab illo Leloyherio diversum putaris. Dixi, quid mihi videatur. In quo si fallor, tam pereat suspicio nostra, quam extrema faba, ut in proverbio est. Non ignoras, ut Amplissimorum Academia Leydensis curâ atque operâ, aliqua sit facta medicina inimicitii inter summos viros Salmasium & Heinsum. Saltem hætenus, ut ne alter in alterum posthac calumiam stringeret. Sed non multo post Goeßii Senatoris

Leidenfis (is affinis tui Heinßii gener est) liber in lucem prodiiit adversus Salmasium; in quo traducit magnum illud sæculi decus, ut merum Grammaticum. Cætera tacere malo. Quare metuo, ne incassum fuerit omnis Curatorum labor. Si benè Salmasium novi, non feret hoc Heinßius inultum. Sed denuò se Salmasius accinget ad impungenda, quæ is scripsit, præsertim in N. T. Oti tandem homines, in studiis excellentes, condonare multa publico possent, nec mutuo, sic dente genuino se roderent. Non modò de Rep. Literaria, sed etiam de seipis mererentur longè melius. Nunc quid faciunt, nisi quod apud imperitos fordeant, & unâ ferè cum illis studia universa? Pluribus non detinebo, partim quia jam adsunt, qui has ad te literas deferent; partim quod nolim longus videri: præsertim postquam ipse adeo in scribendo brevis esse soles. Uxori, filio, genero, plurimam salutem dicito; imo & vos omnes salutant Coniux, & filius Isaacus; qui annum & amplius redux ex peregrinatione, Britannica, Gallica, Italica; quibus penè quadriennium infumit, non sine studiorum incremento. Quod facilius perspicies, si aliquando excurreris. Hoc fore adulto verè proximo, spem fecere illi, qui literas has tradent. Nomina adderem, si inquisissem. Sed leve peccatum, cum liceat mihi sic eos apud te *merpere* Rev.

Amstelodami, vi. Id. Septembris.
clb Idc xlv.

DXXXI.

Illustrissime atque Incomparabilis Salmasi,

A Quo hæc literas accepis, is est Christopherus Witotichius, Pastoris Aulici in Silesia filius, juvenis integræ vitæ, & hoc nomine acceptissimus bonis omnibus qui noverunt. Ante biennium mihi per literas commendatus fuit à Cl. V. Ludovico Crocio Theologo Bremensi. Ea in urbe biennio toto studiis operam dedit, inter cætera literis Græcis & Hebræis, item sacris; ac sub præsidio Crocii, publicè etiam in Theologicis disputavit, & ut intelligo, cum laude. Exinde Groeningam abiit, ubi biennio item præfuit studiis filii Steinbergii, ea in urbe Doctoris, ac Professoris; nec operæ filio impensæ Steinbergium pœnitet. Felicem autem se juvenis hic putaret, si etiam apud Leidenfes, similis ei posset conditio obvenire. Videtur pater in re honesta, sed plures in studiis filios educat: & in adfecto hoc Germaniæ statu,

M m m

statu, non idem potest quod olim. Optaret igitur ut filius suus succo suo in externis Academiis possit aliquantisper vivere. Equidem vix video, quomodo magnopere, non dico consilio, sed auxilio ei hac in re esse possis; sed obnixè à me petit, ut se tibi commendare vellem: & idem fecit natus ex conjugis fratre Franciscus Junius Franc. Nep. qui eum Groeningæ novit familiariter, eo quod noster hic sub Steinbergio juri operam daret, & Wittichius iis ædibus degeret. Hæc pluribus exposui, ne ingratus foret, si quem commendarem in negotio, ubi parum fortasse operâ tuâ possis, vel saltem non sine damno studiorum, quibus ob commodum publicum imprimis consultum volo.

c15 Idc xlv.
vi. Id. Septemb.

Tuus ut suus,

G. J. Vossius.

DXXXII.

V. Cl. Justo Lyræo, Ger. Jo. Vossius.
S. P. D.

NON est nobis, V. Cl. nuper notitia, ut suam cum Menedemo nuncupat Terentianus Chremes: sed vetus adeo, ut penè annos expleat Jubilæi; quem Israelitis suis constituisse septies septenis annis. Quæque in adolescentia vix aliud, quam Notitia dici meruit, ea firmatori ætate, Amicitia sibi nomen vindicat; præsertim postquam amorem uterque nostrum hospitali etiam tessera ob signavimus. Eo fidentius hoc literularum ad te exaravi, quo commendarem nobilem adolescentem Franciscum Junium, ex uxoris meæ fratre natum. Et quomodo non grata esse ejus commendatio possit, cum tanto apud te in pretio fuerit semper magnus Avus, communis præceptor? Quod non exstimo tecum dicere posse quemquam Collegarum. Quantum enim ex ætate eorum colligo, extincto demum Junio, in Leidense Lyceum advenerunt. Arbitror etiam aliquid tibi notitiæ intercessisse cum adolescentis parente, Joanne Casimiro Junio, viro & optimo, & doctissimo, jam ante annos LV. Condiscipulo meo, ac quinquennio post, ut arbitror, etiam tuo. Hæc vel sola poterant amorem nostri Junii conciliare apud te; sed magis illud, quod ingenio, doctrinæque valet; ac modestia est singulari; quæ ubi abest, non genus, aut proavos multum moror, ne doctrinam quidem. Hæc sæpe illi instillare soleo: sæpius etiam facturus,

nisi sic natus, sic educatus, sponte virtutis viam calcaret. Quamobrem sic planè persuasum habeo, si qua in re fortè egeat consilio, aut auxilio tuo, nunquam te ei defore, vel Juniani nominis, vel nostri etiam causâ. Ego te, uxor uxorem, imo uter utrumque vestri plurimum salvere jubemus.

*Amstelodami, c15 Idc xlv.
vi. Id. Septembris.*

DXXXIII.

Clarissimo Joanni Sadlero.

Londinum.

Vir Eximie,

EGI antehac gratias pro egregio erga me affectu, nec insigni minùs operâ tuâ. Denuo ago, pro meritis inde consecutis, quæ fusè mihi exposuit ornatissimus Hoofdus; nec verbis modò enarravit, sed re ipsa comprobavit. Annumeravit enim mihi per fratrem octoginta libras sterlingicas, quas difficili adeo tempore adhuc, & fortasse desiderarem æternum, absque te fuisset. Atque idem bene sperare jussit de cætero. Tantum sibi in posterum etiam promittebat, de amore tuo, atque innato illo ardore bene faciendi omnibus, præsertim quos literarum studia commendant. Atque idem Hoofdus, apud me deprædicabat affectum summi viri, Domini Oliverii Sancti-Joannis, & cum aliis dotibus magni, tum in studiis nostris nullo inferiori Joanni Seldeno. Equidem vestrorum in me meritorum magnitudinem quoties cogito, tantum esse video, ut si effari coner, cogar obmutescere, neque aliud sim facturus, nili ut Poetæ loquuntur, *Divinitus ora mihi dentur dena, ac linguae decem.* Et tamen assidue hæc animo meo obversatur cogitatio; ut aliquo monumento, qualiscumque ingenii, ac doctrinæ nostræ id ignorare non sinam nepotes nostros, & qui ab his sequuntur. Neque id mihi operosum erit, qui totus sum in limandis veteribus laboribus; sed hætenus ineditis, numero tam multis, ut contendere possint cum iis, quæ hætenus è nostris lucem viderunt. Interea valde animo ægrè est meo, quòd non desunt, qui homulum hunc, tam amantem florentissimi quondam Regni Britannici insimulant; quasi cum magno Heroe, his terris consilia capeßam de iis, quæ ad statum regni pertineant vestri: Quasi item in Remonstrantium militem castris: liceat dicere illud Lucilianum, *Pergula Piciorum, veri nihil, omnia falsa.* Assidue preces fundo, pro

pro bono Britanniae, paceque Regis & Procerum. Nec verbum ore excidit meo, unde, qui verum amet, culpae possit. Neque unquam sacra Remonstrantium accedo, vel ab annis xxv: sed sola eorum, quorum publica sonat in Templis nostris Doctrina. Quibus cum solis mensam etiam Dominicam frequento. Nec aliter his terris dicet quisquam. Arctaque mihi familiaritas, etiam literarii commercii, cum omnibus penè Theologiae Doctoribus, in Academiis, & Illustribus Gymnasiis Belgicae foederatae. Ut satis dicere non possim, unde Opiniones adversae. Equidem foci, & Praeceptoris Francisci Junii sententiae insisto, vitamque æmulo, quantum possum, & liberis ejus exemplum ob oculos ponere non desino. Plura in re fortasse supervacua non addam: ne præter morem id faciam, qui parcus verborum esse soleam. Salutem plurimam dicerem, à Clarissimo Viro, communi amico, Joanni Pello; sed ut noscere te jam arbitror, is Amstelodamense Gymnasium commutavit Bredano, ubi Philosophiam ac Mathesin docebit. Mallem hic doctissimi viri amicitia frui; nec tamen consilium ejus damnare audeo. Planè enim confido, melius illi istic fore, favore Illustrissimi Arausionensis Principis, intelligentissimi, quantum Mathesis valeat in re militari.

Amstelodami,
clō Ibc xlv. xvi.
Kal. Octob.

Tuus totus,
G. J. Vossius.

DXXXIV.

Merico Casaubono, Isaaci Filio,
G. J. Vossius S. P. D.

Reverende ac Clarissime Vir,

REdeunte ad vos Hoofdio nostro, committendum non putavi, ut sine meis ad te literis abiret, praesertim cum tam multa mihi retulerit de affectu erga me tuo. Equidem semper de eo fui persuasissimus; sed tamen juvat hoc ex illo etiam cognoscere. De rebus meis quid scribam, aut non scribam, ipse vix video. Nam malim lætissima quæque referre, ut communia gaudia gaudeamus. Nunc pleraque omnia tristitia. Ut de valetudine uxoris perpetuo adversa: deque mortibus duorum filiorum, unius Francisci, Jurisconsulti, alterius Matthæi illustrium Hollandiae ac Zelandiae Ordinum Historiographi, ac Praefecti Bibliothecae Amstelodamensis. Prior unicam, alter geminam prolem reliquit. Atque hujus tomus quartus jam excuditur,

quo persequitur res Comitum Jacobae Bavaræ: in qua Bavari præesse Hollandiae desierunt. Exinde etenim translatum imperium ad Burgundos, uti inde ad Austriacos. Cum autem volumen hoc constet libris quinque, solum quatuor absolvit Matthæus, quintus addetur ab unica nunc prole Isaac J. C. quem fortasse ante quinquennium videris in Anglia. Exinde Gallias, & Italiam triennio lustravit, magno cum studiorum fructu. Vix dicere possim, quam multa optimæ notæ, hætenus ævū sua attulerit. Quorum alia post alia lucem videbunt. Prævertet tamen Geographia Ptolomæi, quam cum variis MSS. contulit, & innumeris pene locis castigavit. Fortasse de his antehac quædam scripsi. Deum rogo, ut propediem ex te lætissima intelligam de rebus Britanniae compositis. Vale, vir eximie, & cum lectissima conjuge, plurimum à me, uxore, ac filio salve.

Amstelodami, clō Ibc xlv.
xvi. Kal. Octobris.

DXXXV.

Cl. Viro D. Marefio. Groningam.

Reverende & Clarissime vir,

VAlde capior Theologia tua ἐλεγκτικῇ, opere docto & laborioso: ut de Nepotis Chronicis judicabat Catullus, videlicet (lubet alterius vatis verficulos παρὰ δὲ λέγειν)

Gallis ingenium, Gallis dedit ore disertum
Sacra Ithalia loqui.

Itaque quantum spissæ occupationes sinunt, valde eo me oblecto: multumque eo nomine debere me tibi fateor, quod muneri miseris, offerendum manu amicæ Hottoni, optimi virorum: spero me propediem posse ἀντιδωρεῖν mittere: sed argumento dispar. O utinam non sic distringerer, ut sacris etiam possem manum addere extremam: quorum notitiā ut longe vincar, haut minus tamen capior fortasse, quam præclari ordinis vestri quisquam. Crede enim mihi, eximie Marefi, vita mihi eo in jucundior, quod sic à melioribus avocer, & valetudine uxoris, & adversis multis, & assiduis undique interpellationibus. Et facile me id puto posse persuadere, qui sine dubio doles, ereptas tibi ab aliis bonas horas, quas adversus communem hostem maluisses impendere. Interea multum gaudeo, non tantum in animo tuo quicquam valuisse molestiarum, ut propterea careremus Elenctica tua Theologia, quæ incanis legetur

tur sæculis. Affinis mea Junia nunquam defuit mihi prædicare summam tuæ domus humanitatem erga te, & suos. Quo nomine gratias ego, & uxor, habemus quantas possumus. Rogo ut hunc adfectum conserves, præsertim si quid valeas, pro nobis, & optime adolescente Francisco Junio: quem ego penè parentis instar amo: non modo propter magnum avum, socerum, & præceptorem in Hebræis, ac Sacris meum; sed etiam, quia virtutis via strenue grassatur ad honorem. Plurimam salutem Conjux uxori tuæ adscribi petiit. Meo etiam nomine, si grave non erit, salutem dicito duobus Clarissimis Collegis tuis, D. Withmario, & D. Pasori, quem gaudeo nunc etiam sacrum in ordinem adscitum.

Amstelodami,
clo Ibc xlvii.
viii. Kal. Febr.

Virtutum tuarum
cultor,

G. J. Vossius.

DXXXVI.

Viro Cl. Antonio Vander Linden,
G. J. Vossius.

Hesterno die convenere me Rabbi Manasses Ben-Israel, & Isaacus Rocamora, natione Lusitanus, religione Judæus. Eorum hic biennio operam medicinæ dedit, illosque in arte vestra progressus fecit, ut confidat se non indignum supremam in hac laureâ. In re tenui constitutus, putabat, ex inclitis Lyceis, illud sibi diligendum, ubi minus avare nobilissimæ artis honori pretium statueretur. Impensè mihi hunc Rocamoranum commendabat Manasses, vir tui amantissimus & in quo, si unam excipias Religionem, nihil requiras. Equidem (quod de paucis, non ejus modo sectæ, sed cæteris etiam hominibus dixero) dignum existimo, quicum vel in tenebris mices. Poscebat ille, ut literularum aliquid ad te exararem, quibus voti sui te facerem certiore. Nihil Religionem ob stare posse arbitror; quandoquidem quo tempore in urbe patria agebas Haroni Amstelodamensi, itidem Judæo, is honos à Leidensibus fuit collatus. Ac memini me ex veteri Collega τῷ μακαρίῳ Vorstio, audire, plane in hoc negotio, haud in considerationem venire, quæ fidei sunt, sed quæ Medicæ artis; præsertim cum his terris, Judæis etiam concedatur artem eam exercere. Valdè desidero nosse, utrum animus tibi persistet, de nova editione elegantissimi scriptoris Cornelii

Celii. Equidem nullus dubito, quin tuo beneficio, meliori toga prodire, celliori etiam in loco Celius licet possit collocari. De Hesychio, quæso aurem velle eximio Schotano. Sæpè me ejus commonuit filius; siquidem periculum videtur, ne tam longo tempore, non redeundo unde abierat, inter aves feras incipiat numerari. Id fieri nolim, neque te sponfore tam integro, & viro, & amico, fieri æquum puto. Salutabis eum meo nomine plurimum. Utī & duo apud vos S. Theologiæ columina.

Amstelodami, iv. Kal. April.
clo Ibc xlvii.

DXXXVII.

Eximio & summo Viro, Georgio Calixto, G. J. Vossius S. P. D.

Redit ad vos ornatissimus Duvius; per quem ante biennium accepi tum gratissimas literas tuas, tum doctissimum responsum adversus Moguntinos. Utrum gratias egerim, non possum certò dicere; factum puto. Fortasse tamen distulerim, ubi cognovi te ad Toruniense Colloquium profectum; sed si id minus à me factum, nunc ago; ed justius, quia tua omnia, ut debeo, amo, & æstimo. Nec sanè ex Germania quidquam huc locorum defertur, quo æque capiantur meliores animæ, ac illis ex Academia Julia. Valdè multis dolet, non plus effectum esse, Toruniensi Colloquio; cujus licet culpa imprimis sit penes adversarios, plus tamen sperare licuisset; si ex nostris etiam cæteri eam animi moderationem attulissent, quam tu cum Clarissimo Bergio; sed ferè ita fit, ut quod quisque didicit retineat, sicut claudus pilam. Pauci etiam, quid Ecclesia Catholica sit, sciunt, vel cogitant. Nec faciliè dixero, quantum mali det Ecclesiæ antiquitatis contemptus. Utinam vero, Sereñiss. Poloniæ Regis auspiciis instaurari simile colloquium, sed eventu dissimili possit. Sæpius ejus rei spem mihi fecit Nobilis Italus, sed Poloniæ Regi perfamiliaris. A Britannia, ut nunc se res habet, nihil ad hoc negotium auxilii expecto. Vellem hoc tempore, pro munere non uno, ἀντίδοτον mittere potuissem; sed ut spero fiet hoc propediem. Variis enim prælum fervet, partim in humanis, partim etiam divinis. Quando enim ætatem cogito (jam septuagesimum excessi) festinandum mihi video, si quid me vivo cupiam videre lucem. Deum Opt. Max. rogo, ut longam

longam ætatem, ad bene de Ecclesia merendum, largiatur tibi; sed & Clarissimo Horneio, & doctissimo Conringio, quibus si meo nomine salutem impertias plurimam, rem facies gratissimam.

Amstelodami, clō Ibc xlvii.
iii. Kal. Maias Styl. Greg.

DXXXVIII.

Cl. V. Jac. Gothofredo.

Amplissime ac summe Vir,

JAM toti sunt anni, ex quo me donasti gratissimo munere, Philostorgium dico; qui me valde delectavit, partim quia magnam adfert lucem historiæ suorum temporum; partim ob ei impenfos doctissimos labores tuos. Non parum itaque tibi studia mea debent, nec mea modò, sed aliorum quoque antiquitatis amantium. Hactenus pro opera, ac dono, gratias egi nullas. Præter tot adversa, adferre multa poteram, quæ me fecerint negligentiorē; sed malo culpam agnoscere, & tardè officium facere, quam nunquam. Nunc verò differre ultra si velim, nullum delicto reperire mantelum possim. Bella adeo se offert scribendi occasio; eunte ad vos, inque Galliam reliquam, foci mei, magni viri Francisci Junii, ex maximo natu filio, Nepotē optimo, & doctissimo. Rogo etiam ut ne grave ducas, de manu ejus accipere minutum *ἀντίδωρον*. Videlicet quæ de Arte Poetica, proximè in lucem dedi. Excuduntur præterea, quæ de Baptismo scripsi. Item de universis veterum studiis libri plusculi; & quædam alia quæ non ingrata fore spero. Mirari vero noli, si eodem tempore, plura distineam præla. Malo cum Aristide esse, *ἐν τῇ ἀνεκέρειαν*, quam *ἐν τῇ ἐμύνητον* sed ista quæ dixi, aliaque multa, multos ante annos ad umbilicum perduxī, solum superest ut edantur. Nec animus est diu ulterius differre. Convasare enim ætas jabet, cum septuagesimum excefferim. Veniam interim postulo, si non omnia faciunt ad palatum tui similibus, quales sanè perpauci. Eò impenfius opto, ut me porro ames, & aliquo habeas loco labores nostros. Vale, vir eximie, & maximos viros, Deodatum, & Tronchinum, quos in Batavia ante annos xxvi. cum voluptate vidi, plurimum meo nomine saluta.

Amstelod. anno
clō Ibc xlvii.
iv. Id. Sept.

Tuus æternum,

G. J. Vossius.

DXXXIX.

Illustrissimo Celsissimoq; Ludovico Duci
Gelriæ, Comiti Egmondæ & Zut-
phanicæ.

Princeps Celsissime,

SI prius fuerim obstrictus Celsitudini vestræ, quod ea dignum me censuerit, cui aliquid imperaret; certe nunc quam obstrictissimus sum, postquam video prolixam meam voluntatem, atque hanc usque adeo imbecillem, tanta excipi benevolentia, à Celsitudine vestra, non aliter, quam si quod volo, possem, & quod possem jam egissem. Utinam vero sic foret! nec incomparabilis illa humanitas Vestræ Celsitudinis, non ex benignitate tantum, sed etiam merito ex meo provenisset. Quam homulus ego mihi gratularer! Verum cum vires meæ non sustineant hoc oneris, ut exsolvere valeam, quantum vellem, & deberem: gaudeo saltem, quod vir nobilis, Mortimerus, pro solitâ sua humanitate indicarit Celsitudini Vestræ, utcumque mihi delit facultas, non deesse tamen desiderium, & voluntatem inserviendi Celsitudini Vestræ. Quod vero stemma attinet Celsitudinis Vestræ, summa enitar ope, ut si quis fortasse mortalium Ducale illud genus ignorat, deinceps videat, nulli illud cedere Principum in Orbe Christiano. Quo fine Comitum Egmondanorum seriem ab annis plus millenis, in Originibus suis Batavis, referet filius meus Isaacus. Hoc opus lucem conspiciere posse confido, non multo postquam ad nos reversus erit Mortimerus. Id spero brevi futurum. Puto ope ille, & consilio, non mediocriter nos juvabit. Deus Opt. Max. Celsitudini Vestræ felicia omnia, & prospera largiatur.

Amstelod. anno
clō Ibc xlvii. prid.
Kal. Octob.

Celsitudini vestræ
devotissimus,

G. J. Vossius.

DXL.

DXL.

Celſiſſ. Principi Ludovico Duci Geldriæ ac Juliæ, Comiti Egmundæ & Zutphania.

Celſiſſime Princeps,

Spiſſius video procedere ſpem, quam de reditu paulo celeriori, feciſſe mihi viſus nobilis vir Dom. de Mari-mortuo. Nec ambigo quin ſic tulerint res Celſitudinis Veſtræ, ut ne reverti celerius poſſet. Dum verò is abeſt, cælator ſublimis generis veſtri, priſcorumque inſignium, eò rem perduxit, ut nihil, quantum ſciam, ultra requiratur, quam præſentia ejus viri uſque adeò ſeduli, in Celſitudinis Veſtræ negotiis, quorum non alter, his terris, ut opinor, intelligentior. Ego verò abſente eo meticuloſe rem gero. Optime noſti, Egregie Princeps (quem non ego magis, ob ſublime genus veneror, quam proprias dotes, in his, doctrinam raram excelli ſtemmatis comitem) quod olim dicebat Poeta Hiſpanus, non hujus temporis, quo tot annos cum gente ea bellum gerimus; ſed ille priſci ævi Bilbilicus vates:

Peccant

Secure nimium, ſollicitæque manus.

Itaque operæ illæ, juxta mecum, impenſæ illius operam deſiderant. Nec minus ille vel illis, vel mihi utilis fuerit aliis in negotiis ſic nati Principis. Quod non ſemel perſpexi, vel paucas ante hebdomadas, cùm Hagam-Comitis excurriſſem; atque occaſio foret, de Celſitudine Veſtra colloquendi cum aliquot viris in dignitate non exigua conſtitutis. Ages quod pro eximia prudentia expedire judicabis. Equidem ut Illuſtriſſimum Ducem horum facerem certior, mei eſſe officii exiſtimavi: qui æternum ero

*Amſtelodami,
clō Ioc xlvii.
prid. Non. No-
vembriſ.*

*Celſitudinis veſtræ cultor
devotiſſimus,*

G. J. Voſſius.

DXLI.

*Cornelio Tollio ſuo, G. J. Voſſius
S. P. D.*

DE laudibus Alexandri Mori multa à variis intellexi, ut de erudiſſione ejus dubitare nequeam. Utrùm vero venturus ſit,

in has oras, ſi ad profeſſionem ſacram à Proceribus veſtris ſollicitetur, nondum dicere poſſum, ſed paucis diebus, vel ego, vel filius, ſuper eo reſcribet. De Plutarchi mente in Sympoſiacon, primò gaudeo te laborare. Nempe nondum ſcis mores amantium, nec hac ætate multum noviſſe attinet. Diſpar mei ratio, qui bis amavi. Non ſoleo ego mea profundere; ſed quo tempore amatoribus accingebar, cogebar, ne tenacior audirem, nunc erga ſamulos, nunc alios etiam liberalior eſſe, quam conſueveram. Marſupium mihi vel apertum ſemper, ad dandum aliquid, vel ſaltem non aliter conſtriſtum, quam nodo folii Porracei, ſcis iſtiusmodi folium, quam tenue ac fragile ſit: ut nihil referat ſitne crumena aperta, an folio ejusmodi nodata; ſic proverbiale illud dictum etiam cepit Coelius Rodiginus lib. XXIX. Antiqu. Lect. cap. XVI. Nec ſanè aliter Plutarchus capi poteſt. Hoc abundè diſces, ubi tam ſerio rem ages inter Virgines Belgicas, quam hætenus feciſti inter Virgines Muſas. Nob. & Ampliſſ. Wiinbergio, uti & Clariſſ. Doct. Valkenirio, plurimam à me ſalutem dicito.

*Amſtelod. clō Ioc xlvii.
Non. Novembriſ.*

DXLII.

Summo Viro Joanni Seldeno.

Londinum.

Summe Vir, & cui in ipſo literarum initio ſic animo dictante proſiteri cogar, plurimum me debere.

QUI hæc tradet, eſt is ampliſſimus Petrus Grotius, filius Illuſtriſſimi, Regi-næ, regniſque Sueciæ ad Chriſtianiſſimum Regem Legati, dum viveret, Hugonis Grotii, mihi à pueritia ejus, ob præclaras animi dotes, longè chariſſimus, nunc Sereniſſimo Principi Bohemico Philippo à Conſiliis. Ac ſcio, hoc lubentius conſpicias, quod undecumque maximus parens, te, tuaque omnia, cujus ego auritus teſtis eſſe poſſim, ſemper fecerit maximi; etiam poſtquam avidè hauſiſſet, quæ eruditè adeo de Mari clauſo repoſueras. Nimirum ſic animi ſunt illorum, quod de meliore luto formatos aiunt; ut diſſentire inter ſe poſſint, ſalvâ amicitia: præſertim ubi utrimque ſtimulantur, patriæ commodis. Hoc igitur in Britanniam tendente, fortasſe ob Principis ſui negotia; committere non potui, quin nuperum animi mei ſœctum, Commentarium videlicet de re Poetica,

rica, ad te, ut oportuit, transmitterem: Non quasi putarem, tantum tibi ab rebus tuis privatis, longèque minus à maximis Regni negotiis, otii esse, in hoc tempore, ut talibus legendis vacare ullo modo posses; sed quia tam commoda occasione, deesse non deberem officio meo erga illum, cujus erga me beneficia nossem; quæ modò Deus vitam diuturniorem concesserit, ne ingratus unquam posteris videar, publicè studebo protheri. Quomodo animatus porrò etiam me, meaque tuæ benevolentiae commendo: ac pariter tam benignè erga me affecto, præstantissimo, & adeò benè apud omnes bonos audienti S. Joannio. Atque ad eum quoque literas exarare erat animus; cum ecce magnopere advocat tristis nuntius, de subito excessu Clariss. Collegæ mei Gasparis Barlæi, contiguus ædibus habitantis: cujus numerosæ familiæ solandæ vix sufficio; sed faciam tamen quod possum.

Scribebam Amstelodami, post. Kal. Jan. anni hujus clō lxxviii. quem tibi, regnoque universo, foelicem exopto, uti etiam affiduè Dominum Deum precor.

Maximarum virtutum tuarum admirator, ac cultor obstrictissimus,

G. J. Vossius.

DXLIII.

*Viro Clarissimo Frederico Spanhemio,
G. J. Vossius S. P. D.*

D. Rector magnifice,

Quid de aliis fieri cogitem, si mihi ipsi permolestum sit, quod sæpè vel nihil, vel tardè adeo respondeam summis viris? Nec tamen mirabitur quisquam, qui sciat, quantopere, dico singulis prope horis, sed momentis penè singulis interpellat, partim ab indigenis, partim à peregrinis. Accessit nunc invaletudo aliqua; nec dolor exiguus ex obitu Clarissimi Collegæ Barlæi, quæ duo & ipsa hocce quadriduo fecere, ut negligentior viderer. Noli tamen putare, quidquam mihi esse gratius literis tuis. Scio quippe quanto in loco Deuste constituerit; non modo si Batavam Academiam adtendam; sed imprimis si Ecclesiam universam. Atque utinam nec te diutius funebria, nec Salmasium fœnebria, vel hujusmodi similia distineant. Hic quoque præclare, uterque de

temporibus nostris meremini; sed satis datum argumento istiusmodi. Magis profutura posteris scio, quæ similia sint à te scriptis dubiis Evangelicis. Quo labore non capior modò; sed satiare me vix possum. Hæc non scriberem, nisi accepissem, quia sic erudita tua facundia in Orando placuit, etiam alia à te exposci non valdè dissimilis argumenti. Et sanè sapiunt quos hoc argumentum tangit. Nec enim sciunt, qui tractare illud melius possint; sed enim existimo, alia aliorum vota esse, qui cogitant, sic annos ire hominis occupatissimi, æquiusque esse, ut ne pereant tot præclare in sacris observata, sed ad posteros propagentur. Verùm sermonem hunc abruptam, ne cogar audire illud, quod ipse multis occuper, longè inferioris argumenti, uti de Vitiis sermonis, de re Poetica, & similibus vix cuiquam alteri, quam adolescentiæ profuturis. Fateor, & suram præbeo, nec verbum addo. Venio potius ad Epistolam tuam, quæ de Moro fuit. Equidem putabam de eo non amplius cogitari; sic videbar mihi, non malè colligere ex verbis Cl. Gronovii, qui paucis diebus nobiscum fuit. Ut cumque est, nihil hætenus à me pro eo, vel adversus eum dictum, factumve. Senectus facit, ut quietis sim amantior, quàm ut me implicem negotio, ubi illos video dissentire, quos hætenus non solum amo; sed etiam suspicio. Aduit aliquot ante dies mihi filius Geberhardi Elmenhorstii, Patricii Hamburgensis, viri benè de studiis meriti. Absque dubio videris ejus Apuleium, Gennadium, Arnobium, aliaque. Coluit amicitiam mecum, & quod majoris longè faciendum, cum Josepho Scaligero, Andrea Schotto, Daniele Heinio, Jano Rutgersio, & quo non? Hujus igitur filius Bibliothecam paternam vellet dividere: idque potissimum Lugduni, quia nuspian major numerus vacantium Theologiæ, & Philologiæ studiis. Negant id fieri sine Urbicorum Procerum consensu. Interim plurimùm in eo posse, qui Inclyta sit Academiæ Rector magnificus. Poposcit igitur filius, & hæres unicus Bibliothecæ, ut vellem tribus de eo verbis ad te scribere; sperat non hoc negatum sibi iri, quandoquidem tanta patri amicitia fuisset cum summis Academiæ Leidenensis viris. De hoc dicere poterit Cl. Heirsius; cum cujus genero, Ego & Ille, de hac ipsa re, paucillos ante dies sumus collocti. Si quid Heinii operam in isto posse exiltimetur, dixit Gener se ei scripturum; sed judicabat nihil ultra ad sensum tuum requiri, vel præterquam ut tribus verbis significetur, æquum tibi videri, ut hoc permittatur, ob præclara merita Elmenhorstii, præsertim cum futurum sit, bono studiose juventutis. Continet

tinet enim Bibliotheca illa multos Scriptores præclaros; ut videre est ex Catalogo, quem habet Typographus La Mair. Vale diutissime, atque salve ab eo, qui æternum colet te, ob rarissimam eruditionem, & cæteras virtutes.

Amstelodami, clō Idc xlviii.

xv. Kal. Februarias.

DXLIV.

*Clarissimo Viro, Isaaco Grutero
S. P. D.*

Accepi unas, alterasque à te literas; quibus & tertix ejusdem ex parte argumenti à Colvio nostro accesserunt. Rescribo tandem, non tam quia sit quod scribam, (soleo autem, quoties nihil certi habeo, quod respondeam, scribendi officium differre) quam ne te ulterius fatigem, exarandis novis Miraris fortasse quod dicam, non satis me scire, quid sim scripturus. At qui ita est, causas accipe. Necdum à Proceribus nostris consultatur de alio, in locum defuncti Collegæ Barlæi sufficiendo. Interea non exiguus est eorum numerus, qui id munus deposcant. Et sunt in his, qui jam publicè Philosophiam sint professi, partim in Batavia, partim extra eam. Urbs hæc tres è civibus suis habet Artium ac Philosophiæ Magistros. Nec solet, si domi parem muneri habeat, quærere alium foris, nisi forte, is albis, quod dicitur, equis prævertat. Vellem constaret Proceribus, quantum in Philosophia etiam operæ ac temporis collocaris. Nunc à prosa, versaque facundia iis notus es; sed filius meus retulit mihi, quantum etiam laudis promereris, sapientiæ, & prudentiæ studiis. Noli dubitare, quin bona id fide, significaturus sim Consulibus ac Curatoribus. Et tamen in tanto tam multorum ambitu, difficile sit videre, quò maxime sint inclinaturi. Si certiora cognoro, curabo, ut quamprimùm de omnibus, ex meis, vel filii literis, ea intelligas. Utinam prodesse tibi in hoc negotio possim; quod non tui modò causâ velim; sed etiam optimi, & cordatissimi Ant. Vivieni, cujus te domesticum esse scribis. Amo eum, & ætimo non tam, quia artificissima inter ejus uxorem, & meam; sed quia non alterum novi, qui cum potius in tenebris micem: ut jam mittam magnam doctrinam, majoremque ejus amorem; qualis in paucos cadit. Salutabis illum, & uxorem lectissimam. Nec diffugies salute impertiri

raræ eruditionis virum, Colvium nostrum, cui nunc solum isthoc dicito; de Barlæi & vita, & obitu, propediem visurum Orationem Corvini J. C. Is enim me ob invaletudinem, ac pariter Collegâ Rufio impedito, in magna auditorum corona parentavit. Vale, Mi Grutere.

Amstelodami,

clō Idc xlviii.

Kal. Febr.

Tuus,

G. J. Vossius.

DXLV.

Clarissimo Viro Ludovico Crocio.

Clarissime & summe Vir,

DIU est quod nihil ad te literarum dedi. Nimirum ingravescit ætas, nec imminuuntur labores, vel privati, vel publici. Præterea invaletudo uxoris, tardior in scribendo facit, & salutatorum nimium quantum; foeliciter aliquanto vetus Collega Heinsius, cui hoc anno, licet quadriennio me natu minori, abstinere à publicis auditionibus. Mihi non licet esse tam beato: sed neque postulavi unquam, quia censo stantem Imperatorem mori oportere. Quare nec sino claudicare munus publicum, nec quæ posteris cudo: In quibus à nobilibus subsidium peto. Proximè juris publici feci nonnulla de re Poetica, ex quibus libellum de natura, ac constitutione ejus artis nunc mitto, unâ cum opusculo de imitatione, & recitationibus Veterum. De artis præceptis, ad manum minimè erant. Libri de Poetis Græcis ac Latinis, propediem prælo parati erunt. Recusæ etiam viginti disputationes de Baptismo; quas dubitavi, an mitterem; quia pleræque omnes habentur in disputationibus Leidæ susceptis, ac Oxoniâ uno volumine recusis. Mihi nihilominus, quia in his luculentam accessionem videbis. Et si prioribus malis esse contentus, facile reperies, qui non gravetur loci aliquid in libris suis impertire. De D. Amyraldi cum Clariss. Spanhemio contentione scire te arbitror; uti & illa Mori Genevensis Theologi, cum eodem Spanhemio. Credo jam videris Genevensis Reip. Ecclesiæ, Scholæque testimonia, Moro data adversus Spanhemium: sunt enim in urbe hac excusa. Quæ Amyraldus reposuit Spanhemio, vidi quidem apud amicum; sed in fœderata hac Belgica, unicum tantum exemplar exstat, ab authore ipso transmissum. Miraberis postquam

quam videris. Non Spanhemium modò, sed Cl. Rivetum vehementer culpat, ob literas, quas ad amicos scripserat acerbis. Puto alteruter aliquid reponet; sic sæviunt Reformatæ Ecclesiæ Antistites in mutua viscera. Nec tamen pari culpa, in dispari causa. Tuam, Vir Clariss. in respondendo modestiam non possum non utroque pollice comprobare. Vellem hac in re imitarentur exemplum tuum, qui similes tui Theologos tepidos appellant. Equidem & ipse multis partibus malim talibus annumerari, quàm Zelotis quibusdam, qui omnes suam in sententiam jurare volunt, nisi convitiis, & quovis calumniarum genere malint obrui; scilicet hoc est, *διολογείν*. Mihi perstat animus non degenerare, ab exemplo eorum, qui rectius præverunt; ante omnes foci mei viri nunquam satis laudati. Ac ne putes me solum hîc esse ejus sententiæ, ingenuè dico, magis magisque & Proceres, & Theologos urbis laudari vestræ, qui *θεῖον* illa pertæsi, modestè malunt sapere: quod si esset in Britannia, non Iliada malorum, sed *ἄγασθῶν ἄγαθῶν* haberemus. Intellego in urbe Bremenfi esse Cl. Goldasti Bibliothecam. Quod si est, non invitus, mei causa facies, vel amici hominis, qui hoc à me flagitavit, ut puero tradas describendum Manuscriptorum Catalogum, si consequi possis, quo deinde, hîc qui sumus, fiamus participes. Plurimam salutem dicito, Clariss. & amiciss. Doctori Balthazari Willio, item optimo Hermanno Hildebrando. Vale, magne Vir, & amice.

Amstelodami,
iv. Kal. Maias,
cdo Id. xlviii.

Tuus ut suus,

G. J. Vossius.

DXLVI.

Illustrissimo & Generosissimo Erico Oxenstierna, Comiti in Zudermor, L. B. in Nimitho, Dom. in Fyholm, & Tideun, &c.

Illustrissime & Generosissime Comes,

REdeunte ad suos Gothardo Wolravio, Clariissimi Loccenii Privigno, officii mei putavi, excellentiam vestram facere certiore, quomodo in hac ætate senili, non malè valeamus, & porrò etiam animus sit, operam dare, ut Ecclesiæ prosumus, & Reip. Literariæ. Cujus rei geminos hosce libellos, quos mitto, argumentum esse volo: Unus est de Baptismo; alter autem de constitutione Poeticæ, cui adjeci opusculum, de imitatione, ac recitatione Veterum. Vides

me non cessare. Et brevi spero me posse alia mittere; quibus prælum nunc fervet. Omnino plus prope facio, quam possum, quia aliud mihi persuadere vix possum, quàm brevi me à summo Imperatore, vocatum iri in sedes meliores. Quo ut pertingam, in eo totus sum, ut facilius temporis rationem reddam, quod mihi divina bonitas concessit. Nunquam non animo meo, observantur Excellentie Vestræ virtutes, quas miratus sum præsens, nec prædicare unquam desinam. Multum optassem, diutius frui licuisset; sed literæ sunt, quæ absentes faciunt præsentis. Quia igitur pedibus venire ad tam longè distitum non licet, à manibus præsidium petit, ad me quodammodo sistendum; scio qua humanitate es, in bonam partem interpretaberis, hunc adfectum meum erga Excellentiam Tuam: pro qua assidue vota facio, uti & Illustrissimo fratre, regni negotia apud Monasterienses, tanta cum laude tractante, atque imprimis, magno parente vestro; qui & inclytæ antea domui vestræ, & maximè potentissimo Regno, tantum fulgoris, prudentissimis suis consiliis attulit, ut promeritæ ejus laudes titulos omnes exsuperent.

Amstelodami,
cdo Id. xlviii.
postr. Id. Maias.

Vestræ Excellentie, ac
toti familiæ inclytæ
Oxensterniæ, ad ser-
vitia omnia paratiss-
simus,

G. J. Vossius

DXLVIII.

G. J. Vossius, Samueli Sorberio suo, S. P. D.

NEC valetudo, nec occupationes, mi Sorberi, fivere, ut celerius literis tuis responderem. Præterea sperabam, jam aliunde tibi satisfactum esse. Tu tamen urgere non desinis, ut facile intelligam, mei quoque officii esse, ut satisfaciam expectationi tuæ. Præter affectum mutuum hoc requirit amor meus erga avunculum tuum Samuelem Petitem, qui te sic diligit, & cui magnoperè sit obstrictus totus orbis literatus. De *Cynemernis* tamen, & *Trapemernis*, deque *Syphograntis*, & *Trabinoris*, nolim esse sollicitus; quia Morus ipse negat, hæc ex Latina Græcave lingua esse arcessita. Meministi verborum, Lib. 11. *Suspicio est gentem (Utopientium) à Græcis originem duxisse, propterea quod sermo illorum, cætera ferè Persicus, nonnulla Græci sermonis vestigia servet, in Urbium, ac Magistratuum vocabulis.* Solùm igitur Laborabimus de illis, quæ à Græco

N n n

font

fonte derivantur, uno alterove excepto, cuius Origo manifestè Orienti debetur. Quale est *Mithra*: sic enim pro *Mythra* apud Mōrum rescribi debet. Deum hoc significari Morus ait. Nempe verò id lingua Persica, qua Sol sic signatur, Hesychio teste. Is verò Persis Deus, vel unicus, vel summus. Quae de re Lib. II. de Theologia Gentili cap. 9.

Barzanes, ex parte priori huc etiam pertinet, si, ut arbitror, fuerit ex 𐎠𐎢𐎡 *bar*, filius, & 𐎠𐎢𐎡, sive *Zdāns*, hoc est, Jupiter. Ac *Bar* etiam habes in *Bar-Jesus*, *Actorum* xiii. b. Item *Bar-Jona* & *Bartimeus*, & *Bartholomaeus* sive *Bar-Ptolomaeus* malis. 𐎠𐎢𐎡 verò pro 𐎠𐎢𐎡, idem ac *Zēds*. Sed pro 𐎠𐎢𐎡 etiam dixere 𐎠𐎢𐎡; unde hic Alexandrino Chronico, sive fastis Siculis, dicitur Pater Martis. Quem admodum igitur *Maōws* Phrygiis idem ac 𐎠𐎢𐎡; sic Salentinis *Marzanes*, vel potius *Marzanes*, idem ac *zanes*. *Barzanes* igitur Jovis filius: quod nomen aptè impositum Syphograntorum Principi, quia Reges, Principesque, sunt Jovis progenies, si non naturalis, saltem, ut *Alexander Magnus* dicebat, adoptiva. Notum est illud Callimachi in hymnis, Ἐκ Νείλου βασιλεύς *Cynemernos* verò, & *Trapemernos*, non esse vocabula Græcis debita, indicant hæc verba Moris: *Primos quosque dies Cynemernos ipsorum lingua, postremos Trapemernos appellant*. Sic enim locus is legendus non uti reperio in Lovanii editione anni c1b lō lxv. *Primos quosque dies Cynemernos, ipsorum postremo lingua Trapemernos appellant*; sequitur deinde, *quæ vocabula perinde sonant, ac si primifesti & sinifesti vocantur*. Poterat aliquis suspicari *Cynemerinos* scribendum, quasi esset à 𐎠𐎢𐎡 vocabulo, & 𐎠𐎢𐎡, ut ad caniculares dies respiciatur. Alterum item esse ab eodem 𐎠𐎢𐎡, & vocabulo 𐎠𐎢𐎡, puta 𐎠𐎢𐎡 ut brumalis dies attendatur. Sed cessare hæc commenta debent, quando sic voces forent à Græcis, quod noluit Morus; qui alioqui non apposuisset interpretationem, *primifesti, & sinifesti*. Nec sanè explicatio ista convenit Græcanicæ Origini. Neque aliter de *Syphogranti* & *Tranibori* nominibus statuendum: quod si ex Græcia essent petita, non Græcis ea vocabulis Morus explicaret. Nunc prius dicit sonare *Phylarchum*, posteriore, *Protophylarchum*. Inanis igitur operæ sit, nominum istorum ἔτυμα vel à Græcis accessere. At contra *Abraxas*, non à Persis, vel Oriente, est; sed planè à Græcis; nempe ex literis Græcis, ex quibus confit numerus ccc lxx. quot dies habet annus absolutus, quot etiam orbes cœlestes esse tradebat Basilides hæresiarcha Alexandrinus, qui sub Adriano Imperatore vixit, seque jactabat Glauciæ esse Discipulum, qui B. Petri, Apostolorum Principis, interpres fuit. Hic Basilides aiebat, supremum orbem cœlestem, sive

supremam virtutem, ex qua progeniti sunt Dii cæteri, *Abraxas* nuncupari, & hoc nomen dierum ccc lxx. numerum complecti. Ac posterius hoc verissimum esse computatio ostendit; siquidem

A	_____	valet	— 1
B	_____		2
P	_____		100
A	_____		1
Z	_____		60
A	_____		1
Σ	_____		200

Summa 365

Meminere Irenæus Lib. I. Cap. xxiii. Epiphanius hæresi xxiv. Hieronymus Lib. I. Comment. in Amos. Augustinus, Theodoretus, & Damascenus, in iis quæ de hæreticorum fabulis ac sectis scripserunt. In gemma Fulvii Ursini erat *Αβραξ*; sed sic quoque idem manet numerus, quia solum est literæ ξ & σ trajectio. At apud Morum perperam est *Abraxa*, quia sic ducenti anni desint iusto dierum numero. Nunc cætera persequamur, quæ à Græcis esse res ipsa ostendit. Ordini verò literarum insistant. *Achoriorum* populus Utopiensibus dicitur oppositus. Puto rescribendum *Achororum*, *Ἀχῆες* enim, *chori expers*; & *Ἀχῆες*, *expers ῥῆγες*, sive regionis; sicut igitur *Utopia*, ex ὑ & τόπος, quia nusquam est, ut Nusquamiam fortassè possis dicere; sic populus iste, quia nulla in regione degit, verè *Ἀχῆες* nuncupatur. Ac similiter *Ademus* Syphograntarum Princeps, cui nullus *ἄδῆμος*, sive *populus*. Aliter nempe vocem *ἄδῆμος* cepit Morus, quam Sophocles, quando, teste Hesychio, ei *ἄδῆμος* *absens à patria*, ut sic *ἔνδῆμος* opponatur. *Alaopolitarum* par est ratio. Uti nusquam *Utopia*, nusquam populus *Achororum*, nusquam Rex *Ademus*, ita nusquam gens *Alaopolitarum*: quæ vox notat cives ex nullius regionis populo. Est enim constatum ex *πῶλις* *civis*, & *ἄλα*, non quatenus *ἄλα*, idem ac *πῶλις*, sed quatenus est à *εὐρησκῶ* & *λαός* compositum. *Amaurotum* præcipua Utopiensium civitas, interim verò *ἄμῆνους* hoc est *obscura*, quippe hæcenus nulli visa, nec videri quita. *Anemonius* Poeta Laureatus, & ob lauream typho inflatus, atque, ut Maro loquitur, linguæ ventosæ; sanè Homero *ἀνεμώνι*, quasi *ἀνεμώνι*, ab *ἀνεμ* *ventus*. *Anydrus* est flumen, ad quod sita *Amauroti* urbs. Uti nusquam ea urbs, quæ sic in tenebris delitescit: sic nusquam fluvius *ἄνυδρος*, sive *aquæ expers*, quæ Græcis ἰδῶς. Nam quomodo fluvius sit, si aquæ sit expers? *Butresca* Moro religiosi dicuntur, qui coelibatum præferant Matrimonio, à *ἑρησκέα*, quo cultus significatur religiosus, & *βῆ ὁρίστηκῶ*, ut in *βῆλμ*, *βῆπας*, & similibus. *Butresca* igitur valde religiosi. *Hylodæus* quia mera narrat mendacia, de Utopiensibus, sic dictus quasi

quasi *nugarum peritus*, vel *nugas edoctus*: à *δαίω* disco, doceor, & ὕδαρ *nuga*; unde cum *φλυαεῖα* subinde conjungitur, & ὕδαρ *idem* terè ac *φλυαεῖν*. *Nephelegetæ*, gens fuisse dicitur pro qua Utopienfes bellum gesserint contra Alaopolitas. Malim autem *Nephelegetæ*; νεφελογενεῖς autem ex nube geniti, hoc est, commentitii æquè ac Poetarum Centauri, quos νεφελογενεῖς & νεφελογενεῖται dixeris, quia ab Ixione ex nube genitidicuntur. Sanè *ἡρόκλῆς* parentem, tūm etiam Ἠρώον *sive prolem* designat ut author Hesychius. *Phylarchus*, φύλαρχος qui & φυλάρχος, *præfectus tribus*. Ut *Protophylarchus* πρωτοφύλαρχος, *tribubus præfectorum Princeps*. *Polyleritæ* ἀπὸ τῶν πολλῶν λίθων, quia λίθες sint ac *nugæ* quæcumque, sive *Hytlodæus*, sive *Morus* hoc de populo narret. *Tricius Apinnius*, quem Hytloedæus fodalem suum vocat, non aliud nomen habere debuit, quàm tale. Nam uti ille ab ὕδαρ & φλυαεῖα dictus, sic hic à *triciis apinisque*, hoc est, ὕδαρ ac λίθους *Martialis Apophoretorum Epigram. i. sunt Apine triceque, & siquid vilius istis. Zapolitæ*, qui quingentis millibus distare ab Utopiensibus dicuntur, potiùs *Zapolitæ* vocandi, à πολιτῆς *civis* & ζᾶ, quod in compositione augget: sicut in ζαυδῆς, ζᾶδε, ζᾶπλῆς. Est igitur *populus civibus abundans*. Spero me istis satisfecisse petitioni tuæ. Nisi quod fortasse judicabis, subinde quædam feliciter minùs composita videri, si hoc pacto vocabulo interpretemur. Non diffiteor; sed nos non possumus præstare culpam *Mori*: sanè ne ipsa quidem vox, *Utopiæ* satis commode conficta. Dequo si ambigis, sponsores pro me dabo summum virum Ivonem Villiomarum *Aremoricum*, hoc est, *Josephum Scaligerum*, animadversionum in controversos Titii locos lib. x. cap. ix. ubi sic scribit: *Verbum Utopia, quamquam ab ornato, & docto viro, Anglo confictum, tamen Græcum non est. Et qui Utopiam Græcum putant, ii quid sit Græca componere nesciunt*. Ac memini idem à me dictum olim, in iv. Oratoriarum partitionum cap. i. Postremò quærebas, utrum in præfatione *Mori*, cum dicitur, *Joannes Clemens, puer meus filius, an famulus* designetur. Planè famulum censeo; sic enim Græcorum exemplo, loqui Romani solent, etiam antiquissimi, quorum est, *Marcipor*, pro Marci puero, hoc est servus, familiaque, *Publipor*, *Caipor*, atque alia de quibus fusè dixi, *Commentariorum Rhetoricorum* lib. iv. cap. xii. §. iv. scribebam ipsis Kalendis Januariis ineuntis anni cdo lxx xliii. quem annum felicissimum tibi, studiisque tuis exopto. Atque idem precor, tum clarissimo Riveto, quod tu per occasionem ei significabis; tum eximio Petito, quem meo etiam nomine, si quando scribas, plurimùm salutes rogo. Ipse id nunc facere decreveram, sed per Ta-

bellarium non licebat. Et sciebam te avidè adeo desiderare responsum nostrum, ut malis literas ad avunculum differri, quàm ut propterea injiceretur mora epistolæ ad te nostræ. Iterum vale.

Amstelodami.

DLXIX.

Nobilissimo Reverendo, & summo viro, Joanni Forbessio, Domino à Corse, S. Theologiæ Doctore eximio, inque Academia Aberdoniensi, ejusdem Professori. G. J. Vossius S. P. D.

NON dubium est quin omnibus, veritatibus ac concordie amantibus, dolorem adferat maximum, quod antiquæ toties repullulent hærese; quandoque etiam succrescant novæ, & olim inauditæ, nec minus veteribus illis sectis veritati adversæ & paci. Cujus rei causam esse præcipuam arbitror, quod qui animum adplicant ad legendum S. Literas, magnam id partem faciant, vel cum stulta ingenii sui fiducia, vel præjudicio ab iis profecto, quos per omnia sequi sibi proposuerint, vel ab animo haut aliter eas interpretandi, quàm iis locis, ubi degant, conducibilius videatur, ad consequendum, vel retinendum mundi bona. Quomodo adfecti parum cogitant, Scripturas non esse Scripturas, quoties alio intelliguntur spiritu, quàm sunt scriptæ. Nisi igitur de infœlici eorum grege esse velimus; quemque veritatem magis amare convenit, quàm seipsum; ac ante omnia quidem scrutandum, quid Deus dicat in verbo suo: sed ne perperam illud interpretemur, quando omnes ad errorem sumus proclives, attendere etiam debemus, non modo quid unus & alter, sed omnino quid constanter docuerit Ecclesia Dei. Quantoperè enim repugnat perspicuitati Scripturæ, si ita exarata credantur, ut, ab Apostolorum excessu, ne in præcipuis quidem fidei capitibus, ipsi eas Ecclesiarum doctissimi ceperint Antistites? Quantum item adversatur bonitati Dei, & amoris erga nos, si per tot sæcula, ad Scripturarum intelligentiam, defuisse statuamus Spiritum Dei, viris licet pietatè, & sanctimonia præcellentibus, Ecclesiæque semper commendatissimis, atque eò melioribus, quo Apostolicis propiores erant temporibus? Nec ignoro, dicta hæc nostra parùm descendere in animos multorum, quia videant etiam ad antiquitatem provocari, in causa deploratissima. Qui cogitare debebant, nisi isti hospites forent in veterum lectione,

non

non tam futilibus motum iri. Viderent enim bellos hosce provocatores, incassum jactare antiquos, præterquam apud Vetustatis nescios, qualibus seos facile sublinere posse sperant. Cæteri autem, qui historia Ecclesiæ sunt exculti, nullo negotio cernunt opiniones eas, quas frustra venditant pro antiquis, si non heri, vel nuper natæ sint, plurimum saltem cœpisse demum anteduo, tria, vel summum sex septem secula, vel non multo amplius. Ut obducere illis liceat hoc Optati Milevitani lib. 6. Quæ est ista nova, & stulta sapientia, novitatem quærere in visceribus Vetustatis? Quis verò non fateatur, præscriptione istiusmodi, multum firmari animos nostros, in genuina Scripturæ interpretatione: Validius quoque, munitiusque hæreses refelli? Quare hoc armorum genere, semper pugnatum fuit à S. Patribus: qui præcipuè quidem se tuentur, Scripturæ autoritate; nec tamen prætereunt priorum temporum consensum. Hoc luce clarius est ex iis quæ differunt adversus. Marcionem, Valentinum, & his æquales: item Samosatenum, Arrium, Macedonium; nec minus Pelagium, Nestorium, Eutychem; ut præteream hæreticorum cæteros. Vellem ista adtenderent, qui territi diffusio adeò, ut aiunt, Ecclesiasticæ antiquitatis oceano, propterea, veteres Theologos non legunt; & quia negligunt, nesciunt; & postquam ignorant, aspernantur; ac ne temere contemnere, vel soli nescire videantur, etiam traducendo illos, complurium animos ab iis abalienant. Tanti mali fons, caputque est, otii amor, ac laboris fuga; dum non satis cogitant, certissimum illud Aristotelis effatum in Nicomachiis, artem ac virtutem, versari circa id quod difficilius est. Et tamen difficultatem illam, de qua tantoperè queruntur, multum leniat rectus studiorum ordo, & hoc omni historiæ innatum, quod delectat, & assidua ingentis boni cogitatio, quod ex historia Ecclesiæ, veterumque Theologorum lectione, ad nos redit; hîdem fecerint, vel solius Magnæ Britannię vestræ, vel etiam nostræ, tot Theologi summi: Ante omnes *κερμῆλον* illud hominis Joannes Juellus Antistes Sarisburiensis. Quis enim è Conciliis, vel Doctoribus (quotquot primis fuere annis sexcentis) non animosius modò, sed doctius quoque, vel felicius impugnavit adversarios? Non defuere quidem, quibus hoc disputandi genus minus probaretur; sed præstantissimi etiam Whittakeri iudicio, timidiore hi fuere, quàm necesse erat. Poteram & alios subdere magno numero; semper enim Britannia abundavit Theologis, ut Scripturarum, sic antiquitatis etiam intelligentissimis; sed ut de iis plu-

ribus, brevis instituti non finit. Ad te itaque venio, eximie Forbessi, qui uti habuisti antea, quem sequereris, patrem tuum *† μαργεῖλιν*, Patricium Forbesium, Episcopum Aberdoniensem, virum unde quaque doctissimum; ita ipse deinceps, in hoc antiquitatis studio Patriæ præibis, ac cunctis amantibus rectam studiorum viam. Nihil me auribus tuis dare, indicio omnibus erit utraque hæc & Theologica, inquam, & Historica Instructio tua, & ille signorum tuorum adpectus, adversus tot infesta Hæreticorum agmina. Quem equidem nescio, utrum comparare velim Phalangi Macedonicæ, an aciei Romanæ; sed huic potius, quando (quod defuisse Phalangi Polybius ostendit) copiis tuis semper erit locus, sic armorum viribus, sic scientia, atque arte instructis, ad nullum non pugna genus. Habet igitur sacra Musis adolescentia, unde melius sapiat, dum videt eos, qui sic avocant ab antiquis, sibi semitam non sapere, licet aliis monstrant viam. Habet quoque media illa, ac constans ætas, quò accendatur deinceps ad studium antiquitatis, si prius neglexit; vel si serum id putet, saltem ab alienis videre oculis adfuescat, ubi nequit suis. Habent denique etiam, in veteribus Theologis subacti, unde proficiant: Imò si ipsi pariter bene mereri de hoc studio volent, non deerit hinc exemplum, quod scribendo æmulentur: quo ita magis & magis gliscat Historiæ Ecclesiasticæ honos, ac fructus. Vides ut quod nostrum sit, de laboribus tuis iudicium, non pigritum fuerit memorare; ac confido idem omnes uno ore dicturos, quorum palato antiquitas sapit. Etsi vero nunquam tam feliciter agatur cum Ecclesia Dei, ut etiam boni omnes per omnia conspirent; confido tamen, etiam ex iis qui antea dissenserint, hîce tuis lectis, conventuros non paucos; saltem in illis Religionis capitibus, super quibus in sex Conciliis Universalibus, vel Africanis etiam, & Arausionensi olim convenit. In iis autem, quæ non ad fundamentum, sed structuram pertinent, non pacem minus consector, quàm amplectar veritatem: ut qui sciam non modò, hæresin vitandam, sed etiam schisma: ac propterea licet ubique grata esse veritas debeat, aliter tamen cum fratribus, quàm Hæreticis, esse disputandum. Utinam verò, Nobilissime ac Clarissime Forbessi, hac cruda ac viridi senectute, pertexere tibi detur, cætera huius operis, auro magis aurei. Hoc ut contingat, rogamus omnes Dominum Deum; cui Ecclesiæ suæ causâ, curæ fore confidimus, & te & labores tuos.

*Amstelodami, 10. Kal.
Sext. 1645.*

C L A

CLARORUM VIRORUM
AD
VOSSIIUM
EPISTOLÆ.

I.

Eximie Indolis Adolescenti, Gerharδο Vossio, bonis literis operam danti, in Collegio Theologico Ordinum Hollandiæ.

S. in Christo Jesu,

Commemoravit mihi, mi Vossi, filius meus, tua in se officia, & quam jucundè, & amicè secum vivas: fuit id mihi per jucundum auditu; sic sanè decet Cœtaneos, & Condiscipulos. Solet hæc jucunda animorum conjunctio in juventute, postea gluten quoddam esse mutui consensus, etiam in ætate adultiore: facit hoc postea ad alendam concordiam inter eos, qui publicis functionibus, in Ecclesia, & Republica præficiuntur. Conjunctionis hujus simul & consensus, exemplum illustre fuerunt, cum alii, tum vero Basilius, & Gregorius Nazianzenus. Rogo itaq, ut cœptam hanc amicitiam, tam jucundam, & utilem, nunquam deferas, sed in ea constanter perseveres; quantumvis filio sis ætate major, & profectu longè superior. Mone igitur obsecro filium meum, ut ordine discat singularum Artium methodos; præcipuè Grammatices partes singulas sæpe relegat: exerceat se loquendo, & scribendo Latinè, ut congrue loqui, & scribere possit. Non negligat etiam studium Linguae Græcæ & Hebrææ suo tempore. Præcipuè ne abjiciat tanquam inutilem & insuavem Librum precum; sed pietatis exercitiis vel præcipuè se oblectet; ita benedicet Deus magis ipsius studiis, & in illa valetudinis imbecillitate, illum confirmabit. Imo si aliud de eo statuisset Deus,

æquiore & promptiore animo emigrabit in vitam meliorem. Si hæc facies, mi Vossi, rem mihi gratissimam præstiteris, & vicissim de te, sicubi possim, benè mereri conabor. Vale, & saluta ex me Edvardum.

Frankeræ

11. April:

Mart. Lydius.

II.

Clarissimo, & eximio Viro, D. Gerardo Vossio, Gymnasarchæ Publico.

Dordracum.

Vir clarissime,

Quam pro ea quam nuper ad me misisti Rhetorica tibi debeam, non aliter intelliges, quam si simul scias quantum omnes illi tibi debent, quorum interest seriò, præstantissimam artem tractare, & semel è plebeis illis naniis abire. Etenim cum ut ubique, ita hic præcipuè, regiam calcaverit viam noster Aristoteles, tamen ut nosti, non juventutem modo, sed plerosque etiam alios, detertere solet, vel obscuritas viri, vel fatalis illa, maximo ingenio βεβηλορία, ut paucis ad hæc sacra aditus pateret: quæ à te ita sublata esse video, ut optarim omnes qui formandis adolescentiæ studiis incumbunt, tuam illam Εἰσαγωγὴν, tanquam προτέλην quædam ἡδὲ μὲλλον τῆς Λειτουργίας μυστικῆς, præmittere, & hinc initium sumere. Quod ut seriò à me scribi scias, parvum tibi munusculum mitto: Maximum cum Alcinoο, Philosopho gravissimo: quorum alter præcipuas quæ apud Platonem sunt quæstiones, divino quodam & suavissimo dicendi genere,

B

exami-

examinat: alter Platonis, Lectorem præparat, & docet. Quam difficile sit in his studiis aliquid præstare, quæ jam prope ignavia quadam nostra sunt sepulta, non ignoras: Multo verò difficillimum est, Latinitate ea donare, quæ simul & scientiam requirunt, & utriusque linguæ non vulgarem peritiam. Certè minus à me præstitum scio, quam optabam: tibi nihilominus & aliis eruditis hominibus, quid de hoc studio nostro videatur ferè expecto. Quare non prætermittes, quin iudicium tuum quamprimum perscribas, & ut amicum decet, candide nobiscum & liberè agas. Vale præstantissime vir, & amicissimum virum Baltazarum Lydium, meis verbis salutabis, cui alterum Exemplar hoc trades; scribere enim ad eum non licebat.

Lugd. Batavor.
Pridie Kal. Jan.
c1515 c vi.

Tui observantissimus,

Daniel Heinsius.

III.

Τῷ Θεῷ Δόξα.

S. P.

Reverende ac dilecte Dom. Frater, cum ea audacia sim usus, ut Eusebium Scaligeri à te commodato petierim, quod ne reculas quidem sed summa voluntate te facturum promittis, jam cistulam meam transmittito, atq; obtestor promptum illud studium, & egregiam animi tui alacritatem me mirifice exhilarasse, ut quæ mihi sinceri tui in me amoris insigne documentum esse possit. De meo erga te non multa dicam, nisi hoc unum quod duplici nomine eum tibi debeam; cum ob pietatem & eruditionem tuam singularem, tum ob foci tui felicissimæ memoriæ D. D. Fr. Junii, summa in me merita, quorum ego, si unquam obliviscar, nimis fuero ingratus. Doctissimum velim me ne voces, nam honorifico illo nomine me indignissimum esse libenter agnosco; sed doctos & pios, ut decet, amo. Inclusi cistulæ meæ duo Chronica, unum illud est quod ex magno Cl. Viri Jo. Scaligeri volumine contexui, quod mihi quantum assequi possum, ipsius videtur esse: alterum est ipsius Eusebii: ut videas me non segniter libris tuis uti, quibus simulac usus fuero, non ingratus, si Deus volet, remittam. Non possum te celare utrumque à S. Scripturæ veritate, & verè magni Viri, foci tui doctiss. verissimis Observationibus, manifeste desle-

tere in supputatione annorum à distracto Regno Salomonis, usque ad occalum Sedekia & Hierosolymorum excidium: quod profecto non possum non dolenter ferre; nam ab illo summæ eruditionis viro D. Jo. Scaligero certe aliquid expectaveram; illum autem in exiguo illo temporis spatio 21 annorum metachronismo peccare, satis puto liquere, si diligenter consideretur, quomodo Spiritus Sanctus annos Regum, Judæ & Israelis inter se conferat, quod in adjuncta hac nostra Tabella, ductu præceptoris heu quondam nostri, putamus factum: Salvo tamen meliori iudicio, neque hoc arroganter à me dictum existimari velim. Videor mihi inaudisse Scaligerum aliquid scripsisse contra Paræum, quod Scriptum si habeas, velim magno ipsius volumini adjungas. Atque his jubeo te salvere, & gratiam Dom. nostri Jesu Christi tibi totique familiæ precor eo animo quo te amo, mi Frater colende & observande.

Non. Decem.
An. 1607.

Totus tuus, ut esse debeo,

Jac. Florianus.

IV.

Gerardo Vossio, Præceptor, & Affini
suo, F. F. F. Junius, S. D.

Neræus, quo frater jamdudum familiarissimè utitur, nuper hunc ad me deferens librum, petiit ut negotium sibi à fratre meo impositum perficerem, & hunc ad te deferri curarem: cumque pluribus, num fratri Casimiro dandus esset, percontari vellem, festinanter abiit. Ego cum hæc à fratre, non sine causa, Neræo in mandatis data esse putarem; malui potius confestim hunc ad te mittere, quam morâ meâ damni aliquid inferre. Potuisssem quidem, ulterius quid agendum esset inquirere, sed quoniam me in Gallorum, h. e. Interpellatorum familiaritatem, ita facile insinuare nolim, ulterius non processi. Quod si Casimiro mittendus est, nescio quid obstat quominus hinc eum ad se deferri voluerit: Sed fortè quippiam est, quod unâ eademque operâ, ad eum deferri debet. Epistolam hanc clausissimè, si animum meum, de scribendo aliquid, quod ad studiorum rationem attinet, non subivisset cogitatio; de qua hæc habet. Nos collegio Græco D. Lonsii nomen dedimus, ex voluntate avunculi Gomari; itaque

que usque ad proximos Caniculares dies, ad Græcas potissimum literas conferemus omne nostrum studium. Hæc ad te scripsi, quod sciam te posse, consilio, aut re juvare me, & velle. Sed de his, quoniam brevi fortè cum matertera ad vos venturus sum, coram plenius agere poterimus. Sororibus si placet, meis verbis salutem plurimam dicito. Vale.

Anno 1608.

Tuus,

Fr. Junius, F. F.

V.

Viro Clarissimo, Gerardo Joanni Vossio, amicissimam salutem.

SOLlicitum te habent Oratoriæ tuæ scio; & quis neget merito? Sed quidam impediunt, quominus operæ pergant. Et quinam isti quæso? Hi ipsi quæis ea cura mandata erat. Bertius decimum octonem jam octiduum servat; misso qui peteret Typographorum servulo, respondit, differendum esse in adventum tuum, totum hoc negotium. Rectè sanè. Huic mandes, si quid rectè curatum velis. Quid si quædam adventum tuum impediunt, nòsne hîc etiam editionem Libri tui differendam putabimus? Quid? Inne, qui hætenus voluit videri omnes chartas Oratorum solus emendasse, inne jam nihil potest, sine te? Sed ne miremur; non tu primus Doctiss. Vossi, cujus ab illo res negliguntur; factus hominis aliena spernit, nec fortè divino viro Literata illa amplius curæ. Ad Templum sapientiæ properat, credo, & ob hoc sibi fortè placet, quod tam pulchrè mores sapientis viri exprimat. Ubi eum compello, homo fastuosus quasi me difflat; & ego non dignus, cum illo loqui, qui & convictor, & in amicitiam receptus, viri longè disparis; quem ille fortè non nimium æstimat, imò & laticulas quærit. Sed O quam non passibus æquis incedit! Quid enim Bertius cum Baudio, infelix puer, atq; impar congressus acti illi. Nec illud tantum, sed & pudorem, quis in eo requirat? dum omnia sibi licere putat, & iis quorum discipulus esse posset, superare cupit. Commodaverat Cl. Badius ei Hermogenem, cum Longino, in octavo editum die quarta (sic enim promiserat) redditurus. Ille tibi dat; cumque ab illo requirerem, D. Vossius habet, inquit, saluta D. Bau-

dium, & simul abit. Ego indigere cum aio: Ille, curabo, ut babeas. Vale. Hæc non dico, quod tu, Chariss. Vossi, eum habeas, non; sed quod ejus non erat, quem post triduum redditurus dixerat, jam tertium mensem, & amplius detinere. Quod si autem Longinum legeris, quæso, ut ubi huc veneris, uti conferas. Etiam rogo te, Doctiss. Vir, ut locos contrarios Rob. Titii, à Lydio petas, eosque conferas, ut cum Ivone Viliom. conferre liceret. Post paucos dies perlegero. Vale & nos ama: Salutat te Vir Cl. D. Badius, mihi amore Pater.

Anno Dionys. 1605.
à Christo nato 1607.

Tuus,

J. Rutgerfius.

VI.

Viro Clarissimo Gerard. Joan. Vossio, Amiciss. salutem nuntio.

NUnciatum mihi hodie est, Vir Clarissime, excessisse Josephum Scaligerum. Quo nuntio, ita consternatus sum, ut etiam nunc vix aliud mihi esse videar, quàm ambulans cadaver, & ut cum Mimo dicam, sepulchri similis. Cogita, quid perdidimus amici ejus; tam invidioso enim vocabulo divinus vir suos appellabat. Cogita, quid Academia, quid universa res literaria. Ego, mi Vossi, præ cateris, casum meum lugeo, quod plus reliquis amisisse videar. Ego Patronum perdidit, & si benè calculum pono, Parentem. Quoties me Filii nomine dignatus est? Quoties, cum publicè literarum Pater esset, etiam privatim meus dici voluit? Dirigebat studia mea, vitam emendabat, monens amicè, quandoque reprehendens, prout medicinam morbus postulabat: ut mihi virendum sit, ne postquam eum amisit, negligentius vivam. Instabat mihi, successus meos urgebat. Quid quæris? Nihil omittebat, quod in Parente desiderare posses. Et ego vicissim eum cultum singulari patrono præstebam, quo majorem nunquam à me requisivit. Itaque hoc effeci, ut ei gratissimus essem: Quidni ita existimem, quoties animo meo obversantur speciosissimæ voces, *Utinam te genuissem?* Quas & sæpius repetisse amici testari possunt; quibus præsentibus, me ostendere solitus erat, adjecto insuper Encomio satis invidioso, *Ecce quem Posteritas vixisse sciet.* Quid quod etiam supremo judicio suo

me persecutus est, legata Bibliotheca parte? Quibus verbis, paucis ante obitum diebus, me adlocutus sit, mea interesse puto, ne ignoretur. Sunt hæc, amice, Ego vobis abeo. Scito te Parentem amissurum. Ita enim tibi persuadeas velim, me non minori erga te affectu vixisse, & victurum porro, quam is cui vitam debes. Et utinam opes mihi concessisset Deus, ut non tam verbis quam re ipsa, ostendere potuissem, quanti te faciam, sed nec fortuna tua id desiderat, nec mea fert. Interim quod solum possum, imaginem vitæ meæ relinquo tibi, quam & recte, & ordine facies, si imiteris, & præmium amicitiae nostræ habiturus es: Partem etiam Bibliotheculae meæ habebis, quæ te mei admonebit. Hæc ipsa verba divini senis, ipsa sunt, è quibus ne punctum quidem periisse scias; quibus largissimas lacrymas mihi excussit; quæ etiam nunc oboriuntur. Itaque vale.

Scribebam Lugduni Bataavorum mestissimus, Die xxi. Januarii, qui erat Mercurii, anno tñs Χειρογρῆς c l o c ix. Excessit nocte, quæ hanc diem præcessit, hora circiter iv.

Tuus

Rutgerfius.

VII.

Viro Clariss. Gerardo Joan. Vossio,
S. D.

EN tibi ταύτην tuum, quod honori Naran feceras: Quod non prius miserim, tute nos excusabis, scio. Non enim occupationes meas, & quam festinandum sit, si ante Calend. Sextil. absolvisse mihi certum sit, ut rovera est. Quadraginta plus minus Oæterniones erunt. Vides, quam præter opinionem, excreverit Liber. Libello δὲ τῷ ἐκφυδισαυτῶν εἰς τὸς δέκα γράφας, quem Tibi dedicatum imus, subjunctum est glossarium trium circiter foliorum, continens eas dictiones, quæ septuaginta duo usi sunt: Itaque Libellus ille, cui unum Oæternionem destinaveram, duo & dimidium occupabit. Isidoro itidem unum destinaveram, at ille quatuor occupabit. Nam Oæternionem unum replebit Εἰσαγωγὴν quoddam scriptum, seu Canones quidam, quos dedit nobis Oraculum illud nostrum, Josephus Scaliger, cujus humanitati quæ debeo, candidè in notis promam. Ita celestis illa, ac divina sublimitas, sese ad hæc officia

aliquando demittit. Certè plurimum est, quod à sacro illo ore oracula petere concessum sit, non ambigua ut Phœbi olim, sed talia, quibus obloqui nemo potest. Sed nimium nos abduxit suaviss. laudum divini Viri campus. Verbum non amplius addam.

Ὁ σὸς δὲ δὲ δὲ τῶς καρδίας,

Janus Rutgerfius.

VIII.

Viro Clarissimo Gerardo Vossio amicissimam salutem.

Iterum hîc sum, mi Domine, cum Scalligero meo. Ita voco; quod ita se vocare apud me non dedignetur. Ad Editionem Libellorum meorum, magnoperè hortatur Heros ille, & notata quadam promittit, hæcenus propter imperitiam Arabicæ Linguae & Historiæ invisa. Quid quæris? Hesternæ die veni in ædes Illustrissimi Viri. In Musæo erat: itaque discessi. Hodie agrè ferre visus est, quod non putaverim quovis tempore aditum mihi patere. Tuus sum, inquit, & volo sic statuas, erisque donec magnus ille Ἀνδρῶν τῶν με ἀ statione hac discedere jubeat. Quid non colat, penè adoret dixeram, tantam demissionem in Viro Principe; in Viro, qui mihi numinis instar. Itaque fovebo amorem hunc, quem in celesti illo pectore, in plebeiam animam miramur. Cæterum ecce Tyrium ab Heinsio tuo, & meo. Rogat ut statim perlegas, & judicium scribas. Vale.

Tuus,

Janus Rutgerfius.

Rogo ut meâ causâ, D. Lydium adeas, rogisque an Luisino suo carere velit, item Leopardo. Pretium persolvam quodcumque tu cum illo transegeris. Non multum ultra duo florenos petet, scio; aut si petat, si tu non nimium esse judicaveris, acquiescam. Vale.

Has literas rogo, ni molestum fiet, ipsi Demestio tradas.

IX.

I X.

*Viro Clarissimo Gerardo Joanni Vossio
S. P. D. Janus Rutgerius.*

Vir Clarissime,

PHarnutum, cujus mentionem, cum istic essem, fecimus, si permutatione pretium non excedente, meum facere potes, velim fiat. Senecam Tragicum, cum amplissimis ipsius Junii manu scriptis commentariis, En tibi. Quod munusculum eo animi candore accipias velim, quo offertur tibi. Vitam *tu uangelis* Scaligeri moliri me alias dixi Tibi. Accepi cum Legatis nostris, literas à Cl. Casaubono, in quibus multa à Thuano *tu ndy*, & Puteanis fratribus pollicetur, quæ isthuc spectant. Mittit nobis muneri Suetonium suum longè auctiorem, adjectis, & Beroaldi, Sabellici, Torrentii, & aliorum, commentariis nuper Lut. receptis in folio. Munus magnificum: incompectus enim xi. flor. pretium excedit. Plura non possum, etiamnum atrocissimo, & certissimo trucidati Galliarum Regis nuncio consternatus. Vale Vir Cl. & nos ama.

Tibi Obligatissimus,

xxi. Maii clo 16 c x.
*Dionys. scribebam
Lugd. Batavor.*

Rutgerius.

Josephi Scaligeri omnia Genevæ in Folio eduntur, secutura mox eadem formâ Julii. Hic Josephi poemata, itémque Seneca Tragicus, cum castigationibus ejus excuduntur. Nugamenta quædam, quæ nuper fudimus, potius quam scripsimus, En tibi; non ut legas, sed instituti mei servandi causâ, quo *tu s plv* meas Tibi obtrudo.

X.

Clarissimo Doctissimoque Viro, D. Gerardo Vossio, Gymnasarchæ Dor-
draceno.

Dorche.

Clarissime Vir, amplexus sum benevolentiam istam in me tuam, quam amicissimis literis tuis, & insuper dono mihi gratissimo, opere nimirum Rhetorico, à te addito, quo me ornandum duxisti, abundè declarasti! Itaque tibi certò persuasum habe, totum me vicif-

sim esse tuum. Nec possim non te amare, propter insignem, quam in opere illo tuo prospicio diligentiam, & elegantem doctrinam; unâque propter pietatem, & virtutem, de quibus ex aliis, qui te norint, audio. Opus tuum legi per intervalla. Video complexum te, eoque quidem methodicè ac perspicuè complexum, omnia illa, quæ ad Rhetoricam artem pertinent. Nec mediocriter me delectat forma sermonis, qua usus es, puri, tersi, ac nitidi, nec diffuentis nimium, nec nimium adstricti. Denique existimo utilem te Operam, hoc labore tuo, te præstitisse studiosæ juventuti, adeoque iis etiam qui docendæ juventuti præsent, atque ideo *tu pndar*, te hujus rei gratia, secuturum esse. Amicitia tua mihi erit gratissima; eamque ita culturum me spero, ut nihil habiturus sis, quod quantum ad fidem, ac studium animûmque in amicitia mutuam attinet, culpare in me possis. Misisses jam *tu ndy*, cum his literis pro munere tuo, nisi fidem suam Typographus fefellisset. Oro etiam ut tarditati huic meæ in respondendo, in quam multæ, ac variæ me causæ, aliæ post alias, longa serie provenientes conjece- rint, ignoscas. Affinis tui Casimiri Junii doctissimi Viri amicitia valdè mihi jucunda est, non solum propter eruditionem, sed etiam propter candorem & pietatem, aliâsque virtutes, quas in eo deprehendo, & propter gratissimam memoriam Clarissimi, ac benè de Ecclesia Dei meriti Patris. Estque mihi dolori, quod non frequentius consuetudine ejus ob occupationes meas penè assiduas uti possim. Vale, Doctissime Vir, & me tuorum in numero habe.

Groninga valde festi-
nanter iv. Cal. Feb.
ann. MDCX.

Tui Obsequentissimus

Ubbo Emmius.

X I.

Insigni & Erudito Viro D. Gerardo Vossio, Dominicus Baudius S. P. D.

Dolui ex animo dolorem tuum, collectum ex obitu lectissimæ conjugis tuæ, sed quoniam hæc acerba calamitas non ex improvîso te oppressit, sed diu jam ante præfagientem id eventurum, nihil in medium adferam unde exulcerata mentes ad sanitatem revocari possunt. Ea tibi ubertim nascuntur domi-
Causa

Causa scriptionis impræsentiarum, est ut tuæ fidei deponam horribile secretum de nostro Rutgerio, quem invasit morbus, non, ut ille ait, qui insputari solet, sed qui homines delirantes concinnat. Varia & multiplex est τέρψις τοῦ πάθους ἰδέσθαι, quo tentari solent etiam ἡρώων πάθος. Complura possem commemorare exempla, quorum oculatus testis fui, & si quis diligenter inquirat, nulla gens hornò & annò fecundius exuberat, quam eorum, quibus non est sanum finciput. Nec illud dico ὡς ἀληθινόν, ut natio ex Chryssippi grege, ac porticu, qui suum solum imaginarium sapientem excipiunt è numero stultorum; ceteros insanire, furere, rabere omnes docent. Loquor humane, & communi more vulgi prorsus, μεταγχαλῶς ἔκ τινος ἀρπής ἐκ τὸν νῦν ἔστω ὁ γυνάδικος. Ei rei multa argumenta fidem faciunt, quæ malo auribus tuis, quam chartis credere. Sed nullum præstantius περικύβητον habeo, quam quod me, quem ἐν πλεῖστοις αἰσῶν, imò supra videbatur amare, atque æstimare, ita ludibrio habuerit, ὡς αὐτὸς ἀ-ψυχὸν πὶ δουροδότημα τῆς τετραγώνου. Rogarat me ut literas ad avunculum Prætozem mitterem, quibus significarem optimo illi viro, esse ipsi volenti habitare mecum, cum antea, non aliam ob causam profectus esset Dordracum, quam ut apud parentes testaretur, non posse se ulterius durare in meis ædibus. Quamquam id officium officiebat dignitati nostræ; tamen adductus prece ejus, & amore suadente, non invitus eo me dimisi. Ille quasi triumphabundus de mea credulitate, jactitavit apud cæteros victores, se pulchrè mihi os sublevisse. Jam enim sibi decretum, quid esset factururus, nec hilum profecturas meas litteras. Postea cum ex pluribus aliis indiciis comperissem, non judicium, sed morbum esse, & quidem eum qui nisi principiis obveniatur, in apertam phrenitidem evadere possit, Hagam me contuli, ut de tota re Dominum Prætozem, certiore facerem. Ille ut rescivit, me isthuc profectum, palam in mensa prædicat, iter hoc à me susceptum, ut precibus exorarem avunculum, ne contubernio nostro divelleretur. Enimverò non ferendam esse duxi hanc insignitam contumeliam nostri, & postremæ sortis arrogantiam. Ut eram recens ex ira, excepi eum atroci jurgio. Ille nihil se de nobis queri, sed uxorem quædam ἀπορρήτως de se dixisse, quæ nullo modo animus ejus tolerare posset. Tandem fatigando impetravi, ut diceret objectam sibi fuisse πωδὲς ἰστίαν.

ἄς μᾶλλον ὃ ἄγχι μὲν ἔχον ἀκρόστα. Repentus explorata reperi nugas meras; esse nec unquam per somnium in mentem venisse uxori tam monstrosam suspicionem. Per ludum, & jocum irrisit fatuam hominis amationem, qui cognatum suum Franciscum de Wit vocare solet suas delicias, suum corculum, etiam in conspectu aliorum, osculari manum ejus, quæ prorsus ridicula sunt, & eodem tendunt, ut scilicet, evincant eum non esse incolumi capite. Sed manum tollo de tabula, invitus enim hæc scripsi; quæ lapidi dicta esse cupio. Vale, & me ama.

XII.

*Virtute & Doctrina ornatissimo Viro,
D. Gerardo Vossio, Præceptorī meo
in perpetuum colendo, S. P. D.*

A Quibus beneficium accepimus, in iis vicissim beneficia pro beneficiis referre debemus. Non omnes hoc faciunt, ac ne facere quidem possunt; quorundam enim res ita in arctum coactæ, ut præter animum cupidum hoc præstandi vix aliquid ultra habeant. Nec tamen hi ingrati. Non enim ii tantum ab hoc vitio alieni qui beneficia accepta ad æqualem lancem refundunt, sed & hi qui beneficium agnoscunt, & offerendo non quod meritum creditoris exigit, sed quod fortuna tenuis permittit, plus se debere quam posse ingenuè fatentur. Danda ergo opera sedula iis qui ingratitudinis notam effugere volunt, ut si non prioribus accenseri, saltem in posteriorum numero esse possint. Ego certè hoc studui, dum me gratum T. D. probare annitor, id quod semper facio & debeo. Conscius enim mihi sum, Præceptor Reverende, quantam diligentiam erga me præstitisti in communicatione doctrinæ, & ad virtutem assuefactione, nec me hoc latet quam istis mente recensendis, nedum re ipsa referendis impar sum. Animo igitur reputans mecum gratorum quidem esse gratiam pro gratia referre, proximum autem ab his locum eos qui beneficium agnitum quoquo modo testantur tenere, hæc Theles (ut & priores meas) T. D. in debita gratitudinis signum offerre volui; nec me quo minus hoc auderem deterruit, quod sint exiguæ ut numero, sic opere. Satiùs enim putavi tenuitatem meam in apertum producere, quam in crimen ingratitudinis incurrere. Quocirca

ea igitur P. R. audentiore instituto ventis vela commisi, ac Theſes Metaphyſicas conſcripſi, DE PRIMO INCREATO DEO GLORIOSISSIMO: Ut de iis diſputantes, aliquid virtutis commodum aſſequamur. Quod ut multum nobis *νεωπύτοις* adferre adjumenti poteſt, in confirmanda veritate hujus Articuli DE DEO: ita plurimum ad vaſorum hæreticorum panurgiam & fucum detegendum. Videmus enim quantis mendacii ſtrophis C. Vorſtius conetur illudere veritati, præſertim cum auſus ſit dicere, Deum ſua Eſſentia non eſſe undiquaque præſentem, argumento hinc ducto, quoniam ſi Deus eſſet præſens in cloacis, in locis ſordidis, commacularetur ac conſpurcatur. O quantam hic hujus Viri videmus ignorantiam ac cæcitatem! qui nobis corporeum quendam Deum fingit: Fortaſſis ſi Vorſtius ipſe conjiceretur in aliquo loco ſordido aut cloaca, egregiè ſane commacularetur, idem etiam verum putat eſſe de Deo, quia omnipræſens eſt. Exemplo ſit nobis Sol, qui radios ſuos in omnibus locis ſpargit, nec tamen conſpurcatur. Sed hæc mitto, ne te P. R. (quem ſcio aliis negotiis diſtractiſſimum) amplius morer. Unum tantum hoc addo, ſi mihi vita ſuperſtes fuerit, plura & meliora (Deo volente) brevi, per me elaborata dabimus. En igitur P. R. amoris magni parvum *μνησθῶμεν*, perpetuum gratiſſimi ſubjectiſſimique animi ſymbolum:

(*Donec quid grandius ætas*

Poſtera, ſorſque ferat melior)

Non dubitans quin animo lætiſſimo accipies, exemplo Artaxerxis Perſarum Regis, qui (ut ſcriptum legimus) non tam donum quam donantis animum exoſculatus eſt. Vale P. R. & ſi quid liberius ſcripſero, boni conſule.

Franeſera Friſorum
Calend. Januar. anno
elo 10 c xv.

T. D. Obſervantiſ.

Franciſc. Mantæus.

XIII

Clariffimo & Doctiſſimo Viro, D. Gerhardo Joanni Voſſio, Scholæ Dordrechtanæ Reſtori meritiſſimo, S. P.

Non ignorare Te arbitramur, Clariffime & Doctiſſime Vir, Theologiæ profeſſionem in Schola noſtra illuſtri, ob Doctōris Hermanni Ravenſpergeri, ad novam Academiam Gronin-

genſem, diſceſſum, hætenus aliquândiu vacuum, & quaſi viduam fuiſſe. Cum autem à Nobis, quibus Scholæ cura, & adminiſtratio, ab illuſtri Magiſtratu noſtro commiſſa eſt, diu multumque de alio Theologiæ Profeſſore vocando deliberatum fuerit: tandem præ aliis, tua perſona, ob inſignem eruditionem, & ſolidam orthodoxæ Theologiæ ſcientiam, quæ partim ex præclaris ingenii tui ſectibus in lucem editis, partim ex aliorum rectè judicantium commendatione, nobis innotuit; digna viſa fuit, quam Illuſtribus, ac Généroſiſſimis Comitibus Bentheimenſibus, Dominis noſtris Clementiſſimis, de meliore notâ commendaremus. Quâ etiam re effectum eſt, ut illuſtres ipſorum Généroſitates, ex ſingulari, quo omnes literatos Viros complectuntur, favore, & amore, in tui ad profeſſionem Theologiæ in Schola noſtra vacantem, vocationem clementer conſenſerint. Itaque ex voluntate prædicti Magiſtratus noſtri, provinciam illam ſanctam & honorificam, jam tibi offerimus: utque eam oblatam prompto animo ſuſcipere, & obire non graveris, etiam atque etiam rogamus. Moveat te ad vocationem illam ſequendam Dei præpotentis, cujus divina providentia ea procurata eſt, voluntas, quâ ipſe operarios in vineam ſuam emittere ſolet. Moveat te illuſtrium & généroſiſſimorum Comitum Bentheimenſium, bona & gratioſa erga te voluntas. Moveat te præclarum & honorificum Senatus noſtri de ſtudiis tuis ingeniiſque dotibus iudicium, ejuſdem humanus, & benevolus in te affectus. Moveat te Scholæ noſtræ ſalus, & incolumitas, quæ ſine Theologiæ Profeſſore, diu conſiſtere non poteſt. Moveat denique te loci hujus ſalubritas, & amœnitas, annonæque in eo facilitas, cum omnium rerum ad Oeconomiam neceſſariorum ubertate conjuncta. Quò meliùs autem Scholæ noſtræ ſtatum, aliâſque loci, & functionis circumſtantias coram perſpicias, & cognoſcas, majorem in modum petimus, ut abjectâ omni morâ & cunctatione, cum præſente Tabellario, Scholæ noſtræ ſumptibus ad nos excurrere, aut ſaltem primo quoque tempore, cum periculum haud exiguum in mora ſit, tum ad nos adventum accelerare non graveris. Ita enim, & de ſtipendio, & de aliis rebus ad profeſſionem Theologicam pertinentibus, commodior ſeſe offeret colloquendi tecum occaſio; & ipſis ſtudioſis abicuriſſimis majora allectamenta, & incitamenta,

incitamenta, ad continuandum in Scholâ nostrâ studii sui Theologici cursum suggerentur. Nos etiam vicissim de te benè mereri studebimus, eâque humanitate & benevolentia te advenientem accipiemus & amplectemur, ut neque itineris suscepti, neque amicæ conversationis nostræ te unquam pœniteat. Bene vale, Vir præstantissime, cum omnibus tuis, quibus cœlestem juxta, & terrenam à Deo benedictionem animitus precamur.

Steinfurti xv. Febr.
Juliani, anno à natō
Christo Servat.
nostro cō dō c xv.

M. Clemens Timplerus
pro tempore Prætor,
nomine totius Collegii
subscripsit. M. P.

XIII.

Viro Clarissimo Conrado Vorstio S. P.

Diu hætenus, Reverende ac Clarissime Vir, Schola nostra novum Theologiæ Professore, & quidem diversis in locis quæsit. Sed nondum eundem ex animi sententia invenit & nacta est. Causa hujus rei videtur esse voluntatis in iis qui vocati sint partim inconstantia, partim perversitas; quippe qui vocationes non tam publici commodi, quam privati sui honoris & lucri amplificandi gratiâ appetunt, easdemque oblatas ex prætextu causæ nescio cujus recusant & repudiant. De Vossio, quem Aulæ nostræ commendasti vocando, jam diu à Senatu nostro deliberatum fuit; sed propter suspiciones quasdam sinistras, quibus à calumniatoribus præter meritum gravatus est, hætenus consensus à reliquis Comitibus Bentheimensibus impetrari non potuit. Nunc autem dissipatis ejusmodi calumniarum nebulis, præter spem & opinionem, Deo ita dirigente, in Vossii vocationem tandem illustris Magistratus noster consensit. Itaque nihil amplius restat, nisi ut is vocationem oblatam prompto animo amplectatur & sequatur, nullâque interpositâ morâ sumptibus Scholæ ad nos Steinfurtum excurrat: ut ita melius coram totum Scholæ statum, singulâque functionis & loci circumstantias, exploret & cognoscat. Quâ in re, rogo nomine Collegarum, ut ipse Scholæ nostræ causam serio & sedulo agas, bonôq; illi Virô ad capeffendam illam provinciam iterque ad nos instituendum suavis, hortator & instigator. Nisi enim is maturè ante ferias Scholasticas ad nos

venerit, verendum est, ne malevolorum hominum obtreactionibus cæterorum illustrium Comitum in vocationem ipsius consensus, intervertatur, ac studiosis Theologiæ, qui hætenus diu Professore magno desiderio expectârunt, discedendi ex Schola nostra ansa præbeatur. Imprimis verò moneas ipsum ut iter ingressus recto tramite Steinfurtum cum præfenti Tabellario proficiscatur; neque vel Bentheimiam vel Schüttorpium sese recipiat, antequam generosum nostrum Comitum salutaverit ac compellaverit.

Hoc enim è re Scholæ videtur fore, & ad removenda omnia obstacula appositum. Cætera divinæ providentiæ & tuæ prudentiæ committo. Bene vale, Vir præstantissime, unâ cum uxore & liberis charissimis, quibus salutem plurimam omnes Collegæ & mecum uxor mea animitus dicunt.

Tuus omni studio amicus

Steinfurti xv.
Febr. Juliani
ann. cō dō c xv.

& Compater,

M. Clemens Timplerus.

XIV.

Clarissimo Doctissimoque Viro Gerardo Joanni Vossio S. P.

Literæ tuæ, Clarissime & Doctissime Vir, pergratæ nobis fuerunt; tum quod luculentam humani & benevoli tui erga Scholam nostram animi declarationem exprimebant; tum quod tui ad nos adventus spem non vulgarem nobis faciebant. De utroque plurimum nobis gratulamur, tibi que gratias habemus, & agimus maximas. Et quoniam ipse pro tua prudentia intelligis, vocationem illam, quæ nomine illustrium & generosissimorum Comitum Bentheimensium nuper tibi oblata fuit, esse divinam, sanctam & præclaram, eamque jam Scholæ nostræ conditionem esse, ut sine maximo detrimento Theologiæ Professore diutius carere non possit; majorem in modum te per Dei gloriam & Scholæ salutem rogamus & obtestamur, ut nulla amplius morâ interpositâ cum præfenti Tabellario, sumptibus Scholæ iter ad nos instituere, nostrôque voto & desiderio satisfacere non graveris. Gratissimus eris nobis omnibus atque exoptatissimus hospes; nihilque nobis erit prius & antiquius, quam ut omnibus modis de te bene mereri studeamus.

Bene

Bene vale, Vir præstantissime, cum tuis, & ut viva nos epistola primo quoque die exhilarēs, etiam atque etiam cura.

Steinfurti XVI.
Martii Juliani
Anno à nato
Christo
c160cxv.

Nomine Senatus Scholastici

M. Clemens Timplerus

pro tempore Prorektor
scripsit & subscripsit.

XV.

Reverendo & Clarissimo Viro Domino
Conrado Vorstio SS. Theologiæ Do-
ctori, & Professori Goudæ, Salutem
à Deo per Christum Jesum, Serva-
torem Nostrium.

EXtrema scholæ necessitas, Reverende & Clarissime Vir, Amice, & Compater honorande, postulavit, ut denuò tabellarius, unà cum literis Senatus nostri, ad Dn. G. Vossium fuerit mittendus, ejusque ad nos profectio omnibus modis urgenda. Jam enim ut scis, feriæ scholasticæ imminēt, & exigunt, ut novus Læctionum æstivo semestri habendarum Catalogus conficiatur: In quo nisi Theologiæ studiosis futuri Professoris, & Læctionum ab eo habendarum, spes aliqua fuerit facta: Metuendum est, ne omnes hinc discedant, & sic magnam scholæ nostræ cladem inferant. Ut igitur huic malo, quantum fieri potest, occurratur, opus esse judicavimus, ut D. Vossium, ad amplectendam vocationem oblatam, suumque ad nos adventum accelerandum, amice hortaremur. Ac ut voti nostri, eò certius & citius, compotes fiamus; majorem in modum petimus, ut ipse pro tua prudentia, scholæ nostræ causam, ut hætenus, ita etiam nunc, diligenter, & fideliter agere non graveris: Nominatim verò procurare, ut Dn. Vossius iter ingressus, directè per Gronaviam, Steinfurtum se recipiat. Quod si etiam est alium quemdam fidum comitem, præter Tabellarium præsentem sibi adjungere voluerit; hoc ipsi liberum relinquimus, & sumptus ei à schola omnes refundentur. De Doctore Gigante in integrum restituendo, nulla amplius spes est. Intellexi enim Generosos nostros Comites, Doctorem Freidagium, Medico Osnaburgensi, hanc conditionem privatim, infcio senatu scholastico, ante aliquot septimanas obtulisse.

Utrum autem eam suscepturus sit, incertum adhuc est: & num è re Scholæ futurum sit, eum qui religione Lutheranus est, & Mathematica non callet, in Professorum ordinem recipere, tibi judicandum relinquo. Quod si Dn. Freidagius, vocationem oblatam recusaverit; equidem eam Doctori potius Neuhausio, tametsi is quoque in Mathematicis non sit exercitatus, quam alii ignoto præsertim Calvinistæ rigidiori offerri cuperem. Sed neque ego, neque quisquam ex senatu nostro, quicquam operæ ad promotionem illam procurandam conferre possumus: cum Aulam Comitum Bentheimensium, minus faventem habeat. Doctor Gigas Monasterium suæ praxis medicæ sedem, & Officinam elegit. Quam ibi fortunam expecturus sit, tempus docebit. Doctor Maternus Electori Brandenburgico operam suam addixit. Quæ vero ipsius sit conditio, & quo in loco, ignoro. Quamprimum ad me scripserit, dabo operam, ut petitioni tuæ satisfaciatur. Uxor mea adhuc infirmæ & dubiæ est valetudinis. Spero tamen Deum, tandem mei, & meorum misertum, ipsi firmioris sanitatis usuram concessurum esse. De novis nihil certi habeo: nisi quod de bello, passim varii, & tristes rumores sparguntur. Benè, & feliciter vale, vir præstantissime, unà cum uxore, & Liberis charissimis: quibus omnes Collegæ mei, necnon Uxor mea, salutem plurimam adscribunt.

Steinfurti xvi. Martii Juliani Anno à nato Christo c160cxv.

Tuæ Reverendæ dignitatis studiosissimus,

M. Clemens Timplerus Compater:

XVI.

Clarissimo doctissimoque Viro Ger. Joanni Vossio S. P.

HAbes hic alterum Tabellarium, vir clarissime, ab illustri Schola Steinfurtenfi ad te missum, ut eò te deducat, si modo animus tibi est locum saltem videre, & Spartæ, quæ offertur honestissima, rationem omnem, cum annexo fructu, coram cognoscere. Ut videas, quanto tui desiderio illic flagrent, literas amici unius atque alterius, ad me datas, tibi legendas mitto; eâ lege, ut per hunc hominem retromittas, nec mihi fraudi esse permittas, tam fidenter & apertè tecum

hæc talia communicasse. Nisi ex aliorum relatu quadantenus te nossem, non sic agerem. Tuae prudentiæ erit, ne hoc quidem aperire, nisi fidissimis tuis, quidquam ad te scripsisse. Nam siue vocationem illam complexurus es, siue omisurus, è tua re non minus quam mea fore videtur, ne vulgo huius aliquid innotescat. Inaudivi aliquid de alia vocatione Leidenfi, jam aut delata tibi, aut saltem destinata. Hanc, si Steinfurtenfi præferes, quod facturum te iuspicio, officii tui fuerit aperte mentem tuam nobis exponere; ut alibi sibi mature prospiciant (quod ægre jam fiet) qui priores te vocarunt. Si coram tecum agere mihi daretur, tuque fidere sermoni meo velles, fortè ut priores istos lequereris, tibi persuaderem. Nunc Deo, & tibi soli, rem committendam putq; amanter interim te rogans, ut saltem iter illuc tuum, quo vocaris, dirigere non graveris, & præsens cum præsentibus Comitibus & Professoribus, de negotio toto tractare. Sic enim plenius statuere tecum poteris, utro in loco fructuosius Domino Jesu Christo, & Ecclesiæ ejus servitutum tu speres. Deus tibi salutare consilium adspiret, & eventum largiatur suo nomini gloriosum, quem veri boni rebus aliis omnibus auferre debeat, & soleat. Vale, Vir Clarissime, hætenus quoad faciem ignote, deinceps melius, si placet, & in Domino & in facie noscende. Cras sub vespæram responsum tuum expecto.

Goudæ Prædie Calendas
Aprilis, Anni 1615.

Tuus in Christo

Conr. Vorstius

Doctor.

XVII.

Doctissimo Viro Ger. Joanni Vossio.

ITa est, ut scribis, Vir clarissime & doctissime, In utramque partem rationes non leves occurrunt, quæ in hoc ad Theologicam professionem vocationis negotio animum tuum impensè dubium & perplexum reddunt. At quoniam in literis tuis postremis non omnem plane tui ad nos adventus spem nobis adimere, sed plussculum duntaxat ad deliberandum temporis poscere videris: nostrarum partium esse duximus, non illico de vocationis illius divinæ successu desperare: sed duce Dei providentia ex parte nostra omnia tentare & agere, quæ tum ad te permovendum,

tum ad schola nostræ utilitatem promovendam conducere videntur. Quam ob causam etiam Clarissimum Virum Dn.M. Georgium Brinckhofium Logicæ Professore & Pædagogetarcham, Collegam nostrum honorandum ad te ablegare volumus; ut coram tecum de omnibus rebus ad hanc causam scitu necessariis fusè & distinctè colloquatur, omnesque tum itineris ineundi, tum vocationis amplectendæ difficultates, quantum fieri potest, removere studeat. Ei igitur ut perinde, ac toti Senatui Scholastico, in omnibus fidem habere, ipsiusque rationibus locum dare velis, magnopere rogamus: Deum interim præpotentem votis seriis & piis invocamus, ut ipse totum hoc negotium ad sui nominis gloriam, ad Scholæ nostræ incrementum, tuamque ac tuorum omnium utilitatem ac salutem dirigere dignetur. Cujus divinæ providentiæ ac tutelæ, te quoque, Vir excellentissime, unâ cum tuis plurimum commendamus.

Steinfurti iv. Nonas
Aprilis Juliani An-
no MDCXV.
c15 1615.

M. Clemens Timplerus
Prorector

Nomine totius Collegii
scripsit & subscripsit.

XVIII.

Clarissimo, Doctissimoque Viro, D. Magistro Gerardo Vossio, Illust. Ord. Collegii Theologici Regenti dignissimo.

SCripfi Tibi, R. D. Compater, ante abitum meum in Walacriam, unâ cum literis publicis, quas pro Guilielmo Nicolai procuravi; simulque interrogavi, an non sufficeret, ratione muneris mei publici, chirographo proprio polliceri, sumptuum restitutionem, si filius non perseveret in studio Theologiæ: an vero publico Notarii instrumento sit opus, quale pro Nicolaide nostro misi; de quo adhuc responsum tuum expecto, ut ad feriarum istarum finem, filium meum ad vos mitam. Quanquam enim ex Walacria rediens, rumusculos quosdam subaudi, de te sparsos, ex inconsiderato quorundam zelo: Illis tamen minimè moveor, quo minùs filium meum, fidei, ac disciplinæ tuæ committere cupiam. Et tamen pro ingenuâ, & sincerâ inter nos amicitia non potui, quin te eorum, quæ de te sparguntur certiorerem redderem. Sunt inter studiosos (ut ab aliis intellexi) qui dicant

dicant se tecum contulisse, de hodiernis controversiis, teque variis argumentis propugnasse sententiam, de Electione conditionali, gratiaque universali: quin & scripto quodam, quod jam in studiosorum manus pervenerit, explicuisse te sententiam tuam; Et levirum tuum D. Junium, hoc de te aperte testari inter studiosos, quam magis tibi arrideat, sententia Remonstrantium, quam nostra. Hæc tibi R. D. Compater, indicare volui, non quod hujusmodi rumoribus fidem adhibeam, (novi enim quam sint præcipitia his temporibus quorundam judicia, quam virulentæ quorundam linguæ, quam inconsideratus zelus) sed ut tanto magis caveas, ne ullam talibus calumniis, & pravis de te judiciis, occasionem præbeas, neque de his rebus conferas, nisi cum iis quos nosti eo pollere iudicio, & ea eruditione præditos, ut mentem, ac sententiam tuam, rectè assequi possint; Et si quid sit, in quo tibi videantur Doctores Orthodoxi non satis accuratè tetigisse, aut explicuisse veritatem, de eo iudicium tuum suspendas; donec assiduâ, & diligenti S. Scripturæ perscrutatione, affecutus fueris ipsam Spiritus Sancti mentem.

Multa enim sunt in quibus, Viri etiam doctissimi, non satis attendentes phrasibus S. Scripturæ, & plusculum tribuentes Antiquitati & Autoritati Patrum, qui post Apostolorum tempora vixerunt; facile à puritate illa sermonis Apostolici deflectant, & aberrant. Quod Ego quidem non ita te monitum velim; quasi dissidam industriæ tuæ, in studio veritatis constanti, & indefesso: sed ut videas, quam sim honoris tui, & existimationis apud omnes bonos, & pios studiosus. Vale mi R. D. Compater, & me tui amantissimum, mutuo amore prosequi, ne unquam desine, meamque hanc scriptionem, ut ex sincero pectore profectam, æqui bonique consule. Salutem adscribo uxori tuæ. Salutat etiam vos mea, & intra paucas hebdomadas, filium isthuc deductura, vos spero, salutabit coram.

Datum Dordr. Id.
Aug. 1619.

Tuus tuique Observan-
tissimus,

J. Becius.

XIX.

Clarissimo, doctrinâ & virtute Præstantissimo, Dn. Gerhardo Vossio Illustris. Ordin. Regenti dignissimo.

Leydam.

S. P.

Benè & laudabiliter agis, Vir Clarissime, quod non tantum amicitia inter nos, recens contractæ cultor es constans; sed etiam scholæ nostræ fautor adeo benevolus, ut propensam tuam voluntatem, ardensque studium, de ea benè merendi, signis non obscuris, sed luculentis declarare, & testari pergas. Commendasti mihi, & senatui nostro scholastico, D. M. Winandum Rutgersium, ut Philosophum, ita Theologum notæ non vulgaris. Illa commendatio apud illustres, & generosos Comites Bentheimenses Dominos nostros clementissimos, tantum ponderis habuit; ut nullus dubitem, si modò rogatu senatus nostri, primò quoque tempore, Steinfurtum, Scholæ nostræ visendæ causa venire voluerit: quin unanimis suffragiis, professionem Theologicam, ei sint oblaturi. Ut autem ipsè promptum sese præbeat ad vocationem, & iter istiusmodi suscipiendum: post Deum à cuius providentia omnia pendent, tuâ nobis operâ, & suadâ opus est. Nec dubito, cum ad scholæ nostræ negotium promovendum, ultrò tuum studium obtuleris; quin pro tua prudentia, omnia diligenter, & fideliter sis facturus: Utque id facias meo, & senatus totius nomine, etiam atque etiam peto. Ita ad priora tua Officia, magnum, & multum adjicies, & totam Scholam nostram, tibi devincies. De nova conditione, quam Leydæ consecutus es, animitus tibi gratulor, Deique benedictionem precor. Ità enim futurum spero, ut studiis tuis major campus, ad promovenda Ecclesiæ, & Reipublicæ Literariæ commoda aperiatur.

Benè salve, & Vale Vir præstantissime; cum uxore, & Liberis carissimis, & me amare perge.

Steinfurti xxi. Julii,
Juliani An. MDCXV.
vrijulij cIdc xv.

Tuus omni studio,

M. Clemens Timplerus.

XX.

FFF. Junius *Clarissimo Viro D. Gerardo Joanni Vossio, Affini conjunctissimo, precatur multijugas Domini benedictiones.*

Fama malum, &c. habent hoc omnes dissensiones, eodem linguas quo animos succo perfundunt: singuli ita ut sunt animati loquuntur. Ad nos hic crebriores quàm optamus finistri rumores, de Bataviæ vestræ turbulento statu deferuntur: Nos etsi aures nonnunquam demus, fidem non semper damus; quò imprudentiæ notam evitemus. Interim esset pectoris ferrei, hac communi Ecclesiarum nostrarum calamitate non tangi, securè quietum, quasi è speculâ, procellòsos Christianæ Reipublicæ motus inspectare, & non quantum fieri potest, votis saltem & suspiriis, naufragium facientibus succurrere: Loquor ex sententia rumorum, qui indies ad nos transvolant, hi enim tales sunt, ac si res vestræ deploratæ omninò jacerent, & medicæ manus opem admittere amplius non possent: Unde enim in conciso, & penitus comminuto corpore, medicinam quis facere incipiat? Graviter vulnerata, corpori tamen annexa membra, remedium expectant, non autem à reliquo corpore avulsa. Mœremus & omninò vix consolabili dolore angimur, cum hæc & his ipsis alia magis trifida auditione accipimus: Ego ad hanc rem nihil præter suspiria, & ardentes ad Deum preces afferre possum; Tu cum aliis divini Numinis sacrosantam Majestatem timentibus viris communicato consilio, periculum facere potes, an ulla per Dei gratiam, restorationis spes, integra relicta sit. Optat hoc mecum D. Teelinguhius, cujus hac de re literas vides. Pietas viri non eget de integro me præcone; adhuc probè meministi, quid de ipso, non exigua pietatis, eruditionis, & apud vos non minoris autoritatis vir tibi retulerit. Crede tantum ex pio pectore, non nisi sancta, & sana consilia proficisci posse; fidem scio in candore, & candorem in pietate non requires: proinde tutò, cum per otium licebit, rescribe; Omnem infidæ futilitatis suspensionem vera pietas tollit. En prior, ad communicanda Consilia provocaris. Deum Opt. Max. precor, ut vobis per spiritum suum adsit, quo Ecclesiæ ipsius prodesse possitis, & uno animo, unâ operâ, in uniendis distractis

partibus versari. Saluta sororem mei amantissimam, cum tota vestra familia, & valetudinem tuam cura diligenter.

Middelb. Anno 1615.
20. Octob.

Nihil hîc quod aut te, aut muneris tui administrationem tangat, inaudivi; non est itaque quod te turbent hæc, quæ de finistris rumoribus scripsi. Omnia enim quæ ad nos hic deferuntur, generalia admodum sunt, & incertissima.

*Tibi multis nominibus
devinctissimus,*

FFF. Junius.

XXI.

Salus plurima, Reverende D. Regens Vossii. Quod serius ad te libros tuos mitto, factum diutina mea ab urbe absentia; uxor à matre avellenda erat & odi muliebres lacrymas; satis rarò rident qui Ministris nubunt; cum peregre sunt, putant majorem sibi licentiam permissam; unde hoc habeant nisi ex natura non video. Nunc Dei beneficio rediit, sed non sine ploratu. Mitto quoque indicem quorundam librorum Pontificiorum, addito pretio singulorum, & simul indicem quorundam, qui à me desiderantur, ita forte absentes mutationem poterimus instituere. Si quos ex iis mihi permutare volueris, exige alios è meis. Collega iterum abest, itaque cogor me præparare concionibus & visitandis ægris. Tu Vir optime vale, & nos ut facis ama.

Veteraquino 14.
Octobris 1616.

Tuus tibi addictissimus,

J. Lydius.

Cistæ huic meos vicissim includere poteris, & alios quos permutare voles. Rupertus de divino officio est inter opera Ruperti. Gorionis, dum Amsterodami fui vidi exemplar Parisium, sed sum mea forte contentus. Ritus Moscovitarum literis Moscoviticis emi, sed carius quàm putaveram; nam expendi florenos 71. mihi Theodoretæ Dialogos Romæ editos pro iis velis remittere, licebit tibi reservare, si abnuis, remitte librum meum Muscoviticum, cum reliquis meis quos expecto. Buceriana mea habes omnia, nihil reservo.

XXII.

XXII.

*Salus plurima, Clarissime D. Regens
Vossii. Recte dixit Poeta;*

*Contrabe ventis nimium secundis,
Turgida vela.*

NAuta meus bene potus, quia hujus versus ignarus fuit, discedentem me non parum turbavit; vix Leiderdorpum venimus, cum navis prope everſa, tantum hauſit aquæ, ut vix terram contigerimus, madidus igitur magnam viæ partem confeci pedibus; hæc Actus primi Scena prima. Tota nocte in diverſorio me ſub dio cubante potavit, hora tertia matutina iter confecimus declinantes pro frigore terram per omnes caſus. Hæc ut rideas, ſcribo. Die Martis forte, crapula laborans de nulla re minus quam de profectione Leydenſi cogitavit heroicus Nauta, nunc accurrit teſtudo, ſignificans ſibi propoſitum cras novam inſtituere volitationem, utinam melioribus avibus. Mitto ad te libros tuos, addidi Valerium Maximum & Catullum Scaligeri pro D. Barlæo. Lyturgica Græca ſunt Johannis Oorlars, cui eas addixi pro Dione; rogo uti D. Johanni Pythio illas ipſi curandas tradas. Diſcendens properante Nauta ſub ſtragulo lecti in quo dormieram, reliqui librum quen- dam à D. Baudio ſcriptum, ſi placet unà cum reliquis illum mittito, non eſt meus, ſed commodato accepi ab alio, & nondum plene inſpexi. Uxorem tuam, D. Meurſium & Commenſales tuos peramanter meo nomine ſalutabis. Raptim. 4. Nov. 1616. Utinam huc veniens damnum tuum reſarcias.

Tui ſtudioſiſſimus,

Johannes Lydius.

XXIII.

*Ornatiffimo, Doctiffimoque Viro, D. Ger-
hardo Voſſio, Col. Hollandici, quod
Leida eſt Regenti ſolertiſſimo.*
Leidam.

S. P. in Chriſto,

SCriptum tuum, Ornatiffime Voſſi, tibi ita petenti cum gratiarum actione remitto: feciſſem citius, niſi excipere prius quædam in uſum privatim maluiſſem. Da igitur veniam cunctationi; Citra adulationem, dico ſcriptum hoc tuum ejuſmodi

videri, quod unicum ſufficiat convellendis iis omnibus, quos D. Walæus, reliquiq; levis armaturæ ſuccenturiati milites, contra ſummi Magiſtratus in Eccleſiaſticis, imperium hætenus, in aciem producere ſunt auſi: Ad me quod attinet, tantum abeſt, ut quod autumas, ad umbilicum, opus meum perduxerim, ut jam à multis menſibus non inſpexerim, quæ commentari occœperam. Cauſas quæ variæ ſunt, jam non explico. Poſſem tamen brevi temporis ſpatio, rem expedire juvante Deo, ſi is qui fuit, animi eſſet ardor; Et per occupationes innumeras, quæ tantum non enecant me, quin & per hæſce turbas, ac procellas, quæ animum de ſtatione ſua identidem dejiciunt, liceret. Audio etiam Magnificum Dominum Grotium, accuratiſſimum de hoc argumento ſcriptum jam paſſe: poſtquam loqui velle, eſt ſemet ludibrio exponere. Vix tamen abſtineo, quin denuo me operi accingam, id ſi utile fore Reipublicæ Chriſtianæ mihi perſuadere queam. Fortè & meâ intereſt, ne penitus elinguis ſim, tanto cum ſtrepitu undique impetitus. At curta nimis mihi ſuppellex eſt. Hæreo, an pergere, an vero figere arma debeam. Si quis, cujus magni facio judicium, properarit, facili momento, animum dubium impulerit. Tu imprimis, Vir doctiſſime, quem quanti faciam, quoq; amore, tacito quamvis, complector, & Veneror, novit ille qui omnia. Huic te tuaque ſtudia, Collegio cui præis imprimis, ex animo commendo. Salveat plurimum à me conjux lectiſſima.

Hagæ 10. Januarii 1617.

Tui ſtudioſiſſimus.

J. Wtenbogaert.

XXIV.

A. Schottus, Ger. Voſſio *zakeen.*

EQuidem tibi me devinctum eſſe, atque obſtrictum, Doctiſſime Voſſi, dum ſpirabo ingenue profitear, indiesque agnoſcam, tuo me in ære eſſe, duplici nomine; cum quod Rhetoricis tuis, tam accuratè conſcriptis, nihil ut Neotericum viderim hætenus melius (nihil hic gratiæ tribuo, aut auribus, ſed ut debeo, candidè, ſenſa mentis enuntio) donaris, inaurato libello, & quidem ſponte tua; tum quod eadem benignitate, animique pii inductione Baſilii M. codicem calamo exaratum, veteremq; utendum miſeris perlibenter,

ter, cum jam Latinam interpretationem recensuissem, denuo tamen ἀσυντῆς illa contuli diligenter, à Capite ad calcem: Etsi ordinem sæpè mutatum in Basiliensi observassem, cujus & paginas, codici tuo (quem cum ingenti gratiarum actione, restituo, ac remitto) ad oram adscripsi; bonâ, ut spero, tuâ veniâ; Luteriæ Græco-latina adornant editionem; Nos ἀπογορεύσει, juvabimus, ne frustra susceptus à me labor videatur. Codex enim perantiquus est, & probæ notæ: debeo itaque vobis, quod committere licuit, cum Cornarii Basiliensi ultima: Tibi quod ultro concesseris homini nihil tale speranti: & Rutgerio, qui index, & fautor fuit; Gevartio etiam, quia attulit, amico, debeo. Si quid aliud sacrum, (vide quid mihi summam) in tua dilitescit Bibliotheca, vel Amicorum, quæso nobiscum communica. Sum enim in Patribus Græcis, Latinisque recensendis totus, ut hanc decet ætatem, vitæque institutum. Grilli Alexandrini ἀνέκδοτα sub prælo sunt Nutiano, hoc est ἱερουσαλὴμ λ. κ. γλαφυροῦ in Pentateuchum, sed ut lentum est omne id operarum negotium in Græcis, proximis nondum apparebunt nundinis. Quod in Rhetoricis Pet. Nunnesii, mihi quondam in Hiberia familiaris, (ut & Phrynichi Eclogas Atticorum verborum Augustæ editas, mihi duxerit inscribendas) librum laudes, ut hominis doctissimi, & de Hermogenis subtili methodo, ante Sturmium, benemeriti, scito me illius habere omnia, etiam Philosophica, ut erat etiam Philosophus excellens, græcèque doctissimus, ex ultima editione, quæ quidem typis sunt edita: si legere placet mittam, atque utinam isthic, si scholis visa sunt utilia, Typographum istic quoque reperiant, tua commendatione. Hoc te scire volebam, in eamque deferre visum qualemcumque Opellam. Vale in Dom. nosque amare, ac juvare ne desine.

Antuerpiæ, Idibus Febr. cld Ioc xvii. quem vobis annum decurrere opto, feliciter. Strenæ vicem adjeci fasciculo Observationum nostrarum juveniliū exemplar, ut si vacat, nugas nostras, quas aliquid esse, putare videris, recenscas, doceasque. Ἐρροῦσθαι πάλιν.

XXV.

Andr. Schottus, Ger. Vossio V.C. χαίρειν.

TUÆ mihi gratæ, Doctissime Vossi, signis amoris, ac benevolentiae pleniss. Perge amabo, nos amare mutuo, & literas provehere bonas, quæ & bonos efficiant, humanitatisque plenos. Sed Etymologicum tuum, cujus mihi spem fecit, imo salivam commovit Gevartius noster, fac, si nos, si te ipse amas, brevi editum videamus; ut nihil nos Fungus, nihil nos Christianus Becmannus posthac moveat. Tua cupidissimis amplectar ulnis, quando tuis Rhetoricis legendis mirè sum affectus. Colonienſes operæ Bibliothecam illam Patrum, auctiorem parant extrudere, nostram in cæteris implorant opem; ut Antonius Hieram multa expectet à nobis, multa efflagitet. Miſi jam quædam, ad Pontium Paulinum, ad Sulpitium Severum, ad Eucherium Lugdun. Episc. & alios. In Vigilio Tridentino Episc. scire avebam, è tua Bibliotheca instructissima; an Simleri editio plura, libro V. adversus Eutychen habeat, quam Georgii Cassandri, Coloniensis editio; Nam in Parisiensi operum Cassandri editione, quaternio accessit è membranarum Codicis Bibliothecæ Petri Pithoei. Nam Lipsiensis hæc editio, nescio quo anno evulgata, aucta est, à Cassandriana; hanc rursus Pithoei codex amplificat, libro extremo quinto, contra Eutychen, ut dixi. Similia si quæ observata, suggeres nobis, per mihi gratum, reique feceris literariæ. Inspiciat noster Gevartius, pace tua, Simleri Editio, an melior, an locupletior. Hoc si est, liceat bona venia vestra, mihi conferre, ut & Gelasium ibidem contra Eutychetem, quem non esse Pontif. Maximum, sed potius Gelasium Cyzicenum tradit Bellarm. Catalog. Eccles. Scriptorum. Cap. 494, & 495. In Cyprianum si quid suppetit, suppedita. Nam in Tertullianum laborat Jo. Lud. de la Cerda noster; cujus vasta, sed erudita vidisti in Maronem Commentaria. Chrysostomi, aut Basilii græcè scripta, quæ penes te sunt, fac ἐπιγορεύω habere possim. Vide quam frontem perfricui? Tibi tuæque imputabis humanitati, quando ita largus es, imo & beneficus. Homo nimirum homini, bene merendo existit Deus. Vale, in Domino, nosque ama.

Antuerpiæ, Idib. Aprilis cld Ioc xvii.

Clarissimo

XXVI.

*Clarissimo Eruditissimo Viro, D. Gerhar-
hardo Vossio, Professori Eloquentiæ.
Leidam.*

Vir Clarissime,

QUamquam ferè invitus, illis scribam quos de facie non novi; tamen facile hunc animum expugnavit amicitissimus Holstenius noster; qui adeo mihi deprædicavit virtutes, & insignem eruditionem tuam, ut me amplius tenere non potuerim, quin cultum, & amorem offerrem. Unde & proximè tibi jussi dari Proclum nostrum: nunc V. Sidonium offero, quem velut obsidem, nunc huper natæ, sed nunquam intermorituræ amicitia accipe, meque ama, quod mutuo facies.

*Hamburgi XVII.
Kal Jul. Juliani
c10 16c xvii.*

Tui Studiofissimus;

Geverhart. Elmenhortius.

XXVII.

*Clarissimo, & Eruditissimo Viro D. Gerhar-
hardo Johanni Vossio Proregenti
Colleg. Illust. Ordinum Holland.*

Leidam.

Vir Clarissime,

GRatias tibi habeo summas, pro The-
sibus, & Libris communicatis, quos
cum contulero, illibatos tibi reddam. Si
improbum non esset, peterem Catalogum
instructissimæ tuæ Bibliothecæ describen-
dum; traderes Holstenio nostro. Scio
complures libros inter tuos esse, qui nobis,
in nostris laboribus, mirum in modum
poterunt prodesse. Syntagma Wouveria-
num Holstenio transmisi, ut tibi traderet.
Cum primùm Epistolæ prodierint, statim
etiam ad te ibunt, ut & omnia nostra, quæ
deinceps provulgabimus. Propter acer-
bissimos calculi dolores, quos hactenus
sustineo, nondum mihi licuit Theses
tuas pervolvere; Inspexi tamen obiter,
unum aut alterum locum, de quo proximè
sententiam meam tibi aperiam; jam enim
planè non vacat. Salve Vir Doctissime,
& nobis responde.

*VIII Cal. Octobris
c10 16c xvii.*

Tui Studiofissimus;

Geverhart. Elmenhortius.

XXVIII.

*Clarissimo & Eruditissimo Viro D. Ger-
hardo Johanni Vossio Proregenti
Collegii Leidenfis.*

Leidam.

Vir Clarissime,

LIteras tuas rectè Holstenius noster
transmisit, ex quibus, & eruditionem
tuam, & benevolum erga me animum,
oppidò lubens perspexi; cui in omnibus
semper, & ubique paria faciam, quod fide
germana tibi dico, spondeoque. De In-
dice, grata sunt, quæ promittis. Desidero
autem syllabum Theologicorum Libro-
rum, cui studio, post Apuleii absolutam
editionem, me totum mancipabo; perdu-
camque multa (ut confido) profutura,
veteri, & veræ Dei Ecclesiæ, cujus ger-
manum alumnus, me in omnibus meis
scriptis profiteor. Theses tuæ eruditionis
diligenter perlegi, & reperi in illis multa,
non publici saporis. Rogo, quicquid de-
inceps provulgas, mecum communicare,
ut velis: Ego rursus omnia minima, ma-
xima ad te inter primos mittam. Jam in
exordio novæ hujus conjunctionis, tibi ex-
hibeo, Mansueti Episcopi Mediolanensis
Epistolam elegantem, quam Jacobo Marci
excudendam dabis. Is enim omnia nostra
in se recepit, nec spero tibi indecorum
erit, quod non de facie plebea, sed Sena-
torii seminis homo, publico aliquo scripto,
appellare te valuerit. Salve Vir Eruditis-
sime, & me amare perge, quod mutuo
facies. xv. Kal. Decembris Juliani c10 16c xvii.
Si adhuc extat penes te Exemplar Ora-
toriarum Institut. velim id committas
Adolescenti probo Joanni Loccenio, qui
apud Jacobum Marci habitat, qui porro
id rectè curabit. Illi poteris etiam tutò
literas tuas concredere. Iterum salve, &
crebriter me appella.

Tui Studiofissimus;

Geverhart. Elmenhortius.

Clarissimo;

XXIX.

*Clarissimo, & Eruditissimo Viro D. Gerhar-
hardo Johanni Vossio Proregenti
Collegii Leidenfis.*

Leidam.

Vir Clarissime,

EX quo Manfuetum tibi misi, nullas à te accepi, ut nec à Collegis tuis, Viris magnis, D. Heinsio, & Meurfio: quæ causa sit, expiscari non possum. Illud demiror, cur Adolefcens, qui apud Jacobum Marci habitat, multaque, & magna mihi debet, tam obstinatè taceat. Si non est grave, statim aliquem ex tuis mitte rogatum, num. Collybum, quem ante menseni ipsi, per Galparem Vinckefort, Civem Amsterodamensem misi, rectè accepit. Et quid de Theodulpho, Manfucto, & Gebete sperare debeam. Magno beneficio me adicies, si postremam, ut vocant, probam semper inspexeris. Transmisi prònuper Nobiliss. D. Grotio, catalogum scriptorum Photinianorum, qui nùm ipsi redditus, adhuc ignoro. Valde amo, & æstimo hominem, ob ingenii excellentis admirandas dotes, quibus eruditissimos, hac ætate, facilè vincit. Poteris in occasione, hunc nostrum animum illi apperire. Clarissimus Rutgerfius, ante xiv. dies apud nos fuit, & negotiis ex animi sententia confectis, Hassiniam profectus est, quod D. Heinsio nunciabis. Apuleii Philosophica Jacobo Marci eis paucos dies committam; modò à te, vel Clariss. tuis Collegis, impetrare possim, ut onus corrigendi in vos suscipere velitis. Quod non tam mei, quam Apuleii causa, vos studiosè facturos, omnino mihi persuadeo. De Indice Theologicorum tuorum Librorum, iterum tibi aurem vello: si me amas, effice, ut prima occasione illum habeam. Nihil enim gratius mihi facere poteris. Salve, mi amicissime Vossii, & si nos non planè contemnis, responde propere.

*Hamburgi VI.
Kal. Februa-
rii Juliani
cio idc xviii.*

Tui studiosissimus,

Geverhart. Elmenhorstius.

Ante VI. Septimanas misi eruditiss. virorum, D. Heinsio, sermonem Libanii, *de his qui non modicam auctoritatem amantibus*, inscriptum magno Rutgerfio scire percipio, quid & illi factum. Iterum salve Vir præstantissime, & responde.

XXX.

*Clarissimo Doctissimoque Viro D. Joanni
Gerardo Vossio, Proregenti Collegii
Illust. Ordin. Hollandiæ.*

Leidam.

QUId hoc causæ esse dicam, Johannes Gerharde Vossii, inter doctissimos humanissime, inter humanissimos doctissime, quod nos adeo obstinatè contemnis, nec responsionis honore dignos putas. Longè aliud nobis promittebant candidissimi mores tui, & summus noster in te amor, quem abundè tibi in meis testatum feci probavique. Rogo te, aperiās nobis, paucis saltem verbis, causam tam pertinacis silentii, ne omnino de tuo affectu incerti, nobis planè persuadeamus, te hunc procum haud magni facere. Salve vir optime, præstantissimoque harum portitori, comem, & benevolum, te exhibe. Nihil mihi gratius facere poteris:

Apuleium Scaligeri, cum Catalogo librorum tuorum Theologicorum avide expecto. Nam Holsteinius nullum mihi misit: si inceperint operæ Apuleium nostrum, rogo curæ eum tibi habeas. Sicuti Loccenio injunxi. Iterum salve, & responde si potes.

*Hamburgi VIII.
Kalend. Aprilis,
Juliani Anno
cio idc xviii.*

Tui observantissimus,

Geverhart. Elmenhor.

XXXI.

*L. Berchemius D. Gerardo Vossio
S. P. D.*

NE amicitia jura violasse videar, vir ornatissime, has mei amoris testes literas exaravi: tua enim benevolentia & non mediocria in me collata beneficia, arcto admodum amoris vinculo, me tibi obstrinxere, quorum facile oblivisci non humani ingenii gratique animi esse judico.

Quid in hac Synodo Nationali hic Dordrechtii habita actum sit satis superque ab aliis intellexisse te non dubito; hoc unicum tacere nequeo, me maxima admiratione affectum esse, cum Remonstrantes Summarum Potestatum tam exiguum rationem habere viderem, tantæque pertinaciæ (quam Constantiam vocare nefas putarem) sese, Illustrum Ordinum decretis opponere. Conscientiam suam scio præ-

prætexunt: faxit Deus non aliud quid lateat. Præterea quod in corona tot illustrium Theologorum Remonstrantes sibi soli sapere viderentur, illorumque iudicium tanquam adversariorum contemnerent, absurdum mihi valde videbatur, præsertim cum illi viri sanctissimi sanctissimo juramento se obstrinxissent, se ex conscientia & veritate iudicatu: Verum quam candide & blande cum Remonstrantibus hic actum sit, ex Actis Synodi brevi vulgandis evidenter patebit. Vir ornatissime, quem, Deo teste, amo, te illorum sententiæ nunquam subscripsisse scio, tæque in eo sæpius coram malevolis defendi, imo quod Synodi hujus Decretis & Canonibus assensurus sis, non dubito, & Remonstrantes (quod fortasse durius) suffragio tot præstantium Theologorum suffultus tanquam Hæreticos damnaturus sis. Quod si à te Viro tanto fiat, multum commodi & patriæ & bonæ causæ accessurum nemo dubitat. Nomini quoque ac famæ consulens provinciam quam nactus es cum honore tueri poteris. Varii hic Dordrechtii rumores sparsi sunt, de Collegii regimine immutando atque alio Regente substituendo, verum vanos illos esse, illisque nullam fidem adhibendam, ex D. Rocho Vanden Honaert satis intellexi; cuius verba hic subtexam: *Quid de D. Vossio futurum sit adhuc incertum est: quod ad me attinet ego boni viri causæ favere; utinam Librum de Historia Pelagiana nunquam scripsisset! tum aliquid boni in ejus causa adhuc sperandum fuisset, sed jam timeo.* Hæc tibi Vir optime, scribere volui si fortè tibi prodesse possent. Vale & me ama.

Die octava
Julii, 1618.

Tuus ex animo,

Ludovicus Van Berchen.

XXXII.

Viro Clarissimo Hugoni Grotio, S. P.

Amplissime Domine,

Literas tuas Prid. Cal. Sept. datas rectè accepi, cum doctissimi Vossii defensione.* Gratulor Tibi toto pectore oblatum tam illustrium, tam præclarum libri tui propugnatorem. Et quando Labor tuus Ecclesiæ

* Vossii Responsionem intellige ad iudicium Hermannii Reovinsperg. de Hugonis Grotii libro contra Socinum.

Christi exantlatus pro merita gratia importuni hominis morsus sensit, gratulor tibi causam tuam à tam præstanti Patrono susceptam. Dolendum eo insanix apud vos devotum, ut præ factionum studio tam protervè irruant quidam, ut nihil pensi habentes quid dicant, saltem odium suum & suspensiones promant; & quid speremus porro tranquillitatis, si talibus ingeniis frena relaxantur? Certe summâ cum voluptate & fructu legi doctissimi Viri lucubrationem, & jam istum quoque in maximis Viris pono.

Quod autem etiam publicè constare voluistis, quid ego sentirem, agnosco affectum vestrum, & quamvis sciam meo calculo nihil vobis accedere posse, gratum tamen mihi est, me inter bonos recensitum, quamvis mea scriptio tam rudis & inconcinna fuerit, ut lucem adspicere non meruerit. Consideratio autem horum qui sacra apud vos tractant, facit, ut vix quidquam sperare possim de Synodo quæ apud vos indicta, ad quam Ordines etiam Electorem nostrum ut suos Theologos eo mittat invitârunt; ad eam rem designati David Pareus, Abrahamus Scultetus, Henricus Altingus & Paulus Tossanus, quamvis incertum an Pareus septuagenarius valetudinis ratione, tam incommoda anni tempestate, iter illud sustinere possit.

Bohemica turbæ, ut in universum Imperium redundant, verendum est. Cæsar magnas copias contrahit, & tamen à moderatioribus consiliis se non alienum ostendit, quâ in re nostrum habet & Saxonem adstipulatores, qui etiam laborem nullum defugiunt, ut Religio salva Bohemis ac libertas conservetur, & Cæsari sua auctoritas maneat.

Quod spem facis editionis scripti tui elaboratissimi De summarum potestatum circa sacra imperio, longè mihi gratissimum. Vellem & animum adjiceret ad historiam tuam promendam, quam negare diutius non debes nobis ac posteritati. De Thuani Historia nuncio tibi, reliqua jam sub prælo esse. Ut autem invidiam vitent Curatores, ita institutum est, quasi Exemplar ab auctore in Germaniam missum, jam promeretur. Excuditur autem Genevæ; qui locus tamen ob invidiam vitandam dissimulabitur.

Vale, decus nostrum.

Heidelbergæ, 25.
Julii, 1618.

T. D. omni Studio
& Amore

G. M. Lingelhemius.

D

XXXIII.

XXXIII.

Clarissimo Viro Domino Gerhar-
do Johanni Vossio, S.

Leidam.

ITane verò cum cura legisti, ea quæ de Grotii libro scripsi? Utinam non cum præjudicio, aut animo calumniandi; cuius non pauca signa ubique paginarum, in tuo isto diffamatorio centunculo, deprehendere fuit; sanè cognovi plus satis, quid censeas de meo scripto, tametsi nullus monuisses. Cognovisses itidem tu, quid ego de tuo, ad meum scriptum responso, statutam, atque adeo quid de eo statuam, & judicent item alii viri clarissimi, & multo doctissimi, si mihi licuisset, per mandatum Senatus nostri Academici, cujus auctoritas pro eo, ac par est, mihi meritò sacro-sancta est, tuo responso respondere. Aliquatenus tamen intellexisti, ex Epistola mea, viro cuidam reverendo, & longè præstantissimo inscripta, typisque Batavicis, ejusdem studio descripta. Cæterum tuas literas ad quas jam nunc respondeo, tum demum accepi, cum eas è Patria mea redux, ubi per ipsas decem & amplius septimanas egeram, in mensa positas viderem. Nempe ut scribis singuli aliquid videmus, nemo omnia, neque ego tuas videre potui, cum alibi essem. Vale.

Groningæ ad xx.
Decembris anno
clo 1688.

T. S. S.

Herman. Ravensperg.

XXXIV.

Clarissimo & Doctissimo Viro, Gerhar-
do Johanni Vossio, Proregenti Col-
legii Illust. Ord. Hollandiæ.

Leidam.

Vir Clarissime,

AGellium manu illustris Scaligeri præ-nobilem, rectè transmisit nobis Holsteinius. Utinam etiam ejus Apuleium, per te habere potuissem? Fuisset ea res nobis longè gratissima. Audio eum in margine Novi Testamenti multa notasse, quod si forsitan in tua Bibliotheca, oro ne illud nobis invidas. Asellus noster, in asinum longè tardiorē incidit, quem & repeti jussi, non sine indignatione, ut forsitan ex Luca nostro intellexisti: si D. Corvinus demum revenit, velim cum eo agas, ut Acta Concilii Chalcedonen-
sis

prælo subiciat; quæ sanè magno cum labore, ex antiquissimis membranarum, locis infinitis emendavimus. Poterimus & alia infinita in Patribus præstare; modo bonum Typographum nacti sumus. Nam nostris sumptibus omnia edere, non est è re nostra; qui artem distrahendi omnino ignoramus. De Grotii infortunio, jam inaudieram: Et angebar intimè, hominis causa, quem propter eruditionem insignem, semper amavi, & æstimavi. Voveo & animo, ut crucem suam ferat patienter, donec Deus eum liberet, à squalore & sordibus non boni carceris. Synodum finitam jam intelleximus, ex D. Heinio: fac omnia ejus acta à te cognoscam; præsertim quo loco jam res tuæ sint. Subtimeo enim ne incendium Barnefeldianum te etiam afflaverit. Salve amicissime Vossii, & nobis de omnibus rescribe. Gratius mihi nihil facere poteris.

Hamburgi xxvi. Geverhart. Elmenhorstius.
Jun. clo 1689.

XXXV.

Clarissimo & Doctissimo Viro Gerhar-
do Johanni Vossio Regenti Collegii
Leidenfis.

Leidam.

Vir Clarissime,

DE Orofii apologia, quæ observasti vera sunt, impenitèque nobis placent. Cum librum istum publicabo, Lectorem ejus rei admonebo, quod non fiet, sine honore nominis tui. † Ormestam, quis nobis confinxerit ignoro. Est verbum novitium, & planè nugatorium, ex Vincentii speculo & recentibus editionibus, perperam Orofio ad fictum, quod optimi ævi MSS. Palat. Leid. & Lips. neutiquam agnoscunt. Magnas igitur nugas egerunt, qui recen-ter id nobis iverunt obtrusum. Commentaria in Cantica Canticorum, non sunt Orofii, sed Henorii, sicuti jam dudum Patri Schotto scripsi. De Grotio, beasti me lato nuntio: hic enim omnia sæva de eo narrabant: fac catastrophē totius tragediæ plenè à te cognoscā; itā tandem sine metu ero. Oratorias tuas rectè curavit amicissimus Holsteinius, quas scito gratissimas nobis fuisse. Non sperno beneficia quæ offers ex bibliotheca tua, com-
pellaboque

† Orchestam
legit sagacis
vir ingenii
Fr. Juretus ad
Symmachum
p. 73. Cui non
invitus accedo.

pellaboque Holsteinium, ut hac in re, mihi manum accomodet. Cum Jacobo Marci pronuper, de nova Apuleii editione adornanda agere cepti. Nosti illum correctorem eruditum non alere, unde & pro amicitia nostra rogatum te volo, cum opus inceperit, ut tum postremam probam studiosè perlustrare velis, ne mendosè liber prodeat, quem ærumnoso labore, cum multis MSS. contuli. Si qua in re tibi vicissim inservire potero, faciam id perlubenter. Dom. Morsum tamdiu inibi fuisse, nec mihi literas misisse, pro certo signo animi, planè à me alienati, accipio. Monebis hominem, nisi planè memoriam nostri effuderit, antequam in Angliam profiscatur, de omnibus rebus me scitorem faciat. Erit id mihi pergratum. Hæc ex recenti laniena nephritidis subager, ad amicissimas tuas amanuensis meo dictavi; ut etiam scires me, vel in mediis tormentis, memoriam tui sanctè habere. Salve, Vir amicissime, & nos ama mutuiter.

Hamburgi, xliii. Kal.
Febr. Juliani, An.
c1o l5c xix.

Tui studiosissimus,
Geverh. Elmenhorstius.

XXXVI

A. Schottus Ger. Vossio in Reg. Tlev.

Lugd. Batav.

Vides, doctissime Vossi, hunc rerum statum, mirari ut desinas, cur ego, in scribendo tam sum meticulosus, ne meæ literæ obfint potius amicis, quam solatio sint in turbis. Age, de literis utriusque caris duntaxat disseram. Quum fratris mei Gualtheri Nepos, ad nos inviseret, seque Lugdunum cogitare, ubi juri civili det operam, affirmaret; hoc mihi sumpsi cohortante, ut ad te tribus agerem verbis. Quod in Græcis, quibus excellis, nec ego abhorreo, professionem mediteris, ad domesticas collegii curas, & Rhetorica illa tua, dono mihi misisti, narro tibi esse penes me notas aliquot in Theonis Sophistæ *αερυμνδουαλα*. Nolle mihi, posterisque perirent; quæque in antiquis notavi Rhetoribus; si spes est, istic Typographum reperiri posse, tua accedente lima, depromam, & in tuum sinum depenam; quæ habeo etiam Rhetorica, & Philosophica Nunnesii, etsi Valentini, hoc est Hiberi, vel Celtiberi potius. Fac

me de re omni certiozem, per Franc. qui has reddet, mittetque fratri meo Cos. Literas.

Et quia sacra & tractas, & abundas antiquis. Amabo si magnam illam Patrum Bibliothecam Colonia nuper editam, inspexisti, & habes quod sit addere operæ pretium, & Catholicum; scito Appendicem adornari ab Ant. Hierat. qui nos visit. Quare si quid desideres, addique jubeas significa. Latent, fateor, multa adhuc abdita, in bibliothecis, quæ lucem avent videre atque existere. Cætera quæ de me meisque cognoscere lubet, Franc. hic noster, qui has reddet, narrabit. Reditum è Gallia Gasparis Gevartii expectamus, editis jam electorum Libris IV. nondum tamen rediit. Vale in Domino.

Antuerpiæ festo Sancti Augustini Mariucti Mediol. Episc. Epist. de fidei professione, tibi inscriptam nuper ab Elmenhorstio libens accepi, & adjungam in Append. magnæ Bibliothecæ.

XXXVII

Clarissimo, & Doctissimo Viro Gerharðo,
Johanni Vossio, Pro-regenti Collegii
Leidenfis.

Leidam.

Vir Clarissime,

R Emittere tibi per optimum Holsteinium nostrum, Arnobium, & Scioppil suspectas lectiones; remissurus etiam brevi, Euthymium cum Orosio tuo. Si interim poteris carere Scaligeri Agellio, rem gratam mihi feceris, si prædicto juveni eum commendaris. Pol anxie expecto, quo loco res tuæ sint; ut & magnorum virorum, quos fortunæ tristioris tempestas, conturbavit graviter. Si non est grave, velim de omnibus, & Politicis, & Theologicis rebus studiosè perscribas. Erit id mihi pergratum. Salve, amicissime Vossi, & nos amare perge.

Hamburgi xliii.
Maii Juliani A.C.
c1o l5c xix.

Tuus,

Elmenhorstius.

XXXVIII.

Clarissimo, & ornatissimo Viro D. Gerhardo Johanni Vossio, Regenti Collegii Leidenfis.

Leidam.

Vir Clarissime,

BEnè sit optimo, & amicissimo Holsteinio nostro, qui te velut longi silentii somno indormientem amica sua ammonitione excitavit, atque in viam officii, & scriptionis iterum reduxit. Ego licet sæpius acerbissimis calculi doloribus oppressus sim, nunquam tamen committam, ut operam meam hac in parte desiderari queas. Librum tuum de diffidiis Pelagianistarum (quoniam incompactus erat) inspicere necdum potui. Puto eruditissimum esse, ut omnia tua, quæ frementibus invidis, cum aliis tuis limatissimi iudicii scriptis canescent, sæculis innumerabilibus. Massiliensis nostri Patrocinium, rectè suscepisti. Male-feriati homines, optimum virum pessimè onerant hæresi insana, de qua ne per somnium quidem unquam cogitavit. Baronius putat initio eum infectum fuisse labe hâc impurâ, sed postmodum ad sanio rem mentem relapsum seriò errorem emendasse; cui ego hæctenus assensum accommodare non potui. De Mansueto, nihil est quod nobis gratias agas, multò potius ego tibi, eas referre debeo, qui nitidè ejus editionem procurasti. Viri * Magnifici casum gravem vehementer doleo. Tribus ante capturam (ô utinam injustam!) diebus, humanissimas ab eo accepi literas, cum tuâ disputatione eruditissima notarum nugonis Ravenspergeri, qui stultè magno virò obvertit cornua. Earum literarum copiam tibi misi, ut videas, quàm de nobis rectè sentiat vir excellentissimus. Lubens ei scriberem, si scirem meas tutò ad illum pervenire posse. Demiror autem quod is postea, adeo sui potuerit oblivisci, ut affinis esset illarum rerum, quæ nonnisi pessimo exitu terminantur. Rogo te obnixè ut tragediam illius funestæ rei mihi explices, quo sciam, num etiam sine capitis & fortunarum, dispendio, ex tanto incendio evolare poterit homo eruditissimus, & nobis propter divina dona, quæ consecutus est, admodum charus. Ex Orosii scriptis si quid habes ineditum, rogo ut id communices. Non solum illius historiam, sed etiam de libero arbitrio, & quæ scripsit ad Augustinum junctim edam. Absolvi etiam Theodori Studitæ

homil. Græcas CC. Zonaram in Epistolas canonicas Veterum Patrum, & Acta concilii Chalcedonensis, quibus biennio jam Typographum quæro, necdum invenio. Vides nos in ea tempora incidisse, ubi citius decem Nugatorii, & Novitii Libelli, quam unus antiquus, & bonus Author, emptorem reperiat. Poteram quidem meis sumptibus omnia ista producere, sed artem distrahendi commodè exemplaria ignoro. Si forsan me juvare poteris, velim ne animus tibi desit; nos quacumque saltem conditione id fieri poterit, facili contenti erimus. Catalogum Theologicorum Librorum vidi lubens, in quo & mihi multos optimæ notæ libros notavi. Salve, amicissime Vossi, & si me amas, nobis de omnibus rebus, quamprimum responde.

Si quid me voles, poteris id vel Holsteinio, vel Petro de Wittenb. & Gaspari Vinkefort Mercatoribus Amsterodamensibus celeberrimis, tutò inscribere. Iterum salve, Vir optime, & Clarissimos Viros DD. Heinsum & Rutgersium meis verbis saluta, simulq, ad scribendum incita.

*Hamburgi v. Kal.
Nov. Gregoriani
Clō Idc xliix.*

Tui studiofissimus,

Geverh. Elmenhorst.

XXXIX.

Clarissimo, & doctissimo Viro Dom. Gerhardo Johanni Vossio Professore Leidenfi.

Leidam.

Vir Clarissime,

DE Testamento Scaligeri, grata sunt quæ promittis. Utinam copia nobis esset, ejus exemplaris, quod Vandermilus possidet! quod impenso quidem pretio lubens redimerem? Sed ubi locorum vivit Vir ille nobilissimus, quem toties ingeniosissimi mortalium, Baudius, Heinsumque, in cœlum magnis extulerunt laudibus. Num & illum loceri oppressit calamitas miseranda, vel hosti? M. Corvino author esse debes, ut convalescentibus suis, maturè sibi consulat, atque in Germania locum sibi eligat, ubi Officinam Typographicam instituere possit. Ita calcar nobis addet, ad illa detexenda, quæ jam pro desperatis seposuimus. Eruditissimus Martinius jam certam spem sui adventus mihi fecerat, quem impedivit opus, quod molitur insanum magnum, *De Origine Latina Lingua*, cujus correctio-

ni omnino eum interesse oportuit. Si tibi est animus pecuniam tuam, hic apud senatum deponendi, puto me posse à Primario civitatis hujus Consule, qui mihi afinitate junctus est, impetrare, ut tuo nomine agat cum Octumviris, qui res, rationesque fisci procurant, ne gravatim eam recipiant. Poteris igitur mihi sententiam tuam plenius aperire; tum quibus conditionibus eam hic collocare possis, lubens tibi adsignificabo. Negotium Remonstrantium, partim ex literis amicorum, partim ex relationibus publicis cognovi. Nisi res citò transactæ fuerint, ut has nubes coactas video, brevi daturæ sunt magnam tempestatem. Laudo prudentiam tuam, quod te ejusmodi turbelis non immisceas. Litem enim lis, & noxa noxam parit. Quod si Patres antiqui, qui non habitu, sed moribus, & vita, sapientiam Christianam exprimebant, jam resurgerent, & eos qui Trinitatis mysterium agnoscunt, Christumque, & Spiritum Sanctum Deum venerantur, adeo sævidicè, de rebus, non merè ad salutem necessariis, digladiantes viderent, quid dicerent? aut quo non fugerent? N. * N. benè Calvinianum, & acerrimum dogmatis de absoluto decreto damnatorum assertorem, tibi in Receptoratu successisse, cum moerore, & cum indignatione percepi. Nunquam putassem homines acutos, adeo potuisse oblivisci suorum, ut homini modestissimo, incivili-ter audacem; & optimè erudito, rusticè indoctum subrogarent. Exclamare libet

* *Is est, opinor,
Festus Homi-
nius.*

*Quo vobis mentes, rectè quæ stare solebant,
Dementi sese flexere ruina?*

Equidem scripta umbratici hujus doctoris, quæ vidi, plena blasphemiarum, & fanaticarum opinionum cognovi, quæ nemo, nisi astrolus, vel exterritæ mentis, probare possit. Peream, nisi ex unica tua Thesi, plus eruditionis hausi, quam ex istius hominis divite centone. Sed hodiè audacia, pro sapientia liceat uti: nec tam benè agitur cum genere humano, ut meliora pluribus placeant. Verùm querelam non instituo; illud dico, ut exauctoratio tua, mihi dividia fuit, ita recreavit me in solidum fortuna benignior, quæ latum campum tibi obtulit, in quo non minus vires eruditionis tuæ, quam in principe ista facultate, quam hæcenus, summa cum laude obiisti, exferas. Age igitur negotium tuum, & reconditas illas artes palam profer, ut inimicis tuis oculi

doleant; atque ita omnes æqui & iniqui intelligant, te non minus benè Oratorem, quam commodum Theologum agere potuisse. Salve, mi amicissime Vossii, & nos amare perge.

*Hamburgi, A.D. xiii.
Augusti Gregoriani,
c15 10 c xix.*

Tuus

Elmenhorstius.

Testamentum Scaligeri rectè curabit Peter de Witte, Civis Amsterodamensis noti nominis, cui semper res meas soleo concedere. Iterum salve, & nobis responde.

XL.

*Clarissimo, & Doctissimo Viro Domino
Gerhardo Johanni Vossio.*

Vir Clarissime,

PUTO te postremas meas, ab amicissimo Holsteinio rectè accepisse. Si me amas, effice ut sciam quam salve agas; hoc enim mihi, vel maximum erit. Apuleius noster jam in fine laborat, in quo si unum aut alterum locum, in juventute emendasti, notatu dignum, rogo ne eum mihi invidias. Video Typographum de la Maire, non usque adeo malè fragmenta veterum Poetarum edidisse. Magno beneficio me afficeret, si illi persuadere posses, ut Acta concilii Chalcedonen- sis, prælo subiceret. Ego lucrum non quero ex meis laboribus; sed id unum ago, ut prosum Ecclesiæ Christi, cujus interest, talia rursus produci, quo erubescant impudorati Novatores, qui ineptissima quæq, inficeto, & insipido sæculo, passim aggerunt. Scripsi antea de toto hoc negotio, ad doctissimum Holsteinium, quem non defuturum nobis probe scimus. Tertullianum D. Thyfii, an habere possim, scire velim. Quod si gravantius librum ipsum trans-mittere, saltem peto variantias, in quibus impetrandis, operam tuam non nobis denegabis: Sed & in alia re, tibi gravis esse cogor. Patronus meus magnus Rutgerfius, dixit, in tua bibliotheca, extare Aldinum Exemplar Apologetici Tertulliani, quod avidè expetimus; ut & copiam variarum Lectionum, quas Galeno tuo olim adscripsit G. Falkemburgius. Nam & has, de facilitate tua securus, Professori Altorphiano D. Hoffmanno, viro insigniter docto, qui totum Galenum recens interpo-
labit,

labit; promissimus liberaliter. Vides quantum mihi, de humanitate tua, pollicear. Salve, mi amicissime, & audaciae nostrae ignosce.

Hamburgi, A. D.
xvii. Kalen. Januar.
c1610 cxx. r4-
prissimè.

Tuus dum vita manebit,

Elmenhorstius.

XLI.

Pio juxta, ac docto Viro, D. Gerhardo
Johanni Vossio, conjunctissime Affinis,
S. P.

RE ipsâ aliquoties expertus sum, adesse tibi tantam beneficiendi vim, ut indulgentiam tuam necessitas æmuletur; dum enim summa in me studia, officiaque avidissimè confers, tantummodò debitum explevisse videri vis. Non feci paria, defuit enim facultas; atque eo magis cupio, ut animum mihi gratum Deus, & animo isti tempus, quam longissimum tribuat. Superfint modo solvendi tempora; reddam vicem si reposces; reddam etsi non reposces. Crebras interea prolixasque literas, certissima debita benevolentiae pignora, non invitus dabo; nihil metuens ne molestus tibi fuisse videar, modum in amore excedendo; neque enim periculum est, ne sit nimium, quod esse maximum debet; & verissimè amat, qui sic se amari putat, ut tædium non pertimescat. Postularem ut vicissim quid in oppido vestro, quid in finitimis agatur (solent enim notabilia quaedam incidere) perscribas; sed temporum ratio aliud suadet: scribes igitur quando, & quantum videbitur. Exsolverem nunc promissi fidem, literasque longiores, quam lubentissimè ad te mitterem, nisi sollicita commodi hospitii investigatio, in tam ingenti urbe, me usq; adhuc, à cognati Junii, D. Tileni, aliorumque alloquio arcuisset. Pleniores itaq; literas, proximè sequenti hebdomade, expecta. Vale, & sororem mihi plurimum colendam, cum tota vestra familiâ, quam officiosissimè saluta.

Reptim, Lutetiae,
Anno 1620. 12.
Augusti.

Tuus omni officio,

F. Junius, F. F.

Opportunè admodum adolescens, qui hasce meas ad vos defert literas, per aurigam nectentem moras diem adhuc unum

Lutetiae detentus fuit. Summo itaque mane cognatum Junium visurus, intellexi unâ cum Rege ad expeditionem profectum. Varii hic quotidie per urbem incessunt rumores, & pro loquentium indole, turbidi, aut pacati. Credit optimus quisque labare hostes, petendaeque pacis consilia sumere, & brevi posse bellum patrari. Nuntiant contrâ alii, Reginam Matrem turbas inexplicabiles minitari, vires regni intimas, molemque belli ciere, & neque astu, neque constantiâ, inter dubia indigere; existimo tamen, nisi me fortè in totum fallit, meum de hac gente judicium, ipsâ Regiae praesentiae famâ, bellum omne statim posse profligari: faxit hoc Deus Opt. Max. pacemque diu immotam, & inconcussam Regi, ac Regno Galliae largiatur. Nihil jam mihi accommodatius sit, quam ut Nobiliss. Legatus, quem discessurus compellavi, de rebus meis quid scribat cognato reduci; poteris adhuc uti operâ alicujus amici, qui pariter, & me norit, & Nobiliss. Legato familiaris sit. Neque enim cuiquam, tam clarum statim ingenium est, ut possit emergere, nisi illi materia, occasio, fautor etiam, commendatorque contingat. Ad hæc ut apud vos, ita & hic malignorum hominum rumoribus laceramur, tanquam pacis publicae turbatores, &c. quò magis opto, ut tantæ autoritatis, & fidei Vir, animum meum pacificum vero testimonio prosequatur. Literarum mihi reddendarum hæc sit inscriptio. *Chez Mr. Piat, demeurant en la Rue St. Estienne des Grecs, vis à vis du College de Montaigu; aupres S. Genevieve: fac & sororem Diamantiam hac de re certiore.* Iterum vale, 13. Augusti.

XLII.

Gerhardo Johanni Vossio, Viro Clariss.
Affini conjunctissimo, S. P.

Virorum integerrime, sanctissime,

Licet crebrioribus literis, otium tuum negotiosum interrumpam, tamen non est quod verear, ne molestus sim tibi, cui vel orbem terrarum, non esset longum circumire meâ causâ. Hac itaque tui erga me amoris fiducia ductus, hasce ad te secundas do literas, crebriores daturus, ubi quod scribam offeretur, imo etiam si nihil offeretur; unicum hoc debiti erga te amoris mei pignus absens dare possum; amat enim intimè, & flagrantissimè,

simè, qui sic se amari putat, ut tadium non pertimescat. Nuperrimè de rebus meis literarum aliquid ad te dedi. Rex etiamnum abest, & cum Rege Nobilitas omnis; si brevi revertatur, quod plerique futurum sperant, uberrimè omnia, quæ me spectabunt, ad te perscribam. Non erit difficile: *Σχολὴ δὲ μέλαινα ἡ δόξα παρὰ τοῖς ἄλλοις*. Interim hîc clausus intra domum, alto pinguique otio, me immergo; atque omne hoc tempus intra libros, jucundissima quiete transmittito. Nam quid agam? Alienissimus sum à consortio hominum vulgò. Vin' scire quales plerique mihi videantur. *Κολακαστικὰ τε εἰς καὶ πεινῶν, ὀργιστικὰ τε καὶ κενυμένων, φιλονεικτικὰ τε καὶ ἀλαζυόνων*. Nobilitatis, nisi me fallunt plurimorum testimonia, longè diversum ingenium est.

Celare te non possum, quemadmodum 15. hujus mensis die convenierim D. Tilenum virum humanissimum, & pro veritate firmissimum; cumq; ei inter alia tuis verbis plurimam salutem apprecarer, subjungeremque me ignorare an ullam tui notitiam haberet, statim ipsissimis hisce verbis responsum dedit, *Notissimus mihi est, & quidem merito suo*. His auditis, non erat cur porro ullam historiam tuæ Pelagianæ, ut discedenti mihi in mandatis dederas, mentionem facerem. Et fortè adhuc judicium ejus super isthoc tuo scripto exquisivissem, nisi iter sibi ad Britanniam Regem habendum significasset, atque adeo jam sarcinas alligare affirmasset. Obstupui, perculsus novitate rei; cùmque me videret tacitè, apud animum meum ambigere, quò hæc tam insoliti itineris usurpatio spectaret; addidit ne sibi quidem causam ejus rei compertam; tantum evocari se blandè humanis Regiæ Majestatis,

* *Lancelotti Andrews.*

& * Episcopi Wintoniensis literis; Medicumq; Regium ad hoc missum, ut eo itineris comite uti posset. Quid opus est, in re tam dubia, suspicionibus multum indulgere? sufficere nobis debet, quod vir magnus, iniquissimam adversæ partis in fratres suos crudelitatem detestatur. Unde & ipse ego coràm animosè satis spondentem audivi, nunquam se causæ melioris patrocinium perfidè deserturum. Proinde totius negotii exitum precibus seriis Deo Opt. Max. committamus. Interea tuam, tuorumque valetudinem, summus idem, atque optimus rerum humanarum Arbitrator, gratiosè promoveat. Ipse valeo; si valere est, suspensum & anxium vivere, expectantem in horas, timentemque pro capite amicissimo, quidquid accidere ho-

mini potest. Est enim suspensum, & anxium, de eo quem ardentissimè diligas, interdum nihil scire. Vereor omnia, imaginor omnia, quæque natura metuentium est, ea maximè mihi, quæ maximè abominor, fingo. Quò impensius rogo, ut timori meo, vel per te, vel (si tutius id judicabis) per alium consulas.

*Lucretia, 18.
Septembris,
Ann. 1620.*

Tuus omni Officio,

Fr. Junius, F. F.

Hagæ Comitum vivit quispiam Vansanten Collega D. Bafii, & Kromvlietii, cujus unicus filius, Bokoldus Vansanten, hic Lucretiæ mensem unum mecum vixit; adolescens est multis experimentis eruditus, & quod rarissimum est, videtur amarè bonam mentem. Italiani sic satis lustravit: Me quoque in Italica lingua fideliter admodum instituere cœpit, & lubentissimus in me instituendo, porro bonam operam navasset; nisi illum pater senex, videndi unici filii desiderio captus, à septenni peregrinatione revocasset. Neque Patrem, neque Adolescentem hunc antehac datum fuit noscere mihi; tu, antequam te invisat, ex ingenio Parentis, de adolescente ipso, conjecturam facies. Temporum ratio suavit, ut hæc scire te voluerim. Iterum vale. D. Molanus tuus quondam discipulus, spatio triduo eodem hic hospitio mecum usus est, antequam Salmurium, Bloys, Orleans, & reliquas istius tractus urbes viferet; unicè verò à me petiit, ut te primis meis ad te literis, quàm officiosissimè salutarem. Dum omnia mihi videor, non minus breviter, quàm diligenter persecutus; succurrit quod præterieram, & quidem serò; sed quamquam præposterè, reddetur tamen tribus verbis. Cùm ex D. Tilenò quæsissem, qualis ipsi videretur iste, quem nosti, equitatus Regii Thesaurarius, in hæc tantummodo verba respondit, *Quantus quantus est, Aulicus est, &c. Aulicus melior, quàm Medicus est*. Scis quorsum hæc narrem. Tercio vale.

Clarissimo

XLIII.

Clarissimo & Eruditissimo Viro Domino
Gerhardo Joanni Vossio, Theologo
& Philologo eximio.

Leidam.

Vir Clarissime,

Mirari satis non possum, te Levio nuntiasse, me ad binas tuas, nihil tibi rescripsisse. Testor numen divinum, me ab ipsis xv. septimanis, ne verbum, imo ne datariam quidem salutem accepisse. Unde & sapius mihi oborta suspicio, te planè memoriam nostri deposuisse: Sed benè sit Levio nostro, qui hanc mihi admitt molestiam, dum salutem, & librum tuum eruditissimum, mihi obfert; qui mihi, sit omnia tua, gratissimus accidit. Lætorque plurimum tibi, favore coelitus, iterum otium, & quietem obtigisse; quo laboribus tuis commodè, ultimam manum imponere possis. Nos etiam multa habemus, non inchoata modò, sed adfecta, quæ ob sæculi fatuitatem & miseriam temporum, extrudere jam non possumus: quæ ubi meliora nobis apparuerint, posteritati non invidemus. Testamentum Scaligeri rectè accepi, quod cum MSS. Orosianis recipies, ubi volueris. Salve Vir doctissime, & de studiis tuis, quamprimum nobis rescribe.

Hamb. A.D. xxv.
Septemb. Juliani,
c1o 1o c xx.

Tui studiosissimus,

Geverh. Elmenhorst.

Cupio scire num Grotio, sine invidia, & reprehensione scribere possim.

XLIV.

Clarissimo Viro D. Gerhardo Vossio,
fratri in Christo observando.

Leidam.

Vir Clarissime,

Beasti me luculento munere tuo; quippe non tantum utili mihi futuro, hisce in locis; sed penè necessario. Cum enim hætenus controversias omnes, de Religione, disceptandas esse crediderim, ex ejusmodi fundamentis, & principiis, quibus solidè, & securè semper, inniti posset conscientia; tamen nunc in eam necessitatem, incidere me video, ut aliunde petenda sint præsidia, quibus error revincatur, & conscientis quorundam tene-

ris, aut hæsitantibus, scrupuli eximantur: Etenim his in locis nunc degere cogimur, ubi antiquitas utramque paginam facit, & omnibus licet ineptissimis, atque absurdissimis opinionibus, veluti scutum Gorgonis obtenditur, adeo ut qui eam sententiæ suæ, aut non potest, aut non curat obtendere, causa cadere; qui verò speciosè eam novit obducere, omne punctum tulisse: Et quicquid scriptura, aut recta ratio manifestè reclamare videantur, triumphare credatur. Tantum hic valet antiquitas: Unde hæc una, in omnibus, sive concionibus, sive colloquiis, veluti sacra quædam anchora est; ad quam, religatæ tenentur stupida plebis conscientia; usque adeo ut si hanc eximas Demagogorum declamationibus, animam Oratori adimere, & præter *οὐλομένην*, nudamque larvam, in pulpito nihil relinquere, videri merito queas. Et hæc quidem cum sint hominum ingenia, necessum planè video esse, ut quo jure meritòque, opinionibus suis, antiquitatem semper prætexant, diligenter inquiratur, non ut hac ratione persuadeatur veritas, sed ut errori inveterato fulcrum suum subtrahatur. Eam ad rem, Vir Clarissime, tuam mihi Operam vehementer necessariam esse sæpenumero credidi: Et si enim non desint, qui de singulis controversiis luculenter, ex ipsa antiquitate multa dixerint, scripserintque, tamen nescio qua ratione fiat, ut eorum autoritate, fide, & judicio, non ita fidenter stare audeam: Video sæpenumero alios, aliorum fidem sequi; & cum in antiquorum Patrum scriptis rudes sint, & hospites, eorum tamen auctoritatibus veluti Laciniis quibusdam, hinc inde sine judicio avulsis, aut detruncatis, tam temerè, tam imprudenter, sua scripta interpolare, ut pudeat, pigeatque: Et hinc ferè fit, ut qui eos sequuntur, risui sese, & ludibrio, non raro propinent apud eos, qui in illis accuratè versati sunt, & ætatem ferè totam suam triverunt. De tua vero, (absit adulationis suspicio) tum fide, tum judicio in Antiquorum scriptis, adeo apud animum meum persuasus sum, ut te judice in controversiis ferè omnibus stare, & credere auserim: Quocirca vix credas, quam mihi gratum feceris, quod disputationibus tuis, de materiis aliquot, inter nos, & Pontificios controversis, me dignatus fueris. Utinam tantum in omnibus eandem operam posuisses, nominatim vero etiam in argumento, de imaginum cultu, & adoratione! Pro hac enim superstitione, summa vi, & quod dicitur, velis remisq; hic contenditur; nec mirum, incurrit

incurrit ea maximè in oculos vulgi, & Idololatriæ crassæ, Gentilisque speciem habet, quam à se amoliri semper student, sed irritò ferè conatu, nisi canam antiquitatem, veluti tabulam in naufragio, subinde arriperent. Et fuit non nemo nuper, qui mecum ea de re per occasionem, fortè fortuna oblatam, inter pocula pluribus egit, qui reliquorum omnium more, cum causam suam tueri non posset scripturarum Authoritatibus, ad hanc Aram confugiebat, & in ea una præsidium causæ totius collocabat. Videbatur ille mihi multa dicere, ut *Θεοι* suam posset *διαφύλαξεν*, quæ ab omni ratione aliena erant, & quæ tamen Antiquitatis totius unanimi consensu confirmata fuisse, firmis lateribus adseverabat: Uti inter cætera quod Gentiles omnes semper adoraverint Idola sua tanquam Deos, quibus videlicet divina virtus, personali unione unita esset, sicut naturæ divinæ humana Jesu Christi; cum tamen Lactantium expressè contrarium dicere, manifestum sit, aliosq; quàm plurimos: Præceptum de Imaginibus non faciendis, fuisse ceremoniale & positivum; de Idolis verò non faciendis, morale, illud sublatum, nova lege, hoc perpetuum esse; Imaginis & Idoli distinctionem, apud Antiquissimos Patres, semper consentientibus calculis, traditam esse, & quod ex T. R. lubens etiam, & ante omnia intelligerem, Apostolos doctrinam de Imaginibus, tradidisse in Concilio Antiocheno, idque ex

† Hæc quidem apud Turrianum legere, memini. Sed statim odoratus sum, ea à Græculis, ut alia multa, fuisse conficta.

bibliotheca Origenis, † Pamphilum Martyrem descripsisse. Verba verò Canonis extare apud Turrianum. Lib. I. pro Canonibus Apostolorum c. 25. Ne errent fideles erga Idola, sed expriment divinam humanam imaginem Dei viri, & salvatoris nostri, ac servorum ejus, ex adverso coram Idolis, & Judæis. Hæc aliaque cum ab eo affirmari, atque asserti identidem viderem, neque tamen, libri mihi ad manum essent, ex quibus illud refellere mihi aut liceret, aut etiam luberet, cum in eo causæ cardo non verteretur; non putavi tamen abs re me facturum, si à R. T. peterem obnixè, ut paucis, quid huius de rebus sit, significare mihi non gravetur. Tanto autem fidentius id petere me posse judicabam, quod à publicis nunc oneribus vaces, & curis nullis gravioribus distraharis, & quod operæ pretium facturus sis, si hac in re, operam tuam nobis commodaveris; Quocirca etiam atq;

etiam rogo R. T. ut si quid à privatis, & fortasse melioribus curis temporis superstitid trium horum capitulorum examini impendere velis, 1. An Ecclesia Antiqua, semper distinxerit inter Idolum & Imaginem? 2. An Gentiles crediderint Idola sua esse Deos ipsos, eosque ut Deos suos semper adoraverint? 3. An Apostoli doctrinam de Imaginibus tradiderint in Concilio Antiocheno, & an verba Canonis extant apud Turrianum; licet fabulosum alioquin, & vanum scriptorem? Unum addam, ut si plures disputationes habitæ sint sub præsidio vestro, eas per Kunerdiniam ad me transmittere non graveris. Dabo operam ne in ingratum beneficia hæc non contulisse reipsa comperturus sis; Et si fortè reduces nos ab exilio hoc tristi vobis sistat Deus, quod futurum non sine causa confido, omni officiorum genere compensem. Vale, Vir Clarissime, & perfer atque obdura; dolor hic tibi proderit olim. Dominus Jesus tibi, tuisque, & quotquot bonæ causæ favent, propitius benedicat. Salveat à me D. Barlaeus.

Rapissimè 6. Novembris 1620.

Tuus omni Officio,

S. Episcopius.

XLV.

Præstantissimo Viro, D. Gerardo Joanni Vossio, Affini Conjunctissimo.

S. P.

SECUNDIS ad te literis, Conjunctissime D. Affinis, de Anglicano D. Tileni itinere, nonnihil ad te perscripsi: quæ si rectè, ut spero, ad te sunt delatæ, superest ut nunc eundem Clarissimum Tilenum reducem tibi narrem. Ut reversum intellexi, inter gratantes ut debui accessi; neque gravatus est vir officiosissimus, totam rerum in Anglia gestarum serièr fusè mihi narrare. En tibi itaque omnis negotii summam. Ad D. Tilenum, etiam Sedani agentem, impulsu D. Melvini, accessere duo Ministri Scoti exules. Nostigentem istam Puritanam; cùmque plus iusto eorum in Regem querelæ, præsentè adhuc Jonstono quopiam ardescerent; existimavit vir magnus, salubrium rationum fomentis; animos præferoces, & Zelinietate morbosos, potius leniundos, quàm porrò inflammandos; sed auribus eorum ad moderatiora consilia surdis,

E

dis, nihil aliud effectum est, quàm ut exacerbatiores digrederentur. Non destitit interim Jonstonus, urgere D. Tilenum, ut præcipua collatiuncula istius argumenta scripto consignata sibi communicaret; quò impetrato, ad Regem Apographum transmissit, qui non indelectatus autoritate viri, & argumentorum pondere, Typis scriptum illud vulgari iussit, atque insuper desiderio videndi ejus flagrans, D. Tilenum per literas, blandè ad se evocavit, præsentemque arctissimè amplexatus, gratias ei pro navata opera egit, amplissimumque obtulit stipendium, si in Angliam transmigrare veller. Sed is unà hac hyeme in deliberandi spatium postulata, à Rege dimissus est, nunquam nisi me ratio prorsus fallit, sedem mutaturus. Promerem nunc hujus meæ suspicionis causas, nisi temporum ratio obstaret. Unum hoc tutius addo, virum doctum, non vanam spem animo concepissem, brevi futurum, ut non tantum sibi, sed & omnibus aliis bonæ causæ patrocinantibus, publica autoritate, libertas quilibet imprimendi, hic Lutetia concedatur; plurima ejus opuscula prelum postulant, quorum nonnulla mihi ostendit, animadversiones scil. in Canones Synodi Dordracenæ, Gallicum aliquod scriptum de causâ peccati, & plura similis notæ: scis quàm hoc alibi non liceat; sed ne longius à proposita narratione deflectendum sit, redeo ad incepta. Rex nihil aut parum admodum, cum D. Tileno de Remonstrantium rebus egit, contentus de Ecclesiarum suarum hierarchiâ ulterius quid ex ipso intellexisse. Episcoporum quoque non obscurum in se favorem narrabat, multaque addebat de singulari affectu; quo abeuntem persecuti sunt. Tum ego, an tui, & Historiæ tuæ nulla unquam à quoquam mentio facta sit, sedulo exquirere cœpi; Annuit ille, & præter aliorum magnifica præconia, à D. Josepho Hall, non sine summa commendatione, sibi oblatam quominus perlegeret, adversa valetudine fuisse impeditum. Intellexi ex his destitui ipsum scripto tuo; utque fidem tibi datam explerem, quid discessuro mihi in mandatis dedisses, significavi, & triduo post tuo nomine, non historiam tantum,

† *Responsionem ad Judicium Ravenspergeri?*

matutinam ingressus, sollicitè admodum coepit interrogare, quemadmodum te; ob hoc tuum scribendi genus exceperet:

sed & Resp. † ad Jud. Rav. dono obtuli; Ille utroque scripto gratissimè accepto, hospitium meum, undecimo post die, circa nonam

Itaque post brevem rei gestæ narrationem, literulas tuas, quas solas 19. Sept. datas accepi, introspectiendas tradidi; quibus ille percursis, post varios sermones abiturus, hæc verba protulit. *Utrumque Affinis tui scriptum, cum maximo fructu, & summa voluptate perlegi; hoc veni tibi significaturus; & simul ac literarum aliquid ad ipsum dabis; non tantum meis verbis, plurimam ei salutem dices, sed & spondebis me suo tempore offensurum, quàm non apud ingratum hoc suum munus collocaverit.* Digressio D. Tileno, Pomeridianum ejusdem diei tempus D. Junio, tùm primùm ab expeditione reverso impendi; & post mutæ gratulationis officia, generalioribus, ut primùm fieri assolet, & longè accersitis sermonibus, diem condidimus, cognato nunc fratri Casimiri mentionem faciente, alias fororum numerum percontante, & priores duas parentis nostri uxores, sibi vilas referente, quandoque etiam de Patriæ nostræ statu nonnihil sciscitante. Septimo post primùm congressum die, me unà cum aliquot Uxellodunensibus, ad prandium vocatum, magnifico lautitiarum apparatu, humanissimè & splendidissimè exceperit. Atq, ita ne tunc quidem per importunam illiterati istius consortii præsentiam, de rebus meis quicquam egi. Interim proximæ cuiq, occasione manum injicere destinatum est, omniaque prout ceciderint, ad te perferbere. Sed jam dudum fortè ex me audire desideras, qualis mihi cognatus ille noster videatur; da veniam, Conjunctiss. Affinis, jam tale quid scripturus eram, cùm præter expectationem, à proposito desistere cogor, ob præproperam Aurigæ Antuerpiani discessum. Itaque hebdomade proximè sequenti, nonnihil de rebus meis, & Agmonii † nostri, si Deus volet, ad te scribam. Nunc jubeo salvere, &c.

† H. e. Junii. Alludit ad nomen Hebræum Nadabi Agmonii, sub quo in Cæsaropoli edendo latere voluit Franciscus Junius Pater, Leydensis Theologus.

Reprim. Lutetia An. 1620. 12. Decem.

Tuus omni Officio,

Fr. Junius F. F.

XLVI.

*Clarissimo Doctissimoque Dn. Gerardo
Joanni Vossio.*

Vir Clarissime,

SI mihi ad familiares meos scribendum foret, quâ ratione literas meas exordirer, non in ipso limine, materiæ penuriâ hæsitarem. Aut enim illis salutem nuntiarem, aut meum in illos amorem testificarer: sed neutrum impræsentia usuvenire intelligo. Nam quid Vossio cum salute, & amore Polyandri? Idem quod divitibus olim cum vocibus Clientum, manè præ foribus salutantium. Quid ergo? Num filebo? Id meritorum memoria, atque data olim fidelia præcepta vetant, eadem igitur servanda exordiendi ratio. At hæc è media Plebe, & Triviis, quæ scribo sumuntur: non mirum si à plebe Plebeia, è Triviis trivialia proficiantur. Quocirca cum sterili mihi calamus, aliud tanto viro dignum, producere non queat, salvere te, Vir Clarissime, hoc rerum statu, multum jubeo, & Deum, ut meliori lætiorique te sæculo parcat, supplex oro, ubi sua merces pietati, laus eruditioni, & præmium concordia. Pessima enim & luctuosa hæc tempora, quo digna dicam? Tantâ ne luce? Vah, radiis ejus cæcutiunt, assueta tenebris, & eam fugere, si fugare non possunt, audentve, sedulo adlaborant. Quam miserè, proh Deum immortalem! pietas, eruditio, concordia exulant: sceleribus, omnique nequitia generi applauditur; quæ natura eminere dedit ingenia, supprimuntur; Discordia, & ex ea orta Tyrannis nusquam non grassatur: sed quid ago? Æneæ regni Trojani excidium, & reliquiis immitis Achillei, mala, quæ perpassi sunt, narro. Præstat, quamvis sciam membra Epistolæ hujus inæqualia, ut me ad eam, quâ apud eruditos uti soleo clausulâ, conferam, oremque, cum aliud argumentum mihi relictum non sit, si quæ habeas, habere autem quamplurima scio, quæ studia mea promovere queant, cupido mihi impertiaris: Nullo id præstiteris labore, quod mihi maximo foret indagandum. De meâ autem in te, Vir Clarissime, voluntate, sic velim judices, me, quæcumque postulaveris, quamquam videam, quantulus sim, & me nihil posse sentiam, tanto studio facturum, quanto tu semper, quod maximum fateor in meis rebus, cum sub regimine tuo degerem, te fuisse signifi-

casti: quod cum præstabo, animum tuum erga me imitabor, merita nunquam assequar. Etiam atque etiam cum conjuge charissimâ Vale, & moderata tua constantia fac infamet Tyrannorum injuriam.

*Roterodami, 22.
Maii 1621.*

Tuus,

Johannes Polyander.

XLVII.

*Clarissimo Conjunctissimoque Adfini D.
Gerhardo Vossio S. P. Conjunctis-
sime D. Adfinis.*

GRatissimum Doubletii nostri adventum gratiorem tuæ ad me literæ reddiderunt, quæ cum crebriores alias prolixè spondeant, spem pariter faciunt omnino posthac futurum, ut & alias ad Reverendiss. Episcopum Wintoniensem iis adjungas: de cujus summi Viri erga te, omnesque bonos benevolentia, jam nunc ad te literarum, aliquid scribit, D. Doubletius, auritus, & oculatus testis minimè varius: mihi, tibi, publico non parum consules, si affectus integerrimi spontaneam vim ulterioribus doctæ necessitudinis officiis, fovere non desinas. Imo (si per tempora liceret) Britannos tibi tandem aliquando videndos judicarem. Sed de his aliâs, certiore nuntio oblato. Nunc de rebus meis, hoc tantum habeo scribere, quod omnino futurum confidam, ut per Reverendiss. Virum, de honesta aliqua conditione, prospiciatur mihi, simulac Farnamensi Arce relicta, Londinum reversus erit. Interim tamen tuæ ad illum literæ, si advolare possint, gratissimas ei fore existimare debes. Non patitur temporis ratio plura me his annexere; Nunc itaque finem facturum, D. Erpenio brevi ad vos redituro, uberiores, Deo adspirante, literas sum commissurus. Vale. Saluta sororem charissimam, & firmiter tibi persuade, me ad omnia debita gratitudinis officia paratissimum. Isidorum MS. Sandwici olim vidi: Inquiram an adhuc apud eundem Bibliopolam venalis proftet, si quando eò excurrere dabitur.

*Raptim Londini
Anno 1621. 18.
Aug. St. Vet.*

Tuus omni Officio,

Fr. Junius F. F.

XLVIII.

*A Monsieur Vossius Professeur des
Messieurs les Etats d'Hollande.*

A Leide.

Monsieur,

** In Partitio-
nes Oratorias
scilicet, quas
illustissimo
Maurerio di-
carat Cl.
Vossius.*

J'AY vû l'Épître * dedi-
catoire, que vôtre Affe-
ction envers moy, vous a
dictée; Laquelle je n'ay pu
lire sans honte, à cause des
excessives louanges, que
vous m'attribués, que vous
eussiez restraints à beaucoup moins, si
j'avois le bien d'être mieux connu de vous.
A cela prés, il n'y peut rien estre trouvé à
redire; Et puisque je ne me puis attri-
buer tant d'Eloges, j'espereray qu'ils servi-
ront, d'aiguillon à mes petits, pour y voir
plustost, quels ils doivent s'efforcer d'
être, qu'ils ne le pourroyent sur le patron
de ma vie. Cependant je vivray en atten-
te, de voir ce bel œuvre aujourd, pour en
profiter moy-même; & pour l'espoir de
l'utilité, qu'ils en pourront tirer, par l'u-
sage des bons preceptes, que vôtre rare
erudition, & bien-veillance envers moy
vous sçauront mieux fournir. A laquelle
fin, je suis résolu de les mener, au premier
jour, sous vôtre conduite, & les commet-
tre à vôtre tutelle. Dieu veuille qu'ils y
fassent tel profit, que cela leur serve à
passer leur pelerinage en ce monde, avec
moins d'inutilité pour leur Patrie, & pour
eux mêmes. Dequoy ils devront recon-
noître, vous avoir la principale obliga-
tion; que je payeray pour eux, en atten-
dant, qu'ils en soyent devenus solvables
eux mêmes. Apres cela il ne me reste,
que vous prier de m'aimer, comme vous
le ferés infailliblement, par

*De la Haye Vôtre tres-affectionné serviteur,
ce 22. Aoust.
1621.*

Du-Maurier.

XLIX.

*Maximo, Clarissimoque Viro, Gerardo
Joanni Vossio.*

Vir Clarissime,

QUæ postremis meis ad te transmissis
litteris, de summo Reverendi Epi-

scopi Wintoniensis, erga te
affectu, ex relatu * Affinis * Fr. Junii FF.
tui significavi; Ea nunc
ipse comperi, & relatione, & eâ, quæ tibi
inde nata esse potest opinione longè ma-
jora. Dum enim unâ cum D. Junio pro-
fectus, ac sub ejus umbra latens, hoc ho-
nore sum beatus, ut salutare Rev. Virum
in Arce Farnamia contigerit, vidi me hoc
uno nomine gratissimum accessisse R. S.
hospitem, quod in ædibus tuis educatus, de
te tuoque, in R. S. amore singulari nun-
tium ferebam. Hoc uno nomine tanta,
ab hoc verè magnifico, & præcipuè au-
thoritatis viro, humanitate sum exceptus;
ut nunquam majorem, imò vix parem in
ullo, vel infimæ sortis mortali sim exper-
tus, aut experturum me sperare audeam,
scilicet pro sua magnificentia, habere quos
vult, potest splendide, & honorificentif-
simè, & pro singulari comitate, ac huma-
nitate, beare quoque vult summis hono-
ribus, omnes quos videt R. S. amantes,
aut à viris eruditis, (quos facit maximi)
grata nunciantes. Non fivit nos quam-
diu Farnami commorabamur, aut prandi-
um aut cenam sumere alibi, quàm unâ
cum R. S. in aula propria: Quin & di-
sertè professus vir Rev. nolle se nobiscum,
aut prandium habere, aut cenam, qua
non se DD. Grotii, Vossii, & Erpenii
memorem, poculo tantorum virorum sa-
luti dicato, probaret: subinde nos com-
monefaciens sedulo, ut si viri esse vel-
lemus, (verba ipsa audire te scias, vir Cla-
riss.) exemplo suo, idem faceremus stre-
nuè. Fuit cum præfatus V. R. semel se
Grotium, pluries Erpenium vidisse, excla-
marer; Ecquane unquam spes erit D. Vos-
sium in Anglia videndi? adderetque, velle
se, & expetere unicè, ut dum abest Vos-
sius, absint duo isti alii, crebro eorum
nomina, in mensa sua saltem audire pos-
sit. Et ut uno verbo comprehendam om-
nia, nulla non dedit nobis vir iste Re-
verendiss. affectus in te propensissimi in-
dicia, quorum aliqua jam ex hisce uti
existimo, literis percipere potuisti, alia
proximis, siquidem occasio se offerat tutò
transmittendi reservo: aut, si unâ cum
Episcopo, sperare tuum in Angliam ad-
ventum mihi liceat, præfenti præfens in-
dicare gestio. Velim nunc exprimere pos-
sim per literas ego, quanto animi mei
gaudio videam ita benè tibi, & causa tuæ
velle virum tanta hic, & autoritate, &
dignitate pollentem; sed dubitare non po-
tes de affectu meo, nisi unâ dubites, de
studio meo, quo annitar, semper talem
me

me probare, qualis ut sim, exigunt, & natura, & recta honestatis ratio, & quæ tandem alia esse potest, vitæ benè instituendæ moderatrix. Vale, vir Clarissime, unâ cum conjugē, & liberis, & omnibus bonis.

*Dabam raptis-
simè Londini III.
Kal. Septemb.
1621.*

Tuarum virtutum Insignium

Admirator & Cultor,

G. R. Doubletius.

Puto fore, ut totam hyemem, in Anglia transigam, quod eò scribo, quò si id mihi à te favoris obtinget unquam, ut literas à te ullas habere possim aliquando, huc eas transmittas; nec sit quòd meruas, ne jam in Gallias fortè, uti constitutum erat, trajecerim. Vale, & tui reverentem ama.

L.

*Præstantissimo Viro Gerardo Joanni
Vossio, Affini conjunctissimo.*

Conjunctissime D. Affinis,

QUamquam recens de uxoris tuæ, sororis meæ, morbo Nuntius, sollicitum mihi animum, tristi imagine confuderit; tamen Deo Opt. Max. multiplices curas in gaudium vertente, de metu non queror. Quod superest, Deum Immortalem precor, ut illam tibi, unâ cum spei non dubiæ liberis, fortem, & hilarem diu præstet: fieri vix potest, quin ad vos jam dudum, perlata sit res, plurimorum rumoribus agitata. Trimestre & amplius est, cum Archiepiscopus * Cantuariensis, inter venandum cervo imminens, ictu fallente, hominem sagitta confixit. Difficili conjecturâ non eget, quam gravi vulnere, casus tam luctuosus, & ipsius Archiepiscopi piam mentem, & bonorum omnium animos affligerit. Nondum is dolor exoleverat, cum statim, non levis difficultas inde exorta, omnium aures oraque advertit, nam quatuor inter, quibus imponenda manus erat, Episcopos, aliqui ambigere cœperunt, an consecrationem hanc, humana cæde, cruentatæ manus ritè possent perpetrare: Neque deerant alii complures, qui destinatione tacitâ, in locum Archiepiscopi, summa (ut putabant) dignitate exuendi; Wintoniensem sufficerent: Wintoniense ipso multum obnitente, & nihil non obnixiè pro Archiepiscopo faciente. Vidit

tandem Rex ad curam suam negotium hoc pertinere; oculosque circumferens, decem spectatissimæ Sanctitatis, ac fidei, viros elegit, qui eruditionem suam intenderent, & genus quæstionis, aut non satis tritum, aut etiam inexpertum, ad liquidum perducerent. Erexerat ea res publicam expectationem, omnis moræ impatientissimam: summisque viris hinc inde, dum Antiquæ Ecclesiæ Canones conferunt, & excutunt, in studia per aliquot dies diductis, abruptam undique gratam saluberrimi consensûs spem, timida sollicitudine non pauci augurabantur; donec Rev. Wintoniensis Episcopus, infinitam hanc sententiarum diversitatem, unico allegato Canone diremit. Clericus de quo dubitatur, an sit regularis, non est irregularis. Modestia gravitasque Rev. Viri mirifice commendavit dicti opportunitatem, præcipuè acceptam, diutinâ quasi altercatione fessis. Sententia itaque hæc, non prævaluit modò, sed omnino post tantas dissensiones sola fuit frequens. Magnam sibi tam notabili æquissima moderationis Exemplo, Vir Rev. admirationem, tam apud ipsum Regem, quam apud omnes bonos comparavit. Monuit certè Archiepiscopum Rex, ut conservatæ gratiam dignitatis, ad unum Wintoniensem referret. In his erat curis Reverendiss. Dominus, cum tuas ei literas offerrem; quibus ille jam dudum, ut longè gratissimis respondisset, nisi priores hæc curas, ex improvviso Parliamentum excepisset, quod res quoque meas nonnihil moratur, copiâ Illust. Comitem Arundelium conveniendi negatâ, qui jam pridem unice petiit, ut sibi operam meam integram reservarem. Brevi itaque si Deus annuat, de omnibus meis rebus te faciam certiore. Exemplar literularum, ad virum magnum datarum, descripturus, hic me, præ temporis angustia sistere cogor. Neque necesse habeo, quicquam super hac re scribere, cum tute omnia perspicias.

*Raptim Londi-
ni Anno 1621.
Kal. Decemb.
St. Vêt.*

Tuus omni Officio,

Fr. Junius F.F.

LI.

LL

Maximo Viro Dom. Gerardo Joanni Vossio.

Vir Clarissime,

TAntopere me pudet diuturni mei silentii, ut nunc quoque scribere, & ficà longo errore, tandem in viam reverti, propemodum erubescam. Video enim non dari alium mihi reditum ad Officii tamdiu intermissi partes; quam per ingenuam, sed turpem, supinæ negligentiae confessionem: Cui tamen veniam sat scio facile dabit tua humanitas, præsertim si consideres, esse interdum hanc non minimam officii erga amicos partem, non esse officiosum nimis; sæpe enim molesta magis quam grata est, frequens illa ad viros magnos, & nunquam non seriis occupationibus intentos, scriptitatio: quasi verò futilibus ineptiis, & literis inanibus legendis otium semper suppetat iis, quibus nunquam, ad volvenda Doctorum scripta, suæque vicissim aliis tradenda Lectoribus otii, temporisve est satis. Et certè ipse etiam nunc, ita habeo pauca scripta digna, ut nisi me ad scribendum impulisset, summum cum claritudine tua, quatenus fieri posset, colloquendi desiderium, vel hoc tempore quoque, ab hisce literis transmittendis, manum abstinuissem. Nec enim dubito, quin per D. Junium, omnia diligenter ad te perscribantur, quæ hic geruntur, scitu digna: uti quam, non ita pridem utraque, hic tam Oxoniensis, quam Cantabrigiæ Academia rigida censuræ subjecerit Paræum, Bucanum, & alios: quæ si nondum fortasse innotuerunt, nunc accipe. Habebat Oxonii ante menses circiter tres, aut paulo amplius, concionem Juvenis quidam Theologus, & non satis temporum, in quibus vivimus, observans; sed probus alioqui & existimationis bonæ. Hic cum prius generalia quædam proposuisset, ex quibus vereri videbatur, nequid Religio reformata, ubique ferè terrarum, nunc concussa etiam in Anglia, detrimenti caperet; tandem eousque deveniebat, ut assereret in tali casu, fas fore subditis, aut saltem inferioribus Magistratibus, etiam invito, & aliud moliente Principe, omnibus modis, atque adeo, vel armis Religionem veram, ejusque publicum exercitium tueri; addens illustrandæ Theosæ suæ causâ, existimare se, Regem Galliarum, si (dum exercitui Reformatos in urbe aliqua obsidenti interest quotidie) ferro per manum subditi

caderet, justè & sine ullo maestationis crimine occisum iri. Quæ verba cum ad Regem, nescio qua ratione delata essent, statim eum in vincula conjici, & captivum ad se adduci Rex jubebat; nemine dubitante quin capite lueret immoderatam linguæ licentiam; sed cum examen super causa institutum esset, Juvenis hic (*Knights* nomine) credidisse se profitebatur, esse hanc communem omnium Reformatorum sententiam, atque ita se à Reformatis Doctoribus esse edoctum, citans Paræum in Commentariis in Epist. ad Rom. Bucanum in locis communibus; & Stephanum Junium Brutum, five * Authorem Libri, cui Titulus, Vindiciæ contra Tyrannos. Excusabat hoc aliquantum juvenem, in Theologia Tyro-nem, non absolvebat plura quam Authores dixerant, construentem, & hypothesin inde formantem. Itaque ipso in carcere detento, censuræ Academiæ postea traditi fuere prædicti Authores. Ac Oxoniensis quidem capita aliquot selecta, pro erroneis, falsis, impiis damnans, Paræi solum commentarios ad Romanos publicè conflagrandos censuit, quod etiam factum, conquisitis quotquot in Officinis Bibliopolarum, & Musæis studiorum, reperiri poterant exemplaribus. Cantabrigiæ verò etiam Bucani locos communes, & Bruti vindicias, publicè flammis tradidit: Et ipsos Authores (si modo ita senatus censuit, uti senatusconsultum scripto conceptum, nondum tamen approbatum erat, cum ego id Cantabrigiæ viderem) perpetuâ infamiâ notavit: Fueram hæc perscripturus antea, cum omnino nova essent, nisi unâ cum Oxoniensi Decreto (quod nunc mitto) etiam Cantabrigiense longè elegantiori formâ, & multo acrioribus verbis conceptum, transmittere desiderassem. Quod tamen ne nunc quidem, post longam expectationem, editum videre contigit: Simulac haberi poterit, curabo ad te perferendum. Videbar ego in Cantabrigiensi Seno videre plusculum bilis, in rigidos istos Genevensis reformationis Professores; five ea causa sit, quod Puritanorum omne nomen exosum habent; five quod plerique ibi Remonstrantium sententiæ sunt addictissimi: Fui istic tempore Comitiorum, in convivio publico splendidissimo, cui plusquam 30. Doctores Theologiæ, aliique Equites ac Nobiles intererant, ubi acerrimè de prædestinatione, libero arbitrio, & reli-

* *Is est Hubertus Langue-tus, Burgundus, Melan-chthoni, Thuroano, Plethæo, & aliis summe charus.*

quis

quis apud vos tantoperè controversis capitibus disputabatur, quibusdam Remonstrantium sententiam obnixè defendentibus, adversus Doctorem Balcanquallum, tibi jam pridem tempore Synodi Dordracenæ notum & alios: quo nomine, cum ego valde mirarer, dicebant mihi Doctorum unus & alter (quibus Episcopus Wintoniensis me per literas commendarat) dubium sibi esse, utra pars, plures in Academia haberet fautores, Remonstrantiumne, an contra-Remonstrantium. Quod in privatis colloquiis ipse postea, verum comperi in quamplurimis. Quin ipse, qui nunc est Academiae Vice-Cancellarius (magnæ hic auctoritatis nomen) remonstrantissimus est, uti & ille qui ejus rogatu Summè certè elegantissimè conceperat, & mihi jam tum in arctissimam consuetudinem admisso, privatim perlegendum dabat, rogans interim, ne antequam prodisset, exemplar exscriberem, aut cuiquam rem communicarem; quoniam incertum erat, anne iisdem planè verbis unquam divulgaretur: Quod ego dum sanctè amico roganti servavi, non possum ultra quicquam hac de re tibi notum facere. Silere nequeo, quanquam gratiam ex aliorum erga te affectu nullam capto, quam Cantabrigiæ invenerim, multos Vossiani nominis amantissimos; ipsum quoque Balcanquallum, Scotum, qui synodo interfuit: Sed præcipue Doctorem Hieronymum Bealum, Aulae Pembrokianæ Præsidem, virum eruditissimum, quique humanitate sua, & amore in me singulari, multum me sibi obstrinxit; & voluit quoque, ut cum occasio daretur, affectus sui in te propensissimi testis apud te essem.

Porro, ne hoc quoque ignores, Rex Angliæ, quò doceat Pontificios (ita enim ego lubens mihi persuadeo) uti majore quàm consueverunt, erga Reformatos clementia, die iv. *Augusti*, literas ad senatum, & omnes per universum regnum Officiarios dedit, quibus Pontificios omnes, ubique è carcere liberari jussit, qui, quod juramentum fidelitatis, Regi præstare recusarant, magno numero per totam Angliam detinebantur captivi; Ministris præterea omnibus interdixit, ne ulla inter Pontificios & Reformatos, controversa capita, in publicis concionibus disputarent: Solis enim Episcopis, Decanis, & Doctoribus, ea in umbone attingere, si opus sit, fas esse voluit. Quæ cum multi interpretarentur, quasi Nuptiarum cum Hispaniæ Principissa contrahendarum præambula; ego tamen potius credere malo,

ex ea quam dixi causa procedere; ne si cum vulgo sentiamus, pravis suspitionibus, & perversis ominationibus, injuria fiat Regi religiosissimo, & fidei defensori. Certè disputandi licentiam paululum coarctari non est sine ratione, cum alioqui sæpè eveniat, ut argumentis adversariorum ingenuè propositis, solidè respondere nequeant, qui ea moverunt, unde fit ut causæ propriæ, magis obliant quam profint. At tu hæc, pro judicii, quo polles gravitate, melius ponderare potes, quid velint, & quò tendant, quam ego scribere. Itaque desino, teque cum lætissima Conjuge, & Liberis divinæ tutelæ commendo. Vale, vir clarissime, & quo soles affectu prosequi me devotissimum, quæso ultra prosequeris.

Τῆς ἐλοφύζου,

*Londini, xvi. Aug.
St. Vet. 1622.*

G. R. Doubletius.

Salutem plurimam, quæso D. Scriverio, D. Barlæo, D. Berchoutio, meo nomine, impertiri velis. Si Deo placeat, præsens rursus vobis adero, post bimestre; interim si aliquid à te literarum videre contingat, scis quam id mihi sit futurum longè gratissimum.

LII.

Speculatissimo Viro, D. Gerhardo Joanni Vossio.

Conjunctiss. D. Affinis,

SI per sororem Brunæam literas, quas Londino discessurus, ad te pariter, atque illam raptim dabam, rectè accepisti, omninò futurum brevi confido, ut petitioni meæ satisfactum esse gaudeam; præsertim si iis quos ad me transmitti postulaveram libris, faustum de tua, sororis, omniumq. liberorum vestrorum prospera valetudine nuntium adjunxeris. Miro certè res vestras cognoscendi desiderio teneor. Nam quod sororem natu maximam attinet, ne quidem ubi terrarum vivat suspicari possum. Latere te non potest, quàm vario dubiarum opinionum æstu agitur animus, pro conjunctissimis sollicitus, eoque omnem mihi scrupulum, festinata scriptione eximendum mihi esse cogitabis. Ego hic tertium jam mensem in ædibus Rev. D. Norwicensis vivo; qui summis me in hac mea conditione non poenitenda honoribus

noribus dignatur. Adspiret modò Deus Opt. Max. conatibus meis, & honoratissimum totius Angliæ Marefchallum, ex gravi lapsu periculose satis decumbentem, sanitati pristinæ restituat. Jamdudum boni otii partem, Grotianæ ad fidem introductioni impendissem, nisi nobile aliquod conjugandorum par, illustrissimi Comitis filiolum, ad nuptiarum suarum celebritatem advocasset; & nunc quoque cum venationi, aut equitationi nobilissima indoles intenta est, me comitem postulat. Post hebdomadas tres, quatuorve, in urbem relictis agris migrabimus; ubi si, quod spero; plusculum à talibus exercitiis vacare contingeret, efficiam, ut tibi otii mei ratio constare possit. Deum precor, ut te, uxori, liberisque, incolumem diu conseruet, meq. familiæ vestræ utilem, quandoque præstet. Saluta omnes sanguinis, & amicitiae necessitudine nobis junctos.

*Raptim, Ludhami,
in edib. Rev. Episc.
Norwicensis, Anno
M. D. C. XXII.
vi. Non. Aug. Sr. vet.*

Tuus omni Officio,

Fr. Junius, F.F.

Rudem aliquam paterni sigilli imaginem ad me transmittas velim, plumbo vel cerâ expressam.

LIII.

*Clarissimo, Eruditissimoque Viro, Dom.
Gerardo Johanni Vossio, Professori
dignissimo.*

Vir Clarissime,

Virum reverendum D. Rivetum, Collegam vestrum quem mihi Galliam petenti, bona fors, & summa viri humanitas, viæ & consiliorum ducem dederant, longè gratissimum; ut itineri quo Bataviam repetit, accinctum videam, nec quam in perferendis literis, comiter offert operam, ambabus arripiam manibus; nec impetrare ab animo meo possum ipse, nec finit vinculum ætèrissimum, quo me tibi obstrictum tenes, non ad sempiternam solum acceptorum beneficiorum memoriam, sed & eorumdem agnitionem frequentissimam. Uti enim is quem Principis liberalitas, latè fundorum constituit Dominum, sub eâ lege, ne unquam se accepti muneri immemorem probet, neutiquam officio suo faciat satis, si intra se, & animum suum, semper sit gratissimus, nisi etiam quotannis, oblata re, vel minimâ, authorem

suum recognoscat: Ita & ego graviter me peccare crediderim, in sanctas officiorum leges, si simplici contentus animi gratitudine, non subinde ore quoque & calamo, summa tua in me merita, ingenuè agnoscam, & profitear. Eamque oris, & calami professionem nudam tua humanitas, pluris facit scio, quàm vulgus hominum, quicum nihil tibi unquam commune voluisti, magnos æstimat æris Thesauros. Utinam verò, dum ego, quod officium mei est, facere contendo, unâ aliquid adjungere rerum novarum, quod te oblectet, possim; aut de virorum eruditorum in Gallia (quos tibi vel fama, vel literarum commercium, vel utrumque notos fecit) lucubrationibus, & curis habeam, quod perscriberem. Verùm quia pusillum illud temporis, quod in Gallia transégi, æquè ab aula, ac eruditorum virorum consortio transegi remotus, nihil nunc tale occurrit, hæc tantummodo scribenti, ut cum consuetus tuus erga me, & tamdiu probatus affectus, te ex D. Riveto, inter alia querere faciet, quid de me, quem secum unâ abduxerat, egerit; ipse tum quasi rogatus, respondeam, me divini numinis auxilio, hætenus sospitem, & optata valetudine fruientem, ac paria de te, familiaque tuâ omnibus votis sperantem, hoc unice expetere, ut quæ tibi ex animo semper vovi, & voveo, propensissimi affectus officia, aliquando tibi, aut tuis (quod nunc non sunt) usui esse possint. Vale, vir clarissime, & nunquam define amare

*Tuum, tuarum virtutum pro
viribus Cultorem Max.*
*Tbouarci, raptiss.
die 17. Septemb.
1623.*

G. R. Doubletium.

LIV.

*Clarissimo Doctissimoque Viro Dom. Gerardo Joanni Vossio, Professori
Academiae Lugdunensis.*

Lugd. Batav.

S. P.

Nisi humanitatem tuam nossem, clarissime vir, excusarem literarum mearum audaciam, ad te hominem semper in literis occupatissimum, præsertim cum sine argumento veniant; nisi tu fortassis hoc pro argumento, satis magno, (quæ tua est benignitas) reputabis, quod amorem, & cultum meum, erga virtutes tuas perpetuum testentur. Certe, mi Vossio,

fi, quamvis interea temporis, ex quo tibi Lugduni valedixi, varias, & terras & maria obiverim: (fui enim & in Britannia, & in Gallia, & in Italia, redux deinde, in Germaniam excurri, in vicinam quoque nobis Poloniam) nunquam tamen fuit, ut non sæpè de eximiis virtutum tuarum meritis, ea cogitaverim, quæ illorum admiratorem religiosum, cogitare par est; sæpè etiam apud alios, quoties fuit occasio, mentionem eorum injecerim, quos partim inveni tibi insigniter velle, partim, (quod sine jactantia dixerim) tales ego de prædicatione mea feci. Quo meo erga te studio, quamvis alia desint, (ut rectè nihil quoque est aliud, quo me apud te efferre possim, aut velim) hoc fortassis mereor, ut non neges mihi in posterum, quamvis longè absenti, favorem eundem quo me præsentem nihil certè magis merentem profectus es. Vellem nunc de studiis meis, aliquid ad te, tanquam omnis, sive sacræ, sive profanæ, literaturæ promum-condum deferre: Sed hoc forsitan prudentius eo differam, cum intellexero tibi non ingratum, literis à me sollicitari: nunc satis sit veluti vadam primum tentasse. Requiris tu forsitan contra à me aliquid, de hujus Academia statu. Est sanè illa si numerum Professorum putes, sic satis rectè constituta; nec desunt inter eos viri egregiè eruditi: Interea cujus fama ad externos manarit, vix habeo nominare, præter Pelargum, & Origanum, illum in Theologicis, hunc in Mathematicis, tibi sine dubio notum. Est & Neander quidam Ethices Professor, Vir optimarum literarum, nec minus Juris Civilis, & Philosophiæ practicæ, insigniter peritus, quo nullum hic tractus in latina lingua oratorem habet elegantiorum, cujus & orationes funebres, typis descriptæ extant; sed nescio an Rhenum, & Danubium transferint. In disputationibus, nemo hic magis fervet Wolfgango Crellio Theologo, cujus præmaturum ingenium (non multum enim, ut suspicor, triginta annos excessit) longum adhuc bellum omnis generis, hæreticis minatur: Aperuit nuper eodem ferè tempore, duo collegia, alterum contra Lutheranos, alterum contra Socinianos, quos vocant. Socinianorum nomen revocat mihi in mentem, Antilrotium, quem scias Racoviz, jam sub typis fervere, & fortassis ad umbilicum esse perductum: Vidi enim jam ipse, bonam illius partem. Author illius est Joannes Crellius, Wolfgango nostro nomine quidem similis, sed nulla cognatione devinctus; juvenis ferè & ipse,

mihî jam ante plurimos annos, notus in Academia altorphinæ, ubi jam tum eriticabat in illo singularis quædam ingenii acrimonia, & judicium supra ætatem, quæ tamen ille modestia planè virginali, quantum poterat, celabat, & deprimebat. Porro si quid ad me rescribere aliquando dignaberis, literas tuas mittas saltem Amsterodamum ad Remum Egbertum Episcopium, Mercatorem tibi, ut credo non ignotum: Cum illo sic constitui, ut sciat, quonam illas ad me dirigere debeat. Vale, optime Vossi, & bono Reipublicæ literariæ, quàm diutissimè feliciter vivè.

*Dab. Francofurti ad
Oderam A. D. viii.
Eid. Nov. ann. æræ
Chr. cl. lxxiii.*

Tui observantissimus,

Mart. Ruarus.

LV.

A. M. Vossius.

Monfieur,

JE vous envoye cy jointe la lettre de Monf. Boswell, la longue & dange-reuse maladie du quel a esté cause du retardement de vos affaires par deçà. Maintenant vous entendrés de sa lettre la continuation de la bonne affection de Monf. le Baron de Brook envers les bonnes lettres, & envers votre personne: à laquelle lettre je n'adjousteray rien de ma part, si non, ce que j'ay entendu de mes propres oreilles ces peu de jours passéz de la bouche de Monf. le Baron c'est qu'il vos attend par deçà avec impatience; qu'il vous assure de ce qu'avez désiré par vos lettres; que rien ne manquera de sa part, qui pourra appartenir à vostre accommodement. Monf. je vous conseille de haster tant que vous pourrez vostre voyage envers nos quartiers: ne vos arrestez à ceste première fois à vostre famille qui pourra suivre commodement en bon temps: cependant ne vous desgagez pas entièrement de l'entretenement dont l'Université de Leyden vous a déjà pourveu, mais si tout ne vous agréé icy, ordonnez vostre voyage de la sorte, qu'y puiffiez avoir seure retraite; je ne dis pas cecy, pour vous descourager en la moindre façon, ou pour ce que je me doute aucunement de la réelle execution des promesses de Monf. le Baron (lequel est honorable en tout & par tout) mais à cause que luy est fort âgé; & pourra faillir en un moment de ceste vie, devant que les bons desirs qu'il a conceus soyent

de tout point arrestez. Adieu Mon^r. & hastes vous de nous venir trouver, ou ne trouverez autre chose sinon les effects d'une cordiale affection.

Londres ce 15. de
Janvier 1624. St.
vet.

Monsieur,

De vostre tres-humble
Serveur

Dudley Carleton.

LVI.

Doctissimo Viri Gerardo Joanni Vossio,
S. P.

* Epistolam
hanc in Mis-
cellaneis Hi-
storicis pri-
mum vulga-
vimus.

INCIDI * nuper, doctissime Vossi, dum officinas identidem pertranseo, in opus tuum de Historicis Græcis, eruditum sanè & ad meum gustum. Coëmi, dumque investigo quæ in limine Cunnæus J. C. ait de arte Historiæ à te præmissa esse, non hic reperi, negantque sibi visa. Si exiit annis prioribus, jube ut Elzevirii mihi current. Narro tibi apud me collecta esse, veluti naufragii scalnos, Vet. Historicorum Græcorum fragmenta, ut Latinorum edidit & Fulvius Ursinus, ab Antonio Augustino collecta, ut nosti, & Ant. Riccobonus. Si putas istic tua operâ evulgari posse, non meo appposito nomine, (hac lege) mittam ad te per Tabellarium, cui tantum portandi perfolves laborem, præterea nihil. Rhetores adhuc antiquos collectos habeo, & nonnulli illustratos, qui & tuam implorant opem, quia Rhetorica tam excellenter simul iterumque edenda curasti, ut & de præcis Rhetoribus libellum, quem legi libenter, ut antea Tragicorum vet. Latinorum à te digestas reliquias. Machæ porro, & Græcos Latinosque Scriptores, ut cœpisti, illustrare, ac compingere perge feliciter. Vale. Salutat te tenebrio, qui Photium dedit Latine. Antuerpiæ, 24. Julii 1624.

LVII.

Clarissimo Viro D. Gerardo Joanni Vossio, Eloquentiæ, & Histor. Professori, S.

ACCEPI, mi Affinis, ante aliquot hebdomadas, opuscula tua, quæ ad me misisti; omnia perplacent, præsertim verò illa, quæ contra Lonigum edidisti, quæ non solum ego, sed & D. Scultetus, & doctissimus quidam Baro, ex Austria profugus, cui etiam dedi exemplar, quod mihi miseras, cum voluptate legimus: optamusque omnes, ut quemadmodum cœpisti, ita pergas à vocibus, aut disputationibus scholasticis, tandem ad res venire; sunt quidem illa rei literariæ utilia, hæc verò Republicæ utiliora, licet iis, à quibus prodeunt, periculosa. Deus tamen vivit, adestque iis, qui curam populi ipsius, eorumque quos ei præfecit, habent. Placet quod tam breviter, & methodicè responderis. Nec enim susurriones isti tanti sunt, apud nos, ut in eorum gratiam, magna volumina condi necesse sit. Si duobus, aut tribus exemplaribus carere posses, velim ea ad me mitti, ut & alios, qui à me petierunt, eorundem participes faciam. A Samuele Narano tandem literas accepi, ut & à sorore nostra Rostochio. Ingenii satis habet, ut mihi quidem videtur: Faxit Deus tantum, ut ingenio rectè utatur. Respondi iis Kal. Maii, & quidem amicè, ut inter fratres, & affines decet, rogavi que ut sese tandem cum Ecclesiis nostris reconciliet. Videbo quid præstiturus sit. Utinam diem illam mihi videre liceat, qua familia paterna audiat in causâ religionis, vestigia ipsius premere! Tu, quæso, me pro viribus juva, & ipsum ad idem mone. Pro pecunia numerata mulieri isti, gratias habeo. Scribit foror, me nunc aliquo modo, in are vestro esse. Puto tamen illud perexiguum esse. Uteumque sit, conabimur satisfacere. Vale, mi affinis conjunctissime, & Uxori Liberisque, plurimam à me, Uxore, & Matertera salutem dic. Nos omnes per Dei gratiam valeamus, etiam si filiola nâtu minor, ante aliquot hebdomadas, in summo vitæ discrimine versata fuerit, à quo tamen gratiosè eam liberavit Deus.

Repin, Groningæ,
17. Junii 1624
St. vet.

Tuus Affinis,

J. Junius.

Quas hic conclusas vides, eas rogo ad D. Lotium perferri cures.

LVIII.

LVIII.

*Translation d'une lettre du 27. de Juil.
1624. écrite par le Sr. Guillaume
Boswell (Secrétaire de Monseigneur
le Garde Seau) au Sr. Dudley
Carleton, Secrétaire extraordinaire
du Conseil Privé de Sa Majesté de
la Grand Bretagne.*

Monfieur,

IL vous peut souvenir de ce dont je vous ay parté touchant Gerardus Vossius. Je vous prie encore ceste fois, de lui donner advis par la première opportunité, que le Seigneur Broock ayant resolu de fonder presentement une lecture d'histoire (ou *Civilis Scientia*) dans l'Université de Cambridge, à intention sur ma recommandation dudit Vossius, de la conferer sur sa personne. Les conditions ne seront point grandes ne difficiles; son entretien sera mille quatre cents florins par an ou davantage, & son logis franc, peut estre, en quelque College. S'il accepte le service & place, obligez le d'escire sa responce à vous ou moy, a fin que je la puisse monstre à sa Seigneurie qui l'attend en grande devotion, & qu'il s'assure que je feray mon mieux d'amender des termes dessus specifiez; ou luy faites sçavoir que s'il escrit, qu'il sera necessaire qu'il face un voyage, pourveu que sa Seigneurie de-fraye ses dispens, en Angleterre. Je parleray à sa Seigneurie de l'en assurer, & plus particulièrement de la somme. Je vous prie derechef de me faire entendre responce de cet affaire avec autant d'expedition que vos occasions vous permettront, & vous m'obligerez de tant plus à demeurer,

Monfieur,

Du College de
Westminster,
le 27. de Juill.
1624.

Votre Serviteur tres-
humble,

Guill. Boswell.

Je fus hier chez Burlamachi pour vous voir, & si je n'estois maintenant en haste sur mon partement vers Cambridge j'escrisois à Vossius moy-mesme, comme il y a apparence que je feray par le premier ordinaire.

LIX.

A. M. Vossius.

Monfieur,

AYant esté nagueres à Leyden en esperance de vous y pouvoir trouver, on m'a informé que vous vous estiez retiré à Dordrecht pour quelque temps; de sorte que pour ceste fois là je faillis de la commodité que je m'estois proposée de vous parler, touchant les desirs de quelques bons amis que vous avez en Angleterre, quoy qu'inconnues encor à vous, lesquels ont complotté avec my Lord Brooke, de vous proposer une honeste condition de vivre en nostre Université de Cambridge, si ainsi n'est que vous soyez déjà mieux pourveu au lieu ou vous estes presentement entretenu: les particularitez de ceste proposition estants contenües en translat d'une lettre, qui m'a esté escrite sur mon dernier partement de Londres de la part de Monsieur Boswell, Secrétaire de Monseigneur le Garde Seaux d' Angleterre (homme treffçavant, & admirateur ensemble de la grande doctrine qui est en vous, selon qu'il a bien peu appercevoir par vos escrits) vous en delibererez s'il vous plaist & m'envyerez vostre responce demain ou après-demain; laquelle je desire d'avoir au plustost, estant dans peu de jours pour retourner en Angleterre: vous trouverez au translat de la lettre de Monsieur Boswell son affection point dissimulée de vous rendre service; & s'il vous pluit de lui escire un petit mot sur ce sujet, je seray bien aise que d'estre porteur de vos lettres: comme aussi de vous faire tout la courtoisie qui sera en mon pouvoir, quand vous aurez occasion de vous servir de moy. Ainsi en attendant vostre responce, je demeure,

Monfieur,

A la Haye ce
10. de Sept.
1624.

Votre serviteur tres-
affectionné,

Dudley Carleton, au logis de
Monsr. l'Ambass. de la Grand
Bretagne.

LX.

Incomparabili Viro Dom. Gerardo Jo-
anni Vossio.

Vir Clarissime,

Nisi notum me tibi, meamque tui ob-
servantiam, abundè tibi perspectam
scirem, esset certè quod vererè, ne om-
nem & tui, & meorum officiorum me-
moriæ, apud me extinctam crederes.
Adeo non me latet, quamdiu sit, quod
nihil ad te literarum dedi. Sed nec quod
darem fuit hætenus, imo ne nunc qui-
dem esset, nisi ad scribendum, me com-
pellerent infausti hic, de morbis conta-
giosis Lugduni, & alibi in Hollandia a-
crius grassantibus, rumores. Delatus no-
bis hic Romæ fuit Nuncius, de morte præ-
matura D. Erpenii, qui certè mihi rei-
publicæ literariæ causâ, fuit auditu tristis-
simus: Nec minus alter me affixit, de
obitu D. Vorstii, sed postremus hic quàm
malè me initio habuerit, cum balbutiens
amici lingua, non nimis accuratè nomen
illud apud me proferret, potius apud alios,
quàm apud te referam, tum ne malè o-
minari videar ei, qui plusquam mortalium
cuiquam boni, & precor, & auguror, tum
ne ostentabundus credar, in iis quæ debiti,
& millies promeriti affectus, esse meus mi-
hi indicat animus. Deus Opt. Max. quod
temerè, & mihi, & omnibus bonis, mœ-
stissimum, perferebat rumor, in vitam
longiorem, omnibusque bonis, faustissi-
mam tibi convertat, precor. Cæterum
quanquam vix mihi, (parum adhuc ordi-
nariæ tabellariorum professionis, hic loci
perito) fuerit pauca quæ vides scribendi
tempus, & manum etiamnunc à charta
avocet, qui hanc laturus, festinabundus
expectat; nolo tamen ignores, interfuisse
me hodiernâ die, actioni, & congrega-
tioni solemnî, & publicæ, Cardinalium,
& sancto officio præpositorum, inquisito-
rum generalium, quâ cadaver Marci An-
tonii de Dominis, olim Archiepiscopi Spa-
latensis, pendente suâ cum inquisitoribus
causâ, in publico carcere, ante trimestre
circiter mortui, igne unâ cum ejus scri-
ptis cremari iussu, ad æternam ejus in-
famiam fuit; eo quod primum apostata
factus, posteaquam dignitatibus restitutus,
& in gremium matris Ecclesiæ receptus,
denuò fuerit, ad hæreses Protestantium re-
lapsus, licet mortuus hæreticum eum esse
ipla neget sententia. In qua plurima sunt
consideratu dignissima, & talia quæ velim

magno retinere potuissem, aut bona fide
descripta consequi possem. Adlaborabo
quantum potero, & prima occasione ad te
dabo hac de re largius. Cardio causæ in
eo vertitur, quod unioni inter Ecclesiam
Catholicam Romanam, & eas quæ Pro-
testantium dicuntur, totus studuerit. Va-
le, plus nec charta capit, nec permittit
tempus.

Romæ, die 21.
Decembris,
1624.

Tuus omni Affectu,

G. R. Doubletius.

LXI.

Arn. Buchellius, D. Gerardo Joanni
Vossio, Eloquentiæ in Academia Bat.
Professori, S. P.

Doctissime Vir,

Cum nuper à Nepote nostro, Josepho
Vorstio, mecum domum attulissem
libros vestros, de Historicis Græcis, non
tantum plurimum eorum lectione delecta-
tus sum, sed & infinitæ lectionis memo-
riam tuam, simul exactum de singulis ju-
diciu, mirum in modum æstimare cepi.
Atque ea causâ est, quæ me impulit vos
etiam vix notos, rudibus hisce, & penè
audacibus meis literis compellare. Et ne
hæc me fingere putes, inter legendum
occurrerunt, quæ animi dubium facerent:
Nempe quod cum nobilis Vir, Theod.
Douza, Georgium Curop. de Constant.
capta cum sua versione olim ediderit, vos
non Georgii, sed Joannis, eidem authori
nomen indidistis. Quod etiam dubitatis
Julianum Imp. vulgo Apostatam dictum,
Historicis adscribere; cum ejus Cæsares
historiam sapere videantur, etiam si non
absque aculeo scripti sunt, & in Episto-
lis ejusdem Historica plura referantur,
atque ad historiam pertinentia, alia ab eo
conscripta esse, verisimile sit, cum ipse
inter Principes doctissimus, atque gloriæ
mirum in modum appetens fuerit, multa-
que gesserit memoria non indigna. Sed
hæc sint, quasi præludia vobiscum amici-
tiæ ineundæ, quàm sanè, omnibus modis,
licet sim ab ambitione alienissimus, am-
bire me fateor. Doctissimum Scriverium,
diu est quod expecto, sed ea spe cecidisse
videor; vereor etiam, ut ab undis Haer-
lemenfis, ardor in illo pristinus rerum
nostratum mergatur, eaque in studiis so-
litis alieniorem reddant. Gratum nihilo-
minus

minus erit, si eidem à me salutem dicere grave non fuerit; & simul petere, quid de libris suis, apud me existentibus, fieri velit. In patriâ historiâ, quæ nuper admonebas, equidem vellem, nisi tam multa deessent, & jam tardior ætas, ab omni labore abhorreret, cogitabimus tamen, si quid ad illum adferre poterimus. Interim vos, doctissime, & diligentissime Vossi, (cui studia, & literæ quamplurimum debent) optumè, & diutissimè valere, & vivere optamus.

*Trajecti in Batavis,
calamo festinan-
tioris, vi. Id. Jan.
An. ineunt. 1625.*

LXII.

*Clarissimo Præstantissimoque Viro Dom.
Gerhardo Vossio, Eloquentiæ Pro-
fessori.*

Vir Clarissime.

SI à negotiis tantum otii fuisset, decreveram diebus hisce, isthuc excurrere, uti videndi tui ac salutandi desiderio & voto, frui possem; quod tamen prope diem futurum confido. Interim quum dignissima * Oratio tua in funere istoc Christiano Orbi funestissimo habita juri publico asserenda sub prælo versetur, visum mihi fuit, rerum mutationi, atque præsentì constitutioni consonantius fore, immutari etiam nonnihil in iis, quorum tibi ego materiam suggessi; scilicet si illud supprimitur; Regem Africæ in mandatis Legato dedisse, ut Dominum Erpenium P. M. in consiliorum societatem adscisceret; sed in locum ejus substituat, Legatum eidem nunquam quidem sibi viso, sed ex famæ claritate, & Regis erga eum benevolentia percognito, hunc honorem detulisse; non quod ibi scrupulus sit, quia ita ex ejus ore ipse accepi; sed quia præstabit in eo tempore ita obsecundasse, uti coram tibi aliquando exponam. Nosti enim minima etiam rerum politicarum momenta esse tenerima. Pectoris tui candor, atque prudentia condonabit mihi, spero, libertatem, quod te audeam in opere tuo aliquis monere. Vale, vir Clarissime. Deus Opt. Max. Musas tuas diu prosperas, & nobis superstites tueatur, meque eorum

* Orationem
intellige in
Tho. Erpenii
obitum.

rogo, numero adscriptum velis, qui eadem amore summo, & veneratione prosequuntur, etenim dum vivam, futurus sum

*Hagæ Comitis
Octob. Kalend.
Febr. M. DCXXV.*

*Tui nominis Amantissimus,
atque observantissimus,*

J. Golius.

LXIII.

*Viro Clarissimo Doctissimoque D. Ger-
hardo Johanni Vossio, Eloquentiæ
Professori.*

Vir Clarissime,

EX literis D. Gerardi Meerman, ad fratrem suum, Italici itineris mihi commitem salutem, quam mihi mittebas, quo æquum est gaudio, accepi: Et summopere latus intellexi, quantis indiciis tandem agnoscere possis, quod ex Anglia redux sæpe præsens tibi retuli, summorum in eo regno virorum, de tua eruditione judicium. Vocat te magnæ Britannix Rex, quantum audio, ad Professionem Theologicam, in Academia Cantabrigienfi obeundam, oblatisque honestis admodum conditionibus, & stipendio luculento invitat ad mutandas, quibus ab infantia assuevisti cum Anglicanis, Batavas sedes. Quod si obvia huic fortunæ aurem præbes, & nos deferis, serò satem ediscant nostri, ex exterorum judicio, virtutem sublatam in pretio habere, quam præsentem negligere se, & fortasse etiam odisse turpiter ostenderunt. Cæterum quid ex re tua sit, ut in isthac causa agas, & propria abundè suggeret prudentia, & amicorum, quos frustra frendentibus invidis, habes plurimos, docebunt consilia. Ut autem ego consulere ausim quicquam ei, qui consultorem, in omnibus optem negotiis meis, non permittit ætas, & propriæ imperitiæ conscientia. Hoc tamen liberè dixerim, ut nisi talia certò offerantur, quibus & honori tuo fiat satis, & tu cum familiâ contentus vivere semper possis, etiam extra omnem augmenti, & meliorationis spem, optare me, ut ne patiaris, lactari te ulla spe incertâ, utcumque magnâ, & speciosâ. Habent hoc Angli, quod exteros ament, & magni faciant eorum virtutes, sed quatenus nihil ad se, inde redire potest detrimenti. Cæterum vix quicquam ita arduum

um

um credunt, cui non sese, & suæ Nationis viros, sine exterorum subsidio sufficere existiment, prout in invidiam adversus eos, à quibus vinci se viderint: Atque hinc rari admodum, imò nulli in Academiis Anglicanis professores exteri. Nec crediderim expetere adventum tuum Cantabrigienses Doctores, licet certus sim, de plurimorum, & præsertim D. D. Hieronymi Beali Aulæ Pembrokianæ Præsidis, viri summi & eruditissimi, luculento erga te affectu; sed totum hoc negotium, nisi me conjectura fallit, à Rege est, & à propensâ Reverendissimi Wintoniensis Episcopi, in te omnesque eruditos voluntate; Ejus autem quantâ sit apud Regem, & in Academia Cantabrigiensi Authoritas, unusquisque novit, & privatissimis indicis, testari ipse possem: Novi ejus favori, & benignitati esse obstrictos, qui isthic præcipui sunt Doctores, & maximo perè quidem; adeo ut dubium non sit, quin vel hoc nomine solo, gratum ipsis futurum sit, quod isti placuerit. Inaudivi hic ante biduum circiter, nescio quid incertum de Reverendissimi Episcopi morte; quæ si accidit, Vir magnus, Angliæ, & terrarum orbi, tibi que summus Mæcenâs occidit: sed nihil hoc absterrebit te à commigratione, modò certa proponantur. Eo vivo plura sperare poteris, vel mortuo fervabunt fidem quam dederint, & alios Deus tibi amicos suscitabit, & fautores, æstimandis pro merito tuis virtutibus pares. Non aliena ab his quæ fortasse liberius scripsi quam debueram, suadet Illustrissimus legatus, cujus quis erga te sit animus non est quod à me scire desideres: Heroem nostri bonæ mentis, & felicissimo hoc conjugio (quo vivit fortunatus, & iterum adolescit senex) tibi uxori que tuæ affinitatis vinculo conjunctum; in cujus ædibus dum summâ, & nunquam promerendâ viri humanitate victus, jam tertium ago mensem, sæpè occasio fuit gratis de te sermonibus, ostendit serio gaudere se: Vir Illustrissimus cum primùm ex me intellexit, oblatum tibi in Angliâ munus, & nunc quoque cum referrem, parare me literas tibi, & certum esse, quantopere gratum tibi futurum sit, tam amicæ prudentiæ, in tam gravi causâ consilium; quale suppeditare ipse poterat; jussit salutari te plurimùm, addiditque omnino, se Authorem tibi fore, ut si certi quid, & quod ex re, & existimatione tua esse possit, offeratur, neutiquam id respuas, majori te isthic loco fore, quàm in Patriâ, aut ea regione, quæ pro Patriâ hætenus tibi

fuit; æque salutarî aurâ istic vesci mortales, atque in Hollandia; nec sic ultra te vexatum iri molestiis, quas oblatrando semper, & maledicendo, tot continuos annos, tibi creant inficii quidam, & malevoli obtrectatores. Sed ut certus primùm sis de loco honesto, & non aspernando emolumento, antequam de commigrando statuas quicquam, idem Vir Illustrissimus suadet, consilium hoc versiculo facere confirmans, & restringens: *sed non mutabis, nisi cum plurale videbis.* Hæc ego sic familiariter, & tibi quem res tangit scribo, tuæque prudentiæ committo, ut quibus hæc referri non interest, iis ut ne referantur interesse judices.

De iis quos hic Venetiis, nominis tui fama amicos tibi fecit, doleo non posse me comperta scribere. Illustrissimum Dominicum Molinum Consiliarium compellere nunquam mihi licuit, quanquam adferrem literas commendatitias, à cognato meo de Thienæ, qui dum hic esset, ejus amicitia usus est familiariter. Salutavi virum per internuntium; scilicet, quia quasi de familia sum Illustrissimi Domini Legati, æquè mihi interdictum esse censetur, ejus omniumque Nobilium alloquio, ac si ipse quoque de gravibus causis legatus advenissem, periculumque esset, ne quid in Reipublicæ perniciem moliri, eamque arcanis consiliis subvertere, & in ruinam trahere, Magnus Atlas studerem. Tanta hic pro securitate cura, tam cum exteris suspecta omnia, vel minima. Cum Patre tamen Fulgentio, quanquam & ipse omnium, ferè Reipublicæ Consiliorum sit particeps, semel iterumque loquendi datam occasionem neutiquam perdidit, summopere delectatus viri insignis colloquiis, omni humanitate plenis, & familiari de omnibus rebus tractandi libertate gratissimis. Nec apud illum ignotus vivis; sed ubi Pelagii historiam, à te editam audivit, incredibili se desiderio teneri ostendit, materiam illam admodum, inquiebat, confusam, & intricatam, è viri eruditi Musæo prodeuntem, videndi & perlustrandi. Verum eò usque, quod lubens alioqui fecissem, viri desiderio satisfacere non potui. Promissis me obstrinxi, simulac Deus me Patriæ reddiderit, operam daturum, ut exemplar nanciscatur. Propediem enim, Deo adjuvante, iter in Gallias, indeque domum, suscipere cum sodalibus nostris stat sententia. Ubi non minima pars erit votorum meorum de te, tuæque familiæ, aut grata, si discesseris, ex amicis intelligere, aut te tali loco

loco reperire, qualem insignes tuæ virtutes promerentur, tibique omni affectu precatur

Veneris die
18. Aprilis.
1625.

Tuus in solidum,

Georgius R. Doubletius.

Salutat te officiosissimè D. Colvius, seque totum offert, si quâpiam in re usui tibi esse possit.

LXIV.

A Monsieur Vossius.

Monsieur,

C'Est pour vous advertir que vostre lettre que m'eschristes quelques semaines passées est arrivée à la Haye moy étant au Camp. d'où étant de retour, je trouvoy que Monsieur le Baron de Broock a-voit fait escrire au Maistre d'hostel de la Roynè de Boheme par la main d'un des principaux Secretaires d'Estat de sa Majesté pour sonder & chercher ou estoit devenu vostre resolution de venir en Angleterre, veu qu'il n'en avoit nulle nouvelle en si long temps: & si vous aviez changé d'avis, qu'il se pourvoiroit incontinent d'un autre professeur. Monsieur, je ne scay point comment vous avez accommodé vostre fait avec Messieurs les Curateurs de vostre Université; mais j'eusse bien désiré que vous eussiez voulu escrire les lettres à Monsieur Sieur le Baron & aussi à Monsieur Boswell selon que je vous avois proposé dernièrement. Je voy qu'il vous fault résoudre sans plus de delay, chose que je vous supplie de faire: car autrement on suppléera la place laquelle on vous a désignée par quelque autre. Ne vous à mettez pas trop en doute, que n'avez l'accommodement que vous désirez; & si voudriez visiter nostre Angleterre, que je puisse avoir le bien de vostre compagnie sur le milieu de la semaine prochaine, que je me mets en chemin pour y aller; ou moins faites m'avoir vostre finale resolution en cest affaire, auquel si c'estoit moy à qui on proposeroit telles conditions, & que je fusse aussi capable comme est Monsieur Vossius à telle charge, je ne ferois pas tant de scrupule pour m'y accommoder. Si vous avez envie d'escrire quelques chose à moy, ou bien de venir parler sur ce sujet, diferez le pour quatre ou cinq jours; car aussi long temps

je me trouveray absent en l'armée; cependant je demeure, Monsieur,

Ala Haye ce 19.
de May. 1625.

Vostre tres fidele amy

& Serviteur,

Dudley Carleton.

Je vous escriray derechef quand je seray revenu du Camp, au je m'en va tout à cet heur; cependant je vous prie de faire vostre finale & absolue deliberation & resolution; à fin qu'à ma venue en Angleterre je puisse satisfaire à l'attente de Monsieur le Baron.

LXV.

Doctiss. Vossi,

Quamvis antea ad te scripsissem, ita ut vel te ipsum, vel à te saltem literas jampridem expectarem: hanc tamen opportunitatem nactus, secundas hasce visum est exarare. Illustriss. D. Baro Brookius daturus est Academix Cantabrigienfi pecuniæ nostratis centum libras annuas, in stipendium historici Prælectoris: Hoc & tibi (si volueris) & successoribus tuis certum erit, ac perpetuum. Adjecit insuper (me rogante) in tuam solius gratiam, domum apud Cantabrigienses, tibi tuisque recipiendis satis amplam: pro qua viginti duæ (aut plures) libræ consimilis monetæ antitiam illi solvenda. Ita ut inter summam à me committorâtam, & à D. Barone promissam, differentia sit non magna. Spartam hanc vides (si placet) tuam: eâ tamen lege, ut illam ornaturus, te huc quamprimum conferas. Te præ omnibus cupit Dominus Baro; utcumque non defint alii non obscuri nominis viri, qui has condiciones libentissime amplecterentur. Tu ergo quod facturussis tecum quam celerrimè statuas, ac me atque ipsum adeò D. Baronem facias certiores. Dudum factum oportuit. Ille enim vix æquo fert animo, nullas se jamdudum à te accepisse literas: imò nec in tuis ad alios ullam sui factam mentionem. Ac ut ingenuè dicam, quod sentio; Conditiones oblatae sunt ejusmodi, ut vel acceptandæ jampridem essent, vel cum grati animi significatione recusandæ, non obstinato silentio rejiciendæ. Si placet veni. Sin minus rescribe, ut quid porro agendum sit Opt. D. Baro quamprimum apud se statuat.

statuat. Vale, Vir Clarissime, meque
confide futurum semper

*Dab. westmonasterii.
In edibus Honoratissi-
mi Domini Episco-
pi Lincolnienfis, Mag.
figil. Angliæ custodis.
20 Maii. A. D. 1625.*

Dignitatis tue

Studiofissimum,

W. Boswell.

LXVI.

A. M. Vossius.

Monsieur,

ME voicy maintenant de retour en
cette place, après avoir fait plus
long séjour au Camp que je ne pensois.
Or si est ce que je vous prieray bien fort
de vous vouloir trouver à la Haye de-
main, à fin qu'ensemble nous nous puissi-
ons refoudre finalement pour répondre à
l'invitation que le Baron de Brooke vous
a faite; j'ay reçu lettres tout fraîch-
ement de Monsieur Boswell, par lesquel-
les je suis bien éclairé en vostre fait, &
à cause que mon voyage en Angleterre est
à cette heure si proche (comme de fait
est le commencement de la semaine
que vient:) je desire uniquement d'en
discourir avec vous. J'espère que Madame
votre femme se sera remise de la sorte
qu'elle vous permettra bien de nous venir
voir: & quant & vous je vous supplie
de m'apporter toutes les oeuvres Mathema-
tiques de Simon Stevin en François selon
qu'elles furent imprimées n'agueres in fo-
lio desquelles je croy vostre libraire Elzevir
vous sçaura bien accommoder, dont je
payeray volontiers le prix que vous accor-
derez avec luy. Ainsi je vous recom-
mande ou tout-puissant, & demeure,

*A la Haye ce 28. Monsieur, vostre Tres-fidele
de May 1625.*

Serviteur Dudley Carleton.

LXVII.

Viro Clarissimo Gerardo Vossio.

NON dubito, Vir clarissime, quin li-
teras à me desideres; Ego verò &
dare eas ad te volui; verum tempus mihi
expectandum erat, dum ad locum desti-
natum pervenirem, & res meas ordinarem.
Primum itaque Ottoniam veni, felicis-
sime, Deo gratias, ad Oligerum Rosacrani-
zium; Virum ut Nobilitatis antiquissimæ,
sic virtutibus longè maximis exornatum,

& imprimis mihi addictum. Is me men-
sem totum tenuit, benignissimèque habuit;
nec dimisit nisi donis oneratum. Inde
Soram me recepi, eoq; veni ad diem xxiv.
Junii Gregoriani, cum suppellex mea
omnis pridie adducta esset. Deo meo
gratias ago, qui in universo itinere tam
benigne mihi adfuit. Locus multo est
amoenissimus; sylvâ, lacu & segetibus
undique cinctus: itaque ambulationes præ-
bet jucundissimas. Certe nullum domi-
cilium Nobilitati regni sui instituendæ con-
venientius, gratiusque Rex eligere potu-
isset. Postridie quam advenissem, Duces
Fridericus & Ulricus, Regis filii, qui hic
studiorum causa commorantur, ad pran-
dium me invitârunt; & eundem item ho-
norem ex eo tempore sæpe mihi habuerunt.
Quin & princeps postero die Friderici-
burgo adveniens, ad mensam adhibuit,
& colloquium; idque etiam hodie fecit,
Anderschoviâ huc excurrens, ut cum fra-
tribus pranderet. Adfuit mihi ante paucos
aliquot dies ejus Concionator Aulicus,
narravitque ipsum perquam honorifice
de me locutum, cum hinc primum à col-
loquio nostro primo rediisset; & amari
me aliquo modo, inde certè conjecturam
facere non incertam licet, quod cum ite-
rum huc venerit iterum ad mensam suam
& colloquium, adhibere me voluerit.
Retulit quoque is, quem dixi, concionator,
ipsum Regem, antequam ad castra abi-
ret, aliquoties verba de me habuisse, quæ
insignem benevolentiam testarentur. Et
præterea, supra stipendium, destinatum
mihi etiam Canonicatum, quem vacare
primum acciderit. Item à Proceribus Reg-
ni, penes quos, absente Rege, summa rerum
est potestas, magna benevolentia
signa accepi; ita ut pœnitere non debeat,
quod novercam tam iniquam, neque mei
quicquam amantem, cum benigna adeò
matre commutaverim. Quis sit rerum
tuarum status, quid vocatione Anglica
factum, aut futurum, & an recusaveris il-
lam, aut acceperis, scire aveo; & si ma-
nes, quidnam tibi ad stipendium prius ac-
cesserit: tum, qui Vorstio, Erpenio, mihi,
substituti, & si quid in Academia novi ac-
ciderit. Vale, vir amicissime, cum om-
nibus tuis. Uxor mea te tuamque salutem
plurimum.

*Dabam Soræ, ad di-
em xv. Julii Juliani
clx lxxv. Sa-
lucant plurimum Do-
mini Faccheus, Snel-
lius & Vorstius.*

Tuus ex animo,

quem nosti,

Johannes Meursius.

LXVIII.

LXVIII.

L Iteras tuas, Vir clarissime, & amicorum præstantissime, prolixas illas, & affectum mihi tuum referentes, rectè accepi. De uxoris tuæ morbo, quem hæc nuntiant, ex animo doleo; verum istud recreavit, quod jam iterum meliusculè haberet; spero, jam convalescere. Ita opto, & Deum precor. Ego, cum uxore, ac liberis & familia universa, rectè valeo, per benigni Dei gratiam: quem supplex veneror, ut hoc mihi beneficium diuturnum esse velit. Quod nuperis meis indicaveram, nunc tibi affirmare habeo; summam me humanitatem, & in me beniginitatem, in hac parte experiri, apud summos, infimosque & medioximos. Quin & nuper Duces illustrissimi me invisere in ædibus meis sunt dignati. Ipse Princeps serenissimus, ut affirmant, qui sunt intimæ apud illum admissionis, summa me benevolentia est complexus, & affectus certè clarum esse testimonium puto, quod hæcenus hic nunquam venerit, quin ad mensam advocaret. Et postremum cum hic esset, interesse etiam Lectioni voluit: Missio quodam è Nobilibus, semihora ante eum, qui hoc ipsum decrevisse nuntiaret. Non possum satis magnas gratias agere Deo, cujus ego manifestam benedictionem agnosco; quâ ut me quam diutissimè frui velit, in nominis sui sanctissimi timore, preces continenter fundo. Quod Professionem meam in dies extraordinarios tibi demandatam scribis, quo consilio illud fiat, equidem non possum capere, neque te sic accepturum existimaram; potius professionem istam totam, cum stipendio quoque toto, aut certè dimidiato, in te transferendam esse. Sed eventum expectabo; de quo ut me aliquando certior facere velis, etiam te atque etiam rogo. De Schrevelio, in locum Vorstii ^{non} ~~maximè~~ substituto, libens sane intellexi: & imprimis de modestia tam insigni, quam non possum sat laudare. Gratulor ipsi, ut & Academia nostræ. Etiam communi amico, Adolpho Vorstio: & profecto est, ut scribis; nemini felicitas ista, eâ ætate, in hac nostrâ Academia unquam obtigit. Sed meretur virtus viri, & doctrina: ac favemus illi ex animo; ut meriti causa, sic & amicitia nostræ tum memoriæ parentis tribuendum aliquid fuit, quem fuisse non exiguum Academiae ornamentum, nemo temere inficias ibit. Quæ de Golio; laudo

Juvenis præstantissimi generosum institutum: & profecto, modo vitam Deus illi largiatur, Virum patriæ aliquando magnum dabit. De Rutgersii vero morbo, tristis audio; verum illud me solatur, quod non desperare medicum item nunties: imo fore, ut non difficulter illi valetudo restitatur. Hoc ex animo ipsi precor: patriæque & amicorum, multum interesse puto, ut præclarum adeo ingenium diurnare Deus velit. In hoc desino; & salvere te, cum tua, liberisque, ex animo jubeo. Idem uxor mea facit. Salutem quoque plurimam nuntio viris clarissimis & amicissimis, Petro Cunæo, Theobaldo Schrevelio, Gilberto Jacchæo, Caspari Barlæo, Theodoro Schrevelio, & Guilielmo Noomsio vestro; cujus indolem tam præclaram, ac ad studia honestissima literarum humaniorum magno nisu assurgentem certè exosculor.

*Scribebam raptim
Soræ, ad diem vii.
Decembris Juliani
c10 Idc xxv.*

Tuus, quam nōsti,

Johannes Meursius.

LXIX.

*Clarissimo Viro D. Gerhardo Joanni
Vossio, in Academia Batava Historiæ
universalis, & Græcarum Literarum
Doctore Publico.*

Lugdunum Batavo.

S. P.

OMnia rectius, Vir Clarissime, rebus meis contulissem, si omisâ professione in Hollandiam, apud vos substituissem, atque iis me sumptibus, quibus nihil aliud, quam longinquas ac vanas spes, mercatus sum, tamdiu Lugduni tolerassem, donec tua aliorumque bonorum virorum diligentia, occasio aliqua suborta fuisset, qua me parumper, ex tot adversis attollere potuissem. Nunc quo concilio, qua ope, acceptum sinistra destinatione damnum sarciam, non expedio. Ad veris exortum, me Athenæo Batavo redonassem, si tantum viatici in hoc sinu Baltico, corrogare fuisset. Verum quoniam citius è pumice aquam, quam ab alienis, erga seorsum à se, in Religione sentientes numum impetraveris, adhuc mihi heic torpendum desperatione est: spes quidem abundi, in comitatu lautissimorum adolescentum affulserat;

fulserat; qui præter viaticum luculentum, quoque Minerval erogassent: sed istum bolum quidam à caudicinatà latrans sibi involavit. De partibus, Græcos scriptores interpretandi Franekeræ adhuc vacuis, quid sit? Quid Cl. Grutero, super ista re animi sit, fragmento ipsius, ad D. Lingershemium, Epistolæ ante binos menses, D. Altingo ostendi; & ut tali petitioni, meo nomine, gratiam vestram intenderetis, rogavi. Utrum successurum sit, silentium vestrum dubitare non finit. Quare alia via mihi prospicite, ut securâ mente, ac tandem ægritudinum parte exoneratâ cum Musis in gratiam redire liceat. Ingenium mille curis, atque anxietatibus oppressum, ut in stuporem demigret, metuo. Nam quamvis interdum redire ad pristina studia mediter, tot tamen acerbitatibus circumfuserum necessitatum, defixus animus avocari nequit à consideratione malorum, quibus indies magis ac magis obruitur. Editioni Cornelii Nepotis, quid tragulam injecerit, nisi ipsius Typographi locordia, non excogito. Idcirco, per ego te mitissimi genii tui bonitatem rogo, atque obtestor, ut ab isto Tricone, vel ipse, vel, si non vacat, per Cl. Scriverium nostrum, scriptum meum repetas, ac vobiscum tandiu retineatis, donec denuò à me necessariis disputationibus elimato, alius, qui suis typis vulget, concilietur. Denique si quid respondere animus fuerit, ad D. Kirchmanum Lubecam mitte.

Rostochii Anno Doctrinæ ac virtutis tue
Dom. xvi. Junii.
c15 Idc xxvi.

admirator unicus,

Janus Gebhardus.

Salutem adscribo Pl. D. Adolfo Vossio, & lectissimo adolescenti, Francisco filio tuo.

LXX.

Cum hic noster ad vos iret, virorum amicissime, & amicorum præstantissime, committendum non putavi, quin te tribus saltem verbis salutare. Quamquam autem hyeme superiore ad te scripserim, & responsi necdum quicquam ad has acceperim; tamen meus in te amor, quem perspectum satis habes, non permisit, ut exemplo tuo uterer. Itaque per

hunc rescribe, quis sit rerum tuarum status, & quid publici literarum boni causâ molaris, quidve edas. Tum de Academia quoque, ejusq. in præsens conditione, scire aveo; an Collegæ omnes vivant valeantq. Ego nihil hætenus mearum lucubrationum vulgare potui, quia Typographo caremus: quem deinceps tamen habituri sumus. Ordinar autem à Solone, cujus vitam hic contexui; ut Pisistrati, cum apud vos commorarer. Inquis forte, post Plutarchum & Diogenem? Ita certè; nam non pauca post utrumque observavi, & nonnulla accuratius inquisivi; ita ut confidere auisim, non te operam damnaturum. Scripsi nuper etiam ad communem amicum, Adolphum Vorstium: Saluta virum meis verbis peramanter, & responsum item pete. Saluta etiam, nisi grave est, Dominum Rivetum, cujus literas, cum humanitatis plenas, tum affectus, rectè accepi; & gratias ago, quod rescribere tam benigne nobis voluerit. Experietur meam in amore, & cultu, constantiam.* De Clemencello, quod rogaverat, inquisivi; sed resciscere nihil potui. Denique tu quoque salve, amice longè præstantissime, à me meaque, cum lectissima matrona, uxore tua, item liberis.

Scribebam rapidim Soræ, ad diem
XI. Julii Juliani
c15 Idc xxvi.

Tuus ex animo,

fide optimâ,

Johannes Meursius.

LXXI.

Doctissime Clarissimeque Vir,

Mutato tempore mutantur plerunque animi: reviso igitur, si quid animi tibi restet in Angliam te recipiendi. Locum nostri (Cantabrigiam) viris undequaque doctissimis humanissimisque repletum. Munus erit illustre, Historiarum & Civilis Scientiæ professio. Labor, trium aut duarum singulis septimanis prælectionum in Scholis publicis, tribus tantum anni temporibus (quos Terminos vocant) pro more Academicæ Scholasticæ eruditioni destinatis: Feriis enim & vacationibus (quæ dimidiam anni partem excedunt) nihil publicè ab Academicis, aut ab illustrissimo hujus Cathedræ fundatore D. Brookio exigetur; ita ut illud (quicquid erit) temporis pro arbitrio tuo, meditando, scriben-

scribendo, edendo aliquid, aut rem familiarem curando, totum poteris impendere. Salarium (suis temporibus certissime numerandum) erit quadringentorum aureorum annuatim. Quibus recensere possum & alios (qui fortasse occurrent) compendii modos, quibus etiam tuis, & tuorum commodis opportunè consulere possis. Etenim non potes nescire, frequentes esse in Anglia ex donatione Regis, Episcoporum aliorumque Præbendas, Canonicatus, & dignitates Ecclesiasticas (at omni animarum curâ vacuas) quibus exteri juxta ac nostrates, de Republica literariâ, & Ecclesia bene meriti honorantur. Sed non urgeo, peto tantum si conditio (quæ prius à me oblata, placuisse visa est) tibi adhuc arrideat atque pedem apud nos figere in animo habeas, ut cum primis me certissimum facias per literas: quas D. Dudleio Carletono (utriusque nostrum amicissimo) ad me mittendas cures. Et etiam quod vehementer à te rogo, ut Thesium tuarum Theologicarum (quæ impressæ apud vos publicè habentur) copiam mihi faceres: rarius enim apud nos inveniuntur: Siquid autem in his partibus velis, mihi mandes,

*Dab. Westmonast.
1. Aug. 1626.*

*Tui amantissimo,
Boswell.*

LXXII.

Exemplum literarum Gulielmi Boswelli ad Dudleium Carletonum ex Anglico in Latinum versarum.

SI rectè memini tunc cum postremum nobis sermo esset, de D. Vossio, visus mihi es hac in sententia esse, utcumq; eo tempore nec animus nec occasio ei esset conditionis in Academiâ Cantabrigiensi oblata accipiendæ, tamen, si ad sextum aut octavum mensem vacaret, fieri tamen posse eò ut inclinaret. Hactenus vacua est ea professio, idque meâ operâ, tantumque ipse mihi sumpsi libertatis (non tamen sine occulto mandato Illust. Baronis Brooke) ut iterum invitandum eò censeam, id quod tu ex literis ad eum meis perspicere potes, quas apertas ad te missas, ubi legeris, obsequare poteris, & statim mittere, urgeréque primo quoque tempore ut rescribatur: quod si ille conditionem abnuet (id quod ego haud face-

rem isthic si essem) alteri prospiciatur. Neque enim desunt multi, iique docti competitores, qui ambiant. Præter centum viginti libras Sterlinenses quas illi annuas promitto sine fraude solvendas; præter sumptuum aliquod (quod in me recipio) transvehendo ipsi, conjugi, liberis, suppellectili, innui apud eum rationes, quibus ipsi liberisque in melius prospiciatur. Quàm benè Casauboni ac Molinai liberis, aliorumque multorum prospectum sit exiguo tempore, tu mecum juxta nosti, nec ille ignorare potest. Est quod meo nomine rogatum te cupiam & illum, nimirum ut mittantur ad me omnes ejus Theses Theologicæ (quæ quidem excusæ sint) compactæ aut solutæ. Magnam autem à me inibis gratiam si primo quoque tempore mittes. Ego verò libenter vel pretium dissolvam, & quod portorii nomine impendetur, vel alios ad te mittam libros majore pecuniâ emptos, &c.

LXXIII.

Clarissime D. Vossi,

Academia nostra Cantabrigiensis, cum non ita pridem Literas à te acceperit, doctissimas simul & humanissimas, summa cum tuorum in se officiorum testificatione, unâ cum Libro tuo nuperrimè in lucem edito, de Historicis Latinis, æquum duxit, ut te eam humanitate tuâ primitus provocantem, literis suis resalutaret: quanto magis mihi hoc ipsum munus incumbit, cum & iisdem beneficiis me unum & multis, privatim efficere, non sit designata Claritas vestra, nam & eodem tempore tum literarum, tum liber mihi redditæ sunt, benevolentia tua erga me amplissima pignora, & necessitudinis tecum initæ, cum olim Dordraci essemus, symbola non vulgaria, cujus etiam in literis istis tuis meminisse complacuit. Cum autem nullum officium, teste Cicerone, referendâ gratiâ magis necessarium sit; Officii ergo mei esse duxi, pro istis erga me meritis, gratias debitas referre, & habere. Quod si nulla privata hæc tua erga nos merita, gratias istas postulerent, est tamen quod ipse & alii studiosi etiam, tibi meritas gratias, Reipub. literariæ nomine persolvamus, ob hoc ipsum postremo elaboratum à te opus de Historicis Latinis, quod unum si non alia superessent ingenii pariter ac laboris egregia monumenta, nomen tuum posteritati merito consecraret. Nemo enim

nim literis aut Humanioribus, aut Theologicis, aut aliis etiam disciplinis vel parum imbutus, qui non facile perspicit, quanti momenti sit Historiæ & Historico-rum notitia, ad omne genus literarum accuratè & cognoscendum, & pertractandum. Gratulantur ergò tibi meritò omnes non solum Historiæ, sed & Antiquitatis studiosi, sive *res Ecdæ*, sive rei Ecclesiasticæ operam naverit, de utroque tuo opere, tum illo de Historicis Græcis, tum hoc de Latinis. Quibus præviis operibus sapientissimè tibi viam munis, ad illud majorum vigiliarum opus, in quo cum Magno illo Annalium Ecclesiasticorum Conditore congressurus sis. Hanc etenim te provinciam in te suscepisse audio, idque non leviter innuis, in literis Academicæ nostræ nuper datis. Opus planè & dignum, in quo lectionem tuam multiplicem, eloquentiam, linguarum peritiam, memoriam, iudicium, omnes denique animi dotes & ingenii vires exercere possis. Sperabamus aliquando, auspiciis & magnificentia, Honoratissimi Mæcenatis, Baronis à Broock nostratis, te hic apud nos pedem fixurum, & in hoc studiorum genere excolendo, operam in hac nostra Academia navaturum. Sed, compedes narras, tibi à tuis injectas fuisse. Quod si nobis contigisset, ut te Academia nostra haberet & gremialem & professorem, illud certè nobis Cantabrigiensibus, longè gratissimum fuisset. Jam Dorillaum vestrum, in locum tibi destinatum suffecit illustrissimus Baro, qui in Cornelium Tacitum nuperrimè binas lectiones in Scholis publicis habuit, iisque sui tum in Historicis, tum etiam in Politicis versandis profectus, specimen egregium exhibuit. Sed ad te redeo, & præfationem operi tuo nuper præmissam, ubi operam utilissimam & bonis omnibus gratissimam posuisti, in vindicanda fama D. Junii felicitis memoriæ soceri tui, Viri præstantissimi, & omni scientiarum genere excultissimi, deque scientiarum principe, sacra Theologia, optimè meriti. Fecisti quod generum decuit, imò quod virum bonum, dum innocentiam tueris, dum ab injustis obrectationibus virorum summorum, virum summum liberas. Præmittis in dicta præfatione te non hosce libros eo animo divulgasse, quasi in posterum omnis operis hujus curam deponere statuisses, sed potius, ut postquam ista jam prodierint, amicorum & iudicio in commissis, & indicio in omis-sis, facilius fruarer. Ingenuitatem tuam amplector & veneror. Ego siquid forsan in

posterum observavero, quod opus hoc tuum, aut promoveat, aut locuplet, aut in aliquibus forsan corrigat, liberè & libenter tibi impertiam. Idque spero te non ægrè laturum, si per otium fecerimus in Historia tua Pelagiana, quam te aliquando limatiorem, & correctiorem editurum & optamus & speramus. Video nonnullos ex Remonstrantibus vestris, qui in Articulo de Originali Peccato & Gratia periculosè admodum, ne quid gravius dicam, errant, ad tuam Historiam non raro provocare. In quibus duobus Articulis, non leviter innuit Augustinus, * fidem Christianam propriè consistere. In ista Historia contexenda præcla-

* *August. de Peccat. Orig. c. 24.*

rè quidem de Ecclesia meritis es; sed optant viri apud nos tui nominis alioqui studiosissimi, ne quid præsidii, suis erroribus, isti homines ex illa Historia haberent, quod prætexant. Superest jam (Vir humanissime) ut cum Commentarios tuos de Historicis Latinis à te acceperim, *avriduey* aliquod remittam, cum autem non habeo de meo quod rependam; en Commentarios sed alterius generis, in Epistolam D. Pauli ad Colossenses nuper hic Cantabrigiæ excusos, scriptos à D. Davenantio Collega nostro, in Synodo Dodracena, viro mihi olim dum in Academia vixit, amicissimo, & tibi non ignoto, jam merito suo evecto ad Episcopatum Sarisburiensem, quem summa cum prudentia & dignitate jam administrat. Spero non ingratum tibi futurum hoc amoris nostri pignusculum. Hosce commentarios publicè dictavit, cum in Academia nostra, Professoris Theologiæ D. Margaretæ Cathedram occuparet. In quam ipse sexennio ferè abhinc, longè indignior suffectus sum. Habet & ille alias lucubrationes luce non indignas, quas spero aliquando lucem visuras.

Vale Vir eximie, Bonis auspiciis, & alacri animo, Spartam quam nactus es, orna. Antiquam Ecclesiæ Catholicæ fidem, mores, disciplinam, ex antiquorum monumentis erue, & à novellis veteratorum imposturis, aslere, vindica. Nos habes in hoc opere obeundo omnia tibi fausta & felicia optantes, precantes.

Cantab. E Sidneyano Coll. 15. Kal. Jan. Anno MDCXXVII

Tui amantissimus,

Samuel Wardus.

V. Cl.

LXXIV.

V. Cl. D. Gerhardo Johanni Voffio,
in Academia Batavorum Lugdunensi
Professori celeberrimo. S. P.

Ludg. Batav.

Digressio me à vobis, Vir Clunà pariter
omnis mei memoria, animis vestris
excessisse videtur. Nihil enim per biennium
literarum, quod vestram benevolentiam
confirmaret, accepi: neque vulgare istud
Ave saltem mihi annunciari audiui; unde
colligere liceret volitare adhuc inter vos,
qualemcumque nominis mei umbram.
Agnosco indignitatem meam, neque in
tantum arrogantiae progredior, ut me
tantis Heroibus, curæ, ac sollicitudini
esse optem. Interim humanitati vestræ
confidebam, credebamque me, qui obviâ
humanitate in notitiam vestram essem re-
ceptus, tam facile ex pectoribus vestris
non posse excidere. Affectavi quidem
aliquoties, Bataviam, vestrique Genii cul-
tum repetere; sed properanti toties, ma-
num sæva fortuna iniecit, meque heic
adeo validis compedibus religavit, ut eas,
nisi publicè à vestris revulsus excutere ne-
queam. Quod tua ope, atque autoritate,
Vir Clarissime, commode, atque ocus
confieri posset. Frenequerani enim non-
dum, ut ferunt, Græci Interpretis locum
suppleverunt, jamque spes venturi eò Gru-
teri expiravit. Quare ut pro me preñes,
etiam atque etiam rogo. Cogitavi qui-
dem specimen mei, in Græcâ literaturâ,
profectus, ad vos mittere. Æliani quæ
πινυλίου, à me emendatam, atque illustra-
tam offerre; sed me miris modis, ac mo-
ris, jam quadriennium, ludificatus est Ty-
pographus, ut ne *αὐτογράφον* meum, neque
Librum in exemplaria alia propagatum,
recipere ab eo hætenus potuerim. Cæ-
teroque in tanta Barbariei facie, silvescit
quoque ingenium meum, videorque mihi
priorum annorum diligentia, compara-
tam dicendi facultatem detrivisse. Priva-
tim tamen Palæstram styli, quâ Prorsî,
quâ Voffi heic aperui; quæ cum non pi-
gendo juvenum numero frequentaretur,
ausi sunt homines, supersticiosa suspicione,
an impotenti invidia, silentium mihi in-
jungere, ne scilicet perorandi exercitia,
hæreticum virus teneriorum animis inne-
teretur. Hætenus molestos, junctis cum
primoribus Academicorum viribus con-
tempfi; sed quò minus ad Rhetoris jam
heic vacuum munus adspirare, vel ausim,

vel velim, nostræ confessionis odium, &
stipendii exilitas, pæne, (ut ita dicam)
committilem faciunt. Ergo adhuc illa
spe sustentor, quâ me vobis conjunctum
iri, eorumdemq; sacrorum, ac parium volun-
tatum nexu, gavisurum esse, mihi persuasi.
Quantum ad votum hoc meum implen-
dum, momenti adferre possis, partim jam
dixi, partim ipse minimè ignoras; si modo
gratiæ tuæ vires interponere, ac pro me
periclitari volueris. Accipis hic poemata
mea, quibus Chalcographum, & Patro-
num quem tibi libuerit, concilies velim.
Notis meis in Nepotem, quid factum sit,
quamvis multiplici sollicitaque inquisitio-
ne pervestigare non potui. Idcirco sive
apud te, sive alibi delitescant, des ope-
ram protrahantur, perque hunc *Βιελνόν-
τιον* Rostochiensem ad me referantur;
ut infinitis locis limam attineam, ac plu-
rima scabra interpoem. In Tacitum ali-
quid molitus sum, nempe de ejus imita-
tione libellum, quem vestris judiciis sub-
jicere, Typographisque committere vel-
lem, si esset, qui excudendum susciperet.
Textum quoque ducentis vicibus emenda-
torem adjungam. Sæpè me miratio
subiit, imò quidem fidem cunctorum ex-
cedet, tantum à Lipsio spicilegium reli-
ctum fuisse. Cæterum impense illius scri-
ptoris Læctione delector, & cum antiqui-
tatem Græcam eruendæ Thucydidis dictio-
ni tam curiosè incubuisse animadvertam,
quis mihi vitio vertat, quòd idem in Thu-
cydide Latino tentarim? In Curtio ali-
quid experiendi ansam quoque Raderi
commentarii suppeditabunt. Ipse, quæ
quæso elaborasti? Auctor esto huic Au-
gustino Ferbero, ut tua ad nos exportet,
ac porro consilio juvato, ut delectum in Li-
bris coemendis habeat. Vale.

Rostochii. 26.
Martii, 1627.

T. omni cultu & obsequio,

Janus Gebhardus.

Salutem plurimam adscribo, filiis tuis
paternarum virtutum æmulis; necnon
D. Vorstio.

LXXV.

Ornatiss. & Clariss. Voffi,

LEgi præfationem quam misisti cum
literis: illam Buckinghamiæ duci in-
scriptam, pulcherrimo stylo, & sapien-
ter admodum formatam. Paucula ta-
men mihi videntur addenda, atque etiam
paucula

paucula mutanda tam ex iudicio amici tui, & mei, Dinglii: (de quo coram tibi locutus sum :) quàm meo proprio: quæ ego negotiis quibusdam nimis distentus, tibi non possum sigillatim præscribere. Ob eamque causam detineo mecum adhuc præfationem: remitto librum (opus egregium & longè doctissimum) nescius an tibi eo uti necesse fuerit, ad compilationem Indicis, quem temporis hoc intervallo perficere poteris: (si ita tibi videbitur quemadmodum ego consulo :) Quod ita mecum confidenter agis gratissimum facis: mihi videndum erit ut benemeritis omnibus quibus potero, tibi respondeam. Vale.

Hage - Comitiss
30. Maii, 1627.
Stylo Novo.

Tui amantissimus,

Dudley Carleton.

LXXVI.

Dudleius Carletonus G. J. Vossio.

AUTOR sim D. Vossio ut captata occasione (quæ se ipsa sponte offerret) ut nonnulla inserat de fide, sollicitudine, prudentiâ & felicitate Ducis in ducendo & reducendo ex Hispania rege (tunc principis) quem unicum sibi super omnia dilectum, & heredem regnorum Ducis fidei ac curæ credidit Pater Jacobus. Nec spe falsus est. Nonnulla etiam addi possint de detectis Hispaniæ fraudibus, quæ eò tendebant, ut æternum arcerentur suis ditionibus Regis filia ejusque liberi, & Germaniæ libertas opprimeretur: quo nomine in conventu publico (quem Parlamentum vocant) Duci seriò gratulatum fuit ab universo Angliæ regno: Denique quod tantâ animi magnitudine & invictâ constantiâ serenissimo suo regi operam dat, in omnium regnorum & Rerumpublicarum subrotore, prædone & hoste, videlicet Hispano oppugnando. Locus pro hisce additionibus commodissimus mihi videtur, ubi mentio fit amoris quo eum regum alter complexus est, alter complectitur.

LXXVII.

Imcomparabilis Eruditionis Viro D.
Gerhardo Johanni Vossio, in Athenæo
Batavo, Professori celeberrimo, S. P.

Lugd. Batav.

QUICQUID spei, V. Cl. mihi facere conaris, admodum languidum, ac dubi-

um apparet. Nam quemadmodum Franequeranos; ita quoque Groningenses variis modis deludet Gruterus; ut abundè aliis subrependi materiæ, atque occasionis superfuturum sit. Et quis tunc mei longius diffici mentionem, ne dicam rationem habebit? Pari ferme distantia ego, & Pasor aberamus: nihilominus, cum mihi in hac studiorum parte, conferri non possit, in muneris delatione antepositus est, sic egregiè famam Gymnasii sui instaurant. Quantum in te est, amicorum smaragde, non cessabis D. Altingum, aliosque affidia mei memoria obtundere, ut oriente occasione, mihi nemo præferatur. Non inferiorem gloriam, scholis Belgicæ circumdaturum me confido, quam isti, qui nullâ proprii ingenii commendatione, tantum propinquorum præfationibus nituntur, & obtruduntur. Interea meo ingenio servire non licet, cui omne tempus in eo perit, ut acquiram, quomodo famem, & nuditatem defendam. Editionem tamen Taciti, cum libello de ejus imitatione dabo, atque ut unum Typographorum vestrorum, qui Lucubrationes meas, venustis literis, & concinnâ formâ, in vulgus diffundat, permoveas, rogo. Nostra in Nepotem Jodocus Hondius detinet, & si ab ejus viscatibus unguibus, chartas meas citius reglutinare potuissim, fortassis haud poenitendum spicilegium jam fecissim. In eum scriptorem emendationes se plures habere affirmavit mihi Cl. Scriverius, à quo vide impetres, & quàm primùm ad me mittas. De Scytala Lacedæmoniorum, siquæ insigniora notasti, admetiaris velim, ut talibus gemmis, mea magis ac magis enitescant, ac preciosiora fiant. Libro tuo de Historicis Latinis, quod ad nos non exportetur, quid factum sit, fac sciam, simulque quid, de tuis originibus Latinæ linguæ, Josepho Cl. Cunæi, aliisque sperandum habeamus, adjice. Salutatio tua Paullo Tarnovio, longè fuit acceptissima; qui se impensè incomparabilem eruditionem tuam colere, atque æstimare aiebat. Vale.

Restochii. Anno
Dom. viii. Junii.
cIdo Idc xxvii.

T. perpetuo cultu

atque obsequio.

Janus Gebhardus.

Sal. pl. adscribo Cl. Vossio, & Francisco filio tuo.

Clarissimo

LXXVIII.

Clarissimo viro Gerhardo Vossio, Præceptoris æternum colendo, S. D.

Quoniam nuper ad fratrem suum, misero diuturnoque morbo intabescens, à Nobilissimo Consiliario Wyngarden fœcero, Lugdunum adductus, te V. Cl. Læctionibus privatis impeditum salutare, non daretur occasio; decreveram postea, per literas interpretes tecum colloqui, & memoriam, quam temporum, & locorum intervallum sæpè obliterare solet, mei apud te renovare. Quod cum hæcenus distulisset, partim argumenti inopia, partim negotia, quæ tot, & tanta summo Republicæ literariæ bono sustines, interpellandi verecundia: commodum se offert Tuisius noster, & salute tuis verbis significatâ, animum nutantem ad scribendum impulit. Tantus enim ad voluptatem, quam ex læctione libri de Historiis Græcis, in quo tum totus eram, totumque ferè devoraveram, cepi, accessit, voluptabili hoc nuntio, incredibilis gaudii cumulus, ut jam non solum præceptorem *παιδαγωγὸν καὶ πάλαιον*, admirarer unice: sed ipsum illud, non quintâ modo parte Nestaris, ut inquit ille, sed universo Caballino fonte imbutum caput amicissimè amplecti visus sim. Quandoquidem verò à Nestoreo docentis ore pendere, ut olim, mihi inviderit fatum, saltem quod concedit, eò arctius duxi amplexandum. Quare divinis operibus, quæ jam aliquot summo eruditorum applausu, protulisti (ut cum Lucr. dicam) in dias luminis oras, diurna, nocturnaque manu versandis, maximum absentis tui desiderium lenire conor. Ac veluti in febricitantibus observamus *ἰατρὸν πάλαιον*,

Quo plus sint potæ, plus siliuntur aquæ.

Non aliter affici soleo à scriptis tuis, quorum satietas me, nec frequentissimâ læctione potest capere. Itaque mitiges rogo, V. Cl. non meam solum, sed omnium quotquot amant literas, hanc *βιβλίαν*, & da brevi quæ confecta, diu nimis retines, reliqua, non modio, neque trimodio, ut ait Plautus, verum ipso horreo. Nec illa modo, quorum spem facis, sed & Notas ad Eusebium de Præpar. Evang. Ut enim aliquis tandem exurgat, qui in illo, parem magno Scaligero, præstet operam, optare non est tuum:

Nam tu Poeta es prorsus, ad eam rem unicus.

Utinam & Agellium haberemus, à te perpolitum. Promiserat quid Gifanius, & alii, nemo vero quod sciam, salutare ei persanando manus attulit; cum tamen varia ejus loca, non solum à Criticis, sed & Medicis, & Jurisconsultis, passim correctâ, & explicata, animadvertem. Huic scholæ nuper Rector datus Is. Becmannus, Musas, quæ tecum hinc discessisse videbantur, revocaturus. Id enim in oratione publicè habitâ promittebat quidam studiosus, quondam D. Becmanni discipulus. Misi Mairio Typographo, Adriani Junii quædam typis suis edenda, quibus vitam ipse addidit, & doctorum elogia. Misiſsem tibi carmen, quod Nicolaus Græcè & Latine non indoctus, D. Æmilii discipulus, brevi tuus, & Jurisconsultorum, in nuptias meas composuit, nisi satis, superque, me nugis hisce, occupationes serias turbasse putassem. Quare, ne in publica commoda peccem, desino, & æternum Numen veneror, te diu, V. Max. & amicissime, liberis, nobis, & Reip. literariæ servet incolu- mem. Salutem meo nomine uxori, optimæ & nobilissimæ matronæ, & filio Johanni.

*Dordr. xii. Jun.
Cl. Io c xxvii.*

Tuus meritisſimo tuo,

Johannes Beverwiickius.

LXXIX.

Clarissimo Viro D. Gerhardo Vossio, Leidenſis Academiae Profefſori, S. P.

Clarissime D. Vossii,

Jam diu magno flagravi desiderio necessitudinis tecum ineundæ; & nisi inopinatus obitus D. Rutgersii intervenisset, jam pridem viam aliquam reperissem, quæ mihi aditum ad tuam amicitiam patefecisset. Is quoties hac transibat, honorificam semper tui mentionem facere, & insignem tuam eruditionem, ex præclaris tuis scriptis, jam antè mihi cognitam, ipsaque fama, multo majorem, crebris usurpare sermonibus solebat. Certòque mihi promiserat, se amicitia inter nos instituendæ, simulac in Belgium venisset, authorem fore. Cujus rei fundamenta, utrum jecerit, nescio. Cum vero is jam fato suo functus sit, arripiendam putavi occasionem, insinuandi me

me in tuam amicitiam, oblatione libelli nostri, de Funeribus Romanorum, ante biennium, & quod excurrit, recusi; quem ut tanquam monumentum, & pignus meæ erga te observantiæ, & amoris accipere velis, etiam atque etiam rogo. Commisi illum Eruditissimo juveni Johanni Christenio, qui cum duobus Nobiliss. adolescentibus studiorum gratiâ, ad vos proficiscitur, quandoquidem tota Germania, viâ militibus ita infestæ sunt, ut nostrarum Academiarum aliqua, præsertim superioris Germaniæ, hinc tutò adiri non possit. Istum juvenem cum discipulis, ac præsertim D. Winterfeldio, quem à teneris unguiculis, propter præclaram indolem, amavi, ut inter familiares tuos recipere, non dedigneris, etiam atque etiam rogo. Magno me beneficio affectum putabo, si intellexero has literas tantum ponderis, quantum scribens confidebam apud te habuisse. Nec ipsi adolescentes committent, ut ~~inveniat~~ nota, sibi à te jure inuri possit. Sex ipsos annos jam factum est, quod commentariorum de lingua Latina spem nobis fecisti; quibus si nondum extremam manum imposuisti, rogo te per Musarum sacra, ut illos tandem aliquando ad umbilicum perductos, in publicum emittas, & hoc quoque beneficio, Rempublicam literariam tibi devincias. Neque enim potest non esse egregium, & omnibus numeris absolutum, quod ex Officina tua exit. Vale, & Cl. D. Cunæum meis verbis, nisi grave sit, saluta.

Dabam Lubecæ,
xxii. Julii, Anno
1627.

Vester omni studio,

Johan. Kirchmannus.

LXXX.

Clarissimo Doctissimoque Viro Domino
Gerhardo Johanni Vossio, in Academia
Lugduno-Batavo Professori
publico, S. P.

Ludg. Batav.

QUI Cl. Gruteri nostri senium casus
aggravet, ex literis viri docti, Hei-
delbergæ ad me exaratis percipe: Sed &
Gruterus noster domi suæ latitat, nuper
Brettâ unde gener Schmentius exclusus est,
huc reversus: rusticaturus ferè, in Barnbel-
diano fundo, quem Gener instaurat, incendio
corruptum. An vero eidem, hic securo, &
ab Idolomania immuni vivere liceat ambigo.

Literas vix amplius agnoscit, ita vertigini se
fert obnoxium. Quæ vero nos belli pro-
cella circumfuderit, ore famæ ad vos quo-
que perlatum esse arbitror. Pedem portâ
efferre non ausimus, quin illicò adsint,
qui manus corporis velamentis injiciant.
Quid si oppugnatio, & obsidio nos pre-
mat? Me privatim etfi belli absistant
incommoda, satis ærumnarum manet, quas
quomodo à me depellam, nullam ratio-
nem inire possum. Magnam in vobis, te,
Cunæo, Altingo, spem fixeram, quam
fore irritam ex more conjicio. Consili-
um tamen aliud, nisi vos interea suc-
curratis, in arenâ capiendum est; nisi
si nolueris optimam ætatis partem, iner-
tiâ summâ interstingui. Quippe studia
mihi propulsandæ saltem inopiæ; non
excutiendis ingenii viribus, aut promeren-
dæ famæ dirigenda sunt, & in vindican-
dis extremis necessitatibus, tempus con-
sumendum. Spicilegium quidem meum sub
incudem revocassem, si ab ungulis Har-
pyæ Amstelodamensis, Jodoci Hont re-
glutinare potuisssem. Eo me istius Len-
tuli tædiosissimæ protelationes adigent,
ut totum opusculum, à capite ad calcem
diffingam, insigni accessione locupletatum.
Si tu & D. Scriverius, meam paupertatem
vestris copiis instruere, mei panni squalo-
rem, purpuræ vestræ hilaritate, exornare
potestis; agite, adjungite meis vestra, ut a-
liena luce parumper emergam, & fortunæ
caliginem vestro splendore disjiciam. C.D.
Cunæo obsequium, & studia commen-
da: Salvare jubeo Cl. D. Adolsum Vor-
stium, Franc. Vossiadem. Responde quæso
brevis, & literas tuas Joanni Maire trade,
qui ad August. Ferberum nostratam Bib-
liopolam rectè curabit: adde quid jam
moliaris, in optimis literis. Vale.

Rostochii Anno
Dom. 27. Sextil.
clio Ioc xxvii.

T. omni cultu & obsequio,

Janus Gebhardus.

LXXXI.

G. V.

ANsa mihi hoc tempore non præbe-
tur alia, quam ut D. V. gratias a-
gam & habeam, quòd dum nuper Ley-
dæ aderam, tantâ humanitate me acci-
pere dignabaris. Ac si verbum adhuc
addere liceat, sit, ut te faciam negotii
istius memorem, quòd in hac vacantia
præsenti, ex humanitate tua, pro com-
muni

muni bono sis pollicitus. D. T. rem probè tenet: scil. ut ex Historiis, tam antiquis quàm modernis, argumenta ab exemplis & testimoniis talia qualia collegerit & deprompserit, quibus tandem Regem possim, ac si ita dicam, gregem hortari, atque ad Parlamentorum usus, quo Rex & regnum *quodvis* in eadem tandem sententia feliciter convenire possint. Causa, proh dolor, communis illud magis atque magis requirit, & expetit: quod quæso studiis tuis promovere digneris. Verendum est, quòd invasio ista in Galliarum insulas causæ Bohemicæ non profuerit: sed factionem Hispanicam auxerit: nec non Danorum Regem exanimaverit. Nova hodie accepimus mala ex Germania, Tillæum Albis transmigrasse flumen, atque in Holsatiam, Regis Ducatum proprium, invadisse fertur. Quem si vicerit Ducatum, Hamburgum vicerit & Albim; & tum, quod Deus avertat, actum est de ipso Rege. Nec sciam quibus hoc sit imputandum malum, nisi, post peccata, Parlamentorum in Anglia, atque inde Regis & Regni consensus consueti & laudabilis defectibus. Qua de causa, si hisce in conatibus parùm sudaveris, D. V. nec se poenituerit, nec me ingratum offenderit. Quod si facias, citò quæso, ac sedulò, ac secreto feceris, ac valeas.

*Dabam Delphis
4. Non. Augusti.
Anno Salutis
c10 Idc xxvii.*

R. T. *Studiofissimus,*

Edw. Misselden.

me invitissimum distinuit negotiorum moles. Sed quod in amorem tui me rapuit, Historia fuit Pelagiana, Historia, non magis sæculis, quàm affectibus Theologorum pugnantium diversis perplexa, seriatim tamen per ipsas laceras Ecclesias deducta, & in ipsis funestissimis Ecclesiasticorum diffidiis, non sine ingenii simul & laboris miraculo ordinata. Ad munus tuum redeo: Gratiasque ago multiplices. Quod tam eruditum opus, tam utile, nostrum, i. Britannicum adoptione feceris. Quod tam iustis laudibus Academiam florentissimam Cantabrigiam apud aures æquissimas, placuit celebrare. Quod me dignum voluisti simul, nomine, inscriptione, libro, literis tuis. Præcipuè verò quod Buckinghamiæ Illustrissimum Ducem, omni virtutum genere cultissimum, & mihi omnis Officii nomine observantissimum, tantis, debitis tamen laudibus, posteris consecrasti. Ego jam Duci paro literas, à me (& forte primo) audiet quid calamo tuo debet. Unum rogo: noli me in lineis hisce turbatis nimium querere, alibi habito, rerum non verborum servus. Et quum Erpenius tuus & Wintoniensis meus fati cessere, ipsi meritis suis immortales, socias jungamus manus, meas licet multo breviores invenias. Pater benedictionum sit cumulus tuus, & ego interim servus tibi in Christo, & si placeat nomen Amicus.

*Ex Aula Regia
Hampton. Sept.
25. 1627.*

Guil. Barbon. & Wellensis.

LXXXII.

Doctissime Vir,

PRæbuiſti gratissimam ansam, & aliquamprehendere mihi jamdiu in votis fuit. Quæ impediabant duo fuere: Negotia plura quàm quibus par esse possum, & stylus inæqualis & barbariem sonans: quem tamen ob male jacta in me literarum fundamenta nunquam satis limare potui. Compedes hosce, non solum Candor tuus, sed & Gratitude mea abruperunt. Accepi literas tuas, utinam scires quàm charas, cum iis solos amoris tui libros, æternum eruditionis tuæ, & ære perennius monumentum, de Historicis Latinis. De Græcis quos edidisti Commentarios, apud me quidem illi sunt, & quod non plenè perlegerim,

*Epistola hæc
magna sui
parte mutila
extat inter
Arminianas,
p. 727.*

LXXXIII.

*Præstantissimo Doctissimoque Viro D.
Gerhardo Vossio, utriusque Eloquen-
tiæ in Academia Lugduno-Batavo,
Professori dignissimo.*

Vir præstantissime, Collega observantissime.

JAM diu est, quod nihil ad te literarum dederim, non oblitus officii erga te mei, quo nullum habeo commendatius; sed quod veritus fui, te participem facere earum rerum, quæ mihi displicebant quam maximè. Et quidem videbatur mihi levior esse ægritudo, quam sustinebam solus. Nunc verò, quando eam felicius dies mihi ademittit, nolo eandem te diutius latere; quo simul præsentem rerum mearum statum intelligas. Attamen cautio est, ne vulgatum, famâ, hoc malum,

H

nunc

nunc gravius mihi noceat, quam antea : Ideoque liceat mihi, hoc velut arcanum committere fidissimo pectori tuo; in quo spero praesidium fore honori meo.

Nosti ab initio, duplicem mihi fuisse curam, de itinere hoc foeliciter instituendo, ut infervire publico, & tutò possem, & sine privata rei dispendio; eamque fuisse causam, cur applicuerim me, ad illustrem Syriæ Consulem : At fateor me illius facti paulo post poenituisse. Ita aliena à me apud illum omnia, vias, mores, & studia reperiebam; quamque in hac urbe tranquillitatem exoptabam & otium, perpetuae ferè disturbancei obnoxiam. Etenim gravis & penè continua, Consuli nostro lis fuit, modò cum suis, modò cum aliis populis, ex orbe Christiano advenis, dum in ordinem redigere nitebatur, quæ paulatim hic collapsa erant. Unde iudicabis facile, quam non ego laboris partem tulerim, qui rebus omnibus interesse, & velut præesse debui. Si tamen me audisset consulentem, ex quiete forsan maiorem gloriam reportasset, & ego insignem fructum. A singulis negotiis, turbarum expectabam finem; sed aliz ex aliis emerferunt, uti ex fluctu fluctus: ita ut pigere tandem me, & tædere istarum rerum vehementer coeperit. Aliter significatum, aliter persuasum in patria ante discessum fuerat; facilem nempe, & liberalem fore operam quæ à me requiretur. At reverà permolestam, & sæpè importunam comperi, ac si quis antea in locum meum suffici potuisset, omnino conditionem illam repudiassent, studiisque meis posthabuissent securitatem, & quævis commoda, quæ tamen mihi nulla fuerunt. Levius mihi reddere patientia conatus fui, quod corrigere haud potis eram; donec tandem Dei Opt. Max. beneficio revixi mihi, restitutus in libertatem: nam ante dies aliquod, Dominus Consul, ob Parentis obitum, in patriam hinc discessit, pauloque ante huc alius venit, in quem onus meum commodè deposui.

Dominum Witsium maximè mutatum ab eo, qui antea fuit, omnes qui eum noverunt, mirabuntur: tantum in liberalem indolem potest honoris tuendi necessitas, & seria mentis occupatio: At ex qua veror ne res ejus familiaris, ingens detrimentum coeperit inter Turcicos Harpyias. Abiturus dignitatem consularem mihi obtulit, instituitque multis, ut vices suas pro aliquo saltem tempore sustinerem, ad quod capeffendum munus, hortatus me quoque fuit illustrissimus Dominus Legatus Cor-

nelius Haga: At recusatione honoris istius, atque fortunæ, commonstrandum existimavi, quàm invitus alia hæcenus negotia tractaverim, præter studia mea, neque aliter posse me aut debere veniam sperare. Quæ alia etiam incommoda me remorata sint, non dubito quin antehac intellexeris; scilicet, ut paulo post quam in Syriam venimus, diri contagii labe, me omni plane consuetudine eorum prohibuerit, per quos proficere desiderabam; & postquam partis, hic subsidii, amicisque uti coeperam, quomodo aurium immensus dolor, tinnitulusque perpetuus, ultra tertium mensem me affligerit, omnique intentiore studio interdixerit, quantum etiam curæ, molestiæque mihi peperit adolescentis cuiusdam incuria, & temeritas, qui per amicorum preces ferè invito mihi, comes obtrusus fuerat. Quædam ex hisce malis talia fuere, ut tanquam divinitus immissa caveri non potuerint, quædam vero prout humanæ sortis erant, si initio præcivissem, evitare debueram, postmodum tamen pro arbitrio effugere non potui.

Nihilominus pro tempore, quo uti mihi licuit, satis profecisse mihi videor, & nî favente, alia atque alia occasione, & invitante, alias quoque tractassent linguas; de Arabica quæ potissimum mihi incumbit, jam ferè securus esse poteram; at deinceps spero, aliud operæ pretium faciam, & quidquid est detrimenti, facile sarciam, quandoquidem partis hic studiorum commodis, quiete in posterum, & ad placitum uti licebit.

Quas quidem rationes meas, proximè exposui amplissimis Dominis Curatoribus, dissimulato tamen honoris ergò, Consulis negotio; quibus ipsi permoti, haud ægrè ferent confido, moram à me paululum prorogari, ultra præscriptum terminum: Quod haud dubium est, quin cum Academiæ utilitate conjunctum erit: Nam tantilli temporis fructum, quem interea à me expectare posset, cum scœnore uti spero, paulo post uberiores recipiet. At de melioribus amicis meis, nonnulli urge summo perè videntur, ut quamprimum possim, in patriam revertar, ob vacantem Cathedram Mathematicæ professionis: Non potui certè hunc casum intelligere, sine maximo animi dolore, atque etiam nunc deploro Academiæ nostræ casum, quod occiderit incomparabile illud lumen, ad cujus laudes adspirare videtur ambitiosum; ascendere verò perdifficile est; id eoque licet ab adolescentia, stimulante genio, disciplinarum illud genus sectatus fui,

fui, & pro captu ingenii quoque penetra-
vi: tum etiam in votis semper habui, ut
pertractare, vel exercere aliquando pos-
sem, in patriæ usum; non ausus tamen
fui, ad ejusmodi felicitatem, hac occasio-
ne sperare, vel animum adicere; præser-
tim postquam amicorum literæ, tardius
perlatae essent, quam ut putarem me ex
consilio eorum, hic res meas expedire pos-
se, & ibi in tempore adesse; quamobrem
universum negotium, divinæ providentiæ,
& amicorum mihi benevolentium; pruden-
tiæ, & arbitrio, committendum duxi; eo
quidem animo, ut in stadio interim meo
gnaviter pergerem, & quam possem ma-
ximè redditum maturarem. At postquam
ex postremis literis, intellexi, è patria ad
me datis, suffragia pro me conspirare quæ-
dam, & Dominis Curatoribus visum fuisse,
in designando Clariss. Snellii, mei quon-
dam Præceptoris, successore, mei quoque
rationem habere, sententiam mutavi, om-
nibusque modis contendendum putavi, ne
tanto favori, summisque meis votis, ipse
deessem. Primum quidem institueram,
commissam mihi Spartam, quæ in hisce ini-
itiis, nulli non tenuis, & ingloria videtur;
amplificare atque exornare, aliarum quoque
linguarum orientalium accessione; sed ut
verum fatear, revera tandem comperi,
præposteram illam operam fore, & Rei-
publicæ Christianæ injuriosam: Nam quid-
quid cæteris incognitis illis linguis, studii
impendi possit, sola Arabica sibi postulat:
ut quæ sola continet, quidquid ferè de
Asia & Africa disciplinis, & rebus por-
rò scire desideramus: Ita ut tanquam uni-
versalis lingua sit, quæ à Græcæ, & La-
tinæ doctrina, separari minimè possit, si
humanam sapientiam, & memoriam tem-
porum, quam maximè fieri potest, apud
nos integram extare velimus; ideoque si
excolendis exoticis linguis, novum ali-
quem, & dignum labore fructum spero,
video ab Arabica repetendum: Et si ad
hujus professionem, etiam Mathemata
mihi decernantur, viderer talentum qua-
lecumque meum, melius posse collocare,
& materiam nactus, jucundi, & utilissi-
mi laboris: Nam & Arabica lingua, de
Mathematicis Græcorum, & aliarum gen-
tium inventis, multa suppeditare potest,
nobis invisâ, omniumque votis desiderata,
& ipsâ illâ contemplatione recreatus sub-
inde animus, facilius superare omnia tæ-
dia posset, quæ in prima tam amplæ, &
implexæ linguæ culturâ non possunt non
oboriri. Ex Græcorum monumentis, ut
hoc in transitu significem, pridem nactus

fui, Apollonii Pergæi, summi Geométræ
tres postremos Conicorum libros, de Græ-
co in Arabicum elegantissimè translato;
scriptum à præcipuis quibusque Mathe-
maticis maximi æstimatum, & frustra ha-
ctenus conquistum; reperi alia quædam,
& uti spero, plura propediem nanciscar
quibus id quod paulo ante dixi, luculenter
posset probari. Sapissimè à dolore tem-
perare nequivi, cogitans, præcipuam vitæ
partem, in illo pulvere fuisse exactam, &
præter muneris mei sortem fore, si in illo
exercere manum, & mentem porro vel-
lem: Videor nunc mihi hujusce felicitatis,
modo capax sim, compos reddi posse,
non sine Reipublicæ nostræ commodo;
cui hisce temporibus, & in præsentis suo
statu, maximè necessarium est, juventu-
tem in ea quoque Mathematicarum parte in-
stitui, atque exerceri, quæ in bello, præ
reliquis ferè rebus omnibus plurimum sem-
per potuit: *Τὴν πολιορκητικὴν καὶ τὴν τακτικὴν*
intelligo, quæ in Academiis hæctenus, in-
iquo divortio prorsus separata, à Ma-
thematica Encyclopædia, neglectæ fuere:
pro modulo ingenii mei, favente eam ad
rem commoditate idoneâ, utriusque dis-
ciplinæ, doctrinam prosecutus, ipsaque de-
lectatus multum fui: id si mihi porro li-
ceret, de progressu, & operæpretio haud
desperarem. Denique cum Arabicæ lin-
guæ, aliarumque orientalium subsidia li-
braria, quæ necessitas, & profectus, alia
atque alia requirat, sine impensis magnis
comparari nequeant, & Mathematica quo-
que inventa, & Machinæ, præ reliquis
studiis, haud leves sumptus postulent, si
ab utriusque laboris, honesto stipendio ju-
varer, quod tolerabilius Academiæ foret,
quam duos Professores alere, utrumque
fortè studium, felicius cederet in com-
mune bonum, quam si alterutro tantum
fungerer. Imprimis verò postquam decre-
tum est mihi, si exorta spes ejusmodi con-
ditionis obtinendæ affulgere perget, vi-
rum aliquem orientalis literaturæ peritum,
in patriam mecum perducere, meisque
impensis ibidem alere; quod si precibus,
& promissis, (nullis autem parcam, quæ
ferre potero, vel potius solvere) impetra-
vero, facile erit propitiantē Divino No-
mine, & haud multo quidem tempore,
arcana harum literarum, publici juris face-
re. Hæ quidem cogitationes faciunt, ut
quò me favor, & amicorum consilia invi-
tant, eò quoque excitatiore animo, spes
meas extendere audeam; non quod me
cum aliis, si qui fortè competitores sunt,
comparare velim, aut qui facile à naturâ,

& doctrinæ dotibus multo sunt instructiores; at si ex re Academiæ, & Reip. videatur, ut ego isti muneri præficiar, ne ipse deficiam. Si tempestivè satis, ante discessum Consulis nostri, certior factus fuisset de Curatorum decreto, ita ut de libris mihi providere, & de idoneo homine modo potuisset; unà me cum illo itineri commisisset, etiam si haud ex omni parte, securum mihi videbatur. Nunc id mihi operis, ut quamprimum possim, me expediam; at quia audio omnes vias esse terræ marique infestas, hostium, prædonumque injuriis; altera me cura tenet, ut quâ possum prudentiâ, ejusmodi discrimina effugiam, & partas hic literarias copias, tutò transportem. Post pauculos ab hinc menses, expectantur aliquot naves Anglicanæ, Constantinopolin appulsuræ, quæ novum ex Anglia legatum vehent, eumque qui jam suo munere est defunctus, accipient, ut eundem cum familia patriæ reddant: Sunt quidem mercatoriæ illæ naves, sed bellicæ classis in modum armatæ: illi ego potissimum occasionem immineo; neque enim similem antea sperare possum, quam obrem brevi hinc Constantinopolin concedere statui, ut doctorum hominum, quales permulti ibidem esse perhibentur consuetudine, instituta promoveam mea, & simul novam illam Romam perlustrem: in quem finem, per literas, illustriss. Dom. Legatus noster, me aliquoties ad se humanissimè evocavit. Ipse quidem commendatione sua, aliisque officiis, hætenus plurimum juvit, & majora cum summo favore obtulit, si illuc venero. Hæc quidem ad latius, ut negotia, & vota mea perspecta haberes, te autem per benevolentiam, quâ me hætenus dignatus fuisti, etiam atque etiam obtestor, ne iisdem porro gratiam tuam, & patrocinium impertire graveris, in quo spem magnam, & fiduciam pono: Novi enim te autoritate doctrinæ, & virtutis tuæ eximie multum valere, apud Dom. Curatores, omnesque cordatiores viros, amicos tuos; quò juxta ceteros amicos meos effectum reddas, ne longior præter expectationem mora, quâ vitæ meæ, & harum literarum fortunæ consulendum duxi, me damno multo maximo afficiat, quod fieret, si propterea conceptæ felicitatis spes decollaret. Quia plus satis prolixus fui, supersedebo commemoratione aliarum rerum, quæ hic contigerunt mihi, aut quæ ad statum, utriusque Imperii Turcici, & Persici, necnon Christianorum Ecclesias, in Asia pertinent, eas quidem, aliasque reservabo pro-

ximis literis, aut in reditum meum, quærâ celitus opto, expectoque, & felicem illum diem, quo repetere mihi licebit, fructum dulcissimæ consuetudinis tuæ: Interim toto animi affectu te complexus, me, meaque omnia, tuæ pietati, & fidei commendo, Deumque Opt. Max. supplex rogo, ut te Orbis Christiani, & Academiæ nostræ insignis decus, ad longævam ætatem incolumem servet, cum carissima Coniuge tua, Liberisque tuis: Idem quoque precor, cæteris amicis omnibus, imprimis vero, conjunctissimis Collegis meis, quos unà tecum omnes officiosè saluto.

Datum Halebi in
Syria Comagena xi.
Kal. Sept. An. Sal.
cId Idc xxviii.

Tui observantissimus,

J. Golius.

LXXXIV.

Clarissimo Viro D. Gerhardo Vossio,
Historiarum Professore.

Lugdun. Batav.

Clarissime Vir, Domine & Amice honorande,

TAM mihi gratum, quam inopinatum fuit, nomen tuum conspiciere, in Instrumento publico, quod de Baptismo liberorum meorum illic, te attestante, formatum fuit. Gratias tibi ago non tantum ob operam, verum etiam, & quidem præcipuè, ob voluntatem, quam ita promptè amico veteri absenti, & non roganti impendisti. Sed nondum habeo rem ex animi sententia confectam. Rogo igitur ut mense, & anno baptismi singulorum liberorum meorum, (ita enim petieram, & ea gratia miseram, ad adfinem meum chartam memorialem, ex Ephemeride rerum mearum domesticarum descriptam, quæ ista omnia continebat) gratificari mihi digneris. Nam quod ille existimavit sufficere, non sufficit. Nos nunc terram Canaan describimus, rem ingentis laboris; dabimusque propediem, Eusebii Pamphili, Cæsariensis, in Palaestina Episcopi librum, *καὶ τὸν τῶν ἱερῶν ἐρμηνείαν ἐν τῇ δὲ γερμανικῇ*, cum interpretatione opposita B. Hieronymi, cui ad oram adjungam vocabula hebraica, singulorum locorum, cum designatione librorum sacrorum, in quibus ea loca nominantur. Subdam præterea, (si Deus volet,) singulis paginis notas meas, ut earum præfens conspectus lectorem juvare possit. Græca Eusebii nunquam edita fuerunt; & scis quanto à nobis

nobis postulata, quanto promissa fuerunt. B. Hieronymi liber Latinus, ingentes habuit lacunas, quas quum ex collatione gravi contextus è regione descripti, deprehendissem, non ante quievi, quam in Bibliothecis S. Victoris, & D. Thuani erui exemplaria manuscripta, quorum ope hiatus explevi. Dici non potest, quantum is liber adjumentum allaturus sit sacrorum librorum lectoribus; nam in illis tertia fere pars continet Geographica. Sed urget Tabellarius. Vale ergo charum Caput à

Tuo,
Bertio.

Dat. Lut. Paris. xxiii.
Sept. An. 1627.

LXXXV.

Clarissimo Viro D. Gerhardo Joanni Vossio, in Academia Lugduno-Batava Professori Celeberrimo,
Lugdun. Batav.

S. P.

Obtundo te, Clarissime Vir, literis, ut silentium tuum tandem expugnem; quamvis dubitem utrum ullæ mearum, ad te pervenerint, atque etiam num hæc sint perventura. Cingimur enim densis undique militum stationibus, & commeatum maritimum, quo nonnihil fidebamus, prope modum nobis Danus intercepit. Urbs verò hæc necessitatem recipiendi præsidii, centenis millibus Joachimicorum redemit, neque dum insidiarum metu vacat. Quid si promptitudine dandi hostis illectus, postulata perpetuet, aut vim apertam intenter? Adeo heic animis decidimus, ut etiam ad primum ordinati militis conspectum, obedienter imperata sumus facturi. De Dano tristitia, ac misera differunt, quæ quia abominor, atque in hostium capita reprecor referre Religioni duco. Nisi Deus è Machinâ me hinc abstraxerit, video in communi interitu, & pestem meam. Nemo amicorum consilio saltem ac voce juvat, nedum addit operam. Unicum ad vos ex tanto naufragio receptum, ac portum habere me posse speravi; sed cum promissa vestra non compareant, animus componendus est, ut imminentem necessitatem, fortiter excipiat, cassæque speculæ renunciet. Antequam tamen arctiora nos circumfundant, Cornelii Nepotis Editionem ex liturariis meis extruo, & eis unam atque alteram septimanam isto labore me defuncturum esse confido. In-

stiti tibi, Vir Clariss. hætenus, ut mihi tuas, aliorumque conjecturas elargirere: Verum Orator fui minimè impetrabilis; unde suspicor vos conjunctionem istam defugere, ac dedignari. Ob id dare tibi amplius negotii non sustineo, ut lucubrationibus meis Typographum conciliares, neque in eventum mea præmittere ad vos audeo; quia nedum ista, quæ ante biennium, Jodoco Hondio credidi, ab ejusdem viscatis manibus, reglutinare potui. Mi Pater, facias me ocius certiozem, quid spei, de promotione mei apud vos, & de Typographo gerere debeam. Simul ac enim tuas accepero, non solum luculento in Cornelium Nepotem spicilegio, sed Analectis etiam in Æliani *πορίαις*, macerabo penates tuos, atque paulo post me hinc ad vos subducam, ne belli incendio hauriar. Raderi commentarios in Q. Curtium, nondum videre contigit, de quibus tuum iudicium expecto. Post Latinorum Historicorum vitas, quid aggressus es? quo ingenii monumento insignire cogitas Mnemosynes templum? Cl. Cunæus Josepho quid facit? cedere certè Heinssio non debet, qui Nonno doctissimis exercitationibus solitudinem depulit, pluresque Lectores conciliavit. Non credis quanta scriptorum tuorum admiratione capiatur; quanto Cunæi desiderio flagrem; ut fortunæ meæ tenuitas, obstare non possit, quin vestra mihi monumenta, studiosè comparem. Vale.

T. T.

Rostochii A. D.
xxi. Octob.
cIdo Idc xxvii.

Janus Gebhardus.

Salutem plurimam adscribo D. Scriverio, D. Vorstio, filiis tuis, paternis vestigiis insistentibus. Literas tuas trade vestrati Johanne Maire, qui curet ad nostratam Civem, & Bibliopolam August. Ferberum.

LXXXVI.

Clarissimo Præstantissimoque Viro, D. Gerardo Joanni Vossio, Eloquentiæ atque Historiarum Professori.

Superioribus tuis, Clarissime, & Amicissime Vossi; quibus absolutum de Historicis Latinis opus tuum, cujus, & brevi exinde missum te mihi exemplar significabas, jam ante respondisse me scio. Nunc illud ad me missum opus, curante Typographo vestro, recteque curatum accepi.

cepi. Gratias verò, hoc nomine tibi ingentes habeo, debeoque. Nam ut referam hoc tempore, in mundo non est. Suetonium interim ecce tibi, ante semestre, & quod excurrit, minori hac formâ, typis excusum, pro munere tuo, munusculum. Est verò insignis hæc opera tua, istamque egregiè nobis exornatam Spartam dedisti, quantum ex filo operis, & eâ quâ adhuc frui licuit, inspectione subitanè, conicere potui. Nam mihi exinde propius, sæpiusque adeunda, ac repetenda hæc adyta. Primo intuitu, & modo hanc, modò illam volutanti paginam, occurrit, Orosius ejusque, ut scribunt, *Ormeſta*. De qua voce, cum tuas legerem conjecturas, ut elegantes, ita doctas oppidò, animadverti editionem quæ prodiit, Maguntiz An. 1615. cum Annotationibus Fabricii, Lantii, & Notis postremò marginalibus And. Schotti, vitam à te haud esse. Nam ibi Schottus in præfatione, præter cætera, hoc monet, hanc Orosii, Historiam, inscriptam olim vitiosè, & barbarè, *Ormeſiam mundi*, sive *Ormeſdam*, pro *Orcheſtram*: Ut titulum scilicet ejusmodi habuerit, *Oroſii Orcheſtra mundi*: quasi in eâ, ut in Scenâ, ac Theatro quodam mundi, ac mortalium clades, ac calamitates, ob oculos propositas omnibus, ac recitatas voluerit. Et addit Schottus, ita nominandam, inscribendamque, primò vidisse in Prodicio suo Pighium. Occurrit deinde & aliud, & quod me propius respicit, illud scilicet, quod in Saxone Grammatico, de S. Gulielmo Parisiensi refert, qui in Daniâ Abbas, obiit Cænobii Ebretoſtrenſis. Ejus enim vita, à Discipulo ipsius descripta si penes te sit, aut ubi haberi possit, (nam ex ea verba quædam laudas) ut mihi significare haud graveris, oppidò velim. Historia quoque Mussati, & ea præsertim cujus mentionem facis, editio Veneta, si jam prodiit, & Leydæ proſtet, ejus mihi exemplar mittat Bibliopola Johannes Maire, ut moneas, rogo. Authorum præterea veterum emendationes, passim insperſas, variasque in eodem, observationes tuas præutiles ac necessarias vidi; quarum ego rerum, atque Authorum syllabum, sive indicem omiſſum solummodò desideravi. Sed hæc altera tua editio, aliaque talia adjicere poterit, volente Domino: Qui & te, mi Vossi, diu saluum, ac sospitem præſtet, quò ita egregiis hujusmodi laboribus, ac lucubrationibus doctissimis, sufficere deinceps, multoſque in annos valeas.

Dabam Hardervic.
Anno Dom. 17.
Novemb. 1627.

T. Joh. Ifac. Pontanus.

LXXXVII.

Arnold. Buchellius G. J. Vossio, Phil.
loſ. & Historico Clarissimo.

Lugdunum.

Clarissime Doctissimeque D. Vossi, percurri pridem librum tuum, de Latinis Historicis; in quo admiratus sum inexhaustam tuam diligentiam, incredibilem patientiam, & exactum simul judicium tuum. Admiratus (inquam) sum quotidianis, & quasi perpetuis tuis occupationibus, tantum temporis vobis superesse potuisse, quod tam vasto operi sufficeret. At supra spem omnia inveni, adeo ut deficiant verba, quibus tanti laboris merita, dignè expreſſero. Vidi quam infinito studio pelagus illud Authorum ingressus fueris, quot etiam incerti nominis, & ætatis scriptores, inter tineas, & blattas deliteſcentes, in lucem produxeris. Et penè (ut ita dicam) miſeret me tui, qui tantum laboris, impenderis istis SS. Vitis legendis, quarum major pars impossibilium, ac incredibilium rerum narrationibus, ne quid dicam acerbius, occupatur. Verumtamen cum hæc, non tantum nostris hominibus, sed toto erudito orbi scripſeris, oportuit sanè ad sæculi hujus mores te accommodare; At interim hoc sedulò cavisti, ne quem temerè offenderes: quod licet apud bonos æquosque Lectores, te impetraturum minimè diffidam, vereor nihilominus (ut nunc sunt hominum mores) ne omnibus, vel sic in iis satisfeceris. Sunt enim quibus Religionis velum SS. vel manifestissimis prætenditur mendaciis, quod omnibus censuris superius arbitrantur. Sed ad rem venio, Vir humanissime, pauca inter legendum notavi, inter quæ, & Typographi errata, sed talia quæ veritati fucum facerent. Eorum hic specimen adjungo.

Pag. 446. *De Beka ad finem; ac prætexit usque ad annum cdo ccxli. quo & ipse in terris morabatur.*] Hic innumero erratum, & C unum omiſſum, nam vixit post annum 1300, & Chronicon suum ad Johannem Episcopum perduxit; ad annum nempe 1345. teste Trithem. MS. meum ultra 1360. producit, sed ab alio quædam assuta credo. Idem Trithemius claruisse tradit, ad annum 1348. Gesnerus in Biblioth. An. 1350. Pantaleon 1340.

Pag. 814. *In lucem primus protraxit, Bernardus Furmerius.*] At erroribus adeo plenum, ut vix linea in toto libro sit integra:

tegra: neque sanè eo nomine illi multum debemus, cum quivis faciliè in tanta copia exemplarium manuscriptorum, pessimè descriptum, lucelli tantum spe in lucem protrudere potuisset; & absque dubio, jam meliorem eum Authorem haberemus, nisi hominis ea sedulitas fuisset. Ego in tantillo libro, aliqua centena errata restitui, quæ nullo modo excusari poterant; Idque cum rursus tantum perlegissem, D. Grutero instante, ac urgente, ut Francofurtum mitterem. Quid autem denuo libro hoc factum sit, nondum intelligere potui, ut neque de Steda meo; ad quem quædam etiam notaveram: quarum Notarum, nonnullas ex Adversariis collectas, unà cum meo Exemplari, ad D. Scrivarium misi.

Pag. 839. *Johannes cognomento Palæomydorus*] Videris hunc Johannem, alium facere, à Johanne de Aquâ Veteri, cujus pag. 529. memineras: cum tamen, Tempus, Patria, Scripta, Ordo convenient, nec alium præter unum Johannem Aquaveteranum reperiam; hos unum, & eundem credo, ut & mecum Valerius Andreas, qui ante annos tres quatuorve, in lucem dedit Lovanii Bibliothecam Belicam.

Pag. 838. Authorem hujus Polyphilij, indicant literæ Capitales Titulorum, quas collegi, in hunc sensum: *Poliæ frater Franciscus Columna peramarvit*: Ut mihi indicium fecerat, Johannes Martinius, qui hunc librum ex Italico translatus, Anno 1546. Parisiis edidit, Gesn. Venerit apud Aldum excusum, tradit Ital. neque puto Latine extare. Benedicte Curtius ad Arresta Amorum, sic de eo scribit; *Et multis Francis Columna Parenthesiones in Templo Polyandrios fieri sinxit, his qui ob amorem periclitati fuerint*. Idem Arresto 40. *Fuerunt etiam qui prosâ vulgari, Amicas suas celebraverint, inter quos verò, doctior Franciscus Columna, cognomento Polyphilus, qui Poliæ illam suam, omnium disciplinarum doctissimam interpretationem, ac omnium Artium Officinam instructissimam exornat, plurimisque Epithetis honestat*.

Eadem. Certè meo judicio, Thesaurum continet Antiquitatum, & Elegantiarum.] Cyriacum Anconitanum nondum vidi, sed eundem, non optimâ fide dedisse inscriptiones, at plurimas finxisse satis aperte indicat Doctiss. Ant. Augustinus, Dialogo xi. de Numis, & Antiq. inscriptionibus; eumque Annio Viterbiensi, ea in re comparat.

Pag. 827. Corius Anno 1485. Anno-

rum fuit 25. ut in Præfatione ad Ascanium Sfort. Card. ipse scribit. Idemque dedit vitas Imp. Rom. à Cæsare, ad Barbarossam, sed Italicè; promittit & librum de Vitis Philosophorum, Poetarum, & Mulierum illustrium, quem nondum vidi; An ediderit nescio; Cæsares ad finem, Operi Historico adjunxit.

Sed in Reuberi Editione libri sunt viii. habeo & ejus operis editionem in fol. Bas. ap. Pernam Anno 1533. octo tantum libris constantem.

Pag. 799. *Rexisse Ecclesiam Rbemensem annis xxvii*] *Redonensem*, scribendum, cum nullus Marbodius hoc tempore fuerit Rbemensis Episcopus; Errorum etiam sequentia verba satis detegunt.

Pag. 327. 796. *Atque omni rep.* Certè mirum videtur, Suffridum Petri tam mordicus propugnare suæ gentis fabulas, cum vir fuerit alioqui doctissimus, & judicii præterquam in patriâ Historiâ boni: hunc pertinaci animo sequuntur Furmerius & Hamconius, quos trium viros fabularum patriarum vocare soleo. Et utinam hi non suos invenissent Affeclas.

Plura attexerem, nisi vererem hisce meis nugis utiles vobis horas adimere; neque hæc alio animo quam juvandi scribo, cum sciam non omnia omnibus eodem tempore patere: neque tu, doctissime vir, aliter hæc capies. Conatum saltem videbis, etiam si nihil alicujus momenti præstiterim. Addo tantum indiculum Authorem, quos nescio, an videris.

Scriptores varii rerum Leodiensium quos Jo. à Chappeauville, in lucem dedit Leodici 3 Tom. An. 1612. in quarto, Inter quos Harigerus Abbas Lobienis, Anselmus Can. Leodiensis & Joannes Placentius Dominicanus; Catalogus Episcoporum Tungrentium; Hunc inter incerti ævi Authores retulisti, sed ætatem faciliè ex ipso quem apud me est libro constabit.

Petri de Blarrorivo Parhisiæ in signe opus, Nanceidos in fol. vulgari Libb. vi. versibus heroicis conscriptum, impressum verò in pago Lotharingæ D. Nocalai de porta; per Petrum Jacobi Perbrum, loci Paganum An. C. 1518. non. Jan. quo die etiam ipsum Nanceianum peractum est An. 1476.

Valerandi Varami de Gestis Johanne virginis Libri iv. versibus conscripti, editi in quarto Paris. Anno 1516. Rob. inde Stephani Anno 1529. iteravit.

Horatii Poetæ Idoraria, Poema Libb. 2. ad Nic. v. Pontif. Max. de Conspiratione Portiana in ipsum Pontificem. In membr. est apud me. Ant.

Ant. Sanderus Presbyter, edidit Anno 1624. Antw. in quarto apud Guil. à Tongris, de Scriptoribus Flandriæ Libros 3. De Gandavenfibus eruditione claris Lib. 3. de Brugenfibus eruditionis fama claris Lib. 2.

Est & apud me Vita Henrici Imp. Virginei quam scripsit (ita habet Tit.) Adalboldus Traject. Epf. Mf. Vita Henrici Quarti Cæs. Aug. Ducis Baviaræ vii. Paulo post, matris illius à quodam ejus temporis conscripta MS.

Item de Impp. Æquivocis Henricis. MS. Vita S. Adalberti confessoris. MS.

Sed jam satis superque tuam patientiam exercuimus, si tamen hæc vobis non ingrata, aut molesta fuisse intellexero, plura me missurum recipio, summi beneficii instar erit, si sensero me vel minimum profuisse. Vale, vir Doctissime, & me tui amantem redama; ac salve, & rem mihi gratam te facere crede, si à me salutem D. Barlæo dicere non grave fuerit.

*Trajecti calamo festinante,
X. Kalen. Decembr.
c10 l0c xxvii. stylo nostro.*

LXXXVIII.

Clarissime Humanissimeque Vir,

NON oportebat gratias esse tam tardas. Sed locorum intervallis, injuriisque temporum dandum est hoc vitium, non meo animo. Aderant jam Natales *Sornelæus*, priusquam appulere ad me amoris illa tui suavissima deposita. Atque interea dum ad Doctorem Bealum (Cantabrigiæ jam tum absentem) ad D. Junium, adque fratrem meum (longissimè distitum) transmittendi quærentur opportunitates, aliquot menses præterfluxere. Jam tandem, repono tamen, pro libro literisque summas gratias, pro amore pectus & animum. Equidem jampridem in eo ipso quod Academiæ nostræ contuleras munere, reputabas meas partes inesse; sed cum & mihi separatim atque inter paucos, viderem te clarissimum hoc pignus ultrò credidisse, mirum in modum cœpi de Vossiana amicitia mihimet gratulari. Et certè si Cantabrigiam te nostram invisere contigisset, (ut aliquando spes erat) non defuissent (confido) officia mihi, quibus meum erga te studium, penitissimosque adfectus commendare præsentī tibi potuissē. Verum nunc intervulsa sunt alia mihi illorum officiorum, præterque gra-

tias, & pia vota, reliquum est nihil, quo amores meos probem tibi. Quanquam cum & Reverendissimo Antistite apud nos, tuique amantissimo dudum intellexerim, non deesse tibi progeniem, Parentis similem, bonæ literaturæ, famæque cupidam, erit fortasse aliquando (*οὐ Θῆσ*) ut hic apud eorum aliquem possim clariùs exponere, quàm aucta in parte existimationis atque benevolentiae æternum refideas in meo pectore.

Tu, egregium decus literarum, vive diu, & benigno numine fruire, nomenque tuum, quod jamdiu fecisti, perge porro æternitati commendare. Ea assidue vota nuncupat, qui te intimis meritò adfectibus complectitur,

*Dat. in ipso Æ-
quinotio Vernan-
li Cantabrigiæ è
Coll. D. Petri
c10 l0c xxvii.*

Æterno nexu tibi devinctus,

Matthæus Wren.

LXXXIX.

Eximie Vir,

QUanquam est quòd doleamus excidisse nos expectatione nostrâ, quam de adventu in Britanniam tuo conceperamus: literæ tamen tuæ minuerunt nobis illam sollicitudinem, quibus præter te ipsum, nihil ad nos gratius acceptiusve pervenire poterat. Quòd si rerum tuarum conditio felicitati nostræ obstiterit, sive Lugdunensium tuorum affectus atq. amor, quem non mediocrem ex tuis in illam Academiam meritis esse conjicimus: Utinam nobis in propensitate erga nos tuâ, quàm luculenter adeò, optimus ipse tui sensus interpret, expressisti videtur acquiescendum. Academiæ itaque Britannicæ, præsertim hanc nostram, tanto apud te in honore esse summopere gratulamur. Non enim leve aliquod momentum laudibus nostris accessisse judicamus ex tanta suffragantis amplitudine. Theologi autem nostri, si jam in vivis essent, quàm mox tibi catervatim gratias rependerent: cujus beneficio habent, quòd nec solerti Lectore, nec fideli testimonio destituti sint? Cum & integritas tua omnem assentandi suspensionem facillè summoveat, & acerrimi judicii confirmata in animis hominum opinio præstet, ne in ferendâ sententiâ deceptus videare. Atque utinam te nobis vel Fortuna non invidisset, vel Numinis potius

potius indulgisset Clementia, ut quod mutis Britannia Magistris debere se profiteretur Humanitas tua, auribus discipulorum turbæ vivâ ipse voce persolveres. Quamquam nec illi muti prorsus sunt, imò ne mortui quidem, quibus tu quotidie vitam ac vocem suppeditas. Ut si rectè rationem subducamus, tuo illi in ære sint, tibi inter ceteros, atque etiam præ quam plurimis hujus Seculi Viris Eruditissimis claritatem illam quâ etiamnum conspicui cernuntur acceptam referant. Quod igitur in nostrorum laudibus tam copiosus fueris, & illud quidem benevolentia tuâ luculentum satis indicium: quod autem insignem illam elaboratamque Ingenii tui tui sobolem (quasi Polydorum alterum) nobis servandam concedideris, hoc certissimum amoris tui *παιδείων*, quin & arctioris cujusdam necessitudinis esse ducimus. Videris enim cum ipso fato contendere, ut nobis aliquo saltem modo prodesse valeas, & licet Scholæ, quæ te anxie cupidè præstolata est, adesse nequeas, Bibliothecam tamen lucubrationibus tuâ ornatam velle. Agnoscimus (Eximie Vir) atque amplectimur hunc animi tui Candorem, & arrhabonem istum inter *καταμύλια* nostra in perpetuam Authoris sui memoriam sanctissimè custodiendum curabimus. Vale feliciter.

*Cantab. datæ è
frequenti Sena-
tu nostro, Anno
cIdo Idæ xxvii.
Postridie Id.
Decemb.*

Amici tui

*Procancellarius reliquisque
Senatus Cantabrigienfis.*

XC.

Gulielmus Bathoniensis & Wellensis
Cl. Vossio.

Aliam datam mihi occasionem ad te scribendi (Vir doctissime) libenter accipio. Et certè gaudeo (etiam si undique mole negotiorum gravatus) hanc opportunitatem mihi se obtulisse. Non diu est ex quo literas tuas gratissimas accepi unâ cum Historicis Latinis à te novâ vitâ donatis. Ego statim acceptis libro, literisque, literas ad te dedi calamo sanè obeso & per desuetudinem titubante. Unum in tua illa pereleganti & gravissima Epistola Duci Illustrissimo nuperrimè nuncupata invitus legi, scilicet, te suâ tuorum & pollicitis Reipublicæ illius ani-

mum tuum mutasse, & proinde cælum non mutaturum, nec accessum nunc ad nos te paraturum. Sed quod in hac re tibi placuit, mihi lex sit: Nolo sperare quod non vis. Interim Dux Buckinghamiæ (qui Deo gratias apud nos iterum salvus) amore & tuo, & tui captus omnes meditatur vias quibus te pari honore, quo tu illum, afficiat. Remora munificentissimæ gratitudinis nulla, nisi quod prorsus nescit quid potissimum eligere debeat, in quo tibi beneficiat. Et hoc ut ego tibi scriberem in mandatis dedit. Officium (etsi difficilior scribo literas) mihi gratissimum. Nunc iterum vel hanc ob rem doleo te exuisse animum ad nos accedendi. Potuisset enim heroicus animus majora quam nunc apud vos potest. Unum restat, ut te ostendas dextrum fortunæ tuæ fabrum & prudenter excogites quid tibi factum velis: sit quale optare fas est (novi autem nî tua me fallant scripta ingenium tuum.) & factum puta. Fortè deliberandum esse de re ipsâ judices: Delibera: tamen hoc unum peto, ut præsentî quam fieri possit responso certior me facias literas has ad manus tuas pervenisse. Scio enim Ducem, Candoris tui cultorem eximium, responsum expectare, quod (si fieri possit) literas hasce meas anteverteret. Quod reliquum est, preces oro effundas pro peccatrice anima

Decem. 22.
1627.

*Devotissimi tibi in communi
Salvatore Jesu Christo,*

Guil. Bathon. & Wellensis.

XCI.

Samuel Johnson Vossio,

Musæ Solonis sententiâ (Reverende Musarum Apollo) *Ζῆλος Οὐρανός* & *ἄγλαα Νύμφη* appellantur. Patrem habent Jovem, & quid Jove majus habetur? Patrem habent adiutorem, sic enim Jovis à juvando nomen, hæc Musarum felicitas. Foelices, nimium foelices fuissent Musæ Cantabrigienfes, si adventum tuum, Clarissime Vossi, quem Academia seu Jovem veneratur, si adventum tuum & influentiam tam diu exoptatum iniqua nobis fata non invidissent. Dorislaum accepimus, O si Vossium! illum laudamus, te suspicimus. Dignus ille fatis qui historiam perlegat, si non Vossius huic muneris

neri destinatus. Epistolium accepimus, quæ quidem Epistola fuit satis ampla & luculenta tui amoris tessera. Sed nobis pro amore visum est epistolium, quicquid sit, cum tuum sit, nos in bibliotheca nostra in Jacobi Scrinio memoriæ sacrum conservamus. Te absentem videt, tacentem audit & amat Academia, & ita amat ut quamvis ad familiaritatem accedere multum cupit, ad amorem certè nihil possit. Sed quò me rapit commune votum & amor tui ut mei obliviscar? Quid ego tibi pro tua in me gratia Lugduni exhibita? quòd mecum indigno tanti viri alloquio dignatus es colloqui, quodque longè maximum duxi in amicorum meorum albo nomen inscribere, meque tuis laudibus (sic enim jure appello) cohonestare. Utinam tam felici esse olim contingat mihi ut qui tibi jam videor, is aliquando esse possim: tum nec falso mihi testimonio adulatus erit Vossius, nec ego tanti viri indignus amicitia. Dabo operam nec vana de me prædicarit Vossius vel hoc uno nomine dignus ut sim qui Vossium prædicem.

Miratus est Seldenus (qui tamen te amat medullitiis) cur librum illum omnium applausu acceptum Duci Buckinghami diceres, ego tuis verbis responsum dedi. Cancellarius est nostræ Academicæ. In titulo epistolæ aliquantulum errabas (quod vitium certè non fuit) vel ab Anglo forsàn aliquo, vel titulo Anglicè scripto deceptus. Ego Domino meo omnia fausta & felicia ex animo precor, & si vel minimam honori tuo labeculam ab immundo cujusquam ore aspersam videro, non secus ac proprio dedecore commovebor. Vale.

Rapin, Cantabr.
& Bibliothec. Coll.
Eman. Jan. 1720.

Tuæ humanitati in omni
& observantia & of-
ficio devinctus,

Samuel Johnson.

XCII.

Guilielmus Bathonensis & Wellensis
G. J. Vossio.

NON profiteor (Vir Clarissime) me hisce ad tuas quas mihi tradidit Vir tui studiosissimus Dominus Carltonus, responsum dare. Sunt tantum characteres amoris mei, qui nec te negligere, nec illum sine literis novit dimittere. Quàm

duobus abhinc mensibus, Majestatem Regiam, ut mihi pro officio incumbit, infausto pede sequor (iter tum faciebat Hamptoniam) rhedâ egressus torrentem non quatuor pedes latum dum transilio pede, inequali plantâ in terram sabulosam, & minus fidam incidente, nervum posteriorem tibiarum dextræ (Tendonem vocant) fregi. Ab eo tempore incedo claudus: nec adhuc constat quando sim vires pristinas recuperaturus. Si quæras quorsum hæc? ut certior fias nactum te esse amicum claudum: Sed etsi nunc fractis nervis, non possum in gratiam tuam, quæ tu, quæ ego cupio, facere: quamprimum tamen vires accreverint strenuè mihi concedita peragam. Ut sic intelligas (saltem si quid possim) me ima tantum mei parte, non corde, non affectibus claudicare. Literis meis proximis meliora forsân ad te perferentur. Quod in votis est

Martii 26.
1628.

Amicissimi tui,

Guil. Bathon. & Wellensis.

XCIII.

Hieronymus Beale, G. J. Vossio.

ÆGrè ne feras, colendissime Domine Vossi, si expectatione tardius literæ ad te nostræ perveniant. In causa erat nimis sera vestrarum traditio, quas diu ante libri etiam tui factam copiam, seorsim accepimus. Quip & alia, colendissimo vestri, Doctori Wrenn, à Rege, à Comitibus objecta est remora, mihiq; multò molestior à novis nuptiis. Tum etiam, ne clarissimus amicissimisque Dominus Dubletius non vetasse credatur, haud diffiteor vino me veteri delectari impensius, utque scias, quam studio, quam cordi mihi sit antiquitas, provectiorem ætate matronam ac propè effectam duxisse fateor. Riden' gravissime Gerarde? Hoc ipsum volebam, quia salutare est. Ut vivas Nestoris annos, ut floreat unâ tecum, ac per te vincat antiquitas, macte porro hilaritate ac lubentia. Et quem olim accuratissimo illo Historiæ Pelagianæ opere concinnasti tui nominis cultorem; hodieq; etiam missis elegantibus literis & libro verè aureo (Τὸ δὲ πρῶτον κοινὸν ἔργον) arctius obstrictum tenes, prosequere oro novis æternisque amoribus; nec ante me deleas ex albo amicorum, quàm patritiâ avitaque

avitaque veritate spretâ, in novatorum castra transfugiam. Vale literarum decus uti ex animo vult vovetque

Cantab. ex Aula
Pemb. Apr. 2.
An. Dom. 1628.

Deditissimus tibi,

Hieronymus Beale.

XCIV.

Spectatissimo Viro D. Gerhardo Joanni Vossio, Affini conjunctissimo, S. P.

Optime & Doctissime Affinis,

FACIS ut te dignum est, quod literas meas frequentiores efflagitas, nec tamen de tam pertinaci silentio, grave quidpiam suspicaris. Non metuo itaque, ne me patientiæ tuæ illudere putes, si continui hujus silentii culpam, tibi quoque purgare parem. Non confugio ad solenne istoc genus defensionis, *Diu absui, & multos subinde menses, in secessu ruris exigens, fidis Tabellariis destitutus, &c.* Hæc si vera essent, tamen assiduitate nimia detrita in invidiam mendacii jam olim inciderunt. Mitto igitur decantatos desidiorum mentium obtentus, & accusationem paranti, objicio vigilem operam, quam Provinciæ mihi impositæ debeo. Sciunt qui hic sunt, quàm continuo hoc sexennio, vix respirare mihi detur; ita veteribus negotiis, nova quotidie ad crescunt; ac prioribus vix dum peractis, majus indies occupationum agmen occultis nexibus extenditur. At omne negotium, inquires, alternis otii vicibus distinguitur. Verissimè id quidem, sed illæ ipsæ feriæ quas nobilissimo adolescentulo honoratissimorum parentum indulgentia facit, tanquam injectâ manu, me ab otii portu retrahunt. Neque enim patiuntur illum parentes optimi, venationibus, & aucupis animum laxare, ac reficere corpus, ut non me perpetuum comitem prodituro addant. Non hæc eo dixi, ut quasi cum venia deinceps, negligam desiderium Affinis conjunctissimi, cum quo mihi maximum vinculum, sanctionis alicujus necessitudinis esse gaudeo; sed ut missâ præteritorum querelâ, crebriores posthac literas expectes; enitar enim posthac, ut assiduitate officii literarii, cogitationes tuas quomodocunque vincam. En tibi hic marmorum Arundellianorum specimen à D. Seldeno editum. Fertur nescio quis Jesuita Gallus, edidisse opusculum de Plafice, Statuaria, & Pictura

veterum, quod ad me transmitti velim, si fortè in manus tuas incider; nam ad nos hic rari è Gallia Libri nunc deferuntur. Non exhiberem occupatissimo tibi hanc molestiam, nisi jampridem, ut ardentissimo Arundellia Comitis desiderio satisfacere, horas aliquot subcisivas, impendere cœpisssem catalogo artificum hujus generis. Sed unde quæso D. Lucam pictorem fuisse liquet? Aut unde ortum quod Pictores, hoc patrono glorientur? Imparties, scio, quidquid hac de re, certò statui posse cognosces. Apochas reddituum annuorum, intra paucissimas hebdomadas ad mei amantissimam sororem, Conjugem tuam, perferri curabo. Vale, & omnibus tuis, plurimam meis verbis salutem dices. Ego quantum in me erit, curabo, ut valeam, ac Deum Opt. Max. longum vitæ spatium precabor, non ob aliud magis, quam ut me tandem aliquando, tibi, tuisque gratum exhibeam.

Raptim, Londini,
in adib. Arund.
An. 1628. Apr.
19. Sr. ver.

Tuus omni officio,

F.F.F. Junius.

XCv.

Amicorum Opt. Max.

NUncium tam certum nactus, mercatorem Slagelosiensem, amicum meum, qui, intra septimanam unam aut alteram ad nos revertitur, committendum non putavi, quin ad te quoque, quamquam magna temporis angustia circumscripta, literas darem. Tu vicissim da hoc amicitia nostræ, ut occasione utaris: & responsum quicquid cupias, illud ad Hermannum Pisium mitti cures, qui ad me curabit rectè. Aliquantum sanè temporis est elapsum, ex quo nihil ad te scripsi: sed nec ferè ad alium quenquam, nisi ad quem necessario scribendum erat. Id tu sic interpretaberis, tanquam publica hæc tempestas, quæ in nostrum orbem sæviit, amicitia hoc officium impedierit. Certè amor in te meus, quem virtute ista tua singulari in animo meo accendisti, ardet ardebitque porro, igne semper inextincto; atque ut id facere possit, satis scio, tu non desines illum alere. Opto quantum possim maximè de rebus tuis sigillatim, publicisque Academia, adeoque universæ reipub. certior fieri. Nos hic, per benigni Dei immensam gratiam, sustinemus nos egregiè; quæque pridem, militum nostrorum ignaviâ,

viâ, ac prodicione fedâ, Deo ob peccata nostra nobis graviter irato, hostis cepit, nunc paulatim recuperamus. Serenissimus Rex noster cum sexaginta aut septuaginta aliquot navibus, bellicis nempe, & triremibus, aliisque è minoribus, Fimbriam insulam, vulgò Femeren appellatur, in potestatem suam redegit; & ex eâ in Holsatiam objacentem facto impetu, urbes duas, Chilonium, & Ekelfortum, expugnâvit; inde porrò sine dubio obviam quæque invasurus: quanquam de Chilonio quidem, qui Hafniâ ad nos inveniunt, tentatum potius illud dicunt, quam occupatum. Istuc tamen ii affirmant, & Rensburgum oppugnatum, adeo ut Hamburgum usque tota Holsatia regi pateat. Quidam aiunt, sed incertum, Athiam quoque, itidem insulam, occupatam. Dismarfi, casu ad internecionem usque præsidio hostili, sese Regi reddidere; & ut deinceps contra hostem melius se tueri possint, cum aggeribus perforatis, tum apertis emissariis, aquam undique in agros suos, quanquam cum insigni sanè detrimento, admiserunt. Sueciæ Rex nostro sese arctissimo foedere obligavit. Miserat auctumno proximo huc Legatos; & in illis generosum Baronem, Carolum Bannyrum, quem Leidæ novimus, studiorum illic causâ commorantem; is me Soræ perbenigne est complexus. Vix abierant, cum Rex noster etiam suos in Sueciam mittit, Cancellarium & unum è Senatoribus Regni. Qui, excepti præter solitum permagnificè, novum foedus pertractârunt. Et nunc iterum ab eo Legati Hafniæ adsunt. Lubecensibus, qui in Cæsarem propendebant, interdixit, ne hostile quicquam in nos cogitare unquam ausint; quod si facerent, se illorum & commercia, quæ in Suecia frequentissima exercere ipsi soleant, perditurum; & pecunias quæ ibidem ingentes illis debeantur, in fiscum redacturum esse. Quibus minis id effecit, ut nunc nuper Legatis Cæsaris, & Hispaniarum Regis, navale auxilium exigentibus, constanter illud pernegaverint: affirmantes, nullo modo se præstare isthoc posse, nisi se, urbemque suam, plane perditum ire velint. Itaque ab iis nihil nobis metuendum; quanquam sanè etiam aliàs portum obstruere, navibus quibusdam immerfis, regi nostro facile esset: qui id item ipsis comminatus fuit. Habet porro etiam Suecus sedecim armatorum millia, in ipsis finibus, prope urbem Gottenburgum; quæ Rex noster suis navibus trajecturus in adversam Cimbriam dicitur. Cujus incolæ adeo in Re-

gem sunt affecti, ut, si alibi impressionem aliquam faciat, statim omnes arma sua sint juncturi; idque nobis certò nuntiant, qui huc veniunt. Idem animorum affectus in Holsatia est: ita ut non dubitemus, quin, benignitate Dei adjuvante, brevi ingentem aliquam mutationem istic habituri sumus. Et prodigia præcessere, hosti, ut speramus, tristia. In Holsatia, in Bredenbergenfi arce sanguis quodam areæ loco copiosius emanavit; nec restingui à Præfecto, quanquam injecta arena, potuit. Hadersleviæ item in arce, equi in stabulo consistentes, reperti sudore defluentes, ac spumantes. Et in adjacente Cimbria, in Urbe Ripensi, in Præfecti ejus mensâ, orbes sanguine maduerunt, ac remissi, ut purgarentur, & relati ac vix appositi, iterum tantundem sanguinis, omnibus convivis illud adspectantibus & horrentibus, habuerunt. Et hæc certo evenerunt; ac referri, tanquam vera, abs te possunt. Illud quoque memoratur, & pro vero affirmatur: ad Oldburgum, itidem Cimbriæ nostræ urbem, Præfectum ejus aliquando, cum ad ambulationem prodisset, puerum in via nudum, humi positum, invenisse; quem cum tollere statim pueros præcepisset, neque id illi, quanquam post conatum multum, potuissent, tum locutum ac dixisse; quam nunc, quanquam summis viribus id annisi, puerum se humo tollere nullo modo valuissent, ita quoque Daniam sibi subjugare plane impossibile fore. Faxit id benignus ac misericors Deus, & infestam à nobis manum tandem avertat. In Scaniâ, in aere visum acre prælium navale; & tonitrua tormentorum explosorum in terra audita à spectantibus, qui scintillas quoque ignis decedentes conspexere. Et profecto, quin æstate imminente, aliquo navali, nam id solum posthæc restat, decertare debeamus, nullo modo dubitamus. Sed in Deo & iis armis, quæ hic nobis est largitus, spem repositam habemus. Instruit Rex noster classem octoginta amplius navium bellicarum, ac triremium; ad hæc Suecus, quatuordecim suas addet; idem Angli, Batavique, ut speramus, sunt facturi; sed imprimis, ut precamur, & confidimus, hosti se opponet Deus: ac nunc ejus quoque peccata respicere incipiet. In hoc voto & fiducia, finem epistolæ, quam hic satis longam habes, ad silentii antea acti justam compensationem, faciendum mihi existimo. Deum oro, ut misereatur nostri, & optatam pacem reddat: ac te mihi, longe amicissimum Caput, diutissimè conservet, cum

cum Uxore, Liberisque. Vale, ac salve,
à me, ac meâ.

*Soræ, ad diem VI.
Aprilis Juliani,
c1510c xxviii.
Raptim.*

Tuus prisca fide,

Johan. Meurfius.

Si quid edidisti, potes hac occasione ad me mittere; idem Heinsum nostrum rogo, ad quem ante paucos menses literas prolixas dedi. Nunc salutem prolixissimam illi nuntio; & ut aliquid rescribat, as suas quoque lucubrationes mittat, quando commoda est occasio, etiam atque etiam rogo. Saluto ex animo omnes veteres Collegas, quotquot sunt; nullo excepto. Amo omnes, ut solebam: etiam magis, ut solemus in absentia. Quod si Deus pacem reddat, & securum iter præstet, cum uxore, liberisque, dum ætatis vigor finit, ad vos excurram, ut semel adhuc chara capita coram complectar. O si votum hoc mihi repræsentet Deus! & repræsentabit, spero, ac confido. Iterum vale, amice. Vorstius, ut video, planè nostri obliviscitur; non hoc merebatur noster in ipsum & defunctum Patrem, amor: neque ab eo expectaveram. Tertium, Vale.

XCVI.

S. P. D.

Clarissime ac Reverende D. Magister Voss,

PRæterito die Sabbathi scripsit ad me cognatus meus Isaac Lydius, te repetere Martyrologion Baronii. Profecto nesciebam tuum esse, & tardè oberans ovis septa repetiisset, nisi te monitorem habuisset; putabam me permutatione justum possessorem; credo tamen tuis verbis, nec ullius volo injustus esse hæres. Deus operi tuo in refutando Baronio benedicat, & faxit ne magno te oceano committens naufragii periculum incurras. Voluntarium mihi exilium Leydense indixi, ne ganeo deceptus frigeat focus meus. In tertio hoc matrimonio quod ante quinquennium subivi, terna prole, ex filia Angla pauperula honestissima ditatus sum. Hinc fit ut jam emere quæ luberent non possim. Vidi apud fratrem meum nuper plurima à te edita de Historia Latina & Græca; utinam emere liceret; sed jam in re tenui sum & quos commo-

dato habere non possum, iis cogor invitus carere. Rogo ne me (pauperem licet) fastidias, sed datâ occasione invisas. Amicorum omnia erunt communia. Ego in conscribendo Martyrologio Belgico versor. Baronium tibi remitto & rogo ut nos visas.

— *habitarunt Dî quoque casas.*

Si neglexeris ego tibi dicam, nec eris qui mihi nunc es & manebis amicus intimus.

*Raptim Vetera-
quino xii. Julii
Anno 1628.*

Tuus quem à Pueris

nōsti tibi amicum,

Joannes Lydius.

XCVII.

V. Ornatissimo J. Gerardo Vossio
J. Seldenus S. P. D.

Vir Amplissime,

Annus est quod ad me opus tuum de Latinis Historicis egregium sanè & eruditione refertissimum mittere dignatus es; munus gratissimum, sive Autorem (quem suspicio) sive rem ipsam spectem. A tanto viro salutari & dignum ad quem ejusmodi munus daretur existimari, mihi permagnum erat. Gratias tibi quas possum maximas ago, & citius egissem nisi cum literis marmora simul Arundelliana, quæ sub prælo calebant, cum tuas acciperem, mittere ad te destinâssem, nec prius rescribere quàm ea, quæ compensationis aliquam figuram induerent, absolventur. Editionem, quamplurima intervenerunt; quæ ita impedire, ut superioris ætatis initium minimè anteverteret. Exemplar ad te ante mensem dedi, sarcinulis V. Cl. Joannis de Laet cum aliis in Batavianis exemplaribus, commissum. Spero te antehac accepisse. Literas tuas adjicere nequibam, neq; citius in Bataviam scribere. Veniam mihi non negabit humanitas tua. Vale, Vir Eximie, & me inter eos, obsecro, fidenter numeres qui admirandam tuam doctrinam summopere amant & colunt.

*Londini Cal. Sept.
M DC XXVIII.*

XCVIII.

XCVIII.

Gulielmus Londinensis G. J. Vossio.

Binas literas tuas accepi, utraque post fata Illustrissimi Ducis Buckinghamia. Utraque tamen de illo silent. Priores putavi ideo tacuisse quia ad aures tuas tam cruenta mors non pervenisset. Sed prorsus obstupui quum secundas attulit filius etiam elingues. Quid est? Num fama defuit esse velox? Num mare non ita spatiosum, inter nos vosque tardius prætervolat? Num cruor, crudeli, infernali dextrâ effusus, & viscus famæ pennas impedit? Imò accelerat sanguis, clamatur eundo. Aliud proculdubio est, prorsus aliud, quod de re tam barbara, de persona tam illustri, de fato tam subito, eligis tacere. Nolo plura, ne iterum cordis mei fontes rumpant repagula, & effundant spiritus. Mortuus est, cui ego, tuque multum debuimus.

Priores literæ tuæ nimium mihi ascribunt. Nec enim is sum cui aut illa debentur elogia, aut cui tu tantum debes. Ducis memoriæ non minus quam nomini agnosce te debere, & sufficit. De Musis à quibus incipis, sunt certè ante omnia dulces, sed de Dominabus & Musis ipsis intelligi volo, de ancillis non item. Illæ enim sunt quæ Absinthium miscent, utpote non naturales Musarum pedissequæ. Ipsæ enim optant, eligunt alias: vi, & infelicitate temporum nunquam satis deplorandâ, hæc obtruduntur illis.

Posterioribus literæ post immeritissimas laudes descendunt in charissimum pignus tuum, filium natu maximum. Quod expectavi, secundum fecit non optio mea, ubi omnes pariter ignoti; sed in memoria erat quod amicus tuus D. Dudleyus Carltonus insinuavit. Quum aliud tibi consilium visum sit, primogenitum æquè mihi charum advenisse scito, etiam non adhibitis rationibus illis, quæ tamen ipsæ per se abundè sunt ad suadendum.

Unum est de quo quid dicam adhuc nescio. Scribis filium tuum præter progressus in Mathesi, & Scientiâ Naturali, animum tandem appulisse ad Juris Scientiam, & in ea Baccalaurei gradum consecutum esse. Timeo ne hoc ei impedimento esse possit, quominus eo optetur in alicujus Collegii societatem, si forte per statuta id exigatur, ut non Graduatús sit tempore admissionis; spero tamen hoc

nón esse omnibus Collegiis commune. Ego (quod potui) statim scripsi, & spero proximâ septimanâ tale responsum me accepturum, ut filius tuus Academia Cantabrigiensi gratissimus hospes sit futurus, quod postea facile poteris & à me, & à filio audire. Si nactus aliquando fuerit Societatem, necesse est ut Academia, Collegiique Statutis obtemperet, & ad gradus ultteriores tardius quàm pro meritis promoveatur, si mores loci jubeant. De sumptibus abundè est quod promittis, nec minimæ mihi curæ erit, quam primum possum de iis minuendis cogitare.

Mitto tibi Theses tuas Oxonii excusas, à quarum editione utinam abstinuissent Oxonienses mei, sic vota tua meis consona sunt. Quâ fide, quâ diligentia publicas fecerint, ipse ex hoc exemplari judicare poteris, sed amore audeo dicere, fecerunt quodcunque factum. Tu tamen quod polliceris facito. Prodeat Editio tua. Et ut scias me legisse aliqua (omnia enim nondum otium erat) velim præcipuè ea quæ à te juniore prodierunt, oculo haud nimis facili ipse jam perlegas, emendatque si fortè aliquid occurrat, quod te iudice, à veneranda, sanâque simul antiquitate deviet. Quod mihi leviter percurrenti factum videtur in Capite de Baptismo Johannis. Neque enim Patres me docuere undique idem fuisse cum Christi Baptismate. Boni consule libertatem hominis amicissimi. Et quid si aliquantulum differas editionem illam à te destinatam, donec ipse, nunc multò maturior, dicas: Eat liber hic priscissimæ Antiquitatis æmulus.

Consilium tuum de Baptismo, unâ cum Historia Rituum antiquorum valdè probo. Oro tamen ne omittas quod de Baronio scripsisti. Unum cave. Vides iterum libertatem meam. Nam libros quinque de antiquis Baptismi Ritibus, Cæremoniisque scripsit Josephus Vicecomes. Quod quum te latere non possit, curabis scio, ut superior sis in illo argumento. Velim enim nihil sub nomine tuo prodeat, nisi Vossio meo dignissimum, & par Historiæ Pelagianæ.

Redeo ad infandos dolores, quibus intime premor ob Ducis Illustrissimi cædem, omni sæculo dolendam. Parricida ille scelestissimus, Gentis & Religionis dedecus, eripuit non mihi tantum, sed & tibi charissimum caput, & (non obstantibus iis quibus eum denigravit hominum quorundam malicia) utrisque & animi & corporis dotibus ditissimum. Cælum non dubito

bito petiit ille: Terrarum incolæ, quos Astra reliquit, nos adhuc sumus. Damna exinde tua cogita, mea infinita sunt. Pecuniam statuit tibi mittere statim à reditu: periit cum illo illa. Decrevit certo certius omnia in usum filii tui paratissima habere. Non dico periisse hoc, sed quod ego possum multò minus est. Diploma Canonicatus tui in Ecclesia Cantuariensi ille à Rege serenissimo impetravit, munivissetque contra quoscumque impugnatores. Ego & hic tibi non deero, nisi potestas mihi defuerit.

Nunc accipe stigmata anni hujus, mihi inauspicatissimi. Ineunte Anno (quod nosti) Tendonem fregi, & adhuc incedo claudus. Successit Concio ineunte Parlamento mihi tum admodum infirmo à Rege imposita, opus, (prout res nostræ se tum habuere) periculosum simul & difficile. Postea Dux Buckinghamiæ mihi charissimus, nescio quo fato, & cum illo ipse haud planè amico usi sumus conventu illo. Finito eo, ille miserrimè est non sine Diabolo occisus. Post multa suspiria (nam verè & sine teste dolui) morbum contraxi acre, à quo vixdum convalui. Servi quatuor variis morbis lassati, quintus à Pleuritide cæsus. Et nescio quid minatur portio anni infausti futura. Sed Deus est cui servio, qui tecum sit gratia speciali, & cum tuis: prout precatur.

Tui Amantissimus,

Guil. Londinensis.

Octob. 25. 1628.

XCIX.

Clarissime Vir,

BInas à te accepi Literas: Alteras Cantuariæ, & alteras Lugduni datas, easque utraq; æquè gratas, quod de felici tui itineris & progressu & fine nos reddidère certiores. Neq; opus habemus ullâ tuæ scriptiōis excusatione, quibus inter innumera quoque negotia Literas tuas legendi nullum unquam deerit otium: Quin potius gratias tibi habemus, atque ad scribendum ultrò sæpius provocaremus; nisi tibi jam pridem constare debebat, eò nobis tuas fore gratiores quòd fient frequentiores. Ista de causâ si quos ex nostratibus ad vos intelligemus transitos, eos nostris committari, & tuæ humanitati commendare haud sumus prætermitturi. Imprimis autem quem jam nunc vobiscum

commorari ipse significasti, tibi satis censuimus commendatum, si, ut est, nostrum asseruerimus Agnatum, Comitis Westmerlandiæ filium.

Est & aliud, in quo tuam expeto operam; Misit ad me, quo de Principe Auriaco ob captam Ducis Sylvam orbi congratulatur, suum carmen D. Casparus Barlaeus; quem, gratissimum quidem istud mihi fuisse, certiore velim reddas, viderique, quod ex omni parte foret perfectum, nisi unicus inesse videretur defectus. Dum enim plurima eaque admiranda rerum operumque illius obsidionis eleganter & apprimè describit Spectacula, mirum, Poetam tam ociosè præterisse Reginam Bohemiæ & Principem Auriacam. Sunt & alii viri digni, quorum hic Honoris causâ memini, mei amici, Domini Polyander, Rivetus, Festus, Heinius & alii quos nosti nostri amantes, quos meo nomine salvere jubeas rogo. Vale, Vir clarissime.

*Dab. Newmarket ipssis
Kalendis Martii Anno
Salutis MDCXXIX.
Stylo Angliæ.*

Tui Studiosus,

Dorchester.

C.

*Clarissimo Doctissimoque Viro Gerardo
Joanni Vossio, Affini Conjunctissimo,
S. P.*

ET tui cultus, & mei officii gratiâ, quælibet ad scribendum amplectenda est occasio: tantum abest, ut eam præterire debuerim, quam filii tui adventus ingessit. Commodum hic Londinii eram, quum Joannes noster, inopinato ad nos cum uberrimis tuis literis advolans, tantâ lætitiâ pectus meum explevit, ut solidi hujus gaudii tacitus quidam sensus, etiam nunc memorem animum pertentare non desinat. Effusissimos illos amplexus, quibus advenientem toto pectore gratulabundus adstrinxi, rursus mihi ante oculos, cogitationes reponunt, & spem utique affirmant, tui tandem aliquando hic videnti: summi certè homines, & quibus largæ benefaciendi materia, in manu est, tam prono in filium tuum favore, te demereri student. Tu quoque beneficia, in te, tuosque congesta, tam grætè interpretari soles; ut minimè dubium habeam, quin tibi sit in optatis, videre regnum sub Re-

gum

gum indulgentissimo florentissimo, atque in eo viros tui amantissimos, & humanitatem haud tralatitiam tuis plenissime exhibentes. Altissime animo meo infedit hæc persuasio; imo jam nunc voto, & cogitatione, præsumo diem illum lætum, signandumque mihi candidissimo calculo, cum cervices tuas invadere, atque artissimis complexibus alligare dabitur. Interpellandam video dulcedinem blandæ spei,

— nimis obstat Rhamnusia votis.

Quamobrem etiam vanis figurationibus, animi desiderio, ægri, atque æstuantis, valere iussis, hoc tantum spondeo, me in omnibus rebus, satis nostræ conjunctioni, amorique facturum; præsertim cum nihil rerum omnium, à te mandari mihi, aut majus, aut gratius, nihil etiam à me suscipi honestius possit, quam ut pro viribus, Johanni nostro commodem, Adolescenti singulari, nec iis tantum, quos sanguine attingit, inter propinquos amando. Ego certè tibi (repetam enim) profiteor, atque polliceor, eximium, & singulare meum studium, in omni genere officii; nec unquam dissimilem scriptis talibus dies arguerit, Divinum modò Numen faciat mecum, atque optata secundet. Quamvis autem longiores Epistolas flagites, & in nostra culpa tibi ignoscere sis paratus, in animum tamen inducere non possum, ut sim prolixior; cum occupationibus tuis, publico bono parcendum sciam. Vale, & amantissimum tui redama.

Londini in ædibus
Arundelianis, Pridiè
Kalend. Mart. Anno
M DC XXIX.

Tuus omni officio,

F. F. F. Junius.

CI.

*Celeberrimo viro, Domino Gerardo
Joanni Vossio, Historiarum Profes-
sori dignissimo, S. P.*

JAM diu ad te, scripturio, mi Vossi, re-
dux in Patriam te salutaturus; sed
præ occupationibus quibusdam hætenus
non licuit. Nunc tantò fufius, calidius-
que. Literas ad te misi non unas, nuper
è Suecia. Insuper quoque exemplar Cen-
turiz meæ Epistolicae, ut & orationis Six-
tini Amama mihi inscriptæ. Quorum
quid acceperis, scire desidero. Ego vero,
quid comminiscar, nescio. Nam si fuisses
nactus, nequaquam dubito, quin saltè,

vel verbulo, me certiore reddidisses. Te
autem nihil planè accepisse, vix mihi
persuaferim. Quippe ea cuidam ex ami-
cis, ad te rectè transferenda tradidi: Qui
si minus officio suo functus fuerit, est
cur hominem redarguam, atque culpem.
Si verò acceperis, nec tamen integrum
tibi fuerit hætenus rescribere, nunc quæ-
so, rescribe tandem. Non ullæ nunc lo-
corum distantia, ut nuper, nos invicem
dividunt, quominus reciproco literarum
commercio, gliscat indies, magis magis-
que, fœdus amicitia contracta quondam.
Rogo itaque te, mi Vossi, ut quam nuper
mihi ultro derulisti amicitiam, eam nunc
porrò rogatus, ulque fovere ne grave-
ris. Ardeo enim, & tecum, mi Heros,
non intermorituram contrahere familia-
ritatem, si placet, ut cum Heinio con-
traxi meo, & sexcentis aliis. Nec ægrè
tu quidem mihi, adstipulabere, si modò
rectè candidum tuum perspectum habeo
ingenium, quo nihil proclivius ad bene
merendum, de melioribus ingeniis; fiat
itaque animi, & adfectus, in me tui nova-
tio, quæ totus tandem obsequio, studiisque
tuis manciper. Ego mea parte allaboro,
neu unquam, te hujus initæ mecum
amicitiæ pœniteat. Quod fugitivo tem-
pori committo ventilandum. Tu saltem
me suscipe, & ama. Parturio nunc quæ-
dam Theologica, & à professione mea
aliena. Polyander noster hic judex esto.
Sed non vulgabuntur, cum bono Deo,
quin tibi visa. Ubi tres contecero par-
tes, stat ad vos advolare. Tum tecum
de omnibus quam fufissimè. Si Diony-
sius tuus, ingens illud sæculi miraculum fu-
turum, adhuc in vivis est, dignaberis eum,
meo nomine, quam cumulatissimè salu-
tare. Si nunc otium esset, equidem si-
mul, & illi scriberem: sed vice proximâ.
Jacobus Dickius te plurimum salvere ius-
sit. Omnia in Suecia adhuc integra. Rex
domi est, sed restaurandis viribus occu-
patus. Merito bellum ille puteo compa-
ravit. Videmus namque passim, Princi-
pes, Dominosque Terrarum, multo dif-
ficilius finire, quàm inire bella. Novi hic
nihil, quod non & vobis jam proculdubio
perspectum. Ultimò quodnam edideris
monumentum, velim eadem mihi operâ
significes. Non addo plura. Tu ignosce
calori nostro, & responde. Vale, mi
Vossi Clarissime, & me ama.

Hagæ Comitum xii.
Mart. clc lcc xxix.

Tuæ Dom. studiosiss.

Johan. Cabeliavius.
CIL

CII.

Amicorum Opt. Max:

QUanquam nihil magnopere haberem, quod in præsens ipse scribere, aut tu scire etiam cuperes, tamen bonam occasionem non putavi negligendam; ac vel saltem hoc testandum, vivere nos ac valere, per benigni Dei gratiam: ac de vobis eadem item sperare. De re publica hujus regni, nihil habeo; nisi quod legati utriusque partis sedulo de pace agant, quam speramus brevi nos, volente Deo, habituros: Siquidem conditiones quas initio iniquissimas adversarii proponebant, cum viderent planè à nostris magno animo recusari, omiserunt; aliasque magis gratas, obtulerunt. Videbimus quid bonus Deus, quem quotidie precamur, & in quo fiduciam nostram collocamus, nobis mox sit concessurus. De studiis meis, istud habeo, ut me videas, etiam si à Typographo destitutum, non ignavia tamen ideo mancipatum desedisse. Paratos itaq; habeo, *Historia Danica Libros III.* quorum prior res Christiani I. alter Johannis, ejus filii; tertius verò, Nepotis Christiani II. comprehendit. Est & Solon, sive de ejus Vita, Legibusque, liber singularis. *Denarius Pythagoricus*; sive de numerorum usque ad denarium, qualitate ac nominibus, ex Pythagoræ Doctrina; liber singularis. *Gorgiae* Leontini, Antisthenis, & Alcidaman-tis, Orationes, quæ supersunt; & de eorum Vita, atque scriptis, liber singularis. *Regnum Atticum*; sive de Regibus Atticæ, libri III ac seorsim *Theſeus*, sive de ejus Vita, ac rebus gestis, liber singularis. Et nunc *Bibliothecam Græcam*, tanto tempore intermissam; Opus sanè operosum, arduumq; seriò urgeo. Habes mea; nunc tu tua mihi redde; tum de Statu Academiæ, publicoq; item patriæ; cui, quanquam minus bene de me meritæ, tamen fausta omnia precor. Vale, & salve ex animo, à me meaque, cum tuâ, omnibusque tuis. Guilielmus Noomſius tuus, quid agit, & ubi agit? Amo certè illum juvenem, ac virtutem ac doctrinam, vera via magno impetu contendentem, cum Lugduni vestra agerem. An non etiam perseverat? Spero, & opto. Si etiamnum in tuis ædibus commoratur, salutem, quæso, meis verbis plurimam dicito. Ad D^{num} Heinſium scripsi ante paucos menses; quare, fodes,

an acceperit: ac salutem item dicito. Iterum vale.

Rapſim, Soræ, ad
diem xii. Aprilis,
c15 156 xxix.

Tuus,

Johannes Meurſius.

CIII.

Guilielmus *Londinensis* Ger. Johan.
Voſſio ſuo.

QUod tam serò ad aures tuas pervenerat Stygium facinus, & fatum Ducis illustriſſimi, haud dubito, miror magis. Sed oculos tunc temporis portus nostros fuisset seriùs ipse reminiscor; & dolor sic amissi Ducis, necnon mutata, aut saltem mutanda (ut sperabatur) rerum facies, quæ in fragili memoria scripta erant facile deleverunt. Quod restat nunc sola patientia est, ut ferendo leviora fiant, quæ nec ferre didicit ingenuitas nec discutere facultas erat. Quiescit in pace anima, quæ terræ indignissimæ, ipsa cælo dignissima. Clarescet spero post sæculi invidiam virtus, quam deprimere non potuit rabies plusquam Scythica, denigrare tantum potuit lingua rabida. Tu age, quod spondes, & (quo solo modo gratus esse potes) nomen Ducis in se clarum, posteris clarius tradere, ne totus uno ictu infernali perisse videatur.

De filio tuo quod scribam nihil aut parum habeo. Antea significavi quam inopportunus adventus fuit. Omnia tamen, prout tum fieri potuit, molitus sum, quo nihil ei moræ esse possit, aut scrupulum injiceret, se in gentem incultam advenisse, aut in amicos dubios incidisse. Cantabrigiæ jam est, in Collegio S. Petri, & Doctori Wrenno curæ: Quæ restant, suo tempore præstabo, si potero. Et scio Wrennum, nunc Vicecancellarium Cantabrigienſem esse & filii tui amicum, & nominis tui cultorem.

Gaudeo te Theſium tuarum syllogen accepisse, & Academiam Oxoniensem, quoniam edere voluit, non penitus inemendatè edidisse. Sed de Theſibus aliquibus omittendis, nempe quia in opere *Historia Pelagianæ*, & quidem emendatus legantur, sicut consilium eorum non fuit, ita nec tuum norunt. Nec sub quocunque prætextu, hoc illis opinor licuisset.

K

De

De Baptismo Joh. mihi abundè est quod scribis. Et utinam licuisset ubique, aut quia illud non sperandum, utinam alicubi licuisset, aptè sententiam vetustatis exponere, sapiat illa hominibus, five non sapiat. Sed in illa tempora mihi certè incidisse videtur Christiana philosophia, ut de ea nec loqui, nec tacere quis tutò possit. Et quàm carè libertatem illam, quàm in alia causa, non sine summo Ecclesiæ bono, usus es, redemeris facile conjicio. Tanti tamen tibi constituisse nunc in novissimis literis primò legi. Adjicerem hic alia, sed est quod prohibet.

De Josepho Vicecomitè admonui tantum, & per amorem. Et magnà me lætitià afficit, te ita vestigia ejus premere, ut simul antecedas. Nec dolori tibi sit, labores si fortè tui spissius (ut loqueris) prodeant. Negotia publica, privata, uxor, filii, amici, aliquam tui partem vendicant, eà lege natus es, sed utinam de tua uxorisq; valetudine latiora propediem audiam, & diu vivas ad Batavorum tuorum gloriam, & Reipub. Christianæ emolumentum. Mihi tendo ferè coaluit, ita tamen ut pristinae sanitatis sit spes perexigua. Deo interrim quotidianas ago gratias, quod vel sic uti crure liceat. Literis meis per omnia responsum dedisti, præterquam quod de Baronio nihil. Nolo sic prætermittere quod summum est; tu id age, ne quid aliud impediatur animadversiones illas. Ecce rogator importunus accedo, id age ut sic tandem Ecclesiæ non desit Historia sua, neve accedat quæ sua non est: si hoc velis, & breviter, potes enim, facer mihi eris Apollo. Vale.

Tuus,

Maii 10. 1629.

Guil. London.

CIV.

Clarissime, Doctissimèq; D. Vossi,

Nesciebam profecto, quo pacto nomen meum ad te jampridem perveniret. Ita autem pervenisse, ut egregios illos de Historicis Latinis libros (magnum existimationis tuæ, affectusq; argumentum) dono acciperem, non poteram satis mirari. Quanti verò facere donum illud, & quàm vehementer de viri optimi amicitia gratularer, per literas non multò post datas quidem D. J. Borro è familia Burlemaëtiana abunde significavi. Conjunctæ erant cum illis literis & aliæ à D. D. Bealo, atq;

à fratre meo, nonnullæ etiam ad C. V. D. Georgium Dubletium. Periere autem (quantum nuper ex filio tuo intellexi) illæ literæ; sed non periere, neq; peribunt unquam, quas debeo gratiæ. Certè nec vota, quæ in illis literis nuncuparæ, perire. Optabam scilicet aliquando fore, ut quia temetipso hic frui non poteramus, è filiis tuis aliquis huc in Academiam nostram transmitteretur in quo exprimere possem aliquam partem Officiorum, quibus parentem meritò, atq; ex animo prosequor. Atque hujus me voti compotem jam cum fecerit Deus, haud erit opus, ut in aliquas preces descendas, quibus ad amorem (quantum in me est) opemve ipsi præstandum animum meum excites. Multum quidem lætabor, siquid illi prodesse potero, omnesq; sedulo occasiones prensabo, ut rebus ipsius studiisque usui sim. Impresentiarum verò ille quid agat, atque ubi sit, & quam gravem subito *epidemiæ* contraxerit, narraturum opinor, qui istas defert. Illud mihi curæ est, primum ut convalescat, dein ut Sociis Collegii Jesu talem se locum exhibeat, qualem illis, non dico à me, sed à Reverendissimis Episcopis Londinenfi atq; Eliensi, vel rectius, ab Augustissimo Rege, commendari par erat. Spero autem eum assiduam (*suæ diæ*) daturum operam, ut id agat, utque Clementiæ Regiæ, & Episcoporum adfectui, ut nostris omnium votis pro virili respondeat. Quod ut pergat anniti, tuum præcipue erit, pro parentis imperio, crebris subinde literis juvenem commonefacere.

Nolo te, vir summe, pluribus jam distingere, gnarus quàm multiplices tuæ occupationes sint, & meæ literæ quàm impolitæ. Sed tu scio ex fide animoq; amicum æstimabis, non ex currente calamo. Salutabis igitur ex me D. Dubletium impensissimè, atque valebis, ex assiduo voto

E Collegio S. Petri
Cantab. die dormi-
tionis B. V. Mæ
Georgii.
clō 10 c xxix.

Meritorum tuorum

verè cultoris,

Matthæi Whren.

CV.

Andræ Colvii Epistola ad G. Vossium,
ex Anglia perscripta.

Vir Clarissime,

SI peccati confessio apud te culpam vel minuit, vel eluit, libens confiteor nul-
lum

lum me patrociniū diuturno meo silentio posse prætexere: sin minus, spero eam apud te mei esse opinionem, ut tarditatem scribendi potius insitā mihi negligentia imputes, quā aut tui, aut debiti muneris mei oblivioni. Si enim toties, quoties innumera beneficiorum tuorum recordatio & officium meum me admonent, scriberem: vereor ne & tu infelix, cui cum garula mea loquacitate conflictandum esset, & ego impudens, maioribus occupato incomptis meis verbis cerebrum excutens, jure dici possem. Nunc tamen, cum & non inutilia scribere me posse existimarem, & tutius per me quā per alium quemvis cogniturum considerem: putavi me non abs re facturum, si sumptā fiducia te compellendi ea transcriberem quæ nosse, meo judicio tua interest. Ex quo in Angliam veni, multa vidi & audiui de quibus præstat tacere quā judicare. Postquam Cantabrigiam appuli, multa occurrerunt de quibus impunē loqui licet; sed judicare non est meum. Id saltem dicere ausim;

— *minuit præsentia famam.* Collegia enim ista Anglicana nostratibus tantopere memorata, sunt quidem (neq, enim ego illis quidquam detractum eo) bono consilio instituta; sed, ut omnia in pejus probabuntur, videntur mihi jam gradus doctrinæ vel honoris magis attribui tempori quā eruditioni: quæ, nisi favore majorum subnixæ sit, tam hic quā alibi jacet. Præcipuē si reperiatur in extero, quem Angli transeuntem amant, remanentem oderunt, utpote metuentes ne aliquando, magnatis alicujus benevolentia suffultus, beneficii illorum incubet. Et meo judicio quicumq, exterus, citra magnam invidiam sibi pollicetur hic promotionem aliquam, longē fallitur; cum omnes etiam privatum limis oculis intueantur: & nisi instar Protei in omnes formas se mutare possit, non est quod cujusquam amicitiam expectet. Sunt tamen hic quidam quos non minūs humanitas quam eruditio ornat: inter quos familiam ducunt Wrennus, hoc tempore Academiæ Procancellarius, & Collegii Petrini Præfectus: Belus aulæ Pembrochianæ idem Præfectus: Criten Academiæ Orator, & Græcæ Linguae Professor, vir, si quisquam alius, eruditus, & à quo noster Aristarchus Nonni singulis ferē lectionibus vapulat. Sed nescio quo fato, ut & apud nos ita hic quoq, præclarissima ingenia maximo odio flagrant, idque ea de causa, quod partes in patria nostra inferiores amare & fovere dicuntur. Sicut & Episcopus Londinensis, eadem de causa, non minus

exosus est omnibus; sed ille, qui animum non minus habet Politicum quā Religiosum, ipsemet Parlamento obtulit quasdam constitutiones adversus Arminianos: quid de illis futurum sit, proxima Parlamenti continuatio dijudicabit. Neque tamen hoc modo effugit suspensionem; & sunt qui proximo Parlamento, ruinam illius (absit omen) sperare audent. Sed spero ipsū auctoritate Regis, apud quem plurimū potest, faciliē illorum si non invidiam, at machinationes evasurum. Rex enim diffidulter quidquam concedet populo, cum populus in gratiam Regis vix teruncium conferre velit. Atque hanc quidem suspicantur fore causam, ut cum quibuscumque Principibus (quemadmodum hic increbuit de Hispano) quales quales condiciones pacis ineat, ne subditis suis cogatur amplius esse subditus. Vidi hic recusas theses tuas, in oppido, credo, Utopiensis; sed Bibliopola mihi dixit, procurante Episcopo Londinensi excusas esse Oxonii, quare nomen civitatis immutaret, tibi forsitan, magis quā mihi cognitum. Si tamen mihi conicere licet, credo ob nomen tuum, hic in Anglia suspectum, & Arminiani titulo insignitum, civitatem mutatam esse; & quod magis est adfui hic quibusdam, qui tuum cum Vorstii nomine confunderent, & mirari se dicerent tantum hæreticum tanto apud nos in loco esse. Atque hæc hætenus: quæ quidem scripta sunt liberiori judicio quā decet ætatem meam, & majori libertate quam convenit regno, ubi accusationibus & adulationibus omnia pervia sunt; sed ego homuncio ignoto nomine, in peregrina terra faciliē latebo inter tot homines quibus terra hæc abundat. Atque eò liberior scripsi, quia ad eum cujus autumabam interesse, & cui præter hoc pusillum etiam animam debeo, quam libens offeram, modo voluerit opera ejus uti, cum ingenuē profiteri cogar, ab ipso habere me eatenus excultam, quatenus est. Si quid sit, quod existimes per me tutius posse procurari, tantummodò literas ad sororem mittas, & comperies me in omnibus esse

*Cantab. iv. Idus
Decembris,
CLO I D C XXII.*

Tuum Usq,

& Mancipio.

Salutabis plurimū meo nomine lectissimam tuam conjugem unā cum tota familia.

CVI.

Salut. in Christo.

Vir Spectatissime,

QUum Literas meas novissimas dārem (& parcius hoc facere cogor pro negotiis quæ urgent & premunt fatiscentem) Literæ tuæ ad me pervenerunt. Sic situlæ nostræ mutuo fontem petiere, dum neuter quid alter ageret certior factus.

Literæ illæ jam antiquæ & adhuc præ manibus, sed sine Responsione, & quod sæpius impeditur volentem, idem est. Novas illæ Sextiles præ se ferunt, & hæc 12. Cal. Feb. nec tamen adhuc Responsio parata; Credideris forsitan me gelu quodam, etiam hac nimis temperata hyeme obriguissæ; hoc te metu ut liberem, ecce jam tandem te iterum saluto, tibi omnia exopto bona. Cum anno novo incipiat, recurraque in finem felicitas.

Prima Literarum tuarum facies gratulatur mihi Cancellarium Oxonii mei, & subridet. Gaudio sit illud tibi; Academiae salus; mihi fat scio onus incumbit, & cui nunquam par ero. Quin & his exulceratis Ecclesiæ temporibus, nec Ecclesiæ tantum (nam & sic solet punire Deus) nescio, ita me Deus amet, nescio, quid agendum sit, mihi præsertim. Sed aliquid est, quod urget, & ducentem sequor.

Illustrissimus Princeps noster, pro tenella illa ætate (Deo gratias) abunde valet. Et mihi quidem gratissimum est, quod lætitiæ illius, quam nos ex foelicissima ipsius Nativitate merito percipimus, te quoque consortem præbeas. Vivat ille valeatq; diu, seriùs tamen spero paternis succedet sceptris.

Alia sunt quæ properans cogor omittere. Sed mortem Matthiæ Martinii certè eo impensius doleo, quo magis indiget Ecclesia æquitate illa quæ in eo vixit, & quæ spero tamen non est penitus cum illo sepulta. Penitus dico. Vereor tamen ne rarior multo sit quam quæ deceret togam nostram. Historia illa unde profitebatur se eam hausisse, prolixè habet in se unde eam conferre possit, nisi Lectores habeat admodum iniquos. Iterum tibi eo nomine gratias ago. Nunc accinge (promissisti enim & non semel) ad historiam aliam; veteris nempe Ecclesiæ, scribendam. Magnopere cupio (Deo si placuerit) antequam fata mihi aperient sepulchrum, Baronium videre sub tuis telis cadentem. Nec literas

potes à me ullas expectare sine stimulo.

Et ecce quum manum Chartulæ huic eram appositurus, aliæ Literæ tuæ ad me perveniunt. Illustrissimus Legatus rediens, non redux sine te. De te certè nec pauca nec parva loquitur. Quin & gratias egi quod nomine meo te sibi cognitum charumq; habuit.

Ad negotium quod attinet. Academiae vestræ ita collapsam esse disciplinam non sine dolore audio. Sunt hæc certè semina omnium malorum, tum in Ecclesia, tum in civili statu, quod loca educationi juvenum, in Artibus simul & Religione, olim dicata, ita laxata sint in omne quod vel maximè dedecet juventutem Christianam. Ad cædes verò, easque frequenter ventum esse, quis ferat?

Consilium quod petis libentissime dārem, si (quod optas) præsens essem. Res certè magna & gravis; tibi honorifica & utilis futura: Amstelodamensibus forsitan non desiderata magis quam salutaris. Rationes quas proponis, primo intuitu firmæ videntur, & rotunda sine offensione quas novi ullæ. Hoc unicum serò considerandum, quid Ordines vestri de consilio hoc tuo senserint, & quibus fundamentis nixi. Nam si illis transitio hæc tua parum Reipublicæ vestræ utilis censetur, quis scit quid inde dispendii, quid periculi tibi possit accedere? Quod ex animo deprecor: Scio te cautum fore & prudentem; & spero Deum cui servis electionem tuam ita velle disponere in melius, ut illud in te assumas quod simul & licitum, & utile & honorificum sit. Quod semper erit in votis

Amici tui & rerum

12. Cal. Feb. 1630.

tuarum studiosissimi,

Guil. Lond.

CVII.

QUod labores meos nomini vestro inscriptos vellem, hoccine tanti (egregie vir) ut obstrictum te mihi credas? Sane hoc & si quid potuisssem majus, vestris in Rempublicam literariam meritis debebatur. Imo superbire magis videbantur vestro Patrocinio Chartæ nostræ, quam si Principem aut Magnatem aliquem ostentarent. Illum siquidem ego mihi colendum duxerim, illum ambiendum, quem vera nobilitas, virtus & eruditio supra vulgus homi-

hominum evehunt, non qui ob inanes titulos & honores merita superantes adorari se ab aliis velint. Adeo satis mihi abunde fuerat, quod coli à me virtutes tuas patere: at quòd aliquam mei rationem habere, quod amore me tuo dignari volueris, superabat hoc ferè votorum ambitionem. Tu verò neque hic gradum fiftis; parum hoc putas (quod tenuitati tamen meæ nimium) nisi & aliorum mihi amorem concilies. Illud autem quò artificio præstes, abunde expertus sum Literis à Cl. viro D. de Dieu acceptis, quibus affectum ergà me singularem luculentè admodum testatur. Cujus viri favorem quanti æstimaverim non sum exprimendo. Ille est certè cujus amicitia nullius aut prætulim aut æquaverim alterius, quam ejus qui illam mihi comparavit. Majus est equidem vestrum hoc in me beneficium quam ut rependi à me queat. Grate (quod unum possum) agnoscere & prædicare nunquam desinam

*Dum memor ipse mei, dum spiritus hos
reget artus.*

Vestrum interim erga me amorem, eadem quæ excitavit bonitas vestra, extingui iterum, uti spero, non patietur. Quæritis præstantissimi D. de Dieu satisfacturas spero Literas has nostras, quas uti illi tradendas cures, rogo. Pollicitus est D. Rouffius, ubi literas ab ampliss. D. Archiepiscopo Armachano (quas quotidie expectat) acceperit suas se ad te daturum. Salutem tibi plurimam dicit D. Harrifonus qui perquam humaniter me vestri causa tractavit. Salutat itidem Chillingworthius. Amant fanè te & colunt apud nos quamplurimi, eo & ipsi nomine à me plurimum amandi & colendi. Vale (clarissime vir) & quem erga me conceperis affectum, fovere pergas.

*Dat. Oxon. in CCC.
2 Martii, 1630.*

Dignitati vestræ

addictissimus,

Edwardus Pococke.

CVIII.

EGO verò, (Clarissime Vossi) quotidie multumque gratulor mihi istas amorum nostrorum confederationes. Sed & gratias nunc quoque ex animo rependo tibi, quòd tam benignos in modos tamque candide interpretari ames exiguum illud animos, meo plane impar, quod in

accessu ad nos tuo præstare potui, in meorum (ut tum res erant) occupationum tumultu. Illud credas obtestor, ex omni Cantabrigiensium tuorum numero, (tuos autem fecisti plurimos) neminem te habere, qui libentius fideliusve tecum coeat sacrum hoc fœdus amicitia. Sed & Coniux mea (quod nescire te nolo) non infrequentem facit tui mentionem, ut hominis (quantum ipsi ex aspectu gestuque recte augurari erat) probissimi suavissimique, & sapius mihi precatur aliquot assiduos sodales consimiles D. Vossii. Ex illo quidem tempore, quo nobiscum adfuisti, Academicam revilare vix dum est datum, sed Windesora per hyemem hanc continuò hæsi. Nunc reditum illuc cum universa familia (ὅν τὴν) meditor ante mensem, filium ibi tuum, in omni re suâ, quantum poterò, curaturus. Non desint iterea scio Literæ optimi parentis ad eum, quibus in hoc lubrico ætatis, ipsum Officii sui subinde commonefacias. Sed absens utcunque, non tamen sum passus frustra esse quas in Literis ad me tuis salutes perscripsi. Procancellarius noster, Collinus, Wardus, Bealus, Duncomus, Critonus feci ut intelligerent, quam memor ipsorum vivas; quod usque ut facias diuque, omnium est votum. De Episcopali verò dignitate quod inaudieras, meræ erant fabulæ. Abundè meo voto responder, quo me jamdudum in loco Deus Opt. Max. & benignissimus Rex collocarunt. Ardua illa atque in sublimi posita conscendant bonis avibus, qui meriti sunt. Vale, vir egregie colendissimeque & inter tuos perge numerare

Windesora, in An-
nuntiatione Domi-
nicâ, 1630.

Eternum tuum,

Matth. Wren.

CIX.

Vir Clarissime,

ET si nihil ferè haberem, quod in præfens ipse scriberem, aut te scire velle crederem, tamen Tabellarium tam certum nactus, non dimittere eum potui, sine literis, quanquam brevibus. Non irascor quidem tibi; (nam qui possim, adeo amico capiti, adeo à me amato?) verum doleo vehementer, quod biennio plane toto tuarum mihi literarum alloquio carendum fuerit. Affirmo enim, nullas sane accepisse, post illas quas ante biennium dabas

dabas Id. Maiis cIo Ioc xxviii. Ego tamen interim non defui amicitiae nostrae. Quae so quam uberrimis defectum supple: & fac sciam, de Academia, de Repub. quicquid novi. Vidi nuper Catalogum Bibliothecae Rutgersianae, plenissimae certe librorum quorumcunque optimorum: Scribo ad communem amicum Dominum Heinsum, heredem atque venditorem, ut existimo; uti mihi hanc gratiam faciat, eximatque auctioni quos subjunxi, ac mihi vendat. Nosti id fieri interdum. Itaque si forte se difficilem praebeat, nava mihi hic operam tuam, & impelle tua Suada, ut gratificari velit. Pretium, quod etiam ipse iudicabit, ab affine meo, Ministro Wassenaariensi, statim accipiet. Nam ad eum etiam hac de re scribo. Possem expectare tempus auctionis, sed quandoquidem hominem nunc certum habeam, per quem tuto deferantur, occasione utendum puto, quae non alias facile se exhibitura est. Qua de causâ etiam te atque etiam rogo, ne deesse hic mihi velis. Scripsi bis ad Elzevirium de quibusdam lucubrationibus meis, quarum editionem urget maxime Illusterrimus Molinus; sed responsum nullum accipio; mone hominem, ne contemnat veterem amicum; &, si commodum ipsi non sit, quicquam edere, saltem verbo id significet, neque ultra expectatione torqueat. Tunc habeo quod respondeam Molino; communi Mœcenati nostro: cui alias excusare me non possum. Nam is vehementer flagitat. Cum hæc scripsissem, tuæ mihi exoptatissimæ per Stephanium afferuntur; quas profecto, ut accepi, exosculabar. In ipso initio, dolorem incussit casus filii tui maximi, quem plus minus mense scribis oculis fuisse captum; sed Deo gratia, qui restituit; quanquam id ex literis tuis magis conjectura capio, quam intelligo: nam non differtê dicis. Quod Britannicum sibi iter tantopere placuerit, tum quod viros illic plurimos quoque offenderis, qui te solide amarent, tibi gratulor, mihiq; gaudeo. Libens quoque intellexi, de Critonii Petrarque in me tam benigno animo. Si fortasse aliquando literas ad utrumque dabis, officia illis mea defer, mutuūque amorem nuntia. Gratulor autem imprimis de Canonicatu illo, quo donavit Rex Britanniae Serenissimus: sed nil scribis, quam ob causam, quâ occasione dederit. Fac ut sciam ex proximis tuis, quas praesentium latori ut committas, in maiorem modum rogo. Nam cum certa mittendarum literarum occasio non se semper offerat,

quotiescunq; ea datur, amplectendam esse cenleo. Amicus quidam ad me scribit, librum quendam Regi abs te dedicatum, ideoque istud tibi honorarium decrevisse. Sed tu nihil tale indicas. Merito hunc Regem docti omnibus praconiis maectent, qui ab illo in hunc modum aestimantur. Sine dubio dolent oculi animusque isti * nostro; qui

* Dan. Heinso,
opinor.

invidere & obrectare nunquam desinit, apud suos. Sed alat ille perpetuum tormentum suum; nos illi non invidemus. Scripsit ad me tributum sibi nil tale expectanti (quod credat Judæus apella) munus Historici & stipendium Scaligeri *fr̃ uangelis*: nempe Florenos bis mille, & quadringentos: quibus si stipendium addat Bibliothecarii, & Secretarii, una cum emolumentis, effici Sexcentos alios. Tu verò scribis, datum illi munus Historici, cum stipendio florenorum annuorum septingentorum. Arlenii conatum praclarissimum, de Salmasio in Scaligeri veterem locum evocando, non possum dignè satis prædicare; utinam perficiat, cum ingenti Academiae patriæ gloria. Neque dubito, quin omnino obnitatur noster iste, qui præ se vix alium aestimat. Sed illum Manes sui exagitant. De Casauboni literis quod mones, est id sane perquam gratum; & accipe quas ad me scripsit: Institutiones tuas Oratorias videre aveo: nam si quisquam est, qui tua aestimat, is ego sum. Golium reduisse & duplicem Professionem obtinere sanè gaudeo; neque ullum habeo dubium, eum olim non duntaxat patriæ communis nostræ, sed totius adeo avi, singulare ornamentum futurum esse. Saluta illum, nisi grave est, meis verbis; & dic, fausta ipsi omnia apprecari. Sed de Heinso, antequam finiam, illud quærere volebam, Ordinum Hollandiæ, an Generalium, sit Historicus; fac ut sciam. Vale, amicorum omnium optime maxime. Uxor quoque tibi tuæque plurimam salutem adscribit; tum & filia item tuæ. Saluto etiam V. R. Andreæ Rivetum; cui potes meis verbis affirmare, me in ipsius amore atque cultu, constantiam tueri. Nec Barlaam præteribo, cujus Carmen de Sylva-Ducis oblatione rectè accepi. Profecto ille vir parem se summis in hoc scribendi genere viris præstat, si non superat. Iterum Vale.

Raptim Sorae
ad diem V.
Martii,
cIo Ioc xxx.

Tuus Fide Batava,

Johannes Meursius.

Quæso,

Quæso, indica locum ex Epistolis Scalligeri, in quo acerbè quiddam, & nequiter, ut mones, de me dictum: oportet inspiciam; nam Epistolas hic habeo. Laurenbergio salutem dicam, cum redierit: nunc enim abest, Hafniam profectus. Opus tuum de Hist. Lat. summa cum voluptate legi; est præclarum, id est, Tuum; quo ut optime de defunctis es meritis, ita vivitium sane studia plurimum tibi obstrinxisti. Placent quoque supra modum quæ pro Socero, Viro summo, admodum luculente dixisti. Est profecto, in tanto Historico, crassus Error; tum malignum nimis iudicium; idque in gratiam potissimum, ut verè dicis, viri illius, magni quidem, sed non candidi alienarum virtutum æstimatoris: maximè in illis, quibus, animus erectior erat, & à turpi adulatione alienior: quod & ipse sum expertus.

Sequitur in Epist. MS. Catalogus Librorum quos ex Rütgerianis poscit V. Cl. sed ut longiorem, nec Lectori ullomodo utilem omisimus.

De Noomisio tuo quærere me ex te memini, ut loci, & quid ageret; quæso fac me certior. Ad Dominum Heinsum, ut statueram, scribere in præsens haud licet, urgente admodum Mercatore, & vix me permittente, ut has finiam; itaque salutem illi meis verbis plurimam dicito. Te verò imprimis rogo, ut negotium hoc librarium des effectum. Ac si ille, quod non spero, se difficilem tibi præbeat, operam dabo, uti habeas unde, ac quocunque item pretio, saltem quatuor istos, Pappum, Apollonium, Orbasium & Diodorum Euchiontem. Facile autem vobis est recuperare, inter tot Auctiones, quæ passim habentur. Qua de causa maiorem te in modum rogo, ut huic meo desiderio satisfacias. Amicissime, vix finem impono; ita planè, dum ad te scribo, sermonem tecum ferere videor. Finiendum tamen semel. Utinam autem coram colloqui daretur, quod, ut maxime ego opto, & desidero maximo cum desiderio, tamen tempora non permittunt, obsidente adhuc vias, ac potissimum circa Embdam, milite Cæsariano. Iterum vale, Amicorum omnium primè. Sed verè de libris istis comparandis, iterum tibi aurem vellò. Oro te, obsecro & obtestor, per humanitatis tuæ, & communis Amicitiae nostræ Genium, uti desiderio meo satisfacias. In penultima Epistolarum Casauboni, si illa de Viro plane eximio, Socero tuo, minus placent, dele aut muta, prout

visum fuerit tibi. Habet Heinsius quandam epistolam, scriptam circa exitum anni 1610 Idc VIII. quam tunc ipse mihi prælegit. In hac elogio sanè amplissimo *de margerius* Casaubonus me ornat: & ut memini, prædicabat meam cum ipso conversationem, dum Lutetiæ commorarer; prædicabat, præter doctrinam, etiam probitatem, gravitatem, fidem, integritatem, & alia. Nescio an is eo candore illam Epistolam sit edendam exhibiturus, quo tunc mecum communicabat: quod fortasse oblitus erit. Nosti ipse ingenium hominis. Sed videbimus, & eventus nos docebit. Rursum vale, & ignosce confundenti scriptionem. Habes Epistolam prolixam, & quæ tibi affectum meum repræsentet. Vide Epistolæ hujus fatum! Nondum licet finem facere, scripseram de Elzevirio, & quarundam lucubrationum mearum editione; ac nunc literas accipio, quibus præli occupationem obtendit; id est, per ambages negat, uti ego quidem interpretor. Mihi certum, nunquam illi aut istiusmodi hominum generi supplicare. Equidem contentus esse partâ hætenus famâ possum; & deinceps mihi, ac Musis, lucubrabo: ut canebat Antigenidas. Mitto autem ad te Denarium Pythagoricum, indelibati in te affectus qualescunque monumentum apud externos posterosque; Panathenæa, cum Scrutero dividebas; hoc opusculum, tuum ex assè esse volo. Facile puto id excudet Commelinus, qui Athenas quoque meas pridem excudit: vel Lemarius quoque tuus, qui excudit tua omnia. Quod si uterque aspernatur, poteris ad me remittere, ut cum cæteris suo carceri mancipetur. Vale quartum.

Tuus, sine ullo fuco, uti nosti,

Johannes Meursius.

CX.

Clarissimo Viro Vossio.

Tibine doleat, Clarissime Vossi, non convenisse me? quin tantum potius virum pudeat tam sollicitè quæsisse aut etiam desiderasse hujus ordinis hominem, usque adeo intra se recedentem, atque pone se latentem, ut neque mirum sit, si tam bona hæc fortuna eum non invenerit, quem non celeberrima prius adierat fama, venisse in Angliam Ger. Jo. Vossium, quam

quam excessisset. Quod si per tempus rescivissem, jam tum me jure pernitem dixisses Ladan aut alatum Persea; quod jam dicis: nec injuria, rapidam enim illam in transcurfu festinationem meam neque sine morum censurâ memorandam præproperantiam, & ipse multoties exinde damnavi quotiesque recordor, pœnitet, pudetq. Amstelodamum vestro Lugduno; Judaicæ Synagogæ ceremonias, quas instanti tum sabbato visere gestiebam; vestris sacris necessarium denique mihi die indicto reditum benignissimo tuo invitamento prætulisse. Quod sanè erratum, aut potius peccatum, ex parte redemissem, modò vel minima tui in Angliam adventus aura aures meas adflasset, diluisssem (inquam) incivilem illam præcipitantiam, omnibusque illico relictis rebus advolassem, pennatori quàm ante remigio prætervexissem: non, quod aiunt delicatuli isti manum osculaturus; verum ad pedes provolutus scientiæ illud oraculum, modestiæ miraculum veneraturus, veniam deprecaturus, tibi gratulaturus. Sed ecce prolixam tuam propeque divinam humanitatem! quæ inhumanitati meæ ultra litatum procedit, quæ offensam, quam eluctari me oportuerat, officio exceptit, neque fastidit hominem errore quidem magis quàm scelere peregrinum inter cultores admittere, imo advocare. Ah! bene sit carinæ illi, quam dicis scævæ, quæ te avocavit interurbavitque mei visendi consilium. Hinc enim suavissimæ tuæ atque literatissimæ Literæ, quas ego non auro contra, amicitiae arrha qua quia me præstinatum venis; ecce manus do, mancipio usq. tuus, utinam & fructu. Fidelem certè spondeo, ac utcunque in tanta cultorum tuorum familiâ me agnosco haudquaquam præ cæteris dignum, qui palum in parietem figam, sicubi tamen siquando si qua dabitur, ad omnia officia habes paratissimum. Sed quid agam interea? Quo non valet manus ibit mens tendet votum; quod bene ominatum faxit ratum Deus, tibiq. det secundam paremque Angliam nostram videndi occasionem. Interim, Salve Clarissime Vossi, & perge quod facis, amare, tui pene contra latinitatis atque amicitiae canonicas solocissans dixissem, colentissimum; sed quoniam ita fieri jubes, meque intra familiaritatis pomœria Civem accitum vis,

Londini, Pridio
Nonas Martias
clō lōc xxx.

Tui amantissimum,

Tho. Farnabii.

Duo Nobilissima Academiæ vestræ lumina Clariss. V.V.D. Heinsum & P. Scriverium veneror, quibus à me summo cum officio, aut amoris religione dici salutem percipio.

CXL

DE di ad te, Vir clarissime, prolixas admodum literas ante triduum, aut quadriduum, quas non dubito quin acceperis, quando eas homini certo ferendas dederim. Iterum nunc ad te scribo: sed brevissime. Qui has tradit, cum Hollandiam cogitaret, videre Leidam nostram voluit, & te in ea ante omnes. Nec hoc tantum; sed & unice amicitiam tuam expectit: quâ experieris eum minime indignum esse. Est autem juris Candidatus, Ethicesque aliquamdiu Professore extra ordinem in hac Academiâ egit: nec remotus est à munere, sed removet à se ipse, studio peregrinandi, & ubique viros claros cognoscendi. Scis talem animum non posse cadere, nisi in eum qui virtutem & doctrinam, pariter amet. Facit ipse: & utramque hactenus præclare satis est sectatus. Deprehendes, si licebit experiri. Non commendo eruditionem ejus, sed virtutem, probitatem, integritatem. Uno verbo: est cum quo in tenebris micare possis. Summa voti est, si ad mentem unum, aut sesqui, (nam diutius commorari non constituit) domo tua, & mensâ uti concedatur. Id si impetrat,

Sublimi feriet sidera vertice:

Oro te, Vir amicissime, si id rationes tuæ ullo modo patiuntur, fac hanc gratiam & mihi beneficium imputa. Nec ingratum aut indignum ille se est præbiturus: & me item in majorem modum obstringes. Si quem unquam talem mihi commendabis, vicissim ostendam, quanti tuam commendationem faciam. Valè, amice incomparabilis, cum Uxore, Liberisque in annos Nestoris. Uxor mea te, tuamque ex animo salvere jubet.

Reprim, Soræ Da-
norum ad diem xv.
Mart. clō lōc xxx.

*Tuus ex interiori ani-
mi affectu,*

Joannes Meursius.

CXL

CXII.

*Doctissimo Viro, Gerardo Joanni Vossio,
Affini conjunctissimo.*

Conjunctiss. Affinis,

BInas jam ad te dederam literas, cum tuæ mihi sunt redditæ. Priores meas cum Libris, jam olim ad vos perlatas spero: Alteras, unâ cum Doct. Wrenni Epistolâ, te pariter cum hoc præsentî scripto, accepturum arbitror; quandoquidem hodiè ad me retulit nuntium is, qui Illust. Comiti Marefchallo à secretis est; cras demùm aut perendiè ingressurum iter, famulum istum Legati, Regis Britanniarum, cui secundas meas commiseram literas. Dolui quidem quod nondum ad te perlatum fuisset alterum illud fidei meæ testimonium: gavisus tamen sum, quod denuò scribendi, tutiusque ut puto, transmittendi occasio affulgeret; præsertim cum triduo abhinc, D. Casauboni literas ad te recepissem, & de iis rectè curandis, non parùm essem sollicitus. Tuis ad me literis, alias ad filium Johannem inclusas, ipsius secundo post die Cantabrigiam ad eum detuli; non quod occasio mittendi eas deesset; sed ut promissi fidem exolverem; sedulò fidelium amicorum opera uti non destiti, & quæ de vita, moribusque Johannis nostri constare poterant, sciscitari. Ibi omnes uno ore, omnia bona prædicare, & singularem ejus modestiam, ac strenuam in studiis operam extollere non desinunt. Ac fidem mihi fecerunt, non vana hæc esse, neque auribus meis tantùm data; cum etiam dum in itinere, eò atque redeo, ex ignotis, ignotus ab his non abhorrentia intellexerim. Utut verò nunc meliorum spes facta sit, nunquam tamen porrò in rationes vitæ ejus, quotiescunque occasio erit, inquirere desinam. Octiduum hodie est, quod Comes Pembroxiæ, subita morte extinctus est: & triduo post Mater Comitissæ Arundellii functa fato est. Unde duplex, nobilem hanc familiam luctus invasit. Initia quædam pestis hîc grassaturæ, quotidie videntur deprehendi; faxit Deus, ne malum ingravescat. Da veniam, præproperæ festinationi: jam avocor; & vix otii satis relinquitur ad obsignandas literas. Saluta omnes.

Anno 1630.
17. Aprilis
St. ver.

Tuus omni officio,

F. F. F. Junius.

CXIII.

Cl. Viro G. J. Vossio, Affini conjunctiss.

Conjunctiss. Affinis.

Literas hæc Doctoris Wrenn, primâ quaque occasione ad te mitto, ne per me stetit dicatur, quominus jucundissimæ consuetudinis mutua officia scribendo excitetis. Videtur is meliora de Johanne nostro sperare, ut & Michael iste, qui Comiti nostro à sacris est; fuit hic jam nuper Cantabrigiæ, & reversus animum meum optimâ spe implevit. Aliud longè sentiunt alii: sed mihi hæcenus excurrere eò, non fuit integrum; quandoquidem post meum è Belgio adventum, præter crebra in vicinos nobis tractus itinera, longo quoque ac permolesto itinere, Comitum unâ cum liberis, in Salopiensem agrum proficiscentem, persecutus est. Dumque revertimur, diem unum in Oxoniensi urbe, ad deponendam lassitudinem, ex itinere hyberno contractam, substitimus. Ibi singularem Bibliothecarii humanitatem expertus; non sine uberrimis ad te literis abiissem, si Rever. Armachensis Episcopus, consilii sui rationem, de Mariano Scoto, per literas aperuisset: sperat tamen Dominus Rous fore, ut brevi te de Primatis Hyberniciæ, super ea re animo certiore faciat. Ostendit mihi etiamnum hodiè Doctoris Usherii literas, nobilissimus Eques Henricus Boucherius, in quibus Rev. Antistes dolet, sibi nihil prorsus de tuo in Britanniam adventu constitisse. Addit se Rev. Episcopum Londinensem, per literas consuluisse, an non spes aliqua relicta sit, pertrahendi te in hæc partes; & alia multa huc spectantia, quæ referre singula superfedeo. D. Seldenus, D. Boucherius, Patricius Junius, D. Boswellus, & quotquot hic sunt literati, unicè tibi commendari optant. Petrus noster scire avert, an unquam videris Theodoretum, de Vitis Sanctorum, quem MS. è Græcia advexit, fac sciamus, an te iudice prælo dignus. Alia sunt de quibus agerem, si per præcipitem, quâ urgeor, festinationem liceret. Nunc tantùm addo, nihil mihi gratiùs obtingere posse, quàm ut te, tuosque omnes, prosperâ uti valetudine intelligam. Vale.

*Rapim, Anno 1630.
6. Maii, St. ver. in
adib. Arundelianis.*

Tuus omni officio,

F. F. F. Junius.

Literas ad te, unâ cum Libris, ad cognatos, & filios jamdudum misi: spero rectè perlatos.

L

CXIV.

CXIV.

Amice Præstantissime,

Literas tuas tam quas postridie Kalend. Maias, per Mercatorem Slaglofienfem, quam quas vi. Id. Junii per Davidem Gulielmum ad me dedisti, rectè accepi. In illis, pariter atque in istis, video affectum, & exosculor: quem ut sempiternum in me esse velis, id te rogo, etsi nullo modo dubito. In prioribus, magnas nimis gratias agis, pro re sanè non tam magnâ: sed est amor, qui exaggerat, & ex musca tibi elephantem facit; tamen abeam à vero, si id mihi majorem in modum gratum negem: item illud, quod spem facis, brevi hunc Libellum nostrum editum iri. Ubi id autem factum fuerit, mitte mihi exemplaria compacta decem, & incompacta alia totidem: pretium compactionis, & ab affine, Ecclesiastæ Wallenariensi, repetes. Mittes verò Amstelodamum, ad Joannem Janssonium: qui rectè ad me curabit. Exemplar quoque Hagam unum mittas censeo, ad Dominum Mylium, communem amicum. Dabis quoque Riveto, Cunæo, Heinsio, Vorstio, Barlæo, & Scriverio. In Italiam duo mittes, illustrissimo Molino, & Francisco Mariæ; in Angliam quatuor, Spelmanno, Junio, Critonio, Petæo; in Galliam, Grotio; de Salmasio, facies tuo arbitratu atque nomine: nam in illo certè viro, ut libenter diffusissimam lectionem, ac doctrinam singularem, æstimo pariter, prædicoque, sic modestiam, & candorem, merito desiderare mihi videor: ubique sedulo cavet, ne me nominet, etiam ubi deberet; taxet verò quamlibet suppresso nomine, ubicumque se occasionem nactum esse putet. Ego tamen, uti fert ingenium meum, ejus mentionem honestam pridem feci, libro de Ludis Græcorum, pag. 35. Et tuam fidem an non jure & judicium requiro; cum tam multa ubique inculcet, collo etiam obtorto adducta, loco admodum alieno? Adde quod ineptum satis, cum Solinum nobis edat, & in illum commentari proposuerit, opus totum quod cum Plinio eum auctorem contulisset, Exercitationes Plinianas dicere. Quis doctorum ad hoc tempus in hunc modum commentationem instituit? Modestiam verò itidem me desiderare jure existimo; nam si qui seorsim sentiant, hos nugari, nugas agere, ridiculè agere, ineptè agere iudex iste sine suffragio pronuntiat; sententiæ suæ, sæpe etiam minus rectæ,

nimis pertinax defensor. Ego nunc Historiam trium Daniæ Regum edo Hafniæ, impellentibus viris aliquot Primatibus; qui ut me ac mea, amant æstimantque, sic vulgari specimen istud operæ meæ plane cupiunt. Ubi Typographus absolverit, mittam exemplar. Probasse se tibi Ernestium nostrum, est quod gaudeam; gratiasque magnas ago, quod posueris tantum pretij commendationi meæ: ego paria sum facturum, sicut amicitiam nostram dignum puto, si quem unquam huc euntem commendabis. Mira retulit, qui has adfert, Jacobus Marci, agere nunc Amstelodami Utenbogardum, Grevinchovium, & Episcopium: ac præterea, urbis ejus magistratum Scholam quandam illustrem erigere, ac Barlæum illuc ad professionem amplissimo stipendio advocasse. Sed tu nullum de his verbum: fac me, quæso, proximè certior. Doleo diffidia Patriæ, & concordiam tandem constitutam optem. Vale, amicissimum caput. Uxor mea te, tuamque salutem plurimum, Liberi, vicissim tuos: Filiam imprimis filia. Vorstii literæ gratissimæ fuerunt: atque rescripsissem ipsi, nisi Jacobus Marci noster festinatione suâ voluntatem impediisset. Fiet proximè: interim salvere multum ex animo jubeo. Salveant quoque viri alii amicissimi & clarissimi, Rivetus, Cunæus, Heinsius, Barlæus, & Scriverius; qui & ipse hætenus in Vorstianum modum fileat. Ejus quoque si potes veternum excita. Facit rem indignam amicitiam nostram. Iterum vale.

Soræ, ad diem
xxi. Junii,
cIo lOc xxx.

Tuus ex animo,

Joannes Meursius.

CXV.

Salutem in Christo.

Literæ tuæ tres numero (Vir Clariss.) manus meas utraq; implevere, à quo te vel coram, vel per literas salutavi. Et pudet, & doleo. Amor tamen tuus, quo me frui gestio, facile huic tarditati veniam dabit, præsertim quum res meæ tibi innotuerint. Literæ enim tuæ novissimæ datæ sunt 14. Feb. 1630. quo tempore ego minus firmâ valetudine responsum nec illis, nec prioribus potui aptare. Nam post discessum tuum, Festo Nativitatis Domini nostri instante, etsi relapsus in febrem non contigit, nescio quomodo tamen

men turbata natura me iterum periclitantem vidit. Et quid per hæc potuit (cum Hilario loquor) limosi corporis gravis Anima?

Festo Paschatis sequente (quod ut nôsti incidebat hoc anno in 28 Martii) confirmator accedentem, & ascendentem solem aspexi, & me paulatim negotiis & Aulæ & Ecclesiæ immiscui. Fretus tamen multo magis Deo & tempore Anni, quam propriis viribus. Exinde Festo finito, Deo sic disponente, negotia undiq; me obruebant. Certè primò non sine metu mei & meorum, sed postea sub mole illa, quâ vix major mihi unquam incubuit, crevere vires, & misericordiam ampliante Deo pristinam adeptus sum valetudinem. Semper tamen excipio Tendonem fractum.

Hodie primum exui paululum negotia. Et hoc Justitio dum fruor te imprimis salutare cura fuit. Salvus itaque sis mihi charissime, & à lævo recipias quicquid adhuc amplius te & studia & familiam tuam beare possit.

Ad literas quod attinet. Primæ discessum tuum tantum reperunt, & quam carus fuisti confratribus tuis Cantuariensibus. Gratiæ ego egi nonnullis eorum quos vidisse contigit, & nomine tuo. Sic illic omnia certa, & spero tibi grata sunt. Filius tuus Johannes dum redit Londinum non multos post dies me invisebat. Claudicabat, sed paululum, & tum quoque magna spes claudicationem illam non fore diuturnam. Ab illo tempore eum non vidi, studiis spero intentum. At ubi loci nunc sit non dubito quin ipse te certiore fecerit, & quam graviter Cantabrigia peste laborat. Morbus ille à vobis, militibus quibusdam redeuntibus, transmissus.

Literæ tuæ quæ his succedebant felices nunciæ fuerunt salvi & sospitis reditus tui in Patriam. Gaudio id certe magno mihi cessit, utpote cui sanitas tua, & vita in longum protracta in usum Ecclesiæ, in primis votis sit. Facile credo fuisse non paucos qui tibi reditum gratularentur, quam dispari animo ipsi viderint. Sat scio quales inter vos amicos habeant qui Potestatis Regiæ, & veteris Ecclesiæ cultores quoquomodo existunt. Si cordatioribus exemisti scrupulum, illud perbene: qui Tribunal olent ad populum refero; curet scilicet qui vult. Me non nominant Literæ illæ, sed satis intelligo, & multum rideo insaniam.

Promittis hic Institutiones Oratorias. Et eas jam accepi per manus doctissimi tui Junii. Ille ante mihi charus, charior nunc nomine tuo. Pollicitus est ille se unâ cum

gratiis ob libros illos doctissimos & tuos, me excusatum habiturum apud te quod tum literas non dedissem. Nunc ego iterum Baronium inculco. Nosti quid velim: Et est quod vel maxime usui sit Ecclesiæ. Induciæ vestræ cum Hispano precor aut non sint, aut sint cum bono & vestro & Ecclesiæ. Nec imprudenter cavent meo iudicio, qui exinde domestica dissidia magis timent; præcipuè prout Religio hodie apud vos — De Scoppio vestro, & reliquis reformatæ Religionis Propudiis, quid dicam nescio, gaudeo tamen Amstelodamenses, ubi Libertatis nescio quod Asylum, in maledicum tam severos extitisse.

Novissimæ Literæ tuæ nil aliud ferè spirant quam honorem Higgii nostri. Certè multum tibi debet Oxoniensis Academia nomine ejus, nec minimum ego, qui Higgium illum virum moderatum æquè ac doctum semper quibus potui modis promovebam. Non opus est ut scribam, ille (scio) narrabit quanto amore, maximo illo certè, si prudenti, si fausto bene est, me Oxonienses, nunc alio nomine mei, persecuti sunt, & me Cancellarium, indignum simul & nolentem elegerunt. Inter eligentes Higgius. Eum sine literis remittere ad vos me graviter pupugit, sed tum vix respirare datum. Gratiæ tamen ago, & tibi & filio Francisco ob honoratum Higgium.

Quod reliquum est scias velim, etsi tempestates quæ sæculo hoc exagitant Ecclesiam sedando non sim, nolle tamen me (Deo favente) aut Causæ aut Officio deesse. Interim cuivis ferè obvium est quam periculose jactantur Respublicæ, fluctuante Ecclesia. Ad filium tuum Johannem quod spectat, quum proxime videro (brevis id spero futurum, Deus si pro misericordia sanarit Cantabrigiam) effectum dabo quod postulas. Tu modo ut mei quotidianis in precibus memor sis obnixè rogo, ut in nomine Christi; ne dum moliuntur inimici, solus sim. Vivas interim opto, valeasque ego ut sim

Virtutum tuarum cultor, sicut

sum & tui amantissimus,

Guil. Londin.

Julii 21.
1630.

CXVI.

S. P. D.

POTUISSEM tibi innotescere V. Cl. commendatione summorum amicorum tuorum Hugonis Grotii & Sam. Nærani, quorumque uterque benevolentia me sua dignum hæcenus existimavit. Sed ego, quotiescunque singularis tuæ eruditionis mentio apud me facta est, insignem simul humanitatem tuam laudare semper audivi illos qui apud vos vixerunt, & tecum versati sunt. Itaque & me eorum numero ut ascribas, quos amore tuo dignaris, per te illud rarissimum nominis tui decus præcor, quod optimis tibi in literas meritis acquisivisti. Qui si quantumq; doctrinæ studia ardore sectari soleam, ornatissimus noster Bellimontius indicare tibi poterit, qui eadem nobiscum ædes aliquandiu habitavit. Sed & ipse te videbo, si votis meis Deus immortalis annuet, & à Sextili statim mense reditum ad meos moliri per Bataviam poterit. Interea ne hoc auspiciū nostræ notitiæ sine onere ad te transeat, maximo pere tu meos conatus provehes, si Stephani Taurini de Stauromachia librum, ante annos forte L. editum, quemq; Cluverius vester & alii sæpenumero adducunt, alicunde mihi erues, & vel ipsum, vel excerpta quæ ad rem meam faciunt, in ædes Grotianas transmittes. Quum enim Daciam antiquam aliquot annorum diligentia adornem, plurima in hoc auctore extare audio, quæ juvare me admodum possint. Et ego frustra tot Bibliothecas hucusque vel ob hanc solam causam perreptavi. Nunc ad te hæc cura redit, quem nihil eorum latere quæ ad literas faciunt publice novimus. Tu videris, an hoc officii genere obstrictiorem me tibi reddere velis, qui virtutes tuas maximamq; doctrinam illo quo debui cultu nunquam non suscepi. Vale.

Lutet. Paris.
vii. Id. Jun.
e1610 cxxx.

Clarissimi nominis tui

observantissimus,

Martinus Opitius.

CXVII.

NULLUS præterit dies, in quo non sapius prudentissimi mihique utilissimi tui sermonis recordor, & infelicitatem meam, quod tam egregii & divini amici, imo op-

timi patris, quem (Deus scit) super omnes mortales amo, magnifacio & admiror, colloquiis & consiliis sim orbatus. Tu enim optime D. Voffi non ignoras, quanti nostra interfit habere, quorum consilia tuto sequi possumus. Pauci certe sunt quos æquus amavit Jupiter. Alii enim, ut Cicero prudentissimus mihi narravit Magister, insipientum & indoctorum Parentum & Præceptorum præceptis sunt imbuti: Alii multitudinis stulto feruntur iudicio, quæque magistro illo erroris bona videntur, ea imitari student. Pauci tamen, siue singulari gratia Dei, vel etiam eruditorum Parentum & Præceptorum disciplina rectam tenent sapientiæ viam. Tertiū hujus ordinis amicū olim fui nactus Christophorū Heidmanum virum rarum: quem tamen statim, quum eum plusquam 60 milliaria essem sequutus, mortis amisi injuria. Eo mortuo, me utraque, quod dicitur, sede carere, mihimet ipsi videbar. Maximam enim spem in docti & pii illius viri prudentia collocaveram. Videbam namque hunc virum non solum doctrina, elegantiaq; excellere, verum etiam animi bonitate, pietate & prudentia reliquos superare. Quæ etiam mihi persuadebam, hunc virum inter mortales jam non habere parem: id quod meum dolorem mediūfidiū non minuebat. At enimvero Voffius errorem meum mihi ostendit. Te enim, optime Pater, satis admirari non possum. Fateor (absit omnis adulatio, Deus autem & scientia testes mihi adsint) te Heidmano esse majorem. Neque tamen quidquam egregio illi olim viro præceptorique charissimo derogatum volo. Nam Architectus omnium gradus dedit, secundum quos unus akero ut sit major ipse voluit. Ita Deus Opt. Max. illud quod abstulisse videbatur, large rependit: cui gratias ago maximas, quod me ejusmodi animo beaverit, qui bonos viros dignoscere potest, eumque veneror, ut bonorum numerum augere velit. De itinere meo, ut aliquid scribam; scito quod primo die Julii Bituriges venerim, ubi unā cum nobiliss. meo Petro Guldensterne, qui te salvere jubet, ad festum usque Michaelis commorabor. Hæc offendi doctissimum & humanissimum Petrum Edmundum Merillium, quo utor familiariter. Hinc quando discedimus, profecturi sumus, divina favente gratia, Andegavum. Peto abs te, optime D. Voffi, ut has ad Patrem meum Literas, quando occasio sese offeret, Helmstadium mittas; & si forsan ad affinem meum Georgium Calixtum scriberes, mei istis in literis

literis mentionem faceres; cuius rei causam aliquando tibi, bono cum Deo, coram indicabo. Vale, unâ cum tuis omnibus. Conjugem tuam suavissimam meo nomine saluta, eique, sic ut ego tibi, pro singularibus in me beneficiis collatis gratias age. Liberis quoque tuis jucundissimis Fratribus ac Sororibus meis multam adscribo salutem. Vale iterum etiam atq; etiam.

Dab. Biturigibus
An. clō 15 cxxx.
26 Augusti.

Tuus & tuorum,

Henricus Ernstius.

CXVIII.

S. P.

A Veritate non abhorret, Clarissime in rem literariam meritis Vir, quod quidam dixit, Τὸν ἐμμελὲς ἄνθρωπον οὐδὲν ἐμμελὲς ἔργον ὄν. Nam & benemerens & opifex amabili quadam constantia eas superare solent molestias, quæ in rei absolutione capiendæ sunt. Quare non dubito, quin tum tua, tum magnifici Domini Rectoris, cæterorumq; Dominorum Professorum, nuper mihi conciliata benevolentia etiam nunc spiret & vigeat. Si enim æquabilitas ista etiam in inferiores cadit animas, sane quam absurdum foret, vel minimam de vobis, summa eruditione & virtute viris, animi mutabilitatem suspicari. At verò ut hæc sunt verissima, ita aliud quoque mihi audiendum, videlicet ὅτι οἱ τόποι, ἐν ᾗ χεῖρ ἀποστα τὴν τῆς φιλικῆς ἐνέργειαν διαλύουσιν. Et certè *Quamvis* quædam necessaria est, qua velut ἐκζητοῦντος semisopitus inter varia vitæ negotia favor reficiatur. Quamobrem, quoniam literæ colloqui vicem defendunt, sic statui, fore, ut facilius ex silentio supinus & negligens, quam ex tali compellatione, audax impudensve censerī possim. Eccujus enim rusticiorem etiam verecundiam non evincat, & ad scribendam impellat singularis tua humanitas, atque candidissima comitas? Multum est, hominem peregrinum intueri, præclarum est ad amicam admittere colloquutionem, sed consolatione sustentare, & ad spem luculentam erigere, ejusmodi est, ut utilitatē humanitatis mensuram excedere dicendum sit. Quos exercitissimæ tuæ charitatis fructus, cum ego tam hilariter demersuerim, ut tuus, atque adeo vester sim factus, & proinde vos in aliqua rerum mearum cura retinere non tam ausim, quàm debeam, haud morabor diutius rem ipsam proponere. Non

per me stetit, quò minus ad vos, uno exacto mense, profectus fuerim, quod fore dixeram; quoniam enim necessaria itineri pecunia nimis lentè, & quasi guttatim datur, profectiōnem differre quotidie cogor. Nec verò alienam alicunde petere, dum mea mihi debetur, velim, nisi summa mihi imponatur necessitas. Quippe infinita hodie eorum qui egent multitudo est, & cavendum mihi, μή τις πῶς ἐξαναγκάσῃ. Si quidem Spiritus Sancti ore ἐυδαμονίζοντες οἱ τὸν ἥδ' ἰδὼν χερῶν πόνον ἀπολαύοντες. Equidem huic loco perinvitus obhæresco. Nam Hispanicum hujus oppidi præsidium Tilliano est commutatum. Quod cum multi sibi gratulentur, mihi tamen *ἐκκοιδέσθαι* (utinam etiam *ἀδελφάνῃσι*) ἵππων videtur. Omnino super priora mala religionis mox appetit. In meis oculis nunc omnia sunt iter meum, quod primo quoq; tempore faciam. Interea, à te, Vir clarissime, majorem in modum peto atque contendo, ut, sic ferente facultate, in promotionis meæ opera perseveres, aliosq; ad studium simile saltem pio exemplo adhortere. Nunquam apud me non stabit magni hujus beneficii gratia, imprimisque efficiam, si Deus concesserit, ut ipsi muneris me pensique fidem satis tueri animadvertatis. Non minore autem studio te rogo, ut, si quid *σολοικῆς* in meis gestibus, importunis ἐμπύχῃς, aut alibi comparuerit, Caritatis πάντα ἐργάσας *ἀντὶ* involvere velis. Hexæctian Scholicam vobis ostendi, non ut aliquid magni præportarem (nec enim ita sum vel exiguitatis meæ inconscijs, vel excellentiæ vestræ) sed ut aliqua significarem, non *ἀκινῆ* me in Scholis desudasse. Palatinis autem potissimum pædagogeis, ubi non pauca mihi præposterè geri visa, eandem destinavi; alios mihi ludos nec debuit esse curatio, nec potuit; utpote qui eorum *μυδδὺς* æquo animo ignoraverim. Adhæc unum ferè istud ibi ago, ut doceam adolescentulos priusquam ad publicas Scholas emittantur, in inferioribus dextre esse instituendos. Qua ex *σεραυθῶν* rem æstimari æquum est. Jam quod attinet ad Psalmos non solum *ἀεφραδίνῃς*, sed etiam plurimis in locis *μυαφραδίνῃς* cum iis omne prope modum tempus vacuum (quod tamen perexiguum fuisse etiam hinc cognoscitur, quia septenas plerumque, aut minimum senas singulis diebus horas docui) impertivissem, totum aliquando *φιλοπρόημα* in unicum Apollinis templum deferre, & artificum trutinæ, quocunq; ingenii periculo, imponere volui. Sed his aliisque de rebus coram agendi dabitur potestas. Vale, vir præ-

præclare, & auditorii tui commodo quam plurimis annis perenna. Honoris & observantiæ causâ salutem adscribo magnifico Domino Rectori, Domino Polyandro, Domino Heinio, Domino Professori Hebraeæ Linguae, Domino Barlæo, aliisque denique Dominis Professoribus omni doctrinarum genere excellentissimis, quorum ut aliquanto penitiorum intrare familiaritatem queam, post conitar.

Hammonæ ix.
Kal. Augusti
An. M DC XXX.

Clar. tuæ observantiss.

Jeremias Hoelzlin.

CXIX.

S. P. D.

EX formidine subeundi audaciæ notam quæ verecundiæ ingenuis animis innata est, clarissime excellentissimeque vir, Domine, & amice honorande; ea mentem hanc & manum abstinuisset ætatem à te per Literas compellendo: nisi fiducia summa humanitatis tuæ trepidanti calcar addidisset. De facie enim quamvis alter alteri sumus ignobiles; mihi tamen eruditionis tuæ facies, ex fronte scriptorum, quibus nomen tuum æternitati commendasti, luculenter innotuit; eoque mihi polliceor, non tantum confidentiæ veniam, sed etiam huic epistolæ perfacilem ad Claritudinem tuam accessum. Addam huc, quod à filio, istuc misso velut ad mercatum quendam eruditionis ac sapientiæ, comitas tua erga se insignitè laudata est; quamquam vereor etiam ut parum ex merito condigne: id quod ex sermone literarum ipsius videor conjectavisse. Cum igitur Doctoris Joannis Laurembergii, amici mei singularis, commendatio de filio ad te per scripta, magni ponderis momenti, fuerit, est quod magnopere mihi gratuler, potius quam ut eodem facientium struam verborum cumulum. Illud præterire, quin maximas tibi gratias agam, non queo, nec par est; quod à filio acceptas Tragœdias meas perlegere dignatus, iudicii quoque tui copiam tam benigne fecisti. Absit, in poetices studio mihi ut placeam; cum uni-ce placere debeat docendi Ecclesiam Christi, sanctum & arduum munus, quod divina quadam virgula & fato sum sortitus: & in quo jam annos viginti octo defatigor. Verum juxta tamen in otio, si quod datum

& quotiescunque datum fuit, bene collocando partes viri boni implere volui, & ut implem, operam dedi; seorsum à quamplurimis, hic præsertim loci, qui cum in concionando aliquid sapiant, hoc tantum sapiunt, in doctrina humaniore, quæ Ecclesiam Dei mirificè ornat, perparum. Quod si contra autem mihi aliquid bonorum & doctorum iudicio contigit, fructum equidem succidaneæ diligentiae tulisse maximum putabo. Candorem animi tui, ita sim salvus, exosculor; quo significasti, versus in Dramatibus non satis ubique esse rotundos, (nam sic filius retulit) sed horridulos nonnunquam. Concesserim sane volens; nec causam dissimulem, venire tales sub acumen styli, dum à lectione Taciti, maxime Tertulliani ad versificandum subinde revertor. Tum nescio quo pacto hac ætate mea, ad canos vergente magis magisque asperitas me quædam, quam rotundus labor delectat. Ut omittam per solennes in Ecclesia labores evenire, quod ferè necesse est, ut partim industriæ meæ, partim iudicii obtundatur acies. Denique in Athenæo hoc Danico iudex & æstimator styli & carminis, qui censuram Romæ, hoc est, in Repub. literaria tecum mereatur, omnino nobis est opus. Atque hinc adeo fit, ut meopte consilio & remigio, sine portifculo, sine hortatore, hoc pelagus cogar navigare. Quibus argumentis si asperitatem excusare non possum, deprecor. Nam & severis rerum arbitris, ex æquo sæpe & bono visum, naves quosdam in civitate tolerare; donec vel sui tædio, vel obrepente honestiore morum cultu oblitterentur. Fiat ejuscemodi quippiam in scriptis, quæ vel focci vel cothurni jus affeçant. In Socco Lampades ex xxv. Capite Evangelistæ Matthæi ante annos aliquot dedi, Hamburgi typis excusas; Monarchicam nuper ex II. Prophetæ Danielis Capite, nunc excudendam, uti in unum corpus seu volumen coeant: Misi ad filium censuræ tuæ fascibus submittendas; ac licet iniquum plane esse fatear, homini industrio & laborioso laborem velle addere (quid enim hoc aliud, quam bonorum abuti patientia?) tamen, qui reges nescio quam belle cothurnatos sulcepisti, admitte, obsecro humanitatem tuam, & Virgines decem, & Babylonium socco indutum Regem, vigilante & censorio ut advertas oculo, quo numero esse mereantur. Magno me beneficio tibi obstrinxeris, paratum promptumque, quibuscunque in rebus facultas aderit, tibi tuisque aliquam gratiam referendi. Deus Opt. Max. te inco-

incolumem, florentem, felicem cum omni familia conservet.

Dabam Hafniae
Danorum vi. Cal.
Augusti Anno
M DC XXX.

Claritudini tuæ additiss.

Bernhard. Meyerus Holsatus.

CXX.

MI frater, nam quidni te sic appellem, quem ut fratrem ipse amo. Cupio scire de tuarum rerum statu; tum quid factum sit denario illo meo Pythagorico: quem quin commendatum habeas nihil dubito. Avet quoque animus scire, quid futurum Libris istis, quos petierim ex Rutgeriana mihi auctione comparari. Edidi hic historiae meae Danicæ Libros III. operæ majoris specimen. Mitto aliquot exemplaria, tibi & amicis reliquis, quæ te distribuere velim: Riveto, Cunzo, Heinio, Vorstio, Barlæo, Scriverio, quanquam nostri nihil amplius memori. Vorstio verò etiam alterum addi cupiam, pro Avunculo Buchelio, ad quem ille rectè mitter. Literis verò ad Mylium, quas inclusi, adde exemplaria quatuor. Eundem modum rogo ut tenere velis in denario dividendo. De pugna navali serenissimi Regis nostri cum Hamburgensibus, & victoria, jam te accepisse putò. Vale cum lectissimâ Uxore, liberisque, & salve à me, meaq; & meis.

Dab. raptim, Hafniae,
quo nunc excurri, ad
diem xix. Sept.
elo 15 c xxx.

Tuus affectu

instar Fratris,

Joannes Meursius.

CXXI.

Præstantissimo Vlamingio, S. P.

Humanitas tua, Præstantissime Vlamingi, qua immerentem me superioribus diebus profecutus es, permovet me, ut simulatque Lugdunum reversus essem, primam mihi curam ducerem, tuo satisfacere postulato. Atque utinam in majoris momenti re, navare tibi operam possem! cognosceres non ingratum me, pro beneficio tuo. Sed quum ea desit occasio, proximum existimavi esse, ut saltem ex levi hac re, meum in te animum perspiceres. Quod tantò apud te feci confidentius,

quod scirem, te non rem ipsam sed animum tantum, ac benignum affectum meum assimaturum. Historia itaque quam petieras ita se habet.

Tamberlanes (qui orientalibus Timour dicitur) Patrem habuit Torgai. Natale ei solum Chougia Bilgar pagus. Patrem ejus Torgai, alii bubulcum fuisse aiunt, alii sutores egenum: Timour ipse cum robore corporis eximio esset, ad furta animum applicuit. Nocte quadam, cum ovem furto abstulisset, Pastor id conspicatus, sagittis duabus, una femur, altera humerum percussit. Eo ex casu cognomen Lenk, ferrum notat, accepit. Unde conjuncta voce Timourlenk dictus est; hinc nostri corruptè pro Timourlenk, Tamberlanem vocant. Ad historiam redeo. Tamberlanem duobus impeditum vulneribus, facile Pastor affecutus est, atque ad Huseinum, Huratæ Regem perduxit. Is Timourum verberibus cæsum agi in crucem jussit. Erat Regi filius Giaet Eddin parum mentis compos. Is pro Timouro intercessit; atque ut sibi donaretur, à Patre, multum abnuente, tandem impetravit: eumq; humili ex loco, ad summas dignitates perduxit. Evenit ea tempestate, ut rebellaret, qui Provinciam Sigustaen pro Rege tenebat. Missus eo cum exercitu Timourus, brevi bellum confecit. Captoq; duce ipso, omnes thesauros invasit, ac contra Dominum suum, bellum parare cœpit. Cumq; eum opprimere nequicquam Rex tentaret, paulatim ita ejus crevit potentia, ut Regem Huseinum perimeret, ac filium ejus Giaet Eddin, salutis suæ Authorem, in carcerem conjiceret, ubi fame mortuus est: jurejurando enim confirmarat Timourus, nihil illi à se nocitum iri. Postea cum jam rerum potiretur Timourus; accidit ut Samarcandæ urbi Principi, erronum, atque nequam hominum magna esset turba. Ille simulatq; Timourus ab urbe discessisset, Præfectum Urbi ejecerunt, ac totam turbârunt Rempublicam. Tantaque eorum potentia erat, ut ipse eos metueret Timourus. Septies illi turbas renovârunt. Tandem cum parum proficere se videret Timourus, ad stratagemam animum convertit. Convivium ergo splendidum instituit. Eò totam hanc promiscuè turbam, summæ, atq; infimæ dignitatis homines vocavit, ac singulos in suos ordines distinxit. Postea Duces, ac præcipuos eorum ad se vocavit, iisque sua manu poculum propinavit, (magni id apud orientales honoris habetur) inde purpura circumdatos, ex atrio à Ministris abduci jussit. Ille singulos extra atrium comprehensos

henfos jugularunt, donec ad novissimum perventum fuit. Atque ea ratione seditiosos hos Timourus, obtruncatis ducibus repressit. Pari ratione Perfarum Rex (est is avus ejus, qui jam imperio praeest) qui toto vitae suae tempore, Timouri exemplum imitandum sibi proposuit, ad imperium pervenit. Mos est, Persis Regibus, fratrum oculos candenti ferro exurere, quo ab iis securi imperare possint in regnum affectum. Excæcarat ea ratione, fratres suos omnes, Perfarum Rex, frater hujus de quo nunc nobis sermo est. Hic callidior cum visus esset cupidissimus, in Parthiam profugit. Ibi cum aliquot annos egisset, cognoscit fratrem suum defunctum, ac regnum, justus hæres cum deesset, à Satrapis regni inter se divisum. Petit itaque à Parthorum Rege; quandoquidem justus regni hæres sit, ut auxilio sibi esse in repetendo regno velit. Ille quod rem arduam, magnique videret negotii, hoc negato, argentum ei dedit, quo vi. militum millia scriberet. Copiis iis coactis Persa in limites Persiae contendit. Erat Satraparum ex numero, vir ætate, ac prudentia magna, qui sive quod justam hujus exulis causam videret, sive quod justa portione defraudatus esset ipse; simulatque de ejus adventu cognovit, cum eo conspiravit. Caterum cum tot numero essent Satrapæ, immensi laboris opus fuisset, omnes eos bello superare. Itaque quod viribus deerat, astu supplendum statuit. Convivio regio instituta, omnes Satrapas regni invitavit. Regem exulem in insidiis extra urbem esse iussit. Satrapæ cum advenissent, & mero incallescere coepissent, famulos omnes, quorum magnam singuli turbam adduxerant, exire jusserunt. Ita enim moris est, Principibus orientalibus, ut nolint famulos lætitiæ, atque ebrietatis suæ speculatores. Itaque postquam ii discessere, in luxum, atque ebrietatem solvuntur: interea in urbem Persa admittitur. Is sexcentis comitatus militibus, personatus in atrium intro-rumpit, ac singuli cum unum obtruncandum sibi proposuissent, brevi omnes conficiuntur. Inde illi, ne rem qui foris excubabant famuli cognoscerent, lætis clamoribus, ac hilaritate, omnia complent. Postridie cum dominorum tardum à convivio discessum famuli admirarentur, nihil tale opinantes, capita eorum sudibus imposita, ac circum fastigium palatii exserta vident, qua re quum Dominum suum desideraret quisque, turbas dare non ausi, domum suam discesserunt; eaque ratione Persa exsul regno est potitus.

Habes quam desiderâras, ornatissime Vlamingi, historiam fufius aliquanto à me perscriptam; quia quantum venustatis, brevitatis attulisset, tantum decessisset perspicuitati. Quum ejusmodi in rebus, quando gentium mores, incogniti sunt, tota obscura sit historia. Salutem plurimam, parentibus tuis, ac cognato tuo Nomfio, à quo si videndi facultas non datur; saltem ut literas habere liceat, pro me impetra. Vale.

Lugd. Batav.
vii. Kal. Octob.
c10 Idc xxx.

Tuus omni officio,

Dionysius Vossius.

CXXII.

Clarissime Vir, Fautor Popularis colende,

Ipsum jam est octiduum solum, quum cum Advocato Fisci Collegii heic rebus maritimis præfecti fui. Nescio an ille vel de nomine tibi notus sit. Crappius vocatur. Multus illi mecum de te sermo fuit, eò magis cum eum tuum erga affectum jam veterem ac Patriæ communis jus non celâssem. Certè eximius tui nominis ac eruditionis cultor est vir hic politiori eruditione non leviter tinctus. Tanti à te profecta scripta facit, ut nihil sit eorum quod non in sua Bibliotheca habeat repositum. Index eorum postridie ab ipso mihi communicatus fidem fecit planissimè. Non edita etiam in eum relata inveni: Commentaria de Lingua Latina: Historiam omnis ævi secundum tempora digestam: Notas in Gelasium de Synodo Nicæna: Anonymi vitarum scriptores. Illa certè & ego hæcenus expecto avidè: De reliquis me fugiebat. Quicquid erit non effugiet meos oculos ac manus, quamdiu fuero superstes. Ipse autem vix quidquam me dignum adhuc cogitare possum. Adeo parum restat temporis, quod ferme omne pulveri Scholastico est impendendum, quem si non excutere, saltem ea sparta, qua non alii subessem, in me non semper eidem, mutare velim. Pro re nata, ubi potes, mei memineris, enixè precor. Jam cum uxore liberisque à me meaque Salve.

Dab. 19. Octob.
1630. Horne.

Tuæ eruditionis &

humanitatis Cultor,

Abrahamus Bocstadius.

CXXIII.

CXXIII.

SI vel unica celeberrimi tui illius calami strictura duntaxat dignatus me fuisses, vel id pro ornamento haud vulgari duendum fuerat, Doctissime Domine; quis enim in splendidi adeo nominis gratiam non penè inolet. At quod tu insuper tam copiosè scribere, ne dicam tam familiariter confabulari cum vulgarissimo homuncione non gravaris: Næ id uti carissimum incomparabilis humanitatis patrum cum eruditione temperamentum indicat: Ita singularem tuum erga me affectum effusè notat. Sed enimvero cum animo reputo tot tamque gravia illa (quibus, in gubernanda Republica literaria, destineris perpetuò) negotia, totus attonitus stupeo ad illam incredibilem mentis tuæ fecacitatem, quæ progignit tam multa nec defetiscit: Adeo tu tuis quâ voluminum quâ Epistolarum ornamentis occupas propemodum omnia tum studia, tum loca: ut mirari non cessem, quomodo in unius animo ea pateat capacitas. Quinimo in memet conversus blandius me effero, dum me alicuius fieri sentio ab eo viro, qui usu longissimo æstimandorum ingeniorum peritissimus, quasi quodam ἀναμνηστικῶς Privilegio non tam conicit quàm divinatur: Id adeo reapse experior, en qui totus ante frigebam, divino tuo velut incitamento, jam de novo vivit penè ac spirat ingenium: si quid posthac promoveo, sisto me tibi debendi reum. Cæterum nostrum hic vitæ genus gloriosum est pariter & suave: vitam quippe hic traduco in adspectu illustrissimi Præsulis, viri non minus singulari vitæ sanctimoniam, quàm rarâ eruditione nobilissimi: Ei assum à sacris: Hic inter Theologos, perpetuo interjectus, atque in sacro munere juxta ac studio totus, cogor amœnissima illa humanioris literatura oblectamenta omittere, ne dicam abjurare: Oblivionem nostram nil opus argumentis amplificare, scilicet vel ex ipsa defuetudine, atque exotici sermonis perpetuo usu, cernis quam lutulenta fluat oratio, quem non habeat genium: Sed enimvero ita innata tua illa facilitas perspecta mihi est, uti de venia utunque nullus dubitem. Vale vir summe, & me tuæ dignitatis observantissimum amare perge. Utinam tuas lucubrationes (quibus Deus O. M. aspiret perpetuò) publico commodo diutius nolles invidere. Ita tuum nomen apud bo-

nos omnes & cordatos adeoque vel maxime in orbe hoc nostro Britannico summo est in pretio. Sed vale iterum atque iterum Vir πολλῶν ἀντιθέως ἄλλων.

Datum raptissime Nocte concubia. Ex Palatio Dunelmensi xv. Kal. Novemb. Anno Redemptionis nostræ cIo Ioc xxx.

Homo tui studiosissimus & tuarum virtutum admirator,

Isaacus Basirius.

CXXIV.

SCRIPSI ad te ante aliquot septimanas, Vir Clarissime, & adjunxeram alias ad amicos literas, ut & exemplaria aliquot Historiæ Danicæ. Spero recte ad manus has pervenisse. Ego illud scire aveo; tum & quid Denario meo Pythagorico sit factum: an promissam lucem videat, aut visurus sit propediem. Etiam certiore facito, quid ab Heinio impetraveris in negotio librorum, quos parari mihi petieram ex Rutgersii Bibliotheca. Qui has adfert, est Ericus Rosencrantzius, magni Oligeri nostri, qui te in majorem modum amat, filius: adolescens est insignis, à quo magna expectamus. Petiit Pater, ut amicis illis meis commendare eum vellem: quorum cum te unum mihi plurimorum instar habeam, uni tibi commendandum existimavi. Itaque, quod commodo tuo facere poteris, hic ostende, quod me, uti facis, ames, patrem existimes: qui, ut hactenus re amavit, sic deinceps etiam arctiore adfectu complectetur. Habet Ephorum, Joannem Molenium, ut doctrinâ, sic modestiâ pariter, & probitate perinfigni. Ipsa re experieris, me non temerè commendare. Vale, Amicorum princeps, cum lectissimâ uxore tuâ liberisque. Uxor mea liberique, tibi, tuæ, atque tuis plurimam salutem dicunt vero animi affectu.

Sora, ad diem xviii. Novemb. cIo Ioc xxx.

Tuus,

Joannes Meursius.

CXXV.

DEdi ad te literas, Vir Clarissime, mense Septembri superioris anni,

M

8c

& adjunxi aliquot Historiæ Danicæ exemplaria, inter amicos tuâ operâ dividenda; quæ curata recte esse, ex literis Domini Vander-Miilli, quas is xii. Novembris dedit, intellexi. Spero tibi placuisse Historiam meam: Certe hic cum summo plausu est accepta. Nunc Ælnothum quoque edidi; & exemplar ecce tibi. Penè tanti non putabam; sed existimabam tamen, vel levissima quæque mea tibi exhibenda esse. Proxime Solonem mittam, volente Deo. Sed quid sit Denario meo Pythagorico? Si Typographus tricatur; quæso hunc ad me remitte: Ego hic curabo edendum. Semel enim nunc constitui, omnia mea in lucem dare; si non nitidè, ut solebam, & accuratè, saltem quomodocunque potero: potius quam ut lucubrationes meæ tenebris semper damnentur. Et id scio viros doctos multo malle, ut benigne opusculis meis hætenus judicaverunt. Perscribere ad me amici, obiisse etiam diem Swanenburgium, & non paucos reperiri, qui succedere ipsi velint. Scribe quæso, quis successerit; & si quid præterea habes, quod me scire velle putes. Bene vale, amicorum Opt. Max. & salve à me meaque cum lætissima tua uxore, liberisque; quos ex animo Deum rogo, ut divina benedictione sua cumulare deinceps velit. Mea filia tuam salutat amicissime.

*Scribebam Soræ, ad
diem xxv. Martii
c10 10c xxxi.*

Tuus sine ullo dolo,

Johannes Meursius.

Salutant plurimum amici omnes, Rivetus, Cunæus, Vorstius, Heinsius, Barlaeus, Scriverius: tum si quos præterea nosti, quibus non ingrata est memoria mei. Exemplar Ælnothi, quod adjunxi, trade Vorstio, ut is ad avunculum mittat Ultrajectum. Misisses plura; verum tanti non putabam. Fiet, cum Solonem dederò: quem existimo magis fore ad palatum cæterorum amicorum. Scribe etiam quid de libris ex Rutgersii Bibliotheca coemendis, expectare posthac debeam. Iterum vale.

Magni Casauboni literarum, quas ad me dederat, exemplaria, bonâ fide descripta, ad te misi. Puto etiam accepisse. Sed quid sit editio? Fac, si commodum est, ut sciam: nam omnino isthoc aveo. Scripsi ad te per Othonem Rosæcrantzium, filium viri, aut herois incomparabilis,

Oligeri: neque dubito, quin incolumis jam advenerit. Commendabam eum tibi; & fat scio, commendatum omnino habebis, five patris ejus causâ aut meâ. Et ille quidem gratias mihi agit, uti ostendat etiam quanti te faciat. Nam prioribus ad me literis, datis ad diem xviii. Decembris anni superioris ita scribit. *Pro literis Vossio meo nomine scriptis gratias maximas ago. Spero etiam me hac occasione ætiores familiaritatem cum viro isto magno propediem contracturum.* Alteris vero, datis die vi. Martii. *Gratias iterum summas ago, cum pro aliis tuis in filium meum beneficiis, tum quod literis etiam tuis Magno isti Vossio vestro eum commendare voveris.* Si scribendum aliquid ad eum unquam existimabis, ad me mitte: ego porro rectè curabo. Tertium Vale.

CXXVI.

*Viro Maximo Gerardo Joanni Vossio,
Eloquentiæ Professore dignissimo.*

Vir maxime,

Quod hæreas, nec leviter statuas quicquam, in negotio certè difficili, minimè miror: quod verò, à me consilium petas, mirarer meritò, nisi jamdudum id mihi neutiquam novum fecisset, toties exploratus erga me amor tuus. Qui non conscium modò me consiliorum tuorum facit, sed & calculum nostrum poscere consuevit, utut iste nullius apud te ponderis esse mereatur. Et fateor profectò interdum me, liberius fortasse quam par erat, tibi sic jubenti, ubi se obtulit occasio, sententiam meam exposuisse. Nec vereor idem hic agere, nisi quod quisquam, in tam longa peregrinatione, commodi simul & incommodi, cernere valeat, id & tu quâ vales prudentiâ, optimè discerneres, & (quod tecum nemo) filii tui genium, mores, indolem, virtutesque omnes, & vitia haberes perspectissima. Quantum quidem ego juvenem, miraculum præstantem novi, ea est in ipso eruditio, atque is solidioris eruditionis ardor, ut non nisi maximo cum fructu, peregrinationem istam, obire possit. Nec facilè affulgebit commodior oportunitas, quam hæc ipsa, quâ citra peculiare dispendium ullum, in comitatu virorum illustrium, quorum probitas,

bitas, & eruditio, sunt extra dubium; Gallias, Italiamque peragrarè, & Constantinopolin adire, invitatur sponte, quin imò vel beneficio adfecturus, benefactores suos, si tam amicæ petitioni obscuraveris. At verò quousque filius tuus, in Religione fixam mentem, quousque firmum pectus gerat, adversus illecebras, quibus omnis juvenus facillimè solet, præsertim foris irretiri; & præ cæteris, ingenia, quæ cæteris præstant, sunt obnoxia: Id tu melius judicaveris, quam consultor quisquam extra ædes tuas, fuerit ille, vel prudentissimus mortalium. Ego quod non sub alio morum Magistro, quam te Patre, sit educatus hætenus, non possum non optima sperare, simul & credere: tu quousque paternæ sollicitudini aurem præbuerit, & spei tuæ satisfecerit, in vitæ, & morum regimine, non potes non penitus noscere. Ego non lubens desideriis filii honestissimis, & ab ardore procudubio generoso proficiscentibus adverser, nec dissuadere profectionem velim, imò suaserim potius, si eatenus meo iudicio fiderem, ut consilium impertiri statuissem. Id verò non statui, nec suadeo, nec dissuadeo: Atque eo quidem minus, quod intellexerim huc te potius inclinare, ut nondum eat foras filius, sed maturam magis ætatem, & quam unà cum annis offerret sortem Deus, sub oculis tuis expectet. Quod si ea tibi potius mens est, viro prudentissimo, & Patri tenerissimo, quid ego in re tanta dicam aliud, quam Deum Opt. Max. precaturum me, ut tibi & huic, cæterisque liberis tuis, in omnibus velit esse propitius, quod vovet omni adfectu

Hagæ Com.
die 19. Feb.
1631.

Tuus,

G. R. Doubletius.

CXXVIII.

Clarissimo D. G. Vossio, S. D. Johannes Beverwyckius.

Sint Mæcenates, inquit ille, non deerunt Marones; At equidem si Marones forent, credo non defuturos etiam Mæcenates. Neque vanam esse hanc fidem, vel tu V. Cl. documento esse possis, quem in celebri Academia, amplo stipendio doctorem, Attalicis conditionibus, in urbem suam pelliciunt Amstelodamenses. Videbar scilicet prudens Senatus, & verè

virtutis æstimator civitati suæ, quam in emendis, vendendisque mercimoniis, apud gentes, sub utroque fitas Phœbo, latissimam lucris affecerat, indeque rerum omnium, quæcumque universus penè orbis possidet, copia abundantem, reddiderat Atlantis ille, Pleionesque nepos; videbat inquam, deesse adhuc cum choro Musarum, Divam Palladem, quarum instructi artibus beant urbes, earumque memoriam mori vetant, Musarum Antifites. Ante Salaminam ipsam, Neptunus obruet, quam Salaminii trophæi memoriam, inquiebat *οὐρανίου* Tullius: Verùm & hanc obruisset oblivio, nisi eam præcellentium scriptorum monumenta, æternitati consecrassent. Vixere fortes ante Agamemnona, florere urbes plurimæ, quæ omnes, ut canit Horatius,

Illacrymabiles

Urgentur, ignotæque longa

Nocte, carent quia vate sacro.

Quare, an tibi hunc honorem gratuler, cujus virtutibus digna tribui præmia, cum omnibus quibus Musa cordi est, merito lætor, an verò urbi, cujus felicitati *κολλοῦμαι* *ἐνδύμηναι*, non parum dubito. Persuadet tamen singularis affectus, quo te à pueris prosequor, ut officii mei esse putarem, laudare fortunas tuas, & gratulari tibi hunc *ἄγχι* Jovis imbrem, ac debitam tantis virtutibus *Εὐδαιμονίαν*. Nec est quod miretur quisquam, te Athenas nostras, Amstelodamo mutare, cum vel ipsam Seriphon, Athenis illustriorem, reddere queat noster Themistocles. Quis sapiens abhorreret, ac non obviis ulnis, reciperet tanti thesaurum boni? quis adeo Suffenus, qui tanta munera sperneret?

Οὐδ' ἂν ἴσμεν ἔτι Θεῶν ἱερὰ δαΐμνη.

His commoditatibus diutissimè, & felicissimè fruaris, ex animo voveo, simulque gratias habeo, quod humanissimis literis, testari voluisti, acceptissimum tibi esse animum meum, ob multa merita tibi devotum. Vale, Doctor æternum colende, & Beverwickium tui observantissimum amare perge.

Dordrechtii xiv.
Apr. clō Idc xxxi.

CXXIX.

Doctissimo Viro D. Gerardo Vossio,
J. Crucius S. D.

Nominis tui, Vir clarissime, ac Doctrinæ, quodam quasi splendore deterritus, scribere ad te hæcenus superfedi. Sed impetravit à me has qualescunque literulas, cum mei officii ratio, tum tuæ humanitatis opinio. Quorum unum impellit, alterum invitat, ut amicitiam tuam ambiam; & benevolentiam tuam erit, si exambiam. Certe quanquam amici tibi non desint, quos plures virtus tua habet, & eruditio, qui verbis aut literis te compellant, tamen & ego venire in partem gestio, & seria tui observantia, eam à te inire gratiam, qua me, qui in affectu aliis hilum non cedo, in numerum tuorum cooptare haud dedigneris. Ita mihi semper in amore, & in pretio docti, qui insignem qua pollent, eruditionem, cum virtute eximia, sociarunt, ut non minus boni audiant & sapientes, quam literati. Equidem non possum, aut tacere quæ de te sentio, aut non sentire ea quæ de illo debeam, in quo (non blandior) omnia quæ in aliis ferè singula, reperiuntur universa. Cum Poeta hoc dicam,

— *potius fugientia ripas*

Flumina devincas, rapidis aut ignibus obster,

quam viri verè literati doctrinam venerari me vetes. Sed cum mihi non sit ea dicendi vis, ea copia, ut quæ de te sentio, verbis queam exprimere, longeque infra doctrinæ tuæ fastigia subsidant, quæ vel mente concipio, vel cogitatione complector, nec verba minus desint animo, quam rebus animus, prolixius ea emetiri calamo, non est consilium. Loquuntur ingenii tui monumenta, quæ nunc sæculum miratur, & sera aliquando venerabitur posteritas. Loquitur, ut alia taceam, subactum illud, & omnibus numeris absolutum opus Institutionum Oratoriarum tertium nuper editum. In quo, quis & quantus sis, non obscurè prodit; & ita sentiunt, qui melioris doctrinæ gustum ac sensum habent. Loquitur denique & indefessa tua in studiis, hac etiam ætate, *persequenda*, qua te affixum tenes libris, ut testæ suæ cochlea. Quam quoties ex relatu aliorum intelligo, stupeo subitque mirari, virum tantum, tam calide adhuc & *ardens* studiis suis desudare. Sed crescentem sequi-

tur cura & labor eruditionem, ut umbra corpus: nec quenquam minus de se sentire video, quam eos qui supra vulgum sapiunt: nullus quoque minus doctrina satiari, quam quibus Palladis leviter laciniam libasse, non est satis, sed in abditissima ejus adyta penetrare decretum, & ad doctrinæ *arcanum* eniti. Quibus omnibus accedit sollicita & perpes formandæ juventutis cura. Ita enim non assuevisti solum, sed natus es, ut libenter te impendas, sæpe etiam feriis relictis, in commoda juventutis. Etsi quæ seria magis sunt? & aut ego fallor, aut Reipublicæ accedit quicquid in istis, ab institutione conficitur, qui illi crescant, & adsurgunt. Sed cum præceptorum fere mores, in adolescentum migrent ingenia, & ab iis mutentur, quod in omnem ætatem transmittunt, beatam ego illam judico juventutem, cui tua institutione, fini datum. A qua fieri non potest, quin ad magna exsurgant, & ad ampla Reipub. munera, cum laude obeunda. Jacent mehercle, etiam optima ingenia, si desint, qui excolant. Ita fecundissimi sterilescunt, aut sylvescunt, sine cultura, agri. Adde illam, etiam tesqua, frugum luxuriabunt copia. Et quis dubitet in animis, culturam posse, quod in terra? sic tamen, ut quod in terris evenit, validiori aratro, ligone, massa, rastro, ad fecunditatem provocanda sit una, molliori altera, quædam ultro fecunda, levi manu colenda, dum rudioribus altera, ac non nisi per sudorem, magna promittat. Idem in ingeniis. Felix ille qui nihil negotii secum habet; at hic de se melius dici potest meruisse, qui malignitatem naturæ suæ vicit, & ad sapientiam se non perduxit, sed extraxit. Ut nulla malignitas tanta sit, quam non assidua virtutis exercitatio corrigit, & institutio: aut minus disciplina & labor in ingeniis poterit, quam in reliquis industria. Magnos sane viros, perditæ pene ac desperata adolescentia in patriæ salutem natos accepimus. M. Torquatum ingenii tarditas in agrum tanquam in exilium ablegaverat, hic tamen periclitantem Latino tumultu patriam, insigni triumpho restituit. L. Valerium Flaccum, quem Roma projectæ libidinis juvenem, virum omnis postea modestiæ, ac probitatis, exemplum vidit. Jam quid Q. Fabii Maximi adolescentia fecidius? quid vero illo sene ornatius, quid augustius Roma tulit? Q. autem Catuli juventutem deliciis & luxu diffluentem quis credidisset in patriæ aliquando Principem, exsurrecturam? Duos in uno Sylla homines fuisse

se dixeris, turpem adolescentem, & virum fortem: duos etiam in Julio Cæsare, in Vespasiano, Imperatoribus. Themistoclis vero adolescentia quid licentius? at is exinde juventutis suæ maculas, rebus strenuè gestis ita eluit, ut Græcorum clarissimus extiterit, & prælio navali, Persis ad Salaminem victis, patriæ libertatis assertor fortissimus. Plurima generis hujus exempla, omnis retro ætas tulit, ut non sit desperandum instructori, si primis conatibus non respondeat eventus. Præsertim hoc sæculi contagio, & morum licentia, quam tu quoque opinor, vides & doles. Benignior Deus aspiciat,

— *Qui solus opem, qui summa medendi
Jura tenet* —

Ille te, vir clarissime, meo voto sospitet, & Reipublicæ Literariæ diu servet incolumem. Animo interim semper, interdum & literis jungamur, quæ si obtineam, inter reposita & cimelia habebō. De me factum volo, & faciam ubi occasio erit. Re hoc malo ostensum, quam verbis dictum. Vale iterum, & amplius, Academiæ (ea est tua laus) ornamentum, & φίλντᾱ ἀντρίαν.

Delphis 6. Cal. Maii.
MDCXXXI.

CXXX.

Amicorum Opt. Max.

ERgo Amstelodami agis? & conditione quidem adeo lautâ? Ita me postremæ tuæ credere jubent. Gratulor profecto ex animo. Digna est fortunâ istâ virtus tua. De Barlæo inaudiveram jam ante de te nihil: & nil minus, fateor certè, cogitaveram. Sed an Græcas quoque Literas, uti Leidæ profiteris: an Historias duntaxat? illud fac ut primis Literis scire possim: tum quis tibi in Leideni Academiâ substitutus: insuper, quem finem illa urbium duarum controversia sortita fuerit: & quid ab utraq; curiâ judicatum. Denarii mei exemplaria rectè accepi, gratiasque magnas ago pro editionis curâ. Scripseram de Literarum Casauboni editione; ac quæviseram quo in loco illa esset: sed tu planè nil rescribis. Nuper admodum, aliud agens, incidi & in istas duas: quas, si tempestivum est, curabis suo loco inferi. Quod invitas, ut excurram, vellem ut vis; sed hæc tempora non permittunt, insiden-

tibus passim vias prædonibus potius quam militibus. Quam jucundum mihi foret te videre & amplecti! sed lætitiā hanc congressus mox tristitia, postquam discedendum foret, oppido acerbam faceret. Mihi bene est in Dania, Dei gratia; favent proceres, amant docti, nec mutare temerè velim; optem tamen, si sors ita utriusque nostrum ferat, ut corporibus jungeremur usque ad mortem individui, sicut animis juncti sumus: esset mihi id profecto omnium multo jucundissimum: sed permitto ista Deo, qui res hominum omnes ordinat; ejusque sanctæ voluntati me subicio. De Historia amici nostri, idem planè hic Doctorum est judicium. Meam verò adeo probari tibi valdè gaudeo: neque dubito, quæ placere tibi potuit, eam etiam aliis placituram esse. Plura vellem, si liceret coram colloqui. O si tempus aliquando istud nobis donet Deus! quam utrique nostrum isthuc gratum foret! Vale, Vir clarissime, & amicissime, in ætatem usque Nestoris; & salve cum tuis omnibus à nobis. Resalutant Laurenburgius, & Stephanus.

Dabam Soræ ad
diem iii. Junii,
clō Idc xxxi.

Tuus fide optimâ,

Joannes Meursius.

CXXXI.

PUdet, Vir Clarissime, omitti officii cui me tam benigne à te provocatum vel per intempestivam molestiam invigilasse oportuerat. Verum omitti ad tempus potius pudere, quam prorsus amitti pigere præstat; quia tamen video me diutini silentii rationem debere, eam paucis cape. Post illas quibus humanissimo tuo ad amicitie mupia colenda atque continuanda invitamento respondi gratiasque egi, literas: cum plerique hic omnes Panico quodam terrore lymphati, convasatis querelis, quasi publico grassante incendio, aut minitante tectis ruinam terræ motu, mortalium illam scopam pestem (recentis ante quinquennium plagæ etiamdum memores) quæ anno qui jam proximè præterit, Londini metuebatur fugientes inconsulti ruerent urbem egressi; & ipse cum Nobilibus fidei meæ commissis, in Cantium intra vicesimum ab urbe lapidem secessi. Exinde quæsitam à me reverso nec inventam diu mittendi opportunitatem jam tandem nactus, salva tibi omnia sana faustaque cum sperem, tum per

Per literas hasce animi significes, propria illa perque omne ævum perennia precor atque animitus voveo. Impendio magis mihi lætitiæ ripas exuperaturo animo, si virtute tuâ, quâ mereris optimè si volente Deo qui te usque provehat maxime, omnia tibi secunda & prospera esse intellexero. Quæ vota tua, nec minus Reipub. Literariæ nomine concepta (tacitas privati Cultus atque Honoris flammæ jam olim in intimis pectoris mei penetralibus accensas taceo) jubeat firma, fixa, ratæque esse summus ille bonorum Fautor Deus. Vale, vir præstantissime, & me, quod facis aut fallis, amantem redama, nunquam secus merebitur

Tuus,

Tho. Farnabius.

Multum me debere video auctori Satyræ cui nomen *Dii vestram fidem*, cupioque tam honorificæ mentioni gratus esse, siquidem nossẽm cui deberem. Quod si tibi, Vir Clar. is nomine innotescat, hanc, quæso, apud te ineam gratiam. Quin & alteram; si quid habes ad Martialem, cujus secundam cûram, & uti spero, saniorẽ, diu cogitavi, jam apparẽ. Scripsi ad Cl. Heinsum, si qua possit, mihi compareret P. Scriverii epistolicas quæstiones ad Janum Rutgersium; ut & Tractatum de dubiis apud Martialem locis; quorum mentio in subinde facit in Notis suis. Vale, vir clarissime.

Londino Nonis Junii,
c1o 16c xxxi.

CXXXII.

Reverendo, Clarissimo, Doctissimoque
Viro D. Gerardo Joanni Vossio Hi-
storiarum Professore, S. P.

Cum postremum te, reverende, & clarissime vir, hic convenirem, inter alia beneficia, quæ mihi immerenti sponte, & benevolo animo obtulisti, memini Reverentiam tuam mihi etiam promittere emendationes quasdam, & notas, in Satyras Varronianas. Insignis tua humanitas, vir præstantissime, tam me fecit audacem, ut eas nunc à te exposulare non erubescam. Scio vix ac ne vix quidem tantum tibi à rebus gravioribus superesse otii, ut minuta hujusmodi curare, meque

voti mei compotem facere possis. Sed nihilominus rogo, ut Reverentia tua vel eas tantum emendationes, quas in numero habet, quæque accuratorem limam, curasque secundas non requirunt, mihi communicare non dedignetur. Sic amore, atque omnibus, quæcumq; à me unquam proficisci poterunt, officiis vadatum me, atque obstrictum habebis in æternum, & ad pristina in me collata beneficia, haud exiguus cumulus accesserit. Oro etiam atque obsecro, ut epistolæ illæ doctorum virorum à me descriptæ, quas Reverentia tua hinc discedens Amstelodamum secum asportavit, data occasione, ad me remittantur, quò alias iis, per otium adjungere, & Centurias aliquot colligere queam. Denique Reverentiam tuam etiam atque etiam rogo, ut eadem operâ, *αὐτοῖς* E. pistolæ D. Ursini, in qua se filiolo auctum conqueritur, restituat. Nescio enim quo fato, hujusmodi doctorum virorum nugæ, haud aliter, quam seria me delectent. Si Reverentia tua exemplar ejus desideret, & à me describi velit, occasionem clarissimo Domino inserviendi, quanquam in re levi, & exigua, me nactum esse gaudebo, & quamprimum me id missurum recipio. Vale, vir humanissime, Domine, & amice plurimum colende. Saluta quæso à me, amicissimè uxorem. Deum precor, ut te, tuamque familiam quam diutissime incolumen servet. Vale iterum, vir honorande, & me quod facis, quamvis indignum, amore tuo complecti perge.

Reverentia tuae addictissimus

Lugd. Batav.
iv. Id. Septem.
anno 1631.

& ad omnia officia paratiss.

Jacobus Lydius B.F.

CXXXIII.

Salutem in Christo.

L Iteras hodie tibi debeo binas: totidem enim accepi nec reddidi. Sum in hoc genere æris solvendo paulo tardior. Et certè aliquid tantum est quod possim solvere. Tanta enim mole negotiorum gravatus sum, ut aliquid sit & sapius, quod mihi met-ipsi debeo nec solvere possum, quidni ergo & amicis aliquando? Et quod nunc in hoc scribendi officio tibi non desim, gratias ago stylo huic contractiori, qui hoc unum novit, multa paucis concludere.

Intelligo

Intelligo ex utrisque literis tuis metum injectum esse Lugdunensibus, non solum ne te amitterent, sed & ne Academiam: saltem ne Professores quosque digniores ad se allicerent Amstelodamenses. Eos autem Primores Juvenum facile sequuntur, sicut illi præmia ampliora. Et quid sine his Academia? Superest ut vel stipendia adaugeant Leidenenses, quod in bonum cederet Professoribus: Aut ut Professores Amstelodamum concedant, quod malum minatur Academia: Quin & civitati etiam, quæ ex frequentia Studentium ditior facta, nec cupit scio lucrum dediscere. Reliqua, in tantum te spectant, cupio audire, sed quum causa finita est, & quum statio tua fixa.

Filium tuum salvum, & reducem gestio videre. Hoc bene est, sed male quod abiit me nesciente. Quid? Ut ad te, quem tanti facio, quanti spero nosti, abeat filius tuus sine me? Iterum (si quæ occasio detur) non faciet spero. Et unice probo quod tam cito remiseris. Non quasi de progressu ipsius, dum apud te dubium ullum, sed ne in Collegii statuta peccaret.

Si quæ parata habeas, nolim ut abscondas. Nosti quid sit, Lucerna sub modio. Nec erit male posita opera, si scripta illa quæ ut antiqua sunt, ita ante hoc sæculum pænè antiquata, è pulvere suo extrahas, usque aliquid lucis addas. Semper tamen inculco Baronium, & eò magis quia Ecclesia (sic enim scribis) summa votorum tibi.

Fran. Junius rediit in Britanniam citius multo quam opinabar, utpote qui satis novi quo animo in Gallias profectus sit.

Attulit secum Literas ab amplissimo viro Hugone Grotio, ad me datas. Gratissimæ illæ (virum enim illum doctissimum semper agnovi) sed rescribendi orium non datur. Nota etiam mihi probitas & eruditio Junii, nec opus ut à te habeam illum commendatiorem. Scias velim, me & tui & Grotii & sui causa facturum quod possum.

Victoriæ Principis vestri gratulor. Cedat precor in gloriam Dei, & bonum Ecclesiæ. De prudentia ipsius, & virtute militum, non est apud me dubium; sed si iterum & in mari non rubro Israël prævivit nebula, date quæ sunt Cæsaris Cæsari, & quæ sunt Dei Deo.

De filio tuo iterum. Et iterum si placeat. Nam cur non & hic duplex primogeniti portio? Certè mihi curæ erit, quam diu ipse sibi. Tu eum hortare ut facis.

Et quo magis te & tua in eo conspexero, eo majori cura me eum profecturum spondeo. Quod reliquum, te & illum, & tuos, Deo fovendos commendo. Et quum fuerit opportunum te rogo, ut nomine meo virum illum spectatissimum Hug. Grotium, eisque pro literis per Junium missis gratias agas. Hoc facto scias me

Amicum semper tibi fore

Novemb. 7.
1631.

Fidelissimum,

Guil. London:

CXXXIII.

*Clarissimo, & Eruditissimo Viro, Dom.
Gerardo Johanni Vossio, Hist. &
Lingua Græcæ Professori dignissimo.*

Vir Clarissime,

SUetonium hunc, scriptorem, ut ego quidem existimo, & tu non ignoras, longè præstantissimum, ac cura nostra, si non nitidiorem, certè non pejorem redditum, jam primum ad te mitto. Per occupationes est, quod non potuerim maturius. Animadversiones nostræ, non ita multæ, aut elaboratæ sunt; sed ejusmodi tamen, ut putem tibi homini doctissimo, & antiquitatis amantissimo, non ingratas fore. Quam malè Author hic cum optimis quibusque, à Librariis habitus sit, nemo paulò humaniorum ignorat. Hi ingeniosius alieno opere plus satis esse voluerunt, omnia immutantes, trajicientes, omittentes, pro libitu, ut visa abundare, aut hiare quælibet. Reliqui Augustæ Historiæ scriptores minores jam sub prælo sunt. Pars eorum tertia, in qua illi sex, qui conjungi ferè solent, leguntur, carceres mordet. Eam Claudio Salmasio, viro, meo quidem judicio, consummatissimæ eruditionis, inscribere est animus, ut hac via aditum mihi ad amicitiam ejus sternerem. Præscriptio nostra ejusmodi est: *Excellentissimo Viro, Claudio Salmasio.* Quod ipsum, an pro dignitate ejus, amplius satis sit, tu non ignoras, qui eum propius nosti. Velim hac in parte, tuo consilio nos juves. Quod si feceris, facturum autem confido, beneficium hoc tuum, ut & alia in me merita, æternum, & publicè aliquando, si otium Deus, & vitam longiorem dederit, agnoscam: specimen hoc

hoc animadversionum velim per otium evolvas, & si quid ineptum, aut alienum in iis sit, pro autoritate tua castiges. Vale, vir eruditissime, & me ama, qui te efflictim. Reverendissimus avus meus, fratres, & omnes nostri, te, tuosque omnes quam officiosissime saluant. Ad filium tuum Matthæum brevi scribam: habeo quod ejus interest non ignorare.

Dom. vestræ dicatissimus,

*Rapin Lugd.
Bat. 8. Nov.
clō Idc xxxi.*

Marcus Buxhorn-Zuerius.

CXXXV.

*Juveni Ornatissimo, Eruditissimoque
Dionysio Vossio.*

Juvenis ornatissime, eruditissimèque,

Binas tuas Epistolas, alteram xxvi. Octobris, alteram x. Novembris, hoc loci accepi, nec sine lætitiâ ingenti, & deprædicatione felicitatis meæ. Felix enim sum, quia Epistolis tuis dignus, ex quibus quantum me ames certus reddor. Neque ego de diligentia tua, neque tu de affectu meo, dubitabis unquam, qui tanta sumpsit incrementa, ut rumpi amplius nequeat. Ad me quod attinet, scribendo non defui, primam Hamburgo, alteram Lubecâ, duas hinc expediavi, adeo ut hæc quinta sit Epistola, quam duplicavi: quas omnes numne acceperis ignoro, sed scire maximopere aveo; facies mihi rem gratissimam, si eo de negotio perscripseris. Jam ultimæ solvunt naves, post quarum discessum, scribendi omnis deerit occasio. Itaque hanc ultimæ volui officio Epistolæ fungi. Non dubito, quin petitionem perceperis meam, & te ad iter huc suscipiendum præpares, quamobrem ejus rei mentionem ampliorem injicere supersedeo, dicam modò quod res est, tibi profuturum iter istud. Videbis Livoniam, Moscoviam, Prussiam, Sueciam, Germaniam, quarum te non pœnitebit adspectus. Iter est facillimum, tempus breve, at mihi Livoniæque utile; illud quod eruditionis tuæ fieri particeps possim. Hoc quod nihil erit Liv. gloriosius, quàm tam divini ingenii juvenem habuisse. Nullas admittam excusationes, nisi legitimæ fuerint, & ejus generis, adferre te nullas posse, jam tum scio. Historiam enim tuam, quam intra

breve tempus, absoluturum te scribis, versionem Priscorum similem, Typographi fidei tuto committere poteris; ita ut non opus sit, ea causa professionem differre. Sunt & alia quædam, quibus te excusare fortè posses; sed levia sunt, reque eo esse ingenio scio, ut tot flagitantium, imo ipsius Livoniæ expectationi satisfacere, quàm ea considerare malis. Omnes enim, qui hîc sumus, in spem certissimam adventus tui venimus; nihilque restat aliud, quàm ut votorum compotes fiamus. Itaque claudio, & Deum veneror, ut tibi mentem ad iter proclivem, ima ex bonitate largiatur, & te sanum incolumemque hûc deducat. Vale, amicorum jucundissime, & hujus tenuitatem Epistolæ, precibus meis condona. Claudio iterum, voveoque ut tu viva sis Epistola, quæ videas, quanto cum desiderio te expectaverim, quodque ad supremum diem sim futurus

*Derpta Livonum
xiv. Nov. styl. vet.
clō Idc xxxi.*

Tuus totus,

Jacobus Skytte.

Si huc veneris, habebis Professionem extraordinariam, in Academia hac, quam tot mensibus, quot hîc manere integrum tibi fuerit, retinebis, in quacumque voveris facultate, vel honorariam, vel quacumque conditione.

CXXXVI.

*Clarissimo Viro, D. Gerardo Joanni
Vossio, Eloquentiæ Professori.*

Vir Clarissime,

Prelegit mihi è Literis illustrissimi Molini, ad se scriptis, Dominus Thadæus Vicus, ferè id quod inde excerptum, vides hic tibi transmitti: ferè inquam; nec enim si conferatur cum Archetypo, in omnibus, sat scio, respondeat. Addidit, quod videam nihil, verùm omisit quædam, quæ imprimis ego, dum legentem assequebar, notaveram. Uti quod verecundè admodum, & magno observantiæ testimonio, proficitur hîc ipsis literis, vir illustrissimus, non audere se jam tantopere pro transmissio specimine tibi obstrictum, ultra esse molestum, aut importunum; ideoque poscere, ut Vicus tanquam motu proprio, nulla Molini id petentis, mentione facta, aut per se, aut per Dominum Vandermyle, aliumque

proux

prout consultum judicabit, ulteriorem dicti operis perfectionem efflagitet. Quod Vicus omiserit, hic in eo quod vides apographo, certè nescio. Caterùm id ego quale accepi lubens transmittit; ac ne quid fortè, in Italico Idiomate, legentem moretur, subnectam interpretationem Latinam. Quamquam verò confido supervacaneam istam operam meam fore, malo tamen in hanc partem, si peccandum est, peccare potius, ne defuisse videar quantillum, id est, laboris, aut tædii. Ergo habe.

Tenor in Literis à D. Molino Venetiis 14. Novemb. ad Secretarium Vicum, Hagam.

Habui à Domino Vossio compendium, in materia Archivorum, quo elegantius eruditiusve desiderari nequeat, meisque ei literis, testatum facio, quantoperè id mihi fuerit acceptum. Verùm quoniam mihi scribit, non habuisse se plus temporis, quam diem unicum adimplendo isti operi, propter festinationem quâ urgebatur, rogo te procures, quo poteris me die opportunius, ut idem D. Vossius, insigni sua virtute, gratiam hanc perfectam reddat; Tractatum istum dilatando, & ampliando, præcipuè, quod attinet considerationes commodi, & incommodi, quod & in privatos, & in Principes, potest redundare, ex eo quod habeant, aut non habeant, habeantque bono, aut sequiori ordine composita Archiva: Videasque si inducas eundem D. Vossium, ad plenam operis perfectionem, quæ certè res erit pulcherrima, atque eo magis, quoniam non est, quod ego quidem sciam, ab aliis pertractata. Ex textura exigui illius specimenis, quod ad me misit, magni valoris D. Vossius, tam mihi videtur concinnè ordinata, ut perfectionem, uti dixi, mereatur, &c. Subjungit postea Vicus, missum ad te iri literas à D. Molino, per D. Vandermyle. Petiit à me ut si quid cognovero, non abhorreere animum tuum ab hoc labore, id ei significem, quo latum D. Molino nuntium mittere & ipse possit. Si octiduo absolvi nequit, rogat viginti dierum horas subcivas impendere, ne graveris, idque cum maximè erit integrum, quod & memini dum me recolo, in suis literis dicere Molinæ. Ego de meo addam nihil, certus me frustra calcar additurum, five te impellar, five non impellar ad hoc studium, tantum viri stimulus; qualis est omnibus eruditis, & tibi præ omnibus, qui illi & præ omnibus, Molinus. Tantum rogo, ut si te operi accingas, nosse id liceat, uti satisfaciam D. Vici, & sic quoque

ipfius illustrissimi Molini desiderio. Vale vir clarissime, cum lectissima conjuge, & erudita liberorum familia, bonisque omnibus frui, quæ tibi precatur

*Hagæ Comit.
xii. Decembris,
cl. 1631.*

Tuus,

G. R. Doubletius.

CXXXVI.

Clarissimo Viro Domino Gerardo Joanni Vossio, Professore celeberrimo.

Vir Clarissime,

Stendit mihi in alteris illustrissimi Molini Literis, propensissimum tanti viri, erga te adfectum, & jam ante abundè tibi exploratum, is qui summoperè te colit Thadæus Vicus, & inde allatas quas vides chartas, ad te mitti postulavit, quod & ipfius, & tui causâ facio, quam lubentissimè. Molinus scire desiderat, cui nunc potissimum operi impendas mentemque manumque, & Molini vice Vicus iterum obnixè petit, festinari illud de Archivis responsum, de quo scripsi nuper. Pasquinius, quid de Veneti oratoris martyrio voluerit, difficile sit conjicere, nisi ante noris Romæ excessisse, mandato Senatus Veneti, Legatum qui apud Pontificem erat Pisaurum, eo quod Thadæus Barberinus, urbi Romæ à Patruo Pontifice Præfectus, & sibi, & Legatis cæterorum Principum, præripere locum tentasset, quem Legati Principibus suis, præ omnibus, uno Papa excepto, deberi de jure perpetua possessione stabilito contendebant. Cùmque inde enata essent publica dissidia, & Veneti Legati veredarius armatâ manu per Thadæum immisâ, liberatus esset ex ædibus Sancti Marci, Legato inessis, in quibus ille custodiebatur, quod emptus à Thadæo crederetur, uti ipsi cederet obvius. Legatus rem omnem serenissimæ Reipublicæ nuntiavit, ac protinus mandatum accepit, domum revertendi, secutique exemplum Legati cæteri, Urbe excessere omnes, atque in Suburbanis degunt, usque dum singuli intelligant à suis, quæ sit Dominorum suorum super hac re sententia. Nunc ultra non morabor tua magis seria, quam mea sunt literæ. Deum precor, ut tibi, & familiæ tuæ æternum faveat. Vale.

*Hagæ Comit.
xv. Decembris,
Octob. 1631.*

*Tuorum virtutum Cultor
omnibus officiis,*

G. R. Doubletius.

Memor sis rogo Grotiani quem emi mihi petieram libri. Iterum vale.

N

CXXXVII.

CXXXVII.

Salutem in Christo.

NUdiusquintus scripsi ad te, Vir clarissime. Nuncius tum & Junius tuus, & Windebankus meus. Quum literas illas ad te dedi, prorsus nihil rescivi de filio tuo, nisi quod omnia bene Cantabrigiæ. Quum ecce Literæ ab amicis meis intimis, & qui tibi filioq, optimè vovent, ad me properant. Clamant filium tuum, non otiosum tantum, sed & penè dissolutum. Deus bone, qualis mutatio, & quam inexpectata! Doleo valdè, sed tua interest, ut quam proximum rescires. Aiunt illum, amore puellæ, & famæ non satis integræ (utpote degentis in diversorio) captum esse. Si matrimonium contrahat & tale, quantus dolor! Statim in ipso Nunc literarum istarum scripsi ad illos, ut omnia facerent quæ ægrum filium tuum possint sanare, aut saltem impedire ne sic miser pereat. Societas enim quâ fruitur in Collegio Jesu, illa altera Societate perditur, & unde violam quæret nescio. Consilium dant amici, nec aliud ego, ut tu quàm citissimè tanquam aliud volens filium accersas, celerimum reditum promittas, sed quum in tuam, i. e. Patriam potestatem devenerit, potes alia & salubria consilia capere. Num Junius abeuns, eum non adiit? Num adiit, & nihil est suspicatus novi? Deus bone, quàm malè me habet animus! A tempore quo à te redux (diu id mihi videtur) me non invisit. Quum hoc audio, jubeo literas hæc meas volare, at tu jubeas reditum filii tui, saniora spero consilia inituri quum te viderit. Vale, & me ama, ut mihi molestum est hæc scribere.

Tibi amic.

Jan. 4. 1632.
Stylo nostro.

Guil. London.

CXXXVIII.

Clarissimo Viro Gerardo Vossio, Præceptoris æternum observando, S. D.

IN causâ vestra Lugdunenses causâ cecidisse V. N. focer meus ex iudicibus unus mihi reulit. At se provocare ad Ordines huic, credo & aliis, scripsere civitati. Si rectè atque ordine olim virtutem vestram coluissent, & comitem tantæ eruditionis Majestatem conservassent, nunc non ne-

cessè haberent sublatam ex oculis invidere melioribus. Neque hic subsistunt, sed etiam si Dis placet, summo Heroi, & nunquam satis laudato H. Grotio, manus injicere, (ô flagitium) tentant, aliasq, civitates, seu potius istos, qui eadem viâ ad Magistratum grassati sunt, in consensum trahunt. Hi mores, hæc tempora, vix obductam cicatricem refricant acerrimi doloris, quem cepi ex obitu, heu nimis immaturo Magnanimi Blyemburgi, qui multis quidem flebilis occidit, nulli quam mihi flebilior. Jam fermè moriens me vocat, mi Beverwice, inquit, jam diu ex vultu indice animi dolentis collegi quam res meæ depositæ essent. Equidem confusus artium, & affectui, speraveram ex hoc malo me emersurum, sed quandoquidem Deo aliter visum, ego, quo nunquam amittes amiciorem, pro tuis in me officiis, gratias habeo immortales, & filios (adstabat major natu) æternum tibi relinquo obligatos. Quid mihi, Doctor utriusq, nostrum amicissime, animi tum fuisse censes? ac quomodo ista, & istiusmodi plura audiendo temperare à lacrymis potuerim? Certè vix nunc hæc recordatio finit, præsertim hac tempestate, quâ rebus viri incomparabilis, aliquod pondus in hac saltem urbe, afferre potuisset. Qui è Magistratu heroicæ ejus virtutes colunt, cæteris ferè numero pares, gemere, virtute, prudentia, eruditione, longè superiores. Immo absque uno foret, quem nosti,

ἂν ἔτ' ἂν ὁρίνης εἶναι θαλάσσιον, ἔτι νόημα
 Ἰνα μὴ δὴν εἰς ἐνδύαν —

Cuncti animis & votis, faverent rigido, veræ virtutis custodi, neque paucis probatus potius, quam multis foret.

Qui è nostris hodie, (non aderat nuper ὁπλῶς Καλβετῶ φιλοζωῶν) ad conventum Ordd. Præfecti videbunt, ne quid Heros ab isto detrimenti capiat. Quin & ipse mihi affirmavit, se magni facere virum magnum, & gratum sibi fore ejus adventum, si autoritate publica, ut potuisse referebat, venire maluisset. Quis non indignetur Batavos inveniri, qui Bataviam eo cive carere velint, qui eam immortaliter illustravit gloria, æternum Patriæ, & seculi decus.

Τὴ δ' ἡτοι καὶ ἐστὶ δόξαι τ' ὁμοῖον ἡνός.

Cum ut Zelandiam, & ultra omittam, in Gelria multos sibi faventes habeat, necnon in Frisia, inter quos affinis meus Veltdnelius, qui ex collegio Ordd. gener. legatione, ad Moscoviæ Ducem functus, iterum concii-

concilio status adscriptus est. Hujus, communis foci senatoris, & meo quoq; nomine rogo (nam ibi esse ex fide dignis accepi) amicissimam ipsi salutem dicas. Plura quæ tutò literis non committuntur, utinam in finium tuum effundere liceat! Non occiderunt omnium dierum soles. Interim vivat, rarum probitatis, & eruditionis exemplar, vivat, & æternum lætus bona tempora ducat; atque tu cum illo, V. Cl. cum Cl. Barlæo, aliisq; literarum, ac Patriæ columinibus. Quod si amare non desinis, hunc Vossianæ Disciplinæ Alumnus, id quæso ne silentio testatum facere velis.

Virtutum tuarum

Dordrecht 12. Jan.
c10 Idc XXXII.

cultor observant.

Joh. Beverwyck.

CXXXIX.

*Viro Clarissimo, & Eruditissimo Gerard.
Joanni Vossio. S. P.*

Nondum opinor excidit animo tuo, Vossi excellentissime, nostrum Amstelodami colloquium, cum vii. Kal. Sextil. præteriti anni, album tibi meum offerrem. Is ipse jam impensè te rogo, æquo animo feras, me his tandem literis mei apud te memoriæ renovare. Locum certè amplius, pudori relinquere nullum potui, qui me à scriptione, ut olim Leydæ a crebriori accessu retardaret. Satis superque, novi tuam humanitatem. Luculentam ejus erga me significationem dedisti, cum me Lugduni, adhuc hærentem, publicè disputantem, benignè audires. Nunc Germano fretus candore tuo, me immeritum, ut in amicorum numerum recipias, obnixè precor. Sanè quanta hic omnium sit expectatio de tuis laboribus, in historia Ecclesiastica, dici non potest. Majorem ego, φίλω εἰς πατρίδα γάλλω, reverlus excitavi. Adeo ut si liberare publicam fidem velis, opere nondum integrè perfectò, *ὑποασημαίνω* quodam nos beare opus sit. Ita omnium hic in te oculi conjecti sunt, ut qui solus es, quem Herois Casauboni τῷ μαχεύειν, partes adversus *ὑποσημαίνω* Loiolitas suscipere æquum est. Nemo enim te melius potest id præstare. Cæterum *δὲ δαυμάσιον κήρυξ*, scito me non sine consilio Clariss. Lindenbrogii, (qui te ut plurimum salvere jubet) commentariis illustranda, τὰ Ἀγαπήντι & Ba-

σιλῶν περιγινέτω κεφάλαια, mihi proposuisse. Illius ad Imperatorem Justinianum, hujus ad Leonem filium. Si singularem illam tuam, quæ τὸ φιλομαθὲς promovere soles, benevolentiam mihi præstiteris, & nonnullis riteam editionem, ut faciliè potest capacissimus omnis eruditionis tuus animus, ornaveris, *δαυμάσιον δόν* me tibi devincies: fortè in insigni illa domestica tua, aut alius viri docti, Bibliotheca, quod scias, latet manuscriptum aliquod, aut ipse etiam, qui nihil ignoras, nihil non perlegisti, quædam monenda habes.

Certè si MS. alicujus copia mihi fieri poterit, idoneos sponsores dabo, qui me bona fide redditurum spondeant. Ignosce, Vir literatiss. Totum illud imputabis tuæ humanitati, quæ me adeo impudentem facit. Ego quidem summæ tenuitatis mihi conscius, non facile, in his studiis quid tentarem, nisi consilio amicissimi nostri Lindenbrogii id facerem, qui & Parisiensem utriusque Editionem, & excepta ex Scholiis Moschopuli in Agapetum, mecum communicavit. Descripsit ea Florentiæ, ex MS. quodam Bibliothecæ Marcianæ. Taceo gravissimas, quæ me incitant, causas, quibus obtundere animum tuum, religio est. Negare velle, & magistratus nostri, & optimorum hujus urbis virorum, de me aliquam esse spem, quem Parens jam quinto ætatis anno studii iniciavit, ἀποπύτατον. Tentandum igitur aliquid quod & ex re mea erit, & erga literas optimas, immanè ardens studium testabitur. *Μὰ τὸν Διὸς*, quam ego delector studio humaniorum literarum: in quibus ætatem huc usque ferè contero. Quo nifus fundamentò, animum sapientiæ præceptis compositum, & excultum, posse tandem aliquid in Ecclesia, cui me devovi, utile præstare spero. Utinam *δὲ Διὸς & δαυμάσιον* Vossi, rivulum tuæ benevolentiae, in me derivares, quem ego tantoperè admiror, colo, veneror. Athenienses publicis execrationibus fanciebant, ne quis ulli unquam viæ ignaro, indicium denegaret; tua id postulat excellens, & singularis scieritia, Germanus candor præstat, ut φιλομαθὲς neminem, frustra dimittas. Sed quæso, Vir eruditissime, quo sensu dicit Agapetus, *Τμήματι δ', οὗ διὰ δάματα περιέμειναι*. An ut apud Terentium, neglecta jacet, ut Sophocles in Ajace accipit, pag. 106. Edit. Henr. Stephani. An quia agunt excubias, & præsidii causa, ut in Principum aulis locati sunt: *τμήματι β. πρὸς κήρυκος πολιτεία, & κγ. ὑπὸ τῷ Διὶ, & παντεφύρου βλέμματι*. numquid novum hoc est vocabulum? Basilus etiam *τμήματι εγ.* Imperatori

ratori ὅτι ποδὶν τὸ ἐρυθρὸν ὑπόδημα tribuit. Sed quando in usu, Imper. rubri calcei? quibus etiam meretrices, & delicatiores mulierculæ, utebantur. Germanicum nobis est proverbium. *Es gehört meh, zum dantz, dan ein pah, rohter schuhe.* τί-δρα alias ἱρυθῆς, sunt punicei calcei; quales erant triumphalium virorum. Albanos olim Reges, puniceo pedum tegmine delictatos esse, Dion. Cassius docet lib. 43.

Expone quæso de his mihi quid sentias, Vir eruditissime; nec admitte, ut frustra ad fores tuæ humanitatis, & benevolentiae accesserim. Scio te germanis, & antiquis adhuc esse moribus; neque indigere eum amicis, quem omnes docti suspiciunt. Ætatem, & ipse meam agnosco; nondum enim xx. ætatis annum sum egressus. At eleganter Thebanus noster Vates, quem jam xiii. ætatis anno, interpretabar, nec sine Doctorum voluptate legebam. *ἑὸν γὰρ καὶ νόμις ἐν ἀνδράσι πολλὰ δαυὰ, καὶ ἑστὶ τῆς ἡλικίας ἐοικὸς ἄνθρωπον.* Etiam hoc novi, quantum à te omnis fastus absit, qui bonos non ægrè admittit. Apud te, virorum omnium Doctissimi cepti veniam fortè impetro. Paulum sepultæ distat inertiae celata virtus. Si non subtilis ingenii, diligentis tamen, & φιλομαθὲς testis erit labor. Hæc in finem gratiæ tuæ ὁ δαυμνιον effundere libuit. Tui enim solius, πάντα κελὶ ἐργάσαι. Vale eruditissime virorum nostri seculi, me totum tuum ama, & literarum, quando vacat, alloquio dignare.

Datum feliciter
Hamburgi
clō lōc xxxii.
xv. Kal. Februar.

Diffusissimæ eruditionis tuæ
Germanarumq; virtutum
æternus cultor,

Bernhard Damke.

Salutant te officiosè, & salvere jubent, D. Frider. Lindenbrog. & parens meus, qui inter primos colit.

Vir optime, ne fortè decipiant te Tabellarii, scito nos semper pro literis hic solvere; ut non opus sit duplum illos accipere.

Si me ut spero, responsione dignatus fueris, literæ curabuntur seu reddentur Hamburgi, qui commorer apud colendiss. Parentem meum, M. Joachimum Damke, Pastorem Templi Nicolaitani.

CXL

Salut. in Christo.

Vir Clarissime,

Admodum gratæ mihi sunt literæ tuæ, ut semper, ita nunc præcipuè. Diu enim expecti brevem, sed magis dilucidam sententiæ Godescalfianæ Expositionem, quam ullibi adhuc mihi videre contigit. Et certè lis illa de gratia & libero arbitrio eo inauspicatiùs mota mihi videtur, quia vix ulli, qui à primis ante S. Aug. Patribus recesserunt, tam feliciter rem aggressi sunt, ac priores illi. Nunc literæ tuæ, & chartulæ inclusæ, mihi & votis meis abunde satisfecerunt, & gratias ago. Si quæ tamen sint, quæ post uberiores disquisitionem prolixius placet scribere, mihi certe pergratissima futura sunt.

Exercitationes Grammaticæ tibi forsitan (ut res tuæ sunt) necessariæ editu, aliis proculdubio utiles, mihi acceptiores futuræ, nisi te à Baronio avocarent. Summopere enim cupio historiam veteris Ecclesiæ à te aut compositam, aut limatam videre: id est, à præjudiciis, & contrariarum factionum interpolationibus liberatam.

Gratulor tibi de Dionysio tuo, quod annum vix egressus vigesimum tam alta sapiat. Si Rabbi Mos. Maimonidis transferre ex Hebræo cogitat, & Author placet & Argumentum, sc. de Idololatriæ Exordiis & Progressu. De nomine cui inscribere decrevit opus tam insigne, id mihi voluptati erit, quod placet vobis. Interim carmina ejus quæ geminum implent Panegyricum, Principi Araufionensium debita, avidius perlegi, sed (ut soleo) propere nimis præ negotiis, quæ me non à studiis modo, sed & à meipso divellunt.

Et utinam hic laus Dionysii terminus esse potest Epistolæ hujus, sed Johannes id non patitur, nec literæ tuæ per Junium nostrum allatæ. De amoribus illis si antea audivisti, eò doleo magis, quod mōitis tuis non dico spretis, neglectis tamen, ullam cum ea consuetudinem ulterius foveret. Si nolit uxorem, cur vult consuetudinem? Cur famam placet alere in proprium dedecus? Si extremæ dementiæ sit projicere se infra sortem suam, certe vix minoris est id agere quo magis fama frustra proscindatur sua. Negat hæc omnia audio, & spero vere. Sed vera sint illa de nuptiis, five non, certum est & horas male collocare bonas, & æs alienum contra-

here,

here, quæ duo, sola ut sint, ferenda non sunt. Hæc autem ita se habere, potes è chartula hac inclusa scire. Clausula est literarum Doctoris Beli, Collegii Jesu apud Cantabrigienſes Præpositi, quas nuperrimè ad me miſit. Belus Lingua vernacula scripſit, literas ejus Latinas fecit inelegantior calamus.

Junius statim à reditu & me conſuluit, & Cantabrigiam petiit. Rediens inde me frustra quæſivit, ut quem negotia alibi magis detinent quam domi. Id tantum ſervo meo concedidit, intra triduum aut eo circiter adfuturum filium tuum. Ecce paro literas ſed nimis propere ſcriptas, & de filio tuo nihil habent quod addant. A Junio ea ſpero accipies. Si bona ſint, tecum gaudeo; ſi alia, & non peſſima, potes id agere, Deo propitio, ut quum ad te venerit filius, redimatur quam queas minimo ſive damno, ſive periculo. Gravia certè hæc ſunt, ſed ad meliorem ſe frugem recipiet Filius, ſi forte (ut fertur) aberravit. Deus te diu incolumem ſervet tibi, tuis, & mihi

Nominis & meriti

Feb. 15. 1632.
Comp. noſtro.

tui Cultori,

Guil. Londin.

Hucusque filium tuum expectavi frustra. Cantabrigiâ Londinum deceſſit antequam ego has literas ſcripſi. Si alas mutuatus eſt quibus ad te volet bene eſt. Sed timeo omnia. Iterum vale.

CXII

*Clariffimo Viro D. G. Voſſio, Hiſt.
Profefſori, Jacobus Crucius S. D.*

JAM diu factum, cum ad te nihil dedi, Vir doctiſſime: ſed nunc ecce compellor haud invitus, ad tibi ſcribendum, ab illo qui juvari ſe commendatione mea, apud te cenſet, & qui amari apud nos, ſpero & apud vos, præbuit ſe dignum. Adoleſcens eſt quem vides, Seminarii noſtri planta, Scholæ diſcipulus, qui me juventæ ſuæ habuit Doctorem & Directorem A. R. NOLDUS VANDER-DUSSEN, gente Batavus, origine Delphenſis & ex Patriciorum familia: qui indolem, animumq; ad omnem literarum ac morum elegantiam direxit, linguarum & Philoſophiæ tyrocinus egregie deſunctus: ſed qui raras inge-

nii dotes velo modeſtiæ involvit. Ætas tenera adhuc (trium vix luſtrorum) & liberali verecundia, qui virtutis color, ſe bonis omnibus commendat. Reliqua, quæ latent, elicient anni, & inſtitutio. Mores, & judicium, virum pollicentur aptum ad altiora promoveri. Ab umbra igitur ad lucem ſe transfert, à pulveris ſitu, ad liberiorẽ ſcholæ veſtræ illuſtris auram, & à privatis ſubſelliis ad publica. Viſurus, imo collaturus cum doctis, in celebri veſtro Athenæo quæ vidit, aut legit; tu viſurus quoque qui humanitate & affectu in liberalia ingenia emines. Me autore ſe transfert, & itineris omnem fructum meis conſiliis hîc metietur. Tu, vir magne, benigno vultu, hunc adoleſcentem excipe, rege, dirige, ſurgentem ad magna. Jam literis amœnioribus operam daturus, tanquam ſolidioris doctrinæ fundamentis; ut conquiſitis abunde his literarum deliciis, Aſtræ aliquando ſtudia jungat pietati. Quicquid in candidatum noſtrum præſtititiſ à parentibus haud ingratis, cum ſcœnore referes. Ipſe dignum ſe favore tuo, ac benevolentia (ita ſpondeo) præbebit; ego vero in hoc Meo beneficia accepiſſe fatebor, & quibuſcunque potero, officiis rependam. Ex ejuſmodi ſurculis arbores educandæ; ex uberi hac ſemente, meſſis, quæ in Republicam & Eccleſiam ſe diffundat: Tu nunc in ſurculum benevolentia tuæ rorem, parentis & mea cauſa. Sic vale, Vir clariſſime, tuis quoque votis faventem habere Deum, ſi huic, quem ſiſto, faveris, imo habe, uti faveas.

Delphis in Muſæo
noſtro 12. Martii,
M DC XXXII.

Doctiſſimo Barlæo Collegæ tuo, ſæculi noſtri Poetarum facile Principi, ſalutem adſcribo. Sed tuæ quando tandem ad me literæ? Si teneam, quis me felicior? inferam velut gemmas Epistolari meæ telæ, quam nunc pertexo. Pondus proculdubio & pretium eæ addituræ huic operi, prælo brevi tradendo, ut ſi non meo, doctorum ſaltem nomine, commendetur.

*Cupio, opto, exſpecto,
Parentes ego dexteræ
Odi, ſperge roſas.*

Et ingenii tui ſtricturæ etiam ad nos volitent, ut jucundiſſimam tui memoriam blandienti gaudio foveam; quod in maxima felicitatis parte numerabo; nam quantum tibi deferam lingua & ſtylus hærent efferre. Quod non ad gratiam dico, ita ſentio
&

& candidè de viro, in omnigena rerum scientia trito, ac subacto. Iterum vale doctorem ocellè, cum lectissima tua conjuge, JUNIA, & me tui amantem ama.

CXLII

*Clarissimo, Præstantissimo, Eruditissimoque;
D. Gerardo Joanni Vossio, S.*

Clarissime & Eruditissime Vir,

DIU est quod te tacito affectu, & amo, & colo: ex quo videlicet, de præclarissimis tuis studiis, & scriptis, non ad pompam, sed ad usum, & emolumentum Ecclesiæ, atque Reipub. comparatis, cognovi. Amicum meum amplissimum virum Matthiam Overbequium, & discipulos meos, qui apud vos, dum hic immanes calamitates, totam Germaniam inundant, delituere; te semel atque iterum amanter, & officiosè meo nomine, salutare jussi. Et nunc ex Hermanno Conringio, ad nos reverso, tibi id haud ingratum fuisse intelligo: facere igitur aliter nequeo, quin temetipsum modo compellem, quamquam mittendi occasio præproperè, (ut hic inter hæc turbas, fieri interdum solet) oblata, vix ullum scribendi spatium concedat. Id autem tibi certò persuadeas, virtutem tuam, & meum erga affectum, quicquid hujus audaciæ est, expressisse. Et meorum quos dixi relatu, & ex tuis ipsius scriptis, haud obscurè cognovi, te magno concordia & pacis, postliminio in Ecclesiam reducendæ desiderio flagrare. Quo equidem, uti & schismatum odio, me dies noctesque, quasi torqueri, neque volo diffiteri, neque possum. Summum autem mihi cordolum est, quod tanta sit seculi perversitas, tanta animorum in plerisque pravitas, ut vix cuiquam de pace & concordia, verba facere tutò liceat. Ego viam me muniturum credidi; si antiquitatem Ecclesiasticam, pro mea virili excolerem, & juventuti nostræ quantà maximā possem curā commendarem, atq; ita studium ejus, apud nos propemodum collapsum, instaurarem. Quod haud paulò felicius successisset, nisi ingens, & diuturna, hæc calamitas, omnes laudabiles conatus, in herbâ quasi oppressisset. Moliri tamen nonnihilo volui, quamquam emoliri vix quicquam potui. Id cognosces ex tractatu de Conjugio Clericorum, quem transmittito, si eum inspicere tibi molestum non fuerit. Ego sane grandis beneficii loco habeo, si non

inspicere modo, sed etiam censere, & me, ubi opus esse videbitur, vel monere, vel docere, dignaberis. Adjunxi apparatus, ante aliquot annos, inchoatum quidem, sed nondum absolutum, cum privatis curis, tum publicis tumultibus laborem operosiorum subinde interruptentibus. Quem equidem tanti non facerem, ut à te inspiceretur, nisi quæ de concordia, quasi obiter, & aliud agendo adpersi, à te cognosci cuperem. Quâ fixi itidem expositionem Epistolæ ad Titum, haud magis aliàs pretii adjeci. Proæmium quod libris Augustini, de doctrinâ Christiana, & Vincentii Lirinensis commonitorio præmissi, cujus apud me nullum reliquum est exemplum, ostendet, ut spero, & præcipuis amicis meis, & olim quoque ex auditoribus, unus Joachimus Wiche-Wordius, civis vester. Cogor hic abrumpere: Caterum si hæc ipsa non ingrata fuisse intellexero, commodiore tempore, pluribus tecum, nisi molestum est, sermocinabor. Vale, & virtuti, atq; comitati tuæ, audaciam meam imputa.

*Rapiss. in Acad.
Julia, xx. Mart.
Cl. Ioe xxxii.*

Vester quantus quantus

Georg. Calixtus.

CXLIII

Clarissimo Doctissimoque Viro D. Gerardo Joanni Vossio, Professori eminentissimo.

Clarissime Vir, Amicorum meorum Alpha,

Nisi tibi Stephaniae tui memoria intercidit, agnoscis primo intuitu manum, quæ toties tibi, dum tempe vestra Leidensia incolerem, molesta fuit; imo vel etiamnum esse non definit, licet nos immensa locorum intercapedo disjunxerit. Excitat audaciam meam, suavissima humanitatis tuæ recordatio, quæ tam luculentis erga me indicis, toto illo studiorum meorum tempore enituit. In plebeiis animis dulcedo amicorum, simul eorum facta ex oculis amolito est, restinguitur; at mihi interjectu loci desiderium tui vehementius gliscit, ut creberrimè cogitationis alâ, ad te properem, videarque mihi consueta familiaritatis, tecum instaurare commercium. Nunc verò literarium quoddam negotium fuit, de quo tecum agerem. Vita S. Wilhelmi Abbatis Monasterii ad S. Paracletum, in Dania ab ejus quidem discipulo

pulo conscripta, sed per Laurentium Surium, in compendium redacta, extat tomo ii. de Historiis Sanctorum, a. d. vi. Aprilis. Eam ut per Amanuensem tuum describi, & per præsentem internuntium ad me transmitti cures, per genium te amicitiae nostrae rogo, atque obsecro. Penes me etenim est volumen Epistolarum, ejusdem Wilhelmi Abbatis, in membranâ exaratum, quod olim, Deo volente, publici juris facere constitui. Huic verò instituto non parùm inservire poterit, hoc quicquid est monumenti; imprimis verò si ad calcem libri adjungatur. Si nonnulla in Saxone nostro, post meum è Belgio discessum, quæ observationem merentur, animadvertere tibi contigit, mecum communices, etiam atque etiam abs te peto. Nam indies adorno, novam illam Saxonis editionem, quam toties coram promisi. Glossas B. Vulcanii, vel veteris alicujus scriptoris, in Martianum Capellam, ad me transmittas oro; nullus dubitans, quin intra trimestre spatium, per bonæ fidei hominem restituam. Gratulor tibi auctos honores, cui jam liceat in majori luce posito, & Theatro illo urbium Belgicarum, divini ingenii claritatem, per omnes literati orbis angulos, etiam ad ultimum Septentrionem nostrum, longè latèque diffundere. Inter nova habeto Selandiam insulam hanc nostram a. d. xxix. Febr. insolitis contremuisse motibus: quid portendant, novit ille qui solus omnia novit. Plura non est dubium, quin Meursius noster suppeditet. Benè foeliciterque vale, optime amicorum, & me pristino affectu tuo constanter complecti dignare.

Sora a. d. xvi. April. *Observantissimus tui,*
c1o 1o c xxxii.

Stephanus Johannis Stephanius.

CXLIV.

Clarissimo, & Celeberrimo Viro D. Gerardo Joanni Vossio, Histor. Professori dignissimo, S. P.

Amsterdamum.

Clarif. & Doctif. Vir, Collega observande,

Accepi nuper, te mittente, munus à doctissimo Casaubono, cui gratias agam prima occasione. Hæc cum se offerret, pereruditum hunc juvenem Medicinæ studiosum, petii, ut tibi redderet munusculum, nuperi mei operis, quod se tibi sistit, ut à te discat, si tanti sit, ut ab otio

tuo, aut potius à gravioribus negotiis, impetrare possis, ut in illud oculos conjicias, & censeatur ubi opus erit. Quicquid sit, animum mittentis, ut soleo, boni consules. Aliud jam sub prælo Elzeviriorum, sudat lucubrationum mearum in Genesin; sed longioris operæ, quam ut post paucos menses prodire possit. Interim paro me ad migrationem, qui in eum finem, ab Illustrissimo Principe, accepi diploma, in quo significat, quid me facere, aut procurare velit, & mihi in reliquam vitam adeo liberaliter prospicit, ut ingratus sim, nisi me totum, addicam ei muneri, ad quod me vocat, & pro viribus in illud incumbam. Quoniam autem Magnus ille puer, adhuc per ætatem, & statutam imbecillior est, quam ut hoc anno possit omnino à curâ mulierum avelli; prospexit mihi de ædibus, in ipso Aulae ambitu, quæ olim fuerunt Graphiarum Junii, non procul à loco, ubi convenit supremum Consilium. Si aliquando Hagam excurras, non pertransibis nos insalutatos, Statui cum bono Deo, ad viii. Maii publicè coram Curatoribus Academiae valedicere. D. Salmasius, acceptis ab utraque parte literis salvi conductus, in procinctu est, expectaturq. ante Kalen. Maias. Conductæ sunt in usum ejus ædes capacissimæ, quæ fuerunt olim Equitum Melitenensium, ubi hortum habebit spatiosum. Plura pro tempore non addam, qui jamjam Hagam me confero, ut crastina die, volente Deo SS. Cœnam administrem adhuc hac vice. Saluta quæso, meo, & uxoris meæ nomine, tuam & tuos omnes.

Lugduni Batavorum X. *Tibi ad omnia officia paratiss,*
Aprilis.
c1o 1o c xxxii.

Andreas Rivetus.

CXLV.

Vir Clarissime, Amicorum maxime,

Superiore anno nihil abs te literarum accepi, præter illas quæ datæ erant iv. Id. Maii: ego tamen semel iterumque scripsi post id tempus, si non tertium, & effigiem meam nisi æri incisam: neque dubito quin acceperis. Si scires quàm mihi charæ sint tuæ literæ, & quam animum exhilarent, sæpe scriberes: ac vel unum hoc te valere. Quod ut tibi diuturnum esse opto, atque tuis item omnibus, ita etiam sæpe intelligere cupiam. Jam occasio tibi est

est mittendi literas, quoties velis, & ego ipse viam tibi indicavi: quaeso utere. Mitto nunc Solonem meum, qui si tibi gratum se praestare poterit, mihi quoque eo nomine multò gravior est futurus. Quod adjunctum exemplar vides, rogo ut Barlaam tradas, & salutem à me addas. Mitto etiam tres ingenii mei foetus; quos te rogo ut excudi illic cures, seu Typographi, sive meis etiam sumptibus, qualicunque demum modo. Cuperem quamprimum fieri, & eam formam atque typis quibus mea omnia olim Elzevirii excudere. Si excudi meo sumtu illa debeant, velim tantum exemplaria quingenta excudi, & hoc quaeso summam curam provideto, ne Typographus fraudem faciat, & seorsim sibi excudat exemplaria; quod cum meo detrimento non exiguo sit futurum: & obstringes in hanc rem ipsius fidem. Postquam absoluta erunt, mites mihi exemplaria triginta; è quibus tamen unum tibi reservabis, duo in Italiam mites ad Molinum & Bonifacium: duo quoque Leidam mites, ad Cunaeum Heinsiumque. Peto etiam abs te in maiorem modum, ne graveris meam causam operam dare, uti prodeant haec Opuscula emendatè, quantum ejus fieri poterit. Quo in loco sit illustri Schola vestra, aut quo nomine appellari magistratui vestro placeat, scire aveo; tum quid tu privatim agas, ac quid etiam luci destines ex tot monumentis tuis: insuper de re domestica universam. Ea quidem mihi haecenus quartum mensem est addicta. Unica enim filia mea per trimestre cum gravissimo certè morbo, ac periculoso valde conflictata, postquam Dei beneficio (cui gratias summas ago, ut debeo) vix evasit, mox in tertianam incidit, quam nunc etiam vexatur; neque sola: nam & filium itidem eodem tempore eadem invasit febris; ac praeterea etiam uxor, fracta curis, (nostri animum maternum & sollicitum affectum) ac vigiliis, & laboribus diuturnis à defluxione humorum, aures pariter atque dentes crudelissime infestante, maiorem in modum cruciatur. Ego inter haec, quantum corpore Dei gratia satis sano; tamen animi excrucior. Nosti animum Mariti, nosti Patris. Sed haec homini Christiano æquo animo sunt ferenda, & speranda meliora. Ego fero, ego spero, neque spem evertet Deus, aut confundet. O passi graviores, ac superiore anno, quod perlatum ad te puto, quidam è Collegis meis, Theologus professione &, si Deo placet, pastor, litem mihi de Religione movit, sed coactus est desistere; adversari

sibi expertus ipsum adeo Regem nostrum serenissimum & primates Regni viros; addo Episcopos, & Theologos item alios, ac cordatos viros omnes, & prudentes extra eum quoque ordinem. Passus est estimationis suae non exiguam iacturam. Certè istud verè dicere tibi possum, summam esse moderationem animi, & mansuetudinem eximiam, in Theologis huius Regni: ut sunt viri si non famam nominis clari, at virtute, & doctrinam, & humanitate summa excellentes: quique nihil minus amant, quam ferociam Germanicam. Et sic Dei beneficio transiit tempestas ista, in tranquillitatem maximam commutata; è qua illud boni habeo, quod didicerim quam sim charus omnis ordinis hominibus in hoc Regno: equidem id antea sciebam satis, sed nunc magis sum expertus. Ita nempe Deum timentibus, juxta dictum hoc Apostoli, omnia in bonum cooperantur; videoque manifestè, quòd me tueatur Deus, atque pietatem meam curam habeat. Huic deinceps me commendo: & te item, Vir Clarissime, cum uxore liberisque. Uxor mea, liberique, impraesens ægri, tuam & tuos plurima salute impertiunt.

Rapinam Sorae ad
Diem xxiv. Aprilis
clō lōc xxxii.

Tuus vero animi affectu,

Joannes Meursius.

CXLVI.

Excellentissimo, Clarissimo Viro, Gerardo Joanni Vossio, S. P.

Quod denuò gravissimas occupationes tuas interpello, Vir literarum famam celeberrime, facit scribendi opportunitas, per Elzevirium Leydensem Bibliopolam mihi oblata. Nec sanè esset adeo *parum*, nisi scirem maximam tuam humanitatem; quam etsi non obscurè antea cognoverim, eam tamen mirificè auxisti. Ne quid praeterita commemorem beneficia, quae C. T. mihi praestitit, vel nuperrimè, Vir Excell. quanto me beasti bono: Inscitas meas literas, benignam fronte excipis, ac respondere etiam non dedignaris. Et pro quo æternum tibi debeo, tantam in me derivasti, incomparabilis viri Hugonis Grotii, benevolentiam, ut nihil supra. Cuius vel solius gratiam haecenus in Patriam havi. Ut postremum saltem factum deprecem, Vir seculorum memoria dignissime,

fime, ne nescias: proximis hisce diebus, cum Notas meas ad Agapetum, tam divino judicio censendas, offerrem viro maximo, non tantum prorsus candidè, nonnulla admonebat, verum etiam ultrò non rogatus, carmen Græcum præfigebat, dignum tanto viro. Quod ego ne expetere quidem ausus fuisssem. Agapetum igitur, Vir Clar. jam absolvi, sumque jam totus in Basilio. Antehac quippe ratio studiorum meorum, ut facerem, non admittebat, qui diligentior eram in Hebraicis. Nunc cum discesserit Judæus, qui me in Rabbinicis docebat, subripio sæpius cæteris studiis tempus, idque impendo Basilii admonitionibus, qui Agapetum paucis diebus absolvi. Si ea etiam tibi, vir summæ eruditionis, spes est de meis studiis, ut lubenter ornare me velis tuo testimonio, five in ligatâ, five prosâ scripto, quod meis præfigatur notis Philologico-politicis, maximam tamen partem Politicis ad Agapetum, item Basilium, gratissimum, & perpetuâ colendum memoriâ beneficium præstiteris. Ut taceam quantum mihi calcat futurum sit, si & Grotio, & tibi, & Lindenbrogio, viris nostra ætate maximis, ac cum omni antiquitate comparandis, placere mea videam. Vellem herclè ita ferre tempus, ut Cl. T. legere has notas possè. Quam optarem: sic enim & meliores fierent, & emendatiores prodirent, quodque maximum, ego tanto magis erudirer. Novi E. T. genium, qui me non frustra dimitteret, ut hac in re plurimum potest. Hexastichon Grotianum sic se habet.

Ἦς ἐδιδάξατο Ἀγαπητὸς Ἰουστιανὸν Ἀνακλ.
Θεοπίστ, ἀρετικὸς διὰ τὰ διηγουμένους,
Οὐτως γὰρ Ἀγαπητὸν ἴδους Ἀγαπητὸς ἔξ αὐτοῦ
Διδίχας τὴν ἀγγλὴν πᾶσαν ἀποκαθάρσας
Ἐνεπὶ τῇ σφίσις τὴν ἀσέβειαν, πᾶν πῶς λήξας
Ὅς νέος ἀρξάμενος σὺν πᾶσι διαισθητοῖς.

Multa viro maximo dictavit amor, qui tamen omnium primus, à te, Vir Clar. ortus est. In quo tam bono omine desino, obnixè rogans, velis, vir summe, me amare, id est, juvenum φιλαμαθίαν, quemque inter primos cultores, tot tuarum virtutum habes. Ignosce etiam, quod stans uno pede, hæc γρηδίζων coactus sum, ob festinationem Elzevirii, nec limatiores literas scripserim. Vale, vir optime, inter eruditos nostri sæculi præcipue, & salvè à δαίμονι Grotio, Frederico Tiliobrogâ, parente item meo.

Hamburgi δ' E. & C.T. studiosissimus Cultor,
Μυθεο meo,
c1o 10c xxxii.
decimo octavo
Kal. 7.

Bernhard. Damke.

CXLVIII.

Clarissimo Viro Gerardo Joanni Vossio,
S. P.

Ignosces, Vir eruditissime, quod ab occupationibus istis tuis summis denuò obstrepere audeam. Satis impudenter fateor, cum te specto; at cum observantiam planè singularem, in te meam, quæ stimulos acerrimos suggerit, non possum non frontem non projicere. Et quamquam haud merear, ut benevolentia me aliqua complectare, humanitatem tamen, virtutem illam tibi propriam cum eximia eruditione, quam omnes admiramur, conjunctam, non meritum meum in consilium adhibebis. Utrumque horum cujus singulari splendore animos tibi eorum devincis omnium, qui eruditum esse, & humanum, quid sit sciunt, ita me fascinavit, ut omnem deposuerim pudorem. Sine dolo dico. Nulli hæc fini, nisi ut tuum propellam favorem: si spes ea non decollabit, virgulam divinam tanti haud fecerim. Quare cum aliquando vacabit, non dubito, quin humanitatis jure, mecum acturus, literarum colloquio me dignabere. Noli esse difficilis, Vir Clarissime, Clar. eruditissime, Erud. humanissimo. Numquid precari dignè satis possum? Quam avidè singulas in horas, tuum, vir optime, de proposito meo consilium, scire expectam, dici nequit. Adeo hæreo nescius, an vitam an mortem, futurus hic mereatur foetus. Si vero Agapeti putâ, & Basilii παρρησιαστικὴν editio, tua opera ornaretur, aut MS. copia fieret, bene de me actum putarem. Reipsa me gratum præstarem, & maturè ad Dominum suum omnia redirent. Vide, vir omnium eruditissime, quid maxima facilitatis tuæ spes, apud me possit. Παρρησιαστικός, quam vocem in secundo capite Agap. habet, nondum me legisse memini. Æque ignoro, quid sibi Basil. Cap. 45. per tricubitalem terram ἐπὶ πλὴν τεκνέως γῆς velit, in Latina versione est, non amplius quam pedes quatuor & semissem. Nec simile quid occurrit, quod est, Cap. 54. φιλοσοφῶν περὶ συμμάχων, φιλοσοφῶν συζῆτος ἰατροῦ. Tu vir summe, qui lectionis inexhaustæ ἐμφυλῆς ἀπονεύεις es, erudi me quæso, & amore tuo æternum prosequere, sic ego, cultu, & observantia. De rubro pedum subtegmine, quod prioribus meis quærebam, rem puto esse satis claram. Et per ἀσχετοῖς δὲ δόματι, excubias

cubias intelligo. Paucis hisce, Vir Clarissime, desino ne patienti humanitate tua abuti videar. Dignum vero te tandem, literis me tuis iudicaturum confido. Vale, vir observantissime, & salve ab eo qui te ex animo admiratur & colit. Salutem tibi adscribi jubent, D. Lindenbrogius amicus noster, summe colendus, & Parens meus, tuæ Cl. cultor.

Hamburgi,
à museo meo,
cl. 126 xxxii.
xvi. Kal. Tertii.
In Cometerio
D. E. C. P. Nicolai.

Additissimus voto facto,

Bernhardus Damke.

CLVIII.

Excellentissimo, Clarissimo Viro D. Gerardo Joanni Vossio, *additissimus cultor, adscribit* Bern. Damke.
S. P.

QUA re satis magnas, tibi, Vir Excellentiss. agam gratias? aut quid primum extollam? diffusissimamne eruditionem, quâ summo cuique hujus seculi palmam præripis? an maximam humanitatem? Utrumque in te supra fidem certat. Rarum hoc sæculo sanè munus. Ego ob omnia illa dona, malo T. E. admirari, colere, venerari, & tanquam in Numinis alicujus intuitu atronitus hære, quam paupertini ingenii mei, cuius sum conscius, collutulare barbarie. Nulla vox est, quæ dignè ea possit comprehendere. Nam quidquid dixerò, minus id est. Hæc tua est illa gloria, Vir Clariss. ut nullius laudibus crescas, nullius vituperatione minuaris. Me tamen non planè silere, pietas postulat. Et gratitudinis est, præstita beneficia agnoscere. Quod affatim apud alios, facere malo, quam T. E. in os laudare, ne in scævam suspensionem incurram. Deo, Vir omnium eruditissime, non semper inaurata cadit victima, & placet, dummodò sit casta. Tu, vir Clariss. non me, non ætatem meam videbis, qui me favore tuo indignum, libens lubensque fateor: cultum modò, & observantiam in te meam, ab omni fuci, & doli mali alieno animo profectam, benigna fronte adspicies. Utinam me citius natum Melpomene placido adeo vultu vidisset, ut tua dignus essem habitus amicitia. Nunc de tarditate annorum, meus in te, Vir Excellentiss. augetur cultus.

Quem quo etiam cunque pacto testari velim, id omne est infra dignitatem tuam. Vel hoc si videam, quantoperè, Vir Clariss. de me meisq. studiis sis meritis Leydæ, tanto jam temporis spatio, ultra duos & semi annos, Præceptorem te habui, & colui. Bis cotidie licuit tua voce erudiri. Nec tamen etiam nunc, cum corpore abs te absum, æque ac præsentem docere desinis. Literis quæ diffusissimæ, omnisque veræ eruditionis indices sunt, invisitis, errantem corrigis, dubium me reddis certum, indotum erudis. Æternum se tibi, Vir Optime, Musæ nostræ debent. Et referet grates, quoniam non possumus ipsi, ille Deus quondam, qui tua dona dedit. Nimirum adeo pauci sunt hoc seculo, quod nisi Phœbus Pater prohibesset, brevi in barbariem præceptu ruer, quibus solida est eruditio. Pauciores qui fideliter docere alios satagant. Cum tamen *ἀποδω*, sint *μνηστικὸν δόξαν*, accedit & hoc, nunquam satis æstimande D. fautor, quod me, non magni pretii juvenem, ingeniosiss. eruditiss. disertiss. D. Hugoni Grotio, de meliori, quod aiunt, nota commendasti. Quem ego virum, jam à primis ætatis meæ annis, quibus se ingenii, aut diligentia vis aliqua exerere cœpit, suspexi plurimum. Vivit ille extra urbem in villa, ut vocant, Dockinhufana prædio Civis Belgæ Gulian de Mohr. Statim eò ivi. Ne enim se animus meus diutius continere tum poterat, tanto munitus parario. Pergatum & volupe erat, viro summo, cum tuo, Vir Excellent. nomine salutarem, & ut fidem haberet, literas tuas legendas traderem. D. Grotius, ut est vir admodum humanus, in prandio me sibi adesse volebat, nec dimissionis veniam ab eo impetrabam. Et quod caput rei est, *ἡμῶν τῶν κατὰ τὴν ἀγορὴν ἀγορεύει*, (ut cætera taceam) quam liberalissimè me excipiebat. Hunc ego honorem, hanc, quæ obtigit, felicitatem tibi, vir maxime, debeo. Nec quidquam magis est in votis, quam ut aut parenti meo, aut mihi ulla se occasio offerat, qua gratum testemur animum: vel potius, cum satis digna referri gratia nequeat, ostendere saltem possumus, nos benefacta in me tua agnoscere. Ego sanè in tam boni nominis memoria libens acquiesco, & dum trium filia sororum patientur atra, T. Cl. in me, nihil tale merentem, affectum grato animo deprædico. Sed pecco in publica commoda, si te longis, Vir optime, moror. Nam & à continuis studiorum vigiliis, in tanta adhuc ætate non remittis: Et in te solo Amsterloda-

menfis

mensis Athenæi fama sita est, postquam ut inaudio, Clar. D. Barlæus, sublimis spiritus, & hoc sæculo facile Princeps Poeta ægrotat. Deus eum pristinae valetudini restituere, & in honorem Belgii supersistere diu velit. Unum præter immortalium gratiarum actionem adhuc addam. Merito sanè aliquem studiorum nostrorum finem ponimus, ut & eo scilicet illis versari, & tanto maiorem ex jugi diligentia fructum percipere possimus. Et is cum pro diversa studiorum ratione varius sit, mihi sacrum Theologiæ studium quam maximè arridet. Non ignoro, Vir Excellentiss. quantum in eo laboris, & diligentia collocandum sit. Mihi tamen cum bene multi adhuc anni, si Deus volet, restent, spero, me divina adjutum opera posse, continuis studiis exercitum, aliquid dignum Ecclesia præstare. Non enim mihi placet præpostera quorundam hominum diligentia, qui hæc studia, quæ ab humanitate nomen habent, at cum sapientia gravitate amicè conspirant, non modo non excolenda, sed ne attingenda quidem existimant, leviter, & tralaticè nescio quibus inutilibus disciplinis imbuti, ilicò pulpitum quærunt. Cujus commatis homines, non pauci apud nos dantur, qui dum multa passim ex Postillis, ut vocant, decerpunt, concipulant, mutilant, egregiam laudem, & spolia ampla referre, imo longè optumè oleum se, & operam insumpsisse putant. Tales frequenti numero apud nos dantur Theologi. At ego cum studii hujus difficultatem video, quanta linguarum scientia, (quas me domi jam Rabbinica, & Thalmudica Judæus quidam conversus, natione Polonus, docet) quam diligens Patrum Lectio, & accurata Historia Ecclesiastica cognitio requiratur, non possum quin risu excipiam *ἀνδρῶν* illos sapientes. Immobilem sæpe miscellum pecus, mihi movet, ut doleam, eò dignitatem studii Theologici rediisse, ut ab indignis adeo tractetur. Et si qui sunt qui speciem quandam eruditionis veræ fingere norint, alienis ii vident oculis, & lat habent, si jurent in alterius verba: In Patribus indices saltem perquirunt, parvi facientes, quid & quomodo ab ipsis dicatur. Quæstiones plurimas inutiles crepant, & si ad verbera res perveniret, facile ipsi victores essent: Nam vita plurimorum, multo pejor Ethnicorum. In Historia Ecclesiastica vix pueri, & infantes sunt. In qua excolenda, quotquot adhuc bonam mentem amant, ii maxima quæque, de tua, Vir Clariss. diligentia sibi

promittunt. Nec ego unquam cesso, omnibus bonis eruditionis, & eruditorum amantibus, plurima polliceri, de immensa tua diligentia, & Remp. literariam adjuvandi prompta dexteritate. Nunc ego, vir Maxime, Orator ad te venio, tu finito exorator ut sim. Idq. per Musas, per Genium tuum, per humanitatem, atq. adeo omnia quibus jam immortale apud omnem posteritatem, tibi nomen comparasti, oro: Etiam hac in parte, pro summa tua eruditione, me erudias, quæ in excolendo studio Theologico monenda habes, imprimis quo pacto, Historia Ecclesiastica, & præsertim recentior, fideliter sit addiscenda, & unde haurienda. Non ego sum adeo ferus, & inhumanus, ut mei causa moram, velim injici continuis tuis, Vir Clariss. occupationibus, aut totam adeo Remp. literariam damnum pati. Sed si quando vacat, placet, & commodum est. T. Exc. eam mihi aliquando præstabit gratiam. Sic, vir optime, mea studia plurimum promovebis: Et ego ad extremum usque vitæ halitum, ita me Musæ ament, nunquam tanti benefacti immemor ero. Hoc est, observande D. fautor, quod volui addere. Nemo enim omnium *καμπεδὸν φάος ἡελίοιο εἰσερχομένων* felicius & melius Spartam illam ornare, digniusque tueri te solo potest. Hæc ad te, Vir Excell. perscribere volui, spe plus quam decumana submisus, fore, ut non ingrata sit tibi observantia mea testificatio. Et si nimis longus dum sum, peccare videor, veniam facile impetro. Non aliter certè potui, & pietas, seu gratitudo id postulavit, *ὡς ἐγὼ καὶ ὑποθήκῃ τοῦ ἀνταποδοθῆναι τοῖς ὑμῖν τὰς χάριτας*, ait Basilus Imp. Et humanitas tua cum eruditione incomparabili conjuncta, maximè me excusabit. Vale, Vir Clariss. cum universa familia tua; sospitet te diu ter sanctus Deus, in gratiam tuorum, & salutem Reip. literariæ. Salutant te Vir Clariss. D. Grotius, & Tiliobroga; Item Parens meus. Vale, vir summe, me ama, & aliis commenda. Et siquid in hisce oris curandum, aut inquirendum habes, impera, non tu promptus adeo eris monendo, quam ego faciendo.

Hamburgi &
Museo meo,
cl^o Bc xxxii.
V. Id. Jun.

T. Excell. & Cl. votofacto
addictiss. cultor,

Bernhard. Damke.

CXLIX.

Vir Illustrissime,

Literis tuæ Id. Februarii datæ nuper ad me delatæ sunt. In quibus, quod mihi gratissimum, lego pro Amstelodamensibus pronunciatum esse, & te ibi inauguratum. Cedant tibi in bonum omnia: Spero enim te, Numine propitio valde, Sedem, non Studia, mutasse. Scipendium altera parte majus usui erit tuis, quod paucioribus horis publice doceas, erit tibi & studiis.

Casaubonus à morte Reverendissimi Wintoniensis in meam clientelam transiit. Ego Patris nomine, & suo quæ potui feci, ut liber à curis, studiis indulgeret; quibus æque ac majoribus conatibus, (si majores sint) res domi angustiores obstare solent. Alia & majora facturus sum quum facultas adsit, & erit opportunum. Interim gaudeo tot nominibus tibi gratum accessisse Casauboni Optatum. Si qua in re aurem tibi vellat, spero mitius agit, nollem enim ut quid durius, quum tantis sis occupationibus distentus, nec vellem ut aliis quam tuis passibus, & quibus feliciter possis, progrediaris.

Armachanus certè noster Vir doctus & gravis, Librum tibi dicatum, à se scriptum, ad me misit. Gratias egi ut par erat: nam valde mihi Præsul ille ob multiplicem Doctrinam charus. Sed quum primum inspexi, nonnulla occurrebant quæ mihi raptim (prout res meæ exigunt) legenti, not ita arrisere. Præcipue vero illa S. Aug. sensus restrictio, qui venerabilem illum Patrem nec Antiquioribus in Ecclesia, nec sibi ipsi, satis constare permittit. Gratias vero tibi ago summas, quod (etsi paucis id à te factum) significare placuit in quibus necesse tibi sit à Viro tanto dissentire. Dignare obsecro, si per otium liceat, pleniori calamo, breviter tamen, ea & si quæ alia sunt describere, & ad me transmittere, in privatum tantum usum vertenda.

De amplissimo illo Viro Hu. Grotio pauca habeo. Salutes quæso virum doctissimum meis nominibus. Fac etiam ut sciat gratum mihi admodum fuisse, quod calculo ejus dignissimo, indignissimus approbatus sim, quod ex ipsius ad Casaubonum literis intellexi. Cæterum redditum ejus in patriam, fateor mihi semper fuisse inter res vix credibiles, cujuscunque demum suasu fuerit. Nec deest mihi ra-

tio, etsi non hic & nunc inferenda. Si iterum sponte Patria excedat, felix est quod eum tot Reges Principesque desiderant. Hoc uno infelicior, quod non tam, aut facile, aut tuto, eligere potest, aut eligi. Quod præ aliis non invides eum Britannia, placet id quidem, & quam utilis esse potest, non magis scio quam agnosco. Sed ut nunc res sunt apud nos, de ea re ne cogitandum quidem.

Quod interjicis de turbis Lugdunensibus, & Capitis supplicio irrogato Homicidæ, certè non sine dolore audio hæc & similia de Academiis. Inter pessimos mores quid restat, si occidere, vel occidi, sit Academicè vivere? Fœlix tamen Lugdunum vestrum, quod inter tam crebras cædes, tot habet tamen Nobiles, quotidie illuc advolantes, studii & eruditionis causa, auditque Asylum Juventutis. Sed non sic olim crevere Literæ. Quod reliquum est, (nam alia me avocant) cura valetudinem, ut diu usui esse possis Ecclesiæ Christi. Ævum schismaticum dicis; nec audeo abnuere: Interim necesse est terre, quod nec vitare potest nec corrigere. Et certè morbus adeo complicatus est, ut nescio quem potest Medicum expectare præter Deum. Authorem Salutis nostræ dum precibus sollicitas sis mei memor. Vale.

Tui Studiosissimus,

Julii 3. 1631.

Guil. Londini.

Fere inter scribendum accepi Orationem à te publicè habitam, certè doctissimam, de Utilitate Historiæ. Gratias ago maximas.

CL.

ITane te, Vir Clarissime, negligere amicum, & tam bonam occasionem, quæ vix semel toto anno sese offert! Non speraram; nec profecto tu debebas. Nimis calidè ut te amo, ita Literas tuas cupio & expecto. Ægre etiam fert Uxor, nil responsi ab Uxore item tua se ad suas accepisse. Atqui non est quod obtendas festinationem ejus, per quem respondendum erat, qui se dies decem & septem Amstelodami substituisse, & Uxorem quoque tuam (nam te convenire haud licuit) de responso semel item, iterumque, compellasse affirmavit. Misi tibi ternas lucubratiunculas typis illic evulgandas, five meo

meo five alieno sumptu. Admodum desiderabam scire, quid hic effecisses; nunc incertus animi pendeo. Certè cum incertitudo mittendarum literarum tanta nobis sit objecta, unam certam occasionem prætermittere nullo modo debebamus. Ego quidem minime officio defum, sed te jure hic accuso. Vide, mi amice, quid agas & quam graviter amicitiam nostram lædas, cujus munia non exeres tam fideliter ac debebas. Joannes Janfœnius Bibliopola illic vester, operam mihi suam obtulit, si quid meum apud vos excusum velim. Mitto itaque *Regnum Atticum*, quod tu illi in manum trades, cum editionem volet inchoare. Interim tibi reservabis; & urgebis etiam hominem, si fortasse Lentulum aget. Vale & salve cum tuâ tuisque à me, mea, item meis.

*Raptim Soræ ad
diem viii. Aug.
c1o Idc xxxii.*

Tuus sine fuco,

Joannes Meurfius.

CLL

SCripfi ad te, Vir Clarissime, ante paucos aliquot dies; & ut puto, recte Literas accepisti; nam per certum hominem misi. Responsum tuum avidè expecto, nec conceptam in te iram, ob priorem negligentiam antepōnam; ac, ne Literæ deinceps errent, sicut hætenus, ecce tibi virum certum ad quem jubeas deferri, Arnoldum van Gendt Notarium Publicum in novo biscocti foro, propè Camelum, commorantem; ille Hafniam curabit, ad filium illic, Mercatorem notum mihi, & amicum; isque ad me sine morâ recte mittet, uti inter nos convenit. Nuper aderam illustri Cancellario Regio, & injectus de te sermo: æstimat te & scripta tua, neq; ego, ut confidere facile potes, sicut dignum amicitia nostrâ erat aliquid detractum ivi. Idem accidit apud Casparum Brochmannum, Theologiæ Doctorem, & Professorem in Academia Hafniensi. Cupiebat ille scire, quisnam Academiæ vestræ seu Gymnasium appellandum est, status foret: an futurum existimeretur; uti illic aliquando facultates universæ sint docendæ, an verò mansuri sitis intra terminos facultatis Philosophiæ. Insuper & hoc quærebat, anne Eloquentiam, præter Historiam, etiam profitereris: quod si faceres haud paucos ex alumnis nostri Regis ad te commeaturos esse. Responde, quæ-

so, ad hæc quamprimum, atq; salve cum Uxore Liberisque à me, meâ atque meis;

*Raptim Soræ ad
diem xxiii. Aug.
c1o Idc xxxii.*

Tuus, ut nōsti,

Joannes Meurfius.

CLII.

Clarissimo V. Gerardo Joanni Voffio,
Erycius Putcanus S. D.

QUam familiaris sum, Clarissime Vir, tam liberè hoc ad te scriptum mitto, de principio *vix duxi*, in Orbe terrarum constituendo. Res ista ut nova, ita magna est: & lineâ tamen constitui potest. Nusquam incipere hebdomadem, quis unquam consideravit? Incipere in Circulo, quem Urbanianum appellavi, & per ipsam duxi Romam, novum pariter & magnum est. Ne homines invenirem, mare petii; mare quod ab urbe Roma, quam remotissimum esset, & sic tamen proximè accederem. Nimirum summi Antistitis autoritate opus erat, ut terminum Orientis, Occidentisque homines admitterent, & hinc septem dies numerarent. Si me amas, aut aliquid industriæ meæ tribuis, judicium tuum ad me perscribe, tam liberè quoque, quam te familiarem humanitas tua, præcipuum eruditionis ornamentum, facit.

*Lovanii, in Arce, subito, cum hic
Tabellarius discederet. ix. Kalen.
Septemb. c1o Idc xxxii.*

Doctissimo filio tuo nuper respondi; si redditæ sunt eæ literæ, benè est, & gaudeo.

CLIII.

S. P.

ORatio tua inauguralis, Vir Clar. quam cum literis ante aliquot menses ad me miseras, mihi salivam movit, gratulatusque denuo sum & tibi & gymnasio novello, gnarus utique nihil à tuo ingenio proficisci posse, nisi *vivimus* & cedro dignum. De quo munusculo tibi ingentes ago gratias, dum occasio emergat, rebus meis in tuto collocatis, te remunerandi. Jampridem autem vicem literis tuis reddidisse,

dissem, nisi lentum & anceps negotium, de quo ubertim ad te scripseram, impetum meum sufflaminasset, fidusque homo defuisset, cui Plautum tuum, cuius usura diutina tam propenso studiis meis commodandi affectu mihi concessa me tibi impense obstrinxisti. Donec nunc nuper cum familia mea ad Socerum meum Gerardum Vander Luan intervendum huc evolavi, ubi commodum mihi obtigit oportunitas per amicum meum D. Plockium, qui in se recepit, se curaturum, ut tibi in coram bona fide testatur. Nihil autem mihi magis in votis erat, quam ut ipse te venerari gratesque agere potuissem. Sed aer inclementior compedes mihi injicit. Utinam ab occupationibus tuis tantillum temporis impetrare posses, ut uno verbo indicium faceres, te illo positum, deque Lycei vestri facie aliquid attexeres, ut liqueret ecquid speculæ relictum esset. Editionem Duficam jam illi jungere promptum non fuit, sed in aliud commodius tempus pace tua rejicere visum est. Ita æternum valeas, Vir Clar. meque amare pergas, qui te æstimo & colo.

Dabam Lissa in Tuus omni fide & obsequio,
prædio Soceri xvi.
Kalend. Octobris
elo 16c xxxii.

Eustathius Swartius
 pro tempore Re-
 ctor Scholæ Syl-
 væ-ducentis.

Officiosam salutem tibi familiarique tuæ
 à focero affinibusque meis subscribo.

CLIV.

Clarissimo V. Ger. Jo. Vossio,
Erycius Puteanus, S. D.

Benignè & eleganter, de Circulo meo judicas, Candidissime Virorum, & me obnoxium tibi, tam amicæ Epistola reddis. Equidem tuo subvectus Elogio, triumphare videor: & quia tuum impetravi, nullius jam iudicium metuo. Videbis igitur propediem, dissertationem meam: videbis rem nudè nuper propositam, Theoresibus suis explicatam. Unum rogo, ut elogii tui verbis, munire mihi inventionis novitatem liceat, & clarissimum nomen tuum usurpare. Verbis inquam, in Epistola tua expressis. O aurum, O gemmæ! sed ad affectum tuum venio, quem satis æstimare non possum. Cupis

enim, & me, & mea in tuto esse, atque etiam meos. Quid igitur dicam? Hoc effice, quælo, ne aut Proceribus, aut Principi ignotus sim. Ea enim studia tracto, quæ cum nemini gravia sint, vestra potissimum debent appellari: quæ cum ab humanitate nomen habeant, nullam hostilitatem agnoscunt. Utinam vero tota belli factio, securâ tandem quiete componatur! Tractari cœptum est, Deus, pacis author adfit, & saluberrima agentibus consilia inspiret! Corporis nomen antiquâ adhuc memoriâ colo. Patrem igitur, & filium à me salutes velim. Sed Grammaticarum Institutionum opus, quantum potes, promove: ut quantum Latina habet Lingua, & Elegantia, industriæ tuæ, & eruditioni debeamus. Mihi nunc à Vossio meo discere, suave erit: Optimum doctissimumque filium tuum Dionysium, & ad famam assurgentem, animo complector: quem hortari quoque audeo, ut cœptam translationem strenuè prosequatur; imò ut in Cæsare illustrando pergat. Cæsar est: & hoc ad laudem satis. Excusam vero Bibliothecas hic nostras, & manuscripta Exemplaria quæram. In Martiniana, satis celebri, nullum est. Si quod, imò si quæ invenero, ad te mittam. Vale, & me amare perge.

Lovanii in Arce, Postridie Kal.
Octobr. 16c xxxii.

CLV.

Literas tuas, Vir Clarissime, vii. Kal. Octob. datas, heri accepi. Primæ illæ à multo tempore, cum jam quintas has tibi mittam intra hoc semestrem tantum. Impatienter, qui meus in te est adfectus, Literas abs te exspectavi; & ægerrime mihi fuit, neglectam abs te occasionem per Slaglofiensem illum Mercatorem vicinum à duabus leucis, & amicum rescribendi: quæ non nisi semel se se toto anno nobis exhibet ideoque jure occupanda erat: præsertim autem cum mittendum aliquid supellectilis esset. Sed hæc si jam est coempta mitti vere proximo poterit, si Deus volet per eundem, tunc de more reditum. Proximis meis ne tamdiu Literis tuis, ob latorum incertitudinem, carere cogar, indicavi cui tradere illic debeas, nempe Arnolde Van Gendr, Notario Publico, qui hic Hafniæ filium Mercatorem habet, cum quo egi.

Ita

Ita recte posthac curabitur quicquid scribere cupiemus. Ad priores Literas meas addideram Syntagmata *Piræum*, *Reliqua Attica* & *Familias* item *Atticas*: ut si nemo suo vellet, meo sumptu ederentur. Maxime avebam scire quidnam illic factum, aut futurum esset: sed tu ne gry quidem indicas. Ignoras desiderium meum, vir amicissime, qui hæc præteris silentio: sed nimirum festinatio nimia in causa fuit, cur id oblivisceris; nam non dubito quin acceperis; quando Literas, quibus huc adjuncta erant, accepisti. Magis alterum me angit; quod nil item nunc significes, an acceperis eas Literas, quas Augusto Mense dedi; & addideram *Regnum Atticum* sive de *Atbeniensium Regibus*, eorumque rebus gestis Libros tres. Certe nolim perisse & nec spero; nam Mercator ille per nautam fidei perspectæ misit: & te accepisse confido: sed hujus quoque mentionem tuam illam festinationem nimiam exclusisse. Quæso proxime fac sciam, & respondendi viâ indicatâ utere. Petieram abs te, ut Joanni Jonsonio traderes, qui ad excudenda mea operam mihi suam obtulit. Hic si cesset, aut sententiam forte mutet, nam responsum necdum accepi, libenter Gulielmo utar, quem commendas maximopere; verumtamen eâ Lege ut non tantum Danicam Historiam meam, sed & reliquas item lucubrationunculas, quas subinde sum missurus, suis typis publicare animum inducat. Id si velit, stat sententia. Quod Historiam autem attinet; versor nunc in continuatione Saxonis, usque ad Domum Oldenburgicam, à quâ inceperam, pertexenda, & non multum (Dei Gratia) à fine absûm. Illustris Dominus Cancellarius Regius, etiam si editâ Pontani Historiâ, operam repetere me istam voluit: quâ finitâ, quæ in domo Oldenburgica inchoavi, etiam deinceps persequar. Quæ pridem edidi de primis tribus Regibus, ea recudi à quoquam nolum, nisi ex meo exemplari, quod hic habeo à me correcto: idque ubi opus erit ad te mittam. Quæ tu nobis à te opera tam præclara polliceris, etiam atque etiam videre opto. Filii tui Dionysii instituto ex animo faveo, & hoc ipso Patris sui filium se esse ostendit, quod per ejus vestigia ad immortale nominis decus viam insistit. Utinam juvare possem; sed nil habeo quod submittam. Ante hos triginta & tres annos cum Curas Plautinas, & una cum illis Animadversiones Miscellas darem, meministi me locum quendam, ipsi Lipsio

desperatam restituere, inspiciat, si operæ erit & examinet; ac, si dignum existimabit mei nominis eâ in re meminisse, gratum erit. Locus existat Animadvers. Miscell. Lib. 1. Cap. xiv. Quæ Uxor pro emenda supellectile meo nomine expenderit, proximis tuis indicate, ut per Mercatorem tibi mox refundam. In Patriæ meæ tot victoriis serio gaudeo, atque Deum supplex quæso venerorque ut constantem ei esse hanc felicitatem velit. Eundem rogo, ut te tuosque omnes diutissimè porro servet: estque id omnium nostrum votum. Resalutant te Landenbergius & Stephanus, qui expectat avidissime quæ promittes per Mullenium.

Sora ad Diem
iii. Novembris
cId Idc xxxii.

Tuus constantissimè,

Joannes Meursius.

Defectum in Solone meo proximè mittam, nam petendum Hafniæ exemplar erit.

CLVII.

Optimo & Clarissimo V. Ger. Jo. Vossio,
Erycius Puteanus, S. D.

NOS pergamus inter nos amare, O delictum meum, & plures erunt, qui suo affectu, utrumque complectentur. Doctissimo illi Amplissimoque Simoni Beaumontio, placere imprimis cupio. Adibo virum, & Literis meis, & ut munusculum simul adferam, Circulo. Tu facies, ut illæ gratæ sint: hic etiam quia aliquid à novitate pretii sumit, æstimeretur. Conor certe hoc nunc argumentum plenius illustrare; hanc maximè ob causam, ut Encomium, quod benignissimè perscripisti, aliquo modo mereri videar. Circa Manuscriptos nihil adhuc effeci. Qui prompti esse poterant, & bonæ erant notæ, ab Amplissimo V. Joanne Woverio collecti, & in Hispaniam ad Comitum Olivaresium, nuperrimè missi sunt. Mireris hos nunc etiam Thesauros, à tam Potentibus instrui; negligi viros, qui quomodo iis sit utendum Thesauris soli intelligunt. Italiâ animosior, quæ Belgas quærit, ut Cathedræ loquantur. Ecce te occupare audeo, ut expertissimum, Fortunatum Plempium, Medicinæ Doctorem, Civem urbis vestræ, nomine meo, imo Cardinalis Bentivoli, Antistitis

Antistitis incomparabilis interpelles. Si conditio placet, primo loco docere Medicinam Bononiæ poterit; conditionem autem ex adjunctis his Bentivoli, ad amicum meum Chrylogonum Flacchium Literis intelliget. Tuâ utor Operâ, quia Plempium non novi, facies autem, ut per hunc Tabellarium, mentem Plempii intelligam. Hoc rogo, & ut amare me pergas. Vale optime, Clarissimeque Vir, & suavissimam Conjugem, Liberosque à me, mea, meis, saluta.

Lotani, in Arce, quam utinam aliquando videas! Post. Eid.
Novemb. clō Iōē xxxii.

CLVIII.

Clarissimo, Doctissimoque Viro Domino
Gerardo Joanni Vossio.

Clarissime, Doctissimeque Vir.

Licet summâ in expectatione, hætenus mihi fuerint Literæ tuæ, quibus nihil antiquius, nihilque jucundius duco; gratissima tamen contigit peramica salutatio, quâ me nuper in Epistolâ, ad communem amicum nostrum Meursium scriptâ dignatus es. Unde advertere potui, te nondum omnem Stephanii tui memoriam abjecisse, sed vivere adhuc in pectore tuo, igniculum quemdam propensi erga me affectus, qui tunc temporis, quum Athenæ Belgicæ studiorum causâ, me detinerent, luculentis subinde indiciis, enitescere cœpit. Meum certe animum ætérno amoris mancupio devinctum tibi habebis, dum animâ spirabo meâ. Vitam Wilhelmi Abbatis quod attinet, velim eam, quam primûm fuerit occasio, describendam cures. Multum enim inservire mihi poterit, in contexendis Prolegomenis quæ novæ Saxonis mei editioni, præfigere animus est. Et siquid penes te fiet præterea, quo institutum meum juvare liceat, impensè peto, nè eo me fraudari patiaris. Nam per quos profecerim, olim ingenuè confitebor. Dionysio tuo meliorem, ut comperi, vitam debebunt propediem Commentarii Cæsar. Deus conatus ipsius secundet! Primam commentariorum Linguae Latinæ partem, quâ etiam Remp. Literariam, beare constituisti, mecum ut data occasione communices, peramanter rogo. Paria facturum me spondeo, ubi aliquem paupertini ingenii fortum, dias in luminis oras procudere,

majus mihi otium concefferit. Benè Vale, Belgii decus, & dimidium animæ meæ.

Soræ ad diem iv.
Nov. Vet. Calend.
clō Iōē xxxii.

T. omni affectu,
& officio.

Stephanus Johannis Stephanus.

CLIX.

Viro Incomparabili Gerardo Johanni
Vossio, S. P. D.

Nihil magis studeo, Celeberrime Vossi, quàm gratias florentissimorum hominum colligere. Inter quos cum te semper eximium habuissim, & essem admiratus; sæpè mihi admota est voluntas, coram noscendi, & vultum, & virtutes tuas, quæ te jam pridem totius Orbis oculis exposuerunt. Sed dum hæreo inter cupiditatem pudoremque; dum molliora semper tempora aucupor, & exspecto, jam selsquiannus abiit, ex quo & compellare te desideravi semper, & nunquam ausus sum. Intereram, quoties Amstelodami fui, doctissimis prælectionibus tuis, eo quidem animo, ut cum abeunte congregarer, sed reipla expertus sum, verissimè dictum à Pallade Homérica.

—Θαυμάσιον ὅδ' ἀνὴρ ἐν πύσιν ἀμνησθῆναι
"Εργασίαν τῆς ἐξ ἐξ πύσιν ἀλλοτρίαν ἔλθειν.

Nuper admodum pulcherrimæ occasione, quasi in sinum delata, ipse defui. Cum enim Amstelodami, apud virum præclarum, & tibi, ut tum cognovi, familiarissimum Johannem Vikewort diverter; sponte ille, ut est humanitatis, & candoris summus, promisit prostridie, me adsumpto, te domi tuæ videre. Verum ipse, mihi ut dixi defui; non enim res me alicujus temporis moram tunc quidem patiebantur. Nunc tandem per literas, (quæ ita pudibundæ esse solent, ut tamen frontem licentius exuant) id tandem tentandi confidentiam sumpsi, cui toties nimis molesta mihi verecundia mea intercessit. Quia tamen ne nunc quidem misissem, nisi insigni humanitate Domini Vikewortii fretus; cum hunc hominem adolescentem quidem, & nulla admodum nota commendabilem; tamen tibi traditurum mihi promissem. Cæterum, ut vel navo aliquo, me cognoscere, orationem à me Nupercumali, quo plausu recitatam ad te mitto:

mitto. Quam tamen ut cederem, ego initio infra fiduciam meam posui, nisi fuisset virorum clarissimorum hortationibus impulsus: Quos ut fortasse consilii sui nondum pigeat, me tamen jam obsequii poenitet. Sed ea ætas est, ut & commendari, & proficere queam; à te, vir maxime, summopere contendo, ut permittas mihi, insignes virtutes tuas admirari, quas intelligere nondum possum. Inter eos autem, quos favore, & amicitia dignaris, ut me colloques, si non preces meas, at tua singularis, & toties mihi deprædicata humanitas suavissimique mores, à te impe-
trabunt. Felicitissime Vale.

Norvici iix. Cal.
Novembr. anno
c1o lœc xxxii.

Excellentiæ tuæ

dicatissimus,

Vincentius Fabricius.

CLX.

*Clarissimo Viro D. Gerardo Joannidæ
Vossio, Collegii Amstelodamensis Pro-
fessori primario, S. P.*

Tardiusculè præsto, quod promisi, vir clarissime; tenuit enim opinio-
ne me mea diutius patria, quam transivi,
& in ea, partim cognati, partim amici.
Nunc tandem tibi mitto libros, quos de-
signaveras, uno excepto, qui ad manum
non erat. Tacerem de illorum pretio,
(nec enim id parvi pendimus, quod vir
tantus ista excutere dignaris) nisi tu pro
tua modestia, cui gravis esse non debeo,
aliter fieri iussisses. Hamburgi
* *Hugonem* * *Tibi ubi* aliquoties conve-
* *Grotium.* ni, nunquam antehac mihi
visum, sed vidisse juvat, & in
perpetuum juvabit, in quo verissimum de-
prehendi, quod vulgo dici solet, omen
nomini convenire. Utinam tandem &
par fortuna meritis ejus responderet! Spe-
rare juvat, uxorem ejus, quæ me præsen-
te, in patriam reversa est, amicorum con-
silio, atque ope, quæpiam molituram,
virtute sua dignum, ut quæ marito pri-
mum libertatis, eadem illi tandem, & pa-
triae recuperanda, sit dux atque ministra.
Nos novum hic Deo providente Regem
nacti Vladislavum, defuncti primogeni-
tum, secunda quoque auguramur. Te-
nuit aliquandiu suspensam electionem al-
tercatio, de pace inter dissidentes, de Re-
ligione Regum sacramento firmari solita,

à qua Pontificii nonnullos, qui de Trini-
tate sacra, minus rectè sentiant, exclusos
volebant: sed audio veteri consuetudini,
pleraque relicta, quædam etiam futuri
Regis judicio, de quo bene speramus, sub-
missa. Vale, vir clarissime, & mihi fa-
vere perge.

Tuæ dignitatis

Dab. Dantisci A.D.
iii. Cal. Oct. an. æræ
vulg. c1o lœc xxxii.

studiosissimus,

Martinus Ruarus.

CLXI.

Salutem in Christo.

Junius vester, nostræque, vos & nati-
vum solum repetit. Causa itineris est
Comes Arundelianus, cui jam felicitè
servit. Comes ille non genere clarior
quam virtutibus, Legatus Regius ad Soro-
rem Reginam Bohemiæ, ad vos profi-
ciscitur; tum ut ei solatio sit graviter
amissum maritum dolenti: tum ut eam,
si ita Deo & Reginæ visum fuerit, in An-
gliam reducat. Hinc occasionem avidè
arripiens Junius, me gaudio perfusus adit,
& vos, desiderio prius quam ulnis ample-
ctitur. Quaris ergo, cur Junius sine Lite-
ris meis? Certè non est quod nihil ha-
beam quod scribam, scribo enim (ut vi-
des) etsi nihil: sed non infcio Junio aliis
manibus Literas meas credidi, ut Juvenis
hic, præclaræ certè indolis, qualem qualem
occasionem habeat te videndi, & meo no-
mine salutandi. Filius autem est, & natu-
quidem maximus honoratissimi D.D.
Francisci Windebanck, Regiæ Majestatis
nuper Secretarii, & à Consiliis: viri ut
alias dignissimi, ita mihi per annos trigin-
ta & amplius amicissimi. Juvenem hunc
eo amore quo amicos beare soles profe-
quere, & omnia quæ nunc petenda sunt
perfecisti. Velim etiam ut Junio gratias
agas, quod hic amici mei filius ei curæ sit.
Quod nec multis, nec sæpius scribo, ne-
gotia mea in causa sunt, non animus.
Baronium tamen etiam nunc inculco, &
scis quid magnopere velim. Hoc etiam
habe: me omnia fecisse, & facturum,
quæ Grotio nostro dignissimo, aut ho-
nori sunt, aut usui esse possunt. Reliqua
Dei sunt. Vale, & quoties Deum ado-
ras pro me ores: sum enim

Lond. De-
cembr. 26.
1632.

Tibi in Christo amicissimus,

P

Guil. Lond.
CLXII.

CLXII.

Clarissimo Viro D. Gerardo Vossio,
Franco Burgerdicius S. P. D.

Nescio quo Literatorum hominum facto fieri solet, clarissime vir, ut magna pars Literarum, quibus absentes amici, inter se colloquuntur, tam negligenter colant; imo penitus deferant, nisi occasio officium illud suadeat, aut necessitas extorqueat. Nec scio quo colore, me culpæ eximam, (ne te in societatem traham) nisi fortè occupationes meas ostendam, quas omnes prætereundæ solent, cum infimulantur omitti officii; atque ita apud te album calculum merear. Si tamen ista excusatio tibi non satisfacit, delibera, quid de me statuas: nihil autem statues, quod æquo animo non feram, si mihi jus non adimas de te quoque arbitrandi ex Rhadamantis Lege.

Ἐπειδὴ πάλαι τὴν καὶ ἐρεῖς, δίκην καὶ δόξαν γένοιτο.

Sed quid necesse erat, tam sollicitè *μελεῖσθαι*, apud te præsertim, mi Vossi, quem & facilem veniæ esse scio, & ejusdem mecum causæ socium, ut me damnare nequeas, quin teipsum quoque condemnes? quare si me audis, negligentiam hanc uterque remittamus alteri, & deinceps ita vivamus, ut amicitiaæ foedus, tot annorum consuetudine firmatum, inter nos non alii scribendi necessitati alligemus, nisi quam vel occasio, vel necessitas postulare videbitur. Ac me quidem primum, ut verum fatear, occasio movit, ad hoc literarum officium, quam tribus verbis exponam. Est hic apud nos Comes Polonus, supra ætatem doctus & prudens. Is ut omnia summa diligentia investigat, quæ ad Reipublicæ spectant gubernationem; ita nuper cum sermo inter nos esset, de re monetaria, & quam illa magna momenta malorum secum trahat in Rempub. si illius ratio non sit benè constituta, quæsit ex me, num quem ego autorem scirem, qui hanc rem, ejusque in Republica benè constituenda rationem exactè tradidisset. Dixi me vidisse apud te, volumen satis grande, in quo varii tractatus continerentur, qui ad rem monetariam pertinerent, sed nomina excidisse mihi, & authorum, & illius, qui volumen istud edidisset. Ideoque rogavit me summo opere, ut si molestum esset, illius libri usuram ad exiguum tempus, concedere, non dedignareris titulum saltem ad me mittere; ut ubicumque pos-

set, librum illum investigaret. Ego tam prolixè tuam humanitatem, (nec tamen supra verum) prædicavi, ut speret se librum ipsum visurum; sic tamen ut sibi satisfactum esse judicaturus sit, si titulum solummodo nanciscatur. Tu igitur vide, quo me, & illustrissimum illum Comitem, tibi velis devincire modo; & utrum eligas modum, rogo te obnixè, ut statim verbo respondeas. Non dubito, quin Vinnium non ignores, post tam multas, & tam longas deliberationes, in Professorum non ordinem, sed numerum esse adscitum: & jam agitur de vocando D. Altingio, nec dubito, quin res processura sit, si ille modo velit spem Heidelbergam redeundi deponere, seseque Academiae obstringere. Intellexi opus Grammaticum, jam cudi, quod diu promisisti: ego sanè illud avidè expecto, & avidius etiam lustrabo, cum erit editum. Fac quæso sciam quousque operæ processere, atque tulerim benè. Cum totâ familiâ Vale.

CLXIII.

Viro Clarissimo Vossio.

Reverende Vir, ac mihi plurimum Honorande;

EN tandem Literas, ne qui per annum oblitus tui meique fuerim per ævum esse videar. Gratas igitur tibi reddo maximas, vir ornatissime, pro humanissimo illo hospitio tuo (quo me cohonestasse te dicam an beasse potius). Amstelodami cum essem. Equidem quoties me in ædibus D. Vossii pernoctasse, recogitat mihi animus, superbit illico. Sed & vota fundo Deo optimo maximo ut in inceptis nuper studiis tuis, Ecclesiæque paci ac commodo destinatis, feliciter & ex tuo & tuorum animo succedant omnia. Perge, vir optime, & in Ecclesiæ bonum nate, & à Deo nutrite, donisque divinis instructe, illudque pro viribus agas indies, quod nomen tuum ad omnem deinceps ætatem, imo & æternitatem deferat. Certe qui apud omnes Theologiæ & Literarum purioris antiquiorisque studiosos magni jam nominis meritissimè es, majoris ita es futurus. Atque apud tui amantes maxime & honorantes, inter quos sunt viri & munere & merito ipsi honoratissimi, nihil gratius agi posse credo, quam ut è plerisque incognita illa Ecclesiæ primitivæ tempora morisque quasi *ἐν πύλῃ* describas. At cave sis quid agas. Astat acer Adversarius,

farius, Damporus nomine, nuper Londinensis Minister, jam (si Dis placet) Amstelodamensis futurus. Is multos ante hinc annos Historiæ Pelagianæ tuæ confutationem minitatus est, eamque in margine jam castigasse palam est professus. Quod si Historiam primitivorum temporum contexeris, disciplinæque nostræ (utpote simillimæ) fautor sis, nonne vapulabis à fugitivo. Quin & Tertiam da (vir inclute) Manichæanam scilicet, qua constet se fuisse similes pari cum errore insanire; sine vitio tamen, quia fato ad omnia acti. Jocari lubet cum venerabili viro. Næ, qui illum Manem, habet pro adversario. Vin à me Historiam Dampordianam, aut Characterem potius? Brevi expediam. Maximo in pretio habitus est apud suos, & in urbe, & in orbe Britannico (Puritanos dicimus) in rebus fidei, consilii, facti, temporalibus, spiritualibus, singula verba, oracula; consilia, præcepta; facta exempla sunt; Judex consiliarius (imo &) confessorius, unicus Damporus est. Papam credas alterum, Semi-Deum, Deum. At apud sanioris cerebri homines, longè audit alius. Vir superbus magis quam doctus, novitatis avidus. In Theologia (gradum licet Baccalaureatus suffuratus sit) lippus planè & cæcus. En specimen! Is est qui in pulcherrima (Deique favore) florentissima Ecclesia Anglicana, nil videt præter naves & noxas. Det Deus illi sociisque sanam mentem, & à reprobâ servet, quæ est ἀποστολική (Christianus oro.) Tibi (Vir ornatissime) vitam largiatur felicem ac longævam, ut diu sospes superstesque sis ad Dei gloriam, Ecclesiæ pacem, tuique & tuorum decus & solamen. Ita apprecatur & ex animo vovet,

Ex ædibus meis prope Reverentiæ vestræ
Templum Sancti Michaelis Cornhil Lond.
Januarii 1. 1633. honestissime cupiens,

Guiliel. Brough.

CLXIV.

Clarissimo, & amicissimo Viro Ger.
Jo. Vossio, E. Putcanus S. P.

Virorum Optime, & Doctissime,

CHrylogonum igitur nostrum suspensum tenebo, donec de Cathedra Lovaniensi serenissima Princeps pronuntiet. Ea tamen, quantum rescire potui,

in Medicum quemdam Bredanum, videtur inclinare, à Magnis hic plerisque commendatum. Eventum expectabimus. Interea, ut affectum meum, studia, & obsequia omnia, Clarissimo Plempio offeras, rogo: quod nomen mihi in Cornelio (nescio an superstite) æstimatum. De quatuor principiis diei, Theoresin nunc istam ad te mitto. Si judicabis oculis amplissimi, præstantissimique Beaumontii, dignam esse, fac ut Exemplar ex his unum habeat: unum Clarissimus Plempius. Adjunge & quartum, ut per eorum ambulet manus, qui curiosi, & periti sunt. Quæstio vero orta est, utri lucrari, utri amittere diem videantur, qui cum sole, an adversus solem, iter orbis terrarum conficiunt; qui recedunt in tempore, an procedunt. Tibi quid videtur? Ego lucrum Navigationi in Occidentem adscripsi. Vale, & me ama.

Lovanii in Arce, xviii. Kal.
Februar. 1633.

Tuos omnes salvere jubeo.

CLXV.

Domino Gerardo Joh. Vossio
Τῷ πάλῳ, Εὐπρεπίῳ.

QUamvis non fugiat me, V. C. quantum peccent in publica commoda, qui tuis occupationibus interstrepunt, non potui tamen, cum D. Mylius, ad vos irer, & verbo, & literis, te non salutare. Imprimis cum hac occasione, videndam tibi offerre possem, quæstionem Epistolicam, de vitæ humanæ termino; de quo utinam etiam tuum judicium, habere potuissem; valedendum cum aliis, vel inter καμάρια literaria adhuc servandum. Video divinæ sapientiæ Consultos, satis sudare, antequam recondita ista planè operiant, & abstrusam in profundo veritatem eruant. Fortasse hic videri possit, ὡς ἀπὸ τοῦ αἵματος, ὡς ἐκ τοῦ νεφελῶς. Diversæ de termino isto, & διὰ τὰ πᾶσι discordantes sententiæ, ac singulis suæ rationes, etiam ἐν τῷ Διδῶναι ὁ μᾶλλον adducitur. Xenophanes apud Varronem dicebat, Hominis est opinari, Dei scire. Annon idem hic usurpare liceat? Ut tu, V. C. pro recondita, & incomparabili eruditione, judicium ferres, visum hæc Clarissimo nomini tuo inscribere: & ut simul aliquod animi, grati, &

memoris, in te publicè extaret monumentum. Utinam quale debere me sentio, præstare possem. Non tu me, ut Senecæ his utar, in grege Discipulorum habuisti, sed dignum putasti propria, & peculiari cura, ingeniumque latens, & pigrum, injecta manu extraxisti, omniaque benignè adeo in me transfudisti, ut ingratiſſimus essem, nisi te inter gratissimas necessitudines diligerem; imo velut alterum parentem amarem, colerem, & omni observantia, æternum prosequerem. Vale, Mi Doctor, & meritis tuis obstrictum amare perge

Raptim 2.
April. 1633.

Vossianæ Discipl. Alumnus,

Joh. Beverwyckium.

Salveant cum matre filii, è quibus Dionysio gratias habeo, pro Heroico Heroe nostro digno, referam nuper, *ἡλικίας ἡγουμένης.*

CLXVI.

PAUCIS ad te scribere cogor, Vir amicissime, quia & hic nuntius inexpectatò sese obtulit, & festinat: parum tamen, quàm omnino nihil, ad te dare malui. De Blavio tuo, quod conjunctim Opera mea edere cuncta constituerit, gratum fuit intelligere; & ut virum in proposito hoc confirmes, in majorem modum rogo. Opus autem excudi ea caractere elegantis, & quo fere hætenus illa sunt excusa à Typographis prioribus. Optimè certè meritum de te me esse existimabo, si in curam hanc incumbere non gravaberis. Quæris quoniam ea modo atque ordine digeri & edi velim; qua de re nunc hoc habeto. Puto lucubrationes meas omnes dividi posse in Tomos IV. quorum unus continebit mea Attica, uti nunc digesta mitto; alter opera historica, tertius Miscella, quartus Auctores à me primum in lucem editos, atque Notis illustratos, & alios in quos Notæ itidem aut Commentarios publicavi. Singuli verò Tomi isti, quo emptori paulo magis commendare sese queant, novo etiam opere aliquo pluribusve augebuntur: cum & singula opuscula emendata & auctiora multo erunt. Initium autem fieri ab *Atticis* velim. De *Regibus Atheniensium*, quæso, aurem homini vellito, & urgeto editionem: sed de *Phædo* meo, *Reliquiis Atticis*,

& *Familiis*, quid futurum est? Miror de his nullam omnino abs te mentionem fieri. Quæso proximis significa. Mitto primum folium Solonis mei, quod scribebas periisse. Tua quæ edis maxime videre aveo. Per hunc rescribe; nam non semper tales se occasiones nobis offerunt: certe tradet quicquid dederis. Uxor mea cum gravissimo ac periculoso quoque morbo diu est conflictata, jam undecimam septimanam, nunc paulatim (Dei gratiâ) convalescit; ac speramus bona omnia. Salutem tibi atque tuæ plurimam dicit: ita & ego liberique, tibi, tuæ, & tuis omnibus, filia imprimis filia.

Scribebam Raptim So-
ræ ad diem x. Aprilis,
clō Idc xxxiii.

Tuus prisca Fide,

Joan. Meursæus.

Quæ jam edidi, quia apud te exstare ea arbitror, ut Typographo recudenda subministres, abs te peto; quæ non edidi, mox submittam: ut & ea, quæ in singulis addidi, aut emendavi. De dedicatione postea cogitabo, cum tempus erit.

CLXVII.

Clarissimo, Humanissimoque Viro Ger. Jo. Vossio, Erycius Puteanus S. D.

ET Suadam & Musam Doctissimi filii tui admirati sumus. Sed ostendit ille ingenii dotibus, qualem Patrem habeat, & quid sit etiam inter doctos excellere. Jam in Patre filium, in filio Patrem amo, & me utrique obmissum munus, novo nexu obstrictum scribo. Etiam pignus vultis? has nunc urbaniani Circuli vindicias, capite, perlegite, censete. Vestras, singulari ratione; quia nomen Vossii, & judicium habent. Nautæ vestri quid omnino de Principio *ρυσθημῶν*, & linea principii statuam, scire cupio. Sed quia per Occidentem, aperto illo novo freto Lemairo, in Orientis Insulas navigatur, & alium in Moluccis Insulis diem Batavi inveniunt; opportunè circulo nostro utentur: non enim illud Homeri audient.

ἢ ἔστιν ἡμεῖς οἱ πῶδιν μέγιστος ὕψος ἔχοντες;

Quæ reliqua hujus argumenti sunt, propediem producam. Vale, Vir Clarissime, & amicissime, & cum tuis salve.

Lovanii in Arce, Nonis Aprilis clō Idc xxxiii.

Subito cum Tabellarius abiret.

CLXVIII

CLXVIII.

Excellentissime Vir,

Ess me eorum de grege esse profiteor, qui facilius ferunt suam in curriculo scribendi Literarum reprehendi segnitem, quam intempestivam crebritatem accusari: tamen hoc sub temporis articulo, vel amici cuiusdam mei atque illius quidem tam veteris quam cari postulatione huc impellor, vel tuâ humanitate invitator: cujus ego dum ero, memor ero. Degit jampridem in hac Urbe Wolfgangus Bacherus, Vir tanto magis mihi honorandus, quanto dignius, dum hæc Germaniæ diluvies Bellica sinebat, aut aliquam ibi religionis *δεδωδξίαν* ferre poterant Pontificii in superiore Palatinatu septendecim *ἐκκλησιαστικῶν* inspectorem esse concionator gessit. Filium autem habet Josephum nomine annos ipsos triginta natum, quem adolescentulum non aliis modò, sed mihi quoque nominatim in Pædagogo Ambergensi erudiendum, ut potuit, diligentissime tradidit. Cujus me Discipuli adeo non poenitet, ut sæpe mirer quomodo cum paucis aliis animum contra licentiæ bellicæ cœnum atque labem tenere rectum, & tam evidenter demonstrare potuerit mentem solidè bonam, ne pessimis quidem sollicitare exemplis solere. Expulsus igitur Patria statim invenit hospitium Francofurti ad Viadrum apud Franciscum Omichium, primum illum Electoris Brandeburgici Medicum, cujus cum filios domi cum cura & fide institueret, facillimè obtinuit ut in Academicis Principis alumnis numeraretur. Exinde & Angliam visere, Serenissimi Bohemiæ Regis commendatione, potuit, & reversus, quadriennium totum vixit cum Rumpfo, medico celeberrimo; denique in Gallia triennium jam commoratus, partim in Briegensium Silesiæ Principum contubernio, partim in Marchionis Forciani familia hæsit. Quibus omnibus in locis & suam abundè præstitit ingenuitatem, & Medicinæ peritiam variis curandis ægrotis mirificè auxit, & morum decus tot præstantissimorum hominum usu & convictu ita cumulavit, ut Palatinatus, si quando recludatur, vix carere eo possit. Interea quoniam nihil vehementius cupit quam ut in aliqua Italiæ Academia Medicinæ studium, cui præcipuè fuit deditus,

perpolire contingat, Patrem optimum frequentibus monet literis, omnes eo perveniendi occasiones circumspeciat. Is igitur quod reputasset, quantum vestra in urbe sit opportunitatum ejusmodi, si quis despiciat; quanta item tua sit & bene meriti & optime merituri autoritas, te & meis literis & mecum impense rogat, ut si quis forte isthic illas proficisci in terras cum aliquo studiorum moderatore cupiat, filii sui mentionem facias, eundemque adeo dignum judices, cui talem conditionem tuto conciliare possis. Mihi sic nota est Juvenis istius summa & pietas & probitas, ut cum nos tres tanto beneficio tibi sis devincturus, tamen confidam eum non minus tibi esse debiturum, qui Josephi opera uti volet. Tu, Vir amplissime, gratum parenti sollicito feceris, si significaris, quid hac in re sit sperandum. Jam ut ad me veniam, nonne tibi tandem stomacho esse incipit mea ista *ὀνειδυμυρία*. Equidem in re familiari, dum necessarios emo libros & alia quædam, nihil nisi *πενυρία*. Ex alia parte, invidentiæ rictum, quem ipsè muneris Academici susceptione distendi, meo labore vel claudere studeo vel mitigare. Præterea nuper aggressus sum Apollonium *Ἀπολλωνίου* Pœtam, idq; cum secundissimo Amplissimi Domini Heinsii judicio. Est illius interpretatio Latina Hartungj, quam Notis uberioribus & nova substituta versione emendo. Quid sim emoliturus, Deo est compertum magis quam mihi. Si manuscripti mihi codices, si antiquissimi dentur libri animus mihi crescat. Sed plura de his & aliis alibi. Vale, Vir excellentissime.

Lugd. Bat. 22. Maii Excell. & Amplit. tue
Anno 1633.

Observantissimus.

Jeremias Hoelzlin.

CLXIX.

Dionysio, magni Vossii filio, S. P.

Mi Dionysii,

QUÆ mihi cum Parente tuo & unâ tecum intercessit familiaritas, ea ut ex animo meo deleatur, nunquam permittam; sed suavissimæ istius consuetudinis affiduè memor, vestram amicitiam, semper colam, & ambibo. Idq; merito, quod hac ratione,

ratione, nonnisi vestro in me animo, responsum sim: cujus & nuper indicium ostendisti, quum licet necessariis curis implicatus, committere voluisti, ut me non compellato discederes; sed iteratò, nec sine munere, veterem amicum salutasti: inter varios sermones, ultrò citròque habitos, cum eorum mentio incideret, quæ sub prelo habebam; ubi parata essent, transmissurum spondebam. Ut fidem liberem, ecce vobis utrumq; mitto scriptum. Vos estis, qui de huiusmodi solidè judicare possitis: nam pleraque, vel linguas spectant, vel historias orientales, vel denique Theologiam. Quid vel Pater tuus, vel ipse de istis censeas, intelligere volupe erit; modo hac in parte eam *missurum* experiar, quam antehac in Parente tuo observavi. In dissertatione ad Lectorem Benjamin præmissa parum dubito, quin vestrum assensum obtenturus sim: sed magis dubito, de discursu, Danieli præmissa, ubi nonnulla, in quibus, à virorum doctorum auctoritate discedo; non ita tamen, quin id non sine ratione à me factum credam. In Medorum regno, & septuaginta hebdomadibus Danielis, præcipua discrepantia. Verum cum in iis nonnulla incerta sint, cum minori crimine, ab aliorum opinionibus discedi posse autumo. Sed de istis vos videritis. Parentes tuos cum fratribus tuis, quam officiosissimè meis verbis salutes velim. Vale, mi Dionysi, & diu vive Reip. meque ut soles redama, qui semper

Lugd. Bat. Nov.
Maii, An. 1633.
exactæ salutis.

Tuus ero,

Const. L'Empereur.

CLXX.

Viro magno & perillustri D. D. Gerardo Vossio apud Amstelodamenses Historiarum & humanioris Literature Professore, S.

HÆC Apologetica, Vir Magne, tibi debentur, quia ab eo profecta sunt quem tu jam potes tuo tibi jure vindicare: tum ea est ingenii tui vis, ut totam eam rem, quæ de agitur, nemo penitus introspexerit, aut de ea sententiam ferre possit æquior: præterea est auctoritas ea nominis tui, ut vel sola asserere possit, si minus assentiendi necessitatem, saltem dissentientiendi pudorem: Peto, Vir Clarissime, sententiam de ea re tuam, imo experto

animo suspensio & trementi: possum fortasse iniquus videri, qui velim aliquid de tuis temporibus & aliorum commodis derivare, ac mihi subducere: sed tu feres eum qui ducitur studio augendæ rei suæ Literariæ, quam agnoscit esse tenuem; & perges in eum esse liberalis, qui hac ipsa in virtute te quandoque imitabitur, & quod à te acceperit alteri tradet; imo eo quoque pacto (improbe dicam) tueberis tua beneficia. Cupido recte (quid ni enim verum fateor præsertim apud te) cupido inquam ita mihi blandior honesta me habet, ornandi ingenii & ea comparandi, quæ ad alios olim possint cum aliquo fructu dimanare. Nosti cui me voto addixerim rei: nempe in qua maximus & honestissimus eloquentiæ locus est: in quâ me non inficior aliquid per te profecisse: submisi enim me tibi, tuisque præceptis patientem aurem accommodavi: plura indies habiturus incrementa ubi ea melius concoxerim: vel paucula, Vir Magne, semina à te peto, unica pagella etiam dimidia contentus esse possum, imo & gloriari. Per illum candorem animi tui quem diligo, & quo, ex quo te vidi, splendidiori luci mihi videor: Per eam eruditionem quam suspicio ac veneror oro te, orat inquam te Prætor verè tuus, ut eorum eum moneas quæ in hac scriptiuncula desiderantur: desiderantur autem plurima. Agam tecum tuo genio, id est liberrimo, & maximè liberali: apage laudem, reprehensionem volo: enimvero si mea prebentur tantum, mea tantum mihi manent: si reprehendor à te, præsertim fugient mala in quæ incideram; accedent bona quæ non eram assecutus: ego autem non ita mihi placeo, ut possim quæsitis & præsentibus acquiescere. Cæterum V. C. mihi si reditur, quo ego non possum me autore, plurimi convolabunt & oraculum consulent Amstelodamicum: Sin minus, ego rectè digitum ad fontem intendendo, defunctus ero eo officio quod iis debeo qui de me sunt optimè meriti: Diebus adhuc 15. Deus uti reor, hinc deducet tibi plurima debentem, & omnia felicia comprecantem,

Lugd. Bat. 1633.
Junii 18.

P. Prætorum.

Salmasius te salutatur, atque uti par est, magni facit, eum inveni puerperam habentem & auctum prole. Dubito an Rhetorica ad Alexandrum sit Aristotelis: quia laxior stylus videtur repugnare.

CLXXI.

Clarissimo Virorum, Gerhardo Joanni
Vossio, salutem & observantiam.

ET incomparabilis eruditio tua, Gerharde Vossi, nomen omni titulo majus, & incredibilis humanitas, quam Balthazar Willius, Theol. Doctor, & Bernhardus Damke, cognatus meus, cum Francofordiæ in me inciderent, prædicare ad satisfactionem se mihi posse desuperant; ita in tui me admirationem pellexerunt, ut velut extra me positus, & adolescentis insuper habens pudorem, istas ad te exararem, & utramque illam tentare aggrederer. Audax facinus, fateor; sed nec infrequens iis qui literas amant, & bonam mentem; nec grave erit tibi, postquam tam arduam famæ arcem ascendere virtute tua dignum existimasti, propius à me cognosci, ut ista in te adorari dignius possit. Exspecto itaque, de uno, atque altero, Augustini, in lib. de Civitate Dei, loco, & meis emendatiunculis, severum & forte judicium tuum, quo si istæ obelo transfigi merebuntur, excusabit tamen conatum meum comitas tua; & si hac non potero, alia via, ut expediam, mihi concede, salvo quem ambio unice, favore tuo. Lib. II. Cap. XX: Die, noctuque ludatur, bibatur, vomatur, diffluatur, saltationes undique concepent; Theatra inhonestæ letitiæ vocibus, atque omni genere, siue crudelissima, siue turpissima voluptatis exastuent. Cod. unus Lud. Vivis, Salutationes, alter Salutationes, abrafo a. Itaque prius ille videtur probare. Sed membr. MSS. quas inspexi in Bibliotheca Senatus Norici, Saltationibus. Ergo scribendum, Bibatur, vomatur, diffluatur saltationibus; undique concepent theatra inhonestæ l. v. & diffluere saltationibus, ut Apuleio, saltatio exossa, & enervis. Plinius Paneg. c. XXXIII. Visum est spectaculum inde non enervæ, nec fluxum, nec quod animos hominum molliret, & frangeret. Cap. XXI. Omnino nullam esse Rempublicam: quoniam non esset res populi, cum tyrannus eam factione capesseret, nec ipse populus, jam populus esset, si esset injustus. Ita omnes editiones, quas vidi, Basilienfis, Genevensis, & optima omnium Parisiensis. Sed nihil puto certius, quam scribendum, cum Tyrannus eam factione capesseret. Nam factio opponitur Aristocratiæ, ut Tyrannis Monarchiæ, ut patet ex præcedentibus. In Cap. XXX. Observavi plaustrum errorum doctissimi Vivis, quod etiam in omnibus editionibus repetitum. Ita Augustinus: Illic

enim tibi non Vestalis focus, non lapis Capitolinus, sed Deus unus, & verus, qui nec metas rerum, nec tempora ponet, imperium sine fine dabit. Msc. ignorat eò qui. Deinde Vives ad verba, Lapis Cap.] Jovis simulacrum in Capitolio erat lapideum; hinc per Jovem lapidem sanctissimum Romanis iusjurandum, ut etiam in proverbium cesserit. Atqui nec per Jovem Lapidem jurabant Romani; sed Jovem Lapidem, & erroris dudum convictus Apulei locus, quo istud videtur probari: nec iusjurandum illud à Jove lapideo ortum, sed à formula quæ pronunciabatur ad projectum lapidem: nec Augustinus Jovem lapideum, sed Terminum intelligit, cujus pertinacia erat symbolum perennaturæ Imperii; sed ego cesso poma ad Alcino-um mittere. Tu, vir maxime, quamprimum responso tuo, me dignare, ut plausum ingenii mei sciam, nec dubita an sim, quod sum, & spondeo nunquam non futurum. Salve & optimo publico optimè vale, cum tuis.

Ampliss. famæ tuæ

Brem. ad Visurgim,
prid. Non. Junias. An.
cId Idc XXXIII.

cultor devotissimus.

Johan. Fredericus Gronovius.

CLXXII.

Clarissimo & incomparabili Viro D. G. J.
Vossio, S. P. D. Joh. Beverwyckius.

L Iteras tuas merum nostri amorem spirantes legi, summa cum voluptate. Pro innumeris tuis in me beneficiis, nunquam satis gratus esse queam, quod serio magis opere, aliquando testatum faciam. Meminit tui in vita sua, Cl. Rutgerius, ac ejus temporis quo sub disciplina tua vixit, non sine gratissima tanti præceptoris memoria, sæpe ac libenter recordari solere scribit. Tuæ etiam institutioni, acceptos referens quoscunque postea ei Aula honores dedit. Ego licet nec dignitate, nec eruditione, sim cum hoc Heroe conferendus, quicquid tamen obtinemus, quod aliis non omnino displicere possit, tibi me debere, ut merito ita lubens profiteor. Et mecum omnes disciplinæ tuæ alumni, qui vel ipsi aliquam eruditionem consequuti, vel eruditionem saltem, & virtutem reverentur: Reliqui non æstimandi unius assis, & calumniæ poena digni. De Cl. Puteano quod scribis, valde me percussit, quamvis tale quid metuerem, cum legissem stateram, docte

doctè magis, quam prudenter scriptam. Accepi ab eo literas, statim jam edita, quam tamen præter morem suum non misit. Eam Catzius Haga (ubi impressam quoque nosti, nec hoc nostro melius) ex conventu ordinum, ubi cum plausu excepta, attulit, & mihi legendam tradidit. Deus bone! quàm bonus ille Belga, tam malus Politicus. Non hic ferremus, qui talia de nobis, quæ ille de Rege, de importuna Archid. legatione, & similia. Ac nisi amici omnia pro illo, est quod metumamus vicem optimi, & elegantissimi ingenii. Vocatus est Bruxellas, bis in concilio privato auditus, & ibi manere iussus, sæpius audiendus. Hoc totum est, quod huc Bruxellis scriptum esse, heri mihi retulit H. Oemius, qui Pastor Dordrechtanus, apud suos audit, sed ob amicos quos plurimos habet, nihil illi periculi fore putabat. Sibi addictissimum habet, Varambonum Archiepiscopum Casariensem Infanti à sacris, Chiffletium Medicum, qui plurimum apud Ser. Inf. possunt, & alios, sed infestum Rosam Præsidem Hispanis obnoxium, & paci ut dicitur, adversum, qui etiam causa esse putatur, cur decem jam mensibus, nullæ ex Hisp. literæ ad nos pervenerint. Infans quoque Cardinalis, qui jam in Burgundia, non minus quàm Eugenia, illi benè volunt. Deum rogo, & benè faciant, neque ob nostras hanc gravius animadvertant, in virum candoris melle penitus imbutum. In quo omine desino, V. C. & te cum præstantissima & Nob. uxore à me, meaq. salvere jubeo.

Reptissimè 8. Julii 1633.
expeçtante Tabellario.

Si quid certus de illo, tecum communicabo. Hæc quamvis pauca, quia iusseras, scribenda tamen putavi.

CLXXIII.

Viro maximo, & incomparabili D. Gerhardo Joanni Vossio, Professore.

Vir maxime,

Mirum in modum, gaudio me affecit filius tuus D. Franciscus, quod tandem aliquando te nobis adfore pro certo nuntiavit. At verò displicet simul uxori, & mihi, quod conjugis tuæ unà tecum utrique nostrum desideratissimæ adventum, nonnisi dubie referat. Atque ita quidem, ut ipse credat potius, non venturam. Qua-

so si id fieri potest, aliter induc, ut statuas; conducet id proculdubio, ejus valetudini mirè quàm nimium firmæ. Tradidi Secretario Veneto Thadæo Vico tui observantissimo, fasciculum, quem miseris, Literarum ad Illustrissimum Molinum. Scire desiderare se ait, an à me tradita tibi sint, quas per Grafwinckelium misisse dicit, literæ à Pignorio, (si bene memini) Theologo Vicentino, itemque an intellexeris, id quod D. Vander-Myle significaturum se receperat; quantoperè illustrissimus Molinus de Ægyptiorum legibus & ritibus, tuum aliquid aveat videre. Præterea summopere desiderare scire Molinum dicebat, absolūtusne esset Reydanus, D. Dionysii, à Typographo, quod ego asserere non dubitabam; quandoquidem id à D. Francisco acceperam, qui simul dedicatorem communicarat, meumque super ea judicium, (quod tu quam sit tenue, nosti ipse, si quisquam alius) fratris, ut inquebat rogatu, quæsierat. Quid dicam? mihi placent omnia, quæ à tam eleganti ingenio, prodire possunt, etiam invisæ. Et placent etiam multò magis, postquam videre, & perspicere contigit. Si quid tamen esset, uti diversæ sunt hominum mentes, quod placeret minus, quam cætera quæ perplacent; id ego literis significare vellem, quod ex absente causam, qua motus diversum à me senserit, intelligere, eaque intellecta, me ipsum refellere non liceret. Coram ista fiunt liberius, & accipiuntur æquius. Interim nihil ego improbo, quod probat ille, præsertim si tuus accessit probandi calculus. Vale, & tuo, unà cum uxore, ad nos adventu bea

Haga-Comitis summa
cum festinatione, die xi.
Jul. 1633 xxxiii.

Tuum

εὐχὴς τῆς καρδίας,

G. R. Doubletium.

CLXXIV.

Viro Clarissimo, ac doctissimo Dom. Ger. Vossio, Historiarum Professore celeberrimo.

Nondum mihi excidit, clarissime Vossi, quam rara in primo nostro congressu, me complexus fueris humanitate: cui accessit nuper amica salutatio, per Suecum quemdam studiosum. Indignus essem tuâ amicitia, si oblivione ista sopirem, si ingratus

gratus ista silentio præterirem. Sæpius quidem in animo mihi fuit, aliquo sive literario, sive alio signo, meum in te affectum testari, sed fateor me à te præoccupatum, & doleo. Tum tales sunt meæ literæ, ut in tantorum virorum conspectum, vix prodire audeant. Idem ergo mihi faciendum duxi, quod olim filii Jacobi, visuri faciem Præsidis Ægyptii, non sine munere acceperunt. Ecce & hic additum munus, sed literarium. Offero, inquam, tibi exemplum laboris mei, quem exantlavi, in opere Catechetico Urfini, & Paræi, non solum contrahendo, sed & complendo, ornando; adeo ut novus omnino labor videri possit, prout in præfatione monitum. Nolui tamen tantorum virorum nomina reticere, quum & meritiissimi fuerint de Ecclesia, & occasionem mihi hujus laboris dederint; maluique ipsis meos labores adscribere, quam mihi quicquam, quod ipsorum sit, stultè arrogare. Fateor, aliis similibus laboribus, & quidem minori cum difficultate, mihi majorem potuisse parari honorem; sed nos utilitati studiosorum, quam propriæ famæ consulere maluimus. Porro ubi hoc munusculum gratum tibi fuisse, vir magne, cognovero; faciam ut propediem habeas (quæ adhuc sub prælo est) necessariam instructionem, de ratione studii Theologici, in gratiam studiosorum nostrorum accuratam. Vale, & me sicut coepisti, amare perge; atque ne desit mihi humanitatem tuam venerandi, ac grata mente recolendi occasio, sicubi ex usu tibi sint officia mea, pro jure amicitia impera, habebis me tibi semper obsequentissimum.

Dabam Hardervici
An. 1633. 1.º Julii.

Tua claritatis
observantissimus,

Henricus à Dieft, Theo. Prof.

CLXXV.

Vir Clarissime,

Literas tuas, quas postridie Kal. Jun. ad me dabas rectè accepi. Admodum invitatus sanè intellexi tantas esse occupationes tuas, ut per illas vix ex voto respondere tibi liceat. Tamen mihi imprimis potes, quia semel toto anno, ac vix iterum, cum non offerat certa se scribendi occasio, ad te literæ meæ eant: & hoc ipsum efficit, ut debeas quoque; cum non possis, quando velis: itaque nunc etiam peto,

jure meo, ut per hunc amicum meum saltem verbis quam paucissimis rescribas. *Artem Grammaticam, & Origines*, sicut & *Pœticam artem*, te jamdudum promittente, valde exspecto, & à filiis *Julium Cæsarem, Rabbi Maimonidem & Historiam Reidani*. Quæso fac promissa appareant. Pro *Oratione* tua filiique *Dionysii Panegyrico* magnas sane gratias ago. Vidit uterque Cancellarius Regis ac Regni; vidit Dom. Rosacrantzius; omnes laudant, idque in majorem modum. Operis mei de *Atbeniensium Regibus* exemplaria avidè videre velim: & impositum esse finem literæ tuæ spem fecere, quam si fallunt quæso hominem impellas, ut absolvat. Cupiam videre quoque quod futurum indicasti separatim *Piræum, Reliqua Attica & Familias*. Utinam & voti hujus compos fiam: nam expectant, & inculant quoque tacitè fidem meam, qui inscripta ea Opuscula sibi norunt. Quæso isthic operam item tuam nava. Mitto nunc quæ necessaria ad priorem operum meorum Tomum; nempe *Bibliothecam Atticam, Ceramicum Theſeumque*; & inferenda aliis lucubrationibus jam vulgatis. Addo exemplar Solonis, ut Græcorum Auctorum loca, hic Latine tantum expressa, ob penuriam typorum, Græce quoque exhibeantur: quod omnino fieri velim. Tum poematum reliquæ multo plures, quam quæ hætenus vulgatæ, adjunguntur; minimè prætermittendæ. Ipse istæc ut lubebit arbitrabere. Addo effigiem æri incisam, quæ in fronte suo loco, quem putabis convenire, collocetur. Quicquid filia tua expendit meo nomine, en remitto, gratiasq; quantas possum ago maximas. Utinam vicissim tuæ inservire mea posset: faceret libenti animo uti debet, & ut amicitia nostra suo illud jure possit, *Atticam Feriatam* meam, quæ debebat in hoc Tomo comparere, nunc omisi; nam cum eam ex *Græcia Feriata* excerpere, & seorsim exhibere, statuissem, aliud consilium cepi. Vale, vir præstantissime. Uxor mea te tuamq; liberi liberos salutant; ego seorsim Franciscum tuum, & Dionysium, & ut porro patrem imitari pergant, seriò hortor.

Raptim, Soræ, ad
diem xx. Augusti
cl. l. c. xxxiii.

Tuus sine dolo,

Joannes Meursius.

Q

CLXXVI.

CLXXVI.

Viro Clarissimo D. Gerardo Joanni Vossio, Mæcenati optimè de se merito, S. P. D.

Amplissime Vir,

Quia omni prorsus abstinere circuitione, eximia illa tua ~~genitricis~~ semel iussit, id quod res est, promptè eloquar, facessunt mihi negotium terni Saxonis versus, lib. 2. p. 20. qui sic habent:

*Adde oculum propius, & nostras prospice Chelas,
Ante sacraturus, victrici lumina signo,
Si vis præsentem tui cognoscere Martem.*

Horum inquam ecquis genuinus sensus? Et quid hoc loco chelæ! Ego certè, & ingenio, & libris destitutus, vix assequi poterò. Apud elegantissimum Poetam Rutilium lib. 1. de reditu suo, v. 183. non ita pridem legi:

*Et jam nocturnis spatium laxaverat horis,
Phæbus Chelarum pallidiore polo.*

Sed utrobique aqua mihi pendet. Te igitur nullus dubito, quin in solvendo hoc nodo, Oedipum nobis præstes. Alter ejusdem Saxonis locus, est lib. 6. mox initio, de liberalitate Cæsaris, & Africani, qui scriptores rerum suarum amplissimis muneribus prosecuti. Sed nomina eorundem scriptorum scire discuperem. Quantum conjectura assequi datur, illorum unus Ennius erit. Verba autem Saxonis nostri, in hunc modum habent: *Eximium exigui poematis premium, famam quoque Cæsarianæ retributionis excessit. Divus siquidem Julius, victoriarum suarum toto orbe editarum scriptorem, illustratoremque municipio donare contentus extitit: sed ne Africanus quidem, in rependendis operum suorum monumentis, munificentia Danos æquavit.*

Tuus,

Stephanus Johannis.

CLXXVII.

Clarissimo Viro D. Gerardo Joanni Vossio, Mæcenati optimè de se merito, S. P. D.

Clarissime Vir, Amice conjunctissime,

Nihil equidem accideret mihi optatius, quam si longiori te Epistola, inpræ-

sens compellare liceret. Sed ferale silentium stylo meo indixit, geminati vulneris acerbitas, quod mihi hoc anno infligere, voluit summus ille, vitæ necisque Imperator ille Deus. Amisi etenim, heu! amisi & dulcissimam conjugem, octiduo post puerperium defunctam, & filiolum desideratissimam, quæ jam risu cognoscere patrem incipiebat, & unicum erat viduitatis meæ solatium. Verum non tam amisi, quam præmisi, ad æternum illud, omnibusque bonis circumfluens cœlestium animarum consortium; ubi me beatæ istæ animulæ præstolantur, donec vasa colligere, & ad piorum mundum commigrare nos jussit, cujus in manibus, sortes meæ sitæ sunt. Interim admitto consolationes, iisque animum quotidie erigo, quas & sacra nobis literæ, & humanæ conditionis recordatio, suppeditant. Quem ego casum non potui, quin in sinum tuum effunderem, quippe quem non ignorarem, æque graviter eum laturum, quam me, cujus maxime interest. Cæterum maximæ à me tibi debentur gratiæ, de divino isto, filii tui Panegyrico, quem mihi tuo nomine, tradidit suavissimus Collegarum Meursius. Cui nunc refundo longè dispar redhostimentum, Oratiunculam scilicet meam, quâ nobilissimæ juventuti, ad parandam Eloquentiam, faces subdere volui. Tuum erit benevolâ excipere mente, & me porro ut cœpisti, amare, qui æternum tibi devotus. Vale, Belgii sydus, & corculum Musarum.

Sora, a.d. xviii Aug.
cl. loc xxxiii.

Stephanus Johan. Stephanus.

CLXXVIII.

Clarissimo Viro Gerardo Joanni Vossio, S. D. Vincentius Fabricius.

CUM nuper suavissimè unà fuisset, Vir Clarissime, in domo Vickewortii, constitueram, ut nosti, proximo die te invisere. Sed optimi Vickewortii humanitas, dieique sequentis convivium, desiderii meis intercessit. Equidem quoties cogito lætissimi candoris tui indicia, quàm hilariter me exceperis, quibus sermonibus, ut laudandus viderer, effeceris: toties in eam devolvor opinionem; ut quemadmodum eruditione tua nihil augustius omnes novimus, ita candore, nihil arbitrer elegant-

elegantius. Quò magis doleo, non licuisse mihi ulterius, jucunda præsentia tua frui, præsertim cum ipse invitares, & inusitata humanitate, quod flagrantissime cupiebam, spontè exigeres. Cæterum, & alia quadam festinaverunt discessum meum. Imprimis quod Leidam rescuæ meæ essent transferendæ. Quas dum convaso, poemation hoc, quod ad te mitto, excidit. Illud autem & crudum, & tumultuarium, si legere tantum dignatus fueris, jamdudum aliquid fiet, quod voto majus sit. Eruditissimum juvenem Dionysium Vossium, filium tuum ex animo diligo, & colo. Nec quicquam contingere potest, quod illius amicitia mihi jucundius sit. Si unquam honestum est, conciliaturam exercere, heic quæso, ne defrigeas, Vir Clarissime; Affectus mei eximii, & sinceri, obsidem munusculum hoc, licet exiguum, à me habeat. Felicitissime vale, vir maxime, cum omnibus tuis.

Lugd. Bat. a. d. xxiiij.
Sept. clō Idc xxxiiii.

CLXXIX.

Clarissimo Viro D. Gerardo Joanni Vossio, fautori meo, S. P.

Clarissime juxta, ac doctissime Vir,

Peramanter rogo, ut si tibi non sit molestum, digneris examine pensiore judicare, an veræ, justæq; integritati restituerim, versus aliquot, non ita pridem in Saxone nostro mihi oblatos; imprimis fol. 4. fac. 2.

Regum colla potentium victrici toties perdomui meorum,

Fastus reorum turgidos exuperans potiore dextra.

Ut constructio talis sit; Ego Gramus multoties perdomui victrici dextrâ colla potentium Regum, & multoties perdomui turgidos fastus meorum reorum, h. e. Clientum, seu meo imperio obnoxiorum, & subinde rebellantium; (Nam alioquin quid per reos suos intelligat, vix divinare possum) exuperans, (pro exuperatis) potiore dextra. Mox sequenti pagina, Sapphico extremo;

*Clarius posthac Agathum manebit
Agnitum, &c.*

Illud Agathum, arbitror Saxonem latina incude efformasse ex Græco ἀγαθόν, pro

bona fama, five virtute, vel fortitudine. Postremò versâ pag. v. 3. & 4.

*Quando Suarimum exanimavi titulis abusum
Nec meritum conciliantis sibi nomen.*

Pro conciliantis restituo conciliantem, ut respondeat, *τὸ Suarimum*. De his omnibus peto mihi sententiam tuam aperias, & importunitati meæ placidus ignoscas.

Observantissimus tui,

Stephanus Johan. Stephanus.

CLXXX.

Vir Celeberrime,

CUM superiori proximo mense Hibrandus Vechterus, Juvenis eruditus & elegans, adductus claritate tuæ inusitatae doctrinæ Amstelrodamum iret, nomen daturus illustri vestro Gymnasio, & tuæ divinæ inhiaturus voci, non duxi meæ esse frontis tibi, tanto sapientiæ professori, literis meis obstrepere, utcunque ille, quem dixi, adolescens quantivis pretii, ter quater id ipsum à me peteret, & ipse quoque ne quid dissimulem, intimus meus animus ad aliquam notitiæ tuæ partem pervenire gestiret. Quia verò hodie, per Epistolam bene longam, idem illud officium summo à me studio postulavit, sustinui tandem, ingenio meo pudori vim facere, & hoc literularum, ad te exarare. Est autem Vechterus noster, filius primariæ viduæ, frugi & cordatæ, nuptæ, olim consuli, municipii Damonensis, in agro Groningano. Non modo, in Scholâ, disciplinæ meæ alumnus fuit, sed & domi meo convictu usus, non pauca dedit signa, unde mihi promptum esset & morum honestatem, & ingenii alacritatem in eo animadvertere. Ego, magne Vossi, testimonii religionem, & fidem colo, neque hæc, temere, de hoc Juvene scribo: & tu ipse, ubi paulo propius ejus indolem nosces, nosces eam, sat scio, nec inertem, nec instrenuam: & cui castitas, & pietas cordi sit. His nominibus, eum impensè promotum cupio ad prædagogicam aliquam functionem, idque, à te potissimum, quæ es, Amstelrodami, auctoritate & gratiâ, in urbe, Civibus frequentissimâ, fieri posse non tam spero, quam confido. Si quid judico, dignus omnino est, cui suos quis credat liberos. Tu, vir summe, idem si

judicabis, unice lætabor, & non mediocriter tibi debebo. Incomparabilia tua scripta quam prorsus sint ad gustum meum, & salivam, apprimè novit noster Vechterus. Amo ea, (si quid hoc, ad te, tantum Hemmonem) & æstimo ea, etiam hoc nomine, quod, in tuâ arte Historica, tum libro de Nat. Rhetoricâ, honorifice de Magistro meo, Barth. Kekermanno, sentis & loqueris. Dantisci olim, adolescens, ipsos tres annos, ei docenti, diligentem, & tantum non quotidianam, quâ publice, quâ privatim, operam dedi: libros verò ejus, ubi ille vivendi finem fecerat, ad unum omnes, novies à Cap. ad Calcem, non sine luculentâ, & insigni, puto, studiorum meorum utilitate evolvi. Hæc res facit, ut perindigne feram, si quis inclementer in ejus scripta dicat: de quibus, tu tantum, & tui, ad unguem, similes, rectè, vere, & incorruptè, pronunciare possunt. Hoc volo nescius ne sis, & huic meæ, inscribendo imprudentiæ, an impudentiæ, veniam pro tua humanitate, prolixè dare ne graveris. Sed non distinguo te à re tuâ diutius. Neque enim profecto, si quid mihi credis, minus hoc vereor, quam Venusinus ille, metuebat longiusculo sermone morari tempora Cæsaris.

Emble Frisiorum
xxv. Octob. Ju-
sani, Anno Æræ
Christiane 1633.
Sub serum cre-
pusculum.

Vossiani Nominis

observantissimus,

Jacobus Henningius.

CLXXXI.

GRatas mihi tuas fuisse, nullus dubitas: neque est quod ego exprimam. Jan-sonii nostri tarditatem valde miror, ac fortasse amat ille Reges meos quasi sub custodia habere. Sed bene agitur, quod jam finem suum spectant: nisi sane, quod confido, jam acceperint. Neque enim Indices, ad quos pervenerat Typographus, diu adeo remorari illos possunt. Doleo contentionem inter duos hos librariorum, cum vicinos, tum cognomines. Sed non aliter solent illi, quibus vita eodem quaestu toleratur. Magis autem inique fero, quod dissidii inter Heinsum & Salmasium est. Non debeat, inter viros tanti nominis. Misera certè & ridicula est ambitio, tum indigna quoque invidia, parem in altero honorem aut stipendium animo iniquo ferre. Ququam de stipendio sane ut

existimo, non contenditur; nam hoc Heinsius superior. Reidani Historiam, & Judæi * hominis * Manassis Conciliatorem libens vidi: Ben. Israël, magis etiam quia filio Dionysio utrobique parva est gloria: Faveo ex animo, & crescentem famam gratulor. Sed quid Julius Cæsar ejus, an quiescit? altum enim in literis tuis est silentium. Pridem movisti salivam, tam præclari operis promissione. Meorum operum primum Tomum rejici in extremam hyemem, facile fero; dummodo tum seriò editio promoveatur. Quæso ne urgere cesses. Existimabam fore ut minuta illa tria Opuscula, Piræus, Reliqua Attica, & Familiae, seorsim excuderentur: sed spes ea, uti video, me fefellit: tamen fieri optassem; liberanda apud amicos fidei meæ quam obstrictam à biennio illi tenent. In his salve cum uxore liberisque, à me mea atque meis. Imprimis Dionysium tuum ego saluto & exhortor ad majora capeßenda; neque enim sic incepit, ut desineret. Resalutant Laurenbergius ac Stephanus. Filia mea Cornelia tuæ plurimam salutem dicit, & gratias agit pro navata sibi opera.

Sore ad Diem
xxix. Novembris,
CIC IDC XXXII.

Tuus fide Batavus,

Joannes Meursius.

CLXXXII.

Clarissimo Viro, D. Gerardo Vossio,
Franc. Burgeradicus S. P. D.

ET si sciam te, Clarissime, atque Amicissime Vossi, tota vitâ sic esse Philosophatum, ut non tam inanis subtilitas, & recondita, atque impervestigabilis veritatis indagatio, nullum habens laboris fatigis dignum pretium, te caperet; quam fructus, quem in componenda vitâ, in coercendis animi affectibus, atque adeo in utraq; fortunâ moderatè ferendâ, sapientia suis cultoribus promittit, & præstat: tamen cum intellexissem te dilectissimo tuo filio Dionysio orbatum esse, putavi ad officium meum pertinere; non solum ut testarer, quam gravis mihi quoque, casus ille tuus sit; sed etiam ut conarer, qualicumque alloquio lenire dolorem, qui nunc te coquit, & versat sub pectore fixus. Sed quid scribam? aut unde ordiar? aut quo dirigam Orationem?

Quæ-

Quæcumque enim in mentem veniunt, ea tu omnia jam mente præcepisti, & multo etiam plura, haud dubie, & efficaciora; quæ si malo tuo modum non ponunt, metuo ut ulla meâ oratione possit mitigari. Sed tamen ad te redi paulisper, Mi Vossi, & momentum temporis discute, crassam immoderati luctus caliginem, quæ tibi fortè nunc adimit, aut impedit exercitissimæ mentis usum; deprehendes certò lugere te amissum filium, non quidem sine causâ, sed fortè supra causam: aut si hoc à te impetrare non potes, da te mihi paulisper, & patere, affectum tuum disputando oppugnari, ab homine tui studiosissimo. Amisisti filium scilicet, quid? An putabas te immortalem genuisse? An quicquam contigit tuo, quod quispiam mortalium, ausit sperare non obventurum sibi? Quin non amisisti perfectò, sed præmisisti, secuturus ipse, cum Summus Imperator vocabit. Abiit ille certè, sed ex valle lacrymarum, ex sentina malorum, ex Theatro vanitatis, ex immundo mundo, in quo optima quæque, divitiæ, natales, gloria, voluptas, & quæ præterea nos homunciones stupemus, quid sunt? Vapor, fumus, umbra, nihil, aut si quid minus nihilo est. Æstima tamen hæc mundana, quanti velis, & pluris etiam quam soles; si rationem in eas, intelliges, quantum abitu suo, lucri fecit. Sperare potuerit Cresci divitiis; tamen sperare tantum potuit, & quis præstitisset? At nunc quas, & quantas divitias consecutus est? Divitias ἀφ' αὐτοῦ καὶ ἀναπαύειν. Quippe jam hereditatem adiit, quam neque rubigo exedere potest, neque fures, aut latrones eripere: quæ extra omnem fortunæ aleam constituta, neque Dominum suum deserere potest, neque ab illo deferri. Si Natales spectes, non jam ille, Vossi filius, non Junii Nepos, (& tamen quam honesta hæc & clara nomine?) sed Dei altissimi filius, & frater J. Christi est. Efferat se mundi Civis, & gloriam suam, celebritatemque jactet; omnia sordent, collata magnificis, istis Titulis. Principes, Reges, Imperatores, pudenda nomina sunt præ iis, quos Deus adoptavit sibi, & divinæ illius ὑιοθεσίας, fecit compotes. Jam voluptate quantâ fruitur! quam nec oculus vidit nec auris; nosti cætera. At filium amisisti bonum, piûm, & doctum supra ætatem. Tanto minus luctui locus est; si filium amisisses improbum, & impium erga te, impium erga Deum, nulla profecto sollicitudo, nullus luctus par esset tanto malo. Nunc verò, quid luges eum, quem certò scis cœpisse

felicem esse, ex quo defuit esse tuus? Infirmitas est, mi Vossi, aut paterni affectus violentia, animo non æquo ferre, felicitatem obtigisse illi, qui sua observantia, maximè meritis est à te diligi. Erat sanè ille supra ætatem doctus, & quid porro pollicebatur? sed quam multa nunc intelligit? quam multa scit? quæ ante ignoravit, quæque omnes ignorabimus, quamdiu hæc vitâ fruimur, quam tuus ille cum meliori commutavit. Præterea magnum esse debet, doloris tui levamen, quod unum è multis amisisti solummodo; in quorum singulis habes, defuncti virtutem, & eruditionem superstitem. Noli ergo vicem tuam plangere, quod unum amisisti: sed benè tecum agi potius existima, quod plures tibi relictæ sint, qui aut paria jam præstant, aut certè pollicentur. Neque vero frustra est illa cura, quod fortè quereris, quam in illo educando, atque erudiendo impendisti; jam mundo testatus est, præclaro opere, quid tibi debeat, & Patri, & Præceptori: Ec nunc idem testimonium, de tua diligentia, & fide, reddit apud Deum, cui omnes aliquando reddemus rationem, etiam liberorum nobis concessorum. Quid ergo? an prorsus te Stoicum esse jubeo? vel etiam Stoico durior, hoc est ad casum, tam funestum, ἀναιδῶς, aut certè ἀνέναντος καὶ ἀπερίττου? nihil minus. Velim sanè malum sentias, etiam ut lugeas, etiam ut desleas: sed ita ut hominem te deslere memineris, qui non potuit immortalis nasci, qui non potuit fieri immortalis, nisi moreretur. Sed jam modum Epistolæ excessi, ita me quoque affectus abripuit: ut jam libentius tibi ignoscam, si tibi paternus affectus, luctum, & desiderium ejusmodi extorqueat, quod in aliis, pro mascula tua sapientia, soles improbare. Remitto etiam tibi librum, pro cuius usu, gratias tibi ago, sanè magnas, & veniam peto, tam longæ moræ. Vale cum uxore, & familia, & hoc meum alloquium amicitia tribue.

Dat. Lugduni
Batavor. Kal.
len. Novemb.
clōc xxxiii.

CLXXXIII.

*Viro Doctissimo D. Gerhardo Joanni
Vossio Petrus Cunæus S. D.*

Vir Clarissime,

DE obitu filii tui, juvenis præstantissimi, & ad summas laudes eveſti, aliquid ex vagis rumoribus primò, ac noviffimè nunc omnia certa, ex cognati noſtri, D. Barlæi literis accepi. Is caſus, tam triſtis, & inopinatus, quam acerbis ſtimulis animum paternum egerit, facile cogitare poſſum, cum etiam mihi ingentis doloris acerbiteriam attulerit, ac me vehementer commoverit. Præterquam enim quod pro neceſſitudine noſtra, & animorum conjunctione; quicquid tibi luſtuoſum eſt, nos amicos tuos aliqua ex parte tangit; etiam illud non exiguum eſt, quod ad publicam ſæculi cauſam pertinet. Qui enim prima juventutis ſpatia ingreſſus, illuſtribus ingenii monumentis, jam nunc promeruerat faventem omnium eruditorum exiſtimationem, quanto majora deinceps, de ſe expectanda relinqueret, nemini dubium fecit. Et ille quidem gloriæ ſuæ, vixit ſatis diu: quod tibi, tuiſq; eſſe ſolatio poteſt. Quod autem earum rerum, quas perficere, & conſummare, ad literarum decus poterat; ſpes omnis abſciſſa nobis, abreptaque ſit, noſtrum magis, quam tuum eſt damnum. Sed non debent hæc apud te prædicari, qui unus omnium optimè ſcis, quantum amiſerimus omnes. Ego inter tot officia, quæ tibi hoc tempore, repræſentat amicorum humanitas, quemadmodum penitus quieſcere, aut tacere non potui, ita illud te duntaxat rogabo, ut nihil aliud ob oculos ponas, niſi luculenta illa, & præclara ſapientum præcepta, quæ tute ipſe in hujusmodi malis, ſuggerere aliis ſoles; uti cogites viri boni eſſe præbere ſe fato; ad hoc, nihil novi tibi accidiffe, uſui quædam nobis, at nihil mancipio dari: Et pro ea ipſa exigui temporis uſura, grates agendas eſſe Summo Deo, qui & hoc munus tibi, hucusque conceſſit, & alios tibi ſperſit adhuc ſervat liberos, quibus meliores optare, nec ipſe poſſes; Cætera non addam: Et jam plus fortasſe dixi, quam apud te opus fuit. Nefcio an intellexeris etiam, D. Vorſtii domum nunc funeſtam eſſe. Obit enim filiulus ejus, natu maximus, ex hoc Epidemico morbo. Vale, Vir Clariffime, cum lectiſſima Uxore, Liberisque.

*Lugduni Bata-
vorum. 7. No-
vembriſ 1633.*

CLXXXIV.

*Reverendo Viro & Clariffimo, Jo. Ger.
Voffio, S. D. Henricus Erſtius.*

ET ſi mihi nunquam dubium fuit, quin tibi eſſem chariſſimus: tamen magis id perſpexi, quum Amſtelodami te inviſerem. Ubi mihi certe pietatem, fidem egregiamque tuam & ſingularem erga me voluntatem, ſatis abunde feciſti teſtatam: idque adeo, ut me tuis tuorumque perpetuum debitorem lubens agnoſcam: Utinam vobis centeſimam ſaltem ejus debiti partem ſolvere poſſem! Verum de me ſic velim judices, me tibi tuiſque curis ſemper, quoad ejus fieri poteſt, tanquam mihi ipſi ſummo cum ſtudio præſto futurum. Literas tuas Hugoni Grotio viro incomparabili ipſe Hamburgi tradidi: ille me, quâ eſt humanitate, ita excepit, ut potuerim videre, commendationem tuam magni apud ipſum eſſe ponderis. Commemorabat mihi, ſe fuiſſe cum Sereniſſimo Rege noſtro Chriſtiano iv. Gluckſtadii, à quo peculiari propemodum humanitate, quam clementiam hodie Principum aura ſtudioſi appellitant, dimiſſus eſt: O miſeri Hollandi qui eſtis, quod neſciatis in propriis arare bovis, iſque idoneis. Rex Angliæ & S. Populusque Hamburgeniſ legatos ad Regem miſerunt Scanderburgum, ubi Rex hybernabit, quorum *ἀναπόδος*, ut equidem credo, in Regem ipſum xiv. Novemb. ut heic numeramus, audietur. Publium meum Syrum quod attinet, velim ut eum edendum quamprimum cures; quæ impendis ego bonâ fide reſtituam. Valde heic in Dania deſideratur & Lubecæ etiam: Si nobiliſſimo Domino Guldenſternio utriusque noſtrum ſtudioſiſſimo eum inſcribes, de gratitudine ejus nolito dubitare. Tu, virorum egregiorum optimus, vale unâ cum tuis omnibus in Chriſto Jeſu.

*Dab. è prædio Regio Hal, in
Cimbriſ Chriſtianeſe xii.
Novemb. cId Idc xxxiiii.*

Dn. Guldenſternius te multa impertit ſalute, proxima occaſione ipſe tibi ſcribet. Peto abs te, amiciffime amice, ut mihi reſpondeas, & literas ad Joſan thor Lippe Mercatorem Hamburgeniſem mittas. Iterum vale etiam atque etiam.

CLXXXV.

CLXXXV.

*Clarissimo Viro Gerardo Joanni Vossio,
Erycius Puteanus S. D.*

Clarissime vir & Amice,

QUÆ scribenda erant, mulier hæc nuper indicaverit. Ego sum ut soleo; imo fileo, & quorundam sino perstreptentes sermones præterfluere. Interim ostendit mihi Clarissimus Plempius noster, judicia apud vos edita. Unum quidem infestum, & ab homine quantum video, malignæ mentis: duo reliqua, etiam à plerisque hic laudata. Ego rogare Deum pergo, ut inducias nobis donet; mutet homines, qui cæde, & sanguine delectantur. Rex noster ut potentissimus, ita optimus est, paratus à bello abstinere, si non iniquæ conditiones sunt: quemadmodum in ipsa Statera scripseram. Viderint, quibus universum negotium commissum est, quæ non iniquæ debeant haberi. De *Uno*, & *Omni*, librum nuper scripseram; sed ut me potius oblectarem, quàm erudirem alios. Typographus ubi absolverit, exemplar faxo sine mora accipias. Clarissimum Barlæum, si me amas, nomine meo complecteris. Scriptionem differre adhuc cogor. Bonum nomen ero, cum scœnore officia candoris persolvam. Vale, & scribe.

*Lovanii in Arce, Prid.
Kal. Decemb. clō Idc xxxiii.*

Totus tuus.

CLXXXVI.

Cl. Ger. Joh. Vossio.

Ignosces, Vir humanissime juxta ac doctissime, quod ignotus te compello, ac seria tua leviculo negotio interpello. Jussa Honoratiss. ac Reverendissimi Archipræfulis Cantuariensis (qui nisi immensâ occupationum mole distineretur, jampridem ad literas nuper à te acceptas responderet) operam tuam implorandam habeo, providendo vellumine terso ac utrinque lavigato, quod & typorum impressionem ferat, & calami etiam ductum non aspernetur. Apud nos periit prorsus hujusmodi artificium, nec aliud habemus velluminis genus, quam quod librorum integumentis adhiberi solet. Apud vos hoc artificium vigere libenter credimus, atque inde Cla-

riss. Virum D. Th. Bodleium vellumen illud comparasse, ex quo constat Catalogus grandis Librorum in Bodleiana, partim excusus, partim calamo exaratus, qui publice prostat in Bibliotheca, quem fortasse notaveras, cum illic esses. Hujusmodi velluminis speciem aliquod, tres scilicet vel quatuor membranas, si apud vos sit parabilis annona, ad se ut transmittas, quamprimum commodè poteris, rogat H. Archipræful; simulque ut significes utrum hujus mercimonii tanta apud vos sit copia, ut suffectura sit operi, quod mille fortasse membranas aut amplius desideret. Habetis hoc nomine Honoratiss. Præfulem tibi debendi reum, meque insuper eadem operâ devinxeris, summum jampridem

*Raptim.
Londino
Decemb.
xx. 1633.*

Virtutum tuarum Cultorem,

P. Turner, Soc. Collegii Merton

in Acad. Oxon.

CLXXXVII.

*Clarissimo Viro Gerardo Joanni Vossio,
E. Puteanus S. P.*

TAlem amittere filium, mi Vossi, quam acerbum sit, meo affectu metior. Cogita ad me quoque, tam triste vulnus pertinere; Ita quæ tua sunt, aliena non puto. Tam variam vero doctrinam, & peritiam linguarum, in ætatem tam floridam cadere potuisse! Prælegi hic Epistolam tuam amicis meis, viris doctis, qui mecum ingemuerunt. Sed tuum est fortiter ferre hanc ærumnam, quæ necessitate suâ ducitur. Ita Deo placuit, cui obtemperare pietas jubet. Ecce ut te recreem, certè ut à dolore avertam, Amœnitatem istam mitto, de *Uno*, & sic *Omni*, scriptam. Lege quæso, & tantum mihi otii impende, ut intelligam etiam nugæ à te meas æstimari. Alterum exemplar, ut Clariss. Barlæo, nomine meo, tradas, rogo, & amicissimam salutem nunties. Reidani Annales avidissimè expecto: in his enim Donyfium tuum extinctum complectar. Is immortalis est, & mox quoque in Bibliotheca Belgica nostri Valerii Andreæ legetur. Vale, & tibi vendica.

*Lovanii in Arce, Prid.
Non. Febr. clō Idc xxxiv.*

Ad Clarissimum Barlæum proximè scripturus sum.

CLXXXVII.

CLXXXVIII.

Clarissime, Amplissime Vir,

SEptimo die, ex quo te non sine maximo dolore meo reliqui, fere Hamburgum attigi, felici atque inoffenso, Numini sint grates, itinere. Et cum milliari tantum urbe aberam, obvium habui Dominum Legatum Salvium, Bremam & ad Duces nonnullos inferioris Saxoniae pergentem. Facile illi erat avidum rerum novarum & cupidum penitus cognoscendi, quo statu res Germanicae essent, secum abducere. Octiduum & quod excurrit illo itinere absumptum. Lustravi Episcopatus Bremensem atque Verdensensem. Quorum prior tantum Episcopum habet Principem ex Holsatia, eundemque Gustavi Regis avunculum. Inde Glucstadium vidi. Quae tuosus ille ut Daniae Regi, sic Hamburgensibus luctuosus est. Aderat tunc Daniae Rex & unus liberorum, nomine Fridericus Christianus. Admissus ad colloquium convictibusque adhibitus sum & munitiones sique alia visu digna erant, spectare permissum. Vocatum illuc à Rege D. Grotium proximoque adfuturum die, rumor magis erat quam certi aliquid affirmaretur. Quare Hamburgum extemplo contendi. Hora ante adventum meum ex urbe profectus erat. Expectavi reditum jam tertium diem sed frustra. Literas quas manu mea exhibendas ad illum dedisti, in aedes ipsius deferre curavi. Dictu incredibile, quanto hoc me dolore adfecerit. Mirari satis nequeo, nihil me à fratre Jacobo literarum vidisse, doleoque sic quoque tuas, ad illustrem Parentem mihi haud missas. Quid apud Dominum Parentem pratendam quamque rationem reddam, cur nec tu nec ille mecum scripseritis, haud in promptu. Convenerat inter me & fratrem, ut proximo subsequenti Saturni die literas suas cum Tabellario Hamburgum mitteret. Quo minus mox mecum sumerem, ambiguus fratris de itinere in Gallias animus in causa fuit. Orationem fratris à filio Isaaco, gnaro per quem describeretur, tibi exhibitam, correctamque & tuis adjunctam literis spero. Tabulae Chronologicae, quas in usum fratris describendas filio Matthaeo reliqui, ubi primum descriptae erint, & mihi mittantur, oro, simulque exiguus liber de Nominibus propriis Hebraicis, quem nimia festinatione reliqui. Frater Benedictus in Germania nunc

agit, in dubia spe eundi propediem in Gallias. Quod si Jacobus iter suum distulerit, acturus sum, ut quamprimum in Hollandiam revertar simulque peregrinas oras adeamus. Quod utilissimum utrique nostrum futurum reor. Nec abs re erit si eadem à Domino Parente frater flagitaverit. Concessurum spero, si me diutius operari literis voluerit; quod imprimis eum velle scio, sed nihil perinde in exteris me evocat regiones quam tui desiderium. Nunc primum vere cognosco quantum fuerit tecum vivere, cum id jam mihi negetur. Hocque vehementius tibi reddi aestuo quo magis divellor. Haec summa votorum erit, ut te conjugii, liberis, amicis orbique & sic quoque mihi supremum Numen, diu superstitem esse velit. Id precor, id voveo. Saluta dilectam conjugem atque charissimos liberos. Nihil gratius erit quam ab illis cognoscere prospera omnes frui valetudine. Et ego officii mei memor ero. Vale, meque more tuo amare per siste qui

Amplissime Vir,

Dabam Hambur.
22. die Apr. An.
1634.

Sum eroque perpetuum

nominis tui cultor,

J. Skytte Junior.

CLXXXIX.

Cl. Ger. Jo. Vossio.

Vir Amplissime,

CITius ad acceptatissimas tuas respondissem, si expectassēs. Tandem fidam nactus manum, mitto Epistolam illam Clementis stylo gravem, sanctitate venerandam, & stylo & sanctitate Apostolicam. Nec divinari possum, cur Clementem hunc doctiss. Heinsius non Romanum velit esse, sed alium quendam. Ipsissimae hic leguntur sententiae, quae apud Irenaeum, Clementem Alexandrinum, Eusebium, Hieronymum, habentur; & quod antiquitati ejus imprimis favet, vix duo reperies novi Testamenti loca, eaque ex Evangeliiis, ex Epistolis nullum. Fateor non Populum ex conjectura repositum rubro notari minio; sed hoc abunde rescitur ex nominibus plane Romanis illorum, qui Literas has Corinthiis detulerunt, & humilis tunc sedis Apostolicae

postolicæ fuerunt legati. Quin ex illâ Constitutionum farragine aliquid astruitur, cum in quinto Libro eadem quæ hic de Phœnice narratio iisdem pænè concepta verbis habeatur; arte ut conjecto sarcientium, quâ ex genuini Clementis flosculis figmento suo fidem faciant. Mitto etiam nuper editum de Veritate librum. Nobile opus si liceat ex Authore & argumento, potius quàm ex opere, iudicium ferre. Ni fallor, hic vere latet Veritas in puteo, cum non novam quam pollicetur; sed aut nullam aut abstrusissime reconditam nobis afferat. Vestrum esto iudicium. Mihi saltem nihil scienti non licet hinc sapere, sint illic limpidissimæ aquæ, at & in profundo sunt, *ἐν τῇ βάθει*. Spero me brevi te invisurum, nec tantum amico sed eruditione ipsâ fruturum; in te enim quasi oculis cernam lucentem veritatem illam, quæ se & facile & purè prodet. Interim si per otium liceat, Nobilitati nostræ logicanti horam unam impendas rogo, sed si opus sit non sine Virgulâ censoriâ. Qui veritati studet, non gravabitur castigari. Alterum velim exemplar Clariss. Barlæo dones (viro mihi nondum noto sed plurimum honorato) simulque petas, ut breviter iudicium suum reddat; vel si placuerit, margini apponat infirmioribus medelam. Expectamus hic Epistolarum fasciculum à Dodrectano quodam medico de Terminò vitæ: unâque tractatulum verius quam Epistolam præstantissimi nostri Salmasii. Quam timeo ne malo scripserit omine! In summo enim languore vivit, vel potius moritur; illum tu habes, si quem uspiam tui amantissimum, ego vero tui simillimum. Pergas vir optime, teneriores semper fovere literarum conatus, & me ama. Vale.

Lugd. Bat. iii. Non.
Febr. An. Domini.
c15 l5c xxxiv.

Tibi omni obsequio

devotissimus,

Stephanus Goffe.

CXC.

Cl. V. Ger. Vossio.

Clarissime & Amplissime Vir,

SI non optatissima Doctissimi Viri amicitia abundè molestias omnes compensasset, me paulo infeliciorem sentirem

ex itinere meo Amstelodamensi: Quippe reverso vel paucas tantum horas indulget Nobilissimus meus Patronus Dominus Verius, quibus me aptarem longiori non tam itineri, quàm itineranti domo; Namque verè *ἀνατολῆς* Scythæ fixam non debeo expectare sedem, adeoque si rudis & barbarus rediero, non est pene quod me culpet Literarum Patronus, quum studia lentè augescunt, etiam quæ maximè foventur, facile enecantur, quæ assiduis destituuntur subsidii. Utcunque avido Literarum animo nulla elabetur hora, & si contingat Leodium rursus adire, plenius & certius Godeschalci quæ illic sunt perquiram: interim fruatur Clarissimus Vir, historiâ istâ Chapeauvilli tribus tomis distinctâ, in quâ memini me quædam alicubi legisse de Hæresi Godeschalci, quæ tamen in hac nimîa meâ festinatione invenire & monstrare non possum. Ex paginâ verò trecentesiâ vicesimâ tomi primi certo sciet Doctiss. Vir esse quædam ejusdem manuscripta, tum in ædē Lambertinâ, tum Laurentianâ Leodii: propè est ut suspicarer hunc esse alium quendam Godeschalcum, sed non licet penitus examinare; Proinde omnia in manus vestras trado; ut & ipsum me, quem credas oro,

Dignitati vestra

Hagæ, 25. April.

obsequentissimum,

Steph. Goffe.

Si quid mihi in mandatis dare cupies, Literas ad me datas (in Castris apud Dominum Verium Anglicarum cohortium Generalem) lubentissimo animo accipiam.

CXCI.

Cl. V. Ger. Vossio.

Amicissime Vossi,

DOleo mihi non licere per angustias temporis tecum prolixius agere: Castra me vocant; festinanter omnia agimus. Interim necesse est ut clarissimo amicissimoque mihi viro valedicam. Te cura non tantum tuorum & Reipublicæ literariæ causâ, sed & Ecclesiæ præsertim tuæ, id est, Anglicanæ. Expectant omnes Commentarios tuos de re Grammaticâ; sed adversis imputant ventis,

R

quod

quod exemplaria Angliæ destinata nondum sint transmissa. Poteris jam officio illo supersedere erga Dominum Doctorem Mason, Principis Præfectum. Ex quo enim veni Amstelodamum, certus huc de morte ejus defertur nuncius, ejusque in locum sufficit Dominus Doctor Duppa, Decanus ædis Christi in Academia Oxoniensi, cui si libet (utpote antea tibi noto, ni fallor) poteris Librum illum Masono destinatum donare. Scias illum doctissimum esse, & te dignum. Vale.

Aprilis die 26.
Hagæ.

Totus tuus,

Stephanus Goffe.

CXCII.

Doctissime Vossi,

QUAMVIS Regis erga te animum ante paucos dies perscripserim, nunc tamen oblata occasione eodem defungar munere, ne fortè primæ literæ non delatæ anxium te & suspensum teneant. Ma- & sodes, Editionem matura Principi nostro dicandam. Hoc Rex non tantum boni consulit, sed videtur etiam exoptare, & quod eo sit erga te animo, optimo nostro Domino Archiepiscopo penitus deberes, nisi quod merita tua de Literis & Ecclesiâ hoc ipsum efflagitant. Scias insuper & hodie secundam de libro tuo coram Rege factam fuisse mentionem, eamque hoc pacto: Occurrebat mihi dubium ne forsan Exterus Scriptor erraret in titulo Principi nostro plene & proprie assignando, adeoque necessum habui Reverendum Virum Decanum Salisburiensem (is enim Principi instituendo jam præest) hæc de re consulere. Ille de Walliæ titulo scrupulum iniecit, ex eo quod ante certam ætatem non obtineatur, utpote qui ex Creatione quadam Principibus nostris addatur, & non ex jure nascendi. Proinde Reverendus ille Vir Comitem Arundelianum in consilio habuit; per quem tandem res ad Regem delata est. Qui statuit aperte ne Princeps Walliæ vocaretur, sed Princeps Magnæ Britanniæ, Dux Cornwalliæ & Comes Cestriæ, &c. Et ne error aliquis obveniat, uni ex facilibus mandatum est ut statim formulam aliquam secundum Leges suas componat, quam ipse ad te transmittendam curabit per manus (uti credo) præstantissimi

Domini Boswelii. Nunc restat, ut te curâ hæc literariâ, quam celerrime emancipes, & stilum illum insigniter felicem Ecclesiæ tradas, & sacrum reddas. Scias velim literas tuas ad illustrissimum Archiepiscopum fore acceptatissimas; Sed cum negotiis gravissimis undique sit confusus, breves videtur exoptare, & tales quæ studia tua narrent potius quam gratias. Vale. Salutem tuam faxo cures, & ama

Rapim. Londini, Tui observantissimum
Novemb. die 23.
St. vet. 1634.

& amantissimum,

Steph. Goffe.

CXCIII.

Cl. V. Ger. Joh. Vossio.

Vir amplissime & doctissime,

SI quem unquam me certe torquent iniquiores literæ, utpote quas naturâ suâ & pulchras & difficiles amare mihi licet, assequi non licet. Tot enim negotiorum undæ me obruant ut illis pro voto frui non possum; & certe (quod res est) mitius carerem, si facilis & celeberrima Vossiani pectoris Bibliotheca longius abesset. Quorum aculeos infixit mihi nuperus ille cum doctissimo viro congressus? in quo non tantum plenos eruditionis fontes perspexi, sed felicem diffundendi se facilitatem. Mihi enim (ea summa vestra fuit humanitas) plane patere voluisti, in sinu vestro conclusos omnes liceret aggredi Ecclesiæ Patres. Adeoque si voti mei compos esse potuerim humanitatem erga me vestram repetito itinere ultus essem; sed cum illud improvisa rerum turba non patitur, feret doctissimus hæc literarum molestias. Ex quo redii; in Clementis Romani Epistolas nuper in Angliâ ex vetustissimo MS. exemplari editas incidi. Illas puto jamdudum ad manus vestras delatas, sin minus à me celerrime mittendas expectabis. Miram video styli simplicitatem, piam plane doctrinæ pietatem, quæ Apostolicum sapiat virum. Sed unde illud de Mose? ὃ παλιν λέγει, Ἐγὼ δ' εἰμι ἀτμὶς ἀπὸ χύψας cum nullibi in Scripturis nec suum sensum, nec verba inveniatur. Et illud; ἡ χάρις αὐτῆς, ὅπου λέγει Ταλαίπωροι οἱ δὲ δούλοι, οἱ διδάσκοντες τῷ κυρίῳ, οἱ λέγοντες τῷ κυρίῳ ἡκούμενοι & ἀπὸ τοῦ πατρὸς ἡμῶν, &

ἰδὲ γυνεὶ αὐτοῦ, καὶ ἰδὲν ἡμῶν τέτων συμῖνεν.
 quæ etiam verba repetuntur in Secundâ
 Epistolâ, & vocantur Περίηκτος λόγος. Sic
 etiam in illa Secunda (cujus tantum frag-
 mentum habemus) duos Dialogos inter
 Christum & Discipulos nobis exhibuit.
 De quibus fortasse dici potest ipsum à
 Magistro suo Petro traditione edoctum;
 sed de Mosis & Prophetico dicto quid
 conjectandum? An ut Junius in Notis
 suis ex Chrysostomo Scripturas quasdam
 periisse? Hoc est *Remedio magis quam*
Morbo laborare. Hoc ipsum observare licet
 ab ipsis Evangelistis & Apostolis aliquando
 factum. Matth. c. 2. 23. ὅτι Ναζαρεῖται καὶ
 δόσαντες. Actor. c. 2. 35. Μαριανὸν ὅτι δούνα
 ὑμῶν ἢ λαμβάνειν. Ephes. 5. 14. ἰδὲ λόγος
 Ἐργασίᾳ ὁ πρὸς δίδων, &c. Sic Ignatius in E-
 pistola ad Magnesios de Die dominico
 περὶ τῆς ἡμέρας εἰς τὸ πάλαι ὡς τῆς ἡμέρας.
 Jam quo pharmaco? Responsorias pro-
 lixiores à vobis non expecto, ne Reipub.
 literariæ injurius essem, dum publico bono
 detrahi horas illas necesse erit, quæ levio-
 ribus hisce quæstiunculis impenduntur.
 Saltem unico verbulo rescribas per filium
 qui Hagæ vivit, ut parte saltem tui fruar
 donec liceat ipso te. At quid interim de
 Puritanis nostris? Certe plura indies audio
 de illo apud vos ipsorum Coryphæo, adeo-
 que libere dicam, me rem Cl. Vossio
 dignam de illo in manus vestras commen-
 dâsse: nam cum sis planè non tam Ec-
 clesiæ nostræ Filius quam Patronus, non
 poteris rem gratam magis & Regi & ve-
 stris Amstelodamensibus præstare quam
 si efficias ut prudenti Magistratuum cau-
 tela statim dimittatur. Ex ipsius amicis
 audio ipsum à Classe vestra æque ac ab
 Hierarchiâ (ut solent dicere) nostrâ ab-
 horrere; ipsum contra Acta publica in se
 lata de Regno turpiter aufugisse; Ecclesi-
 am relictam infalutam adhuc Pastore
 destitutam. Et cum talis sit ut Libertatis
 Belgicæ est permittere, ut lateat, ita ami-
 citiæ non est ut promoveatur. Spero
 dignas vobis gratias brevi reddendas. In-
 terim vale & bono publico vivas.

Amplitudinis vestræ

Hagæ
 Decemb. 3.

omni officio animique

affectu studiosissimus,

Stephanus Goffe.

CXCIV.

Cl. V. Ger. Jo. Vossio.

Vir Clarissime,

[Iteris tuis, elapsâ septimanâ ad Re-
 verendissimum Archiepiscopum ma-
 nu mea traditis, hodie ab ipsius ore hoc
 responsum ad te properè perscribendum
 accepi: ipsum nimirum Regi significâsse
 consilium tuum, atque Regem libentissi-
 mis auribus illud accepisse. Adeoque Re-
 verendiss. noster Dominus perlustrato tuo
 per me misso volumine suadet, ut sub una
 Dicatione omnes septem Libri simul
 prodeant, atque illâ ad Illustrissimum
 Carolum Principem Walliæ, Fratrem ejus
 Duce Eboracensi hac vice prætermisso;
 hoc notanter dixit. Et quoniam vestra
 librorum compactura nostrâ & politior
 est & apertior, convenientius visum est,
 ut Liber ille quem Illustrissimo Carolo
 missurus es, Amstelodami compingatur,
 ne crassities (ut solet) sub nostra liga-
 tura impeditior & inconcinnior videatur.
 Vides quam peniculatè res tuas
 expendit Mæcenæ & Literarum & Ec-
 clesiæ & noster; jam restat ut Editio-
 nem illam matures, & si vacabit, ut sæ-
 pius de te vel ego aliquid accipiam, ex
 quo possim de studiorum tuorum ra-
 tione cum amicis meis disserere, atque
 hoc ex re tua maximopere futurum spon-
 deo. Unum insuper moneo, ne ampli-
 us de humaniori Literatura cogites, adeo-
 que omisâ circa Rem poeticam, & Ori-
 ginum libros operâ, necesse est ut Theo-
 logicis te penitus accingas. Hoc pæne
 efflagitant Reverendissimus noster Præsul
 & omnes eruditi. Et si consilia tua de
 illis Theologicis quæ sub manu tenes, Re-
 verendiss. Archiepiscopo præscribas, scio
 (sic enim dixit) illa acceptissima fore. Nec
 dubito quin hoc pacto tibi tuisque omnibus
 bene consules. Me interim devotissimum
 habes, paratissimumque fidelî opera nego-
 tiis tuis incumbere, si quæ mihi curanda
 commiseris. Atque hoc debeo meritis illis
 Cl. Vossii non publicis solum, sed privatis
 erga me, quem (ut sæpe agnovit Archi-
 episcopus) pulchro Elogio affecisti. In-
 dignum vereor nisi quod laudes tuæ me
 dignum facient. Vale, Vir doctissime &
 salutî tuæ prospice.

Totus ex animo tuus,

Stephanus Goffe.

R 2

Brevi

Londini, decimo
 die Novembris,
 Stilo veteri.

Brevi accipies Literas ab ipso Archiepiscopo, quas nunc per ingentem negotiorum molem expedire non licuit. Et quoniam Liber tuus non patitur moram, hanc mihi provinciam injunxit. Literæ tuæ ad ornatiss. Franciscum Junium missæ ad me illico deferentur.

CXC.V.

Cl. P. Ger. Jo. Vossio.

Vir Clarissime,

NON dubito quin Literæ vestræ ad me datæ de Dampporto jamdudum sint in manibus Reverendissimi honoratissimiue nostri Domini Cantuariensis. Atque hoc tibi debitum fuit, ut ex illis legeret quam serio & sedulo rem nostram, nec tam nostram quam Christi agas. Hoc feci privati cujusdam amici ope, inconsulto etiam ipso Boswelio. Habet enim ille alios tibi gratias referendi modos: nam perlectis illis ad me tuis maximas egit, & pollicitus est se brevi ad te scripturum. Interim si quid habeas, ne dubites ad me dare, cogitesque in nullius manus literas vestras deventuras, quin & inde honorem & gratias ingentes reportabis. Dampportus per biduum Hagæ fuit, nec Boswelium invisit. Quid sentis? an omnia sana? an non hoc rei indicium est? Literas dimissorias nondum habet; sed jam petit ex Anglia. Quæ hæc fraus? Nam certissimum est ipsum aufugisse à grege suo: De quaestione quidem de Ceremoniis contra illum motâ, expecto quotidie Literas quæ mira narrabunt. Audio ipsum ferocissime contra Genuflectionem nostram concionatum fuisse, filiumque tuum Cantabrigiensem agere hoc tulisse. Hoc si verum sit velim cum aliis quando occurrent scribas. Vobis utrique maximas ago gratias. Chartulam hanc perlectam rogo ut comburas, illud enim de Cantuariensi tibi soli dictum velim. Iterum vale.

Tuus,

Stephanus Goffe.

Per latorem hunc literæ tuæ ad me certissime venient, sive hic, sive quod sepius Hagæ fuero, atque per illum, ut narrabit melius, poteris singulis septimanis, cum opus fuerit, bene mittere.

CXC.VI.

Cl. Ger. Vossio S. P.

Vir Clarissime & optime,

QUANTUM doleo improvisum filii tui discessum prolixiores literas non pati: Accedit etiam crastina concionandi cura. Utcunque virum præstantissimum mihi que plane sine merito amicissimum insalutatum præterire non possum. Habes me obsequio quam intime devinctum; Utinam aliquando contingeret exprimendi facultas; Hactenus perventum non licuit ex Angliâ quicquam rescire; Plurima expecto à Chariss. nostro Boswelio, qui quantum debet meritissimo de se & Ecclesiâ nostrâ Vossio, mihi in mandatis dedit, ut vice suâ quam possum serio agnoscerem. Forsan hoc ipse Literis suis præstitit, sic enim statuit aliquandiu Briellæ impeditus. Ex filii reditu plura velim de Nihusio Abbate intelligere. Quem provocationis suæ exitum invenit. Quid adhuc ediderit, quid agit. Et si per negotia tua liceret vehementer erudiri cupio quâ ratione, & quibus authoribus optime possem instrui adversus illud cui maxime innotuntur Pontificii de Schismate nostro ab Ecclesiâ Romanâ. Sed plura nunc non licet. Hanc Seldeni nostri Diatribam quod incompactam habes, hisce temporis angustiis imputabis; Utcunque quia nondum ad manus tuas pervenisse suspicabar, obsequii mei testem mittere gestiebam: Omnia mea boni consulas oro. Vale.

vi. Idus Aprilis.
elo 13c xxxiv.
Hagæ-Comitæ.

Tuus,

Stephanus Goffe.

CXC.VII.

Cl. Ger. Vossio S. P.

Vir amplissime clarissimeque,

Literas has nunc ad manus meas ex Angliâ delatas statim tibi mittendas duxi, alioqui Deo volente me latorem habituræ essent post paucos dies. Ex illis quam gratum sit quod pro Ecclesiâ nostrâ moliris facile intelliges, cum is qui scribit sit Regi à sacris, & cum Archiep. nostri (ni fallor) literis ad te missus cum Comitem

tem Arundelianum huc comitatus fuerit. Sed vereor ne propter impeditum iter diu scriptæ fuerint; videntur enim illæ, quæ ad me dantur, primis meis solis respondere; Expecto adhuc recentiores, & à viro longè potentiori; Interim ex his quædam dilces; illud imprimis ratum facit Transfugam illum nunquam in quæstionem vocatum fuisse de rebus Ecclesiasticis; sed planè desertorem fuisse militiæ suæ, quod jure nostro castrensi gravius est puniendum, sin ex partium suarum zelo voti compos fiet; fruatur suo grege Pastori simillimo vere vario (& Jacobini illius instar) maculis interstincto. Tuæ utcunque pietati, & insigni erga Matrem nostram Ecclesiam amor, immortales debentur gratiæ. Raptim hæc. Vale, Vir optime, & me ama: quem vereor, ne diutius quam velim, habeas in his regionibus inquilinum. Nam & à Rege ipso & Archiepiscopo designatus sum Pastor Mercatorum Nostratum, qui Delphis habitant, in locum Forbesii; hoc est ingentis oneris & invidiæ. Sed Dii meliora! Hoc esset vel Amicorum contra proverbium *ἀδελφὸν δίδωμι*. Adeoque per totum ferè mensem Hagæ versatus fui cum Prolegato nostro ut istud onus inoffenso Rege declinarem: quod spero. Boswellius festinatò petit Angliam, sed reversurus. Tu tamen ante accipies ab ipso Literas (ut ait) debitissimas. Iterum vale.

Lugd. Batavor.
vii. Kal. Martii.
A. D. 1634.

Amplitudinis Vestræ

studiosissimus,

Steph. Goffe.

Ecce nunc alias accipio Literas quæ afferunt Metaphysici nostri Baronis non tam protestationem quam Literarii Belli provocationem; vix licet mihi jam percurrere. Sed Clariss. Barlæo (quælo) tradas ut viri *præcautus* veritati (quàm jactat) inimicissimam advertat.

CXCVIII.

Cl. Ger. Joh. Vossio S. in Christo.

Accipies hic (mihi merito charissime) unam, eandemque brevem Epistolam. In eâ tribus tuis mihi exoptatissimis Responsionem, sed qualem moles negotiorum (quæ penè opprimor) permittit,

rudem scilicet & incultam, solâ brevitate gratam, solo amore candidam. Reliqua tota una Litura sunt.

Et primis Literis tuis de Tempestate, quæ domum tuam invasit, & filium prostravit, tam meritis quam natura chariorem, consultius non respondi, ne manus meas in crudum adhuc vulnus immitterem. Spero jam cicatricem contraxit. Et tu quod decet, teque dignum est, fecisti, patienter te, & tua Deo, (qui suis, quæ optima novit, impertire solet) submittendo. Ibi enim aut acquiescendum est, aut in hac vita nullibi. Sed opera quædam filii tui si placet edere, quibus ille etiam mortuus luce fruatur, aut perfectâ des nobis aut nulla.

De Novatoribus nostris apud vos quæ scribis vera sunt, quæ contra illos conaris pia, & pro Pace Ecclesiæ. Si nolint se ad pacatiora studia recipere (& certè nolunt) sint quod esse cupiunt, inter pusillos Gigantes, modo sint quod & esse, & haberi merentur, inter doctos Scioli, & inter prudentes Temerarii.

Literæ tuæ secundæ Causam Blauii tantum exponunt Patris, Filiique, & quo consilio Twissum typis mandavit. Certè prudenter Farnabius, qui mentionem Privilegii sui fecit; sed valdè inconsultò Londinenses Typographi Privilegia sua silentio damnarunt. Unde enim Exteri caveant quod nesciunt? Num Prophetas volunt Typographos esse? Sed responsum his Literis retulit diu abhinc Blauii Filius, utpote quem statim post Literas tuas acceptas, sine ulteriori processu, sumptibusve, dimisi è Curia in tui solius gratiam. Responsum putavi illud scripto melius, præcipuè cum tunc nihil mihi daretur oculi. Et video ex subsequentiis Literis tuis, fidum se fuisse narrando tibi Parentique suo quid in ea re fecerim. Gratias enim Literæ tuæ referunt, & tuas & Patris. In Literis autem tuis novissimè scriptis, non solum lego gratias mihi supra meritum repensas, sed hoc etiam, te labores tuos Grammaticos ad finem perduxisse. Gaudeo certè, & eò magis, quia semper cogito de Baronio. Librum etiam unum cum Literis misisti, tradidit mihi Goffius, qui & ante hæc Literas has ad te detulisset, si citius redire potuisset. Goffium antea non vidi, de eo, modestiâ, & doctrina ejus ab aliis, ut etiam à te ipso sapius audiui. Si pergat (nil dubito) possit pro meritis præmium & expectare & recipere.

Confi-

Consilium tuum in Editione horum Librorum, nempe ut sub nomine & auspiciis, aut Principis Walliæ aut Eboracensis, prodeant, valdè probavi. Necessarium tamen duxi illud cum Serenissimo Rege Carolo communicare. Partim ut intelligat quàm memor & gratus sis pro Beneficio in te collato; partim ut sciat obsequium tuum non sibi solum, sed & suis paratissimum: præcipuè vero, ut penes illum sit eligere utri horum Principum Illustrium Liber iste tuus inscriberetur, an utrisque? Gratosè quidem accepit Rex optimus, quod intendis. *Et forte aliquando (inquit) Nomen fronte inscriptum, invitabit filium meum ad ejus lectionem, licet fortè minus seriam.* Hoc verò jussit, ut tibi rescriberem; velle se ut Libri hujus dedicatio (quando ita tibi placuerit) sit Illustrissimo Walliæ Carolo. Perge nunc, & Librum hunc habeamus publici juris.

De Novatoribus iterum in his Literis scribis. Certè quod vellent turbare omnia, suum est, quod non possunt, Dei. Interim miserrimè laceratur Ecclesiæ Christi facies, Corpusque; neque (Disciplinâ penitus fracta & concussa) videt ipsa Prudentia, quibus artibus vulneribus hisce possit succurri.

De Johanne tuo, doleo quod nequeas in eo illum Studiorum amorem quem desideras excitare. Sed quum res ita se habeant, aliâ aggrediendum est viâ, & sapienter meo judicio facis, si alia animo tuo agitare incipias. De reditu autem ejus in Angliam noli cogitare. Nam mentis vix præterit, quo publica fama Cantabrigiæ increbuit, illum non solum fidem dedisse mulieri illi, de quâ antea scripsi; sed cum eâ solennia matrimonii publicè in facie Ecclesiæ celebrasse. Nominatur Locus Tempusque. Præpositus & Socii Collegii Jesu consilia ineunt, de alio in ejus locum, utpote sic vacantem, surrogando. Fama etiam in aures meas volat. Ego ad Ecclesiam Parochialem nominatam mitto, Registrum Matrimoniale (quo in singulis Parochiis utimur) inspicendum curo; Nihil ibi reperitur de Solennizatione Matrimonii. Desistunt ergo ab intentione suâ Socii, nec alium eligunt. Sed vides quæ sit opinio, quæ expectatio; & si redierit filius, certo certius aliquid eveniet quod nolis. Et ut finis sit huic malo, optimè opinor consules & famæ & salutis filii tui, si ibi eum retineas, disponasq; ut ei magis congruum esse inveneris. Resignatio autem Socie-

tatis in Collegio Jesu, in forma Juris manu propriâ subscripta, si ad me mittatur, ut in manus Præpositi illius Collegii tradatur, quamprimum curabo, ut sic honestè à Collegio discedat. Aliter probabile est, illos tam diu absentem ulterius non expectaturos, sed locum ejus vacuum pronuntiaturus, quod nollem factum.

Quod reliquum est, gaudeo te vinculis morbi tui liberatum, ut possis iterum Ecclesiæ, Reipub. & Amicis inservire. Valeas. Ex animo sic optat

*Dat. ex Aedibus meis
Lamb. Febr. 27. 1634.
Stilo nostro.*

Amicissimus Tibi,

Guil. Cant.

CXCIX.

Clarissime Vir, Amice observande,

Fungens non ita pridem legatione nomine Serenissimi Regis mei ad complures in hoc occidentali tractu Europæo Principes, non postremum duxi in tanta rerum mole atque continuo negotiorum strepitu, virorum virtute, consilio, doctrina præstantiorum, consortio & conversatione refici ac relaxari. Id cum ubique apprime curarem, tum in fœderatis Belgii partibus, ob hominum honore & gravitate florentissimorum frequentiam atque humanitatem, singulariter mihi non prætermittendum existimaram: Tot autem & tantis obrutus impedimentis cum remissius desiderio meo obsequi coactus essem, nihil ardentius expetivi, quam vel tibi uni innotescere, tuamque amicitiam atque amorem conciliare, utpote cujus insignis prudentia ac eruditio in pluribus Europæ partibus clarissimam meruit famam. Sed cum id mihi five urgentium mearum occupationum multitudine five temporis inopia & brevitate ereptum sit, pro eo ac debeo graviter molestèque fero. Interim tamen cum id quod mihi non accidit, filium meum consecutum esse videam, eumque non solum semel in amorem receptum foveri abs te, sed ex intimo affectu optimis monitis dirigi & in literis juvari probè sciam, gratulandum mihi existimo: eoque magis postquam à nonnullis intellexi qua facilitate recipias, humanitate tractes, sedulitate exerceas ingenia tuæ curæ commissa. Quippe arbitror filium etiam meum majori utilitati sibi, mihi solatio, Patriæ usui posse existere, si ei, ut ex tuæ sapientiæ fonte in sui

fui ingenii cultum rivulum aliquem attraheret, spatium temporis longius concederetur. Nunc cum & mea privata rationes & præsens rerum Status exigat, ut in Poloniam quamprimum revertatur, quod illum in commercium tuarum literarum sapientiaeque lubens adsciveris, & in profectu ejus ita desudaveris, ut non sine insigni fructu ac emolumento tam celebris viri in bonis literis auxilia sensurus sit, eam quam possum tibi maximam habeo gratiam. Ita profecto & me in praecordia laudum tuarum traxisti, & filium meum ad omne officii genus ac grati animi testificationem obligasti. Quod reliquum est vicissim mutui mei affectus declarandi occasionem exoptans, optima valetudinis magnaeque sapientiae maxima incrementa à Deo Opt. Max. tibi apprecor. Vale.

Dabam in Suec.
16. Maii. 1634.

Clar. D. Vestræ

Studiofissimus,

Joan. Sawadski

Guber. Suecensis.

CC.

Amicorum Opt. Max.

Quas dedisti pridie Calendas Maias nudius-tertiis accipi: quibus certè percussisti vehementer, dum de obitu Dionysii tui scribis. Doleo majorem in modum ereptum tibi tantum filium, mihi verò, filioque item meo, amicum rarum, orbi virum aliquando certe maximum: sed ostendere illum Deus voluit potius, quam concedere. Non solamen ullum offero quod abunde à te habes: ac largitur tibi ratio, quod daturum esset tempus. Maimoniden ejus, Casaremque, & Reidanum, quos promittis avide expecto: & accuso Elzevirium, qui cum ad nos commearet te in transitu compellandum non putavit. Nollem factum. Grata mihi mentio de Noomio nostro, sed quod queritur edi à me Bibliothecam meam Atticam, & inter nos aliter olim convenisse, fallit virum optimum, & amicissimum, hic memoria. De altero quod restat, opere nempe Bibliotheca Græca, egeramus; quam si edere etiamnum est illic animus, per me licet: ego libens acquiescam: ac si à me edi velit, gratum

erit: & Laborem quoque istum impendam Reipub. Literariae. Fac me quæso proximis tuis certiore. Interim consilio tuo obsequutus, testandæ veteri amicitiae meaeque in amando ipso constantiae, dedicabo ejus nomini opus sane luculentum Creticarum Antiquitatum Libros quatuor, quod secundo statim tomo comparebit. De dissidio Typographorum, sanè doleo; magis etiam quod per hoc editio meorum operum differatur. Quæso, quod promittis, urge & effcito, ut admoveat tandem manum. Jam salivati movi multis in hoc Regno eruditis, & magnatibus: itaque ne fidem meam hic destituit; ac ridendum aut fugillandum me prostituit. Regnum Atticum admodum mendosè excusum est; ut errata tibi mitto quæ Typographus tempestivè emendabit. Perlegantur quoque Græcorum Auctorum loca, quæ festinans non inspexi. Nullus dubito quin mendorum illic plaustra inveniantur. Mitto nunc præfationem primo Tomo præfigendam; missurus statim quicquid ad secundum Tomum pertinebit, ubi primum inchoatum intellexero. Habe tamen operum illorum elenchum, quæ in eo comparebunt. Vale amicorum maxime. Uxor mea quam potest amantissime tuam, liberi liberos salutant, & imprimis filia filiam.

Soræ xii. Julii.
clō 166 xxxiv.

Ætatem Tuam,

J. Meursius.

Adjunctas ad Spelmannum, quæso, ut primâ occasione curare velis.

CCI.

Viro Reverendo & Clarissimo Gerardo
Johanni Vossio, S. D. Henricus
Ernstius.

Immaturum obitum filii tui credo prohibuisse, quo minus mihi ad meas responderes. Incredibili sanè desiderio tuas frustra hæcenus expectavi: & nescio certè quo malo fydere ego ad scribendum eo, quum nunquam ab iis, à quibus velim, responsum auferre possim. Suspicio me incomptis meis literis vobis elegantiae Patronis talem movere nausæam ut simulac horridum & incultum sermonem quando fastiditis, mei etiam memoriam exuatis. Verum concedite aliquid nobis inferioribus;

bus; gradus posuit Architectus omnium. Cæterum tui silentii id esse causæ existimo, quod egregio isto tuo filio orbatus sis. Eheu conditionem reipublicæ literariæ! quæ tot gravibus ictibus percellitur, ac pene prosternitur, quot illustria membra amittit, ex quibus filius tuus certè non infimus. Doleo tuam vicem, doleo præstissimæ tuæ conjugis dolorem; quibus elegantissimum & divinum istud ingenium maturum videre, fructumque illum colligere non licuit. Sed sufficiat vobis, Deum vos beasse filio, cujus ingenii magnitudinem viri docti mirantur, cujusque mortem boni omnes dolentius ferunt. Mortuus est, non interiit, vocatus est & non obtorto, quod dicitur, collo tractus, ab eo ad quem omnes pii pergimus. Tum erit comprehendere mentem aliisque qui tua auctoritate nituntur, monstrare, virum pium esse immobilem & stare in quadrato. Peto abs te, Cl. Domine Vossi, pro tua in me singulari & maxima benevolentia, proque constanti nostra amicitia, ut mihi respondeas, meque certiorrem facias de libello meo, in quo Publii Mimi, quem apud te deposui, num excusus sit. Si putas id apud vos fieri haut posse, mihi velim eum unà cum tuis Notis remittas, tum illum heic, ubi valde desideratur, typis dabo rescribendum. Operam dabo, ut iis, quæ ad metrum faciunt, satisfacere possim. Literas tuas tradendas dare commode potes Domino Johanni Mulenio illustris & generosi Domini Oligeri Roskrantzii filii Erici apud vos comiti. Ego enim jam sum cum incomparabili isto Heroe: cujus virtutes & eruditio in hoc vertuntur, ut Deum pura mente, hoc est rejectis huius mundi vanitatibus, colat, proximoque suo serio inserviat. Audi factum æterna memoria dignum. Optimus hic Vir, quum per omnes gradus ad honorum & dignitatum fastigium pervenisset, illudque inter sui similes teneret, sua se sponte eo abdicavit, ut Deo suo melius servire posset. Utinam tibi vir ille familiaris esset notus! tibi dico, qui laudes ejus ad posteritatem mittere, maxime es idoneus. Plura ad te hac de re scribere non audeo, ne videar prudentiæ tuæ diffidere. Quare te rogo, ut mihi rescribas, existimans, neminem te tui amantorem habere. Salve in Christo Jesu Amicorum optime, nobilissimamque conjugem & suavissimos liberos salvere jube.

Dab. Rosenholmi iv. Non. Julii. 1610 xxxiv.

Scripta jam epistolâ vocat me illustris noster Heros, & jubet te plurimum salvere, obnixè rogans, ut se excusatum habeas, quod ipse tibi non responderit, sed officium hoc suum mihi delegaverit: id quod jam arduis negotiis pæne obrutus præstare non potuit, proxima occasione se compensaturum pollicetur. Iterum vale etiam atque etiam.

Verum hæc frustra, siquidem generosus Dominus se ipsum ad scribendum accingit. Tu velim qua es humanitate garulo amico ignoscas.

CCII.

Vir Celeber. Ger. Vossi, Amice desiderate.

Optarim utique quàm non tantum privatis tuis in me meosque, verum etiam publicis in rem literariam meliorem meritis, plurimum me juxta cum bonis omnibus debere, lubens profiteor; tam etiam commoditatem satis opportunam, jampridem atque in præsens etiam oblatam fuisse, qua id manu saltem, cum aliter nondum datum sit, ingenue tibi testatum facerem. Quando autem id mihi hæctenus pluribus se ingredientibus impediementis, denegatum esse fide sancta tibi testari possum, spero omnino, animum in te meum, quem tibi totum debere agnoscere non nequis, etiam officiis quibusvis deditum & promptum nunquam non debere me velle tibi, pauculis saltem lineolis facile me posse tibi comprobare. Ericum filium meum, qui se, magno tuo merito, totum tuum jam sapius mihi professus est, urgentibus de causis domum modo revoco, monitis rectis & solidis probe instruendum, priusquam mundo ulteriori, errore seculi præsentis violentiore, committatur, quem tamen intra pauculos menses ad vos rediturum, nolim omnino Belgio vestro valedicere, quam sapientia tua, quicquid dictare equidem ipsi sufficiam, confirmari sibi coram deprehenderit. Plurima aliàs essent, de quibus te convenire jam valde pridem gestio, verum intempestiva Tabellarii præsentis compellatione, temporis justâ usurâ exclusus, cum summo meo desiderio satis non posse modò fieri deprehendam, opportunam utique commoditatem mihi voto continuo exoptare non desinam, quousque etiam eâ ex parte, ipsum Fatum meum, quod nullum nisi solius Dei effectum agnosco, me ex assè bearit. Interea

terea cum tuis omnibus supercœlesti nostro
Brosio religiosè commendatus vale optime.

Ex Rosenholmiano
 meo 3. Non. Julii
 Anno 1634.

Oligerus G. Rosencrantz.

CCIII.

ET si serius aliquantò rescribam, Vir
 Clar. & à me non una ratione ex-
 culari possit (non ignoras opinor Capituli
 Generalis Celebratione solemnem nobis
 per statuta nostra semper esse Junium; ut &
 Novembrem mensem, eaque negotiis Ec-
 clesiæ nostræ cujuscunque generis expedi-
 endis destinata esse Capitula) eò tamen
 minus mihi de excusatione laborandum,
 quod etsi non verbis, re tamen ipsa literis
 tuis dudum jam à me satisfactum est. Si-
 mulac enim tuas accepi Kal. Maii datas,
 25. libras (quantum Londoni tum casu
 versanti mihi in promptu erat:) Peistero
 ipsi numeravi; ceteras autem 25. paucos
 post dies, Beviro Peistrii Delegato, Can-
 tuariam reversus. Sed ut signatius rem
 intelligas, scripta est apocha Peysteri 23.
 Maii; Beviri autem, 5. Jun. Reliqui si quid
 hic tibi negotii, cum superioribus meis literis
 sit omnis ejus ratio tibi exposita, tu autem
 ejus mentionem in tuis omiseris, non est
 quod hoc tempore plura super eo addam.
 Illud tamen non te celabo, Illustriss.
 Dominum Archiepiscopum (cui per sta-
 tuta nostra peculiaris Cantuariensis hu-
 jus Ecclesiæ cura commissa est, summa-
 que hic post Regem autoritas) nuper
 Archiepiscopalem Visitationem per Dele-
 gatos instituisse, multaque tum ad univer-
 sum hujus Ecclesiæ statum, tum ad singu-
 lorum Canonicorum jura pertinentia ad
 ipsum relata esse, & ab ejus cognitione
 jam pendere, quæ cum erunt judicata, ii
 quid ad te pertinebit, per me resciturus es.
 Luctum tuum ob mortem charissimi tui
 Dionysii prolixè narrabant tuæ, quem
 etsi maximum fuisse, prout à te magno
 affectu parique facundia descriptus est,
 animo concipiebam cum legerim tu-
 as, non tamen aut iniquus, aut expecta-
 tione mea major mihi visus est. Si enim
 à me, si ab aliis hic plurimis, quibus ali-
 quot duntaxat ingenii sui præludiis inno-
 tuerat, ita exceptus est tristissimus ille nun-
 cius, & multos à nobis gemitus expri-
 meret, diuturnoque doloris sensu afficeret;
 quantum tuum patris indulgentissimi, do-
 ctissimi, simul & præceptoris diligentissimi

dolorem fuisse amisso tali filio necesse fu-
 erit, facile erat conjicere. Ego sanè ita
 affectus sum, ut nisi te hominem haud
 vulgari more ad pompam & fastum lite-
 ratum, sed verè ac solide sapientem cogi-
 tasssem, oneri tam gravi ferendo parem
 fore planè desperasssem. Sed noto plura
 de eo, ne vel testam Demeam, tuum do-
 lorem renovem; vel te consolando, ni-
 mium ipse mihi videar tribuere, quasi me-
 liora possim ego suggerere, quam quæ
 prompta tibi de tuo ac parata fuisse, quo-
 rumque utilitatem jam usu ipso perceperis,
 tuis ipse literis abunde testatus es. Reli-
 quum igitur est, ut de Antonino tibi re-
 spondeam. Narras te bina ejus exempla-
 ria accepisse; sed literarum, quæ cum ex-
 emplaribus ad te curanda Peistero tradita
 sunt, nullam facis mentionem, ut mini-
 me dubium sit, eas periisse. Rogabam te
 per illas (scripta autem sunt illa, si bene
 memini, circa medium Januarium :) ut
 binorum exemplarium alterum ad virum
 amplissimum, & doctissimum Dominum
 Bolwellum, Regium istic Oratorem, nisi
 aliter tibi ipsi videretur, five tuo five meo
 nomine curares. Is ad vos jam redierit
 necne, compertum non habe. Audio e-
 nim nuper eum hic fuisse: sed audio tan-
 tum. Non enim hætenus accidit ut
 viderem. Jam sub prælo est, & brevi, ut
 audio, proditura secunda ejus libri editio;
 non me sane procurante, (in aliis enim
 jam pridem sum) sed Bibliopolâ, cujus im-
 pensis prima prodiit, suis compendiis con-
 sulente. Valde enim, ut videtur, pri-
 mam Editionem quæstuosam expertus sit,
 cum intra paucos menses direpta sint omnia
 Exemplaria. Quod de quibusdam locis sen-
 tentiam tuam proponis, magnam in eo
 gratiam à me inivisti, qui magno redime-
 rem familiarem tibi Linguam Anglicam,
 ut plura loca comparare sine alterius opè
 potuisses. Lib. 1. ubi utraque Xil. editio de
 Sexto, τὸ ἀδελφόντων ἢ ἀδελφών, tu conjicis,
 τὸ ἀδελφόντων τὸ ἀνελφών, quasi Antoninus
 Sextum ab ingenua quadam simplicitate
 (si mentem tuam rectè capio) commenda-
 ret, quod amicorum peccata pari quadam
 cum vinolentis (qui minimè perspicaces
 hic esse solent) facilitate præteriret. Ego
 per ἢ ἀδελφών, eos intelligebam; quibus
 οἷνός & οἷνυα vulgò in Philosophorum libris
 tribuitur, τὸ ἰδιώτης nempe, & ἀναδιδύς; atq;
 inde commendari Sextum, quod talis ac
 tantus Philosophus ostendendæ sapientiæ
 occasiones pro cæterorum Sophistarum,
 ἢ ἀδελφόντων more (illustre Exemplum
 apud Aulum Gellium, lib. 1. cap. 2.)
 S qui

qui quocunque loco quocunque tempore, Theoremata & Scita Stoica crepare solebant, minime captaret ipse; sed cum inter homines idiotas & Philosophiæ rudes versaretur, ab intempestivis ejusmodi disputationibus cautè abstineret, ne se pariter & Philosophiam ipsorum odio & contemptui temere exponeret. Quo & ista Epicteti pertinent, Wolf. edit. Cap. 68. *μη λάλει τὸ πολὺ ἐν ἰδιώταις ἀλλ' ἢ διανοημάτων*, &c. quæ & proximo cap. repetuntur. Qualia & ex aliis plurimis multa adduci possint. Vocem autem *ἀδιώρητον*, in hunc sensum ex Laertio exponebam, ubi ex Stoicorum Sententia virtutes alias esse *διανοητικὰς, τὰς ἔχουσας ὅς οὐσαν ἐν διανοημάτων*, asserit; alias autem *ἀδιώρητους ὅτι ἔχουσιν*, &c. Si cui magis arridebit ut verba ista passive accipiantur, & *τὰ διορθώματα*, sint dogmata ipsa & opiniones Philosophorum, non ego valde repugnarim; præcipuè si exemplo non careat: Eadem autem tum fuerit Sententia. Hæc quoque super obscuro hoc loco, quæ etsi non tam satisfaciunt ipsi mihi, ut pro veris & certis ausim obtrudere; haud minus tamen etiam nunc arrident, quàm quod tibi obiter hoc agenti venit in mentem. Si tamen re accuratius expensâ, (quod ut facere mea causa ne graveris etiam atq; etiam te rogo) in priori sententia persistiteris, tanti facio tuum judicium, ut minime dissensurus sim. Alio loco, ubi Xyl. editio pag. 155. *ἐνεργητικόν*, reponis tu *ἐνεργητικόν*; ita omnino sensus postulat. Sed, quod tu non advertisti, jam in Notis Xylander ipse monuerat, & in Versione exprefferat, quod & à me factum est. p. 158. quod legitur *ἀλλ' ὅς ἀδελφὲ μου Σεύρη, τὸ φιλοκρίνον, &c.* corrigendum fuisse *ὅς Οὐήρη*, videris innuere; nec tu solus ita censes. Ita enim (ut alios omittam) hunc locum edidit præstantissimus Salmasius, in Hist. Aug. pag. 77. Ego tamen adhuc *ἐνέργειαν*, cum utrumque tam *Veri* quam *Severi* nomen ab Antonino nostro (quem Catilium Severum à materno proavo nominatum testis Jul. Capitol.) ad hunc Lucium Commodum, jam imperii consortem, transire potuerit. Imo vero ita rem habere liquiddò affirmare possumus, si Galeno fides, qui *ὅς τὸ ἀλλ' ὅς τὸ πρὶν καλεῖσθαι*, exerte Anton. Imperatorem, Severi nomen, quo prius appellabatur ipse, in Lucium transulisse prodit. • At Galeni codices depravatos hic censet Baron. Ann. Ch. 163. §. IV. & pro *Severo*, rescribit ipse *Verum*. Cui sanè sententiæ alter Galeni locus (à Baronio tamen hic præteritus) *ἀντὶ τοῦ*

ἰδίαν βίβλιν. non parum favere videtur, ubi Galenus cum de mutatione nominis idem dicat, Verum non Severum scriptum præferunt editi Codices. Sed quicquid hujus sit, cum non deesse viderem, quod objici possit, si quid in Antonino, non prius expensis utrinque rationibus, mutarem; expendendi autem locum fore tuum maxime opportunum, si quando Antoninus nostris Commentariis illustratus Græce prodiret in lucem; ideo in hac editione consultò prætermiissa est omnis rei ejus mentio. Nam notulæ illæ quæ nunc *καύματος χάριν* editæ sunt, vix centesima pars sunt eorum, quæ nobis in hunc divinum Scriptorem pridem jam notata sunt. Xylandrum Interpretem, virum doctissimum, optimè de literis meritum, agnosco libens. Eundem tamen in hujus Scripti versione negligentissimè vel infelicissimè versatum esse, negabit nemo qui Græca accuratè expensurus est, & mihi est exploratissimum. Nobis tamen Anton. legentibus, ipsum intelligere, non Interpretis errores sugillare, propositum fuit; etsi quæ inter legendum observata sunt, non ut aliis ea probarem; sed ut mihi ipsi satisfacerem; primò à me factum est. Quare, etsi iidem, qui versionis Anglicanæ, animi oblectandi causa à me susceptæ, publicandæ auctores fuerunt; iidem ut Græcam editionem adornem, valdè suadeant; ægrè tamen, quantum video, præstituri sumus. Sacra enim profitentes, alia scilicet nos hic occupatos habent: inter alia, concionandi grave onus; nec otii tam felices sumus, ut ad ista divertere, utcumque gratissima & optatissima, sæpe vacet. Sed epistolæ modum jam excessi. Vale, Vir præstantissime, & amare perge

Cant. post. Id. *Tuum, quantus quantus est,*
Julii, 1634.

Mer. Casaubon.

Mitte quæso cum proxime scribes ad Beyfferum talem Apocham, qualem jam fere biennium est, cum misisti; ea nempe præscriptione, te ex præbenda tua ab initio ad Octob. mensem 1634. tibi debebatur, rectè ac plenè accepisse. Sed mitte eâ conditione, ut non nisi exacto Sept. eam mihi tradat, cum præter 25 libras, quæ jam tibi paratæ sunt; alteras 25. quæ tum debebuntur, acceperit. Plurimam quæso tuæ tuisque à me meaque & universò nostro Collegio dic salutem.

CCIV.

*Excellentissimo, & Clarissimo Viro, D.
Gerardo Joanni Vossio, Historiarum
Professori solertissimo.*

Postquam, Vir Clarissime, humanitate tua illectus, amicitiam tuam ambivi, memini me semel tantum ad te dedisse literas: at quod non sæpius à me tibi fuerint redditæ, non modò non negligentia meæ, sed ne occupationi quidem tribues. Quoties enim te, vel coram vel per literas, alloqui cupio, toties pudor hunc conatum supprimit; eò quòd occupatiorem te credam, quam ut paululum temporis amico, novo quidem, & nuper nato, sed tui amantissimo, in tanta copia amicorum, multo me digniorum, tribuere possis. Verumtamen perfricare frontem malui, quàm pudore diutius à tua humanitate secludi. Ne autem vacuus in tuum conspectum venirem, ecce donum, quod superiori anno, non tam elaboravi, quam importunis quorundam flagitationibus, deproperans precipitavi; ut necdum ipsi mihi satisfaciat; nempe instructionem de ratione studii Theologici. Hanc si pellegeris, maxime ubi de ratione studii Hebræi, ac Linguarum Orientalium agitur, tuumque mihi iudicium sinecere communicaveris, feceris mihi gratissimum. Sanè in studio Hebræo, & Linguarum cognatarum, ut multum inde à juventute, auspiciis D. Buxtorffii, operæ locavi: ita nunc in professione experientia, eò usque provectus sum, ut auditores meos, non semel semestri, ac nuper diligentiores nonnullos, trimestri spatio, impensis ad summum, quinque in hebdomade horis, hucusque perfecero, ut textum quemlibet Hebræum, adhibitâ versione, & Lexico, facile resolvere, ac intelligere queant. Tuâ humanitate fretus, quæ tacere mallet, scribo; sperans fore, ut tuâ me amicitia digneris, meique aliquando, ubi offeretur occasio, rationem habeas, & ubi à negotiis urgentioribus dabitur respiratio, (quod tamen vix postulare, nedum expectare audeo) rescribas. Caterum sic existimes velim, me tui non observantem modo, sed & observantissimum esse, nihilque fore tuâ amicitia majus; idque semper dabo operam, ac omnibus officiis meis efficiam, ut ita esse verè possis judicare. Deus te bono publico diu servet incolumem.

T. C. observantissimus,

*Dab. Hârdervici,
Anno 1634. Aug.
28. Sr. ver.*

Henr. à Dieft, Theol. Prof.

CCV.

*Eruditissimo, Clarissimoque Viro Amico
æternum colendo, D. D. Gerardo Jo-
anni Vossio, Isaacus Basilius S. D.*

Quod ad te studiis gravissimis distentum perpetuò perumpere audeo, vir nostri sæculi eruditissime, facit insignis tua illa humanitas, quâ in tuis præterpropter Quadriennium ad me datis ad hoc officii genus, cunctantem alioquin sua mandata animavit. Nempe veteri, quâ te æternum prosequor, veneratione defungi identidem gestit animus: quinimo istuc ipsum gratitudinis leges imperant; præclaris tuis monitis ac blandis præceptionibus factus erectior, meum exinde in bonis literis profectum qualemcunque, habeo tibi quod acceptum feram. Nimirum tuis hortamentis, quibus me per literas dignatus es, obsecundare totus adnitor; votorum summam complexurus si me meaque conamina, tametsi haud ea unquam futura sunt tanti tibi aliisque Reipub. literariæ Principibus, quandoque approbem sæculares literas, aliquampridem abdicare habui necesse, uti in Theologica studia totus effunderer, & Augustissimæ animarum scientiæ me meaque omnes Scholasticas curas devoverem unice: hinc in perorationum vernacularum provincia assiduo politiora omnia studia sensim obsolescunt: neque verò piget sic à Toga ad Pallium transgredi, sed id cautor, quo tu nil mirere si fluo luculentus, & quoties calamus agitandus est, frigeam totus: imprimis si incomparabile tuum illud nomen appellandum mihi est. Emoriar, ni minore negotio putem me ad Senatum integrum literatorum posse dicere. Sed (quâ es æquitate) missis defensionibus. Ad Patres subinde divertor, Græcos imprimis, quos ut secundum sacrosanctum Scripturarum Oraculum profunde suspicio: ita, Vir summe, si aliquod tuum super iis consilium, vel verbulo *quod dicitur* *in præfator*, exorare liceret, omnes omnino habeam causas, te quod facio æternum venerandi. Nempe tametsi in eam rem Pedariorum Scriptorum est affatim, tamen de ordine Lectionis, de dolectu, de charactere quo spuria à genuinis queant secerni, si te ducem vel verbo impetrem (cujus in eo disquisitionum genere præclarum studium, Historiæ Pelagianæ, Scriptorum veterum Catalogi, præcipua atque elaboratissima singula loquantur & orbis admiratur;) nã in sacratissima illa venerabilis Antiquitatis

S 2

Pene-

Penetralia continuo involo. Tu qua es in studiosos mei ordinis incredibili pietate, meum hac in parte studium, datâ occasione, & per otium aliquando tuum adjuvare dignator. Aliquid novi ex tuis Commemorationibus frequenti Doctorum hic celestimate efflagitari scito: utinam ne lucem iis, nobis autem fructum diutius invideres. Convivo illustrissimo Præsuli D. Thomæ Mortono, Antistiti Dunelmensi, cujus Apologia Catholica, causâ item Regia adversus Rob. Bell. de Officio Principis Latine extant. Is me sibi à sacris adoptavit, abhinc quinquennium; qui ut est rara eruditione, ita tua, quibus collustraris, scripta apud se habet. Franciscum tuum salutavi pridem, aliquoties per literas, adeoque utroque sermonis genere, modo Latine, modo Græcè attentavi, quo aliquid literarum extunderem; sed enimvero ni meâ interciderint, ille ἰδιωκῶν. Eum ego tamen ob veterem conjunctionem deamo, adeoque meis verbis salvere perpetuo affatim cupio. Si quando syllabarum aliquot munus mihi destinâs, id uti pro πειμνίῳ καὶ θυσιῶν ἰδίῳ semper reputabo. Ita ad clarissimum D. Cunæum transmittere erit in proclivi: is quippe me meaque studia suis identidem sustentat.

Vale, studiosorum omnium Oraculum, & me juxta cum observantissimis tuis Clientibus concentuari patere. D. Opt. M. cœlesti suo te spiritu perpetuo impleat.

Dat. ex Arce Aucklandiana
in Diœcesi Dunelmensi vii.
Kal. Septem. Anno ultimi
temporis cō Ioc xxxiv.

CCVI.

S. P.

Clarissime & Eximie Vir,

Sistunt se tibi aliquot Suedicæ gentis adolescentæ, quorum pars ante vel domo vel mensâ meâ usa est. Dom. illustri Skittii ex fratre Nepos, Laurentius Skytte, ingenium ἰδιωκῶν & ad præclara natum, doctrinâ & judicio, quam pro ætate, majori, ut ex primo congressu deprehendes; magis cum excusseris. Mensâ verò meâ usus Nobilissimus Claudius Sternskyld unâ cum Præceptore suo M. Erico Broms. Ille erectæ & verum nobilitatis decus spirantis indolis, hic studiis moribusque optimis. Omnes famâ tui exciti unice desiderant summa tua eruditione & conversatione

dulcissima frui, quam ut eis gratificari velis (quod tamen sine dispendio graviorum tuarum occupationum fiat) est quod eorum nomine peto. Illi debito id honore & redhostimento pro virili pensare insuper haud habebunt. Sed & hoc pro veteri tuo in me favore ac amore majorem in modum rogo, ut si à gravioribus paulum otii decerpere posses, me epistola tua dignari, & quid Musæ tuæ, quæ semper egregiè publico laborant, editioni pararent, mihi significare velles. Meâ tibi officia iterum constabunt prompta. In præmaturo charissimi tui Dionysii obitu non possum non tibi ὀνειδίζω. Et quid ni? Cum ingenium tam eximium & illud Bataviæ decus, à quo tantæ eruditionis monumenta jam profecta, & majora, si per fata licuisset, expectanda erant, ut herba solstitialis ceciderit. Sed quia Deo anima ejus placuit, ideo properat ejus finem qui melioris & veræ vitæ introitus. Illius voluntatem cum quotidianis precibus exposcemus, eidem utique fas est acquiescere, sed quid ego unguem in ulcere & solatia tibi quæro quæ ipse domi habes; & non solum ut pater sed etiam ut Christianus dolere scis. Deus te erigat ac te nobis & Reip. Lit. diu servet. Recensui notas meas in Curtium & auxi, quæ si tanti luci dabo in juventutis gratiam; cujus bono etiam scripsi periodum quandam imperiorum, in qua IV. Monarchiarum incrementi & decrementi causas strictim exposui, sed Wittebergæ indignè excepta est & publicata à Typographo mendis plena. Nunc verò castigatorem edere animus esset, si diligentiorum Typographum reperire posset. Ignosce, vir magne, nugis meis, & me quod facis, ama. B.V.

Upsaliæ A. D.
ix. Septembr.
cō Ioc xxxiv.

Tui studiosiss.

Johannes Loccenius.

CCVII.

Clarissimo, Præstantissimo, Eruditissimo-
que Viro D. Gerhar. Joach. Vossio, S.

Clarif. præst. & erudit. Vir, & amice honorande,

SI quàm te amo, & æstimo, tam prolixas quoque possem scribere literas, prolixiores à nemine unquam accepisses. Quoniam verò, non quantum adfectus imperat, sed quantum festinatio in patriam pergentis, & Hamburgum transeuntis, permittit, scribere licet; noli mirari breves

te

te nunc accipere. Misi autem Leidam ad amicum meum Overbequium, quæ tibi, ut spero, rectè tradi faciet. Non sunt fortè tanti, quæ per tantum maris, & terræ transportentur, aut quibus lustrandis, tute tempus teras, nisi tamen digressioni, de arte nova, argumentum, & scopus ad quem collimavi, pretium statuam. Quo pacto ad scribendum, vi quasi injectâ, pertractus fuerim, ex ipsâ intelliges. Utinam autem quidquid ejus est, ad Ecclesiæ tranquillitatem tantoperè faciat, quanto ego eam, quum meditarer, & commentarer, ob oculos positam semper habui! Quemadmodum enim molestissimum mihi est, si cum quopiam mortalium contendere cogar; ita è contra nihil accidere potest gratius, quam si publicè queam prodesse, & vel è longinquo, & obliquo viam aliquam concordiae ostendere. Utinam alii, sicut me, sine dubio acutiores sunt, ita quoque in via quam dixi reperiendâ, sint foeliciores. Gratulabor mihi, si me procul à tergo, relictum animadvertero. Scripturis equidem juxta sensum, quem ex communi intelligendi modo, in sani hominis conceptu, facere natæ sunt, acceptis, unanimem primorum V. seculorum consensum, adjungo sive subjungo: ad quem nisi respicimus, nullum ego sane controversiarum, vel ut rectius loquar, miseriarum nostrarum finem video. Non placent, qui ejus rationem non habent, sed suo saltem ingenio indulgent, & fidunt, suoque arbitratu, & judicio vetera rejiciunt, nova invehunt. Sed sententiam meam, si legere digneris, plenius perspicies; quæ eum demum, mihi metipso probabitur, si tibi eam probari cognovero. Neque minus gratum erit, si moneas, aut corrigas, ubi monendum aut corrigendum censueris. Quamquam ego, quod hic egi, quasi aliud agendo egi; obversatur animo, genus irritabile vatum. Multi autem admittunt, ex obliquo & per ambages expetita, vel alicui hypothefi aptata, quæ si planè & nudè proferrentur, rejecturi essent. Salve plurimum & vale.

Tui amantissimus

Hamb. ex itinere
raptim, vi. Eid.
Sept. clō Idc xxxiv.

& studiosissimus,

Georgius Calixtus.

CCVIII.

L Iteras tuas, Vir Clarissime, & Reidani adjunctum exemplar à Mercatore Slagoniensi rectè accepi. In Reidano ingenium tui Dionysii mirè elucet. Dictio est tota pura, & majorem in modum elegans, quæque Tacitum felicissime representet. Laudibus ejus memorandis alibi occasio erit, idque publicè: hic si faciam, metuo ne dolorem tuum aliquatenus jam lenitum, tibi refricem, ac restantem, etiam augeam. Grotii nostri Sophompaniam, quam tantoperè deprædicas, admodum videre velim; quam quod tibi dedicavit nihil fecit præter amicitiae vestrae antiquissimæ dignitatem. Quod meorum operum editionem Blavius tam diu differt, malè animum meum habet: utinamque vel nunc tandem fidem liberet, inchoetque. Mitto interim quæ II. Tomi erant, & in illis Cretam meam, quam inscriptum ivi Noomfio, veteris nostræ amicitiae monumentum. Peto abs te ne è manibus id dimittas, antequam excudi debeat. Aristarchum tuum, sive de re Grammaticâ, Libros, expecto impatienter, & nunc absolutum spero. De Salmasio planè doleo: & non possum non invidiam Menapisci accusare. Stephanus noster jam Saxonem suum absolvit, & æstare proximâ se editurum pollicetur, nunc est totus nuptiarum, quas contraxit iteratò. Salutat te plurimum; uti quoque Laurenbergius. Creta mea si placuerit, mox eodem quoque modo Rhodum dabo, quam affectam nunc adservo: tum paulatim alia item, quæ concepi, subsequenter; si vitam Deus, uti spero, & otium dederit. Tu quæso, quantum potes, excita Typographum & urgere excitatum nunquam desine. Vale amice singularis, & saluta uxorem tuam liberisque meo nomine, conjugisque, ac meorum.

Soræ ad diem
xxvii. Octobris,
clō Idc xxxiv.

Tuus sine dolo,

Joannes Meursius.

CCIX.

Præstantissimo Viro, Gerardo Joanni Vossio, Affini conjunctissimo.

Conjunctissime Dom. Affinis,

EXprimere verbis nequeo, quàm mihi gratæ venerint literæ, Glossarium Vul-

Vulcanii, Hefychium aliosque libros, ad me pervehentes: interim quod verbis nunc assequi non possum, re ipsa, Deo dante, testabor. Hefychium tribus quatuorve ab hinc mensibus, in eum præter spem incidens, undecim flor. emeram; Vulcanii Glossarium nusquam reperiēbam. Quapropter, ut de eo mihi gratulor, ita neque importunè missus à te Hefychius; cū melioris notæ plerisque Authores, bis coemere soleam; ut & hic Londinii, & in agris, ubi plerumque æstatem, transigere solemus, bibliothecam qualitercumque instructam possideam. Ingenuè quid de schedis, quas ad te transmissi, sentiam fatebor: Invasit me commune hominum vitium, qui arbitrantur ea quæ ipsi cum labore scripserunt, ab aliis quoque cum voluptate legi. Nunc verò cū tute eas tibi non displicuisse tēstis, teneri non possum, quin porro urgeam, ut certior me facias, an tuto famam periclitari possim, deque edendis iis cogitare. Vidi Jul. Cæs. Bulergeri, atque aliorum quorundam, super hac materiā tractatulos; mihi tamen minimè satisfacere potuerunt; requirebam in iis, nescio quid, quod an ipse assequi potuerim, iudicandum tibi relinquo. Non contemnendum commentationibus istis, adjecti auctarium, ex quo ad vos missæ sunt: spes adhæc est uberioris materiæ; prout ea se quotidie Catalogum Artificum perscripturo offert; non obstabo tamen, quominus primos istos conatus, ad periclitanda hominum iudicia divulges, per amicorum aliquem, suppresso tamen scriptoris nomine, quod non nisi curis secundis deberi puto. Caterum de his plenius, si tu idem sentias. Literas Stephani Goffe ad te transmittō, ex quibus Reveren. Archiepiscopi consilium, à proposito tuo diversum non esse intelliges. Det Deus ut labores tui, quemadmodum merentur, Regi nostro ac Principi adlubescant. Siquid super ea re, ad Dominum Goffe Literarum perscribas, primā quaque occasione eas ad ipsum perferam; aut si forte absit, in agris ad eum perferendas curabo; quod ut commodè fieri posset, ipse D. Goffe prospexit. Vivit Cantabrigiæ, in Collegio Divi Petri, amicissimus mihi, totiq; vestræ familiæ D. Joannes Francius, qui inclusas à se, ad filium tuum Johannem literas dedit. Ait Praefectum Collegii Jesu, Richardum Stearne, ac reliquos istius Collegii socios paratos esse, ut prorogetur tempus illud absentiae, quod filio tuo indulserant, si modo per ipsum filium tuum, aut per te postuletur. Siquid tibi, tuisque ulla in re gratificari

possim, nunquam expectationem tuam fallam. Precabor interim Deum Opt. Max. ut tibi, uxori tuæ, totique familiæ vitam, ac valetudinem firmam largiatur.

*Reprim in Aedibus
Arundelianis Anno
1634. 15. Novemb.
St. vet.*

Tuus omni officio,

F. F. F. JUNIUS.

CCX.

*Clarissimo Viro Gerardo Joanni Vossio,
Affini conjunctissimo.*

Conjunctissime Affinis,

Jamdudum, cum hic apud nos esses, quid de conscribendo Artificum catalogo in animo haberem, ex me audivisti; haud muto factum. Sed dum ei rei prolegomena quaedam præmittenda putabam, observatiunculā unā aliquā, plures alias quandoque eliciente, ac post se veluti trahente, excrevit opus, in justis ferè voluminis formam. Ac novā se quotidie materiā supeditante, metuo ne in nimiam tandem excreseat molem, quicquid illud est, quod ex diversissimis Authoribus, in unum quasi corpus congeffi: Interea per otium inspicies, scio, opusculum hoc à me elaboratum; ac me iudicii tui scientem, quamprimum facies. D. Pettæus, atque alii quidam viri, optimi, meique amantissimi, ut edam suadent; minimè tamen persuadere poterunt, nisi fortè suffragio tuo juventur. Vale, conjunctissime D. Affinis, cum sorore carissima, atque omnibus liberis.

*Reprim Londini
in Aedib. Arun-
delian. An. 1634.*

Tuus omni officio,

F. F. F. JUNIUS.

CCXI.

*Viro maximo Ger. Jo. Vossio, S. P. D.
Johan. Fredericus Gronovius.*

Desiderium vestri, Vir magne, quod ipsa mora crescit, mihi in hac solitudine, incentivum fuit, ut denuo quia bella occasio erat, inficetis literis te inquietarem. Miraris solitudinem dici tantæ celebritatis locum, præsertim ibi studiis vacanti, ubi nec cogitandi, nec quiescendi spatium datur, ubi,

*Nos transeuntis risus excitat turbæ,
Et ad cubile est Haga.*

Ego verò in media frequentia, malignum secessum colere videor, qui nec amicum, nec familiarem habeam, præter unum Heilersichium; sed & illum districtior jam cura otioso garrivui tempus concedere vetat. Ampliff. D. Senator, vir est ad amulsum factus, & omni comitate me excipit. Sermo quoque ipsius minus est tragicus, & potest securum convivam pati. Equidem nihil omitam, quod ratio mei muneris exigat, ut si quæ nobis exhibita sunt beneficia, ea perdidisse se fateantur. Sed pessimus mos est, promovere fastum, & spiritus imperitorum adolescentium, iisque in quam minutis indere contemptum Doctorum suorum: quem profecto ego optavi, eo agro desitum esse, in quem mores malos Plautinus ille mittebat, si qua possent ferendo interfieri. Ipsa literæ sic observantur, & à teneris ea imbibitur opinio, potiore semper pecuniæ, quam eruditionis æstimationem habendam. Scilicet cavendum est serio, ne unquam falsus sit arbiter, qui cum designare vellet, *ὁ ἀνθρώπος* mortalem, ex hac nota literatorum aiebat, eum esse, quos odisse divites solent. Ex Tobia Andree cognovisse te puto, reviviscere negotium illud, Landsbergenfis Principis, cujus conficiendi spe, Cl. Altingius me Groningua excivit. Illustrissimæ Principi Matri placui, ob istorum commendationem, & unice velit me huic Provinciæ præfulcire. Sed re non amplius integra, meque jam in aliam servitutem transcripto devolvi, à me repudii omen, in heros meos, quorum animos optimus Tobias frustra, puto, tentavit. Nemo vitio mihi vertet, si serio illi de me benè mereri vellent, meque dimittere, non alienum à votis meis, esse locum, ad amplam fortunam, & honorem promptum: fin honestati potius quam commodo meo velificabor. Et gratus mihi erit nexus, in quem iniquo meo tempore me casus dimisit. Illud te oratum volo, summe fãutor, nè suspiceris quicquam, me cum heris meis fidem obstrinxi, fraudis contractui nostro miscuisse. Deum testor omnem ambitionem me depositam habuisse, nec vel minima cogitatione præcepisse ea, quæ nunc evenerunt eo tempore, cum conditiones ab istis mihi propositas amplecterer. Illud consilium quod à callido homine suggestum, apud te aliquando promebam, statim à dissuasu tuo abjeci, & damnavi. Et utcumq; res cadet, ipsa constantia mea demonstrabo, sincera omnia esse à me acta, quamvis multa acida, hic

& jam mihi obvenerint, & prævideam post fidelem operam, ab iis quibus maxime ea expenditur, parum nobis gratiæ, honoris nihil fore. Quod apud te solum perire cupio, & indicium esse incomparabilis fidei, quam de tuo erga me affectu, concepi; & publice nunquam diffitebor, siquidem nomen erimus posteritati non omnino oblitum. Vitam sic trudi scimus, & surgere sæpè aliquid, quod in ipsis floribus angat. Supellectilem librariam à Germania superiori recepi mense, quæ me tandem Musis reconciliabit. Mirè optem denuo, pervolutare Msc. Lucretium tuum, ut spicilegium colligam eorum, quæ in festinatissima priori collatione oculis conniventibus prætermisi. Itaq; rogo, an pati possis, ut si Lugdunum in reditu, ad vos (qui spero, post hebdomadas, aut ad summum quatuor, non differetur) transeam, à Salmasio illum repetam. Summus ille Vir, in nuperis ad me suis prolixè se excusavit, ne putarem eo animo, se librum abstulisse, quasi in scriptorem illum aliquid meditaretur, & mihi quod enotaveram, ire vellet præreptum. Non queo comminisci, quæ ipsi causa fuerit hujus de me suspicionis. Nam nec mihi nunc otium, ut in integro edendo, aliquod operæpretium, præstaturum sperem; & sic viros de Republ. jam benè meritos, præcipuè illum, veneror, ut quidcumque ab iis discere malim, quam quæ ipse parum certè didici alios docere. Miscellaneis meis per otium, quod breve nunc mihi, extremam manum impono. Boxhornius denuo mihi fidem fecit, se cum Janfonio de iis collocuturum. Si persuadebit gratum erit; sin jaceant, nonnunquam premantur in animo, donec mihi ipsi invisa esse cœperint. Nam ut nosti in talibus, expirante juventutis gratia, nihil ferè est, quod ipsi authores amemus. Salve plurimum, & vale cum tuis, publico bono, cui natus es, præcipuum literarum decus. Scripsi corrente calamo.

*Hagæ Comit'is Eidib. Novem.
Juliani An. c1o 15c xxxiv.*

Miscellanea mea ex consilio tuo, secui in quatuor partes, dempto etiam Titulo, Exercitiorum Criticorum, & Saturæ, quæ nomina delicatas aures radebant. Singuli libri xviii. vel xx. habebunt Capita. Atq; adeo primam Sectionem, hic ad te mitto. Collegi in ea quæ sparsum ad historicos libros notaveram. Minus placebunt vulgaria nimis historica nonnulla quæ immiscui. Sed scias, viro nobili cuidam & Jurisconsulto eam destinari, & ii non capiuntur arida

aridâ illâ, ut vocant criticâ. Aveo cognoscere iudicium tuum, & si quid inaudivisti de optimo Fabricio; rescribe quæso duobus, aut tribus verbis, & puta familiari colloquio meo tantum temporis dari. Salve iterum & vale, præsidium nostrum. Cum obsignare has vellem, venire mihi, ab Cl. Pontano, literæ indicantes, se in mandatis dedisse filio tuo, quem saluto, ut exemplar Epistolæ ipsius adversus Jesuitam, qui C. Croii operi edidit, mihi exhiberet; id servari usque ad reditum meum peto.

CCXII.

Virum utriusq; nostrum adeo amicum nactus, Vir præstantissime, nolui eum sine meis ad te literis dimittere. Scripsi anno superiore exeunte per Elzevirium, ac te accepisse puto. Nunc enixè abs te peto, ut Typographum impellas, quantum possis, nimis hætenus cunctatum; maxime pro voto meo, & meorum in hoc Regno amicorum, ac fautorum: inter quos illustris Dom. Cancellarius jure suo primum sibi locum vendicat: Ad quem quam Præfationem nuper misi, suppressendam in præsens nuntio. Siquidem ille è re meâ esse censet, uti Regi serenissimo opera mea dedicentur: itaque consilio ejus morem, uti æquum est, geram. Insuper est in Opusculis meis Atticis, quæ in primo Tomo apparent, aliquod Othoni Skielio dedicatum: sed cum diem ille suum nunc obierit, magno cum dolore meo, nam amabat me vir iste maximopere; muta pro prudentia tua inscriptionem, & præfige nomen Goudæ Rosæcrantzii nostri, cui familias meas Atticas dedicavi; & repone Erii Rosæcrantii nomen, ut succedat frater fratri. Quæ ad secundum Tomum pertinent, & in istis Criticarum Antiquitatum Libros IV. mittam proximè. Tu me, quæso, fac de rebus tuis omnibus, & librorum editione, certiore; tum quo loco etiam res meæ sitæ. Mitte quicquid ad me voles, uti pridem indicavi, ad Joannem Van Gandt, Mercatorem; isque ad me curabit rectè. Bene vale, ac salve, cum uxore liberisque à me, mea & meis.

*Raptim, Soræ, ad
diem xi. Martii
c1010c xxxv.*

Tuus constanti affectu,

| Joannes Meursius.

Præfationem ad Regem mittam tempestive.

CCXIII.

Scripsi ad te, Vir Clarissime, Martio superiore, per Joannem Elichmannum, Medicinæ Doctorem, virum præstantem, & communem amicum nostrum. Nunc his paucis iterabo scriptionem, atq; eam festinatam; nam Mercator, qui has adfert, me discessus sui monet adeo in ipso puncto. Misi tibi per eundem Elichmannum Creatam meam; insuper & reliqua omnia, quæ ad Operum meorum Tomum alteram pertinebant. Monui quoque suppressendam Præfationem ad illustrem Dom. Cancellarium; quando Regi dedicanda opera mea ille censet. Indicabam & de Opusculo, Othoni Skielio dedicato; quando ille diem obierit, nunc Gaudæ Rosæcrantzio inscribendo, & Familiis item Atticis transfereendis in Georgium, ejus fratrem, eodem titulo, tantum nomine commutato. Quæso, scribe, an inceperit Typographus, & quousque sit progressus: tum impelle, ut promoveat; nam id unicè est in votis Cancellario, aliisque in hoc regno, dignitate, & doctrina, eminentibus. Tum Rex quoque meus Clementissimus discupit videre Historiam. Eapropter iterum rogo, urge Blavium, quantum potes, quod est sane non exiguum. Feceris mihi rem gratissimam, feceris doctis & amicis in hoc regno; feceris & Dominico Molino, qui desiderat vehementer: & nostri viri illius adfectum in literas, & literatos, & in me quoque inter istos. Utinam hic etiam quandoque possem tuis commodis inservire! Opera mea certè tibi prompta essent. Hic definam, & salvare te jubeo cum lectissima uxore liberisque. Idem faciunt uxor mea liberique; tibi & tuis addictissimi.

*Scripsi admodum festinanter, Soræ ad
diem xxiii. Aprilis
c1010c xxxv.*

Tuus antiqua fide,

Joannes Meursius.

Quæso ne neglexeris mihi per hunc Mercatorem nostrum respondere: nam occasio tam idonea, atq; certæ, vix se mihi, toto anno semel offert. Iterum vale, & ætatem Nestoris vive. Scribe etiam, imo mitte, si quid pridem edidisti: tum si quid in præsens edis. O si liceat semel tantum singulis annis te præsentem compellare! quàm id velim. Nunc sufficere nobis debet, quod per literas illud ipsum concedatur. Cætera Deo committenda, qui nos curat, amicorum præstantissime. Vale iterum.

CCXIV.

CCXIV.

*Incomparabili Viro Domino Gerardo
Joanni Vossio.*

Vir Clarissime,

Offero tibi merito tuo opusculum, quod nuper in vulgus exire iussi, & inter summas occupationes per intervalla condidi, cum non liberet otari. Partim Emblemata sunt, ad quæ nihil dictum, nisi quod in confesso, ante me natum fuit, & nemo è plebe etiam ignorat. Aliter tamen quam vulgo, dixi, & proinde novum, atque indictum videbitur, quod unusquisque, quanquam Platonem, aut Aristotelem non legerit, quotidie loquitur, & sentit. Partim orationes sunt, in quibus nihil præter officii mei rationem, debes æstimare. Non passus sum diligentiam meam desiderari, cum aut occasio, aut alius, atque alius, quem ex Romana antiquitate explicandum susceperam, scriptor invitaret. Promittimus certe quæcumque non præstamus. Et hoc ad laudem mihi satis est, eâ ætate inquam magna eruditio non cadit, imo quâ magnus est, qui ad confessionem ignorantiae profecit. Nunc Juvenalem meum pergo illustrare. De usu codicum tuorum, valde mihi gratulor, & devinctum me ostendam, ubi per me licuerit, & tibi placuerit hujus hominis affectum experiri. Sed vereor ne humanitate tua abutar. Interea tamen mox libros tuos remittam, quam primum intellexero, eos a te desiderari. Opus tuum de Arte Grammatica, avidè hic omnes expectamus. Spes nuper facta brevi proditutum. In tua autem manu est, vota nostra explere. Vale, Vir Incomparabilis, & me ama.

*Rapim Lugd. Clarissimo nomini tuo
Bat. Kal. Febr.
Id Idc xxxv.*

Dicatisimus,

Marcus Zuerius Boxhornius.

CCXV.

Cl. V. Ger. Vossio.

NON erit, Vir, Cl. quod de excusanda Literarum tuarum tarditate, (quod à te non semel factum est) dein-

ceps labores, cum jam exemplo te meo tueri possis, qui literis quas Octobri mense superioris anni reciperem, nunc demum respondeam. Non tamen hoc à me factum, vel imitandi tui causa, si quando res tuæ ita tulerunt, ut serius responderes; vel ut exemplo meo fultus securius in posterum sileres. *Οὐ μὰ τὸν φίλιον τὸν ἐμὸν τὸν ὅν* (ut olim Platoniarum elegantiarum simul & dogmatum decus illud ingens Synesius loquebatur) *ἐκ ἐργα* hoc in me facinus admiserim, qui non in postremo felicitatis meæ loco semper posui ponamque semper, hoc mihi tecum amicitiae, mutuarum Literarum commercio firmatum excultumque, jus intercedere. Dicam igitur, quod res est, mi Vossi. Quantum video, in eo satis conspirant nostrum utriusque fatum, quod vitam vivere otiosam, neutri datum est. At in eo discrimen ingens, quod tuæ omnes curæ, omnia negotia ad Literas & Musas pertinent; quorum scilicet fructum percipiunt tum felicissimi Juvenes, qui te quotidie audiunt; tum qui tua laboriosissima scripta legunt per totum orbem literarium docti gravesque viri. Mea pleraque negotia quam diversi sint generis vel inde potes colligere, quod totos haud raro menses occupatissimo mihi transigere contingit, quibus tamen totis librum videre, aut certe studendi causa, non contingit. Hoc quominus mireris, scias velim (ut alia nunc taceam) qui Residentes, (ut vocamus) sunt hujus Ecclesiæ Canonici, iis tum universis simul, tum singulis per vices agenda curandaque multa incumbere, quæ temporis haud minimam partem, quod unicuique suppetit, sibi vendicent. Superiore anno molestissimo Thesaurarii munere sum defunctus. Hoc anno sum Receptor Ecclesiæ, onere fateor, si genus ipsum laboris, & præcipue si præmia utriusque spectentur, non adeo molesto aut gravi; à Musis tamen, & otio literario non minus alieno, quam quod erat Thesaurarii. Quæ quidem de occupationibus meis eò fusiùs, non habita tuarum ratione, sunt à me nunc exposita, ut errorem, in quem te postremæ meæ induxerunt, tibi eriperem. Ita enim ex iis collegisse te aperte scribis, multò majora me sub manibus habere, quam quæ hæctenus (Majoris ea certe mitto pro tuo erga me amore, quam pro eorum merito æstimata) à me præstita sunt. Magnam sane in eo, mi Vossi, amoris tui vim agnosco, tum quod talem me tibi fingis, à quo magno possint à te tuique similibus expectari,

pectari, tum quod, cum ita de me iudicas, ne ipse mihi desim, cohortatione tua, quantum in te est, providere satagis. Plurimum igitur amoris me tuo debere profiteor libens. Cum tamen hominis sit, meo iudicio, vani stultique eam de se opinionem excitare, quam destitutum se certò sciat, etiam atque etiam te rogo, ut quam opinionem de me temere concepisti, eam, me non spondente, imò alia omnia proficiente, & bonam copiam egerante, tibi quam potest celerrimè, avelli sinas. Jam enim dudum est, cum de meis studiis, non meâ sane, quod sciam, culpâ, sed fati ita volentibus, actum est; & ea nunc vita est, ut si hæcenus omnia pro voto successissent, nunc tamen vel invito deoquendum, & arenâ, quod aiunt, cedere essent. Neque tamen spero ita vivemus unquam, ut *in una ære æquans*, & fruges duntaxat consumere natos, quicquam merito nobis exprobrare possit. Ab hoc à nobis, ut eo vecordia unquam deveniamus. Si ut profimus aliis, Scriptis & lucubrationibus nostris non datur, at sunt alia personæ quam gerimus, & professioni Sacerdotis non minus convenientia, in quibus non inutiliter ad Dei gloriam occupatum iri quicquid in nobis est industria, confidimus. Interim si contingat, ut aliquid interdum edamus in lucem, hoc scilicet succisivis horis nostris debebimus totum, magisque recreationis nostræ quam laboris erit. Ad Parentis autem *in margine n. æquans* edenda quod hortaris, res factu facilis esset, nec à me tam diu dilata, si ea essent ejusmodi, vel quæ perfecta æstimari mererentur, vel saltem ita effecta, ut sine Authoris injuria publicari possent. Horum cum neutrum sit, & eorum quæ præcipua sunt, non sine summo labore ad perfectionem aliquam perducere possint, & argumenti sint à meis studiis, id est sacris, alieni, (quales sunt operosissimæ in Polybium animadversiones, amplissimi de re Vestiarum Commentarii, &c.) quid aliud iis præstare possim, quam ut dum vivam ipse, fideliter à me integra illibataque conserventur; & post obitum, sacra publicæ alicujus Bibliothecæ custodiæ fideique committantur, non video. Cætera si quæ sunt, qui minore opere indigent, ut publico parentur (ut sunt fortasse Notæ in Epistol. ad Atticum, & alia nonnulla id genus) aut quæcunque sunt argumenti Theologici seu Ecclesiastici, quæ ulla mea quantacunque opera sive perfici, sive quocunque modo ad publicam utilitatem disponi poterunt; in his operam

nostram publico non defuturam, si Deus vitam nobis & otium, quæ sufficiant, audeo tibi promittere. Quamquam ut verum fatear, nupera quædam Calamitas studia mea vehementer afflixit, ex qua vereor ne longum sit, priusquam se integre recolligant. Obiit enim ante mensem unum aut alterum omnium meorum amicorum, quibuscumque familiaritas mihi & de literis frequens communicatio hic intercedebat, longè doctissimus Augustinus Lindsellus, postquam Herefordiensi Diocesi, cujus erat Episcopus, annum vix integrum, sanctitate & integritate vitæ præful, etiam si olim vixisset, admirandus, præfuisset. Vix est ut tantam eruditionem in tanta modestiâ, tanta obscuritate (etiam jampridem toto hoc regno celeberrimæ famæ fuerit) latere potuisse quisquam credat, hoc præsertim seculo, quo scribendi cacoethes plerosque homines, qui aliquid sciant, tam impotenter transversos agit. Nullum genus est eruditionis, in quo non ita excelleret, ut tota vita nihil aliud egisse videretur. Nullus liber antiquus aut recens, Latinus, Græcus aut Hebraicus; nullus ferè Gallicus, Italicus aut Hispanicus, qui quidem alicujus momenti fuerit, quem notum non haberet, totumque ita excussisset, ut pro re nata suam de eo sententiam apud amicos doctè pariter ac copiosè proferre non posset. Hic ante quatuordecim plus minus annos, cum libellum quem contra patrii nominis infamatores edideram, legisset & probasset, antea sibi penitus ignotum ita complecti cepit, ut deinceps non aliter de me sollicitus esset, quam si propiori aliquo naturæ vinculo ipsi conjunctissimus fuisset. Nullum officii genus est, quo mihi commodare potuit, quod inexpertum reliquerit. Nam & studia mea quæ consulendo sapissime, quæ docendo non rarè adjuvavit; & fortunas meas aliquando tenues non ipse modò sponte sua liberalitate sublevavit, sed & ab aliis ut sublevarentur, sua apud magnos viros autoritate, nunquam à me ne minimo quidem verbo sollicitatus, effecit: Ille denique fuit, qui benignissimum Dominum ac Patronum, nuper Episcopum Londinensem, nunc Cantuariensem Archiepiscopum (in tanto dignitatis fastigio meritis quam loco longè celsiorem) primus mihi conciliavit; ut omnia propè ipsi debeam, tanquam fortunæ meæ fabro & architecto præcipuo, quæcumque mihi felicia postea contigerunt. Sed ut ad studia redeam, assiduus hic mihi *in margine n. æquans* erat, & temporis acti severus

severus exactor, pensis etiam interdum impositis quæ pro ratione sive virium meorum, sive otii & temporis, maxime congrua judicaret. Paucos ante mortem annos, totus in eo fuerat, ut Græcorum veteris Ecclesiæ Scriptorum Scripta quædam *avāditu*, magno ære non ita pridem è diversis Europæ Asiæque locis comparata & huc allata, quam emendatissima cum Latina Interpretatione in lucem emitteret. Me quoque (magis id quidem amori erga me suo indulgens, quam humeris meis confusus) ad partem tam gloriosi propositi vocârat, mandatâ mihi veteris Græci codicis, qui Commentationes in partem Psalmorum, Chrysostomo vulgò adscriptas continet, Interpretatione. Quæ quidem eò facilius à me suscepta, quod dies ad perficiendum data, nec alia conditione imposita quam si per alias occasiones liceret. Alia quippe erant plura, seu majoris ea momenti, seu quod acceptiora futura essent, prælo designata, priusquam harum usus esset. Neque jam quicquam restabat, quam ut Typographus primo quoque tempore ad opus accingeretur, cum supremum diem obiit Præsul Illustrissimus. Sed Deo laus, quod ille superstes, diuque sit superstes oro, quo vivente nunquam Patrono carituræ sunt in Angliâ meliores literæ; cuius potissimum auspiciis, & prudentissima administratione, ut eò perductum negotium illud, quo perductum diximus, cum Præsul Illustrissimus obiit, omnes hic agnoscimus; ita & in cura providentiaque ejus, nulli non pari negotio omniumque hætenus difficultatum feliciter victrici, spes nobis non exigua, tot conatus & labores, ob intemperatam præcipui instrumenti jacturam, incassum non futuros. Sed vereor ne qui modo pertinax silentium excusandum habebam, idem nunc importunæ prolixitatis crimen incurrerim; adeo hoc quoque verum illud experior, quam sit illud in omni re difficile, ut ne quid nimis. Ad literas igitur tuas redeo, etsi jam pertæsus prolixitatis, ne in tanta sermonis redundantia, me tibi non respondisse queri possis. Grotium & Salmasium, incomparabiles Heroas, quod in tuis memoras, rem fecisse mihi gratissimam. Etsi enim vitæ eam rationem inire, ut inter eruditos nomen profiteri meum possim, non datum est, in eo tamen non leve solatium, quo supra vulgus non parum assurgere mihi videor, quod viros verè doctos affectu (sed & iudicio fortasse) non vulgari colo, eorumque incolumitatem in maxima parte scelicitatis meæ pono. Sed ô seculi infamiam, summum illum virum, desultoriæ vitæ incommodis tamdiu jactari, & incertis sedibus errare! Dignum certè virum, de cuius virtutis possessione omnes Europæ reges & régna, si sciperent, haud paulo majori contentione inter se decertarent, quam olim urbes illæ Græciæ de Homeri umbra. Sed nimirum tanti stant ei Libertas, & Veri amor, qua non pauciores ubique fere inimicos, quam Eruditio & divinum Ingenium admiratores illi peperere. Sed quando, ut ait ille, nondum omnium dierum Soles occidere, non est quod desperemus res ejus aliquando tranquilliore loco fore. Filium tuum Johannem reducem, ut & Opus Grammaticum, quod promittis, (illum corporis, istud ingenii tui foetum in utroque te complexurus) & libens videbo, & avidus expecto.

De re tuâ pecuniariâ, serum me tibi scribere; scribam tamen; 24 nempe die Mensis Octobris ultimo elapsi 50 libras, quæ tibi debebantur, Pesteri Delegato Cantuariensi, persolutas esse: alteras autem 50 libras (quod jam magis tempestivum me tibi scribere:) si interim te priores illas accepisse (quod semper observandum tibi est) vel verbo significaveris, intra paucas septimanas tibi paratas fore. Res tuæ reliquæ omnes, prout feret occasio, mihi semper erunt curæ. Sed hortense illud negotium tuum (quando & Successoris tui res ad te pertinere rectè judicas) adhuc pendet & sub iudice lis est. Quando erit aliquid constitutum, quod brevi speramus, omnia per me plene resciturus es. Vale, Vir præstantissime, & amare perge

Cantuar. viii.
Kal. Mart.
1635. Stilo
vet.

Tui tuorumque omnium

merito tuo amantiſſimum.

Mer. Casaubonum.

CCXVI.

Cl. Ger. Joh. Vossio Salutem & Officia.

IN votis quidem erat, Vir clarissime, te ante abitum Illustrissimi Comitæ Lescinii in Angliam, videre; verum quia partim promotione quæ hac die fiet, distractus, partim rebus itineri parandis, id facere nequeo, per hæc mihi tecum esse agendum existimavi. Totum negotium

T 2

in

in tuis literis versatur, quibus instructi Angliam petere volumus. Magnum te in illa insula, collati à Regibus honores testantur, Illustrissimo Comiti satis erit, si tuis ibidem amicis significaveris, magnum literatorum æstimatorem eum esse. Utramque Academiam videbimus, in utraque aliquot septimanas consumpturi. Te parario viri magni innotescunt, quorum tamen & ego non paucos amicos habeo. Addere non oberit, si videbitur, Parentem ipsius unicum in Polonia Reformata Religionis patronum esse, prout Princeps Radzivilius in Lithuania, prudentissimum & literatissimum inter Palatinos haberi, & quod ad rem facere maxime videtur, in magno apud Serenissimum Magnæ Britannia Regem favore, quem multis literis testatum fecit. Ipsius Comitibus dotes ex aliorum forte relatione nosti. Sed quid ego multis in his te, Vir clarissime, turbo: sufficit petuisse, ut literas nobis ante diem Jovis vel Veneris submittantur Lugdunum. Hospitium nobis est in Pappengraff apud Dominum de la Rue. De favore erga nos tuo nihil dubitamus, quem ut continuare erga me præsertim velis, observanter peto. Vale, Vir clarissime

Lugduni 15. Maii ipso
die promotionis meæ in
Medicine Doctorem.

T.C. additissimo,

Johanne Jonstono.

CCXVII

*Præstantissimo viro Domino Gerardo
Johanni Vossio, Affini Conjunctis-
simo.*

Conjunctissime Adfinis,

Vides hinc auctarium non pœnitendum, (nisi me fallunt amici, quorum hac in parte judicium desideravi) opusculi illius, quod olim ad te transmissi; quodque propediem typis committendum, ultimis tuis literis indicasti. Amicos dico, non Seldenum, Petzium, Oughtredum, qui priora approbaverant; sed fratres Wrenni, quorum alter nunc est Episcopus Herefordiensis, in magna apud Regem gratia, alter verò Decanus Windsorienfis. Ambo certè in omnibus ostendunt, quam bene tibi, mihiq; velint. Tertii libri caput ultimum, quod rationem picturas dijudicandi pertractat, nonnihil reconcinnavi, ac porro quid in singulis, corporis humani membris, verè pulchrum olim

judicaverint adjeci; quemadmodum & caput tuum de Statuarum materia; quoniam ea res quoque, ab hac rectè judicandi scientia, non videtur aliena: subdubitavi aliquamdiu, an septimum caput Libri tertii cum hac, quam nunc vides, appendicula, peculiari quodam titulo vindicem, inscriberem; ac picturam veterem statim exciperet vindex, sive de ratione picturas dijudicandi: Tu facies quod consultius judicabis; aut in duo opuscula dispenses, aut conjunges. Mihi certè, si Regi nostro inscribatur opusculum, omnia conjungi debere, atque in unum volumen componi videntur debere. Miraberis fortè, nimiam hanc levis Tyrocinii fiduciam, nolisque me adeò temerè periculum famæ adire. Ego quoque, ab hac arrogantioris ausi, ut mihi quidem videbatur, temeritate, alienior eram; donec suavisit, ac penè persuasit, Rev. Episcopus Herefordiensis; qui lectâ hac, quam nunc transmittit, parte, multis asseveranter urfit dubium ac tergiversantem, constare sibi dicens, quàm acceptum Regi, Proceribus Regni, omnibus denique futurum sit opusculum. Dignabitur profectò Rex noster, inquit, hoc tuum scriptum inspicere, pro eo quo artes hæc profectò adfectu; nunquam quicquam gratius ei obtingit, quàm si post regni curas, offeratur aliquod antiquæ artis specimen, quo oculos, animumque pascat. Quinimò nuperrimè adhuc, dum tuas schedas percurro, inquit, adfui Regi super antiquorum eximia arte, nonnulla sciscitanti; atque ei spem feci, visurum brevi opusculum aliquod, suppresso tamen tuo nomine, cum cura elaboratum. Respondi non tanti mihi videri tumultuarium hoc opusculum, quod inexpectato ferè excidit majus opus, Catalogum nempe Artificum, molienti: daturum operam, ut majus hoc opus, tanti patrocini gloriâ magis mereatur. Ad hæc Rev. Vir, tanto magis hac in re, consilio meo obsequeris; quandoquidem spero fore, ut Serenissimus Rex, pro navata strenuè opera, animos tibi addat, ad reliqua pari industriâ prosequenda. Unum tantum in hisce tuis lucubrationibus requiritur, inquit, Rex noster inquit, ac Proceres Regni, multique alii ingenuarum artium amantes, Latine quidem intelligunt, Græcè non item. Minus gratum hoc nomine futurum erit opusculum, nisi Græcam passim Interpretationem adjicias. Multis super eâ re mecum egit. Non repetam singula. Video certè Typographo, mihi, publico, non inutilem fore hanc

hanc operam: si quid ex hac re commodi obtigerit, amicis qui hanc mihi operam non denegabunt, deberi putabo. Quædam talia sunt, ut à filiis tuis, Isaac, atque Gerardo, fortè ad probandum Græcæ Linguae tyrocinium transferri possint; ubi major aliqua emphasis latet, nemo melius exprimere ea posset, quam Adfinis noster Næranus; sed is gravioribus fortè curis distinetur; pertentabis animum, si impetrari posse putabis. Utcumque tamen, vel precibus, vel pretio invenendus erit aliquis, qui id præstet. Refundam quicquid impenderis; nolim enim nostras has qualescumque curas, minus gratas esse, ob leves aliquas impensas. Typographus quoque, si quid ea res editionem differat, moram hanc æquo animo feret, quoniam sic denique fiet, ut exemplaria magis distrahantur. Ad quod etiam conducet, si quàm minima, ac portabili (ut loquuntur) formâ, minimèque sumptuosè excudatur; ne quem pretium ab emendo deterreat. Cum primum has de pictura observationes congererem, quin etiam cum eas ad vos transmitterem, nihil minus quàm de editione cogitabam; unde etiam evenit, ut de interpretandis Græcorum Authorum locis, minimè laboraverim; putaveram majori operi reservanda esse hæc, quasi prolegomena; sed quoniam præter opinionem in iusti operis formam excreverunt, est nescio quid, quod mihi suadet, famam hoc opusculo prætentare, donec reliqua prodeant. Sunt multa loca ex Authoribus Græcis, quæ nudam tantum rei gestæ Historiam, aut Apophthegma aliquod, aut aliquid simile continent, ea Latine tantum imprimi velim, ne in nimiam molem excreseat opus. Reliqua loca Græca, quæ Emphasin quamdam habent, ac in ipsa phrasi præcepta quædam continent artis, integra servari velim, adjecta interpretatione; aut si Latine tantum videntur imprimenda, optem nihilominus, ut Græca verba quæ vim aliquam habent, ad oram adjiciantur, quo peritis pariter, atque imperitis Græcæ Linguae satisfiat. Dabis veniam pluribus, præter amorem meum verbis: non leviter animum meum tangit hæc cura. Quicquid posthac, Deo volente, adornabo, ipse semper hac cura defungar; neque amicis meis negotium amplius faceßam. Certiorem quoque fecisti me Clarissimum Claudium Salmasium, tunc optare specimen aliquod statuæ paliatæ, chlamydatæ, habitus Epheborum, & similibus; jam ante per D. Boswellum, ipse Salmasius tale quid petierat; quineti-

am Gallicum aliquod ipsius Salmasii scriptum penè me est, quo à Boswello petit, ut hoc à Comite Arundellæ impetraret: placet Comiti propositum, ac mecum re communicata, desiderio Clarissimi Viri, quamprimum satisfieri volebat. Negabam partem illam antiquæ eruditionis, quæ versatur circa rem vestiariam, ita mihi perspectam; ut pictori, quod exemplar potissimum exscribere debeat, præmonstrare auserim: Compellaturum interim D. Seldenum, ac Patritium Junium; eos enim in hac re magis fortè versatos, pictori commodius statuas delineandas assignare posse. Placuit Illustrissimo Comiti ratio consilii mei. Confestim itaque ad Junium advolavi, ostensaque Cl. Salmasii manu, quam non iniqua vir Magnus postulare docui. Rogavi ut conveniret D. Seldenum, atque ad Ædes Arundellianas, comitante Seldeno accurreret: gratissimum id fore Comiti, si inspectis monumentis antiquioribus, Artifici quid delineandum videretur, ostenderent. Recepit facturum Junius; nec tamen venit; acceptis deinde tuis literis, iterum interpellavi, atque illam tuarum literarum partem, quæ id urget, prælegi: Respondit, se non immemorem fuisse promissi; sed nunquam in D. Seldenum, variis negotiis civilibus distentum, eoque raro se domi continentem, incidere potuisse: datum operam, ut ubi primum compellare datum erit, unâ cum ipso advolet. Quatuor aut quinque sunt hebdomadæ, ex quo venturum recepit, & nihil interim fit; neque possum adsequi conjecturâ, quid tantulam rem moretur. Non desinam tamen eniti, ut tandem aliquid fiat. Nisi fortè inveniat amicum aliquem Cl. Salmasius, qui in Britanniam fortè excurrens, ex ipsius sententia, quæ delineanda sint ostendat. Si quis talis offeratur, & me, & Artificem non imperitum, ad omnia officia paratissimos experietur. Imo si fortè dum in agris sum, talem aliquem appulisse intellexero, Londinium statim excurrâ, neque operam meam requiri in re tantulâ patiar. Jamdudum ad te literas dedi, quibus te Cantabrigiâ reversus, de rebus Joannis nostri certiorem feci. Responsum exspecto, quod postremæ literæ tuæ, brevi promittere videntur. Etenim ex quo literas ad te, Cantabrigiâ reversus dedi, tuas quoque, cum literis Johannis nostri accepi. Sed is parçè admodum, atque obscurè res suas tangit, adeo ut vix conjecturâ, quid sibi velit, adsequi possim. Varii hic atque incerti, de matrimonio ejus

eius rumores: ille nihil super ea re aperte: aliquid tamen videtur innuere voluisse, deditâ tamen rursus operâ præterisse. Sunt adhuc penes me literæ ejus ad quamdam Prudentiam Greene; hanc illam esse putant; nolui compellare eam, cum essem Cantabrigiæ, nisi prius exploratum haberem animum tuum. Hoc illud est, quod ultimis meis literis, sedulo à te petii, ne me patereris ignorare, quo loco illa mihi esset habenda. Rev. Episcopus Herefordiensis, facile agnoscendam non putat, nisi prius plenius quid constiterit. Aliquantulum igitur adhuc differo Cantabrigiense iter, sperans fore, ut ad priores literas meas respondeas, & ad me transmittas Schedulam, in quâ Joh. propriâ manu perscripsit, quamnam sint illa, quæ dilectæ tribui velit. Ego utar in omnibus consilio Reverendi Episcopi Herefordiensis, quem Academicarum Artium callentissimum, vestrique amantissimum quotidie experior. Hæc sunt potissima, quæ raptim ad te scribenda putavi. Interim hunc animi mei dubium, etiamnum motum de instituenda dedicatione alios celabis: nisi fortè & ipse putaveris, non inconsulte me facturum, si consilium Herefordiensis Episcopi amplectar. A quo consilio si non abhorrebis, cura sciam te, me, meaque, unico tantum verbo Archiepiscopo commendasse; quod magnum addet animum, timide alioquin tantam rem aggressuro. Scis quantum apud Regem nostrum, valeat vir merito eminentissimus. Precor interim Deum Optimum Maximum ut te, tuosque, publico, mihi incolumes servet. Vale.

*Raptim. In edibus
Arundelianis, anno
Domini, 1635. Cal.
April. stylo vetere.*

Tuus omni officio,

FFF. Junius.

Continuatam hanc opusculo meo appendicem, ita raptim exscripsi, ac prope ranter misi, ut ne quidem eam potuerim perlegere, antequam Reverendo Episcopo legendam præberem; imo ne quidem otium fuit percurrendi, postquam reverendus Vir eam restituit, propterea quod statim videbatur ad te mittenda; maluissem alioqui Græcam Interpretationem, locis suis ex consilio Episcopi passim adjicere, ac primò quidem consilium erat, quamprimùm hoc facere; sed subibat animum cogitatio, posse Typographum falli, in voluminis formâ, ac Typorum modo eligendo; nisi ante Cal. Maias, totius operis

conspectus, certiorum consilii rationem suggeret. Nunc aliquâ ex parte, animo meo satisfacisse mihi videor, & quemadmodum hæc prorsus videbantur addenda, ita nunc verbum non amplius addam. Unum hoc iterum rogo, ne patiaris propter leves aliquas impenas spem meam imminui. Inveniendus est aliquis, aut precibus, aut pretio, &c. Grati animi testimonium nunquam requires, sat scio. Etenim ut ut non accesserit, officii hujus gratia, tibi tamen obstrictum me esse semper agnoscam. Iterum vale, & me amare perge.

CCXVIII.

HAud abs re facturum me existimavi, Vir clarissime, si te quoque tot annis, tot beneficiis mihi conjunctissimum, brevi epistolio, sed intra præcordia nato, compellarem. Enimvero tanta sunt tua de me, tamque præclara merita ut cui plus eo nomine debere possim, velimve, sciam neminem. Cætera verò longe antistat ingens illud nec mea unquam memoria excessurum beneficium: quod filiorum meorum, non unum, non duos, sed trinos, pignora mihi charissima ad optimarum rerum scientiam, quâ neque majus aliud, neque præstabilius, non incitatis modo, quo solo obstringi æternum poteram; sed duxeris etiam, traxerisque; ne sic quidem innato tibi bene merendi studio satisfactum ratus, nisi & simul informator fores. Quod quantum sit, rem ex vero æstimantes, etiam me tacente, nōrunt cuncti. Sincerum tuum in me mosque affectum, & alia hujuscemodi, quæ deteri prædicando nullus abnuerit, ne modum epistolæ excessisse, vel solum id egisse videar, libens & consultò prætermitto. Ego saltem omnium, dum superstes fuero, recordabor; sin, occasionem nactus, officia esse mea aliquid judicaro: non negligam actu promptus esse, benefactaque benefactis reponere. Interea sic me animatum credas velim: Filium Benedictum, Britannia jam decedentem mareq, transmissurum ubi ad vos appulerit, ut complectaris foveasque facile te exoratum iri confido, si cogitare tibi subierit, quam ipsi semper cultus fueris, quamque prolixè ei operam navare, cupereque jamdudum cœperis. Vellem is tuo consortio longum frui, adeoque te Doctorem habere posset; sed quia necessum est in patriam

patriam, sesquianno haud visam, regredietur, infelicem hac parte esse oportebit. Habes Laurentium, excitata indolis ingenique, quem doctrina affecisse, tibi honorificum, mihi & compluribus alijs futurum est, quam maxime jucundum. Adeo non veremur, ne ab materie devinciendi ulterius familiam nostram destituaris. Quid mihi hac legatione præstitum, quanquam memorare possem, tamen filio optime relatu quoque vis, supervacuum videtur. Hoc saltem profiteri licebit; nihil omnium secus quam optaram evenisse. Jam in eo sum, ut hinc discedam; Belgicis navibus, uti spero, transfretaturus. Deus te bono literarum, tuoque decori incolumem servet, & senectâ ætate, quam scio expetis, dignetur. Vale.

Virtutum & Eruditionis

*Calendis Maii,
cō lō c xxxv.*

tua admirantor &

Cultor perpetuus,

Jo. Skytte, Senior.

CCXIX.

*Spectatissimo Viro D. Gerardo Joanni
Vossio, Affini conjunctissimo.*

Conjunctissime Domine Affinis,

Literæ tuæ in quibus, librorum à te missorum mentio fiebat nonnisi decimo postquam allatæ essent die, ad me perlatae sunt. Fasciculum librarium, tali nota insignitum, qualem inscriptio literarum tuarum fasciculo tributum testabatur, nullum invenire potui. Aliquoties ad portum advolans, & cum inquisitoribus illis, qui in portubus regia vectigalia curant, prece & pretio contendi, ut talem mihi fasciculum demonstrarent. Omnes pernegabant, quicquam sibi, de tali aliquo fasciculo constare. Subit tamen moestum animum cogitatio, adeundum mihi esse Dominum Dell, qui Archiepiscopo à se cretis est; sperans fore, ut ex ipso intelligerem, an & quâ ratione fasciculum sibi inscriptum nactus esset. Narrat ille miserum utriusque fasciculi casum: ac casu ferè libros à se recuperatos, atque ex orci faucibus ereptos. Iple fortè super ea re ad te prescripserit. Utrumque tamen tres tantum adhuc ab ipso libros recepi.

Unum inauratum, quod tuo nomine tradidi primogenito Comitis Nepot; duo reliqua exemplaria, Cantuariam misi, ut postulabas. Spem tamen facit Dellius, duo adhuc recuperari posse, quæ Cantabrigiam, te monente, mitti debent. Quumque ostensa ea literarum tuarum parte, inauratum unum, quod Bibliothecæ Cantabrigienfi deberetur, quæcumque ratione inveniendum esse urgerem, etiam hoc spondit: scire enim se affirmabat, ubi Londini in *The High Commission Court*, ut vocant, duo exemplaria delitescant, quæ fortè inter diripientium manus, ad aliquem ibi pervenerunt, quorum unum inauratum esse arbitrat; plura se invenire non posse contendebat. Biduum tamen nunc est, ex quo nihil etiamnum de exemplaribus istis resciscere potui. Misi heri vesperi ad ipsum: respondit peregrè profectum hominem istum, intra biduum aut triduum rediturum. Et mihi hoc ipso die rus abeundum: mensem unum atque alterum in Surriâ loco quodam xxii. millia ab urbe hac transigemus. Literas itaque tuas, una cum meis, ad Doctorem Richardum Sterne, Præfectum Collegii Jesu, amico fideli committo, qui eas cum libris (si fortè restituantur) Cantabrigiam mittat. Alioqui literas ad Præfectum dare nondum statui. Quod si libros recuperari non potuisse intellexero; literis hisce meis, tuisque, quas fido amico tradidi, alias addam, quibus eum de jactura librorum certiore faciam. Sed spero non fore opus. Utrumque tamen nullum mihi exemplar relictum fuit, & si fuisset, Episcopo Herefordienfi tuo, meoque nomine lubens tradidisset. Spero acceperis prolixas literas meas, in quibus Herefordienfis Episcopi memini; dolerem sanè si literæ istæ unâ cum auctario non poenitendo, calci opusculi nostri de picturâ adjiciendo, ad manus tuas non pervenissent.

Non tanto me dignor honore, quam habuit mihi clarissimus Grotius: olim avidè amplexus fuisset optatam conditionem; nunc operam meam addixi familiæ Arundellianæ, cui jam dudum, ut scis, adfuevi; & in quâ, ut forte omnia non placeant, plura tamen placent; vitæ genus quod varias interdum recreationes, severioribus curis interponit, satis indoli meæ congruens experior. Totus jam sum in persequendis iis, quæ de picturâ coepi. Primò per otium in vernaculam nostram linguam, ea quæ Latine dedi transfero; Quin etiam hortatu multorum, in hoc regno

regno Britannicè idem conabor. Nolim enim alium quemquam, mentis meæ non usque adeo gnarum, opus hoc interpolare; meæ industriæ hac in parte magis fido. Urgent admodum artifices, & quotquot artes illas delicatas amant, imminet deinde cura majoris operis; spondeo, ut scis, Carologum Artificum. Non patiar quantum in me erit, fidem meam requiri. Horum nihil amplius possim, si novum vitæ genus amplectar. Plura sunt, quæ afferre possem; sed hæc præcipua: excusabis itaque non sine debita gratiarum actione; nunc intra horam unam, atque alteram conscendendi nobis equi. Ad ipsum clarissimum D. Legatum scribere non possum.

Menses circiter tres sunt, ex quo literas ad sororem, amicissimo mihi D. Roberto Van Voerst, sculptori eximio, iter ad vos instituenti, traditurus eram; impedit Rex tum temporis iter ejus: & stipendio annuo mille florenorum detinet eum, additis insuper quadringentis flor. conducendæ domui. Adolescens est optimus, biduum modò aut triduum apud vos diversetur. Experiemini non indignum amicitia vestra hospitem; atque abundè gratum. Quid ab eo expectem, ut apud vos meo rogatu faciat, in iis ad sororem literis perscripsi, quas ipse adferet. Ubi venerit, de omnibus, quæ opusculum illud meum spectant, certiores ipsum facies, horulam unam, atque alteram lucraberis; quoniam ipse ad me perscribet, illa quæ tibi alioqui perscribenda fortè essent.

Cantabrigiam intra festum Nativitatis Christi, ac præsens hoc tempus bis excurri. Quumque post extremum reditum, deprehendissem, incrementum quotidie rumores, multosque qui avidè societati inhiabant, malis eam artibus petere. Reverendissimum quoque Archiepiscopum, multum laborasse, ut inhiberet dño tria mandata Regia, quæ obtendebantur ab iis, qui Aulicorum quorundam favore, tale quid à Rege obtinuerant, dum impudenter satis affirmabant vacare jam locum. Quum denique instaret Præfectus Collegii totius societatis nomine, ut societatem resignarem, & liberam iis electionem relinquerem, priusquam indignus aliquis obtruderetur: geminas Præfecti super ea re literas habeo; nolui Collegio injurius esse, diutius tergiversando; sed ex consilio Reverendi Episcopi Herefordiensis, Magistri Hall, qui tum temporis hic Londinii erat, ante dies decem, quàm literas tuas acceperam, Collegio jus feci subrogandi

quem vellent: in locum filii tui. Grate id acceptum. Nescio quid nunc moliantur. Neque mea porro interest. Multa tamen sunt, de quibus, filius longè aliter apud te, quàm hic rem se habere deprehendo. Longum esset singula perscribere. Georgius Stearne, cui librorum curam reliquerat, negat se ita subito negotium hoc de libris conficere posse, quoniam plures libros, aliqui quibus pecunias debebat, utendos sumpserant, nescio, an in pignus: Et eorum aliqui Cantabrigiæ nunc non sunt; expectandum itaque aiebat, usque dum reversi essent. Spondet Præfectus Collegii operam suam; & in meis ad ipsum literis postulavi, ut me absente mitteret eos ad Jonam Peysterum, qui eos recepit ad vos transmissurum. Ex dividendis ejus receperam, cum ultimo Cantabrigiæ essem 35 libras, 18 s. 6 d. quam totam summam, gnaris, Præfecto, ac sociis expendi in eos, qui certam pecuniæ sibi debitæ rationem reddere poterant, aut ostensa manu filii, qua se iis obstrinxerat, aut testibus fide dignis adhibitis. Si unquam revertatur filius, videbit quid sit actum, neque improbare poterit. Præfectus, ac reliqui socii, authores erant, atque ipse etiam eò inclinabam; nequam in Academia finistri rumoris occasionem, cuiquam præberem. Non sufficit tamen hæc summa. Circa festum Michaelis, Cantabrigiam iterum excurrendum mihi erit, ut porro quinque, aut sex libras recipiam, quæ porro dividendis acceperunt. Præsentiam meam requirunt, quia annumerari pecunia ista non potest, nisi in libro, qui acta Collegii continet, propria manu pecuniam à me receptam esse subsignem. Accessione ista ad dividendas facta, spero fore ut bonum nomen, existimeretur filius tuus. Non intermittam, quin videas, si libet, Præfecti, ac societatis testimonium, hæc sic gesta. Utcumque mihi sic prospiciam, ut filio tuo, faxit modò Deus, ut reducem videre liceat, in omnibus possim satisfacere. Vale, & me amare perge.

Londini in ædibus
Arundellianis, anno
1635. 22. Maii sty-
lo vetere.

Tuus omni officio,

F F F. Junius.

Excidit de utensilibus, quod primo adventu Cantabrigiam deprehendi, omnia jam à matre Prudentiæ, in domum suam translata; fortè nè debitores in ea involarent, ut commodissime interpreter: non

non putavi inquirendum, quoniam significaveras, voluisse filium, ut auferret quidquid ei in suppellectile placeret, libris ac picturâ exceptis: quin etiam libri periclitabantur; nisi persolutum ex dividendis fuisset eis qui litem ei intentaverant, ut jam olim ad te perscripsi, quibus cum persolutum esset, quod debebatur, etiam aliis qui modestius egerant, & minus importuni fuerant, quod justum erat videbatur tribuendum.

CCXX.

Illustrissimis Ordinibus, &c.

Domini mei Clementissimi,

STatum rerum mearum illustrissimæ vestræ Dominationi per supplicem hunc libellum declaro. Is autem ita se habet. Cum Grajugena Dei gratia, sanctissimæ memoriæ Cyrilli Patriarchæ Constantinopolitani, prius fuisset domesticus, atque Capellanus, ante ejus obitum ab ipso commendatus, in Angliam veni, studendi gratia, ubi benignè, & humaniter acceptus, sex annos integros mansi, progressibus in Theologia, & Latina Lingua satis magnis factis. Verùm adhuc desiderio studendi veni Leidam, ubi jam annum & dimidium mansi: expertus sum ibi, benevolentiam, & benignitatem eruditissimorum virorum, certè secundum Evangelium Christi, Christianissimorum: quorum beneficiis, & munificentia libros orthodoxos, ad propagandam in patria mea Religionem, & Evangelium Christi mihi comparavi. Verùm jam tempus instat, ad Ecclesiam Constantinopolitanam redire, cujus membrum sum, & libros istos mecum habeo, satis oneris, & ponderis. Pro quorum portoriis, & navigiis, magni sumptus mihi faciendi sunt, qui vires meas excedunt, quandoquidem, & iter satis longum est: ideoque sciens vestram pietatem, liberalitatem, & clementiam, ad vestras Excellentias, cum hoc libello supplex accedo, ut vestram liberalitatem, conferre dignemini, quemadmodum & Illust. & Piet. Ordinis fecere, ut in gratiarum actione, quam hic agere debeo, similitérque vestram benignitatem annumerem: ejusdem enim Pietatis & Religionis estis. Ad me verò quod attinet, hic & in patria mea, non immemor eto, vestrorum beneficiorum, & prædicator prom-

ptissimus, ut Deum optimum oro, ut vobis omnibus semper benedicat, & omnem abundantiam concedat, ut & hic honorem, & laudes, piis hominibus debitis consequamini, & in futurum cœlestem gloriam; quod faxit Deus optimus maximus suâ gratiâ & misericordiâ.

† Is est Nath. Nathanael † Conopius. Conopius Cre-
tensis, qui Batavis pollicitus erat se Calvinī Institutionem in Græcū sermonem versurum, idque in gentis suæ usum.

CCXXI.

EQuidem scribendi ad te nullam occasionem omitto, Vir clarissime, neque cello etiam molestus esse. Nam quantumvis sponte tua te facturum quidvis credam, quia tamen mora meo desiderio nimis longa est, nequeo non per amicos ad te iter capientes, etiam currentem ultro porro impellere. Quæso, itaque fac quod facis, lentulósque illos excita; siquidem pro uno duos, ut intelligo, nunc posthac sim habiturus. Utinam nunc tandem incipiant; & duobus, quod promittis, prælis opus cœptum urgeant. Nisi faciant; & cunctari etiam diutius velint, libros decem Historiæ Danicæ, quibus tracto eos Reges, qui familiam Oldenburgicam præcessere, hic seorsim dare cogar. Scripsi nuper per Soranum quendam civem; quæso, ut per hunc respondeas, atque certum de negotio toto facias. Qui has meas ad te affert, est egregiâ tum virtute, tum doctrina, Fredericus Andreæ, antea, ut puto, notus, cum adesset Rosacrantzio: nunc illustris Dominus Cancellarius Regius suo filio Ephorum dedit; cui rogare, ut benè, quantum possis, facias, est id hominis illam tuam maximam humanitatem ignorantis. Sophompanzas Grotii, est excellens plane opus: tui verò de Grammaticâ Arte libri cæteris in eo genere longè præstant: nec invenio, quod cum illis jure comparare queam. Ex Præfatione Grotii, uno & altero loco, video te de Poeticâ edidisse. Quod cum necdum ad me miseris, amicitia nostræ jure, & fiducia, abs te peto. In opere meo de Creta, lib. III. cap. V. post verba Dionis, libro XLV. quæ sunt de Libertate, ab Antonio restituta, *imperare decrevimus*, adde. Et apud ipsum Ciceronem, Philipp. II. *At quam cæca avaritia est? nuper fixa tabula est, quæ civitates locupletis-*

simæ Cretensium vectigalibus liberantur: statuiturque, ne, post Marcum Brutum Proconsulem, sit Creta provincia. Tu mentis es compos? tu non constringendus? An Caesaris decreto Creta post M. Bruti decretum potuit liberari, cum Creta nihil ad Brutum, vivo Caesare, pertineret? Iterum, lib. IV. cap. XII ubi de Mefomede ago, post, Musæus Poeta agnoscitur: adde, Vide quæ de eo Suidas in Mesomede: & Julius Capitolinus, in Antonino Pio. Illud porro, si licebit, cupiam ex te intelligere, ecquid operis istius dedicatio Noomfio nostro grata fuerit. Mone candidè, mutaturum, si displiceat. In hoc defino, tæque uxorem liberòsque plurimum salvere jubeo: quod & mea, ac mei faciunt.

*Sora ad diem,
XXIII. Junii,
cIo Io c XXXV.*

Tuus antiquo affectu,

Johannes Meursius.

CCXXII.

Clarissimo Viro D. Gerhardo Joanni Vossio, Eloquentiæ Professori dignissimo.

NON tam gratus est ros cœlestis hortulo meo, atque mihi sunt literæ tuæ, vir excellentissime, amice summe, quas ex longo intervallo, abs te cupidissime accepi; plenas doctrinæ, & bonæ mentis, in qua radiat pietas, & candor. Neque ego, neque Collegæ mei redhostimentum norunt, beneficentiæ tuæ exercitæ in eos quos commendavimus. Utinam tandem aliquando, inveniamus, aut saltem illi, qui jam se vobis totos debent, Heilerfigius, & Gronovius noster, juvenes ambo bonæ spei. Vidimus hisce diebus, commentarios tuos de re Grammatica editos, opus rarum & immensi laboris dignum quod in cedro scribatur; & ex Cabeliavio viro elegantis ingenii, accepimus, nunc quoque sub prælo esse Lexicon Etymologicum, quod jam tempore Synodi Dordrechtanæ meditabaris: cui operi ex animo favemus, idque nimio opere expetimus. Martinus noster, & *mauriceus*, Lexicon suum ante obitum, nonnihil emendavit, & auxit, in spem editionis secundæ. Filii ipsius superstites, plurima te salute impertiunt, & pro amicitia, quam pater defunctus tecum coluit, consilium abs te petunt. Nollent enim sibi laborem patris perire, inter tineas, & blattas; siquidem cum Typogra-

pho, honestis & æquis conditionibus transigi posset. Germania nostra continuis bellis attrita, è proximo nullam spem facit iterandæ editionis, quod Typographi plerique ad incitas redacti, hæredibus Martinii, vix præmium laboris promittunt. Si apud Amstelodamenses Jansonios, aut alios florentiores Typographos, aliquid foret sperabile, tuam cum primis opem, fiducia paternæ amicitiae implorarent. Vide, vir maxime, quam audacter, abutuntur benignitate tua, quod ne mihi vertas vitio, amanter peto. Malui enim in hanc partem peccare, mihiq; notam inurere, quam Orphanistanti viri, qualicumque hoc officio deesse. Edo nunc S. Theologiæ libros quatuor auditoribus meis, ante annos aliquot dictatos, ut deinceps scriptiois tantæ supersedeant, rudes quidem illos, at suavis amicorum, destinatos in usum Tyronum. Profuerunt mihi Theses tuæ Theologicæ, & Historicæ, quas creberrimè laudo, & historia Pelagiana, ad cujus instar vellem omnes partes Theologiæ nostræ, ab ultima antiquitate, ad ætatem nostram, scitè prudenterque repetitas. Quod quidem opus à nemine, quam abs te, vir maxime, rectius elaborari posset. In Academia Julia vivit D. Georgius Calixtus, vir, in parte quidem Lutheranorum; sed pereruditus, æquus, modestus, & candidus, qui edita nuper parte Theologiæ moralis, cum digressionem de arte nova Nihufii, Veronii, aliorumque Pontificiorum, mihi salivam movit, & spem injecit reparandæ doctrinæ, altercationibus ultimi seculi nimis labefactatæ, & implicatæ: si modò plures, cum bono Deo, in hanc rem conspirarent. Evolvit is ferè omnem antiquitatem sacram, adhibito lumine analytico, quò dialecticæ, & sophisticæ disputationes, à necessariis vinculis etiam certis, sapienter disseparantur: quarum confusio luminibus cœlestis veri hætenus obstruxit. Obstant quidem non pauci nycticoraces, qui ferale carmen dicere, bonorumque studia traducere non desinunt: sed & horum crocitantiones Deus facile compescet, & in columbinos gemitus vertet. D. Polyander, & D. Heinsius, Epigrammatis suis opusculum meum condecorarunt. Si ferunt occupationes, ego, quæ non inverecundius forte peto, studium conatumque meum calculo tuo approbari velim. Intra mensem proximum imponam, Deo dante, Colophonem. Quartum Alphabetum jam typis excubitur. Primus liber agit, de naturâ, & constitutione sacre Theologiæ, ubi

ubi de illius principio, scriptura sacra : alter de summo hominis bono, & ultimo fine, alterna beatitudine, ubi definiuntur quædam hypothesès, de animæ immortalitate, de statu illius separata, de resurrectione carnis, de fine mundi, deque ultimo judicio. Tertius de subiecto nempe homine, quatenus civis Dei, capax illius regni, & æternæ salutis; ubi de illius ortu, & statibus, adeoque de Deo, de creatione, de hominis lapsu. Quartus de principiis æternæ salutis, nempe gratia paternæ miserationis, fraternæ redemptionis, & supernæ, sanctæque vocationis; deque mediis quibus æterna salus obtinetur, externis, Verbo Dei, Sacramentis, Ministerioque sacro: interno, nempe fide ejusdemque consequentibus, unione cum Deo, justificatione, sanctificatione, bonisque operibus, horumque statu, Libertate Christiana, & Exercitio, Christiana Militia, & precatione; cujus fructus, est pax conscientiæ, quæ est vitæ æternæ initium. Hæc est Theologiæ meæ *œnigma*. Si intellexero, piis, & doctis non displicere, quintum & alios edam, quibus describo sacra Theologiæ partem propriam, quæ continet officia Christiana, tum hieratica, tum politica, tum scholastica, tum denique oconomica. Vides quam familiariter tecum agam, amicorum oculissimè, & pro candore tuo facilè agnoscis. Abrumpo, & hemiolium responsum expecto. Bene vale, Vir doctissime, & salve, cum charitatibus tuis à me meisque æternum.

Dat. Bremæ, æ
re nobis usitā-
te clō Id c xxxv.
Præd. Cal. Julias.

Qui virtutes, doctrinam,

& in Remp. Literariam.

Merita tua æstimat,

Teque colit,

Ludovicus Crocius.

D. Bergius, & D. Willius, plurima te salute vicissim impertiunt, atque diu bene agere, & gaudere jubent, viri tui juxta mecum amantissimi.

CCXXIII.

Quas à te postremas accepi IV. Id. Oâ. datas, redditæ sunt illæ mihi circa medium Novembris; nec multis interjectis diebus 50 libras quantum tibi ad id tem-

poris debebatur, Peystero tuo *ἀντίμισθον* numeravi, & cum pecunia responsum ad tuas, ut memini, satis amplum dedi. Quare ut pristina non regeram, scito me haud multo post, communicatis ipsi quas in eum finem scripseras ad me literis, de Horto controverso cum B. nostro egisse, idque quo candidius secum agi intelligeret, privatim primò; quod valde ipsi gratum fuit. Non enim quantum video, publicæ fide Collegii, five quorumcunque cognitioni causam suam libenter commissurus est, unde & bonitati ejus quantum confidat, potes conjicere. Nisi fallor, unicum hoc illi refugium superest, ut literis suis ad te five querulis five blandis (*Τῶν δὲ σεβῆς ταῦτα προσηκόντων*, vel inter primos *ἐυχαίται ἔδ*) aliquid à te eliciet, quod vel ad obtendendum consensum tuum, vel ad amolendam ulteriorem rei disquisitionem faciat. Tui erit judicii quid responsum sis. Sed cave ne quid ad te detrimenti rediturum inde putes, si in proposito persistiteris. Serio enim id à me cavebitur, & ut res nunc sunt, ne minima quidem metuendi causa. Nam ad Præbendarias tuas rationes quod attinet, cum binæ tibi conditiones initio propositæ fuerint, quarum alteram ea conditione amplexus es, ut alterius, si quando ita malles, jus tibi servares integrum; si (quod ego suadere aliquando memini) optionis hujus pro re nata arbitrium, aliqua voluntatis tuæ significatione per literas mihi promississes; valde fallor, aut & novæ conditionis non poenitendos fructus hoc anno, me Thesaurario, percepisses, & ad primam redire (quandocunque velles) liberum tibi fuisset. Quod eò à me dicitur, non ut te consilii tui poeniteat, sed quo magis intelligas non admodum tibi cujusquam gratia opus esse, ut in his securus remanere possis, quas nunc obtines. Atque hæc quidem hætenus. Mitto ad te bina exemplaria non ineleganter (ut sunt hic nostri Bibliopæga plerique hujus artificii valde imperiti) compacta Libri hîc nuper editi. Est autem Marci Aurelii Antonini, Rom. illius Imperatoris nunquam satis laudati, *De Vitâ suâ* (ut vulgo vocant) in Linguam Anglicam versio. Dubito an liber sit tibi unquam visus: non enim opinor alioquin inter Historicos tuos Græcos penitus omisisses. Quanquam revera inter illos, nisi per publicum errorem, nullus illi locus. Est enim liber non historicus, sed philosophicus purus putus, & planè divinus: neque de Vitâ suâ, verus illi titulus, sed *τῶν εἰς ἐαυτὸν*, quod longè aliud est, &

ex intima Philosophia Platonica exponendum, ut paucis in notis ad librum iudicatum est. Mihi bina exemplaria, ut si tibi videretur, alterum ad virum amplissimum & doctissimum D. Boswellum, Regium apud vos Oratorem, five tuo five meo nomine curares. Sane hic tanto studio excepta est hæc versio, ut quamvis adhuc musteus propè sit liber, & à prælo calens, jam tamen de secunda editione cogitare incipiant. Et si tu Anglicam non intelligas, non dubitavi tamen aliquem tibi istic amicum vel Anglum vel qui Anglicæ Linguae non sit imperitus, cui novus liber munus sit futurus non ingratum. Vale, & ocyus (ut Hortense negotium à me expeditiùs curetur) rescribere meum esto.

Lond. v. Idus Jan.

Tuus,

M. Casaubonus.

CCXXIV.

Clarissimo Viro, Gerardo Joanni Vossio,
Petrus Cunæus S. D.

Vir Clarissime,

ANte paucos dies, cum me D. Barlaeus, cognatus meus, invitasset, constitueram ad vos excurrere, ac tibi gratias coram agere, pro libris tuis de arte Grammatica, quos ex munere tuo accepi: cæterum mox casus aliquis inopinatus me hic detinuit, fecitque, ut per literas, præstare cogar hoc quidquid est officii. Utique si, quisquis grate munus accepit, jam gratiam retulit, exiguum est, quod aut ego debeam tibi amplius, aut tu à me desideres. Etenim nihil quidquam mihi, à multo jam tempore, accidit jucundius. Sed quia longè satius est, re, quam verbis, aut sola mente rependere officia, angit cruciatque me, inertiae meae conscientia, quod in publicos usus nihil evulgem; neque sit unde par pari dare hostimentum tibi queam. Ego dum opus illud hic illic inspicio, plurima reperio, quæ majoris operæ, curæque sublimioris sint, quam promittit Titulus. Quod autem Aristarchum, noluisse te inscribere ais, in eo *epistolæ* tuam agnosco. Certe primum librum sine intermissione perlegi, cum summa admiratione, & percurrere evolamque sæpius. Adeo ubique ingens ubertas, lectissimarum observationum, & reconditæ cujusdam doctrinæ illic est. Ex

cæteris quos ordine perlegere nondum potui, illud tamen summatim didici, haud satis me latine scire, multaque esse, quæ male dudum percepi. Quæsi in his sollicitè, an aliquid de recto usu particulæ, *citra*, traditum extaret, sed non inveni. Pertinet autem ea investigatio, ad Jurisconsultorum controversiam, quæ oritur ex verbis Diocletiani, & Maximiani in *L. Transigere* 18. Codic. de transactionibus. Quippe Cujacius lib. 6. observat. cap. 11. & lib. 19. cap. 39. Item Goveanus lib. 1. Variarum Lectionum, cap. 30. atque alii plures, statuunt voce ea, exceptionem significari, ut de nullis criminibus publicis, quæ sanguinis pœnam non ingerunt, transigere liceat, præterquam de falsi crimine. Brissotius autem lib. 3. de verborum significat. in voce *citra*, & in lib. singulari, ad *L. Jul. de Adulter.* & Ravardus lib. 4. Var. Lect. cap. 6. Omnino negant Idoneos Scriptores Latinos, ea voce sic usos unquam fuisse, idque passim ex legibus etiam nostris, atque ex aliis constitutionibus ipsius Diocletiani, & Maximiani, quæ sunt in eodem codice, ostendunt. Quare vocem eam pro *sine* accipiunt, ut ex ipsa illa lege nemo de criminibus, quæ sanguinis pœna carent, transigere possit, quin ex transactione illa, in crimen falsi incidat, planè & sine falsi crimine transigi de his nequeat. Disceptatio hæc omnis ex usu ejus vocis pendet. Et certè, nisi ex norma latini sermonis vox *citra*, exceptionem, quandoque denotet, & pro, *præterquam*, accipi possit, falsa est Cujacii & Goveani opinio. Nam exemplum quod ex *L. unica*. Cap. de re uxor. Act. §. *accedit*. 13. circa finem adfertur, non multum ad rem facit, cum is locus extet in novissimis constitutionibus Justiniani, qui ex seculi vitio, sæpè loquitur barbarè, nec illam secutus est latinæ linguæ puritatem, quæ superfecit adhuc Diocletiani, & Maximiani tempore. Si propediem ad vos venero, cupio ex te intelligere, quid sentias, Vir clarissime, quem Latinitatis habeo Authorem optimum certissimumque. Vale, & uxorem tuam, liberosque saluta.

Lugd. Bat. vi.
Julii. 1635.

CCXXV.

CCXXV.

Clarissimo, Ornatissimoque Viro, D. Magistro Gerardo Vossio Historia Professori celeberrimo, S. P.

Reverende D. Professor Vossi,

Reverfus domum, obrutus sum Ecclesiasticis ac Scholasticis negotiis; me absente, pestis hic cœpit grassari, visitandi fuerunt ægri, legata Ecclesiæ accipienda, Apochæ scribendæ, & alia quæ res tempusque exigunt. Unus Discipulorum meorum peste correptus. Est is filii nostri Balivii Wassenhovii, qui filiam ante octiduum sepelivit, & tres jam habet cum morte luctantes. Deus illius misereatur, ac felicem largiatur catastrophem. Excusabis ergo silentium tenax, non pertinax. Mitto filio tuo Johanni, Merulæ Ennium, pro Colutho Aldino, quem exspecto cum responso ipsius, an velit me mihi servare Macrobi-um, cujus loco, (si velit) remittam ipsi, utramque partem Homeri. Si remiserit codicem Egmondanum, & Worperum, MS. remittam Euripidem, cum Authoribus Historiæ Augustæ, quos duos solos habeo; nam Coluthum remitto. Scripsi Guilielmo Blawio, ut præmia Scholastica mittat, nam unum destinatum filio Balivii ægro, qui expetit ante mortem, si possit videre, fortè impressio illa aliquid boni causaretur. Roga itaque filium, ut Blawium urgeat, ut ad me libros mittat. Causam habes. Hagæ Comitum emi duobus Imperialibus, Historiam Herreræ Occidentalis Indiæ, à D. Barleæo versam, roga an non sit nimium. Mittat mihi filius tuus Coluthum meum, cum Papiæ, ac Maio, ac rescribat, an Macrobius mihi pro Homero velit relinquere, sin minus, cum reliquis ad septa redibit. Heri quod nunc occurrit in Servio legi, *septa non septa*, esse scribendum, quod à sæpe adverbio derivetur. Ego ex te scire velim, rectène, an malè. Deus mihi testis, quam avidè desiderem legere censuram tuorum veterum Grammaticorum, hanc solum mihi fac gratiam, ut mihi significes, quo pretio Blawius tibi vendat; sic possem ad te pecuniam, pro compacto exemplari mittere, & tu pro me, quasi pro te emere, hæc pia, & mihi utilis futura esset fraus. Pro Corollario addo, me inter libros meos invenisse Q. Marium Cotradum de Lingua Latina lib. 12. Venetiis excusum, apud Andream Valvassorem 1569. Is an unquam

tibi visus sit nescio; videtur mihi plus quam vulgo sapere; si eum expetas, pro filii Macrobio, aut Euripide, fac me certiore. Hæc furtim inter scholæ murmura scripsi. Vale, & ut soles, nos ama.

*Raptim 2 Kal.
Nov. an. 1635.
Veteraquin.*

Tui observantissimus,

Johannes Lydius.

Copias Epistolarum D. Fr. Junii, prima vice mittam, defuit describendi tempus.

CCXXVI.

Doctrina & pietate eximio Viro, D. Gerardo Vossio, Professori dignissimo.

Vir Doctissime, & amande Dom. Vossi,

Nuntium immaturæ dissolutionis Dionysii tui antea intellectum, proximè D. Franciscus mihi ex ordine tristi retulit tristissimus. Non enim sine præcipua animi ægritudine, casus ejusmodi recenseri, vel audiri potuit. Equidem ea obstrictum necessitudine, & iis meritis obligatum me tenes, ut non propriis familiæ miseriis differar magis, quam tuarum sensu conturber. Luctum ergo mihi hoc renovavit, Leonardus ante biennium amissi, & tuæ causa tristitiæ quam addidit plurimum propter filium omnibus affatim cumulatam dotibus. Arduum & rarum est, ætatem doctrina antevenire, rariùs fama, & scriptis illam celebrare. In illo utrumque sic eminebat, ut vix pater tanto filio dignissimus alterutrum quoque exoptatus videre potuisset. Sed fuerit hoc divinum, benigni erga te animi testimonium. Brevem tamen locupletis possessionis usuram gratè potius recordare, quam te ejus avulsione impatienter lacerari. Nec primum, nec unicum, nec gravissimum tibi hoc soli contigit. Deus revocavit donationem suam, tum cum modo, & ratione mœrorem experiri vult. Etsi itaque res coacta, ingentem videatur molestiam aspergere, & humanitùs alteri, in alterum sæpè criminationis immodestiam extundere soleat. Prudens nihilominus, semper refugit ab omni specie impatientiæ; quanto magis Christiana mens fortiter illa tolerat, quæ Deus extra propositum nostrum immitit, pro plenissimo Domini jure, quod in homines habet. Hæc ego non scribo, amice intime, tanquam si dubitem, te corculi eruditæ familiæ tuæ extinctionem, non moderatè ferre,

re, atque indignando potius exagitare: sed quasi in summo sensu mœstitiæ, luctus & squaloris tui, non aliud inveniam remedium, quàm quod in cœlesti consolatione, & profundissima æternæ providentiæ meditatione, conquiescat. Abiit tuus Dionysius, & vitam innocentem felici exitu, in Christo servatore nostro clausit, memoriam nominis suavem cognatis relinquens, & Rheidani annales Latine legentibus, admirationem purissimæ dictionis, expromptique iudicii afficiens. Donum istud ultimum retinebo semper, ac æstimabo plurimum animo meo, quem conjunctionis nostræ antiquitas, & literaria tua munificentia totum occupat, fortunâ cupiditati meæ resistente ad remunerandum. Vale præstantissime amicorum, & gratuitam affectionem amoris erga me tui, fidenter conserva. Tuam conjugem, mea peramanter salutat, atque hanc calamitatem, communibus exemplis, præterire jubet. Tandiu enim variis mileriis in hac vita affligemur, quamdiu volet is, qui nisi hæc pati nos vellet, fieri non permetteret. Illius clementiæ vias nostras commendo, & vos iterum, atque iterum, cum tota domo salvere jubeo.

Hagæ Comitum
16 Nov. 1635.

Tuus, ut diu nosti,

L. Casembroot.

CCXXVII.

Salutem in Christo.

STrena sint Literæ hæc (Vir clarissime) quam Calendis hisce Januariis mitto more & fide antiquis. Tres ni fallor apud me sunt Literæ tuæ & omnes gratissimæ, pro tribus unam reddat vel ipsa inurbanitas. Nec tamen inurbanitas adeo me gravat quàm negotium; nec tam illam affecto quàm hoc premor. Veniam dabit scio humanitas tua singularis, amico nimium extra se viventi.

Ad Literas tuas quod attinet, lego in secundis tibi à Dello significatum (jussi enim ut scriberet ipse tum occupator) opus vestrum Grammaticum egregium quidem & quod supra vulgaria sapit, de manu meâ in optimæ spei Principis transisse. Quod tibi gratum fore spondere mihi ausus sum, etiamsi literis supervenientibus de ea re siluisses. Sed quid princeps? Illud enim putato adhuc audivisti. Quum post mensem

mentio Archiepiscopi coram ipso facta est, novi, inquit tenerulus, sed quando mihi alium allaturus est librum? Spero futurum ut tam libri sit tenax, quàm afferentis memor.

In his etiam lego me unam Epistolam tuam non legisse, imo ne vidisse quidem. Intercidit enim, sic scribis, incuriâ eorum quibus dederas, fortè præmissa est in Sueciam quo non sum secuturus. Huic ut respondeam non expectas.

Si Sternius meus, sic enim est, rationem tibi reddidit gratam rerum Cantabrigienarium, fecit quod se decuit & mihi pergratum fuit. Nolui enim tibi deesse, quia sibi defuit filius tuus. Spero nunc meliora, referet ab Indiis quò advocati ficalis dignitate ornatus abiit. Det Deus ut se te dignum gerat.

Quod de Scipionis Gentilis filio, nepote Alberici scribis, mihi grata sunt omnia. Commendatus etiam venit à doctissimo amico meo Joan. Seldeno. Et valuissent apud me facile nota vestra & Seldeni, quin & vel nomen Alberici mihi virtutibus suis abundè noti, si quidquam in ea re potuissent. Sed aditus qui olim patuit nostris, jam in rem suam & literariam attentionibus multo obstructior est. Nec possum ea præstare, quæ facultas si daretur mihi in summis notis semper fuere: Erigere scilicet afflictos & bene merentium, inter quos Albericus non infimus fuit, etiam seros nepotes fovere.

Auctum dignitate Legati Suecici Hugonem nostrum Grotium jam antea audiui & simul gavisus sum, non ita quando revocatum apud nos sparsum fuit. Sed invidiæ tuba cecinit illud, & quamprimum audiui famam mentitam lætitiâ auctior rediit. Literis etiam suis è Gallia me decoravit, sic enim de doctissimo illo viro sentio cui opto summa. Tragedias & Poemata alia quæ ille dicaverit tibi, tu mihi dedisti, optatissime ad manus meas pervenerunt. Pauca legi, utinam otium daretur ut reliqua possim.

De expeditione vestra una cum Gallo prima ætate suscepta vere scribis & graviter. Nolo ea de re quidquam adjicere præter hoc unum superasse vos (Gallos dicam an Belgas nescio) in urbe Tirlinensium direpta irruptionem illam plus quàm barbaram Gothorum & Vandalorum, de qua & everfis omnibus sacris tories & tam funestè conquestus est suo tempore S. Augustinus.

Restant Literæ tuæ tertiæ. Nec illæ sine dono me petunt. Cum illis enim moram ingratam nectentibus Typographis circa Dionysiana vestra & tua alterius filii tui

Mat.

Matthæi nempe foetum suscepi. Et certe multum me afficit videre Patrem in filio, Gerardum in Matthæo. Ita iudicium & dictio nec de fide dubito seniore in juniore adornarunt. Quæ interspersæ sunt parum cum Regum Imperio convenientia Apologiam una secum ferunt. Scripta ea esse in & sub Regimine alio, ubi populus ut alios mores, ita & alias leges postulat. Nec Proceres vestri satis honori suo consulunt, si non juvenem de illis tam egregie meritum, ut Stipendio, ita & Titulo ornent. Crescat hic in solamen tibi, & uberrime in sinum tuum refundat spes in Dionysio amissas. Et quotquot alia tibi cordi sunt, cum anno foeliciter currente & revertente, omnia tibi vovet

*Dat. ex Aedibus
nostris Lambeth.
Kal. Jan. 1636.*

Amicus tuus studiosiss.

W. Cant.

CCXXVIII.

ET si semel iterumque, ad te scripsi, Vir clarissime, tamen hanc occasionem negligendam non putavi. Primis Literis commisi quæ in Cretâ suis locis inferenda cupiebam; tum & alia scribebam, quæ ad operum meorum editionem pertinebant: quam ut porro urgere velis, etiam nunc in majorem modum rogo; ac confido, semel tandem, post promissa multiplicia eam inchoatam esse. Si id fieri commode queat, Tomo historico primum locum dari velim: quem transmittam, volente Deo, primo vere; simul aliquem certum hominem, cui committere tuto possim, nactus fuero. Qui has adfert est Jonsonii minister; & se rediturum dicit circa proximum Paschatis festum; itaq; & huic trades si curatum quicquam voles. Quæso autem, uti scribas mihi quidvis quod putabis scitu non ingratum fore de Leidenfis Academiæ ac Gymnasii vestri statu. Audio Salmasium in Galliam se recepisse, forte nunquam rediturum. Ego quidem sic existimo: siquidem familiam & suppellectilem universum secum adduxit:

Hoc Ithacus velit, & magno mercentur Atreidæ.

Ote, meque, ter felices, quorum animos transversos non ambitio ulla capit aut invidia. Tu quid novi jam moliris? Nam non cessas, satis scio. Ubi libri de Poetica, ubi filii tui Cæsar, & quæ alia expectamus. Hodie natalem celebro septimum &

quingagesimum per benigni Dei gratiam; utinam ut præsentem te adesse opto, ita votum tu repræsentare posses: magnus mihi ad læticiam cumulus accessurus esset: sed quam frustra sunt hæc verba, tam hoc animo meo dolet, quod non liceat te frui. Itaque iterum te rogo in Epistola hoc fine, ne committas, ut hunc ad me redeuntem vacuum abs te dimittas. Vale diu, amicorum præstantissime, cum uxore liberisque. Ego, mea ac mei annum hunc felicem vobis apprecamur.

*Scribebam raptim
Soræ a. d. vi. Jan.
cl. l. c. xxxvi.*

Tuus antiquâ fide,

Joannes Meursius.

Illud quoque monitum velim, ut effigies in conveniente loco Tomi primi colloceatur. Iterum vale.

CCXXIX.

*Viro incomparabili Gerhardo Johanni
Vossio, S. D. Vincentius Fabricius.*

Jacobus Pauli, venustate morum, rareque eruditione insignis, dum ad vos proficiscitur, pariter ad amicitiam tuam, Vir maxime, viam adflectat. Quæ si ipsi contingere potest, quod spero, non id tam mea commendatione fieri arbitror, quam quod ipse eximiis, animi, ac morum ornamentis instructus, favorem summorum hominum meretur. Si tamen ipsi precibus meis inductus, aliquid peculiaris amicitiae tribueris, facies pro solita indulgentia tua, tot beneficiis mihi nota. Cæterum ipse hoc quasi benevolentiae pignore accepto, omnia luculentiora coram, prope diem cum bono Deo expectabo. Imprimis velim, si qua in re possis, eas quas agit amicus noster, consiliorum rationes à te adjuvari. Cum enim civilis juris cognitionem accuratam habeat, eam aliis cum aliquo subsidio sumptuum ac emolumento impartiri cupit. De cætero is est, qui plura eruditionis documenta, coram daturus sit, quam à me, in Epistola poni possunt. Te domumque tuam, inter illas ut audio, civitatum vestrarum strages, omnia salva esse spero. Deumque precor, ut à tam insigni capite, totque beneficiis mihi nota familia, omnem procul luem, ac calamitatem, abesse jubeat. Quam universam plurimum salvere jubeo; imprimis Matthæum nostrum, cujus Annales jam arbitror

tror prodiisse, & vos omnes, opto esse incolumes, donec coram, illam amicitia vestrae dulcedinem, tantoperè dilatatam, resumere liceat.

Hamburgi pridie Kal.
April. cl. loc xxxvi.

CCXXX.

ANte triduum ad te scripsi, Vir clarissime, per Petrum Vilhadum juvenem doctum & modestum: nunc nec hanc occasionem negligendam existimavi. Ac Vilhadum sat acceptum tibi fore nullus dubito. De rebus meis iterum urgeo. Ægre fero spei meæ, quasi illudi. Jam triennium suspensor, & de die in diem differor. Ipse filius Literis superiore anno datis, ad diem xvii. Julii statim se editionem incepturum promittebat; & hac hyeme eousque perducturum, uti causæ nihil foret, cur Typographo Hafnienfi Danicam historiam darem; sed admoneor ab amico, Literis ad me ante duos menses scriptis Amstelodamo, necdum adnotam manum esse. Et profecto facit res hæc, ut ulterioris moræ impatiens fiam: itaque semel tandem dicat, quidnam facere constituerit, ut consilium ipse quoque aliud capiam. Si excidere opera mea detrectabit, ob impensam, per me licet, non magnopere laboro. Quanquam enim volupe videre foret, opera mea junctim edita, non invitum curam hanc deponam tamen, & posteritati tradam; semel ea evulgata, satis habens. In hoc casu cupiam remitti mihi per hunc nostrum Mercatorem, quæ non edita pridem mihi, nisi forte hæc seorsim ob minorem illic sumptum sit libentius excusurus; quod ut uno fieri volumine possit commodissime, & in formâ (ut loquuntur vulgo) folii; ita non ingratum erit. Quod si neque istud volent, obsecro, quod dixi facito, & remitte per hunc nostrum: etiam ex ære laminam, in quâ sculptâ effigies. Nunc est commoda occasio atque certa, quam te rogo ne prætermittendam putes, negligasve. De Creta mea illud quoque abs te peto, ut significes an ostenderis eam Noomsio; & inscriptio an placuerit. Erit mihi intellectu istud gratum, ut propositum dedicandi vel retineam vel mutem. De Rep. si quid habes, fac me item certior. Vale & salve à me, mea atque meis, cum tua & tuis diutissime.

Sora ad diem
xxii. Aprilis
cl. loc xxxvi.

Tuis antiquæ fide,

Joannes Meursius.

CCXXXI.

Clarissimo Viro D. Gerardo Joanni Vossio, Affini conjunctissimo.

Conjunctissime Affinis,

Mercator ille Gemmarius, cui tuas ad me literas commiseras, seriùs eas ad me detulit; eo quod metu contagionis, vestrate naves, hic aliquamdiu portum ingredi vetabantur; neque eas exonerare licebat, nisi post certum aliquod præstituti temporis spatium. Utcumque tamen gratulor mihi, quod tandem aliquando, expectatas diu schedas videre contigerit; quamquam doleam, quod ob hæc nugas, tuis quæ imprimenda erant scriptis, mora aliqua sit injecta. Nolim factum. Dum cursim lustrò, in unum atq; alterum tantum incidi errorem Typographicum. Pag. 44. in verbis Statii leg. *Myroni*. Pag. 101. in verbis Plinii, leg. *Harpocratem*. Quamvis metuo, ne meus magis hic error, quam Typographi fuerit; fieri enim potest, ut Harpocratonis nomen, cujus Lexicon in hoc ipso cap. toties citatur, pro Harpocrate exciderit. Gaudeo alioqui, tam diligentibus Typothesis rem commissam. Videris urgere Epistolam dedicatorem, quam nunc præcipiti festinatione, qualitercumque elaboratam, Rever. Episcopo Nordovicensi ostendi, qui lustratis schedis hisce, suadere perstitit, ut Regi nostro Opusculum inscriberem; probavi, rogavi, ut Archiepiscopum Cantuariensem, super ea re consulere; etiam hac in parte, desiderio meo plenissimè satisfecit Vir humanissimus, ac tui amantissimus; retulitque mihi hæc ipsa vespèrâ, Archiepiscopum non modò non improbare consilium, sed favere conatibus hisce meis, paratumque porrò fore, causam meam apud Regem agere. Expertus es quàm prolixè Vir magnus iis soleat indulgere, quibus bene vult. Cæterum de his aliàs uberius: Nunc quod reliquum est persequar. Insolens est hoc mihi scribendi genus: nescio quo ore tale quid aggredi ausus fuerim: adhibe, quæso, judicii tui limam, in iis quæ non satis commodè se videbuntur habere. Ingravescit hic quotidie contagio; quamprimum igitur cras summo mane secedendum nobis est, æstatem hanc in agris, fortè etiam magnam hyemis partem transacturi. Jamdudum scripsi commodissime, ac minori cum periculo, ad me transmitti posse exemplaria, si Abrahamus Van Bartham, fascem libro-

rum commendet, Mercatori Anglo; Rotodami hic agit, M^r. Quarles. Is quoniam Comitibus negotia, in talibus curat, etiam hanc curam, quæ familiam Arundellianam tangit, in se suscipiet. Magnum est quod nunc peto, nulla tamen ratione tibi, tuisque fraudi futurum. Quidquid expenderis lubens refundam, simul ac de sumptuum summâ certior me feceris. Tam aliena est hæc gens ab omni commercio cum iis locis, quæ contagionis suspitione laborant, ut certus sim, me nunquam impetraturum ab ea, in qua vivo familia, ut liceat libros compingendos Londinium mittere; neque auderem Regi, aliisque Proceribus Regni, libros ibi compactos exhibere, si vel minimum ingravescat lues. Apud vos jam deferbuit, spero, malum; & post quaecumque temporis intervallum, tutius putant Britanni nostri, libros alterius cæli, ac soli, tractari posse. Debebitur Regi exemplar melioris notæ; Carolo Principi, Principi Electori, fratrique ejus, Comiti Arundellæ, ac filiis Archiepiscopo Cantuariensi, Episcopo Londinensi, Norwicensi, Lincolnensi, plerisque Proceribus regni, & quibusdam Aulicis. Longum esset enumerare singulos. Facile est conicere quam multorum gratia peregrino homini, aut captanda, aut tuenda sit. Pudet me certè tam importunæ audaciæ, neque ullo jure videor mihi hoc exigere, nisi quod prona benevolentis animi facilitate, quam semper paratissime mihi exhibuisti, in spem adducor: credere adhuc debes, me prima quoque occasione lubenti, ac grato animo refuturum quidquid impenderis. Debebuntur adhuc exemplaria compacta tibi ac tuæ familiæ, Affini Nerano, Avunculo Gomaro, Cl. Grotio, Salmasio, Barlæo, Doubletio, Heemskere qui scripta ad vos detulit, & quibus consultum porro videbitur. Quamquam ego lubens impolitum scriptum, tantorum virorum oculis si fas esset subtraxerim. Quod titulum spectat, omnem rem arbitrii vestri facio: bene factum judicabo, quicquid feceris; cum tibi, ac Typographo talium rerum sit major usus. Titulum quoque dedicationis Epistolæ præmittendum omisi, non quidem consulto, sed quum scriptiorem hanc seriùs inchoatam, in multam notam produxissim, oculis in eam quam jamjam literis hisce involvere parabam dedicationem conjectis, titulum fortè desideravi. Magni Monarchæ tituli non sunt ambigui. Et hærenti per cognatum Franciscum succurret D. Boswelus. Quantum Gerardo, atque Isaaco, pro operâ strenuè

navatâ debeam ipsi propediem, Deo Opt. Max. nobis vitam, atque animum largiente, experientur. Vale, conjunctissime Affinis, ac meis verbis sorori carissimæ, atque omnibus tuis salutem plurimam dicito.

*Raptim in Ædib.
Arundellianis Ann.
1636. 12. Maii.*

Tuus omni officio,

FFF. Junius.

CCXXXII.

Salutem in Christo.

Dignissime Vossii,

Literas accepi tuas. Datæ sunt ad 8. Calend. Junias. Literæ pregnantiores erant. Nam ex illis semel apertis prodire Literæ Calendrinianæ Regium nomen perferentes & petentes manum. Quas priores misit nescio. Has sicut impensius desideratis & ille pro se & tu pro illo in manus Regias dedi.

Rex serenissimus ut vidit quo tendebant Literæ tradidit eas Secretario Domino Joanni Coco, à quo puto responsum potest Calendrinus expectare. Mihi enim nihil dedit Rex, nec ad me pertinet in rebus ad Monilia & Pecunias spectantibus responsa dare. Hoc tamen tibi ausum dicere, nisi admodum falsa mihi memoria nimis labilis suggerat, Calendrinus parum candide se gessit, in negotio de Monilium Jocaliumque Regionum restitutione. Nec hoc mihi tantum visum est, sed & aliis & summis quidem Regni Proceribus. Sed audio nunc fere superatas esse illas difficultates, & si ita res sit gaudeo. Sin aliter, non habeo quo te amplius detineam. Nam quo in loco res Burlamachianæ jam sunt, ego planè nescio. Scio quod scribis Calendrinum in Bataviam profectum ad expediendum Regium negotium. Si ille interim operam det ad impediendum sub nescio quali prætextu (sicut nonnulli apud nos prudentes augurantur) quid est quod ego illi in gratiam præstare possim? Spero meliora de persona & familia, tam bene de te merente. Et si quid possim pro Calendrino, nihil prætermittam, ne occasionem ipsam, semel si constiterit sedulam illum Regio negotio navare operam. Hoc quamprimum volui te scire Literas Calendrinianas in manus Regias pervenisse. Vale.

*Ex Ædibus meis
Lamb. Jun. 9. St.
nostro, 1636.*

Sic jubet tibi amicissimus,

W. Cant.

CCXXXIII.

CCXXXIII.

CUM Soranus iste Civis, Vir & amice praestantissime, ad te iret, sine meis eum Literis dimittendum non putavi. Tuas scriptas iii. Non. Jun. recte accepi: sed non mea, quae omnino expectabam. Quia vero nunc Typographus serio editionem inchoare velle dixit, libet saltem hâc vice etiam fidem ejus, quam jam toties sefellit, experiri. Itaque expecto specimen, quod promisit: &, ut porro sine dolo certa omnia exequatur, valde cupio. Mitto in eundem finem reliqua, ad Cretam quædam, suis locis inferenda, quod ut per amanuensum tuum cures, etiam atque etiam rogo. Filii annales legi; nec mirari satis possum, aut iudicii in ætate juvenili gravitatem, aut styli quoque majestatem, Historiæ parem. Faveo nascenti famæ, quantum quicquam, & applaudo: pergat sic cum bono Deo, magnum aliquando virum Patriæ daturus suæ. Tibi gratulor talem filium, & ut diu conservet summum eum numen velit opto ac voveo. Pestem invalescere doleo, sed incolumem te tuosque servaturum esse Deum confido; utq; faciat ex animo precor; neque ego id duntaxat, verum mea quoque & mei, qui vos omnes ex interiore animo salutamus.

*Reptim Soræ ad
diem xxviii. Jun.
clō lōc xxxvi.*

Tuus antiqua fide,

Joannes Meursius.

De Patriæ rebus fac me quæso certior. Pestis Leidæ denuo grassari dicitur. Arlander-venia Domino, nisi grave est, multam à me salutem; dicito etiam Barlæo nostro, Viro non è multis & amico veteri. Ubi videro Typographum serio manum operum editioni admove, mittam Danicam Historiam. Dum cunctatur Civis noster, commodum se offert nobis Joannes David Zurmerius; itaque utendum ejus opera existimavi, hominis imprimis fidi, & utrique nostrum amici. Iterum salve, atque vale, amicorum optime maxime.

CCXXXIV.

Vir Clarissime,

QUI has adfert est Petrus Wilhadus egregius Javenis virtute & eruditione. Commendatum tibi cupio pro vetere nostra amicitia: paucis tamen, quia mul-

tis non est opus, & seipsum satis tibi commendabit ubi videris, & cognoveris. Vixit aliquot jam annos in Clarissimi Brochmanni, SS. Theologiæ Doctoris & Professoris in Academia Hafniensi, maximi amici mei contubernio, & hoc ipsum magnæ commendationis instar puto. Honestis Parentibus honestè natus & educatus, operam studiis jam navavit prædicandam: porro ea & virtutem ante omnia colere certus. Te observat inter eruditos maximè & amari abs te petit. Quæso facito, ac facturum satis scio, vel virtutis tuæ causâ, & humanitatis etiam, quâ honesta quæque ingenia sponte tua tibi quovis genere officiorum prosequenda arbitraris. Non hic falles expectationem nostram, nec virtutem tuam deseres. Post nonnullam mansionem etiam Lugdunum cogitat: quod si quando est petiturus, Heinio eum, ac Cunæo, & id meis quoque verbis commendato. Mea opera quo sunt loco, & Typographus an inceperit semel tandem fidem datam liberare, ac quousque sit progressus, fac occasione primâ scire possim. Valde velim justo meo desiderio aliquando satisfieri. Vale amicorum princeps, cum uxore liberisque diutissime. Uxor mea te, tuamq; filia filiam plurimum salvere jubent.

*Soræ ad diem
xix. Octobris,
clō lōc xxxv.*

Tuus fide antiqua,

Joannes Meursius.

Has scripseram anno ut vides superiore, sed dilatas propter ingruentem illo tempore Pestilentiam, nunc demum mitto: siquidem qui eas ferret meo hic consilio usus, iter suum ab eandem causam distulit. Iterum rogo, ut me primâ quæque occasione rerum mearum certiore facere velis. Si procrastinare pergit, cogar Danicam Historiam nostro huic Typographo tradere. Quod si animus excudendi post dilationem triennii etiam abierit, redeant ad me quæ antea pridem misi, nisi forte illa excudere sola malit, quod vel sic non improbavero. Si excudere opera nolit, statim effigiem remitte, poterisque commodissime per Jansonium, qui ad famulum curabit Hafniæ res suas agentem. Iterum vale, Vir clarissime, at nos amare constanter perge.

*Soræ ad diem xix.
Apr. clō lōc xxxvi.*

Adjunctas rogo uti statim Leidam cures per nautam deferri.

CCXXXV.

CCXXXV.

*Reverendo, Clarissimo, Doctissimoque Vi-
ro, D. Gerardo Joanni Vossio, Histo-
riarum Professori, S. P.*

Vir Clar. Dom. & amice plur. observande,

DOmum reversus prospero satis, per Dei gratiam, itinere, memoriaque repetens promissum filio Isaaco Hannonis Periplum, nihil prius habui, quam ut, quod receperam me facturum, præstarem; fidemque meam liberarem, necnon literato filii tui desiderio, quadantenus satisfacerem, mittendo exemplar Latinum juxta atque Græcum, illud quidem ex Interpretatione Conradi Gesneri, hoc verò ex Basiliensi quod anno MDXXXIII. prodit, exemplari exscriptum manu, Patris mei *τῆς μακαρίτης*. Notæ ad Varronis Satyras, alia occasione ad vos, si Deus volet, perferentur. Interim gratias, quas possum, habeo maximas pro insigni erga me immerentem, humanitate, ac benevolentia, tot ac tantis beneficiis, jamdudum comprobata, quibus remunerandis etsi me longe imparem sentiam, adeoque ratio accepti, atque expensi hactenus, haudquaquam inter nos conveniat, remunerabo te tamen grato animo. Sanè voluntatem emetiar tibi abundè. Vale, Vir humanissime, cum tota familia, cui, atque imprimis uxori, multam à me salutem, ut dicas oro. Dominus Deus verus ille *Αληθινός*, quam diutissimè vos omnes incolumes conservet, ad Ecclesiæ, Patriæque salutem, atque ornamentum.

Dordraci prop-
rie Kal. Junii,
cl. loc xxxiv.

R. T. observantissimus,

Jacobus Lydius.

CCXXXVI.

*Viro maximo Ger. Jo. Vossio, Johan.
Fredericus Gronovius salutem & ob-
servantiam.*

Sanctius est mihi otium tuum, quam ut tralatitia salutatione id interpellem. Quia tamen aliquid de Salmasio, scribi petieras, quod alios scire nollem, certè solus scire jussus eram, his exaravi. Reverendo D. Riveto, gratissima fuit tua salutatio, atque hanc à me, tibi vicem reddi voluit. Is de Salmasio hæc mihi. Emiffarii Pontificis,

rursum variis ipsum pollicitationibus tentarunt, ut ad mutandam Religionem ipsum adducerent. Sed ille omnibus spretis, paravit ea quæ essent itineri: in quo non leve fuit, quod vix ullis rationibus, uxor expugnari potuit, ut reditum ad has terras pararet. Itaque tandem ipse constituerat, reverti solus, ne quid Domini Curatores, in fide ipsius desiderarent. Sed novum ecce de transverso, quod nos omnes in maximum metum conjecit. Princeps Condæus amplissimam ipsi in Gallia dignitatem, cum lautissimo salario, obtulit hac conditione, si aliam simulare vellet Religionem. Cum ille solita constantia id refuteret, commotior paulo Princeps secessit alio, ac stantem reliquit: mox reversus; sed si Rex id tibi det in Gallia stipendium, quod Lugduni accipis, eademque lege, & libertate, numquid habes rationis Patriæ te negandi? Ille rursum proponere fidem datam, obligatamque apud D. Curatores, quam infirmare nec fas esset, nec se, ut frangat, ulla spe, aut præmio proposito, adductum iri. Iratus plane Princeps, insulatum reliquit, ac postero die, per quemdam ex amicis, ipsi significari fecit, ni ille ultro maneret, atque acciperet conditionem, quam posterius ipsi obtulisset, fore ut Decreto Regis Christianissimi, Gallia egredi prohiberetur. Quæ res vehementem ipsi, omnibusque ejus amicis attulit perturbationem, adeo ut ipse, Pater Catholicus, & uxor, quæ tantopere antea repugnaverant, unum hoc jam optabile habeant, liberum pedem patria efferre, & huc reverti. Hæc ex Epistola ipsius ad Rivetum, quam ipse mihi prælegebat, & Gallicè scriptam interpretabatur. Hujus enim consilium in re crepera expetebat; neque enim dubitabat, si illud Regis edictum conficeretur, res ipsius ad incitas redactum iri, certè *πολλὰ χεῖρον* dicendum esse isti majorum simplicitati, cujus in Regnis non licet dicere nomen, vestri libertatem vocant. Hæc fortè non grata tibi, sed nec mihi ipsi scribenti, opto ut in vino, & aqua scripta sint; ut vovere solent, qui infaustos nuntios habent de amoribus suis, Poetæ. Vidi nuper Cl. Grafwinkeli nostri observata ad Sallustii bellum Catilinarium, affecta ferè, & quantum permittunt alia negotia, quæ nunc ipsi imposita sunt, propediem absolvenda. Quamquam merè politica sint, ipeque abhorreat, à severa Critica; gratum fore tamen sibi testatus est, si velut in Epistolam conjicerem, quæ animadversio- ne digna haberem, quæ ipsius operi adde- retur, ut ne hac in parte id manum esset.

Existimo juvari me posse, scripto codice tuo, quem aliquando offerebas mihi, & peto ut appareat promissum, occasione commoda. Neque enim properandum est, antequam nactus fidum fueris hominem cui thesaurum istum credere velis. At Coleri editionem & notas petii à filio tuo. Eum quæso cura, ut prima occasione habeamus. Neque enim vidit eam antehac Grafwinkelius. Vale Clarissime Virorum, & me ama.

*Hage raptim, iii. Eid. Jun.
Anno clō Iōc xxxvi.*

Heinsii Epistola contra Balzacam cœpit excudi.

CCXXXVII.

*Clarissimo Viro Gerardo Joanni Vossio,
Aubertus Miræus S. P. D.*

Vir Clarissime,

A Multis retrò annis, ingenii vestri monumenta, vidi, & legi. Audaciam nunc sumo ad te scribendi, quod de tua singulari humanitate, nuper communis quidam amicus, multa coram prædicavit. Sed & exemplar unum, Chronici nostri Belgici, unà cum Typo veteris Gallie Belgicæ, & viarum in ea militarium transmittito: ut si tanti sint, cum otio percurras, & libere censeas. Ego certè iudicium vestrum plurimi faciam, & magni id beneficii loco habeo. Post pauculos enim menses, meditor alteram Chronici nostri Editionem: ideoque libens audiam illius iudicium, qui de tot Historicis, & Chronographis, publicam sententiam tulit. Et verò diu est, quod exemplar vestri Libri, de Historicis Latinis, hîc quæro, nec venale reperio. Velim itaque meo sumptu exemplar unum Antuerpiam, ad me mitti; & quicquid expenderis promptè refundam. Si quid porro sit, in quo ego hîc aut alibi, vicissim tibi gratificari queam, operam omnem meam libens offero, & rogo ut de tuis studiis, ac scriptionibus, præsertim Historicis, quibus ab ineunte ætate mirificè capior, subindo certior me reddas. Vale.

*Raptim Antwerp. Cl. D. Vestræ Studiofissimus,
iv. Idus Novembr.
clō Iōc xxxvi.*

Aubertus Miræus.

CCXXXVIII.

Gerardo Johanni Vossio, *Viro maximo S. D.* Johan. Fredericus Gronovius.

CUM in eo essem ut elegantissimis filii tui literis, responderem, nec opinanti, humanissima tuæ, supervenerunt; adeo gratæ mihi; ut sacro eas osculo adorarem, simul manum agnovi. Sallustii omnes rectè mihi redditi sunt, & nunc quoque bene pudicèque asservantur. Quid ego inde profecerim, non sine prædicatione tuæ benignitatis, testabor fortè aliquando publicè, si tamen perrupero carceres, quibus nunc undique, & undique ne prodeam, nescio quæ iniqua fortuna me circumvenit. Nosti, non infœcundos prorsus, nos esse nugarum, si in obsequentem materiam incidimus. Cl. Salmasius, cum cura dicendus, nunc tandem bona fide, propediem adfuturus expectatur. Si mandatum Dominorum Curatorum, quo ipsum revocabant, venisset in manus ejus, antequam solvit è Galliis, Amplif. Legatus ab Hemstede, non ultra nunc absentem desideraremus. Incidit etiam consilia Principis Condæ, & aliorum magna Salmasii cum lubentia, imminens Galliarum status, unde horribiles afferuntur nuntii, vobis proculdubio certiores. Itaque etsi dimiserint eum, nec ullo nunc sufflamine istiusmodi inhibeatur, nonnihil terrent tamen pericula itinerum, quæ ubi numinis clementia, prudentiaque sua evitandi rationem iniverit, nihil erit propius, quam ut divinum, & exoptatissimum Heroem hic amplectamur. De Benthemio lator oppido esse tibi in manibus, quo necessitates ejus sublevantur. Est enim ille haud dubiè non indoctus, cæterum modestis moribus, inculpata vitæ juvenis: Parente natus valde honesto, proboque, & de Bremensi Schola egregiè merito, qui plurimos eo beneficii genere juvit, quo tu nunc ejus filium. Quo magis dignus est, ut paternæ bonitatis, velut redhostimentum cernat, & ipse benè moratus, de quo confirmem nunquam te commendationis tuæ pudorem habiturum, ut quidem hominem confirmare oportet. Quare ultrò meas preces, cum illius conjungo, ut de erudito, pudenti, & fortè Ecclesiæ Dei, olim profuturo juvene, quemadmodum soles, bene mereri velis. Miscella nostra, Papinianaque,

naque, quantum ab aliis studiis respirare licet, quorum & locus hic, & rationes meæ me admonent, ingenti cumulo adacta hic sunt. Sed edendi quicquam nunc omnis spes mihi decollavit, postquam in Galliis, Salmasius licet valde adnissus, ut nunc ibi agitur, nihil impetrare potuit, & non ita pridem nova perfidia L. mihi illaferunt. Interim monstra librorum quotidie prodeunt, & ingenti cum gratia excipiuntur eorum, qui quidem præter titulum, & præfationem nihil legunt; Cæterum soli faciunt, ut gaudeat, qui scripsit. Sed heu! alia major infelicitas mea, quis hic Bibliothecam tuam mihi reddit? Ego quidem etsi prolixus beneficiorum interpres sum, & agnovi semper magnitudinem tuorum erga me meritum, tamen cum maximè inopia ipsa me docet, quantum sit, Vossianæ Bibliothecæ usu liberali perfrui. Promittebat nuper filius tuus Statii Gryphianum exemplar alicunde se nancisci posse. Id nollem cum oblivioni tradidisse. Meus hic sumptus sit, ut & pro altero Colinei: operam mutuam imo maiorem ipse, imo omnes è gente vestra (ita de me meriti estis) gratissimo lubentique imperetis. Junii de pictura veterum, an absolutum sit, aveo scire. Eset fortè ubi is liber usui mihi esse posset, in Statianis meis. Magnus Rivetus te peramanter *avvaand'etui*. Ampliss. Grafwinkeliu rusticatur, vel potius in rure vero, barbaroque, bellum gerit cum Seldeno, pro libertate maris. Verum est, cum jussu Illustriss. Dominorum Ordinum id opus meditari: atque ipse adeo hisce oculis diploma vidi. Vale decus nostrum, & literarum præcipuum, & salve cum sanctissima Matrona tua, filiis, filiabus, familia.

Hage, *des rûges*, uti jufferas, ad diem
iv. Kal. Septembris, Anno Christi
c1o lcc xxxvi.

Vidisti proculdubio librum nuper editum in æmulationem magni Chæronensis: vidisti & non doles malè sentire de bonis, qui sic seipsum conterant.

CCXXXIX.

Insignissime & Clarissime Vir,

Quin aliquam mei rationem (recognitionem saltem) & adhuc habeas dubitare non finit ille, quem ante annos jam

aliquam multos erga me professus es amor. Nihil certe gratius in patriam reverso potest accidere, quàm ut cum etiamnum non defecisse intelligam. Si rationem exacti in Syria temporis ut reddam (quod jure poteris) expectes, vereor ne mihi expediendo impar prorsus fuerim. In Lingua Arabica exercitator paulo si redierim; si tenui Librorum Arabicorum supellectile ditatus, quid hîc tanti ut melioribus studiis tot horas (ne annos dicam) ademisse non pudeat & poeniteat, nisi in his plus profecissem? Si tanto oneri pares essent humeri mei, sunt penes me Proverbiorum Arab. antiquorum sex Chiliades, quas audacter dicam in lucem edi è re literaria esset. Est & historia quædam compendiosa à Creatione ad annum Hegiræ ultra 600. Saracenicæ isti Erpenianæ & stili elegantia & judicio (si quid ego censeam) longe præferenda, cui in Linguam Latinam transferendæ ni tenuitas me mea deterreret, libenter me accingerem. Sequi possent & alia. Et fieri forsân potest, Deo volente, vitamque & otium concedente, aliquid si tu quem studiorum meorum fautorem & arbitrum elegerim, calculo & præceptis tuis animos addideris. Plurimum certe vigoris à candore & monitis tuis receptura sunt studia mea penè languescencia. Vale, magne literarum Antistes, & me amare perge.

Oxon. in C. C. C.
Decemb. 5. 1636,

Dignitatis tuæ

addictissimus,

Edwardus Pococke.

CCXL.

Lætum mihi nuntium postremæ tuæ attulere; scilicet, Typographum jam semel tandem manum operi admovisse; verum de Constantia dubito, quando cum discederet Joannes David, nil omnino literarum ad me dederis. Credo, quia pudebat scribere, ab incepto destituisse, maluisti nihil scribere. Quod si ita sese habet, merito desidero in eo homine probitatem; nec à levitatis vitio excusare illum possim, ne quid gravius pronuntiem. Certe neque probus quisquam, fideique suæ observans, aliter queat. Itane me ludibrio, nam hoc dicendum, annos quatuor haberi? Reddat potius lucubrationes meas, quæ ipsius mala fide nimis diu sunt suppressæ. Pater, iniquies, potius culpandus erat, nec diffiteor:

or: sed profecto ego metuo, ne quid filius per vestigia Patris ire animum inducat suum. Quæso itaque & obtestor, per finceram tot annorum amicitiam, per eximiam illam tuam probitatem, ne me ultra derideri patiaris. Mitto tandem, si quid forte hominem exstimulare istud possit, Historiam Danicam, quam præverti, cæteris sepositis omnibus, maximè velim; nec cessari, antequam ad finem duxerit. Potest autem illud facere, si promoverit diligenter, intra sex aut septem Menses. Eapropter Tomi Historici partes duas esse volui, uti suo Typothetæ singulæ committi possint. Ita autem edi cupiam, uti primus iste Tomus etiam seorsim vendi cuivis possit, Historiæ magis quam Philologiæ amanti; quod ni faciat, fore sciat ut alius sic excudat. Cupio autem, sicut dixi, maxime editionem maturari. Nam si istic etiam antiquum obtinere velit, sciatur mihi *αὐτόγραφον* esse; & hic edere, de superiorum quoque voluntate, planè item constitutum. In Athenis meis Batavis, cum ad me perventum erit, rogo, ut Catalogo meorum Operum ad hunc modum, quem præscripsi, exhibere ne graveris. Idem abs te fieri in tuis velim; & adjungi, quæ post illud tempus plurima juris publici fecisti. Amicorum optime maxime, à te postulo enixè, amicitia nostræ jure, urge hominem, quantum queas; tum mortalitatem nostrum utriusque, quibus ætas jam in senectutem vergit, animo reputare velis; tum pergratum mihi fore, si priusquam vitâ excedam, consummatam Lucubrationum mearum editionem contueri concedatur. Utinam hoc votum mihi bonus Deus repræsentet. Absolvi Historicus Tomus potest, si nimirum operas Typographus sic partiatur, ad id tempus, quo Joannes David noster ad nos reversurus erit: isque exemplaria, mittenda mihi, secum non invitus deferret, suis sarcinis inclusa. Insta Blavio, ne spem meam hanc destituat: poterit culpam præcedentis tarditatis aliquatenus isto modo emendare. Etiam tamen atque etiam abs te peto, ac per omnia amicitia nostræ sacra te compello, uti tuâ mihi fide universam rem exponas, quo se cunque modo habeat: ac, si denuo inchoatam editionem, quod hic animus auguratur, intermiserit, maximopere contendo, uti omnia quæ commisi tuæ fidei, mox restituenda mihi per Davidem nostrum proxima ætate cures: is suscipiet haud gravatè, & curabit bonâ fide. Ego verò, si me Blavius porro etiam fastidiet, aut inveni-

am mihi alium, aut non paullo illo rectius adservabo. Itaque permittas cæve, ut deinceps meâ ipsè patientiâ, quæ plus nimio est læsa, abutatur. Utinam vanus esset metus, quem concepi; certè valdè illud velim. Sed persuasum mihi habeo, si omisit inchoata, ut existimo, illum operum meorum editionem promississe, non ut ederet, at vicino, cum quo malè admodum conveniebat, ut subtraheret. Nam & ille, ut meministi, operam suam per id tempus offerebat: ac profecto longè meliore fide, quam expertus jure laudo, præstitisset: nec injuria pœnitet, quod ab ipso me abduci passus fuerim. Equidem tibi nihil imputo, qui propensum in utrumque nostrum animum habuisti, & ab eo Lucubrationes meas evulgari voluisti, sed multiplicem adeo dilationem, tot mendaciis excusatam, meritò iniquè fero. Vel nunc demum bona agere fide statuat, & incipiat semel seriò, ac continuet; nec priusquam Colophonem imposuerit, conquiescat: & præterita condonabo. Inchoari autem cupiam, ut jam dixi, ab Historiarum Tomo: quem cur classẽm ducere velim, causam habeo, quam tu facile, pro prudentia illa tua, divinabis. Cum absolverit, mitte statim aliquot mihi exemplaria, quibus Regis Procerumque desiderio satisfaciam. Nam vix credas, quanta sit operis illius expectatio; tum privatim meâ quoque refert plurimum, ut editio maximopere maturetur. Da hic operam: meque ac mea, quo affectu consuevisti, porro etiam complectere. Vale, Vir eximie, diutissimè; ac salve plurimum, cum uxore liberisque, à me, meâ, atque meis. Laurenburgius & Stephanus plurimam salutem reddunt.

Raprim, Soræ, ad
diem xx. Decemb.
c10 l0c xxxvi.

Tuus, antiquâ fide,

Joannes Meursius.

Si quis possit studiosus reperi, qui in Danicam Historiam Indicem accuratum scriberet, esset ea res Lectori acceptissima, uti nosti, & Typographo non inutilis. N. B. Præfationem, ad illustrem Dominum Cancellarium, Christianum Frisium, cupio antiquatam, & illius loco poni hanc ad Regem, quam præfixi Historiæ Danicæ libris quinque prioribus.

CCXLI

*Viro Maximo Domino Ger. Jo. Vossio.
Johannes Fred. Gronovius Salu-
tem & Observantiam.*

MUltis contestarer apud te, Vir maxime, gravissimum dolorem meum, quo affectus sum, simul accepi, valetudinem tuam tentatam esse: nisi gauderem nunc intemperantius, postquam pristinas vires, sanitatemque recuperavisse, omniaque in melius mutata intellexi: Cujus rei causa ex animo tibi gratulor, precorque Deum Opt. Max. ut hoc sit proprium bonum, & talis Nestoreos annos continues, pergasque ingentia merita tua cumulare, docereque nos, quæ aliunde, aut ex alio discere non possumus. Ego per numinis gratiam, adhuc benè me habui, nec de solito fervore studiorum, quicquam remisi. Quod narro tibi, quia omnem sectam, rationemque, vitæ meæ, non secus ac sollicito Patri filius, Ephe-meridas, approbare gestio: qui ea præcipuè de causâ magnorum Virorum notitiam, familiaritatemque appetii; ut sub his quasi censoribus agerem, ac voluptatum illecebras, quæ in hac ætate, bonis etiam immodestius interdum effervescunt, fallerem, aut metu aliquo continerem. Nescio an in proximis meis significaverim tibi, tradidisse mihi summum Virum And. Rivetum, Ila. Casauboni Epistolas, magna pietate collectas, ut editionem earum curæ haberem. Eæ nunc cæptæ sunt prælo dari, opus anxie expectatum, plurimisque identidem reconditæ eruditionis emblematis yermiculatum. Quod si unquam cum incomparabili Viro commercium literarum instituisti, aut aliunde quod habes, quo amplius ornatusque id possit reddi; & nos optamus, & tuæ humanitatis est, nec nobis, nec publico latentis ejusmodi Thesauri invideri. Ea quoque occasione, cum jam omnis mihi spes decollasset, his in regionibus quæque edendi, subita alia occasio affulsit Stadianam diatribem emittendi è Vestæ penetralibus. Uterque liber absolutus erit, ante proximas nundinas, si Deus volet. Quæ in re unicum molestissime fero, quod nec censione, nec aliis subsidiis *si vult* Salmasii, exactior ante editionem, fieri poterit labor noster. Jam enim duo menses abierunt, ex quo, nihil de illo auditur, precesque ad Deum allegamus,

ut decus illud incomparabile, Leydensi Academiæ reddat. Te aliquando roga- veram, ut videres, an aliquid opis, ad-ferre posses deploratissimo loco, in Lib. III. Silv. Carm. II. quod est Propempticon Metii. *Sint quibus exploret rupes gravis, arte Molochus.* Nisi autem tu, aut ille hoc faciat, vix erit, ut spes ulla superet. Et promiseras sanè: sed multiplicia negotia tua, catenatæque occupationes, ne urge-rem, me prohibuerunt. Nunc repeto pro- missum, rogoque uti unius horulæ spati-um, isti cogitationi impendas. Quod & perpetua humanitas tua, studiumque benè merendi spondet. Et quia utcumque nunc cuncteris, olim in Originibus tuis, deside- ratissimo opere, de voce *Molochus*, ali- quid dicendum est, quantum est, ut in divotissimi tui cultoris gratiam id anticipes. Salustios tuos remittam, simul habebō; cui tutò & sine sumptu tuo, eos tradere possum. Haveo nunc inspicere Daus- queii de Orthographiâ, veteris novique Latii Librum, & Claudianum ex Edit. Stephani Claverii. Illum certo scio tuâ in Bibliotheca esse: hunc arbitror. Multa enim ad hunc scriptorem notavimus, mul- ta emendavimus, aliter, quam in Rap. Scaliger, & sua Barthius, immiscuimus- que Stadianis nostris. Sed nescio an quæ- dam à Claverio sint occupata. Vehemen- ter itaque rogo, ut eos prima quaque oc- casione per amicum, aut si non obveni- ret, per rhedarios ad me mittas. Brevis mo- ra erit, dum utar: & salvos puerosque reci- piesz. Potuissim alterum petere ab ami- co nostro S. quem nosti. Sed ille absen- tium amicorum, non tepore aliquo, sed torpore, & ignavia, pæne dixeram, sed apud te, prorsus incuriosus est. Inclusas ad Hardervicenses Tabellarios, haud gra- vatim, per tuas curabis. Vale, præcipu- um decus seculi nostri, & salve cum le- ctiſſima Matrona tua, filiis, filiabus, omni denique familia, meque ama.

*Hæc comiss. xix. Kalend. Januarii, Anno
1610 cxxxvii. quem felicissimum tibi,
tuisque, incipere, & decurrere, à Deo Opt.
Max. precor.*

Tui Observantissimus,

Johannes Fred. Gronovius.

Jam clauseram Epistolam, ut latori traderem, cum ecce commodum, hæc oc- casio obvenit libros tuos mittendi. Atq; en quatuor Salustios: Nunc Silium Giun- tæ adhuc servo. Pro Statio Colinei, pre-
tium

tium filio tuo Gerardo debeo. Libellum Gretseri etiam meum, adhuc penes te esse credo. Sed hujus nunc non usus, ut illorum, quos petii, & iterum peto, ut mittas quamprimum.

CCXLII.

S. in Christo.

Vir Clarissime,

Literæ tuæ (prout semper sunt) mihi gratissimæ fuerunt. Recepi eas per anni ferè abhinc spatium, sed ut libere dicam quod veritas postulat, majora negotia quolibet ferè momento animum satis ad hoc officium propensum plane ad alia avocârunt.

In illis gratularis huic Regno, mihique quod jus lustrandi Academiæ Præsulibus Cantuariensibus ab antiquis temporibus debitum revocavi. Opus sane arduum & revocare quod diu intermissum, & exercere quod semper invisum. Sed quum misericordia Dei atque optimi Regis iustitia potestas visitandi Academiæ mihi & meis multis retro annis debita jam denovo decreta sit, dabo operam & spero non inutilem ut Academiæ floreat & ut Academici moribus cultiores, doctrinâ politiores, Religione primævis temporibus conformiores evadant. Et ut ab ineuntibus studiis ea principia imbibant, quæ & Dei cultum & Ecclesiæ pacem, & Academiæ honorem promoveant. Nec quicquam verius est quàm illud quod scribis humana instituta omnia, etiam optima, facile per incuriam in pejus vergere. Quid igitur sit, quum malitia nonnullorum qui inordinata tantum amant, aliorum incuriæ superadditur?

Goffius hic interfuit diu à receptis literis vestris, sed adeo occupatum me invenit expectatione adventus Regis & Regina, ut vacuum eum remittere necesse fuit. Gradum tantum Professoris in Theologia obtinuit rogatu (iussu i.e.) Frederici Principis Electoris Palatini, qui una cum Rege Oxoniam petiit. Præco est Goffius ille virtutum tuarum; nec immerito, sensit enim & fatetur quantum tibi devinctus sit, dum Amstelodami Musis inservit.

De Calendrino nolo ego plura, & quod aperte satis in scriptis tuis video, tu forte de illo pauciora, si quæ mihi & tibi quoque innotuissent. Nolo tamen ut illud ullo

modo molestiam tibi creare possit. Soleo enim ego quæ ab amicis tui simillimis in gratiam alicujus tertiæ personæ scripta sunt facere si possim & iusta sint, sed deliberare si suspecta. Ignoscas quæso moram harum literarum, & quando iterum placuerit scribere, sperabo me posse, tu autem semper puta me velle multo citius responsum dare. Vale, & dum quotidie Deum colis, sis, quæso, memor in orationibus

*Dat. ex Aedibus Amici tui perquam fidelis,
Lambeth. Junii.
1637.*

W. Cant.

Oro ut Globos terrestrem & coelestem magnitudine ampliori, Topographia aliisq; descriptionibus eruditè delineatos, & pro more undique aptatos, placeat tibi emere & ad me mittere. Vir iste mercator nobilis & mihi perquam gratus Job Harbye pretium tibi solvet. Solum cupio opera vestra, uti ne fraudem patiatur in re illi non satis nota.

CCXLIII.

Paucis scribo, Vir & amice summe, quia opprimor; tuas tradidit Joannes David, in quibus bona de Typographo hætenus tricone maximo mihi nuntias. Faxit Deus, ut promissa semel tandem exequatur; accepi etiam specimen Historiæ Danicæ, quod per Elzevirium ad me mittebas. Utinam tam sedulo pergat, quam est hætenus cunctatus; scribo ad eum, postuloque ut quæ forte excusa erant, ei tradat, qui has affert. Tu negotium, quæso, urge pro adfectu in me tuo. Ernstius apud te fuit, utinam mecum & amplecti ex intervallo tantum amicum licuisset, sed hoc voti est, nec speramus ultra quicquam. Fiat Domini voluntas, in quâ est acquiescendum, ac si nobis, ut videtur, non licebit, filiis aliquando dabitur per benigni Dei gratiam, ad quos amicitia nostra hæreditate devolvetur. Opus tuum de Idololatriæ origine & progressu utinam videam, sicut etiam Maimonidem filii *in jure*. Poteris commode ad me mittere per hunc Mercatorem nostrum Slogosensem, qui negotiorum causa ad vos excurrit, si decennio minor mihi ætas esset aut nos iter tam longinquum non disjungeret, una item, uti, ante vitæ finem, adhuc semel te complecterer, nunc oportet

ut

ut ponamus cogitationem istam, & nos Deo permittamus. A Salmasio jam reduce mirum est nil nobis dari. Heinſii in Novum Testamentum Notas, quarum specimen Elzevirius hic ostendit, avidissime expectamus. Misiſi mihi Historiam obſidionis Sylvæ-ducis, sexto ab editione ejus anno: idem mihi in mittenda Historia Danica faciendum eſſe cenſeo. Nempe hoc eſt recte amicitiam colere, & amicū æſtimare; cujus deſiderio ab ipſo initio ſatiſfactum oportebat. Tu & ego non ſic agimus, ac prohibeat præſes amicitiae Deus, qui conjunxit corda noſtra. Is nos ſerveſt diutiſſime. Uxor Liberique mei te & tuam atque tuos plurima ſalute imperiunt; Reſalutant officiōſè Laurenbergius & Stephanus.

Reprim, Soræ ad diem xxvii. Maii.
c1o lœc xxxvii.

Tuus, conſtanti affectu,

Joannes Meurſius.

CCXLIV.

Literas tuas, Vir præſtantiffime, rectè accepi, hæc ipſâ horâ. Gratum mihi maximopere fuit videre Commentarium de re Grammaticâ, quem non dubito famæ tuæ reſponſurum: legam ubi compa-ctus erit. Summæ ſanè mihi voluptati fuit, cum viderem. Idem dixerim de Sophompaneâ Grotii, cui & ingenii hunc ſortum gratulor, & honorem ſplendidæ Legationis. Faxit Deus ut fruatur diutiſſime: quod ex animo illi opto. De meorum operum editione adeo lenta fieri hæud poteſt certe quin commovear: ſiquidem ut acrius promoveatur, non exiguum eſt cur velim. Quæſo urge ut facturum te conſido, & ſi poteſ paula certiora ſcribe per hunc, qui hæc tibi adfert: qui quandoquidem feſtinat finem nunc imponere cogor. De Rep. tecum ſentio, Deum Opt. Max. rogo ut porro fortunare eam velit. Vale diutiſſime cum Uxorē Liberisque quibus ego, Uxor, mei plurimam ſalutem dicimus.

Soræ Danorum ad diem vii. Junii.
c1o lœc xxxvii.

Quæ in dedicationibus mutare volui, quæſo uti obſerventur, & imprimis ut Typographus, quantum potuerit, maturet; nam Hiſtoriæ Danicæ Libros decem quibus totum Pontani opus retractare juſſus

fui, flagitant hic optimates atque docti; metuoque ſi nunciari veſtri pergant, ne excudi apud nos ſuperiores mei velint; quod & aliquod detrimentum Blavio ſit allaturum; ſic enixè etiam rogatum cupio ne neceſſitatem mihi hanc imponat. Iterum Vale, mi Voſſi, animæ dimidium meæ. Præſationem ad illuſtrem Dominum Cancellarium, quanto Regi ſereniſſimo opus dedicandum erit concerpere poteris.

Tuus,

Joannes Meurſius.

CCXLV.

Oratorum Summe, Philoſophorum maxime, Belgice Varro,

Operibus tuis velut ſaccharo, & ne-ctare dulciſſimo quotidie recreor: nam quæ ſcribuntur à te cuncta, tuum ſapiunt ſalem, ac te referunt. Hac ſapientia, facundia, artibus optimis ſatis inſtructus, ne deſpicias noſtra, quæ ſi mutila inveneris, hiulca, & nec ſatis excuſa, ea dele, reſeca. Si laudaveris conatus noſtros, gaudebo nimis, quia à te omnifcio, licet falſo merui laudari. Summe doleo quod unum exemplar non mittam, nam unum ſolum habui pro meo uſu. Ita avari ſunt Typographi, qui ſolum ſibi omnia aſſumunt. Amicus noſter D. Fontanus indicabit. Vale ergo bonarum artium ſpecimen, Plinius, aut *Lucius ipſe meus, me- * f. Lucilius. que amare perge.

Ex Muſæo noſtro
1636. die vero 2.
April. Amſtel.

Te reverenter colit,

Zacutus Luſitanus, M.D.

CCXLVI.

S. P.

Vir Excellentiffime,

Hunc Joh. Ludovicum in urbem veſtram miſi negotiorum cauſa. Ei ut utrumque librum Logicum tradas rogare veritus eſſem, ſi ſciſſem illis te diutius uti velle, aut præ aliorum mole negotiorum poſſe. Apollonium filio tuo reſtitui: cujus mihi vehementer probatur eruditio; quamvis videatur alicubi ad emendandum

Y

Scylacis

Scylacis contextum, aut potius *vaudeia* esse calidior. Utilissima sane illius est opera. Quæ ego in ora exemplaris mei *ἡτοιμασθαι*, in aliquot ipsi dieculas concessissem ut immatura invitor, concessissem tamen tui respectu, nisi ille accipere recusasset. Equidem nunquam negabo tantum me tibi debere quantum nulli. Mearum in Rhodium illum lucubrationum edendarum spes nunc est certior. Nam Dominus Le Maire edendas suscepit; utinam in proposito perseveret! Oblata mihi nuper est Harderwikensis Professio Græcæ Linguae & Logicæ, quam quo minus acceperim per meum stetit *ἡναυον*. Indignabatur enim stipendii, & minoris quidem stipendii solutionem tardam, atque adeo annuam. Tu nihilominus vides opus esse ut illa *λογικῆς* aliquando regustem, & me ad quidvis parem. Vale, Vir præclarissime, & meis verbis saluta nobilissimam tuam Matronam, & filios filiasque.

Lugd. Bat.
15. Septem-
bris, Anno
1637.

Tui observantissimus,

Jeremias Hoelzlin.

CCXLVII.

Clarissimo & Doctissimo Viro, D. Gerhardo Joanni Vossio; Johannes Elichmannus S. P. D.

EX vulnere, quod in communis amici immaturo funere sensit, Stapeliorum familia; ego quoque haud eximium dolorem cepi; tum quod *τὸ μαργεῖον*, raram in schola nostra, diligentiam, & ingenuitatem, adamarem magnoperè, tum etiam ob incommodum, quod exinde circumvenit amplissimam Th.... Nec dubito quin ad te hujus damni sensus pervenerit quoque imprimis. Novi enim quam calido affectu, & non sine singulari judicio, is tuam nobilissimam Polymathiam prosequeretur constantissimè; novi etiam, & mecum novit literatus orbis, quàm impensè tu amare studeas, ac fovere, literarum, atque artium cultum, atque cultores, & de nostro *μαργεῖον* præsertim. Faciet aliquando ut spero, fidem, opus illud Posthumum, si ut fecisti *μαργεῖον*, ita nunc pergas *ὑπομνήματα*. Et facit quidem tuæ *ἐκ τῶν μαργεῖων* pietatis apud me opinio, ut æquiore animo feram, quod ut non acciderit, no-

stris lacrymis, nunquam possumus efficere; solatium etiam percipio, cùm animo volvo perennaturam amici memoriam, cuius posthumum fortuna manet, tam nobilis tutelæ. Licet autem ego præter amorem rerum cùm nostrarum, tum etiam elegantioris Scholæ publicarum, quod aliquid momenti ad earum curam, & ornatum possit afferre, penes me vix inveniam; molitus sum tamen, nonnihil ad ornatum, jam dictæ editionis, ut Authoris desiderio aliquo modo obsequerer. Ea res te habeat arbitrum nunc oportet, ac moderatorem; ideoque rogo, ni molestum sit, aliquo responso mihi edices, quod faciendum videbitur. Dixeram *τὸ μαργεῖον* me in volumine aliquo Arabico, inter legendum deprehendisse, ex Græcorum traditione de Thalete narrari quiddam aliter, quàm apud Laertium, præcipuè quod scripta, quorum Author dicens C. Th.... Ille tunc statim impellere, darem operam, ut & inde aliquid, novæ lucis suæ editioni accederet; quod promisi futurum, si præterea quoque se offerrent, quæ varietatem eam, illustriorem possent reddere, & contra Laertii auctoritatem, majus aliquod pondus adderent, novæ Antithesi. Cessit autem ea res ex voto. Nam inveni in iis, quæ Arabes à Græcis habent, inter alia ad istum scopum, insignem indicem omnium scriptorum Aristotelis, quem in Tr. de vita, morte, & testamento Aristotelis, secutus sententiam Andronici Rhodii, ponit Ptolomæus ille, qui summus Philologus Peripateticus sua ætate. Laudatur Longino, uti refert Porphyrius in vitâ Plotini. Istum indicem animus erat inserere vitæ Th..... ex Arab. Interpretamentis petita; quia Aristoteli tribuit pleraque scripta, quæ apud Laertium dicuntur esse Th..... Et sic illorum sententiam egregiè firmat, qui aliunde persuasi, apud Laertium in Catalogum scriptorum Th..... multa temere intrusa, ibique redundare statuunt. De his volui *τὸ μαργεῖον*, paulò antequam nobis ereptus esset te rogare, nùm placeret, ut hic unus aut alter denuò Typis Arabicis, cum Vers. Lat. imprimeretur, qui operi possit præfigi, post textum Laertii. Sed fata hoc judicium in te devolverunt, in quo si cessandum statuas, parcam operæ quæ restat; paratus aliàs amici communis manibus fidem servare integram. De variis lectionibus ex tribus diversis Manuscriptis Vaticanis, spem quoque mihi fecerunt Holstenius, & Dormatius, uti ex hujus (quò Leidæ sum usus familiarissimè) literis

literis addictis cognovit quoque, & *marcelinus*. verum quia tandem silent ad meas monitiones, spem quoque illam incipio amittere. Amicitia uti video, vitium Romæ facile contrahit. Ceterum molestus adhuc ero, si petam, quod vix absque verecundia cogito. Verum dabis veniam, spero, pro solita humanitate. Accepit à me mutuò & *marcelinus* noster, duos Libellos Joannis Lalemantii, alterum com. in lib. De Diebus criticis Galeni, Lyon 1560. 4°. Alterum, De Varia Anni Ratione, Ibidem, 1571. 8°. Vellem commoda occasione moneri parentem *marcelinus* libros istos mihi esse restituendos, mutuò concessos à selsqui-anno. A D. Salmasio literas postremum accepi datas Calend. Decembris à portu Diepensi, in quibus conqueritur, se toto bimestri ibi frustra transitum operiri. Ejus familia omnis cum tota suppellectili, hic jam fuit in tertium mensem. Comitari eam non potuit, ob naufragium vehementissimum, quod ipse & uxor passi sunt adeo, ut maluerint, relictâ ventis familiâ littus repetere, & secundiorem navigationem expectare. Hoc consilium malè cessit hætenus, & quidem cum majore incommodo, quia nihil è nave secum sumplerant, earum rerum, quæ quotidie sunt ad commoditatem vitæ necessaria. Ignosce, Vir clarissime, quod tam multis te fatigem, aut distineam. Unum adhuc addam, quod omnium est maximè cordi, me nimirum uti debeo, suspicere te, ac colere, ob celebratissimam virtutem, atque eruditionem, quæ famam intermortuam nunquam sinent; optare etiam quamplurimum, ut possint hujus observantiæ testes, tibi dare officia, quæ grata habeas. Ea interim dicabo, præstiturus, ubi jusseris. Vale, Vir Doctissime.

*Dabam Leide Cal.
II. Januarii, 1637.*

CCXLVIII.

*Clarissimo Viro D. Gerardo Joanni
Vossio, Affini Conjunctissimo.*

Conjunctissime Affinis,

Octo menses atque amplius, in agris transeginimus, dum pestis Londinii grassatur; tantaque iis, qui hic in nobili aliquâ familiâ vivunt, & Nobilium liberos curant, cautela opus est, ut nihil cum

Londinio, aut Londinienfibus commercii habere possint. Excusabis itaque, quod nullas hætenus literas ad vos dederim. Pridiè antequam in agros secederemus, die 13. aut 14. (si bene memini) mensis Maii, dedicationem misi: neque leviter gavisus sum quod eam ad manus tuas rectè perlatam, ex literis tuis V. Cal. Quint. datis intellexi; augebat hoc meum gaudium propinqua, quam feceras, spes videndi tractatulum de pictura: scribebas enim, intra duas hebdomadas absolvi tum potuisse. Quorundam certè expectationem obviâ credulitate plusquam nunc factum voluissim fovi: non desinunt enim quidam, quotidiano ferè convitio, promissi fidem efflagitare: sed juxta mecum ferant necesse est quod aliter se habere non potest. Ne quidem vacaverat adhuc, cum Epistolam dedicatorem transmitterem, xiv. quaterniones percurrere; leviter tantum inspexeram, & unum atque alterum errorem (si bene memini) annotaveram. Nunc per otium tribus hisce hebdomadis, quibus hic Londinii sum, perlustravi, atque alios quosdam errores Typographicos annotavi, eosque tibi misi: seriùs fortè quàm voluisses, sed citiùs non potui propter diutinam absentiam. Metuunt plerique, ne malè per hyemem repressa contagio, rursus ineunte vere, ingravescat; statuit itaque Comes Arund. Nepotulos suos intra hebdomadam unam, atque alteram, in remotiora quadam loca ablegare. Viderit summus rerum humanarum arbiter. Nihil mihi interim gratus obtinget, quàm ut lato de vobis nuntio, aliquando perfrui detur, usquedum idonea gratum animum testandi tempora affulgeant. Quum cogitarem cui rectè literarum aliquid ad vos commissurus essem, obtulit sese vir humanissimus Dominus Hermannus Mylius, qui spondit se Amstelodamo rescripturum, si quid ad me perscribi velles. Si otium tibi non erit, libentissimè faciet vir humanissimus, quod facturum recepit. Cantuariensi Archiepiscopo pro me, meaque, per literas, quas ipsi tradere possim, commendabis; neque enim obscura proni favoris indicia, hætenus exhibuit immerenti: confido plus exhibentur gratiæ habitura, quæ, te commendante, mea enim interest, ut tanto antistiti probentur qualescumque labores mei, priusquam eos Regiæ Majestati offeram. Subinde literas ad me scribit Prudentia, quibus ut tibi unicè commendari cupit, ita subveniri sibi angustia rei familiaris miserè laboranti postulat. Ego nihil ad

hæc respondi, quoniam nullas adhuc Joannis nostri, neque tuas literas vidi, quæ me instruant, quatenus ei subsidium ferendum sit. Non deero afflictæ, si certior me feceris, quid consultum judices. Nihil non faciam pro viribus. Universæ familiæ tuæ plurimam meis verbis salutem dices. Vale.

*Raptim in Ædibus Arundelianis, An. 1637.
18. Febr.*

Tuus omni Officio,

FFF. Junius.

CCXLIX.

*Viro Maximo Domino Gerardo Jo-
hanni Vossio: Jo. Fred. Gronov.
salutem & observantiam.*

Vir Summe,

Cum præstantissimus Christenius noster advenisset, sub ipsum articulum temporis, quo perficiebatur Libellus meus, non potui eum dimittere, sine exemplari, quod tibi perferret. Id tu quidem accipies, ut profectum ab homine observantissimo tui, quodque siquidem legere dignatus fueris, lima tua exornetur: non quasi ego dignum judicem, ut eruditissimos oculos tuos subeat. Fortasse habebit interdum Gerhardus tuus, quo se delectet; atque utinam tam doctæ pueritiæ satisfacere potuissim. Illud fortè non opus est, ut addam, quum legeritis, & errores meos notaveritis, gratissimum futurum mihi, si de omnibus simpliciter monear. Nostis enim ingenuitatem, & *quirquidway* meam; & is vester erga me est amor, ut ab derisu, & reprehensione malignorum, vestris monitis, & amica reprehensione, securum præstare non sitis gravaturi. Superest ut aurem tibi vellam, Vir amicissime, de Epistolis If. Casauboni ad Meursium, tum de MSS. Ovidii, aut excerptis potius eorum, quæ cum hic esses, mihi promiseratis, tuque puerque tuus. Vale, & salvè, cum lectissima matrona tua, filiis, filiabus, totaque domo: & amato natus nostros, ut effectui impari ignoscas.

*Hæc raptim, ad
diem xviii. Calen.
Jul. ann. Christi,
c1637 c xxxvii.*

Tuo Nomini devotissimus,

Johan. Fred. Gronovius.

CCL.

Cl. Viro, D. Gerardo Joanni Vossio.

Clarissime & Excellentissime Vir,

Soleo mihi sæpenumero revocare in mentem gratissimam temporis illius memoriam, quo eruditissimos sermones tuos coram excipere, teque ipsum exemplar omnis honestæ vitæ intueri mihi licebat. Atque ideo majori cum voluptate recolo, quod tanti boni magnitudinem (non ut plerique solent) tum demum intellexi cum amiseram, sed tum maxime capiebam, cum maxime, eo fruebar. Sed quantum tunc gratulabar mihi de consuetudine tua; tanti nunc impensius doleo quod non solum conspectu tuo caream, verumetiam ne per literas quidem quibus absentium amicorum animi refoveri solent, tecum colloquar. Et mihi quidem maxime id conveniebat, fateor, ut te primus compellarem; sed primum gravissimis occupationibus tuis, quibus non præsentem solum, sed etiam futuro sæculo prodesse conaris, obstrepere literis meis vix audebam: deinde etiam reputando tenuitatem, tum ingenii, tum styli mei, metuebam subire judicium ejus viri, cui nihil nisi limatum & exquisitum placeret. Sed tandem vicit fiducia humanitatis & moderationis tuæ, qua futurum spero, ut me etiam balbutientem libenter audias: deinde vicit etiam præsens necessitas, ne charissimum fratrem meum in Hollandiam abeuntem sine meis ad te literis dimitterem, quem ego tibi quam commendatissimum esse cupio. Etsi enim ille eo animo propositum iter ingrediatur, ut in re militari, cujus peritiâ quemvis Christiani Orbis populum provocare possitis, juvenilem ætatem suam exercere valeat: tamen id multum momenti ad incipiendum & perficiendum Deo volente hoc studium afferet illi, si eum tutelâ ac patrocinio tuo dignum existimaveris. Quapropter ita eum tibi commendo, ut quicquid residet in te amoris erga me, id omne in eo amando atque fovendo ostendas. Reddet paria huic tuæ bonitati primum quidem Deus, deinde nos omnes, qui jampridem unice id conamur exprimere, quantum tibi pro summis tuis erga nos meritis debere nos sentiamus. Vale, Vir clarissime, Deum ter optimum maximum enixè veneror.

neror, ut te quam diutissime conservet, ad gloriam nominis sui & bonorum omnium emolumentum.

*Dabam Opolia,
dies 4. Aug.
anno 1637.*

Clarissimæ Domin. tuæ

ad quævis officia

paratissimus,

*Georgius Slupeck, de Conari
Capitan. Pilsnensis.*

CCLI.

*Clarissimo Doctissimoque Viro Gerhardo
Johanni Vossio, Mæcenati meo co-
lendo.*

*Clarissime ac Doctissime Vir, Mæcenat ætatem
colende,*

Quemadmodum nulli quondam, ad oraculorum adyta, aut Deorum immortalium pulvinaria, obstructus erat aditus, qui modò serium, sincerum, debitoque numinis cultu, compositum adferret animum: ita & omnibus, ad augustissimum illum sapientiæ tuæ Tripoda, liberum patere accessum, & testari potest studiosæ juventuti, potissima pars, quæ agmine facta, ad te consulendum in dies, in horas, confluit, doctior à te semper rediens; & ego expertus sum sapius, quem nunquam non voti compotem, juxta ac saluberrimis consiliis abundè instructum, solitus es à tuo colloquio dimittere. Quæ tua facilitas, rarum in nostri sæculi doctis bonum, me novis his ausis animavit, ut magnis meis in patria fautoribus, specimen aliquod diligentæ, propediem exhibiturus, tuam operam in partes mihi accersendam, non dubitaverim. Ut itaque verba conferam in compendium, constitui, Deo adjuva, hibernis his mensibus, labori non reprehendendo, vim omnem ingenii impendere. Nempe cum animadverterim, quæcunque uspiam typis divulgata sunt, nobilissimi illius historici, Saxonis Grammatici, exemplaria non solum innumeris mendis scatere, quæ properantem Lectorem faciliè effugiunt; sed & locis nonnullis dubiis, ac parum integris undique secus obsita esse, quæ ipsi historiæ obscuritatem haud exiguum offundunt; impetum cepi Augiæ hoc stabulum perpurgandi, & notas quasdam tam historicas, quam censorias in libros ejusdem omnes

ac singulos procudendi: amoris in patriam arcano potius jussu, quam ostentationis gratiâ. Sed quia simul perspectum habeam, tuis auspiciis hanc rem optimè geri posse, eâ quâ par est, submissa animi mente, abs te contendo, digneris mecum lubens, volensque, communicare, si quæ vel ipse habeas, ad Saxonem nostrum (quod tuum esse solet, in emedullandis melioris notæ scriptoribus, acumen,) jamdudum annotata, vel ab aliis Criticis scias esse observata. Quinimò si hæc te exorare non liceat, (quomodo mihi tamen persuadeo) velim mihi subinde petenti, ex instructissima Bibliotheca tua, suppedites bonorum Authorum monumenta, quæ scilicet aliquid ad institutum meum faciant; imprimis Achillem Gasserum, Bocerij cujusdam annotationes, in Reges Daniæ, & similes. Præbe te mihi, quæso, benevolum, mægne Doctor, conatibus meis fave, & exangui fronti ignosce.

Observantissimus tui,

tibique addictissimus,

*Stephanus Johannides Stephanus,
Hafnienfis Danus.*

CCLII.

Clarissime atque Excellentissime Vir,

Rumpendum tandem erit silentium, neque tamen & illud excusare velim, quin potius deprecetur ut à te veniam; quid enim dicam, aut quam excusationem adferam tam diuturni silentii mei? Occupator enim, defuit scribendi occasio, vel materia. Scilicet ulla esse potuit tanta cura: difficile literarum commercium: aut destitutus unquam esse possum, quid ad te scribam, ad te inquam, Vir incomparabilis? Si nihil enim aliud, nisi tua erga me eximia merita propensum illum animum, summam qua me complectebaris benevolentiam, commemorem; an non satis ampla & opulenta scribendi materia? quod si nunc meum tibi gratias referendi studium, & promptissimam voluntatem testari velim; videnturne hæc vel longissimis literis posse comprehendi? Sane, si quid est, quod justæ excusationis loco adferri mereatur; verecundia erit, quæ me sapius ad te scribere incipientem deterrebat. Nimirum, grave mihi admodum videbatur ad te scribere, à quo Latini Sermonis magna

magna quondam hauseram incrementa, cuius nunc jam pridem usum posthabui. Sic hærebam, atque à meipso dissidebam; sed vicit tandem officii necessitudo, vicit amor tui; cessit & ipsa verecundia pudori: pudebat nempe tanto te tempore exigere à me scribendi officium, non tamen adhuc exegisse. Accessit hortator vehementens, tui, unà mecum, uti debet, amantissimus Germanus meus, quem ego, patria limina deferentem, hac una re beatum judico, ac prope invideo quod te conspecturus brevi amplexurusque sit; jamq; mihi intueri videor illam tuam humanitatem, illos amores, quos illi exhibiturus es. Dabis igitur veniam, siue quod tam diu cessatum à me sit, siue quod nunc audenter nimis te laceßam literis. De me omnia, quæ voles ex fratre meo cognoscere; unum hoc ex me velim scias, neminem esse cui plus, libentiusque quam tibi, debeam: nihil esse, quod me magis sollicitum habeat; quam ut intelligas, in quem beneficia contuleris, cui operam tuam, cui tot labores impenderes. De te autem tuisque qui valeas, quid agas aut potius quid orbi profuturum pares, ex tuis potissimum literis scire cupio. Hic finem facerem, sed venit in mentem, quod nos anno proxime elapso mirè omnes exerceat. Id ut tibi perscribam, vel ipsa me cogit scribendi ad te dulcedo. Judæorum genus adeo diffudit se per universum hoc Regnum Poloniæ, ejusque provincias, ut omnes pene infederit urbes, oppida, villas, hac maxima in finitima Germania, bellorum tempestate. Tanta hæc multitudo, fieri non potest, quin multorum offendat animos, Mercatorum imprimis & Subditorum, qui Judæis subesse ægre ferunt, quibus eorum operæ & Nobilibus locari solent. Inde odia immortalia, perpetuæ de illis querelæ. Sed imprimis frequens est, quod reos deferant cædis infantium Christianorum. Crimen, sæpe nimis, quia impune licet, objectum, nescio an unquam satis fuerit probatum. Proximo hoc anno Lublini, inventus à matre diu quæsitus puerulus, aquis submersus dextrâ aure præcisâ, venisq; omnibus acu apertis tenui; atque adeo supremo Regni nostri Tribunalitio Lublinensi judicio oblati sunt: cunctorum mox animos ingens adversus Judæos suspicio pervadit; hinc sine mora capti, quos violentissimæ præsumptiones urgebant, tormentisque tam diu quæsit, ut unus eorum vi doloris superatus, paucos post dies obierit; cæteri tandem, quia fateri renuebant, dimissi: fecisse tamen Judæos immane hoc

homicidium publica fama est. Accusatos, convictos, damnatosq; ob idem hoc crimen Tridenti Judæos scripsisse commemini Sabellicum, ex eoq; refert in Annalibus suis Dlugissus noster, quin & in vestro Belgio, nisi me fallit memoria, accidisse, prodit Historia. Mirum ni nocentes sunt, quos tanta toto orbe premit invidia, fama accusat. Odione dicam Christiani sanguinis tantum eos patrare facinus; an quia forte opus ad remedia habent, aut ad sua sacra, siue denique ad Magicas artes, quibus plerique impense delectantur? An dicam impleri maledictionem illam Moysi? Deut. 28. *Omni tempore calumniam sustinentes.* Tu quid de toto hoc negotio sentias, aut sentiendum putes, rogo plene me doceas: tum enim judicium in utramvis partem lubens sequar. Sed vide, quo provectus sum voluptate tecum loquendi. Ergo jam vale, mi suavissime Vossii, meque amare perge; tum si quid in hac Epistola mea vel rude vel inconditum (vereor ne omnia) teneras & insuetas talibus aures tuas offenderit, corrige, cæterum mihi ignoscas precor. Iterum vale.

Tui observantissimus,

*Dabam ex Rure meo
paterno Klickovix.
Prid. Kal. Aug. Ann.
Sal. MDCXXXVII.*

Chr. Slupecius de Conary,

Secr. Ser. R. Poloniæ.

CCLIII.

*Viro incomparabili Gerhardo Joanni
Vossio, in Amstelred. Gymnasio Pro-
fessori celeberrimo.*

Vir incomparabilis,

Post tot, tantaque tua in me officia, puto ambitiosum non esse, si amoris tui liberalitatem, inter amicos, latissima prædicatione circumferam. Id quod facio libentissimè, & frequenter, quoties incido in homines, honestarum artium, modestæque pietatis amantes. Cæterum cum tam uberem, & penè immensam eruditionem ingenio complexus sis, nihil tamen in laudibus tuis, commemoro frequentius, quam sanctissimos illos, & defæcatos mores, amoremque Religionis purissimæ, & innocentis. De qua quoties judicandum est, animum imperturbatum, sine fastu omni, sine pugnandi libidine semper affers. Hæc tamen idcirco non scribo, quasi tu non potius virtute tua, quam meis laudibus

laudibus censeris velis: sed ut ostendam, quibus rebus motus, familiaris iste meus, qui has tibi reddit, ad notitiam tuam pervenire cupiat. Ordinatus est studia nobilissimorum juvenum, quos sui mores, & contubernium, mihi fecit amicissimos. Eos si benignè admiseris, non tam te, id mea commendatione motum, facere arbitrabor, quàm quod in humanitate, semper tuos mores tenere soles. Porro de rebus meis prolixius dicitur in *Regum Josephi*. Leidenfes frigore tactos, ipse coram sensi, & nuper amicus monuit. Quid causæ sit, facile suspicor. Habe summam culpæ meæ: semper sordidum esse putavi mutuis adulationibus atteri. Maximè tamen insidiatur existimationi meæ & *diva* nugacissimus, & fumo suo turgens. Quod mirum videri non debet, cum ingenti supercilio etiam viros maximos ad censuram vocet: adeo post emissas aliquot tumentes declamatiunculas sibi bellus videtur. Si vixero, non tam paribus nugis hominem, quàm solida studiorum, & cordata severitate obruam. Idque jam ago sedulo. Sed abeant ista: fida Voffiorum, & priscae integritatis amicitia, mille fricatorum, glorioforumque mortalium, simulatis blanditiis, mihi contra cara non est. Foelicissimè vale, & salve cum universa familia, Vir maxime, meque amare perge, quæ meorum votorum summa est.

Col. Agrip. xvii. Sept.
An. cfo lcc xxxvii.

Tuus,

Vincentius Fabricius.

CCLIV.

Letissimo Domino Doctori Gerardo Voffio, Historiarum Professori longè eminentissimo, Varroni verius nominando.

CUM nomen tuum toto terrarum orbe celeberrimum ad unguem contempler, parum abest quin obstupescam; mente enim capere nequeo, unde tantos scientiarum omnium thesauros exhaustas, doctrinâ, facundiâ, & omnisfciâ eruditione refertissimos, quos in publicum mortalium usum quotidie depromis. Nos milites pusilli, sub vexillo fecundissimo solertis ingenii tui stipendium facimus, scripta tua eruditissima venerantes. Ergo fortissimus Antesignanus, rudia hæc, & inermia ne despicias: Imò corrigas rogo. Scio quam sis rara indole præditus, & quam rectissime

de omnibus sentias, amoreque genuino studiosos prosequaris, & maximè me, qui autoritate tua, scripta sua tuetur, munit, ac defendit, lege lib. 3. in com. hist. 47. Ad aras solertissimi ingenii tui, hæc prolegomena appendo, ut pretium quod ex se non habent inde possint demereri. Vale ergo Belgicus Varro, & Zacutum tuum, te amantem, redama.

Amst. 1637. die
vero Septemb. 3.

Te veneratur

Zacutus Lusitanus, M. D.

Non possum remittere priora folia; hanc præfatiunculam lege, & parce meo tardo ingenio, quod ut aliud naturale agens, ultra metas activitatis suæ agere non potest:

CCLV.

Clarissimo, Doctissimoque Viro, D. Gerardo Johan. Voffio.

Clarissime Vir, Amice fidelis gratiâ conjunctis.

QUEM in Daniam quotannis, Jansonius vester Librorum vendendorum causâ solet ablegare, exoptatissimo me beavit nuntio, quum sub initium præteriti veris, apud nos consueta exerceret commercia. Spem etenim fecit mihi non exiguam fore, ut tu Saxonis nostri edendi curam in te suscipere velles, tuaque suadâ Typographorum vestrarium quempiam eò adducere constitueres, qui nitidissimis Typis, augustiore formâ, & prorsus ex voto meo, florentissimum hunc scriptorem procuderet, ac divulgaret. Quod si his verbis ipsius indubitata constare fides debeat, & si tuo me rogatu, tam largis implevit promissis; uberrimæ profectò tibi debentur gratiæ, non tam à me, cujus honori ac famæ tantopere faves, quàm à bonis omnibus ac doctis, qui desiderium Saxonis nostri hæcenus ægerrimè tulerunt. Biennium certè jam integrum est, quod incomparabilis ille Historicus, debito per me nitori restitutus, faventem Typographi alicujus operam frustra imploravit: quid igitur suavius, quid jucundius, quid auditu gratius unquam accidere mihi potuit, quam te talem, tantumque virum, diligenter curaturum, ut divinus hic author, splendidior, & ornatior, diis in luminis oras exeat? Edoceas me, quæso, primâ quaque occasione, quid sperare habeam, & cuinam Saxonem

xonem excudendum tutò committere liceat. Quod me atinet, nullam planè laboris mercedem aliam postulo, quam ut viginti, aut summum triginta exemplaria Typographus mihi impertiat, ut primum lucem viderit nova editio. Post Saxonem editum, proximam sibi curam vindicabit Quinctilianus; in cuius duodecim Institutionum Oratoriarum, totidem Commentariorum libros panè affectos habeo. Sed quia animadverti te in libris de arte Grammatica, parte ultimâ pag. 202. ad partes vocare membranas quasdam MS. Quinctiliani, quæ olim Joachimi Camerarii fuerunt; omnibus abs te precibus contendo, ut variantes Lectiones ex codice isto excerptas mecum benevole communices, & si quid insuper ad manum sit subsidii, eâ quâ soles humanitate, suppedites. Id quod ego olim beneficium grato animo ingenue profitebor. Præterea quoniam frontem jam apud te deponere cœpi, per amorem istum quo me complecteris, rogo, atque obsecro, ut libros hosce omnes, & singulos, quorum in adjunctâ schedulâ, notatos vides titulos, per filios tuos, vel in Auctione quâdam, vel si in Bibliopoliis reperiantur, meam in gratiam, quocumque tandem pretio, isthic cœmas; nullus dubitans, quin quicquid meo nomine argenti exposueris, eâ quâ par est *ἐνταῦθα* tibi restituam. Caterum licetne mihi jure amicitiae nostræ tecum exoptulare, quod clarissimo viro, & communi amico nostro, D. Meurfio, tot subinde variorum opera, recens edita, transmiseris, me præterito, quem non minus, in intimam familiaritatem admittere dignatus es? Habet à te Reidanum filii tui, *πρὸς μαργαρίτην*, habet alterius Annales Hollandicos, habet tuas Institutiones Grammaticas, Franc. Junii de Picturâ veterum libros, & quid non? Nobis non licet esse tam beatis? Verum emenda, quæso te; nisi Mulas meas iratas habere tibi cupias. Imprimis fac tractatum tuum, de Historicis Latinis, juxta ac libros de arte Grammatica, quamprimum à te habeam, quibus vehementer indigeo: finem scribendi faciam, ubi unum, alterumve proposuero. Locus est Saxonis, me judice, valdè corruptus, qui extat Hist. Danicæ lib. vii. pag. Edit. Francofurtensis 123.

*En pia progenies trucibus concurrere telis
Ausâ peris, sudo prognati sanguine fratres
Illata sibi cade ruunt.* —

Ubi quid *Sudus Sanguis* significet, non satis intelligo. Ego *Socio* legerem; nisi mox sequeretur: *Exitiale malum socio Styga fu-*

nere visent. Tu mihi sis Apollo. Deinde edoceas me rogo, quænam sit *Insula Lachmiorum*, vel *Lachmiorum*, cuius meminit Valerius Maximus, lib. viii. cap. xiii. Exemp. extern. vii. sub finem. Ejus etenim mentio apud Geographos nulla, quod sciam, occurrit. Vale, decus Belgii, & deliciæ literati orbis, & cum omnibus, qui circa te sunt, æternum salve.

Soræ a. d. xxviii.
Septemb. Anno
cIo Io c xxxvii.

Tuus omni

affectu & officio,

Stephanus Johan. Stephanus.

Quas heic adjunxi literas, velim per te rectè curentur, Viden' os hominis?

CCLVI.

D. Doctori Gerardo Vossio, *Philosophorum oculo, & in Academia inclita Amstelodamensi humanarum Literarum Professori celeberrimo, viroque omnis Literaturæ cultissimo.*

Miraberis, Vir solertissime, quænam me capiat fiducia tuam sic meis literis compellendi & amplitudinem & magnificentiam. Certè selectissimæ virtutes tuæ unâ cum candidissimis moribus conjunctæ id efficiunt, & aliæ animi & corporis dotes ita te omnibus amabilem præbent, ut non aliud abs te contendam, quam ut me in amicorum tibi arctissimè conjunctorum album adscribi patiaris, qui te non solum diligam, verum & unice observem. His fretus, tuâq; in studiosos humanitate confusus has tandem ad te dare decrevi, quas comitabitur liber meus pusillus, rudis & tenuis, cui novato nomine de Praxi Medica Admiranda titulum dedi: licet enim Medicus re & opere non sis; in arduis tamen medicinæ clivis emedullandis te versatissimum esse, & putavi, & puto: nam ingenii acumine polles, eleganti facundia, & rerum omnium cognitione es præditus, ita ut non solum celeberrima Amstelodamensis Civitas, illustre Lycaum Leydense, sed Europa tota, imo universus orbis te omniscium vocet, tua amplectetur opera, Lemnisco ornanda, dignissima Cedro, eaque plenissimis, ut aiunt, tibiis jactet, & prædicetur. Quare, Zacuti, tuarum laudum acerrimi propugnatoris, licet ignoti, tui tamen

tamen amantissimi, libellum inermem ne despicias: nec enim Dii croco infecti semper cinnamoma eructant, sed pulcem in casa furnaria, Reges rapam in tuguriato, & ipsæ Gratiæ fraga, myrtillosve sæpe in montibus, & sylvis prodelicatis epulis comederunt. Quare illius errores mentis tuæ sagacissimæ limâ solerti castiga: id enim feram libentissimè. Hanc curam si non molesto animo pro me sumseris, habebis Zacutum tuum tuarum laudum vocalissimum præconem, atque omni tempore memoriæ tuæ clarissimæ non ingratum. Quocirca si quid est, quod tui causâ me valere existimes, impera, exequar enim libentissimè. Vive ergo diu cum dilectissima familia tuâ, & ita videas filios tanta prole beatos, ut ii tanquam novelli olivarum, usque ad quartam generationem in circuitu mensæ tuæ adesse queant. Vale ergo, Vir omniscie, nostri quoque gloria sæcli. Ex Musæo nostro.

Ex Musæo nostro
Amitelod.

Te amat, colit, observat

D. Zacutus Lusitanus.

CCLVII.

Quamquam bis jam ad te scripserim, tamen nec hunc Mercatorem Slaglofensem sine meis ad te Literis dimittere potui: per quem uti ne graveris respondere etiam te atque etiam rogo. Opus tuum de Idololatria Gentium, ut Velleium Scylacemque, & Batavicos Annales filiorum maxime videre aveo. Pro navatâ mihi operâ, apud Typographum cunctatorem, gratias, quantas possum, ago; & enixè abs te peto, ut pro amicitia nostrâ, hominem urgere pergas; quod facturum te confido. Quæso, effice uti operas partiatur, alterumque Typothetam etiam abhibere velit; in quem finem Historicum Tomum in duas partes separavi; ita meo, & multorum in hoc regno Procerum, desiderio satisfaciet. Simul autem editio absoluta fuerit, velim Hagam exemplaria duo mittas: unum Mylio, alterum Riveto; tria Leidam, Heinsio, Cunæo & Vorstio: unum tibi vindicabis: cætera viginti minimum, aut, si potes, etiam quatuor, statim huc ad me curabis. Poteris id commodissime per Ludovicum Elzevirium; quem deinceps apud vos commemoraturum, libens sanè ex illo ipso intellexi. Sæpe nobis ejus opera, ad curandas Literas nostras, usui erit. Misit nu-

per ad me Typographus, duo exemplaria primi tantum ternionis, cum certe plures expectarem, & progressum longius existimarem: sed causam affert, satis fiivolam, nec sufficientem sane. At placebit, si deinceps quod prolixè pollicetur, culpam suam, maturanda gnaviter editione, emendaverit. Quæ interea folia excusa erunt, quando nunc tam bona occasio sese offert, quæso mitte, ut quid expectare habeam, scire possim. Vale, Vir, & amice magne. Uxorem tuam, quam convaluisse speramus, liberosque ego, uxor, liberique ex interiore animo salutamus.

Raptim, Soræ, ad
diem xii. Octobr.
clo Idc xxxvii.

Tuus, constanti affectu,

Joannes Meursius.

Si ad Dominum Rivetum aliquando es scripturus, quæso, Viro, quem omnino magni facio, plurimam salutem nunties; & constantem, etiam in silentio, affectum meum: tum hoc munus literarium qualecunque meis verbis itidem pollicearis. Iterum vale.

Est hic vir quidam doctus, penes quem sunt libri aliquot Manuscripti Græci, quos ut amplissimo magistratui urbis vestræ, ad Ornamentum Bibliothecæ illic publicæ, cui præfectus filius tuus, venales offerrem, à me petiit: neque ego id negare homini amicissimo potui. Sunt autem isti uno volumine comprehensi;

- Athenai* Περὶ μηχανημάτων.
Bitonis Κατασκευαὶ πολέμικων ὀργάνων, καὶ ἱερὰ μηχανῶν.
Heronis Χειρὸς καλίστρας καὶ λαοδὴν, καὶ συμμετρεῖα.
Heronis Ctesibii Βεροπολίτης.
Apollodori Πολιορκητικῆς.
Bitonis Μηχανικῆς.
Julii Africani Κεκοί.
Heronis Alexandrini Βεροπολίτης. Idem liber cum superiore, nisi quod figuræ variant: ideoque nonnullius plane pretii. Hos indicat quadringentis Florenis Hollandicis.
2. *Libanii Epistola*, plus minus trecentæ, trecentis Florenis.
 3. *Callisthenes de Vita Alexandri*, Scriptori ævi medi, centum Florenis. Et hæc quidem exemplaria sunt in folio perscripta, ut loquuntur. Quæ sequuntur verò in Quarto.
 4. *Nicephorus Imp.* Περὶ τῆς παρὰ δρομῆς πολεμικῆς. Florenis centum. Et hi quidem sunt in charta omnes scripti; qui sequitur verò in membranâ.

Z

5. *Mele-*

5. *Meletius Monachus, Neel quoniam ardebat.*
Quem Latine vertit, ediditque Nicolaus Petreius Corcyraeus, Venetiis, An. 1552. itidem Florenis centum.

Quaeso juva, quantum potes, commendatione tuâ, ut hos libros emere Magistratus velit: poteruntque ex editione eorum filii tui nominis famam augere, & posteritatem etiam magis sibi obligare. Si huc animum inclinabit Magistratus, poterit pecuniam mittere per Johannem Davidem vestrum, & Libros per eundem accipere. Tertium vale; & effectum, quantum potes, istud dato.

6. His præmissis à me additur *Theodori Metochitæ*, cujus partem pridem edidi, Historiæ Corpus universum, ingens volumen, in folio, quod Florenis quadringentis comparare Magistratus sibi potest.

7. Ac præterea *Andrea, Cretensis Archiepiscopi, Homilia XX.* Florenis ducentis quinquaginta.

Si fortasse grave erit emere non viſos Libros, impetra, cui libet filiorum, liberam legationem, qui eos videat, & me simul. Certè gratior advenire mihi hospes nullus possit. O quam illum ſim ardentè complexurus. Atque utinam teipſum, amicorum opt. maxime, ſi quo loco eſt Hamburgum, Amſtelodamum veſtrum eſſet, non tam diu diſtulſſem ad te excurrere: quem videre & complecti, ſi id liceat, adhuc ſemel ante ſummum diem optem. Sed hoc voti eſt; quod quis ſcit an unquam effectum nobis dare Deus velit. Interim ei te ex animo commendo, ac tuos omnes, ego atque mei omnes. Quantum ſalve, ac vale.

Si Librorum forte horum nimium videatur pretium, quod non puto, noſti ipſe nullum aliud libris Manuſcriptis, eſſe, quam id quod poſſeſſor ſtatuit.

CCLVIII.

Clariffimo D. Voſſio, D. & amico plurimum honorando.

Clarif. Vir, & amice peculiariter mihi honor.

Alunt aliqui, in luctum ſat gravem te, cum iis qui tibi cariffimi, conſectum diebus hiſce proximis. Si ita eſt, & ipſe equidem unâ lugeo. Ex quo enim benevolentiam erga me tuam, quoties te acce-

do, imò etiam aliàs experior affatim; non poteſt non mihi tua tuorumque, ut proſperitas eſſe gaudio, ita cordolium ciere calamitas, præſertim tanta. Quod ipſum ſaltem, quin verbo tibi perſcriberem, continere me nunc non potui: Solari te coner inſuper; ſed vereor, ne ſic ad animum tibi revocans caſum triſtiſſimum, irritem potius vulnus, adeò recens. Quicquid ſit, ferendum tamen eſſe denique æquo animo, quod infectum reddi nequit, Magiſtri ſapientiæ, tibi haudquaquam ignoti, docere nos ſolent. Deum rogo, ut mœrorem hunc tuum, & honoratiſſimæ domus tuæ totius compenſare aliàs gaudiis, ac felicitate hic & æternum dignetur.

Harlemi, xxxi. Jan.
MDC XXXIII.

Cl. D.V. Servus,

Bartoldus Nihufius.

CCLIX.

Literæ tuæ, quibus diem non adſcripſeras, Vir clariffime, heri demum mihi traditæ. Narras caſum vere triſtem & deplorandum filia majoris tuæ, in quâ, præter pietatem ac virtutes jam cæteras alia tot tam præclara currebant. Ego, uxor librique indoluimus ex animo, ac vix lacrymas tenuimus, qui paternum & maternum ipſi quoque affectum gerimus. Ac tu quidem, ut Vir plenus Chriſtianâ ſapientiâ, ideoque animo ad quævis firmo conſolatione haud eges; verum mater pro infirmitate ſexus & teneriore animo quin diſcrucietur gravius fieri nullo modo poteſt. Sed oportet cogitare tot & tantis dotibus ornatam virginem quantas nullam in antiquitate tota, necdum noſtro iſto ſeculo habuiſſe, credi poteſt terræ quæ non capiebat tam illuſtre decus ſuum, Deum ereptum voluiſſe, & in coelo cui vere debatur collocatum. Ad negotium meum tranſeo. Video Typographum & iterum cunctatum eſſe; & propoſitum mutafſe. Utinam perſeveraret ſemel tandem & abſolverit inchoatum: ut id Regi ſereniſſimo ac Senatui exhibere poſt tam longam expectationem poſſim. Urge quaſo, quod te facere ſcio, virum: neque deſine compellare. Video præſationem quinque priorum Librorum, quæ eſt ad Regem, item alteram ad Lectorem, tum elenchum item Operum quæ priore iſto Tomo continentur, & effigiem quoque meam prætermiſſam. Haud ſperaverim, negligentia aut oblivione

oblivione factum sed dilatione tantum qua differri talia solent, & post cætera absoluta demum excudi. Ubi absolutus fuerit primus Tomus, quæso cures ad me mitti exemplaria viginti; quædam aliis meo nomine distribuito Leidæ & Hagæ amicis, quorum nomina scio me in literis superioribus perscripsisse: imprimis verò, quod vel me tacente debes, tibi unum retineto. Filio tuo Isaaco quantas possum gratias ago pro Asconio: etiam tibi qui mittendi illi auctor. Vivite ac Valete omnes, tu Uxor Liberique, & salвете à me, mea, atque meis interiore animo quem addictum vobis universis scitis.

Rapim, Soræ ad
diem xxi. Maii.
cIo Ioc xxxviii.

Tuus ac tuorum

constanti Affectu,

Joannes Meursius.

CCLX.

Vir Nobilissime & Amicissime,

BInas tuas quas dedisti xxvi. die Martii item xvi. Maii recte accepi. Doleo sane vehementer, quod Historica mea opera Blaviis non acceperis. Petenda tibi sunt per communem amicum virum Gerardum Vossium quem rogarem ut exemplar ad te mitteret, idque nunc effectum spero. Cum acceperis oriumque ad legendum nactus eris, ut de eo judicare ne graveris etiam atque etiam velim. Quando verò tres priores Libros meos de familiæ Oldenburgicæ primis Regibus placuisse tibi memini, etiam istos minime displicituros esse, spero. Certe optem: nam abs te probari eos magni fecerim, qui iudicium tuum æstimo. Bonifacii constantem affectum planè osculor, amo virum, æstimoque quantum quisquam seu insigne Italiæ suæ ornamentum: cuperemque operis mei itidem exemplar mittere, si id commodè fieri posset. In Cunæi morte indolui. Magnam Academiæ jacturam fecit, & amicum ego amisi non è multis. Ipse quoque per hanc hyemem pessimè habui. Vexabat Nephritis, ut excernerem calculos plures: accedebat novum ulcus quod per totum quadrimestre sanguine, & pure manavit: etiam tertiana febris eaque duplex: insuper magna lassitudo, dejectio virium & appetitus. Sed nunc Dei Opt. Max. singulari beneficio omnia hæc mala evasi; is me porro quamdiu videbitur

servet sanum, ut inservire ipsi etiam ultra possim in vocatione meâ, ac cætera vita. Idem tibi ex animo precor & in eo voto finio. Uxor mea Liberique tibi, tuæ, atque tuis officiosè se commendant.

Soræ ad diem xxix. Tui observantissimus,
Maii. cIo Ioc xxxix.

Joannes Meursius.

Si exemplar commode ad Bonifacium mitti posse existimabis, pete à Vossio illud ut ad te transmittat quod Cunæo jam defuncto destinaveram.

CCLXI.

Clarissimo, & Celeberrimo Viro D. Gerardo Jo. Vossio, Historiarum Professori dignissimo S. P.

Amstelodamum.

Cl. Doctiss. & Celeber. Vir, amice Coniunctissime.

NON possum, nec debeo, nostrum Heilerfigium ad vos abeuntem dimittere, sine literis meis. Quamvis enim talis sit, qui meos sensus norit, & quomodo erga te & tuos sim affectus, testari possit; nolui tamen id ejus verbis committere, sine speciali Syngrapha. Non libenter obductam familiæ tuæ cicatricem refrico: id tamen coram Deo, apud te debeo profiteri, vulnus illud tuum, me graviter affecisse, & mali non ignarum, tibi & lectissimæ uxori tuæ, unâ cum mea, seriò condoluisse; sed qui te novi non Philosophiâ tantum, sed Christiana etiam sententia, & opera, non dubitavi quin consilio Dei acquiesceres, & manum ejus osculareris, vel percutientem. Id te fecisse & forti animo casum hunc tulisse, significavit nuper mihi amicus noster, nobiliss. Salmasius, qui hic aliquot dies, sui nobis usuram fecit, totus in Ufuris describendis, & distinguendis, in quibus tale specimen edidit omnigenæ eruditionis, & diffusissimæ lectionis, ut qui, nonnullorum arte secus de eo senserant, nihil vulgare deinceps à tali ingenio expectent: in quo nec tu falsus fuisti, nec pro eo qui est in te candore, unquam dissimulasti, quam tibi displicerent sequiora illorum iudicia, qui ei raram & exquisitam eruditionem derogarent. Quantum tibi deferat, testis esse possum, ex iis quos unâ de te contulimus sermonibus, in quibus id

interea enumerabat, quæ sibi infelicia accidissent, quod eo tempore Leidam venisset, quo Clariss. Vossius emigraverat, cujus communicatione & confortio frueretur. Sed ita Deus sedes, & habitationes nostras determinat, ut nullibi simus, ubi nobis nihil sit desiderandum, donec sedes illas incolamus, in quibus Deus est, omnia in omnibus. Ei te, tuosque omnes, ex animo commendo; & reliqua de quibus apud te libenter garrirem, nostro Heilefigio committo, teque cum tuis, à me, & mea, salvere, plurimum cupio.

Haga-Comitis. Pons ut suus omni
strid. Kal. April.
C1515C XXXVIII.

Studio & affectu,

Andreas Rivetus.

Novi, quam benè velis affini meo Molinæo, ideo existimavi tibi gratissimum fore, si significem eum adhuc athleticè valere, Dei beneficio, quamvis septuagenarius sit, & auctum esse numerosâ prole, superstitibus ex secunda uxore, quinque liberis impuberibus. Addam Samuelem Petitem, qui tibi ex scriptis notus est, conditionem à Franeckerensibus oblatam, in locum Bogermanni acceptasse, & venturum proximo Augusto.

CCLXII.

Extrait de la Lettre envoyée à Monsieur Vossius, par Freinshemius, en date 11. Julii. Juliani 1638.

TAcito, ipse ut spero, locum aliquem adsignabis in Bibliotheca tua. Tum cum libebit introspicere, infinitum devincies homines tui studiosos; si quæ minus rectè vel commodè se habent, annotes, atque moneas. Est enim præ manibus alia major editio, quam multorum annorum opere, atque labore paratis subsidiis, tendimus fieri ornatissimam. Institutum nostrum probavimus, & alibi viris magnis, quorum ille Grotius jam misit aliquot, suspicionum, atque emendationum, in Authorem paginas: eas nos inferemus locis suis, cum fide, & gratitudine. Non dubitamus autem, quin tibi, dum scriptorem istum tractas, egregia notarum ejusmodi, messis succreverit. Ad quam annonam dividendam, si nobis dispensatoribus uti placet, aliqua fortè peccabimus,

per imperitiam, aut levem aliquam culpam, sed tamen dolus aberit. Idem te rogatum puta de Curtio. Quamquam enim ejus Notæ, jam aliquatenus sint progressæ, ut vides ex pagellis, quas censura tuæ subjecio, multa tamen adhuc inferi poterunt sequentibus: sed & indici, cui, ut poteris animadvertere, multa reservantur, quæ vulgo commentariis adsparguntur: ne dicam omiſsa posse subijci etiam absoluto jam operi. Eum Authorem edo, sumptibus Viri Nobilis, atque docti, Joachimi Wicfortii, civis vestri. Utque jam sentias, quam obnoxia sit excellens humanitas impudentibus desideriis, audeo rogare, ut fasciculum ei inscriptum, reddi cures; mercedem quæ expendenda erit, ipse libenter, aut solvet, aut restituet; molestiam non conciliarem tibi, si certam aliquam occasionem nosses, quâ admittendas ei literas uti liceret. Est & alia causa, quam, & ipsam non dissimulo: ut nimirum viro illi, qui fortassis, oblata hac occasione, consilio tuo uti cupiet, suadeas quod ad Authorem eum rectè atque ordine perornandum pertinere, arbitraberis. Atque ut summatim instituti nostri ordinem teneas, post notas has, subijcietur ipsa Curtii Historia; capitibus, atque versiculis, distincta, cum adnotatione, similium locorum, ad Taciti ferè formam. Inde priorum Librorum qui perierunt vicem scribam, stylo, atque genio, quantum poterit Curtiano: quem interjecto tempore, tum occasione notarum penitus meditor, & inter ipsam textus editionem sæpius relego, aliquanto familiarem mihi reddere potero. Totum opus Index finiet, quem præcedet variarum Lectionum Libellus. Ad decus simul, & explicationem locorum aliquot illustrium, accedunt rerum variarum simulacra, Typis æneis expressa. Ita hanc editionem censemus fore omnibus aliis, quæ quidem hætenus processerunt, longè ornatiorem, locupletiolem, commodiorem, atque utiliolem. Sunt autem quæ obſtare possent ex mole operis, (nam si ita pergamus, duo volumina implebit) sumptuum gravitas, & mora paulò longior. Cum enim id nobis in votis sit, ut edere possimus hos Authores, ad usum hominum quam accommodatissimos: semper conamur ut quicquid ab aliis in eos observatum est, si tamen aliquid momenti adferre judicamus, suo loco, atque ordine inferamus, idque quo longius sit ab invidia, ipsius ferè Authoris verbis. Jam autem scripserunt in Curtium; Popma, Loccenius, Acidalius, Glareanus,

nus, Modius, sed verbosissime Raderus, cujus ex prolixis commentariis, quamquam recido, (ut ex ipsa collatione, cum vacabit, cognosces) quantum possum; non tamen evado, quin magna accessione, Notas meas onerem. Tamen si Wicfortio nimis prolixum fore videbitur id opus, reliqua, dum tempori monear, impensius detumere jubebo.

CCLXIII.

Gerhardo Joanni Vossio τῷ πάντῃ
Johannes Fredericus Gronovius
Salutem & observantiam.

Luctus ille vester, Vir maxime, tristissimus, & inopinatus, omnes quidem ubi auditus est, mirificè affecit, me verò prorsus exanimavit. Quare etsi magnoperè cupiebam, quia non voce possem, & planctu, literis saltem, adesse complorationi vestræ: tamen adhuc five me, five te respicerem, refugit animus, nec huic scriptioni vacare permisit. Sciebam φιλόστοργον & φιλόφρονον te esse, & in acerbissimo hoc vulnere, veterem cicatricem rescindi. Sciebam amisisse te puellam obsequentissimam, probatissimam suis, quæ simulacrum erat paternæ maternæque virtutis, ingenii, morum: unde dulcis illa spes nepotum proximior, & hoc avidior. Nec leto tristius leti genus ignorabam venisse ante diem, haut fato, ut veteres loquebantur. Quare ausus non sum admonere te, dum

— *Stat pectore demens luctus,
Et admoto latrant præcordia tactu.*

Nunc tandem Religio mihi officio deesse diutius: & parandum fuit alloquium, five mavis, lacrymæ cum amici, quem Parentis instar veneror, cujus liberos amore, & studiis ut æquales, fratres, sorores, ingenio, doctrina, & spe, ut majores amplector, lacrymis miscendæ. Cur tamen lacrymæ modo? Vir es magnus, bonus, Christianus, in hac palæstra, qua Deus ascetas suos castigat, ab ineunte ævo exercitatissimus: ad hæc venerabilibus annis, & multa hujuscemodi exempla legisti, vidisti, cognovisti. Quare non debes aptare tibi vulgaria ista, quibus exulceratæ mentes, ad sanitatem revocantur; sed ab ipso casu sumere animos, & ab iis quæ maximè cruciant, & faciem subdunt

dolori, petere solatia. Nam quoniam amas illum, qui se vult solum amari, qui jubet Parentibus, conjugibus, liberis, dicere, non novi vos; imo odi vos; quoniam non vulgarem in modum, ipse ab illo Zelote amaris; non debes mirari, si ea eripit tibi, quæ inter carissima etiam bene compositis affectibus reputantur, quæ aliqua parte amorem tuum, qui sursum vocatur, terræ alligabant. Nec enim parvo constat, mortalibus vera sapientia, aut amor summi boni, sine magnis documentis habetur. Quod verò præmisisti imaginem tuam, virginem, unicum pietatis, pudicitiae, modestæ elegantiae exemplar, quid aliud est, quam petiisse à te Deum has suorum munerum primitias, quasi in sacrificium, quantum humanitas provideri poterat, mundum, sanctum, inviolatum, purgatum, & regnitum agni immaculati sanguine: quod velut sponsor, & vas esset aliquis, secutura olim tuæ in eadem beata loca professionis. In quo, quod tibi, spei tuæ, mundo ereptum, id servatori ejus, & castissimo Cœlitum choro acquisitum est. Ipsa vero sors mortis, seu ut magis ex formula sacramenti nostri loquar, ipse commeatus, quo summus ei arbiter hujus militiae vacationem dedit, est ille quidem illatabilis, lugubris, & præfestinus, si hominem roges; nequaquam verò deplorandus, si roges eum, vel ipsam potius, quæ semper ita se gessit, ut eam modo horam felicem arbitraretur, ut huc solum adspiraret. Quid enim luctuosum, per quod ad lætitiā solidam transitur? ad peccati immunitatem, quod solum illatabile, flebile, miserum in nobis? Neque tamen metum, aut cruciatum, aut tabem lentam, vivi sepulturam cadaveris, non mortem denique ipsam sensit: sed uno ictu, levi corporis vulnere, momento aternam animæ sanitatem redemit, & spiritum semper in hoc paratum, non flens, repugnans, vix appellata Creatori suo reddidit. Quomodo autem præpropere, & ante diem, (ut pueriliter, & stultè Pagani loquebantur) venit, quod ad voluntatem Dei, & mandatum, & præstitutum rebus volvendis, ordinem evenit? Vivit ergo illa purissima, & beata anima, pulchri corporis aliquandiu hospes, & tuum amorem ab se, ad id quod solum amabile est, revocat; jamque haud dubium amplius curæ vestræ testimonium, coram omnibus sanctis perhibet, quod à Deo acceptos, Deo servetis, veri οἰκονόμοι καὶ χειριστὰς αὐτῶν data in antecessum, & supposita pignori futura vestrae ascen-

ascensionis, abiit non invita, non imparrata, non gemens, & tum cum cito absolutis stipendiis evocata, missionem meruit. Nihil ergo hic lugendum; sed adoranda voluntas *τῆς ἐν ὑψίστοις*, quæ cum tot præstantium pignorum tibi numerum largita sit, eam tecum rationem duxit, ut fecunditatem, felicitatemque conjugii tui, inter cælum, & terram partireris. Omitto nunc de incerto humanarum rerum, de varietate discriminum, & ipsius bonæ fortunæ insidiis, de conditione communi: omitto omnia illa, quæ ex literis *ἡμῶν*, contra jacturas tales, præfidia comparantur. Nempe has cum unus optimè omnium calleas, semper tamen facras habuisti potiores, & hinc demùm salubria *ἐδίδαξας*. Nec ignoro omnium horum te quoque meminisse; sed quia loquax res dolor est, videtur, & hanc solatiis necessitatem imponere, ut similiter sint, & sæpe nota nimis repetant. Deus Opt. Max. animum tuum erigat, honorandum senium vegeter, & quod censei queat, abruptum Liberorum tuorum, qui præiverunt, annis id in tuis, in gravissimæ Matronæ tuæ, in fratrum, & fororis superstitum augeat. Vale Vir *Σελασπιότατι* & hoc officium meum, ut à pietate profectum interpretare.

Hagæ-Comitis, Idib. Februar. Anno
c15 l3c xxxviii.

Grafwinkeliu*s* *ὁ πρῶτος*, & egregius Heilerfichius, salutant te officiosè, dolent cum dolente, & in mei alloqui cupiunt venire partem. Inclusas, ni grave est, jubebis ad Hardervicenos Nautas deferri.

CCLXIV.

Clarissimo Viro, Gerhardo Johanni
Vossio, Professori Celeberrimo.

Vir Clarissime,

EA mea felicitas fuit, ut quantum apud te possem, non rarò etiam in amicis meis experirer. Quos cum ea comitate excipias, qua me soles, illi, quod tuæ humanitatis est, mecum beneficium interpretantur. Utrum hujusmodi homines errent, an verò rectè sentiant, id explorare, quæ mea ambitio est, non lubet. Si quis tamen hodie vivit, quem amari à te valde velim, is omnino est Jacobus

Seertlingius, qui has tibi tradit. Is in eadem mecum urbe natus, hic apud Ubios ita mecum vixit, ut nihil possit dici conjunctius. Unus sanè fuit, qui agritudinem animi mei leniret, & hoc in loco molestissimo, vivendi tedium suavi contubernio solaretur. Cum enim omnes in hac civitate, magis fatui sint, quàm fabrorum betæ, idque ab ineunte ætate addiscant, ut crasse & loquantur, & sentiant, nitorem omnem, à verbis pariter, & judicio arceant: apud hunc unicum, cordatè sapere licuit. Adderem alia, sed nescio, quomodo hominis familiaris, semper suspectæ laudes sunt. Nosti invisum morem quorundam, qui alios Alcæos faciunt, ut ipsi Mimnermi videantur. Unum dicam; justæ sanæque indolis est, & rectè judicat. Quod in omni laude palmarium esse, tu me sæpe, Vir Optime, & Candidissime, docuisti. Excute solum, in manus sume, attrecta, & miraberis ineptam sollicitudinem meam, qui aliunde causas, cur Seertlingium ames, conferam, cum ipse domi plures habeat. Vir incomparabilis, felicissimè Vale.

Coloniæ Agrippinæ
Propriæ, Kal. Apr. An.
c15 l3c xxxviii.

Tuus ex affe,

Vincentius Fabricius.

CCLXV.

Clarissimo Viro, D. Gerhardo Joan.
Vossio, Eloquentiæ & Historiæ Pro-
fessori Celeberrimo.

DE obitu filix tuæ, Vir Excellentissime, & summe, virginis ornatissimæ, sex Linguarum peritæ, aliisque virtutibus supra sexum, & ætatem suam condecoratæ, mihi renuntiatum est. Quem ego casum familiæ tuæ, non sine maximo dolore, ac *συμπυθῆς*, accepi. Digna enim illa erat, quæ Parentibus honoratissimis gaudium pareret, & familiam augetet. Verum supremo Imperatori aliter visum, qui eam jussit subito, à statione sua discedere, ne seculi plures molestias devorare nobiscum cogeretur, qui in horas cupimus dissolvi & esse cum Christo. Eapropter sancto pectusculo, ne sanè felicitatem invidemus; sed illud processisse in locum omnibus piis communem, in quem seriùs, ocius sequemur, omnino statuamus. Uxorem lectissimam, cum filio pristinam valetudinem jampridem recu-

recuperasse spero, quam utrique, tecum firmam, & perpetuam, ex animo precor. Pro Theſium tuarum Theologicarum Theſauro, mihi dono dato, immortales ago gratias; pro quibus licet *ισοππων*, dare nequeam; tamen quasdam meas olim in Auguſtanam Confeſſionem, à me diſputatas mitto, quas tanquam ſignum nexus mei, in quodam Bibliothecæ tuæ angulo reponere, ſiquidem id mereantur, haud graveris. Qui verò harum lator eſt, juvenis eſt Linguarum Orientalium amantiſſimus; qui jam in Græcis, Hebraicis, Chaldaicis, & Syriacis, mediocriter profecit; ac Rabbinos legere cœpit. Quæ de cauſa etiam tibi ſiſti voluit, ut auctoritate tua Linguarum Profeſſoribus, in Academia Leidenſi, D. D. L'Empereur, D. Golio, & D. Ludovico de Dieu, commendatus, in penetralia Orientis, ſeſe facilius ingerere; & Arabicæ cum primis Linguae notiſſimæ ſibi, tantis Ducibus, atque Magiſtris, comparare poſſit. Quod illius propoſitum non potui non probare, & illius amore, hanc tibi faceſſere moleſtiam. Des hoc, amabo te, amicitiae noſtræ, quod toties, tamque audacter, ſanctiſſima tua ſtudia interpello. Antequam claudam, de ſycophantarum quorundam morſibus, apud te queri cogor, qui ſyn-tagma meum, clam & palam, inceſſunt tanquam Photinianum, & Socinianum, à quorum hominum erroribus ita abhorreo, ut à veneno præſentiſſimo Chriſtianæ Religionis. Calumniæ Author eſt Flockenius, diſcipulis quidam olim meus, quem tibi; Vir ſumme, & Polyandro noſtro unicè commendaveram, quem me propter variè ornatiſtis, juviſtis. Is, is hanc mihi nunc rependit gratiam. Sed Deus qui innocentiae meae teſtis eſt, veritati patrocina-bitur, & vitiligatores confundet. Ignoſce, quod hanc animi mei ægritudinem, in ſinum tuum effundere audeo; & cum charis tuis longum, ac benè vale, & ſalve.

Dat. Bremæ Anno.
c1o1ocxxxviii.
18. April. juxta ve-
terem formulam.

Excellentiæ tuæ

Devotiſſimus,

Ludovicus Crocius.

CCLXVI.

*Reverendo, & Maximo Viro, Gerhardo
Jo. Voſſio, Canonico Cantuarienſi
Salutem & obſervantiam.*

Vir Maxime,

Quam prolixè nuperam tuam, tuæque domus benignitatem interpreter, quodque grates debere velim tibi præſenti, ſignificare paucis literis, ſi cupiam, nihil agam aliud, quàm ut infantiae meae quarum exemplum. Animus meus, qui ſi tibi notus non eſſet, nec tanta me eſſes gratia dignatus, æternum meminerit. Nunc ut ad te ſcriberem, non tam factum eſt, quod tua ſtudia, & arctum otium morari neceſſe ſit, quàm uti ſatisfaciam petitioni ejus, qui has fort; quod etſi faciam lubentiſſimè, tamen quia meae erga te obſervantiae potiore ſemper rationem ducō, in ejuſmodi officiis, præmiū me ferre exiſtimo urbanæ frontis. Illi ergo, nomen Joannes Cornerus; juvenis eſt, & doctrina, & omni virtutum genere cumulatiffimus, ex diſciplina optimi, & eruditiffimi Berneggeri. Venit in has regiones comes, cujuſdam genere, & dignitate Comitum, ut ſtudia ejus ordinaret: cæterum quoniam iſte, neſcio quo animi morbo, nihil minus curat, quàm ſtudia, & militiae ſe dedit, prorsus inhonestiſſimè haecenus ab illo, Cornerus noſter habitus eſt. Eo magis, quod eum domo longè abſentem norit, vix alias rationes inire poſſe, ut foedum ſervitium eſſugiat. Illaque ergo ei præcipua cauſa ſalutandi tui fuerit; ut quem virum ex fama, & ſcriptis veneratur ut qui maximè, ejus videndi honorem habeat: tamen & ſic petiit ſtudia ſua commendari, ut ſic ubi locare eum poſſes, ubi inſervire aliis, & illa ſua ſtudia promovere poſſet, velis hominis fortuna meliore digni memor eſſe. Scimus autem iſtiusmodi occaſiones, ſæpè ad te deferri. Hoc promitto tibi, nunquam fore, ſi tale quid evenit, ut te hujus commendationis poenitere poſſit. Talem ſe, opinor, probabit ipſe tibi. Nam mihi quoque gratiſſimum fieri hoc pactum, adjungere non audeo, qui tantos fructus, benevolentiae tuae percepi, ut majores à nemine optare poſſim. Vale.

Tuae Dignitatis Obſervantiſſimus,

Johannes Freder. Gronovius.

Hagæ ad diem iiii. Eid. April. An. c1o1ocxxxviii.

Hoc

Hoc quoque scito; Satageus ille Ultrajectinus, de quo narraveram tibi; scripsit Epistolam furiosam ad τὸν πρῶτον Theologum, qui hic in aula agit: in qua ineptissime judicat, de nupero scripto Salmasii, à se, ut ipse fatetur nondum visi. Rogat ut persuadeat summo Viro, ne dedignetur opinionem suam, aut revocare, aut valde mollire in secunda parte: quod ni fiat, minatur ab omnibus J. C. & Demagogis, velut signo dato scripta in contrarium. Nicol. Heinsius nuper hic fuit, & valde conquestus est de silentio Isaaci tui. Eum saluto, & gravissimam matronam tuam, filiosque & filiam, mera parentum vota, & gaudia. Iterum vale. Scripsi raptissime expectante latore.

CCLXVII.

*Clarissimo, Doctissimoque Viro Domino
Gerhardo Johanni Vossio, Fautori
meo.*

Clarissime Vir, Fautor, & Amice, fidelissimâ gratiâ
Conjunctissime,

Saxonem meum Grammaticum, nil nisi faventem expectare Typographum, ultimis ad te Literis meis significavi, quas Mercatori cuidam nostrati, ad vos proficiscenti, superioris anni Autumno, me dedisse memini. Vehementer scire discupio, num apud vos reperiat propitius, & velut è machinâ Jupiter, qui florentissimi hujus scriptoris, editionem in se suscipere dignetur. Cujus rei te diligentem spero indagatorem fore, imò suaforem, & impulsorem. Et si quid tuâ ope, atque consilio efficere poteris, quæso te, per hunc ipsum internuntium certior me facias. Interea verò dum latâ spe solor, atque sustento animum meum, sententias quasdam, ex Quintiliani institutionibus Oratoriis excerptas, ad te transmittito: enixè abs te contendens, ut si bono publico id fieri posse existimes, Typographo alicui des quamprimum imprimendas. Ego laboris nullam postulo mercedem aliam quàm viginti, aut summum triginta exemplaria. Perverlim autem typis nitidissimis, & quidem majusculis, quicquid hoc est oppellæ, prodeat & formâ portabili; quâ ferè solent lucem aspicere hæc studiorum minutia. Imprimis te per amicitiam nostram oro, atque obsecro, ut totum hunc libellum, à capite ad calcem sedulò perlegas, videas-

que ne quid sit, quod existimationem meam lædat, aut nomini meo maculam aspergat: & simul des operam, ut voto nostro satisfiat, hoc est, ut præsens hic Tabellarius, propediem οὐν δὲ, redux, ad nos aliquot exemplaria referat. Hac in parte, rem feceris mihi longè gratissimam, quam ego vicissim, omni studiorum genere demereri conabor. Tractatum tuum de Idololatriæ origine, juxta ac filii tui Scylacem, & Velleium Paterculum, avidè desidero. Vale, Vir præstantissimi Belgii decus, deliciæ Musarum, & me solito amore, ac favore prosequere.

*Soræ a. d. xiv. Maii, Observantissimus tui,
clo Io c xxxviii.*

Steph. Johan. Stephanus.

CCLXVIII.

Gerardo Johanni Vossio, Excellentissimo Viro, Steph. Joh. Steph. S. P. D.

Clarissime Vir, corculum Musarum, deliciæ & decus Reipublicæ Literariæ.

Literas tuas Amstelodami xvi. Calend. Aprilis scriptas, tandem accepi, ad diem Maii xx. stylo vetere. Eas statim ad os & pectus appressi; cum intimo voto, ut te tam charum mihi caput, eundem in modum complecti possem. Nullum sanè verbum, in istis literis fuit, non plenum humanitatis, officii, benevolentia. Et non fine summa voluptate sentio vivere, etiamnum in animo tuo, scintillas veteris erga me amoris tui: quas utinam nulla unquam extinguat dies! Quod me attinet, non possum non tam impensè amantem me redamare, quamdiu animâ spirabo meâ. Summo equidem honori mihi erit, & apud vivos & posteros, innotuisse me tanto viro, cui divina scripta æternam circumdederunt famam. Affectus quoque tui, luculentum hoc est indicium, quod Saxonis mei editionem, tam esse tibi curæ, & cordi esse patiaris; quâ tamen nunc ego te libero sollicitudine. Generosus etenim Præses noster, cui Deus æternum benedicat, sumptus se hanc in rem liberaliter suppeditaturum promisit. Itaque propediem ferrum ejus, quod dicitur, in igne erit, præloque committam, ut primum chartæ tantum comparaverit sibi Typographus, quantum toti operi excudendo sufficiat. Utinam felicitibus pro-

deat

deat auspiciis! Fiduciâ etiam amicitia nostrâ, nuper ad te transmissi, Florilegium Sententiarum M. Fabii Quintiliani, quas ut Elzevirius, vel La Maire tuo, excudendas, maturè tradas, si modò digna sunt istâ minutia, quæ lucem aspiciant, omnibus abs te precibus contendo. Si tergiversentur illi, quomodo vix mihi persuadeo, aedum per Laurembergicum nostrum Autographum meum restituas. Tractatum tuum de Historicis Latinis, juxta ac Institutiones Grammaticas, quæso te, ornatâ veste munitas Bibliotheca meâ, quæ avidè eos libros desiderat, transcribas. Rara etenim hic prostant exemplaria; Sed vide hominem exanguis frontis! Si pecco, fiduciâ amicitia nostrâ pecco. Librum tuum de Idololatriæ origine, adhuc sub prælo sudare intellexi, ex literis tuis, ad Cl. Dom. Meursium, Collegam meum dilectissimum. Ubi Lucem viderit, unâ cum Scylace & Velleio Paterculo, filiorum tuorum, mecum etiam exemplar communices, etiam atque etiam rogo. De obitu filia tua dulcissima, vel potius de funesto illo, quo periit, casu, posteaquam mihi renunciatum est, sanè quàm pro eo ac debui, graviter molestèque tuli; sed patienter ferendum est quod mutari non potest, & imprimis divinæ voluntati acquiescendum. Ego huic rei diutius immorari nolo, ne refricem dolorem tuum, & domesticum vulnus, sat inopinatum. Pauca hæc volante calamo exaranda duxi, ne ἀνέμω & planè ad vos veniret Collega noster suavissimus D. Laurembergius. Amicissimam salutem ascribo uxori tuæ, & filiis.

Soræ, ad diem
xxiv. Maii. Ity-
lo vet. 1638.

Tui observantissimus,

Steph. Johan. Stephanius.

CCLXIX.

Viro Maximo, Gerhardo Joanni Voffio, Johannes Fredericus Gronovius salutem & observantiam.

Post longum silentium, alloqui statui te, Vir clarissime, non quasi de observantia mea, sine isto officii genere, minus certum te arbitrarer: sed quia post aliquot dierum nimiam contentionem, ociari hodie, & salutare amicos constitueram. Scelus esset me ex consuetudine tua filendi, de sanctissimo verissimoque amore tuo erga me malè suspicari: cujus ea

habeo, sensique *παινεῖσθαι*, ut five studia mea, five vitæ rationes inspiciam, tantum tibi acceptum feram, quanto nunquam paria tecum, aut cum tuis facere quivero. Nec de meo in te animo ambigere te posse puto, quin ingratissimum bipedum me esse existimes, quod in tam probos mores, tam simplex, & venerandum senium non cadit. De meis nunc studiis pauca: quæ quidem tota in civili jure occupantur, quando hoc urgebant cognati, & hanc mihi unicam anchoram restare providebam. Itaque libris tuis rarò, nec nisi ex intervallo utor: nec enim unquam adeo in istud mare immergar, ut dulcium ante omnia Musarum, quas tanta ambitione procatus sum obliviscar. Epistolarum Casauboni opus ipsum absolutum est; in appendice nunc hæremus, cui si per me staret, non per moras Typographi, jamdudum Colophonem addidissemus: cupio enim nimis molestissimo labore levare, quum immenso temporis dispendio, fructu præ lectoribus quibuscumque exiguo, gloria ut in alieno opere nulla, hætenus exantlavimus. Ad Meursium *τῷ πάλιν*, scripseram rogaveramque, ut à Casaubono ad se scriptas nobiscum communicaret. Eæ literæ missæ ad Cracovium Agentem Ordinum, integrum annum in Dania peregrinata, vix tandem ad destinatas manus pervenerunt. Interea cum tua comitate, Epistolas illas summi viri accepissemus, ante duos fere menses respondit Meursius, easdemque in fasciculum collectas, una misit. Egi igitur gratias illi, ut exemplar diatribæ Elzevirius, uti poterat, curandum Soram dedi. Sed quoniam horum quoque fides suspecta sit mihi (certè cum Brema ad Salmasium scripsissem, usus officio Bibliopolæ, qui meas ad illos miserat, responsum detinuerunt semestrem integrum, & detinuissent diutius, aut perdidissent, nisi ipse in has oras profectus poposcissem) hæc scripsi, & alia via, si potest, per Blauwium velim quamprimum mitti; idque ut per filiorum aliquem mihi effectum dares, rogare ausus sum. Reverendus Rivetus sub incude habet Apologiam pro beata Virgine, in duas tributam partes: quarum prior historiam, quatenus vera sciri potest, & commentitiam de vita ejus persequitur. Posterior de cultu ejus ager. Heilerfichius Burræ est cum Domina Principe, & illustrissimo Discipulo suo. Uxorem tuam, sanctissimam Matronam, & liberos omnes saluto officiosissime. Ad Isaacum scribam propediem. Est enim penes me Justinus, quem ille Peiraredo Comitem dederat,

A a

cum

cum foenore conjecturarum ejus. Vale,
Vir *Sicquid*, & me ama.

Hage, ad diem, Prid.
Calend. Sextil. Anno
c1o 1o cxxxviii.

CCLXX.

Clarissimo Viro Gerhardo Johanni Vossio S. P.

Vir Clarissime,

Curtium ad te mitto, & in eum meas notas, de quibus ut ingenuè fatear, judicium Poetæ in partes vocare liceat:

Sunt bona, sunt quædam mediocria, sunt mala plura,

Qui legis hæc, aliter non fit, amice, liber.

In re ardua, etiam citra operis effectiorem, honestus conatus, bonis haut improbari solet. Si Deus vitam & vires dederit, quod nunc minus limatum, ut iterata editio, (modo eam sperare liceat) ac dies posterior, prioris magister faciat, operam dabo. Libelli quidem mei indignè ab homine, cæterarum rerum omnium, nisi lucri incurioso habiti sunt, ita ut pudeat me editionis. Omnia scatent mendis. Et aliquem ex malignitate inseruisse credidissim, nisi hominis (Jacobum Marci à me significari scis) supinam negligentiam perspectam haberem. Altera editio *ad* *me*, emendatior & acutior prodibit. Ut autem summæ tuæ eruditioni semper asurgo, ita tuum de notis meis in Curtium expecto judicium, cui lubens acquiescam. Ut aliquid in Curtium commentarer, post alios, Superiorum iussa, & hujus loci juvenum desiderium urserunt; quorum etiam captui, non eruditus hæc scripsi. Quid tuæ Musæ, jam nobis parent, unice scire aveo. Si me responso dignaberis, harum lator Daniel Jonæ juvenis eruditus, ex fide curabit. Vale, virorum eruditissime, & me amare perge.

Upsalæ, a. d.
xvii. Augusti,
c1o 1o cxxxviii.

Tibi addictus,

Johannes Loccenius.

CCLXXI.

Admodum Reverendo Viro Gerhardo Vossio Ecclesiæ Cantuariensis Canonico, & Chronologiæ in Amstelred. Gymnasio Professori.

Clarissime Vir,

Non opinor excidisse tibi preces meas, quas pro amico meo, viro spectabili & summè erudito, nuper interposui, de Literis, ad Grotium incomparabilem, amicum tuum, tuo nomine perferendis. Arbitratur ille hac ratione, viam sibi muniri posse, ad amicitiam summi viri, qui præter mortales cæteros plurimum tibi defert. Nisi scirem memoriam tuam bene faciendi tenacissimam esse, plura conjungerem ad impetrandum ab humanitate tua hoc officium. Nam & de doctrina, & cæteris virtutibus familiaris mei, differerem aliqua, & quam nos ambos, tibi devincturus sis, ostenderem. Sed sufficit tui te promissi admonere, quod noles evanescere; quandoquidem deferere mores tuos non potes. Multum augebis beneficium tuum, Vir maxime, si id sine mora præstiteris. Cum enim itineris ratio ipsum festinare jubeat, omnia quæ tardare illud possunt noxia erunt. Felicitissimè vale, Vir incomparabilis, & meæ confidentiæ ignosce.

Ultrajecti 29.
Augusti, 1638.

Tuus omni studio,

Vincentius Fabricius.

CCLXXII.

Venerandissime Vir,

Si negligentiam officii mei excusare apud te cœpero, vereor ne rationes meæ omnes quæ te ab his illiteratissimis hætenus liberarunt, unica illa ratione maximorum tuorum erga me meritum vincantur. Quanquam enim fatear me pepercisse summis occupationibus, quibus dies noctesque jugiter obrueris; æquissimo dolori, cui ob amissam incomparabilem filiam parentis affectu indulges: non tamen debuissim te mea gratitudine, infinita hac cunctatione fraudare. Interea id tibi interposita fide spondere possum affectum gratamque memoriam quam stylo

stylo aut non expressi aut usquequaque non potui, animo verbisque hæcenus fuisse profectum, atque imposterum novis incrementis aucturum. Humanissima enim tua, triennii quasi, conversatio, liberrius ad tua omnia accessus, & quod maxime veneror, diligens eruditissimaque informatio, omnes gratitudinis species me excogitare experiri jubet. Ut si ego grata mentis tantum testimonium dare possem, quantum tu summi affectus, Apollineo tuo iudicio, quo me ut audio coram aliis ornas: Prædicarem me felicem quod condignas gratias referre scirem, quemadmodum te dignissimum qui ita multorum gratias mereare. Vulnus, clarissime Vir, quod tibi filix lætissimæ mors inflixit, & quidem variis nominibus nimis grave, hac epistola non refricarem, nisi & defunctæ magnæ virtutes & tuus amor à me quoque testem aliquem doloris exigent. Nam quemadmodum ipsa propter tot in ea virtutes, quibus omnibus notabilis atque exemplar erat, meritò à me laudari debet: ita tu privato nomine profecto mereris ut acerbissimum hunc casum tanquam immaturum in sinu tuo defleam. Sed quid ego tam gloriosam memoriam exili hac charta, quæ dignas laudes non capit, prosequar; cui si par essem maximum æternitatis monumentum vellem erigere? quid te in memoriam gravissimi luctus reducam, cui præstaret ut solatia adhiberem & tanto dolori paria? Reverentia mea erga mortuam hanc recordationem ejus expressit. Sublimis tuus animus tam sapientiæ præceptis quam altero domestico casu antea instructus mea solatia tanquam minora supprimit. Quineti- am domi præter tot egregios filios filiam solatio habes, ex qua id adhuc sperare potes quod gravissimus casus, humanus tamen tibi in altera præripuit, cui quoque ego opto, ut sorori virtutibus par, fato felicius sit. Porro quæ hucusque tuis tanquam meis exolvi, ea nunc verè meis dabo, quo si calculo tuo facta mea probaveris, persuadeam mihi nihil me egisse aut deinceps acturum cui non sua ratio constet. Vitam quam per annum quietam in patria vixi placuit tandem hac peregrinatione mutare, ut & studia hac velut cote acuantur, & ætas his laboribus ad majores præparetur. Post Angliam ubi jam trimestre transegi propediem Gallias invisam, & illis tuum Grotium; tuum malo dicere, quanquam & patriæ meæ sit, quia mihi de ejus benevolentia vestræ amicitia nomine promittam. Potes etiam tu data occasione tua commendatione eandem pro me parare:

si modo hac mea petitione tantum à te qui plura quoque soles amicis indulgere, possum impetrare. Ex Galliis dein quem locum meæ peregrinationi ulterius destinem certius cognosces, cum nihil tam flagranter cupiam quam habere te & consocium & rectorem eorum quæ à me laudabiliter suscipiantur. Postremum, Vir clarissime, tu ne desinas eadem constantia qua ego te venerari, tuo vicissim affectu me complecti, ne aut ego hoc desideratissimo paratoque amoris præmio frustrer, aut tu videaris meum cultum non putare tanti. Vale.

Tuus, tuique

*Lond. xx. Dec.
c10 DC xxxviii.*

observantissimus,

Laurentius Skytte.

CCLXXIII.

Affectus in te meus ex Arte Historica tua genitus, primævos emisit vagitus in Patria; nutritus est Romæ ex opere itidem tuo de Historicis Græcis; grandior demum factus est in Hispania ex altero quod in lucem dedisti de Historicis Latinis. Tandem nunc properat in sinum tuum, evolassetque antea, ut hoc quaecunque obsequii, & venerationis specimen præberet assiduis laboribus tuis, floridiori Doctrina, & eruditione multijuga refertis. Sed vacuis manibus non est ausus properare. At quamvis propria ad hoc temporis non possit afferre, aliena tibi tamen dare non reformidat: à præfationibus, quas ad Lectores summa humanitate, & modestia tua in vestibulo operis ejusdem de Historicis Latinis præfixisti, invitatus. Mitto tibi igitur quatuor antiquos Chronologos, scilicet Herempertum Longobardum, Lupum Protespatham, Anonymum Cassinensem, & Falconem Beneventanum ab Antonio Caracciolo Clerico Regulari Viro Ill. & omnibus numeris absoluto in lucem emissos: & Epitomen orientalis & occidentalis Bibliothecæ, hoc est, Elenchum Scriptorum ferè omnium, qui de novo Orbe historicè scripserunt usque ad annum MDCXXIX. Hispano Idiomate pro tempore consarcinatum ab Antonio de Leon excellentis ingenii Viro, & in rerum Indicarum notitia, eruditione magna ornato: quam plane præstat in multis quidem operibus, quæ si lucem aspicient, argumentorum, materiarumque novitate, ac excellentia, omni- bus

bus certe probabuntur, auctoritateq; apud omnes valebunt; ac ætatem nostram ornabunt profecto, Indicasque regiones, & res oculis omnium aperient. Sed ejus potissimum doctrina, & multijuga Lectio in Bibliotheca & de Scriptoribus Indiarum elucet; quæ adhuc inedita, ducenta & amplius folia complectitur. In ea enim quid egregie scriptum docet, quid falsè rejicit, quid apocryphe mōnet, & omnia demum in sani judicii sui tutrina expendit. Quod pariter egregie quidem, & peraccurate agit singulari ingenii acrimonia, Ibericorum Literatorum decus, & Amicorum suorum delictum V. C. Thomas Tomagus de Vargas Toletanus Historiographus Regius Castellæ, & Indiarum primarius in MS. Catalogo, propediem edendo, quem de Scriptoribus Hispanis materno idiomate exaravit.

Chronologi igitur prædicti, & qui in præcitata Epitome orientalis, & occidentalis Bibliothecæ (quique modo sint) recensentur, tui exercitus Latinorum Historicorum signa augere poterunt. Augebunt & ducenti ferè Historici Latini, & Græci aliqui, à me inter legendum observati, quos in schedas relatos habeo; tibi; eos polliceor, & dabo si Appendicem novam, vel secundam cogitas editionem. Quamq; multi, & major ferè eorum pars cum vestibus aliis, quàm propriis nominibus inducti, imò & omni alio prorsus, sive ornatu, sive notitia, etiam temporis in quo peculiariter florere, destituti. Ita enim extra proprium solum, imo in extraneo, jam Latinam Linguam non minus quam omnem aliam, quæ materna non sit minus amante, nudi, & vagantes sunt à me deprehenfi. Patriam, si post septennem peregrinationem quam ago cum Illustriss. & Reverendiss. D. D. Laurentio Campegio Senogallienfæ Episcopo, & Comite Sereniss. D. N. Domini Urbani Papæ VIII, & Sanctæ sedis Apostolicæ in his Hispaniarum Regnis cum potestate Legati de Latere Nuncio, cui à secretis famulantes undevigesimum jam annum calcamus, incolumiter nobis repetere D. O. M. concedet; fortunâ si non comptos, ac perornatos, saltem non adeo nudos eos tibi proferam, nec desperandum, comites alios sibi adscituros. Utinam & majores symbolas vigiliis tuis conferre valerem, non renuerem quidem; sed me summa hilaritate id facturum compertum habere potes. Is est amor in te meus; inque maxime proficiuos labores tuos de Republica Literaria, sed summo loco de Historica bene merentes,

cui facem addidisti diligentia, & eruditione tua, imo oculos efformasti. Utinam cætera opera tua, scilicet, Partitiones & Institutiones Oratorias; de Rhetoricis Græcis, itemque de Latinis, de Historicis antiquis; de Anonymis Vitarum Scriptoribus; & res gestas omnis ævi abs te digestas mihi videre contigisset; in omnibus summam doctrinam tuam contemplari mihi licuisset; & fortè symbolulas aliquas conferre non desperassem; id profecto minimè præteribo, si ullo unquam tempore ad manus meas devenient.

Vitam & miracula Sancti Demetrii Martyris Thessalonicensis Græciæ Procos. ego scripturus, ut habebis ex adjuncto folio typis dato, undeque monumenta ad opus conquiro. Inter cæteros autores, qui hucusque mihi in manus inciderunt, unus Demetrius est Chrysoloras, Thessalonicensis, ut conjicio ex Panegyrico ab eodem scripto, in magnum hunc Martyrem, ejusque unguentum. Sed quo tempore floruerit, quod summo opere noscere cupio, me latet adhuc. Septem alios reliquit Panegyricos, sive Homilias, ut ex codicibus Vaticano, & Regio in Bibliotheca Monasterii S. Laurentii in Elcuriali apparet; suntque de Transfiguratione D. N. Jesu, &c. De sancto ejus sepulchro; in sanctam Resurrectionem; in Annunciationem Deiparæ, & semper V. Mariæ; in Dormitionem ejus; de Domini nostri nativitate; & gratiarum actio ad sanctissimam Deiparam. In Regio autem codice additur alius sub nomine ipsius ad Pulicem, quem exscribendum curavi. Adde insuper Indicem Manuscriptorum Græcorum & Latinorum de Sancto prædicto apud me, vel re ipsa, vel notitia tenus existentium; teque perenixe rogo, ut si quid de Demetrio Chrysolora præfato innotuerit, & ubi cæteri qui desunt Autores reperiri possent; & an fortè aliquis istic in Græcis codicibus Bibliothecæ Theodori Doufæ, quos secum è Græcia advexit Georgius frater ejus latitet, mihi indicare ne graveris. Officia enim quæcunq; tua in his, summi beneficii loco adscribam. Spero equidem, ac consequar, ut te de me optime meritum esse jure lateris, officiaq; tua in hominem nullo non tempore memorem, gratiæque referendæ studiosum sentias.

Sanctæ Syncreticæ vitam quam Divus Athanasius Episcopus Alexandrinus scripsit, & Baronius in suis Annotationibus ad Martyrologium Romanum sub die v. Januarii, deperditum non sine gravi totius orbis Christiani jactura deplorabat, in tenebris

bris jacentem à blattis & tineis subtraxi, ac describendum curavi è Græco Codice Regio, adeo pervetusto, ut jure credatur annis mille senior, & forte ætatis ipsiusmet Autoris. Dignum Athanasio opus, & verè genuinum ejus, ut tu in Græcis eruditissimus spero cognosces. Et typus vitæ asceticæ, & norma ad perfectionis viam. Delituit hucusque sub nomine vitæ Sanctæ Theclæ. Titulus enim operis ejusdem corruptus erat, & in limine ejus, & in Indice Bibliothecæ Regiæ prædictæ, quem Guiljelmus Lindanus eques Ruremondensis legerat, & tali pacto de eo notitiam attulerat Baronio, qui postea ex iis in Annotationibus suis ad Martyrologium Romanum sub die xxiii. Septembris asseruit Divum Athanasium S. Theclæ vitam scripsisse, ut ad eandem vitam Sanctæ Syncliticæ fufius demonstro in Prolegomenis meis, quibus, & notis eam exorno, & propediem publici juris faciam. Folia communia quatuordecim Græcus textus complectitur, totidem Latine factus à Davide Colvillo Scoto, omnia denique erunt quadraginta plus minus. Onus eam excudendi si Typographus aliquis in se suscipere vellet, libenter illi traderem, si pecuniæ aliqua summam, & exemplarum certum numerum inter amicos dividendum conferat; quam tamen pecuniam non accipiam, sed tot libros quot eorum pretium conventæ summam implebit. De his si cum Typographo amico, sive Lugduni Batavorum, sive Amstelodami, sive alibi tractari posset, & scire quicquid in hoc certo stabilire liceret, me tibi devinctissimum fassurum pro comperto habeas. Iis enim intellectis quid expediet constituam. Fortè B. Antonii quoque vitam dabo, eodem Divo Athanasio Autore, & pristino genuinoq; nitore, ac splendore restitutum; unde nonnulla ei erepta & fraudata liquido constabit ex collatione ejusdem vitæ, quam David Hoeschelius è Codice Boico edidit anno M DC XI; cum quatuor antiquissimis exemplaribus Bibliothecæ Regiæ Monasterii prædicti, quorum unus non solum ætatis illius, sed peculiari ipsiusmet Athanasii scriptione, vel saltem ejus Amanuensis exaratus, ut piæ memoriæ Antonius Mauritius Monachus Hieronimyanus, eruditus, & cordatissimus vir, arctissimo necessitudinis vinculo mihi conjunctus, eidem Regiæ Bibliothecæ Præfectus, ac Monasterii prior, ex clarissim. spectatissimorumq; virorum in iis autoritate, opinabatur. Modestæ enim summæ B. Athanasii tribuitur, autoris nomen in inscriptione desiderari, cujus in aliis tribus

honorificentissimo sanctitatis titulo mentio habetur. Sed quia legi lib. 4. c. xiii. de Historicis Græcis, te in dubium revocare opus hoc genuinum esse B. Athanasii, ego (humanitate tua fretus, quod perenixè abs te flagito) desperare non audeo te probaturum mihi aperte, quibus sententia tua nitatur rationibus; ut si quando vita hæc per me edatur, ut dixi, eas producere possim, dum necessario mihi de his aliqua libanda erunt. Interim te etiam atque etiam oro, ut neminem atque me habere credas, vel firmioris in te animi, vel præclarioris in te benevolentia; quæ etiam ad præstantis ingenii adolescentem D. Matthæum, ceterosque filios tuos jam nunc prolatari incipit; eamque quibuscunque potero officiis, ac studiis illis semper probabo, & quia virtutibus illos perornatos audio, & quia tuos. Ratio enim hæc tantummodo ad illos per diligendos me semper alliceret; facietq; qui ab omnibus in oculis ferantur. Ea ornamentorum est præstantis animi tui vis; ea laborum, ac vigiliarum tuarum apud philaretos autoritas. Salvare igitur ipsos meo nomine jube, & cura, ut perpetuo eorum unicuique, ut tibi metipsi, me additissimum credant. D. O. M. tibi cum renati anni principio perennes, felicitates auspiciari, & ea possidenda, ac tenenda concedat; quæ tuo, familiæ tuæ, publicæ rei literariæ, & amicorum tuorum comodo, ornamento, & jucunditati, vitam tuam adeo incolumem, longævam, ac in utroque homine beatam efficiat, ut nulla magis. Ita optat, ita vovet intimo cordis affectu ex merito, & Justitia.

Mantua Carpe-
tanorum, v. Id.
Jan. MDCXXXIX.

Servus tuus studiosissimus,

Laurentius Coccus.

CCLXXIV.

Eximio Viro Gerhardo Joanni Vossio,
Historiarum Professore dignissimo.

Vir Incomparabilis,

Poematum meorum exemplar ad te mitto; ineptissimum libellum, & qui de authoris infelicitate prolixè testatur. Agnosces te, cum de rebus omnibus incorruptè, & divinum in modum, judicare soleas, de me saltem parùm accuratas hætenus sententias dixisse. Quæ enim ipse tecum sentire, aliisque magnificè de meis studiis

studiis promittere consuevisti, in hoc opusculo planè nulla apparent. Nunquam ineptè aestimare ingenia soles; utique, in me uno falsus es. Itaque opinor jam nolle, perfectam editionem, cujus me prope modum suppedere coepit; & jam te laboris sumpti, dum hætenus, maximò studio editionem promoveo, quemadmodum me consilii pœnitet. Sed memineris ad hebetudinem ingenii mei, accessisse, fortunæ vitæque varietatem. Quæ me tot annos hinc inde jactatum, & alia omnia diu potius conantem, si qui essent, ardoris poetici igniculos bona fide colligere vetuit. Diversis enim agitationibus dispersi, antequam solida aliqua flamma fieret, evanuerunt. Atque hoc quoque narratis amicis tuis, ut non tam in judicando deceptum, quam tantam meam calamitatem prospicere non potuisse sentiant. Animadverto quoque præterea, quam propè absim à peccato, qui aliqua opusculi parte, clarissimo nomini tuo inscripta, quasi vili quadam commissione, obsolescere te audio. Sed vulnerata jam causa, non alibi præsentius remedium, quam in incomparabili tua æquanimitate invenero. Vale, Vir maxime, & summam tuam benevolentiam mihi perpetuam esse patere.

Ultraj. x Kal.
Januar. Anni
cIo lOc xxxix.
Quem tibi &
clarissimæ familiæ tuæ, feliciter evenire opto, vo-
veoque.

Tui obsequentissimus,

Vincentius Fabricius.

CCLXXV.

Viro maximo Gerhardo Johan. Vossio,
Johannes Freder. Gronovius S. P. D.

EN tibi, Vir venerande, observationes nostras, hoc est, vitrea fracta, & somniorum interpretamenta. Quarum etsi ea est indoles, ut exerserit potius domo tua, & tot oculos, auresque eruditæ subterfugerent: tamen quia id posse desperant, veniunt ultrò, & plausum suum, sive benignus is sit, sive Eumolpianus, & solitus auspicantur. Adde quod bona pars muneris tui est, & luculentissimæ Bibliothecæ debetur: absque qua fuisset, nunquam ad eas, Kal' evap, aspirassemus. Si beneficium optimè intelligit, qui dedit, te ergo nemo verior arbiter, utrum nos prudenter an se-cus, eo sumus usi. Sane majore ingenio,

doctrinæque, ac ego homines, quales vel adolescentes tui, majora erueri potuissent. Neque tamen spernenda omnino sunt levia, & aliquam laudem nanciscitur, qui ea colligit, etiam ideo, quod illi se dignis intenti hæc lubentius prætereunt, certè non subtiliter consectantur. Vidisti olim aliquas; sed accessit nunc nova vestis, & descriptio tota immutata est; multa quoque superflua recisa: brevitati quippe in proponendis singulis studuimus, ut gratiam quæ ipsis deerat, ubertate, & copia mererentur. At non potuit abhiberi omnibus, ea meditationis, ut sic dicam, coctura, & maturitas, quam in nonnullis pro captu, & modulo nostro apparere putamus, cum præsertim liber tertius inopinanti, dum operæ exercentur, seligendus, & dirigendus fuerit. Hos morbos vitiaque, ex edito Edilium palam recte apud te pronuntio: ut siquidem indignum censeatur munus hoc quod offerretur tibi, sine fraude tamen ac simpliciter egisse videamur; si placuerit, id bonitati magis tuæ, quam ipsius merito acceptum feramus. Vale, ac salve, Vir maxime, cum gravissima Matrona, uxore tua, liberisque, & me amare perge.

Dabam Hagæ, a. d. xiii. Kal.
Feb. cIo lOc xxxix.

CCLXXVI.

Salutem in Christo.

Vir eximie,

BInas à te accepi Literas. Diu hæserunt apud me quasi mutum & nihil respondentem. Harum priores ad me datæ sunt pridie Kalend. Octob. 1637. Posteriores vero 12. Kalend. Augusti, 1638. Puderet me certe tanti silentii tali amico, nisi satis tibi nimium mihi nota essent intestina pericula (pene jam bella) quibus laboramus. Causa horum malorum è scandalo accepto, sed non dato, prorupit, sed cum gravi scandalo dato Religioni reformatæ, quæ apud multos Scotorum (in tenebris illiteratorum illiberaliter versantes) didicit contra Regem suum arma sumere & assumpta defendere. Spero meliora, sed vix habeo quod promittam.

Nolo particularia Literarum vestrarum examinare, non solum quia non datur otium, sed quia negotia cum tempore ut plurimum aut variantur aut finiantur. Præcipue

cupiè post tam longa intervalla, quibus necessitate pene cogente prorsus filii. Spero tamen uxorem tuam, è longo illo quem meministi morbo liberatam.

Quod verò nunc me impellit te Vir literatissime & otia tua si quæ habes interpellare hoc est: Voluit Rex serenissimus (i. e. apud me iussit) ut scripta quædam mea non tamen sub nomine meo tunc edita contra Fisherum Jesuitam iterum prelo & sub nomine proprio committerem. Interim scripsit contra illa mea Jesuita A. C. Fisherus ipse, an alius nescio. Multa impedierunt quo minus illi possem respondere; præcipuè verò multiplicitas negotiorum quibus quotide fatigatus & qualibet fere horulâ avocatus fui, me penitus ineptum reddidit huic operi. Sed institit Rex serenissimus; ego obtempero; & sine læsione octavi præcepti temporis quædam fragmenta furatus sum, & lucubrationes meas quales quales sint perfeci, & in lucem edidi. Noli te hoc ignorare, & libellum tibi misissem nisi quod Anglico idiomate conscriptum tibi prorsus inutilem fore putarem. Sed audio ita quibusdam hic placuisse, ut in se suscipiant è malo Anglico bonum Latinum facere, saltem quod ad Phrasin attinet. Nam aliter quid poterit à me jam sene & per annos totos duodecim ad minimum à libris literisque avulsus expectari. Quamprimum liber iste meus utcumque imperfectus Latine loqui didicerit, tibi exemplar mittam, & acerrimo iudicii tui acumini subdam, libentius à te amico auditorus in quibus erravi, quam ab inimicis apud quos utriusque factionis scio decretum esse non parere. Vivas, valeasque, & me, ut soles, ames, & contra malevolos Orationibus tuis quoties coram Altari Dei & Christi nostri sis devolutus, tutum præstes

*Dat. ex Ædib.
Lambethan. pri-
die Galen. Mart.
1639.*

Tibi tuisq; amicissimum,

W. Cant.

CCLXXVII.

*Excellentissimo Viro Ger. Jo. Vossio,
Stephanus Joh. Stephanus S. P. D.*

QUOD binis jam literis tuis nihil planè responsi loco reposuerim, veniam à te magis exposcere, quam excusationem aliquam, intermisso officio prætexere pa-

ratus sum. Imprimis tibi, maxime Viro-
rum, uberrimas debeo gratias, de singula-
ri diligentia tua, quam in Saxone meo ist-
hic edendo hætenus adhibuisse, te postre-
mis tuis significasti. Demirari satis nequeo,
quo facto fiat, quod florentissimus hic scri-
ptor, Typographorum vestrarium favorem,
quem tantopere ambiit, nondum exorare
potuerit: præsertim tua commendatione
accedente, quæ nihil non persuadere ipsis
merito debuisset. Hac itaque spe fallus,
ac fraudatus, consilium cepi, vel te ipso
suasore, & Authore, Magnates hujus regni
subinde sollicitare, ut honestum propo-
situm meum, suâ munificentia juvenet, ac
provehant. Quæ res etsi moram nonnul-
lam injicit expectationi, Doctorum viro-
rum, quorum in animis spem satis amplam,
de meis in tantum Historicum notis, ac
observationibus, jamdudum concitavi; pro-
derit tamen, plurimumque momenti ad-
fert, ad augenda, & accuratius expendenda,
conjectanea nostra, quæ nondum ultimam
receperunt manum. Florilegio meo
Fabiano quid contigerit, edoceas me ve-
lim. Si & hac in parte, operam suam mihi
denegaverint Typographi, fac ad me re-
deat, primâ quaque occasione. Meæ post-
hac lucubrationes, quas non paucas affe-
ctas habeo, longum, imo ultimum vale,
Belgio vestro, se dicturas cum indigna-
tione minantur. Opus tuum de Gentium
Theologia, & Christianorum Physiologia,
prorsus absolutum jam esse, ut nullus du-
bito, ita exemplum ejus avidè desidero.
Tuum est me voti damnare, fidemque tu-
am apud me liberare, quam antehac non
semel ultro dedisti. Cl. D. Meursius noster,
proh dolor! ad desperationem usq; Me-
dicorum decumbit. Stillicidio urinæ laborat,
quod plurimum puris admixtum ha-
bet. Ulcus in vesica enatum hariolantur.
Deus Opt. Max. pristinae sanitati restituat,
diuque nobis, incolumem, florentemque
servet optimum hunc virum, & de Re-
publica literariâ tam præclare meritum!
In quo voto finio, teque charum caput, di-
vinæ protectioni seriò commendatum sal-
vere jubeo, atque ex animo exopto. Offi-
ciosissimis te verbis ut resalutarem, roga-
runt virorum par incomparabile, D. D.
Christianus Matthias, & Johannes Laurem-
bergius; hic famâ eruditionis, & longâ fa-
miliaritate tibi notus, ille inter ornamen-
ta seculi numerandus, & recentioris tibi
amicitiæ vinculo conjunctus. Vale, decus
Belgii. De cætero, ut propensum illum
affectum in me tuum, quem tot tamque
luculentis indicis expertus sum, perpetu-
um,

um, atque constantem conserves rogo, atque obsecro.

Soræ, a. d. v. Mart.
cIo Ioc XXXIX.

Observantissimus tui,

Steph. Joh. Stephanus.

CCLXXVIII

Viro Celeberrimo D. GerharDO Joanni Vossio, Historiarum Professore S. P.

Amsterdam.

UT feliciter cum bono Deo ad meos redii; ea sedulo mecum ruminare cœpi, quæ & commissæ accepissem, & quorum me maximè recordari deceret. Tu, Vir Clarissime, tuæq; dicta, & facta, cum primis obveniebant. Nempe qui me humaniore benevolentia, te accepisset, vix meminisse quemquam poteram. Singula percernere nihil attinet. Hoc saltem profiteor, tantum tibi obstrictum me agnoscere; ut vehementer viribus meis diffidam, finne ullæ aliquando in me reperiendæ, quibus utcumque grati animi signum dare valeam. Si quas tamen Deus suffecerit, tibi tuisque libens, meritoque dico. Cæterum Clariss. nostris D. D. Buxtorfio, & Lucio, salutem tuo nomine diligenter (ut par erat) nuntiavi: quorum ille jamdudum aliquas tibi destinasse se, significabat. Isti autem alteri, maxima tecum communicandi, injecta est cupiditas. Itaque à me postulavit, te ut ipsius nomine peramanter, ac officiosè resalutarem. Tum quodnam tuum de Historia Ecclesiastica propositum rogarem. Narravi enim illi, quæ tecum de Centuriis Magdeburgensibus collocutus fuero. Inter alia; tibi hucusque latuisse, eas Basileæ, operâ ipsius D. Lucii, reculas, ac tribus Tomis distinctas prodiisse. Tibi item animi fuisse, tuis cum notis eandem emittere; postea eam curam certis de causis depoluisse. Porro, tibi etiam indicasse; ipsum D. Lucium, reliquas Centurias addere constituisse; meque ad hoc, quæ ex Antonini tertia parte haberi potuerint, excerpta illi tradidisse. Hortatus itaque me est, ut de hoc ipsius instituto denuo ad te scriberem; ac quodnam esset tuum ea de re consilium expeterem. Nam seculum illud decimum quartum, in quo desiere Centuriatores, adeo jejunum à nobis deprehensum est, ut post Occam, vix secundum inveniamus, ex quo, quæ Ecclesiasticam doctrinam concernunt excerptamus. Novimus Wiclefi

esse ea tempora: verum cum ne in ipsa quidem Angliâ, quidquam nuper de illo, sive indagare, sive corrolare quiverim; quid deinceps speremus incertum est. Relatum fuit ibi terrarum, à præclaræ eruditionis Theologo; Anglum aliquem, qui hodieque in vivis, universam Wiclefi historiam conscripserit, sed vernaculâ, neque tamen illum hætenus, abs Typographis, editionem impetrare potuisse. Quod si Clariss. Vir, tuas aliquas notas, in dictas illas Centurias, aut concinnatas habeas, aut concinnare velles; equidem non solum rem præstares omnibus historiæ Ecclesiasticæ studiosis gratissimam; quippe, qui norunt, quantum tibi, tum in Theologia, tum Historiâ, universa Respublica Christiana, ac literaria, tuo merito deferat: sed & si illasdem ad nos permittere tibi videretur, omnino daturi essemus operam, ut Appendicis in modum, fideliter præcedentibus tomis annecterentur. Præter ista, percipere etiam ex te optârim: ubi, & quando, & quo oratione, in lucem prodierint, Excellentiss. D. Salmasii, de Ecclesiis Suburbicariis libri? Nam ab eo tempore, quo mihi Heroem illum, ejusque scripta tantoperè commendasti; sedulo investigare utrumque sægei. Alterum processit. Nam Lugduni Batavorum, alloquium, aut potius colloquium, ad unam atque alteram horam, summa ejus humanitas mihi indulsit. Inde desiderium operum ipsius multo intensius me incessit. Lugduni frustratus aliis, quàm quæ ibidem impressa essent, (ut Lib. de usuris) pro cæteris, Lutetiam sum remissus, ubi primitus procusa fuissent. Eo postquam venissem, De Ecclesiis Suburbicariis, præter Eucharistico ad Sirmondum, nil aut exhibere, aut indicare poterant. In hoc Eucharistico, deprehendo mentionem Epistolæ, ad amicum, Censuræ, & aliorum, quorum nunc memoriam non recorder: libro autem ad amicum amisso, revidere nequeo. Itaque nisi suggeras editionis cujusque locum, & Typographum; ubi inquiram? Invitus posthac carebo istis. Nostris omnino omnibus, & Bibliopolis, & aliis magnum Salmasii nomen inauditum: nisi uni, qui recenter Lugduno vestro rediit. Tandem obnixè rogo, Clariss. D. Barlaam, vicinum tuum, haud gravatim meo nomine plurima salute impertias: ejus præsepe Christi, abs te mihi indigitatum, tandem Hagæ Com. inveni. Magis nunc cupio, & alia ejusdem inspicere opera. Illud præsertim, quod deprædicas Grammaticæ tuæ, lib. i. cap. 3. fine. Nescio tamen, Typisne descri-

descriptus, & publicatus, huc usque fuerit. Saluto familiam tuam dilectissimam, ac nominatim in eâ, D. D. Matthæum, & Gerhardum, (si probè recordor nominum) filios tuos; quibus mea officia promptissima offero. Si tamen quid reliquum habeam, quod tibi, tuisque offeram, ac non verius debeam; sum enim, maneoque,

Basil. nonis Mar. Tibi, Vir celeberrime,
c1510c xxxix.

tuisq; cultu, ac officiis,

addictissimus,

Joan. Rodolphus Wettstein. B.

CCLXXIX.

Viro Clarissimo Gerharo Joanni Vossio, in Academia Lugduno-Batava Professori dignissimo S. P.

JAM vir es, mi optime Clarissimeque Vossii, qui rogatus à me, ut ad illustrationem Idoli Vandalorum, quod illis tripiti vertice, Trigla dictum, locum mihi & verba Eustathii, qui ad manus non est, suggereres, quod is Dianam etiam Triglam nuncupatam, ut volunt, asseruerit; tu non modò Eustathium, sed & plures adducis, qui Dianam Tricipitem describunt. Quibus, (ut sunt hæ literæ nostræ humaniores dico, inexhaustæ propemodum, ut eruditionis, ita & disquisitionis) addi, & alii idem dictitantes possunt, & inter Græcos Aristophanes, & Lucianus, & præter etiam hos, Burdigalensis Ausonius, qui in Ternario suo, versum Maronis sic expressit.

*Tergemina est Hecate, tria virginis ora
Diana.*

Sed quod erat præcipuè in quæstione, Triglam etiam Dianam appellatam non dicunt. Et ut redeam ad Eustathium, ejusque verba quæ adducis, nec ille iis Triglam Dianam nuncupatam ait, sed sacrum fuisse Dianæ Triglam piscem, qui Latinis Mullus appellatur. Cur autem illi sacer fuit? An ut vult Charicles à te laudatus, quia Triglis, five Mullis Hecate delectabatur? Et iterum cur delectabatur? An quia apud inferos, quod Erasmus ha-

bet, Hecate cæna vilibus piscibus, ut erant Mænides, Triglaque, perficiebatur? At Erasme doctissime, Triglane five Mullus, adeo tibi vilis, qui, teste, apud Macrobius nostrum, Sammonico, septem millibus nummum Romæ divendebatur? Quod autem Athenis locus fuerit, Trigla dictus, & inibi Hecate simulachrum, cum inscriptione *Hecate Trigla-thena*, hic an *Hecate Mullo Minervæ*; an ut legisse videtur Erasmus, *Hecate Triglatina* reddendum, ecquis docebit? Jam quas adducis notationes, & quod simile aliquid sonet, *Trigla* cum *Teodisy* & *Trigone*, quis illa ut vera etyma probabit? Sed mitto hæc haud fortasse magis expedienda nobis, quam Grammaticus ille, qui cum omnes solvere posset, ut refert Suetonius, quæstiones, unum difficile expediebat nomen. Interim clarum certumque esto, amari à me Vossium, & id ut mutuo fiat, porro semperque optare. Hæc ad egregium illud doctumque responsum tuum, super quæsito de loco Eustathii meo; sed Laconicè & è lectulo: nam ad Musas, Museumque respicere, quomodo in afflictissima hac valetudine possem?

Harderici, 23. Mart. 1639.

T. Joh. Ifacius Pontanus.

CCLXXX.

Clarissimo Viro Gerharo Vossio Ecclesiæ Cantuariensis Canonico, & in Amstelredami Gymnasio Professori dignissimo.

Vir Clarissime,

POPularis meus Seertlingius, quem aliquando adduxi ad te, quique Colonia quasdam à me chartulas tibi attulit, cum ad vos iret; denuò per me redire in memoriam pristinæ benevolentiae tuæ voluit. Arbitratur ille profuturum me ipsi, ad colligendam gratiam tuam; teque putat multum conferre posse, ad id negotium de quo Gronovius scripsit. Meministi fortasse, quæ aliquando tibi dixerim, de moribus, & indole conjunctissimi sodalis: pro quo procurare nullum beneficium poteris, quod non ego ad meas utilitates pertinere existimem. Exiguum hoc fortassis momentum est, apud alios, qui amicos, atque ignotos perinde

B b

habent.

habent. Tu verò, vir iudicii pristini retinentissimus, desciscere à veteri benignitate non potes. Vale, foelicissimè cum omni familia.

Hagæ, vii. Kal.
April. Anno
c1610xxxxix.

Devotissimus Tuus,
Vincentius Fabricius.

CCLXXXI.

Clarissimo Viro D. Gerhardo Joanni Vossio, *Historiarum Profess. digniss.*

Clarissime Domine,

Sesquiannus est ferè, cum ad exemplar Libri recens in Hispaniâ excusi, de nescio quibus sanctorum reliquiis, aliisque antiquis monumentis, misit Laurentius Cocchus, Vir humanissimus, qui Senogallienfi Episcopo, Pontificio Nuntio à secretis est; alterumque addidit Exemplar, ad D. T. destinandum; sed non prius quam literas adjungendas dedisset. Eas tandem à paucis diebus accepi, sive oblitio obreperat, seu quæ illum avocarant curæ. Eâ nunc utor occasione, D. T. salutandi, offerendique ei obsequium meum. Notus Opinor, Dominationi tuæ, fuit Heribertus Rosweyda. Et vastum opus, de sanctorum vitis, meditabatur, collegeratque jam plurima, nihil adhuc digesserat, cum eum mors, anno ætatis 60. oppressit. Ne frustra ei labor susceptus esset, adjeci ad ea, quæ congefferat, ordinanda animum. Chaos est vastum, præsertim ob mediæ ævi barbariem. Eluctor quæ possum. Sub prælo mihi jam Januarius sudat, qui duos tomos, haud sanè tenues, complectetur. Lucem sæpenumero mihi doctissimus tuus, de Historicis commentarius, præbet. Audieram eum recudi, avidèque id expetebam: præsertim, quod plerasque vitas, posse se certo auctori tribuere, D. T. pollicetur. Optem id profectò, & lubens quos observaro auctores suggeram. Vitarum vetusta probataque exemplaria MSS. quæ dominationi tuæ sint ad manum, non vulgo trita, si indicârît, beneficium agnoscam, & lubens quo licebit, obsequio munerabor. Vale Vir Clarissime.

Antuerpiâ 20.
April. 1639.

Clarissimæ D. T.

servus in Christo,

Joannes Bollandus,

de Societate Jesu.

CCLXXXII.

Literas tuas, & adjunctum filii Isaaci Scylacem, rectè accepi, Vir amicissime. Laudo profectum, & gratias ago. Plura ab ingenio isto, & doctrinâ, jure expecto. Næ tu admodum beatus, cui ita in liberis quoque summus Deus benedixit. Blavii tricas, dudum expertus, & nunc animo prævidebam: adeoque nihil mihi præter expectationem hic contingit; quanquam tamen spem conceperam, fore, ut servaret fidem semel tandem, quam tamdiu fefellisset. Nunc quod restat, saltem absolutis tuis, quod futurum ad Solstitium, aut Calendas Junii, scribis, animum inducat pergere; aut, si porro etiam me ludos faciat, vide, an cum alio, quod ipse suggeris, tractare possis, de ineditis edendis, sive singulis seorsim, sive junctim universis. Habeo etiam inter alia Antiquitatum Laconicarum libros quatuor, & de Regibus Lacedæmoniorum, à primo usque L. librum singularem. Forte alter Janſonius, sicut opus de Atheniensium Regibus pridem excudit, neque ista detrectabit. Explorare viri animum per occasionem poteris, ac me certiores facere. Blavio verò, illud ut denunties velim, ni deinceps gnâviter in excudendis meis pergat, me injuriam ulturum esse; & Moltkenio Historiam Danicam recudendam traditurum, cum Auctario rerum Friderici Primi interregni atque Christiani III. tum & curaturum ei privilegium, quo in Regnum hoc importari Blavii editio prohibeatur. Itaque seriò secum reputet, quid hic sibi faciendum esse putet. Ego certe non diutius sum passurus me deludi etiam porro, neque patientiam meam ultra lædi. A Vossio heri accepi literas, & Orationem in Cunæi obitum, itaque accusare desino. Quas adjunxi ad Gronovium, ut curare, cum occasio erit, velis, valde rogo. Valetudo per hanc hyemem admodum mihi mala fuit. Divexabat me Nephritis, calculosque aliquot excrevi: postea ulcus in sinistro rene erupit, quod per totum quadrimestre pure & sanguine manavit. Accedebat febris tertiana duplex: insuper magna lassitudo, dejectio virium, & appetitus. Sed nunc Dei beneficio singulari, omnia hæc mala evasi; qui me porro ut conservet, supplex peto. Idem tibi ac tuis omnibus, ab eodem seriò precor. Vale, amicorum maxime,

maxime, cum uxore liberisque. Mea & mei, plurimam salutem nunciant.

Raptim, Sor.e, Kal. Constanter tuus,
Junii c15 Ioc xxxix.

Joannes Meurfius.

CCLXXXIII.

Viro maximo & reverendo Gerardo
Jo. Vossio, Jo. Fredericus Gronovius S. P. D.

CUM aliquandiu hic egissem, Vir magne, incidi fortuito in Bibliopolum, qui Theses tuas Theologicas olim recudit. Ego, ut jusserant filii tui, exposulare cum eo, quod non exemplaria plura in Bataviam mitteret, constare cum lucro suo & studiis doctorum hominum, qui magno ejus libri copiam redimerent. Ille unicum tantum ex omni numero restare sibi aiebat, egisseque ideo cum Typographo, ut propediem editio repetere-tur. Ut vero me audiret domui tuæ familiarium esse, exultabat, prensansque manum meam ne ipsi beneficium negarem, orabat, promississe te olim cum hic esses aiebat sibi secundas curas, & non parvum augmentum operis. Jam esse tempus, ut promissi admonearis. In quo literis suis meas petebat adjungi, & tanto certius egregiam ejus voluntatem tibi nuntiari. Vilum id fore non ingratum tibi, ideo libens parui homini bono, testis & index serii illius desiderii, si modo tibi otium vete-res tuas delicias retractandi. Vix certe ullum scriptum tuum in Anglia notius est, & majore cum gustu plausuque legitur. Et designabit ipse puto hominem Londini, ad quem tuto schedas tuas mittere possis. Nos ex hac Insula jam incipimus pedem movere. Vidimus hic multos Thesauros, sed inter aquas Tantalii, frui enim desultoria hæc vita non permisit. Tarde ad eos accessus peregrinis patet, quem posse tamē patientia multa pauci exemplo nostro didicere. Ipsa Bibliotheca Bodleiana tot Statutorum cassibus adversus externos munita est, ut duas integras hebdomadas hic exegerim, antequam tractare ullum MS. Codicem mihi licuerit. Nec licuisset unquam (adeo sæpè obstat nobis pudor noster) absque V. C. Patricio Junio fuisset, cui soli debetur, si quid studia nostra hic ad-juta sunt. Interim respondimus futilissimæ
....., cujus pater, quantum in ipso fu-

it, nihil reliquit, quo minus stuporem suum, inscitiam, malignitatem publicaret. Cum itaque tam male seipsum traduxerit, nos tantum Judicis vice functi sumus, & involucri quibusdam, quibus vix tamen latere posset, nudum evolvimus. Forte is libellus in Gallia edetur, unà cum textu Silvarum. Codices Arundellianos, quos ad Rivetum *τῶν πάλιν* destinaram, ut vobis redderentur, curatos rectè puto. Tuam de Idololatria Veterum Commentationem & Gerhardi Vellejū avidè videre gestio. Nos cras discessuri hinc Cantabrigiam sumus; inde Londinum, ac cis dies paucissimos in Galliam *ὅν ἐστὶν* transfretabimus. Vale, Vir summe, & salve cum uxore & liberis lectissimis.

Scripsi raptim Oxon. prid. non. Sextil.
Stylo vestrate Anno c15 Ioc xxxix.

Nomen Bibliopolæ est Guiliel. Webbius.

CCLXXXIV.

Viro Clarissimo Domino Gerardo Joanni
Vossio, *Historiarum Professore Cele-*
berrimo.

Clariss. Vir, Patrone, & amice Colendissime,

DIU inter nos siluimus; vicissitudine inquam literarum, non autem animorum *συνδυά*, atque affectu benevolo. Id tu quidem ex omnibus iis, quas ad communem amicum nostrum, Dominum Laurentium, crebro scribere soleo, affatim intelligere potuisti. Nunquam enim in illis, tui gratissimam memoriam intermisi, neque omittere etiamnum cogito, quoad vixero. Ita totus in pectore meo hæres defixus, ut vel tædeat, vel pudeat etiam, nullum mihi superare argumentum, te condigne demerendi. Tristissima etiam tempora, me huc usque ita exercitum tenuerunt, ut unde vitam sustentarem, vix invenirem: prout & meis aliquot ad Laurentium nostrum scriptis, factis superque tibi constare arbitror. Obtuli nuper Domino Henrico Laurentio, Parentis mei *τῷ μαρτυρῶν*, Chronologiam sacram, quam apud nos typis edi voluit. Sed cum in Germania, tam misera sit ratio Typographicæ rei, hac tempestate, in animum induxit, apud vos illam in lucem producere. Quo nomine mihi valde gratulatus sum. Meministi, Vir Clarissime, te antehac desiderium tuum, hujus libri,

mihi in literis explicasse. Nunc igitur illius compos factus es. Maluisssem quidem apud nos, edi potuisse, eo fini, ut ipse praelo praeesset, ac mendas praeberem. Quare cum res nunc aliter ferat, oratum te velim, mi amantissime Domine Vossi, ut manibus paternis hanc gratiam facere ne dedigneris, atque operis Typographicis, interdum sicubi usus fuerit, succurras. Argumentum hoc scio, tuum ^{esse} esse. Proinde planissimè persuasus sum, laborem hunc Patris tibi fore gratissimum. Nosti quem adversarium, dum in vivis fuit, in spinosa hac materia habuerit, qui scilicet nimium sibi placere solitus fuit, planèque ut tu alibi loqueris, ^{ιδιογενῶν, & αὐτογενῶν} vehemens alieni nominis insectator. Utinam superviveret, & Pareanum hoc opusculum videre posset? non quod placitum credam, sed ne in aliis quoque dona Dei despiceret. Tu quaelo ^{ἑρπεδοκέρως} te praebe, ac si quid perperam scriptum offendes, tuae prudentiae velo contegas. Quam libertatem lubens tibi transmitto. Spero viris doctis hunc laborem probatum iri, quo praesertim Historiae suae majestatem, masculè assertum ivit, fideique Christianae, non ex profanis, ac Gentilibus Scriptoribus, ^{σεμίων} suum constabilivit. De ceteris abundè scripsi ad Dominum Laurentium, ex quo rerum mearum statum intelliges. Sensi animo liberalem ^{ἑρπεδοκέρως} vestratum: & Deum laudo. Interim spes melior apud nos nulla adhuc dum affulget: sub quâ tantum non lentè conficimur. Mihi quidem in senecta hac ætate, nihil durius, vel acerbius, unquam accidit, quam sub paupertate ingemiscere, cui aduersus nunquam fui. Eoque sapiusculè fit, ut me vitæ hujus pertædeat. Sentio tamen altissimi benedictionem; quâ largiter me sustentò. Vale, Clarissime Vir, meque amare, ac juvare perge.

Hanovia, Anno
1639. ad diem
24. Junii.

Tui studiosissimus,

Ph. Pareus.

CCLXXXV.

Cl. V. Ger. Vossio.

Clarissime Vir,

Operis mei de Primordiis Britannicarum Ecclesiarum, simulatque summa manus ipsi imposita fuerat, atque à praelo exierat, aliquot exemplaria in Hol-

landiam transmissi, illic inter præcipuos amicos meos distribuenda, in quo numero, quum te tuis meritis habeam, ac per hosce multos annos habuerim; negotium illi dedi, cui hanc provinciam demandavi, ut tibi quoque unum ex iis curaret exhiberi. Totam ferè Historiam Pelagianam ipsi intexui, idque quâ potui diligentia & fide, ubi fortasse invenies, quæ aliquantum te juvare possint, si quando alteram Operis tui editionem adornaveris: quod spero te facturum, & Marianum Scotum quoque cujus in * Libro meo commotam videbis expectationem, aliquando praelo commissurum, atque publico donaturum. Misi simul † De ^{† De quibus ibid. p. 972.} Scriptoribus Hiberniæ, qui eodem tempore prodierunt, D. Jacobi Waræi, libros duos, quia tibi non ingratos futuros illos augurabar. Ego quam vergente jam ætate, atq; in ingressu senectæ, integra tamen ac vegeta valetudine (Deo laus) perfruor: idemque de te ominor ac opto; & rem ita se habere ex literis tuis lætus intelligam. Vale Clarissime Vir, ac Deo commendatus esto.

Dublinii, die 13. Aug. Tui amantissimus,
MDCXXXIX.

Jac. Usserius Armachan.

CCLXXXVI.

Clarissimo Viro D. Gerhardo Joanni
Vossio Historiæ Professore.

Maxime virorum Vossi, decus & lumen seculi nostri,

SUB initium veris elapsi, ministro cuidam Jansonii vestri domuitionem paranti, aliquid ad te literarum dedi, quibus diuturno silentio meo excusationem qualemcumq; prætexere conatus sum, & simul de singulari diligentia tua, quam in Saxone meo isthuc edendo hætenus adhibuisti, gratias egi maximas. Vix ille abierat, ecce, mox à te literæ, seu verius exemplum literarum, quas ante semestrem, & amplius, rectè commodumque acceperam. Animadverti ^{μνημονὸν} hoc ^{ἀμνημονεύειν} esse; quum & posteriores à te haberem perscriptas iii. Kalen. Octob. ejusdem ferè argumenti, cujus erant illæ, Prid. Id. Junias exaratæ. Attamen exosculatus sum vehementer luculentum adeo propensi in me affectus indicium, quod malueris me gemina

gemina beare Epistola, licet rescripta, quam me prorsus carere unâ. Nunc vero consuetâ illâ ad te scribendi materiâ omisâ, nempe de Saxone nostro, cujus apud vos edendi omnem plane spem decollasse video; non possum non in finem tuum novam deponere sollicitudinem, quam animo meo afferre cœpit Typographorum vestrarum lenta nimis mora in excudendo Florilegio nostro Fabiano; quod ultimam jamdudum manum recepisse omnino speraveram. Haud equidem diffiteor, indi es hic fervere præla scriptis Clarissimorum Virorum, quæ Reipublicæ literariæ summopere interest, ut maturè lucem aspiciant: verum quam brevi aliquot horarum spatio absolvi possent istæ minutæ nostræ, quæ vix quatuor, aut summum quinque, chartæ plagulas excedunt? Proinde te per amorem illum, & favorem, quibus me, jam multis ab annis prosecutus es, rogo, atque obsecro, ut negotium istud seriò, seduloque etiamnum urgeas, & quantum in te erit, procures, ut civis ille noster, qui has ad te perfert, libellum hunc Typis elegantioribus exscriptum, ad nos redux secum referat. Sin autem, nollem isthoc loci diutius hære; quum fixa stet animo sententia, aliam quercum, ut in proverbio est, concutere, & demum experiri, quid Danica præla valeant. Cæterum quod mea nunc studia attinet, totus sum in limandis, ac perpoliendis notis meis in Saxonem: qui Deo volente, circa ver adultum sequentis anni, lucem videbit. De statu rerum nostrarum, nihil alioquin est scitu dignum. Clarissimus Meursius noster, utcumque convaluit: sed vereor, ne hæreat lateri arundo; utinam non lethalis! Te quoque æstivis hisce mensibus febriculam infestasse fando comperi: verum lætiora nos propediem audituros confidimus. Opus tuum de Gentilium Idololatria, & Christianorum Physiologia, avidè expectamus. Noli quæso te, exemplari me defraudare, sicut antea, abs te factum, jure conqueri possum. Filium etiam tuum, qui Scylacem nuper edidit exores velim, ut exemplar mecum communicet. Erit aliquando, cum paria vobiscum faciamus. Dominus D. Christianus Matthias, eminentissimus ætatis nostræ Theologus, Collega huc usque meus conjunctissimus, brevi vobis aderit, eo fine ut apud vos in posterum, sedem fortunarum suarum, ac domicilium figat. Dignus est omnium favore, & patrocinio. Vale feliciter, ac plurimum salve, He-

ros incomparabilis, & me constanter ama.

Soræ, v. Id. Augusti, Tui observantissimus,
CLOIS XXXIX.

Stephanus Johannis Stephanus.

CCLXXXVII.

Viro docto, & incomparabili Domino,
Doctori Gerhardo Johanni Vossio.

NON dubito, Clarissime, & Celeberrime Vir, fautor plurimum honorande, quin rumor de obitu Patris mei, ad excellentiam vestram fuerit allatus. Quare dolore, & tristitia, me affectum judicabis facile. Hoc etiam, Vir celeberrime, te angere, mihi non absque re persuasum habeo. Primum propter jacturam rei literariæ, (quam lugent omnes Musæ, Gratiæque omnes) cui tu solus nunc servator existis. Secundo propter sincerè ante annos xl. initæ amicitiaæ fœdus, quod fati invisum, à morte jam interruptum videtur. Ego igitur abs te peto, Clarissime Vir, prosequaris tali amore, Meursium filium, quasi Patrem prosequutus es, ut in statu tristiori, hoc solatium mihi supersit, Vossium benevolum habere; & profectò me repulsam laturum non confido: quandoquidem aqua & justa sit petitio. Actus funebris habitus est, die viii. Octobris, more Magnatum, & Equestris ordinis hominum. Diem etiam obiit magnus Cancellarius. Christianus Fris, Patris mei amicus singularis. Celeberrime Vir, fautor plurimum, videtur mihi Blavius, in excudendis Historiis tardus admodum fuisse, sed jam sane in cæteris lucubrationibus, quæ ad secundum tomum operum pertinent, tardior. Intellexi autem ex tua Epistola, nuper per Sartorem nostrum accepta, quod lucubrationes excudendas, velles remittere, quod si ille Typographus nolit inceptis finem imponere facias quæso. Et hac de re me certiore reddas, Vir summe, summopere rogo. Huic Epistolæ, incomparabilis Vossi, adjunctam invenies dissertationem, contra Anonymum, qui falsò conatur Majestatem debitam Reipublicæ serenissimæ Venerorum, de bono titulo, & jurè Insulæ Cretæ, atque Cypri adimere. Quod autem Specimen meum, antequam prælo subjiciatur, quæso corrigas, & in illo

illo delenda deleas, & inferenda inferas: spero etenim mihiq; persuasum habeo, hoc in negotio, me consilio tuo, & iudicio uti posse, propter amorem erga patrem meum, etsi mortuum; tamen vestigia cordi tuo perpetuò impressa. Vale, Vir summe, fulcrum rei literariæ, ornamentum patriæ, &c.

Datum Soræ, an.
cō 10 c xxxix.
die xvi. Octobr.

Tuus omni Cultu,

& Observantiâ,

Joannes Meursius Filius.

CCLXXXVIII.

Viro Incomparabili & Maximo, Gerardo Joanni Vossio, Salutem & officia paratissima.

Incomparabilis & maxime Vossi, Eruditionis numen mihi venerandum,

ECquid habeo, quod referre possum, quo liceret mihi esse grato? Pro maximis erga me beneficiis tuis, nihil habeo, quanquam quædam velim, vel si hoc admittis, parum daturus, qui multa conceperam. Quid illud quæso est? Totus ego. Nescio, quomodo me carius vendam, qui sic inducere debitum queam. Sic mihi feliciter cedit mea solutio. Neque maxima tua benevolentia, humanitas eadem tua, summe Vir, dubitare me finit, utrum sic tibi satis solvendo sim, qui nihil mihi relictum vides, quo ultra respondere possem. Habes itaque me, & mea omnia, quem me si insolitum acceperis, nunquam putabo felicius magna mihi redemisse. Quanquam aliis jacturam fecisse videri queas, qui tam ineleganti homine beneficia maxima, sic dicam, vendideris, posthæc cautius mercaturam esse instituendam. Quibus ego quidem non habeo quid respondeam, nisi quod videam Deos quoque non satis cautè mercari, quibus sæpè pro maximis votis rei farre & polenta satisfaciunt, & sic olim religiosi essent, qui ab iis aurum, argentum, magistratus, victorias, triumphos, sex consulatus, Pontificatum, innumera trophæa, summa omnia in spem gratiæ acceperant.

Atque utinam, sicut per ista, quibus decori sumus, vultus lineamenta, qualis intra animus sit, deprehendi sæpè potest, sic etiam per hæc manus impedimenta effluere posset, qui intra me regnat, gratus

animus: de cætero nollem esse majorem in modum sollicitus, maximè apud te, incomparabilis Vossi, qui, *Quantum lenta solent inter viburna cupressi*, sic Philosophos inter emines omnes, alioque genio, ingenia judicare, & discernere didicisti. Non fucus hic aliquid fecerit, & quæsitæ sub lingua verba quæ fundum in animo non habeant, non pressa manus, non dextrum prehensum genu, & si demissius quid imitatur facilis imponere levitas; alia tua bonæ probæque mentis argumenta sunt, quæ mihi apud te enotavi, quæ non afferro, ne docere velle videar. Fratrem quoque, eadè operâ, dum me respiceres, cogitare & agnoscere cepisti, jussisti præsentem me, ut inquirerent in ejus Cornelium Nepotem, Sleusingæ, vel Erfurti prostantem, quod ut fieret tacitus precatus sum. Cui frater meus ita de recto stylo dissertationem præfixit, ut quod sæpè testatur, tuo ore loqui malit quam suo, ut non tam Augusti Buchneri magni profecto Witebergæ viri, Præceptoris nostri Discipulum agnoscas, quam ex tua exisse domo, scholæque videri queat. Non poenitebit spero, operâ, quam recognoscendo admiratori tuo impendes, cum non minus impurorum hominum, maximi aliquando viri, & qui veritatem eruditionis supergrediuntur, scripta de se judicia repetere legendo debeant, quanto rectius peccabis, si quid ex altera parte docti ubique de te viri sentiant, non gravaberis agnoscere. Inter quos quidem nescio, an frater meus, non suo quodam jure sit reponendus, qui non gratis quidem hæc scripsisse putat, si tu, maxime vir, suum de te sensum non intelligas, cum bene sciat, non semper dari occasiones summis viris, ut quid minuti aliqui de se Dii sentiant, intelligere ordine possint, & si dentur, malle evitare, ne in suam gloriam cupidi videantur; ut possim præterea fratri esse testis, nunquam ipsi spem mutui amoris tui, ne nunc quidem, etiam si intimè desideret, esse factam, ut eò minus causam habere queas aspernandi, cum nihil adulationi scripserit, iudicio, & hinc amoris omnia. Quæ propterea pro fratre afferro, quod tres annos natu major me sit, & hoc meæ ætatis, quam ago juventute, Erfurti scripserat, & ante quasi biennium, eodem sensu in discursu suo, de sacra eloquentia Rostochii impresso, ubique scilicet maxima cum tui admiratione loquitur. Quo felicius spero posthæc frater in tuam gratiam illabetur, si vel semel quis, vel qualis sit aspietur. Hæc perorare pro fratre volui, eò confidentius

confidentius, quia eum, sicut præpostera hic fortuna lufit, ex me agnoscere incepisti, quod verso ordine debuisset. Hic autem qui literas offert, sub peregrina specie non parum tegit, & est Anhaltinorum Principum Confiliarius, qui ut haberet occasionem tui colloquii, secum has sumpsit, de quo plura scriberem nisi vetasset. Frater certè ejus sub Veranglio, generalis auditor est, suntque Francofurti ad Oderam oriundi, mei conterranei.

Pro me autem, summe Vossi, maximo perè rogo, ut quia animus adhuc est, Constantinopolin abire, navibus in principio Septembris, Octobris, stylo veteri discessuris, ornare me tuis ad Pocockium, quod facillè erit, literis, & velut commendare velis; ego dabo ubique operam, ut non indignus tua maxima amicitia videri queam. Prolixissimè vale, incomparabilis maximeque Vossi, etsi mereo, vel licet non mereo, quia vis me ama.

Totus tuus quantus quantus

M. Christianus Rave.

CCLXXXIX.

Viro undequaque maximo, Gerardo Joanni Voßio, Cantuariensis Ecclesiæ Canonico, & Historiæ sacræ Professore.

POenitet me jamdudum fidei, quam discedenti dabam, Vir maxime, fore ut intra octiduum ad te redirent, duo isthæc quæ nunc mitto, insignis tui Idololatriæ operis volumina. Nec enim licuit interea percurrere, nedum accuratè legere universa. Ubi reliqua quoque absolverit Typographus, iteratâ lectione, si Deus vitam dederit, animum explebo. Cæterum uti jussas, indicavi locis aliquot, quæ legenti obiter, occurrere Typographi errata, aut festinantis calami *περὶ ἑξῆς*. Porro cum inciderim in locum de anno Ægyptiaco, qui est pag. 209. Et geminam quam habeo Hori Apollinini editionem inspicerem, inveni, ut si alterutrâ sit usus Petavius, versionesque tantum inspexerit, mirum non sit si negaverit, lib. 2. cap. 89. reperiri quod ex illo capite Scalliger allegaverat. Sed cum non sit verisimile, virum tantum versionibus in materia controversa contentum fuisse; neque ad Contextum Græcum voluisse recurrere,

probabili mihi conjecturâ duci videor, ut credam usum eadem Editione Græca, qualiscumque illa sit, quam in versione sua secutus est Bernardinus Trebatius Vincentinus, uti Trebatium Interpres Galus. Caruisse enim illa videtur libri secundi capitibus II. *Τὸ ἀεὶ νέον*. Et V. *πῶς πολέμου σύμα*. Et XXIII. *πῶς μέλλον ἔργον*. Atque inde factum, ut qui quærebatur locus, octogesium sextum caput, non octogesium nonum illic occuparet. Prodidit Trebatius Horum latinè, ac Chunrado Peutingero dedicavit, anno 1313. Istam autem, quam ego Græcam, cum Latina Interpretatione Trebatii habeo, in Octavo expressisse se ad Aldinum exemplar, curante Angelo Argonenfi, testatur Typographus Petrus Vidovæus, sub scuto Basiliensi, Parisiis scilicet anno 1521. quanquam postremum hoc, de loco, & tempore editionis certo asserere non ausim, probabili tantum nixus conjectura, deest quippe folium unum meo exemplari. In hac ipsa ergo Editione Græcus Contextus, habet ista tria capita supra recensita; Latinus non habet, uti nec Gallico-Latinus, qui Parisiis prodit, anno 1574. ex Officina Galesti à Prato, & Joannis Ruellii; nisi quod hic sub Appendicis titulo, ad veterem codicem tria illa cum octo aliis capitibus sit reperire. Typographi autem isti Parisienses anno 1574. dolosè suppresso Trebatii nomine, tum primum quas dabant prodire versiones lectori persuasum voluerint, cum tamen Latinam Trebatii darent. Hæc monenda duxi, ut scires quid fefellerit Petavium, interea neutiquam excusandum, quod non proxima saltem capitula percurrere vacare voluerit. Erat & coram sermo nobis de Lapide porcino, seu Piedra de Puerco, qualem quod hinc discedens affini meo à me restituere, non fueris gravatus, habeo gratias. Tantæ virtutis lapidi poterat locus fuisse non incommodè, pag. 1087. Curaboque ut intelligas quid senserit de eo, dum viveret Elichmannius, ubi rescivero sub Appendicis, vel Addendorum nomine animum tibi esse aliqua adhuc calci operis attexere. Id si statuas, deliberes velim an & horum quæ sequuntur, operæ fuerit meminisse.

Pag. 676. Ubi de aquis in lapides crescentibus sermo est, locum meretur Wookevium seu Ocheium, antrum in Mendippiis collibus Minerariis prope urbem Welles, quam eundem cum Bathoniensi fortitur Episcopum, in Agro Somerfensi Angliæ situm. Mentionem ejus obiter

in Belgis habet Cambdenus, cum accolae non minora de eo somnia narrare ait, quam de Sybillino commentum sint Itali. Somnia equidem sua de utroque narrantes, audiui & ipse utriusque accolae: sed & pererravi utrumque, & obstupui fatetor, ad stupenda naturae in hoc Anglico opere cum comitante Heemskerchio nostro, Strias lapideas innumeras, ex aquae intramontanæ stillicidio, sua capere incrementa, ad oculum simul & contactum cernerem: hic postes integros ex concretis aquae guttulis, longo temporis lapsu sic efformatos, ut ad summam altitudinem concavum montis sustinerent, hic figuras lapideas varias, ac multiplices, uno loco pendulas, altero in alterum succrescentes, ac paulatim sibi mutuo quasi procedentes obviam conspicerem, taliaque viderem, quæ magno nolim non vidisse. Maximam autem stillicidii, quod nunquam cessat, & de tribus binas nobis faculas extinxerat, partem rivuli abripiunt, per diversos anfractus, uno omnes antri ostio effluentes, ortique ab insigni fontis scaturigine, quæ non minus dimidio ab ingressu milliari Anglico meta nobis erat, istius subterranei erroris. Mea nunc quoque me narrare somnia crederes, nisi me nosces. Atque hæc nisi sufficerent, ac nimia jam essent, poteram singularem quædam tum temporis non injucunda visu observanti, ex meo itinerario adicere. Cæterum habet & Gallia, in Agro Turonensi, antrum huic non omnino ab simile, quod cellam guttulare dicunt, seu *la Carve Gouttiere*, sed longè magis admirandus mihi videtur, & situs, & lapidescentia hujus Anglicani. Ad pag. 758. Et sagittæ & fulmina, uno eodemque vocabulo Italis, *Sagitte*, Anglis *Shafts* dicuntur, idque non poetice, sed usitato, & plebeio quoque loquendi modo. Ad pag. 762. Memoratu dignus est, seu tonitrus, seu fulminis ictus, qui ante annos sex septem, prope Middelharuiffe, & Sommeladicum, claudo gressum restituit, arbores radicitus erutas, in altum sustulit, & in vicina pomaria, ultra sepes, arborisque altiores alias trajecit, & molendini in frusta disparfi vela, inspectantibus pluribus, trans amplum illud maris an fluvii istius ostium, ita diripuit ut in adversam oram conjecerit intervallo duorum ad minimum Italicorum Milliarii. Uti hæc omnia mihi paulo postquam accidissent, ipso illo in loco, narrarunt, & partim commonstrarunt, accolæ fide dignissimi.

Quod Pag. 837. Principis Condæi nulla fiat mentio, et si XIII. mense nati, & tamen

sententia supremi Parlamenti Regii, extra natalium dubium constituti nihil miror.

Pag. 858. Ægyptios hominem mysticum cicadâ picta expressisse, ait Horus Apollo, lib. 2. cap. 55. quod non ore canat, sed *ὡς τὸ πάθος φθεγγόμενα*. Pertinet illud ad ea quæ coram disceptabamus nuper.

Pag. 1041. Talpis cutem detrahi, ut appareant oculi, non est opus, cum satis conspici sint etiam in vivis, quod non semel exploravi ipse.

Pag. 1045. aut alioquin pag. 2137. Adduci potuisset nec *ἀλβος*, id quod de Simia Christum Legislatorem verum esse demonstrante, non miraculo simile, sed verè miraculum; modo verum, ex relatione, & literis Anglici apud Mogolem Legati Thomæ Rouvi, adhuc puto superstitis, narrat Purchasius eo, quem coram ante annos aliquot ostendisse me tibi meminisse loco.

Pag. 1162. Pergamenorum spectaculo annuo, aut melius, Pag. 1196. Atticæ legi adjungi potuissent, Anglorum *Cock-Pits*, seu creberrimæ apud Anglos pugna Gallorum, in amphitheatris quoque adhuc extructis, exhiberi solitæ, uti & tauros, ursoque inter se & canibus quoque committere publicè consueverunt, disco etiam jacto certare, & luctas singulis diebus festis, & quotannis coram supremo urbis Londinensis Magistratu, præpositis victori præmiis exercere iidem solent, circa campos *Moortfields* dictos. Quæ omnia cum bellicæ virtutis, & disciplinæ sint argumenta, in honorem Nationis obiter attingi possent; Textui tamen quam Appendici convenientiora putem. Tuo interim iudicio, permittens singula, finem imponam, longiori, & fortasse non sine tædio legendæ tibi Epistola. Vale, Vir maxime, cum lætissima conjuge, & præstantissimis liberis.

Haga-Comitis
duodecimo Oct.
1639.

Tuus in æternum,

Georgius R. Doubletius.

CCXC.

Clarissimo, & Incomparabili Viro, Domino Doctori Gerardo Vossio.

Vir Incomparabilis, Magne Vossi,

Iterum ad te scribere, me inter alia, præcipue observantia compellit. Et si mihi nullum sit dubium, quin ad manus tuas, Literæ ab Elzevirio tibi tradendæ rectè pervenerint: tamen etiam adhuc sedulo abs te petiturus sum, remittantur omnes, ineunte vere, piæ memoriæ patris mei, lucubrationes, unâ cum ad eas pertinentibus Epistolis dedicatoriis; exceptâ autem Cretâ, illam excudendam quælo tradas, Elzevirii, quibus hac de re jam scripsi; quare non dubito, quin excudendum hoc Cretæ opus in se susciperent. Ideoque nunc curam in erratis Typographicis, tibi soli committo, ac te facturum, si Meursii tui memor sis, persuasum mihi habeo, absque repulsâ. Causa autem, celeberrime Vir, cur ita Cretam urgeo, est hæc, cum etenim in dissertatione mea, sæpius Cretæ patris mei, mentionem faciam. Sed hæc ut se habent, quæso solummodo responsione, data occasione, mihi digneris, ac certiore facias de iudicio tuo, super dissertationem meam; utrum, ut luci publicæ exponetur, digna fuerit.

Dabam Soræ Danorum ad diem xii. Januarii, anno 1640. Cujus auspiciis foelix, foeliciorem progressum, foelicissimum exitum tibi, uxori tuæ, ac liberis, omnes ex animo precamur.

Tuus omni Cultu & Observantiâ,

Johannes Meursius *Filius.*

CCXCI.

Excellentissimo Viro, Domino Gerardo Joanni Vossio, S. P. D.

Excessum Matthiæ Berneggeri foci mei amantissimi, merito inter primos ejus amicos, significandum tibi duxi, excellentissime Vossi. Quippe & prolixi affectus, observantiæque, quâ te constantissime prosequutus est, ipsi præ cæteris conscius fui; & documentorum quibus, amorem tuum, in illum vicissim declarasti.

Nihil dabo conjunctioni nostræ; sed profecto amisisti amicum, quotquot ipsi in deliciis fuistis, qualem optare haud paulò facilius est, quam reperire. Ego in tanta jactura literaria, negotia pro solatiis accipio, cum maximè Curtio perornando intentus: in quem supplementi mei specimen, tibi non ineptum esse visum, Vicoforti nostri literis compertum habeo. Id nuncium me liberavit à metu reliquorum judiciorum. Nec enim vereor, ut cuiquam displiceat, quod tibi tantæ eruditionis, tamque subacti judicii viro placuit. Quamquam sanè, neque sperem magnum assensum, tumultuario opusculo, neque aliam ejus infamiam deprecor, præterquam ut vetere supplemento deterius habeatur. Vale, Vir excellentissime, cum eruditissimo filio, & quam focero meo dum vivebat, benevolentiam præstitisti, quum mereri videbor, in me transfunde; tantam amicitiam si non pari dignitate, certè fide non minori culturum.

Dabam Argentorati, ad diem v. Cal. Mart. 1640.

Excellentiss. Famæ

Doctrinæque tuæ

Candidus Æstimator Cultorque,

J. Freinshemius.

CCXCII.

Excellentissimè Vir,

Quam verum sit Comici illud, *Veritas odium parit*, experimur quotidie, qui illius constante professione plurimos in nos concitamus: à quibus clam & palam impugnamur, nunc ut Pelagiani, nunc ut Arminiani, nunc ut Sociniani; cum ab omni partium studio alieni unam veritatem omnibus hominum opinionibus & affectibus antiquiorem censeamus. Ingrati quidam discipuli calcibus nos suis petunt & tantum non conculcant, tanquam jurati hostes **GRATIÆ UNIVERSALIS**, qualem omnibus sufficientem in Christo offerre Syntagmate meo doceo. Id Belgis quibusdam vestris displicuit, quorum Academicis præjudiciis, hi facti sunt ferociore & in nos iniquiores. P. Polyander, vir alioquin candidus & nobis amicus, jam plane filet, ut nesciam an sibi amor nostri constet. Æmuli nostri artibus suis effervent, ut Combusius quidam è Schola Castellana huc vocatus sit, qui unguis

C c

est

est in vulneribus nostris, quæ consolidare deberet. Verum ita sibi Suffenus est, ut tum hic, tum alibi non benignè de scriptis D. Bergii, D. Willii & meis iudicet & parti adversæ, à qua vocatus sit, apertè velificetur. Nos solatur causa, iustitia & conscientia. In ære sum doctissimi filii tui, qui triumphum classicum Trompii vestri dono mihi miserat per amicum, qui, eo mihi in limine ædium mearum exhibito, ἀπαλὲς ἐξήκω. Doleo autem nimis quod neque ἀντίδωρον nunc ad manum mihi sit, neque humanitas mea viro optimo innotuerit, adeoque barbarus illi videri possim jure meritissimo. Excusa nos, amato utrique. Sed & quæ in Docenium, filium Consularem, pronuper contulistis, ut ille non prolixè satis prædicare potest, ita nos vobis obnoxios æternum faciunt. Qui has tradit, auditor noster est brevi huc rediturus, cui tuto tradi possunt, si quas ad nos dare velis. D. Calixtus Professor Helmestadiensis, peculiari nunc libro à suis impugnatur, quod concordia sit studiosior, quam morosi Stentores, quibus classicum è suggestis suis canere prolubium est. Sic impulsus sum utrinque à domesticis fidei, quibus pacis censores sumus. Adeo sedit animis plurimum illud:

Nulla salus paci: bellum te poscimus omnes.

Claudo & salutem cum officiis Cl. T. Scytte à D. Bergio utroque Willio & me.

Bremæ prid.
Non. Maii,
Anno 1640.

Clarit. Vestra

devotissimus Servus,

L. Crocius.

CCXCIII.

Clarissimo, & Doctissimo Viro D. Gerardo Joanni Vossio, Historiarum & Chronologiæ, Professori celeberrimo.

Clarissime & celeberrime Vir, olim Collega, semper Amice,

NON possum verbis exprimere, quam fuerim commotus, quando præstantissimus Dubletius, mihi per occasionem communicavit, quas à te acceperat literas, super iterata illa tam paucis diebus probatione, qua Deus patientiam tuam, & lectissimæ Matronæ uxoris tuæ, voluit non quidem sua causa experiri, qui vos intimè

novit, sed aliis in exemplum exhibere. Et certè opus fuit vobis, speciali gratia spiritus divini, ut hanc jacturam lucro deputaretis, præsertim iis quos Deus ad se recepit, hujus sæculi incommodis, & corruptelis exemptos, & Cælo exceptos. Taceo unicæ quæ supererat puellæ carentiam: sed qualis fuit juvenis ille, qui in ea ætacula poterat, quæ pauci attingunt, post multorum annorum labores? At non quamdiu, sed quam benè vitam hanc duxerit, cogitasti; & quam fœlicem finem Deus laboribus ejus imposuerit. Et certè, hoc præsertim corruptissimo sæculi statu, admiranda sunt quæ de ejus victoria narras. Cur enim hoc nomine, non indigitarem, beatum illum excessum, & fidem illam ac constantiam, cujus ad extremum usq; vitæ halitum edidit testimonia? Beati estis, tali filio cælorum cive, qui in terra, sui memoriam tam suavem, omnibus bonis, & doctis reliquit? Beati qui quæ humanitus vobis accidunt, divinæ Providentiæ, adscribitis, & in ea acquiescitis; siquid possunt, amicorum συμπαθείαι, si καὶ φίλοι; ἀντιέμνητοι ἑταίρων ἡδὲ φίλων, tot sunt qui vobiscum lugent amici, quot sunt, quibus non ignotus erat maximæ spei juvenis; sed quem spes melior non fefellit, quem etiam non lugetis, quomodo lugent ii qui spem non habent. Prævit, sequemur ad nos non rediturum, qui ad eum tendimus, id est ad Deum. Det tibi, Vir clarissime, in iis qui supersunt gaudia diuturniora, eosque benedictionibus suis, coram oculis tuis cumulet, teque iis diutissime conservet, cum lectissima uxore, quam tecum cum mea, saluto officiosissimè, cum reliqua familia. Vale.

Hagæ Comit.,
postrid. Kal. Apr.
clō 1641.

Tuus omni

officio & affectu,

Andreas Rivetus.

CCXCIV.

Viro Incomparabili Domino Doctori, Gerardo Joanni Vossio.

Literæ tuæ, Vir celeberrime, cum doctorem nostrum augerent, ex tuo, quem non minus domesticum nobis, Paterna conjunctio effecit; è vestigio tibi responderi mandabant: Ne à fidelissimis amicis destitutus, cum solatium non potes expectare

expectare videris *supra*. Ipse enim nosti, simplex quidem, & vulgare, sed unicum esse nostrum, adversus mala omnia præsidium; voluntatem Dei; quæ nulum à Christianis patitur murmur, quia quod infligit, non malum vulnus est. Quippe quo firmitas, & constantia, imo ipsa animæ valetudo, ac sanitas quæritur. Nos quidem cum Patrem, caput amiserimus, sic fermè, veluti naturale est, extabuiamus. Et tamen resumimus spiritum, tanquam furtim editur, postquam cladem maximam fortuna fecit. Tibi membrum aliquod abreptum, quamquam charissimum, si nihil aliud, leviorē præ nobis dolorem, esse patietur. Cumque orphani nos paululum erigamur, quid tanto viro defuerit, cui solidum est omne Christianum robur; & in hac causâ, viridique senectute, virenti palmæ non abfimile. Sed hæcenus quidem; ne quod dici solet, Sus Minervam. Quod dissertationem meam spectat; si præter spem Blauvius manum non admovisset, Elzevirius eam tradi peto, qui non hanc modo, sed & Cretam ipsam, absque omni morâ edituros, polliciti sunt. Quicquid fuerit (nam & Cretam non videor sic urgere nunc debere) quæso, ut dissertationunculam, cum Elzevirius mitti impressa valeat, quos proximè speramus. Paucarum pagellarum est, jacturæ, aut impenis illius, quæ ob exilitatem vix æstimari possit. Alias, præter Cretam omnes Parentis lubricationes, quotquot fuerint, remitti peto; hoc enim regno, excudi facilius curabo. Spero autem antequam de Cretâ quicquam fiat, me literas à te recepturum; quibus me certiorē facies, an Parentis dedicatoria, ad Franciscum Molinum annexa sit. De quibus omnibus, porro te etiam atque etiam rogatum volo, Vir maxime, ut molestiam imputare fidei, ac benevolentis tuæ cupias; mihiq; ad omne genus, tam officiorum, quam literariæ laudis faciem præbere, imo ut rectius dicam, calcar addere. Potes enim, potesque. Mater, soror, tui, tuorumque causa, sollicitæ ac prorsus anxie salutem tibi dicunt plurimam, & decumbenti filio, meliora omnia per me, & mecum simul apprecantur. Vale, decus unicum avi nostri, nostræ domus præsidium.

Dat. Soræ, a. d.
xii. Aprilis, An.
1640.

Tuus omni cultu

& observantia,

Joan. Meursius Filius.

Hæc scripsi, etenim dubito, num Epistola mea per Hambürgensem nuntium missa, tradita sit.

CCXCV.

Viro Illustri, Excellentissimæque Gerardo Joanni Vossio, Rhetori ac Polyhistori dignissimo. Salutem plurimam ac debitam observantiam.

Illustris ac Excellentissime Vossii,

TUIS Literis plurimum me debere, iis quas in Angliam abitu gratiosè communicabas, meis ex Angliā ad T. Exc. datis literis, libentissimè agnovi, veluti hæc agnitione, partem grati animi monstrassem. Illustriss. quoque Hugo Grotius earum causa me Parisiis honorabat. Constantinopoli quoque, hic inquam, ubi jam decem ferè menses, cum Cl. Pocokio tuo dego non ingratus, earum, quas non viderat, nomine sum susceptus. Ita ut gratias agere maximas debeam, pro istis tuæ in me benevolentis tesseri, adeo utilibus in meam rem. Et eo ipso me veluti aliquem tuorum ascitum commendasti, ut ingratus sim, nisi singularem, & ut scilicet credam, paternam quandam curam deprædicem. Gratitude causa impræsentiarum, hoc ex animo suadeo tuæ Exc. ut aliquem tuorum filiorum, Isaacum, vel Gerardum, navi Hollandicâ, vel si ista desit, Anglicâ, quæ in initio Augusti, vel ad finem Julii ex Douvrâ solvit, & Generalis vocatur, quod totius Societatis Turcicæ Mercatores, merces suas imponunt, huc mittas, ubi maximum pro eruditione orientali commodum facere queat, cum & hic librorum sit copia, emendique potestas satis magna, licet pretia cara sint; & si quis Græcas visitare Ecclesias velit, quæ hic in Oriente sunt, queat manuscripta quædam reperire, quæ præsentī pecunia redimat. Vivendi ratio, filio tuo foret facilis; cum Illustriss. confœderati Belgii Residens D. Cobs, vel mihi biennii mensam, domumque, & hospitium liberale promiserit, quodque recepissē, nisi quædam alia me intercepissē, Pocokius scilicet, & Anglicus Legatus. Quod quum mihi fecerit peregrino, quid tuò non faciet filio, cui multis nominibus, Belgium quoque ipsum debet esse obstrictum? Et nullius hic quoque æstimatur adesse tabulæ, cum omnes Legati cogantur hic splendide, & liberaliter vivere, veluti versantes in oculis Turcarum, qui ex splendore externo, gratiam suam favoremque inclinant, cum Legatis honorificum sit, splendidos secum habere domesticos, nobilesque, quo ipso modo

est in vulneribus nostris, quæ consolidare deberet. Verum ita sibi Suffenus est, ut tum hic, tum alibi non benignè de scriptis D. Bergii, D. Willii & meis iudicet & parti adversæ, à qua vocatus sit, apertè velificetur. Nos solatur causa, iustitia & conscientia. In are sum doctissimi filii tui, qui triumphum classicum Trompii vestri dono mihi miserat per amicum, qui, eo mihi in limine ædium mearum exhibito, ἀπαλίστως ἐξήλυτο. Doleo autem nimis quod neque ἀντίδοσιν nunc ad manum mihi sit, neque humanitas mea viro optimo innotuerit, adeoque barbarus illi videri possim jure meritissimo. Excusa nos, amato utrique. Sed & quæ in Docenium, filium Consulare, pronuper contulistis, ut ille non prolixè satis prædicare potest, ita nos vobis obnoxios æternum faciunt. Qui has tradit, auditor noster est brevi huc rediturus, cui tuto tradi possunt, si quas ad nos dare velis. D. Calixtus Professor Helmeftadenfis, peculiari nunc libro à suis impugnatur, quod concordia fit studiosior, quam morosi Stentores, quibus classicum è suggestis suis canere prolubium est. Sic impulsus sumus utrinque à domesticis fidei, quibus pacis censores sumus. Adeo sedit animis plurium illud:

Nulla salus paci: bellum te poscimus omnes.

Claudo & salutem cum officiis Cl. T. Scytte à D. Bergio utroque Willio & me.

Bremæ prid.
Non. Maii,
Anno 1640.

Clarit. Vestrae

devotissimus Servus,

L. Crocius.

CCXCIII.

Clarissimo, & Doctissimo Viro D. Gerardo Joanni Vossio, Historiarum & Chronologiae, Professori celeberrimo.

Clarissime & celeberrime Vir, olim Collega, semper Amice,

NON possum verbis exprimere, quam fuerim commotus, quando præstantissimus Dubletius, mihi per occasionem communicavit, quas à te acceperat literas, super iterata illa tam paucis diebus probatione, qua Deus patientiam tuam, & lectissimæ Matronæ uxoris tuæ, voluit non quidem sua causa experiri, qui vos intimè

novit, sed aliis in exemplum exhibere. Et certè opus fuit vobis, speciali gratia spiritus divini, ut hanc jacturam lucro deputaretis, præsertim iis quos Deus ad se recepit, hujus seculi incommodis, & corruptelis exemptos, & Cælo exceptos. Taceo unicæ quæ supererat puellæ carentiam: sed qualis fuit juvenis ille, qui in ea ætatula poterat, quæ pauci attingunt, post multorum annorum labores? At non quamdiu, sed quam benè vitam hanc duxerit, cogitasti; & quam foelicem finem Deus laboribus ejus imposuerit. Et certè, hoc præsertim corruptissimo seculi statu, admiranda sunt quæ de ejus victoria narras. Cur enim hoc nomine, non indigitarem, beatum illum excessum, & fidem illam ac constantiam, cujus ad extremum usq; vitæ halitum edidit testimonia? Beati estis, tali filio cælorum cive, qui in terra, sui memoriam tam suavem, omnibus bonis, & doctis reliquit? Beati qui quæ humanitus vobis accidunt, divinæ Providentiæ, adscribitis, & in ea acquiescitis; siquid possunt, amicorum συμπαθείας, si καρίζον? οἱ ἀντιρόμοι συαλγόντων ἢ φίλων, tot sunt qui vobiscum lugent amici, quot sunt, quibus non ignotus erat maximæ spei juvenis; sed quem spes melior non fefellit, quem etiam non lugetis, quomodo lugent ii qui spem non habent. Præivit, sequemur ad nos non rediturum, qui ad eum tendimus, id est ad Deum. Det tibi, Vir clarissime, in iis qui supersunt gaudia diuturniora, eosque benedictionibus suis, coram oculis tuis cumulet, teque iis diutissime conservet, cum lectissima uxore, quam tecum cum mea, saluto officiosissime, cum reliqua familia. Vale.

Hagæ Comitæ,
postrid. Kal. Apr.
clō 1641.

Tuus omni

officio & affectu,

Andreas Rivetus.

CCXCIV.

Viro Incomparabili Domino Doctori, Gerardo Joanni Vossio.

Literæ tuæ, Vir celeberrime, cum doctorem nostrum augerent, ex tuo, quem non minus domesticum nobis, Paterna conjunctio effecit; è vestigio tibi responderi mandabant: Ne à fidelissimis amicis destitutus, cum solatium non potes expectare

expectare videreris *supra d. d. d.* Ipse enim nosti, simplex quidem, & vulgare, sed unicum esse nostrum, adversus mala omnia præsidium; voluntatem Dei; quæ nulum à Christianis patitur murmur, quia quod infixit, non malum vulnus est. Quippe quo firmitas, & constantia, imo ipsa animæ valetudo, ac sanitas quæritur. Nos quidem cum Patrem, caput amiserimus, sic fermè, veluti naturale est, extabuiamus. Et tamen resumimus spiritum, tanquam surculos edituri, postquam cladem maximam fortuna fecit. Tibi membrum aliquod abreptum, quamquam charissimum, si nihil aliud, leviorẽ præ nobis dolorem, esse patietur. Cumque orphani nos paululum erigamus, quid tanto viro defuerit, cui solidum est omne Christianum robur; & in hac causâ, viridique senectute, virenti palmæ non absimile. Sed hætenus quidem; ne quod dici solet, Sus Minervam. Quod dissertationem meam spectat; si præter spem Blauvius manum non admovisset, Elzevirius eam tradi peto, qui non hanc modo, sed & Cretam ipsam, absque omni morâ edituros, polliciti sunt. Quicquid fuerit (nam & Cretam non videor sic urgere nunc debere) quæso, ut dissertationem, cum Elzevirius mitti impressa valeat, quos proximè speramus. Paucarum pagellarum est, iacturæ, aut impensæ illius, quæ ob exilitatem vix aestimari possit. Alias, præter Cretam omnes Parentis lucubrationes, quotquot fuerint, remitti peto; hoc enim regno, excudi facilius curabo. Spero autem antequam de Cretâ quicquam fiat, me literas à te recepturum; quibus me certiorẽ facies, an Parentis dedicatoria, ad Franciscum Molinum annexa sit. De quibus omnibus, porro te etiam atque etiam rogatum volo, Vir maxime, ut molestiam imputare fidei, ac benevolentia tua cupias; mihiq; ad omne genus, tam officiorum, quam literariæ laudis facem præbere, imo ut rectius dicam, calcar addere. Potes enim, potesque. Mater, soror, tui, tuorumque causa, sollicitæ ac prorsus anxie salutem tibi dicunt plurimam, & decumbenti filio, meliora omnia per me, & mecum simul apprecantur. Vale, decus unicum avi nostri, nostra domus præsidium.

*Dat. Soræ, a. d.
xii. Aprilis, An.
164 c.*

Tuus omni cultu

& observantia,

Joan. Meursius Filius.

Hæc scripsi, etenim dubito, num Epistola mea per Hambürgensem nuntium missa, tradita sit.

CCXCV.

Viro Illustri, Excellentissimæque Gerardo Joanni Vossio, Rhetori ac Polyhistori dignissimo, Salutem plurimam ac debitam observantiam.

Illustris ac Excellentissime Vossi,

Tuis Literis plurimum me debere, iis quas in Angliam abituro gratiosè communicabas, meis ex Anglia ad T. Exc. datis literis, libentissimè agnovi, veluti hæc agnitione, partem grati animi monstrassem. Illustriss. quoque Hugo Grotius earum causa me Parisiis honorabat. Constantinopoli quoque, hic inquam, ubi jam decem ferè menses, cum Cl. Pocokio tuo dego non ingratus, earum, quas non viderat, nomine sum susceptus. Ita ut gratias agere maximas debeam, pro istis tuæ in me benevolentia testibus, adeo utilibus in meam rem. Et eo ipso me veluti aliquem tuorum ascitum commendasti, ut ingratus sim, nisi singularem, & ut foeliciter credam, paternam quandam curam deprædicem. Gratitude causa impræsentiarum, hoc ex animo suadeo tuæ Exc. ut aliquem tuorum filiorum, Isaacum, vel Gerardum, navi Hollandicâ, vel si ista desit, Anglicâ, quæ in initio Augusti, vel ad finem Julii ex Douvrâ solvit, & Generalis vocatur, quod totius Societatis Turcicæ Mercatores, merces suas imponunt, huc mittas, ubi maximum pro eruditione orientali commodum facere queat, cum & hic librorum sit copia, emendique potestas satis magna, licet pretia cara sint; & si quis Græcas visitare Ecclesias velit, quæ hic in Oriente sunt, queat manuscripta quadam reperire, quæ præsentī pecunia redimat. Vivendi ratio, filio tuo foret facilis; cum Illustriss. confœderati Belgii Residentens D. Cobs, vel mihi biennii mensam, domumque, & hospitium liberale promiserit, quodque recepissem, nisi quadam alia me interceptissem, Pocokius scilicet, & Anglicus Legatus. Quod quum mihi fecerit peregrino, quid tuò non faciet filio, cui multis nominibus, Belgium quoque ipsum debet esse obstrictum? Et nullius hic quoque æstimatur adesse tabulæ, cum omnes Legati cogantur hic splendide, & liberaliter vivere, veluti versantes in oculis Turcarum, qui ex splendore externo, gratiam suam favoremque inclinant, cum Legatis honorificum sit, splendidos secum habere domesticos, nobilesque, quo ipso modo

modo P. Golius, per quatuordecim menses, gratis vixit, in ædibus Cornelii Hagæ, & ego ipse si magis ducerer deliciis, quam studiis, vel decennium hic commorari queam. Perfidem verò, cum Dei aspirante gratiâ, intra mensem, vel aliquanto ultra, peturus sum, consilio meo ea inde reportaturus, quæ per propriam diligentiam potero, cui interdum pecunia desit, sed nunquam constans firmusque, & quadratus animus, quo aliquid certè reportabimus, aliisque viam, quam ex nostra Religione nemo studiosorum ingressus est, aut doctorum virorum monstravit, inveniam unde & nostra Respublica literaria ditari queat, cum indignum sit, Mercatoriam Rempublicam, ex Oriente suos advehere Thesaurorum, nobis inde nihil, aut parum divitiarum venire. Id quod quemadmodum ferre nequeo, ita spero, me cum filio tuo Isaaco posse, nostris doctis viris, oculos aperire; ut sciant non minus sibi, quam Mercatoribus Orientem esse petendum, cujus scientias, historiarumque, & millena eruditionis genera, non melius spernimus, quam illi nostras ignorant, quibus ut optima quoque nostra ex animo optamus, ita plurima nostra, ex illorum reliquiis lucem sine dubio magnam accipient. Quod verò id hætenus factum non est, non defectu librorum scientiarumque sit, sed quod docti nostri, adeo diligenter Orientem non investigant, uti Mercatores, magno mehercule nostro damno, & ignominia. Concedes itaque, Excell. Vossi, ut cujuscumque ex præclaris filiis tuis animus cupidine has videndi oras ducitur, eum permittas suis votis, neque in itinere plus periculi est, quam domi, magnoque in mari, quam parvo, id quod pro dolor! Filiorum subita mors ostendit. Et hic Constantino poli pericula tanta non sunt, quanta vulgo creditur, & ab iis spargitur, qui peregrinationibus suis, ex periculi commentis ordinibus majorem adstruere gloriam, & admirationem contendunt, qualibus ingenii, & nunquam delectatus sum, & nunquam credidi. Quot hic per decennium, imo per vicennium vivunt, qui tale quid non sensere! Uniuscujusque prudentia, post divinam providentiam omnibus iis, quæ accidere queunt præveniet. Quod itaque P. Golius, Pocokius, Greefius, & is quem commendasti, Christianus Ravius hic aut fuere, aut sumus, ut Dasam, aliosque taceam, hoc amorem filio tuo, facile concitabit, maximè cum ex Golio, Pocokioque conjecerit, quantum eruditionis hic comparari queat. Quod si vero Pto-

lomæum prius edere velit, amarem ut eum Græco-Arabicè magis, quam Græco-Latinè ederet, pluribus ad eum perscriptis de causis. Utinam vestri Amstelodamenses, aliquot juvenes mitterent, alerentque in diversissimis Orientis partibus, ut duo aut tres conjunctim omnia inquirerent; quoniam impossibile est, ut unus aliquid singularis perficiat, quod semper miror melius intelligere Mercatores, quam Doctos. Hisce vale, Excellentiss. & Illustriss. Vossi, & me ama.

Constantinopoli
13. Apr. 1640.

T. Exc. observantissimus,

Christianus Ravius.

CCXCVI.

Viro incomparabili, D. Doctori Gerardo Joanni Vossio.

NON potui, Vir amplissime, datâ occasione, quin literarum aliquid, iterum ad te darem: & iis favorem tuum mihi conciliarem. Vir summe, utinam jam mihi ferè desiderio tabescenti, paterna monumenta transmitti possent, si tibi forsitan occasio sit denegata, quæso Ludovico Elzevirio, qui ea omnia, ut rectè ad me perveniant, operam dabit. Dissertatiunculam meam pari desiderio expecto; in cujus frontispicio, hanc imaginem præponi benevole etiam volo: te magne Vossi, rogo, propter charitatem, & amorem tuum, quo semper candidè Patrem meum prosecutus es, sit tibi de dissertatiunculâ edendâ cura. Quod adeo urgeo, quæso, mihi ignoscas; nam in causâ est peregrinatio mea, quam, volente Deo, hoc autumno, vel futuro vere ad ultimum, instituere cupio. Dissertatiunculæ meæ triginta exemplaria benè compacta inauratis foliis, tradas quæso meo nomine, illustri Domino, Cornelio Vander Mylen, qui curabit, ut Venetiis, inter Patritios, & Senatores, distribuatur. Vale, decus ævi nostri, nostræ domus præsidium. Mater mea, & soror, tibi, tuisque per me, salutem plurimam officiosè annuntiant.

Scribebam Soræ
Danorum, a. d. iv.
Jun. An. cl. lxx xl.

Tuus omni cultu,

& observantiâ,

Joannes Meursius filius.

CCXCVII.

CCXCVII.

Clarissimo, & Doctissimo Viro, D. D. Gerardo Joanni Vossio, Historiarum & Eloquentiæ Professori eximio. Salutem ab Authore salutis.

Clarissime & Doctissime Vir, Literatorum decus.

D. Laurentius nuper Amstelodamo red-
dux, post salutem mihi impertitam
tuo nomine, (de qua officiosa salutatione
mihi summè gratulor,) retulit, & inter
alia, te cupidum esse scire, quæ observavi
circa Echonem illam admirandam, Romæ
extra portam Capenam, hodie D. Lauren-
tii vocatam. Cum meum unicum studium
sit, benè mereri de literis, & præcipuè de
literatis, (inter quos te ut Coryphæum, &
Antistitem veneror, & amplector) nolui
deesse hac in re, tam exigua, imo gratula-
rer mihi, & laudi ducerem, si sæpius (de
ejusmodi rebus interpellatus) vobis possem
inservire, opella mea, & talento exili. De

Echone ergo illa, hæc habere, quæ
Ann. 1614. ipse observavi. Extra portam

D. Laurentii, in via Appia ex-
tat, Cæcilie Metellæ sepulchrum, seu po-
tius Turris, Sphæricâ extructa figurâ, vul-
gus hodiè Caput Bovis nominat, scilicet à
Boum Capitibus, quæ circumcirca excul-
pta spectantur. Hujus Mausolei muri,
crassitudinem habent 50. meorum pedum,
ut ipse dimensus sum. Exterior structura
est ex solidis quadratis lapidibus, interior
ex lateribus constat. Prope hanc Turrin-
am, audivi memorabilem illam Echonem, quæ
quaternis vicibus successive, sine interpel-
latione, perfectè, & particulatim repetit
omnia verba, quæ pronunciantur, nempe
totam dictionem, sententiam, vel versum
integrum; cum inclamarem, *Arma virum-
que cano, Trojæ qui primus ab oris*, repetit
quater istum versum integrum: eo loci
unde procedit sonitus, extant 4. muri, seu
arcus potius, unus post alium, à se invi-
cem paulo disjuncti. Ultra illas quaternas
vices, seu clamores, audivimus quidem so-
nitum, & murmur, sed imper-

*Anno 1602.*fectum. Observavi & Lutetia
Parisiensium, in horto Regio Ar-
cis Luparæ, similem ferè Echonem; Con-
tre une muraille de la hauteur de 10. ou 12.
pieds, en un coin du jardin est une Echo,
laquelle refere parfaitement, un long
ordre des paroles, quand on chante, ou
crie. Exempli gratia, *Si cest pour mon
puçelage*: Omnia hæc verba uno sonitu,

simul exprimebat aliquoties. Longe alia
est Echo illa, quam audivi, 2. Leucis Lu-
tetia distantem, nempe in Pago Charen-
ton, illam enim audivi ipse, Quatorze
fois repeter les paroles, distinctement &
clairement, Lesquelles se finissent, &
abaissent, petit à petit, dont est referé
grandement, *heu, heu*, comme la voix &
complainte, d'un qui meurt. Hæc Echo
admirationem quidem meretur, ob toties
repetitum unum verbum (si enim clama-
veris, Jan, nihil aliud respondebit quam
Jan, Jan,) sed versus integros, integrè, &
sæpè etiam recitat. Talis est &
illa Echo, quam Cardanus lib. 18. *Ticini.*
de Subtilitate, testatur vocem red-
dere decies & ter. De tali etiam loquitur
Lucretius;

*Sex etiam ac septem, loca vidi reddere voces,
Unam eam faceres. —*

Ejusmodi Echonis mentionem facit &
Plinius, lib. 36. cap. 13. quæ fuit Olym-
pis, & Athenis, diciturque fuisse Hepta-
phonem; idem tradit Plutar. lib. de Gar-
rulitate, & refert rem quasi admirabilem.
Colophonis loco addam, verba Boissardi,
quæ habentur prima parte Typographiæ
Romanæ, de supradicta illa Echone; *Ad
radices collis, in quo Mausoleum Cæcilie Me-
tellæ situm, si quis integrum versum heroicum
pronunciet, Echo admiranda eundem reddet,
integrum, & articulatam sæpius. Ego Vir-
gilianum illud primum Aneidos distinctè
repeti, octoties integrum audivi, & postea
confuse aliquoties. Nusquam gentium ejus-
modi Echo auditur, quæ ideo tanto dicitur
excitata artificio, ut in funere hujus Cæcilie,
Plorantium ejulatus, Exclamations, & plan-
ctus funebres, in immensum multiplicarentur.*
Et Franciscus Schottus, eadem ferè refert;
in suo itineraio de hac Echone.

Hicce, Vir Clarissime, te Deo Opt. Max.
commendo, unà cum familia.

*Hardervici,
8. Jul. 1640.*

Tui observantissimus,

Ernestus Brinck.

CCXCVIII.

Cl. V. Ger. Vossio.

Clarissime & doctissime Vir,

Ecce hic habes summaria vitæ hucusq;
præteritæ Reverendissimi Archiepi-
scopi Cantuariensis: cui Nestoreos annos
optare omnes cordati debent.

In Collegio Sancti Johannis Oxonii enutritus, in quo optimam sui memoriam posuit; auxit enim illud ipsum Collegium, tum ædificiis splendidis, tum redditibus duplo amplius quam prius.

Oxoniensem Academiam, cui præest ut Cancellarius, decoravit multis beneficiis; primo privilegiis firmioribus quam antehac: locupletavit Bibliothecam publicam, rarioribus Manuscriptis codicibus in omni genere Linguarum & Artium, ab extimis Orbis finibus petitis, Indicis, Arabicis, Persicis, Græcis, Hebraicis, Latinis.

In Academia propriis sumptibus Lecturam Arabicam fundavit, & annuo stipendio honoravit.

Universæ Ecclesiæ quanta testimonia Curæ, Pietatis & Providentiæ addidit!

Corruptiones præcipuè Simoniacos corrigendo, doctos & pios commendando, fovendo omnes qui eruditione & ingenio valent.

Collapsam Ecclesiæ Anglicanæ disciplinam restaurando, ad primam primorum Reformatorum scopum perducendo, Ecclesiæ paci & securitati per nuperam Nationalem Synodum optime & provide consuluit.

Ecclesiæ Paulinæ Londinensis per totam terrarum orbem celeberrimæ magnitudine columnas contra ruinam apposuit, curavit reparari splendidissime.

Succurrit quotidie innumeris pauperioris fortis hominibus; qui litibus vexantur facilem ipsis præbens aurem, & operam, curam & consilium.

A latere Serenissimi Regis adstat fidissimus Consiliarius, honoris Gentis avidus, Consiliis incorruptus, sincerus, cordatus.

In juventute semper ingenii acumine celebris, summus & acutus Philosophus, postea demum Concionator sedulus, & doctus: scriptor eruditus contra Pontificios, de præcipuis Fidei capitibus & corruptionis Pontificiæ columnis. Teste lib. ab ipso edito judicio omnium doctissimo, & antiquitatis puræ propugnaculo.

Collegii Joannensis primò Socius deinde Præses. Demum quod concionibus erat celebris & frequens, concionator Regius è Capellanis (ut loquuntur) domesticis. Decanus Glocestriæ brevi factus; à Glocestria promotus in Episcopatum S. Davidis; & inde Bathoniensis & Wellensis Ecclesiæ præfuit Episcopus, & inde ad sedem Londinensem evectus, & inde propter vitam inculpabilem, singularem integritatem, & rerum Ecclesiasticarum experientiam, Metropolitanus totius Angliæ, sedem Cantua-

riæ jam occupat, & in bonum totius reformatæ Ecclesiæ diu occupet, votis ardentibus contendo ad Deum.

Vale, Vir doctissime, vix errare potes nimia Hyperbole, omni Rhetoricâ major est summus Archiepiscopus; in hoc inter multa felicius, quod te nactus est amicum, & clientem. Me quæso calci Catalogi amicorum adjicere dignare.

Ex Aula Seren.
Reginæ Bohem.
Hagæ comitis
13 August. An.
salutis Christi.
MDC XXXX.

Tuus in omni

observantia &

officio Amicus,

Samsonus Johnsonus.

CCXCIX.

Memorand. de Reverendissimo in Christo Patre Guilielmo Domino Archiepiscopo Cantuariensi totius Angliæ Primatè & Metropolitano: Serenissimo Magnæ Britannie Regi Carolo à SS. Consiliis, Academiæ Oxoniensis Cancellario, &c.

1. **P**rofectum in Philosophicis & Theologicis studiis debet Collegio D. Johannis in Academia Oxoniensi; ubi postquam alia cum publica in Academia tum privata in Collegio munera, perpetua cum laude sustinuerit: à Collegii Sociis (quibus ex plurimorum annorum necessitudine & experientia abunde perspecta esset ejus Prudentia, Probitas, Doctrina) in Præpositum Collegii electus, non tam præesse, quam prodesse illi voluit.

2. Vacante supremo magistratu Academiæ (qui non nisi Magnatibus & meritissimis deferitur) Defertur autem ipsa seipsam ejus custodiæ & clientelæ commisit; Academico Senatu in Academiæ Cancellarium ipsum eligente; quod quanto beneficio, atque gloriæ Academiæ atque rei literariæ universim versum est, appareat ex ejusdem Privilegiis stabilitis, auctis: legibus & Statutis in ordinem usumque digestis, &c. Ut respublica Literaria in illa unica Academia suos numeros implevisse videatur. Ratio tam accurata in admittendis, instruendis, exercendis, promovendis, moderandis, &c. studiosis; & negotiis Academicis omne genus administrandis, &c. ex ejus voto & dire-

directione in illa habetur. Vide Statuta Acad. Oxon. impressa Oxon. 1638.

3. Religionis Orthodoxæ, atque uniformitatis in cultu divino, per Ecclesiam Anglicanam, ex legibus & constitutionibus Patriæ; moribus antiquis & probatis: adeoque regula & mente (qua queat assequi) primorum Reformatorum illius Ecclesiæ, acerrimus assertor: ab omni confusione, immunditie, profanatione Sacrorum, &c. abhorrens. Utque major reverentia sacris concilietur, ordinis Ecclesiastici atque Facultatum, quibus honestius, & liberalius se sustentent, quâ justè poterit, vindex & promotor studiosissimus.

4. In Theatro Theologico five cominūs certandum cum adversariis, five concionandum è Cathedra promptissimus, æque ac nervosus & strenuus. Quo etiam loco habet Jesuitarum & Romanensium superstructiones stramineas & superstitionem; juxta ac aliorum (Socinianorum, &c.) in re religiosa, dogmata & deliria perniciosæ, nemini constare non poterit, cui cæcutire non lubet; ex operibus ejus publice impressis.

5. Templum Divi Pauli Londini (opus ingens, &c.) ab ætate suâ æque ac incuria temporum non leviter passum, ejus consiliis & auspicio reparari inceptum, propediem (in maximum & urbis illius & Ecclesiæ Anglicanæ ornamentum) pristinum suum decus & splendorem recuperaturum.

6. Ardor ejus sumptusque immensi in conquirendis Orientalium Scriptorum Monumentis, publico & æterno usui in Academia Oxon. destinatis. Ubi etiam liberalitate & sumptibus propriis jam amplo atq; annuo Salario dotavit Professore, qui Linguis illis studiisque propagandis omnino insuder. Vide Epistolam D. Joh. Seldeni præmissam ejus de Successoribus ad leges Ebraeorum, &c.

7. Mira in precibus divinis, Consiliis Regiis, Foris Justitiæ (quibus aut præesse aut interesse illi incumbit) assiduitate & zelo: ab omni largitione atque corruptione (quod nemo non fatetur de ipso) alienissimus.

8. Virtus invidiâ carere non potest, &c.

CCC.

Cl. V. Ger. Vossio, *Salutem in Christo.*

Annus elapsus est (Vir eximie) à quo Literæ priores vestræ (sed quibus re-

sponsum non dedi) ad me pervenerunt. Sed annus occupatissimus fuit, & in quo vix libere spirare, ne dum scribere potui. Regis in partes Regni Boreales discessus: negotia quæ eo absente mihi aliisque incubuerunt: pacificatio illic sancita, sed vereor an satis tuta: à reditu Regis Consilia inita: Parliamentum indictum, conventum & dissolutum, negotiis Regis & Regni non compositis: statim à soluto Parlamento seditiosa & furiosa in me, & domum meam, hominum malè feriatorum & conditionis infimæ Insurrectio, quingentis ad minimum domum meam horâ noctis mediâ obsidentibus, sed Deo gratias frustra: Convocatio five Synodus Nationalis sequuta est ut (si fieri posset) res Ecclesiæ turbas non darent, nec Religio (ut ubique gentium solet) pallium fieret. Interim apud nos omnia arma sonant. Et inter hæc quæ me, & animum meum pacis cupientissimum pessimè habuerunt, quî potui de literis tuis, utcunque semper mihi gratissimis cogitare?

Sed omiſſis quæ me distinuerint, & manum à tabula, gratias tibi summas ago, quod memor mei Literas misisti. Junius charissimus attulit tuas, meas etiam refert; sic enim decreveram, sed abiit literis meis nondum transcriptis. Breviares sunt quam aut res postulant aut quæ tam diuturnum silentium possunt expiare. Sed non ignoras (idipsum enim lego in tuis) quantas turbas, & quam malas nobis hic in Anglia res Scoticæ dederunt: furiosi novatores quo tendunt scio, quo pervenire dabitur novit Deus, & jam Angliam armati invaserunt. De his autem nec vacat nec placet scribere, ne quid fellis Chartulas meas nigraret, quum video ubique, & apud externos etiam, nomen meum, famamque, illorum virulentis calamis, laceratam & fo-datam undique.

Redeo itaque ad privata. Et certè doleo annum tuum Climactericum tam malè te mulctasse. Sed non eripuit cum sanitate vitam, nec diu detinebit spero revertentem sanitatem. Et (quod impensius opto) Deus dabit solatium pro malis illis quibuscunque quæ annus iste tibi parum faustus intulit.

Mitto per Junium Librum meum superiori anno editum, sed Idiomate Anglicano. Promisi fateor editionem Latinam me tibi antehac missurum. Nec falsus sum in hoc, sed deceptus. Vir enim satis doctus, & cui satis otii est, hoc in se suscepit, & ut apertè tecum agam perfecit: Sed quum paulo penitiùs inspexi, vidi non pauca in quibus sensum, plurima in quibus stylum non

non est assequutus. Et melius multò duxi suppressere Translationem, quæ nec me, nec mea loqueretur, quam talem edere, unde exteri omnes, quibus Lingua Anglicana non satis nota est, me quidem, sed speculo male fido, intuerentur. Si corrigi poterit potes adhuc expectare, sed vereor transferentis socordiam magis quam calamum; cum hoc libro meo Canones mitto novissima Synodo constitutos, quibus videre potes me nec Ecclesiam nec veterem Ecclesiæ tramitem deseruisse. Reliqua, sicut & teipsum Deo, & gratiæ ejus commendando, efflagitoque ut temporibus hisce quibus tam subdole, tam violenter res nostræ undique petuntur, velis jugi oratione Deum & Salvatorem nostrum fatigare, ut incolumem servet servum suum, &

Dat. ex Aedib.
meis Lambeth.
Aug. 31. 1640.

Tibi (Vir doctissime)

amicissimum,

Will. Cant.

CCCI.

Clarissimo, Doctissimoque Viro D. Gerardo Joanni Vossio, Artium & Philosophiæ Doctori celeberrimo.

Clarissime & celeberrime Vir, Amice honorande,

NUdiustertius interfui funeri, ὃ μάλιστα, Antonii Thyssii, in Academia Doctiss. duobus Theologis orba, in tantillo temporis spatio. Spes aliqua affulget, D. Bisterfeldium, qui ad defuncti D. Walæi professionem vocatus est, affuturum circa ver proximum. Nisi jactura tanta brevi refarciatur, & Academia de celebri etiam J. C. & Philosopho provideatur, frigeant studia, & vicini ad se florem studiosorum pertrahent. Cum ibi essem exiit in lucem, novus affinis mei Molinæi foetus, quem Decano, & Capitulo Cantuariensi placuit dedicare. Mitto hodie exemplaria Cantuariam operâ D. Boswelli. Unum tibi retinui, qui inter eos es allectus, & affinis mei in Canonicatu Collega. Accipies igitur illud à me, nomine Authoris, qui erga nomen tuum, non minus affectus est, quam tu erga illum, quod ei etiam nuper testatus sum. Cellissimus Princeps cum filio crastina die, huc Groningam versus tendit, ob causam tibi notam. Ego interim hic quiesco, ubi si opera mea tibi, aut tuis esset

necessaria, eam vobis libenter impenderem. Heri tumultatus fuit D. Bouchortius, cujus locum in Concilio ordinum Generalium implebit D. Aerlenius. D. Salmasius tandem appulit Diepam, post agitationem periculossissimam, dierum octodecim, in quorum quarto amisit filiam majorem natu, quæ in corpore imbecillo, ferre non potuit tantam concussionem. Rhotomagi aliquamdiu egit, apud Senatorem Sarra-vium, virum doctissimum, & doctorum amantissimum, ac tandem Lutetiam Parisiorum pervenit. Boxhornius sub prelo habet, librum de Trapeziticis, an hic tollerentur tantum, vel approbentur? Audio eum satis modestè rem illam tractare, quia eum vestigia terrent. Hæc habui quæ pro tempore, & raptim, ad te scriberem, quæ boni consules, & me amare perges, qui tibi & tuis, omnia prospera voveo. Vale.

Rapt. Hag. Com.
xv. Kal. Dec.
c1o 1o c xl.

Tui studiosissimus,

Andreas Rivetus.

CCCII.

Excellentissimo, & Clarissimo Viro D. Gerardo Joanni Vossio, Athenæi Amstelodamensis Professori celeberrimo, cum debita honoris præfatione S. P.

DUÆ sunt causæ, Vir undequaque clarissime, quæ me ad hoc quicquid est literarum ad te exarandum impellunt. Una quidem humanitas tua, & φιλοξενία singularis, cujus utriusque amœnus radius, me quoque calfecit non ita pridem, dum non tantum colloquio minimè penitendo, sed & ejusdem eximio condimento, vini scilicet nectarei tecum alternato haustu, seorsim me dignatus es; pro qua utraque beneficentia, quantas possum maximas etiamnum tibi gratias ago. Altera est D. Professoris Hoelzlini, & affinis mei nunquam non veneranda mihi auctoritas, qui me ad hanc scriptionis aleam ipse quoque instinxit, his & similibus verbis; Heus tu, qui semel hortatu meo, virum tantum, tam amicum, coram ausus es compellare, cur non etiam per literas tandem? Quod si ego amicitiam ejus tanti æstimare debeo, tu multo magis favorem ejus, hoc præsertim rerum tuarum tam flebili statu, conciliare tibi necesse habes. Sic illo me monente, meus ipse me porro monuit

nuil animus, quantam rerum mearum, non ita pridem fecerim jacturam, quantis fatorum fluctibus, infœlix ego sim volutatus. Quid enim non patitur is, qui in Dynkerkanas istas Harpyias incidit? Cujus tamen cladis, oblivionem potius, quam memoriam optavi sæpiculè; sed hanc invito subinde refricant, non tam pecuniæ, & sarcinarum jactura, quam cicatrices illæ post vulnera in pectore meo, tum accepta, etiamnum residuæ. Postquam enim prædones illi nos debellassent, nostramque navim, post cruentum satis, & novem horis continuis durantem conflictum, tormentorum ictibus plusquam ducentis, jam pessum dedissent, vulturum instar, uti solent, advolantes, omnia ex hoc naufragio, nobis reliqua surripere, nec ipsam interulam, nedum vestem reliquere: dumque ego sic partim reluctor, partim precibus ab eis impetrare conor, ut vel interiorem tunicam, pudoris gratiâ non raperent, perditissimus quidam nebulo, furibundus in me irruens, me non tantum nudavit penitus, sed & pectus meum unguibus suis uncis, sic dilaniavit, ut sanguis inde largiter efflueret. Taceo nunc cætera, ne & mihi non minus ac tibi, velut crambe quadam bis cocta, molestus sim. Ad has igitur redactus incitas, tantisque studiorum meorum viduatus subsidiis, ad te V. C. tanquam ad naufragii hujus fospitricem tabulam, me convertito, rogans efficitim (quod & coram feci) ut si quam peregrinandi studiorum causa, pro digno aliquo stipendio, cum Mercatorum filiis, vel id genus, aliam nôris commoditatem ea me languentem beare, & hoc modo studiis meis succurrere ne dedigneris. Satis credo Palatinorum exulum plorabilem sortem, quæ me quoque premit, jam ultra quindecim annos perspectam habes, plerosque nimirum, imo ferè omnes, non suis, sed aliorum subsidiis, & facultatibus adjutos, ex hoc communis sibi calamitatis Oceano emergere, & sustentari. Ad pulverem tamen pædagogicum mallem non revolvi denuo, quippe qui tot annos jam in eo sudaverim, idque cum studiorum meorum damno, vix reparabili; sed si quæ essent, jam robustiora paululum ingenia, & quæ manum ferulæ subduxissent, eis ego me comitem, & ductorem optarem præfici. Nec enim me latet, multos cordatos & haud infimæ sortis Parentes, in hujusmodi filiorum suorum cura, ad te, tanquam ad proram & puppim consiliorum se recipere. Quod si talis, te dirigente, conditio obtingeret, efficerem ego, *Θεῷ*

Διδόνῳ, ut nec me susceptæ provinciæ, nec te commendationis tuæ, unquam pœniteret. Peragravi Germaniam, jam aliquoties, in Gallia totum biennium Clarissimus Molinæus me habuit auditorem, ac mare decies ingressus, Daniam Borusciam, ipsam denique vastam perlustravi Poloniam, & jam Angliæ, seu, ne imprudens committam solæcismum *εἰς τὴν Μεγάλην*, Magnæ Britannię obeundæ propinquus eram, ni lamentabilis ille, & horrendus casus me repressisset. Tantis deniq; (quod citra omnem dixerim jactantiam) asperimorum itinerum reciprocis ambagibus, sum volutatus, ut in his Tyro quiliam, & qui nido suo nondum evolavit, me duce, & Achate, ad hujusmodi professiones, non infœliciter, spero, ulurus esset. Talem porro ut ambiam conditionem, aurem mihi subinde vellit, Domini Professoris, & affinis mei, jam per aliquammultum temporis afflicta satis, & nimis quam incerta valetudo, quæ quidem eum tam male habet, etiamnum, ut munere suo publico, ultra sex hebdomadas, jam intermisso, pedem domo efferre, nondum valeat. Cum Apollonio suo, eo jam progressus est, ut quomodocunque res cadat, modo sic pergat Typotheta, totum opus sub finem mensis Januarii, commodè absolvi possit. Amplissimisque Curatoribus, paulò post illud tempus, hic adfuturis, insinuari. Nimirum octo circiter folia, ut appellant, tantum restant imprimenda, jam omnibus, præfatione & indice exceptis, à me descriptis. Cæterum Deus Opt. Max. cujus judicio tot pericula, & labores exantlavi hæctenus, me ipse tandem, spero, respiciet. Meam interim vult exercere patientiam, meque ad se precandi studium tanto magis excitare. Sed ne te morer diutius, en tibi pagellas illas, vel potius commentationes in Genesin Molinæanas, omnes quidem quas toto illo biennio dictavit: quas gratâ manu, quæso accipe, iisque quantumlibet utere. Verum totus iste tractatus, post tot alia Theologica, viri hujus & satis famigerabilia scripta, ipse quoque in lucem tandem prodibit. Ego nunc in eo sum, ut hoc ipse per literas, ex eo velim cognoscere, eademque opera commendaticias illas literas, & alia id genus testimonia, quibus me tum dignatus est quæque ego cum cæteris hujusmodi chartis, hostium & durioris metu captivitatis, in mare tum projeci, recuperem. Et quamvis satis ille habeat commendationis, quem virtus sua commendat, hoc tamen ævo, sic comparatum est, ut literis talibus,

talibus, quam ipsi personæ plus fidei tribuatur. Te quoque, V. C. iterum iterumque rogo, ut me tibi commendatum habeas. Τὰ δὲ ὑπέσχεσθαι, καὶ μνησθαι, καὶ παρακαλεῖν σὺν ἐμπιστάῳ ἀμειβέσθαι. Etiam atque etiam vale, Germaniæ nostræ decus, & inter cultores virtutis, nominisque tui, non falsè cense

Lugd. ad Rhenum
x. Kal. Decemb.
Anno 1640.

Georg. Andr. Richterum.

Dom. Professor Hoelzlinus cum uxore, tibi, tuisque officiosam quoque salutem nuntiant.

CCCIII.

*Celeberrimo & undiquaque Eruditissimo
Viro D. Gerardo Joanni Vossio,
Professori dignissimo, S. P.*

Vir Clarissime, fautor, & amice honorande,

Quod sæpè ante hoc tempus, facere decrevi, ut tot benevolentiae officiis à te affectus, cultum, & observantiam meam, etiam calamo declararem, id ulterius ne differam, præsens occasio me monet. Vacat in illustri Lycæo nostro, Professio Historiarum & Eloquentiæ, quæ cum ante biennium, ab amplissimo hujus urbis senatu, in commodum studiosæ juventutis, institueretur, ex commendatione Doctoris Vedelii, Martino Schoockio fuit demandata: qui nunc eam derelinquit, hinc in Academiam Groninganam, ad Professionem Physicæ, & Logicæ evocatus. De Successore igitur jam laboramus, qui munus istud deinceps cum laude administret. Commendatur nobis à Leydensibus, & Ultrajectinis, filius Gisberti Voetii, & ut amicorum literis, plus ponderis adderetur, ipse se nobis præsentem stitit: ac undecimus jam dies est, ex quo in urbe hac moratur. Sed quantum animadvertere possumus, ipsi hæc provincia non obtinget: præterquam enim quod valde juvenis adhuc est, nec illis dotibus videtur satis instructus, quæ ad munus istud exornandum requiruntur: nostri etiam in cooptando novo Doctore, cautiore jam erunt. Ideo de alio cogitandum esse existimo. Hæret in animis multorum, nomen & fama Gronovii nostri, cujus etiam mentio fiebat, ante biennium, cum Historiarum, & Oratoriæ Professor vocandus esset, nec ille, credo, tunc temporis ab ejusmodi

conditione alienus fuisset, præsertim cum & ingenium, & studia illius, ad otium literarium tunc propendere, ipse deprehenderim. Nunc vero de ejus voluntate & instituto judicare nequeo, cum toto eo tempore, quo à nobis discessit, nihil de ipso cognoverim; nec ipse Gronovius, quod vehementer miror, quicquam ad me scripserit. Id quidem scio, quæ ejus est virtus ac eruditio, non defuturas ipsi emergendi occasiones, cum habeat in sua familia, tot præcipuæ dignationis cognatos, per quos honestissimam conditionem, exambire poterit, si modo in Patria pedem figere voluerit. Obisset nihilominus eunti istis in locis, Lutheranismò sic addictis, Religionis professio. Hoc ipsum forsitan permoveret, ad ejusmodi functionem in hisce provinciis amplectendam: quamvis & alia adsint, quæ reditum in Patriam bellorum incendiis adhuc ardentem, non parum remorentur. Præterquam verò, quod Gronovius à me, cæterisque Professoribus nostris commendatur, fama ejus quoque innotuit aliquibus ex Senatu nostro, qui Hagæ-Comitis in Collegiis Ordinum hanc civitatem subinde repræsentant. Ab illis igitur jussus, & à Collegis meis monitus, præsentem ejus conditionem inquirere, non potui hoc officium scholæ nostræ denegare, imprimis cum pro ea quæ inter Gronovium, & me intercedit amicitia commodum illius omni ratione promovere allaborem. Rogo itaque te, Vir clarissime, ne grave putes, quod super hac re sentias, num Gronovium hanc vocationem, si offerretur, accepturum putes, & ubinam locorum nunc degat, paucis indicare, vel si nihil de eo sperandum judices, alium quempiam si quis occurrit, nominare. Præstabis ea in re, nobis omnibus gratissimum officium, & de schola nostra, studiisque humanioribus optimè mereberis. Conditio sanè non est spernenda, tali præsertim loco, & inter tales cives, literis sic addictos. Stipendium est septingentorum florenorum, & forsitan augebitur, si condignum hominem, quem unicè quærimus, nancisci possumus. Finem facere cogor. Vale, Vir præclarissime, cum universa familia, & me inter cultores tuos numera. Responsum vero quamprimum exspecto.

Dab. prid. Kal.
Dec. Jul. An. 12.
cIo Io c xl.

Præclariss. Dominationi tuæ,
omni fide, & officio addictiss.

Joann. Christenius, J. U. D.
& Professor Illustris Gymnasii,
P. T. Rector.

CCCIV.

CCCIV.

Gratiam & Pacem à Deo Patre, & à Domino nostro Jesu Christo. Amen.

Peroptassem Reverendi admodum Doctissimi que viri, fieri potuisset, ut ipse coram, hæc apposita deliberationum capita, vestris Reverentiis obtulisset. Sed quamvis multis, magnisque adducar argumentis, ut id expetam, pluribus tamen, & longè multo majoribus retrahor, à conatu, quo id effectum dari posset. Revocor enim in Magnam Britanniam, maximisque precibus à me contendunt amici, ut nullibi nec ullam ob causam, me detineri patiar, donec eò pervenero: quoniam ibi omnino insperatam, & exoptatissimam, rei bene gerendæ ansam, mihi offerri autumant: meque per omnia sacra adjurant, ne tantæ occasione deesse velim. Ergo illorum vocationi nunc obtemperandum erit, ita ut simul debitus erga Dignitates vestras respectus non intermittatur. Spero igitur vos in optimam partem accepturos hanc affectus mei erga Ecclesias vestras propensi testificationem, quâ honorem suffragii in re tanta, quæ omnes concernit Evangelicos, vobis delatum volui. Et ne forsan istud quod in Appendice, de Confessionum particularium usu, non legitimo, dicitur aliqua cum sermonis libertate, sit vobis offensionem, velim ut rectè mentem meam de eo percipiat; atque causam cur ita loquutus sim intelligatis. Constat haud dubie vestris prudentiis complures esse libros in Ecclesia Lutherana Symbolicos, præter Augustanam Confessionem, de cujus etiam exemplaribus variatis, & invariatis, ac horum autoritate non parùm disceptatur. Nostis Catechismos, Majorem, Minoremque Lutheri, Articulos Smalcaldicos, & Catechesin Hutteri, in superiori Saxonia, & alibi Symboli loco esse; nostis & ibi, & aliis in locis, aut formulam concordiæ Jacob-Andræanam, aut cum ea particulares formulas, qualis Confessio est Wirtembergica, aut corpus doctrinæ Jul. aut corpus doctrinæ Philippi, &c. instar Canonis haberi; si non primarii, saltem paulò plusquam secundarii. Has tot Confessionum distinctas formulas, (quamvis & inter ipsos Lutheranos, per sæpe acres pariant, suis de opinionibus concertationes, & nobiscum, in opere quæsitæ reconciliationis, non paucas afferant remoras, & difficultates:) facile tamen omnes ad-

mitto: ut extent, & quantum possunt, valeant, si modò unum absit, quod omnino intolerabile videtur, & nihilominus ubique locorum fermè invaluit: nempe quod eousque attollant, atque extendant plerique suarum Confessionum loquendi formulas, utiis tam suos ipsorum Doctores Academicos, quam aliarum Ecclesiarum Pastores, ita circumscriptos & limitatos velint, ut nec sibi suisque in prophetando ullam libertatem, ultra præcisos Confessionum terminos concedant, nec cum exteris pacificè agant, aut amicitia Christianæ jura observent cum ullis, nisi cum iis, qui in ipsorum verba jurare parati sint. Hinc est quod mihi de Confessionum fine, atque usu legitimo, cum Ham-burgensibus, cum Lubecensibus, cumque D. Bulchero Helmestadiensium Professorum Censore, (quod scilicet, ex præscripta formula non semper loquantur) & aliis quibusdam præsertim Lutheranis disceptanti, illud quod in Appendice dicitur de abusu Confessionum, in mentem venerit: ut ab errore quo, & privatam suam, & publicam quantum in se est, omnium Evangelicorum pacem, impediunt, & interturbant, revocentur.

Hoc igitur quod Lutheranis, qui vocularum quarundam aucupio delectantur, dictum est; nolim à vobis, aliter quam à me prolatum est, accipi; quoniam existimo, Confessiones publicas, non solum utiles, sed etiam necessarias Ecclesiis esse; necessarias esse dico, non tantum ut extent, in veritatis Evangelicæ testimonium, adversus Pontificiorum, & aliorum graves errores, humanasque traditiones, quibus conscientias credentium sub jugum cæcæ obedientiæ, mittere conantur; sed etiam ut contestationem fraternam initio Reformationis inter pios veri Dei cultores, in fundamento puræ Religionis, antea constitutam porro confirmet. Ac proinde utiles quoque posthac fore judico, ad communem Ecclesiæ cujusque sententiam, in præcipuis doctrinæ capitibus agnoscendam, & ad concordiam inter eos qui dissidiis non necessariis distrahantur, promovendam. Haudquam igitur oportet eas abolere, aut flocci fieri; sed tamen nec ita usurpari, ut loquendi formulæ iis comprehensæ, vel in aliarum Ecclesiarum, vel in Propheticæ libertatis, vel in Concordiæ religiosæ, vel in Communionis Christianæ, vel Conscientiæ scrupulosioris præjudicium adhibeantur. Ideoque, observandum erit, me Lutheranis in memoriam revocare voluisse ipsorum confessiones esse scripta humana,

quibus illaqueare conscientias minime convenit. Nullus enim tenetur ullas humanorum verborum formulas, aliter admittere quàm quatenus agnoscit sibi permisum fore, bonâ cum illorum pace, quorum causâ id facit, illas ita interpretari, ut cum fidei analogia, sibi in Dei verbo revelata, possit eas conciliare: quod si permittatur, tum etiam si verba nova, atque priscis inaudita, (qualia tamen, nollem temerè à quoquam usurpari:) in confessionibus humanis, inveniantur, & possit ea quispiam, aliquali adhibitâ interpretatione sano sensu accipere; judico illum pacis causâ, id tutò facere posse; imo & debere potius, quam ut otiosa certamina, de phrasibus & loquendi modis excitet; ex quibus lites, maledicentiam, invidiam, & suspiciones malas oriri dicit Apostolus. Atque hoc illud est, quod ego in meis, cum Sueciæ, & Daniæ Theologis, agere, pro mea in Christo libertate volui, quando phrasès Lutheranas, de orali manducatione, deque omni præsentia Corporis Christi, me certo sensu admittere posse professus sum; atque ita interpretatus sum, ut fidei analogiæ mihi revelatæ, non repugnarent in conceptu meo, quamvis eas nec approbarem, nec iis me teneri vellem, nec promiscuè adhibendas esse censerem; hoc tamen aliqui ex nostris, non rectè attendentes, meam hanc parrhesiam, animo non satis æquo, ferre videntur; putant enim agnitæ in Ecclesiis veritati, hac ratione aliquid derogari; à qua sententia ego ingenuè fateor me alienum esse, cum sciam non his, aut illis, loquendi modis, sed in rebus ac sententiis, sensuque verborum, analogiæ fidei consentaneis, veritatem consistere; nec unius hominis particularem, & certo sensu limitatam, phrasèos hujus, aut illius acceptionem, præjudicium ullum afferre posse, omnibus Ecclesiarum Confessionibus, quæ mentem Reformatorum manifestè produnt. Nec denique meæ qualicumque phrasèos, licet incommodioris admissione, Orthodoxiam labefactari posse, quamdiu in præparatoriis tanti operis solummodo versamur. Etenim hoc jam præcipuè agitur, ut ad Tractatus ordinatos, constantes & universales, amicabiliter intendendos, de mediis, modoque procedendi, in concordia ritè constituenda, perducantur affectus illorum, qui hætenus maximam studii sui partem collocarunt, in clamoribus, & insanis verborum pugnis; à quibus ut tandem abducantur, & ad res ipsas pertrahantur, mihi non videbatur inconsultum, hoc

pacto agere: præsertim cum hoc agens, nihil præter veritatem sensus mei proferam. Jam autem si quis velit à mea interpretatione dissentire, facile id permittam, dummodo id fiat pacificè; & nolit propter ejusmodi opinionum diversitatem, omnia Christianæ Communionis vincula dissolvere, quod, proh dolor, inter multos, nimis sæpe fieri solet hodie!

Hæc paulo fusius apud vos edidiero, Reverendi in Christo fratres, quoniam non sum nescius, quantum possint aliqui, in præjudiciis, aut aliorum animis instillandis aut apud multitudinem fovendis: nec ignoro, quantis obnoxium sit suspicionibus, & sinistris imperitorum interpretationis, hoc quod præ manibus habeo negotium. Conor itaque hac ratione, huic mederi malo: atque ideo à vestris pietatibus efflagitabo, ne facile aliud de nostro instituto apprehendatis, præter illud, quod re ipsa præ se fert. Stamus enim in conspectu Domini, qui judicabit propedem secreta cordium. Nolite igitur ante tempus, de proximo judicium ferre, aut ex invidiosis conjecturis, præposterè à quibuldam hausta judicia temerè admittere: sed ex hisce de nobis judicate. Libenter enim, quicquid de re tota statuetis, excipiemus: quando id nobis communicare non gravatè volueritis: quod rogo etiam ut faciatis: quo mens vestra, iis quorum intererit eam intelligere, patefiat ad multorum ædificationem. Valete.

Dabam Amstelædami,
Jan. 7. anno 1641.

CCCV.

Vir Clarissime, Fautor & Amice summa Observantia honorande,

NON voluntate mea vel incuria, sed inopia Tabellariorum, qui hac anni tempestate rarius iter faciunt, distuli in hunc usque diem respondere literis tuis; quæ certe voluptati mihi fuerunt, cum tot annis cognitam erga me benevolentiam, quantaque sollicitudine rei Literariæ prospectam esse cupias, abunde testarentur. Utinam verò talis nobis Collega contingeret, qualem hæc tempora, politici doctrina parum propitia, desiderant! Ita enim est, Vir clarissime, ut scribis, videmus barbariem ubique locorum magno impetu ingruere, cum multis in locis præsertim in Germania propter assiduas bellorum clades studia

studia Literarum paulatim intercidant, & in his quoque provinciis hic studiorum ordo à plerisque observetur, ut postquam discentes vix prima elementa perceperunt, statim ad superiores disciplinas animum adiciant, nullis vel exiguis linguarum ac solidioris Literarum adminiculis instructi. Quod vitium etiam in hac Schola experimur, dum plurimi ex Classibus promoti, quia aliunde adveniunt confestim sacra Theologiæ & Jurisprudentiæ invadant, nec in illis studiorum gradus fieri patiuntur, ut legitimo ordine proficiant; sed cum vix prima quatuor folia alicujus compendii perlegerunt, in disputationum campum profluiunt; inque eo exercitio aliquot mensibus exactis, ad Sacerdotium vel Præturam viam affectant. Huic incommodo ut apud nos ex parte obviam eatur, summis votis expetimus virum eruditum, qui studiosæ juventuti ad elegantiorum ingenii cultum viam præeat. Hanc operam de Gronovio nobis pollicemur, adducti egregii animi dotibus, quibus apud multos commendabilem se fecit. Ideoque unice id agimus, ut eum consequamur. Professio ipsi est decreta, nostrique Proceres mihi significarunt in stipendio nihil fore difficultatis, sibi quæ curæ fore, ut honestissime hic excipiat. Jussu illorum ad Gronovium jam scripsi, eumque sedulo hortatus sum, ne hanc occasionem, non omni die obviam, temere prætermittat. Eum quidem in Italia nunc esse cum discipulis suis, sed reditum eorum circa Ver proximum Amstelodami expectari, intellexi. Multum faceret ad rem, si clarissimus Dominus Vossius eo quoque nomine paucis ad Gronovium scriberet. Literæ possent curari per matrem istorum juvenum quibus est præfectus. Habitat illa ad fossam Cæsaris, uti vocant (*tegen over Schout Blas*, vocatur, *Jouffrow Gerarts*) præstabis nobis rem gratissimam, siquidem de hoc negotio sumus valde solliciti: metuius enim, ne ineptus aliquis magistellus, qui per fautores suos potentes hanc provinciam ambit, nobis obrudatur, si forte Gronovius illam suscipere recuset. Hic finem facio, cum ad alia jam avocer, nec te ulterius interpellare deceat. Clarissimus Dominus Dieftius, nosterque Ilendoornius amicissimam salutem per me tibi nuntiari volunt. Vale, Vir eximie, cum universa familia, quam perofficiose saluto, & me amore tuo porro persequere.

Dabam Daventriæ III. Cal. Feb.
Gregoriani An. clo 16 c xli.

Clarissimum Dominum Barlaam officiosissime saluto.

Celeberrimo tuo nomini

toto pectore devotus

Joes Christienus

CCCVI.

S. P.

Vir Excellentissime, Clarissime, Celeberrime,

EX Literis superiori mense raptim ad te perscriptis, statum rerum nostrarum satis luctuosum non dubito quin perceperis; quæ, quo loco nunc sint, paucis accipe. Postquam affinis meus ultimum naturæ jam perfolvisset debitum, de honesta ejusdem sepultura præcipue fuimus solliciti: dumque ei sic anxii quærimus sepulchrum, amplissimus Paets, Reipublicæ hujus Exconsul, præter omnem spem ultro se obtulit, huncque defunctum nostrum suo quod hic habet in Templo S. Pancratii, sepulchro donavit. Quod tamen ne ille in totum haberet gratis, nescio cujus vel negligentia vel invidia factum sit, ut tardius paulò funus ad locum destinatum deduceremus, unde xii. florenorum multa viduæ fuit imposita. Poëtæ suo Rhodio, & *marcello* noster, quinto demum ante obitum die, cum jam gravissime decumberet, manum ultimam imposuit, nec durante morbo, nisi sex diebus novissimis, lecto fuit affixus, atque sic moriendo studuit, & studendo mortuus est. Nec absque providentia Dei singulari contigit, ut ego, qui nil minus sperabam, per hoc tempus adessem, meamque ipsi qualem qualem commodarem operam. Absque me enim fuisset suum hoc opus, cui tot annis jam insudaverat, necdum, imò fortè nunquam ad hunc umbilicum perduxisset. Unde mihi sæpe gratulor ipsemet, quod Deus me dignum habuerit, qui non tantum huic tanquam affini, sed & præceptorî meo olim fidelissimo *τῷ ἀντιπαλαρῆς* vicem, quamvis, quod fateor, non *ισόρροπον*, hoc modo rependerem. Quod tamen citra omnem dictum volo jactantiam, cum id solum mihi datum fuerit negotii, ut quæ ille scripsisset intricatius, ego describerem, autorum scripta, quæ ipse præ nimia corporis imbecillitate, non valebat amplius inspicere, prælegerem, Indicem colligerem, Errata denique quæ commisisset Typographus, emendarem.

Simu-

Simulac igitur hoc opus lucem aspexit publicam, tu Vir Excellentissime, primus es inter ceteros, omniumque dignissimus, cui unum muneris loco mitteremus exemplar. Quin & ipse author hoc donum tibi jampridem, tanquam suo non solum fautori & amico meritissimo, sed & horum laborum uni non è multis, & ob hoc Judici, jampridem destinaverat. Tu illud quæso, vultu dignare benevolo, charamque defuncti hujus, cui tu vivo nunquam non fuisti charissimus, habe memoriam. Nec dubito, quin, si adhuc vixisset, ad vos ipse hoc onustus munusculo, transisset, tibi que coram obtulisset. Meum verò erat, hoc ejus loco præstare officium, sed dum amita mea tam in recenti adhuc est luctu, nolui eam tam diu solam relinquere. Boni igitur & optimi consule illius Libri latorem, patria Silesium, Consulis apud suos amplissimi filium, hujus Academiæ civem non postremum, mihi quoque amicissimum; isque jam pridem hunc ambivit honorem, ut te aliquando videre, tuoque humanitatis radio, qua licet, illustrari queat. Quem tu scio repulsam pati non patieris; ceterum opus jam toties nominatum, D. D. Curatoribus, eo ipso die quo Rectorem nobis crearent magnificum, & in Curia congregati essent, auctoris & viduæ nomine insinuavi, qui quidem illud tam benigno & liberali respexerunt oculo, ut viduæ CL florenos pro oblatione, & supra hos CCCC alios, in stipendium annuum & quo ad dies vitæ frueretur, decernerent. Equidem multi hic sunt, qui hanc munificentiam mirentur, vel potius invideant, dicant, nulli unquam hujusmodi viduæ tam largiter prospectum esse. Quibus ego respondere soleo, nullam forsitan hactenus fuisse, quæ tali beneficentia magis indigeret. Me quod attinet, penes eam hic tantisper morabor, donec illustri Domina de Donaw ex Galliis Hagam advenerit, quam quidem instante mense Martio sperant illic affuturam esse. Quæ quandoquidem Virum desiderat, qui ipsi sit ab epistolis, mihi que hæc provincia jam pridem oblata sit, suscipere eam est animus. Tu verò si quod consilium possis impertiri salubrius, ne, quæso, detrecta. Etiam atque etiam vale, V. E. *munus*, & me tibi commendatum habe.

Lugduni Batavor. Honoris & famæ
viii. Kal. Martias
c10 lxxxi.

tua deditissimus,

Georgius Andreas Richter.

Vos & omnes officiose saluta mea amata; à me quoque salvete omnes.

CCCVII.

*Clarissimo, & Doctissimo viro Domino
Gerardo Joanni Vossio, Historiarum
& Chronologiæ Professori celeberrimo S. P.*

Clarissime & Eximie Vir, & mihi plurimum honorande,

Sufficiebat mihi quod ex Doctiss. juvene filio tuo, certus fueram factus, reditas fuisse tibi literas meas, cum opusculo affinis mei, neque quid ultra expectabam, cum Ampliss. Dubletius, tuas mihi attulit, ex omni parte gratissimas, nisi quod de tua, & lectissimæ uxoris tuæ adversa valetudine, addisco primum, sed cum lenitivo melioris sortis, quæ priores tuas, & publicæ rei literariæ, utilissimas curas, non amplius remorabitur. Exoptatissimus est ubique hic labor tuus, & Galli nostri inter alios, ejus publicationem impatientius expectant. Det Deus, ut intra paucos dies, fiant votis compotes. De Bolducii Oggio, ut appellat, Christiano, egeram cum filio tuo, eique librum ostenderam, in Bibliopolio Elzevirii, putabamque ad te fuisse delatum. Sunt nonnulla quæ censuram tuam merentur. Totius operis scopus est, ut ostendat, ab ipsis mundi primordiis, per omnes ætates, oblatas fuisse Deo placetas, figuras Sacramenti Eucharistiæ, etiam in Orgiis, & Bacchanalibus, & in eum finem multa colligit ex gentiliū sacris. Ordine Capucinus est, Natione Gallus, homo Octogenarius, qui etiam scripsit libros, de Ecclesia ante legem. Magnus Salamasius ex quo Lutetiam venit, variis calamitatibus fuit impetitus. Socrum amisit, Uxorem habuit tam graviter laborantem, ut quatuor continuis diebus, iterata sanguinis missione opus fuerit. Variè etiam fuit tentatus, ne ad nos rediret, nec se potest penitus extricare, quamvis ei steteredeundi animus. Sperat salvum conductum, aut potius dimissionem, ex publicatione Libri, de Primatu, qui sub prælo sudat, & vires acquirit eundo. Mittit subinde ad Typographos, materiam novam, quam ei subministrant regiæ membranz: Reliquit tibi Librum nostri Croii, de Versionibus antiquis, ut aliquem ex Typographis vestris excites, qui illum typis

typis describeret. Nuper accepi literas ab Authore, qui ferè desperat de editione, his in locis, petitque, ut si obtineri non possit, ad eum remittatur scriptum. Rogo ut me certiore facias, an aliquid sit sperandum. Idem Author mihi significat, se opus Heinſii in N. Testam. ad examen revocasse, animadvertisse innumera Authoris *σφάλματα*, & Bezam defendisse. Primam partem absolviſſe, quam miſſurus sit Genevam, nisi sit hic qui excudere velit. Vir doctus est, & in linguis ad id necessariis apprime versatus. Postquam à te responsum accepero, ad eum rescribam. Opus esset festinato, quia Celsissimus Princeps, voluit ut unicum suum in Angliam comitarer, nec satis scio, an mihi tempus suppetet, nuptiis mei filii interesse, quæ Leydæ celebrari debent nono Aprilis. Hæc res inopinato nobis accidit, cum missus est Buram, & Leydæ apud amicum vicinum, viduæ Burgesdikia diverteret, invitatus fuit ad cenam, cum hospite suo, ubi cum vidisset puellam octodecennem, defuncti Collegæ filiam, in eam vota sua convertit, & communicato mecum consilio, cum viderem eum eousque processisse, ut protestaretur se non posse dimoveri, sciremque puellam, honestis parentibus ortam, & mediocres esse facultates, annui, quandoquidem ille, xxxvii. ætatis annum attigit, & amici ex Gallia, ab initio mihi suavisſent, ut occasione data, eum huic jugo alligarem, quod felix faustumque sit, Deum precor, & ab amicis, qualis es inter primos, peto, ut vota sua meis jungant; qui etiam tibi, & tuis omnia prospera voveo, & si voluerit Deus me in Angliam deducere, fac ut mihi significetur, si quid in re tua, aut tuorum, possim, habebis me promptum, & paratissimum. Salutem plurimam D. uxori, à me, & mea. Vale.

Hagæ-Comitis. Tibi addictissimus, & ad
xxvi. Martii.
clp lxx xli.

omnia officia paratissimus.

Andreas Rivetus.

CCCVIII.

Clarissime Vir,

NON mihi excedit benevolentia & summa humanitas tua quam mihi domi tuæ non uno testimonio probasti. De qua si hætenus filii gratias agere per literas, temporè, amicis & continuis amico-

rum visitationibus imputabis, in quibus tuum tamen nomen semper nobis sacrum fuit, eritque mihi quamdiu spirabo. Nec prætermisi animum tuum in Patriam nostram summis (ut potui) viribus depradicare, non solum Illustrissimis Regni Proceribus ubi ad eorum colloquium fui admissus, præsertim summis in Republica nostra Viris Domino Comiti de la Gardie, Regni Marscho & magno Cancellario, qui eruditionem tuam summam & piam maximi merito tuo faciunt; verum etiam omnibus bonis, quibus ingens ac divina tua virtus satis nota, mihi que nuspiam tacenda. Literas quas Hamburgo filio tuo Viro Clarissimo Ilaaco destinavi, jam (ut opinione metior) acceperat: Optarem per literas ejus continuationem amicitia nostræ intelligere. Amicorum visitationes, tum iter de loco ad locum invifendi amicos & cognatos mihi adhuc ad silentii veniam suffragabuntur. Quamprimum hic amoris mei error aliquam mihi requiem indulerit, locabo eam honori & reverentia eorum, qui mihi in Belgio doctrinae & honestæ conversationis duces exſistere. Præteritis diebus Academiam nostram invisi reperi, inter alios Loccenium Bhemiumque viros tibi addictissimos. Loccenius varia sub manibus habet, imprimis tres libros Antiquitatum Sueo-Gothicarum; in quos conferre constituit quicquid habet patria antiquorum institutorum, laudisque. Parat etiam translationem legum Suecicarum eamque bono Esthonom, Livonorum & Ingriorum. Cæteri pro sua quique professione varia ediderunt & adhuc sub prælo habent. Eorum tamen nunc memoracione abſtineo. Quoad publica exercitia & diligentiam docentium & discipulorum, vix dicere possum, quanta hic mutatio, quamq; gnaviter bonæ menti litent. Numeravi, ut cæteros taceam, præſentes una disputatione è nobilium filiis nostræ nationis 97, & quotidie plures accedunt. Adeo ut vel ex hoc ego conjiciam, Musas extorres sedibus prioribus in septentrionem migrare & hic tantisper sedem figere dum alibi Mars detonuerit. Sed ignosces mihi, virorum eruditissime, si amore Patriæ meæ ejusque incrementis abductus de studiis aliter forte judico, quam tenuitatem meam decet. Video otia hæc & prætia etiam esse literis qualia in pacatissima Republica sub optimo Magistratu poni solent. Neque in aliis rebus divinæ benevolentia indicia latent. Nunquam hætenus tanta fodinarum copia, tantæque in iis divitiæ reperta sunt, atque præteritis

teritis annis effoderunt. Quibus jam in omnibus hujus Regni Provinciis succenturiantur officinae fabrorum, ut non dicam amnes sed rivos excoli hic videas & elaborandis metallis adhiberi. Provida hic ut ubique fuit rerum natura quæ maximis metalli rupibus adposuit sylvarum densitatem & aquæ mira profluvia, utpote sine quibus neque solvi neque procudi metalla potuissent. De hisce ultra quam volui scribo, sed non ut debui. Taceo tamen, hoc confidentia virtutis tuæ, quæ nihil in me contempsit, illud vero ex contemplatione rerum in patriâ ejus speciem adhuc in animo gero, eamque invitus in chartam conjicio.

Vale Virorum mihi maxime, & me optimæ honestissimæque tuæ familiæ officiosè commenda.

Holmiæ ix. Apr. Claritatis Tuæ
Anno 1641.

Filiali affectu

observans,

Haraldus Appelboom.

CCCIX.

Gerardo Jo. Vossio, Viro summo, Ludovicus Crocius S. P. D.

CHristophero Timplero inscriptas à F. Junio affini tuo literas Rudgero fratri illius, Reip. nostræ Physico, homini Zelotas nostros in omni occasione in nos extimulanti actutum tradi curavi; qui non sibi, sed fratri ante quinquennium defuncto datas aiebat. Impetravi tamen responsum, quod hic inclusum accipies. E morbo gravi te iterum eluctatum gaudeo, & affimilem in modum ut honoratissima uxor tua morbi sui reliquias edomet & vincat, Deum sospitorem obnixè precor. Zelotæ nostri Acheronta movent, ut candorem, veritatem & concordia studio nobis extorqueant: sed vanas scimus sine viribus iras. Virtus enim invicta omnem pravum affectum sui ipsius agnoscit ultorem. Res agitur putidis calumniis domi forisque. Colliguntur hinc inde suffragia Academiæ & Classium vestrarum, quibus à plebe minores habeamur ac prope inauditi per provincias vestras passivitus damnmur. Hoc seculum est! Quid aga-

mus? Nil conscire sibi, hic murus aheneus esto. Detonant in nos omnia pulpita, omnes cathedræ vestræ, siquidem fama vera est. Sed nec bona, nec mala fama nos à Christo avellere debet. Duræus, Vir eximius, in Angliam profectus, ne iota quidem ad nos perscripsit, ex quo hinc discessit. Miramur tam longum viri silentium, ac veremur ne quid illi vel in via vel in regno contigerit sinistri. Capita rerum hæcenus in negotio *ignotus* ab ipso gestarum à Lutheranis cupidè quaruntur ac leguntur. Domino Calixto exemplaria aliquot misi & aliis istarum partium. Sciret Deus moderata ingenia quæ veritatem simul amant & pacem. Audio naves in exterarum regiones de Anglia solventes in porta diligenter excuti, ne quid literarum transvehant, quibus creperus regni status exteris intempestivius reveletur. Triste est quod de Parlamenti inferioris sensu scribis. An enim una Genevensis Ecclesiæ facies præ omnibus placet? An hæc est illud Apostolicæ Ecclesiæ *utroque*, sine omni macula, sine ruga; cæteræ omnes imbubinata? Magni sanè Viri, Calvinus, Beza, alii, & de populo Dei sæculo præterito præclarè meriti; sed Petrus Martyr & Martinus Bucerus istis nihilo sunt inferiores. Fatebuntur ipsi illi, quos modestius de se sentire novimus, quam infruniti quidam eorum admiratores, quibus omnis pia Antiquitas præ illis sordet. D. Gomarum è vivis excessisse dudum acceperamus, cujus immoderatum & improvidum Zelum jampridem frænâsem, siquidem id è publica re judicavissim. Malo bonas horas aliis tribuere, & quicquid in me iniquius dictum scriptumque fuit, amore pacis publicæ concoquere. Horret enim animus intestinas fratrum & Symmystarum lites. Nunc Antipapismum sub incudem revoco & Antifocinismum. Si Typographi vestri fortean sint adeundi, velim, siquidem integrum est, edoceri, an sit qui libellos quosdam nostros Typis suis exscribat. Nam æmuli nos forsitan ita devenustarunt, ut deinceps nemo suam nobis collocet operam. Theologiam Gentium & Physiologiam Christianam, opera eruditissima ad indices usque jam Typis exscripta, ut primum ad Colophonem perducta fuerint, cupidissime exspectamus. Deum ex animo veneror, ut prospera valetudine & aquilæ senectâ te, Vir summe, beet, quâ hæc & alia plurima recondita eruditionis monumenta à manu tua habeat & admiretur posteritas.

Salutem

Salutem plurimam officiosissime scribo tibi, favior maxime, matronæ honorandissimæ & filiis eruditissimis à D. D. Bergio, Willio & me quoque. Bene valeto & salve æternum, ô maximum Decus nostrum.

Bremæ x. Kal. Apr. Anno æræ nostræ c1o 10c xli.

CCCX.

D. Gerhardo Jo. Vossio *πρὸς πάλιν*
S. P. D. Ludovicus Crocius.

E Sectatoribus nostris, Vir maxime, fores tuarum Charitum nunc pulsas doctissimus Juvenis Daniel Succius Anhalinus, Hebræis, Chaldæis, Græcis Latinisque literis mediocriter excultus, & ad prædicationem Evangelii Christi præparatus, osor litium & Epicuræ morum licentiæ, quæ hoc ævi passivus dominatur. Is voluit in transitu uberimos doctrinæ & pietatis tuæ latices coram degustare, eorumque adspersione fragrantior per Belgium vestrum ad Britannos & Gallos abire, ea fieri, ut patriæ tandem aliquando redditus debita cum prudentia partem reipub. Christianæ gubernare posset. Id propter, me parario, *εὐσταθὲς* à manu tua sperat ac petit obnixè, quibus summis in Anglia viris, Academicarum & Ecclesiarum aliquot præfulibus innotesceret, ac sua Officia qualiacunque & servitia literaria offerret. Virtutes edecumata, quibus hic ingenium radiat, omnium bonorum favorem merentur. Præfuit quibusdam liberis Baronibus domi meæ tanta cum laude & dexterritate, ut eum habeam inter eos, qui sunt intimæ admissionis & magnæ spei. Iudicio valet, & antiquitatem rursari incipit, ut in dogmatibus venetur Catholicum consensum. Hortaberis eum, ut hoc tramite pergat & privas sæculi opiniones & novellitates constantè evitet. De rebus nostris nihil dico, quoniam eas callet hic noster & candida vobis voce enarrabit, siquidem id ferunt vestra severiora studia. Monumenta, quæ ad umbilicum à vobis perducta sub prelo nuper fervebant, spero brevi manibus nostris versatum iri, ut ex iis nostra locupletemus. Deum veneror cum Collegis meis D. Bergio & D. Millio, ut Nestoris trisecli ætatem, eamque firmam tibi, Vir maxime, elargiatur, ut elucubra-

ta opera & omnigena eruditione referta, quibus armaria tua sunt exposita, felicissimo obstetricatu tuo omnia in lucem edantur. In hoc voto finio, salutis perennitates universæ familiæ tuæ calidè apprecatus.

Brem. Kal. Maii An. c1o 10c xli.

CCCXI.

Celeberrime & Amplissime Vir,

A Deptus certissimam occasionem per hunc studiosum Gothofridum Kretschmarum, iterum ad te scribere non omittendum illud, sed faciendum mihi putavi. Tum etiam progressum Dissertationis meæ exquirere: Quam quidem, etsi paratam spero, tamen dubito. Ideoque nunc abs te peto, responsione me digneris, ac hac de re certiore facias, quam celerrimè. Clarissime Vir, Typographus ille Lugdunensis Jacobus Marci, certè non præstat se erga me, honestum, probum aut sincerum Virum, sed mendacem & nebulonem. Et profecto, si ille Jacobus Marci Dissertationem meam brevi temporis spatio non absolverit, hoc in regno excudi curabo. Sed tunc faciam ad Lectorem præfatiunculam, in qua Jacobum Marci (causis meis iustis adhibitis) ut hominem mendacem & nebulonem, apud omnes declarabo. Quæso maximopere, Jacobo Marci hæc epistola ad perlegendum detur. Clarissime Vir, Patrone Patris instar colende, exemplaria quædam Dissertationum mearum tibi etiam transmittito, quæ pro arbitrio tuo inter amicos dividere velis, obnixè peto. Præterea etiam habeo sub prelo Typographi nostri tractatum de Tybis: cujus exemplaria data alia occasione quoque accepturus es. Vale ac vive diu tuis & patriæ.

Scribebam Soræ
Danorum ad diem
6. Maii An.
c1o 10c xli.

Tuus omni cultu

& observantia,

Johannes Meursius Filius.

E e

CCCXII.

CCCXII.

Domino Gerhardo Jo. Vossio, *eruditi
Orbis Principi*, Ludovicus Crocius
S. P. D.

Virorum & Patronorum maxime,

VAletudinis gratia à Principe sua Vir reverendus Henr. Thumelejerus Superintendens Ecclesiarum Lippiacenſum, olim discipulus meus, concionator facundissimus, sed hemiplegia in suggestu lingua & memoria privatus, in Belgium vestrum missus, per me voluit adſpectu & alloquio tuo, tanquam Numinis cuiusdam propitii, vel ad momentum recreari. Id ut ambirem, nimio opere & effictum à me expetiit. Si gratissimæ meditationes tuæ, quibus publico litas, ferunt, patere, amabo, ut, quod tanto affectu quæſierit, impetret. Filium habet probioris notæ, quem, si commodè fieri posset, præfici vellet puerulis quibusdam informandis pietate & literis, de quo forſan in Academia quadam Belgica bono civi commendando ipſe coram laborabit. Ea re calamum hic ſufflamino. Affinis meus Hagam nuper profectus, literas meas nuper in tranſitu Claritudini tuæ haud dubiè tradidit. Professor est Oratoriæ & Poeseôs in Academia Castellana, & fratrem Juris professorem in Academia Sedanenſi, nunc Hagæ rerum Principis ſui cauſa commorantem inviſit. Res Anglicanæ non leviùs quam Germanicæ animum afficiunt meum. Diæta Ratiſbonenſis cauſam Palatini, turbato Angliæ ſtatu, minus feliciter tractabit. Sed ταῦτα ἐν γένει θίγῃ καίτοι. Salutem ſcribo honoratiſſimæ Matronæ, Uxori tuæ & familiæ univerſæ, virorum maxime. Bene & jugiter vale, Salve.

Brema, 3 Idus Maii Anno æræ
noſtræ. cId Idc xli.

CCCXIII.

D. Gerhardo D. Vossio, τῷ πρίντι,
L. Crocius S. P. D.

Virorum maxime,

MOre noſtro Juvenes literatos ad vos iter ſuſcipientes & immenſum eruditionis veſtræ pelagus admirantes literis meis fores veſtras pultare jubeo, quæ mea eſt confidentia. Eapropter ignoſces ſi in

publica ſimul & privata tua commoda ita pecco. Neque enim aliter poſſum, quando diſcipulis meis multum inde emolumentum cupientes, ut grātè fatentur, ſervire cupio. Nunc ſiſto Henricum Oldenburgium, Collegæ quondam mei in hac Schola filium, in Academiam Ultrajectinam abeuntem, ex quo cognoſces quam male nobiſcum agatur ab Rectore novo, Johanne Combaiſio, qui publica hodie diſputatione Syntagma meum propter aſſertam univerſalem gratiam allegatis verbis meis in Theſibus ſuis ut Heterodoxum & Huterianum traduxit & ſugillavit, non ſine magno multorum offendiſculo. Collega meus D. Bergius, qui Excellentiam veſtram mecum officioliſſime ſalutat, partes noſtras contra eum piè ſimul & cordatè egit; ſed ſurdo narratur fabula: quoniam Palladio ſuo, abſoluto Reprobationis decreto, ex quo omnes, qui non ſunt ſingulariter electi, nulla prorsus ratione damnationem evitare poſſint. Quid ad hæc dicent Lutherani ad conteſſerationem Eccleſiarum Evangelicarum toties à piis Majoribus noſtris provocati, ſi videant nos viperinis morſibus invicem conſcisci, & gratiam univerſalem omni modo negari, qua conciones Evangelicas enervari ad ravim uſque inculcant: Moderata docendi ratio ſordet huic ſeculo, & ἀνεμώτης multis bonis utrinque improbata plerique allubeſcit. Conſcientiam liberabimus, quantum poſſumus, & patientiam deinceps omnibus malis, Deo juvante, opponemus. Acta Alenconienſia hiſce diebus à D. Theſtreſaito Pariſienſi Theologo, Viro moderato, accepi, quibus cauſa Teſtarii & Admiraldi cognita & definita fuit. Vobis ea haud dubie nota ſunt. Quid verò de iis videatur, velim mecum amiciter communicari. Utinam Buceros, Junios & hiſ ſimiles Theologos haberemus redivos, viros ſapientia & charitate maxima præditos; nā aliter ſentirent quam proletarii, aut etiam ἐξέδραμοι quidam novitii. Sunt nunc multi in vulneribus Eccleſiæ ungues. Sed quid quiritor? Claudio, avocatus laboribus Officii. Bene vale, Vir maxime, & ſalve πανοικί.

Brema. ii. Kal. Jun. An. cId Idc xli.

CCCXIV.

CCCXIV.

*Doctissimo & Paternæ Laudis æmulo
Adolescenti II. Vossio, J. Pyraredus, S.*

T*ἄριστον ἢ δὲ ἑκείνα.* Liceat enim mihi cantatissimo illo versiculo te affari, doctif. adolescens, dum in animo reputo, quam benignè quam honorificè à Patre tuo, non jam dicam quod universo orbe celeberrimum est, clarissimo & doctissimo sed virorum optimo exceptus sim, quot insuper à te & fratre, heu quondam tuo! charitatis officiis cumulatus, non possum me *ἀχαριστία* crimine, quod ego fœditissimum semper duxi, nisi ex parte exsolvere; quod animo tamen meo non infedisse penitus Deum verè testor. Præterquam enim quod hac in parte non omnino mihi defui, datis ad filium meum sæpe literis, quibus illi haud maxime in mandatis dabam, ut aut vos præsens verbis meis saluaret, aut saltem per internuncios salutem deferri curaret, etiam illud in causa fuit, quod didiceram duas aut tres Epistolas, quas ad clariss. & nobiliss. V. Constant. Huggenum dederam, interceptas fuisse, aut intercidisse, & cum iis plurimas ad Statium & Tacitum emendationes, quas per eundem nobiliss. V. tectum & Gronovio mihi per te amicissimo communicatas volebam. Accidit insuper ut dilata, præter spem, in longum tempus, quam in hanc urbem institueram profectio, eadem opera scribendi ad te tempus protulerim. Sed tam pudendæ moræ pudorem auxit Clariss. Salmasii tam optatus nobis adventus, quam vobis gravis illius discessus. Ab eo didici de Patre tuo quæ me statim summâ lætitiâ perfudere, quam augebant reliqua de vobis, nisi subito turbasset & absterfisset fere omnem de fratris tui acerbo fato facta mentio, qui cum Patri chariss. fratri tibi amantissimo, toti familiæ vestræ, universo denique literatorum ordini æternum lugendus occiderit, nulli tamen flebilior quam mihi. Quem si fata virum! sed in tanto luctu & negotiorum quibus obvolvor & involveris, nihil à me jam expectes, quo aut desiderium illius vestrum, aut meum solari possim. Illud enim in tanta clade verè expertus sum, Parvi dolores loquuntur, magni tacent. Quod ut maxime vellem *εἰς βυβλίον μου* *ἀνέμω*, tempus fortè & verba quæ præpedit dolor, nec mihi satis in expedito sunt, me deficerent. Itaq; ad lætiora, dilata in aliud tempus tam gravis casus memoria, defle-

ctam. Nam quid, obsecro, jucundius aut honorificentius à Clariss. Salmasio audire potui, quàm te exquisitissimis tuis ad Justinum notis æternum mihi nomen adstruxisse, nullo tamen aut perexiguo meo merito? Potes certe tu sine ullo famæ tuæ damno & intertrimento, quæ tecum nata per te in immensum crescit aliquid mihi de tua luce impertire, idem faciens ut qui lumen de lumine accenderit; vereor tamen ne apud eos qui me penitiùs norunt, tantum affectui tuo dedisse, quantum veritati detraxisse videaris. *Οὐκ ἔστι τοις δὲ δὲ εἰμι, ἢ μὴ ἀδανδρῶσαν ἔσταις.* Nescio enim, ex animo dico, pudore an lætitiâ suffusus sim, dum me quoque principibus permixtum agnovi. An obsecro te tanti erant observatiunculæ illæ, quæ mihi Amstelodamo Lugdunum naviganti *ἐν τῷ πρὸς πύργον* inter Nautarum & Vectorum strepitus notatæ erant, ut me tot titulorum & elogiorum mole fortè an invidia onerares. Hac quidem parte legis illius immemor quæ pretia rerum ex affectu æstimari vetat. Sed paucis tam parvo fama posteritatis constitit, quam mihi, qui quod ab ingenio meo aut doctrina sperare non poteram, à commendatione tua tam facile, tam præclare impetraverim. Quod nescio an tibi acceptum & inter beneficia referre debeam, qui me è tenebris eruere, & sic melius latentem in tantam lucem producere conaris. Etenim aut tibi tantæ ignoti hæctenus hominis laudationis invidia sustinenda est, aut mihi contra anteaactæ vitæ institutum & virium mearum conscientiam adnendum est, ne tu temerè aut nimia charitate hæc de me prædicasse videaris. Unde autem id consequi possim non video, nisi ad pueritiæ studia quæ mihi satis fœliciter cesserant, recurrendum, aut de novo triginta annorum miserè in summis ferè calamitatibus, aut agrorum cultura perditata tempora refarcienda sint; quod ut vellem maxime & per negotia liceret, atas jam fessâ & ingravescent, totque insuper adversis fracta, in tanta præsertim ingeniorum vilitate, non fineret; nisi igniculis quibusdam gloriæ, cujus apud bonos, non leve præmium est, succenderer, quos aut tu cum patre & fratre tuo, aut Gronovius noster mihi è Batavia discendenti subdidistis. Quamvis enim ruri delitescere & unius memet dominum fecisse latebræ, unica mihi cura esset: quamvis omni bibliotheca supellectile destitutus essem, quam fratri juniiori, abjecto omni instrumento artis clausaque taberna tradideram, ut tamen Gronovio, qui tum Statium excolebat

satisfacerem, cepi etiamnum fallendo labori Poetam illum in manus, in quo aut emendavi aut notavi non pauca, quæ serò ad Ampliff. & longe Clarissim. Virum Sarravium Senatorem Paris. misi, tam ipsius gratia quam Gronovii, quem Lutetiam venturum ab ipso Sarravio per literas didiceram. Quo factum est, ut cum tantisper hic Gronovius commoratus esset & Sarravius paulo post cum delectis à Senatu Parisiens. Senatoribus, Rothomagum juri provinciam dicundo à Rege missus esset, ego interim utroque exciderim brevique postea Gronovium Massilia solvisse tum peragrata Gallia, & Venetias profectum esse, per Literas ejusdem Sarravii ad Salmasium didicerim. Post exactum autem Statium quum unicum penes me Tacitum ex reliquis libris haberem, ausus sum etiam quædam in tantum Authorem, post tot tantorumque virorum, quorum scripta omnino, nomine fere, mihi ignota erant, cujus postremi conatus *ἀποσπασμένη* quædam ad te misissem, nisi quotidie messis sub falce cresceret, brevi omnia missurus ad te; & quia hæc & alia in lucem edere amicis & magnis viris impellentibus animus est, gratissimum facies si quæ ad illum observatæ tibi aut Doctiss. Patri tuo, eorum me participem esse velis, ut aliquatenus te retaliare possim. Habebis interea summarium eorum, quæ ad Statium elucubravi. Etiam quædam olim mihi puero notata ad Lucanum addidi, quia à Salmasio spes nobis injecta est te nobis illum terissimum daturum propediem. Quo successu tenuem hunc laborem suscepim tuum erit judicium; interim meliora à te expecto, ipse meliora à te monitus daturus. Utrumque candidus imperti, aut his utere mecum, tam bene quam tibi pararis, modo ne in publicum prodeant quæ ad Statium pertinent, quem brevi editurus sum, & ad vos missurus. Cum autem hæc scriberem, opportunè reddita mihi est Clariss. Huggenii honorifica & amica pariter Epistola, ad quem protinus rescripsi, & in eodem fasce & sub eodem involucro omnia quæ ad te pertinent obsignavi, eumque oravi, ut postquam ea aut percurrisset aut exscribi curasset, ad te perferri curaret; vicissimque; si quid ad me rescripturus esses, per eum illorum mihi copia fuerit, quod ut certius & citius procurari possit, obsecro te ut non contentus ea via, uti velis opportunitate negotiatoris Bergeracensis, qui Amstelodami agit nomine Villepontus, qui quicquid à te venerit Burdegalam deferen-

dum ad Henricum Boudeüyns, quæ illius est humanitas & affectus erga me curabit. Adjecissem his quædam Epigrammata à me nuper effusa potius quam elaborata, nisi ea fere jam sub prælo essent, & te tanta mole ineptiarum obruere vererer. Satis in præsentia harum veniam impetrare. Sed jam finem faciam, postquam Chariss. Patri tuo, lectissimæ Matronæ Matri tuæ mihi summopere colendis, totique adeo sanctissimæ familiæ tuæ prospera omnia ex animo voverim. Vale tu, atque iterum vale, merito tuo mihi amicissime Adolescent, meque; tui tuorumque; observantissimum porro quod facis amare perge.

Dat. Lutetiae xii. Cal. Maias,
Salutis nobis per Christum
partæ, 1641.

CCCXV.

Præstantissime Vossi, & quia religiosum me Cultorem tui non aspernaris numero amicorum adscribere, eoque nomine censere, Amice summe,

Sollicitè mihi anquirenti qua usus opportunitate responderem ad priores quas ad me dedisti Literas pr. Kal. Sextiles c10 15c xli. ecce altera à te scripta quidem Kal. Decemb. mihi verò reddita Kal. Maiis superveniunt. Tantum moræ desiderii nostrum mutuis, (ut etiam de meis hinc ad te missis suspicari datur) post emensum mare non ita magnum creat tantilla intercapedo terræ, xx. sc. à Londino milliarium. Tanquam verò parum foret me nihil tale meritum literarum tuarum humanitate dignari, pergit propensa tua benignitas, jam ante satis obligatum, irremunerabili librorum beneficio ulterius mancipare, quos ab ingenio vegetis, iudiciis solide tersis profectos, ab amicissima manu quam semper admiratus exosculabar missos, nisi venerer, dispeream male, mortalium omnium stupidissimus, ingratissimus. Ut enim de exactissima Maimonidæ editione eruditissimi filii tui tralatione notisque exornata taceam: (quis enim juvenis ad literas nati & formati, jamque *μαγεῖτε*, merita verbis consequi velit, æquare valeat?) quam altè atque ex ipsis adeo reconditissimæ Scientiæ archivis, Theologiæ Gentilis & Philosophiæ Christianæ (tanquam Nili ex Goyome & Lunæ montibus per Zaire & Zambre lacus, Abyssinos populos, Nubias regiones, Æthiopiam, Ægyptum, septena dein ostia in Mediter-

raneum deflui) originem & progressum ex Antiquitatis rupibus & ruderibus, per Theologorum scita, Philosophorum placita, Poetarum mysteria, Historicorum factos & fidem ad nos deducis, omnigenâ fretus eruditione, Linguarum cognitione penitissimâ, ingenii vena mascula, iudicii acie heroicâ, methodi luce plane divinâ. Sed unde mihi hunc calculum? Homini à Musis averſo, quarum castra Academica adolescens olim deserui, nomenque dedi ad Colonias Martias? atque inibi florem ætatis diu exercui: Terra tandem mariq; per Galliam, Hispaniam, Hiberniam jactatum me paupertas impulit audax in hoc pistrinum, docere coactum antequam didicissem, redegitque dura Dea ut necesse haberem ad studia per fastidium relicta me recipere. Ubi nec inutiles nec planè ingloria defunctus opera *ἡρώδης* & *παυσανίας* emensus, *ἀπολαυστικός* jam sperare ceppi. Sed & hujus spei incisus est nervus, exorto apud nos diffidio usque ad arma civilia; quorum furorem avertat precor Deus, qui te, Vir clarissime, mihiq; charissime, tuos tuaq; tueatur. Ita vovet

Merito tuo,

Ex agro Cantiano,
prid. Kal. Quinti-
lis, 1641.

voto meo tuus,

Tho. Farnabius.

CCCXVI.

Excellentissime, Clarissime, Doctissimeque Domine Vossii, amice fidelissimâ gratiâ conjunctissime,

AB excessu communis amici nostri Clariss. Domini Meursii *τὸ μαχαίρειον* tanta exercuit animum meum consternatio, ut in unico isto viro omnium ferè amicorum me fecisse jacturam putaverim. Id causæ fuit, quod & tui quædam quasi temporaria me incesſerit oblivio; quam consueta literarum missiculatione in præſens abstergendam duxi. Te etenim ex omni amicorum numero, quos Belgium mihi conciliavit, solum me reliquum fecit *ἡ ἀγάπη τῶν*. In primis nemo illic mortaliū præter te nunc est; cui debent aliquid studia mea, posteaquam heu! amisi chariss. caput D. Johannem Isacium Pontanum, etiam *καὶ τὸν ἀγίον*. Nisi si etiānum in pectore Cl. Scriverit nostri, amoris erga me pristini vivat scintillula. Nam de Heinſii affectu vereor ne certi aliquid sperare mihi liceat; quippe quem versilis animi hominem & in amicitia in-

constantem esse perhibent. Utut sit, ipsius benevolentiam tantopere non ambio, modo tu me favore, quo soles, prosequi non desinas. Salmasio equidem, Viro celeberrimo, & sæculi nostri Varroni, innotescere vehementer discuperem; si idoneus mihi pararius & proxeneta obtingeret, qui animos nostros mutui amoris vinculo conjungeret, aut saltem ad amicitiam ipsius facilem mihi aditum pararet. Huic rei cum neminem te aptiorem sciam, peramanter rogo, imò omnibus abs te precibus contendo, ut fidelem hac in parte operam mihi præstes, & quacunq; poteris ratione (poteris autem plurimis) tanti viri favorem & benevolentiam conciliare mihiq; comparare studeas. Ut vero ipse, fortasse ardui, hujus negotii initium facerem & velut fundamentum ponerem, literas Salmasio inscriptas exhibendas duxi; quas velim prima quoque occasione Lugdunum Batavorum, per bonæ fidei internuncium, ad Salmasium perferendas cures; verum non sine adjunctis tuis literis, quæ nostris gratiam pariant & auctoritatem. Epistolio meo comitem dedi Simplicii Commentarium in Epictetum, manu Clariss. Meursii ad exemplar Manuscriptum diligenter emendatum, quem ipsi fore gratissimum confido. Caterum nullus dubito, quin lucem aspexerit Tractatus tuus de Origine Idololatriæ. Si ita est, obsecro te istius libri unico saltem exemplari me bees atq; impertias. Quinimo nisi grave tibi nimis sit, majorem in modum abs te peto, ut Henrici Canisii Antiquas Lectiones, quocunq; tandem pretio, isthic cõemere, & huic Bibliopecto nostro domitium paranti committere digneris: cui in mandatis dedi, ut meo nomine solveret quicquid petieris. Vehementer enim indigeo istius libri usu. Quod me attinet, totum nunc habet Saxo meus; quem tandem aliquando post tam diu frustratam multorum expectationem publici juris facere constitui, Deo juvante & vitam ac valetudinem clementer suppeditante. Vale, Vir eminentissime, & me, ut soles, ama.

Soræ v. Id. Junii,
clō lō c xli.

Tui observantiss.

Steph. Johan. Stephanus.

CCCXVII.

Nescio sane, Vir celeberrime & amicorum maxime, an Dantiscanus ad vos iturus certaminum nostrorum initia proculdubio exhibuit, in quæ conjecti sumus à malefico & ingrato discipulo. Nos stamus pro Gratia universali ac sufficiente, quam cum speciali Electionis gratia nihil pugnare existimamus. Nisi illam asseramus, non videmus quomodo Evangelium satis plenè docere & iustitiam Dei damnantis eos, qui non credunt in Christum, tueri possimus. Sed sunt qui hanc doctrinam dicunt putidam & humani cerebri figmentum. Mirum, inter Theologos Christianos esse, qui secius quam Jurisconsulti de favoribus humanis, de favore divino sentiant. Illos enim prudentes juris ampliandos censent. Nunc iterum exemplar mitto Thesium nostrorum, si prius forsàn non sit redditum. Synodus Synod-Hollandica nuper Roterodami coacta de Liticula Scholæ nostræ ad Senatum simul & nos scribere non dubitavit, & nobis impropere hæreses antiquitus damnatas, Sabellianismum, Photinianismum, Pelagianismum, Socinianismum, imo Sadducæismum & Atheismum; de quibus ne per febrim unquam somniavimus. Respondebimus consilio senatu, qui hoc ipso die nos in Curiam vocat, ut de hac re deliberaretur, & quod controversiosum est prudenter sopiretur: quod ut fiat, Deum veneror. Vorstius & Glaneus harum latores, vivarum instar epistolarum erunt, & statum nostrum vobis prolixè exponent. Quapropter ego nolo latius. Bene vale, Virorum maxime & salve à nobis *παρασπονδίζω*.

Brem. xxiii. Sex-
til. c. 15. Id. c. xli.
secundum veterem
formulam.

Clar. Tuæ

observantissimus,

J. Crocius.

CCCXVIII.

Vir clarissime, Domine observande,

Jamdudum gestit animus aliquid ad te literarum dare, quibus significarem, quanti faciam, quod tibi innotuerim. Merebatur id summa humanitas tua, qui per varios amicos meos sæpius me salu-

tari, benevolentiamq; mihi tuam declarari volueris. Impellebat me admiratio eruditionis tuæ. Ei proposito exequendo, quæ hætenus defuit, nunc data est occasio. Neque enim debuit, sine literarum familiariori alloquio, te adire libellus hic, qui his diebus ex Musæo meo erupit: quem, quæso, ita recipias, ut ab æstimatore tui profectum, receptum ita iudices, ut nec veritati amicum, si forte, officere, nec ea, ubi non assecutus fuerit, carere permittas. Certè enim tuum est in hoc negotio veritatem clarissimam facere, qui eam & prophana & ecclesiastica Historia cognitionem, sacrarumque literarum peritiam, itaque subactum iudicium habes, ut melius quàm quivis alius ea de re disserere possis. Meum certè nihil nisi voluntatem sacras Literas illustrandi consensumque cum orthodoxa Ecclesia laudari, aut potius probari volo. Magnus, ut aiunt, est vir ille, cujus sententia à nostra diffidet. Quem tamen non possum mihi persuadere seriò id spectasse, quod quidam volunt, ut Papa non sit Antichristus. Potius est, ut credam, voluisse ipsum ostendere, quo loco is, tanquam Antichristus, habendus sit, qui nihilo melioribus encomiis in S. Literis afficiatur, quàm quibus Caius aut quivis alius Impius, Idololâtra, Tyrannus, Impostor, affici potuerint. Si tamen alia mens ipsius est, *ἀγὼν ἀεστὴν τὴν ἀλήθειαν*. Ego cum magno isto viro litigare non volui, quod quovis tempore mihi licebat, quid in istis sacris textibus dici putarem, exponere visum est. Si alius aliter iudicat, præstare non possum. Comparet dicta, Lector, & verum vincat. Tu verò, Vir clarissime, si me iudicii tui certiore feceris, maximo me affeceris beneficio. Vale & bono Literarum perenna.

Clar. Tuæ

Dab. d. 11. Jun.
1641.

observantissimus,

Johannes Cocceius.

CCCXIX.

Eminentissime Vir, Amice maxime,

CUM ad vos rediturus esset amicissimus noster Fontanus Medicus, qui per aliquot dies nos Daventriæ dignatus est præsentia sua; dimittere eum

eum nolui sine Literis meis ad te, quem ego perpetua Observantia mihi colendum sumi, & cujus memoriam non nisi cum vita deponam. Ejus affectus mei testimonium perhibebit hic noster, qui has ad te defert, eademque opera renunciabit, quanto cum honore, cum & præsens adesset noster Isendornius, sermo nobis fuerit de clarissimo Domino Vossio, non sine ingeminatione illius voti, ut is diu nobis sit superstes. Utinam vero, Vir clarissime, occupationes tuas, quas promovendis Literis perpetuo impendis, aliarque curæ domesticæ tantum otii tibi concederent, ut ad exemplum Fontani excursionem aliqua in hæc oras, suavissimoque amicorum alloquio ac hospitalitate, mentem aliquatenus reficeret; foret id nobis supra quam dici potest acceptum. Optamus id quidem vehementer; sed si respicimus incommoda ingravescentis ætatis, voto isto potiri vix licebit. Spero autem me circa Nundinas Amstelodamenses, si Deus volet, in vestram urbem venturum, tunc & te videbo, coramque jucundum os oculosque suaviabor. Interea summo cum desiderio expectamus Literas à Gronovio, vel potius eum ipsum, ut subeat apud nos Professionem, ad quam illum vota & studia nostra jampridem destinarunt. In suis, quas ante tres menses ab eo accepi, valde miseratur jacturam nostrarum Literarum quibus statum & conditionem hujus Professionis pluribus perscripseram; ideoque jam in alium id munus collatum esse existimat. Respondi autem, rem adhuc esse integram, nostraque intercessione effectum, ut Proceres nostri, redditum illius se expectaturos, promiserint, modo certiores reddamur, ipsum hanc vocationem suscepturum. Postquam redux factus fuerit in Hollandiam, sine dubio te compellabit, antequam ad nos scribat, vel ipsum se sistat. Rogo itaque, Vir clarissime, ut rei Literariæ hoc officium præstes, optimoque Gronovio calcar addas, ne ulterius tergiversetur, oblatam hanc felicitatem, quam multi concupiverunt, pauci verò sunt adepti, serio amplecti. Experietur sane, rebus ac studiis suis hac ratione optime consuli, multumque præsidii in amicorum benevolentia hic sibi repositum esse. De Professione Trajectina necdum aliquid certi est statutum. Deliberat adhuc à quorum suffragio res pendet. Fervor iste, quo pridem ferebantur ad tertium Juris Professore vocandum, videtur frigore aliquo contactus. Interim nostra forte hic contenti vivimus, si non æquè splen-

dida, certè non minus quieta, & studiis nostris accommoda. Nostrum quondam spectrum nocturnum Trajecti jam moratur. Si is favorem illum, quo nonnulli è primariis in nos propensi videbantur, poterit imminuere, sine dubio ostendet se ea in re non alium quàm à multis bonis viris, quos arrodere consuevit, hætenus est cognitus. Nisi molestum tibi est, Vir clarissime, data occasione uti me insinues in gratiam clarissimi Domini Lyraei, summo opere rogo. Eam quippe commendationem mihi multum utilitatis allaturam certo scio. Deus Optimus Maximus te, Vir clarissime, cum tota familia benignissime protegat.

*Dabam devotissimo
affectu Daventriæ
Idibus August. ann.
cdo lxx xli.*

*Tuæ Eminentia
Omni Fide & Officio
addictissimus,*

J. Christenius.

CCCXX.

PLacuit, Vir maxime, harum latori, prælustri Proconsulis Dantiscani ab Hobten filii præfecto, in Academiam Leidensem profecturo in conspectum tuum me venire parario, ex quo didicerat omnibus bonis adhuc à me missis fores Mularum tuarum fuisse apertas. Patere igitur Virorum amicissime, ut & hic experietur id nos ex vero sibi testatum fuisse. Concerationum Scholasticarum, in quas nos Zelotarum quorundam importunitas conjecit, *ἀποστασὶς μάλιστα* quoddam mitto, ut intelligas in quo nunc versetur pulvere. Synodus Sudhollandica Roterdami nuper celebrata, ut & Professores Leidenses pessimè de nobis informati videntur: quippe qui literis suis tum ad Magistratum nostrum, tum ad Collegium Scholasticum & Ecclesiasticum datis deplorant quod Schola & Ecclesia hæresibus variis contaminetur, quæ hic fuerit prælustri officina Veritatis & Orthodoxias. Putant enim hic foveri Sabelianismum, Pelagianismum, Semipelagianismum, Photinianismum, Sadducæismum, Atheismum. Vix Monstra horribiliora Orcus habet, quàm apud nos stabulari credunt optimi illi viri. Nimirum quos dogma de universali & sufficienti gratia non poterat de ponte dejicere; illi tot ab antiqua

tiqua Ecclesia damnatis hæresibus erant gravandi. Miror vestros tam præcipientes fuisse, ut se ad æmulatorum nostrorum prava desideria rebus nostris immiscuerint & præjudiciis suis gravare voluerint. Spero Deum & Magistratum illius Ministrum remedium inventurum tanto malo & morbo. Precibus & Consilio nos juvabis, ne causam bonam malè agendo perdamus. Bene vale, & salve *monu* à D. Bergio, D. Willio & me, Virorum optime, maxime.

R. D. T.

*Brem. Aug. 4.
clo 10 cxli. se-
dum veterem
formulam.*

Observantissimus,

L. Crocius.

CCCXXI.

Vir celeberrime, Domine & Fautor observande,

Plus tibi debeo, quod me Literis tuis manu tua scriptis dignatus es, quam si per Amanuensẽ nitidius, ut ais, scriptæ essent. Nec meas ego nitore quam affectu æstimari epistolas malim. Candida mihi quàm polita magis placent. Si ita est, ut scribis, illustrem Virum H. G. esse Authorem Commentarii locorum de Antichristo, isque ita sentit, ut is Commentarius præ se ferre videtur; doleo sanè ipsius vicem; & hoc mihi restat dicere quod solent Rabini non absurdè *שרא ליה מריח*. Ego verò de Authore ita scripseram, non quod omninò ambigerem, quis esset, aut quasi ignorarem, magnos etiam viros labi posse, & eorum plerumque magnos lapsus esse; sed quod ad illum ipsum virum illustrem hoc scripseris, vel saltem illa mente, quæ omnis Ecclesiæ Reformatæ sententiam uno ictu tollit, scripsisse nollem, idque illo viro indignum, atque eum scopum, quem indigabat Epistola mea longè minùs absurdum judicabam. Mihi verò dolèt, (ita æstimo eruditionem tanti Viri) accidisse, ut, qua in re laudatorem ipsum me habiturum confidebam, si quid conatus essem, in ea haberem adversarium. Nam si quis putet, ea me causâ delatum esse ad hanc scriptionem, ut me componerem magno Viro, isme ignorat planissime. Utinam voluisset ingenium suum veritati accommodare! Quàm exactè, quàm eruditè, quàm ornatè, quàm copiosè, acperspicuè idem argumentum, contractis clarissimis Scripturarum testimoniis, Prophetarumque comparatis vaticiniis, phrasibus enucleatis, ænigmatibus solutis, additâ luce Historia-

rum, gravi & solido interposito de singulis rebus judicio potuisset illustrare! Quàm gestirem in illis confertissima doctrina Commentariis habitare, quæ imaginor ab ipso proditura fuisse, si verum quæreret! Nunc rei indignitas miseris nobis & pueris, qui alioqui tantos viros vix contra conteri audemus, vocem extorquet. Quod si videt, multa superstitiosè ac tyrannicè geri in Papatu (quæ certè tot ac tanta sunt, ut animus pius non possit non cohorescere) suadebitne nobis, ut redeamus ad illud regnum Superstitionis & Tyrannidis? Et annon videt, Superstitionem & Tyrannidem capitales Antichristi notas esse? Si quid verò etiam in aliis Ecclesiis non probat (nec miror: sunt enim variæ Ecclesiæ quædam plus, quædam minus de Antichristi doctrina & moribus trahentes) hæcine illas sanandi commoda ratio erat, ut persuaderet nobis, Papatum ut Antichristianum non damnari sacris Literis, in quo tamen multa superstitiosè & tyrannicè fiunt; ut scilicet ad illum tanquam sinceritatis exemplar redigantur & reformentur. Metitur omnia Doctoribus antiquis. Potes nos (Vir excellentissime) omnium optime erudire, quantum deferendum sit Doctoribus vel antiquissimis extra Scripturam loquentibus; & an hodiernus Papatus cum antiquis illis verè Doctoribus, non seductoribus consentiat. Hoc tamen, quod de Antichristo nos docet, scio, quod nec veterum Doctorum sit sententia, nec Pontificiorum. Sed quo dilabor? Neque enim tecum, Vir excellentissime, mihi agendum est, tanquam cum ipsius advocato: qui tibi, ut rerum harum gnarissimo & locupleti arbitro conatum & studium meum, ut aliis piis & doctis Viris, vehementer cupio probari, qui alias non perfunctorius laborum meorum sat tenuium laudator es. Qua fiducia audeo à te contendere, ut & consilium meum (qui non tam in H. G. illustri Viro, adversarium legi, quam occasionem datam de iisdem rebus, de quibus ille dixit, & pro Conscientia & pro Officio dicendi, non omisi) benignè interpreteris, lapsus meos ac defectus humaniter feras & indices. Quod porrò me ad similia veteribus elaboranda extimulas, pro lege accipio: & in eo sum, prout cura mihi demandata efflagitat, quantumq; labores quotidiani permittunt, totus. Fateri tamen audeo tibi, Vir eximie, non mediocriter studium aliquando nostrum hebetari temporum, an hominum iniquitate. Quò enim multum laborasse, torfisse se noctes & dies, collegisse, scripsisse, descripsisse,

descripisse, si perfecta cum blattis tineisque certare debent? Nihil ego magis cum officio meo atque scopo studiorum conjunctum invenio, quam sedula meditatione Scripturæ sententiam ex genio linguæ illustrare. In istiusmodi genere aliquid nonnunquam nascitur apud me, quo ut mihi ipsi profecisse, ita me rudioribus prodesse posse videor. Inter ista est Jobus meus. Sed experior hic tantam editorum (qui respuunt quicquid non statim sortem cum centesima redditurum est) morositatem, dum à Typographis (sunt autem qui dimidium impensarum pro copia sua vellent subire) rogantur, ut mihi videar à Midis istis stultis & ingratissimis operam meam ut indignam luce & oculis hominum ignominia notatam domum referre: quod indignum & intolerabile est. Si sic pergitur, pereunt studia & tandem nihil nisi fabulæ & cantilenæ legentur. Vide quo me abducatur humanitas tua. Ita enim te abutor, ut mihi jam videar *ἀπεργάζομαι*. Quod aliquando vix effugimus, quum lubenter scribimus & tempus, ut mihi nunc, conceditur. Convictor enim meus Eques Polonus, qui his Literis aditum ad tuam comitatem querere voluit, in tempore me de itinere suo admonuit. Sed hic abrumpo, Vir eximie, teque divinæ curæ commendo. Vale, & me ama.

Scribebam die 18. Cl. T. Observantissimus,
Oñob. 1641.

J. Cocceius.

CCCXXII.

Excellentissime Domine,

VEreor ne Literarum à me officium requiras, quod pro summis tuis in me meritis jam sæpe misissem, nisi usque ad meum ex Italia distulissem reditum, cujus forsitan celeritatem miraberis. Istis itaque literis complectere placuit, me salvum & sospitem huc ex Italia rediisse, felicissimumque finem meæ imposuisse peregrinationi, sic quidem ut ego qui ingredi illam diffidebam, semper magis adversos rerum exitus metuens, quam sperans secundos, animadvertam summam Dei ter Opt. Max. in me conservando clementiam. Multas casus me tibi varietates, itineris incommoda, quæ optabiles in experiendo fuerunt minime, nihil attinet exponere, quoniam confido securam illarum recordationem, tandem jucundam allaturam

delectationem. Quid tantarum gentium, nationum, linguarumque varietatibus delectabilius! Helvetos, Grifones populos more humanæ cupidinis vidi non minimis difficultatibus emensus Alpes perennis nivibus obrutas, illas cum ascenderem insolentia itineris interdum timebam, nam omnia natura opere velut atque consulto præceps. Basiliam quoque tetigi, unde Argentoratum proficiscebam, ibi invisi D. Freinshemium. Is plurimam salutem tibi, excellentissime Domine, jussit nuntiari. Ejus Viri ingenium, à multis admiratum, Argentoratenses non magni faciunt, sicuti ab iis, qui quotidie simul ibi cum illo vivunt habeo. De toto statu meo si scire cupias, quid hic nunc post reditum agam, quam longum meum discessum à patria, & à te futurum putem, ex istis intelligere poteris; me fere adhuc per tres menses hic commoraturum, si mihi id esse emolumento sciam. Exercitia tam animi quam corporis, quæque me digna putem interdum tracto. Dilectum tuum filium Domitium Isaacum sapissime inviso, & gaudeo illam ipsam conversandi cum illo facultatem obvenisse hic mihi rursus, quæ Amsterodami. Quod superest etiam atque etiam rogo, ne meo nomine dilectissimam tuam conjugem, & filios tuos charissimos graveris salutare. Celeritati mearum Literarum ut indulgeas, utque me inter tuos ames ad meam Observantiam. Vale.

Æternum tuus,

Datum Lutetia
Parisiorum die
xiii. Septembris
clō 10 c xli.

qui excellentiss. Nomini tui

omnia Officia defert,

Ernestus Johannes Creutz.

CCCXXIII.

Clarissimo & incomparabili Viro Domino
Gerardo Joanni Vossio Salutem &
Observantiam, D. D. Godefridus
Cretschmarus.

DA veniam, Vir Clarissime, si etiam nunc mihi gratulor, ac pio quodam animo deprædico summam illam virtutem tuam & humanitatem, qua me non ita pridem accipere dignatus es, hominem ignotum & parum à se commendabilem,

F f

nisi

nisi forsā vel cultū tui, & observantiæ professione, vel Literis Meursianis quas exhibui. Quanquam non magis istis adscribo, quam virtuti tuæ, quippe quæ tam generosa est, ut neminem bonum ab aditu excludat, admittat omnes, si non hominum, saltem humanitatis causā, ne non semper optimus sis. Rara bonitas in tam illustri dignitatis ac famæ fastigio, quo tua te Virtus & Doctrinæ meritum eminare voluit, sed quo rarior, eo majori laude dignior haberi meretur. Quanquam satius duco silentii Religione venerari, quam exiguiſsimæ scriptionis conatu deterere: ea enim magnitudine animi es, ut malis te Virum bonum esse quam dici, ac propensius facere quam audire præclara. Quæ incredibilis tua bonitas in eam me libertatem excitat & fiduciam, ut non solum gratias, sed majus etiam beneficium tibi me debere velim. Panegyricum enim sermonem, quem ante biennium, cum adhuc Soræ viverem, meritis ac memoriæ clarissimi Viri Domini Johannis Meursii consecravi, ea qua decet reverentia ad te defero, defero autem non sui, non Autoris, sed humanitatis vestræ, sed argumenti, id est, Meursii fiducia securus. Accipe, Vir summe, & si quid exorare me pateris in honorem Meursii tui, lege & cense; illud cuiusvis est, hoc iudicium requirit, & imprimis tuum, cujus tanta me & omne literarum nomen incessit observantia atque auctoritas, ut omnibus me compendiosè probatum iri existimem, si tibi me prius, & nominis tui patrocinio probavero. Da veniam, clarissime Domine, & si quid vel pravi erit, vel ambigui, pro libera iudicii tui auctoritate, & quo teneris gratificandi hominibus studio, mone & corripere, admonitio tua tam grata mihi erit quam honorifica ac salutaris; inter eos enim sum, qui à vobis moneri partem laudis putant & eruditionis. Non possum equidem non vereri, ne aut ignarus videar virtutis vestræ ac dignitatis, aut oblitus meæ cum modestiæ tum tenuitatis, quod tam exiguum pietatis erga Præceptorem documentum iudicio submittam tuo, & quod majus nomen est, tempora tua morari audeam, quæ non nisi publico literarum bono destinantur; sed solatium habeo humanitatem & præcellentem animi tui moderationem, quæ tam magnanima est, ut etiam publicè prodesse putet, si quos ipsa ornare possit aut juvare plurimum. Accedit præterea Meursii nomen, quod facile mihi veniam à te impetrabit, qui tam bonus quam doctus es, & bene de ingeniis mereri non

alia causa velis quam quatenus Viro bono dignum est. Vale, gloriosum sæculi decus, decusque nostrum, & libertatem hancce meam, si non alio nomine, saltem pietatis professione, & fiduciæ erga te meæ vel proba vel excusa. Deus te conservet tam semper felicem, quam semper cognovimus optimum & benignum.

Ex Museo meo Lugduni Batav.
16. Cal. Octobris An. 1641.

CCCXXIV.

Vir Præstantissime,

NON eram tanti, quem amicissimus Collega meus D. Lindanus tibi commendaret, & in notitiam benevolentiamque vestram infinuaret. Jam vel hoc nomine Hesychii editio allubescit, quod tantam rem mihi *καὶ ἀρχαῖς* consecrerit. Tu enim eruditorum eximie & tanti in orbe literato nominis & meriti prolixè omnia polliceris, quod mihi sperare improbum fuisset, nisi *τὸ φιλοφιλὲς* σε innotuisset. Hesychium autem tarde & cunctanter, hortantibus Collegis amiciss. D.D. Lindano & Cocceio apprehendi, vergente quidem huc & trahente prona mea voluntate, rapiente autem necessitate penè rei ob publicam utilitatem & ad exornationem muneris suscepti; at repellebat conscientia tenuitatis, quæ optaret tanto Grammatico doctiorem operam admoveri. Caterum, quod intelligo de eruditissimo Viro, filio vestro, eum cogitare de hac re, id me tantum reprimat, quantum tua pollicita impellunt. Itaque velim scire, quanti temporis res sit & quantæ lubentiæ. Si enim magnopere velit & in propinquo spes exitus sit, resilire me præstabit & locum cedere meliori. Sin autem, fervidè urgebo *τὴν ἐκδοσὴν τῶν βιβλῶν*, fretus vestra tam benigna pollicitatione, simulque aliorum insignium virorum, qui Symbola conferre ultro etiam promiserunt. Tui autem, Vir maxime, exemplaris cujus usus erit, significabimus, & post brevissimi temporis usuram, fide optima, remitemus. Plura hoc tempore, incumbenibus aliis & tabellario festinante, non addo: proximis prolixior ero, nisi offendendi metus inhibeat. Publica à Domino Lindano intelliges. Vale, & nos ab his initiis amare perge. Salutem autem plurimam Domino Barlæo, Viro summo, præter tuos,

tuos, & inter eos Clarissimum Ifacium, quem tibi & Reipublicæ Literariæ Deus velit diurnare.

*Raptim ad diem
xvi. Kal. Octob.
Jul.*

Tuus & tuorum,

Christ. Schotanus.

G. L. Profess.

CCCXXV.

Clarissime Virorum,

Summio cum gaudio accepi ab his, qui Amstelodamo veniunt, prospera te frui valetudine, quam bono publico propriam tibi faxit, Deum veneror. Misi nuper Exercitationem de Calculo, in cuius pag. 44 si inspexeris verba tua, non verba has querere, aut cineres, ut inquit ille, videbis, sed quæ dicere vetat ingenuus pudor. De Nobilissimo Salmafio diu est, quod audio, venturum, mallem feliciter advenisse. Non turpe puto talis Viri dextra cecidisse, honorificum vero, amica. Ego post responsionem illam ad vernacula deflexi, quibus prælum hic sudat. Meditor & de Tabæ quid, ac Hydrope, quale dedi de Calculo. Tu, cum aliud vix possis, conatum proba, & discendi desiderium, quod ipse instillasti. Consulis filia cras nubit Capitori, qui fœceri favore Senatoris Dordrechtani munus jam biduum obit, antequam (ut Christiana Charitate credere par est) implevit sponsi. Mallem tibi uni & soli adesse, quam turbæ nuptiali. Sed vel absens nobis aderis, & si quid ad salutem hoc, non omittetur tuæ spumans patera. Vale, Vir magne, & salve ab eo qui semper fui, sum & ero

Nomini tuo æternum

grato animo devotissimus,

Joh. Beverovicus.

Nobilissimæ Uxori tuæ & eximiis filiis amicissimè S. D.

*Dordrecht præd. Kal.
Octobr. clæ 1641.*

CCCXXVI.

S. P.

Vir Clarissime & Celeberrime, Amice conjunctissime,

HAS Literas trado D. Junio filio D. Junii olim Parisiis apud proceres nostros magni nominis. Matrem habet matronam honestissimam, quæ hunc suum filium amicorum consilio huc misit militatum, iussitque ut occasione data salutaret posteros nostri Junii *τὸ μανγέλιον*. Statuit igitur hoc exequi apud vos, & memoriam renovare stirpis communis. Scripsit ad me Saravivus Senator Vir doctissimus & doctorum amator, se vidisse Pandectas, sic enim loquitur, Doctissimi Vossii de Idololatria, & mirari quod sine præfatione emissæ fuerint. Causam ei aperui in mea responsione: Vidi hic in transcurso libellum Annotatorum in Cassandri Consultationem, cujus usuram obtinui spatio bihorii. Si prostraret eum cum otio expenderem. Mira item mihi videntur quæ a tali Viro Papatui conceduntur. In miserrimos seculorum fines incidimus. Deus meliora! Quem tibi & tuis, Vir Clarissime, propitium & in omnibus faventem adprecor. Vale.

Tuus & tuorum

Raptim x. Nov. 1641.

omni officio & affectu,

Andreas Rivetus.

CCCXXVII.

DIU sane est, Virorum & Amicorum maxime, quod nequicquam colloquimur. Matthias noster Möesum ituriens, postremæ vicem fecit Epistolæ. Cura valetudinis vestræ & amor calamum me jubent corripere, quo te laceßam. Quæ nos intemperies homullorum aliquot infrunitorum agitet, ex publica credo, fama nosti. Quum enim dogma de Universalis ac sufficiente gratia illis non videretur sat virium habere ad defamandum nos in Belgio vestro, & apud amicos alios in Academicis & aulis Principum, affinxerunt nobis hæreses nefandas, Sabellianismum, Photinianismum, Pelagianismum, & nescio quid non. A Synodis vestris eadem re moniti sumus, quibus ante menses aliquot

aliquot nos excusavimus. Earum Deputatos nunc Hagæ congregatos rem arbitrari audimus. Utinam feliciter! Hæreses & Schismata, quæ dividunt Ecclesiam, averſamur. Veritatem antiquitus & à majoribus veluti per manus traditam veneramur, & consensum Catholicum omnium Orthodoxorum inde à tempore Apostolorum sequimur. De salute vestra cupio fieri certior. Vale, Vir amicissime, & salve *muovi*.

Brem. 24. Novembris
cl. 16c xli. secundum
veterem formulam.

Clarit. T.

omnio officio & affectu,

Lud. Crocius.

CCCXXVIII.

Salutem & Observantiam.

FAteor, clarissime Vir, verecundiam in me desiderari posse, quod ineptis hisce literarum formulis gravissimas occupationes tuas interpellare audeam; sed solatium habeo virtutem tuam & excellentiam, quæ, quanquam maxima, ita tamen ab humanitate temperatur, ut possim ex quacunque occasione animum erga te meum profiteri. Quod tantò nunc facio lubentius, quantò aut majora beneficia tibi me debere agnosco, aut expectare quotidie videor ab incredibili benignitate tua, quæ, ut nemini bono interclusa est, ita propense in eum devertit, à quo & colite intelligis & observari. Nuperius epistolam ad te dedi, Vir incomparabilis, simulque Panegyricam orationem, quam Præceptor olim meo Cl. V. Domino Johanni Meursio conscripsi, ut extaret levitè aliud animi & pietatis meæ argumentum; utrumque cum despicere posses, admisisse te intelligo & quod humanius nomen est, perlegisse; non quod tanti erat, sed ut ostenderes tam judicare te posse maxima, quam in minimis probare conatum & navatam operam. Patere, Clarissime Domine, agnoscere me & admirari summam hanc bonitatem tuam, & ab eadem illa polliceri mihi aut testimonium iudicii tui, aut fructum benevolæ admonitionis, ambitiose fortasse sed utiliter. Quemadmodum enim sol quodcumque tangit, non illustrat modo, sed accendit; ita splendor nominis tui tam excitabit ingenium meum, quam fovebit, ut in spem

ac frugem feliciter exsurgat, & conari aliquando velit, quod tu ad exemplum admirationis potes. Da veniam arrogantiae meæ ac credulitati; non hoc ago, ut eliciam literas à te publicitus occupatissimo, quanquam ad aliquam mei five commendationem, five excitationem, nihil honorificentius contingere mihi posse persuadeo; sed ut profitear eo me nomine tibi plurimum debere, & observantiæ testificatione, necnon admiratione tuæ virtutis, id aliquando intendere, ut beneficium referre videar voluisse. Vides animum meum, Princeps literarum, quem non plus ex scriptione mea quam ex meritis tuis aestima, & quem semel admisisti æternum tibi devinctum patere. Quo in nomine vivere ac valere te exoptat.

Lugd. Batav. d.
2. Dec. An. 1641.

T. Godefr. Cretschmarus.

CCCXXIX.

S. P. & Observantiam.

Excellentissime Vossi, Fautor & Amice Venerande,

Constantinopoli redux factus, quod ibi literis intellexissem optimum & clarissimum Filium tuum Isaacum hic in Angliam esse, sperabam hic invenire, & aliquod optimæ notæ Manuscriptum Arabicum ex Bibliotheca mea Orientali, quam per Dei gratiam satis magnam reportavi, donare decreveram, sed abitu in Galliam meum reditum præverterat. Nunc quod intelligam reditus mei famam in Belgio sparsam, non possum facere, quin amicis & fautoribus eundem indicem, tibi que certe pluribus nominibus obstrictus sum, nam hac ad Magnatem me recommendabas, & Illustrissimus Grotius eo me nomine amavit, ut plurima ab eo prona erga me voluntatis signa retulerim. Quod si itaque filius tuus Isaacus meum ad vos adventum prævertat ex Gallia reditu, quem ipsi faustissimum voveo, ut tam præclari filii summis virtutibus quasi reviviscas Pater, licet nunquam mori ipse queas, hoc rogo, ut meo nomine salutes, & postquam Catalogum meæ Bibliothecæ perlegerit, quemcunque librum usui desiderabit, non denegatum iri meo nomine rogo promittas. Quadringentorum Manuscriptorum Græcorum, Ebræorum, Arabicorum, Persicorum, Turcicorum, Russici & Armenii Catalogum penes Leidenſes imprimi

imprimi credo. Clariss. ac Doctiss. Filium Matthæum Amicum meum colendum salutabis, ipsumque Gerhardum præstantissimum Juvenem, quos vos Deum rogo ut sanos propediem & florentissimos reperiam. Gratias autem ago ingentes etiamnum pro veteri illo literarum tuarum beneficio, rogoque tibi persuadeas non apud decoctorem ea deposuisse. B. V.

Londini ex Coll.
Gresham. 21. Jan.
St. V. 1642.

à Tui Nominis

Observantissimo,

Christiano Ravio.

Inclusas rogo literas Cl. Golio transmitti, ni grave, jubeas, ita novo beneficio me obstringes. Εἰρη.

CCCXXX.

S. P.

ET si, Clarissime Domine Vossi, religio mihi sit, gravissimas illas publici boni causa à Cl. T. susceptas occupationes intempestivis interpellationibus ullo modo turbare; cum tamen ex illo, quem præterito autumno cum Cl. T. habebam, discursu non obscuris indiciis deprehenderim, eam de negotiis literariis, & imprimis Chronologicis animi sensa haut gravatim explicare; idcirco cum id negotii mihi datum sit ab amico quodam, ut tuam, Vir Clarissime, sententiam super una atque altera Controversia Chronolog. perquirerem, quæso te per omnia literarum sacra, ne id in sequiorem partem rapias, sed audaciæ huic meæ pro summa humanitate tua ignoscas. Primum de quo informari desiderat amicus prædictus, hoc est; Quanam vi rationes solidæ contra vulgatam Æram Christianam pugnent, quo minus eandem sartam testam retineamus: Quorum unam, si rectè memini, Cl. T. tunc temporis ex Josepho adducebat, sed (quæ est vacillantis memoriæ meæ infelicitas) planè istius argumenti summa mihi excidit, & ni fallor, remittebat me Cl. T. ad quendam Tractatum à se editum, in quo planius mentem suam hac de re explicasse se, assererat; quem vellem, nisi molestum esset, una cum ratione prædicta per literas exoptatas demum mihi in memoriam revocari. Porro etiam edoceri expetit, quod Cl. Dn. Vossius sentiat de

magno illo numero quem invexit Joseph. Scaliger (à quo vocatur magna Periodus Juliana) ex tribus Cyclis confecto, Lunæ, Solis, & Indict. Rom. anne illa firmo talo subsistat, nec ne? De hisce, ut quamprimum fieri potest, Cl. T. mihi rescribere dignetur, submissè rogo. Et cum semel de benevolentia tua, Venerande senex, optima quæque animo conceperim, proinde obnixè insto, ut insuper quoque Auctores quosdam insignes, qui de Particulis tam Græcæ quàm Latinæ Linguae ex professo aliquid prodiderunt mihi indices, quarum collatione Hebræas aliqua ex parte collustrare liceat. Vale, Vir Excellentissime, & importunitati meæ hominis peregrini quidem, attamen Excellentiæ tuæ observantissimi ignosce.

Lugd. Batav. An. vulgata Ære Christi.
cl. 1642. d. 14.
Februarii.

M. Johan. Michaelis,

Stralsund. Pomeranus.

E Musæo meo qui est apud Bibliopolam nomine Pieter Hercules prope Templum D. Petri.

CCCXXXI.

QUam libenter & quam sæpe (Vir amplissime, doctissime & plurimum dilecte) de te & vicino tuo Domino Barlæo cogito, ipse mihi sum conscius, non conabor tibi literis exponere. Superioribus diebus cum vos honoris causa viderem, quos vehementer observo, casu accidit ut in tua mensa sermo oriretur, de iis rebus de quibus vos tam Philosophice quam Theologice solerter differentes audiebam cum summa delectatione: te quidem de tormentis futuri seculi, an satius sit miseris omnino non esse, quam poenas sub quibus sunt, sustinere; illum autem de Animæ essentia, perfectione & virtute. Sicne tota in toto corpore, & tota in qualibet parte; de quibus mihi ingenio vix mediocri instructo, otio certe nunquam abundanti, adversa etiam per annos multos modo valetudine, modo fortuna vexato, liceat cum vestra bona venia paucis quid sentiam subscribere: Ut sic absens tacitus vobiscum loquar, & leniatur sic desiderium meum, quod facere me nolo credatis expectatione literarum aut responsonum vestrarum, quæ etsi me incredibiliter delectarent; ego tamen vos mea causa à gravioribus studiis ad nugas revocari nolo: Satis me habere

habere putabo, si & meas tibi esse redditas, & tibi vicinoque tuo, ut cupimus esse intellexero, sententiam vestram pluribus (quando favente Deo rediero Amstelod.) auditurus, eique acquieturus, qui non ignorem vobis ab omni cura expeditis, ingenioque florentibus, quotidianum esse cum libris usum, & cum omni doctrina, utpote in ista luce viventibus Batava, summa omnium virtutum ingeniorumque præstantia, feminibusque eloquentiæ & reconditoris intelligentiæ referta. Accedo ergo primum ad miseros istos in quibus, quæ erudit nos natura, inveniri tormenta hæc sunt.

Invidia, de qua Poeta ait, Siculos non invenisse Tyrannos tormentum majus. Dolorem, omnes sciunt quam grave sit malum, eum scilicet quem Tristitiam dicimus. Desiderium præterea Narcissi fabula, & alia experimenta testantur quantum habeat mali. Metu denique multos esse mortuos non est rarum meminisse. Sed quis quæso invidus unquam fuit, qui non ipsam invidiam ornaverit. Desiderium celebrant Poetæ, quasi nullus alius sit amantium fructus. Mæstos tenebras, & omnia quæ malum augeant quærere quotidie experimur. Malum fugiunt Meticulosi, sed ipsum timorem adamant. Hæc si vera sint, vide num hi miseri velint esse sine his pœnis? Et si non velint his cedere, cur eos credat aliquis malle non esse, quam istas sustinere? Omnis porro Spirituum pœna voluntaria est, & non potest (quoniam à Voluntate proficiscitur) non voli: & si volitur ipsa miseria, potestne credi eos malle non esse, quàm hanc pati? Constat enim multa proverbialiter dicta esse, ad exprimendam pœnæ gravitatem. Tormenta & Cruciatu qui in futuro seculo animabus impiorum parati sunt, tantos esse ut præstet omnino non esse, in ipsa Theologia videtur indubitatum: sic enim Christus suo ore enunciavit, Melius fuisse proditori, ut natus non fuisset ille homo. Tormenta etiam futuri seculi agnoscit Philosophia ipsa; neque si his quæ præsens vita patitur compares, Ludicra nostra hæc præ iis, flores, rosas & delicias, ipsa Philosophia jurare dubitaverit. Novit enim animæ, post hanc vitam, potentiam, cum ea quam in materia habet, non pati proportionem. Novit affectus quos hic colligit, illic ad proportionem status & existentiæ excreturos. Novit itaque in immensum & bona & mala non per Hyperbolen sed ipsa re augenda. Verum cum hæc omnia doceat nos Philosophia, huc usque tamen attingit, ut melius illis non

fuisse censeat. Quod si hoc certum sit in Theologia, ex iis quæ naturam superant contigisse putandum videtur. Cum hoc iudicium (quod melius fuerit illis non esse) vel ex natura rei vel ex opinione personarum, sit pensitandum. Personas duas video examinandas, ipsum illum qui pœnis irretitus manet, & prudentem aliquem qui rem humanitus existimet. Priorem pœnas suas fovere iisque delectari ostendimus. Prudentis iudicium non tam certum esse, sed falli posse videtur. Si naturam consulamus; quid quæso facit aliquid alio melius in Natura? Seu in qua ratione Melioratio est consideranda? Melioratio haud dubio est in ratione Entis; Et illud melius est in ratione Entis, quod plus de Ente habet. Et potest quæso quis dubitare, num id quod est, & quantum homo est, & plus quam homo est, & ita plus quam homo est, ut comparatio inter ipsum & hominem nulla maneat, plus habeat de Ente, quam nihil; quam quod non existit. Præterea quid respondebimus eis qui docent, omnes actus nostros ab ipsa æternitate, catenatis à causarum necessitate passibus, usque ad ipsum liberi arbitrii exercitium alligatos & perductos? Videbiturne Deus tot hominum Myriadum Myriadas, æternis horrendis & ineffabilibus pœnis ante omne ævum addixisse gratis, viam munivisse, gressus coegisse, fatalem pœnam perstruxisse? Quæ si ita sint, quorsum post hæc cum gemitu fundemus preces? Quorsum per aspera exercitia carnem domabimus? Quorsum solitudinem & extentum ad futura animum, vel ipsi colimus, vel aliis ad colendum commendabimus? Sed excrevit calamus. Hæc sunt illa varia in utramvis partem quæ colloqui & exercitationis gratia exciderunt, donec te videro, ut de tuo promptuario sumantur, &c. Quod ad ista attinet quæ à Domino Barlæo accepi de anima, ego cum Ang. lib. 6. de Trin. 6. existimo totam animam in toto esse corpore, & totam esse in qualibet ejus parte. Sed nisi me in hoc destituat memoria mea, memini didicisse me secundum triplicem divisionem esse triplicem totalitatem. Est totum quod dividitur in partes quantitativas, totum aliud quod dividitur in partes rationis & essentiæ. Est & tertium potentiale totum, quod dividitur in partes virtutis. Prima hæc totalitas quantitativa non convenit animæ nec per se nec per accidens. Secunda totalitas convenit, & sic anima tota secundum totalitatem Perfectionis & Essentiæ est in toto corpore & qualibet corporis parte. Sicut Albedo tota recte dicitur

dicatur esse in tota superficie & tota in qualibet ejus parte, si totalitatem speciei & essentia intelligimus. Sed si de totalitate quantitativa mentio fiat, quam albedo per accidens habet, non erit tota albedo in qualibet superficiei parte: neque si totalitatem Virtutis notemus; cum magis possit movere visum albedo, quæ est in tota superficie quam quæ est in aliqua ejus particula. Sicut anima non est tota secundum totalitatem Virtutis in qualibet corporis parte, sed secundum visum in Oculo, secundum auditum in Aure, &c. Et licet sit tota in qualibet parte, non tamen eodem modo compartitur ad partes, & ad totum: cum ad totum primò & per se respiciat tanquam ad propriam & proportionatam perfectibile: ad partes autem per posterius, secundum quod partes habent ordinem ad totum. Porro anima cum unitur corpori, non ut motor tantum, sed ut forma non mediante aliquo Corpore, necesse est sit in toto & in qualibet parte, cum sit forma substantialis quæ est perfectio totius, sicut & cujuslibet partis, non vero accidentalitatis, ut forma domus posita in compositione & ordine, quæ etsi toti domui non tamen dat esse singulis partibus. Quomodo autem potentia animæ distinguuntur, quem habeant ad invicem ordinem: Utrum una potentia ex alia oriatur; & utrum omnes potentia animæ remaneant in ea post mortem; & denique sit ne alia forma præter intellectivum in homine animus; hæc & alia ejusmodi Domino Barlæo viro eruditissimo cum his quæ raptim de Anima scripsi relinquo. De rebus meis nihil scribo; sed me tibi Dominoque Barlæo totum, salutemque meam quam serio possum commendans. Negotii administrandi rationem singulari vestra sapientia permitto in Domino. Literas inclusas Domino Johanni Nebstero reddendas, cures, vehementer oro, cui me multum debere & plurimum devinctum esse profiteor, ejusque officium tam benignum ab excelsio quodam animo liberalique profectum libenter amplector. Etsi interim, ulli privato etiam nobilissimo esse oneri nunquam cogitavi; quod si compensare meis officiis non potero, memoria tuebor, & prosequar laudibus, quamdiu vita fruor, apud omnes, ipsumque serenissimum Regem Reginamque: ut ex optima saltem voluntate qua boni omnes & sapientes Viri metiri beneficia consueverunt, aliquam sibi relatum esse gratiam existimet. Δὲν ἔλαθ' ὁ κύριος πρὸς ὅσον ἀντὶ τοῦ Νεβστερου, ὅτι πολλὰς με ἀνεψύχας ἢ πολλὰς, ἢ καὶ γὰρ ἀλλοτρίαν

μὴ ἐκ ἐπιθυμίας ἀλλὰ ἡρωϊκῶς ἐν ἀμειψιότητι ἐξήγησέ με καὶ εὖρε δὴν αὐτῷ ὁ κύριος εὐρεῖν ἔλαθ' ὅτι καὶ ἐκείνη τῇ ἡμέρᾳ. Vale, Vir ornatissime, & me tuæ humanitatis summae semper memorem, sicut & dignitatis tuæ studiosum valde, amplectere; Dominisque Barlæo & Nebstero meis verbis salutem plurimam, quem accerses, &c. Iterum vale à tui amantissimo

Archib. Cassellius.

Hag. 19. M. 1644.

CCCXXXII.

Celeberrimo Viro Domino Johanni Gerhardo Vossio, ἔνι Ἀθήναις.

TOT annorum V.C. intervallo ad te redeunt à me literæ, quarum importuna inveniuntati propensius in me favor tuus veniam largietur. Desiderii sanè mei necessitas id postulavit, cui explendo, non inoratus mihi sis. Ac Deos non sine precibus adimus. Anni V.C. non pauci effluxere, ex quo tum liberalioribus literis, tum Jurisprudentiæ Sacris sedulo incubui, cui fini Academiæ plures florentissimas maturo consilio elegeram. Nunc è peregrinationibus Galliæ ac Germaniæ demum in patriam redux, parente optimo, (in quo spes opeque mea omnes sitæ erant) supremi Numinis arbitrio ad plures evocato, quid inceptem, ac ubi gentium certam sedem figam, incertus sum. Frequens hic eorum seges est, qui se eruditos jactant, titulisque sed meris ac inanibus splendent. Opulentiores atque impudentiores priori loco sunt. Ego, dum lenior mihi benigniorque aura adspiret, fortunæ ac temporis cedere constitui. Quamobrem V.C. si lautioris apud vos fortis quispiam doctrinæ morumque præfectum filio quæreret, non invitum id mihi oneris imponi paterer. Nec quidquam, quod jure deceat, in me desideratum iri confido. Dari condiciones ejusmodi scio. Verum uti non exiguum harum est discrimen, sic avidè sine dubio ambiuntur: Si spes aliqua mihi fieret, expectato volarem citius. Præsentia enim in hoc promotionis genere potissimum requiritur. Rogo per tuum te Genium V.C. beneficium hoc ei præstes, quem satis ubere benevolentia prosequi antehac solebas. Neque in ingratum conferes, neque pœnitebit, hunc hominem commendasse cui iteratus tui visus alloquiumque animum

animum addent, ut inter dubios fortunæ fluctus de rebus suis melius speret. Vale V. C. ætatem mihi colende, Reipublicæ tuisque diu superstes, delitescens affectus in me scintillas excita, meque responso dignare. Dionysium filium plurimum salvere jubeo.

Hamburgi A.D.
cId Ico XLII.
xx. Febr.

C. V. addictiss. studiosiss.

Bernhardus Damke.

CCCXXXIII.

Reverende & Excellentissime Vir,

Accepi nuper illa quæ ad me misisti munera. Quo nomine & hunc animum & me debere tibi fateor. De quibus aliisque pluribus, ut spero, sum scripturus, cum ordine perlegero. Nosti enim qui & ipse aliquando maxima cum laude inter nos versatus es, quam hoc tempore, ex instituto Academiæ, quo & recensendi studiosi, & alia nonnulla peragenda sunt, ab octavo Februarii ad primum sequentis septimanæ, distrahi soleam. De affectu meo & observantia si quæris, nemo nescit, quomodo de te scriptisque tuis judicare soleam. Quo magis detestandi sunt, qui Versus quosdam, quos in maledicum, qui de facundia aliorum judicare solet, conscripsi, de te scriptis, tibi aliisque persuaserunt: quod amici jam non semel indicaverunt nobis: cum id ne in mentem quidem venisse nobis sciam. Homo, de quo cogitabam, natione Batavus, aliquandiu Professor tandem ludo literario præfatus est, in qua cura expiravit. Qui non magis fortasse tibi, cum privatim de omnibus sententiam ferret, quam aliis pepercit. Simile est, quod cum nemo olim magis Rhetorica tua, non semel nec eodem modo edita, commendaret aliis, ea à me perstringi, non quidem forte crediderunt ipsi, persuasum tamen tibi distrahendis inter nos animis nonnulli voluerunt: quo nihil diabolicum magis, nihil magis hodie usitatum. Cum de *Loyolita* quodam egerim, qui de autoribus antiquis petulanter ac sinistre judicat; quod à te factum non memini, quem ob eruditionem singularem semper veneratus sum, qui sum ac futurus semper sum

Lugd. Bat. An.
cId Ico XLII.
Febr. xxvii.

Reverentia tua devotiss.

Daniel Heinsius.

CCCXXXIV.

Clarissimo Doctissimoque Viro Ger. Joh. Vossio, Gaspar Scioppius S. P. D.

Clarissime & Præstantissime Vir,

Nihil planè dubito, quin ornatissimi Juvenes Justus Riccovartius & Cornelius Vuerchovius, qui me per familiariter hic usi sunt, satis tibi confirmarint, quanti tuas excellentes ingenii animique dotes faciam, quantumque ætati nostræ de lumine tanto gratulandum putem. Quo minus mihi nunc laborandum intelligo, ut ambitiosa mei erga te amoris ac studii professione tuam mihi mutuam voluntatem conciliem. Missis igitur ambagibus pro amico te in partem voco negotii, in quo cum consilii & prudentiæ tuæ vires maxima cum laude tua experiri, tum ab omni Republica, inprimisque à Batavis tuis magnam & solidam gratiam me judice inire poteris. Id cujuscumodi sit, ex Italica Relatione, quam unà mitto, intelliges. Galilaus *ἡ μάχη* pro veteri, quæ cum ei intercedebat, amicitia mihi curæ esse cupiebat; ut relictis inventi sui experimentum caperetur, idque tanto impensius, quanto gratius ei fuit, quod Pieruccium disciplinæ ejus alumnus in contubernium meum adscivissem, propterque spectatam ejus fidem & singularem in omni genere virtutum omnium meorum bonorum hæredem fecissem. Is jam triennium apud me fecit, & usque eo mihi se probare pergit, ut eum in senectutis meæ præsidium cælo demissum statuam. Cæterum verba non invenio, quibus divini ingenii ejus vim satis dignè prædicem. Nam quicquid dixerò, minus erit. Promittit ille quidem in hoc Patavino Athenæo Juris civilis interpretationem, in qua tam cumulate omnibus satisfacit, ut in hoc uno studio videatur quoddam quasi tabernaculum vitæ suæ collocasse. At illum sui propemodum poenitet ac piget, cui necessitas incumbat ista professione vitam tolerandi, quam genio suo magnopere alienam ac modo non adversam experitur, cum sit maxime *πικρὸς* pectusque cuiusque modi artibus instructum gerat, quarum una quævis victum aliis satis lautum ex se præbere posset. Si suis ea fata auspiciis vitam ducere permitterent, ille quodcumque Mathematicarum disciplinarum genus & Philosophiam liberam nulliusque Magistri verbis addictam profiteri

ac

ac docere alios impendio præoptaret, satis quippe sibi conscius, posse se non verbis doctis, dictis auditores pascere (quamvis nec ab istis non satis sit paratus) sed res nemini unquam nec visas, nec auditas, omnemque humanam admirationem exhausturas manuum & oculorum sensibus subicere, quas magni principes, satis scio, ut videre possent, impenso pretio depecisci nihil dubitarent. Ego quidem, cui tam admiranda oculis & manibus usurpare contigit, planissimè mihi persuadeo, si Pythagoras, Plato & Aristoteles, in terris nunc existent, nec suum illud discendi studium abjecissent, nihil eis prius futurum, quam ut ad veri istius Philosophi acroasin certatim convolarent. Madaurensis autem Philosophus, nisi omnia me fallunt, non jam Hippiam, sed Pieruccium floriloquio suo dignam censeret, ejusque *πινυλαροποιον* distinctè explicanda ingenium delassare mallet. Tanta tamen hominis est modestia, ut istas ingenii ejus divitias nemo nisi diu multumque eo usus possit animadvertere. His accedit quod ego palmarium duco, quoque nomine plus hominem amo, ardens divinarum literarum amor, & mirificum S. Scripturæ studium, unde sibi mentem scientia augeri, sensusque ad boni ac mali discrimen exercitatos fieri gaudet (quod Apostolus perfectorum esse testatur) ne ipsum fallant animi vafra sub vulpe latentes (quales ab Alphonso meo de Vargas descriptos vidi) neve inveniat *ἡμεῖς τὸ κρυπτόν* & *ἀποκαλύψωμεν τὸ κρυπτόν* *τῆς διδασκαλίας*. Hunc ergo talem virum tibi nunc concilio, ejusque demerendi occasionem tibi offero: quam tanto avidius arrepturum te arbitror, quanto plus Batavorum publice privatimque interest, ipsis non intercideret fructum illum, quem eis Galilæus ex invento suo augurabatur. Si ergo istic sint, qui rem tantam cordi habeant, sive per te, sive per P. Fulgentium Servitum Reip. Venetæ Consiliarium, seu denique per quos visum eis fuerit, cum Pieruccio transigere poterunt; quem studii, quod Galilæus erga nomen Batavum singulare profitebatur, heredem esse præstabo, sicut etiam fide mea tibi recipio ac polliceor, futurum ut ex rebus ipsis homini omnium gratissimo operam te navasse intelligas, nec minimum mihi velut amicitia vestrae interpreti ac parario debere nolis.

De me ipso meisque consiliis, studiis & actionibus alias te certior faciam, nunc in antecessum hoc tantum narro, me jam Exegeſi seu *Prophetia Scripturæ* (quam

S. Petrus vocat) plus quingenta folia explevisse, ea ipsa Clave ad aperienda ejus mysteria usum, quam idem Apostolus nobis reliquit, vix tamen à quoquam adhuc intellectam. Prophetæ scilicet præter mandata de credendis & faciendis (quæ Isai. 45. *Justitia & Recta*, Johan. 16. *Omnis veritas* dicuntur) & an *Secreta* seu *Ventura* (Amos 3. 7.) five Christi & Ecclesiæ passiones ac glorias cum singulorum temporibus exquisiverunt & scrutati sunt, & à Christi spiritu sibi revelatas nobis ministrarunt (1 Pet. 1. 10, 11.) & dies istos annunciarunt tempora refrigerii & restitutionis omnium; five adventum Christi antecessuros (Act. 3. 20, 21, 24.) ut scrutando Scripturas scire possemus, quæ primi temporis seu diluculi passiones & gloriæ, quæ medii diei passio seu tribulatio magna à multis Pseudochristis & ab uno Antichristo sine ulla externæ gloriæ parte, quæ horæ novissimæ (postquam tempus non crit amplius) præſenti seculo veniente Patre futuri seculi (Apoc. 10. 7. Isai. 9. 6. Heb. 2. 5, 8.) sine ulla passione gloriæ futuræ essent. Ista trium temporum unius diei 12 horarum sicut & triduanæ mortis Ecclesiæ, vel 40 horarum eventa, comparatis inter se Scripturarum locis lucidissimè exposui: quæ ut minori negotio intelligi queant, omnemque altercandi occasionem omnibus præcidat, quatuor libellos, istis indicibus seu titulis jam confectos habeo.

1. Fons sapientiæ intento digito monstratus, hoc est, Eclogæ ex S. Scriptura & Sanctis Patribus de S. Scripturæ studio, ejusque studii necessitate, utilitate adjumentis & temporibus.

2. Clavis Scientiæ ad aperienda regni cælorum mysteria propediem consummanda, hoc est, specimen Exegeſeos Prophetica in Psal. 45.

3. Annunciatio regni Christi ac populi Christiani in orbem terræ futurum usque ad novissimum annorum & expeditionem Gog & interneconem ejus.

4. Systema artis Prophetandi, continens ejus artis finem, officia, materiam subjectam & instrumenta, exemplo Galeni in Systemate artis Medicæ.

Vix autem sperare audeo, fore ut quicquam istorum in Italia edendi venia mihi detur, non quod quicquam in eis vel decretis Romanæ Ecclesiæ de fide, vel bonis moribus adverſetur, sed quod mores Curia Romanæ omnes Ecclesiæ leges jam olim in potestatem suam perduxerint, nec jam cuiquam fas sit quicquam tale dicere aut

scribere, quale ipsi Pontifices in D. Bernardo, Brigitta & Catharina Senensi non modo verè rectèque dictum facti sunt, sed etiam pro saluberrimo fidelium dogmate religiosè observari voluerunt; quicquid autem hujus edi contigerit, ad te quamprimum curabitur perferendum, cujus ego me discipulum perhiberi minime erubescam, quæque à me proficiuntur, ea iudicio tuo stare aut cadere facile patiar. Deus te, Vir Clariss. publico Literarum bono diu vitalem servet ac prosperet.

Patau. ad diem 20. Febr. 1642.

CCCXXXV.

S. P.

Clarissime & Doctissime Vir, Collega & amice
conjunctissime,

EXpectavi tempus quo prodiret meus Apologeticus, ut gratias tibi agerem pro elegantissima & amica Epistola tua, simulque ad nonnulla responderem quorum in ea memineras. Videbis Libellum meum non in D. Grotium sed in illius votum, quod à te perlectum non dubito. In quo certe ipse quasi D. Grotium, nec talem inveni qualem olim & non ita pridem existimavi. Quis enim ab eo tantum virulentia, & tam odiosas digressiones expectasset? Coegit me ut veritatem & innocentiam tuerer, acrius aliquanto quam voluissim ei respondere, spero tamen te ipsum judicaturum, neque me modestia & gravitatis munere & ætate mea dignæ limites transgressum fuisse, nec potuisse aliter agere quam feci, nisi nostram causam prodere volluissim. Quod spectat Suevum illum, nihil mihi est cum illo commune, cujus ab initio culpavi petulantiam, nec dissimulavi in Epistola quam à me extorsit ejus importunitas, cum mihi plane ignotus esset, quantum à candore & modestia recessisset. Cum autem abusus sit particula meæ Epistolæ in sua illa investiva, non potui etiam quin lectorem meum moneam quantum illius agendi modum improbarem. De cætero libenter submitto scriptum hoc meum iudicio tuo, postquam collatione cum adversario scripto facta, utrumque expenderis. Mihi audiustertius ad D. Corselium folium unum operis Blondeliani cum duabus Epistolis ad te & eum scriptis; spero te accepisse. Aliud folium miseram antea ad

Blavium, à quo nondum accepi responsum. Hæc duo folia multa habent notatu digna, circa potestatem ordinationis, in quibus etiam nonnihil habet de Novato, Ilchyra, Zachæo, contra sententiam D. Grotii. Amicus noster nobiliss. Salmasius, expectabat partum uxoris propinquum, ut ad nos rediret. Nunc existimo omne impedimentum fore sublatum, postquam Cardinalis eminentiss. fuit; nihilque amplius eum remoraturum. Accepit per diligentiam filii tui, qui ei descripsit Florentiæ, exemplar Expeditionis in Alanos per Arianum, in quo dicit se mira habere de Militia Romana, & quæ ad eam spectant. Ab eadem opera expectare Urbicum, ut opus Principi nostro promissum, his adjumentis instructus possit absolvere. Ejus Hellenisticus nunc, post absolutum meum Apologeticum, diligentius procedat. Significaveram Ampliss. Saravio, quæ in literis à me tuis, de eo habebantur. Ille quanti te, & tua omnia faciat, non posse se verbis exprimere dicit. Expectaturum reditum filii tui, ut illum rursus amplectatur, & ab eo audiat quantos ex Italia thesauros sit allaturus. Interim semper urget apud me, ut te inducam ad ea promenda quæ habes de Antiquitatibus Ecclesiasticis. Si quid ad Blondellum rescribere velis, meam offero operam, in literis tuis curandis, ejusque & meo nomine à te peto, ut opus illud Typographo subinde commendes, & ut emendatè prodeat hortoris. Princeps noster affligit chiragra & podagra, quæ curis hodierni temporis addita, eum macerant, reipublicæ tamen huic, etiam ad multos annos, necessarium. Deus eum nobis servabit, quem tuis omnibus faventem & propitium precor. Vale, Vir amicissime.

*Hage-Comitis,
x. Kal. Febr.
finiente anno
c1642c XLII.*

Tibi addictissimus

& ad omnia officia

paratissimus,

Andreas Rivetus.

CCCXXXVI.

CCCXXXVI.

Præstantissime & Clarissime Vir,

Cumulatè me beasses vel solis Literis tuis, ex quibus & valere te & nostri memorem adhuc esse percepi. Non enim celare debeo quanta & in felicitatis & in gloriæ parte ponam à tali Viro amari. Jam verò adjunctum munus, quibus verbis prædicabo? Istum primo Maimonidis tractatum, Latine redditum, notisque eruditissimis illustratum à tanto tanti Patris Filio, Dionysio Vossio. Quam stupendi ingenii & industriæ Juvener? qui antequam eo ætatis pervenerat, quo qui bonas Literas vel primoribus labiis delibaverint, satis properasse videantur, totam absolverat *ἡ γυμνασιαρχία*, nec quicquam quod hominibus scire datum, intactum reliquerat. Quam illi ex voto cessasse videatur, qui tam sciendi avidus fuit, quod nobis minime, ut præmature è terris, in quibusdum peregrinamur, qui plurimum norunt, ex parte tantum sciunt, in cœlestem patriam transferretur, ubi & scientia & beatitudine *ἰσχυροί* fieret. Huic annexum mirandum illud opus tuum de falsâ Nationum Religione, humanæque mentis ex natura ascensu ad Deum, quo & filii *μαργεῖται* & tuæ simul gloriæ magis quam Mausoleo vel superba Pyramidis mole extructa consuluisti, & quam pene supra humanæ naturæ terminos ipse scientiæ gloria ascenderis, ostendisti: Opus (ut illa C. Plinii de Avunculi sui Hist. Nat. cui merito debeantur adscribam) diffusum, eruditum, nec minus varium, quam ipsa natura; quo cum omnes studiosos tibi mirum in modum devinctos reddideris, tum me, singulari præ cæteris beneficio devinctissimum, cui per tot annos à literis & libris politionibus exulanti, in hoc uno Bibliothecam instructissimam aperuisti, ut nulla sit alia volumina conquirendi necessitas. Quin & ne vel hic Thesaurus ullo, qui nullo contra carus fuisset, mihi pretio redimendus esset, munere tuo cavisti. Dum igitur donum & donantis simul affectum perpendo, quas tibi gratias debeam scio, quas referam nescio. Tibi vero, utriusque beneficii *Ἀυτῶν ἐν μεγάλῳ ἀντίθετον ἔστιν ἀμοιβή.* Quod ad studia nostra, magis turbata sunt, quam ut aliquam eorum rationem tibi reddam. Nescio an plantis Arabicis faveat Cœli nostri temperies. Quod si Deus otium & vitam concesserit, dabo forsân operam, ut lucem videant, vel Editio in saltē parentur, libri sex am-

plissimi Viri Hugonis Grotii de Veritate Religionis Christianæ in Linguam Arabicam versi: uti & Catechismus brevior, & Articuli Ecclesiæ nostræ. Certe quam maxime è re Christianorum in partibus Orientalibus, crassissimis ignorantiae tenebris miserè demerforum, esset, ut hujusmodi libri illis communicarentur, unde quid credere se profiterentur, haurire & ipsi possent, & alios docere. Aliis, è contra, si qua operæ pretium viderentur, è Lingua Arabica in Latinum sermonem transferendis manum admove non pigebit, si à te discere liceat, quo præcipue modo, studiis nostris vel Arabicis vel Rabbinicis Respublica literaria, vel tantillum, juvari poterit. Vale, summe Vir, & favere perge

Oxon. è C.C.C.
VI. Id. Aprilis,
1642.

Sincere atque ex animo

Te colenti,

Edwardo Pococke.

CCCXXXVII.

Clarissime Domine,

EX diserto Vossianæ Familiæ penu, ô quantum librorum accepimus, quinque numero Volumina, pondere Bibliothecam: spectantibus deauratam, inspectantibus auream! Longè fecundiorē te Jove Ethnico celebramus, Minervæ non solum Patrem, sed Avum; dum & libros in lucem edis, & patrizantem in libris conscribendis Filium. Cerebri ac spinæ medullam vel hinc cernimus continuam, quod ex vase utroque sobolem germanam suscepisti; ex altero scientiam, ex altero tam scientem. Filius ille tuus Dionysius, priusquam fato concessit, tibi fatum enixus est, cui concedat fatum. Maimonidem bis ille fidissimus transtulit, verbo & sensu; novi Idiomatis Januæ clavim aptando Commentarii. Postquam ipsum Deus in vitam beatiorē transtulit, huc etiam transtulisti Monumentum ejus in vitam Musarum. Verum quod vivet in scriniis nostris, ac multo pollice versabitur, illud minimum est. Nam ex Musis Oxoniensibus, quas ille non solum scriptionis auxit beneficio, sed Inscriptio- nis titulo decoravit, unā cum aternitate honorem & amplexus reportabit. Indignum esset liberalibus ingeniis sub eodem quo ingressa Frontispicio non posse regredi charitatem, omniaque honoris vestigia nos adversum spectare at nulla retrorsum; vivet itaque tam in pectore quam in oculis;

lis; aliorum scripta legemus, judicabimus; illius diligemus, efferemus laudibus. Talia si meruit Filius, quod Seminarium doctrinæ rigavit ingenii flumine, quid meruisti Pater, qui exundasti in universum Cleri Anglicani hortum? Nam in fronte quatuor tuorum voluminum inscriptionem præfigis, Clero Anglicano; amplam quidem, sed inscriptionum præstantiæ angustam. Libros ab omnibus legi dignos, ornare si velles justæ mensuræ titulo, non Literarum genti, sed omnium gentium Literatis dicere debuisses. Verum hac in re singularem tuam agnoscimus dilectionem. Cum enim unicus tu extraneorum omnium præter unum alterum ab orbe toto selectus fueris, & in primariæ nostratis Ecclesiæ sodalitiū adoptatus, mutui honoris ergo, confratribus huc in gremium illud thesauri conjicis, quod lati orbis fructu debetur. Nemo in toga nostra perflare jam potest indoctus, nisi perftet etiam inhumanus, ac ea nolit perlegere quæ ad ipsum humane mittuntur. Nam ex promptuario tuo haurire datur omne genus Eruditionis, Artēs, Historiam, Philosophiam, Theologiam. Dum in isto quem vocas Gentilis Theologiæ & Christianæ Physices conflictu, Dei speculationem è creaturis eruere proponis, à naturæ cultu Idololatriæ vindicare, secernere, elevare, disponere, prima facie promittis non solum veram scientiam mundi, sed mundum scientiæ. Elaborata hæc mysteria suspicemus vehementius, nisi tuo prodirent nomine: admirationem operis mergit Autoris excellentia; in sylva quercum, in Oceano Balzænam non miramur, nec in Vossio magna, quia nihil is profert minus maximis. Proinde cum satis laudet, qui dicit te similem tui, nos reliqua præconia mole gratiarum supplebimus, similia hæc tui incrementa inferemus donorum registro, reponemus cum Sociis in Bodleiana, ubi Classē Vossianam fulgidis protendent foliis, & æmulatione accendent Heroas calami. Custodi te sanum, servet te Deus felicem, nos te fore vivacem curabimus.

E dono nostræ Convocationis,
Maj. 24.
Eximii tuis meritis
charissime devincta,
Oxonienfis Academia.

CCCXXXVIII.

Amplissime, clarissime Vir,

Opportunè admodum advenit hodie ad me D. Ravius, cujus Literas ad me misisti, ut & harum mearum ad te vicissim lator esset. Maximas tibi habeo gratias, quod præclaro munere laborum præclarissimi filii tui *fr. maxeire*, Juvenis longiori vita digni, beare me volueris. Nec dissimulare possum, inter ceteras ejus præclaras doctissimasque Annotationes, vel maxime oblectasse me, quod Servatoris nostri æternam divinitatem fideliter tueatur, eumque Angelum illum fœderis fuisse asserat, qui nomine Jehovah insignitus cum Patribus egit. Vivat nomen ejus inter eruditos, dum Sol & Luna splendebunt. Te autem, Vir doctissime, qui jam orbem nostrum tot luculentis operibus illustrasti, & plura non minoris eruditionis & utilitatis affecta habes, de valetudine conqueri doleo. Opto menti tuæ, vegetæ adhuc & doctrina onustæ, validum vegetumque corpus, quo quos parturis fœtus eniti fœliciter atque ex animi sententia queas, unde Reipublicæ literariæ splendor novus nascatur. Ravius noster ex Oriente redit Perficæ, ac præsertim Turcicæ Lingux peritissimus, quam promptissime hic cum suo, quem adduxit Arabe Christiano loquentem non sine admiratione audiavi. Gratulor ipsi ac Reipublicæ literariæ quam exinde splendidiorem iri redditum spero. Solpiter labores ejus Deus Optimus Maximus, qui ut & optima tua studia secundet, atque valetudinem tuam firmet, etiam atque etiam rogo.

Datum Lugd. Bat.
25. Martii, 1642.

Reverentiæ tuæ

studiosissimus,

Ludovicus de Dieu.

CCCXXXIX.

Venerande Vir,

Mitto serius quàm voluissē filio tuo salarium utriusque anni, quod non sine difficultate obtinui, præsertim posterioris. Objiciebatur enim non amplius eum Hagæ vacare causis agendis, ideoque causam cessare. Utinam in majoribus ostendere liceat memorem me gratumque esse tuorum beneficiorum, quæ & olim in me

me contulisti, quæque non desinis cumulare indies novis. Nescio certè quibus verbis tibi gratias habeam, non tantum pro tam insigni munere, quod me in ruborem dedit, sed & quod in eo non semel honorificè nominis mei meminisse dignatus es. Monstravit Colvius locum de vitæ termino. Ego omnia à capite ad calcem diligenter perlegam, videborque in ejus lectione à te ipso, ut olim, erudiri, & ab ore docentis pendere. Tu certè cum paucis potes, quod ego cum multis conor. Prohibet brevi Thesaurus insalubrium nostra lingua, cum tabellis aeneis, & versibus D. Catlii, qualis editus est, ac jam quintum Amstelodami edetur Thesaurus salubrium. Munus parum te dignum, ex nomine tamen, & hoc animo tuis rependendum. Decrevi tum vernaculis valedicere, & redire ad magis seria. Quamvis ista tantum habeam pro occupata mentis diverticulis, & quæ nonnihil Bibliothecæ affricent. Miror in responsione mea, te movere Coprianicam vocem. Ego etiam ea usus, sed nullo quenquam lædendi animo. Neque ullam causam offensionis video. Tu perge, Vir reverende, de Republica literaria optime mereri, & me, ut soles, amare, qui sum & ero,

Innumeris meritis tuis

æternum devinctus,

& devotus,

Joh. Beverovicus.

Salutat te D.D. Colvius & Corputius, qui etiam causæ cum Consulari Wittio favit, cum jam nummos astu recepissim. Uxor mea puerperio (quod nonum erit) vicina, tibi, optimæ conjugii, & liberis omnia fausta mecum precatur.

CCCXL.

S. P.

Celeberrime & Clarissime Vir, Collega & Amice observande,

Post repetitas gratias pro munere doctissimarum lucubrationum tuarum, quas mihi nomine tuo dedit amplissimus Dubletius: Reddo nunc *χαλκὰ ἀντὶ χρυσίου* Animadversiones meas in Viri magni An-

notata ad Consultationem G. Cassandri. Quid memoverit ut onus illud susciperem in præfatione videbis, nec spero improbabis agendi modum, nec modestiam desiderabis, quam observare conatus sum, cum mihi res sit cum adversario cujus dignitatem colo, & eruditionem admiror. Sed cum veritas magis nobis esse cordi debeat, quam deferere non possumus oppugnatam ab iis qui ejus assertores esse debuerant, eam, prout debui, & semper observaturus sum, præferam omnibus quæ alias laudanda agnosco in præstantissimis alioquin ingeniis. Nec te judicem & censorem rejiciam, sed potius appellabo, si tibi vacet oculos in hanc lucubratiunculam conjicere. Maresius suas ad appendicem vindicias, commisit Typographo, & qui malè exceptus fuit, vix abstinebit à retaliationē. Audio eminentissimum Cardinalem, præsentē Cardinale Mazarino, graviter increpasse Milletorium & Veronum pro Hæreticis scriptis & concionibus. Videbimus, si Deus vitam prorogaverit, quo tandem istiusmodi conatus perducentur. Opto tibi & tuis omnibus omnia fausta & prospera.

Hagæ-Comitis,
7. April. 1642.

Tuus omni Officio

& Affectu,

Andreas Rivetus.

Filius tuus vidit Salmasium Divioni, eique dedit unum exemplar Annotatorum, quorum habebat quatuor in Italiam deferenda, Salmasius promittit se post Pascha venturum Lutetiam & omnia dispositurum ut redeat ad nos. Absolvit opus suum satis spissum de Lingua Hellenistica, quod brevi ad Typographum missurus est.

CCCXLI.

Clarissime atque eruditissime Vir,

ÆGrè mihi accidit nuper, quod ornatissimus Ravius sine meis ad te literis dimittendus esset; siquidem discessurum se ipso demum discessus momento indicaret. Exinde optimi parentis, jam plus quam octuagenarii valetudo, & alia atque alia sapius mihi, ut forte ad te scribere volui, inopinanti remoram iniecerunt. Quapropter per veterem tuam erga me, quam de novo comprobasti, benevolentiam

volentiam rogo, ne prætermissi Officii culpam velis imputatam affectui erga te meo; quippe quo te pro summis meritis tuis summopere diligo & observo. Inprimis verò, cum tam mirificè me affecerint, certantibus inter se lætitia & mœrore, literarium quod misisti munus, comitesque literæ tuæ. Nam cum tua tuorumque, quàm privatim & publice profiteri vilius fuit, amicitia exultarem, tum præstantissimi filii tui *maximæ* posthumus fœtus me graviter commovit. Non potuit enim non refricari pristinum vulnus, ab immatura ejus morte mihi inflicto, cum præfixum charissimum illud nomen, & extrema, quæ in terris reliquit, cœlestis animi vestigia conspexi. Alias per se nunquam non ob animum versatur ille dies, quo postremum hic adfuit mihi. Nam cum supra ætatem sapuisset semper, tunc quidem tantum cœlestis Sapientiæ spirabant ejus dicta, & quæ communicaret mihi, cogitata atque instituta vitæ, ut jam in cœlitum ordinem transcriptus videretur. Ut autem paulo post vitæ id ipsum meæ, & omnium, qui norant, delictum ereptum intellexi, majus mihi, qui forte tunc iniqua valetudine confictebar, vitæ tædium obrepfit. Nec secus, quam si de proximis unus fuisset, uti vero affectu eram, solatio opus habebam, qui te consolari deberem. Nolo autem redintegrare tibi luctum, præsertim cum defuerim leniendo: sed occasione ita ferente non potui non, quod ubique facio & facturus sum, dum vivam, intimum testari amorem, quo Dyonisium tuum vivum complexus fui, & defuncti memoriam colo. Leve fuit, equidem fateor, quicquid à me potuit in illum proficisci: & quamvis permagna contigerunt aliunde, nihil tamen exultimo fuisse, ut non majora meruerit & virtus & eruditio ejus. Cum itaque amanti nihil jucundius nihilque optatius sit quam redamari, ficuti volupe mihi fuit, ab illo, dum in vivis esset, vicissim diligi: ita gratissimum mihi accidit, vestri etiam amoris erga me testificatione id ipsum approbari. Cui quidem atque humanitati vestræ acceptum fero, quicquid hac parte laudis gratiæ aut lætitiæ mihi accessit; maximasque pro eo, uti & gratissimo dono, gratias ago. Quamprimum, volente Deo, istuc venero, nihil mihi prius erit, quàm ut te salutem, & sincerum animi mei affectum coram quoque tester. Maxime autem beaveris me, si subinde etiam domi meæ conspectu tui, & dulcissimi consortii parte aliqua frui possim. Interim, Celeberrime Vir,

& tibi & lætissimæ conjugi liberisque tuis plurimam salutem dico, atque omnem felicitatem precor; pro me enixurus sedulo, ut amicitiam quæ & olim inita inter nos, & nunc renovata fuit, quibuscunque possum studiis colam. Vale, & amantem tui ama.

*Dabam Lugd.
Bat. xv. April.
c1010c XLII.*

*Clar. tue Totus devinctus,
atque ad omnia officia
paratissimus,*

Jacobus Golius.

CCCXLII.

Maxime Vossi,

Etiam si intra anni decursum nihil ad meas responderis diversis occasionibus scriptas literulas, quibus vel amicos, vel res nostras pietati tuæ à multis jam annis commendare consuevi: tamen solenne meum observaturus Musarum tuarum fores pultare haud desino, etiam atque etiam rogans ne festivissimos obdas pessus meque deinceps habeas pro exclusissimo. Non ita tetricus es, sat scio, tot jam exemplis antehac edoctus. Idpropter pium ac modestum juvenem Georgium Huldericum Wenningium Archipalatium nunc mitto, iturum in Bataviam & Angliam, ut Ecclesiarum statum coram penitus cognoscat & reversus cum prudentia operam suam populo Dei collocet. Is vivæ instar epistolæ res nostras explicabit, siquidem eum audire lubet & vacat. Osiores universalis gratiæ etiamnum scripta nostra sollicitant. Nescio an videris, quæ D. Triglandius in Syntagma meum nuper commentatus sit. Miratus sum viro collibuisse ipsissima Syntagmatis verba exagitare & cum aliorum placitis, imo & Pelagii erroribus confundere, ubi de universali gratia cum Orthodoxa antiquitate & Catholica Ecclesia dissero. Præjudicium causæ nostræ peperit, quam tamen bonis me approbaturum confido. Ubi Dissertationes meæ exegeticæ & apologeticæ ad umbilicum perductæ fuerint, id quod propediem futurum spero, eas censuræ tuæ submittam. Interea gratiæ verbi Dei commendo te, Vir maxime, *maximi*.

*Brem. xx. April. veteris
c1010c XLII.*

Excellentiæ tuæ

Devotissimus,

L. Crocius.

CCCXLIII.

CCCXLIII.

Summo Viro, Gerhardo Joh. Vossio
S. P. D. Joh. Ravius.

EST utique permagni affectus, nec, uti modestia tibi dictavit, minutum, sed quod reapse experior, probum justumque Symbolum, quod ad me destinasti. Qui enim inter meritos de Arte Logica me referre tantus ipse vir aggressus es, quid facis aliud, quam ut nomen meum consecres? Ego autem qui mereri primum volo, & hætenus fui incertus, an aliqua me via sic etiam duxerit, ne prorsus eam à bonis desertus, post tot obtrectatores meos te primum invenio laudatorem: Principem utique & summum Virum, quemque unum non reverear omnibus opponere. Cui si primum placuero, facile bonis probatum me confidam. Ego quoque ut debeo tibi jam à pueritia mea, & Magistrum te mihi publice præstitisti, ut erudis me ac doces quotidie, ita non possum vel hoc ipso non agnoscere beneficium tuum, qui in Arte Logica studium atque operam meam confirmas. Ita enim undique pressus sum calumniis & malevolorum insultibus, ut jam ante annos tres ipsos omnem spem atque animum abiecerim; Quid enim facerem unus adversus tot multos? Quod tam disparibus armis? Loco iniquo? Ubi sola autoritas, nulla ratio placeret. Ubi omnis conatus nixusque, contumacia ipsa virtus sibi exitio erat. Tacui ergo hætenus, & ista equidem lege, ut scilicet tantibus etiam Collegis, ne sententiam ausus fuerim proloqui. Ad pedes abieci ultro, deserui; tantum ut ne fraudi esset veritati patrocinium. Itaque evenit ut quæ conculcanda projecerim, servata sint jam omnia. Utcunque enim demandata mihi Professio Logica, tamen ista evanuit conditio, ne novarem. Dimidium ergo nunc Soræ licet, ut alicubi liceant omnia. Quæ ipsa tamen ex veteri documento intra spem metumque comprehensa sunt. Ego quoque si alter ille perditis rebus mereri potuit gratias, quod de Republica non desperasset, possum ostendere similiter aliquot parvos bonæ indolis ac virtutis igniculos. Et credo utique non aberratum me à favore illorum, in quorum potestate sita apud nos est libertas literarum, si primum audeant ipsi credere. Qui enim istis coloribus depictus sum, quibus male-nominati homines aliaque omnia

obsceni ominis solent, non possum sic mea ultro virtute renidere, nisi magnorum virorum judiciis ante omnia sublevatus. Quapropter, mi Domine, si vel à te, quod longè credo facillimum, vel ab aliis impertrare possis, ut honestè de me sentiant, ut jubeant velint me hanc Philosophiæ ancillulam pudicè ac liberaliter Dominae suæ erudire, absolveres beneficium, & quam mereri volentem habes, benè merentem ipse efficeres. Quanquam non ausim hæc plura à te petere, qui jam satis in me munificus extitisti. Quod scias, omnia mea, ut video, intercepta mihi, hoc munusculo restituisti omnia. Quicquid enim sani bonique est in multis illis, ut libellus titulo promittit, quæ ab aliis Logicis non tradita sint de forma Enunciationum & Syllogismorum simplicium, id omne meum est. Et admiror Nihusii mentem, quare ille veteranus tanta ambitione annixus sit, ut esset inter Philosophos τῶ ἀλλήλων κλέπτης. Præcipue cum etiam juvenis scriinia compilare non reveritus sit. Non me convitiari, ex istis collige. Nunquam Nihusio venisse in mentem de Forma hac enunciandi (*Id, quod est homo, est id, quod est animal.*) nisi post illa quæ anno cō lōc xxxviii. iv. Kal. April. edideram, quæque statim eodem anno Colonia Agrippinæ in Bibliopoliis visa mihi Nobilissimus Conradus Labun, Eques Pomeranus, recens tum à contubernio, ipse homo doctissimus, rescripsit. Non alia afferre eum, quam ex editis odorari potuerit, & ideo illum in multis falli, quia rationem principiorum nondum viderit; quorum ergo præscripta ratio est, hæc dexterrimè tenere; quorum autem occasio se non præbuit, hæc statim corrumpere. Istam à se constitutam formam Enunciandi [aliquid, quod est homo, est aliquid quod est animal] esse quidem apud imperitos, quod interpolat rem domini, apud doctos, judicium. Nihil enim aliud dictum, nihil factum, nisi quod factum. Istam quoque constitutam formam enunciandi à nemine aut inveniri aut asseri potuisse, nisi qui ex suis cunctis principiis eam eduxerit, in quæ ille adhuc impingit. Ex ista forma enunciandi multa sequi infallibiliter, quæ ipsi adhuc non videntur. Quæ de causâ? quia illa pars principii, ex qua derivantur, adhuc latet. Ideoque illum in forma enunciandi & ejus primis principiis parcum, in forma Syllogismi fermè omnem esse. Quæ causâ? Scilicet constituta forma enunciandi, omnes errores in Syllogismis, qui

qui illi debebantur, dissipati erant. Illum tantum Appendicem demonstrationis edidisse à me in fine libri istius promissam, discentibus necessariam, mediocriter doctis superfluum, & à quocunque etiam homine expectatam. Hæc summa duntaxat capita sunt. Taceo modos loquendi, five non evitatos & alias recentes ac meos, five etiam de industria leviter inflexos, reapse *ταυτῆς*. Dolum statim in principio deprehensum habui. Quæ quæso *ἀπορῶν* illa hujus libelli, & præcipuè istarum pollicitationum, de forma enunciandi & Syllogismorum? Sanè ut in Modalibus autor ipse itaque à me laudatus est, qui primus recentiorum ostenderit, ad Prædicatum modos pertinere, ut partem Termini: ita negare non potest, formam enunciandi, ex qua istud fluit, sibi tum ignotam, imo aliam fuisse. Nam qui veram Copulam non habet, veterem autem malam Copulam avellit à Prædicato cujus pars erat, & pro vera copula substituit, ille erravit in tota forma enunciandi, tam in Terminis quam in Terminorum connexionem. Demere enim Termino, & ex parte materiali facere formalem adeoque copulam, est offendere in universum formæ logicæ fundamentum. Totam ergo formam enunciandi immutavit, ut etiam manifestissimum est, minime defendit. Imo, quid in causâ fuit, quod cum anno c10 Idc xxxiii. Horneius illum refelleret ex Copula, ab eo tempore nihil ex Copula, hoc est, ex forma enunciandi responderit. Ego autem sequente statim anno aggressus sum Horneium, & ex vera enunciandi forma, tum à me primum multo studio & pro maximis convitiis reperta, defendi Nihusium. Ita quidem, ut Horneius admittatus sit, quomodo id in mentem venerit, quod aliam Copulam præter consuetam exigere, & alio igitur fundamento, niti cœperim. Unde ipsius hoc pulchrum exstabat consilium, ad Henricum Rhanium J. U. D. & Professore, tum Collegam meum, pro se quidem non malè initum, ut in herbis istas disputationes opprimerent; longè enim alia ex iis principiis sequutura, quàm quæ apparent. Hæc ego tum frequentissimis Collegiis, in Academia florentissima M. DC. studiosorum publicè ac privatim agitare. Undequaque ad omnes Academiâs delapsa, sententia mea, nec in Anglia neque Tubingensibus incognita, locis maxime diffusa. Tabulas producere possum & homines; sed causam videamus, quæ Nihusium confidentem in isto voto

suo reddiderit. Claritas nominis sui, obsecritas mea, aut ætas, juvenis tum xxiv annorum. Quomodo me opportunum vidit ad omnes injurias facile ferendas. Sed istarum rerum quicquid sit, patiar, ut cœpi, & suffecerit mihi conscientia & fructus in publicum. Non enim necesse est, quærere quibus autoribus literæ beatæ ac felices sint, dum sint modo. Et potest ille à Deo missus esse, ut vel autoritate sua adjuvet verum, quod ea sola hætenus pressum est, vel nisi gratus exstiterit, etiam materia nominis mei fiat. Id enim certum est, utcumque ego tacuero, posteritas non tacebit. Dum vestra me judicia nostris Mecænatibus, in has Logicorum, ut putant, calumnias minime otiosis, antiqua fide & bona, quod aiunt, de nota commendarint.

Tu autem, fortunate Senex, ignosce homini sic in tot tantisque negotiis tuis strepenti, & existima hæc talia esse *τῆς ληδῆς Ὀμήρου*, & non tam disertum me à calamitate, quam loquacem factum. Tibi quidem parvum semen verborum ad me, in tantam usque segetem excrevit, ab homine minime Philosopho, quia non sylabas modo, sed ne verba quidem numerare aut appendere cœpi, sed fundere. Non videbor prætexere causam miserabilem, si quemadmodum ad tantum virum hætenus scribere non sim ausus, jam ante nosti. Et profecto video sæpe ineptos homines ambire vestram gratiam, & negotium scribendo faceßere; nec unquam hætenus in me reperi, quod dignum esset tantorum virorum personis. Nunc vestra me benevolentia, ut solet inſperatis fieri in gaudiis, ne temperare quidem permittit, & ex contrariis admodum causis idem fermè novum crimen pecco. Bene sit Hemerodromo, qui me non finire, sed abrumperere jubet. Vale optime, & fratrem & me tibi asserere ac vendicare, si merebimur.

Sora Dan. viii. Id. Maii c10 Idc xiii.

CCCXLIV.

*Reverendo & Incomparabili Viro
Gerhardo Jo. Vossio, Jo. Fredericus
Gronovius S. P. D.*

Reverende & maxime Vir,

Jamdudum argumentum non unarum ad te Literarum habui, cum de aliis rebus tum quod Libros interdum ex Bibliotheca

otheca tua desiderarem, sed quia desideria ista fere momentanea sunt & serum est quod non fit statim, paupertate mea plerumque me involvo. Ad graviores autem scribendi materiam, præterquam quod tibi non valde vacare scio, me quoque tardior efficit, quod in duplici hac professione publice sustinenda privatisque habendis Scholis tantum invenio quod agam quotidie, ut facile alias cogitationes cessatum demittam. Eo autem laboro vitii, ut nihil eorum, ex quibus qualemcumque fructum manare putem debere, negligenter agere possim aut perfunctorie; ita fit ut delassatus in iis quæ revera occupare nos haud erat tanti ad alia meliora osciter & minime sufficiam. Jacent ergo illa quæ multa moliebar, immo festinabam, & jacebunt aliquandiu, dum non nisi fastidiose & ex intervallo tangere licet. Sed tanto credo fient maturiora. De cætero hac quidem solitudo vehementer me delectat. Amamur, colimur, audimur frequenter satis pro numero, qui hic est studiosorum; nemo obtrectat, æmulatur nemo. Itaque nulla de re, quæ animum torqueat solliciti in diem vivimus. Isaacum tuum valere & rem bene gerere spero & cognoscere haveo. Item quid fiat iis, quæ sub prælo habebas. Inclusas rogo ut haud gravatim tradi cures Cl. Freinshemio qui me magna affecit injuria, quod adventum suum in vestram urbem celatum me habuit. Commode enim per ferias Pentecostes ad vos excurrere potuissim & hebdomadem illam, quæ alias magis Bacchanalium quam festi more hic agitur & acta est, siccius saniusque apud vos ponere. Vale Vir maxime & gravissimam Matronam tuam, filium Matthæum & Hufwedelium, nihil grave est, à me saluta.

Daventræ postrid. Eid. Jun. 3 c1o 15c XLII.

Pascalium Grosippum & Polyænum Calauboni desiderabam his diebus; si iis egere paululum potes, rogo ut ad me mittas. Leviter chartæ rejiculæ involuti tradi possunt Tabellario Daventriensi in de Warmerstraet in den Issel in de blinde Man, destinati ad me domi D. Christenii qui te observanter salutat.

CCCXLV.

Clarissimo Viro Gerhardo Jo. Vossio.

Optime, Clarissime, & Amicissime Vir,

Dutius quidem filui, non amoris defectu, sed temporum vitio, hominumque, qui nihil literis, aut amoris nostro concedunt. Hic sanè à literis ortus est, & ab iis artibus, quibus quieti non factiosi, eruditi non ambitiosi sumus, in suo uterque munere occupati, ut bene de omnibus mereamur. Ego certè, quod tu præstas, conari me profiteor & post quadraginta duorum annorum publicas continuasque dissertationes, audienti me juventuti, vocem ingeniumque impendo. Omne quidem sic Scriptorum genus attigi; ausus, amœnitatis causâ, etiam Censorini de die Natali librum explicare: quo deinde argumento, ad curiosam temporum doctrinam, converti stylum, & plurima hætenus non observata, produxi. Cum alios docerem, discere ipse potui, qua ratione tempora omnia, ex tempore computarentur. Specimen aliquod in meo libro, de Bissextis est: qui adjunctam dierum Diorthosin habet. De Circulo Urbaniano nihil jam dico: totus enim editus adhuc non est: nihil de Olympiadicis, quæ limam expectant. Amici de Nundinis jam quoque molesti sunt: quas distuli, ut tabulam prius expenderem Nundinalem, in Gruteri inscriptionibus, Pag. cxxxvi. Torquent me Circuli isti abrupti, & numeri: an ad Lunam referendi? Si quid in te opis est, si quid in amicis, fac juver, gratiamque à me uberem expecta. Theatrum nunc adorno heroicum, sive Elogia Imperatorum Austriacorum, Ducum Burgundiæ, Regum Hispaniæ, sed ex illis utrisque stirpem trahentium; ad alios deinde Principes, exemplo Jovii, (cujus olim Musæum perlustravi) operam translaturus. Jucundum fit, Viris etiam locum Doctis, & Amicis dare. Statui verò & imagines, à meliori manu addere, & his auxiliis opus commendare: quæ si ulli libro, Elogiis certè conveniunt. Ut Scriptionis formam videas, geminum hoc specimen mitto, Albertum inquam, & Fredericum. Burgundiæ Duces unâ Orchestrâ absolvi, mox etiam transmittendos. Exemplaria enim à Typographo quotidie expecto. Sed quid audio? In Aulo Gellio te esse? Laudo consilium. Hic ille scriptor est, quia magnam Anti-

H h

quitatis

quitatis partem noctibus suis illustrat, varius, Latinus, accuratus. Quantum, O Musæ, damnum! Librum viii. intercidisse! Quantum bonum, suppleri posse! Vide etiam an Caput ultimum Libri xx. præfatio operis totius fuerit potius quam conclusio, ut nunc habetur. Pluscula observabam nuper, cum selecta totius voluminis hujus capita publicè explicarem: si tempestivum sit, mittere velim, & meam quoque Symbolam, ut ita dicam conferre. Tu me ama, & ad me scribe; ut intelligam amari me; silentium autem hætenus meum, pro delicto non censeri. Sic nunc toto animo te complector, qui totus,

Lovanii in arce regia iii. Kal. Septemb.
CLO IOC XLII.

Erycius Puteanus.

Hanc utinam aliquando videas, quem admodum Anna Romeria Clarissima Matrona nuper vidit! Det mihi hæc, priusquam moriar, gaudia Bonus Deus. Vale.

Mi Vossi.

Licetne addere? Temporum hominumque vitium, in principio Epistolæ hujus accuso. Sed unus hic potissimum est, totus malus, ac perversus; dives tamen, & instrumentis nequitiae abundè instructus; qui (ô nefas) Epistolas meas, & ad me missas, fraude interciperet, & referare, elegantiam, & ingeniosum facinus putaret. Deprehensus tandem, accusatus, convictus, evadere poenam potuit; adhuc mihi, & amicis meis timendus. Tantum nummi possunt, qui scelere gubernantur. Magis mireris, si narrem omnia. Fecit hic igitur, ut quia amicorum nomina occultanda erant, de Anagramatismo Theoresin scriberem: quæ parata est, ut in lucem veniat, ad te sic quoque transmittenda. Si igitur Raselramium leges, quem notare velim, intelliges. Sed de hoc homine aliàs. Quomodo & literas, sed alieno ingenio, attingat, Viri docti indignentur. Iterum Vale, & me semper ama.

CCCXLVI.

D. G. V. S. P.

Celeberrime Vir, & amice integerrime,

Literas, quas prid. Id. Maii ad me dederas, reversus domum inveni. Iisque avidè perlectis magno perfusus sum gau-

dio; quod non tantum veterem & indelebilem amico licet absenti in me favorem permanere, ex dono literis conjuncto perciperem; sed reipsa quoque ex utriusque filii tui scriptis experirer, tuum in me affectum hæreditario jure in posteros tuos propagari. Ne quid jam de utilitate & fructu dicam, quem multiplicem ex munere literario isto perlentisco, & porro ulteriori Lectione hauriam. Sunt juniores, qui eadem cum filio tuo Dionysio tentarunt, eademque conati fuere. Quis tamen ignorat, quid distent æra Lupinis? Dionysius & *maxgeims* ea præstitit, quæ non facile quis imitetur: cum Maimonidæ verba & phrasin latinissimè & tanta fidelitate expressit, ut consignificationes (liceat ita cum Philosophis audacius loqui) etiam non prætermiserit. Id quam sit arduum in orientalium scriptis occidentali quadam lingua exprimendis norint, qui id sapius aggressi fuere. Præterea nobis omnibus abundè suam probavit *maxgeims*, in doctissimis, quas singulis paragraphis subjecit, notis. Fratris sui vestigia premit filius tuus Isaacus, quod vel sola ad Lectorem præfatio ostendit; adeoque spem facit, fore ut quæ frater ad meliores occupationes se recipiens perficere nequivit, ipse tandem omnibus literatis exhibeat. Quod non parum conducit iter ad Italos Judæos susceptum; quos eruditione præcellere, indicio sunt tot præclara volumina ibidem excusa. Imo quum eò Græci, Syri, Persæ, Arabes se conferre non raro soleant, quid D. Isaaco deerit, quin in isto studio ad eruditionis culmen ascendat? D. O. M. eum faciat reducem; quo parentes gaudio delibutos reddat; nobisque omnibus sua dona impertiatur. Cæterum volui quidem *avridogov* remittere; verum præ avaritia Typographorum nequeo; qui in Orientalibus excudendis remissiores sunt. Attamen, Deo volente, intra menses tres debitum exsolvam. Interea Patrem Jesu Christi veneror, ut tibi tuisque omnia secundet, & una cum lectissima tua, ab uxore mea & eo salvebis qui est

Lugd. Bat. 14. Kal. Maii Anno patriæ salutis, 1642.

Dignitatis vestræ

observantiss. & amantiss.

C. L' Empereur.

CCCXLVII.

CCCXLVII.

Χαῖτε ἐν κυρίῳ.

Clarissime & humanissime Vir, Domine & amice plurimum honorande,

SI vales cum suavissima conjuge & liberis tuis gaudeo. Quum adolescens hic istuc iturus esset, mihi que id significaret; aliquid ad te dandum censui literarum; etsi vix otii mihi ad scribendum satis concedunt labores, quibus vix eram ferundis. Neque dubitabam, quin tibi studium hoc meum qualecunque gratum esset facturum; quippe cujus in me benevolentiam pridem perspexerim. Nec est tamen magnopere quod scribam. De rebus enim nostris hic ipse adolescens te docebit. De vestris certior fieri per vos cupio. Te oro si per occupationes tuas licet, perscribas ad me aliquando, Publii Syri mimos quando filius tuus edet. Mea studia & conatus quod attinet, Valerium Probum de Notis Romanorum ad Janfonium edendum misi, Notas & observationes meas ad eum, optarem ut tu, præstantissime Vir, antequam publicentur, videres & emendares: quo certè nihil mihi hac vice incidere possit gratius. Bibliopolam rogavi, ut tibi meo nomine det exemplum Catalogi Bibliothecæ Medicæ. Pero abs te boni consulas, neque spernas prorsus; etsi industria & diligentia nullam in partem cum vestratibus, rei literariæ proceres, mea conferri possunt. Quæ ratio, quod aliis magnis viris mittere ea non ausus sum. Tu spero, mea qualia qualia sunt, vel mea causa non planè abjicies: quod te rogo, & me de erroribus in notis meis ad Valerium Probum paternè admoneas. Vale & me tui amantissimum contra amare perge.

Dab. ex Arc. Sorana. iii. Id. Maii c13. 1302. xlii.

T. C. ἔν. Ἰω. 55,

Henricus Ernstius.

CCCXLVIII.

*Summo Viro Gerhardo Joh. Vossio
S. P. D. Johannes Ravius.*

Udum mecum delibero, an hoc quidquid est chartarum ad te mittam. Nam ut legas, nec necesse nec volupe est, nisi quod jacturam facias temporis optimasque horas tam male colloques. Ut au-

tem ex iis, tanquam exemplo quodam, judicium eruditionis meæ capias, nulli hominum æque incommodum est, quam mihi, meo enim me indicio instar, soricis proderim. Quapropter, mi Domine, si ulla alia de causa in conspectum tuum venire patior hos fœtus meos, nisi boni animi, & mediocris industriæ, interque continetissimos docendi labores otii reddendi gratia, procul adhuc ab omni virtute me existimato, cujus tamen primordia & mediator quotidie & exerceo. Et ignosces ipse conatui meo, si intellexeris, quam impium sit, altissima pace istaque crudissima simul viridique senectute communis omnium Patris tacere velle beneficium Dei. Quamquam derisus satis fuerim hoc regno, quod de magno Climacterico prædicare multa cupiam, cum apud se moris atque instituti non sit, istos annos observare. Ita ipsi plus æquo ridiculi erant! Mihi non tam annus, quem ipsum nec sibi homo nec ulque adeo naturæ debet, quam Dei gratia ostento erat. Et cum Regnorum mutationes, præsentibus ubique turbas, machinationes aliaque considero, videor mihi gravissimis ex causis ad hanc pietatem excitatus esse. De me ac nomine meo sollicitus non sum; non enim existimo homines nobis, quàm actiones, aut actionum summas bonamque in iis mentem spectanda, &c. Confiteor tamen, gratissimum & mihi fuisse, si aliter gratulari licuisset. autem quam fatale mihi extiterit, ægrotare ad ipsius editionem. Cum enim initium sic satis procederet, & jam morbi vis ingruveret quotidie, ego tamen nollem desistere, pervicit malum. Absolveram nihilominus fermè ultimas laudes Academiæ nostræ. Interea fama malum toto Regno exierat, quemadmodum contra rationem status & privilegia Nobilitatis dixissem. Alii qui speciosius me obruere cogitabant, febri imputare, & quod Soræ non potuerim edere, itaque domi me non fuisse. Eratque tam gravis & acerba prorsus invidia, ut latere debuerim per biennium, donec furor iste poneret. Redit itaque xv. Aprilis, ad quem tentanda erat editio, sed redit simul valetudo; & de vita mea desperant omnes. Itaque cætera non licet ex Schedis ne exscribere, nisi aliqua ultima eaque incomposita. Maturandum tamen erat, quod & tempus idoneum & virum nactus essem, opprimendis penitus calumniis. Quapropter existimabam satius esse, partem, eamque ferè meliorem relinqui, quam deesse bonæ hominum existimationi,

mationi, quam profecto mihi tutiorem esse judico omni alia fortuna. Atque ita de statu nostræ Ecclesiæ, de conditis ubique locis sacris, totisque urbibus & propugnaculis, de modo imprimis tenendæ pacis, de pace ipsa, & aliarum gentium spe atque expectatione anxia, nemo quicquam leget, etiam si dicta sunt omnia & perscripta omnia. Quod quidem cum alii deprehenderint, quia causas nesciunt, vituperabunt. Quamque & plura longè metuerim. Omnino enim & lapsus subinde fui, & oneri cessi, & indulgi mihi, nec semper intendi animum, nonnunquam fatigatus, & tanquam inclinans. Quod quidem in magnis viris opprobrio non est, quibus alia & multa & maxima incumbunt; mihi autem prorsus turpitudini est; quia hoc cum magnis viris non pecco. In quo tamen (vide ingeniosam hominum socordiam!) hoc mihi exco-gitavi ultro solatii, quod quivis non videat immodulata poemata iudex. Et certè agnoscis istius juvenilis exemplum ambitionis, quod melius dicere voluerim, quàm poteram. Itaque nihil amplius affero ad excusationem, quàm bene veterem ignavorum querelam, quod ad meliora sibi omne quondam in juventute præsidium defuerit. Defuit tamen, ut mire video, quamplurimum ab aliis, nec minimum à meipso. Nunc enim vir ista errare incipio, quæ juvenis cum laude poteram. Et vides ubique ista. In illis equidem Commentatiunculis ad Miltiadem, Cæsarem, Livium; proletaria valde sunt, & quorum me statim pœnitet & revera pudet, quamprimum scripsi. Video me voluisse, deprehendo lapsum, sæpe de emendatione cogito, sæpe de non amplius conando. Sed istæ disceptationes meæ tandem in ista stulticia desinunt, quod putem, nomen & gloriam hominis spectari, non ejus fructum in Rempublicam. Sive autem ista *οὐρανὸς* quædam, sive arrogantia ipsa est, confiteor tibi, mi Domine, non licere mihi, quæ sic edam, considerare. Qui enim publicè bis, privatim per tres quatuor horas quotidie doceo, variisque admodum & studiis & ingeniis & profectibus impeditus sum, memoriæ usque adeo infirmæ, ut mea ipsius præcepta logica, stans in cathedra & heri interpretatus, reminisci non possim, valetudine plerumque adversa, & post vexatus undique calumniis, malisque amicis; non possum meliora edere. Et profecto hæc talia pro editis, nec habeo nec agnosco, neque quisquam extraneus facile ac-

cipiet. Tantum pro usu & manu ductione Juventutis sunt, ut jactis quibusdam fundamentis cætera à nobis superstruantur. Ego enim existimo & vos ipsos longè majorem ubique gentium in literas fructum laturos, si alii vobis idoneos Auditores Lectoresque pararent. Occlusis enim initiis ipso itinere capite, quis Viator erit? Itaque existimo tam necessarium esse habere Philoponos, quàm Varrones. Necessarium, inquam, non salutare aut gloriosum. Et hæc est altera pro me scripta defensio, quæ sic iterum parata est, quasi prorsus ea optis sit. Tu autem, maxime Vir, qua per virtutem simul & gloriam in minorum gentium patres modestia & comitate es, fave cœptis atque animo meo, & existima me in literis adorare, potiùs Occidentem quàm Orientem Solem, nec unquam ingratum fore adversus te, istud nostri sæculi, omniumque lumina & oculos accendens, sydus. Deus modo te nostro Hemisphærio diuturnum porro & saluum præstet. V. B.

Sora, Id. Maii,
c1o 10c xlii.

CCCXLIX.

Χαίρων τῷ τῷ διδασκάλῳ τοῦ Χέλφ' Ἰησῶ.

Clariss. & Præstantiss. Vir, Dom. mi & Amice honoratissime.

QUIA constat *ἀνεπισημίας ἢ τῆς αἰ' χαίρων* *δίδας*, non dubitavi Præst. Tuam per ingenii monumenta satis cognitam, hisce literis audacius affari. Mitto quoddam *μυλῆμμα* meum *ἡερολογικόν* nuper editum, idque censuræ tuæ, quoad fieri potest, sub-jicio; quæ quo acrior fuerit, ac rationibus pollentior, hoc futura mihi est gratior, & ad scopum veritatis tuendum, vel contingendum obtinendumq; conducibilior. Non equidem inficior, hoc mihi studium à multis jam annis ita cordi fuisse, ut nec ingenii (si quid in me est) laureolam quaesierim, nec commodis meis servierim. Unica meta fuit Christi Salvatoris nostri gloria & Ecclesiæ decus. Quicquid assēcutus sum, divinæ id acceptum fero gratiæ. Assēcutus autem mihi, si quid videre possum, videor tantum, ut omnium qui alicujus sunt nominis in hoc genere scriptorum, quos legi, calculos ad normam judicii revocare, erroresque singulorum deprehendere possum. Veruntamen ne meo forte

fortè iudicio falsus temere in publicum prodirem, ac mea proferrem immaturius, in animum induxi aliorum hominum doctiorum explorare iudicia, atque audire sententias. Contradicentes nonnullos hæcenus habui; sed auctoritatibus ac opinionibus magis pugnantes, quam certis rationibus. Quumq; animadverterem, magnos quosdam hodie scriptores, velut defatigatos in novis subinde cudendis mundi Epochis, periodum istam pridem à Jos. Scaligero excogitatam amplecti, quippe quæ Cyclos ubique promptos, & in his quoque (si Musis placet) Indictionum Romanarum in annis mundi methodum repræsentet; pertasus ego jampridem vani hujus Pagnii, cœpi tandem de canonibus iudicii Chronologici, & legibus generalis ac veræ mundi Æræ serio cogitare. Has igitur simpliciter breviterque consignatas benevolo Lectori publicè offero, ut, quid in iis iure desideretur amplius, cognoscam, & deinceps vel adjungam vel corrigam; aut, si me id pia fata vetabunt, aliis me doctioribus ac tanto negotio perfungendo dignioribus expolienda relinquam. Libet ex iis unam considerare. Nimirum veram hanc esse regulam, nemo negaverit: Ex Sacræ Scripturæ testimoniis fundamentaliter extrui oportere sacrum hunc Orbis creati computum; sed iis rectè ad rem accommodatis: e. g. Quæritur ad quem mundi annum referenda sit Exodus, seu Quoto M. anno filii Israël ex Ægypto duce Mose migrarint? Non te fugit, quanta hic Chronologistarum sit discrepantia. Judæi quidem in suis parvis Chronicis exprimunt annum mundi 2448. quamvis æræ suæ universali (qua numerant usque ad æram Christianorum annos integros saltem 3760.) minime coherentem. Sed nostrorum Chronologorum hæcenus nemo fuit, quin plures numeraverit annos; donec tandem ante annos 17. (Anno & 25.) prodiit Philip. Lansberg. Gæsanus, qui in sua sacra Chronologia annos 2448½ numerat, quod & Judæos ait agnoscere. Tametsi idem Gæsanus à justis illius anni M. Cyclis procul aberrat, propter reliquarum suæ Chronologiæ partium inconvenientiam. Exinde quæritur, quamdiu in Ægypto commorati sunt filii Israël? Responderet Moses in Ex. 12. v. 40. annos 430. habitasse eos in Ægypto. Hosce jam annos si quis à descensu Patr. Jacobi in Ægyptum velit denumerare, actum egerit cum Gilb. Genebrardo Theologo Parisiensi, cumque Reimaro Urso Dismarfo Mathem. Cæsareo. Neque enim ultra 210. annos

ab illo descensu ad hunc solennem excessum elapsi fuerunt, ut verus calculus arguit. Quum itaque reliqu. 220 anni altius ordiendi sint, quæro unde? Plerique omnes hodie eos petunt à 75 anno ætatis Abrahæ à Charris discedente. Qui sic? quia ibi primum (inquiunt) accepit promissionem seminis. Itan' ergo nulla promissio facta ei ex Ure patria evocato? Nulla (aiunt) nisi terræ quondam hæreditario jure possidendæ. Eho nonne hæc est promissio? Quare ergo terræ hæreditatem pollicebatur, annon ille simul promittebat semen? Et qui semen, nonne & Christum semen illud Benedictionis complectebatur. Hæc nempe statim illa *ἐπαγγελία τῆς διαθήκης εἰς Χριστόν*, de qua Paulus Gal. 3. v. 16. quæ annis 430 ante legem datam facta est, ipso tempore Abrahæ vocati, non ex Harane, sed ex Ure Chald. Gen. 15. v. 7. atque assumpti à regione trans flumen, Josuæ 24. v. 3. priusquam habitaret in Haran sive Charris. Sic enim Vocationem hanc (unam, non geminam) cum verbo promissionis (quæ velut anima est Vocationis) conjunctam describit B. Lucas in Actis 7. v. 2, 3, 4. Et Apostolus ad Hebræos c. 11. v. 8. Per fidem vocatus Abr. auscultavit Deo, abeundo in locum, quem accepturus erat in hæreditatem, & exivit nesciens quo. Jam si per fidem vocatus exiit, utique habuit promissionem, tamquam materiam fidei circa quam sive objectum. In omnibus hisce testimoniis, Vocatio illa & egressio atque obedientia Abrahæ astringitur ad primam ex Ure migrationem; nusquam v. ad discessum ex Haran. Sequitur ergo illos 430. annos *τὸ περιήκοντος ἡδὲ ὅτε Ἰσραὴλ, ἢν περιήκοντες ἐν γῇ Αἰγύπτῳ καὶ ἐν Χαρραν, αὐτοὶ καὶ οἱ πατέρες αὐτῶν* (ut est in Græcis Bibliis) à prima illa vocatione Abra. ex Ure & primum susceptâ inde peregrinatione ordiendos esse; minimè v. quinquennio post, à profectioe ex Haran. Alias forent tunc annis 425. Sic in Lib. Judicum anni Servitutis accommodandi & includendi sunt legitimorum Judicum annis. Item in Historiis Regum Judæ & Israelis magna requiritur diligentia & ἀκρίβεια in collatione annorum Successionis rectè instituenda, ne inter-regna & alia inconvenientia admittantur: qua in re plerique omnes hallucinantur. Sic in multis aliis, de quibus suo loco.

Ante octennium edidi Prodromum quendam Chronologicum de veritate & certitudine Æræ Christianæ, necnon de numero Paschatum Ministeriis Christiani-

Illum

Illum verò ego nollem editum propter plurimas mendas in eo residuas, quas non sine magna molestia tollere ac mea manu corrigere me oportuit in iis exemplariis, quæ amicis hinc inde communicavi. Vix unum mihi restat, idque variè interpolatum, si quæ se occasio det ejus denuo edendi.

Paschata Ministerii Christi numero saltem tria, quorum uni tantum primo Christus solenniter celebrando interfuit, anno Æ. C. 32. ætatis 31. (30. videlicet completo, excurrentibus diebus 110. Cyclis Lunæ 14. Solis 13. Bissextili Juliano 19. Exodico 355. Mundano 967. die 13. Apr. f. 1. A secundo, quod à Judæis peractum est 4. Apr. f. 7. Luna 16. (quum ex Lege debuisset pridie, feriâ 6. celebrari) abfuit, ut patet ex Collatione Textus Joh. 6. & 7. cap. v. 1, 8, 30. anno Æ. C. 33. ætatis 32. annis elapsis 31. & diebus insuper 100.

Tertium denique fatale Pascha, secundum Legem, celebrandum erat die 26. Mart. (quæ fuit Lun. 15. à primâ φάσιν) f. 6. & prid. f. 5. mactandus & comedendus fuerat Agnus Pasch. quod & à Christo discipulisque ejus factum. Verum obstitit traditio veterum, ne scilicet Paschatos celebratio Sabbato ordinario anteferretur, ac favit hac in parte instituto Seniorum, Pontificum & Scribarum, ut nempe Dominum Jesum abolerent ac tollerent ante Festum, Matt. 26. v. 5. Anno Æ. C. 34. ætat. C. 33.

Festum autem illud ἀνθρῳπον, Joh. 5. quod attinet, pro Paschate non habendum esse planè sentio. 1. Quia ἑστὴν quoties Pascha significat, habet præfixum sibi articulum ἡ, qui hic desideratur. Sic distinguitur etiam in Bibliis Græcis, Exod. 23. v. 15. & 16. Item Ex. 34. vers. 18. τὸ ἑστὸν ἀζύμων φυλάξῃ, Festum illud Azymorum observes. At Vers. 22. sic ἡ ἑστὸν ἑβδομάδων ποιήσεις μοι ἀρχὴν ἡμερῶν πνῶν. Et Festum septimanarum feriaberis mihi initium messis triticeæ. Et si enim cum articulo & usurpatur de Festo Tabernaculorum, Joh. 7. manet tamen hæc observatio, ut sine Art. non usurpetur de Fest. Pasch.

2. Quia Evangel. Johannes, qui ultimum scripsit, hoc sibi propositum habuit, teste Irenæo, ut conderet quot Paschata Ministerio Christi tribuenda sint. Jam verò non nisi tria tandem commemorat: I. Joh. 2. vers. 13, &c. Eiusdem præteriti mentio fit Joh. 4. vers. 45. II. Instantis mentio fit, Joh. 6. vers. 4. præsentis aut

præteriti nusquam, nisi implicite, fit mentio, vel potius vestigium extat, Joh. 7. vers. 12. Non enim ad hoc Pascha II. venit Christus, neque Hierosolymam ascendit ante Festum Judæorum Scenopægiæ. Interea loci continet se in Galilæa, nec vult in Judæa versari: quod in ipso culpant & fratres & cognati ejus, Joh. 7. vers. 3, 4, 5. Requirunt Judæi, vers. 11, 12. Occidere eum cogitarant, vers. 25. III. Indicatur Joh. 11. vers. 55. & deinceps sequentibus cap. describitur, nec minus è reliquis Evangelistis.

3. Quia sic ordine sequuntur Festa apud Evangelistam commemorata; Primum ἡ ἑστὴν τὸ πᾶσα τῆς Ἰουδ. Joh. 2. Cujus memoria bis renovatur, Joh. 4. vers. 45. Deinde mox subjungitur, Joh. 5. vers. 1. ἑστὴν ἡ Ἰουδαίων, Festum Judæorum, videlicet illud quod designatur, Exodi 23. vers. 16. Festum Hebdomadum sive Pentecoste. Hinc sequitur Joh. 7. Festum Judæorum ἡ οὐλομένη, de quo Christus, ἰσθὶ ἔγω ἀναβαίνο εἰς τὸ ἑστὸν ταῦτων, q. d. Ego qui non ascendi proximè εἰς τὸ πᾶσα τὸ ἑστὸν τῆς Ἰουδ. (Joh. 6. vers. 4.) ἰσθὶ ἔγω νῦν ἀναβαίνο εἰς τὸ ἑστὸν ταῦτων, idem ego ne nunc quidem ad hoc festum Scenopægiarum ascendo. Et videtur Christus in hoc festum, quod erat complementum cæterorum, ipsius Paschatis festi (à quo abfuerat) honorem hoc pacto usurpatione Articuli, velut de industriâ conferre velle.

4. Quia Christus ipse Luc. 13. vers. 6, 7. trium duntaxat annorum indicinam facit sub parabolâ ficus. Item vers. 32. Ecce (inquit) ejicio dæmonia, & sanationes facio hodie & cras, & tertia die consummabor. Itaque tria tandem fuerunt Christi operantis Paschata, tribus annis incompletis. Nam quod Vinitor, Luc. 13. vers. 8. etiam quartum annum sterili ficui indulgeri postulat, ad subsequens Apostolorum tempus prædicationemque pertinere videtur.

5. Festum istud Joh. 5. non fuisse Pascha, sed potius Pentecosten, probatur autoritate cum veterum, tum recentiorum; ut puta Ignatii, Irenæi, Hieronymi, Epiphani, Chrysostomi, Augustini, Cyrilli, Eusebii, Cassiodori, Orosii, Theophylacti, Petri Lombardi, Guillermi, Bedæ, Hospiniani, Maurolyci, Panvinii, Lucæ Osiandri, Erasmi, Maldonati, Pererii, &c. Denique D. Crameri, qui in Germ. suis Bibl. ad Margin. capitis S. Johan. ascripsit Perfindstfest.

Maldonatus

Maldonatus ex illis Domini verbis. Joh. 4. vers. 35. 'Οὐχ ὑμῖς λέγετε, ὅτι πλεονέκων ἐστὶ, καὶ ὁ θεὸς ἀποκατεστήσει; negat secundum Pascha rectè statui posse; censet enim proverbiale esse dicendi genus Judæis usurpatum de frugibus ferotinis. Nam quoties mense Nisan, vel Ijar, propter anormalam quandam aëris constitutionem, nondum ita maturuissent fruges, ut meti possent, dicebant, superesse adhuc anno vertenti absolvendo menses quatuor, intra quos (aiebant) satis maturescent fruges, & metentur; atque adeo tempus esse expectandum. Hæc Christus ad spiritualem Evangelii segetem, messimque transferens, inquit, ἰδοὺ λέγω ὑμῖν, ἐπὶ τῇ σελήνῃ ὑμῶν, καὶ ἀποκατεστήσει τὰς χόρδας, ὅτι λελούται ἐν σελήνῃ θεοῦ. Instabat nempe messis altera triticea, quo tempore Christus hæc ad discipulos loquebatur, mense Ijar decurrente, ubi peractio primo Paschate, ex Judæo in Galilæam revertens per Samariam transiret (Johan. 4. vers. 3, 4.) ante Festum Pentecostes. Inde ergo paulò post rediit Hierosolymas ad Festum Hebdomadarum, de quo Joh. 5. vers. 1. Videatur etiam Samuel Petitus in Eclogis Chronologicis, c. 12. Et Gerh. Mercator, qui quatuor annos statuit, nihilominus in præfatione suæ Harmoniæ, Tamesti (inquit) veteres omnes, tres tantum annos posuerint. Quæ cum ita sint, relinquitur omnino illud Festum, Johan. 5. minime Pascha fuisse, adeoque tria tantummodo Paschata ministerii numeranda esse.

Sed desino jamjam pluribus tibi negotium facessere legendis, quæ alteri reservabo occasionem, siquidem T. P. suis me vicissim literis beare non dedignabitur. Ἐπὶ τοῦτο ἐν τῇ Χριστῷ ἀναστάντι ἐν νεκρῶν, καὶ ἡμεῖς πρὸς ἀναστήσονται ἐν ἡμέρᾳ ἡμετέᾳ.

Dabam Stralsundi ex Museo meo propriid. Festi Resurrectionis Dominicæ. An. A. C. 1644. a Pass. C. 1608. Estque hic præsens dies 6. Id. seu 8. April. juxta meum computum a rebus conditis 2000676. h. e. anni 5477. & d. 202. Ex his nimirum colligat T. P. quem statuam primum reum conditarum diem. Eum nampe quem Egyptii quondam (teste Plut. in Osiride) ἡγουμένους πρὸ ἐρμῆ, μέλι καὶ σῖτον ἡδίων, ἐπὶ λέγοντες. ΓΑΤΚΥ 'Η 'ΑΛΗΘΕΙΑ.

T. P. & Humanitatis studiosissimus,

Andreas Helvigius R. Sch.

CCCL.

Clarissimo & Celeberrimo Viro Domino
Gerhardo Vossio, Jacobus Gothofredus S.

ET si me dudum in tui amorem pertinax tuum meliores literas juvandi studium, collectaque inde famæ celebritas, quam alii alioquin sæpe merentur, alii habent, pertraxerit, nondum tamen opportuna sese mihi hactenus interpellandi tui occasio obtulisse videbatur: sed commodum nuper accidit, ut cum Reipublicæ nostræ nomine Divionem Legatus issem, in Salmasium nostrum τὸν πάλιν prope Belnam inciderem: Ibi statim, atque inter primores sermones, jucundissima tui memoria habita: deque operibus tuis hactenus præclare editis utriusque judicia concinere; mox & in id convenire Historiæ potissimum Ecclesiasticæ illustrandæ studium tibi, neque alii temere melius deinceps impingendum, eamque gratissimam laborum tuorum summam metamque impofterum esse oportere. Id quod abs te impetratum tam enixe cupio, quam in hoc studi genere ἀμύττω meam subinde oblectare soleo; cujus rei exiguum ad te specimen propediem mittere jam olim constitueram, eamque primum scribendi ad te materiam mihi seposueram. Sed enim cursoriâ hæc prævertere nunc visum in gratiam ornatissimi & doctissimi Viri D. Henrici Alers, ad vos proxime ni fallor recursuri. Ita credas mihi velim, vir clarissime, non temere hospite ullo gratiore multos annos heic usos nos, quàm eo ipso. Ita publicè is hæc morum elegantia, eo animi candore, hisce ingenii dotibus, hic egit, ut proborum primorum quorumvis affectum animamque sibi conciliarit. Uno tantum infelix, quod spes ejus privatas, liberalesque operas eventus aliquà eluserit; Trippii, inquam, egregii cateroquin juvenis, dispar in literas quibus excolendus traditus fuerat, saltem ne inter idiotas haberetur, affectus; eâ re liberioris vitæ studium, custode remoto. Id summatim ad te perferri operæ putavi, ne alioquin alterutrus fama sui diffidio laboraret, vel aliunde causas ejus maligna interpretatio arcefferet, præ illa quam verissime nunc perstrinxi: quæ ubi semel tibi comperta, hac fide mea, explorataque fuerit, ad alios, ubi opus propagandam spero cupioque. Publice enim interest opinari eorum

rum qui ad magna nati sunt, existimationem ad nos pertinere, ne aliqua sui parte unquam per fufurros labascere queat. Rem verò te candoreque tuo dignam feceris, si hæc apud matrem Juvenis propinquosque extuleris: Eademque me tibi devinxeris, si Alerfium, cui ego factum cupio, commendatione tuâ juveris: simul & responso bearis. Interea dum Philostorgium tibi submitto, in amicorum tuorum censum referri cupio. Vale Vir Cl. & Celeber. annos multos.

Dabam Kal. Junii 1642. Genevæ.

CCCLI.

Viro incomparabili Gerardo Johanni Vossio, Samuel Petitus S. P. D.

QUanquam non sim nescius, Vir summe, quam religiose adiri debeas, ne in publica commoda peccetur, tamen mei esse putavi officii, beneficiis tuis in Samuele Sorberium meum è forore nepotem provocatus, testatum tibi facere quantum tibi debeam, vel eo maxime, quod meus Sorberius me à te amari perscripsit, quod cum unice velim, facile mihi persuaderi passus sum: Bea me igitur ^{te} ^{meu} tuo amore, & certus esto te à me omni observantiæ genere coli, meque omnia tua causa velle: certè quicquid imperaveris, à me impetrabis. Vale, Vir maxime.

Nemaugi Nonis Sextilibus anni Dionysiani cdo Idc XLII.

CCCLII.

Clarissimo Viro Ger. Jo. Vossio, J. Rousius S. P. D.

Amplissime Vir, doctissime Amice,

FATO quodam meo fieri videtur, ut cui plus debeam, illi fere minus persolvam. Id cum in aliis vitæ meæ actionibus non semel adverti, tum nusquam magis (quod sciam) quam literis amicorum respondendo, ubi cessator intolerabilis vix unquam ad diem solvo. Causari possem fortasse occupationes, quibus in munere meo fungendo distineor; verum ejusmodi excusationes ut quotidianæ nimis & jejunæ, ita amicitia nostra prorsus indignæ. Ut enim cujusvis generis impedimenta ob-

tendam, leve quidem esset unum vel alterum officiosum vocabulum in Epistolam conjicere, præsertim ad Heroem Ger. Jo. Vossium, qui me toties nec merentem non solum literis tuis humanitate plenissimis provocavit, sed & libris eruditione consummatissima refertis à se compositis iterum atque iterum donavit. Vides, Amplissime Vir, quam tecum agam ingenue, me fisto ipse propriæ negligentia reum, cum non aliud habeam quo me apud te honestè purgem. Literas tuas cum librorum fasciculis, quos mihi, doctissimo Pococko, & Bodleyanæ nostræ dono misisti, accepi, post unum vel alterum mensē quam à te datā, de quibus, ut & aliis reconditæ & stupendæ eruditionis tuæ operibus mihi antea donatis, immortales gratias ago. Illos verò quos Bodleianæ destināras, Reverendissimo D. Procancelario, astantibus Collegiorum præfectis, eaque fere horā quā mihi à Tabellario allati, tuo nomine in manus tradidi. Neque opus sciscitari, quo vultu quove animo ab illis accepti: nempe ut ancile de cælo delapsū, sive ut reliquias sacras certatim contrectant & suspiciunt. Humanitatem & eruditionem Doctoris prædicant, de *Arndtsen* reponendo aliqui cogitant. In hoc autem omnes consentiunt, ut in solenni Ordinum Academicorum conventu, gratia per literas Academiæ nomine (qui honos apud nos maximus) tibi decernantur. Postremò mihi injunctum (quod & alias ipse sponte fecissem) primo quoque tempore locum illis in Armario Bodleiano nobilissimum assignare, nomen verò Cl. Vossii in Registro Magno cum alijs Heroibus in perpetuam rei memoriam inscribere.

Doctissimum filium tuum Isaacum, quem superiori anno cum filio D. Heinsii mihi per literas commendasti nondum vidi. Audio eum cum Legato Christianissimi Regis, (id quod & literis mihi ipse significavit) in Galliam trajecisse. Si in reditu nondum abiecit consilium Oxonium invifendi, dabo operam ut intelligat quanti & quam chara familiæ Vossianæ apud nos memoria. Valemus hic omnes per Dei gratiam amici tui quos Oxonii cognovisti. Reverendissimus Prideauxius Episcopus Vigorniensis, Academiæ Procancelarius, nunc brevi Cathedram Theologicam relicturus; Archiater Claytonus, vir bonus & summe doctus qui de te & honorifice & sentit & loquitur; D. Fellius Professor Margaretæ, cum tu hic esses, nunc verò Ædis Christi Decanus; D. Fruinus Col-

legii

legii Magdalenensis Præses frater tuus, Ecclesiæ Glocestrensis Decanus, & alii qui te officiosissime salutant. Ignoscas clarissime Vir festinanti calamo, dabitur occasio brevi iterum scribendi. Interim vale & habe in numero cultorum tuorum,

Oxon. 17. Kal. Observantissimum Tui,
Jul. 1642. Sr.
Ver.

Jo. Roussium,

Acad. Oxon. Bibliothecar.

CCCLIII.

Clarissime & Præstantissime Vir,

JAM quatuor sunt menses, cum literas ad te dedi, unâ cum Synopsi Systematis mei, quo artem prophetandi, evangelizandi vel prædicandi sum exsecutus. Cum autem tanto tempore nullum à te responsum acceperim, aut meas aut quas rescriptisti intercidisse suspicor. Et quoniam illustrissimus Alexander Syncleticus, domo Cyprius, ex nobilissima Roncasiorum Comitum familia, primarius in hoc Athenæo Antecessor, me certiore fecit, filium suum Aloysium ad nos nunc professionem parare sub Auriaci Principis militia adolescentiæ rudimenta positurum, visum mihi est istam tui literis iterum salutandi occasionem non amittere. Una igitur cum istis accipies priorum exemplum, quodque mihi humanitas sua spondet, nos quamprimum certiores facies, quid animi sit Batavis suis, cum ex te quæ Pierruccius à se expectari jubet cognoverint. Is salutem tibi amoris ac studii plenissime per me nunciat: cujus si familiaris usus tibi contigisset, sat scio, non me quicquam amicitiae magis, quàm veritati, in laudibus ejus prædicandis tribuisse fatereris.

Ego etiamnum hic hæere necesse habeo, mirifice gestiens Alpes transvolare, ut aliquo in loco, ubi libertas æqua sit omnibus, vulgandis lucubrationibus meis vacare possim. Dux Mantuanus pro vetigalibus, quæ ex Monteferrato capere solebam, cum ea ministri ejus plures annos in ærarium ejus intulissent, tandem mihi Feudum Cavadoro (vulgo Cavatorre) cum Marchionis appellatione in Monteferrato transcripsit, ut id cui velim vendendi potestatem habeam. Cessit mihi quoque fundum optimum maximum Goδιο vel Goito finitimum, à flumine Min-

cii ad Veronenses usque fines pertinentem, qui tantum complectitur spatii, ut eum equo vectus non nisi decem horis circuire possit. Solum ejus est uberrimum & rerum omnium præterquam salis & olei feracissimum, quod Marchiones Piscariæ fundi dominos, cum familia centum capitum alere solebat, fuitque postea bene diu Mantuanorum Ducum delicia, cum præsertim venationis, aucupii & piscatus maxima sit ibi commoditas: etsi nunc & pleraque agri Mantuani post diuturnum bellum ibi versatum fundus est satis incultus & sylvestris: quem tamen Pieruccius, qui superiore anno possidere eum nomine meo cœpit, uno triennio affirmat tam fructuose coli posse, ut videatur non minus quatuor Ducatonum millibus annuis redditurus. Sed Marchionatus nihil domino affert emolumenti, adeoque non tam facile oratorem inveniet, nisi quem præter jurisdictionem in subjectos & venationem, cujus multiplex ibi est commoditas, Palatium amplissimum Principe non indignum alliciat, si præsertim æstates in loco satis edito, unde in mare Ligusticum prospectus patet, jucunde exigere gaudeat. Istorum venditione cum pecuniæ aliquantum redegero, non erit, opinor, quod ultra me cis Alpes detineat. Cum quid ejus ex sententia transactum fuerit, egoque de loco, qui senectæ meæ sedes sit, constitutum habuero, curæ mihi erit, ut ne quid rerum mearum diutius ignorem. Te interea, Vir præstantissime, prospere valere beneque rem privatam & publicam gerere opto & auguror.

Patavio ad diem Tui observantiss.
3 Julii 1642.

Gaspar Scioppius.

CCCLIV.

Sisto tibi, maxime Vossi, Academiæ Rostochiensis Oratorem, D. Laurentium Bodocum Polonum, qui Belgicæ vestræ vult eloquentiam suam innotescere. Commendatus fuit D. Bergio, τῷ κυρίῳ ἐν δόξῃ, à D. Jeremia Elborough Pastore Ecclesiæ Hugle-Hamburgenfis; sed, hoc satis functo, literas mihi resignandas exhibuit, ut, me parario, tuas auderet pultare fores. Ad innumera beneficia, quæ tibi debeo, amicorum principi, hoc jam dignare coaddere, ut generosus animus intelligat, preces meas apud te pondus habere.

bere. Inclinare videtur ad partes nostrarum Ecclesiarum. Hortatus sum eum, ne se mancipet partibus, sed verum è solis Scripturis & Orthodoxa eruat Antiquitate. Nos in eodem hæremus luto, & ob amorem pacis & conciliandæ Ecclesiarum concordia domi forisque vapulamur. Præter D. Hug. Grotii, & D. Riveti collationes incidi hisce diebus in ea, quæ D. Revius cum D. Vedelio acius disputat de potestate Magistratus in rebus Ecclesiasticis, & quæ de Adoratione Christi, qua Mediatoris, in Academia Ultrajectina disceptantur. Si hæc non avocabunt vestratum animos à nobis ad sua, quid tandem de nobis omnibus fiet? Theologia gentilis cum commentario in Symbola me cogunt ingratum mori. Nihil enim à me expectari potest, quo tanta munera minima ex parte penssem. Nautæ cuidam nostrati commisi Dissertationes nostras & Declarationem D. Hermannii Hildebrandi, Collegæ mei, ut ad pedes tuos deponat. Siquando vacabit, limis saltem inspice, ut videas quibus de rebus male feriat quidam nobiscum litigent; & sicubi animadvertas me à janua veritatis aberrare, in viam revoces. Vera enim docenti, lubens cedo. Bene vale, virorum & amicorum maxime, & vive quam longissimè Deo, Reipub. tuis, nobis.

Brem. Kal.
Sept. Julianis
1642. cl. loc xlii.

Tui observantissimus,

L. Crocius.

CCCLV.

Salve, Princeps Ingenii ac Doctrinæ
Gerarde Johannes Vossii,

QUEM non suo nomine magis quam hoc elogio compellare debeo, cum primum compellare audeo. Nemini me adulari vel natura patitur, vel conditio adigit: sed Germano more sensuque testor, à te expectari, quæ hoc tempore, inter summa etiam ingenia, à nemine expectantur. Præstitisti enim ea quæ hæcenus nemo præstitit. Singularis Providentia Dei te in curas incomparabiles excitavit: id quod serio existimo, & sæpe pro tua incolumitate vota facio; quippe qui nihil habeam, quod me à veneratione tui abstrahere possit, sicut interdum malignitate sæculi videmus accidere apud eos,

qui nec beneficia cœli æstimare, neque officia humanitatis exercere didicerunt. Esto hoc argumentum ingenuæ simplicitatis, quod cum calamo statim cogitationes animi huic chartæ se infundunt, postquam ascribendi ad te consilium amicissimus noster Freinshemius instauravit apud me confirmavitque. Nam Velleium istum, ad tantum Virum, nisi fors testandæ observantiæ, mittere tanti non putassem. Verum, ut audio, non minor quam eruditio, & humanitas tua, quæ vel venia vel favore meam hanc scriptionem dignabitur, spero. Deus te servet, Vir Illustris.

Scribebam Ar- Illustri tuo nomini dicatissimus,
gentorati 1642.
9. Septemb.

Jo. Henricus Boeclerus.

CCCLVI.

D. G. V. S. P.

Vir Celeberrime,

HARUM exarandarum occasio sese obtulit ex itinere Johannis Ramyghii; Viri sane, si quisquam in isto ordine, longè doctissimi. Quem à multis annis novi familiariter, & quia in literis humanioribus erat versatissimus, favore prosecutus sum. Per plures annos nepoti meo ex affine in ædibus meis præfuit; ibique suam mihi probavit diligentiam, in docendo dexteritatem, probitatem, pietatem ac fidelitatem. Adeoque nihil in ipso desideratur, quod ad perficiendum virum bonum requiritur; vel in eo exoptamus, qui Scholæ alicui præficiendus est. Quocirca cum Conrectorem virum huc vocaverint N. & A. Curatores, hunc de meliori nota tibi commendare non sum veritus: ut qui de ipsius dotibus certus essem. Id certissimè scio, si vestræ Scholæ præficiatur, me optimam initurum gratiam apud omnes, qui me eo quidpiam contulisse noverint. Ipse satis ex colloquio, me nihil favori dare, experieris. Itaque ejus promotioni faveas, peto; ut quandoquidem dignus est, Conrectoris munus nancisci queat. Porro munusculum literarium mitto; in quo an aliquid præstiterim, ex Epistola præfixa cognosces. Quod de Salmasio ibidem scripsi magnam mihi creavit invidiam dicam, an inimicitiam. Quid agas? difficile est placere omnibus. Nosti indolem meam, omnibus placere studeo; imprimis viris probis, doctis ac piis.

piis. Sed coram brevi fortassis plura.
Hic subsisto, tibi ex animo tuisque bene
precatus : atque permaneo

*Lugd. Bat. 13. Jul. Amplitudinis tuæ
An. partæ salutis
1642.*

observantissimus,

Constantinus L'Empereur.

CCCLVII.

Filios meos, Vir Clarissime, ætate quidem impares, studiis vero pares in gymnasium vestrum missurus, tibi eos potissimum commendo, cujus amicitiam uti mihi semper utilem ita & honorificam expertus sum. Quare etsi magnorum tibi beneficiorum debitor sum, hoc tamen pro colophone flagitare audeo, ut in meorum studia digneris inspicere.

Extremum hunc, Vir summe, mihi concede laborem. Quibus Libris opus sit ad audiendas tuas cum fructu Lectiones, quæso indices, & quo pacto se ad eas præparare valeant; uno verbo ut absolvam; methodum ipsis studiorum præscribere, si volueris, spero eos dicto audientes fore, me certe, satis jam devinctum in æternum porro devincies. Hoc meum est consilium ut antequam ad jurisprudentiam accedant humanioribus studiis non perfuntorie imbuantur, præcipue vero in arte oratoria & cognitione historiarum, quæ tibi meritissimo mandata est provincia. Hac in parte, te manu-ductore haud parum præstituros confido, si avum si patruium cogitabunt, neque unquam commissuros ut à literis, quibus familia nostra se in clientelam dedit, dicantur alieni. Vale Virorum & eruditorum decus, & eam qua me semper prosecutus es benevolentiam filiis quoque impertire ne graveris.

*Hagæ Comitæ
xix. Sept. 1642.*

Celebritati nominis

tui addictissimus,

Guilhelmus Grotius.

CCCLVIII.

S. P.

Clarissime & doctissime Vir, collega & amice
conjunctissime,

EX reditu nostri Heilersieg comperi quam benigne & amice cum eo & aliis de me fueris collocutus, & memoriam mei apud alios testatus, quo nomine non solum in hac occasione, sed in aliis multis plurimum tibi debeo. Clariss. & Rever. David Blondellus scripto tibi brevi significavit gratitudinem suam, pro ea opera quam ei impendisti in opere suo commendando D. Blavio, qui ejus Editionem suscepit & specimen ad me misit. Per D. Spanhemium, qui heri nobis adfuit accepi folia quæ ad te mitto, ut ea tradas Typographo aliis jungenda. Quæ reliqua sunt brevi sequentur. Additionem huic Epistolæ conclusam jubebis suo loco reponi, & D. Blavio meis verbis salutem dices, urgebisque ut properet & ad me mittat folia quæ singulis septimanis excudentur, ut ea auctori mittam qui, si quæ menda irrepant, ea notabit. Amici quidam ad me miserunt Epistolam Vigiliæ de quinque capitulis à P. de Marca editam cum sua dissertatione, in qua multum laborat ut Pontificem illum ab inconstantia nota liberet. Mitto ad te unum exemplar ex duobus quæ accepi, quod levidense munus ab animo tibi addictiss. accipies. Saravius Senator qui unum ad me misit de te sentit & loquitur tanquam de Viro hoc nostro seculo eruditissimo & à quo nihil prodit nisi tersum & exactum. Rogat per me ut doctissimas lucubrationes non finas diu doctorum hominum gaudia morari, præsertim quæ ad Antiquitatem Ecclesiasticam pertinent. Expecto novum laborem à D. Grotio, qui examini meo opponit, ut quidem ille ait, postea quieturus, Votum pro pace Ecclesiastica adversus Rivetum & alios irreconciliabiles: Ego, si Deus dederit eum excipiam cum solita modestia & si possim majori. Nosti quo in statu sunt res Sedanenses; Princeps sua ipsius confessione reus intercessione Celsiss. nostri Principis salva vita elabitur, ea tamen lege ut Rex novum præfectum Sedanum mittat cum decem cohortibus, nec loci Domino & ejus familiæ ibidem habitandi potestas fiat. In Religionis negotiis nihil mutabitur. Noster Molinæus paulatim declinans ex morbo continuo eo adspirat ubi

nulla mutatio. Constitui Deo dante ad vos excurrere, sed hucusque impedimenta mihi fuerunt obiecta, etiamnunc expectanda mihi est D. Spanhemii inauguratio; postquam, si Deus dederit, te & tuos ibi sum salutaturus & cum Typographo acturus. D. Salmasius serio promittit se ad nos venturum ante hyemem. Misit ad Elzevirios librum de Græca Lingua & ejus variis Dialectis & de Hellenistica. Bisterfeldius adhuc detinetur à Principe Transilvano nec spes est eum facile inde iri ereptum. De alio erit cogitandum. Rogo ut occasione data certior me facias te hunc fasciculum accepisse & in eo contenta. Salveasque interim & semper à me & à mea cum Domina Coniuge & Liberis tuis, inter quos gratulor D. Matthæo, quod re ipsa aliquid pro eo fuerit præstitum, ut deinceps alacrius operi insistat. Deus tibi alterum reducem sistat auctum omni eruditionis genere sanum & sospitem.

Hagæ-Comitis Tuus omni officio & affectu,
3. Octob. 1642.

Andreas Rivetus.

CCCLIX.

Clarissime & præstantissime Vir,

NON dici potest, quam grata mihi fuerint literæ tuæ, quas Creutchio & Freinshemio ad me perferendas tradidisti. Et cum in iisdem plenissime referas, quæ semper fuerit ac etiamnum sit animi tui in me & filios propensio, vix ac ne vix quidem lucis hujus usura dignus existimarer, nisi eandem summo observantia cultu prosequendam mihi judicarem; potissimum verò hoc nomine, quod & filium Benedictum in Galliam proficiscentem salutaribus monitis & exemplis instructum dimiseris, & filio tuo Isaaco sine dubio suasor & autor exstiteris, ut in præfatione sua R. Moïsis Maimonidæ de Idololatria libro apposita & mei & filiorum mentionem faceret præclarissimam, ipsæque promittas, te præclariora tuæ in nos omnes voluntatis in posterum & ad omnem posteritatis memoriam spectantia editurum documenta. Quibus quidem officiorum generibus te nobis vehementer devincies, ut omni tempore parati simus & de te tuisque bene sentire, & optime mereri. Freinshemius cum præter literas meas evocatorias, commendatione testimonioque

tuo instructus ad nos ante perpaucos menses venerit, talemque se in omnium conspectu 25. die præterlapsi mens. Aug. exhibuerit, qualem monumenta ejus in publicam lucem antehac emissa eum declararunt, ingenio scilicet acerrimo & omni eruditionis genere refertissimo, non dubitabis, quin eundem singulari amore sumus complexuri. Imò verò cum tot in eo conspiciantur multiplicis scientiæ ornamenta, vere profiteri possum, Academiam Upsaliensem adventus illius felicitate mirifice recreatam. Et cum iis dotibus jam sit cumulatus, ut multorum in re literaria tenuitati & ariditati facile possit consulere, procurabimus, Deo juvante, ne eum protectionis in Sueciam susceptæ poëniteat. Quantum tibi debere cupiat filius Jacobus, literis ad te datis ostendet. Benedictus, quem Deus præpotens hesternæ luce salvum & incolumem nobis omnibus restituit, & felicissima quaque domui tuæ & tibi longissimum diuturnioris vitæ curriculum comprecatur. Vale omnium literatorum decus singulare.

Fenecopiâ Australium Gothorum 4. Oct.
Anno 1642.

Tibi tuisque & obligatiss.

& addictissimus,

Johannes Skytte.

CCCLX.

Clarissime & eruditissime Vir,

ISaacus filius tuus juvenis virtutis spectata, & supra ætatem probitatis antiquæ Italiam perlustrans animi & studiorum causa, me Lucam humanissime adivit. Thyrsus voluptatis decumanæ meum pectus percussit admirantis, susipientis indolem tantam. Tibi gratulor, mihi gaudeo, te tanto filio, me tantâ lætitiâ auctum, tui ipsius vivam imaginem in eo intuentem, quem tibi deprecor incolumem superstitemque ad annos Nestoreos. Hospitalitatis nostræ mutuam tesseram literariam agnovit, quam in Cimeliarchio sacrariove servo. Mea illi antiqua vota indicavi de recudenda Polymachia, & Amaltheâ etiam aucta emendataque. Pararium mihi ascivi in meis schediis interpolandis, si per te liceat, postliminio patriæ restitutum. Interim quæ obsequii in eum signa præ me tuli, eadem tu in me candidioris animi argumenta agnosce; & ignosce, si meritis vestris paria facere per meas opes non licuit.

licuit. Et quia meæ nugæ canoræ tantam lucem literatorum ferre nequeunt, calculum, oro, suspende, clientem patronus defende, & quid Critici sentiant de Amalthea, veluti Jovis suffragium, tuam opperior Crisim. Deus te, tuaque fortunet æternum.

Lucæ. Kal. Nov.
c1o Idc XLII.

Tibi addictissimus,

Josephus Laurentius.

Responsione si me dignabere, eam Gulielmo Bartilotto per Lucam Donatum ad Balthassarem de Judicibus Bibliopolam Lucensem curabis tradendam quàm primum.

CCCLXI.

S. P.

NAutæ culpa, Vir maxime & amicissime, dissertationum mearum sarcina, perditis duobus fasciculis, unâ cum adiunctis Literis, huc rediit. Excussus enim fatetur, se ædes D. Cabeliavii, ad quas sarcinam amicis Leidensibus & Hagienfibus destinatam deponere iussus erat, invenire non potuisse. Quippe quas mutaverat, me inscio, cui notum eum non procul à nobilissimo Domino Grootehusen habitare. Inde factum ut cum indignatione repetierit, navique suæ reddiderit. Id scire te volui, ne fides D. Cabeliavii, communis amici nostri, fieret suspecta. Doleo autem vehementer, quod Dissertationes illæ meæ neque vobis neque aliis amicis fuerint exhibitæ. Mitigassent forsan iram quorundam fratrum, qui utramque Synodum Hollandicam iterum concitarunt, ut tum ad Magistratum, tum ad Ministerium hujus loci de periculis doctrina de Universali gratia à nobis asserta veritati & Ecclesiæ Christianæ imminetibus denuo scripserint, quamvis stylo paulo leniore, quam anno 1641. nisi quod jam etiam deputatos Synodicos reliquarum provinciarum in consensum adversum nos attraxerint. Idem queritur etiam extra Provincias Belgicas in Helvetia, Galliis & alibi, ex consilio D. Altingii, qui pro Opinionibus Piscatoris, præceptoris olim sui, tanquam pro aris & focis pugnare videtur. Quid tandem de nobis fiet? An hæc doctrina tantopere in Belgio fœtet? An Ecclesia Christi ministros Belgas

deinceps habebit perpetuos Censores & fidei Dictatores? D. Spanhemium, novellum Leidenfium Theologum audimus rigorem Allobrogicum in prælectionibus suis ad Vaticinia V. T. de Christo strenuè inculcare. Sic gratiam, pacem & misericordiam, imo reditum in patriam speramus & ambimus? O miseriam! Ignosces, Vir candidissime, dolore meo & favore tuo me meosque constanter complexaris. Duo mihi filii sunt sacræ Theologiæ destinati, quos Philologiæ causa vellem aliquantisper in Belgio vestro pedem figere, quippe quod hac parte excellit, si patronos inibidem invenirent, qui pædagogias commodas eis ad minuendum sumptus procurarent. Pietatem ac Modestiam spondeo. Consilium verò tuum hac in re obnoxie peto. Alter in Hebræis, Chaldæis & Syris mediocriter exercitatus est, & jam attingit Arabicas literas. Alter, præter Philosophiam, Græcas, Latinas & Hebræas Literas, *διολογέματα* tractat. Si quid in me vicissim superest, quod Excellentia tuæ gratum sit, id tam paratum tibi, quam paratissimum credat. Calamum sisto. Bene vale, Vir excellentissime, & salve *παιωνί*.

Brem. $\frac{2}{12}$. Jan. c1o Idc XLIII. Quem cum pluribus subsequeturis vobis prosperum decurrere animatus precor.

Excellentia tuæ devotissimus,

L. Crocius.

CCCLXII.

Joacimus Matt. J. C. fil.

S. P. D.

SAlve & tu mihi tandem aliquando, Optime & maxime Virorum, Vossi, jamdudum honorate, sed nondum salutate. Aliis enim hætenus eam concessi felicitatem, ut si non coram, saltem per literas tecum colloquerentur, & virtutem inde suam, atque eruditionem augerent. Ego tanto Viro negotium faceßere, & meliores aliquot ipsi horas perdere nolui. Ac sic perrexissem, nisi admodum nuper Gothofridus noster Cretsmarus Juvenis elegantis Ingehii, nec proletariæ Eruditionis, ex Gallia redux, quam è Belgio adierat, inter alia à me rogatus mihi tuam erga Germanos meos Humanitatem, quæ

que tibi proprius perhibetur, Candorem oppidò prædicasset. Forſitan & ille tibi, quem abſens colit, veneratur, æſtimat, nondum excidit, ſed locum adhuc obtinet tuos inter cultores non poſtremum. Ejusmodi inter nos ſermone habito, occaſione ſcribendi inſuper à probo & modoſto Viro Juveni Joanne Selfſchio Germ. cujus opera his in locis Janſonius veſter in vendundis Libris uſus eſt, oblata, diutius infelix eſſe nolui. Venio igitur ad te literatorum hodie Dictator, levidenſi aliquò munere (ſine eo enim accedere, religioni mihi duxi) quod ut benevole accipias etiam contendo à te. Etiamque tædet alloqui mei quo olim Danorum Regem ſapientem & comem honoravi, exemplum offerendum eſſe tam comto Capiti in viliori Charta, cum reliqua omnia quæ nitebant, jamdudum diſtributa ſint; ſed tu animum offerentis trutinabis, non ſcripti veſtem. Quod ſi hac ratione tibi, Vir clariffime, filiſque tuis doctiſſimis innoſcere potis eſſem, ſicuti jam *H. Grotio* *D. Heinfio*, *Aug. Bucknero* immortalibus undiquaque nominibus innotui, horam profeſſo qua has ad te exaravi, ponerem inter feliciffimas. Sæpe quidem optavi illam mihi diem illuſcere, quâ mundi ocellum Amſtelodamum adire, teque in eo miraculum convenire poſſem; verùm cum res meæ miſerrima illa bellorum continuatione incredibilem in modum attrita ſint, hætenus me fruſtra illud optare animadverti. Si autem Deus mihi per te aliquem illic loci Mecænatem impoſterum excitaret, grato animo beneficium ac ſtudio illud agnoſcerem, & perpetuis laudibus proſequerer. Priuſquam has literas finiam, tibi Philologo excellentiſſimo, aliquod pro bellariis ex penu literario apponi Problema, non ſpero moleſtum futurum. Hoſpes meus Simon Paul. Anatom. & Botan. Prof. hæc in Acad. ſolertiſſimus, nuper ex Epistoſta Hippocratis ad S. P. Q. Abderitanum ΠΑΒΑΟΤ ΑΝΑΛΗΨΙΝ deprompſit ac ſeſe nondum à quopiam Criticorum, quid ſibi ipſa veller, edoceri potuiſſe, cum ne quidem P. Caſtellanus Medicus doctiſſ. in Syntagmate de Feſtis Græcorum quicquam de illo Feſto ſibi lectum ſcriptitet. Cum mihi pro ea, quæ cum Viro illo optimo intercedit familiaritate, poteſtas fieret de hoc loco meum exponendi, Literatorum infimi, judicium, diligenter expoſito loco, adverti eum talem eſſe, qui citra ullum detrimentum ignorari poſſit. Et facile conceſſerim neminem illorum quos ille de Hip-

pocratici loci intellectu percontatus eſt, rationem reddere potuiſſe: cum mea ſententia privata illa fuerit ſolemnitas quæ ipſo Hippocratis tempore vix pluribus in Græcia, quam Cois Civibus nota fuerit, ab iſſque peculiarem ob cauſam celebrata. Quod enim ſi aliquem Italum aut Gallum, imo, ex ipſa hac Siolandia aliquot miliaribus Hafnia remotum hoſpitem ad *Χωαζιά* Amakeranam, quæ plurimum quotannis in vico ad unum miliare hinc diſtante in Bacchanaliorum ſtultitia peragitur, invitarem, an conjiceret quid rei indicato in loco peragendum ſpectandumque eſſet. Suspenditur ab Agricolis, quos è Belgio huc viciniæ olim commigraſſe aiunt (nomen enim Belgarum hodieque retinent) ad funiculum aſcer, cui collum ſebo & ſmegmate quam poteſt fieri pinguiſſime inungitur. Illic incitatis equis periculum faciunt ruricolæ, an pedibus ſuſpenſæ avis collum curſu illo veloci apprehendentes poſſunt avellere, quod cum ob glabram illam, Nervis, Oſſibus, Cureque firmiter concretam cervicem, plerumque fruſtra ab iſſ tentetur, equiti illi pro epinicio riſum pro aſcerino capite avulſo, probe adipe illitas manus deportant. Si tu Vir. Clar. aliqua de VIRGÆ iſtius aſſumptione ejuſque feſto nos pro immenſa tua lectionis & antiquitatis notitia docere poteris erit illud longe nobis gratiſſimum. Vale, Vir candide, & adſuturum cum illo qui has adferet Joachimum de cætero tuum futurum Epistoſtio aliquo exhilara. Ego hocce meum obſidem impoſterum obſervantiæ cultuſque in te mei ſiſto.

Scrib. Hafn. xvii. Calen. Janu. ann. ſerv. humano generi dati CLO IOC XLIII.

CCCLXIII.

Clariffime & celeberrime Vir,

REddidit mihi ampliff. Dubletius munus tuum auro mihi carius, nodos te vindice digniſſimos. Ego pro ratione temporis celeriter percurri pleraque, eadem poſtea cum otio expenſurus: ſed tamen ex ea lectione agnoſco me multa didiciſſe, vel quæ neſciebam, vel quæ non ita accuratè noveram. Methodus qua uſus es exacta & facilis Lectorem allicit, perſpicuitas ubique elucet, variorum autorum opiniones exactè ad trutinam revocantur, & quæ maxime probari debeant, ita aſſeruntur & confirmantur, ut nihil ſuperſit quod

quod desideremus, nisi ut porro in talibus pergas de Ecclesia & Repub. literaria bene mereri, & antiquitatem illam illustrare, quam maximi facere debemus. Gratiarum autem tibi summas ago, quod me inter alios amicos hoc munere beare volueris. Nobiliss. Salmasium salutavi Leidæ, adhuc claudicantem ex pedum infirmitate, post labores maris, quibus addita fuit podagra. Promittit se ad nos venturum cum primum convaluerit. Eum hortatus sum quantum potui, quod etiam fecerunt amici Parisienses, ut neglectis parum utilibus controversiis, & vitiliginibus, deinceps se traderet seriis illis in quibus plurimum potest, & ex quorum tractatione major utilitas, in bonum Ecclesiæ, sperari potest, & laudabilior fama expectari, quod nos ab illo impetraturos confido. De Cl. Petito non magna spes affulget, præsertim si quod Sorberius ad me scripsit, periculum sit ne in Marasium incidat, ad quem prævertendum coactus est, sepositis aliquantulum studiis rusticari. Deplorandum erit si quæ cum maximo sumptu & labore collegit in Josephum imperfecta maneant. Quod de optimo Affine meo Molinæo petis, dabo operam ut situm tuam in eo expleam. Oñtimestre totum in suscepta peregrinatione ad Alvernenses impendit, cujus temporis maximam partem transegit in loco qui dicitur S. Meon, ubi sunt acidulæ quas medici judicaverant aptæ pellendis Symptomatibus quibus vexabatur. D. Grassus Reipub. Lugdunenensis expertissimus Medicus, propria sponte per dispositos equos eum invisit, dies quinque continuos cum eo egit, ut morbi naturam detegeret, & quibusdam quæ secum attulerat pretiosis medicamentis eum donavit; nec quicquam ab eo præter preces & benedictionem postulavit. Non planè fuerunt inutiles aquæ, quæ tamen morbi inveterati pertinaciam vincere non potuerunt, sed utcumque imminuerunt. Itaque Maringam veniens ad Elaveram, ubi est Ecclesiola reformatorum, ibidem concionem habuit, & navigiolum conscendens in Ligerim descendit Blasas versus, ubi aliquot dies apud generum suum quievit. Exinde ad filium profectus Castellodunum in Agro Carnotensi, aquas quas secum asportaverat sumpsit per dies quindecim, & ibidem habita Concione & distributa Eucharistia, cum totius Ecclesiæ admiratione, Lutetiam Parisiorum venit, ubi à veteri grege cum maximo gaudio fuit exceptus Carentoni ad Matronam, & post duas Hebdomadas, quibus cum

familia ab amicis fuit exceptus lautissime, duobus florenorum millibus ab Ecclesia acceptis, (quæ ei etiam Schedam tradidit, quæ spondet, si in Acad. & Eccles. Sedanensi deficient ordinaria professorum & pastorum stipendia, omnia ex arario Parisiensis Ecclesiæ quamdiu vixerit, ei refundenda fore) Sedanum rediit, unde nudius tertius literas habuimus à filia ejus quam hic vidisti, quæ prosperum ejus adventum, cum totius Ecclesiæ lætitiâ nobis narrat, additque medicos conjectare, si nihil aliud accadat, posse eum adhuc integrum decennium in eo statu durare. Itaque illa ad nos reditum meditat. Habes historiolum in qua libentius tecum excurri, quod sciam te ex affectu de talibus inquirere, quem amicum semper testatus es & propensum in optimum illum Dei servum. Gratulor tibi reditum Isaacii tui Lutetiam Parisiorum, quem Saravius ampliss. ad me scribit venisse optimis onustum spoliis ex illustr. Bibliothecis, quæ postea in usum literatorum sit liberaliter sparsurus. Deum precor ut eum tibi restituat gratia sua cumulatam, & ab omni superstitionis contagio quod in Italia & locis similibus grassatur planè liberum. Tibi insuper, Vir Clariss. & D. uxori tuæ, valetudinem firmam & prospera omnia exopto, quod mecum facit uxor mea, quæ vobis plurimam salutem dicit.

*Vale Hag. e. Com. xv.
Kal. Jan. cio idc xliii.
Quas vobis cum toto
anno brevi inchoatu-
ro, felicissim. precor.*

Clariss. & celeberrimo

Nomini tuo addictissim.

Andreas Rivetus.

Ausimne à te petere ut D. J. Blauvio aurem vellat, qui tamdiu cessat ab opere Blondeliano? Non potest causare defectum copiarum quam vocant, quam adhuc habet satis uberem. Efficit hac sua perendinatione, ut autor etiam cesset, quasi de foetus sui obstetricatione desperans. Vocant eum Lutetiam illustres quidam Viri, qui eum sumptibus suis alunt, ut studiis illis vacet à quibus avocabatur, per ordinariam Ministerii Functionem. Pauca supersunt capita ad priorem illam partem, quæ si Blavius aliquot folia mittat, intra paucorum dierum spatium absolvet. Interea Choppini in libris de Politia Ecclesiastica errores non paucos nec leves annotavit, in Mæcenatum suorum gratiam. Militerius tandem quod faciebat fecit, & Pontificiis se adjunxit, factus exinde Redemptor Vectigalium.

CCCLXIV.

S. P.

Clarissime & celeberrime Vir, amice, Collega conjunctissime.

Misit ad me Gothofredus Syndicus Genevensis ante bimestre, quatuor exemplaria Philostorgii sui. Sed Literæ quibus mihi indicabat amicos quibus ea destinaverat, in via perierant. Scripsi ergo & petii ut mihi significaret quid de exemplaribus factum vellet. Te, Vir Cl. inter alios nominavit, cui unum destinaverat, quod nunc ad te mitto, & simul peto ut te accepisse significes. Misi ad te inter primos tertiam lucubratiunculam meam de pace Ecclesiæ. Non dubito quin nauta eam domum tuam detulerit, quamvis de ea nihil quicquam ex te audiverim. Spem mihi fecit Blavius brevi scriptum aliquot tuum absolutum iri, & se postea nostri Blondelli opus curaturum. Multum eum devincies, si aliquando Typographum hortari digneris, ne deinceps sit cessator. D. Salmasius promittit se post festum Paschatis iter ad nos inchoaturum. Interim emisit Funus Hellenisticum, quod erit eristicum. Sed non potuit ab eo proposito dimoveri. Is adversus quem Offilegium scripsit est Sam. Bochartus meus affinis, occasione colloquii habiti Rothomagi apud ampliff. Saravium. Non probat quod quæ privatim inter eos transacta fuerant, eliminaverit. Plura pro tempore non addo ne seria tua remorer. Tibi & tuis omnia fausta precor.

Tuus omni affectu

& officio,

Andreas Rivetus.

Hag. Com.
24 Martii,
1643.

CCCLXV.

Refocillârunt animum meum Literæ tuæ, maxime Vossi, quas Dozenius noster felici manu mihi 2^o Jun. exhibuit, quod veterem mei amorem spirarent ac niveum candorem, ob quem te literatus orbis mecum admiratur ac colit. Eodem momento cum tuis accipiebam optimi D. Calixti eruditissimam Commentationem de Bono perfecte summo sive æterna beatitudine suspensam ad aram beatæ memoriæ Georgii Ducis Lunenburgici; quæ, ut & antehac, Georgii Cassandri de Com-

munione sub utraque dialogo & annexis, ΒΙΣΛΟΓΙΩΝ meum locupletavit. Is in concordia Ecclesiastica studio sibi constat adversus exserta capita Orci galea quantumvis munita Sycophantarum, ut præfationes horum Libellorum canora voce attestantur. Judicium tuum de illustrissimo Grotio mihi apprimè arridet. Interpretatio tamen dictorum præcipuorum de Antichristo à diversis jam examinata, mihi non satisfacit. Ego Romanum Episcopum, qualis jam diu est & infallibilem se scripturarum interpretem & Hildebrandinum conscientiarum, totiusque Christi Ecclesiæ ostentat, eo loco habeo, quo Casaubonus noster ὁ πρῶτος olim in exercitationibus doctissimis ad Annales Baronii. Etsi enim non sit maximus ille Antichristus, qui paulo ante ultimum ac decretorium hujus mundi diem, tyrannidem suam in Sanctos Dei exercebat, ut D. Zanchius meo animo rectè in Miscellaneis suis judicavit: tamen magnus videtur: quo hodieque in domo Dei vix major est, siquidem eum cum hierarchia sua integrè consideremus. Non tamen dubium est, quin pii quidam Urbis Episcopi fuerint & porro esse possint, qui mysterium illud iniquitatis abominentur. Vapulat eruditissimus Grotius tam à Lutheranis quibusdam, quàm à nostratibus hoc nomine, quod in partem Pontificiam, quàm Evangelicam non paulò prior videatur. Classicum belli sacri, adversus eum ab omnibus Lutheranis suscipiendi decantatum à Johanne Peysterio Ulmenfi scatet maledicentia. Laurentius vester satis calidè in eum scribit. D. Rivetus acutè quidem, sed, ut mihi videtur, moderatius. Utinam tandem aliquando disceremus omnes, quæ veræ Christi Ecclesiæ sit nota, unitas videlicet, quam declarant mutua officia charitatis à Christo nobis tantopere commendatæ. Collegarum quidam hujus notæ obliviscuntur, dum hujus studium nobis vertunt in notam hæreseos. Et vestri frigidam more fabrorum ferrariorum nonnunquam suffundunt & litium favillas sponte sua emorturas redaccendunt. Nam non sine pacis nostræ impedimento ejecta quædam in Belgicam Linguam vasa invulgata sub titulo Hoornste Sorghe, continens Epistolam ad Magistratum nostrum directam, in qua horrendæ hæreses, Sabellii, Photini, & aliorum nobis improperantur: sed & Synodici Nordhollandici Deputati nova Epistola, in qua repetunt, ad quæ antehac respondimus, tanquam gladio ignem nostrum

nostrum iteratò fodiunt, & Æmulos nostros, quamvis præter intentionem, animant. Concordiam illi quidem suadent, sed quia hypotheses quasdam nostras cum reformata Ecclesia pugnare putant, bellum propè sopitum & patientia nostra depugnatum, facile instaurabunt. Recordor nunc ejus quod D. Riverus alicubi ad D. Grotium testatur de Confessione quadam T. Claritatis qua Ecclesiis Belgicis satisfactum sit. An illa edita est? Quæ & ubi? Vellem sane eam videre, si forsàn illa ad redintegrandam Concordiam nostram faceret! Si ea ad manum est, ne quæso, eam nobis invide. Nihil enim antiquius nobis est, quam magnorum virorum exemplo veritatem juxta ac pacem colere. Pro voluntate in me filiumque meum hodie degentem Leidæ, quantam possum ac debeo gratiam habeo. Est ille quidem Linguarum Orientalium & Medicinarum studiosus, sed paulo quàm vellem verecundior. In occasione Excellentiae tuæ serviet mecum. Tempore exclusus, claudendo, teque cum amoribus tuis salvere jubeo.

Brem. rapt. ^{21 Jun.}
_{2 Jul.}

Excellentiæ

tuæ devotissimus,

L. Crocius.

Inclusæ per famulum, quæso curentur
& audaciæ meæ ignoscetur.

CCCLXVI.

Clarissime, maximeque Vir,

PErpetua mihi est agendarum gratiarum apud te necessitas, sive meum fratrem, vere alterum me, sive meipsum intueor. Qua enim benevolentia illum sis complexus, non opus est referre ad te, & quem mihi animum ostenderis, alibi dicendum erit, cum licere mihi rectius & prolixè potest non immemorem esse. Nunc quidem cum præter opinionem redire ad suos Elzevirius instituit, pauca eaque incondita necessario mihi ad te perscribenda sunt, ne prorsus negligere humanam voluntatem tuam videar. Librum tuum de Symbolis Ecclesiæ & cupidissime & non uno cum fructu pervolvi. Præter enim operis argumentum alia quoque pro meis usibus excepi. Scilicet quæcunque de forma & caractere Symbolico sparsa per totum sunt librum, transtuli in Commentarios meos de Brevitate. Quam materiam ad-

miror veteribus ipsis adeo relictam. Neque enim mihi contigit aliquem Græcorum Latinorumque Authorem offendere, qui istam persecutus sit Ideam. Primum igitur est, quod à te peto, ut si absque molestia tua fieri possit, mihi aliquas erigere veluti Hermas velis, & succurrere aliqua submonitione ad istud opus. Video enim per totum Oratoris opus fusam esse hanc dicendi formam. Et laborem incipio intelligere, quò plura mihi nunc demum adminicula paro. Instituo enim Anathemen Authorum, & in minima resolvo, quæ toto opere continebantur: More Concordantiarum, ut vocant. Ciceronis ergo Rhetorica, Alconium, Photium, Agellium, sic habeo dissectos; ultimusque mihi hætenus exstitit Demetrius: quem pro bono juventutis editum ante omnes cupio. Causas allegare non opus est apud te; modum formamque describere necesse est, ut tuo judicio labor meus probari Elzevirius possit. Quia enim spes mihi facta ab ejus filio, non possum deesse studiis Tironum, & defungi libenter incepto velim. Contuli autem Victorii & Morelli editiones. In capita distinxì, ex ipsius autoris instituto & more, in versus autem sive Periodos ex editione Victorii. Indicem fere absolutum, quem spero non inutilem fore. Præterea aliquid Notarum adjicio; quod qualecunque sit, existimavi non prætermittendum esse. Victorii & Casellii Commentationes justo mihi videntur prolixiores, alterius sane bona fide exscriptas. Tabulæ quoque illæ Cyllenii, non necessariae. De Autore Victorii & tuum judicium præscripturus sum. Hæc sunt propositi mei. Mitto autem initium Notarum mearum & Indicis, ut æstimare possis, an aliquid digni sit publica. Et sane utrumque sic descriptum est, velut Canis ex Nilo bibere dicitur & fugere. Elzevirius enim properat, ego pessime habeo, ita ut Disputationem publicam habere non potuerim, etiamsi jam datum erat signum. Quapropter oro à te, ut speres etiam meliora, quam nunc ex Schedis meis excerpta sunt. Sero enim mittenda erant necessario, ut confirmari possunt ii, qui sumptum facere debent. Unicum addo. Hieroclis nescio quantus amator factus sim; nescio an plura habeantur, quam in Aurea, de Providentia, & quæ existant in sermonibus Stobæi. Et incepti eum pari modo *avartuven*. Ignosce Domine, quod tam audacter de his talibus ad te scribo. Ego enim existimo in eruditione vos pro Oraculis nobis publice constitutos. Eaque

K k

utinam

utinam aut consulere aut sequi etiam velint plerique, non utique tam.....multum & malorum librorum. Vale Domine. Ego enim propter valetudinem scribere plura non possum, quam salutem fratris mei. Vale, inquam vale.

Tui nominis

Soræ 28. Jan.
1643.

cultor perpetuus,

Joh. Ravius.

CCCLXVII.

Clarissime & Celeberrime Vir,

CUM juvenis hic, qui per hoc caniculare otium visurus vestram Batavi-
am est, à me petiisset, ut transitorium Ci-
vitatem vestram orbis, qua commercii
aditur, emporium, tuæ celebritati com-
mendarem; istud officii honestissimo Juve-
ni negare non potui. Inprimis cum præ-
ter Philosophiæ studium, in quo lauream
adeptus est, eloquentiæ quoque flagranti
desiderio teneatur, cujus veram imaginem
nostro seculo repræsentas. Quod elogium
cum omnis gens, quæ literarum cultu non
destituitur, tuo ingenio, tuæ famæ tribuat,
recte judicabis, si à me per adulationem
effusum non existimes. Hoc enim vitii in
istos quam rarissime cadere solet qui li-
bertatem, in qua nati sunt, servilibus pro-
bris non defcedant, & si quod animo te-
nent, professione veritatis emuniunt. Ego
certe illo tempore quo filius vester Mat-
thæus V. Cl. apud nos in amoribus erat,
sæpe colloquium vestrum exoptavi, sed
præproperum iter, etiam inter imbres ac
naturæ inclementias, quæ festinationem
intempestivam tardare debuissent, illam
felicitatem mihi invidit. Quam tamen
ipsam nisi fati lex prohibeat, melior ali-
quando dies dabit. Interea Juveni huic
accessum velim facias, ut, quod omnis
eloquentiæ cultor admiratorque merito
optare possit, desiderium suum meæ sal-
tem commendationis interventu expleat.
Bene vale Clariss. & Celeberr. Vir.

Franc. vii. Eid. Aug.
c1o Ioc. xlviii.

Amicus tui

observantiss.

P. Winsenio.

Historiæ meæ libri 7. in folio hic excu-
dentur, quam ubi expressa fuerit, curabo
ut inter primos V. Cl. habeas. Mathæo
filio multam à me salutem.

CCCLXVIII.

Summo Viro, D. Gerardo Joanni Vos-
sio, Joannes J. F. Schildius Bre-
mensis S. D.

VIX mihi bona sua satis intelligere
videntur, quibus divina quadam vir-
gula excellentium virorum voluntates con-
ciliantur. Nam si priscorum, quos nun-
quam vidimus, non libros solum, verum
etiam imagines conquirimus, quid iis for-
tunatus esse potest, qui vivorum gratia,
& amicitia florent, qui non admirantur
solum homines admiratione dignissimos,
sed vident, alloquuntur, consulunt, comple-
ctuntur? Sane refert Plinius secundus Ga-
ditanum quendam, Titi Livii nomine glo-
riaque commotum, ad visendum eum ab
ultimo terrarum orbe venisse, statimque,
ut viderat, abiisse. Tanti putabat Barba-
rus, etiam vultum celeberrimi viri cogno-
visse. Ac ne longius hæc arcessam, me
quoque insitum illud mortalibus studium,
magna & inusitata noscendi, in hæc Pro-
vincias excivit. Non est quod ipse me
differam. Ardeo cupiditate incredibili, ne-
que ut ego arbitror, reprehendenda, ut hu-
manitatis ac benevolentia tuæ sensum alli-
ciam, qua sola propemodum mercede in
Belgium profectus mihi videor. Nihil præ-
stantius, nihil amabilius, nihil quod im-
pellat magis homines ad suspiciendum,
quàm virtutis magnitudo. Adde, ad vir-
tutem si inusitata eruditionis Gloria acce-
dat, incredibilem quandam hominum ad-
mirationem accedere. Diu te, Vir maxi-
me, eo loco consentiens hominum existi-
matio collocavit, quo multis sæculis vix
alium. Jamdudum nomen tuum iisdem,
quibus Lingua Romana, spatiis pervaga-
tur. Meruit hoc singularis, ac prope di-
vina quædam virtus tua; meruere tot im-
mortalis ingenii monumenta, quot per-
egisti volumina,

*Hæc qua secula, posterique possint
Arpinus quoque comparare chartis.*

Ut taceam ex filiis honorem, quorum duos,
ni fallor, immatura mors abstulit, non
minus ob egregias animi dotes tibi charos,
quàm quod filii fuere. Non est autem
verendum, ne assentatiuncula quadam au-
cupari tuam gratiam videar, cum, quic-
quid de te dixerò, omne infra dignitatem
tuam fuerit. Equidem Cl. Virum Ludo-
vicum Crocium non sine grata animi me-
moria

moria recorder, cujus commendatio maximo nobis apud te adjumento & ornamento fuit. Ei lubens debeo, quod cum mense Maio istic ad te adiremus, integram ferè horam doctissimis sermonibus nobiscum transigesti. Nihil ibi audisse me, nisi profuturum, memini, nihil didicisse, quod nescire rectius fuerit. Ut omittam, quàm tu omnia ista mira in sermone, mira etiam in ore ipso vultuque suavitate, condideris, planè instar Homerici Nestoris, cui

— μέλιθ' ἡλυκίαν ῥέειν αὐδῶν.

Itaque illa horula, quantum admirationem animi mei, tantum auxit desiderium. Exinde scribere ad te sæpe conantem deteruit pudor meus, & tenuitatis meæ conscientia. Quid enim? Annon ipsi nostræ modestiæ vim facimus, cum te tot diversis functionibus districtum impeditumque literarum insuper alloquio fatigamus? Annon ipsum me pudeat mei, quod homo adolescens, nulla vel ingenii vel doctrinæ laude commendabilis, ad incomparabilem Heroa Vossium scripturiam? Oneravit ista tristis de invaletudine tua nuncius, de qua ipse Cl. Crocii filio, amico meo perscribebas. Qui hercle nuncius gravissimo me dolore confudit, cum mihi non unus homo sed literæ ipsæ, omnesque bonæ artes in uno homine summum periculum adire viderentur. Nam qui voluptatibus dediti, quasi in diem vivunt, vivendi causas quotidie finiunt: qui verò posteros cogitant, & aternitatem laboribus suis sibi devinciunt, his nulla mors non repentina est, ut quæ semper inchoatum aliquid abumpat. Enimvero jam ante perculerat me præfatio in partem quandam Theologiæ gentilium, diffusissimi illius operis, nec minus varii, quam est ipsa natura. Sed, quæ Dei Opt. Max. fuit indulgentia, hæcenus seculo nostro servatus, teque & domum & literas sustentas; speramus etiam porro sustentaturum. Nihil enim tam certum est ex his, quæ timentur, ut non certius sit, formidata subsidere. Quamobrem spe metum temperabimus; præsertim quando nihil scævum istinc allatum meminimus. Non morabor te diutius. Quod si ad me quoque, velut rivi ex illo benignissimæ naturæ tuæ fonte decurrant, næ ego cresecam & exultabo, næ ego non dicam aliud mihi, quam numen adfuisse. Offero tibi exiguum observantiæ meæ pignus, avi mei oblectamenta Metrica, quibus ille, tanquam ocio quodam literato, intervalla negotiorum dispungebat. Aliud, te dignum, munus haud invenio. Ipsum me, si alicui

jus precii putas, totum tene, habe, possideque. Impendam me tibi, si possas; impendam, etsi non posses. Vale.

Lugd. Bat. cId Idc xliiii.
xviii. Kal. Septembris.

CCCLXIX.

Amplissime Vir, Reipub. literariæ Princeps, Doctor,
& Fautor plurimum honorande,

NON temere illi assentior, qui principibus placere viris, non ultimam laudem esse cecinit, cum ex iis sibi quisque, prout virtutis & industriæ capax sit, magnum decus addere & conciliare arbitretur. Quo nomine si ullus sibi blandiri audit, mihi imprimis illam laudem & felicitatem gratulari possum; cui, dum ex fortuna majorum meorum, iniquior sors obtigit, summorum & instar principum hominum, pietate & favore ita compensata est, ut ea nunc lætus vivam. Non enim solum ex illustrissimi Herois piis benignissimisque manibus, corporis pabulum suppetit, sed & animi incrementis, ad bonæ mentis & eruditionis metam contendo: id quoniam ductu & auspicio tuo fiat, serio triumpho, & palmarium duco, cum te nunc, ipsius Reipub. literariæ principem, non Batavica tantum Regnorumque & Regionum vicinarum, variæ Eruditionis præclara ingenia agnoscunt; verum etiam disita illa septentrionalis plaga, charissima patria mea, Musarum suarum præsidem, instar magni Apollinis meritò veneratur. Et quis tandem Orbis Christiani angulus est, in quo non nomen Vossii, pro sapientia legitur, & colitur? Vera hæc est laus, quæ mihi ex tanti principis favore descendit, eademque ad vitam beatam sufficeret, nisi quod præter voluntatem in fortunis meis non sit, quo tantum favorem tantaque merita tua remunerare possem. Superest, ut pro singulari benevolentia tua & humanitate, qua omnes amplecteris, imprimis Suecos, tantam meam voluntatem, gratissimumque animum, magis quam remunerandi vires, respicere velis. Non ego ignorabo, quo animo beneficia tanta celebrem, coram præsentibus semper, & si fieri aliquando potest, coram toto orbe, quotidie verò coram Deo, remuneratore omnium beneficiorum optimo & largissimo; imprimis ex prædicatione mea, patria hoc totum sibi acceptum referet, pondusque hoc nomine, reliquis, in

suam prolem, meritis, addidisse te existimabit. Non exprimo nunc pluribus, vel industriam & fidem, quas informationi meae collocas vel favorem, quo saluti meae & successui, commendatione tua, de meliori nota, apud bonos quosque consulis; ne forte dum virtutes tuas & merita vivis coloribus depingere conarer, turpis adulationis suspicionem incurrerem indignam, quae de me omnibusque candidioris ingenii hominibus susciperetur. Haud tamen & ita quicquid in me plane paterno animo contuleris, apud alios, silentio praeteribo, quam potius assidua praedicatione meritum tuorum, gratissimo animo celebrabo, omnia quae in bonae mentis & eruditionis cultum ingessisti. Deus amplitudinem vestram diu sospitem conservet, & corporis vires, tanti tui incomparabilis animi facultatibus, pares largiatur, mihi, charissimae patriae, & toti omnino orbi, ornamento & bono: ad hanc voluntatem ingerat, quae voluntatem meam, magis quam remunerandi magnorum beneficiorum vires, respicere velit.

*Dabam ex Museo
meo, quod Amstelodami est*
Octobris, Anno
1643.

*Amplitudinis vestrae,
omni cultu & veneratione
dicatissimus,*
A. Wallwick.

CCCLXX.

Vir Reverendissime,

EN Epistolas ab Avunculo meo Samuele Petito, qui eo est in me affectu ut tanquam collata sibi ducat quae mihi contulisti humanitatis officia. Vadem ego illum accersivi assiduum bonique nominis, ne quid tibi perire possit beneficiorum, & ne in posterum te pigeat benevolentia nos ornare, qua nihil exoptamus ambitiosius; quod enim magis ornamentum accedere potest nobis *vis basileensis*, quibus negatum est nos tollere ingenio & eruditione, quam si viris utroque pollentibus aternitatemque famae consecutis non solum noti sed charissimus. Hae certe non ultima laus erit, sed quod ego potissimum specto, favor ille tuus addet mihi animos ad bonam mentem, ad quam nemo non debet contendere. Vale igitur & favere perge, Vir Reverendissime,

Haga-Comitis xxv. Aug.
clo lxx. xliii.

*Tui observantissimo
additissimoque,*
Samueli Sorberio.

Clarissimum filium tuum Matthaeum plurimum meo nomine salutatum velim.

Amico cuidam meo eadem nunc ob sunt Lutetiae quae mihi nuper obfuerant, prospiciendum illi esset de honesto quodam loco, qua in re pergratum mihi faceres, necnon, scio, Domino Grotio, cui una mecum innotuerat. Iterum vale.

CCCLXXI.

Præstantissime Vir,

Schedas haec reperi, quas mitto, ut stem promissis, non quia dignas iudico, ut eas legas, aut eas tibi usui fore existimem. Locutus etiam sum viduae p. m. Vander-Merii, super arcanis Patris, quae penes eum deposita fuisse putas. Illa mihi promisit se inquisitum ea Delfis (ubi Manuscripta apud filiam adservantur) & secum allaturam quae simulac mihi tradita fuerint, transmittam.

Salutavi D. Voetium tuo nomine, illud ipsi gratissimum fuisse animadverti; qui de te summa cum laude locutus; praesertim quod antiquitatis arcana penes te hoc in seculo propemodum suo adserventur, & summa cum constantia propugnentur, praesertim contra Dogmata F. Socini, quod à D. Grotio non ita fieri dolemus: quem volubilem esse quis non animadvertit? habent profecto suos navos praecleara ingenia. Adfuit nobis D. Heinsius nuperrime, qui illustrissimi Salmasii adventum nullo carmine celebrabit. Rogum funeris Hellenistici Hyperaspistes ejus Schoockius praeparat. Et profecto magnum incendium. D. Voetius habebit etiam qui causam ejus agent contra D. Cartesium. Scripsit ante paucos dies ad me illustrissima & doctissima Elizabetha, Bohemiae princeps: dolet & ridet doctos ita digladiari; & ita contemptui exponi una cum eruditae ipsam scientiam. Theologis hoc quasi proprium antehac creditum fuit. Sed & Critici & Grammatici de lana caprina bellum excitare noverunt. Nolo autem hanc camerinam movere, praesertim apud te quem pacificum semper agnovi. Salutatur te communis noster Beverovicus, qui summo cum desiderio epistolas tuas expectabit, super anno climacterico: quia jam novum opus epistolarum quaestionum parat. Ignea enim haec ingenia à scribendo vix se temperare possunt. Ego Ecclesiam meam pro Epistola habere gaudeo. Vale, Vir Clarissime, cum tota familia.

*Dordrecht 16.
Sept. 1643.*

Tuus omni obsequio,
Andreas Colvius.
Vidi

Vidi apud D. D. Arminium scripta quædam de Arte Magnesia, quæ si meis sumptibus transcribi possent, faceret mihi magnus Barlaeus insignem gratiam. Sed hæc vix ab eo petere auderem. Quocirca ejus de Magnete philosophicas quæstiones expectanda nobis erunt. Interim salutabis peramanter Virum celeberrimum meis verbis.

CCCLXXII.

Virorum maxime Vossi, & Amicorum,

HEi! lachrymas, quibus Bergii fatum de-
fleo, semivivus in sinum tuum effun-
do, ut excusam *ἀχαριστία* meam, qua non-
dum me delendi reum professus sum tibi
pro divino opere, Gentilium Theologia
& tribus Symbolis, quod te tui similem,
hoc est, *παρρησιώδης* ostendit. Efficit il-
lud ut tibi ingratus moriar. Nullum enim
redhostimentum tanto dono dignum à me
est sperabile, à quo nil nisi humiles myri-
cæ. Deum obnoxie veneror, ut te nobis
& Reipublicæ Christianæ supersitare ac
diurnare velit. Æmuli nostri ne defun-
cto quidem hic parcunt, sed varias de eo
spargunt calumnias, quas præfatione dis-
sertationum mearum abstergo, ut prope-
diem, ut spero videbis. Saniores Genti-
lium olim sapiebant rectius, quorum vox
erat

Pascitur in vivis livor, post fata quiescit.

Item,

Pugna suum finem, cum jacet hostis habet.

Quanquam hic vir nemini erat inimi-
cus. Sed nobis, quoad sumus, pugnandum
est pro veritate, justitia, pace. Hac enim
lege ad Christi commilitium vocati sumus.
Et ut pia olim anima canebat,

*Nunquam bella piis, nunquam certamina de-
sunt,*

Et qui cum certat mens pia semper habet.

Hæc raptim. Salutem tibi scribo, Vir
summe, & familiæ à Collega D. Willio
superfite & me, cum officiis & gratiis pro
honore mihi immerenti in Theologia ve-
stra delato.

Brem. xliii.
Cal. Sepr.
cio idc xlii.

Tuus, omni officio & affectu,

L. Crocius.

CCCLXXII.

Εὖ μεγαλτερον.

ANte trimestre, maxime Vossi, sarcu-
lulam librorum nauta quidam no-
stras ad pedes tuos deponere jussus, unâ
cum duobus fasciculis, quorum alter tibi,
alter D. Heinsio cum adjunctis literulis in-
scribebatur, aliisque amicis: Sarcinulam, in-
terveniente quodam studiis nostris non
fatis propitio, à nauta isto ad nos repor-
tatam video, sed absque adjunctis literis &
prædictis fasciculis: Ubi verò hæreant,
nescio. Hæc propter peramanter peto, ut
in proxima occasione me doceas, an cum
literis Dyoderadem Dissertationum mea-
rum & orthodoxam delarationem D. Hil-
debrandi, Collegæ mei, acceperis, necne:
& si quid in his desideres, nos liberè mo-
neas. Sumus enim dociles. In locum
D. Bergii, conjunctissimi quondam Colle-
gæ mei, plebs nostra vocavit D. Crellium,
D. Pezelii ex filia nepotem, affinem me-
um, virum doctissimum, antehac in Aca-
demia Viadrina Professore Theologum,
sed rigidum Pisentorianorum placitorum
assertorem & Bergianæ moderationi con-
trarium. Hic proculdubio præsentia
sua à folliis nostris inflatus Came-
rarium denuo movebit, nisi Deus singu-
lari gratia alium ei animum inspiraverit.
Summum Virum, D. Hugonem Grotium
ad Pontificiorum castra jam transiisse,
publica fert fama & eoipse excidisse gra-
tia regni Suecici, quod ob mutatam Reli-
gionem ei non fidat. Dolerem sanè, si id
factum. Quid hujus sit, vos rectius scive-
ritis. Theologia vestra gentilis & phy-
siologia Christiana, divinum opus, quotidie
pascit animum meum. Vivit in eo Vossius
noster & æternat, quem cum universa fa-
milia sospitem perpetim salvere jubeo,
eique sum

Bremæ V. Cal. Dec.
vet. cld Idc xlii.

Devotissimus,

Lud. Crocius.

CCCLXXIV.

Clarissime Vir,

Introductio ad Medicinam indigenam,
quàm vernaculo sermone scriptam nu-
per ad te misi, nunc Latino excuditur, bre-
vi mittenda. Addo Encomium Medici-
næ

na longe auctius, celeberrimo nomini tuo consecrabunt: necnon Epistolicas Quaestiones, cum responsis nobilissimæ Virginum Annæ Mariæ à Schurman, multis D. Heinsii, pluribus D. Salmasii, & aliorum. Quare rogo & tuum ibi nomen legi ne graveris. Quod eo lubentius te facturum confido, quoniam intellexi simile quid te meditarum, mihi quæ aliquam epistolam destinasse, sive de annis climactericis, materia, ut mihi quidem videtur, plane dubia & incerta, sive alio quovis argumento. In eo mihi gratificari, ut velis, vehementer abs te peto. Nec serò, etiam post unum aut alterum mensem, veniet. Vale, mi Doctor aeternum observande, & studiis meis favere perge.

Dordrecht, Meritis tuis aeternum obstrictus,
11. Cal. Jun.
c10 Ioc xliii.

Joh. Beverovicus.

CCCLXXV.

Vir clarissime,

Libellus hicce, quem transmittito, lucem videre vix ausus est; fuerunt enim, qui suppressendum eum esse dicerent, quod pessime consultum foret Religioni Christianæ, si ejusmodi de Christo opiniones vulgarentur. Certè Theologica facultas religioni habuit, ut testimonio aliquo librum munirent. Cordatior fuit Dominus L'Empereur qui quod pretii, lubens volensque præstitit. Sed hæc coram malo. Dominum Salmasium brevi rediturum, constans nunc omnium vox est; sin moreretur diutius, locum forsàn apud multos inveniat, quod Dominum Heinsium Hagæ Comitum dixisse intelligo, honorarium Professore verius onerarium vocari posse. Dominus Spanhemius suos hic habet admiratores; sed nec desunt, qui ipsi invident: planè diversa hominum experitur judicia. Inventus est nuper vir doctissimus, qui in magna copia (sermo fuit de facundia Spahemii) maximam sæpe reperiri inopiam, dixit. Alii alia dicunt, quæ ubi Amsterodamum venero, audacius promam. Vale, Vir Clarissime, & studiis meis favere perge. Dominus Baro salutat Clarit. T. quam potest officiosissime; idem rogat obsecratque, ne, si quando Lugdunum veniat alio quam suo uti velit hospitio.

Anno 1643.
20. Julii.

Claritati tuæ devotissimus,

Levinus Warnerus.

CCCLXXVI.

Vir doctissime, amicissime,

Olim ad te Literas non mitto, non defidia, non oblivione tui, sed longis & assiduis peregrinationibus impeditus. Annis superioribus Germaniæ partem non exiguum lustravi; post (quasi antea non vidissem) in Italiam contendi. Secuti sunt itinera duo Hibernica, brevia quidem illa, sed incommoda, & nisi insignium amicorum quorundam conciliatio & convictus molestias repensasset, maxime penitenda. Nunc demum lares colo Londinenses meos. En tibi rationem silentii illius cui tamdiu indormivi. Causas ex alto non peto, nec circuito ago. Impræsentiarum si quæris quid agam, scito pauca at bella minantem vivere nec recte nec suaviter. Non utique quod à fortunæ subsidii imparatus sim, sed quod positus in querulo & moroso corporis statu, gravibusque ac diutinis languoribus (duntaxat calculi vellicationibus quæ me indies premunt) lassus & conquassatus, etsi victus alioquin parci ac restrictioris, *Ὁυδὲ ζῶντος ἀσφάλειν ἀλλὰ θανάτου περίτασιν ἑμαυτοῦ παρασιδῶμαι* quædam tibi non ἀποδανὲν σοφισμῶν. Accessit cumulus his malis mors Straffordiæ Comitum eximii Mecænatismei, Regnorum trium exempli ac convivii, extincti magna bonorum sapientiumque civium penuria, alienissimo Reipublicæ tempore, ac majore ingrata patriæ quam suo damno. Loquor liberius fateor quam pro conditione temporum ac rerum nostrarum, ergo hæc soli commissa tibi celare memento: Ac tacitus nostras intra se fige querelas. *ἡ πάντα μὲν ἐν ταῦτῃ.*

Commendo qui has Literas reddet tibi Isaacum Vossium ex Gerardi filii. Juvenis probus est, & modestus, ingenium habet non publici examinis, amatque bonas literas ac bonam mentem. Eum tu, pro insigni humanitate tua, quam ego olim adeo prolixè expertus sum, complecteris: dum in vestra celeberrima civitate commorandi animum habuerit, ornabis commodabisque, & cum abeundi consilium formaverit, faustis votis prosequeris. Ita veteribus tuis erga me officiis ac studiis novum pondus accedet. De cætero (urget enim nec me longius evagari finit) cum primum commodè potueris, de salute tua velim me certiore facias, & quid eruditi vestrates novi moliantur, quid tu imprimis, ex cujus scriptis nil lego nisi profuturum, nil discō quod nescisse

neſciſſe rectius & utilius fuerit. Ignosce, Vir amice, quod officium iſtud tamdiu debitum tam ſero tamque parum cumulate reddo, & ſi potes, priſtinam tuam erga me voluntatem conſerva.

*Londini Prid. Amicitia ac humanitati tue
Cal. Sept.*

devinctiſſimus,

Joannes Priceus.

CCCLXXVII.

*Incomparabili Viro, Gerardo Jo. Voſſio,
Johannes Fredericus Gronovius
S. P. D.*

QUOD ſæpius Author fuiſti mihi, Vir maxime, ut quæ de Seſtertiis, ab doctiſſimis viris perperam tradita mihi viderentur, in unam aliquam diſſertatiunculam conjicerem; id tentatum non ſemel, ſemper autem hætenus per occupationes intervenientes abruptum; his tandem feriis, & ſummo ſtudio ſum aggreſſus, & pro capto meo, non infeliciter perfecit. Dedi cum primis operam, ut rem ſententiamque meam, ita dilucidè proponerem, ut non poſſit ab ullo, mediocriter docto, paulò attentius legi, quin intelligatur: iis deinde rationibus, ac authoritatibus munirem, ut neminem contradicendum, qui intellexerit, liceat ſperare. Atque hoc eo magis, quod deprehendi ex ſcriptis divini Salmaſii noſtri, cum nuſquam hanc materiem ex profeſſo tractet, quacumque tamen obiter, aut explicat, aut corrigit, cum ſæpe non conveniant illis, quæ alii tradiderunt, noſtra cum ratione ubique ad amuſſim conſentire. Curabo fortaiſſis; imò conſtitutum eſt omnino curare, ut circa paucas tempeſtates hic edantur, quæ concepimus: non prolixum eſt hoc quicquid eſt ſcripti, trium putà, aut quatuor philyrarum. Authores quibuſcum res eſt mihi, ſunt Budæus, Georg. Agricola, Hotmannus, Scaliger, Paſchaſius Groſſippius. Hos diligenter legi, & expendi. Cæterum Agricola, & Hotmannus, citant quemdam Portium, qui eodem ſerè tempore, cum Budæo ſcripſerit: habeo Libellum Matthæi Hoſti, de numerandi ratione emendata, in qua ſuam hiftoriam rei nummarie allegat: ni fallor etiam, Eric. Puteanus aliquid huiusmodi edidit, & P. Ciacconius. Hos quos non vidi non-

dum, videre tamen, ſi fieri poſſet, nimis quàm cuperem: eaque de cauſa oro, quos eorum Bibliotheca tua ſervat, eos ad me commodato tranſmittere quamprimum ne graveris. Valde etiam indigeo Grammaticorum opere Putſchiano: nam cum eorum loca quædam examinanda ſint, id hætenus, niſi ex ipſis verbis, quæ allegant Authores mei, facere nequivi. Collega noſter Cl. Ifendornius in Hollandia eſt, ei dederam in mandatis, ut Grammaticos hos, & Andreæ Schotti obſervationes humanas, meo nomine à te peteret. Eo enim indigeo propter Livium, quem à nobis reſenſitum, & plurimis locis ſaniorum futurum Elzevirii ſub prælo habent. Nunc quod commodum fiat tuo, ejus adventum exſpectare te noli, ſed prima quaque occasione, designatos libros, aut quorum eorum tibi copia eſt, mitteres. Vides quàm ſimpliciter humaniſſimis verbis tuis credam, quibus aliquoties, adverſum te, adeo audacem me eſſe juſſiſti. Vale, & ſalve, vir incomparabilis, cum graviſſima matrona tua, Liberique & Nuru. Annon addendum erit propediem, Nepote, vel Nepte? Et quomodo rem gerit, & nūquid Matthæus? Mea uxor (gratias Deo) intumuit admodum, & ut ſpero, intra tres meſes, tres erimus. Iterum valete, & me amate.

*Daventriae, ad diem III. Eid.
Oſtoobr. anno 1600 xliii.*

Iſaacus autem ubi, & quàm benè agit? ſed & quæ ſpes, de Salmaſii reditu?

CCCLXXVIII.

*Admodum Reverendo, & Incomparabili Viro, Gerardo Johan. Voſſio,
Canonico Catuarienſi, ſalutem & obſervantiam.*

Reverende & Maxime Vir,

ACCEPI lepidiſſimum Epithalamium, diſertiffimi Poetarum Collegæ tui, inque eo magnum beneficium, quod non authori magis, quam tibi debeo, cujus interventu, & deleniſſima facundia id impetratum eſt. Nec minuit ejus pretium, quod ſeriùs, & poſt exſpectationem reſentatum eſt, triduo nempe, poſt peractas nuptias; quia nullam hic veſtram culpam eſſe ſcio, & ipſe ſtatim editione facta

facta curavi, ut temporis illud damnum refarciretur. Integer igitur est tanti applausus honor, integra vobis apud me gratia, tibi præcipue, cujus ingentibus erga me meritis, ingentem accessionem factam, tam diligenti tua opera, lubens profiteor. Agnosco imprimis candorem tuum, quod adeo sollicitè me doces mollia verba, quæ me apud occupatissimum, & quibus delinimentis soleat ambiri, haud ignorantem voti compot..... Quibus quod opus non habui, tuæ adscribo solertia, paratus alioquin accuratissimis precibus, emere bona tanti Vatis omina, si citius tuæ mihi reddita fuissent. Nunc unà cum optimis versibus accipe malos, nisi tamen ingenii largitor, Amor, homini non Poetæ, qualem esse authorem, æque ac meipsum novi, brevem poetandi prosperè calorem subjecerit. Sed istos maneat, vel Eumolpi plausus, siccum haud interdum; quod autem præcipuum est, dies jam noctesque sunt duodecim, quod cum uxore vixi: nunquam autem credidissem ante, tam perditè amare me posse; nec gratiarum satis persolvere possum supremo illi *παρρησια*, qui tam amabilem mihi conjugem adjunxit. Intueor suavissimos mores, jucundum obsequium, pudorem, & castitatem singularem, peritiam rei familiaris, frugalitatem sine confinio fordium, animos sine superbia, modestiam in cultu & vestitu, studium soli marito placendi *ὡς δαλαμανδριον*, ut sic loquar, odiumque sodalitorum etiam muliebrium, & futilis garrulitatis, omnia denique quæ ego, in tua gravissima Matrona (genus nobile excipio; id quoque tamen honestissimum est) paucisque aliis ad hoc exemplum semper, & admiratus sum, & contingere mihi in mea exoptavi. Atque hæc ipso flore juventæ, & non minima corporis gratia, dote etiam honesta, sed longè uberiori spe hæreditatis, siquidem superstites erimus, commendari adeo me adfuit, ut indies magis non *ἐρωτάλη*, sed prorsus *ἐρωταμὴς* reddar. Audeo hoc apud te confiteri virum & optimum, & *φιλόστονον*, sine metu ludibrii, quo laudantis impatientia traducitur. Fasciculum Epistolarum periisse nobis doleo: malo tamen periisse, quàm malè redditum esse. Inerat unà ad *τὴν ἐρωταμὴν* quam commiseram homini soli conficio deliciarum mearum: & utramque incidere nolebam in manus eorum, quos licet proximos hic mihi, hætenus justis de causis celatos ejus negotii habueram. Ideo ad te potius direxeram, præterito illo, qui plerumque, quæ ad me veniunt Ham-

burgo, quæque à me eodem commeant recipit. De filio Isaac nihil adjecisse te miror, cui per hanc peregrinationem eandem, quam fratri sollicitudinem præsto, precorque ut salvus, multis cum egregiis monumentis, ad vos salvos redeat. Scire itaque aveo ubi nunc sit, quosque de eo ultimos acceperis nuntios. Rogo etiam, ut ex tomis antiquarum lectionum Canisii, illum in quo Aldhelmi carmen de laudibus virginittatis ad me mittas. Mira petitio, inquis, post zonam nuper solutam pactasque nuptias istum librum velle legere. Sed literarum negotium hic ago: contuli enim libellum istum cum MS. in Anglia bonæ notæ: inde omnes suppleri lacunas, multa etiam corrupta restitui. Eam opellam recognoscere libet; quamvis nec mirum, si ut intelligere discam mea bona, cupio Encomium legere ejus rei, quæ non ita pridem in prædam mihi cecit. Vale, Vir incomparabilis, & ut divinæ clementiæ, quæ senium tibi vegetum concessit, quamque ut diutissime concedat, oro, vivendi tenore te accommodes, interdum ride, ac hilaritate curas tempera.

Daventria,
ad diem vii.
Cal. Febr.

Merito deditissimus,

devotissimusque tibi,

Johannes Freder. Gronovius:

Collegæ mei te vicissim humanissime, & observanter salutant. Ego quoque omni cum reverentia, Matronam tuam, & nobilissimum Junium tuum. Ad Cl. Barlæum de eodem oleo scripsi.

CCCLXXIX.

Incomparabili Viro Gerhardo Joanni Vossio, Johan. Freder. Gronovius S. P. D.

Audaciæ meæ castigationem, & merebar, & metuebam, tanto munere Bibliothecæ tuæ impetrato, Vir maxime, tu benignitate tua etiam, ut modesta videretur petitio mea, effecisti. Rectè igitur & in tempore accepi utrumque fasciculum; gratias egissem citius, nisi una, quomodo beneficio tuo fuerim usus, cognoscere te voluissem. Et nunc igitur id facio lubens privatim, & publicè fecisse gaudeo, in commentario quam mitto, Pag. 85. & 237. de Sestertij: atque hoc unum fortassis

fortassis in Opusculo, cætera exspectatione tua inferiori, credo, tibi probabitur. Nihilominus rogo, obsecroque, ut vacuum aliquam horam nactus, lectione tua digneris, etsi quidem emendationem recipit, nec una litura satis absolvitur universum, in quibus excidisse videbimur, comiter moneas. Quid enim mirum, ubi tot errorum diverticula, summi viri vitare non potuerunt; ibi me quoque interdum à vera via aberrasse? quodque in illis in eam revocandis præstiti studium, id ab aliis, te præsertim, qui præter cæteros, & præcipuè potes, me exspectare? Hoc effecisse me spero, ut nonnulli è turba eruditorum, qui hæc legerint, in Veteris rei Nummariæ summis enuntiandis, attentius, & consideratius sint locuturi: quod si illud accedit, ut aliquis ex vobis literariæ rei Principibus, meo conatu incitatus, præcipuam quæstionem, doctius, & accuratius explicet, non minus id gratum erit, quàm si ipse rem acu tetigisse judicabor. Erant nonnulla, quibus non inutiliter, opinor, plures paginas produxissem: sed quia inter edendum natis, & operarum instantia, & labores ordinariæ functionis, otiosius expendendi (in quo rarò mihi satisfacio) spatium denegabant, in aliam occasionem, ea reservavi. Libros per occasionem remittam, aut si citius indigebis, ut quosque petes. Illud scire velim, constetne tibi, uter prior Budæus, an Portius sua publicarint: Nam neuter alterius meminit, & primus videri vult observasse, decies sestertium, decies centena millia, nummum significare: item sestertia, non nummum esse unum, sed pecuniam seu collectionem mille nummum. Ego Budæo primùm adscripsi, quem legeram; post, altero inspecto, dubitare cœpi. Isaaci tui fortuna non delector minus, quam si ipsi mihi contigisset; Deumque precor, ut sospes ad vos sospites cum Thesauris suis redeat, & tam doctam, sapientemque peregrinationem, summo cum literarum emolumento, & æterna (qualis tamen ante est) Vossii nominis gloria seculis commendet. Petri Fabri semestribus aliquando uti velim, si lubet, & carere potes. Adjeci tuo exemplaria tria incompacta, quorum unum Matthæus tuus, ad se recipiet, alterum Amplissimo Hoofdio, tertium Cl. Corvino, quod commodò fiat tuo, trades, cum officiosissima salutatione. Velim cognoscere, satisne tibi Latinè videamur dicere *Locum* Authoris, quod Galli appellant, *un passage*, & vulgo receperunt omnes: *Locus* Ciceronis, &c. *correctus*; &

similibus; etenim cœpi & hic hæsitare. Unum rogo fortassis nimium familiariter, ut si legeris Libellum, & aliqua probaveris, verbo scribas, non sine aliquo fructu publico editum: Id autem peto, non vanæ ambitionis causa (à qua procul absum, & sic nunquam me ita frontem perfricuisse, ut hoc peterem) sed ut viso hoc testimonio, gaudeant illi, qui sumptum editioni præstiterunt, Curatores nostri. Eadem causa admisi, in fronte Operis triatum illum, post maximos Viros, &c. cujus me sanè pudet; sed hoc illice fuerunt invitandi ad nummos. Vale, & salve, Vir incomparabilis, cum gravissima Matrona tua, Liberisque, à quibus auctam tibi domum feliciter, & auguror, & opto.

Daventriæ: Postrid. Eid. Decembris.

Cl. Barlæo proximè scribam, & mittam exemplar una cum observationibus, quas promisi ipsi, necdum habet. Collegæ mei Dieftius, Christenius, Isendornius, te plurimum salutant.

CCCLXXX.

Vir admodum reverende & Princeps Historicorum nostri Seculi,

SUMMAS T. R. gratias ago pro dono utriusque scripti tui pereruditi atque elaborati. Prius in quo de Christi genere annisque accuratè differis, evolvere incepi. Quamvis cum tussi senili interdum confliet, non tamen ea sicca est, atque adeo aspera, ut pulmonem meum nimium quatiat, vimque molestat mihi aliquando pituitam pectore meo expellendi impediat. Qua vi munitus, utrumque munus meum; Academicum scilicet, atque Ecclesiasticum fortiter ac constanter etiamnum præsto. Quo nomine quamplurimi amici mei probitate atque ingenuitate tibi similes, mihi & coram & per literas familiares suas tecum gratulantur. Pro qua amica gratulatione, sicuti me tibi tuisque, ita me illis illorumque liberis ac propinquis summo perè devinctum esse lubens agnosco. Epithalamii in nuptias unicæ filię meæ cum Johanne Pollione Edamensis Ecclesiæ quondam Pastore ante annos viginti septem connubio junctæ à T. R. conscripti, probe memini, illudque aliis carminibus tuis in Doctoratus mei Theologici honorem compositis adjungere decrevi, nec non cæteris versibus intimorum amicorum meo-

meorum, tam veterum, quam recentiorum : sed priusquam illud faciam, ea de re privatum tecum, oblata occasione, colloquar, & cum eximio vate ac vicino tuo D. Barlaeo, qui nuperrimè suo quoque epithalamio nuptias nepotis mei Johannis Pollionis condecoravit. Jussi nepotem meum nunc civem vestrum, ut amicitiam vobiscum inchoatam, quibuscunque poterit rationibus, foveat. Unum exopto, ut quanta, tum propter te, tum propter Conjugem tuam vultum ac mores magni Patris sui representantem, liberos vestros complectar benevolentia, aliquando ipsis re ipsa demonstrare possim. Uxor mea te tuamque officiosissime resalutat, ac mecum precatur Deum Opt. Max. ut sanctis lucubrationibus tuis è caelo cumulatissime benedicat.

Dat. Leidam
27. Decemb.
1643.

T. R. addictissimus,

Joh. Polyander à Kerckhoven.

CCCLXXXI.

Vir Celeberrime,

ACcepi præstantissimum munus tuum, quod eo mihi commendabilius est, quia id à manu tua habeo. Fecisti sane, ut cujus eruditioni omnia summa hætenus tribui, ejus etiam humanitatem ac benevolentiam deprædicare debeam. Serius verò vices scribendi ad te occupandas censeui, ut spatium haberem lucubrationes tuas evolvendi, quæ diffusam lectionem, raram eruditionem, & subtilissimum judicium, adeoque characterem tuum ubique referunt. Gratulor mihi cateroquin, quod pleraque quæ de Genealogicis Controversiis, & Anno Natalitio in dubiis meis annotaveram, suffragio tuo comprobari videam. Quod ipsum non parum me in eâ, in quâ hætenus fui, sententiâ confirmat: Dissertationem tuam de tribus Symbolis summa cum voluptate etiam excussi, ubi ea nos docet, quæ nondum animadversa à viris etiam eruditissimis fuere. Nosti verò ipse melius omnibus, in argumentis id genus varia occurrere, in quibus licet *ἐπιχρησθαι*, propter multa veterum dicta, in quibus non usquequaque sibi constant. Antiquitatis studium meritò à te commendatur, & eruditis omnibus commendatum esse debet, modò summa semper primæ antiquitatis habeatur ratio, & ad eam revocentur secula omnia sequiora. Quod & tibi ita videri certus sum. No-

bilissimum Salmasium reducem habemus, & ab ipso habebimus propediem varia Opera eximia, quæ affecta hætenus reditum Authoris, & ultimam manum expectarunt. Nihil nisi magnum & inusitatum ab utroque vestrum nobis & orbi literario polliceri debemus. Vale, Vir Celeberrime, & me ingentem eruditionem tuam suspicere, & Vossiano nomini, cujus summa ubique meritò Claritudo est, devotissimum esse persuasum habet. Scripsi *ὡς τὰ γὰρ*.

Lugd. Batav. Id. T. omni cultu & officio,
Jan. Cl. Id. XLIV.

Freder. Spanhemius.

CCCLXXXII.

ELige sis, Vossi Amplissime, socordiane hoc silentii imputatum velis an occupationibus quarum in perpetuo me rotata & conflictata versari scis cum Politicorum, tum Aulicorum, item & præcipuè Militarium. Quidquid sit, fatale fuit, Barlaeum, semel mihi elapsum, denuo inter nos commeari, ne quid à me literarum traderetur, nisi tam amica manu. His ommissis, gratiam habeo & referre velim, de munusculo imprimis grato; docto denique & præstanti, ut sunt tua; sine fuco dicam, supra seculum omnia & ejusmodi, ut cum esse tu quidem desieris, paucis animus sufficiet talia aggrediendi, nemini vires exequendi. Perculisti me vero, mi Amice, adversa valetudine quacum te tres totos menses conflictatum nuncias. Absit, absit ingenti animo ægre ut sit in hoc tugurio! Neque vero deijci te pateris, qui in ipso corporis languore tantæ rei manum mentemque adjeceris. Maeste, mi senex, hoc vigore & stando quidem tu, id est hoc agendo quod agis mori destina. Differ autem hoc & protolle, quantum pote, si Patriam, si tuos, & in his me amas, qui te integerrimo affectu;

Hagæ-Com. Non. Feb. Tuus,
Cl. Id. XLIV.

C. Hugenius.

Narrabam hodie Barlaeo epigrammatia mihi hac nocte excidisse, quorum numeros non verba, tenerem. Occurrit unum commode quod eum ad ætatis fluxum & senii quasi *ἐπιχρησθαι* spectet; ecce hic adscribo, ut vel rideas, si tanti est, quæ in incendium

cendum hoc nostrum properè lusimus.
Barlaeus secum portat.

In Clepsydræ.

*Verto vitram? versæ redeunt ad munia stillæ:
Quisquis heri liquor hac transit, hic hodie
est.*

*Dicite, quæis summo jam descendantibus ævi
Monte parit primas ultima bruma nives.
Vespillo non esuriat, si fata senectæ
Clepsydræ dederint vertere cuique suæ?*

CCCLXXXIII.

Vir Præstantissime,

Postquam D. Warnerus, unâ cum pri-
stini favoris testimonio, à te donum
eximium mihi obtulisset; iter meditabar
ad amicos Amstelodamenses, quibuscum,
partim meo, partim aliorum nomine, ex-
pedienda erant negotia. Verum aliis cu-
ris iter remorantibus tandem læso pede im-
peditus, consilium mutare necesse habui:
adeoque quam ore gratiarum actionem
cogitabam, scripto consignare fas fuit.
Siquidem limatum & eruditum scriptum
tam multa me docuit, docetque, ut me-
ritò ingratus habear, ni id apertè fatear, &
saltem gratitudinem pollicear. Jam de-
mum verò agnosco, doctum eum demum
censeri, in quo omnium scientiarum genera
est invenire; unam atque alteram scien-
tiam, licet exactissimam, non perficere
eruditum virum. Quam se mutuò pro-
vehunt disciplinæ, si in una mente unam
fedem fixerint; & ibidem de gloria cer-
tent! Sed quia rarò fit, rarò huiusmodi
orbis lumina conspiciuntur, qualia Scalig-
er, Salmasius, Vossius alique paucissimi;
quorum scripta ubi lego, & relego, cum
summa voluptate, maximam percipio uti-
litatem, neque etiam satius me unquam
tenet istorum librorum, qui abundantia
sua, semper nova præbent fercula, quæ fa-
mem exasperant. *Arriadesv*, spero, initio
ætatis accipies, at diffimillimum muneri, quo
me beasti; diffimillimum inquam valore
& materia ipsa; quippe in quo Judæorum
Leges forenses novo codice, puta, secundo
cum Romanis conféro: Humi serpens, &
mediocribus insudans, cum nonnisi summa
meditemini, interim eo animos fumo,
quod vobis etiam placeam, meaque grata
esse & fore confidam. Vale amicorum
decus, & salvebis cum tua dilecta liberis-

que à nobis omnibus, imprimis ab eo
qui permanet

*Lugd. Bat. 5. Kal. Virtutum & eruditionis
Mart. a. peractæ
Salutis 1644.*

tua Admirator,

C. L'Empereur.

CCCLXXXIV.

Salve Vir Clarissime & Præstantissime,

Et si multo gratissimæ mihi fuerunt li-
teræ tuæ, quas Nonis Novemb. anni
1642. datas mense demum Augusto anni
superioris accepi, rescribere tamen adhuc
distuli, partim quod non esset, de quo
scribendum videretur, partim quod Isaaci
tui, vel nostri potius, literas expectabam,
quibus me de itineris sui processu exituque
certiorem faceret. Sed quoniam ille no-
stri omnino oblitus videtur, *Aio* certe lo-
cuto litare, quomodo Lipsius noster aie-
bat, parum pensi habet, nolui hanc tui
salutandi occasionem amittere, quam mihi
offert nobilissimus & literarum amantiss.
Juvenis, Eques Danus, qui has tibi reddet,
vivæque Epistolæ fidem de præsentis vitæ
meæ statu distinctius omnia narrabit. Ipse
quid rerum geras aut moliaris, scire qui-
dem studeo, recteque omnia esse magna
cum voluptate accipiam; nec tamen pro-
pterea te ullam temporis partem seriis tuis
subtractam mihi expensam ferri postulo,
cum satis mihi sit, ex Isaaci literis de vo-
bis quæ velim cognoscere. Tu fac ne
cessare eum patiaris, utque illis Pervigilii
verbis subinde aures ei personent,

*Perdidi vocem tacendo, nec me Phæbus
respicit.*

*Sic Amyclas cum tacerent, perdidit silen-
tium.*

Pieruccius noster, Pandectarum publicus
jam Interpres, utrique vestrum plenissi-
mam amoris & officii salutem verbis suis
adscribi petiit, quos & ego ex sententia
rem gerere ac valere precor ac voveo.

*Patavis ad diem Tui amantiss. & observantiss.
12. Mart. 1644.*

Gaspar Scioppius.

CCCLXXXV.

S. P.

Constitueram equidem, Vir longè clarissime maximeque, literis meis nunquam tibi molestus esse; ut tamen nunc tandem aliquando veniam polliceri mihi ausim apud te, facit eximius tuus erga me favor, quam ne apud illos nostros quidem dissimulasti qui in transcurso tantum te salutarunt. Tum vero officii mei esse iudico saltem semel manu & scripto testari, me esse inter singularis doctrinæ ac virtutis tuæ admiratores ac cultores non unum è multis. Id quod uti tibi persuadeas, est profecto quod etiam te atque etiam rogem. Ejus rectius testandi ergò nunc mitto quæ elapso anno edidi historici argumenti. In quo genere quoniam te primum æstimo, tuæ censuræ unice omnia submitto. Haud diffiteor procul à meo munere & vitæ genere, (ut qui totus praxi Medica occuper) esse quicquid istuc est studiorum, sed protractus sum invitatus in hanc scenam, ab iis qui novis artibus clarissimæ veritati nebulam objicere in laude collocant. Calixtus noster longam tibi vitam ac vegetam senectutem juxta mecum precatur: mittique per me voluit tibi disputationes quas proxime habuit de Transubstantiatione & visibili Ecclesiæ Monarchia, quas totidem ejusdem argumenti haud multo post sequentur. Haud dubito non ingratum fore munusculum hoc profectum ab homine ut tui studiosissimo, ita ejusdem tecum in sacris negotiis sententiæ, hoc est, animi Ecclesiasticæ concordie cupidi, cujus (proh dolor!) hodie sunt paucissimi. Vale Vir optime & maxime, & me porro benevolentia prosequere.

Helmstadii.
cl^o l^oc xlii.
27 Martii.

Tui Cultor,

Herm. Conringius.

CCCLXXXVI.

Clarissime Vir, Amice & Fautor exoptatissime,

Dissertationem tuam geminam, de Genealogia & tempore Nativitatis & Passionis Christi, à te donatam mihi, gratissima manu ac mente accepi: & ut legi, miratus sum summam in Antiquitate experientiam, ac Nestoris annos tanto auctori precatus sum, ut ex tanta experientia complures ejusmodi tractatus, in Ecclesiæ commodum, protruderentur.

Quàm vellem de nonnullis istius dissertationis tecum conferre, nisi molestum tibi esset: Sed accipe hæc pauca. Quæ de Panthere affers, non parum me erudivere. Est inter Judæos liber Blasphemus, Sopher-Tholedoth Jesu inscriptus, quem olim descriptum habui, sed D. Buxtorfio concessi, eo quod publicationem ejusdem cum Notis promitteret: in illo, memini me à D. Buxtorfio audire, Petri filium ex adulterio Mariæ fingi Jesum; hinc suspicabar Petri nomen esse פֶּטְרוֹ, pro פֶּתְרוֹ, quum soleant Dagesh in Nun resolvere alicubi Chaldæi: Buxtorfius affert nomen פֶּתְרוֹ in Lexico Chald-Rabb-Thalmudico, ibique allegat eundem libellum תְּהִלָּתוֹ יֵשׁוּ: sed apud neminem ex Scriptoribus Christianis illud nomen inveniri scribit, quam apud Damascenum; id quod video, ex Dissertatione tua, aliter se habere, quum & Epiphanius, & Origenes, hoc habeat. Porro, in assignanda causa Festi Natalis Christi, constituti in Decembrem, miror à te non fuisse additas duas alias, quas observavi. Prima est ex Joh. iii. 30. Illum oportet crescere, me vero minui. Verba sunt Johannis Baptiste, de Christo. Hinc Johannis Baptiste Festum in Solstitium æstivum, quo incipiunt decrescere dies, Nativitatis Christi in hybernium, quo crescere, constitutum videri possit: ut insinuat alicubi Prudentius, si recte memini. Altera est, quia mense Decembri celebrabatur Festum Martiris Deorum; cui surrogatum Festum nati filii Dei; idque pia, ut loquuntur, fraude; quam & tu ipse alicubi insinuas, de Christi mense dieque natali, Thesi III. Hæc nunc sufficiant, ne te cæteroqui fatis occupatum obruam. Cæterum

Qui has tibi offeret, doctissimus Juvenis, Polonus est, Rutgerus Hermannides, olim meus Convictor, nuper in Gallia magnis rebus adhibitus, nisi mors Richelii intercessisset. Philosophiæ ille ac Theologiæ hæcenus operam dedit, quidque profecerit in sermonis elegantia, tu ipse rectius judicare poteris. Patriam hoc rerum statu repetere vix audet: & sunt, qui tantum ingenium hic detinendum, atq; majoribus aptandum, judicant. Id vero, si fieri debeat, scio, nullum se in Hollandia certiorum atq; promptiorem commendatorem aut promotorem inventurum, Clarissimo Vossio. Hoc igitur nomine eundem tibi commendare volui, ut sive Pædagogia aliqua inter Mercatores vestrates, (aut Procures aut alios) requiratur, sive Rector Scholæ, aut Professor alicubi petatur, sive quocun-

quocunque alio modo, eum commendes, quo vel sumptus studiorum continuandum tolerare, vel talentum creditum rectè locare possit. Non dubito, ingenium huius Juvenis ipsum tibi placitum, vel nemine commendante. Quocirca confusus humanitate & benevolentia tua, abrumpo; & ut me amare pergas etiam atque etiam rogo. Vale. Deus te diu nobis incolumem præstet.

*Dabam Davenportie An. 1644.
vi. Idus Aprilis.*

T. Cl. observantissimus,

Henricus à Dieft.

Iusseram Janſonium tibi offerre meo nomine Theologiam Biblicam, nuper à me editam. Eam si necdum acceperis, procurabit, qui has tibi offerret, Rutgerus Hermannides.

CCCLXXXVII.

Excellentissime Domine,

Nostræ antiquæ familiaritatis tesseram bonis avibus, sub auspiciis magni Molini olim initæ, fractam deprecans coram tuo Isaaco filio Luca, Juvene eruditione modestiæque singulari eam interpolandam curavi, eique ad te literas mittendas tradidi, quarum responsionem adhuc desidero. Juvenem illum tui vivam imaginem præ se ferentem, eâ, quâ potui, humanitate sum prosequutus, quem iterum Lucam petiturum summis votis opteriebar. Sed spe frustratus, en iterum ad te literas exaro amoris, & observantiæ in te meæ testes locupletissimos. Te semper veluti numen literarum colui, tuæque typis edita exosculor, veneror. Rhetoricam, Grammaticamque tantum habui; si quid præterea in lucem editum, cura ad nos perferendum.

Hujus Epistolæ lator erit Sanctes Pagninus adolescens indolis præstantia, natalium splendore, modestiæ dote præclarus, nepos magni illius Sanctis Pagnini Sacræ Scripturæ interpretis, ubique terrarum notissimi. Istam petit urbem, negotiis operam navaturus. O quam vellem hunc tibi de meliori nota commendatum! Tuo patrocinio, clientelæ tuorum filiorum trado, addico. Hic à patriâ non degenerabit claritate, & probitate. Huic, obsecro, responsionem, literasque tradas ad me: illæ non aberrabunt. Operum tuorum Indicem mitte, vel si quid habes levi ma-

nu promulgatum illi tradere; tua enim mihi aurum coronarium, tuæ literæ ad me exarata in Cimeliarchio repositæ servantur. Te numen & lumen passim deprædico. Quare te obsecro, ut tui Cultorem benignus respicias, tuis responsis digneris.

Amaltheam Onomasticam jam diu in lucem edidi; bonis avibus? ignoro. Tuum de ea judicium opperior, quod semper in me benignissimum sensi in Polymathia, quam auctam, & Amaltheam etiam, ex unis geminas factas video. Quid si per te ibi typis recuderentur? Sublimi ferirem sydera vertice. D. Isaacum filium, si ibi tecum, meo nomine salvere jube. Ille saltem mihi tuo nomine rescribat. Tibi denuo ex animo commendo Pagninum, meque tuo patrocinio singularem. Deus te fortunet ad Pylios annos.

*Luca Non. Eruditioni probitatique
Apr. 1644.*

tuæ ex asse mancipium,

Josephus Laurentius.

CCCLXXXVIII.

Incomparabili Viro Gerardo Joh. Vossio, Jonannes Fredericus Gronovius S. P. D.

Accepi, Virorum maxime, redhostimentum ingens pro munere exiguo totque nominibus debito, ut omnem muneris gratiam dudum perdidit: accepi nihilo minoris pretii epistolam, non qualem mereor, sed planè qualem desiderabam, & aliquid amplius. Si expectasti ut ex gratiarum actione mea magnitudinem uberis tuæ & prodigæ humanitatis æstima- res, oportet te falli: neque enim studio meo & cupiditati faciendi eam quam amplissimam verbis sufficio: sed quandoquidem optimus es, animum, ita me Deus, optimum facile interpretaberis. Collegæ debita cum reverentia latitiæque acceperunt aureum munus tuum, meque gratias ingentes agere suo nomine iusserunt; id quod etiam coram faciet Clar. Christenius cis paucos dies, siquidem has, quemadmodum promisit, cras profectura uxor ejus portatura est. Libros nondum remitto, quia per studiorum varietatem nondum illis usus sum satis; neque tamen in mora ero, si te aut omnibus aut aliquo ex iis indigere te significaveris. Gratissimæ fuerunt

runt literæ Isaac tui, sed miror nihil eum cogitare de reditu, certè ne verbo quidem spem de eo propinquam facit; itaque &, quibus respondi, quasi Lutetiam iturum inscripsi. Fasciculum ad Crocium nostrum pridem destinatum, quia non habeo, cui commendem, denuo te respicere fidemque tuam interponere necesse habui. Quia enim interdum ad eum scribis, offerri tibi occasiones puto, aut facile resciscere per tuos lubet, si Nautæ Bremenenses adsint, quibus committatur. Ad des igitur hos tuis erga utrumque nostrum meritis, nisi grave est. Vale, Vir incomparabilis, & salve à me meaque cum tua & gente & animo Junia, totaque domo.

Daventriæ ad diem x. Kal. April. c1o Idc XLIV.

Si scirem ubi nunc ageret Franciscus Junius V. Cl. affinis tuus, libenter ad eum exemplar mitterem, & memoriam ei humanitatis, qua Londini sibi me devinxit, confiterer.

CCCLXXXIX.

S. P.

Vir Clarissime & Doctissime, Amice & Collega observande,

PETIIT à me D. Rosayus ut ei ad te viam aperirem. Vir est elegantis ingenii, promotus Doctor Medicus, in Mathematicis & aliis Philosophiæ partibus bene versatus. Quid quærat vel optet, ipse tibi exponet: Si possis eum in suo proposito juvare, non conferes beneficium in ingratum aut indignum. Scripsi ad D. Casaubonum, eique gratias egi pro munere, quod ipsius nomine à te accepi. Nunc tibi & D. Matthæo filio tuo gratias ago maximas pro tertia parte Historiæ, quam mihi, ipsius nomine, reddidit D. Senator Dubletius. Adfuit mihi hodie Doctor Forbesius autor Lucubrationis cuius primam partem tibi communicavit Elzevirius. Ipse Amstelrodamum se confert, ut cum Typographis agat; habet enim tertiam partem absolutam. Te inter primos salutaturus est, & dignum iudicabis tua admiffione & benevolentia. Affinis meus Molinæus adhuc cum diuturno illo morbo conflictatur; subinde tamen aliquas Conciones habet, cum ea iudicii lima, quæ nihil redolet morbi. Misit huc Philosophiam suam, id est,

præter Logicam, Physicam & Ethicam eadem Methodo brevi & perspicua. Expectamus hic D. Salmasium, cum Epistola de Coma, quæ valde comata est, quia cum promississet unum folium, excrevit ad octodecim vel viginti. Reliqua ipse tibi indicabit. Nos hic valemus, Deo gratiâ, tibi & tuis omnia fausta expetimus.

Rap. v. Id. Maias Tuus omni affectu & officio,
c1o Idc XLIV.

Andreas Rivetus.

CCCXC.

Eupantus Tyllbertucio * suo, *Tyllbertucius,
avide hætenus expectato & est Blitterswyg.
expetito, S.

TAndem igitur ades! Gaudeo & lætor vehementer. De dignitate Senatoria intellexeram, quam & tibi & Dominae Conjugi, totique familiæ quam solenniter tam candide gratulor, plurimum profecto & ipse in hoc honore tuo consecutus. Indigebam & apud Sicambros nostros amico, indigebam Tyllbertucio, qui & ingenii & eruditionis & prudentiæ ornamentis splendens literarum, quasi in nocte jacentium, fortunam illustraret. Non adhuc pretium suum apud gentem, sive Mercurio sive Marti deditam, ingenuæ Artes invenere. Atque ego cum in historia Patriæ occupari potuissem, neglectus sum. Jam quid præstem? Consenui: nisi post Imperatores Austriacos, quos absolvere nunc statui, Duces quoque Geldriæ repræsentem. Te expecto, ut uberiores de omnibus sermonem instituas: imo ut audiam tuis tot Amicos verbis loqui qui honorem genio tuo, & sic meo habuerunt. Sed quid ais? † Verultham
† Verultha
est Walther.
gravi Morbo affligi vehementer doleo, nostra, Literarum & reipublicæ causâ. Servet Deus Virum, qui in exemplum veræ bonitatis humanitatis & elegantiae natus est; ille meus, ille tuus, ille bonorum omnium. Votis locus est, quæ summum Numen ut spero, audiet; & magnum nobis Pacis conficiendæ momentum corroborabit. Cæterum res meæ, ut solent; valetudo pro ætate, studia pro valetudine. *Biviam* tamen *vita humanæ* paratur ut publici juris fiat. Aphorismi Politici partem rursus lectionum atque dissertationum constituunt: quod opus, nisi fallor, decumanum erit, & decumanis quoque typis dignum. Quid

Quid etiam? Imperatores in manu sunt una quidem opera Fredericus & Maximilianus, ut reliqui deinde Carolo adjungantur. Hæc Angellistini Epistola te vel maxime spectat, & quasi ad te directæ. Mitti sibi optimus eam parens tuus cupiebat. Mitto sed ut à te accipiat, cum uberrimo salutis voto. Arcis negotium quod in se suscepit, hac occasione commendo. Te rogo ut cum venies, conferre utrumque Diploma literasque Regias à sanctiore Ærario confirmatas, velis. Sic nunc te complector toto animo & lætam felicemque esse jubeo, lætam Dominam quæ tam feliciter te recepit. Salveat Eubisæ noster: tu salve, vale, iterumque vale.

Lovanii in Arce 3. Eid. April. clō Idc XLIV.

Siquid de *Mentalco* * certi, quæso sciam. Stemma ejus apud Eubisam videris, hic te exemplar expectat. Remitto fasciculum, Caramveli inscriptum, is enim in Germaniam jam Abbas profectus est.

Lovanii in Arce Eidib. April. clō Idc XLIV.

O tristem optimi Verulthæ & nimis repentinum casum! In uno malo plura mala. Sed unum tamen maximum; quia qui dignissimus longiori erat vita, sic nobis & Regi & Reipublicæ ereptus. Hæret & mihi animus, hæret calamus, & quasi obstupescit. Idcirco quæ scribenda erant differo vel etiam ut in sermonem conjiciantur. Ergo nec de Arce jam dico, nec de altera petitione, quam non unis jam literis Hamiresio commendavi. Mentalcus & suas partes exequetur. Te videre & complecti cupio. Vale.

xvii. Cal. Maias clō Idc XLIV.

Ab Aheno alterum jam fasciculum accepi, in quo præter tabulas Geographicas imago D. Vossii erat vere pulchra & venerabilis, in pretio habenda mihi & honore, sed tu nimis in me effusus es & propemodum liberalitate peccas: bene rursus meriturus: si gratum me esse fiveris. Erat quidem in Epistola fasciculus, & sic tamen loqui vel maxime videbaris, ego potius qui nunc scribo mutus sum quia munus nullum mitto. Veni, veni, ut dare possim.

CCCXCI.

V. cl. Gerardo Joanni Vossio
Janus Vlitius S.

Immemor profecto omnis beneficentiæ & benevolentiae tuæ fuisset, Virorum decus, quæ etiam puerum me totum tibi devinxisti; si non isthac saltem occasione memoriæ studioque tuo, quo omnes vel mediocriter φιλομέσους prosequutus semper es, me insinuarem. Aut si id nimium audaciæ est, mandata exhibeo. Fasciculum isthunc à Cognato Blittervicio Bruxellæ mihi commissum, ab Affine tuo Fr. Junio, quem Antuerpiæ, dum Arondellium Comitum resalutatum ibam, & jamdudum in domuitione nostra ex Anglia familiarem habere contigit, salutem plurimam tibi, tuæ, tuique. Parem à Puteano Heroe, quocum aliquandiu Lovanii otium egi, quod regioni isti intensissimus calor indixerat. Ibi dum essem, de reditu Isaaci tui (at quanti Viri!) rumor increbuit, quem faustum illi omnes fovebamus, quanti interesse censebamus. Vivat dignus pater filius; & dignissimus, qui vivat, pater. Ego interim rei domesticæ insudo; Uxorem, Senatoris Hesselii filiam, duxi; apud quem commoramur. Quo mandata tua, si qua pro jure, quod summum in me habes, imperas, ut dirigeres, scire hoc te volui. Vale, Decus meum, & quo olim cœpisti favore, prosequi porro ut digneris rogo. *ὦς τῆς αἰ.*

Datum pridie Idus Sextiles, Hagæ. clō Idc XLIV.

Quas addo, Daventriam ad communem nostrum amicum deferendas, quia discefferat hinc tabellarius, ne grave sit curare.

CCCXCII.

Amplissime Domine,

Inclusas Alosto ad me misit Guilhelmus Hefius, ut ad Amplissimam Dominationem tuam destinarem. Nuper scripsit ad me Madrito D. Laurentius Cocchi Italus, aliquot Nunciorum Papæ in ista Aula Secretarius, percunctatusque est quid iis literis sit factum, quas ante annum alterumve Domino Vossio inscriptas, mihi tradi unâ cum libro Hispanico curarat.

rat. Si otium esset eruditissimo Viro, ut paucis ei rescriberet, rem mihi gratissimam faceret; vereor enim ne, ut est genius Italarum, se vel ab eo contemptum, vel à me delusum existimet. Vale, Vir amplissime, eique & à me & obsequia omnia defer, & salutem plurimam precare.

Antwerpia vi. Junii 1644. Ampliss. Dominationis tuæ

Humillimus Clientis,

Johan. Bollandus.

CCCXCIII.

Clarissime & eximie Vir, Domine & Amice plurimum honorande,

Literas tuas, unà cum adjuncto Librorum tuorum eruditissimorum dono, scriptas xv. Kal. Quint. anno cō iō c xlii. hoc demum anno iv. Kal. April. accepi. Miror, ubi tam diu delituerint; nec ipse minus, sine dubio, miraberis. Ante annum & quod excurrit, proficiscebatur ad vos quidam meorum familiarium, Mauritius Bonerus. Ei nonnulla ad te perferenda tradideram, quæ an reddiderit, nondum me docuit. Credo literis ejus idem contigisse, quod tuis; & forte adhuc è latibulo alicunde advolaturas. Pro munere autem illo tuo, si quantas meretur, aut quam acceptum fuit, tantæ agendæ sint gratiæ, fateor mihi verba defore. Imprimis verò animi tui candorem & moderationem cum summa eruditione conjunctam veneror. Has tibi reddet nobilissimus juvenis Johannes Christianus à Boineburg, dignus sanè, quem tuâ benevolentia complectaris. Hyemem quæ præterit, apud nos hic exegit, commendatus quidem à serenissimo Principe Ernesto Saxonie Duce, sed à suâ ipsius virtute & discendi cupiditate longè commendatior. Quali latratu artifex novus, qui à nobis ad partes transiit, & apud vos hodie degit, me infestat, non potes ignorare. Sed feci ei potestatem latrandi, quantum & quamdiu libuerit. Moguntia pari rabie in me nuper insurrexere: quibus tamen respondebitur, ut veritas vindicetur. Prodebunt etiam hæc ætate, si Deus annuat, Exercitationes de visibili Ecclesiasticâ Monarchia, Transubstantiatione, Sacrificio, Pontificiis oppositæ. Tenuia sunt quæ his adjunxi; inspicias

si vacat. Deus te diu servet incolumem bono publico. Vale.

Tui amantissimus

Ex Acad. Julia quæ est Helmstadis x. Kal. Jun. cō iō c xlii.

& observantissimus,

Georg. Calixtus.

CCCXCIV.

Vir maxime,

Næ malum nomen sum, qui tamdiu sum in ære tuo, necdum me à nexu libero. Præclara ingenii tui monumenta me totum tibi obstringunt, ut nihil dicam de humanitate, qua filium meum adolescentulum illotum, tam arctè complecteris. In prima occasione tentabo an officio meo satisfacere possim. Emersi hisce diebus per Dei gratiam è gravi & periculoso morbo. Pituuta enim cerebrum meum ita pertinaciter occupaverat, ut per menses aliquot à suggestu Ecclesiastico me excluderet, defluens ad asperam Arteriam & cannas pulmonarias, unde raucedo, in senibus vix sanabilis, oborta fuit; quam tamen per Dei gratiam diætæ & pharmacis hac vice absterfi. Ignosces, Vir summe, quod meritis tuis non respondeam, ex quo plurima disco. Jam commendo Henricum Thalemejerum, Theologiæ studiosum, Lippiatum, qui venerandæ canicie tuæ manus exosculari & salutigerulus esse amat. Hoc volui. Bene vale & salve, amicorum & virorum, quos suspicio, maxime.

Excell. tuæ studiosissimus,

Brem. $\frac{1}{2}$ Jun. cō iō c xlii.

Ludov. Crocius.

CCGXCIV.

Vir Clarissime,

EX quo humanissimis pariter ac doctissimis colloquiis me dignatus es, varius me & infelix casus volvit ac revolvit. Invalescente enim, qui jam à multis mensibus inceperat, parentis mei morbo, vix Flandriam, habitationis locum, pedibus calcaveram, quin illico reducem me in Hollandia non exoptant modo, sed & quam maxima festinatione revocant. Et ut

ut quamplurimum malum unum premit aliud, ita funestum illud, de desperata parentis optimi valetudine, nuncium, alio multo tristiori comitatum ad aures meas pervenit, nempe eum miseram hanc vitam beata morte commutasse. Qui quamvis ultimus Christianorum & exoptatissimus sit terminus, ut qui animam è miserrimo hujus corporis ergastulo demigrantem, sperata beatitudinis possessione beat, dici tamen non potest quanto hoc ipsum mœrore animum meum percussit; præsertim cum oculos in fratres sororesque converterem, parvulos adhuc, qui pio pariter ac solerti patre orbi, variis rerum casibus subjecti, & diluvio declinantis orbis objecti videntur. Hæc in causa sunt, V. Clar. quod promissis meis de mittenda Ecclesiarum Zelandicarum *αποστολή* ad Ecclesias Anglicanas, hætenus non satisfecerim. Verum tristissima animi fluctuatione utcunque pacatâ, ubique sollicitè inquisivi, ut quod addideram effectum darem. Quod nunc præsto. Si quid hic est præterea in quo opera mea aliquid tibi commodum afferre queat, felicem me prædicavero, si literis hoc indicaveris. Porro, summo opere mihi & Ecclesiis nostris gratulor, quod & tu V. Clar. super intricata de pilis controversia sententiam tuam aperire volueris, utinam id aliquanto prolixius factum fuisset. Sed non video quomodo Cl. D. Salmasius p. 25. f. tantam alendis comis licentiam concedat, cum ipse ore mihi dixerit, intonsos capillos, vel intonsis similes virorum naturæ prorsus contrarios esse, quum sane (ut dicebat) gestari non possint efflui, sed necessario, foeminarum instar, sollicitè repurgari, religari & variis nodis vinciri debeant, quod viros utique non decet. Hac de re tecum Vir Cl. præsens, si occasio ferret, libenter sermones miscerem, ut & de aliis nonnullis, quod in aliud tempus differre cogit necessitas. Sed gravissimas tuas, quibus Ecclesiæ & Reipubl. bono implicatus es, curas, literis prolixioribus interrumpere religio mihi est, eoque finem facio, summum numen supplex orans ut te, Vir Clar. Ecclesiæ suæ & orbi literato diu servet incolumem.

Dabam Ardenburgi
17. Aug. Æræ Chr.
1644.

Illustriss. nomini

tuo dicatissimus,

Daniel Gravius.

CCCXCVI.

Gerardo Johanni Vossio, V. Clariss. &
Eruditiss. D. Joseph. Laurentius
S. P. D.

Totus in læticiam diffusus frontem exporrexì, cum tuas tamdiu exoptatas vidi, legi, relegi, spirantes adhuc antiquum in me amorem, Lethæis nunquam delendum aquis, vel locorum longinqua intercapedine. Te enim semper ut literarii cœli solem colui, tuum filium suspexi, tuâ scripta Palatino cimeliarcho non indigna tanquam sacrosancta cum veneratione pertracto; sed vix unum atque alterum exemplar in nostra urbe, adeo rara, quia præclara. Ego Rhetoricam contractam, Oratorias Institutiones, & Grammaticam, & nihil præterea habeo, aveo tamen reliqua typis tradita nosse, quæ curabo ad me perferenda. De recudenda Polymathia cum Opusculis Philologicis, item Amalthea cum atactario multo ad trientem usque, adeo ut opus ferme in duplum excreverit, imprimendum in folio, ut dicitur, utrumque te obsecro pro eâ, quæ inter nos maxima intercedit familiaritas, ut urgeas, instes, omnem moveas lapidem pro amico tam charo, qui se suaque tibi nexa mancipioque devovit. D. Isaacus si rediit (ut spero) incolumis, à me plurimum salveat, quem sequestrem voveo inter me & Typographum, cum quo agat sedulo, serio peragat, meque certiore reddat per eundem Pagninum, quem tibi de meliore nota commendavi. Si quid in Italici oris scire cupis, aut habere, me tibi Jovi Mercurium cense, qui statim tabellis alatis nunciabit, aut asportabit, quæ tibi in votis. De D. Balthasare Bonifacio mihi amiciss. nihil mihi certi, per proximum Tabellarium aliquid scribam. Heinsius, Farnabius, adhuc in vivis? Literatorum proceres ibi & alibi agentes nosse percipio. Italia nostra destituta luminibus jacet in tenebris. A tuo filio de hoc certior, oculato teste fies. Mihi vivere cupiens & amicis sexagenarius ad coronidem perduxì publica stipendia, rude jam donandus, emeritum meritis, sed non recepturus, quæ est publica horum temporum calamitas. Literis aliquando te compellabo, (ah ne dedignere) respondeat D. Isaacus, ut tibi parcas bono publico valde laboranti. Me tibi commendatum ex corde amantem redama. Ita Deus

M m

te

te tuaque fortunet, felicitateque maectet
aeterna. Vale.

Luce Id. Aug. c1o 15 c XLIV.

CCCXCVII.

S. P.

Biennium est & semestire, cum binas
tuas literas grata manu & mente ac-
cepi, viva certè Vossianæ humanitatis &
nivei candoris exemplaria. Etenim ex
iis intellexi commendatitias meas, quas
optimi juvenes Dunsius & Erasmus
Hammeliu tibi meo nomine tradide-
runt, plurimum ponderis apud tuam
humanitatem habuisse. Hunc affectum
in me & meos gratissima mente, uti par
& æquum est, complector; ac voveo vi-
cissim datum iri mihi occasionem de te
tuisse bene merendi. Hocce mutuum ac
meritum gratificandi tibi studium auxit
donum illud eximium, quod humanissi-
marum literarum velut benignum quod-
dam auctarium esse voluisti. Posthumum
scriptum indigito à filio tuo charissimo
b. m. DIONYSIO VOSSIO elaboratum
maximâ cum ingenii & eruditionis laude.
Ego illud inter rara meæ Professionis *reputa-*
na numero. In eo non unum Musarum
certamen iniri jucundo quodam oculorum
spectaculo observare licet. Interpret *o u-*
gelius ætate minor grandævo Mofi Mai-
monidæ (sit venia Homericæ & Virgili-
ano Patronymico in Prosa) autori scripti
Rabbinici de Idololatria, viro magnæ au-
thoritatis & celebritatis apud Rabbinos
& Christianos Ebraicæ Linguae æstima-
tores haut cedit. Imo quo magis præstat
puritas Linguae Latinæ Rabbinismi farra-
gini, eò laudabilior est interpretatio ipso
textu. In Commentariis verò tres Linguae
cardinales certant de Primatu. Agmen
ducit Rabbinicæ Antiquitatis peritia, &
Ebraicæ Literaturæ cognitio ætate juvenis
unum & viginti annos nati major, atque
veteranos in admirationem rapit. It com-
es Græca & Latina, notisque grande
decus & lumen addit. Etiam Ecclesiasti-
cæ antiquitatis radius subinde Lectoris ocu-
los ferit. Hæc omnia in Drusii monu-
menti & aliis id genus paucis comparent.
Aulim affirmare, si, postquam ex eph-
ebis excessit, tanta dexteritate Codices
Rabbinorum evolvere potuerit, atque eru-
ditis Commentariis illustrare; quod ætate

grandior redivivus Drusius audisset, si
cœptam horum studiorum telam pertexere
ipfi fuisset propositum: sed aliter visum
sapientissimo Deo, humanarum rerum mō-
deratori summo, cujus opera & judicia
quia nobis sunt abyssus, idèd sola venera-
tione metiri ac complecti ea obligamur.
Ut autem debitam animi gratitudinem ali-
quo indicio adprobarem tuæ humanitati:
ecce prodit de paupertinâ musei mei sup-
pellectile gemina Exercitatio antiquitatis
literariæ, si non tuo muneri dignitate par,
saltem ob mittentis affectum & gratifican-
di studium, haut ingrata, uti spero, tibi
futura. Claudet epistolam, qui eam ex-
hibet, Nicolaus Matthiæ juvenis ab eru-
ditione, modestiâ, vitæ integritate, aliis-
que virtutibus commendatissimus, quem
ut tuo amore & favore in posterum com-
plecti velis, salutaribus studiorum consiliis
sublevare, atq; peregrino patrocinari haut
grave ducas, inter maxima publicarum ac
privatarum occupationum gravamina, qui-
bus te in dies, imò horas distractum teneri
novi, præsentis scriptionis votum & sum-
ma est. Raram tuam humanitatem erga
se literis ad me scriptis oppido deprædi-
vit Dunsius, adeo ut aditum ad tu-
as Musas subinde tibi patere gratus agnos-
ceret. Quod si præsentem, qui in poste-
rum à tuo ore pendere constituit, simili
benevolentia dignum judicaveris, præ-
ero collati hujus in Nicolaum nostrum
favorabilis beneficii te haut pœnitebit, &
parens honoratus Regiæ hujus Metropolis
civis maximopere demereri conabitur,
apud me verò ejus memoria erit sempiter-
na. Vale, Vir summe, summoque studio
bene de literis ac literatis mereri perge.

Hauria Kal. Oct.
c1o 15c XLIV.

Tui nomini addictiss.

Tho. Jo. Bangius, M. S.

CCCXCVIII.

Clarissime & Celeberrime Vir, Amice & olim Colle-
ga conjunctissime,

NON possum pro nostra amicitia quin
tibi gratuler felicem reditum Isaaci
tui, quem in transcurso tantum vidi, &
velut fulgetrum. Occupati fuimus tum in
S. Cœnæ præparatoriis; quæivi eum sub
vesperam diei dominicæ apud Senatorem
Dubletium, apud quem existimabam eum
divertisse: qui mihi significavit hospitio
materteræ fuisse usum, & abiisse paulo
ante

ante Leydam, ubi expectabatur à D. Salmasio qui conquestus est se præteritum fuisse. Causam satis conjeci, quod à me ipso intellexerit recenter, morbum illum qui tibi duos abstulit filios, filias ejus binas intra paucorum dierum spatium letho dedisse. Sed id resarciri facile poterit per literarum commercium, missis, si quos habet pro illo, fasciculis. Cum autem ad te redierit auctus divite suppellectile intus & extra, spero eum deinceps tuo consilio, & amicorum flagitationibus concessurum, ut publici juris faciat nonnulla, quorum editione doctos & pios sibi devinciet; præsertim si Ignatii Epistolas quas habet pleniores ex Manuscripto Florentino nobis communicet. Qua de re paucis apud eum egi, monitus ab ampliss. Sarravio, qui id enixe petierat. Samuel Bochartus affinis meus per literas suas testatus est, quantum debeat filio tuo, qui ipsius causa à via tantopere deflexerit, ut Cadomi eum inviseret, qui ex communicatione cum eo non dubitat quin patris vestigia sit sequuturus. Narrabit etiam tibi quid molitur vir ille doctus, & quæ ipsi fuerint objecta impedimenta ne quod susceperat peregerit, aut isthic peragere spes aliqua superfit, ubi tyrannis etiam in bonas literas sævit, erit à nobis evandus in parturitione foetus utilissimi. Tentabimus [nempe quia Cl. Viri L'Empereur & Golius possent emendationi præesse.] J. le Maire, quod se facturum suscepit D. Salmasius. Si minus succedat videndum erit, an commodè Amsterodami cudi poterit opus tam varium & tot Linguarum Characteribus aspersum. Tu cum filio poteris communicatione & nobis consilio præire. Hic expectamus brevi nostros bellatores, & intra biduum Gynecæum, qui hætenus per semestre solitarii viximus. Causam intellexi à D. Dubletio, cur spe nostra frustrati fuerimus qui te expectabamus, ut hic in amplexus tuos veniret filius. Firmet Deus valetudinem tuam, & D. uxoris tuæ, efficiatque ut diu filii superstitis senectutem vestram solentur, & pulchra prole beent, tam corporis quam animi. Affinis Molinæus semper cum veteri morbo conflictatur, ita ut tamen supersint vires quibus die & nocte perambulet; & subinde conciones habeat elegantes & efficacissimas. Ego & uxor valeamus (Deo gratia) vobisque omnia prospera vovemus. Vale.

*Tibi & tuis
addictissimus,*

Andreas Rivetus.

*Hagæ-Comitis
xiii. Octobr.
c1610 c xlii.*

CCCXCIX.

Clarissime Vir,

Mitto legenda, tum quæ disputanda brevibus proposuit Canonicus, tum quæ edidi per Moguntinum quendam: qui tamen menda reliquit satis multa. In Latino opusculo prodidi quæ vulgo hic terrarum sunt incognita. Placetne perlustrare, ac mihi dein reddere? Necdum enim suppetit mihi exemplar aliud. Ambiant ut video, tuum contra me iudicium & evulgaturi quidem. Per me tibi licet quod lubet. Hoc tamen scio neminem posse quidquam definire contra me solide, qui non audierit me penitus, postquam objectionibus impeti cœpi ab iis, qui, ut candide eloquor, pugnare contendunt, quæ non pugnant, & sequi evidenter, quæ non sequuntur: ac profecto nostrorum omnium sententia, res ita habet, ut scribit Petavius in schedula, hisce inserta. Prudenter Lutheranus, libris editis clarus, non ita pridem, epistola quadam ad me; malle se audire partem utramque, quam iudicem agere. Sapit item piscator, qui ante ictum sapit. Id est, per quem tibi creatur molestia, rectius ille curaret res magis necessarias. Ego non vacillo; tuiturus matrem facile; qui tela conjiciuntur in eam non fortiora quam est juncus. Hæc animo scribo candido, atque in te tuosque amicissimo. Utinam gratus reapse esse possim de benevolentia, quam à tot jam annis, indignus ego expertus insigniter. Salve, Vir optime, mihiq; omnibus modis honorande.

*xxvi. Octobris
c1610 c xlii.*

Bartoldus Nihufius.

CD.

*Clarissimo & Venerando D. D. Ger. Jo.
Vossio, Joh. Smith S. P. D.*

TAM prolixa, Vir Clariss. humanitate Commentarium de Batavorum oppido scriptoremque ejus antehac complexus es, ut ille à Typographica fornace calens ante alios ad te merito properat, cujus beneficio quoque & opera lucem videt. Si nunc æquè, atque nuper expectationem sui apud te sustinet, & tuetur, est quod mihi gratuler & de aliorum judiciis securus serio cogitem de excutiendo suppellectile antiquaria. D. Blauwium multis negotiis distrahi

M m 2

distrahi sentio, eadem tamen qua exemplaria ad Bibliopolas mittit opera, mihi amicisque vacabit spero, inprimis ad externos, in exemplari quod doctissimo Sam. Bocharto, Reformatæ Cadomensis (Caen vocant) Ecclesiæ Pastori inscribo qui nobis omnium gentium origines, ex Cap. Genes. X & Orientalium Linguarum monumentis recludit, & altero quod D. H. Grotio quamquam ignotus, cum Literis destino, illius opera quam in Bataviæ Republicæ antiquitate describenda posuit, meretur, ut qui illum ducem sequimur, illi nostra quoque probemus. Si tamen res apud Blauwium secus cedat, prius exemplar D. Riveto commendabo, super altero te consulere cogar. Interea bene vale, Vir Clarissime, publico rei Literariæ bono, & fave.

Scrib. Noviomagi xxiii.
Greg. A. cio iō c xliv.

CDI.

Incomparabili Viro Gerhardo Joanni Vossio, Johannes Fredericus Gronovius S. P. D.

ANte paucos dies scripsi ad te unas. Vir maxime, easque ad amicum misi, ut tibi traderet. Si tamen moratus esset, præbente occasionem politicissimo illo juvene, qui has adfert, non committerem, ut ipse in mora essem mihi, sed *et ad te* de eodem argumento te interpellare constitui. De septertiis, quod suaseras, diatribam habemus paratam, & ornatam, sic ut aliqua secunda, cum spe lucem videre possit. Budæi, Hotmanni, Agricola, Scaligeri, Grosippi, virorum longè eruditissimorum plurima *in quibus*, ea modestia, qua par est deteximus: Nostram sententiam dilucidè exposuimus, & argumentis tantum non apodicticis adstruximus. Libellus erit sex aut septem philyrarum: & consenserunt amplissimi curatores nostri, ut sumptibus iis, quibus Theses describuntur, impensa impressionis adscriberetur. Itaque nunc in eo sum, ut extremam manum imponam: nam ni properem, liber fiet grandis; Ita quotidiana plura subnascuntur. Caterum præter illos, quos nominavi, quosque vidi, scripserunt, ni fallor, de re nummaria, Portius, Matt. Hostus, P. Ciacconius, Erycius etiam, ni fallor, Puteanus. Quamquam eos magis descripsisse ex illis putem

sua, aut de reducendis veterum summis, ad nostræ pecuniæ summas, sollicitos fuisse, quàm quippiam attulisse novi, aut inquisivisse in formulas veterum: tamen videre eos gestit animus, antequam nostra edantur. Eos igitur, si servat Bibliotheca tua, commodato ad paucos dies petii: ipsum quoque Grosippum: non enim satisfacio mihi, in legendis denuo, & considerandis eorum sententiis, cum quibus mihi res est; præsertim cum brevi corrigere nostra omnibus permissurus sim. Petieram præterea Grammaticorum corpus, & Schotti Observationes Lutschianas. Quod commodò fiat tuo; repeto illam petitionem, & ut sine mora, siquidem potest, compotem me facies voti, per primos Tabellarios; nam sumptum hunc lubenter faciam, dummodò, uti desideratis potiar. Vale, Vir incomparabilis, & salve cum gravissima Matrona, omnibusque tuis.

Daventriæ a. d. xii.
Kal. Nov. cio iō c xliv.

Fabricius noster, ab Episcopo Lubecensi Duce Holsatiæ; ad Consiliorum munus est evocatus: cujus honoris, fortunæque causâ ex animo gaudeo.

CDII.

Clarissimo & doctissimo Viro D. Gerardo Jo. Vossio, Amico charissimo, S. P.

ACcipe, Vir clarissime, promissam dissertationem de consensu doctrinæ Augustini de Gratia Dei, cum perpetua Catholicæ Ecclesiæ Doctrina. Qua dissertatione inspecta, facile perspicies, tui dilectionem, & doctrinæ tuæ reverentiam & exultationis tuæ curam, etiam tunc cum te de facie non nosses, tantum apud me valuisse, ut nisi muneris divinitus impositi necessitas me impulisset, non fuero palam daturus hanc (licet mitem & benignam & cum honoris tui Præfatione conjunctam) significationem disensionis meæ ab eo quod abs te profectum esset. Tametsi persuasum habeo, & jam ex diuturna consuetudine comperisse mihi videor te non agere ferre, si quisquam, sincero veritatis studio, & recta ratione suffultus, seorsum abs te aliquid se sentire amice & modestè profiteatur. Et te ita esse animo affectum confido, ut malis *et idia d'augustin*

ἐπὶ σωτηρίᾳ τῆς ἀληθείας, absit enim à nobis Christianis ut in hoc φιλαληθείας officio nos ab Ethnicis anteverti sinamus. Laudatur Princeps Apostolorum quod alterius postmodum nati Apostoli justam reprehensionem non spreverit. Nec minus audientis celebratur εὐκοία, quàm monentis παρρησία. Homines sumus & mutua ope sublevamur. Amicam iusti monelam psalter suaveolentis & refocillantis olei loco habuit. Tu mihi in legendis nostris, ut pari libertate ac benevolentia fidum te præsentes monitorem, & amicum censorem, etiam atque etiam rogo. Vale, Vir humanissime, amice charissime, & quod facis nos ama.

Amst. 17. Jan.
1645.

Tibi addictissimus,

Joannes Forbescius, à Corfe.

CDIII.

Clarissime & eximie Vir, Domine & Amice magnopere honorande,

Raræ sunt occasiones ad vos scribendi vel mittendi, nec mihi commodiores aliæ sese offerunt, quàm si forte ex auditoribus nostris unus & alter ad vos iter instituunt. Literæ quæ variantibus Tabulariis per diversa loca transeunt, inter vicissitudines plerumque pereunt. Hâc igitur occasione per eum, qui hæc offert, oblata, si nihil aliud, saltem te, quem ex animo amo & æstimo, salutare volui. Adjunxi nuperum meum maledicis Moguntinorum vindiciis oppositum Responsum: de quo quæ tua sit sententia si candidè & liberè me docueris, magno me affeceris beneficio. Discordiam & odia mutua Christianorum doleo, imo detestor: & concordiam aliquam viam invenire discupio. Interim fieri potest, ut aberrem, & scopum parum dextrè feriam. Sed aliorum judicia & correctiones lubens audiam & admittam, neminis autem lubentius & avidius, quàm à te profectas, quem multiplici & perfectâ eruditione pollere, & pari concordiam desiderio teneri certus sum. E nostris nonnulli quod primæ & priscae antiquitatis in constituendam religionem rationem haberi volo, damnant: alii, quod rem per colloquia tentari suadeo, improbant; neque desunt qui omnem conatum, curam & spem instaurandæ concordiam rectius abjici quàm suscipi censeant. Quod meditatur & molitur serenissimus Poloniae Rex, opus est planè pium, Regium & Christianum,

nec tamen desunt, qui dehortentur nostros, ne controversias in colloquium deduci patiantur. Magis propemodum turbant & terrent, quæ in Anglia aguntur, quorum nihilominus propter locorum intervalla & itinerum difficultates rara & tenuis ad nos dimanat noticia. Angit sanè animum, tranquillitatis auram, quæ ex iis locis adspirare coeperat, & nos in spem malaciæ erexerat, in diram & truculentam tempestatem conversam esse: Hyems, quæ exacta est, nobis propter viciniam & transitum exercituum inquieta fuit & turbulenta: idque adeo est causa, quod responsum contra Moguntinos nondum integrè prodierit. DEUS Ecclesiæ suæ & tantopere afflictæ Germaniæ tandem misereatur, teque, Vir eximie, bono publico incolumem servet diutissime. Officiose te salutatum cupit clarissimus Collega meus D. Horneus. Vale.

Ex Acad. Julia.
v. Kal. Apr.
cLo Idc xlv.

Vester quantus quantus

usu mancupioque,

Georgius Calixtus.

CDIV.

S. P.

Clarissime & eximie Vir, Domine & Amice magnopere honorande,

Nescio an nuperas meas, quibus exemplum Responsum Moguntinis oppositi junxeram, acceperis. Non est autem alia scribendi vel mittendi opportunitas, quam per Juvenes studiosos, qui hinc ad vos commigrant, quibus volupe est aliquid ad te ferre, quo facilior tui compellandi fiat copia. Equidem tua tempora salutationibus & alloquiis deteri, nefas propemodum esse existimo. Tantum enim egregio publico decedit, quantum iis decerpitur, ut ex multis tuis præclaris scriptis, & insigniter ex ultimo illo πολυτοιμία de Idolatria, magni laboris & diffusissimæ Lectionis opere, est intelligere. Deus tibi vitam diu servet, & valetudinem firmet, ut & hoc ipsum & similia plura perficias. Scio tamen eâ te esse humanitate, quàm omnes, qui à te ad nos veniunt, prædicant, ut ingenuos & literarum cupidos tuique celeberrimi nominis studiosos Juvenes aditu non prohibeas; quorum proinde votis, qui ex meis familiaribus vel auditoribus

per

per me conciliari sibi eum cupiunt, nec ego deesse debeo. Inter eos est, qui hæc offert, Augustus Buffius, recti animi adolescens, optimi parentis, olim in mea patria Cancellarii bene meriti filius, cui pietatis, virtutis & optimarum disciplinarum studiis nihil est antiquius. Talibus quamvis aliàs pareas, quum me tamen pararium sibi deposceret, hæc deproperare malui, quam operam denegare, vel vacuum dimittere. Salve & vale diu & feliciter, bono publico.

Ex Acad. Juliâ.
vi. Id. Aprilis
c1o 10c xlv.

Vester quantus quantus,

Georgius Calixtus.

CDV.

Clarissime Domine Pro'essor,

EN tibi donum Reverendissimi D. Uferii Archiepiscopi Armachani, quod jamjam discessuro ipse quoque Oxonio abscedens ad te perferendum tradidit: opus inter πολυδάκρυτα hæc & plusquam Civilia bella mediumque armorum strepitum natum, fato adeo adverso, ut vixdum editum incendio, quo ante annum præterpropter oppidum correptum fuit, penè totum conflagrarit. Sed dimidia exemplarium pars commodum paulò ante ex ædibus Typographi alio translata ignem evitavit. Atque ita ille Ignatius nunc flammarum, ut olim ferarum rabiem omnino effugere non valuit. Tarditatis autem meæ (utpote cui ex Anglia reduci jam quarta septimana labitur) culpam aut excusarem aut deprecarer rationibus, quæ mihi suppetunt, compluribus, nisi metuerem, ne non satis summæ humanitati & æquitati tuæ tribuere ac confidere tibi viderer, quod crimen ita plane detestor, ut priori isti tarditatis vitio sive culpæ affinis esse multo malim, quam ut huic obnoxius habear. Sed vel hæc ipsa effutiendo vereor ut satis utrique nostrum consulam tua negotia studiaque interturbando, meoque qualicumque otio abutendo. Itaque manum tollam de tabula, ubi tibi, Uxori lectissimæ, filiisque eruditissimis plurimam salutem impertitus fuero. Valere ergo & vivite diu felices atque incolumes patriæ, familiæ, mihi.

Dordraci Kalend.
Jun. c1o dc xlv.

Reverent. Tuæ observantiss.
& addictissimus,

Jacobus Lydius.

CDVI.

Illustri & Incomparabili Viro,
Ger. Jo. Vossio S. P.

Illustris & Incomparabilis Vir, sol, & sal avi nostri, Decus præsentium, Exemplum Posterorum.

DEfunctus, ut nosti, mihi in peregrinis versanti, Anflonius, exterrita mea studia, quæ propter gravissimas Patriæ clades, per biennium retro externorum beneficio, sustentata fuerunt, & porro debent: quapropter te, Maxime Vir, etiam atque etiam rogo, ut inusitata, ævo nostro tua benevolentia, humanitate, & comitate, studia mea fovere, & promovere velis, quæ certè promoveris, si viris Illustribus commendaveris; ut Hofdion, & aliis, tibi sine numero notis: ut illorum beneficio, & quantulumcumque munificentia, quæ optimè cœpi, emoliri queam: utque turbata Anflonii obitu, Musæ animentur Amicorum certitudine, omnisque generis difficultates, & procellas, per Orientem, sæliciter illorum favore, propellere queam. Alterum quo mea studia promoveris, & tibi devinctissima reddideris, si à societate Indica, literas commendatitias ad Ind. Orient. Rectores procuraveris: cum enim Persidem petere omninò debeam, ubi excolendis Persicæ Amœnitatis floribus, aliquamdiu subsistendum erit: gratum & tutius erit Indicæ societatis patrocinio frui: Offerri illi quoque mea qualiacumque possunt studia, in remotissimis illis equidem Provinciis; non est dubium, quin omnis generis indigeant opera. Max. Vir, si huic necessitati meæ obstetricatus fueris, me sælicem, & ad tua, tuorumque imperia promptissimum reddideris. Res equidem est digna commendatione, & promotione; ut scilicet illa studia, quibus Arabes tot annos floruerunt, tandem etiam Christianis innotescant Europæis. Quantum licuit per improbos labores, & adversos casus, in hoc studiorum campo, futuros, eluctari animus est, modo tu, & alii, animi favore tuo addideris. Non dubito, quin è re mea acturus sis, pro tuo in me favore, quid possis, non quidem quæ mereor; sed quæ totum terrarum orbem demereri studes. Quæ hic geruntur; ex præsentis literarum latore, summo mihi amico, Mercatore Amstelodamensi, Byzantii florentissimo uberius cognosces; etiam quæ de nostris sentiant, externæ nationis doctissimis studiis. Mercator noster

ster est virtute rarissima præditus, quem ideo si amaveris, doctioribus, prout quidem natura fictus, & factus esse videtur, faventiorum reddideris. Mirantur Proceres hujus Imperii, aliorum regnorum Legati, quænam causa esse possit, quare Illi Ordines huc denuo Legatum mittere torpescant: alii eos huic amicitia indignari, alii parum sua de gloria sollicitos, interpretantur: factum mihi nunquam videtur, si factum nunquam probatum, & si probatum nunquam probandum; Gentis gloriam armis ubique claram, literis, & omnibus artificis locupletem, unius ignavia obscurari. Satiùs certè erat, ignotum esse, quàm ignobilem: actiones multæ perversæ; imò ne fingi quidem possunt: Doctioribus Græcæ Ecclesiæ insidiatur, exilium minatur. Hinc lamentationes, & querimonie Græcorum, qui aliud non crepant in sermonibus; nisi Belgarum Ministros, Ecclesiæ Græcæ exitio huc missos, ut qui præter pietatis normam, & Ecclesiæ formam, Turcarum potentia are Ecclesiæ Græcæ effuso, Græcis miseris, atque invitis, Patriarchas impiè obtrudunt: prout nuper factum, ubi 100000 Imp. in Turcas effusis, incerto populo, & reclamante, *avdētō*, obtrusus fuit: hinc debitis Ecclesiæ Græcorum oppressa; miseri vexati. Plura ex Mercatore senties, Viro certè ingenio dulcissimo, Ital. Hisp. Turcicæque peritissimo, doctis addictissimo, quem quo majori honore, & amore prosecutus fueris, quod certè pro usitata tibi, tuisque, humanitate facies, tanto tibi tuis mihi omnibusque doctis, faventiorum reddideris: ille equidem est unus, qui hic mihi pecuniolam, liberatissimè mutuo dare solet: Mihi perplacuit Mercatoris modestum, & omni doctorum favore, laudeque dignum ingenium, quique si tibi, Maxime Vir, tuisque operam præstare poterit, promptum deprehendes; meaque animi studia; quæ tibi, tuisque quamdiu vixero debeo, semper offero, tu illis cum tuis ne abuti quidem poteris. Mihi enim nullum gratius fieri potest officium, quàm si amicis officium facerem, proinde cum tuis liberrimè imperare licet, imperata lubenti animo exequar. Et sine dubio multis doctis gratum præstare potero officium, pro ea quæ mihi, cum Græcorum, Muhammetanorumque intercedit doctissimis familiaritate, ut, facillè quicquid hic extat, per me impetrari possit. Hic literarum limites sisto, Vir Maxime, etiam

atque etiam rogans, ut me cum tuis amare pergas, habebis certè semper qui te coluit, colet, & suspiciet, tuis tuorumque nutibus

D. Byzantii
7. Maii An.

45.

Addictissimum,

G. Gentium.

CDVII.

S. Clarissime Doctissimeque Vir,

Qui tibi literas hasce adfert, Nepos * est ex sorore viri religiosissimi doctissimique Luca Holstenii, Romæ nunc degentis: cujus solius nomine, eo juvenem hunc favore dubio procul prosequeris, ut commendatitia aliorum opus non habeat. Quamvis etiam sine meis literis hinc discedere potuisset, magnopere tamen eas à me desideravit, majus inde sibi augmentum benevolentia tua persuadens. Dabis igitur hoc communibus studiis, dabis juvenis bonæ mentis amantissimi propriis meritis, ut mea adjutus intercessione obtineat, quod suoapte ingenio, ubi adnitus fuerit, impetrare potest. Vale.

* Fuit is Petrus
Lambecius.

Hamburgi xxiv.
Anno Christi
1710 Iac xlv.

Tuus,

Fridericus Lindenbrogius.

CDVIII.

Illustris Domine,

AN acceperis literas, quibus aliquoties observantiam erga te meam testatus sum, nescio; neque responsum efflagito, gnarus tuarum occupationum, quæ publico debentur. Sed repeto tamen nunc quoque id quod dixi officium, fretus tua æquitate, quam videor mihi absens etiam tanquam apud præsentem perspexisse. Adeo non sum alias cupidus creandi magnorum Virorum curis molestiam, ut ardentissimos quoque affectus, quibus in venerationem eximiarum virtutum & doctrinarum feror, potius intra animum & pias voces continēam, quam more seculi ambitiosius fatagam promulgare. Sed quia semel cœpi te per literas venerari, vel ob hoc ipsum in eo genere officii perseverandum duco, ne parum constanti proposito, quod semel destinaui, videar suscepisse. Accessit nova causa,

ex

ex sermone cuiusdam studiosi, qui à Vobis ad nos pervectus tuo nomine me salutavit; adjecitque te scripturum fuisse, si temporis ratio tulisset, in causa Filii, à quo in notis Velleianis dissentirem. Præterea nihil explicare poterat de tua mente. Itaque me ambiguum reddidit ac parè sollicitum, si quid forte mihi excidisset, quod tibi displiceret. Sed cogitanti diligenter nihil occurrit, quod à veneratione, quæ tibi, ab æstimo, quod Filio tuo debetur, alienum esset. Honorifice aliquoties laudari filium, sive potius laudes ejus stilomeo majores nominatim agnovi. De cætero, vix est ut dissentire meminerim in re alicujus momenti: interdum sustinui assensum, non quod parum probarem felicissimas ejus emendationes, sed quod in hoc genere ~~soxanæ~~ omnimodam certitudinem vix dari crederem. Fuerit forte, ubi meam quoque sententiam attulerim: sed absque omni proposito contentionis, quod sancte testor: quippe qui nihil magis semper solitus sim execrari, quam altercationes literarios quæ hodie in genus quoddam tralatitii moris transmigrarunt. Editio Velleiana filii tui adeo certe mihi placuit, ut omisurus fuerim omne consilium edendi ejus Auctoris, nisi aliam propositi formam, uti per se apparet, destinasset. Maximopere itaque rogo, ut me certiores faciatis, si quid desideratis, reperieris eandem, quam hæcenus fovi, mentem, venerandis tuis meritis, Vir summe, & æstimandis filiorum doctrinis, Germano candore fideque deditam. Vale, incomparabilis Domine, & mihi fave.

Dat. Argent. Illustri nomini tuo devotus,
3. Aug. 1645.

Jo. Hen. Boeclerus.

CDIX.

Carolus Ludovicus *Dei gratia, Comes Palatinus Rheni, S. Romani Imperii Archidapifer & Princeps, Elector, Dux Bavaria, &c.*

Salutem & Benevolentiam nostram, Reverende & Doctissime, Nobis fincere dilecte. Petit à Nobis nobilissimus & generosus, tam prosapia quam literis & armis clarus Baro Herbertus de Cherbury, ut librum quendam à se scriptum, de Religione Gentilium, Errorumque apud

eos Causis, in quo multa allegat loca, ex tuo libro, de Origine & progressu Idolatriæ extracta, tibi commendaremus. Quà in re ideo libentius ipsi gratificari placuit, tam quod dictus ipse liber te aliquo modo respicit, quam quod omnia in eo contenta tuo judicio submittit. Argumentum (prout ab illo tractandum suscipitur) adeo novum est, ut accuratam mereatur disquisitionem. Te igitur valde rogamus, ut præfatum Librum diligenter perlegere, & quicquid visum fuerit in eo corrigere, explicare aut amplificare ne graveris. In quo Nobis gratissimum feceris, tum etiam ipsi supradicto Domino Baroni, ut qui eximiam tuam doctrinam cum primis suspiciat, tuoque frui favore multum desideret. Nos igitur hoc Nobis ab amicitia tuâ promittentes, te bene valere, & de propensissimo nostro in te affectu te certum esse cupimus.

Dab. Londini
14. Aug. Anno
1645.

Amicus tuus benevolus,

Carolus Ludovicus.

CDX.

Reverendo, & Doctissimo Viro, Domino Gerardo Joanni Vossio.

Reverende, & Doctissime Vir,

Opus hoc à me concinnatum, sed ex tuo præcipue Libro, De Origine, & progressu Idolatriæ, descriptum; tibi cum primis subjiciendum curavi, quem facile Authorum hujus seculi Coryphæum agnoverim. Sed & id quoque me permovet, quod alicubi, à te discrepans, an in errore meo, vel tuo evenit, haud illicò dixerim. Ut fateri tamen necesse sit, homini senio laboranti, & calamitatibus publicis afflicto, plurima excidere posse, quæ accuratiorem normam desiderant. Tu igitur, Vir præstantissime, ubi ita visum fuerit, corrige, emenda, explica; sed & pro humanitate tua, adice, auge, amplia. Quùm enim à te præsertim perfectum sit opus, tuâ interest etiam, ut numeris omnibus absolutum prodeat. Providentiam quidem Universalem, summum Dei attributum semper agnovi; cujus (obscuris scilicet) vestigiis in ipsa Gentium Religione insisto. Neque obstitit, quod Ecclesiæ Patres, (Egregii scilicet Authores) sæpè contra Gentiles invehantur. Plurima enim ficta, & falsa, & inania; ut in eorum Religione deprehendi queant, eundem

eundem tamen Deum Opt. Max. ac Nostrum, ex eadem virtute coluerunt. Præmium bonis, Pœnam malis etiam post hanc vitam statuentes. An inde verò salutem æternam consequi possint Gentiles, viderint alii: nihil enim hic decerno; sed eousque saltem, Providentiam Divinam Universalem, pertigisse contendo. Ceterum hæc ex operis contextu peti mallet. Unà cum hisce, literas serenissimi Principis Electoris accipies; quibus ad ea, quæ à D. Tuâ peto, exequenda hortatur. Tu benè quidem Vale, Vir Doctissime, & rem literariam eruditissimis tuis lucubrationibus promove.

*Dabam ædibus
meis prope West-
Monasterium $\frac{1}{2}$;
Augusti 1645.*

D. Tuâ addictissimus,

Herbert de Cherbury.

Librum nostrum hic simul accipies; in quo vitiis Amanuensis facile, (uti spero) condonabis.

CDXI.

*Clarissimo & Spectatissimo Viro Domino
Gerardo Johanni Vossio Eustathius
Suartius S. P. D.*

Religioni mihi fuit, Vir Cl. ac Venerande, Waesburgium nostrum velis remisque ad vos evolantem post silentium diuturnum absq. meis literis constantis mei & religiosi in te affectus cultusq. indicibus dimittere. Quam impensè te semper æstimarem ob eminentes ingenii tui dotes & luculenta oppidò in Rempub. literariam merita, quibus præclaras disciplinas feliciter tot annorum decursu illustrasti, quæque per totum eruditum orbem diffudisti, non ~~ædibus~~ *ædibus* omnibus bonis palam fecisti, idque ego quoque apud alios profiteri malo, quam laudes tuas culpa ingenii mei deterere. Vel nuperrimus, ut innumeros alios silentio premam, foetus tuus, ~~tuâ~~ *tuâ* ~~opibus~~ *opibus* te acclamantibus eruditus, nitidus exasciatus ita salivam mihi movit, ut spem certam inde conceperim, nos propediem absolutissimis tuis quoque Originum libris iri beatum, quorum spem jampridem nobis in operibus tuis cedrinis præluxisti; in qua palæstrâ Incomparabilem Virum, Cl. Salmasium, cui olim Lutetiæ innotueram, cum opus illud de Ecclesiis Urbicar. & Suburb. contra Sirmondum moliretur, feliciter quoque desudasse, recondita ejus eruditio nobis fidem facit. Deus omnis boni fons & dator vobis

totius eruditionis Duumviris vires animi corporisque integras præstet. Ad me quod attinet, ego verò jam nunc totus nova editione Curtii adornanda in hoc otio liberali post tot spinosos & ærumnolos labores juventuti impensos, distineor, publici juris facturus, quæ olim & nunc in cultissimum istum Auctorem mihi observata, in quo me non adeo indiligenter fuisse, operamque & oleum in eo perpoliando non penitus perditurum, editio quamvis accuratissima doctissimi Freinsheimii spondet, meque inflammiat. Iccirco te etiam atque etiam oro quæsoque Vir Clariss. conatibus meis impigrè subvenias, comiterque impertias, quo meliorem ac tersiorem fieri Curtium posse autumes. Modii editionis mihi copiam facere digneris, aliarumque veterum, quas habes, ut & Gualteri Paraphraseos Poeticæ, quæ omnia post collatum contextum, cui cis paucos dies manum admoveere gestio, optima fide ad te illibata remittam, deprædicaturus publico præconio tuum literas juvandi ardorem, propensumque in me affectum. Unum superat, Vir observande, quod resciscere aveo, sandone aut reapse compertum habeas, prodiisse nuper Parisiis, ut mihi ante aliquot menses amicus quidam se ibi vidisse prostantem adfirmavit, novam editionem Curtii cum Commentariis, nisi forte, ut didici in Commentario in Silium, Dausqueii, qui promittere inibi videtur. Vale, Vir clarissime, ex animi sententia, cum honoratissima conjuge, quam à nobis officiosè salvere jube, & doctissimos filios tuos, meque amare perge,

*Dab. Ultrajecti
priù. Id. Octobris
clō JOC XLV.*

Nominis tui celeberrimi

Religiosum Cultorem,

Eustathium Suartium.

CDXII.

*Viro Amplissimo Gerardo Joanni Vossio,
Guntherus Henricus Plathnerus Ge-
tus, D. Consil. Saxon. S. P. D.*

LEgi, Amplissime Vossi, plerasque lucubrationes tuas, quibus eruditum hoc seculum illustrare dignatus es; legi, quam, atque ex illis, magnam, & utilitatem, & voluptatem percepi. Diu enim jam factum est, quod ingenti tenebar desiderio, Theologiam Gentilium, à Viro aliquo tui simili, ex veterum scriptis deductam videre. Nam quæ de Mimisi Dia-

bolica, Caeozelia Gentium, Theologia Philosophica, Viri doctissimi haecenus ediderunt, egregia quidem sunt, sed nescio quomodo ad sitim explendam, non sufficiant. Tu verò magnis nos invitas poculis, & vel *συδομένην* jubes; quod lubentius facimus, quia ex eruditissimis tuis horreis, non tantum,

Bellorophontei promittitur humor equi.

sed etiam suavissimum Philosophiae merum, Divino Theologiae Nectare permixtum, adeò ut omne mihi punctum tulisse videaris; qui tanta dulcia tot utilibus miscuisti. Elegantissimi porrò Libelli tui, de genere, anno, & mense Nativitatis, & passionis, Salvificatoris, & D. Nostri Jesu Christi, non potuerunt me non magno perfundere gaudio, tum quod undique Vossiana i. e. Doctissima quæque spirent; tum quod eandem tractantem materiam, in multis confirmarint, in multis quoque juverint. Postquam enim Illustrissimus Wilhelmus Dux Saxoniae, me non tantum in Consiliariorum Aulicorum, sed etiam Assessorum supremi Consistorii Ecclesiastici, album recepit, ab officio meo non alienum fore duxi, si ex Philologicis; vel ad ipsam *τὴν διότιμον χάριν*, vel beatorum Patrum monumenta, congestis observationibus Historiam sacram Domini nostri Jesu Christi, horis subcivis pertexerem.

Quod igitur Natatoriam qui expetunt, facere solent, ut antequam verticosis se committant fluminibus, vada tentent; idem mihi faciendum censui. Excitationem nempe de Vaticinio Jacobi, Gen. xlix. sub ficto Phabetrani Nomine, in publicum ideo præmisi; ut Doctorum judicia, de hoc Scriptionis genere experirer. Etsi autem non desint, qui Theatricum illud *σφαῖς καὶ κλέψ*, acclamitent: Verum quia mihi maximè verendum, ne isti amoris affectu minus *φιλαλήδως* judicent, ad te Amplissime Vossi, hominem quem mihi fama humanissimum, scripta eruditissimum demonstrant; ignotus licet ad ignotum venio, tuoque exactissimo judicio submitto exercitatiunculam istam, ex qua tanquam ex ungue de toto *κυνεακὼν*, (hoc enim titulo Historiam illam sacram insignire fert animus) systemate judicare poteris; multoperè rogans, ut & audaciae meae ignoscere, & vel inter ultimæ admissionis amicos, eum numerare sustineas, qui te ob edecumatam eruditionem semper fert in oculis. Quod si porrò quid de conatibus nostris sentias, certior me reddere

dignatus fueris, profectò me non tantum tibi reddes amicissimum, sed omnibus quoque meis officiis efficiam, ut ista esse verè judicare possis. Vale Amplissime Vossi, & ut tibi, tuis, bonoque publico diu valeas, cura.

Vimar. x. Kal. Nov.
An. cl. lxx. xiv.

Vossio additissimus,

G. Plathnerus.

CDXIII.

*Viro summae Eruditionis, Clarissimoque,
Gerardo Johanni Vossio S. P.*

Nullus dubito, Vir Maxime, rectè tibi tradita quæ fratris mei curæ commiseram, de Germanicorum corporum habitu, simulque Programmata quædam Academica. Erat tum consilium propediem, literis te adire, non tamen nisi edito majoris nonnihil molis libello. Verum illa spes decollavit, quam de edendo opere conceperam, præ multitudine negotiorum, quæ mihi partim ars mea, partim Magistratus pepererunt inperato. Ne itaque nimis silentio peccem, visum fuit saltem has chartas transmittere, donec cætera lucem videant. Inter hæc, quas adolescens Nobilis Theses heic proposuit disputandas, ex Scholæ more, cum primis optarim, abs te severo judicio expendi: ac quidem ipsius mei causâ; utpote qui urgeor hoc argumentum in illam quæ proposita est sententiam latius diductum publicare; quod tamen ego haud ausim, nisi benigna doctiorum censura invitet. Programmata à memet ipso sunt profecta, leviora tamen, neque nisi ad adolescentum fortassis captum; ut etiam hæc cum aliis meis sacris, in unum Opusculum haud competant jungi. Ipse tu quid suadeas, Vir Maxime, utinam liceat intelligere! Etenim tua mihi sententia pro plurimis est. Librum meum de sanguinis generatione, ac motu naturali, altera editione apud vos, recoctum dabit frater, qui si haud displicuerit, gaudebo. Calixtus noster navatâ tam præclara Ecclesiæ operâ, id impetravit, ut qui haecenus fuit Semi-papista, nunc Semi-calvinista audiat Zelotarum Ordini. Quam virulenter illum sit infectatus Jesuita Erbermannus in Irenico, quod vocat Catholicum, fortè jam vidisti; ejusdem novas *diatribas*, indubiè dabunt nobis Nundinæ Francofurtenses. Omnibus

bus illis voculis generosum contemptum, innocentia fretus, Calixtus opponit. Erbermanno tamen fortè aliquid regeret. Vide quam sit misera conditio eorum, qui tranquillandæ Ecclesiæ dant operam. Quam veremur, ne etiam te, ab ejus argumenti scriptis, absterreant mores hi seculi nostri, pari omnium animorum immoderatione infesti? & tamen heic quidem, istis tuis nihil est desideratius. Neque enim facile expresserim, quanti etiam in hac doctrinæ parte faciant te, cum alii, tum Calixtus, & Horneus Nostrates. Uterque illorum, juxta mecum te, summe Virorum, salvere, atque valere jubet plurimum.

Tuæ doctrinæ cultor,

Herman. Conringius.

CDXIV.

*Clarissimo Doctissimoque Viro Domino
Gerardo Joanni Vossio.*

Præstantissime, Colendissimeque Domine,

Literas tuas, quas mihi curavit Excel-
lentissimus vester Orator, accepi.
Ex quibus intelligo, te perlegisse Lucu-
brationes meas, de Gent. Religione, Er-
rorumque apud eos causis; neque displicuisse tibi, vel Opus, vel descriptionis genus.
Tuum judicium tamen circa ea, quæ inter nos controvertuntur, desidero. Eoque magis quod tumultuaria opera, (mediis bellorum intestinorum cladibus) apud Castrum meum de Montgomery (ubi per biennium commorabar) scribenti, in errores dilabi proclive fuit. Sed & errare tecum minus probrosum esset aliquando, quam rectè cum aliis sentire. Is enim es, Vir Magne, ut Authoritatem tibi ipsi, etiam in argumento quovis conciliare possis. Sicubi tamen aliquid à me rectè animadversum esse arbitreris, id pro ingenuitate tua significa: quò ita reliqua omnia expungam, quæ in te redundant, prodeatque tandem in lucem meus qualiscunque Liber. A te porrò, Vir Optime, scire vellem, pretium quod Typographus, pro impressione libri exigat, ut Nummos ita pro valore tibi transmittam. Cum enim haud ab aliis, quam idoneis Lectoribus evolvi vellem Librum, eum sumptibus meis excudam. Utinam mihi per valetudinem, & negotia, liceret vere proximo, Bataviam tuam invisere, ut dulcif-

simo alloquio tuo fruerer, & circa dubia, quæ occurrunt, sententiam tuam exposcerem! Multa quidem in hoc argumento, expleri vellem, cum fieri nequeat, quin ut plurima desint, quæ ad rem totam illustrandam faciant. Sed ea præsertim quæ circa quinque Articulos nostros Cathol. proferri possint equidem expiationum genera varia, quæ in remedia criminum, excogitabant, sive vafri, sive inepti sacerdotes, à nullo adhuc satis tractata esse, pro dignitate argumenti puto. Circa hæc omnia igitur, responsum tuum cum bona venia expecto. Benè vale, magnum literarum Decus, & Ornamentum, Meque si placer, ama.

*Dabam ædibus
meis Westmon.
Jan. 2^o.*

Tuus æternum,

Herbert.

Quod operam tuam, mihi commodare, in libro meo excudendo, polliceris, gratias quàm maximas tibi ago. Serenissimus Princeps Electoralis, mihi monstravit literas tuas, quibus me summo honore cumulas; quo nomine me tibi devinctum esse scias.

CDXV.

*Clarissimo Eruditissimoque Viro
Gerardo Joanni Vossio.*

HÆC est semperque fuit magnorum Virorum fors, & calamitas, ut etiam si maximè velint, talem nec possint latere, nec immunitatem consequi, ab officiosis venerantium molestiis. Fœlices ter & amplius, inquis, quos irrupta tenet cum Musis suis copula; nec ulla divellunt è tam jucundis amplexibus ingrata Clientum Consortia. Cuperes, proculdubio, cuperes, si fata sinerent, circumvolitantes umbras, levesque populos dispellere, & quàm ardenti studio optares, perpetua tranquillitate, nullisque violanda interpellationibus inaccessus perfrui, credo equidem, eruditissime Vossi,

— *Sed te decor iste quod optas
Esse vetat, votoque tuo, tua forma repugnat.*

En igitur ego inter tot procos, novus tuarum virtutum, inexhaustaque eruditionis cultor accedo, tam tibi nunc ignotus, quàm tu universo Orbi literario notissi-

mus; nunc inquam, Vir Clarissime, quondam enim per biennium, auditor tuus, dum in Academia Lugdunensi, Sulpitii Severi sacram historiam enarrares, à te dilectus, & suavi colloquio sapissimè honoratus fui. Ab eo tempore in Galliam nostram redux, totum me foro dedi, donec valetudini, & indoli meæ indulgens, iussi Stichum, Mævium, & Semproniam res suas sibi habere, & me in Ciceronis, Senecæ, Virgilii, Scaligeri, & Vossii dulcissimos ac nimis abditos sinus recepi. Ita est certè abhinc aliquot annis singula tua scripta & miror, & versò nocturnâ diurnâque manu; & dum recentissimè hæreo poeticis tuis institutionibus, repentè quasi in bicipiti somniassem Parnasso, Poeta fides, effluuntque nobis hi otii nostri, Præceptorumque tuorum informes foetus, pro quibus, si quod superesset in Muxæ tuo exemplar Historiæ Pelagianæ, illud omnibus votis efflagitarem, non tam meo, quàm Bocharti nostri, quàm multorum Doctorum nomine: Sic eruditissime Vossi, vilissimo rete, Aureum Tripodem piscarer, & crepundia, Orbisque nostri quisquillas, Eois mercibus commutarem. Sed O pudor, quam te violò, & tua jura resolvo! Indoctus nihil unquam de te meritis, vix notus, gravissimâ tua studia summe importunis Epistolis interrompo, delicatisque auribus obstrepo rauco cantu, nec veniam, quam solam tamen vix sperare debueram, sed præmia posco. Ignosce tam effræni audaciæ, quam nobis fecit, & olim perspecta singularis tua humanitas, & incuria, aut egestas, quotquot sunt Librariorum, non dicam, in hac nostra Cadomenfi Academia, sed & Rothomagi, & Lutetiis; omnium quippe summâ cum curâ excussæ sunt officinæ, nec in ulla repertus aureus iste liber tuus, quem si suppliciter petentibus concesseris, habebis tunc pro tanto munere, debendi reum, tibi, devotissimum me, qui jam propter incomparabilem tuam doctrinam sum & ero in æternum

Cadomi 18.
Kal. Dec.

Tui Observantissimus,

D. Brieux.

Si quid dignaberis ad nos vel mittere, vel scribere, illud si placet, fidei & curæ, committes Domini Adriani Fyk Delfis nunc degentis,

In suprema Mediomatricum Curia
quondam Senatoris.

CDXVI.

Clarissimo Viro Domino Gerardo Joanni Vossio, apud Amst. Professori celeberrimo S. P.

Clarissime Vir, fautor mihi plurimum colende,

CUM tuæ submitterentur mihi nuper Dantisca literæ, eademque & vitæ mihi tuæ, & affectus erga me amici, existerent testes desideratissimæ: ausim dicere, vix olim (si Plutarchus vera narrat) majus gaudium Alexandro Magno accidisse, ex nuntio, quod redivivus factus esset Homerus; ac mihi tui causâ submæsto tum accidit ex eo, quod superesse te, mihiq; haud leviter etiam favere intelligerem. Nam ita me proptidem amicorum quorundam literæ occuparant, ut Vossium inter mortales esse desuisse, persuasus essem. Igitur ubi sic ex adverso, & manus, & mens tua mihi comparuit, superstitis, atque optimè precantis; quid potui potius, vel debui etiam, quàm exultare, atque in futurum quoque benè tibi vicissim apprecari. Ac Magno quidem Alexandro illi, gaudium, quod dixi, existit, ob gloriæ privatae spem, vanam illam, & inanem. Mihi dum Vossium superesse video, spes adfirmatur publici boni, rei que communis literariæ: quam si quisquam graviter, gnaviterque promotum ivit; ipse certe hoc præstitit, idemque proponi locupletissimè est præstiturus; dum vitæ eum dignetur Deus. Minimè me de expectatione hac dubitare finunt, quæ præfari, in gravissimis diatribis illis de tribus Symbolis, & Christi genealogia. Quarum nomine, & gratias ago multò maximas, & ut sarcinulas (quod munitaris) colligere amplius pergas, publicoque exponere nihil differas, opto. Hostinenti loco an esse ex me possit, quod nuper de Pauli expromsi, equidem ambigo. Interim quod voluntatis est propensæ, testari ita volui; cum præsertim & Ornatissimus Et literæ tuæ mihi affatim attestentur ne λεπτολογίματα istiusmodi mea displicere tibi. Quod si quid de Pauli isto loco succurrit, quod submoneas, de exquisitissimis observationibus tuis, gratissimum profectò accidet. Cum tempore sequentur alia forte, quæ affecta apud me hætenus latitant aliqua, nescio, an à Commentatoribus, ac prorsus etiam quædam antehac præterita. Quod vale dicturiens requiris, ut amemus nos mutui, ego cum cultu

cultu etiam nominis tui perpetui memor observabo; tanto etiam ad nomen numero sexagenario ipse accedens, quanto tu, cum Dei beneficio nunc excedis. Compleat in te verò, Vir Maxime, Deus Opt. Max. atque superexaugeat etiam, quod vitæ mortalis summum esse dicitur; neque id finat in te obtinere locum, quod animum auferat. Quæ nisi vim nimiam, vel corporis etiam respectu, mihi pridem intulisset, sanè vel coram te etiam, Vir faventissime, venerarer; Patronis præsertim magnis quibusdam in Belgium vestrum me invitantibus. Sed si in terris visuri unquam nos non sumus, conjunget nos certè cælum in beata visione, ad quam per labores, sudores, vigiliæque nostras hinc enitimur, reddituri Deo, otii, negotiique nostri rationem, atque isthic demum desituri *ἡρώων ἐν μέσῃ, ὅ, αἰς ἐν αἰνίγματι*. B. V.

Lisnæ Polonorum
An. MDCXLVI.
x. Cal. Febr.

Celeberr. Nominis tui
Cultor perpetuus,
Georg. Vechnerus.

CDXVII.

Clarissimo Viro Domino Gerardo Joanni
Vossio Professori Historico.

Clarissime Domine,

Incidi hic fortean in carmina quædam non omnino inuenta, composita ab Anglo generoso in Beat. Mem. Clarissimum virum D. Hugonem Grotium: & licet ferè idem sonant, Illada post Homerum, & Epitaphia post Barlaam vestrum, velle conscribere: duxi tamen me operæ pretium facturum, si ea qualiacunque tandem sint, velim exscribere, & amicis Dom. Grotii Viri nunquam satis laudati, vel mittere, vel ostendere. Non quod sit mihi in animo Poëtastrum hunc cum D. Barlaæ velle committere; absit! Sed tantum ut D. V. & alii apud Belgas Doctissimi Viri intelligant, Gentem nostram universam (quæ modo callet literas) cujus mentem hæc carmina satis, opinor, exprimunt, cum reliqua literatorum per Orbem cæterva, quasi pacto, & fœdere inito, amicè conspirare, in hoc scilicet, quod extra alem dubitationis apud posteros habebitur: nempe D. Hug. Grotium illustrissimum fuisse Heroa; usque ad stuporem ferè & miraculum doctum, simul & sapientem,

omni laude majorem, universa tam divinarum, quàm humanarum omnium literarum suppellectile cumulatifimè instructum. Non opus est pluribus, imo nec omnino istis, præsertim in literis ad D. V. conscriptis. Gratias habeo D. V. ob officia, & beneficia mihi immeritò in adibus vestris collata, cum nuper veteris amicitiae recolendæ gratiâ, D. V. inviserem Amstelodami.

Deum Opt. Max. quæso, quod quotidie facis, obnixissimè supplex obtestari non desinas; ut pacem, & pietatem, ab Ecclesia, & Regno (olim florentissimis) apud Anglos, jam ferè exules factas, tandem aliquando utrique in integrum restituere, propitius dignaretur: in hisce piis votis, multos habet D. V. Collegas comprecantes, & inter eos, servulum D. V. omni obsequio obstrictum

E. Duncomium.

Bruxellis in adibus Domini Henrici Devie
Angli Legati. Febr. 2. in festo Purificationis. 1646.

CDXVIII.

Vir Clarissime,

ET si pro veteri necessitudine atque amicitia quæ tibi olim cum parente utroque intercessit non exigua & quam jure quasi hæreditario ad me aliquatenus devolutam jactare soleo, nihil optatius mihi accidere posset quàm si de re aliqua Theologica, Historica aut Philologica sententiam tuam interdum exquirerem; attamen tibi penitus literis involuto negotiorumque mole districtissimo, ne dicam obruto, novam subinde te interpellando molestiam creare hætenus mihi fuit religio. Nihilominus ut id quod ante cavi sedulo, nunc tandem committere audeam fecit doctorum virorum, quos mihi in Anglia amicos paravi postulatio, cui ut morem gererem, æquum fuit. Nescis, Vir eruditissime, quàm te regni istius viri literati, & imprimis illi qui in eruditorum choro funem ducunt, uti in ipsis Musarum Gratiarumque manibus doctum & educum, omni-genæque antiquitatis promum-condum venerentur ac suspiciant. Eorum complures (inter quos nunc D. Rob. Baylius Deputatus Scoticus imprimis mihi nominandus) rogant te & obsecrant oppidò quam obnixè, ut opus illud tuum adversus errores Anabaptisticos (quod affectum habes, quodque

quodque oculis obiter lustrare, cum te Amstelodami officiosè saluaret, sibi datum fuisse D. Baylius amicis denarravit) quam fieri poterit ocyssimè in lucem edere digneris. Si verò ad omnia perpolienda non suppetat otium, illam partem quæ de Pædobaptismo tractat publico uti non inideas. Existimant enim, nec abs re hac rerum tempestate perquam necessarium: esse ut id scriptum Anglorum manibus teratur, utpote apud quos errores isti Anabaptistici (ut alios penè innumeros præteream) Ecclesiæ faciem miserè deturparunt. Dabis ergo hoc, uti spero, virorum pietate & doctrina conspicuorum iustis precibus, dabis Ecclesiæ Regnoque Anglicano, dabis veritati utroque quasi cornu nunc inibi laboranti. Ego verò, Vir doctissime, per quem vota sua ad te deferri voluerunt, meum quoque ipsorum votis votum adjungo, Deumque oro ut otium ac valetudinem tibi largiatur ad ea perficienda quibus de omnibus Christi Ecclesiis bene mereri poteris. Vale cum uxore lectissima totaque familia, quibus plurimam salutem impertit

Dord. 22. Feb.
1646.

C. T. deditissimus

Jacobus Lydius.

CDXIX.

S. P.

Semel atque iterum tuis, Clarissime Vossi, rescripti. Anno superiore, hæc ipsa anni tempestate, nostris vid. Francofurtum descendentibus, per ornatissimos duos studiosos Tigurinos, (Lavaterum alterum) Dissertationes VII. vel VIII. Cl. D. D. Buxtorfi nostri, misi; quarum unam atque alteram D. Cappello placuit arroderere. Nempe, prævidit is, Revelationibus suis arcani punctationis ambos quod aiunt oculos, effossum iri, sic si pergat noster ille. Verum, ex vindiciis, quas modoque mitto, iudicium, Cl. V. facies, quibus præfidiis uterque ad suum opus accesserit. Si, quod sperare jubet, cum bono Deo, de Punctorum origine processerit; curabo maturè tibi quoque perferatur. Puto enim non ingratum accidere (etiāsi diu nullis responsis ejus abs te factus sim certior) si sic gratam, tuæ in me olim exercitæ humanitatis memoriam, integram meo animo perstare, utcunque contester.

Quando enim de meo id facere adhuc dum nequeo, spero, quod in nostra saltem terra obnatum fuerit, si mea ad te pertingat opera, tantisper meam penuriam suppleturum, maxime cum ad eam nondum maturitatem assurgere mea messis potuerit. Nolo autem te, Vir Cl. ignorare, diu multumque me desiderare ac optando quærere illum de merito Christi Scriptorem, cujus in præfatione lib. de Satisfactione Amplissimi Viri Hugonis Grotii, meministi. Desii tamen mirari, cur id à maximi ingenii Viro, cum eundem hæreticum oppugnaret acerrimè ac solidissimè, prætermisum: Cur abs te non suppletum, quod gemina præstare, facili negotio, & proximè ad sententiam summi Viri, poteras? Desii, inquam, mirari, ex quo nostrorum Theologorum certamina vidi & expertus sum, quæ imprimis apud nos (Polano olim præcinate) hodieque vigent; sic tamen ut, Dei gratia, nullæ inde turbæ. Expertus vero ista sum, quando Cl. D. Lucio nostro D. M. succedere iussus, vindicias controversiæ de Causa meritoria Justificationis, ab eodem mihi delegatæ, suscipere, aliquorum consilio & instinctu, sive debui, sive etiam volui ac tentavi. Oppugnavit enim illum gravissimus ac doctissimus pariter Anglorum Theologus, D. Thomas Gatakerus, ac iis quidem argumentorum plerumque præfidiis, quibus ego verba reponi posse cernebam, aut verius officias: paucissima verò alia, quæ rem tangerent, minus refutarent. Tua, in eâ lite, autoritas, V. Cl. me non parum intricavit, quod sic d. l. ad Lect. præfatus es. Cum duo nobis pepererit Christus, impunitatem & præmium, illud satisfactioni, hoc merito Christi distinctè tribuit vetus Ecclesia, Mox: Satisfactio consistit in peccatorum translatione: Meritum in perfectissimæ obedientiæ pro nobis præstitæ imputatione. Nam, quod ad prius, distinctionis illius, in Patrum scriptis nullum invenio vestigium; sed meritum & satisfactionem Christi promiscuè usurpare videntur: unde frequens meritum mortis ipsius appellatur. Quamquam fateor, hæc distinguere ex accurata eruditione sic posse: planè uti explicas Resp. ad Ravensp. c. 1. p. 3. Itaque si quæ vetustatis loca tibi observata sint: denovo id rogo, illa mihi suggerere ne graveris. Posterius, quod ad alterum lemma, candido eget Interprete. Neque enim satisfactio videtur Peccatorum tralatio; sed hæc, velut effectum, sequitur ad illam. Alterum verò, si de imputatione loquitur Obedientiæ PRO NOBIS, h. e. loco nostro

partæ:

partæ: quemadmodum vulgo nunc scribunt, *imputari nobis alteram hanc satisfactionem Christi partem*: (esse namque eam geminam, alteram pro pœna, alteram pro obedientia.) Fateor nullum me in Sacris Literis hujus Opinionis deprehendisse fundamentum. Atque ea quidem sententia, si sic grassari pergat, uti hætenus; brevi (mea conjectura) nobis novam Theologiam refinget. Nam, ab imputatione obedientiæ progrediuntur, ad vicariam illius præstationem: inde ad satisfactionem; inde ad sacerdotium. Tum, ut veri speciem magis obtineat, *nobis imputari*, faciliusque obtrudant, aiunt; nostrâ vice præstitam à Christo, *quâ homo fuit*, seu secundum humanam naturam. Qui perniciosus error, prope abest quin meritum Christi funditus nobis evertat. Video D. Paræum mature sat valuisse occurrere gliscenti malo, Epistola ad S. Comitem Witgenstenium, in ultima Edit. Explicat. Carech. Palat. à Philippo vulgarâ. Sed & à D. Gomaro, nupera editione Operum, excussam illam video, parum (si liberè licet) solidè. Maluisssem, vindicasset is (Gomar.) Elencticam suam Disp. de Mat. & Form. Justificationis: quam doctè castigavit illi, cujus suprâ mentionem feceram, Theologus Anglus. Plerosque omnes modernos videre videor ad illud impingere; *sola satisfactione passiva* (sic enim catè distinguunt ab Activa, sicut pariter, de Obedientia & Justitia loquuntur, cujus Script. vel Ecclesiæ auctoritate, nescio:) *Nobis remitti peccata*: &

* Sic Bellar. lib. 2. de Justif. c. 6. sub fin. cui resp. D. Paræus lect. 251. Chamier. To. 3. l. 21. c. 15. Sect. 47. 49.

tantum peccata remitti, non item concedi vel tribui gloriam ac beatitatem. Ego verò certus sum, neque Script. S. talia docere, neque talia dogmata constare posse cum fidei principiis; neque in eam sententiam ituros, quotquot Ampl. V. Cap. VIII. extremum te satisf. probant: vel ei saltem non contradicunt, quod est in universa Ecclesia receptum, Christi sanctitate & innocentia nostram contegi impuritatem, culpamque ac pœnam deleri, &c. Summa, *Justum esse mortuum pro injustis*, 2 Cor. V. 21. 1 Pet. III. 18. Jam, dum novis & puriori antiquitati inauditis distinctionibus illis invehunt, & satisfactionem (dicto modo) duplicem sic partiuntur, ut altera quidem valeat pro culpa, altera pro pœna; vel altera pro debito pœnæ, altera pro debito obedientiæ; vel altera pro redemptione à malo, altera

pro acquisitione bonorum: vel (nondum enim certi sunt quod horum teneant) altera pro vita æterna privativè, altera pro eadem positivè considerata, &c. (taceo plura:) Non satis est sibi hæc somniare, ni & spissis libris propalent, & insciis tyronibus sedulo instillent, eo quod putent, actum esse de Lege & Evangelio, Satisfactionem & Merito Christi, (quæ tamen perpetuo confundunt) nisi strictè observetur ea discriminatio: scilicet, Passionem & Mortem Christi *solam* valere ad remissionem peccatorum tantum; quia scriptum sit, *si peccaveris morte morieris*. Itemque, activam obedientiam *solam* valere ad jus vitæ æternæ promerendum, secundum illud: *Fac hoc & vives*. Hinc miræ phrasès. Imputari nobis meritum; & Christi quidem ipsius meritum; adeo ut nobis non minus atque Christo debeatur vita æterna; adeoque Jure experiri peccatoribus nob. cum Deo liceat. Mira profectò Gratia, quod jure deposcitur & expositulatione obtinetur! Si hoc est *Evangelium*; de re nihil dicam, jam in nomine adhuc hæsito. Verum quid ego hæc ad te? Ut studia nostra nonnihil, V. Cl. cernas, & juves. Nam ea quæ suprâ attigi, intricant & impediunt. Unde maximopere peto, ut explicatius nonnulla ad me perscribere digneris: Quibus si addideris conciliationem eorum quæ Disp. de Pecc. Orig. cont. Pelag. par. 2. antith. 4. nomine Catholicorum proposuisti, cum dictis à Chamiero, eodem nomine Panstrat. Cathol. To. 3. lib. 1. cap. 4. Sect. 7. Theodoret. in Cap. V. 12. ad Rom. imo Augustin. cont. adversar. Leg. & Prophet. lib. 1. cap. 16. To. 6. Oper. col. m. 599. nihil posset accidere optatius. Certus sum, sine Script. S. obambulare utramque phrasin: *Imputari nobis à Deo primum peccatum Adami*: & *imputari nobis Christi meritum*, Obedientiam, Justitiam. Non nego horum vel alterutrum: sed sanè & Script. S. convenienti sensu intelligo; quem nescio an assequantur, qui putant, rationem imputationis peccati primi esse, arctissimam nostri cum Adamo conjunctionem, quippe patre, capite & radice totius generis humani. Hæc si militaret ratio, nil fingi potest, cur non perinde alia omnia, post primum illud, imputentur nobis peccata: quando non desit esse Pater, Caput, Radix, inde à Lapsu. Sic pariter falluntur, (nisi ego valdè fallor) qui fundamentum imputationis Justitiæ, ponunt Vicariam Legis per Christum impletionem; quâ, nos, redemptos à Legis perfectâ observatione aiunt. (Palan. Lucius Macc.)

Macc.) Certe nihil aliud credo Ampliss. Virum abstinuisse ab illa tractatione de Merito, præter istam disceptationem quam in Apologetico, sibi inter Tilenum & Molinæum auditam scribit. Si quid enim judicare valeo (novi autem meam tenuitatem) non minus nostri Theologi castigandi veniunt, quam refutandus hæreticus, ob negatum Christi Meritum. Et quid durius est, datis principiis plerorumque modernorum, maxime illo (Christum, *qua Homo est*, meruisse) dubito, an solidè ullatenus hæreticus possit convinci. De his tamen tuum V. Cl. iudicium subactissimum, quod iterum iterumque peto, expecto; quod sciam, & in his te posse plurimum, & Antiquitatis premere vestigia fortiter. Opto autem te, commune Studiorum columen, Deus Opt. Max. Ecclesiæ Scholæque suæ diuturnum indulgeat sospitem. Salut. plur. quæso, Cl. D. Barlæo, tuoque F. D. Mattheo, cum Officiis paratiss. nomine

Dab. Basileæ Prid. Tui V. Cl. Studios.
Non. Mart. St. Vet.
 cl. l. c. XLVI.

Joh. Rad. Wetstein.

CDXX.

O Brutus sum abs te, maxime Vossi, mole beneficiorum, quibus filium meum hodie unicum, quum in Belgica vestra degeret, affatim ornaſti, neque video qui ſim ſolvendo, juxta cum illo. Quod redhoſtire nequimus, id perpetuâ & grata recolemus memoria, & Dominus è cœlo remunerabitur. Germania noſtra inteſtinis bellis diſſociata, exteris abſ in prædam. Diata Monaſterienſis & Onabrugenſis etiamnum eſt in ancipiti. Pax ſi coeat & cum Hiſpano Gallis conveniat, Provinciæ veſtræ dabuntur in dotem Regiæ filiæ, ut fama eſt, non ſine maxima rerum veſtrarum, fortaiſſis & noſtrarum, converſione. Colloquium Turonenſe in Pruſſia diſfluxit præter votum noſtratum D. Bergii & D. Calixti, qui concordiam Eccleſiarum calidè ac ſincerè quæſiverunt. De infallibili Controverſiarum judice, quem pars Pontificia Pontificem Romanum ſtatuerunt, noſtris enixè repugnantiſſimis, conveniri non potuit. Atque ita, quantum ſcimus, re infectâ diſceſſum & domum itum eſt. Audio ſpiſſum opus contra univerſalem Gratiam D. Amiraldi Salmurienſis Theologi à D. Spanhemio

in Academia veſtra opponi. Quid verò eſt quod de hoc argumento tantopere inter nos digladiemur? Quæſi Dei gratia nimis ampla eſſe poſſit, quæ ipſo cœlo amplior eſt. Harum latoꝝ Adolphus Pulekenius Medicinæ ſtudioſus, Medicis in Academia Leidenſi amat commendari. Quod ſi abſ te obtineat, pergratum erit. Bene vale, Vir maxime & amiciffime, cum amoribus tuis, & ſalve jugiter.

Brem. 5. Mart. Greg. Omnigenæ doctrinæ
 cl. l. c. XLVI.

& virtutis tuæ,

Admirator & Cultor,

L. Crocius.

CDXXI.

S. P.

Clariffime & doctiffime Domine Collega & amice integerrime.

QUO ipſo tempore accepi exoptatiſſimum ingenii Iſaaci tui foetum, eodem triſte nuntium mihi allatum fuit, de inexpectato obitu Matthæi tui; in quo non tua tantum & familiæ tuæ, ſed etiam Reipub. Batavæ & Literariæ gravis jactura, me graviter affecit. Doleo certè tam paucis annis, tot nobiliſſima ingenia nobis fuiſſe erepta, & te tantum virum in plerisque culturâ te dignâ fuiſſe privatum, & penè orbem redditum. Sed id me ſolatur, quod non ſolum ſis Philoſophus ſententia, ſed etiam fortiſſimus opera, & in talibus ita exercitatus, ut quos oſtenderunt terris tantum fata, nec ultra eſſe fiverunt, Deo cujus erant ſine murmure reddideris. Eum precor ex animo, ut Iſaacum tuum ſuperſtitem diu ſervet, vivat corâ illo, & tibi in omnibus ſuccedat, non degener filius, ſitque tibi & afflictiſſimæ matri ſolatio, toto vitæ veſtræ tempore. Hac ipſa hora monuit me filius meus ſe Amſterodamum, ab amico invitatum, proficiſci. Quod pluribus feciſſem, tribus verbis ago feſtinatò, juſſique ut præſentia ſua ſuppleret, tibiſque & D. Uxori, à me & mea quæ non ignara mali, vobis condolet, omnia officia & ſervitia deferret.

Hagæ-Comitis
ix. Aprilis,
 cl. l. c. XLVI.

Tibi addiſtiſſimus,

Andreas Rivetus.
 CDXXII.

CDXXII.

*Summo Viro, Gerardo Joanni Vossio,
S. P. D. Fridericus Spanhemius.*

ERUDITISSIMUM munus tuum accepi cum gaudio, & non parum me tibi obnixum profiteor, quod me non publicè tantum cum aliis, sed & privatim tibi obstringere volueris. Ego omnia tua cum summa voluptate, & fructu pari lego; & ingentem eruditionem tuam, non miror tantum, sed etiam colo. Mitto ad te *Ἀντισθεν* aliquod, Exercitationes nostras, de gratia universali, quas mihi expressit *σεπτίμια* hominis, qui non tam in me, quàm in Academiam nostram invasit: si dogmata minus tibi probentur, aut valdè fallor, aut probabis *ἀντιρρήσεις* eorum, quæ docemus, & deprehendes illum, quocum commissus, docere *ἀνίσταται*, & quæ se invicem pervertunt. Ausim etiam à te contendere, Vir celeberrime, ut causam cum causâ conferre, & aliquot horas nobis indulgere velis. Judicium tuum expecto; cui plurimum tribuere soleo. Non dubito quin istam Theologorum *ὀψιπάζειν* deplores. Idem me tecum facere, persuasissimum habe, & quanvis de bonitate causæ certus sim, infelicitati tamen meæ imputo, quod ingratis meis, in certamen istud litigiosum pertractus fui. Vale, Vir summe, cum clarissimis filiis, & me nominis vestri gloriæ dicatissimum amare perge. Scripsi raptissimo calamo.

*Lugd. Batav. xx. Mart.
c15 Ioc XLVI.*

CDXXIII.

Reverende & Clarissime Vir,

NUPER cum ad nos Heidanus noster rediisset, maximo cum animi dolore, tuum intellexi. Ereptum nempe filium tibi charissimum, qui ætate ea esset, ut quæ maxime optares, expectare ab eo posses. Ego candide ac bonâ fide testor, quæ amicis eveniunt, evenire & mihi. Cum interim non dubitem, quin magno, quin composito ac forti animo ferenda ea esse ac toleranda scias quæ, præside Monarcha illo maximo summoque homuncionibus his miseris obijciantur nobis, quibus idem, cum eidem videbitur, expectandum est;

ne de eo quidem dubitare possem, quin à te tibi quàm à me fortiora suppeditari possint remedia, quæ quotidie in usum tuum promas: cui hæc jampridem animo infixæ sedent; postquam toties præsertim cum adversis jam commissus es; sed & aliis constantiæ jam toties exemplum fuisti. Hæc obiter, cum ad vos quidam properaret juvenis, qui ut verbo se commendarem tibi petiit. Neque jam compareret, cui & Rutgersii, quam vides, vitam, & ab ipso conscriptam, & à genero meo hic editam, tradidissem. Reverende & Clarissime Vir vale, & nos, qui te veneramus, ama.

*Lugd. Bat. Ann.
c15 Ioc XLVI.
Aprilis xviii.*

Nominis tui observantiss.

Daniel Heinsius.

CDXXVI.

Salutem & incolumitatem perpetuam!

TANDEM me Saxone suo dignatur Stephanus noster. Bonum factum, inquires, summe virorum. Fateor ingenue, in amicitiam nostram non parum deliquisse me, quod tamdiu defraudaverim te novello hoc ingenii nostri foetu, cujus tibi primum exemplar jure merito debebatur. Sed hanc moram imputes velim Batavis tuis, quorum verum elogium extat lib. xxx. LIVII GENS INIQUIS REGUM TEMPORIBUS IMMINENS. Illi etenim perfidis Suecis supparasitantes, dulcissimam patriam nostram iis involvere calamitatibus, quæ omnibus bonis omnem de amicis bene merendi alacritatem prorsus excusere. Illi mare hætenus infestum reddiderunt, imò maria omnia. Illi vias omnes & aditus, qui antehac negotioribus nostris ad vos patuerunt, suis armis excluderunt. Sed JUSTUS JEHOVAH JUDEX. Vereor ne grave fatum impendeat Belgis, qui contritionem Joseph nihil pensi habuerunt, sed ex injustâ prædâ sibi exiguum lucelli quæfiverunt, de quo non tertius gaudebit hæres. Verum quorsum ista *μυμνησεία*? Te potissimum alloquor, ad te orationem convertito, quem triennium est, quum alloquutus sum. Peramanter rogo, si quid emendatione dignum in Notis hîscè animadverteris, candidus ut impertias. Erunt, cum bono Deo, curæ secundæ meliores. Totus nunc

O o

in

in eo sum, ut Historiam Christiani III. Danorum incliti Regis, post Beatum Meursium, ad finem perducam. Editurus sum & alia rerum Danicarum monumenta, quæ propediem, *ὅτι δὴ*, lucem videbunt. De tua valetudine, quam non adeo prosperam, utpote septuagenarii senis, esse inaudivi, vehementer sollicitus sum. Deus te incolumem præstet, Vir incomparabilis, egregio Reipub. literaræ bono, in annos Nestoreos! Salutem tibi plurimam ascribit D. Laurenbergius noster & D. Ernstius.

*Sora, τῆς γὰρ Die xxiv. April.
Anno M. ssie Regis aeterni
clō Idc XLVI.*

Tui observantissimus,

Stephanus Johannis Stephanus.

CDXXV.

Clarissime Domine,

ELapsis jam aliquot septimanis ex quo te per literas salutavi, & aliquod responsum frustra expectavi, subiit suspicari literas meas, nescio cuius culpa, haud fideliter tibi traditas fuisse, aut (quod absit) valetudine non satis integrâ te frui. Alioquin negotiū ipsius gravitatem aliquid literarum à te extorturam fuisse vix mihi dubium est. Est autem negotium de quo scripseram ejusmodi. D. Rob. Baylius Scorus ante biennium hac iter faciens, uti fortassis meministi, ex officio te Amstelodami salutavit, & opus scriptumque palato ejus admodum arridens, obiter apud te oculis suis lustravit, quod hac rerum tempestate in lucem prodire unice optat, & cum eo viri pii, probi, docti; existimantes cum Ecclesiæ Christi ubivis, tum imprimis in Anglia cum Anabaptisticis Erroribus conflant, te utilissimam operam navaturum. Est enim opus, quod designabam contra Anabaptistas adornatum, & ut ejus editio maturetur te per me quàm obnixè rogari voluerunt, & quidnam impetrare potuerim avidè cognoscere desiderant. Quod si forte ad integrum opus edendum tempus vireſce minus suppetant, eam partem saltem quæ de Pædobaptismo differit, ut publici juris facias obsecrant. Ad hæc aliæque complura perficienda, ut Deus te, Vir Reverende ac doctissime, quàm diutissimè sospitem incolumemque conservet orans, vel brevissimum à te tuiſſe (quibus juxta cum uxore lectissima fa-

lutem plurimam impertior) responsum ut feram summo opere desidero, quo amicorum desiderio atque expectationi aliquatenus satisfieri possit.

*Dordrecht xxv. Maii Reverentiæ tuæ
clō Idc XLVI.*

observantissimus,

Jacobus Lydius.

CDXXVI.

*Clarissimo Viro D. Gerardo Joanni
Vossio, Professore Historico.*

Vir Clarissime plurimūque Reverende,

Literæ tuæ amoris, ac benevolentia significationibus refertæ, mihi sanè fuerunt oppidò quàm gratissima. Illud tamen animum meum, in doloris sensum rapuit, ubi verè *μολύχλινα χόμματα*, tristis duorum filiorum tui mentione conspexi; quo magis Deum rogo, ut filium superstitem (quem magis ex virtutum, doctrinæque fama, imo & monumentis, quam ex vultu novi) D. Isaacum Vossium quàm diutissimè incolumem conservet, ad senectutis tuæ fulcimentum, & oblectamentum. Equidem, nisi te, ad casus istiusmodi adversos, forti constantique animo excipiendos divinarum, humanarumque literarum præsidio, beneficioque probè munitum, mihi planè persuasum, perspectumque fuisset; jamdudum officii mei esse duxissem, mœstitudinem quæ animum tuum pervellere potuit, literis meis, quæ poteram, evellere. De Baptismo, & Anabaptismo, commentationes tuas, etsi nunquam non tempestivas fore arbitrer; tamen nunc vel maximè fore, si eo quo scripsi tempore, lucem aspiciant; ut credam, faciunt amici cujusdam mei, qui Rev. D. Baylio, familiariter utitur, ex Anglia datæ, ad me nuper literæ. Cæterum quemadmodum salivam mihi moverunt scripta varia, quæ memorasti, ad prælum parata, ita non mediocriter me affecit Manuscriptorum quos peregrinando filius collegit, Librorum mentio. Quod autem, amicissime Domine, velle te scribis, ac desiderare meum adventum, utique egometipse id nimis quàm velim. Nihil enim animo meo objici potest magis *ἀναισθητόν*, quàm istud ipsum quod proposuisti illicium, præsertim ubi pristinam, & avitam amicitiam una atque eadem opera,

opera, refarcire, atque statuminare dabitur. Simulac Deus otium mihi fecerit, grallatorio, ne dicam, Pegaseo gradu, ad vos advolabo. Interim salutem plurimam, tibi juxta, atque Uxori lectissimæ, filioque D. Isaaco impertio. Salutant vos quoque fratres mei, sororesque quotquot hîc degunt. Vale, Vir Doctissime, & me quod facis, amare perge.

Dordrecht Idib. Reverentiæ tuæ
Sextil. cl. Id. c. xlv.

observantissimus,

Jacobus Lydius.

CDXXVII.

Summo & Excellentissimo Viro, Domino
Gerardo Joanni Vossio, & πρῶτο
Professori Historico.

Neumannus noster, Virorum & Amicorum maxime Vossi, redux à vobis, Epistola exhibita, cum eruditissimis Commentariis tuis, de Vitiis sermonis, me mirificè affecit, quod humanitatem, ac benevolentiam tuam, non satis prædicare posset. Sed & munus transmissum, ipso tacente, egregium affectum in me tum esse voce proclamat. Verè & sine fuco affirmo, nullas tuis chariores mihi literas ab amicis dari, quibus tanquam divino Nectare, & Ambrosia, quando languo, reficior, quando suavissimum, & candidissimum spiritum tuum ex iis haurio. Debendi reum me tibi, quod sum fateor. Nihil enim à me proficisci posse scio, quo dignam aliquam remunerationem faciam. Pro incolumitate tua, tuorumque Deo litare interim haud cessabo. Alcyonia nobis sunt, singulari Dei beneficio concessa, ab habitu Combachii. Turbabit si possint, quidam balatrones, si quis fibulam à prudentia Magistratus restrictam fortassean luxaret. Non desunt enim, qui vestros sollicitent, ut in nos caninam exercent facundiam. Scripsi dissertatiunculam, de sopiendis Ecclesiæ diffidiis, anno nuper præterito, quæ à quodam Polono, Torunium ad suos missa fuit, quum Colloquium Charitativum, quod vocant, auctoritate regia institueretur: in quo Pontificii, nostris parum charitatis, Lutherani vero etiam minùs ostenderunt. D. Calixtus vir egregius, & ad concordiam pronus, à suis pessimè ibidem habitus fuit. Mo-

guntini Jesuitæ in eundem sæviunt. Neque Nihusius vetus, nisi fallor, discipulus ei parcat, qui mirum concordia modum, nupero scripto, apud vos, ut suspicor, edito excogitavit, quo tergiversantem, aut succumbentem damnat, ad panem, & aquam. De quo, quid sentias, candide, quæso, ut soles, mecum communica. Cogor calamum sistere, quia Glaucus, juvenis probus, & non indoctus, harum lator festinat. Benè vale, & salve, Vir summe, πρῶτον, à D. Willio & me, qui sum

Bremæ 1.º, Sext. Eruditionis ac virtutum
cl. Id. c. xlv.

tuarum Æstimator,

& Cultor quoad sum,

Ludovicus Crocius.

CDXXVIII.

Celeberrimo Viro Domino Gerardo
Johanni Vossio Historiæ Professore.

Reverende, Clarissime, ac Celeberrime Vir,

ITA semper apud me reputavi, faciendum esse mihi contrarium ejus, quod facit D. Voetius, dum affectibus suis obtemperat, si quid benè factum velim. Ea causa me movit, ut cum Tribunal suum iniquum inchoarit, alloquio ad Clarissimos, & Celeberrimos Belgii Professores, Ego præsentem meam Apologiam, maluerim per Apostrophen, ad illos claudere: & cum illustrem vestram Scholam (quæ in te, Celeberrime Domine, & egregio Barlæo, plus splendoris fundit, quàm Novella Voetii Academia per se, & mille sibi similes possit unquam sperare) in sua compellatione prætermiserit; Ego putaverim etiam illius judicio me, meaque esse subjienda; ut saltem apud plures meam contestem innocentiam, quam ille voluit eligere, apud quos me calumniaretur. Te igitur rogo, Doctissime Virorum, ut æqui bonique consulas, quod graviora tua studia his naniis interpellem. Spero brevi me daturum solidiora, & utiliora Ecclesiæ: sed neq. fama in ea fuit negligenda. Perge benè velle mihi, qui reverà sum, & manebo in ævum,

Groningæ 1.º, Tibi ad omnia obsequia paratiss.
Aug. 1646.

Sam. Marefius.
CDXXIX.

CDXXIX.

*Viro Incomparabili Gerharδο
Joanni Vossio, S. P.*

Vir Incomparabilis,

Magnorum hominum famam, ita semper veneratus sum, ut singula quæ ostendunt favoris signa, singula honoris testimonia esse credam; nam ut onerosa res est, Viro jam dudum, ad celebritatis fastigium evecto, crebras multorum compellationes, gratulantium vota, longos sermones, & cætera pretiosi temporis dispendia ferre: ita vilioribus ingeniis, plausibilis honor est, quantillum in usurpandæ patientiæ, ac humanitatis occasionem duci. Neque ignorare potes, Vir Excellentissime, quæ me causa, in hunc sermonem egerit; cum non ita pridem ad te venerim, Ignotus, Peregrinus, ac Hospes, ut Virum sapientiæ & doctrinæ gloriâ latè per terras notum, coram adspicerem, obfirmaremque ita gratiori argumento fidem, antea solum ex fama, & admiratione suspensam. Tum expertus abundè sum, omnia in te ad raræ cujusdam virtutis, ac humanitatis modum esse composita, neque te sollicita ambitione, aut gravi supercilio, longas ac inanes honorum præstigias, à gratulantibus exquirere; sed simplici infonctique affectu, quod in homine, præsertim magno, pulcherrimum est, tuorum animos ad spontanea officia, commendandumque justiore encomio, virtutis tuæ pretium incitare. Memoria enim teneo quod à te audiivi, cum diceret: numquid externi quicquam in me vides? Quod sanè rarum est in magna fama; sed eò illustrius quò censentur internæ animi dotes, omnibus aliis externi splendoris, & fortunæ ludibriis præstare. Verùm tuam modestiam irritare nolo. Vir Celeberrime, quod si auderem, jam tuæ laudes, utramque in Epistola paginam facerent; sed quoniam & melior, & honestior, semper est virtutis apud alienas aures commendatio, apud te hæc omitto; contentus non ignorare, quale de tanto homine judicium ferri debeat. Ignosce præterea facienti, quod ipse permiseras, cum juberet uti frui tua facilitate, quâ lubitum esset; scribendi libertatem intelligo, quam si officiosam magis, quàm molestam interpreteris, luculentissimum habebo, & bonitatis tuæ, & non repudiati obsequii mei argumen-

tum. Literas ad illustrissimum Salmasium, cum prima occasione ipsemet perferam, ut etiam vigore tuæ commendationis, in cognoscendo illo literarum miraculo, ingens meum desiderium quodammodo possit acquiescere. Cogitavi tum quidem Lugdunum; sed alius me casus, huc appulit, ubi Illustr. Banerius, stationem per hyemem elegit. Vale æternum, Vir Amplissime, quem perenni famæ, jamdudum literarum gloria assignavit. Vale, & cogita me virtutem tuam non his caducis verbis; sed pectore magis, & æterna, tacitaque mentis Religione venerari, cum magna quæquæ laudum merita, animo justius, quàm oratione soleant censer.

*Dabam Ultra- T. Devotissimus Cultor,
jecti 1^o. Sept.*

1646.

Emund. Figrelius S. Gothus.

CDXXX.

*Gerardo Joanni Vossio,
Claudius Salmasius.*

Clarissime, & Celeberrime Vir,

HAgam profecturus, & cum jam essem in procinctu tuas accepi: quod erit mihi pro excusatione tarditatis in respondendo. Gaudeo te cum dilectissimo filio valere; sed Lectissimæ Uxoris morbus me sollicitat, ac tuo pro illa minus sana dolore doleo. Deum precor, ut citò liberetur isto malo, tuque eo metu, in quo nunc es propter illam. Te non cessare tamen æternum victuris scriptis posteritatem demereri, lætus etiam accepi. Bonum factum quoque, quod *sic marseis* Matthæi tui Annales excudantur, & quod eorum series, ut egregiè potest, ita etiam vult Isaacus tuus pertexere, serio tibi, illique gratulor. Vellem ut velles de Provincia Historiæ, ei ab ordinibus Hollandiæ mandanda. Nemo hac tempestate id melius posset præstare quàm ipse: & faxo omni occasione, id ita esse intelligent illi Procerum, quibus notus sum. Non multi illi sunt, non enim sum ambitiosus, nec pluribus innotescere cupio; præcipuè Magnatibus, qui quos putant se inferiores valde despiciunt; ita eos non admodum ipse suspicio. Sed nostris qui fortasse aliquid volent in meam gratiam, ut etiam in hac causa vobis sint suffragatores, instabo. Mitto tibi Librum alterum Verini de Transubstantiatione. Dubitavi diu an mitterem, quia contra Grotium eum scriptum accepisti.

cepisti. Quoniam omnes volunt me Verinum esse, quàm verè, viderint; non credidi te diversam orbitam secare à communi sententia. Malitia tota vergit adversus Pontificios, & Lutheranos. Et velim scire, quid tu, & Isaacus tuus de eo sentiatis. Uxor mecum vos officiosissimè salutat Te, Uxorem, & filium. Vale.

Leyde Idib. Septemb. cId Idc xlv.

CDXXXI.

Pulsat hodie, amicorum maxime, fores Charitum Musarumque tuarum Burchardus Cnipplingius nostras, salutigerulus tui Crocii, qui eruditissimos labores ingenii tui æstimat & admiratur. Quærit ille in Belgio vestro Pædagogiam honestam, quæ, si te parario, ipsi obtingat, tuus erit homo. Patre natus est viro bono, Scholæ nostræ Collega. Sin, agnoscet tamen cum observantia affectum. Ad-

* Is est Joh. Lud. Wolzogenius, postea Fausti Socini affecta haud indoctus.

fuit mihi non ita pridem Baro *quidam à Wolzogen profectus in Poloniam, qui spem mihi fecit Historiæ Ecclesiasticæ de Mysterio sacro-sanctæ Trinitatis, manu tua conscriptæ & edendæ in morem Historiæ Pelagianæ. Imple spem nostram & votum, si potes, & matura. De posteritate ut es meritissimus, ita meritis tuis hanc coronidem impones. Sic vive, virorum summe, & Crocium tuum redamare, quod facis perge. D. Willius, Collega meus plurima te & tuos juxta mecum impertit salutem.

*Rapim, Brema Excellentie tue, Vir maxime
xix. Octobris
cId Idc xlv.*

devotissimus,

Ludovicus Crocius.

CDXXXII.

Viro maximo, Incomparabili. D. Joh. Gerardo Vossio Theologiæ Doctori Samuel Sorberius S. P. D.

EN Epistolas, Vir summe, quas ad me misit & ad te scribit Ægidius Gaillardus nobilis quidam Gallus, qui à castris Pontificiorum ad nostra aliàs transiit, & edito libro pietatem & doctrinam suam

probavit. Illi nuper venit in mentem nescio quid circa Nestorium, quasi perperam in Ephesina Synodo fuerit livore Cyrilli hæreseos insimulatus damnatusque; eaque de re edidit librum, cui titulus est *De Supposito*, cujus verò, ut puto, copiam sibi fecit optimus reverendusque Curcellæus. Efflagitat autem Gaillardus, ut à te responsum, ut & à Salmasio Spanhemioque extorqueam. Sed imprimis à te, cujus æquitatem & subactissimum in expendendis veterum dogmatis judicium novit. Si quid igitur ad illum, vel ad me quibus mentem tuam significes, literarum per Curcellæum nostrum scribas, gratissimum feceris, & quo tibi devincies Virum nobilissimum. Tu vale, Senex venerandissime, seculi nostri decus primum, cum tuis omnibus, quibus salutem quæso plurimam meo nomine dices.

Lugd. Batav. iiii. Nov. cId Idc xlv.

Audio Joh. Crocium in eadem sententia esse in qua Gaillardus noster.

CDXXXIII.

Clarissime & Celeberrime Vir,

Nisi cognita orbi humanitas tua esset, haudquaquam ignotus, gravissimas occupationes tuas, intempestivis literis, interpellare ausus essem. Ea mihi & spem fecit discendi à te, quod docere solus potes, & pudorem qui cum peregrinitate mea conjunctum esse debebat, ademit. Quæstio his diebus apud nos mota fuit, de vera origine vulgariarum Arithmetices notarum, quas Ziphras vocant, 1. 2. 3. & varie ea res agitata. Sed de Antiquitate, & qua occasione, apud nos in Europa, quibusque temporibus, usurpari primum coeperint nemo quicquam. Additum & hoc, rationem non apparere, cur apud Latinos V quinque, L quinquaginta notet. Recondita penes te omnis Antiquitatis cognitio, hæc aliis ferè inaccessa, facillime expedit. Quod si gravissima negotia tua patiantur, ut vel tribus verbis, mentem tuam, Domino Richtero harum latori aperias, felicem me arbitror, & maximo beneficio affectum. Brevem me eadem nominis tui reverentia facit. Deuste, incomparabile seculi nostri decus, sospiter.

*Leide ex ædibus
Spanhemianis. iiii. Id.
Dec. cId Idc xlv.*

*Cl. nominis tui
Cultor addictiss.*

Georgius Horn.
CDXXXIV.

CDXXXIV.

Viro summo D. Gerharδο Joanni Vossio, Χαῖρεν ἐν Κυρίῳ.

Clarissime & humanissime Vir, D. & Amice plurimum honorande.

CUM Cretzmarus noster, isthuc transiturum se diceret, sine meis eum literis ad te, amicum meum singularem, venire nolui: etsi nihil ferè erat, quod ad te scriberem, qui meis nunquam responderes; & inanibus te literis non magnoperè delectari existimabam. Nisi tu eas fortè, non prorsus inanes judicas, quæ benevolentiam, & officii habent significationem. Ego quidem mihi conscius sum, mei in te animi; quem suscepi, ex quo tuum perspexi. Te quoque amicitiam meam non omnino adspernari, non quidem è tuis, quas nullas ad me dedisti, sed ex amicorum salutationibus intelligo. Simus inter nos hoc perpetuo animo, mi Vossi, & quod pauci serio faciunt, sincere amemus; etiam quod uterque nostrum cupit, de juventute bonarum artium studiosa, suo quisque loco, porro benè mereri studeamus. Ego id, quoad consequi, per tenuitatem meam possum, facere non desinam. Argumento tibi erit libellus Anonymi Scriptoris, quem notis meis illustrare conatus sum, quemque superioribus mensibus edidi, in usum eorum, qui Historiarum tractant studia. Tibi mitto, ut & videas, & lectione ejus te oblectes, existimesque ecquid in eo dignum à me præstitum, operâ, & sumptu. Vale, quam optime, & salve.

Ex Academia Sorana Prid. Non. April.
CIC IOC XLVII.

Si Pub. Syri mimos, quos aliquando fidei tuæ commisi, mihi remitteres, rem profectò faceres te dignam, & mihi carissimam.

Tui studiosissimus,

Henricus Ernstius.

CDXXXV.

Viro summo, Gerharδο Joanni Vossio, Seculi Ornamento S. P. D.

QUAnquam, Vir summe; mirari possis, quod ego, homo ignotus, & ex Pomeraniæ oris id ad te ausim: credo tamen me excusari posse, vel una ista fiducia, quâ præsentem olim veneratus sum, & loquentem audiui. Res quidem tanti momenti non est, ut hac scriptione forsan, interpellare debeam tuos labores, & gravissima studia: quia verò ad alium ire non licebat, à quo erudirer, condonaturum te spero importunitati meæ. Et ne multis te remorer, Vir Magne, statim in limine scribam, quid te velim. Notum est, quam hodiè nimium insaniat turba Chymicorum, circa laudes Medicinarum, quæ ex Metallis, & Mineralibus petuntur. His ut fidem adstruant, Argumentum sumunt maximè ab antiquitate, & quidem Ægyptiorum: à quibus Mineralia, & Metalla, ob præclaras in Medicina dotes, ac vires, in numerum Deorum relata, & tanquam Deos, ac Numina quædam culta fuisse, magno hiatu clamant, ac testantur. Memini hanc in rem, de cultu fossilium, in Theologiæ Gentilis ad Lib. iii. & iv. præfatione, quædam moneri; atque alibi in libris istis tradî; Paganos multis rebus, unde insigne aliquod commodum ipsi sensissent, divinos nonnunquam honores tribuisse; sed hæc parùm facere ad notitiam Theologiæ Gentilis; ad symbolicam tamen plurimum conferre. Quia ut constat, & allium, & porrum, & capræ, inter numina accipiebantur; ob utilitatem scilicet, quam hæc talia præstabant hominibus. An autem tale quid, Metallis, ac Mineralibus præferim, ob hanc causam, quam nominari contigerit, difficile est sine gravi aliquo Authore affirmare. Nec cordato unquam homini hoc in mentem credo venire posse, uti id sentiat, aut credat. Quis enim tam graviter desipiat, ut quia Solis vires maximè conspicuæ sint in sole terrestri, hoc est auro; huic ob id Metallo, nomen ab ipso inditum esse velit, & religiosè postea tanquam numen, ab Ægyptiis adoratum? Quis item Martis, Veneris, Jovis, Saturni, Lunæ nomina, nostri Ferro, Argento, Stanno, Plumbo, Cupro, Mercurio tribuat, ob Naturæ, & Virium cognitionem? Quod hodie Chymici faciunt; quo jure, & quibus fundamentis,

mentis, ipsi viderint. Quas tantopere vires jactant, de illis puto parum constituisse Antiquis; nec ipsis hodie Chymicis quicquam certi de illis constat. Interim multa infruncti oblateralant, de auro potabili, de auri anima, & tinctura, de cæterorum Metallorum, & Mineralium extractis, Essentiis, Spiritibus, & Tincturis, de quibus ne somniasse quidem credo Ægyptios. Alios quidem usus Metallorum, non negaverim. De Chymicorum verò nugis, an certi aliquid ex Antiquitate adstrui possit, à te, Vir summe, erudiri velim, & quidem si dignus videar, uno vel altero verbo, ego tam grande beneficium, si non alio, saltem observantia, & pietatis in Præceptorem redhostimento, submissem, ac devotè, compensare studebo. Vale, & diu vive bono Reipub. literaria.

Dab. Stetini 5. Maii 1547.

Magnific. T. observantissimus,

Georgius Kirstenius Med. D.
& Professor Regius.

CDXXXVI.

*Viro Incomparabili, Gerardo
Joanni Vossio.*

Celeberrime Vossi,

QUas nuper pagellas Sulpicianas, per doctissimum Richterum, misi, eas à te pari humanitatis affectu, ac cætera, exceptas fuisse, cum gaudio intellexi. Gratias pro tanta in opus nostrum *οδυνή* agere nunquam possum: debebo semper. Nunc quoniam paulatim, ex Historia Veteris Testamenti, ubi pede magis inoffenso pergere licuit, ad amplissimos Historiæ exoticæ campos pervenimus, & nobis Imperium Græcorum, Judæisque formidati Syriæ Reges, tum Romani dicendi erunt; quantum humanitatem tuam fas est, oro, & obtestor, ut Læctionis tuæ, & historiæ fontes nobis pandas, ac quæ videntur impertias. Imprimis quod Historiam Arrianam spectat, in qua noster cum cura, & apparatu majori versatus videtur, nescio an pari ubique fide, & abique ira ac odio. Eam igitur, Celeberrime Vossi, commendatam tibi præ cæteris habe, & quicquid videris dignum observatione tua, fac tibi debeamus. De vita Martini, & Monachorum Orientalium, nostri quid deside-

rem. Ea vel omninò sine decenti notarum veste, publicanda erunt: vel tu succurrere, & inopiam sublevare tua copia debes. Occurrunt ibi multa Antiquitatis Ecclesiasticæ monumenta, de Monachorum prima origine, habitatione, institutis, vestitu, victu, & quantum posteriores, ab antiqua illa severitate, declinarint ad socordiam. Quæ omnia requirunt tantam antiquitatis illius peritiam, quantum in te solo, seculum nostrum agnoscit, & veneratur. Sed ego & prioribus tui ip Sulpitium affectus documentis, & optima, quam Richterius fecit, spe incitatus, polliceor nobis, Sulpitium tua opera insigniter illustratum. Interea vale, Vir seculi nostri Maxime, & me, cætera omnibus, affectu in te, & cultu nemini inferiorem, amare, & ornare perge.

Leide xviii. Maii
clo Ioc xlvii.

Clar. Nominis Tui,

Cultor addictissimus,

G. Horn.

CDXXXVII.

*Viro Excellentissimo, Gerardo
Joanni Vossio.*

PAucis lineis prolixam *ὀδυνή*, figuraturus, tuique sic florentis status nuncio brevi gavifurus, faventissime Vossi, subjicio acri tuo judicio, & candido, geminam exercitationem: alterâ undequaque doctissimum Junium vindicatum, & ab acerbioris censura maximi Josephi Scaligeri, omninò non malè, sed veritatis perstudioso. Etenim viri summi eximias, & ingenii vastissimi opes, ut numero plurimas, ita pondere gravissimas, ex animo veneror. Eadem est penè controversia literaria, quam hic duo, Doctissimus Joan. Buxtorfius, & ingeniosissimus, atque eruditissimus Ludovicus Capellus, ventilant. Sed hæc melius publica loquuntur scripta. Porro passus sum meis manibus extorqueri sponsalia, quæ si Excellentissimus Vir, vel oculo emissicio, saltem lustrare dignatus fuerit, & probaverit; conabor efficere, ut mixtus hic severitate ingemii à Musis tristioribus, respirantis, Lusus, lucem à vestratibus Typis sit mutuaturus: sin minus, mihi etiam displicebit. Tuam igitur Celeberrimo Typographo Janfonio sententiam super hac lucubratiuncula (uti super

super aliis de literis Antidiluvianis Adami, Sethi, Enochi, Noachi, &c. item de literis Hieroglyphicis Aegyptiorum, quæ tibi muneri missa sunt) si indicare haud grave duxeris, sempiterna erit apud me hujus beneficii memoria. Quod si haud nossem insignem tuam humanitatem, & candorem, quem optima anima, Meursius, mihi sæpè deprædicavit, & te legendi, & me met scribendi liberarem labore: quem tantæ nunc publicæ occupationes circumstant, ut Lictores olim, Consulem Romanum. Quod si suaseris in aliis, quæ domi pepereris, foris vestiendis, & nutricandis, haud ero in posterum difficilis. Metuo saltem genio loci: nihil ne inquam, abmorso ungues sapiat, ex angulo insularis septentrionis venire putatur. Sed festinantius hæc, quàm oporteret, ad virum tam eximium, & celeberrimum; quem plurimum salvere jubet

Havniæ
ii. Junii
1647.

Thomas Jo. Bangius.
Acad. Havniensis, P.T.
Rector M.S.

illa centum quinquaginta florenos, quotannis apud suos esset lucratus. Ea res urit graviter Curatorem, qui legendas mihi exhibuit ejus literas, & suo cum labore, lulum esse indignissimè fert. Magna enim, nec digna Gronovio levitas, postquam prius tum literis, tum coram conditionem accepisset, jam quasi cum pueris esset negotium, spernere omnia, & flocci habere. Viderit ne hoc aliquando se offendant. Verum desinam ipsi malè ominari. Fuit item hic Ifendornius, & professionem adeptus est. Excusavit se de literis; ac scriptas aiebat, priusquam cum Curatoribus Zutphanæ esset locutus, & à nebulone diutius, quàm oportebat, retentas. Vale Vir incomparabilis, & æternum mihi suspicende, atque amare perge tibi devotissimum. Salutem adscribo plurimam ornatissimæ Conjugi, ut & clarissimo filio, ac instar omnium, Isaaco.

Harderovici. xi. Kal. Septemb. clō Idc xlvii.
Stylo Juliano.

CDXXXVIII.

Illustri & summo Viro, Gerardo Jo. Vossio, Cornelius Tollius S.P.D.

SI quidem in me grati animi, & officiorum mentis est, quod sanè quamplurimum, Vir incomparabilis; illud omne exposcunt sibi immensa tua erga me, & cumulatifima beneficia. Defero etiam grates omnes, officia omnia, operam, & laborem meum, & quod maxime possum, memoriam non obliterandam. Sed nolo pietatem meam hic multis jactare; cum ego quanti te faciam, semperque fecerim, qualem item me à te fieri abundè cognorim; ipse mihi sim testis. Mitto dicatorem Epistolam, ad Curatores nostræ Academicæ, ut ex te intelligam, Vir summe, anne aliquid in ea me, ut meum fefellit. Scio enim quam sit magnum, dare quid in manus hominum, sæpè Vitiligatorum; ac facile persuadere mihi possum, non solum mecum sapissimè, sed etiam tecum tractanda, quæ placere omnibus, necnon tibi, velim. Rogo igitur obnixè, ut quid de illa sentias, queam cognoscere. Ero enim in edenda confidentissimus, si illuc judicium tuum, & autoritas accesserit. D. Gronovius nudiustertius, vocationem sui remisit Nobilissimo Winbergio, cum

CDXXXIX.

Clarissimo Viro, Gerardo Joanni Vossio.

Literæ ex Anglia nuperrimè ad me datæ, tristitia omnia nuntiant. Exercitus enim Farfaxii, qui maximam partem constat ex Anabaptistis, jam rerum potitur, Regemque captivum detinet, nec minus Presbyterianorum (uti eos appellare Angli assolent) quàm Episcoporum, Ecclesiastico regimini, bellum indixisse videtur. Independentibus, qui idem agunt, haud segniter, auxilium ferentibus: adeo ut duabus partibus infelicitè contendentibus, tertia jam palmam præripuisse judicari possit. Nunc certè redeo in memoriam, Vocum asperrimarum quorundam in Anglia Virorum, non imi subsellii, & cætera Piorum, & Doctorum, pacem (tanquam consiliis ipsorum inimicam) cum Rege, procul esse jubentium. Quæ utique sicuti tunc Aures meas raserunt, cum eas audire contigit, ita nunc me conturbant vehementius, animique mei serenitatem obducunt. Miserrima Anglia! Miserrima Ecclesia! cui suppetias ferre quemadmodum non est cujusvis, ita Deo acceptissimum fore nemo sanus dubitet. Tui, Vir Doctissime, auxilium quod præstare potes, ne denega, & quod jamdudum Viri docti ac probi desiderant; Opus illud contra Anabaptistas, saltem quatenus

Pado-

Pædobaptismum asserit, fac quæso lucem aspiciat. Etenim amici tui, meique idipsum rursus efflagitant, hoc te afflictæ Angliæ daturum sperantes. Sperâram mihi hac ætate tempus, locumque, datum iri coram, de hisce, aliisq; sermones ferendi. Sed spei jam successit *despecta*. Rogo, ut quid de libri editione, amicis promittere possim; ubi per occupationes licebit, mihi indicare non dedigneris. Interim vale, Vir clarissime atque humanissime, & me, (quod facis) amore ac favore tuo amplecti perge. Uxorem lectissimam filiumque D. Isaacum salvere jubeo.

Dordr. iii. Id.
Sept. 1647.

R. T. *observantissimus*,

Jacobus Lydius.

CDXL.

Clarissimo, Doctissimoque Viro, D. Gerardo Joanni Vossio.

Reverende admodum, clarissime & doctissime Vir,
Avuncule ætatem honorande,

COMplures jam misi literas, quas non ingratas fuisse scio, modò bona fide sint traditæ omnes. Dubium quodammodo me facit, quod unas tantum à clarissimo Cognato, binas verò à Matre exaratas, viderim hæcenus, licet per quatuor menses, jam in Gallia fuerim, aut saltem id spatium effluxerit, ex quo vobis ultimùm precatus sum, Vale. Prospera omnes uti valetudine spero: ut utamini hoc instanti, & compluribus annis, Deum continuis precibus oro. Quod si certior me faceret clariss. Cognatus, acceperitne nostras, acceperitne illa ampliss. D. Saravii, multum sanè mihi gratularer. De Manuscriptis, qui hic in Bibliotheca publica sunt, jam scripsi; quod si opera nostra in conferendo uno, vel altero, ei utilis esse possit,

*Libenter hoc & omne militabitur
Bellum in tuæ spem gratiæ.*

Ampliss. D. Gothofredus, creberrimam tui mentionem facit, ut & Clar. D. Tronchius, hospes meus; uterque verò multum te præ aliis omnibus æstimat. Ampliss. Gothofredus aliquoties me jam convenit, & se accedentem excipit perquam humaniter: non habet hic alium quempiam discendi jura avidum; quæ res facit, ut

tantò me amet impensius. Optarem, ut bono viro melius conveniret cum uxore, quæ ab ipso separatam, ob quas nescio rixas, vitam agit. Opus Institutionum Poeticarum, necdum hic vidi: Pudet me quotiescunque, ipsum sine libro tuo convenire necesse habeo. Dabis veniam huic nostræ temeritati, qui exemplar illi dandum, dedimus alii; nec te ita id in sequiorem partem, interpretatum putem, ut aliud ejus loco, mihi submittere nolis: humanitas enim tua, ac singularis erga me amor facit, ut propediem me id accepturum putem. Typographus Elzevirius, dubio procul hic quem habebit Librarium, cum quo ei sit negotium, ad quem id facilè mitti possit. Sed nolim pluribus te detinere. Inclusi hic literas ad reverendum D. Hottonum, & Matrem, quæ expensâ, pro omnibus literis reddet. Interim tibi, clarissime D. Avuncule, Amitæ, ac D. Cognato carissimis, instantem hunc, & sequentes complures annos felicissimos precor; Deumque rogo, ut Te, Amitam & Cognatum, quam diutissimè servet incolumes. Idem se tibi precari ex animo scribere jussit D. Tronchius.

Dab. Genev.
v. Kal. Dec.
St. Juliano,
cIo Idc xlvii.

Ampliss. & clariss. nom. tui

observantiss. Cognatus:

Franc. Junius, F. N.

CDXLI.

*Viro incomparabili Gerardo Jo. Vossio,
Vincentius Fabricius S. P. D.*

NON patitur candor tuus, & eximia erga me benevolentia, prolixè apud te de me deprædicare, quot nominibus, & quantoperè, tibi, tuisque devinctus sim. Postrema profectò Epistola tua, ejusmodi fuit, ut etiam si absque cæteris tuis beneficiis foret, planè certius ipsè possim de paterno tuo in me affectu, quem pluris æstimo, quàm quicquid satis indulgens fortuna hæcenus suggestit. Id unicè Deum precor, ut tanti Viri amicitia, ac amore dignus inveniar, quem Reipub. literariæ maximè interest, præter cæteros mortales, in vegeta illa senectute, diutissime esse supersistere. Isaaci filii crescenti gloriæ, ex animo faveo, gaudeoque quod tam dignè sustineat onus, quod humeris ejus incumbit; ut nempe tam parentibus sanctissimis,

P p

quam

quam bono publico, fratres repræsentet, jacturasque tantas compenſet. Uti hætenus conſuetudine plane fraterna convincti viximus; ita ſpero illam inter nos animorum conjunctionem æternam fore. Nec puto aſpernari ipſum veterem amicum, quem tenuitas primò ingenii, aliæque adverſa, mox Reip. negotia, à literarum gloria arcuerunt. Nunquam tamen ulla negotia ita me occupant, ut non meminerim benevolentiaſ veſtræ, aut mihi tempus deeſſe patiar, ad diligenter evolvendos incomparabilis ingenii tui fœtus, quos proveſta quidem, ſed fœcundiſſima illa ſenectus quotidie parit: in quibus proſectò nihil ſenile eſt, præter admirabilem, judicandi, & ſcribendi maturitatem. Iſta unica mihi voluptas in poſterum ſupererit, implicito tot negotiis, & à priſtinis meis amœnitatibus, per mille divortia miſerrimè diſtracto. Filio Viri Cl. Manaffis Ben-Iſrael, libenter affectum meum, luculenta aliqua opera fuiſſem teſtatus, ſi uterque in molliora, & oportuniora tempora incidiſſemus. Sed ipſe coram accuratius omnia ediſſeret. Uxori matronæ laudatiſſimæ, ut à me, meaque, officioſiſſimam nunties ſalutem, obſervanter oro. Uxor mea illam uti matrem colit, & veneratur, hætenus ſibi ignotam, ſed ex institutione mea, gnariſſima illius erga me inuſitatæ benevolentia. Ego dum vivo, me clientem tuum, tuæque familiae proſitebor. Deus vos ſervet optimè volentes, omnique exoptata felicitate perfruentes.

Gedani propriè Kal. Dec. 1647.

CDXLII.

*Reverendo admodum, Clariffimoq; Viro,
D. Gerardo Joanni Voffio, Hiſto-
riarum ac Politices Profefſori.*

Reverende admodum, Clariffime & Doctiffime Vir,
Avuncule plurimum honorande,

Bina hodie ſunt hebdomades, quod literas ad præſtantiſſimum filium, cognatum cariſſimum, Geneva miſerim. Hoſpitem hic habeo, Reverendum D. Tronchinum, virum ſingularis pietatis, ac modeſtiæ, ſummum verò tui æſtimatorem. Ampliſſimo Gothofredo, tuæ fuerunt acceptiſſimæ; tùm quod ex iis rectè ad te delatum ſuum Philoſtorgium cognoverit, tum vero, quod opus Institutionum Poe-

ticarum ei mittis. Lutetia Pariſiorum cùm adhuc hærerem, ſapiffimè inquiſivi, nùm eo jam miſiſſet Exemplaria Elzevirius, abs Mercatoribus, & Librariis, emiſſem enim aliud loco ejus, quod ampliſſ. D. Cromon filio natu maximo dedi, cùm Hagæ eſſem tam liberaliter ab ampliſſimo parente exceptus. Simulac' Genevam veni, id ipſum etiam ſedulò curavimus: ſed non invento ullo exemplari, literas nudas ampliſſimo Gothofredo tradidi, ſpem ei faciens, proxima occaſione id te miſſurum. Multum mihi gratulabor, ſi miſerit huc ad Typographum quædam exemplaria Elzevirius, ut unum mihi emere queam, D. Gothofredo dandum. Bis me jam inviſit Vir ſummus, atque ad ſe venienti humaniſſimè quidvis offert. De editione corporis Juris Civilis, ac Codicis Theodoſiani, cum locupleti ejus commentario, ad præſtantiſſimum cognatum jam ſcripſi. Inveni hic in Bibliotheca publica, quatuor vel quinque Manuſcriptos, qui videbantur ſatis antiqui. Ii ſunt Juvenalis, Ovidii Metamorphoſis; quædam Ciceronis; quædam Senecæ Philoſophi, & Nonius Marcellus. Quod ſi opera noſtra, hic præſtantiſſimo cognato in conferendo utilis eſſe poſſit, unico verbo id ſignificare non gravabitur; ego in me nihil patiar deſiderari. Salutem officioſiſſimam quaſo, cariſſimis Amitæ & Cognato impertiri ne ſit moleſtum. Avidiſſimè verò exemplar aliquod expectabo. Facile verò pro amore erga me tuo, audaciæ noſtræ dabis veniam, quod exemplar illud D. Gothofredo dandum, D. Cromon donaverim.

Dabam Geneva viii. Id. Decemb.
St. Julian. clxxxviii.

Officioſiſſimam ſalutem adſcribi tibi juſſit Reverend. D. Tronchinus.

Clariffimo nomini tuo

æternùm devinctus,

Franc. Junius, F. N.

CDXLIII.

Celeberrimo & Clariffimo Viro, D. Gerardo Joanni Voffio.

Celeberrime Vir,

Ad tuas quas mihi reddidit, Junius veſter, bene doctus & moratus Juvenis,

nis, quem idè quoque animo complector, nondum respondisse me, scio, neq; adhuc responsurus eram, ob non redditum adhuc commentarium de Poetica, nisi fontica quædam eò causa me nunc adigeret; candoris quoque tui fiducia fretum. Nullus dubito, Vir de literis, & literatis meritissime, quin Reverendi & Clarissimi Viri, Alexandri Mori, Pastoris, & Professoris in hac Ecclesia & Academia celeberrimi, fama, meritumque tibi innotuerit; tum ex aliis, tum ex eo quoque, quod jam in Belgium quoque ad professionem Theologicam invitatur. Et is tamen, ut summæ virtutis comes invisidiam esse solet, jam ab aliquot annis ab æmulis, non una ratione laceffitur, lancinatur: quorum impetus feliciter semper non elusit, sed elisit, doctrinæ partim sanctitate, partim morum innocentia. Neque dum tamen confectam rem video: novum ecce, horrendumque crimen impingi audio, & blasphemiam in spiritum sanctum. Quo quidem nuntio, totum me cohorruisse fateor, protinusque de innocentia ejus tutanda cogitare cœpi: nam etsi calumnias illas, ex Orci faucibus erutas ipse, quæ valet integritatis fiducia, quibus ingenii dotibus, nemo melius quam ipse diluere possit, & magnificè diruere; non potui tamen, quia amici mei summi, imò Ecclesiæ nostræ hac parte res geritur, mihi temperare, quin *Cyprianæ* meæ testimonium, in candidissimum sinum tuum effunderem, simul & vicem apud te seridò dolerem, temporum horum iniquissimorum; quibus pax Ecclesiæ indies, magis magisque turbatur. Certò enim scias velim, Vir candidissime, pacisquæ studiosissime, agnovisse me in Moro nostro, doctrinam constanter sinceram, sobriam, & à variis quæstionibus abhorrentem, vitam inculpatam, mores candidos, ingenuos, ab omni fūco alienos, cum charitatis ardore vivo. O si Deus nobis ubique benè multos ad hanc formulam, & characterem factos sufficeret! Certè paci Ecclesiarum optumè consultum esset, quæ nihil habitura esset vel insidiarum, vel aucupii. Sed quid facias iis, qui procul ab ira, & studio, bona fide nunquam abesse possunt? sensit ut modo dixi, Morus noster quorundam ex hoc ordine insidias: qui ideo propter nonnulla doctrinæ capita, antehac ipsi litem moverunt, quæ cessare visa, posteaquam is publicè certissimis argumentis præbitis, nulli suspicionis nebula locum reliquit. De Spiritu Sancto, nemini adhuc male feriato in mentem venit, ut dicam, scribere: imò hoc

ipsum doctrinæ caput, sæpius pro concione ad populum tractavit felicissimè, & summa cum Orthodoxia: etiam cum anno Symbolum quod dicitur Apostolorum tractaret. Ad summum, adeone stipites esse nos hic, adeone Ecclesiasticos hic nostros, Ecclesiæ curam abdicasse, qui hujusmodi erroribus, culpæque affinem tolerare, in animum inducerent suum, neque tolerare modò, sed etiam operosè retinere, quoties vocatio aliqua, ut aliàs Londino, ita novissimè Lugduno Galliarum contigit? Velut merito suo nobis charissimum, decessoribusq; suis summis dignissimum: cui & ideo triplex eodem tempore munus impactum, Ecclesiæ, Professoris ac Rectoris: quibus omnibus, tam gnaviter, tam sincere defungitur, ut si singula tantum incumbèrent. Quare oro te, Vir omnium humanissime, juxta nobiscum in hanc sollicitudinis partem, venire velis, quo inculpatissimo viro, sua constet apud vos fama, & existimatio: præjudicioque hoc etiam meo juvare laborantem apud vos digneris: sequentur propediem publicæ Literæ & testimonia in eandem rem. Feceris ipse hac in re, negotium dignum nomine tuo, verè Christiano: feceris mihi rem longè gratissimam, quasi mihi exhibitam: Ego vicem referam tibi, tuisque, ubi ubi poterò. Vale, Vir summe, meque amare perge.

Tuus ad omnia studia,

Jacobus Gothofredus, J. C.

& Ex-Consul.

CDXLIV.

*Clarissimo Viro Gerardo Joanni Vossio,
Professori Historico.*

Clarissime Domine,

NON una mihi ad te scribendi causa est; primum enim se offert tristissimus Domini Barlæi obitus; in quo viro omnis literatura magnam fecit jacturam; ideoque communem meum cum aliis mœrorem, tibi potissimum honoratissimo ejus Collegæ, testandum duxi. Deinde petiit à me ante aliquot menses Typographus Baertius, ut ad te transmitterem Poemata aliqua Belgica fratris *fr. uangelis*, quod jam primum facio. Quia Epistolam Joannis hæcenus frustra expectatam nunc primum Roterodamo accepi, addidi expli-

cationem Capitis LIII. Esaia, & ultimi Proverbiorum, ubi de foemina forti agitur, itemque hymnos aliquot veteres, ab eodem Belgico nostro versos. Quæ omnia si mereri videntur, ut in publicum prodeant, judicio tuo permitto, & potestatis tuæ facio. Si aut tu, aut filius fortè Haggam brevi excurritis, gratissimum mihi erit, de valetudine tua, & uxoris optimæ edoceri. Interea si quid est, in quo opera mea tibi possit esse usui, confidenter impera. Vale.

Celebritati nominis

Raptim Hage
xxv. Jan. 1643.

tui addictissimus,

Gulielmus Grotius.

CDXLV.

Clarissimo & celeberrimo Viro, Gerardo Joanni Vossio, Cl. Salmasius.

Accepi nuper Londino, Vir celeberrime, literas à Seldeno nostro, cum quibus, & has simul inclusas reperi, quæ filio Isaaco inscriptæ sunt. Resignatas vides; quia ita mandavit Seldenus, ut si prædictus Isaacus in his oris amplius non esset, eas aperirem, quia ad rem meam, quod in his scriptum est pertinet. De filio tuo doctissimo, velim scire an adhuc hæreat Monasterii. Audio res turbatas esse, inter Reginam & Parliamentum. Si quid habes de his certi, gratum feceris, si vel tribus verbis scribas. Terribilem Britanniae magnæ tragœdiam, omnes jam sciunt, mirantur, & detestantur. Tanta me tenet indignatio, & dolor, ut plura de eo non possim. Jam nostri sunt certissimi Regum occisores, quod Jesuitis solis antea objiciebatur. Deus tales terris pestes avertat. Meam ad Tollium, quaeso te ut cures. Vale, & me ama.

Leide xviii. Feb. clō Iōc xlix.

CDXLVI.

Clarissimo, doctissimoque Viro, D. Gerardo Jo. Vossio, Historiarum Professori celeberrimo.

Reverende admodum, Clarissime & doctissime Vir, Avuncule ætatem honorande.

Complures jam misimus literas, quarum aliquas rectè delatas esse, exinde mihi constat, quod mater, & Clariss. D. Hattonus, jam ad quasdam mihi responderint. Id unicum hic mihi in votis est; ut vel unis saltem literis dispositionis tuæ, ac charissimæ Amitæ, cognatique præstantissimi, certior fieri possem. Nec dubito quin id jam diu fuisset factum, si vel morbus tuus annuus (quanquam sperem hoc anno te ab eo fuisse liberum) vel cognati fortè absentia, non fuissent impedimento. Amplissimi Godofredi librum indies expecto, quia non dubito te Elzevirio Amstelodamensi, in mandatis dedisse, ut ejus rei curam gereret, sed quominus hætenus acceperim, hyberno tempore adscribo. Invisit me hesterno die Reveren. D. Alexander Morus, Theologiæ Professor, hujusque Academiæ Rector, jussitque scribere, nihil optare se magis, quam occasionem testandi observantiam, & affectum, quibus te, & carissimum cognatum prosequitur. Genævæ adhuc per mensem unum aut alterum morabor; vix enim, & ne vix quidem ausim discedere, nisi prius traditis amplissimo D. Godofredo Institutionibus tuis, idque eò magis quòd creberrimam earum mentionem faciat. Non addam plura; quia tempus instat, quo Tabellario discedendum est. Deum rogo, ut te, carissimam Amitam, & præstantissimum Amitinum, quam diutissime servet incolumes.

Rever. & amplissimi

nominis tui,

Dab. Gen. ipsis Kal.
Mart. St. Jul.
clō Iōc xlviii.

Observ. affinis filius,

Franciscus Junius, F. N.

CDXLVII.

Celeberrimo Viro, Gerardo Joanni Vossio, S. P. D. Fredericus Spanhemius.

Dllata fuit negotii, quod mihi commendaveras expeditio, quamvis non defuerim officio, nec Academia, in ea apud

apud amplissimum Magistratum nostrum promovendo. Non cessavi tamen in eo urgendo, nec destiti, donec res confieret ex voto. Integrum itaque erit hæredibus Cl. Elmenhorstii auctione publica bibliothecam *fr̃s uangelis* hic distrahere. Quod tibi significandum duxi. Philippicæ cujusdam in me à Moro ex mera æruginē scriptæ, evulgationem, vobis curæ esse audio; cui speciosum pacis nomen præscriptit, ut & panegyrici potius, quàm *ovsattikāv*. Quamvis verò nihil tale ab iis expectarim, quos semper sincero animo colui; & iteratis juramentis Morus coram Magistratu, & Proceribus Genevensibus, testatus fuerit, se de me, haudquam in ista oratione cogitasse; demonstrare tamen possum, non exiguum ejus partem, in me unum destinatam esse. Quod suo loco, ad hanc necessitatem mei defendendi adactus, profiteri cogar, & me publicè purgare, quia publicè traducor. Videbit etiam Lector, quid de incomparabili isto Heroe judicandum sit, quia Cicerone, dubio procul didicit singulis propemodum pagellis, pedagogica affectatione Græca, suæ orationi miscere, & versus. Quod quàm ex regulis artis fiat, nemo te melius novit. Qui etiam testimonia illa Genevensibus extorta fuerint, & quibus artibus, quam multis ex fide mihi narrandum erit; qui ejus rei documenta complura evidentissima habeo, à primariæ dignitatis, in Republica & Ecclesia Genevensi viris. Constat inde omnibus, qui ab hoc Heroe in hoc negotio actum fuerit. Nec dubito Genevenses ægerrimè laturos, literas suas, & suorum Ministrorum evulgari. Publicè etiam narranda erit historia, qui & alibi, & Genevæ vixerit, ut constet omnibus, quid de eo judicari debeat. Nec hîc verebor, ad acta, & conscientiam Genevensium ipsorum provocare. Et quamvis mei haudquam meminerit, Genevæ in Testimoniorum istorum petitione, non quidem amore mei, sed ne paterer repulsam, haudquam tamen permittere debeo, me eo nomine apud multos, & à multis traduci, qualia ex odio, vel invidia, ea de homine isto dixerim, quæ aliena sunt à candore, & veritate. Nec ob certum id genus *ovsattikāv*, & emendicata elogia, à scriptore profecta (qui nihil aliud se cupere dixit, quàm ut inflatis velis eum in Hollandiam propellere, ulla ratione posset) sententiam mutò; sed constantissimè, & verissimè profiteor; cum & heterodoxiæ Salmurienfis, & ambitiosi, ac turbulenti, & inquieti

ingenii, si ullum mortalium, meritò à me accusatum fuisse, Cl. Viri etiam & Bornius non patientur se cruentari, & famam suam proscindi. Scio quos habeas Panegyristas, & quibus de causis. Ego meà me innocentiam includo, donec cogar publicè læsus, publicè etiam famam meam tueri. Ut me potissimum malè habet, illorum opera negotium istud vel commendari, vel urgeri, quos ego toto animo semper suspexi. Eo te loco semper cum Cl. filio, fuisse sincerè, & verè testari possum. Eventum Deo committo, qui & Mori, & meum animum novit, & quid in tota hac causa actum fuerit utrinque. Ille & *Kapdovnos* est, & judex aliquando erit. Nihil à me officii, vel studii in nobilissimo Viro, qui hoc negotium primus novit, mihi conciliando, prætermisum fuisse, & gaudeo, & gaudebo semper. Vale, Vir celeberrime, cum Cl. filio, utut Mori summè studioso.

Scripti rapidissimo calamo Lugd. Bat.
xxxiii. Mart. cl̃o Id̃c xlviii.

Quanti Godofredi elogia facienda sint, & multis demonstrare possum, & probare ea ex mera loligine erga me proficisci, cujus causæ ipsi parum honorificæ sunt. Nobiliss. Salmasius, professus est, haudquam suo vel consilio, vel operâ, ista omnia evulgari. In viros itaque consilii istius auctores, inquirendum nobis erit.

CDXLVIII.

Celeberrimo Viro D. Gerardo Joanni Vossio, Historiarum Professore.

Reverende admodum, Clarissime, & Doctissime Vir,
Avuncule ætatem honorande,

Tres sunt Hebdomades, quod literas tuas, & carissimi cognati, suis inclusas mihi misit Reverendus D. Hattonus; exosculatus eas sum sæpius, ac latum diem notavi, quo non alius mihi Genevæ affulsit jucundior; siquidem ex iis, & prosperam tuam, carissimæ Amitæ, ac suavissimi Cognati valetudinem, non tantum licuit intelligere, sed & pristinum illum vestrum erga me affectum, qui sanè ad omnia obsequia, obligatum jam ante multo semper reddit alacriorem; ita ut ubicumque, & quandocumque gratum animum testandi se obtulerit occasio, nunquam officium meum claudicare passurus sim. De laboribus tuis quod scribis, gaudeo

deo equidem, quod nunquam desinas bene velle mereri de posteris; sed & ignosces mihi, si dolere me ex parte dicam, quod tot simul suscipias labores, quibus ferendis, an par sit quisquam alius dubito. Cogito nempe ingravescentem ætatem tuam, quæ sane jam aliquam requiem, suo jure sibi poscere videtur. De Institutionibus tuis poeticis amplissimo Gothofredo tradendis, nihil scribis; unde conjectare ausim, Elzevirio ejus rei curam demandatam à te esse: scribam primo die Mercurii, ea de re ad Elzevrios Parisienses, ad quos proculdubio, Amstelodamensis noster, jam diu puto, quid literarum exararit. Non ausim sanè Geneva discedere, priusquam amplissimo Gothofredo suum dederim. Doleo sanè summi Viri vicem, qui uxorem habet, quæ quotiescunque ferè lubet, ab eo divertit, eumque res suas sibi habere jubet. Interdum huic mulieris furori, à Collegio Ecclesiastico (Consistorium vocant) obviam itur. Interim officiosissimam salutem tibi jussit adscribi, ut & reverendus Tronchinus, Cl. Deodatus, Clariss. Morus, qui maximo hic in pretio est. Scripsit ad ipsum illustris Salmasius, cogitare vos de eo Amstelodamum vocando. Tradidit mihi nuper Oratiunculam aliquam D. Salmasio tradendam, & quidem mihi, quia conquerebatur, siquid tale mitteret, id ab aliis plerumque detentum iri; siquidem ut favitores, ita & malevolos, ac invidos, hic magno numero habet Vir optimus. Obfignavi igitur figillo meo, meaq; manu, ejus rogatu inscriptionem addidi. Tradet vobis fasciculum istum, Mercator quidam Amstelodamensis, Dompfeler, cujus filius hic mecum, ædes Reverendi Tronchini habitat, qui aliis à se ad Patrem missis, fasciculum istum involvit. Deum rogo, ut te, cariss. Amitam, ac cognatum suavissimum, quam diutissimè servet incolumes.

Rever. & ampliss.

Dabam Genev. iii.
Kal. April. St. Jul.
clb lbc xlviii.

nominis tui, observantiss.

Franciscus Junius. F.N.

CDXLIX.

Viro celeberrimo D. Gerardo Joanni Vossio, Historiarum Professore dignissimo.

Vir Clarissime,

Literarum raritatem non oblivio aliqua tui fecit, sed quia aliis plerumque negotiis occupatus, non existimabam fidem amicitiae nostrae, istis tantum niti oportere. Sapius tamen affectus, & studiorum tuorum, quæ mihi olim declarasti memor, laudum tuarum hic præconium feci. Testimonium & velut vadem hujus affectus filium habebis, quem 12. annorum & animi, & ingenii viribus, secundum vota mea, pulchrè efflorescentem, charissimum & vitæ, & familiæ nostræ pignus, ad vos mittere destinavi: Ille, Vir amplissime, cum venerit; si per horulæ spatium, quotidie erudito colloquio tuo dignatus fueris, ampliori me debito devinxis; suavit enim hoc mihi, cum amicitias urbis vestræ, Literarum decus, hominum, & nationis illius elegantia, & lepos, tum præcipuè fiducia humanitatis, & amoris tui, in me, meosque. Expressit id nulla alia necessitas; neque inopia Literarum & Literatorum, quorum sub hac demum Regina, spero pulcherrimam messem futuram: ut ad *Gradium* illum Patrem *Martem*, *Apollinem* adjunctum iri præsidem nostris arvis, læto augurio ominemur. Vale lumen literati Orbis, & me pari affectu benevolentiae per literas tuas dignare. Salutabis ex me charissimos filios tuos, quorum nunquam apud me memoria intercidet.

Tui observantissimus,

Dab. Lincopie Ann.
Christ. M DC XLIX.
v. die Februar.

Jacobus Skytte.

CDL.

Viro clarissimo, Præstantissimo D. Gerardo Johannidæ Vossio, Historiographo celeberrimo, S. P. D. Andreas Essenius.

Vir clarissime, literarum, & seculi nostri decus præstantissimum.

Librum celeberrimi viri Hugonis Grotii adversus Socinum, pro fide Catholica, de Satisfactione nostri Jesu Christi exaratum

aratum, rectè virorum insigniter doctorum calculo comprobatum, docuisti jam pridem, in responsione ad Judicium Hermanni Ravenspergeri de eodem opere. Utinam ab illo tempore pari studio, tum Papiſmi tyrannidem, tum Socinianismi effraſnem licentiam vitasset, refutasset, compesceſſet, Vir celeberrimus! Jam nobis serò post illius excessum; at serò potius quàm nunquam: & per me tandem (multorum tamen hortatu inductum) at per me potius, quàm per neminem, tot annos desertum opus suscipiendum fuit. Nequaquam isto (ingenuè enim quod res est fateor) omnigenæ eruditionis apparatu; indubitatis tamen, uti confido, SS. literarum testimoniis, genuinis eorum vindictis, firmisque rationibus, ubi opus, è naturâ petitis. Exemplum hujus scripti tibi, tum in multis aliis, tum speciatim in hoc ipso labore insigni magistro, prorsus debitum, quo par est animi affectu, ac reverentia L.M.Q. mitto, offero. Certè scriptis tuis quàm plurimis, multijuga eruditione refertissimis, quibus hac etiam ætate, non minus vegetâ quàm grandi, strenuam operam impendis, in re literaria, & antiquitatibus communis dudum factus es Magister. In magnis tenebris fidus tam fulgidum, in ambiguis ducem peritissimum, meritò nobis gratulamur: sed mihi speciatim in hoc opere, propter doctissimam Grotiano Tractatui, præfixam præfationem, & laudatam pro illo responsionem, quibus non parum me hic adjutum seriò confiteor. Unum tamen, de singulari tua humanitate, certò mihi persuasus, hic commemorare audebo, ubi sicut à Grotio, ita etiam à te in alia concedendum putavi; sed tam humili verecundiâ, quàm vel à filio juvene requiras. In negotio liberationis nostræ, Deum non esse considerandum, ut partem offensam, non ut creditorem, non ut judicem superiori subiectum; sed ut Rectorem, & quidem summum planè assentior: neque enim illis, quâ talibus, jus puniendi competit; isti autem competit quidem, sed non præter legis formulam. At quæritur, qualis sit Dei in isto negotio actus? Actum esse jurisdictionis Rectori competentem necessum est: Legis abrogationem ac derogationem, omninò vobiscum nego: Legis *ὡς ἐκεῖνο καὶ δόλῳ* strictam executionem, prout noxa caput sequitur, & nostra pœna infinita, ob infinitam Dei maiestatem, Legis transgressionem læsam, in obligatione erat, pariter rejicio. De dispensatione, an interpretatione καὶ ἐπιείκεια manet controversia. Illam hic non ag-

nosco: dispensatur de lege, cùm personæ alicui permittitur, quod alii istius ordinis per legem prohibentur, aut res aliqua similiter ab obligatione tollitur. Sic dispensatio definiente Grotio, est actus superioris, quo legis manentis obligatio circa quædam personas, aut res tollitur. Sicut Derogatio est partialis abrogatio: sic dispensatio est objectiva quædam derogatio, quæ id quod per legem alias obligaretur, ab obligatione eximitur, cæterum lege ipsa manente integrâ. Porro ut lege non existente non committitur peccatum: *ἡ δὲ ἀμαρτία οὐκ ἐστὶν ἡ ἀνομία*; sic facta dispensatione non est peccatum, quod aliàs futurum erat peccatum, ut conjugium inter Liberos *αἰχμαλώτων*, ablatio opum Ægyptiarum ab Israelitis facta, &c. At fideles non simpliciter impunè auferunt peccata sua, quasi peccata non essent, quæ esset dispensatio, ratione personarum; nec certa quædam peccata, quæ esset dispensatio ratione rerum: sed pœnas dederunt æquivalentes, optimaque proportionem, peccatis suis respondentem, per sponsores conjunctissimum. Ita nos absolute lege soluti non sumus, nec à legis vinculo relaxati, *ὅτι εἰ δὲ καὶ πάντων ἀπὸδεύειν, ἀρετὴ ἀπαντὸς ἀπὸδεύειν*, 2 Cor. v. 15. Sic non solum νόμον ἐ κατὰ γένος διὰ τῆς πίστεως, ἀλλὰ νόμον ἰσάμην, Rom. iii. 31. *Ὅπως τὸ δικαίωμα τοῦ νόμου πληρωθῇ ἐν ἡμῖν*, Rom. viii. 4. *καὶ τέλος νόμου Χριστὸς εἰς δικαιοσύνην πατρὶ τοῦ θεοῦ*, Rom. x. 4. *Ἐπιείκειαν* qualemcumque adhibere cuiusvis est; ea vero quæ legis in puniendo executionem spectat, solius Rectoris est: quæritur autem de liberatione nostri, à pœna, per pœnam succedaneam καὶ ἐπιείκειαν. Hujusmodi interpretatione Deus in Evangelio declarat, pœna secundi Adami, nos præstari immunes, iustitiâ ipsius constitui iustos; sicut ex primi Adami reatu juxta legem (verbis tamen synecdochicè acceptis) omnes reatum infinitum contraximus; sic per legem, nos eramus obnoxii: at satisfactionem per nos in propriâ personâ necessariò præstandam non expressit Lex; per sponsores faciendum non exclusit: sed neque admissibilem pronuntiat, *ὡς καὶ δόλῳ καίτοι*. In Evangelio est, *ἐπαυρόθεν μα νόμου, ἢ ἐλλείπει διὰ τὸ καὶ δόλῳ*: sic *Ἐπαυρόθεν* admissus est sponſor, & ob solutionem illam pœnalem, quæ καὶ ἀκριβοῦς νομὸν videbatur recusanda, saltem erat recusabilis, nos liberati sumus à pœna. Tralatio ista pœnæ non est quidem formaliter actus interpretationis, sed est actus iudicii, secundum jus *ἐπιείκειαν* interpretatione (quæ nobis Evangelio expressa est) mōstrum,

atque

atque ea ratione relaxatum. Confer so-
des laudatæ responfionis tuæ paginam 78.
cum nostra pag. 459. Ignosce, Vir præ-
stantissime, ut calamo libero, sic animo
stupendæ eruditionis tuæ, & lucubrationum
accuratissimarum observantissimo scriben-
ti. Ignosce iterum interpellanti, dum
convales tua (ut nuper loquebaris) cedro
dignissima, & antiquæ veritatis, ac ve-
ræ antiquitatis studiosis desideratissima.
Hoc denique munusculum, maximæ obser-
vantia exiguum monumentum, pronus ac-
cipe. Sicubi à veritate aberro, benignè
in viam reducere discipulum, utinam va-
caret, ac liberet! Deus Optimus Maximus
te seculi nostri decus, & validum Reipub-
licæ Literariæ columnen, quam diutissimè
incolumem nobis servet.

*Dabam in Neder-Langbroeck, xiv. Cal. Mart. an-
no vulgaris æræ Christianæ clō lxx.*

CDLI.

A Mademoiselle Vossius

Mademoiselle,

à Amsterdam.

S'il étoit des afflictions, comme des far-
deaux, qui se trouvent plus légers,
quand plus de personnes les soutiennent;
celle dont il à plu à Dieu de vous visiter, en
retirant à soy feu Monsieur Vossius votre
Mary, ne vous devoit point être fort pe-
sante; puisque s'intéressent en votre perte,
tous ceux qui ont eu l'honneur de le con-
noître, & qui ont profité de ses travaux.
Je me sens obligé de devoir, & d'affection,
de me professer de ce nombre; recon-
noissant qu'en sa mort, les bonnes Lettres
ont perdu une grand lumière, le public
un rare ornement, vous un bon Mary, &
moy un bon Ami. Cependant & à vous,
Mademoiselle, & à nous tous, ne reste,
que de metre le doigt sur la bouche, &
d'acquiescer, en la bonne volonté de celui,
qui est le souverain Arbitre de la vie, &
de la mort. Nous n'entrons en ce monde
que pour en sortir; en tous les contrats
de Mariage, il se parle de la mort; pour ce
que le Ciel, qui fait les Mariages, se re-
serve le droit de les dissoudre; & vous
n'avez point perdu votre Mary, mais seu-
lement, il est alle le premier au rendes-
vous general de tous les enfans de Dieu:
Car ayant vescu comme il à fait, de la vie
des Gens de bien, il est mort de la mort
des justes; & ayant si bien fait profiter les

talents, que le Souverain Maître luy avoit
departi, il est maintenant reçu en la joie
de son Seigneur. Et outre cette com-
mune consolation des Chrestiens, que
Bien heureux sont ceux qui meurent au Seigneur.
Vous en devez tirer une particuliere, de ce
qu'il est mort ancien, & rassasié de jours,
vous laissant un fils heritier de son nom,
& de son Erudition, & s'étant acquis par
ses doctes labeurs tres utiles au public, &
à l'Eglise de Dieu, une reputation immor-
telles. Aussi ne doute je point, que la sa-
gesse, & la resolution, avec la quelle il s'est
composé de longue main à ce depart,
n'ait fait d'assez fortes impressions sur
votre Esprit, pour l'admettre avec moins
de perturbation. Vous n'avez garde en
cette occurrence, de parler comme une
femme mal sage, ainsi que faisoit celle de
Job, étant fille d'un si excellent Pere, que
Dieu vous avoit donné, veufve dun tel
Mary, qu'il vient de vous retirer, & Mere
d'un tel fils, qu'il vous a conservé, d'un
plus grand nombre d'enfans, pour être vô-
tre Benjamin, & le Baston de votre
vieillesse. Veuillez ce Pere de toute mise-
ricorde essuier vos larmes par la main
de sa grace; je l'en supplie de tous mes
vœux, & vous de croire, que comme je
cheriray, tant que je vivray, la memoire
de M. Vossius, aussi demeurerai je sans
varier, & à Mr. votre Fils, du quel je
 plains l'absence en cette occasion :

Mademoiselle, Votre tres humble,

A Groningue ce 26. Mars. }
5. Avril. } 1649.

Des Marets.

DCLII.

Clarissimo Viro Isaaco Vossio Historio-
grapho dignissimo.

Clarissime, & incomparabilis Vir,

CUM ante octiduum Groningham pro-
fectus sit præstantissimus D. Junius,
& ea de causâ tuis respondere non potuerit,
mei officii esse duxi, de iis certior te
reddere, quæ per literas quæsisisti. Quod
igitur ad Bibliothecam *re mangelri* Sixtini
attinet, primum habe. Eam hodie lustra-
vi, & quidem ex præstantissimis constare
scriptoribus comperi, interque alios Manu-
scriptos inveni, *Priscianum Grammaticum*
in Pergameno antiquiss. *Senecam Tragicum*
uti & *Philosophi Epistolas*, itidem in Perga-
meno.

meno. Adhæc *commentaria Græca Anonymi in Aristotelem* nitidissimè descripta, aliosque Manuscriptos codices multos, quorum catalogum post octiduum fortè transmittam. Plurimos quoque authores vidi tam Græcos, quam Latinos, qui à Grutero aut emendati, aut cum Manuscriptis collati erant. Interrogavi denique, utrum venales essent libri, sed quoniam de vero hærede Sixtini nondum constat, & hinc de iis litigatur, divendi minimè possunt. Valdè solliciti sunt Proceres nostri Amstelodamenses, de acquirendo aliquo viro erudito, & digno, qui in locum præstantissimi parentis tui succedat.

Interea tamen ad eam professionem, valde commendari audio Davidem Blondellum, quem aiunt Historiæ Ecclesiasticæ esse peritissimum. Alii Procerum animos putant eò inclinare, ut muneris id, Rectori Junio committant. Sed nihil de his, ante redditum tuum futurum, alii mecum existimant. Ad Professionem Theologicam in Leidenfî Academia, ob D. Spanhemii obitum vacuam, à Riveto commendari dicitur Bochartus. Ante octiduum, per filium illustis Salmasii, ad te misimus diatribam quamdam Samuelis Petiti, nunc primum à Sorbiero editam. Editus quoque nuper est libellus Boxhornii, de jure Majestatis Regiæ, ejusdemque responso, ad calumnias Anonymi, sed eum tibi comparare operæ pretium non videbatur, quia parum laudis, eo labore apud doctos meruit. Ad finem jam vergit fratris mei Palæphatus, quem ubi absolutus fuerit transmittam, & si quid interim novi edatur, addam. Vale, celeberrime Vir, & me ama.

Amstelodami,
3. Julii,
clō 10 c xlix.

Præclarissimo tuo nomini

eternum devotissimus,

Alexander Tollius.

CDLIII.

Clarissimo Viro Francisco Junio Leydam honorificè vocato S. P.

† Literas hæc
à Putanis fra-
tribus habuit
Cl. Voßius,
Salmasio teste
in Epistolis p.
149.

† Vir Clarissime,

Nihil videmur præter officium nostrum facturum; si quod ante decennium tentavimus, idem nunc denudò, Literis hisce, quali

succedaneis, aliquando iteremus: hoc est ut te, (quod absque incommodo tuo fiat) in Academiam Leydensem, ad primarium Theologicæ Professionis munus capeffendum evocemus. Fiduciam petitioni nostræ tribuit, Scholæ hujus herbescens (cui nos Curatores dati) ac doctrinæ cum primis sacræ promovendæ cupiditas; tum verò obvia ista humanitas tua, piis ac doctis omnibus perspectissima. De qua, ut omnia nobis promittere audeamus, literarum tuarum ruminationio facit; quibus ante decennium illud (quod diximus) prolixè, cumulatèque, ad priores nostras rescripsisti: quas etiamnum (uti meritum est earum) in Tab. nostris conditas aservamus. Summa conditionis, quam deferimus, hæc est; ut (& ex rei ipsius dignitate, & tua) principem in Lycæo hoc nostro, in sacrarum Literarum professione ordinem ducas, atque obtineas: Collegam habiturus M. Lucam Trelcatium (quem honoris causâ nominamus) Virum literatissimum, juxta ac modestissimum; proque eo munere, decreto publico, octingentorum Caroliorum nostratium (quos Florenos vocant) mercedem annuam ordinariam in stipendium, tibi constitutam esse scito: (cujus ita apud nos ratio constare solet, ut ex ærario Academico de summâ, quâ convenit, singulis trimestribus, quadrans deductus, in partem rei solutæ Professoribus procedat.) Viatici præterea loco Daleos ducentos, qui tibi recens advenienti, quamprimum à Quæstore publico ultrò repræsentabuntur. Dispice, Vir clarissime, quantum incrementi, ac præsidii Lycæo huic nostro sis allaturus; quantum subsidii Bataviæ Ecclesiæ, ac veræ pietatis cultoribus; quantum denique tibi ipsi solidi honoris & gratiæ. Nos verò à nominis tui splendore lucem mutuaturi, & doctrinæ tuæ plurimum debemus. Et ut alii debere in posterum velint, grata animorum significatione, omnibusque officiis, quâ privatim, quâ publicè, ex parte nostra studiosissimè adnitemur. Tuæ comitatus fuerit, per Tabellionem hunc Academicum (hujus solius rei causâ isthuc ad vos ablegatum) quamprimum nobis, super hoc negotio, quidquid constitutum habueris, ex animi tui sententiâ, liberè ac planissimè perscribere, sine circuitione inquam, more Majorum: nec in Lycæo hoc nostro (si tibi placuerit hæc conditio) Theologicæ Disciplinæ Candidatos tuæ eruditionis desiderio pati oblanguere diutius. Deus te quam diutissimè incolumem sibi, atque

Q q

Ecclesiæ

Ecclesiæ conservet. Vale, Vir Clarissime.

Lugduni Bat.
anno Christi
xix. Augusti,
clō 19 xci.

Ex Decreto Curatorum

& Consulum

J. van Hont.

CDLIV.

Clarissimo Viro Jano Grutero, J. V.
Doctōri dignissimo. S.

R Aræ quidem inter nos Literæ, Vir doctissime, tum intervallo magno locorum, tum hominum injuria. Sed quid agamus? Manebit tamen conjunctio animorum, studiorumque integra, quam tuæ suaves Literæ, admodum confirmarunt. De Seneca, quod plura polliceris, operam bene locatam puto: etsi meminisse nos interdum oportet illius, manum de Tabula. Plautus multa quidem adhuc habet vindice digna: & Camerarii in eum operam dilaudant certè docti: si religiosè lectionem veterem (nisi quid manifesto *σφαλόν* videris) servabis, illud equidem malo, quàm ut conjecturis agatur. Nam est in conjecturis nescio quis malus genius, quo allubescunt Authoribus, primo illo aditu, sed in pericula conjiciunt eos plurimum. Grave est ex alea conjecturæ subire judicii alieni aleam. Epistolas ad Atticum attigi brevitate mea: mallet, & longius & clarius: sed alio me vocant alia, nec me decet, in hoc genere valdè curiosum esse. Commulcium à commulcando ut dicitur, non iniquè fero: sed illud magis placet. Videtur enim Tullius, de toto illo concursu bonorum dicere, in quo primas Cato occupavit, & fuit *πρωτεύων*. Accessit Hortensius, &c. Epistola 13. Lectiones alias reticui, eo quod non placet aliena distringere: eadem simplicitate ago, qua viri boni, qui promercaleis res suas proponunt, alienas intactas sinunt. Hotomanni lectionem probare non possum, quia alius sermo est, quod mihi satis principio illius notæ videbar observasse: ideoque aliena est, judicio meo, ab hoc loco rei nummarie metaphora. Fabæ ego quidem opponi malo *ἀποδείκναι*, & ita sibi constat argumentum. De rebus prolatis, quod scripsi, puto, me ita scripsisse, ut

principium ostenderim, cætera non excluderim, quæ ad ceremoniam illam accesserunt: Nam locutionem dico, ab solenni ritu profectam esse. Ut autem locus sit illustrior (cogis me obsoleta repetere) Legationem liberam à Casare Tullius postulaverat Epist. 13. Eiusdem libri 14. sed non ante Liberalia legari voluerat, Epist. 5. quo die, Tullius fugiens tumultum, legatione usus est, ut reprehendit Atticus, Epist. 10. Erat enim bi-duo post parricidium, ut vocabant. De hoc die sentit Tullius, quum ait, *ante res prolatas*. Bina autem Liberalia, multi fuisse putant malè. Hæc liberalia verò, non à Libero Patre Baccho, sed à Libero Deo dicebantur, qui virorum semini præerat, ut Libera semini mulierum. Author mihi Augustinus, lib. 4. de civitate Dei, cap. 11. & lib. 6. cap. 9. his Liberalibus Togæ dabantur pueris xvi. Calen. April. & per totum oppidum, sedebant sacerdotes Liberi hedera coronatæ anus, cum libis, & foculo, pro emptore sacrificantes, ait Varro, l. 5. de L.L. Sed quid ago? *γλαυκ' εἰς ἀδελφείαν*. Ego quoque manum de Tabula. Et te salvere jubeo cum filiola tua.

Lugd. Batav.
Cal. Aprilibus,
1595.

Tuus,

Fr. Junius.

CDLV.

Francisco Junio, F. F.

I Ncolumem te isthuc pervenisse, Francisce fili, gaudeo, & oro Dominum prout iter secundavit, sic etiam studiorum tuorum secundet cursum. Cursum dico, non quod te putem currere, qui à tergo multorum subsidis, sed quod velim te id facere, & quod Deo, & mihi debeas. Nihil à te mihi gratius potest accidere, quàm si te studentem videro, & in iis literis, quæ te ornare, & publicum juvare possunt, vehementem; si feceris, me uteris, dum vivo, bono, & favente Patre: si non feceris, (avertat Deus) meam offensam scito, non fore tibi adjumento. Excusata illam tuam animulam, & postpositis nucibus, & jocis, (quibus adhuc indulxisti plus satis) arripe libros, & ad studia rapere, ut puerum virtutis amantem decet. Deum time; Præceptores cole, cum bonis versare, abstine amatorum consuetudine, & in eo

torus

totus esto, dum me habes superstitem, ut hæc commoda bene occupes; quæ si Deus ex hac vita me evocaverit, essent te momento fugitura. Nos tibi omnes salutem dicimus.

Lugd. Batav.
die Dominico
xxviii. April.
1602.

Tuus Pater,

Fr. Junius.

CDLVI.

Gerardo Joanni Vossio V. C.

Lugd. Bat.

Pudore suffusus sum, cum literas tuas vidi, illas ad exemplum candoris & elegantiae scriptas. Tanti fecisti PUTEANUM, ut quem in Scholarum primo quasi pulvere noveras, adhuc amicum censes. Si pectoris mei adyta lustras, talis fui semper: & quemadmodum olim suavissimam vivacissimamque ingenii tui indolem, rapiente velut naturâ, puer dilexi, ita postquam ad aliquem nominis gradum veni, clarissimam doctrinæ tuæ famam venerari non desii. Quantum me, bone Deus (ut reliqua jam taceam) ultimi de Historicis Græcis libri ceperunt! Tam felici industriâ usus es, ut quicquid à veteri ævo Græcia sudavit, ignorare jam docti indoctique definant, quos omnes unus docuisti. Quæ divitiæ! quæ deliciae! Nihil tam abditum, quod non legeris; tam dubium, quod non expenderis; tam obscurum, quod non illustrâris. Sed si hæc destinati laboris pars est, possumus tuo unius ingenio contenti esse, & omnis porro ævi Historiam accuratam in compendium serie collectam expectare. Imperfectum est, & sæpe hiulcum, quicquid in hoc genere hætenus vidi. Sive tuo igitur nomine; sive hominum commodo gloriam metiaris, æternus es; citiusque nulla Scriptorum Græcorum memoria erit, quam tuam ventura sæcula involvant. An te amem igitur, an te æstimem, vides: causas dixi: inhumanus, indoctus, barbarus sim, nisi amem. Sed ut ad literas tuas redeam, ex velut flammæ quædam sunt, & magis magisque ardentem jamdiu animum corripunt. Ignem amorem esse etiam illum honestum, nunc sentio; claudi aut constringi nequit; sed nec impediri. Nihil intervallum locorum potest, præsentis sumus: nil belli diffidium, amici sumus, & amoris causas à publicâ irâ removemus. Studia nostra Humanitatis sunt, & ad

pacem ac tranquillitatem diriguntur: admonemur homines nos esse, ut à furore & feritate absumus. Pugnent alii, sive verbis sive armis, imò armorum loco verba habeant: mihi jucundum semper erit, Virtutem Doctrinamque, ubi eminent, colere; uni vitio & ignorantiae infestum esse. Dabit Deus publicis ærumnis aliquando finem, ut quemadmodum amor noster nullâ temporis injuriâ impediri potest, ita in quiete rerum, plenos liberosque amicitiae fructus capiamus. Atque ita est: unus tibi è tam vasto numero reliquus sum, qui spretis tot vitæ diverticulis, tot vitatis bonæ mentis scopulis, Musæ & Palladi adhæsi, honestam famam ~~amandis~~ vivendo divitiis præferens. Producere igitur stilo ingenium ausus sum, & quasi humo me tollere, quia primus ille Literarum bonique nominis amor exstingui non potuit. Tandem tuo unius exemplo excitari vehementius cœpi, quam felicibus ad immortalitatem pennis videbam eniti. Redibant in mentem studiorum incunabula, & pueriles æmulationes. Recolebam sermones, lusus, jocos; & tanquam familiariter amari adhuc posses, aperire continuò affectum studui. Tu qui in aliis superas, hic quoque victoriam tibi vindicasti. Prior scribis, & ad perennem amicitiam invitas: quam à me flagitatam non esse, doleo. Crede candori meo, ita se rem habere, quemadmodum initio dixi: Pudore suffusus sum, cum literas tuas vidi; felicior nescio, quia amorem tuum intellexi: an infelicio, quia serò indicare meum coactus sum. Bene est: juncti animis sumus. Tuæ benevolentiae fuit, stringere hunc nodum: meæ constantiae erit, id agere, ne unquam dissolvatur. Vale.

Lov. in Arce, xv. Cal.
Octob. clō. 10c. xxiv.

CDLVII.

Gerhardo Joanni Vossio, V. C.

Lugd. Bat.

Libera tandem aliquando humanitatis nobis officia erunt, decumana belli severitate impedita. Patet enim jam tabellariis iter, quod affectui meo numquam clausum fuit. Homo non essem, nisi te amarem; à Literis & honestis artibus alienus, nisi singularem doctrinam tuam & excellentem ingenii vim etiam tacitus suspicerem. Mirum etiam in modum accendit animum meum nupera illa epistola tua,
Q q 2 amantius

amantiùs nescio, an eruditiùs exornata, an etiam modestiùs. Qui hoc agis, ut mente complectaris optima, adhuc ignorare videris, quantum tibi docti omnes tribuant. Magnus es, qui docere omnes potuisti. Ejusmodi libri tui sunt, de Historicis Latinis incredibili industria scripti; nequid jam de Græcis dicam, quos omnes tibi obstrictos habes. Laudo, imò summopere admiror utrumque hoc opus. In altero enim totam exhaustisse Antiquitatem videris; in altero veteribus adjunxisti novos, claris obscuros nonnullos; sed ut illustrares simul omnes. Pulchrum mercedè facinus, neminem prætermisissum esse. Quisquis enim Historiam attigit, bene de genere humano meritum est; & quia aliquam rebus lucem dedit, luce ipse dignus erat. Inter sordes & fumum nonne gemmam interdum invenias? Ad famam satis erat, eminentes scriptores, tanquam lucida quædam sidera recensere: sed ut amplius publicæ utilitati dares, viliores etiam calamos pulcherrimo & semper victuro Volumine complexus es, nequid deinceps omnino in Historia nesciremus. Juvat profectò & illos, ut sic dicam, capite censos intueri, hætenus utiles, quia ingenium occuparunt. In tenebris tenuè etiam lumen veram aliquam imaginem distinguit: & quis est, qui non malit luscus esse quàm cæcus? Non potuit igitur diligentia tua in vitum excedere; nemini supervacua, nisi nuperum ævum, & Monasteria omnia, in quibus Literæ conservatæ sunt, fastidiamus. Quid mihi verò doctissimus ille labor tuus profuerit, publicè in Commentariis meis Insuabricis, quibus Irruptiones Barbarorum in Italiam illustro, profitebor. Historicum, & simul Interpretem egi. Ita enim videbar & purius narrare, quæ cadente Imperio Romano gesta sunt; & facilius explicare, quæ, ut sæcula illa, plus noctis quàm diei habuere. Prope diem, ut spero, mittam ad te opus, sed tanquam ad Censorem suum. Nam qui omnem examinasti Historiam, meam etiam emendare poteris. Nunc illam de S. FLAVIA DOMITILLA Observatiunculam vide, & Clarissimo simul HEINSIO ostende: ad quem mox & literas & exemplar missurus sum. Nuperas verò meas ab ARCERIO an acceperis nescio. Summum crimen putem, in tanti viri affectum silentio peccare. Partitiones Oratorias non Batavicus tantum scholis, sed omnibus omnium provinciarum dignas judicio. Faxo & hinc Eloquentiæ priscæ specimen sibi filii mei

proponant. Vale, & me amare perge. Hem, CHRISTOPHORUM CALENIUM video Avunculum tuum magnum fuisse: sed CALENII Venlonenses sunt: an igitur & Patriæ nexu jungimur? Iterum vale.

Lovanii, in Arce, XIII. Cal.
Junii, c. 130. xxix.

CDLVIII.

Jacobus Armachanus, Gerharδο
Johanni Vossio, Viro Cl. Salutem.

PERvenerunt in manus meas abhinc amplius annis XIII. Johannis Latii de Pelagianis & Semi-pelagianis Commentarii: quibus eorum originem & progressum usque ad tempora Johannis Papæ, qui Severino succcessit, studiosè diligentèrque est persecutus. Delectatus scriptionis genere, ab anno in quo ille defuit ducto principio, proximorum temporum Historiam adjeçi: ex Lugdunensis Ecclesiæ scriptis & Flodoardo, majore ex parte, eam contexens; de meo vero (illius, quem suscepi continuandum, exemplo) *nihil adferens nisi ordinem*. Vix dum autem ista abolveram, cum Historia tua Pelagiana prodiret, & curâ & vigiliis elaborata: in cujus parte extremâ, ea ferè omnia occupata à te comperi, quæ ego tumultuariâ operâ in Adversaria mea conjeceram. Itaque tum quidem, *ἰδὼς* illud ἀγράφον abjeçi penitus: verum ubi obtulissent sese mihi postea alia ad *Gotteschalci* causam pertinentia, quæ in nostri utriusque Collectaneis desiderari videbam; antè exorsa retexere placuit, & ad priorem illum centonem etiam ista attexere *ὁπλίσμῳ*. Quæ, cujusmodicunque sint, ad te allegare visum fuit: si cui fortè usui, in novâ Historiæ tuæ editione adornandâ, esse poterint. Ea tu, ut ab homine existimationis tuæ cupidissimo profecta, æquo ac libenti animo accipies. Vale.

Dublinii, V. Calend. Julias:
anno æræ nostræ Christianæ
M. DC. XXXI.

CDLIX.

CDLIX.

Clarissimo Gerhardo Joanni Vossio.

Accepi, Vir Eximie, Literas tuas; quibus dum amorem quo te prosequor, ex leviori saltem muneris indicio, rectè quidem colligis, nobilissimum tuum pectus instar fertilioris alicujus agri aperis, qui plus multo adferat quàm acceperit. Adeò munusculum nuper tibi à me oblatum extollis, ut quo te merito meo exsolvere studebas, eo me tuo totum implices, & beneficium longè majus reddere videaris, cum te debere aliquid mihi profiteris. Utcunque verò aliqua inter nos in Gottschalci Historià oboriatur differentia; gaudeo tamen, & tibi ex animo gratulor, nos, (quod ais) in eo, quod rei caput est, consentire: uterque dum B. Augustini sententiam amplectimur. Quam sive Gottschalcus per omnia fuerit secutus, sive aliquando exceßerit, nolim ego multum contendere: modò (quod libenter audio) nobis ipsis cum Augustino conveniat, cujus sententiam in causà Gottschalci tuendam susceperat Remigius. Qui verò duriores sunt, vel fuerunt, Augustini interpretes, nunquam mihi placuerunt: minimèque omnium inertes illi τὸ ἀγνὸν λόγον κήρυκε, qui faciunt agendo, ut nihil agamus, & homines sponte suà ignavos ipsis quoque truncis reddunt stupidiores: quum divinus ille gratiæ præco, ex eo ipso quòd Deus is sit qui efficiat in nobis τὸ τὸ θέλει καὶ τὸ ἐργάζει κατὰ τὴν ἐκδοχίαν, contrarium planè deducat πείραγμα. Itudendum idcirco, ut cum timore & tremore salutem nostram operemur. Quippe quod verendum sit, si ab Religione officii hic declinaverimus, &, vel nihil agendo, vel malè agendo, eum à cujus ἐκδοχία illa quam habemus volendi & faciendi potestas tota pender, irritaverimus; ne Deus ita à nobis laceffitus jure suo nobiscum agat, atque nos desertus deferat, & novas ad volendum & agendum vires (abique quibus, ipsi nos ipsos lapsos erigere nequeamus) ultrà non impertiat.

De Mariano nostro, quò factum ut mutus omnino ad vos venérít, amantissimo utriusque nostrum D. Ludovico de Dieu rationem reddidi. Mens verò quæ nunc est mihi, tum erat eadem: nempe ut, sicut tuà operà ita etiam sub tuo nomine, integer prodiret Marianus. Integrum verò in unico Cottonianæ Bibliothecæ

exemplari repperi: si tamen integrum. Postrema enim pars Chronici, à Dionysianæ æræ anno 900. usque ad finem (quam inde descriptam totam seorsim ad te miseram) integrior in Sichardi editione legitur: cui siquid desit, ex tuo supplendum erit exemplari; quod illud Gemblacense esse suspicor, ex quo novam ^{Miræus, in} Mariani editionem promissit ^{Sigeberti} nobis Miræus, quam non præstitit. Nactus sum & alia tria ^{ann. 854.} exemplaria, in quibus Anglicanum Florentii Chronicon cum Universali Mariani hoc Wigorniensis quidam Monachus Regis Stephani temporibus commiscuerat. Ex eorum uno, Florentium (vel potius Marianum) suum edidit nobilissimus D. Guilielmus Howardus de Naworth, Thomæ Norfolciensis Ducis filius. Duo alia apud Oxonienses vidi; in Bodleianà unum, in Collegii Corporis Christi Bibliothecà alterum: quorum utrumque præter Proemia, integrum librum secundum habuit, qui à primo aberat.

Initio Cottoniani codicis verba ista præfixa inveni, *Meum nomen, ut dignum, Cronica Cronicarum: cum præ illis seruo verba Evangelistarum. Nulla enim Cronica conservat diem Mensis Solaris Resurrectionis Christi, juxta historiam Evangelii, nisi ista sola.* Sequebantur deinde, tanquam ipsius Mariani, Tabellæ illæ Chronologicæ quas in apographi mei principio descriptas vides: quæ commodius, ni fallor, ad calcem operis essent rejiciendæ. Earum aliquot in Bodleiano quoque habentur codice (qui à Consululo Indiculo incipit;) & in altero, Collegii Corporis Christi, plures; Romanorum Episcoporum Catalogo usq; ad Eugenium III. perducto, cui alià adscripti erant manu, *ann. 8. mens. 4. die 20.* quod Argumento est; Eugenii tempore illud fuisse exaratum. Ut autem intelligas, quibus in locis Cottonianum libri *primi* & *tertii* Chronicon à vulgato differat: Florentium Wigorniensē nunc ad te mitto, quem Francisci Quarlesii operâ (qui mihi tum erat ab Epistolis, vir ob sacrationem Poësin apud Anglos suos non incelebris) cum illo conferendum curavi; ad annum usque Domini DCCCC. Dionysianum, à quo quaternio prius missus initium duxit. Ubi quæ lineis subtilius ductis sunt notata, à Cottoniano exemplari absunt, & ex Florentii Annalibus à Wigornienfi de quo dixi Monacho sunt hæc intexta.

Mitto simul & Epitomen à Roberto Lotharingo Herefordensi Episcopo, eodem quo Marianus mortem obiit anno, con-

cinnatam:

cinnatam : cujus in quarto de Pontificibus libro Gulielmus Malmesburienſis ita meminit: Erat tunc temporis monachus Marianus apud Magontiam inclufus, qui longo ſolitudinis otio Chronographos ſcrutatus, diſſonantiam cyclo- rum Dionyſii Exigui contra Evangelicam veritatem, vel primus vel ſolus animadvertit. Itaque ab initio ſæculi annos ſingulos recensens, 22. annos, qui circulo deerant, ſupradidit; magnam & diffuſiſſimam Chroni- cam facere adorſus. Eum librum Robertus miratus unicè, æmulatus mirificè, Angliæ in- vebendum curavit. Denique captus Mariani ingenio, quicquid ille largius dixerat, in arctum contrahens deſloravit, adeo ſplendide, ut magis valere videatur deſloratio quàm in- gentis illius voluminis diffuſio.

Ad calcem hujus Epitomes in Cottonia- no codice appendix adjecta, ab altero Bodleianæ Bibliothecæ aberat: quam vel eo nomine negligendam non putabam, quòd magnæ illius Periodi Julianæ, cujus uſum magno Scaligero acceptum referimus, prima veſtigia in eâ deprehenderim. De magnis Cyclis Appendicem non diffi- milem ad finem libri primi ipſius Mariani in Collegii Corporis Chriſti Manuſcripto appoſitam inveni: quam hîc incluſam mitto; alia quoque de Mariani patriâ & variis editionibus Collectanea miſſurus ſi- militer, ſi ad Editionis tuæ ornatum aliquid inde acceſſurum à te intellexero. Deus laboribus tuis benedicat: & omnia tua ſtu- dia in honorem gratiæ ſuæ, Eccleſiæ bonum atque Reipublicæ Chriſtianæ ver- tat emolumentum. Vale, Vir Clariffime; & ſi quæ ſunt alia, ex latore harum Lite- rarum D. Freyo fuſius intellige.

Dublini, anno
MDCXXXII.
4. Id. Jun.

Tuæ Dignitatis ſtudioſiſſimus,
Jac. Uſſerius Armachanus.

CDLX.

Clariffimo Gerhardo Johanni Voſſio.

I Gnoſces, Vir Humaniffime juxta ac Doctiffime, quòd ignotus te compello ac ſeria tua leviculo negotio interpello. Juſſu Honoratiſſimi & Reverendiſſimi Archipræſulis Cantuarienſis (qui niſi im- menſâ occupationum mole diſtineretur, jampridem ad Literas nuper à te acceptas reſponſiſſet) operam tuam implorandam habeo in providendo vellumine terſo ac utrinque lævigato, quod & Typorum im-

preſſionem ferat, & calami etiam ductum non aſpernetur. Apud nos periit prorfus hujusmodi Artificium, nec aliud habemus velluminis genus, quam quod librorum in- tegumentis adhiberi ſolet. Apud vos hoc artificium vigere libenter credimus, atque inde Clariffimum Virum Dominum Th. Bodleium vellumen illud comparafſe, ex quo conſtat Catalogus grandis Librorum in Bodleianâ, partim excuſus, partim calamo exaratus, qui publicè proſtat in Bibliotheca, quem fortafſe notaveras, cum illic eſſes. Hujusmodi velluminis ſpecimen aliquod, tres ſcilicet vel quatuor membranas, ſi apud vos ſit parabilis annona, ad ſe ut tranſmittas, quamprimum commodè poteris, rogat Honoratiſſimus Archipræſul; ſimulque ut ſignifices utrum hujus mercimonii tanta apud vos ſit copia, ut ſuffectura ſit operi, quod mille fortafſe membranas, aut amplius deſideret. Habetis hoc nomine Ho- noratiſſimum Præſulem tibi debendi reum, meque inſuper eadem operâ devinxeris, ſummum jampridem

Raptim. Lon-
dino Decem-
bris xx. 1633.

Virtutum tuarum Cultorem

P. Turner, Soc. Collegii
Merton in Academia Oxon.

CDLXI.

Cl. V. Gerardo Voſſio.

Quæ populum ſcire, uti nunc ſunt res noſtræ par erat, ex Epiftola quam nomini tuo, Vir Clariffime, inſcribere au- ſus eram, nota ſunt: quæ ſapientes, ex iſta ſi vacat, ſeductus accipies. Quum Grammaticam Scholis apud nos Edi- cto imperatam omnes propemodum docti at- que indocti clamarent alii curtam, pro- lixam alii, hi methodum, illi materiam in- cuſarent, Danefius quidam Epitomen Grammaticæ edidit: hanc Haineus (quem Miſum ego, quia Gallis Haine odium ſonat, agnomino) apud Archiepiſcopum Can- tuarienſem, Episcopum Ciceltrenſem, alios mancam clamat, ſuam ex regia Danefiana conſutam promovere ſtudet; res ad Regiam Majeſtatem deſertur, cujus mandato evocatus ego huic operi de- ſignor: quod à me abſolutum Rex ad proceres qui illi à Sacris Conſiliis deman- dat, hi ad Scholarchas tres & his adjectum Haineum, pernicioſo credo conſilio, ne & hîc novas res moliri arguerentur qui mihi

mihi autores. Plura cùm publicus tum privatus super recenti vulnere ex obitu dilectissimi filii adjicere non permittit dolor. Si quid erit, quo, vel consulendo, vel monendo, aut etiam, si promerebitur, cohortando, me beare dignata fuerit nota mihi dudum prolixa tua humanitas; faciam ne apud ingratum aut immemorem pereat illud beneficium, verùm trabali fixum clavoster apud eum, qui te meritissimè semper coluit, religiosissimè usque colet, est eritque Tuus,

*Londini, Maii No-
nis anno Domini
MDCXLI.*

Tho. Farnabius.

Ego jam per quinquennium secessi in rus meum ad vicessimum ab urbe lapidem. Londinum subinde viso. Si quid ad me voles, tradet mihi Assuerus Regemorterus, alumnus quondam meus, qui Lugduni studuit, suscepitque gradum Doctoris Med. Habitat is Londini, in Vico qui vocatur *Time street.*

CDLXII.

S. & Obs.

QUod dulcisonos audientibus concen- tus evenire solet, Vir longè celeberrime, idem mihi suavissimo tuo colloquio Amstel. dimisso nuper accidisse fatendum. Ut enim illi exoptatè in auribus circumferunt vocis sonum: sic mihi non auribus tantum obversatur, sed etiam penitus pectori infixus, hæret & hærebit, quamdiu sanguis in venis caluerit, sermonis tui, quo me dignatus es, lepos pariter & candor. O dulces & frugiferas dapes, quibus tunc frui datum fuit! Hominis graci, piorumque monitorum audientis vix responderem officio, nisi has ipsas & obsequiosâ mente exoscularer &

in succum sanguineum meum, quoad vires in hac nostrâ infirmitate tulerint, convertere studerem. Non ergo temporis senectus nec loci longinquitas, nec rei ipsius difficultas æquè ac à multis neglectus hoc apud me, (ut cum bono Deo spero) efficient, ut ejus amorem studiumque menti meæ vel excutiant vel exosum reddant. Fruantur alii suo judicio, ego & quid sanis istiusmodi debeat confiliis & quantum ex rei illius studio hauriatur utilitatis, per Dei gratiam non sum ignarus. Quamprimum igitur per alia, quibus etiamnum distrahor, licuerit ad amenissimos & aquæ vivæ uberrimos antiquitatis fontes degustandos me conferam: cumque multum mihi ad hanc rem adjumenti adferre possit eminentia tua, si efficiat apud Cl. Dominum Franciscum Junium, ut interdum unius atque alterius auctoris antiquioris usus ex Bibliothecâ Arundelianâ studiis meis concedatur; ne in hoc mihi desit obnixè rogo. Ipse quidem benevolentiam dicti Dn. Junii præsens hic ambivi, & mentione tuæ eminentiæ benevolentiaque mihi exhibitæ exambivi; quin tamen largiorem illius fructum sim sensurus; si recommendatore insuper te apud eum uti mihi daretur nullus dubito: ego inter eminentiæ tuæ cultores animo non facile ulli secundus, & Deum venerans, ut eadem superstite rempub. literariam quam diutissime frui ac gaudere, clementer largiatur. Vale Literatorum ocelle, meque tua prosequi benevolentia perge.

*Dab. Londi-
ni 12. Julii
cdo P c xli.*

Celeberrimæ Tuæ Eminentia

Observantissimus,

Daniel Sachsius.

P. S. Si Theses tuæ antehac editæ et nunc prostant venales, quæso te eminentissime Vir, indices exhibitori præsentium ubi, ut exemplar earum accipere possim.

FINIS.

ERRATA

ERRATA sic emendabit Benignus Lector.

Pagina 1. Columna 2. Nassovius. pag. 3. col. 1. pro LXII. reponere XLII. p. 10. c. 1. pro I. V. reponere *Is. Vossius*. p. 15. c. 1. Alcuinus. p. 31. c. 1. pro *Chatio* lege *Achatio*. p. 45. c. 2. *αὐδαδαία*. p. 54. c. 2. Ansegiso. p. 56. c. 1. Cicestrienfis. p. 58. c. 1. Cicestrienfis. p. 59. c. 1. Burhilli. p. 69. c. 1. Cicestrienfi. p. 70. c. 2. pro *Cui* reponere *Qui*. p. 77. c. 2. Slupeskiū. Sic etiam lege ubicumque nomen istud in his Epistolis inventes. p. 84. c. 1. Auberius Maurerius. pag. 85. c. 2. Confilis. p. 86. c. 2. Scholastico malè sentire. Ibidem. Ideo. p. 89. c. 2. Grenvillo. p. 95. c. 1. *Ἀλαπύου*. p. 100. c. 2. Lithocomi. p. 101. c. 1. Davidi de Willem. Ibid. c. 2. Hoffero. p. 102. c. 2. Hagam. p. 105. c. 2. Heroe. p. 113. c. 1. *ἀδελφότης*. c. 2. *βασιλειῶν*. p. 114. c. 2. pro *quis* reponere *quia*. p. 127. col. 2. Londinum. p. 181. c. 2. pro *Hoellus* fortè reponendum *Hoelzelino*. Ibid. Curatorum. Ibid. provinciam. p. 186. c. 2. Archiepiscopo Armachano. p. 188. c. 1. pro *M. Scripto*, reponere *MS*. p. 190. c. 1. Radzivilli. p. 193. c. 2. pro *Dutiaca* lege *Doufiaca*. Ibid. Doufiaca. p. 194. c. 2. prodidisse. p. 195. c. 1. lectione. p. 199. c. 1. Junio Philargyrio. Ibid. Phranza. p. 200. c. 2. Blaeu. p. 202. c. 1. reponere *Andr. Riveto S. P.* p. 206. c. 2. sumptus. p. 210. c. 1. Hagam. p. 214. c. 2. Hugonem. p. 216. c. 2. de Willim. p. 217. c. 1. Skyttio. p. 221. c. 1. *ἐπαλυσίαν*. Ibid. c. 2. Joanni. Ibid. Semiebio-nitas. p. 222. c. 1. pro *monte* reponere *monet*. p. 232. c. 1. Sorigianis. p. 239. c. 2. Scyttiana. p. 241. c. 2. Tiobrogæ. p. 251. c. 2. *Ἐγγερίαν*. p. 252. c. 2. Regis. p. 253. c. 1. Goudensem. p. 258. c. 2. Grotii. p. 265. c. 1. bis Rykwaert. p. 230. c. 1. Vander-Myllo. p. 416. c. 1. Sorana. p. 454. c. 2. cogor. p. 446. c. 2. Ecclesia. p. 441. c. 1. Langermanno. p. 426. c. 2. unum aut alterum. p. 291. c. 1. aut contemptum. c. 2. hæredum.

In Clarorum Virorum ad VOSSIUM Epistolis.

Pagina 14. Columna 1. pro *Grilli* reponere *Cyrilli*. pag. 1. col. 15. pro V. reponere *vero*. Ibid. Elmenhorstius. p. 23. c. 1. Anti-Grotium. Ibid. c. 2. Altorphina. p. 34. c. 1. A Londres. p. 35. c. 1. paré. Ibid. nécessaire. p. 36. c. 1. mortuum. p. 49. c. 1. Commentariis. p. 66. c. 2. Wren. Ibid. c. 1. puto legendum esse *Burlamachian*. p. 67. c. 1. Creighton. p. 104. c. 2. di-vertar. p. 101. c. 1. pro *Eques* reponendum puto *Episcopus*. p. 191. c. 2. Galeotti à Prato. p. 192. c. 2. pro *Rouvi* legendum cenſeo *Roe*. p. 196. 1. Greeſius reponere *Gravius*. p. 210. c. 2. pro *Tesſreſano* lege *Mestrezatio*. p. 211. c. 1. 1. Peyraredus. p. 222. c. 2. Aug. p. 226. c. 2. procedit. p. 229. c. 2. Millererium. p. 232. c. 2. *λίπας*. p. 240. c. 1. Nemausi. p. 244. c. 2. Polymathia. p. 245. c. 2. *ἱερολογίον*. p. 20. c. 2. Petro de Witte. p. 100. c. 2. virare potes. p. 280. c. 1. Joh. Rod. p. 276. c. 1. De Erioux, in *ſuprema Mediomaricum curia quondam Senator*. Ita lege, & dele quæ habentur in infima parte columnæ. p. 276. c. 1. poſt *degentis* appone punctum. p. 276. c. 2. atteſtentur nec. P. 268. c. 2. pro *Laiſchianas* vide an legendum ſit *Humanus*. p. 272. c. 2. an errore.

Cetera Lectoris Judicio permittimus.

I N D E X

R E R U M & V E R B O R U M

I N

E P I S T O L I S

Ad Viros Claros

à Gerardo Joanne Vossio Missis.

a, Primam Paginæ Columnam denotat: b, Secundam.

A

A Braxas, Vox Basilidis Hæresiarchæ, numerum dierum in Anno absoluto complectitur. Pag. 458 a

Adhæ ab Hebræo אָדָּה. 199 a

Æthelstanus, Rex Angliæ. 15 b

Agapetus, Explicatur. 199 b

Albuinus Flaccus, Bedæ Discipulus, Carolo M. author fuit Parisienſium in Gallia, Ticinenſis in Italia Academiæ condendæ. 15 a

Alfredi, Regis Angliæ, Opera & Elogium. 15 a

B. Ambrosii verba, ubi exponit, cur Lex prohibeat, ne Vir mulieris stola vel Mulier virili schemate utatur. 412. b Factum in Theodosium Imperatorem, nec penitus approbatum nec damnatum. 67 a

Ammianus Marcellinus corrigitur. 36 b

Amorem Dei depreciant, qui negant eum gradu aliquo Reprobis esse cum Electis communem. 336 a

Amstelodamum peste laborat. 274 b Amstelodamensium controversia cum Leidenſibus, de jure erigendi Collegii Amstelodami. 76, 144 a 172, & seqq. 188 b

Andreas Alciatus Patavium vocatur. 92 a Angliæ Reges & Regina, qui doctrina non minus quam sceptro insignes fuere. 13 b, & seqq. Ecclesiæ Reformatæ salus, post Deum, ab Anglia & Hollandia dependet. 137. b. Ecclesia Anglicana Apostolico ævo & proximis sæculis simillima. 89 b,

119 a, 264 b, 374 b. Gubernatio per Episcopos Junio & Gomaro placuit.

423 a. Reformatio. 402 b. Quo sensu Rex dicitur Caput Ecclesiæ. 69 a. Quo tempore fidem Christianam recepit Anglia. 14 a. Augustinus Monachus, Gregorio M. in Angliam missus, introducit (quantum potuit) Religionem Romanam. 14 b.

Anglicani Motus in Carolum I. & Ecclesiæ, per Puritanos concitati. 336, 367 b. 371, 374, 375 a 264 b. Ecclesiæ veteris Contemptores ubique cornua tollunt, ob felicem Puritanorum in Anglia successum.

378 a. Lutheranorum judicium de Ecclesia Anglicana. 367 b

Aniceti Papæ, Epistola Apocrypha, & ætas. 415 a

Annus Climactericus Magnus. 334 b. 335, 336, 338 a. Solonis dictum de Anno Climacterico decimo. 442 a. Alii Anni Climacterici. 336, 338, 354 a

Antiochenæ Synodi in Paulum Samosatensem Censura. 6 b, 7 a

Antiquitatis Contemptus lites producit in Ecclesia. 354 b. Antiqui sunt mirandi, non tamen temporum nostrorum ingenia despicienda. 400 a

Antonini Imperatoris lib. de seipso emendatur. 235 b

Aphorismi Cardinalium Venetiis excuduntur, quibus colligunt Saxonicum & Brandenburgicum Electorem dignitate sua a Pontifice spoliari debere. 74 a

Apocalypſeos Interpretes Batavi cuncta ad Romanum

I N D E X.

- Romanum Episcopum referunt, præter anti-*
quitatis mentem. 416 b
- Aquinati (Tho.) Liber de Regimine Prin-
 cipum falsò tribuitur. 63 b
- Arabica Lexica Christianorum, admodum im-
 perfecta: Arabum, intellectu difficilia. 94 b
- Aristidis, Oratoris, dictum de dedicatione li-
 brorum ad Viros eximios. 19 a. De
 se. 103 a
- Aristotelis Logica ætati adultiori accommodata. 86 b
- Arviragus, Rex Britanniae. 14 a
- Arundelæ Comes Ill. mittit Pitteum in Orien-
 tem, ut antiquos lapides aliaque monumenta
 in Britanniam inde referret. 145 a
- B. Athanasii Liber de Virginitate, parum ge-
 nuinus habetur. 413 b
- Athenodori Consilium Augusto, nequid iratus
 committeret, priusquam Alphabetum animo
 percurrisset. 72 b
- Augustana Confessio, Concilii legitime congre-
 gati auctoritatem non habet. 50 b. A
 Melancthone mutatur. 36 b. Germa-
 niæ Principes non aliam agnoscunt, quam
 quæ Carolo V. exhibita fuit. 37 a
- B. Augustini Sententia de Prædestinatione &
 Gratia. 208 b. & seq. Liber adversus
 Julianum pro genuino habendus est. 123 a.
 Corrigitur. 36 b
- Augustinus Monachus in Angliam missus. 14 b
- B**
- Baii (Michaelis) dogmata damnantur Bullâ
 Pontificiâ. 363 a
- Barbari, Vox, Relativa; nec à Græcis Roma-
 nisq; solummodo, sed Gothis, Arabibus, a-
 liisque in extraneas gentes infixâ. 26 b
- Barlæi (Casp.) Poemata. 118 b, 431. b.
 Philosophiæ Professor Amstelodamensis nomi-
 natur. 79 a. Libellis petitis, quod Opus-
 culo Menassîs, Judei, de Creatione carmen
 præponit. 301 b
- Baronii Error de Porphyrio. 306 a
- Barzanes, ex רב & זאב. 458 a
- Basilii M. de rubris Imperatorum calceis ex-
 plicatur. 199 b
- Basilides Hæresiarcha jactat se esse Glauciæ
 Discipulum; deumque supremum Abraxas
 nuncupat. 458 a
- Batavi multo maximam spem in propugnaculis
 sitam habent; victique difficulter cum victo-
 ribus instaurant Certamen. 255 b. Eorum
 libertas ante Burgundorum & Austrianorum
 imperium 263 a. Fastigia Annalium Ba-
 taviæ Zelandiæque. 263 b
- Belgiæ Ecclesiæ Pastorum inopia nulli cor-
 dato placet. 423 a. Belgiæ Confessionis
 sensus de Electione. 363 a
- Beverovicii Lib. de vitæ termino. 217 a,
 285 b
- Beza à Salmasio refellitur. 357 b
- Bodecheri (Job) Banningii, Poemata corri-
 guntur. 241 b
- Bombardarum Inventio & Historia. 424 a
- Boxhornius Virgula censoria notatur per Spili-
 arum. 45 a
- Brifacus Gallis captus. 314 a
- Buceri Moderatio & cum Calvino dissidium. 402 b, 403
- Buckinghamiæ Ill. Ducis Elogium. 10 b, &
 seq.
- Butrescæ. 458 b
- C**
- Cadmo Literas debet Græcia. 79 b
- Cælestini Papæ censura in difficiliore quæstio-
 nes de Gratia Dei. 209 a
- Caipor. 459 a
- Calandrini negotium in Batavia pro restitu-
 tione Reginum Monilium. 289 b
- Caligula an Anti-Christus esse possit? 360 b
- Calixti (Geo.) Opera Theologica. 433 b
- Calpurnii Pisonis lib. de Continentia veterum
 Poetarum. 426 b
- Calvini dissidium cum Bucero. 402 b, 403.
 Ille suos patiebatur Manes. 407 a. Vita
 candida & perfecta desideratur. 407 a
- Camerarii (Joachimi) Laus. 349 a
- Capillos quam altè vel demissè refecare oportet,
 præsertim Clericos & Monachos. 413 a
 & seq.
- Canonicum jus quicquid boni habet, è scriptu-
 ris & patribus petiitum est. 129 b
- Cardanus (Hier.) negligentior à salutationibus,
 & Epistolari commercio. 341 b. Edwardum VI. Regem Angliæ pro naturæ miracu-
 lo habuit. 17 a
- Caroli I. Regis Angliæ Elogium. 2 b
- Caroli V. Imperatoris dictum de Brabantia,
 Hannonia & Hollandia. 31 b
- Carthaginensis Concilii Canon de Comis Cleri-
 corum alendis. 414 a
- Cassiani Codex MSS. 371 b
- M. Catonis gloriæ nec Tullius laudando profuit,
 nec Cæsar vituperando obfuit. 88 a
- Catullus emendatur. 275 a
- Causidicina. 312 a
- Celwolfus Northumbriæ Rex. 15 a
- Christi Passio, Pæna an Sacrificium volunta-
 riè susceptum? 123 b
- Christinæ, Reginae Sueciæ, Elogium. 8 b, &
 seq. 28 a
- Chymia sic æstimatur à Vossio, ut Antiquis
 suis constet bonos. 445 a
- Clavium Sacerdotium potestas. 59 b
- Climaci (Job.) Lib. Paradisi Scala, & E-
 tas, 415 a
- Cluverii

I N D E X.

- Cluverii mors. 85 b
 Coldingense Colloquium. 49, 50
 Constantinus Magnus, natus & Imperator salutatus in Anglia. 14 a. Subscripsit Concilio Nicæno, rationum pondere victus. 66 a. Elogium. 14 a
 Constantius Imperator, utrum vere Arrianus. 66 a
 Conopii (Nath.) Presbyteri Græci, commendatio & Historia. 441 b
 Conscientiis solus Deus præest: Violentia nulla inferenda. 293 a
 Constitutiones & Canones Concilii Cantuariensis & Eboracensis, Anno 1640. satis esse debent calumniis retundendis, quæ adversus Anglicanam Ecclesiam, Antistites, & præsertim Laudum Archiepiscopum sparguntur. 361 b, 368 a
 Copernicana Hypothesis Romæ damnata. 240 a
 Cunæ (Petri) mors. 328 b, 332 a
 Cynemernos. 457 b, 458 a

D

- Dadsqueii Commentaria in Silium, & Orthographica. 254 a
 Decalogi Præceptum secundum explicatur. 345 a
 Diogenes dolium versat, ne vivos inter mortuos diceretur. 2 a
 Dionysius Areopag. de Tonsura, in Hierarchiâ Eccles. explicatur. 414 b. Extremis B. Hieronymi temporibus vixit. ibid.
 Diuban (Francisc.) Augustodunensis, ad munus Professoris ultraject. commendatur. 243 b
 Doctoris Titulus bonus, an Onus? 431 a
 Donaldus, primus Regum Scotticorum Christianorum. 17 a
 Donellus à Batavia exire jussus: modum non invenit exagitandi Cujacium. 73 a
 Δοξολογίας vetus Forma. 6 b
 Dordrechtana Synodus in damnanda Remonstrantium sententia simul condemnarunt Lutheranam. 367 b. Soli, decretis ejus qui subscribunt, ad publica loca & stipendia admittuntur, plerique in Urbibus Bataviæ. 307 b
 Duræ negotium εἰρηνοποιόν. 374 b. 367 b

E

- Ebionitæ, Hæretici, extra Ecclesiam projecti. 6 a
 Ecclesiæ tria tempora; Conformationis, Deformationis & Reformationis. 402 b
 Edgari, Regis Angliæ, Elogium. 15 b
 Edictum Ordd Holland. vapulat à zelotis. 39 a
 Editha, Eduardi Confessoris Conjux eruditissima. 13 b
 Eduardi VI. Regis Angliæ Elogium. 16 b
 Elizabethi Regine Angliæ Elogium. 14 a
 Eloquentia Viris principibus maxime ornamento. 25 a
 Episcopii Judicium de Grotii Libello ἀπολυτέγνωσιν. 123 b. Et de errore Socini. 124 b
 Episcopos Presbyteris præfuisse Apostolicis temporibus, Religionemque esse ab eorum gubernatione recedere, existimat Vossius. 410 a, 423 a. Constituendi non sunt, nisi de voluntate Episcoporum Provinciæ, per Canones Nicænos & Constantinopolitanos: quibus tamen Patres præscribere, quid expediret, non quidliceret. 69 a. Episcoporum Anglicanorum ordo placuit Junio & Gomaro. 423 a
 Erasmi (Desid.) Elogium. 277 a, 105 b, 389 a
 Ethelwolfus, Occiduorum Saxonum Rex. 15 a
 Eugenius, Rex Scottorum. 17 a
 Eugubini (Stedchii) Sententia, quod Mystéria Christianæ Religionis antiquis Gentium Philosophis cognita erant, rejicitur. 112 b

F

- Fabiani Burgravii à Dbona, dicta colliguntur. 32 a, & seqq.
 Ferdinandi Propugnaculum Batavis obsesum. 282 b
 Floravanti (Hieron.) opinio, quod Trinitatis mysterium Gentibus cognitum fuit, rejicitur. 113 a
 Forbesii (Job.) Studia & Labores laudantur. 260 b
 Frederici (Hen.) Principis Arausionensis, Elogium. 1 b
 Fregusius, vel Fergusius, primus Regni Scottici Conditor. 17 a
 Freinsheimii (Job.) Commentarii in Curtium, Florum, Tacitum, &c. 277 b
 Fromondus laudatur. 287 b

G

- Galilæus Galilæi in Carcerem conjicitur. 240 a. Amstelodamensium votum, ut suas intraras veniret. 276 b
 Gallorum successus Batavis formidabiles. 267 b. Victoria apud Hujam ab Hispanis reportata. ibid. Fœdus cum Batavis initum, dubium an salutare futurum sit Bataviæ. ibid. Plurimis ex Catholicis Romanis Papalis Tyrannis & Superstitio improbat. 408 a
 Gaudanæ Synodi decreta adversus Vossium. 71 b
 Genevensem Ecclesiam qui sequuntur, seditione dicuntur à Grotio. 402 b
 Gennadii Massiliensis ætas. 117 a
 Gennadius, Patriarcha Constantinopolitanus. 116 b, 117 a
 Gentilis, Scipio & Albericus. 272 a
 Germanis Mars apertus semper placet. 255 b
 Gildas Sapiens. 14 b
 Godeschalci Historia Vossiana & Usseriana: † 2 186 b;

I N D E X.

186 b, & seq. 192, 201, 202 a, 208 b
 Goefius traducit Salmasium, ut merum Gram-
 maticum. 449 b
 Golii Reditus ex Syria. 145 b. Geminam
 professionem obtinet. 145 b, 100 a
 Gomari sententia de Prædestinatione placet
 Vossio. 362 b. Lib. de Poesi Hebræa. 317
 a. Obitus. 374 b
 Gorchomienfis Synodus Confessionem & Cate-
 chismum Belgicum examinandi per Scripturas
 licentiam concedit. 45 b
 Gothorum Imperium, Leges, Lingua. 26 b.
 Gallie Pars vocatur Gothia Sidonio Apolli-
 nari. ibid.
 Gothofredi (Jac.) Pholostorgius. 417 b.
 453 a. Successio in locum Cunei defuncti
 Curatoribus Leidensibus ei offertur. 332 a
 Grammaticæ artis & Studii difficultas. 353 b
 Gratia præueniens tollitur à Chrysostomo, Au-
 gustino, aliisque ante Pelagium. 37 a. Ir-
 resistibilis, Scripturis & Augustino repugnat.
 187 a. Celestini Papæ iudicium in diffici-
 liores quæstiones de Gratia. 209 a
 Gratiani Decretum corrigitur. 415 a
 Gronovii liber de Sestertio. 425 b
 Grotius (Hugo) Zelotarum in se Batavorum
 maligna iudicia experitur. 35 b. A Danie
 Rege vocatus est, magni Stipendii spe; simul
 & à Suecici Regni Cancellario: in Polonia
 quoque de eo cogitant. 226 a. Legatus mit-
 titur ad Gallie Regem, à Regina Sueciæ.
 259 a. Socinianismi à Skokio accusatur,
 ex libris de Veritate Christianæ Religionis.
 328 b. Multorum sermone vapulat, qua-
 si Laudensibus in Anglia & Papissantibus
 faveat. 368, 380 a. Ejus Sophomponea.
 240 a, 253 b. Commentarii in Novum
 Testam. 355, 379 b, 402 a. In Vetus.
 436 a. Diatriba de Antichristo paucis pla-
 cet. 355, 368 b. Opponitur per Mare-
 schium. 360 b. Diatriba super Cæna. 355
 b. Diatriba adversus Borboritam & Fron-
 tonem non recte intelligitur ab inimicis suis.
 380 a. Animadversiones in animadversi-
 ones Riveti. 408 b. Lucanus. 37 b. Er-
 rata in libro contra Sibrandum. 36 b, 37 a.
 Lib. de Veritate Christianæ Religionis. 81,
 114, 329 a. Sententiæ suæ de Antichristo
 ratio exponitur. 388 b, 416, 402 a. Tria,
 quibus inimicos offendit in annotationibus ad
 Novum Testam. à Vossio vindicantur. 402 a
 & seqq. Oraculum audit. 199 b. Pon-
 tificius non est. 415, 176 b
 Gruterus (Janus) in Academiam Groningæ
 & Omlandicæ vocatus est. 114 b. Lauda-
 tur. 88, 89
 Gulielmi Principis Arausienfis Elogium. 1 b
 Gustavi (Adolphi) Titulus & Inscriptio. 185 b

H

Hadrianus Imperator, Poetarum versus remu-

nerabatur versibus suis. 112 a
 Heinsius, Ordinum Hollandiæ Historiographus.
 145 b. Ejus commentum de lingua Helle-
 nistica. 342 b. Historia Sylvæ Ducis cap-
 itæ. 388 a. Dissidium cum Salmasio. 116,
 225 a, 406 b, 342, 357 a, 449 b
 Helena, Constantii Imp. Coniux, & Coeli Re-
 gis Brit. Filia. 13 b
 Hellenistica Lingua Commentum in fumos
 abit. 342 b
 Helvetica Confessio, de cura religionis Magi-
 stratus demandanda, explicatur. 68 b
 Henricus I. Rex Angliæ bello-Clericus dictus.
 15 b
 Henricus V. Angliæ Rex, Gymnasi Cado-
 mensis Conditor. 16 a
 Henrici VII. Angliæ Regis, Elogium. 16 a
 Henrici VIII. Regis Angliæ, Elogium. ibid.
 Herberti Baronis de Cherbury lib. de religione
 Gentilium. 435 b, 436 a
 Hesychius, literaturæ Græcæ Thesaurus. 375 b
 Hispania, superba natio, nec Batavorum lau-
 dibus æqua. 37 b
 Historiæ usus ad conservandam rerum memo-
 riam in omne ævum. 32 b
 Homerus non magis Poeta, quam Philosophus.
 20. Versiculus unus Pompeio M. à Possido-
 nio commendatus. 13 b
 Hoofdi (Pet.) Poemata. 343 b. Vita, &
 gesta Henrici IV. ibid.
 Horatii, domus exilis Plutonis, explicatur. 199 a
 Hytlodæus. 459 a

I

Jacobus I. Rex Scotiæ, literarum Patronus. 17 b
 Jacobus I. Rex Angliæ Scotiæque, maximarum
 rerum scientiâ Reges omnes superavit à Salo-
 mone. 17 b
 Ignatii Epistolæ per Usserium & Isaacum Vos-
 sium. 443 a
 Imperatores Constantinopolitani rubris calceis
 uti sunt. 199 b
 Ina, Occiduum Saxonum Rex. 15 a
 Independentes Angli. 409 a
 Indicina apud Apuleium. 312 b
 Ingratitudo sæculi erga viros eruditos. 357 a
 Joannes à Lasco, Belgicæ Ecclesiæ in Anglia
 Episcopus. 49 a
 Joshua, ut Eleazari imperio suberat. 68 a
 Josina, Regum Scoticorum nonus. 17 a
 Judæorum conversionem propagandam, & pænas
 (tela, ignes, ferrum) amovendas, petit Vos-
 sius à Stupeskio. 293 a
 Juelli Episc. Sarisburiensis Elogium. 460 a
 Junius (Franc.) vindicatur contra characterem
 errore ei à Thwano datum. 72 b, & seq
 104 b, & seq. 113, 128 b. 105. Non
 satisfacit Genevensibus in quæstione de Eccle-
 sia Romana. 403 b. Dictum ejus de pro-
 funditate Scripturarum. 436 b. Conviitiis à
 Scaligero

I N D E X.

Scaligero oneratur. 113 b. Vindicatur contra Scaligerum. 113 b, 128 b, 105.
Junius (Fr.) F.F. de *Pictura Veterum*. 292, 296 a
Juridicina apud Tertullianum. 312 a

K

K. & C. Latinis non sunt literæ diversæ, sed ejusdem literæ ductus diversi. 261 a
Karolus, in *Membranis optimis & vetustissimis* exaratur. 261 a

L

Laborem sæpe fugiunt præclara Ingenia in re cauta. 371 b
Lapponia, dubium fabulis an historiis magis decantata. 171 b
Laudus (Gul.) Arch. Cant. semper in Epistolis adhortabatur Vossio, ut Baronio responderet. 370 b, 368 a, 264 b. Quam falsum sit, quod Puritani eum cogitare aiunt de reducendo Papatum. 264 b, 368 a. Constitutiones & Canones Synodi Anno 1650. absolvent eum à Crimine Papismi. 368 a. In custodiam abducitur. 367 b. Liber contra Fisherum; & Puritanorum quærimoniæ de eodem. 368 a, 370 b, 331 a
Laurentii (Jac.) lib. adversus Grotium irridetur. 404 b. Judicium de Antiquis Ecclesiæ Doctoribus. 406 b
Leidenfium Urbis peste laborat. 178 b, 274 b
Libros magnos inter & breves Comparatio. 88 a
Lipfii (Justi) Politica, initiis Civilis studii accommodantur. 205 a. In Ramum differunt. 313 a
Literarum Formatarum usus in Ecclesiâ Primitiva. 7 a
Livium privatim legendi ratio optima. 166 a
Logicæ Compendia meliora. 86 b
Longinus commercio Judæorum profecit, & Mosem ornavit elogio. 6 b
Lucius, Britannicæ Rex, primus Regum Christianorum. 14 b
Lucius (Ludov.) scribit contra Socinianos. 364 b
Lucretius Poeta. 80 b
Ludovici Vivis Consilio, Maria Angliæ Regina optimis Scientiis erat imbuta. 14 a
Lutheri dictum de Sacramentariis, Zuingliani & Tigurinis. 48 a. Cum bono semine zizania seminavit. ibid. Lutheranorum judicia de eo. 49 b, 50 a. Lutheranorum & Calvinianorum simillima ad Scripturas provocatio. 49, 50
Lydius (Balthus.) non dubitavit, inter verâ, etiam falsa impingere Ecclesiæ Romanæ: quod increpat Vossius. 335 b

M

Magdeburgenses Centuriæ errores suos habent:

unde nihil magis exoptat Vossius, quam eas edere cum brevibus suis notis. 364 a
Magistratus jus in Ecclesiasticis vindicatur à Vossio. 51, 52, & seq. Argumenti Walæi è contrario solvuntur. 58 b, & seqq. Dissertitur inter Vedelium, Rævium, & Triglandium. 407 a
Maimonides (Moses) quantum extollitur inter Judæos? 209 b. Dissertatio ejus de Idololatria ex Hebræo transfertur Latine per Dionys. Vossium. ibid.
Marcellus, primus Philosophiam Peripateticam in Gymnasium Dordrechtanum introduxit. 313 a
Mareschii lib. adv. Voetium. 409 b. Theologia ἐλαγκυή. 451 b
Maria, Regina Angliæ, optimis scientiis imbuta. 14 a
Mariani Scoti exemplaria MSS. 188 a, 177 b
Martialis laudatur & corrigitur. 194 a
Martinii (Matthiæ) mors & vindictio. 87 a, 153 b
Martinus Papa, Anglorum scholam Romæ à Tributo immunem esse jussit. 15 a
Matheldis, Regina, non eruditionis minus quam pietatis laudem meruit. 13 b
Menandro vim comicam desiderat J. Cæsar. 29 b
Menasses Ben-Israel secundum Præceptum Decalogi exponit. 345 a. Vossio gratus. 208 a. Loca Pentateuchi ἐν ἀποφαινή conciliat. 225, 226 a. Omnem prope ætatem in Scriptoribus Rabinicis trivit. 225 a
Merulæ Commentarii in Ennium. 426 b
Meursius (Job.) de Atticæ Regibus. 211 a
Mexicana Classis Batavis capta. 23 a
Micronius (Martinus) Belgarum omniumque Profugorum Londino, Pastor. 49 a
Miraculorum Christi Magnitudo & Certitudo. 4 b
Mithra. 458 a
Moguntinæ Synodi de Godeschalco judicium. 186, 187 b
Monachi Mesopotamiæ, intonsi, ab Epiphania improbantur. 413 a
Morcacus Rex Scotorum. 17 a
Moses & Aaron divisum tenuere imperium in Ecclesiasticis. 68 a

N

Natolius, Theodosianorum Episcopus, Hæreticus, à Victore P. in Ecclesiam recipitur. 6 a
Niuhuysius (Barthold.) ex Lutheranis Pontificius Abbas, ἐπισκοπὴν scribit, & cum Vossio de Ecclesiâ Romana colloquium habet. 240 b, 349 a
Nonnius vindicatur. 349 b. Codex MSS. 419 a

I N D E X.

O

ΟΤΑΠΙΟC; in eo nomine nequit C ba-
berī pro s: 360 b
Oxonienſis Academia Caput cælo infert ſub
Alfredo Rege. 15 b

P

Pœnæ penitenciales vim legum non habent, niſi
ſummo ſanciente Magiſtratu. 66 b
Panis ὁμῶς in Orat. Dom. ſpiritualem im-
primis alimoniam ſignificat. 366 a
Paraiba in Braſilia Batavis capta. 255 a
Paſtorum Electio, Magiſtratus iudicium ſe-
cum ferre debet. 69 b
Pauli Samoſatenſis Hiſtoria. 6 a
Paulus Servita dicere ſolebat, non eſſe meliorem
viam infringendi vires Hiſpanorum, quam
ſi Batavi Americam infeſtent. 155 a
Pelagius arbitrium hominis ſic extollebat, ut ne-
ceſſitatem Gratiae negaret. 208 b
Phamaluka in Braſilia Batavis expugnata.
155 a
Pitteus ab Arundelia Comite in Orientem miſ-
ſus, ut antiquos lapides, aliaque monumenta
inde referret. 145 a
Platoni minime cognita erant myſteria Chriſtia-
nae Religionis. 112 b. Cur Poetas ex ſua
arceſt Republica. 20 b. Plurima hauſit ex
Homero. 20 a
Plempius (Fortunatus) tum Bononiensibus,
tum Lovaniensibus ad Profeſſionem Medi-
cam vocatur. 185 b
Poetices antiquitas & bonos. 19 b, 20
Polycarpi Epiſtola ad Philippenſes. 310, 322 a
Pontificii criſtas erigunt; multique in Batavia
& Gallia ad eos abeunt. 150 a. In verbis,
Hoc eſt Corpus meum, agnoſcunt tropum, non
ſigni, ſed materiae. 201 a
Porphyrius, an ad Chriſtianam fuerat conver-
ſus Religionem? 306 a. Porphyrii Panegy-
ricus non eſt Malchi opus, ſed Publii Optati-
ani Porphyrii. ibid.
Porracei folii nodus. 454 b
Prædeſtinatio. III b, 208, & ſeq.
Prætores Romani cinctum Gabino ius Civile
dicebant. 312 a
Prificiani Codex MSS. 419 a
Prophetæ Prophetis quomodo ſubjecti eſſe de-
bent? 69 b
Ptolemaicam Opinionem minime damnat Voſ-
ſius. 287 b
Puritanorum Anglorum Clamores & Bella in
Carolum I, & Eccleſiam. 409 a, 264, 367
b. Succellus animos addit Zelotis in Bata-
via. 407 a
Puteani (Erycii) pericula propter ſtateram,
quam ſcripſit, Belli ac Pacis. 218 b. Laus.
210 a
Pymius, Puritanus Anglus, magnam in Parli-
amento autoritatem gerit. 409 a

Q

Quadrageſimalis jejunii Antiquitas & Uſus
410 b.

R

Rabanus Maurus, omnium ætatis ſuæ doctiſſi-
mus, Goderchalcum damnat. 192 a
Radzevilli Principis Servus ultimo ſupplicio
affectus in Academia Leydenſi. 190 a
Ralura Sacerdotum & Monachorum. 415 a.
Multo recentior eſt quam Tonſura. ibid.
Reformationis Authores, non ea modo quæ à
deformatis erant temporibus, ſed Apoſtolico
etiã tempori convenientibus, aliquando ſu-
ſtulerunt. 402 b. Eorum diſſenſus inter ſe
48 a. Quanta parte mundi obtinuerunt? 357 b
Reidani Hiſtoria Belgarum, è ſermone Belgico
latine translata per Dionyſ. Voſſium. 223 a,
224 b, 226 a
Reſuſcitandorum corporum qualitates. 125 a
Reutha, Regum Scotiarum VII. 17 a
Rhenoberka capta. 221 b
Richardus III. Anglia Rex. 16 a
Rivetius Salmaſium adjuvat, ad obtinendum
Scaligeri locum in Academia Lugdunenſi.
143 a
Romanam Eccleſiam falſis criminibus accuſa-
re minime oportet. 355 b, 402 a
Roteradamenſis Synodus. 71 b
Ruetract (Juſtus) Grotio commendatur. 265
Rutgerſius, Legatus Regis Suecici ad Ordines
Holland. 73 b

S

Salmaſius, Equeſtri Dignitate & Conſiliarii
Titulo à Rege Gallia decoratus. 295 b, 296
a. Lugduni habitat inter tam infeſtos, quam
ſi in mediis viverat Jeſuitis. 351 b. Verſi-
culis virulentis laceratur. 350 a, 351 b.
Diſſidium habet cum Heiſſio. 225 a, 406 b,
342, 347 a, 449 b. In Galliam diſcedit
ſub conditione redeundi Lugdunum. 357 a.
Reſellit Bexam. 357 b. Ejus exercitati-
ones Pliniana. 162 a. Exercitationes in So-
linum. 228 a. Commentarii in Nov. Teſt.
357 a. De Uſuris. 342 b. De Caſarie
viroꝝ, & mulierum Coma. 432 a. De
Primata Papæ. 442 b. Funus Helleni-
ſticum & Offilegium. 418 b, 423 a. Ora-
culi inſtar conſultitur. 357 a. Noſtri ſæcu-
li Varro. 371 a. Encomium. 83 a, 117
b, 203 a
Scaligeri (Utriuſque) merita agnoſcuntur à
Voſſio, Heiſſio extolluntur. 105 a. Joſe-
phi lib. de Emendatione Temporum. 105 b.
Conjectanea in Varronem; deque iis iudicium
Petri Viſtorii. 105 b. Julius ad verſus Car-
danum. ibid. Eraſmus cum utroque Scali-
gero comparatur. ibid. Vid. Junius.
Schrevelius,

I N D E X.

- Schrevelius, *Professor Medicus Lugdunensis*, cedit *Heurnio*. 94 b
- Scotorum *Rebellio contra Carolum I.* 331 a. In *Sententiis & Ritibus Ecclesiae*, novella omnia iis magis quam antiqua placent. 298 b
- Scripturarum *Excellentia*. 5. Interpretatio *gennina ab Antiquitate petenda est*. 5 b, 459 b, 460 a
- Seldenus *incarceratur*. 145 b. *Lib. de Diis Syris*. 434 a
- Sibrandiana *Causa*. 41, 35 b
- Sibyllina *Oracula*, *supposititia*. 113 a
- Sigebertus, *Orientalium Anglorum Rex*. 15 a
- Smantius, *Ecclesiastes*, ex *Amstelodamo exire jussus*. 180 b
- Socini *Error*, *negando Sacrificium Christi esse propriè propitiatorium*. 125 a. *Socinianæ Sectæ manibus pedibusque obviam eundum*. 364 b. *Sententia de Corporibus resuscitandorum*. ibid.
- Sophoclis *Tragædiæ*, *Latino Carmine per Rattalerum redditæ*. 29 b
- Spanhemii *Elogium*. 422 a
- Stobæi *Commentaria per Grotium edi, desiderat Vossius*. 82 b
- Stephanus Stephanus *Saxonem Grammaticum edit*. 446 a, 377 a
- Suetonius, *non Donatus, Autor est Vitæ Terentii*. 251 b
- Sylva-Ducis *Batavis capta* 23 a. *Historia scribitur per Heinsium*. 388 a. *Ordo Marianus Sylvæ-Ducensium Procerum reformatorum damnatur Voetio, defenditur Marefchio*. 409 b
- Symmachi *Elogium per Macrobius*. 312 a. *Odit parsimoniam bonorum verborum*. 128 b
- Synodorum *Congregatio & Autoritas*. 65 b
- T
- Tenenisium *Urbis clades sævissima*. 271 a, 272 b
- Testamenti *V. & N. Veritas*. 5 a
- Themistoclis *Epistolæ*. 101 a
- Theodericianæ *leges*. 26 b
- Theodotus *Byrantius, Ebionita, Communione Christiana per Victorem Papam privatur*. 6 a
- Theologicum *Vinum, quare sic dictum?* 306 b
- Tilenus *varia de se judicia experitur*. 82 b
- Tonsuræ *Antiquitas, præsertim Clericorum & Monachum*. 413 a, & seqq.
- Toruniense *Colloquium*. 452 b
- Trajana *Columna*. 252 a
- Trapemernos. 457 b, 458 a
- Tricius *Apinius*. 459 a
- Trismegistus, *supposititius*. 113 a
- V
- Vallæ (*Laur.*) *error de Cælestino Papa*. 36 b
- Udenhemus *a Cæsarianis captus*. 255 b
- Vedelii *Lib. de Episcopatu Constantini opponitur Revio & Triglandio*. 409 b. *Mors. ibid.*
- Vesalia *Batavis capta*. 23 a
- Victorii (*Petri*) *cenfura in Scaligeri Conjectanea in Varronem*. 105 b
- Vinum *Generosum, cur dicatur Theologicum?* 306 b. *Neque solum Cos. sed Costa & ibid.*
- Virgilius *explicatur*. 199 a
- Vocum *Latino Barbararum tria Genera*. 420 b
- Vorstius *Scaligero opponit de Saccharo veterum*. 332 b
- Vossius (*Dionysius, G. J. F.*) *Maimonidem ex Hebræo latine reddit*. 209 b. *Cæsarem post Scaligerum castigat*. 229 a. *Mors & Elogium*. 228 b, 229 b, 231 a, 235 a, 376 a
- Vossius (*Gerardus Johan.*) *Canonicus Cantuariensis*. 2 b, 25 b, 140 b. *Alienissimus à Vorstii opinionibus de Deo*. 40 a. *Ad Professionem Theologiæ in Schola Steinfurtenfi vocatur*. 42 a, 39 b. *Ad Professionem Historiæ in Academia Cantabrigiensi*, 91, 92, 93, 98. *In Philosophia ἐκλεχτους* 80 b. *Theologis tepidis annumerari mavult, quam Zelotis*. 457 a. *In Academiam Oxoniensem honorifice adscitus est*. 262 b. *Academiæ Cantabrigiensis grato animo dedicat Librum de Historicis Latinis*. 119. *Amstelodamum vocatur, ut sit Historiarum & Politices Professor*. 308 a. *Historiarum, Eloquentiæ & Linguae Græcæ Professor Lugdunensis*. 98 a. *Deum orat, ut Grotius nullo modo à Religione Reformata abstrahatur*. 176 b. *Mulum amat Ecclesiam Anglicanam*. 407 a. *Filii Filiaque ejus felicissimæ indolis*. 308 a. *Lib. de Idoloratriæ Origine & Progressu*. 343 a, 344 b. *De Tribus Symbolis*. 2 b. *De Vitiis Sermonis & Glossematis Latino-Barbaris*. 439 b, 436 b. *Amores*. 454 b. *Studiorum ratio*. 353 b. *Vix audere se, dicit, inter literatos nomen suum profiteri*. 371 a
- Vossii (*Gerard. G. J. F.*) *Opuscula*. 354 a, 298 b. *Mors*. 347 a
- Vossius (*Joan. G. J. F.*) *Socius Cantabrigiensis*. 142 a
- Vossii (*Isaaci, G. J. F.*) *Opuscula*. 374 b, 395 b
- Vossius (*Matth. G. J. F.*) *Annales Bataviæ & Zelandiæ condit*. 263 a, 273 b, 275 b
- Moritur*. 445 b
- Usserius (*Jac. Arch. Armach.*) *de Antiquitatibus Ecclesiarum Britanicarum*. 375 a
- Utenhovii (*Joan.*) *Historia, nomine Joan. à Lasco & Micronii scripta*. 49 a
- Utopia. 459 a
- W
- Walæi *Argumenta contra jus Magistratus in Ecclesiasticis solvuntur*. 58 b, & seqq.
- Warneri (*Lævini*) *Opuscula & Laus*. 432 b
- Whitakerus. 460 a

INDEX

RERUM & VERBORUM

IN

EPISTOLIS

Clarorum Virorum

Ad Gerardum Joannem Vossium Missis.

a, Primam Paginæ Columnam denotat: b, Secundam.

A

A Bbot (Geor.) Arch. Cant. inter venandum, iſtu fallente, hominem pro ceruo ſagittâ configit. 29 a. Quæſtio de illius irregularitate ſolvitur per Epiſcopum Winton. 39 b
 Abrahæ (Patriarchæ) Vocatio & Migratio ex Ure & Charris. 237 b
 Academiæ Oxoniensis & Cantabrigiæ in Paræum, Bucanum, & Stephanum Junium Brutum cenſuræ. 30. Rari in iis Profeſſores exteri. 38 a
 Adoleſcentia plurimorum Virorum, in Patriæ ſalutem natorum, perdita pene ac deſperata fuit. 84 b
 Ægyptii hominem myſticum cicada picta expreſerunt. 192 b. Eorum Numina. 286 b
 Amakeranæ ἡλικίας in vico prope Hafniam ludus. 246 b
 Amiraldi opus contra univerſalem gratiam à Spanbemo in Academia Leydenſi opponitur. 280 a
 Angliæ inteſtina Bella è ſcandalo accepto, non dato prorupere. 182 b. Grave ſcandalum Religioni Reformata. ibid. Turbant & terrent etiam Exteros. 269 b, 49 a, 208 b. Gallorum, Taurorum, Urſorum, & Canum pugna apud Anglos exhibitæ, jactus item & luctæ, bellicæ virtutis argumenta ſunt. 192 b
 Anima tota in toto corpore & tota in qualibet parte. 222 b, & ſeqq.
 Annus Climactericus Magnus. 235 b

Antiocheni Concilii Canon de imaginibus. 25 a
 B. Antonii Vita per Athanaſium. 181 a
 Antonii de Leon, Epitome Orientalis & Occidentalis Bibliothecæ. 179 b
 Antrum Wookevium in Mendippii Collibus Minerariis, prope Wellas, in Agro Somerſetenſi, aquas habet ex ſtelicidio in lapides concretas. 191 b. Cui non abſimile eſt alterum in agro Turonenſi, in Gallia. 192 a
 Apollonii Pergæi Conicorum libri 3. de Græco in Arabicum elegantiffimè tranſlati. 51 b
 Apuleius corrigitur. 111 b
 Arabicæ Linguae uſus & præſtantia. 51 a
 Ariſtotelis Rhetorica. I b. Index Arabicus omnium ſcriptorum Ariſtotelis. 162 b
 Artaxerxes, Perſarum Rex, non tam donum quam donantis animum exoſculatus eſt. 7 a
 B. Auguſtini ſenſus nimis ab Uſſerio reſtringitur. 100 a. Lib. de Civit. Dei corrigitur. 111 a

B

Baptiſma Joannis non undique idem fuit cum Chriſti baptiſmate. 61 b, 66 a
 Barlæi (Caſp.) Poema de Sylva ducis capta. 63 b. Elogium. 99, 277 a
 Baſilii M. locus de rubris Calceis Imperatorum. 91 b. Codex MSS. 13 b
 Batavorum Elogium ex Livio. 281 b
 Bodleiana Bibliotheca. 187 a
 Bollandus (Jeſuita) Roſweydi opus de vitis Sanctorum Ordinatus. 186 a
 Bolducii (Capucini) Oggius Chriſtianus. 206 b
 Buckinghamiæ Ducis III. fatum ſubitum & barbarum. 62 a, 65 b

I N D E X.

C

- Calandrini Negotium in Batavia, pro restituti-
one Regionum Monilium. 153 b
Calixtus (Geo.) semi-Calvinista audit Zelotis.
274 b. Laceratur ab Erbermanno, Jesuita.
ib. Laudatur. 146 b.
Cantabrigia peste laborat. 75 a. Academia par-
tibus Remonstrantium & contra Remonstran-
tium dividitur. 30 b, 31 a. Resalutat
Vossium. 43 b
Cantuariensibus Archiepiscopis jus visitandi A-
cademias denno revocatur. 160 a
Casauboni (Isaaci) Epistole. 159 a
Gasaubonus (Meric.) in laude Clientelam tran-
sit. 100 a
Caroli I. Regis Angliæ Parricidium. 292 a
Christi (Jesæ) tria Paschata, 258 b. Satisfa-
ctio & Merita. 278 b. & seqq. Judeorum
Fagmentum de Nativitate ejus. 260 b. Cause
constituendi Festi Nativitatis in mensem De-
cembrem. 260 b
Chymix Antiquitas examinatur. 286 b
Citra, particule, usus inter Jurisconsultos dis-
putatur. 148 b
Clementis Romani Epistole vindicantur. 120 b
Quædam dubia ex iis. 122 b.
Colvii (Andree) in Angliam & Academiam
Cantab. Censura. 67. De Comis alendis,
Salmasius. 265 a
Commulcium. 298 a
Confessionum Fidei publicarum Usus & Abu-
sus. 203 b
Conopii (Nathan.) supplex libellus ad Ordi-
nes Holland. 145 a
Crocii (Ludov.) Theologiæ præfati. 147 a

D

- Damperti, Londinensis Ministri, Historia &
Charact. 107 a, 123, a 124, a, 125, b
Danorum incurfus in Fimbriam & Holsatiam.
60 a
Davenantii (Episc. Sarisb.) Commentarii in
Epistolam D. Pauli ad Colos. 44 b
S. Demetrii Martyris Thessalonicensis, Vita &
Miracula per Coccum. 180 b
Demetrii Chrysoloræ Thessalonicensis Qpuscula.
180 b.
Diceta Monasteriensis & Osnaburgensis. 280 a
Dodrechtana Synodus, in eaque Remonstran-
tium Fiducia. 16 b
Dorifflaus Historiæ Professor Cantabrigiensis.
44 a, 57 b
Doubletlii (Geo. R.) in Anglos Censura.
37 b, 38 a

E

- Echones memorabiles Varii. 197 a
Electio conditionalis. 11 a

Erpenius in Conciliorum societatem Legati Re-
gis Africæ, ex famæ charitate, adscitus. 37 a.
Moritur. 36 a. Vossius in funere orationem ha-
bet. 36 a

Eustathius de Trigla Pisce, Dianæ sacro, expo-
nitur. 185 a

F

- Farfaxii exercitus Regem Carolum captivum
desinet. 288 b
Fimbria, Insula, in potestatem Danorum re-
dacta. 60 a
Forbesii (Job.) Dissertatio de consensu Doctri-
næ Augustini de gratia Dei cum perpetua
Catholicæ Ecclesiæ doctrina. 268. b. Vossio
commendatur. 262 a
Freinshemius Tacitum, Curtium, &c. edit.
172 a

G

- Gaillardii (Ægidii) lib. de Supposito. 285 b
Galilæus, Galilei singulare erga Batavos studi-
um profitebatur. 225 a
Gatakeri (Tho.) lib. de justificatione laudatur.
278 b.
Gellii (A.) Noctes Atticæ, magnam Antiqui-
tatis partem illustrant. 233 b
Genevensis Ecclesiæ faciem Parlamento Angli-
cano placere, dolet Crocius. 208 b
Gentilium Idololatria. 25 a
Godeschalci Historia. 121 b, 92 b, 301 a
Golii itineris in Syriam ratio. 50 a, & seq.
Institutum generosum laudatur. 41 a. In
Patriam rediit, duplicemque obtinet Profes-
sionem. 70 b
Græcorum querimonia in Belgarum Ministros
exitio Ecclesiæ Græcæ in Persidem missos.
271 a
Grafwinkeliu bellum gerit cum Seldeno, pro
libertate maris. 157 a
Gratia Universitatis defenditur per Crocium.
193 b, 210 b, 214 a. Et Vossium. 11 a.
Opponitur per Combaisium. 193 b, 210 b. Sy-
nodos Hollandicas. 214 a, 245 a. Et Span-
hemium. 245 b. Cum speciali Electionis gra-
tia nihil pugnat. 214 a
Gronovius (J. Fred.) Thesaurus vidit in An-
glia, ad quos peregrini tardè accedunt, spe-
ciatim in Bibliotheca Bodleiana. 187 a. De
Sestertiis. 255 a, 256 b, 268 a
Grotius (H.) tam à Lutheranis quam Evan-
gelicis vapulat. 248 b. Volubilis & soci-
nianus dicitur Colvio: 252 b. Sententia de
Antichristo opponitur. 214, 216, 248 b.
Vti & votum pro Pace. 226 a. De satis-
factione Christi. 294 b. Incarceratur. 18 b,
20 a. Vindicatur & laudatur. 139. Ama-
tur à Laudo. 100, 105. b. Carminibus
Barlei & generosi Angli pro meritis celebra-
tur.
†††

I N D E X.

tur. 277 a. *Librum de Veritate Christiane Religionis Arabicè transfert Pocockius.* 227
b. *Reditus in Patriam inter res vix credibiles.* 100 a

H

Heinfius (Dan.) *invidere & obrectare nunquam desinit.* 70 b. *Diffidium maximum gerit cum Salmasio.* 116 a
Herberti (B. de Chisbury) *lib. de Gentilium Religione, errorumq; apud eos causis, judicio Vossii subjicitur.* 272 a, 275 a
Hispaniæ *Fraudes detectæ.* 46 a
Hommii (Festi) *Character.* 21 a
Honorius, *Author Commentariorum in Cantica Canticorum.* 18 b
Horus Apollo. 191 a

I

Idoli & Imaginis *distinctione urgent Pontificii* 25 a. *Gentiles adoraverunt Idola sua tanquam Deos.* ibid. *Præceptum de Idolis non faciendis, Morale & Perpetuum.* ibid.
Ignatii *Epistolæ per Usserium.* 270 a
Imaginum *Cultus & Adoratio Pontificia:* 25 a
Independentes, *Angli, rerum potiuntur: Regemque Carolum captivum detinent.* 288 b
Johnstonus, *Scotus, pro causa Regia contra 2 Ministros Scotos Puritanos disputat coram Tilenno.* 25 b
Per Jovem *Lapidem, sanctissimum Romanis iurjurandum.* 111 b
Israelitarum *Exodus ex Egypto.* 237 a
Judæorum *Multitudo in Polonia.* 166 a.
Figmentum de Nativitate Christi. 260 b.
Frequenter rei deferuntur Cædis infantium Christianorum. 166 a
Julianæ *Periodi Vestigia deprehenduntur in Epitome Mariani Scoti, Roberto Lotharingo concinnatâ.* 302 a
Julianus (Imp.) *Apostat. inter Historicos adscribi meretur.* 36 b
Junius (Franc.) *a Vossio vindicatur contra Thuanum.* 44 a

L

Lachmiorum *Insula apud Valerium Maxim.* 168 b
Lapis *Porcinus.* 191 b
Laudus (Gul.) *Arch. Cant. commendat Vossio refutationem Baronii.* 62 b, 68 a, 75 b, 87 a, 92 b, 105 b, 66 a, 125 b. *Fatum deflet Buckinghamiæ Ducis.* 62 a, 65 b. *Animum non minus politicum quam religiosum habet: Parlamento & Puritanis exosus, Regi Carolo charus.* 67 a. *Luget Ecclesiæ tempora.* 66 a, 68 a. *Non deerit Officio, neque Ecclesiæ.* 75 b. *Grotium amat.* 100 a, 105 b.

Casaubonum (M.) *in Clientelam accipit.* 139 a, 100 a. *Academias visitandi jus Archiepiscopis Cant. revocat.* 160 a. *Cancellarius Acad. Oxon.* 75 b, 68 a. *Literarum Patronus.* 139 a. *Ridet insaniam inimicorum suorum.* 75 a. *Veterem Ecclesiæ tramitem non deserit.* 200 a. *Librum contra Fisherum mandato Regis edit.* 183 a. *De Invasione Scotica.* 182 b, 199 b. *De Novatoribus Anglicanis.* 125 b, 126 b. *Summaria Vita.* 198, 199
Liberalia apud Tullium. 298 b
Lindsellii (Aug.) *Hereford. Episc. Mors & Elogium.* 138 b
Logica disputatio inter Ravium & Niubusum. 231 b
Londinum *Peste laborat.* 163 a

M

Magdeburgenses *Centurias ornare Notis rogatur Vossius.* 184 b
Magistratus *jus in Ecclesiasticis defenditur contra Walæum.* 13 b
Mantæi (Franc.) *Theses Theologicæ de Deo increato.* 7 a
Manuscriptorum *Athenæi, Apollodori, Libanii, aliorumque Græcorum Authorum, Catalogus.* 169 b
Marci Ant. *de Dominis, Arch. Spalat. Cadaver & Scripta Romæ cremantur.* 36 a
Mariani *Scoti exemplaria MSS. Usserio collecta.* 301
Martinii (Matth.) *Mors.* 68 a
Metalla, *an inter Egyptios pro Numinibus habitata?* 286 b
Meursius (Job.) *Modestiam & Candorem desiderat in Salmasio.* 74 a. *Opera.* 65 a. *Obitus.* 189 b
Milletorius *graviter increpari dictus pro scriptis & concionibus Hæreticis.* 229 b. *Pontificiis se adjungit.* 247 b
Molochus. 159 b

N

Neander, *Ethices Profess. Francofurti, laudatur.* 33 a
Nestorium *perperam in Ephesina Synodo Hæreseos damnatum fuisse, Opinio Egidii Gallardi.* 285 b
Nunnesii (Pet.) *Rhetorica & Philosophica* 14 a
Nuxinque *principium scrutatur Puteanus.* 18 b, 108 b

O

Ormeftam, *Vox, Orofio rejicitur.* 18 b
Orosius *non est Author Commentariorum in Cantica Cantic.* 18 b

Oxoni-

I N D E X.

Oxonienfis Academiæ gratiæ redditæ Vossio. Scioppii (Gasp.) Prophetia Scripturæ. 225 d
227 b Scoti, gens Puritana. 25 b. Armati 42

P.

Παγισσος & apud Agapetam.	97 b	Scripturas quasdam periisse, Junius arguit	
פְּתִיחַהּ Vox, apud Damascenum, Ephipha-		Chrysostomo.	123 a
nium, & Origenem.	260 b	Selandia, insula, terræ motum patitur.	95 a
Papa, Antichristus, judicante Crocio.	248 b.	Servius corrigitur.	149 a
& Cocceio.	214 b	Simiæ, Christum esse Verum Legislatorem de-	
Parei Chronologia.	187 b	demonstrantis, fabula ex Purchasio.	192 b
Pelagiana Historia Usserii & Vossii.	188 b.	Sora, Urbs Daniæ.	40 b
100 a, 49 b, 146 b		Spanhemius rigorem Allobrogicum in Præle-	
Perlarum Reges fratrum oculos ferro candem-	80 a	ctionibus inculcat. 245 b. Amiraldis opus	
ti exurunt.		opponit. 280 a. Varia de se experitur ju-	254 a
Petavii error de Horo Apolline.	191 a	Straffordix Comitiss mors.	254 b
Pieruccii Elogium.	224 b	S. Syncreticæ Vita per Athanasium, quæ sub	
Plempius (Fortun.) Bononiam vocatur.	103 b	nomine S. Theclæ prius delituit, genuinum	
Plinii Paneg. in Trajanum corrigitur.	111 a	opus.	180 b, 181 a
Pontificii, Angli, Carcere liberantur: Con-		Synesii Elogium.	137 b
troversæque Religionis inter eos & Refer-			
mates in publicis Ministrorum Concionibus			
interdicuntur.	31 a		
Prodigia in Cimbria, Scania, & Holsatia			
visa.	60 b		
Providentia Dei Universalis est, contendit			
Herbertus B. de Cberbury.	272 b		
Puteani pericula propter Stateram Belli & Pa-			
cis.	111 b		

R.

PABOT ANAAPHIN	apud Hippocra-	tem.	246 a	Tileni iter in Angliam.	23 a,	26 a
Remonstrantium Constantia	in Synodo Dor-	drechtana.	16 b	Tirlinensium Urbis Clades,	plus quam bar-	bara.
Riveti Apologia pro B. Virgine.	177 b.	An-		Tonitrûs ictus memorabiles.		150 b
notationes in Grotii Annotatum ad Consulta-		tionem Cassandri.	229 b	Tormenta futuri sæculi.		192 a
Rutgerfius (Winand.) Scholæ Theologicæ		Steinfurtenfis commendatur.	11 b.	Terminus viæ apud Basilium.		222 a
Accusatur in Degstas.	6 a.	Mors	47 b	Trigla Idolum Vandalorum, & Piscis Diana		97 b
Rutilius Poeta.			114 a	sacer.		185 a
				Turonense Colloquium.	280, a	283 a

§.

Salmafius Pontificiis Gallis ad Religionem mutandam tentatur. 155 a.	156 b.	Diffidium gerit cum Heinſio. 116 a.	Magnatibus innotſcere non cupit. 284 b.	Idem non eſt, qui Verinus de Tranſubſtantiatione. 284 b.	Variis Calamitatibus impetitus eſt in Gallia. 206 b.	Ejus Menapiſcus. 133 b.	de Uſuris. 171 b.	de Primatu Papæ. 206 b.	Saxonis Grammatici loca corrupta. 114 a, 115 a, 168 a.	Scaligeri (Joſ.) error in ſupputatione annorum à Regno Salomonis ad Occaſum Zedekie & Hieroſolymorum excidium. 2 b.	Mors. 3 b.	Elogium. 4 a.	Schrevelius Laudatum. 41 a.
		graphus Regius Caſtellæ. 180 a.	Verinus de Tranſubſtantiatione, non eſt Salmafius. 284 b.	Veronus pro Scriptis & Concionibus Hæreticis increpari dictus. 229 b.	Uladiſlai Regis Electio ad Regnum Poloniæ. 105 a.	Voffius (Dionyſius, G. J. F.) Maimonidem ex Hebræo Latine transfert. 92 b, 227 a, 266 a, Opuscula alia. 92 b, 102 b, 116 b, Mors & Elogium. 116 b, 118 a, 128 a, 149 b, 64 b, 102 b, 227 a.	Voffius (Gerard. Joan.) ad amplectendas contra Remonſtrantium partes rogatum. 17 a.	Deponitur Reſtorata Collegii Leydenſis. 21 a.					

T

Talparum Oculi.	192 b
Tamberlanis Historia.	79 b
Thaletis Philof. Opera apud Laertium Arifto- reli adfcribuntur ex parte, in Indice Ara- bico fcriptorum Arifotelis.	162 b
Theologorum hujus ſæculi ineptia.	99 a
Difficilior ſtudijs Theologicis.	99 a.
ישו הנלריה (Tholedoth Jeſu,) liber Blaf- phemus inter Judæos.	260 b
Tileni iter in Angliam.	23 a, 26 a
Tirlinenſium Urbis Clades, plus quàm bar- bara.	150 b
Tonitrûs iſtus memorabiles.	192 a
Tormenta futuri ſæculi.	222 a
Τουμιας τῶν apud Baſilium.	97 b
Trigla Idolum Vandalarum, & Piſcis Dianæ ſacer.	185 a
Turonenſe Colloquium.	280, a 283 a

v

Vargas (Tomagus Tho.) Toletanus, Historiographus Regius Castellæ. 180 a
Verinus de Transsubstantiatione, non est Sakmasius. 284 b
Veronus pro Scriptis & Concionibus Hæreticis increpari dictus. 229 b
Uladislai Regis Electio ad Regnum Poloniae. 105 a
Vossius (Dionysius, G. f. F.) Maimonidem ex Hebræo Latine transfert. 92 b, 227 a, 266 a, Opuscula alia. 92 b, 102 b, 116 b, Mors & Elogium. 116 b, 118 a, 128 a, 149 b, 64 b, 102 b, 227 a
Vossius (Gerard. Joan.) ad amplectendas contra Remonstrantium partes rogatum. 17 a.
Deponitur Restorata Collegii Leydenfis. 21 a. Con.

INDEX.

- Constituitur Canonicus Cantuariensis. 63. a.
Historie Professio apud Cantabrigiam ei offer-
tur. 35, 37, 38, 39, 40 a, 42 a, 43 a, 44 a,
 57 a. Innuit se suscepisse refutationem Baronii.
 44 a. *Theser Theologica Oxonia imprimuntur.*
 65 a, 67 b, 187 a. *Etymologicon.* 14 b. *Insti-*
tutiones Rhetoricae. 1 b, 5 b, 14 b. *Respon-*
sio ad iudicium Hermannii Ravensperg. de
Hug. Grotii libro contra Socinum. 17 a, 18 a.
Historia Pelagiana. 44 b, 49, 146 b. *Com-*
mentarii de re Grammatica. 146 a. *Theolo-*
gia Gentilis & Philosophia Christiana. 212 b.
De tribus Symbolis. 258 a. *De Pado-Bap-*
tismo. 278 a, 282 a, 288 b. *De Dissidiis*
Pelagianistarum. 20 a. *De Historicis Gre-*
cis & Latinis. 36 b, 43 b, 47 a, 49 a, 71 a,
 54 a. *Ad Scholam Theologicam Steinfurti*
vocatur. 7 b, 8, 9. *Moriuntur.* 296 a
 Vossius (Joan. G. J. F.) socius Cantabrigi-
 ensis. 65 b, 66 b, 90 a, 126 a
 Vossius (Matth. G. J. F.) laudatur. 151 a
 Vorstii (Conr.) error de Dei omnipresentia.
 7 a. *Mors.* 36 a
 Usserius (Jac.) Arch. Armach. sensum Au-
 gustini nimis refringit. 100 a. *Vossio mittit*
Mariani Scoti exemplaria MSS. 188 b, 301 b.
Differt à Vossio in Historia Gadeschali. 301 a.
De Primordiis Historiarum Britanicarum.
 188 a
 W
 Wallæ Principis Titulus, ex Creatione. 122 a
 Wiclefii *Historia perfecta desideratur.* 184 a
 Wookevium Antrum in Agro Somersetenfi,
 prope Wellas, aquas in lapides concretas
 continet. 191 b
 Z
 Zedekiz Regis occasus. 2 b

FINIS.
